

Exemplum Camaldulensis Monasterii Regii Vasariani, 1634



K. IV. 18





REVER<sup>mo</sup> & ILLVST<sup>mo</sup> S. R. IMP.  
PRINCIPI AC DOMINO,

D. FRANCISCO.  
BAMBERGENSI ET HERBI-  
POLENSI EPISCOPO, FRANCIAE  
ORIENTALIS DVCI, &c.

*Domino meo Clementissimo.*

**R**EVERENDISSIME & Illustrissime Prin-  
ceps, Domine Clementissime, dictum est  
antiquissimum, vetustissimi Philosophi  
Platonis, non modo omnium Sapientum  
calculo, verum etiam Diuina autoritate,  
ipsaq; experientia comprobatum: Tunc de-  
mum Respublicas fore beatas, cum vel  
Reges saperent, vel sapientes regnarent. Intelligens hoc Salo-  
mon Rex, datâ sibi à Deo omnium bonorum fonte amplissi-  
mo, petendi, quicquid vellet, optione, petiit Sapientiam,  
quam



## EPISTOLA

quam & Deus ipsi abundanter largitus est, quo incomparabili dono ornatus, eâ felicitate, dexteritate & prudentia Regno Israelitico præfuit, vt, teste Sacra Scriptura, & splendore. & rerum abundantia, atque vniuersis illis, quæ à benignissimo Deo in miseros mortales conferri possunt dona, vniuersa Regna totius orbis terrarum superarit, & longo post se interuallo reliquerit. Nec deest certe ratio huius: Vt enim insipiens, teste D. Ambrosio, in Epistola ad Simplicium, instar Lunæ, mutatur; ita ex aduerso sapiens metu non frangitur, nec potestate mutatur, non attollitur asperis, nec tristibus mergitur, sed semper idem est, non minuitur, non angitur rerum permutationibus, nec fluctuat, vt circumferatur omni vento, sed manet perfectus, defectus rerum ignorat, & varios animi nescit affectus; sed fulget sicut Sol Iustitiæ: Cunctis præterea suum tribuit, bene merentibus præmia, male vero merentibus poenas: Neminem despicit, neminem tristatur, omniaq; ad summam Reipublicæ felicitatem confert. Sunt autem inæstimabilis huius virtutis, quæ instar amplissimæ altissimæq; arboris, ramos suos quàm longissime latissimeq; extendit, membra nobilissima, Fortitudo, Religio & Iustitia, Regentis maxima ornamenta, gemmæ preciosissimæ, validissimæq; Christianæ Reipublicæ fulcra atque indissolubilia humanæ societatis vincla: Nec enim quicquam est quod animos hominum arctius connectat, quam Religio; nec quicquam vehementius Rempubliam continet, quam Iustitia. O beatam igitur Remp. in qua Vir Sapiens sceptrum renet, cuiq; sub tantarum virtutum vmbra delitescere contingit!

Has



# DEDICATORIA.

Has verò, inter cæteras Reuerend. Celsitud. V<sup>re</sup> Christianas virtutes, quibus à Deo ter Optimo Maximo, præ aliis, vberime ornata est, tanquam sydera clarissima elucere, tot, tamq; dilucidis argumentis, atque experimentis hætenus Ipsamet testatum reddidit, vt nemo mortalium, absque extrema impudentiæ nota, hoc inficias ire possit. Hæ Reuerend. Celsitud. V<sup>ram</sup> ad summam principalemq; dignitatem extulerunt, eandemq; nuperrime magna accessione auxerunt, dum coniunctis sententiis, ac concordibus suffragiis, Deo fauente, cunctisq; bonis applaudentibus, amplissima Episcopatus Bambergensis dignitas Reuerend. Celsitud. Vestræ delata fuit.

Proinde, Reuerendissime, Illustrissime Princeps, Domine Clementissime, Reuerend. Celsitud. Vestræ de tantis honoribus animitus, & qua possum humillima deuotione, gratulor, æternumq; Deum & Patrem Domini nostri I E S V Christi precor, vt Ipse, qui salutem dat Regibus, & sapientiam largitur Principibus, Reuerend. Celsitud. Vestram spiritu Sapientiæ, Roboris atque Iustitiæ magis magisq; implere, Ecclesiis suis, Ditionibus ac subditis suis, nimium, proh dolor! à crudelissimo hoste nunc preffis, ac deuastatis, suoq; legitimo Pastore & Episcopo orbatis, reddere, felix & pacificum Regimen largiri, Eidemq; post hanc ærumnosam vitam immarcescibilem iustitiæ & gloriæ coronam imponere velit.

Cæterum, ne hæc mea demissa gratulatio sine symbolo existat, hanc Regij Prophetæ Dauidis Psalmorum Explanationem, à Beatissimæ memoriæ Cardinale Domino Roberto Bellarmino,



EPISTOLA DEDICATORIA.

Diuini Numinis inspiratione atque afflatu, accuratâ diligentia, conscriptam, & sumptibus meis publici iuris factam, Reuerend. Celsitud. Vestræ Nomini Amplissimo offerre, inscribere ac dedicare volui, eâ qua par est animi demissione rogans, vt hoc perexiguum, ac Reuer. Celsitud. Vestræ munusculum minus dignum, serenâ fronte accipere, & me meosq; clementissimo fauore suo complecti non dedignetur. Hac enim ratione animûm mihi addet ad maiora, si benignissimus Deus lucis huius diuturniorem vsuram clementissime concefferit, Reuerend. Celsitud. Vestram iterum atque iterum Diuinæ protectioni commendans.

*Reuerend. Celsitud. Vestræ*

*Deuotissimus seruus,*

BERNARDVS GVALTERI,

*Cinis & Bibliop. Colon.*



BEATISSIMO PATRI  
AC DOMINO

PAVLO QVINTO  
PONT. MAX.

ROBERTVS S. R. E. CARDINALIS  
BELLARMINVS.




*V* M primum ex ordine Religioso ad Cardinalatum, imperio, sanctæ memoriæ, CLEMENTIS VIII. Pontificis Maximi vocatus sum: mecum ipse cogitare cæpi, studium contemplationis rerum sacrarum, ob auctas publicas occupationes, non esse facile deferendum. Et cum ambigerem, quid potissimum ex corpore sanctarum scripturarum mihi desumerem, in quo meditando, & explanando laborarem; obtulit se liber Psalmorum, quem Ecclesiastici omnes quotidie legunt, & pauci admodum intelligunt. Neque terruit me multitudo eorum, qui in Psalmis elucidandis egregie desudarunt, quoniam tanta est Psalmorum obscuritas, ut nullius labor in ijs explanandis superuacaneus videri possit. Quare horas illas, quibus à publica functione vacabam, ac præsertim nocturna quietis tempore, in meditatione Dauidicorum Hymnorum non sine animi voluptate, & utilitate consumpsi. Et quamuis toto triennio, quo Capuæ Archiepiscopus fui, & Romæ postea in scribendis varijs opusculis occupatus, integris sæpe mensibus opus inchoatum intermiserim: tandem tamen hoc anno Psalmorum explanationem ad exitum, Domino adiuuante, perduxì. Propositum verò meum non fuit, omnes aliorum explanationes, præsertim recentiorum, considerare, vel libros eorum euoluere, multo etiam minus aliorum scripta in Comment. meos transferre, sed breuitati & perspicuitati studere, vulgatam latinam editionem pro viribus defendere, & spiritali mentis refectioni ac pia deuotioni consulere. Inde factum est, ut omnes



# PRÆFATIO

omnes Psalmi satis dilucide, nisi fallor, explicati, sed non omnes aque fusè tractati à nobis sint: & fortasse non deerunt, quibus aliqui valde breuiter, & ieiune, ut nonnulli ex primis: alij multo plenius, & uberius: pauci veronimis copiose expositi videbuntur. Sed non eadem semper adfuit spiritualis deuotio, non eadem semper mentis alacritas, & Psalmorum ego tractationem magis propria meditatione, quam multa librorum lectione composui. Id quicquid sit, Sanctitati Tue (pater Beatissime) offerendum censui, tum ut tibi, qui Pater, & Dominus meus es, constet ratio temporis à me consumpti, non solum in publicis, & notis functionibus; sed etiam in priuatis, & secretis occupationibus, tum, ut si quid fortè errati in hac mea postrema, ut arbitror, scriptione irrepperit, tu qui index, Christi loco, toti Ecclesie præsides, benigne corrigas.

Ego vero Deum precabor, ut det Sanctitati Tue diu viuere feliciter in terris, & felicissime semper in caelis.



PRÆ-





## PRÆFATIO.



NTEQVAM ad explanationem singulorum Psalmorum veniamus, pauca quædam explicanda esse videntur. Primo de excellentia Psalmorum. Secundo de vocibus Psalmi, & Psalterij. Tertio de diuisione, & ordine Psalmorum. Quarto de auctore. Ac excellentia quidem potest intelligi tum ex materia, tum ex forma, & genere descriptionis. Est enim liber Psalmorum quasi compendium, & summa totius veteris instrumenti: quicquid enim Moyses vel in historia tradidit, vel in lege præcepit, & quicquid Prophetæ ceteri, vel exhortando ad virtutes, vel prædicando futura, scripserunt, id totum in Psalmis David brevissimè comprehendit. Nam in Psalmo 8. 77. 103. 104. 134. & aliis creationem Mundi, res gestas Patriarcharum, captiuitatem Ægyptiacam, plagas Ægypti, peregrinationem populi in deserto, ingressum in terram promissionis, & alia id genus, luculenter exponit. In Psalmo 28. legem diuinitus traditam miris laudibus effert, atque ad eam custodiendam omnes inflammat. In Psalmo 2. 15. 21. 44. 68. 71. & aliis, Christi Regnum, ortum, prædicationem, miracula, passionem, resurrectionem, ascensionem, Ecclesiæ propagationem ita manifestè prædicat, vt Euangelista potius, quam Prophetæ fuisse videatur. Denique in Psalmo 1. & sequentibus fere omnibus hortatur ad virtutes, retrahit à vitiis, inuitat, allicit, minatur, terret: atque hæc omnia non simplici narratione complectitur, sed vario carminum genere, phrasibus Poeticis, & metaphoris pluribus & admirabilibus: denique nouo quodam genere dicendi ita rapit animos ad amorem, & laudem Dei, vt nihil dulcius, nihil salutarius cani audiriue possit. Itaque rectè S. Basilius scribit in explanatione primi Psalmi, Davidis Psalmos etiam ex corde lapideo lachrymas elicere: rectè etiam S. Ioannes Chrysostomus in explicatione Psalmi 107. affirmat, eos, qui Psalmos ritè canunt, cum Angelis choreas ducere, & quasi cum eis de Dei laudibus, & amore contendere.



P R Æ F A T I O.

VENTO ad voces Psalmi, & Psalterij. Psalterium apud nostros librum Psalmorum significat : sic enim S. Augustinus hanc vocem accepit in epist. 140. ad Audacem, cum ait, *Psalterium à S. Hieronymo translatus ex Hebræo non habeo*. Sic enim S. Hieronymus in epistola ad Sophronium de ordine & titulis Psalmorum, *Scio, inquit, quosdam putare Psalterium in quinque libros esse diuisum*. Sed in scripturis sanctis Psalterium est instrumentum musicum decem chordis instructum, quod Hebraicè dicitur, נבל *nebel*. Tradunt autem S. Basilius in explicatione primi Psalmi, & S. Augustinus in explicatione Psalmi 32. Psalterium hoc differre à cithara, & lyra, quod cithara & lyra reddunt sonum à parte inferiore, Psalterium à parte superiore addit S. Hilarius in prologo Psalmorum Psalterium fuisse instrumentum rectum, sine vllâ obliquitate. De hoc instrumento frequentissima mentio est in sacris literis, & de eo dicitur : *In Psalterio decem chordarum psallam tibi* Psalmus Hebraice, מִצּוּר *mizoor*, significat *cantum* siue sonum, deducitur enim à verbo, זמר *zamar* quod & *canere*, & citharam, siue Psalterium pulsare significat : eodem prorsus modo, quo verbum, ψάλλω, apud Græcos. De significatione psallendi manibus, videlicet pulsando instrumentum, habemus illud 1. Reg. 16. *Querant hominem scientem psallere cithara, ut quando corripuerit te spiritus Domini malus, psallat manu sua, & lenius feras*. Atque hoc idem habetur cap. 17. 18. & alibi. De significatione psallendi, voce videlicet canendo, habemus illud in psalmo 22. *Bene psallite ei in vociferatione* : & apud Apostolum 1. Corinth. 14. *Psallam spiritu, psallam mente, id est psallam spiritu oris, canendo voce corporali laudes Dei, & psallam spiritu cordis, desiderando, & amando gloriam eiusdem Dei*. Hoc autem interest, sancto Hilario, & sancto Ioanne Chrysostomo Authoribus in Prologo Psalmorum, inter *Psalmum* & *Canticum*, & *Psalmum canticum*, & *canticum Psalmi* : quod *Psalmus*, est sonus organi solius, sine vlla voce hominis cantantis : *canticum*, est vox cantantis hominis absque organi modulatione : *cantici Psalmus* dicitur, cum cantico præinente Psalmi sonus subsequitur, *canticum Psalmi* cum sonitu præeunte æmula vox canentis auditur. Porro Psalmi *Dauidis* non quemcunque cantum vel sonum designant, sed eum, quo vel Dei laudes, vel preces ad Deum, vel cohortatio ad virtutem, non autem inanes fabulæ, vel lasciuui amores, aut Principum adulationes concinuntur. Hinc enim liber Psalmorum inscribitur Hebraice סֵפֶר תְּהִלִּים *sepher thehillim*, id est *liber hymnorum*, siue *laudum diuinarum* & post finem Psalmi septuagesimi primi, quem vltimum omnium Dauid cecinit, legimus, defecerunt תְּפִלֹּת *tephillot* *Dauid*, id est, *orationes Dauidis*. Psalmi enim, vt plurimum continent, vel Dei laudes.



# P R A E F A T I O

laudes, vel orationes ad Deum, vel vtrumque simul: quamuis etiam nonnulli sint, qui in cohortandis hominibus ad virtutem toti consumantur, vt primus, & secundus, & alij.

IAM vero quod attinet ad diuisionem, & ordinem Psalterij, partiuntur Hebraei Psalterium in libros quinque, S. Hieronymo teste, tum in prologo Galeato, tum in epistola ad Sophronium supra citata: vbicunque enim ad finem Psalmi scribitur, *Amen, Amen*, ibi terminari librum existimant: scribitur autem, *Amen, Amen*, ad finem Psalmi 40. 71. 88. & 105. quibus quatuor libris addunt quintum à centesimo sexto vsque ad centesimum quinquagesimum. Sed hæc Hebræorum traditio non est conformis Scripturis sanctis, & ideo ab eodem S. Hieronymo refutatur in epistola, quam supra notauimus ad Sophronium, & à S. Hilario in prologo Psalmorum. Inscriptio enim Psalterij tum in Bibliis Hebraicis, tum in editione Septuaginta Interpretum est, *Liber Hymnorum*, & Luc. 20. Dominus ipse loquitur dicens, *Dixit Dauid in libro Psalmorum, dixit Dominus Domino meo*, & Act. 1. loquitur S. Petrus, & ait, *Scriptum est enim in libro Psalmorum, fiat commoratio eorum deserta*, &c. Porro Psalmorum ordo non est accommodatus tempori, quò scripti sunt. Satis enim constat Psalmum tertium scriptum fuisse, quando Dauid fugiebat persecutionem Absalonis filij sui: Psalmum vero quinquagesimum multo antea fuisse scriptum, quando videlicet idem Dauid reprehensus fuit à Nathan ob crimen adulterij, & homicidij: Psalmum autem centesimum quadragesimum primum, adhuc antea scriptum fuisse, quando nimirum idem Dauid in spelunca ob metum Saulis Regis delitescerebat: Psalmum quoque centesimum quadragesimum tertium scriptum fuisse longe antea, quando scilicet Dauid cum Goliath gigante pugnauit: Denique probabile est, ac fere certum, Psalmum septuagesimum primum esse omnium postremum origine temporis, cum scriptus sit in Salomonem iam regnare incipientem; & post eum Psalmum addatur, *Defecerunt laudes Dauid filij Iesse*: & tamen videmus hunc Psalmum non in vltimo loco, sed fere in medio constitutum. Cur ergo ita dispositi sint Psalmi, vt eos habemus, non est facile diuinare. Non est tamen reicienda illorum opinio, vel suspicio, qui volunt, primos quinquaginta Psalmos, quorum vltimus est, *Miserere mei Deus*, pertinere ad pœnitentes, siue incipientes: alteros quinquaginta, qui desinunt in Psalmum, *Misericordiam, & iudicium cantabo tibi Domine*, ad iustos proficientes: postremos quinquaginta, quos concludit Psalmus, *Laudate Dominum in Sanctis eius*, pertinere ad viros consummatos, atque perfectos; siue Psalmos ita disposuerit Esdras, vt videtur sentire S. Athanasius in synopsi, siue Septuaginta Interpretes, vt S. Hilarius docet in prologo Psalmorum.

RESTAT quaestio de auctore Psalmorum: duæ sunt autem veterum Patrum



trum sententiæ: nam S. Athanasius in synopsi, S. Hilarius in prologo Psalmo-  
rum, & S. Hieronymus in epistola ad Sophronium de ordine Psalmodum, &  
in epistola ad Cyprianum de expositione Psalmi octogesi noni, varios esse  
censent Auctores Psalmodum, eos videlicet omnes, qui nominantur in titu-  
lis, *Dauidem, Moysen, Salomonem, Asaph, Idithun, & alios.* Contra vero S. Ioan-  
nes Chrysostomus, Theodoretus, Euthymius, & Cassiodorus in præfatione  
Commentariorum in Psalmos, & S. Augustinus lib. 17. de Ciuitate Dei c. 14.  
Psalmodum omnium vnum Dauidem auctorem agnoscunt. Nobis tria sunt  
certa: primum, auctorem primum omnium Psalmodum esse Spiritum S.  
id enim testatur Apostolus Petrus Act. 1. & Apostolus Paulus ad Hebr. 3. & i-  
pse Dauid 2. Reg. 23. dicit, *Spiritus Domini locutus est per me, & sermo eius per lin-  
guam meam,* & in Psal. 44. *Lingua mea calamus scribae velociter scribentis:* ergo siue  
Dauid, siue Moyses, siue quis alius Psalmos condiderit, ipsi quidem quasi cal-  
ami fuerunt, sed Spiritus S. fuit, qui per eos scripsit: quid vero necesse est la-  
borare de calamo, cum de scriptore constat? Secundo certum mihi videtur,  
maximam partem Psalmodum esse Dauidis: nam in fine Psalmi 71. legimus,  
*Defecerunt laudes Dauid filij Iesse:* item lib. 2. Reg. cap. 62. dicitur, *Dauid egregius  
Psalmes Israël,* denique in 2. Paralip. cap. 5. dicitur, *Cantores fuisse, vt canerent Psal-  
mos, quos fecit Dauid.* Tertio pro comperto mihi habere videor, eos Psalmos,  
qui carent titulo, esse Dauidis, vt etiam omnes illos, qui nomen *Dauid* in ti-  
tulo præferunt, siue scriptum sit, *ipsius Dauid,* siue *ipsi Dauid;* nam Psalmus 2,  
caret titulo, & tamen Act. 4. Apostoli affirmant, eum Psalmum à Dauide  
fuisse compositum: & Psalmus 94. caret titulo apud Hebræos; & Apostolus  
ad Hebr. tribuit eum Dauidi. Deinde Psalmi, qui in Hebræo Codice carent  
titulo, in Græco textu adscribuntur Dauidi: proinde credibile est, excidisse  
titulos ex Codice Hebræo, qui in eo aderant, cum Septuaginta Interpretes  
scripturas Hebraicas in Græcum idioma transferrent. Denique regula He-  
bræorum, qui dicunt, Psalmum, qui caret titulo, esse illius Auctoris, qui scri-  
psit præcedentem, falsa esse conuincitur: nam secundum eam regulam pri-  
mus, & secundus Psalmus nullius essent, cum vterque careat titulo: præterea  
Psalmus 89. adscribitur Moyse, & decem Psalmi consequentes, qui titulo ca-  
rent, eidem Moyse adscribi deberent. At id fieri non potest, cum in Psal. 98.  
mentio fiat Samuelis, qui satis longo tempore post obitum Moyse natus est,  
Vide plura de hac re in explicatione tituli Psalmi 89. quod autem non soli  
illi Psalmi Dauidis sint, qui habent in titulo, *ipsius Dauid,* sed etiam illi, qui ha-  
bent, *ipsi Dauid,* probat S. Augustinus ex Psalmo 109. qui habet, *τῷ Δαυὶδ, ipse  
Dauid:* & tamen Dominus Matth. 24. dicit: *Quomodo Dauid vocat eum dominum,  
dicens, Dixit Dominus domino meo?* Atque hæc quidem de Auctore Psalmodum  
certa mihi esse videntur. De reliquis Psalmis, qui titulum præferunt *Moyse,*



# PRÆFATIO





aut *Salomonis*, aut *Asaph*, aut *Idithun*, aut *Ethan*, aut *filiorum Core*: probabilem cenſeo ſententiam S. Athanaſij, & Hilarij, & Hieronymi, ſed probabiliorem Chryſoſtomi, Auguſtini, Theodoret, & aliorum, qui eos ſecuti ſunt. Cur autem ſententiam poſteriorem præferendam putem, ratio eſt, quia eſt communior, & fuit etiam communior ante annos mille: id enim teſtantur S. Auguſtinus lib. 17. de Ciuitate Dei, cap. 14. & Theodoretus in præfatione Pſalmorum. Item quia ſatis conſtat, *Asaph*, *Idithun*, *Ethan*, & filios *Core* fuiſſe Cantores potius, quam Prophetas, & Pſalmos illis tribui in titulo, quia dabantur illis ad canendum, non quod ipſi eos compoſuiſſent; quod ex eo intelligi poteſt, quod in eodem titulo aliquando ponitur nomen *Dauid*, & *Idithun*, ſive alterius, vt videre eſt in titulo Pſal. 38. 61. 64. 136. 137. 138. Accedit poſtremo, quod Luc. 20. cum Dominus ait, *Dixit Dauid in libro Pſalmorum*, viſus eſt totum librum Pſalmorum *Dauidi* tribuere.





# INDEX PSALMORVM

ALPHABETICVS PRIOR NVMERVS INDICAT  
ORDINEM PSALMORVM, POSTERIOR PAGINAS  
Commentarij.

119	 Dominum cum tribularer. pag. 718	74	Confitebimur tibi Deus.	418
24	Ad te Domine leuavi animam meam. 100	9	Confitebor tibi Domine in toto corde meo, narrabo.	34
27	Ad te Domine clamabo.	110	Confitebor tibi Domine in toto corde meo, in consilio.	655
122	Ad te leuavi oculos.	117	Confitebor tibi Domine in toto corde meo, quoniam.	785
28	Afferte Domino filij Dei.	729	104	Confitemini Domino, & inuocate.
77	Attendite popule meus legem meam.	121		610
48	Audite hac omnes gentes.	433	105	Confitemini Domino, quoniam bonus 1.
118	 Eati immaculati in via.	267		621
127	Beati omnes qui timent.	683	106	Confitemini Domino, quoniam bonus 2.
31	Beati quorum remissa sunt.	745		630
40	Beatus qui intelligit.	140	117	Confitemini Domino, quoniam bonus 3.
1	Beatus vir qui non abiit.	217		677
111	Beatus vir qui timet Dominum.	1	135	Confitemini Domino quoniam bonus 4.
33	Benedicam Dominum in omni tempore,	660		779
102	Benedic anima mea Domino, & omnia	157	15	Conserua me Domine.
103	Benedic anima mea Domino, Domine.	593		53
143	Benedictus Dominus Deus.	601	115	Credidi propter quod.
84	Benedixisti Domine terram tuam.	815		673
91	Bonum est confiteri Domino.	503	4	Cum inuocarem exaudiuit me.
95	 Antate Domino canticum nouum, cantate.	540		14
97	Cantate Domino canticum nouum, quia.	558	129	 E profundis clamaui.
149	Cantate Domino canticum nouum, laus.	569		751
18	Celi enarrant gloriam.	842	43	Deus auribus nostris, audiuiimus.
		73		119
			49	Deus Deorum Dominus.
			62	Deus Deus meus ad te.
			21	Deus Deus meus respice in me.
			69	Deus in adiutorium meum intende.
			31	Deus in nomine tuo saluum me fac.
			7	Deus iudicium tuum Regi da.
			108	Deus laudem meam ne tacueris.
			66	Deus misereatur nostri.
			45	Deus noster refugium & virtus.
			82	Deus quis similis erit tibi.
			59	Deus repulisti nos, & destruxisti.
				Deus



# INDEX.

81 Deus stetit in synagoga Deorum.	461	19 Exaudiat te Dominus.	78
78 Deus venerunt gentes.	445	60 Exaudi Deus deprecationem.	328
39 Deus ultionum Dominus.	546	54 Exaudi Deus orationem meam &	299
113 Dilexi quoniam exaudiet.	670	63 Exaudi Deus orationem meam, cum.	340
17 Diligam te Domine fortitudo.	61	16 Exaudi Domine iustitiam meam.	57
38 Dixi custodiam vias meas.	200	39 Expectans expectavi Dominum.	208
109 Dixit Dominus Domino meo.	649	80 Exultate Deo adiutori nostro.	457
35 Dixit iniustus, vt delinquat.	176	32 Exultate iusti in Domino.	149
13 Dixit insipiens in corde suo. 1.	49	67 Exurgat Deus & dissipentur inimici.	358
52 Dixit insipiens in corde suo. 2.	295	68 <b>F</b> undamenta eius in montibus.	488
140 Domine clamaui ad te.	801	85 <b>I</b> ncлина Domine aurem tuam.	481
7 Domine Deus meus in te speravi.	26	125 <b>I</b> n conuertendo Dominus.	737
97 Domine Deus salutis mee.	494	10 In Domino confido.	43
8 Domine Dominus noster.	30	113 In exitu Israel de Aegypto.	666
101 Domine exaudi orationem meam, &	584	30 In te Domine speravi. 1.	134
142 Domine exaudi orationem meam,	810	70 In te Domine speravi. 2.	385
aurib.	810	65 Iubilare Deo omnis terra, psalmum.	352
10 Domine in virtute tua.	81	99 Iubilare Deo omnis terra, seruite.	572
6 Domine ne in furore tuo. 1.	22	34 Iudica Domine nocentes me.	166
37 Domine ne in furore tuo. 2.	192	42 Iudica me Deus, & discerne.	228
130 Domine non est exaltatum.	756	25 Iudica me Domine, quoniam.	107
238 Domine probasti me.	788	121 <b>L</b> ætatus sum in his, quæ dicta.	724
3 Domine quid multiplicati sunt.	1	145 Lauda anima mea Dominum.	828
14 Domine quis habitabit.	52	147 Lauda Hierusalem Dominum.	83
99 Domine refugium factus es.	116	148 Laudate Dominum de celis.	835
23 Domini est terra, & plenitudo eius.	96	150 Laudate Dominum in sanctis eius.	845
26 Dominus illuminatio mea.	110	116 Laudate Dominum omnes gentes.	676
22 Dominus regit me.	93	46 Laudate Dominum, quoniam.	831
92 Dominus regnavit, decorem.	544	154 Laudate nomen Domini.	771
96 Dominus regnavit, exultet.	565	112 Laudate pueri Dominum.	771
98 Dominus regnavit, irascantur.	173	140 Leuavi oculos meos.	
133 <b>E</b> cce nunc benedicite.	770		
132 <b>E</b> cce quam bonum.	768		
58 Eripe me de inimicis.	318		
139 Eripe me Domine.	797		
44 Eructauit cor meum.	238		
144 Exaltabo te Deus meus.	820		
29 Exaltabo te Domine.	127		



# I N D E X.

47	<b>M</b> agnus Dominus, & laudabilis.	260	2	Quare fremuerunt gentes.	5
131	Memento Domine Dauid.	718	41	Quemadmodum desiderat cervus.	222
56	Miserere mei Deus, miserere,	310	124	Qui confidunt in Domino.	734
55	Miserere mei Deus, quoniam.	306	51	Quid gloriaris in malitia.	292
50	Miserere mei Deus secundum magnam.	282	90	Qui habitat in adiutorio.	125
100	Misericordiam, & iudicium.	580	79	Qui regis Israel, intende.	450
88	Misericordias Domini.	500	128	<b>S</b> ape expugnauerunt me.	748
126	<b>N</b> isi Dominus adificauerit domum.	741	68	Saluum me fac Deus.	371
123	Nisi quia Dominus erat in nobis.	731	11	Saluum me fac Domine.	45
36	Noli emulari in malignantibus.	181	57	Si vere utique iustitiam.	113
61	Nonne Deo subiecta erit.	330	136	Super flumina Babylonis.	780
25	Notus in Iudæa Deus.	421	64	<b>T</b> E decet hymnus Deus.	345
46	<b>O</b> mnes gentes plaudite manibus.	257	24	<b>V</b> enite exultemus Domino.	554
107	<b>P</b> aratum cor meum Deus.	639	5	Verba mea auribus percipe.	18
72	<b>Q</b> uam bonus Israel Deus.	461	76	Voce mea ad Dominum clamaui. 1.	425
83	Quam dilecta tabernacula.	469	141	Voce mea ad Dominum clamaui. 2.	807
			12	Vsquequo Domine obliuisceris.	48
			74	Vt quid deus repulisti in sinem.	409



PSAL





# PSALMVS PRIMVS.

## ARGVMENTVM.



Rimus Psalmus titulus caret apud Hebraeos, nec desunt, qui putent eum esse Esdra, qui Psalmos in ordinē digessit, sed communiter tribuitur Dauidi ab Ambrosio, Hilario, Basilio, Augustino, & ceteris. Ipse etiam sanctus Hieronymus, qui alioqui multos facit auctores Psalmorum, hunc primū Psalmum Dauidis esse dicit in Epist. ad Paulinum de studio Scripturarum. Denique in textu Græco additus est titulus, siue à Septuaginta, siue ab aliis, Dauid Prophetæ, & Regis melos. Aptissime autē ponitur hic Psalmus in primo loco, quia de beatitudine tractat: beatitudo enim est fundamentū, & principii doctrina moralis. Argumentū igitur Psalmi est ostendere beatitudinē siue in spe, siue in re non contingere, nisi hominibus iustis, proinde iustitia dandā esse operam, ut ad beatitudinē perueniamus.

### EXPLICATIO PSAL. I.

**B**Eatus vir, qui nō abiit in consilio impiorū, & in via peccatorum non stetit, & in cathedra pestilentie non sedit.

In primo & secundo versiculo Prophetæ docet beatitudinem, quatenus in hac vita haberi potest, nō consistere in alia re, quam in vera iustitia. Quod ipsum docet Apostolus Rom. 14. Regnum Dei non est esca, & potus, sed iustitia, & pax, gaudium in Spiritu sancto. Soli enim homines vere iusti, sunt amici Dei, imo & filij, ac per hoc hæredes Regni, & spe beati, quod attinet ad perfe-

ctissimā felicitatem: & hic interim solido gaudio, & pace, quæ exuperat omnem sensum, perfruentes. Describit autem in primo versu hominem iustum per negationem, in secundo per affirmationē: ac si breuiter dixisset, illum esse iustum, ac per hoc beatum, qui declinat à malo, & facit bonum.

Illud autem hoc loco diligenter notandum, & memoriæ commendandum est, consuetudinem Dauidis, & aliorum Prophetarum esse, ut idipsum bis repetant, ita ut vna pars versiculi sit repetitio, vel explicatio alterius. Exempli gratia, Exod. 15. in Cântico Moysis, *Iste Deus meus, & glorificabo eum, Deus patris mei, & exultabo eū.* Deut. 32. *Concresecat ut pluuia doctrina mea, fluat ut ros eloquium meū.* Psal. 33. *Benedicā Dominum in omni tēpore, semper laus eius in ore meo.* Hæc frequentissime occurrunt, cum sit hæc repetitio genus ornamenti proprium sanctorum Prophetarum. Prima igitur pars primi versiculi hanc sententiam continet, beatum esse illum, qui non præuaricatur legem Dei. Sed poetico more Dauid hanc sententiam expressit per metaphoram viæ, & ambulationis. *Beatus, inquit, vir, qui non abiit in consilio impiorum*, id est, ille beatus est, qui iustus est; *ille autem iustus est, qui non abiit in consilio impiorū*, id est, qui in via vitæ non est sequutus consilia, leges, sententiam impiorum, quæ sunt omnino contraria viæ Dei, id est, legi Dei. Altera pars eiusdem versiculi idipsum explicat alijs verbis idem significantibus. Nam cum dicit,



*Et in via peccatorum non stetit*, non significat, & in via peccatorum non substituit, sed, & in via peccatorum non ambulauit. Stare enim in via, hoc loco, non est quiescere, & non ambulare, sed est ambulando non recedere à via inchoata. Itaque idem est, non abire in consilio impiorum, & non stare in via peccatorum; vtrumque enim significat illum esse iustum, qui recedit à via, id est, lege, & consiliis peccatorum. Et quoniam lex Domini soluitur non solum male viuendo, sed etiam male docendo, iuxta illud Matth. 5. *Qui soluerit vnum de mandatis istis minimis*, & docuerit sic homines, minimus vocabitur in regno caelorum; Ideo Propheta adiungit, *Et in cathedra pestilentia non sedit*; id est, ille est iustus, ac per hoc beatus, qui neque operibus, neque doctrina legem Domini prauaricatur. Sedere enim in cathedra pestilentiae, est esse in consensu hominum pestilentium, siue assidere pestilentibus, & cum eis legem Domini despiciere, quasi nihil conducatur ad beate viuendum, id est, cum gaudio, & lætitia, sed vtilius sit carnis desideria perficere, sensibusque in omnibus indulgere. Vox sedentium in cathedra pestilentiae describitur Malachia 3. illis verbis, *Vanus est, qui seruit Deo*, & quod emolumentum, quia custodiimus precepta eius? Quod ad verba attinet, pro voce, *beatus*, in Hebræo habetur, *אשר*, quæ vox habet formam numeri multitudinis, & ideo à nonnullis recentioribus vertitur, *beatitudines viri*, &c. Sed probabilius est vocem illam esse indeclinabilem, & significare, tum beatum, tum beatitudinem. Nam non solum Septuaginta verterunt *μακάριοι*, & *ἀνις*, id est, *beatus vir*; sed etiam sanctus Hieronymus vertit in Hebræo, *Beatus vir*. Pro cathedra pestilentiae, in Hebræo habetur ad litteram, *cathedra Lexim*, id est, derisorum, sed sensus est omnino idem. Nulla enim est pestilentia maior, quam deridere legem Dei, & eos, qui iuste, ac pie viuere student. Ad extremum notat sanctus Basilius, per id, quod dicitur *beatus vir*, non excludi feminas à beatitudine, sed includi, quoniam

vir caput est mulieris, & in capite intelliguntur etiam membra.

*Sed in lege Domini voluntas eius, Et in lege eius meditabitur die, ac nocte.*

In hoc secundo versiculo describitur iustus per affirmationem, & sunt hic etiam duæ partes, quarum vna est fere alterius repetitio. Recte autem dicitur esse iustus, siue beatus, cuius voluntas est in lege Domini: quoniam non requiritur ad iustitiam huius vite, vt nulla in re offendamus, cum scriptum sit Iacob. 3. *In multis offendimus omnes*. Sed satis est, si ita sumus affecti erga legem Domini, vt cupiamus eam omnino perficere, & si forte labimur in aliquod peccatum, vt certe sæpe labimur, id sit præter voluntatem bonam, id est, præter charitatem, quam habemus ad Deum. & ad legem eius, non autem contra charitatem; proinde peccatum sit, non crimen id est, veniale, non lethale. Idem alijs verbis habetur in alio Psalmo, *Lex Dei eius in corde ipsius*. Nam & voluntas, siue cor iusti est in lege Dei, & lex Dei est in voluntate, siue corde iusti. Lex est in corde, vt in sede, & cor est in lege, vt in re amata, vt in sede, & cor est in lege, vt in re amata, quæ semper cogitatur, & appetitur. Atque hoc est, quod sequitur, *Et in lege eius meditabitur die, ac nocte*. Id enim est legem esse in voluntate, siue voluntatem in lege, perpetuo mente exerceri in ea cogitanda, & amanda, vt quicquid agendum sit, secundum eam regulam fiat. Itaque illud, *die, ac nocte*, non significat, non posse hominem ipsum vacare, vel ad punctum temporis à contemplatione diuinæ legis, sed frequentissime debere animum ad legis præcepta reuocare, eiusque memorem semper esse, dum aliquid cogitandum, dicendum, faciendum occurrit, in quo periculum sit, ne iustitia violetur. Porro, non solum Latina vox *meditabitur*, sed etiam Græca *μελετήσεται*, & Hebraica *Ieghe*, referri possunt ad exercitium siue cogitationis, siue vocis, siue operis. Psalm. 34. *Lingua mea meditabitur iustitiam tuam*, & Psalm. 36. *Os iusti meditabitur iustitiam*. Poeta quoque prophanus dixit,

מִן

דִּי

דִּי



dixit, *Meditabor arundine Musam*. Et exercitia militum, militares meditationes dicebantur. Itaque sensus est, *Et in lege Domini meditabitur die, ac nocte*, id est, in lege Domini cogitanda, perficienda, docenda assidue exercebitur.

III. Et erit tanquam lignum, quod plantatum est secus decursus aquarum, quod fructum suum dabit in tempore suo.

IV. Et folium eius non defluet, & omnia quaecunque faciet, prosperabuntur.

Declaravit Propheta, quis sit dicendus vere iustus: nunc declarat, talem iustum esse beatum, spe in hoc seculo, re in futuro. Sumitur autem declaratio à similitudine arboris, quæ plantata iuxta riuos aquarum habet omnia, quæ in arbore felicissima requiri possunt. Nam aliquæ arbores sola folia producant, & ea non diu retinent, aliæ folia producant, & semper retinent, sed fructus earum, vel nimis præcoces sunt, vel nimis ferotini; aliæ denique fructus edunt tempore suo, & foliis semper vestiuntur, sed non omnes fructus ad maturitatem perducunt: solæ igitur illæ arbores omni ex parte perfectissimæ sunt, quæ folia, fructusque producant, & folia semper retinent, & omnes omnino fructus tempore suo maturos præstant. Tales arbores sunt Pini, Palmæ, Oleæ, quibus scriptura iustos homines passim comparare solet. His igitur felicissimis arboribus similes esse dicit iustos hoc loco Propheta. Nam iusti fundati, & radicati, ut ait Apostolus, in charitate, propinqui sunt per amicitiam fonti viuo, unde humorem gratiæ semper trahunt, & opera bona tempore opportuno faciunt, & omnia eis cooperantur in bonum, & semper virent gloria & honore. Quamvis enim interdum à carnalibus despiciantur, tamen à sapientibus, & quod maius est, ab angelis, & ab ipso Deo honorantur. Et hæc quidem in hoc seculo, sed præterea fructus faciunt in tempore suo, quia salutem veram operantur tempore congruo recipendam, id est, post mortem, cum impij ante tempus, in hac vita felicitatem quærant,

& sic temporalem, & sempiternam amittant. Et folia semper retinent, quia accipient, iuxta verbum Apostoli Petri, *immarecescibilem gloriæ coronam*, & in memoria æterna erit iustus. Et denique quaecunque faciunt, prosperabuntur; quia opera omnia usque ad calicem aquæ frigidæ datum in nomine discipuli plenam, ac perfectam mercedem accipient. Scio textum Hebraicum in Bibliis modernis vnum tantum versum ex his duobus facere, & priorem partem versus terminare ad illa verba, *Et folium eius non defluet*. Ex qua distinctione adducti nonnulli, verba illa, *Et omnia quaecunque faciet, prosperabuntur*, non exponunt de arbore vera, sed solum de homine iusto. Sed nos sequimur lectionem Hebraicam, quæ est in operibus sancti Hieronymi, cui concordant codices Græci, & Latini. Et certe secundum nostram lectionem similitudo ab arbore sumpta, est multo pulchrior, & plenior. Illud etiam observandum est hoc loco, verbum *prosperabuntur*, in Hebræo esse, *ta'z liach*, quod proprie significat, prosperare faciet. In quo notatur virtus actiua arboris, quæ concurret ad maturandos omnes fructus, & pari ratione notatur in applicatione similitudinis virtus actiua liberi arbitrij, quæ concurret cum gratia Dei ad opera meritoria. Quod est aduersus dogmata Lutheranorum.

Non sic impij, non sic, sed tanquam pulvis, quem proicit ventus à facie terre.

V.

Ex comparatione miseriæ impiorum confirmat Propheta felicitatem iustorum. Ne quis enim existimaret, illa bona esse communia omnibus, & ex causis naturalibus tantum provenire, & non præcipue ex providentia Dei, addit, *Non sic impij*, id est, non eandem sortem, sed contrariam omnino recipient. Elegantissime vero Propheta describit miseriæ impiorum, eamque opponit felicitati iustorum. Iusti ob humoris divini copiam virent, & fructum faciunt, nec unquam virorem suum, aut laborum fructum amittunt. Contra, impij di-



# EXPLICATIO

uino illo humore destituti, aridi, & steriles  
instar leuissimi pulueris, à vento dispersi, ne  
vestigium quidem sui relinquunt; nec solum  
omnem gloriam, opes, & voluptates  
perdunt, sed etiam ipsi pereunt in æternum.  
In textu Hebraico non habetur illa repeti-  
tio, *non sic*, neque illud, *à facie terræ*: sed hæc  
addita sunt à Septuaginta Interpretibus ex-  
plicandi, vel orandi gratia. Vocabulum  
item pulueris, non est, *haphar*, quod proprie  
pulverem significat in genere, sed est, *mors*,  
quod significat *glumam*, id est, speciem pul-  
ueris ex tritura paleæ, paleam videlicet mi-  
nutissime contritam, & quasi in pulverem  
redactam, quæ leuissima est, vt eam modicus  
flatus procul abigere possit.

עפר  
מז

## VI. Ideo non resurgent impij in iudicio, ne- que peccatores in concilio iustorum.

Recte in editione Sixti V. & Clementis  
VIII. positum est *non resurgent*, cum in ple-  
risque codicibus haberetur, *non resurgunt*.  
Nam ex Hebræo, Græco, Chaldæo, & e-  
mendationibus manuscriptis satis aperte  
colligitur, legendum esse, *non resurgent*. Il-  
lud autem, *in concilio iustorum*, positum est  
ex Hebræo: nam in Græco, & manuscriptis  
Latinis constanter legitur, *in consilio*. Po-  
tuit quidem fieri, vt ex similitudine nomi-  
num, fuerit in latinis codicibus positum,  
consilium, pro concilio; sed potuit etiam  
fieri, vt in Hebraicis codicibus irrepsit,  
*עדה* *hada*, pro *haza*, id est, concilium pro consi-  
lium. Certe Septuaginta Interpretes, qui  
eodem modo verterunt in primo versu, &  
in sexto, vtroque ponentes *βελι*, viden-  
tur eandem vocem Hebraicam in vtroque  
loco legisse. Itaque vtraque lectio proban-  
da videtur, vna ob auctoritatem vulgatæ  
editionis, quæ cum Hebræo concordat al-  
tera ob auctoritatem Septuaginta Inter-  
pretum, quorum vocabulum *βελι*, vbi-  
que in ipsa vulgata Latina editione consilium,  
non concilium vertitur. Declarat igitur hoc  
loco Propheta, discrimen iustorum, & im-  
piorum in nouissimo iudicio perspicue ma-  
nifestandum. Nam hoc tempore sæpe acci-

עדה  
עזה

dit, vt omnia confundantur. Ait igitur, *Id-  
eo non resurgent impij in iudicio iustorum*.  
Illud enim, *iustorum*, ad vtramque partem  
versiculi pertinet, sicut etiam illud, *non re-  
surgent*, non solum refertur ad illud, *in iudi-  
cio*, sed etiam ad illud, *in concilio*. & idem fe-  
re est, *non resurgent impij in iudicio iustorum*,  
& non resurgent peccatores in concilio,  
vel consilio iustorum. Itaque cessat quæ-  
stio illa, quam nonnulli hoc loco pertra-  
ctant, cur dixerit Propheta, *non resurgent im-  
pij in iudicio*. Pulchre autem David coniun-  
xit vltima primis; sicut enim dixerat in  
principio, iustos non abisse in consilio im-  
piorum, & in confesso eorum non sedisse:  
ita nunc dicit, in die iudicij impios non re-  
surrecturos in iudicio, & concilio iustorum.  
Sensus igitur hic est, *ideo non resurgent impij  
in iudicio iustorum*, id est, longe aliud erit iu-  
dicium iustorum, quam impiorum. Quod  
explicatur sequentibus verbis, *neque pecca-  
tores in concilio iustorum*, id est, cum resur-  
gent impij, non erunt in confesso, & cõsor-  
tio iustorum, sed iudicati ad inferos in cõ-  
tutu damnatorum erunt. Quod si legamus,  
*in consilio iustorum*, poterit consilium acci-  
pi pro loco consilij, & tunc in idem recide-  
ret cum voce concilio. Et quoniam illud,  
*non resurgent*, ex Hebræo commodè verti  
posset, non stabunt, siue non consistent: erit  
etiam hic sensus, in iudicio, & cõtutu iusto-  
rum, quando videlicet sancti cum Christo  
sedebunt iudices mundi, tunc peccatores  
non stabunt, sed cadent. *Iusti autem stabunt  
in magna constantia aduersus eos, qui se an-  
gustiauerunt*, Sap. 5.

## Quoniam nouit Dominus viam iusto- rum, & iter impiorum peribit.

VII.

Reddit rationem, cur impij non sint in  
iudicio accepturi iustorum gloriam. Quo-  
niam videlicet via iustorum approbatur à  
Deo, qui falli non potest, ac per hoc via est  
recta, & perducens ad Ciuitatem Dei; via  
impiorum non approbatur à Deo: & qui  
per eam ambulant, frustra laborant, quia  
nunquam peruehiant. Illud, *nouit*, accipi-  
tur pro notitia approbationis, & cum dici-  
tur,



zur, Deus nouit viam iustorum, nos certi red-  
dimur, securos esse de vera felicitate, qui  
per eam viam incedunt. Illam autem, iter  
impiorum peribit, significat ambulationem  
impiorum frustra esse susceptam, quia per  
eam viam non peruenitur ad optatum lo-  
cum. Itaque hoc loco, iter, non accipitur  
pro via materiali, in qua ambulatur, sed pro  
ipsa ambulatione, vt diximus. Per ambula-  
tionem autem intelligitur cursus totius vi-  
tæ, studia, labores, contentiones, quæ om-  
nia nihil impiis proderunt. Hic Psalmus  
potest accommodari omnibus sanctis, sed  
potissimum, & per antonomasiam Christo,  
qui præter omnes homines, & angelos non  
præuicatus est legem Dei, sed eam perfe-  
cte impleuit factus obediens vsque ad mor-  
tem. Et ideo tanquam lignum plantarum  
iuxta riuos aquarum, habens animam con-  
iunctam hypostatice fonti viuo, qui est Ver-  
bum Dei, fons sapientiæ in excelsis, gloria,  
& honore coronatus est, & fructus mirabi-  
les edidit, & ad maturitatem perduxit, om-  
nes videlicet electos vocauit, iustificauit,  
magnificauit.

## PSALMVS II.

## Argumentum.

**H**ic Psalmus caret titulo, sed Dauidi tri-  
buitur ab Apostolis Act. 4. Nonnulli  
Psalmum hunc non secundum, sed partem pri-  
mi esse iudicant, propterea quod in Actis Apo-  
stolorum cap. 13. in quibusdam codicibus cite-  
tur hic Psalmus sub nomine primi Psalmi: sed  
codices plures, & meliores habet, sicut in Psal-  
mo secundo scriptum est, & consonat editio  
Græca, τὸς δ' υἱοῦ. Est autem totus hic Psal-  
mus prophetia de Regno Christi manifestissi-  
ma, & explicata ab Apostolis Act. 4. & 13. &  
ad Hebr. 1. & 5. vt omnino errare videantur,  
qui ad litteram de Dauide hunc Psalmum ex-  
plicare nituntur.

## EXPLICAT. PSALMI II.

- I. **Q**uare fremuerunt gentes, & populi  
meditati sunt inania.

Dauid in spiritu prænoscent Messiam  
uenturum, & persecutiones multas aduer-  
sus eum exorturas, & eum tamen felicissi-  
me regnaturum, incipit ab increpatione  
persecutorum, & sensus est, frustra Gentiles,  
& Hebræos tum Principes, tum populos  
infremuisse indignatione contra Messiam,  
& cogitauisse rationem impediendi Regni  
eius. In Hebræo primum verbum est præ-  
teriti temporis, secundum futuri: sed quia  
de re eadem est sermo, septuaginta Inter-  
pretes vtrumque verbum reddiderunt per  
tempus præteritum, & S. Hieronymus v-  
trumque reddidit per tempus futurum. Et  
quidem sententia semper est vera; nam res  
ipsa in se futura erat, sed Propheta quo-  
dammodo præterita, cum eam cerneret  
quasi præteritam. Tamen absolute lectio  
septuaginta Interpretum, & vulgatæ editio-  
nis præferenda est, tum quia in Actis Apo-  
stolicis cap. 4. legimus in præterito, fremue-  
runt, & meditati sunt, tum quia ratio exigit,  
vt significatio primi verbi sit regula signi-  
ficationis secundi, non contra. Nomine,  
gentium, cum dicitur, quare fremuerunt gen-  
tes, videntur intelligendi Gentiles. Nam sic  
intellegerunt Apostoli Act. 4. & vox He-  
bræa Goyim, passim in scripturis accipitur  
pro Gentilibus, siue Ethnicis. Per populos  
autem, cum subditur, & populi meditati sunt  
inania, intelligendi sunt Hebræi, vt constat  
ex eodem cap. 4. Act. Verba quoque valde  
proprie tum Gentilibus, tum populis He-  
bræorum accommodantur. Gentiles enim  
fremuisse dicuntur, quasi animantia ratio-  
nis expertia, populi Iudaici meditati esse  
inania, quia ipsi consilium inierunt, vt Ie-  
sum perderent.

Astiterunt Reges, terra, & Principes  
conuenerunt in unum aduersus Dominum,  
& aduersus Christum eius.

Dixerat in genere, Gentes, & populos  
indignatos fremuisse, & inania meditato-  
rum, nunc explicat in particulari quæ sint illæ  
gentes, & populi, & aduersus quem indi-  
gnati sint, ac dicit, fremitum non cœpisse à  
plebe, sed à capitibus, id est, à Regibus, &



# EXPLICATIO

Principibus. Primus enim qui infremuit, fuit Herodes Rex, vt habemus Matth. 2. qui quidem Herodes alienigena erat, vt inter gentes reputari potuerit. Eum sequuti sunt Principes, & populi Iudeorum. Nam Herode turbato, turbata est omnis Hierosolyma cū illo. Deinde tēpore passionis Domini, iterum alius Herodes, & Pontius Pilatus cū Principibus, & populis Iudeorum in Christum insurrexerunt. Denique post Christi passionem, & resurrectionem semper persecutiones à Regibus, siue Imperatoribus inchoabantur, & à populis Duces suos sequentibus fouebantur. Quamuis autem indignatio, & fremitus proprie contra Christum esset, non contra Deum, imo sub colore gloriæ Dei, & quasi ex zelo Diuini honoris; tamen re vera, qui Christum oppugnabant, Deum verum oppugnabant. Christus enim operibus diuinis se veri Dei Filium ostendebat, & qui odit Filium, sine dubio odit & Patrem. Quod attinet ad verba, illud, *astiterunt*, proprie in Hebræo significat sese constituerunt, id est, quasi murum se statuerunt, vt resisterent venienti Messia: illud autem, *conuenerunt in vnum*, in Hebræo proprie significat, consultauerunt, siue ad capiendum consilium conuenerunt simul: quod in Euangelio Herodem, & Principes Iudeorum contra Christum fecisse legimus. Tam autem est aperta hæc Prophetia, vt non solum Apostoli Act. 4. intellexerint ad litteram de Iesu Christo Domino nostro hunc locum; sed etiam veteres Rabini, teste R. Salomone in Commentario huius Psalmi, exposuerunt hunc eundem locum de vero Messia, quem adhuc cæci, & infatuati expectant.

III.

*Dirumpamus vincula eorum, & proiciamus à nobis iugum ipsorum.*

Explicat Propheta causam, cur Reges, & Principes cum gentibus, & populis fremuerint, & conuenerint aduersus Christum Causa enim est, ne cogerentur seruare legem Christi contrariam sensibus carnis, & humanæ prudentiæ. Itaque verba ista dicuntur in persona Regum, & Princi-

pum impiorum, quasi dicat, *Astiterunt Reges terræ, & Principes conuenerunt aduersus Dominum, & aduersus Christum etus*, dicentes inter se, *Dirumpamus vincula eorum*, id est, non sinamus nos subiici legibus, & imperio Messia, & Domini, qui inicit illum. Pro, *iugum ipsorum*, sanctus Hieronymus vertit, laqueos eorum; verbum Hebraicum *hauoth*, significat funes; & videtur Prophetia repetere voluisse idem fere vocabulum, vt ordinarie solet id ipsum bis dicere. Itaque septuaginta Interpretes, & S. Hieronymus non tam ad vocabulum, quam ad sensum respexerunt. Sunt autem omnia vocabula metaphorica, siue legem appelles vincula, siue funes, siue laqueos, siue iugum. Explicant autem ista metaphoræ naturam legis, qualis est iudicio impiorum. Impiis enim lex Domini durissimum iugum, & laqueus lethalis videtur, cum viris sanctis eadem lex sit melle dulcior, & desiderabilior auro, & lapidibus pretiosis, vt habemus in Psalmo 18.

עבד

*Qui habitat in caelis, irridebit eos, & Dominus subsannabit eos.*

IV.

Hic iam Propheta demonstrat, frustra Principes, & populos laborare in oppugnanda Christi Religione, quod initio etiam dixerat. Nam Religio Christi à Deo est, & Deo nemo resistere potest. Recte autem dicit, *Qui habitat in caelis*, vt ostendat Deum super omnes esse, & omnia cernere, & ideo nullo negotio dissoluturum omnia eorum consilia, & omnes molitiones dissipaturum. Quod autem dicit, Dominum irrisurum, & subsannaturum eos, significat, eos, diuino iudicio per signa, & prodigia, per Martyrum patientiam, per conuersionem gentium, & populorum, perque alios modos soli Deo notos, ita confundendos, vt omnium irrisioni, & subsannationi pateant. Id videmus impletum. Nam sacerdotium Iudaicum & idololatricum nunc ab omnibus irridetur. Carent enim Iudæi, & Gentiles templis, & sacrificiis. Reges quoque Gentilium, qui Ecclesiam persequabantur, omnes misere perierunt.

Tunc



V. *Tunc loquetur ad eos in ira sua, & in furore suo conturbabit eos.*

Explicat modum, quo Deus persecutores Christi irridendos exposuit, quia nimirum loquutus est ad eos, non verbis, sed verberibus, grauissimis pœnis illos admonens, vt patet de Herode ab angelo percussio, de Maximino vermibus consumpto, & aliis. Non est proprie ira, nec furor in Deo, sed semper cum tranquillitate indicat: sed dicitur per metaphoram irasci, & furere, quando seuerè punit, & tunc præsertim, quando ea punitio non prodest illis ad salutem æternam; id enim facere solent, qui irascuntur, & furunt, qui non nocent, vt sanent, quomodo Medici faciunt, sed nocent, vt noceant. Itaque Dauid, Domine, inquit, *ne in furore tuo arguas me, neque in ira tua corripas me.* Cupiebat enim argui, & corripi, sed paterne, non hostiliter, ad salutem, non ad interitum.

VI. *Ego autem constitutus sum Rex ab eo super Sion montem sanctum eius, prædicans præceptum eius.*

Hoc loco dicendum est aliquid de verbis, antequam veniamus ad sensum. Nam in Hebræo Codice sic habetur, *Ego autem ordinavi Regem meum super Sion montem sanctum meum*: & quamuis non multum referat, quo ad sensum, vtum Deus pater dicat se ordinasse Christum Regem, an ipse Filius dicat se ordinatum à Patre: tamen valde probabile est septuaginta Interpretes legisse paulo aliter, quam nunc legimus. Habemus nunc *ne facti*, ordinavi, sed ipsi legisse videntur mutatis tantum punctis, *nissacti*, ordinatus sum, quæ vox habetur Prover. 8. vbi legimus, *ab æterno ordinatus sum*, & vbi legimus *Malchi*, Regem meum, ipsi legisse videntur *Malcho*, Rex eius, & vbi nos legimus *Chodfco*, sanctum meum, ipsi legisse videntur *Chodfco*, sanctum eius. Et quoniam probabile est septuaginta Interpretes habuisse codices Hebræicos valde correctos, inde fit etiam probabile lectionem nostram vulgatam veritiorem esse, quam ea sit, quæ nunc legitur in codicibus Hebræi-

cis. Veniamus nunc ad sensum. Dixerat Propheta aduersarios Christi tumultuatos, & posuerat verba ipsorum, *Dirumpamus vincula eorum, &c.* Ideo nunc introducit ipsum Christum loquentem, & quasi respondentem eis, quasi dicat, gentes, & populi, necnon Reges, & Principes dicent, *Dirumpamus vincula eorum*: vos vero Deus iridebit, & Christus ipse ita eis respondebit: Ego ordinatus sum Rex non ab hominibus, sed à Deo, & ideo non timeo minas hominum: ordinatus autem sum Rex super Sion montem sanctum eius, id est, super Ecclesiam, quæ est ciuitas in monte posita, & cuius typus fuit Ierusalem, cuius pars præcipua, & magis à Deo dilecta, & sanctificata est Sion, iuxta illud, *Diligit Dominus portam Sion super omnia tabernacula Iacob.* Hæc autem ordinatio mea in Regem, constat ex decreto Dei, quod ego prædicaturus sum. Quod enim habemus in nostra vulgata editione, prædicans præceptum eius, & in textu Hebræico, *enarrabo decretum eius*, intelligitur de decreto, quo Deus statuit Christi Regnum in totum orbem propagandum, Vox Hebræa *choo*, significat præceptum, decretum, statutum, vt patet ex multis locis, sed potissimum ex Psalmo 104. *Et statuit illud Iacob in præceptum, & Israel in testamentum æternum, dicens, Tibi dabo terram Chanaan.* Vbi præceptum Hebræice est *choo*, & significat decretum Dei de donanda filiis Israel terra promissionis.

*Dominus dixit ad me, Filius meus es tu, ego hodie genui te.*

Hoc est initium, & fundamentum decreti diuini. Nam Christo debetur omnis potestas in coelo, & in terra, quia est verus, & naturalis filius Dei. Sunt autem tres huius loci expositiones, & omnes literales, & intentæ à Spiritu sancto. Prima est de generatione æterna, quæ colligitur ex Apostolo ad Hebr. 1. vbi sic ait, *Tanto melior Angelis effectus, quanto differentius præ illis nomen hereditauit. Cui enim dixit aliquando angelorum, Filius meus es tu, ego hodie genui te?* Hic locus Apostoli non potest intelligi de

נסכה  
נסכה  
מלכי  
מלכי  
קדש  
קדש



de generatione aliqua creata, vt de Natiuitate, vel Resurrectione secundum carnem. Quia per generationem creatam sunt etiam angeli filij Dei, vt patet ex 1.2. & 3. capite libri Iob. & tamen Apostolus intendit probare, Christum esse filium; Angelos autem ministros. Necesse igitur est verba Psalmi ab Apostolo citata, intelligi ad litteram de generatione æterna, vt recte exponit sanctus Augustinus, cui expositioni fauet tum vocabulum, *hodie*, quia æternitas est præfens duratio carens initio, & finem tum vocabulum, *genui*, Hebraice *lalad*, quod significat proprie parere. Deus enim in æterna generatione matris consortio non indiguit, sed ipse genuit, ipse peperit filium suum vnigenitum, iuxta illud Psalmi 109. *Ex utero ante luciferum genui te*. Altera expositio est de Resurrectione Domini, quæ colligitur ex eodem Apostolo Act. 13. vbi sic legimus, *Et nos vobis annunciamus eam, quæ ad Patres nostros repromissio facta est, quoniam hanc Deus adimpleuit filiis vestris, resuscitans Iesum, sicut & in Psalmo secundo scriptum est: Filius meus es tu, ego hodie genui te*. Et quadrant optime hæc verba in resurrectionem Domini; tum quia resurrectio est quædam regeneratio, vt habemus Matth. 19. *in regeneratione cum sederit filius hominis*; tum etiam quia resurrectio Christi fuit à solo Deo, & ipse dicitur *primogenitus mortuorum*, Coloss. 1. tum denique quia in die Resurrectionis cepit gloriosa exaltatio Christi, & manifestatio nominis supra omne nomen. Philipp. 2. *Propter quod & Deus exaltauit illum*; & ipse Dominus dixit Matth. vlt. *Data est mihi omnis potestas in cælo, & in terra*, atque hæc est expositio Hilarij & Chrysostomi. Tertia expositio est de die Natalis Domini secundum carnem, quæ est sancti Cypriani libr. 2. contra Iudæos cap. 8. & colligitur ex introitu Misæ in nocte eiusdem Natalis. Ecclesia enim accommodat verba Psalmi huius ad Mysterium Natiuitatis secundum carnem: quoniam generatio illa, singulare opus Dei fuit, vt etiam angelus Gabriel dixerit, Luc. 1. *Ideoque & quod nascetur*

*ex te sanctum, vocabitur Filius Dei*. Et sancti Patres, non solum de diuina, sed etiam de humana Christi generatione intelligunt verba illa Isaia 53. *Generationem eius quis enarrabit*? Itaque iuxta Theologos illos qui docent, in eadem sententia posse inueniri plures sensus litterales, existimamus sensum horum verborum esse, hodie, id est, in die æternitatis genui te Deus Deum; & hodie, id est, in die natalis tui secundum carnem, genui te, id est, feci, vt esses Deus, homo sine semine viri, sine corruptione Matris, sine labe peccati, & item hodie, id est, in die resurrectionis tuæ genui te, id est, feci diuina mea virtute, vt redires ad vitam, eamque immortalem, & gloriosam.

*Postula à me, & dabo tibi gentes hereditatem tuam, & possessionem tuam terminos terræ.* VIII.

Sententia est apertissima, ac si Deus Pater dicat: Quia tu Christe Filius meus es naturalis, & virtute mea incarnatus, & à mortuis excitatus, iure potes à me petere imperium in omnes gentes, tanquam hereditatem tuam, & omnem terram vsque ad vltimos eius fines, tanquam possessionem tibi debitam. Sunt autem hic aliqua obseruanda. Primo, nomen hereditatis in scripturis accipi pro quacunque re, quæ possidetur, vt propria, etiam si proprie non sit relicta à patre defuncto: & ideo tam populus Dei dicitur hereditas Dei, quam ipse Deus hereditas populi sui. Et quia hereditas proprie dicta solebat diuidi inter fratres, & plerunque diuidebatur sorte, & partes diuise mensurabantur funiculis: ideo pro eodem accipitur hereditas, pars, fors, funiculus, possessio, sæpe etiam iunguntur duo ex his nominibus, vt, *Dominus pars hereditatis meæ*, id est, Dominus est pars, quæ mihi hereditate obuinit, & alibi, *Iacob funiculus hereditatis eius*, id est, populus Israel est hereditas Domini, quam ipse sibi elegit, & quasi funiculo mensus est, & diuisit ab hereditatibus aliorum. Itaque hoc loco dicuntur omnes gentes hereditas Christi, quia factus est Dominus totius mun-



mundi quod exponitur per sequentia verba, & possessionem tuam terminos terræ. Secundo, obseruandum est hæc intelligenda esse præcipue de spiritali Regno Christi, id est, de Ecclesia toto orbe propaganda, vt S. Augustinus sæpissimè docet. Sensus igitur est, Christum esse constitutum Regem super Sion, id est, super populum Domini, sed hoc Regnum non concludendum finibus Iudææ, vel Palæstinæ, sicut Regnum Davidis, & Salomonis; sed extendendum per omnes gentes, & occupaturum omnia Regna mundi, iuxta prophetiam Danielis cap. 2. Nec tamen negandum est quin etiam intelligatur de potestate Christi in omnes gentes, etiam infideles. *Data est enim ei omnis potestas in celo, & in terra, & ipse est, qui constitutus est Iudex viuorum, & mortuorum. Act. 10.*

IX.

*Reges eos in virga ferrea, & tanquam vas figuli confringes eos.*

Hic significatur potestas Christi in Ecclesiam, & in omnes homines summa, & iustissima, vt possit tam facile bonos remunerare, & impios suppliciis afficere, quam facile potest figulus virga ferrea cōfringere vasa recentia, & lutea. In priore parte versus describitur summa potestas Christi ex parte virgæ ferreæ, id est, iudicij rectissimi, inflexibilis, & cui resisti non potest: in posteriore ex parte hominum subiectorū, qui erunt respectu Christi sicut vasa lutea recentia respectu figuli. Itaque illud confringes, non significat actum, sed potestatem, id est, non significat Christum confracturum omnes gentes; sed subiectas ei futuras omnes gentes, vt possit eas pro arbitrio cōfringere, siue misericorditer confringendo in eis infidelitatem, & peccata, & formando ex vasis contumelia, vasa honoris; siue iustè, & seuerè cōfringendo eos æternis suppliciis propter ipsorum demerita. Nam cōfringes vt vasa figuli, idem significare debet, quod reges in virga ferrea, illud autem, reges in virga ferrea, non refertur ad solam punishmentem impiorum, sed ad regimen totius Ecclesiæ iustum, & potentissimum.

Quod perspicuum est tum ex versione Septuaginta interpretum, qui reddiderunt *παύσις*, id est, paces, quomodo etiam reddidit Græcè, sanctus Ioannes in Apocalypsi cap. 2. & 19. tum ex Michæa c. 5. vbi loquens apertissimè de Christo, qui ex Bethlechem egredietur, vt sit Dux super populum Dei, dicit, *Reget eos in fortitudine, & vtitur eadem voce, quæ habetur hoc loco, nimirum, Raha.*

*Et nunc Reges intelligite, erudimini qui iudicatis terram.*

Hortatur nunc Propheta Reges terræ, à quibus populi dependent, vt quandoquidē frustra nituntur resistere Christo, verò, & supremo Regi omnium Regum, sponte illi subiciantur; & quia ordinariē, ex prauo iudicio sequitur prauus affectus, primū hortatur eos vt corrigant iudicium, intelligant veritatem, eruditionem suscipiant. (Idem autem est, Reges intelligite, & erudimini Iudices terræ. Reges enim sunt Iudices supremi populorum.) Deinde hortatur vt corrigant prauum affectum, & pro odio erga Christum, incipiant illi seruire, eumque diligere, & reuereri, ideo subiungit.

*Seruite Domino in timore, & exultate ei cum tremore.*

Mirè miscuit amorem cum timore, ac si diceret, timete cum amore, & amate cum timore. nam illud, seruite, est proprium seruorum timentium, præcipue secundum vocem Hebræam *biudia*. Illud autem in timore significat propriè reuerentiam filialem, seu pietatem: nam illa ipsa vox *ijra*, quæ hic habetur, habetur etiam Isaia II. vbi dicitur de Christo, *Requiescet super eum spiritus pietatis*, & passim in Scripturis accipitur pro pietate, seu timore filiali. Itaque *seruite Domine in timore*, secundum vim vocis Hebræicarum, significat, seruite quidem Domino, sed seruitute liberali propria filiorum. Quod verò sequitur, *Et exultate ei cum tremore*, idem significat, sed ordine, & vocibus variatis. nam in priore parte versiculi posuit in verbo timorem seruilem, in nomine, pietatem filialem: in po-

B

steriori

תנח  
X.

XI.

עבד  
יְהוָה



steriori parte, è contrario posuit in verbo, exultationem filij amantis, in nomine autem, tremorem serui timentis.

XII. *Apprehendite disciplinam, ne quando irascatur Dominus, & pereatis de via iusta.*

Hunc locum ex Hebræo alij reddunt, osculamini filium; alij, adorate filium; alij, adorate purè; posset etiam reddi, complectimini puritatem, ad quod facilè posset reduci translatio Septuaginta Interpretum: nam apprehendere disciplinam, idem est, quod complecti puritatem, doctrinæ videlicet. Sic etiam osculari, siue adorare Filium Dei, idem ferè, quod apprehendere disciplinam eius: Sed cum Septuaginta Interpretes doctissimi fuerint, & textus optimos habuerint, & in translatione huius loci nulla sit apud Græcos varietas, & (quod magis est mirum) Chaldæus etiam Paraphrastes reddiderit, accipite doctrinam, suspicor omnino, vel in Hebræo aliquid mutatum vitio

22 temporum, aut certe vocem *Bar* non solum filium, & puritatem, sed etiam disciplinam significare, præsertim cum aliqua litera superaddita. Quemadmodum enim apud Græcos à voce *παις*; id est, puer, sit nomen *παιδία*, id est, disciplina, quod est in hoc loco Psalmi, ita fieri potest, vt à voce *Bar*, id est, filius, fiat aliquod nomen quod significet disciplinam, quæ maximè filiis à parentibus debetur. Sensus autem horum verborum est, vt non solum Reges corrigant iudicium, & affectum; erudiantur, & seruiant, quod supra dictum est, sed etiam magno seruiore id faciant, vt perseueret in eis eruditio, ex qua pender affectus. Nam

ps verba tam Hebraicum *Nassacu*, quam Græcum *πάσχειν* non significant simpliciter suscipere, sed magno affectu rapere, & complecti, & firmiter retinere, quomodo quis complectitur ad osculandum personam valde amatam. Reddit autem rationem, cur id necessarium sit, dicens: *Ne quando irascatur Dominus, & pereatis de via iusta.* In Hebræo non habetur *Dominus*, nec *iusta*. Sed simpliciter, *Ne quando irascatur, & perea-*

*tis de via:* sed Septuaginta addiderunt, explicandi gratia. Subintelligebatur enim *Dominus* ex versu superiore, *Seruite Domino in timore, & exultate ei cum tremore.* Sensus igitur est, Apprehendite disciplinam, ne quando irascatur in impios, & rebelles, is, cui dixi seruendum esse cum timore: & vos pereatis, siue exterminemini de via iustitiæ. Hæc est grauissima pœna Principum, quando Deus ob eorum peccata tradit illos in reprobum sensum, vt dicitur Rom. 1. & permittit, vt decipiantur à malis consiliariis, & faciant multa mala, ob quæ tandem pereunt in hac vita, & futura, vt patet de Pharaone, Roboam, Achab, & similibus, in quibus peccata grauissima fuerunt pœnæ aliorum peccatorum, vt disputat S. Augustinus lib. 5. cap. 3. in Iulianum: hoc enim est non aliquantulum declinare à via recta, sed plane perire, & exterminari omnino à via Iustitiæ.

*Cum exarserit in breui ira eius, beati omnes qui confidunt in eo.*

XIII.

Hæc est conclusio totius Psalmi, in qua Sanctus Propheta pronunciat, ex dictis posse colligi, quam sit bonum, & vtile diligere Dominum, & illi toto corde seruire: soli enim, qui eiusmodi fuerint, in die vltimi Iudicii, quod non longè abesse potest, fiduciam habere poterunt. Dicit, *cum exarserit in breui ira eius*, vt significet cito venturum diem illum terribilem, nam mille anni sicut dies hesternæ quæ præterit, nec longum dici potest quod finem habet; dicit *exarserit ira eius*, vt significet diem Iudicii fore diem solius vindictæ & iustitiæ, non autem misericordiæ: dicit, *beati qui confidunt*, non quod solum fiducia sufficiat: sed quia vera fiducia oritur ex vera amicitia.

## PSALMVS III.

*Titulus, & Argumentum.*

Psalmus David cum fugeret à facie Absalon filij sui.

HIC



**H**IC titulus habetur in omnibus Codicibus Hebraicis, Græcis, & Latinis, ex quo non potest dubitari, quin ad litteram Psalmus debeat intelligi de ipso Dauide, & sic oratio quadam ipsius Davidis pro liberatione sua à persecutione Absalonis. Quia uero Dauid figura fuit Christi, adeo ut apud Prophetas Christus ipse nominetur Dauid, ut patet ex Hierem. c. 30. Ezech. c. 34. & Ose. c. 3. ideo potest, ac debet Psalmus intelligi etiam de Christo. Imo sensus principaliter intentus à Spiritu sancto uidetur esse de Christo. Observandum autem est nomen Dauid positum in titulo non esse casus genitiui, sed datiu: nam in Hebræo est articulus, *le*, qui potest genitiuum, & datiuum casum denotare; sed Septuaginta uiri semper uertunt *τὸ*, qui est articulus solius datiu: & prudentissime hoc Septuaginta uiri fecerunt, ut significarent, autorem Psalmorum precipue non esse Dauidem, sed Deum. Itaque sensus est, Psalmus Dauid, id est, Psalmus inspiratus à Deo ipsi Dauidi.

## EXPLICAT. PSALM. III.

I. **D**omine quid multiplicati sunt qui tribulant me? multi insurgunt aduersum me.

Queritur Dauid, & miratur, colloquens in oratione cum Deo, de multitudine persecutorum suorum: nam ut habetur 2. Reg. 15. uniuersus Israel toto corde sequebatur Absalonem. Idem Christo accidisse notum est ex Euangelio, præsertim tempore passionis; tunc enim filius eius, id est, populus eius rebellauit ab eo, dicens: Non habemus Regem, nisi Cæsarem; & ipse recessit ab eis quasi infirmus, & fugiens per mortem, sed paulo post rediit per resurrectionem. Absalon significat patris pax, quia reuera bellum fuit filij; sed in patre semper fuit pax, ut patet, tum de Dauide, qui fleuit mortem filij, tum de Christo, qui orauit pro crucifixoribus; & quemadmodum in persecutione Absalonis, Achitophel intimus consiliarius & familiaris Dauid prodidit eum, & postea se ipse suspendio necauit, 2. Reg. 17.

Ita in passione Christi, Iudas vnus ex intimis familiaribus prodidit eum, & in fine laqueo se suspendit.

Multi dicunt anima mea: non est salus ipsi in Deo eius. II.

Videtur hoc referendum ad internas tentationes, quod Dæmones suggererent illi intus in animo cogitationes diffidentiae, quasi frustra in Domino confidisset. Potest etiam referri ad sermones hominum, qui ex hoc infortunio iudicabant Dauidem à Deo derelictum, in quo tamen confidere solitus esset: est enim hoc ferè ordinariū, ut imperfecti existiment viros bonos in graui ærumna constitutos frustra sperasse in Deo. Sic Iob vxor eius dicebat: *Adhuc permanes in simplicitate tua.* Iob. 2. Sic Tobia vxor quoque dicebat: *Manifestè vana facta est spes tua, & eleemosyna tua modo apparuerunt.* Tob. 2. Sic denique de Christo dicebant: *Confidit in Deo, liberet eum, si vult.* Matth. 27.

Tu autem Domine susceptor meus es, gloria mea, & exaltans caput meum. III.

Vox iusti in tribulatione positi hæc est, qualis fuit Dauid, sed præ omnibus, qui caput est omnium, Christus. Sensus est, multi mihi dicunt, frustra me confidisse in Deo, sed falluntur omnes: nam tu Domine non deferis sperantes in te, ideo *susceptor meus es*, id est, suscepisti me protegendum contra omnia hostium tela: nam in Hebræo est, *Clypeus meus*; nec solum me defendis, sed etiam glorificas, ideo es etiam *gloria mea*, id est, causa gloriæ meæ. Atque ex his fit, ut sis *exaltans caput meum*, id est, latificans me, ut qui præ mœrore demisso capite incedebam, nunc exaltans caput attollam. Est hæc phrasis Hebræis familiaris, vnde & Hieremias ultimo dicitur: *Eleuauit Euilmerodach Rex caput Ioachim, & eduxit eum de carcere;* & Dominus in Euangelio: *Leuate capita vestra, quoniam appropinquat redemptio vestra.* Hæc vera esse docent exempla non solum Christi, & Davidis, sed etiam Ioseph, Iob, Tobia, Danielis, &c.



IV. *voce mea ad Dominum clamaui, & ex-  
audiuit de monte sancto suo.*

In Codice Hebraico legimus, clamabo, & exaudiet; in Græco & Latino, clamaui, & exaudiuit. Iuxta priorem lectionem significat Dauid, se ex fiducia, quàm versu superiore expressit, in præsentī tribulatione clamaturum ad Dominum, & sine dubio more solito audiendum. Iuxta posteriorem lectionem probat exemplo suo, quod supra dixerat, quod videlicet Deus sit clypeus, & gloria eius. Nam sæpè, inquit, aliàs afflictus clamaui ad Dominum, & semper exaudiuit me. Circa verba nota illud, voce clamaui, habere emphasim ad exprimendum affectum; nō orauit demissa voce, sed clamaui, & clamaui voce sua, id est, non per alium, sed per se, non solum spiritu, sed etiam corporali voce. Illud autem de monte sancto suo, significare potest montē Sion, ubi erat arca Domini, in quo peculiari modo præsentia Domini residebat, & vnde responsa dabat; vel etiam cælum, quod vocatur à Salomone, *firmum habitaculum Dei*, 3. Reg. 8. & ab Apostol. ad Hebr. 12. *vocatur mons Sion, & Hierusalem celestis*.

V. *Ego dormiui, & soporatus sum, & exurrexi, quia Dominus suscepit me.*

Obseruanda sunt aliqua circa verba, antequam exponamus sententiam, verbum, *dormiui*, tam Hebraicè, quàm Græcè significat propriè cubare, & iacere, & quia omnes dormientes, cubant, & iacent, significat etiam dormire: verbum autem *soporatus sum*, in Hebræo, & Græco non significat nisi dormire. Itaque sensus est eorum verborum: Ego dormiui. i. accubui, siue iacui, vt dormirem, & re ipsa soporatus obdormiui, & postea euigilans surrexi. Obserua præterea illud, quia Dominus suscepit me, in Hebræo, & Græco esse futuri temporis, quia Dominus suscipiet me, vel vt sonat vox Hebræa, sustentabit me. Sed sciendum est moris esse linguæ sanctæ, vt ponat futurum pro præterito, quando significatur quædam continuatio, vt Job. 1. *Sic faciebat Job cunctis diebus*, illud *faciebat* in Hebræo futuri

temporis est, rectè igitur Hieronym. & vulgatus interpretes verterunt suscepit, siue sustentauit, & potuissent etiā reddere, suscepiēbat, vel sustentabat. Veniamus ad sententiam. Dauid in illa persecutione filij dicit, *Ego dormiui*, seu iacui dormiturus. i. declinaui, fugi, non restiti, & sic iacui quasi oppressus, & *soporatus sum*. i. ita derelictus, quasi mortuus essem, vnde Absalon potitus est Regno, quasi Rex mortuus fuisset, & *exurrexi*. i. paulò post recepi animum, & resistere cœpi, quoniam Dominus sustentauit me. Sed longè significantius hæc omnia Christo conueniunt, ipse enim verè dicere potuit. *Ego dormiui*, id est, sponte iacui in cruce, vt in ea morerer, quomodo se in lectum componunt, qui dormire volunt; Nemo, inquit ipse, *tollit animam meam à me*, sed ego pono eam. Et *soporatus sum*, id est, somno mortis verè confopitus sum, & hoc etiam sponte, non inuitus; vnde *inclinato capite tradidit spiritum*. Vocat autem mortem suam somnum, quia tam facile illi erat resurgere à mortuis, quam aliis euigilare de somno; & *exurrexi*, quia Dominus suscepit, seu sustentauit me, id est, paulò post surrexi à mortuis, non fretus vilo humano auxilio, sed innixus potentia infinita diuinitatis. Et hoc modo probauit rerū esse quod dixerat versu superiore. *Voce mea ad Dominum clamaui, & exaudiuit me de monte sancto suo.*

VI. *Non timebo millia populi circumdantis me: exurge Domine, saluum me fac Deus meus.*

De Dauide clarissima sunt: ille enim dicitur exurrexisse, quando recepit animum, & parauit se ad resistendum inimicis; ideo nunc dicit, non timere se populum illum innumerabilem, quia in Deo confidit, non in suis viribus, aut armis sociorum: ac propterea rogat Deum, vt exurgat, ac saluum se faciat de manibus hostium. Dicitur Deus per metaphoram exurgere quando incipit iuuare, quemadmodum dicitur dormire, quando non iuuat. *Exurge*, inquit alio loco, *quare obdormis Domine?* pulchre autem



coniunguntur, *exurrexi, & exurge*, quasi dicat, ego te excitante per immisissam inspirationem exurrexi, & tu igitur me excitante per orationem exurge, & pugna pro me. Christo autem hæc omnia accommodantur rectissime, non ratione capitis, sed ratione corporis, id est, Christus hæc dicit post resurrectionem non pro persona sua, sed pro corpore suo, quod est Ecclesia, quæ in illis initiis innumerabiles habuit inimicos, sed Deo freta omnes vicit.

VII.

*Quoniam tu percussisti omnes aduersantes mihi sine causa, dentes peccatorum contriuisi.*

In Hebræo legitur sic, *Quoniam tu percussisti omnes inimicos meos in maxilla, dentes impiorum contriuisi*: sed credibile est Septuaginta interpretes legisse pro *lechi*, quod significat maxillam, *lechinnam*, quod significat in vanum, & credibile etiam est, codices, quos habuerunt Septuaginta fuisse meliores iis, quos nos habemus. Sed tamen utraque lectio bonum sensum habet. Rogatur igitur Deus siue à Davide pro se, siue à Christo pro Ecclesia sua, ut pugnet aduersus hostes, quoniam semper alias id fecerit, nimirum percusserit omnes inimicos piorum. Et si quidem legamus *sine causa*, sensus erit, Deum semper punire illos qui sine causa persequuntur iustos, atque eorum dentes confringere, id est, efficere, ut mordere, id est, nocere, non possint, sed latrare, ac terrere solum possint. Quamuis enim aliquando videantur iusti ab impiis premi, tandem tamen omnia cooperantur in bonum, & impij persecutionis suæ poenas luunt, Quod si legamus in maxilla, sensus erit Deum non solum punire, sed etiam confundere, & pedefacere impios. Percussio enim maxillæ non solum ad dolorem, sed etiam ad contemptum fieri solet: & coheret optimè cum percussione maxillæ, quod sequitur de contractione dentium: per quam contractionem significatur, quod supra diximus, fieri videlicet per Dei gratiam, ut inimici iustorum, siue Dæmones, siue homines sint, la-

trare possint more canum, sed mordere, id est, verè nocere non possint.

*Domini est salus; & super populum tuum benedictio tua.* VIII.

Concluditur Psalmus per inuocationem, & laudem Dei, quasi dicat, ex dictis concludere possumus Domini esse salutem, & illi acceptam esse referendam. Nam in Hebræo est, *Domino salus*, id est, Domino accepta referenda est salus, quæ salus est benedictio tua Domine super populum tuum, nam benedicere Dei, est benefacere.

*De voce Selà.*

In hoc Psalmo habetur tribus in locis, videlicet post secundum versum, post quartum, & post vltimum vox Hebræa, *Selà*, quæ habetur in aliis nonnullis Psalmis, non tamen in omnibus; habetur etiam in quibusdam locis Habachuc prophetæ, & nusquam alibi. Scribit de hac voce S. Hieronymus epistolam ad Marcellam, in qua refert tres opiniones; primam quorundam, opinor, Rabinorum, qui volunt, ea voce significari mutationem, vel distinctionem rythmi, aut eleuationem vocis. Secundum interpretum Septuaginta, nec non Theodotionis, & Simmachii, qui eam vocem Hebræam interpretati sunt, *diapsalma*, vocem æquè obscuram. Tertiam Aquilæ, & quintæ ac sextæ editionis, quod *Selà* sit idem quod semper. Hanc sententiam postremam S. Hieronymus sequutus est in sua versione ex Hebræo. Et certè prima opinio videtur improbabilis, nam si vox illa significaret mutationem, aut distinctionem rythmi, aut vocis eleuationem, poneretur in omnibus Psalmis, ac præsertim in longioribus. Videmus autem in hoc breuissimo Psalmo haberi ter, ut etiam bis in Psalmo quarto, & in Psalmo quadagesimo sexto, qui breuissimi sunt, in longissimis quibusdam nunquam. Deinde non poneretur in fine Psalmorum, sed tantum in medio, quæ enim mutatio, vel distinctio, vel eleuatio significanda est Psalmo finito? Videmus autem haberi in fine Psalmorum, tertij, noni, vicesimi quarti, & quadagesimi sexti. Secunda opi-



da opinio probabilis est propter auctoritatem Septuaginta interpretum. Significat autem *diapalma*, interprete Augustino in commentario Psalmi quarti, interuallum psallendi, sed certe ratio vix reddi potest; cur istud interuallum notetur in Psalmis paucissimis, & breuissimis tantum. Tertia opinio fortasse probabilior est, nam præter S. Hieronymi auctoritatem, videmus illud semper, rectè poni vbiunque, *sela*, inuenitur. In hoc Psalmo in versu secundo, & quarto rectè, *sela*, potest exponi semper. Multi dicunt *animæ meæ*, non est *salmus ipsi in Deo eius semper*, id est, esto Deus aliquando seruauerit Dauidem à periculis, at non semper seruabit, nunc certè non seruabit. Responderet autem Dauid, *voce mea ad Dominum clamaui*, & exaudivit me de monte sancto suo semper: id est, vos dicitis non semper me seruabitis, ego contra dico, me semper exaudiri, & spero semper seruandum. Porro in fine Psalmorum sicut poni solet, Amen, vel in æternum, vel Alleluia, ut patet legentibus; ita rectè ponitur, semper, quod significat desiderium, ut sint firma & rata, quæ dicta sunt. Ita hoc loco super populum tuum benedictio tua semper; id est, semper sit, ac si diceret Amen, vel iugiter, ut alibi.

## PSALMVS IV.

### Titulus, & Argumentum.

In fine in hymnis Psalmus Dauid.

**H**ic est titulus Psalmi quarti, in quorū varietas est inter lectionem Hebraicam, & Græcam, nam ex Hebræo, ut hodie habetur, virtus S. Hier. Victori, pro eo quod nos habemus ex Græco, in finem, & S. Hieronymū sequuntur omnes, qui vocē Hebraicam interpretantur ad verbum, nec potest aliter exponi vox illa, *Lamnazach*. Nata est hæc varietas præcipue ex additione punctorum, & ex litera, *m*, quæ fortè accessit vitio librariorum. Nam Septuaginta interpretes videtur legisse, *lamnazach*, quod significat in finem, ut patet expressè versu Psalmi 12. Vsq̃ue quo Domine obliui-

sceris me in finem. Et sanè magna est auctoritas Septuaginta interpretum, quos, & doctissimos fuisse, & optimos codices habuisse, dubitari non potest. Adde, quod & sententia est grauior secundum lectionem Septuaginta. Nam secundum Hebraicam lectionem significatur, hunc Psalmum datum esse Victori in hymnis, id est, Magistro cantorum, siue optimo cantori, qui præpositus est concinendis hymnis. Quæ res non videtur adeo grauis, ut debuisset extare in diuinis libris ad æternam rei memoriā. At secundum lectionem Septuaginta interpretum, significatur, hunc Psalmum esse canendū vsq̃ in finem, id est, perpetuū, siue frequentissimè, quod est signum, Psalmum esse vnum ex utilioribus. Accedit etiam intelligentia mystica, quod sit Psalmus ad Christum pertinens, qui est finis Legis & Prophetarum. Illud, in hymnis, posset etiā verti, in pulsatione instrumentorum musicorum. Siquidem, nagan, significat pulsare instrumentum, inde nomē, *Nezhinā*, pulsatio, sed accipitur etiam passim pro laude, siue carmine atque hymno. Itaq̃, sensus erit, Psalmus Dauid inter hymnos canendus perpetuū, atque ipsum Christum propriè respiciens, atq̃ hoc idem dicendum est de alijs, qui sequuntur eodem titulo inscriptis.

### EXPLICAT. PSALMI IV.

**C**um inuocarem exaudivit me Deus  
iustitia mea in tribulatione dilatasti mihi.

Hunc Psalmum canit Dauid in persona Ecclesiæ, vel cuiuslibet animæ fidelis, quæ exemplo suo monet peccatores, ut conuertantur, & fiduciam ponant in Domino, declinent à malo & faciant bonum. Ponit igitur exemplum suum dicens. Ego cum inuocarem Deum tempore tribulationis, exaudivit sum. exaudivit enim me Deus iustitia mea. id est, Deus, à quo est omnis mea iustitia, hoc est, cuius gratia me iustum facit. Ostendit autem, quomodo sit exauditus, dicens. In tribulatione dilatasti mihi tribulationem; aliquando dando patientiæ virtutem; & hoc est maius beneficium: aliquando

נגן  
נגינה

למנצח

לנצח



quando non solum patientiam, sed etiam gaudium in tribulatione dando, & hoc est beneficium maximum, & de hoc loquitur Psalmus. Tribulatio enim angustias facit, gaudium dilatat corda, sed quia gloriatur in tribulatione, huic tristitia vertitur in gaudium, & tribulatio ei non angustias, sed dilationem affert. Mutatio vero personæ de tertia in secundam additur ad significandum, unde veniat illa dilatio; nimirum ex illapsu Dei in cor tribulati, iuxta illud, *Cum ipso sum in tribulatione*. Itaque sensus est, Cum inuocarem Deum tribulatione pressus, exaudivit me; quod inde scio, quia tu Domine cordi meo dulcissimam tuam presentiam exhibens miro modo angustias tribulationis in latitudinem conuertis lætitiæ. Superabundo gaudio, inquit Apostolus, in omni tribulatione nostra. Illud autem, *dilatasti mihi*, phrasis est Hebraica, pro dilatasti me.

II. *Miserere mei, & exaudi orationem meam.*

Postulat continuationem gratiæ, ac si dicat, Ita Domine semper miserearis, semper exaudias, sicut adhuc fecisti. Nouit enim sanctus Propheta nos in hac vita semper obnoxios esse periculis, nisi misericordia eius non solum præueniat, sed etiam comiteretur, & subsequatur.

III. *Filij hominum vsquequo graui corde, ut quid diligitis vanitatem, & queritis mendacium?*

Lectio Hebraica multum discordat à Græca, ex qua Latina nostra vulgata deriuatur, sic enim ad verbum legitur Hebraicè, Filij viri vsquequo gloriosi mei ad ignominiam diligentes vanitatem, queritis mendacium. Sed facile apparet unde nata sit varietas; nam sublatis punctis, quibus carebant libri Hebraici ante Christi aduentum, & una litera in aliam similem commutata, existit lectio nihil discrepans à Græca. Verba Hebraica nuncita sonant, *Cheuodi lichmma*, gloria mea ad ignominiam. Sicut autem legerunt Septuaginta, *Cheuode leu lamma*, graues corde vsquequo. Ac ut sæpè diximus, credibile est emendatiore codices Hebraicos

fuisse temporibus Septuaginta Interpretum, quam nunc sint. Itaque lectio nostra vulgata omnino conseruanda est, quippe quæ conformis reperitur lectioni Hebraicæ, quam Septuaginta Interpretes emendatiorem habuerunt. Neque tamen in sensu discordia est magni momenti, imo una lectio aliam adiuuare videtur. Sententia igitur hæc est, *filij hominum vsquequo graues corde*, id est, quam diu cor habetis cor lapideum, durum, ad terram inclinatam, non cogitantes nisi bona terrena? Corda enim ex sententia Domini grauantur crapula, & ebrietate, & curis huius mundi: & quia corda dura non recipiunt supernas cogitationes, sed solum terrenas, & transitorias; ideo non diligunt, nisi terrena, & transitoria; & quoniam ea sola querimus diligenter, quæ ardentè diligimus; ideo subiungit Propheta, *ut quid diligitis vanitatem, & queritis mendacium*. Dicuntur autem bona terrena, vana, & falsa, quia nec solida sunt, nec stabilia, quamuis talia esse videantur, & propterea merito falsa, & fallacia dici possunt, præsertim si comparentur ad æterna. Additur in Hebræo, *sela*, id est, semper, quod rectè ponitur hoc loco: id enim valde mirum est, quod homines non tantum initio mundi, nec solum initio vitæ, sed in omni sæculo, & in omni ætate post tam longam experientiam, res humanas, & fallaces tanto studio confestim. Lectio Hebraica Græcam, & vulgatam adiuuat. Nam iidem homines, qui propter naturæ corruptionem sunt filij hominum, & graues corde, iidem ex imagine Creatoris, ad quam formati sunt, rectè dici possunt gloriosi, atque incliti, & ideo valde ignominiosum illis est diligere, & querere bona temporalia vana, & falsa, quæ sub pedibus habent, & non diligere, neque querere sempiterna, solida, & vera, unde originem, atque imaginem trahunt. Magna est hæc increpatio, quæ non ab homine mendace, sed à spiritu veritatis procedit.

*Et scitote quoniam mirificauit Dominus sanctum suum: dominus exaudiet me, cum clamauero ad eum.*

VI.

Hæc



Hæc est potissima ratio , cur deberent homines non amplius inhaerere temporalibus , quia videlicet venit ad nos de cælo Sanctus Dei, id est, Filius Dei, qui solus inter omnes homines impecabilis fuit. Vnde etiam Dæmon in Euangelio clamabat, *Scio quis sis, Sanctus Dei.* Hic autem sanctus pertransiit benefaciendo , & mala tolerando, temporalia despiciens , & sempiterna prædicans , & tandem hoc nouo itinere gradiens ad summam felicitatem peruenit, sedens in cælo corpore , & animo in æternum beatus. Et quoniam ille Dux noster est, & præiuit parare nobis locum, sine dubio si per vestigia eius ambulamus ad veram, & sempiternam felicitatem perueniemus. Scitote igitur quia Dominus Deus sanctum suum Christum, quia temporalia despectit, mirabilem omnino reddidit, resuscitans ab inferis, & in cælo ad dexteram suam constituens. Et quoniam non solum Dux noster est, sed etiam aduocatus, & mediator; ideo subiungit Dauid, *Dominus exaudiet me, cum clamauero ad eum*, id est, nunc potissimum certo confido me semper exaudiendum , cum sciam esse in dextera Dei mediatorem , qui interpellat pro nobis.

V. *Iraſcimini, & nolite peccare, quæ dicitis in cordibus vestris, in cubilibus vestris, compungimini.*

Post increpationem grauissimam, & admonitionem, vt resipiscant filij hominum, instruit eos Spiritus sanctus quid agere debeant, ac docet, vt sancta quadam iracundia exardescant, & resistant prauis desideriis, & eo modo peccatum vitent: quod si forte peccauerint, continuo doleant, & compungantur, neque contenti sint declinare à malo, sed etiam sacrificent sacrificium iustitiæ faciendo bonum. *Iraſcimini*, inquit, *& nolite peccare*, id est, cum surgunt prauis, & rebelles motus, qui sunt initia, & radices omnium peccatorum, irascimini naturæ vestræ corruptæ, & resistite, ita vt non peccetis. Ad hoc enim nobis data est ira à Deo (vt docet Sanctus Basilius

in oratione de ira) *vsq; ad virtutis.* Vox Hebræa significat etiam, pauete, contremiscite, quod etiam rectè quadrat in hunc locum. Debemus enim statim tremere, & pauere cum apparet caput serpentis, id est, mala suggestio. *Quæ dicitis in cordibus vestris, in cubilibus vestris, compungimini.* In Hebræo legimus ad verbum, *Dicite in cordibus vestris super cubilia vestra, & tacete*; in Græco verò sic, *Quæ dicitis in cordibus super cubilia vestra, compungimini*: ex quibus intelligimus nostram lectionem sic esse ordinandam. *Quæ dicitis in cordibus vestris in cubilibus vestris*, de his compungimini tacentes. Sensus igitur est, tempore nocturno cum estis soli in cubilibus, liberi ab omnibus aliis curis, tunc in cordibus vestris cogitare omnia vestra errata, & quæ dicitis, & confitemini apud vos in corde; de his coram Deo, tacentes præ verecundia, compungimini. Fuisse autem solitum Dauidem in cubilibus recogitare peccata, propter opportunitatem secreti, & silentij nocturni, potest intelligi ex illis verbis, *Lanuabo per singulas noctes lectum meum, lachrymis meis stratum meum rigabo.* Itaque quod ipse faciebat, alios monet, vt faciant.

*Sacrificate sacrificium iustitiæ, & sperate in Domino: multi dicunt, quis ostendet nobis bona?*

Addit nunc alteram partem iustitiæ, videlicet, vt non solum declinent à malo, sed etiam faciant bonum. Vocat autem opera bona *sacrificium iustitiæ*, quia opera iusta placent Deo valde, & per ea Deus honoratur. *Videant*, inquit Dominus, *opera vestra bona, & glorificent patrem vestrum, qui in cælis est.* Et Apostolus loquens de eleemosyna, *Accepi*, inquit, *quæ missus in odorem suauitatis.* Et de ieiunio, aliisque bonis operibus corporalibus, *Obsecro vos*, inquit, *vt exhibeatis corpora vestra, hostiam beneplacentem.* Addit autem, *& sperate in Domino*, ad tollendam præsumptionem, quæ bonis operibus insidiatur, bene operari nos oportet, sed ita tamen, vt non superbe confidamus de operibus nostris, vt Phari-

VI.



Pharisæus ille, qui dicebat, *Gratias tibi ago, quia non sum sicut ceteri hominum, ieiuno bis in sabbato, &c.* Sed in Domino speremus, qui dabit peccata vitare, bona opera facere, & ad portum salutis pervenire. Sicut enim præsumptio, est venenum, contumpens meritum operum bonorum, sic humilitas de viribus proprijs diffidens, & in Domino spem reponens, & veluti sal condiciens, & conseruans omnia recte facta. *Multi dicunt, quis ostendet nobis bona?* In Hebræis codicibus incipit hoc loco nouus versus; sed in Græcis, & Latinis pertinent hæc verba ad versum superiorem, sed non est varietas magni momenti: Ponit hoc loco Propheta communem carnalium hominum obiectionem; & quia stultorum infinitus est numerus, ideo ait, *Multi dicunt*, id est, cum prædicamus contemptum rerum temporalium, atque ad innocentiam & iustitiam exhortamur, plurimi dicunt, quis ostendet nobis bona, si hæc quæ videmus & tangimus, bona non sunt; quis rediit ab inferis? quis ascendit in cælum? Potest etiam per illud, *bona*, intelligi, iustitia & probitas; quia enim dixerat, *sacrificium iustitiæ*: obicitur improbi, quid est hæc iustitia? quis nobis ostendet viam iustitiæ?

VII.

*Signatum est super nos lumen vultus tui Domine: dedisti lætitiā in corde meo.*

Respondet Propheta viam iustitiæ nobis à Deo demonstratam esse, & nos habere magistrum intra nos, qui nos doceat verum bonum, lumen videlicet rationis naturalis, hoc enim lumen signatum est, & impressum indelebiter super nos, id est, in suprema parte hominis. Habemus enim partem inferiorem, corpus, partem superiorem, animam: & in ipsa anima parrem inferiorem, qua viuimus, & sentimus; & superiorem qua ratiocinamur, & sapimus. In hac igitur suprema parte est lumen, quo distinguimur à bestiis; estque hoc lumen deriuatum à vultu Dei, quia id nos facit esse ad imaginem, & similitudinem Dei. Et ex hoc lumine possumus intelligere primum viam iustitiæ: lex enim naturalis

scripta in corde, quam ne ipsa quidem deleret iniquitas, docet non faciendum alteri quod nobis ab alijs fieri volumus: proinde non furandum, non mœchandū, &c. Possumus etiam intelligere adiuui gratia Dei, nostrum verum bonum consistere in assimilatione ad Deum: bonum enim imaginis est, quam simillimam esse exemplari. Ex hac autem cogitatione existit in voluntate ingens lætitia, spes, & amor erga Deum. Quid enim dulcius, quam cogitare se esse imaginem viam rei infinitæ pulchritudinis? & se exemplari suo omnipotenti esse charissimam? Quia vero non omnes hoc experiuntur, ideo David non ait, dedisti lætitiā in cordibus eorum. sed, *dedisti lætitiā in corde meo*, quod idem omnes iusti, & pii dicere possunt. Parum autem refert, quod in Hebræo habetur, *signa super nos lumen vultus tui*; & nos habemus, *signatum est super nos lumen vultus tui*: nam literæ eadem mutatis punctis efficiunt, *signatum est*. Et hanc veram lectionem esse credimus, quia Septuaginta Interpretes melius nouerant, quomodo legendæ essent illæ literæ, quam Rabini posteriores, qui puncta addiderunt.

*A fructu frumenti, vini, & olei sui multiplicati sunt.*

VIII.

Addit Propheta aliud argumentum ex quo possunt homines intelligere Deum esse auctorem omnium bonorum, quia videlicet ipse est, qui temporibus suis multiplicat fruges, & producit fructus omnes. Sic etiam B. Paulus Act. 14. *Non sine testimonio reliquit semetipsum dans pluuias, & tempora fructifera, replens cibo, & lætitia corda nostra.* *A fructu, inquit, frumenti, vini, & olei sui multiplicati sunt*, id est, aucti sunt, creuerunt in bonis temporalibus ob illorum trium præcipue fructuum abundantiam. Vox enim Græca, quam Interpreter reddidit, *multiplicati sunt*, significat etiam, aucti sunt, siue creuerunt, & sic exponendam esse docet etiam textus Hebræicus, ubi ad verbum habemus, *frumentum, & vinum eorum multiplicata sunt*. Parum etiam

C

re-



refert, quod in Hebræo non fit mentio olei: nam vel excidit ea vox, vel Septuaginta Interpretes eam addiderunt explicationis gratia. Scriptura enim passim hæc tria coniungere solet.

IX.

*In pace in idipsum dormiam, & requiescam.*

Concludit Psalmum David dicens, Quicquid sit de aliis, quos ad amicitiam cum Deo exhortatus sum, ego omnino in Deo confidere, ac penitus conquirere volo. Ego, inquit, in pace, id est, cum tranquillitate animi, in idipsum, id est, coniunctim, pariter, simul, dormiam, & requiescam, id est, securus cubabo ad dormiendum, & re ipsa quietissime dormiam. Voces enim tam Hebraicæ quam Græcæ pro quibus habemus, dormiam & requiescam, significant proprie iacebo, siue cubabo, & dormiam. Sed non male nos ter interpretis vertit, dormiam & requiescam, quia qui cubat, ut dormiat, dici potest dormire; & qui dormit, præsertim somno placido, dici potest quiescere. Possunt etiam hæc referri ad futuram requiem in cælo: tunc enim vere summa pax erit ex unione cum Deo, & summa, ac verissima requies. Illud, in idipsum, quod frequentissime occurrit in Psalmis, in Hebræo est, יחדו Iachdau, quod S. Hieronymus, & alij vertunt, pariter, siue simul, Septuaginta Interpretes ubique reddunt, ἐν τῷ αὐτῷ, id est, in idipsum: sed idem est sensus: nam in idipsum, idem est, quod coniunctim, & simul. Sanctus Augustinus per idipsum, intelligit Deum, qui solus est semper idem ipse, æternus, & immutabilis, iuxta illud, Tu autem idem ipse es: acuta, & pia interpretatio, sed mystica, non literalis.

X.

*Quoniam tu Domine singulariter in spe constituisti me.*

Reddit causam, cur velit in Deum proiicere omnem sollicitudinem, siue, cur in futuro seculo in pace dormiturum & quieturum se dixerit. Ratio enim est, quoniam Deus verissimis, & fidelissimis suis promissionibus eum in sola spe constituerit, id est, habitare fecerit. Id enim significat vox

Hebræa, & Græca. Itaque vir iustus, & amicus Dei in sola spe diuina habitat, tanquam in tutissima domo; agit quod potest pro vita præfenti, & futura; at non confidit in propriis viribus, neque vlla re creata; sed in Deo solo, & ideo non confunditur, securus dormit, & securus dormiet in seculo futuro.

## PSALMVS V.

*Titulus, & Argumentum.*

In finem pro ea, quæ hereditatem consequitur, Psalmus David.

**H**ic titulus varie exponitur, propterea quod in Hebræo quoddam vox est, Nechilot, quam Rabini, & qui Rabinos sequuntur, significare volunt instrumentum musicum. Sed à Catholicis omnino reiiciendi sunt, cum S. Hieronymus Hebraicæ lingua peritissimus verterit, pro hereditatibus; & Septuaginta adhuc peritiores, & quibus lingua Hebræa patria erat, verterint, pro ea quæ hereditatem consequitur. Et verba ipsa Hebraica has interpretationes omnino recipiunt: siquidem, Nachal, hereditare significat, Nachalot, hereditates, Nochelet, eam quæ hereditat. Credibile igitur est, textum Hebraicum diuturnitate temporis una, vel altera litera immutatum peperisse has varietates: sed in re dubia Septuaginta Interpretibus fides habenda est magis, quam recentibus Rabinis, præsertim cum S. Hieronymi versio magis faueat Septuaginta, quam Rabinis. Igitur hic Psalmus compositus est in persona Ecclesiæ, quæ hereditatem salutis æterna quotidie in suis membris consequitur, & in fine mundi tota consequitur. Quia vero Ecclesiæ pro meliore sua parte, similis est columba, quæ perpetuo gemit, & innocentiam custodit, ideo in hoc Psalmo columba officium exercens, partim orat, partim peccatum detestatur. Quod ipsum facere debent omnes, qui pertinent ad columbam: sic enim unimur Deo, in quo consistit hereditas, sic oratione trahimus Deum ad nos, & puritate vite propinquamus ad Deum.

EX.



## EXPLICATIO PSAL. V.

i. **V**erba mea auribus percipe Domine,  
intellige clamorem meum.

II. Intende voci orationis mee Rex meus,  
& Deus meus.

Tribus modis fieri potest, ut aliquis non audiatur ab aliquo: vel quia ille non percipit sonum verborum, vel quia non percipit significationem eorum verborum, vel quia non attendit intentus aliis rebus. Deus quidem omnia percipit, & intelligit, & semper attendit: sed dicitur aliquando non percipere, vel non intelligere, vel non attendere, quia sic orantem contemnit, ac si non perciperet, vel non intelligeret, vel non attenderet. Ideo S. Propheta oraturus Deum, initio postulat, ut Deus percipiat, intelligat, & attendat. Porro Deus orantem contemnit, ac si non perciperet sonum verborum, quando is, qui orat, ita distrahitur, ut nec ipse verba sua percipiat: vel ita frigide orat, ut oratio sursum ascendere non possit. Tunc vero Deus ita se habet, ac si non intelligeret quid petatur, quando is, qui orat, nescit quid petat, petens ea, quae sibi non sunt utilis, etiam si attente, & ferventer oret, atque adeo clamet. Tunc denique Deus similis est non attendenti, quando orans non est dignus, qui audiatur, vel quod sine debita humilitate, fiducia, aliisque debitis circumstantiis oret, vel quod sit peccator, & de poenitentia nondum cogitare inceperit. Propheta igitur miro artificio à Spiritu S. edoctus, orat Deum pro dono bene orandi, videlicet ut detur ei sic orare, ut opus est, ad hoc ut Deus non repellat orationem, sed percipiat sonum, intelligat clamorem, & intendat orationi. Addit autem, *Rex meus*, ut facilius impetret. Solet enim bonus Rex audire populum suum: adiungit vero, & *Deus meus*, ut ostendat se non solum esse populum Dei quasi Regis, sed etiam creaturam eius, & in omnibus ab eo pendere, & sine eo nihil posse.

III. Quoniam ad te orabo Domine: mane  
exaudies vocem meam.

Reddit rationem, cur petierit audiri à Domino, quoniam, inquit; ad te orabo, id est, quia studium meum precipuum futurum est oratio; ideo tam sollicitus sum de auditione. Et quia studium orandi non solum est mihi precipuum, sed etiam primum, ideo summo mane antequam aliud vllum opus aggrediar, tu Domine audies vocem meam: nulli enim loquar antequam tibi, *ut labia mea aperies, & os meum annuntiabit laudem tuam.*

IV. Mane astabo tibi, & videbo, quoniam  
non Deus volens iniquitatem tu es.

Non solum, inquit, mane orabo, sed etiam astabo tibi, id est, conabor me presentem tibi exhibere: & contemplanbor (id enim sonat vox Hebraea) in illo silentio matutino, antequam irruat turba negotiorum huius vitae. Materia vero precipua contemplationis meae erit considerare, nihil te magis odisse, quam peccatum: innocentiam, & iustitiam tibi summopere, gratam esse, cum tu sis lux, & iustitia, & ideo si tibi placere volo, innocentiam, & iustitiam mihi sectandam esse, & iniquitatem odio habendam.

V. Neq̃ habitabit iuxta te malignus, neque  
permanebunt iniusti ante oculos tuos.

Non solum Deus non vult iniquitatem, sed neque vult homines iniquos: ideo non habitabit, inquit, iuxta te malignus, id est, non propinquabit tibi iure amicitiae: neque permanebunt iniusti ante oculos tuos, id est, non diu respicies oculo clementiae iniustos. Nunc enim Deus respicit etiam iniustos oculo clementiae, id est, eis concedit multa temporalia bona, sed hoc non diu durabit. Breui enim proiciet illos à facie sua in aeternum interitum.

VI. Odisti omnes qui operantur iniquita-  
tem: perdes omnes, qui loquuntur menda-  
cium.

VII. Virum sanguinum, & dolum abomi-  
nabitur Dominus.

Non solum Deus non vult iniquitatem, nec  
solum



solum non vult amicitiam cum iniquis, sed illos odit, & perdere vult, ac re ipsa perdet? & quoniam peccata committuntur opere, verbo, & cogitatione; siue desiderio, ideo singula Psalmus enumerat, primo operantes iniquitatem: secundo loquentes mendacium, quod de pernicio lo intelligitur: tertio virum sanguinum, ideo, crudelem, sanguinis appetentem, & dolo sum, id est, qui dolo meditatur, & struit.

VIII.

*Ego autem in multitudine misericordiae tuae introibo in domum tuam, adorabo ad templum sanctum tuum in timore tuo.*

Dixerat Propheta matutino tempore, se contemplaturum quantopere Deus peccatum, & peccatores auersetur. Exponit nunc fructum contemplationis, ac dicit, *Ego autem in multitudine misericordiae tuae*, id est, confusus in multa misericordia tua, non in viribus meis, vt euitem omnia peccata, *introibo in domum tuam*, quae est domus orationis, & *adorabo ad templum sanctum tuum*, id est, prosterne coram tabernaculo tuo in timore tuo, timens, ac tremens implorabo auxilium tuum.

IX.

*Domine deduc me in iustitia tua, propter inimicos meos: dirige in conspectu tuo viam meam.*

Hæc est oratio, qua orat in domo Dei, videlicet, vt Deus eum deducat in iustitia sua, id est, vt eum ducat per semitas iustitiæ faciendo illum implere omnia mandata diuina, & sic vitare omnia peccata, & quod idem est, dirigat in conspectu suo viam eius, id est, faciat eum ambulare per viam rectam, Deum semper præ oculis habendo. Id vero potissimum orat propter inimicos siue (vt habetur in Hebræo) propter insidiatores suos: necessarium enim est diuinum auxilium dirigens, & protegens, præueniens, & subsequens propter multitudinem hostium, qui nobis insidiantur, & ad peccata pertrahere conantur, siue ij Dæmones sint, siue homines terrentes, vel allicientes. Vocat enim inimicos, omnes, qui impediunt viam salutis, etiam si aliqui

amicissimi videantur: nam inimici hominis domestici eius. Parum autem refert, quod in Hebræo habetur, *Dirige in conspectu meo viam tuam*, quomodo etiam haberi in editione Septuaginta Interpretum, testatur S. Hieron. in epist. ad Suinam, & Fretellam, & in nostro Græco, & Latino, *Dirige in conspectu tuo viam meam*. Nam sensus in idem recidit, siue dicas secundum Hebræos codices, *Dirige in conspectu meo viam tuam*, id est, fac, vt inueniam, & videam viam tuam rectam: siue secundum Græcos, & Latinos, *Dirige in conspectu tuo viam meam*, id est, fac vt ambulem coram te per viam rectam. Semper enim petitur gratia incedendi per viam mandatorum Dei.

*Quoniam non est in ore eorum veritas, cor eorum vanum est.*

X.

*Sepulchrum patens est guttur eorum, linguis suis dolo se agebant.*

XI.

Reddit rationem, cur velit auxilium contra inimicos insidiantes, quia videlicet illi nihil intendunt, nisi decipere, & difficile est insidias eorum vitare. *Non est*, inquit, *in ore eorum veritas*, quia si terrent, decipiunt, persuadentes fugam exigui mali, vt inducant in maximum malum: si alliciunt, decipiunt, persuadentes prosecutionem exigui boni, vt adducant iacturam summi boni. *Cor eorum vanum est* intus, & extra peruersi sunt: non sapiunt, nec appetunt nisi vana, ideo non possunt loqui, nisi vana. Idem autem repetit in versu sequenti, sed ordine mutato: nam quod dixerat, *Cor eorum vanum est*, repetit, dicens, *Sepulchrum patens est guttur eorum*: & quod dixerat, *Non est in ore eorum veritas*, repetit, dicens, *Linguis suis dolo se agebant*. Itaque cum dicitur, guttur sepulchrum patens, significatur guttur, seu os, & linguam, quæ sunt instrumenta loquendi, esse quasi os sepulchri; interiora vero sepulchri, esse animam, siue cor, vbi sunt desideria, & cogitationes horridæ, & foetentes, quasi cadauera putrefacta, vnde exhalat foetor verborum, mortiferorum. Et ideo



ideo addit: *linguis suis dolose agebant*, hoc est, non solum falsa dicunt inimici mei, quia non est in ore eorum veritas, sed etiam dolosa, quia sub specie boni persuadent mala. In Hebræo est, *linguis suis blandiuntur*, quod in idem recidit.

XII. *Iudica illos Deus, decident à cogitationibus suis, secundum multitudinem impietatum eorum expelle eos, quoniam irritauerunt te Domine.*

Prophetia est potius, quam imprecatio: significat enim Psalmus fore, ut inimici iustorum, non solum non admittantur ad hæreditatem, de qua in titulo Psalmi, sed condemnentur ad æternas pœnas, & nihil obtineant eorum, quæ moluntur. *Iudica illos*, id est, iudicabis; vel, ut significantius habent Hebræi, condemnabis illos, decident à cogitationibus suis, id est, frustrabuntur spe sua, qua sperabant se subverti posse electos: *secundum multitudinem impietatum eorum expelle eos*, id est, pro meritis suis expellentur ab hæreditate in tenebras æternas, *quoniam irritauerunt te Domine*, id est, quoniam dum hominibus se nocere existimarunt, non homines offenderunt, sed Deum, iuxta illud, *Non te abiecerunt, sed me*. 1. Reg. 8. &, *Non es mentitus hominibus, sed Deo*, Act. 5.

XIII. *Et latentur omnes qui sperant in te, in æternum exultabunt, & habitabis in eis.*

XIV. *Et gloriabuntur in te omnes, qui diligunt nomen tuum, quoniam tu benedices iusto.*

XV. *Domine, ut scuto bonæ voluntatis tuæ coronasti nos.*

Hic prædicat felicissimam hæreditatem electorum, quibus titulus Psalmi eam promiserat. Ac primo inuitat iustos ad lætiam ob spem bonam futurorum. *Latentur omnes, qui sperant in te*, id est, & si aunc in labore certaminis iusti reperiuntur, tamen latentur in spe, qui non sperant in vanitatibus, sed in Deo vero, & in tempore suo in æternum exultabunt laudantes

Deum, qui habitabit in eis, id est, super eos ad modum tentorij, ut in Hebræo legimus, proinde ipsi in Deo erunt, & Deus in eis: & erit Deus omnia in omnibus. Hæc autem exultatio, & laus, quasi exterior, nascetur ex interna immensa lætitia, & gloria: nam *gloriabuntur in te*, ô Deus, omnes qui diligunt nomen tuum, id est, omnes vere iusti. Charitas enim es, quæ iustos, & amicos, & filios Dei facit. Gloriabuntur autem, quoniam tu benedices iusto, id est, unicuique iusto benedices, & benedicendo benefacies, reddendo eis coronam gloriæ, quam merentur. Et quoniam radix omnium bonorum est benevolentia Dei, qui nos elegit ante mundi constitutionem, cum ex illa procedat vocatio, iustificatio, merita bona, & ipsa glorificatio: ideo concludit, *Domine, ut scuto bonæ voluntatis tuæ coronasti nos*, id est, confiteor tibi Domine, omnia nostra bona inde manare, quia beneplacitum tuum, siue gratia tua nos complexa est, & undique protexit, ut scutum protegere solet milites. Cui simile est illud, *Qui coronat te in misericordia, & in miserationibus*. Verbum Hebræum ambiguum est, quo ad pronomen: nam verti potest *coronasti eum*, id est, iustum, cui benedixisti, & sic vertit S. Hieronymus. Potest etiam recte verti, mutatis punctis, *coronasti nos*, ut vertunt Septuaginta, sed sententia est omnino eadem.

## P S A L M V S VI.

Titulus, & Argumentum.

In finem in hymnis pro octaua,  
Psalmus David.

**Q**UOD dicitur, pro octaua, vel, ut habetur in Hebræo, super octauam, videtur esse genus citharæ habentis octo chordas, vel aliquid simile: nam in priore libro Paralip. 15. ubi describuntur varia instrumenta, quibus canendi erant Psalmi, inter alia ponitur cithara super octauam. Non est



tamen repudiandum, quod communiter dicitur, per octauam, hoc loco significare diem ultimi iudicii, quæ erit octaua, quia sequetur post sex dies laboriosos huius vite, & post septimam quietis animarum. Hic enim Psalmus est primus illorum septem, qui ad pœnitentiam pertinent. Neque verisimile est, quod Rabini, & eorum sectatores dicunt, hunc Psalmum compositum fuisse à Dauide pro sanitate corporis recuperanda, quam videlicet amiserat ob adulterium, & homicidium perpetratum. Scriptura enim satis declarat in 2. lib. Regum, quam pœnam exegerit Deus à Dauide propter illius peccati reatum: neq; vsquam meminit morbi corporalis. Sed neque Ecclesia ab antiquissimis temporibus inter pœnitentiales hunc Psalmum, & primo etiam loco numerasset, nisi proprie, & ad literam ad pœnitentiam pertineret. Itaq; argumentum huius Psalmi erit oratio peccatoris timētis diuinum iudicium, & ad reconciliationem suspirantis.

## EXPLICATIO PSAL. VI.

I.

**D**omine ne in furore tuo arguas me, neque in ira tua corripas me.

Petitio est hæc vere pœnitentis, & contriti, qui super omnia peccatum odit. Nam tunc Deus arguit, id est, accusat, & corripit peccatorem in ira, & in furore, quando non castigat, vt saluet ex amore paterno, sed castigat, vt perdat, ac iustitiæ satisfiat. Quod facit in hac vita, quando percutit cœcitate, & obstinatione, vt sit peccatum pœna peccati: in alia vero quando perdit in gehennam. Iste igitur concussus horrore, & timens abyssum iudiciorum Dei, non recusat flagellum pœnarum, quæ non separant à Deo, sed compellunt ad Deum, sed horrendum, id est, tradi in desideria cordis sui, in passionem ignominie, obdurati, & tandem in æternum separari à facie Dei. Porro ira, & furor pro eodem hoc loco accipiuntur, sicut etiam argui, & corripui: est enim (vt alias adnotauimus) familiare Prophetis id ipsum bis recipere, explicandi, vel inculcandi gratia.

Miserere mei Domine, quoniam infirmus sum: sana me Domine, quoniam conturbata sunt ossa mea.

II.

Ad permouendum Deum, vt non in furore arguat, adducit pœnitens Dauid aliquot argumenta, ac primum sumit ab infirmitate sua, quasi dicat, non respicias Domine peccata, vt offensas tuas, sed vt miseria, & ægritudines meas, proinde non punias, vt Iudex, sed cures vt Medicus, vire, & seca, si opus est, sed ex misericordia ad sanandum, non ex iustitia ad perendum. Vere enim peccata miserie sunt, & quo sunt magis ex malitia commissa, eo sunt maiores miserie, & quo minus nos ea cognoscimus, & timemus, eo miserieiores sumus. Ergo, inquit, miserere mei, quoniam infirmus sum, id est, respice misericorditer peccata mea, quæcunque illa sint, vt ægritudines, & morbos animæ meæ, quæ me debilem, & imbecillum reddiderunt, sana me Domine, quoniam conturbata sunt ossa mea. Idem repetit aliis verbis. Deus enim si misereatur, miseriam tollit, & proinde sanat, atque ita idem est, miserere mei, & sana me. Idem quoque est, quoniam infirmus sum, & quoniam conturbata sunt ossa mea. Per ossa enim significatur robur, ac fortitudo, & tunc dicuntur ossa conturbata, quando fortitudo nutat, & robur frangitur, ac debilitatur. Poterant autem verba Græca, & Hebraica sic etiam reddi, Tremuerunt, siue, tremefacta sunt ossa mea.

Et anima mea turbata est valde, sed tu Domine vsquequo.

III.

Alterum argumentum ducit à cognitione proprii peccati, sicut in Psalmo 51. Quoniam iniquitatem meam ego cognosco. Dicit igitur, non solum miser sum, sed etiam miseriam meam agnosco, ac propterea anima mea se ipsam tam deformem, ac miseriam aspiciens, & horrens turbata est valde, & conterrita salubriter impatiens efficitur, & clamat, & tu Domine vsquequo non misereris, non sanas? Habet vero magnam emphasim, illud, vsquequo, sine alio verbo. Significat enim prolatum esse ab anima



nima turbata, & non valente integram formare sententiam.

IV. *Conuertere Domine, & eripe animam meam: saluum me fac propter misericordiam tuam.*

Hoc est argumentum tertium, quod à misericordia Dei sumitur. *Conuertere*, inquit, id est, respice me: nam respectu Dei est causa omnium bonorum nostrorum. *Conuertere faciem tuam, & salui erimus.* Et alibi. *Aueristi faciem tuam, & factus sum conturbatus:* Respexit Dominus Petrum, & fleuit amare: Et Iacobus ideo vocat Deum *patrem luminum*, quia sicut sol aspectu suo illuminat, calefacit, viuificat corpora, & Deus respiciens oculo pietatis illuminat, calefacit, viuificat corpora, sic Deus respiciens oculo pietatis illuminat, accendit, viuificat animas: *& eripe animam meam*, id est, edue de fouea, in quem cecidit, erue de laqueo venantium, quo capta, & irretita tenetur, eripe de manibus inimicorum, quibus, tradita est propter peccatum. *Saluum me fac*, id est, libera ab imminente damnatione ad infernum: nam proprie saluare est liberare ab imminente mortis periculo. Norandum est autem ordo. Primo Deus conuertitur ad nos, ac nos respicit gratia sua. Secundo nos conuertimur ad illum, & sic anima eruitur à culpa. Tercio liberati à culpa saluamur à periculo imminens damnationis. Hoc autem totum, quod fit in actu iustificationis, non fit per vlla nostra merita precedentia (quid enim meretur impius nisi penā?) sed per misericordiam Dei, ideo addit, *propter misericordiam tuam*: quasi dicat, Audeo petere tam ingens donum, non quia dignus sum, sed quia tu misericors es.

V. *Quoniam non est in morte qui memor sit tui: in inferno autem quis confitebitur tibi.*

Est hoc argumentum quartum à gloria Dei desumptum. Peto, inquit, non argui in furore, quia si ita fieret, ad mortem æternam sine dubitatione damnarer: & sic periret ex parte memoria tua, & laus tua. Damnati siquidem ad gehennam non recordantur Dei,

vt eum laudent, neque, vllus est in inferno, qui confiteatur Domino, id est, laudet Dominum confitendo eius beneficia, & mirabilia. Qui hunc locum intelligunt de morte corporali, & per infernum intelligunt sepulchrum, & sensum esse volunt, quod mortui in sepulchris iacentes Deum non laudant, neque eius memores sunt, cum nihil sentiant; allegant verba Ezechiae apud Isaiam cap. 38. *Quia non infernus confitebitur tibi, neque mors laudabit te*, & satis constat, Ezechiam petiuisse liberari à periculo mortis corporalis. Sed profecto locus etiam Ezechiae debet intelligi de morte æterna ac de inferno damnatorum. Nam tametsi Ezechias timebat mori corporaliter: timebat etiam mori in æternum, & cantauit canticum illud gratias agens Deo, quia intellexit ex dono corporalis sanitatis, tanquam ex signo diuinæ beneuolentiæ sibi remissa fuisse peccata, & liberatum se esse à periculo gehennæ, vnde ait: *Tu autem eruisti animam meam, vt non periret, proiecisti post tergum tuum omnia peccata mea, quia non infernus confitebitur tibi, neque mors laudabit te, non expectabunt, qui descendunt in lacum, veritatem tuam.* Et sane si de morte sola corporali hæc intelligerentur, valde exilia essent argumenta. Nam etsi mortui corporaliter, & in sepulchro iacentes non laudant Deum, tamen animæ eorum viuunt, & Deum laudant, & ipsæ etiā corpora in sepulchro expectant veritatem Dei, id est, fidelitatem Dei de promissa resurrectione. Soli illi sunt qui descendunt in lacum æternæ damnationis, qui non expectant veritatem Dei, neque Dei recordantur in bonum neque laudant aut vquam laudabunt: atque ita hunc locum Ezechiae intelligit S. Hieronymus in commentario Isaia, & alij Patres.

VI. *Laboravi in gemitu meo, lauabo per singulas noctes lectum meum, lacrymis meis stratum meum rigabo.*

Quintum argumentum ducit Propheta à fructibus dignis poenitentiae. Nam, vt Apostolus dicit, *Si nos ipsos diiudicauimus, non utique iudicauerimur*, id est, si nos ipsos dam-

nare-



naremur, & puniremur, non damnaremur, nec puniremur à Domino. Parcit enim Deus iis, qui sibi non parcent. Dicit igitur se non solum intelligere, & detestari peccatum suum, sed etiam pro viribus punire, & puniaturum. *Laboravi*, inquit, *in gemitu meo*, id est, tam ingenti fletu peccata mea deploraui, ut fatigatus sim, nec tamen adhuc cesso. Nam *lauabo per singulas noctes lectum meum*, id est, singulis noctibus vice somni, & quietis, vbertim peccata deflebo, & lacrymis stratum rigabo. Notanda est hoc loco abundantia, & diuturnitas lacrymarum. Nam pro verbo, *lauabo*, in Hebræo est, *asche*, natate faciam, ut etiam vertit S. Hieronymus: & ipsum etiam Latinum, *lauabo*, non significat effusionem paucarum guttarum, sed tantam copiam, ut iis lectus lauari posset. Vox etiam, *rigabo*, insinuat ingentem copiam lacrymarum decurrentium instar iuuuli. Illud autem, *per singulas noctes*, in Hebræo ambiguum est. Nam significare potest, per totam noctem, & sic vertit S. Hieronymus: potest etiam significare, in omni nocte, & sic acceperunt Septuaginta: utrunque mirabile est, & fortasse utrunque verum simul, id est, quod longo tempore singulis totis noctibus lacrymas copiosissimas fuderit. In quo speculo intueri se deberent, qui plurima, & grauissima peccata committunt; & vix paucas lacrymarum guttas emittere valent, cum remissionem à Deo quærunt.

VII. *Turbatus est à furore oculus meus: inueteraui inter omnes inimicos meos.*

Pertinent hæc ad effectum indicandum maximæ illius profusionis lacrymarum. Nam in Hebræo pro *turbatus est*, habetur caligauit, seu corrosus est oculus meus, ut sensus sit, oculus meus propter furorem, & indignationem meam contra turpitudinem peccati, à fletu nimio quasi corrosus caligauit, & turbatus est. Quod autem sequitur, *inueteraui*, in Hebræo refertur ad oculum, & est tertiæ personæ, inueteraui: tamen quia non solum Septuaginta, sed etiam S. Hieronymus, vertit in prima persona,

inueteraui, siue consumptus sum, credibile est lectionem Hebraicam nonnihil ab eo tempore immutatam, ut in voce, *atecha*, desit vnum Iod in fine, & loco תקת, debet esse תקתה, & legendum sit *atachti*, quæ mutatio facillime accidere potuit. Sensus igitur est, *Turbatus est à furore oculus meus, inueteraui inter omnes inimicos meos*, id est, quia inueteraui inter omnes inimicos meos: & clarius, oculus meus caligauit præ fletu ex indignatione, quam concepi, ex eo quod tam diu in peccatis hæserim, ut inueterauerim inter omnes inimicos meos: quasi dicat, Non possum non vehementer mihi ipse indignari, quod nullum vitium adhuc perfecte vicerim, nullumque hostem animæ meæ debellauerim, sed consenuerim inter omnes hostes meos. Vocat autem hostes, omnes qui eum ad peccandum impulerunt, siue Dæmones, siue homines, siue ipsa vitia, & habitus malos.

*Discedite à me omnes, qui operamini iniquitatem: quoniam exaudivit Dominus vocem fletus mei.*

VIII.

Quia tam graviter ferebat se consensuisse inter hostes; ideo prorumpit in hanc vocem, *Discedite à me*, id est, nolo amplius consortium vestrum, non acquiescam tentationibus vestris, fretus diuino auxilio. *Quoniam exaudivit Dominus vocem fletus mei*, id est, quia Dominus misericordia motus ob lacrymas meas, non solum peccata dimisit, sed etiam virtutem auxit resistendi vobis.

*Exaudivit Dominus deprecationem meam, Dominus orationem meam suscepit.*

IX.

Explicat quod dixerat, se exaudivit, & idem repetit bis, terve, ad significandam certitudinem exauditionis; & ut ipse sibi hoc modo animum adderet ad resistendum tentationibus.

*Erubescant, & conturbentur omnes inimici mei: conuertantur, & erubescant valde velociter.*

X.

Concludit optans finem totalem bellorum spiritualium. *Erubescant, & conturbentur*,

tur,



tur, quia nihil profecerunt, sed in vanum laborauerunt; conuertantur in locum suum, vnde venerunt, & erubescant, id est, confusi discedant velocissime: quia nimirum nolo differre vitæ mutationem: sed ex hac hora, ex hoc momento aggredior viam Domini rectam, & perfectam. Potest etiam hæc conclusio esse oratio pro conuersione eorum hominum, qui vel persequendo, vel alliciendo causa peccandi illi fuerunt. Optat enim, & orat, ut illi erubescant, & conturbentur per veram cognitionem, & detestationem peccati: & sic ipsi quoque ad Deum velociter conuertantur. Potest denique esse imprecatio implenda in die Iudicii. Tunc enim vere omnes impij, siue demones, siue homines, qui iustos ad impatientiam, vel alia peccata inducere voluerunt, confundentur, & erubescant, & conuertentur ad agnitionem veritatis, sed inutiliter. Tunc enim dicent, Ergo errauimus a via veritatis, &c. Erant autem id celeriter valde, quia dies Domini non tardat, etiam si nobis nunc secus videatur. Sed cum venerit, & repentinus venerit, tunc sentietur, quam celeriter venerit. In Hebræo habetur, Erubescant, & conturbentur vehementer. Quæ vox, vehementer, non habetur hoc loco in nostris codicibus Græcis, & Latinis, sed fuisse in editione Septuaginta Interpretum, testatur S. Hieronymus in epist. ad Suniam, & Fretellam. Sed si quis recte consideret, illa particula non deest in nostris codicibus, sed posita est paulo inferius. Nam ubi nos habemus, conuertantur, & erubescant valde velociter, in Hebræo non habetur valde, sed solum velociter. Ex quo intelligimus, non esse sensum, erubescant valde velociter, sed, erubescant valde, & erubescant velociter. Et hoc modo Codices omnes concordantes erunt.

## P S A L M V S VII.

## Titulus, &amp; Argumentum Psalmi.

Psalmus Dauid, quem cecinit Domino pro verbis Chusi filij Iemini.

**I**N Hebræo non est Psalmus, sed, Sigaleon, quod proprie ignorantiam significat; tamen quia Septuaginta, & S. Hieronymus reddiderunt, Psalmus, dicendum erit, eam vocem esse ambiguam, & significare non solum ignorantiam, sed etiam genus aliquod canticæ. Quis item fuerit Chusi, non est adeo certum. S. Augustinus, & alij, qui non norunt linguam Hebraicam existimant esse Chusi Arachitem amicum Dauid, qui (ut legitur 2. Reg. 16) misit nuntium ad Dauidem, eique significauit consilium Achitophel. Sed ille Chusi scribitur per litteram Chet, iste de quo in hoc Psalmo, per litteram Caph, neque constat, an ille Chusi fuerit filius Iemini. Denique Dauid in hoc Psalmo refellit calumniam cuiusdam filij Iemini, ut patet ex illis verbis, Si feci istud, Chusi autem Arachites nullam calumniam dixit contra Dauid. S. Hieronymus existimat, titulum intelligendum esse de Saule, qui vocatur Chus, id est, Æthiops, ob nigredinem morum, & erat de Tribu Benjamin, seu (quod est idem) filius Iemini, ut patet ex lib. 1. Reg. c. 9. Saul enim lib. 1. Reg. cap. 22, dixit coram omnibus seruis suis, Non est qui vicem meam doleat eo quod suscitauerit filius meus seruum meum aduersus me insidiantem mihi vsque hodie. Hanc igitur calumniam refutat Dauid in hoc Psalmo iuxta opinionem sancti Hieronymi. Sed potest etiam æque probabiliter dici, Chus hoc loco esse Semei, qui erat etiam filius Iemini, & maledixit Dauid, cum fugeret persequutionem Absalonis, & ait, Egredere vir sanguinum, & vir Belial, reddidit tibi Dominus vniuersum sanguinem domus Saul, quoniam inuastisti Regnum pro eo. 2. Reg. 16. Ob hanc calumniam pessimam, & falsissimam videtur hunc Psalmum composuisse, orans Deum, ut defendat innocentiam, & iustitiam suam; & ideo vocatur Psalmus. Ignorantia Dauid, quia vere ignorabat, se mala illa fecisse de quibus accusabatur à Saule, siue à Semei. Ideo etiam dicit in principio Psalmi. Domine Deus si feci istud, si est iniquitas in manibus meis, &c. Videtur igitur Psalmus scriptus esse tempore persecutionis Absalon, ob verba maledictionis Semei, vel tempore persecutionis Saul, ob ver-



ob verba supradicta. Prophetice autem David gerit personam Christi, & cuiuscunque iusti calumniam sustinentis.

## EXPLICAT. PSAL. VII.

I. **D**omine Deus meus in te speravi: saluum me fac ex omnibus persequentibus me, & libera me.

In te, inquit, speravi, quia penè omnes deseruerunt me; ita ut etiam filius meus Absalon, vel focer meus Saul querant me occidere: non habeo, cui fidam, nisi te Deum meum. *Saluum me fac ex omnibus persequentibus me.* Multi enim cum persequerentur, alij consilio, alij maledictione, alij bello, & armis.

II. *Ne quando rapiat ut leo animam meam, dum non est qui redimat, neque qui saluum faciat.*

Respicit ad Principem persecutionis, ne forte, inquit, Saul, aut Absalon rapiat animam meam, id est, vitam meam, ut leo solet absque vlla misericordia interficere animalia cetera: *dum non est qui redimat, neque qui saluum faciat*, id est, dum tu non redimis, neque saluas. Sciebat enim David omnem industriam humanam sine Deo esse vanam. Vtitur Scriptura voce redemptionis pro quacunque liberatione, etiam si non fiat proprie per solutionem pretij. Sicut enim dicitur Deus vendere, quos alienat quodammodo à sua misericordia, & tradit ministris sue iustitiæ puniendos: ita dicitur Deus redimere, quos iterum à ministris iustitiæ erutos misericorditer liberat. In Hebræo habetur paulò aliter, videlicet: Ne forte rapiat ut leo animam meam, lacerans, & non sit saluus: sed in sententia non est varietas.

III. *Domine Deus si feci istud, si est iniquitas in manibus meis.*

IV. *Si reddidi retribuētibus mihi mala, decidam meritò ab inimicis meis inanis.*

Reddit causam, cur petierit liberari à Deo, quia videlicet Deus nouit innocen-

tiam eius, & sic refellit calumniam Saulis, & Semei de insidiis in Saulem, & de inuasionem Regni: nec solum dicit se non reddidisse malum pro bono, neque malum pro malo, sed reddidisse bonum pro malo. Primò igitur dicit se non reddidisse malum pro bono, *Si feci*, inquit, *istud*, id est, si insidiatus sum Regi, vel si inuasi Regnum fraude aliqua, aut vi. *Si est iniquitas in manibus meis*, id est, si operatus sum iniquitatem reddens malum pro bono, id est, cum receperim à Saule honorem magnum, ut essem gener eius, & Tribunus super mille viros, si reddidi pro his beneficiis malum insidiarum, ut ipse dicit. Addit, se non reddidisse malum pro malo. *Si reddidi retribuētibus mihi mala*, id est, cum Saul, siue Semei retribuerint mihi multa mala pro beneficiis à me acceptis, ita ut me occidere voluerint, si reddidi eis vicem procurando eorum mortem, & non potius abstinerim semper à nece ipsorum, cum facile & impune insecraream possem: *decidam meritò ab inimicis meis inanis*, id est, si non sunt falsæ eorum, calumniæ, non recuso cadere in prælio penitus inanis, id est, sine vlla gloria militari, nullo damno hostibus illato, & maximo accepto. In Hebræo legitur hoc modo: *Si reddidi retribuētibus mihi malum, & dimisi hostes meos vacuos*: sed vox *dimisi*, potest significare etiam recedam, seu discedam, & tunc efficitur sententia, quam reddiderunt Septuaginta. Idem enim est recedam ab inimicis inanis. Si autem legamus cum S. Hieronymo, *Et dimisi hostes meos vacuos*, tunc sensus erit, se reddidisse bona pro malis, ac si dicat, Si dimisi hostes meos non affectos à me aliquo insigni beneficio, eueniat mihi hoc, aut illud malum.

V. *Persequatur inimicus animam meam, & comprehendat, & conculcet in terram vitam meam & gloriam meam in puluerem deducat.*

Hæc sunt mala, quæ sibi ipse imprecat, si sunt veræ calumniæ Saulis, aut Semei, Semper autem fecit oratio *Primò*, inquit, *persequatur inimicus animam meam*, id est,



id est, conetur me occidere. Secundò, *comprehendat*, id est, non possim effugere manus eius, quin capiat me ad interficiendum. Tertiò, *Conculcet in terra vitam meam*, ignominiose destruat vitam meam, quomodo destruantur, quæ pedibus minutatim atteruntur. Denique, *gloriam meam in pulverem deducat*, id est, post mortem detrahatur gloria mea de loco sublimi, in quo nunc est, vsq; ad pulverem, ita ut memoria mea cum infamia, & opprobrio viuat inter homines. Quintò additur in Hebræo, *Selâ*, id est, semper infamis maneam.

VI.

*Exurge Domine in ira tua, & exaltare in finibus inimicorum tuorum.*

Demonstrata innocentia sua petit à Deo iustam defensionem. Et quia Deus per metaphoram dicitur dormire, cum non adiuuat: surgere à somno, quando incipit adiuuare, iuxta illud. *Exurge, quare obdormis Domine?* Ideo nunc dicit: *Surge in ira tua*, id est, irascere inimicis meis, eosque repelle, ac terre, ne mihi noceant. Illud autem, *Et exaltare in finibus inimicorum tuorum*, idem ferè significat: est enim sensus, Appare sublimis in finibus inimicorum, ut omnes te videant, id est, ut omnes præsentiam tuam sentiant. Pagum autem refert, quod in Hebræo habetur, *inimicorum meorum*, in Græco, & Latino, *inimicorum tuorum*. Iidem enim inimici erant Davidis, & Dei.

VII.

*Et exurge Domine Deus meus in præcepto, quod mandasti: & synagoga populorum circumdabit te.*

Petierat simpliciter auxilium Dei contra inimicos: nunc addit rationem cur deceat Deum hoc facere. Et ratio est, quia Deus præcepit Iudicibus terræ, ut liberent innocentes de manibus opprimentium. Ex quo sequitur, ut ipsum quoq; id facere deceat, qui est Iudex supremus super omnes Iudices. *Exurge, inquit, in præcepto, quod mandasti*, id est, iuxta præceptum quod mandasti. In Hebræo habetur, *Iudicio quod mandasti*, & idem est sensus, nimirum, iuxta lu-

dicium, quod fieri præcepisti. Potrò in Hebræo habetur: *Exurge ad me*, pro eo quod nos habemus: *Exurge Domine Deus meus*. Sed facilè apparet unde nata sit diversitas interpretationis. Nam vox Hebræa potest legi, *Eli*, ac sic legerunt Septuaginta, & rectè verterunt, *Deus meus*: potest etiam legi, *Elai*, & sic legerunt, qui addiderunt puncta, & S. Hieronymus, & ideo reddidit S. Hieronymus, *ad me*, & sic reddunt omnes, qui recipiunt puncta. Sed, ut sæpe dixi, in eiusmodi varietatibus, magna debet esse auctoritas Septuaginta virorum. *Et synagoga populorum circumdabit te*, id est, ex hac demonstratione præsentiae tuæ in cõhibendis inimicis meis, & in defensione mea, fiet, ut multi alij agnoscant te, & confiteantur tibi, teq; laudent, & sic circumdabunt te, quia ubi sunt aliqui congregati in nomine tuo, ibi tu es in medio eorum.

*Et propter hanc in altum regredere: VIII. Dominus iudicat populos.*

Quia dixerat, Synagoga populorum circumdabit te: ideo nunc adiungit, *Et propter hanc in altum regredere*, id est, sicut propter me exaltatus es in finibus inimicorum meorum terrens eos ex iustitiæ tuæ folio: ita propter synagogam populorum laudantium te, quandoeunque opus erit, in altum solum iustitiæ iterum ascende, & appare conspicuus in finibus inimicorum eius. Quod sequitur, *Dominus iudicat populos*, in Hebræo coniungitur cum versiculo sequenti, & verè cum illo optimè cohæret: sed optimè etiam cohæret cum versiculo præsentis, ut distinxerunt Septuaginta Interpretes. Est enim redditio rationis, quasi dicat Propheta, Domine pro synagoga populorum tibi adherentium ascende in solum iudicii aduersus hostes eorum, quia Dominus iudicat populos, id est, quia Domini supremi, qualis tu es, proprium est iudicare populos. Neque refert si legamus, iudicat, cum Græcis, vel iudicabit, cum Hebræis, quia idem est sensus, nimirum, ad Dominum pertinet iudicare populos.



IX. *Iudica me Domine secundum iustitiam meam, & secundum innocentiam meam super me.*

Hæc est conclusio totius superioris pre-  
cationis. Quia enim conscius sibi erat, fal-  
sam esse calumniam Saulis, siue Semei, &  
conscientiæ suæ testem habebat Deum; ro-  
gat ipsum Deum supremum iudicem, vt  
iudicet causam suam iuxta iustitiam suam,  
& innocentiam, quæ est super se: & det vni-  
cuique prout meretur.

X. *Consummetur nequitia peccatorum, & diriges iustum: scrutans corda, & renes Deus.*

Hæc est quasi pars altera Psalmi, in qua  
docet Propheta eos, qui male agunt, aduer-  
sus seipsos agere, ac per hoc hortatur om-  
nes, vt conuertantur ab iniquitate ad iusti-  
tiam. Ait igitur, *consummetur nequitia pec-  
catorum*, id est, perficiatur, & ad summum  
perueniat nequitia peccatorum, tamen ius-  
to non nocebit; non enim eum inflectet  
ad dexteram, vel ad sinistram: quia tu *diri-  
ges iustum*, id est, per tuam prouidentiam  
aderis iusto, ne declinet ad dexteram, vel  
ad sinistram. Tu, inquam, hoc facies qui  
solus nosti, qui sint vere iusti, cum scruteris  
corda, id est cogitationes, & renes, id est,  
desideria. In Hebræo habetur verbum futu-  
ri temporis, *ignar*, id est, consummetur, siue  
consummabitur: sed Septuaginta Interpre-  
tes legerunt sine litera, *iod*, quæ minutissi-  
ma est, & potest postea esse addita: sensus  
tamen in idem cecidit. Si enim legas, *Con-  
summetur nequitia*, sensus erit, nequitia  
peccatorum crescet vsque ad summum, &  
tota consummetur in vexatione iustorum,  
& tamen eos non deiciet, neque inflectet:  
quia Deus eos dirigit, & stabiliet: vtrumq;  
enim significat vox Hebræa, *Theconem*.

כונם  
XI.

*Iustum adiutorium meum à Domino, qui saluos facit rectos corde.*

Ex vniuersali sententia colligit in parti-  
culari, se meritò sperare adiutorium Do-  
mini *iustum*, inquit, *adiutorium meum à  
Domino* veniet, quia iustum est, vt Deus ius-

tos adiuuet; quoniam eius proprium est,  
saluos facere rectos corde, id est, eos qui  
verè sunt iusti coram Deo, qui scrutatur  
corda. In Hebræo coniungitur prima vox  
huius versiculi, cum versu superiore, *scru-  
tans corda, & renes Deus iustus*, & deinde  
incipit nouus versus, *Adiutorium meum à  
Domino*. Res non est magni momenti, & in  
rebus dubiis preferenda videtur auctoritas  
Septuaginta virorum, & Vulgatæ nostræ e-  
ditionis.

*Deus iudex iustus, fortis, & patiens: nunquid irascitur per singulos dies?* XII.

In hoc versiculo videntur dissidere co-  
dices Hebræi, Græci, & Latini. Nam ex  
Hebræo veritè S. Hieronymus, Deus iudex  
iustus, & fortis comminans tota die. Ex  
Græco reddit S. Augustinus, Deus iudex  
iustus, & fortis, & patiens, non iram addu-  
cens tota die. Videntur autem plane con-  
traria, comminans, siue irascens (vtrumque  
enim significat vox Hebræa) tota die, &  
non iram adducens per singulos dies, id est,  
non irascens omni die. Codex autem La-  
tinus per interrogationem habet, *nunquid  
irascitur per singulos dies?* sed facilis est con-  
cordia. Nam vox Hebræa si legatur *El*, vt  
legit S. Hieronymus, & vt nunc legitur se-  
cundum puncta Rabinorum, significat for-  
tem: si autem legatur *Al*, vt potest legi cum  
aliis punctis, & vt legerunt Septuaginta  
Interpretes, significat, non. Et hanc lectio-  
nem veriorè existimamus, & sic concor-  
dat Græcus codex cum Hebræo; vterque  
enim habet, non irascitur, siue non com-  
minatur. Illud autem *fortis*, quod est in  
Græco, non est interpretatio vocis Hebrai-  
cæ *El*, sed est nomen superadditum à Se-  
ptuaginta explicandi gratia, sicut etiam pa-  
tiens. Nam in Hebræo ad verbum habe-  
tur, *Deus iudex iustus*, non comminans siue  
non irascens omni die, siue tota die. Lati-  
nus autem Interpres securus Græcam le-  
ctionem reddidit sensum, non verba, cum  
per interrogationem posuit nunquid ira-  
scitur per singulos dies? idem enim est, non  
irascitur, & nunquid irascitur? Sententia  
igitur



igitur huius versiculi est, Deum Iudicem iustum, qui simul est fortis & patiens, non semper comminari, vel irasci: sed aliquando re ipsa effundere iram suam grauissimè puniendo, id quod dicitur aduersus eos, qui videntes Deum sæpe minari multa mala peccatoribus, & tamen differre executionem, contemnunt minas Dei. Hunc autem sensum esse huius versiculi colligitur ex sequenti.

XIII. *Nisi conuersi fueritis, gladium suum vibrabit: arcum suum tetendit, & parauit illum.*

Probat Propheta, Deum non semper irasci, vel minari, sed aliquando effundere iram, & inferre mala, quæ comminabatur. *Nisi conuersi*, inquit, *fueritis, gladium suum vibrabit* (sic enim legendum est, non vibrabit) id est, gladium agitabit cadendo, atque ita splendere eum faciet. Nec solum gladio percutiet, sed etiam arcu: iam enim arcum tetendit, & parauit. Vitur autem similitudine gladij, & sagittarum, vt significet Deum ferire tam prope, quam longe. Quando causa mali nobis illati proxima est, & manifesta, tunc Deus gladio ferit cominus. Quando causa mali remota, & occulta est, tunc videtur Deus eminus iaculari sagittas suas.

XIV. *Et in eo parauit vasa mortis, sagittas suas ardentibus effecit.*

Ne putaremus, sagittas Dei facile posse repelli, aut vitari, addit Propheta, eas sagittas esse *vasa mortis*, id est, instrumenta mortifera, & sagittas effectas siue fabricatas ardentibus, id est, ex ardenti materia, vt sint tela ignita, quæ velocissime, & summa vi penetrant omnia. Porro nomen vasis passim accipitur in Scripturis pro instrumento, vt Psal. 70. *In vasis Psalms*. Isaie 22. *Vasa musicorum*. Hierem. 50. *Vasa ira*, & cap. 51. *Vasa belli*.

XV. *Ecce parturit iniustitiam, concepit dolorem, & peperit iniquitatem.*

Tribus sequentibus versiculis ostendit Propheta sagittas Dei, vt verè ignitas velocissime, & summa vi ferri, vt vitari non pos-

sint. Nam illa ipsa actione, Dei prouidentia sic disponente, qua peccatores nocere parant iustis, se ipsi occidunt. Hæc enim est mira Dei animaduersio in peccatores, cum facit, vt omnes eorum machinationes in ipsos conuertantur. *Ecce*, inquit, *peccator concepit dolorem, & peperit iniquitatem*, & foueam aperuit, ac profunde fodit, vt iustum, vel aperte, vel clam opprimeret; sed Deo sic operante, cecidit ipse peccator in suam foueam, & dolor, quem conceperat, & iniquitas, quam pepererat, in caput eius reciderunt. Sed singula explicemus. *Ecce parturit iniustitiam*, peccator videlicet, iniustum aliquod opus aduersus iustum effecit. Potro hoc loco *parturit*, non est aliquid diuersum à voce *peperit*, sed omnino idem; explicat enim statim clarius, quo semine parturietur, siue pepererit. *Concepit*, inquit, *dolorem, & peperit iniquitatem*. Concepit enim semen, & paritur fetus. Conceptio doloris, est conceptio inuidiæ, siue odij in proximum, quæ sunt semina malorum, & rectè conceptio inuidiæ, vel odij, dicitur conceptio doloris; quia inuidia, & odium torquent, & disrumpunt animum inuidientis, & odio habentis. Ex hoc malo semine concepto paritur opus iniquum, vt cædes, rapina, detractio, falsum testimonium, & similia. Quamuis autem videantur nonnullis tria distincta, *parturit iniustitiam, concepit dolorem, peperit iniquitatem*, & verè parturitio sit quid medium inter conceptum, & partum: tamen dixi non esse hoc loco, nisi duo; tum quia duo sola respondent paulo infra, cum dicitur, *conuertatur dolor eius in caput eius, & in verticem ipsius iniquitas eius descendet*; tum quia si, *parturit*, hoc loco poneretur pro parturitione distincta à partu, poneretur post verbum, *concepit*, non ante illud. Igitur *parturit iniustitiam*, dictum est in summa, & breuiter; deinde explicatum est per illa, *concepit dolorem, & peperit iniquitatem*.

*Lacum aperuit, & effodit eum, & incidit in foueam quam fecit.* XVI.

Dixerat peccatorem peperisse iniquita-



tem contra iustum; addit aperuisse etiam lacum, siue cisternam, ut est in Hebræo. Significat autem his similitudinibus, peccatorem aliquando apertè, aliquando occultè moliri malum iustis: & quia tam parvus, quam folio sunt opera valde laboriosa, significatur, opera mala, non sine dolore, & labore fieri. Hinc illa vox perditorum, Sap. 5 *Ambulaui in uias difficiles. Et incidit in foueam, quam fecit.* Incipit iam Propheta ostendere mala illa hominum peccatorum ipsis peccatoribus solum nocere, & hunc esse gladium, siue sagittas Dei; & incipit ab ultimo malo, quia in illo desierat. Aperuit, inquit, lacum, seu cisternam, ut iustus nesciens ibi esse foueam, in eam caderet; sed ipse prior in eam incidit, qui eam foderat.

XVII.

*Conuertetur dolor eius in caput eius, & in verticem ipsius iniquitas eius descendet.*

Non solum mala occulta, ut apertio foueæ, sed etiam manifesta, ut odium, siue inuidia concepta, quæ multis signis prodit exterius: & ipsa mala ex odio, & inuidia profecta, ut cades, & rapinæ, similia in auctorem, Deo sic disponente, recident. Exemplo sunt Saul, & David; Christus, & Iudæi; Martyres, & persecutores.

XVIII.

*Confitebor Domino secundum iustitiam eius, & psallam nomini Domini altissimi.*

Concludit Psalmum cum laude Dei: *Confitebor Domino*, id est, laudabo Dominum, sic enim passim accipitur in Scripturis confessio pro laude, quia uidelicet, qui laudat, confitetur eum, quem laudat, dignum esse laudem; *secundum iustitiam eius*, id est, laudabo, prout meretur eius iustitia, quæ tam admirandis modis liberat iustos, punit iniustos. *Et psallam nomini Domini altissimi*, idem significatur aliis verbis; Hymnum dicam Domino altissimo, id est, supremo Iudici, qui sedet in altissimo solio super omnes alios iudices.

## PSALMVS VIII.

*Titulus, & Argumentum.*

*In finem pro torcularibus. Psalmus David.*

**V**ox, torcularibus, in Hebræo est, Haggith, que nihil significare videtur, & ideo moderni, qui ita legunt, dicunt esse genus instrumenti musici nobis incogniti. At Septuaginta, & S. Hieronymus, qui reddiderunt, torcularibus, legerunt sine dubio, Haggith, quod significat torcularia, & hanc esse veram lectionem, dubitare non possumus. Quid autem sit, pro torcularibus, difficile est diuinare, qui enim intelligunt Ecclesiam, vel martyria, vel Crucem Christi, mysticè exponunt. Animaduerti titulum, pro torcularibus, haberi in tribus Psalmis, qui ad amorem Dei precipuè pertinent, uidelicet in hoc octauo, qui exorditur à magno affectu: Domine Dominus noster, quam admirabile est nomen tuum in uniuersa terra? In octogesimo, qui similiter hortatur ad iubilum spirituale: Exultate Deo adiutori nostro, iubilate Deo Iacob: sumite Psalmum, & date tympanum, psalterium iucundum cum cithara. Denique in octogesimo tertio, qui plenus est affectu ardentissimi amoris diuini: Quam dilecta tabernacula tua Domine, concupiscit, & deficit anima mea: Cor meum, & caro mea exultauerunt in Deum uiuum. Itaque ex materia horum Psalmorum suspicor dici, pro torcularibus, quia sunt aptissimi ad exprimendum vinum diuini amoris ex cordibus hominum, vel quia cum letitia, & cordis iubilo canendi sunt, quomodo latari & canere solent, tempore vindemie, qui de torcularibus ingentem vini copiam exprimunt. Facior tamen me nondum assequi tituli huius, ut etiam aliorum multorum intelligentiam: est igitur argumentum huius Psalmi, laudatio potentie & benignitatis Dei, ac precipuè erga genus humanum.

הגית

הגית

\*\*

EX-



## EXPLICAT. PSALM. VIII.

**I.** **D**omine Dominus noster, quam admirabile est nomen tuum in vniuersa terra!

Ex consideratione magnitudinis Dei, rapitur Propheta in admirationem, quod tantus Deus tanti faciat hominem, qui est pulvis, & cinis, ut eum visitare, & ornare plurimis, & maximis beneficiis dignatus sit. Illud *Domine*, in Hebræo est nomen proprium Dei, quod scribitur quatuor literis, & deducitur ab *esse*, iuxta illud: *Ego sum qui sum*: quod nomen moderni exprimunt per vocem, *leousa*, sed Septuaginta Interpretes, & S. Hieronymus imo Christus ipse, & Apostoli pronuntiare non solebant, sed loco eius dicebant, *Domine*. Illud autem, *Dominus noster*, est in Hebræo alia vox, *Adonai*, quæ propriè *Dominum* significat. Itaque sensus est, *Deus qui es ipse fons essendi*, unde omnia quæ sunt, deriuantur, ac proinde *Dominus noster*, id est, Dominus rerum omnium es, *quam admirabile est nomen tuum in vniuersa terra?* id est, gloria tua, siue bona fama nominis tui, diffusa est per omnem terram, cum ingenti admiratione omnium, qui illam considerare satagunt. Quod Isaias cap. 6. aliis verbis dicit, *Plena est omnis terra gloria eius*. Dicit autem nomen Dei esse *admirabile*, quia tametsi pauci re ipsa mirentur, cum pauci sint, qui considerent opera Dei; tamen ipsum Dei nomen est admiratione dignissimum, cum omnes creatura assidue laudent creatorem, ut omnia pulchra opera laudare dicuntur artificem. Et hoc modo plena est omnis terra gloria Dei; quia quicquid est in terra, etiam si minimum quid videatur, potentiam, & sapientiam creatoris infinitam manifestat.

**II.** *Quoniam eleuata est magnificentia tua super cælos.*

Ratio redditur, cur sit tam admirabile nomen Domini in vniuersa terra: quia videlicet magnificentia Dei est altior cælo, id est, non capitur cælo; tanta est, ut totus mundus eam capere non possit. Operuit

cælos gloria eius, & laudis eius plena est terra, inquit Abachuc in cantico suo. Porro magnificentia virtus est magnorum Principum, qui magnis sumptibus, vel ingentia palatia, aut ciuitates ædificant, vel maximum numerum famulorum, aut etiam exercitus integros alunt, vel amplissima dona in alios conferunt. Deus autem ædificauit palatium huius totius mundi, cuius pauperculus est orbis terræ, & tectum est cælum. Alit autem omnia viuentia, quæ sunt innumerabilia: denique donauit Angelis sanctis, qui sunt in maximo numero, & donaturus est hominibus iustis Regnum amplissimum, non temporale, sed æternum. Verè igitur magnificentia eius maxima est.

*Ex ore infantium & lactentium perfecisti laudem propter inimicos tuos, ut destruas inimicum & vltorem.*

Respondet obiectioni quæ poterat fieri: si gloria Dei replet orbem terræ, & magnificentia eius eleuata est super cælos; unde fit, ut non omnes eam cognoscant, & laudent? Respondet inde fieri, quod Deus non dignetur cognosci, & laudari à superbis, qui de sua virtute præsumunt; sed ab humilibus & paruulis, iuxta illud Matth. 11. *Confi-teor tibi Pater, quia abscondisti hæc à sapientibus & prudentibus, & reuelasti ea paruulis*. Et hinc valde crescit gloria & magnificentia Dei, cum non cognoscatur, nisi à quibus ipse cognosci voluerit. Potest autem hic versiculus duobus modis intelligi. Primo, ut per infantes & lactentes, intelligentur homines, qui re vera comparatione Angelorum sunt veluti infantes: & lactentes, præsertim circa intelligentiam rerum diuinarum: ergo, inquit, ex ore mortalium hominum perfecisti laudem, reuelans eis gloriam tuam, propter inimicos tuos, id est, ad confusionem superborum Angelorum; ut destruas inimicum & vltorem, id est, ut perdas sapientiam primarij inimici tui, diaboli, & defensoris, siue vltoris eius, id est, agminis Angelorum reproborum, qui illum sequuntur. Secundo, per infantes & lactentes, possunt intelligi

hoc.



homines humiles, & paruuli in oculis suis, & imperiti scientiarum secularium, quales fuerunt multi Prophetae, & Apostoli, & ingens numerus Monachorum, & Virginum sanctarum, nec non verè Puerorum, qui in tenera ætate adeo perfectè cognouerunt gloriam Dei, & admirabile nomen eius, vt pro ipso mortem oppetere non dubitauerint. In hoc sensu allegauit Dominus hunc Psalmum in Euangelio: *Nunquam legistis, quia ex ore infantium, & lactentium perfecisti laudem?* Matth. 21. Inimici autem dicuntur Sapientes huius mundi, & defensores ipsorum, qui quamuis Deum cognouerint, tamen non sicut Deum glorificauerunt, ideo insipientes facti sunt, vt Apostolus docet ad Rom. 1. Quod dicitur, *vt quiescere facias*; sed sensus est idem. Nam non loquitur Psalmus de destructione personæ, sed sapientiæ, iuxta illud Isaïæ: *Perdam sapientiam sapientum*; & illud Apostoli 1. Cor. 1. *Stultam fecit Deus sapientiam huius mundi*.

IV.

*Quoniam videbo celos tuos, opera digitorum tuorum, lunam & stellas, quæ tu fundasti.*

Sanctus David ponit se in numero infantium, & lactentium laudantium Deum; quasi dicat, Certè ex ore infantium, & lactentium perfecisti laudem. Nam ego vnus ex illis, quippe qui pastor ouium eram, tuas laudes perficiam, *Quoniam videbo celos tuos*, id est, considerabo attentè admirabile illud opus manuum tuarum, & inde laudabo te tanti operis creatorem. Illud tuos, non est in Græco, tamen est in Hebræo, & inde in editionem nostram rectè translatus fuit: cur autem dixerit, *tuos*, declarat dicens, *opera digitorum tuorum*: nec dicit opera brachiorum, sed digitorum, tum vt ostendat summa facilitate celos à Deo fuisse conditos; tum quia digitis fiunt opera subtilia, & pretiosa, ad quæ faciendâ ingenium, non labor requiritur: non meminit Solis, sed Lunæ tantum, & stellarum, quia tempore nocturno contemplari solebat David; quoniam tempus illud ob quietem con-

templationi aptius est. *Media nocte*, inquit, *surgebam ad confitendum tibi*. Et alibi: *In matutinis meditabor in te*. Sicut etiam Isaïas: *Anima mea desiderauit te in nocte*. Nocturnum autem celum videtur Luna, & stellis ornatum; denique verbum, *fundasti*, significat celos, Lunam, & stellas ex nihilo creatas, quasi dicat Propheta, quæ tu à fundamento fecisti, cum antea nihil eorum extaret.

*Quid est homo, quod memores eius, aut filius hominis, quoniam visitas eum?*

V.

Ex magnitudine Dei iam declarata, accedit ad extollendam magnitudinem Dei erga homines. *Quid est*, inquit, *homo*, quod tu creator cæli, & terræ dignaris eius recordari? Quasi dicat, maximus est hoc beneficium, quod altissimus Deus dignetur meminisse hominis, qui est pulvis & cinis. Quia verò istud, recordari in Deo non est simplex memoria, sed est recordari ad benefaciendum; addit explicans, *aut filius hominis, quoniam visitas eum?* Homo, & filius hominis hoc loco idem significant, nisi forte ponatur hæc distinctio ad significandum beneficia Dei non esse collata in solum primum hominem, qui fuit homo, sed non filius hominis: sed etiam in omnes posteros, qui ita sunt homines, vt sint etiam filij hominum. Visitatio autem significat specialem prouidentiam, quam Deus habet erga homines, sed præcipuè illam, quam Deus ostendit, cum venit in hunc mundum, & assumpsit humanam naturam, & in terris visus est, & cum hominibus conuersatus est. Hæc est proprie visitatio, de qua Zacharias in Cantico Luc. 1. *Benedictus Dominus Deus Israel, quia visitauit, & fecit redemptionem plebi suæ*. Et infra, *Visitauit nos oriens ex alto*. Hæc sanè visitatio maxime meretur illam admirationem. *Quid est homo, &c.*

*Minuisti eum paulo minus ab Angelis, gloria & honore coronasti eum, & constituisti eum super opera manuum tuarum.*

VI.

Hæc



Hæc duplicem habent sensum, literalem & allegoricum. Secundum literalem sensum commemorantur tria beneficia Dei erga naturam humanam, primo quod homo sit conditus à Deo tam nobilis naturæ, vt non sit inferior Angelis, nisi modicum: deinde, quod sit ornatus gloria & honore præ omnibus aliis inferioribus creaturis, quia sit factus ad imaginem & similitudinem Dei, ratione & libero arbitrio præditus. Denique quod acceperit potestatem & dominium in omnia opera Dei, ac præsertim in animalia; ideo subiungit:

VIII.

*Omnia subiicisti sub pedibus eius, oues & boues vniuersas, insuper & pecora campi.*

*Volucres cæli, & pisces maris, qui perambulans semitas maris.*

Per oues & boues intelliguntur omnia animantia domestica: per pecora campi animantia syluestria, quæ libere vagantur per campos: per aues cæli, & pisces maris, non est dubium quid intelligatur. Illud est notandum, in Hebræo post *pisces maris*, addi in singulari *perambulans semitas maris*, & in Græco etiam mutari saltem genus; nam post *pisces maris*, habetur in neutro *perambulans semitas maris*. Sensus igitur est, non solum pisces proprie dictos, sed omne perambulans, siue omnia perambulantia semitas maris, id est, quicquid mouetur in mari, siue sint pisces, siue monstra, siue quid aliud. Iam vero secundum allegoricum sensum, sed certum, & à Deo intentum, Apostolo teste, Heb. 2. & 1. Cor. 15. significatur, hominem in Christo post illam insignem Dei visitationem, id est, Verbi incarnationem, minoratum aliquantulum ab Angelis propter passionem; tunc enim Christus visus est aliquo modo minor Angelis, cum ei apparuerit Angelus de cælo confortans eum; & cum Angeli sint impassibiles & immortales; Christus autem eo tempore passus & mortuus sit. Absolutè autem semper fuit Christus Angelis superior, & omni ex parte superior. Quod apparuit, quando gloria & honore coronatus est, id est, per resurrectionem

nem circumdatus vndique glorioso & immortalis corpore: & constitutus per admirabilem ascensionem super omnia opera Dei, exaltatus videlicet ad ipsam Patris sui dexteram. Omnia quoque subiecta sunt ei, nulla re excepta; præter illum, vt Apostolus ait 1. Cor. 15. *qui subiicit ei omnia*. Res autem illi præcipue subiectæ sunt, primo homines tam fideles, significati per oues & boues, subditos & prælatos, minores & maiores; quam infideles, significati per animantia syluestria. Deinde Angeli hominibus superiores significati per aues cæli, quæ in sublime feruntur, & canunt assidue laudes Dei. Denique dæmones hominibus inferiores, significati per pisces maris, qui in imis & profundissimis locis habitant, & muti sunt ad laudes Dei, & luto ac humoribus delectantur: Hæc omnia allegorice variis exponi posse, docet S. Augustinus in hunc locum: vbi aliam ponit expositionem, quæ apud eum legi poterit. Vnum hoc loco addendum est, quod superius commemorandum fuisset, cum Psalmista dicit: *Minuisti eum paulo minus ab Angelis*, non esse in Hebræo nomen Angelorum, quos Hebræi vocant, *Malachim*, sed *Elohim*, quod interpretari solet *Deus*, vel *dei*; sed quia nomen Dei in Scripturis sæpe tribuitur Angelis, & ipsis etiam hominibus, qui aliis præsunt; recte Septuaginta Interpretes respicientes sensum Prophetæ, posuerunt *ab Angelis*; & eam interpretationem approbavit Apostolus Hebr. 2.

מלאכים  
אֱלֹהִים

*Domine Dominus noster, quam admirabile est nomen tuum in vniuersa terra.*

IX.

Repetit primam sententiam, vt ostendat illam esse quasi conclusionem, quam in toto Psalmo declarare & approbare intendebat, quasi dicat, lute igitur ac merito exclamaui,

*Domine Dominus noster, quam admirabile est nomen tuum in vniuersa terra!*

\* \*

E

PSAL-



## PSALMVS IX.

Titulus &amp; Argumentum.

In finem pro occultis filij  
Psalmus Dauid.

**H**Vnc Titulum Hebraei legunt, Victori  
super mortem filij: & quidem verba  
Hebraica, vt modo leguntur, ita sonant. Sed  
quia Psalmus hic est Psalmus latitia, & Da-  
uid non latitia, sed mœrore maximo affectus  
fuit ex morte filij, ideo aliqui volunt vocem  
illam Laben, legendam esse ordine literarum  
conuerso, videlicet Nabal, vt sensus sit, pro  
morte Nabal. Sed Psalmus non loquitur de  
morte vnus hominis tantum, sed etiam de  
interitu magni alicuius exercitus. Ideo alij  
dicunt in hoc Psalmo gratias agi Deo pro mor-  
te Goliath, & fuga totius exercitus Philisti-  
norum. Sed Goliath non fuit filius Dauid, vt  
in scribere debuerit Psalmum pro morte filij.  
Verissima est igitur lectio Septuaginta & vul-  
gata Latina editionis, pro occultis, siue arca-  
nis filij. Voces enim illa, almuth, possunt legi  
alamoth, quod significat occulta siue arcana,  
& credibile est excidisse prepositionem al, &  
legendum alalamoth, pro occultis, sicut legi-  
tur in titulo Psalmi 45. Certe Septuaginta In-  
terpretes, qui vtrumque titulum eodem modo  
reddiderunt, videlicet pro occultis, siue dubio  
eodem modo legerunt, videlicet alalamoth,  
neque dubium esse potest, quin libri eorum e-  
mendatiores fuerint quam nostri. Quia vero  
ponitur hoc loco nomen filij absolute, & prece-  
dit nomen arcani, siue occulti, id est, mysterij  
reconditi, recte intelligimus in hoc Psalmo tra-  
ctari de vnico illo Filio Dei, qui in carne hu-  
mana delitescens, & nouo bellandi genere pu-  
gnans, vicit diabolum & exercitum eius,  
quod Apostolus Coloss. 1. vocat mysterium ab-  
sconditum à seculis. Ad quem sensum reduci  
potest lectio Hebraica, pro morte filij, id est,  
pro morte Christi Filij Dei, quatenus ea  
mors fuit gloriosa debellatio Prin-  
cipis tenebrarum.

\* \*

## EXPLICATIO PSALMI IX.

**C**onfitebor tibi Domine in toto corde  
meo, narrabo omnia mirabilia tua.

Proponit materiam Psalmi, quæ erit lau-  
datio Dei propter opera eius mirabilia. Il-  
lud, in toto corde, significat rem esse omnium  
maximam, quam laudaturus est, & ideo to-  
tis viribus, totoq; affectu laudandam. Illud  
etiam, omnia mirabilia, significat, rem lau-  
dandam esse tam vniuersalem, vt quasi com-  
pendio quodam comprehendat omnia ope-  
ra mirabilia Dei. Et vere talis fuit redem-  
ptio generis humani, opus summæ miseri-  
cordiæ, in quo recapitulantur omnia bene-  
ficia Dei, iuxta illud Apostoli ad Ephes. 1.  
Instaurare omnia in Christo, id est, recapitu-  
lare, vt sonat vox Græca, & in vnâ quasi  
summam omnia redigere.

Labor, & exultabo in te, psallam  
nomini tuo altissime.

Id ipsum aliis verbis significat, vel potius  
explicat, q. d. Confitebor tibi iubilans  
& exultans, ita vt lætitia sit in corde, exulta-  
tio in exteriori motu, atque ita in toto corde  
confitebor. Narrabo mirabilia psallens no-  
mini tuo altissime, id est, in gloriam tuam  
canens illa mirabilia.

In conuertendo inimicum meum re-  
trorsum, infirmabantur, & peribunt  
à facie tua.

Incipit narrare victoriam Christi contra  
diabolum & satellites eius, & loquitur in  
persona totius Ecclesiæ. In conuertendo, in-  
quit, inimicum meum retrorsum, id est, cum  
conuerteretur inimicus meus diabolus retro-  
sum, fugere videlicet incipiens à facie tua;  
tunc omnes eius milites infirmabantur &  
peribunt, id est, cognita fuga ducis, debiles  
reddentur, & dilabentur, ac euanescent, ac si  
permissent. De hac fuga diaboli loquitur in  
Euangelio Dominus, Nunc iudicium est  
mundi, nunc Princeps huius mundi eicietur  
foras, Ioan. 12.

Quoniam fecisti iudicium meum, &

call-



*causam meam, sedisti super thronum, qui iudicas iustitiam.*

Reddit causam, quare futurum sit, vt Diabolus fugiat, & totus eius exercitus dissipetur. *Quoniam*, inquit, tu Domine fili Dei fecisti iudicium meum & causam meam, id est, absoluisi iudicium, & litem (id enim proprie sonat vox Hebræa, *dini*) & controuersiam quæ erat generi humano, siue Ecclesiæ cum Diabolo Diabolus enim prætendebat genus humanum iuste à se teneri captiuum, & tyrannice illud vexabat, sed Christus in cruce absoluit hanc litem, satisfaciens pro homine; vnde subditur; *Sedisti super thronum, qui iudicas iustitiam.* vbi crucem vocat thronum, iuxta illud S. Leonis serm. 8. de passione Domini: O ineffabilis gloria passionis, in qua & tribunal Domini, & iudicium mundi, & potestas est Crucifixi. Atque hæc sunt vere occulta Filij Dei, vt habetur in titulo Psalms. *Qui enim in oculis hominum reus videbatur, & cum summa ignominia pœnas luere; is illo ipso tempore in throno sedens iustitiam iudicabat, id est, iustissime iudicabat, iam pretio persoluto hominem liberandum, & Diabolum dominio spoliandum, & re ipsa Chirographum decreti, quod erat contrarium nobis, vt scribit Apostolus Coloss. 2. tulit de medio, affigens illud Crucis, & spolians principatus, & potestates.*

*Increpasti gentes, & periiit impius: nomen eorum delesti in æternum, & in sæculum sæculi.*

Post debellatum Diabolum per crucem, Dominus Christus per Apostolos increpauit gentes, arguens mundum de peccato, de iustitia, & de iudicio (vt ipse Dominus futurum prædixit) & eo modo petiit impius, id est, periiit impietas idololatæ, & homo de impio factus est pius. Nec solum periiit impius qui tunc erat; sed deleuit Christus nomen eorum, id est, gentilitatis, & idololatæ in æternum, vt non amplius sint redditura, quasi stirpis eradicatæ. Id quod iam videmus ita impletum vt ne Iudæi quidem colant amplius idola; quia dea colenda

propensissimi erant. Quod attinet ad verba, in Græco non est, *nomen eorum*, sed *nomen eius*, id est, impij: sed in Hebræo est, *nomen eorum*, & Latina interpretatio idem habet, vel quod olim in Græco ita legere-tur, & postea sit m<sup>o</sup> arum vitio librario-rum, vel quod Latino interpreti magis placuerit lectio Hebræica: sed in sententia non est diuersitas vllius momenti. Illud autem *in æternum, & in sæculum sæculi* in Hebræo est, *in sæculum*, & in æternum, significatur autem ista additione vera æternitas, id est, nunquam finienda duratio, ne quis acciperet hoc loco æternum pro longo tempore, sed aliquando finem habituro.

*Inimici defecerunt frameæ in finem, & ciuitates eorum destruxisti.*

VI.

Reddit causam cur non sit reditura idololatria, quia petierunt arma Diaboli, & ciuitates vbi habitabat, ita vt non habeat, nec vnde offendat, nec vbi se defendat. Illud *inimici*, est genitiui casus, vt patet ex Græco, nam ex Hebræo posset etiam verti, O inimice, sed rectissima est versio Græca & Latina, & non repugnat Hebræica, pro frameæ, in Hebræo non legitur solitudines, sed verbum *Carabot*, significat gladios, & *Carabot* solitudines, vtunque autem legi potest solum mutatis punctis. Itaque Septuaginta legerunt, *Carabot*, ideo recte verterunt frameæ, siue gladij, vt sensus sit, defecerunt gladij hostis nostri Diaboli, vique in finem, id est, nullo remanente, siue in æternum. Illud etiam, *ciuitates eorum*, in Hebræo & Græco habetur sine pronomine eorum, & ciuitates destruxisti, nimirum inimici, quasi dicat, inimicus amisit gladios, & ciuitates, per gladios inimici intelligi possint tentationes, siue suggestiones, & quasi verba Diaboli, sicut *gladium spiritus* vocat Apostolus verbum Dei: vnde etiam idem Apostolus tentationes Diaboli dicit esse *telæ igneæ*, ad Ephes. 6. Dicuntur autem, isti gladij defecisse, quia nihil nocere possunt armatis fide Iesu Christi. In quo sensu allegauit hunc locum Psalms Sanctus Antonius apud Athanasium in vita ipsius

חרבות  
חרבות



probare volens tentationes Diaboli signo crucis facillime repelli, per ciuitates autem Diaboli intelligi possunt homines infideles, in quibus Diabolus libere regnat. Destruxit Christus has ciuitates, dum per totum mundum idola sustulit. De hac re Dominus loqui videtur, cum ait Luc. 11. *Cum fortis armatus custodit atrium suum, in pace sunt omnia, quae possidet: si autem fortior superueniens vicerit eum, vniuersa arma eius auferet, &c.* Cum Diabolus custodiebat atrium, in pace erant omnia, quae possidebat, id est, cum infidelitatem conseruabat, se- cure possidebat omnia sua; quia dum homo est infidelis, semper est in manu Diaboli, etiam si moraliter bene viuere videatur, vt multi Philosophi, alijque Ethnici faciebant. At atrio expugnato per Christum, id est, infidelitate sublata, & cognitione veri Dei introducta, omnia sua Diabolus perdidit.

VII.

*Perijt memoria eorum cum sonitu, & Dominus in aeternum permanet.*

המח  
המח

In Hebraeo, vt nunc legitur, non habetur *cum sonitu*, sed, *cum ipsis*: vt sensus sit, perierunt impij, & cum ipsis perijt etiam memoria ipsorum. Ceterum vox Hebraica potest legi, *Hemma*, & significat cum ipsis, potest etiam legi, *Hama*, & significat sonitum; & sic legerunt septuaginta Interpretes, & addiderunt perspicuitatis gratia praepositionem, *cum*, & ideo verterunt *cum sonitu*, sensus autem est, perijisse memoriam idololatrarum, & ipsorum idolorum, & totius Regni Satanæ cum magno strepitu, & sonitu. Repugnauit enim mundus totus & ipsi summi Reges, & Imperatores totis viribus conati sunt idola defendere: sed quo magis mundus fremebat, eo magis idololatria cadebat, & memoria eius abolebatur. Denique finito strepitu persecutionum memoria quoque idololatriæ perijt: Dominus autem Christus, & eius memoria nunquam peribit.

VIII.

*Parauit in iudicio thronum suum, & ipse iudicabit orbem terra in aequitate, iudicabit populos in iustitia.*

Post Christi mortem, & resurrectionem data est ei omnis potestas in caelo, & in terra. Matth. ultimo. Id hoc loco Dauid commemorat, quasi dicat, post certamen cum Diabolo Dominus parauit, siue, vt sonat vox Hebraea, stabiliiuit thronum suum in iudicio, id est, ad iudicandum, & ipse, qui est Princeps Regum terræ, iudicabit orbem terræ, id est, populos omnes totius mundi, in aequitate, & iustitia. Idem est autem hoc loco aequitas, & iustitia. Nam tam in Hebræo, quam in Græco pro, *aequitate*, habetur iustitia, pro *iustitia* habetur, reſtitutio. Itaque Latinus interpres non accepit aequitatem proprie, sed vt poni solet aliquando pro iustitia; & sicut in Hebræo, & Græco res eadem bis repetitur diuersis vocibus, ita credendum est, Latinum interpretem idem intelligi voluisse per aequitatem, & iustitiam. Dicitur autem Christus iudicare orbem terræ, quamuis multi sint in mundo Principes infideles, & impij, qui contra Christum pugnant; quoniam corda eorum in manu Christi sunt, nec faciunt, nisi quod ipse iusto iudicio facere eos sinit.

IX.

*Et factus est Dominus refugium pauperi, adiutor in opportunitatibus in tribulatione.*

Ex eo quod deinceps regnabit Dominus Christus, & iudicabit iuste, colligit Dauid magnam consolationem pauperum, qui a illis a potentibus opprimi solent, quasi dicat, non timeant amplius pauperes, quia Dominus in caelo sedens factus est refugium pauperum, & rursus id ipsum alijs verbis repetit, *adiutor*, inquit, *pauperum in opportunitatibus*, id est, temporibus opportunis, quando videlicet necessitas id requirit: nimirum in tribulatione. Tunc enim opportune diuinum praebetur auxilium, quando tribulatione vrgemur, & deficit humana consolatio. Adimpletur autem hæc promissio in omnibus, qui Deum vere quaerunt, & timent, & ideo subiungit:

*Et sperent in te, qui nouerunt nomen tuum, quoniam non dereliquisti quaerentes te Domine.*

X.

Muta-



Mutatio personæ frequens est in Psalmis, & sæpe nascitur ex affectu nouo, qui Dauid inspirabatur, dum laudes Dei caneret. Merito inquit, in te sperare possunt in angustiis suis omnes, qui nouerunt nomen tuum, id est, qui non solum sonant voce nomen Dei; sed probe intelligunt, quam magnam rem significet, & ex nomine isto recte intellecto cognosco potentiam, & misericordiam Dei. Ideo merito in te sperare possunt amici tui, *quoniam non dereliquisti*, id est, nunquam dereliquisti quærentes te. Dicuntur autem quærere Deum, qui cupiunt eius gratiam, & student toto corde placere illi.

XI.

*Psallite Domino, qui habitat in Sion, annunciate inter gentes studia eius.*

Post apostrophen ad Deum, ex eodem seruire spiritus facit aliam ad homines, exhortans eos, ut ipsi quoque Deum laudent, & alios ad laudandum excitent. Dicitur Dominus habitare in Sion, quia ibi erat arca testamenti, & locus orationis, & additur hæc periphrasis, ut distinguatur Deus verus à Diis falsis, qui habitant in delubris, & fanis Ethnorum. Illud autem, *studia eius*, significat cogitationes, consilia, molimina, adinventiones, opera Dei mirabilia, quæ relucet in redemptione generis humani. Nam idem vocabulum Hebraicum, *haliloth*, quod hic vertitur, *studia*, in Psalmo 104. vertitur *opera*, & Isaia 12. in cantico Isaia vertitur *adinventiones*. Itaq; sensus est, Cantate Deo vero Psalmum, laudantes eum, & annunciate inter gentes mirabiles cogitationes, & mirabilem industriam, atq; adeo mirabilia opera eius, ut omnes gentes hæc audientes illum laudent.

XII.

*Quoniam requirens sanguinem eorum recordatus est: non est oblitus clamorem pauperum.*

Redit Propheta ad id, quod dicebat, Dominum iustum iudicem esse refugium pauperum in tribulatione: & respondet tacite obiectioni, quæ poterat fieri, quia videmus

interdum pauperes pios opprimi à potentioribus, & etiam innocenter occidi. Laudate, inquit, Deum, quoniam etiam si videatur aliquando obliuisci pauperum suorum; tamen non ita est, sed *requirens*, id est, inquirens in vitam hominum, dissecuens acta singulorum, *recordatus est sanguinem innocentum iniuste effusum*, & non est oblitus clamorem eorum, qui dum opprimerentur, clamauerunt ad eum. Deum autem recordatum esse sanguinem suorum, patebit suo tempore, quando & opprimentium pœna, & oppressorum gloria manifestabitur.

*Miserere mei Domine, vide humilitatem meam de inimicis meis.*

Laudauit Deum de præteritis beneficiis: nunc implorat auxilium aduersus præsentem, & futuras angustias. Est autem vox Ecclesiæ contra persecutores tum visibiles, tum inuisibiles. *Miserere, inquit, mei Domine, vide humilitatem meam*, id est, abiectiōnem meam (id enim sonat verbum Græcum) siue afflictionem meam (quod significare solet verbum Hebraicum) de inimicis meis, id est, ex inimicis meis prouenientem.

*Qui exaltas me de portis mortis, ut annunciem omnes laudationes tuas in portis filia Sion.*

Prima pars huius versiculi coniungitur cum superiore versu. Est enim sensus, *Miserere mei, & vide humilitatem meam*, tu Domine, qui exaltas me de portis mortis, id est, qui soles me longe facere à portis mortis, & quia portæ illæ intelliguntur esse in loco inferiori, & eadem cum portis inferi, quia non loquitur Propheta de morte corporis, sed de morte animæ per peccatum, siue de morte æterna, ideo exaltari se dicit, ut longe fiat ab illis. Per portas mortis; siue inferi videtur intelligenda multitudo infernalium hostium nostrorum. Quia enim multitudo populi ad portas conuenire solebat apud Hebræos, siue ad iudicium, siue ad alia publica negotia, ideo multitudo

XIII.

XX.

XIV.



do nomine portarum significatur. *Marth.*  
 16. *Porta inferi non praeualebunt aduersus eā.*  
*Ecclesiastici ultimo, de portis tribulationum,*  
*que circumfoderunt me.* Pulchre autem  
 opponuntur portae mortis, portis filiae  
 Sion, id est, portis Ierusalem quia portae  
 mortis seu inferni in loco infimo sunt,  
 portae Ierusalem in monte excelso: in portis  
 mortis congregatur populus infernalis,  
 in portis Ierusalem populus Dei. Portae  
 mortis tentationes, & bella emittunt, per  
 quae itur ad mortem, portae Ierusalem in  
 pace fundatae sunt. Ierusalem enim posuit  
 fines suos pacem, & ipsa visio pacis dicitur.  
 Itaque exaltatur Ecclesia à portis mortis, ut  
 annunciet laudem Dei in portis filiae Sion, id  
 est, liberatur à tentationibus, ne cadat in  
 mortem eternam, ut gratiam liberatoris  
 agnoscat, & laudet coram angelis Dei, qui  
 sunt in portis caelestis Ierusalem.

XV.

*Exultabo in salutari tuo, infixae sunt  
 gentes in interitu quem fecerunt.*

Exultabo, inquit, liberatus de portis  
 mortis, in salutari tuo, id est, in salute, à te  
 mihi donata. Quoniam (id enim subintel-  
 ligitur, ut saepe alias in Psalmis) gentes quae  
 mihi interitum fecerunt, id est, parauerunt,  
 in ipsum interitum infixae sunt, tanquam in  
 luto tenacissimo, unde euadere nequibunt:  
 hoc est, persecutio inimicorum non mihi  
 nocuit, sed ipsis.

XVI.

*In laqueo isto, quem absconderunt,  
 comprehensus est pes eorum.*

Nec solum aperta persequutio, sed etiam  
 occulta, quae veluti laqueus tendebatur,  
 auctoribus perniciosi fuit, non mihi.  
 Fortasse hic tanguntur persecutiones ap-  
 pertae Diocletiani, & similibus, & occultae  
 Iuliani Apostatae, & Imperatorum Hæreti-  
 corum.

XVII.

*Cognoscetur Dominus iudicia faciens:  
 in operibus manuum suarum comprehensus  
 est peccator.*

Ex hoc mirabili iudicio Dei, qui con-  
 uertit arma, & fraudes hominum impio-  
 rum in ipsos, colligit Dauid fore, ut cogno-

scatur Deus. *Cognoscetur Dominus iudicia  
 faciens*, id est, cognoscetur esse Deus verus,  
 & summus dum iudicia facit tam admiranda;  
 nam per eius prouidentiam in operibus  
 manuum suarum comprehensus est  
 peccator; nimirum dum incidit in interitum,  
 quem alijs parauerat, & in laqueum  
 quem alijs tetenderat. Similia habentur in  
 Psalmo 7. versu 15. & eundem sensum ha-  
 bent. Post hunc versiculum in Hebræo ad-  
 ditur, *Higgaion selà*, quod verti potest, me-  
 ditatio semper, quod significat, iudicia Dei  
 supradicta, assidue, ac iugiter esse medi-  
 tanda.

*Conuertantur peccatores in infernum,  
 omnes gentes, quae obliuiscuntur Deum.*

XVIII.

Non imprecatio, sed prophetia est, im-  
 pios ad inferos descensuros: *conuertantur*,  
 positum videtur pro reuertantur, ut vox He-  
 bræa sonat, & reuertantur, pro reuertentur.  
 Dicuntur autem peccatores reuersuri ad  
 inferos, quia inde venerunt, quia pec-  
 catores sunt. Deus enim fecit hominem  
 rectum, sed Diabolus eum peccatorem fecit.  
*Vos*, inquit Dominus, *ex patre diabolo  
 estis*. Quod sequitur, *omnes gentes quae obli-  
 uiscuntur Deum*, declarat qui sunt peccato-  
 res reuersuri in infernum; illi nimirum om-  
 nes, qui obliuiscuntur Deum. Oblivio  
 enim Dei est radix omnium peccatorum,  
 nam omnis qui peccat, auertitur à Deo, &  
 conuertitur ad creaturam.

*Quoniam non in finem obliuio erit  
 pauperis, patientia pauperum non peribit  
 in finem.*

XIX.

In Hebræo non habetur negatio in se-  
 cundo membro, sed legitur, *patientia pau-  
 perum peribit in aeternum*, sed negatio prio-  
 ris membri ex phrasi Hebraica, trahitur  
 etiam ad membrum posterius, & ideo Se-  
 ptuaginta Interpretes recte verterunt, *non  
 peribit*. Significat autem hic versiculus, id-  
 eo peccatores, qui pauperes opprimere so-  
 lent, in infernum deiciendos, quoniam  
 Deus vindictam aliquando sumet de op-  
 pressionibus pauperum suorum. Quamuis e-  
 nim ad tempus videatur non recoidari



ri eorum, tamen non obliuiscetur eorum  
vſque in finem; ſed aliquando recordabi-  
tur, & proinde patientia, ſiue exſpectatio  
pauperum non peribit *in finem*, id eſt, in æ-  
ternum, vt ſonat vox Hebraica *Labad*. Di-  
citur autem patientia pauperum non peri-  
tura in æternum, non quoad ſe, ſed quoad  
ſuum effectum: quali dicat, non fruſtrabi-  
tur in æternum, ſed aliquando effectum  
ſuum ſortietur.

XX.

*Exurge Domine, non confortetur ho-  
mo, iudicentur gentes in conſpectu tuo.*

Poſteaquam prædixit interitum impio-  
rum, rogat Deum vt incipiat coercere im-  
pios. *Exurge, inquit, Domine, non conforte-  
tur*, id eſt, non præualeat homo, qui pulvis  
eſt, contra Deum factorem ſuum. *Iudicen-  
tur gentes in conſpectu tuo*, id eſt, iudicium  
contra eos à facie tua prodeat. Quod in alio  
Pſalmo legimus: *Iudica illos Deus.*

XXI.

*Conſtitue Domine legiſtorem ſuper  
eos, vt ſciant gentes, quoniam homines  
ſunt.*

Iudicium contra gentes, quæ perſeque-  
bantur Eccleſiam, manifeſtum fuit, quan-  
do ſubiectione fuerunt Principi Chriſtiano.  
Tunc enim intellexerunt Gentiles, ſe ho-  
mines eſſe, infirmos videlicet, & contra  
Chriſtum præuolare non poſſe. Id prædicit  
Propheta per modum precantis. Nomen  
Hebraicum *Morab*, vel *More*, Doctorem ſi-  
gnificat, & etiam terrorem, vt vertit S. Hie-  
ronymus. Et quia Propheta loquitur de  
Doctore terribili, qui cum imperio præci-  
pit, & docet, ideo recte legiſtorem dixe-  
runt Septuaginta Interpretes. Multi per  
hunc legiſtorem intelligunt Chriſtum,  
multi Antichriſtum. In re obſcuriſſima quiſ-  
que in ſuo ſenſu abundet. Ego Conſtanti-  
num intelligo, Iouianum, Valentinianum,  
Theodoſium, & ſimiles.

XXII.

*Vt quid Domine receſſiſti longe, de-  
ſpiciſ in opportunitatibus, in tribula-  
tione.*

In hoc verſu incipiunt Hebræi Pſalmum  
decimum, ſed hanc diſtinctionem Septua-  
ginta Interpretes non habuerunt: & credi-  
bile eſt, à poſterioribus ex cogitatam fuiſſe  
diſtinctionem, propterea quod materia  
huius partis Pſalmi videatur diuerſa omni-  
no à materia prioris partis, cum in parte  
priori exultet Eccleſia pro victoria contra  
inimicos Dei, & ſuos: in poſteriore gemat  
ob eorundem inimicorum proſperos ſue-  
ceſſus aduerſus Eccleſiam. Sed non tam ex  
diuerſa materia, quam diuerſa ſunt tempo-  
ra, quæ Dauid prophetando percurrit. In  
principio enim Pſalmi exultabat Dauid in  
ſpiritu ob occulta myſteria filij Dei, qui  
moriendo debellauit aéreas poteſtates, &  
Gentilitatem atque Idola deſtruxit. Dein-  
de in fine prioris partis, & in hac poſteriore  
prædicit perſecutiones Eccleſiæ, tum à Gen-  
tibus, tum ab aliis malis hominibus exci-  
tatas, quæ interdum ita creſcunt, vt vi-  
deatur Dominus oblitus eſſe populi ſui,  
quem tam glorioſe liberauerat, & quia di-  
xerat paulo ante, *Factus eſt Dominus reſu-  
gium pauperi, adiutor in opportunitatibus,  
in tribulatione*: ideo nunc reſpiciens aliud  
tempus, quo, Deo permittente, pauperes  
opprimuntur à potentioribus, ait, *Vt quid  
Domine receſſiſti longe*, id eſt, ita permittis  
impios graſſari in iuſtos, ac ſi non adeſſes,  
ſed longe receſſiſſes? *Deſpiciſ tuos pauperes  
videlicet, in opportunitatibus*, quando op-  
portunum eſſet eos iuuare, nimiram *in tri-  
bulatione*.

XXIII.

*Dum ſuperbit impius, incenditur pau-  
per, comprehenduntur in conſiliis quibus  
cogitant.*

Difficilis omnino verſiculus. Videtur  
hæc eſſe ſententia, *dum ſuperbit impius*, id  
eſt, dum impius proſpere agit, & glorioſus  
apparet: tunc *incenditur pauper*, id eſt,  
ſcandalizatur, & vritur æſtu cogitationum  
iuſtus pauper: *comprehenduntur in conſi-  
liis quibus cogitant*, id eſt, vterque, tam  
impius glorioſus, quam iuſtus pauper com-  
prehenditur & illaqueatur conſilio, id eſt,  
cogitatione ſua. Nam impius cogitat ſibi  
debe-



deberi illam foelicitatem, & ipse se decipit: iustus vero videas impium prospere agere, cogitat, quid hoc sibi velit, & magis ac magis se inoluit. Quod ad Grammaticam attingit, cum dicitur, *in consiliis quibus cogitant*, Græcismus est, & Latinus Interpretes ad verbum vertere voluit. Nos enim dicereamus in consiliis de quibus cogitant, vel quæ cogitant. Per consilia vero cogitationes intelligimus, ut magis proprie significat vox Hebraica. Porro hæc videtur ratio versiculi superioris: ideo enim rogauit Propheta Deum, ut non despiceret pauperem in tribulatione, quia prosperitas impiorum, & impiis & iustis nocet, dum illi superbiunt, isti scandalizantur.

XXIV.

*Quoniam laudatur peccator in desideriis animæ suæ, & iniquus benedicitur.*

Hebraica lectio, ut nunc se habet, ad verbum sic vertenda esset, *Quoniam laudauit impius desiderium animæ suæ, & auarus benedicens exacerbauit Dominum.* Sed remotis punctis & distinctionibus, quæ tempore Septuaginta Interpretum non aderant, clarissime cernitur sententia, quam Septuaginta rectissime expresserunt. Verbum enim *hillel*, quod significat laudauit, si legatur *hullal*, ut Septuaginta legerunt, significat laudatus est, & verbum *berech*, benedicens, si legatur *barruch*, significabit benedictus est. Illud autem exacerbauit Dominum, pertinet ad versiculum sequentem, qui incipit, *Exacerbauit Dominum peccator.* Reddit igitur causam Propheta, cur ex prosperitate superbiat impius, & vratur pauper, quia videlicet peccator male agit, & tamen quia diues est & potens, laudatur à multis, quasi bene agat, & desideria animæ eius, id est, desideria ipsius (est enim phrasis Hebraica, desiderium animæ meæ, pro desiderium meum) quamuis iniqua & iniusta, approbantur, & hinc fit, ut iniquus benedicatur, cum maledici potius mereantur.

XXV.

*Exacerbauit Dominum peccator: secundum multitudinem iræ suæ non quæret.*

Pergit explicare malitiam peccatoris superbi. *Exacerbauit*, inquit, *Dominum peccator*, & cum deberet omni studio quærere reconciliationem, secundum multitudinem iræ suæ non quæret, id est, propter multitudinem iræ suæ in pauperes afflictos, non quæret Deum, vel reconciliationem cum Deo. Ira enim & arrogantia excæcat mentem, ut non cogitet peccator, quam magnum sit malum, exacerbare Deum omnipotentem.

*Non est Deus in conspectu eius, inquinata sunt viæ illius, in omni tempore.*

XXVI.

Excæcatus peccator non cogitat Deum. In Hebræo maiori emphasi legitur, *Non est Deus in omnibus cogitationibus eius*, id est, in nulla eius cogitatione est Deus, id est, cum tam multa cogitet, nunquam cogitationi eius occurrit Deus. Ita funditus Deum oblitus est. *Inquinata sunt viæ illius in omni tempore.* Hoc sequitur ex superiore, quia nunquam Deum cogitat, nullo tempore dirigit viam suam ad Deum, sed ad carnalia desideria explenda, & ideo omnes viæ, id est, omnia opera eius sunt inquinata sordibus concupiscentiæ.

*Auferuntur iudicia tua à facie eius, omnium inimicorum suorum dominabitur.*

XXVII.

Id quod eum conuerrere posset à via mala, cogitatio videlicet terribilium iudiciorum tuorum, longe est à corde ipsius, & ideo sine ullo timore Dei dominatur omnium inimicorum suorum, id est, tyrannice opprimit omnes, quos inimicos suos putat.

*Dixit enim in corde suo, non mouebor à generatione in generationem sine malo.*

XXVIII.

Confidentia vana impij hic notatur, cogitat enim apud se nihil sibi nocere posse. *Dixit*, inquit, *in corde suo, non mouebor*: id est, nemo me commouere poterit, nec deicere à statu meo, à generatione in generationem sine malo, supple, ero. Nam & in Hebræo & in Græco ponitur distinctio post verbum, *mouebor*, & in Hebræo clare appa-



apparet sensus ille, a generatione in generationem siue malo ero, quomodo etiam vertit S. Hieronymus.

XXIX. *Cuius os maledictione plenum est, & amaritudine, & dolo: sub lingua eius labor, & dolor.*

Descripsit Propheta quale sit cor impij, quod videlicet non cogitet Deum, nec iudicia eius, & speret, nihil mali sibi euenturum: nunc describit, quale sit os, descripturus postea qualia sint opera. Dicit igitur, os impij esse plenum maledictione, amaritudine, & dolo. Ad maledictionem pertinent blasphemiae in Deum, & conuicia in homines, ad amaritudinem detractiones, murmurationes, contentiones, & alia, odium, & rancorem testantia: denique ad dolos calumniae mendacia, periuria. Quod additur *sub lingua eius labor, & dolor*: significat effectum superiorum malorum. Eo enim tendunt omnia verba impij, vt laborem, & dolorem afflictis adferant. Sub lingua eius labor, & dolor. i. id quod est sub lingua impij, id est, materia in qua exercetur lingua impij, est labor, & dolor miserorum hominum, qui ei quoquo modo subiiciuntur.

XXX. *Sedet in insidijs cum diuitibus in occultis, vt interficiat innocentem.*

Hic iam describuntur mala opera. i. oppressiones, pauperum. Est autem oratio metaphorica, ducta similitudine ab eis, qui latent intra vestibula domus, vt obseruent, quando transcant quos interficere cupiunt. Significat autem Propheta hac metaphora viros impios, & potentes adiunctis sibi sociis alijs diuitibus, & potentibus varijs artibus, & dolis circumuenire pauperes, eosque ad extremam perniciem adducere, in Hebraeo non est, *in insidijs cum diuitibus*, sed, *in insidijs, atriorij, seu vestibulorij*. Ceterum Septuaginta non legerunt *chazerim*, vt nunc habetur in codicibus Hebraicis, sed *hassirim*. Illud. n. atria, hoc diuites significat. Itaque probabile est, post tempora Septuaginta textum Hebraicum fuisse mutatum.

XXXI. *Oculi eius in pauperem respiciunt, insidiat in abscondito, quasi leo in spelunca sua.*

*Insidiat, vt rapiat pauperem, rapere pauperem, dum attrahit eum.* XXXII.

*In laqueo suo humiliabit eum inclinabit se, & cadet cum dominatus fuerit pauperem.* XXXIII.

Quod dixerat in versiculo tricesimo, exponit in his tribus versiculis, varians metaphoras. Nam in 30. versiculo comparauit oppressorem pauperum homini insidianti alteri homini: in 31. comparat Leoni insidianti alijs bestiis debilibus: in 32. & 33. comparat homini tendenti laqueos bestiis & capienti eas, versiculi duo postremi sunt in Hebraeo multo clariores. Sic. n. ad verbum reddi potest lectio Hebraica, quomodo vertit S. Hieron. *Insidiat, vt rapiat pauperem, rapiet pauperem cum attraxerit eum ad rete suum: & confractum subiciet, & irruet viribus suis valenter*. Nostri vero lectio sic explicanda est: *Insidiat, vt rapiat pauperem*, rapere autem pauperem insidiat tunc, cum eum ad se attrahit alliciendo incautum. *In laqueo vero suo iam captum humiliabit*. i. opprimit, & inclinabit se super eum, atq; in eum cadet. i. super eum irruet, cum dominatus fuerit pauperem, id est, cum ijs plane potius fuerit. Et simul haec verba pulchre alludunt ad casum interiorum impij: tunc enim horrende cadit in seruitutem Diaboli, cum dominari sibi videtur hominum miserorum.

*Dixit enim in corde suo, oblitus est Deus, auertit faciem suam, ne videat in fine.* XXXIV.

Repetit causam tantae impietatis, nimium, quia impius cogitat apud se. Deum non curare res humanas, nec vnquam esse curaturum.

*Exurge Domine Deus, & exaltetur manus tua, ne obliuiscaris pauperem.* XXXV.

Rogat Deum, vt impios coerceat. Exurge, inquit, quasi a somno, & exaltetur manus tua ad percutiendum: manus enim dormientis, vel quieti hominis demissa, & saepe complicata esse solent. In Graeco adduntur duae voces, post Domine Deus, additur meus, & post, ne obliuiscaris pauperem.



additur, *in finem*. Sed in Hebræo non habentur, nec in Latinis emendationibus.

XXXVI. *Propter quid irritauit impius Deum? dixit enim in corde suo, non requiret.*

Iterum repetit causam, cur impius Deum irriter peccando, eam esse, quia cogitat Deum ista non requirere.

XXXVII. *Vides, quoniam tu laborem & dolorem consideras, ut tradas eos in manus meas.*

Refellit Propheta illam causam, q. d. Imo vides, o Deus, & requiris, quod ex eo apparet, quia tu laborem & dolorem miserorum consideras, ut cum impleta fuerit mensura, tradas impios in manus tuas puniendos: in Hebræo & Græco habetur, *Quoniam tu laborem & furorem consideras*, & sic etiam legit S. Augustinus & S. Hieronymus, & si ita legamus, sensus erit, Quoniam tu laborem oppressorum, & furorem opprimentium consideras.

XXXVIII. *Tibi derelictus est pauper, orphano tu eris adiutor.*

Merito ista consideras, quia tibi Patri omnium incumbit cura eorum, præcipue qui sunt destituti omni alio auxilio.

XXXIX. *Contere brachiū peccatoris & maligni: quaratur peccatū illius, & non inuenietur.*

Contere brachium, i. potentiam & robur peccatoris, & sic humiliatus resipiscet, nec amplius peccabit: ideo quæres postea peccatum eius, & non inuenies: nam ut ait Isaias, *Sola vexatio dabit intellectum auditui*, & Dauid, *Imple facies eorum ignominia, & quærent nomen tuum.*

XL. *Dominus regnabit in æternum, & in seculū seculi peribit gentes de terra illius.*

Prædicit futurum, quod ut fieret, orauerat. Dominus, inquit, semper regnabit, inuitis inimicis eius, imo ipsi inimici peribunt, & exterminabuntur de terra illius, i. de orbe terrarum vn. uerso, quia Domini est terra & plenitudo eius.

XLI. *Desiderium pauperum exaudiuit Dominus, præparationem cordis eorum audiuit auris tua.*

Quod futurum est, ponit tanquam præteritum, propter certitudinem, nec dicit orationem, sed *desiderium pauperum*, ut ostendat celerem exauditionem, q. d. Deus qui scrutatur corda, non expectabit orationem, sed ipsum desiderium, quod orationem præcedere solet, exaudiet. Idem vero est, desiderium, & præparatio ad orandum.

*Indicare pupillo & humili, ut non apponat ultra magnificare se homo super terram.*

XLII.

Exaudiuit Dominus desiderium pauperum, *indicare pupillo & humili*, i. ad hoc exaudiuit, ut iudicet causam pupilli & humilis contra ipsos eorum oppressores, ne deinceps homo audeat superbiere, homo, inquam, qui est super terram, contra Deum, qui est in cælo. In Hebræo significantius dicitur, *Ut nequaquam ultra superbiat homo de terra*, id est, homo de terra compositus, q. d. ut non superbiat signum contra factorem suum. Hæc omnia quæ dicuntur in hoc Psalmo aduersus impium & oppressorem pauperum, attribuuntur Antichristo à S. Hiero. & Augustino, & sine dubio illi conueniunt, per antonomasiam omnia, quæ dicuntur in genere de impiis: sed si ad litteram dicantur hæc de oppressoribus pauperum in genere, ut nos existimamus, certe manifeste apparet, quam ingens crimen sit, quod tot verbis, & tam significantibus à Spiritu Sancto reprehenditur.

## PSALMVS X.

### Titulus, & Argumentum.

In finem, Psalmus Dauid.

**D**E titulo dictum est in præcedentibus. Argumentum huius Psalmi est cohortatio ad confidentiam tempore calumniarum, aliarumq; persecutionum. Loquitur Dauid in persona cuiuslibet iusti prouidens quodammodo illud Apostoli: Omnes qui pie viuere volunt, persecutiones patientur. 1. Tim. 3.



## EXPLICATIO PSAL. X.

I. **I**N Domino confido, quomodo dicitis animae meae, transmigra in montem, sicut passer?

Vox Iusti, qui pulsatur tentatione desperationis, ut vocationem suam deferat ob multitudinem calumniatorum, *In Domino*, inquit, *confido*, qui ubique est, & omnipotens est, *quomodo dicitis animae meae*, id est, cur mihi persuadere conamini. Iam enim supra diximus, phrasim esse Hebraicam, *anima mea*, pro mihi. Alloquitur autem vel Dæmones tentantes, vel ipsas internas suggestiones, hoc est cogitationes à Diabolo immittas, *Transmigra in montem sicut passer*, id est, desere vocationem, & hominum consortium, & abi ad locum, ubi nulla sint pericula, nullae tentationes. Passeres enim, cum timent aucupes, volant ad cacumina montium ad quæ aucupes ascendere non possunt. Tales montes respectu tentationum nulli sunt, nisi in imaginatione hominum, qui cum tentantur grauitur, imaginantur mutatione locorum posse molestiam illam declinari, & qui desperant, ipsam etiam violentam mortem eligunt, ad quam fugiant, tanquam ad montem. Iustus autem constans est, & locum suum non deserit, sciens ubique tentationes Diaboli, & ubique adiutorium Dei esse.

הַדָּם כַּפֹּדֶם  
In Hebræo habetur, *Transmigra in montem vestrum passer*, sed vocem, *chem*, quæ significat *vestrum*, Septuaginta legerunt, *cha*, quod est, *sicut*, & hæc sine dubio est lectio venior & clarior. Nam etiam S. Hieronymus sic vertit. Itaque post tempora S. Hieronymi videtur hic locus corruptus in Hebræo, libratorum vitio.

II. Quoniam ecce peccatores intenderunt arcum, parauerunt sagittas suas in pharetra, ut sagittent in obscuro rectos corde.

Hæc est ratio, cur sit fugiendum ad montem, id est, deserenda vocatio prænuntio timore, quem tentatio suggerit, videlicet, quia mali homines assidue persequuntur Iustos siue calumniis, siue alia ratione. Comparat autem calumnias, siue alias per-

secutiones sagittis, quæ iaciuntur in obscuro, ut significet eas calumnias, vel persecutiones non solum grauitur ferire, sed etiam vix posse cauere. In Hebræo habetur, *Parauerunt sagittas suas in neruo*: & secundum hanc lectionem idem est intenderunt arcum, & parauerunt sagittas in neruo. At Septuaginta verterunt, *Parauerunt sagittas in pharetra*, ut significarent, non solum peccatores intenderunt arcum, ut semel iacerent sagittam, sed etiam impleisse pharetram sagittis, ut sepius iaculari possent. Quamuis autem vox Hebræa *leter*, neruum & chordam significet, & in dictionariis non inueniatur locus, ubi ponatur pro pharetra: tamen auctoritas Septuaginta Interpretum satis est, ut credamus etiam pro pharetra accipi posse. Quod Latinus codex habet *in obscuro*, & Hebræus *in caligine*, in Græco est *in obscura luna*, sed in re nulla est discrepantia. Nam obscura Luna significat noctem carentem Lunæ splendore, siue sit nebulis tecta Luna, siue sit cum Sole coniuncta, aut Soli vicina. Possent hi duo versiculi etiam hunc sensum habere, *In Domino confido, quomodo dicitis animae meae, transmigra in montem sicut passer*, quoniam ecce peccatores intenderunt arcum, parauerunt sagittas suas in pharetra, ut sagittent in obscuro rectos corde. Id est, non licet iam esse recto corde, quoniam vndique tenduntur insidiæ rectis corde, ideo vel oportet in montem inaccessum extra homines recedere, quod fieri non potest, vel cedendum est consuetudini, & deserenda via iustitiæ. Sed huic tentationi respondet Iustus: *In Domino confido*, & ideo net in montem inhabitabilem abibo, nec deferam viam iustitiæ.

Quoniam quæ perfecisti, destruxerunt, iustus autem quid fecit?

Confirmat Propheta per apostrophem ad Deum, verum esse, quod peccatores iniuste persequuntur Iustos. Quasi dicat, verum est, quod audiui de impietate peccatorum. Nam peccatores *destruxerunt ea, quæ tu perfecisti*, id est, leges tuas perfectissimas, nec non consilia, & ordinationes omnes tuas, quas posuisti in populo tuo, dum non solum non reddunt bona pro malis, ut tu iubes,



השתות  
השתות  
שתת

sed reddunt mala pro bonis, sine vlla causa calumniando, & persequendo Iustos, *Iustus enim quid fecit*, hoc est. Iustus non dedit illis vllam occasionem, sed ipsi oderunt iustos gratis. Vox Hebræa, quam Septuaginta verterunt, *perfecisti*, valde obscura est. S. Hieronymus vertit, *leges*, alij *fundamenta*, alij *retia*. Mihi verissimi videatur Septuaginta Interpretes non legisse, vt nunchabemus in Hebræo, *hasciator*, quod habet formam nominis pluralis, sed legisse *hasciattota*, quod significat posuisti, a verbo *sciatat*, in coniugatione *hiphil*, sunt enim eadem omnino literæ, & solum additur punctum vnum sub vltima litera. Nam fere id obseruamus in Psalmis, vt Septuaginta legerint paulo aliter, quam leguntur, qui puncta addiderunt.

IV. Dominus in templo sancto suo, Dominus in celo sedes eius.

Incepit rationem reddere, cur in Domino confidere se dixerit, & non timeat insidias hominum iniquorum: quia videlicet, Dominus omnium in celo sedeat iudex, vnde omnia videat, & omnes subiectos habeat. *Dominus*, inquit, *in templo sancto suo*, subintellige, sedet. Vocat autem templum sanctum Dei, summum calum, quod est templum non manu factum. Idem significat clarioribus verbis, cum ait, *Dominus in celo sedes eius*; hoc est, Dominus in celo sedem, siue thronum habet. Est autem phrasys Hebraica, *Dominus in celo sedes eius*, pro sedes Domini est in celo, vel Dominus in celo sedem habet.

V. Oculi eius in pauperem respiciunt, palpebra eius interrogant filios hominum.

Ex throno illo altissimo, cui nihil abscondi potest, respicit Deus pauperes proinde nihil mali accidere potest hominibus Deo non sciente, aut non permittente, quæ est maxima consolatio Iustorum. Quod sequitur declarat magis prouidentiam Dei. Non solum enim Deus videt homines, sed videndo discernit, ac diiudicat bonos, & malos, & omnia eorum opera. In Hebræo non habetur, *in pauperem*, sed similitur,

oculi eius respiciunt, sed Septuaginta addiderunt, *in pauperem*, explicandi gratia. Præterea, pro, *interrogant*, habetur in Hebræo, *proant*, sed eadem sententia est. Metaphorice enim dicitur Deus interrogare, siue probare, id est, tentare, siue examinare, quando perfecte discernit ac diiudicat, quod homines non possunt sæpenumero facere nisi interrogando, & examinando. Illud, *palpebra eius interrogant*, nihil significat aliud, nisi oculi eius perfecte discernunt quoniam enim Psalmi poetice scripti sunt, ideo, figuris multis scatent. Itaque palpebra ponuntur pro oculis, & oculi pro mente, & interrogare; pro exacte cognoscere, ac si exactissime prius interrogasset, & examinasset.

Dominus interrogat Iustum, & impium: qui autem diligit iniquitatem, odit animam suam.

VI.

Non solum Deus exacte cognoscit Iustum, & impium, sed etiam pro meritis eos remunerat, vel punit. Et ideo *qui diligit iniquitatem, odit animam suam*, id est, se ipsum, quoniam propter iniquitatem grauissime punitur. Ex Hebræo potest etiam reddi, *diligentem iniquitatem odit anima eius*, id est, Deus odit eos, qui amant iniquitatem, & sic vertit sanctus Hieronymus. Vterque sensus est verus, & vtrunque patiuntur verba Hebraica. Mira sententia est, & elegantissima. *Qui diligit iniquitatem, odit animam suam*. Nam qui diligit iniquitatem, videtur diligere animam suam, id est, se ipsum, quia, vt sibi ipse satisfaciatur, peccat, & tamen reuera odit animam suam ac perdit. Hoc est quod Dominus, ait, *qui amat animam suam, perdet eam*, id est, qui male se amat vere se odit.

Pluet super peccatores laqueos, ignis, & sulphur, & spiritus procellarum pars calicis eorum.

VII.

Hæc est ratio, cur iniqui oderint animas suas, quia Dominus pluet, siue, vt in Hebræo expressius legitur, *pluere faciet super peccatores laqueos*, id est, in hac vita immitteret laqueos in maxima copia quasi guttas pluuiæ.



pluuiæ in peccatores, id est, finet eos quotidie inuolui plumbis, & maioribus peccatis percutiendo eos cæcitate, & tradendo eos in reprobum sensum; quæ est pœna horrenda, & grauissima; deinde in alia vita, ignis, & sulphur, & spiritus procellarum, id est, venti rigidissimi, & vehementissimi in gehenna erunt pars calicis, id est, portio, & hæreditas ipsorum. Obseruandum est hoc loco, nomine calicis intelligi hæreditatem, vt etiam alibi saepe in Scriptura. vt eo loco, *Dominus pars hæreditatis meæ, & calicis mei*: vbi idem intelligitur dictum duobus vocabulis, & ideo addit: *Tu es qui restitues hæreditatem meam mihi*: dicitur autem hæreditas calix, quia sicut calix in mensa, saltem in cœna paschali diuidebatur inter conuiuas, vnde est illud, Luc. 22. *Accipite, & diuidite inter vos*: ita hæreditas diuiditur inter filios eiusdem patris. Eadem quoque hæreditas interdum vocatur pars, vel portio, vt *pars mea Dominus*; & alibi, *portio mea Dominus*, interdum pars hæreditatis, vt loco citato, *Dominus pars hæreditatis meæ*: vbi non significatur, Dominum esse partem hæreditatis, ita vt aliunde sit quærenda alia pars, sed significatur Dominum esse partem, quæ sibi contigit ex hæreditatis diuisione, ita vt idem sit hæreditas, & pars hæreditatis; sic etiam idem est calix, & pars calicis, id est, portio illa, quæ vni debetur ex diuisione calicis. Pulchrè autem filiis Diaboli, quibus Dominus ait, *Vos ex patre Diabolo estis*, tribuitur hæreditas, quam Diabolus possidet, id est, pœna horribilis significata per ignem, & sulphur, & spiritum procellarum.

VIII.

*Quoniam iustus Dominus & iustitiam dilexit, æquitatem vidit vultus eius.*

Hæc vera ratio est, cur Deus tam atrociter impios puniat, quia iustus est ipse in se: Deus enim lux est, & tenebræ in eo non sunt vllæ, 1. Ioan. 1. *Et diligit iustitias*, id est, opera iusta in omnibus aliis, quos ad suam imaginem creauit. Id ipsum repetit, dicens: *Æquitatem vidit vultus eius*: nam per æquitatem hoc loco intelligitur rectitudo, vt sonant vocabula Hebraicum, & Græcum,

rectitudo autem est quasi declaratio iustitiæ. Non enim hic agitur de iustitia, quæ est vna ex quatuor virtutibus Cardinalibus, quæ est iustitia particularis, ponens medium in commerciis hominum; sed de iustitia vniuersali, quæ complectitur omnes virtutes, & est quædam rectitudo totius hominis, cuius quasi compendium est charitas Dei, & proximi, nam *sint præcepti charitas*, 1. Tim. 1. *Et qui diligit, legem impleuit*, Rom. 13. Illud autem, *vidit vultus eius*, non significat simplicem visionem, sed visionem approbationis, iuxta illud Psalm. 1. *Novit Dominus viam iustorum*. Adem igitur est, *iustitiam dilexit, & æquitatem vidit*, id est, rectitudinem approbavit vultus eius, id est, oculus eius.

## P S A L M V S X I.

*Titulus, & Argumentum Psalmi.*

In finem pro octaua Psalmus David.

**D**E hoc titulo dictum est in Psalmo 6. *Argumentum huius Psalmi est, fidendum in Deo, & non in hominibus, quod verba hominum plerumque sint fallacia, Dei autem semper verissima, & fidelissima.*

## EXPLICATIO PSAL. XI.

**S**aluum me fac Domine, quoniam defecit sanctus, quoniam diminutæ sunt veritates à filiis hominum.

Tu Domine à periculis omnibus salua me, quoniam non est alius in quo fidere possim: nam defecit sanctus, id est, vix inuenitur in mundo aliquis verè pius, & misericors (id enim proprie sonat vox Hebraica) nec solum defecit misericors, sed etiam verax: *diminutæ sunt enim veritates à filiis hominum*, id est, vix inuenitur, qui verum simpliciter dicat. Itaque perit fere de terra misericordia, & veritas. In Hebræo habetur, *emunim*, quod S. Hiero. vertit, *fideles*, vt hæc sit sententia, imminuti sunt fideles à filiis hominum, sed eadem vox significat etiam veritatem, seu veritates, & sensus est idem.

*Vana loquuti sunt vnusquisque ad proximum*

II.



*imum suum, labia dolosa in corde, & corde locuti sunt.*

Probat defecisse sanctum, i. misericordem, quoniam homines, ut plurimum, non loquuntur proximis utilia & bona, sed vana quæ à periculis eruere non possunt, unde etiam in ultra loquuntur, quomodo vertit S. Hiero. Probat quoque defecisse veritatem, quoniam *labia dolosa*, i. homines, quia labia dolosa dici possunt, in corde, & corde, i. duplici corde locuti sunt, vnum volentes loqui, & aliud volentes facere, & sic decipere. In Hebræo adverbium est, *labium diuisionum*, i. labium autem diuisionum seu duplex, ex corde diuiso seu duplici oritur. Quia vero quæ leniuntur, diuiduntur; ideo eadē vox significat in Scripturis *labium bladiarum*, & adulationum; & quia omnis adlatio decipit, ideo recte verterunt tam Septuaginta quam S. Hier. *labia dolosa, seu subdola*, in Græco additur *mala, in corde, & corde locuti sunt mala*, sed ea vox neque in Hebræo, neque in Latinis emendationibus habetur.

III.

*Disperdet Dominus vniuersa labia dolosa, & linguam magniloquam.*

Imprecatio prophetica est, per modum enim imprecationis prædicit, fore, ut omnes, qui decipiunt, decipiantur: & dum putant se multum lucrari suis fraudibus: perdant omnia, & ipsi etiam pereant in æternum. Illud, & *linguam magniloquam*, significat linguam se iactantem ob suos dolos & fraudes, ut patet ex versic. seq. In Hebræo & Græco non habetur cōiunctio &, ex quo intelligimus, hic non reprehendi duo genera hominum, dolosos & superbos, sed dolosos tantum, qui tamen confidunt in suis dolis, & ideo magnificiunt sua labia dolosa, & de illis magnifice loquuntur. Proinde editio Latina, quæ habet cōiunctionem, ad eundem sensum reducenda est & commodè reducit, ut nos explicuimus.

IV.

*Qui dixerunt, linguam nostram magnificabimus, labia nostra à nobis sunt, quis noster Dominus est?*

Explicat cur coniunxerit linguam magniloquam cum labiis dolosis, quia videlicet dolosi confidunt maximè in sua lingua: ita ut

nulla re alia indigere se credant, nec ulli Domino subiecti esse debeant. *Qui dixerunt*, inquit, videlicet apud se in animo suo, *linguam nostram magnificabimus*, i. linguam nostram magnificemus, illi tribuentes omnia nostra bona quæ per illam lucratur: ex Hebræo alii qui vertunt, *linguam nostram roborabimus*, verbū enim *gabar*, significat grauem & robustum esse, sed accipitur etiam pro quacunque magnitudine, & ideo *nagbir*, quod habetur hoc loco, recte vertitur *magnificabimus*, nam etiam apud Latinos vir grauis non solum refertur ad pondus molis, sed etiam ad magnitudinem virtutis. *Labia nostra à nobis sunt*, ambiguum est in Latino, sed ex Hebræo & Græco constat, sensum esse, *labia nostra nobis sunt*, pro nobis faciunt, à parte nostra pugnant. Itaque pergit Propheta explicare confidentiam, quam habent dolosi in suis labiis, tanquam in instrumento optimo ad præualendum aliis hominibus. Ideo subiungit, eos dicere, *quis noster Dominus est?* q. d. non agnoscimus vllum superiorem, cum per instrumentum linguæ omnes alios subiiciamus.

*Propter miseriam inopum, & gemitum pauperum nunc exurgam, dicit Dominus.*

Docuit Propheta non esse confidendum in hominibus: nunc docet esse confidendum in Deo, cuius promissa fidelissima sunt; docet autem hoc poetice introducendo ipsum Deum loquentem, & promittentem auxilium suum humilibus & afflictis. *Propter miseriam*, inquit, *inopum*, qui à dolosis decipiuntur & affliguntur, unde & gemere necesse habent: non differam auxilium, sed *nunc exurgam* quasi à somno, eisq; adero.

*Ponā in salutari, fiducialiter agam in eo.*

Explicat quid sit facturus cum surrexerit. *Ponam*, inquit, *in salutari*, i. colloco eos in salute, stabiliam illos in salute: ut semper salui consistent: *fiducialiter agam in eo*, i. nemo me impediet: audacter & libere agam in hac re. Exprimit vox Græca *παρρησιόσως* hoc loco confidentiam & libertatem atque audaciam. Ex Hebræo S. Hiero. vertit: *Ponam in salutari auxilium eorum*. Sed nescio quid in hac re secutus sit: nam vox Hebræa, *laphiachlo*, significare potest, sufflabit in eum, vel

אבר  
נאביר

V.

VI.

וּפִיחֵל  
vel



vel illaqueabit eum, vel aspirabit ei. Ceterum Septuaginta Interpretes videntur legisse in prima persona, *Aphichlo, afflabo in eo*, siue aspirabo ei, id est, vnicuique pauperum aspirabo, & fauebo, & quia spiritus ubi vult spirat, & ubi spiritus Domini, ibi libertas: ideo fortasse vertuntur, *fiducialiter agam*, id est, libere aspirabo, & fauebo.

VII. *Eloquia Domini, eloquia casta, argentum igne examinatum, probatum terra, purgatum septuplum.*

Docet iam Propheta promissionem Dñi explicatam verbis duobus superioribus, non esse similem promissionibus hominum dolosorum, sed esse verissimam & fidelissimam. *Eloquia Domini*, inquit, *casta*, i. munda & pura, vt sonat vox Hebraica, non fucata, non simulata, sincera, fidelia. *Argentum igne examinatum*, i. sunt eloquia, siue promissa Dei veluti argentum verissimum in sono, pondere & candore, quale est argentum in igne probatum, nec solum probatum in igne, sed etiam *probatum terra*, i. populis terræ approbatum, videlicet ab hominibus peritis metallorum: denique *purgatum septuplum*, i. non semel sed sæpius per purificationem (vt exprimit vox Hebr.) purgatum à scoria. In Hebræo illud, *purgatum terra*, est valde obscurum: S. Hiero. vertit, *separatum à terra*: alij à Domino terræ, nimirum *purgatum septuplum*: alij in vase siue in camino, sed cum vox *baabil*, non habeatur nisi hoc loco, nulla est ratio cur non debeamus acquiescere interpretationi LXX. Interpretum, quibus lingua Hebraica notissima erat. Quicquid n. alij dicant, diuinitio potius erit quàm interpretatio.

VIII. *Tu Domine seruabis nos, & custodies nos à generatione hac in æternum.*

Colligit ex dictis, Deum facturum quod promissit. Tu, inquit, iuxta promissa tua, *seruabis nos*, id est, custodies nos, non enim hic est verbum saluandi, vel salutis neque in Græco, neque in Hebræo: sed simpliciter conseruandi, & custodiendi. In Hebræo habetur, *seruabis ea*, nimirum eloquia tua, & custodies nos: sed Septuaginta legerunt, *seruabis nos*, & facillima fuit mutatio, quia maxima est similitudo inter *ea*, quod

significat *ea*, & *nos*, quod significat nos, sed vterque sensus est optimus.

*In circuitu impij ambulans: secundum altitudinem tuam multiplicasti filios hominum.*

Quasi quæreret aliquis, Quid de impiis fiet, dum tu seruabis nos? Respondet, impij interea, dum nos quieti sumus sub alis tuis, in circuitu ambulant, semper ambientes bona huius mundi, & nunquam ad finem desideriorum suorum peruenientes, semper autem erunt impij ambientes, dum hic mundus durat: quia *secundum altitudinem tuam multiplicasti filios hominum*: & *Stultorum infinitus est numerus*. Videntur in fine huius Psalmi oēs editiones inter se dissidere, Hebræa ad verbum habet, *In circuitu impij ambulans, dum exaltantur vilitates filiorum hominum*, id est, dum exaltantur, & regnant homines vilissimi, tunc impij ubiq; discurrunt: Græca vero sic habet, *In circuitu impij ambulans, secundum altitudinem tuam sollicitudinem gessisti de filiis hominum*: sed Græca, & Latina facile concordantur, nam Deus secundum altitudinem suam maximam sollicitudinem gessit de specie humana, & ideo ne ea periret, præ omnibus aliis speciebus eam multiplicauit: proinde Latinus Interpres reddidit sensum, cum ait *multiplicasti*. Et quia in magna multitidine, paucorum est perfectio, ideo *stultorum*, vt citauimus ex Salomone, *infinitus est numerus*, & ideo impij semper & ubiq; inueniuntur in circuitu ambulantes. Hebræa & Græca non videntur posse concordari, nisi Septuaginta aliter legerint: & fortasse non est improbabile eos legisse, *Dallota*, vel *Dillita*, non *zallor*, vt nunc habemus: vnica enim littera mutata fit aliud verbum, quod ex Itali significat, vel suscipere, vt Septuaginta verterunt in primo versiculo Psalmi 29. *Exaltabo te Domine, quoniam suscepisti me*. Sensus tamen semper est verus, & non contradicit vna lectio alteri, quamuis diuersa dicant.

# PSALMVS XII.

*Titulus, & Argumentum.*

*In finem, Psalmus Dauid.*

DE



**D**E hoc titulo nihil occurrit dicendum. Argumentum Psalmi est oratio ad Deum tempore tentationis.

## EXPLICAT. PSALM. XII.

- I. **V**squequo Domine obliuisceris me? in fine? vsquequo auertis faciem tuam a me

Qui tentatur, duo mala pati solet, praua desideria in voluntate, & tenebras in intellectu. Quando praua desideria valde urgent, tunc videtur Deus obliuisci, & deferere animam, quando tenebre obscurant intellectum, videtur Deus auertere faciem suam ab anima. Ipse enim lux est, & ideo illuminat, cum conuertit faciem; in tenebris relinquit, cum auertit. Propter primum dicit homo in tentatione positus: *Vsquequo Domine obliuisceris me in fine?* propter secundum dicit, *Vsquequo auertis faciem tuam a me?*

- II. **Q**uamdiu ponam consilia in anima mea? dolorem in corde meo per diem?

Inuerso iam ordine queritur primo de tenebris quas patitur: secundo de prauis desiderijs, quae inuitus tolerat: *Quamdiu*, inquit, propter obscurationem intellectus ponam consilia in anima mea? i. varia consilia excogitabo, ut à malo praesenti liberari possim? quamdiu rursus propter desideria instantia cor meum, ponam dolorem in corde meo? i. assumam dolorem ac tristis ero, ne forte Deum meum offendam, atque id faciam per diem, i. tota die sine intermissione vlla. In Graeco additur, & per noctem. Sed hoc non habetur in Hebraeo, neque legitur à S. Aug. proinde recte omisum est in editione Latina.

- III. **V**squequo exultabit inimicus meus super me? respice & exaudi me Domine Deus meus.

Prima pars huius versiculi complectitur vtrumque malum: tunc enim exaltatur inimicus super hominem, quando opprimit eum, tum ingerendo praua desideria, quae homo non potest excutere; tum tenebras offundendo, quas non potest dissipare. Ideo quasi vim patiens clamat ad Deum: *Vsquequo exultabit inimicus meus super me?* Deinde inuocat auxilium contra vtrumque malum, *Respice*, inquit, i. conuertere faciem

tuam, & exaudi me, i. ne obliuiscaris, ne deferas, adiuua exoratus.

*Illumina oculos meos ne vquam obdormiam in morte, ne quando dicat inimicus meus, prauaui aduersus eum.*

Iterum clarius eandem orationem repetit: *Illumina*, pelle tenebras mentis conuertendo ad me faciem, meque respiciendo: *nequando obdormiam in morte*, i. ne consentiens desiderijs in mortem animae incidam. Vocat Scriptura passim somnum ipsam mortem, siue corporalem, siue spiritualem: quia Deo tam facile est mortuum ad vitam reuocare, quam nobis facile est dormientem à somno excitare. Præterea illud, *ne vquam obdormiam*, significat, hominem cedendo tentationi quasi obdormiscere, nec amplius sentire cruciatum ex tentatione: sed quia ista quies non est salutifera, sed mortifera, ideo additur, *in mortem*. Itaque cum duobus modis homo liberetur à molestia tentationis, vel per gratiam Dei fugato tentatore, vel per consensum in peccatum satiata libidine: petit liberari primo modo, ne forte cum suo maximo detrimento liberetur secundo modo, videlicet, obdormiendo per consensum in peccatum. Addit deinde rationem, quare cupiat liberari à tentatione dicens: *Nequando dicat inimicus meus, prauaui aduersus eum*: i. ne gloriatur diabolus à se victum seruum Dei: quod etiam in iniuriam Dei cederet.

*Qui tribulant me exultabunt si motus fuero, ego autem in misericordia tua speraui*

Explicat rationem superiorem, quasi dicat, non sine causa dixi, *nequando dicat inimicus, &c.* nam exultabunt qui tribulant me, si motus fuero, i. non solum si plane cessero tanquam victus, sed etiam, si paulisper nutare coepero: sicut enim gaudium est in caelo super vno peccatore poenitentiam agente, quàm super nonaginta nouem iustis, qui non indigent poenitentia: sic etià magis daemones exultant, si virum aliquem perfectum ad inchoandum peccatum induxerint, quàm si multos peccatores in peccatis maximis volutari fecerint: exemplum est apud S. Gregor. lib. 3. Dialog. c. 7. Atque hinc apparet Psalmum hunc scriptum esse

IV.

V.



esse pro liberatione Iusti à tentatione diabolica, non vt aliqui volunt, pro liberatione Dauidis à persecutione Saulis. Dauid n. in illa persecutione quotidie loca mutabat. Itaque non dixisset, *si motus fuero, exultabit inimici mei*, quasi pro magno haberet, non moueri. Quod sequitur, *Ego autem in misericordia tua speraui*, est altera ratio, cur deceat eū iuari à Deo, quia nimirū fretus misericordia Dei, & non viribus propriis tētatori resistat.

VI.

*Exultabit cor meum in salutari tuo, cantabo Domino, qui bona tribuit mihi, & psallam nomini Domini altissimi.*

Hęc est vltima ratio qua Deum ad subueniendū flectere conatur, quia videlicet liberatus à tentatione non erit ingratus liberatori sed corde, ore, & opere beneficiū celebrabit. Ad cor pertinent prima illa verba, *Exultabit cor meum in salutari tuo*, i. prae lætitia gestiet cor meum cum salutem obtinuerit, eam à te recognoscendo, teque ob eam laudando. Ad os pertinent sequentia. *Cantabo Domino qui bona tribuit mihi*. In Hebræo non habetur *bona*, sed solum verbū, *tribuit*, vel potius, *retribuit*. Sed Septuaginta declarauerunt illud retribuit, vertendo, *benefecit mihi*, & Latinus interpres adhuc clarius, *qui bona tribuit mihi*, sed sensus est idem, nā Deus fiducię retribuere solet, protectionē, ideo Dauid Hebraicavocē dixit *retribuit mihi*, protectionem se in se confidēti, & quia liberatio à tentatione, est liberatio à verissimi, & maximi mali periculo; ideo recte Græcus, & Latinus addiderunt vocabulum, *bona* nimirū veri, & maximi boni. Denique ad opera pertinent vltima verba, & *psallam nomini Domini altissimi*. nā psallere proprie est manu citharam pulsare. Dauid, inquit Scriptura, *psallebat manu sua*: & alibi, *In psalterio decachordo psalla tibi*. Itaque pmittit, se corde exultatum, ore cantatum, manu instrumentū musicū pulsaturū, vt totus homo seruiat Dei laudib⁹, *psallere à nomini Domini*, est psallere in gloriā Domini, i. ad celebrandas eius laudes. In Hebræo non habentur hęc vltima verba & *psalla nomini Domini altissimi*: sed fortasse diuturnitate temporis exciderunt. Certe cū superioribus optime cohererent, & sunt in Græcis

codicibus, & citantur, atque explicantur à patrib. Hieron. & August. Theodoro eto & Euthymio. Mystice, psallere nomini Domini est opera consona cordi, & verbis efficere, vt videntes homines opera nostra bona glorificent Patrem nostrum, qui in coelis est.

## PSALMVS XIII.

Titulus, &amp; Argumentum.

In finem Psalmus David.

**T**itulus nihil habet noui: argumentū vero est deploratio natura humana corrupta, qualis precipue cernitur in infidelibus, in quibus nondum cœpit sanari per gratiam.

## EXPLICATIO PSALMI XIII.

**D**ixit insipiens in corde suo, non est Deus.

I.

Ad tantam insipientiam deuenit humana natura in primo homine corrupta; vt inuentus sit aliquis, qui tametsi voce non sit ausus negare Deū esse; tamen in corde suo dixerit, *non est Deus*. Non significat Dauid vnum certum hominem insipientem hoc dixisse, sed vult dicere, homines mēte corruptos ad tantam cecitatem peruenire, vt fiant insipientes etiam circa vltimum finē, & cogitent nullum esse Deum, qui res humanas curet, & cui rationem reddere teneātur. *Dixit, inquit, insipiens*, i. homo ad summam insipientiam reductus, *dixit in corde suo, non est Deus*, id est, cogitare cœpit, nullum esse Deum.

*Corrupti sunt, & abominabiles facti sunt in studijs suis, non est qui faciat bonum, non est vsque ad vnum.*

II.

Illud vsq; ad vnum, non habetur in editione Hebræa, & Græca. In Latino habetur, & citatur, & exponitur à S. Hieron. & August. Dixit Propheta, corruptam fuisse mentē, & insipientem factam; nunc addit, corruptam quoq; fuisse voluntatē, ita vt plerūq; homines peccent, bene autē nunquā faciant, aliud enim est non peccare, aliud benefacere, si loquamur de opere absolute, & perfecte bono. Homines n. fide, & gratia destituti, solis viribus corruptę naturę vtentes, plerūq; peccāt; sed aliquando etiā faciūt opera quædā bona, moralia, quę peccata dici non possunt sed nō sunt

G



Sunt perfectæ; & absolute bona, vt S. August. disputat. lib. 4. in Iulianū; cū ad summū bonū nō pducāt. Ait igitur Dauid *Corrupti sunt, & abominabiles facti sunt in studijs.* i. in desiderijs, siue affectib. suis: corrupta, & abominabilia desideria habēt, vnde ipsi quoq; corrupti, abominabiles sunt. *Nō est qui faciat bonū, nō est vsq; ad vnū* corrupti quidē sunt homines in desiderijs, & iniquitate, sed non ita generatim; vt omnia desideria, & omnia opera sint corrupta, & iniqua. Certe n. cum infidelis ex humana inclinatione miseretur pauperis, vel curā gerit filiorū, nihil mali facit, At bonū perfectæ, & absolute nullus omnino ex solis corruptę naturę virib. facit. Hinc habes verā huius loci intelligentiā nihil omnino facere pro hæreticis huius tēporis, qui testimonio Psal. hui⁹ abutūtur ad probādū, omnia opera hominis peccatoris siue non renati esse peccata.

III. Dominus de cœlo prospexit super filios hominum, vt videat, si est intelligens, aut requirens Deum.

IV. Omnes declinauerunt, simul inutiles facti sunt, non est, qui faciat bonum, non est vsque ad vnū.

Dixerat, naturam humanā esse corruptā tū quo ad mentē, tū quo ad voluntatē: ostēdit nunc, vnde id cognouerit, nimirū ex reuelatione Dei. De⁹ n. qui omnia nouit, videt hoc ita esse, & Prophetis suis reuelauit. Describit more humano Deum quasi respexisse de cœlo. i. de sublimi specula sua, vt videret, an esset aliquis intelligens. i. nō corruptus, quo ad mentē, aut requirēs Deū. i. nō corrupt⁹ quo ad voluntatē, qui proinde intelligeret, & amaret, atq; adeo quæreret Deū, qui est summū bonū Quid autē Deus cognouerit. i. nos cognoscere fecerit, explicat illis verbis. Omnes declinauerunt, siue auersi sunt. i. vidit omnes omnino declinasse à lumine sapientię, & à semitis iustitię, imo auersos esse, ac tergavertisse sapientię, & iustitię. Simul inutiles facti sunt. i. vidit omnes pariter inutiles Deo esse factos, quippe qui eum nō colūt, neq; ei seruiūt, neq; tributū gratiarū actionis rependunt. Deniq; vidit, nullum esse, qui faciat opus perfectæ, atq; absolute bonum. Quamuis autē hec generatim dicantur: tamen intelliguntur solū de

hominibus, quales sunt ex natura corruptas: non autem quales sunt ex gratia Dei. Nam Gen. 6. dicitur, *Omnis caro corrupta erat viā suā,* & tamen ibidem dicitur, *Nōc vir iustus fuit, atque perfectus.* S. Hier. ex Hebræo pro illis verbis. *Simul inutiles facti sūt,* vertit, *Pariter adhaeserunt, siue agglutinati sunt,* Sed nescio quid sequutus sit. Nam vox Hebraica, *nealachu,* significat, putrescere & foetere: & verti potuisset, putrefacti sunt, ac proinde inutiles facti sunt. Res enim putrefactę nulli sui sūt.

*Sepulchrum patens est guttur eorum: linguis suis dolose agebant: venenum aspidum sub labijs eorum.*

*Quorum os maledictione, & amaritudine plenum est, veloces pedes eorum ad effundendum sanguinem.*

*Contritio & infelicitas in viis eorum, & viam pacis non cognouerunt, non est timor Dei ante oculos eorum.*

Hi tres versiculi non sunt in Hebræo, neq; in trāslatione Septuaginta Interpretum, vt S. Hier. testatur tum in Præfatione lib. 16. in Isaiā, tum in Commentario huius loci. Imo nec omnino idē cum hoc 13. Sed quia B. Paul. ad Rom. 3. ex diuersis locis Scripturę videlicet Psal. 5. Psal. 39. Psal. 9. Isaię 19. & Psal. 35. hos omnes versiculos simul citauit, posteaquam allegauerat duos versiculos proxime explicatos, arbitrati sunt aliqui veterū, hos oēs versiculos ad hunc Psalmū pertinere, & casu aliquo excidisse, ideo eos ex Apostolo huc trāstulerūt. Significat autē his versiculis malitiā hominū impiorum, qui verbo & opere nocēt proximis suis. *Sepulchrū patens est guttur eorū.* i. sicut ex aperto sepulchro exhalat fetor corporū mortuorū, ita ex ore istorū pdeunt verba turpia testātia corruptionem cordis. *Linguis dolose agebāt.* i. non solū verba turpia, sed etiam dolosa loquuntur. Venenum aspidum sub labijs eorum. i. non solum turpia, & dolosa, sed etiam venenata, & inficientia, atq; ad malum prouocantia verba effundunt. *Quorū os maledictione, & amaritudine plenus est, veloces pedes eorū ad effundendū sanguinē.* homines isti perdiri nō solū maledicunt, & amaris.



contentionibus iurgantur, sed etiam malefaciunt, & re ipsa nocent. Nā quorum os plenum est maledictione, & amaris comminationibus, eorum pedes velocissime currunt ad ledendum, & occidendū. *Constitutio, & infelicitas in vijs eorū, & via pacis nō cognouerunt.* i. omnia eorū studia ad conteređū, vastandū, calamitate afficiēdum spectant. Siquidē pacis viā. i. studia pacifica omnino ignorant. *Non est timor dei ante oculos eorū.* Hic est fōs omnī supra dictorū malorū, q̃a timorē Dei plane abiecerunt, dicētes in corde suo. *Nō est de⁹.* Redeam⁹ nunc ad versiculos hui⁹ Psalmi proprios.

VIII. *Nonne cognoscent omnes, qui operantur iniquitatem, qui deuorant plebem meam, sicut escam panis?*

Ex hoc versiculo manifeste colligitur, quē supra dicta sūt de vniuersali corruptione generis humani, esse intelligēda de genere humano quale est ex se. i. secundum vires solius naturæ corruptæ. Nā per gratiā Dei homines vere iusti, & pii efficiuntur: & hos vocat hoc loco plebē suā; quā impij illi persequuntur, & pro nihilo habent. *Nonne cognoscent,* & c. vox est increpantis, quasi dicat, Nunquid semper erunt insipientes? nunquid nō aperiēt aliquādo oculos? nūquid tandē nō incipiēt cognoscere? *Qui deuorant plebē meā, sicut escā panis,* significat impios, ex hoc tanto malo potuisse admoneri suæ iniquitatis. Sicut n. panis quotidie cōeditur, & sēper sapit: ita impij sēper & cū delectatione vexāt pios, & nunq̃ satiātur.

IX. *Dominum non inuocauerunt, illic trepidauerunt timore, ubi non erat timor.*

Reddit Dauid rationem, cur impij tanta mala faciant, quia videlicet Deum nō inuocauerunt, i. spem suam in Deo vero non posuerunt, sed in rebus creatis, & ideo illic trepidauerunt, ubi non erat timor. i. non cognoscentes in quo sit sperandum, & a quo sit timendum, trepidauerunt, ne incurrerēt mala temporalia, vel ne amitterent bona temporalia, quæ nō sunt materia iusti timoris, cum parua, & caduca sint; & etiam quia si sperarent in Domino, & quererent regnum Dei, & iustitiam eius, hæc omnia adijcerentur eis.

X. *Quoniam Dominus in generatione iusta est: consilium inopis confudisti, quoniam Dominus spes eius est.*

Hic versiculus reddit rationē, cur impij amatores hui⁹ sæculi timeāt, ubi nō est timor. Impij timuerunt ubi non erat timor, *quoniam Dominus in generatione iusta est,* siue iustorū (vt habet text⁹ Græcus) i. sicut impij Deum nō inuocauerunt, nec in illo sperauerunt, ita Deus eos deseruit, & in generatione iustorū manet: deserti autē à Deo, à luce vera, ab ipsa veritate in tenebris ambulāt, & ideo timent ubi non est causa timendi, Deinde facit apostrophē ad ipsos impios, dicens, *Consiliū inopis confudisti, quoniam Dominus spes eius est,* quasi dicat, adeo vos excecati estis, vt nō solum nō inuocetis Deū, sed irrideatis eos, qui id faciunt. *Nā consiliū inopis,* qui totus à Deo pēdet, vos confudisti. i. irrisisti, vt inopē erubescere faceretis, quasi stultum sit in Deo spē ponere. Irrisisti autē inopis consilium, quasi stultum, *quoniam Dominus spes eius est.* i. quia illi pauper in Domino spem posuit, videtur n. stultum cōsiliū hominib⁹ huius mundi, sperare in Deo, qui non videtur, & non sperare in diuitiis, & aliis rebus, quæ videntur.

XI. *Quis dabit ex Sion salutare Israel, cū auerterit Dominus captiuitatem plebis suæ, exultabit Iacob & latabitur Israel.*

Hic versiculus postremus orat Deum pro celeri aduentu Saluatoris, qui liberet genus humanum à captiuitate diabolica, in qua erant omnes illi excecati & peruersi, quorum tenebras, & malitiā toto Psalmo descriperat. *Quis dabit ex Sion salutare Israel,* i. vtinam cito veniat salus ex Sion ipsi Israeli. *Salus enim ex Iudæis est,* vt ait Dominus Samaritanæ: nec solum ex Iudæis. i. ex tribu Iuda sed ex familia Dauid, cuius ciuitas dicebatur Sion. Itaque expectabatur, & desiderabatur salus, siue Saluator promissus ex Sion ciuitate Dauid. i. ex stirpe Dauid, qui saluaret Israel, i. populum suum. Dicitur autē Christus Saluator Israelis populi sui, quia tamen si pro toto mundo venerit, tamen re ipsa non saluauit, nisi certos quosdam, qui dicuntur populus Dei, & spiritualis Israel. *Cum auerterit, siue conuerterit captiuitatem populi sui, exultabit Iacob, & latabitur Israel.* i. oro ac peto salutē ex Sion, ac proinde Saluatorem qui liberet à captiuitate, quia cum id factum fuerit, tūc



vere & perfecte exultabit, & letabitur populus Dei, qui dicitur spiritualiter Iacob, & Israel, utrumque enim est nomen eiusdem hominis. Promissiones autem istas, & alias similes non pertinere ad solos carnales Israelitas, sed ad populum Dei, partim ex Iudeis, partim ex Gentibus congregatum, docet Apost. in epistola ad Rom. & copiosius August. in epist. 200. ad Afellicum.

## PSALMVS XIV.

Titulus, & Argumentum.

In finem Psalmus David.

**T**itulus nihil habet noui. Argumentum vero est scientia salutis: nam in hoc Psalmo describitur via ad vitam aeternam.

## EXPLICATIO PSALMI XIV.

I. **D**omine quis habitabit in tabernaculo tuo? aut quis requiescet in monte sancto tuo.

Ex Hebræo vertunt aliqui. *Quis peregrinabitur in tabernaculo tuo, aut quis habitabit in monte sancto tuo?* Sed vox Hebraica *gur*, significat utrumque, peregrinari, & habitare; sicut etiā *Sciacan*, significat habitare, & quiescere. Itaque non potest reprehendi versio Græca, neque Latina. Alludit Propheta ad montē Sion, & ad tabernaculum Dei, quod in eo monte erat; sed re vera per hæc nomina significat celestem Hierusalem, ubi est tabernaculū Dei non manufactū. Propheta n. prædicabant Regnū cælorum per huiusmodi figuras. Vnde B. Paul. ad Heb. 8. & 9. sæpius meminit tabernaculi cælestis, & c. 12. vocat montē Sion, ipsum cælōrum habitaculum, & B. Ioan. in Apo. c. 14. meminit montis Sion cælestis, & c. 21. ait. *Ecce tabernaculum Dei cum hominibus, & habitabit cum eis, &c.* Querit igitur Propheta, quis sit habitaturus, i. stabili mansione potiturus in tabernaculo celesti aut requieturus in vertice montis altissimi, in quo finitur omnis labor ascensionis, cum supra illud nihil sit. Hic enim in terris, neque stabilis mansio, neque vera quies esse potest.

II. *Qui ingreditur sine macula, & operatur iustitiam.*

Hæc est cōpendiosa & summaria responsio, quasi dicat, *Qui declinat à malo, & facit*

bonū, siue, qui neque commissione culpe, neque omissionē iustitię Deum offendit. Dicitur ingredi sine macula, qui ambulat in via huius vitæ, i. qui viuit sine culpa lethali Veniale n. peccatū nō proprie relinquit maculā. Dicitur operari iustitiam, qui facit omnia ad quę tenetur non timore pene, sed amore iustitię.

III. *Qui loquitur veritatem in corde suo, qui non egit dolum in lingua sua.*

Explicat magis in particulari quis habitaturus sit in tabernaculo Domini, ac dicit illū esse, qui neque corde, neque ore, neque opere malum operatur. De corde, dicit, *qui loquitur veritatē in corde suo.* Nā omnis, qui res temporales pluris æstimat, quā valeant, nō loquitur veritatē in corde suo; & quicunque in peccatum aliquod consentit, loquitur falsum in corde suo, quia iudicat expedire sibi id, quod vera sibi non expedit. Ita omnia peccata cordis reduci possunt, tanquā ad radicē ad falsū iudiciū. De ore dicit, *qui non egit dolum in lingua sua;* nam tā detractiones, quā adulationes, & alia id genus peccata linguae ad dolum reuocari possunt. De opere, dicit in seq. versic.

IV. *Nec fecit proximo suo malum, & opprobrium nō accepit aduersus proximos suos.*

V. *Ad nihilum deductus est in cōspectu eius malignus, timētes autē Dominū glorificat.*

Non solum non fecit ipse malum, qui habitaturus est in tabernaculo Domini, sed nec promisit, quantū in se fuit, ut alij malū facerent. Ideo nō accepit opprobriū aduersus proximos suos, i. non admisit ad aures suas vituperationes detractiones, susurrations, calūnias contra proximos, & non fauit in quā malignis, sed eos cōtempnit, & pro nihilo duxit: contra autē glorificauit, honorauit, iuuuit viros bonos, qui Deū timēt. Magna est hæc laus non solum in se odisse malū, sed etiā in alijs.

VI. *Qui iurat proximo suo, & non decipit, qui pecuniam suam non dedit ad vsuram, & munera super innocentem non accepit.*

Exposuit in genere virtutes viri pbi; nunc in particulari attingit vitium vnum, videlicet auaritiā, quo præcipue carere debet qui cupit hæres fieri Regni cælestis. Cur autē hoc particulare vitium attingat, causa est, vel quia ra-



*dix oīum malorū est cupiditas, vt ait Apost. ad Tim. & per cupiditatem intelligit auaritiā q̄ vocat philargyriam, i. amorē pecuniæ: vel quia hoc vitium semper fuit & est familiare Iudeis. Porro auaritia locū habet vel in fraudib. quę cōmittuntur in cōtractib. alioqui licitis, vel in cōtractib. genere suo illicitis, vel in munerib. De primo genere dicit, Qui iurat proximo suo, & nō decipit. De secūdo dicit, Qui pecuniā suā non dedit ad vsuram. De tertio dicit, Et munera super innocentem, i. ad opprimendū innocentē, non accepit. Ex Heb. S. Hieron. vertit, qui iurat, vt se affligat, pro eo q̄ nos habemus, qui iurat proximo suo, sed vox Hebræa potest legi leharah, & significat ad faciendū malum, nimirū sibi, hoc est, ad se affligendū, & sic legit S. Hier. potest etiam legi lehareah, quod significat proximo, & sic legerūt LXX. a quorū versione Latina editio vulgata profecta est, & certe magis coheret cū superiorib. verbis nostra lectio, quam S. Hier. Ex hoc versic. aperte colligitur, errare Iudeos, qui vsuram licitam esse existimant.*

*Qui facit hec, non mouebitur in aternū.*

Respondet questionī in primo versic. propositę, ac dicit, eos, qui ita viuūt, vt supra expositum est, habituros firmissimā in celesti tabernaculo mansionem. Itaq; ait: *Qui facit hec*, quę supra dicta sunt, *non mouebitur in aternū*, i. habitabit securus in tabernaculo Dei, ac requiescet in monte sancto eius sine vllō timore cadendi à tam felici loco.

## PSALMVS XV.

Titulus & Argumentum Psalmi.

Tituli inscriptio ipsi Dauidi.

**H**ic Psalmus obscurissimus est, atque ab ipso titulo incipit eius obscuritas. Vox Hebr. Miçtam, ignota est, S. Hier. vertit, humilis & simplicis Dauid, forte quia mac significat pauperē, ac per hoc humilē, & tam significat simplicem & perfectū, alij volunt miçtam esse pretiosum aliquid, quia cherem significat aurū. Mihi probabile est LXX. Interpretes non legisse miçtam, sed miçtab, vltima litera paulū immutata, nam à verbo catab scribere, fit nomen miçtab, scriptura, siue inscriptio. Sed quia vox Græca *μυσταια* non significat sim-

plicem inscriptionē, sed inscriptionē incisam in columna ad memoriā sempiternā, propterea intelligere debemus inscriptionē hoc loco significare titulū memorabile, dignū qui nunq̄ aboleatur. Argumentū Psal. est oratio Christi ad Patrē: & eadē accommodari pōt mēbris Xpi tū vnīuersis tū singulis. De Xpo n. & nō de Dauidē intelligēdos esse 4. versus postremos, ac p̄sertim illa verba: Nō dabis sanctū tuū videre corruptionē, docet Apost. Pet. Act. 2. & Paul. Act. 13. & quia totus Psalmus est oratio quedam cōtinuata, non possunt intelligi 4. vltimi versus de Christo, quin totus Psal. de Christo intelligatur

## EXPLICATIO PSALMI XV.

**C**onserua me Domine, quoniam speraui in te: Dixi Domino, Deus meus es tu, quoniam bonorum meorum non eges.

In Hebręo, vt nūc legitur, habetur, *Dixisti*, sed non est dubium debere legi *amarti*, non *amarti*: nam non solū LXX. verterunt, *dixi*, sed etiam S. Hier. si tñ vtraque lectio defendi debeat. Illud *dixisti*, referendū erit ad animā, quia *amarti* est secunda persona generis feminini, & sensus erit, *Dixisti o anima mea*, & idē est, *dixi ego*, vel *dixisti anima mea*. Ait igitur Christus, & pōt dicere quilibet Christianus, *Cōserua me Domine*, i. custodi ac protege me ab imminente tribulatione, quoniam speraui in te solo, nō in vlla re creata. Quod aut in te solo sperauerim & sperē, ex eo cognosci pōt: *Quoniam dixi Domino*, i. cōfessus sū tibi Dño, ac dixi ex corde: *Deus meus es tu*, i. supremus Dñs meus es tu: vt clarius habet textus Hebraicus & Græcus: nam Latinus posuit, *Deus meus*, pro Dñs meus, vt variaret sermonem, quoniam bonorū meorū nō eges, sed ego bonis tuis indigeo, i. tu nulla ratione à me depēdes, sed ego à te in omnib. pendeo: ideo tu solus verus & summus Dñs meus es, & quia ego hoc cognosco & cōfiteor: ideo in te solo spero & confido. Hęc verba Prophetā scripsit in persona Christi pro eo tēpore, quo Christus nō solū homo erat, sed etiā passioni & morti obnoxius. Quamuis n. in Christo homine & passibili, non fuerit spes, quę est virtus Theologica, & respicit beatitudinem animę, vt S. Thom. docet 3. par. q. 7. art. 4. fuit tamen spes vt significat fiduciam & expectationem



II.

gloriæ corporis, & aliorum, quæ nondum habebat; & de hac spe loquitur David in Psal.

*Sanctis qui in terra sunt eius, mirificauit omnes voluntates meas in eis.*

In Græco legitur sic: *Sanctis qui sunt in terra eius, mirificauit Dominus oēs voluntates suas in eis.* Itaq; dissentiunt Græcus & Latinus in illa voce *meas* & *suas*. Nam additio illa vocabuli *Dominus*, non mutat sensum. In Heb. legitur ad verbū sic, *Sanctis qui in terra ipsi, & magnificis omnis voluntas mea in eis.* Quod ad Græcū attinet, S. Aug. in ep. 59. ad Paulin. q. 2. dicit codices electiores habere *meas*, quauis alij habeant *suas*. Itaq; probabile est, in Græco vitio librariorū irrepsisse mēdum: præsertim cum in Hebraico etiam habeatur *meas*. Idem quoq; Aug. dicit, non esse dissonantiam alicui⁹ momenti, cū opera Patris & Filij & Spiritus S. sint indiuisa. Hebraeus autē codex cū ait, *Qui in terra ipsi*, non differt à nostro codice, nisi q̄ omittit pronomen *eius*. Cū autē dicit, *& magnificis*, sciendū est, vocē *veaddire*, videri omnino corruptā. Est n. nomē numeri multitudinis, in regimine, i. regens aliud nomē casus genitiui. Hebræi siquidē aliter formāt nomē absolute positiū, & aliter nomen regēs post se aliud nomē casus genitiui. Hic autē nō sequitur aliud nomē, q̄ regatur ab isto *magnificis*:

præterea si LXX. legissent *veaddire*, non potuissent vertere *mirificauit*, nisi imperitissimi fuissent. Itaq; existimo eos legisse *headdir*, q̄ significat *mirificauit*. Illa vero, *omnis voluntas mea in eis*, nō habēt difficultatē, quia cū Hebræi nō declinēt nomina per casus, verti debēt vocabula secundū exigētiam verborum.

Recte igitur verti pōt hic locus, *Sanctis qui sūt in terra, mirificauit oēm voluntatē meam in eis*: atq; ita in concordiam rediguntur oēs lectiones. Sentētia autē hec esse videtur: Quia De⁹ bonorū meorū nō eget, ideo benefacere studeo electis eius, cuius meq; bonę volūtatis ipse Deus mihi testis est, qui Sanctis, qui sūt in terra eius, i. sanctis & electis suis qui sūt in terra eius, mirificauit, i. mirabiles reddidit oēs volūtates meas in eis, i. oēm beneuolentiam meam, omniaq; studia mea erga illos. Dicitur autē Deus mirabilē reddidisse beneuolentiam Christi erga electos declarando il-

lam tum per Prophetas, & per varias figuras Testamenti veteris, tum etiam per miracula ipsius Christi & Apostolorum: mirabilis vero fuit Christi beneuolentia erga electos, cum pro illis animam suam ponere voluerit.

*Multiplicata sunt infirmitates eorum, postea accelerauerunt.*

In Hebr. habetur in futuro, *multiplicabuntur*, sed accipitur futurū pro præterito. Illud etiam *postea*, vertitur cōmuniter ex Hebræo *alienū*, sed LXX. non legerūt *acher*, *alienum*, sed *achar*, q̄ significat *postea*. Explicatur hoc loco effectus beneuolentiæ Christi in electos, qui antea debiles erāt ob vulnera grauissima peccatorum, ita vt ambulare non possent, & postea sanati per gratiam currere cœperunt viam mandatorū Dei. *Multiplicata sunt*, inquit, *infirmitates eorū*, i. ægitudines ac morbi spirituales, vnde Apost. ad Roman. 5. *Cum adhuc infirmi essemus*, Christus pro nobis mortuus est; & paulo post explicans infirmitates: *Cū*, inquit, *peccatores essemus*. Ex Hebr. multi vertūt, *idola*, sed vox Hebræa p̄ptie significat infirmitatē & dolorē, & per figurā accipitur p̄ idolis, vel quia idola inhumana sunt, & nullius potētis, vel quia peccatores, ac per hoc infirmos homines faciunt. *Postea accelerauerunt*, i. antea infirmissimi erāt multiplicatis peccatis vltq; ad summū; sed postea sanati per gratiam, fortes effecti sunt, & ideo exultarunt ad currendam viam. Id apparuit in principio Ecclesiæ, quando conuersi homines ab idololatria, ad martyria festinabant.

*Non congregabo conuenticula eorum de sanguinibus, nec memor ero nominum eorum per labia mea.*

Ex Hebr. vertūt cōmuniter, *nō libabo libamina eorū de sanguine*, & vere verbū *nasac*, significat libare & fundere: sed significat etiam tegere & operire, & quia quæ tegūt, cōgregāt, vt tegi possunt, credibile est, idē verbū significare etiam cōgregare: sentētia vero est eadē: nam quia ad sacrificia celebranda cœtus cōgregari solet; ideo perinde est, si dicatur, *nō libabo libamina eorū de sanguine*, i. nō placebūt mihi sacrificia eorū, q̄ sāguinis effusione cōstāt: & nō cōgregabo cōuenticula eorū de sanguinibus,

III.

דוד  
חזק

IV.

נס



I. non placebunt mihi cōgregationes eorū ad sacrificia cructa celebrāda; p̄inde nō ego illas cōgregabo, nō ero auctor, vt eiusmodi cœtus fiant. *Nec mēmor ero nominū eorū per labia mea*; i. non solū non ero auctor taliū congregationum & sacrificiorū; sed ea ne nominabo quidē. Cohæret autē hic vers. cum superiore, quia rationē reddit, cur electi post multiplicata peccata, ac potissimū idololatriæ, accelerauerint currere viam Dñi: ratio n est, quia Dñs vehementer detestatur idola & eorum venerationem, vt ne nominari quidem velit à suis, ideo quos elegit in Christo, mundauit à peccato idololatriæ, & sic sanctos currere fecit viam mandatorum suorum.

*Dominus pars hereditatis meæ, & calicis mei, tu es q̄ restitues hereditatē meā mihi.*

Quia dixerat, se detestari idola & peccata; addit pro ratione, omnia sua bona in vno Deo habere. Vox propria Christi, qui omnino segregatus à peccatoribus, & Deo Patri summe amicus, omnia sua bona in Deo habet. Idē & nos, p̄ modulo nostro sc̄ire deberē. Dicit igitur, *Dominus pars hereditatis meæ*, i. pars q̄ mihi ex diuisione hereditatis contingere debet, i. quicqd omnino exspecto, mihi Dñs est, ipse mihi est omnia; & *calicis mei*, repetitio est eiusdē sententię: nā & calix, qui diuidi solebat inter cōuiuas, p̄ hereditate accipitur. Nisi magis placeat, p̄ partē hereditatis intelligere opes, per partē calicis delicias, vt sc̄sus sit, oēs meas opes, atq; oēs meas delicias in solo Deo cōstitui. *Tu es q̄ restitues hereditatē meā mihi* hoc additur, quia cū Christus adhuc mortalis hęc diceret, nodū plene possidebat hereditatē: & nos cū hęc dicimus, desiderio quidē omnia bona in Deo habemus, sed nondū re ipsa possidemus, possessio autē ista interim deposita est apud Deum, & ille nobis eam restituet in die nouissimo; sicut Christo restituit in die resurrectionis eius, huc alludit B. Paul. cū ait, Scio cui credidi, & certus sū, quia potēs est depositū meum seruare in illū diem, 2. Tim. 1. In Hebr. habetur; *Tu sustētas hereditatē meam*, & sensus est idem: nam ideo restituet Dñs hereditatem, quia nunc eam sustētat & cōseruat nobis; iuxta illud B. Petri. *In hereditatē incorruptibilem cōseruantam in cœlis*, 1. Pet. 1.

*Funes ceciderunt mihi in præclaris, etenim hereditas mea præclara est mihi.*

Similitudine ducta à terrena hereditate, declarat præstantiam hereditatis æternæ, quā habebunt, qui Deum solum eligunt. Siquidē funiculis mensurari solebant cāpi, qui ex hereditatis diuisione obueniebāt, & quia diuisio sorte fiebat, ideo dicebātur funiculi in præclara partē cadere, quādo pars hereditatis optima cōtingebat. *Funes ceciderūt mihi in præclaris*, i. optimam hereditatem sorte felicissima cōsecutus sum; etenim *hereditas mea præclara est mihi*; idem dicit aliis verbis. Meminit autē fortis, quia principium huius hereditatis à prædestinatione ducitur, prædestinationis autē gratia respectu nostri fors quadam est; vnde Paulus, *Sorte vocati sumus*: & *elegit nos in partem sortis Sanctorum*, ad Eph. 1. & ad Col. 1.

*Benedicam Dominum, qui tribuit mihi intellectum, in super, & vsque ad noctem increpauerunt me renes mei.*

Gratias agit Deo, qui inspirauit illi cōsiliū, & accēdit in eo desiderium, vt tam præclaram hereditatem eligeret. *Benedicam*, inquit, *Dominum*, i. laudabo Deum auctore mihi tanti boni, *qui dedit mihi intellectum*, i. qui me cognoscere fecit, & prudenter eligere, vox enim Hebræa *Iahaz* significat proprie dare cōsiliū. *In super, & vsq; ad noctē increpauerūt me renes mei*, per renes in Scriptura intelligitur affectus & desiderium; vnde sunt illa: *Scrutās corda & renes Deus*; &, *Proba cor meum & renes meos*, vbi per cor intelligitur cogitatio, per renes affectio, per noctē intelligitur tēpus tribulationis, sicut per diē tēpus prosperitatis, per verbū *increpauerunt* significatur potius eruditio quā reprehensio, nam & in Hebræo & Græco est verbū significās eruditionē: proinde verbū Latinū interpretandū est pro increpatione hortatoria, qualis est, *Quare tristis es anima mea, & quare conturbas me? spera in deo*, quoniam adhuc confitebor illi. Denique illud, *vsq; ad noctē*, in Hebræo est, *in noctibus*; ex quo intelligimus significari non solū tota diē, sed etiam vsq; ad noctem totā, quod vulgo dici solet in clusine. Itaque sensus hic erit, *in super, & vsque ad noctē*, id est, non solum

VI.

VII.

tem-



tempore prosperitatis, sed præterea vsque ad tempus aduersitatis, & in ipsa aduersitate affectus meus in Deum accensus, erudiuit me excitans & adhortans ad passionem equo animo subeundā, ac sēper de Deo bene sperādū.

VIII. *Prouidebā Dominū in cōspectu meo sēper: quoniam à dextris est mihi, ne cōmouear.*

Ex intellectu & affectu bono, de quo in superiore versu Deum laudauit, profectum est, ut semper Deum ante oculos haberet: anima enim magis est ubi amat, quā ubi animat. In Hebræo habetur, *posui Dominū in cōspectu meo sēper*: ex quo clarius declaratur, Christum studiose egisse, ut semper Dominū præsentem haberet: *quoniam à dextris est mihi, ne cōmouear*, hoc est nec falsa mea cogitatio fuit, qua Dominum mihi ante oculos cordis semper ponebā, nam vere à dextris mihi sēper est, tanquā tegēs latus meum, meq; præcedens ut adiutor fortis, ne cōmouear de gradu meo, sed perhistam & perseuerem vsq; in finē.

IX. *Propter hoc letatum est cor meum, & exultauit lingua mea, insuper & caro mea requiescet in spe.*

Explicat nunc tandē hæreditatē præclarā, quam Deus restituet sibi & aliis, qui Dñum elegerūt, *Propter hoc*, quia Dominus a dextris mihi est adiutor & protector fidelissimus, *letatum est cor meum* lætitia vera & solida, de qua Dñus in Euangelio: *Gaudebit cor vestrum, & gaudium vestrū nemo tollet à vobis. Et exultauit lingua mea*, quia gaudium interuū redundare solet etiā exterius. In Hebr. habetur, *Exultauit gloria mea*, quod in idem recidit: gloria n. interior, per linguam exultat exterius, *insuper & caro mea requiescet in spe*, hoc est, animus lætabitur, & caro obdormiet in morte placida & secunda, ob certam expectationem celerrimæ resurrectionis.

X. *Quoniam non derelinques animam meam in inferno, nec dabis sanctum tuum videre corruptionem.*

Hæc explicata sunt ab Apostolis Petro & Paulo Act. 12. & 13. & quamuis proprie de solo Christo hæc dicantur, cuius anima non est relicta apud inferos, in limbo videlicet SS. Patrum, neque caro in sepulchro experta est vl-

lam putrefactionē, tamen nos oēs hæc dicere possumus, tum quia membra Christi sumus, & in illo, ut ait Apost. Eph. 2. *conresuscitauit nos Deus*, tum quia animæ nostræ non re-inquantur in inferno, i. in Purgatorio, neque caro nostra videbit æternam corruptionem.

*Notas mihi fecisti vias vitæ, adimplebis me lætitia cum vultu tuo, delectationes in dextera tua vsque in finem.*

Hic exponit perfectā hæreditatis promissionem. *Notas*, inquit, *mihi fecisti vias vitæ*, i. docuisti me modum redeundi ad vitā post mortem, metaphora est pulcherrima, per quā modus per se resurgendi dicitur via vsque ad illam diem ignota, quia nullus vnquā per se resurrexit, Christo excepto. Nec solum, inquit, docuisti me resurgere ex mortuis, sed etiam *adimplebis me lætitia cū vultu tuo*, gloriosū, immortalem & beatū faciens me vultū tuum mihi ostendendo: nam ex visione Dei, in qua cōsistit beatitudo essentialis, redundat etiam gloria in corpus, qua sola Christus carebat: gloriam n. animæ à conceptione habuerat. *Delectationes in dextera tua vsq; in finē*. Nec solū gloriosum me facies, sed ad dexterā collocabis in celis, ubi delectationes sunt sine vllo fine. Quæ omnia etiam electis suo modo conueniunt, quibus Deus ostendit vias vitæ, cum legis obseruationem docuit esse viam ad regnum cælorum. Eosdem adimpleret lætitia cum vultu suo, cum eis sevidendum exhibet facie ad faciem, & demū delectationes vsque in finē eis præbet dextera sua, cū eos ad dexterā partē collocat, & cum dextera manu sua tanquā inexhausto fōte bonorū eos indefinēter delectationibus replet. Ad finē huius Psalmi a notare placet incredibilem temeritatē Theod. Bezae, qui verba illa, *Non derelinques animam meam in inferno*, ex textu Græco Act. 2. sic interpretari ausus, *Nō relinques cadauer meum in sepulchro*: quæ n. corruptio sacrarū literarū est, si hæc non est? Vide, si placet, refutationē huius paradoxii in nostris Cōtrouersis lib. de Anima Christi c. 12. ubi demonstramus voces rum Hebraicas tum Græcas, quæ in Psalmo & c. 2. Act. 2. habentur, non cadauer & sepulchrum, sed animam & infernum proprie significare.

X I.

PSAL.



## PSALMVS XVI.

## Titulus &amp; Argumentum.

Oratio Dauid.

**H**ic Psalmus, ut ipse titulus indicat, est oratio iusti persecutionem iniuste patientis, qua precatur à Deo liberationem; ducit autem argumenta primum ab innocentia sua, secundum à iustitia Dei, tertium à misericordia eiusdem, quartum à malitia impiorum iustos persequentium.

## EXPLICATIO PSALMI XVI.

I. **E**xaudi Domine iustitiam meam: intende deprecationem meam.

II. Auribus percipe orationem meam, non in labiis dolosis.

Hi duo versiculi coniunguntur in vnum apud Hebræos, sed apud Græcos & Latinos distincti sunt. Res est parui momenti, neque sententiam mutat. Primum igitur orat exaudiri iustitiam suam: nam apud iustum iudicem magis clamat causa, quam persona. Addit deinde, ac postulat attendi etiam ad deprecationem suam, quia Deus non solum iustitiam, sed etiam iustos diligit, & vt S. Iacobus ait, *Multum valet oratio iusti*. Postremo coniungit vtrumque, iustitiam & deprecationem, cum ait, *Auribus percipe orationem meam. Non in labiis dolosis*, hoc est, exaudi orationem meam, quæ non prodit ex labiis dolosis, sed in iustitia nititur. Itaque sensus est, Moueat te Domine iustitia, moueat deprecatio, moueat iusti deprecatio.

III. De vultu tuo iudicium meum prodeat: oculi tui videant aequitates.

Alterum argumentum petit à iustitia Dei, quasi dicat, te appello Domine, à te iudicari volo, qui es iudex iustissimus. *De vultu tuo*, id est, ab ore tuo iudicium meum prodeat, id est, sententia pronuncietur. *Oculi tui videant aequitates*, id est, noli claudere oculos, & dissimulare calumnias impiorum, sed aperire oculos, & considera, quid iustitia exigit. Nam, vt alias monui, non ponitur hoc loco æquitas pro *ימיני*, sed pro ipsa vera iustitia,

vt sonant vocabula Hebræa & Græca. In Græco habetur, *Oculi mei videant aequitatem*, & sic legit S. Augustinus, & exponit de iudicio hominis iusti, non de iudicio Dei, vt sensus sit, De vultu tuo iudicium meum prodeat, id est, illumina mentem meam, vt iuste iudicem; *oculi mei videant aequitates*, id est, mens mea non aberrat in iudicando: sed si debeat conuenire sententia Græci codicis cum lectione Hebræa & Latina, vt iuste esse sensus, *Oculi mei videant æquitates*, quas tu videlicet exerceas, id est, videant iusta iudicia tua. Et sane lectio, quæ habet *oculi tui*, magis coheret cum superioribus, & eandem approbat S. Hieronymus in epist. ad Suniam & Fretellam.

IV. Probasti cor meum, & visitasti nocte, igne me examinasti, & non est inuenta in me iniquitas.

Reddit causam, cur velit indicari à Deo, quia videlicet ipse solus scrutatur corda, & perfecte nouit innocentiam seruorum suorum. *Probasti*, inquit, *cor meum*, id est, tentasti, qualis sim intus, vbi nemo videt præter te, experimentum de mea sinceritate fecisti. Quomodo autem id fecerit, declarat dicens, *Visitasti nocte, & igne me examinasti*. Nam duo sunt tempora, quibus appareret quid sit in corde, occasio occulte agendi, & tempus tribulationis. Multi enim intus mali, exterius boni, si occasionem habeant peccandi in occulto, vbi nullum sit periculum, ne detegantur, tunc malitia se prodat. Sic etiam tempore prosperitatis non discernuntur mali à bonis, sed cum ignis persecutionis aduenit, tunc aurum lucebit, & palca fumabit. De primo tempore dicit, *Visitasti nocte*, i. cum in occulto occasiones peccandi habui. De secundo vero, *igne me examinasti*, i. ardente tribulatione. *Et non est inuenta in me iniquitas*. In Hebræo pro istis verbis, *non est inuenta in me iniquitas*, adverbium sic legitur: *Non inuenisti, cogitavi, non transibit os meum*. Quæ verba nullum sensum facere videntur. Sciendum igitur est, LXX. Interpretes non legisse *חממתי*, quod significat, cogitavi; sed *חממתי*, mutati tantum punctis,

ומתי  
ומתי



punctis, id est, iniquitatem meam, & coniunxerunt hoc nomen cum superiore verbo, & ideo reddiderunt, *Non est inuenta in me iniquitas*, quod est idem cum eo, *non inuenisti iniquitatem meam*, ut ad verbum est in Hebræo. Sequentia verba, nimirum, *non transibit os meum*, coniunxerunt Septuaginta Interpretes cum verbis sequentibus, *in opera hominum*, & verterunt, *ut non loquatur os meum opera hominum*. Idem enim est, non transibit os meum in opera hominum, & non loquatur os meum opera hominum.

V. *Ut non loquatur os meum opera hominum, propter verba labiorum tuorum ego custodiui vias duras.*

Ostendit, unde factum sit, ut Deus non inuenit in eo iniquitatem: & dicit ex eo factum esse, quia custodierit vias duras iustitiæ propter præcepta Dei, non ob aliquam spem humanam. Nam qui ob spem humanam custodiunt viam iustitiæ, exterius id faciunt, ubi homines vident, ac per hoc inuenitur in eis latens iniquitas; qui vero propter Dei mandatum viam iustitiæ non deserunt, id faciunt exterius & interius, atque ideo nulla in eis iniquitas inuenitur. Ait igitur, *Ego custodiui vias duras*, id est, permansi in via iustitiæ, quamuis aspera & dura, neque me vlla tribulatio ab ea via declinare fecit. Permansi autem in hac via propter verba labiorum tuorum, i. propter mandata tua, siue propter promissiones & minas tuas. *Ut non loquatur os meum opera hominum*, i. ut non cogar implorare humanam opem; neque ab spe humana pendeam, neque laudem opera hominum. In Hebræo, pro eo quod nos legimus *vias duras*, habetur *vias pariz*, id est, latronis, seu dissipatoris: sed mutatis punctis, illud *pariz*, potest legi *perez*, i. ruptura, siue fractura; & sensus erit, custodiui vias præruptas, ac per hoc periculosas & duras.

VI. *Perfice gressus meos in semitis tuis, ut non moueantur vestigia mea.*

Agnosceus non suis viribus, sed auxilio Dei se permansisse in angusta semita iustitiæ, rogat Deum, ut confirmet hoc beneficium. *Perfice gressus meos in semitis tuis*, id est, confirma

& stabili gressus meos in hac via tua: ne forte declinem ab ea, si tuo adiutorio destituar. In Hebræo ad verbum est, *Sustent a gressus meos, ne labantur vestigia mea*; ubi declaratur id ipsum per similitudinem ductam à via lubrica. Itaque perfice gressus, significat, sustentare & stabili, & ne moueantur vestigia mea, significat, ne labantur ob viæ lubricitatem. Vere enim infirmitas carnis, & illecebra mundi faciunt viam vitæ humanæ valde lubricam: & multi labuntur in ea.

*Ego clamaui, quoniam exaudisti me Deus, inclina aurem tuam mihi, & exaudi verba mea.*

Exposito argumento ab innocentia sua, & à iustitia Dei, iterum repetit orationem initio Psalmi propositam: quæ est quasi conclusio, quæ colligitur ex duobus illis argumentis. Sententia igitur hæc est, *Ego clamaui ad te Dñe, quoniam exaudisti me*, i. cum fiducia clamaui, quoniam semper alias exaudisti me. Et ideo pro solita benignitate nunc etiam inclina aurem tuam mihi, & exaudi verba mea.

*Miserere misericordias tuas, qui saluos facis sperantes in te.*

Hoc est argumentum tertium, quod sumitur à misericordia Dei: quasi dicat, exposui innocentiam meam, appellavi iustitiam tuam: inuoco nunc misericordiam, quoniam & si me innocentem existimem à crimine, ob quod tribulationem patior, tamen multa sunt alia fortasse peccata mea, ob quæ iuste puniri possem. *Miserere ergo misericordias tuas*, i. ita manifesta misericordias tuas exerce in me liberando, ut omnes mirentur. Tum est enim saluos facere omnes, qui in tua misericordia spem suam repositam habent.

*A resistentibus dextera tua custodi me, ut pupillam oculi.*

In Hebræo coniunguntur cum superiore versiculo illa verba, *A resistentibus dextera*, ut sensus sit, qui saluos facis à resistentibus dextera tua eos qui sperant in te. Sed coherent etiam optime cum verbis sequentibus in hunc modum: *Custodi me ut pupillam oculi*, id est, maxima diligentia, à resistentibus dextera tua,

id.

VII.

VIII.

IX.



id est, ab impiis hominibus, qui resistunt dexterae tuae, vel laedendo, quos tu protegis, vel non ambulando quo tu ducis. Neque hoc est contrarium ei, quod legimus in lib. Esth. c. 13. *Non est, qui possit tua resistere voluntati.* Nam illud intelligitur de voluntate beneplaciti, quae semper impletur: hoc autem de voluntate signi, quae non semper impletur, quia Deus permittit impios multa facere contra leges à se positas: sed eos postea punit, ut merentur. Idcirco S. Petrus hortatur, dicens: *Humiliamini sub potenti manu Dei; ut vos exaltet in tempore visitationis.* 1. Pet. 5. Similitudo illa, *ut pupillam oculi*, aptissima est, quoniam pupilla res est simul pretiosissima & infirmissima, & ideo diligentissime custodiri solet, & ab ipsa natura munita est, rum variis tunicis, tum etiam palpebris, & pilorum vallo.

X. *Sub umbra alarum tuarum protege me à facie impiorum, qui me affligerunt.*

Id ipsum repetit alia similitudine. Sicut enim pulli teguntur alis gallinae, & eo modo obumbrantur, & securi delitescent, ut laedi non possint à miluis: sic optat iustus protegendi uiuino auxilio à persecutoribus suis. Illud, *à facie impiorum*, significare potest, à conspectu impiorum: alia siquidem dum pullos tegunt, faciunt, ne videantur à miluis. Item à morsu impiorum, siue ab ira impiorum. Nam, & dentes in facie sunt, & ira in facie demonstratur. Illud, *qui me affligerunt*, significat, iustum iam expertum esse morsus impiorum, & ideo protectionem querere, ne si sepius mordeatur, tandem consumatur. Familiaris est hæc similitudo diuinæ Scripturae, Psal. 62. *In velamento*, inquit, *alarum tuarum sperabo.* Rursus Psal. 90. *Scapulis suis obumbrabit tibi, & sub pennis eius sperabis.* Et ipse Dominus in Euangelio: *Quoties uolui congregare filios meos, sicut gallina congregat pullos suos sub alas, & nolui.* Matth. 23.

XI. *Inimici mei animam meam circumdederunt, adipem suum concluserunt, os eorum loquutum est superbiam.*

Et hoc argumentum postremum, quod sumitur à malitia inimicorum. *Inimici mei,*

inquit, *animam meam circumdederunt*, id est vitam meam, siue me ipsum undique premunt, *adipem suum concluserunt*, id est, nulla misericordia mouentur, etiam si me videant ad extrema redactum: *os eorum loquutum est superbiam*, id est, non solum non misercntur, sed etiam insultant arroganter. Porro adipem concludere, significat viscera claudere, ac per hoc non miseri, iuxta illud S. Ioannis: *Qui habuerit substantiam huius mundi, & uiderit fratrem suum necesse habere, & clauderit viscera sua ab eo, quomodo charitas Dei manet in eo?* 1. Ioan. 3. Quia uero viscera claudendi solent, cum adeps crescit, ideo maluit Prophetæ dicere: *Adipem suum concluserunt*, quam viscera clauderunt, ut simul indicaret causam, unde viscera clauduntur, quæ est multiplicatio adipis, id est, opulentiae temporalis. Sicut enim adeps naturalis claudit viscera carnalia: ita multiplicatio opum, facit superbe sapere, & contemnere proximos, & claudit viscera spiritualia.

*Proicientes me nunc circumdederunt me, oculos suos statuerunt declinare in terram.*

XII.

Pergit narrare nequitiam inimicorum, & ait, eos modo unam viam aggredi, modo contrariam, sic tamen ut semper noceant. *Proicientes me nunc circumdederunt me*, id est, antea proicientes à suo consortio, nunc circumdederunt me. In Græco sensus est clarior, quia illud, *proicientes*, est temporis præteriti, & significat, cum proiecissent me. Itaque sensus est, cum antea proiecissent me à suo consortio, ne fruerer communibus bonis: nunc iterum querunt me, & circumdant, ut malis afficiant. Huius autem malitiae ipsorum causa est, quia *statuerunt oculos suos declinare in terram*, id est, firmiter decreuerunt non aspicere ad Deum, qui est in cælo, nec timorem ullum Dei admittere: sed solum terram intueri, & ea quæ in terra sunt bona sectari. In Hebræo pro illa voce, *proicientes me*, habetur *assurenu*, quod aliqui vertunt, *gressu meo*; alij, *incedentes in me*; alij aliter. Sed Septuaginta Interpretes legisse videntur,

H 2

hori-



**הורישוני** *horisuni*, quod significat, *expulerunt me*: sunt enim literæ fere eadem, sed transpositæ.

XIII. *Susceperunt me sicut leo paratus ad prædā, & sicut catulus leonis habitans in abdītis.*

Non solum, inquit, circumdederunt me, sed crudelissime in me seuerunt. *Susceperunt enim me* ea auiditate & sæuitia, qua leo paratus ad prædā suscipit occurrentem sibi ouiculam. Dicitur autē leo paratus ad prædā, is qui famelicus, & in prædā intentus est. Idem repetit per verba sequentia: *& sicut catulus leonis habitans in abdītis*, id est, sicut leonis catulus latens in insidiis suscipit prædā sibi occurrentem. In Hebræo pro *susceperunt me*, habetur *dimiono*, similitudo eius, videlicet impij, quasi leonis desiderātis prædā. Cæterum Septuaginta legerunt paulo aliter, ut legi potest vox illa, si remoueantur puncta: nimirum videntur legisse *demauni*, ab eodem verbo *dama*, quod non solum similem esse, sed etiam succidere significat. Itaq; intellexerunt hic significari *succiderunt me*, sicut leo succidere solet prædā oblatam, sed pro *succiderunt*, maluerunt vertere *susceperunt*, nimirum ad succidendum, quia non succiderunt re ipsa, sed tantum voto: non enim Deus permittit, ut re ipsa succiderent; ut ex sequenti versiculo perspicuum est.

XIV. *Exurge Domine, præueni eum, & supplantā eum: eripe animam meam ab impio, frameam tuam ab inimicis manus tuæ.*

Explicata malitia persequentium, rogat Deum, ut adsit & liberet ipse, qui solus potest. *Exurge Domine*, non amplius differas auxilium, *præueni eum*, id est, impium, qui instar leonis me rapuit ad deuorandum, præueni dentes eius, ne eos in me infigat, & occidat. Et verē solus Deus præuenire potest actionem cuiuslibet causæ etiam velocissime agentis; sicut præuenit dentes leonum, ne læderēt Danielem inter ipsos famelicos iacentem; & sicut præuenit impetum ignis, ne cōbureret tres pueros in fornacem proiectos: ex quo magna consolatio oritur iustis, qui sciunt eam esse Dei sui potentiam, ut securos eos

præstare possit inter dentes leonum, & inter flammās ignis ardentis. *Supplantā eum*, id est, decipe eum, mirabili prouidentia tua efficiendo, ut dum putat se dētes infigere in carnem iusti, infigat in carnem propriam. *Eripe animam meam ab impio*, id est, ne sinas me occidi ab impio sæuiente more leonis, sed libera & salua me. *Frameam tuam ab inimicis manus tuæ*. In Hebræo post *frameam tuam* finitur versiculus, & deinde incipit alius versus; & quia Hebræi non declinant nomina per casus, potest sic verti ea sententia, *Eripe animam meam ab impio framea tua*, id est, ut vertit S. Hieronymus, *ab impio, qui est framea tua*; vel, ut alij volunt, *eripe animam meam ab impio framea tua*, id est, per frameam tuam: sed versionem Septuaginta, & editionem vulgatam sequendo, sensus erit, *Eripe animam meam ab impio*, ac ut hoc facias, *eripe frameam tuam*, id est, potestatem affligendi, ab inimicis manus tuæ, id est, ab iis, qui ea non bene vtuntur, qui sunt inimici manus tuæ: ac per hoc non sequuntur directionem manus tuæ, sed contra eam abutuntur potestate à te illis concessa. *Omnis enim potestas à Deo est*, siue, ut Apostolus loquitur, *Non est potestas nisi à Deo*, Roman. 13. In Hebræo pro *inimicis manus tuæ*, habetur *à viris manus tuæ*, siue, *à mortuis manus tuæ*: nam vox Hebræa *metim*, & viros & mortuos significat. Septuaginta Interpretes intellexerunt significari mortuos, & verterunt, *inimici manus tuæ*: quoniam inimici manus Domini, id est, qui nolunt sequi directionem manus Domini, mortui sunt manui Domini, quomodo omnes peccatores dicuntur mortui Deo, & inimici Dei, verterunt autem potius *inimici*, quam *mortui*, quia id est multo clarius.

*Domine à paucis de terra diuide eos in vita eorum: de absconditis tuis adimpletus est venter eorum.*

Imprecatio est prophetica, id est, predictio per modum imprecationis, prædicat enim futurum, ut diuidantur impij à iustis, & impiis quidem sola temporalia tribuantur, iustis vero etiam æterna. *Domine à paucis de terra*

*diuide:*

מתים

XV.



**מְתֵימִים**  
**חֲדָרָה**  
*diuide eos*, id est, separa multitudinē impiorum à puſillo grege tuo. In Hebræo est eadē vox, *metim*, quæ in fine versiculi superioris. David enim sicut inimicos Dei vocauerat mortuos Dei, ita nunc amicos Dei vocat mortuos seculo, siue terræ: vox enim, *cheled*, significat terram, mundum, seculum, & similia. Itaque verti poterat, diuide eos à mortuis mundo: sed maluerunt septuaginta dicere à paucis de terra, quia vere mortui mūdo sunt valde pauci, respectu amatorū mundi. Illud, *diuide eos*, est in Hebræo, pars eorum, sed mutatis punctis eadē voces significant, diuide eos. Quod sequitur, *in vita eorum*, posset recte coniungi cum sequentibus, nisi obſtaret particula, & *de absconditis tuis*, &c. quæ particula est in Hebræo, & in Græco, & in multis Latinis: nec scio, cur in editione vulgata omiſſa sit. Sensus igitur est non solum in vita futura; sed etiam in præſenti, quæ proprie est vita ipsorum quam ipsi videlicet solum agnoscunt, & amant, diuidendos à viris iustis, qui seculo mortui sunt. In hoc autem diuisio consistit, quod de *absconditis tuis adimpletus est venter eorum*, id est, de bonis terræ à Deo creatis, & conſeruatis, & quæ veluti de theſauro abscondito singulis annis, emanant, adimplent ventrem suum, & hanc partem suam esse dicunt.

**מְתֵימִים**  
*Saturati sunt filijs & dimiserunt reliquias suas paruulis suis.*

Hoc est, filijs abundant, & ijs post mortem sua relinquunt bona, quæ ipsis supersunt: hæc enim censetur à filijs huius seculi perfecta felicitas, si & ipsi bonis terrenis circumfluant, & filios suos bonorum suorum relinquunt hæredes. Ex Græco S. Augustinus vertit, *saturati sunt porcina*, sed etiam verti posse dicit, *saturati sunt filijs*, ratio huius varietatis in promptu est: nam vox Græca si scribatur per simplex ypsilon ὢν, significat, porcum; si scribatur per ypsilon & iota; ὢν, significat filios: sed ex Hebræo perspicuum est, legendum filijs, non porcina.

**חֲדָרָה**  
*Ego autem in iustitia apparebo conspectui tuo, satiabor cum apparuerit gloria tua.*

In hoc, inquam, diuisio consistit, quod illi saturari cupiant in hac vita bonis terrenis: ego autem, vt etiam cæteri iusti in hac vita iustitiam esuriam, & in alia gloria, & beatitudine satiabor. *In iustitia apparebo conspectui tuo*, id est, iuste coram te viuere studebo, *satiabor cum apparuerit gloria tua*, id est, sicut, nunc tibi apparebit iustitia mea, ita postea mihi apparebit gloria tua, & tunc demum vere satiabor nihil amplius expetens. In Hebræo pro *apparebit gloria tua*; habetur, *cum excitabitur similitudo tua*; & sensus est idem, tunc enim apparebit nobis gloria Domini, quando excitabitur in nobis similitudo, de qua scriptum est, 1. Ioan. 3. *Similes ei erimus, quia videbimus eum sicuti est*. Quando enim videbimus eū sicuti est, tunc erimus ei similes in gloria: nam, & ipse beatus est, quia seipsum videt. Hæc est enim vita, & gloria sempiterna, videre Deum sicuti est.

## PSALMVS XVII.

*Titulus, & Argumentum.*

In finem, puero Domini David, qui loquutus est Domino verba Cantici huius, in die, qua eripuit eum Dominus de manu omnium inimicorum eius, & de manu Saul, & dixit.

**חֲדָרָה**  
*Hic titulus indicat, Psalmum hunc à Davide compositum fuisse in gratiarum actionem; quando liberatus fuit ab omnibus inimicis suis, & potissimum à Saule, qui nominatim ea de causa exprimitur. Habetur hic idem Psalmus in libr. 2. Regum cap. 22. paucis mutatis. Mutatio autem illa incertum est, an ab ipso Davide facta fuerit, an ab Esära, qui Psalmos collegit: Quia vero David figuram Christi gessit, potest Psalmus hic etiam de Christo recte exponi.*

## EXPLICAT. PSAL. XVII.

**חֲדָרָה**  
*Diligam te Domine fortitudo mea: Dominus firmamentum meum, & refugium meum, & liberator meus.*

*Diligam te Domine: id est, merito te diligens.*







V. *Circumdederunt me dolores mortis, & torrentes iniquitatis conturbauerunt me.*

VI. *Dolores inferni circumdederunt me, praecupauerunt me laquei mortis.*

Incipit Propheta iam enarrare accepta beneficia. Ac primum dicit, se quondam fuisse in apertissimo periculo vitae, quando videlicet, Saul eum quarebat, ut interficeret. Sed hoc periculum vitae poetice describit variis metaphoris adhibitis. *Circumdederunt me dolores mortis*, id est, vndiq; talia pericula me oppresserunt, ut de salute corporali desperarem; & ideo tali dolore, id est mœnore animi affectus fui, quali affici solent, qui mortem sibi imminere vident. *Et torrentes iniquitatis conturbauerunt me*, id est, inde periculum, & dolor, de quo dixi, proficiscebatur, quod multitudo iniquorum instar torrentis me inuasert, & conturbauerat, quomodo conturbati solent, qui à torrente aquarum deferuntur & circumuoluuntur. *Dolores inferni circumdederunt me*, repetit quod dixerat, *circumdederunt me dolores mortis*. Idem enim ex hoc loco, dolor mortis, & dolor inferni. Nā quia ante Christi passionē omnes, qui moriebantur ad infernum descendebant, quamuis non ad eandem partem inferni, ideo pro eodem accipiebatur, mori, & ad infernum descendere. *Circumdederunt*, inquit, *me dolores inferni*, id est, mœror animi, qualem patiuntur, quibus imminet discessio ex hoc mundo ad locum mortuorum, qui est infernus. *Praecupauerunt me laquei mortis*, repetit, quod dixerat, *torrentes iniquitatis conturbauerunt me*. Sicut enim cum turbatio ex multitudine iniquorum in eum insurgentiū erat causa Dauidi dolorum mortis: ita praecupatio laqueorū mortis erat causa eidem Dauidi dolorū inferni. Vocat laqueos mortis insidias iniquorum, quibus perebatur ad mortem. Itaque sensus horum duorum versiculorum est, Dauidem occupatum fuisse ingenti dolore ob imminens mortis periculum, tum ex inuisione manifesta inimicorum instar torrentis violenter rapientis, & inuoluentis, tum ex insidiis eorundem inimicorum, instar laqueorum in cautos capi-

entium. Quod attinet ad verba, pro, dolores, in Hebræo habetur, *cheule*, quæ vox dolores, & funes significare potest. Ideo S. Hieronymus vertit, funes mortis, & funes inferni. At septuaginta Interpretes verterunt, dolores mortis, & dolores inferni: quæ lectio posterior clarior est. Pro, torrentes iniquitatis, in Hebræo habetur, *torrentes belial*, quod S. Hieronymus vertit, *torrentes diaboli*, & septuaginta Interpretes, *torrentes iniquitatis*. Vtrumq; recte se habet: nam *belial*, ad litteram sonat, absq; iugo, & in scripturis sanctis passim inuenitur hæc vox usurpata ad significandos viros iniquos, qui excusserunt iugum legis, vel ipsam iniquitatem, quæ est contraria legi: & quia iniquorum caput est Diabolus, ideo Diabolum quoque hac voce significare solent Hebræi.

*In tribulatione mea inuocaui Dominum, & ad Deum meum clamaui.*

*Et exaudiuit de templo sancto suo vocem meam, & clamor meus in conspectu eius, introiit, in aures eius.*

Dixerat, se in maximo periculo constitutum fuisse: nunc dicit, se confugisse per orationem ad Deum, & exauditum. *In tribulatione mea*, id est in illis magnis angustiis, in quas me coniecerat persecutio Saulis, & in aliis similibus multis, *inuocaui Dominum*, in quo tota mea fiducia posita esse solet. *Et ad Deum meum clamaui*. Repetitio est Dauid familiaris, *Et exaudiuit de templo sancto suæ vocem meam*, id est, oratio mea peruenit vsque ad summum cælum, quod est templum Dei non manufactum, & vere sanctum quod violari, polluiq; nulla ratione potest. *Et clamor meus in conspectu eius, introiit in aures eius*. Repetitio est, & aliquo modo declaratio superioris versiculi: quasi dicat: clamosa oratio mea, id est, magno affectu prolata, & in conspectu eius effusa, id est, quam effudi Deum præ oculis habens, *introiit in aures eius*, id est, exaudita est. In Hebræo habentur in futuro omnia verba, inuocabo, clamabo, exaudiet, introibit. Sed septuaginta Interpretes recte verterunt in preterito, inuocaui, clamaui, exaudiuit, introiit;

חבלי

כלי

VII.

VIII.

מחנה

מחנה



IX.

luit, quoniam lex Hebraicæ Grammaticæ id permittit, ut futurum ponatur pro præterito.

*Commotæ est, & contremuit terra: fundamenta montium conturbata sunt, & commota sunt, quoniam iratus est eis.*

Incipit iam describere effectum exauditionis diuinæ, qui fuit auxilium de cælo ad uersus inimicos suos, ex quorum interitu ipse tandem non solum periculum euasit, sed etiam Regnum adeptus est. Describit autem iram Dei aduersus hostes suos poetico more: sicut enim cum irascitur Rex aliquis, & bellum parat, totum eius Regnum turbatur: ita cum irascitur Rex totius mundi, totus mundus turbatur, ac potissimum tria visibilia elementa, terra, aer, & aqua. Non significat hoc loco Dauid re ipsa terram, & aerem, & aquam ita perturbata fuisse, ut verba sonare videntur: sed significat, talem esse Dei iram, ut possit continuo tremefacere terram usque ad ima fundamenta, & in aere continuo excitare ventos, nubesque tenebrosas, & tonitrua, atque fulgura: denique fontes, & flumina, & maria ita siccare, ut appareant cauernæ terræ, & fontium origines. Incipit ab elemento terræ, ac dicit, *commotæ est, & contremuit terra, fundamenta montium commota sunt, quoniam iratus est eis*; hoc est, quando Deus irascitur terræ, continuo tota mouetur. & contremiscit, non solum in superficie, sed usque ad ima montium fundamenta. Nec solum quando Deus irascitur, sed etiam quando præsentiam suam manifestat in terra, concussio terræ consequitur: quasi tremantis, & reuerentis Maiestatem creatoris. Sic in Resurrectione Christi terræ motus factus est magnus, & cum idem Christus moriens infra terram descensus erat, terra mota est. Et Dauid in alio Psalmo, *A facie Domini mota est terra*. In Hebræo non habetur, *quoniam iratus est eis*, sed, *quoniam ira ei*, id est, quoniam iratus est. Itaque secundum textum Hebraicum terra, & montes contremiscunt, non quia Deus ipsis montibus iratus est, sed quoniam absolute iratus est. At septuaginta verentes, *quoniam iratus est eis*, significare voluerunt, iram Dei esse contra terram, & ter-

ra montes, rationes hominum, qui in terra habitant, alioqui nulla est ratio, cur Deus terræ, & montibus irascatur.

*Ascendit fumus in ira eius, & ignis à facie eius exarsit, carbones succesi sunt ab eo.*

Adhuc pergit explicare operationem Dei in terra, quando vult Deus ostendere in ea præsentiam suam: non enim solum terram tremere facit, sed etiam ardere, ac fumare: quod accidisse describitur Exod. 20. Heb. 12. quando Deus in Monte Sina legem dedit. *Ascendit, inquit, fumus in ira eius*, id est, ira Dei excitauit in terra calorem vehementem, vnde ingens fumus ascendit. *Et ignis à facie eius exarsit*, nec solum calorem, & fumum, sed etiam incendium magnum excitauit. *Carbones succesi sunt ab eo*, id est, ira Dei, siue facies Dei terram respiciens ita fecit eam ardere, ac si totam in carbones ardentes conuertisset. Alibi etiam dicit, *Qui respicit terram, & facit eam tremere, qui tangit montes, & fumigant.*

*Inclinauit cælos, & descendit, & caligo sub pedibus eius.*

Transit à terra ad aerem: & describit ea: quæ fiunt in aere, quando Deus iram vel præsentiam suam demonstrare vult: dicitur Deus inclinare cælos, quando demittit nebulam, in qua ipse apparet. Videtur enim nebula quasi pars cæli: ordinarie autem Deus per nebulam se ostendere solitus est, ut patet ex lib. Num. cap. 9. 3. Reg. 8. Matth. 17. & alibi: ait igitur, *Inclinauit cælos, & descendit*, id est, demissa nebula, per eam se manifestauit, *& caligo sub pedibus*, id est, ita Deus in nebula habitauit, quasi caliginem sub pedibus haberet: sunt omnia Metaphorica, ex quibus intelligimus, Deum inuisibiliter præsentem nobis se facere.

*Et ascendit super Cherubim, & volauit, volauit super pennas ventorum.*

Pergit describere operationem Dei in aere quando iram suam manifestare hominibus vult. Ponit autem nobis ante oculos Deum, quasi hominem armatum insidentem currui velocissime discurrenti, & ex eo sagittas in hostes suos emittentem. Currus Dei sunt nubes

X.

XI.

XII.



nubes, iuxta illud Psalmi 103. *Qui ponis nubem ascensum tuum, qui ambulat super pennas ventorum.* Equi velocissimi sunt venti, qui nubes huc, illucque deferunt Aurigæ sunt Angeli, quos Cherubim vocat: sagittæ sunt fulgura, & fulmina, quæ ex nubibus iaciuntur. Et vere mirabilis est ista descriptio. Nulli enim sunt currus agiliores nubibus, nulli equi velociore ventis, nulli aurigæ peritiores angelis, nulla iacula, quæ cœlestibus fulminibus conferri possint. Et præterea currus isti ex loco superiore pugnant, ut lædere possint, & lædi non possint. *Ascendit, inquit, super Cherubim,* id est, non solum Deus utitur nebula, quasi domo, vel tentorio; sed etiam utitur nubibus, quasi curribus, & angelis Cherubim, quasi aurigis: & ventis, quasi equis. Dicitur autem ascendere super Cherubim, ut intelligamus, Deum non regi ab auriga, sed ipsum præsidere aurigæ, & principalem esse, tum ipsius currus, tum aurigæ motorem, atque rectorem. Itaque dicitur Deus ascendere super Cherubim, & volare super pennas ventorum, quia utitur ministerio angelorum in mouendis nubibus, quæ sunt veluti acrei, & velocissimi, quippe qui trahuntur à ventis, veluti equis pennigeris, ac per hoc non ambulant, sed volant, & volant celerius omni volucre.

XIII. Et posuit tenebras latibulum suum, in circuitu eius tabernaculum eius: tenebrosa aqua in nubibus aeris.

Ne putaretur Deus visibiliter in nubibus, tanquam in curru eminere declarat Prophetam Deum inuisibiliter adesse, & ea de causâ tenebrosis nubibus uti, ut eo veluti symbolo inuisibilem se esse demonstret. Est etiam in his verbis elegantissima, & poetica metaphora. *Posuit, inquit, tenebras latibulum suum,* id est, latet Deus in tenebrosis nubibus, quasi in loco abdito; siue effecit, ut nubes tenebrosæ pro latibulo sibi deseruirent. *In circuitu eius tabernaculum eius,* id est, eadem nubes sunt quasi tabernaculū Deo, ipse undique tegitur. *Tenebrosa aqua in nubibus aeris,* id est, tabernaculum, de quo dixi nihil est aliud, nisi nubes tenebrosa, qualis est,

cum est disposita proxime, ut in aquam vertatur. Tunc enim est nubes valde densa, & aquea, ut non improprie aqua dici possit in nube existens.

*Præ fulgore in conspectu eius nubes transferunt, grando, & carbones ignis.*

Declarat quomodo Deus ex nubibus, quasi ex curribus suis armatis pugnet, ac dicit, iubente Deo nubē scindi, & inde prodire grandinem, & fulgura, instar carbonum ignitorum. Elegantissime autem dicit, *Præ fulgore in conspectu eius nubes transferunt,* quasi scissura nubium procedat à fulgore Dei intus latentis, quasi nubes ferre non possit Divinum fulgorem, & ideo in conspectu Dei rumpatur, & dissoluatur, atque ex ea parte evanescat, & transeat. *Præ fulgore in conspectu eius nubes transferunt,* id est, à fulgore Dei præsentis concussæ nubes, in conspectu eiusdem Dei, transferunt distringuntur, & dissolvuntur. *Grando, & carbones ignis,* supple. ex ea scissura processerunt grandines, & fulgura. Re ipsa hoc accidit tempore Pharaonis, ut habemus in lib. Exod. cap. 9. *Et grando,* inquit, & ignis mista pariter ferebatur. Similia in bello Iosue contra quinque Reges, Ios. 10. nec non in bello M. Antonini Imperatoris contra Germanos, de quo vide Tertullianum in lib. ad Scapulam, & in Apologetico cap. 5.

Et intonuit de cælo Dominus, & altissimi dedit vocem suam, grando, & carbones ignis.

Idem repetit aliis verbis, ex nubis dissolutione oritur fragor ingens. qui dicitur tonitrus, cum quo sæpe fulmina coniuncta esse solent. Fragorem illū eleganter illū vocat Prophetam vocem Dei, non solum quia Deus est causa fragoris illius, sed etiam quia tam ingens, & tam terrificus est sonus ille, ut soli Deo tribuendus videatur, quia propria vox eius. Hinc est illud ipsius Dei ad Iob: *Si habes brachium sicut Deus, & si voce simili tonas,* Iob. 40. Illud autem, *grando, & ignis carbones ignis,* in nonnullis Græcis textibus non habetur, in Hebræo habetur, & posset legi, grandinē, & carbones ignis, ut aliqui legunt, sed noster Interpretes recte vertit, *grando, & carbones ignis.*

XIV.

XV.



*carbones ignis*, quia fiunt omnino eadem voces, quæ in versiculo superiore. Itaque oportet hic etiam aliquid subintelligere, ut sensus sit, *Altissimus dedit vocem suam*, ex qua voce processit etiam grando, & fulmina, quasi carbones igniti.

XVI. *Et misit sagittas suas; & dissipauit eos, fulgura multiplicauit, & conturbauit eos.*

Explicatio est superiorum, ac præsertim illius vocis, *carbones ignis*, quasi dicat, carbones ignis prodierunt ex nubium scissione, quia Deus *misit sagittas suas*, id est, fulgura, eaque multiplicauit, & eo modo inimicos suos dissipauit, & conturbauit.

XVII. *Et apparuerunt fontes aquarum, & reuelata sunt fundamenta orbis terrarum.*

Hic iam loquitur de operatione Dei in aquis, quæ operatio est mirabilis, & repentina exsiccatio aquarum, qualis facta est in mari rubro, & Iordane flumine, ut habemus Exod. 14. & Ios. 4. ex qua exsiccatione patuit profundum maris, & fluminum, quod profundum vocat Propheta *fundamentum orbis terrarum*, quia est pars infima totius terræ. Pro voce. *Fontes*, in Hebræo est, *apiche*; Quod significat, *decursum*, seu *torrentes*. S. Hieron. vertit, *effusiones aquarum*, sed cum sit nomen generale, recte potuerunt septuaginta Interpretes reddere, *fontes*. Sensus igitur est, *Et apparuerunt fontes aquarum*, id est, iussu Dei siccatis aquis apparuit fundum fontium, siue fluminum, siue etiam maris, & sic *reuelata sunt*, & discooperata *fundamenta*, i. partes imæ orbis terrarum.

XVIII. *Ab increpatione tua Domine, ab inspiratione spiritus iræ tuæ.*

Explicat causam exsiccationis aquarum. Apparuerunt, inquit, fontes, seu decursus aquarum. *Ab increpatione tua Domine*, id est, quia tu Domine increpasti aquas, & illæ continuo disparuerunt. Quomodo autem increpauerit, explicat, dicens, *Ab inspiratione spiritus iræ tuæ*. Mirabili metaphora, & plane poetica vocat Propheta ventum cuius ministerio siccatae sunt aquæ, spiritum iræ Dei, & increpationem Dei. Nam vento vrente siccatae fuisse aquas maris rubri à Deo, testatur Scriptura Exod. 14. Itaque quod proprie dici

poterat, tu Domine immisso vento vehemēti, siccasti aquas maris, dicit elegantissima metaphora. Tu Domine increpasti aquas, quia impediabant transitum populi tui, & spiritu iræ tuæ sufflasti in eas; & illæ continuo fugerunt: ut alibi dicit, *Quid est tibi mare, quod fugis?* Hunc versiculum cum superiore coniungunt codices Hebraici, quia sententia prioris ab hoc posteriore pendet: sed recte septuaginta Interpretes separauerunt, quia viderunt ex ratione metrica ita esse faciendum, neque enim absurdum est, ut vna sententia duobus versibus contineatur.

*Misit de summo, & accepit me, & asumpsit me de aquis multis.*

Iam redit ad beneficium Dei enarrandum, id est, ad liberationem suam ab inimicis. Omnia enim quæ dicta sunt à versiculo nono, vsque ad hunc decimum nonum, pertinent ad declarationem potentiae Dei. Et quia dixerat initio, *torrentes iniquitatis conturbauerunt me*: & in versiculo præcedente dixerat, Deum spiritu suo siccare solitum aquas, & facere, ut appareat fundum fluminum, & maris: ideo in eadem metaphora persistens dicit, *Misit de summo, & accepit me*, id est, misit manum suam ex alto loco vsque in profundum torrentis, & accepit me; & sic eduxit me de aquis multis, id est, oppressum tribulationis mirabiliter liberauit. In Hebræo habentur verba futuri temporis, *mittet de summo, & accipiet me*, sed, ut sæpe diximus, non ignorabant septuaginta Interpretes tempora confundi secundum regulas linguæ Hebraicæ, & vnum pro altero sæpe poni. Hic certe magis quadrat tempus præteritum.

*Eripuit me de inimicis meis fortissimis, & ab his qui oderunt me, quoniam confortati sunt super me.*

Quod metaphorice dixerat versu superiore, propriis verbis dicit in hoc versiculo. Illud, *quoniam confortati sunt*, super me, debet exponi per tempus imperfectum, id est, quoniam robustiores me erant, & sic vertit sanctus Hieronymus: redditur enim ratio, cur necessarium fuerit auxilium Dei potentius,

XIX.

XX.



tius, quia videlicet inimici Davidis, ipso Davide fortiores erant. In Hebræo & Græco codice habetur futurum, *eripiet me*, ceterum nostra lectio habetur etiam in antiquis libris, & eam exponunt Hieronymus & Augustinus. Quare verisimile est in Græco fuisse olim in præterito, Hebraicum autem recte potest accipi pro præterito.

XXI.

*Præuenerunt me in die afflictionis meæ, & factus est Dominus protector meus.*

Inculcat aliis verbis beneficium Dei. *Præuenerunt me in die afflictionis meæ*, i. nulla iniuria à me accessit, ipsi primi fuerunt ad nocendum; vel, antequam præcauere possem, me adorti sunt; præueneruntq; incautum: sed Dominus pro me vigilauit, & fecit, ut eorum diligentia nihil mihi nocere posset.

XXII.

*Et eduxit me in latitudinem, saluum me fecit, quoniam voluit me.*

Iterum atque iterum repetit liberationem suam, ut ostendat sibi alte in memoria infixum Dei beneficium. *Eduxit me in latitudinem*, i. de angustiis tribulationum liberatum quasi in latum campum eduxit, ut libere iam spaciari possem sine metu ullo insidiatorum. *Saluum me fecit, quoniam voluit me*; i. saluum me fecit à tot imminentiis periculis, at id potissimum, quia complacuit ei, i. ob immensam eius misericordiam, qua me dilexit. Nam etiamsi paulo post allegabit merita sua, tamen ipsa merita nostra dona Dei sunt, quod sanctus Propheta non ignorabat.

XXIII.

*Et retribuet mihi Dominus secundum iustitiam meam, & secundum puritatem manuum mearum retribuet mihi.*

XXIV.

*Quia custodiui vias Domini, nec impie gessi à Deo meo.*

XXV.

*Quoniam omnia iudicia eius in conspectu meo, & iustitias eius non repuli à me.*

XXVI.

*Et ero immaculatus cum eo, & obseruabo me ab iniquitate meâ.*

XXVII.

*Et retribuet mihi Dominus secundum iustitiam meam, & secundum puritatem manuum mearum in conspectu oculorum eius.*

Laudauit Deum de beneficio liberationis ab inimicis. Nunc addit etiam in futurum se perpetuo liberandum, neque id ex sola misericordia, sed etiam ex iustitia futurum, propterea quod iuste vixerit, & viuere deinceps in animo habeat. Deus enim iustus est, & iustos amat, & adiuvat, ac protegit. *Et retribuet mihi*, inquit, *secundum iustitiam meam*, i. retribuet mihi, ut hæcenus fecit, multa bona, prout iustitia mea meretur. *Et secundum puritatem manuum mearum retribuet mihi*, i. sicut ego iustitiam habeo non solum in corde, sed etiam in manibus, id est, iustus sum interius & exterius; iustum habeo cor & iusta opera: ita Deus mihi bona retribuet coram se, & coram hominibus interius exteriusq; custodiet. At præsumptio videtur iustitiam suam prædicare. Non est præsumptio, quando sincere id agitur, & agnoscitur Deus auctor bonorum nostrorum. Sic etiam merita sua coram Deo pronuntiavit Nehemias 2. Esdr. 5. Ezechias Isa. 38. Esther cap. 14. At videtur falsum, quod Dauid hoc loco dicit. Nam cum hæc diceret, commiserat adulterium & homicidium. Et præterea ipse alibi dixit, *Delicta quis intelligit? ab occultis meis munda me Domine*. Et alibi, *Non iustificabitur in conspectu tuo omnis viuens*. Aliqui propter hanc obiectionem existimant, Dauidem non loqui de iustitia sua absolute, sed de iustitia causæ, quam habebat cum aduersariis. Alij existimant Dauidem loqui solum de iustitia Religionis, id est, quod semper permanserit in vera religione, nec vnquam idolis cultum adhibuerit. Sed repugnant his opinionibus verba illa: *Quia custodiui vias Domini*. Item: *Omnia iudicia eius in conspectu meo*. Item: *Ero immaculatus cum eo*, &c. Dicendum igitur est, Dauidem commemorare iustitiam suam, quæ in eo sita erat, ut sincero corde Deum coleret: & propositum stabile haberet, nunquam præuicari legem Domini, & si forte secus ageret, continuo respiceret, & ex corde reuerteretur ad Deum. Illud autem: *Delicta quis intelligit? de peccatis venialib. intelligi potest, quæ iustitiæ non repugnant*. Illud vero: *Non iustificabitur in conspectu tuo omnis viuens*,



*viuens*, intelligitur de iustitia. quæ sine gratia Dei præueniēte haberi credatur. Sic enim nullus coram Deo iustificabitur, quia quicumque iustus est, gratia Dei iustificatus est.

XXVIII. *Cum sancto sanctus eris, & cum viro innocente innocens eris.*

XXIX. *Et cum electo electus eris, & cum peruerso peruerteris.*

Reddit rationem, cur secundum iustitiam suam sibi retribuendum à Deo dixerit, quia nimirum Deus reddit unicuique secundum opera sua. Alloquitur autem ipsum Deum, & ait, *Cum sancto sanctus eris*, id est, cum homine misericordi & pio, pie ac misericorditer ages, siue pium ac misericordem te præbebis. Nam vox Hebræa, *chafid*, pro qua nos habemus, *sanctum*, proprie misericordem significat. Et pro, *sanctus eris*, in Hebræo est verbum vnicui coniugationis Hirpaël, quod proprie significat misericordem se reddere, vel exhibere. Itaq; non est sensus, si nos erimus sancti, Deum quoq; fore sanctum: sed, si nos erimus sancti, Deum nobiscum sancte, id est, misericorditer acturum. Eodem modo intelligenda sunt cetera; *cum innocēte innocēs eris*, id est, ei qui nemini nocet, Deus se innocentem præbebit, id est, non ei nocebit, neque noceri ab aliis sinet. *Cum electo electus eris*, id est, cum homine sincero, & puro, id enim proprie significat vox Hebræa

חסיף

תחרם

נכר

*nahar*, purum te exhibebis, id est, sincere, & candidè ages. *Et cum peruerso peruerteris*, id est, ei qui non est misericors, misericordiam non præstabis; ei, qui nocet, nocebis, qui non sincere agit, sed callide supplantat, eum tu callide, id est, sapienter supplantabis. Est autem hic obseruandum, vbi dictum est, *Cum sancto, sanctus eris, cum innocēte innocēs eris, cum electo electus eris*, eādem vocem Deo tributam fuisse: ac vbi dictum est, cum peruerso peruerteris, in Hebræo non esse eandem vocem. De homine dictum est, *hiches*, quod proprie peruersum significat. De Deo autem, *thithpaël*, quod significat iustari, & conari in contrarium. Itaque sensus est, si homo peruersus fuerit, Deus non erit se peruersus, vel peruersè ager, sed contra-

עקש

תתפל

peruersum hominem iustabitur magnomolimine, vt illum plane euertat, & ab omni spe sua cadere faciat.

*Quoniam tu populum humilem saluum facies, & oculos superbiorum humiliabis.*

XXX.

Explicat Propheta duos superiores versiculos, quasi dicat, cum sancto sanctus eris, & cum innocēte innocens, & cum electo electus, quia populum humilem saluum facies, id est, quia humilitas, quæ est custos omnium virtutum, tibi gratissima est, & omnibus humilibus das gratiam: cum peruerso autem peruerteris, quia oculos superbiorum humiliabis, id est, quia superbia, quæ est Regina vitiorum, tibi summo opere displicet, & ideo superbis omnibus resistis, eosque deicis, & humilias. Nominat autem oculos, præter cetera membra, quia in oculis, ac potissimum in superciliis arrogantia cernitur.

*Quoniam tu illuminas lucernā meā Domine, Deus meus illumina tenebras meas.*

XXXI.

Quia Propheta Dauid videbatur satis magnifice de sua iustitia, & puritate loquutus, ostendit, vnde habuerit iustitiam, & alia dona: & hinc maxime Deum laudat, quod ab illo sit lumen, & fortitudo, & omnia bona. *Quoniam*, inquit, *tu illuminas lucernam meam Domine*, id est, à te habeo principium omnis boni, quod est lumen ad discernenda vera bona à falsis, & vera mala à falsis. Primum enim vulnus ex peccato originali naturæ infectum est ignorantia veri boni; & ideo prima curatio à lumine Diuino incipit. *Tu*, inquit, *illumina lucernam meam*, id est oculum interiorē cordis mei tu solus illustras. *Deus meus illumina tenebras meas*, id est, tu pater luminum, tu lux vera in quo tenebræ non sunt vllæ, sicut hæcenus, coepisti illuminare interiores oculos cordis mei: ita perge illuminare tenebras meas, id est, expellere omnes tenebras meas. Nam sine gratia Dei illustrante quod attinet ad supernaturalia mysteria, meræ tenebræ sunt in corde nostro. Nam non sumus sufficientes cogitare aliquid ex nobis: tanquam ex nobis. In Græco habetur, *illuminabis*:



minabis tenebras meas. In Hebræo, *illumina-  
bit tenebras meas*. Nostra lectio, *illumina-  
tenebras meas*, habetur in antiquis libris san-  
ctorum Hieronymi & Augustini, sensus au-  
tem semper est.

XXXII. *Quoniam in te eripiar à tentatione, &  
in Deo meo transgrediar murum.*

Particula *Quoniam*, sæpe redundat in o-  
ratione Hebraica, sicut etiam particula *&*,  
quæ sæpe ponitur initio versuum, vel etiam  
librorum. Id admonendum fuit, ne anxie  
nimis queratur ratio harum particularum.  
Dixerat Propheta, se à Deo habuisse lu-  
men, quod est principium operum bono-  
rum, verèq; iustitiæ: nunc addit, habuisse  
se fortitudinem & robur ad vitanda mala  
& facienda bona, quæ ex diuino lumine  
cognouerit vitanda, vel facienda. *In te*,  
inquit, *eripiar à tentatione*, id est, fietus au-  
xilii tuo, quo fortis efficior, superabo o-  
mnes tentationes, omniq; mala vitabo:  
*& in Deo meo transgrediar murum*, id est, e-  
iusdem Dei confisus auxilio, atque ab eo-  
dem accepta fortitudine omnia potero,  
quantumvis difficilia, quale esset transcen-  
dere altissimum murum. In Hebræo pro il-  
lis verbis, *eripiar à tentatione*, habetur,

*אֶרֶץ גְּבֻדָּהּ*, id est, *percurram exercitum*, siue  
(vt S. Hieronymus reddit) *percurram accin-  
ctus*. Videntur Septuaginta Interpretes sen-  
sum reddidisse, non verba. Nam percurrere  
exercitum aduersariorum, & nullum vulnus  
accipere, idem est quod eripi à iaculis ho-  
stium, quæ iacula, tentationes significant, vt  
Apostolus interpretatur, cum ait, Ephes. 6.  
*In quo possitis omnia tela nequissimi ignea ex-  
tinguere*. Sic etiam *percurram accinctus* inter  
medios hostes illæsus, idem significat, quod  
eripiar à tentatione quando maxime opus er-  
it.

XXXIII. *Deus meus impolluta via eius, eloquia  
Domini igne examinata, protector est o-  
mnium sperantium in se.*

Redditationem, cur à Deo acceperit lu-  
men & vires, & cur in eo tantopere confi-  
dat, quia Deus bonus & verax protector est  
omnium in se confidentium, & quia ipse i-

dem est solus verus Deus, & verus Dominus,  
à quo bona ista expectari possunt. *Deus meus  
impolluta via eius*, id est, Deus meus, cuius  
via impolluta est, id est, Deus, qui sanctissi-  
mus est, & viam impollutam ambulat, id est,  
operatur iustissime. *Eloquia Domini igne  
examinata*, id est, promissa Domini certissi-  
ma & probatissima, vt aurum igne exami-  
natum: iste, inquam, Deus impollutus,  
& cuius promissio est certissima, *protector  
est omnium sperantium in se*. Ex Hebræo  
clarior sensus habetur, in quo textu legitur,  
eloquium in numero singulari, & pro voce  
*protector*, est *scutum*. Ex quo apparet, tam  
Deum, quam eius eloquium dici scutum  
confidentium in Deo. Sic enim ad literam  
verti posset lectio Hebraica, *Deus immacu-  
latus in via sua, eloquium Domini igne exa-  
minatum, scutum est omnium sperantium  
in se*. Sed quia Septuaginta Interpretes po-  
suerunt eloquia in numero multitudinis, &  
pro voce *scutum*, posuerunt *protector*, inde  
obscurata est sententia, quæ ex Hebræo di-  
lucidanda est.

*Quoniam quis Deus prater Dominum? XXXIV.  
aut quis Deus prater Deum nostrum?*

Est altera ratio, vt paulo ante diximus,  
cur in Deo sit confidendum, & cur ab eo so-  
lo lumen & robur expectandum sit; quia  
ipse solus est verus Deus. In Hebræo habe-  
tur, *Quis Deus prater Dominum? aut quis  
petra prater Deum nostrum?* ex quo intelli-  
gimus, Deum nostrum solum esse verum  
Deum, & quia solus est verus Deus, solum  
ipsum esse veram petram, firmam, stabi-  
lem, in qua tuto confidere & quiescere pos-  
simus; & omnes, qui in realia confidunt,  
necesse esse, vt decipiantur & confundan-  
tur.

*Deus qui praeinxit me virtute, & po- XXXV.  
suit immaculatam viam meam.*

Declarat nunc in particulari dona à Deo  
accepta, per quæ ab hostibus omnibus li-  
beratus ad regnum peruenit. Ac primum  
dicit, se à Deo accepisse robur & innocen-  
tiam, quæ duo rarissime coniunguntur. Viri  
enim robusti proni sunt ad iniurias inferen-  
das.



das. Dauid autem vere fortissimus, & innocentissimus erat, ut ne hostem quidem suum Saulem occidere vellet, cum facillime posset. *Deus, inquit, per cinxit me virtute, id est, viribus ac robore me domavit, & posuit immaculatam viam meam, id est, simul probitatem vitæ mihi concessit.*

XXXVI

*Qui perfecit pedes meos tanquam ceruorum, & super excelsa statuens me.*

XXXVII

*Qui docet manus meas ad prælum, & posuisti, ut arcum areum, brachia mea.*

Describit in particulari fortitudinem suam, de qua dixerat, *qui præcinxit me virtute*, ac dicit, se accepisse à Deo miram celeritatem in pedibus, & miram artem bellandi in manibus, & mirum robur in brachiis. Dicit sibi pedes ad currendum perfectos, quasi ceruorum, & super excelsa collocatum, id est, ea celeritate pedum facile montes altissimos conscendisse: quod verificatum est, quando Saulem fugiens, habitabat in altissimis & præruptis montium cacuminibus. Addit, se doctas manus ad prælum habuisse, & brachia quasi ærea, in quibus robur & ars militaris significatur. De quibus nemo dubitare potest, qui legerit primum & secundum librum Regum. Nam de arte manuum testis esse potest lapis ex funda in fronte Goliath infixus: de viribus brachiorum testes sunt vrsi & leones, quos sola vi brachiorum Dauid interfecit. In Hebræo habetur *nichata*, *conteritur*, ubi nos habemus *posuisti*. Sed Septuaginta Interpretes non legerunt *nichata*, sed *natatta*, quod est *dedisti*, siue *posuisti*. Itaque corrupta videtur casu aliquo lectio Hebræica moderna: neque enim dubitari potest, quin Septuaginta Interpretes emendatos codices habuerint, eosque rectissime intellexerint.

XXXVIII

*Et dedisti mihi protectionem salutis tue, & dextera tua suscepit me.*

Declarat nunc innocentiam, de qua dixerat, *Posuisti immaculatam viam meam*. Nam quia dono Dei innocenter Dauid vivebat, ideo illum Deus assidue protegebat, ut nunc dicit, *Dedisti mihi protectionem salutis tue*. Parum enim profuisset celeritas pedum & ro-

bur brachiorum, & ars pugnandi aduersum Regem, & Regium integrum exercitum, nisi adfuisset protectio salutis Dei, id est, protectio diuina saluans, & dextera Dei suscipiens & sustentans.

*Et disciplina tua correxit me in finem, & disciplina tua ipsa me docebit.* XXXIX.

Hoc etiam pertinet ad innocentiam, siue immaculatam viam Dauidis ostendendam. Non solum, inquit, protectio tua mihi adfuit, sed etiam disciplina tua me correxit, id est, eruditio, quæ ex lege tua habetur, illa me direxit, ne errarem, & si quando in periculo essem errandi, illa diligenter inspecta & considerata, me correxit, idque perseveranter usque in finem. Eadem quoque disciplina legis tue deinceps me docebit. Posset etiam hæc disciplina significare paternam castigationem, qua Deus per aliquas temporarias calamitates Dauidem correxit, si quando ob humanam fragilitatem deliquit. In Hebræo non habetur hic versiculus, sed loco totius huius versiculi habentur hæc pauca verba: *Et mansuetudo tua multiplicauit me*. Fortasse idem est sensus: potest enim sic exponi lectio Hebræica, *mansuetudo tua*, id est, lenis & paterna castigatio, *multiplicauit me*, id est, auxit me scientia. Nam à verbo *rabab*, quod hic habetur, dicuntur *Rabbim*, Magistri & Doctores, quod sunt multi in scientia.

*Dilatasti gressus meos subtus me, & non sunt infirmata vestigia mea.* XL.

Pergit narrare victorias suas, quæ sunt omnia beneficia Dei. *Dilatasti*, inquit, *gressus meos subtus me*, id est, fecisti magnis passibus progredi, & non sunt infirmata vestigia mea, id est, nec propterea fatigatus destiti à cursu. In Hebræo habentur hæc in futuro, *dilatabis*, &c. sed ex more linguæ sæpe futurum ponitur pro præterito.

*Persequar inimicos meos, & comprehendam illos, & non conuertar donec deficiant.* XLI.

*Confringam illos, nec poterunt stare, cadent subtus pedes meos.* XLII.

Hæc non videntur proprie pertinere ad futurum tempus, sed ad præteritum, ut ex præ-



precedentibus & sequentibus colligitur. Et sicut Septuaginta Interpretes, *Dilatabis gressus meos*, verterunt, *dilatasti gressus meos*; ita potuissent reliqua vertere, & ex futuris præterita facere. Sed retinenda est lectio, vt iacet, & subintelligendum verbum *dixi*, vt sensus sit, *dilatasti gressus meos, & non sunt infirmata vestigia mea*, ideo magna spe concepta dixi apud me, *Persequar inimicos meos, &c.*

XLIII. Et *præcinxisti me virtute, & supplantasti insurgentes in me subitus me.*

Hinc apparet, Prophetam loqui de præterito. Sicut, inquit, dixi, *persequar inimicos meos, &c.* ita factum est Deo adiuvante. Tu enim Deus *præcinxisti me virtute*, i. robore ad bellum, & tu *supplantasti*, i. cadere fecisti *subitus me eos, qui in me insurgabant.* Illud, *præcinxisti virtute*, est frequens in Scriptura; *Accinctus potentia, qui conturbas profundum maris. Induere fortitudinem brachium domini. Indutus est dominus fortitudinem, & præcinxit se. Sedete in ciuitate, donec induamini virtute ex alto.* Significat autem præcipua arma non consistere in gladio & lorica, sed in viribus & robore, & ideo non est auctor victoriæ, qui militem induit gladio & lorica; sed qui viribus & robore illum induit.

XLIV. Et *inimicos dedisti mihi dorsum: & o-dientes me disperdidisti.*

Idem repetit aliis & aliis verbis, vt magis declararet & lauder beneficium Dei. Sensus versiculi perspicuus est: significat enim à Deo factum esse, vt inimici David fugerent, & eo modo dorsum ferendum præberent. Sed verba duriuscule sonant. S. Hieronymus vertit, *& inimicorum meorum dedisti mihi dorsum.*

XLV. *Clamauerunt, nec erat qui saluos faceret, ad Dominum, nec exaudiuit eos.*

Reddit aliam causam victoriæ: quia non solum Deus exaudiebat orationes eius, sed non exaudiebat orationes aduersariorum ipsius, quamuis ipsi quoque Dominum inuocarent.

XLVI. Et *comminuam eos vt puluerem ante faciem venti: vt lutum platearum delebo eos.*

Videtur de reliquiis inimicorum suorum loqui, quasi dicat, iam victoriam de inimicis meis retuli; sed si quæ forte reliquæ supersunt, comminuam eas in minutissima frusta; & proiciam, vt proies solet puluis à vento, & auferam eos de terra, vt siccari solet lutum platearum flante vento vehementi.

Eripies me de contradictionibus populi; constitues me in caput gentium. XLVII.

Iam hoc factum erat: nam antequam hunc Psalmum David componeret, liberatus fuerat à variis populi contradictionibus & defectionibus, & constitutus erat in caput gentium, id est, in regni solum eleuatus. Itaque vel exponenda sunt verba futuri temporis, pro verbis temporis præteriti, quod est vsitatum in lingua Hebraica: vel certe significatur continuatio beneficij. Quasi Propheta dicat, in posterum, vt hactenus fecisti, eripies me à rebellionibus, & constitues in folio meo, si forte deici ab eo contingat.

Populus quem non cognoui, seruiuit mihi; in auditu auris obediuit mihi. XLVIII.

Filij alieni mentiti sunt mihi, filij alieni inueterati sunt, & claudicauerunt à semitis suis. XLIX.

Non sine causa postulat se eripi à contradictionibus populi sui: quia maiorem fidem & obedientiam expertus erat in quibusdam Gentilibus, quam in filiis populi Israël. Quæ est etiam prophetia manifesta de Christo, cui Gentiles adhæserunt, & à quo Hebræi defecerunt, *Populus quem non cognoui*, id est, Gabaonitæ, Getæ, & alij, quos non cognoui pro fratribus, cum essent Gentiles, *seruiuit mihi, in auditu auris obediuit mihi*, i. promptissime mox audito imperio obediuerunt. *Filij autem alieni*, i. filij adulterini, quo ad mores *mentiti sunt mihi*, id est, deceperunt me, ficto corde seruierunt. *Inueterati sunt*, id est, deflexerunt à me tanquam folia arentia: id enim significat vox Hebræa, *& claudicauerunt à semitis*, id est, non rectè & fideliter mecum inceserunt. Hæc significant rebelliones sub Absalon, sub filio Bochi, & alias.

In



In Hebræo pro *claudicauerunt à semitis suis*, habetur *contrahentur in angustiis suis*, vt vertit S. Hieronymus, vel, *expauescent à carceribus suis*, vt vertit Pagninus. Sed sciendum

est, vocem *iachregu*, non haberi, nisi in hoc Psalmo; & ideo, si licuit Pagnino vettere *expauescent*, & S. Hieronymo *contrahentur*; multo magis licuit Septuaginta Interpretibus vettere *claudicauerunt*. Imo mirum est, cur posteriores ausi sint recedere à versione antiquissimorum Interpretum in ea voce, quæ non habetur alibi in Scripturis, præsertim cum interpretatio Septuaginta maxime cohareat cum reliquis partibus huius versiculi.

Porro altera vox, *Misgheroth*, significat proprie locum angustum, vel clausum à verbo

*סגר* *sagar*, quod est claudere, & propterea S. Hieronymus vertit *angustias*, Pagninus *carceres*, & Septuaginta *semitas*: nam *semitæ* sunt viæ angustæ. Itaque sensus est, filios adulterinos, qui ficto corde seruiunt, claudicare à semitis, id est, declinare à semitis, per quas recto pede ambulandum fuisse.

L. *Viuit Dominus, & benedictus Deus meus, & exaltetur Deus salutis meæ.*

Concludit Psalmum laudans Deum. *Viuit Dominus*, id est, nunc apparuit Dominum viuere, & sicut viuit, ita semper viuat, & *exaltetur Deus* auctor salutis meæ.

LI. *Deus qui das vindictas mihi, & subdis populos sub me, liberator meus de inimicis meis iracundis.*

*קא* Exaltetur, inquit, Deus, qui vindicauit iniurias mihi factas, & subiecit mihi populos, qui rebel auerant, & liberauit me de insidiis, & impetu inimicorum furentium, quales fuerunt Saul & Absalon. Pro voce *iracundis*, habetur in Hebræo *As*, quam moderni vertunt *et*, vel *etiam*. Sed cum ea vox sæpe significet *nasum*, & *nasus* in Scriptura passim ponatur pro *iracundia*, quæ ex nasi immutatione cognoscitur, recte Septuaginta Interpretes vertebunt *iracundis*, idem est enim phrasi Hebræica, *ab inimicis meis nasi*, id est, *iracundiæ*, & *ab inimicis iracundis*.

*Et ab insurgentibus in me exaltabis me, à viro iniquo eripies me.*

LII.

Precatur sibi conseruationem diuinorum beneficiorum, nimirum exaltari ab insurgentibus in se, vt frustra nitantur, cum pertingere tam alte non possint, & liberari ab omni homine iniquo. Particula *et*, in principio versiculi potuisset omitti; nam in Hebræo & Græco non habetur, nec eam habet S. Augustinus. Videtur in nostro textu hæsisse ex altera interpretatione vocis *As*, quæ *nasum* significat, & etiam particulam *et*; & fortasse erari in margine: sed nihil officit sententiæ.

*Propterea confitebor tibi in nationibus Domine, & nomini tuo Psalmum dicam.*

LIII.

Hac de causa, inquit, *Confitebor*, id est, laudabo confitens beneficia tua, idq; non clam, sed palam, & coram multitudine populi, vt omnes discant confidere in Domino.

*Magnificans salutes Regis eius, & faciens misericordiam Christo suo Dauid, & semini eius vsque in seculum.*

LIV.

Hæc conclusio per se manet, & sensus est, fit Dominus *magnificans salutes Regis sui*, id est, augeat & multiplicet salutem corporis & animæ, & omnium rerum Regis, quem ipse Deus sibi elegit: & faciat perpetuam misericordiam Dauidi, quem vngi iussit in Regem, & omnibus successoribus eius vsque in æternum. Quæ precatio impleta est in Christo Iesu Domino nostro, qui regnat, & regnabit in omnem æternitatem.

## PSALMVS XVII.

*Titulus, & Argumentum.*

*In finem Psalmus Dauid.*

**T**itulus nihil habet noui. Argumentum Psalmi est laudatio diuinæ legis. Comparat Propheta legem diuinam cum cælesti corpore, quo nihil videtur esse in rebus corporalibus pulchrius, vtilius, potentius. Potest idem Psalmus exponi de Christo, & Apostolis, vt S. Augustinus facit.

EX-



EXPLICATIO PSALMI XVIII.

**C**œli enarrant gloriam Dei, & opera  
manuum eius annunciat firma-  
mentum.

Comparaturus legem cum cœlo, atque inde eam mirifice celebraturus, dicit, tantam esse maiestatem cœli, ut inde maxime eluceat gloria Dei, qui cœlum fecit. *Cœli enarrant gloriam Dei*, id est, præ cæteris operibus Dei; quæ omnia artificem laudant, cœli sunt, qui sua magnitudine & pulchritudine gloriam Dei manifestam faciunt. *Et opera manuum eius annuntiat firmamentum*, idem repetit aliis verbis; idem enim hoc loco significant cœli & firmamentum, videlicet totum illud celeste corpus in quo sunt stellæ, & ipse etiam Sol & Luna. Nam in 1. cap. Genesios, *Deus vocavit firmamentum cœlum*, & in eo posuit Solem, Lunam & stellæ. Nihil autem refert, siue cœlum, siue cœlos dicamus. Nam apud Hebræos nomen est habens formam numeri multitudinis, & coniungitur cum verbis numeri multitudinis. Sed Interpretes modo vertunt cœlum in numero singulari, modo cœlos in numero multitudinis. Firmamentum igitur, in quo secundum modum loquendi Scripturæ S. sunt omnia cœlestia lumina, annunciat & declarat hominibus opera manuum Dei, id est, primaria & nobilissima opera manuum Dei, ex quibus ingens colligitur gloria Conditoris.

*Dies diei eructat verbum, & nox nocti indicat scientiam.*

Admirabilis plane est prædicatio, qua cœli enarrant gloriam Dei. Id quod ostenditur tribus modis. Primo, quia sine intermissione cœlum prædicat: secundo, quia prædicat verbis omnium idiomatum: tertio, quia prædicat toti orbi terrarum. In hoc versiculo declaratur prædicatio sine intermissione: & quia cœlum prædicat per dies & noctes, cum interdiu conspiciatur pulchritudo Solis, & noctu pulchritudo stellarum; & quia dies ac noctes non permanent, sed labuntur, ac sibi inuicem succedunt; ideo poetico artificio fingit Propheta, unum diem peracto cursu & prædicatione sua, tradere diei sequenti

verbum prædicationis, & noctem quoque peracto cursu, & quasi hymno cantato, tradere nocti sequenti munus canendi. *Dies*, inquit, *diei eructat verbum*, id est, dies cum finitur, tradit alteri diei verbum laudis diuine. *Et nox nocti indicat scientiam*, id est, & nox similiter cum finitur, indicat, id est, annunciat nocti succedenti scientiam laudandi Deum, atque ita iugiter, & sine ulla intermissione dies & noctes quasi choreas ducunt, & Deum laudibus celebrant.

*Non sunt loquela, neque sermones, quorum non audiantur voces eorum.*

Hic iam demonstrat Propheta prædicationem cœlorum fieri omnibus linguis, id est, intelligi ab omnibus nationibus, ac si cœli omnium nationum linguis loquerentur: quia videlicet omnes vident pulchritudinem & præstantiam cœli, & inde venire possunt in cognitionem pulchritudinis & excellentiæ Conditoris. *Non sunt loquela, neque sermones*, id est, nulla sunt idiomata, quorum idiomatum non audiantur voces eorum, id est, cœlorum, id est, quæ idiomata non exprimentur vocibus cœlorum.

*In omnem terram exiit sonus eorum, & in fines orbis terræ verba eorum.*

Explicatur tertia laus eloquentiæ cœlorum, quod non solum sine intermissione & omnibus linguis, sed etiam in vniuersa terra audiantur cœli enarrantes gloriam Dei. Per sonum non intelligitur concentus aliquis corporalis, qualem in cœlis Philosophi aliqui posuerunt, sed prædicatio illa gloriæ, quæ oritur ex pulchritudine cœli considerata ab hominibus. Idem quoque est, *in omnem terram*, &, *in fines orbis terræ*: sæpissime enim Propheta rem eandem bis repetunt. In Hebræo legitur pro *sonus eorum*, *Kauam*; quod significat *linea*, siue *regula eorum*. At videtur Septuaginta legisse non *Kauam*, sed *Kolam*, vnica litera addita, quod est *sonus eorum*. Nam si legisset *Kauam*, nunquam vertissent *φῶν* & *αἰτῶν*, id est, *sonus eorum*, nisi imperitissimi fuissent. Adde, quod S. Hieron. quoque ex Hebræo vertit, *sonus eorum*. Et sic etiam citauit Apostolus ad Rom. 10. &

III.

IV.

קום

קולם

K

con-



congruit, *sonus eorum*, cum eo quod sequitur, *verba eorum*, ubi idipsum aliis verbis reperitur. Ex quo intelligimus textum Hebraicum esse corruptum vitio scriptorum, idq; post S. Hieronymi tempora. Porro S. Paulus citat hunc locum ad Rom. 10. probare volens, prædicationem Christi ad omnes Gentes peruenisse. Ex quo intelligimus, per cælos exponi debere Apostolos, saltem in sensu allegorico. Et reuera SS. Apostoli, ut etiam alij sancti Prædicatores, rectissime comparantur cælis, quod eleuati à terra per contemplationem, ampli per charitatem, splendidi per sapientiam, semper sereni per animi tranquillitatem, celerime moti ab intelligentia per obedientiam, pluentes per instructionem, tonantes per obiurgationes, fulgurantes per miracula, multa bonis terris largientes, & nihil ab eis quærentes per veram liberalitatem, purissimi ab omni forde per vitæ sanctitatem, denique habitaculum summi Regis per iustitiam perfectam sint. Nam anima iusti sedes est Sapientiæ.

*In Sole posuit tabernaculum suum, & ipse tanquam sponsus procedens de thalamo suo.*

Quamuis totum cælum enarret gloriam Dei, tamen præcipue id facit pars nobilissima cæli, quæ est Sol. Proinde in Sole tanquam in parte totius mundi præstantissima; *Deus posuit tabernaculum suum*. Recte autem dicit tabernaculum, non domum, quoniam in Sole commoratur Deus tempore peregrinationis nostræ, quo eum videmus per speculum creaturarum; inter corporales autem creaturas Sol, ut diximus, obtinet principatum. Sed cum peruenerimus ad patriam, non in tabernaculo Solis Deum videbimus, sed in propria eius domo, quæ videlicet æternitas eius est. In Hebræo habetur, *Soli posuit tabernaculum in eis*, id est, Deus posuit in cælis tabernaculum Soli, constituit Solem in cælo tanquam in tabernaculo. Posset quidem utunque lectio Græca reuocari ad Hebræum, si cum dicitur, *ὁ θεὸς ἡλίου ἐν τῷ οὐρανῷ*, illud *αὐτῷ*, accipiatur pro-

*αὐτῷ*, id est, illi, quod non est iniustum. Tunc enim sensus esset, *in Sole*, id est, Soli posuit tabernaculum illi, id est, in cælis. Sed dura est interpretatio, *in Sole*, id est, Soli. Quia vero non apparet in textu Hebræo vlla verborum ambiguitas vel obscuritas, & tamen certum est Septuaginta Interpretes viros doctissimos, non potuisse reddere id quod reddiderunt, si legissent verba, quæ in Hebraicis codicibus habentur, cogimur dicere eos aliter legisse. Vtraque sententia vera est, Deum videlicet in Sole posuisse tabernaculum suum, & Soli posuisse tabernaculum in cælis. Probat autem Propheta Deum in Sole posuisse tabernaculum suum, tanquam in excellentissima creatura, tribus rationibus, quarum prima ducitur à pulchritudine, altera à robore, tertia à beneficentia. *Et ipse*, inquit, *tanquam sponsus procedens de thalamo suo*. Hæc est ratio ducta à pulchritudine: ipse, inquit, decorus, nitidus, ornatus exoritur, tanquam si sponsus aliquis esset, qui de thalamo nuptiali procederet; & vere nihil pulchrius & lucidius Sole inter omnia corpora reperitur.

*Exultauit ut gigas ad currendam viam, à summo cælo egressio eius.*

VI.

*Et occursum eius usque ad summum eius, nec est qui se abscondat à calore eius.*

VII.

Altera ratio ducitur à robore & viribus, quod sine fatigatione, summa celeritate decurrat viam prope immenturabilem. *Exultauit ut gigas*, vel ut fortis & robustus (ut ad verbum in Hebræo legitur) *ad currendam viam*. Exultatio alacritatem significat, quam habere solent, qui sine labore, imo cum voluptate aliquid faciunt. Itaque significatur hoc loco, Solem immentum cæli spatium, velocissimo cursu, sine vlla fatigatione vel labore peragere. *A summo cælo egressio eius*, & *occursum eius usque ad summum eius*. Per summum cælum Oriens designatur. Non enim hoc loco per summum intelligitur altum, sed extremum, ut verbum Hebraicum *קֶזֶז*, & Græcum *ἄκρη* significant. Dicitur

VP.



atitem extremum, ubi res incipit, & ubi definit. Incipit autem cœlum ab oriente, quia inde surgit eius motus, & ibidem etiam definit. Sensus igitur est, Solem exoriri ab oriente, per occidentem toto cœli ambitu decurso, ad orientem reuerti. Parum refert, quod in Hebræo & Græco habetur in futuro *exultabit*, ubi nos habemus *exultant*: nam tempus futurum sæpe accipitur pro præterito. Itaque S. Hieronymus vertit ex Hebræo *exultant*; & sic etiam legunt in Commentario tam ipse quam S. Augustinus. *Nec est qui se abscondat à calore eius*. Hæc est potissima ratio ducta ab utilitate, quam capiunt omnia inferiora à Sole. Siquidem ita fouet Sol omnia calore suo viuifico, vt dici possit communis quidam parens omnium rerum, quæ nascuntur in terra, & in mari. Et ea causa est, cur Sol tam assidue & tam sollicitè totum orbem circumear & visitet, vt res nulla se abscondat, id est, excludatur à participatione tam insignis beneficij.

VIII.

*Lex Domini immaculata conuertens animas, testimonium Domini fidele, sapientiam præstans paruulis.*

Applicat nunc Propheta comparisonem, quasi dicat, pulchrum est cœlum, pulcherrimus Sol, sed lex Domini multo pulchrior: lucidum cœlum, lucidissimus Sol, sed lex Domini multo lucidior: vile cœlum hominibus, utilissimus Sol, sed lex Domini multo utilior. Ponit autem ordine sex encomia legis diuinæ. Primum est, *Lex Domini immaculata conuertens animas*, i. lex Domini pulcherrima est, vtpote sine vlla macula vel scditate, cum nullum peccatum permittat, sicut permittunt leges humanæ: & ideo ubi lex Domini confiderata & perspecta fuerit, *conuertit animas*, i. conuertit ad se amandam animas, easq; rapit consequenter ad Deum, tam pulchræ legis auctorem. Ad illud, *Conuertens animas*, subintelligitur est, & ideo explicuimus, *conuertit*. Alterum encomium est in illis verbis, *Testimonium Domini fidele, sapientiam præstans paruulis*, ubi per *testimonium*, intelligitur eadem lex. Siqui-

dem in Scripturis, & potissimum in Psalmis, lex Domini non solum vocatur lex, præceptum, mandatum, statutum, & similia, quæ apud alios quoque scriptores legem significant; sed etiam vocatur testimonium, iustitia, vel iustificatio, & iudicium, vt perspicuum est præcipue ex Psalmo 118. Dicitur lex Domini testimonium, quia testificatur hominibus, quæ sit voluntas Dei, quid à nobis requirat Dominus, quas pœnas præuocantibus, & quæ præmia obseruantibus præparauerit. Ait igitur, *Testimonium Domini fidele*; i. lex Domini, quæ certissime bonos præmiis, & malos pœnis afficiet. *Sapientiam præstans paruulis*, i. præstans est, siue præstat sapientiam paruulis, hoc est, hominibus paruulis sensu dat lumen prudentiæ, vt sciant bona opera facere, & peccata vitare. Paruulos enim hoc loco vocat Propheta homines, qui non pollent iudicio spiritali, quales sunt omnes amici huius sæculi. Et per sapientiam intelligit prudentiam spiritualem, quæ corrigit mores, & format ad præscriptum diuinæ legis.

*Iustitia Domini recta, lætificantes corda, præceptum Domini lucidum illuminans oculos.*

IX.

Tertium encomium diuinæ legis est, quod posteaquam cœpit amari, vt habet primum encomium, & obseruari, vt habet secundum, mirabili læticia perfundit hominem: nihil enim iucundius bona conscientia. *Iustitia*, inquit, *Domini*, id est, lex Domini, siue præcepta Domini, quæ dicuntur iustitiæ, quia iustissima sunt, & quia iustum faciunt obseruatorem, ista, inquam, præcepta, cum recta sint, lætificantia sunt, id est, *lætificant corda*: corda enim recta valde bene conueniunt cum rectis præceptis, & ideo lætantur & gaudent, cum obseruandorum præceptorum occasio venit. Quartum encomium est, *Præceptum Domini lucidum, illuminans oculos*, id est, Lex Domini lucida luce diuinæ Sapientiæ, illuminat oculos mentis, quia facit intelligere voluntatem

K 2

tatem



tem Dei, & quæ sint vera bona, & vera mala. Docet etiam ceremonias Dei. plenas diuinis mysteriis. Illuminat etiam Domini per modum dispositionis; nam in maleuolam animam non introibit sapientia: nihil enim magis impedit cognitionem Dei, in qua vera sapientia consistit, quam impuritas cordis. *Beati enim mundo corde, quoniam ipsi Deum videbunt.*

X. *Timor Domini sanctus, permanens in seculum seculi; iudicia Domini vera, iustificata in semetipsa.*

Quintum encomium est, quod superiora bona non temporalia, sed æterna facit esse lex Domini. *Nam timor Domini sanctus*, id est, timor Domini, quo quis Deum offendere trepidat, qui alio nomine *pietas* dicitur, *manet in seculum seculi*, quo ad præmium suum, non terminantur in morte bona quæ producit observatio legis, siue timor castus legem obseruare faciens, sed manent in æternum. Quo modo alibi dicitur, *Patientia pauperum non peribit in finem.* In Hebræo est, timor Domini *theora*, id est, mundus; & in Græco similiter est *θεωρα*, non *απειρα*. Itaque significatur timor filialis, qui non habet admixtam seruitutem, de quo dicitur in alio Psalmo, *Beatus vir qui timet Dominum, in mandatis eius cupit nimis.* Nam qui timet timore serui, seruat mandata non volens, sed inuitus: at qui timet timore filiali, *in mandatis eius cupit nimis*, id est, cupit valde, & vult omnino ea seruare. Vltimum encomium est, quod lex Domini sit vera & iusta per seipsam, non egens iustificationem. *Iudicia Domini vera, iustificata in semetipsa*, id est, in mandata Domini, quæ dicuntur iudicia, quia per ea Deus iudicat homines, & quæ sunt norma ac regula discernendi virtutes a vitiis, & opera bona à malis: ista, inquam, mandata verissima, iustificata sunt in semetipsa; id est, non egent vt ab aliquo demonstrentur iusta: hoc enim ipso, quod sunt mandata Dei, iusta esse probantur. Et præterea decem præcepta, de quibus potissimum David loquitur, cum sint prima principia iuris naturalis, continent in se talem

iustitiam, vt in omni loco & tempore, & casu particulari sint iusta, & nullam admittant dispensationem; cum aliæ leges sæpe indigeant circumstantiis loci, temporis & personarum, vt iustæ sint. Itaque sola lex Domini iustificata est in semetipsa. In Hebræo habetur, *iudicia Domini veritas*, id est, verissima, iusta sunt, siue iustificata sunt, *taedan*, quod significat pariter, simul, in idipsum: sed recte noster Interpres vertit, *in semetipsa*. Hoc enim loco iustificari simul, vel pariter, nihil est aliud, nisi non egere, vt aliunde iustificentur.

*Desiderabilia super aurum & lapidem pretiosum multum, & dulciora super mel & fauum.*

Hæc est conclusio ex superioribus, quasi dicat Propheta, Cum tam bona sint præcepta Domini, certe præponenda sunt omnibus diuitiis & deliciis huius mundi: nam *desiderabilia sunt super aurum & lapidem pretiosum multum*, i. in maxima copia habitum; *& dulciora super mel & fauum*, i. non solum super mel quodcunque, sed etiam super fauum plenum & redundans melle purissimo. Positum est enim illud *& fauum*, ad significandam copiam, vt correspondeat ei, quod dictum erat, *lapidem pretiosum multum*. In Hebræo est, *super aurum & topazion multum*, & *super mel & redundantiam fauorum*; sed Interpretes sensum verterunt. Est autem topazius species lapidis pretiosi: sed Propheta posuit speciem pro genere. Quam longe remota est hæc veritas à sensu carnalium hominum: quotusquisque carnalium est, qui pro paruo lucro, vel exigua delectatione non contemnat omnia diuina præcepta? & tamen verissimum est, vtiliorem & iucundiorum esse legis observationem omnibus thesauris, atque omni voluptate.

*Etenim seruus tuus custodit ea, in custodiendis illis retributio multa.*

Probat exemplo, siue experientia sua, verum esse, quod dixit. Nam, inquit, *seruus tuus custodit ea* præcepta, & *in custodiendis illis retributio multa* illi contingit, id est, experimento probauit seruus tuus, se multa bona

יְהוָה

XI.

XII.



bona percipere, dum præcepta custodit. Ex Hebræo S. Hieronymus vertit, Seruus tuus docebit ea. Pagninus autem vertit, Seruus tuus illustratur in eis. Sed Septuaginta rectissime verterunt, custodit ea. Nam vox Hebræa, *nizhar*, tametsi in aliis coniugationibus, docere, vel splendere significet, tamen in passiva coniugatione, qualis est hoc loco, significat custodire se, siue cauere, vel seipsum admonere. Itaque ad verbum sic verti potuisset, *seruus tuus custodit se in eis*, id est, abstinet à peccando, præcepta tua custodiens, quod est idem cum eo, *seruus tuus custodit ea*, id est, præcepta.

*Delicta quis intelligit? ab occultis meis munda me, & ab alienis parce seruo tuo.*

Dixerat se custodire mandata Dei, corripit se, atque excipit peccata ex ignorantia, quæ vix caueri possunt. Quali dicat, Seruus tuus cauere à peccatis, legem tuam seruando, non omnino, sed quantum patitur humana fragilitas. Pulchre in Hebræo legitur ad verbum, *ignorantias quis intelligit?* ubi opponit ignorantiam intelligentiæ, demonstrare volens, esse difficillimum cauere peccata, quæ ex ignorantia committuntur, & tamen quia vere peccata sunt, & caueri potuerunt, addit orationem, *ab occultis meis munda me*. Quod sequitur, *& ab alienis parce seruo tuo*, non significat, vt Deus nobis ignoscat peccata aliena, vt vulgo hic locus citari solet; sed vt Deus custodiat nos à soliditate peruerforum hominum. Homines enim bonæ voluntatis, qualis erat sanctus Dauid, ab ignorantia priorum delictorum, & à seductione prauorum sodalium in primis cauere debent. Pro voce, alienis, habetur in Hebræo, *zedim*, quod superbos significat. S. Hieronymus vertit, à *superbis libera seruum tuum*. Sed Septuaginta legunt, *zarim*, non *zedim*: significat autem, *zarim*, alienos. Sensus est fere idem, nisi quod secundum Hebræum, vt nunc se habet, significatur liberatio ab vno genere maiorum, id est, à superbis: at secundum Græcum textum, & veram Hebraicam lectio-

nem, significatur liberatio generalis ab omnibus peruerfis amicis. Nostra igitur lectio sic exponenda est, ab alienis, id est, ab iis, qui alienis moribus sunt, parce seruo tuo, id est, parcendo remoue illos ab amicitia serui tui.

*Si mei non fuerint dominati tunc immaculatus ero, & emundabor à delicto maximo.*

Reddit rationem, cur tantopere timeat improborum familiaritatem. Nam, inquit, si isti alienis moribus præditi, non fuerint dominati mei, id est, si per nimiam familiaritatem, non me sibi subiecerint, & ad suam voluntatem me non redegerint, tunc immaculatus ero, & emundabor, id est, mundus ero à delicto maximo, id est, à peccato graui, & mortali, omne enim mortale crimen maximum dici potest, cum à Deo bono maximo auertat, & ad pœnam gehennæ planè maximam perducatur. S. Augustinus legit, à delicto magno, vt habetur in Græco, sed parum refert.

*Et erunt, vt complacent eloquia oris mei, & meditatio cordis mei, in conspectu tuo semper.*

Non solum tunc immaculatus ero, sed etiam tunc erunt, vt complacent, id est, fiet, vt complacent eloquia oris mei, & meditatio cordis mei in conspectu tuo semper, id est, hymni, quos in laudem tuam corde, & ore decanto, placebunt tibi semper, quia de mundo corde, & simplici ore prodibunt.

*Domine adiutor meus, & redemptor meus.*

Placebunt, inquam, tibi cantica mea, ex gratia tua, non meritis meis: quia vt sum immaculatus, mundus à delicto maximo, & proinde placeant tibi verba mea, dono tuo habeo, qui es adiutor meus, & redemptor meus, adiutor in bonis,

& redemptor à malis.



## PSALMVS XIX.

Titulus &amp; Argumentum Psalmi.

In finem Psalmus David.

**P**salms hic videtur cantatus à Davide prauidente Christi aduentum ad debellandas aëreas potestates, quo etiam pertinent duo Psalmi sequentes.

## EXPLICATIO PSALMI XIX.

I.

**E**xaudiat te Dominus in die tribulationis, protegat te nomen Dei Iacob.

Cum David nullius hominis nomen exprimat, alloquitur sine dubio illum, in quem omnia iustorum desideria, & omnium Prophetarum vaticinia respiciebant. Ac quasi Christum videret in bellum aduersus diabolum prodeuntem, & oratione se armantem, imminente passionis tribulatione, acclamat illi, *Exaudiat te Dominus in die tribulationis*, id est passionis, in qua, vt dicit Apostolus ad Hebr. 5. *cum clamore valido & lachrymis preces supplicationesq; offerens, ad eum, qui posset illum saluum facere à morte, exauditus est pro sua reuerentia.* Exauditus est autem, non vt mortem euaderet, sed vt mortem moriendo destrueret, & vitam resurgendo repararet; & confusio in gloriam, mortalis in immortalē verteretur, sicut ipse ait Ioan. 17. *Pater venit hora, clarifica Filium tuum.* De hac exauditione loquitur Propheta. Quo etiam pertinet, quod sequitur, *Protegit te nomen Dei Iacob.* Per nomen intelligi potest inuocatio, sicut in eo loco: *In nomine meo demonia eiciunt*, Marc. vii. Potest etiam intelligi potestas, siue auctoritas, vt Ioan. 5. *Ego veni in nomine Patris mei.* Potest denique simpliciter per nomen Dei, Deus intelligi: saepe enim in Scripturis ponitur nomen pro persona cuius est nomen, vt cum dicit B. Petrus Act. 4. *Non est aliud nomen sub cælo, in quo oporteat nos saluos fieri:* & cum S. Lucas ait in Act. in Græca editione, c. i. *Erat autem turba nominum simul fere centum viginti.*

Addit Propheta, *nomen Iacob*, quia Iacob significat populum Dei, cuius populi Christus est caput: quasi diceret, protegat te Deus populi sui, vt protegendo te, qui es caput eius populi, consequenter totus populus saluus fiat. Protectio vero petitur à rebus iniuriorum, vt non noceant: tunc autem vere nocuissent, si vel Christi resurrectionem, vel Christi fidem & nomen, vel Ecclesiæ propagationem impedire potuissent.

*Mittat tibi auxilium de sancto, & de Sion tueatur te.*

II.

Per sanctum, intelligit montem sanctum, qui dicitur Sion, vt explicatur in secunda parte versiculi. Dicebatur autem sanctus mons ille, propter præsentiam arcæ Testamenti. Sed hoc loco videtur accipiendus mons, Sion cœlestis, de quo loquitur Apostolus ad Hebr. 12. *Accessistis ad Sion montem, ciuitatem Dei viventis*, Hierusalem cœlestem, &c. Nam meminit hoc loco Propheta montis Sion, vt ostendat Deum ex altissimo monte suo omnia speculari (nam & Sion specula interpretatur) ac proinde posse commode Christum præliantem videre, atque inde illi suppetias mittere; locus autem tam altus, vt inde omnia videantur, non est mons Sion terrestris, sed cœlestis. Itaque ait, *mittat tibi auxilium de sancto monte*, id est, de celsissimo cœlorum habitaculo; vnde omnia cernit; & *tueatur de Sion*, id est, altissima illa specula, vnde omnia prospicit.

*Memor sit omnis sacrificij tui, & holocaustum tuum pingue fiat.*

III.

Quia Dominus præliaturus cum hoste generis humani, non solum orauit, sed etiam sacrificauit, id est, non solum obtulit orationem verbalem, vt sic loquar, sed etiam realem, quæ est sacrificium, ideo Propheta sicut de oratione verbali dixerat: *Exaudiat te Dominus*, ita nunc dicit de oratione reali: *Memor sit omnis sacrificij tui*, id est, non contemnat, semper in memoria habeat, & respiciat omnia sacrificia tua. *Et holocaustum tuum pingue fiat*, id est, acceptetur, vt solent acceptari holocausta ex animalibus pinguibus. Eo siquidem



quidem holocaustum est gratius, quo animal immolatum est melius & perfectius. Hinc est illud Danielis c. 3. *Sicut in millibus agnorum pinguium, sic fiat sacrificium nostrum in conspectu tuo, ut placeat tibi.* Porro Christus obtulit multa sacrificia, & ad extremum, holocaustum; ideo dicit Propheta: *Memor sit omnis sacrificij tui, & holocaustum tuum pingue fiat.* Sacrificia multa sunt passionum multa, quas pertulit Dominus pro gloria Dei, dum viveret; holocaustum quo se ipse totum obtulit, est ipsa mors crucis. Additur hoc loco *Sela* in Hebræo textu, quod significat *semper*. Itaque sensus est, memor sit Dominus semper omnium passionum, & ipsius mortis Christi. Videtur autem precatio Davidis, propheta potius, quam precatio: vere enim semper viget, semperq; vigebit coram Deo, passio Christi; imo etiam ab initio mundi semper viguit, ac per eam nobis omnia bona donantur.

*Tribuat tibi secundum cor tuum, & omne consilium tuum confirmet.*

Declarat finem orationis & sacrificij, quasi dicat, ad hoc te Deus exaudiat, & sacrificium tuum accipiat, ut peruenias, quo peruenire cupis, & finem tibi propositum consequaris, nemosq; sit, qui te ab illo prohibere valeat. *Tribuat tibi secundum cor tuum*, id est, det tibi, quod est secundum cor tuum, id est, quod cupis. *Et omne consilium tuum confirmet*, id est, & omne quod deliberaſti, ſtabiliat, ratum eſſe velit, & executioni mandari permittat & concedat. In Hebræo habetur, *omne consilium tuum impleat*, quod est idem. Itaque sensus est, Exaudiat te Deus, & accipiat sacrificium tuum, ut destruas opera diaboli, ut hominem de captivitate liberaſ, ut vitam æternam in te credentibus præbeas, &c. Hoc enim fuiſſe deſiderium cordis Chriſti, & conſilium, & deliberationem, docent ſacræ Litteræ. *Filius Dei*, inquit Ioannes, *venit, ut diſſolvat opera diaboli*, 1. Ioan. 3. Et B. Paulus: *Chriſtus venit in hunc mundum, peccatores ſalvos facere*, 1. ad Tim. 1. Et ipſe Dominus: *Veni Filius hominis quærere, & ſalvum facere, quod perierat*, Luc. 19.

*Letabimur in ſalutari tuo, & in nomine Dei noſtri magnificabimur.*

Cum id factum erit quod petimus, videlicet, ut tu Rex noſter victoriam de inimicis reportaveris, tunc *letabimur* non ſolum corde, ſed etiam voce (id enim ſignificat vox Hebræa *ranan*) in ſalute tua, id eſt, ob ſalutem tuam, id eſt, quia incolumis ex bello redieris, quæ ſalus & incolumitas in nos redundabit: *Et in nomine Dei noſtri*, à quo tanta victoria proceſſit, *magnificabimur*, magnos videlicet nos eſſe ducemus & dicemus, non propter magnitudinem, quæ in nobis ſit, ſed propter magnum Dominum, quem habemus: In Hebræo eſt, *Nidgal*, id eſt, *vexillum erigemus*: ſed Septuaginta legerunt *Nigdal*, vna littera tranſpoſita, id eſt, *magnificabimur*. Itaque in Hebræo irrepiſt error vitio ſcriptorum, tamen illa etiam lectio optimum ſenſum habeat.

*Impleat Dominus omnes petitiones tuas, nunc cognoui quoniam ſalvum fecit Dominus Chriſtum ſuum.*

Iterum repetit ſauſam precationem, quaſi dicat, impleat ergo Dominus omnes petitiones tuas, ex quibus tam multa bona ſequutura ſunt: *Nunc cognoui quoniam ſalvum fecit Dominus Chriſtum ſuum*, id eſt, ideo audacter repeto, ut Dominus exaudiat te, & impleat petitiones tuas, quia nunc Domini ſiſtatione cognoui omnino fore implendas. Cognoui enim, quod Dominus ſalvum fecit, id eſt, certiffime ſalvum faciet Chriſtum ſuum, & iam in prædefinitione ſua ſalvum illum fecit, à morte excitauit, in cœlo collocavit, hoſtes ſub pedibus eius ſubiecit.

*Exaudiet illum de cœlo ſancto ſuo, in potentatibus ſalus dextera eius.*

Quia dixerat, ſalvum fecit; declarat illud eſſe dictum de ſalute in prædefinitione, non in executione. Nam, ut quod prædefinitum eſt, tempore ſuo impleatur, *exaudiet illum de cœlo ſancto ſuo*, & ſic ſalvum faciet Dominus Chriſtum ſuum. Illud, in *potentatibus ſalus dextera eius*, poteſt habere duplicem ſenſum: poteſt enim accipi potentatus pro

V.

ננ

ננ  
ננ

VI.

VII.



גבורה

pro potentia, & robore, & hoc magis proprie sonat vox Hebræa, *gheburā*, & tunc sensus erit, *in potentiss*, id est, in Magna potentia ad erit Christo salus dextera Dei. Et quamuis verbum Græcum, *dynastia*, & Latinum *potentatus*, proprie significant imperium siue principatum; tamen possunt accipi pro potentia & robore, quomodo accipiuntur eadem vocabula in Psalm. 89. *Si autem in potētatibus octoginta anni*, &c. in Psalm. 20. *versu vlt. Cātabimus, & psallēmus virtutes tuas.* ubi in Græco est *δυναστίαις*. Potest etiam accipi potentatus, pro principatu, & imperio, ut verbum Græcum *dynastia*, & Latinum *potentatus* proprie significant, & tunc sensus erit, *Exaudiet illū de cælo sancto suo, & in potentatibus*, id est, quia in principatibus nimirum constituendis, vel conferuandis, præcipue necessaria est salus dextera eius. Quamuis enim multa præsidia ad salutem Principes habere videantur. ut equos, & currus, arma, & milites, arces, & munitiones, tamen ista omnia nihil sunt, si absit salus dextera Dei: ideo recte subiungit.

VIII.

*Hi in curribus, & hi in equis, nos autem in nomine Domini Dei nostri inuocabimus.*

Pergit explicare victoriam Christi, quam futuram præuidebat, & ait, *Hi in curribus, & hi in equis*, id est, alij aduersariorum in curribus armatis confident, alij in equis fetocibus; & per hæc duo nomina, intelligi vult omnia alia humana præsidia, quibus olim in bellis, tum ad prælium, tum ad fugam utebantur. *Nos autem* cum capite nostro, & rege Christo, non tam in curribus, & in equis, quam in nomine Dei omnipotentis, per deuotam precem inuocato, fiduciam nostram collocabimus. Porro idem est, nomen Domini inuocare, & in nomine Domini inuocare, secundum Scripturæ sanctæ phrasim. Neque multum refert, quod in Hebræo textu habetur, *nazchir*, commemorabimus: non enim loquitur Dauid de qualicunque Dei commemoratione, sed de ea quæ sit ab ijs, quæ eius nomen implorant, ab eoque auxilium petunt.

נזכיר

*Ipsi obligati sunt, & ceciderunt, nos autem surreximus, & erecti sumus.*

IX.

Ostendit, quanto sit vtilius in nomine Domini, quam in curribus, equisve confidere. Illi, qui in curribus, vel in equis confidebant, *obligati sunt, & ceciderunt, nos autem*, qui in Deo confidimus, *surreximus, & erecti sumus*. Et simul indicat miram rerum conuersionem. Nam ante Christi victoriam, hostis humani generis sublimis, quasi in curribus & equis, minabatur deiectis hominibus ob originale peccatum; & similiter Principes Iudæorum, Herodes & Pilatus, aliæque visibiles Christi hostes; quasi erecti insultabant Christo patienti, humilibusque eius discipulis: sed paulo post illi omnes colligati, & impediti corruerunt, isti vero surrexerunt, atque erecti in æternum stabunt. In Hebræo habetur, *carehu*, incuruati sunt: unde aliqui putant Latinam vocem esse corruptam, & legendum, *obligati sunt*, & non obligati sunt, sed falluntur. Nam Latina lectio Græcam imitatur; in Græco autem est *ὀλισσόμενοι*, id est, *colligati sunt*, quasi compedibus, quod noster recte vertit, *obligati sunt*, id est, ligati & impediti, ne pugnare vel consistere possent, *ceciderunt*. Itaque Septuaginta non tam ad verba, quam ad sententiam respexerunt.

*Domine saluum fac regem, & exaudi nos in die qua inuocauerimus te.*

X.

Concludit coniungendo finem cum principio. Initio dixerat, *Exaudiat te dominus in die tribulationis*, nunc idem confirmat conuertendo orationem ad Deum, *Domine saluum fac regem* de tribulatione sua; & eodem modo *exaudi nos, & saluos fac in die, qua inuocauerimus te*, id est, in die tribulationis nostræ, in qua non alium, quam te inuocabimus. In Hebræo sunt eadem verba, sed interpunctio est alia. Itaque S. Hieronymus & moderni ita legunt, *Domine salua; Rex exaudi nos in die, qua inuocauerimus te*. Sed cum nomen, *hammelech*, possit verti, Rex, & Regem, quia Hebræi non declinant nomina per casus, & Septuaginta Interpretes vetterint, *τὸν βασιλιά*, id est, *Regem*, & sic legerint omnes veteres Patres; non est magni

גבורה

המלך



magni facienda lectio modernorum Hebræorum, cui post tempora LXX. Interpretum interpunctio addita est. Porro S. Hiero. fideliter vertit: sed textum habuit minus commendatum. Posset hic Psalmus commode recitari, quando Christiani Principes profiscuntur ad bellum contra infideles.

## PSALMVS XX.

Titulus & Argumentum Psalmi.

In finem Psalmus David.

**P**salms vigesimus connexus est cum præcedente decimonono. Ille petebat à Deo, ut Christum Regem cum hoste generis humani præliaturum, protegeret. Iste gratias agit, quod protexerit, exaltauerit & coronauerit.

## EXPLICATIO PSALMI XX.

I. **D**omine in virtute tua letabitur Rex, & super salutare tuum exultabit vehementer.

Adepta victoria, Rex noster Christus letabitur in virtute tua, i. ob virtutem potentiamq; tuam, per quam de hostibus suis feliciter triumphauit. Et super salutare tuum, i. de salute à te illi præstita gaudebit, & voce etiam exultabit vehementer. Itaque vna pars versiculi aliam dec arat.

II.

Desiderium cordis eius tribuisti ei, & voluntate labiorum eius non fraudasti eum.

Respondent hæc verba illis, quæ in Psalmo superiore dicta fuerant, tribuat tibi secundum cor tuum &c. phrasis Hebraica est, dare petitionem, pro eo quod est dare rem petitam, quomodo in 1. lib. Reg. c. i. dicit Heli Sacerdos Apnæ, Deus Israel det tibi petitionem tuam, quam rogasti eum. Sic igitur hoc loco dicitur, Desiderium cordis eius tribuisti ei, i. id ei tribuisti, quod desiderabat. Et voluntate labiorum eius non fraudasti eum, i. non fraudasti eum ea re, quam volebant labia eius, id est, quam se velle, & desiderare, labiis orationem fundendo, demonstrauit.

In summa dicit, datum fuisse Christo, quod corde desiderauerat, & labiis expetuerat.

Quoniam præuenisti eum in benedictionibus dulcedinis; posuisti in capite eius coronam de lapide pretioso.

Magna vere fuit Christo causa letandi, quod non solum habuerit quod petiit, sed quod Deus præuenit eius desideria, & dederit ei maxima dona, antequam peteret. Præuenisti, inquit, eum in benedictionibus dulcedinis, in Hebræo est bonitatis, & similiter in Græco. Itaque sensus est, Christum fuisse præuentum donis bonitatis Dei, quæ fuerunt conceptio de Spiritu sancto, vnio ad personam Verbi, infusio omnium scientiarum & virtutum, & ipsa Dei visio: quæ omnia in primo instanti conceptionis illi data fuerunt; proinde præuentus fuit benedictionibus dulcedinis. Quod vero sequitur: Posuisti in capite eius coronam de lapide pretioso, vel, ut habetur in Hebræo, de auro perfecto, videtur referendum ad Regnum & Sacerdotium, quod etiam ab ipsa conceptione habuit, propter quæ Christi cognomen accepit: corona enim aurea, insigne est Regium & Sacerdotale.

Vitam petiit à te, & tribuisti ei longitudinem dierum in sæculum, & in sæculum sæculi.

IV.

Beneficia superiora præuentus accepit: at corporis gloriam & immortalitatem, & alia deinceps petiit & obtinuit, petiit vitam, cum imminente passione preces & supplicationes obtulit ei, qui posset eum saluum facere à morte, ut dixit Apostolus ad Hebr. 5. Deus autem tribuit ei longitudinem dierum in sæculum, & in sæculum sæculi, i. vitam sempiternam, ut resurgens à mortuis iam non moriatur; & mors illi ultra non dominetur. Ex hoc loco manifeste conuincuntur, qui hunc Psalmum ad litteram exponunt de Dauide, quod fecit Iansenius, vel de Ezechia, quod facit Euthymius, & ante eum Theodoretus: nam nec Dauid, nec Ezechias habuit longitudinem dierum in sæculum, & in sæculum sæculi.

L

Magna



V.

*Magna est gloria eius in salutari tuo, cui tuus, dextera tua inueniat omnes, quos gloriam & magnum decorem impones super te oderunt.*

Non solum vitam in saeculum saeculi dedit ei Deus, sed etiam exaltauit illum, & dedit illi nomen, quod est super omne nomen. Philip. 2. Hæc enim est vera magna gloria, quam habuit in salutari Dei, id est, in salute, qua illum saluum fecit Deus: & hinc gloriam & magnum decorem, id est, immensum honorem impones super eum, pro eo quod imposta illi fuit ab inimicis spinea corona tantæ ignominia, ut eo tempore non esset species ei, neque decor, ut cecinit Isa. cap. 53.

VI.

*Quoniam dabis eum in benedictionem in saeculum saeculi, latificabis eum in gaudio cum vultu tuo.*

Post exaltationem ad dexteram Patris, & nomen super omne nomen, sequetur vniuersalis benedictio caelestium, terrestrium & infernorum, quæ nunquam deficiet, de qua loquitur B. Paulus ad Philipp. 2. & Ioannes Apoc. 5. Verba illa, *dabis eum in benedictionem*, significant, pones eum, ut communem benedictionis materiam, id est, facies ut omnes illi benedicant. Græcus codex clarior est, habet enim; *dabis ei benedictionem*, sed in Hebræo habetur; *pones eum benedictionem*: sensus est idem. Quod autem additur, *latificabis eum in gaudio cum vultu tuo*, significat lætitiæ consequentem illa omnia bona iam dicta: semper enim lætitia sequitur adeptionem boni. Illud, *cum vultu tuo*, significat coram te, & in præsentia tua.

VII.

*Quoniam Rex sperat in Domino, & in misericordia Altissimi non commouebitur.*

Bona iam dicta prædicit fore omnino stabilia & firma in æternum. *Quoniam*, inquit, *Rex sperat in Domino*, id est, confidit in potentia infinita Dei, non in viribus humanis, *Et in misericordia Altissimi*, id est, in bonitate illius, qui super omnes est, & cui subiiciuntur omnia, ideo non commouebitur, siue non mutabit, sed permanebit securus in æternum.

VIII.

*Inueniatur manus tua omnibus inimicis tuis.*

Probat non commouendum Christum, neque regnū eius, quoniam inimici eius omnes peribunt. *Inueniatur manus tua omnibus inimicis tuis*, id est, inuenietur manus tua super oēs inimicos tuos, ut eos videlicet punias. Idem repetit, dicens: *Dextera tua inueniat, pro inueniet, omnes qui te oderunt*. Textus Hebræus clarissimus est, *Inueniet manus tua omnes inimicos tuos, dextera tua inueniet odientes te*. Sed Interpretes variare voluerunt. Videtur autem Propheta nunc alloqui Christum, non Patrem: Christus n. proprie est, quem Iudæi, alijq; persecutores oderunt, & de eo dicitur in Psal. 109. *Sede à dextris meis, donec ponam inimicos tuos scabellum pedum tuorum*.

*Pones eos, ut clibanum ignis in tempore vultus tui, Dominus in ira sua conturbabit eos.*

Describit pœnam inimicorum: *Pones, inquit, eos, ut videlicet inimicos, ut clibanum ignis*, id est, facies eos vndique aestuare, quomodo aestuat clibanus ardens, *in tempore vultus tui*, id est, in die iræ tuæ, quæ in vltimo iudicio manifestabitur. Idem repetit in tertia persona, quasi dicat, vere dixi, *pones eos ut clibanum ignis in tempore vultus tui*. Nam Dominus Christus, in ira sua conturbabit inimicos suos, & tunc ad imperium Christi, deuorabit eos ignis æternus, & sic efficientur quasi clibanus ardens. Verbum Hebræum, *balag*, significat proprie deglutire, vel perdere, ac dissipare. Ideo S. Hieron. vertit, *Dominus in furore suo precipitabit eos*. Fortasse, *conturbabit eos*, positum est, pro *exturbabit eos*, videlicet à facie sua in gehennam, & ibi deuorabit eos ignis. Sic enim cohærebit lectio Hebraica, cum Græca & Latina, fortasse vox Hebraica, *balag*, significat non solum deglutire & perdere, sed etiam conturbare: nota enim erat LXX. Interpretibus vis Hebraicarum vocum magis, quam posterioribus Rabinis. Sensus autem semper est bonus.

*Fructum eorum de terra perdes, & semen eorum à filiis hominum.*

Ne.



Ne forte obiiceret aliquis, posteros inimicorum Christi aliquando pro patribus surrecturos, & molestiam Christo illaturos, addit Propheta, non solum inimicos Christi, sed omnes eorum filios ac nepotes, atque adeo omne semen eorum perituum. *Fructum, inquit, eorum, i. filios & posteros, de terra perdes & eliminabis, & semen eorum à filiis hominum, nimirum perdes.*

XI.

*Quoniam declinauerunt in te mala, cogitauerunt consilia, quae non potuerunt stabilire.*

Iuste punies eos, quoniam illi iniuste tibi nocere conati sunt. Videtur David valde proprie & subtiliter dixisse, *declinauerunt in te mala*, quoniam mala poenae directe ad Christum non pertinebant, in quo nulla fuit culpa, sed iniqui homines detorserunt & declinauerunt mala. id est, contumelias, vulnera, plagas; mortem ipsam, à suo quasi itinere in Christum innocentem. *Cogitauerunt consilia, quae non potuerunt stabilire*, id est, mala voluntas in ipsis fuit perdendi Christum, & impediendi regnum eius, sed non potuerunt perlicere, quia Deus mala omnia conuertit in bonum ipsius Christi, & fidelium seruum eius.

XII.

*Quoniam pones eos dorsum, in reliquiis tuis preparabis vultum eorum.*

Hic describitur summa impiorum calamitas: quod videlicet sunt destinati ad sola flagella, & ad maiorem calamitatem visuri sint electos Dei in summa gloria & felicitate. *Pones eos dorsum*, id est, facies ut nihil sint nisi dorsum, pars videlicet flagellis exposita: sic nimirum totos flagellabis, quasi toti sint dorsum. *In reliquiis tuis preparabis*, seu diriges (ut sonat vox Hebraea) *vultum eorum*, id est, diriges vultum eorum in reliquiis tuis, hoc est, ad considerandos electos tuos, quos tibi reliquisti, de quibus scriptum est, *reliquia salua fient*. Voce Hebraea *metarecha*, S. Hieronymus vertit, funes tuos, sed LXX. Interpretes recte verterunt, *reliquiis tuis*, quia vox illa vtrumque significat. Locus hic obscurus est admodum, si cui nostra interpretatio minus placeat, audiat alias. Theo-

doretus & Euthymius sic exponunt, *Pones eos dorsum*, id est, in fugam eos conuerteres, faciens ut terga vertant: *In reliquiis tuis preparabis vultum eorum*, id est, in reliquiis eorum, hoc est, in filios eorum preparabis vultum tuum, id est, iram tuam. Volunt enim isti auctores hyperbaton esse in verbis Prophetae, & propterea inuertenda esse verba eo modo, quo diximus. An hac interpretatio literae & verbis inhareat, lectores iudicent. S. Hieronymus, & S. Augustinus, necnon moderni, quisque suam interpretationem excogitauerunt.

*Exaltare Domine in virtute tua, cantabimus & psallemus virtutes tuas.*

XIII.

Concluditur Psalmus sancta acclamatione ad Christum Regem, & simul praedictione eorum, quae futura sunt post ultimum exitium omnium impiorum. *Exaltare Domine in virtute tua*, id est, qui aliquando apparuisti humilis, & tanquam infirmus crucifigi passus es, nunc in fortitudine & potentia deuictis hostibus, & in gehennam detrusis, *exaltare* usque ad summum coelum: interim nos electi tui *cantabimus* voce, & instrumentis musicis resonabimus potentiam tuam, ut aliquando ad te perueniamus, & in saeculum saeculi te laudemus. Hic solum est obseruandum, per *virtutem*, in vtraque parte versiculi, non intelligi virtutes morales, sed potentiam & robur, ut ex verbis Hebraicis & Graecis manifeste colligitur.

## PSALMVS XXI.

*Titulus & Argumentum Psalmi.*

In finem, pro susceptione matutina, Psalmus David.

**P**salms hic de passione & resurrectione Domini tam aperte loquitur, ut plane temerarium sit, ad alium sensum eum velle detorquere. Titulus respicit resurrectionem, quae significatur in illa voce, suscepio matutina. Resurrectio enim facta est tempore matutino, & per virtute Dei suscipiens quodammodo Christum de sepulchro, & educens eum ad auram vitalem.



**אֵלֶּל** iuxta illud Psal. 3. & exurrexi, quoniam Dñs suscepit me. Vox Hebraea aieleth significat ceruum, vel, ut alij volunt, stellam. Sed LXX. Interpretes recte verterunt susceptionem, quoniam apud ipsos verbum aial, suscipere significat. Quod planum est ex Psal. 106. v. 17. ubi vocem aulim, ipsi legerunt aialem, & verterunt, suscepit eos. Neque longe ab sunt ab eodem sensu lectiones ex Hebraeo, pro cerua matutina, siue pro stella matutina. Sensus enim est, pro Christo resurgente. Ipse enim resurgens recte comparatur stella, quia surrexit plenus gloria, accinctus lumine, sicut vestimento, & de se ipse dicit Apoc. vlt. Ego sum stella splendida & matutina. Ipse quoque similis est ceruo, siue cerua, tum quia ceruo nihil nocent animantia venenata, imo ipse habitu suo serpentes de cauernis educit & occidit, ut S. Hieronymus in hunc locum, & Basilius in Psal. 28. scribunt: Christus autem spiritu oris sui interficiet impium, & nihil ei nocere potuerunt omnes impiorum persecutiones. Tum etiam, quia ceruus velocissime salit in altissimos montes, unde in Canticis saepe comparatur Christus hinnulo ceruorum salienti in montes. Ipse enim in die resurrectionis velocissimo saltu ab inferis, & à morte ad vitam immortalē & gloriosam ascendit. Tum denique, quia ceruus dicitur arte quadam naturali à senio se defendere, & vergentem in defectum vitam rediuiua nouitate ab inferis reuocare, ut scribit Gilbertus Jer. 14. in Cantic. Christus autem in die resurrectionis arte omnipotentia, & infinita sapientia sua vere corpus suum iam mortuum rediuiua nouitate ab interitu reuocauit. Cerua vero potius, quam ceruus dicitur, quia resurrectio proprie ad carnem pertinet. Si enim Christus in carne passus est, ita & in carne resurrexit.

## EXPLICATIO PSALMI XXI.

**I.** **D**EUS DEUS MEUS, respice in me; quare me dereliquisti? longe à salute mea verba delictorum meorum.

Loquitur David in persona Christi pendentis in Cruce, & in summo passionis dolore constituti, ut patet ex Euangelio Matth. 27.

in quo legimus, Christum morti proximum dixisse: *Deus meus, Deus meus, ut quid dereliquisti me?* quae sunt prima verba Psalmi huius. Illud enim, *respice me*, non habetur in Hebraeo, sed fuit additum à LXX. Interpretibus declarationis causa. Quod autem Christus queritur, se derelictum à Deo, non significat, eum fuisse derelictum à persona Verbi, quasi esset dissoluta vnio hypostatica; vel destitutum à gratia & beneuolentia Patris; sed significat, permissum fuisse à Deo, ut ipse in humana natura pateretur horribilia illa tormenta, & mortem ignominiae plenam; à qua si Deus voluisset, eum facillime liberare potuisset. Neque orta est querimonia illa ab impatientia, vel ab ignorantia, quasi Christus ignoraret causam suae passionis, aut non libenter ferret, se à Patre in illis doloribus derelictum; sed fuit querimonia illa, protestatio quadam acerbissimae passionis. Quia enim in toto progressu passionis tanta animi æquitate Dominus omnia pertulerat, ut àe gemitus quidem exaudiretur; potuissent homines credere, illum superiore aliqua virtute impassibilem redditum, dolores non sensisse. Ideo igitur vicinus morti protestatur, se verum esse hominem, vereque passibilem, & à Patre derelictum in doloribus, passionis acerbissimam sensu doloris intimo & maximo hausisse. At igitur, *Deus Deus meus*, Christus in forma serui vocat Patrem Deum suum, quia in illa hora proprie eum colebat ut verum Deum, sacrificans illi sacrificium corporis sui, sacrificium omnium quae vnquam facta fuerant, praestantissimum. *Respice in me*, rogat vt videat, ubi pro honore suo constitutus sit. recognoscat obedientiam Filij sui, acceptet sacrificium pro genere humano oblatum. *Quare me dereliquisti?* non solum protestatio verae passionis, ut diximus, sed etiam admiratio quadam esse videtur, quasi dicat, fieri ne potest, ut dilectissimum & vniuentum filium in hanc doloris abyssum deuenire permiseris? Similia sunt illa: *Sic Deus dilexit mundum, ut Filium suum unigenitum daret*, Ioan. 3. & illa Rom. 8. *Proprio Filio suo non pepercit, sed pro nobis omnibus tradidit illum.*

Longe.



Longe à salute mea verba delictorum meorum. Multi timentes, ne Christo peccati notam iurant, coacte exponunt. Atqui legunt cum interrogatione: *Longe à salute mea verba delictorum meorum?* Sed talis interrogatio gratis fingitur; cum in nullo textu inueniatur. Alij exponunt, *Peccata mea*, cum nulla sint, *longe sunt à salute mea*, id est, non impediunt salutem meam. Sed facilius dixisset Propheta, *Longe à morte mea verba delictorum meorum*, si delicta non fuissent causa mortis Christi. Alij coniungunt cum superioribus partem huius sententiae, sic, *Deus meus, quare me dereliquisti longe à salute mea?* Sed omnes textus habent interpolationem aliam. Et deinde quid significabit illud, *verba delictorum meorum?* Alij denique considerant, verbum Hebraicum *Sciaagathi*, significare rugitum, non delictum; & interpretantur, *Longe à salute mea verba rugitus mei*, id est, rugitus meus, siue clamor meus, quo auxilium imploro, longe est à salute mea, id est, non potest impetrare mihi salutem. Ceterum LXX. Interpretes sine dubio non legerunt *Sciaagathi*, sed *Sciagaathi*, vnica litera transposita, & recte verterunt, *delicta*, non *rugitum*. Sententia igitur simplex & vera hæc est, *Longe à salute mea verba delictorum meorum*, id est, merito me dixi derelictum in doloribus, quia delicta totius mundi, quæ in me suscepi, non possunt coniungi cum mea salute. Necessè enim est, vt patiar & moriar, si ea purgare volo. Christus autem sibi tribuere posse nostra peccata, ac si sua essent, Scripturæ passim docent, Ioan. 1. Ecce Agnus Dei, ecce qui tollis peccata mundi. 1. Pet. 2. Peccata nostra ipse pertulit in corpore suo super lignum. Iſa. 53. Posuit Deus in eo iniquitates omnium nostrum. 2. Cor. 5. Eum, qui non nouerat peccatum, pro nobis peccatum fecit, id est, hostiam pro peccato. Sicut igitur hostia pro peccato non potest non immolari, si peccata purgari debeant, ita Christus hostia pro peccatis totius mundi factus, recte dicit: *Longe à salute mea sunt verba delictorum meorum*, id est, non possum mortem euadere, cum peccata totius mundi in me sint posita, vt pro eis penas

luam. Porro, *verba delictorum*, phrasis est Hebraica. Hebræi enim vtuntur nomine *verbi*, ad rem, siue negotium in genere significandum. Itaque sensus est, *verba delictorum meorum*, id est, hæc ipsa res, quod tot peccata super me acceperim, pro quibus satisfaciam, *longe est à salute mea*, id est, non potest coniungi cum salute mea, ac per hoc, in causa est, vt mortem non euadam.

*Deus meus clamabo per diem, & non exaudies, & nocte, & non ad insipientiam mihi.*

Iterum alia ratione se derelictum ostendit sine spe salutis temporalis. *Clamabo*, inquit, *per diem, & non exaudies, & nocte*, supple, *clamabo, & non exaudies*. Est autem sensus, Etiam si clamem die ac nocte, non exaudies me, vt liberer à morte corporali. Videtur alludere ad duas orationes, quas fecit, vnā de nocte in horto, alteram de die in Cruce, sed non seruat ordinem, quia sensus est ille, quem dixi, etiam si clamem die & nocte, non exaudies. Quod sequitur, *& non ad insipientiam mihi*, in Hebræo est, *& non silentium mihi*, sed Septuaginta non videntur per *dummya*, vnquam intellexisse *silentium*. Nam in Psal. 61. v. 1. vertunt, *subiecta*, in Psal. 64. v. 1. vertunt, *deceat*, hoc loco, *insipientiam*. Igitur vel aliquid aliud legerunt, vel nouerunt hanc vocem recipere omnes istas intelligentias. Sensus autem hic esse videtur, *Clamabo die & nocte, & non exaudies*, & tamen hoc *mihi ad insipientiam* adscribi non poterit, quia, licet sciam me non exaudiendum, vt mortem temporalem euadam, tamen prudenter clamo, quia scio me exaudiendum, quo ad principalem intentionem meam, quæ est, vt genus humanum redimatur, & ego non detinear in morte, sed resurgam ad vitam immortalem. Occurrit mihi alia expositio, in qua per *diem*, intelligatur tempus vite, per *noctem*, tempus mortis; & hic sit sensus, *Clamabo per diem, & non exaudies*, id est, clamabo, dum viuo, vt à morte liberer temporalis, & hunc clamorem non exaudies,



Et nocte clamabo, & non ad insipientiam mihi, i. clamabo postea, cum mortuus fuero, ut resurgam, & non ero insipiens, quia clamorem hunc nocturnum exaudies, in quem sensum recidit etiam lectio Hebraica, *Et noctu, & non silentium mihi*, i. clamabo de nocte, & tunc non silebis, sicut siluisti ad clamorem diurnum; sed respondebis mihi, ac per hoc exaudies me. Et quia illud, *non exaudies*, potest etiam reddi, *non respondebis*, utrumque enim significat verbum *hana*, clarissime verti potuisset versiculus in hunc modum: *Clamabo per diem, & non respondebis mihi, clamabo per noctem, & tunc respondebis mihi*, vel secundum Septuaginta: *Clamabo per diem, & non exaudies, clamabo per noctem, & non ero insipiens*.

כך

III.

*Tu autem in sancto habitas laus Israël.*

Probat se non insipienter de nocte clamaturum, etiam si de die non sit exauditus, & se omnino exaudiendum; idque quatuor rationibus: primo, quia Deus sanctus & misericors sit: secundo, quia soleat inuocantes se benigne audire: tertio, quia ipse in maxima pressura sit: quarto, quia in Deo ab ipsa sua natiuitate confusus sit, ei que soli adhæserit. Prima ratio est in præsentis versiculo: *Tu, inquit, Domine, omnino exaudies me*, quia *in sancto*, id est, in sanctitate habitas, totus sanctus & pius es, & ad te malitia, vel crudelitas accedere non potest: & ideo tu es *laus populi tui Israël*, tum quia te laudat populus tuus Israël, tum quia propter te laudatur populus tuus Israël. Hæc enim est maxima laus populi tui, quod habeat Deum omni ex parte sanctissimum. In Hebræo habetur sic: *Tu autem sancte, inhabitas laudes Israël*, id est, tu sanctus es, & ideo versaris assidue in ore populi tui te laudantis. Sed credibile est LXX. Interpretes non legisse *chados*, sanctus, sed *chodes*, sanctitas, una littera transposita, & tunc verti debet: *Tu autem sanctitatis habitator*, quod est idem cum eo quod nos habemus: *Tu autem in sancto habitas. Laudes Israël*, in numero multitudinis est in Hebræo; sed quia id coniungitur cum Deo, ut sententia esset clarius, maluerunt Septua-

קדוש קדוש

ginta vertere, *laus Israël*, quam laudes Israël.

*In te sperauerunt patres nostri; sperauerunt, & liberaisti eos.*

IV.

*Ad te clamauerunt, & salui facti sunt; in te sperauerunt, & non sunt confusi.*

V.

Hæc est altera ratio ab exemplis, & sententia perspicua est. Habentur autem multa eiusmodi exempla in libro Iudicum. Quotiescunque enim filij Israël clamauerunt ad Dominum, misit eis Dominus saluatorem vnum ex Iudicibus, vt Gedeonem, Sampsonem, Samuelem, &c.

*Ego autem sum vermis, & non homo; opprobrium hominum, & abiectio plebis.*

VI.

*Omnes videntes me deriserunt me; loquuti sunt in biis, & mouerunt caput.*

VII.

*Sperauit in Domino, eripiat eum; saluum faciat eum, quoniam vult eum.*

VIII.

Hæc est tertia ratio ducta à pressura Christi crucifixi. *Ego autem, inquit, sum vermis, & non homo*, id est, in tali statu sum hoc tempore, vt non solum minofatus ab Angelis, sed ab hominibus minoratus videar; nimirum nouissimus virorum, vt dixit Isaias cap. 53. imo infra omnes homines factus, cum & Barabbæ & latronibus postpositus sum. Itaque adeo factus sum vilis, vt vermis potius videar esse quam homo. *Opprobrium hominum*, de quo videlicet homines erubescunt, quasi de homine dedecoroso, quod impletum est quando Petrus ipse iurauit se non nosse hominem illum. *Et abiectio plebis*, id est, quem etiam plebs vilissima populi pars ita abiect, vt diceret: *Non hunc, sed Barabbam*: *Omnes videntes deriserunt me*, id est, qui me in eo statu viderunt, irriserunt omnes, omnia videlicet hominum genera, nobiles, ignobiles, sacerdotes, laici, Hebræi, Gentiles, quod impletum est quando, vt scribit S. Lucas cap. 23. *Stabat populus spectans, & deridebant eum principes cum eis*. Et infra: *illudebant autem ei & milites*. *Loquuti sunt labijs, & mouerunt caput*; hoc etiam impletum fuisse docet S. Matthæus cap. 27. *Blasphemabant enim mo-*

uentes



mentes capita sua, & dicentes: Vah qui destruis templum Dei. Sperauit in Domino, eripiat eum, saluum faciat eum, quoniam vult eum. Easdem voces Iudæorum fuisse, testatur S. Mathæus in eodem loco: *Confidit, aiebant, in Deo, liberet nunc eum, si vult.* Nec mul- rum refert, quod Propheta dicit, *quoniam vult eum.* Et Euangelista refert, eos dixisse, *si vult.* Nam cum Propheta dicit, *saluum fa- ciat eum, quoniam vult eum,* subintelligitur, vt ipse dicit, quod perinde est, ac si dixisset, *liberet eum, si vult eum,* id est, si amat eum, vt ipse dicit, *liberet eum,* vel quandoquidem vult eum, vt ipse dicit, *liberet eum.* Admi- randa prorsus Prophetæ illustratio, qui non solum res gestas, sed etiam verba prænouit; & prædixit, quæ Iudæi in passione Christi di- cturi fuerant. Pro *sperauit in Domino*, ha- betur nunc in Hebræo, *gal*, id est, *volue ad Dominum.* Sed Rabini male collocarunt puncta. Debet enim legi, *gal*, id est, *voluit*, vt legit S. Hieronymus, qui vertit, *confugit ad Dominum*, quod est idem cum eo, quod venterunt Septuaginta, *Sperauit in Domino.* Idem enim est, voluit, siue reuoluit se ad Do- minum, confugit ad Dominum, & sperauit in Domino.

IX. Quoniam tu es, qui extraxisti me de ventre; spes mea ab vberibus matris meæ.

X. In te proiectus sum ex vtero, de ventre matris meæ Deus meus es tu, ne discesseris à me.

Hæc est ratio postrema ducta ab inno- centia perpetua ipsius Christi. Illud, *quo- niam*, non est vbiq; nota causæ, sed sæpe ponitur loco coniunctionis &, vel autem Aliquando etiam nihil significat, sed additur ornatus gratia. Tu es, qui extraxisti me de ventre, id est, à natiuitate tuus sum, præser- tim, cum reuera non naturali modo, sicut cæteri homines, sed virtute tua singu- laris natus sim, non reueratis claustris pudoris: sicut etiam absque virili semine in vtero Virginis conceptus fui. S. Hieronymus vertit ex Hebræo, Tu autem propugnator meus ex vtero. Sed verbum *gochi*, à radice *guach*, proprie nihil significat aliud, nisi

educator meus ex vtero. Quid S. Hieronymus sequutus sit, fateor me nescire. Spes mea ab vberibus matris meæ, id est, sicut tu me edu- xisti ex vtero, ita tu es, qui præcipue me aluisti: vbera quidem matris suxi, sed intel- ligo lac de cælo matri subministratum; & ideo in te ab vberibus matris confidere & sperare didici. In te proiectus sum ex vtero, id est, prodiens ex vtero, in sinum tuum ceci- di, qui singulari prouidentia curam mei ge- ris. De ventre matris meæ Deus meus es tu, id est, sicut ab incipiente vita mea tu mihi singulari prouidentia adstitisti, ita & ego ab exordio vite meæ te colere cœpi, vt Deum meum. Ne discesseris à me; hæc verba sunt apud Hebræos initium sequentis versiculi: Sed recte etiam ponuntur in textu Græco & Latino in fine superioris versiculi. Sunt enim veluti conclusio superioris rationis, ac si Christus diceret, Quandoquidem in te pro- iectus sum ex vtero, & ab eo tempore Deus meus es tu, ideo iure à te requiro, vt non dis- cedas à me, præsertim cum iam inisset grauif- sima & vltima tribulatio mea, id est, mors corporis mei.

Quoniam tribulatio proxima est, quo- niam non est, qui adiuvet.

XI.

Possent fortasse hic versus exponi de propinquantem passionem, ac de mortem & timore, quem Dominus in horto pati voluit. Sed certe multo probabilius est, totum hunc locum de propinquantem morte esse intelli- gendum, tum quia Dominus in præterito statim adiungit, *Foderunt manus meas.* Et: *Diruerunt sibi vestimenta mea:* tum etiam quia paulo ante voces Iudæorum expressit, quas in se iam cruci affixum iactauerunt: tum denique quia primum Psalmi versicu- lum Dominus in cruce pendens, ac morti proximus recitauit. Igitur iuxta id, quod di- xerat, *non ad insipientiam mihi,* nimirum clamabo ad te, precatur nunc, vt Deus sibi adit in vltima tribulatione, non vt liberetur à mortem, sed vt non detineatur in morte. Peto, inquit, vt non discedas à me, *quo- niam tribulatio*, videlicet vltima & gra- uissima, *proxima est*, &, *quoniam non est* alius,



alius, qui adiuuate me possit, vt sic moriar, vt mortem occidam.

XII.

*Circumdederunt me vituli multi, tauri pingues obsederunt me.*

Narrat crudelitatem hostium suorum, quos comparat tauris, leonibus & canibus. Intelligit per inimicos Pontifices & Phariseos, qui veluti tauri insultabant ei, quasi cornibus eum peterent, dicentes: *Vah qui destruis templum Dei*, &c. & qui veluti leones aperto ore famem suam demonstrabant, id est, desiderium ingens perdendi eum, vnde & rugiebant, dicentes: *Tolle, tolle, crucifige eum*. Et qui veluti canes mordebant eum, detrahentes videlicet ei, dum dicerent: *Hunc inuenimus subuertentem gentem nostram*. Et: *Si non esset hic malefactor, non tibi tradidissimus eum*. Ex quibus detractionibus, falsisq; calumniis tandem factum est, vt Dominus crucifigeretur, ideo statim subiungit: *Foderunt manus meas*, &c. sed singula videamus. *Circumdederunt me vituli multi*, per vitulos non intelligit hoc loco vitulos quoscunque, sed vitulos grandiores & cornigeros, qui etiam tauri dici possint. Nam quod sequitur, *Tauri pingues obsederunt me*, est explicatio, siue repetitio, praesertim cum in Hebraeo ad verbum habeatur, *fortes Basan obsederunt me*. Vocat vitulos, *fortes Basan*, quia erant robusti & pingues; nam Basan erat regio abundans optimis pascuis, vnde pinguiissimi tauri & arietes prodibant. Dicuntur autem Pontifices & Pharisei fortes & pingues, quia erant potentes & diuites. Aliqui distinguunt vitulos a tauris, & per vitulos intelligunt plebem indisciplinatam & imbellem, per tauros, Pontifices & Phariseos. Non est improbabilis expositio, sed probabilius arbitror id, quod dixi.

XIII.

*Aperuerunt super me os suum, sicut leo rapiens & rugiens.*

Eodem significat Pontifices & Phariseos, qui miro desiderio inhiabant morti eius, vt supra diximus.

XIV.

*Sicut aqua effusus sum, & dispersa sunt omnia ossa mea.*

*Factum est cor meum tanquam cera liquefscens in medio ventris mei.*

XV.

*Aruit tanquam testa virtus mea, & lingua mea adhaesit faucibus meis, & in puluerem mortis deduxisti me.*

XVI.

In his versiculis declarat, quomodo se gesserit contra inimicorum suorum crudelitatem, ac dicit, se non restitisse illorum violentiae, sed in omnibus humilitatem, patientiam & mansuetudinem seruasse, iuxta illud Isaiae: *Faciem meam non auerti ab increpantibus & conspuentibus in me* & illud S. Petri: *Cum malediceretur, non maledicebat; cum pateretur, non comminabatur: tradebat autem iudicanti se iniusto*. Itaque inquit, *sicut aqua effusus sum*, id est, non restiti villo modo, sed instar molliissimae aquae me praebui versandum, & impellendum in omnem partem. *Et dispersa sunt omnia ossa mea*, id est, omnis fortitudo mea dilapsa est a me, non quod vere potentiam amiserim, sed quod ea vti noluerim, & aduersariis meis potentia sua vti permiserim, iuxta illud: *Hac est hora vestra, potestas tenebrarum*. Itaque debilem atque imbecillum me praebui ad resistendum, quasi solam carnem sine ossibus haberem. *Factum est cor meum tanquam cera liquefscens in medio ventris mei*, id est, non solum exterius patientem & mitem me praebui, sed etiam interius humilis corde fui; non intumuit, neque obduru it cor meum contra persequutores, nolens ignoscere, & vlcisci parans: sed contra potius factum est sicut cera liquefscens ex affectu pio erga illos, miserans illorum cecitatem, & pro eis rogans: *Pater ignosce illis, quia nesciunt quid faciunt*. Illud, *in medio ventris mei*, significat in medio viscerum meorum. Sumitur enim in Scriptura venter pro interioribus, vt Ioan. 7. *Flumina de ventre eius fluent aqua viva*. Et Cant. 5. *Venter meus contremuit ad tactum eius*. *Aruit tanquam testa virtus mea*, id est, robur meum quasi exaruit omni virore exhausto, quia videlicet ita me ligo & vulnerari permisi, quasi impotens essem ad resistendum. *Et lingua mea adhaesit faucibus meis*, id est, ne verbis quidem aduersarios ledere



dere, aut de ipsorum iniustitia conqueri volui. Et in puluerem mortis deduxisti me, i. & sic tandem illis persequentibus, & me non resistente, tu Deus meus, sine cuius permissione nihil fieri potest, in mortem & sepulturam adduxisti me. Vocatur n. pulvis mortis ipsa sepultura, quia mortui puluere tegi solent.

XVII. *Quoniam circumdederunt me canes multi, concilium malignantium obsedit me.*

XVIII. *Foderunt manus meas & pedes meos, dinumerauerunt omnia ossa mea.*

Declarat modum quo in puluerem mortis deductus est. *Quoniam*, inquit, *circumdederunt me canes multi*, id est, detractores multi, Pontifices videlicet & Pharisei, qui falsis criminationibus subuersionis populi, tributi denegati, Regni affectati, & similibus Pilatum coegerunt, vt me crucifigendum militibus traderet. *Concilium malignantium obsedit me.* Declaratio est verborum superiorum. Canes enim multi nihil sunt aliud, nisi concilium, i. cœtus malignantium. Isti, inq., malignantes, *foderunt manus meas & pedes meos*, non quidem manibus, sed auctoritate sua. In Hebræo legitur *caari*, quod significat *quasi leo*, sed Septuaginta legerunt *caaru*, quod est *foderunt*. Et sic omnino esse legendum non dubium est, quia Septuaginta nunquam vertissent *foderunt*, si legissent *caari*. S. quoque Hieron. ex Hebræo vertit *foderunt*, ac per hoc legisse credendus est *caaru*. In ipso etiam libro Massoreth ad cap. 24. Numeri, dissidentes Rabini de illis verbis, *Accubuit vt leo*, quod est Hebraice *caari*, movent in Psalmo hoc legendum quidem esse *caari*, sed iuxta codices emendatiores scribendum *caaru*. Quamuis enim ex perfidia sua legere velint *quasi leo*, tamen fatentur scriptum esse *caaru*, id est, *foderunt*. Denique sententia multo est clarior, *foderunt manus meas*, quam, *quasi leo manus meas*. Neque multum refert, quod *foderunt*, Hebraice scribendum esset *caru*, non *caaru*; quoniam litera *aleph*, sepe redundat, & ideo paragogica vocatur ab Hebræis. *Dinumerauerunt omnia ossa mea*, id est, ex corporis extensione in Crucem factum est, vt omnia ossa numerari possent.

Addidit vero David hoc de extensione & numeratione ossium, vt intelligeremus crucifixionem. Alioqui enim per fossionem manuum & pedum potuissent intelligi vulnera gladio facta, non clauis. In Hebræo habetur in prima persona, *numeravi omnia ossa mea*. Sed facile est vnus vel alterius literæ mutatione contigisse errorem. Certe sensus est clarior, si legamus *numerauerunt*, quomodo sine dubio legerunt LXX. Interpretes, & lectionem illam sequuti sunt S. Hieronymus, S. Augustinus, Theodoretus, & Euthymius in expositione huius loci.

*Ipsi vero considerauerunt & inspexerunt me: diuiserunt sibi vestimenta mea, & super vestem meam miserunt sortem.*

Addidit ad supplicium Crucis, ignominiam nuditatis. *Ipsi*, inquit, curiose inspexerunt totum corpus meum, quoniam nudatum erat omnibus vestibus. Siquidem eas vestes diuiserunt milites inter se, & super tunicam, quæ supererat, sortem miserunt. Quæ omnia impleta esse, ad literam Ioannes Euangelista testatur.

*Tu autem Domine, ne elongaueris auxilium tuum à me, ad defensionem meam conspice.*

Reuertitur ad orationem, quam inchoauerat in principio Psalmi, & rursus repererat versiculo decimo & vndecimo. Itaque iam tota passione sua exposita, rogat Deum pro celeri resurrectione: nam per eam perfecte liberabitur ab omni persecutione & iniuria aduersariorum. *Tu autem Domine, ne elongaueris auxilium tuum à me*, id est, aduersarij mei ad summum malitiæ peruenierunt, atque in me omnes vires suas exercuerunt; iam tuum est non differre amplius auxilium, sed meam defensionem paterne suscipere. In Hebræo ad verbum sic legitur: *Et tu Domine ne longe fias, fortitudo mea ad auxilium meum festina*. Possent aliquo modo paucis mutatis concordari hæc ipsa verba cum verbis Græcæ & Latine editionis, sed non videtur opere precium in hac re laborare, cum sensus omnino sit idem.

XIX.

XX.

כארי  
כאר

כאר  
כאר



XXI.

*Erue à framea Deus animam meam, & de manu canis vnicam meam.*

XXII.

*Salua me ex ore leonis, & à cornibus vnicornium humilitatem meam.*

Declarat, in quo velit auxilium sibi adesse. *Erue*, inquit, à framea siue gladio animam meam, id est, libera ab instrumento mortis vitam meam. Ponit enim gladium, qui mortis est instrumentum, pro quolibet instrumento mortis, quod in Scriptura frequens est, 2. Regum 12. *Non recedet gladius de domo tua.* Ezechiel. 33. *Si videris gladium venientem super terram,* &c. Rom. 8. *Quis nos separabit à charitate Christi?* tribulatio? an angustia? an fames? an gladius? ponit vero animam pro vita, quod similiter in Scriptura vsitatum est. Et de manu canis vnicam meam. Per canem intelligit canes illos, de quibus supra dixerat, sed vitur numero singulari, vel per figuram intellectus, vel ad significandam vnionem in malum inimicorum suorum. Per vnicam vero intelligit eandem vitam suam, quam vnice diligebat, sicut par erat diligi vitam Verbi incarnati. *Salua me ex ore leonis*, illius, de quo supra dictum est: *Aperuerunt super me os suum, sicut leo rapiens & rugiens.* Et à cornibus vnicornium humilitatem meam. Antea dixerat: *Tauri pingues obsederunt me*, nunc loco taurorum ponuntur vnicornes, qui sunt indomitæ bestiae, & tauris etiam ferociiores, vt significet, nequitiam & crudelitatem inimicorum suorum non imminutam tot suppliciis fuisse, sed auctam. Porris his omnibus verbis non petit Dominus vitam temporalem suam saluari, sed (vt sæpe diximus) petit vitam suam celeriter reparari, & ita reparari, vt non amplius pateat morsibus canum, vel vnguibus leonum, vel cornibus vnicornium, aut taurorum. Illud, *humilitatem meam*, in Hebræo est, *hanithani*, quod S. Hieronymus vertit, *exaudi me*, Pagninus autem, *respondisti mihi*. Sed LXX. Interpretes non legerunt, *hanithani*, sed *honthi*, vna litera dempta, id est, *humilitatem meam*.

עניתי

עניתי

*Narrabo nomen tuum fratribus meis, in medio Ecclesie laudabo te.* XXIII.

Iam incipit narrare fructum resurrectionis suæ, quæ est conuersio mundi ad Deum. Narrabo, inquit, nomen tuum fratribus meis, id est, postquam resurrexero, mittam Apostolos in mundum vniuersum, & per eos narrabo nomen tuum, id est, notitiam diuinitatis tuæ manifestam faciam omnibus hominibus, qui fratres mei sunt propter assumptam carnem, & sic in medio Ecclesie laudabo te, id est, non amplius in angulo Iudææ, sed in medio Ecclesie magnæ ex Iudæis & Gentibus adunatæ, laudabo te, per ministros meos videlicet. Hunc locum adducit Apostolus ad Hebr. 2. Propter quod, inquit, non confunditur fratres eos vocare, dicens: Nunciabo nomen tuum fratribus meis, in medio Ecclesie laudabo te.

*Qui timetis Dominum, laudate eum; semen Iacob, glorificate eum.* XXIV.

*Timeat eum omne semen Israël, quoniam non spreuit, neque despexit deprecationem pauperis.* XXV.

Quia dixerat, in medio Ecclesie laudabo te, quod erat implendum per fideles suos, ideo nunc ipsos fideles hortatur, vt Deum laudent. *Qui timetis Dominum*, id est, qui Dei notitiam habetis, eumq; colitis. Timere enim Deum in Scriptura accipitur pro colere. Itaque I. Ionas interrogatus de populo suo, Ego, inquit, Hebræus sum, Deum qui fecit cælum & terram, ego timeo. Et Dan. 6. *Pauent omnes Deum Danielis.* Et Iudith 1. dicitur de Iudith, quod timebat Dominum valde. Itaque sensus est, Vos qui Deum verum cognoscitis & colitis, laudate eum. Et ne putemus fideles, quos alloquitur, esse paucos, vt pote vnā gentem Iudæorum, addit: Vniuersum semen Iacob glorificate eum, & timeat eum omne semen Israël, id est, glorificent & timeant Deum omnes Israëlites, non tantum ij, qui sunt Israëlites secundum carnem, sed etiam qui sunt Israëlites secundum promissionem; quales sunt omnes Gentiles ad Christum conuersi.

Vide



Vide S. Augustinum in epist. 200. alias 197. ad Afellicum, vbi demonstrat, Christianos esse veros Israhelitas, non carne, sed spiritu, fide & promissione. Verba sequentia, *quoniam non spernit, neque despectit deprecationem pauperis*. Hebraei faciunt nouum versiculum, eiq; adiungunt totum versiculum sequentem. Sed Septuaginta aliter interpunxerunt. Reddit igitur rationem Dominus, cur velit ab omnibus laudari Deum, quia videlicet exaudiuit orationem, quam fuderat pro resurrectione & gloria sua, pro victoria contra Diabolum, & redemptione generis humani. Vocat autem se pauperem, quia talis erat tempore passionis, cum nudus ac derelictus, fame sitiq; laborans penderet in Cruce.

In Hebræo pro deprecationem pauperis, habetur, *henuh*, quod S. Hieronymus vertit, *modestiam*, & posset etiam verti, *afflictionem*, *humilitatem*, *clamorem*, &c.

XXVI. Nec auertit faciem suam a me, & cum clamarem ad eum, exaudiuit me.

Idem repetit aliis verbis. In Hebræo legitur, *Nec auertit faciem suam ab eo, & cum clamaret ad eum, exaudiuit*. Verisimile est, Septuaginta legisse *Iod*, vbi nunc habetur *Vau*, cum sint literæ similes, & *Iod* sit nota pronominis primæ personæ, *Vau* autem tertiæ. Sed sententia est omnino eadem. Nam si dicatur, *Nec auertit faciem suam ab eo*, per illud, ab eo, intelligitur, à paupere, de quo dictum est, *non despectit deprecationem, siue afflictionem pauperis*: pauper autem ille, Christus ipse est.

XXVII. Apud te laus mea in Ecclesia magna, vota mea reddam in conspectu timentium eum.

Hortatus fuerat fideles suos, vt Deum laudarent, nec prædicit, id omnino futurum. *Apud te laus mea in Ecclesia magna*, id est, laus, quam ego tibi canam per fideles meos, erit apud te siue coram te in Ecclesia magna; non in cœtu paucorum Hebræorum, sed in Ecclesia omnium Gentium. Posset etiam hic locus exponi de laude, qua laudatur Christus in Ecclesia coram Deo. Euthymius legit, *A te laus mea*, vnde videtur legisse

*ἀπὸ ἐσ*. sed in textu nostro habetur *παρὰ ἐσ*, apud te, & sic legunt Hieronymus, Augustinus, Theodoretus, & alij. Hebraica vox *meittechā*, vertitur à S. Hieronymo, *apud te*, ab aliis, *à te*. Vtramque enim expositionem recipit, *Vota mea reddam in conspectu timentium eum*: per vota intelligenda videntur hoc loco vota sacrificiorum & oblationum, iuxta illud Isaia 19. *Colent eum in hostiis & muneribus, vota vouebunt Domino, & reddent*. Christus enim cum videret holocaustum mortis suæ gratissimum Deo fuisse, videtur quodammodo promississe, se holocaustum illud per ministros suos frequentissime oblaturum eo quo deceret modo, atque hoc est quod nunc dicit: *Vota mea reddam in conspectu timentium eum*, id est, per ministros meos Sacerdotes noui Testamenti assidue immolabo sacrificium Deo gratissimum; idq; in conspectu timentium, id est, colentium eum, ac per hoc verrorum fidelium. Non enim licet hoc sacrificium coram infidelibus immolare.

Edent pauperes, & saturabuntur; & laudabunt Dominum: qui requirunt eum, viuent corda eorum in saculum sæculi. XXVIII.

De hoc sacrificio edent pauperes, qui suam paupertatem & egestatem spiritualem agnoscunt, & saturabuntur, quia gustabunt bonum, quod est super omne bonum, & laudabunt Dominum, gratias agentes Deo pro tam insigni beneficio illi omnes, qui querunt eum, qui esuriunt, & proinde auide requirunt Dominum, viuent corda eorum in saculum sæculi. Hic erit fructus illius refectionis, vt corda tam nobili cibo resecta viuant vita spiritali, vita gratiæ interim, ac postea vita gloriæ in saculum sæculi. Sic enim Veritas ait Ioan. 6. *Qui manducat hunc panem, viuet in æternum*. Sicut enim cibus corruptibilis vitæ conseruat ad tempus, ita cibus incorruptibilis vitam æternam præbet. In Hebræo habetur, *viuet cor vestrum in æternum*, sed vna litera mutata, ex *leuanehem*, cor vestrum, fit *leuauam*, cor eorum.

Reminiscentur, & conuertentur ad Dominum, vniuersi fines terræ.

M 2

Red.

מאד

XXVIII.

לככם  
לככם

XXIX.



Reddit causam, cur in Ecclesia magna sit laudaturus Deum, quia videlicet conuertentur ad Deum merito sacrificij crucis, omnes gentes. *Reminiscuntur*, inquit, principij, vnde prodierunt, id est, recordabuntur, se olim à Deo in primo parente conditos, quod per originale peccatum iam dudum obliuioni mandauerant; & ideo ligno & lapidi dixerant: *Pater meus es tu. Reminiscuntur*, inquam, primæ creationis, & conuertentur ad Dominum *vnuerſi fines terra*, id est, omnes gentes, quæ habitant orbem terrarum, vsque ad vltimos eius fines. Significantur autem per omnes gentes, non singuli homines totius mundi, sed ex omnibus gentibus aliqui.

XXX.

*Et adorabunt in conspectu eius vnuerſa familie gentium.*

Declaratio est versiculi superioris. Id est enim conuerti ad Dominum omnes fines terræ, *adorare Dominum*, relictis idolis, omnes familias gentium, quæ vsque ad fines terræ propagatæ inueniuntur. Porro adorare coram Domino, idem est quod adorare Dominum, quoniam vox Hebræa, quam nos vertimus *adorare*, proprie significat *incuruari*. Incuruari autem coram Domino, idem est quod adorare Dominum.

XXXI.

*Quoniam Domini est regnum, & ipse dominabitur gentium.*

Merito conuertentur ad Dominum, & adorabunt eum omnes gentes, quoniam ipse est verus & naturalis Rex omnium gentium; ideo ipse deinceps, non demones, dominabitur gentium.

XXXII.

*Manducauerunt, & adorauerunt omnes pingues terræ; in conspectu eius cadent omnes, qui descendunt in terram.*

Quia dixerat, *edent pauperes, & saturabuntur, & laudabunt Dominum, & adorabunt eum vnuerſa familie gentium*: ne quis putaret, solos pauperes & plebeios conuertendos ad Dominum, adiungit de diuitibus & potentibus: *Manducauerunt & adorauerunt omnes pingues terræ*, id est, ipsi etiam pingues terræ, qui abundant terrenis bonis, ipsi Principes, Imperatores, Reges manduca-

bunt de mensa Domini, & adorabunt, ac laudabunt communem Dominum, cuius est regnum super omnes gentes. Ponitur autem more prophetico præteritum pro futuro, *manducauerunt, & adorauerunt*, pro *manducabunt, & adorabunt*. Et denique omnes, *qui descendunt in terram*, siue, vt sonat vox Hebræa, *qui descendunt in puluerem*, id est, omnes mortales, qui tandem per mortem resoluntur in puluerem, omnes, inquam, *cadent in conspectu eius*, id est, genua flectent, & adorabunt. Atque ita vere generalis erit conuersio gentium, quæ est fructus Dominiæ passionis & resurrectionis.

*Et anima mea illi viuet; & semen meum seruiet ipsi.* XXXIII.

Concludit Psalmum, dicens, se deinceps perpetuo victurum ad gloriam Dei, & eidem Deo posteritatem suam fideliter seruituram. Ponit autem animam pro toto homine, quod in Scripturis, & præsertim in Psalmis est frequens. *Anima mea*, id est, ego illi viuam, & *semen meum*, id est, posteritas mea regenerata per aquam & Spiritum sanctum, *seruiet illi*. In Hebræo habetur, & anima eius non viuet, sed manifeste apparet, Septuaginta non legisse, *naphſcio, anima eius*, sed *naphſci, anima mea*. Solum enim, extendenda est particula ynius literæ, vt ex vna voce fiat alia. Sic etiam certum est, Septuaginta non legisse *lo*, non, sed *lo ei*. Et cum sententia lectionis, quam habuerunt Septuaginta, longe clarior sit; imo cum sententia lectionis modernorum Hebræorum nihil plane significet, non videtur posse dubitari, quin textus Hebraicus sit corruptus vitio libranorum.

*Annunciabitur Domino generatio ventura, & annuntiabunt cæli iustitiam eius populo qui nascetur, quem fecit Dominus.* XXXIV.

Declarat, quod dixit, *semen meum seruiet ipsi*, dicens: *Generatio ventura*, id est, populus noui Testamenti suscipiet bonum nuncium de Domino, & de iustitia eius, quæ est iustitia Fidei. Illud, *annunciabitur generatio ventura*, significat, annunciabitur generatio

ni



ni venturæ, siue nuncium accipiet generatio ventura. Est enim phrasis Græca, qualis habetur etiam Matth. 11. *Pauperes euangelizantur*, id est, pauperibus euangelizatur. Et 1. Timoth. 1. Secundum Euangelium, quod creditum est mihi, nam in Græco ad verbum est, *quod creditus sum*, sed Interpres mutauit phrasim Græcam, quam reliquit Matth. 11. Itaque non est sensus, *annunciabitur Domino generatio ventura*, id est, adscribetur Domino generatio ventura, sed *annunciabitur de Domino, siue Dominus generationi venturæ*. Quod colligitur tum ex Hebræo, ubi habetur, *lad dor*, id est, *generationi*; tum quia idem repetitur, vel declaratur in sequentibus verbis, de more Dauidis, *Annunciabunt cæli iustitiam eius populo qui nascetur*. Idem enim est, *generatio ventura*, & *populus qui nascetur*. Annunciabitur ergo Dominus generationi venturæ, quia *annunciabunt cæli*, id est, cælestes homines, *iustitiam Dei populo qui nascetur*. Vocatur autem iustitia Dei, iustitia Fidei, quam Deus donat gratis credentibus in Christum, quæ vere facit homines iustos. Hoc enim præcipue docuit Euangelium, omnes esse peccatores, nec posse viribus propriis iustificari, sed à solo Deo per Christi Fidem veram iustitiam expectandam. In Hebræo non habetur, *generationi ventura*, sed post nomen *generationi*, habetur interpunctio, ac deinde verbum *veniet*, quod coniungitur cum sequenti, & *annunciabunt*. Cæterum LXX. Interpretes non habuerunt illam interpunctionem post nomen *generationi*, & verbum *veniet*, legerunt in singulari, *veniet*, ac proinde recte legerunt, *generationi quæ veniet*, id est, generationi venturæ. Nomen *cæli*, cum dicitur, *annunciabunt cæli*, non habetur in Hebræo, neque in Græco textu, sed Latinus Interpres addidit explicationis gratia. Et legitur hæc vox *cæli*, apud S. Hieronymum & S. Augustinum in commentario huius Psalmi, sed non legitur à Theodoro & Euthymio Græcis scriptoribus, quia (vt diximus) vetus Latinus Interpres eam addidit. Illud, quod habetur in fine, *quem fecit Dominus*, significat, *populum istum noui Testamenti, peculia-*

rem esse Dei populum, ab ipso Deo proprie regeneratum, & creatum in Christo in operibus bonis, vt dicit Apostolus ad Titum c. 3. Similis est sententia in Psalmo 117. *Hæc dies, quam fecit Dominus.*

PSALMVS XXII.

Titulus & Argumentum Psalmi.

Psalmus Dauid.

**T**itulus indicat auctorem Psalmi fuisse Dauidem: Argumentum vero Psalmi est eximia Dei beneuolentia erga Electos.

EXPLICATIO PSALMI XXII.

**D**ominus regit me, & nihil mihi deerit, in loco pascuæ, ibi me collocauit.

In hoc Psalmo describitur felicitas Electorum Dei per similitudinem ouium, quæ ab optimo aliquo pastore reguntur. In eorum persona Dauid, qui vnus erat ex illis, dicit: *Dominus regit me, & nihil mihi deerit*, quasi dicat, ouicula Dei sum, & quia Deus pastor est potentissimus, sapientissimus & optimus: ideo confidenter dico, *nihil mihi deerit*. Hæc vox est hominis felicissimi in via, & in spe. Nam Beati in patria, & in re, non dicunt, *nihil mihi deerit*, sed nihil mihi deest. Siquidem fugit ab eis labor & dolor, & iam intrauerunt in gaudium Domini sui: at Beati in via & in spe, non possunt dicere, nihil mihi deest, cum sint obnoxij multis passionibus, sed recte dicunt, *nihil mihi deerit*, quia si esurierint, non deerit panis, si ægrotauerint, non deerit medicus, & sic de cæteris. Porro vox illa, *regit*, in Hebræo & Græco textu proprie significat, *pascere*, & idcirco sensus est: Dominus regit me pastoralis modo, sicut pastor regit ouiculas suas. Quod autem dixit in summa, *nihil mihi deerit*, declarat per partes in sequentibus verbis. Videntur autem hæc esse, quibus ouicula egere solent; primo, pascua pingua: secundo, aquæ puræ: tertio, vt reducantur, si forte errauerint. quarto, vt ducantur per commodas vias: quinto,



ut à lupis, alijsq; feris defendantur: sexto, ut fatigata sustententur: septimo, ut si per tribulos & saxa incendentes laedantur, refocilentur & recreentur: denique, ut euoluto die confectiq; itinere domum habeant, ubi requiescant. Hæc omnia præstat abunde Deus electis suis, ac per hoc recte dicunt, *nihil mihi deerit*. Incipit David à primo, cum subiungit, *in loco pascuæ, ibi me collocauit*, i. non collocauit me in loco arido, vel deserto; sed in pascuis vberimis, ubi salubrium herbarum maxima copia est. Particula *ibi*, non habetur in Hebræo, neque est necessaria: addita est ab interprete Græco, & inde translata in Latinam editionem, sed redundat. Porro pabula, siue pascua spiritualia rationabilium ouium Dei, quibus Electi abundant, nihil sunt aliud, nisi notitia Dei, Eucharistia, panis verbis Dei, Veritas ipsa. Hæc enim est, quæ vitam spiritualem sustentat & auget.

II.

*Super aquam refectionis educauit me, animam meam conuertit.*

Attingit secundum & tertium bonum oculis necessarium. *Super aquam refectionis educauit me*, id est, non solum in loco herbis affluente collocauit me; sed etiam in loco vicino salubribus aquis, atque ita educauit & aluit me optimo pabulo super riuos aquarum sito, ut possim ab æstu & sitis ardore refrigerari. Parum refert, quod vox Hebræa *menuchot*, & Græca *ἀναδυστος*, non tam refectioem, quam requiem significat. Idem enim est sensus. Qui enim salubribus aquis ardorem sitis extinguit, & requiescit & reficitur. Spiritualis aqua, quæ concupiscentiæ ardorem rationabilium ouium restinguit, gratia Dei est, de qua Dominus in Evangelio, Ioan. 4. *Qui biberit ex aqua, quam ego dabo ei, non sitiet in æternum*. Nihil enim æque reprimat carnalia desideria, quam gustus amoris Dei. Gustato enim spiritu desipit omnis caro. *Animam meam conuertit*, hoc est tertium bonum, reductionis videlicet. Neq; enim potest homo suis solis viribus reuerti ad Deum, sicut potest suis solis viribus auerti, ait igitur: Bonus pastor errantem me quesituit & reduxit: quod est beneficium ma-

gnum, atque Electorum proprium, ut non sinantur errare perpetuo.

*Deduxit me super semitas iustitiæ, propter nomen suum.*

III.

Quartum bonum commemorat. *Deduxit*, inquit, *me super semitas iustitiæ*, i. ingredi fecit me per viam angustam præceptorum suorum, ut iuste viuerem. Id vero fecit remouendo occasiones peccandi, minuendo vires tentatoris, augendo charitatem, dulcescere faciendo iustitiam, illustrando, inflammando, alliciendo, terrendo, alijsq; innumerabilibus modis. Quos modos si aduerteremus, non cessaremus omnibus momentis tam dulci Pastori gratias agere, præsertim cum id faciat non propter merita nostra præcedentia, sed propter nomen suum, id est, ut notat faciat diuitias misericordie suæ in laudem gloriæ gratia suæ, ut dicit Apostolus Ephes. 1.

*Nam & si ambulauero in medio umbræ mortis, non timebo mala, quoniam tu mecum es.*

IV.

Hoc est bonum quintum, defensio videlicet à lupis alijsq; syluestribus feris. Nam & si ambulauero in medio, siue, ut habet Hebræus textus, in valle umbræ mortis, id est, per loca tenebrosa, & periculis omnibus exposita ferarum, latronum, præcipitiorum, non timebo mala, quoniam tu mecum es. Nam si Deus pro nobis, quis contra nos? Et vere incredibilis securitas est in corde diligentis Deum, dum recogitat, secum esse illum, cui nihil resistere potest. Frequentissima est in libris Prophetarum commemoratio umbræ mortis, quæ proprie significat tenebras densas, quales adfert mors, quæ priuat omni lumine. Dicuntur enim cæci esse in tenebris, quia nihil vident, & multo magis mortui dicuntur esse in tenebris, quia nihil sentiunt. Hinc videlicet Poëta loca mortuorum umbræ, ac tenebris obfusa esse dicunt. Hinc etiam Scripturæ sanctæ passim coniungunt umbram mortis cum tenebris, ut vnum per aliud explicetur, Iob. 3. *Obscurent eum tenebræ, & umbræ mortis*, & cap. 10. *Ad terram tenebrosam, & operam mortis caliginem*. Isaïa 2. *Populus qui ambulat in tenebris*,



bris, vidit lucem magnam: habitantibus in regione umbrae mortis, lux orta est eis: vbi pro eodem accipitur, habitare in tenebris, & habitare in regione umbrae mortis. Quia vero loca tenebrosa multis periculis sunt exposita, & non sine ingenti pauore per ea iter facere solemus, ideo Dauid hoc loco dicit, *Et si ambulauero in medio umbrae mortis*, id est, in medio ingentium tenebrarum, vbi multa vndique pericula circumstant, *nihil timebo, quoniam tu mecum es.*

V. *Virga tua & baculus tuus, ipsa me consolata sunt.*

Sextum bonum explicatur, quod est sustentatio fatigati. Iam enim Propheta, omiſſa ſimilitudine ouium, loquitur proprie de hominibus, neque enim oues laſſe ſuſtentantur baculo, ſed deferuntur in humeris paſtorum. Et quamuis poſſent hæc verba referri ad caſtigationem paternam, vt S. Aug. facit, tamen probabilius eſt ad literam eſſe referenda ad ſuſtentationem, vt ea referunt Theodoretus & Euthymius. Nam vox Hebraica, *miſhantea*, ſignificat proprie ſulcrum, i. baculum fulcientem: ſicut etiam vox Græca *βακτηρία*, à ſuſtendendo deducitur, vnde *βακτηρίων*, eſt baculo inniti. Niſi placeat forteſſe, virgam referre ad caſtigationem, & baculum ad ſuſtentationem. Deus enim cum videt ſuos in via fatigari, lentiusq; progredi, quam par eſſet, vtrunq; adhibere ſolet, & verbum increpatorium & conſolatorium, vt altero excitet, altero ſuſtentet. Sed vtrunq; tandem conſolationem adfert, quoniam lætatur anima, cum videt proſectum ſuum curæ eſſe Deo.

VI. *Paraſti in conſpectu meo menſam aduerſus eos, qui tribulant me.*

VII. *Impinguavi oleo caput meum, & calix meus inebrians quam præclarus eſt?*

Hoc eſt bonum ſeptimum, quod videlicet Deus electos ſuos in tribulationibus, quas in hac vita non poſſumus euadere, mirifice cōſoletur. Quare non eſt ſenſus horum verſiculorum, quod Deus parauerit electis menſam, oleum & vinum aduerſus hoſtes, quali-

hec ſint arma, quibus contra hoſtes pugnandum ſit: ſed ſenſus eſt, Deum opponere tribulationibus magnis magnas conſolationes, & ſicut ingeruntur ab hoſtibus amaritudines, ſic ingeri à Deo ſuauiſſimas, quæ deſcribuntur more humano per ſimilitudinem conuiuij, in quo ſit menſa reſerta cibis optimis, adſit etiam vnguētum pretioſum, quo aſpergatur caput, nec deſit vinum egregium, atq; ad inebriandum, i. exhilarandum aptiſſimum. Solebant enim veteres in magnis conuiuijs adhibere inter præcipuas delicias vnguenta pretioſa, quod etiam ſeruatum videmus in Euangelio Matth. 26, à S. Maria Magdalena erga Dominum. Porro illa verba, *aduerſus eos qui tribulant me*, clariora ſunt in textu Græco & Hebraico. Nam *ἐναντίας* Græcum, & *neged* Hebraicum, ſignificant *è regione*, ſive *ex aduerſo*, vt vertit S. Hieron. Proinde ſenſus eſt, *è regione tribulationum*, quas mihi ingerunt hoſtes ſpirituales, *tu paraſti*, ſive *ordinaſti*, vt ſonat verbum Hebraicum, conſolationem ingentem, menſam videlicet opiparam. *Impinguavi caput meum oleo*, id eſt, vnguento pretioſo caput meum perfudiſti, & ſic exhilaraſti faciem meam in oleo, & non deeſt ex gratia tua calix vini inebrians & præclarus, qui lætificet cor meum. Similis eſt ſententia in alio Pſalmo, *Secundum multitudinem dolorum meorum in corde meo, conſolationes tuæ lætificauerunt animam meam*. Et in Epist. 2. Corinth. 7. *Repletus ſum conſolatione, ſuperabundo gaudio in omni tribulatione noſtra*. Illud, *calix meus*, in textu Græco eſt, *calix tuus*, ſic legunt Auguſtinus & Euthymius: ſed in Hebræo habetur *coſi*, *calix meus*, & ſic etiam vertit S. Hieronymus. Probabile eſt, emendatiores codices Græcos habuiſſe, *calix meus*, quomodo legit S. Hieronymus in Commentario, vbi exponit verſionem Septuaginta, & ſic videtur legiſſe Theodoretus. Imo S. Hieronymus in Epist. ad Suniam & Freſellam, dicit, in editione Septuaginta haberi, *calix meus*: & ex errore haberi in quibusdam codicibus, *calix tuus*. Proinde noſtra lectio Latina omnino retinenda eſt: ſenſus vero ſemper eſt idem. Calix enim ille & meus

דגד

כוס



& meus est, quia mihi datus; & Dei est, quia à Deo datus.

VIII. Et misericordia sua subsequetur me omnibus diebus vite mee.

IX. Et ut inhabitem in domo Domini, in longitudinem dierum.

Hoc est ultimum bonum, quod perducit ad summum bonum. Misericordia tua subsequetur me, non ad tempus, sed perseveranter usque in finem, quod est donum proprium Electorum. Et ut inhabitem, id est, & subsequetur me, ut inhabitem in domo Domini in longitudinem dierum, id est, in æternum. In Hebræo & in Græco textu non habetur, ut, sed solum, & contra autem nonnulli veterum, ut Augustinus, Hieronymus, Theodoretus in Commentariis non legerunt, & sed solum, ut; & certe sine alterutro esset clarior lectio, nimirum sic: Misericordia tua subsequetur me omnibus diebus vite mee, ut inhabitem in domo Domini, quomodo legunt Patres; vel sic: Misericordia tua subsequetur me omnibus diebus vite mee, & inhabitem in domo Domini, quomodo vertit ex Hebræo S. Hieronymus. In his enim lectionibus nihil subaudiendum est. Tamen lectio nostra non est adeo obscura, ut non possit satis facile intelligi. Subauditur enim illud, subsequetur, quod paulo ante præcedit, nimirum, Misericordia tua subsequetur me, dum vivo, ut redeam viam, & subsequetur post hanc vitam, ut in æternum viam. Quare S. Augustinus licet in textu non legerit, & tamen in Commentario addidit etiam, ut videatur illud subintellexisse. Porro pro voce, inhabitem, in Hebræo habetur, *Sci auti*, quod significat, *redibo*. Cæterum Septuaginta legisse videntur *la sci auti*, una literula addita, & sic recte verterunt, ut inhabitem. Quomodo etiam legit S. Hieronymus, qui non vertit, *redibo*, sed *inhabitabo*.

Quare lectio Hebraica post S. Hieronymi tempora depravata fuisse videtur.

\* \* \*

## PSALMVS XXIII.

Titulus & Argumentum.

Psalmus David, prima Sabbati.

**I**N hoc titulo pars illa, prima Sabbati, non habetur in Hebræo, sed addita est à Græcis, fortasse quia in principio Psalmi fit mentio creationis terre, quæ prima Sabbati, id est, die Dominico facta est, vel quia solerent hunc Psalmum die Dominico recitare. Quod quidem volunt additum esse prima Sabbati, quia illo die Dominus resurrexit, non mihi videtur probabile, cum hic Psalmus non resurrectionem, sed ascensionem Domini manifeste prædiceret: ascensionem autem non prima Sabbati, sed quinta factam esse, notissimum est. Quod ad Ascensionem hic Psalmus proprie pertineat, testantur Cyprianus serm. de Ascens. Hieronymus epist. 142. ad Damasum, Rufinus in expositione Symboli, Gregorius Nyssenus, Ioan. Chrysostomus, Augustinus, Leo, & alij in serm. de Ascensione.

## EXPLICATIO PSALMI XXIII.

**D**omini est terra, & plenitudo eius; Orbis terrarum, & universi qui habitant in eo.

Propositum Davidis est, ostendere ex innumerabili hominum multitudine solum Christum, & paucos alios, paucos, inquam, si ad multitudinem aliorum conferantur, in domum Domini cœlestem & beatissimam intraturos, quare ne forte crederentur cæteri homines ad Deum non pertinere, sed ab alio aliquo principio creatos esse: quod postea Marcionistæ, Manichæiq; senserunt, præmittit hos duos versiculos, quibus docet Deum Creatorem ac Dominum esse totius orbis terrarum, & omnium rerum, quæ in eo sunt. Domini est terra, & plenitudo eius, id est, & omnia quæ in ipsa sunt, quæq; ipsam replent. Quod explicatur per alteram partem versiculi, orbis terrarum, & universi qui habitant in eo. Declarat enim se, cum dixit, Domini est terra, intellexisse potissimum de terra:

שבת  
שבת



**הבנ** terra habitabili, quæ proprie dicitur, *Tebel*, Hebraice, & Græce, *ὁ κοινὸν*, id est, orbis terræ habitabilis; & cum dixit, *omnis plenitudo eius*, declarat, se intellexisse præcipue de hominibus, qui habitant in eo, non de cæteris rebus, quæ in ipso sunt.

H.

*Quia ipse super maria fundavit eum, & super flumina præparavit eum.*

Probat Deum Dominum esse orbis terræ, & omnium habitantium in eo; quoniam ipse fecit terram, & fecit eam supereminere aquis, ut esset habitabilis. Nam si vel aquis omnino careret, vel esset aquis undique cooperta, inhabitabilis esset. *Quia ipse*, inquit, *super maria fundavit eum*, id est, à fundamentis fecit orbem terræ, ac per hoc ex nihilo fecit, & fecit *super maria*, id est, ut superficies terræ esset altior superficie maris, & similiter *super flumina præparavit eum*, id est, præparavit orbem terræ ad habitationem hominum, & ideo fecit superiorem, & altiorum fluminibus, alioqui enim mare & flumina terram obruerent, si altiora essent. Ex hoc autem, quod Deus terram habitabilem fecit, sequitur, ut sit etiam Dominus omnium hominum, tum quia homines ex terra facti sunt, & in terram reuertuntur, tum quia terram incolunt, non ut domini, sed ut coloni à Deo constituti, ut terram colant.

III.

*Quis ascendet in montem Domini, aut quis stabit in loco sancto eius?*

Cum omnes homines coloni, & servi Dei sint, & omnes pariter terram, quæ Dei possessio est, incolant: *Quis ascendet in montem Domini?* id est, erit ne aliquis ex tanto numero, & quis ille erit, qui dignus sit ascendere ad locum ubi proprie habitat Deus. Vocatur *mons Domini* (ut alias sæpe diximus) domus celestis, quæ est vere sublimis, & sancta, de qua dicitur in alio Psalmo: *Cælum cæli Domino, terram autem dedit filiis hominum.* Qui hunc locum exponunt de monte Sion, qui erat in Ierusalem ciuitate Iudææ, videntur nullo solido fundamento niti posse, cum confict, montem illum plenum fuisse homi-

nibus omnis generis, ut plane ridiculum videatur de illo dicere: *Quis ascendet in montem Domini?*

IV.

*Innocens manibus, & mundo corde, quæ non accepit in vano animam suam, nec iuravit in dolo proximo suo.*

Respondet, quatuor conditiones requiriti in eo, qui sit ascendens montem Domini. Prima est, ut sit *innocens manibus*, id est, nihil mali perpetrauerit: altera, ut sit *mundus corde*, id est, nihil mali cogitauerit, aut cupuerit: tertia, ut non accepit in vano animam suam, id est, ut non frustra vitam à Deo acceperit, id est, ut non solum nihil mali fecerit, vel cogitauerit, sed etiam ea omnia bona cogitauerit, & fecerit, quæ ad finem sibi à Deo constitutum obtinendum requiruntur: quarta, ut non iuraverit dolo. Illud, qui non accepit in vano animam suam, aliqui detorquent ad iuramentum, ut sequens particula sit explicatio superioris. Voluit autem legi, qui non in vano accepit animam eius, id est, Dei, vel iuxta puncta Rabinorum, qui non accepit in vano animam meam, ut Deus loqui intelligatur. Verum hæc expositio non videtur probabilis, tum quia sine causa Rabini legi volunt, *animam meam*, cum vox Hebræa habeat pronomem tertiæ personæ, non primæ, & in tertia persona verterit S. Hieronymus, tum quia lectio illa, *animam eius*, est omnino noua, & inaudita, cum Latini, & Græci hæcenus in ea voce intellexerint relatiuum reciproci, nimirum *animam suam*; tum denique, quia nomen Dei in vanum accipere, pro eo quod est, falso iurare per Deum habetur in Scripturis sanctis, sed animam propriam, vel animam Dei in vanum accipere pro falso iurare, nusquam legitur. Alij volunt animam suam in vano accipere, nihil esse aliud, nisi vana, id est, temporalia, & caduca cogitare, & concupiscere: sed hoc iam comprehensum erat in illo, *Mundus corde*, & videtur coactum, & durum. Addidit vero Propheta quartam illam conditionem, de iuramento dolo, ut in eo peccato, quod est vnum ex maximis, cum sit pariter contra Deum, & contra proximum,

N

com-

הבנ  
הבנ



comprehenderet omnia alia peccata, que per instrumentum lingue committuntur. Itaque is, qui dignus sit in montem Dei, id est, in cælum conscendere, debet vndequeque esse perfectus, ita vt neque corde, neque voce, neque opere vnquam deliquerit, & contra, bona omnia fecerit que ad eius officium pertinebant. Hæ vero conditiones non in alium, quam in Christum conueniunt. Is enim vnus est, qui peccatum non fecit, nec inuentus est dolus in ora eius, vt dicitur 1. Petri 2. De reliquis, non est qui faciat bonum, non est vsque ad vnum, vt loquitur Dauid in Psal. 13. Et omnes nos quasi ones errauimus, inquit Iſaias cap. 53. Et Apostolus Paulus ad Rom. 3. Omnes peccauerunt, & egent gloria Dei. Proinde recte Dominus ipse ait Ioan. 3. Nemo ascendit in cælum, nisi qui descendit de cælo Filius hominis, qui est in cælo. Reliqui sunt de terra terreni, ille solus de cælo cælestis, sanctus, innocens, impollutus, segregatus à peccatoribus, excelsior cælis per Ascensionem factus. Nec tamen sola persona Christi ascensura erat in montem Domini, sed ipse, & corpus eius, quod est Ecclesia, quam lauit sanguine suo, vt exhiberet ipse sibi gloriosam Ecclesiam, non habentem maculam, neque rugam, ad Ephes. 5. propterea sequitur:

V. *Hic accipiet benedictionem à Domino, & misericordiam à Deo salutaris suo.*

*Hic, videlicet Christus, accipiet benedictionem à Domino, id est, copiosissima bona pro se, & misericordiam à Deo salutaris, pro corpore suo, quod est Ecclesia, cuius etiam respectu dicitur Deus salutaris eius. Siquidem vita æterna in regno cælorum, Christo iustitia, fidelibus eius misericordia est, nam etiam si iusti merentur ex condigno vitam æternam; tamen ipsa eorum merita ex misericordia Dei nascuntur, & dona Dei verissime appellantur. Vnde in Psalmo 102. dicitur, Qui coronat te in misericordia, & misericordibus; & ad Rom. 6. Stipendium peccati mors, gratia Dei vita æterna. In Hebræo habetur, Iustitiam à Deo salutaris suo, & sic vertit S. Hieron. secundum quam lectionem totus hic versiculus Christo proprie conueniret.*

Tamen Septuaginta, qui verterunt misericordiam, videntur considerasse, iustitiam in Scripturis aliquando accipi pro bonitate, imo etiam expresse pro misericordia, vt in Psal. 111. *Dispersit, dedit pauperibus, iustitia eius manet in sæculum sæculi.* Vnde est illud in Euangelio Matthæi 6. *Attendite, ne iustitiam vestram faciatis coram hominibus, vt videamini ab eis.* Et mox, *Te igitur faciente elemosynam, nesciat sinistra tua, quid faciat dextera tua.* Itaque Septuaginta hoc loco non tam ad vocem, quam ad rem significatam respexerunt.

*Hæc est generatio querentium eum, querentium faciem Dei Iacob.*

Hic iam manifestat Prophetam illum vnum innocentem manibus, & purum corde, qui ascendet in montem Domini, & accipiet benedictionem, & misericordiam à Deo, non esse solū caput, sed caput eum corpore, Christum cum Ecclesia. *Hæc, inquit, est generatio querentium eum, id est, iste qui ascendet in cælum, est generatio quædam hominum regeneratorum in Christo, quorum præcipuum studium est Deum querere, ad faciem Dei videndam anhelare, ad montem denique sanctum totis viribus niti.* Et vere vnum est, ac forte præcipuum signum electorum Dei suspirare ad patriam. Generatio enim filiorū huius sæculi nihil minus, quam Deum querit, nihil magis, quam mortem horret, & si optio daretur, mallet in hoc sæculo semper viuere, quā dissolui, & esse cum Christo. In textu Græco habetur, *Hæc est generatio querentium Dominum, & sic legunt in Commentario Hieronymus, Augustinus, Euthymius, & alij: tamen in Hebræo habetur, querentium eum, vt habet nostra editio Latina. Sensus omnino est idem; nam illud, eum, refertur ad Dominum, de quo dictum erat, accipiet benedictionem à Domino.* Itaque Septuaginta videntur explicasse pronomen, eum, quod est in Hebræo. Quod sequitur, *querentium faciem Dei Iacob,* in Hebræo est, *querentium faciem tuam ô Iacob.* Quo etiam loco Septuaginta explicauerunt sententiam obscuram textus Hebraici, in quo

VI.



quo subintelligitur, *Deus*, ut sensus sit, quærentium faciem tuam, *Deus Iacob*: nisi forte per *Iacob*, in textu Hebraico intelligatur cœtus Beatorum siue cœlestis Hierusalē, & tunc in idem recidet, quærere faciem Dei, & quærere faciem *Iacob*. Quia nemo videt faciem *Iacob*, i. cœlestis patriæ, qui non videt faciem Dei *Iacob*; cum totum negotium, totaq; felicitas illius beatissimi *Iacob* sit contemplari faciem Dei. Additur in Hebræo *sela*, i. semper, quia non solum generatio hæc Deum quærit, sed semper Deum quærit, i. non fatigatur Deum quærendo, neq; finit se abduci a quærendo Deo, ut quærat aliquid infra Deum.

הלו

*Attollite portas principes vestras, & eleuamini portæ aternales, & introibit Rex gloria.*

Cum præuidisset S. Propheta, inuentum esse vnum, qui ascendere dignus esset in montem Dei, id est, Christum, prædicit iam illum re ipsa ascensurum, & portas cœli æternas illi aperiendas. Sed more Poëtico vtitur prosopopœia, & alloquitur tum *Principes cœli*, id est, Angelos, tum *ipsas portas*, ac iubet Angelis, ut aperiant, & portis, ut sinent se aperiri, imo sponte pateant aduenienti Regi gloria. Euthymius notat portas non aperiri, sed tolli, quia adueniente Rege solent portæ ciuitatis auferri, & deponi in signum subiectionis. \* At non dicit *Dauid* auferre portas, sed *attollite*, & non dicit portis, exite de medio, sed *eleuamini*. Dicit igitur, *attollite, & eleuamini*, quia portæ cœli non sunt quasi in pariete, ut ad latera moueri debeant, sed quasi in tecto, vel laqueari, ut sursum versus aperiendæ sint. Vnde etiam refellitur opinio eorum, qui volebant, Prophetam loqui de domo aliqua in monte *Sion* terrestri, in quam introducenda erat *Arca*. In Hebræo ad verbum, ut vertit S. Hieron. alloquitur Propheta *solas portas*, ac dicit: *Attollite porta capita vestra, & eleuamini ianua sempiterna, & introibit Rex gloria*. Dicuntur autem portæ attollere capita, quando eleuantur sursum versus, quia tunc attolluntur extreme partes earum, quæ sunt in eis veluti capita. Et quamuis vox Hebræa, *rascim*, significare possit non

solum *capita*, ut vertit S. Hieronymus, sed etiam *Principes*, ut venterunt Septuaginta: tamen pronomen additum, quod Hebræi dicunt affixum, secundum communem phrasim Hebraicam solet coniungi cum nomine immediate præcedente, & ideo illud, *rascim*, deberet verti *capita vestra*, ut vertit S. Hieron. vel *Principes vestros*, quod hoc loco non est ad propositum. Tamen quia Septuaginta Interpretes satis aperte per *rascim*, intellexerunt *Principes*, cum venterint *oi æthiops*, & pronomen coniunxerunt cum nomine *portas*, dicendum est, vel in textum ipsorum pronomen affixum fuisse nomini *scabrim*, q. significat *portas*, non autem, nomini *rascim*, quod significat *Principes*, vel posse pronomen affixum vni nomini, referri ad aliud nomen, quamuis rarissime, & præter regulam.

דאשכ

דאשכ

דאשכ

*Quis est iste Rex gloria? Dominus fortis & potens, Dominus potens in prælio.*

VIII

Introducitur *Principes cœlestis Hierusalem* interrogantes, quis sit ille Rex gloria, non quod Angeli in die Ascensionis Domini, ignorarent, Christum esse Regem gloria: sed ut exprimat admirationem, quam secum adferebat nouitas illa, quod cerneretur verus homo corporalis ascendere super cœlos, non tanquam hospes, sed tanquam Dominus gloriose ac sempiternæ ciuitatis. Respondet autem Propheta, Regem gloria esse Christum Dominum fortissimum & potentissimum, qui potentiam suam ostendit in prælio contra Principem tenebrarum, quem deuicit, spoliavit, & alligauit.

*Attollite portas Principes vestras, & eleuamini portæ aternales, & introibit Rex gloria.*

IX.

*Quis est iste Rex gloria? Dominus virtutum, ipse est Rex gloria.*

X.

Fingit Propheta Angelos, qui cœlo præfunt, quasi cunctari in aperiendis portis, & ideo rursus intonat, *Attollite portas*, &c. quæ non significant aliud, nisi ingentem rei nouitatem, quod corpus terrenum supra corpus cœleste, & caro humana supra ipsos Angelicos spiritus, cum incredibili totius naturæ

דאשכ



## PSALMVS XXIV.

Titulus, &amp; Argumentum.

In finem, Psalmus David.

צבאות

יהוה

miratione, & quasi stupore conscendat. Rursus igitur introducit Angelos interrogantes, *Quis est iste Rex gloria?* quibus ipse respondet: *Dominus virtutum ipse est Rex gloria.* Audito autem nomine sibi notissimo, nimirum, *Dominus virtutum*, continuo aperiunt, & Regem gloriæ læti suscipiunt. Dominus virtutum, in Hebræo est, *Dominus, Zebaoth*, quod S. Hieron. vertit, *Dominus exercituum*. Quod nomen in Prophetis frequentissime tribuitur Deo, neque est commune Diis per participationem, sed proprium soli Deo proprie dicto, tum quia continet nomen quatuor literarum, proprium soli Deo vero; tum quia solus sit vere Dominus exercituum, quia præest exercitibus Angelorum qui sunt pene innumerabiles, & potentissimi, & etiam quia soli Deo vero militat omnes creaturae. Nam, ut habemus in Psalmo 148. *Ignis, grando, nix, glacies, spiritus procellarum faciunt verbum eius*, id est, pugnant ad imperium eius. Expertus est quidem Pharaon Deum esse Dominum exercituum, cum non solum per Angelos, sed etiam per minutissima animalia contra eum pugnaverit, videlicet per ranas, muscas, & culices; nec solum per animalia, sed etiam per res inanimatas, grandinem, ignem, tenebras, morbos, & similia. Porro translatio Septuaginta, qui verterunt, *Dominus virtutum*, in idem recidit. Nam per virtutes non intelliguntur virtutes morales, quæ dicuntur *acquiri*, sed vires, & potentia, quæ dicuntur *inveniri*. Itaque Dominus virtutum, est Dominus virium, & potentiarum, quales præcipue sunt castrorum acies ordinatæ. In vulgari etiam sermone exercitus armati dici solent, *les forces*. Ex his habemus, Christum Dominum vere, ac proprie esse Deum, non creaturam, ut Ariani, alijq; permulti hæretici voluerunt. Nam in hoc Psalmo dicitur, *Dominus virtutum*, siue exercituum, quod nomen in tota Scriptura sacra soli Deo tribuitur; nec non *Rex gloria*; id est, Rex celestis Ierusalem, quæ est regio lucis, & summæ, æternæq; claritatis, quod sine dubio soli Deo vero convenire potest. Additur in Hebræo *Sela*, semper, ut significetur, Christum Regem esse gloriæ, non ad tempus, sed ad omnem æternitatem.

סלה

**I**N Hebræo non habetur, in finem, sed solum, Psalmus David; non multum refert siue Septuaginta addiderint illud, in finem, siue exciderit ex textu Hebræico. Hic Psalmus est primus ex alphabeticis, habet enim tot versiculos quot sunt literæ alphabeti, nimirum viginti duos, & incipit primus versiculus à prima litera Alphabeti, secundus à secunda, & sic deinceps. Una dumtaxat litera est, à qua nullus versus incipit, videlicet Coph, sed ut damnum hoc resarciatur, in fine Psalmi post ultimam literam ponitur alius versiculus incipiens à litera Phe, atq; ita duo versiculi incipiunt à litera Phe. Quid huius rei causa fuerit, difficile est diuinare. Similes Psalmi alphabetici sunt 33. 35. 110. 111. 118. & 144. Cur alphabetici scribantur Psalmi, nulla melior occurrit ratio, quam ut consulatur memoria. Argumentum Psalmi est oratio deuotissima, qua petitur remissio peccatorum, & gratia bene viuendi. Conuenit autem hac oratio homini incipienti despiciere temporalia, qui sic tenetur desiderio placendi Deo, ut tamen laboret in concupiscentiis superandis.

## EXPLICATIO PSAL. XXIV.

**A**D te Domine leuavi animam meam, Deus meus in te confido non erubescam.

In hoc versiculo, qui est vnus apud Septuaginta, quia continet integram sententiam, sunt duo secundum Hebræos; incipit enim secundus ab illis verbis, *In te confido*, quia ibi ponitur secunda litera alphabeti. Ad te Domine leuavi animam meam, id est, non inueniens in creaturis vllis quietem, sed vbique spinas & tribulos, pertæsus vitæ prioris, animam meam abstractam ab affectu, quo inhebebat terræ, ad te leuavi; tibi per cogitationem assiduam, & amorem à te inspiratum

I.



ratum inhaerere ceppi; à te auxilium contra tentationes expecto, & quia in te confido non erubescam, id est, non recedam à te confusus, auxilio non impetrato: ita ut cogar erubescere coram inimicis meis in textu Græco additur in æternum; sed id non habetur in Hebræo, neque legitur à S. Hieronymo. S. Augustino, & Theodoro in commentarijs; sed à solo Euthymio ex veteribus. Itaque rectè non est receptum in editione Latina.

**H.** *Neque irrideant me inimici mei, etenim vniversi, qui sustinent te non confundentur.*

Explicat quod dixerat, non erubescam, quia tunc erubesceret, si irrideretur ab inimicis tanquam qui frustra sperasset in Deo. In Hebræo habetur, *Neque exulient de me inimici mei.* Sed idem sensus est: Si quidem exultatio inimicorum species irrisiois est. Per inimicos autem intelligi possunt tum homines mali, tum etiam Dæmones, quorum exultatio, & irrisio intolerabilem confusionem pareret si eam serio cogitaremus. Reddit postea causam, cur omnino confidat se non confundendum, quoniam, inquit, *vniversi, qui sustinent te, non confundentur*, id est, quia longo experimento, exemplis nostrorum maiorum, & ex ipsis verbis tuis didicimus neminem confundi, neque à spe sua exidere ex ijs, qui te sustinent, id est, qui in te confidentes patienter auxilium tuum expectant. Sustinere Dominum in Scripturis frequentissimum est; & significat expectare Dominum cum certâ spe auxilij.

**II.** *Confundantur omnes inique agentes, superuacue.*

Duplicem sensum hic versiculus habere potest; primo enim sensus esse potest, ut significetur, confundendos eos, qui sine causa peccant, id est, qui non peccant ex ignorantia, vel infirmitate; sed ex malitia. Isti enim non cogitant de poenitentia, neque de peccato abijciendo; & ideo, si forte sperant aliquid à Deo, spes eorum præsumptio est. Ita Theodoretus, & Euthymius. Potest etiam esse alius sensus, fortasse magis literalis, ut

significetur, confundendos inimicos iustorum visibiles, tunc inuisibiles, quia frustra iniqui agunt dum vexant homines iustos; non enim consequuntur finem sibi propositum, nimirum ut iustos perdant, & ad gehennam perducant; cum è contrario illa vexatio sit eis virtutis exercitatio, & meritum gloriæ sempiternæ. Retorquet igitur Propheta confusionem in hostes, quasi dicat, ne finas Domine, ut ego confundar, quod fieret, si inimici mei me irriderent & de perditione mea exultarent, sed contra confundantur ipsi, dum cernunt, se superuacue, ac frustra inique egisse, ut me ad impatientiam pro uocarent.

*Vias tuas Domine demonstra mihi, & semitas tuas edoce me.* **IV.**

Per vias Domini intelligimus legem Domini, quæ vere est via, qua itur ad Deum. Nam si vis ad vitam ingredi, Dominus ait, *serua mandata.* Cum itaq; postulasset Propheta auxilium Domini contra tentationes, explicat quod auxilium potissimum habere delideret, atque ait, *Vias tuas, Domine, demonstra mihi*, id est, fac me ambulare per vias præceptorum tuorum; & *semitas tuas edoce me*, id est, ostende mihi augustum iter iustissimæ legis tuæ, sic enim euadam omnes irrisiones inimicorum, & non ego confundar, sed confundentur ipsi, qui frustra me suis tentationibus exagitant. Porro cupit doceri legem Domini, non quo ad intelligentiam speculatiuam, sed quo ad praxim, id est, cupit gratiam, quæ persuadeat voluntati, ut libeat implere mandata.

*Dirige me in veritate tua, & doce me, quia tu es Deus Saluator meus, & te sustinui tota die.* **V.**

Idem repetit, & addit rationem. *Dirige me*, inquit, *in veritate tua*, id est, ex me facile declino ad dexteram, vel ad sinistram, deserens viam mandatorum tuorum, propter temporales prosperitates, vel aduersitates: ideo tu dirige me ducens auxilio gratiæ tuæ per viam rectam in veritate tua, id est, in lege tua, quæ verissima via est. Nam omnia mandata tua veritas. Quia tu es Deus Saluator meus, id est, ideo à te auxilium hoc peto, quia



quia tu solus, qui Deus, es, potes saluare animam meam. Non est enim alius Medicus, qui nouerit curare morbos animarum, & multo minus qui possit sanitatem perfectam reddere, nisi Deus. Et præterea hoc à te peto, & spero impetraturum, quia te sustinui tota die. i. perseueranter, & patienter expectaui medicinam tuam, neque aliunde consolationem accipere volui. Magni meriti est apud Deum, tempore tentationis non deficere à spe celestis auxilij, neque humanas consolationes requirere.

VI.

*Reminiscere miserationum tuarum Domine, & misericordiarum tuarum, quæ à seculo sunt.*

Quando Deus finit animam tentationibus agitari, vel in peccatis hæere videtur oblitus misericordiæ suæ; ideo iustus diu luctatus cum tentatione, vel videns se non posse liberari à lapsu in peccata, quod summopere cupit, clamat ad Deum vt recorderetur miserationum, & misericordiarum suarum antiquarum. Inter miserationem, & misericordiam hoc interest, quod miseria significat actum miserendi, misericordia habitum virtutis, & idem fere discrimen inuenitur in verbis Hebraicis, quāuis sint magis dissimilia inter se, quam Latina. Quod hic habemus, *miserationes*, in Hebræo est, *rachameca*, quod amorem, & viscera paterna proprie significat, vnde est illud Psal. 102. *Sicut miseretur pater filiorum.* Quod autem hic habemus, *misericordias*, in Hebræo est, *chafadecha*, quod pietatem, & probitatem, ac misericordię virtutem significat. Itaque sensus est, recordare Domine, te ab æterno misericordem fuisse, nec solum misericordem, sed etiam misereri solitum, & viscera paterna exhibere erga filios tuos. Proinde hoc tibi esse proprium & naturale. Illud, *quæ à seculo sunt*, in Hebræo & Græco est, quia à seculo sunt, & sic legunt. S. August. & Theodoretus. Tamen S. Hieron. in commentario, & Euthymius legunt, vt nos habemus, *quæ à seculo sunt*; ex quo apparet, textum Græcos, & Latinos olim fuisse varios. Sensus est idem, siue dicamus, reminiscere, quod ab æterno mise-

ricors es, siue reminiscere misericordiæ tuæ quæ ab æterno est.

*Delicta iuuentutis mee, & ignorantias meas ne memineris.*

VII.

Pulchre opponit reminiscentię obliuionē, quasi dicat, reminiscere misericordiæ tuæ, & obliuiscere peccatorum meorum. Nam vnum est causa alterius tunc enim Deus reminiscitur misericordiæ suæ, quando non vult amplius reminisci peccatorum nostrorum, sed ea remittit, ac delet, ac si æternæ obliuioni mandetur. Commemorat aut peccata iuuentutis, & ignorantias. i. delicta commissa ex infirmitate, & ignorantia, tum quia istis magis quam alijs conuenit misericordia, iuxta illud Apost. 1. Tim. 1. *Misericordiam consequutus sum, quia ignorans feci*, tum quia forte Dauid non alia peccata habebat: & hæc oratio iusti hominis est, cui cum peccatis leuibus certamen est, tum etiam quia, vt notat Euthymius, peccata ex malitia non remittuntur per solam orationem, sed dignis penitentię fructibus indigent. In Hebræo non habetur, ignorantias meas, sed, *Pescia- gai. id est, scelera mea.* Quia vero Septuaginta verterunt *ἀγνοίας*, id est *ignorantias*, & de eorum eruditione, & fide dubitare non possumus, & re vera magis congruit cum peccatis adolescentię ignorantia, quam scelus, cogimur dicere vocem Hebraicam generalem esse, & tam scelera, quam peccata leuiora significare.

יְעִשָּׂה

*Secundum misericordiam tuam mentem meam tuam, propter bonitatem tuam Domine.*

VIII.

Declarat quod dixerat, reminiscere misericordiæ tuæ, & obliuiscere delictorum meorum. Hoc enim totum fit, cum Deus recordatur hominis peccatoris secundum misericordiam suam.

*Dulcis, & rectus Dominus, propter hoc legem dabit delinquentibus in via.*

IX.

Confirmat, ipse se in spe impetrandi, affirmas, Dominum bonum, & iustum esse, & ideo libenter corrigere solere delinquentes. Sic enim exercet misericordiam erga hominem,

&amp; iu-



& iustitiam erga peccatum. Pro dulcis, in Hebræo est, *roḥ*, quod proprie bonum significat: & in Græco quoque *χρῆς* ὁς bonum potius, quam dulcem significat. Proinde illud, *dulcis*, quod est in nostra editione Latina, pro bono, accipiendum est. pro, *legem dabit*, in Hebræo est, *torā*, id est, *docebit*, & in Græco *νόμος* ὁρῶναι, id est, *legislatorem*, seu *præceptorem se exhibebit*. Itaque non est sensus, Deum legem dare quomodocunque, sed legem dare eam docendo, & persuadendo, ac per hoc faciendo, ut obseruetur. Respondent enim hæc verba verbis superioribus, *vias tuas demonstra mihi, & semitas tuas edoce me, dirige me in veritate tua*, & *doce me*. Quod enim tunc petebas, nunc affirmat, Deum concedere solitum esse. Hic igitur est sensus, *Dulcis & rectus Dominus est*, & ideo amat homines, & odit peccata, ac propterea legem suam demonstrat, ac persuadet delinquentibus in via huius vite, ut ipsi etiam ex iniquis, & malis, iusti & boni efficiantur.

*Diriget mansuetos in iudicio, docebit mites vias suas.*

Declarat quod dixerat, *legem dabit delinquentibus*, ac dicit non de omnibus delinquentibus id esse intelligendum, sed solum de mansuetis; & mitibus, qui non resistunt Domino docenti, imo cupiunt doceri. *Diriget*, inquit, *mansuetos in iudicio*, id est, ducet perviam recte legis sue (que iudicium etiam in Scripturis appellatur, ut diximus in explanatione Psalmi 18) homines humiles, & mites. Deinde hoc ipsum declarat alijs verbis, dicens, *Docebit mites vias suas*, id est, mitibus dabit gratiam cognoscendæ & amandæ, ac per hoc implendæ legis. Hoc loco annotandum est, non excludi superbos omnino à gratia Dei, sed ordinem assignari. Superbi siquidem non sunt perfectionis capaces, de qua proprie agitur in hoc Psalmo, nisi prius timore cōcepto pœnitentiam agant, & timore deposito, mites humilesq; reddantur. Itaque primum gratia Dei superbos atq; obstinatos emollit, & conterit, deinde contritis, & humiliatis demonstrat vias suas, & dirigit eos in iudicio.

*Vniuersæ via Domini misericordiae & veritatis requirentibus testamentum eius, & testimonia eius.*

Addit ad id quod dixerat, non solum à Deo dirigi mansuetos, sed omnia opera Dei erga tales homines esse misericordiam, & veritatem, id est, misericordiam, & iustitiam accipitur pro fidelitate, & veritate, quæ quod promittitur implere facit: *Via Domini* hoc loco vocantur opera Dei, quibus Deus ad nos quodammodo venit, nisi forte magis placeat, per vias Domini intelligere morem Dei, siue regulam, & quasi legem, qua Deus vtitur. Itaque via Domini semper significat legem, sed aliquando legem, quam nobis dat, ut per eam, quasi perviam rectam ascendamus ad ipsum, aliquando legem qua ipse vtitur, cum per opera descendi ad nos. Et quia iam multa dixerat Dauid de via Domini priore, id est, de lege nobis data: nunc adiungit aliquid de via Domini posteriore, id est, de lege, quam ipse sibi posuit, & quam servat erga nos. Ergo, inquit, *vniuersæ via Domini misericordiae, & veritatis*, id est, lex, siue regula, siue modus procedendi Dei consistit in misericordia, & veritate, ut misericorditer promittat, & fideliter impleat, quod promissit. At cum quibus vtitur Deus hac lege? cum *requirentibus testamentum eius, & testimonia eius*. Vocat testamentum Dei pactum illud, quod fecit hominibus, quādo legē dedit, ut ipsi sint populus eius, & ipse Deus eorum: Quod quidem pactum vocatur etiā in Scripturis testamentum, quia cōtinet promissionem hereditatis, & quia morte testatoris confirmandum erat, sicut re vera confirmatum est in morte Christi, in cuius rei signum Moyses asperxit sanguinem in populum dicens, *Hic est sanguis Testamenti, quod mandavit ad vos Deus*. Exod. 24. & Hebr. 9. Vocat autem testimonia Dei, ipsam legem, quam Deus dedit, quoniam, ut alias diximus per legem testificatur nobis Deus vtitur lege misericordiae, & veritatis, qui requirunt pactum cum Deo initum, ut illud obseruent, & similiter requirunt legem Dei.



Dei, ut eam impleant, id est, cum hominibus bonę voluntatis, Deum timentibus, & diligētib. In Hebręo habetur pro voce, testamentum, *berith*, quod proprie pactum significat. Sed Septuaginta vertere solent *διαθήκη*, id est, testamentum, propter rationem iam dictam. Sic etiam pro voce, *requirētib. in* Hebręo est, *nozere*, custodientibus, sed idem est sensus. Qui enim requirūt pactum, quod forte iam obliti erant, ad hoc requirunt, ut custodiant.

ברית

נצרי

XII.

*Propter nomen tuum Domine propitiaberis peccato meo, multum est enim.*

Ex vniuersali lege, qua Deus utitur erga timentes se, colligit Propheta bonam spem se habere posse de remissione suorum peccatorum. *Propter nomen tuum Domine*, id est, ut manifestetur misericordia, & veritas tua, *propitiaberis peccato meo quod multum est.* Potest autem dici multum, vel propter multitudinem, sicut dicitur multis populus, iuxta illud Apostoli Iacobi, *In multis offendimus omnes*, vel propter magnitudinem, & gravitatem, quia viri sancti etiam parua peccata, magna existimant: & vere magna sunt, si magnitudo eius qui offenditur, consideretur.

XIII.

*Quis est homo, qui timet Dominum? legem statuit ei in via, quam elegit.*

Facit Propheta more amantium, qui nunc suspirant ad rem amatam, nunc eam laudant, nunc iterum suspirant. Amabat vir iustus gratiam Dei, cupiebat remissionem peccatorum, donum recte viuendi, & placendi Deo: ideo nunc hoc ipsum petit, nunc laudat gratiam istam, & felicitatem enarrat timentium Deum, id est, eorum, qui gratiā istam consequuti sunt, nunc reuertitur ad hoc ipsum desiderandum, & postulandum. Itaque in hoc versiculo, & duobus sequentibus narrat bona, quę assequuntur timentes Deum. *Quis est, inquit, homo qui timet Deum?* quasi dicat, prodeat in medium homo vere timens Deum; & audiet ex me suam felicitatem. Quod sequitur, *legem statuit ei in via, quam elegit*, multi volunt esse initium fe-

licitatis, quam Propheta enarrandam suscepit, quasi dicat, iste timens Deum, hoc in primis habebit, quod Deus cum instruet de lege sua in via, quam elegit, id est, in statu vitę, quem elegit. Ita Theodoretus, & Euthymius. Non rejicio expositionem, sed magis literalem puto aliam, quam insinuant Hieronymus, & Augustinus. Est enim consuetudo Prophetę id ipsum in eodem versiculo bis repetendi, vel declarandi in vna parte versiculi, quod in altera dictum est. Hunc igitur sensum esse existimo, *Quis est homo qui timet Deum?* Quis, inquam, est ille, quę Deus instruxit de lege sua in via, quam ipse homo elegit, id est, in recto itinere bene viuendi, & eundi ad Deum, quod ipse voluntarie iam elegit: sic enim vna pars versiculi declarat alteram. Ille enim est homo timens Deum, qui dono Dei elegit viam, qua itur ad Deum, quę est observatio mandatorum. Illa verba, *Legem statuit ei*, in Hebręo, & Gręco vnicum tantum verbum est, quod significat docere, instruere, pręceptorem se exhibere; & similia. Itaque verti poterat, quis est ille, quem Deus docuit; proinde *legem statuit ei*, significat, legem dedit in corde eius, id est, instruxit, & docuit eum. Et pronomen, *ei*, explicandum est (ut sanctus Hieronymus fecit) per relatiuum, quem vel cui, id est, quem docuit de lege, vel cui dedit legem in corde. Hęc enim est recta interpretatio verbi Hebraici.

*Anima eius in bonis demorabitur, & semen eius hereditabit terram.*

XIV.

Hęc est felicitas timentis Deum, quod *anima eius*, id est, ipse timens Deum *in bonis demorabitur*, id est, bonis fruatur non ad breue tempus, aut per transitum, sed permanenter, & stabiliter. Quę sententia verissima est, nam *diligētib. Deum omnia cooperantur in bonum*. Proinde timens Deum semper fruatur bonis, quia si res bene cedēt, fruatur bono prosperitatis si contra, fruatur bono patientię, & spe magni pręmij in Regno cęlorum. Ita semper erit latus. Nec ipse solum in bonis morabitur, sed etiam filij eius propter ipsum, hereditabunt terrā, id est, terram



terram possidebunt. In Scripturis enim, vt exposuimus in Psalmo 15. pro eodem accipitur hereditare, & possidere. Dicuntur autem filij timentium Deum possessuri terram, quia pacifice habitabunt in terra, & nemo eis nocebit, in eo sensu, quem attigimus; quia bonis omnia cooperantur in bonum, & ipsarum tribulationes conuertentur in gaudium.

XV.

*Firmamentum est Dominus timentibus eum, & testamentum ipsius, vt manifestetur illis.*

Hæc est ratio, cur timentes Deum in bonis semper morentur, quoniam non innituntur rebus caducis & perituris, sed Deus ipse est firmamentum eorum, id est, in Dei amicitia & auxilio fundatas habent spes suas. In Hebræo est, *Sod*, quod secretum significat, & ideo S. Hieronymus vertit secretum Domini timentibus eum, supple, reuelatur. Sed Septuaginta videntur legisse *iesod*, *fundamentum*, vna litterula addita, quæ facili negotio ex textu Hebraico temporis progressu excidere potuit. Et sine dubio melius congruit hoc loco fundamentum, siue firmamentum quam secretum. Cur autem timentes Deum innitantur Deo, vt solidissimo fundamento, ratio est, quia *testamentum*, i. pactum Domini, hoc eis manifestat; quia enim timentes Deum optime norunt, & sæpe recogitant, Deum pepigisse fœdus cum hominibus, vt sit eorum Deus, & quasi amantissimus parens, si ipsi leges eius seruauerint; ideo ex hoc pacto intelligunt se in Deo, tanquam in firmissimo fundamento, quiescere posse. Hæc est sententia huius loci, sed verba Latine editionis obscura sunt, & ex verbis Græcis dilucidanda erunt. Vox illa, *testamentum*, nominatiui casus est in Græco, videlicet *διαθήκη*, & sic etiam intelligi debet in Hebraico & Latino. Illud, *vt manifestetur illis*, in Græco *δηλώσει αὐτοῖς*, *manifestabit eis*, i. pactum Domini manifestabit timentibus Deum, quod Dominus firmamentum eorum sit, id est, ex pacto illo cognoscent Dominum esse firmamentum timentium se. In eundem sensum exponi possunt verba Hebraica, *Et pactum eius ad docendum eos*: sic enim est ad verbum, & sen-

sus est, & pactum Domini erit ad docendum eos, id est, docebit eos, quod Dominus firmamentum sit timentium se. In eundem igitur sensum oportet etiam accommodare verba Latina: *Et testamentum ipsius, vt manifestetur illis*, id est, & testamentum, siue pactum eius, supple faciet, vt manifestetur illis id quod paulo ante dictum est, videlicet Deum esse firmamentum timentium se.

XVI.

*Oculi mei semper ad Dominum, quoniam ipse euellet de laqueo pedes meos.*

Laudata paulisper felicitate timentium Dominum reuertitur ad eam optandam & petendam: *Oculi mei semper ad Dominum*, id est, assidue respicio mentis oculis Deum tanquam ab illius auxilio rotas pendens. Efficacissimum orandi genus est, habitu miserabili respicere eum, à quo auxilium speres, & magis inopiam ostendendo & modestè tacendo, quam odioso clamore benignitatem diuitis implorare. *Sicut oculi ancilla*, ait idem Propheta alio loco, *in manibus dominae suae, ita oculi nostri ad Dominum Deum nostrum, donec misereatur nostri*. Quoniam ipse euellet de laqueo pedes meos, id est, ideo tam intente in Deum respicio, quoniam ipse tandem, vt spero, liberabit me ab omni periculo tentationum, quæ veluti laquei vbique nobis in hac vita insidiantur. Posset etiam illud, *oculi mei semper ad Dominum*, referri ad intentionem semper Deo placendi, neque villo modo aliquid admittendi contra ipsius voluntatem. Posset quoque referri ad contemplationem diuinæ pulchritudinis, quam semper ob oculos habent, qui serio diligunt Deum. Sed prima explicatio videtur maxime literalis.

XVII.

*Respice in me, & miserere mei; quia vnicus & pauper sum ego.*

Quia ipse Deus semper respicit; merito petit, vt respiciatur à Deo. Hoc enim est, quod tacite petebat, cum oculis intentos in Deum habebat, nimirum vt misericorditer respiceretur eius solitudo & paupertas. Dicit se *unicum*, id est, solum & desolatam, vel quia reuera destitutus fuisset ab amicis & cognatis, vel, quod magis probo, quia ipse se animo



ab aliis omnibus separauerat, & in Deo solo spem omnem posuerat. Dicit autem *paupe-rem*, quia humilis erat, & se virtutibus ac meritis vacuum arbitrabatur.

XVIII.

*Tribulationes cordis mei multiplicatae sunt, de necessitatibus meis erue me.*

De tentat. onibus peccatorum hunc locum intelligo potius, quam de temporalibus aduersitatibus. Erat enim & hic vnus ex illis, qui cum Apostolo gemunt & dicunt: *Sentio aliam legem in membris meis repugnantem legi mentis meae*, &c. &: *Miser ego homo, quis me liberabit de corpore mortis huius?* Necessitates autem à quibus liberari cupit, videntur esse molestissimæ illæ concupiscentiæ, quæ velimus nolimus nos vexant, & aliquando in peccatum pertrahunt. *Multiplicatae sunt*, in Hebræo habemus, *hirchiun, dilatatae sunt*. Sed quoniam verbum Hebraicum, *tsarosh*, angustias proprie significat, pro quo nos habemus tribulationes, & angustias, cum dilatantur, desinunt esse angustias, ideo ad tollendam ambiguitatem, Septuaginta prudenter verterunt, non vt verba sonant, *angustias dilatatae sunt*, sed, vt sensus erat, *tribulationes multiplicatae sunt*. Siquidem hoc loco dicuntur angustias dilatatae, non quia perierunt, sed quia creuerunt. Quod enim dilatatur, vtique crescit. Posset etiam fieri, vt Septuaginta non legissent, *hirchiun, dilatatae sunt*, sed, *hirchiun, multiplicatae sunt*, vnica littera mutata, S. etiam Hieronymus eodem modo vertit, *tribulationes multiplicatae sunt*, proinde si corrupta sit Hebraica lectio, post tempora S. Hieronymi corrupta est.

XIX.

*Vide humilitatem meam, & laborem meum, & dimitte vniuersa delicta mea.*

Pergit in oratione, ac petit sibi remitti peccata, in quæ aliquando tentatione vincente prolabitur. Quamuis enim affligatur timens Deum, & multum laboret resistendo concupiscentiis, tamen septies in die cadit iustus; sed hinc etiam iustus esse probatur, quod sordes, quas minus caute ambulando contrahit, studiose flendo & orando abluit. Per humilitatem hoc loco non intelligit virtutem humilitatis, sed abiectionem & vilita-

tem, vilescit enim sibi vir iustus vehementer, cum immaculatus esse cupit, & tamen sordes non euadit, pro verbo *dimitte*, in Hebræo est *sa*, quod S. Hieronymus recte vertit, *porta*: *porta*, inquit, *omnia peccata mea*, & quamuis sensus sit idem, tamen habet nescio quam vim illud *porta*, significat enim timorem quendam, siue sollicitudinem hominis amantis Deum, ne forte Deus multitudinem peccatorum offensus ad iram prouocetur; ideo clamat, *porta omnia peccata*, quasi dicat, & si multa sunt; tamen non fatigeris ignoscere, supposita imbecillitatem meam.

*Respice inimicos meos, quoniam multiplicati sunt, & odio iniquo oderunt me.*

XX.

Ab alio loco ducit argumentum, videlicet à multitudine & crudelitate hostium. Quasi dicat, vidisti Domine humilitatem & laborem meum, vide etiam hostium meorum spiritualium multitudinem & crudelitatem, atque iniquitatem. Hostes qui nos ad peccata pertrahere tentant, & ignitis iaculis concupiscentiam accendere non cessant. Dæmones sunt, quos *spirituales nequitias* Apostolus vocat: eos innumerabiles esse notum est, nec minus est notum, odio iniquitatis, id est, odio iniquissimo in nos ardere. Dicitur odium iniquum, siue iniquissimum, cum quis alium sine causa odit, à quo videlicet nullam accepit iniuriam. Potest etiam dici odium iniquum, vel iniquissimum, cum quis alteri nocere studet, solo studio nocendi, non vt ipse inde aliquid lucretur. Tale omnino est odium diaboli erga genus humanum, ac potissimum erga electos; neque enim homines diabolo iniurias vllam fecerunt, sed ille ab initio inuidia excæcatus, hominem perdidit. *Inuidia diaboli*, inquit Sapiens cap. 2. *mors intravit in orbem terrarum*. Et nunc fideles tentationibus exagitat, non vt ipse commodum reportet, sed quia delectatur in perditione iustorum.

*Custodi animam meam, & erue me; non erubescam, quoniam speravi in te.*

XXI.

Cum tot hostibus, ac præsertim inuisibilibus circumdatus sim, non sufficio meis viribus illis resistere; ideo ad te recurro, vt tu custo-

הרחיב

צרות

הרחיב  
הרכיב



custodias animam meam, & custodiendo liberes & cruas de manibus eorum. Nam non solum dicuntur liberari & erui de manibus hostium, qui iam capti sunt, sed etiam qui muniuntur ne capiantur; & qui sine dubio caperentur, nisi adiuuarentur. *Erusisti me*, inquit idem Propheta, *ex inferno inferiore*, id est, fecisti ne caderem in infernum inferiorem. Potest etiam sensus esse, Custodi animam meam in hoc carcere corporis, in quo captiuus detineor, nam lex membrorum captiuum me ducit in lege peccati, Rom. 7. & postea suo tempore.

XXII.

*Innocentes & recti adhaeserunt mihi, quia sustinui te.*

Quia dixerat in praecedenti versiculo, non erubescam, quoniam speravi in te: adiungit rationem, cur timeat erubescere, si à Deo deseratur. Et ratio haec est, quoniam multi viri innocentes & recti, exemplo ipsius commoti adhaerebant illi, ob id potissimum quod videbant eum sperare in solo Deo. Qui certe cogere eum erubescere & confundi, si à spe sua frustraretur. Quare illud, non erubescam, aliter accipitur in principio Psalmi, aliter hoc loco. Nam in principio Psalmi sensus erat, non erubescam coram inimicis irridentibus; hoc loco sensus est, non erubescam coram amicis diligentibus & dolentibus. In Hebraeo habetur ad verbum, *innocentia & rectitudo conseruabunt me*: sed non est inusitatum, ut abstractum sumatur pro concreto, & futurum pro praeterito, id est, *innocentia & rectitudo*, pro *innocentibus & rectis*; & *conseruabunt*, pro *conseruauerunt*. Sed pro voce Hebraica, *izzzeruni*, quae significat, *conseruabunt me*, siue *conseruauerunt me*, videntur legisse Septuaginta, *izzzeruni*, vnico puncto mutato, quae vox deducitur à *zarar*, & significat, *alligabunt*, siue *alligauerunt se mihi*, quod est idem cum eo, quod Septuaginta verterunt, *adhaeserunt mihi*. Recta igitur est interpretatio Graeca & Latina, sed Rabini non recte legerunt dictionem Hebraicam, & ideo non recte puncta omnia subiecerunt.

XXIII.

*Libera Deus Israël ex omnibus tribulationibus suis.*

Quoniam Dauid non solum vnus erat de populo Dei, sed erat etiam Princeps & caput aliorum: ideo posteaquam orauit satis diu pro se, adiungit orationem pro toto populo suo, & orationem generalem, quoniam non facile poterat descendere ad singularum personarum necessitates & angustias. *Libera*, inquit, *Deus Israël ex omnibus tribulationibus*. Vbi vox illa *Israël*, est in casu accusandi, ut cognoscitur ex articulis additis in Codicibus Hebraicis & Graecis. Sensus igitur est, non mihi satis est, si solus ab angustis meis liberer, sed peto etiam ut liberes Israël, populum scilicet Israeliticum ab omni genere tribulationum.

PSALMVS XXV.

*Titulus & Argumentum Psalmi.*

*In finem Psalmus Dauid.*

**I**N Hebraeo non habetur pro titulo nisi simplex nomen Dauid, seu potius Dauidi. Argumentum vero idem est quod Psalmi septimi. Cum enim Dauid grauissimis calumniis accusaretur, quasi regnum inuadere appeteret, & propterea exulare, & latibula quare cogere, scripsit hunc Psalmum in quo Deum innocentia sua testem adducit, eundemq; Deum pro liberatione sua precatur.

EXPLICATIO PSALMI XXV.

**I**Vdica me Domine, quoniam ego in innocentia mea ingressus sum; & in Domino sperans, non infirmabor.

Dauid cum Rege causam habens, Deum quodammodo appellat, qui Rex Regum est: neque enim alius erat tunc in terris, quem appellare posset. *Iudica me Domine*, id est, sis tu Domine Iudex meus, non finas à Saule me iudicari, sed assume tu hoc iudicium. *Quoniam ego in innocentia mea ingressus sum*, id est, audacter prouoco ad iudicium Dei, quoniam conscientia mea, quam solus Deus videt, me non reprehendit, nam in inno-



centia ambulauī, id est, innocenter vixi. *Et in Domino sperans non infirmabor*, id est, in Dei iustitia confidens, non deficiam in hoc iudicio, sed praualebam. Illud, *non infirmabor*, Hebraice est, *non deficiam*, siue, *non vacillabo*; proinde, non infirmabor, significat, non ero infirmus ac debilis, vt causa cadam.

II.

*Proba me Domine, & tenta me, vt renes meos, & cor meum.*

Quia dixerat se innocenter vixisse, probat hoc Dei testimonio, qui falli & fallere nequit: non enim Deo dicitur, *proba & tenta*, quasi ipse aliquid ignoret, sed vt aliis nota faciat, quæ ipse solus videt. Itaque S. Dauid fretus bona conscientia, & sinceritate cordis sui, dicit Domino: *Proba me, & tenta me*, id est, explora diligenter, an ita sit, inspicie intimos & profundissimos recessus cordis mei, quin etiam, *vt renes meos, & cor meum*, id est, examina cogitationes & appetitiones meas, ea diligentia qua probatur aurum, cum igne examinatur. Non enim hoc loco, vt ego quidem existimo, petit Dauid probari se, ac tentari per aduersitates, vel renes suos: & cor suum aduri igne tribulationum, cum potius contra liberationem ab aduersis in hoc Psalmo petat, sed postulat, vt dixi, probari se ac tentari per exactam explorationem & inspectionem, & quia Deus omnia exactissime videt & perspicit, sententia huius loci est, vt Deus notam faciat hominibus innocentiam serui sui, & calumnias inimicorum re ipsa, & factis refellat.

III.

*Quoniam misericordia tua ante oculos meos est, & complacui in veritate tua.*

Reddit causam, cur velit probari & tentari, quoniam conscientia eius bonum illi testimonium dabat, quasi dicat, peto, vt probes me, quoniam per vias tuas ambulauī: nam omnes viae tuae misericordia & veritas. Et misericordia tua ante oculos meos est, id est, semper aspicio & considero misericordiam tuam, vt illam imiter, & iuxta eam cum proximis viuam, & similiter complacui mihi in veritate tua, siue, placuit mihi veritas tua, & ideo iuxta illā ambulauī. In Hebræo est, *hithallachti*, id est, ambulauī in veritate tua, proinde

Septuaginta non tam verbum, quam sensum inspexerunt, quod etiam fecerunt in Psal. 34. v. 17.

*Non sedi cum concilio vanitatis, & cum iniqua gerentibus non introibo.*

IV.

*Odiui Ecclesiam malignantium, & cum impiis non sedebo.*

V.

Recte meo iudicio, Theodoretus hæc exponit de conuentibus Gentilium idololatrarum in suis prophanis templis, à quibus Dauid semper abhorruit, dum exulauit apud Regem Philistinorum. Hæc enim opponuntur iis, quæ postea in eodem Psalmo habentur: *Domine dilexi decorem domus tuae*; & paulo ante: *Circumdabo altare tuum Domine*; & infra: *In Ecclesiis benedicam te Domine*. Vocat cœtum idololatrarum concilium vanitatis, quia nihil inanius idolis, quæ sunt falsæ imagines. Quod significat Apostolus, cum ait: *Scimus, quia idolum nihil est in mundo*, 1. Corinth. 8. & passim in Scripturis idola vocantur vana, vel vanitates, vt Deuter. 32. *Ipsi me prouocauerunt in eo, qui non erat Deus, & irritauerunt in vanitatibus suis*, 1. Reg. 11. *Nolite declinare post vana, quæ non proderunt vobis, neque eruent vos, quia vana sunt*. Vide etiam; Reg. 16. 4. Reg. 17. Hierem. 2. & alibi. Idem idololatras recte dicuntur iniqua agentes, quia summa iniquitas est, cultum soli Deo debitum rebus creatis exhibere. Quod autem dixerat, *concilium vanitatis*, in sequenti versiculo dicit, *Ecclesiam malignantium*, & quos vocauerat, *iniqua agentes*, vocat *impios*, quod vocabulum proprie in idolorum cultores conuenit. In Hebræo, pro *iniqua gerentibus*, est *nabalamim*, quod significat, occultis vel pueriliter ludentibus: nam *halam*, est occultari, & *helem*, est puer. Dicuntur autem occulti, hypocritæ, simulatores, derisores, & in genere, omnes iniqua agentes, vt Septuaginta recte vixerunt, quia *omnis qui male agit, odit lucem*. Sed idololatras rectissime etiam dici possunt pueriliter ludentes, quia quomodo pueri fingunt ex argilla domunculas, & varia animantia: sic idololatras, ex varia materia fingunt Deos. Propterea Moses idolatriam

תלמי  
של  
עלם

תהלל  
כתי



lufum vocauit, *Sedit populus manducare, & bibere, & surrexerunt ludere.* Exodi 32. quem lufum, idololatram fuisse, docet Apostolus, 1. Cor. 10. num. 7.

VI. *Lauabo inter innocentes manus meas, & circumdabo altare tuum Domine.*

Posteaquam dixerat se odisse conuenticula infidelium idololatrarum, inter quos tunc versabatur, adiungit se è contrario summo amore prosequi tabernaculum Domini, & conuentum Sanctorum, ac breuiter describit, quid sit facturum, cum Deo adiuvante ab exilio in patriam reuocatus fuerit. *Lauabo*, inquit, *inter innocentes manus meas; & circumdabo altare tuum Domine*, id est, lauabo manus ante ingressum tabernaculi, vt homines pii facere solent, & circumbo cum pfallentibus altare tuum. In Hebræo habetur, *Lauabo in innocentia manus meas*, sed idem est sensus: nam lauare manus in innocentia, est hoc loco, lauare manus more innocentium, siue, vt innocentes facere solent, quod idem significat, lauare manus inter innocentes, siue cum innocentibus. Quod autem ad sententiam attinet, aliqui volunt allusisse Dauidem ad lotionem manuum, quæ sit aliquando in signum innocentie, quo modo Pilatus lauit manus coram Iudæis, dicens: *Innocens ego sum à sanguine iusti huius*, quasi diceret, Ecce laui manus, nolo eas inquinare sanguine iusti huius, ideo non audeo illum condemnare, quod & nos vulgo dicimus, cum nolumus admisceri negotio, in quo sit periculum peccandi, *Io me ne lauo le mani*. Cæterum probabilis, & magis consentaneum ad sequentia esse iudico, si dicamus, Dauidem loqui de ritu Hebræorum, qui ante ingressum tabernaculi tum se ipsi, tum hostias purificabatur quas lotiones, Apostolus ad Hebr. 9 vocat *varia baptismata, & iustitia carnis*. & quoniam lotio illa externa, signum esse debebat internæ puritatis; ideo Dauid ait, *Lauabo inter innocentes manus meas*, id est, lauabo manus in signum veræ puritatis internæ, vt innocentes faciunt, non autem lauabo manus cum hypocritis, qui manus puras, & cor sordidum gerunt. Illud autem quod se-

quitur, *Et circumdabo altare tuum*, referunt aliqui ad multitudinem victimarum, quibus vndique altare implendum esset. Sed verius mihi videtur, vt referatur ad choros canentium in circuitu altaris: nam in Psalmo sequenti habetur, *circuiui, & immolau i hostiam vociferationis, &c.* & hoc loco statim subiicitur, *vt audiam vocem laudis, & enarrem vniuersa mirabilia tua.*

Vt audiam vocem laudis, & enarrem vniuersa mirabilia tua.

VII.

Explicat, ad quid altare Domini circumdare velit, nimirum, inquit, vt choris canentium immistis, audiam laudes Domini, & ipse etiam eas canam. In Hebræo habetur, si puncta recipiamus, vt audire faciam vocem laudis: sed si puncta mutantur legi potest, vt legerunt Septuaginta, & S. Hier. *vt audiam vocem laudis*. Sanctus Augustinus acute, & pie docet hoc loco aduersus Pelagianos, eos tantum audire vocem laudis Dei, qui intimo sensu percipiunt, quidquid habent, donum esse Dei, in cordibus enim istorum, qui habent aures audiendi, omnia ipsorum bona merita, omnesq; virtutes, laudem gratie sonant: contra autem, qui de iustitia sua præsumunt, deq; suis meritis tument, quasi illa à se ipsi, non à Deo acceperint, non audiunt vocem laudis Dei sed vocem laudis propriæ.

Domine dilexi decorem domus tuæ, & locum habitationis gloriæ tuæ.

VIII.

Ostendit Propheta, nulla alia de causa magis sibi molestum fuisse exilium, nisi quia tabernaculum Domini videre non poterat, animus enim erga Dei amorem vehementer incensus, nihil pulchrius in terris iudicat eo loco, in quo præsentia Domini clarius se ostendit. Vocatur autem tabernaculum, in quo erat arca fœderis, *domus dei, & locus habitationis gloriæ eius*, quoniam sepe in eum locum descendebat nubes lucida, in signum præsentie Dei, qui *lucem habitat inaccessibilem*, vt Apostolus dicit: & quia in eodem loco, erat oraculum, ex quo Deus responsa dare solitus erat. In Hebræo habetur, *dilexi habitaculum domus tuæ*, pro eo quod nos habemus,



beimus, dilexi decorem domus tua: fortasse Septuaginta non legerunt, *mabon*, habitaculum, sed *nobam*, literis inuerlis, quod significat decorem.

IX.

*Ne perdas cum impijs Deus animam meā, & cum viris sanguinum vitam meā.*

Quoniam Deum iudicem initio appellauit, & innocentiam suam, cuius idem Deus testis erat, exposuit, concludit orans, ut pro se sententia proferatur. *Ne perdas*, inquit, *cum impijs animam meam*, id est, non me condemnes, quemadmodum impios condemnare soles: posuit animam, pro vita, siue pro tota persona sua, ut alias sæpe, *per viros sanguinum*, intelligit homicidas, quales erāt, qui eum persequēbantur. Porro vox illa, Deus, non habetur in Hebræo, neq; in Græco, neque legitur à Hieronymo & Augustino, tamen legitur à Theodoro, & Euthymio, ex quo intelligimus, in Græcis eorum codicibus non defuisse.

X.

*In quorum manibus iniquitates sunt, dextera eorum repleta est muneribus.*

Declarat qui sint impij, & viri sanguinum de quibus dixerat versu superiore, addicit eos esse, qui peruerse iudicant ob accepta munera notat enim peccata Principum, qui sunt iudices populorum. Pulchre autem dicit. *In quorum manibus iniquitates sunt*: sic enim in ea parte corporis ponit iniquitatem, per quam accipiuntur munera, ut ostendat acceptionem munerum causam fuisse iniquitatis.

XI.

*Ego autem in innocentia mea ingressus sum, redime me, & miserere mei.*

Repetit causam, cur non debet condemnari cum impijs, quia videlicet in innocentia ingressus sit, id est, innocenter vixerit, redime me, & miserere mei, id est, libera me a præsentī calamitate, & deinceps miserere, ne iterum in eandem incidam. passim enim in scripturis, sponitur redimere pro liberare, id est, species pro genere, nisi forte Spiritus S. insinuarē voluerit, omnem liberationem electorum, de quacunque tribulatione, dici

posse redemptionem, quia precio sanguinis Christi nostri redemptoris acquiritur.

*Pes meus stetit in directo, in Ecclesijs benedicam te Domine.*

XII.

Respiciunt hæc verba particulam vltimam superioris versiculi, videlicet, *Et miserere mei*, quasi dicat, petij liberationem à præsentī calamitate, quia innocenter vixi, peto etiam ut miserearis in futurum, quia *pes meus stetit*, id est, stabilitus & fixus est in rectitudine, ac per hoc non facile recedam à recto itinere legis tuæ: & pro gratiarum actione benedicam & laudabo te hymnis, & Psalmis. in Ecclesijs, id est, in piorum conuentibus. Est autem hæc, ut Euthymius notat, prophetia, quod reuera tempore noui testamenti, in omnibus Ecclesijs, Psalmi Davidici assidue, concinendi essent.

## PSALMVS XXVI.

*Titulus, & Argumentum.*

Psalmus David, priusquam liniretur.

**I**N Hebræo non habetur pro titulo, nisi David, reliqua sunt addita à Septuaginta, ut intelligeremus, hunc Psalmum compositum fuisse à Davide antequam regnare inciperet, durante videlicet persecutione Saulis, Nam tamen si David linitus oleo fuisset à Samuele cum adhuc puer esset, tamen illa vñctio fuit priuata, non publica, & adhibita potius ad designandum, quam ad consecrandum Regem. Postea vero Saul occiso vñctus fuit David in Regem publice ac solemniter ut constat ex lib. 2. Reg. cap. Et de hac posteriore vñctione, intelligendus est titulus huius Psalmi. Videtur autem hic Psalmus scriptus fuisse proxime post superiorem, Davide adhuc in exilio & tribulatione constituto: sed quia post orationem Psalmi præcedentis magna consolatione spiritus affectus fuerat, & deo reuelante cognouerat ad maius quoddam regnum, quam sint regna terrena, se vocari, ineffabili desiderio ad cælestē regnum suspirare, ac temporalia omnia, siue aduersa siue prospera contemnere cepit. Conuenit idem Psalmus omnibus electis, qui iam in vñctione gratia, atq; ad



regnum caeleste designati, & ad unctionem gloria, per quam vere regnare incipient, tota animi deuotione suspirant.

Dum appropiant super me nocentes, vt edant carnes meas.

III.

Qui tribulant me inimici mei ipsi infirmati sunt, & ceciderunt.

IV.

EXPLICATIO PSAL. XXVI.

I.

**D**ominus illuminatio mea, & salus mea, quem timebo?

Tribulatio tenebras adducit, prosperitas lucem & serenitatem: perturbat enim & confundit animum tribulatio, vt non facile videat, quid facto opus sit, atque inde ad impatientiam, vel aliquod aliud peccatum prouocatur. Sed si Deus lumine diuinitus immisso tenebras dissipet, continuo cernit animus momentaneam & leuem esse tribulationem, quae in umbra noctis magnam horrorem incutiebat, & simul cernit protegente se Deo, tribulationem non solum non posse nocere; sed etiam mirifice profuturam. Hoc Dei beneficium expertus Dauid in persona sua & omnium electorum canit, *dominus illuminatio mea, & salus mea, quem timebo*, quasi dicat, Ignorantia & infirmitas timidum me in tribulatione reddebant, sed cum Dominus illustrauerit iam mentem meam, meque aperte cernere fecerit, nullam temporalem calamitatem grauem aut diuturnam esse, & amoris diuini vnguento sanauerit infirmitatem meam, neminem timeo: veritas enim tenebras, & charitas foras mittit timorem.

II.

Dominus protector vitae meae, a quo trepidabo?

Addit aliud argumentum, quo sibi ipse persuadeat, nullum timorem deinceps esse admittendum. Dominus, inquit, non solum illuminat & sanat, sed illuminatum & sanatum non deserit, sed protegit assidue scuto prouidentiae & beneuolentiae suae, a quo igitur trepidabo? Si deus pro nobis quis contra nos? si Rex cohorte mortalium militum stipatus non timet, cur timeat seruus Dei stipatus protectione omnipotentis & immortalis Imperatoris? S. Martinus, apud Sulpitium, ego, inquit, signo crucis, non clypeo protectus, aut galea, cuneos hostium penetrabo securus nimirum ex iis erat, qui dicere poterant, dominus protector vitae meae, a quo trepidabo?

Describit effectum protectionis Dei, & praeteritum pro futuro ponit, more prophetarum ad designandam rerum certitudinem. Sensus igitur est. Ex protectione Dei fiet, vt cum appropinquabunt super me, quasi prostratum & deiectum, ij qui nocere mihi cupiunt, & quasi canes, aut leones famelici carnibus meis saturari desiderant, tunc isti ipsi, qui tribulant me, & inimici mei sunt, debiles fient, & corruent, ira conatu suo, non mihi, sed sibi nocebunt. Hoc verissimum esse, non solum Dauidis, sed Christi, & Martyrum, atque adeo Sanctorum omnium exempla demonstrant. In Hebraeo & Graeco habetur, *tribulantes me, & inimici mei*, Latinus Interpres omittit illud, & sed res est parui momenti pro, *infirmati sunt*, S. Hieronymus vertit *impegerunt*, sed verbum Hebraicum vtrumque significat.

Si consistant aduersum me castra, non timebit cor meum.

V.

Si exurgat aduersum me praelium, in hoc ego sperabo.

VI.

Addit ad ea quae dixerat, vt spem & fiduciam plenissimam se in Deo habere demonstraret, non solum se non timere singulos hostes, sed neque integra castra, & ea non in tentoriis quiescentia, sed in acie praellantia. Illud, *In hoc ego sperabo*, varie exponitur, propterea quod, tum in Hebraeo, *zoth*, tum in Graeco *ταυτη*, vox est generis foemini. S. Augustinus exponit, *in hac petitione*. Theodoretus, *in hac spe*: Euthymius, *in hoc meo corde*: nam cor Graece est generis foemini, sed videtur Latinus Interpres rectissime vertisse, *in hoc ego sperabo*. Considerauit enim Hebraeos credere neutro genere, & pro eo vt genere foeminino: proinde, illud *zoth*, non significare, in hac spe, vel in hac petitione, vel in hoc corde, sed absolute, in hoc, id est, in hac re, videlicet quod Deus sit illuminatio, & salus, & protectio mea, vt supra dictum est. Itaque Graeci posuerunt *ταυτη*, non quod care-

EXU

XXI



careant neutro genere, sed qui avoluerunt ad verbum reddere, quod erat in Hebræo; sed Latinus non tam vocem, quam significationem respexit.

VII. *Vnam petij à Domino, hanc requiram, vt inhabitem in domo Domini omnibus diebus vitæ meæ.*

Mirum est cur Latinus Interpres non verterit, *Vnum petij à Domino*: nam hoc etiam loco in Hebræo habetur genus femininum, pro neutro. Voluit igitur in hac voce reddenda imitari Græcum interpretem, & vertere ad verbum. Sensus tamen est, *Vnam petij*, id est, vnum petij, siue, vnam rem petij. Plerique intelligunt hunc locum de domo Domini, vbi erat arca Dei, & propitiatorium, & volunt hunc esse sensum, *vnum petij à Domino, hoc requiram*, vt de hoc exilio reuerteretur; & liceat mihi assidue versari in tabernaculo Domini, vbi est arca Dei, & propitiatorium, &c. Sed certe mihi sententia S. Aug. qui exponit de domo cælesti, non solum vera, sed etiam literalis esse videtur. Nam non dicit Dauid, cupere se habitare prope domum Domini, sed in ipsa domo Domini: notam autem est, non habitasse vnquam Dauidem in domo Domini, sed in palatio proprio, quod longe aberat à tabernaculo, præsertim antequam arca deferretur in montem Sion: & potuisset vtique si voluisset, quando Rex erat, habitare iuxta tabernaculum Domini. Præterea similis est hic locus illi qui habetur in Psal. 83. *Beati qui habitant in domo tua domine, in sæcula sæculorum laudabunt te*, quod certe non conuenit nisi habitatoribus domus Dei quæ est in cælo. Denique nunquam Dauid, vir sanctus, & perfectus, rem aliquam temporalem tanto affectu peteret, vt diceret, *vnam petij, hanc requiram*, quasi nihil aliud petendum sit. Explicat igitur hoc loco Propheta radicem veram confidentiæ in Deum, & cur non timeat malum aliquod temporale: Radix enim est ardens charitas in Deum; qui enim ardenter diligit summum, atque æternum bonum, nihil facit omnia temporalia. *Vnam, inquit, petij à Domino, hanc requiram*, id est, nihil temporale appe-

to, non magni facio iacturam omnium aliarum rerum, modo vnam rem habere merear; ideo de hac vna sollicitus sum, hanc vnam petij, hanc vnam petam, vt videlicet inhabitem in domo Domini, non ad tempus, sed, *omnibus diebus vitæ meæ*, id est, quamdiu durabit vita Sanctorum cum Deo, quæ sine dubio non habebit finem. Valde proprie dictum est, *vt inhabitem in domo Domini*: nam hic in terris, quamuis amici, imo filij Dei sumus; tamen non habitamus, sed ambulamus cum Deo; nec in domo, sed in tentorio requiescimus.

Vt videam voluptatem Domini, & visitem templum eius.

VIII.

Docet, cur in domo Domini habitare desideret, quia videlicet ibi perfecta felicitas est. Multi Latini codices habent, *Vt videam voluptatem Domini*: sed recte correcti sunt in editione Sixti V. & Clementis VIII & positum, *vt videam voluptatem Domini*, vt habebant emendatissimi codices manuscripti. Per voluptatem autem hoc loco, non est accipiendâ actio delectationis, sed obiectum, id est, pulchritudo, venustas, suauitas. Nam vox Hebræa, *noham*, proprie pulchritudinem significat: vox autem Græca *τὸ πνεῦμα* potest delectationem, & voluptatem significare, quam vocem Latinus interpres accepit, sed significat etiam venustatem & pulchritudinem, & pro pulchritudine hoc loco vocem illam Theodoretus accepit, Quare vox Latina voluptas, si cum Hebræa, & Græca conuenire debeat, accipiendâ est, pro voluptate obiectiua, id est, pro pulchritudine, & venustate. Quod ipsum etiam verbum vidēdi, siue contemplādi requirit: non enim proprie videmus actionem delectationis, sed rem delectabilem. Itaque S. Hieronymus vertit, *Vt videam pulchritudinem Domini*; & S. Augustinus legit, *vt contempler delectationem Domini* & exponit per delectationem, speciem delectabilem. Si quis tamen omnino velleret, voluptatē hoc loco accipere pro ipsa actione capiendi delectationem, nō deberet intelligere per *voluptatem Domini*, delectationem, qua fruitur Dominus, sed quæ percipitur.



cepit ex Domino, id est, ex visione pulchritudinis Domini, atque ita sensus in idem recideret. Porro S. David hoc loco omnino proprie felicitatem expressit; quæ ex sententia solidioris scholæ in actione nobilissima potentia omnium præstantissimæ erga summum obiectum, i. in intellectu Dei visionem consistit, ex qua ineffabilis voluptas & delectatio sequitur. Illud autem quod additur, Et visitæ templum eius, S. Augustinus legit, & protegat à templo eius. In qua lectione, nescio quos codices sit sequutus: Hebræus enim & Græcus nihil habent, quod ad protectionem referri possit. Vox Hebræa, *bacher* significat proprie quærere, inspicere, oculis perustrare præsertim illucente die: vnde *בקר* bocher, Hebræis significat mane, quia tunc primum depulsis tenebris, requirimus & perlustramus ea quæ latebant. Sic etiã vox Græca ἐπισκοπέω, significat cōsiderare, attendere, visitare. Sensus igitur est, vt videam pulchritudinem Domini, & deinde ad nouam illam lucem, visitem, id est, oculis perlustrem & requiram totum illud cœleste Dei templum, & omnia quæ in eo sunt. Nam re vera post visionem Dei, nihil iucundius occurrere potest, quam spectaculum illius cœlestis patriæ, & diuinæ illius domus, in qua sunt omnes Beati, qui merito templū dicitur, cum nō sit domus aut ciuitas profana, sed sacratissima, cum in ea nihil profanum agatur, sed assidue sacrificetur hostia laudis & iubilationis.

IX. Quoniam abscondit me in tabernaculo suo, in die malorum protexit me, in abscondito tabernaculi sui.

Reddit rationem, cur tam audacter petat habitare in domo Domini, & videre pulchritudinē eius; quia gustare iam cepit, quia dulcis est Dominus, & pignus amoris eius iam tenet, quasi breuissime diceret, audeo petere gloriam, quoniam percepi gratiam. Sunt autem verba omnia metaphorica non enim proprie absconditus fuit David in tabernaculo Domini, cum quæreret à Saule, sed sensus horum verborū est, tempore præsentis vitæ, in qua dies mali sunt, tam singulari prouidentia, Deus me defendit ac prote-

xit, ac si in intima & abditissima parte tabernaculi sui, me collocasset. Ex hac autem tanta Dei gratia & beneuolentia, spem concipio, me aliquando ad domum Domini peruenturum, quod vnum peto & requiro. Idem vero significetur in vtraque parte versiculi: nam *abscondi in tabernaculo*, non est poni in quacunque parte tabernaculi, sed in abscondito tabernaculi collocari, vbi à malis omnibus protegatur. In Hebræo & Græco, illud in die malorum, coniungitur cum prima parte versiculi, *abscondit me in tabernaculo suo in die malorum*. Sed in codice Latino coniungitur cum secunda parte, hoc modo, in die malorum protexit me in abscondito tabernaculi sui. Perinde est, vbi ponatur interpunctio, cum sensus sit idem: tamen prior interpunctio habetur etiam in libris Patrum Augustini & aliorum, & fortasse in Latino codice interpunctio non tam deseruit intelligentiæ, quam cantui.

In petra exaltauit me, & nunc exaltauit caput meum super inimicos meos.

X.

Alia metaphora idem significat, nimirum se à Deo singulari prouidentia protectum ac defensum; ac si in arce munitissima & altissima collocatus fuisset. Similis metaphora est apud Isaiam cap. 33. *Iste, iustus videlicet in excelsis habitabit, munimenta saxorum sublimitas eius*. Itaq; celsus est, in petra exaltauit me, i. posuit me in loco sublimi, & munito. Et nunc exaltauit caput meum super inimicos meos, id est, ex q. in loco tutissimo, & altissimo iam consisto, factū est, vt caput meum sit exaltatū super inimicos meos, i. e. sim superior & victor inimicorum meorū. Porro per has metaphoras, non solum describitur protectio & defensio hominis iusti, cui nihil nocere possunt omnium aduersariorū machinationes, iuxta illud S. Petri, *Et quis est qui vobis noceat, si boni amulatores fueritis?* Sed etiã indicatur modus, quo vir iustus ad hanc securitatem peruenit: modus enim est ascensio mentis per contemplationem in Deum, & res æternas. Qui enim serio meditatur æterna, & ardentem Deum amat, iam est in altissima, & munitissima petra constitutus,



vt nihil ei nocere possit, cum terrena omnia iam illi viluerint.

XI.

*Circuiui & immolaui in tabernaculo eius hostiam vociferationis cantabo & psalmum dicam Domino.*

In Hebræo coniungitur prima vox huius versiculi cum superiore, & pro circuiui, legitur, *circuitibus meis*; vt sit integra sententia, *Exaltauit caput meum super inimicos meos, circuitibus meis*: vel, vt vertit S. Hieronym. *qui sunt in circuitu meo*. Sed Septuaginta Interpretes non legerunt, *sebibothai*, vt nunc est in Hebræo, & significat *circuitibus meis*; sed, *sabbothi*, id est, *circuiui*, vnica literula depta, & punctis mutatis. Igitur Propheta per contemplationem supra terrena omnia exaltatus, erumpit in admirationem operum Dei, & laudem opificis omnipotentis. *Circuiui*, inquit, id est, mente perlustravi omnia opera Dei, quæ sunt in cælo & in terra. *Et immolaui in tabernaculo, eius hostiam vociferationis*, id est, in hoc ingenti tabernaculo Dei, quod est cælum, quo per contemplationem ascendi, magna voce, ex magna admiratione procedente, laudauit Deum, quæ laus sacrificium est il i gratissimum. Sic enim alibi legimus, *Immola deo sacrificium laudis*; & rursum, *Sacrificium laudis honorificabit me*. Nec solum, inquit, immolaui hostiâ vociferationis, sed & deinceps pergâ assidue idem facere, *cantabo, & psalmum dicam Domino*.

XII.

*Exaudi Domine vocem meam: qua clamaui ad te, miserere mei, & exaudi me.*

Redit ad id, quod dixerat, *Vnam petij à Domino, hanc requiram*. Atque in hac vna petitione se exaudiri postulat, flagrans nimirum ardenti desiderio videndi dilectum. *Exaudi*, inquit, *Domine vocem meam, qua clamaui ad te*, videlicet vocem illam, qua clamaui, *vnam petij à Domino, hanc requiram*, &c. *Miserere mei* hoc exilium ægre ferentis, & *exaudi me*.

XIII.

*Tibi dixit cor meum, exquisiuit te facies mea, faciem tuam Domine requiram,*

*Ne auertas faciem tuam à me, ne declines in ira à seruo tuo.*

XIV.

Hæc non tam egent explicatione, quam pia meditatione, & imitatione. *Tibi dixit cor meum*, id est, tibi loquitur desiderium meum: *Exquisiuit te facies mea*, id est, oculi mei interiores qui sunt in facie animæ meæ, tuam pulchritudinem requirunt, cætera omnia fastidiunt. *Faciem tuam Domine requirâ*, id est, hoc semper erit studium meum, vt cōspectum tuum quæram, non solum vt in alio sæculo reuelata facie vultum tuum videam, sed etiam in hoc sæculo, hoc vnum satagam, vt me respicias, & respiciendo illumines & accendas. *Ne auertas faciem tuam à me*, id est, noli quæso cessare à me respiciendo, ne simul lumen obscuretur, & charitas refrigeret. *Ne declines in ira à seruo tuo*, id est, ne linas me in peccata labi, ne forte iratus à me recedas. Recte hoc loco S. Augustinus obseruat, timorem castum, non seruilem exprimi in his verbis: Timor enim seruilis cupit abesse Dominum, ne puniat, ac ideo non diceret, ne declines, sed abi & decina: timor autem castus, qui dilectum vere amat, nihil magis timet, quam ne dilectus recedat. In textu Græco, post illa verba, *Tibi dixit cor meum* additur, *Domine requiram*, sed ea verba non habentur in Hebræo, neque leguntur à Hieronymo, & Augustino, quamuis à Theodoro, & Euthymio legantur. In Hebræo non habetur pronomen, te, vbi legimus, *exquisiuit te facies mea*, sed absolute, *exquisiuit facies mea*: cæterum subintelligitur, & ideo additum est ab Interpretibus Græcis & Latinis.

*Adiutor meus esto, ne derelinquas me, neque desprecias me Deus salutaris meus.*

XV.

Quia dixerat, *ne declines in ira à seruo tuo*, considerans se suis viribus non posse cauere peccata; ob quæ in iram incurrimus, clamat ad Deum, vt adiuuare non cesset in Hebræo habetur, *Adiutorium meum fuisti*, sed septuaginta Interpretes non videntur legisse, *habita*, id est, fuisti, sed *habes*, quod significat, esto: nam est similitudo maxima inter has voces si remoueantur puncta, quæ tempore.

וית  
היה



XIV.

pore Septuaginta Interpretum, nondū erant apposita. Sensus autem semper est verus, & ad rem faciēs: nam si legamus, *adiutor meus fuisti, ne derelinquas me*; sensus erit, quoniam haec tē me semper adiuvisti, deinceps quoque me adiuva: si vero legamus, *Adiutor meus esto, ne derelinquas me*, erit repetitio eiusdem orationis, quae magnū affectum exprimit. Porro in verbis illis: *Ne derelinquas me, neq; despicias me*, videtur Latinus Interpretes inuerti ille ordinem: Nam in Hebr. & Græco textu prius est, *ne despicias*, siue, *ne abijcias me*, quam, *ne derelinquas me*. Pro illo autem, *ne despicias*, Græci habent vocem valde significantem ἀπορροπήσεις, quae apud Euthymium deducitur, vel à scoria, vel à coruis, & significat proici, quomodo proijciatur scoria, vel quomodo proiciuntur ad coruos cadauera. Petit igitur iustus auxiliū Dei, ne peccet, & si forte peccauerit, nō proijci à facie Dei, quomodo proicitur scoria, vel nō proijci ad infernales coruos, & nō solū non proijci, siue despici, sed neq; absolute relinqui & dimitti, sed benigne curari & sanari: ideo enim addit *Deus salutaris meus*. Saluatoris enim, non est despiciere, ac deferre miserum, sed saluare & curare.

XVI.

*Quoniam pater meus & mater mea dereliquerunt me, Dominus autem assumpsit me.*

Magna ratio redditur, cur equū sit, Deum adiuuare quia videlicet, nemo sit illo amantior. Notanda est phrasis Hebraica, quae Deum in tertia persona reuerentiæ causa Propheta alloquitur: non enim dicit: *Tu autem assumpsisti me*, sed, *Dominus autē assumpsit me*. Similis est phrasis in Gen. ca. 31. num. 35. vbi Rachel dicit patri suo, *Ne irascatur Dominus meus, quod coram te assurgere nequeo*: & lib. 3. Reg. cap. 1. numer. 27. dicit Nathan Dauidi, *Nunquid à Domino meo Rege exiit hoc verbū, & mihi non indicasti seruo tuo, quis sessurus esset super thronum Domini mei Regis post eum?* Illud igitur, *Dominus assumpsit me*, idem est, ac si dictum esset, *Tu autem Domine assumpsisti me*, siue, *collegisti me*, vt proprie significat vox Hebraica. Est autem

in his verbis quædam figura aptissima: ad explicandum beneficium Dei, non enim puer erat Dauid, vt egeret parentum auxilio, neque magnum erat in illa ætate relinqui à parentibus, qui oneri potius quam auxilio esse possissent. Sensus igitur horum verborum est, Ego sum instar infantis recens nati, quem pater & mater dereliquerunt humi iacentem, atque omni iniuriæ expositum: Tu autem Domine, ita abiectum & desolatum, benignissime collegasti & fouisti, vere enim si quis fragilitatem naturæ humanæ consideret, & hostium inuisibilibus potestatem, & quantopere Dei gratia in omnibus actionibus egeamus, nullo modo negare poterit, nos infantibus à parentibus neglectis, rectissime comparari. Porro S. Ezech. vsque adeo rem hanc intelligebat, vt non infanti, sed pulso hirundinis se ipse comparauerit, Isaia 38. *Sicut pullus*, inquit, *hirundinis, sic clamabo.*

*Legem pone mihi Domine in via tua, & dirige me in semitam rectam propter inimicos meos.*

XVII

Quia se comparauerat infantulo, quem Deus collegerat, recte iam petit, vt se ambulare doceat, petit igitur gratiam implendi mandata diuina, quam gratiam in toto Psalterio frequentissime petere solent; nec immerito, cum ea sit via ad illam celestem domum Dei, quam vnā se toto corde desiderare paulo ante professus est: pro, *Legem pone mihi Domine in via tua*, in Hebræo est, *doce me viam tuam*, siue, vt vertit S. Hieronymus, *ostende mihi viam tuam*. In Græco, est vnum verbum, νομοθέτησον, quod secundum Etymologiam significat, *legem ponere*, vt Latinus Interpretes reddidit. Cæterum accipitur etiam, pro docere, erudire, præceptorem se exhibere; proinde hoc loco, *legem pone mihi in via tua*, significat, *erudias me circa viā*, id est, circa legem tuam: quod in alio Psalmo legimus: *Vias tuas Domine demonstra mihi & semitas tuas edoce me*. Ac vt alibi diximus, non postulat Propheta notitiam solam legis, sed internam vnctionem, quae sibi à Spiritu Sancto intime persuaideatur,

XV.

אמר  
לדוד



seruandam esse Dei legem. Idem fere significant verba sequentia, & *dirige me in semitam rectam*, id est, duc me per viam mandatorum tuorum, quæ est vere semita recta, id est, iustissima, sed angusta: nisi magis placeat per illud, *doce me viam tuam*, postulari lumen internum: per illud, & *dirige me in semitam rectam*, postulari pium affectum implendi mandata diuina; quod additur, *propter inimicos meos*, vel, vt S. Hieronymus vertit, *propter insidiatores meos*, significat valde necessariam esse gratiam Dei, in hac peregrinatione, propter multitudinem hostium, tum visibilibus, tum inuisibilibus, qui nobis vbique insidiantur, vt à recta via legis diuinæ nos deducant, & ad inuia & prærupta viarum nos perducant.

XVIII. *Ne tradideris me in animas tribulantium me; quoniam insurrexerunt in me testes iniqui, & mentita est iniquitas sibi.*

Pergit in eadem petitione: petit enim non tradi in animam, id est, voluntatem & desiderium hostium, præcipue inuisibilibus. Similis phrasis est Luc. 23. *Iesum vero tradidit voluntati eorum*: iud enim est, voluntati eorum; & in voluntate eorum, sed illa est phrasis Latina, hæc Hebraica. Itaque S. Hieronymus vertit: *Ne tradideris me animas tribulantium me*. Sequentia verba; *Quoniam insurrexerunt in me testes iniqui*, à multis referuntur ad falsa testimonia, quæ dicebantur aduersus Dauidem: quod quidem non improbo, sed videtur mihi sensus magis coherere cum præcedentibus & sequentibus verbis, & cum argumento totius Psalmi, si referamus hæc verba ad tentationes Dæmonum, siue hominum, qui falsis promissis, vel minis hominem iustum ad impatientiam, vel alia peccata deducere conantur, iuxta illud Ps. 118. *Narrauerunt mihi iniqui fabulationes, sed non ut lex tua*, in Hebræo habetur; *Insurrexerunt in me testes falsitatis*, siue mendacij: proinde illud, *testes iniqui*, accipiendum est pro testibus falsis, qui inique agunt, dum falsa pro veris obtrudunt, vt ad iniquitatem impellant. Quod additur, & *mentita est iniquitas sibi*, non tam est interpretatio, quam ex-

plicatio verborum Hebraicorum, in Hebræo enim non habentur, nisi due voces. *vipheach, chamas*, quas voces S. Hieronymus vertit, & *apertum mendacium*. Alij reddunt, & *loquens rapinam*. Sed LXX. Interpretes acutissime & verissime transulerunt: nam illud *vipheach*, tametsi à verbo *tsach*, significet loqui, vnde Neoterici vertunt, loquens; tamen potest deduci à verbo *suach*, quod significat illaqueari, vnde est nomen *sach*, laqueus. Et vox illa *chamas*, licet significare possit rapinam & mendacium, tamen frequentissime accipitur pro iniquitate. Intellexerunt ergo LXX. Interpretes hic significari ipsam iniquitatem à se ipsa illaqueatam, dum videlicet homines vel Dæmones iniqui, in propriam perniciem, falsitatis laqueos iusto tenderunt. Quod aliis verbis dixit Daniel iniquis illis senioribus Susanna accusatoribus: *Et tu mentitus es in caput tuum*. Ait igitur Dauid, *insurrexerunt in me testes iniqui*, falsitatem & mendacia obtrudentes, & *illaqueata est iniquitas*, id est, *sed iniquitas mentita est sibi*, id est, nemini nocebit, nisi proprio auctori.

XIX. *Credo videre bona Domini, in terra viventium.*

Reddit rationem, cur mentita sit iniquitas sibi. Ego enim, inquit, inuitis omnibus inimicis meis, *credo*, id est, certe confido, *me visurum bona Domini*, id est, illa bona, quæ ipsi etiam Domino bona sunt, quæ illum beatum reddunt, quæ sola sunt vera bona, idq; in terra viventium, id est, in regione illa, vbi mors locum non habet. In Hebræo habetur initio versiculi vna vox, *lule*, quam aliqui vertunt, *nisi*; & melius S. Hieronymus, *autem*. Ego autem *credo videre*, &c. A LXX. Interpretibus fuit omissa, quia non erat magni momenti, quantum ad sensum.

XX. *Expecta Dominum, viriliter age, & confortetur cor tuum, & sustine Dominum.*

Concludit per apostrophen ad seipsum, sectandam esse patientiam & fiduciam in Deum, quasi dicat, Ergo anima mea, quia de-

פח  
חמספח  
פח  
פח  
פח  
חמס

XIX.

XX.

XX.



sideras in domo Dei habitare, quia tam multa pignora diuini amoris habes, quia credis videre bona Domini in terra viucentium, non li deficere in tribulationibus, neque terrenas consolationes respicias, sed *patienter expecta, confortare in Domino, utiliter age*, dum transeant dies mali, & adueniant dies boni in Hebræo ad verbum habetur vt vertit S. Hieron. *expecta Dominum, confortare, & roboretur cor tuum, & expecta Dominum*. Similiter in Græco sunt eadem voces in principio & in fine. Sed Latinus Interpres varietate gaudet, ideo initio posuit, *Expecta Dominum*, & in fine, *sustine Dominum*. Patientia cum fiducia coniuncta vires addit. & vires additæ patientiam & fiduciam augent. Ait igitur: *Expecta Dominum*, id est, patienter, & cum fiducia expecta auxilium & consolationem Domini: Hinc *viriliter age*, seu roborare: roborare autem non armis exterioribus, sed *confortetur cor tuum*, excita animum, audacter perge. Hinc vero, multo magis confide, & cum patientia *expecta* consolatorem & adiutorem *Dominum*, qui sine dubio, cum sit fidelis & iustus, *veniens veniet, & non tardabit*.

sed diceret: Ad te Domine clamaui, &c. Videtur igitur præferenda S. Augustini & S. Hieronymi expositio, qui in persona Christi Psalmum à Dauid cantatum fuisse volunt: Dauid enim qui simul præuidebat passionem & glorificationem Christi, conuenienter ea coniungere potuit, sicut etiam in Psalmo 21. cuius Psalmi longissimi & pulcherrimi, hic, quem explicandum in manibus habemus, videtur esse quasi compendium.

## EXPLICATIO PSALMI XXVII.

**A**D te Domine clamabo, Deus meus, ne sileas à me, ne quando taceas à me, & assimilabor descendentibus in lacum.

Verba sunt Christi in cruce pendentis, ac postulantis celerem resurrectionem. Pro illo, *Deus meus*, in Hebræo est, *petra mea*, siue *fortis meus*, & quanquam hoc ipsum nomen ponitur ad significandum Deum, & recte Septuaginta verterunt, *Deus meus*; tamen ex vi Hebræicæ vocis, intelligimus hoc loco inuocari Deum, quia potentissimus est, & potest morti ipsi imperare, vt Christum cito restituat: Pro *ne sileas à me*, S. Hieronymus vertit, *ne absurdescas mihi*. Sed sciendum est, verbum *charas*, significare tacere, sileare, surdum se ostendere. Itaque sensus est, *ne sileas*, quasi non audieris vocem meam; ne veluti surdum te mihi exhibeas. Illud, *à me*, idem est, quod mihi, ex Hebræica phrasi. Breuiter petit exaudiri se, & responderi sibi, facturum Deum, quod petitur. Quod sequitur, *ne quando taceas à me, & assimilabor descendentibus in lacum*, continet causam, cur velit sibi responderi, quia videlicet, nisi Deus exaudiat & respondeat, erit ipse similis aliis hominibus mortalibus, qui per mortem dissoluntur, atque ad inferos descendunt, non redituri. Ne quando taceas à me, id est, ne forte tu non exaudias, & hinc fiet, vt ego per omnia similes fiam descendentibus in lacum, id est, iis, qui moriuntur, & ad inferos descendunt, sine spe resurgendi, nisi in die nouissimo. Posset etiam sensus esse, si non exaudias, ero similis hominibus mortuis: sicut

## PSALMVS XXVII.

Titulus & Argumentum.

Psalmus ipsi Dauid.

**H**unc Psalmum de Dauid fugiente Saulis persecutionem, exponunt Theodoretus & Euthymius. Sed repugnant multa. Primo quod in titulo id non indicetur, sicut alias fere semper fieri solet, cum ad historiam Psalmus respicit. Secundo, quod in hoc Psalmo is qui loquitur, appellat se Regem; Dauid autem eo tempore nondum Rex erat. Tertio, quod in eodem Psalmo dicit is qui loquitur, se exaudiatum, & restoruisse carnem suam: quod certe Dauidi pro eo tempore, quo Saulem fugiebat, conuenire non potest. Recentiores aliqui exponunt de Dauid iam Rege, & perfectè liberato à persecutione Saulis. Sed si ita esset, non diceret: Ad te Domine clamabo, ne sileas à me:



כור  
sicut enim mortui nihil omnino possunt, ita homo sine Dei adiutorio nihil omnino potest. Vox Hebraea *bor*, significat *cisternam, lacum, profundam foueam*, potest igitur accipi pro sepulchro, sed melius pro loco subterraneo animarum, sicut Isa. 14. *Verumtamen ad infernum detraheris in profundum lacu, & c. 38. Non expectabunt qui descendunt in lacum veritatem tuam*: quo modo etiam accipitur in illa oratione Ecclesiastica, *Libera animas omnium fidelium defunctorum de poenis inferni, & de profundo lacu, libera eas de ore leonis, &c.*

II.

*Exaudi Domine vocem deprecationis meae, dum oro ad te, dum extollo manus meas ad templum sanctum tuum.*

Quod antea dixerat, *ne files, & ne taceas*, nunc clarius dicit: *Exaudi Domine vocem deprecationis meae*: volebat enim Deum respondere, id vt signum esset exauditionis. Illud, *Domine*, non est in Hebraeo, sed solum, *exaudi vocem deprecationis meae*. S. Hieronymus in epistola ad Suniam & Fretellam, existimat esse additum ab aliquo explicationis gratia: fortasse etiam excedit ex nostris codicibus, quod in codicibus quibus Septuaginta vsi sunt, aderat. Illud, *dum oro ad te*, in Hebr. significantius habetur, *dum clamo ad te*, id est, dum oro cum clamore valido, vt Apostolus loquitur ad Hebr. 5. Illud, *dum extollo manus meas*, significat à signo, eandem ipsam orationem: solebant enim Hebrei manus in altum tollere, cum orabant, cuius caeremoniae pleni sunt libri sacri, sed & Gentiles eundem ritum imitabantur. Itaque idem est, *dum oro ad te, & dum extollo manus meas ad templum tuum*. Alludit vero interim Prophetia ad manus Domini in Cruce extensas, & ad coelum sublatis, tunc enim verissime dicere potuit Dominus, *dum clamo ad te, & dum extollo manus, &c.* quando de Cruce, orauit. Pro voce, *ad templum*, in Hebraeo est, *deuir*, quod proprie *oraculum* significat, unde Deus responsi dabat. Sed hoc loco siue templum, siue oraculum, pro coelesti templo, & oraculo accipitur.

דפיר

III.  
*Ne simul trahas me cum peccatoribus, & cum operantibus iniquitatem ne perdas me.*

Solus Christus id vere dicere potuit: ipse enim solus fuit omnibus modis segregatus à peccatoribus, vt dicit Apostolus ad Hebr. 7. Et sicut solus fuit, in quem peccatum cadere non potuit, ita iustissime petiit, vt non iudiceretur, & non pereat cum peccatoribus, sed ipsam potius mortem occidat, & resurgens ex mortuis, de mortis Principe, & de ipsa morte gloriose triumphet. Recte in editione Sixti V. & Clementis VIII. emendatum est, *ne trahas*, quod antea legebatur, *ne tradas*: nam cum tam vox Hebraica, quam Graeca, significet trahere, verisimile est ob literarum similitudinem, vitio librariorum, irrepisse in editionem Latinam, *ne tradas*. Illud, *ne perdas*, non habetur in Hebraeo, sed additum est, explicationis gratia. Itaque sensus est, *ne trahas me ad interitum cum ceteris hominibus, qui peccatores sunt, cum ego peccator non sim.*

IV.  
*Qui loquuntur pacem cum proximo suo, mala autem in cordibus eorum.*

Describit peccatores ab eo peccato quod vniuersalius est, & communius: Nam idcirco in alio Psalmo dicitur, *Omnis homo mendax*, & in alio, *Ab homine iniquo & dolo e-ripe me*: & de Christo dicit Apostolus Petrus: *Qui peccatum non fecit, nec inuentus est dolus in ore eius*: quasi dolus fere tam late pateat, quam peccatum. Certe plurimi sunt, qui volunt videri amici, bene velle proximis, & tamen ab amore proprio excaecati, malum habent in corde, id est, odio vel inuidentia erga eosdem proximos afficiuntur.

V.  
*Da illis secundum opera eorum, & secundum nequitiam adinventionum ipsorum.*

VI.  
*Secundum opera manuum eorum tribue illis, redde retributionem eorum ipsis.*

Hæc non imprecatio, sed prophetia est, vt aliàs sæpe monuimus: significatur enim his verbis, id omnino futurum, vt mali male percant,



III. pereant, nisi videlicet ex malis boni fiant. Sensus igitur est: *Dabis peccatoribus secundum opera eorum*, id est, afficies ea poena, quam merentur opera eorum. Et secundum nequitiam adinventionem ipsorum, supplice, dabis eis, id est, sicut ipsi ex malitia sua excogitauerunt & adinueniunt varios modos vexandi iustos; ita tu per sapientiam inuenies varios modos cruciandi peccatores; & denique *reddes eis retributionem suam*, id est, ipsi retribuuerunt iustis mala pro bonis, sed tu eam retributionem conuerteris in caput ipsorum, facies enim ut illis noceat, non iustis.

VII. *Quoniam non intellexerunt opera Domini, & in opera manuum eius destrues illos, & non edificabis eos.*

Hinc apparet fuisse prophetiam, non imprecationem, id quod duobus superioribus versiculis continetur: non enim dicit: *destrue eos*, sed *destrues eos*; vel, ut habetur in Hebræo, *destrues eos*. Significatur his verbis radix omnium malorum, radix enim est, non le intelligere opera Domini non applicate animum ad consideranda & cognoscenda mirabilia opera Dei, quæ fecit in creatione, in redemptione, in gubernatione generis humani: si quis enim ista consideret, vix fieri potest, quin in Dei amorem misericordie exardescat. Hinc 1. Corin. 2. B. Paulus ait: *Si cognouissent, nunquam Dominum gloria crucifixissent: & ipse Dominus Luc. 19. Quia si cognouisses & tu, & quidem in hac die tua quæ ad pacem tibi: & infra: Non relinquent in te lapidem super lapidem, eo quod non cognoueris tempus visitationis tuæ.* Quod attinet ad verba, in Latina editione est aliqua obscuritas, quæ non est in Hebraica, neque in Græca: nam in his editionibus legitur: *Quoniam non intellexerunt in opera Domini, & in opera manuum eius*, vel, ut S. Hieronymus reddit: *Quoniam non intellexerunt opera Domini, & opus manuum eius*, illa enim præpositio *in*, adiungitur utrique nomini ex phrasi Hebraica, sed secundum usum linguæ Latinæ, ex utroque loco tolli potuisset. Latinus autem interpretes ex priori loco sustulit, in posteriore reliquit; ideo sententiam obscuriorem reddidit.

Cur autem Propheta, cum dixisset: *Non intellexerunt opera Domini*, adiunxerit, *& opera manuum eius*, ratio esse videtur, ut explicaret, se loqui præcipue de illo opere, quod ipse facit per se non per secundas causas, quæle opus fuit creatio cæli & terræ, incarnatio Verbi, miracula Christi, Resurrectio, & Ascensio Domini, & similia. Ait igitur, quoniam peccatores non intellexerunt opera Domini, & præcipue opera illa, quæ manibus suis, id est, per se immediate fecit; ideo tu Domine destrues illos, & non edificabis, id est, destrues illos, & cum destruxeris, non te poenitebit destruxisse, ideo nunquam amplius edificabis eos. Alludit Propheta ad vocem operis manuum Domini, quod opus est quasi ædificatio quædam, quasi diceret, quia non intellexerunt ædificationem Dei, Deus illos destruet, & nunquam amplius edificabit. Id optime quadrat in ciuitatem, & templum, & ipsum regnum Iudæorum, quæ omnia Deus ob Iudæorum infidelitatem destruxit, nec vnquam amplius edificabit. Quadrat etiam in singulos peccatores, qui non intelligunt se esse ædificationem Domini, & ad imaginem eius conditos, & precio sanguinis Domini redemptos, & tam multa beneficia naturæ & gratiæ in se collata; ideo tandem ita destruentur, nunquam amplius reedificandi, ut nihil remaneat, nisi ruina ædificij, id est, unde poenam sentire perpetuo possint. In Hebræo habetur in tertia persona, *destruet, & non edificabit*; fortasse librariorum vitio, prima litera Hebraica, quæ indicat personam, mutata est; fortasse vltima litera Græca, ex qua persona intelligitur, vitio librariorum addita est; fortasse interpretes, non tam ad verbum, quam ad sensum respexerunt.

*Benedictus Dominus, quoniam exaudivit vocem deprecationis meæ.*

Transit Propheta ad gloriam resurrectionis Domini prædicandam, & in persona Christi gratias agit Deo, dicens: *Benedictus Dominus*, id est, benedicatur ab omnibus Dominus, *quoniam exaudivit vocem deprecationis meæ.*

Do-



IX. Dominus adiutor meus & protector  
meus, in ipso speravit cor meum, & adiu-  
tus sum.

Explicit, in quo exaudita sit oratio sua, ac dicit: *dominus adiutor meus & protector meus*, supple, solet esse. Ideo *in ipso sperauit cor meum*, id est, fretus auxilio & protectione Dei, non recusat pælium subire cum Diabolo, & cum ipsa morte, nec spe mea frustratus sum, quoniam adiunxit me Deus, vt plane victor euasertim. In Hebræo pro *adiutor & protector*, habetur *fortitudo & securum*. Ex quo intelligimus, accepisse à Deo auxilium interni roboris, & protectionem externi præsidij.

X. Et resloruit caro mea, & ex voluntate  
mea confitebor ei.

Describit effectum auxilij & protectionis, qui fuit gloriosa Resurrectio, ob quam toto corde laudaturum se dicit Deum. *Resloruit caro mea*, id est, caro mea, quæ per mortem exaruerat, non solum rediit ad vitam, sed ad florem ætatis, sanitatis, lætitiæ, venustatis maximæ rediit. *Et ideo ex voluntate mea*, id est, corde *confitebor ei* confessionem laudis & gratiarum actionis. In Hebræo nunc legitur: *Gaudium est cor meum, & in cantico meo confitebor ei*. Itaque pro *caro mea* legitur *cor meum*, pro *voluntate mea*, legitur *cantico meo*. Nam quod pro *resloruit*, legatur

*vaialoz besciari, velibbi ahodennu, id est,*  
*& re floruit caro mea, & corde meo, siue vo-*  
*luntate mea, confitebor ei.*

*Dominus fortitudo plebis sue, & prote-  
ctor saluationum Christi sui est.*

Hec est materia confessionis, de qua dixit, *confitebor ei*, quod videlicet dominus sit *fortitudo plebis sue*, quod ostendit, dum tam potenter protexit salutem Christi fidei, qui est caput totius plebis, & a quo fortitudo & salus totius populi dependet. Ex Hebraeo S. Hieron. vertit, *dominus fortitudo mea*, alij vertunt, *dominus fortitudo eis*: & hoc sonant verba, quae nunc sunt in Bibliis: sed Septuaginta non videntur legisse *lamo*, quod est *eis*, sed *laama*, id est, *plebis sue*. Dicit autem, *protector saluationum*, non protector saluationis, fortasse quia protector fuit ad multiplicem salutem, videlicet vt caro mortua non corrumperetur, vt sanguis effusus non periret, vt non solum anima corpori, & sanguis venis restitueretur, sed vt auerteretur immortalitas, impassibilitas, agilitas, splendor, & si quae sunt alia, quae ad corpus gloriosum requiruntur.

*Saluum fac populum tuum Domine, & benedic hereditati tuae, & rege eos, & extolle illos usque in aeternum.*

Christo, qui caput est Ecclesiæ, glorifica-  
to, hoc superest, vt corpus eius, id est, popu-  
lus Dei, qui est peculiaris hæreditas Dei,  
quam acquisiuit sanguine suo, pariter glo-  
rificetur. Dicit igitur Christus ad Patrem,  
vel Propheta ad Christum: *Saluum fac po-  
pulum tuum.* Vt autem saluum facias, be-  
nedic iustificando, rege conseruando & pro-  
tendendo in via, *exalta* glorificando,  
quæ glorificatio vsque in sæ-  
culum duret.

✱ ✱

PSAL.



PSALMVS XXVIII.

Titulus & Argumentum Psalmi.

Psalmus Dauid, in consummatione Tabernaculi.

**H**ic Titulus non habetur in Hebraeo, sed solum, Psalmus Dauid: reliqua addita sunt, vel à LXX. Interpretibus, vel ab aliis, & duobus modis legitur, & intelligitur titulus huius Psalmi. Nam S. Basilius, Theodore-  
tus & Euthymius legunt, Psalmus Dauid in exitu tabernaculi, & significari volunt, prae-  
cipi Sacerdotibus & Levitis exeuntibus de ta-  
bernaculo, ut prepararent quae necessaria sunt  
ad cultum Dei. S. Hieronymus & Augustinus  
legunt, ut nos habemus in editione vulgata,  
Psalmus Dauid in consummatione taberna-  
culi, & sensum esse vult S. Hieronymus, hunc  
Psalmum compositum fuisse, quando Dauid  
perfecit tabernaculum, & collocavit in eo Ar-  
cam Domini. Quod attinet ad argumentum,  
volunt nonnulli ad literam in toto fere Psalmo  
agi de potentia Dei, & velle Dauidem hortari  
populum ad laudandum Deum, qui potentiam  
suam solet manifestare admirandis operibus,  
quae solo verbo sine imperio facit. Alij, quorum  
sublimior interpretatio, & dignior Davidico  
spiritu esse videtur, volunt, in hoc Psalmo cele-  
brari Evangelicam predicationem. Congruit  
vero titulus, in consummatione tabernaculi:  
nam cum Dauid tabernaculum foederis intel-  
ligeret figuram esse Ecclesiam, quae tabernaculum  
Dei cum hominibus dicitur in Apocalypsi, &  
simul etiam spiritu reuelante cognosceret, in-  
strumentum, quo tabernaculum hoc novum  
perficiendum erat, fore predicationem Evan-  
gelicam, ideo in consummatione tabernaculi  
illius umbratici, Spiritu Sancto inspirante,  
cantavit praeconia vocis Domini, quae taberna-  
culum verum construitur. Nos utramque ex-  
plicationem breuiter persequemur.

EXPLICATIO PSALMI XXVIII.

I.

**A**fferre Domino filij Dei, afferre Do-  
mino filios arietum.

Cantaturus Propheta laudes potentiae di-  
uinæ, excitat filios Dei, id est, populum Dei  
peculiarem, cui notus erat Deus (nam notus  
in Iudaea Deus, in Israël magnum nomen eius)  
ut potentiam illam honorent, victimis eo  
tempore consuetis, & etiam predicatione vo-  
cis, & inclinatione corporis. Sed iuxta poste-  
riorem intelligentiam, cantaturus laudes vo-  
cis diuinæ, per quam perficitur tabernaculum,  
id est, Ecclesia, quæ est mater omnium filio-  
rum Dei, inuitat ipsos filios Dei, ipsos voca-  
tos illa voce celesti, ut Deo sacrificent sacrifi-  
cium laudis. *Afferre, inquit, filij Dei filios arie-  
tum*, id est, vos per sanguinem agni imma-  
culati effecti filij Dei, afferre agnos, offerre  
sacrificium gratiarum actionis & laudis: sic  
enim explicat ipse idem Propheta in sequen-  
ti versiculo, *Afferre domino gloriam, &c.* In  
Hebraeo non habetur, *Afferre domino filij  
dei*, sed solum, *Afferre domino filios arietum*.  
Fortasse in editione quam habuerunt LXX.  
Interpretes, erat utraque pars versiculi, &  
postea successu temporis excidit pars prior;  
fortasse etiam non erat nisi pars posterior,  
sed ea duobus modis interpretata est, & alte-  
ra interpretatio, quæ erat in margine, irrep-  
sit in textum, & hinc nata est lectio, quam nos  
habemus. Nam si vox *Elm*, legatur ut modo  
se habet, significat arietes; si legatur vnica li-  
tera addita *Elm*, significat Deum: proinde  
eadem sententia reddi potuit, *Afferre domino  
filij dei*: & etiam, *Afferre domino filios arie-  
tum*. Neque desunt in editione vulgata alij  
loçi, in quibus duæ interpretationes eiusdem  
sententiae simul inueniuntur in textu. Certe  
S. Basilius in Commentario huius Psalmi  
scribit, in multis exemplaribus addita esse  
hæc verba, *Afferre domino filij dei*. Ex quo  
intelligimus, non fuisse hæc verba in omni-  
bus exemplaribus Græcis, sed solum in ali-  
quibus. Sed vndeunque hæc verba in edi-  
tione nostra accesserint, satis bene cum se-  
quentibus cohererent, & habentur in omnibus  
Latinis codicibus, etiam antiquissimis.

*Afferre Domino gloriam & honorem,  
afferre Domino gloriam nomini eius: ado-  
rate Dominum in atrio sancto eius.*

Q

Hxc

II.



Hæc est declaratio sacrificij, quod ut offeramus Domino, Propheta nos admonet: *Afferre*, inquit, *Domino gloriam & honorem*, i. voce & opere glorificate Dominum: nec solum voce & opere Deum laudate, sed etiam corporis inclinatione illum veneramini, & per veram adorationem supremum Dominum agnoscite, ac protestamini. In Hebræo pro voce *honorem*, habetur *hox*, quod proprie *fortitudinem, potentiam, siue imperium* significat. Ex quo intelligimus, honorem, quem iuxta editionem Græcam & Latinam Deo debemus, esse honorem confessionis potentie & imperij Domini: tunc enim Deum vere honoramus, cum eius potentiam & imperium agnoscimus & confitemur. Et est valde ad propositum hoc loco honor potentie, cum in toto Psalmo Dei potentia laudetur. Pro *nomini eius*, in codicibus Hebraicis cum punctis Rabinorum habetur *nomini eius*: quæ lectio faciliorem sensum habet, quam nostra. Sed quia editio Græca habet *nomini eius*, & eodem modo ex Hebræo vertit S. Hieronymus, oportet LXX. Interpretes & S. Hieronymum aliter legisse, quam Rabini legerunt. Nimirum illi legerunt, *chaud scemô*, gloriam *nomini eius*; isti vero, *cheud scemô*, gloriam *nomini eius*. Sensus igitur est, *Afferre Domino gloriam nomini eius*; id est, afferre gloriam Domino, id est, nomini eius, celebrantes videlicet nomen, famam, notitiam Domini. Pro voce *atrio*, in Hebræo est *hadrat*, decore, seu pulchritudine, in Græco est αἰλῆ, unde S. Augustinus & alij legunt *aula*. Cæterum facile est videre, LXX. Interpretes non legisse *hadrat*, sed *chadrat*, vnica litera simillima immutata: illa enim vox, si legatur per *ח* significat *decorem*, si per *א* significat *atrium*; & hanc esse veram lectionem, dubitare non possumus, nisi Septuaginta viros, qui omnium iudicio sapientissimi erant, imperitiam arguere velimus, ut omittam quod magis conuenit cum verbis, *Adorate Dominum in atrio sancto eius*, quam in decore sancto eius. Porro vox Græca αἰλῆ, non significat id, quod nos Latine dicimus *aulam*, sed *vestibulum*, siue *atrium subdiale*, proinde qui legunt in *aula*, retinent sonum vocis Græcæ: qui le-

gunt in *atrio*, retinent veram tam Hebræam quam Græcæ vocis significationem. Per hoc atrium sanctum, in quo Deum adorare iubemur, intelligitur tum ipsum tabernaculi Iudaici vestibulum, ad quod omnibus promissæ aditus erat, cum in tabernaculum soli Sacerdotes intrare permitterentur: tum potissimum Ecclesia Catholica, quæ est velut atrium, seu vestibulum tabernaculi cælestis, nam in Ecclesiam & boni & mali passim admittuntur, sed in tabernaculum cæleste illi soli ingredientur, qui dicere poterunt Christo, ut in Apocalypsi legimus: *Fecisti nos Deo nostro regnum, & Sacerdotes*, Apocal. 5.

*Vox Domini super aquas, Deus maiestatis intonuit, Dominus super aquas multas.*

III.

Hic iam incipit explicare Propheta, cur nos inuitauerit ad laudandam & celebrandam potentiam Dei. Causa enim est, quia vox Domini mirabilia operatur, tum in corporalibus elementis, tum in spiritali fabrica Ecclesiæ. Describit primum operationem Dei in aquis, deinde in aëre, tum in igne, postremo in terra; quæ sunt partes principales mundi huius inferioris nobis maxime noti. Prima operatio Dei in aquis describitur in 1. cap. Genesim, cum dicitur: *Spiritus Domini ferebatur super aquas*: & ibidem: *Dixit Deus, Fiat firmamentum in medio aquarum, & diuidat aquas ab aquis*: & ibidem: *Dixit Deus, Congregentur aquæ, quæ sub cælo sunt, in locum vnum, & appareat arida*. Tunc igitur facta est vox Domini *super aquas*, cum Deus imperauit ut aquæ diuiderentur, & diuisæ congregarentur in locum vnum, id est, in cavernas terræ, & terra habitabilis fieret. Hæc ipsa vox dicitur *tonitruum*, *Deus maiestatis intonuit*, quia quomodo tonitruum nos continuo prostermit, & obedire cogit: sic ad imperium Domini continuo aquæ recesserunt, & in loca humilia se receperunt. Fuit autem hæc vox, & hoc tonitruum Dei *super aquas multas*, quia tunc aquæ vndique totam terram cooperiebant, proinde erat quasi immensa aquarum abyssus super terram. Hoc ipsum clarius describit idem Dauid in Psal. 103. *Abyssus*

fictus.



sicut vestimentum amictus eius, super montes stabant aquæ, id est, immensitas aquarum undique terram vestiebat, ita ut super omnes montes flarent aquæ. Ab increpatione tua fugient, à voce tonitruu tui formidabunt. Ascendunt montes, & descendunt campi, in locum quem fundasti eis, id est, ab imperante Deo aquæ recesserunt, quasi à tonitruo fugerent, & tunc apparuerunt montes editi, & campi depressi. Terminum posuisti, quem non transgredientur, neque conuertentur operire terram, id est, non solum aquæ ad vocem Domini recesserunt, & terram aridam atque habitabilem reddiderunt, sed ab eadem voce Domini terminum acceperunt, quem transgredi nunquam audebunt. Iam vero secundum alteram expositionem, describitur initium Evangelicæ prædicationis, quæ cepit, cum Deus ipse per se, Christo in aquis Iordanis baptizato, euangelizavit toti mundo, Iesum Christum esse filium suum, quod est quasi compendium totius Evangelij. Igitur vox Domini super aquas, est illa magnifica Dei vox in baptismo Christi audita: Hic est filius meus dilectus, in quo mihi bene complacuit, Matt. 3. Tunc enim deus maiestatis intonuit, & intonuit super aquas multas, quia tunc institutum est baptisma, & data virtus omnibus aquis totius mundi ad filios Dei regenerandos. S. Augustinus, per vocem Domini super aquas, intelligit vocem Christi super populos, quia dicitur in Apocal. c. 17. Aqua multi populi multi sunt: & addit, ideo dictum esse, deus maiestatis intonuit, quia maiestas diuina erat in carne humana Christi tãquam in nube, & proinde vox Domini ex humana carne, erat quasi tonitruum ex nube. Elegans & vera expositio: sed superior, quæ est Patrum Græcorum, videtur magis literalis.

III.

IV. Vox Domini in virtute, vox Domini in magnificentia.

Vtrique interpretationi laus hæc vocis Domini optime quadrat. Nam vox Domini iubentis, ut aquæ in principio creationis rerum omnium diuiderentur, & aquæ inferiores in cauernas terræ sese reciperent, & non reuertentur operire terram, non fuit inanis

& sine effectu, ut pleraque tonitrua esse solent, quæ nihil præter ingentem sonitum habent; sed fuit vox plena virtute & gloria, atque ad eam continuo est consequutus effectus: sic etiam vox Evangelicæ prædicationis ab ipso Deo inchoatæ, & à Christo & Apostolis propagatæ, non fuit inanis verborum strepitus, qualis multorum Oratorum & Philosophorum est, sed fuit vox efficacissima, & signis atque prodigiis confirmata. Ad efficaciam verbi pertinet illud, in virtute, ad gloriam miraculorum illud, in magnificentia siue splendore & decore, ut sonat vox Hebraica *hadar*. Apostolus Paulus 1. Cor. 2. Prædicationis meæ, inquit, non in persuasibilibus humana sapientia verbis, sed in ostensione spiritus & virtutis: & 1. Thess. 1. Evangelium meum non fuit ad vos in sermone tantum, sed in virtute, & Spiritu Sancto.

הדר

Vox Domini confringentis cedros, & confringer Dominus cedros Libani.

V.

Iuxta priorem interpretationem transit Propheta ab operatione Dei in aquis, ad operationem in aëre. Significat autem his verbis, vocem Domini, id est, imperium Domini, excitare ventos ac tempestates, quas in Psal. 149. vocat spiritum procellarum, quæ faciunt verbum eius. Et sane mirabilis est potentia Dei, quæ rei tam exili ac tenui tantam virtutem attribuit, ut etiam maximas arbores in momento confringat & prosternat, quod multi homines magna vi, & longo tempore vix facerent. Nominat autem Propheta cedros, & cedros Libani, quia cedri sunt arbores durissimæ & maximæ, & earum nusquam maiores inveniuntur, quam in Libano monte. Iam vero, iuxta posteriorem interpretationem, cedri Libani ratione sublimitatis sunt homines excelsi, siue magnitudine potentie, siue splendore sapientie, siue gloria eloquentie: ratione boni odoris, quem cedri spirant, sunt homines delicis & voluptatibus dediti. Denique ratione densitatis & duritiei, qua mixtum in modum cedri polleat, sunt homines obstinati & pertinaces in patetis erroribus. Has omnes cedros, Evangelicæ prædicationis magni-



fice confregit, & ad humilitatem & mansuetudinem Christianam, nec non ad fructus dignos poenitentiae faciendos perduxit, exemplorum plenae sunt historiae.

VI.

*Et comminuet eas tanquam vitulum Libani, & dilectus quemadmodum filius vnicornium.*

Ex Hebraeo iuxta priorem intelligentiam habetur sensus facilis & pulcherrimus. Sic enim legimus in Hebraeo, *& salutare faciet eas sicut vitulum Libani, & Saron, sicut filium vnicornium.* & sensus est, non solum vox Domini confringet cedros Libani, sed etiam integras cedros radicitus euellet, & exilire faciet ea facilitate, qua vituli saliant. Nec solum cedros Libani, sed ipsos etiam montes, Libanum & Saron saltare faciet ea facilitate, qua filius vnicornium saltat. Cui sententiae similis est illa in Psal. 113. *Montes exultauerunt ut arietes, & colles sicut agni ouium.* Iuxta posteriorem intelligentiam sensus erit, vox praedicationis Euangelicae non solum confringet cedros Libani, id est, viros quamuis excelsos & obstinatos ad humilitatem Fidei Christianae inflectet, sed etiam easdem cedros eradicabit, & in alium locum exilire faciet, id est, ab affectibus terrenis penitus abstrahet, & ad vitam pene Angelicam transferet, quod Apostolis & Apostolicis viris conuenit, qui non solum fideles, sed religiosissimi & perfectissimi euaserunt, ut non tam homines, quam terrestres Angeli viderentur. Nec solum cedros singulas, sed integrum montem cedris plenum, siue integras cedrorum sylvas exilire faciet Euangelica praedicatione, id est, non solum hunc, aut illum virum, sed ingentem hominum multitudinem, ceterasque integras, ad fidem & religionem, vitamque perfectam adducet. Sed videndum est, quid Graeca & Latina editio habeat inter quas hoc solum interest, quod in Graeca legitur, *& comminuet eas tanquam vitulum Libani,* in Latina vero, *& comminuet eas tanquam vitulum Libani.* Quamuis autem S. Basilii & Euthymii legant *Libanum*, tamen probabile est, in editionibus Graecis emendationibus fuisse *Libani*, ut legunt S. Hieronymus

& Augustinus, & Codex antiquissimus, quod videtur in Psalmis canendis Ecclesia S. Petri Romae. Et quidem verba illa priora, *& comminuet eas tanquam vitulum Libani*, possunt non difficulter concordari cum verbis Hebraicis; nam dum Cedri magno impetu confringuntur & comminuuntur, certe fragmenta exiliunt, & sparguntur in varias partes. Itaque sensus erit, Et comminuet eas, Cedros videlicet, ac per hoc fragmenta & frustra exilire faciet, quomodo vituli montis Libani exilire & saltare solent. Sed verba sequentia, *& dilectus quemadmodum filius vnicornium*, difficilius cum Hebraicis vocibus, quae nunc habentur in Bibliis, concordari possunt: nam *Saron*, pro quo nos habemus, *dilectus*, significat montem Hermon, Deut. 3: & Iorican, 1. Reg. 17: & 3. Reg. 22. Oportet igitur, ut LXX. Interpretes, vel aliquid aliud legerint, vel certe intellexerint vocem illam, quae significat montem Hermon, & Iorican, res videlicet tam dissimiles, significare etiam dilectum, quibus habenda fides est, cum ipsi doctissimi essent, & linguae Hebraicae peritissimi. Posita autem hac lectione, iuxta priorem intelligentiam, hic erit sensus: *Et comminuet eas*, nimirum Cedros, & comminuendo exilire faciet fragmenta Cedrorum, *sicut vitulum Libani*, id est, sicut saltat vitulus per montem Libani, *& dilectus quemadmodum filius vnicornium*, id est, ut saltat dilectus filius vnicornium. Dicitur autem dilectus filius vnicornium, quod sit speciosum & amabile animal, praesertim quando iuuenulus vnicornis est. Alij sic exponunt, Et comminuet Cedros durissimas, quomodo comminui possunt tenerissimi vituli, & tenerissimi filij vnicornium: sed nostra expositio magis accedit ad lectionem Hebraicam. Iuxta posteriorem intelligentiam sensus erit, praedicatione Euangelica non solum confringet Cedros Libani, id est, homines potentes & sapientes humiliabit, sed etiam comminuet ut vitulum Libani, id est, rediget altissimas Cedros ad paruitatem exigui vituli, qui pascitur in monte Libano. Per vitulum autem recte intelligitur Christus qui non solum humilis & mansuetus fuit, more

lacten-



lactentis vituli, sed etiam immolatus in sacrificium Deo: *Et dilectus quemadmodum filius unicornium*, id est, & tunc quando cedi Libani contractæ fuerint apparebit dilectus, qui est Christus dilectissimus Patri, & desideratus cunctis gentibus: apparebit, inquam, non amplius ut inermis vitulus, sed ut filius fortissimi unicornis. Maestas enim diuina, & omnipotentia Christi tunc primum apparere cepit, cum per Euangelicam prædicationem piscatorum, Oratores & Philosophi, & ipsi etiam Principes mundi credere ceperunt in Christum. De viribus unicornis, siue rinocerotis, vide Iob: 39.

VII.

*Vox Domini intercedentis flammam ignis, vox Domini concutientis desertum, & commouebit Dominus desertum Cades.*

In prima parte huius versis, quæ apud Hebræos est versus integer, transit Propheta ab operatione Dei in aere ad operationem in igne, ac dicit, *voce Domini*, id est, imperium & potentiam Domini, *intercedere*, id est, diuidere *flamas ignis*, quod fit, quando imperante Domino; varia mittuntur è nubibus, quasi è cœlestibus caminis; fulmina in terras, quibus nihil terribilius & formidabilius mortalibus accidere solet, potest etiam illa intercessio, siue diuisio flammarum; non solum referri ad multitudinem, & varietatem fulminum, sed etiam ad subtilitatem, & acumen ipsorum fulminum: quæ enim acuuntur diuiduntur, ac interceduntur, ut ad subtilitatem redigantur; porro nihil est omnino in rebus corporalibus acutius, subtilius, penetratibus cœlesti fulmine: vnde est illud in cantico Moysi, Deut. 32. *Si acuro, ut fulgur gladium meum*. Iuxta alteram intelligentiam, *vox Domini*, id est, Euangelica prædicatione diuidit flamas ignis, dum per eam Spiritus sanctus in cordibus hominum iaculatur ignem diuini amoris, multis & variis modis: in cuius rei signum apparuerunt die Pentecostes super credentes, *disparuit lingua tanquam ignis*, Act. 2. In altera parte versus celebrat Propheta potentiam Dei operantis in terra ac dicit, *Voce Domini con-*

*cutere & commouere desertum*. Verbum Hebraicum, *iachil*, significat, paturire faciet: ex quo intelligimus, concussione & commotionem, quæ in Græca & Latina editione exprimitur, non esse simplicem terre motum, aut concussione ex fragore tonitruum in deserto peculiariter resonantis, ut aliqui volunt, sed esse concussione, & commotionem ad parturiendum. Itaque significatur hoc loco mirabilis potentia Dei, quæ sicut montem Libani potest cum voluerit Cedris omnibus spoliare, & desertum facere: ita è contrario potest ipsum desertum Cades, ubi nihil nasci solet, vnica concussione parturire facere, & continuo arboribus & animalibus replere. Simile est, quod dicitur in Psalm. 106. *Posuit flumina in deserto, terra fructiferam in saluginem, & paulo post: Posuit desertum in stagna aquarum, & collocauit illic eunietes, & constituerunt ciuitatem habitationis, & seminauerunt agros, & plantauerunt vineas*, Sed iuxta alteram intelligentiam significatur, ad Euangelicam prædicationem conuertendas esse etiam Barbaras nationes, quæ antea cauerant cultura spiritali, & irrigatione gratiæ Dei, ut comparatione aliarum nationum, deserta dici possent. Quid si etiam hic significari dicamus, vera deserta paritura fuisse infinita agmina Monachorum, ac per hoc, ut loquitur S. Hieronymus in Epist. ad Heliodorum, futura deserta vernantia floribus Christi? Nam in hoc ipso deserto Cades, fuisse plurima Monasteria tempore S. Hieronymi, testatur ipse in vita sancti Hilarionis.

LIII

*Vox Domini preparantis cernos, & uolabit condens, & in templo eius omnes dicent gloriam.*

VIII.

Iuxta priorem intelligentiam Propheta qui Dei potentiam laudauit in elementis omnibus, aqua, aere, igne, & terra: nunc laudat in animantibus, & plantis, paulo post, laudaturus in hominibus. Dicit igitur, *Vox Domini preparantis cernos*, ubi ponit loco exempli, operationem Dei in cernis. Nam ut habemus in libr. Iob. cap. 39. cernæ summa difficultate pariunt, & causa videtur esse,

Q3

quia



quia tam perfectos fetus edunt, ut illi statim ad pastum pergant, nec redeant ad matrem; ut in eodem loco dicitur. Mira igitur Dei potentia in eo cernitur, ut ceruas parere faciat. In Hebræo habetur, *Vox Domini parere faciens ceruas*, vel ut Sanctus Hieronymus vertit. *Vox Domini obstetricans cervis*. Idem significant verba Græca & Latina. Nam *preparare ceruos*, nihil est aliud hoc loco, nisi *preparare ad pariendum*. Nomen, ceruos, commodius legeretur, ceruas: nam in Hebræo est nomen foemininum, & in Græco, est nomen commune. Sed recte etiam potest intelligi, *preparantis ceruos*. nam ponitur nomen masculinum ad exprimendum ceruos in genere non distinguendo sexus: quasi diceretur, *Vox Domini preparat ceruos*, id est, speciem ceruinam ad partum, quæ species sine peculiari providentia Dei parere non posset. In verbis sequentibus, *Et reuelabit condensam*, siue, ut in Hebræo apertius legitur, *aperiet sylvas*, significatur operatio Dei in arboribus & sensus est, Deo nihil esse clausum, sed omnia peruia; ipse enim omnia penetrat, etiam densissimas sylvas, & ubiq; operatur; & ideo, *In templo eius omnes dicunt gloriam*, id est, omnes creaturæ Deum laudant, & glorificant in hac rerum universitate, quæ est veluti templum eius. In Hebræo est *omne ipsum*, siue, totum hoc dicitur *gloriam*: ideo exposuimus, *omnes*, id est, omnes creaturæ: non enim loquitur solum de hominibus, sed de toto eo, quod dictum erat, id est, aqua, igne, &c. Iuxta alteram intelligentiam, sublimiorē, *vox Domini preparat ceruos*, cum Evangelicæ prædicationis preparat homines spirituales, altera petentes, & venenos serpentes spiritu suo occidentes, ad partum mirabilem operum, quid enim maius & mirabilius, quam ut homo infernus, operetur opera meritoria vitæ perpetuæ? Et cum vox Domini ceruos omnes parere fecerit, tunc demum *reuelabit condensam*, id est, ut exponit. Sanctus Basilius in secunda expositione huius Psalmi, *reuelabit abscondita tenebrarum, & manifestabit consilia cordium*, in extremo iudicio, iuxta Apost. 1. Cor. 4. & tunc, tam erit evidens iustitia Dei, ut in ma-

gno illo theatro, & templo omnes omnino, tam boni quam mali sint glorificaturi Deū. Tunc enim *curuabitur Christo omne genu*, & omnes vel inuiti, vel libenter dicent, *iustus es Domine, & rectum iudicium tuum*, sic in templo eius, omnes dicent gloriam, S. August. per illud, *reuelabit condensam*, intelligit reuelationem Sacramentorum, & arcanorum Scripturæ sanctæ, quæ viris sanctis & perfectis, quasi ceruis alta petentibus, aperiuntur.

*Dominus diluvium inhabitare facit, & sedebit Dominus Rex in æternum.*

IX.

In Hebræo est, *dominus diluvium inhabitat*, & sic etiam ex Græco legunt Basilii, & August. tamen Hieron. in epist. ad Suniam & Fretellam magis probat nostram lectionē, nimirum, *inhabitare facit*, & sic dicit se transulisse. Eodem modo legit Euthym. Et certe græca vox utrumque significat, *inhabitare*, & *collocare*. i. habitare facere, vox Hebræa parva mutatione facta in eandē significationem adduci potest. Retēta igitur nostra lectione, iuxta priorem intelligentiam, redditur causa, cur omnia dicant gloriam Deo. Causa enim est, quia *Deus diluvium inhabitare facit* id est, copiosum imbrē effundit super terrā, ex quo rebus omnibus alimentum produci- tur & vita sustentatur, & ipse idem Deus sedebit Rex, & Dominus in æternum, omnia videlicet regens, omnia gubernans, omnia disponens. At iuxta posteriorem intelligentiam. Dominus cum in extremo iudicio reuelaverit condensam, & ab hominibus iustitia eius laudata fuerit, tunc diluvium inhabitare facient, effundens omnia genera bonorum in bonos, & omnia genera malorum in malos, & sic nullo penitus resistente, sublato de medio omni alio Principatu, & regno Daemonum, atque hominum impiorum, *sedebit Dominus Rex in æternum*. Referunt hoc diluvium alij ad diluvium Noe, alij ad baptismum, & quia sunt auctores graves & magni nominis, non audeo improbare.

*Dominus virtutem populo suo dabit; Dominus benedicet populo suo in pace.*

X.

Hæc



Hæc est conclusio Psalmi, in qua, iuxta priorem intelligentiam, Propheta, qui laudauit Dei potentiam in omnibus aliis rebus mundi huius inferioris, laudat postremo in hominibus, id est, in populo suo, cui dandam esse dicit à Deo *virtutem*, id est, robur & vires contra omnes aduersarios, & iis omnibus superatis, dulcissimam quietem & pacem. At iuxta posteriorem intelligentiam, concludit Psalmum promittens populo Dei *virtutem*, id est, potentiam & robur in hac peregrinatione ad resistendum tentationibus, & *benedictionem* ac pacem sempiternam in æterna vita. Non videtur hoc loco prætereunda pia quorundam observatio, qui vocem Domini septies in hoc Psalmo repetitam, septem Ecclesiæ Sacramentis ita accommodant, vt vocem Domini super aquas, Baptismo; vocem Domini in virtute, Confirmationi; vocem Domini in magnificentia, Eucharistia; vocem Domini confringentis cedros, Pœnitentiæ; vocem Domini coneuientis desertum, Ordini; vocem Dñi intereidentis flammam ignis, Matrimonio; vocem Dñi præparantis ceruus, Extremæ vñctioni conuenire velint.

## P S A L M V S XXIX.

## Titulus &amp; Argumentum.

Psalmus canticus, in dedicatione domus  
David.

**H**ic titulus indicat Psalmum & voce & instrumentis musicis cantatum, quod in præfatione annotauimus ex B. Hilario, & id ipsum docet in Commentario huius Psalmi S. Basilus. Ex eodem titulo colligimus, hunc Psalmum compositum fuisse à Dauide, quando domus eius in Hierusalem magnificentissime extructa, dedicata fuit. Tunc enim intellexit David regnum suum à Deo confirmatum & stabilitum fuisse, & ideo in gratiarum actionem hunc hymnum cecinit Deo. Habetur hæc historia lib. 2. Reg. 5. & lib. 1. Paralip. 14. Videtur autem hic Psalmus duplicem sensum habere, vt Psalmus superior, vnum historicum, alterum propheticum, utrumque literalem.

Et quidem recte post consummationem tabernaculi, quod est Ecclesia militans in terris, sequitur dedicatio domus, qua est Ecclesia stabiliter quiescens in cœlis, cuius fundamentum, quod est Christus, iam dedicatum est, cum ad vitam immortalem & gloriosam peruenerit.

## EXPLICATIO PSALMI XXIX.

**E**xaltabo te Domine, quoniam suscepisti me; nec delectasti inimicos meos super me.

Dauid confirmato Regno, arce Sionis munita, & de nomine suo ciuitate Dauid appellata, denique domo regia magnificentissime extructa, Deum agnoscens tantorum beneficiorum auctorem, tributum illi offert gratiarum actionis, ac dicit: *Exaltabo te Domine*, id est, quamuis tu Domine altissimus sis, vt re ipsa altior fieri non possis; tamen apud eos qui altitudinem tuam minus agnoscunt, exaltabo te prædicatione mea, & faciat, quod in me est, vt te altissimum esse omnes agnoscant. *Quoniam suscepisti me*; de imo videlicet, ac de profundo humilitatis suscepisti, & exaltasti in solium Regni. Nam vox Hebræa, *dala*, exaltare significat. Itaque ait, tu exaltasti me, & ego exaltabo te; non tribuens meis viribus exaltationem meam, sed magnificentia tuæ: tu exaltasti me, & ego humiliabo me, vt exaltem te. *Nec delectasti inimicos meos super me*; & hoc ex illa exaltatione consecutum est, vt inimici Dauid, qui plurimi fuerunt, & cum longissimo tempore ad necem quaesierunt, non habuerint materiam gaudendi ex eius interitu, quem audissimè expetebant, sed contra dolendi ex illa exaltatione, quam impedire totis viribus conabantur. Iam veto prophetico sensu, loquitur Dauid in persona Christi & Electorum, tum omnium, tum singulorum, quos in cœlesti regno quasi exaltatos præuidebat, & quorum numero ipse quoque futurus erat. *Exaltabo te Domine, quoniam suscepisti me*, id est, nunc vere te Domine cogitatione & voce exaltabo, cum ex mea exaltatione cognoscant sublimissimam altitudinem tuam; nam ex ima terra & profundo miseriarum, ex ipsa mortalitate



litate suscepisti & exaltasti me ad gloriam resurrectionis & immortalitatis, atque adeo ad Regnum cœleste & sempiternum. *Nec delectasti inimicos meos super me*, quia nō permisisisti ut potirentur desiderio suo, quo in sempiternum interitum meum anhelabant Dæmones, & homines mali. Gausi sunt quidem impij Iudæi, cum à Pilato extorserunt sententiam mortis in Christum, & non raro lætantur mali, cum bonos, vel opibus, vel etiā vita spoliare possunt; sed eorum lætitia tam brevis est, & tam longum adducit dolorem, ut merito somnium potius lætitiæ, quam vera lætitia dici debeat.

II. Domine Deus meus clamaui ad te, & sanasti me.

III. Domine eduxisti ab inferno animam meā. *saluasti me à descendantibus in lacum.*

Reuocat Propheta ad memoriam angustias suas, quas ante Regnum adeptum, passus est, ut ostendat verum esse, quod paulo ante dixit: *Nec delectasti inimicos meos super me.* Domine Deus meus clamaui ad te, cum in periculis animi contabescerem: sed tu Domine sanasti ægritudinem illam meam, & à morte propinqua, ita me liberaisti, ac si ex ipso inferno me eduxisses. Illud autem, *saluasti me à descendantibus in lacum*, idem significat, sed est loquutio paulo obscurior. Sensus est, saluasti me, vel habetur ad verbū in Hebræo, *uiuificasti me à descendantibus in lacum*, id est, excitasti me à mortuis. Nam per descendentes in lacum intelliguntur mortui. Dicitur autem Dauid excitatus à mortuis, quia à morte propinqua & certissima liberatus fuerat. At iuxta Prophetiam intelligentiā, Christus plane ad literā dicere potest, *sanasti me*, id est, vulnera mea in cruce accepta, & *eduxisti ab inferno*, i. à Limbo animam meam, & *uiuificasti me per resurrectionem*, atque ita à mortuis excitasti. Denique Sancti omnes dicere poterunt, cum domus eterna dedicabitur, sanasti me perfectissima sanitate corporis & anime, & *eduxisti ab inferno animam meā*, quia non permisisisti ut in infernum damnatorum descenderem, &

saluasti, seu uiscasti me à descendantibus in lacum, quia vitam & salutem æternam mihi donasti. Idem habetur in Psal. 102. *Qui sanat omnes infirmitates tuas, qui redimit de interitu vitam tuam.*

Psallite Domino sancti eius, & confitemini memorie sanctitatis eius.

IV.

Et Dauid acceptis temporalibus beneficiis, & vnusquisque sanctorum acceptis beneficiis æternis, parum esse iudicans, si ipse solus Deo gratias agat, hortatur alios, qui similia beneficia perceperunt, ut Deum laudare non cessent. Illud, *Confitemini memoria sanctitatis eius*, hunc sensum habet, confitemini confessione laudis, id est, laudate memoriam sanctam eius, quod uidelicet vestri memor fuerit memoria sancta, memoria pia, memoria paterna, non ad puniendum, sed ad sanctificandum. passim enim in lingua Hebraica ponitur nomen substantiuum in secundo casu, pro adiectiuo in primo casu. Quod enim frequenter legimus, *in monte sancto eius*, vel *in templo sancto eius*, in Hebræo est, in monte, vel, in templo sanctitatis eius. Itaq; S. Hieronymus, qui hoc loco posuit, *memoria sanctitatis eius*, in Psal. 97. versu ultimo, posuit, *memoria sanctæ eius*. Et vero magnum est hoc Dei beneficiū, & memoria gratissima recolendum, quod cum nos, qui Dei ope semper indigemus, sepe obliuiscamur illius; ille, qui bonorum nostrorum non eget, semper recordetur nostri, & præcipue recordatus sit cum misit ad nos filium suum, Saluatorem mundi, quod ipsum idem Dauid in Psal. 8. miratur, cum ait: *Quid est homo, quia memor es eius?*

Quoniam ira in indignatione eius, & vita in voluntate eius.

V.

Reddit rationem, cur dixerit, laudandam esse memoriam sanctam, quam de nobis habet Deus. Ratio enim est, quia Deus, si nos punit, id facit ex indignatione, quam peccata nostra prouocant, id est ex iusto iudicio; sed alioqui in voluntate, & electione eius nō est pœna, sed vita. Itaque per iram intelligitur pœna & castigatio, quæ dicitur ira, quia est



est effectus iræ: per indignationem, intelligitur iustum Dei iudicium, ut sanctus Basilius, & alij exponunt. In Hebræo habetur, *quoniam momentum est in indignatione eius*, & *vita in voluntate eius*. Sed septuaginta Interpretes non videntur legisse, *regah*, quod significat iram, fortasse etiam legerunt, *regah*, & verterunt iram, quia vox illa, non solum significat momentum, sed etiam scissionem, proinde intellexerunt, sensum esse, in indignatione Dei esse scissionem, id est, occisionem, & mortem, sed in voluntate Dei esse vitam: sed pro scissione posuerunt iram, quia sæpissime in scriptura ponitur ira pro pœna. Caterum sensus etiam, quem ex Hebræo exprimit sanctus Hieronymus, non est contemnendus: vere enim respectu electorum, de quibus in hoc Psalmo agitur, *momentum est in indignatione Dei*, id est, breuissima & momentanea est indignatio Dei in electos peccantes, quia statim pœnitentibus ignoscit: nam in voluntate eius non est ira, sed vita. Porro hæc omnia in Christum caput electorum misisse quadrant. Nam *pater filio suo non peperci*, sed tamen ira, id est, punitio fuit in Christo ex indignatione contra peccata nostra, & fuit castigatio illa breuissima, sed vita, & resurrectio Christi fuit plane ex voluntate & electione Dei.

VI.

*Ad vespertinum demorabitur fletus, & ad matutinum lætitia.*

רִנָּה

Sanctus Hieronymus vertit, *in matutino laus*, sed vox Hebræa, *rinna*, significat proprie iubilationem, siue exultationem, in qua est coniuncta laus cum lætitia, proinde non est discrepantia interversiones. Sensus igitur est, inde probari, iram siue momentum, esse in indignatione Dei; sed in voluntate & beneplacito eiusdem esse vitam electorum suorum; quia post fletum ex castigatione, & pœnitentia natū, statim succedet lætitia, & laus iubilantis ex remissione, & reconciliatione: nam inter vespere & mane, id est, inter noctem & diem nihil est medium. Recte autem tribuitur tempus nocturnum fletui, & diurnum lætitie, tum quia cum peccamus,

recedit à nobis lux gratiæ diuinæ, cum reconciliamur, redit; tum quia tempus huius vitæ in quo peccata dessemus, & præ desiderio patriæ gemimus, & suspiramus, tēpus est nocturnum; quia non videmus Deū, qui est sol iustitiæ: tempus autem vitæ futuræ, in quo exultabimus lætitia inenarrabili, & glorificata, ut loquitur S. Petrus i. epist. c. i. tēpus erit diurnum, quia videbimus Deū sicuti est. Sed in Christo ad literam impletū est hoc vaticinium: nam ad vespertinam cū dolore mortuus est, & in matutino cum lætitia resurrexit.

*Ego autem dixi in abundantia mea, non mouebo in æternum.*

VII.

Vicissitudinem iræ & vitæ, fletus, & lætitie, quam demonstravit Propheta superioribus versiculis generationi; nunc demonstrat in particulari, loquens tum in persona sua, tum in persona electorum Dei. Ac primum in persona sua dicit, se antequam in regnum exaltaretur, aliquando tanta pace, & bonorū temporalium copia abundasse; ut existimaret, sibi illa perpetuo adfutura. Videtur autē respicere ad illud tempus, in quo post cædem Goliath Philistæi, vt habetur i. Reg. 18. diligebatur à Rege, à filio Regis, atque ab omni populo, ita vt paulo post heret tribunus, & gener Regis. De hoc igitur tēpore dicit, *Ego autem dixi in abundantia mea*, id est, dum bonis omnibus abundarem, *Non mouebo in æternum*, id est, tam bene fundata est hæc felicitas mea, vt semper duratura videatur.

*Domine in voluntate tua præstitisti decori meo virtutem.*

VIII.

Reddit rationem, cur dixerit, *non mouebo in æternum*, atq; id facit per apostrophēn ad Deum, quasi diceret, ideo dixi, *non mouebo in æternum*, quia tu Domine præstitisti virtutem, id est, robur ac vires decori meo, id est, felicitati meæ, idque in voluntate tua, id est, in beneplacito tuo, quia ita placuit tibi, ita voluisti, & decreuisti. In Hebræo habetur *monti meo*, pro decori meo: sed septuaginta non legerunt, *hareri*, id est, *monti meo*, sed *haddar*, decori meo, vnica iterum, eaque simillima mutata; &, vt sæpe diximus, in eiusmodi vocum ambiguitatibus, videtur omnino

R

præ-

הָרִי  
הָרִי



preferenda lectio septuaginta Interpretum, & editionis vulgatę omnibus alijs lectionibus.

IX.

*Auertisti faciem tuam à me, & factus sum conturbatus.*

Hic iam declarat rerum vicissitudinem, quę tamen ex Dei prouidentia pendet. *Auertisti*, inquit, *faciem tuam à me*, id est, paulo post, in medio cursu felicitatis destituiisti me fauore tuo, & permisisti, ut in odium Regis inciderem, *Et factus sum conturbatus*, in de enim exilium, fuga, mortis periculum, & alia mala exorta sunt. Sed hæc omnia longe adhuc melius conueniunt in vicissitudines, quas patiuntur Electi, cum peregrinantur in terris. *Ego autem*, inquit Electus quilibet, *in abundantia mea*, id est, dum gratia Dei, & spirituali consolatione abundabam, *dixi*, non mouebo in aeternum: etiamsi oportuerit me mori tecum, non te negabo, dixit vnus ex primariis electis, *Domine in voluntate tua prestitisti decori meo virtutem*, id est, robur meum non ex me erat, sed ex te, quia tu presteras virtutem decori meo, id est, pulchritudo animę meę, quę ex luce sapientię, & iustitię oritur à tuo adiutorio conseruabatur. *Auertisti faciem tuam à me, & factus sum conturbatus*, id est, ut punires presumptionem meam, dimisisti meipsum mihi, & continuo cecidi, & conturbatus sum. Quod attinet ad Christum, possunt hi tres versiculi tribui Christo, pro corpore eius, quod est Ecclesia, id est, ut ea omnia dicat in persona membrorum suorum. Possunt etiam Christo tribui in persona propria. Nam quemadmodum ipse dixit in Cruce, Matth. 27. *Deus meus, ut quid dereliquisti me?* ita dicere potest, *Auertisti faciem tuam à me*, non auersione inimicitię, sed auersione defensionis, & auxiliij tempore passionis. Itaque sensus erit, *Ego autem dixi in abundantia mea, non mouebo in aeternum*, id est, humanitas mea iniuncta prę omnibus consortibus suis oleo abundantissimę gratię, ipsi nimirum fonti gratiarum Deo hypostaticę vnita, dixit, *non mouebo in aeternum*, id est, nihil mihi nocere, nihilque me perturbare poterit. *Domine in voluntate tua*

*prestitisti decori meo virtutem*, id est, quia tu Domine pulchritudini, & excellentię meę, quę pręsto omnibus hominibus, & Angelis, addidisti robur & potentiam, nondum videlicet insolubilem hypostaticę vnionis, idque ex voluntate tua, cui nemo resistere potest. *Auertisti faciem tuam, & factus sum conturbatus*, id est, nihilominus tamen manente vinculo hypostaticę vnionis, & illęsa pulchritudine gratię, auertisti ad tempus pro salute hominum faciem tuam à defensione mea: voluisti, ut calix amarissimę passionis non transiret à me, sed biberem illum: ideo *conturbatus sum*, corpi pauere, tædere & mortuus esse, & dixi, *Tristis est anima mea vsque ad mortem*. Neque hinc colligi debet, Christi animam aliquid ignorasse, vel aliquid inopinatum ei contigisse: nam verum est, nihil ei nocere, vel eam turbare potuisse, nisi ipsa voluisset: sed admisit in se furentium manus, & turbauit semetipsum. Et sicut dixit ad Patrem, *Auertisti faciem tuam à me*, ita dicere potuisset, auerti faciem diuinitatis meę ab auxilio humanitatis meę, & sciens, & volens conturbatus sum.

*Ad te Domine clamabo, & ad Deum meum deprecabor.*

X.

*Qua utilitas in sanguine meo, dum descendo in corruptionem?*

XI.

*Nunquid confitebitur tibi puluis, aut annuntiabit veritatem tuam?*

XII.

Hęc omnia videntur accipienda pro tempore præterito, neque est insolitum, ut apud Hebręos futurum ponatur pro præterito. Itaque David in sensu historico dicit, se tempore tribulationis & periculi, clamasse ad Dominum, atque inter cætera allegasse, non esse utilem Domino mortem suam, quia mortuus non posset Deum laudare. *Ad te Domine clamabo*, id est, cum te auertente faciem factus sum conturbatus, non desperavi de misericordia tua: sed ad te clamaui, & te, deprecatus, dixi, *Qua utilitas in sanguine meo, dum descendo in corruptionem*, id est, quid tibi Domine proderit effusio sanguinis mei, dum ego ab inimicis occisus, putrefcam in sepul-



sepulchro? Certe pulvis nō confitebitur tibi confessionem laudis. Iuxta sensum altiore & propheticum, Christus in passione ad Dominum clamasse, & orasse se dicit, quod impletum fuit, quando, vt Apostolus loquitur ad Hebr. 5. *cum clamore valido, & lacrymis, preces obtulit ad eum, qui posset eum saluum facere à morte.* Tūc igitur ait, *Quæ utilitas in sanguine meo, dum descendo in corruptionem?* id est, quæ utilitas erit gloriæ Dei, & salutis humani generis in sanguine meo in cruce effuso, dum ceterorum hominum more, corpus meum in sepulchro putrefcit & corrumpitur? Nam nisi Christus resurrexisset, inanis esset fides nostra, vt dicit Apostolus 1. Cor. 15. & neq; ipse rediuius annunciaffet Apostolis veritatem Dei, neq; homines mortales qui sunt ex se pulvis, & cinis, facti essent spirituales, & filij Dei, qui Domino confiterentur, & annuntiarent aliis hominibus veritatem, id est, fidelitatem, & iustitiam Dei. Denique possunt hæc eadem verba tribui singulis Electis, qui post lapsum in culpam, pœnitentia ducti, clamauerunt ad Deum pro remissione peccati, vt possent Domino confiteri, & annuciare aliis peccatoribus veritatem promissionum Dei.

XIII.

*Audiuit Dominus, & misertus est mei, Dominus factus est adiutor meus.*

Ex hoc versiculo perspicuum est, verba versiculi decimi recte explicata fuisse pro tempore præterito. Affirmat igitur Prophetarum in persona sua tū in persona Christi, & Electorū, clamorem suum à Deo fuisse exaudutum. In Hebræo legitur, *Audi Domine & miserere mei, Dominus esto adiutor meus.* Sed eadem voces Hebraicæ sub alijs punctis reddunt lectionē, quam nos habemus. Proinde certum est, Septuaginta Interpretes aliter legisse, quam S. Hieronymus, & Hebræi posteriores legerint: neque dubitandum est, Septuaginta Interpretum auctoritatem in iisdem vocibus legendis præualere debere.

XIV.

*Conuertisti planctum meum in gaudium mihi, concredidisti saccum meum, & circumdediti me lætitia.*

Hic est effectus exauditionis. Dauid ex

misero exule Rex potens effectus; Christus ex mortuis resurgens, & de ipsa morte triumphans; Electus quisq; ex valle lacrymarum ad patriam celestem perueniens iustissime dicit, *Conuertisti planctum meum in gaudium mihi.* In Hebræo, pro, in gaudium, est in chorum, sed per chorum Hebraice, machol, intelligitur instrumentum musicum. Sensus est idem: sed vox Hebræa videtur paulo elegantius respondere voci præcedenti, ac si Latine diceretur, *Conuertisti in plantū cantum.* Quod sequitur, *concredidisti saccum meum, & circumdediti me lætitia,* significat mutationem vestis lugubris in vestem lætitiæ conuenientem. Dicit autem Prophetæ, *concredidisti,* & non, exuisti, vel spoliasti, quia quod exuitur, remanet integrum, quod scinditur, destruitur, vt vsui deinceps esse non possit. Itaq; significatur hoc loco, saccus miserie, vel mortalitatis, & passibilitatis plane destructus, vt nunquam amplius vsui sit futurus in Sanctis, ac multo minus in Christo, qui resurgens à mortuis, iam non moritur.

מחול

*Vt cantet tibi gloria mea, & non compungar, Domine Deus meus in æternum confitebor tibi.*

XV.

Hic est vltimus finis gloriæ Christi, & Sanctorum omnium, laus Dei. *Beati qui habitant in domo tua Domine. in sacula seculorum laudabunt te.* Illud, & non compungar, in Hebræo est, & non taceat, vt sensus sit, vt gloria mea cantet tibi laudem, & gratiarum actionem, & nunquam taceat, nunquam cesset à laude; cui recte subiungitur, *in æternum confitebor tibi,* id est, semper laudabunquam silebo. Sed quanquam hæc lect. satis cohæreat cum reliquis verbis, tam idem vocabulum Hebraicum, *iddom.* significat silere, & excidere siue succidere: & hanc significationem elegerunt Septuaginta Interpretes, & legerunt in prima persona, & non compungar, quod est idem cum eo, & non succidar. Est autem sensus, cantet tibi gloria mea, & non gemitus meus, ex timore mortis, vel peccati: vel cantet tibi gloria mea, & non amplius compungar aculeo mortis vel peccati.

R 2

PSAL.



## PSALMVS XXX.

Titulus &amp; Argumentum.

In finem Psalmus Dauid,  
pro Ecclasi.

**I**N hoc titulo nihil est noui, nisi illa vox Ecclasi, qua non habetur in Hebraeo, & fortasse non est addita à LXX. Interpretibus, sed ab aliquo alio interprete: nam in quibusdam solum exemplaribus illam se inuenisse Theodoretus testatur. S. quoque Hieronymus eam non habet, neque in versione sua ex Hebraeo, neque in commentario, ubi exponit versionem LXX. Interpretum. Quicumque illam particulam addidit, eam accepit ex versiculo 28. huius Psal. Ego autem dixi in excessu mentis meae. Significat autem ecclasis mentis excessum, cum animus ita intendit in rem aliquam, ut quasi corpus proprium deseruisse videatur. Oritur autem iste excessus, vel ex diuina aliqua reuelatione, quae rapit mentem in arcanum aliquod intueundum; vel ex vehementi passione timoris, vel amoris. Hoc autem loco, videtur intelligenda ecclasis ex timore repentino & maximo, quo Dauid correptus fuit, cum audiuit Absalonem filium, & omnem populum contra se constirasse. Quae historia habetur 2. Reg. 15. Videtur autem ad litteram Psalmus de Dauid fugiente persecutionem Absalonis intelligendus, ut Theodoretus & Euthymius volunt. Sed potest etiam ad Ecclesiam inter persecutionem angustias gementem, accommodari.

## EXPLICATIO PSALMI XXX.

**I.** **I**N te Domine speraui, non confundar in eternum, in iustitia tua libera me.

Dauid Rex fugiens persequentem Absalonem, omni humano auxilio destitutus, ad Deum recurrit, ac dicit, *In te speraui*, & ideo confido, quod nunquam frustrandus mea spe sim, quia tu omnipotens & fidelissimus es. Igitur iuxta hanc spem meam, libera me in tua iustitia, id est, ob iustitiam tuam, qua impios punire soles, & innocentes liberare.

*Inclina ad me aurem tuam; accelera vt eruas me.*

Quia persecutio vrgebat, & amici Dauid 2. Reg. 17. per nuncios ei significauerant, vt non quiesceret, sed fugere perseueraret, nisi opprimi vellet: ideo petit velociter exaudiri, & de imminente periculo erui.

*Esto mihi in Deum protectorem, & in domum refugij, vt saluum me facias.*

Verba sunt clara, quia LXX. Interpretes exposuerunt verba metaphorica, quae sunt in codice Hebraico; sic enim legunt ad verbum: *Esto mihi in petram fortissimam, & in domum munitissimam ad saluandum me.* Vocatur autem hoc loco petra fortissima, vel saxea rupes in sublimi posita, vel domus siue arx ex fortissimis lapidibus constructa: & tunc verba sequentia erunt explicatio praecedentium, vt sensus sit, *Esto mihi, o Deus, instar petrae durissimae, id est, instar domus siue arcis munitissimae, in quam tuto confugere possim.* Dicuntur autem haec omnia plane ad rem propositam aptissime. Nam Dauid fugiebat per campestria deserti, vbi nulla erat arx, in quam confugere posset.

*Quoniam fortitudo mea, & refugium meum es tu: & propter nomen tuum deduces me, & enutries me.*

Hic etiam exposuerunt Septuaginta metaphoras vocum Hebraicarum; sic enim legimus in Hebraeo: *Quoniam petra mea, & munitio mea es tu*, id est, sis tu mihi loco arcis lapideae & munitae, quoniam munitiorem aliam habere non possum. Quod sequitur: *Et propter nomen tuum deduces me, & enutries me*, optime respondet historiae. Dauid enim ob repentinam fugam, neque quo iturus esset sciebat, neque vnde alimenta conquireret: vnde diuina prouidentia factum est, vt ei Siba occurreret cum ducentis panibus, & centum alligaturis vuae passae, & duobus vtribus vini. Itaque ait, *propter nomen tuum*, id est, in gloriam nominis tui deduces me in locum tutum, & ad nutrimentum cibos prouidebis. Recentiores aliqui vertunt, *duces me & deduces me*; quod mirum est, cum vocem Hebraicam

II.

III.

IV.



נבִּל cam, *nabal*, non solum Septuaginta, sed etiam S. Hieronymus, tum hoc loco, tum in Psalmo 23. significare velint, *enutrire*, vel *sustentare*.

V. *Educes me de laqueo hoc, quem absconderunt mihi, quoniam tu es protector meus.*

Non solum, inquit, duces me ad locum tutum, & ibi enutries, sed etiam liberabis de insidiis, quas veluti laqueum absconditum tetenderunt mihi: vocat enim laqueum, occultam coniurationem factam cum Absalone in Hebron contra se, nihil tale metuentem, neque cogitantem. Ad illud, *quoniam tu es protector meus*, additur, *Domine*, in textu Græco, sed superuacaneum esse affirmat S. Hieronymus in epist. ad Suniam & Fretellam.

VI. *In manus tuas commendo spiritum meum, redemisti me Domine Deus veritatis.*

Quamvis bona spe dixerit, *educes me de laqueo hoc*, tamen quia de vita nondum securus erat, addit: *In manus tuas commendo*, vel, ut habetur in Hebræo & Græco textu, *commendabo spiritum meum*, id est, curam tuam commendabo vitam meam. Quoniam tu sæpe aliàs *redemisti me* de morte. Tu, inquam, *Domine*, qui es *Deus veritatis*, id est, Deus verissimus, vel Deus fidelissimus. Propter hunc locum suspiciantur aliqui totum Psalmum intelligendum esse de Christo: ipse enim in Cruce pendens dixit: *Pater in manus tuas commendo spiritum meum*. Sed etiam si Psalmus non intelligatur ad literam de Christo, tamen potuit Dominus hæc verba de hoc Psalmo accipere, cum spiritum suum Deo Patri commendare vellet. Quomodo etiam S. Nicolaus moriens, hunc Psalmum usque ad verba, quæ nunc exponimus, pronuntiavit; & nos frequentissime iisdem verbis utimur. Certe verba illa eiusdem versiculi, *redemisti me Domine Deus veritatis*, non recte tribuuntur Christo, cum sit ipse Redemptor, non redemptus. S. Augustinus Christo tribuit priora verba: *In manus tuas commendo spiritum meum*: posteriora

tribuit populo Christiano, *redemisti me Domine Deus veritatis*; vult enim S. Augustinus in hoc Psalmo frequenter mutari personas, & nunc loqui Prophetam, nunc vero Christum, nunc autem populum. Quod quidem recte & pie dicitur, cum mystica explicatio quæritur: sed cum sensus literæ investigatur, non videntur mutationes personarum intelligendæ, ubi non est distinctio, siue interpunctio, quæ notet finitam sententiam; hoc autem loco sine tali interpunctione continuantur verba totius versiculi in omnibus codicibus, Hebræo, Græco, & Latino.

VII. *Odisti observantes vanitates superuacue.*

VIII. *Ego autem in Domino speravi, exultabo & letabor in misericordia tua.*

Reddit aliam rationem, cur in manibus Dei commendauerit vitam suam: quia videlicet Deus odio habere soleat eos, qui non sperant in suo adiutorio; sed in rebus vanis, quæ nullum auxilium adferre possunt. *Odisti*, inquit, *observantes vanitates*, id est, somnia, vel auguria, vel responsa Dæmonum; quod fecit Saul, qui consuluit pythiissam. Potest etiam nomine vaaitatis intelligi industria, vel astutia humana, siue quodcunque consilium & auxilium hominum, quod sine Deo, vel contra Deum nullas vires habet, ideo additur, *superuacue*, quia frustra nituntur homines in rebus vanis. *Ego autem*, inquit, non observavi, neque aspexi res vanas, ut in illis confiderem; sed *speravi in Domino*, & ideo *exultabo & letabor in tua misericordia*, quia nimirum sperantes in Domino misericordia diuina non deserit. Ex Hebræo legunt recentiores, *odisti observantes vanitates*; & vere vox Hebræa, *sanethi*, significat, odiui: sed Septuaginta, & S. Hieronymus legerunt, *sanetha*, quod significat, odisti; proinde mutatio textus facta est post tempora S. Hieronymi. Sensus semper est verus, sed melius coheret cum sequentibus nostra lectio: non enim recte coniungitur, *odisti vanitates*, cum illo, *ego autem speravi*.



IX.

*Quoniam respexisti humilitatem meam, saluasti de necessitatibus animam meam.*

X.

*Nec conclusisti me in manibus inimici, statuisti in loco spatiofo pedes meos.*

Allegat præterea beneficia, vt gratum se ostendens; prouocet Deum ad similia concedenda. Sensus est, *exultabo & letabor in tua misericordia*, quoniam pignus habeo misericordiae, liberationem ex persecutione Saulis: tunc enim *respexisti humilitatem meam*, id est, abiectionem & afflictionem meam, hæc enim omnia significat vox Hebræa; *saluasti etiam tunc animam meam*, id est, de angustiis, in quibus necessario hærebam, neque inde me eximere poteram. In Hebræo ad verbum est, *Statuisti angustias anima mea*, sed sensus est idem, voluerunt enim Septuaginta non verbum verbo reddere, sed vtunque sententiam explicare. Id ipsum repetitur, vel explicatur sequenti versiculo: *Nec conclusisti me in manibus inimici*, id est, non permisisti, vt Saul, qui me quærebat ad necem, voto suo potiretur, sed, *Statuisti in loco spatiofo pedes meos*, id est, fecisti, vt ex angustiis, in quibus hærebam, liberatus, ambulare possem quocunque vellem, quasi in aperto & libero campo constitutus.

XI.

*Miserere mei Domine, quoniam tribulor: conturbatus est in ira oculus meus, anima mea, & venter meus.*

Ex recordatione præteritorum beneficiorum orat pro futuris, & narrat calamitates suas. *Miserere mei Domine, quoniam tribulor*, id est, sicut alias cum tribularem, misertus es mei, ita & nunc miserere mei, quoniam iterum me tribulatio inuasit. Incipit deinde tribulationes præsentis enumerare: *Conturbatus est in ira oculus tuus*. Illud, *in ira*, est ambiguum: nam potest intelligi de ira Dei, & de ira Davidis. Malim cum S. Augustino intelligere de ira Dei, constat enim ex lib. 1. & 2. Reg. Davidem in persecutione Absalonis, & in omnibus alijs persecutionibus nunquam excanduisse, sed mitissimum & patientissimum semper fuisse. Itaque sensus e-

rit, *in ira tua*, qua peccatum meum punis, *conturbatus est oculus meus*, id est, oculus corporalis præ lachrymis caligauit, vel, oculus interior obtenebratus est, conturbata est etiam anima mea, dum timore magno concussa est; & denique conturbatus est venter meus, venter, inquam, interior animæ meæ, id est, memoria; quæ est receptaculum cogitationum. Ita breuiter sanctus Propheta omnium trium animæ partium meminit, dum per oculum, intellectum; per animam, voluntatem; per ventrem, memoriam intelligi voluit.

*Quoniam defecit in dolore vita mea, anni mei in gemitibus.*

Ad senium iam David peruenerat, & vere dicit *defecisse vitam suam in dolore*, id est, ætatem consumptam in continuo mœrore, & annos in gemitibus. Nam primis triginta annis persecutiones fere continuas passus est: deinde ad Regni gubernacula adnotus, primis septem annis bellum gessit cum progenie Saulis: postea multa bella gessit tum cum vicinis nationibus, tum cum proprio filio. Denique ipsa gubernandi sollicitudo, si quis non pertunderet, sed cum timore Dei serio fungi velit officio, gemere facit sub onere.

*Infirmata est in paupertate virtus mea, & ossa mea conturbata sunt.*

Præter afflictiones totius vitæ præteritæ, accessit hæc vltima tribulatio, in qua propter inopiam debilitatus vires pristinas amisit. Idem enim significat, *virtus infirmata est, & ossa mea conturbata sunt*: nam per ossa intelligitur robur, sicut etiam per virtutem. Hæc ad literam verissima esse, historia lib. 2. Reg. c. 15. 16. & 17. aperte docet. Fugit enim David sine vlllo comæatu, & perrexit ad loca deserta, nec solum pedibus, sed etiam nudis pedibus iter fecit: vnde postea ab amicis comæatu adiutus fuit. In Hebræo pro paupertate, legitur, *iniquitate*, & sic vertit S. Hieronymus, *infirmata est in iniquitate virtus mea*: sed Septuaginta non legerunt, *hauoni*, vt legit S. Hieronymus, sed *honi*, in qua voce sunt eadem literæ, vna dempta, sed puncta diuersa: & illud *iniquitatem*, hoc paupertatem,

XII.

XIII.

עני  
עני



sem significat. Vterque sensus est verus: nam etiam si debilitas ex inopia alimentorum nata erat, tamen inopia illa ex iniquitate persequentium, & iniquitas persequentium ex peccato Davidis, quod eo modo puniebatur à Deo, sine dubio procedebat.

XIV.

*Super omnes inimicos meos factus sum opprobrium, & vicinis meis valde, & timor notis meis.*

Explicat aliam calamitatem suam ex nouissima persecutione exortam, quod videlicet cœperit despici à vicinis populis, qui audierunt tam turpem eius fugam: & noti eius atque amici cœperint timere, ne si illi adhaerent, de vita periclitarentur apud Absalonem, si forte is victor euaderet. Quod attinet ad verba, illud *super omnes inimicos meos*, in Hebræo est, *miccol zorerai*, sed Septuaginta, & S Hieronymus legerunt per *iota*, *zorerai*, quod potest exponi, *ab omnibus inimicis meis*, item, *apud omnes inimicos meos*: quæ vltima expositio placuit S. Hieronymo, qui vertit ex Hebræo, *apud omnes hostes meos*: & videtur etiam placuisse LXX. Interpretibus, nam veterunt, *παρὰ πάντας τοὺς ἐχθρούς μου*, quod significat, *ad omnes*, siue *apud omnes*. Sed lectio Latine editionis concordat cum secunda intelligentia vocis Hebraicæ, quæ est valde propria: idem enim est, *pra omnibus*, & *super omnes*. Prima intelligentia placuit quibusdam recentioribus, qui exponunt, *ab omnibus*, id est, propter omnes. Omnes intelligentiæ habent rectum sensum; itaque si legas, *super omnes inimicos meos*, sensus erit, *ego factus sum opprobrium vicinis, & timor notis*, magis quam vnquam has misérias passi sint vlli inimici mei, quamuis impij & iniusti, & sic exponit S. Augustinus. Si legas, *apud inimicos meos*, sensus erit, scientibus & ridentibus inimicis meis factus sum opprobrium vicinis meis, & timor notis meis, & hanc expositionem sequitur Theodoretus. Si legas, *ab omnibus inimicis meis*, sensus erit, multitudo & sæuitia inimicorum meorum effecit, vt essem opprobrium vicinis, & timor notis. Illa coniunctio, &, cum dicitur, & *vicinis*, recte restituta est vulgata

editioni: nam adest in Hebræo & Græco, & legitur ab antiquis Patribus.

*Qui viderunt me foras fugerunt à me, obliuioni datus sum, tanquam mortuus à corde.*

Declarat id quod dixerat, & timor notis meis, quasi dicat, multi ex notis meis, qui viderunt me ita fugientem & afflictum, foras fugerunt, id est, longe à me recesserunt, timentes vitæ suæ, si mihi iungerentur. Atque ita *obliuioni datus sum à corde*, id est, cor eorum non recordatur mei, neque de me cogitat, non secus ac si mortuus & sepultus essem, existimant enim de me iam actum esse. In Hebræo habetur interpunctio post particulam *foras*, hoc modo, *qui viderunt me foras, fugerunt à me*: & ideo quidam legi volunt, *foris*, non *foras*: (vox enim Hebræa vtrumque significat) & sensum esse volunt, *qui viderunt me foris*, id est, extra palatium nudis pedibus, capite cooperto, sine vllò insigni regio, *fugerunt à me*. Sed quanquam hæc etiam intelligentia recta sit, tamen non cogimur admittere interpunctionem codicis Hebraici, quæ addita est à Rabinis, cum in Græco nulla sit interpunctio, & Patres constanter legant, *foras*, non *foris*.

XV.

*Factus sum tanquam vas perditum, quoniam audiui vituperationem multorum commorantium in circuitu.*

XVI.

Nec solum, inquit, amici & noti obliuati sunt mei, & me dereliquerunt: sed etiam apud vicinos, qui in circuitu habitant, contemptui habitus sum: quasi *vas perditum*, i. contractum, ad omnia inutile, quod vel inde patet, quia ego ipse vituperantes me audiui. Videtur autem hoc loco Propheta mentionem facere vituperationis Semei, qui in faciem illi maledicere, & in eum lapides iacere ausus est: nimirum existimauit Semei, Dauidem à Regno deiectum nullius potentia deinceps futurum, sed tanquam vas inutile in cloacam proiciendum. Maledictio hæc describitur lib. 2. Reg. c. 16. Et quamuis in loco illo 2. Reg. solius Semei maledicentis mentio fiat, tamen credibile est, plures alios eodem.



dem tempore male loquutos fuisse de Dauide, ut verum sit, quod hic dicitur, *vituperantium multorum*. In Hebræo, pro *commorantium*, est *magor*, quam vocem S. Hieronymus vertit *congregationem*; alij vertunt *pauorem*: sed potest commodè etiam verti *commoratio rem*, nam verbum *gur*, unde sit *magor*, significat commorari, incolere, peregrinari, &c. Itaque sensus erit, *audui vituperationem multorum, commorationem in circuitu*, id est, qui habent commorationem in circuitu: sed Septuaginta sententiam clarius vertere voluerunt, ideo posuerunt, *multorum commorantium in circuitu*.

XVII.

In eo dum conuenirent simul aduersum me, accipere animam meam consiliati sunt.

Narrat historia 2. Reg. cap. 17. post maledictionem Semei, consilium initum coram Absalone, de Dauide occidendo, atque hoc est, quod in hoc versiculo commemoratur, quasi dicat Propheta, Dum in præsentia maledicor, & vituperantes me audio; in absentia consilium de me necando in Ierusalem initur.

XVIII.

Ego autem in te speravi Domine, dixi, Deus meus es tu, in manibus tuis sortes meæ.

Ostendit vir sanctus, inter tot angustias, se non despondisse animum; propterea quod spem suam non posuisset in auxilio fallaci hominum, sed in Deo omnipotente, cui nemo resistere potest. Ego autem in te speravi Domine, quare? quia dixi in corde meo, Deus meus es tu, magnum habeo protectorem, sine cuius nutu nemo mihi vitam eripere potest. Nam, in manibus tuis sortes meæ, id est, sortes vitæ vel mortis meæ non pendent à sorte, sed à manu tua, id est, à potentia & voluntate tua. In Hebræo habetur, in manibus tuis tempora mea, & fortasse, quod nunc legimus in Græco, κἀπορ, quod significat sortes, legendum esset, καί ποι, quod significat tempora: nam non desunt antiquæ versiones ex Græco, quæ habeant, tempora mea. Sic certe legitur in officio Mis-

sæ non semel, & in Psalterio Ecclesiæ S. Petri Romæ. Sensus autem est idem: nam, in manibus tuis tempora mea, nihil est aliud, nisi à tua voluntate pendent tempora vitæ & mortis meæ; non vitam, nisi quamdiu tu volueris, neque moriari, nisi quando tu volueris.

Eripe me de manu inimicorum meorum, & à persequentibus me.

XIX.

In hoc versiculo nulla est difficultas, & concordant omnes editiones.

Illustra faciem tuam super seruum tuum, saluum me fac in misericordia tua, Domine non confundar, quoniam inuocaui te.

XX.

Eandem petitionem inculcat, sed additis argumentis ad Deum flecendum appositis. Illustra faciem tuam super seruum tuum, id est, ostende faciem tuam, siue respice in me: hæc enim omnia idem significant. Sicut enim propter peccata Deus nobis irascitur, & auertere dicitur faciem, siue nubem opponere, & nos non respicere: ita è contrario quando reconciliatur, dicitur conuertere faciem, nosq; respicere & illuminare vultum suum super nos, ut nos luminosos efficiat. Petit igitur primum reconciliationem cum Deo, si forte aduersus sit, & addit pro argumento, se seruum eius esse promptum ad eius obsequium & obedientiam. Addit deinde, saluum me fac; hoc enim sequitur post reconciliationem, ut saluum faciat & liberet eum, cui reconciliatus sit, & adiungit argumentum, dicens: In tua misericordia, id est, non ob merita mea, sed ob misericordiam tuam. Addit postremo tertium argumentum, non confundar, quoniam inuocaui te: pertinet enim ad bonum & fidelem Dominum, qui promissit auxilium confidentibus in se, ut non confundat eum, qui tanta fiducia ipsum inuocare non cessat.

Erubescant impij, & deducantur in infernum, muta fiant labia dolosa.

XXI.

Prophetica imprecatio est, & continuo adimpleta. Nā Achitophel, qui erat parci-  
con-



consiliarius Absalonis, & consilium dederat perniciosissimum aduersum Dauid, dissipante Deo consilium eius, confusus est, & non ferens confusionem suam, laqueo se suspendit, & sic ad infernum deductus est impius, & *muta facta sunt labia dolosa*. Habetur historia lib. 2. Reg. c. 17. Vocatur autem Achitophel impius, quia filium ad necem patris concitabat: & labia eius recte dicuntur dolosa, quia simulauerat longo tempore se amicum, & fidelem Dauidi, & postea oblata occasione perfidiam suam prodidit. In Hebræo, pro *deducantur*, habetur *idemu*, quod S. Hieronymus vertit, *taceant*: sed Septuaginta non videntur legisse *idemu*, sed *iddecu*, quod significat *expellantur*, à verbo *nadach*.

XXII.

*Quæ loquuntur aduersus iustum iniquitatem in superbia, & in abusione.*

Hæc verba coniunguntur in Hebræo cum superioribus in eodem versiculo: in nostra editione constituunt nouum versum, sed quoad sensum pendunt à superioribus. Declarant enim labia illa dolosa Achitophelis iuste obmutescere debuisse, quia *loquebantur contra iustum*, id est, contra Dauidem, qui nullam iniuriam fecerat, neque ipsi Achitopheli, neque Absaloni; & loquebantur *iniquitatem*, id est, consilium iniquitate plenum, & *hoc in superbia & abusione*, id est, cum maxima arrogantia, & contemptu. Pro abusione, tam in Hebræo, quam in Græco est vox significans *contemptum*, & sic legunt S. Augustinus, & Psalterium S. Petri. Proinde abusus in Latina editione, non est accipiendus pro simplici abusione, sed pro ea, quæ nascitur ex contemptu, siue pro ipso contemptu: dicitur enim Achitophel, hoc loco, *loquutus esse in superbia & abusione*, quia superbe contemnebat Dauidem, & sic abutebatur eius nomine.

XXIII.

*Quam magna multitudo dulcedinis tuæ Domine, quam abscondisti timentibus te!*

XXIV.

*Perfecisti eis, qui sperant in te, in conspectu filiorum hominum.*

Iam sanctus Propheta exauditum se sentiens, ac diuina consolatione percepta, exclamat præ admiratione, *quam magna multitudo*, &c. In Hebræo solum habetur, *quam multa bonitas*, siue *dulcedo*. Sed Septuaginta explicare voluerunt admirationem Prophetæ, ideo dixerunt, *quam magna multitudo dulcedinis*, &c. Sed quia videtur quædam contradictio in his verbis, cum primo dicat, *quam abscondisti*, & deinde, *quam perfecisti in conspectu filiorum hominum*, ideo S. Augustinus coniungit illud, *In conspectu filiorum hominum*, non cum verbo, *perfecisti*, sed cum verbo, *qui sperant*, ut sensus sit, Deus abscondit multam dulcedinem timentibus se; quam eis daturus est in alia vita, nunc interim finens eos angustiis premi: eam vero dulcedinem *perfecit sperantibus in se in conspectu filiorum hominum*, id est, iis qui libere ostendunt hominibus, se esse Dei seruos, & sperare in Deo, & non timent confiteri, id quod sunt. Theodoretus, & Euthymius volunt coniungi illud, *In conspectu filiorum hominum*, cum verbo, *perfecisti*, & hunc sensum tradunt, Deus tempore tribulationis abscondit à timentibus se magnam dulcedinem, id est, mercedem, & præmia, ut eos exerceat: sed paulo post eandem mercedem, & eadem præmia palam ostendit in conspectu filiorum hominum, ut seruos suos bene sperare iubeat. Sic ad tempus Dauidi abscondit dulcedinem, cum videlicet is fugeret filij persecutionem, sed paulo post perfecit illi suam bonitatem, cum eum reduxit in Regnum cum maxima gloria. Id ipsum accidet omnibus iustis, quibus nunc absconduntur præmia, sed in die iudicii palam apparebunt. Potest adferri etiam alius sensus: *Quam magna multitudo dulcedinis tuæ Domine, quam abscondisti timentibus te*, id est, vere multiplex est consolatio tua Domine, quam infundis intus in abscondito cordis timentium te, id est, eorum, qui te colunt & diligunt, & filiali timore venerantur. Hoc est enim *manna absconditum*, quod nemo scit, nisi qui accipit, ut in Apocalypsi legimus. Hoc experiebatur qui dice-

bat.



bat, *Secundum multitudinem dolorum meorum consolationes tuas letificauerunt animam meam*: & ille, *Repletus sum consolatione, super abundo gaudio in omni tribulatione nostra*. Et si tempore tribulationis tanta est multitudo dulcedinis in corde militantis, quanta erit tempore gloriæ in corde triumphantis? *Perfecisti eis qui sperant in te, in conspectu filiorum hominum*, id est, eam dulcedinem perfecisti, perfectam, cumulatam, copiosissimam infudisti in corde sperantium in te, qui videlicet renunt conolari nisi in te, hoc autem totum fecisti in conspectu filiorum hominum, id est, ex aduerso, siue ex opposito filiorum hominum, id est, quanto illi magis multiplicat dolores exterius, tanto tu magis multiplicas consolationes interius.

XXV Nam vox Hebræa *neghed*, & Græca *ἐναντίον*, proprie significat è regione, siue ex opposito, vt etiam notauimus in Psalmo 23. proinde, vt verbum Hebraicum concordet cum Latino, & Græco, illud, *in conspectu*, non tam referendum est ad visionem, quam ad oppositionem, illa enim dicuntur esse inter se in conspectu, quæ è diametro opposita se respiciunt. Sed & illud præterea verum est: hanc dulcedinem infundi in cordibus timentium Deum, *in conspectu filiorum hominum*, id est, videntibus & stupentibus filiis huius sæculi, qui filios Dei suis persecutionibus vexant: nam quamuis filij hominum, id est, carnales homines non norint illam dulcedinem; imo ne suspicari quidem possint qualis sit, cum palatium animæ nimis infectum habeant, tamen vident effectum eius, dum intuentur, & obstupescunt patientiam, mansuetudinem, hilaritatem, & pacem Sanctorum. Sic igitur miro modo datur Sanctis abscondita quædam dulcedo in conspectu filiorum hominum, dum ea dulcedo in se latet, & in effectibus patet.

Declarat modum, quo sancti viri dulcedinem Dei in tribulatione percipiunt: id enim fit, cum Sancti per amorem, & contemplationem rapiuntur in Deum, & in ipso Deo inueniunt domum refugij: iuxta id quod in hoc eodem Psalmo dicitur, *Esco mihi in Deum protectorem, & in domum refugij*: qui enim in Deo delitescere norunt, nihili faciunt omnes tribulationes, ac si ad eos minime pertinerent. *Abcondes, inquit, eos, videlicet timentes te, in abscondito faciei tue*, id est, in loco abdito, quod est in facie tua: nam qui raptus est ad contemplandam faciem Dei, & qui se à Deo videri attentissime cogitat, quique obseruat nutus Dei, & qui pulchritudinem eius considerans accenditur in eius amorem, iam habitat in latibulo tutissimo à conturbatione hominum, id est, ab omni malo, quod homines conturbare solet. *Proteges eos*, id est, eosdem timentes te, *in tabernaculo tuo*, id est, in teipso, in quo & tu habitas. Deus enim non habet aliam domum, siue aliud tabernaculum in quo capi possit, nisi seipsum, & qui per amorem & contemplationem in Deo habitant, altissimum posuerunt refugium suum, non accedet ad eos malum, neque flagellum appropinquabit tabernaculo eorum, vt dicitur in Psalmo 90. Proteguntur autem in hoc tabernaculo ab omni malo, non solum factorum, de quo dictum est in superiori versiculo, sed etiam verborum, quod hic dicitur, *à contradictione linguarum*, quia nihil curant sermones hominum, qui Deum testem habent. Quod si facies Domini tam insigne latibulum siue tabernaculum est hominibus timentibus Deum, dum per speculum & in ænigmate cernitur: quid erit, quando videbitur sicuti est? tunc vere habitatio nostra erit in Ierusalem, quæ est visio pacis, de qua dicitur, *Qui posuit fines tuos pacem*.

XXV. *Abcondes eos in abscondito faciei tue à conturbatione hominum.*

XXVI. *Proteges eos in tabernaculo tuo à contradictione linguarum.*

*Benedictus Dominus, quoniam mirificauit misericordiam suam mihi in ciuitate munita.*

Quæ dixerat generatim de consolatione diuina, quam viri iusti in tribulatione percipiunt

XXVI.



piunt, applicat ad se, qui vnus est ex illis, & inde gratias agit Deo. *Benedictus*, inquit, *fit Dominus, quoniam mirificauit*, id est, mirabilem misericordiam erga me ostendit, *in ciuitate munita*, id est, abscondens me in abscondito faciei suae, quod est veluti ciuitas munitissima, vt iam mihi nihil nocere possit. S. Augustinus legit, *in ciuitate circumstantia*, in quo nescio quos Latinos codices sit sequutus: nam vox Hebraea *masfor*, munitionem significat, vox Graeca *περιουχία*, ambitum designat, atque inde S. Augustinus *circumstantiam* accepit: sed Theodoretus & Euthymius Graeci auctores intelligunt per *ambitum*, moenia siue aggeres, quibus ciuitates muniuntur, vt sensus sit, *in ciuitate ambitus*, id est, in ciuitate moenibus, vel aggeribus munita. Et S. Hieronymus non solum in versione ex Hebraeo, sed etiam in Commentario vbi exponit versionem Septuaginta, legit, *in ciuitate munita*.

XXVIII.

Ego autem dixi in excessu mentis meae, proiectus sum a facie oculorum tuorum.

Accusat ipse se diffidentiae, quam passus fuerat initio persecutionis. *Ego autem dixi in excessu mentis meae*, id est, eo tempore, quo praenimio terrore quasi mentis inops factus eram, dixi apud me, *Proiectus sum a facie oculorum tuorum*, id est, non placet tibi vt amplius regnem, vel vt diutius viuam, ideo abiecasti me a benigno aspectu tuo & fauore, atque auxilio tuo solito me destituisti. Exeat dubitationis huius vestigium in lib. 2. Reg. cap. 15. *Si inuenero gratiam*, inquit, *in conspectu eius, reducet me, si dixerit mihi, non places, praesto sum, faciat mihi quod bonum est coram se*. Pro voce, *in excessu mentis*, in Hebraeo est, *bechophzi*, quod ad verbum significat, in festinando me, id est, dum festinare, siue, in obstupescendo & pauendo me, id est, dum obstupescerem & pauerem: nam verbum *chaphaz*, significat festinare, & obstupescere ac pauere, & omnia sunt vera: nam Dauid illud dixit, cum festinaret egredi ex Hierusalem, & pauore ac stupore correptus esset. Hunc stuporem Septuaginta verterunt, *confusum*, & Latini, *excessum mentis*.

Ideo exaudisti vocem orationis meae, dum clamarem ad te.

Sententia perspicua est, *ideo*, inquit, ne diffiderem de bonitate tua, cum me in tanta consternatione videret, continuo *exaudisti vocem orationis meae, dum clamarem ad te*. Illud *ideo*, posset etiam verti, *vere*, siue certe, est enim aduerbium multa significans.

Diligite Dominum omnes Sancti eius, quoniam veritatem requirit Dominus, & retribuet abundanter facientibus superbiam.

Viriliter agite, & confortetur cor vestrum, omnes qui speratis in Domino.

Hortatur in fine Psalmi homines pios, qui similia patiuntur, vt non cessent diligere Dominum, atque in eo sperare, quoniam etiam si ad tempus impij videantur impune grauari, tamen breui poenas acerbissimas dabunt. Illud, *veritatem requirit Dominus*, S. Hieronymus vertit, *fideles seruat Dominus*: vox Hebraea, vtrumque significat, *veritatem*, & *fidelitatem*, & etiam *fideles*, & sensus in idem recidit. Illud, *abundanter*, in Hebraeo & Latino, ambiguum est, vtrum coniungi debeat cum verbo, *retribuet*, an cum verbo, *facientibus*: sed ex Graeco apparet, coniungendum esse cum verbo, *facientibus*, & eodem modo S. Hieronymus vertit ex Hebraeo, *Retribuet*, inquit, *his qui satis operantur superbiam*, & S. Augustinus, *Retribuet his, qui multum superbiunt*: eodem modo Theodoretus, & alij veteres.

PSALMVS XXXI.

Titulus, & Argumentum.

Ipsi Dauid Intellectus.

**H**IC titulus, indicat Dauidi post commissum peccatum, per Dei gratiam apertos fuisse oculos mentis, vt intelligeret, quam



quam graviter deliquisset, quod antea carnali delectatione occisus, intelligere non potuerat. Indicat etiam idem titulus, Psalmum esse obscurum, atque ad eum penetrandum dono intelligentia opus esse. Iure hic idem Psalmus à S. Gregorio, & aliis inter septem poenitentiales numeratur, cum totus consumatur in peccato proprio deslendo, & in cohortandis hominibus ad poenitentiam.

## EXPLICATIO PSAL. XXXI.

I. **B**eatī quorum remisse sunt iniquitates, & quorum tecta sunt peccata.

II. *Beatus vir cui non imputavit Dominus peccatum, nec est in spiritu eius dolus.*

Nemo melius novit, quam dulcis sit sanitas, quam is, qui amissam deslet. Prophetā David tunc primum vere cognovit, quam dulce sit erare peccatis, quando amaritudinem peccati gustavit. Hæc est causa cur Psalmum poenitentiae ordiatur à laude indulgentiæ & innocentiae: hæc enim sanam reddunt animam, & opponuntur agrotationi, quæ contrahitur ex peccatis. Incipit ab indulgentia, tum vt à minoribus ad maiora progrediatur, tum quia illa erat recentissima eius sanitas. *Beati quorum remisse sunt iniquitates.* Exclamatio est, & prædicatio boni, quod est in indulgentia, quasi dicat, O quam sunt illi felices, qui posteaquam peccaverunt, non despiciuntur à Deo, sed per gratiam eius excitati, convertuntur ad poenitentiam, & perveniunt ad indulgentiam. *Et quorum tecta sunt peccata,* idem repetitur aliis verbis, nam peccata eum remittuntur, absconduntur & teguntur, vt nusquam appareant; sed de hac voce paulo post plura dicemus. *Beatus vir cui non imputavit Dominus peccatum.* Transiit ab indulgentia, quæ est multorum, ad innocentiam, quæ est paucissimorum, ac dicit, O vere beatus ac felix quicumque ille est, qui nihil fecit, quod in peccatum reputari poterit, cui proinde Dominus, cuius

rectissimum iudicium est, nihil omnino ad peccatum imputavit, Nec solum factio non peccavit, sed nec dolus inuentus est in spiritu eius, id est, neque verbo, neque cogitatione peccavit: spiritus enim ad utrumque spiritum referri potest, ad illum, quo sapimus, & dicitur cor, aut mens, & ad illum, quo loquimur, & dicitur spiritus oris, siue labiorum. De priore dicit Apostolus, 1. Corinth. 2. *Quis enim scit, quæ sunt hominis, nisi spiritus hominis, qui in ipso est,* De posteriore, 1. Corinth. 14. *Orabo spiritu, orabo & mente psallam spiritu, psallam & mente.* Porro innocentiam hoc loco intelligimus, non naturalem, vel operibus propriis sine dono Dei acquisitam, quæ nulla est, sed eam, quam Deus paucis quibusdam singularis gratiæ suæ dono impertivit, quibus ita remisit peccatum aliena voluntate contractum, id est, originale, vt non permiserit eos peccatum mortiferum propria voluntate committere: quod est genus excellentis remissionis. Proinde omnis innocentia annexam habet remissionem aliquam peccati, & de omnibus, Christo excepto, dici potest, *Omnes peccaverunt, & egent gloria Dei.* Itaque Apostolus ad Rom. 4. hunc Psalmi locum adducit, ad probandum, neminem iustificari ex operibus præcedentibus gratiam, & ait, *Ei qui non operatur, credenti autem in eum, qui iustificat impium, reputatur fides eius ad iustitiam: secundum propositum gratiæ Dei: sicut & David dicit: beatitudinem hominis, cui Deus accepto fert iustitiam sine operibus, beati quorum remissa sunt iniquitates, & quorum tecta sunt peccata: beatus vir cui non imputavit Dominus peccatum.* Quibus verbis Apostolus Prophetam exponit, ac dicit, Davidem non vocare beatos eos, qui propriis operibus iustitiam adepti sunt, sed eos quibus Deus per gratiam peccata remisit, iustitiamq; donavit. Porro videtur mihi Prophetā singulares quosdam homines respexisse, cum ait, *Beatus vir cui non imputavit Dominus peccatum,* &c. videlicet S. Iob, qui de se ait cap. 27. *Non recedam ab innocentia mea: iustificationem meam, quam cœpi*



*tenere, non deseram: neque enim reprehendit me cor meum in omni vita mea.* Item Abelem, Henoch, Noe, Abraham, Isaac, Iacob, quorum nulla peccata in Scripturis leguntur. Fortasse etiam in spiritu praeuidebat Hieremiam, & Ioannem Baptistam in vero sanctificatos, & ipsam Deiparam Virginem excellentiori privilegio, à peccato Originali, & ab omni actuali præservatione. Quod attinet ad verba, in Hebræo habetur in singulari, *Beatus, cui remissa est iniquitas, & cuius rectum est peccatum:* sed muratis punctis, potest legi, *beati quorum remissa sunt iniquitates*, quam lectionem esse verissimam, satis magno argumento nobis est, editio Septuaginta ab Apostolo confirmata. Rursus in codice Græco habetur, *in ore eius*, pro eo quod est in Hebræo, & in Latino, in spiritu eius: sed sanctus Hieronymus in epistola ad Soniam & Fratellam testatur, illud in ore eius esse ex translatione Symmachi, Septuaginta vero & omnes alios Interpretes vertisse, *in spiritu eius*, ut est in Hebræo Hæretici huius temporis, tria falsa dogmata ex his versiculis statuere conantur: ac fortasse Spiritus sanctus, ideo titulum fecit huic Psalmo, *Intellectus*, quia praeuidebat à multis perperam intelligendum: Dicunt igitur illi, iustificationem in sola peccatorum remissione, non in iustitiæ infusione consistere. Dauid enim absolute dicit, *beatos*, id est, iustos, *quibus sunt remissa peccata.* Addunt præterea, hanc ipsam remissionem peccatorum, non esse remissionem peccatorum veram, sed imputationem; quia videlicet Deus non tollat peccata, sed tegat, & non imputet. Denique colligunt ex hoc loco, nullam esse necessariam satisfactionem post remissionem culpæ: quia si pœnam quamvis temporalem exigeret Deus ab homine iustificato, non vere diceret se non imputare peccatum: quomodo enim non imputat, si punit? Sed Propheta sanctus, qui in titulo posuit intellectus Dauid, intelligebat omnino remissionem peccati non fieri à Deo sine infusione iustitiæ, ac per hoc intelligebat per iustificationis gratiam, homines,

fieri ex impijs, non solum non impios, sed etiam vere iustos: sicut enim sol corporalis non expellit tenebras nisi lucem infundat, sic etiam sol iustitiæ, & Pater luminum non remittit peccata, nisi per gratiam, siue iustitiam quam infundit. Quare S. Paulus ad Rom. 4. citans hunc locum Psalmi, *Beatus vir cui non imputavit Dominus peccatum*, ita loquitur, *Sicut & Dauid dicit, beatitudinem hominis, cui Deus accepto fore iustitiam sine operibus*: quibus verbis Apokolus indicavit, in remissione, seu non imputatione peccati vere includi iustitiam. Sed tam prior, quam posterior error adhuc apertius refelleretur, declaratione vocum tegi, & non imputari. Dicuntur enim peccata tegi hoc loco, non quod sint, & non videantur, sed quod abolita sint, & eorum loco iustitia successerit: & ideo vere recta sint & abscondita etiam oculis Dei, cui nihil tegi, vel abscondi potest eorum, quæ usquam extant. Quocirca idem Propheta varijs metaphoris, utitur ad remissionem peccatorum significandam, ut quod vni deest, per alteram suppleatur. Sed illa præter cæteras insignis est in Psalmo 50. *Asperges me Domine hyssopo & mundabor, lauabis me, & super niuem dealbabor*: quò loco dicitur peccatorum remissio non solum tegere maculam, sed vere abluere, & non solum vere abluere, sed addere nitorem: nec solum tollere nigredinem, sed addere albedinem tam veram, ut niuis candorem superare dicatur. quid est autem tollere maculam, & addere nitorem, nisi tollere peccatum, & infundere gratiam? quid auferre nigredinem, & ponere candorem, nisi auferre iniustitiam, & donare iustitiam; Quod enim legimus in primo cap. Isaïæ, *Si fuerint peccata vestra sicut coccinum, quasi nix dealbabitur, & si fuerint rubra sicut vermiculus, velut lana alba erunt.* Porro Sancti Patres, Gregorius Nazianzenus oratione in sanctum Lauacrum, Augustinus, & Gregorius Papa in commentario huius Psalmi, ut ostendant peccata tegi non esse manere, & non videri, sed plane tolli, ut ideo non videantur quia non sunt, dicunt,



cunt, peccata tegi à Deo in iustificatione, quomodo vulnera teguntur emplastro à medico, per quod emplastrum ita vere curantur, & tolluntur, ut nusquam appareant. Origenes quoque lib. 4. in epist. ad Rom. & Theodoretus in hunc locum, dicunt his vocibus significari, peccatum ita funditus eradici, ut ne vestigium quidem remaneat. Iam vero quod attinet ad vocem imputationis, toto cælo aberrant adversarij. Peccata enim non imputari in Scripturis sanctis est, non adscribi ad reatum, siue non referri in rationes, quod vulgo Italice dicimus, *Non si mettere à conto*. Sapient. 12. *Quis tibi imputabit, si perierint nationes, quas tu fecisti?* id est, quis exiget à te rationem, si perierint omnes homines? vel quis te ob hoc reum faciet? & Ezech. 33. de peccatore poenitente, dicit Deus, *Omnia peccata qua peccavit, non imputabuntur ei*, id est, non reddet rationem de eis. 2. Paralip. 30. *Dominus bonus propitiabitur cunctis, qui in toto corde requirunt Dominum Deum Patrum suorum, & non imputabit eis, quod minus sanctificati sunt*, id est, facile condonabit, nec re vera exiget rationem, de eo quod minus parati sint. Iob. 24. *Ut non imputetur vobis stultitia*. 2. Timoth. 4. *Omnes me dereliquerunt, non illis imputetur*, & in epist. ad Philemonem. *Si aliquid nocuit tibi aut debet, hoc mihi imputa, ego reddam*, id est, adscribe rationibus meis, ego debitor tuus esse volo. Cæterum duobus modis potest non imputari peccatum. Primo si re vera aliquis non peccaverit, & proinde nihil debeat: & hoc modo intelligitur id, quod ex libro Sapientiæ citauimus, *Quis tibi imputabit, si perierint nationes, quas tu fecisti?* Nam etsi perirent omnes homines, non culpa Dei perirent, proinde non posset hoc imputari Deo. Et eodem modo nos supra exposuimus verba Davidis, *Beatus vir cui non imputauit Dominus peccatum*, id est, qui nihil mali propria voluntate fecit, ob quod reus ac debitor sit coram Deo. Secundo, si peccatum remissum & condonatum fuerit, ut iam non sit, quod imputetur, & sic intelliguntur omnes aliæ sententiæ supra citatæ: & sic etiam multi in-

relligunt locum Psalmi, *Beatus vir cui non imputauit Dominus peccatum*, id est, Beatus vir à quo Deus non vult exigere rationem peccati, quia iam illud remisit, & donauit; & hanc expositionem non rejicimus, sed superiorē anteponendam existimamus, quia melius continuatur cum verbis sequentibus, *Nec est in spiritu eius dolus*. Tertius modus imputationis, quem finxerunt hæretici, ut non imputari peccatum, sit, peccatum quidem hære in anima peccantis, sed non reputari peccatum à Deo, nullo exemplo scripturæ probari potest, sed apertissime potius improbat, cum Scriptura dicat, tum a libi. tum Psalmo 5. *Odisti omnes, qui operantur iniquitatem, perdes omnes qui loquuntur mendacium*. nam si Deus odit, & vult perdes iniquos, certe dum manet in eis iniquitas, imputatur eis peccatum. Et quis credat Deum iustum iudicem, & qui non accipit personas, non imputare peccatum, sed imputare iustitiam eo tempore, quo homo adhuc in sordibus peccati versatur, & quidquid agit, ex Lutheranorum placitis, peccatum est, Pulchre sanctus Iustinus Martyr in dialogo cum Tryphone refellens errorem sumilem errori Lutheranorum, ait, *Beatus vir cui non imputabit Dominus peccatum*, id est, cui poenitenti Deus peccata remittet, non sicut prædicatis vos in etipfos fallentes, & alij quidam vestri similes asseuerant, etiam si peccatores fuerint, modo Deum nouerint, non imputabit eis Dominus peccata; hæc ille. Hoc quod diximus de non imputatione peccati, potest ostendi ex contrario, ex imputatione iustitiæ. Nam imputari iustitiam in Scripturis, non est, reputari hominem iustum, cum re vera iustus non sit; sed est reputari iustum diuino iudicio, quod falli nequit, eum, qui verissime iustus sit. Siquidem illud Genes. 15. *Credidit Abraham Deo, & reputatum est ei ad iustitiam*, quod allegatur ab Apost. Paulo ad Rom. 4. & ab Apost. Iacobo c. 2. nihil aliud significat, nisi, actum illum credendi fuisse in Abrahamo opus iustum, & pro tali reputatum à Deo. Et illud Psal. 105. *Stetit Phinees & placauit, & cessauit quassatio, & reputatum est ei ad iustitiam in genera-*



riore & generationem usque in sempiternum, quid aliud significat, nisi zelum illum Phinees, quo interfecit impios quosdam, fuisse opus iustissimum, & à Deo pro tali habitum, ut propterea confirmaverit filijs & nepotibus Phinees Sacerdotum in longissima tempora. Eodem pertinet illud quod est in eap. 4. ad Roman. *Ei qui operatur, merces non imputatur secundum gratiam, sed secundum debitum.* Quid enim hoc est, nisi mercedem iuste debere ei, qui operatur opus dignum mercede; non igitur imputari, est reputari, ac si esset: sed reputari, sicuti est. Et quod in eodem loco sæpius repetit Apostolus, *fidem reputari ad iustitiam*, non significat fidem non esse, sed reputari iustitiam: sed significat fidem per charitatem operantem verissimam esse iustitiam, non ex operibus gratiam præcedentibus acquisitam, sed à Deo donatam & infusam, & ideo pro vera iustitia à Deo reputari, & acceptari. Sic igitur peccatum non imputari, non significat, peccatum manere, sed non puniri: sed significat, nihil esse in homine iustificato, quod in peccatum reputari possit. Ex his facile intelligitur unico verbo solui posse, quod Lutherani obijciunt de satisfactione. nam si non imputetur peccatum, quia innocenter aliquis vixit, non mirum erit, si nulla satisfactio requiratur ab eo, cui hoc modo peccatum non imputatur: sin autem non imputatur, quia remissum est per gratiam; tum si remissum fuerit quoad culpam & poenam æternam, non imputabitur ad culpam & poenam æternam, sed adhuc imputabitur ad poenam temporalem: sicut factum videmus in Davide, cui dictum est à Propheta, *Domine transulit peccatum tuum à te, nō morieris, sed quia blasphemare fecisti inimicos nomine Domini, filius, qui natus est tibi, morietur.* Vbi videmus imputari peccatum quoad mortem propriam, & imputari quoad mortem filij: & Davidem fuisse iustificatum, & tamen debuisse dolorem magnum de morte filij tolerare, in poenam peccati commissi. Quod si aliquando peccatum remittatur omnino quoad omnem poenam, tunc etiam non imputabitur ad viliū reatum, vel debitū.

*Quoniam tacui, inueterauerunt ossa mea, dum clamarem tota die.*

Proposita beatitudine iustificatorum, deslet miseriam suam, quasi dicat: Illi quidem sunt beati; sed ego miser sum, qui non solum innocentiam non servaui, sed longo tempore distuli per confessionem peccati indulgentiam querere, & ideo post agnitam culpam meam, cepi tam assidue clamare, & rugitu me ipse macerare, ut debilitata sint, & attrita ossa mea, i. fere consumptum omnino robur meum, *Quoniam tacui*, re vera longo tempore David peccatum adulterij tacuit, imo multis artibus occultare conatus est, primo enim Vriam multis modis inducere tentavit, ut cum vxore propria dormiret, ut filius ex adulterio conceptus, ipsius Vriæ proprius putaretur. Et cum Vrias ad domum propriam accedere nollet, adiecit David crimen homicidij, ut Vria sublato, & illius vidua in vxorem continuo ducta, partus qui post novem menses expectabatur, crederetur esse Davidis non adulteri, sed mariti. Nec tamen vidua illa in vxorem assumpta, continuo David peccatum confessus est, sed expectavit, ut filius nasceretur. Et ne tunc quidem peccatum desleret cepisset, nisi à Propheta Nathan admonitus fuisset. Itaque annum fere integrum, & fortasse etiam diutius David in cœno peccati iacuit, & confessionem distulit. Propterea dicit, *quoniam tacui*, & non continuo peccatum confessus sum, sed abscondere, & occultare volui; ideo *inueterauerunt ossa mea, dum clamarem tota die*, id est, post agnitum peccatum tota die pro indulgentia clamare cepi, & tam diu, ac tanto affectu clamaui, ut ossa mea, debilia & vetusta facta sint. Vox Hebræa *balu*, significat *inueterauerunt*, & etiam consumpta sunt, siue attrita sunt, ut veritit Sanctus Hieronymus, proinde illud, *inueterauerunt*, non est referendum ad tempus, sed ad debilitatem: quomodo accipitur illud Thren. 3. *Vetustam fecit pellem meam*, id est, attritam, nigram, &c. Illud etiam, *dum clamarem*, in Hebræo ad verbum est, *dum rugire*.

Ex



Ex quo intelligimus, clamorem illum fuisse clamorem doloris, & compunctionem, qui recte rugitus dici potest; non autem clamorem exultantis in peccato, vel superbe iactantis peccata sua, ut aliqui exponunt. Neque putamus fuisse rugitum ex corporali morbo, ut alij volunt: non enim Scriptura prodit Dauidem ægrotasse illo tempore: & aliquid sine Scripturæ testimonio affirmare; diuinare est; sed rugitum penitentis, ut cum Theodoro nos exposuimus.

IV. *Quoniam die ac nocte grauata est super me manus tua, conuersus sum in ærumna mea dum configitur spina.*

Multa mala propter peccatum Dauidi contigerunt, nam filius natus ex adulterio infans mortuus est, & filia nomine Thamar ab Amon fratre per incestum polluta est, & idem Amon ab Absalone fratre occisus est, & Absalon aduersus patrem dimicans, & ipse cæsus est: quæ omnia summos dolores Dauidi attulerunt, ut 2. lib. Regum narrat historia. De his igitur diuinis flagellis dicit, *Quoniam die ac nocte grauata est super me manus tua*, id est, assidue, sine intermissione flagella super me ingeminare non cessas: dicitur enim grauare manus super aliquem, qui non leuiter eum, sed grauius percutit. *Conuersus sum in ærumna mea, dum configitur spina*, id est, propter huiusmodi flagella conuersus sum ad cognitionem grauitatis peccati mei in ærumna mea, dum spina tribulationis configitur mihi, id est, tribulatio, atque ærumna mentis oculos aperuerunt, quos carnis illecebra, & voluptas clauferant. Posset etiam per spinam intelligi cum Sancto Hieronymo stimulus conscientie, ut sensus sit, *conuersus sum in ærumna mea*, dum stimulus conscientie pungit. In Hebræo & Græco additur, *mihi, dum configitur mihi spina*: ideo in Latino subintelligi debet. In Hebræo habentur alia verba atque alius sensus, *conuersus est viror meus in siccitates æstatis*, id est, omnia mea bona perierunt, quomodo viror humor in æstate solis ardore siccatur & pe-

rit. Sed Septuaginta legerunt aliter, quam nunc habeatur, in codicibus Hebraicis, nam pro, *ne hephac le sodd, conuersus est viror meus*, legerunt, *ne hephacti le sodd*, quod est, *conuersus sum in ærumna mea*, & sic etiam legit sanctus Hieronymus, qui vertit ex Hebræo, *versatus sum in miseria mea*. Illud vero quod sequitur, *be carboni Kaita*, in siccitates æstatis, legunt Septuaginta, *be carboni Kots, dum adurit me spina*, quod idem est cum eo, quod nos habemus, *dum configitur spina*, dum enim configitur spina, certe adurit, & vastat, quod significat verbum, *charab*. Itaq; minima mutatione purpatorum, & vnius vel alterius literæ similis, videmus inueniri posse lectionem, quam Septuaginta Interpretes habuerunt, veriorum autem esse lectionem, quæ erat in codicibus Septuaginta Interpretum, ea quæ nunc est in codicibus nostris, quibus Rabini puncta addiderunt, dubitare non possumus.

*Delictum meum cognitum tibi feci, & iniustitiam meam non abscondi.*

V.

Ex conuersione ad cognoscendam peccati magnitudinem, de qua dixit in verticillo superiori, factum est, ut peccatum suum, non amplius taceret, neque occultaret, sed palam confiteretur Deo, & hominibus. In Hebræo habetur in futuro, *cognitum faciam*, sed ponitur futurum pro præterito, cuius temporis est verbum, quod sequitur, *abscondi*. In Græco non habetur, *tibi*, sed in Hebræo habetur, & in Græco subintelligitur. Porro illud, *cognitum tibi feci*, non significat Deo fuisse ignotum, antequam Dauid illud confiteretur: sed loquitur more humano. Iudex enim etiam si sciat delictum rei, quia ipse vidit fortasse illud committi; tamen non dicitur scire iudice, nisi reus ex testimonio plurium testium sit conuictus, aut ipse reus aperte confiteatur, adactus fortasse ad confessionem per tormenta. Sic igitur Deus viderat quidem Dauidem peccantem, sed volebat eum aperte confiteri, ideo flagella quasi questionem adhibuit. Tum vero Dauid confiteri cœpit, nec ait solum,

pecca-

הפך  
שדי  
הפכתי  
לשדי  
כחרכו  
ני  
קיע  
כחרכו  
ני  
קיע  
חרב



peccavi Domino, quod ante flagella dixit priuatim ad Nathan Prophetam, sed publice notum fecit Domino peccatum suum, id est, iuridice confessus est, & per Scripturam Psalmorum toti mundo peccatum suum manifestauit: ideo verissime addit, *& in iustitiam meam non abscondi*

VI.

Dixi, confitebor aduersum me iniustitiam meam Domino, & tu remisisti impietatem peccati mei.

Ad solatium poenitentium declarat ineffabilem Dei misericordiam, quam in se ipse expertus est. Quamuis enim Deus, qui lux est, & tenebra in eo non sunt ulla, summo odio prosequatur tenebras peccatorum, & nisi peccator resipiscat, paratus sit eum proicere in tenebras exteriores, ad summum & sempiternum cruciatum: tamen ita propensus est ad ignoscendum, si quis ex corde poenitentiam agat, ut ipsam etiam confessionem miserando & parcendo praeueniat. Videtur respicere tempus illud, quo Nathan Prophetam Dei nomine exprobrauit illi peccatum suum, & ipse continuo compunctus, dixit: Peccavi Domino, & Nathan subiunxit: Dominus quoque transtulit peccatum tuum, non mortis. Viden enim tam subitam indulgentiam, cogitauit quod erat verum, remissionem peccati priorem fuisse ipsa confessione, sed non priorem interna contritione, in qua simul fuit odium peccati, amor Dei, propositum confitendi & satisfaciendi. Ait igitur: Dixi, confitebor, id est, compunctus corde statui continuo confiteri aduersum me iniustitiam meam, meque reum & peccatorem aperte fateri, & tu non expectasti vocem illam, qua dixi, peccavi Domino, sed ex paterna & ineffabili benignitate remisisti impietatem peccati mei, quod ex Prophetam tuo Nathan cognoui, qui ait, Dominus transtulit peccatum tuum a te. In Hebraeo habetur, iniquitatem peccati mei, in Graeco, impietatem cordis mei, & sic legunt veteres in Commentariis, Augustinus, Theodoretus, Euthymius. Latinus interpres videtur accepisse impietatem, ex Graeco, & peccati mei, ex Hebraeo. Sed omnia in idem recidunt, nam impietas

cordis dicitur, quia corde concipitur: impietas peccati dicitur, quia peccatum committitur. Idem etiam Davidis peccatum, & fuit iniquitas respectu Viri, & fuit impietas respectu Dei.

Pro hac orabit ad te omnis sanctus, in tempore opportuno.

VII.]

Veruntamen in diluuium aquarum multarum, ad eum non approximabunt.

VIII.]

Exemplo suo dicit Propheta multos futuros, qui discant orare Deum pro indulgentia peccatorum, ut hoc modo liberentur à magnis malis, quibus aliquando peccatores inuoluendi sunt. Pro hac, Graeci Interpretes, Theodoretus & Euthymius, & cum eis S. Augustinus, exponunt, Pro hac impietate, quia impietas Graece & Latine, est generis feminini: sed vox Hebraea est generis masculini, & non concordat cum ea illud, pro hac, quod etiam in Hebraeo est generis feminini: ideo cogimur dicere, pro hac, significare, pro hac re, siue pro hoc: nam Hebraei vtuntur genere feminino pro neutro. Et posset etiam recte verti, propter hoc, siue, super hoc. Itaque sensus erit, hac de causa, id est, quia tu tam clementer ignoscis poenitentibus, orabit ad te, id est, fiduciam te orandi sumet omnis sanctus, id est, omnis pius, omnis vere poenitens, qui incipiens odisse impietatem suam, incipit induere pietatem tuam. Orabit autem in tempore opportuno, id est, antequam tempus misericordiae finiatur, dum haec vita durat, dum ad poenitentiam Deus inuitat. Quante Deum, inquit Isaias, dum inueniri potest, innocate eum, dum prope est, Isaiæ 55. Quod sequitur, duplicem habet sensum; vnus est, orabit ad te omnis sanctus in tempore opportuno, ut in diluuium aquarum multarum, aqua illa ad eum non appropinquet, id est, ut in die nouissimo, quando veluti diluuium quoddam inundabunt super impios omnia genera poenarum, & praeterierit tempus opportunum orationis & poenitentiae, tunc ipsi salui sint ab eiusmodi poenis. Hic sensus in Hebraeo clarissimus est: sic enim ad verbum S. Hieronymus vertit:

T

Pro



*Pro hac orabit ad te omnis misericors tempus inueniens, ut cum inundauerint aqua multa, ad illum non accedant.* Et hunc sensum sequitur Theodoretus, quamus paulo aliter exponat, nimirum sic: *Pro hac orabit ad te omnis sanctus, in tempore opportuno, ut cum inundauerint aqua multarum tribulationum, ad illum non accedant,* id est, illum non perturbent, sed illis omnibus superior sit, easq; imperterritus perferat. Aliter sensus est, *orabit ad te omnis sanctus in tempore opportuno, & recte ac sapienter faciet:* nam in diluuiio aquarum multarum, cum inundauerint mala super omnes impios in die nouissimi, sic inuaduerint aqua diluuii temporibus Noë, tunc impij ad eum, id est, ad Deum, non appropinquabunt: non enim erit amplius tempus opportunum; ideo Isaias ait: *Inuocate eum dum prope est,* nam aliquando procul erit, ut ad eum appropinquare non possitis. Sic exponit S. Augustinus, & alij. Vterq; sensus verus est, sed prior videtur magis literalis, nam illud, *ad eum non appropinquabunt,* non videtur posse secundum literam referri ad Deum, cum nulla sit facta mentio Dei in verbis præcedentibus. Itaque illud, *veruntamen,* pro copulatiua particula accipiendum est, vt Euthymius recte monet, & vox Hebræa, *rac,* non solum significat *veruntamen,* sed etiam *certe, vere,* &c.

Tu es refugium meum à tribulatione,  
quæ circumdedit me: exultatio mea. erue  
me à circumdantibus me.

Accepta indulgentia, quoad culpam, petit etiam indulgentiam, quoad poenam, liberationem videlicet a tribulatione, in quam incidit propter peccatum. Videtur autem loqui de persecutione, quam patiebatur ab Absalone filio, de qua in toto Psalmo superiore loquutus est. Fortasse etiam loquitur de tentationibus Dæmonum; quæ perpetuo nos circumdant et tribulant. *Tu es refugium meum à tribulatione, quæ circumdedit me.* Quasi dicat, non habeo tutum refugium, nisi in misericordia tua, quoniam vndique deficiunt amici, et vndique cingor ab inimicis: ideo tu, qui solus es *exultatio mea*, id est

causa omnis meae latitiae, *erue me ab hostibus circumdantibus me.* In Hebræo habetur: Tu es refugium meum ab angustia, vel, ab hoste, *custodies me: exultationibus liberandis circumdabis me.* Sed manifeste apparet, puncta Rabinorum, & aliquam literarum mutationem totum hunc locum perturbasse. LXX. Interpretes non legerunt, *tizzereni, custodies me, à nazar, sed tizzereni, obsidebit me, siue circumdabit me, à zur, & futurum ponitur pro præterito, ideo vertitur, quia circumdedit me.* Neq; legerunt, *ronne paltet, exultationibus liberandi, sed, ronni paltet, exultatio mea libera, siue erue.* Sanctus quoque Hieronymus ex Hebræo vertit, *laus mea, unde legit, ronni, non ronne, ut hodie habetur in Bibliis Hebraicis.* Denique non legerunt Septuaginta, *tesobebeni, circumdabis me, sed, misobebene, à circumdante me.*

Intellectum tibi dabo, & instruam te  
in via hac, qua gradieris; firmabo super te  
oculos meos.

Respondet Dominus orationi serui sui, ac pollicetur auxilium, quod petebatur. Tria promittit: Primo, prudentiam interiorē, ut possit cauere insidias hostium, & discernere amicos ab inimicis, dum dicit: *Intellētum tibi dabo*, id est, intelligentem & prudentem te faciam. Secundo, auxilium externum singularis prouidentiae Dei, sine quo in multis periculis homines etiam prudentissimi versantur, & hoc significat illud: *Instruam te in via hac, qua gradiēris*: Nam in Hebræo est, *Offendam tibi viam*, per quam ambules: in Græco vero, *Comitabor te in via*, siue, *simul tecum gradiar*. Ex quibus omnibus intelligimus, illud, *instruam te in via*, significare directionem, & ducatum in omnibus actionibus. Dicitur enim Deus ostendere viam, & comitari nobiscum, ut dux itineris, & quando auxilio gratiae suae facit, ne erremus in via morum, & ne in pericula & insidias hostium, praecipue inuisibilibium, incidamus. Tertio, perseverantiam in gratia, quod est maximum beneficium, & proprium electorum Dei. *Firmabo in-*  
quē,



quit, *super te oculos meos*, non auertam oculos à te, sed perseueranter & stabiliter oculo benignitatis te aspiciam, proinde auxilium internum prudentiæ, & externum prouidentię semper tibi aderit. In Hebræo habetur, *deliberabo super te oculo meo*, siue, ut vertit S. Hieronymus, *cogitabo de te oculo meo*, reddere potest, *oculis meis*, vel, *oculos meos*, itaque in illa voce nulla est difficultas. Suspicio autem pro voce, *ihaza*, *cogitabo*, vel, *deliberabo*, Septuaginta legisse, *ehatfom*, *firmabo*, vel, *roborabo*: quomodo enim fieri potest, ut viri doctissimi per verbum, *ihaza*, quod significat, *deliberare*, *consilium inire*, *cogitare*, intellexerint, *firmare*, & *roborare*? Si tamen lectio Hebraica, ut modo se habet, cum Græca & Latina concilianda sit, oportebit subintelligere vocem, *semper*, ut sensus sit, *cogitabo semper de te oculo mentis meæ*, quod est idem cum illo, *firmabo super te oculos meos*.

איעה

אעצום

קצי

XI.

*Nolite fieri sicut equus & mulus, quibus non est intellectus.*

Hortatur nunc demum Propheta fideles omnes tam bonos quam malos, ut ab exemplo suo discant mala, quæ consequuntur peccatum, & bona, quæ consequuntur penitentiam & virtutem, ipse enim omnia expertus erat. Ac primum ad malum conuersus dicit, *nolite fieri sicut equus & mulus, quibus non est intellectus*, id est, nolite duci solis sensibus, cum ratione præditi sitis: nolite sicut equi & muli hinnire ad vxores proximi vestri, sicut ego feci: nolite tanquam indomiti & feroces equi vel muli, pauperes atque humiles morsu & calcibus impetere, ut ego aduersus Vriam feci.

XII.

*In camo & freno maxillas eorum constringe, qui non approximant ad te.*

Prædicat mala, quæ eos sequuntur, qui equos & mulos imitari voluerint, cogentur enim tribulationibus, vel ad Deum conuerti, vel certe impediuntur, ne noceant aliis quantum vellent. Sed more Prophetico hanc prædictionem exprimit Dauid per modum imprecationis. *In camo*, inquit, & *freno maxil-*

*las eorum constringe*, qui non approximant ad te, id est, capistro & fræno quasi equos & mulos coërcibus, qui recusant ut homines ratione præditi sponte accedere ad te per obedientiam. Ridicule Calvinus contendit, non esse legendum, *in camo*, sed, *in lupato*, quasi mulum intersit inter hæc vocabula, & quasi ipse sapientior sit LXX. Interpretibus, qui verterunt, & *camus*, unde est nostrum *in camo*, & S. Hieronymo, qui ex Hebræo vertit *in camo*, & S. Augustino, Theodoro, & aliis veteribus, qui omnes legunt *in camo*. Porro *camus* funem significat, siue capistrum, quo alligantur equi. Sed hoc loco metaphorica vocabula sunt *camus* & *frænum*, & ponuntur ad significandas calamitates & ærumnas, quibus Deus utitur ad coërcendos homines à peccatis, id quod exponitur sequenti vericulo, in Hebræo habetur in singulari, *maxillam eius*, sed non solum Septuaginta, sed etiam S. Hieronymus vertit in numero multitudinis, *maxillas eorum*. Ex quo intelligimus, puncta non recte in nostris Bibliis vbique esse collocata: nam secundum alia puncta, eadem vox significat *maxillas eorum*.

*Multa flagella peccatoris, sperantem autem in Domino misericordia circumdabit.*

XIII.

Hæc est declaratio cami & fræni, quasi dicat Propheta, peccator impenitens, & qui complacet sibi in peccato, multis flagellis atteretur, tum in hac vita, tum in futura. Quamuis enim interdum peccatores florere videantur, tamen ipsum peccatum est grauissima pœna, quæ parit alias pœnas sine numero; sollicitudines, anxietates, timores, pericula, remorsum conscientię, & similia: neque his contentus Deus iustus Iudex multa alia flagella adiungit, & nisi peccator resipiscat, & oret ad Deum in tempore opportuno, sine dubio ad flagella sempiterna perueniet. Contra, iustus, qui sperat in Domino, & non confidit in vanitate mortalium, ab ipsa misericordia diuina vndique circumdabitur, ut à nulla parte flagellum ad eum accedere possit. Porro misericordia diuina



fontes est omnium bonorum; ideo cum dicitur: *misericordia circumdabit sperantem in Domino*, significatur cumulus omnium bonorum, quo abundantissime fruuntur, qui vni Deo adherent. Nam, ut saepe diximus, quid nocere potest ei, cui omnia cooperantur in bonum, & cuius omnes passionem conuertuntur in gloriam? Ideo recte concluditur Psalmus illis verbis:

XIV. *Latamini in Domino, & exultate iusti; & gloriamini omnes recti corde.*

Sicut in principio beatos dixit iustos, ita nunc in fine eosdem hortatur ad lætitiā, quæ est etiam quasi ex obliquo exhortatio ad perseverandum in iustitia, ut perseverare possint in lætitia. *Latamini in Domino, & exultate iusti*, id est, magnam habetis, o iusti, materiam gaudendi & exultandi, sed *in Domino*, qui vobis est causa tantorum bonorum, quibus affluitis; non est cur tristemi ob temporalia detrimenta, pro quibus rependetur vobis in æternitate mensura bona, conferta, coagitata, & superfluens, & hic interim spiritualis consolatio non vos deficiat. Et *gloriamini omnes recti corde*, idem aliis verbis repetitur. Nam gloriarī, hoc loco, non est efferre seipsum laudibus, ut sonat vox Latina, sed est iubilare, ut sonat vox Hebræa, id est, cum lætitia laudare Deum, & non semel in Scripturis gloriarī accipitur pro lætari & exultare, ut cum dicit Apostolus ad Rom. 5. *Sed & gloriamur in tribulationibus*. Verbum quod proprie significat in Hebræo *gloriarī*, habetur Psal. 51. in principio: *Quid gloriaris in malitia?* Hoc autem loco non est idem verbum, sed aliud, quod significat, *iubilare*. Per *rectos corde*, intelligimus iustos; nam ex rectitudine cordis oritur rectitudo verborum & operum: illi autem sunt iusti, quorum corda, voces & opera conformia sunt rectissimæ regulæ, quæ est lex diuina: ex qua rectitudine fit, ut Deus placeat homini, & homo placeat Deo: & quicquid tandem volente vel permittente Deo accidat homini, æquo animo accipiat: atque ita sit in corde non solum iustitia, sed etiam pax & gaudium in Spiritu Sancto, id est, Regnum Dei, ut Apostolus

interpretatur ad Rom. 14. proinde rectissime David ait: *Beati quorum remissa sunt iniquitates, &c. & Latamini in Domino, & exultate iusti, &c.* quia soli iusti sunt beati, & vero solidè; gaudio perfruuntur.

## PSALMVS XXXII.

Titulus & Argumentum Psalmi.

Psalmus David.

**H**ic Psalmus caret titulo apud Hebræos. Illud autem, Psalmus David, postum est à LXX. Interpretibus, qui tamen disertis verbis admonuerunt, nullum se titulum in Hebræis codicibus reperisse. Argumentum Psalmi est exhortatio ad iustos homines, ut Deum laudent, ob eius maximam potentiam, providentiam & bonitatem: hortatur autem iustos, tum quia non est speciosa laus in ore peccatoris; tum quia potentia, providentia & bonitas Dei ipsis potissimum iustis utilissima est.

## EXPLICATIO PSALMI XXXII.

**E**xultate iusti in Domino, rectos decet collaudatio.

*Exultatio*, quæ hic ponitur, significat laudem cum lætitia. S. Hieronymus vertit, *Laudate iusti Dominum*: sed vox Hebræa utrumque significat, ideo plenus sensus est, laudate cum exultatione, id est, laudate non inuiti, non tristes; non negligenter, sed ex magno affectu iubilantes & exultantes in cordibus vestris, laudate Dominum non solum animo, sed etiam voce. Reddit rationem, cum addit, *rectos decet collaudatio*, quasi dicat, vos iustos inuito potissimum ad laudandum Deum, quia vobis potissimum conuenit laudare Deum: per *rectos* intelligit iustos, ut etiam diximus in fine Psalmi superioris. Sed congruit hoc loco, ut iusti dicantur



dicantur recti, quia rectis placet Deus, qui est ipsa rectitudo, & quod placet libenter laudatur. Distortis non placet Deus, cuius opera & iudicia rectissima sunt & ideo non quadrant voluntatibus iniquorum: inde iniqui & distorti non libenter Deum laudant sed reprehendunt, & blasphemant. Pro verbo, decet, in Hebræo est nomen speciosa, & sensus est, in ore rectorum speciosa est laus Dei: atque huc alludit Ecclesiasticus ca. 15. cum ait, *Non est speciosa laus in ore peccatoris*. Pro voce, collaudatio in Hebræo, & Græco est, *laus*: sed Latinus Interpres posuit, *collaudationem*, ut significaret debere iustos non solum singillatim, sed etiam coniunctim laudare Deum.

II. *Confitemini Domino in cithara, in psalterio decem chordarum psallite illi.*

Hortatur rursus iustos, ut confiteantur Domino confessionem laudis, non solum voce, sed etiam instrumentis musicis, quæ erant in usu illius gentis. Mystice autem significatur, ut Deum laudemus non solum verbis, sed etiam operibus, ac præsertim perfecta observatione Decalogi significati per psalterium decem chordarum, ut *videntes ceteri homines opera nostra bona glorificet Patrem nostrum qui in celis est*. Notant hoc loco Basilius & Augustinus, citharam resonare ex parte inferiore, psalterium ex parte superiore. Vnde colligitur, Deum esse laudandum ex cognitione Dei, quæ habetur ex creaturis, vnde existit sonus citharæ, & ex ea, quæ habetur ex revelatione diuina in Scripturis sanctis, vnde existit sonus Psalterij.

III. *Cantate ei canticum nouum, bene psallite ei in vociferatione.*

Coniungit quasi per epilogum, quæ dixerat in duobus versiculis superioribus. Dixerat, ut voce laudaremus. & instrumentis psalleremus: vtrumque coniungit, & monet, ut omnia accurate, & diligenter fiant. *Cantate ei canticum nouum*, hoc pertinet ad illud, *Exultate in Domino*, &c. Iubet autem ut exultantes laudemus Deum cantico aliquo non visitato, & veteri, sed recens composito accommodate ad rem præsentem.

*Bene psallite in vociferatione*, pertinet ad id quod subiunctum est, *Confitemini in cithara*; &c. & iubet, ut hoc ipsum bene & accurate fiat, & non frigide, ac summissa voce, sed magno cum sonitu, quo magnitudo affectus significetur. Itaque illud, *in vociferatione* non debet referri ad voces humanas tantum, sed etiam ad voces instrumentorum musicorum. S. Hieron. vertit, *in iubilo*, & S. August. legit, *in iubilatione*. Vox Hebræa significat *iubilationem*: vox Græca, *geminatum clamorem*. Recte monent sancti Patres Basilius & Augustinus, canticum nouum opponi cantico veteri. Canticum vetus est, quod solet canere homo vetus, qui natus ex carne caro est, & terrena sapit, ac in terrenis delectatur, & hic Deum laudat, cum bona temporalia ab eo recipit: at canticum nouum canit homo nouus, qui renouatus spiritu mentis suæ, celestia sapit; & in æternis delectatur, & Deum semper laudat, etiam cum flagellatur, quia nouit flagella etiam cooperari in bonum. Sic etiam per illud, *bene psallite ei in vociferatione*, admonemur dum psallimus, benefacere hoc diuinum opus, attente, deuote, magno cum affectu, & cordis iubilo. S. Benedictus in regula sua monet, psalmodiam esse opus Dei, & ideo ceteris omnibus operibus anteponendum. Er S. Bernard. serm. 47. in Cantica, Vos, inquit, moneo dilectissimi, pure semper, ac strenue diuinis interesse laudibus. Særenue quidem, ut sicut reuerenter, ita & alacriter Domino assistatis, non pigri, non somnolenti, non osecitantes, non parentes vocibus, non præcidentes verba dimidia, non integra transilientes, non fractis & remissis vocibus muliebri quidquam balba de nare sonantes, sed virili ut dignum est, & sonitu, & affectu voces sancti Spiritus deponentes.

IV. *Quia rectum est verbum Domini, & omnia opera eius in fide.*

Incipit explicare rationes, cur Deus sit tanto affectu laudandus, quæ sumuntur, ut diximus, à bonitate, potentia & sapientia eius. De bonitate dicit, *Rectum est verbum*

T ; Domi-



domini, & omnia opera eius in fide, id est, quia verba & facta Domini iustissima, fidelissima, & sanctissima sunt: hoc est quod Psalm. 144. aliis verbis dicitur, *Fidelis Dominus in omnibus verbis suis, & sanctus in omnibus operibus suis*. Verbum Domini intelligitur mandatum, prohibitio, promissio, comminatio, & hæc omnia rectissima & fidelissima sunt: nihil enim iubet Deus nisi bonum, nihil prohibet nisi malum, & quod promittit, vel comminatur, fidelissime præstat. Ideo rectum est verbum Domini, & fidelis Dominus in omnibus verbis suis: opera vero Domini verbis conformia sunt; ideo dicuntur esse in fide, id est, fidelia, iusta, sancta, & dicitur Deus sanctus in omnibus operibus suis. S. Basilii, & S. Augustini in commentario huius Psalmi, per fidem intelligunt hoc loco fidem Catholicam, & exponunt, opera Dei dici esse in fide, quia ex operibus Dei, ut ex fabrica cæli & terræ inspecta homines mouentur ad fidem, ut videlicet credant in Deum opificem tanti operis; vel dicunt opera omnia esse in fide, quia omnia opera bona, quæ Deo placent, sunt in fide tanquam in semine vel radice; non enim placent Deo quæ fiunt ante fidem, sed quæ nascuntur ex fide. Ambæ sunt piæ veræque sententiæ, sed non videntur literales explanationes.

V. *Diligit misericordiam & iudicium: misericordia Domini plena est terra.*

Sanctitas verborum & operum Domini nascitur ex sanctitate voluntatis. Deus enim diligit misericordiam & iudicium, id est, amat primum largiri dona gratiæ suæ, & postea secundum opera vniuscuiusque reddere præmia, vel supplicia, atque ita omnes viæ Domini misericordia & veritas. In Hebræo habetur, diligit iustitiam, & iudicium, sed Septuaginta Interpretes, scientes confundi duas illas voces, *zedech*, & *chesed*, id est, iustitiam & misericordiam, sæpe verterunt iustitiam, ubi legunt, *chesed*, aliquando (ut hoc loco) vertunt misericordiam, ubi legunt, *zedech*. Quod si interpretari velimus verbum Hebræicum ut sonat,

dicendum erit in prima parte versiculi declarari bonitatem voluntatis diuinæ ex parte iustitiæ: in altera parte, nimirum misericordia Domini plena est terra, declarari eandem bonitatem ex parte misericordiæ. Sed iuxta nostram lectionem dicendum est, in prima parte declarari bonitatem ex parte misericordiæ & iustitiæ: in secunda, docere misericordiam latius patere quam iustitiam, & esse, ut alibi dicitur, *super omnia opera eius*, nam ad misericordiam pertinet tollere miseriam, & defectum: nihil autem est quod non indigeat misericordia Dei cum omnia omnino creata defectum aliquem patiantur. Sed res corruptibiles, quæ sunt infra Lunam, tanto plures & maiores defectus patiuntur, quam res incorruptibiles, quæ sunt supra Lunam, ut respectu corruptibilium non videantur incorruptibilia vllum habere defectum, ideo dicit Propheta *Misericordia Domini plena est terra*: nam per terram intelliguntur omnia corruptibilia, terra enim sedes est non solum hominum mortalium, & animalium terrestrium, & omnium plantarum, sed etiam piscium; & avium, quamvis enim aves volitent in aere, & pisces perambulent semitas maris, tamen & illæ, & isti quiescunt in terra. Porro omnia corruptibilia egent multiplici misericordia Dei, creante, conseruante, mouente, nutriente, reparante. Sed homines mortales, præter ista omnia, egent misericordia præueniente, comitante, subsequente, indulgente peccata, armante contra Dæmones, dirigente, protegente, &c. Itaque rectissime dicitur, *misericordia Domini plena est terra*. Hoc loco illud etiam considerandum est, misericordia perfectam, ad quam pertinet tollere omnes defectus, esse propriam solius Dei, qua non potest tollere omnes defectus, nisi qui caret omni defectu, ac per hoc est infinitæ perfectionis, actus purus æternus, omnipotens: itaque recte Ecclesia canit, *Deus cui proprium est misereri*.

*Verbo Domini cæli firmati sunt. & spiritu oris eius omnis virtus eorum.*

Trans-



Transit à laude bonitatis ad laudem potentie, cuius primarius, & maxime conspicuus effectus est fabrica cœli. Auger autem potentiam Dei; quod tantam molem non solum fecit, sed sine labore, sine mora temporis, sine ministris sine machinis, solo verbo fecit, & eis æternam stabilitatem attribuit. Alludit autem Propheta ad creationem mundi, quæ describitur in 1. cap. Genes. per ea verba: *Dixit Deus, Fiat firmamentum, & factum est firmamentum, & vocavit firmamentum cœlum.* In Hebræo habetur, *Verbo Domini cœli facti sunt*, sed Interpretes verterunt; *firmati sunt*, ut declararent cœlos factos esse incorruptibiles. Quod sequitur, *& spiritus oris eius omnis virtus eorum*, posset videri repetitio quædam: nam *verbum*, & *spiritus oris*, idem fere sunt, & firmitas cœlorum, & virtus cœlorum pro eodem accipi posset, nisi in Hebræo esset vox *Zeuam*, quæ significat, *exercitus eorum*, siue *ornatus eorum*, ut vertit S. Hieronymus, LX.X. Interpretes, pro eodem accipiunt virtutem & exercitum, quia revera exercitus natus est virtus, id est, potentia & robur Principis. Per virtutem, siue exercitum, siue ornatum cœli intelliguntur stellæ, quæ sunt veluti castrorum cœlestium acies ordinata, & simul mirifice cœlum ornant, & virtutes suas variosq; influxus in hæc inferiora diffundunt. Quamvis autem per *verbum Domini*, & *spiritum oris eius*, possit imperium Domini simpliciter accipi: tamen sine dubio Spiritus sanctus insinuare voluit per hæc verba mysterium sanctissimæ Trinitatis, quod tempore novi Testamenti revelandum erat. Neque mouere nos debet, quod videatur Propheta creationem cœli tribuere Verbo, & creationem stellarum Spiritui sancto, quasi Dominus Pater per Verbum cœlos fecerit, per Spiritum sanctum stellas. Nam propter unitatem essentiae, quæ est virtus operatrix, indiuisa sunt opera Trinitatis; & ideo cum dicitur Deus Pater per verbum creasse cœlos, intelligitur non sine Spiritu sancto id fecisse: & cum dicitur Virtus, siue exercitus cœlorum esse à Spiritu oris Domini, intelligitur esse etiam à Verbo

quod ab eiusdem Patris ore procedit, & à quo Verbo Spiritus ipse procedit.

*Congregans sicut in vire aquas maris, ponens in thesauris abyssos.*

VII.

Pergit explicare potentiam Dei, qui non solum cœlos, & stellas Verbo fecit, sed etiam ea facilitate omnes aquas, quæ initio creationis mundi operiebant vadique terram, coëgit in loca inferiora & profundiora terræ, qua facilitate implet homo virem vnum aqua, vel recondit pecunias in arca, vel loculis. *Congregans sicut in vire aquas maris*, id est, congregans est, siue congregat Deus aquas maris in locum vnum, ac si virem impleret; id est, facillime, nulloque negotio. Idem repetitur sequentibus verbis; *Ponens in thesauris abyssos*, id est, ponit Deus abyssos, multitudinem videlicet & profunditatem aquarum, quæ erant super terram, & pertingebant vsque ad cœlum, ponit, inquam, omnem illam aquarum immensitatem in angustis terræ cauernis; ac si reconderet pecunias in thesauris. Abyssum esse aquarum multitudinem, quæ initio creationis erat super terram, perspicuum est ex 1. capite Genes. *Et tenebræ erant super faciem abyssi*, per thesauros, significatur aliquando copia rerum pretiosarum, aurum, argenti, lapidum pretiosorum, ut eo loco, *Simile est regnum calorum thesauro abscondito in agro*; aliquando significatur per thesaurum, locus eiusmodi rerum preciosarum, ut arca, vel loculi, ut in verbis illis, *Omnis scriba doctus in regno cœlorum profert de thesauro suo noua & vetera*, & de Magis legimus, apertis thesauris suis obtulerunt ei munera, aurum, thus & myrram. In hæc posteriore significatione accipitur hoc loco thesaurus. Dicit autem Propheta in tempore præsentis, *congregans & ponens*, cum tamen ab initio hæc facta sint, quia Deus ita semper conseruat, quod initio fecit, ut vere dici possit semper id facere. In Hebræo pro *vire*, habetur, *ned*, quod aceruum significat: sed Septuaginta, & sanctus Hieronymus legerunt, *nod*, quod *virem* significat, & hæc est verior lectio; & melius explicat

נד  
נאד



plicat congregationem aquarum in locum unum id est, in caueinas terræ, quam Propheta significare volebat. In Hebræo & Græco deest præpositio, in & legitur, *Congregans sicut vitem aquas maris*: sed omnino subintelligitur, & recte habet nostra editio, *sicut in vire*, & non deerant olim Græca exemplaria quæ haberent, *in vitem*, vt notat sanctus Basilius, & sanctus Augustinus semper legit in vitem. Qui legunt, *sicut vitem*, existimant significari nubes, quæ intumescunt sicut vites, & postquam aquam effuderint, detumescunt: sed literalis, sensus est is, quem supra posuimus.

VIII.

*Timeat Dominum omnis terra: ab eo autem commoueantur omnes inhabitantes orbem.*

Ex iis quæ dicta sunt de potentia Dei, occasione accepta, David hortatur homines, vt Deum timeant, eiusque mandata præuaricati formident. *Timeat igitur, inquit, omnis terra dominum*, tantæ potentia & maiestatis: & mox explicat id ipsum, dicens, *Omnes inhabitantes orbem* (hoc est enim omnis terra) commoueantur, id est, contremiscant ab eo Domino, videlicet aliquid iubente.

IX.

*Quoniam ipse dixit & facta sunt, ipse mandauit & creata sunt.*

*Quoniam ipse dixit & facta sunt, ipse mandauit, & creata sunt.* Optima ratio, cur solus Deus timendus sit, quia videlicet quidquid est extra Deum, nihil nobis nocere potest, nisi Deus permiserit: & contra, nihil est extra Deum, quod nos ab eius ira defendere possit: omnia enim ab eius nutu dependent, à quo habent, vt sint, Ratio autem cur Deus omnia fecerit Verbo, est, quia Verbum eius plenum est potestate & auctoritate, ita vt sit mandatum atque imperium, cui nihil resistit: ideo adiungitur, *ipse mandauit, & creata sunt*, In Hebræo habetur ad verbum, *ipse dixit, & fuit, ipse mandauit, & floruit*. Sed sensus est idem: significant enim verba Hebraica, *ipse dixit*, & omnis creatura facta est: *ipse mandauit*, & omnis creatura existere cepit.

*Dominus dissipat consilia gentium: reprobat autem cogitationes populorum, & reprobat consilia principum.*

Venit tandem Propheta ad Sapientiam, vt ostendat omni ex parte Deum esse laudandum. *Dominus dissipat consilia gentium*, id est, ita supereminet sapientia Dei supra omnem omnium hominum sapientiam, vt quidquid homines consultando deliberrant, quamuis consilia eorum sapientissima, & prudentissima videantur, Deus in momento infatuare, dissoluere, irritum facere possit. Idem repetitur sequentibus verbis cum dicitur, *Reprobat autem cogitationes populorum*. id est, Deus reprobat tanquam stultas cogitationes populorum omnium: nec solum populorum, sed etiam ipsorum Principum, qui consiliariis in omni doctrinarum genere abundant, consilia, deliberationesque, vt plane insipientes & inutiles reprobat. Et vere mirabilis est sapientia Dei, quæ sapientes in astutia sua comprehendit, & ineffabili ratione ita nunquam consilia illorum infatuat, vt quæ utilissima sibi esse iudicant, & perniciem, & interitum illis adferant. In Hebræo non habetur illud, *& reprobat consilia Principum*, fortasse excidit iniuria temporum, vel incuria libratorum.

X.

*Consilium autem Domini in æternum manet, cogitationes cordis eius in generatione, & generationem.*

XI.

Dominus quidem inscrutabili sapientia sua dissoluit humana consilia, vt finem sibi propositum non assequantur. Contra autem, humana prudentia nihil omnino potest aduersus consilium Dei: quidquid enim semel decreuit Deus, stabile in æternum erit. *Omne consilium meum stabit, & omnis voluntas mea fiet, dicit Dominus*, Isaia 45. Non est autem consilium Dei consultatio quædam præcedens electionem, neque sunt in Deo multæ cogitationes, sed vnico, & simplicissimo actu ab æternitate decreuit Deus, quidquid vnquam facturum est. Sed Scriptura accommodat se nostræ imbecillitati nostrisque verbis utitur, ideo



dicat, *Consilium Domini in aeternum manet*, id est, quod Deus quasi consultando decreuit, nullo modo dissolui potest, nec impediri quo minus executioni mandetur. Idem repetitur aliis verbis, cum additur, *Cogitationes cordis eius in generatione, & generationem*, id est, quæ Dominus cogitauit facere, nullo tempore impediuntur, sed fient prorsus eo modo, quo ipse fieri voluit. Nec tamen ita se accommodat Scripturæ nostræ infirmitati, vt non sit veritas in eius verbis: nam etiam si non est in Deo consilium, præcedens electionem, tamen est in Deo quidquid perfectionis reperitur in consilio, cognitio videlicet omnium mediolorum ad assequendum finem vtilium, & quamuis in Deo vna sit & simplicissima cogitatio, ea tamen æquiparatur innumerabilibus cogitationibus, quas in se eminentissimo modo continet.

XII.

*Beata gens, cuius est Dominus Deus eius, populus, quem elegit in hereditatem sibi.*

Ex iis, quæ dicta sunt de potentia, sapientia, & bonitate Dei, colligit Propheta beatum esse populum, cuius Deus non est aliud idolum inutile, sed ille potentissimus, sapientissimus, & optimus Dominus, cuius laudes explicatæ sunt; tunc autem vere, perfecteque felices, ac beati sumus, quando & nos magnum illum Dominum pro Deo habemus; & ipse nos pro peculiari suo populo habet: ideo Propheta vtrumque coniungit cum dicit, *Beata gens, cuius est Dominus Deus eius*, id est, beati sunt illi homines, qui pro Deo non agnoscunt, nisi vnum illum Dominum, cuius verbo cæli firmati sunt, &c. & simul, *beatus populus, quem elegit Dominus in hereditatem sibi*, id est, beati sunt illi homines, quos ille idem magnus Dominus elegit in populum peculiarem, & quasi propriam possessionem & hereditatem. Sunt autem ista duo ita connexa, vt separari non possint, illi enim soli Deum verum pro Deo suo habent, qui illum fide, & spe, & charitate colunt: illi autem soli Deum fide, & spe, & charitate colunt, quos ipse elegit in hereditatem sibi, quos per gratiam præordinauit, voca-

uit, & iustificauit. Vera prorsus & in immo corde recondenda sententia: nam quidquid homo habeat, etiam si totum mundum lucretur, egenus & miser est, si Deo careat, qui solus totum animæ sinum replere potest: & contra, qui Deum habet, etiam si aliis careat, beatus, & diues est, quia in Deo sunt omnia, præterea, imago Dei est homo; imaginis bonum, totaque perfectio est, exemplari suo simillimam esse: tunc autem verè similes Deo, ac per hoc beatissimi erimus, quando *videbimus eum sicuti est*, nam & ipse Deus ideo beatus est, quia videt se sicuti est. Itaque qui Deum nunquam videbunt, semper Deo dissimiles, ac per hoc semper miserrimi erunt. Denique quidquid infra Deum est, vel est homine vilis, vt omnia corporalia, vel par, vt Angeli, quibus in resurrectione æquales erimus: nihil autem nos perficere, felicesque ac beatos reddere potest, nisi quod est nobis melius, atque perfectius: igitur illi soli vere beati sunt, qui adhærent Deo, & vnus spiritus sunt cum eo, id est, qui diligunt Deum, & diliguntur à Deo; qui quidem hic interim spe beati sunt, sed re ipsa beati erunt, quando tam felici vinculo inhærebunt Deo, vt ab eo excidere nulla ratione possint.

*De cælo respexit Dominus, vidit omnes filios hominum.*

XIII.

*De preparato habitaculo suo respexit super omnes, qui habitant terram.*

XIV.

Probat quod dixit, beatam esse gentem cuius Deus est Dominus ille, qui fecit cælum; probat autem ex eo quod cum Dominus de cælo, tanquam altissima specula, videat omnes homines, & cognoscat, non posse vllum hominem propriis viribus saluum fieri, quamuis aliqui fortissimus aut potentissimus videatur; tamen Deus oculo paterno peculiariter populum suum respicit, & illum adiuvat ac saluat, vt merito dictum sit initio Psalmi, *exultate iusti in Domino*. At igitur, *de cælo respexit Dominus, vidit omnes filios hominum*, huc (vt est in Hebræo) *vidit omnes filios Adam*, id est, Domi-



aus de cœlo, à quo nihil occultari potest, non solum videt populum suum, sed videt omnes homines, & intelligit quid quisque possit. Idem vero significant verba sequentia, *De preparato habitaculo suo*, id est, de sede, quam sibi ipse parauit, & stabilivit (nam *cælum cœli Domino, terram autem dedit filiis hominum*,) respexit, ac respicit omnes habitatores terræ. Sanctus Hieronymus ex Hebræo vertit, *de firmissimo solo suo*, pro eo quod nos habemus, *de preparato habitaculo suo*: sed verba Hebraica vtrunque significationem recipiunt.

XV. *Qui finxit singillatim corda eorum, qui intelligit omnia opera eorum.*

Declarat Propheta, Deum non vidisse de cœlo filios hominum, eo modo, quo nos videmus ea, quæ sunt longe posita, confuso videlicet, & crasso modo; sed vidisse distincte, & subtilissime omnia opera eorum, id est, quid possint operari, vel operentur, vel mente, vel corpore. Itaque vidit omnes cogitationes, omnia desideria, omnia dicta, omnia facta, præterita, præsentia, & futura omnium, & singulorum hominum. Et probat Deum hæc videre potuisse, quia ipse *formauit corda singulorum*, id est, creauit animas singulorum hominum, ac per hoc etiam creauit corda, hoc est, mentes & voluntates, à quibus omnia hominum opera oriuntur: qui enim corda fingere potuit, idem sine dubio corda scrutari potest. In Hebræo habetur, qui *finxit, tachad*, id est, *pariter*, corda eorum, sed illud, *pariter*, non significat eodem tempore, vt Origenes, & alij, errantes crediderunt. Nam sanctus Leo in epistola ad Turbium Asturicensis Episcopi cap. 10. docet, fidem Christianam habere, animas ante corpora non fuisse. Igitur illud, *pariter*, non refertur ad idem tempus, sed ad eundem auctorem; ac si Propheta dixisset, *qui finxit omnia corda* nullo excepto: non enim vnum cor ipse formauit, alia vero alijs formanda reliquit, sed ipse pariter omnia, ipse vnus finxit omnia. In Græco habetur, *κατὰ μάνας*, id est, *seorsim, siue solitarie*, quod sanctus Basilius

refert ad cordis puritatem & simplicitatem, vt sensus sit, qui finxit corda separata ab omni impuritate; siue, vt Euthymius addit, separata ab aliorum animantium natura. Sed videtur rectius intellexisse antiquus Latinus. Interpres, qui vertit, *singillatim*, id est, seorsim singuli id enim magis congruit cum lectione Hebraica, & cum verbis sequentibus. dicit enim Propheta, Deum formasse omnia corda, vt inde colligat, Deum intelligere omnia opera eorum. Hæc autem ratio id requirit, vt Deus formauerit omnia, & singula corda, non vt separauerit ab impuritate, vel ab alijs animalibus. Ex hoc etiam loco colligitur aliud dogma Ecclesiasticum, quod videlicet Deus non creauit quasi in confuso omnes animas, cum creauit animam primi hominis, quasi in illa fuerint omnes, & ex illa fiant omnes, sicut re vera tunc creauit quodammodo omnes homines; quia in vno erant omnes, & ex vno fiunt omnes, quantum ad generationem carnis: sed creauit Deus singillatim omnes animas, non vnâ ex alia, sed ipse singulas ex nihilo distincte, ac separatim. Scio sanctum Augustinum in epist. 28. non existimare, ex hoc loco solide probari creationem animarum, quia in Psal. 50. dicitur, *Cor mundum creauit in me Deus*. Sed responderi potest, in Psal. 50. tractari de sanctificatione, non de naturali creatione: hunc autem locum requirere, vt verba proposita de naturali creatione inte ligamus; cum inde colligatur Deum omnia corda scrutari, quia omnia ipse formauit.

XVI. *Non saluatur Rex per multam virtutem, & Gigas non saluabitur in multitudine virtutis suæ.*

Explicat quid viderit illè, qui omnia videt; videlicet hoc vidit, neminem propria virtute liberari posse à malis, quæ nos circumstant; sed egere omnes misericordia Dei: ponit autem exemplum in iis, qui videntur maxime de suis viribus posse gloriari, quasi dicat, vidit Deus quod *non saluatur Rex per multam virtutem*, id est, non sufficit Regi ad propriam salutem, seu vitam tuendam, multa virtus, id est, multa potentia, multus



exercitus, multa vis pecuniarum. Et Gigas non saluabitur in multitudine virtutis sua, id est, sicut Regi non sufficit robur aliorum, qui illi seruiunt; ita fortissimo viro non sufficit robur proprium. Non est in Hebræo nomen gigantis, sed in genere nomen robusti & fortis viri: sed LXX. Interpretes posuerunt nomen gigantis, quia illi solent esse fortissimi, & ceteris hominibus formidabiles, ut de gigante Goliath legimus in primo libro Regum, cap. 17.

XVII.

*Fallax equus ad salutem, in abundantia autem virtutis sua non saluabitur.*

Tria sunt, quæ possunt hominem eripere ab instanti periculo, vires alienæ, ut custodia militares, vires propriæ, velocitas equi: illæ, si resistendum sit; ista si fugiendum. Docuerat I salmista, non sufficere duo priora, nunc addit neque tertium sufficere, & habemus exemplum omnium in libris Regum; Saul enim Regem non potuerunt a nece defendere ingentes copię militares: Goliath gigantem robustissimum David puer occidit: foras filium Achab veloci curru fugientem, sagitta velocior interemit. *Fallax equus ad salutem*, id est, fallitur qui confidit salutem suam velocitati equorum: velocitas enim illa multis modis impediri, vel præueniri potest, ideoque fallax est. *In abundantia virtutis sua non saluabitur*, id est, equus in virtute sua, qua abundat, vel si ea maxime abundet, quæ virtus in velocitate consistit, non saluabitur cum seipso suo, id est, neque se, neque seipsum a periculo liberabit. In Hebræo habetur æstive, non saluabitur, nimirum seipsum suum: sed idem verbum Hebræum mutatis punctis fieri potest coniugationis passivæ, & eo modo legimus LXX. Interpretes, quos Interpres Latinus sequutus est. Et quidem lectio, *non saluabitur*, quam habet S. Hieronymus, clarior est. Lectio vero nostræ editionis, non saluabitur, requirit ut intelligatur aliquid, videlicet, non saluabitur cum seipso suo: neque enim dubium esse potest, quin de salute hominis potius quam de salute equi hoc loco agatur. Porro quæ dicta sunt de salute corporali,

multo magis intelligenda sunt de salute spirituali, ad quam obtinendam nemo sufficiens est, sine præueniente, comitante, & subsequente gratia Dei.

*Ecce oculi Domini super metuentes eum, & in eis qui sperant super misericordia eius.*

XVIII.

*Vt eruat à morte animas eorum, & aliat eos in fame.*

XIX.

Concludit Propheta ratiocinationem suam, qua, ut supra diximus, probat beatam esse gentem, cuius Deus est Dominus. Nam videt quidem Deus omnes homines, & intelligit, quam parum possint, nisi ipse adiuvet: sed tamen peculiariter in homines iustos dirigit oculos suos, ut eis de cælo auxilium præbeat, tum ut à mortis periculo liberentur, tum ut commode sustententur in vita. *Ecce oculi Domini super timentes eum, & in eis qui sperant super misericordia eius.* Per timentes & sperantes, pulchre describuntur iusti, qui vere sunt iusti & amici Dei. Nam timor sine spe, timor servilis est, spe sine timore præsumptio est. Timor cum spe charitatem veram declarat, id est, amorem liberalem quo diligitur Deus, ut amicus, ut Pater, ut sponsus: qui enim tali amore flagrat, & vehementer timet, ne dilectum ostendat, & secure confidit, ac sperat, misericordiam dilecti sibi nunquam defuturam. *Vt eruat à morte animas eorum & aliat eos in fame.* Hæc est causa, cur Dominus respicit oculo paterno timentes, & sperantes in se, ut videlicet hæc duo beneficia illis tribuat, liberationem à periculo mortis, & alimenta dum vivunt. Quia iusti timent Deum offendere, liberat illos Deus à timore, ne offendantur, præsertim circa vitam, quæ est fundamentum omnium bonorum: quia sperant in misericordia eius, præstat illis perpetuam misericordiam, dum aliat eos in fame. Quæ duo beneficia possunt inteligi tam de salute corporali, & temporali, quam de spirituali, & sempiterna. *Erunt dominus à morte animas*, id est, vitam timentium se, dum singulari providentiâ liberat eos à variis mortis periculis, à quibus propria virtute



sua, vel suorum liberari non potuissent. Deinde sic liberatos sustentat in vita, prospiciens eis de omnibus ad vitam necessariis, & præsertim tempore famis, quo multi alij rerum omnium penuria laborant. Sed spiritualiter eruit animas eorum à morte, dum vel non finit eos labi in peccatum, quod est mors animæ; vel si forte peccauerint, mox illos per salubrem penitentiam ad gratiam, quæ est vita animæ, reuocat; & utroque modo animas eorum à morte sempiterna liberat. Viuentes autem Deo per inhabitantem Spiritum sanctum, alit in fame, dum in hoc deserto, per quod ad terram promissionis tendimus, deserto plane sterili, & inaquoso alit Manna pluyente de cælo, & potat aqua de petra scaturiente, id est, coelestibus consolationibus reficit, ac sustentat: alit autem, non satiat, & sitim temperat, non extinguit, quia saturitas seruatur in aliam vitam, in qua satiabimur dum apparuerit gloria Domini, & inebriabimur ab vbertate domus Domini, & voluptatis torrente potabimur.

XX. *Anima nostra sustinet Dominum, quoniam adiutor & protector noster est.*

Hactenus Propheta iustos Dei seruos allocutus est, eosque ad exultandum in Domino, & laudandum Deum, patrem indulgentissimum, & misericordissimum exhortatus est. Nunc introducit iustos respondentes, ac dicentes, *Anima nostra sustinet Dominum*: intelligunt iusti, quid Spiritus sibi velit, cum eos ad exultandum, & laudandum inuitat, nimirum intentionem Spiritus sancti esse, vt per hoc ipsi animentur ad perseverandum in iustitia, & ad inhaerendum Deo, neque ab eo recedendum ob quascunque persecutiones, ac deum ad Deum laudandum, magis opere, quam verbis. Itaque respondent se tot beneficijs Dei confirmatos, constantissime in eius timore, ac amore permanituros. *Anima nostra*, inquit, *sustinet Dominum*, id est, quidquid acciderit, non nos separabit à charitate Dei, neque ad alium consolatorem respiciemus, sed expectabimus patienter consolationem de cælo, scien-

tes scriptum esse, *si moram fecerit, expecta eum, quia veniens ueniet & non tardabit*. Dicitur autem, *anima sustinere Dominum*. Hebraica phrasi, quæ tribuitur animæ id, quod toti homini conuenit, præsertim quando agitur de re spirituali. Sic dixit Isaias cap. 26. *Nomen tuum, & memoriale tuum in desiderio animæ: anima mea desiderauit te in nocte*. Et Hieremias Thren. 3. *Bonus Dominus sperantibus in se, anima quærenti illum*, Et beatissima Virgo Lucæ 1. *Magnificat anima mea Dominum. Quoniam adiutor, & protector noster est*. Reddunt iusti rationem, cur tam constanter Dominum expectare decreuerint, quia videlicet sciunt, & experimento cognouerunt à Domino in bonis se adiuuari, & à malis protegi potentissime, & fidelissime.

*Quia in eo latabitur cor nostrum, & in nomine sancto eius sperauimus.* XXI.

Posteaquam responderunt iusti primariæ intentioni Spiritus sancti, respondent nunc secundariæ, quæ erat, vt exultarent in Domino, sicut in primis Psalmi verbis dictum est. Dicunt igitur se id facturos libentissime, *In eo latabitur cor nostrum*, id est, *exultabimus in Domino*, & *in nomine sancto eius sperauimus*, id est, quia *in nomine sancto eius sperauimus*. Nam quia sperauerunt in Domino, adiuti ab eo, atque protecti sunt, & ideo experimento proprio edocti, quam bonus & potens Dominus sit, exultant in eo, & confitentur nomini eius. Quod attinet ad verba, in Hebræo habetur, *quia in eo latabitur cor nostrum, quia in nomine sancto eius sperauimus*: sed primum, quia, positum est pro, & vel pro, certe, vel vacat: Sicut contra in Latina editione, illud, & cum dicitur, *in nomine sancto eius sperauimus*, positum est pro, quia. Itaque clarissima lectio esset, & in eo latabitur cor nostrum, quia in nomine sancto eius sperauimus. Porro sperare in nomine Domini, non est sperare in literis, aut sono nominis, sed sperare in Domino per nomen significato: & habere videtur vim quandam maiorem hic loquendi modus, quam si dicitur simpliciter, sperare in Do-



mino: nam sperare in nomine Domini, est sperare in ipso Domino nominatum, & proprie appellato; dicitur vero nomen Domini sanctum, quia dignum est, ut ab omnibus honoretur, & ideo summum scelus committitur, cum blasphematur.

XXII. *Fiat misericordia tua Domine super nos, quemadmodum sperauimus in te.*

Concluditur Psalmus per orationem, ut saepe alias, & est oratio aptissime coherens cum superioribus verbis, & cum toto Psalmo; quia enim aliquoties dictum est, Deum misereri sperantium in se, & iusti dicunt se in Domino sperauisse, & egent semper noua misericordia propter continua pericula, ideo concludunt: *Fiat misericordia tua Domine, super nos*, id est, non cesset, sed perseueret, imo addatur semper noua misericordia super nos, quemadmodum sperauimus in te, id est, sicut de tua bonitate futurum sperauimus, & nobis ipsi promissimus.

## P S A L M V S XXXIII.

## Titulus &amp; Argumentum.

Dauidi, cum immutauit vultum suum coram Abimelech, & dimisit eum, & abiit.

**H**ic titulus ad duas historias referri potest, qua habentur lib. I. Reg. c. 21. prior historia narrat, Dauidem fugientem à facie Saul Regis venisse ad Achimelech Sacerdotem, atque ab eo panes & arma postulasse, neque ei indicasse fugam suam, sed simulasse secretum Regis negotium se habere; ob quod tantopere festinaret. Posterior historia refert, Dauidem confugisse ad Achis Regem Philisthaum, sed cum serui eius Regis incitare cepissent dominum suum in necem Dauidis, tum Dauidem insaniam & fatuitatem simulare cepisse, atque ea ratione mortem euasisse. Theodoretus ad priorem historiam titulum refert: sed S. Basilus, S. Augustinus, S. Hieronymus & Euthymius, referunt ad posteriorem: Et hac est ve-

rior sententia; *Primo*, quia in priore non immutauit Dauid vultum, sed officium: in posteriore vero vultum immutauit, ut videtur esse, qui non erat. *Secundo*, quia ubi nos legimus, & dimisit eum, in Hebraeo est, naigareschu, quod significat, & expulit eum, siue, & proiecit eum, vel, & repudiavit eum, quod nullo modo conuenit cum priore historia, sed tantum cum posteriore: non enim Achimelech Sacerdos expulit Dauidem, sed Achis Rex eum expulit, ut insanum & furiosum. Ex quo etiam refellitur sententia eorum, qui dimisit eum, sic intelligunt, dimisi Dauid Regem Achis, vel Sacerdotem Achimelech: non enim Dauid dimisit, id est, expulit, sed expulsus fuit & dimissus. *Tertio*, quia in hoc Psalmo Dauid gratias agit Deo, quod ex magno periculo liberauerit eum: nullum autem periculum passus est Dauid apud Achimelech, sed maximum apud Achis. *Quarto*, quia in titulo huius Psalmi iuxta Codicum Hebraicorum & Graecorum fidem, non habetur Abimelech, ut haberi deberet, si titulus priorem historiam respiceret: sed Abimelech. Et sic legunt & exponunt Basilus, Augustinus, & alij veteres, excepto Theodoro & Latini etiam Codices vulgata editionis, quos vidi, habent Abimelech, excepta editione Sixti V. in qua habetur Achimelech: quod vitio librarium vel impressorum factum videtur, cum repugnet omnibus Codicibus, & facile fuerit errare ob vocum similitudinem. Cur autem Achis dictus sit Abimelech, rationem reddit S. Basilus, quia Abimelech erat nomen commune Regibus Philistinorum, sicut Pharaon erat nomen commune Regibus Aegyptiorum, & Caesar Imperatoribus Romanorum. Probat autem S. Basilus, Abimelech fuisse nomen commune Regibus Philistinorum, ex c. 20. & 26. Genes. Porro quod in hoc titulo dicitur, immutauit vultum suum, in Hebraeo est, immutauit sensum suum, quod in idem recidit, nam immutare sensum, est hoc loco simulare stultitiam, & de viro sensato facere se insensatum, quod fecit Dauid torquendo os & oculos, & collabendo & impingendo in ostia domus more ebriorum, & salua copiam emittendo ad similitudinem epilepticorum: hac enim narratur in I. lib. Reg. c. 21. Argumentum Psalmi est

נגרשדו



gratias agere deo pro beneficio liberationis à periculo illo mortis imminenti, & hac occasione exhortari omnes ad amandum Deum, & sperandum in eo. Intelligebat enim vir pius, suam illam omnem industriam, quam adhibuit simulando stultitiam, parum fuisse profuturam sine adiutorio & favore diuino.

## EXPLICATIO PSALMI XXXIII.

- I. **B**enedicam Dominum in omni tempore; semper laus eius in ore meo.

Psalmus est Alphabeticus: incipit enim primus versus à prima litera Alphabeti, secundus à secunda, & sic de cæteris; quod videtur ideo factum, ut facilius memorie mandaretur, & sæpe à fidelibus cantaretur. Incipit igitur magno affectu gratias agere, quasi diceret: Nullo unquam tempore obliuiscar beneficium hodiernum, sed pro eo, *Benedicam Dominum in omni tempore*, id est, quamdiu vixero: & id ipsum repetens, *semper*, inquit, *laus eius in ore meo*. Itaque illud, *semper*, non significat omni momento, omni die, omni nocte, quasi nihil aliud agendum sit: sed significat id esse faciendum suo loco & tempore, sed usque ad finem vitæ; imo etiam usque ad finem sæculi cantabuntur Psalmi isti, & sic per alios benedicet Deum David in omni tempore. Potest etiam hic locus spiritaliter intelligi, quod iusti semper Deum laudant, & cum beneficia recipiunt, & cum flagella patiuntur, iuxta illud S. Iob: *Dominus dedit, Dominus abstulit, sit nomen Domini benedictum*.

- II. *In Domino laudabitur anima mea; audiant mansueti, & letentur.*

Nec solum, inquit, ego benedicam Dominum ob hoc beneficium in omni tempore, sed etiam alij benedicent: quicumque enim hoc audierint, laudabunt me, quod iam mirab in arte eluserim illum Regem, & simul Deum laudabunt ac benedicent, qui me per illam artem de mortis periculo liberauit. *In Domino laudabitur anima mea*, id est, ego laudabor ab omnibus, ad quos huius rei fa-

ma perueniet; sed laudabor in Domino, ac per hoc laus præcipua referetur ad Dominum, qui singulari prouidentia sua mihi bonum consilium inspirauit, & iuuuit, ut felicem sortiretur effectum. In Hebræo verbum *laudabitur*, est cuiusdam coniugationis, quæ significat actionem in seipsum; itaque secundum proprietatem vocis Hebræica, *laudabitur anima mea*, significat, anima mea laudabitur à seipsa, id est, gloriabitur; & quia ponitur anima pro toto homine, sensus erit, ego ipse ob hoc factum mirifice gloriabor, non in me, sed in Domino, quo protegente & adiuvante periculum euasi. Admonemur ex hoc loco, non semper esse vitium gloriari, & facta propria laudare, sed tunc solum, cum vel gloriamur de re, quæ laudem non meretur, vel non agnoscimus auctorem primarium omnium bonorum, Deum: *Qui gloriatur*, inquit Apostolus, *in Domino gloriatur*, non enim qui seipsum commendat, ille probatus est, sed quem Deus commendat. Quod sequitur, *audiant mansueti, & letentur*, significat ad eos proprie pertinere communicationem huius lætitiæ, quibus similia pericula solent esse communia; quales sunt homines mites & patientes: qui enim eiusmodi sunt, & sæpe à potentioribus opprimuntur, & facile Deum experiantur adiutorem. *Audiant*, inquit, *mansueti*, humiles, Deum timentes, mei similes, quod mihi accidit, & *letentur*, ac Dominum benedicant. In Hebræo sunt hæc verba temporis futuri, *audient, & letabuntur*: sed quia imperatiuus apud Hebræos caret tertia persona, ad eam exprimentandam vtuntur Hebræi tertia persona futuri: proinde recte verterunt Græci & Latini Interpretes, *audiant, & letentur*.

*Magnificate Dominum mecum, & exaltetis nomen eius in idipsum.*

Conuertit sermonem ad ipsos mansuetos, quos iusserat audire, & lætari; atque illos hortatur, ut non solum singuli apud se Deum laudent, sed cum ipso coniuncti, pariterque vniti Dominum glorificent. *Magnificate Dominum mecum*, id est, Dominum, qui solus vere magnus est, magnam esse con-

III.



stetamus; & eum, qui vere solus altissimus est, voce etiam nostra altissimum esse prædicemus, & eius nomen, id est, notitiam & famam, vel potentiam & maiestatem coram hominibus extollamus. Placet enim Deo valde, ut fideles non solum seorsim in cubiculis, sed etiam coniuncti in Ecclesiis unanimiter, uno ore ipsum honorificent, ut Apostolus monet ad Rom. 15. Illud, in idipsum, sæpe iam diximus, nihil significare aliud, nisi pariter, una, coniunctim, &c.

IV.

*Exquisiui Dominum, & exaudivit me;  
& ex omnibus tribulationibus meis eripuit me.*

Explicat nunc Propheta causam, cur benedicere velit Dominum omni tempore: quia videlicet expertus sit eum liberatorem optimum & potentissimum. *Exquisiui Dominum*, id est, cum angustiis premerer, ad Dominum confugi, eius auxilium quæsiui, ad eum cum fiducia accessi, & exaudivit me, solita sua benignitate & misericordia; & effectus exauditionis in eo se prodidit, quod *liberauit me ex omnibus tribulationibus meis*, quasi dicere velit: conatus est me Saul Rex, & manu sua, & per satellites suos occidere, & protegente Domino manus eius effugit: fugiens autem præ festinatione, neque arma neque cibum capere potui, & continuo adfuit misericordia Domini, quæ mihi per Achimelech Sacerdotem panes & arma promittit: paulo post per imprudentiam in eidi in manus Achis Regis Philistæorum, sed eodem inspirante, adiuuante & protegente Deo, mirabili & insolita arte periculum declinaui. Itaque *ab omnibus tribulationibus*, quæ hucusque mihi acciderunt, eripuit me benignissimus Dominus, & amantissimus Pater, Deus.

V.

*Accedite ad eum, & illuminamini, & facies vestra non confundentur.*

Hic iam incipit exhortatio pulcherrima & efficacissima ad amorem & timorem Dei, & ad proiciendam in eum omnem sollicitudinem nostram. *Accedite ad eum*, vel, ut sonat vox Hebræa, *respicite in eum*, id est, quot-

quot in tribulatione estis, *accedite* per fidem & orationem ad Deum, *respicite* in auxilium eius, & *illuminamini*, id est, percipite lumen consolationis & lætitiæ, reiecta tristitia obnubilante: lux enim lætitiæ significat, iuxta illud: *Lux orta est iusto, & rectis corde lætitia*. Potest autem altiore & mystico sensu hic locus ita exponi: *Accedite ad eum* per conversionem, & *illuminamini* per gratiam iustificationis: nam illuminatio diuina vitam spiritualement confert; unde dicit Apostolus ad Ephes. 5. *Surge qui dormis, & exurge à mortuis, & illuminabit te Christus*: & Christus ipse ait Ioan. 8. *Qui sequitur me, non ambulat in tenebris, sed habebit lumen vitæ*: & in Ps. 35. legimus: *Apud te est fons vitæ, & in lumine tuo videbimus lumen*; ubi pro eodem ponitur, *Fons vitæ, & fons luminis*. Denique ideo Baptismus apud veteres dicitur *illuminatio*, quia per eum homines mortui peccato regenerantur, & de tenebris mortis veniunt ad lumen vitæ. *Accedite igitur ad eum* per conversionem & penitentiam, & ipse conuertetur ad vos, & vultu suo lucidissimo, & maxime vitali, quippe qui Sol est increatus, & fons vitæ, illuminabit & viuificabit vos. *Et facies vestra non confundentur*, id est, *accedite securi, nolite timere repulsam*, exaudiet & excipiet vos, neque patietur rubore confundi facies vestras. Dicitur enim confundi facies, quando qui petit non impetrat, & ideo cum rubore discedit. Sic lib. 3. Reg. cap. 2. dicit Bethsabee Regi Salomoni: *Petitionem vnam paruulam ego deprecor à te, ne confundas faciem meam*. In Hebræo pro *accedite ad eum, & illuminamini, & facies vestra non confundentur*, habetur, *respexerunt ad eum, & illuminati sunt, & facies eorum non confundentur*; sed facile est videre quid Septuaginta legerint: nam illud hiebitu, *respexerunt*, legerunt *habitu*, *respicite*, quomodo etiam legit S. Hieronymus: quia vero accessus ad Deum per conversionem, est accessus oculorum interiorum, non pedum; ideo idem est, *accedite, & respicite*, nimirum *accedite oculo fidei, conuertite faciem, respicite in Deum*. Sic etiam illud *nabaru*, potest esse præteritum indicationi modi, & etiam

חִיטו  
חִיטו

נהר



etiam imperatiui: sæpe enim defectiua inflectuntur more perfectorum. Certe non solum Septuaginta, sed & S. Hieronymus vertit eam vocem per modum imperandi: & quidem S. Hieronymus vertit, *confluere*, & Septuaginta, *illuminamini*, quia verbum *nabar*, & confluere, & illuminari significat; sed illuminamini magis cohæret cum præcedenti verbo, respicite, & ideo communiter est recepta versio LXX. Interpretum. Denique Septuaginta, & S. Hieronymus non legerunt, *penehem*, facies eorum, sed *penechern*, facies vestra. Itaque tota discordia codicum Hebræorum à Græcis & Latinis nascitur ex punctis male collocatis à Rabinis, vel ex libris minus correctis, quos nunc habemus.

פניהם  
פניהם

VI. *Iste pauper clamauit, & Dominus exaudiuit eum: & de omnibus tribulationibus eius saluauit eum.*

Probat exemplo suo, secure accedendum esse ad Deum tempore tribulationis. Nam, inquit, *iste pauper*, Dauid videlicet, omni ope destitutus, ita vt etiam panem à Sacerdote mendicaret, *clamauit* cum fide & fiducia, pulsauit ardenti prece ad ostium diuinæ clementiæ, & Dominus continuo exaudiuit eum, & ab omni tribulatione liberauit eum.

VII. *Immittet Angelus Domini in circuitu timentium eum, & eripiet eos.*

Probauit exemplo, nunc probat ratione, accedendum esse ad Deum cum omni fiducia. Ratio est, quoniam Angelus Domini, cui Deus ipse mandauit, vt custodiat homines iustos, vt dicitur in Psalmo 90. cum videt hominem in periculo, continuo adest, & more castrorum circumdat protectione sua hominem illum, vt nihil ei nocere possit. Immittet Angelus Domini, subintelligitur, ipse se, in circuitu timentium eum. In Hebræo sensus clarior est: sic enim ad verbum legimus, *castramentatur Angelus Domini in circuitu timentium eum, & eripiet eos*. Mira potentia Angelorum, vt vnus Angelus vicem exercitus suppleat. Ex quo sequitur, vt ma-

xima securitas & pax esse debeat in corde timentium Deum, qui tali custodia munipatur.

*Gustate & videte, quoniam suavis est Dominus: beatus vir qui sperat in eo.*

VIII.

Pergit in exhortatione, & quia dixerat, accedite ad eum, & probauerat exemplo & ratione, esse accedendum ad Deum tempore tribulationis: nunc hortatur ad experientium, vt etiam ipsi proprio experimento discant, rem ita se habere. *Gustate*, inquit, & *videte, quoniam suavis est Dominus*, id est, experimentum sumite, facite periculum, incipite re ipsa iactare in Deum omnem sollicitudinem vestram, inhærendo illi, dimissis omnibus consolatoribus aliis: & *videte*, id est, cognoscite, quoniam dulcis est Dominus omnibus inhærentibus sibi. Et vere quid suauius fingi potest, quam animum præditum charitate, conscientia bona, corde puro, fide non ficta quiescere in sinu summi boni: vere *beatus vir, qui sperat in eo*, id est qui pacem habet ad Deum, & certa spe recumbit in eo. Sicut autem illud, *accedite, & illuminamini*, exposuimus altiore quædam sensu de incipientibus, qui illuminantur per iustificationem: ita quod hic dicitur, *gustate, & videte*, potest exponi de proficientibus, qui post regenerationem spirituales incipiunt nutrire & crescere, iuxta illud S. Petri in epist. 1. cap. 2. *Sicut modo geniti infantes lac concupiscite, vt in eo crescatis in salutem: si tamen gustatis quoniam suavis est Dominus*; vbi S. Petrus hunc locum Psalmi citat in eum sensum, quem nos modo perfectumur. Sanctus etiam Paulus cap. 6. ad Hebræos, coniungit illuminationem cum gustatione, cum ait: *Impossibile est, qui semel sunt illuminati, gustauerunt quoque bonum dei verbum, &c.*

*Time-te Dominum omnes Sancti eius, quoniam non est inopia timentibus eum.*

IX.

Post exhortationem ad experientium, quam dulcis sit Dominus, hortatur Prophetam ad timorem Domini, id est, ad obseruantiam mandatorum, siue, quod est idem, ad perseuerandum in iustitia & charitate Dei,



Dei, quæ est fundamentum fiducia; per quam accedimus ad Deum, & gustamus beneficiorum eius suauitatem. Rectissime etiam coniunguntur hæc verba superioribus secundum altiorum alium sensum: nam sicut accedendo incipimus, & gustando proficimus, ita timendo perficimur: non enim hic agitur de timore serui, sed de timore casto & filiali, qui conuenit sanctis & perfectis. *Timete*, inquit, *dominum omnes sancti eius*: timor enim iste includit perfectam charitatem, quia qui perfecte diligit, vehementissime timet, ne in aliquo dilectum offendat, & ideo diligentissime conformatur se voluntati Dei, & seruat in omnibus verbum eius: qui autem sic seruat verbum eius, *in hoc charitas dei perfecta est*, vt ait S. Ioan. in 1. epist. cap. 2. De hoc timore dicitur Iob 28. *Ecce timor domini ipsa est sapientia*: & Ecclesiastici 1. *Plenitudo sapientia est timere deum*: & cap. 25. *Timor domini super omnia*: & Isa. 33. dicitur de Christo: *Et repleuit eum spiritu timoris domini*. Denique Ecclesiastes ultimo: *Ti me deum, & mandata eius obserua*: hoc est enim omnis homo, quasi dicat, in hoc consistit tota perfectio hominis, & omne eius bonum in hac vita, vt timendo Deum custodiat omnia mandata eius; & hoc significant verba sequentia in altiori sensu, quoniam non est inopia timentibus eum, siue, vt proprie significat vox Hebraica, non est defectus timentibus eum, id est, nihil deficit timentibus eum: hoc enim est esse perfectum, nihil ei deesse. Et vere quid potest deesse amico Dei, cuius sunt omnia; cum amicorum omnia sint communia? Quod si aliquando iustissimis viris deesse videntur temporalia, vere tamen eis nihil deest, cum eis detur patientia, quæ longe melior est diuitiis: neque dicitur proprie carere diuitiis, qui diuitias non desiderat: animus enim diues debet esse, non arca. Sed tamen idem Propheta, siue potius idem Spiritus sanctus, qui verbis suis instruit sapientes: iisdem verbis humilioris sensu acceptis, instruit etiam insipientes, eosque hortatur, vt Deum timeant, quoniam non est inopia timentibus eum, id est, quoniam Deus temporalia subministrat seruis

suis, neque eos destituit tempore necessitatis. Et sunt in scripturis & in historiis de viris Sanctorum exempla sine numero, quibus probatur, Deum mirabili prouidentia prospicere solitum esse seruis suis ea, quæ ad vitam necessaria sunt.

*Diuites eguerunt & esurierunt: inquirentes autem Dominum non minuentur omni bono.*

Idipsum explicat, comparando impios cum timentibus Deum, quasi dicat Propheta, non solum non erit inopia timentibus Deum; sed contra, erit inopia magna non timentibus eum, etiam si diuites antea fuerint. In Hebræo pro *diuites*, est *leones*, siue *leunculi*: vocat enim Propheta diuites impios, metaphoricè leones, quod aliena rapiant. Dicit igitur diuites impios non semel, Deo ipsos puniente ad extremam inopiam esse redactos. *Diuites eguerunt & esurierunt*, id est, qui diuites fuerunt, egere & esurire cœperunt, quia diuitiæ instabiles sunt & fallaces, & multis variisque periculis expositæ. *Timentes autem Dominum non minuentur omni bono*, id est, qui non in diuitiis, sed in Deo spem suam positam habent, quales sunt qui Deum timeant, illi etiam si pauperes sint, non minuentur omni bono, id est, non deerit illis vllum bonum: est enim phrasis Hebraica, & in Scripturis frequentissima, vt ponatur in propositione negante, non omne, pro nullo. Nos dicemus, nullo bono minuentur, pro eo quod Hebræi dicunt, non minuentur omni bono. Sic in Psalmo 48. *Cum interierit, non sumet omnia*, id est, cum interierit, nihil sumet. Sic in Apocalypsi cap. 22. *Et omne maledictum non erit amplius*, id est, & nullo maledictum erit amplius. Porro illud, *diuites eguerunt & esurierunt*, habet etiam alium sensum magis reconditum, quod videlicet ij, qui diuitias temporales amant, quantumuis diuitiis abundant, semper egent & esuriunt; quia semper appetunt plura quam habeant: *inquirentes autem*

X

Domi-



*Dominum*, quia rem infinitam quærunt, quæ maior est ipsorum desiderio, iuxta illud S. Ioan. *Maiores est Deus corde nostro: ij non minuentur omni bono*, quia summo bono inhzrentes, in eo habent omnia bona.

XI.

*Venite filij, audite me; timorem Domini docebo vos.*

Posteaquam Propheta hortatus est homines ad timorem Domini, docet quæ sit utilitas huius timoris, & in qua re timor iste sit positus. *Venite*, inquit, *ad me*, venite ad scholam Spiritus Sancti, qua nulla utilior inveniri potest: *audite me*, vel potius Spiritum Domini per linguam meam loquentem. Sic enim David ipse loquitur lib. 2. Reg. c. 23. *Spiritus Domini loquutus est per me, & sermo eius per linguam meam. Timorem Domini docebo vos*, id est, docebo quanta sit utilitas timoris Domini, & quid sit iste timor Domini, ad quem, tanquam ad summum omnium bonorum, tam sæpe vos in Psalmis, & tam vehementer exhortor.

XII.

*Quis est homo qui vult vitam: diligit dies videre bonos.*

Explicat his verbis Propheta utilitatem & finem timoris Domini, quod videlicet timor Domini pariat veram vitam & dies bonos, id est, vitam felicissimam, quam iusti præstant in hoc sæculo, dum *Regnum Dei quod est iustitia, pax & gaudium in Spiritu Sancto*, in corde suo habent, & in alio sæculo perfecte possidebunt, quando absorpta erit mors in victoria. *Quis*, inquit, *est homo qui vult vitam?* quasi dicat, promisi me timorem Domini esse docturum; nunc igitur adimpleo promissionem meam, ac dico, finem timoris Domini esse id, quod omnes cupiunt, sed pauci assequuntur, videlicet veram atque beatam vitam. Sed qui hunc finem assequi volunt, debent media assumere, quæ mox subiungam. Quis igitur est qui vult vitam, id est, qui dicunt se velle vitam beatam, & tamen non ingrediuntur viam quæ ad illam ducit, non videntur vere ac serio velle vitam beatam, sed umbram solum & imaginem vitæ: ideo interrogo, quis est, qui vere ac serio vult vitam veram? quis ve-

re diligit videre dies bonos, dies felices ac beatos? In Hebræo habetur paulo aliter, *diligit dies ad videndum bonum*; & quamvis sensus idem sit, tamen potest fieri, ut in Codicibus antiquis fuerit in numero multitudinis, *robim*, bonos, quod nunc est, *rob*, bonum: & quod legerint veteres non per gerundium, sed per infinitivum illud, ad videndum: eadem enim vox apud Hebræos facit infinitivum & gerundium, unica littera superaddita in principio. Nam non solum LXX. Interpretes, sed etiam S. Hieronymus, & ipse S. Petrus in Epist. 1. cap. 3. legit, *dies videre bonos*, non autem, *dies ad videndum bonum*.

*Prohibe linguam tuam à malo, & labia tua ne loquantur dolum.*

XIII.

*Diuertere à malo, & fac bonum: inquire pacem, & persequere eam.*

XIV.

Docet iam S. Propheta, quibus modis timor Domini perducatur homines ad vitam & dies bonos, ac dicit, perfectam observationem mandatorum Dei, siue abstinentiam ab omni peccato verborum, operum, & cordis, esse rectam viam ad vitam, iuxta illud Domini, *Si vis ad vitam ingredi, serva mandata*: hæc autem legis observatio, & fuga omnis peccati à Dei timore proficiscitur, proinde timor Domini est, qui per legis observationem ad veram vitam, & diēs bonos pervenire nos facit. *Prohibe linguam tuam à malo*, id est, caue ne Deum offendas peccato linguæ, mentiendo, peierando, detrahendo, rixando, &c. Incipit autem à peccatis linguæ, quia sunt frequentiora, & difficilius cauentur, propter quod S. Iacob ait: *Qui non offendit verbo, hic perfectus est vir. Et labia tua ne loquantur dolum*, prohibuit generatim omnia peccata linguæ, sed voluit etiam in specie prohibere perniciofa mendacia, quia sunt multo graviora cæteris, & ex quibus multa alia mala oriuntur. *Diuertere à malo, & fac bonum*: à peccato linguæ transite ad peccata operis, & primum monet, ut vitentur peccata commissionis, cum ait: *Diuertere à malo*, quale est homicidium, adulterium, &c. deinde addit, *& fac bonum*, ut vi-

dentur



dentur etiam peccata omissionis, qualia sunt cum parentes non honorantur, cum Deus tempore suo non colitur, cum omittuntur eleeumofynæ, orationes, ieiunia, & similia bona opera. *Inquire pacem, & persequere eam.* Hic tandem adiungit, ut caueantur peccata cordis, ira, odia, inuidentiæ, & cæteræ prauæ animi affectiones: ut vera pax & tranquillitas in omni negotio procuraretur & teneatur. Recte autem dicit Propheta, *inquire pacem*, quia boni viri officium est, non tam pacem cum omnibus habere, quam optare & querere: sæpe enim aliorum culpa pax obtineri non potest; ideo & Apostolus ait ad Rom. 12. *Quod in vobis est, cum omnibus hominibus pacem habentes.* Et Propheta David in alio Psalmo: *Cum his qui oderunt pacem, eram pacificus.* Nec solum cum aliis, sed etiam nobiscum ipsi perfectam pacem habere non possumus in hac valle miseriarum. *Video enim*, ait Apostolus ad Rom. 7. *aliam legem in membris meis repugnantem legi mentis meæ.* Quamuis autem perfectam pacem nobiscum ipsi habere non possumus, tamen inquirenda pax est, domando membra ieiuniis, & carnem spiritui subiiciendo, ut aliquando discat non repugnare, vel minus repugnare imperio mentis. Denique inquirenda illa pax est totis animi viribus, quæ nos manet in cœlesti Hierusalem: qui enim ad pacem illam, ut par est, toto corde anhelant, facile contemnunt bona & mala temporalia omnia, ac per hoc habent etiam in hoc mundo pacem ad Deum, quam vnâ respicit timor Domini filialis.

XV.

*Oculi Domini super iustos, & aures eius in preces eorum.*

Probat quod dixerat, obseruantes mandata Dei, & cauentes peccata, habere vitam, & dies bonos. Ratio autem est, quia Dominus perpetuo respicit viros iustos, & semper exaudit preces eorum; quo modo enim non habebunt dies bonos, qui sub omnipotente custode vitam degent? Nam si iusti cognoscunt mala imminetia, & clamant ad Deum, inueniunt apertas & intentas aures eius: si forte non cognoscant, Deus pro illis vigilat,

& liberat à malis plurimis, quæ iusti ipsi nec vident, nec intelligunt: ad hoc enim sunt *oculi Domini super iustos*, ut custodiat eos à malis, ad quæ ipsorum oculi non pertinent. Mira Dei bonitas: quem non delectet tam bonum Dominum toto corde diligere, & filiali affectu timere: quis ista considerans, non clamet cum Propheta, *confige timore tuo carnes meas? & in alio Psalmo, Latetur cor meum, ut timeat nomen tuum?* At non semper iusti exaudiuntur à Deo; imo semper exaudiuntur: sed si non facit Deus, quod ipsi petunt, ideo non facit, quia non expedit eis. Medicus est, & si non exaudit, ut amara potio non sumatur, exaudit, ut per eam potionem morbus curetur.

*Vultus autem Domini super facientes mala, ut perdat de terra memoriam eorum.*

Ex comparatione impiorum auget Propheta beneficium iustorum: nam sicut oculi Domini super iustos vigilant, ut nos custodiat: ita etiam *vultus Domini*, id est, oculus Domini (nam vultus in Hebræo dicitur *panim*, à verbo *pana*, quod est aspicere) *vigilat super facientes mala*, id est, super iniquos, non ut eos custodiat, sed *ut perdat de terra memoriam eorum*, id est, ut funditus exterminentur & pereant, non ipsi solum, sed filij & nepotes, & posterij omnes, donec eorum memoria penitus aboleatur. Hoc non solum fieri videmus, quia vel ipsi impij prius resipiscunt, quam tempus vltionis adueniat, vel filij & nepotes non imitantur peccata parentum, vel alia de causa, iusto Dei iudicio differuntur eiusmodi pœnæ: sed Psalmus cantat id, quod ut plurimum fieri solet, & quod habetur in 1. præcepto decalogi: *Ego sum Deus tuus, fortis, zelotes, qui visito iniquitates in tertiam & quartam generationem in his qui oderunt me,* Exod. 20.

*Clamauerunt iusti, & Dominus exaudiuit eos; & ex omnibus tribulationibus eorum liberauit eos.*

Probat, quod dixit: *Oculi Domini super iustos,*

X 2

XVI.

פנים  
פנה

XVII.



*stos, &c. exemplis Patrum, quæ in sacris historiis leguntur, vt Abraham, Isaac, Iacob, Ioseph, Moyses, Iosue, Gedeonis, & aliorum, & forte etiam spiritu præuidebat & canebat liberationem Danielis de lacu leonum, Trium puerorum de fornace ardente, Susannæ de morte ad quam ob falsum crimen damnata erat, & aliorum plurimorum. Neque repugnant huic versiculo exempla Machabæorum, qui de tormentis & morte liberati non fuerunt, sicuti nec exempla Apostolorum & Martyrum, & ipsius Christi, qui ab inimicis & persecutoribus iniuste supplicia grauissima pertulerunt: isti enim verissime de omni tribulatione liberati sunt; qui, vt Ecclesia canit, *Compendio mortis sacra vitam beatam possident.* Verissime etiam isti clamantes ad Deum exauditi sunt, quia dedit illis Deus aliquid melius, quam sit liberatio de temporali calamitate: dedit enim eis pretiosum patientiæ donum, & pro eadem patientia coronam gloriæ sempiternæ.*

**XVIII.** *Iuxta est Dominus iis, qui tribulato sunt corde, & humiles spiritu saluabit,*

Declarat modum Propheeta, quo Deus iustos de tribulatione liberat; & videtur pluribus verbis explicare, quod breuissime dixit in Psalmo 90. *Cum ipso sum in tribulatione, eripiam eum, & glorificabo eum,* id est, cum ipso sum per patientiam in hac vita, eripiam eum per mortis soporem, & glorificabo eum per gloriosam resurrectionem. Ita nunc dicit: *Iuxta est Dominus iis, qui tribulato sunt corde,* id est, iustos, qui ob angustias & persecutiones corde afflicto & tribulato sunt, Deus non deserit; sed prope adest patientiam subministrans, & consolationem ecclestem admiscens, vt fortiter sustinere possint: neque hoc diu durabit, nam paulo post *humiles spiritu saluabit,* id est, illos ipsos humiliatos & afflictos corde & spiritu (nam in Hebræo est *contritos spiritu*) ob grauitatem tribulationis eruet de omni angustia.

**XIX.** *Multa tribulationes iustorum, & de omnibus his liberabit eos Dominus.*

Hoc pertinet ad illa postrema verba ver-

siculi superioris, *humiles spiritu saluabit:* est enim ac si dixisset, *humiles spiritu saluabit,* & ita saluabit, vt etiam si plurimæ sint eorum tribulationes, tamen de omnibus omnino liberabit eos. *Asterget enim Deus omnem lachrymam ab oculis eorum,* vt in Apoc. dicitur, cap. 21. Hinc admonemur, non promitti fidelibus in hac vita carentiam inopiæ, morborum, ignominie, persecutionum, calumniarum, oppressionum; sed promitti consolationem spiritualem præsentis tempore, & plenam atque perfectam liberationem in futuro. In Hebræo habetur in singulari numero, *multa tribulationes iusti, & de his omnibus liberabit eum Dominus:* sed in sensu nulla est discordia: non enim Propheeta significare voluit, vnus tantum iusti multas esse tribulationes, sed vniuscuiusque iusti, ac per hoc omnium iustorum.

*Custodit Dominus omnia ossa eorum, vnum ex his non conteretur.*

**XX.**

Videntur hæc ad resurrectionis gloriam pertinere, ad quam sine dubio pertinet, quod in Euang. Luc. 21. Dominus dicit: *Et capillus de capite vestro non peribit:* recte enim dici potest non esse contractum, quod statim post contractionem integrum, & fortius ac pulchrius representatur. Quamuis igitur iustorum ossa, & membra omnia dissipentur; & vel à feris deuorentur, vel in mare proiciantur, vel ab igne consumantur, custodit tamen Dominus omnia illa in sinu prouidentie suæ, & nihil omnino ex eis peribit, sed integra omnia, & gloriosa in resurrectione restaurabuntur. Alij tamen exponunt hunc locum de ossibus interioribus, id est, de fortitudine animi, quæ in sanctis, in maximis etiam persecutionibus, Domino custodiente, non deficit.

*Mors peccatorum pessima; & qui oderunt iustum, delinquent.*

**XXI.**

Ne putarent impij, suos quoque cruciatus & miseras in morte finiri, quod Athei, vel qui Dei prouidentiam, aut animæ immortalitatem non credunt, sibi falso persuadent, adiungit Propheeta: *Mors peccatorum pessima,* quia videlicet initium eris cruciatuum

et cetera.



eternorum, sicut mors Sanctorum preciosa est, quia requiem & gloriam inchoat sempiternam. *Et qui oderunt iustum, delinquent*, id est, & ij qui iustum vexant, & odio habent, omnes videlicet iustorum persecutores, qui existimant se victores esse, & multum lucrari, cum iustos deprimunt, spoliant, occidunt, tandem *delinquent*, id est aberrabunt à via veræ felicitatis, & dicent id quod legimus in lib. Sapientiae, c. 5. *Ergo errauimus à via veritatis, & iustitie lumen non luxit nobis, lassati sumus in via iniquitatis & perditionis, ambulauimus vias difficiles, viam autem Domini ignorauimus, quid nobis profuit superbia? aut diuitiarum instantia? transferunt illa tanquam umbra, &c.* In Hebræo pro illis verbis, mors peccatorum pessima, habetur ad verbum; *interficiet impium malitia*. Et quamuis sensus sit idem, cum sine dubio pessima sit mors eorum, quos malitia interficit, quia malitia non mortem solum temporalem, sed etiam sempiternam adducit: tamen omnino credibile est. Septuaginta Interpretes aliter legisse, & ideo aliter transulisse. Illud igitur, *themothet*, quod est verbum, & significat, *interficiet*, ipsi legerunt, *themuath*, quod est nomen in regimine, & significat, *mors*. Nam in Hebræo sunt literæ omnes eadem, & sola puncta mutari debent, quæ à Rabinis addita sunt, & sæpe non recte: Posito autem nomine, *themuath*, sequens vocabulum non potest verti impium, sed *impij*, siue peccatoris: & tertia vox non potest reddi malitia, sed mala vel pessima, quamuis verbum Hebræum, utrumque significet. Itaq; recte Septuaginta verterunt, *Mors peccatorum pessima*. Quod sequitur, *& qui oderunt iustum, delinquent*; ex Hebræo multi vertunt, *& qui oderunt iustum desolabuntur*: sed vox hebraica utrumque significat, *delinquere*, & *desolari*, & refertur tam ad poenam, quam ad culpam, sed quia Septuaginta verterunt, *desolari*, quod verbum *delinquere*, peccare, errare significat: & Sanctus Hieronymus ex Hebræo reddidit, culpabuntur, non debemus ab hac posteriore significatione

recedere. Quia tamen delinquere potest accipi, pro eo, quod est delinquere in alium, siue lædere, & nocere: & pro eo, quod est delinquere in seipsum, id est, errare à scopo, siue deficere in cursu & amittere brauium, hoc posteriore modo nos paulo ante accepimus, & exposuimus. Si quidem dubium esse non poterat, quin impij delinquerent in homines iustos, sed dubium esse poterat, an lædendo iustos, læderent magis seipsos, & hoc propheta affirmat dicens, *Odiunt iustum, delinquent*, id est, nocentes iustos, sibi ipsi magis nocebunt, quia errabunt à fine ultimo, quem omnes homines desiderant, & qui solus beatos ac felices reddit possessores suos, & in hoc sensu, delinquent, idem est, quod *desolabuntur*: nulla enim est desolatio maior, quam amittere vitam æternam.

*Redimet Dominus animas seruorum suorum, & non delinquent omnes, qui sperant in eo.*

XXII.

Concluditur Psalmus prædicendo iustis contrariam sortem ei, quæ prædicta est impiis. *Redimet Dominus* ab omni seruitute, atque adeo ab omni malo *animas seruorum suorum*, cum eas de carcere corporis eruerit, & ideo mors iustorum optima, ut merito dixerit Balaam, *Moriatur anima mea morte iustorum, & sint nouissima mea horum similia*. Num. 23. *Et non delinquent omnes, qui sperant in eo*: id est, & non errabunt à scopo, non deficient in cursu, peruenient omnino ad brauium supernæ felicitatis, omnes, qui non in suis viribus, sed in Deo confidunt. Est autem hoc loco aduertendum, non satis esse, spem qualemcunque, sicuti nec fidem mortuam, ad vitam æternam obtinendam: sed hoc loco tribui spei ademptionem beatitudinis, quia sermo est de spe iustorum, timentium & diligentium Deum, quam Apostolus Petrus vocat *spem viuam* 1. Petri 1. Hæc plane spes & fiducia quæ nascitur ex patientia, ex bonis operibus, ex testimonio conscientie bonæ, iuxta illud, *Patientia probationem operatur*, probatio



batio vero spem, Rom. 5. & illud: *Qui bene ministraverint gradum bonum sibi acquirent, & multam fiduciam in fide, qua est in Christo Iesu*, 1. Tim. 3. & illud: *Si cor nostrum non reprehenderit nos, fiduciam habemus ad Deum*, 1. Ioan. 3. Hæc, inquam, spes viua & perfecta recta perducit ad rem, id est, ad gloriam sempiternam, ut quod sperauimus, aliquando possideamus.

## PSALMVS XXXIV.

Titulus, & Argumentum.

Ipsi David.

**T**itulus nihil habet noui. Argumentum Psalmi videtur esse oratio Christi ad Patrem aduersus persecutores suos, & corporis sui, quod est Ecclesia. Fortasse etiam, ut Theodoretus, Euthymius, & alij volunt, orat ipse David pro liberatione sua, & contra Saul Regem, aliosque persecutores suos. Sed quia Propheta erat, & de Christo, ut plurimum loquebatur in Psalmis; ut colligitur ex verbis Domini Luc. ult. ideo cum S. Aug. & S. Hieronym. sensum principalem ad Christum pertinere censemus.

## EXPLICATIO PSAL. XXXIV.

I. **I**udica Domine nocentes me, expugna impugnantes me.

Propositio generalis est, qua petitur auxilium contra persecutores. Sed ex Hebræo textu sententia explicanda est. Siquidem in Hebræo habetur ad verbum: *Iudica Domine indicantes me, siue litiga cum litigantibus mecum*. Nam ab eadem voce formatur verbum & participium, seu nomen verbale: & quamuis Hebræa vox, *riuah*, sit ambigua, & possit referri tum ad iudicium, tum ad litem: tamen Græca & Latina editio declarauerunt esse referendam ad iudicium. Itaque sensus erit, *Iudica indicantes me*, id est, iusto iudicio condemna eos, qui me iniusto iudicio condemnarunt, quales fuerunt Principes Hebræorum, Annas, & Caiphas, & Principes Ethnici, Pilatus, & Herodes, qui Christum iniuste iudicarunt, & multi Prin-

cipes, qui sanctos Martyres iniquissimo iudicio condemnarunt. Quod autem nos legimus, *iudica nocentes me*, eundem sensum habet, qui enim iniuste iudicat, sine dubio nocet. Et quia persecutores Christi, & Ecclesiæ videri volebant, quasi secundum leges, atque ex zelo iustitiæ Christum, & seruos eius morti adiudicare; reuera autem non iudices, sed hostes erant; & cum vera pietate pro superstitionibus suis bellum gerebant, ideo subiungit Psalmus: *Et expugna impugnantes me*: vel, ut clarius habetur in textu Hebræo, & Græco, ubi est similis allusio verbi, & participij, *pugna contra pugna-tes mecum*, id est, suscipe causam meam, & bellum meum, ut expugnante te inimicos meos, ego manus eorum effugiam, & victoriam referam.

Apprehende arma & scutum, & exurge in adiutorium mihi.

II.

Declarat illud, *expugna impugnantes me*; & quia qui pugnat, debet instructus esse armis, tum quibus repellat ictus. Aduersarij, tum quibus Aduersarium feriat: ideo in hoc versiculo meminit armorum prioris generis, in sequente vero posterioris. Nam pro eo quod nos legimus, *apprehende arma & scutum*, in Hebræo est ad verbum, *apprehende clypeum, & scutum*: sed Græci, & Latini Interpretes, pro prima voce vertunt, *arma*, ne rem eandem bis ponerent, sed per arma intellexerunt arma defendentia, & protegentia, id enim omnium consensu significat, *maghen*, à verbo, *ghanam*, quod est, protegere. Porro *clypeus*, & *scutum* Dei est bona eius voluntas, iuxta illud Psalm. 5. *Domine, ut scuto bona voluntatis tua coronasti nos*. Item *aquitas*, siue iustitia, Sapient. 5. *Sumet scutum inexpugnabile aquitatem*. Et quidem beneuolentia Dei clypeus est, quo Deus nos protegit, Plane enim securus est, quem Deus amat, & de illo dici potest, *scuto bona voluntatis tua coronasti eum*. Iustitiam Dei, quæ in scripturis vocari solet *aquitas*, scutum est, quo Deus seipse protegit à iudiciis, & calumniis homi-

יִכַח



hominum impiorum, quantumvis enim Deus seuerus, & atrociter impios puniat, semper iustissime punit, & ideo non timet. Deus iacula linguarum, vel iudiciorum, iuxta illud, *ut iustificeris in sermonibus tuis, & vincas cum iudicaris*, Psalmus 50. Et de hoc dicitur, *Sumet scutum inexpugnabile aequitatem*, quando videlicet Deus ad iudicium nouissimum veniet, & armabitur in vltionem inimicorum. Quare non sine causa bis hoc loco ponitur nomen clypei, siue scuti, quoniam utroque simul Deus armatur, cum & nos misericorditer protegit, & iuste se ipse defendit.

III.

*Effunde frameam, & conclude aduersus eos, qui persequuntur me: dic anima mea, salus tua ego sum.*

Hic iam loquitur de armis ad laedendum aptis, & per frameam intelligit gladium, vt S. Hieronymus, vertit, & sensus est, euagina gladium, & stringe illum contra persecutores meos. Illud enim, *effunde frameam*, significat facilem; & promptam gladij euaginationem, qualis est cum gladius politus, & laevis est, tunc enim nullo labore eximitur, & quasi funditur è vagina: contra autem gladius rubigine confectus; vix magno labore nudari potest. Illud autem, *& conclude*, intelligitur de conclusione gladij, qui manu acriter stringi debet, vt firmiter teneatur, & fortius feriat. Verbum enim Hebraicum *claudere*, & *stringere* significat, sed quia framea, & vox Hebraica, *chanith*, & Graeca, *romphæa*, non proprie gladium, sed spiculum, vel lanceam significat: ideo potest etiam sic exponi hic locus, *Effunde frameam*, id est, iace spiculum, seu lanceam in hostes, & *conclude aduersus eos qui me persequuntur*, id est, claude viam, pone obstaculum, ne hostes accedant. Porro gladius, & lancea Dei est ira ipsius, id est, iustitia vindicativa, qua impios punit. Sic enim legimus Deuteron. 32. *Si acvero ut fulgur gladium meum, & arripuerit iudicium manus mea, reddam vltionem hostibus meis*, & Sap. 5. *Acuet diram iram in lanceam*. Nam & gladius, & lancea arma sunt offen-

sua. Mirabile prorsus spectaculum animæ fidei obicitur; cum cogitat Deum pro se stare armatum scuto, & gladio, siue lancea, & audit illum in corde dicentem, *Salus tua ego sum*. Quamuis enim satis sit ad omnem securitatem, id quod Apostolus dicit Rom. 8. *Si deus pro nobis, quis contra nos?* tamen Spiritus Sanctus, vt adhuc potentius infirmitatem nostram sustentaret, describit Deum, non quomocunque, sed armatum omni armorum genere, pro Ecclesia, & singulis fidelibus suis, aduersus hostes visibiles, & inuisibiles pugnantem. *Dic anima mea, salus tua ego sum*. Non satis est ad animi tranquillitatem, vt Deus pugnet pro nobis, sed necesse est, vt id nobis innotescat, ideo petit Christus pro corpore suo, vt id reueletur, & loquente Spiritu sancto ad cor fiducia oriatur. Quamuis autem magis proprie Deus medicus dici possit, quam salus, rectissime tamen salus dicitur, quia medici & medicamenta non semper sanant, nec intime penetrant substantiam rei, quam sanare cupiunt: Deus autem sanat semper, & intime illabitur animæ, & sicut fieri non potest, vt sanitate praesente homo non sit sanus, etiam si omnia alia sint; ita fieri nequit, vt Deo volente sanare, & per gratiam suam praesente, anima non sit sana, etiam si omnia alia desint.

*Confundantur, & reuerentur querentes animam meam.*

IV.

Describit exitum impiorum, aduersus quos Deus arma capit: ac primum dicit, *Confundantur, & reuerentur*, id est, erubescant ob amissam victoriam, qui quaerunt me interficere, idem enim significant illa duo vocabula, *confundantur, & reuerentur*. Non enim hic agitur de reuerentia erga alium, sed de pudore, quo suffundi solet, qui cadit causa. Illud, *qui quaerunt animam meam, ambignum est*. Aliquando enim accipitur in bonam partem, vt in eo loco, *Perijit fuga à me, & non est qui requirat animam meam*, id est, non habeo refugium vltimum, neque est qui me nouerit, & requirat.

re.



vt defendat. Aliquando in malam partem accipitur, vt hoc loco, & alibi sæpius: vbi querere animam, est conari ad tollendam animam, id est, vitam.

V. *Auertantur retrorsum, & confundantur cogitantes mihi mala.*

Non solum igitur confundantur, & pudore afficiantur, sed etiam *auertantur retrorsum*, id est, recedant victi; & confusi, qui cogitant mihi mala, id est, qui meditantur necem meam.

VI. *Fiant tanquam puluis ante faciem venti, & angelus Domini coarctans eos.*

Addit tertiò, vt non solum erubescant, nec solum recedant, sed celeriter fugere cogantur, & dispergantur in varia loca. Puluis enim à vento in varias partes magno imperu, velociterque dispergitur. Augetur autem hoc loco celeritas fugæ, & dispersio, tum ex parte pulueris, tum ex parte venti. Nam pro puluere in Hebræo est, *moti*, quod significat *glumam*, vt diximus in explicatione primi Psalmi, id est, puluerem leuissimum, ex minutissimis, & aridissimis paleis conflatum. Et pro vento corporali, hic ponitur *Angelus Domini*, qui Spiritus est viuens, & longe potentior, & efficacior omni vento. Fiant igitur sicut puluis leuissimus, qui ab omni vento facile rapi potest, & tamen non levis ventus, sed, *Angelus Domini sit coarctans, & impellens eos.*

VII. *Fiat via illorum tenebra, & lubricum, & Angelus Domini persequens eos.*

Addit vltimo, vt non solum dispergantur, & fugere cogantur; sed etiam sine vllò remedio in exitum præcipitentur. Fugientes enim iuuari solent scientia viarum, itinere tuto & stabili, aut certe si via sit lubrica, tarditate ambulationis. Hic autem ista omnia remedia cessant, imprecatur enim Propheta impijs, vt fugere cogantur in tenebris, & per viam lubricam, vt neque oculi, neque pedes officio suo fungi possint, & in-

stante post eos, ac vehementer urgente Angelo Domini, vt necesse sit eos in præcipitium, & exitum ruere. Hæc omnia implentur hoc tempore in Iudæis, alijsq; persecutoribus Christi, & Ecclesiæ qui iusto Dei iudicio versantur in tenebris ignorantie, & in lubrico concupiscentiæ; & persequente eos ira Dei, quod die labuntur, in maiora peccata, & ad sempiternam mortem summa velocitate festinant. Sed manifestius implentur in die iudicij; tunc enim impij confundentur, & pudentur confusione ineffabili, & auertentur retrorsum in præcipitium gehennæ diuina potestate coacti, idque absque vllò remedio, quomodo sine remedio ruit, & corrui in exitum, qui in tenebris per lubricum, alio persequente festinare compellitur.

*Quoniam gratis absconderunt mihi interitum laquei sui: superuacue exprobrauerunt animam meam.*

VIII.

*Veniat illi laqueus, quem ignorat, & captio, quam abscondit apprehendat eum, & in laqueum cadat in ipsum.*

IX.

In primis septem versiculis loquutus est Propheta in persona Christi, & omnium iustorum de persecutionibus generatim: in sequentibus versiculis explicat tria genera persecutionum, quas pati solent iusti ab impijs. Nam primum fraudibus, & insidijs iustos vexant, deinde falsis testimonijs cosdem appetunt, postremo aperta vi non verbis tantum, sed etiam factis iustos opprimunt. Dicit igitur de primo genere: *Quoniam gratis absconderunt mihi interitum laquei sui*, id est, quoniam quidem nulla iniuria à me lacesiti, mihi insidias struere non cessant, ideo precor Deum, vt prouidentia sua faciat, vt insidiæ illæ in perniciem ipsorum conuertantur. Quæ imprecatio, vt alias meminimus, non tam imprecatio, quam Prophetia est. Vere enim prouidentia Dei hoc agit, vt insidiæ, vel solis noceant insidiatoribus, vel prius & magis illis quam alijs: quomodo fax accensa, vt comburat domum, se ipsa prius incipit com-

com-



comburare, & consumere, quam domum; & sepe domui nihil nocet: ita malitia insidiantium, statim incipit animum insidiantis vastare; aliis autem, vel nihil nocet, vel longe minus; quia minus est malum poenae, quam malum culpae. Quod attinet ad verba illa, *absconderunt mihi interitum laquei sui*, S. Augustinus legit, *Absconderunt mihi laqueum corruptionis suae*; sed Hebraei, Graeci; codices, cum nostra editione concordant. Sensus autem idem est. Dicitur enim, *interitus laquei*, mors, quae paratur per instrumentum laquei, & dicitur laqueus interitus, siue corruptionis, laqueus, qui paratur, siue tenditur ad capiendum, & occidendū. In Hebræo habetur rete, non laqueus, sed parum refert, vitumq; enim instrumentum est ad capiendum aptum. Illud, *superuacue*, in Hebræo est, *chinnam*, id est, gratis, sicut paulo ante; sed Interpres variare voluit. Itaque sensus est, *superuacue*, id est, sine causa, cum nullam à me iniuriam acceperint, exprobrauerunt animam meam, id est, probro me affecerunt, tendentes mihi laqueos, & retia quasi feræ syluestri. In Hebræo nunc habetur, *chapheris*, id est, foderunt, sed Septuaginta legisse videntur, *charephu*, vna litera transposita, idem enim significat, *exprobrauerunt*. Quamuis si legamus, foderunt animam meam, idem erit sensus; nimirum sine causa foderunt foueam deceptionis vitæ meae, ac per hoc pudore me affecerunt. Illud autem, *veniat illi laqueus, quem ignorat*, & capio, quam abscondit, apprehendat ipsum, & in laqueum cadat in ipsum: multo clarius est in Hebræo, videlicet sic. *Veniat illi*, nimirum insidianti, *calamitas quam ignorat*, id est, calamitas insperata, & inopinata. Et declarat quæ sit ista calamitas, addens, *rete suum*, siue, *laqueus suus*, quem abscondit mihi, capiat ipsum, & sic incidat in ipsam calamitatem, quam mihi parauerat. Sententia tamen eadem est, nisi quod Septuaginta pro calamitate in utroque loco ponere maluerunt instrumentum calamitatis, videlicet laqueum; & pro rete, siue laqueo, posuerunt *captionem*; quæ est effectus laquei;

Illā repetitio, in ipsum, est hebraismus, pro eo quod nos Latini dicimus, in ipsum eundem laqueum cadat.

*Anima autem mea exultabit in Domino, & delectabitur super salutari suo.*

X.

*Omnia ossa mea dicent, Domine quis similis tibi.*

XI.

*Eripiens inopem de manu fortiorum eius, egenum, & pauperem à diripientibus eum.*

XII.

In his tribus versiculis Propheta explicat lætitiā inenarrabilem, quæ perfundetur iustus, cum se perfecte liberum esse cerneret ab omnibus insidiantibus. Sunt autem phrasæ poeticæ, metaphoricæ, admirabiles: est autem hæc sententia. Cum id acciderit, quod precatus sum, *Anima mea*, quæ viuō, & sapio, præ lætitiā *exultabit in Domino deo*, videlicet laudans, & magnificans; & simul *delectabitur super salutari suo*, quam se adeptam esse videbit, vel potius super ipsum Dominum, qui est salus eius, non solum anima, sed etiam corpus, imò omnes partes corporis, etiam intima, & abiectissima, quales sunt ossa; quæ sensum non habent: nec solum ossa, sed omnia ossa, etiam minima gestient præ voluptate, & si sensum & vocem haberent, exclamarent utique & dicerent, *Domine quis similis tibi?* nihil enim est in terra, neque in cælo te fortius, benignius, sapientius, amabilius: quippe qui tā potenter, & misericorditer eripis pauperem de manu hostis multo fortioris ipso, qui violenter eius bona, & ipsam vitā rapere cupiebat. S. Augustinus more suo allegoricū sensū persequens, per ossa intelligit viros perfectos, qui sunt in Ecclesia, per carnem verò homines infirmos, ut sensus sit, quamuis tempore tentationis, vel persecutionis caro mystici corporis Ecclesiæ cedat, ossa tamen non cedent, sed resistent, ac dicent, *Domine quis similis tibi?* Quod attinet ad verba, illud salutari suo, in Hebræo est salutem suam. Sed quia secunda pars versiculi, ut plurimū repetit, explicat primam, & in prima dictum est, *exultabit in Domino*, recte S. Augusti-

Y

gusti-



gustinus per *salutare* intelligit ipsum Dominum, qui supra dixit: *Salus tua ego sum*. Illud autem, *omnia ossa mea dicent*, simile est illi, quod habetur in Psalmo. 102. *Benedic anima mea Dominum, & omnia quae intra me sunt, Domini sancto eius*. Significatur autem in hac phrasi perfecta quaedam letitia, quae totum hominem repleat. Aliquando enim animus gaudet, sed corpus dolet, & tunc non est plena perfecta letitia: sed quando sanabit Dominus omnes languores nostros, & replebit in bonis omne desiderium nostrum; tum demum totus homo inenarrabili voluptate perfusus exultabit in Domino, & omnes partes eius usque ad ossa insensibilia dicent Domino, *quis similis tibi?* sicut enim res insensibiles fiti tunc dicuntur, quando carent necessariis adiumentis, iuxta illud, *Suavit in te anima mea, quam multipliciter tibi caro mea*, sic etiam eadem res insensibiles, quando defectus earum tolluntur, exultate & gestire dici possunt. Illud, *Domine quis similis tibi*, in Graeco geminatur *Domine Domine*, sed neque geminatio habetur in Hebraeo, neque legitur ab Augustino, vel Theodoro, vel Euthymio. Illud eripiens inopem, in Hebraeo facilius connectitur cum superioribus, sic enim ad verbum legitur, *Domine quis sicut tu, qui eripis inopem*, est itaque sic connectenda sententia, *Domine quis similis tibi, qui es eripiens inopem de manu fortiorum eius?* illud quoque, *de manu fortiorum eius*, in Hebraeo clarius est. Sic enim legimus, *eripiens inopem a robusto pra ipso*, id est, ab hoste robustiore, quam ipse sit. Sed Latinus Interpretes reddidit ad verbum quod invenit in Graeco. Denique pro illis verbis *a diripientibus eum*, in Hebraeo solum est *a violento*, sed Interpretes explicare voluerunt latius quod unico verbo continebatur in textu originali.

XIII.

*Surg nres testes iniqui, quae ignorabam interrogabant me.*

XIV.

*Retribuebant mihi mala pro bonis sterilitatem anima mea.*

Pergit nunc Propheta ad secundum genus persecutionum, quo impij testimoniis falsis, non ex insidiis, sed palam iustos persequuntur, & mire exaggerat nequitiam horum testium: primo dicit, *surgentes*, ut significet eos non expectasse citationem, sed per se venisse. Secundo addit, *quae ignorabam*, ut ostendat accusari iustum ab iniquis testibus, de eo quod nec fecerat, nec cogitauerat. Dicimur enim ignorare, quae non probamus, nec vquam fecimus, ac si facere nesciremus. Sic de Christo dicit Apostolus. 2. Cor. 5. *Eum qui peccatum non noverat, pro nobis peccatum fecit*. Tertio addit, *interrogabant me*, ut ostendat audaciam, ac impudentiam testium, qui non contenti falsum testimonium dixisse coram Iudice, ipsum etiam virum iustum coram arguere, & interrogare audent. Quarto addit, *retribuebant mala pro bonis*, ut ostendat falsos istos testes nulla iniuria lacestos, sed contra beneficiis affectos, ex mera malitia ad calumniandum adductos. Addit ultimo *sterilitatem anima mea*, ut ostendat per falsa testimonia impios illos non querere leve aliquod malum, sed omnium maximum. Potest enim sterilitas hoc loco posita duobus modis accipi, primo generatim pro desolatione, & vastitate universali, qualis accidit sancto Iob, qui vna die amisit opes, filios, sanitatem. Et huc pertinet expositio Theodreti, & Euthymij, qui accipiunt *sterilitatem* pro obliuione, id est, tali desolatione, ut ipsum etiam nomen obliuioni tradatur. Potest secundo accipi sterilitas pro vno genere mali, sed maxime aestimationis, tum apud Diabolum, in qui illud per ministros suos inferre conatur, tum apud hominem iustum, qui illud cogitur pati. Id malum est, ut homo iustus infamiae per falsa testimonia notatus, sterilis, & orbis maneat, ut nec fructum facere possit, & quod iam fecit, pereat. Sic S. Augustinus exponere videtur.

*Ego autem cum mihi molesti essent induabar cilicio.*

XV.

*Humiliabam in ieiunio animam meam.*

XVI.



*Oratio mea in sinu meo conuertetur.*

Antequam Propheta de tertio genere persecutorum loqui incipiat, exponit quid egerit aduersus persecutores secundi generis, ac dicit se non reddidisse malum pro malo; neque de vindicta cogitasse, sed ad Deum orandum cum magna humilitate se conuertisse. Cum, inquit, *Aduersarij mihi molesti essent*, non superbe illis insultauit, sed sacco indutus, ieiunare coepi, vt oratio mea Deum facilius placaret. Saccus enim, & ieiunium sunt alae orationis. Sic Rex ille Niniuitarum cum sacco, & ieiunio orans exauditus, Ionæ. 3. Quod idem legimus de Rege Achab. 3. Reg. 25. Vnde, & Sapiens dixit, *Oratio humiliantis se nubes penetrabit.* Addit verò, *Oratio mea in sinu meo conuertetur*, vt ostendat se fructum orationis non dubium expectare. Ponitur enim, *in sinu meo*, pro *in sinum meum*, vt habetur in textu Hebræo, & Græco; quasi dicat, oratio ex tanta humilitate profecta non reuertetur ad me vacua, sed sinum meum cælesti consolatione implebit. Possumus etiam, si velimus, illud, *in sinu meo*, accipere vt iacet, in casu auferendi, exponere hunc locum de frequentia orationis, vt sensus sit, oratio mea in sinu meo existens, cæpius reuertetur & recurreret, vt quod semel, aut iterum querens non inuenit, perseuerando, id est, sæpius reuertendo inueniat. Et quamuis ad litteram hæc non videantur conuenire Christo, quem in Evangelio non legimus indutum cilicio ieiunasse, & orasse, dum persecutiones pateretur: conueniunt tamen eidem Christo, prout est in membris suis; hoc est enim proprium membrorum Christi, dum aduersa patiuntur, non cum aduersarijs contendere: sed ad cor suum redire, & Deum humiliter deprecari. Quod ad verba attinet, illud, *cum mihi molesti essent*, in Hebræo est, *bachalotham*, cum ipsi infirmarentur. Sed verisimile est, Septuaginta Interpretes legisse cum alijs punctis, vel cum additione alicuius alterius litteræ, in coniugatio-

ne, Piel, vel Hiphil. Tunc enim accipi debet actiue illud verbum, vt non solum Septuaginta, sed etiam S. Hieronymus ex Hebræo vertit. Sic enim legimus apud Hieronymum. *Cum infirmarer ab eis*, id est, cum ipsi me agrotare facerent, quod est idem cum eo, quod legunt Septuaginta, *cum mihi molesti essent*. Potest etiam dici, Septuaginta, & S. Hieronymum legisse, *cum infirmarentur ipsi*, vt nunc legimus in Hebræo, sed altius cogitasse, Prophetam loqui de illa agrotatione animi; quæ semper coniuncta est cum iniusta persecutione, quicumque enim alium iniuste persequitur, seipsum lædit, & vastat; & dum alium agrotare facit morbo penæ, ipse agrotat morbo culpæ. Recte ergo sententiam reddiderunt Septuaginta, & S. Hieronymus, idem enim est, quo ad sensum, *cum mihi molesti essent*, & *cum morbi iracundia*, vel odij, vel inuidentiæ, aduersus me agrotarent. Illud autem, *induebar cilicio*, in textu Hebræo, & Græco est, *induebar sacco*. Ex quo intelligimus per cilicium non esse intelligendum indumentum ex pilis animalium, quod interius adhiberi solet, vt legimus de Rege Ioram. 4. Reg. 6. sed vestem sacceam, qua exterius etiam ad significandam humilitatem aliqui vtuntur vt de Rege Niniuitarum Ionas testatur: illud, *humiliabam in ieiunio animam meam*, phrasis est Hebræica, passim enim Hebræi animam ponunt pro toto homine.

*Quasi proximum, & quasi fratrem nostrum sic complacebam: quasi lugens, & contristatus, sic humiliabar.*

Hic versiculus multò clarior est in textu Hebræo, quam in Græco, vel latino. Sic enim ad verbum reddi potest cum S. Hieronymo, *Quasi ad amicum, quasi ad fratrem meum, sic ambulabam: quasi lugens mater tristis, sic incuruabam*: & sensus est, ego non solum in tribulatione positus non reddidi malum pro malo, sed reddidi bonum pro malo: sic enim affectus fui erga vnumquemque Aduersariorum, vt amicus



erga amicum, & imo vt frater erga fratrem vel potius, vt mater erga filium paruulum, & languentem. Sicut enim mater videns filium aegrotantem, incuruat se tristis, & gemens ad eum suscipiendum: sic, & ego me cum aduersarijs meis gessi. Non potuit grandius, & luculentius exprimi pius affectus erga inimicos. Et quidem, Propheta David opere prestitit, quod hoc loco in persona Christi, & sua, & omnium perfectorum virorum expressit. David enim Saulem, quē vt fratrem, dum viueret dilexit, mortuum vt filium defleuit. Idem fecit multo excellentius Christus, qui videns ciuitatem fleuit super illam, Luc. 19. seque gallinæ pullos sub alas congregare satagenti comparauit, Mat. 23. Lectio Latinæ editionis eundem sensum habet, sed obscura est, quia verba Græca totidem verbis Latinis reddidit. Sed ex Hebraica lectione illustranda, & supplenda est. Hic igitur erit sensus, *quasi proximum, quasi fratrem nostrum sic complacebam*, id est, cōplacēbam mihi, siue affectus eram erga vnumquemque aduersariorum, quasi erga proximum, siue socium, & amicum, immo etiam erga fratrem nostrum. *Quasi lugens, & contristatus sic humiliabar*, id est, non solum affectus eram ad persecutorem meum, vt ad proximum & fratrem, sed humiliabar, & inclinabam me ad eum, ex compassione dolens, & contristatus de malis eius, quomodo pia mater inclinatur tristis ad filium languidum, & iacentem.

XVIII.

*Et aduersum me latati sunt, & conuenerunt, congregata sunt super me flagella, & ignorauit.*

Docet consequenter Psalmus, persecutores iustorum reddere mala pro bonis, & simul transit ad tertium genus persecutionum, quo non contenti impij fraudibus, & calumniis iustos vexasse, flagellis quoque eos aggrediuntur. *Et aduersum me latati sunt*, ego de malis eorum dolebam, ipsi de malis meis latabantur: neque hac impietate contenti, conuenerunt aduersum me flagellis armati, vt me, si possent, occiderent;

*& ignorauit*, id est, ignorauit eorum consilia, & ideo præcauere non potui, vel ita me patienter gessi, ac si quid facerent ignorare. Quod attinet ad verba, pro, *& aduersum me*, Sanctus Hieronymus vertit, *& in infirmitate mea*, vox enim Hebraica, *tsalgi*, potest significare, latus meum, & infirmitas mea. Priorem significationem sequuti sunt Septuaginta, & ideo verterunt, *aduersum me*, quod fere est idem quod ad latus meum. Posteriores sequutus est Sanctus Hieronymus. Sed in sententia non est varietas. Illud autem, *congregata sunt super me flagella*, in Hebræo est, *congregati sunt super me flagellantes*, sed idem est sensus. Denique pro, *ignorauit*. Sanctus Augustinus legit, *ignorauerunt*, & refert ad persecutores, qui vere ignorauerunt, quam magnos viros percuterent, cum Christum, vel sanctos flagellarent. Sed quamuis vox Græca sit ambigua, tamen Hebraica non est ambigua, nec potest reddi in prima persona: proinde recte habet Latina vulgata editio, *& ignorauit*, vt etiam legunt Theodoretus, & Euthymius Græci.

XIX

*Dissipati sunt, nec compuncti tentauerunt me: subsannauerunt me subsannatione, frenduerunt super me dentibus suis.*

Pergit explicare malitiam aduersariorum, ac dicit, eos non potuisse implere quod cupiebant, diuina prouidentia protegente suos, ne ab iniquis persecutoribus læderentur. Sed nec sic quidem quieuisse eos: nam quos non potuerant flagellis verberum mouere, tentabant flagellis verborum, irrisiōibus, & comminationibus terrere. *Dissipati sunt*, inquit, id est, qui conuenerant in vnum, vt nocerent & flagellarent, diuisti sunt ab inuicem: Deo dissipante eorum conuenticulum: sed non propterea *compuncti sunt*, id est, non resipuerunt, vel, vt proprie sonat vox Hebræa, *damu*, non *si*luerunt & quieuerunt, vt par erat. Sed potius tentauerunt me, nimirum ad iracundiam prouocare, quia *subsannauerunt me subsannatione* irrisoria, & *frenduerunt contra me*.



me dentibus suis, minas crudeles intentantes. Quod attinet ad verba, quod in Græco & Latino legimus, *tentaue- runt me, subsanna- uerunt me* subannatione, S. Hieronymus ex Hebræo vertit, *in simulatione uerbarum si- thorum*. Sed verba ipsa Hebraica, neque hunc sensum, neque illum recipere videntur: sic enim legimus, *bechanphe labage mahog*, id est, *in hypocrisi, sine simulationibus subannationum uerbi otiosi*. At profecto om- mino credibile est, LXX. Interpretes aliter legisse, & libros optimos habuisse, præ- fertim cum verba Hebraica, ut nunc legun- tur cum punctis Rabinorum, nihil significa- re videantur. Existimo igitur mutanda esse puncta, & ex nomine, & in simulationibus, faciendum esse verbum modi infiniti cum affixo primæ personæ, quod red- lendum erit, in tentando me. Nam etsi, *chanaf*, simulare, & hypocrisiam esse significet, tamen tentare proprium est hypocritarum, iuxta illud Do- mini: *Quid me tentatis hypocritæ?* Scidem est, in tentando me, quod, in hypocrisi agendo mecum, & similiter ex nomine subannatio- num, faciendum erit verbum temporis præ- teriti cum affixo primæ personæ, & tunc sensus erit, subsannauerunt me; illud au- tem *mahog*, significat quidem verbum otio- sum, sed significat etiam subannationem. Proinde integer sensus erit, *in tentando me subsannauerunt me subannatione*, quod est idem cum eo, quod nos habemus, *tentaue- runt me, subsannauerunt me subanna- tione*.

XX. Domine quando respicies? restitue ani- mam meam à malignantate eorum, à leoni- bus vnicam meam.

Expositis persecutionibus, reuertitur Pro- pheta in persona iustorum omnium, qui persecutionem patiuntur, ad orandum Deum, ut finem cum principio coniungat. Et quoniam videtur Deus non respicere quid in terris fiat, quando non punit iniu- stos, ideo dicit: Domine quando respicies? id est, quando te videre mala impiorum pu- niendo demonstrabis? Restitue animam meam à malignantate eorum, id est, eripe vi-

tam meam de periculo, in quo versatur, dum est in potestate malignorum, & re- stitue illam in pristinam securitatem, siue, restitue mihi vitam, quam pene amisi, dum est in manibus malignorum. Quod ipsum repetit, & clarius explicat, dum adiungit, *à leonibus vnicam meam*, id est, restitue mihi animam, quæ est mihi vnica, ac per hoc dilectissima, quod facies eruendo eam à potestate inimicorum, qui crudelitate & ferocitate leones dici possunt, & *freudent*, ut supra dictum est, *dentibus suis*. Quod ad verba attinet, illud, *à malignantate*, S. Augustinus legit, *ab astutiis*. S. Hierony- mus autem vertit, *à calamitatibus*. Cau- sa diuersitatis fuit, quia vocem Hebraicam, *missibem*, deduxerunt Septuaginta à ver- bo, *nasa*, quod est, decipere, & ideo S. Augustinus legit, *astutiis*, & noster In- terpres, *à malignantate*: at S. Hieronymus deduxit ab alia radice, nimirum à *sua*, quod est *desolari*, & ideo vertit, *à calamita- tibus*, sed idem est sensus, ut patet. Per *uni- cam*, S. Augustinus intelligit Ecclesiam, quam Christus erui vult à persecutoribus. Quod quidem verum est, sed ad literam vi- detur omnino referendum ad animam, seu vitam. Sicut etiam illud Psal. 21. *Erue à fra- mea Deus animam meam, & de manu canis vnicam meam*. Anima enim recte dicitur vnica, quasi vnice dilecta. Vita enim tempo- ralis est fundamentum omnium bonorum temporalium; & vita æterna omnium bono- rum simpliciter. Itaque & Dominus ait in Euangelio Matth. 16. *Quid prodest homini, si vniuersum mundum lucretur, anima vero sua detrimentum patiatur? aut quam dabis homo commutationem pro anima sua?* & ta- men multi ita desipiunt, ut pro nihilo liben- ter perdant animam, quam vnice amare de- buissent.

XXI. Confitebor tibi in Ecclesia magna, in populo graui laudabo te.

Promittit se non fore ingratum, si libe- rationem ab aduersariis obtineat. Confite- bor tibi, inquit, in Ecclesia magna, id est, non abscondam beneficium tuum, sed pu- blice

מִשְׁאֵתָם  
נָשָׂא

שָׂאָה



publice coram omnibus prædicabo : & idem  
repetit aliis verbis, *in populo graui laudabo te.*  
Idem enim est confiteri & laudare, idem  
quoque Ecclesia magna, & populus grauis.  
Dicitur enim Ecclesia magna ratione mul-  
titudinis, quod proprie significat vox He-  
braea, *rab*, id est, Ecclesia multa; & similiter  
dicitur populus grauis, siue, vt significantius  
habetur in Hebræo, *hazum*, robustus, ra-  
tione multitudinis. Tunc enim robustus est  
populus, cum tam multis viris abundat, vt  
hostes non timeat. Videtur etiam Propheta  
ad Ecclesiam Christianam respicere, in qua  
laudatur assidue Deus ob piorum liberatio-  
nem. Est enim Ecclesia Christiana vere mul-  
ta & magna, cum totum orbem terrarum  
obtineat; & vere grauis & robusta, cum por-  
ta inferi aduersus eam prauallere non possint,  
Matth. 16. Ecclesia quoque triumphans,  
Ecclesia magna erit, cum de ea scriptum sit,  
Apoc. 7. *Vidi turbam magnam, quam dinu-  
merare nemo poterat: & populus robustus,*  
cum ibidem additum sit, *& palma in mani-  
bus eorum.*

XXII.

*Non supergaudeant mihi, qui aduer-  
santur mihi inique; qui oderunt me gra-  
tis, & annuunt oculis.*

Redit ad orationem quam inchoauerat,  
& petit liberari à persecutoribus, præsertim  
hypocritis, qui simulant se amicos, cum ni-  
hil minus sint. *Non supergaudeant mihi*, id  
est, non gaudeant super me, siue non læten-  
tur de interitu meo, *qui aduersantur mihi*  
*inique*, id est, qui me persequuntur fingentes  
amicitiam, nam in Hebræo habetur, *secher*,  
quod mendacium proprie significat: vnde S.  
Hieronymus vertit, *inimici mei mendaces*: &  
hæc ipsa est maxima iniquitas, persequi ho-  
minem, & decipere specie amicitiae. Hoc i-  
dem declaratur, & repetitur in sequentibus  
verbis, *qui oderunt me gratis, & annuunt o-  
culis*, id est, qui sine causa me oderunt, cum  
nihil mali illis attulerim, & tamen fingunt a-  
micitiam, annuendo oculis, salutantes, blan-  
de aspicientes & approbantes quæ dico. Quid  
est, inquit Augustinus, annuere oculis? pro-  
nunciantes vultu, quod in corde non gerunt.

*Quoniam mihi quidem pacifice loque-  
bantur, & in iracundia terra loquentes  
dolos cogitabant.* XXIII

Declarat Propheta, cur dixerit de inimi-  
cis suis, *& annuunt oculis*, & dicit, quoniam  
ipsi quidem mecum verbis exterioribus pa-  
cifice loquebantur, quasi amici essent; sed in-  
teriori præ iracundia disrumpebantur, & co-  
gitabant dolos, quibus me perderent: hæc de  
sensu. In verbis magna difficultas est. Nam  
Hebraicus codex ad verbum sic habet, *quo-  
niam non pacem loquebantur, & super scissu-  
ras terra verba dolosa meditabantur.* Et sic  
etiam vertit S. Hieronymus, nisi quod pro  
scissuras terra, ponit in rapina terra. Græcus  
vero codex sic habet, *quoniam mihi quidem  
pacifica loquebantur, & super iracundiam  
dolos cogitabant.* Et sic legunt & interpre-  
tantur S. Augustinus, Theodoretus, & Eu-  
thymius. Sed obseruandum est, vocem  
Hebraicam *lo*, quæ significat non, à LXX.  
Interpretibus lectam fuisse *li*, quæ signifi-  
cat mihi, & omnino credibile est, LXX.  
Interpretes habuisse libros Hebraicos eimen-  
diores: proinde non videtur ambigen-  
dum, meliorem esse lectionem Latinam  
vulgatæ editionis, quæ responderet voci,  
quam in suis libris habuerunt Septuagin-  
ta, quam ea sit, quam nunc habemus in  
Hebræo. Quod autem in Hebræo habe-  
tur, *super scissuras terra*, verterunt Septua-  
ginta, *super iracundiam*, quia intellexerunt  
sermonem Prophetæ esse metaphoricum, &  
per scissuras terra, significatam esse iracun-  
diam, quæ est quædam scissura cordis terre-  
ni & animalis. Qui enim irascuntur, ij dis-  
rumpuntur interiori, & quietem ac pacem a-  
mittunt: & quidem Latinus Interpres addere  
voluit vocem illam, *terra*, quam inuenit in  
Hebræo; sed Græcus Interpres satis esse pu-  
tauit, eam subintelligi in voce iracundiæ,  
quæ est feruor circa cor. Explicanda igitur  
est vox illa, *terra*, vt accipiat pro corde ter-  
reno & animali, vt diximus. Cur autem S.  
Hieronymus vertit, *rapinam terra*, non asse-  
quor, nisi per scissuras metaphoricè intelle-  
xerit rapinam, aut forte vox Hebraica hoc  
etiam



etiam significare possit. Sed absolute præfrenda est interpretatio LXX. Interpretum, quam Ecclesia in Latina editione sequitur. Quod autem in Latina editione nos habemus, *loquentes dolos cogitabant*, non differt in sensu à verbis Hebraicis, *verba dolosa cogitabant*. Idem enim est, verba dolosa cogitare, &, loquendo intra se dolos cogitare. Neque multum refert, quod Septuaginta non habeant, verba, aut, loquentes, sed simpliciter, *dolos cogitabant*, quia in ipsa cogitatione satis intelligitur interna locutio.

XXIV. *Et dilataverunt super me os suum: dixerunt, Euge, euge, viderunt oculi nostri.*

Quam sit verum, quod supra dixit de inimicis suis, quod simulato corde pacifice loquerentur, ostendit Propheta in persona iustorum in hoc versiculo, ubi dicit, eosdem inimicos, qui aliquando blandiebantur & annuebant oculis; postea cum in eas calamitates incidisset, quas illi fraudulenter concinnauerant, dilatato ore cœpisse aperte insultare, & inter se gratulari, ac dicere, Vidimus tandem, quod tantopere cupiebamus. Hoc totum in Christo, qui caput iustorum est, impletum legimus in Evangelio: aliquando enim pacifice loquebantur inimici dicentes: *Scimus, quia veraces, & viam Dei in veritate doces*: sed interim dolos meditabantur, ut caperent eum in sermone. Cum autem illum cruci affixum viderunt, dilataverunt os suum insultantes, & dicentes: *Vah qui destruis templum Dei, &c.* Quod ad verba attinet, conveniunt codices omnes, eo excepto, quod interiectionem Hebraicam, *וואה*, Septuaginta reddiderunt, *Euge*, S. Hieronymus, *vah*, & *Euge* est letantis, *vah* insultantis: sed parum refert, nam utraque est exultantis, & exultatio inimicorum quædam insultatio est.

XXV. *Vidisti Domine ne fileas, Domine ne discedas à me.*

XXVI. *Exurge Domine, & intende iudicio meo, Deus meus; & Dominus meus in causam meam.*

*Indica me secundum iustitiam tuam, Domine Deus meus: non supergaudeant mihi.* XXVII.

Redit Propheta ad orationem, id ipsum aliis & aliis verbis repetens ad insinuandum affectum. *Vidisti*, inquit, Domine, quanta videlicet sit oppressio pauperis serui tui, *ne fileas*, quasi non videas, aut non possis, aut non velis defendere sperantes in te. *Ne discedas*, vel, ut habet vox Hebraica, ne elongeris à me, id est, ne deferas me in tribulatione positum, quomodo faciunt qui procul abeunt. Nec solum non fileas, & non discedas, sed nec sedeas, quasi ociose spectans, vel dormitans; sed exurge, & quasi iudex iustus & potens intende diligenter animum ad iudicium meum, id est, ad litem, quam cum persecutoribus habeo, intende, inquam, Deus meus in causam meam, & indica me secundum iustitiam tuam Domine, id est, si iustitia tua, quæ rectissima est, iudicat me iniuste ab aduersariis opprimi, libera me de manibus eorum, ut non amplius gaudeant super miseriis meis.

*Non dicant in cordibus suis, euge, euge anima nostra; nec dicant, deuorabimus eum.* XXVIII.

*Erubescant, & reuereantur simul, qui gratulantur malis meis.* XXIX.

*Induantur confusione & reuerentia, qui magna loquuntur super me.* XXX.

Explicat id, quod dixerat, non supergaudeant mihi, *non dicant*, inquit, *in cordibus suis, Euge, euge, anima nostra*, id est, non exultent in cordibus suis super vitam meam, quasi iam extinctam. Sicut enim illud, *non supergaudeant mihi*, significat non gaudeant super me; sic etiam hoc, *non dicant euge anima nostra*, debet exponi, non dicant euge super animam nostram, & explicat in verbis sequentibus, *Nec dicant*, inquit, *deuorabimus eum*, id est, non possint iactare ab eis, quasi à leonibus me deuoratum. Sed contra potius amissa spe victoriæ erubescant & reuereantur, id est, verecundentur simul omnes inimici mei, qui nunc spe victo-



riæ gratulantur sibi de malis meis, id est, mihi imminuentibus. Nec solum leuiter erubescant & verecundentur, sed induantur confusione & erubescant, id est, toti cooperiantur confusione, qui magna loquuntur super me, id est, qui magnifice iactabant potentiam suam super me. Al. qui legunt, *maligna*, pro *magna*: sed nostra lectio consentit Græcæ & Hebraicæ veritati.

XXXI. *Exultent & latentur, qui volunt iustitiam meam, & dicant semper; magnificetur Dominus, qui volunt pacem serui eius.*

XXXII. *Et lingua mea meditabitur iustitiam tuam, tota die laudem tuam.*

Quemadmodum precatus est Propheta, ut iniqui confundantur; sic etiam nunc precatur, ut iusti exultent & latentur, qui bene sibi volunt, & amant innocentiam suam, vel cupiunt iustitiam suam palam apparere. Excitat quoque ad laudem Dei omnes qui cupiunt pacem suam, quæ secutura erat ex liberatione sua ab omnibus malis. In Hebræo habetur, *qui vult pacem serui sui*. LXX. Interpretes videntur legisse verbum in numero multitudinis, quod in nostris libris est in numero singulari: sed uterque sensus optimus est. Claudis Psalmum David, promittens gratiarum actionem pro accepto beneficio. *Lingua mea*, inquit, *meditabitur iustitiam tuam*, id est, exercebitur in prædicanda iustitia tua: & hoc ipsum repetit, & repetendo declarat, dicens: *Tota die laudem tuam*, id est, lingua mea tota die meditabitur laudem tuam, id est, exercebitur in prædicanda laude iustitiæ tuæ. Quod autem dicit, *tota die*, significat frequenter & assidue; ita ut nunquam tanti beneficii subrepat obliuio.

S. Augustinus hoc loco pie monet, eum semper Deum laudare, qui semper bene agit.

\*\*\*

## PSALMVS XXXV.

Titulus & Argumentum Psalmi.

In finem seruo Domini David.

DE hoc titulo dictum est in explicatione Psalmi 4. ubi primum legitur in finem. Sensus igitur est, Psalmus inspiratus seruo Domini Davidi, qui canendus est iugiter usque in finem, quæ ad Christum pertinet, qui legis & Prophetarum est finis. Argumentum est, immensam fere esse quorundam hominum malitiam, sed multo maiorem Dei misericordiam & iustitiam.

## EXPLICATIO PSALMI XXXV.

**D**ixit iniustus, ut delinquat in semetipso: non est timor Dei ante oculos eius.

Describit Propheta duas primas peccati radices, quarum altera est in voluntate, quæ decernit male agere; altera in intellectu, qui non cogitat timorem Domini prohibentis peccatum. *Dixit, inquit, iniustus, ut delinquat in semetipso*, id est, apud se, in corde suo, decreuit iniustus delinquere, id est, corde suo in peccatum consensit. *Non est timor Dei ante oculos eius*, id est, ideo corde peccatum elegit, quia oculis mentis non cogitauit timorem Domini omnia videntis. Vbi timor ponitur pro obiecto timoris, id est, non cogitauit Deum iustum, fortem, videntem omnia: ex qua cogitatione timorem tantæ potestatis sine dubio concepisset. Sicut enim qui timeret hominem, non audet in conspectu eius malum exterius facere; ita qui timet Deum, non audet interius cogitare, quoniam Deus etiam corda scrutatur. Quod attinet ad verba, tres primæ Hebraicæ voces sic ad litteram verti possent: *Dictum prauaricationis impij*, sed vox illa, *neum*, quamuis proprie dictum significet, tamen accipitur passim pro verbo *dixit*, illud autem *pesah*, quod significat *prauaricationem*, mutatis

pua-



punctis, quæ à Rabinis apposita sunt, legi poterit, *poseah*, id est, *prauaricator*, siue iniustus: sic etiam illud, *larasah*, quod S. Hieronymus vertit, *impij*, mutatis punctis significabit, *ad delinquendum*, siue, *ut delinquat*, ut Græci & Latini codices habent. Et hæc si sine dubio vera lectio est, quod confirmat littera *lamed*, quæ signum est verbi modi infiniti, non autem nominis ex casu genitiuo. Illud autem, *in semetipso*, in Hebræo est, *libbi*, *in medio cordis mei*, sed corrupta videtur littera Hebraica mutatione vnius litteræ: nam ipse etiam S. Hieronymus vertit, *cordis eius*, non *cordis mei*. Itaque legendum videtur, *libbo*, id est, *corde suo*.

*inueniendum iniquitatem eius ad odium*. hunc sensum facit, Vt inueniat Deus iniquitatem eius ad odiendum, id est, non ad parcendum, sed ad puniendum. Quod autem dicitur in Græco codice, *inuenire iniquitatem suam*, & *odisse*, potest etiam legi, *inuenire iniquitatem eius*, & *odisse*, id est, vt Deus inueniat iniquitatem eius, & non ignoret, sed odio habeat & puniat: neque enim Græci habent discrimen inter *eius*, & *suam*, vt nos Latini habemus, proinde illud *adit*, quod S. Augustinus legit, *suam*, noster interpretes legit, *eius*.

*Verba oris eius iniquitas & dolus; noluit intelligere, vt bene ageret.*

III.

II.

*Quoniam dolose egit in conspectu eius; vt inueniatur iniquitas eius ad odium.*

Demonstrat in hoc versiculo Propheta, quod dixit, iniustum non habere timorem Domini. Nam, inquit, *in conspectu ipsius Dei dolose egit cum ipso Deo*, & omnibus hominibus adeo grauitur, *vt iniquitas eius non inueniatur apud Deum ad veniam*, sed *ad odium*, quod certe nunquam fecisset, si Deum timuisset. Quis enim delinquere audeat in conspectu Iudicis, si Iudicem timeat? Verba Hebraica & Græca possunt alium sensum facere, nimirum, quod iniustus dolose agit, cum videtur velle redire ad cor, & confiteri peccata: nam non querit peccata sua, dum conscientia suæ secreta rimatur, vt vere illa odio habeat, sed tantum vt fallat Deum, vel homines: & hunc sensum persequitur S. Augustinus. Verba Hebraica sic sonant: *Quoniam dolose egit aduersus eum in oculis eius ad inueniendam iniquitatem eius*, *ad odiendum*. Græca vero sic habent: *Quoniam dolose egit in conspectu eius*, *inuenire iniquitatem suam*, & *odisse*. Quamuis autem sensus posterior verus sit, & verbis Propheta aptari possit: tamen prior sensus est magis vniuersalis, & melius connectitur cum superioribus, & magis conuenit cum vulgata Latina editione; & non difficulter accommodari potest verbis Hebraicis & Græcis. Quod enim dicitur in codice Hebraico, *ad*

Dixit Propheta hominem impium dolose agere, nunc addit etiam dolose loqui, additurus postea etiam dolose cogitare, vt vndique manifestetur insignis perversitas eius, qui Deum non timet. *Verba*, inquit, *oris eius*, sunt conformia factis, nimirum iniusta, imo tam iniusta, vt non sit aliud nisi *iniquitas & dolus*, quicquid loquitur, eo tendit, vt vel lædat aperte, vel decipiat. *Noluit intelligere, vt bene ageret*, id est, neque potest excusare culpam suam, prætexendo ignorantiam: voluntarie enim ignorauit, cum non curauerit discere legem iustitiæ, vel per se inuestigando, vel ab aliis querendo; quoniam decreuerat male agere: & vt male ageret, scientiam bene viuendi contempsit.

*Iniquitatem meditatus est in cubili suo; astitit omni via non bonæ: malitiam autem non odit.*

IV.

Ordine retrogrado descripsit primo opera iniusta, deinde verba iniqua, nunc tandem cogitationes & affectiones malas describit: quamuis enim ex corde, vt est in Euangelio, & procedant verba & opera mala: nos tamen ex operibus & verbis malis, quæ videmus & audimus, cognoscimus cogitationes & voluntates malas, quas videre & audire non possumus. *Iniquitatem*, inquit, *meditatus est in cubili suo*, id est, opera & verba iniqua, non casu aut imprudenter patrauit,



uit, vel effudit, sed in secreto cubilis sui multo ante meditatus est. *Astitit omni via non bona, malitiam autem non odit*, id est, dum medicaretur in corde suo, & varia consilia occurrerent, quasi viæ ad operandum, approbavit omnia mala consilia, & sic ingredi cœpit omnem viam non bonam, quia corrupta est eius voluntas, & ideo malitiam non odit, sed amavit potius, non quia mala est, sed quia utilis visa est. Illud, *omni via non bona*, positum est pro *omni via mala*, ac si diceret, non placuit illi ullum consilium bonum; sed & contrario elegit sequi omnia mala consilia, & sic astitit viæ non bonæ, id est, stetit in via non bona.

V. *Domine in cælo misericordia tua: & veritas tua vsque ad nubes.*

VI. *Iustitia tua sicut montes Dei, iudicia tua abyssus multa.*

Transit Propheta ad alteram partem Psalmi, atque ostendit, magnam quidem esse aliquorum hominum malitiam; sed maiorem esse in Deo bonitatem, quæ in misericordia & iustitia eius consistit. Ac de misericordia dicit: *In cælo misericordia tua*, id est, tam magna est misericordia tua, vt à terra ad cœlum pertingat, & omnia repleat: quod clarius habetur in Psalmo 107. *Magna est misericordia tua super cælos*. Misericordiæ adiungit veritatem, id est, fidelitatem, quæ facit obseruari, quod misericorditer promittitur; de qua dicitur in Psalmo 144. *Fidelis Dominus in omnibus verbis suis*. Et *veritas tua vsque ad nubes*, id est, misericordia vsque ad cœlum pertingit cum sua comite veritate, quæ ipsa quoque extenditur *vsque ad nubes*, id est, vsque ad cœlum, in quo sunt nubes. Neque minor est in Deo iustitia, quæ reddit vnicuique secundum opera sua. Nam *iustitia tua*, inquit, *sicut montes Dei*, id est, magna est instar montium altissimorum, qui nubes aliquando superant. Dicuntur enim res magnæ res Dei, vt alio loco Psal. 79. *Sicut cedros Dei*. Adiungit iustitiæ iudicia, quæ sunt actus iustitiæ, ac dicit: *Iudicia tua abyssus multa*, id est, profunda & inderutabilia, quomodo profundissima, orago, quæ abyssus dicitur,

oculis penetrari non potest. His omnibus corporalibus similitudinibus altitudinis & profunditatis diuinæ misericordiæ & iustitiæ, nec non veritatis & iudiciorum, nihil significatur aliud, nisi misericordiam & iustitiam Dei maiora esse, quam vt à nobis perfecte intelligi possint; quemadmodum oculis corporalibus non pertingimus ad ea, quæ superant nubes, vel quæ sunt infra terram.

*Homines & iumenta saluabis Domine, quemadmodum multiplicasti misericordiam tuam Deus.*

Ostendit nunc Propheta, misericordiam Dei maximam esse, quoniam saluat homines & iumenta, id est, conseruat, nutrit, replet corporalibus bonis, non solum homines, id est, eos qui ratione vtuntur, sed etiam iumenta, id est, eos qui instar iumentorum, solo sensu & appetitu ducuntur, quorum malitiam supra explicauit. Et vere infinita & stupenda est misericordia & benignitas Dei, qui cum posset impios & blasphemos iustissime perdere, & ad nihilum redigere, tamen illo ipso tempore, quo blasphemant & maledicunt Deum, & mandata omnia Dei præuaricantur, Deus illos quasi manibus propriis sustentat, portat & alit, delectationibus replet, Solem suum oriri super eos facit, & pluuies de cælo agros eorum & hortos rigat. Illud autem, *quemadmodum multiplicasti misericordiam tuam Deus*, admirantis est, ac si dicat, O quomodo multiplicasti misericordiam tuam Deus: Nam in Hebraico codice habetur, *Quam pretiosa est misericordia tua Deus*. Neque dissentiant codices Græci; & nostra Latina editio hunc sensum facile recipit. Est autem optimus commentarius textus originalis, quando ex eo veritas nostra explicari potest.

*Filij autem hominum in regmine aliarum tuarum sperabunt.*

Dixit de misericordia erga impios & carnales, quos nomine iumentorum appellandos censuit. Nunc dicit de misericordia erga

pios



prios & spirituales, quos filios hominum vocat: quæ etiam iustitia dici potest respectu impiorum, quos tam eximii bonis iuste priuandos esse decreuit. At igitur: *Filij autem hominum in regimine alarum tuarum sperabunt*, id est, iumenta quidem corporali salute contenta esse debebunt, quam etiam solam nouerunt, & solam appetuerunt. At filij hominum, quasi pulli sub alis gallinæ, ita ipsi sub alis tuis Deus, amantissime collecti & quiescentes, omnia bona à te vno sperabunt. Quibus verbis significatur præcipua quædam prouidentia, & singularis beneuolentia Dei erga pios homines, & contra, summa quædam & securissima fiducia piorum ad Deum, qualis est gallinæ sollicitudo in fouendis pullis, & pullorum fiducia sub alis gallinæ. Qua similitudine, quoniam aptissima est, sæpe utitur idem Propheta, vt Psal. 62. *In velamine alarum tuarum sperabo, adhaesit anima mea post te*: & Psal. 90. *Scapulis suis obumbrabit tibi, & sub pennis eius sperabis*. Quam autem dulce sit, & quam anteponendum omnibus humanis deliciis, sub alis Dei foueri, & paternam, vel maternam pietatem ipsius experiri, nemo scit, nisi qui accipit.

IX.

*Inebriabuntur ab vbertate domus tue: & torrente voluptatis tue potabis eos.*

Profectio sub alis Dei in hoc mundo habetur, vbi periculum est à morsibus miluorum & ferarum: at quod sequitur, in cælesti patria nobis dabitur. Explicat autem Propheta bona illa ineffabilia eo modo, quo potest, id est, corporalibus similitudinibus, & quidem primum sumit similitudinem ab ipso recipiente, deinde ab ea re, quæ recipitur. Ipse quidem recipiens tunc est contentus, cum est plenus, vt nihil amplius appetat. Ista plenitudo satians omnem appetitum describitur hoc loco aptissime per ebrietatem. Qui enim est audax vini, tum demum est vere satur, cum est ebrius, tunc enim non amplius fuit vinum: sed in somnium resoluitur. Ita igitur & nos, qui in hac vita nunquam satiamur neque quiescimus, quantumlibet bona

temporalia crescant, tum demum pleni & saturi, ac per hoc beati erimus, cum inebriabimur ab vbertate bonorum, quæ sunt in domo Dei, quia tunc omni appetitu satiati, resoluimur in somnum sempiternæ quietis. Dicit autem: *Inebriabuntur ab vbertate*, & non dicit, inebriabuntur à vino, quia vult nos intelligere, non accipi hoc loco ebrietatem proprie, sed vt significat plenam sarietatem. Deinde adducit similitudinem ab ipsa re, quæ datur & recipitur, dicens: *Et torrentis voluptatis tue potabis eos*. In torrente tria sunt, multitudo maxima aquarum ex montibus descendentium, repentina inundatio, vbi enim paulo ante nihil erat aquæ, repente conspicitur flumen ingens, denique impetus aquarum decurrentium, & secum omnia obuia rapientium. Sic igitur cælestis beatitudo, aderit multitudo sapientiæ & scientiæ ex illo monte descendens, de quo dicitur Ecclesi. 1. *Fons sapientiæ Verbum Dei in excelsis*, id est, in excelsio monte diuinitatis est fons sapientiæ. Verbum Dei: ex quo monte & fonte repentina oritur inundatio in Beatis. Nam qui in hac vita magno labore & multo tempore, quasi guttatim sapientiam hauriebamus, ibi repente & in momento Deo clare viso affluemus omni scientia, non solum rerum creaturarum, sed etiam omnium attributorum ipsius Creatoris, quæ abundantia sapientiæ & scientiæ rapiet animum magno impetu ad amorem & fruitionem summi boni. Neque enim in patria liberum erit diligere vel non diligere Deum, frui vel non frui bono tam magno, sed erit felicissima necessitas adherendi summo bono, & per complexum intimum infinita suauitate fruendi.

*Quoniam apud te est fons vitæ, & in lumine tuo videbimus lumen.*

X.

Reddit rationem, cur ex visione Dei, sit futura in Beatis tanta sapientiæ & scientiæ inundatio, quia videlicet *apud Deum est fons vitæ*, qui idem est cum fonte sapientiæ. Deus igitur, qui fons est sapientiæ, hoc ipso fons est vitæ, quia sapere sapientibus est viuere: & quia



& quia fons est vitæ, hoc ipso fons est essendi, quia vivere viventibus est esse. Dicitur autem fons sapientiæ, vitæ & essentiæ, quia non habet ab alio, ut sapiat, aut viuat, aut sit, sed ipse est sapientia, est vita, est esse, & omnia alia, quæ utunque sapiunt, viuunt, aut sunt, ab illo id habent. Vtitur autem Dauid nomine fontis, ut persistat in metaphora torrentis, quasi dicat, torrente nos potabis; quia apud te est fons, unde torrens ille descendit. Dicitur autem, *apud te est fons vitæ*, cum videtur dicere debuisse, fons sapientiæ, quia voluit ostendere vitam æternam iustis promissam, atque ut summum bonum ab omnibus desideratum, in hac summa sapientia consistere, iuxta verbum Domini, Ioan. 17. *Hæc est autem vita æterna, ut cognoscant te solum verum Deum, & quem misisti Iesum Christum.* Addit vero, *in lumine tuo videbimus lumen*, ut tandem verbis clarioribus explicet, quod per metaphoras adumbrauerat. Nam in lumine tuo videbimus lumen, nihil aliud significat, nisi in te ipso, qui lux & fons luminis es, videbimus te lumen inaccessibile & indeficiens. Nunc enim videmus Deum, sed in speculo creaturarum, in mente nostra, quæ est imago Dei, ratiocinando & discurrendo ab operibus ad opificis notitiam, denique in fide, non in specie: tunc autem videbimus Deum in se ipso, & ut dicit Apostolus Paulus, *facie ad faciem*, & ut loquitur B. Ioannes. *Videbimus eum sicuti est*, non sicut in imagine representatur. Et quoniam, ut idem Ioannes dicit, 1. Ioan. 1. *Deus lux est, & tenebra in eo non sunt vlla*, ideo recte dicitur, *in lumine tuo*, id est, in ipsa tua diuinitate, quæ lux est, non in figuris & ænigmatibus. *Videbimus lumen*, id est, te ipsum, *qui es lux vera, quæ illuminat omnem hominem venientem in hunc mundum.* Recte quoque Theologi ex hoc loco colligunt lumen gloriæ, quod necessarium esse volunt ad Deum videndum. Nam Deus lux quædam est, sed inaccessibilis, ut dicit B. Paulus 1. Timoth. 6. & ideo nisi mens eleuetur & confortetur quodam dono Dei, quod vocant lumen gloriæ, non potest obtutum fi-

gere in lucem illam increatam: proinde videbimus quidem lumen, quod est ipse Deus sed in lumine ipsius, id est, adiuti lumine gloriæ, quod ipse donat iis, quod ad sui visionem dignatur admittere. Sed prior explicatio videtur magis literalis.

*Prætexde misericordiam tuam scientibus te: & iustitiam tuam his, qui recto sunt corde.*

Docet nunc Propheta, magna ista bona, de quibus hæcenus locutus est, ad solos iustos pertinere, quos paulo ante filios hominis appellauit, cum impios iumentorum nomine vocasset. Vtitur quidem Propheta forma loquendi imperatiui modi, sed vim habet apud Prophetas ea forma modi indicatiui, ut sæpe diximus. *Prætexde*, inquit, *misericiordiam tuam scientibus te*, id est, extende hanc magnam misericordiam tuam scientibus, id est, illis tantum, qui te cognoscunt notitia familiaritatis & amicitiae, qui tecum versantur, te inuocant, qui audiunt te in præceptis tuis, & quos tu audis in precibus eorum. Quo modo loquendi dicitur in Euangelio, Matth. 25. *Amen dico vobis, nescio vos: Et iustitiam tuam his, qui recto sunt corde*, id est, extende, siue porrige hanc misericordiam, quæ simul est corona iustitiæ, *his qui recto sunt corde*, id est, iustis & piis, qui cor habent rectum & conforme rectitudini tuæ, & ideo placent illis omnia mandata tua & iudicia tua. Idem enim repetit Propheta more suo diuersis vocabulis: nam scientes Deum notitia amicitiae, ipsi sunt recti corde, & felicitas æterna misericordia & iustitia est, misericordia quidem, quia ex dono gratiæ facti sumus iusti ex impiis, & amici ex inimicis, & recti corde ex distortis & obliquis, & operarij bonorum operum ex operariis iniquitatis, sed tamen eadem felicitas est etiam corona iustitiæ, & merces bonorum operum. Nam ut habetur in Concilio Arausicano 2. Can. 16. Debetur merces operibus bonis, si fiant; sed misericordia quæ non debetur, præcedit ut fiant.

XI.

X

Non



*Non veniat mihi pes superbia, & manus peccatoris non moueat me.*

Solicitus iam de se Propheta, ne à tanto bono forte excidat, precatur Deum pro dono perseverantiæ, ac præsertim contra vitium superbiæ, cui obnoxij sunt magni viri, qualis ipse erat. *Non veniat*, inquit, *mihi pes superbia*, id est, ne quaeso sinas, vt mihi appropinquet pes superborum, ne forte manus ipsorum moueat me verbo, vel exemplo, vel alia tentatione, & deiciat de statu gratiæ in foueam peccati. Nomine superbi & peccatoris, cuius pedem & manum, id est, cuius accessum & potentiam timeret, intelligitur præcipue Diabolus, qui est Rex super omnes filios superbiæ; & deinde etiam ministri & satellites eius. Posset etiam cum S. Augustino ita exponi: *Non veniat mihi pes superbia*, id est, non contingat mihi, vt incipiam habere pedem superbiæ, id est, affectum superbiæ; & manus peccatoris non moueat me, id est, & operatio peccatoris non inducat me ad consensum peccati, & sic vel ex meo vitio, vel ex tentatione aliorum deiciat de statu meo, & cadam.

XIII.

*Ibi ceciderunt qui operantur iniquitatem; expulsi sunt, nec potuerunt stare.*

Reddit rationem, cur tantopere timeat si bi à superbia; quoniam, inquit, *ibi ceciderunt qui operantur iniquitatem*, id est, in superbia initium sumpsit omnis perditio, vt ait Tobias c. 4. nam & primus Angelus cum sociis suis, & primus homo cum vxore sua, ob superbiam ceciderunt, & per eos peccatum in mundum intrauit. Et posteaquam ceciderunt à iustitia ad iniquitatem, expulsi sunt à Deo à loco felicitatis, & deieci in profundum miseriarum. Nam *Deus superbis resistit, humilibus autem dat gratiam*, vt dicunt Apostoli Petrus in epist. i. cap. 5. & Iacobus c. 4. *Nec potuerunt stare*, in loco illo felicitatis, in quo posuerat illos Deus, vt ad maiora prouheret, si in bono perseverarent.

\* \* \*

## PSALMVS XXXVI.

Titulus & Argumentum.

Psalmus ipsi Dauid.

**I**n titulo nihil est noui. Continet autem hic Psalmus pharmacum saluberrimum ad curandos animos pusillorum, qui facile scandalizantur, cum vident in hoc mundo impios prosperare, & inde dubitare incipiunt de prouidentia Dei, & animari ad imitanda opera impiorum. Non est in hoc Psalmo continuata quadam oratio, sed collectio quadam sententiarum, quasi aphorismorum, & ideo vt facilius memoria custodiretur, per Alphabetum digestus est, ita vt primus, quasi aphorismus continens duos versiculos, incipiat à prima littera, secundus à secunda, & sic de aliis. Quas litteras notabimus, vt appareat distinctio sententiarum.

## EXPLICATIO PSALMI XXXVI.

**Aleph.** *Noli emulari in malignan-  
tibus, neque zelaueris facientes iniquitatem.*

*Quoniam tanquam fenum velociter  
arescent, & quemadmodum olera herbarum cito decident.*

Admonet Propheta, tanquam spiritualis medicus, fideles, vt si videant impios prospere agere, non prouocentur ad eos imitandos, neque irascantur, aut indignantur aduersus Deum, quasi iniustum: quoniam prosperitas impiorum non diu durabit, imo velocissime transibit, & tunc apparebit iustitia & prouidentia Dei, quæ impios non sinit diu exultare & lætari. Verba tamen sunt obscuriora, propter constructionem verborum cum præpositionibus, quæ Hebraicum, vel Græcissimum redolent: sed conabimur perspicuam sententiam reddere. *Noli emulari in malignantibus*, id est, noli prouocari ad æmulationem, siue, noli fieri æmulus, & rivalis malignorum. In Hebræo est, *ne irascaris*, vel, vt S. Hieronymus reddit, *ne contendas cum*

Z 3

mali-



*malignantibus.* Sed idem est sensus. Loquitur enim non de contentione, & pugna, quæ sit gladio, vel hasta; sed de ira, & contentione æmulationis, quomodo quidam certant in theatro criminibus canendis, alij in agone cursu equorum, vel currum, & irascuntur nisi vincant. Itaque sensus est, ne contendas cum malignantibus in temporalibus bonis per fas & nefas acquirendis, neque irascaris si minus bene æmulatio ista succedat. Quod sequitur, *Neque zelaueris facientes iniquitatem*, idem est ac si dictum fuisset, neque indigneris successus zelo super operantibus iniquitatem, iniustum videlicet iudicans, ut Deus tantis bonis afficiat iniquos. Clarius id habetur in Psal. 72. *Quam bonus Israel Deus his, qui recto sunt corde: mei autem pene moti sunt pedes, pene effusi sunt gressus mei, quia zelavi super iniquos pacem peccatorum videns*, id est, Deus quidem bonus videtur his qui conformes sunt voluntati ipsius: sed ego, qui non tanta rectitudine polleo, pene cecidi in scandalum; & dubitationem, dum zelo succendor quasi pro iustitia, & irascor super impiorum prosperitate, dum cogito pacem, & reliqua bona, quæ possident, cum tormentis & pœnis dignissimi sint. Sequitur, *Quoniam tanquam fœnum velociter arescent, & quemadmodum olera herbarum cito decident.* Aptissima similitudo ad ostendendam breuitatem temporalis prosperitatis. Fœnum siquidem, & olera non habent profundas radices, ut cedri, & palmæ, quibus comparari solent iusti. *Iustus*, inquit, *ut palma florebit, sicut cedrus libani multiplicabitur.* Inde fit ut fœnum, & olera continuo arescant, & putrescant; at palmæ, & cedri diutissime perseverant. Neque dixit Propheta, prosperitatem impiorum cito perituram; sed ipsos impios citissime perituros: ipsis autem pereuntibus, dubium non est quin omnis eorum gloria & prosperitas pereat. Et quamuis nonnunquam impij multos annos viuunt, & prospere illis omnia succedant, tamen multitudo illa annorum nihil omnino est, si ad diuturnitatem iustorum

& felicitatis ipsorum comparetur. Nam *iustus in perpetuum uiuent*, & in memoria æterna erit *iustus*, & nihil est diuturnum quod habet finem, vide Sapientia. s. si vis ad viuum depictam videre velocitatem, & breuitatem rerum omnium temporalium. *Transierunt*, inquit, *omnia tanquam umbra, & tanquam nuncius præcurrens. & tanquam nauis, quæ pertransit fluctuantem aquam, quæ, cum præterierit, non est vestigium inuenire, aut auis, quæ transuolat in aere, cuius nullum inuenitur argumentum itineris, sed tantum sonitus alarum verberans leuem ventum, aut tanquam sagitta emissæ in locum destinatum; diuisus aer in se continuo reclusus est, ut ignoretur transitus illius, sic & nos nati continuo desinimus esse.*

*Beth. Spera in Domino, & fac bonitatem, & inhabitat terram, & pasceris in diuitiis eius.*

III.

*Delectare in Domino, & dabit tibi petitiones cordis tui.*

IV.

Absterruit nos à malo Dauid in primo aphorismo, nunc in secundo incitat ad bonum, quasi dicat, Si vis beatus & felix esse, intellige quis sit auctor omnis felicitatis, & ab eo expecta, ab illo spera, non ab aliis. *Spera*, inquit, *in Domino.* Ipse enim, qui Dominus rerum omnium est, ipse solus res suas vere dare potest. Sed ut spes firma sit, & non confundaris, *fac bonitatem* bene operando, iuxta Dei mandata. Quis enim facile sperare audeat in eo quæm scit inimicum sibi esse? & tum demum securus *inhabitare terram*, quis enim te expellet, si amicus eius fueris, cuius est terra, & plenitudo eius? quin etiam pasceris in diuitiis eius, terra enim ad te alendum abunde proferet fructus suos. S. Hieronymus ex Hebræo legit, fide, pro diuitiis. Et vere in textu Hebræo est *emuna*, quod fidem, aut veritatem significat, sed LXX. Interpretes non videntur in suo textu habuisse, *emuna*, sed, *hamona*; quæ vox diuitias significat, & patet ex hoc eodem Psalmo versu 16. ubi legitur, *Melius est modicum*

in se

אמנה

אמונה



*iussto super diuitiis peccatorum multas.* Quamuis etiam si legamus, *paſceris fide, aut veritate,* erit sensus, paſceris in terra fide, id est, fideliter, & vere, quod est fere idem, cum, *paſceris, in diuitijs eius.* Ille enim fideliter, & vere paſcitur in terra, cui non deest abundantia fructuum terræ, quæ sunt eius diuitiæ. Sed, ut quis bene operetur, & sit amicus Dei, ita ut in illo secure confidat, necessaria est charitas ideo dicit: *delectare in Domino,* id est, ama Deum ex corde, & illæ sit deliciae tuæ; & tunc securus eris, quia *dabit tibi petitiones cordis tui,* id est, quicquid cor tuum desiderabit: At, inquires, multos nouimus, qui sperabant in Deo, & faciebant bonitatem, & delectabantur in Domino; & tamen non spebantur habitare in terra, nec paſcebantur in diuitijs eius, nec dabat illis Deus petitiones cordis eorum. Nam, ut omittam multitudinem, prope infinitam fidelium, quos videmus quotidie in summa egestate vitam degere: certe B. Paulus sperabat in Domino, & faciebat bonitatem, & tamen, ut ipse testatur, 1. Corinth. 4. *ut purgamentum mundi,* & peripſema ejiciebatur, & esuriebat & sitiebat, & nudus erat. Et cum delectaretur in Domino, non dabat ei Dominus petitiones cordis sui, cum interrogauerit, *ut auferretur ab eo stimulus carnis,* & non impetrauerit, 2. Cor. 12. Respondeo, maximam partem illorum, qui in summa egestate versantur, non sperare in Domino sicut oportet, nec obseruare mandata eius, ut ipse iubet, multo etiam minus delectari in Domino: nam præter promissiones huius Psalmi, Christus, ipse Matth. 6. apertissime dicit: *Respicite volatilia cœli, quæ non serunt, neque metunt, neque congregant in horrea.* & Deus paſcit illa: nonne vos magis pluris estis illis? & infra, *Quarite primum regnum Dei,* & iustitiam eius, & hæc omnia adicientur vobis. Itaque dubium esse non potest, Deum prouidurum suis omnia necessaria, si serio illi confidant in Deo, & mandata eius obseruent. Quod si aliquando id non fiat, ut dicebatur de Apostolo, ratio est, quia Deus dat illis aliquid melius, & quo illi magis cō-

tenti sunt, id est, meritum ingens patientiæ. Idem enim B. Paulus, qui scripsit suam egestatem, aliasq; tribulationes, scripsit etiam, *Repletus sum consolatione, superabundo gaudio in omni tribulatione nostra,* 2. Corint. 7. Et si non dedit ei Dominus petitionem cordis sui, ut auferret stimulum carnis, dedit ei gratiam abundantem, per quam stimulus ille conuerteretur in instrumentum triumphi. Itaque non dedit rem paruam, ut daret rem magnam, quam sciebat esse veram petitionem cordis ipsius.

*Gimel. Reuela Domino viam tuam, & spera in eo, & ipse faciet.*

*Et educet quasi lumen iustitiam tuam & iudicium tuum tanquam mercedem.*

Propinavit Propheta, bonus medicus pharmacum contra morbum interiore famis, sitis, & simillum malorum: nunc proponit aliud contra morbum exteriorem persecutionum, & calumniarum. Quando enim ista nobis eueniunt, non prohibemus nos defendere, & calumnias propulsare, sed præcipuum remedium esse debet oratio ad Deum, & fiducia in Deo: quod obseruauit Susanna, quæ condemnata ad mortem per calumniam, flens suspexit ad cælum, inquit, scriptura Danielis 13. *Erat enim cor eius si ductam habens in Domino.* Reuela, inquit Dauid, Domino viam tuam & spera in eo, id est, aperi in oratione coram Deo operatua, & confide in Domino, committens illi causam tuam; & ipse faciet, nimirum iudicium, & iustitiam. Ipse inueniet rationem qua detegatur falsitas testium, qui aduersus te dixerunt testimonium? & qua innocentia tua manifesta fiat. Id quod clarius habetur in sequenti versiculo. *Et educet quasi lumen iustitiam tuam,* id est, Deus admirabili prouidentia sua faciet, ut iustitia tua, id est, ius tuum, quod erat quasi in tenebris sepulchrum propter calumnias persequentium, emergat, & clarissime conspiciatur, quomodo lumen cernitur: cum candela accenditur,

V.

VI.



ditur: vel cum profertur ex clausa & obsecura laterna. Et repetens idem alijs verbis, addit, *Et iudicium tuum tanquam meridiem*, id est, producet in apertum, & clarum idem ius tuum, ut luceat, & conspiciatur ab omnibus, ut conspiciatur Sol, meridianus. Quod quidem in Susannæ iudicio manifestè apparuit. Nam sicut initio iustitia, & innocentia Susannæ in tenebris erat, quando à duobus testibus, contestibus, & omni exceptione maioribus convicta erat, ita paulò post, providentia Dei excitante spiritum Danielis, & per eum demonstrata falsitate testimonii ex ore proprio ipsorum, & tam clare apparuit innocentia Susannæ, & iniquitas testium, ut cōtinuò & ipsa liberata fuërit, & illi damnati à populo mala morte perierint. Quod attinet ad verbum illud, *revela*, S. Hieronymus, & Iudeorum magistri ex Hebræo vertunt, *volue*, siue reuolue, ut sensus sit, reijce in Deum causam tuam; iuxta illud, *iacta cogitatum in Dominum*. Sed *revela*, quod nos habemus ex versione Septuaginta Interpretum, non repugnat Hebræicæ voci, *gol*, quod significat reuolue; nam & reuoluitur, quod in alium reijcitur; & reuoluitur etiam quod aperitur, & explicatur, ut cernatur: quod coincidit cum *revela*, siue, *aperi*. Vtraque expositio vera est, sed nos latinam editionem, & commentarios Græcorum, & Latinorum Patrum sequi debemus, qui, *revela*, non reijce, exposuerunt. Porro cum revelare aliquid iubemur Deo, nō idēd iubemur, quia Deus aliquid nesciat, sed quia vult orari à nobis, & per orationem explicari quæ volumus, ut nos ipsi intelligamus, quæ de causa diuino auxilio egeamus. De vocibus, iustitia, & iudicium, notum est illa variè in varijs locis accipi. Sed hoc loco, iustitiā certum est accipi, pro iure; iudicium autem vel accipiendum est etiam pro iure, cum eadem res agatur, vel pro iusta sententia, quæ iuri debetur, iudicium enim actus iustitiæ est.

Psal. 54.

377

VI. Daleth. *Subdius esto Domino, & ora eum.*

*Noli amulari in eo, qui prosperatur in via sua in homine faciente iniustitias.*

VII.

Verba illa, *subditus esto Domino, & ora eum*, in editione græca & latina pertinent ad vericulum superiorem: in Hebræo verò codice sunt initium versiculi, ut manifestè apparet ex litera quarta alphabeti, quæ hic habetur. Nos, ut ostenderemus Psalmum esse alphabeticum, posuimus ea verba sub litera Daleth, & tamen non adiunximus illi numerum versiculi septimi, ne mutarem distinctionem versiculorum, quam in editione latina habemus, & iuxta quam distinctionem Psalmi canuntur in Ecclesia. Sensus huius sententiæ, quæ quartus aphorismus spiritualis numerari potest, hic est. Vide, ut sis semper Deo ad nutum obediens, & ora eum assidue; ne forte si videris hominem felicem in seculo, & simul iniustum, eius felicitas tentet te, & inducat ad iniustitiam. Verè enim magna tentatio est felicitas iniquorum; sed faciliè superatur, cum quis habet Deum semper ante oculos cordis, & illi per obedientiam, & orationem adhæret. Nam qui Deo ita adhæret, respicit quasi ex alto felicitatem iniquorum, & videns eam modicam & fugacem, faciliè contemnit, ac despiciat. At igitur, *Subditus esto Domino, & ora eum*, id est, exhibe Deo putam, ac simplicem obedientiam, & cum illo per orationem frequenter versare, & colloquere. S. Hieronymus ex Hebræo vertit, *tace Domino, & expecta eum*. Sed idem est sensus, quem Septuaginta Interpretes pluribus verbis explicare voluerunt. Illud igitur, *tace Domino*, quod est in Hebræo significat non murmures contra Deum, etiam si nescias cur ille aliquid iubeat, vel faciat, sed ut subditum decet, silens obedias in omnibus. Illud autem, *expecta eum*, significat, pete in oratione, & patienter expecta. Dabit enim Dominus, quod petis, sed quando opportunum, iudicabit. *Noli amulari in eo qui prosperatur in via sua, in homine faciente iniustitias*, id est, noli fieri æmulus, & quasi rivalis

lis



lis hominis, qui in via sua, id est, in actionibus suis prosperatur, hominis, inquam, iniusti, & iniqui, qui malefaciendo prosperatur. S. Hieronymus ex Hebræo vertit, qui facit quæ cogitat, pro eo quod nos ex Græco habemus, faciente iniustitias. Sed vox, *mezimmoth*, quamvis descendat à verbo, *zamma*, quod est cogitare: tamen significat etiam scelera, ut idem S. Hieronymus eandem vocem interpretatur in Psalm. 25. vers. 12. & Hierem. II. vers. 15.

ra, & in gehennam ad æternam infelicitatem detrudentur: qui autem abstinent se ab iniquitate, & à Domino mercedem suam sperant, ipsi hæreditabunt terram, id est, ipsi stabili possessione terram obtinebunt, quasi propriam hæreditatem, quæ ab eis nunquam auferetur. Verè enim homines pii cum migrant ad Deum, non amittunt possessionem terræ, sed acquirunt cælum, & terram, cum dicatur de eis, *Super omnia bona sua constituet eos*, Matth. 24.

VIII. He. Desine ab ira, & derelinque furem, noli amulari, ut maligneris.

Vau. Et adhuc pusillum, & non erit peccator, & queres locum eius, & non inuenies.

X.

IX. Quoniam qui malignantur exterminabuntur, sustinentes autem Dominum, ipsi hæreditabunt terram.

Mansueti autem hæreditabunt terram, & delectabuntur in multitudine pacis.

XI.

Hæc sententia est quasi repetitio, & declaratio primæ sententiæ; in toto enim. Psalmos res eadem sæpè repetitur, & inculcatur, ut illustrior fiat, & memoriæ magis inhæreat. In primo versu dixerat, *Non zelaueris facientes iniquitatem*: id ipsum nunc dicit clarius, cum ait, *Desine ab ira, & derelinque furem*, i. cum videris impium in terra florere, non irascaris, neque incipias furere, & dicere, Quare iste iniquus prosperatur? ubi est iustitia Dei? ubi prouidentia illius? Item in primo versu dixerat, *Noli amulari in malignantibus*: hoc ipsum repetit, & explicat dicens, *Noli amulari, ut maligneris*, id est, noli æmulando malignos fieri socius malignantium. Noli imitari opera iniusta eorum, quorum felicitati inuides & addit, *Quoniam qui malignantur, exterminabuntur*; ut declaret quod ante dixerat, quoniam tamquam fornix velociter arefcunt. Adiungit postea, *sustinentes autem Dominum, ipsi hæreditabunt terram*, ut repetat, & declaret, quod ibi dixerat, *Spera in Domino, & inhabita terram*. Sustinent enim Dominum, qui patienter expectant promissiones eius, & securi expectant; quoniam fidelis & potens est Dominus, qui promissit. Et ideo sine ulla dubio, qui malignantur, etiam si ad tempus florere videantur, non diu florebut, sed exterminabuntur de ter-

Quia dixerat, *malignantes exterminabuntur*, addit hoc breui futurum. Et adhuc, inquit, *pusillum temporis pertransibit*, & peccator, qui videbatur felix, non apparebit in terra: & queres locum eius inter homines, & non inuenies, quia videlicet perijt omnino, & quasi arbor infructuosa radicitus euulsus est. *Mansueti autem*, id est, illi qui non indignantur, nec irascuntur Deo, cum vident impios prosperari; sed patienter ferunt, & tolerant id quod Deo placet, *hæreditabunt terram*, non solum hanc ubi peregrinamur, sed etiam illam viuentiũ, quæ sola propriè terra est, id est, firma & stabilis, vnde & Dominus ait Matt. 5. *Beati mites, quoniam ipsi possidebunt terram*; & quia terra illa dicitur Hierusalem, id est, visio pacis, cum omnes inimici longissime ab illa absint; ideo *delectabuntur in multitudine pacis*, id est, fruuntur pace multa, quia pax illa erit cum multitudine magna incolentium terram illam, & durabit multo tempore, vel potius æterno tempore, & sic delectationem habebunt, quam pax adferre secum solet.

Zain. Observabit peccator iustum & stridebit super eum dentibus suis.

XII.

Dominus autem irridebit eum; quoniam prospicit, quod veniet dies eius.

XIII.



Monet S. Propheta iustum, vt non multum formidet insidias iniquorum, quia Deus vigilat ad custodiam eius. *Obserua- bis*, inquit, *peccator iustum*, id est, attentè respiciet peccator omnes actiones iusti, vt inueniat aditum ad eum perdendum. *Et stridebit dentibus suis super eum*. i. instar famelici canis desiderabit interitum eius, ac præ iracundia, & indignatione dentibus frendebit. *Dominus autem iridebit eum*, id est, Dominus qui omnia prospicit, & in cuius manu sunt omnia, ita vt non cadat folium in terram nisi ipso iubente, vel permittente, *iridebit eum*. *Quoniam prospicit, quod veniet dies eius*, id est, iridebit eum, quoniam videt inflare diem interitus eius, & illum ante rapiendum, quam iusto nocere potuerit. Nam etiamsi forte Deus permittat iustum à peccatore occidi; tamen prius peccator animam suam occidit, quam iusti corpus occidat: & quoniam mors iusti preciosa est in conspectu Domini, & lucrum est non detrimentum; mors autem peccatorum pessima, & ad mortem sempiternam peccatorem detruit, ideo semper ante rapitur peccator, quam iusto nocere potuerit. Proinde irridendus merito est, quia dum alterius interitum procurat imminuentem interitum suum non videt.

XIV. Chet. *Gladium euaginauerunt peccatores; intenderunt arcum suum.*

XV. *Vt deiciant pauperem & inopem, vt trucident rectos corde.*

XVI. *Gladius eorum intret in corda ipsorum, & arcus eorum confringatur.*

Declarat hic Propheta, quod obscurius dixerat in superioribus versiculis literæ Zain. Quod enim ibi dixit, *obseruat peccator iustum*, hic declarat dicens, *Gladium euaginauerunt peccatores, intenderunt arcum suum*, id est, stant peccatores armati districtis gladijs, & arcubus extensis, obseruantes quando sit tempus occidendi iustum; vt videlicet tunc deiciant arcu, & trucident gladio iustum, qui pauper & inops est, & rectus corde. Sed Deus, qui prospicit omnia ex alto, facit vt gladius conuertatur

in corda ipsorum, & arcus eorum conuertatur, & ipsis solis noceant, & sic iridebit eos. Obseruandum hoc loco est, quod hic dicitur de gladio & arcu, posse intelligi tum de arcu & gladio ferreo, tum de gladio & arcu linguæ. Sæpe enim peccatores occidunt iustos, vel certè conantur occidere calumnijs, & falsis testimonijs, sæpe etiam vero gladio & arcu. Item notandum est, verbum illud, *vt deiciant*, rectè sic positum esse in editione Sixti V. Pontificis, cum ante haberetur in codicibus vulgatis, *vt decipiant*: nam cum in Hebraico, & Græco codice habeatur, *vt deiciant*, & sic legerint veteres Patres, & hoc requirat coniunctio cum arcu & gladio, & denique non decissent codices antiqui Latini manuscripti, qui haberent, *vt deiciant*, facile iudicari potuit, errore librariorum, ob literarum similitudinem, irrepsisse, *decipiant* pro *deiciant*. Rursus considerandum est, iustum hoc loci dici *rectum corde*, vel vt est in Hebræo, *rectum via*, quia iustus cor habet conforme legi Dei, quæ est rectissima; & quia eadem lex est via recta, per quam ambulare debemus dum operamur, ideo rectus corde dicitur etiam rectus via, quia nunquam aberrat à recta via, quæ est lex Domini. Præterea notandum hoc loco, iustum dici *pauperem & inopem*, vel quia omnes iusti sunt pauperes spiritu: & licet interdum diuitijs abundent, intelligunt eas diuitias non esse proprie suas, cum de eis rationem reddituri sint Deo, vel certe non loquitur Dauid de omnibus iustis, sed solum de pauperibus & abiectis, qui à potentibus opprimuntur. Porro inter pauperem, & inopem hoc interest quo ad voces Hebraicas, quod *ani*, pro qua habemus *pauperem*, significat humilem, afflictum, mitem; *ebion*, pro qua voce habemus, *inopem*, significat proprie egenum, qui omnia desiderat, quia omnibus caret. Denique illa imprecatio, *gladius eorum intret in corda ipsorum*, est prædictio potius, quam imprecatio. Tunc autem gladius peccatoris extensus aduersus iustum intrat in corda peccatoris, quando peccator dum nocere intendit iusto, sibi ipse ma-



gis nocet : dum enim fortè spoliat iustum pallio, se ipse spoliat veste charitatis: & dum iustum priuat vita carnis, se ipse priuat gratia Dei, qui est vita animæ : & dum iustum calumnijs suis trudit in carcerem, se ipse præcipitat in gehennam.

XVII.

*Teth. Melius est modicum iusto super diuitias peccatorum multas.*

XVIII.

*Quoniam brachia peccatorum contemuntur, confirmat autem iustos Dominus.*

Ne iusti pauperes iniquis diuitibus inuideant, & dimissa iustitia ad perpetrandam iniquitatem accedant, munit eos David his duobus versiculis *Melius, inquit, est modicum iusto super diuitias peccatorum multas*, i. plus prodest iusto modica substantia, quàm peccatori ingentes diuitiæ, proinde felicior est iustus tenuis, quam peccator locuples; & ideo magis expetenda est iustitia cum paruis opibus, quam multæ copiarum cum iniustitia. Ratio est, quia iustus dirigitur à Deo, ut sciat uti diuitijs, non est auarus, non est prodigus, ac propterea non eget, neque grauatur ære alieno, neque retinet ociosas opes, unde vel in superbiam erigatur, vel ad luxuriam prouocetur. Peccator autem superbus, & prodigus est, nec scit uti diuitijs; inde semper eget, semperque debet, nec diu statum suum conseruare potest. Atque hoc est quod sequitur. *Quoniam brachia peccatorum contemuntur, confirmat autem iustos Dominus*, id est, potentia, & fortitudo peccatorum facile perficiet, quia nititur brachio carnis, nec diuitiæ illum iuuare poterunt. Iusti autem fortitudo & potentia non potest deficere, quia nititur brachio Dei: Deus etiam, qui amicus iustorum est, illum confirmat, vel ut clarius rem explicat vox Hebraica, illum sustentat. Denique peccator non obstantibus maximis suis diuitijs, non effugiet æternum interitum, quia cum morietur nihil secum asportabit, neque descendit cum eo gloria eius. Iustus autem, qui non in diuitijs terrenis, sed in Deo condidit, in sempiternum uiuet.

*Iod. Nouit Dominus dies immaculatorum, & hereditas eorum in æternum erit.*

XIX.

*Non confundentur in tempore malo, & in diebus famis saturabuntur.*

XX.

Confirmat Propheta quod paulo ante dixit de felicitate iustorum, etiamsi modicas opes habeant. *Nouit, inquit, Dominus dies immaculatorum*, id est, approbat Dominus vitam iustorum, eisq; fauet, & benedicit, & ideo dies eorum diuturni erunt, & hereditas eorum cum ipsis diutissime conseruabitur. *Non confundentur in tempore malo*, id est, tempore sterilitatis, & penuriæ non confundentur, quia non cogentur erubescere mendicando panem; *& in diebus famis saturabuntur*, i. non solum non erubescunt mendicando tempore communis famis, sed etiam habebunt ex suis copijs, unde comedant ad satietatem. Sed hæc interdum implentur in hoc seculo, semper autem implebuntur in futuro. Ventura enim est post hanc vitam incredibilis quædam sterilitas, quando nemo poterit serere, vel metere, & diues in inferno guttam aquæ desiderabit, nec obtinebit. Tunc igitur immaculati, qui nihil dimiserunt in terra, sed in cælum omnia transtulerunt, inuenient æternam hereditatem, neq; confundentur mendicando cum stultis virginibus, date nobis de oleo vestro; sed satiabuntur cum apparuerit gloria Domini.

*Quia peccatores peribunt.*

*Caph. Inimici vero Domini mox ut honorificati fuerint & exaltati, deficientes quemadmodum fumus deficient.*

XXI.

Tres primæ dictiones pertinent ad versiculum superiorem in editione Græcæ & Latina: sed voluimus eas hoc loco ponere, ut appareat artificium Prophetæ, qui per litteras alphabeti Psalmum digessit. Nam in illa particula, *quia*, posuit litteram *Caph*, quæ in alphabeto sequitur, & inde incipit in Hebræo nouus versus, Ergo illa verba, *Quia peccatores peribunt*, reddunt rationem, cur

imma-



immaculati pacifice: possidebunt hereditatem in terra, & in tempore famis saturabuntur. Id enim fiet, quia peccatores, qui eos perturbare, eisque bona sua diripere solebāt, peribunt. Quod autem sequitur, *Inimici vorā Domini mox ut honorificati fuerint, & exaltati, deficientes quemadmodum fumus deficient*; respondet duobus versiculis superioribus, ut hic sit sensus. Immaculati homines, tanquam amici Dei, habebunt æternam hereditatem, & in tempore malo non confundentur: inimici vero Domini, quales sunt omnes peccatores, è contrario habebunt breuissimam felicitatem; statim enim atque exaltati cœperint, euanescent inftar fumi, qui dum exaltatur consumitur, neque vestigium vllum post se relinquit. Illud verbum, *exaltati*, à S. Hieronymo legitur, *Sicut Monoceros*, ab alijs, *Agni*, quæ sunt res diuersissimæ. In Hebræo nunc habetur *Carim*, quod propriè *Agnos* significat: & ad sententiam huius loci nihil facit. S. Hieronymus videtur legisse *Carem*, & ideo vertit, *sicut Monoceros*; nam *Monoceros* in libr. Num. cap. 23, & 24. dicitur, *reem*, & in libr. Iudic. cap. 38. dicitur, *rem*, & tunc sensus est, quod inimici Domini cum honorificati, & gloriantes fuerint sicut Monoceros, tanquam fumus consumuntur. Sed Septuaginta Interpretes non legerunt *Carim*, neque *Carem*, sed *Carum*: & ideo recte verterunt. Cum *exaltati fuerint*: quæ lectio optima est, eamque noster Interpres etiam sequutus est, & tota frequenter Ecclesia.

כרים  
כרים

אדם

כרים  
כרים

XXII.

XXIII.

Lamed. Mutuabitur peccator & non soluet: iustus autem miseretur, & tribuet. Quia benedicentes ei hereditabunt terram, maledicentes autem ei disperibunt.

Confirmat quod supra dixerat, Melius est modicum iusto super diuitias peccatorum multas. Nam sæpius accidit, ut peccator quamuis ditissimus, mutuo accipiat pecuniam, & tamen non restituat: quia volunt diuites peccatores supra censum laute

viuere, vel superbè vestire, aut habitare; inde semper laborant ære alieno grauati: iustus autem, qui ut supra diximus, scit uti diuitijs, etiamsi modicum habeat, tamen ex modico illo habet, vnde misereatur pauperum, & tribuat sine spe recuperandi. Quia benedicentes ei, Deo videlicet, ut S. Aug. exponit, hereditabunt terram, & sic semper habebunt, vnde tribuant: maledicentes autem ei, tanquam blasphemi, & ingrati, disperibunt, ut etiāsi velint tribuere, non possint. S. Hieron. legit passim, quia benedicti ab eo, nimirum à Deo, hereditabunt terram maledicti ab eo disperibunt. Et quidem verba Hebræica modica facta mutatione punctorum, tam actiue, quam passiue exponi possunt, & vna sententia aliam infert. Qui enim Deum in omnibus rebus benedicunt, ab eo quoque benedicuntur, & qui Deo maledicunt, maledictionem ipsius consequuntur.

Mem. Apud Dominum gressus hominis diriguntur, & viam eius volent.

XXIV.

Cum ceciderit, non collidetur, quia Dominus supponit manum suam.

XXV.

Incipit hoc loco Propheta exponere singularem prouidentiam erga iustos, ut tanto magis eos confirmet, ne fortè prosperitas impiorum eos alliciat ad peccandum. Dicit igitur, vitam iustorum à Domino dirigi, & custodiri. Apud dominum, inquit, gressus hominis iusti, ille dirigit actiones, & opera iusti, qui iustum fecit. Et viam eius volent, i. hinc fiet, ut iustus viam Domini velit, diligat, libenter sequatur: vel, Deus volent viam iusti, id est, approbabit actiones, & opera eius. Prior explicatio S. Augustini, posterior Euthymij est. Illud, apud dominum, in textu originali est, à domino, & sic legit S. Augustinus & Græci Interpretes: sed verba nostræ editionis, ut non dissintiant à textu originali, sic explicanda sunt, Apud Dominum, id est, in secreto consilio Domini diriguntur, quod est idem cum illo, à Domino diriguntur. Sequitur, Cum ceciderit, non collidetur, quia Dominus, suppo-



*supponit manum suam.* Potest hoc refecti ad miseria corporales, & etiam ad miseria animæ. Nam si iustus ceciderit in aliquam afflictionem & tribulationem, quæ sunt quasi foueæ, vel saxa, vel lutum in via vitæ huius, non collidetur, id est, non omnino succumbet, aut opprimetur, quia Dominus supponit manum suam, ne lædatur, vel, ut est in Hebræo, *quia Deus sustentat eum manu sua*, id est, auxilio & prouidentia sua. Et si forte ceciderit in tentationem peccati, non collidetur, id est, non perueniet ad consensum culpæ lethalis, nec amittet patientiam, aut fidem, aut aliam virtutem, quia Dominus auxilio gratiæ suæ sustentabit eum.

in Ecclesia multos fideles mendicantes panem: nam mendicantes religiosi sponte mendicant amore paupertatis, non necessitate inopiæ, neque derelicti dici possunt, cum Deus eos mirabili prouidentia sua alat & sustentet. Ceteri mendicantes, ut plurimum non sunt filij eorum, qui consueuerint misereri aliorum, & donare: ad hos enim proprie hæc promissio pertinet. Sæpe etiam neque iusti sunt ipsi, neque filij iustorum: denique ut supra diximus, si qui vere iusti, & sperantes in Domino derelicti videntur, & quatenus micæ panis, ut Lazarus de Euangelio; ij melius aliquid à Domino acceperunt, quam sit copia rerum temporalium: neque mutarent meritum patientiæ cum omni temporali felicitate.

XXVI.

Nun. Iunior fui, etenim senui, & non vidi iustum derelictum, nec semen eius querens panem.

XXVII.

Tota die miseretur & commodat, & semen illius in benedictione erit.

XXIV.

XXV.

Probat ab experientia sua, quod supra dixerat, iustos in tempore malo non confundendos, & in diebus famis saturandos. *Iunior fui*, inquit, vel, ut expressius habetur in Hebræo, *puer fui, & postea senui*, & in tam longo tempore nunquam vidi iustum derelictum à Deo, ita ut graui inopia premeretur; nec vidi semen eius, id est, filios eius querentes & mendicantes panem. Sed contra potius vidi, quod iustus tota die miseretur & commodat, id est, omni tempore ita abundat, ut vel ex misericordia donet, vel certe mutuo, aut commodato det proximis de facultatibus suis. Quare semen illius, id est, filij eius non solum non mendicabunt panem, sed in benedictione erunt, id est, benedicti à Deo copiis abundabunt, vel ab omnibus benedicentur, tanquam filij optimorum parentum. Obserua circa verba, illud etenim, in Hebræo esse gam, quod significat etiam, ut sensus sit, Puer fui, & etiam senui. In Græco quidem habetur *ἄρ̄*, etenim, sed accipi potest pro etiam. Obserua præterea, non repugnare hanc sententiam veritati, etiamsi videamus

Samech. Declina à malo, & fac bonum; & inhabita in seculum seculi.

XXVIII.

Quia Dominus amat iudicium, & non derelinquet sanctos suos: in æternum conseruabuntur.

XXIX.

Ex iis, quæ dixit paulo ante, se fuisse expertum à pueritia vsque ad senectutem: concludit per modum adhortantis, ac dicit: Declina à malo, & fac bonum, quæ sunt duo prima præcepta iustitiæ, & inhabita in seculum seculi, id est, vide ut iustus sis, & securus inhabitabis terram vsque in sempiternum. Et reddit rationem, cur iusti terram perpetuo habitaturi sunt. Quoniam, inquit, Dominus amat iudicium, id est, iustissimus est, & iuste iudicat, & ideo non derelinquet sanctos suos, id est, iustos seruos suos; ideo affirmo, quod in æternum conseruabuntur. Hæc promissio pertinet quidem aliquo modo ad hanc vitam, in qua per varias successiones iusti longo tempore terram inhabitare solent: sed absolute & proprie pertinet ad vitam futuram, quæ in terra viuacium sempiterna erit.

Aijn. Iniusti patientur, & semen impiorum peribit.

XXX.

Iusti autem hereditabunt terram, &

XXXI.

Aa. 3.

in-



*inhabitabant in seculum seculi super eam.*

Hoc loco desunt in Hebræo duæ primæ dictiones, videlicet *Iniusti punientur*, quæ aptissime leguntur in textu Græco: & hinc factum est, ut non appareat litera *Aijn* initio horum duorum versiculorum; ut numerus & ordo literarum Alphabeti postulabat: Sed vox, *iniusti*, quæ est apud Græcos & Latinos, apud Hebræos esset, *auilim*, quæ incipit per *Aijn*. Itaque si addatur ad Hebræum textum, *Iniusti punientur*, vocibus Hebraicis, constabit ratio Alphabeti. Sententia autem horum duorum versiculorum clarissima est, ut explicatione non egeat.

ד'ל'ד

XXXII. Phe. *Os iusti meditabitur sapientiam, & lingua eius loquetur iudicium.*

XXXIII. *Lex Dei eius in corde ipsius, & non supplantabuntur gressus eius.*

Dixit paulo ante, diuinam prouidentiam vigilaturam, ne iusti ab impiis opprimantur; nunc addit, iustos quoque per sapientiam suam, quæ est etiam Dei donum, effecturos, ut non supplantentur à malitia iniquorum. *Os iusti meditabitur sapientiam*, id est, iustus sapienter loquetur, ut non possit capi in sermone: meditari enim sapientiam ore nihil est aliud, nisi exercere sapientiam inter loquendum, ut alibi diximus: & hoc ipsum repetit Dauid, cum addit: *Ei lingua eius loquetur iudicium*, id est, lingua iusti non temere profundet verba, sed loquetur quod iustum est, & quod pro tempore dici debet, quod est sapienter loqui. Addit rationem, dicens: *Lex Dei eius in corde ipsius*, id est, sermo iusti sale sapientie conditus erit, quia iustus habet in corde legem Dei; & propterea, dum loquitur, cogitat mandata Dei, ut non delinquat in lingua sua: & propterea lex est lux, ut ait Salomon Prou. 6. & ut idem Dauid ait Psalm. 18. *Lex Domini illuminat corda, & sapientiam præstat paruulis*; & ideo non est mirum, si iustus, qui habet legem in corde, eamque cogitat & dili-

git, sapienter loquatur. Ex his colligit Propheta: *Et non supplantabuntur gressus eius*, id est, quia iustus semper loquitur sapienter, nemo illum supplantando impellet ad casum. Supplantare dicitur, qui plantam alterius tenendo, vel impediendo cadere illum cogit, præsertim quando id astutia potius, quam violentia fit. Ergo non supplantabuntur pedes eius, ac per hoc non impelletur iustus ad casum dolo alicuius iniqui circumuentus.

Zade. *Considerat peccator iustum, & querit mortificare eum.*

*Dominus autem non derelinquet eum in manibus eius, nec damnabit eum, cum iudicabitur illi.*

Declarant hi duo versiculi versiculos duos superiores. *Considerat*, inquit, peccator iustum, nimirum obseruans diligenter quid loquatur; & quid agat, ut supplantet eum: & querit mortificare eum, id est, querit supplantando illum occidere. Quod quidem præcipue fieri solet in iudiciis, cum iudex, vel accusator iniquus innocentem aliquem circumuenire & perdere cupiunt. *Dominus autem non derelinquet eum in manibus eius*, id est, Dominus non permittet, ut peccator habeat iustum in potestate, & ideo inspirabit illi sapientiam, ut cognoscat fraudes inimicorum, & sapienter loquendo euitet supplantationes eorum. *Nec damnabit eum, cum iudicabitur illi*, id est, Iudex non damnabit iustum, cum tempus iudicij eius aduenerit, quia Deus non permittet obscurari iustitiam. Verba illa, *cum iudicabitur illi*, clariora sunt in textu originali, & nihil aliud significant, nisi cum ille, iustus videlicet, iudicandus erit, siue cum fiet ei iudicium, siue cum iudicabitur. Habentur eadem vere verba versu duodecimo: *Obseruabis peccator iustum, & stridit dentibus in eum, &c.* sed ibi de violentia agitur, hic de astutia.

Coph. *Expecta Dominum, & custodi viam eius: & exaltabit te, ut hereditate capias terram; cum perierint peccatores, videbis.*

Hor,



Hortatur Propheta iustum, ut speret in Deo, & perseueret in iustitia. *Expecta Dominum*, id est, spera in Deo, si forte differri tibi videtur promissio eius: *& custodi viam eius*, id est, observa legem eius, & non declines à via iam inchoata sanctitatis & iustitiæ, ut hereditate capias terram, id est, ut cum implebitur promissio eius, possideas quasi propria hereditate terram viuientium. Cum perierint peccatores, videbis, id est, cum peccatores omnes iudicio diuino condemnati perierint, tunc videbis, quod nunc speras.

Res. *Vidi impium superexaltatum, & eleuatum sicut cedros Libani.*

Et transiui, & ecce non erat; quasiui eum, & non est inuentus locus eius.

Quia dixerat: Cum perierint peccatores, videbis, poterat iustus quærere, quando hoc erit? Ideo nunc addit, breui hoc futurum esse. Nam vidi, inquit, impium superexaltatum, & eleuatum sicut cedros Libani, id est, positum in altissimo gradu dignitatis & potestatis, & radicum ac fundatum opibus, clientelis, & similibus rebus, ut videretur æterna futura eius felicitas: & tamen vix pertransiui, & ecce non erat, id est, transiens vidi hominem illum eleuatum, & radicum ac fundatum ut cedros Libani, & vix illum pertransiui, & ecce respectu post me, & euauerat, quasiui ubi fuisset, & an vestigia remaneret tantæ magnitudinis, & non est inuentus locus eius, quasi nunquam ibi fuisset. Hæc verissima esse, quotidiana experientia docet. Vbi enim nunc sunt potentissimi illi Monarchæ, ut de minoribus taceam, Assyriorum, Persarum, Græcorum & Romanorum? certe nisi aliquid in libris historicorum legeremus, ignoraremus illos vnquam fuisse. Ita nulla supersunt vestigia tantæ potentie; & tamen humana superbia ita mortalibus oculos perstringit, ut videre non possint, quæ tangunt manibus; & credere nolint, quæ vel inuiti sentire & experiri coguntur. Quod attinet ad verba, in Hebræo habetur, *Vidi impium robustum, fortissimum, sicut indigenam vi-*

*rentem.* Sed LXX. Interpretes respicientes ad similitudinem cedri, ut rem magis explicarent, dixerunt, *superexaltatum, & eleuatum*; ex quo tamen sequitur, ut robustus & fortissimus esset: cedri enim altissimæ, & robustæ & fortissimæ sunt. Et pro illo, sicut indigenam virentem, verterunt Septuaginta, sicut cedros Libani, quia non legerunt, ut nunc habemus, *ceeræa*, sicut indigenam; sed vna litera transposita, *ceeræa*, sicut cedrus: & quia cedri virentes in monte Libano potissimum inueniuntur, ideo pro cedros virentes, posuerunt cedros Libani. Porro ubi nos legimus, *& transiui*, in Hebræo est, *& transiuit*; sed credibile est, Hebraicam vocem incuria librariorum esse corruptam vnius literæ mutatione. Nam non solum LXX. Interpretes verterunt in prima persona, sed etiam S. Hieronymus.

Schin. *Custodi innocentiam, & vide aequitatem; quoniam sunt reliquia homini pacifico.*

Iniusti autem disperibunt simul, reliquia impiorum interibunt.

Pergit Propheta in adhortatione, & ait: Custodi innocentiam, & vide aequitatem, id est, conserua innocentiam erga te ipsum, & vide aequitatem, id est, iudica quod rectum est, erga proximos. Quoniam sunt reliquia homini pacifico, id est, quia dabit Deus in præmium homini pacifico, ut relinquat filios post se. Vel altiore sensu, quia multa bona reliqua sunt homini pacifico post mortem eius. Opera enim bona sequuntur illos, qui in Domino moriuntur, ut dicitur Apocal. 14. Iniusti autem è contrario, peribunt ipsi simul omnes nullo excepto, & reliquia peribunt cum eis; quia nec filios in hoc seculo relinquent, nec boni aliquid eis reliquum erit; cum omnia in concupiscentiis suis, sceleribusq; consumpserint.

Thau. *Salus autem iustorum à Domino, & protector eorum in tempore tribulationis.*

כאורה  
כאורה

XL.

XLII.



*Et adiunabit eos Dominus, & liberabit eos, & eruet eos à peccatoribus, & saluabit eos, quia sperauerunt in eo.*

Hac est quasi recapitulatio Psalmi totius, & satis aperta & perspicua.

PSALMVS XXXVII.

*Titulus & Argumentum.*

Psalmus David, in rememorationem de Sabbato.

**T**itulus huius Psalmi in Hebraeo codice, non facit mentionem Sabbati, sed solius rememorationis? tamen placuit Interpretibus LXX. viris grauiissimis, explicandi gratia addere vocem Sabbati. Videtur autem satis aperta esse explicatio S. Augustini, quam etiam sequitur S. Gregorius, vt hic Psalmus, qui vnus est ex ijs, qui proprio ad poenitentiam pertinent, compositus sit à poenitente Davide, in rememorationem Sabbati, id est, quietis amissa in statu innocentiae, vel promissa in resurrectione iustorum. Posset etiam intelligi de Sabbato, quod agit bona conscientia, dum gratia Dei fruatur; & quod amittit, qui peccat; & cuius cum gemitu recordatur, qui veram poenitentiam agere incipit. Argumentum Psalmi est oratio poenitentis, similis illi, quae habetur in Psalmo 6. qui idem omnino principium habet, & valde probabile est, compositam fuisse hanc orationem eo tempore, quo David fugit de Hierusalem ob persecutionem Absalonis.

EXPLICATIO PSALMI XXXVII.

**D**omine ne in furore tuo arguas me, neque in ira tua corripas me.

Precatur David poenitens, vt Deus eum non puniat in ira & furore suo, vt Iudex cum reis facit, sed in misericordia, vt medicus cum aegrotis se gerit. Vide quae diximus ad initium Psalmi 6. vbi ostendimus, nihil interesse hoc loco inter furorem & iram, & inter arguere & corrumpere. Si tamen placet delictum admittere, poteris cum S. Augustino

& S. Gregorio dicere, illos argui in furore, qui damnantur ad gehennam; illos in ira corripui, qui post mortem in igne purgatorii cruciantur: Prophetam autem precari Deum, vt hic illum puniat pro peccatis admissis, non in purgatorio, vel gehenna. Monet autem S. Augustinus, non esse contemnendum ignem purgatorii, quoniam grauior est ille ignis, quam quicquid pati potest homo in hac vita. Illud quoque addendum est, quamuis hoc loco, & in Psalm. 2. vers. 5. & Psalm. 6. v. 1. accipiat iram Dei pro damnatione ex iustitia; tamen alibi accipi aliquando pro zelo patris, qui irascitur filiis, non vt perdat, sed vt custodiat.

*Quoniam sagitta tua infixae sunt mihi, & confirmasti super me manum tuam.*

Quia nouerat Propheta, nihil esse utilius ad veniam peccatorum impetrandam, quam plene cognoscere miseriam peccati, & eam coram Domino deplorare; desit in hoc versiculo, & aliquot sequentibus infelicitatem, quam secum adfert lethale peccatum. Ait igitur, Non arguas me in ira tua, quoniam ea grauiissima est, vt iam experientia didici. Siquidem *sagitta tua infixae sunt mihi*, id est, multa tribulationes, te puniente peccatum meum, acciderunt mihi; & *confirmasti super me manum tuam*, id est, ideo sagittae tuae infixae sunt mihi, & non leuiter tantum tetigerunt, quia tu manum tuam aggressus super me, vt sagittae profundius penetrarent. Videtur autem per has tribulationes & supplicia intelligere mortem filij ex Bethsabee suscepti, stuprum filiae à proprio eius fratre allatum, eadem Ammonis filij, incestum & adulterium vxorum suarum à proprio filio patratum, expulsionem suam à Regno, & alia id genus, quae propter peccatum suum, Domino vlciscente, perpessus est. Fortasse etiam sagittas vocat verba illa increpatoria & comminatoria, quae à Nathan Dei nuncio audiuit, 2. Reg. 12. *Hac dicit Dominus Deus Israël, Ego unxi te in Regem super Israël.*

& ego



Ego erui de manu Saul, & dedi tibi domum Domini tui, & uxores Domini tui in sinu tuo, dedique tibi domum Israel & Iudæ. Quare ergo contempsisti verbum Domini, ut fratres malum in conspectu meo? Vriam Ethaum percussisti gladio, & uxorem illius accepisti in uxorem tibi, Quamobrem non recedet gladius de domo tua usque in sempiternum. &c. Certe ista exprobratio beneficiorum, & comminatio poenarum pupugit sine dubio gravissime animum Davidis, & verecundia, timore, & dolore vehementissimo illum affecit.

III. Non est sanitas in carne mea à facie iræ tuæ, non est pax ossibus meis à facie peccatorum meorum.

Describit effectum sagittarum Domini, ac dicit, se vehementer conturbari nec requiescere posse, dum iram Dei, & peccata sua recogitat, quæ iram illam meruerunt. Non est sanitas, inquit, in carne mea à facie iræ tuæ, id est, aspectus iræ tuæ, quæ mihi semperante oculis mentis versatur, carnem meam mœrere & tabescere facit. Dolor enim animi carnem quoque affligit, & extenuat, pallere & languere cogit. Non est pax ossibus meis à facie peccatorum meorum, id est, aspectus deformitatis, & gravitatis culpæ meæ ita me conturbat, ut nulla sit requies, & ipsa etiam ossa contremiscant.

IV. Quoniam iniquitates meæ supergressæ sunt caput meum: & sicut onus grave gravatæ sunt super me.

Reddit rationem, cur tantopere conturbetur, dum respicit peccata sua, & dicit rationem esse, quia peccata sunt multa & magna: de multitudine dicit, Quoniam iniquitates meæ supergressæ sunt caput meum, id est, in tantum cumulum creverunt, ut me quasi obruant, quo modo obruitur quis, qui ita profundum fluvium ingreditur ut aquæ supergrediantur caput eius; de magnitudine dicit, Et sicut onus grave gravatæ sunt super me, id est, peccata mea quasi pondus importabile gravant humeros animæ meæ, quia super vires meas est pro tam gra-

ui debito satisfacere. Id clarius est in textu Hebraico, ubi illud, *super me*, significat proprie, *super vires meas*, siue, gravius quam ferre possim. Peccatum Davidis fuit adulterium cum homicidio coniunctum, sed verus poenitens multas valde deformitates in eo considerat. Nam offendit David servum fidelem, cui uxorem, & vitam eripuit: offendit Bethsabeam, quam ad peccandum induxit, & spiritualiter interfecit. ostendit uxores proprias, quibus fidem non servavit: offendit populum universum, imo etiam infideles ipsos malo exemplo, unde Nathan dixit 2. Reg. 12. *Blasphemare fecisti inimicos nomen Domini: offendit denique Deum, cuius leges aperte prævaricatus est.* Itaque si numerentur tot offensiones, & tot delicta, quot personas illo suo peccato David offendit, non sine causa dicere poterit idem David. *Iniquitates meæ supergressæ sunt caput meum.* Deinde gravitas peccati ex circumstantiis cognosci potest, nam occidit David Vriam, primo innocentem, secundo fidelissimum, tertio qui tum Davidi militabat, quarto quia uxorem eius polluerat per adulterium, quasi vellet, quia iniuria illum affecerat, maiori adhuc iniuria afficere, quinto quia ipsum eundem ministrum suæ mortis esse voluit, sexto quia cum scripsit ad Ioab, ut Vriam occideret, credi voluit, illum magni alicuius criminis reum esse, & eo modo famam eius maculavit. Sed ingratitude erga Deum præcipua causa est gravitatis peccati Davidis, Deus enim in vnum Davidem omnia fere dona temporalia, & spiritualia abundantissime contulit. Illi enim Regem magnum, Prophetam eximium, Imperatorem fortissimum fecit, donavit prudentia, robore, pulchritudine, divitiis, omnibus bonis, quæ ab hominibus expecti possunt quæ certe omnia gravissimum reddebant peccatum eius, quod cum ipse appenderet in statera diligentissimæ considerationis, merito dicebat, *iniquitates meæ sicut onus grave gravatæ sunt super me.* Atque hæc est causa cur sensum doloris, quem par esset, ex peccatis suis pauci percipiant, quia



peccati magnitudinem pauci in statera serie considerationis appendunt.

*Putruerunt & corrupta sunt cicatrices mee à facie insipientia mea.*

Hæc pertinent ad tempus illud, quod intercessit inter peccatum adulterij, & admonitionem Nathan Prophetæ, quod fuit plusquam nouem mensium. Siquidem Nathan Dauidem corripuit, postquam natus fuerat puer ex adulterio illo conceptus, vt dicitur 2. Reg. 12. Toto igitur illo tempore distulit Dauid curare vulnera peccati sui per penitentiam. Interim autem obducta erat quædam quasi cicatrix obliuionis, quæ non sinebat vulnus agnosci, sed reuera cicatrices illæ putrescebant, & vulnera grauiora, magisq; incurabilia fiebant, atque hoc est, quod nunc deplorat, dicens: *Cicatrices mee*, non ex arte medici curantis, sed ex negligentia & obliuione superinductæ, *putruerunt, & corrupta sunt à facie insipientia mea*, id est, insipientia mea, quæ causa fuit, vt vulnera mea non aduerterem, eadem fuit etiam causa, vt ipsa vulnera putrefacta foetorem scandali latius, longiusq; diffunderent. Per cicatrices hoc loco non intelliguntur signa, quæ remanent post curationem plagæ, sed intelligitur plaga non curata, quæ solet claudi ad modum cicatricis, & quia non est expressus sanguis corruptus ex ea, neque ipsa *foea oleo, aut circumligata*, vt dicitur Isaïæ 1. ideo putrescit & corrumpitur. Id colligitur ex textu originali, vbi habetur vox *Chaburosh*, quæ non significat cicatrices proprie dictas, sed liuorem & plagam tumentem: quare vel in Latina editione accipiuntur cicatrices pro plagis, vel, vt diximus, quæ cicatricibus perse fiunt, dum vulnus non curatur, sed per se clauditur, & plaga negligitur & corrumpitur.

*Miser factus sum, & curuatus sum vsque in finem: tota die contristatus ingrediebar.*

Ex corruptione illa factum est, vt Dauid miser & curuus fieret, quod potest intelligi duobus modis, primo de culpa, secundo de pœna. Nam qui grauius peccat, præsertim

peccato luxuriæ, hoc ipso fit miser & curuus, quia relicto Deo, in quo est nostra beatitudo, curuatur ad terram, & fit iumentis similis, ac per hoc miser, & miser valde: & hoc significat illud, *vsque in finem*, nimirum miser & curuatus sum adeo, vt inferior & magis curuatus fieri non potuerim, cum à delectatione Angelorum curuatus sum ad voluptates pecorum. Id colligitur ex textu Hebraico, vbi habetur, *miser & curuatus sum vsque valde*. Proinde illud, *in finem*, non significat, vsque ad finem vitæ, vel vsque ad finem temporis, vel vsque in æternum, sed vsque ad finem curuationis, vt magis curuari nequeat. Nam versu octauo vbi legimus: *Humiliatus sum nimis*, eadem est vox Hebraica, quam Interpres nunc vertit, *vsque in finem*, nunc, *nimis*, aut *valde*. Potest etiam intelligi de pœna: nam qui peccat peccato luxuriæ, miser efficitur, & curuatus valde propter conscientia remorsum, timorem iræ diuinæ, & verecundiam humiliantem & confundentem, vt non audeat talis homo ad cœlum oculos leuare. Sed potest etiam vtraque intelligentia simul coniungi, vt sensus sit, Miser factus sum miseria culpæ & pœnæ, & curuatus valde, tum quia faciem animæ, quam defixam in Deo habere debui, conuerti ad carnales & infimas voluptates: tum quia præ pudore cœlum aspicere non possum, & humilis atque abiectus terram aspicere cogor, & propter hæc omnia, *tota die contristatus ingrediebar*, id est, semper conscientia mordente & accusante, tristis ac mœrens incedebam: quæ enim lætitia esse potest homini misero, si miseriam suam agnoscat?

*Quoniam lumbi mei impleti sunt illusionibus, & non est sanitas in carne mea.*

*Afflictus sum, & humiliatus sum nimis: rugiebam à gemitu cordis mei.*

Transit Propheta à peccato suo particulari ad corruptionem generalem, quam in carne sua experiebatur ex peccato primi parentis, vnde peccatum illud suum particulare tanquam ex fonte manauerat: & ex ea corruptione.

VII.

VIII.



prione dicit se affligi & humiliari, & continuo gemere & rugire: *Quoniam*, inquit, *lumbi mei*, hoc est pars illa bestialis, & concupiscens disrupto fræno iustitiae originalis parit perpetuo desideria ignominiosa & turpia, & ideo repletur illusionibus spirituum malignorum: & non est sanitas in carne mea, quia non habitat in ea bonum, sed malum passionum variarum, quæ illam infirmam reddunt, ideo *afflictus sum*, & *humiliatus nimis*, quia pudet me hominem ratione præditum, eiusmodi bestialibus motibus non posse carere: & ideo *rugiebam* præ dolore à gemitu interiore cordis mei, prouocatus ad rugitum & clamorem exteriorem. Scio Rabinos, & qui eos sequuntur, fabulari nescio quid de morbo corporali & fortente, quo Dauid laborauerit in partibus corporis pudendis: sed sancti Patres nostri Ambrosius, Hieronymus, Augustinus & Gregorius in commentariis huius loci referunt hos versículos ad carnalem concupiscentiam, vt similis sit hæc Dauidis querimonia illi, quæ legitur apud Apostolum Roman. 7. *Video aliam legem in membris meis repugnantem legi mentis meæ, & captiuam me in legem peccati. Infelix ego homo, quis me liberabit*, &c. S. Ambrosius, & S. Augustinus legunt, *anima mea impleta est illusionibus*, vbi nos legimus, *lumbi mei impleti sunt illusionibus*. Sed accidit hoc, quia apud Græcos, lumbi dicuntur *lumbi*, & animæ dicuntur *ψυχαι*, vna litera addita. Proinde facile fuit corrumpi Græcum textum, ob litterarum similitudinem: quæ nulla est in textu Hebraico. Ita vel lectio ea est, quæ cum textu Hebraico & Latino concordat. Quod autem vox Hebraica, pro qua habemus, *illusionibus*, significare videatur proprie *ignominiam*, vt S. Hieronymus vertit, non variat sensus: nam qui repletus est ignominia, ille derisioni expositus est: quod vero S. Hieronymus vertit, *euigilans*, pro eo quod nos habemus, *afflictus sum*, non video quid sequutus sit, vox enim quam nunc habemus in textu Hebraico, debilitari proprie significat, debilitari autem & affligi, pro eodem accipi possunt.

*Domine ante te omne desiderium meum, & gemitus meus à te non est absconditus.*

Quia dixerat, gemitum cordis sui excitare rugitum, declarat ad quem gemat corde, ac dicit gemere se ad illum, qui scrutatur corda, & scit, quid desideret spiritus. Domine, inquit, ante te omne desiderium meum, id est, tu Domine solus vides omne desiderium meum, quod non est aliud, nisi vt aliquando liberer à concupiscentia mala, & perueniam ad Sabbatum perfectæ quietis, & de hac re *gemitus meus interior tibi non absconditus*. Simile quid Apostolus dicit, cum ait Rom. 8. *Et ipsi intra nos gemimus ad adoptionem filiorum Dei, expectantes redemptionem corporis nostri*.

*Cor meum conturbatum est, dereliquit me virtus mea, & lumen oculorum meorum, & ipsum non est mecum.*

Pergit describere corruptionem naturæ humanæ, ac dicit: *Cor meum conturbatum est*, quod significat bellum intestinum ex rebellionem partis inferioris à superiore, & addit: *Dereliquit me virtus mea*, quia nata est ex illa rebellionem tanta infirmitas, vt homo, velit nolit, patiatur desideria mala, & dicat cum Apostolo: *Velle adiacet mihi, perficere autem non inuenio*. Addit postremo: *Et lumen oculorum meorum, & ipsum non est mecum*, quia non solum infirmitas in voluntate, sed etiam ignorantia in mente ex eadem rebellionem orta est. Sæpe enim de rebus iudicamus, non vt sunt, sed vt nobis male affectis videntur: quomodo febricitantes, quod dulce est, amarum iudicant, & quod amarum, dulce. Itaque non ait: *Lumen oculorum meorum extinctum est*, sed *non est mecum*, nam lumen intelligentiæ & rationis est quidem semper in anima rationali, sed quia corpus quod corrumpitur, aggrauat animam, sæpe impediti carnalibus passionibus, illo non possumus vt, & ideo dicit, & *lumen oculorum meorum, & ipsum*, inquam, lumen oculorum meorum, interiorum videlicet, *non est mecum*, dum operor licet in me sit.



Proinde est in me quoad essentiam, non est mecum quo ad vsum.

XI.

*Amici mei, & proximi mei aduersum me appropinquauerunt, & steterunt.*

Posteaquam descripsit bellum intestinum, quod intra hominem continuo geritur, describit etiam bella externa, persequutiones, & detractiones, quæ omnia peccatorum poenæ sunt: Ac primum queritur, quod amici, & proximi facti sint illi inimici, quod accidit præcipue in rebellionem Absalonis filij, cum quo multa amicorum, & proximorum Dauidis aduersus eum conspirarunt. Sed moderni expostores, ex textu

Hebraico longe aliter exponunt, quam veritas vulgata editionis habeat textus Hebraicus nunc habet, *Amici mei, & proximi mei de regione lepra mea steterunt.* Quomodo etiam fere vertit S. Hieronymus ex quo multi colligunt, hoc loco tantum significari amicos, & proximos Dauidis, non quidem factos esse illi inimicos, sed non fuisse auctores accedere ad eum iuuandum, vel consolandum, & ideo de regione procul stetisse. At cum versio Septuaginta Interpretum habeat ἡ γυνὴ & Latinus interpres antiquus reddiderit, *appropinquauerunt*, certe nimis durum videtur dicere, *non appropinquauerunt*, sed longe steterunt, neque obstat vox Hebraica, nam illud, *nigbi*, quod vere significat, *lepra mea, vel plaga mea*, Septuaginta Interpretes, qui habuerunt codices correctiores, legerunt, *nagehu appropinquauerunt*, Sunt enim literæ eadem, excepta vltima, quæ facillime mutatur in alteram, cum non differant, nisi quod vna est paulo maior, quam altera. Iod enim si paulum extendatur, efficitur vau, & ideo vitio librariorum facillime contingit, vt vna ponatur pro alia. At, inquit, in versiculo sequenti dicitur, *de longe steterunt*, Verum est sed non est sermo de iisdem personis, vt iam dicemus.

XII.

*Et qui iuxta me erant de longe steterunt, & vim faciebant qui querebant animam meam.*

Dixit amicos & proximos, vt Absalonem,

& socios eius factos esse inimicos, & aduersum se appropinquasse, & stetisse, vt nocerent: nunc dicit alios, qui iuxta eum esse solebant, vt milites, aut seruos, longe recessisse, nec a desse voluisse tempore persequutionis, & interim inimicos vi magna conatos esse vitam illi adimere. Neque solum habuit Dauid, qui quærerent animam eius, id est, qui quærerent eum occidere, vt milites Absalonis, sed habuit etiam, qui detraherent honori, & famæ eius, vt Semei, qui maledixit ei maledictione pessima, & alios, qui consilia dolosa contra eum dabant. vt Achitophellem, & alios, ideo subiungit.

*Et qui inquirebant mala mihi, loquuti sunt vanitates, & dolos tota die meditantur.*

XIII.

*Ego autem tanquam surdus non audiebam, & sicut mutus non aperiens os suum.*

XIV.

*Et factus sum sicut homo non audiens, & non habens in ore suo redargutiones.*

XV.

Hæc perspicua sunt, & verissima, quod præcipue intelligi potest ex lib. 2. Reg. cap. 16. vbi cum Semei malediceret Dauid, eumque virum Belial appellaret, & Regni inuasorem, Dauid incredibili patientia cum sustinuit, neque permisit, vt vllus ei noceret, eumve reprehenderet, sic factus est quasi surdus, & non audiens, & tanquam mutus, & non habens in ore suo redargutiones.

*Quoniam in te Domine speraui: tu exaudies me Domine Deus meus.*

XVI.

Reddit tres rationes, cur ita obsurderit, & obtumuerit: prima est, quia vtilius sibi existimauit sperare in Domino, quam in sua propria defensione: Ait igitur, obsurdui, & obmutui, quoniam in te Domine speraui: non attendi quanta illi falsa, & vana in me iactarent, quoniam sciebam à te omnia audiri, & cognosci, in quo semper speraui, qui es iudex iustus, & reddes vnicuique secundum opera sua, & quia in te speraui, tu exaudies me Do-



me Domine Deus meus, & liberabis à labiis iniquis, & à lingua dolosa.

XVII.

*Quia dixi, ne quando supergaudeant mihi inimici mei: & dum commouentur pedes mei, super me magna loquuti sunt.*

Hæc est altera ratio, cur elegerit obsurdescere, & obmutescere, *Quia dixi*, inquit apud me, *ne quando supergaudeant mihi inimici mei*, id est, bonum est mihi patientiam habere, & sperare in adiutorio Domini, ne forte si impatiens fuero, & reddam maledictum pro maledicto, Deus derelinquat me, & gaudeant inimici mei super me, id est, super ruina mea latentur. Et dum commouentur pedes mei super me magna loquuti sunt, id est, non sine causa metuo, ne de exitio meo latentur inimici; nam dum commouentur pedes mei, id est, dum incipiunt nutare pedes mei, & ego inclino ad casum (quod factum est, quando fuit in periculo Regni amittendi) *inimici mei magna loquuti sunt super me*, comminantes mihi, & prædicentes extremum exitium. Est autem hoc loco obseruandum particulam, & sæpe in Scripturis poni pro, quia, vt Isaiæ 63. Tu enim Pater noster es, & Abraham nesciuit nos, & Israel ignorauit nos; id est, tu solus Domine Pater noster es: nam Abraham, & Iacob, qui videbantur patres nostri esse, non agnoscunt nos pro filiis. Sic etiam cap. 64. Tu iratus es, & peccauimus tibi, id est, quia peccauimus tibi. Ita igitur hoc loco cum dicitur, *Et dum commouentur pedes mei*, illud, & ponitur pro, quia, vt sensus sit, ne quando gloriantur super me inimici mei, & dum commouentur pedes mei, id est, quia dum commouentur pedes mei, &c. Illud etiam, dum commouentur, positum est pro, dum commouerentur. Siquidem in Hebraico, & Græco textu habetur per infinitiuium, in commoueri pedes meos, quod potest verti, dum commouentur, & dum commouebantur, & dum commouerentur, proinde debet exponi iuxta exigentiam verbi sequentis, vt oratio cohæreat.

XVIII.

*Quoniam ego in flagella paratus sum, qui oderunt me inique.*

& dolor meus in conspectu meo semper.

Addit tertiam rationem, cur voluerit obsurdescere, & obmutescere coram aduersariis, *Quoniam*, inquit, ego propter peccata mea paratus sum flagellari non solum flagellis verborum, & detractionum, sed etiam flagellis verberum, & plagatum. Nam dolor, quem merui, semper ante oculos mentis meæ versatur, vel, quia dolor meus, id est, peccatum meum, quod mihi doloris continui causa est, nunquam ab oculis cordis mei recedit. In Hebræo est vox, *zelagh*, quam aliqui vertunt claudicationem. Alij putant legi debere, *zeragh*, id est, lepram; nos habemus flagella ex Græco; sed nulla est difficultas: nam vox illa *zelagh*, communiter significat latus, siue costam, sed traducitur ad significandam claudicationem, quia claudum ambulant, declinant ad vnum latus, & non recti incedunt. Traducitur etiam ad significandam plagam, vel attritionem, ac per hoc etiam flagellum, quia flagellis accipiuntur plagæ. Itaque sanctus Augustinus vertit, *Ego ad plagas paratus sum*, & LXX. Interpretes, *Ego autem in flagella paratus sum*.

צ'לע  
צ'רע  
צ'לע

XIX.

*Quoniam iniquitatem meam annuntiabo, & cogitabo pro peccato meo.*

Reddit rationem, cur in flagella paratum se dixerit, *Quoniam*, inquit, *iniquitatem meam annuntiabo*, id est, quoniam agnosco, & confiteor me peccasse, & flagella commeruisse: & cogitabo pro peccato meo, expiando videlicet. Significantius ex Hebræo vertit S. Hieron. *Et sollicitus ero pro peccato meo*, id est, diligenter, & anxie cogitabo, quo modo possim Domino satisfacere, ac plenam indulgentiam obtinere. Quod quidem salutare documentum est poenitentibus, vt solliciti sint pro expiatione peccati, & libenter accipiant occasiones à Deo oblatas patientiam exercendi.

XX.

*Inimici autem mei viuunt, & confirmati sunt super me, & multiplicati sunt,*

Bb. 3;

Postea.



Posteaquam Propheta exposuit rationes, cur obfurduerit, & obmutuerit coram aduersariis suis, vt per patientiam Deum placaret, opponit patientiæ suæ contrariam aduersariorum malitiam. Cum enim ipse non redderet malum pro malo, illi è contrario retribuebant mala pro bonis: & tamen vivebant, & exultabant, & roborabantur. Quæ ad eum finem commemorantur à Dauide, vt facilius Deum ad misericordiam inclinent. *Inimici autem mei viuunt, & confirmati sunt super me*, i. ego quidem humiliatus sum, & afflictus, & tamen patientiam seruo, ac si surdus, & murus essem: interim autem *inimici mei viuunt*, i. alacres sunt, & exultant, *& confirmati sunt super me*, i. robustiores, & fortiores euaserunt, *& multiplicati sunt*, i. & creuerunt etiam quo ad numerum, qui oderunt me inique, i. illi viuunt, & roborati sunt, *& multiplicati, qui oderunt me*, sine vlla iusta causa. In Hebræo est, *qui oderunt me mendaciter*, i. ob causam falsam, & euentitiam. Videntur enim hæc referri ad coniurationem Absalonis, qui mendacio suo persuaserat populis, Regem non constituisse aliquos, qui iuste iudicarent; se autem iustissime iudicaturum, si Rex constitueretur. Hinc enim factum est, vt populus rebellaret & toto corde sequeretur Absalonem, vt dicitur lib. 2. Reg. c. 15.

XXI.

*Qui retribuunt mala pro bonis, detrahebant mihi, quoniam sequebar bonitatem.*

Probat quod dixit, sine iusta causa se odio habitum fuisse ab inimicis, dicens, *Qui retribuunt mala pro bonis, detrahebant mihi*, quasi dicat, vere oderunt me inique inimici mei: nam illi detrahebant mihi, qui retribuunt mala pro bonis, quales fuerunt Absalon filius, & Achitophel consiliarius. Absalon enim plurima bona à Dauide acceperat, & paulo ante obtinuerat indulgentiam fratricidij, & tamen detrahebat Dauidi patri suo tanquam negligenti, & iniusto, dicens ijs, qui veniebant ad iudicium Regis, *Videntur mihi sermones tui iusti, & boni, sed non est, qui te audiat constitutus à Rege*, 2. Reg. 15. Sic etiam Achitophel acceperat à Dauide magnum honorem, vt esset principalis Re-

gni Consiliarius, & tamen oblitus beneficii defecit à Dauide ad Absalonem, & consilia iniquissima, contra eundem Dauidem Absaloni dedit, 2. Reg. 16. & 17. Nec solum detrahebant mihi, qui retribuunt mala pro bonis, sed etiam (quod grauius est) *detrahebant mihi, quoniam sequebar bonitatem*, id est, quia sincero corde, & bona voluntate cum omnibus agebam, & eo modo contrarius eram iniquis eorum desideriis, & operibus.

*Ne derelinquas me, Domine Deus meus, ne discesseris à me.* XXII.

*Intende in adiutorium meum Domine Deus salutis meæ.* XXIII.

Concludit ex ijs, quæ dixit, Deumque precatur, vt protectione sua illi adsit, & quasi idem repetit, quod in principio Psalmi dixit, tunc enim Deus in ira, vel furore suo grauissime punit aliquem, cum illum gratia sua desinit, & tanquam ab inimico recedit, & inter hostes nudum adiutorio suo constituit. Sic igitur dixerat initio Psalmi, *Domine ne in furore tuo arguas me*, ita nunc in fine concludit, *Ne derelinquas me Domine Deus meus*, id est, ne deserat me gratia tua, quandoquidem tu es Dominus meus, qui me condidisti, & Deus meus, qui ad summum bonum me fecisti. *Ne discesseris à me* tanquam ab inimico: sed potius vt Pater *intende in adiutorium meum*, i. diligenter incumbe in auxiliū meum, tu Domine Deus salutis meæ, id est, tu qui auctor es salutis meæ, à quo solo salutem expecto, & in quo solo confido. Et hic quidem mihi visus est huius Psalmi sensus literalis: tamen quoniam sancti Patres Chrysost. August. Hieron. & Gregor. vel totum Psalmum, vel certa à medio usque, ad finem de Christo exponunt: sciendum est, posse totum Psalmum de Dauide explicari, primum, vt Davidis personæ proprie conueniat; deinde vt David personam Christi gerebat. Spiritus enim S. plura simul intendere potest in verbis ijsdem, nimirum narrare tribulationes Davidis, & simul prædicere Christi passionem, qui Davidis filius secundum carnem futurus erat. Cum igitur de persona Davidis Psalmum exposuerimus, indicabimus etiam



iam breuiter, quemadmodum ad Christum idem Psalmus applicari possit.

ALIA EXPLICATIO EIVSDEM  
Psalmi.

I. Domine ne in furore tuo arguas me,  
neque in ira tua corripas me.

Christus pro corpore suo loquitur, quod est Ecclesia, eique postulat liberationem.

XII. II. Quoniam sagitta tua infixae sunt mihi,  
& confirmasti super me manum tuam.

Dicit iuste se petere Ecclesiae liberationem, quoniam sagittae irae Dei, quae ad illam pertinebant, in se suscepit.

III. Non est sanitas in carne mea à facie irae  
tuae, non est pax ossibus meis à facie pec-  
catorum meorum.

Describit passionem suam generatim, ob quam à planta pedis vsque ad verticem capitis non fuit in eo sanitas. Quod autem dicit à facie peccatorum meorum, intelligitur de peccatis, non quae ipse fecit, sed quae in se punienda suscepit.

IV. Quoniam iniquitates meae supergressae  
sunt caput meum, & sicut onus graue gra-  
uatæ sunt super me.

Dicit, ideo in carne sua non fuisse sanita- tem à planta pedis vsque ad verticem capi- tis: quoniam peccata, quae suscepit expian- da, tam multa sunt, & tam graua, vt super- gressa sint caput eius multitudine sua, & in- har plumbi fuerint ob grauitatem suam.

V. Putruerunt, & corruptæ sunt cicatri-  
ces meae à facie insipientiae meae.

VI. Miser factus sum, & curuatus sum vs-  
que in finem, tota die contristatus ingre-  
diebar.

VII. Quoniam lumbi mei impleti sunt illusio-  
nibus, & non est sanitas in carne mea.

Hæc dicit pro corpore suo, deplorans corruptionem generis humani: quomodo quando quis dicit, doleo pedes, vel manus, vel stomachum; caput est quod loquitur,

sed non loquitur de dolore, quod in sepa- riatur, sed quod in membris, & in corpore suo habeat.

Afflictus sum, & humiliatus sum nimis,  
rugiebam à gemitu cordis mei.

Hic incipit ordine recensere passionem suam. Pertinent enim hæc verba ad oratio- nem in horto habitam.

Domine ante te omne desiderium me-  
um, & gemitus meus à te non est abscon-  
ditus.

Cor meum conturbatum est, dereliquit  
me virtus mea, & lumen oculorum meo-  
rum & ipsum non est mecum.

Ad eandem orationem pertinent, in qua desiderauit calicem transire, & coepit turba- ri, pauere, tædere, & moestus esse. Et vt ex- periretur amaritudinem imminens passio- nis noluit virtutem, & lumen diuinæ con- solationis in partem inferiorem influere; ita vt etiam Angelus de cælo apparuerit con- fortans eum.

Amici mei, & proximi mei, aduersum  
me appropinquauerunt & steterunt.

Hoc impletum est in Iuda amico, & Iu- daeis proximis, quando comprehenderunt eum.

Et qui iuxta me erant, de longe stete-  
runt.

Hoc impletum est in Apostolis, qui fuge- runt, & in Petro, qui sequebatur à longe.

Et vim faciebant, qui querebant ani-  
mam meam.

Impletum est in concilio Sacerdotum, sollicitè quærentium falsa testimonia, vt eum perderent.

Et qui inquirebant mala mihi, loqu-  
ti sunt vanitates, & dolos tota die medi-  
tabantur.

Ad idem concilium pertinent.

Ego autem tanquam surdus non au-  
diebam, & sicut mutus non aperiens os  
suum.

Es:



XV. *Et factus sum sicut homo non audiens, & non habens in ore suo redargutiones.*

Ad litteram impleta sunt in Christo, qui coram Caipha primam, & deinde coram Pilato, & Herode nullam attulit defensionem, sed sicut agnus coram tondente se obmutuit, ut etiam praedixit Isaías cap. 53.

XVI. *Quoniam in te Domine speravi, tu exaudies me Domine Deus meus.*

Ad idem silentium pertinet, ideo enim siluit coram hominibus, quoniam non tacebat coram Deo, à quo expectabat remunerationem, salutem populi sui.

XVII. *Quia dixi, nequando supergaudeant inimici mei, & dum commouentur pedes mei, super me magna loquuti sunt.*

Seruaui Christus inuictam patientiam, ne de impatientia gauderent inimici, qui, dum commouebantur pedes eius, i. dum infirmitas eius ad tempus ostendebatur, magna loquebantur super eum, dicentes: Si non esset hic malefactor, non tibi tradidissemus eum, &c. Hunc inuenimus subuertentem gentem nostram, &c.

XVIII. *Quoniam ego in flagella paratus sum, & dolor meus in conspectu meo semper.*

Ad litteram impletum scimus in flagellatione, & colaphizatione, & spinarum coronatione.

XIX. *Quoniam iniquitatem meam annuntiabo, & cogitabo pro peccato meo.*

Dicit se annunciaturum peccatum suum, quod, ut dictum est, non fecit, sed expiandum suscepit: & cogitaturum, i. sollicitum futurum pro eo penitus delendo, quod fecit cum peccata nostra pertulit in corpore suo super lignum, ut S. Petrus scribit in epistola 1. cap. 2.

XX. *Inimici autem mei viuunt, & confirmati sunt super me, & multiplicati sunt, qui oderunt me inique.*

Hoc impletum est, cum Principes, & Sacerdotes existimantes se iam victoriam obtinuisse exultabant, & crucifixo insultabant.

*Qui retribuunt mala pro bonis detrahebant mihi, quoniam sequebar bonitatem.*

Quando videlicet pendenti in cruce dicebant, *Vah, qui destruis templum Dei, & de-secndas nunc de cruce, &c.*

*Ne derelinquas me Domine Deus meus, ne discesseris à me.*

Hoc disertis verbis in cruce Dominus loquutus est, cum ait, *Deus meus, Deus meus, ut quid dereliquisti me.* quasi dicat, si dereliquisti ad tempus, quoad consolationem, non derelinquas quoad resurrectionem.

*Intende in adiutorium meum Domine, Deus salutis meae.*

Non derelinquas in inferno animam meam, neq. des sanctum tuum videre corruptionem: sed intende in adiutorium meum ostendens mihi viam vitam, & adimplens me letitia cum vultu tuo.

## PSALMVS XXXVIII.

*Titulus, & Argumentum.*

In finem, ipsi Idithum, canticum Dauid.

**T**ITVLVS demonstrat Psalmum compositum esse à Dauide, sed datum ipsi Idithum ad canendum. Erat enim Idithum unus ex tribus principibus cantorum, ut habemus lib. 1. Paralip. cap. 16. & lib. 2. cap. 5. Quid autem sit, in finem, vel, pro victoria, ut ex Hebraeo S. Hieronymus vertit, diximus in explicatione Psalmi quarti. Sed hoc loco conuenit materia de qua agitur, tum in finem, tum pro victoria. Quamuis enim Rabini, & recentiores aliqui doceant, Dauidem agrotum corporali morbo opasse finem viri, & miseriarum, & hac à Domino petere in presenti Psalmo: nos tamen sequuti vetres Patres, existimamus longe altiore doctrinam in hoc diuino Spiritus sancti cantico per Prophetam edito contineri. Nimirum censemus, hic describit breuitatem, & vanitatem praesentis vitae.



**XXI.** vita, ut intelligamus spem nostram non in hac vita, sed in Deo, in quo vita aeterna est, esse ponendam, & ideo dandam esse operam patientia & paci cum omnibus hominibus, & precipue linguam esse custodiendam ab omni rixa & iurgio & contentione, ut non impediamur à cursu ad brauium superna vocationis. Certe enim, qui ad brauium maximi pretij currit, si in medio cursu videret sibi litem pro pallio moueri, pallium potius dimitteret, quam se à cursu impediri pateretur. Neque litigant aut contendunt homines in terris, nisi pro temporali-  
**XXII.** bus rebus. Itaque Psalmus praesens doctrinam Evangelicam & Apostolicam continet. Nam & Dominus docuit, ut percutienti maxillam, praebeamus etiam alteram; & volenti pallium nobis eripere, demus illi tunicam, Matth. 5. & Apostolus dicit: Delictum est in vobis, quod lites habetis inter vos, cur non magis fraudem patimini? 1. Cor. 6. Hic igitur Psalmus, propter doctrinam tam sublimem, cani debet in finem, id est, semper, usque ad mundi finem, & non solum tempore illo Davidis & Iditum. Idem etiam Psalmus recte inscribitur, pro victoria, quia nulla esse potest victoria nobilior, quam per patientiam vincere in bono malum, & sibi ipsi hominem imperare.

## EXPLICATIO PSALMI XXXVIII.

**I.** **D**ixi, custodiam vias meas, ut non delinquam in lingua mea.

Sollicitus erat David de vero bono non amittendo; ideo deliberavit, ac firmiter apud se constituit, magna circumspectione, uti in omnibus actionibus suis, ut si fieri posset, ne in verbo quidem offenderet; quasi audiuisset ab Apostolo: Videte quomodo caute ambuletis, Ephes. 5. & à B. Iacobo: Qui non offendit verbo, hic perfectus est vir, Iacob. 3. Ait igitur: Dixi, nimirum apud me statui, decreui, legem mihi ipse posui, ut custodiam vias meas, ut cautiissime ambulem in via vitae huius, & diligenter attendam, ubi gressum pono, ne forte in foueam cadam, vel offendam ad lapidem, vel lutosam viam pro munda eligam, vel certe deuiem ab itinere

recto, id est, deliberaui & statui considerare omnes actiones meas. Et quoniam nihil est facilius, neque periculosius, quam verbo offendere, cum ex verbis inconsiderate prolatis, oriantur rixae, contentiones, iurgia, & alia mala tam multa, ut S. Iacobus dixerit, linguam esse universitatem iniquitatis, Iacob. 3. ideo singulariter addit Propheta: Ut non delinquam in lingua mea, id est, ad hoc potissimum custodiam vias meas, ut non delinquam in lingua mea: hic enim infinita mala effugiam.

**II.** Posui ori meo custodiam, cum confisteret peccator aduersum me.

Nunquam est periculum maius delinquendi per linguam, quam cum ab aliquo detractore, vel contumeliam faciente prouocamur, ideo dicit Propheta: Posui ori meo custodiam, cum confisteret peccator aduersum me, id est, cum aliquis iniquus forte irritaret me conuitio, aut detractio, aut alio iniurioso verbo, tum maxime custodiui os meum, ne prorumperet in aliquod verbum, cuius postea poenitentiam agere deberem.

**III.** Obmutui, & humiliatus sum; & filui à bonis, & dolor meus renouatus est.

Declarat, quam custodiam ori suo adhibuerit, dicens: Obmutui, id est, filui omnino, ac si mutus essem, & humiliatus sum, id est, humiliter patientiam habui, & filui à bonis, id est, abstinui etiam à iusta defensione, & à debita reprehensione, & dolor meus renouatus est, propter hoc ipsum, quod filui à bonis. Nam dolueram primo propter acceptam iniuriam, sed mitigauerat dolorem premium patientiae: iterum ergo dolor renouatus est, quia filui à bonis, & proximum meum debita correptione fraudavi. Ita S. Augustinus: sed posset etiam ita exponi: Dolor meus renouatus est, quia dolueram ex passione mea, sed dolor renouatus est ex compassione fratris, quem vidi tam grauiter aegrotare, ut medicinali correptionis nihil ei profutura videretur, propter quod etiam filui à bonis.



IV. *Concaluit cor meum intra me, & in meditatione mea exardescet ignis.*

Exponit, quid ille dolor renouatus effecerit, ac dicit: *Concaluit cor meum intra me*, id est, ex dolore illo compassionis calefactum est cor meum dilectione, & inde meditari corpori de miseria humana, de misericordia Dei, de ingratitudine hominum, de abundantia charitatis Dei erga ingratos & malos: & alia id genus multa. *Et in meditatione mea exardescet ignis*, ille, inquam, ignis, de quo dicebant duo illi Discipuli apud Lucam c. 24. *Nonne cor nostrum ardens erat in nobis, dum loqueretur in via, & aperiret nobis Scripturas?* Diligens enim & attenta meditatio rerum coelestium ordinaria via est ad accedendum ignem actualis charitatis Dei. Scio alios aliter exponere istum ignem ex meditatione exardescentem, de igne videlicet iracundiæ & indignationis: sed nos S. Ambrosium sequuti sumus; & rationem connexionis, & lectoris ædificationem.

V. *Loquutus sum in lingua mea, notum fac mihi Domine finem meum.*

VI. *Et numerum dierum meorum quis est, ut sciam quid desit mihi.*

Ex illo æstu interiore *loquutus sum*, inquit, *in lingua mea*, id est, non sum loquutus in lingua, quam omnes intelligunt, sed in lingua mihi nota, quasi dicat, Ego scio quid voluerim dicere. *Notum fac mihi Domine finem meum*, &c. videtur sensus esse, quod cupiat scire finem vitæ suæ, id est, numerum annorum & dierum, quibus victurus sit super terram, ut sciat quantum ei temporis superfit usque ad mortem, sed hoc non voluit dicere: ista enim curiositas vitiosa, & temeritas quædam fuisset, ideo præmisit: *Loquutus sum in lingua mea*, in sensu meo, sermone mihi noto. Illud igitur significare voluit, vitam humanam esse brevissimam, & quasi quoddam nihil. Sed quoniam hanc veritatem, quamvis alioqui clarissimam, & experimento notissimam, pauci bene norunt, ideo precatur Deum, ut non sinat se decipi, ut plerumque decipiuntur, ut existimet diuturnum,

quod est brevissimum. Curenim maxima pars hominum tota intenta est in cumulandis opibus terrenis, proque iis pugnat & contendit acerrime, & bona futura contemnit & negligit, nisi quia non cogitat, vel non credit, vitam præsentem fugere velut ymbra. Ait igitur: *Notum fac mihi Domine finem meum*, id est, fac Domine per gratiam tuam, ut illustrentur oculi mentis meæ, & aperte cognoscam, finem vitæ meæ iam prope adesse. *Et numerum dierum meorum, quis est, ut sciam quid desit mihi*, id est, fac, ut attenta cogitatione penetrem, quam sit brevis numerus dierum meorum, & sciam quam parum temporis mihi superfit. Hanc esse veram expositionem, sequentes versiculi docebunt. Nam exauditus à Domino non refert præcise numerum annorum, qui sibi supererant, sed variis modis ostendere nititur tempus humanæ vitæ brevissimum esse, præsertim si ad æternitatem Dei, & futuri sæculi conferatur.

VII. *Ecce mensurabiles posuisti dies meos, & substantia mea tanquam nihilum ante te.*

Edoctus à Domino, quod postulauerat, dicit, *mensurabiles esse dies suos*, id est, tam breuem esse durationem vitæ suæ, ut facillime mensurari possit. Sed observandum est, S. Hieronymum ex Hebræo vertisse, *Ecce breues posuisti dies meos*. S. Augustinum cum aliis legisse, *Ecce veteres posuisti dies meos*. S. Ambrosium legisse, *Ecce palmas posuisti dies meos*. Denique Chrysostomum, & alios legisse: *Ecce palmares posuisti dies meos*. Sed hæc omnia in idem recidunt: vox Hebraica *tephachoth*, significat res palmares, id est, palmo vno mensurabiles: nam *taphac*, significat mensuram palmi quatuor digitorum, quod idem significat vox Græca *παλάστην*, quam habemus in editione LXX. Interpretum. Igitur S. Hieronymus recte vertit, *breues dies*, breues enim sunt, qui mensura brevissima mensurari possunt. S. Augustinus, & alij, qui legerunt, *veteres dies*, fortasse habuerunt in Græco textu *παλαιάς*,

pro



pro παλαιάς, sed tamen, *dies veteres*, recte dicuntur dies vitæ nostræ, quoniam, vt Apostolus ait ad Hebr. 8. *Quod antiquatur, & senescent, prope interitum est.* Et nouimus, vestes veteres, & domus veteres, & similia vetera non diu durare. S. Ambrosius vocem Græcam non a mensura, sed a palæstra deduxit; & tamen aptissima similitudine explicuit cursum velocissimum, & breuissimum, & simul laboriosissimum vitæ nostræ. Qui enim in palæstra currunt, vel dimicant, tempus habent breuissimum, sed laboriosissimum, vt notum est. Nostra editio recte posuit, *mensurabiles dies*, id est, qui tam breues sunt, vt nullo negotio mensurari possint: quod idem significant *dies palmæres*, vt Chrysostomus ex interpretatione Symmachi legit. Sed Propheta non contentus dixisse, dies suos breues & mensurabiles esse, addidit quasi corrigendo: *Et substantia mea tanquam nihilum ante te*: quasi dicat, parum dixi, dies breues esse, nam *substantia mea*, id est, substantia mea, hoc ipsum quod sum & subsisto, nihil est ante te. Est quidem aliquid ante oculos hominum, qui non vident nisi præsentia, sed *ante te*, qui vides futura, & intueris æternitatem, quæ omni caret mensura, nihil omnino est. Quid enim sunt pauci anni, qui velocissime transeunt, ad infinitam durationem? Nomen *substantia* hoc loco non significare aliud, quam *subsistentiam*, & spacium vitæ, intelligi potest ex voce Hebræa, *cheldi*, quæ significat proprie tempus, siue sæculum, vt sensus sit, tempus meum, vel, vt S. Hieronymus reddidit, *vita nihil est coram te.*

VII.

*Veruntamen vniuersa vanitas omnis homo viuens.*

Adhuc magis declarat, & nobis persuadere nititur, quod ipse plane perspexit. Non solum, inquit, tempus vitæ nostræ breuissimum est, sed *omnis homo*, quicumque ille sit, etiam Rex & Monarcha, quem omnes mirantur, & cui ceteri omnes inuident, ille, inquam, etiam *dum uiuit*, id est, dum viget & floret, & in optimo statu est; vel, vt est ad

verbum in Hebræo, *dum stat, dum firmiter consistit*, & radicans videtur in terra, nihil est aliud, nisi *vniuersa vanitas*, siue vniuersitas vanitatis. Quicquid enim in illo est, siue sanitas, siue robur, siue pulchritudo, siue diuitiæ, siue dignitas, siue potentia, totum fragile & momentaneum est.

*Veruntamen in imagine pertransit homo, sed & frustra conturbatur.*

IX.

Videbat Propheta tam alto sopore depressum esse genus humanum, vt non contentus tonitruis verborum, quibus hactenus vsus est ad homines excitandos: addat aliud adhuc vehementius percellens humanas mentes, si forte somno discusso vigilare incipiant. Quoniam igitur poterat aliquis dicere, non videri verum, vitam hominum nihil esse, cum videamus tam multis bonis vitam hominum circumfluere, opibus, honoribus, sanitate, robore, & similibus; ideo nunc dicit Propheta, ista non esse vera bona, sed imagines & vmbas rerum bonarum, & ideo frustra turbati homines, cum ista vel non possunt acquirere, vel acquisita coguntur amittere. Quomodo frustra Rex conturbaretur ob amissam imaginem ligneam, vel papyraceam Regni, quando Regnum verum illi maneret. *Veruntamen*, inquit, *in imagine pertransit homo*, id est, homo pertransit & perambulat viam vitæ huius in imagine rerum, non in rerum veritate, habens videlicet ante oculos in toto hoc itinere non res veras, sed rerum vmbas, atque imagines. Vita enim, quam hic habemus, imago est vitæ beatæ, quæ sola vera est vita; sanitas huius temporis, imago est immortalitatis, quæ sola vera est sanitas; pulchritudo, quam hic videmus, vix vmbra quædam est pulchritudinis illius, quam habebimus, cum *iusti fulgebunt sicut Sol in Regno Patriæ eorum*: diuitiæ terrenæ, non sunt diuitiæ, sed illarum diuitiarum imagines, quas habebimus, cum nulla omnino re indigebimus, sed erit Deus omnia in omnibus. Idem dici potest de sapientia, de gloria, de celsitudine, & de cæteris, quæ hic dicuntur bona.



Porro phrasis illa, *in imagine pertransit*, siue perambulat homo, similis est illis phrasibus in Scriptura sacra frequentibus, *ambulare in luce, in tenebris, in fide, in timore, in dilectione*, & quæ est bis, *terve, in secunda & tertia epistola Apostoli Ioannis: ambulare in veritate*, cui potest opponi, *ambulare in imagine*, quatenus imago opponitur veritati. Sed & frustra conturbatur, id est, sine vlla causa conturbatur homo in rebus temporalibus anxie quærendis, vel conseruandis: frustra lætatur in earum lucro, & frustra plorat in earum iactura, quasi res solidæ & veræ, ac permanentes essent: cum imaginariæ, fragiles & caducæ sint. Si Ioan. Chrysostomus, quem Theodoretus & Euthymius sequuntur, exponit illud, *in imagine pertransit homo*, ac si dictum esset, instar imaginis pertransit homo, vt non solum res humanæ sint imagines rerum verarum, sed ipse etiam homo non tam sit homo, quam hominis imago in tabella depicti.

XI.

*Thesaurizat, & ignorat cui congregabit ea.*

Probat vnico exemplo, frustra conturbati homines in opibus quærendis, augendis, conseruandis: quoniam nesciunt cui laborent. Existimant illi quidem, se filiis, aut nepotibus, qui grati memoriæ parentum futuri sint, thesaurizare: sed accidit sæpissime, vt filij, vel nepotes continuo moriantur, & hæreditas ad ignotos, vel inimicos perueniat: vel certe vt filij, vel nepotes dissipent breuissimo tempore, quæ pater, vel auus magno labore & longissimo tempore acquisiuit: vel denique vt hæredes ingrati sint, & reddant mala pro bonis, detrahentes industriæ & laboribus maiorum suorum: quæ si præuidere homines illi potuissent, thesaurizassent potius sibi thesauros in celo, & sine turbatione vitam istam traduxissent. Vide similes sententias in Ecclesiaste cap. 2. 4. 5. & 6.

XI.

*Et nunc quæ est expectatio mea? nonne Dominus? & substantia mea apud te est?*

Ex breuitate & vanitate vitæ præsentis tam clare perspecta, concludit, se quidem spem suam in solo Deo ponere constituisse. Et nunc, inquit, his ita se habentibus, quæ est expectatio mea? quid spero? quid quero? quid opto? nonne Dominus expectatio & spes mea est? Deinde conuersus ad ipsum Deum dicit: *Substantia mea apud te est*, id est, vita mea & opes meæ apud te sunt, nihili facio cunctas res creatas, te vnum pro rebus omnibus habere cupio, quia in te sunt omnia. In Hebræo ad verbum habetur: *Et nunc quid expecto Domine? expectatio mea tibi ipsa?* Ex quo intelligere possumus, Hebraicæ lectioni respondere illa tantum, *Et nunc quæ est expectatio mea? nonne Dominus?* Illa vero, *& substantia mea apud te est*, videntur addita explicandi gratia à LXX. Senioribus, quæ à nostro Latino Interprete fideliter reddita sunt. Itaque non oportet quærere, vt multi faciunt, cur substantiam Latinus Interpretes posuerit pro voce Hebræica, quæ *spes*, vel *expectationem* significat. Latinus enim Interpres, non substantiam pro expectatione posuit, sed addidit ad verba Hebræica, id quod LXX. Interpretes addiderunt. Simile est in Psalmo 21. vbi legimus: *Deus meus respice in me, quare me dereliquisti?* illud enim, *respice in me*, non habetur in Hebræo codice, sed additum est à LXX. Interpretibus, & inde translatum est ab Interprete Latino in editionem vulgatam.

*Ab omnibus iniquitatibus meis erue me, opprobrium insipienti dedisti me.*

XII.

Quoniam dixit, se terrena contemnere, & solum Deum expectare, & in eo spes suas omnes collocasse: consequenter adiungit, de peccatis in Deum sollicitum se esse, non autem de opprobriis hominum. *Ab omnibus*, inquit, *iniquitatibus meis erue me*, id est, quia sola peccata sunt, quæ mihi ad te viam impedire possunt, & quæ sola vera sunt mala, ideo precor, vt ab illis me liberis, & quidem omnibus, non præ-

terti.



teritis tantum, sed etiam futuris, illa delendo, ista impediendo. Quo loco notandum est, viros etiam perfectos, qui terrena despicunt, & ad Deum toto corde anhelant, habere semper aliquid, quod sibi petant ignosci: & sollicitos esse debere pro quotidianis peccatis quotidianas Deo preces offerre. *Opprobrium insipienti dedisti me*: Hæc pars versiculi coniungitur cum sequentibus hoc modo. Tu quidem opprobrium insipienti dedisti me, ego autem obmutui, & non aperui os meum. Significat autem, se propterea quod diceret, vana esse & contemnenda præsentia, & in solo Deo spem esse ponendam: derideri solitum ab insipientibus, qui non capiunt, quæ Dei sunt. Quomodo etiam dicit Evangelium de Christo Domino Luc. 16. *Audiebant hæc omnia Pharisæi, qui erant avari, & deridebant illum.* In Hebræo habetur contraria sententia, nimirum, *opprobrium insipienti non pones me.* Sed anteponenda est lectio LXX. Interpretum, ut Sanctus Ambrosius admonet: quoniam sequentia verba, *Obmutui, & non aperui os meum*, manifeste docent, Davidem audiuisse opprobria insipientium, & sic etiam legunt & exponunt Augustinus, Chrysost. & alij veteres patres. Ipse etiam S. Hieron. qui in versione ex Hebræo posuit particulam negantem, tamen in commentario legit & exponit hunc locum sine tali particula. Proinde videtur ea particula irrepsisse in textum Hebraicum post temporale LXX. Interpretum.

que aperiunt os suum. Reddit autem rationem, cur obmutuerit, & non aperuerit os suum. *Quoniam, inquit, tu fecisti*, nimirum, ut opprobria in me iactarentur: tu enim es, qui posuisti me opprobrium insipientibus. Et hanc eandem rationem reddidit idem David, quando obmutuit ad maledictionem Semei, 2. Reg. cap. 16. *Sinite, inquit, illum ut maledicat, Dominus enim præcepit ei ut malediceret David, & quis est, qui audeat dicere quare sic fecerit?* Vbi tamen obseruandum est, Deum non præcepisse Semei, ut malediceret. Davidi præcepto eiusmodi, ubi obedientia laudaretur, sciimus enim Semei grauitè peccasse maledicendo Davidem, & propter hoc postea fuisse à Salomone punitum, sed dicitur Deus præcepisse Semei, ut malediceret, quoniam videns malam Semei voluntatem, vñus est illa mala voluntate, quam ipse non fecerat, ad humiliandum, & corripiendum Davidem. De qua re vide sanctum Aug. lib. de gratia & libero arbitrio, c. 20. & seq. vel si vis fusius aliquid tractatum legere, vide in controuersis nostris l. 2. de amissione gratiæ & statu peccati, cap. 13. & seq. *Amoue à me plagas tuas*, quasi dicat, libenter accipio contumelias, & opprobria insipientium, quæ tu ad meam humiliationem paternæ severitatis ordinasti, sed plagas tuas ferre non possum, ideo precor, ut eas à me omnino remoueas. Vocat enim *plagas Dei*, flagella, & supplicia, quæ Deus iratus immittit, non ut pater aut medicus, sed ut iudex, de quibus in Psal. superiore dixit, *Domine ne in furore tuo arguas me*. Tales plagæ sunt excæcatio, obduracyo, sensus reprobos, & ipsa damnatio ad ignem sempiternum.

*Obmutui, & non aperui os meum, quoniam tu fecisti, amoue à me plagas tuas.*

Cum opprobria ab insipientibus audiui, non respondi, neque defendi me, sed obmutui, id est, ita me gessi, ac si mutus fuisset. Imo etiam non aperui os meum, sed ita me gessi, ac si surdus fuisset, neque opprobria illa audiuissem. Qui enim muti sunt, & non surdi, aperiunt os suum & conantur respondere, cum aliquid audiunt, qui autem surdi sunt, & muti, neque loquuntur, ne-

*A fortitudine manus tuæ: ego defeci in increpationibus, propter iniquitatem corripuisti hominem.*

*Et tabescere fecisti sicut araneam animam eius, veruntamen vane conturbatur omnis homo.*

Explicat cur tantopere cupiat à se remoueri,

XIV.

XV.



ueri plagas Dei, & dicit causam esse, quoniam expertus est in seipso, & in aliis, quam intolerabiles sint eiusmodi plagæ: de se primum ita dicit, *A fortitudine manus tua ego defeci in increpationibus*, id est, ego ipse fortitudinem, & potentiam, siue grauitatem manus tuæ percutientis expertus defeci, & plane consumptus sum, & perij, in increpationibus, id est, in illa crudeli increpatione, quando in furore tuo arguisti me. Hoc autem Dauidi contigit, quando ob peccatum adulterij commissum Deus in pœnam huius peccati, permisit illum cadere in peccatum homicidij, quod est grauius, & in tantam cæcitatem, vt per multos menses non redierit ad se, neque statum suum, id est, mortem animæ suæ cognouerit: nullum enim est supplicium grauius, quam, quando pœna peccati est aliud peccatum. Quod enim peccatum sit aliquando pœna peccati, & quidem pœna horribilis, & timenda super omnes pœnas, docet Apostolus Roman. I. *Qui cum cognouissent Deum, non sicut Deum glorificauerunt, propterea tradidit illos Deus in desideria cordis eorum, in immunditiam, vt contumelijs afficiant corpora sua, & infra, Propterea tradidit illos Deus in passionem ignominie, & infra: Et sicut non probauerunt Deum habere in notitia, tradidit illos Deus in reprobum sensum, vt faciant ea, quæ non conueniunt.* Vide de hoc flagello sanctum Augustinum libr. 5. in Iulianum, cap. 3. Deinde addit Prophetæ de alijs peccatoribus, hæc plaga crudeli à Deo punitis, *Propter iniquitatem corripuisti hominem, & tabescere fecisti sicut araneam animam eius*, id est, propter peccata præcedentia corripuisti in furore tuo hominem peccatorem & fecisti, vt anima eius contabesceret instar aranæ, quæ laborat in texenda tela, vt capiat muscas, & interim ipsa exsiccatur, & consumitur. Sic enim animæ hominum carnalium, iusto Dei iudicio, perpetuo laborant in rebus temporalibus acquirendis, & in eo labore consumunt ingenium, & mentem, & inde anima exsiccatur omni humore gratiæ, vt ne cogitent quidem de salute sua, neque illo

desiderio tangantur veræ felicitatis. Contra quam animæ ariditatem desiderabat in alio Psalmo idem Prophetæ adipem, & pinguedinem spirituales; dicens, *Sicut adipe, & pinguedine repleatur anima mea.* Concludit Prophetæ, *Veruntamen vane conturbatur omnis homo*, id est, omnis homo, cuius anima tabescit sicut aranea, vane conturbatur, frustra laborat, sine vlla causa tot contentionibus agitur. *Quid enim prodest homini, si vniuersum mundum lucretur, anime vero sue detrimentum patiatur?* Sed hoc loco multa obseruanda sunt: primo verba illa, *in increpationibus*, in textu Hebraico, & Græco, & apud Ambrosium, & Hieronymum coniungi cum verbis sequentibus, nimirum sic, *In increpationibus propter iniquitatem corripuisti hominem*, tamen apud Augustinum, & in nostris communibus libris, coniungi cum superioribus, nimirum cum illis, *A fortitudine manus tua ego defeci in increpationibus*, sed vtroque modo sensus constat. Secundo nota, Sanctum Hieronymum ex Hebræo non vertere, *araneam*, sed *tineam*; sed credibile est vocem Hebraicam vtunque significare. Certe similitudo magna est inter araneam, & tineam, vt enim aranea texendo telam se exsiccet, ita etiam tineam rodendo pannum se ipsa interimit. Tercio nota, vbi nos habemus ex Græco textu, *animam eius*, in Hebræo haberi, *desiderabile eius*, proinde LXX. Interpretes non tam verbum reddiderant, quam exposuerunt. Vere enim anima ratione prædita est id quod in homine est maxime pulchrum, pretiosum, & desiderabile, ipsa enim imago Dei est, ipsa æterna est, ipsa capax est æternæ felicitatis, & per illam communicamus cum Angelis, vt per carnem communicamus cum bestiis: proinde incredibilis cæcitas est propter explendas carnis appetitiones, perdere quod in nobis est summe pretiosum, & desiderabile. Quarto nota, non haberi in Hebræo, vel Græco textu verbum, *conturbatur*, sed solum, *vane omnis homo*, siue, *vane omnis homo*. Ceterum Latinus Interpres addidit verbum explanationis gratia, & addidit



didit illud, quod supra habetur versu 9. Nota ultimo, non deesse, qui hos duos versus exponant, vel de flagello temporalis calamitatis, vel de paterna correptione, quæ facit homines, qui antea dura ceruice erant, molles, vt araneas, id est, humiles, & contritos. Sed in his, quæ non sunt contra fidem, & obscurissima sunt, licet vnicuique abundare in sensu suo. Nobis illa verba, *Amoue à me plagas tuas*, facile persuaferunt hic non agi de flagello temporali, cum Psalmo superiori dixerit idem Dauid, *Ego in flagella paratus sum*: neque de paterna correptione, sed de correptione illa terribili, quam iusti maxime horrent: paternam enim correptionem, quæ humiles, & contritos reddit, iusti diligunt, & expetunt, non horrent, aut fugiunt. Similitudo quoque araneæ tabescentis nihil boni nobis significare visa est. Non tamen reprehendimus, sed laudamus potius explicationes aliorum, quæ profunt ad ædificationem, quamuis non videantur nobis literales.

XVI.

*Exaudi orationem meam Domine, & deprecationem meam auribus percipe lacrymas meas.*

Magno affectu Psalmum concludit orans Deum, quid autem oret, paulo post explicabitur. Interim illud sciendum est, *per orationem* intelligi simplicem petitionem, *per deprecationem* autem vehementem clamorem, vt vox Hebraica demonstrat, *per lacrymas* autem affectum, cuius vox magis resonat coram Deo, quam vlla verba. In Hebræo, & Græco, vt nunc se habent, continuantur cum hoc versiculo verba illa, *ne sileas*, quæ nos habemus in sequenti versu, & eo modo tribus nominibus tria verba respondent hoc modo, *Exaudi orationem meam, deprecationem meam auribus percipe, & lacrymas meas ne sileas*. Ceterum nostram lectionem habent veteres Patres, Ambrosius, Hieronymus, & Augustinus in commentariis huius loci, & verba Hebraica remota distinctionibus, quas Rabia addiderunt, optime distinctionem librorum nostrorum recipiunt.

*Ne sileas, quoniam aduena ego sum apud te, & peregrinus, sicut omnes patres mei.*

Adhuc postulat exauditionem, & nondum explicat petitionem, sed loquitur ad eum, qui scit, quid desideret spiritus. *Ne sileas*, inquit, id est, responde petenti, ne despicere clamantem, qui enim silet audita petitione, idem facit, ac ille, qui non vult concedere, quod petitur. Reddit autem causam cur debeat audire, dicens, *Quoniam aduena sum apud te, & peregrinus sicut omnes patres mei*, id est, quoniam tu nosti, & aquod notitiam tuam est, quod ego non sum ciuis huius mundi, sed aduena, & peregrinus, ac per hoc ciuis ciuitatis supernæ Ierusalem, quamuis hic interim degam; decet autem vt audias ciuem ciuitatis tuæ in exilio positum, & experegrinatione sua ad te clamantem. Notat hoc loco S. Ioannes Chrysostomus, magnum virum & spiritualem fuisse Dauidem, qui cum Regni gloria, & opibus terrenis abundaret, tamen vere agnouit se aduenam, & peregrinum in terra.

*Remitte mihi, vt refrigerer priusquam abeam, & amplius non ero.*

XVIII.

Hic iam exponit petitionem suam, & est illa, de qua dicitur in Psal. 31. *Pro hac orabit ad te omnis sanctus in tempore opportuno*. Petit igitur cum clamore, & lacrymis veniam peccatorum, vt pacata conscientia, de peregrinatione ad patriam lætus perueniat, atque in summa gratiam & gloriam petat, quæ est illa petitio, quam soli, & omnes illi toto corde Deo proponunt, qui mundi vanitatem agnoscunt. Ait igitur, *Remitte mihi*, vel vt sanctus Hieronymus vertit, *Parce mihi*, vel vt ad verbum ex Hebræo verti posset, *desine à me*, id est, ne sis durus exactor, non instes pro solutione debitorum, desine à me repetere, quæ male dissipauit. *Vt refrigerer priusquam abeam*, id est, vt ante discessum ex hac vita refrigerer, intelligens mihi peccata esse remissa: nisi enim hic remiseris, non ibo ad requiem, sed ad carce-



carcerem. Dicigitur animæ meæ, salus tua ego sum, antequam de corpore egredi iubeatur. *Et amplius ero*, advena videlicet, & peregrinus, sed ciuis Sanctorum, & domesticus Dei. *Vel antequam abeam, & amplius non ero*, id est, antequam discedam ex hac vita, & amittam omnem vitam: qui enim post hanc vitam, non habet æternam vitam, consequenter habet æternam mortem, & quoddam non esse; cum longissime absit ab eo qui est. Sunt enim & viuunt, qui damnati sunt ad inferos, sed dicuntur non esse nec viuere, quoniam ideo solum habent esse, & viuere, vt semper moriantur, & non esse desiderant. Posteriorem sensum habet S. Augustinus, vtrumque autem attingit S. Ambrosius.

Christus in persona populi sui exponit longam expectationem redemptionis. Expectauit enim supra quatuor annorum milia, dum interim per Patriarchas, & Prophetas, partim figuris, partim oraculis promitteretur liberatio à miseriis, in quas per peccatum primi hominis genus humanum ceciderat. *Expectans*, inquit, *expectaui Dominum*, id est, longo tempore, sine intermissione expectaui Dominum miserantem, visitantem; & liberantem populum suum, *& intendit mihi*, id est, & tandem à me spe fraudatus non fui: nam ad me audiendum intendit aures suas. Ex Hebræo colligitur illud, *intendit mihi*, proprie significare, *inclinauit se ad me*, siue, extendit se ad me, nimirum audiendum.

# PSALMVS XXXIX.

Titulus, & Argumentum.

In finem Psalmus David.

**I**N titulo nihil est noui. Psalmum hunc nonnulli ex recentioribus nimis humiliter exponunt, referentes eum ad morbum corporalem Davidis, de quo morbo nihil legimus in Scripturis, sed tantum in fabulis Rabinorum. B. Paulus ad Heb. 10. de Christo exponit nonnulla, quæ in hoc Psalmo dicuntur, quæ Davidi non conueniunt villo modo. Quædam etiam alia sunt, quæ ad Davidem accommodari non possunt, vt illa, In capite libri scriptum est de me & illa, Ego autem medicus sum, & pauper. Recte igitur S. Ambrosius, S. Hieronymus, S. Augustinus, & Euthymius Psalmum hunc totum de Christo, & Ecclesia exponunt, id est, de capite, & corpore, ita vt Christus semper loquatur, sed primo in persona corporis sui, deinde in persona sua.

## EXPLICATIO PSAL. XXXIX.

I.

**E**xpectans expectaui Dominum, & intendit mihi.

Et exaudiuit preces meas, & eduxit me de lacu miserie, & de luto facis.

II.

Explicat quod dixit, *intendit mihi*, dicens, *intendit mihi*, nam *exaudiuit preces meas*: & effectus exauditionis fuit, quod *eduxit me de lacu miserie, & de luto facis*. Per lacum miserie intelligitur profunda fouea, nam vox Hebraica, *bor*, significat cisternam & vox Hebraica, *saon*, significat *tumultum, confusionem, desolationem*, & similia. Describitur igitur locus profundus, carens lumine, & luto putrido plenus, in quem multi deciderint, ex quorum motu, & eulatu existat tumultus, & confusio magna, quam LXX. Interpretes generatim miseriam appellarunt. Hic status est impiorum, qui carent lumine notitiæ Dei, & mandatorum eius, & infixi sunt in limo carnalium cupiditatum, ex quibus non solum fit, vt non possint ambulare ad æternam felicitatem, sed perpetuo inter se tumultuantur, & contendunt. Ab hoc profundo liberat nos gratia Redemptoris, cum incipimus per fidem cognoscere verum Deum, & vera, & sempiterna bona, & per spem, & charitatem liberari à cupiditatibus terrenis, & pacem Dei, atque animæ tranquillitatem possidere. Illud autem obseruandum est cum S. Augustino, eum qui exaudi-

tus



tus dicitur, vt educeretur de lacu, iam caput fustulisse, & agnouisse miseriam suam, & ideo de profundo clamare coepisse. Deus enim inspirat electis suis, adhuc in peccato, manentibus, spiritum fidei, & timoris, & inuocationis, sine qua praueniens gratia nemo vnquam de profundo clamaret; sed contemneret potius Deum, & salutis monita, iuxta illud Prouerbiorum 18. *Impius cum in profundum malorum venerit, contemnit.*

III.

*Et statuit supra petram pedes meos, & direxit gressus meos.*

Ille qui ceciderat in lacum miserie, de via ceciderat, in qua posuerat eum Deus initio creationis, vt per eam recto, & facili tramite perueniret ad Regnum: ideo qui postea illum eduxit de lacu miserie, & luto fecis, in viam restituit, & viam stabilem, ac firmam, nec minus rectam, & plenam atque hoc est quod ait, *Et statuit supra petram, pedes meos*, id est pedes meos, quos de profundo, & luto lacu eruit statuit supra altam, & firmam petram, *petra autem erat Christus*, qui de se ait, *Ego sum via, veritas & vita*. itaque statuit supra fidem & doctrinam, atque exempla Christi, pedes iustificatorum, vt sequantur vestigia eius. Et direxit gressus meos, id est, non solum constituit pedes meos in via lapidibus strata, sed etiam in via recta, & sic direxerit gressus meos in viam pacis,

IV.

*Et misit in os meum canticum nouum, carmen Deo nostro.*

Ex eo quod constituit Deus me in via firmissima, & rectissima, factum est, vt ceperim cantare canticum nouum, antea siquidem, vt eram homo vetus, ita cantabam cantica vetera de amoribus mundi; sed renouatus spiritu mentis mee coepi cantare canticum nouum de amore Dei; quod canticum ipse Deus immisit in os meum: & ipsum idem est carmen Deo nostro iucundissimum. In Hebræo pro illo, *carmen deo nostro*, habetur, *laudem deo nostro*. Itaque *carmen Deo nostro* debet intelligi, *carmen*

laudis Dei nostri; & hoc est canticum nouum, de quo diximus supra: qui enim canit amores mundi, mundum sine dubio laudat, & qui canit amores Dei, Deum sine dubio laudat.

*Videbunt multi, & timebunt, & sperabunt in Domino.*

Populus Dei iam liberatus à lacu miserie, siue idem Christus in persona populi iam liberati, prædicit multos ad eorū exemplum liberandos. *Multi*, inquit, *videbunt lacum miserie, & liberationem aliquorum, & timebunt, & sperabunt in Domino*, id est, timebunt lacum, & sperabunt in liberatore. Hoc enim est initium salutis, cum Deus per gratiam suam incipit aperire oculos interiores hominibus peccatoribus, vt videant statum peccati miseritimum, & simul cognoscant à quo liberari possint, & inde timere, & sperare incipiunt.

*Beatus vir, cuius est nomen Domini spes eius, & non respexit in vanitates, & insanias falsas.*

Hæc est quasi adhortatio, & laudatio inuitans homines ad imitandos liberatos. *Beatus est vir, cuius est nomen Domini spes eius*, id est, ille vere felix est, qui spem suam vere ponit in Domino, qui solus omnipotens, & misericors est, & ideo potest, & vult de omni miseria liberare eos, qui sperant in se. Illud, *nomen Domini*, significare potest inuocationem, siue notitiam familiaritatis, siue potentiam & auctoritatem, siue simpliciter ipsum Deum. Addit ad maiorem explicationem, *& non respexit in vanitates, & insanias falsas*, id est, non respexit ad auxilium alicuius alterius, ac præsertim non respexit ad auxilium rerum vanissimarum, & fallacium, quæ saluare non possunt, vt respiciunt homines vani, & stulti. Nonnulli, vt Euthymius, & aliqui moderni, referunt vanitates ad idola gentium, & insanias falsas, ad vaticinia oraculorum gentilium. S. Hieronymus vertit ex Hebræo, *Ad superbias & pompas mendacium*, sed communis explicatio sanctorum Ambrosij,

Dd

Hiero.



Hieronymi, Augustini, & Chrysostomi in commentario huius loci, generalis est, ut per *vanitates* intelligantur omnia vana auxilia, siue in hominibus, siue in rebus alijs creatis, & per *insanias falsas* intelligantur eadem falsa, siue fallacia auxilia, quæ etiam insanæ dici possunt, id est, res insanæ quæ non eligerentur nisi ab insanis. Eiusmodi sunt præter cetera, prædictiones Astrologorum, vel incantationes Necromanticorum, vel obseruationes, & auguria, quibus multi credunt, & confidunt, sed vanissimi, ac stultissimi sunt.

VII.

*Multafecisti tu Domine Deus meus, mirabilia tua, & cogitationibus tuis non est qui similis sit tibi.*

Transit nunc ad explicandum mysterium altissimum redemptionis humanæ, per quod educti sunt, & educuntur plurimi de lacu miseræ, & luto fecis: & primo generatim significat mirabilia esse opera Dei. *Multa, inquit, fecisti tu Domine mirabilia tua*, id est, multiplicasti mirabilia tua, & *cogitationibus tuis non est qui similis sit tibi*, id est, & in cogitationibus, siue in adinventionibus sapientiæ tuæ non est qui tibi perfecte similis sit, ita ut tibi comparari possit. Sanctus Hieronymus ex Hebræo vertit, *Non inuenio ordinem coram te*, pro eo quod non habemus, *non est qui similis sit tibi*, sed Septuaginta Interpretes clarius interpretati sunt verba Hebraica: nam verbum *harac*, non significat solum ordinare, sed etiam *astimare*, æquare, comparare. Itaque recte ad verbum sic verteremus; *Non est, qui tibi comparari, vel æquari possit*, quod idem est cum eo, quod nos habemus in Græco, *non est, qui similis sit tibi*.

VIII.

*Annunciaui, & loquutus sum; multiplicati sunt super numerum.*

Reddit rationem, cur nemo possit cum Deo comparari, quoad opera mirabilia, & cogitationes profundas, & ait: *Annunciaui, & loquutus sum*, id est, manifestavi aliqua eiusmodi opera per Prophetas, per sapientes homines, per ipsa elementa mundi:

nam *cæli enarrant gloriam Dei, & opera manuum eius annunciant firmitermentum*, sed *multiplicata sunt super numerum*, id est, tam multa sunt, ut numerari non possint, proinde neque annuntiari, & manifestari omnia possunt. Ex Hebræo posset etiam hic esse sensus, Maiora sunt, quam ut enarrari queant: nam ad verbum sic habetur, *Roborata sunt prænarrari*, siue, *prænuerare*, idem enim verbum significat *numerari* & *narrare*, & fortasse de industria posuit Propheta verbum ambiguum, ut ad utramque significationem referretur. Vere enim opera Dei, etiam si solum naturalia respiciamus, roborata sunt, siue creuerunt tam quoad magnitudinem, quam quoad multitudinem, ut neque narrari, neque numerari possint: nam in singulis rebus etiam minimis, ut in vna arbutuscula, in vno animalculo, in vno flosculo tot sunt mirabilia, ut ne summi quidem Philosophi eorum rationem inuestigare potuerint. Sed hoc loco illud est obseruandum, quod cum hæc verba referuntur ad Christum, intelligendum est mirabilia Dei non esse enarrabilia, vel innumerabilia respectu ipsius Christi, sed respectu nostri: ipse enim, qui fecit opera illa mirabilia nouit exactissime magnitudinem, & multitudinem ipsorum, sed mortales homines capaces non sunt tantæ scientiæ. Sancti Patres Ambrosius, Hieronymus, & Augustinus in commentarijs, quia legerunt ut nos nunc habemus, multiplicati sunt super numerum, retulerunt hunc totum versiculum ad conciones Christi, & audientium persuasionem, ut sensus sit, *Annunciaui, & locutus sum mirabilia tua, & multiplicati sunt ij*, qui crediderunt, *super numerum*, id est, innumerabiles crediderunt, posito numero infinito pro finito per hyperbolem, vel crediderunt multi super numerum præordinatorum ad vitam æternam, quia multi reprobi cum electis in arcam Domini, siue in rete dominicum intrauerunt. Et potest ad hunc sensum non difficulter accommodari codex Hebraicus: nam vbi habemus *prænuerari*, mutatis punctis potest fieri, *prænúmero*, ut notum est.



est intelligentibus. Et quidem hæc explicatio vera est, sed non ita perfecte respondet textui originali, neque tam apte connectit hunc vericulum cum superiori, vt expositio prior: quæ est Euthymij, & aliorum, & est conformis versioni S. Hieronymi, neque contraria est editioni nostræ vulgatæ: illud enim *multiplicati sunt*, vel est error librarium, vt multi suspicantur, & scriptum est, *multiplicati*, pro *multiplicata*, id est, cogitationes, aut *multiplicata*, id est, opera mirabilia: vel certe ipse Interpres posuit genus masculinum, dicens, *Multiplicati sunt*, quia respexit ad nomen Græcum, quo significantur cogitationes, quod est generis masculini, videlicet *λογισμοί*. Simile quid habemus Sap. 5. *Spiritus Domini repleuit orbem terrarum, & hoc quod continet omnia, scientiam habet vocis*. Vbi illud hoc, & illud quod, referuntur ad *spiritum Domini*, & debuisset scribi, *Et hic qui continet omnia*, secundum Grammaticam Latinam, sed Interpres posuit genus neutrum, quia *spiritus*, Græce est generis neutri, videlicet *πνεῦμα*.

IX.

*Sacrificium, & oblationem noluisti, aures autem perfecisti mihi.*

X.

*Holocaustum & pro peccato non posuisti: tunc dixi, ecce venio.*

Mirabilia vere sunt omnia, quæ fecit Deus, & in omnibus relucet profundissimæ cogitationes eius, sed omnibus aliis quasi in infinitum excellunt opera redemptionis humanæ. Quid enim maius cogitari potest, quam Deum descendere ad formam serui, & fieri mendicum, & pauperem vt homo educatur de lacu miseriæ, & ad summum cælum euehatur? eundem etiam Deum in forma serui virgis cædi, atque in latrones crucifigi, vt seruos exaltet inter Angelos ad consortium Regni sempiterni, & hæc omnia iustissime, sapientissimeque sine vlla iniuria, imo vero cum summa gloria Diuinitatis fieri. Hoc igitur admirabile mysterium in sequentibus versiculis. Christus ipse per linguam, & calamus Davidis exponit, *Sacrificium, inquit, & ob-*

*lationem noluisti*, hoc est, non voluisti placari sacrificio pecorum; neque oblatione panum vel thuris, sed victima infiniti pretij, ideo corpus mortale assumere me voluisti, vt per obedientiam vsque ad mortem, expiarem primi hominis inobedientiam: & quoniam *holocaustum* pecorum, & *sacrificium* pro peccato non admisisti, idcirco dixi, *ecce venio*, vt ego ipse hiam sacerdos, & sacrificium, quo placatus humano generi, educas homines de lacu miseriæ, & de luto facis. Multa sunt hoc loco notanda. Primo per sacrificium, & oblationem non intelligi hoc loco actionem sacrificandi, vel offerendi, sed hostiam mastrandam, vt agnum, aut vitulum, & donum offerendum vt panem, vel quid aliud: nam in Hebræo est, *zebach, & mincha*, & Sanctus Paulus Hebr. 10. legit, *hostiam*, pro eo quod nos habemus *sacrificium*. Notandum secundo, non esse contrarium quod hic dicitur, *sacrificium, & oblationem noluisti*, tot præceptis Domini de sacrificiis offerendis, quæ habentur in Leuitico: nam voluit quidem olim Deus sacrificia, oblationes, & holocausta, & victimas pro peccato, sed voluit ad significandam, non ad faciendam expiationem: nam, vt docet Apostolus in epist. ad Hebr. 10. *Impossibile erat sanguine hircorum, & vitulorum auferri peccata*. Tertio notandum vulgatam Latinam editionem, quæ habet, *Aures autem perfecisti mihi*, non convenire cum Hebraico textu, neque cum Græco, nam in Hebræo habetur, *Aures autem fodisti mihi*, in Græco vero, *Corpus autem perfecisti mihi*. Sed lectio illa, quæ habet, corpus autem perfecisti mihi, nullo modo reici potest, quia non solum habetur in textu Græco, & recipitur à Patribus Latinis, & Græcis, vt Ambrosio, & Augustino. Chrysostomo, & Theodoro, sed etiam approbatur ab Apostolo ad Hebr. 10. & fortasse in textu Hebraico antiquo, quem habuerunt LXX. Interpretes, erat vox aliqua quæ corpus significaret. Lectio quoque Latinæ editionis, *Aures autem perfecisti mihi*, reici non potest, cum quia lectio illa est etiam antiquissima, vt perspicuum

וכח  
מכה



כח

spicuum est ex Chrysostomo in secunda expositione huius Psalmi, & ex Hieronymo in commentario huius Psalmi tum quia Latina vulgata editio approbata est in Concilio Tridentino, & potest facile concordari cum lectione Græca & Hebraica. Nam verbum Hebraicum, *carah*, non solum significat fodere, sed etiam præparare, siue apponere, ut notum est ex lib. 4. Reg. c. 6. vers. 22. ubi *parare mensam*, & appositio ciborum significatur per hoc idem verbum, *carah*. Idem autem est, *aurem apposuisti mihi*, & *aurem perfecisti mihi*; neque diuersa sunt, corpus perfecisti mihi, & *aures perfecisti mihi*, nisi quod prior locutio est propria, posterior est figurata, qui enim dicit, *Aures perfecisti mihi*, ex parte significat totum: & non sine causa per aures, potius quam per aliud membrum significatur hoc loco totum corpus, quoniam aures sunt instrumenta, per quæ accipiuntur præcepta superiorum, quibus debetur obidentia, iuxta illud Psalmi 17. *In auditu auris obediuit mihi*. Christus autem ob id potissimum corpus humanum accepit, ut Patri Deo per obidentiam in forma serui obediret, & obediendo pro peccatis totius mundi satisfaceret. Ego veni, inquit ipse Ioan. 5. & 6. *non ut faciam voluntatem meam, sed eius qui misit me*. & Ioan. 4. *Cibus meus est, ut faciam voluntatem eius qui misit me*, & Ioan. 8. *Quæ placita sunt ei facio semper*. Sola restat illa lectio, *Aures autem fodisti mihi*, quæ non videtur recipienda, ut neq; expositio illorum, qui verba illa, *Aures autem perfecisti mihi*, significare volunt, *aures purgasti*, siue: *aperuisti*, ut idem sit, quod *fodisti*, id est, *aperuisti*. Hæc enim lectio non habetur in commentarijs vllius veteris Patris, quod ego sciam, & videtur repugnare veritati mysterij: qui enim dicit, *Aures fodisti, vel purgasti mihi*, significat se habuisse aliquando aures clausas, vel imundas. Christus autem, qui hic loquitur, semper habuit apertas, & purgatissimas, ut nunquam vere potuerit dicere, *Aures fodisti, vel aperuisti, vel purgasti mihi*. Notandum quarto illa verba, *Holocauftum, & pro peccato*, non significare, *holocaustum*

esse sacrificium pro peccato, distinguuntur enim eo loco duo genera sacrificiorum, videlicet holocaustum, & sacrificium pro peccato, nam in Hebræo est, *holocaustum & peccatum*, sed nomine, peccati, intelligitur sacrificium pro peccato, ut etiam apud Apostolum 2. Corinth. 5. *Qui peccatum non nouit, pro nobis peccatum fecit*. Igitur sensus est, *holocaustum, & sacrificium pro peccato non postulasti*. Meminit autem in his duobus versiculis omnium generum sacrificiorum veterum, ut ostendat omnia fuisse figuras sacrificij Christi. Nam ut scribit Sanctus Leo sermon. 8. de passione Domini, omnes differentias hostiarum vna corporis & sanguinis Christi implet oblatio. Notandum quinto illud, *Tunc dixi, ecce venio*, referri ad tempus, quo Deus decreuit, nolle admittere sacrificia veteris Testamenti pro expiatione: tunc enim, ubi Deus hoc decreuit, dixit filius Dei, *Ecce venio ego*, ut per sacrificium corporis, & sanguinis mei reconciliatio impleatur.

*In capite libri scriptum est de me, ut facerem voluntatem tuam: Deus meus volui, & legem tuam in medio cordis mei.*

XL

Exponit iam, ad quid veniat, cum dixerit, *Ecce venio*, & ait, *venio ut faciam voluntatem Dei*, sicut de me scriptum est. Voluntas autem Dei erat, ut per oblationem corporis sui ad passionem, & mortem, sanctificaret nos. Sic enim hunc locum exponit Apostolus ad Hebr. 10. ubi postea quam citauit hunc locum Psalmi, addit: *in qua voluntate sanctificati sumus per oblationem corporis Iesu Christi semel*. In capite libri scriptum est de me. Sanctus Ambrosius intelligit per caput libri, initium libri Geneseos cap. 2. ubi scriptum est, *Hoc nunc os ex ossibus meis & relinquet homo patrem & matrem, & adhærebit uxori suæ*. Quod exponit Apostolus ad Ephes. 5. *Sacramentum hoc magnum est, ego autem dico in Christo, & in Ecclesia*. Sanctus Augustinus exponit, hoc dictum esse de principio libri Psalmorum, ubi dicitur de Christo, *In lege Domini voluntas*

eius.



*eius* S. Ioannes Chrysostomus, Euthymius & Theodoretus, intelligunt generatim de libris Prophetarum, in quibus plurima de Christi passione scripta sunt: neque putant vim esse faciendam in illa voce, *in capite*, quoniam in Hebræo non habetur, *in capite*, sed *in volumine libri*, S. Hieronymus in Commentario, ut etiam Chrysostomus in secunda expositione, intelligit per *caput libri*, initium Evangelij secundum Ioannem, ubi scriptum est, *In principio erat Verbum*, &c. & infra, *Et Verbum caro factum est*. Non desunt, qui per caput libri intelligunt initium libri vitæ, de quo libro vitæ multa dicuntur in Psalmo 68. Daniel. 12. Luc. 10. Philip. 4. & Apoc. 20. & 21. & quadrat in hunc librum, quod dicitur hoc loco secundum Hebraicas voces, *in volumine libri*, siue, *in libro inuoluto, & clauso*. Liber enim vitæ, in quo scripta sunt nomina prædestinatorum, clausus est, quia non potest hoc tempore legi, sed constat tamen in capite eius libri, Christum scriptum esse, eiusque passionem, & mortem. Hæc omnia probabilia sunt, sed videtur simplicissima, & maxime literalis expositio, si nomine capitis intelligatur summa totius libri diuinarum Scripturarum. Siquidem in textu Hebræico, ideo non habetur in qua parte libri hoc scriptum sit sed dicitur, *In volumine libri scriptum est de me*, quasi dicat, in toto volumine, quia summa totius Scripturæ Christum loquitur: Dominus enim dixit Luc. ultimo, *Oportet impleri, quæ scriptæ sunt in lege Moysi, & Prophetis, & Psalmis de me*. & ibidem, *Interpretabatur duobus discipulis in omnibus scripturis, quæ de ipso erant, incipiens à Moysè, & omnibus Prophetis*, Et Ioan. 5. idem Dominus dixit in genere, *Scrutamini Scripturas, quia illæ sunt, quæ testimonium perhibent de me*. Et quod habetur in textu Græco & Latino, *In capite libri*, apte exponi potest, *in summa libri*: nam & Græce & Latine, dicitur caput non solum initium libri, sed etiam id, quo omnia referuntur. Nam & recapitulare, est in summam redigere, & capita librorum distingui solent iuxta ea ad quæ reuocantur

partes principales librorum. Et hoc modo accipitur quod ait Apostolus ad Hebr. 8. *Capitulum super ea, quæ dicuntur, talem habemus Pontificem*, id est, summa eorum, quæ dicuntur, est, quod talem habemus Pontificem, &c. Quoniam igitur non ait hoc loco Dominus, *In capite primi libri*, vel, *in capite primo libri*, sed generatim, *in capite libri* recte dixerunt Chrysostomus, Theodoretus, & Euthymius hoc loco in capite libri significare totum volumen diuinarum Scripturarum: id enim coincidit cum eo, quod nos dicimus, summam totius Scripturæ ad Christum pertinere: ipse enim est finis legis ex Apostolo ad Rom. 10. Dicit igitur Dominus, *In capite libri scriptum est de me, ut facerem voluntatem tuam*, id est, Scripturæ omnes testantur me ad hoc venturum fuisse in mundum, *ut facerem voluntatem tuam*, tibi per omnia accuratissime obediendo. Deinde conuersus ad Patrem addit, *Deus meus volui*, id est, libentissime acceptam decretum tuum, & *legem tuam in medio cordis mei*, supple, posui, id est, nihil maiori affectu desideravi, quam implere legem tuam. De iustis dicitur in Psalm. 36. *Lex eius in corde ipsius*: sed de capite iustorum, *legem tuam in medio cordis mei* posui. Et qui sunt Christi, spiritum hunc Christi habere debent, ut legem Domini rebus omnibus anteponan, eamque in medio memoriæ, in medio intelligentiæ, & in medio voluntatis semper habeant. Non multum refert quod in Hebræo, & Græco est, *In medio ventris mei*: agitur enim de ventre animæ, non corporis, in anima vero cor, & venter idem omnino sunt.

*Annunciaui iustitiam tuam in Ecclesia magna, ecce labia mea non prohibebo, Domine tu scisti.*

Quamuis diuinæ voluntatis finis præcipuus fuerit, ut Christus pro humano genere moreretur, voluit tamen Deus Pater, ut Christus antea assidue prædicaret, & prædicatio veritatis esset quasi via ad passionem & ipse non solum Redemptor, sed



Doctor & Magister esset generis humani: ideo nunc dicit: *Annunciaui iustitiam tuam*, id est, prædicaui legem tuam iustissimam, & etiam opera veræ iustitiæ, quæ tu ab hominibus requiris: & hoc prædicaui palam & publice audientibus innumerabilibus populorum turbis: & tu Domine testis esse potes, quia id feci, & faciam deinceps. Et vere tota via sua Christus prædicaui, ab infantia prædicare cœpit exemplo suo contemptum rerum visibilium, modestiam, temperantiam, humilitatem. Deinde à Baptismo, in quo dictum est à Patre: *Ipsam audite*, prædicare cœpit etiam verbo, neque cessauit usque ad mortem per se prædicare, & prædicationem postea per Apostolos continuauit, & continuabit usque ad mundi consummationem per Apostolorum successores.

XIII. *Iustitiam tuam non abscondi in corde meo, veritatem tuam & salutare tuum dixi.*

Multi prædicant, dum spes lucri adest, vel timor damni non terret: sed cessante spe, vel urgente timore, abscondunt in corde suo prædicationem veritatis, neque eam foris erumpere sinunt. Ab iis vitiis longissime Christus absuit, & nos exemplo suo docet, ut idem faciamus; ideo dicit: *Annunciaui iustitiam tuam*, & neque per negligentiam, neque per vllum timorem illam vnquam abscondi in corde meo. Quod autem dixit de iustitia, quam à nobis Deus exigit, videlicet quod eam annunciauerit, & non absconderit, idem nunc subiungit de iustitia & misericordia, quæ est in ipso Deo: nam iustitiam vocat veritatem, id est, fidelitatem, per quam fideliter reddit vnicuique secundum opera sua, & misericordiam vocat salutare, id est, salutem, quam misericorditer præbet sperantibus in se. Ait igitur: *Veritatem tuam, & salutare tuum dixi*, id est, annunciaui quoque veritatem, quæ in te est, manifestans omnibus, quam fideliter reddas ineffabilia præmia iustis, & horrenda supplicia iniustis, & simul annunciaui salutare tuum, id est, quam misericorditer salues omnes, qui in te spem suam constituunt.

XI. *Non abscondi misericordiam tuam, & veritatem tuam à concilio multo.*

Quam paulo ante vocauerat *salutare*, nunc expressius vocat *misericordiam*, & cum *veritate*, id est, cum iustitia, coniungit. Dicit igitur: *Non abscondi* propter vllum timorem à concilio multo, id est, à multitudine populorum *misericordiam & iustitiam*, quæ in te sunt, sed eas publice & libere prædicaui. Hæc verissima esse, manifeste colligimus ex Evangelio, nam Matth. cap. 5. 6. & 7. prædicaui Dominus iustitiam, quam nos facere debemus: & in variis parabolis Matth. 13. 24. & 25. prædicaui iustitiam & misericordiam Dei.

XI. *Tu autem Domine, ne longe facias miserationes tuas à me: misericordia tua, & veritas tua semper susceperunt me.*

Transit nunc à prædicatione ad passionem. Et sicut ipse manifestauit hominibus iustitiam & misericordiam Patris, ita nunc precatur Patrem, ut non differat misericordiam & veritatem suam in ipso, per resurrectionem celerem ab omni passione & morte liberando. *Tu autem Domine*, inquit, *non longe facias miserationes tuas à me*, id est, vides Domine Pater, in quam acerbam passionem incidi, quia non tacui manifestare hominibus iustitiam & misericordiam tuam: ideo tu quoque non longe facias miserationes tuas à me, celeriter resuscitando: sicut hactenus *misericordia tua, & fidelitas tua semper susceperunt me*.

XVI. *Quoniam circumdederunt me mala, quorum non est numerus: comprehenderunt me iniquitates meæ, & non potui, ut viderem.*

XVII. *Multiplacæ sunt super capillos capitis mei, & cor meum dereliquit me.*

Reddit rationem, cur dixerit: *Ne longe facias miserationes tuas à me*, & ait: *Quoniam circum-*



*circumdederunt me mala, quorum non est numerus.* Vere enim passionēs Christi plurimæ fuerunt, & simul omnes quasi agmine factō in eum irruerunt. Cur autem tot fuerint eius passionēs, causa fuit, quoniam peccata nostra, quæ ipse super se accepit, innumerabilia sunt. *Comprehenderunt me, inquit, iniquitates meæ,* id est, iniquitates omnium hominum, quas Pater super me posuit, ut dicitur Isaiæ 53. & quas proinde meas fecit, ut super lignum in corpore meo illas portarem, illæ, inquam, omnes comprehenderunt me. *Et non potui, ut viderem,* id est, tot sunt iniquitates, quæ me comprehenderunt, ut non præualuerim videre quot sint. Nam *multiplicata sunt super capillos capiti mei,* id est, superant multitudine sua numerum capillorum, capilli enim capitis tot sunt, ut numerari non possunt: & ideo quasi obrutus multitudine tanta malorum defeci, & *cor meum dereliquit me,* id est, vigor ipse, & ipsa vita dereliquit me. Porro quod hic dicit Christus: *Non potui, ut viderem,* non est accipiendum proprie, quasi reuera non potuerit Dominus videre numerum peccatorum, ob nimiam eorum multitudinem: nam sine dubio nouit accuratissime numerum peccatorum præteritorum, præsentium & futurorum, sed loquitur more humano, & solum significare voluit peccata, quæ expiando suscepit, esse innumerabilia. Simile est, quod dicitur Marci cap. 6. *Et non poterat ibi virtutem vllam facere,* & mirabatur propter incredulitatem eorum, poterat enim, si voluisset, virtutes eo loco facere, sed dicitur non potuisse, ut significaretur incredulitas illius populi, ob quam non volebat in eo loco miracula facere. Sicut etiam non proprie mirabatur, quia admiratio nascitur ex ignoratione, quæ in Christo locum non habet, sed dicebatur mirari, quia signum admirantis edebat, ut ostenderet, mirum esse, quod populus ille tanta incredulitate teneretur. S. Augustinus versiculum hunc, & duos superiores vult accipiendos esse in persona membrorum infirmorum Christi, id est, fidelium imperfectorum: eius nos sententiam non reiciimus, sed ostendere volumus, quomodo sint expo-

nendi tres isti versiculi, si accipiantur scripti in persona Christi, & vere in persona Christi scripti sunt versiculi præcedentes, quos Apostolus allegauit ad Hebr. 10. cum quibus isti continuari videntur.

*Complaceat tibi Domine, ut eruas me, Domine ad adiuuandum me respice.* XVIII.

Redit ad orationem, quam inchoauerat in versiculo 15. ac petit liberationem à tantis malis per celerem resurrectionem, ut supra diximus. *Complaceat, inquit, tibi Domine,* id est, placeat tibi Pater, quem etiam Dominum agnosco, propter formam serui, quam accepi, placeat, inquam, *ut eruas me* de tot doloribus, qui circumdederunt me. *Domine ad adiuuandum me respice,* id est, videris quidem ad tempus me dereliquisse, & à me faciem auertisse, dum finis me crucis tormenti sine vlla consolatione perpeti, sed iam respice ad me adiuuandum, ut breui repleas me lætitia gloriose resurrectionis.

*Confundantur, & reuereantur simul, qui querunt animam meam, ut auferant eam.* XIX.

Ex Christi resurrectione sequuta est maxima confusio aduersariorum, qui eum plane à se extinctum existimabant. Id nunc prædicat per modum imprecationis: quæ forma loquendi frequens est apud Prophetas. *Confundantur, inquit, & reuereantur,* id est, confusi erubescant, *qui querunt animam meam, ut auferant eam,* id est, qui querunt vitam meam auferre, me occidendo, & penitus extinguendo: hoc enim erat votum Iudeorum, & hoc se assequutos crediderunt, cum Christum cruci affixum viderunt, sed paulo post, cum eum surrexisse audierunt, & signis ac prodigijs maximis resurrectionem eius confirmari, & à populis credi viderunt, confusione & erubescencia repleti sunt, sed multo maiore confusione & verecundia replebuntur in die nouissimo, cum eum Iudicem suum iustissimum esse videbunt, quem in concilio suo



suo falsis testibus inductis, iudicare præsum-  
pserunt.

XX. *Conuertantur retrorsum, & reuer-  
tantur, qui volunt mihi mala.*

Idem repetit ad rem magis explicandam,  
vel confirmandam. *Conuertantur*, inquit,  
*retrorsum*, id est, confusi recedant, & *reu-  
ertantur*, id est, verecundentur & erubescant,  
*qui volunt mihi mala*, id est, non ij solum,  
qui quærunt me interficere, sed etiam omnes  
alij, qui cupiunt confusionem & ignomi-  
niam meam. S. Augustinus exponit hunc  
versiculum in bonam partem, quasi Domi-  
nus præceat aduersariis suis conuersionem  
à peccatis ad Deum, vti non amplius su-  
perbe præcedant, sed humiliter subsequan-  
tur Dominum suum. Pia expositio, sed prior  
videtur magis literalis, & facilius cum supe-  
riori versiculo continuatur.

XXI. *Ferant confestim confusionem suam,  
qui dicunt mihi, euge, euge.*

Id ipsum tertio repetit, dicens: *Ferant con-  
festim confusionem suam*, id est, non in lon-  
gum tempus differatur eorum confusio: sed  
statim, post tridui videlicet breuissimum  
spacium, confusionem suam experiantur,  
*qui dicunt mihi, euge, euge*, id est, qui de me  
quasi victo inter se gratulantur, dicentes,  
*euge, euge*. S. Hieronymus ex Hebræo vertit,  
*qui dicunt mihi, vab, vab*, quam vocem fuisse  
Iudæorum deridentium Christum in cruce  
pendentem, in Euangelio legimus. Sed  
Septuaginta verterunt, *euge, euge*, & non du-  
bium est, quin ipsi quoque recte intelligen-  
tent vim Hebræicæ vocis. Proinde illud pro-  
nomen *mihi*, non ita accipiendum est, quasi  
aduersarij Christo blandiri vellent, aut eum  
laudare, vel hortari, vt nos solemus, cum ali-  
eum dicimus, *euge, euge*, sed intelligendum  
est, aduersarios inter se exultantes super  
Christi passionem dixisse, *euge, euge*, ita vt il-  
lud *mihi*, accipiat pro *de me*, vel *super me*.  
Paulo clarius idem legimus in Psalm. 34. *Non  
dicant in cordibus suis, euge, euge, anima no-  
stra, nec dicant, deuorabimus eum*, vbi appa-  
ret, illud *euge*, dictum esse in cordibus eo-

rum, qui putabant se Christum iam deto-  
rasse. Quod autem nos habemus ex Græco,  
*ferant*, S. Hieronymus ex Hebræo vertit,  
*peruant*. Sed credibile est Septuaginta non le-  
gisse, *iasomus*, à verbo, *iasam*, quod est, *deso-  
lare*, sed *issehus*, vnica litera mutata, à verbo,  
*nasa*, quod est, *ferre*. Denique quod nos ha-  
bemus, *confestim*, S. Hieronymus vertit ex  
Hebræo, *post*. Cæterum verba Hebraica si-  
gnificant proprie *ad calcaneum*, siue *ad ve-  
stigium*, id est, immediate, siue *confestim*,  
quod est idem; & ipse idem S. Hieronymus  
hanc eandem vocem in Psalm. 69. vertit, *ad  
vestigium*. Recte igitur LXX Interpretes  
reddiderunt verba Hebraica: & Latinus In-  
terpres fideliter reddidit verba Græca.

XXI. *Exultent, & latentur super te omnes  
quærentes te, & dicant semper, magnifice-  
tur Dominus, qui diligunt salutare tuum.*

Sicut prædixit per modum imprecationis  
confusionem persecutoribus suis: ita nunc  
per modum precationis bonæ prædicat lati-  
tiam sectatoribus suis. *Exultent*, inquit, &  
*latentur super te*, id est, exultabunt & læta-  
buntur in Deo, diuino videlicet & inenarra-  
bili gaudio, *omnes qui quærunt te*, id est, om-  
nes qui quærunt gloriam Dei; & qui dili-  
gant Deum, & in eo spem suam ponunt. *Et  
dicant semper, magnificetur Dominus*, id est,  
& non sibi tribuant, nec suis viribus, aut vir-  
tutibus bonum, quod habent, sed dicant,  
*magnificetur Deus* ab omnibus, *qui diligunt  
salutare tuum*, id est, qui diligunt Saluato-  
rem, quem misisti ad homines, Christum vi-  
delicet Iesum, siue, qui diligunt salutem, quæ  
abs te est, id est, qui cupiunt veram atque æ-  
ternam salutem, quam tu solus dare potes.

XXII. *Ego autem mendicus sum & pauper,  
Dominus sollicitus est mei.*

Reuertitur ad statum suum, in quo erat  
tempore passionis, ac dicit: *Ego mendicus  
sum & pauper*, id est, egenus, & destitutus  
humano auxilio. Sunt enim in Hebræo  
duo



**אביו עני** duo vocabula, *ebion* : & *ani*. prius significat egenum, inopem, medicum; posterius significat afflictum, humilem, destitutum: quæ omnia conueniebant Christo toto tempore suæ mortalitatis; sed præcipue quando nudus pendebat in cruce. Sed quamuis egenus & pauper esset, quantum ad temporalia bona; tamen ditissimus erat protectione paterna: ideo subiungit, *Dominus sollicitus est mei*, vel, ut est in Hebræo, *Dominus cogitat pro me*. Vocat autem Patrem *Dominum*, quoniam loquitur in forma serui, id est, ut filius hominis, secundum quam naturam pendebat in cruce.

XXIV.

*Adiutor meus, & protector meus es tu, Deus meus, ne tardaueris.*

Quod vnico vocabulo dixerat, *Dominus sollicitus est*, id nunc duobus vocabulis exponit, dicens, *Adiutor meus & protector meus es tu*. Deus enim Pater sollicitus erat filij sui, illum adiuuando, & protegendo; adiuuando in superandis malis presentibus, & protegendo in remouendis futuris. Concludit postremo, *Deus meus ne tardaueris*, nimirum eripere me ab omnibus malis per celere resurrectionem.

PSALMVS XXXX.

Titulus, & Argumentum.

In finem, Psalmus ipsi David.

**V**idetur hic etiam Psalmus, ut præcedens, ad Christi passionem totus pertinere. Sic enim eum Patres accipiunt Ambrosius, Hieronymus, Augustinus & Chrysostomus, qui addit, temerarium esse aliter exponere, cum existeret ab ipso Christo, Ioan. 13. vnus versiculus ex hoc Psalmo ad demonstrandam tudam prodicionem fuisse multo ante prædictam. De titulo nihil dicimus, quia nihil noui continet.

EXPLICAT. PSAL. XXXX.

**B**eatus, qui intelligit super egenum & pauperem; in die mala liberabit eum Dominus.

*Beatus, qui intelligit super egenum, & pauperem*, id est, beatus, qui attentè considerat Christum pauperem: inueniet enim esse pauperem, non necessitate, sed voluntate; & pauperem voluntate, ut nos sua inopia locupletaret. Item inueniet pauperem foris, sed intus diuitem in eo enim *absconditi sunt omnes thesauri sapientie, & scientie Dei*, ut scribit Paulus Coloss. 2. Denique inueniet pauperem in carne, ut dicit S. Ambrosius, sed diuitem in Regno: idem enim pauper erat, cum non haberet ubi caput reclinaret; & simul hæres erat vniuersorum, Rex Regum, & Dominus dominantium. Præterea, *beatus est, qui intelligit*, super Christum pauperem, nudum videlicet in cruce pendentem, id est, qui attentè cogitat passionem eius: nam & Hieremias antea dixerat, *Attendite, & videte si est dolor similis, sicut dolor meus*, Thren. 1. Et Apostolus postea idem repetiuit, *Recogitate eum, qui talem aduersus semetipsum à peccatoribus sustinuit contradictionem*, Hebr. 12. Infinitus enim thesaurus paratus est Christi passionem, ut par est, intelligentibus, & diligenter meditantibus. Denique beatus quoque est, qui intelligit super egenum & pauperem Christum in membris suis, de quibus dicturus est. *Quod vni ex minimis meis fecistis, mihi fecistis*. Sed non dicit Psalmus, *beatus qui dat elemosynam pauperi*, sed, *qui intelligit super egenum, & pauperem*, id est, qui prudenter considerat pauperum necessitates, & dat eui, quando, quantum oportet, ex pura charitate, & liberalitate, non ex inani gloria, vel spe retributionis. Hanc enim vim habet verbum Hebraicum, *maschil*, significat enim attentè cogitare, siue prudenter considerare. Sequitur, *In die mala liberabit eum Dominus*. Hæc est ratio, cur sit beatus dicendus qui intelligit super egenum, quia videlicet ipse ab egestate liberabitur: dies enim mala est dies penuriae, & sterilitatis. Sed hoc loco præcipue dicitur dies mala, dies vltimi iudicij, quæ erit dies solius iustitiæ, ac per hoc erit in illa summa penuriae miserationis, & gratiæ. In illa igitur die secuti erunt, qui

Ec

Christi

מסכיל

XXIII

L



Christi crucem amauerint; & qui propter Christum pauperibus beneuoli fuerint: dicetur enim illis, *Venite benedicti Patris mei, possidete paratum vobis Regnum, Esuriui, enim, & dedistis mihi manducare, &c.* Sed etiam in hoc saeculo liberabit Deus viros misericordes in die mala, vt Psalmus trigessimus sextus antea nos docuit, dicens, *Non confundentur in tempore malo, & in diebus famis saturabuntur.* Mirificetur enim delectatur Deus, cum videt filios suos, ad patris imitationem, quae ab illo liberaliter accipiunt, cum aliis quoque liberaliter communicare: Et ideo cum faenore reddit, quod pauperibus datur, iuxta illud Prouerb. 19. *Faenerator Domino, qui miseretur pauperis.*

II.

*Dominus conseruet eum, & viuificet eum, beatum faciat eum in terra, & non tradat eum in animam inimicorum eius.*

Declarat quod dixit, *in die mala liberabit eum Dominus*, & per modum bonae imprecationis praedicat bona, quae dabuntur intelligenti super egenum, & pauperem. *Dominus*, inquit, *conseruet eum*, id est, custodiat dum vivit; *& viuificet eum*, id est, post mortem iterum viuere faciat, resuscitando eum cum iustis. *Et beatum faciat eum in terra*, id est, & tunc vere, perfecteque beatum reddat in terra viuentium. *Et non tradat eum in animam inimicorum eius*, id est, & neque in hoc saeculo, neque in futuro sinat eum subiaceri voluntari inimicorum, siue homines, siue Demones sint. Vocat enim animam, voluntatem, siue desiderium. Codices Graeci variant hoc loco; nam alij habent, *in manus inimicorum*, alij *in animam inimicorum*, vt sanctus notauit Ambrosius; sed sensus est fere idem, nisi quod videtur esse aliquid amplius *tradi in animam*, id est, in voluntatem, siue arbitrium, siue libidinem, quam *tradi in manus*, id est, in potestatem: nam qui supplicio affigendi sunt, traduntur in manus carnificum, sed non in voluntatem: quia possunt carnifices eos interimere, non tamen eo modo quo voluerint; sed eo tantum modo, quo leges praescribunt.

*Dominus opem ferat illi super lectum doloris eius, vniuersum stratum eius versasti in infirmitate eius.*

Quoniam tam multa bona pollicitus fuerat misericordibus, intelligentibus super egenum, & pauperem; poterat aliquis suspicari, nullam tribulationem passuros in terris eiusmodi pios homines: ideo nunc subiungit, passuros quidem in hoc exilio pios homines varias tribulationes, seu tentationes, sed non absque diuina consolatione. *Dominus*, inquit, *opem ferat illi, super lectum doloris eius*, id est, si quando pius ille incidit in lectum doloris, siue dolor sit corporalis, siue spiritalis, siue sit proprie in lecto aegrotus, siue metaphorice decumbat quasi in lecto, afflictus, quacunque tribulatione: *dominus opem feret illi*, atque ita consolabitur eum, vt patienter ferat & ex ipsa patientia probari se intelligat, & ex probatione spem magnam concipiat, & ex illa spe gaudium tale inueniat, vt gloriatur in tribulationibus, & cum Apostolo dicat. *Repletus sum consolatione, superabundo gaudio in omni tribulatione nostra.* 2. Corinth. 7. Adiungit deinde ad probandum id ita esse futurum exemplum de praeterito dicens, *Vniuersum stratum eius versasti in infirmitate eius*; id est, tu Deus suavis, & mitis, ita soles facere cum fidelibus tuis; nam si quando vidisti pium aliquem grauari tentationibus, vel afflictionibus, ita illum consolari consueuisti, quomodo consolatur aegrotum, qui totum stratum eius versat, & reuerfat, vt mollius cubet, & quiescat. S. Ambrosius, & S. Ioanna. Chrysostomus ita exponunt, vt velint versari stratum in infirmitate, esse mutari statum aegroti in statum sanitatis. S. Hieronymus, & sanctus Augustinus contrario modo exponunt, sed egregie omnino, & vtilissime: volunt enim hunc sensum esse. Quia dixerat Propheta, *dominus opem ferat illi super lectum doloris eius*; poterat pius homo respondere, si Deus fert opem, vnde tot

scan-



scandala, & tribulationes hominibus pijs? Respondet Propheta, quia idem Dominus *uniuersum fratum*, id est, eas res terrenas, in quibus etiam pijs acquiescunt, & delectantur, versat, & remouet, vt pius peregrinus non diligit stabulum pro domo; sed ex amissione temporalium, quamuis licitarum consolationum, disceat in solo Deo delectari, illum vnum querere, ad illius visionem anhelare, & suspirare. Hæc enim est causa, cur Sancti homines non solum tribulationes aliunde aduenientes amauerint, sed ipsi etiam eas sibi accerferint, ieiunijs, vigilijs, humi cubationibus, nuditate & flagellis carnem propriam atterendo; quoniam intelligebant, animam non omnino erigi posse ad querendum Deum, dū aliquid habet in terra, quod amat, vel in quo delectetur, & quiescat: Vtraque expositio amplectenda est, quamuis prior videatur nobis magis literalis.

IV.

*Ego dixi, Domine miserere mei, sana animam meam, quia peccavi tibi.*

Hic iam incipit Christus declarare, se esse egenum illum & pauperem, de quo initio dixerat, *beatus, qui intelligit super egenum, & pauperem*. Ego, inquit, dixi, Domine miserere mei, id est, miserere corporis mei mystici, infirmorum membrorum meorum, *Sana animam meam, quia peccavi tibi*, id est, ad hoc misericordiam tuam imploro, vt sanes languores fidelium meorum, quorum peccata mihi ipse imputo, quasi ego illa fecissem. Potest etiam sic exponi vt Christus ipse de passione sua loquatur, dicens, *Miserere mei in tribulatione positi*, vt celeriter resuscitando ab omni passione me liberares: *sana animam*, quæ tristis est vsque ad mortem, & ideo tristis est & languet, pauens, merens, & tædēs, *quia peccavi tibi*, id est, peccata totius mundi in me recepi. Nam quod non loquatur de peccatis à se commissis, perspicuum est ex versiculo decimo tertio, vbi dicit, *Me autem propter innocentiam suscepisti*. Itaque is, qui loquitur in Psalmo, non est David vel quicvis alius, sed ille solus, qui & inno-

cens erat quoad actiones proprias, & peccata aliorum portabat.

*Inimici mei dixerunt mala mihi, quando morietur, & peribit nomen eius.*

V.

Hæc manifeste pertinent ad Phariseos, & Sacerdotes Iudæorum, qui audissimè Christi mortem sitiebant, & de ipso interficiendo sæpe inter se colloquebantur. Illud autem *mibi*, positum est pro, *deme*, vt in Psalmo superiore. *Qui dicunt mihi*, id est, de me, *euge, euge*, vel abundat, vt in hoc ipso Psalmo, *Aduersum me cogitabant mala mihi* & alibi sæpe.

*Et si ingrediebatur, vt videret, vana loquebatur, cor eius congregauit iniquitatem sibi.*

VI.

Transit à Iudæis ad Iudam; quasi dicat, & si aliquis eorum, vt Iudas proditor, *ingrediebatur*, vt videret, id est, & exploraret, & quereretur opportunitatem prodendi, *vana loquebatur*, id est, falsi aliquid fingebat, ne animus eius detegeretur. Posset etiam hoc referri ad alios, qui ad Christum accedebant, tentantes eum; vt *caperent eum in sermone*, vt dicitur Matt. 22. Sed iste *vana quidē loquebatur* ad Christum, sed interim *cor eius congregabat iniquitatem sibi*, id est, corde meditabatur dolos, & proinde multiplicabat, & congregabat iniquitates sibi, ad suam videlicet æternam perditionem. Hæc nimirum iusta merces est mendacium & dolosorum, vt dum alios decipere tentant, ipsi decipiantur à Satana, & dum alijs moliantur interitum, ipsi sibi interitum parent.

*Egrediebatur foras, & loquebatur in idipsum.*

VII.

De eodem Iuda Patres hæc etiam accipiunt, qui cum explorasset opportunitatem prodendi Dominum, *egrediebatur, & loquebatur simul cum ijs*, quibus Dominum proditorus erat. Illud, *in idipsum*, Hebræi codices coniungunt cum sequenti versiculo, sed nos sequimur distinctionem antiquā Septuaginta Interpretum, qui maiori fide digni sunt, quam recentiores Rabini, qui

Ec 2

puncta,



puncta, & distinctiones, quas nunc habemus, Bibliis addiderunt.

VIII.

*Aduersum me susurrabant omnes inimici mei, aduersum me cogitabant mala mihi.*

Audito Iuda proditore, ceperunt inter se susurrare, ne forte sermo innotesceret, si alta voce loquerentur, de pecunia danda, & ratione inuenienda Christum capiendi, atque perrendi. *Aduersum me*, inquit, *susurrabant*, id est; summissa voce loquebantur *omnes inimici mei: aduersum me cogitabant mala*, id est, susurrando deliberabant, de morte mihi inferenda. Iam supra dixi illud, *mihi*, redundare, ex phrasi Hebraica.

IX.

*Verbum iniquum constituerunt aduersum me: nunquid qui dormit, non adiciet ut resurgat?*

Ex illa susurratione inimicorum hoc sequitur, ut firmiter constituerent Iudaei Christum occidere, & hoc est, quod subiungit dicens, *Verbum iniquum constituerunt aduersum me*, id est, decreta iniquum statuerunt contra me, ut videlicet me, quamuis innocentem, morti traderent. Addit vero continuo, *nunquid qui dormit, non adiciet ut resurgat?* id est; quamuis illi tam iniustum decretum fecerint, nunquid mihi potestatem resurgendi auferent? quin potius ideo mortem suam somnum vocauit, quia quam facile est homini dormientem socium suum excitare a somno, tam facile est Verbo Dei carnem suam mortuam ad vitam reuocare. Id quod multo ante praedixit, cum ait, *nemo tollit animam meam a me, sed ego pono eam: potestatem habeo ponendi eam, & potestatem habeo iterum sumendi eam*, Ioannis 10. In Hebraeo codice longe aliter habetur, sic enim ad verbum verti potest, *Verbum belial infusum sibi, & qui dormiuit, non adiciet, ut resurgat*, sed LXX. Interpretes, qui & doctissimi erant, & codices correctissimos habebant, per *verbum belial*, recte verterunt, *verbum iniquum*: nam *belial* significat, absque iugo, & accipitur etiam pro Diabolo, sed passim *viri belial* di-

cuntur viri iniqui, quasi qui iugum legis excusserint, & Diabolum ducem sequantur: & sicut *viri belial*, sunt viri iniqui, ita *verbum belial*, est verbum iniquum quod sequitur, infusum Hebraice *iazzuch*, legerunt Septuaginta *iazzichu*, quod est *constituerunt*, & pro *bo*, quod est *ei*, vel *sibi*, legerunt *bi*; quod est *mihi*, siue *in me*, aut *contra me* Hebraice enim *sibi* & *mihi* simillima sunt. Denique pro *uasfer*, quod significat, *& qui*, legerunt Septuaginta *haaser*, quod significat, *nunquid?* Viderint autem Hebraei, vtrum negligentia, an malignitate hunc locum corruerint. Certe vulgata nostra editio cum Graeca editione concordat, & Graeca cum vera Hebraica omnino consentit: necesse enim est, ut, vel Hebraica lectio, qualis nunc est, ob literarum similitudinem corrupta sit, vel LXX. Interpretes imperitissimi fuerint. Non desunt qui hunc versiculum ad Dauidem aegrotantem, & ad sermones hominum de eius valetudine disputantium referant. Sed ij cum Patribus omnibus repugnant, cum nimis humiliter Spiritus sancti oracula exponunt.

*Etenim homo pacis meae, in quo speraui, qui edebat panes meos, magnificauit super me supplantationem.*

Reddit rationem, cur inimici verbum iniquum aduersum se constituerint, & dicit, fuisse causam eius iniqui decreti Iudae proditionem. *Etenim*, inquit, *homo pacis meae*, id est, verbum iniquum aduersum me constituerunt inimici mei, quoniam *homo pacis meae*, id est, cum quo pacem habebam, ut Magister cum discipulo, & cum seruo Dominus, & homo in quo speraui, id est, in quo tamquam in amico, & familiari confidere poteram. *Qui edebat panes meos*, id est, qui in mensa mea, ut domesticus, mecum vesebatur. *Magnificauit super me supplantationem*, id est, mirifice me supplantauit, cum per insidias inimicis me tradidit. Hunc locum Dominus ita citauit Ioannis 13. *Non de omnibus vobis dico, ego scio quos elegerim, sed ut adimplatur scriptura, qui manducat mecum panem, calcabit*



*calcaneum suum.* In Hebræo ad literam est, *oleuauit contra me calcaneum*; sed Septuaginta explicauerunt sensum: nam leuare calcaneum contra aliquem, & illum supplantare, idem est. Quo loco notandum est, cum dicitur, *ut impleatur Scriptura*, significari, prodicionem Iudæ fuisse prædictam & adimpletam, ut prædicta fuerat; ideo hunc locum Psalmi non fuisse citatum à Christo ut aliquid simile, vel commune, sed ut proprie ad hanc rem pertinentem, ut notauit S. Ioannes Chrysostomus; & ideo non recte facere, qui hæc verba Psalmi ad alios sensus detorqueere conantur. Secundo notandum est cum S. Augustino, vocatum fuisse Iudam hominem pacis, quoniam præuidit Propheta, Christum à Iuda per signum pacis, id est, per osculum fuisse tradendum: quod etiam Dominus significauit, cum illi ait: *Amice ad quid venisti?* &: *Iuda osculo filium hominis tradis?* Item dictum esse à Propheta, qui edebat panes meos: quoniam præuiderat per buccellam Iudæ prodicionem fuisse manifestam. Addi potest dictum fuisse ab eodem Propheta, *in quo speraui*, quoniam præuiderat, Christum crediturum fuisse Iudæ Marsupium, quod erat confidentiæ signum, itaque prædictio cum euentu rei optime conuenit. Tertio notandum, exprimi à Propheta miro modo vocis prodicionis indignitatem: primo enim uocat Iudam hominem pacis Christi, ut ostendat nullam intercessisse inimicitiam, nullam iniuriam, nullam odij causam inter Christum & Iudam: deinde addit, non solum non intercessisse causam odij, sed intercessisse causam beneuolentiæ, cum addit, *in quo speraui*; quia Dominus credens Iudæ loculos, signa confidentiæ, ut diximus, illi ostendebat. Denique addidit, non solum non fuisse inimicum, nec solum fuisse amicum, sed etiam fuisse intimum familiarem, & maximis beneficiis affectum: nam illa ipsa nocte, qua Christum tradidit, non solum panem communem in mensa Christi comederat, sed etiam panem cœlestem, ac diuinissimum: & ante eam idem Christus pedes illi humiliter lauerat; & per hoc exempla

summæ charitatis atque humilitatis ostendat.

*Tu autem Domine miserere mei, & resuscita me, & retribuam eis.*

Preceatur nunc Patrem, & per modum precationis prædicit, quod futurum erat: vere enim post resurrectionem suam retribuit Iudæis excidium, quod merebantur. *Tu autem Domine*, inquit, *miserere mei, & resuscita me*, id est, illi quidem verbum iniquum statuerunt contra me, & discipulo meo supplantante & prodente, interficient me; sed *tu Domine miserere mei*, in cruce morientis, & paulo post *resuscita me*: Et tunc *retribuam eis*, quod merentur. Precatur autem Filius Patrem, non quod ipse ut Verbum Patris carnem suam resuscitare non posset; sed quia loquitur in forma serui, defert Patri, cui in forma Dei æqualis erat, aliqui ipse idem dixit Ioan. 2. *Solue templum hoc, & ego in triduo excitabo illud: hoc autem dixit de templo corporis sui*: & Ioan. 10. *Potestatem habeo ponendi animam meam, & potestatem habeo iterum sumendi eam. Quid vero Christus Iudæis retribuerit post resurrectionem suam, notum est omnibus, qui ab eo tempore vident Iudæos de terra sua eradicatorum, dispersos esse inter Gentes, sine Rege, sine Sacerdote, sine Deo vagari. Quod illis prædixerat Dominus, quando ait: *Auferetur à vobis Regnum Dei, & dabitur genti facienti fructum eius*, & alibi: *Relinquetur vobis domus vestra deserta*, & alibi: *Non relinquent in te lapidem super lapidem*, Matt. 21. & 23. & Luc. 19.*

*In hoc cognoui, quoniam voluisti me, quoniam non gaudebit inimicus super me.*

Exauditam orationem suam fuisse dicit, idque inde posse cognosci, quod non gaudeat inimicus de morte eius. Quod quidem in Iuda impletum est, qui ante se ipse suspensio necauit, quam Christus moreretur, & quam ipse precio prodicionis suæ frui posset. Potest tamen hoc etiam referri ad reliquos inimicos eius, qui tam breui tempore gauisi sunt, ut dici possint non esse gauisi.

Et ;

Me

XI.

XII.



XIII.

*Me autem propter innocentiam suscepisti, & confirmasti me in conspectu tuo in æternum.*

Docet, inimicos non diu gauisuros de morte sua, quoniam à Deo susceptus & exaltatus ob innocentiam suam fuerit. *Me autem*, inquit, propter innocentiam tibi optime notam suscepisti de manibus eorum, & confirmasti in conspectu tuo in æternum, id est, humiliasti me ad horam in conspectu hominum, sed suscepisti, & confirmasti me in conspectu tuo, id est; stare fecisti ante conspectum tuum in cælo vsque in æternum: vox enim Hebræa significat, statuisti ante conspectum tuum, quod factum est per exaltationem, & assumptionem in cælum.

XIV.

*Benedictus Dominus Deus Israel à sæculo, & vsque in sæculum, fiat, fiat.*

Ista conclusio, siue Christi sit, siue Prophetæ, nihil aliud significat, nisi propter exaltationem Christi, & confusionem inimicorum eius, deberi honorem, & gloriam, & benedictionem Deo ab æterno, & vsque in æternum, id est, siue sine fine. Illud autem fiat, fiat, Hebraice autem Amen, Amen, confirmatio est dictorum, ut sensus sit, vere seu fideliter ita sit, siue ita fiat, ut semper Deo laus & gloria deferatur. Atque hic est finis primi libri secundum Hebræos, qui Psalterium in quinque libros distribuerunt.

128  
108

## PSALM. XLI.

*Titulus, & Argumentum.*

*In finem, intellectus filiis Core.*

**T**itulus admonet filios Core, quibus datur Psalmus cantandus, ut intelligant qua canunt, ut & auditores intelligere faciat: qua admonitio cantoribus Ecclesiasticis memoria commendanda est: cantus enim in Ecclesia spiritui deferuire debet, & non soli aurium oblectationi, & sicut qui intelligenter, & deuote canunt, animos audientium rapiunt in

Deum, ita qui theatrales modulos in Ecclesiâ inuehant, de domo Dei scenam Mundi faciunt. Vide S. Hiero. in cap. 5 ad Ephes. Argumentum Psalms aliqui esse volunt, quod dauid exultet tempore Saulis queratur, se non posse ter in anno in Hierusalem ad festa Domini accedere. Sed tempore Saulis non erat tabernaculum Domini in Hierusalem, sed in Silo, & ad eum locum ibant ter in anno Israelita. Præterea tam ingens desiderium, quale hoc loco exprimitur, non videtur posse referri ad tabernaculum manu factum, & arcam ligneam. Propterea Psalmi argumentum esse putamus, ut S. Patres Hiero. Aug. & Chrys. docent, quod Dauid amore diuino succensus, exprimere conatur vehemens desiderium quo tenebatur perueniendi ad visionem Dei, qua est vera, & sempiterna felicitas, cum tamen inter tentationes, & pericula peregrinationis uiueret. Sed dum ipse desiderium suum exprimit, simul docet, qua sint argumenta, unde verus Dei amor possit agnosci.

## EXPLICAT. PSAL. XLI.

**Q**uemadmodum desiderat ceruus ad fontes aquarum, ita desiderat anima mea ad te Deus.

Amor res est igneæ naturæ, ac per hoc intus retineri non potest, sed per verba, & suspiria foras erumpit. Dauid igitur, ut amorem suum aliquo modo exprimat, comparat se ceruo sitibundo, dicens, *Quemadmodum desiderat ceruus ad fontes aquarum*, videlicet; peruenire, ita desiderat anima mea peruenire ad te Deus, quæ aptissima similitudo est: ceruus enim quatuor habet qualitates: primum inimicissimus est serpentibus, atque cum eis perpetuum bellum gerit: deinde, cum à venatoribus quæritur, ad montes altissimos velocissimo cursu confugit: tum mandatum illud Apostoli, Gal. 6. *Alter alterius onera portate*: ab instinctu quodam naturæ obseruat: nam, ut scribit S. Aug. tum hoc loco, tum ferm. 21. de verbis Apostoli, traduntur cerui, vel quando in agmine suo ambulant, vel quando natan-do alias terrarum partes petunt onera caputurum



pitum suorum super se inuicem ponere: denique si quando vel ex pugna cum serpenti-  
bus, vel ex fuga ad montes, vel ex deporta-  
tione oneris ambulando, vel natando fatiga-  
tur, ardentissime sitiri solet aquas, neq; ab eis  
inquirendis vlla vel tenetur amenitate pra-  
torum, vel terretur difficultate viarum. Ta-  
lis omnino est amator Dei; nam & cum ser-  
pentibus carnalium cupiditatum bellum  
perpetuo gerit; & cum tentationibus, vel  
persecutionis premitur, ad montem con-  
templationis fugit, & infirmorum molestias  
patienter tolerat; sed praecipue summo desi-  
derio Deum sitit, neque vlla terrena felici-  
tate, vel aduersitate impeditur, quo minus  
ad Deum semper anhelet. Talis erat Dauid,  
quamuis vxoratus, quamuis Rex, quamuis  
miles, talis Paulus, talis Petrus, tales Aposto-  
li ceteri, & Martyres, tales omnes, qui exi-  
lium agnoscunt, siue per prospera, siue per  
aduersa gradientes eursum ad patriam nun-  
quam relaxabant.

*Sititit anima mea ad Deum fontem vi-  
num: quando veniam & apparebo ante  
faciem Dei?*

Declarat apertius, quid sit desiderare De-  
um, & simul aperit, cur tantopere deside-  
randus sit Deus. Tria sunt, vt Chrysostom-  
us annotauit, quae amorem, ac per hoc  
sitim: & desiderium accendere solent; pul-  
chritudo, beneficia, & amor: nam & res  
pulchrae amari se quodam modo cogunt,  
& qui beneficia praestant ad se amandos pro-  
moucant, & qui amant redamari merentur.  
Sed si haec tria in vnum conueniant, id est,  
si persona aliqua pulcherrima, & nobilissi-  
ma, te summis & quotidianis afficiat bene-  
ficiis, & eundem te maximi faciat, teque ar-  
dentissime amet, quomodo non vehemen-  
tissimam in tuo pectore flammam amoris  
accendet? Haec igitur tria in Deum conue-  
nire Dauid hoc loco docet, & ideo sitire se  
Deum, id est, amore, & desiderio eius ardere  
se dicit. *Sititit*, inquit, *anima mea ad Deum*,  
id est, ad rem pulcherrimam, nobilissimam,  
praestantissimam, quae bona omnia in se  
complectitur. *Fontem*, id est, ad rem non

fluxam, & caducam, sed stabilem, perma-  
nentem, aeternam. *Vinum*, id est, ad rem o-  
perantem, intelligentem, amantem, quae  
nos continuis beneficiis afficit, quae nos  
magni facit, quaeque nos incredibili amore  
diligat. Haec ergo sitis in rem tam bonam,  
tam beneficam, tam mei amantem, cogit  
ex toto corde dicere, *Quando veniam*, &  
*apparebo ante faciem Dei* id est, quando finis  
erit peregrinationis? quando initium frui-  
tionis? Ex Hebraeo clarius verti posset,  
*Quando veniam*, & *videbo faciem Dei*? Id  
enim solum est, quod sitim animae rationalis  
expleri potest.

*Fuerunt mihi lacryma mea panes die,  
de nocte, dum dicitur mihi quotidie, vbi  
est Deus tuus?*

Qui vere & intime cogitat tria quae di-  
ximus, videlicet, Deum esse supra omnem  
speciem pulchrum, & omnia quae nos habe-  
mus, ab illo, vt a fonte manare, & eundem  
ipsum tanti nos aestimare, atque ita nos di-  
ligere, vt filium suum vniuentum pro no-  
bis dederit: fieri non potest, quin lacrymis  
desiderij opprimatur, dum visio tanti boni  
differtur. Dauid igitur, qui ista serio con-  
templabatur, recte adiungit, *Fuerunt mi-  
hi lacryma mea panes die ac nocte*, id est, la-  
crymis, quasi panibus, sustentabar assidue  
per dies, & noctes, id est, toto tempore hu-  
ius peregrinationis, vel, per dies prosperi-  
tatis, & noctes aduersitatis: nam renuit a-  
nima mea consolari terrena felicitate, nec  
minus renuit contristari terrena aduersita-  
te; sed vtroque tempore lacrymae meae fue-  
runt mihi cibus, & potus, dum dicitur mi-  
hi *quotidie* ab impijs, & incredulis, *vbi est  
Deus tuus* ad quem sitis? cui suspiras? cur di-  
ligis, quem non vides? Sed posset etiam  
sic exponi. *Dum dicitur mihi quotidie, vbi  
est Deus tuus*, id est, dum quotidie per cir-  
cuitum omnia lustrans quaerens quem dili-  
git anima mea, & dicitur mihi a spiritu meo  
a cogitatione mea, *vbi est Deus tuus*? haec  
enim omnia, quae contemplando perlustra-  
sti, opera sunt Dei, pulchra quidem omnia,  
sed non sicut Deus tuus, vbi est igitur  
Deus

III.



vbi quæres, vt intuenias? quando venies, & videbis faciem Dei tui?

RV.

*Hæc recordatus sum, & effudi in me animam meam, quoniam transibo in locum tabernaculi admirabilis, vsque ad domum Dei.*

Pergit in explicando desiderio suo. *Hæc, inquit, recordatus sum*, quæ dicta sunt de inquisitione Dei, *& effudi in me animam meam*. Hæc effusio tribus modis accipi potest. Primo, vt sensus sit, *effudi in me animam meam*, id est, euacuavi apud me animam meam omni terrena delectatione, vt intraturus tabernaculum admirabile, & ipsam domum Dei, implem eam delectationibus Domini mei. Secundo, vt sensus sit, *effudi in me animam meam*, id est, dilataui animam meam, extendi desiderium meum, vt capax esset tanti boni, quantum inueniet in tabernaculo illo admirabili, vbi est vbertas indeficiens domus Domini. Tercio, vt sensus sit, *effudi in me animam meam*, id est, effudi super me animam meam, transcendendi contemplando ipsam animam meam, quo modo dicitur Thren. 3. *Sedebit solitarius, & tacebit, quoniam leuauit se supra se*. Vere enim nulla est in hac peregrinatione scala aptior ad attingendum aliquo modo tabernaculum admirabile, & ipsam domum vbi videtur Deus, quam anima nostra, quæ est imago Dei: ipsa enim est sublimior cælo, & profundior abyssu, & qui animam suam contemplari nouit, ac deinde eam transcendere, & per eam ad exemplar ascendere didicit, is pertransibit ad locum tabernaculi admirabilis, vsque ad domum Dei. Ac vt breuiter hunc ascensum attingamus, anima spiritus est, ac per hoc longe transcendit omnia corpora: sic igitur & Deus spiritus est, & spirituum corporumq; creator, proinde longe transcendit non solum corpora, sed etiam spiritus. Deinde, anima simplex, & indiuisibilis cum sit, tamen in toto corpore est, & in singulis partibus tota, omnia membra repleas, & nullum occupans locum; sic igitur & Deus, vnus & simplicissimus, atque

indiuisus est, & tamen mundum totum, & res creatas omnes replet; vbiq; totus, vbiq; præsens, nusquam inclusus. Tercio, anima non mouetur in corpore, & totum corpus portat, mouet, regit, viuificat, atque sensibilicatur, quod in morte cognoscitur: anima enim recedente, corpus continuo cadit, & motum sensum, speciem, & quicquid habebat boni, in momento amittit: quod autem est anima corpori, id est rerum vniuersitati Deus, non quod proprie Deus sit anima mundi, vt Philosophi quidam sensisse videntur, sed quod similitudinem animæ habere videatur: ipse enim immobilis in se manens, *portat omnia verbo virtutis suæ, & in eo viuimus, mouemur, & sumus*. Quarto anima intelligens est, & tota intellectus quidam est, eminenter continens cognitiones omnium sensuum, & multa præterea cognoscit, ad quæ sensus corporis nullus attingit: sic Deus totus intellectus est, eminenter continens cognitiones omnium hominum & Angelorum, & infinita præterea, quæ intelligentiam nostram superant. Quinto, anima non solum theoricè multa intelligit, sed etiam practicè; atque inde existunt opera ingenij humani plane admirabilia in variis artibus, in ædificiis, hortis, fontibus, alijsq; id genus plurimis, vt sæpe opera artis humanæ cum operibus naturæ contendere videantur: sic etiam Deus non solum theoricè, sed etiam practicè intelligit, & sine instrumentis, sine labore, & sine spacio temporis, solo nutu, atque imperio voluntatis condidit vniuersa. Sexto, anima liberum habet arbitrium, atque inde ad nutum mouet corporis membra: sic Deus liberrime dominatur rebus omnibus creatis; vnde Dauid ait Ps. 118. *Omnia seruiunt tibi*. Neque solum anima imago Dei est, quo ad essentiam, sed etiam (quamuis obscurius) quo ad personarum trinitatem: nam in anima est mens intelligens, quasi Pater; est notitia producta, quasi Verbum Patris: est & amor à mente per notitiam productus, quasi Spiritus. Est etiam in anima fecunditas memoriæ, est intellectus & voluntas, quæ tres diuinas personas



utrunque representant. Anima igitur supra seipsam effunditur, seque ipsa transcendit contemplando, ut transire possit ad tabernaculum admirabile, ideo subiungit Propheta, *Quoniam transibo in locum tabernaculi admirabilis usque ad domum Dei*. Per locum tabernaculi admirabilis, intelligimus caelestem Ierusalem, quæ est tabernaculum non manufactum, æternum in cælo, ubi est domus Dei, de qua dixit in Psalmo, *Vnam petij à Domino, hanc requiram, ut inhabitem in domo domini omnibus diebus vite meæ*. Sanctus Hieronymus ex Hebræo vertit, tacebo, pro eo quod nos habemus admirabilis. Sed LXX. Interpretes non legerunt, *edaddem*, ut nunc habetur in codicibus Hebraicis, quod significat, *tacebo*, sed legerunt, *adderet*, quod significat, *admirabilis*, & differentia solum est in duabus literis similibus, ut ex figura characterum intelligi potest. Facile autem fuit librariis mutare duas literas in alias similes, & credendum est LXX. Interpretes habuisse codices Hebraicos meliores, quam nos habeamus. Alioqui non potuissent vertere *admirabilis*, pro silebo, nisi imperitissimi fuissent.

אדם

ארת

V.

*In voce exultationis, & confessionis, sonus epulantis.*

Declarat Propheta, in illa sua ecstasi, qua effudit supra se animam suam, & contemplando pertransiit ad locum tabernaculi admirabilis, usque ad domum Dei, non pertransiisse tacitum, sed exultandum, & laudandum ex admiratione. *In voce*, inquit, *exultationis, & confessionis*, adde, pertransibo in locum tabernaculi admirabilis, id est, pertransibo admirans gloriam tabernaculi illius, & ex admiratione prorumpam in vocem exultationis, & confessionis, laudis videlicet Conditoris illius tabernaculi, quæ vox erit sonus epulantis, id est, vox læta & festiua quales audiuntur in solemnibus, & festiuis, ac nuptialibus epulis. Neque enim potest animus contemplantis erigi ad considerandam gloriam cœlestis Ierusalem, sine admiratione, & exultatione

maxima. Quod attinet ad verba, illud, *sonus*, in Græco est casus genitiui, & S. Aug. legit, soni, ex quo fieri potest, ut noster Interpres posuerit, sonus, pro, sonitus, genitiui casus, sed potest etiam fieri, ut significare voluerit, vocem exultationis & confessionis fuisse sonum epulantis. In Hebræo, pro, sono, habetur *hamon*, quod sanctus Hieronym. vertit multitudinis, sed vox illa Hebraica utrunque significat, *sonitum & multitudinem*. Illud autem, *epulantis*, tam in Hebraico textu, quam in Græco, est *festiua celebrantis*, & sic etiam legunt Augustinus, & Euthymius. Sed videtur Latinus Interpres declarare voluisse quale festum illud esset, & dixisse *epulantis*, id est, festum conuiuii solemnem, quale est nuptiale, in quo multa adhibentur instrumenta musica, & cantica amatoria: & habetur vox *epulantis in commentario* S. Hieronymi in hunc locum, ne quis existimet recens irrepsisse in editionem vulgatam.

המון

*Quare tristis es anima mea, & quare conturbas me?*

VI.

*Spera in Deo, quoniam adhuc confitebor illi salutare vultus mei, & Deus meus.*

VII.

Ex illa mentis eleuatione, & gaudio spiritali consolatur lacrymas suas, dicens, *Quare tristis es anima mea?* id est, quare lacrymæ tuæ sunt tibi panes die, ac nocte, *dum dicitur tibi, ubi est Deus tuus?* quare tam incessabili fletu conturbas me? *Spera in Deo*, id est, quamuis Deum non videas, quem tu ardentem videre cupis, tamen spera in eo, *quoniam adhuc confitebor illi*, id est, quia nondum tempus præterit, adhuc erit quando præsens laudabo Deum, & confitebor misericordias eius, & dicam illi, *Salutare vultus mei, & Deus meus*, id est, tu salus es vultus mei, dum illuminas fulgore tuo vultum meum, & facis ut videat facies mea faciem tuam, & cognoscam sicut & cognitus sum, & ex clara notitia dicam, *Tu es Deus meus*. In Hebræo habetur, ut etiam S. Hieronymus vertit, *Salutes vultus eius, Deus meus ad me ipsum*, &c.

Ff

fed



sed manifeste corruptus est hoc loco textus  
 Hebraicus, & vna litera, videlicet vau, non  
 suo loco posita totam hanc confusionem  
 peperit. Id quod ex repetitione horum ver-  
 borum, quæ habentur in fine huius Psalmi  
 & in fine Psalmi sequentis perspicuum est.  
 Itaque non est legendum, *panan helobai*, vt  
 hic legitur sed *panai vehelobai*, vt legitur  
 in repetitione: & vera lectio Hebraica ad  
 verbum hæc est, *Salutes vultus mei, & deus  
 meus*. Dicit autem *salutes* in numero multi-  
 tudinis, non *salus* vel *salutare*, quia licet vna  
 sit salus nostra, tamen ea multa bona conti-  
 net, quæ etiam salutes dici possunt.

VIII. *Ad me ipsum anima mea conturbata est,  
 propterea memor ero tui de terra Iordanis,  
 & Hermonim à monte modico.*

Exponit vicissitudines tristitiæ, & conso-  
 lationis suæ, tristitiæ ex metu, & pericu-  
 lis huius vitæ consolationis ex spe, & pro-  
 missione futuræ. Dicit igitur, *Ad me ipsum  
 anima mea conturbata est*, id est, quamuis  
 dixerim animæ meæ, *Spera in Deo*, tamen a-  
 nima mea ad me ipsum respiciens, ad infir-  
 mitatem meam, ad modicum lumen, &  
 modicas vires, quæ in me sunt, timore ma-  
 gno concutitur, & eo terrore conturbat  
 me: *propterea memor ero tui de terra Ior-  
 danis*, & *Hermonim à monte modico*, id  
 est, propterea vt huic terrori, & conturba-  
 tioni medicinam faciam, remouebo ocu-  
 los à me ipso, & ad te conuertam, & ab hoc  
 Iordane, quem video in hac terra, memor  
 ero tui, id est, memor ero fluminis, quod  
 lætificat ciuitatem tuam, & torrentis volup-  
 tatis tuæ, quo potantur, qui apud te sunt,  
 & ab hoc monte modico, qui dicitur Her-  
 monim, quem ante oculos habeo, *memor  
 ero montis sancti tui*, in quo habitas cum  
 sanctis Angelis tuis, & ex hac memoria  
 consolabor animam meam, & desiderium  
 meum. Quis proprie sit mons Hermonim,  
 & an diuersus sit à monte Hermon, non  
 omnino liquet: tamen verisimile est, esse  
 montes diuersos, & in diuersis locis sitos.

Nam & S. Hieronymus in vita S. Paulæ di-  
 stinguunt hos duos montes, & constat mon-  
 tem Hermon esse montem amplissimum, &  
 Hermonim, hoc loco dicitur esse modicus.  
 Fortasse igitur Hermonim erat mons ali-  
 quis in Galilæa non longe à Iordane, cum  
 Dauid hæc duo coniungat.

*Abyssus abyssum inuocat, in voce cata-  
 ractarum tuarum.*

*Omnia excelsa tua, & fluctus tui super  
 me transierunt.*

Pergit narrare tentationes, & afflictio-  
 nes huius vitæ, & vritur metaphora munda-  
 tionis aquarum, alludens ad magnum  
 diluuium, quod fuit tempore Noe. *Abyssus*,  
 inquit, *abyssum inuocat*, id est, maxi-  
 ma aquarum inundatio, & profunditas su-  
 per me venit, & illa transeunte alia super-  
 uenit, quasi à priore vocata, venerunt au-  
 tem istæ magnæ inundationes in voce cata-  
 ractarum tuarum, id est, in strepitu, & so-  
 nitu apertionis cataractarum coelestium,  
 vnde aquarum inundatio descendebat. *Et  
 omnia excelsa tua*, id est, omnes gurgites  
 altissimi, & *omnes fluctus tui super me tran-  
 sierunt*, id est, omnis illa inundatio, & vni-  
 uersum diluuium super me venit. Alludit,  
 vt dixi, ad diluuium generale, in quo cata-  
 racta cali aperta sunt, id est, tam ingens  
 pluuia descendit, ac si cataractæ aliquæ  
 in celo aperte fuissent, & inde tota illa aqua  
 magno cum impetu descendisset: & ex ea  
 inundatione facta est abyssus, id est, maxi-  
 ma aquarum altitudo, & profunditas. Sed  
 hæc metaphora nihil aliud significat, nisi  
 ingentes tentationes, & pericula, quibus di-  
 uina prouidentia sinit exerceri electos suos  
 Horum autem periculorum magnitudinem  
 soli spirituales viri, qualis erat Dauid, in-  
 telligunt, qui norunt multi formes infidias  
 Diaboli, & sciunt quanti referat excidere à  
 gratia Dei, atque hæc videtur esse literalis  
 expositio, quamuis repudiandæ non sint piæ  
 nonnullorū expositiones, qui volunt, *abyssus  
 inuocat abyssum*, significare, abyssus miseræ  
 inuocat abyssum misericordiæ diuinæ. Item  
 abyssus



abyssus humanæ malitiæ inuocat abyssum diuinæ iustitiæ. Item, abyssus secretorum Testamenti veteris, inuocat abyssum arcatorum Testamenti noui. Item abyssus cordis humani, quod inscrutabile est, inuocat abyssum scientiæ Dei, qui scrutatur renes & corda. Illud solum adendum est, per vocem. inuocat, non significari, implorari, sed, vocari, ut ex Hebræa voce colligitur: est enim sensus, *abyssus abyssum vocat.*

*In die mandauit Dominus misericordiam suam, & nocte canticum eius.*

Redit ad vicissitudinem consolationis, post narratam, & miro modo amplificatam magnitudinem tentationis. *In die*, inquit, *mandauit Dominus misericordiam suam*, id est, posteaquam transierunt inundationes aquarum, & horrendæ illæ abyssi, in die prosperitatis mandauit, id est, misit Dominus misericordiam, consolantem, & visitantem, *Et nocte canticum eius*, id est, sed tempore nocturno, tempore; videlicet, tentationis, & tribulationis, non cessabit canticum eius, id est, oratio, & gratiarum actio illi oblata. Id quod clarius explicatur in sequenti versiculo.

*Apud me oratio Deo vitæ meæ, dicam Deo, susceptor meus es.*

Hoc videlicet est canticum nocturnum, oratio secreta & cordis potius quam oris: *Apud me*, inquit, *oratio Deo vitæ meæ*, id est, in sinu meo est iugis oratio ad Deum, auctorem vitæ meæ, cui cum fide, & fiducia dicam, *Susceptor meus es*, id est, in te confido ad te confugio, tu me labentem suscipies, tu lapsum eriges.

*Quare oblitus es mei, & quare contristatus incedo, dum affligit me inimicus?*

Miratur vicissitudines diuinæ providentiæ in seruis suis gubernandis, quasi dicat, Cum tu Deus vere susceptor meus sis, *quare oblitus es mei*, id est, unde hoc accidit, ut tentationes, & tribulationes ita me obruant, ut me dereliquisse videaris, cum tu spes mea sis, & fortitudo mea? Vnde, inquam accidit ut contristatus incedam, dum affligit me ini-

micus, cum tu sis protector meus, & adiutor meus.

*Dum confringuntur ossa mea, exprobrauerunt mihi, qui tribulat me inimici mei.* XIV.

*Dum dicunt mihi per singulos dies, ubi est Deus tuus, quare tristis es anima mea, & quare conturbas me?* XV.

*Spera in Deo, quoniam adhuc confitebor illi salutare vultus mei, & Deus meus.* XVI.

Non solum, inquit, affligit me inimicus, te vidente, & spectante, qui susceptor meus es, sed etiam dum confringuntur ossa mea, id est, dum ad summam debilitatem, & infirmitatem, deuenio, ut tentationes vix iam ferre possim. Exprobrauerunt mihi inimici mei, qui tribulant me, dum assidue mihi dicunt, *ubi est Deus tuus?* id est, illi ipsi: qui me persequuntur, & tribulant exprobrauerunt mihi fiduciam quam in te habeo, quasi frustra in te sperauerim: dicunt enim, *ubi est Deus tuus?* quem tu adiutorem, & protectorem tuum esse iactabas? sic legimus exprobratum Tobie, *ubi est spes tua*, pro qua elemosynas, & sepulchras faciebas; & infra, *Manifeste vana facta est spes tua*, & elemosynæ tuæ modo apparuerunt, Tobie 2. Sic etiam Christo exprobratum legimus Matth. 27. *Confidit in Deo, liberet eum, si vult.* Sic igitur, & Dauid in tribulatione posito exprobrabant increduli hostes eius, sed is tamen, quamuis ad horam turbatus, & contristatus, se ipse reprehendebat, & dicebat, *Quare tristis es anima mea, & quare conturbas me? Spera in Deo, quoniam adduc confitebor illi salutare vultus mei, & Deus meus*, quæ sunt explicata in expositione versiculi 6. & 7.

## PSALMVS XLII.

Titulus, & Argumentum.

Psalmus Dauid.

**H**unc Psalmum, qui sine titulo est apud Hebræos, & apud Græcos & Latinos nihil habet in titulo, nisi Psalmus

Ef 2

Dauid



David, & est quasi appendix, vel potius epitome Psalmi superioris, breuissime declarabimus. Precatur igitur David à Deo liberationem ab inimicis, & simul consolatur se spe futura beatitudinis.

## EXPLICATIO PSAL. XLII.

I.

**I**udica me Deus, & discerne causam meam de gente non sancta, ab homine iniquo & doloso erue me.

Videtur David oppressus fuisse, vel à Rege Saule; vel tentatus grauiter à Dæmonibus, à quibus, cum non posset refugium habere ad homines, Deum Iudicem appellat: ait igitur, *Iudica me Deus*, id est, tu Deus esto Iudex meus, non enim habeo ad quem pro iustitia confugiam, nisi ad te. In Græco habetur clarius, *Iudica mihi*, id est, sis mihi Iudex. Et *discerne causam meam de gente non sancta*, id est, diiudica causam, quæ mihi intenditur à gente non sancta. In Hebræo & Græco est pulchra allusio nominis ad verbum, Hebraice enim habetur, *riua, riuu*, Græce autem *ῥινα, ῥιυ*, quo modo si nos diceremus, *litiga litem meam*, vel, *iudica iudicium meum*: & quia verba sunt generalia, duplex sensus esse potest in his verbis: vnus vt petat à Deo, vt non solum sit Iudex, sed etiam patronus, quasi dicat, *Iudica me, & litiga litem meam*: aliter, vt declararet quod dixit, *Iudica me*, per verba sequentia, *discerne causam meam*, id est, cognosce causam, & iudica iudicium meum, proferens iustam sententiam ad meum fauorem. Vocat autem gentem non sanctam, homines iniquos, crudeles, & sine misericordia, vt vox Hebraica manifestat, quæ proprie significat hominem sine misericordia, & patet etiam ex sequentibus. *Ab homine iniquo, & doloso erue me*, id est, sic iudica causam meam, vt per hoc iudicium liberer me ab homine iniquo, & doloso, id est, à quouis homine iniquo, & doloso, vel certe ab aliquo certo homine iniquo & doloso, qui erat Princeps gentis non sanctæ, à quo ipse affligebatur.

II.

*Quia tu es Deus fortitudo mea, quare*

*me repulisti, & quare tristis incedo, dum affligit me inimicus?*

Hic versiculus est fere idem cum versiculo duodecimo Psalmi superioris, & eundem habet sensum, id est, cum tu Deus sis fortitudo mea, & ego in tuo adiutorio vnice confidam, unde fit, vt me repulisse videaris, & ego tanquam à gratia repulsus tristis incedam, dum affligit me inimicus? Itaque est hæc quædam familiaris, & ex fiducia in Deum procedens expostulatio, quæ queritur se ita à Deo affligi permissum, quasi Deus repulisset eum ab amicitia sua.

*Emitte lucem tuam, & veritatem tuam ipsa me deduxerunt, & adduxerunt in montem sanctum tuum, & in tabernacula tua.*

Ex hoc versiculo intelligimus, Dauidem spiritualem virum fuisse, vt dictum est in Psalmi superiore, & sollicitum fuisse de liberatione, non tam à malis temporalibus quam à periculis peccatorum, & amissionis æternæ vitæ. Ait enim, *Emitte lucem tuam, & veritatem tuam*, id est, concede mihi lucem gratiæ, & misericordiæ tuæ, & veritatem, ac fidelitatem tuam: ipsa enim me deducunt in hac periculosa peregrinatione, & adducunt in montem sanctum tuum, vbi cælestis est Hierusalem, & in tabernacula tua, id est, in ipsam domum tuam, vbi sunt multæ mansiones, & multa tabernacula; pro electis tuis. Per lucem, & veritatem S. August. intelligit Christum, qui est lux, & veritas. Sed videtur ob stare illud pronomen, ipsa cunctiditur, ipsa me deduxerunt. Quod habetur expresse in textu Hebraico, & Græco in numero multitudinis. Præterea similis est hæc loquutio ei quæ habetur in Psalmo 56. *Misi Deus misericordiam suam, & veritatem suam*: & familiare est Dauidi per lucem intelligere gratiam siue misericordiam, vt Psalm. 66. *Deus misereatur nostri, & benedicat nobis illuminet vultum suum super nos, & misereatur nostri*. Illa vero, ipsa me deduxerunt, & adduxerunt. In Hebraico codice habentur in futuro, ipsa me deducunt, & adducunt, & quam-



& quamvis Septuaginta Interpretes, & vulgata editio habeant in præterito, tamen videtur esse positum tempus pro tempore, ut Euthymius annotauit Sæpe enim Scriptura prophetica, quæ futura sunt, explicat per tempus præteritum ad certitudinem rerum indicandam.

IV.

*Et introibo ad altare Dei, ad Deum qui lætificat iuuentutem meam.*

Explicat quid facturus sit in monte sancto, & in tabernaculo Dei, nimirum se facturum, quod cæteri faciunt, qui in domo Dei habitant, quorum munus est sacrificare sacrificium laudis: *Beati, inquit, qui habitant in domo tua Domine, in sacula saculorum laudabunt te. Introibo, inquit, ad altare Dei, sacrificaturus videlicet sacrificium laudis: omnes enim, qui domum illam ingrediuntur, continuo Sacerdotes fiunt, ut ex illis eorum verbis intelligi potest, Fecisti nos Deo nostro Regnum, & Sacerdotes; Apocal. 5. Nec solum ad altare introibo, inquit, sed etiam introibo ad ipsum Deum, id est, coram ipso Deo apparebo, quasi in intimum eius cubiculum introductus, ad Deum, inquam qui lætificat iuuentutem meam, id est, qui lætificat nouam meam iuuentutem. Nam in patria renouabitur sicut aquila iuuentus nostra, ut dicitur in Psalm. 102. & ut Apostolus ait ad Ephes. 4. Occurremus omnes in virum perfectum, in mensuram ætatis plenitudinis Christi. Sanctus Hieronymus vocem, *ghil*, vertit, exultationem, pro qua Septuaginta verterunt, *iuuentutem*. Sed vocabulum hoc rarissime inuenitur in Scripturis: & sicut ex auctoritate sancti Hieronymi credere possumus significare exultationem, ita ex auctoritate Septuaginta Interpretum credere possumus significare iuuentutem, Quod autem habetur Danielis 1. *ghilchem*, non significat, ut quidam scripserunt, iuuentutem, sed similitudinem ætatis. Sanctus enim Hieronymus pro illa voce posuit, *conuictus vestris*, & ex eius auctoritate Sanctus Pagninus in Dictionario suo docuit, *ghil*, significare similitudinem. Nemo reprehend-*

dere potest Septuaginta Interpretes, vel editionem vulgatam.

*Confitebor tibi in cithara Deus Deus meus: quare tristis es anima mea, & quare conturbas me?*

V.

*Spera in Deo, quoniã adhuc confitebor illi, salutare vultus mei, & Deus meus.*

VI.

Explicat clarius, quod sacrificium oblaturus sit ad altare Dei, cum venerit in tabernaculum non manu factum, æternum in cœlis. *Confitebor, inquit, tibi in cithara*, id est laudabo te: confitendo misericordias tuas, iustitias tuas, omnia denique mirabilia tua; & laudabo non solum ore, sed etiam opere, tunc enim optime, & sine ulla discordia, vel repugnancia concordabunt cantus, & cithara, id est, voces, & opera, quæ duo in hac peregrinatione raro perfecte concordant. Porro citharæ meminit etiam Apocalypsis, cum describit laudes Sanctorum in cœlo, Apoc. 5. *Habentes singuli citharas in manibus, & cap. 14. Et vocem quam audiuisti, sicut citharedorum cithararum, tantum in citharis suis.* Quæ sequuntur, explicata sunt in fine Psalmi superius.

## PSALMVS XLIII.

*Titulus & Argumentum Psalmi.*

*In finem, filijs Core ad intellectum.*

**T**itulus huius Psalmi nihil differt à titulo Psalmi quadragesimi primi, nisi quod in eo vox, intellectus, proponeretur, hic postponitur. Ibi erat intellectus filijs Core, hic est, filijs Core intellectus, ut est in Hebræo. Vel, ad intellectum, ut est in Græco, & Latino. Et fortasse nullus est in hac transpositione mysterium. Fortasse etiã vox, intellectus, proposita significabat in eo Psalmo deplorari calamitates præteritas, vel præteritas, in hoc autem postponitur, quia deploratur calamitates futurae longe post tempora Davidis: conueniunt enim Sancti Patres hunc Psalmum continere prædictionem rerum, quæ

Ff 3,

post



post tempora *Davidis* contigerunt, & *Græci* quidem ut *Chrysostomus*, *Theodoretus*, & *Euthymius* docent, *Psalmum* hunc cantari in persona *Machabeorum*, qui gravissimas calamitates ab *Antiocho*, alijsq; Regibus *Syria*, vel *Aegypti* passi sunt. Latini vero, ut *Ambrosius*, *Hieronymus*, & *Augustinus*, volunt in hoc *Psalmo* exprimi voces *Sanctorum Martyrum*, qui crudelissimas persecutiones à Romanis Imperatoribus pertulerunt. Sed conciliari possunt hæc Patrum sententia, si dicamus *Psalmum* præsentem ad utrosque pertinere, ad *Machabeos*, & ad *Christianos*, similes enim persecutiones utrique passi sunt, & propter causam eandem, propter confessionem videlicet, & legem eiusdem veri Dei. Sicut enim hic *Psalmus* non solum pertinet ad *Martyres*, qui tempore *Neronis* passi sunt, sed etiam ad eos qui tempore *Diocletiani*, qui plus ducentis annis fuit *Nerone* posterior, sic etiam pertinere potest ad *Martyres*, qui sub *Antiocho Epiphane* decertarunt, qui ducentis circiter annis *Neronem* præcessit.

## EXPLICAT. PSAL. XLIII.

- I. **D**eus auribus nostris audiuit, Patres nostri annunciauerunt nobis.  
II. Opus quod operatus es in diebus eorum, & in diebus antiquis.

Incipit populus Dei in persecutione positus, & pro afflictione gemens commemorare magnalia, quæ Deus pro fidelium suorum defensione aliquando fecit, & mirari cur nunc eisdem fideles suos dereliquisse videatur, ut hac commemoratione & admiratione Deum ad misericordiam flectat. Sed ideo præmisit in titulo *David* hic intellectu opus esse, quoniam Deus non mutatur, sed medicinam pro tempore mutat, prout populo suo ægotanti conuenire iudicat. Deus, inquit *Propheta* in persona *Ecclesiæ*, vel *Martyrum* utriusque Testamenti, auribus nostris audiuit. Dicit autem, auribus nostris, cum satis uideretur dicere, audiuit, vel auribus audiuit, ad maiorem certitudinis expressionem: quo modo san-

ctus *Ioannes* scribit initio primæ epistolæ. Quod vidimus oculis nostris, & manus nostræ contrēctauerunt: videbatur satis fuisse, dicere, quod vidimus, & contrēctauimus, sed magnam habet vim ad significandam certitudinem exploratam, illud, oculis nostris, manibus nostris. Ita igitur hoc loco dicunt, auribus nostris audiuit, id est, nos ipsi audiuit. Addunt continuo, unde audierint: ac dicunt, Patres nostri annunciauerunt nobis, id est, non accepimus incerto rumore ab hominibus ignotis, sed ipsi Patres nostri, viri fide dignissimi, qui nos filios suos nunquam deceperunt, ipsi, inquam, annunciauerunt nobis. Quid autem audierint à Patribus, explicant, cum addunt, Opus quod operatus es in diebus eorum & in diebus antiquis, id est, annunciantibus Patribus audiuit mirabile opus, quod fecisti in diebus eorum, ipsi videlicet videntibus, & etiam opus, quod fecisti in diebus antiquis, quod Patribus suis narrantibus ipsi Patres nostri audierunt. Non multum refert, quod in *Hebræo* non habetur, & unde aliqui exponunt, in diebus eorum, qui sunt dies antiqui.

Manus tua gentes disperdidit, & plantasti eos, afflixisti populos, & expulisti eos.

III.

Explicat in particulari vnum ex operibus mirabilibus, quod Deus fecit pro fidelibus suis in diebus Patrum, ac dicit, Manus tua gentes disperdidit, id est, potentia tua disperdidit ex terre promissionis gentes *Chanaanorum*, & *Iebuseorum*, quæ in illa habitabant, & plantasti eos, id est, & gentibus illis electis, plantasti Patres nostros in illa ipsa terra. Afflixisti populos, & expulisti eos, id est, disperdidit illos manus tua, quia afflixisti grauissimis prælijs populos illarum gentium, & tandem deuictos depulisti, ut locum darent populo tuo. Ex hoc loco intelligimus, quod supra dictum est, Patres nostri annunciauerunt nobis opus quod operatus es in diebus eorum, non esse accipiendum de narratione immediata, sed mediata, id est, mediante successione filiorum: quod enim



enim hoc loco narratur, factum est tempore Moſis, & Ioſue, non potuit autem Moſes vel Ioſue id narrare per ſe Machabeis, aut Apoſtoliſ, ſed neque Dauidi, qui Pſalmum ſcripſit, ſed narrauerunt per ſucceſſores ſuos. Illud autem, *plantaſti eos*, continet inſignem metaphoram: ſignificat enim ita conſtitutos, & ſtabilitos fuiſſe in terra promiſſionis Hebræos, vt non niſi difficulter expelli poſſent, quomodo ponuntur arbores in terra, quando plantantur, & firmiter radicantur, vt non facile auelli poſſint. Præterea quæ plantantur, non ſolum firma conſiſtunt, ſed etiam creſcunt, & multiplicantur: quam metaphoram explicat clariuſ Pſalmuſ. 79. *Plantaſti radices eiꝯ & impleuit terram, operuit montes umbra eiꝯ, & arbuſta eiꝯ cedros Dei.*

IV. *Nec enim in gladio ſuo poſſederunt terram, & brachium eorum non ſaluauit eoſ.*

*Sed dextera tua, & brachium tuum, & illuminatio vultuſ tui, quoniam complacuiſti in eiſ.*

Probat quod dixit, *Manuſ tua diſperdidit eoſ*, &c. Nam, inquit, *non in gladio ſuo poſſederunt terram*, id eſt, Patreſ noſtri tempore Moſis, & Ioſue pugnauerunt quidem cum Chananeis, ſed niſi adiutor, & protector eorum tu fuiſſeſ, neque terram poſſeſſiſſent, neque euadere potuiſſent de manibuſ hoſtium ſuorum: ipſi enim pauciores erant, & minus in bello exercitati, & pugnaturi erant aduerſuſ vrbeſ munitiſſimaſ. Non igitur in gladio ſuo, id eſt, virtute armorum ſuorum poſſederunt terram promiſſionis. *Neque brachium eorum ſaluauit eoſ*, id eſt, neque robur eorum tantum erat, vt in prælio captiuitatem, vel mortem euadere poſſent, ſed *dextera tua, & brachium tuum, & illuminatio vultuſ tui*, dedit eiſ terram poſſidendam, & ſaluauit eoſ à morte, vel captiuitate, quando cum Chananeis pugnabant: & hoc ideo, *quia complacuiſti in eiſ*, id eſt, non propter eorum virtuteſ, aut merita, ſed quia tibi placuit eligere eoſ in populum tuum. Illud, *illuminatio vultuſ tui*, ſignificat

proprie benignum aſpectum, ſue gratiam, & fauorem, vt diximus in Pſalmo ſuperiori verſu tertio. Dicitur enim Deus *illuminare vultum ſuum ſuper aliquem*, quando illum ſereno vultu reſpicere dignatur, id eſt, cum eiꝯ miſeretur, eiꝯque gratiam ſuam imperat. Eſſe autem veriſſima, quæ hoc loco dicuntur, perſpicuum eſt ex libro Ioſue cap. 6. vbi legimus muros vrbis Hierico ad ſolum clamorem filiorum Iſrael fundituſ corruiſſe, & ex cap. 10. vbi legimus, pugnante Ioſue, Deum immiſiſſe de cælo lapideſ grandiniſ ſuper hoſteſ, & ait Scriptura, *Et mortui ſunt multo plureſ lapidibuſ grandiniſ, quam quos gladio percuſſerant filij Iſrael.*

*Tu eſ ipſe Rex meus, & Deus meus, qui mandat ſalutes Iacob.*

Exponit nunc admirationem ſuam populuſ Dei, dicens, *Tu eſ ipſe Rex meus, & Deus meus, qui mandat ſalutes Iacob*, id eſt, tu ipſe, qui Patreſ noſtroſ adiuuabaſ, & protegebaſ, quia Rex, & Deus eorum erat, tu, inquam, ipſe eſ etiam Rex meus, & Deus meus, & ille idem, qui mandat ſalutes Iacob, id eſt, qui conſueuiſti ſaluare populum tuum, qui à parente ſuo nominatur Iacob. Hoc loco nonnulli volunt ſuperuacaneum eſſe illud, & cum dicitur, *& Deus meus*, & exponunt, *tu eſ Rex meus, Deus meus*. Ratio eorum eſt; quia illud, & non habetur in textu Hebraico. At Septuaginta Interpreteſ habent, & ſic legunt, & exponunt omneſ veteres Græci, & Latini, Ambroſiuſ, Hieronymuſ, Auguſtinuſ, Chryſoſtomuſ, Theodoretuſ, Euthymiuſ, & ſenſuſ eſt ſublimior: nam ſignificat Scriptura, Deum non ſolum eſſe Regem populi ſui, ſed etiam Deum, id eſt, Iudicem totiuſ mundi, æternuſ & omnipotentem, qui poſſit non ſolum protegere populum ſuum, quem regit, ſed etiam punire omneſ aduerſarioſ eiꝯ. Itaque retinendum eſt illud, & credendum, vel excidiſſe ex Hebræo textu, vel Septuaginta ſeniores addidiſſe illud, vt declararent vocem, Deus, non eſſe vocatiui caſuſ, ſed nominatiui, & aliquid



aliquid amplius eo nomine significari, quam nomine Regis. Est etiam hoc loco obseruandum, illud, *qui mandas salutes Iacob*, non significare, qui mittis salutes, sed qui præcipis, siue iubes: vox enim Hebraica, & Græca hoc significant, & ex illis declaranda est, ambiguitas vocis Latinæ. Itaque sensus est, *qui mandas*, id est, qui iubes, & præcipis saluari populum tuum, id est, qui solo imperio, & nutu potes, & soles salutem dare populo tuo: quasi dicat, *tu es Rex meus*, sed non ut alij Reges, qui bellando protegent, sed es etiam Deus meus, qui solo verbo, solo imperio, solo nutu vales saluare Iacob.

VII. *In te inimicos nostros ventilabimus cornu, & in nomine tuo spernemus insurgentes in nobis.*

Ostendit nunc, non solum Deum esse eundem Deum, qui erat tempore Patrum, sed etiam populum esse eundem, & eandem spem in Deo habere, quam Patres habuerunt: hinc enim oritur admiratio, cur idem Deus cum eodem populo ita contrario modo se gerat, ut quem antea victorem nullo negotio faciebat: nunc vinci, & debellari sinat. *In te*, inquit, *inimicos nostros ventilabimus cornu*, id est, nos quoque, si adiutor, & protector noster fueris, inimicos nostros vincemus in te, id est, in tuo auxilio confidentes, *Et in nomine tuo spernemus insurgentes in nobis*, id est, & inuocato nomine tuo, non timebimus, nec magnificemus impetum hostium insurgentium in nos. Illud, *ventilabimus cornu*, est metaphoricum, ducta similitudine, à tauris, qui cornibus proijciunt in ventum, & in auras quicquid illis obijciunt. Nos inquit, tua potentia freti, ea facilitate hostes nostros abigemus, & fundemus, qua solet ferocissimus taurus cornibus ventilare paleas.

VIII. *Non enim in arcu meo sperabo, & gladius meus non saluabit me.*

Pergit in demonstranda similitudine inter populum Dei præsentem, & antiquum.

Sicut enim antiquus populus non in gladio suo possidebit terram, ita, inquit, *& ego populus tuus præsens non in arcu meo sperabo*, id est, non confidam in viribus, & armis meis. *Et gladius meus non saluabit me*, id est, scio, & confiteor, quod si salutem consequar, eam mihi non dabit gladius meus, sed auxilium tuum.

*Saluasti enim nos de affligentibus nos, & eos qui nos oderunt, confundisti.*

Declarat, quod dixit, *Gladius meus non saluabit me*, dicens, *saluasti enim nos de affligentibus nos*, id est, confiteor salutem meam non à viribus meis pendere, quoniam quotiescunque saluus factus sum à quacunque tribulatione, tu *saluasti nos ab affligentibus nos* & tu es qui inimicos nostros, qui nos oderunt, & perdere cupiebant, confundisti, efficiens protectione tua, ut conatus eorum frustraretur, & ipsi confusi ab oppugnatione nostra recederent.

*In Deo laudabimur tota die, & in nomine tuo confitebimur in seculum.*

Concludit ex ijs, quæ dixit, populum Dei, quotiescunque liberabitur à tribulatione, id beneficium Deo acceptum relaturum, & gloriam omnem ipsi Deo daturum esse. *In Deo*, inquit, *laudabimur tota die*, id est, non in nobis, sed in Deo gloriabimur omni tempore, quo de hostium manibus liberabimur: & nomine Domini inuocato, ipsi confitebimur laudem, & gloriam usque in æternum. Quibus verbis confirmat quod demonstrare volebat, populum esse eundem, qui antea fuerat, id est, confidentem in Dei auxilio, non in suis viribus ut populus antiquus: non in viribus suis, sed in adiutorio Domini confidebat. Illud, *laudabimur*, phrasis est Hebraica, significans gloriari, non proprie laudari. Similis est phrasis. Italica, quando dicimus, *Milodo del tale*, & habetur hæc phrasis in alijs locis multis, ut in Psalmo. 33. *In domino laudabitur anima mea.* Psalm. 104. *Laudimini in nomine sancto eius*, & alibi sæpe. Illud autem, *Et in nomine tuo confitebimur*



*tebimur*, clarius est in Hebræo, & *nomini tuo* confitebimur. S. Augustinus hos versiculos, à septimo vsq; ad decimum, vult continere prophetica futuræ victoriæ Christi, & Christianorum, quando Ecclesia de omnibus hostibus triumphabit. Sed superior expositio, quæ est Chrysostomi, videtur magis literalis: non enim hic loquitur Propheta, sed populus Dei, qui miratur se à Deo non iuari, cum sit idem populus cum eo, quem Deus tam manifeste auxilio protegebat. Sequitur igitur.

IX

*Nunc autem repulisti, & confudisti nos, & non egredieris Deus in virtutibus nostris.*

Hic iam incipit admiratio, & conquestio miserabilis populi graviter afflicti ab inimicis, *Nunc autem*, id est, olim tanto favore nos prosequeris, *nunc autem repulisti, & confudisti nos*; nam & tempore Antiochi opprobrium erat vocari Iudæum, & tempore Tyrannorum infame erat Christianorum nomen, & videbantur fideles derelicti à Deo. *Et non egredieris Deus in virtutibus nostris*, id est, si velimus hostibus repugnare, qui nos affligunt, tu non egredieris nobiscum, ut olim egrediebaris, ut pro populo tuo pugnares. Per virtutes intelliguntur exercitus, ut clare habetur in Hebræo: sunt enim exercitus armati vires, & robora populi; & virtus hoc loco non virtutem mortalem, sed potentiam, & robur significat. Porro tempore persecutionum tam Antiochi, quam Imperatorum gentilium tanta erat debilitas in populo Dei, ut non auderent vlllo modo resistere; & ideo patiendo, & tolerando solum pugnabant. Sed quamvis ab hoste visibili fugerentur, & caderentur, tamen de hoste inuisibili gloriosissime triumphabant: & quamvis in conspectu hominum derelicti viderentur à Deo, tamen in occulto maxima Dei gratia iuuantur. Sed hoc loco de eo tantum agitur, quod foris agebatur, & relinquuntur filijs Core intelligendum, quod agebatur in occulto.

*Auertisti nos retrorsum post inimicos nostros, & qui oderunt nos, diripiebant sibi.*

Pergit in explicanda persecutione. *Auertisti nos retrorsum post inimicos nostros*, id est, fecisti, ut qui in primo loco eramus, iam in postremo essemus, & tanquam victi, & captivi sequeremur inimicos nostros: & iidem inimici nostri, qui nos odio habebant, pro arbitrio suo, & nos & nostra diripiebant & sibi, id est, in vsum suum conuertebant. S. Hieronymus ex Hebræo reddidit, *vertisti terga nostra hosti*: quem sensum verba Hebraica facile admittunt, quæ ad verbum sic sonant, *auertisti nos retrorsum ab inimicis nostris*. sed versio Græca, & Latina, quæ habet, *post inimicos nostros*, non facile sensum illum ferre possunt; qui enim terga vertunt, & fugiunt, non terga vertunt post inimicos, sed ante inimicos. Ideo sensum alium nos supra posuimus ex Chrysostomo, & Augustino: neque repugnat nostra expositio verbis Hebraicis; nam pro eo quod haberi diximus, *ab inimicis nostris*, potest etiam legi, *pra inimicis nostris*, ut legit S. Augustinus, & secundum eam lectionem optime constat explicatio, quam attulimus: siue enim legas, *auertisti nos retrorsum post inimicos nostros*, siue legas, *auertisti nos retrorsum pra inimicis nostris*, semper significatur; nos redactos esse ad locum inferiorem, & posteriorem, & in hostium potestatem misere deuenisse.

*Dedisti nos tanquam oues escarum, & in gentibus dispersisti nos.*

Mire describit martyria Sanctorum. *Dedisti*, inquit, *nos tanquam oues escarum*, id est, permixisti nos tam facile trucidari, & in tanta multitudine, ac si essemus oues destinatæ ad macellum, quæ in magna & copia, & sine vlla resistentia occiduntur. *Et in gentibus dispersisti nos*, id est, & eos ex nobis, quos occidere hostes noluerunt, permixisti dispergi inter gentes. Vbi notantur exilia in loca remotissima, ad quæ frequenter Sancti ablegabantur.

Gg

Ven-

XII.

XIII.



*Vendidisti populum tuum sine pretio, & non fuit multitudo in commutationibus eorum.*

Aliud supplicium describit, quo sancti Martyres tanquam vilissima mancipia deputabantur ad secanda marmora, vel ad curandas bestias, vel ut in theatris laniarentur à feris, ut eo spectaculo oblectarentur spectantium oculi. *Vendidisti*, inquit, *populum tuum sine pretio*, id est, tradidisti populum tuum potestati inimicorum, & nihil pretij accepisti. *Et non fuit multitudo in commutationibus eorum*, id est, & cum hostes, quibus eos tradideras, vellent eos vendere in mancipia, & pro pecunia commutare, non fuit multitudo pecuniarum in commutationibus eorum, id est, tanquam vilissima mancipia fere pro nihilo vendebantur, & ad opera abiectionis deputabantur. S. Augustinus legit, *Nō fuit multitudo in iubilationibus eorum*, & exponit, non remanserunt multi in Ecclesijs, qui Domino iubilarent in officijs diuinis celebrandis; sed codices Græci variant: emendatiores autem habent, ut nos in vulgata legimus, quæ lectio concordat cum textu Hebraico, & sic etiam legunt, & exponunt Ambrosius, Hieronymus, & Chrysostomus.

XV. *Posuisti nos opprobrium vicinis nostris, subsannationem, & derisum his, qui sunt in circuitu nostro.*

Ad supplicia corporalia adiungit irrisiones, & opprobria. *Posuisti*, inquit, *nos opprobrium vicinis nostris*, id est, ex eo quod permissione tua deuenimus in calamitates, quas paulo ante descripsimus, inde factum est, ut iam simus opprobrio vicinis nostris, & subsannemur, ac irrideamur ab iisdem vicinis, qui sunt in circuitu nostro.

XVII. *Posuisti nos in similitudinem gentibus, commotionem capitis in populis.*

Per similitudinem, intelligitur prouerbiū, sive parabola, ut clarius dicitur in Psalmo 68. *Factus sum illis in parabolam*. Ait igitur,

*posuisti nos in similitudinem gentibus*, id est, fecisti, ut gentiles de nostra calamitate parabolam, sive prouerbiū, sibi facerent, & cum vellent inter loquendum exemplum proponere rei valde detestandæ, nostram miseriam in medium adferrent. *Posuisti etiam nos commotionem capitis in populis*, id est, fecisti, ut populi gentium non solum irrisione verborum, sed etiam capitis agitatione nos detestarentur, vel irriderent.

*Tota die verecundia mea contra me est, & confusio faciei meae cooperuit me.*  
*A voce exprobrantis, & obloquentis, à facie inimici, & persequentis.*

Explicat effectum irrisionum, qui sine dubio ingens confusio, & verecundia erat. *Tota die*, inquit, *verecundia mea contra me est, & confusio faciei meae cooperuit me*, id est, omni tempore huius persecutionis verecundia mea in conspectu meo est, semper video confusionem meam, quæ confusio faciei meae totum me quasi velo quodam cooperuit. Oritur autem hæc tota confusio à voce exprobrantis, & obloquentis, id est, ab ijs, qui mihi exprobrant stultitiam, quod Crucifixum colam, exprobrant impietatem, quod Deos non venerer, exprobrant falsa crimina, infanticidia, incestus, & similia, & de his inter se obloquuntur. Explicat autem qui sint isti exprobrantes, & obloquentes, cum addit, *à facie inimici & persequentis*. Sed videtur hæc verecundia, & confusio non cōuenire sanctis Martyribus, cum scriptum sit, *Qui erubuerit me, hunc filius hominis erubescet cum venerit in maiestate sua*, & *Petrus*, Luc. 9. & *Qui me confessus fuerit, & filius hominis consitebitur eum, cum venerit in gloria Patris sui cum Angelis sanctis*. Marci 8. Caterum Dominus non prohibet quamcunque verecundiam, & confusionem; sed eam, quæ impedit confessionem. Illi enim reprehenduntur, qui ab huiusmodi verecundia superati, Christum confiteri non audebant, vel etiam ad negandum adigebantur: Istos autem de quibus in hoc Psalmo agitur.



eur, non fuisse à verecundia victos, docent  
verba sequentia.

XIX.

*Hac omnia venerunt super nos, nec  
obliti sumus te, & inique non egimus in  
testamento tuo.*

Post explicata beneficia Dei erga Patres  
antiquos, & destitutionem, ac derelictionem  
populi iunioris; subiungit Propheta  
in persona eiusdem populi, causam huius  
derelictionis non posse tribui peccatis suis:  
vnde colligitur ratio admirationis, & que-  
rimoniae. Sic igitur loquitur, *Hac omnia ve-  
nerunt super nos*, id est, has angustias, & tri-  
bulationes passi sumus; & tamen *non obliti  
sumus te*, id est, non dimisimus te, ut colere-  
mus Deos alienos: solet enim Scriptura  
conungere obliuionem Dei cum idolola-  
tria. Psalm. 105. *Mutauerunt gloriam suam in  
similitudinem vituli comedentis fœnum, ob-  
liti sunt Deum, qui saluauit eos.* & Deut. 32.  
*Immolauerunt demonibus, & non Deo: Deū,  
qui te genuit, dereliquisti, & oblitus es domi-  
ni creatoris tui.* Et in hoc ipso Psalm. Si ob-  
liti sumus nomen Dei nostri, & si expandimus  
manus nostras ad Deum alienum. Isti igitur  
affirmant, se non coluisse Deos alienos; ideo  
aiunt, *obliti nō sumus te, & iniq. non egimus  
in testamento tuo*, id est, non solum non ad-  
hæsimus Dijs alienis obliuiscences te Deū  
verum; sed neque iniquitatem fecimus con-  
tra pactum, quod pepigimus tecum in Sina,  
ut seruarem legem tuam: nam testamen-  
tum hoc loco, ut est clarius in Hebræo, pa-  
ctum significat. Itaque protestantur, se  
Deum non reliquisse, neque in legem eius  
peccasse.

XX.

*Et non recessit retro cor nostrum, &  
declinasti semitas nostras à via tua.*

Idem repetunt alijs verbis, ut magis in-  
nocentiam suam declarent. *Et non recessit re-  
tro cor nostrum*, idem est quod, *obliti non su-  
mus te*, id est, cum tecum ambularem ex  
corde adherentes tibi, non recessimus retro,  
neque te deseruimus. Illud autem, & *decli-*

*nasti semitas nostras à via tua*, requirit repe-  
titionem præcedentis negationis, ut sensus  
sit, *non recessit retro cor nostrum, & non declina-  
sti semitas nostras à via tua*, id est, nō permi-  
sisti, ut gressus nostri declinarent à via tua,  
id est, à lege tua, quod est idem cum illo, &  
*inique non egimus in testamento tuo*. S. Hiero-  
nymus clarissime vertit ex Hebræo, *Et non  
declinauerunt semita nostra à via tua*: quam-  
uis enim in Hebræo non habeatur negatio,  
& verbum, declinasti, sit in secunda persona  
singulari: tamen voluit sanctus Hieronymus  
sententiam reddere, non verba. Alij quoque  
interpretes, ut notat S. Ioannes Chrysosto-  
mus, addiderunt negationem. LXX. In-  
terpretes, quos sequitur editio vulgata,  
non posuerunt in textu suo negationem,  
quia non inuenerunt in originali, sed tamen  
ea subintelligenda est, ut in multis alijs locis.  
Quod si quis omnino velit affirmatiue ex-  
ponere illud, & *declinasti semitas nostras à  
via tua*; poterit per viam Domini, intell. ge-  
re viam misericordiae, & gratiae: nam *uni-  
uersa via Domini misericordia, & veritas*, ait  
alibi idem Propheta. Itaque sensus erit, de-  
clinasti semitas nostras à via misericordiae  
tuae, à fauore, à gratia, ab auxilio tuo in tri-  
bulationibus nostris; cum qua expositione  
saris conueniunt quæ sequuntur.

*Quoniam humiliasti nos in loco affli-  
ctionis, & cooperuit nos umbra mortis.*

XXI.

Si sequamur posteriorem expositionem  
verficuli superioris, verficulus præfens de-  
clarabit quomodo declinauerit Deus semi-  
tas populi sui à via sua; quoniam videlicet,  
*humiliauit eum in loco afflictionis*: si vero se-  
quamur priorem expositionem; particula,  
*quoniam*, vel redundabit, ut non semel in  
Scriptura sacra redundat, vel reddet causam  
sententiæ sequentis, non præcedentis, hoc  
modo, *Quoniam humiliasti nos in loco affli-  
ctionis, ideo & cooperuit nos umbra mortis*.  
Porro humiliare aliquem in loco afflictio-  
nis, est deicere illum in profundum miseria-  
rum: ponitur enim, *in loco*, pro, in loco.  
S. Hieronymus vertit ex Hebræo in locum



תנ"ס

draconum. Et vere vox, *tannim*, quæ est in textu Hebraico, dracones significat. Sed videntur Septuaginta sensum vertisse, nõ verbum. Loca enim draconum sunt loca cauernosa, deserta, horrentia, ac per hoc loca afflictionis: & quoniam loca afflictionis obscura sunt, & tenebrosa, vt cauernæ putei, terti carceres; ideo addit, *& cooperuit nos umbra mortis*, id est, operuerunt nos tenebræ, & ingens obscuritas. Quæ omnia metaphoræ sunt, quibus tribulationis, & persecutionis magnitudo significatur. Vocabulum, *umbra mortis*, frequentissimum est in Scripturis vtriusque Testamenti, & vt plurimum coniungitur cum vocabulo, *tenebrarum*, vt est videre Iob. 3. Psalm. 87. & 106. Isaia 9. Matt. 4. Luc. 1. & nihil aliud significat, nisi magnam obscuritatem. Dicitur autem obscuritas ymbra mortis, quoniam in morte extinguitur vita, quæ est quasi lumen quoddam, vnde extincta vita solum tenebræ relinquantur. S. Augustinus dicit, mortalitatem esse ymbra mortis, id est, imaginem mortis; mortem autem veram esse damnationem cum diabolo, quæ dicitur mors aeterna.

Concludit populus Dei petens à Deo finem persecutionis. *Quoniam*, inquit, *propter te mortificamur tota die*, id est, quoniam propter confessionem nominis tui, quotidie morti tradimur, multi quotidie occiduntur ex nobis. *Æstimati sumus sicut oues occisionis*, id est, similes facti sumus ouibus destinationis ad maculationem, quæ sine resistentia, vel misericordia iugulantur. *Exurge, quare obdormis Domine*, id est, cum causa tua hic agatur, & serui tanta patiantur, cur tu siles, quasi dormiens non aduerteres? *Exurge a somno*, id est, fac quod illi faciunt, qui surgunt à somno, & incipiunt videre, quod antea non videbāt. *Exurge in auxilium nostrum*, & ne repellas nos ab adiutorio tuo in finem, id est, vsq; ad consummationem, finiatur tandem te opem ferente persecutio. Hunc locum adduxit Apostolus ad Rom. 8. *Quis*, inquit, *nos separabit à charitate Christi*? tribulatio? an angustia? an fames? an nuditas? an periculum? an persecutio? an gladius? sicut scriptum est, quia propter te mortificamur tota die, *æstimati sumus sicut oues occisionis*.

XXII.

*Si obliti sumus nomen Dei nostri, & si expandimus manus nostras ad Deum alienum.*

XXIII.

*Nonne Deus requireret ista? ipse enim nouit abscondita cordis.*

Probant, qui in hoc Psalmo loquuntur, testimonio Dei, se re vera non esse oblitos Domini, vt supra dixerunt. Dicunt enim, *Si obliti sumus nomen Dei nostri, & si expandimus manus nostras ad Deum alienum*, deprecandum, *nonne Deus requireret ista?* quasi dicant, certe requireret, & inueniet an ita sit. Ipse enim nouit abscondita cordis. Sed profecto inueniet, nos oblitos non esse nomen ipsius.

XXIV.

*Quoniam propter te mortificamur tota die, æstimati sumus sicut oues occisionis.*

XXV.

*Exurge, quare obdormis Domine? exurge, & ne repellas in finem.*

*Quare faciem tuam auertis, obliuisceris, inopia nostra, & tribulationis nostra?*

Pergit in eadem oratione, & vtitur duabus alijs metaphoris: nam in versu supetiore sumpsit similitudinem à somno, nunc sumit ab auersione faciei, & ab obliuione, quorum neutrum cadit in Deum. Dicitur tamen Deus auertere faciem, quando non iuuat, quasi non videret miseriam nostram: & dicitur etiam obliuisci, quando non succurrit egentibus auxilio, & tribulatis, quasi esset oblitus eorum.

*Quoniam humiliata est in puluere anima nostra, conglutinatæ sunt in terra venter noster.*

In eadem oratione persistens, & sciens, orationem humiliantis se grauissimam esse Deo, dicit, se humiliatum vsq; ad summum, vt magis humiliari non possit. Qui enim stans orat, potest humiliari accedendo genibus,

XXVI.

XXVII.



nua; & qui genibus flexis orat, potest adhuc humiliari prosteruendo se totum ad terram; sed qui humi prostratus orat, non habet, quo descendat, ut magis humilietur. Porro humiliari potest homo corde, & corpore vsque ad terram; corde, si vere cogitet, & intelligat; & fateatur se puluerem esse, quo modo orabat Abraham cum diceret, *Loquar ad Dominum meum, cum sim pulvis & cinis*, Genes. 18. corpore autem, si ad terram prostratus oret, quod de Christo Domino referunt Matthæus cap. 26. & Marcus cap. 14. *Procidit, inquit, in faciem suam super terram*, dicens, &c. neque obstat quod Lucas cap. 22. dicat, *Positis genibus orauit*: nam positis genibus orare cepit, deinde procidit in terram. Vtramque humilitatem præ se ferunt, qui in hoc Psalmo dicunt, *Quando humiliata est in puluere anima nostra, conglutinator est in terra venter noster*, id est, cognoscimus nos puluerem esse, & vere adhæsit in terra venter noster, dum toto corpore prostrati oramus te. Possunt etiam hæc omnia referri ad magnitudinem persecutionis, per quam redacti erant ad extremam, & summam ignominiam, & contemptum.

*Exurge Domine, adiuua nos, & redime nos propter nomen tuum.*

Addunt ultimam, & efficacissimam rationem, cur Deus moueri debeat ad misericordiam erga populum suum; ne videlicet blasphemetur amplius nomen ipsius. *Exurge, inquit, adiuua nos in hac tribulatione, & redime*, id est, libera nos propter nomen tuum, id est, ut non blasphemetur, sed gloriificetur nomen tuum: & sicut sine pretio vendidisti nos, ita sine pretio redime, non ob nostra merita, sed propter nomen tuum, propter misericordiam, & benignitatem tuam. Ad maiorem intelligentiam huius Psalmi videntur expediendæ quæstiuncula quædam, quæ lectori facile possent occurrere.

Prima quæstio est: Cur ij, qui in hoc Psalmo loquuntur, querantur se sine culpa sua puniri, cum alij Sancti persecutiones pec-

catis suis imputare soleant: nam Daniel cap. 9. loquens de captiuitate Babylonica dicit, *Peccauimus, inique fecimus, impie egimus, & recessimus; & declinauimus à mandatis tuis, & iudicijs tuis*. Et tres pueri sancti in fornacem ignis coniecti, & à Deo mirabiliter liberati, consentientur hoc modo Daniel. 3. *Iudicia vera fecisti iuxta omnia, quæ induxisti super nos, & super ciuitatem sanctam Ierusalem; peccauimus enim, & inique egimus recedentes à te, deliquimus in omnibus*. Eadem est vox sanctorum Machabæorum lib. 2. cap. 7. *Nos, inquit, propter nos ipsos hæc patimur, peccantes in Deum nostrum*. Eadem dicit de persecutionibus Christianorum sanctus Cyprianus in serm. quinto, qui est de lapsis. Respondeo, negari non posse, quin ob peccata populi Deus persecutiones excitari permittat. Caterum sancti Viri variis modis loquuntur: aliquando enim suscipiunt personam membrorum infirmorum (vnum enim corpus sumus, alter alterius membra,) & peccata fratrum suorum sibi tribuunt: quo modo sæpe lingua confitetur quasi peccata sua, quæ tamen à membris alijs patrata sunt: aliquando vero induunt personam perfectorum, & sanctorum, qui re verà puniuntur in communi persecutione sine propria culpa. Sic igitur Scripturæ allatæ inter se non pugnant: nam Daniel, tres pueri, & sancti Machabæi loquebantur in persona membrorum infirmorum; isti vero qui in hoc Psalmo loquuntur, personam innocentium, & Sanctorum induerunt.

Secunda quæstio: Cur Deus innocentes puniri sinat, cum propter iniquos persecutionem excitari permittat? Respondeo, Innocentes in persecutione, non proprie puniri, sed probari: vult enim Deus per atrocitatem persecutionis, quasi per ignem conflatorij, vel per ventilabrum aræ, purgare Ecclesiam suam, & efficere, ut appareant qui sint veri, qui ficti fideles; qui sint aurum, qui aurichalchum; qui frumentum, qui paleæ. Tribulatio, inquit Apostolus Rom. 5. probationem operatur, & in lib. Sap. cap. 3. *Deus tentauit eos, & inuenit eos dignos se: tanquam aurum in fornace probauit illos*.



Tertia quæstio: Cur ergo Sancti queruntur de persecutione, & eam cito finiri precantur? Respondeo, quia tribulationem tolerare iubemur, non amare, & nemo quod tolerat amat, etsi tolerare amet: quamvis enim gaudeat se tolerare; tamen mauult non esse, quod toleret; ut scripsit S. Augustinus in lib. 10. Confess. cap. 28. Deinde, quia persecutio, atque tentatio periculosa est; cum sit incerta victoria, & Sancti de se non presumant.

Quarta quæstio: Cur Deus, ut in hoc Psalmi dicitur, aliquando populo suo tribuit temporalia bona, & victoriam de inimicis; aliquando è contrario aufert eadem temporalia bona, & populum suum ab hostibus vinci, ac debellari finit? Respondeo, ut omnes intelligant bona temporalia à Deo dari; non à dæmonibus, vel à fato, aut fortuna, id eo tribuit illa amicis suis, quando ita expedire iudicat. Ut autem amici Dei non hæreant temporalibus bonis, neque ament stabulum pro domo, & exilium pro patria: sæpe illis eripit eiusmodi bona: ut in explicatione Psalmi quadragesimi, versu tertio fusius explicauimus.

miseram & mortalem ducebant vitam in terris, acturi erant felicem, & sempiternam in cælis. Per dilectum, intelligunt omnes Christum, de quo non semel Pater cælestis ait, Matth. 3. & 7. Hic est Filius meus dilectus; & quem nemo nouit, qui non ardentissime diligit; cum totus sit suauis, & pulcher, quippe speculum sine macula, & candor lucis æternæ. ut legitur Sap. 7. Sensus igitur tituli hic erit, Canticum datum filiis Core ad intelligentem, & sapienter canendum usque in finem, cuius materia est, pro ijs, qui commutabuntur, & pro dilecto, id est, pro Ecclesia, & pro Christo, pro Sponsa, & Sponso. In Hebræo legitur, pro lilijs, ubi nos habemus pro ijs, qui commutabuntur, sed vox Hebræica, Iosannim, utrumque significare potest, videlicet lilia, & qui commutabuntur, ut S. Hieronymus facietur in epistola ad Principiam Virginem, in qua totum hunc Psalmum diligenter explanat: & satis commode, qui commutandi sunt, lilia dici possunt; cum de Ecclesia, qua est multitudo commutandorum, dicat Sponsus in Cantico cap. 2. Sicut lilium inter spinas, sic amica mea inter filias.

לילים

## EXPLICAT. PSAL. XLIV.

## PSALM. XLIV.

## Titulus, &amp; Argumentum.

In finem, pro ijs, qui commutabuntur, filiis Core ad intellectum, Canticum pro dilecto.

**S**umma confessione docent omnes expositiones Latini, Græci, Hebræi, Psalmum hunc continere laudes Messie, & sponsa eius Ecclesie, ut sit quasi spirituale epithalamium, & huic argumento titulus satis apte respondet: nam per eos, qui commutabuntur, intelligit Prophetam fideles populos, qui Ecclesiam faciunt; dicuntur autem commutandi, quia mutandi erant per iustificationem in hoc saculo, & per resurrectionem in alio: qui enim adorabant idola, adoraturi erant Deum verum, & qui

**E**ruit aut cor meum verbum bonum, dico ego opera mea Regi.  
Lingua mea calamus scribæ, velociter scribentis.

I.

II.

Hi duo versiculi continent præfationem totius Psalmi. in qua præfatione Prophetia docet, hunc Psalmum esse meram prophetiam à Spiritu sancto dictatam, nihilque hic esse ab ingenio suo elaboratum: quamvis enim omnis diuina Scriptura sit verbum Dei, & à Spiritu sancto inspirata; tamen multum interest inter prophetias, & historias, vel epistolas: nam in edendis Prophetiis sancti scriptores non laborabant cogitando, & discutendo, & ad memoriam aliquid reuocando; sed simpliciter loquebantur, vel scribebant quæ Deus illis ostendebat: quod de Hieremia testatur Baruch, Hierem. 36. quod videlicet ita loqueretur, ac si in libro aliquo legeret, quod dicebat. Sed cum Sacri scriptores scri-



scribentibus historias, vel epistolas; inspirabat quidem illis Deus scribendi voluntatem, eosque dirigebat, ut recte, & sine errore vlllo scriberent; sic tamen ut etiam ipsi memoriam exercerent, & ingenium, ut recordarentur res gestas, & cogitarent rationem, & ordinem scribendi: quod de se testatur auctor libri secundi Machabæorum cap. 2. David igitur cum in Psalmis cantabat historias beneficiorum Dei, vel calamitatum suarum, aut etiam totius populi; memoriam, & ingenium exercebat, & non sine proprio labore Psalmos componebat; quamvis à Deo semper excitaretur, & dirigeretur: cum autem meras prophetias caneret, vel scriberet, ut in hoc Psalmo fecit, nihil suum agnoscebat, nisi simplex lingua, vel manus ministerium. Hoc igitur est quod in hac præfatione dicit, quod ipse idem clarius explicuit in 2. lib. Reg. cap. 23. cum ait, *Spiritus Domini loquutus est per me, & sermo eius per linguam meam.* Ait igitur, *Eruit aut cor meum verbum bonum*, id est, mēs mea ex plenitudine, & copia illustrationis diuinæ, & celestium reuelationum protulit foras ad aures hominum Psalmum hunc, qui continet verbum bonum, sermonem videlicet gratum, & salutare omnibus. Sed ad maiorem explicationem notanda sunt aliqua. Primo, vsum esse Prophetam vocabulo eruendi, ut ostenderet se non propria voluntate, & propria inuentione in hoc Psalmo loqui: ructus enim non emittitur voluntarie, & ex electione, sed velut, nolit homo, ex plenitudine stomachi erumpit. Secundo, voluisse etiam Prophetam ostendere, se non omnia, quæ Deo illustrante cognouit, in hoc Psalmo expressisse; sed modicum quid ex illa plenitudine protulisse: ructus enim signū est repletionis, sed est exiguus status ab illa repletionem foras erumpens. Multa enim Prophetæ vident, quæ non licet homini loqui. Vnde, & Isaias dicebat, *Secretum meum mihi*, Isai. 24. Et qui reuelationes à Deo percipiunt, id ut plurimum fateri solent, se non habere vocabula, quibus eas reuelationes ita explicent, ut ipsi eas vident: & fortasse hac de causa Propheta dixit, *verbum bonum eru-*

*itasse cor suum*; non verba bona in numero multitudinis. Tertiò, verbum bonum vocari hunc Psalmum, quia non continet prophetiam rerum malarum, ut exitij ciuitatis, captiuitatis populi, & similia, quæ passim à Prophetis prædici solebant; sed prædictionem rerum secundarum, & felicitium, quæ magnam lætitiā, & voluptatem sint allaturæ. Quarto, Deum in his verbis ita descripsisse emanationem huius verbi ex corde Davidis, ut alluserit ad productionem Verbi æterni, & voluerit nos quasi manu ducere ad intelligentiam generationis æternæ Verbi diuini: vere enim Pater æternus non eguit auxilio coniugis ad filium producendum; neque eum ex electione produxit; neque plures filios genuit; sed ex plenitudine cordis, siue ex perfectissima intelligentia Verbum mentis, & Verbum vnicum, idque summe bonum naturaliter produxit, ut proprie dicere potuerit, *Eruit aut cor meum verbum bonum.* Sequitur, *dico ego opera mea Regi*: non defunt, qui ista verba sic exponant, *dico ego opera mea Regi*, id est, confiteor peccata mea Deo: vel dico carmina ista de Rege; vel, consacro opus meum Regi; vel, alloquor in hoc Psalmo Regem; quas expositiones, vt non reprehendo; sic existimo nostram explicationem melius connecti cum verbis præcedentibus, & sequentibus: nostra enim opinio ne hæc pars secunda primi versiculi, reddit rationem, cur David dixerit, *Eruit aut cor meum verbum bonum*; est enim ac si diceret, Ego simpliciter confiteor Regi meo, qui est Deus, omnia opera mea; & non mihi tribuo; quod non est meum; ideo non dixi, *Ego Psalmum istum scripsi*, sed, *eruic aut cor meum verbum bonum*, id est, non ex electione mea prodiit, sed ex plenitudine illustrationis tuæ. Quod clarissime explicatur in sequenti versiculo, cum dicitur, *Lingua mea calamus scriba velociter scribens*, id est, lingua mea protulit hunc Psalmum, sed id fecit, non ut lingua mea, non vt membrum corporis mei, quod ad imperium voluntatis meæ mouetur, sed vt calamus Spiritus sancti, tanquam scribæ velociter



citer scribentis. Dicit autem, linguam suam, esse calamus scribæ velociter scribentis, & non dicit, linguam suam, esse linguam spiritus velociter loquentis; quia vult ostendere linguam suam in prophetia edenda esse instrumentum separatum, ut re vera est calamus; & non instrumentum coniunctum, ut sunt membra corporis, vel, significare voluit, prophetiam hanc non abituram in ventum, ut quæ ore pronuntiantur; sed perpetuo mansuram, ut quæ calamo exarantur. Illud autem, *velociter scribentis*, significat, Spiritum sanctum non egere tempore ad considerandum quid, & quomodo scribendum sit; illi enim tarde scribunt, qui inter scribendum cogitant, quam sententiam, & quibus verbis scribere debeant.

III. *Speciosus forma præ filiis hominum, diffusa est gratia in labijs tuis, propterea benedixit te Deus in æternum.*

Incipit Christum laudare, ac primum à pulchritudine laudat, deinde ab eloquentia, tum à fortitudine & robore, tertio à virtutibus animi, postremo à diuina & regia dignitate, & potestate, quibus addit etiam exteriora, videlicet vestimenterum, & palatij nobilitatem. Incipit autem à pulchritudine, vel quia describit Sponsum, & in Sponso pulchritudo potissimum desideratur: vel quia progreditur à minoribus ad maiora, & pulchritudo eloquentiæ cedit, eloquentia robori, robor virtutibus, virtutes diuinitati. Ait igitur, *speciosus forma præ filiis hominum*. Videtur abrupta sententia, & obscura, cum non addiderit, quis sit iste speciosus; sed, ut supra notauimus, ideo dictum est, *eructauit cor meum verbum bonum*, id est, ex plenitudine contemplationis aliquid foras emanauit, non omnia. Sensus igitur est, Non mirum est, si tu Christe dilectus dicaris, nam *speciosus forma es præ filiis hominum*: dicit autem, *præ filiis hominum*, & non addit præ spiritibus angelicis; quoniam Deus Verbum non Angelus, sed homo factus est, ac si dicat, tu dilecte homo es,

sed speciosus forma supra homines. Et vere Christus supra homines formosus est: nam si respicias diuinitatem, infinita pulchritudine præditum videbis; si respicias spiritualem animæ pulchritudinem, speciosus Christus est præ omnibus spiritibus creatis; si respicias splendorem corporis eius glorificari, pulchrior sole est, & pulchritudinem eius sol, & luna mirantur. Sequitur, *diffusa est gratia in labijs tuis*: quibus verbis laudat eundem Christum à gratia sermonis, qui mirum in modum pulchritudinē ipsam commendat. Dicitur autem, *diffusa gratia in labijs*, ut ostendatur permanens, & naturalis fuisse Christo gratia sermonis, non acquisita per studium, aut exercitationem. In Euangelis legimus Luc. 4. *Mirabantur in verbis gratia, quæ procedebant de ore ipsius*. Et Ioan. 7. *Nunquam sic loquutus est homo, sicut hic homo*. Experti sunt sanctus Petrus, sanctus Andreas, sanctus Iacobus, sanctus Ioannes, sanctus Philippus, sed præcipue sanctus Matthæus vim verborum eius, & energiam in sermone eius latentem, qui ad simplicem vocationem subito efficacissime tracti, & persuasi relictis omnibus sequuti sunt eum. Sed mirabilis est, quod voci eius ventii, & mare, & ipsæ febres, ac denique mortui obediabant: quanquam nec mirabile videri debet, si verbum substantiale, & diuinum, per carnem assumptam verba gratiæ efficacissima & suauissima loqueretur. Sequitur, *Propterea benedixit te Deus in æternum*. Possunt hæc duplicem sensum facere, & utrumque rectum: potest enim accipi illud propterea, pro quia, siue, propterea quod, ut sensus sit, *speciosus est præ filiis hominum, & diffusa est gratia in labijs tuis*, propterea quod benedixit te Deus in æternum; ut benedictio Dei æterna sit causa tantæ pulchritudinis, & tantæ gratiæ. Significatur autem per benedictionē hoc loco gratia vniōis hypostaticæ, quæ in æternum duratura est; inde enim tanquam ex fonte manauerunt omnia dona, quæ in Christi humanitatem copiosissime fusa sunt. Sed potest etiā, ut Chrysostomus, & alij exponunt, simpliciter accipi, *propterea*, pro particula significante effectum, ut sen-



ſensus ſit, quia *ſpecioſus es præ filiis hominum*, & *diffuſa eſt gratia in labijs tuis*, propterea *benedixit te Deus in æternum*, id eſt, quia amabilis, & gratioſus es præ omnibus, ideo te Deus præ omnibus dilexit, & benedixit in æternum. Ex quibus verbis non debet cõligi, Chriſtum non fuiſſe amatum, & benedictum à Patre, antequam appareret eius pulchritudo, & gratia ſermonis; ſed hæc fuiſſe meritum, ſive titulum nouum amoris: quo modo dicit ipſe Chriſtus Ioan. 10. *Propterea diligit me Pater, quia ego pono animam meam, ut iterum ſumam eam*. Et iterum Philip. 2. *Humiliauit ſemetipſum uſque ad mortem, mortem autem Crucis: propter quod, & Deus exaltauit illum, & donauit illi nomen, quod eſt ſuper omne nomen*. Videtur tamen prior expoſitio anteponenda.

IV.

*Accingere gladio tuo ſuper femur tuum potentiſſime.*

Transit à laude pulchritudinis, & facundia ad laudem fortitudinis militaris, & poetico more non ſimpliciter narrat; ſed per modum precantis, ſive inuitantis dicit, *Accingere gladio tuo ſuper femur tuum potentiſſime*: id eſt, Eia dilecte Deo, qui non ſolum ſpecioſiſſimus, & gratioſiſſimus, ſed etiam potentiſſimus, & robuſtiſſimus es, accingere armis tuis, & veni, libera populum tuum. Quæ ſint autem arma eius, explicat in ſequenti verſiculo, dicens:

V.

*Specie tua, & pulchritudine tua intende, proſpere procede, & regna.*

Verba illa, *Specie tua, & pulchritudine tua*, coniungi poſſunt cum præcedentibus, ut ſit ſensus, *Accingere gladio tuo, potentiſſime ſpecie tua, & pulchritudine tua*. Poſſunt etiam coniungi cum ſequentibus, ut ſensus ſit, *Specie tua, & pulchritudine tua intende, proſpere procede, & regna*: ſed utroque modo ſignificatur, arma Chriſti eſſe ſpeciem, & pulchritudinem ipſius. Quod ut intelligatur, conſiderandum eſt, pulchritudinem veram, & ſummam, ut Auguſtinus loquitur, eſſe pulchritudinem ſpiritualem, quæ

nunquam marceſcit, & quæ placet oculis, non hominum ſolum, ſed etiam Angelorum, & ipſius Dei, qui falli non poſſet. Poſſet autem pulchritudo ſpirituſualis cognosceſi ex pulchritudine corporali. Sicut enim corporum pulchritudo conſiſtit in proportionem membrorum; & ſuauiſſe coloris; ita pulchritudo ſpirituſualis conſiſtit in iuſtitia, quæ eſt proportio quædam; & ſapientia, quæ ſplendet inſtar lucis, vel potius, ut Sapiens, loquitur, *luci comparata inuenitur prior*. Illa igitur eſt anima pulcherriſſima, quæ habet in voluntate iuſtitiam, in intellectu ſapientiam, Hæc autem duo, & pulchram reddunt animam, ac per hoc amabilem Deo; & ſimul arma ſunt potentiſſima, quibus Chriſtus Diabolum ſuperauit: pugnauit enim cum Diabolo Chriſtus, non ſua omnipotentia, ut poterat, ſed ſapientia & iuſtitia; ſapientia vincens aſtutiam, & iuſtitia vincens malitiam. Diabolus enim aſtutia ſua primum hominem impulit, ut per inobedientiam Deum irritaret, & Deo quidem honorem, ſibi autem & toti humano generi vitam beatam detraxeret, cum hac autem aſtutia, malitia, ſive inuidia coniuncta fuit; id enim fecit Diabolus, quia torquebatur inuidia, quod homo ad cælum aliquando aſcenſurus videretur, unde ipſe deciderat. Sed Chriſti ſapientia vicit aſtutiam, quoniam per obedientiam ſuam in natura humana Deo exhibitam, reddidit honorem Deo multo maiorem, quam per inobedientiam Adami amiſerat: & ſimul per eandem obedientiam exaltauit genus humanum ad gloriam multo ſublimiorem, quam ea futura eſſet, ex qua exciderat. Chriſtus præterea charitate ſua, quæ eſt vera, & perfecta iuſtitia, vicit inuidiam, & malitiam Diaboli, quoniam inimicos dilexit, & in ipſa cruce pro perſecutoribus orauit, & pati ac mori voluit, ut inimicos ſuos Deo reconciliaret, & ex inimicis amicos & fratres, & cohæredes ſuos efficeret. Hoc eſt igitur quod nunc dicit, *Specie tua & pulchritudine tua*, id eſt, decore tuo, qui in ſpecie ſapientiæ, & pulchritudine iuſtitie conſiſtit, quaſi gladio; & arcu

Hh

accin-



accinctus, & instructus intende, prospere procede, & regna, id est, dirige cursum tuum ad praelium contra Diabolum, prospere in praelio, & deuictus, ac debellato Principe huius mundi, acquire tibi Regnum, vt tu deinceps in cordibus hominum per fidem & charitatem regnes. Per verbum, *intende*, S. Ioannes Chrylost. exponit, intende sagittas, quæ expositio probabilis est, quia paulo post dicitur, sagittæ tuæ acutæ. Illud est certum ex textu originali, per, *intende*, non posse recte exponi attende, vel considera, sed solum, *intende sagittas*, aut intende seu dirige iter. Quod attinet ad verba, ex Hebræo S. Hieronymus sic reddit, *gloria tua, & decore tuo: & decore tuo prospere ascende*. Sed LXX. Interpretes aliter acceperunt, vel aliter legerunt easdem voces Hebraicas, eisdem literis seruatis. Vbi enim Hebræi repetunt, decore tuo, quia legunt, *vahadarecha*, Septuaginta legerunt *vahadrech*, quod significat, *& intende*, siue dirige, à voce, *darach*. Et vocem, *tselach*, quam S. Hieronym. accepit pro adverbio, & reddidit, prospere: Septuaginta acceperunt pro verbo imperatiui modi, & verterunt, *prospere procede*, siue *prospere*. Et vere vox illa utroque modo accipi potest. Denique, vocem, *recab*, quam sanctus Hieronymus recte vertit, *ascende*, Septuaginta verterunt, *regna*, quia sensum potius respexerunt, quam verbum: nam per ascensionem, regnum interpretati sunt. Potest etiam eadem vox Hebraica, & magis adhuc proprie significare, *sede in curru*, vel in *equo*, quæ ad regnum referri possunt. Nam cum Reges inaugurabantur, equum regium, vel mulam regiam equitabant, vt colligitur ex primo capite libri tertij Regum: & sedere in curru triumphali proprium est Regum, qui hostes praelio vicerunt.

VI.

*Propter veritatem, & mansuetudinem, & iustitiam, & deducet te mirabiliter dextera tua.*

Explicat rationem, cur Christus merito regnare debeat; quia videlicet habet virtutes regias: ac si diceret, *prospere procede*,

*& regna, propter veritatem, & mansuetudinem, & iustitiam*, id est, quia non desunt tibi regis virtutes. Hebræus codex clarius explicat hunc locum, vt possit esse vice commentarij, sic enim habet: *propter verbum veritatis, & mansuetudinem iustitiae*. Ex quibus verbis docemur, duo esse necessaria Regi, vt sit verax, siue fidelis in verbis suis; & iustus in operibus suis: quod etiam de Deo summo Rege dicitur in Psalmis, *fidelis deus in omnibus verbis suis, & sanctus in omnibus operibus suis*. Sed quia iustitia iudicis solet habere annexam asperitatem, quæ est quasi natus iustitiæ; ideo Christi iustitia, quæ perfectissima est, adiungitur, mansuetudo. Est enim Christus mansuete iustus, id est, iustissime iudicat, sed sine morositate, sine asperitate, sine arrogantia; non absterret, sed conciliat sibi subditos. Sic igitur verba nostræ editionis explicanda sunt, *regna propter veritatem*, quam in verbis, & promissis tuis semper obseruas: *& mansuetudinem, & iustitiam*, id est, & propter mansuetudinem, quam iustitiæ semper admisces. Et deducet te mirabiliter dextera tua, id est, & cum his virtutibus regnans, mirabiles progressus regni tui videbis, neque egebis auxilio aliorum, sed ipsa dextera tua, virtus, & potentia tua per se sufficit, vt mirabiliter te deducat, & progredi faciat in Regno amplificando, donec ponas omnes inimicos tuos sub scabellum pedum tuorum. In Hebræo legitur paulo aliter quoad verba, sed sensus est idem. Sic enim S. Hieronymus vertit, *Et docebit te terribilis dextera tua*, id est, dextera tua vincens, ac sternens hostes docebit te, id est, ostendet tibi, ac cernere te faciet terribiles euentus, strages videlicet, inimicorum tuorum.

*Sagittæ tuæ acutæ (populi sub te cadent) in corda inimicorum Regis.*

VII.

Explicat modum, quo dextera Regis Christi deductura sit ipsum in amplificando imperio, dicens, id fiet, quia sagittæ, quas iaculaberis dextera tua, acutissimæ sunt, & ideo



ideo penetrabunt inimicorum tuorum corda, & populi, ipsi inimici sub te cadent, & tuæ subicientur potestati. Nomine sagittarum intelliguntur verba Dei, siue prædicatio verbi Dei: hoc enim est generale institutum, quo Christus vititur ad Regnum suum propagandum: hinc enim ipse dicit in Psal. 2. *Ego autem constitutus sum Rex ab eo super montem sanctum eius prædicans præceptum eius.* Dicitur autem verbum Dei & gladius, & sagitta, & malleus, & similia, quia cum omnibus armis similitudinem habet. Dicitur autem, sagitta acuta, quia magnam habet efficaciam penetrandi corda, & multo maiorem, quam habet humana cuiusvis magni oratoris eloquentia. *Vivus est enim*, ut Apostolus ait ad Hebr. 4. *Sermo Dei, & efficax, & penetrabilior omni gladio ancipiti.* Illud autem, *populi sub te cadent*, per parenthesis legendum est; & dicuntur populi sagittis vulnerati eadere sub isto Rege, quia non vulnerantur, ut omnino extinguantur; sed ut moriantur peccato, & vivant iustitiæ, & eo modo subiecti Regi Christo remaneant, & eique serviant, cui servire regnare est. Illud denique, *in corda inimicorum Regis*, in Hebræo, & Græco codice, & in multis latinis manuscriptis, legitur, *in corde*, non *in corda*: sed parum refert, utrum legatur in corde, vel in corda: nam & verum est sagittas verbi Dei penetrare corda peccatorum, & verum est easdem sagittas semel in corde infixas ibidem hærere, & vulnus amoris alere, & conservare, & eo modo ex inimicis, & peccatoribus, amicos & sanctos facere. In Græcis codicibus legitur, *sagitta tua acuta potentissime*: sed illud, potentissime, non habetur in Hebræo. Ex quo intelligimus, auctorem Latinæ vulgatæ editionis codicem Græcum emendatorem habuisse, quam sint ij, qui nunc circumferuntur, vel certe animadvertisse, illam vocem non esse à LXX. Interpretibus in textu positam, sed aliunde irrepisse.

VIII.

*Sedes tua Deus in saculum saculi, virga directionis, virga Regni tui.*

Venit tandem ad supremam dignitatem Messiae, & apertissime vocat eum Deus, & sedem Regni eius æternam esse dicit; quem locum sanctus Paulus ad Heb. 1. adduxit ad probandum Christum tanto esse Angelis maiorem, quanto maior est Dominus servus, & Deus rebus creatis. Ait igitur, *Sedes tua*, ô Christe Deus non temporalis erit, ut fuit Davidis, & Salomonis; sed manebit in saculum saculi. *Et virga regni tui*, id est, sceptrum tuum, erit semper rectissimum, atque iustissimum: phrasis enim Hebraica est, virga directionis, pro virga rectissima; sicut etiam, *Deus scientiarum*, pro Deo scientissimo.

*Dilexisti iustitiam, & odisti iniquitatem propterea vnxit te Deus Deus tuus oleo lætitiæ præ consortibus tuis.*

IX.

Hunc etiam locum dupliciter possumus intelligere, ut illum versiculi tertij, *propterea benedixit te Deus in æternum.* Nam illud propterea, potest significare effectum, ut sensus sit, quia dilexisti iustitiam, & odisti iniquitatem, obediendo vsque ad mortem, & mortem crucis; propterea, Deus vnxit te oleo lætitiæ, id est, glorificavit te, & exaltavit ad dexteram suam, & dedit tibi nomen, quod est super omne nomen, ut in nomine tuo omne genuflectatur, caelestium, terrestrium, & inferorum. Quæ glorificatio recte dicitur *vnctio lætitiæ*, quia per eam finem accepit omnis dolor. Recte etiam dicitur *præ consortibus tuis*; quoniam, etiam Angeli quoque glorificati sunt, & homines glorificandi sunt; tamen nemo exaltatus, vel exaltandus est ad dexteram Patris, & nemo accepit, vel accepturus est nomen super omne nomen, vno Christo excepto, qui est caput hominum, & Angelorum, & est simul Deus, & homo. Sed rursus illud, *propterea*, significare potest causam, & positum esse pro, quia, siue propterea quod, ut sensus sit, dilexisti iustitiam, & odisti iniquitatem, propterea quod Deus vnxit te oleo gratiæ spiritualis præ consortibus tuis, quia videlicet vnxit te gratia vñionis

Hh 2

hypo-



hypostatica, & inde factum est, ut in te spiritus sine mensura effunderetur, ceteri autem omnes de plenitudine tua mensuram spiritus acceperunt; quam expositionem sequitur sanctus Augustinus, & videtur eandem sequi S. Basilii, qui hunc locum exponens dicit, Christo fuisse naturalem dilectionem iustitiae, & auersionem ab iniquitate; quoniam illam habuit à natiuitate, siue potius à conceptione, & à principio interno: ceteros autem exercitio, & labore virtutes acquirere. Obseruat autem sanctus Augustinus aduersus Hebræos, & Hæreticos negantes Christi diuinitatem, in illa repetitione, Deus, Deus tuus; priorem vocem esse casus vocatiui, posteriorem nominatiui, quomodo etiam hunc locum intelligendum esse docet sanctus Hieronymus in epist. ad Principiam. Itaque sensus est, vixit te, ô Christe Deus, Deus Paternus oleo lætitiæ; & affirmat idem Augustinus id clarissime apparere in textu Græco; proinde existimandum est in textibus Græcis, quos nunc habemus, incuria librariorum, mutatum esse omega in omicron. Cum autem dicitur, Deus Deum vixisse, non intelligimus Deum ratione diuinitatis vnctum, sed ratione humanitatis: vixit enim Deus Pater Deum Filium; quia Deus Filius homo factus est, & ratione humanitatis gratiam vnctionis accepit, ipse tamen Deus Filius vnctus dicitur, quia ille homo, qui vnctus est, Filius Dei, & Deus est.

XI. *Myrrha, & gutta, & casta à vestimentis tuis, à domibus eburneis: ex quibus delectauerunt te filia Regum in honore tuo.*

Hic versiculus obscurissimus est: explicemus igitur primum vocabula; deinde sententiam. Myrrha succus est notus, amarus, & odoratus: gutta nomen est genericum, sed in Græco habetur, *σάκχι*, quæ apud Basilium in explicatione huius loci, est gutta distillata ex myrrha, ita ut sit quasi flos myrrhæ, id est, pars subtilissima myrrhæ. Sed non videtur verisimile, Prophetam di-

cere voluisse, Myrrha, & gutta myrrhæ subtilissima: in Hebræo est, *ahalot*, quam Aloë Latine dicimus. Est autem Aloë succus item amarus, & odoratus, sed specie distinctus à myrrha: vnde in Euangelio legimus, ad Christi sepulturam emisit Nicodemum Myrrhæ, Aloës quasi libras centum: Quod igitur noster Interpres dixit, guttam, intelligere debemus, guttam esse Aloës, ut sanctus Hieronymus scribit in Epist. ad Principiam; vel myrrhæ distillatæ, ut sanctus Basilii in commentario docet. Casta denique frutex est, vnde cortex odoratus defumitur & inter aromata numeratur, quemadmodum & cinnamomum. Per domus eburneas, intelliguntur palatia, siue templa sumptuosa quorum parietes secti sint ebore: nam in Hebræo non est, *baith*, quæ proprie domum significat, sed *hechal*, quod palatium, basilicam, & templum significat. Nomen etiam Græcum magna palatia significat, ut dicit sanctus Basilii. Itaque improbabile est, quod aliqui volunt, domus eburneas esse cellas aromatum, & magis improbabile quod alij volunt, esse thecas, siue arcas, in quibus vestimenta, vel aromata conseruantur. At, inquit, thecæ fiunt ex ebore, non autem palatia: verum est, sed non dicuntur hoc loco domus eburneæ, quasi totæ sint ex ebore, sed quod testæ sint ebore: quomodo domus Neronis dicebatur domus aurea, & porta Constantinopolis porta aurea, quod essent deauratæ, vel auri laminis cooperatæ; non quod totæ essent aureæ: & sic intelligimus illud, Reg. 22. domus eburnea, quam adificauit Achab, & Amos 3: Peribunt domus eburneæ. Sanctus Gregorius lib. 35. Moralium cap. 13. legit à gradibus eburneis: sed id natum esse ex ambiguitate vocabuli, colligitur ex Sancto Hieronymo in epistol. ad Principiam. Scribit enim vocem Græcam *βασιλειαν*, ambiguum esse, & significare posse grauibus, & palatiis, siue domibus: inde aliquos Latino- rum hac ambiguitate deceptos, vertisse, à grauibus eburneis: sed quia hoc nihil significat, credibile est, mutatum fuisse, & scriptum, à gradibus eburneis. Per filias Regum, intel-



intelligi possunt multitudines variorum Regnorum. Scriptura enim passim vocat filiam Hierusalem, filiam Babylonis, filiam Assyriorum, filiam Tyri, pro multitudine populi illarum ciuitatum, vel gentium. Possunt etiam intelligi, vt verba sonant, filiae Principum, per quas figurate significatur animae excelsae; vt dicit S. Basilius, totus enim hic sermo figuratus est. His expositis vt ad sensum veniamus, per aromata intelligimus virtutes, siue dona Spiritus sancti, quae spiritualem odorem spirant: & quia paulo ante dixerat Propheta Christo: *Vixit te Deus deus tuus*; recte subiungit nunc *Myrrha, & gutta, & casia*, explicans odores aromaticos, qui ex illa vñctione emanarunt: de quo odore B. Paulus loquitur: cum ait. 2. Corinth. 2. *Christi bonus odor sumus*. Et quoniam in passione sua Christus praecipue spirauit odores maximos virtutum, praecipue fortis patientiae, humilis obedientiae, & ardentis charitatis, ideo nominauit Myrrham amarā, sed odoratā, quae conuenit patientiae, Aloem quoque similiter amarā, & odoratā, qui conuenit humilitati, obedientiae, de qua Beatus Paulus, *Humiliauit semetipsum factus obediens vsq; ad mortem*, Philip. 2. denique, casiam calidā, & odoratā, quae conuenit ardentissimae charitati, qua etiam pro crucifixoribus orauit. Hae autem aromata manabant à vestimentis, & domibus eburneis Christi. *Myrrha*, inquit, *gutta & casia à vestimentis tuis, à domibus eburneis*, supple, manant, vel, manabant. Per vestimenta, intelligitur humanitas Christi, quae quasi veste, aut velo diuinitatem tegebatur: per domos eburneas, intelligitur eadem humanitas, quae erat quasi templum, siue palatium candidissimum ob puritatem, in quo diuinitas habitabat. Neque mirum videri debet, si res eadem, vestis, & domus dicatur: nam & Apostolus 2. Corinth. 5. haec duo simul coniungit, cum sic loquitur, *Scimus, quoniam si terrestris domus nostra huius habitationis dissoluatur, quod aedificationem ex deo habemus domum non manufactam, aeternam in coelis: nam & in hoc ingemiscimus*

*habitationem nostram, qua de caelo est, superindui capientes si tamen vestiti, & non nudi inueniamur: nam qui sumus in hoc tabernaculo, ingemiscimus grauati, eo quod nolumus expoliari, sed superuestiri: vt absorbeat quod mortale est à gloria: Vbi vides corpus mortale dici domum, & tabernaculum, & simul vestimentum, quo nolumus expoliari, sed superuestiri: & similiter domum caelestem dici vestem, & habitationem. Sic igitur Christi humanitas vnde suauissimi odores virtutum spirabant. Vestimentum dici potest, & domus eburnea, nisi quis velit vestimentum referri ad animam, domum eburneam ad corpus, quod ipse Christus Ioan. 2. templum vocauit, cum ait, *Soluite templum hoc, & ego in triduo reaedificabo illud*. Neque mouere debet, quod in numero multitudinis dicat Propheta, à domibus eburneis: nam domus magna est, vna, & multae propter multitudinem cubiculorum, & cellarum; vnde etiam de domo vna dicimus in numero multitudinis, aedes nostrae. Sequitur, *Ex quibus delectauerunt te filia Regum in honore tuo*, id est, ex quibus aromaticis, quae à vestimentis, & domibus eburneis humanitatis tuae spirant, *filia Regum*, siue, animae regiae, & excelsae, siue, multitudines populorum ex varijs Regnis, *delectauerunt te*, dum currunt in odorem vnguentorum tuorum. Valde enim delectatur Christus, cum videt multitudines Sanctorum excitatas, & tractas ab odore suo, currere post eum odorem. Et vere, qui spirituali sensu odoratus sentire incipit suauissimum odorem, qui spirat ex patientia, humilitate, & charitate Christi, non potest non currere post eum, & quaelibet tormenta pati potius, quam se ab illo separari patiatur: dicit enim cum Apostolo, *Qui nos separabis à charitate Christi* Roma. 8. Sed ideo potissimum Christum delectant filiae Regum currentes post odorem vnguentorum ipsius, quia id faciunt in honore eius, id est, ex pura intentione glorificandi Deum. Martyres enim passione sua currentes post Christum Deum valde glorificabant: vnde dicit Ioan. c. 21. de*



passione S. Petri à Christo illi prædicta: significans inquit, quo morte clarificaturus esset Deum.

XL

*Astitit Regina à dextris tuis in vestitu deaurato, circumdata varietate.*

Prophetavit hæcenus David de sponso: nunc de sponsa prophetare aggreditur: per sponsam autem intelligunt omnes fere expolitores Ecclesiam: quoniam Apostolus ad Ephes. 5. apertissime docet, Ecclesiam sponsam Christi esse. Hic igitur est principalis sensus, ut per sponsam intelligatur Ecclesia. Sed possunt etiam hæc omnia, quæ dicuntur de sponsa accommodari unicuique animæ perfectæ, & potissimum B. Virgini Mariæ, quæ licet Mater Christi sit secundum carnem; tamen est etiam sponsa secundum spiritum, & inter membra Ecclesiæ primum locum tenet. Itaque non sine ratione hic Psalmus canitur in festis B. Virginis, & aliarum etiam Virginum: nec sine ratione de singulis dicitur *Veni sponsa Christi*. Ait igitur David Christum alloquens, *Astitit Regina à dextris tuis*, id est, assistet sponsa tua, quæ Regina etiam est, cum sit sponsa tua, qui Rex es à dextris rois, id est, proxima tibi, & in loco summi honoris infra regalem thronum: assistet autem *in vestitu deaurato circumdata varietate*, id est, in veste pretiosa qualis decet Reginam. Sed verba singula consideranda sunt, *Astitit*, ponitur pro assistet, more prophetico, qui vident futura quasi iam facta sint. Præterea notat Chrysostomus, non dici, sedit; sed *astitit*, quia sedere convenit æquali, & ideo filius sedet ad dexteram Patris, ut æqualis Ecclesia autem, ut inferior, assistit cum cælestibus potestatibus, quæ assistere dicuntur coram Deo. Verbum Hebraicum proprie significat, *stetit*, & denotat firmitatem, quasi dicat Propheta, sponsa tua firmiter tibi adhæsit, & ita constituta, & confirmata est, ut nullum sit ei periculum repudij. *Regina* in Hebræo est *seegal*, quod vxorem, & concubinam significat, inde natæ sunt variae interpretationes; nam alij verterunt,

*Astitit vxor*, alij *astitit concubina*; sed LXX. Interpretes, ut explicarent eam vocem esse intelligendam de vera coniuge, non de concubinis, vertere maluerunt Reginam; neque enim concubina Regum, sed sola legitima coniuges appellantur Regina. *A dextris tuis*, hæc voces non significant sponsam ita esse à dextris sponsi, ut sponsus intelligatur esse à sinistris; sed sponsum collocant in medio, & solio altiore, à dextris eius Reginam, à sinistris autem alios Principes. Et fortasse voluit Spiritus Sanctus per has voces significare incredibilem dignitatem Ecclesiæ, quæ non solum admittitur ad Regnum cælorum, & ut assistat cum Angelis ante thronum Dei; sed etiam præcedat Angelos, ita ut ipsa Ecclesia ex hominibus sit à dextris, cætus autem Angelorum à sinistris. Nam etiam si intermixti sint homines Sancti Angelis Sanctis, & vnam civitatem faciant: tamen multi Sancti homines multos Angelos in Regno cælorum præcedunt: & est in Ecclesia hominum Beata Virgo, quæ omnes Angelos præcedit, & caput hominum, & Angelorum Christus est, qui non Angelus sed homo est. Hinc autem monet Sanctus Ioannes Chrysostomus, ut cogitent homines quam ingrati sint tantæ Dei benevolentiae, quando peccant: Deus enim genus humanum, & præcipue Ecclesiam ex gentilitate, & idololatria assumptam, ex profundo peccatorum, & vere ex luto facis, exaltavit ad summam dignitatem, ut cum Angelis in Regno cælorum assistat, & sponsa Dei nomen obtineat: Idque totum ex sola charitate sponsi cælestis, qui dilexit eam, & tradidit semetipsum pro ea, ut eam sanctificaret, & mundaret, & exhiberet ipsæ sibi gloriosam Ecclesiam non habentem maculam, neque rugam, ut scribit Apostolus ad Ephes. 5. *In vestitu deaurato, circumdata varietate*: pro his omnibus verbis non sunt in textu Hebraico, nisi hæc duo verba, *bechetem*, *ophir*, id est, *in auro de ophir*, quæ verba Sanctus Hieronymus vertit in *diademate aureo*; alij aliis modis sed Septuaginta Interpretes explicare voluerunt

420

דמ  
79



luerunt quid includeretur in illa generali voce hebraica, & recte dixerunt, significari vestem pretiosam, & omnia alia ornamenta sponsæ, quæ pro varietate membrorum varia sunt, ut diadema, monile, cingulum, calcei, & similia, quæ explicatio desumpta videtur ex eo, quod paulo infra dicitur, *in sim-brijs aureis circumamicta varietatibus*. Quid autem hæc significant spiritualiter, Patres non vno modo exponunt, S. Augustinus per aurum intelligit, sapientiam, per vestem, doctrinam: per varietatem linguas varias, quibus hæc eadem doctrina Ecclesiastica prædicatur. Sanctus Basilius intelligit quidem per vestem auream doctrinam Ecclesiasticam, sed per varietatem, varia dogmata, moralia, naturalia, theorica, practica, &c. S. Hieronym. & S. Chrysostomus intelligunt per vestem auream gratiam iustificationis, per varietatem varias virtutes, eandem spem, dilectionem, humilitatem, & alias. Quæ explicatio confirmari potest ex cap. 19. Apocalypsis, ubi dicitur, *Sponsa ornata byssino splendens, & candido*: & exponens S. Ioannes dicit, *byssinum enim iustificationes sunt Sanctorum*. Posset addi, non solum varietatem ornamentorum sponsæ consistere in varijs virtutibus, quæ singulis necessariae sunt, sed etiam in varijs donis, quæ pro varietate membrorum Ecclesia possidet: alia enim sunt dona Apostolorum, alia, Martyrum, alia Virginum, alia Doctorem, alia Confessorum, & alia aliorum.

genter quæ audis, & *inclina aurem tuam*, id est, humiliter obedias præceptis eius, & *obliscere populum tuum, & domum patris tui*, id est, ut facilius sponso seruias, obliuiscere mundum, & quæ in mundo sunt: nam ex mundo electa est Ecclesia, & ex mundo exiit, & quamuis adhuc in mundo sit, tamen de mundo esse non debet, sicut, & sponsus de mundo non est: mundus autem recte dicitur populus eorum, qui diligunt mundana; & idem mundus est domus patris nostri veteris Adami, qui de Paradiso eiectus fuit in hunc mundum, nisi magis placeat, per patrem, intelligi Diabolum, qui est pater omnium iniquorum: iuxta illud Ioannis 8. *Vox patris diaboli estis*. Et certe, qui cogitabunt, quæ supra diximus de ineffabili amore Sponsi, qui tradidit semetipsum, ut nos de profundo lacu tueretur, & in summum cælum transferret, & faceret nos gloriosam sponsam suam: non difficulter amorem tuum à mundo abstrahent, ut totum in sponsum transferant. Vox autem illa *obliscere*, magnam emphasim habet, significat enim radicitus à mundo amorem abstrahendum, ut non solum à desiderio, & cogitatione, sed etiam à memoria omnium recedat, ac si nunquam fuisset.

*Et concupiscet Rex decorem tuum quoniam ipse est Dominus Deus tuus, & adorabunt eum.*

XIII.

Reddit rationem, cur debeat sponsa obliuisci populum suum, & domum patris sui ut tota sit amanti, & obedientiæ Sponsi celestis intenta, quia videlicet sic fiet, ut & concupiscat pulchritudinem tuam videre, & apud se habere. Et quoniam vera sponsa pulchritudo interior est, ut paulo infra clarius explicatur, ubi dicitur, *omnis pulchritudo filia Regis ab intus*, & in virtutibus consistit, ac præcipue in obedientia mandatorum eius, siue in charitate à qua dependent omnia mandata: ideo addit, *Quoniam ipse est dominus Deus tuus*, id est, ideo diliger pulchritudinem tuam, quæ in obedientia ipsius posita est, quoniam ipse est Dominus Deus tuus. Nihil enim magis requi-

XII.

*Audi filia, & vide, & inclina aurem tuam, & obliscere populum tuum, & domum patris tui.*

Alloquitur nunc ipsam Ecclesiam, eamque fideliter, & pie monet. Vocat aurem *filiam*, vel quia loquitur in persona Dei Patris, ut S. Hieronymus dicit, vel quia loquitur, ut vnus ex Patribus Ecclesiæ, ut dicit S. Augustinus. Sed quando sponsa intelligitur B. Maria Virgo, tunc omnino proprie, filiam vocat David, quia ex eius carne propagata est. *Audi filia*, inquit, id est, audi vocem sponsi tui, & *vide*, id est, considera dili-



requirit à servis Dominus ; neque Deus à creaturis, quam obedientiam. Et ut intelligamus hunc sponsum esse Dominum absolute, & Deum verum. addit, *& adorabunt eum*, id est, sp̄sus tuus non est talis, ut cum eo prætendere possis æqualitatem, sed est quidem sponsus tuus per gratiam, sed Dominus tuus, & omnium creaturarum per naturam, & illi ab omnibus debetur adoratio. In Hebraico textu non habetur, Deus sed solum *Dominus*, ubi nos habemus, *Quoniam ipse est Dominus Deus tuus*. Sed non solum Septuaginta, verum etiam S. Hieronymus, verterunt, *dominus Deus tuus*; & ex adoratione illi debita colligitur eum, esse non Dominum tantum, sed etiam Deum, id est, non Dominum qualemcunque, sed supremum Dominum. In eodem Hebraico textu, ut etiam in græco, habetur, *Et adorabis eum*: sed in sensu non est discrepantia: Deum enim adorare debent omnes creature, proinde ipsa etiam Sponsa debet adorare, neque lectio ista, *adorabunt eum*, recens est: nam inuenitur apud S. Augustinum, S. Basilium, S. Chrysostomum, & alios, imo S. Hieronymus in epist. ad Principium dicit, Septuaginta vertisse, *adorabunt eum*. Proinde lectio græca, quæ nunc habet, *adorabis eum*, non est ex editione Septuaginta Interpretum, vel corrupta est. Et quia ut sæpe diximus, Septuaginta Interpretes habuerunt optimos codices hebraicos, credendum est, lectionem Hebraicam ab eo tempore librariorum errore fuisse mutatam, quod facillime fieri potuit, cum voces Hebraice, *adorabunt* & *adorabis*, non differant nisi in ultima litera, quæ facile variari potuit propter summam inter eas similitudinem.

XIV.

*Et filia Tyri in muneribus, vultum tuum deprecabuntur, omnes diuites plebis.*

Quia dixerat, *Et adorabunt eum*, Sponsum videlicet, addit, ipsam etiam Sponsam ut reginam, muneribus, & supplicationibus honorandam. *Et filia Tyri* inquit, in muneribus vultum tuum deprecabuntur, id est,

& filia gentilium; inimicorum antea Sponsi tui, subijciunt imperio eius, & venient ad te, ac faciem tuam deprecabuntur, non solum precibus verborum, sed etiam donis, & muneribus. *Omnes diuites plebis*, id est, quod dixit de filiabus Tyri, intellige potissimum de potentioribus, quales in primis diuites esse solent. Hoc etiam loco singulare verba explicationem propriam desiderant, *Et filia*, in Hebræo est, *Et filia*, & sic legunt sancti Basilii, & Chrysostomus, & græcus codex nunc ita habet: sed tamen S. Hieronymus, & Augustinus in commentario legunt, *Et filia*, Si legamus, *Et filia Tyri*, significabitur ciuitas siue populus Tyri, quomodo dicimus filia Babylonis, filia Hierusalem, si legamus, *Et filia*, significabuntur feminae ciuitatis Tyri: meminit autem feminarum potius quam virorum, quia sponsam alloquitur, solent enim ad Reginam familiariter feminae accedere, ad Regem viri, Sed sicut per sponsam non intelligimus hoc loco veram mulierem, sed Ecclesiam, quæ viros, feminasque complectitur: sic etiam per filias Tyri intelliguntur omnes gentiles, siue mascululi, siue feminae sint. Tyri, vox hebræa *צור*, ambigua est: nam & robustum, siue potentē significare potest, & simul etiam ciuitatem; quæ dicitur Tyrus. Sed Septuaginta Interpretes Tyrum interpretati sunt, & eam interpretationem sequutus est latinus Interpretes, & omnes Patres græci; & latini eam exponunt; excepto S. Hieronymo in epist. ad Principium, qui, *filiam fortissimam*, & legere maluit, & exponere. Porro Tyrus ciuitas erat gentilium magna, & celebris, & in sinibus terræ promissionis, & ideo à vicina ciuitate denominauit Propheta omnes gentiles. *In muneribus*, munera vocat oblationes, quas gentiles conuersi ad fidem obtulerunt in ædificationes, vel ornamenta Ecclesiarum, in alimoniam pauperum, & similia opera bona. *Vultum tuum deprecabuntur*. S. Basilii, & quidem alij per vultum Sponsæ, intelligunt caput Ecclesiæ, id est Christum, sed simplicior expositio est, ut per vultum Sponsæ, ipsa Ecclesia intel-

liga-



ligatur: est enim phrasim Hebraica, deprecari vultum alicuius, pro eo quod est, deprecari aliquem, vt i. Reg. 13. *Faciem Domini non placavi*, & Psalm. 94. *Præoccupemus faciem eius in confessione*: & Psalm. 118. *Deprecatus sum faciem tuam*. Dicimur autem deprecari faciem, quia cum precamur aliquem, faciem eius aspicimus, & ex faciei tristitia, vel hilaritate intelligimus, an ille sit nobis propitius vel iratus, quem precamur. *Omnes diuites plerique*. Hæc est appositio, quasi dicat, Filie Tyri in muneribus vultum tuum deprecabuntur, non omnes in muneribus, sed diuites tantum.

XV.

*Omnis gloria eius, filie Regis ab intus in fimbrijs aureis, circumamicta varietatibus.*

Quia sepe Dauid de pulchritudine, & ornatu Sponsæ loquutus est, ne quis forte putaret, ea corporalia esse, occurrit hoc loco eiusmodi carnalibus cogitationibus, ac dicit, *Omnis gloria, siue decoris faciei, siue preciosarum vestium, huius Regina, ab intus est, & si fimbrijs aureis ornata, & circumamicta*, dicitur variegata veste ista, omnia spiritalia sunt, interna sunt, in corde requirenda sunt. Hinc S. Petrus monet Christianas mulieres, vt ad similitudinem huius Sponsæ ornatum interiorem adhibeant. *Quarum, inquit, non sit extrinsecus capillatura, aut circumdatio auri aut indumenti vestimentorum cultus; sed qui absconditus est cordis homo in incorruptibilitate quieti, & modesti spiritus*. Neque tamen reprehendendus est exterior cultus Ecclesiarum in Sacramentorum celebratione, in ornatu altarium, in sacris solemnitatibus: non enim hic agitur de materiali Ecclesia, sed de hominibus, qui populus Dei, & Christi membra sunt, quorum præcipua pulchritudo, & ornatus in virtutibus consistit, vt supra diximus; ex quibus tamen virtutibus nasci debent extrinsecus opera bona, vt qui ea vident glorificent Patrem nostrum, qui in calis est, vt Saluator docet, Matth. 5. Porro per fimbrias aureas, nihil aptius intelligi posse videtur, quam ipsa charitas, quæ compara-

tur auro, quia preciosissima, & præstantissima virtutum omnium est, & similis fimbrijs dici potest, quia sicut in fimbrijs definiunt vestimenta, & ab iisdem fimbrijs fulciuntur: ita finis omnium mandatorum, & virtutum est charitas, & à charitate dependent omnia mandata, & ab eadem formantur, & perficiuntur omnes virtutes. Quod sit autem vestis variegata, supra diximus. De hac autem variegata veste loqui videtur. Apostolus cum ait, *Induimini viscera misericordie, benignitatem, humilitatem, modestiam, patientiam*, & cat. Coloss. 3. Quod attinet ad verba illud pronomen, *eius*, non habetur nunc in Hebraico, vel Græco textu; tamen legitur à sancto Hieronymo in epist. ad Principiam, & in commentario Psalmorum, tamquam ex versione Septuaginta, & legitur etiam à S. Augustino, & vox Hebraica, si legatur cum puncto in vltima litera, significabit, *gloria eius*, Verum tamen est, illud, *eius*, esse referendum ad phrasim Hebraicam, & secundum Latinam phrasim redundare. Quod autem Sponsa dicatur *filia Regis*, mirum esse non debet; nam Sponsa filij Regis, vltate dicitur *filia Regis patris*, quia sponsus, & sponsa sunt duo in carne vna. Non ignoro in textu Hebraico diuersam esse interpunctionem à Græca, & Latina interpunctione, sed non multum curanda est interpunctio, quæ à Rabinis adiuncta est codici Hebraico; & magis credendum est Septuaginta Interpretibus, quam omnibus Rabinis posterioribus.

*Adducentur Regi virgines post eam, proxima eius afferentur tibi.* XVI.

Quamuis vnica sit sponsa Christi, eaque vnice dilecta, id est, Ecclesia vniuersalis, tamen post eam sunt etiam Christi Sponsæ, præcipua quadam prærogatiua præter ceteros fideles, illæ animæ, quæ in carne virginitatem suam Deo vouerunt, & ipsi soli placere studuerunt. De quibus dicit Apostolus i. Corinth. 7. *Qui sine vxore est, sollicitus est, qua Domini sunt, quomodo placeat Deo: qui autem cum vxore est, sollicitus est qua sunt mundi, quomodo placeat vxori, &*



alius est: & mulier innupta, & virgo cogitat, quæ Domini sunt, ut sit sancta corpore, & spiritu: quæ autem nupta est cogitat quæ sunt mundi, quomodo placeat viro. De his loquitur nunc Propheta, & virginitatem, quæ Christo virgini mirifice placet, quippe qui pascitur inter lilia, his duobus vericulis commendat. Adducentur, inquit, Regi Christo virgines post eam, id est, post principalem sponsam Ecclesiam, adducentur etiam ad nuptialem thalamum sponsi ecclestis omnes illæ animæ, quæ virginitatem suam Deo dicarunt. Proxima eius afferentur tibi, id est, illæ virgines solæ afferentur tibi Sponso, quæ principalis sponsæ tuæ Ecclesiæ proximæ fuerint, id est, quæ illi coniunctæ, atque vnitæ fuerint; quod dicitur, ut sancti Patres Basilius, & Augustinus, & alij exponunt, ad hæreticos, & schismaticos excludendos: virginitas enim extra Ecclesiam non habet sponsæ prærogatiuam. Et quoniam initio diximus, quæ in hoc Psalmo legimus de Sponsa, posse intelligi etiam de B. Maria matre Domini, quæ Virginum Regina iure appellatur: possumus etiam quæ sequuntur de illa exponere, ut sensus sit, adducendæ esse ad Christum omnes veras Virgines, post eam, id est, post matrem Domini: & proximas eius, id est, quæ illi per imitationem æternæ integritatis propinquarunt, adferendas esse ad nuptias eiusdem sponsi, & Regis Christi.

XVII.

*Afferentur in lætitia, & exultatione, adducentur in templum Regis.*

Explicat gaudium tam multiplicium nuptiarum: *Afferentur*, inquit, *in lætitia, & exultatione*, id est, afferentur virgines ad nuptias cum magno plausu, & iubilo totius ecclestis Hierusalem. Fortasse etiam notatur hoc loco canticum illud, quod soli Virginum choro in cœlesti Regno cantare licet: de quo sic legimus in Apocalypsi cap. 14. *Et cantabant quasi canticum nouum ante sedem, & ante quatuor animalia, & seniores: & nemo poterat dicere canticum, nisi illa centum quadraginta quatuor millia, qui empti sunt de terra: hi sunt, qui cum mulieribus non sunt*

coinquinati: virgines enim sunt, hi sequuntur Agnum quocumq; ierit. Felices animæ, quæ sequuntur Agnum itinere virginali gradientem, & in lætitia, & exultatione dicunt canticum nouum ignotum videlicet antiquis Patribus, quod nemo alius dicere potest; & cum hoc iubilo adducentur in templum Regis, id est, in cœlesti tabernaculum, quod, & palatium propter magnificentiam, & templum propter sanctitatem dici potest.

*Pro patribus tuis nati sunt tibi filij, constituit eos Principes super omnem terram.*

XVIII

Expofuit hætenus Propheta dignitatem: & ornamenta Sponsi, & Sponsæ: nunc fructum nuptiarum exponit, dicens, nascituram ex hoc matrimonio felicissimam prolem, quæ toti orbi terrarum imperatura sit. Dubium autem est, ad quem loquatur Propheta, ad Sponsum, an ad Sponsam: ad Sponsum loqui dicunt aliqui recentiores, ea ratione ducti, quod in Hebræo illa pronominata tuis, & tibi, sint generis masculini: ad Sponsam autem hunc sermonem dirigi, docent sancti Patres Basilius, Chrysostomus Hieronymus, Augustinus, & cum iis Euthymius in commentariis. S. Hieronymus, in epist. ad Principiam, utroque modo exponi posse affirmat: quod quidem verum est; sed Patrum communis sententia præferenda est: neque repugnat huic sententiæ textus Hebraicus, si puncta remoueantur, vel mutantur, ut periti facile intelligunt. Quoniam igitur monuerat Sponsam Propheta, ut obliuisceretur populi sui, & domus patris sui, id est, maiorum suorum; nunc eam consolatur, promittens copiam filiorum loco patrum quos reliquit, & quorum obliuisci iussa est; & simul, ut diximus, prædicat fructum nuptiarum Sponsi ecclestis, & Ecclesiæ sponsæ felicissimum fore. *Pro patribus tuis nati sunt tibi filij*, id est, pro patribus, quos habuisti, & iam mortui sunt, id est, pro Patriarchis, & Prophetis, & pro Patribus, quos reliquisti in gentilitate, & quorum obliuisci iussa es, nati sunt tibi filij



*filij. i. Apostoli, & Discipuli Christi, qui tantæ excellentiæ erunt, vt toti orbi leges dare possint, ideo constituit eos Principes super omnem terram, Vere enim Apostoli, primi Ecclesiæ filij, toti orbi terrarum leges dederunt, quod nullus temporalis monarcha facere potuit. Nam vt S. Ioannes Chrysostomus notat, Monarchæ Romanorum non potuerunt Persis leges dare, neque Persæ Romanis: Apostoli vero, & Romanis, & Persis, & omniibus aliis gentibus leges dederunt. Et sicut in prima ætate Ecclesiæ, pro patribus Patriarchis, filios Apostolos habuit: ita etiam in sequenti ætate pro patribus Apostolis filios Episcopos habet, qui si non singuli, omnes tamen Principes sunt super omnem terram, & hoc modo per successiones Episcoporum, semper Ecclesiæ pro patribus filios habet, quos in patrum sedibus, & dignitate constituit.*

XIX.

*Memores erunt nominis tui Domine in omni generatione, & generationem.*

Concludit Psalmum, dicens, spirituales has nuptias in Psalmo decantatas, & fructum nuptiarum, id est, nobilissimam prole ex hoc sancto connubio nascituram, non alium finem habituram, nisi perpetuam Dei laudem. Nam, inquit, *filij isti, qui patribus substituentur*, & ipsi quoque patres filiorum euadent; *memores erunt nominis tui*, id est, cantabunt potentiam; & gratiam tuam in omni generatione & generatione. In Hebræo, & Græco codice habetur in singulari, *Memor ero nominis tui*, & sic legunt Græci Patres, & sic etiam habetur in plurimis Latinis codicibus manuscriptis: sed quoniam sanctus Hieronymus, & sanctus Augustinus in commentariis legunt, *Memores erunt nominis tui*, & Ecclesiæ in officio Ecclesiastico, cum festos dies Apostolorum celebrat, hos versiculos ita canit: non visum fuit expedire, vt in Bibliis recognitis tempore Sixti V. & Clementis VIII. hic locus mutaretur, præsertim cum in sensu nulla sit diuersitas. Qui enim legunt, *memor ero nominis tui*, volunt hoc dici à Propheta, qui pollicetur Deo; *se omni tempore cantaturum Dei laudes, ob*

tam ingentia beneficia humano generi præstita, quæ in hoc Psalmo explicata sunt. Caterum quia Dauid moriturus erat, & non poterat ipse per se in omni generatione, & generatione canere laudes Dei, dicunt, illum significare voluisse, se cantaturum per alios, qui sibi inuicem succedentes vsque ad mundi consummationem Psalmos istos cantaturi erant. Hæc autem expositio non est diuersa à superiore: idem enim est dicere, ego *memor ero nominis tui, & cantabo laudes tuas per memoriã, & linguam aliorum*, qui sibi inuicem succedunt, & filij tui, qui sibi inuicem succedent, *memores erunt nominis tui*, & has laudes tuas à me conscriptas perpetuo decantabunt. Notat autem S. Ioannes Chrysostomus, Dauidem Prophetam præter alia multa, quæ præuidit, & prædixit, hoc etiam de suorum carminum æternitate præuidisse, & prædixisse, quod videlicet, nullo vnquam tempore ipsorum celebratio intermittenda esset, quam prophetiam impletam esse, & quotidie impleri cernimus.

*Propterea populi confitebuntur tibi in æternum, & in sæculum sæculi.*

XX.

Ex eo quod Apostoli, & eorum successores Episcopi semper memores futuri erunt nominis Domini, & laudes eius cantaturi, & prædicaturi: recte colligit Propheta, id etiam futurum esse, vt populi fideles ab Episcopis instituti, confiteantur Domino laudes eius *vsque in æternum, & in sæculum sæculi*, in hac vita, & in futura: quamuis enim in patria cessabunt preces, & lacrymæ, tamen laudatio, & glorificatio non cessabit.

## P S A L M V S XLV.

*Titulus, & Argumentum.*

*In finem filiis Core pro arcanis.*

**R**ecentiores Interpretes nonnulli Psalmum hunc scriptum esse volunt in gratiarum actionem, pro victoria Davidis ab inimicis suis Dei auxilio reportata; sed



mirum est nulli veterum Patrum venisse in mentem eiusmodi argumentum. Nam S. Ambrosius, S. Hieronymus, S. Augustinus, S. Basilus, S. Ioannes Chrysostomus, Theodoretus, & Euthymius magno consensu docent, Psalmum esse intelligendum de liberatione Ecclesiae Christianae à persecutionibus infidelium. Et confirmari potest hæc explicatio ex titulo Psalmi, illud enim, pro arcanis satis aperte demonstrat, Prophetam non loqui de re præterita, sed de futura, & eiusmodi, ut tempore Davidis oculatissima esset, & non nisi Deo reuelante sciri posset. Igitur Psalmus præsens recte subiungitur Psalmo superiori: In illo n. prædicta est Ecclesia exaltatio ob nuptias spirituales cū Rege Christo Domino: in hoc autem prædicatur persecutio, & liberatio à persecutione, quæ liberatio potissimum futura est, ut S. Basilus arbitratur, in consummatione seculi.

## EXPLICAT. PSAL. XLV.

I. **D**eus noster refugium, & virtus adiutor in tribulationibus, quæ inueniunt nos nimis.

Milites Christi non minus vincunt fugiendo tentationes, quam tolerando. Quando fugiendum est, Deus refugium tutissimum est: quando tolerandum est, Deus virtus, & fortitudo est, utroque autem tempore adiutor est in tribulationis: nam & adiuuat præbendo refugium, & adiuuat præstando gloriam. Illud autem, quæ inueniunt nos nimis, significat, tribulationes grauissimas fuisse, quæ initio exortæ sunt aduersus Ecclesiam, & repente ac inopinato irruisse: nam ut legitur in Actis Apostolorum cap. 2. & 3. post Ascensionem Domini, & aduentum Spiritus sancti, Ecclesia edificabatur, & crescebat in Hierusalem magna cum pace, & tranquillitate: Quotidie, inquit S. Lucas, per durantes unanimiter in templo, & frangentes circa domos panes, sumebant cibum cum exultatione, & simplicitate cordis, collaudantes Deum, & habentes gratiam ad omnem plebem, & Dominus augebat qui salui fierent quotidie in idipsum. Sed paulo post cæpit vehementissi-

ma persecutio, flagellatis Apostolis, Stephanus lapidatus, & omnibus discipulis dispersis, præter Apostolos. In Hebræo textu legitur, *Adiutor in tribulationibus inuentus est nimis*, id est, Deus in tribulationibus inuentus est auxiliator valde potens. Vterque sensus optimus est, sed quod attinet ad veritatem lectionis, adhaerendum est Septuaginta Interpretibus, qui sine dubio vocem illam Hebraicam, *nimpsi*, paulo aliter legerunt, alioqui nunquam ventissent inueniunt, nisi valde imperiti fuissent. Notat S. Basilus, multos habere in ore versiculi huius verba, *Deus refugium nostrum, & virtus*, sed paucissimos ex vero affectu ista pronunciare, quod inde colligitur, quoniam ad superandas tribulationes tanto ardore confugiunt ad humana præsidia, vel etiam ad artes diabolicas, quasi Dei auxilium pro nihilo haberent. Contra autem sanctus David ideo dicit, *Deus noster refugium, & virtus*: quia parum omnino in hominum robore, vel armis, vel industria confidebat.

Propterea non timebimus, dum turbabitur terra, & transferentur montes in cor maris.

II.

Sonuerunt, & turbata sunt aquæ eorum, conturbati sunt montes in fortitudine eius.

III.

Hi duo versiculi obscurissimi sunt, sed nos sanctos Patres Basilium, & Chrysostomum sequimur. Igitur ex eo quod dixit populus Dei, *Deus refugium nostrum, & virtus*, concludit, se impavidum fore, etiam si terra, & mare sursum, ac deorsum moueantur, & sedes suas horribili cum sonitu mutant. Propterea, inquit, populus Dei, non timebimus, dum turbabitur terra, id est, dum forte turbabitur terra, siue, etiam si maxime turbetur terra, & transferantur montes in cor maris, id est, etiam si ipsi montes, qui à Deo fundati, & radicati videntur, ut immobiles esse censcantur, agitentur, & fluctuent, & in profundum mare præcipientur, id est, si ita sit, si ista fiant, non time-



timebimus, quia Deus omnipotens refugium nostrum, & virtus nostra est. *Sonnerunt, & turbata sunt aqua eorum*, id est, non timebimus, etiam si ex translatione montium in cor maris, resonent, & turbentur aquae maris. Dicit autem, *eorum*, id est, marium, quia ubi nos habemus; in *cor maris*, in textu Hebraico, & Græco est, *in cor marium*: noster autem Interpres mutauit numerum multitudinis in numerum singularem in voce, *maris*, & reliquit numerum multitudinis in pronomine, *eorum*, & inde nata est obscuritas. *Et conturbati sunt montes*, id est, etiam si ipsi montes translati de terra in mare conturbentur, amissa videlicet stabilitate sua, in fortitudine eius, in potentia, & robore Dei. Deus enim est, qui solus potest conturbare terram, & transferre montes in cor maris, & ipsum mare; montesque tremefacere; iuxta illud Psalm. 76. *Viderunt te aqua Deus, & timuerunt; & turbati sunt abyssi*, & Psalm. 103. *Qui respicit terram, & facit eam tremere*: & Isaia 51. *Ego sum Dominus Deus tuus, qui conturbo mare, & intumescunt fluctus eius*. Itaque in his versiculis declaratur maxima fiducia populi Dei, qui non timebit, etiam si mundus ruat; & simul insinuat maxima Dei potestas, qui potest elementa omnia conturbare, & mouere: sicut re vera conturbabit; & mouebit in consummatione sæculi, quando erunt terramotus maximi per loca, & præ confusione sonitus maris & fluctuum arescent homines præ timore; & tunc populus Dei non solum non timebit, sed aspiciet, & leuabit caput suum, ut in Evangelio dicitur, quoniam appropinquabit redemptio eius. Possunt hæc omnia figurate intelligi, ut per terram intelligentur homines terreni; per montes vero, non solum terreni, sed etiam potentes, & superbi, quales erant Reges magni, Ecclesiæ inimici; per mare autem, amaritudo tribulationis, & poenarum, quibus in nouissima die inuoluentur omnes impij. Itaque turbabitur terra, quando impij terræ amatores turbabuntur timore horribili, ut dicitur Sapient. 5. & montes transferentur in cor maris, quando magni quondam Reges,

qui Ecclesiam persequabantur, demergentur in profundum abyssi: & tunc sonabunt, & turbabuntur aquæ marium, quando futura vltima tribulatio horrendum in modum turbabit impios; & Reges eorum, in fortitudine Dei, quoniam tunc apparebit quanta sit potestas iræ Dei in peccatores.

*Fluminis impetus latificat ciuitatem Dei, sanctificauit tabernaculum suum altissimus.*

*Deus in medio eius non commouebitur, adiuuabit eam Dominus mane diluculo.*

Ostendit nunc, quare non timebit populus Dei, quando turbabitur terra, & montes transferentur in cor maris: & rationem esse dicit, quoniam pro amaritudinis abundantia, quæ turbabit impios, dabitur Ecclesiæ abundantia voluptatis, quæ eam latificabit: & pro instabilitate montium, qui transferentur in cor maris, dabitur Ecclesiæ stabilitas perpetua, quia Deus erit in medio eius. *Fluminis*, inquit, *impetus latificat ciuitatem Dei*, id est, non timebit populus Dei, quando turbabitur terra, quia non irruent in Ecclesiam fluctus maris amari; sed fluminis aquæ dulces, & clatæ magno impetu, magnæ videlicet copia, & abundantia voluptatis latificabunt eam. In Hebræo habetur *fluminis riuus*, siue diuisiones, pro eo quod nos habemus ex Græco, *fluminis impetus*. Sed non sunt contraria; nam riuus aquarum possunt & cum impetu, & sine impetu fluere: voluerunt autem Septuaginta Interpretes declarare, riuos illos non remisse, & tenuiter fluere, sed cum magna plenitudine, & impetu, ad significandam vehementiam dulcedinis, quæ redundat in ciuitate Dei; sicut in alio Psalmo dicitur, *Torrente voluptatis tue potabis eos*. Addit Propheta. *Sanctificauit tabernaculum suum altissimus*, quasi dicat, ideo latificat ciuitatem suam Deus, quia eam elegit, & sanctificauit in tabernaculum sibi, eamque esse voluit propriam suam habitationem, iuxta illud Apocal. 21. *Ecce tabernaculum*

V.

VI.



*maculum Dei cum hominibus, & habitabit cum eis, & ipsi populus eius erunt. Deus in medio eius non commouebitur: hoc opponitur instabilitati terræ, & montium, quasi dicat, non timebit ciuitas Dei, ne forte transferatur in cor maris: nam Deus est in medio eius, id est, Deus non recedit ab ea, sed presentissimus illi adest, utpote in medio, in intimis, in corde eius, & ideo illa ciuitas non commouebitur, sed æterna stabilitate solidabitur. Et concludit ostendens, unde, & quando ista erunt, dicens, Adiuuabit eam Deus mane diluculo, id est, lætitia, & stabilitas dabuntur ciuitati Dei; quoniam Deus adiuuabit eam in exortu diei, id est, incipiente die felicitatis æternæ. Scriptura enim comparat infidelitatis tempus tenebris noctis, tempus fidei aurora, visionem Dei claritati diei. B. Paulus ad Romanos 13. Non praecessit dies autem appropinquauit. Et B. Petrus in 2. epistol. cap. 1. Habetis firmiorem propheticum sermonem, cui benefactis attendentes, quasi lucerna lucenti in caliginoso loco, donec dies illucescat, & lucifer oriatur in cordibus vestris. Et sponsa in canticis cap. 2. donec aspiat dies, & inclinentur umbra, Et Propheta Malachias cap. 4. Vobis timentibus nomen meum oriatur Sol iustitiae. Et cum hac sententia satis apte cohaeret antiqua lectio, quam habet S. Augustinus, & cuius meminit S. Ambrosius, & quam amplectitur Ecclesia in officio Ecclesiastico. Adiuuabit eam Deus vultu suo, id est, adiuuabit eam adiutorio omnium maximo, & potentissimo, quando ostendet ei vultum suum, quod tunc erit, quando Sol iustitiae manifeste se illi ostendet, & inchoabit diem illum ab initio mundi à Sanctis omnibus desideratum, & expectatum: de quo dicit Apostolus, Scio cui credidi, & certus sum, quia potens est depositum meum seruare in illum diem, 2. Timoth. 1.*

VI.

*Conturbata sunt gentes, & inclinata sunt Regna: dedit vocem suam, mota est terra.*

*Prædicit verbis propriis, quod figuratis*

*ante prædixerat, destructionem videlicet, inimicorum Ecclesiæ; unde pax vniuersalis, & perpetua consequetur. Quod igitur antea dixerat de terra, & montibus, nunc dicit apertius de gentibus, & Regnis. Conturbata sunt, inquit, gentes, quia propinquat interitus earum, & inclinata sunt Regna, id est, deiecta ab altitudine sua, & vsque ad terram prostrata. Dedit vocem suam, Deus videlicet intonuuit de coelo, & mota est terra, id est, contremuit, vel liquefacta, & desolata est terra: nam vox Hebraica, mug, liquecere & dissolui est. Quod autem hic dicitur de Regnorum terrenorum destructione, prædictum fuit clarius à Daniele cap. 2. vbi dicitur, Regnum Christi consumpturum omnia Regna, & ipsum mansurum in æternum, & explicatum fuit Ab Apostolo. 1. Corinth. 15. illis verbis, Deinde finis cum traderit Regnum Deo, & Patri, cum euacauerit omnem principatum, & potestatem, & virtutem.*

212

*Dominus virtutum nobiscum, susceptor noster Deus Iacob.*

VII.

*In his omnibus ruinis gentium, & Regnorum non timebit populus Dei quoniam dicere poterit, Dominus virtutum, id est, exercituum, nobiscum est. Susceptor noster, id est, qui nos tuendos suscepit Deus Iacob est. Dicitur autem, Dominus virtutum, id est, exercituum, quoniam omnes Angeli, qui plurimi, & potentissimi sunt, ad nutum illi obediunt, iuxta illud Psalmi 102. Potentes virtute facientes verbum illius. Nec solum Angeli sunt milites Dei, sed omnes omnino res creatæ: nam ignis grando, nix, glacies spiritus procellarum faciunt verbum eius, vt dicitur in Psal. 147. & vt dicitur in Psal. 118. Omnia seruiunt ei. Itaque duo argumenta proponuntur in hoc versiculo, quibus apertissime demonstratur, posse, ac debere populum Dei nihil timere: primum est, quia Dominus potentissimus, cui omnia militant, huius populi adiutor est. Alterum, quia hic idem Dominus, non solum potest, sed etiam vult populum suum iuuare, cum dici velit Deus*

*Iacob*



VIII.

Iacob, id est, Deus populi huius, qui dicitur Iacob à Patriarcha illo sancto, & Dei amicissimo, ex cuius progenie carnem sumere dignatus est.

*Venite, & videte opera Domini, quæ posuit prodigia super terram, auferens bella, usque ad finem terra.*

Hortatur omnes gentes, ut cogitent mirabilia opera Dei, atque illud inprimis, quod erit in nouissimo tempore, quando sublati omnibus inimicis, vel potius subiectis omnibus sub scabellum pedum Christi, finis erit omnium bellorum, & solus regnabit Deus, nullo amplius resistente; vel rebellante. Quod regnum expectamus, & petimus, cum quotidie dicimus in oratione Dominica, *Adueniat Regnum tuum. Venite, inquit, & videte*, id est; accedite per fidem, & mentis oculis contemplamini, & considerate opera Domini, quæ posuit prodigia super terram, id est, considerate opera, quæ Deus ponet (nam præteritum ponitur pro futuro more prophetico) super terram tam admiranda, & stupenda, ut prodigia nominari possint. Ponet autem hæc prodigia auferens bella, usque ad finem terra, vere enim mirabile est, potuisse ex tota terra usque ad ultimos eius fines auferri bella, & ita auferri, ut in æternum renouari non possint. Ex Hebræo S. Hieronymus vertit, *Quantas posuerit desolationes in terra*, pro eo quod nos legimus, *quæ posuit prodigia super terram*: & sensus idem est: nam ex desolatione totius terre translatis iustis in celum, & detrusis impiis in infernum, orietur cessatio bellorum in vniuersa terra. Verbum tamen Hebraicum, *sammoth*, utrumque significat, *desolationes, & admirationes*, siue prodigia: nā vox, *samam*, significat admirari, & desolari, proinde Septuaginta Interpretes recte verterunt; *prodigia*, cum vox Hebraica id significet, quamuis etiam desolationes significare possit.

IX.

*Arcum contereret, & confinget arma, & scuta combureret igni.*

Declarat quod dixit; *auferens bella*, ac dicit id futurum esse, quia Dominus destruet

omnia arma, tam quibus usus est in feriendo, quales sunt arcus, & lanceæ; quam quibus vtuntur milites ad sui defensionem, qualia sunt scuta: sine armis autem bella geri non possunt. In Hebræo pro voce, arma, habetur in specie *hasta*, siue *lancea*, sed Septuaginta maluerunt vertere *arma*, quia sine dubio Propheta nomine arcus & lanceæ significare voluit omnia arma offensiuæ, itaque sensus est, arcum contereret, & confringeret reliqua arma. Pro voce vero, scuta, est in Hebræo, *currus*, & quidem sensus est idem, quia & scuta, & currus militares, & omnia similia instrumenta belli cremanda prædicuntur: tamen sciendum est, vocem hebraicam, *hagaloth*, significare currus, quia currus rotundi sunt, proprie enim vox illa rotunditatem significat. Quoniam igitur scuta etiam rotunda sunt, & melius coniunguntur scuta cum lanceis, & arcibus, quam currus: ideo Septuaginta prudenter verterunt, *scuta*. Hos duos versiculos aliqui exponunt de pace temporali, quæ fuit tempore Augusti, vel Constantini, sed longe melius conueniunt in æternam pacem, quæ erit in fine sæculi quando Ecclesia desinet esse militans, & incipiet esse triumphans, omnibus videlicet hostibus vndique debellatis.

*Vacate, & videte, quoniam ego sum Deus, exaltabor in gentibus, & exaltabor in terra.*

Dixerat paulo ante Propheta. *Venite & videte opera Domini*. Nunc ut ostendat, quomodo venire oporteat, si quis opera Domini intelligere velit, dicit, *Vacate*, & videte: ac, ut magis persuadeat, inducit Deum ipsum loquentem, & exhortantem, *Vacate, & videte, quoniam ego sum Deus*. Nam contemplatio rerum diuinarum requirit animum liberum à tumultu perturbationum secularium, radix autem omnium perturbationum est cupiditas: ex desiderio enim diuitiarum, deliciarum, honorum, & similibus rerum, oriuntur occupationes molestissimæ, quæ nullam omnino quietem homini sic affecto relinquunt. Hinc Hierem. de viro

שמות  
שם

עגלות

X.



viro contemplatiuo dicit, *Sedebit solitarius, & tacebit, quoniam leuauit se supra se.* Thren. 5. & Dominus præcepit Matth. 6. *Tu autem cum oraueris, intra in cubiculum tuum, & clauso ostio ora Patrem tuum.* Quid sit enim clauso ostio Patrem orare, exemplo suo nos docuit, qui vt plurimum oraturus, ascendebat in montes, & solus orabat, remotus uidelicet, ab omni strepitu curarum & negotiorum. Sed, vt diximus, præcipua vacatio debet esse à concupiscentia rerum terrenarum: nam qui nihil desiderat eorum quæ videntur, etiam si multum occupetur in auxilio proximorum, facile colliget animum, cum voluerit, & vacabit, & videbit, quoniam Dominus ipse solus est Deus, ipse principium & finis, ipse spes tota fidelium in terris, & vera felicitas eorum in cælis: nam & Dauid occupatissimus erat in Regno administrando, & sanctus Gregorius (vt etiam plurimi alij sancti Pontifices) in administrando Pontificatu & tamen altissimis contemplationibus suspendebantur, eo quod alas mentis, à luto concupiscentiæ liberas gererent. Ipse etiam Apostolus sollicitudine omnium Ecclesiarum premebatur, & labore manuum ad victum querendum exercebatur, & tamen quia à desideriis secularibus liberrimus erat non solum vacabat, & videbat, sed etiam vsque ad tertium cælum rapiebatur, & audiebat arcana verba, quæ non licet homini loqui. Contra vero multi sunt homines ociosi, quod attinet ad occupationes negotiorum, sed quia carnales sunt, & secularibus desideriis implicati, Deo vacare non norunt. Ait igitur, *Vacate*, id est, ocium sanctum querite, & animum purum, & tranquillum afferte, & videte attentissime cogitantes, *quoniam ego sum Deus*, id est, ego sum Deus solus, & nulla res creata, quamuis magna, & sublimis videatur; est Deus, ego solus sum, id quod est, ego solus, *ex quo omnia, per quæ omnia, & in quo omnia*, ego solus, sine quo nihil potestis, & nihil estis, & in quo omnia potestis, & vere estis. *Exaltabor in gentibus, & exaltabor in terra*, id est, ego cum mirabilia fecero, quæ supra dicta sunt, apparebo

sublimis coram omnibus gentibus, & coram omni orbe terrarum, ita vt omne genus flectatur, cælestium, terrestrium, & infernorum. Nam in fine sæculi nullus omnino erit, qui Deum contemnere audeat, sed omnes vel volentes, vel inuiti agnoscent supremum eius imperium, & illique subicientur. Sanctus Basilii, & alij alij mystice interpretantur hanc exaltationem de exaltatione Christi in cruce: vt sensus sit, *Vacate, & videte, quoniam ego*, qui homo esse videor; sicut homines cæteri, vere tamen sum Deus, & exaltabor inter gentes, & in terra suspensus in cruce ad ignominiam, & supplicium in oculis impiorum. Vere autem per hanc ipsam crucem exaltabor in omnibus gentibus, & in omni terra; quia omnia traham ad me ipsum, & iugo fidei, atque obedientiæ meæ, ipsi etiam summi Reges cum populis colla submittent. In Hebræo est, *cessate & videte*, quod potest intelligi de cessatione à negotiis & desideriis secularibus, vt diximus, & eam literalem, & propriam expositionem esse censemus: tamen non est improbanda sententia illorum, qui volunt, in his verbis exhortationes, contineri ad impios, vt sensus sit, Cum ea futura sint, quæ sunt paulo ante explicata, *cessate iam tadem à peccato infidelitatis, & à persecutionibus piorum, & videte oculis fidei, quoniam ego sum Deus*, & idola vestra non sunt Dij, ego enim solus in fine sæculi exaltabor in gentibus, & in omni terra.

*Dominus virtutum nobiscum, susceptor noster Deus Iacob.*

Concludit Psalmum repetitione versus septimi, vt affectum piorum, exhortatione illa Dei, rursus excitatum, & renouatum fuisse demonstret.

## PSALMVS LXIV.

*Titulus & Argumentum Psalmi.*

*In finem; pro filiis Core Psalmus.*

**T**itulus nihil continet noui, sed de argumento quaestio esse potest: non enim desunt



desunt ex recentioribus, qui Psalmum ad literam exponendum esse censeant de asportatione arce fœderis in montē Sion à Davide. Mouentur autem ea ratione, quod sicut in hoc Psalmo scriptum est. Ascendit Deus in iubilo, & Dominus in voce tubæ: ita scriptū sit, 2. Reg. 6. Ducebant arcam Testamenti Domini in iubilo, & in clangore buccinæ, & pro verbo, ducebant, in Hebræo est, mahalim, id est, ascendere fecerunt. Caterū S. Patres, ut Chrysostomus, Hieronymus, Augustinus, & cum eis Theodoretus, & Euthymius, nullam arce mentionem fecerunt, & simpliciter totum Psalmū de victoria, & Ascensione Christi exposuerunt. Eorum sententia nobis sequenda esse videtur, tum propter ipsorum auctoritatem, tum quia si de sola arce asportatione ad literam ageretur, non esse opus omnes gentes ad lætitiā inuitare: neq; similia sunt, quæ dicuntur in 2. li. Reg. c. 6. ijs quæ dicuntur in hoc Psalmo: ibi enim dicitur, ascendere fecerunt arcam; hic dicitur, Ascendit Deus, & rursum repetitur, & Dominus in voce tubæ: sunt autem valde diuersa, ascendere fecerunt arcam, & ascendit Deus; illud enim recte redditum est per verbum, ducebant; quod proprie conuenit arce lignæ, quæ non mouetur nisi ab alio deferatur, at, ascendit Deus, ad eum refertur, qui propria virtute sursum abiit.

## EXPLICATIO PSAL. XLVI.

I.

**O**mnēs gentes plaudite manibus, iubilate Deo in voce exultationis.

Inuitat Propheta sanctus omnes gentes, ut voce, & gestibus lætitiā animi ostendant: omnes gentes inuitat, quia gloria capitis toti corpori communis est, corpus autem non solos Iudæos, sed etiam gentes comprehendit: Ecclesia enim, quæ corpus Christi est, toto terrarum orbe diffunditur. Quod autem ad plaudendum manibus inuitat, non significat strepitum corporalem edendum, ut recte S. Chrysostomus admodum, sed metaphorica loquutio est, quæ indicat gaudendum, & latandum esse, ut ijs faciunt, qui præ gaudio exiliunt, & manibus strepitum, & voce clamores excitant:

nam idem Propheta non solos homines ad plausum, & exultationem inuitare solet, sed etiam cælum, & terram, & flumina, & montes, & arbores, Psal. 95. Latentur cœli, & exultet terra, commouetur mare, & plenitudo eius, gaudebunt campi, & omnia, quæ in eis sunt: tunc exultabunt omnia ligna sylvarum à facie Domini, quia veni, & in Psal. 97. Flumina plaudunt manu, simul montes exultabunt à conspectu Domini: quæ omnia metaphorica sunt, neque aliud significant, nisi ingentem animi lætitiā hominis cupientis, si fieri posset, ut omnia sibi congauderent. Neque omittendum est, quod monet S. Augustinus, illorum dumtaxat gaudium Deo gratum esse, qui manibus plaudunt, & voce exultant, id est, qui operibus bonis, & voce laudis testantur se in Domino gaudere.

**Quoniam Dominus excelsus, terribilis, Rex magnus, super omnem terram.**

II.

Reddit rationem Propheta, cur omnes gentes ad plaudendum, & exultandum inuitauerit: ac primum rationem ducit à magnitudine Christi, quem dicit esse excelsum ratione diuinitatis, terribilem ratione potentiae, & Regem magnum ratione prouidentiae, & gubernationis. Quoniam, inquit, Dominus excelsus, id est, cum plausu, & exultatione iubilate Deo gentes omnes, quoniam Deus, & Dominus noster Christus excelsus est, siue altissimus (ut vertit S. Hieronymus) quoad naturam diuinam, ratione cuius longe excellit omnibus rebus creatis. Itē quoniam terribilis est, quoad potentiam, cum vere sit omnipotens, & nihil ei resistere possit. Denique, quia Rex magnus est super omnem terram, quoad gubernationem, cum ipse sit supremus, & absolutus, & vniuersalis rector orbis terræ.

**Subiecit populos nobis, & gentes sub pedibus nostris.**

III.

Alteram rationem ducit à beneficio, quod Ecclesiæ suæ contulit in principio, quando eam eduxit de terra Egypti; tunc enim Deus, siue Christus secundum formam

K k

Dei



Dei introduxit populum in terram promissionis, & populos ac gentes, quæ loca illa possidebant, subiecit populo suo, & fecit, ut re ipsa pedibus conculcarent colla Regum illarum gentium, ut scribitur in lib. Iosue ca. 10.

IV.

*Elegit nobis hereditatem suam, speciem Iacob, quam dilexit.*

Tertiam rationem ducit ab alio beneficio, quo idem Deus Christus, post eiectionem Chananos, & populum suum in eorum terram introductos, elegit sibi in peculiarem, & propriam hereditatem, primitivam Ecclesiam, ex Iudæis credentibus, id est, Apostolis, cæterisque, discipulis. *Elegit*, inquit, *nobis*, id est, in nobis, siue ex nobis, *hereditatem sibi*, populum videlicet peculiarem; *speciem Iacob*, quam dilexit, id est, elegit pulchritudinem quandam eximiam populi Iudaici, qui dicitur Iacob, quam pulchritudinem merito adamavit, & ideo ex eo populo Ecclesiam, quasi propriam hereditatem sibi ipse constituit. Obseruandum est ex hoc loco, in populo Iudaico plurimos fuisse duræ ceruicis, & idololatriæ addictos ac per hoc tandem reprobatos: sed fuisse etiam sanctissimos Patriarchas, quorum spiritualem pulchritudinem Fidei, ac morum Deus valde dilexit unde & Apostolus dicit Rom. 11. *Iudæos fuisse Deo charissimos propter Patres, & Ecclesiam ex Iudæis esse bonam oliuam, cuius aliqui rami fracti sunt ob incredulitatem, & in eorum locum insertos esse Gentiles conuersos ad fidem, quos oleastros appellat & hysdem Gentilibus iam fidelibus dicit, Quod si aliqui ex ramis fracti sunt, tu autem cum oleaster esses, insertus es in illis, & socius radicis, & pinguedinis oliuæ factus es, noli gloriari aduersus ramos: quod si gloriaris, non tu radicem portas, sed radicem te.* Hæc igitur est species Iacob, quam Deus dilexit, & propter quam elegit sibi hereditatem ex populo Iudæorum, cui postea adiunxit multitudinem gentium. In Hebræo codice nunc habemus, *Elegit nobis hereditatem nostram*: sed LXX. Interpretes, qui verterunt, hereditatem sibi, sine dubio non legerunt, *nachalatenu*, quod significat, hereditatem nostram, sed,

*nachalato*, vel, *nachalalo*, quod est, hereditatem sibi. Et facile fuit post tempora LXX. Interpretum mutari textum ob literarum similitudinem. Certe sententia multo clarior est, quam reddiderunt LXX. Interpretes, quam ea sit, quam nunc recentiores colligunt ex Hebræo. Quid enim sit, *elegit nobis hereditatem nostram*, vix intelligi potest, at, *elegit in nobis hereditatem sibi*, facillime intelligitur.

*Ascendit Deus in iubilo, & Dominus in voce tubæ.*

Hæc est quarta ratio, cur oporteat plaudere, & exultare, quia videlicet, posteaquam Dominus, *elegit sibi hereditatem* in populo Hebræorum, id est, inchoauit Ecclesiam suam in Apostolis, & Discipulis, qui omnes Hebræi erant, ascendit in cælum, & naturam nostram personæ tuæ indissolubiler vnitam euexit supra omnes cælos, super omnes Angelos, & super omnes creaturas. Quamuis enim in hoc Psalmo non exprimitur, quo ascendit; exprimitur tamen in Psal. 67. ubi dicitur, *Ascendit in altum, captiuam duxit captiuitatem, & ibidem. Ascendit super cælos cælorum ad orientem.* Ait igitur, *Ascendit Deus*, id est, Christus ascendit in cælum, sed ascendit propria virtute, quia Deus erat, ideo enim dicit, *ascendit Deus*, illud, in iubilo, & in voce tubæ, de spiritali iubilo, & sono Angelorum intelligendum est: nam ut Chryso. notat, quod ad corporalem strepitum attinet, ascendit in silentio Apostolis aspicientibus, & mirantibus; & fortasse non sunt visi, neque auditi chori Angelorum, ut in natiuitate, ut Apostoli nulla alia re distraherentur, sed toti essent intenti ad cogitandum mysterij magnitudinem, dum viderent, naturam humanam, cui dictum erat, Gen. 3. *puluis es, & in puluerem reuerteris*, iam cum ingenti gloria & immortalitate indutam ascendere super omnes cælos: Sed tamen dubitari non potest, quin adessent Angelorum legiones ineffabili iubilo deducentes Dominum gloriæ in gloriam suam.

*Psallite Deo nostro, psallite: psallite Regi nostro, psallite.*

VII.

Quo-



*Quoniam Rex omnis terra Deus, psallite sapienter.*

Antequam subiungat quintam rationem, ex admiratione ascensionis, prouocat omnes ad laudandum Deum, & ad effectum suum significandum non semel tantum dicit, sed iterum, atque iterum repetit, *Psallite*, inquit, *Deo nostro, psallite: psallite Regi nostro, psallite*, id est, *psallite Domino*, quia Deus noster est, iterum *psallite*, quia *Rex noster est*, & tertio *psallite*, quia non solum Rex noster est, sed quia *omnis terra Rex est*. Nec solum *psallite* frequenter, sed etiam *sapienter*, id est, attente, & considerate, vt nulla in re fiat error; oportet enim officium, quod summo Regi præstatur, cum omni diligentia præstari. Vide de hac re S. Bernardum serm. 7. & 47. in Cantica. Significatur etiam per vocem, *sapienter*, vt Chrysostomus, & Augustinus admonent, vt qui Psalmos canit, intelligat quod canit, & ex intelligentia mysteriorum moueatur affectus pietatis in Deum. In qua re videtur hoc tempore non leuiter peccari ab ijs, qui officium canendi in Ecclesia susceperunt.

*Regnabit Deus super gentes: Deus sedet super sedem sanctam suam.*

Quinta ratio ponitur hoc loco, cur oporteat psallere, & iubilare Deo in voce exultationis; quia, videlicet, Christus posteaquam in cælum ascendit, per Apostolos suos toti orbi terrarum prædicauit Euangelium, atque ad Regnum suum gentiles adduxit. *Regnabit*, inquit, *Deus super gentes*, id est, non contentus Christus Deus hereditate, quam sibi acquisiuit ex populo Iudæorum, regnabit etiam super gentes, dum per Apostolorum prædicationem gentes omnes iugo Fidei colla subijcient. Sed interrim *sedet super sedem sanctam suam*, id est, sedet ad dexteram Patris, quæ est sedes Regni Dei sanctissima, id est, iustissima, & in qua nulla cadere potest iniquitas. Vocatur etiam sedes Dei sancta, quoniam anima iusti sedes est sapientiæ, & Deus sedet super Cherubim, qui sunt sanctissimi, & beatissimi spiritus.

*Principes Populorum congregati sunt cum Deo Abraham; quoniam Deus fortes terra vehementer eleuati sunt.*

Declarat quod dixit, *Regnabit Deus super gentes*. Id enim futurum erat, quia per Apostolum prædicationem. *Principes populorum* cum ipsis populis fideles futuri erant, & dimissis Dijs Patrum suorum, cum Deo Abraham, qui solus verus est Deus, congregandi erant. Hocigitur est, quod dicit, *Principes populorum*, gentilium videlicet, *cum Deo Abraham congregati sunt*, id est, cum Deo Abraham conuenerunt, vt ipse esset eis in Deum, & ipsi populus essent. Nominat autem Deum Abraham ad differentiam Deorum, quos sibi variæ gentes adoprarunt, eum in Mundum ingressa est idololatria, quo tempore apud familiam Abrahami veri Dei cultus relictus est. In Hebraico textu legitur, *populus Dei Abraham*, pro eo quod nos habemus, cum Deo Abraham; sed Interpretes Septuaginta non legerunt, *ham*, sed, *him*, eadem enim litera cum vno puncto, significant, *cum*, cum alio significant *populus*. Et vel ex hoc loco intelligi potest, puncta non esse vbique recte collocata: nam si legemus vt legerunt LXX. Interpretes, sensus esse clarissimus: si vero legamus, vt nunc est in Hebræo, sensus nullus, aut obscurissimus erit. Quid enim est, *Principes populorum congregati sunt populus Dei Abraham*? hæc enim lectio nunc habetur in textu Hebraico. Quod autem sequitur, *Quoniam Deus fortes terra vehementer eleuati sunt*, sanctus Augustinus exponit de superbis hominibus, qui non conuenerunt cum Deo Abraham, sed reprobi facti sunt ob eorum superbiam, S. Ioannes Chrysostomus exponit de Apostolis, per quos Principes populorum conuersi sunt ad Deum Abraham, vt sensus sit, *Principes populorum congregati sunt cum Deo Abraham*, quoniam *Deus fortes terra*, id est, Apostoli, *vehementer eleuati sunt*, cum pleni fuerint donis sapientiæ, & fortitudinis, & miraculorum in tantam eminentiam, vt Principes populorum eis resistere non



potuerint. Vere enim Apostoli Spiritu sancto repleti tam fortes fuerunt, vt omnia pericula, omnia tormenta, omnem potentiam diaboli, & omnem mundi sapientiam superauerint. Sed potest etiam satis commodè ad literam intelligi de iisdem Principibus populorum, vt iisdem sint Principes populorum, & Dij fortes terræ, & sensus sit, *Principes populorum cum Deo Abraham congregati sunt*, quoniam ipsi, qui sunt quasi Dij quidam, & potentes in terra, vehementer eleuati sunt, cum antea essent per idololatriam serui dæmoniorum, & nunc sint facti per fidem filij Dei veri, & viui. In Hebræo est alia lectio, *Quoniam dei scuta terre valde eleuatus est*. Et quidem vox, Dei, in Græco etiam habetur in genitiuo τῶ θεῶ, ex quo putant aliqui in Latino textu legendum esse, Dei, & errore libratorum positum esse, dy, pro, dei. Sed cum S. Augustinus, & S. Hieronymus in commentatio legunt, *Dij*, & sensus sit longe clarior, credibile est, varias fuisse lectiones Græcas, & nostram Latinam translata esse ex Græca emendatione, præsertim cum nulla inueniatur varietas in codicibus Latinis manuscriptis, sed in omnibus legatur, *Dij*. Illud autem, *scuta terre*, potest etiam ex Hebræo verti protectores, siue Magistratus terræ, vt petiti facile intelligunt ex capit. 4. Osee vers. 18, vbi hæc eadem vox, *magane*, quam hoc loco S. Hieronymus vertit, *scuta*, vertitur ab eodem Hieronymo, *protectores*. Et quoniam protectores siue Magistratus, potestatem habent super alios, non debet mirum videri, si LXX. Interpretes, & Interpres Latinus posuerint, *fortes*. Itaque *Dij fortes terra sunt* Principes, qui insistant Deorum fortiter protegere, debent terram ipsis subiectam. Denique illud *eleuatus est*, venterunt LXX. in numero multitudinis, ad sensum potius, quam ad verbum respicientes. Sensus enim est, *Dij fortes terra eleuatus est*, id est, vnusquisque eorum eleuatus est, quod clarius vertitur, *eleuati sunt*. Neque est hoc nouum in lingua Hebraica, sed vsitatum, vt Genes. 1. vbi nos habemus, *Sunt luminaria*, in Hebræo est, *Sit luminaria*, Eccles. 10. vbi legimus,

*Musca morientes perdunt suauitatem unguentis*: in Hebræo legitur, *Musca morientes perdit suauitatem unguenti*. Et Gen. 49. vbi inuenitur, *Filia discurrunt super murum*, in Hebræo vertitur, *Filia discurrunt*. Sicut etiam è contrario non raro in Hebræo inuenitur nomen singularis numeri; cum verbo numeri multitudinis, vt Aggæi 2. pro eo quod nos legimus, *Et veniet desideratus cunctis gentibus*, in Hebræo habetur, *Et venient desiderium gentium*: & Iob. 15. vbi nos habemus, *Numerus annorum incertus est*, legitur in Hebræo, *numerus annorum reconditi sunt*. Igitur verba huius postremi versiculi, quæ iuxta literam Hebraicam nullum sensum habere videntur, sapientissime à LXX. Interpretibus, & à nostro Latino Interprete reddita sunt.

## PSALMVS. XLVII.

## Titulus, &amp; Argumentum.

Psalmus Cantici filiis Core secunda Sabbati.

**T**itulus notus est ex ijs, quæ alibi dicta sunt, exceptis illis verbis secunda Sabbati, quæ non habentur in Hebræo, sed à Græcis addita sunt. Significatur autem illis verbis, Psalmum traditum filiis Core, vt eum cantarent secunda Sabbati, id est, secunda die hebdomada. Quæ sit autem secunda dies, & cur secunda die canendus esset, inter Auctores non euenit. S. Ambrosius existimat, secundam Sabbati, esse diem dominicum, quia est secundus à Sabbato, quod erat principale festum iudeorum: & quoniam in Euangelijs legimus Christum resurrexisse in prima Sabbati, respondet S. Ambrosius diem dominicum apud Iudeos fuisse secundam Sabbati, & ideo sic nominari in titulo huius Psalmi, sed propter Dominicam resurrectionem, diem dominicum esse capisse primam Sabbati, & ideo in Euangelijs vocari primam Sabbati S. Hieronymus, & S. Augustinus intelligunt hoc loco per secundam Sabbati, diem sequentem post Dominicam, qui-



*Qui est prima Sabbati, non solum in Euangelij sed etiam in titul. Psalmi vigesimi tertij: & hac est verior sententia: Sabbatum enim apud Iudeos, erat quidem festus & sollemnis dies, at non dicebatur primus, sed ultimus dies hebdomadae. Quia vero prima die facta est lux, secunda factum est firmamentum, S. Hieronymus, & Augustinus volunt, Psalmum praedictum pertinuisse ad Christum, qui est lux vera; hunc autem pertinere ad Ecclesiam, quae est firmamentum spirituale, in quo sunt stellae innumerabiles, id est, homines plurimi sapientiae, & sanctitatis gloria rutilantes. Argumentum Psalmi est laudatio Dei ob aedificium ciuitatis sanctae Hierusalem, & quidē Graci, Chrysostomus, Theodoretus & Euthymius existimant ad literā tractari de readificatione Hierusalem, post reuersionem à captiuitate babilonica simpliciter intelligunt, sed fieri potest, ut utriusq; sensum Spiritus S. intēderit, sed magis posteriorem, constat enim ciuitatem sanctam Hierusalem, Ecclesia Christi gessisse figuram.*

EXPLICAT. PSAL. XLVII.

I. **M**agnus Dominus, & laudabilis nimis, in ciuitate Dei nostri, in monte sancto eius.

Laudaturus Propheta aedificium, incipit à laude architecti, ac dicit, in aedificio sanctae ciuitatis mirifice splendere artem, & sapientiam Dei, qui illam aedificauit. Magnus, inquit, Dominus & laudabilis nimis. Magnus Dominus est, siue spectes essentiam eius siue potentiam, siue sapientiam siue iustitiam, siue misericordiam; omnia enim infinita, aeterna, incomprehensibilia sunt; & inde idem Dominus laudabilis est nimis, ut non sufficiant omnes Angeli, & omnes homines omnia opera eius satis eum laudare. Sed ex ijs, quae nobis reuelata sunt, nihil fere maius habemus, vnde Domini magnitudinem melius cognoscamus, & vnde magis eum laudare possimus, quam Ecclesiae Catholicae aedificationem, & ideo dicit

Propheta, Magnus Dominus, & laudabilis nimis in ciuitate Dei nostri, in monte sancto eius, id est, magnitudo Dei, vnde laudandus est valde, conspicitur in Ecclesiae fundatione, & constructione, quae est ciuitas Dei nostri, quae in monte sancto, id est, in excelsu perfectionis posita est. De hac enim dicitur Isaia 2. Erit mons domus Domini preparatus supra verticem montium. & Matthaei. 5. Dominus ipse vocat Ecclesiam suam, ciuitatem supra montem positam. Atque ut huius aedificij miracula breuissime attingamus: primo, cogita incredibilem varietatem gentium, linguis, moribus; ritibus, legibus distictarum ita conuenisse in vnius fidei, & sacramentorum vnitatem, ut vnum populum, imo vnam familiam efficiant. Secundo, cogita Ecclesiam fundatam fuisse super Petrum, ut Matth. 16. aperte dicitur, id est, super hominem piscatorem, vilem, indoctum, & pauperem; & tamen ita solide fundatam, ut porta inferi aduersus eam praeualere non possint: vellet enim nolit mundus; in quo Christi Ecclesia peregrinatur; & fremant quantum volunt, & possunt, omnes immundi spiritus, & persecutiones moueant omnes Reges terrae; tamen ad terram promissionis securus perueniet, & supra omnes caelos aliquando constituta felicissima in aeternum regnabit. Haec certe fieri non possunt, nisi à magno Domino, id est, à potentissimo, & sapientissimo architecto, qui propterea laudabilis est nimis, id est, omni laude maior est.

*Fundatur exultatione vniuersa terra  
mons Sion, latera Aquilonis, ciuitas Regis magni.*

Explicat Propheta, cur Deus sit laudabilis valde in Ecclesia, quae significatur per montem Sion, & ciuitatem Hierusalem: & causam esse dicit, quoniam à Deo fundatur Ecclesia cum exultatione vniuersa terra: & non dicit, fundata est; sed fundatur quoniam semper in varijs locis fundatur Ecclesia, ubi antea non erat. Non enim Ecclesia est vna parua domus, quae statim



fundari potest, sed est ciuitas magna totum orbem terrarum occupans, & varijs temporibus in varijs locis fundatur per Architectos, Spirituales, qui succedentes Apostolis, Christum, lapidem fundamentalem predicando iaciunt, ac deinde lapides viuos superedificant. Porro fundatio ista fit cum exultatione vniuersa terra, quoniam in vniuersa terra fundatur Ecclesia per Euangelij predicationem, quæ predicatio incredibilem lætitiã spiritualem adfert illam recipientibus: nam ideo comparata est a Domino notitia Regni calorũ thesauro abscondito in agro, quem qui inuenit cum gaudio vendit omnia quæ habet, & emit agrum, in quo thesaurum absconditum esse nouit, Matth. 13. & in actis Apostolorum cap. 2. cum fundaretur Ecclesia in Hierusalem dicitur, *Sumebant cibum cum exultatione* & capit. 8. baptizatus Philippo & fundante Ecclesiam in Samaria, *factum est gaudium magnum in illa ciuitate*, & Eunuchus Regina Candacis cum audiuisset fidem ab eodem Philippo, & baptizatus fuisset, *ibat per viam suam gaudens*. & c. 13. cum B. Paulus Gentibus predicare cepisset, & Ecclesiæ fundamenta iaceret, *gausa sunt gentes*, & *glorificabant verbum nomini*. Dicitur autem fundari mons Sion, vt intelligamus hic non agi de monte Sion corporali, ille enim fundatus fuit ab initio mundi, sed de monte spirituali, cuius ille figura erat. Est igitur hoc loco mons Sion. Ecclesia Christi, quæ dicitur mons Sion propter eminentiam doctrinæ, & perfectionem vitæ, quæ est in Ecclesia. Eadem quoque Ecclesia dicitur, *lætera Aquilonis*, quoniam sicut mons Sion corporalis situs est in terra promissionis ad partem borealem; & est, quasi murus quidam defendens eam regionem à vento illo frigido & furioso, qui dicitur Aquilo: sic etiam Ecclesia Christiana est quasi murus oppositus Aquiloni spirituali, id est, flatibus spirituum immundorum: qui enim requiescunt in sinu Ecclesiæ, id est, acquiescunt doctrinæ, quæ docetur in Ecclesia, & obediunt legibus eiusdem Ecclesiæ, non

facile læduntur ab Aquilone spirante pernicioſa dogmata, vel exempla. Denique eadem Ecclesia dicitur Ciuitas Regis magni; quod ad eius nobilitatem maxime facit: Ecclesia enim Christiana proprium Regem habet Christum, qui est Princeps Regum terræ, & Rex Regum, ac Dominus dominantium. Ceteri enim, qui Ecclesiæ præſunt, Ministri Christi sunt, vt Apostolus loquitur 1. Cor. 4. *Sic nos existimet homo, vt ministros Christi, & dispensatores mysteriorum Dei*. Et ille, qui supremam in Ecclesia potestatem habet, Vicarium Christi se dicit, nec solum seruum Dei, sed etiam seruum seruorum Dei ipse se nominat. Quod ad verba attinet, difficultas est solum de voce illa, *fundatur*: nam sancti Ambrosius, & Augustinus legunt, dilatans: S. Hieronymus vertit ex Hebræo, *specioso germine*. S. Ioan. Chrysostomus legit, bene radicans. Alij vocem Hebraicam significare volunt terminum, aut clima, aut regionem; aut ramum. Sed sancti Ambrosius, & Augustinus videntur legisse in græco textu *ὑποκίων* quod significat bene dilatans, pro *ὑπὸ ἰων* quod significat bene radicans. Et certe lectio posterior est verior, quia concordat cum vulgata latina antiquissima editione: nam vt Chrysostomus exponit, idem est, radicare, & fundare. Et idem est, *fundatur à Deo mons Sion*, & fundat Deus montem Sion: hoc solum interest quod græca vox habet adiunctum aduerbium, bene, quo caret vox latina. Sed in latina voce subintelligitur, bene, siue pulchre, vt est in Hebræo. Ex eo quod subiungitur, *exultatione vniuersa terra*, facile colligitur, non solum fundari, sed etiam pulchre, & bene fundari montem Sion. Ideo enim exultat vniuersa terra, quia videt hoc ædificium tam pulchre, & tam solide fundari. Versio S. Hieronymi, fundamentum habet in voce Hebraica, *iephe noph*, quæ potest reddi, *specioso germine*, siue pulchris ramis, & sensus erit, montem Sion ornatum esse pulchris ramis, siue pulchris arboribus, sed vox illa *noph*, quæ tam multa, & tam diuersa significat secundum opinionem



miones recentiorum, vt etiam ad regiones, & terminos, & climata referatur, cur non poterit etiam referri ad fundationem & radicacionem, vt Septuaginta seniores antiquissimi & doctissimi censuerunt? Itaque censemus verba Hebraica consentaneè ad versionem LXX. Interpretum, & ad expositionem Chrysostomi, Theodoret, & S. Hieronymi in commentario Psalmorum, reddi posse, *bene fundatur.*

III. *Deus in domibus eius cognoscetur, cum suscipiet.*

Addit secundam rationem, cur magnus sit Dominus, & laudabilis valde in ciuitate sua Hierusalem: quia non solum bene fundauit eam, sed etiam continuo protegit & exaltat. *Deus*, inquit, qui fundauit Ecclesiam instar regie ciuitatis, tunc potissimum *cognoscatur in domibus eius*, id est, tunc cognoscetur ab omnibus habitantibus in domibus eius; siue, tunc cognoscetur habitare in domibus eius; quando in tempore persecutionum *suscipiet eam*, protegendam atque exaltandam. Pro voce, *domibus*, in Hebræo est vox, *armenoth*, quæ significat non qualibet domos, sed palatia, basilicas, templa. Itaque hinc intelligimus, Deum habitare potissimum in domibus ipsi Deo sacris, quales sunt basilicæ ac templa, quæ Deo propitius dedicantur. Pro vocibus autem, *cum suscipiet eam*, est in Hebræo, *lemisgab*, quod significat, in refugium, siue, in auxilium, siue, in exaltationem. Proinde illud, *cum suscipiet eam*, explicandum est, cum suscipiet defendendam & exaltandam; siue, cum susceptor eius erit, id est, auxiliator & defensor: nam in Psalm. 45. vbi legitur, *susceptor noster Deus Iacob*, pro *susceptor*, in Hebræo est, *misgab*, vt hoc loco.

IV. *Quoniam ecce Reges terra congregati sunt: conuenerunt in vnum.*

V. *Ipsi videntes sic admirati sunt, conturbati sunt, commoti sunt, tremor apprehendit eos.*

VI. *Ibi dolores vt parturientis, in spiritu vehementi conteres naues Tharsis.*

Hos tres versiculos diuerso modo expouunt Latini, Ambrosius, Hieronymus, Augustinus, & Græci, Chrysostomus, Theodoretus, Euthymius: Latini enim Patres expouunt de Gentilibus conuersis ad fidem: Græci vero de Gentilibus oppugnantibus fidem. Vtraque expositio vera est, & vna cum altera non pugnat. Itaque iuxta Latinos hic erit sensus: Deus cognoscetur esse in Ecclesia ex conuersione Gentilium, *Quoniam ecce Reges terra*, & populi eorum cum eis ex potentia verbi Dei per Apostolos prædicati, & virtute signorum & prodigiorum per eisdem patratorum conuersi, *congregati sunt, & conuenerunt in vnum*, id est, ex variis sectis ac superstitionibus conuenerunt in vnitatem fidei, & congregati sunt in vnam Ecclesiam, quasi in populum vnum; imo vt efficerentur cor vnum, & anima vna, vt dicitur de primis Christianis in Actis Apostolorum cap. 4. Conuersio autem eorum sic fuit, quoniam *ipsi videntes signa & prodigia, sic admirati sunt*, & cognoscentes magnitudinem erroris, & peccatorum suorum, dum idola pro Deo colerent, *conturbati sunt, & commoti sunt* per veram poenitentiam: vnde etiam tremor apprehendit eos, considerantes periculum eternæ damnationis, in quo tam diu fuerant. Tremor autem non levis, sed grauissimus, apprehendit eos: qualis est dolor parturientis, qui tamen in gaudium magnum definit. Cum enim parturiens peperit filium, iam non meminit pressuræ propter gaudium, quia natus est homo in mundum, vt dicitur Ioan. 16. sic & dolor poenitentis definit in lætitiā inenarrabilem, cum adoptionis gratia, quæ salutis eternæ semen & pignus est, cordi poenitentis infunditur, & tunc impletur, quod sequitur: *In spiritu vehementi conteres naues Tharsis*, Spiritus enim sanctus hominem iustificatum inhabitans, & vehementi ardore charitatis inflammas confingit naues Tharsis, per quas superbia, luxuria, & auaritia significatur: naues enim tumentibus velis per fluctuantes vndas in Tharsis properantes, aurum & argentum adducebant, vt dicitur; Reg. 10. & 2. Paralip. 9. tumor.



tumor velorum superbiam; fluctuatio navis luxuriam, aduectio auri & argenti auaritiam designat. At iuxta expositionem Græcorum sensus est, Deus in Ecclesia cognoscitur ex admirabili victoria Christianæ religionis aduersus impios persecutores. *Ecce enim Reges terra*, audita fama Christianæ religionis, *congregati sunt*, conuenerunt in unum, id est, ex variis locis, & ex variis superstitionibus conuenerunt aduersus Christi Ecclesiam, vt eam persecutionibus suis opprimerent & extinguerent. Sed *videntes* fortitudinem sanctorum Martyrum; & mirabilem constantiam, in sexu etiam fragili & in ætate tenera; nec non signa & prodigia, quæ per eos Deus faciebat, & quod numerus Christianorum persecutionibus & mortibus augebatur, *admirati sunt*, conturbati sunt, commoti sunt, partim indignatione, partim dolore: & tremor apprehendit eos, sicut dolor parturientis, cum viderent templa idolorum deseri, & Christi Regnum ipsis inuitis, & totis viribus repugnantibus crescere. Hoc autem accidit, quia Dominus in spiritu vehemēti, cum admirabili manifestatione potentie suæ contriuit idololatricam, quomodo solet tempestas venti breuissimo tempore dissipare & conterere naues in mari. Quod attinet ad verba, vox illa, *terra*, cum dicitur, *Reges terra*, non habetur in Hebraico codice, sed LXX. Interpretes explicandi gratia addiderunt. Illa autem particula, *sic*, iungenda est cum verbo sequenti, non cum præcedenti: est enim sensus, *ipsi videntes, sic admirati sunt*, id est, viderunt, & sic admirati sunt. Vox illa, *commoti sunt*, ex Hebræo à S. Hieronymo vertitur, *admirati sunt*. Sed vox Hebræa, **כפח** *chaphaz*, significat quidem admirari, sed significat etiam commoueri. Et quoniam iam dictum erat, *admirati sunt*, conturbati sunt, recte Septuaginta verterunt verbum sequens, *commoti sunt*, tum ne idem bis repeteretur, tum quia hic est ordo naturalis, vt inopinato malo adueniente primum oriatur in nobis admiratio, deinde turbatio, postremo commotio, siue fuga. Cum dicitur, in spiritu vehemēti conteres naues Tharsis,

subintelligitur, *quia*, vel alia similis particula: redditur enim ratio, cur ibi fuerint dolores vt parturientis. Potest autem duobus modis intelligi contritio nauium: primum, vt subintelligatur particula similitudinis hoc modo: *In spiritu vehemēti conteres eos*, quomodo ventus validus confringit naues: secundo, vt sensus sit, *in spiritu vehemēti conteres naues Tharsis*, id est, non solum terrestres copias, sed etiam classes instructas aduersariorum dissipabis. Sicut enim impij terra mariq; Ecclesiam oppugnant, sic etiam Deus terra mariq; pro Ecclesia pugabit. De voce, *Tharsis*, quam Græcus & Latinus Interpres reliquerunt, vt in Hebraico textu inuenerant, magna quæstio est, aliis volentibus significare Ciliciam, aliis Carthaginem, aliis Indiam, aliis ipsum mare. Sed hoc postremum improbabile est, quoniam Ionas ascendit in nauem, vt iret in Tharsis, vt legimus Ionæ 1. Si autem Tharsis mare significaret, iam fuisset Ionas in Tharsis, quando erat in naui: quorsum igitur nauigabat, vt iret in Tharsis? ex aliis significationibus, illa videtur verior, quæ pro Tharsis India designatur, cum ex Tharsis adferretur Salomoni tertio quoque anno magna copia auri, & argenti, & eboris; vt dicitur 3. Regum 10. & 2. Paralip. 9. Atqui ex Cilicia, vel Carthagine non adducuntur eiusmodi metalla, neque est opus triennio, vt ex Hierusalem nauigetur in Ciliciam, vel Carthaginem. Sed hoc loco dicuntur *naues Tharsis*, naues magnæ, quales esse solebant eæ, quibus nauigabatur in Tharsis, id est, in Indiam.

*Sicut audiuiamus, sic vidimus in ciuitate Domini virtutum, in ciuitate Dei nostri: Deus fundauit eam in æternum.*

Verba sunt filiorum Ecclesiæ, qui lætantur se experimento iam discere de Ecclesiæ stabilitate, quod ante promissum audiuerant. Et nos præsertim hæc dicere possumus, audiuiamus enim Christum dixisse: *Super hanc petram ædificabo Ecclesiam meam,*  
 & per-



*Et porta inferi non praeualebunt aduersus eam,* Matt. 16. & nunc post mille sexcentos annos, post tam multas & tam graues Paganorum & Hereticorum persecutionem, videmus Ecclesiam non potuisse deficere. Dicit ergo Propheta in persona fidelium: *Sicut audiuius,* à Prophetis & Apostolis prae dictum, *ita vidimus* adimpletum in Ecclesia, *quae est ciuitas Domini virtutum*, cui videlicet militant omnes res creatae, & qui ideo dicitur *Domini virtutum*, id est, exercituum, *qui est Deus noster*. Quod autem audiuius & vidimus, est, quod *Deus fundauit eam in aeternum*, vt nullum sit periculum, ne vnquam euertatur. Atque ex hoc loco satis aperte colligitur, in hoc Psalmo non accipi ciuitatem Dei pro terrena Ierusalem, vt aliqui recentiores volunt; illa enim iam olim à Tito Imperatore euersa fuit, & de illa prae dictum fuit à Domino: *Non relinquent in te lapidem super lapidem*, Luc. 19.

VIII.

*Suscepimus Deus misericordiam tuam in medio templi tui.*

His verbis confitetur populus Dei, non suis viribus aut meritis tribuenda magnalia, quae Deus fecit & facit in Ecclesia, sed soli misericordiae Dei. Ideo subiungit: *Suscepimus Deus misericordiam tuam in medio templi tui*, id est, hanc stabilitatem Ecclesiae, & alia bona innumerabilia, quae sicut audiuius promissa, ita nunc vidimus impleta; de tua manu accepimus, non ipsi nobis peperimus. Fatemur igitur *in medio templi tui*, id est, publice, & coram omnibus, nos suscepisse *misericordiam tuam*, illi tribuimus omnia bona. In Hebraeo habetur verbum, quod non tam suscipere, quam aestimare significat; quare S. Hieronymus vertit: *Aestimauimus misericordiam tuam in medio templi tui*. Sed idem est sensus, vt S. Chrysostomus recte exponit, qui verbum Hebraicum & Graecum expendit: illud enim, *suscepimus*, referendum est ad cognitionem & estimationem beneficii, vt diximus. S. Augustinus legit, *in medio populi tui*, sed habuit codicem Graecum inemendatum ob litera-

rum similitudinem; siquidem legitur *λαῶν, populi*, pro *ναῶν, templi*. In Hebraeo nulla est similitudo literarum, unde error manare potuerit.

*Secundum nomen tuum Deus, sic & laus tua in fines terra: iustitia plena est dextera tua.*

IX.

Pergit Propheta in persona fidelium laudare Deum ob accepta beneficia, ac sicut initio dixerat: *Magnus Dominus, & laudabilis nimis*, ita nunc dicit: *Secundum nomen tuum, sic & laus tua in fines terra*, id est, secundum magnitudinem nominis tui est etiam magnitudo laudis tuae. Sicut enim nomen Dei in vniuersa terra innotuit ob magnalia, quae in Ecclesia fundanda & protegenda patrauit; sic etiam laudatur Deus per totum mundum, vsque ad vltimos terminos terrae. Addit etiam materiam laudis, dicens: *Iustitia plena est dextera tua*. Inde enim vbique laudatur Deus magnificentissimus praeconio omnium gentium, quoniam iustissime pios defendit, & impios puniuit. Dicitur autem *dextera Dei plena iustitia*, non quod non sit etiam plena misericordia, sed quod nullum locum habeat apud eum iniustitia. *Iustus enim Dominus est in omnibus operibus suis.*

*Latetur mons Sion, & exultent filiae Iudae, propter iudicia tua Domine.*

X.

Ex eo quod dextera Domini plena est iustitia, hortatur Propheta populum Dei ad exultandum, quoniam is populus praeter ceteros nouit per experientiam iustitiam Domini. *Latetur, inquit, mons Sion*, id est, populus Dei, siue Ecclesia Dei, quae per eum montem significatur; *& exultent filiae Iudae*, id est, non solum viri, sed etiam foeminae in populo Dei latentur, *propter iudicia tua Domine*, videntes scilicet iustitiam, quam exercuisti in protegendis fidelibus, & perdendis infidelibus. Fortasse etiam per montem Sion intelliguntur perfecti & fortes; per filias Iudae, imperfecti & debiles. Vel, per montem Sion, intelligitur arx & caput Religionis, qualis erat Ierusalem apud Iudaeos; per filias Iudae, intelliguntur reliqua membra Ecclesiae,



clisæ, qualia erant oppida subiecta Ierosolymæ: sæpe enim in Scripturis, ac præsertim in libro Iosue, per filias, intelliguntur castella, siue oppida subiecta maioribus ciuitatibus.

XI. *Circumdate Sion, & complectimini eam, narrate in turribus eius.*

XII. *Ponite corda vestra in virtute eius, & distribuite domus eius, vt enarretis in progenie altera.*

Hortatur in fine Psalmi ad ædificationem & munitionem sanctæ ciuitatis, de qua dixerat: *Fundatur exultatione vniuersa terra mons Sion ciuitas Regis magni.* Hæc enim ciuitas non est similis materiali ciuitati, quæ semel fundatur & ædificatur, sed vsque ad finem mundi fundanda, & ædificanda, & munienda est, ex lapidibus viuus, qui quotidie inferendi sunt, donec ciuitas perfecta in die nouissimo dedicetur. Sic enim Apostolus loquitur ad Ephes. 2. *In quo & vos ædificamini in habitaculum Dei in Spiritu sancto, & c. 4. Et ipse dedit quosdam quidem Apostolos, quosdam autem Prophetas, alios vero Euangelistas, alios autem Pastores & Doctores ad consummationem Sanctorum in opus ministerij, in ædificationem corporis Christi.* Et S. Petrus in epist. 1. cap. 2. *Ad quem accedentes lapidem viuum, ab hominibus quidem reprobaturum, à Deo autem electum & honorificatum, & ipsi tanquam lapides viuus super ædificamini domus spirituales.* Ait igitur: *Circumdate Sion, & complectimini eam*, id est, muris cingite sanctam ciuitatem, vbi forte desunt. Dicuntur autem muri ciuitatis viri perfecti, qui reliquum populum defendunt ab inimicis, *Narrate in turribus eius*, id est, ex edito loco publice prædicare: nam (vt supra diximus) prædicatio Euangelij est instrumentum, quo ciuitas fundatur & ædificatur. *Ponite corda vestra in virtute eius*, id est, serio cogitate de munitione & robore ciuitatis, ne pateat hostium incursum: *& distribuite domos eius*, id est, post fundata & ædificata moenia, fundentur & ædificentur domus:

& quoniam ad hoc opus multi requiruntur, distribuite variis operariis partes suas, vt domos ædificent, & sic ciuitas paulatim repleatur & crescat: & sic fiet, vt enarretis in progenie altera, id est, vt per vos multiplicato populo Dei, ad posteros transmittatis notitiam Dei.

*Quoniam hic est Deus, Deus noster in æternum, & in sæculum sæculi, ipse reget nos in sæcula.*

Hoc est quod narrandum est posteris, quod videlicet, *hic Deus*, qui fecit mirabilia in ciuitate sancta Ierusalem, *ipse est Deus noster in æternum*, nec vnquam recedemus ab eo, nec ipse recedet à nobis; nos erimus in æternum populus eius, & ipse Deus noster erit in æternum, & *reget nos in sæcula.* S. Hieronymus vertit ex Hebræo hæc vltima verba, *Ipse reget nos in morte.* Sed facile est videre, vnde orta sit varietas lectionis; nam vox Hebraica, si legatur, *halamoth*, significat *sæcula*, & sic legerunt LXX. Interpretes; si legatur cum aliis punctis, *halmuth*, significat *ad mortem*, & sic legit S. Hieronymus, & legunt hodie Rabini. Vterque autem sensus verus est, & in idem recidit: nam si Deus regat nos vsque ad mortem, reget sine dubio in sæcula: non enim post mortem ab illo excidere poterimus. Qui exponunt hunc Psalmum de terrena Ierusalem, valde laborant in explicatione vndecimi & duodecimi versiculi, Qui autem exponunt ad literam de Ecclesia, nullas patiuntur angustias.

## PSALM V. S. XLVIII.

### Titulus & Argumentum Psalmi.

In finem filiis Core. Psalmus.

**I**N titulo nihil est noui. Argumentum est adhortatio vtilissima ad virtutem sectandam, & fugienda vitia.



EXPLICATIO PSALMI XLVIII.

I. **A**udite hæc omnes Gentes, auribus percipite omnes, qui habitatis orbem.

II. *Quia, terrigena & filij hominum, simul in vnum diues & pauper.*

Hæc est præfatio ad captandam attentionem, quæ sumitur ex eo quod oratio habenda conveniat omnibus hominibus æqualiter, nec solum præsentibus, sed etiam futuris. Itaque convocatur omne genus humanum ad audiendum, & quoniam neque locus ullus tantam multitudinem caperet, neque vlla vox Oratoris à tam multis audiri posset: intelligere debemus Prophetam prævidisse Psalmos suos in omni terra, & in omni futuro tempore decantandos, & ideo omnes omnino ad audiendum invitasse. *Audite*, inquit, *omnes gentes*, siue (vt habetur in Hebræo) *omnes populi*: quia videlicet ad omnes pertinent ea, quæ dicenda sunt. *Auribus percipite omnes, qui habitatis terram*: declarat verba præcedentia, quod enim dixerat: *Audite*, declarat addens, *auribus percipite*, id est, non ita audite, vt sermo tantum circumsonet aures, & pertranseat, sed ita audite, vt sermo intra aures recipiatur, ibiq; hæreat, vt attente cogitari possit. Quod autem dixit, *omnes gentes*, explicat addens, *omnes qui habitatis orbem*, ne videlicet per gentes intelligantur soli Gentiles; vel per populos, vt est in Hebræo, intelligerentur soli qui ciuitates incolunt. Vocat igitur ad audiendum omnes, qui orbem terrarum incolunt, siue sint Gentiles, siue Hebræi, siue congregati in ciuitatibus, siue dispersi in montibus & solitudinibus habitent. Ac ne videatur solos viuentes & præsentem alloqui, addit aliquid generalius, dicens: *Quia, terrigena & filij hominum*, id est, audite omnes, qui ex terra & ab hominibus ortum ducitis: omnes enim homines, tam qui sunt, quam qui erunt, communem habent matrem, terram, & communem patrem, Adamum, siue, communem habent materiam ex qua sunt, terram, & commune princi-

pium actuum, hominem. In Hebræo habetur, *filij Adam*, vbi nos habemus, *terrigena*; sed credibile est, LXX. Interpretes non legisse, *Adam*, sed *adamà*, quæ vox terram significat: facile enim est, litteram vltimam ex nostris codicibus Hebræicis excidisse. Adiungit postremo, *simul in vnum diues & pauper*, vt ostendat id quod dicendum est in hoc Psalmo, ad omnes æqualiter pertinere, non magis ad diuites, quam ad pauperes, neque in hoc theatro vllam rationem habendam differentiarum personarum; sicut non habebitur in conuentu illo, quo conuocabimur ad iudicium in die nouissimo. Hæc enim oratio, quam in hoc Psalmo per Prophetam Spiritus Sanctus ad homines habet, talem omnino conuentum requireret, qualis erit in vltima die.

III. *Os meum loquetur sapientiam, & meditatio cordis mei prudentiam.*

IV. *Inclinabo in parabolam aurem meam, aperiam in psalterio propositionem meam.*

Hæc est altera pars præfationis, in qua rursum Propheta præparat auditorem ex alio duplici capite; ex dignitate materiæ, & ex dignitate docentis. Dignitas materiæ ostenditur ex eo, quod sermo futurus est de sapientia & prudentia, & sermo non simplex, sed parabolicus & ænigmaticus, qualem decet esse sermonem de rebus grauissimis, vt non contemnatur, neque intelligatur, nisi à diligentibus & attentis auditoribus. *Os meum*, inquit, *loquetur sapientiam*, id est, docebit ea, quæ faciunt hominem sapientem: & *meditatio cordis mei prudentiam*, id est, & meditatio cordis mei, quæ per os foras erumpit, docebit ea, quæ faciunt homines prudentes; declarat enim priorem versiculi partem per posteriorem: cum enim dixisset, *Os meum loquetur*, ne putaremus eum temere loquuturum quicquid in buccam venerit, addit, & *meditatio cordis mei*, supple, loquetur, id est, os meum pariet, quod cor meum diuturna meditatione conceperit. Et quia dicitur se loquuturum

אדם  
אדמה

III.

IV.



turum sapientiam, ne quis existimaret, sermonem futurum de rebus speculatiuis, & ad actiones humanas parum pertinentibus, addidit *prudentiam*. Itaque significat sermonem habendum de rebus, quæ sapientiam simul & prudentiam contineant, quæq; faciunt hominem sapientem in altissimis causis contemplandis, & prudentem in vita rectissime instituenda. Attingit deinde magnitudinem Doctoris, cum addit: *Inclinabo in parabolam aurem meam, aperiam in psalterio propositionem meam*, quasi dicat, non ego loquuturus sum. quæ mox audietis, sed spiritus Domini per me loquetur: ego enim attente primum audio internum Doctorem meum, deinde quæ audiui, loquor. *Inclinabo ad parabolam aurem meam*, id est, subiciam aurem meam spiritui loquenti, & obedienter audiam, & sic aperiam in Psalterio propositionem meam, mihi videlicet à Deo inspiratam & communicatam. Per parabolam, hoc loco intelligitur ænigma, id est, propositio obscura, quæ attentionem & studium requirit, ut intelligatur. Id patet ex verbis Hebraicis, quæ significant Prouerbum, ænigma: & similia habentur Iud. 14. ubi Sampson proposuit explicandam illam sententiam: *De comedente exiit cibis, & de forti egressa est dulcedo*, quam sententiam vocat problema, & propositionem: & habentur eo loco eadem verba Hebraica, quæ hic habentur. Quod autem additur, *in psalterio*, siue *in cithara*; ut proprie sonat vox Hebraica, pertinet etiam ad præparationem auditorum: significat enim Dauid se propositurum doctrinam suam grauissimam cum cantu & sono, ut suauitas musicæ temperet gravitatem doctrinæ, & præcepta vtilissima iucundius & audius suscipiantur.

W. *Cur timebo in die mala? iniquitas calcanei mei circumdabit me.*

Hoc est prouerbum, siue ænigma, quod præmissa tam accurata præfatione toti humano generi Propheta proponit & soluit. Sed solutio non minus est obscura, quam propositio, ut tam propositio, quam solu-

tio ænigmatica dici possit. Sed tamen ænigmata sunt hæc verba hominibus huius sæculi amore præoccupatis: nam viris spiritualibus & veris Dei seruis apertissima sunt. Ait igitur: *Cur timebo in die mala?* quasi dicat, propono vobis omnibus, qui habitatis orbem terrarum, hanc questionem soluendam. *Quid est, quod me terrere poterit in die mala?*, id est, in die iudicii diuini, quæ dicitur Sophoniæ 1. *dies ira, dies tribulationis & angustia, dies calamitatis & miseria, dies tenebrarum & caliginis, dies nebula & turbinis, dies tubæ & clangoris?* Siue (quod est idem) *Quid me securum reddere poterit in die illius iudicii, à quo summa bonorum omnium, & malorum meorum dependet?* Magnum profecto problema, & quod omnes omnino contingit. Soluit autem Propheta suum ænigma, cum dicit: *Iniquitas calcanei mei circumdabit me*, id est, quod me timere faciet in die illa mala, non est paupertas, quia Iudex non corrumpitur donis: non est humilitas generis aut status, quia Iudex non respicit personas, non est malitia restium, aut aduocatorum, quia Iudex omnia nouit, non est potentia aduersariorum, quia Iudex neminem timet, denique nihil est aliud, nisi iniquitas; & non quæuis iniquitas, sed sola *iniquitas calcanei mei*, id est, iniquitas extremæ vitæ meæ, iniquitas perseverans usque ad finem vitæ: illa enim si intueniatur in illa die in me, omnino *circumdabit me* instar aggeris aut muri, ut nullo modo euadere possim, quia tunc non erit amplius locus poenitentiae vel indulgentiæ. Et contra, quod me securum & impavidum in die mala facere poterit, non eunt diuitiæ, aut nobilitas; aut Aduocatorum diligentia, vel amicorum potentia, sed sola iustitia, & non quæuis iustitia, sed iustitia calcanei mei, id est, extremæ vitæ meæ, siue innocentia perseverauerit mecum usque ad mortem, siue per veram poenitentiam iniquitate deleta, in eius locum successerit vera iustitia. Scio multis aliis modis hos versiculos ab aliis exponi: sed ego breuiter studeo, & de variis sententiis Lectori iudicium relinquo.



VI.

*Qui confidunt in virtute sua, & in multitudine diuitiarum suarum gloriantur.*

Posteaquam dixerat Propheta; nihil esse timendum, nisi peccatum, ut quis in die mala securus sit: addit nunc multos esse, qui hoc non intelligentes, confidunt in viribus suis, ac per hoc gloriantur in diuitiis, quas magno studio parauerunt, existimantes hac ratione se tutissimos fore in qualibet mala die; & simul demonstrat illos omnino falli, & problema suum, cuiusque solutionem esse verissimam. Ait igitur, *Qui confidunt in virtute sua*: id est, qui non timent diem malam, freti potentia, & viribus suis, ut sunt plurimi ex filiis huius sæculi, illi etiam consequenter gloriantur in multitudine diuitiarum suarum: existimant enim pecuniis omnia vin- ci, & expugnari posse. Et vere in hoc sæculo magna vis est in opibus & diuitiis, ut vere dixerit Sapiens, *Pecunia obediunt omnia*, Eccl. 10. Sed in die mala nullæ amplius inueniuntur pecuniæ, neque si inuenirentur prodesse possent: ideo subiungit Propheta.

VII.

*Frater non redimit, redimet homo? non dabit Deo placationem suam.*

Ostendit vanam esse fiduciam confidentium in pecuniis. Ait enim, *frater non redimit*, id est, nemo poterit quamlibet magnis diuitiis in die mala redimere fratrem suum. *Redimet homo?* hoc legendum est cum interrogatione, ut monet sanctus Basilius, *frater non redimit, redimet homo?* vel repetenda est negatio de more. Scripturæ sanctæ Frater non redimit, non redimet homo. Est enim sensus, *frater non redimit*, multo minus alius homo redimet. *Non dabit Deo placationem suam*, id est, neque alium, neque se ipse liberare poterit; quamuis enim pecuniis maxime abundet; & eas omnes offerat ad placandum Deum in die mala, nihil ei proderit. Nam ut Dominus in Evangelio loquitur, *Quam dabit homo commutationem pro anima sua?* superat enim precium animæ humanæ omnia bona humani mundi, & ideo solus sanguis vnigeniti

Dei, qui infiniti valoris erat, precium animarum esse potuit. Itaque qui hoc magno precio neglecto in diabolica captiuitate detentus perueniet ad diem malam, non dabit Deo placationem suam.

*Et precium redemptionis animæ suæ, & laborabit in æternum, & viuere adhuc in finem.*

VIII.

Declarat quod dixerat, *Non dabit Deo placationem suam*: placatio enim Dei, est precium redemptionis, quod solus vnigenitus Dei dare potuit: de quo intelligit S. Basilius verba sequentia, *Laborabit in sæculum & viuere adhuc in finem*, id est, laborabit in hoc mundo ad tempus, & viuere postea in æternum. Sanctus autem Ambrosius, & Chrysostomus exponunt hæc eadem verba de viro pio, & sapiente quocunque, quem opponunt viro stulto, & impio confidente in multitudine diuitiarum suarum: Vir enim pius, & sapiens laborat ad tempus in seruandis præceptis, sed viuere in æternum. Sanctus vero Augustinus exponit de illo eodem, de quo dictum est paulo ante, *non dabit Deo placationem suam*: & vult hunc sensum esse: ille, qui confidit in multitudine diuitiarum suarum, *laborabit in æternum*, quia labor eius non habebit finem, & viuere modico tempore, quia vita eius erit vsque in finem, & non ultra. Et videtur secundum hanc expositionem melius continuari textus prophetæ, & magis proprie exponuntur verba, *in sæculum, & in finem*; nam laborare in sæculum, non est laborare in hoc mundo, vel laborare modico tempore, sed est laborare in æternum: & viuere in finem, non est viuere sine fine, sed est viuere vsque ad finem statutum, & definitum; ita ut finis naturalis vitæ non præueniatur, neque extendatur. Verba Hebraica, pro, *laborabit in sæculum*, videntur habere, *quiescit in sæculum*: Nam *chadal*, quiescere significat. Sed non est verisimiliter LXX. Interpretes reddidisse omnino contrarium sensum: ideo suspicor illos legisse, *charal*: nam literæ ד, & ר, simillimæ sunt. Verbum autem *charal*, signifi-



nificat, *angustari*, & cruciari, & quasi vrticis pungi; quod satis proprie conuenit amatoribus diuitiarum, quas Dominus in Euangelio Matth. 13. spinis comparauit. Itaque qui in diuitijs suis confidunt, non solum non dabunt precium redemptionis animæ suæ, sed laborabunt in tormentis cum diuite Epulone vsque in æternum; & viuent vitam voluptariam, quæ illis sola videtur esse vita, vsq; in finem à Deo constitutum. De varia interpretatione textus Hebraici non laboro; quoniam illa posita: est ad arbitrium Rabinorum, quibus iniuriam non facimus, cum eis Septuaginta Interpretes antiquiores, & doctiores anteponimus.

IX. *Non videbit interitum, cum viderit sapientes morientes: simul insipiens, & stultus peribunt.*

Quia dixerat, impium victurum vsque in finem, cursu videlicet naturali; addit confirmans hoc ipsum, *Non videbit interitum, cum viderit sapientes morientes*, id est, continuabit cursum vitæ suæ vsque ad vltimam senectutem, etiam si videat aliquos sapientes, & iustos rapti ante tempus, & non continuare cursum vitæ vsque in finem naturalem; sæpe enim Deus ijs, quibus daturus non est vitam æternam, dat vitam temporalem diuturnam, quomodo Lazarus in Euangel. Luc. 16. mortuus legitur ante Epulonem. Sed quamuis vita hæc temporalis aliquando impijs satis longa contingat: tandem tamen finitur, & fit quod sequitur in Psalmo, *simul insipiens & stultus peribunt*. Itaq; sensus totius versiculi est, *Non videbit interitum*, id est, non morietur stultus, confidens in diuitijs ante tempus, cum viderit aliquos sapientes ante tempus morientes: tandem tamen simul cum sapientibus etiam stultus, & insipiens ad vitæ temporalis finem peruenient. S. Augustinus paulo aliter exponit illud, *nō videbit interitum*: vult enim sensum esse, non enim verus interitus est mors corporis, sed mors animæ. Posset etiam dici, *non videbit interitum*, id est, non cogitabit se quoque moriturum, quando sapientes viderit mori-

entes: quæ sententia verissima est, hæc est enim cæcitas humana, vt cum quotidie videamus morientes homines, nobis etiam meliores, & iuniores; tamen vix adduci possumus, vt serio cogitemus, nos quoque morituros esse: tamen ad litteram in scripturis Sanctis, *non videre interitum*, est, non corrumpi, Psal. 15. *Non dabis sanctum tuum videre corruptionem*; & Ioa. 8. *Si quis sermonem meum seruauerit, mortem non videbit in æternum*. Quid autem intersit inter stultum, & insipientem, docet S. Basilus: dicit enim insipientem esse, qui ad humanam, & communia inepertus est, qui videlicet, humana sapientia, siue prudentia caret: stultum autem vocari eum, qui caret notitia rerum diuinarum, & solis terrenis intentus est. & videtur S. Basil. non tam ad Græcas, quam ad Hebraicas voces respexisse. Vere enim, *chēsil*, vox hebraica, significat eum, qui sapientia etiam humana caret vox autem, *haar*, significat hominem pecori similem: pecora enim sola terrena cogitant; vnde etiam paulo post dicit Psalmus, *Homo cum in honore esset non intellexit, comparatus est iumentis insipientibus*.

X. *Et relinquent alienis diuitias suas, & sepulchra eorum domus illorum in æternum.*

Confidentes in diuitijs stultos, & insipientes vocauerat sanctus Propheta, quomodo vocat etiam Dominus in Euangelio Luc. 12. cum dicit cuidam diuiti, *Stulte hac nocte repetet à te animam tuam, & quæ perastisti cuius erunt?* Ideo probat eos vere stultos esse, ex eo quod diuitijs vtī nesciunt, easque relinquunt ijs, quos ignorant. *Peribunt*, inquit, *insipientes*, & stulti, quales sunt confidentes in diuitijs, & vt stultitiam suam mau fesse prodant, relinquent alienis diuitias suas. Vbi recte notat S. Augustinus, per alienos, intelligi posse etiam filios, & nepotes hominum impiorum: nam etiam isti, tamquam alieni cito obliuiscuntur eorum, quorum opes obtinuerunt: & quamuis etiam non obliuiscerentur, tamen mor-



mortuos impios iuuare non possent: quomodo dines ille de Euangelio quinque fratres habebat in seculo, & tamen ab eis iuuari non poterat, quo minus arderet in gehenna, Luc. 16. Proinde quinque illi fratres inter extraneos deputabantur: vnus autem Lazarus, qui eum iuuare potuisset, vere proximus, & non extraneus fuisset, si misericordiam in illum facere voluisset. Adiungit Propheta, *Et sepulchra eorum domus illorum in aeternum*, id est, ipsi quidem morientes reliquerunt alienis diuitias suas, sibi autem nihil retinuerunt, nisi angustissimam domum, id est, sepulchrum, in quo iacere debent in aeternum, id est, ad finem vsque seculi: sepe enim, aeternum, in Scripturis, significat integram durationem alicuius temporis, vel status: & declaratur hæc phrasis in verbis sequentibus, *Tabernacula eorum in progenie & progenie*. Quod enim vocauerat sepulchrum, & domum aeternam, id ipsum nunc vocat tabernaculum, in progenie, & progenie, id est, habitaculum, vbi manebunt corpora eorum, donec generationes & generationes peragentur: quod sine dubio erit vsque ad mundi consummationem. In Hebræo non habetur, *sepulchra*, sed, *interiora*: cæterum credibile est Septuaginta Interpretes non legisse *Kirbam*, vt modo legitur, & significat interiora eorum; sed literis transpositus *Kibram*, & significat sepulchra eorum.

XI.

*Tabernacula eorum in progenie, & progenie, vocauerunt nomina sua in terris suis.*

De priore parte versiculi dictum est in explicatione versiculi superioris. Quod autem additur, significat, post mortem hominum insipientium, nihil superesse in terris, præter nomina ipsorum: multis enim modis conantur mortales, qui hanc solam vitam nouerunt, nomina sua aeternitati commendare: vel enim nomina sua inscribunt parietibus; vel ea ciuitatibus indunt; vel in libris à se scriptis apponunt; vel denique filios, aut nepotes ad memoriam persequendam nomina sua gerere curant. Ita filij huius seculi

nomina sua scribunt in terris quoniam scripta esse non sperant in coelis.

*Et homo, cum in honore esset, non intellexit, comparatus est iumentis insipientibus, & similis factus est illis.*

Occasione insipientis: atque in diuitijs confidentis, digreditur Propheta ad ipsum genus humanum coarguendum, quasi dicat, *Et sic homo cum in honore esset, non intellexit*, id est, homo præter cætera animalia honoratus à Deo intelligentia, & ratione, libero arbitrio, imagine diuinitatis, immortalitate animæ, imperio super omnia, quæ in terris sunt, non intellexit hunc honorem suum: sed comparatus est iumentis insipientibus, quibus non est intellectus. Et similis factus est illis, dum more pecudum, non prospicit in futurum, sed præsentibus solum inhiat; & subijcit se corporalibus passionibus, quibus imperare debuerat: ac denique vera, & sempiterna bona contemnit, vt falsis, & caducis fruatur, cum è contrario temporalia omnia despiciere debuisset, vt sempiternam vitam sibi compararet. In Hebræo codice non habetur, intellexit, sed, *ialin commorabitur* cæterum Septuaginta Interpretes non legērunt, *ialin*, sed *iauin*, quod est intellexit, Facile autem fuit progressu temporis vnam litteram in alteram mutari.

XII.

*Hæc via illorum scanda'um ipsis, & postea in ore suo complacent.*

XIII.

Pergit explicare, vel deplorare miseriam generis humani. *Hæc via*, inquit, *illorum scandalum ipsis*, id est, hæc vita, quam ducunt similem vitæ brutorum, siue hæc via, quam sequuntur, dum viuunt more bestiarum, hæc lex, hi mores, hoc institutum, scandalum est ipsis id est, offendicula multa illis præbent, & ruinæ magnæ causa sunt illis, qui tamen postea in ore suo complacent, id est, placebunt ipsi sibi in sceleribus, & gloriabuntur, cū male fecerint; quod ad summam miseriam, & calamitatem pertinet. In Hebræo non est, *scandalum*, sed, insipientia: sed facile est videre, vnde nata sit discrepantia; siquidem Septuaginta Interpretes

קברם  
קברםיבין  
יבין



405  
406  
pretes in suis codicibus Hebraicis non habuerunt, *chesel*, quod insipientiam significat, sed *cheschel*, quod significat scandalum. Vtiores autem fuisse codices, quos habuerunt Septuaginta, ijs, quos posteriores habuerunt, non credimus posse negari.

XIV.

*Sicut oves in inferno positi sunt, mors depascet eos.*

Quoniam dixit homines factos esse per peccatum similes bestiis insipientibus addit finem illorum fore, ut morte ouium insipientium mactentur: ubi demonstratur tum multitudo, tum imbecillitas hominum, qui post mortem ad inferos detruduntur, oves enim gregatim conijciuntur in stabula, & sine ulla resistentia ducuntur ad macellum. Itaque minori labore deus multitudinem impiorum, quamuis in mundo ditissimi, & potentissimi fuerint, detruet in infernum ad mortem sempiternam, quam solet pastor ouiculas simplices, & inermes vel trudere in stabulum, vel educere ad cædem. Quod autem dicitur, *mors depascet eos*, duplicem sensum habere potest; unum, ut significetur, mortem instar pastoris futuram, & homines instar ouium ducturam ad pascua squalida, & arentia, ubi nihil inueniant præter gemitus, & dolores: alterum, ut significetur mortem instar lupi famelici, depasturæ, & consumpturæ homines impios instar ouium destinatarum ad escam. Prior sensus conuenit voci Græcæ *ποιμαίνω*, posterior voci latinæ, *depascet*: utrunque autem optime recipit vox Hebraica, *raha*, sed in re nulla videtur esse discrepantia. Huc enim tandem recidit uterque sensus, ut significetur mors impiorum nunquam finiendâ.

XV.

*Et dominabuntur eorum iusti in matutino, & auxilium eorum veterascet in inferno à gloria eorum.*

Pergit narrare miseriam impiorum ad inferos descendentium, ac dicit eos in *matutino*, id est, in principio noui, ac futuri seculi, quod incipiet in resurrectione vniuersali, futuros omnino iustis subiectos: iusti enim in die nouissimo, qui etiam erit

principium futuri seculi, iudices erunt impiorum, eisque in aeternum dominabuntur; & nihil erit, quod impios eo die aduersus iustos iuare possit: omne enim *auxilium eorum*, quod in robore, & potestate situm erat, *veterascet*, ac marcescet, atque inutile fiet in inferno, à gloria eorum, id est, post gloriam eorum, quam in hoc mundo habuerunt, dum gloriosa palatia inhabitarent. Illud, in *matutino*, demonstrat tempus huius seculi totum esse noctem quamdam. Vnde dicit Apostolus Rom. 13. *Nox præcessit, dies autem appropinquabit.* In nocte huius seculi videtur sæpe iniustitia præualere, sed in matutino apparebit, ubi sint iusti, & ubi sint iniusti. In Hebræo secunda pars versiculi longe aliter haberi videtur: sic enim vertit sanctus Hieronymus, *Et figura eorum conteretur in inferno post habitaculum suum*: aliud est enim auxilium, aliud figura, & aliud gloria, aliud habitaculum. Sed de prima voce non est magna difficultas: vox enim Hebraica, *tsur*, quamuis figuram significare possit à verbo, *iat sar*, quod est formare: tamen proprie, *tsur*, quæ vox hoc loco habetur, significat, *petram*, & metaphoricè robur, ac potentiam. Itaque recte Septuaginta Interpretes verterunt *auxilium*, quod in viribus, & potentia consistit. Altera vox, quæ Hebræicè dicitur, *zebul*, videtur proprie significare, *habitaculum*, non quodcunque, sed gloriosum, quale est cælum: habetur n. hæc vox in duobus tantum locis. Isai. 63. vers. 15. *Attende de caelo, & vide de habitaculo sancto tuo, & gloria tua.* Et Habach. 3. vers. 11. *Sol, & luna steterunt in habitaculo suo.* Hoc igitur loco sanctus Propheta opponit infernum, habitaculum videlicet obscurissimum, & vilissimum domibus gloriosis, & splendidis, quas in hoc mundo impij possidebunt. Septuaginta vero Interpretes verterunt, à gloria ipsorum, volentes per gloriam significare gloriosas domos, quas impij cum inferno commutant: hic igitur totius versiculi sensus erit, *Et dominabuntur eorum*, impiorum videlicet in inferno positurum, *iusti in matutino*, id est, cum illucescet dies resurrectionis, atque initium



initium sæculi futuri. *Et auxilium eorum*, id est, robur, & potentia impiorum *veterascet*, id est, conteretur, & inutile erit, instar vestis consumptæ, & laceræ. *In inferno à gloria eorum* id est, quando post gloriam splendorum habitaculorum, infernum teterrimum, & vilissimum habitaculum etiam corporaliter habere incipient.

XVI.

*Verumtamen Deus redimet animam meam de manu inferi, cum acceperit me.*

Addit nunc, quæ sit futura fors piorum, in quorum numero seipse ponit: quasi dicat, impijs quidem accidet id quod dixi: verum mihi meisque similibus contrarium evenit, *Deus enim redimet animam meam de manu inferi*, id est, liberabit me, ne ab inferno detinear, quando veniens assumet me. Videtur hoc loco prædicere redemptionem, quæ est in Christo Iesu, & descensum eiusdem Christi ad inferos: tunc enim per solito precio sanguinis, redemit de manu inferi animas iustorum; cum descendens ad inferos accepit eas, & ad se assumpsit. Sic veteres Patres Basilius, Augustinus, Ambrosius, Hieronymus, & Euthymius. Potest tamen cum Chrysostomo hic locus intelligi de inferno inferiore, ubi torquentur animæ impiorum, ut sensus sit, *Deus redimet animam meam de manu inferi*, id est, non patietur Deus animam meam rapi à manu inferi, nec deduci ad loca pœnarum, cum de hoc mundo per corporis mortem accipiet me.

XVII.

*Ne timueris cum diues factus fuerit homo, & cum multiplicata fuerit gloria domus eius.*

XVIII.

*Quoniam cum interierit non sumet omnia, neque descendet cum eo gloria eius.*

Ex dictis concludit per modum exhortationis, non esse timendam potentiam diuitum huius mundi, quoniam brevissima est: alloquitur autem iustos pauperes, atque à diuitibus huius mundi oppressos. *Ne timueris*, inquit, *cum diues factus fuerit homo*, id est, ne formides potentiam eius, ne ob timorem temporalis potentie forte offendas æternam omnipotentiam Creatoris: neque etiam ti-

meas, si forte videris non solum hominem inimicum tuum diuitem esse factum, sed etiam multiplicatam gloriam domus eius, per numerosam familiam, & multiplices dignitates propinquorum eius. *Quoniam cum interierit*, per mortem videlicet, quam nemo effugere potest, & quæ diuitibus communis est, *non sumet omnia*, id est, nihil sumet, nihil secum asportabit eorum, quæ in hoc mundo possidebat: neque descendet cum eo gloria eius, id est, non comitabuntur cum ad inferos descendente propinqui, vel famuli, & multo minus honores & dignitates. Itaque diuitiæ, & gloria impiorum ad brevissimum tempus durant; paupertas, & confusio sempiterna sunt. *Contra vero paupertas*, & confusio piorum momentanea sunt; opes, & gloria manet in sæculum sæculi: quod Apostolus pulchre expressit, cum ait 2. Corinth. 6. *Quasi tristes, semper autem gaudentes*. Tristitia enim piorum non est tristitia, sed quasi tristitia; qualis est ea, quam somniantes aliquando patimur: lætitia vero non quasi lætitia; sed vera, solidaque lætitia est, nunc quidem, in spe, postea vero in re: & contra, lætitia impiorum de carnali voluptate, vel gloria, non est lætitia, sed quasi lætitia, quali fruuntur dormientes, dum se possidere quæ diligunt, somniant. Tristitia autem in gehenna non erit quasi tristitia, sed verissima, certissima ac sempiterna tristitia.

XIX.

*Quia anima eius in vita ipsius benedictur, confitebitur tibi, cum benefeceris ei.*

Reddit rationem, cur gloria impiorum non comitetur eos ad inferos. Quoniam inquit, sicut ipsi Deum laudare consueverunt, quando eis beneficia temporalia tribuit: ita Deus in hac solum vita eis benedicere solet. *Anima eius in vita ipsius benedictur*, id est, anima impij, siue ipse impius in hac solum vita benedictur, tum à Deo per beneficiorum temporalium collationem, tum ab hominibus, per laudationes, siue potius adulationes. *Confitebitur tibi*, id est, & ipse vicissim confitebitur tibi, hoc est laudabit te tibi que gratias agat *cum benefeceris ei*: si autem aliquid mali illi evenire

M m

permi-



permiseris, continuo blasphemabit te : non enim ex illis est, qui dicunt. *Ps. 33. Benedicam Dominum in omni tempore, semper laus eius in ore meo: vel, Iob. 2. Dominus dedit Dominus abstulit, sit nomen Domini benedictum.* In Hebræo habetur actiue, *benedicet*, pro quo habemus in græco, & latino, *benedicetur*: sed idem est sensus. Sic enim legi debent verba Hebraica, *Quia animam eius in vita ipsius benedicit*: ex quo intelligimus, illud, *benedicet*, referri ad Deum, ac per hoc etiam, illud, *benedicetur anima eius*, referri debet ad Deum, vt nos supra exposuimus. Idem autem sensus est, siue legas, *anima eius benedicitur à Deo in vita ipsius*, siue, *animam eius benedicit deus in vita ipsius*. Quod autem sequitur, *confitebitur tibi, cum benefeceris ei*, in Hebræo legitur, *cum benefeceris tibi*: sed ex literarum similitudine corruptus videtur textus hebraicus: nam Septuaginta Interpretes non legerunt, *lac*, quod est tibi, sed, *lō*, quod est ei, & hoc modo posteriore legitur in omnibus codicibus græcis, & latinis, & est sensus multo facilius, & clarior.

XX.

*Introibit vsque in progenies Patrum suorum. & vsque in aeternum non videbit lumen.*

Impius in hac vita in luce honorum, & gloriæ viuit, Deo illum beneficijs temporalibus replente, vt vel remuneret aliqua bona opera eius, vel alliciat ad. resipiscen-  
tiam, & conuersionem. Sed in alia vita apponitur (vt scriptura loquitur) ad patres suos, vt eos sequatur in supplicijs, quos sequutus est in flagitijs *introibit*, impius videlicet, post hanc vitam, *vsque in progenies patrum suorum*, id est, introibit ad ea loca, ad quæ illum præcessit progenies Patrum suorum, & *vsque in aeternum non videbit lumen*, quia iusto iudicio manebit in æternis tenebris, qui nimirum delectatus est luce honorum, & gloriæ temporalis, & lucem gloriæ celestis non quaesuit.

XXI.

*Homo cum in honore esset non intelle-*

*xit: comparatus est iumentis insipientibus, & similis factus est illis.*

Repetit Propheta versiculum duodecimum, tum vt ostendat præcipuam causam miseræ hominum esse insipientiam; & merito homines plurimos in æternum lumine carituros, atque in tenebris futuros, quia lumine rationis vti non voluerunt: tum etiam, vt non miremur si pauci omnino ænigma propositum in hoc Psalmo intelligant. Id enim accidit, quia homo propter peccatum comparatus est iumentis insipientibus, & similis factus est illis.

## PSALMVS XLIX.

Titulus & Argumentum.

Psalmus Asaph.

In priore libro Paral. cap. 16. legimus, *Asaph fuisse Principem cantorum à Davide constitutum. Vtrum autem ipse Psalmos composuerit, qui inscribuntur nomine eius, an solus cecinerit, vel canenti præfuerit, non est omnino certum, vt in præfatione diximus. Argumentum Psalmi est duplex Domini aduentus, vnus ad prædicandum, aliter ad indicandum, vnus occultus & in humilitate, aliter manifestus & in maiestate. Et quoniam in vtroque aduentu Christus congregat homines, vel ad fidem, vel ad iudicium: recte Psalmus inscribitur, Asaph, qui interpretatur congregans. Addit, & declarat Propheta, quibus de rebus potissimum reddituri simus rationem in die iudicii: proinde Psalmus utilissimus est.*

## EXPLICAT. PSAL. XLIX.

**D**eus Deorum Dominus locutus est, & vocauit terram.

Incipit à primo aduentu, ac dicit; Dominum locutum esse ore proprio, qui per ora Prophetarum antea loquebatur: & ad concionem suam vocasse non Iudæos tantum, sed omnem terram, id est, omnes inhabitantes.



bitantes terram: quod per Apostolos suos fecit, siquidem, *in omnem terram exiit: sonus eorum*. Dicitur autem hoc loco Dominus esse *Deus Deorum*, ut intelligamus, Christum esse Deum verum, veri Dei filium, qui eandem cum Patre diuinitatem habet: vna enim, & sola esse potest vera diuinitas; multi autem sunt Dij, vel per errorem, & existimationem, ut Dij gentium, qui *demonia sunt*, ut dicitur in Psalmo 95. vel per gratiam adoptionis, ut sancti Angeli, & sancti homines, vel per similitudinem, ut Principes, & Iudices terræ. Sed omnes isti Dij subiecti sunt vni & soli Deo vero, qui ideo dicitur *Deus Deorum*. Ex Hebræo S. Hieron. vertit; *Fortis Deus Dominus locutus est*; sed voces Hebrææ utramque versionem patiuntur, & sensus utriusque lectionis est verus, ad propositum rerum dicendarum. Nam si respiciamus primum aduentum, Christus Dominus Deum Deorum se ostendit, cum terribilis fuerit Dæmonibus, qui sunt Dij gentium; & ipse per adoptionis gratiam multos fecerit Deos: & ipse idem *fortis Deus fuit*, cum hostem generis humani per crucem deuicerit, & vasa eius diripuerit. Si respiciamus secundum aduentum, *Deus Deorum* rectissime dicitur, quoniam Iudex Iudæum omnium erit; nec minus proprie conueniet ei titulus *fortis Dei*, cum Diabolum, & omnes asseclas eius, siue Dæmones, siue homines in gehennam verbo detrudet, & vectibus sempiternis portas inferni claudet. At igitur, *Deus Deorum Dominus locutus est*, id est, Dominus Christus, qui est Deus Deorum in hunc mundum adueniens, locutus est verba Euangelij sui. *Et vocauit terram*, id est, & ad sermones suos audientes, terram vniuersam conuocauit, dicens, *Venite ad me omnes, qui laboratis & onerati estis; & ego reficiam vos*, Matth. 11.

simul explicat locum, vnde Dominus loqui cœpit. Cœpit enim ex Sion, siue ex Hierusalem, iuxta illud Isaia 2. *de Sion exibit lex, & verbum Domini de Hierusalem*, & illud Luc. vlt. *Oportebat Christum pati, & resurgere à mortuis tertia die, & predicari in nomine eius penitentiam, & remissionem peccatorum in omnes gentes, incipientibus ab Hierosolyma. A solis ortu*, inquit, *vsque ad occasum*, vocauit terram, id est, omnes homines, qui habitent terram, à principio vbi Sol oritur, vsque ad finem, vbi Sol occidit. *Ex Sion species decoris eius*, id est, locutus est Dominus & vocauit terram ex Sion, quæ est species decoris eius, id est, ex Sion orta est prædicatio Euangelica, quæ est species decoris eius. Porro species decoris significat speciem pulcherrimam, siue perfectam pulchritudinem, ut magis sonant verba Hebræica. Erat autem Hierusalem, iuxta priorem sensum, *perfecti decoris*, ut dicitur Thren. 1. quia erat ciuitas nobilissima, antiquissima, frequentissima, ornata sede regia, & pontificia, nec non tabernaculo, arca fœderis, & cæteris, quæ eam caput Religionis, & Regni faciebant: vnde etiam typus erat cælestis, ac diuinæ ciuitatis. Sed, iuxta posteriolem sensum, erat Euangelica prædicatio perfecti decoris, quia continebat mysteria redemptionis, notitiam sanctissimæ Trinitatis, sacramenta Efficacissima, legem perfectam, & innumerabilibus signis, & prodigijs comitata veniebat; atque audientes, & credentes renouabat, & iustificabat; & ex ima terra ad summum cælorum exaltabat.

*Deus manifeste veniet; Deus noster, & non silebit.*

III.

Hic iam prædicit secundum aduentum, quasi dicat, Deus Deorum venit, & vocauit terram, sed occulte venit, quia in forma serui, in humilitate, in mansuetudine, ut esset locus redemptioni per passionem, & mortem, sed postea *manifeste veniet* in potestate, & maiestate magna, non in præsepi pelunçæ, sed in nubibus cali; non cruci affixus inter latrones, sed in sede Iudicis

Mm 2

cum

*A solis ortu vsque ad occasum: ex Sion species decoris eius.*

Declarat se per terram, non intellexisse terram Palestinæ, vel aliquam aliam particularem, sed omnem omnino terram; &



cum omnibus Angelis suis. Neque solum manifeste veniet, sed etiam *non silebit*, sicut in primo aduentu, quando ut agnus mansuetus ductus ad occisionem non aperuit os suum : & sicut hoc tempore silet, dum peccata fieri videt, & tacet, sed veniet cum tuba, & clamore horribili, *Media nocte clamor factus est, ecce sponsus venit*, Matth. 25. *Et mittet Angelos suos cum tuba, & voce magna, & congregabunt electos eius à quatuor ventis*, Matth. 24. & *Ipse Dominus in iussu, & voce Archangeli, & in tuba Dei descendet de celo* 1. Thess. 4. & *In nouissima tuba, canet enim tuba, & mortui resurgent incorrupti*, 1. Cor. 15. In Hebræo prima illa verba, *Deus manifeste*, coniunguntur cum versu superiore, hoc modo, *Exsion species decoris eius Deus manifestabitur* : & deinde subiungitur nouus versiculus, *Veniet Deus noster & non silebit*. Sed non tenemur sequi distinctionem Hebraicam, quæ à Rabinis excogitata est : illud autem verbum, *manifeste*, in textu Hebraico ambiguum est, ut possit esse aduerbium, manifeste; & verbum, manifestabitur, proinde non errauerunt LXX. Interpretes, qui per aduerbium expresserunt. Quod si Rabinis contendant, vocem Hebraicam, *hophiag*, non posse accipi adverbialiter, dicemus. LXX. Interpretes reddidisse non verba, sed sensum, idem enim est, Deus manifeste veniet, Deus noster, & non silebit; & Deus manifestabitur, veniet Deus noster, & non silebit.

IV. *Ignis in conspectu eius exardescet, & in circuitu eius tempestas valida.*

Hæc accipiuntur communiter pro conflagratione mundi, id est, eorum omnium, quæ sunt in terra, ciuitatum videlicet hor-  
torum, vinearum, palatiorum, animantium, & similibus rerum corruptibilium, de quibus dicit S. Petrus in epist. 2. cap. 3. *Aduenit autem dies Domini, ut fur, in qua cali magno impetu transiet, elementa vero calore soluentur, terra autem, & quæ in ipsa sunt opera, exurentur* : de qua conflagratione disputat S. Augustinus lib. 20. de ciuit. Dei

cap. 18. & Scholastici in 4. Sentent. dist. 47. sensus igitur est. *Ignis in conspectu eius exardescet*, qui exuret omnia, quæ in terris inueniunt. *Et in circuitu eius tempestas valida*, id est, commotio maxima ex omni parte mundi, tum in terra, tum in mari, tum in aere, tum in celo, *arrescentibus hominibus præ timore, & expectatione, quæ superuenient uniuerso orbi*. ut ait B. Lucas c. 21. Tamen S. August. hunc locum Psalmi exponens, per ignem, intelligit iudicium diuinum per tempestatem vero ventum separantem grana à paleis, id est, discretionem bonorum à malis. Alij non male per ignem; & tempestatem, describi volunt iram Iudicis æterni, cum qua adueniet in nouissimo die, vel certe hæc omnia signa esse maiestatis Dei omnipotentis : nam, & quando descendit Deus in monte Sinai daturus legem, mons totus ardere videbatur, & audiebantur tonitrua, & conspiciebantur fulgura, & omnino tempestas ingens, & terror maximus, Exod. cap. 19.

V. *Aduocabit cælum desursum, & terram discernere populum suum.*

Describit frequentiam eorum, qui in illo quasi theatro intererunt, atque ad spectaculum omnium maximum conuenient. *Aduocabit*, inquit, *cælum desursum*, id est, ex parte mundi superiore aduocabit Iudex ipsum cælum, id est, omnes Angelos cæli habitatores : sic enim Dominus ait Matth. 29. *Cum venerit filius hominis in maiestate sua, & omnes Angeli eius cum eo*. Ex parte inferiore aduocabit terram, id est, omnes homines qui ab initio mundi usque ad finem per successores generationum incoluerunt terram. Aderunt ergo omnes Angeli, & omnes homines. *Aduocabit autem hunc tam magnum conuentum, discernere populum suum*, id est, ad iudicandum populum suum, & segregandos electos à reprobis : nam, ut dicitur Matth. 13. *In consummatione sæculi exibunt Angeli, & separabunt malos de medio iustorum*. Et Matth. 25. *Separabit oves ab hædis*, id est, ea facilitate Iudex cælestis secernet omnes electos ab omnibus reprobis, quamuis prope innumerabiles sint  
fu.



faturi, qua pastor separare potest paucas oves à paucis hædis. Alij existimant aduocari cælum & terram in testes diuinæ sententiæ, tanquam immobilis, quomodo alibi sæpe in diuinis literis. Prior expositio est S. Augustini, posterior S. Ioannis Chrysostomi, quem sequuntur Theodoretus & Euthymius. Vtraque est vera, & vna alteri non repugnat.

VI. *Congregate illi sanctos eius, qui ordinant testamentum eius super sacrificia.*

Quamuis omnes omnino homines ad iudicium vocandi sint, tamen peculiari ratione iudicium ad fideles pertinebit, qui enim non credunt, iam iudicati sunt, Ioannis 3. vnde etiam Matth. 25. soli fideles iudicandi introducuntur, & de operibus, non de fide discutiuntur. Itaque nomine Sanctorum intelligendi sunt fideles, qui ad populum Dei pertinent, qui per circumcisionem olim Deo consecrabantur, & nunc per baptismum consecrantur: sic David in Psalm. 85. dicit: *Custodi animam meam, quoniam sanctus sum*, & Apostolus in epistolis suis omnes Christianos vocat sanctos. Alloquitur igitur Angelos, & dicit: *Congregate illi sanctos eius*, id est, adducite ad iudicium populum Dei peculiarem, quem sibi per sacramenta sanctificauit: quod enim id per Angelorum ministerium faciendum sit, perspicuum est ex cap. 13. Matthæi: *Exibunt Angeli, & separabunt malos de medio iustorum*: & cap. 24. *Et mittet Angelos suos cum tuba, & congregabunt electos eius*. Quod sequitur: *Qui ordinant testamentum eius super sacrificia*, est declaratio vocis *Sanctorum*, illi enim dicuntur Sancti, qui ordinant testamentum super sacrificia: quæ sententia clarior est in textu Hebraico, ubi ad verbum legitur: *Qui feriunt pactum eius super sacrificio*, id est, qui pactum cum Deo faciunt, vt sint populus eius, & ipse sit Deus eorum, quod pactum est super sacrificio, id est, super cultu diuino, qui præcipue in sacrificiis offerendis consistit. Lectio nostra est paulo obscurior, sed eundem sensum facit: nam per testamentum

intelligitur pactum, & per ordinare significatur disponere. Disponere testamentum, & ferire pactum, idem sunt, vt perspicuum est ex variis locis Scripturæ, sed præcipue ex lib. 1 Machab. cap. 1. *Eamus, & disponamus testamentum cum gentibus, quæ circa nos sunt*: nam ex quo recessimus ab eis, inuenerunt nos multa mala, igitur sensus huius versiculi est, congregandos esse ad iudicium sanctos Dei, id est, homines Deo dicatos, qui ordinant testamentum eius super sacrificia, id est, qui testamentum disponunt, & pactum feriunt cum Deo. vt ipsi colant Deum sacrificiis, & Deus sit eorum Deus, eosq; beneficiis semper afficiat. In Hebræo codice habetur pronomen primæ personæ, hoc modo: *Congregate mihi sanctos meos, qui feriunt pactum meum super sacrificio*. Sed LXX. Interpretes in omnibus his vocibus legunt literam *vau*, vbi nunc est litera *iod*, facile autem fuit, mutari literam *vau*, in literam *iod*, cum non differant, nisi quod vna est paulo longior altera: posita autem in textu litera *vau*, efficitur pronomen tertiæ personæ, & recte Septuaginta verterunt, *Congregate illi, & sanctos eius, & testamentum eius*.

*Et annuntiabunt cæli iustitiam eius, quoniam Deus Iudex est.*

VII.

Congregatis omnibus ad iudicium, tum demum annuntiabunt cæli iustitiam eius, id est, de cælo proferetur sententia in bonos & malos, & inde apparebit omnibus quantitas iustitiæ Dei, quæ nunc sæpe non apparet; cum permittente Deo iusti opprimantur ab iniquis: tunc igitur annuntiabunt cæli iustitiam eius, quia de cælo veniet, qui iustissime iudicabit, & in cælo aereo sedens sententiam iustissimam proferet, & totum cælum, id est, omnes cælites assensu & laudibus confirmabunt iustam sententiam, ac dicent: *Iustus es Domine, & rectum iudicium tuum*. Neque poterit esse falsa hæc cæli annunciatio, quoniam Deus Iudex est, id est, quoniam, qui iudicabit, Deus est, in quem iniustitia cadere non potest.



VIII.

*Audi populus meus, & loquar: Israël,  
& testificabor tibi; Deus Deus tuus ego  
sum.*

Transit nunc Propheta ad eruditionem populi, ac docet quæ sit futura materia iudicij, id est, quibus de rebus reddenda sit ratio in iudicio, ut unusquisque parare se possit. Atque ut admonitio maiorem fidem habeat, Deum ipsum loquentem, & paterne admonentem inducit: *Audi, inquit Deus, populus meus, & loquar:* nisi enim audieris, non tibi loquar, sed aliis, qui habent aures audiendi: nam non sine causa Dominus in Euangelio Matthæi 11. & alibi sæpe dicit: *Qui habet aures audiendi audiat:* sicut enim qui surdi sunt, habent aures ad ornamentum corporis, sed non ad audiendum: sic etiam qui mentem habent, sed non attendunt ad doctrinam Dei, habent aures interiores, quasi non haberent. Oportet igitur attente cogitare & considerare quid dicat Deus, si volumus, ut nobis loquatur. Explicat deinde clarius, dum addit: *Israël, & testificabor tibi,* id est, audi populus meus Israël, & loquar testificando, & notum faciendo tibi, quod tua maxime interest. Per Israëllem autem non intelligitur solum populus, qui secundum carnem ab Israël descendebat, sed etiam populus Christianus, qui fidem Israëlitis imitatur. Imo hic maxime per Israëllem intelligendus est, cum Apostolus dicat Roman. 9. *Non omnes, qui ex Israël, hi sunt Israëlita, neque omnes qui semen Abraha, hi filij: sed qui filij sunt promissionis, æstimantur in semine.* Quod autem sequitur: *Deus Deus tuus ego sum,* est ratio cur nos oporteat audire, quia videlicet qui loquitur, est Deus, & peculiariter Deus noster: ac per hoc certo scimus, illum scire, & velle nobis utilissima precepta tradere: nam si Deus est, omnia nouit, si noster est, amat nos, ac propterea vult utilia nos docere.

IX.

*Non in sacrificiis tuis arguam te: holocausta autem tua in conspectu meo sunt semper.*

Summa doctrinæ diuinæ est, Deum non requirere à nobis munera, qualia sacrificia sunt, quasi illis indigeat, vel quasi hæc illi præcipue placeant: sed requirere internas virtutes, fidem, spem, dilectionem, obedientiam, propter quas virtutes munera placeant, & sine quibus non placent. Id conforme est verbis Samuel. 1. Regum 15. *Numquid vult Deus holocausta & victimas, & non magis ut obediatur voci Domini?* & Isaïæ c. 1. *Quo mihi multitudinem victimarum vestrarum dicit Dominus? plenus sum, &c. & infra: Lauamini, mundi estote, &c.* & Christi ipsius Matth. 23. *Va vobis Scribæ & Pharisei hypocritæ, quia decimatis mentam, & anethum & cyminum, & reliquias quæ grauiora sunt legis, iudicij, misericordiam & fidem.* Et denique ipsius Davidis Psal. 50. *Si voluisses sacrificium dedissem utique, holocaustis non delectaberis. Sacrificium Deo spiritus contribulatus, cor contritum & humiliatum Deus non despicies.* Ait igitur: *Non in sacrificiis tuis arguam te,* id est, non accusabo vel damnabo te in iudicio, quod pauca mihi sacrificia obtuleris; deinde reddit huius rei multas rationes, quarum prima est in secunda parte huius versiculi, quia videlicet satis multa holocausta sibi quotidie offerebantur: nam cum dicit, *Holocausta autem tua in conspectu meo sunt semper:* illud autem, ponitur pro enim; nam in Hebræo est particula, &, quæ frequentissime ponitur pro enim. Sensus igitur est, non arguam te de defectu sacrificiorum, quoniam holocausta tua semper inueniuntur in altari meo.

*Non accipiam de domo tua vitulos, neque de gregibus tuis hircos.*

X.

*Quoniam mea sunt omnes fere sylvarum, iumenta in montibus & boues.*

XI.

*Cognoui omnia volatilia cæli, & pulchritudo agri mecum est.*

XII.

Hæc est secunda ratio, cur Deus non magis requireat nostra sacrificia, quoniam ipse est rerum omnium Dominus, & ideo si velit oves, aut boues, aut aues, aut aliquid aliud, nullo negotio potest habere, cum ipse omnia



בהרר  
אלף  
בהרר  
ואלף

omnia non erit, omnia possideat. *Non accipiam*, inquit, *de domo tua vitulos, neque de gregibus tuis hircos*, id est, non opus est mihi, si velim vitulos, aut hircos, ut illos tibi eripiam, vel à te petam. *Quoniam mea sunt omnes fera sylvarum*, id est, mea sunt omnia animalia sylvestria, ut cerui, capræ, apti, & similia. *Iumenta in montibus*, & *boues*, id est, mea sunt etiam omnia animalia, quæ pascuntur in montibus, ut oues, capræ, arietes, hirci, boues & vituli. *Cognoui omnia volatilia cæli*, id est, non solum animalia quadrupedia mea sunt, sed etiam omnes volucres cæli, quos ego noui ubi sint, & ad quid proficiant. *Et pulchritudo agri mecum est*, id est, non solum animalia, sed etiam omnes fructus terræ, ex quibus agri pulchri & diuites redduntur, apud me sunt, ad ius meum pertinent, & omnibus uti possum, ut mihi placeat: vel apud me est, id est, omnis perfectio agri, cum omnibus frugibus, arboribus, animalibus, fontibus, & cæteris rebus, mecum est ab æterno eminenter in essentia mea consistens, ut mihi opus non sit ad ista exteriora descendere. In Hebræo pro illa voce, *iumenta*, est vox, *behemoth*, quæ vox significat animalia generatim, & non sola iumenta proprie dicta: nam Psal. 8. eadem vox habetur, ubi noster Interpres vertit, *pecora campi*: & Psal. 148. ubi legimus, *uniuersa pecora*, eadem etiam vox reperitur. Illud autem, *in montibus*, & *boues*, ex Hebræo verti posset, *in montibus mille*: nam vox Hebraica, *eleph*, quæ hic habetur, significat & *bouem*, & *mille*. Itaque LXX. Interpretes non male verterunt, *boues*, quamuis S. Hieronymus verterit, *millium*: sed utraque lectio verum sensum habet: nam secundum lectionem S. Hieronymi sensus est, Dei esse animalia innumerabilia, quæ in montibus mille, id est, plurimis inveniuntur. Secundum lectionem Septuaginta, sensus est, Dei esse animalia, quæ libere vagantur in montibus; & etiam boues, qui in præsepibus detinentur: & quoniam in textu Hebræo, ut nunc legitur, illud, *in montibus*, regit post se genitium, & legi debet, *in montibus bouis*; quæ verba non videntur aptum sensum reddere, suspicor

LXX. Interpretes non legisse, *beharere behem*, in montibus bouis: sed, *beher* & *eeleph*, in monte, & *bos*, vnica litera paululum immutata, id est, *iod* mutata in *vau*, quæ sunt literæ simillimæ, quod facile contingere potuit vitio librariorum: sed explicandi gratia Septuaginta posuerunt numerum multitudinis pro singulari, & pro, in monte, & *bos*, posuerunt, in montibus, & *boues*. Illud autem, *cognoui omnia volatilia cæli*, S. Hieronymus ex Hebræo vertit, *cognoui omnes aues montium*: & vere vox Hebræa non cælum, sed montes significat, neque est similitudo literarum inter vocabula, ut errorem librariorum suspicari possimus. Sensus tamen idem est, nam *volatilia cæli*, & *aves montium*, idem sunt, dicuntur enim volatilia cæli, quia per cælum æthereum discurrunt, & aues montium, quia in arboribus montium, ut plurimum nidificant. Illud denique, & *pulchritudo agri*, vertitur à S. Hieronymo, & *uniuersitas agri*: vox autem Hebraica, & 17. est omnino ambigua, nam Septuaginta hoc loco reddiderunt, *pulchritudo*, in Psal. 79. reddiderunt eandem vocem, *singularis ferus*, Isaia 66. eandem vocem transtulerunt, *introitus*, Sanctus autem Hieronymus hoc loco reddidit, *uniuersitas*: in Psal. 79. *Omnes bestia*, Isaia 66. *omnimoda*, in hac tanta varietate tutissimum est auctoritatem LXX. Interpretum sequi, à quibus quoad sensum, S. Hieronymus non dissentit. Si quidem pulchritudo agri ex uniuersitate agri, id est, ex uniuersis fructibus agrorum confurgit.

דף

*Si esuriero, non dicam tibi: meus est enim orbis terræ, & plenitudo eius.*

XIII.

*Numquid manducabo carnes taurorum? aut sanguinem hircorum potabo?*

XIV.

Hæc est tertia ratio, cur Deus non requirat nostra munera propter suam necessitatem, vel vtilitatem; quia videlicet non esurit, neque sitit: & consequenter non calet, neque

X.

XI.

XII.



neque friget, neque vlla re indiget: & si indigeret, omnia illi præsto essent, quia Dominus est omnium rerum. *Si esurio*, inquit, *non dicam tibi*, vt cibum videlicet mihi prouideas: *quia meus est orbis terra, & plenitudo eius*. Nunquid manducabo carnes taurorum? aut sanguinem hircorum? id est, non vescor ego eiusmodi rebus, qui substantia sum spiritalis & immortalis.

XV. *Immola Deo sacrificium laudis, & redde Altissimo vota tua.*

XVI. *Et inuoca me in die tribulationis, eruam te, & honorificabis me.*

Docuit hætenus, non esse spem ponendam in externis sacrificiis, quasi illa sine interiori cognitione & amore sufficiant: nunc docet, in internis actibus virtutum consistere sacrificium, quo delectatur Deus, & quod nos in Iudicio ultimum securos præstare poterit. Sed obseruandum est, aliud esse laudem Dei, aliud sacrificium laudis. Potest enim laudari Deus ab iis, qui labiis solis Deum honorant, sed non potest sacrificari laus, nisi ab iis, qui in ara cordis, & cum igne charitatis thus laudis offerunt, id est, nisi ab iis, qui credunt, & aliquo modo apprehendunt Deum esse summum bonum; quiq; Deum sic creditum & cognitum toto corde diligunt, & tanquam pulcherrimum, optimum, sapientissimum admirantur & laudant. Itaque sacrificium laudis, signum & effectus est cognitionis & amoris: & quia Beati in coelo semper Deum vident & amant, ideo de illis dicitur Psal. 83. *Beati qui habitant in domo tua Domine in secula seculorum laudabunt te*. Ait igitur: *Immola Deo sacrificium laudis*, id est, non solis labiis, sed ex intima cognitione & amore Deum lauda. *Et redde Altissimo vota tua*, id est, posteaquam Deum, vt est in se, laudasti, respice illum, vt est auctor & fons omnium bonorum tuorum, qui ex te nihil es, & redde illi gratiarum actionem, & solue tributum obedientiæ, quod est præcipuum votum inter omnia vota tua: hoc enim promissisti, cum ad populum & fami-

liam eius admissus es, & hoc ipse requirit magis, quam externa sacrificia: *melior enim est obedientia, quam victima*, vt dicitur 1. Regum c. 15. Denique *inuoca me in die tribulationis*, id est, sicut in die prosperitatis agnoscere debes omnia bona tua, à me fonte bonorum omnium descendere; sic etiam in die tribulationis ad me confugere, & in me spem tuam totam collocare debes; ego enim *eruam te de omni tribulatione*, & tu vicissim *honorificabis me sacrificio laudis & gratiarum actionis*.

*Peccatori autem dixit Deus, quare tu enarras iustitias meas, & assumis testamentum meum per os tuum?*

Post instructionem iustorum, pergit Psalmus ad eruditionem iniquorum, sed fidelium. *Peccatori*, inquit, *dixit Deus*, id est, peccatorem Deus per me admonitum voluit, *quare tu enarras iustitias meas, & assumis testamentum meum per os tuum?* id est, quare profiteris te scire legem meam, vt enarres præcepta mea, in quibus omnis iustitia continetur, & profiteris etiam ad te pertinere testamentum, siue pactum meum, dum te fœdus Abraham esse gloriaris; cum neque legem meam serues, neque pactum custodias, neque vestigia Abraham imiteris?

*Tu vero odisti disciplinam, & proiecisti sermones meos retrorsum.*

Describit primum interna vitia iniquorum, deinde in sequentibus versiculis enumerat peccata operis & oris. *Tu inquit, odisti disciplinam*, id est, auersaris omnino eruditionem diuinæ legis. *Et proiecisti sermones meos retrorsum*, id est, & factus es quasi oblitus esses præcepta mea, eaq; post tergum haberes.

*Si videbas furem, currebas cum eo, & cum adulteris portionem tuam ponebas.*

Ex obliuione & odio diuinæ legis nascuntur peccata operis, qualia sunt furta & adulteria, quo nomine fornicationes quoque intel-



intelliguntur. Sunt autem hæc duo peccata frequentissima, quæ ex avaritia & luxuria oriuntur: ideo horum duorum meminit Prophetia: dicit autem, *Sir videbas furem, currebas cum eo, & cum adulteris portionem tuam ponebas*, & non dicit, *furabaris*, vel *fornicabaris*, quoniam minus est furari, vel mœchari, quod occulte & libidine stimulante fieri solet, quam cum furibus concurrere, vel cum adulteris portionem ponere, quia ista fiunt palam, & prompte, & ex animi peruersitate potius, quam ex inopia vel libidine.

quia probrum iactatum in alium, scandalum illi sit. Quod sequitur, *Hæc fecisti, & tacui*, apud Hebræos ad sequentem versiculum pertinet. Sed non est magnificianda interpunctio Hebraici textus, cum à Rabinis exco- gitata sit: significant autem illa verba Deum hoc tempore omnia videre, sed non omnia statim punire, ut det locum penitentiae. Itaque videt, & tacet, ac si non videret: ceterum veniet brevis dies iudicii, in quo, ut supra dictum est, vers. 3. *Deus manifeste veniet, & non sile- bu;* & hoc idem subiungit, cum ait:

XXI. *Os tuum abundavit malitia, & lingua tua concinnabat dolos.*

Transit ad peccata oris, ac dicit, *os tuum abundavit malitia*, id est, abundanter ex ore tuo, tanquam ex fonte scaturiuit maledicentia: nam verbum Hebraicum, *scialach*, significat *dimittere*, quasi dicat, dimisisti linguam tuam quasi ruptis habenis in omnem maledicentiam: sed LXX. Interpretes declarauerunt metaphoram. *Et lingua tua concinnabat dolos*, id est, loquebaris apposite ad fallendum adhibens artificium dissimulationis, vel mendaciorum.

XXI. *Sedens aduersus fratrem tuum loquebaris, & aduersus filium matris tua ponebas scandalum: hæc fecisti; & tacui.*

Addit ad peccatum oris, quod non solum aduersus extraneos, sed etiam proprios fratres per linguam deliquerit. *Sedens*, inquit, *aduersus fratrem tuum loquebaris*, id est, non obiter, & per iram, sed sedens ociosus, & pacato animo, studiose, & longo tempore detrahebas fratri. *Et aduersus filium matris tua*, id est, aduersus eundem fratrem scandalum ponebas calumnias struendo, unde ille offenderetur, & ruinæ occasionem haberet, in textu Hebraico habetur vox *dophi*, quæ proprie opprobrium, siue probrum, aut conuicium significat. Sed LXX. Interpretes *scandalum* verterunt, aut quia vox illa scandalum etiam significat, aut

*Existimasti inique, quod ero tui similis, arguam te, & statuam contra faciem tuam.*

Dum sine timore Dei peccant impij, videntur existimare Deo non displicere peccata: sed in Iudicio intelligent quod in hoc Psalmo dicitur, *Existimasti*, inquit, *quod ego essem tui similis*, id est, quod iniquus essem, & peccatorum amicus, sed non ita est; imo *arguam te* in die iudicii, *& statuam contra faciem tuam* peccata tua, id est, faciem, ut videas grauitatem, & multitudinem peccatorum tuorum, & negare non possis sententiam contra te latam esse iustissimam. In Hebræo habetur, *Statuam te contra faciem tuam*, sed idem est sensus: nam *statuam te contra faciem tuam*, nihil est aliud, nisi statuam vitam tuam, actiones tuas, peccata tua, ante oculos tuos: ut non possis ea non videre.

XXIII. *Intelligite hæc, qui obliuiscimini Deum, ne quando rapiat, & non sit qui eripiat.*

Hæc exhortatio est Prophetæ ad impios, qui obliuiscuntur Deum esse Iudicem iustum, & omnipotentem; ut intelligant, attempta consideratione recogitantes, quæ dicta sunt. *Ne quando deus rapiat eos*, dum nihil minus cogitant, & ad iudicium adducat, & pro meritis damnet; & non sit, qui de manu eius eripere possit. In Hebræo habetur in prima persona, *ne quando rapiam,*



& secundum hanc lectionem continuantur verba Dei : sed LXX. Interpretes videntur legisse in tertia persona : & sensus est idem.

XXIV. *Sacrificium laudis honorificabit me, & illic iter quo ostendam illi salutare Dei.*

Concludit Deus verba sua docens, viam salutis ad vnum sacrificium laudis reduci, ita ut illi in die iudicii salui futuri sint, qui hoc sacrificium iugiter obtulerint; illi reprobis; & condemnandi, qui hoc sacrificium offerre neglexerint. *Sacrificium laudis*, inquit, *honorificabit me*, & illic iter quo ostendam illi salutare Dei, id est, qui sacrificauerit laudem mihi, ille mihi acceptus erit, nam ab eo me honorificatum esse confitebor, & illic, id est, in eo sacrificio, iter erit, ad salutem: nam per illud iter perueniet ad locum, in quo ostendam illi salutare Dei, diuinam videlicet, plenam, atque perfectam salutem. In Hebræo est vox ambigua, *sam*, quæ significat, illic, si legatur cum puncto in dextro cornu, ut LXX. Interpretes legerunt : sed si legatur cum puncto in sinistro, ut S. Hieronymus legit, significat posuit, siue disposuit: sed in re ambigua non est, quod à communi, & recepta lectione recedamus. At vnde est, quod summa salutis ponitur in oblatione sacrificij laudis? S. August. respondet, ex eo esse, quod nemo vere laudat Deum, nisi pius sit; impij enim si verbis laudant, vita non laudant; ac per hoc non vere laudant, cum verbis eorum vita contradicat. Potest etiam dici, ut nos supra monuimus, sacrificium laudis, non esse simplicem laudem, sed laudem ex ara cordis, & igne charitatis procedentem: quare cum sacrificium laudis includat charitatem, & sit inchoatio sacrificij, siue officij, quod in secula seculorum in cælo à beatis omnibus exercetur, mirum non est, si in eo summa salutis includatur.

## PSALMVS L.

Titulus, & Argumentum.

In finem Psalmus David, cum venit ad eum Nathan Propheta, quando introiit ad Bethsabæe.

Titulus docet, qua occasione compositus fuerit Psalmus iste à Dauide: historia vero fusius narratur lib. 2. Reg. cap. 12. summa historia hæc est. Dauid ex palatio suo vidit mulierem formosissimam, nomine Bethsabæe, se lauante captus amore, adulterium cum ea commisit: quod ut facilius colaretur, maritus eius Uriam neci dedit; sic viduam coniugio sibi copulauit, & filium ex ea suscepit: postea Dei monitu venit Nathan Propheta ad Dauidem, eumque de perpetrato flagitio, & eade corripuit. Dauid in se reuersus pœnitentiam serio egit, atque hunc Psalmum, in quo peccatum suum conflet, ea occasione composuit. Sensus igitur tituli hic est, Psalmus in finem usque mundi canendus, quem Dauid composuit, quando venit ad eum Nathan Propheta, qui tunc ad eum increpandum venit, quando intrauit idem Dauid ad Bethsabæam uxorem Uriæ, atque adulterium cum ea parauit. Ad hunc titulum pauca quadam annotanda videntur circa personas, quæ in eo nominantur, videlicet Dauidem, Nathan, & Bethsabæam. Primo peccatum Davidis iustis hominibus magnum timorem incurere posse: si enim tantus amicus Dei tam facile corruit, quis non timebit casum? Secundo eiusdem Davidis pœnitentiam omnibus peccatoribus spem salutis adferre: peccatum enim eius omni ex parte grauissimum fuit, & tamen per veram pœnitentiam facile inuenit indulgentiam. Tercio, Nathan fuisse quidem Prophetam, sed Dauide inferiorem, non solum dono prophetia, sed etiam potestate, sapientia, alijsque donis Dei: & tamen placuisse Deo, ut is Dauidem corripere, & ad pœnitentiam adduceret. Quo exemplo admonentur homines magni, ut non contemnant ministros Verbi Dei, sed ad eos audiendos accedant etiam si sint ipsi forte sapientiores, & maio-



ver illis. Quarto, hinc cognosci, quantorum malorum causa sit pulchritudo mulieris cum imprudentia & facilitate coniuncta. Si enim Bethsabea mulier speciosissima in loco unde videri posset, corpus suum non nudasset; aut non tantæ facilitate Dauidi consensisset, certe vir tantus in tam gravia scelera non cecidisset. Quinto, Nathan non intrasse ad monendum Dauidem statim post ingressum eius ad Bethsabea, ut titulus indicare videtur, sed multo postea: iam enim natus erat filius Dauidi ex Bethsabea, quando venit Nathan. Itaque quod dicitur in titulo intelligitur potius de occasione, quam de tempore: Consensus est, Psalmum scriptum esse, quando Nathan intravit ad Dauidem ex occasione, quia intraverat Dauid ad alienam contigem, nomine Bethsabeam.

## EXPLICAT PSAL. L.

**M**iserere mei Deus secundum magnam misericordiam tuam.

Incipit Propheta Psalmum ab oratione, qua remissionem peccati petit; & simul explicat primam rationem, qua mouetur ipse ad pcedendum; & Deum moueri posse credit ad indulgendum; alias deinde rationes in sequentibus versiculis explicaturus. Ait igitur, *Miserere mei Deus*; miserum se agnoscit, & confitetur Dauid ob iniquitatem admissam, quamuis alioqui naturæ, & fortunæ bonis omnibus abundaret; ut è contrario beatos dicere solet eos, qui timent dominum, non qui diuitiis, aut honoribus abundant: ex quo intelligimus, quam peruerse de miseria & felicitate iudicent filij huius seculi. Addit, *secundum magnam misericordiam tuam*, quasi dicat, ideo misericordiam tuam implorare audeo, quia miser sum: misericordia enim miseriam respicit, ut eam tollat: quamuis autem in Hebræo codice non sit vox illa, magnam tamen LXX. Interpretes eam vocem in sua versione posuerunt, vel quod in codicibus Hebraicis emendationibus illam inuenerint: vel quod hunc locum voce illa addita explicare volue-

rint. Vocatur autem magna misericordia qua peccata remittuntur, tum quia peccatum magna miseria est, tum quia compactione huius misericordiæ, parua misericordia dici potest ea, per quam Deus bona temporalia tribuere solet: bona enim temporalia Deus inimicis etiam suis, atque iis, quos in fine reprobaturus est, præbet; gratiam vero remissionis peccatorum illis tantum donat, quos in filios, & hæredes æterni Regni adoptare dignatur. Dauid igitur non contentus parua illa misericordia, qua Regni gloriam, & opes copiosas, ac filiorum multitudinem, & victoriam de hostibus, atque alia id genus acceperat, petit misericordiam magnam, quam in peccatorum remissione, & gratiæ restitutione positam esse sciebat.

Et secundum multitudinem miserationum tuarum dele iniquitatem meam.

Idem repetit, & declarat, quod enim dixit: *Miserere mei*, declarat, dicens, *dele iniquitatem meam*; & quod ait, *secundum magnam misericordiam tuam*, declarat, cum dicit, *secundum multitudinem miserationum tuarum*. Sed ordinem Prophetæ non inuertamus; ipse enim eleganter in hoc secundo versiculo incepit ab eo, quod erat postremum in primo versiculo, ut hæc varietate pulchriorem Psalmum efficere. Ille igitur voces, *secundum multitudinem miserationum tuarum*, explicant quid sit magna misericordia Dei, quæ filijs dilectis exhibetur. Significat autem multitudo miserationum affluentiam pietatis Dei: nam vox Hebraica, ut notauimus in 1. vers. Psal. 17. significat proprie paternum, ac tenerum amorem, quem Scriptura explicare solet, per *viscera misericordiæ*. Ecclesia quoque rectissime id expressit in collecta Dominicæ xi. post Pentecosten, cum ait, *Qui abundantiæ pietatis tuæ, & merita supplicum excedis & vota*. Vere enim pietas diuina tanta est, ut multo plus donet non solum quam mereamur, sed etiam quam optare audeamus. Quod ostendit etiam Dominus in para-



bola de filio Prodigio. Luc. 15. Pater enim filium penitentem; non solum admittit ad gratiam sed etiam continuo amplexatus, & osculatus est, & iussit illi dari stolam primam, & annulum preciosum; & occidi in gratiam eius vitulum saginatum, ac denique tanta signa benevolentiae erga filium, qui vniuersa bona sua dissipauerat, ostendit, ut plura non posset erga eum, qui victor ac triumphator de hostibus rediisset. Quod sequitur *dele iniquitatem meam*, refertur tum ad reatum; tum ad maculam peccatorum: sciebat enim David ex actione peccati relinqui in anima reatum mortis aeternae, qui scribitur in conscientia, & maculam priuationis gratiae, quae reddit animam deformem, tenebricosam, Deo inuisam, ad utrumque refertur vocabulum delendi: nam Scripturae deleri solent, cum remittitur debitum, & maculae etiam delentur, cum abluitur quod maculatum erat. Petit igitur David, ut Deus non agat secum ex rigore iustitiae, sed ex paternae misericordiae remittat debitum peccati, & lauet maculam, restituendo nitorem gratiae.

III.

*Amplius laua me ab iniquitate mea, & à peccato meo munda me.*

Post culpam remissam, & gratiam restitutam, adhuc remanent in homine mali habitus vitiorum, & ipsa concupiscentia carnis, quae hominem reddunt infirmum, & debilem; quales sunt qui recens ex graui morbo conualuerunt: & quidem mali habitus paulatim exterminantur exercitatione virtutum: concupiscentia vero potest quidem minui, sed ordinarie non eradicatur, nisi in morte: quamuis autem ad vitiorum exterminationem, & concupiscentiae diminutionem multum valeat studium, & diligentia nostra: tamen praecipuae partes sunt gratiae Dei, sine qua nihil possumus, & cum qua omnia possumus. Ideo Propheta David, qui haec nouerat omnium optime, in Psal. 102. scripsit, *Benedic anima mea Domino, & noli obliuisci omnes retributiones eius, qui propitiatur omnibus iniquitatibus tuis, qui sanat*

*omnes infirmitates tuas.* Et hoc loco posteaquam petit deleri peccatum suum, & audiuit à Nathan Propheta, *Deus transtulit peccatum tuum, non morieris*, iterum petit lauari, & mundari, id est, magis, & magis iustificari per maiorem gratiae infusionem, ut malis habitibus sublevis, & concupiscentia mortificata, anima candidior & pulchrior fiat, & per hoc etiam ad resistendum temptationibus fortior. *Amplius*, inquit, *laua me ab iniquitate mea*, & à peccato meo munda me, id est, spero peccatum meum per gratiam tuam esse deletum, & animam meam lotam, & mundatam à reatu, & macula per actionem peccati contractam, sed cupio, & peto iterum, atque iterum lauari per gratiae incrementum, ut anima mea candidior, & fortior euadat. Posset etiam simplicius exponi, ut haec secunda petitio pertineat ad magnitudinem peccati declarandam, quasi dicat, si macula peccati mei levis esset, sufficeret simplex ablutio, sed quia macula ingens, & multiplex est, ideo multum, valde, amplius atque amplius lauari desidero, ut tantae maculae vestigium nullum supersit.

IV.

*Quoniam iniquitatem meam ego cognosco, & peccatum meum contra me est semper.*

Haec est secunda ratio, unde persuadere Deo conatur, ut indulgeat peccanti: quia videlicet confitetur peccatum suum, & illud in se punit continua cogitatione; & recodatione. Ignosce inquit; *quia ego peccatum meum agnosco*; non excuso, non nego, nec solum agnosco, sed perpetuo de illo cum dolore animi cogito: nam *contra me est semper*, id est, in conspectu meo positum, me quasi iaculum fodere, & cruciare non cessat. Hoc exemplum imitari debemus, qui Psalmos Penitentiales recitamus, ut vere dicere possimus, *peccatum meum contra me est semper*, quod fiet si peccatum semel admissum, & per gratiam Dei forte deletum, in memoria nostra viuat, & ingratitude nostrae erga tam magnam



gnum benefactorem nos semper admoneat.

V.

Tibi soli peccaui, & malum coram te  
feci, ut iustificeris in sermonibus tuis, &  
vincas cum iudicaris.

Tertia hæc est ratio, cur à Deo indulgentiam postulet: quoniam non alium Iudicem timet. *Tibi*, inquit, *soli peccavi*; non dicit, contra te solum peccavi: peccauerat enim etiam contra Viriam, quem occiderat, & contra Bethsabeam, quam adulterauerat, & contra populum quæ scandalizauerat, sed dicit, *Tibi soli peccavi*, nimirum vt Iudici, apud quem solum conuinci poterat: nam nec alium Iudicem habebat, & si habuisset conuinci non potuisset; quoniam factum erat sine teste; & quamuis ex suspitione fama peccati manasset in vulgus, tamen legitime peccatum probari non poterat; sed apud Deum Iudicem conuictus erat, tum quia Deus viderat, tum quia conscientia ipsius testis erat apud Deum, qui scrutatur renes & corda; & ideo subiungit declarans & *malum coram te feci*: quamuis enim Dauid occulte peccauerit, in tenebris clausi cubiculi, tamen oculos Dei excludere non potuit. *Vt iustificeris in sermonibus tuis*: illud, vt, non significat causam: sed consequentiam, vt Theodoretus hoc loco notauit, & sensus est, *Tibi soli peccavi, & malum coram te feci*, ex quo secutus est, *vt tu iustificeris in sermonibus tuis*, dum me peccatorem & iniustum esse pronuncias: vel certe subintelligitur verbum aliquod, vt hic sensus sit. Dico, *tibi soli peccavi*, dico, *malum coram te feci*, confiteor me iniustum; vt iustus, & verax inueniaris in sermonibus tuis, quibus per Nathan Prophetam me adulteri, & homicidii reum esse pronuntiaſti. Et *vincas cum iudicaris*; repetitio est eiusdem sententiæ: ac si dicat; & si iudicium inter te, & me instituat, & ego negare velim crimen, cuius tu reum me esse dixisti, tu omnino vincas causam, & ego causa cadam, cum mecum iudicaris. Hunc existimo literalem esse sensum huius obscure sententiæ, qui sensus valde confirmatur ex verbis Apostoli Rom. 3. *Et*

autem Deus verax, omnis autem homo mendax, sicut scriptum est, ut iustificeris in sermonibus tuis, & vincas, cum iudicaris. Sed non rejicio quod alii dicunt, Deum iustificari in sermonibus suis, & vincere cum iudicatur, si pœnitentibus ignoscat, quoniam veniam pœnitentibus repromisit. S. Augustinus refert ad Christum hunc versiculum, quia solus ipse est sine peccato, & ideo illi soli iusto, nos iniusti peccamus, & ille solus vicit, cum iudicatus est iniuste ab iniustis.

Ecce enim in iniquitatibus conceptus  
sum, & in peccatis concepit me mater  
mea.

VI.

Quarta ratio ducitur à prima origine, & primi nominis peccato in nos transfuso per generationem, ex quo facti sumus infirmi, & proclives ad peccandum, & ob hanc quasi naturalem miseriam misericordia digni sumus. Quod autem hic locus non intelligatur de peccatis parentum, sed de ipso peccato originali quod ex conceptione trahimus? probat hoc loco S. Augustinus, quia David non est natus ex adulterio, sed ex casto coniugio piorum parentum. Sed hoc ipsum probare possumus ex proprietate verborum hebraicorum: illud enim, *conceptus sum*, est in Hebræo, *holalibi*, quod nō significat actum gignendi, qui ad parentes pertinet, sed actum formationis membrorum; quæ conformatio in vtero sit facis diu post concubitus parentum. Et videtur Spiritus sanctus diuina providentia non voluisse scribi hoc loco, *genitus sum*, sed *conceptus*, siue *formatus sum*, vt praueneret hæreticorum peruersas interpretationes. Illud etiam, *conceptus me mater mea*, in Hebræo est, *iechematni*, quod proprie significat, *calescit me*, siue *fouit me*: proinde non refertur ad actum concubitus, in quo peccant parentes, quando fornicantur, vel merchantur; sed ad actionem confouendi foetum in vtero, dum formantur membra, vt anima infundatur, quamuis autem, sanctus Hieronymus verterit, *peperit*

Na 3

273C



*me mater mea*, & sanctus Augustinus legat: *aluit me mater mea*, & nos cum septuaginta legamus, *conceptit me mater mea*: tamen proprietas verbi est, quam diximus, cum qua non pugnant illæ varæ lectiones: mater enim recte dicitur *concipere*, quando factus in vtero eius formatur, & fouetur, sic etiam dicitur *alere*, non solum quando lacte nutrit iam editum, sed etiam quando in vtero conseruat, & auget: denique non male S. Hieronymus vertit, *In peccato peperit me mater mea*, quia peccatorem peperit, quem in peccato conceperat. Adde etiam, quod in textu originali, dicitur in singulari, *in peccato conceptus sum*, & *in peccato conceptit me mater mea*. Vere enim peccatum originale quod in cōceptione contrahimus, vnum est, non plura. Sed Septuaginta Interpretes verterunt in numero multitudinis, *in iniquitatibus conceptus sum*, & *in peccatis conceptit me mater mea*: quia vnum illud peccatum est quasi fons omnium aliorum peccatorum, & in illo includuntur omnia.

VII. *Ecce enim veritatem dilexisti incerta & occulta sapientia tua manifestasti mihi.*

Hæc est ratio quinta, quæ ducitur à veritate, & simplicitate cordis, quæ semper fuit in Dauide, & quam Deus maxime diligere solet; propter quam etiam Deus qui veritas est, Dauidi multa mysterio futura reuelauit: nam, vt Sanctus Ioannes Chrysostomus hoc loco copiose docet, nullum est vere mysterium Christi, & Ecclesiæ, quod Dauid non præuiderit, & in Psalmis prædixerit. Igitur Dauid hanc veritatem commemorat, propter quam tot mysteria diuina cognouit, & quia in eadem veritate perseverat, simpliciter peccatum suum confitendo, inde petit à Deo remissionis donum. *Ecce, inquit, veritatem dilexisti*; id est, tu Deus veritatem, & sinceritatem cordis semper amasti, sicut etiam contra duplicitatem, & peruersitatem semper odisti. *Incerta, & occulta sapientia tua manifestasti mihi*, id est, quia veritatem amas, & in me veritatem, & rectitudinem

cordis inuenisti, ideo tam multa mihi patefecisti mysteria diuina secretissima & occultissima, quæ signa sunt infinite sapientiæ tuæ. Illud *incerta*, non significat mysteria diuina esse incerta, id est, dubia in se: quasi possint non fieri: sed incerta, & dubia nobis, quomodo dicimus, incertus est hominibus dies Iudicii, non quod non certum sit, futurum esse diem iudicii, sed quia incertum est nobis quando sit futurus. In textu originali vox hebraica significat *absconditum*, & *cooperitum*. Itaque *incerta, & occulta* sapientiæ diuinæ dicuntur illa, quæ Sapientia diuina ordinauit ab æterno, vt fiant temporibus suis; sed abscondita, & occulta sunt; antequam fiant, nisi speciali priuilegio reuelentur.

*Asperges me hyssopo, & mundabor: lauabis me, & super niuem dealbabor.*

Aperit hic vnum ex incertis; & occultis mysterijs diuinæ sapientiæ, quod videlicet tempore noui testamenti aspergendi essent homines aqua munda in Baptismo, & perfectissime iustificandi: alludit autem ad cerimoniam, quæ describitur Num. 19. vbi ad expiationem tria necessaria esse dicuntur, cinis vaccæ ruffæ immolatae in holocaustum, aqua cineribus mixta, & hyssopus, quæ aqua aspergebatur: per cinerem vaccæ ruffæ significatur Christi mors: per aquam, Baptismus, per hyssopum, fides: hyssopus enim herba est humilis, radices habens in petra. Sicut enim in illa expiatione typica, aqua mundabat, sed vim habens ex cineribus vaccæ occisæ, & per hyssopum aspersa: sic etiam in Baptismo aqua mundat, sed vim habens ex morte; & merito Christi & per fidem applicata. Ad has igitur expiationes tum figurantem, tum figuratam respicit Dauid cum dicit, *Asperges me hyssopo, & mundabor*: petit enim illam purificationem, quam nouerat figuratam, per expiationem aquæ hyssopo aspersæ, & quæ implendam præuidebat, & prædicebat in Baptismo, & vt ostendat illius expiationis primum auctorem esse Deum, dicit, *Asper-*



*Asperges me hyssopo, & non dicit, asperget me Sacerdos hyssopo: & ut demonstret, expiationem Baptismi fore perfectissimam, ita ut vere tollat peccata, ut non solum non imputentur, sed ut non sint, & non solum tollat peccata, verum etiam infundat copiosam gratiam, addit, Lauabis me, & super niuem dealabor. Vide sanctum Augustinum in libro questionum super numeros, c. 33. & Theodoretum in hunc locum Psalmi.*

*Auditui meo dabis gaudium & letitiam, & exultabunt ossa humiliata.*

Effectus, & signum perfectæ iustificationis est, cum spiritus reddit testimonium spiritui nostro, quod filij Dei sumus. Hoc testimonium in se aliquando Propheta experitur, iterum illud petit dicens, *Auditui meo dabis gaudium & letitiam*, id est, cum me perfecte laueris, addes & hoc beneficium ut interiore quodam gaudio tamquam signo remissi peccati me mirabiliter afficias, quod gaudium erit veluti bonus nuncius, quem cordis aures iucunde percipiam. In Hebraico textu est vnicum verbum, pro eo quod nos habemus, *auditui meo dabis*, & significat proprie, *audire me facies*. Itaque sensus est, audire me facies internam vocem Spiritus sancti, qui me gaudio, letitiaque perfundet. *Et tunc exultabunt ossa humiliata*, id est, tunc animus spiritu timoris contractus, & dissolutus, resumptis viribus exultabit. In hebraico textu habetur, *Et tunc exultabunt ossa, quia tu confregisti*. Ex quo intelligimus, spiritum timoris, quo cor conteritur, & humiliatur, à Deo esse, & disponere ad spiritum dilectionis, quo anima iustificatur. Per ossa intelliguntur vires animi, non ossa corporis, nam & paulo post dicitur, Cor contritum & humiliatum Deus non despiciet.

*Auerte faciem tuam à peccatis meis, & omnes iniquitates meas dele.*

Quod prædixit futurum, in presenti sibi postulati dixerat enim, *Asperges me hyssopo, & mundabor, lauabis me, & super niuem dealabor. Auditui meo dabis gaudium, &c.* nunc ista ipsa postulat. Ac primum petit remitti

peccata, sicut antea dixerat, *Asperges me hyssopo, & mundabor, Auerte, inquit, faciem tuam à peccatis meis*, id est, ne consideres peccata mea, ut ea punias: quo modo alius Sanctorum dixit, *Ne reminiscaris Domine delicta mea*. Sunt tamen istæ omnes loquutiones metaphoricæ: neque enim fieri potest, ut Deus, quem nihil latet, auertat faciem à peccatis, vel obliuiscatur eorum, sed dicitur *auertere faciem*, vel obliuisci, quando facit id quod faciunt, qui non considerant, aut non recordantur: qui. n. non considerant, aut non recordantur, non puniunt. Addit autem, *Et omnes iniquitates meas dele*, ut non solum ad tempus Deus non puniat, sed numquam omnino puniat: qui enim auertit faciem à scriptura aliqua, potest iterum conuertere faciem, & considerare quod scriptum est: sed qui deleuit scripturam, non potest amplius legere. Facit hoc aduersus hæreticos, qui docent, peccatum in iustificatione non imputari, sed manere tamen, quasi Deus auertat quidem faciem à peccatis, sed ea nunquam omnino deleat.

*Cor mundum crea in me Deus, & spiritum rectum innoua in visceribus meis.*

Hoc respondet illis verbis: *lauabis me, & super niuem dealabor*: petit enim, ut non solum peccata deleat, sed etiam iustitiam infundat, quæ animam renouet, & formosam, ac splendidam reddat, quod etiam est contra hæreticos, qui iustificationem in sola peccatorum remissione constituunt, quod autem dicit, *Cor mundum crea in me Deus*, intelligitur formaliter, ut scholæ loquantur, id est, de creatione munditiei: non de creatione cordis: per peccatum enim non perit substantia cordis, sed mundities. Itaque sensus est, crea munditiam in corde meo: & satis proprie dicit, *crea*, quoniam nihil inuenit Deus in corde peccatoris, unde munditiam in illo efficiat, sed ex magna misericordia sua sine vllis meritis homines iustificat: nam etiam si disponantur peccatores per fidem, & poenitentiam ad iustificationem, tamen fides, & poenitentia



tentia, & alia omnia similia dona Dei sunt. *Et spiritum rectum innoua in visceribus meis.* Explicatio est verborum præcedentium: vt enim intelligeremus, creari cor mundum, esse, creari munditiam in corde, addit, & in visceribus meis innoua spiritum rectum, non autem innoua mihi viscera. Per viscera intelliguntur interiora animi, id est, voluntas ipsa, quæ paulo ante cor dicta est. Per spiritum rectum, intelligitur recta affectio, quæ nihil aliud est, nisi charitas: per cupiditatem enim affectus cordis distortus efficitur, dum conuertitur ad inferiora, ac præcipue ad seipsum; sed per charitatem dirigitur, dum conuertitur ad superna, ac potissimum ad Deum. Innouatur igitur spiritus rectus in visceribus, quando corde munda-to per gratiam, renouatur in anima pia affectio in Deum, quæ per peccatum amissa erat, & in cuius locum cupiditas distorta successerat.

XII.

*Ne proicias me à facie tua: & spiritum sanctum tuum ne auferas à me.*

Hic iam perseuerantiam postulat, memor videlicet fragilitatis suæ, ne forte per gratiam erectus, iterum labi contingat. Dicitur in Scriptura, *proici à facie Dei*, qui dimittitur, ac deseritur non amplius recipiendus in gratiam, 1. Reg. 16. *Dixit Dominus ad Samuel, Vsq̃uequo tu luges Saul, cum ego proiecerim eum?* & 2. Reg. 7. *Misericordiam meam non auferam ab eo, sicut abstuli à Saul, quem amouit à facie mea,* & 4. Reg. 24. *Ira-sebatur Dominus contra Ierusalem, & contra Iudaam, donec proiceret eos à facie sua.* Ait igitur: *Ne proicias me à facie tua*, id est, ne finas me iterum labi in peccatum, ne forte in perpetuum à gratia tua me remoueas: parum enim mihi prodesset, lauari, & super niuem dealbari, & spiritum rectum in me innouari, si tandem à facie tua cum reprobis proiciendus essem. Vt autem me non proicias à facie tua, *Spiritum sanctum tuum ne auferas à me*, id est, donum perseuerantiæ mihi tribue, efficiendo per gratiam tuam, vt Spiritus tuus sanctus iugiter in me ma-

nens, spiritum rectum in visceribus meis conseruet. Hoc loco notandum est, verum esse dogma Ecclesiasticum Concil. Trident. sess. 6. cap. 13. S. Augustini tract. 2. in Ioan-nem, & S. Prosperi resp. 7. ad obiectiones Vincentianas, Neminem à Deo desereri, nisi prius ipse deserat Deum, id est, non auferri Spiritum sanctum à iustis, nisi ipsi peccando spiritum in se extinguant; tamen, vt homo non peccet, & spiritum non extinguat, ad donum perseuerantiæ pertinere, de quo dicit Apostolus: *Oramus, vt nihil mali faciat, 2. Cor. 13.* De hoc dono hunc locum Psalmi intelligimus, cum enim dicit Dauid: *Spiritum sanctum tuum ne auferas à me*, non significat, non auferas, si peccaui; sed ne auferas, vt non peccem.

*Redde mihi lætitiā salutaris tui, & spiritu principali confirma me.*

Respondet hic versiculus illis verbis: *Audisti meo dabis gaudium & lætitiā*: sicut enim prædicit, post veram perfectamq; iustificationem securum in homine internum gaudium, ex testimonio Spiritus intus loquentis: ita nunc posteaquam petit remissionem peccati, & infusionem gratiæ cum dono perseuerantiæ, petit signum & effectum iustificationis, dicens: *Redde mihi lætitiā salutaris tui*, id est, per peccatum amissi gratiam & lætitiā consequentem, ideo sicut petij reddi mihi gratiam amissam, ita consequenter peto reddi lætitiā salutaris tui, id est, lætitiā, quæ nascitur ex donata à te mihi salute: ac ne forte lætitiā extollat, & periculosam securitatem inducat, adiungit: *Et spiritu principali confirma me*, id est, peto, vt stabilias & confirmes me in bono per spiritum principalem mihi à te inspiratum. In Hebraico textu est vox, *nediua*, quæ significat principem, & spontaneum, siue liberalem, & potest referri tum ad Spiritum sanctum, qui vere princeps est omnium spirituum, & liberalissimus, ac munificentissimus, cum sit fons omnium donorum: tum ad spiritum, id est, affectum ipsius Dauidis, qui



qui petitur à Deo talis, qualis deest optimum principem, qui debet esse spontaneus erga Deum, & liberalis erga populum, S. Augustinus & S. Hieronymus in commentario, & S. Bernardus serm. 3. de Pentecoste scribunt; posse per Spiritum principalem intelligi Deum Patrem, per Spiritum rectum, Deum Filium, per Spiritum sanctum, Deum Spiritum sanctum. Sed videtur hæc pia, non tamen literalis expositio.

*Libera me de sanguinibus Deus, Deus salutis mee, & exultabit lingua mea iustitiam tuam.*

Oravit paulo ante David pro absolutione peccati, & promisit, se docturum peccatores vias Domini: nunc orat pro liberatione à poena, siue à vindicta, quam expetebat sanguis Vriæ iniuste fusus, & promittit, se laudaturum Dei iustitiam. Cur autem dicat, *de sanguinibus*, & non potius, de sanguine, ut requirebat phrasia Latina, rationem reddit S. Augustinus, quia voluit Interpretes seruare numerum, quem inuenit in textu Hebraico: in textu autem Hebraico ponitur numerus multitudinis, ad significandam magnam effusionem sanguinis, ut Genes. 4. *Vox sanguinis fratris tui clamat ad me de terra.* In Hebræo est, *vox sanguinum*, id est, vox multi sanguinis effusi. Sic igitur hoc loco dicitur: *Libera me de sanguinibus*, id est, libera me à voce multi sanguinis Vriæ, qui à me iniuste fusus clamat ad te, & vindictam contra me exposcit; & dicit: *Libera me*, quoniam videbat sanguinem illum, quasi militem armatum contra se stare; proprie etiam addit: *Deus salutis mee*: nam proprium est Saluatoris, liberare ab imminente periculo. Et hæc etiam ratio est, cur adiungat, & *exultabit lingua mea iustitiam tuam*: nam liberatio & saluatio vera per meritum Christi præiussa fiebat, ut nunc sit per meritum Christi re ipsa exhibiti. Meritum autem Christi exquisitissime iustitiam continet, & talem, ut toto corde, & maxima vocis contentione laudari mereatur. Atque hoc significat verbum Hebraicum, *therammen*, pro quo nos habemus, *exultabit*, id est, exultando & vociferando laudabit. S. Augustinus & alij, per sanguines, intelligunt peccata: sed, ut bene notauit Euthymius, literalis sensus ad verum sanguinem Vriæ referendus est: spiritualiter autem, per sanguinem, peccata intelligi possunt, quoniam praua ex praua concupiscentia oriuntur, in concupiscentia vero præcipue sanguis dominatur.

*Domine labia mea aperies, & os meum annuntiabit laudem tuam.*

Oo

Hoc

XVI.

XIV. *Docebo iniquos vias tuas, & impij ad te conuertentur.*

Exponit fructum iustificationis suæ, quæ redundabit in gloriam Dei, & multorum utilitatem. Ego, inquit, à te receptus in gratiam, post tam graues offensiones, docebo, & verbis & exemplo, vias tuas, misericordiam videlicet, & iustitiam: nam omnes viæ Domini misericordia & veritas: & inde sequetur, ut impij exemplo meo docti ad te conuertantur. Fuit autem David omnibus posteris insigne exemplum misericordiæ & iustitiæ diuinæ, misericordiæ quidem, quia post tam grauiæ scelera, mox vt ex corde dixit: *Peccanti Domino*, remissum fuit ei peccatum; iustitiæ autem, quoniam grauissimas temporales penas de eo Dominus sumpsit, ut non solum statim moreretur filius ex adulterio natus, sed etiam paulo post ipse eiiceretur à folio Regni, vxores eius publice violarentur à proprio filio, duo eius filij Amnon & Absalon interficerentur. Hoc autem exemplum non solum profuit hominibus illius sæculi, sed etiam cæteris omnibus vsque ad mundi consummationem: nam Psalmus de hac re ab ipso compositus vbique frequentatur & frequentabitur, quamdiu Ecclesiæ militantis status permanebit. Itaque impleuit David quod promisit, cum hunc Psalmum edidit: docuit enim iniquos vias Domini, & multi peccatores ad Deum conuersi sunt, & alij deinceps sine dubio conuertentur. Verisimile quoque est, Davidem post reparationem suam multis prædicasse diuinam indulgentiam, atque eius exhortatione non paucos peccatores ad Deum fuisse conuersos.

תרכ



Hoc iam sequitur ex perfecta iustificatio-  
ne & liberatione peccatoris, ut labia solita  
Deum laudare, quæ per peccatum clausa  
fuerant, iterum per indulgentiam aperian-  
tur ad gratiarum actionem, & laudem Re-  
demptoris. Ait igitur: *Domine labia mea a-  
peries*, id est, tu quidem indulgendo & con-  
donando peccata, & fiduciam & lætitiā re-  
stituendo, aperies labia mea, & tunc *os meum  
annuntiabit laudem tuam*, predicando mise-  
ricordiam & iustitiam, non solum præsentibus,  
sed etiam futuris hominibus.

XVII.

*Quoniam si voluisses sacrificium, dedis-  
sem utique, holocaustis non delectaberis.*

Reddit rationem, cur sacrificium laudis of-  
ferre velit, quoniam videlicet sacrificia pec-  
corum Deo non placent, ac si dixisset: *Os  
meum annuntiabit laudem tuam*, quoniam  
sacrificio laudis delectari te scio, non sacrifi-  
ciis animantium brutorum; nam si ea tibi  
placerent, non distulisses ea offerre. Non est  
autem sensus, sacrificia pecorum nullo mo-  
do placere Deo, cum satis constet ex libro  
Leuitici à Deo illa esse instituta, & offerri  
iussu. Sed dicuntur non placere ex seipsis,  
quasi mactatio pecorum sit ex se opus Deo  
gratum, vel utile, aut necessarium: item di-  
cuntur non placere, si conferantur cum sacri-  
ficio Eucharistie, ut patet ex 1. cap. Malachie,  
ubi sacrificia vetera dicuntur cessatura, quā-  
do oblatio munda in omnibus gentibus of-  
ferretur: dicuntur etiam non placere, quando  
offeruntur à peccatoribus, ut dicitur Isaie 1.  
cum Deo magis obedientia placeat, quam vi-  
ctimarum oblatio, 1. Reg. 15. Denique dicun-  
tur non placere ad expianda peccata; quo-  
niam impossibile est, ut dicit Apostolus ad He-  
bræos 10. sanguine taurorum & hircorum  
auferri peccata: & in hoc sensu dicit hoc loco  
David, *si voluisses sacrificium pro remissione  
peccati mei, dedissem utique*: sed quia holo-  
caustis non delectaberis, ita ut eorum gratia  
mihi peccata condones; ideo *os meum an-  
nuntiabit laudem tuam*: nam, ut diximus  
in explicatione Psalmi superioris, sacrifi-  
cium laudis Deo gratissimum est, quoniam

in ara cordis igne charitatis succenditur. In  
Hebræo videtur paulo aliter haberi. Sic e-  
nim ad verbum legitur: *Quoniam non voles  
sacrificium, & dabo: holocaustum non place-  
bit*. Sed videtur repetenda negatio, cum di-  
citur, & dabo, ut sensus sit, *quoniam non vo-  
les sacrificium, ego quoque non dabo*. Vel forte  
LXX. Interpretes loco negationis legerunt  
particulam conditionalem: nam ea posita  
potest litera Hebraica sic legi: *Quoniam si  
velles sacrificium, & darem*: quod est idem  
cum eo, quod nos habemus ex versione Se-  
ptuaginta: *Si voluisses sacrificium, dedissem  
utique*.

*Sacrificium Deo spiritus contribulatus,  
cor contritum & humiliatum Deus non  
despicies.*

XVIII.

Explicat clarius, quod sacrificium laudis  
Deo placeat, illud videlicet, quod ex corde  
contrito & humiliato procedit, quando vi-  
delicet homo agnoscens misericordiam suam, &  
misericordiam Dei, humiliatur sub potenti  
manu eius, & illi honorem & gloriam, sibi  
autem ignominiam & confusionem tribuit,  
Dan. 9. *Tibi Domine iustitia, nobis autem  
confusio faciei*: & paulo post: *Domine nobis  
confusio faciei, Regibus nostris, & Principibus  
nostris, & Patribus nostris, qui peccauerunt*:  
*tibi autem Domine Deo nostro misericordia  
& propitiatio*. Spiritus contribulatus idem  
est, quod cor contritum: nam in codice He-  
braico, & Græco codice eadem vox repeti-  
tur, *spiritus contritus, & cor contritum*, sed  
Interpres maluit variare vocabula, & sensus  
idem est: dicitur enim *spiritus contribulatus*,  
anima dolore affecta, ac per hoc in tribula-  
tione posita ob peccatum in Deum commis-  
sum: sic etiam spiritus contritus, dicitur ani-  
ma ex dolore concepta ob admissum pecca-  
tum, quasi scissa, & in puluerem redacta,  
non amplius retinens lapideam duritiem, &  
resistentiam. Hæc autem contritio spiritus  
est gratissimum Deo sacrificium; quia,  
quemadmodum peccatis Deus offenditur,  
ita poenitentia placatur; & ideo recte subiun-  
gitur: *Cor contritum & humiliatum Deus*



non despicias: quoniam despicit Deus superbos, illisq; resistit, sed humilibus, qui se illi libenter subiiciunt, semper dat gratiam.

XIX.

*Benigne fac Domine in bona voluntate tua Sion, ut ædificentur muri Hierusalem.*

Hæc est ultima ratio, qua Dauid vitur ad placandum Deum, & impetrandam perfectam iustificationem, & reparationem, post tam grauem lapsum. Dicit enim hanc suam reparationem toti populo profuturam, sicut toti populo noceret eius ruina. Itaque rogat, ut præster hoc beneficium ipsi ciuitati Sion, & Hierusalem. *Benigne fac Domine in bona voluntate tua Sion*, id est, si ego dignus non sum, qui exaudiar, respice ciuitatem, cuius ego sum caput, & illi benefac sanando caput illius, *in bona voluntate tua*, id est, iuxta beneplacitum tuum, quo tibi complacuit, hanc ciuitatem tibi eligere in propriam & peculiarem sedem. *Ut ædificentur muri Hierusalem*, id est, ut sic muri Hierusalem, qui corruerunt, iterum ædificentur. Vocat muros Hierusalem, seipsum, qui instar murorum totum populum custodiebat & defendebat, qua metaphora dicitur etiam de Rege Christo: *Saluator ponetur in ea murus & antemurale*, Isaïæ 26. &: *Dabo te populo huic in murum æneum*, Hierem. 15. In Hebræo legitur: *ædifica muros Hierusalem*, qui per lapsum meum ceciderunt: restitue mihi spiritum copiosum, & gratiam abundantem, ut populum tuum instar murorum defendere & custodire valeam.

XX.

*Tunc acceptabis sacrificium iustitiæ, oblationes & holocausta: tunc imponent super altare tuum vitulos.*

Effectus iustificationis sunt opera iustitiæ, quæ placent Deo, ut vera sacrificia spiritualia, iuxta illud Apostoli ad Hebr. 13. *Beneficentia & communionis nolite obliuisci: talibus enim hostiis promeretur Deus*, & 1. Petr. 2. *Offerte spirituales hostias acceptabiles Deo, per Iesum Christum*. Tunc, inquit, id est, cum ego perfecte reparatus & iustificatus fuero,

acceptabis sacrificium iustitiæ, bona videlicet opera mea, & populi mei, oblationes & holocausta, id est, quæ bona opera, vel erūt spirituales oblationes, vel spiritualia holocausta. Oblationes spirituales sunt, cum quis ex charitate donat bona sua, eleemosynas erogando: holocausta vero, cum donat se totum in Dei obsequium, iuxta illud Rom. 12. *Obsecro vos fratres, ut exhibeatis corpora vestra, hostiam viuientem, sanctam, &c. tunc imponent super altare tuum vitulos*, id est, cum viderint homines ista sacrificia iustitiæ acceptissima tibi esse, accurrent multi, & certatim imponent super altare tuum sacrificia, non quæcunque, sed omnium optima; sacrificium enim vituli erat omnium sacrificiorum præstantissimum: ac per hoc vitulos super altare imponere; nihil est aliud nisi opera iustitiæ perfecta Domino Deo offerre. S. Augustinus more suo exponit hunc locum de ædificatione cœlestis Hierusalem, vbi sacrificia iustitiæ vndeque perfecta ab omnibus offerentur. Theodoretus & Euthymius exponunt etiam mystice de ædificatione Ecclesiæ Christianæ, quæ versatur in terris: iidem quoque addunt, posse intelligi hos duos versiculos de reædificatione Hierosolymæ, quæ facta est tempore Nehemiæ, ut videlicet Dauid in spiritu post desertum peccatum suum, & impetratam remissionem præuiderit peccatum commune totius generis, ob quod euertenda esset Hierusalem, & simul orauerit pro remissione illius peccati, & reædificatione Ciuitatis.

## P S A L M V S L I.

*Titulus & Argumentum.*

In finem intellectus Dauid, cum venit Dôëg Idumæus, & nunciauit Sauli, venit Dauid in domum Achimelech.

**T**itulus Psalmi notissimus est ex historia libr. 1. Regum cap. 22. Argumentum autem est reprehensio Dôëg Idumæi, qui calumniatus est Dauidem & Achimelech



Sacerdotem apud Regem Saul, & causa fuit  
perditionis multorum hominum.

## EXPLICATIO PSALMI LI.

I.

**Q**uid gloriaris in malitia, qui potens  
es in iniquitate?

Orditur Dauid ab interrogatione, ut effi-  
caciore sit reprehensio, quomodo M. Tullius  
aduersus Catilinam incepit: Quousque tan-  
dem abutere Catilina patientia nostra? *Quid  
gloriaris, inquit, in malitia, qui potens es in  
iniquitate?* gloriabatur enim Doëg Idu-  
mæus, quod accusatione sua perdidisset Sa-  
cerdotem Domini, & omnem familiam e-  
ius. Saul enim cum audiuisset ab ipso Doëg  
Idumæo, Dauidem fuisse receptum hospitio  
ab Achimelech Sacerdote, in tantam iram  
exarsit, ut non solum occidi iusserit ab ipso  
Doëg, Sacerdotem Achimelech, sed etiam  
octoginta quinque alios Sacerdotes, qui e-  
rant cum eo; & deinde percussit in ore gladij  
ciuitatem sacerdotalem, occidens viros &  
mulieres, paruulos & lactantes, oues quo-  
que, & boues & asinos. Ecce quanta mala  
nata sunt ex calumniatore illo, ut vere dictus  
sit *potens in iniquitate*. Sed occurrit difficul-  
tas ex discordia codicum Hebraicorum, Græ-  
corum, & Latinorum. Nam S. Hilarius, &  
S. Augustinus legunt: *Quid gloriatur*. Sed  
nostræ lectioni, *Quid gloriaris*, fauent textus  
Hebraicus & S. Hieronymus, non solum in  
versione, sed etiam in commentario. Præ-  
terea in textu Hebraico & Græco constitui-  
tur punctum post vocabulum, *qui potens es*,  
*Quid gloriaris in malitia, qui potens es*. Sed  
nostræ lectioni fauent S. Hilarius, & S. Hie-  
ronymus in commentario, quamuis S. Au-  
gustinus & Euthymius legant, ut nunc ha-  
betur in Hebraico & Græco textu. Apparet  
igitur apud veteres fuisse varias interpun-  
ctiones. Denique in Hebraico codice habe-  
tur, *misericordia Dei*, pro eo quod est in  
Græco, *iniquitas*: sic enim ad verbum legitur  
in Hebraico: *Quid gloriaris in malitia, qui  
potens es misericordia Dei*. Sed vox Hebraica,  
cheſed, non significat solam misericordiam,

sed etiam opprobrium, ut perspicuum est ex  
Leuitico cap. 20. vers. 17. & ex Prouerbijs  
cap. 14. vers. 37. Igitur hoc loco non debuisset  
verti, *misericordia Dei*, sed, *opprobrium Dei*,  
quia occidit multitudinem Sacerdotum,  
quod in opprobrium Dei redundauit. LXX.  
Interpres verterunt, *iniquitatem*, quia fa-  
ctum illud Doëg Idumæi iniquissimum fuit:  
nam, ut legitur 1. Reg. 22. nulli alij ausi sunt  
mittere manus suas in Sacerdotes, etiam Re-  
ge iubente, præter istum Doëg Idumæum,  
qui tamen omnium optime nouerat inno-  
centiam Sacerdotum, ut testis oculatus om-  
nium rerum.

*Tota die iniustitiam cogitauit lingua  
tua, sicut nouacula acuta fecisti dolum.*

Exaggerat miris modis calumniosam il-  
lam delationem Doëg Idumæi: ac primum  
dicit, non fuisse repentinam delationem, sed  
diu meditatam. *Tota die, inquit, iniustitiam  
cogitauit lingua tua*, id est, assidue cogita-  
bas, quo modo iniuste deferres, & tandem  
oblata occasione lingua tua peperit, quod  
diu antea parturiebat: quamuis enim cogi-  
tatio ad mentem pertineat, tamen Dauid  
poëticè tribuit hoc linguæ, quasi ipsa lingua  
tam mala fuerit, ut etiam silens apud aures  
hominum, tamen apud se ipsa cogitando lo-  
queretur. Deinde addit deceptionem ab i-  
pso celerrime factam esse, quomodo noua-  
cula acuta expeditissime & facillime scindit:  
coniungit enim Propheta eleganter tar-  
ditatem meditationis cum celeritate exe-  
cutionis. Vere enim Doëg Idumæus, quod  
diu antea cogitauerat, celerrime data occa-  
sione perfecit. Siquidem paucissimis verbis  
omnino Sauli persuasit, Achimelech Sa-  
cerdotem cum Dauid coniuisset, qui fuit  
dolos & impostura grauissima; ait igitur:  
*Sicut nouacula acuta fecisti dolum*, id est,  
sicut nouacula acuta facillime scindit capil-  
los, ita tu facillime Saulem decepisti. Potest  
etiam per *dolum*, intelligi dolosa & fraudu-  
lenta occisio Sacerdotum, quam Doëg effecit  
interficiendo totam progeniem Sacerdotum,  
& sic ad paruulos & lactentes, quomodo



prouacula abradit penitus omnes pilos, quāuis tenuissimos. Dicitur autem dolosa occisio, quia sacerdotes non fuerunt vocati ad Regem tanquam inimici, ut timere potuerint se occidendos, sed circumuenti sunt & de improviso perierunt.

III.

*Dilexisti malitiam super benignitatem iniquitatem magis, quam loqui aequitatem.*

Declarat ex qua radice prodierit illa calumniosa delatio, ac dicit, illam non prodijisse ex ignorantia, vel casu aliquo, sed ex mala voluntate ipsius, qui dilexit semper malum potius quam bonum, & mendacium potius quam veritatem. *Dilexisti*, inquit, *malitiam super benignitatem*, id est, delectaris potius nocere proximo, quam illi benefacere. *Iniquitatem magis, quam loqui aequitatem*, id est, mendacium potius loqui te delectat, quam veritatem: nam verbum hebraicum, *schécher*, proprie mendacium significat: sed quia mendacium perniciosum iniquitas quaedam est, ideo Septuaginta Interpretes verterunt, *iniquitatem*, ut declararent hic agi de mendacio pernicioso: sic etiam ipse David cum deberet mendacio opponere veritatem, opposuit tamen iustitiam, dicens, *quam loqui aequitatem*: quoniam voluit indicare mendacium illius Doeg Idumæi, non fuisse mendacium ociosum, vel officiosum, sed plane perniciosum, & iniustum. Porro per, *aequitatem*, intelligenda est iustitia, ut sonat vox Hebraica, non autem id quod apud Latinos proprie sonat vocabulum, *aequitas*. At non videtur Doeg mendacium aliquod protulisse, cum ait, *Venit David in domum Achimelech*. Respondeo, mendacium fuisse in verbis illis iuxta intentionem dicentis, & audientium: ipse enim significare, voluit, Achimelech fuisse socium coniurationis David: & in eo sensu accepta sunt verba eius à Rege Saul.

*Dilexisti omnia verba præcipationis lingua dolosa.*

Explicat adhuc magis quid dixerit mendacium, & iniquitatem: & ait, fuisse mendacium vere perniciosum, cum fuerit causa perditionis plurimorum hominum innocentium. *Dilexisti*, inquit, *omnia verba præcipationis*, id est, dilexisti omnia verba, quibus possent homines innocentes præcipitari in ruinam, & perditionem: vox Hebraica, *balah*, significat deglutire, absorbere, perdere, & similia. Itaque illud præcipationis, exponi debet, præcipationis in mare, vel in foueam, ut absorbentur, vel deuorentur, vel possetum est præcipationis, pro iustitia, & perditionis: constat autem ex lib. 1. cap. 22. propter verba Doeg Idumæi integram ciuitatem periisse. Illud autem, *lingua dolosa*, varie legitur ab auctoribus, nam S. Hilarius, & S. Augustinus legunt, *linguam dolosam*, ut etiam legit Theodoretus, & nunc habent græci codices: & si ita legatur, sensus erit. *Dilexisti omnia verba præcipationis, linguam dolosam*, At S. Hieronymus quamuis ex Hebraeo vertat, *linguam dolosam*, tamen in commentario Psalmorum legit, in lingua dolosa, ut etiam legit Euthymius, licet non taceat varietatem codicum græcorum, in quorum nonnullis sit in accusatiuo, *linguam dolosam*: & si quis ita legat, sensus erit, *dilexisti omnia verba præcipationis in lingua dolosa*, id est, per instrumentam linguæ dolosæ: Nostri codices videntur accipiendi in vocatiuo, ut sensus sit, *ô lingua dolosa tu dilexisti omnia verba præcipationis*, id est, delectaris semper loqui verba perniciofa: & videtur nostra lectio satis concordare cum textu hebraico, ubi simpliciter ponitur vocabulum sine vilo signo casus obliqui.

כלי

*Propterea Deus destruet te in finem, et nuellet te, & emigrabit te de tabernaculo tuo, & radicem tuam de terra viuentium.*

Prædicit non fore impunitum peccatum Doeg Idumæi, sed pro temporali destructione Sacerdotum, cuius ipse causa fuit, retri-



retribuendum ei exitium sempiternum. Propterea, inquit, deus destruet te in finem, id est, propter hoc tuum peccatum Deus te radicatus destruet in hoc seculo, & in futuro, ita ut in eternum destructus maneat: quibus significari videtur aeterna desolatio in hoc seculo, & aeterna damnatio in futuro. Atque haec est iusta retributio impiorum, ut qui alios perdunt, ipsi quoque male pereant. Deinde quod generatim dixerat, explicat per partes dicens, *Euellet te, & emigrabit te de tabernaculo tuo; & radicem tuam de terra viuentium*, id est, hoc modo te penitus destruet, quia puniet te exilio, & orbitate, ita ut primum amittas opes, & patriam, deinde in exilio, & sine liberis moriaris. *Euellet, inquit, te, & emigrabit*, id est, migrare faciet de tabernaculo tuo, & sic exul, & vagabundus errabis: *& radicem tuam euellet de terra viuentium*, id est, te cum omni posteritate tua de terra eradicabit: filii enim similes sunt radicibus, quia per eos pater radicitur, & stabilitur in terra. Et quoniam per terram viuentium significari potest patria caelestis, indicatur hoc loco, ut supra diximus, etiam damnatio sempiterna. In Hebraico textu, pro, euellet te, habetur *iachthea*, quam vocem S. Hieronymus vertit, *terrebit te*. Sed Sanctus Hieronymus deduxit eam vocem, à *cathath*, quod est *terrere*. Cæterum LXX. Interpretes deduxerunt à *chatha*, quod est *capere*, siue *carpere*, quod idem cum *euellet*.

יהתך  
חתך  
חתך

VI.

*Videbunt iusti, & timebunt, & super eum ridebunt, & dicent, Ecce homo, qui non posuit Deum adiutorem suum.*

VII.

*Sed sperauit in multitudine diuitiarum suarum, & prauaui in vanitate sua.*

Ex poena impij delatoris id sequetur, ut multi erudiantur. *Videbunt iusti, & timebunt*, id est, casum istum considerabunt viri iusti, & cordati, & horrebunt. *Et super eum ridebunt, dicentes, Ecce homo, &c.* id est, & illum iridebunt, quod stultissime egerit, cum in Deo, qui potentissimus est, sperare

noluerit, & in diuitiis fragilibus, quæ facillime amittuntur, spem suam posuerit. *Et prauaui in vanitate sua*, id est, eundem iridebunt, quod prauale re studuerit non in vero robore, veraque virtute, sed in insidiis & mendaciis vanitate plenissimis: illud enim, *prauaui*, non significat, quod vere tandem prauaui, sed quod opinione sua prauale re se posse crediderit: nam etiam si ad tempus aduersus innocentes prauale re visus est, tamen exitus demonstrabit, eum succubuisse, non prauauiisse, quando *iusti stabunt in magna constantia aduersus eos, qui se angustiauerunt*.

*Ego autem sicut oliua fructifera in domo Dei, speraui in misericordia Dei in aeternum, & in seculum seculi.*

Concludit Psalmum ostendens se omnino contrariam viam ingressum esse. *Ego, inquit, similis sum oliua fructifera in domo Dei*, id est, non euellat, neque eradicabor, ut Doeg lignum aridum: sed radicabor magis & magis, ut oliua speciosa semper virens, & fructum adferens, & quia talis sum, ideo *speraui in misericordia Dei in aeternum, & in seculum seculi*, id est, speraui, me adiutum iri à Deo in aeternum, & in seculum seculi. Vbi mire opponit se Doeg Idumæo, illum comparat ligno arido, se vero oliuæ virenti: illum dicit euellendum etiam de tabernaculo suo, se dicit radicandum in domo Dei: illum dicit sperasse in diuitiis suis, se autem in misericordia Dei.

*Confitebor tibi in seculum, quia fecisti: & expectabo nomen tuum, quoniam bonum est in conspectu sanctorum tuorum.*

X.

Gratias agit pro re futura, quasi præterita, quoniam futura apud Deum, & in cognitione Prophetarum certissima sunt. *Confitebor, inquit, tibi in seculum*, id est, laudabo te semper, quia fecisti iudicium hoc: ut destrueres: sperantem in te confunderes, & ædificares. Et expectabo nomen tuum, id est, & semper deinceps sperabo in te: idem enim



non est sperare in Deo, & expectare Deum  
& nomen Dei pro ipso Deo ponitur. Quo-  
niam bonum est in conspectu Sanctorum tuo-  
rum, id est, merito sperabo in nomine tuo,  
quoniam nomen tuum dulce est Sanctis tu-  
is, qui eius dulcedinem gustauerunt.

sunt in iniquitatibus suis, non est qui faci-  
at bonum.

Deus de caelo prospexit, ut videat, si est  
intelligens, aut requirens Deum.

Omnes declinauerunt, simul inutiles  
facti sunt, non est, qui faciat bonum, non  
est usque ad vnum.

Nonne scient omnes, qui operantur i-  
niquitatem, qui deuorant plebem meam  
ut cibum panis.

Deum non inuocauerunt, illic trepida-  
uerunt timore, ubi non erat timor.

Quoniam Deus dissipauit ossa eo-  
rum, qui hominibus placent confusi sunt,  
quoniam Deus spreuit eos.

Quis dabit ex Sion salutare Israel? cum  
conuertit Deus captiuitatem plebis sue,  
exultabit Iacob, & letabitur Israel.

Hic Psalmus idem fere est cum Psalmo  
tertiodecimo, inde igitur petatur explicatio:  
satis enim erit hic annotare diueritatem v-  
triusque Psalmi.

Primus versiculus est omnino idem.

Secundus versiculus est etiam idem, nisi  
quod in isto habetur, in iniquitatibus, in il-  
lo, in studiis: sed idem est sensus, studia e-  
nim illa sunt affectus, & desideria mala, quae  
omnia iniqua sunt, & peccata, ac per hoc ini-  
quitates.

Tertius versiculus idem est, nisi quod hic  
dicitur, Deus, ibi dicitur, Dominus.

Quartus versiculus idem omnino est.

Quintus versiculus, sextus, & septimus,  
qui habentur in Psalmo tertiodecimo, in  
hoc non habentur: sed, ut ibi admonuimus,  
illi tres versiculi additi sunt ex diuersis Scri-  
pturae locis, & ad Psalmum proprie non per-  
tinent.

Quintus versiculus, qui respondet octa-  
uo in Psalmo tertiodecimo, idem cum illo  
est, nisi quod hic dicitur, Nonne scient, ibi di-  
citur, Nonne cognoscent.

Sextus versiculus, qui respondet nono, idem  
est.

PSALMVS LII.

Titulus, & Argumentum.

In finem pro Macheleth intelligentia  
Dauid.

**H**ic titulus habet unam vocem non in-  
terprecatam, videlicet pro Macheleth.  
Et S. Hieronymus vertit, per chorum. Sed per  
chorum, videtur intellexisse instrumentum  
musicum; ut ipse idem testatur in epistola ad  
Dardanum (si tamen ea epist. ipsius est) de  
musicis instrumentis, quo modo nonnulli acci-  
piunt vocabulum chori in Psalmo ultimo, in  
illis verbis, in tympano & choro, in chordis &  
organo. Neg, improbable est, per chorum posse  
intelligi cætum canorum canentium, ut sen-  
sus sit, Psalmum esse compositum pro choro, ut  
videlicet canatur a multis simul. Fateor ta-  
men priorem expositionem videri veriore;  
quoniam Septuaginta Seniores non reliquissent  
eam vocem non interpretatam, nisi ex: ma-  
sens ea voce significari nomen proprium alicu-  
ius instrumenti musici. Quod additur, intelli-  
gentia Dauid, significat, in hoc Psalmo aperiri  
intelligentiam, siue eruditionem Dauid, ut  
vertit S. Hieronymus: ex quo titulo colligitur  
argumentum Psalmi, quod est, deploratio insi-  
pientia generis humani: ideo enim fit mentio  
intelligentia Dauid, quia per ipsum coarguen-  
da erat cecitas, & insipientia generis humani.

EXPLICAT. PSAL. LII.

**D**ixit insipiens in corde suo, non est  
Deus  
Corrupti sunt, & abominabiles facti



est cum illo, nisi quod hic dicitur, *Deum ibi Dominum.*

Septimus versiculus, qui respondet decimo, plane diuersus est. Ibi enim dicitur, *Quoniam Dominus in generatione iusta est: consilium inopis confudistis, quoniam Dominus spes eius est:* hic vero dicitur: *Quoniam Deus dissipauit ossa eorum, qui hominibus placent, confusi sunt, quoniam Deus spreuit eos.* Hic igitur versiculus, qui solus explicandus est, reddit rationem, cur impij trepidant timore, ubi non est timor; & dicit, causam esse, *quoniam Deus dissipat omnia ossa eorum*, id est, debilitat omne robur eorum, & etiam leuissima quæque formident: id vero facit admirabili prouidentia sua infatuando consilia eorum, impediendo conatus eorum, & ad nihilum redigendo omnes machinationes eorum: ossa enim in Scripturis pro fortitudine passim accipiuntur. Addit Propheta, *qui hominibus placent*, quoniam eiusmodi homines pleni sunt timore humano, siue mundano, & torum studium eorum est hominibus placere. Apostolus autem è contrario dicit, *si hominibus placerem, Christi seruus non essem.* In Hebræo non habetur, *Qui hominibus placent*, sed *Circudantium te*: sed Septuaginta Interpretes non legerunt, *chonach*, quod est, circudantium te, sed, *chonaph*, quod significat hypocritam, simulatorem, adulatorem, quam vocem rectissime interpretati sunt, ἀνδρῶν ἀποκρίων, id est, eorum qui hominibus placent: eiusmodi enim sunt adulatores, & hypocritæ. Adiungit Propheta, *Confusi sunt, quoniam Deus spreuit eos*: quibus verbis videtur alludere ad versiculum decimum Psalmi decimi tertij, *Consilium inopis confudistis, quoniam Dominus spes eius est.* Quasi dicit, vos impij confudistis consilium inopis confidentis in Deo: & Deus confundet vos, ut saepe erubescere cogamini videntes irrita consilia vestra, quoniam in Deo non sperastis, & Deus spreuit vos; ac per hoc non adiuuit vos. Possent etiam hæc referri ad nouissimum iudicium, in quo omnes impij confundentur, quoniam Deus Iudex omnium

spernet eos dicens, *Non noui vos, ite in ignem æternum.*

Octauus versiculus, qui & postremus, idem est, cum postremo versiculo Psalmi tertij decimi, nisi quod ibi dicitur, *Cum auerterit Deus captiuitatem.* Sed quanquam auertere, & conuertere videantur esse contraria: tamen hoc loco sensum eundem faciunt. dicitur n. Deus auertere captiuitatem, cum tollit è medio: & ad nihilum redigit ipsam captiuitatem: quod fit cum captiuus liberatis, captiuitas esse desinit. Dicitur autem idem Deus conuertere captiuitatem, quando captiuos reuocat, & reducit in patriam. Denique cum dicitur auerti captiuitas, sumitur captiuitas pro forma, id est, pro ipsa vera captiuitate: cum dicitur conuerti captiuitas, sumitur captiuitas pro personis, quæ erant captivæ.

## PSALMVS LIII.

### Titulus, & Argumentum.

In finem in carminibus intellectus Dauid, cum venissent Ziphæi, & dixissent ad Saul, nonne Dauid absconditus est apud nos?

**E**X titulo colligitur argumentum. Scribitur lib. 1. Reg. cap. 23. Ziphæos proditores fuisse Dauidis qui apud eos, tanquam apud amicos manens, declinabat persecutionem Saulis. Ipsi enim Sauli patefecerunt Dauidem apud se latere: unde factum est, ut Saul cum maximo exercitu ad eos accederet, & quasi in modum corona totum locum cingeret, ut Dauid pene de vita desperaret. Occasione igitur tam imminens periculi, Dauid ad Deum per orationem confugit, & hæc Psalmum, Domino inspirante, composuit, Theodoretus, & Euthymius, quem aliqui recētiore sequuntur, existimant Psalmum compositum fuisse post liberationem, & esse hymnum gratiarum actionis. S. Hieronymus, & S. Augustinus, quamuis mystice solum exponant, tamen indicant Psalmum compositum fuisse instante perse-

חנך  
חמף



persecutione, quod clarius tradit S. Hilarius, exponens ad literam, & mystice. Hanc sententiam veriorum esse, & ipse titulus, & totus Psalmi contextus ostendit. Illud, intellectus David, significat, hanc fuisse sanctam prudentiam Davidis, ut intelligeret in tam magno periculo ad Deum esse recurrendum, & in illo sperandum. In qua oratione intellexit etiam inspirante Domino se de omni periculo liberandum.

## EXPLICATIO PSAL. LIII.

**D**Eus in nomine tuo saluum me fac, & in virtute tua iudica me.

Orat Deum, ut quando defecerant omnia humana remedia, ipse per se ad iuuandum accederet. Deus, inquit, in nomine tuo, id est, potestate tua, cui omnia cedunt, saluum me fac: & per alia verba idem significans, addit, & in virtute tua, id est, potentia, & robore tuo, iudica me, id est, sis Iudex meus, & pro meritis retribue mihi defensionem, & aduersario meo ultionem: non enim habebat tunc David, ad quem appellaret ab iniustitia Regis, nisi solum Deum. Quo exemplo admonemur nunquam esse desperandum de auxilio Domini, etiam si mors euidentissime imminere videatur; Deus enim vbique est, & omnia in manibus habet, & cultores suos ad se confugientes non despiciat.

**D**eus exaudi orationem meam, auribus percipe verba oris mei.

Iam confessus fuerat, potentiam Domini: nunc orat, ut Dominus ad potentiam adiungat voluntatem, Deus, inquit, exaudi orationem meam, quasi dicat, scio te omnia posse; sed oro, ut velis; ideo peto ut exaudias orationem meam, qua te rogaui, ut potestate tua saluum me faceres. Idem repetit sequentibus verbis, Auribus percipe verba oris mei, id est, ne auertas aures tuas, neque despicias orationem meam.

**Q**uoniam alieni insurrexerunt aduersum me, & fortes quaesierunt animam meam, & non proposuerunt Deum ante conspectum suum.

Explicat pericula, à quibus liberari desiderat, dicens, Quoniam alieni insurrexerunt aduersum me, id est, Ziphæi qui proximi videbantur, sed corde alieni erant à me: insurrexerunt contra me, irritantes Saulem ad me persequendum: & fortes quaesierunt animam meam, id est, & Saul cum armato exercitu, quaesierunt vitam meam ad extinguendum eam: hæc enim erat tota ratio persecutionis: quia enim timebat Saul, ne aliquando David regnaret, cupiebat eum de medio tollere: quamuis enim Dauidem innocentem esse Saul non ignoraret, tamen cupiditas retinendi in propria familia Regnum, quam orationem status nunc vocant, faciebat, ut iustum videretur, quod iniustissimum erat. Et non proposuerunt Deum ante conspectum suum, id est, & neque illi, neque isti timorem Domini præ oculis habuerunt: illi enim, Ziphæi videlicet, gratiam Regis legi Domini; & isti, Saul, & satellites eius, regnandi cupiditatem iustitiæ, quam Deus in primis obseruari iubet, antepotuerunt. Vere enim initium omnium malorum est auertere oculos mentis à Deo, & eius lege naturali omnibus nota, vide S. Thomam quaest. 1. de Malo, ar. 3.

**E**cce enim Deus adiuvat me, & Dominus susceptor est anime mee.

Illi, inquit, non habuerunt Deum ante oculos suos: sed Deus habuit illos ante oculos suos, & vidit quid molirentur, & non permisit, ut malam suam voluntatem implerent. Illud ecce, significat repentinam illustrationem Prophetæ, qua præuidit auxilium Dei sibi non defuturum, & tam certo præuidit, ut tanquam de re præsentē dicat, Ecce Deus adiuvat me: particula, enim, vel ponitur pro, autem, vel subintelligitur aliquid, hoc modo, illi non proposuerunt Deum ante conspectum suum, ut facere debuissent, ecce enim Deus adiuvat me. Et Dominus susceptor est anime mee, id est, ecce video Deum me adiuuantem, & susipientem quasi in sinu suo custodiendam vitam meam, quam isti quaerunt mihi eripere.



Et vere repentinum, & inopinatum fuit auxilium Dei: nam cum undique circum dedisset Saul exercitu suo Dauidem, ut euadere non posset: repente venit nuncius ad Saulem, qui diceret Philistæos magno agmine se infudisse in regionem Saulis, quo nuncio coactus est Saul recedere à persequendo Dauide, & fortasse orante Dauide venit ille nuncius, & Dauid, qui cum in spiritu præuiderat, dicit, *Ecce deus adiuvat me, & Dominus susceptor est anima mea.*

*Auerte mala inimicis meis, & in veritate tua disperde illos.*

Per imprecationem intelligitur prædictio, ut sæpe monuimus; & in Hebræo legitur per modum prædictionis, sic enim ad verbum reddi possunt verba Hebraica, *Reuertetur malum inimicis meis*, nostra autem lectio facilius esset, si ita legeremus, *Auerte mala à me ad inimicos meos.* Sed in eundem sensum verba explicanda sunt, *Auerte mala quæ mihi impendent*, à me, & conuerte illa ad inimicos meos. Quod quidem ita factum est, nam Saul Dauidem persequabarur: & continuo factum est, ut Philistæi persequerentur Saulem. Ita pericula, quæ imminabant à Saule Dauidi, ceperunt imminere à Philistæis Sauli. Illud autem, *& in veritate tua disperde illos*; impletum est non diu postea, nam in montibus Gelboe periit Saul cum exercitu suo, in quo exercitu credibile est adfuisse, & similiter periisse illos, qui Dauidem persequuti fuerant: disperdere enim hoc loco non significat, dissipare, sed omnino delere, & extinguere, si vox Hebraica consideretur. Vide lib. Reg. cap. vlt. Illud, *In veritate tua*, significat, iuxta promissiones tuas, siue secundum iustitiam tuam, qua reddis unicuique secundum opera sua.

*Voluntarie sacrificabo tibi, & confitebor nomini tuo Domine, quoniam bonum est.*

Videns Propheta, se continuo exaudiri, siue ex prænotione futuræ liberationis, siue ipso orante discesserit Saul propter pericu-

la Philistinorum sibi denuntiata, gratias agit Deo, ac dicit, *Voluntarie sacrificabo tibi*, id est, promptissimo animo offeram sacrificium laudis: & idem aliis verbis repetens ait, *& confitebor nomini tuo*, id est, confessionem laudis offeram tibi (nomen enim Dei pro ipso Deo ponitur) *quoniam bonum est.* Siquidem nomen Dei, pro re significata sumptum, id est, pro ipso Deo, res est omnium optima; ita ut Christus ipse dixerit, *Nemo bonus nisi solus Deus*, Matth. 19. Luc. 18. Marci 10. S. Augustinus recte monet, occasione aduerbij, *voluntarie*, Deum esse diligendum propter seipsum amore puro, non tam propter præmium aliquod, quam propter ipsius Dei summam, & ineffabilem bonitatem; quam dilectionem qui habet, non minus Deo sacrificat, eique confitetur in prosperis, quam in aduersis: siquidem Deus non minus bonus est, cum nos flagellat, quam cum pascit & recipit.

*Quoniam ex omni tribulatione eripisti me, & super inimicos meos despexit oculus meus.*

Ostendit ex effectu Deum esse bonum, quoniam tam cito exaudivit seruum suum, *Quoniam*, inquit, *ex omni tribulatione eripisti me*, id est, quoniam revelans mihi meam certam liberationem, iam in spe ex omni tribulatione liberaisti me, & *super inimicos meos despexit oculus meus*, id est, & in eadem prænotione iam oculus meus vidit inimicos meos prostratos, & consumptos: refertur enim hoc ad id, quod antea dixerat, *In virtute tua disperde illos.* Nisi forte placeat, ut supra indicauimus, ipso Propheta orante incepisse eius liberationem, recedente videlicet Saule propter nuncium allatum de aduentu Philistinorum; tunc enim sensus erit, *Quoniam ex omni præsentis tribulatione eripisti me, & oculus meus vidit inimicos meos*, recedentes cum Saule Duce ipsorum. Nam vox illa, *despexit* non significat contemptum, sed simplicem visionem, ut perspicuum est ex Hebraica voce, *rahatka*, verti n. potuisset,



Super iniquos meos respexit oculus meus id est, oculus meus libere, & sine timore respexit inimicos meos. Vulgatus Interpres posuit, *despexit*; vt significaret Dauidem ex alto loco vidisse inimicos prostratos aut recedentes, iuxta duas expositiones indicatas. Vere enim David *despexit*, id est deorsum aspexit inimicos suos; siue quia tunc erat in monte edito corporaliter; siue quia spiritus prophetiae in altum illum euexerat, & ex alto diuinæ reuelationis inimicos suos vidit quasi iacentes in imo. Porro hic Psalmus quotidie in Ecclesia frequentatur ad horam primam vt exemplo Davidis discamus aduersus omnes persecutores armis orationis ad initium diei communiri, scientes quod omnes qui pie viuere volunt in Christo Iesu, persecutiones assidue patiuntur. 2. Timoth. 3.

Prophetis, & Psalmis de me. Denique quod exemplo Davidis omnis iustus eodem modo orare possit, dubium esse non potest.

## EXPLICATIO PSAL. LIV.

**E**xaudi Deus orationem meam, & ne despexeris deprecationem meam: intende mihi, & exaudi me.

Incipit David quasi à proœmio, quo capatur beneuolentia Iudicis, ac petitur, vt benigne, & attente audire velit: ac primum dicit, *Exaudi Deus orationem meam*. Deinde ne forte oratio; vel persona orantis displiceat, vtrunque commendat, ac de oratione dicit, *Ne despexeris deprecationem meam*, id est, humilem, & supplicem precem meam: id enim proprie significat vox hebraica hoc loco posita: de persona vero orantis addit, *Intende mihi*, & *exaudi me*, id est, benigne me respice, & benignam aures mihi porrige. Fortasse etiam ter eandem orationem repetit, quia nouerat Deum esse Trinitatem, & orationem dirigit ad Patrem; deprecationem ad Filium, personam orantis ad Spiritum sanctum, Denique tertio idem alijs verbis orat, vt affectum, & desiderium ostendat: quo modo & Christus in horto eandem orationem tertio repetiuit, Matth. 26. & Apostolus ter Dominum rogauit. 2. Cor. 12.

**Contristatus sum in exercitatione mea, & conturbatus sum à voce inimici, & à tribulatione peccatoris.**

Exponit nunc materiam orationis suæ, quæ est vehemens persecutio inimicorum, ob quam contristabatur, & conturbabatur, & à qua liberari desiderabat. In hebræo, pro voce, *Contristatus*, est verbum, *arid*, quod significat flebo, siue ululabo; sed futurum ponitur pro præterito, vt ex versione Septuaginta; & S. Hieronymi perspicuum est, & pro voce, in exercitatione mea,

## PSALMVS LIV.

## Titulus, &amp; Argumentum.

In finem, in carminibus intellectus David.

**I**n titulo nihil est, quod non sit alias explicatum. Argumentum esse volunt Sancti Patres Hilarius, & Hieronymus de passione Christi: Euthymius, & Theodoretus Psalmum exponi volunt de Davide fugiente persecutionem Saulis, vel potius Absalonis: Sanctus Augustinus de homine iusto in tribulatione posito siue de corpore Christi, quod est Ecclesia. Sed omnes expositiones admitti debent, aut certe possunt: nam quod de Davide Psalmus ad literam recte exponatur, intelligi potest ex præcedente, & sequente, & ex alijs multis, vbi diuersis verbis ponitur in titulo, Psalmum esse compositum occasione talis, vel talis persecutionis, quam David patiebatur, quo & etiam Davida figuram Christi gesserit, & quod Psalmi fere omnes ad Christum principaliter pertineant, dubitari non potest, cum ipse Dominus aliquoties Psalmos de se scriptos allegauerit, & Lucæ ultimo dixerit, Necessè est impleri omnia, quæ scripta sunt in lege Moïsi &



שׁוּב

est, *Sichi*, quod significat, *meditationem*, & *submissa voce loquutionem*. Itaque sensus est, fleui dum exerceret cogitando, & mecum ipse conferendo miseras meas: quod idem est cum eo, quod nos habemus. *Contristatus sum in exercitatione mea*. Sed verba hebraica clariora sunt; sequitur, *Et conturbatus sum à voce inimici*, & à tribulatione peccatoris, id est, non solum tristis fui, & fleui ob praesentes miseras: sed etiam timui futuras, *conturbatus à voce inimici*, comminantis longe peiora, & à tribulatione, quam minabatur peccator inimicus meus. Idem enim est à voce inimici, & à tribulatione peccatoris: nam inimicus peccator voce sua tribulationem minabatur innocenti. Istum autem inimicum peccatorem intelligere possumus, tum Saulem, aut Absalonem respectu Dauidis, tum Caiphiam, & Annam respectu Christi, tum quemlibet persecutorem respectu hominis probi.

III.

*Quoniam declinauerunt in me iniquitates, & in ira molesti erant mihi.*

Ostendit, non vanam fuisse turbationem suam. *Quoniam inimici declinauerunt*, inquit, *in me iniquitates*, id est, proiecerunt in me falsa crimina, conuicia, calumnias, opprobria, ut exponunt SS. Patres Hilarius, & Augustinus: ex quo intelligimus vocem, iniquitates, esse in casu accusandi, non in casu nominandi, ut nunc habent codices graeci communiter: & *in ira molesti erant mihi*, id est, & ob iram in me conceptam molesti erant, non verbis tantum calumniantes, sed etiam factis me persequentes.

IV.

*Cor meum conturbatum est in me: & formido mortis eecidit super me.*

Explicat magis in particulari, quod dixerat, *conturbatus sum*. *Conturbatum*, inquit, *est cor meum in me*, id est, in intimis meis, ubi sedes cordis est, conturbatus sum. In Hebraeo habetur clarius, *cor meum doluit in medio mei*, Et subiungit rationem dicens, & *formido mortis eecidit super me*: nulla enim

res facilius ad intima descendit, & magis totum hominem turbat quam mortis imminentis periculum: hoc impletum fuisse in Dauide, cum plorans fugeret à facie Absalon, & in Christo cum in horto paueret, & sudorem sanguineum funderet, notissimum est Matth. 26. Luc. 22.

*Timor, & tremor venerunt super me, & contexerunt me tenebrae.*

Idem alijs verbis dicit, & quasi summam omnia comprehendit: nam timor in anima erat, tremor in corpore, tenebrae autem maioris totum hominem operuerant: sicut enim letitia exhilarat, & dilatat cor, sic etiam tristitia constringit, & obducit, ac per hoc tenebras facit, unde etiam qui morerent, tenebras quaerunt, in cubicula se abdunt, fenestras claudunt.

*Et dixi quis dabit mihi pennas, sicut columba & volabo, & requiescam.*

Verba sunt iusti suspirantis ad patriam caelestem, neque enim alibi vera requies inuenitur quasi dicat, o si nunc possem ad altissimos montes caelestis Hierusalem confugere, quomodo columba potest pernicitate sua ungues accipitis euadere, vel quomodo columba tempore diluij, cum non inueneret, ubi requiesceret pes eius, ad manus Noë, atque ad arcam redijt. Proprie autem iustus columbae comparatur, quae innoxium est animal; secundum, & simplex, & non pugnando, sed fugiendo vincit: sic enim, & vir iustus aduersus tentationes accipitis Tartarei, fugiendo potius, quam disputando, vel altercando vincere solet.

*Ecce elongaui fugiens, & mansi in solitudine.*

Hæc satis apposite Dauidi conueniunt, qui fugiens Saulem, & postea Absalonem, ad desertum se contulit, quasi dicat, quia non datur mihi, ut instar columbae ad locum veræ quietis ascendam, feci quod potui: nam *elongaui fugiens*, & *mansi in solitudine*. Idem conuenit cuilibet viro iusto in tribulationibus posito, qui cum possit ad patriam



triam commigrare, elongat se cogitatione à tumultibus sæculi, quantum potest, & ad solitudinem cordis & conscientie se transfert, ubi solus cum solo Deo colloquens aliquantulam quietem inuenit.

VIII.

*Expectabam eum, qui saluum me fecit à pusillanimitate spiritus, & tempestate.*

In ea solitudine expectabam Deum, id est, auxilium eius, *qui me saluum fecit*, id est, qui alias saluum fecit, & saluum facere solet à *pusillanimitate spiritus, & tempestate*, id est, à paruo animo ad tolerandum, & à magna tentatione. Vbi coniunguntur duo, quæ mirum in modum amplificanc necessitatem auxilij diuini: nam si paruitati animi contingat parua tentatio, vel magno animo magna tentatio, æquale erit certamen: sed si cum paruitate animi iungatur magna tentatio, intolerabilis erit. Hoc igitur nunc dicit, sibi accidisse, ac proinde petit à Deo, vel vt sibi addat vires, vel diminuat tentationem, vel (quod magis optandum est) vtrunque faciat. Sed Codices hoc loco sunt admodum varij: nam Hebraicus habet ad verbum: *Festinato, vt saluer à spiritu concitato, à tempestate*. Græcus autem habet: *Expectabam Deum, qui me saluum faceret à pusillanimitate, & tempestate*. Noster autem interpres videtur aliquid ab Hebræo, aliquid à Græco accepisse, prima vox Hebraica, *achisa*, significat, *festinabo*; nec video quid legere potuerint Septuaginta, vt verterent, *expectabam*; ideo existimo illos vertisse non verba, sed sensum: nam, *festinabo vt saluer*, bene cohæret, cum, *expectabam saluantem Deum*: siquidem expectabat salutem ex festinatione per orationem ad Deum, quo modo, qui in fuga spem ponit, dicere potest, expectaui salutem ex festinatione in currendo & fugiendo. Sic igitur vir iustus festinans ad Deum feruenti desiderio, orando & pulsando, expectabat auxilium, quo salus fieret. Illa vox, *Deum*, quæ est in Græco, non est in Hebræo, neque in Patribus, Hilario, Hieronymo, Augustino. Itaque videtur addita à posterioribus explicandi gratia. Illud au-

tem, à *pusillanimitate spiritus*, facile colligitur ex Hebræo, & concordatur cum Græco: nam vox Hebræa, *Sohha*, non habetur, nisi hoc loco, & communiter dicitur significare concitationem; vnde S. Hieronymus vertit, à *spiritu tempestatis*, id est, à spiritu concitato; sed quia sequitur, à *turbine*, siue à *tempestate*; rectius dicemus, spiritum concitatum hoc loco significare spiritum hominis metu concitatum & turbatum, quod idem est cum pusillanimitate spiritus: nam qui magno spiritu, vel animo sunt, non facile turbantur & concitantur; sed firmi ac stabiles permanent. Itaque sensus erit in Hebræo, *festinabo, vt saluer à spiritu concitato, à tempestate*, id est, à paruitate animi, & à *tempestate tribulationis*. In Græco non nominatur spiritus, quia intelligitur in voce pusillanimitatis, idem est enim pusillus animus, & pusillus spiritus.

סעה

*Præcipita Domine, diuide linguas eorum: quoniam vidi iniquitatem, & contradictionem in ciuitate.*

IX.

Quia expectabat salutem à Domino per orationem, orat Deum, vt impediatur consilia hostium suorum. *Præcipita*, inquit, *Domine*, id est, præcipita in profundum inimicos meos: hoc enim significat vox Hebræa & Græca. Vnde legit Augustinus, *demerge eos*: deinde addit modum, quo velit illos præcipitari in exitium. *Diuide*, inquit, *linguas eorum*, id est, fac vt qui contra me conspirant, non conueniant in consiliis; sed vnus hoc, alius aliud iudicet & loquatur: & vere sic accidit inimicis Dauid: nam cum Absalon capta ciuitate consultaret de modo perdendi Dauidem, varij varia consilia dederunt; infatuauit autem Deus consilium Achitophelis, quia inspirauit Absaloni, vt consilium eius non sequeretur; inde deterior consilio electo rem male gesserunt, & plurimi eorum perierunt. Itaque ex diuisione linguarum in præcipitum acti sunt, vide libr. 2. Regum cap. 7. & 18. sequitur: *Quoniam vidi iniquitatem, & contradictionem in ciuitate*. Hæc etiam satis apposite exponuntur.

pp. 3

ponuntur

אחשה



ponuntur de Dauide, qui viderat in ciuitate sua Hierusalem prodicionem iniquissimam aduersus personam suam, & rebellionem manifestissimam, quæ significata est nomine contradictionis; quia contradicebant eius imperio, cum Absalonem in Regem elegissent. Possunt etiam exponi hæc omnia de Christo, vt exponit S. Hilarius: nec non de viro iusto, qui persecutionem iniustam patitur, & contradictionem à ciuibus Babylonie, id est, ab amatoribus Mundi, qui semper persequuntur & odio habent eos, qui de Mundo non sunt, sed vt hospites & peregrini in Mundo sunt.

X. *Die ac nocte circumdabit eam super muros eius iniquitas: & labor in medio eius, & iniustitia.*

XI. *Et non defecit de plateis eius vsura, & dolus.*

Pergit describere iniquitatem ciuitatis, à qua ipse persecutionem patiebatur; ac mirabili modo loquendi dicit, iniquitatem, quasi armatum militem obtinuisse muros eius, vt iustitia non posset accedere. *Die, inquit, ac nocte*, id est, semper, *circumdabat eam super muros eius iniquitas*, id est, iniquitas super muros eius consistens circumdabat eam, instar custodiæ militaris: *& labor in medio eius, & iniustitia*, id est, & interim intus in ipsa ciuitate nihil aliud erat, nisi labor miserrorum, & iniustitia potentiorum; dum secure & libere iniusti diuites & potentes opprimerent pauperes & imbecilles. *Et non defecit de plateis eius vsura, & dolus*, id est, & oppressio illa partim erat manifesta, dum in ipsis plateis exigerent vsuras diuites à pauperibus: partim occulta, dum variis dolis & insidiis eos circumueniebant, & vexabant. Hæc conueniebant quidem Hierosolymæ tempore Davidis, sed multo magis tempore Christi, & multo maxime conueniunt Babylonie, id est, amatoribus Mundi huius, in quo regnat concupiscentia carnis, concupiscentia oculorum, & superbia vitæ.

*Quoniam si inimicus meus maledixisset sustinuissem vtique.*

*Et si is, qui oderat me, super me magna loquutus fuisset: abscondissem me forsit an ab eo.*

*Tu vero homo vnanimis, Dux meus, & notus meus.*

*Qui simul mecum dulces capiebas cibos, in domo Dei ambulauimus cum consensu.*

Posteaquam conquestus est Dauid de tota ciuitate & populo, conqueritur nunc de vno particulari proditore, qui videtur fuisse Achitophel, si Psalmus exponatur de Dauide; Iudas autem, si exponatur de Christo; quiuis alius falsus amicus, si de homine iusto generatim accipiatur. Ait igitur: *Si inimicus aliquis manifestus maledixisset mihi, æquo animo tulissem*, quia inimicus solet id facere, & non est mirum, si faciat: *Et si is, qui oderat me, ita vt profliteretur manifestam inimicitiam mecum, magna aliqua conuicia, vel magnas calumnias de me loquutus fuisset, ego forsan abscondissem me ab eo*, vt eius iracundiam mitigarem; & ne darem occasionem maiorum conuiciorum. Sed à te abscondi non poteram, neque vnquam eiusmodi prodicionem à te expectassem, quoniam *tu homo vnanimis* videbaris, id est, amicissimus meus, & vnum cor & vnā animam mecum habens. Item *Dux meus*, id est, consiliarius meus primarius, cuius ego sententiam in rebus agendis semper sequebar. (*Erat enim Achitophel consiliarius Davidis, & talis consiliarius, vt consulere Achitophel, idem fere esset, ac Deum consulere*, vt dicitur 2. Reg. 16.) Sed si exponatur Psalmus de Iuda, dicitur Iudas *Dux Christi*, quia à Christo Dux fuerat constitutus populorum cum aliis Apostolis, iuxta illud Plal. 44. *Constitues eos Principes super omnem terram*. Item *notus meus*, id est, familiaris & commensalis, *qui simul mecum dulces capiebas cibos*: dicuntur autem dulces cibi, quia amicitia conuiuium eos facit dulciores: nam in Hebræo ad literam habetur,

XII.

XIII.

XIV.

XV.



qui simul dulces faciebamus cibos. Sed S. Augustinus per *dulces cibos* intelligit Eucharistiam, quam Iudas cum Christo in vltima cena gustauit; qui cibus omnem habet saporum suauitatem. Denique non solum vnaminis, & notus, & commensalis in rebus politicis & domesticis, sed eiusdem religionis & eiusdem sententiae in sacris ceremoniis; *ambulauimus enim in domo Dei cum consensu*, id est, non fuit inter nos vlla dissensio in actionibus, quae ad cultum Dei pertinebant.

סוד In Hebraeo pro *cibos*, est *sod*, quod *secretum*, non *cibum*, significat. Sed credibile est, LXX.

סוד Interpretes non habuisse in suis Codicibus *sod*, sed *zed*, quod *escam* significat: & magis coheret dulcedo cum cibis, quam cum secreto: capere enim dulces cibos, rectius dicitur, quam capere dulce secretum. Illud etiam,

סוד *cum consensu*, ex Hebraeo S. Hieronymus vertit, *in terrore*. Sed fortasse S. Hieronymus non habuit in suo Codice *raghez*, vt nos habemus, quod significat *coniunctum*, sed habuit *raghez*, quod *terrorem* significat: nostra lectio conuenit cum Hebraico & Graeco Codice.

סוד

סוד

XVI.

*Veniat mors super illos, & descendant in infernum viuentes.*

Imprecatur, seu potius praedicat per formam imprecationis, eam poenam, quam iuste dederunt Dathan & Abyron, Num. 16. Qui seditionem & schisma facientes, viui à terra dehiscente absorpti sunt: qui quidem *videntes perierunt*, id est, videntes se absorberi, & viuos sepeliri, perierunt. Hoc impletum est in iis, qui Dauidem, Absalone duce, persequebantur: nam plures eorum *saluos consumpsit, non gladius*, vt dicitur 2. Reg. 18. Impletum quoque est in Iudaeis, qui in obfisione Hierosolymae viuentes, & videntes peribant, vel fame cadentes in plateis, vel ex muris se deiicientes, vel in foueis delitescerent. Denique impletur in plurimis impiis, qui vident apertissimam veritatem, & sponte oculos claudunt, vel non ignorant, in eo statu, in quo versantur, se saluos esse non posse, & tamen scientes & volentes in eo ad mortem vsque perseuerant.

*Quoniam nequitia in habitaculis eorum, in medio eorum.*

Haec est ratio tam seuerae imprecationis, iuste enim absorbentur viuentes à terra, vt perpetuo habitent cum poenis, qui elegerunt habitare cum vitiis: nam *nequitia in habitaculis eorum*, & non in habitaculis vacuis, sed *in medio eorum*, id est, cum ipsis in eisdem habitaculis commoratae sunt.

*Ego autem ad Deum clamaui, & Dominus saluabit me.*

*Vespere, & mane, & meridie narrabo, & annuntiabo, & exaudiet vocem meam.*

Prædixit interitum inimicis: nunc sibi salutem praedicat. Ego, inquit, *clamaui ad Dominum* ardenti oratione, & ipse *saluabit me* à periculo, in quo versor: & deinceps *clamaui*, non semel, sed etiam secundo & tertio, videlicet *vespere, mane & meridie*, narrando & annuntiando arumnas meas, & misericordias Domini, & ipse Dominus *exaudiet me*. Consuetudo ter in die orandi, legitur etiam apud Daniele cap. 6. fortasse in honorem sanctissimae Trinitatis, cuius mysterium Prophetis non erat incognitum. Cur autem dicatur, *vespere, mane & meridie*, & non potius *mane, meridie & vespere*, ratio esse videtur, quoniam secundum legem festa celebrabantur à vespere ad vespem, vt dicitur Leuit. 23. proinde primum tempus orationis erat vespertinum: quod etiam nunc obseruat Ecclesia, quae incipit officia Diuina à primis vespertis.

*Redimet in pace animam meam ab his qui appropinquant mihi: quoniam inter multos erant mecum.*

Explicat, in quo sit exaudiendus à Deo. *Redimet in pace*, id est, ad pacem restituet *animam meam*, id est, vitam meam *ab his, qui appropinquant mihi*, id est, qui de propinquo aduersus me dimicant: *quoniam inter multos erant mecum*, id est, quoniam multi erant dimicantes mecum, siue mul-

XVII.

XVIII.

XIX.

XX.



multi erant aduersum me vnum, siue in magna multitudine erant, qui mecum pugabant. Hunc existimo sensum esse huius obscurissimi loci cum S. Hieronymo in versione sua ex Hebræo. Itaque sententia erit, Deus liberabit vitam meam, transferendo eam à prælio appropinquantium contra me, ad optatam pacem, & id faciet ea ratione, quoniam iniquum erat, ut multi contra me vnum pugnarent. Quod si hoc duriusculum videatur, poterit cum Euthymio ita exponi: *Redimet in pace*, id est, sine labore meo, *animam meam*, id est, vitam meam, *ab his qui appropinquant mihi*, ut mihi noceant, quoniam isti ipsi antea inter multos alios erant mecum: proinde proditorie & iniuste contra me pugnant, qui paulo antea in meis castris militabant. Impletum est hoc in Davide, qui in prælio contra Absalonem sine labore vicit, quia domi remansit, ut dicitur 2. Reg. 18. Impletum quoque est in Christo, qui liberatus est à morte per resurrectionem omnino in pace, & sine labore.

XXI.

*Exaudiet Deus, & humiliabit illos, qui est ante secula.*

*Exaudiet*, inquit, me, qui oppugnor iniuste, & *humiliabit eos*, qui me oppugnant, *is qui est ante secula*, id est, Deus creator sæculorum. In Hebræo significantius habetur: *Qui sedet ab initio*, id est, qui ab initio mundi Iudex sedet omnium hominum, is iudicabit pro me, & condemnabit aduersarios meos

XXII.

*Non enim est illis commutatio, & non timuerunt Deum: extendit manum suam in retribuendo.*

Merito, inquit, humiliabit illos iustus Iudex, quia non est illis commutatio, obdurati enim sunt, neque pœnitent eos sceleris sui: & non timuerunt Deum, sed magis homines reueriti sunt; ideo Deus extendit manum suam in retribuendo singulis, prout merebantur. Non defunt, qui illud, *non est illis commutatio*, volunt debere exponi, non est illis redditio vicissitudinis, & hanc esse vim Græcæ vocis. Sed vox Hebraica non potest accipi pro

redditione vicissitudinis: nam S. Hieronymus recte vertit, *non mutantur*, & similiter reddidit Symmachus Theodoro teste: proinde si velimus concordare Codicem Græcum cum Hebraico, oportet vocem illam, *אַרְאֵי־מַיָּמָא*, accipere hoc loco pro commutatione hominis à vitio ad virtutem, non pro permutatione vnius rei cum altera: & potest ita accipi, ut communiter accipiunt Interpretes tum Græci, tum Latini, quia vox illa generalis est.

*Contaminauerunt testamentum eius, diuisi sunt ab ira vultus eius, & appropinquauit cor illius.*

Hic versiculus obscurissimus est propter mutationes numeri singularis in numerum multitudinis. In Hebræo habetur in singulari, *contaminauit testamentum eius, diuiserunt*, siue *molluerunt præ butyro os suum*, potest exponi, *contaminauit unusquisque testamentum eius*, quod est idem cum illo, *contaminauerunt testamentum eius*. Illud etiam, *præ butyro*, si legatur vox Hebraica, *chamaboth*, per ת, non per כ, significabit, *præ ira*, vel, *ab ira*, ut verterunt LXX. Interpretes. Illud etiam, *diuiserunt*, potest etiam significare, *diuisi sunt*: nam vtramque significationem habet vox, *chalecu*, sentus igitur hic erit, Deus iuste extendit manum suam in retribuendis suppliciis inimicis meis, quoniam illi non solum non voluerunt mutari de vitio ad virtutem; sed magis ac magis contaminauerunt testamentum, siue pactum eius, malis operibus, præuaricando leges eius: propterea *diuisi sunt*, hoc est, dispersi ac dissipati sunt ab ira vultus Dei; quia *appropinquauit cor illius*, Dei videlicet, ad eos puniendos.

*Molliti sunt sermones eius super oleum, & ipsi sunt iacula.*

Redit ad malitiam præcipui proditoris, qualis fuit Achitophel respectu Davidis, & Iudas respectu Christi. *Molliti*, inquit, *sunt sermones eius super oleum*, id est, præ oleo; & tamen ipsi sermones eius non sunt verba, sed

XXIII

היה  
אבות

ק

XXIV



sed iacula, siue lanceæ: delectant aures, feriunt corda: tales sunt omnes occultæ detractiones, omnes blanditiæ meretricum, omnes peruersiones hæreticorum, omnes proditorum simulationes.

*Iacta super Dominum curam tuam, & ipse te enutriet: non dabit in æternum fluctuationem iusto*

Consolatur Propheta in fine Psalmi se, & sui similes, atque exhortatur ad fiduciam totam in Domino collocandam, qui sine dubio sollicitus est pro seruis, & amicis suis, vt S. Petrus admonet in epistol. I. cap. 5. *Omnes sollicitudinem vestram projicientes in eum, quoniam ipse est cura de vobis*: quod ipsum copiose, & multis exēplis allatis Christus ipse monet, Matth. 6. Quæ non eo pertinent, vt ocio se viuamus, & de victu querendo solliciti nullo modo simus: sed vt non anxie & perturbate viuamus, ac vt præcipuam spem, & fiduciam non in nostris viribus, vel industria, sed in Dei misericordia, & prouidentia collocemus. *Iacta*, inquit, ô anima mea, & qui quis es timens Deum, in *Dominum curam tuam*, id est, relinque prouidentia diuinæ curam eorum, quæ tibi necessaria sunt ad vitam, siue sustentandam siue protegendam: & ipse te enutriet, ipse tibi de necessariis omnibus prouidebit, benedicens laboribus manuum tuarum, & prosperans omnia opera tua: nec solum enutriet te, sed etiam defendet ab inimicis, & si aliquam diu fluctuari iustum permiserit ad probandam patientiam, siue defectu rerum necessariarum ad vitam, siue persecutionibus impiorum: tamen hæc non diu durabunt, quia non permittit Deus iustum in æternum ærumnarum fluctibus agitari: æterna enim tribulatio solis impiis reseruatur, vt dicitur in sequenti versiculo.

*Tu vero Deus deduces eos in puteum interitus.*

Impios videlicet, tu Deus Iudex deduces in puteum mortis, vnde nunquam emergere poterunt. Vocatur autem *puteus interitus* ipsa gehenna ignis æterni, in qua qui

decidunt, perpetuo moriuntur, viuunt enim semper in pœnis, vt semper moriantur & mortis finē, quem cupiunt, nunquam inueniant.

*Viri sanguinum, & dolosi non dimidiabunt dies suos: ego autem sperabo in te Domine.*

Non solum viri, qui insidiantur sanguini, præcipitabantur in puteum mortis æternæ, sed etiam hic in terris non diu viuunt: iustum enim iudicium est, vt qui vitam eripiunt, vitam perdant. Sic enim Deus ait Genes. 9. *Quicunque effuderit humanum sanguinem, fundetur sanguis illius, & Dominus Matth. 26. Omnes, qui acceperint gladium gladio peribunt.* Sed hæc omnia testimonia tum Psalmi huius, tum Genesis, & Euangelij, non significant, omnes omnino, qui occidunt esse occidendos, sed eos tantum qui iniuste occidunt, & eos præcipue, qui ex insidiis occidunt: illi enim proprie sunt viri sanguinum & dolosi. Deinde neque significant omnes omnino qui ex insidiis occidunt gladio perituros: sed vt plurimum fieri, vt occidantur, vel à Iudice, vel ab hostibus, vel à seipsis, vel à casu aliquo, qui tamen respectu Dei non sit causas, sed dispositio prouidentia ipsius. Denique illud, *non dimidiabunt dies suos*, non est accipiendum mathematicè, id est, nimis subtiliter, sed est modus loquendi, quo vitæ breuitas significatur. Quod autem quidam obijciunt ex Psal. 72. *Et dies pleni inuenientur in eis*, non impedit veritatem huius versiculi; nam S. Hilarius hoc loco scribit, verba illa intelligi de iustis, hæc de iniquis, quod si etiam quis contendat, vtræque intelligi de peccatoribus, responderi poterit, illud non dici de viris sanguinum, & dolosis; sed de aliis peccatoribus, vel de paucis quibusdam, qui interdum extra communem regulam diu viuere permittuntur. Concludit Propheta illis verbis sibi valde familiaribus, *Ego autem sperabo in te Domine*: quæ videntur referenda ad omnia supra dicta, vt sensus sit, Ego autem tum vt liberer à proditoribus, qui sunt hostes oc-



culti; tum ut euadam inimicos manifestos; tum ut non incidam in pœnas impiorum; ut non cadam in puteum interitus; ut dies mei in medio cursu non deficiant; sperabo in te Domine, non in viribus meis.

## PSALMVS LV.

### Titulus, & Argumentum.

In finem pro populo, qui à Sanctis longe factus est. Dauid in tituli inscriptionem, cum tenuerunt eum Allophyli in Geth.

**I**N hoc titulo habetur primo materia, siue argumentum Psalmi: deinde auctor, & excellentia Psalmi. Sed hac omnia pendent ex historia, qua habetur l. i. Reg. c. 21. ubi scribitur, Dauidem fugisse à Saule, qui eum quarebat ad necem; & peruenisse ad Achis Regem Geth Philistæum: sed cum à Philistæis agnitus fuisset, & detentus tanquam hostis ipsorum, simulasse insaniam, & furorem, & eo modo è manibus eorum elapsus, venisse in speluncam quadam, ibique ad eum congregatum fuisse populum quadringentorum hominum exulum, & miserorum. Ex hac historia colligimus, populum elongatum à Sanctis, pro quo scribitur Psalmus, esse populum illum quadringentorum exulum, qui ad tabernaculum Dei accedere non poterant, sed cum Dauide huc atque illuc vagabantur: & hoc est argumentum Psalmi, deploratio miseriarum Dauidis; & populi eius. Auctor, & excellentia Psalmi continetur illis verbis, Dauid in tituli inscriptionem: nam tituli inscriptio, ut intelligi potest ex voce Græcæ ἐπιγραφία, est inscriptio incisa in columna ad æternam memoriam. Sensus igitur est, Psalmus Dauidis scriptus ab eo, quasi incisus in columna, ad memoriam sempiternam: denique occasio scribendi fuit illa euasio de manibus Philistinorum per simulatam stultitiam, quando tenuerunt eum Allophyli. i. Philistæi in Geth. S. Hieron. ita vertit hunc titulum, Pro columba muta, eo quod procul abierit Dauid simplex, & humilis, quando tenuerunt eum Philistæi in Geth. Quæ versio satis conuenit cum verbis Hebraicis ut nunc habentur in Biblijs:

Pro columba muta, intelligitur idem Dauid, qui obtinuit, quando stultum se finxit. Ceterum LXX. Interpretes viri doctissimi, sine dubio recte verterunt quod in libris Hebraicis inueniunt. Ideo dicendum est, per columbam, qua legitur in Hebræo, illos intellexisse populum, & vertisse sensum, non verba. Sape enim in Scripturis populus per columbam significatur: per vocem, ellem, quod significat mutam, illi verterunt à Sanctis, qui habuerunt in suo codice inuerso modo easdem literas, meel, quod est à Deo, & per Deum intellexerunt arcam Dei, & ut clariorem sensum redderent, verterunt, à Sanctis, id est, à sanctuario ubi erat arca Dei: per vocem, mictam, quam S. Hieron. vertit, simplicem, & humilem, ipsi verterunt inscriptionem tituli, quia legerunt, mictab, quod ipsi inscriptionem significat. S. Hilarius, & S. Augustinus totum Psalmum de Christo exponunt, qui per Dauidem figuratus est: & per tituli inscriptionem S. August. titulum Crucis intelligit.

### EXPLICAT. PSAL. LV.

**M**iserere mei Deus, quoniam conculcauit me. Homo: tota die impugnans tribulauit me.

Incipit ab oratione, & misericordiam postulat; quoniam miseriam suam agnoscebat: patiebatur enim indignam persecutionem Saulis, & cum ab ea declinare vellet, incidit in grauiorem Philistinorum: & ab utraque ad tempus liberatus, in spelunca interit exul, & inops dilatescebat. Miserere, inquit, mei Deus, qui miserorum vnicum soles esse refugium. Quoniam conculcauit me homo, id est, Saul; dicit autem, homo, potius quam Saul, ut opponat hominem Deo, quasi dicat, Tu Deus miserere, quandoquidem homo est qui tribulat: celum aspicio, dum à terra despicior: ad Dominum confugio, dum conseruus me persequitur. Tota die impugnans tribulauit me, hoc est, non semel mihi nocuit, sed omni tempore mihi molestus fuit; neque me vnquam quiescere passus est. Hæc verissima esse intelliget, qui legerit primum librum Regum. Neque difficile erit hæc omnia ad Christum.



Rum applicare, qui propter nos factus est homo, & tamen homo semper eum impugnauit, & tribulauit à natiuitate vsque ad sepulturam: & postea corpus eius, quod est Ecclesia, impugnare, & tribulare non cessat, neq; ad diem vsque iudicij cessabit. Significatur autem nomine hominis, cum dicitur, *conculcauit me homo*, vel Diabolus, qui in Euangelio Matth. 13. dicitur, *inimicus homo*, vel ipsum genus humanum, quatenus spiritu Dei caret, & nihil est nisi homo, iuxta illud 1. Corinth. 2. *Cum enim sit inter vos zelus & contentio, nonne carnales estis, & secundum hominem ambulatis?* & paulo infra, *Nonne homines estis?* vnde, & Dominus, Matth. 16. distinguit Apostolos ab hominibus, cum dicit, *Quem dicunt homines esse filium hominis? & vos autem quem me esse dicitis?*

*Conculcauerunt me inimici mei tota die: quoniam multi bellantes aduersum me.*

Non solus Saul, sed omnes serui eius Dauidem persequerantur, & contere nitebantur. Nec solus Diabolus, sed omnes ministri eius aduersum Christum & Ecclesia bella gerebant, & gerunt.

*Ab altitudine diei timebo; ego vero in te sperabo.*

Hic variant Hebræa, & Græca: nam in Hebræo coniungitur altitudo cum versiculo superiore hoc modo, *Multi bellantes aduersum me altissimo*: & deinde sequitur alter versiculus, *Deum timebo, ego in deo confidam*. Sed de hac distinctione Iudæorum parum laboramus; quoniam in textu antiquo nulla erat distinctio. In Græcis codicibus additur negatio, hoc modo, *Ab altitudine diei non timebo*: & sic legit etiam S. Hilarius. Sed nostram lectionem approbat S. Hieronymus in epist. ad Suniam, & Fratellam, vbi dicit, negationem esse superadditam: & in Commentario huius Psalmi vtrunque lectionem explicat. Igitur sensus est, Ego tamen tam multos habeam inimicos: tamen non ab illis timebo, sed ab altitudine diei timebo, id est, à diuinis iudiciis timebo, quæ

procedunt ab altissimo lumine, quale est in meridie, quod lumen omnia penetrat etiam intima cordium: sed cum timore spem quoque adiungam ego enim, qui timebo ab altitudine luminis tui, simul etiam in tua misericordia, & bonitate confidam.

*In Deo laudabo sermones meos, in Deo speraui: non timebo, quid faciat mihi caro.*

Explicat clarius fiduciam suam, & rationem fiducie, Deus enim per Samuelem olim promiserat Dauidi Regnum: nam li. i. Reg. c. 13. dicit Samuele de Dauid, *Quasiuit sibi dominus virum secundum cor suum*, & praecepit ei, ut esset dux super populum suum: ac deinde eod. lib. cap. 16. iussit eum inungi in medio fratrum eius. Hac igitur promissio erat causa fiducie, & de hac dicit, *In Deo laudabo sermones meos*, id est fretus auxilio Dei laudabo aliquando promissiones mihi factas à Deo, tamquam verissimas, quando videlicet completæ fuerint. *In Deo speraui*, adimplendas scilicet eius promissiones; & ideo *non timebo quid faciat mihi caro*, id est, non timebo minas, & persecutiones inimicorum meorum, qui caro sunt, id est, infirmi, & fragiles, si cum Deo, qui mihi salutem, & Regnum promisit, comparentur. In Hebræo habetur, *laudabo verbum eius*; sed non repugnat nostræ lectioni, quæ habet, sermones meos: siquidem illæ promissiones erant Dei, quia ille promiserat, & erant Dauidis, quia illi promiserat. Potest etiam fieri, ut LXX. Interpretes non legerint, *deuaro*, verbum eius; sed, *deuari*, verbum meum, sola enim differentia consistit in vna media litera. Non erit difficile de Christo exponere hunc versiculum, siquidem Angelus promittens Virgini, ait, *Dabit ei Dominus sedem dauid Patris eius*, &c. & ipse Christus verissime dicere potuit, *Non timebo quid faciat mihi caro*.

*Tota die verba mea execrabantur, aduersum me omnes cogitationes eorum in malum.*

IV.

דבר  
דבר

V.



Redit ad explicandam malitiam aduersariorum suorum, ac dicit eos toto tempore, quo apud illos fuit, non cessasse vituperare omnia verba, & facta eius: & excogitare, quomodo eum perderent quod non minus conuenit in Scribas, & Phariseos calumniantes verba, & opera Christi & consilia agitantibus de morte eius, quam in Saulem, & ministros eius erga Dauidem dixi autem verba, & opera, quia vocabulum verbi apud Hebræos, & verba, & opera significat:

VI. *Inhabitabunt, & abscondent: ipsi calcaneum meum obseruabunt.*

Addit aliam malam aduersariorum suorum qualitatem. *Inhabitabunt*, inquit, & *abscondent*, id est, simul habitare solebant mecum, tanquam amici, & contubernales; & interim abscondebant se, & recte, atque occulte machinabantur dolos. *Et calcaneum meum*, id est, gressus meos, actiones meas *observabant*, ut me ad casum impellerent. Hec enim erga Dauidem ministri Saulis, & erga Christum Iudæi faciebant. Quamuis autem verba, *inhabitabunt, & abscondent*, sine futuri temporis, tamen apud Hebræos pro preterito, ac præsertim pro imperfecto præterito frequenter accipiuntur. S. Hieronymus ex Hebræo vertit, congregabuntur: sed vox Hebraica, *iagudu* à Septuaginta lecta est, *iaguru*, per, *non per*.

*יגורו*, *יגורו*, *ru*, per, *non per*.

*Deus vitam meam annunciaui tibi: posuisti lacrymas meas in conspectu tuo.*

VII. *Sicut sustinuerunt animam meam, pro nihilo saluos facies illos: in ira populos confringes.*

Prædicit nunc ruinam aduersariorum suorum, iusto Iudice Deo illis reddente quod proximo suo facere cogitauerunt. *Sicut*, inquit, *sustinuerunt animam meam*, id est, sicut in abscondito obseruantes expectauerunt vitam meam, ut eam perderent: ita tu Deus *pro nulla re eos saluos facies*, id est, nullo modo saluabis, sed *in ira tua populos illos confringes*, & ad internecionem persequeris. Hoc impletum est in hostibus Dauidis, qui cum Saule Rege simul interierunt

Posteaquam de supplicio inimicorum loquutus est; reuertitur ad precandum pro se, ac dicit; *Deus vitam meam annunciaui tibi*, id est, narraui in oratione cursum vitæ meæ, transmigrationes, varietates, labores: vox enim Hebraica, *nodi*, significat mutationem; & migrationem: sed Septuaginta Interpretes verterunt, *vitam meam*, ut breuissime omnia comprehenderent. Itaque per vitam intellexerunt cursum vitæ. Et tu *posuisti in conspectu tuo lacrymas meas*, id est, ego flens coram te exposui cursum afflictissimæ vitæ meæ; & tu misericors, & pius Pater non auertisti faciem tuam; sed aspexisti cum misericordia lacrymas meas.

Im



**לח** In Hebræo habetur pro , *in conspectu tuo*, *noti*, quod virem Hebræi significari dicunt. Sed non solum Septuaginta verterunt *in conspectu tuo*, sed etiam S. Hieronymus ex Hebræo reddidit; *in conspectu tuo*: & sic habent omnes latini, & græci Codices. Quare vel vox illa significat conspectum, vel aliquid aliud legerunt, tum Septuaginta, tum S. Hieronymus. Parum autem refert, quod in Hebræo habetur *numeraſti*, pro eo quod nos habemus annunciaui: nam facile potuit mutari persona secunda in primam addendo vnam, vel alteram litteram hebraicam: & sensus est idem: nam & Propheta narrauit suæ vitæ miseras, & Deus eas numeravit: idem autem verbum *saphar*, *narrare*, & *numerare* significat.

*Sicut & in promissione tua, tunc conuertentur inimici mei retrorsum.*

Prima pars huius versiculi pertinet ad versiculum superiorem: nam non solum in Codice hebraico coniunguntur hæc verba, *sicut & in promissione tua* cum in superioribus sed etiam sic exponunt Hilarius; Hieronymus, Augustinus Euthymius; & alij. Itaque sensus est, *posuisti lachrymas meas in conspectu tuo, sicut & in promissione tua*: id est, sicut promissisti, te exauditurum deprecantes cum lacrymis, ita fecisti, quia *posuisti lachrymas meas in conspectu tuo*, vt eas exaudires. Et cum exaudieris, tunc conuertentur inimici mei retrorsum, id est, fusi fugatiq; dissipabuntur, & peribunt. Sanctus Augustinus exponit more suo in bonam partem, vt sensus sit, inimici, qui ante præire nos volebant, & ad interitum ducere; conuertentur per penitentiam, & nos sequentur ad vitam; quomodo dixit Dominus Petro Matth. 16. *Vade post me Satana, scandalum es mihi, quia nō sapiſ, quæ Dei sunt*, id est, noli me præire, sed post me ambula; quoniam dum præire tentas, scandalum es mihi. Euthymius non minus vtiliter exponit de dæmonibus, qui nos præire, & ducere cupiebant ad gehennam, sed per gratiam Dei nostras preces audientes coguntur retrocedere, & nos oblatrantes

sequi, dum properamus ad Regnum; vnde illi exciderunt.

*In quacunque die inuocauero te, ecce cognoui, quoniam Deus meus es.*

Concludit gratias agendo, & laudando Deum. Ecce, inquit, experimento cognoui, quod *in quacunque die inuocauero te, tu Deus meus es*: id est, tu declarabis exaudiendo, te meum esse Deum.

*In Deo laudabo verbum, in Domino laudabo sermonem: in Deo speravi non timebo quid faciat mihi homo.*

Hunc versiculum supra exposuimus: est enim omnino idem cum versiculo quarto, eo excepto; quod hic bis repetitur, *in Deo laudabo verbum*: quamuis enim interpres primo verbum dixerit; deinde sermonem: tamen in hebræo, & græco est eadem vox vtroque: quare poterat verti, *in Deo laudabo verbum*; *in Domino laudabo verbum*: cur autem primo dixerit, *in Deo*, deinde *in Domino*, ratio esse videtur, vt ostendat se credere in Deo, vt Iudice, quod significat nomen Dei, & vt executore iustitiæ, quod significat nomen Domini, cui omnia seruiunt, addit, *non timebo quid faciat mihi homo*: vt declararet quod ibi dixerat, per carnem videlicet, hominem intelligi debere.

*In me sunt Deus vota tua, quæ reddam laudationes tibi.*

Pro his omnibus beneficijs pollicetur se persoluturum vota laudum in tribulatione concepta. *In me sunt*, inquit, *vota tua*, id est, in memoria mea sunt, siue in intimis precordijs apud me conseruantur; vt non excidant, *vota tua*, id est, promissiones tibi factæ à me *Quæ reddam laudationes tibi*, id est, *quæ vota reddam*, vota videlicet laudum & gratiarum actionis, siue, quæ vota continent laudationes tibi assidue à me continendas.

*Quoniam eripuisti animam meam de morte, & pedes meos de lapsu: vt placeam coram Deo in lumine viuentium.*



Hæc est summa beneficiorum diuinorum. Quoniam eripuisti animam meam de morte, id est vitam meam conseruasti ab imminete morte, siue à Saule siue ab Achis Rege Philistinorum: & pedes meos de lapsu, id est, conseruasti me ne laberem in peccatum inter tot, & tantas tentationes, quibus prouocabar, vt Saulem interficerem, vel ei maledicerem: conseruasti autem me à morte, & à peccato, à morte videlicet corporali, & spiritali. *Vt placeam coram Deo, siue vt ambulem* (vt habet vox Hebraica) *placens Deo in lumine uiuentium*, id est, in lumine vitæ huius temporalis, quo carent, qui mortui sunt: item in lumine fidei, & gratiæ, quo carent infideles, & peccatores, vt tandem perueniam ad lumen gloriæ cœlestis, quo fruuntur illi, qui soli vere, proprièque viuentes dici possunt. Possunt hæc etiam de Christo exponi, qui per resurrectionem liberatus est à morte carnis, & ab omni periculo subiacendi vlli passioni, & viuit, & regnat à dextris Patris in lumine uiuentium. Amen.

## PSALMVS LVI.

## Titulus, &amp; Argumentum.

In finem, ne disperdas, Dauid in tituli inscriptionem, cum fugeret à facie Saul in speluncam.

**H**istoria, cuius occasione Psalmus iste cōscriptus fuit, habetur lib. 1. Reg. c. 24. tunc enim Dauid Saulem fugiens absconditus est cum aliquot ex suis in speluncam Engad-di, & cum Saul casu ad eam speluncam deuenisset, & solus in eam intrasset, vt purgaret ventrem, Dauid qui in parte interiore latebat, incitatus à suis, vt interficeret Saulem, noluit id facere, ex qua historia colligitur argumentum huius Psalmi simile esse argumento Psalmi superioris. In titulo nihil est noui, præter illa duo verba, ne disperdas, quæ quid significent, incertum est. Sanctus Hilarius id refert ad Christi resurrectionem per quam factum est, ne caro Christi in sepulchro corrumpere- tur: nam alia lectio habet, ne corrumpas.

S. Augustinus, & S. Hieronymus interpretantur de titulo crucis Christi, quem Pilatus noluit corrumpere ad petitionem Iudæorum, quasi id prædixisset Dauid hoc loco. Theodoretus, & Euthymius exponunt de Dauide, qui noluit occidere Saulem, cui impune posset. Itaque, volunt ad æternam rei memoriam scriptum, ne disperdas siue ne perdas, quia Dauid non perdidit Saulem. Sed quamuis hæc expositio in hunc Psalmum quadret tamen in Psalmum 57. & 58. & 74. Vbi est eadem sententia in titulo, non videtur quadrare. Alij volunt Dauidem pro se rogare Deum, vt non sinat eum occidi, & perdi, Alij denique arbitrantur, illis verbis significari instrumentum musicum, in quo Psalmi isti concinendi erant.

## EXPLICATIO PSAL. LVI.

**M**iserere mei Deus, miserere mei: quoniam in te cōfidit anima mea. Et in vmbra alarum tuarum sperabo, donec transeat iniquitas.

Dauid in spelunca precatur Deum pro liberatione à persecutione Saulis; & in hoc figura Christi est, qui latens in spelunca forma serui, cum esset Dominus omnium, orat pro liberatione corporis sui, quod est Ecclesia à persecutione Satanæ, & ministrorum eius. Miserere, inquit, mei Deus, id est, tu Deus misericors tolle miseriam, quam patior ob periculum vitæ, cui Saul insidiatur, Miserere mei, quoniam in te cōfidit anima mea. confidentia in Deo est optima ratio; quæ allegari potest ad impetrandam misericordiam, cum Deus promiserit auxilium confidentibus in se, Et in vmbra alarum tuarum sperabo: id est, non solum hæcenus in te confidit anima mea, sed etiam perseuera- bo in hac confidentia toto tempore; quo protectione indigebo, quod erit, donec transeat iniquitas, id est, donec finem habeat hæc nostra peregrinatio, & exilium à patria cœlesti: tandiu enim durabit iniquitas, quamdiu durabit peregrinatio, in qua mali bonis admixti sunt. Porro me-



metaphora illa de vmbra alarum Dei familiaris est scripturæ sanctæ: nam in Psal. 16. dicitur, *sub vmbra alarum tuarum protege me* in Psal. 62. *In velamento alarum tuarum sperabo*, & in Psal. 90. *sub pennis eius sperabis*: & Dominus Matth. 23. *Quoties volui congregare filios tuos, quemadmodum Gallina congregat pullos suos sub alas*, & noluit? sensus autem est, sperabo in protectione tua, quo modo sperant pulli in protectione Gallinæ; quæ sub alas suas colligit eos, & mirabili zelo à Miluo defendit. Significatur hac metaphora ingens amor Dei erga suos electos, quos fouet, & protegit, vt res sibi vnice charas.

*Clamabo ad Deum altissimum, Deum qui benefecit mihi.*

Ex hac fiducia, qua sub vmbra alarum Dei sperabit, prodibit clamor ad Deum altissimum, id est ad supremum Iudicem, qui super omnes alios Iudices in altissimo throno residet, & ratio clamandi erit experimentum proprium: iam enim expertus erat Dauid clamando ad Deum, se multum profecisse. *Clamabo*, inquit, *ad Deum, qui benefecit mihi*, id est, qui vltus me est de inimicis meis: vox enim Hebraica, *gomer*, hoc loco non significat benefacere absolute, sed vltisci, ac per hoc benefacere vltiscendo innocentium iniurias, vnde sanctus Hieronymus vertit ex Hebræo, *inuocabo Deum altissimū, Deum vltiorem meum*. Qualis autem fuerit hæc vltio, habetur lib. 1. Reg. cap. 23. Nam cum Saul cinxisset exercitū suo montem, ad quem Dauid confugerat, vt iam de vita sua pene desperaret: prouidentia diuina fecit, vt nuncius veniret ad Saulem, qui referret, Philistæos cum magnis copijs in terram Israhelitarum se infudisse, quo nuncio accepto coactus est Saul recedere à persequendo Dauide, cum magno suo opprobrio: & dolore, & hoc breuiter attingitur in sequenti versiculo.

*Misit de cælo, & liberavit me, dedit in opprobrium conculcantes me.*

*Misit Deus misericordiam suam, & ve-*

*ritatem suam: & eripuit animam meā de medio catulorum leonum dormiui conturbatus.*

*Filij hominum dentes eorum arma & sagitta, & lingua eorum gladius acutus.*

*Misit de cælo*, auxilium videlicet, & liberavit me, quando cinctus legionibus hostium iam iam capiendus, & occidendus eram. *Dedit in opprobrium conculcantes me*, id est, exposuit probis Saulem, & milites eius, qui me vt puluerem conculcabant, & contemnebant, quando re infecta coacti sunt recedere, & Philistæis occurrere vt supra diximus ex cap. 23. lib. 1. Reg. *Misit*, inquam, *de cælo misericordiam*, & *veritatem* quasi duas manus suas, *misericordiam*, qua liberaret me, & *veritatem*, id est, iustitiam, qua hostes meos pudore, & dolore afficeret. *Et eripuit animam meam*, hoc est, vitam meam *de medio catulorum leonum*, id est, Saulis, & militum eius, qui ferocia leones iuvenes, ac per hoc, fortissimos referebant. Sed etiam sic liberatus ab imminente morte, tamen *dormiui conturbatus*, quia timui detractiones, & calumnias inimicorum meorum, quorum dentes, & linguæ feriunt instar lancearum, & gladiatorum acutorum. In hebræo deest, verbum *eripuit*, & sic vertit Sanctus Hieronymus, *Anima mea in medio leonum dormiuit ferocientiam*. Sed in hebræo Codice non est, *dormiuit*; sed *dormiui*: in prima persona. Quare vel excidit verbum, *eripuit* vel subintelligi debet, & quia hebræi non habent casus, recte possumus vertere tam, *Anima mea*, quam *animam meam*: denique illud, *conturbatus*, quod S. Hieronymus vertit, *ferocientium*, videlicet leonum in hebræo proprie significat, *ardentem vel inflammatum* quod satis apte conuenit cum voce, *conturbatus*: qui enim conturbati sunt, æstuare, & ardere solent. Itaque lectio hebraica non difficulter cum nostra, græca & latina concordari potest, & hunc sensum facere, *Animam meam eripuit de medio leonulorum, dormiui æstuans, & conturbatus*: cur autem dormierit conturbatus quando

VI.

III.

I.

II.

גמר

IV.

V.



quando iam liberatus erat, exponit cum ad-  
 dij. *Filij hominum, dentes eorum arma, & sa-  
 gitta, & lingua eorum gladius acutus*, id est,  
*dormini conturbatus*, quoniam etiam si Sau-  
 le recedente liberatus eram à morfu leonū,  
 qui de propinquo mordent: tamen sciebam  
 non deesse detractores, & calumniatores,  
 qui etiam longe feriunt, instar iaculorum,  
 & sagittarum: multi enim erant, qui calum-  
 nijs suis incitabant Saulem aduersus Dau-  
 dem, ut ipse testatur libr. 1. Reg. capit. 24.  
*Quare, inquit, audis verba hominum loquen-  
 tium, quare dauid malū aduersum te?* Porro  
 phrasis illa, *filij hominum dentes eorum  
 arma, & sagittæ*, est Hebræorum propria:  
 sensus autem est, *filij hominum tales sunt,*  
*ut dentes eorum sint veluti lanceæ* ( hoc e-  
 nim sonat vox Hebraica, pro qua Septua-  
 ginta reddiderunt *arma*) & *sagittæ*; & *lin-  
 gua eorum* veluti *gladius acutus* quibus ver-  
 bis significatur detractio, quæ per instru-  
 menta dentium, & linguæ formatur, & non  
 minus nocet, & interimit, quam lancea, sa-  
 gitta, & gladius, cum incitet ad iracundiam,  
 & sit causa malorum plurimorum.

VII.

*Exaltare super cælos Deus, & in om-  
 nem terram gloria tua.*

Exposito timore suo precatur Deum, ut  
 exercendo iustitiam in impios hostes suos,  
 manifestet gloriam suam *Exaltare*, inquit,  
*super cælos Deus*. id est, sede in altissimo thro-  
 no, qui est super omnes cælos, ut iudices:  
 vel, exalteretur nomen tuum super cælos co-  
 ram Angelis, & in omnem terram coram ho-  
 minibus dilatetur *gloria tua*; ita ut omnes  
 intelligant, & laudent iustitiam tuam.

VIII.

*Laqueum parauerunt pedibus meis, &  
 incurruerunt animam meam.*

IX.

*Foderunt ante faciem meam foueam,  
 & inciderunt in eam.*

Reddit causam, cur iudicium Dei aduer-  
 sus hostes suos imploret. Nam præter alia,  
 inquit, *laqueum parauerunt pedibus meis*, id  
 est, insidias mihi tetenderunt, ut me quasi  
 fœram de improviso caperent. *Et incurru-*

*uerunt animam meam*, id est, atque his insi-  
 dijs me affligerunt, ut præ continua sollici-  
 tudine incurruis, ac mœstus incederem. De-  
 inde id ipsum repetit alia metaphora, *Fode-  
 runt, inquit, foueam ante faciem meam*, id est,  
 foderunt foueam in itinere, quo iturus erā,  
 ita ut fouea ante me esset, quamuis eam à  
 me conspici non existimarent: illud enim,  
*ante faciem meam*, non significat, me aspici-  
 ente; & vidente, sed in loco, qui ante me e-  
 rat, & per quem transiturus eram. *Et incide-  
 runt in eam*, id est, parauerunt mihi pericu-  
 lum vitæ, & ipsi in illud inciderunt: nam ut  
 dictum est supra ex cap. 23. li. 1. Reg. Saul in-  
 sidiabatur vitæ Davidis, & illo ipso tempo-  
 re incidit in spelunca in manus Davidis, à  
 quo poterat occidi, si David voluisset.

*Paratum cor meum Deus, paratum  
 cor meum, cantabo, & psalmum dicam.*

Iam in fine Psalms excitat Propheta spi-  
 ritum suum in Deum, ac dicit, *Paratum cor  
 meum, paratum cor meum*, id est, paratus sum  
 viuere, paratus sum mori; paratus sum concul-  
 cari, paratus regnare, & quicquid acciderit,  
 de manu tua accipiam: *cantabo & psalmum  
 dicam*, laudabo misericordiam, laudabo iu-  
 stitiam; & voce, & instrumento musico.

*Exurge gloria mea, exurge psalteriū,  
 & cithara, exurgam diluculo.*

Quia dixerat *cantabo, & psalmum dicam*:  
 nunc ut id recte fiat, non inuocat Musas  
 ut prophani poetæ faciunt, sed inuocat spi-  
 ritum prophetiæ, ut Theodoretus exponit.  
*Exurge, inquit, gloria mea*, id est, domum spi-  
 ritus, quo afflante canere soleo, mysteria  
 diuina; *exurge psalterium, & cithara*, id est,  
 exurge spiritus meus, & lingua mea: spi-  
 ritus enim per psalterium intelligitur, quod  
 ex parte superiore sonum edit, & lingua  
 per citharam, quæ ex parte inferiore son-  
 nat. *Exurgam diluculo*, id est, summo mane;  
 quod est aptissimum tempus contem-  
 plandi diuina, & canendi Deo, ego, spiri-  
 tus Dei exurgam, & excitabo spiritum tu-  
 um, & linguam tuam ad canendum. Po-  
 test

X.

XII.

XI.

XIII.



test etiam cum S. Hieronymo & S. Augustino hic locus intelligi de resurrectione Christi: Dauid enim, qui satis intelligebat, se in passionibus suis Christi patientis & morientis figuram gerere, Spiritu sancto afflatus ad Christum loquitur, ac dicit: *Exurge gloria mea*: nullam enim maiorem gloriam Dauid habere potuit, quam ut Pater Christi diceretur. *Exurge*, inquit, *gloria mea*, Christe redemptor meus & Dominus meus: *exurge psalterium & cithara*, id est, exurge caro Christi, quæ psalterium fuisti, dum diuina miracula operando ex parte superiore sonuisti; & cithara, dum humana patiendo ex parte inferiore sonitum dedisti. Deinde inducit ipsum respondentem: *exurgam diluculo*: satis enim constat, Christum à mortuis diluculo surrexisse.

*Confiteor tibi in populis Domine, & psalmum dicam tibi in gentibus.*

Surgens diluculo Dauid ad canendum Deo, dicit: *Confitebor tibi*, id est, laudabo te in populis Iudæorum, & *psalmum dicam tibi in gentibus*. Nouerat enim sanctus Propheta Psalmos suos toto terrarum orbe cantandos à fidelibus, tum ex Iudæis, tum ex gentibus in Ecclesia congregatis. Potest etiam sic exponi, ut Christus, qui dicit: *Exurgam diluculo*, addat etiam, se per corpus suum, quod est Ecclesia, Deum semper & ubique laudaturum.

*Quoniam magnificata est usque ad cælos misericordia tua, & usque ad nubes veritas tua.*

Hæc est materia laudis apud omnes gentes, quod *misericordia Dei* magna effecta sit, & creuerit *usque ad cælos*, non in se, quomodo semper est infinita, sed in operibus suis: & pari ratione *veritas Dei*, siue pro fidelitate, siue pro iustitia accipiat; repleuerit omnia *usque ad nubes*, id est, usque ad cælos: accipit enim Propheta pro eodem *usque ad cælos*, & *usque ad nubes*, quæ ideo dicuntur in Scripturis nubes cæli, Matth. 26. *Videbitis filium hominis sedentem à dextris virtutis Dei, & venientem in nubibus cæli.*

*Exaltare super cælos Deus, & super omnem terram gloria tua.*

Quomodo misericordia & veritas Domini pertingunt usque ad cælos; sic etiam par est, ut gloria & laus eius, & cælum & terram repleat.

## P S A L M V S LVII.

*Titulus & Argumentum.*

In finem, ne disperdas Dauid in tituli inscriptionem.

**T**itulus nihil habet noui. *Argumentum* est acris reprehensio hominum iniquorum: quamuis enim occasio scribendi nata sit ex iniquitate Saulis & ministrorum eius persequentium Dauidem: tamen reprehensio est generalis, & ut monuit S. Augustinus, concinnatur Spiritus sanctus per os Prophetæ ad uniuersum genus humanum.

## EXPLICATIO PSALMI LVII.

**S**i vere utique iustitiam loquimini, recta iudicate filij hominum.

Non defunt ex recentioribus, qui velint totum versiculum legi per interrogationem, hoc modo: *Num vere iustitiam loquimini? num recta iudicatis filij hominum?* Sed veteres omnes Hilarius, Hieronymus, Augustinus, Theodoretus, Euthymius, & alij, legunt ut nos in textu nostro habemus. Sanctus autem Hieronymus non solum in expositione Psalterij, sed etiam in versione ex Hebræo vertit, *Si vere utique iustitiam loquimini, recta iudicate filij hominum*. Quamuis enim in prima parte versiculi adsit in Hebræo littera *Th*, quæ est signum interrogationis; tamen in secunda non habetur: proinde ad verbum sic vertendum esset: *Num vere iustitiam loquimini? recta iudicabitis filij hominum*: quæ sententia eadem est cum ista, *si vere iustitiam loquimini, recta iudicate filij hominum*. Igitur sententia Prophetæ hæc est: Cum omnes homines interrogati, an sit bonum furari,

Rr

moe-



mœchari, decipere, & similia; recte respondeant, non esse bonum; quia lex scripta in corde docet, ista non esse bona; cum nemo velit talia sibi fieri: conuincuntur omnes iniqui non vere loqui iustitiam; sed fiste ac simulate, quia in corde suo iudicant, sibi esse bonum furari, mœchari, decipere, & similia: non enim facerent, nisi bonum sibi esse crederent. Nec solum conuincuntur esse mendaces, dum falso loquuntur iustitiam, & dicunt, non est bonum furari, mœchari, decipere, & similia: sed etiam conuincuntur mirabili cecitate laborare, cum negare non possent pati fures: & tamen iudicent, sibi bonum esse furari, & facere alteri, quod sibi fieri nolunt: nam si bonum est furtum, quare nolunt sibi fieri? si non est bonum, quare volunt alteri facere? Aduersus istam voluntariam & inexcusabilem cecitatem clamat Spiritus sanctus: *Si vere utique iustitiam loquimini*, dum dicitis, malum est furari, mœchari, & similia; *recta iudicate filij hominum*, id est, iudicate in corde vestro, non esse faciendam, ac per hoc nolite facere, quæ mala esse confessi estis.

III. *Etenim in corde iniquitates operamini: in terra iniustitias manus vestre concinnant.*

Ostendit, non sine causa se admonuisse, ut recta iudicent, si iustitiam vere loquuntur; nam apparet contraria illos facere, ac per hoc non vere iustitiam loqui, sed fiste, ac mendaciter. *Etenim*, inquit, *in corde iniquitates operamini*, id est, in corde iudicatis ac decernitis mala: neque ibi sistitis, sed *in terra manus vestre*, cordis mandata exequentes, *concinnant iniquitates*. Illud, *in terra*, significat peccata operum non posse fieri, nisi dum hic in terris viuimus: nam in inferno erunt quidem mala desideria, sed facultas exequendi non erit. Illud, *concinnant*, in Hebræo est, *appendunt*, in Græco, *connechtunt*. Sed omnia idem significant, nimirum peccata peccatis apte coniungi, & appendi unum alteri, sed admixta sæpe specie aliqua virtutis, ut turpitudine iniquitatis aliquo mo-

do tegatur: exemplo esse potest Davidis adulterium: nam adulterio perpetrato, concinnauit David dolum, quo adulterium tegeretur, aduocato videlicet Vria marito, atque ad uxorem misso, ut ex eo concepissem videretur: & quia hoc non successit, adiunxit adulterio homicidium, atque hoc etiam dolo alio concinnato, ut in prælio periissem dici posset. Vide alia exempla apud S. Augustinum.

*Alienati sunt peccatores à vulua, errauerunt ab vtero, loquuti sunt falsa.*

Hæc est alia peccatorum miseria, quod non post multos annos vitæ peccate incipiunt, sed ab ipsa natiuitate, vix in lucem editi à recto tramite desectunt. *Alienati sunt peccatores à vulua*, id est, ab ipso exitu de vulua alienati sunt à recto tramite, à via veritatis, à beata vita, errauerunt ab vtero, hæc est repetitio & declaratio eius, quod dictum erat, *alienati sunt à vulua. Loquuti sunt falsa*: hoc enim est primum ordinarie peccatum actuale, quod pueri committunt, mendacium videlicet; inde se primum prodit naturæ corruptio.

*Furor illis secundum similitudinem serpentis, sicut aspidis surda & obturantis aures suas.*

*Que non exaudiet vocem incantantium: & venefici incantantis sapienter.*

Docuit, morbum peccati ab ipsa infantia incipere: nunc addit, non solum hunc esse morbum diuturnum, sed etiam grauissimum, quia nonnunquam peccatores tanto furore, & tanta obstinatione grassantur in perniciem aliorum hominum, ut similes efficiantur serpentibus illis, qui surdi dicuntur, quia incantationibus nullis cedunt. *Furor illis*, id est, grauissimis peccatoribus, qualis tunc erat Saul, est *secundum similitudinem serpentium*, qui nulla arte mansuefieri possunt: imo *secundum similitudinem aspidis surda*, quæ obturat cauda aures suas, ut non exaudiat vocem incantantium, nec venefici incantantis sapienter, id est, valde periti in arte sua. Vtrum sit verum, an fabulosum, quod,



quod dicitur de aspidē claudētis sibi aures, ne audiat maleficū incantantē, non multum refert ad huius Psalmi explicationem. Dauid enim similitudinē ducit ab eo quod vulgo fertur. Monet etiam S. Augustinus, non ideo approbari incantationes veneficorum, quia Dauid inde similitudinē accepit; nam & Dominus in Euangelio similitudines duxit ad iudicē iniustō, qui *nec Deum timet, nec hominē reueretur*: & à villico iniquitatis, qui *donando bona Domini sui, amicos multos sibi conciliavit*: & ab illo, qui *inuento thesauro in agro alieno, continuo emit agrum illum, ut thesauro solus potiretur*: nec tamen approbavit iniustitiam iudicis, neque fraudes seruorum, nec astutiam cupidorum.

VI. *Deus conteret dentes eorum in ore ipsorum, molas leonum confringet Dominus.*

Descripta grauitate peccati aliquorum hominum, inter quos Saulem Dauid numerabat in primis: describit nunc pœnas eorum peccatorum aptissimis similitudinibus. Prima similitudo continetur in hoc sexto versiculo, & summa eius est, à Deo auferri potentiam hominum peccatorum, quantumvis magni, robusti, & feroces esse videantur: nihil enim robustius & terribilius leone, & in ipso leone nihil durius, acutius, horribilius dentibus molaribus. *Deus igitur dentes leonum confringet*, id est, robur & potentiam peccatorum quamuis potentissimorum auferet. *Deus*, inquit, *conteret dentes eorum*, peccatorum videlicet, qui instar leonum discerpunt & dilaniant innocentes. *In ore ipsorum*, id est, dum adhuc sunt in ore ipsorum viuentium & rugientium: nam contere dentes leonum iam euulsos, facile est. *Declarat*, vel repetit more suo Propheta, quod dixit, dum addit: *Molas leonum confringet Dominus*, id est, non solum dentes minores, sed etiam molares, qui sunt omnium maximi & durissimi, confringet Dominus.

VII. *Ad nihilum deuenient, tanquam aqua*

*decurrens: intendit arcum suum, donec infirmetur.*

Hæc est altera similitudo, quæ docet potentiam impiorum fore breuissimam, & post modicum ita redigendam esse ad nihilum, vt tota progenie extincta, ne vestigium quidem eius remaneat. Similitudo autem ducitur, vel à torrentibus secundum Augustinum, qui ita interdum intumescunt, & omnia secum rapiunt, vt flumina maxima esse videantur, & tamen post vnā vel alteram horam omnino siccantur & euanescent, vt ne gutta quidem aquæ remaneat in alueis torrentium; vel ducitur similitudo ab ingenti pluuia hyemali, vt exponit S. Hieronymus, quæ per loca decliua ita statim decurrit, vt post modicum cessante pluuia, nusquam aqua ipsa compareat. Exempla innumerabilia adduci possunt tum potentissimorum tyrannorum, vt Saulis, Achab, & Hieroboam, vel Neronis, Caij, Domitiani, & similibus; tum hæresiarcharum magni nominis, vt Arii, Nestorij, Dioscori, & cæterorum. *Ad nihilum*, inquit, *deueniant tanquam aqua decurrens*, torrentis vel pluuie, quæ velocissime transit, & vestigium non relinquit. Ac ne putaremus casu fieri, vel ex naturalibus causis, vt potentissima Regna tyrannorum, aut famosissimæ hereses tam cito finem accipiant, subiungit Propheta: *Intendit arcum suum, donec infirmetur*, id est, impiorum potentia tam celerem finem habebit, quia Deus omnipotens intendit arcum suum aduersus eos, neque arcum remittet, donec illi infirmetur ac debilitentur, & viribus amissis deficiant & pereant.

*Sicut cera, quæ fluit, auferentur: supercecidit ignis, & non viderunt solem.*

Tertia est hæc similitudo, quæ demonstrat, non minus facile esse Deo, potentiam tyrannorum atque aliorum impiorum ad nihilum deducere, quam facile sit soli, aut igni ceram liquefacere: cera enim quantumvis indurata, calori solis, vel ignis nullo modo resistit, sed continuo liquefit, diffluit & perit. *Sicut cera*, inquit, *quæ fluit,*

VIII.



tangente illam sole, vel igne, ita auferentur de medio homines peccatores. Nam *supercecidit ignis iræ Dei in illos*, & ipsi tanquam cera continuo liquefacti perierunt, & non viderunt amplius solem, quem soli viuentes videre possunt. In Codice Hebræo hic versiculus longe aliter habetur, sic enim vertit S. Hieronymus: *Quasi vermis tabefactus pertransciant, quasi abortiuum mulieris, quod non vidit solem.* Sed quod attinet ad vocabulum, *sciabbellul*, non possunt reprehendi Septuaginta, quod verterint, *ceram*, quia vox illa non habetur, nisi hoc loco, & aliqui volunt significare *vermiculum*, aliqui *limacem*, alij alia. Inter tot opiniones de obscurissima voce, cur non magis credemus LXX. Interpretibus, antiquioribus, doctioribus, & pluribus? Quod vero pertinet ad illam vocem, *themes*, nulla est difficultas: nam proprie significat *liquefactionem*, & Septuaginta recte verterunt, *ceram, quæ fluit*, hoc est, liquefcit: & S. Hieronymus, qui vertit, *tabefactum*, sensum explessit, non verbum. Denique illa verba, *nephel esseth*, S. Hieronymus recte vertit, *abortiuum mulieris*, sed Septuaginta recte etiam verterunt, *supercecidit ignis*, quia remotis punctis Rabinorum illud, *nephel*, potest legi, *naphal*, quod significat, *cecidit*, & illud, *esseth*, legerunt sine vltima litera, & verterunt, *ignis*, quia, *es*, ignem significat.

IX. Priusquam intelligerent spine vestre rhamnum, sicut viuentes, sic in ira absorbet eos.

Hæc est vltima similitudo, qua docet Propheta, impios succidendos & perdendos à Deo, antequam implere possint mala, quæ aduersus iustos meditati sunt, vt not habeant gaudium de exterminio iustorum, quod maxime cupiebant: quomodo Saul antea male periit, quam de morte Dauid lætari potuerit, & Diocletianus & Maximianus, alijq; persecutores Ecclesiæ prius perierunt, quam vltimum exitium Christianorum viderint, ad quod totis viribus inhiabant. Similitudo autem desumpta est à spi-

nis, quæ ab agricolis succiduntur, dum teneræ sunt, antequam ad robur rhamni, quod est lignum magnis & durissimis spinis instructum, crescendo perueniant. Priusquam intelligerent *spina vestra rhamnum*, S. Hieronymus ex Hebræo vertit, *Antequam spina vestra crescant in rhamnum*. S. Hilarius & S. Augustinus legunt, *Antequam producat spinas vestras rhamnus*. Notra lectio concordat ad verbum cum Hebraica & cum Græca: Porro lectio S. Hilarii & S. Hieronymi in sensu conueniunt: nam spinas crescere in rhamnum, & spinas teneras, quæ ferire non possunt, paulatim crescere, & fieri rhamnum, qui duris aculeis suis pungat & feriat, sic etiam rhamnum producere spinas, est rhamnum tenerum, & qui nocere non potest, crescere & induere aculeos, vt maxime nocere valeat. Oportet igitur ad eundem sensum reducere verba obscura nostræ lectionis: id quod fiet, si per vocem, *intelligere*, quæ est in Hebraico & Græco Codice, interpretemur crescere ad perfectum robur: quod quidem hominibus conuenit, qui tunc ad perfectam ætatem perueniunt, quando sapere & intelligere incipiunt: sed per metaphoram tribuitur etiam aliis rebus. Itaque sic exponi potest versiculus: *Priusquam intelligerent spina vestra rhamnum*, id est, priusquam ad perfectionem suam spinæ teneræ crescendo peruenirent, vt ad instar rhamni pungere, ferire & lacerare possent: *sicut viuentes, sic in ira absorbet eos*, id est, Deus absorbebit (*absorbet enim hoc loco positum est pro absorbebit*, sicut in Euangelio Ioan. 15. *ardet pro ardebit*) Deus, inquam, absorbebit eos sic in ira sua, sicut viuentes absorbere solet terra, aut mare: mutatio autem illa personæ familiaris est Prophetis, vt cum loqueretur ad ipsos impios in secunda persona dicens, *spina vestra*, mox transeat ad tertiam dicens, *absorbet eos*, pro *absorbebit vos*.

Latabitur iustus cum viderit vindictam, manus suas lauabit in sanguine peccatoris.

Cum



Cum hæc facta fuerint, quæ supra dicta sunt de perditione impiorum: tunc *latabitur iustus, cum viderit vindictam*, non autem amore vindictæ lætabitur, sed amore iustitiæ, & quia videbit se Dei gratia custoditum non esse lapsum in ea peccata, unde tam seuerè puniri mereretur: nec solum lætabitur, sed etiam *manus suas lauabit in sanguine peccatorum*, id est, bona opera ipsius magis elucebunt ex comparatione malorum operum peccatorum: nam opposita iuxta se posita magis splendent per sanguinem enim in scripturis, peccata intelligi solet. Vel dici potest cum S. Augustino, iustum hic in terris lauare manus suas, id est, mundare opera sua, & bene operando fieri diligentior, dum cernit sanguinem, id est, mortem, ac supplicia impiorum. In Hebræo habetur, *pedes suos lauabit*. Sed omnes alij Codices Græci, & Latini, & omnes tractatores legunt, *manus*.

XI.

Et dicet homo, si *vtiq; est fructus iusto: itaque est Deus iudicans eos in terra*.

Cum impij punientur, & iustus lætabitur, tunc *dicet homo*, id est, tunc homines, qui ista videbunt, dicent, si iustitia fructum aliquem adfert, vt vere adfert, ille maximus est fructus, quod Deus summus omnium Iudex non sinit peccatores impunitos, neq; iustos irremuneratos, sed retractat omnia iniusta iudicia, & iudicat eos, id est, tam malos, quam bonos, tribuens iustis debita præmia pro omnibus bonis operibus, quæ fecerunt, & pro omnibus malis, quæ pertulerunt: & impiis debita supplicia pro omnibus malis, quæ fecerunt, & pro omnibus deliciis, in quibus lasciuierunt. Et sic impletur illud; Apoc. 18. *Quantum se glorificauit, & in delicijs fuit, tantum date illi tormentum & luctum*. Iudicium autem hoc dicitur fieri in terra, quia fit pro his actionibus, quæ factæ sunt in terra, & quia sæpe inchoatur in hac vita, licet perficiendum sit in altera, deniq; quia vltimum etiam iudicium fiet de hominibus, qui adhuc erunt in terra, & inde transitori erunt, vel ad cælum, vel ad gehennam. Vnde dicitur Deus iudicaturus orbem terrarum inæquitate. In Hebræo Codice non habetur condi-

tionalis, si; cum dicitur, *si est fructus iusto*: sed, *vere est fructus iusto*, *vere est Deus iudicans eos in terra*. Illud igitur, si, quod ex Græco transit in Codices Latinos; non est conditio, vel particula dubitationem significans: sed explicanda est, vt nos paulo ante explicuimus, *si est aliquis fructus iusto*, vt sine illo dubio est, ille est, quod Deus iudicabit accuratissime omnia opera bona, & mala, & non sinit iustos in perpetuum opprimi ab impiis, sed impiis condemnatis iustos coronabit. Quæ certe magna est consolatio iustorum afflictorum qui ex fide viuunt, & expectant beatam spem, & aduentum magni Dei, & Saluatoris nostri Iesu Christi, cui sit laus, & gloria in secula.

## PSALMVS LVIII.

Titulus, & Argumentum.

Ne disperdas, Dauid in tituli inscriptionem, quando misit Saul, & custodivit domum eius, vt eum interficeret.

**E**X hoc titulo colligitur occasio scribendi Psalmum præsentem. Scribitur enim lib. I. Reg. capit. 9. Missos fuisse satellites à Saule qui custodirent domum Dauid, ne forte noctu effugeret, vt eum mane facto interficerent: sed Dauidem coniugis suæ consilio, & auxilio per fenestram noctu demissum aufugisse. Scribit igitur in hoc Psalmo Dauid orationem quam imminente tam ingenti periculo fudit ad Deum: & simul prædicat, vt solet, perditionem inimicorum suorum S. Augustinus, & Theodoretus volunt, Dauidem figuram Christi fuisse: Christus enim in sepulchro, quasi in domo, custodiebatur à satellitibus vt impediretur eius resurrectio, & proinde etiam prædicatio Apostolorum, & edificatio Ecclesie qua corpus est Christi. Sed Christus resurrexit non aperto sepulchro, relictis syndonibus, & Dauid euasit relictis in lecto pellibus caprimis.

Rr 3

Po



Potest etiam totus Psalmus commode explicari generatim de impijs persequentibus iustos, & impiorum exitio, ac iustorum liberatione. Solet enim David occasione afflictionum suarum concionari in uniuersum de afflictionibus, & consolatione iustorum, & malitia, ac supplicijs iniquorum. Quæ etiam causa est cur Ecclesia frequentet assidue Psalmodyam, quod non tam accurate faceret, si de solo Davide pleriq; Psalmi intelligendi essent.

## EXPLICAT. PSAL. LVIII.

I. **E**ripe me de inimicis meis Deus meus, & ab insurgentibus in me libera me.

Vox est Davidis in propria domo, quasi in carcere detenti, obidentibus eum satellitibus Saulis: vox item est Christi in sepulchro iacentis, custodibus adhibitis: vox denique est cuiuscunque iusti in mortis periculo constituti.

II. **E**ripe me de operantibus iniquitatem, & de viris sanguinum salua me.

Hæc est explicatio versiculi superioris: quos enim dixit ibi inimicos suos, hic dicit operantes iniquitatem; iusti enim non alios habent inimicos, nisi iniquos; neque alia est causa inimicitiae ipsorum, nisi quia illi iniqui sunt, isti iusti, & quos ibi dixit, insurgentes in se, hic dicit, viros sanguinum, id est, viros homicidas, & qui insurgunt in proximum, ut eius sanguinem fundant.

III. **Q**uia ecce ceperunt animam meam, irruerunt in me fortes.

Reddit rationem, cur dixerit, salua me, vel eripe me: quia videlicet in maximo discrimine vitæ amittendæ versabatur. Erat enim quasi fera intra rete conclusa, & comprehensa, & iam iam interficienda: quod explicat clarius vox Græca ἐν ῥήματι, id est, venati sunt animam meam, quod etiam satis congruit cum voce Hebraica, quam sanctus Hieronymus vertit, insidiati sunt animæ meæ. Ergo illud, quod in nostra editione legimus, ceperunt animam meam, non significat acceperunt vitam meam, neq; occide-

runt; sed comprehenderunt me, siue captiuum me ceperunt. Et irruerunt in me fortes, id est, viri potentes, qualis erat Rex Saul, Aber Dux militiæ, & similes, in me impetum fecerunt: quod dicit, ut ostendat persecutionem suam non esse paucorum satellitum à quibus tunc obsidebatur, sed Regis potentissimi, qui alios, & alios satellites, ac milites ad eum occidendum mittere poterat.

Neque iniquitas mea, neque peccatum meum Domine: sine iniquitate cucurri, & direxi.

Si ad personam Davidis hæc referantur, non significant, nullum fuisse in Davide peccatum absolute, sed non fuisse peccatum aduersus Regem, ut æmuli eius calumniabantur. At si referantur ad Christum, absolute verissima sunt: Christus enim peccatum non fecit, nec inuentus est dolus in ore eius. At igitur, Neq; iniquitas mea, neq; peccatum meum Domine, id est, irruerunt in me fortes, & tamen nulla est iniquitas, nulla iniustitia, neque peccatum aliud aduersus eos à me patratum, ut causam persequendi me habeant. Ego enim sine iniquitate cucurri, id est, cursum vitæ hucusque peregi sine vlla ipsorum offensione. Et direxi, id est, rectum cursum institui, non declinaui ad dexteram ad aucupandos fauores potentiorum: neque ad sinistram, ut opprimerem pauperes, & humiles. In Hebræo habetur in tertia persona: cucurrerunt, & direxerunt, id est, inimici mei cucurrerunt aduersum me, & direxerunt acies suas, ut me occiderent. Sed LXX. Interpretes aliter legerunt verba Hebraica, & facilis fuit mutatio, cum prima persona, & tertia non differant, nisi in vltima terminatione. Sed res non est magni momenti,

Exurge in occursum meum, & vide: & tu Domine Deus virtutum, Deus Israel.

Intende ad visitandas omnes gentes; non miserearis omnibus qui operantur iniquitatem.

Dixe-

IV.

V.



Dixerat, *cucurri, & direxi*: qui autem dirigit cursum suum, sine dubio ad Deum currit, ad quem omnia bona, vt ad finem vltimum diriguntur. At igitur, Ego bene operando ad te cursum meum direxi: tu igitur vicissim me protegendo, *mihi occurre atque ad me cursum auxilij tui dirige*; & vide de proximo periculum meum, considera afflictionem meam: neque potes excusare impotentiam, vel ignorantiam; nam Dominus & Deus virtutum es; atque vt Dominus, omnia potes, vt Deus, omnia vides, vt Deus virtutum, id est, exercituum, non solum per te, sed etiam per Angelos, & quaslibet alias creaturas me iuuare potes; quia tibi omnia militant: denique *tu es Deus Israel*, proinde Israelitas, vt proprius eorum Deus ex fœdere cum patribus nostris inito, protegere debes. *Intende ad visitandas omnes gentes*, id est, adueniat aliquando dies vniuersalis Iudicij tui, & tunc non miserearis omnium operantium iniquitatem, id est, nullius operantis iniquitatem miserearis; sed omnes pro meritis punias. Hæc videntur accipienda prophetice potius, quam per modum imprecantis, vt sensus sit, Veniet aliquando magna illa visitatio omnium gentium, in qua reddent omnes Deo summo Iudici rationem factorum suorum; & tunc Deus nullius impij miserebitur, sed omnes malos male perdet. Atque ex hac explicatione cessat questio, quam S. Augustinus mouet, quomodo verum sit, quod hic dicitur, *non miserearis omnibus qui operantur iniquitatem*, cum constet, Deum miserrum esse ipsius Dauidis operantis iniquitatem adulterij, & homicidij; & S. Petri ipsum Christum negantis; & S. Pauli Ecclesiani persecutentis. Cessat, inquam, ista questio, quoniam Deus misereatur operantium iniquitatem, non vt Iudex, sed vt Pater misericordiarum, dum operantes iniquitatem misericorditer conuertit ad poenitentiam. Dauid autem hoc loco loquitur de Deo, vt Iudex est, qui red-det unicuique secundum opera sua, Matt. 16. ac præsertim in vltimo Iudicio nullius impij, vel iniqui miserebitur.

*Conuertentur ad vesperam, & famem patienter vt canes: & circuibunt ciuitatem.*

Pergit explicare miseram conditionem iniquorum in nouissimo die. *Ipsi enim conuertentur ad vesperam*, id est, finito die, in quo fructuose conuerti licebat, nimisque sero sapere incipient, & poenitentiam agere nihil eis profuturam de quibus dicitur Sapient. 5. *Poenitentiam agentes, & præ angustia spiritus gementes.* Et *famem patienter vt canes*, famem vtrique iustitiæ, quam esurire nescierunt quando tempus erat: vel famem qualiscunque consolationis, & quietis, & circuibunt, vt canes famelici, ciuitatem Dei, id est, electorum cætum: respicient enim ad omnes, si quo modo apud aliquem misericordiam inuenire possint; sed non inuenient: nemo enim Sanctorum in illa die miserebitur operantium iniquitatem. Erit autem hæc digna retributio, quoniam in hac vita viri iniqui conuersi sunt ad vesperam, id est, ad tenebras noctis, non ad lucem diei: & famem passi sunt, vt canes id est, famelici fuerunt carnalium delectationum, quæ si comparentur ad spiritalia, cibi sunt corrupti, ac putridi, & canum propriis, & ideo circumierunt ciuitatem: nam extra ciuitates in fossis murorum proijci solent cadauera equorum, aliorumque animantium immundorum, quæ non ab hominibus, sed à canibus deuorantur. Hunc locum alij exponunt de reuersione satellitum ad vesperam, vt noctu Dauidem in domo sua raperent, & instar canum vitam eius deuorarent. Alij de conuersione Iudæorum circa finem Mundi, iuxta illud Apostoli Rom. 11. *Cecitas ex parte cecidit in Israel, donec plenitudo gentium intraret, & sic omnis Israel saluus fiet.* Alij de conuersione eorundem Iudæorum ad vesperam, id est, post mortem Christi, qui famem passi sunt, sicut canes, id est, sicut gentiles, & simul saturati sunt ad prædicationem Apostolorum, & tum ipsi quoque circumierunt ciuitatem docendo, & prædicando, quæ est expositio S. Augustini.

Alij



Alij de reuersione Iudæorum, in Palestinam post euerfionem ciuitatis suæ Hierusalem, qui famem patiebantur pristinæ felicitatis, & ceremoniarum legalium, & circuibant euerfam ciuitatem, si quo modo eam reedificare possent. Nos lectori iudicium relinquimus.

VIII. *Ecce loquentur in ore suo, & gladius in labijs eorum: quoniam quis audiuit?*

Reuertitur ad malitiam iniquorum: vicissim enim loquitur Propheta nunc de culpa, nunc de pœna impiorum. *Ecce*, inquit, qui me quaerunt ad necem, *loquentur in ore suo*, id est, submissa voce inter se loquentur, vt vix ex ore sonus egrediatur. *Et gladius in labijs eorum*, id est, & verba ipsorum quasi gladius erunt, quoniam de nece inter se consultabunt. Secure autem inter se loquentur, *quoniam dicent, quis audiuit?* id est, nemo audiuit, secretus erit sermo.

IX. *Et tu Domine deridebis eos, ad nihilum deduces omnes gentes.*

Illi putant se non audiri, quando inter se secreto consultant, & putant se magna facturos: *sed tu Domine*, cui nihil est occultum, *deridebis eos*, tamquam vanos, qui nosti eorum consilia, & impedire conatus ipsorum nullo negotio potes; nec solum inimicos meos deridebis, sed etiam si omnes gentes cum illis coniugerentur, eas quoque contemneres, & nihili faceres. Vbi illud, *Ad nihilum deduces* in Hebræo est *subsannabis*, vt sit fere idem cum deridebis. In Græco est, *pro nihilo duces*, quod in idem recidit. Itaque vt nostra latina editio cum textibus originalibus conueniat, sic explicandum est illud, *Ad nihilum deduces*, id est, pro nihilo habebis, siue ad nihilum deduces in mente tua, quia tamquam nihilum existimabis. Clarius id habetur in Psal. 14. vbi dicitur, *Ad nihilum deductus est in conspectu eius malignus* vbi illud, *in conspectu eius*, demonstrat, deduci ad nihilum, non esse extingui penitus, ac deleri, sed pro nihilo reputari. Quomodo dicitur Isai. 40. *Omnes gentes quasi*

*non sint, sic sunt coram eo, & quasi nihilum & inane reputata sunt ei.*

*Fortitudinem meam ad te custodiam, quia Deus susceptor meus es, Deus meus, misericordia eius praueniet me.*

X.

Quia meminit omnipotentia Dei, coram quo omnes gentes pro nihilo reputantur; humiliat se sub potētī manu Dei, vt gratiam mereatur. *Fortitudinem*, inquit, *meam ad te custodiam*, id est, ego robur meum non ex me habeo, sed à te accepi, ideo non in meis viribus est illud conseruare, sed *ad te*, id est, apud te custodiam: tu qui dedisti, conseruabis: *quia susceptor meus es Deus meus*, id est, non sine causa confido in protectione tua, quia tu Deus suscepisti me protegendum ab infantia mea, quia tu es proprie Deus meus, quem solum colo. *Misericordia eius praueniet me*, id est, non frustra hæc loquor, quia misericordia Dei præuenit me olim, & (vt confido) semper præueniet, vt non finat me opprimi ab hostib⁹ meis. Hæc iustissime Dauid dicit, qui in pueritia præuentus fuit gratia Dei, & robur diuinitus accepit, vt vrsū, & leonem, ac deinde Goliath gigantem armatum ipse inermis occideret & in Regem item adhuc puer à Samuele inunctus fuit. Quod si hæc referantur ad Christum, multo magis verificantur, cum ipse non à pueritia, aut infantia, sed à conceptione vnctus fuerit Spiritu sancto, & virtute, vt loquitur S. Petrus Apostolus Act. 10. In Hebræo legitur, *Dei misericordia eius praueniet me*. Sed LXX. Interpretes non legerunt, *eloha*, sed, *eloha* Deus meus. Itaq; Rabini non recte puncta collocauerunt.

אלה  
אלה

*Deus ostendet mihi super inimicos meos, ne perdas eos, ne quando obliuiscantur populi mei.*

XI.

*Disperge illos in virtute tua: & depone eos protector meus Domine.*

XII.

Reuertitur Propheta ad inimicos suos, ac prædicit pœnam ipsorum: sed hæc omnia magis loquitur in persona Christi quam in persona propria. *Deus*, inquit, *ostendet mihi*

מִי



*mibi super inimicos meos*, id est, demonstrabit mihi supplicium, quod patientur inimici mei, quasi dicat, iam reuelauit mihi Deus quid euenturum sit inimicis meis, sed etiam reipsa ostendet euentum, & tunc videbo supplicium, quod iustissime patientur. Ego autem precor Deum, vt non occidat eos, id est, non omnino extinguat gentem Iudaeam: *nequando homines obliuiscantur populi mei*. vult enim Christus agnosci populum suum, vnde originem secundum carnem ducit. Rogo igitur, inquit, *vt Deus in virtute sua*, in potentia sua, cui nemo resistere potest, *dispergat filios per orbem terrarum*, & deponat eos de altitudine gloriae, in qua positi erant, cum essent populus Dei peculiaris, & Regnum, ac Sacerdotium obtinerent. Quae omnia in Iudaeis videmus ad litteram adimpleta. In Graecis codicibus habetur, *ne quando obliuiscantur legis tuae*; & sic legunt Hilarius, Augustinus, Euthymius, & alij. Sed nostra lectio concordat cum Hebraico codice; & credibile est sic etiam vertisse Septuaginta Interpretes, sed Graecum textum postea fuisse mutatum: testatur enim S. Hieronymus in epist. ad Suniam, & Fretellam, in Septuaginta Interpretibus haberi, populi mei, vt habetur in Hebraeo.

XIII.

*Delictum oris eorum, sermonem labiorum ipsorum, & comprehendantur in superbia sua.*

Explicat causam dispersionis Iudaeorum, quasi dicat, haec illis eueniant, propter *delictum oris eorum*, id est, propter sermonem labiorum ipsorum, quo dixerunt, *non habemus Regem, nisi Caesarem*; & *Sanguis eius super nos*, & *super filios nostros*; Matth. 27. Deus enim iuste illis tribuit, quod sibi imprecati sunt, iuxta illud Dan. 9. *Et non erit eius populus, qui eum negaturus est. Et comprehendantur in superbia sua*, id est, captiui fiant à Romanis, & humiliantur, ac deiiciantur ob superbiam suam, qua gloriabantur se filios esse Abrahæ, & liberos, & nemini vsquam seruiisse, vt perspicuum est ex cap. 8. Ioannis. Verè enim propter superbiam, & contuma-

ciam suam Romanorum indignationem in se prouocauerunt, vt patet ex libris Iosephi de bello Iudaico. Sed illa occasio fuit exitij: vera autem causa fuit superbia, qua Dei filium contempserunt.

*Et de execratione, & mendacio annuntiabuntur in consummatione, in ira consummationis, & non erunt.*

XIV.

Per execrationem, & mendacium intelligo verba illa supra dicta, *Sanguis eius super nos*; & *Non habemus Regem, nisi Caesarem*, illud enim, *Sanguis eius super nos*, fuit horrenda execratio, qua sibi imprecati sunt Iudaei poenam debitam inhumanissimi omnium scelerum. Illud autem *Non habemus Regem, nisi Caesarem*, mendacium, & simulatio fuit: constat enim illos noluisse dare Caesari census, & iactasse se liberos, & nemini vnquam seruisse, cum tamen hoc ipsum esset insigne mendacium: seruierunt enim Pharaoni in Aegypto, Nabuchodonosor in Babilonia, Philistaeis in terra promissionis, & tunc cum haec dicerent, Romanis manifestissime seruebant. Praedicat ergo Propheta, quod de hac execratione, & mendacio, id est, propter haec delicta oris ipsorum, propter tam horrendam execrationem, & tam superba mendacia, *annuntiabuntur in consummatione*, id est, diuulgabuntur, & infames erunt toto orbe terrarum, quando euersa ciuitate consummaretur, ac destrueretur omnis potentia, omnis gloria, omnis status Reipublicae Iudaeorum. *In ira consummationis*, hoc est, in illa consummatione, quae non casu accidet, sed ab ira, & indignatione Dei proueniet, & ideo erit perfecta & absoluta consummatio, vt nunquam deinceps Iudaei Regnum, & ciuitatem Regiam sint habituri: ideo additur, *& non erunt*, id est, & sic perfecta consummatione, non amplius subsistent Iudaei, id est, non erunt populus, nec Regnum, sed dispersio, & dissipatio miserabilis, vt hodie cernimus oculis nostris. In codice Hebraico legitur, *De execratione, & mendacio annuntiabuntur*: sed verba He-

Ss

braica



Hebraica facile mutant significationes : propterea Septuaginta Interpretes , qui peritissimi erant Hebraicæ linguæ , verbum actiuum in passiuâ significatione interpretati sunt. In eodem codice legitur , *Consume in ira consume, vt non subsistant.* Verum Septuaginta Interpretes, vel acceperunt vocem, *calle*, pro nomine, non pro verbo, id est, pro consummatione, non pro imperatio, *consume*, vel certe sensum expresserunt, non verbum verbo reddiderunt.

כיה

XV.

*Et sciant, quia Deus damnabitur Iacob, & finium terra.*

Et cum fuerint dispersi Iudæi per omnes terras, tunc scient, & aperte videbunt, Deum verum, non solum Dominum esse Iacob, id est, populi Israëliti, sed etiam finium terra, id est, omnium gentium vsque ad ultimos fines terre. Antea siquidem notus erat in Iudæa Deus, & in Israël magnum nomen eius; & dicebatur, *Effunde iram tuam in gentes, quæ te non nouerunt, & in Regna, quæ nomen tuum non inuocauerunt:* sed post euersionem Ierosolymæ, Euangelio Christi per orbem terrarum prædicato, dispersi Iudæi viderunt vbique Deum verum coli, Idola confringi, Psalmos Dauidicos cani : ita didicerunt, Deum non solum Iudæorum Deum esse, sed etiam gentium.

XVI.

*Conuertentur ad vespem, & famem patientur vt canes : & circuibunt ciuitatem.*

Sed nunquam apertius scient, Deum dominari Iacob, & finium terræ, quam in nouissimo die, quando stabimus omnes ante tribunal Christi, & illi flectetur omne genu: tunc conuertentur ad poenitentiam, sed ad vespem, finito tempore misericordiæ; & famem patientur vt canes, & circuibunt ciuitatem electorum, vt cibum consolationis inueniant.

XVII.

*Ipsi dispergentur ad manducandum: si vero non fuerint saturati, & murmurabunt.*

Idem Iudæi dispergentur ad manducandum recurrendo ad Patriarchas suos, & Pro-

phetas, atque ad eos clamando, vt canes famelici; & quia nihil consolationis accipient, neque ab illis pro filijs agnoscentur, murmurare incipient, & queri de infelicitate sua. Quod si hæc nostra explicatio non probetur, iam indicauimus alias multas, dum versiculum septimum explicaremus.

*Ego autem cantabo fortitudinem tuam, & exultabo mane misericordiam tuam.*

XVIII.

Hactenus de impijs persecutoribus, nunc Dauid siue in persona propria, siue potius in persona Christi, & Ecclesiæ, quæ corpus eius est, explicat lætitiā, & exultationem suam, nec non laudem Dei, & actionem gratiarum. *Ego autem, inquit, cantabo fortitudinem tuam,* id est, mihi illi latrabunt, & murmurabunt; ego autem è contrario cantabo, & laudabo fortitudinem meam, id est, magnam potentiam tuam, quam ostendisti in debellatione, & perditione iniquorum. *Et exultabo misericordiam tuam,* id est, exultans laudabo misericordiam, quam ostendisti in liberatione, & glorificatione iustorum: id autem faciam summo mane, id est, primo quoque tempore, ante omnia alia negotia; vel mane, id est, inchoante die sempiternæ felicitatis, transacta iam nocte terribilis Iudicij vniuersalis. Pro, *exultabo*, multi Latini Codices habent, *exaltabo*: sed lectio nostra concordat cum textu Hebraico; & Græco; & sic legunt Patres.

*Quia factus es susceptor meus, & refugium meum in die tribulationis meæ.*

XIX.

Declarat effectum misericordiæ, quam exultando decantaturum se promittit: quod videlicet Deus susceptor eius fuerit, id est, protegendum suscepit, & refugium illi præstiterit in omni tribulatione sua.

*Adiutor meus tibi psallam, quia Deus susceptor meus es, Deus meus misericordia mea.*

XX.

Idem alijs verbis repetit, vt affectum suum, & gratum animum erga tantum benefactorem ostendat. Illud, *Adiutor meus;*

in



in Hebræo est, *fortitudo mea*, ex quo intelligimus, significari adiutorem robustum, & potentissimum: proinde laudatur ea voce potentia Dei. Per illud autem, *Suscceptor meus*, laudatur bonitas Dei, quæ sub alas suos protegendos suscipit electos. Per illud, *Deus meus*, significatur summum bonum nostrum, ac finis ultimus omnium desideriorum, quamvis autem in Hebræo sit, *Deus misericordiæ meæ*; tamen recte Septuaginta, & Latinus Interpres verterunt, *Deus meus, misericordia mea*, quia vox Hebræa una, & eadem si legatur, *Elohe*, significat Deus, si legatur, *Elohai*, significat Deus meus: & sic legerunt Septuaginta, & hæc est vera lectio, quicquid Rabini dicant. Denique illud, *Misericordia mea*, significat in compendio omnia beneficia Dei, quibus ad ipsum Deum, id est, ad summum bonum peruenimus recte enim observat. S. Augustinus, multo amplius esse misericordia mea, quam salus mea, vita mea, spes mea, & similia. Misericordia enim fecit, ut essemus, ut viueremus, ut liberaremur à malo, ut proficeremus in bono: misericordia Dei prædestinati sumus, vocati sumus, iustificati sumus, glorificati tandem erimus: nam etiam si glorificatio ex meritis detur, tamen ipsa merita nostra, dona sunt Dei, quia sine gratia præcedente nulla essent. Merito igitur idem Propheta in Psal. 102. dicit, *Qui coronat te in misericordia, & miserationibus.*

## P S A L M V S LIX.

## Titulus &amp; Argumentum.

In finem pro his, qui immutabuntur, In tituli inscriptionem ipsi Dauidi in doctrinam, cum succendit Mesopotamiam Syriæ & Sobal, & conuertit Ioab, & percussit Idumæam in valle Salinarum duodecim millia.

**O**ccasio scribendi Psalmi præsentis fuit ea victoria, quæ narratur in titulo, & fusiis lib. 2. Reg. cap. 8. & 10. & 11. Paralip. 18.

Occasione, inquam, huius victoriae canit Propheta præteritas afflictiones suas, & totius populi, & præsentem, ac futuram felicitatem. Quæ omnia possunt etiam applicari Ecclesiæ, quæ post multas persecutiones mirum in modum dilatari, & crescere coepit, ut etiam Imperatores, & Reges, eorumque Imperia, & Regna sceptro suo subijceret. Non legitur quidem in libris Regum, quod Dauid succenderit Mesopotamiam, & Sobal, sed tantum, quod coeperit: ceterum non omnia scripta sunt in libris Regum, neque pugna hic titulus cum ea historia, cum utrunque fieri potuerit. Videtur etiam hic titulus dissentire ab historia, quod hic dicantur caesa à Ioab duodecim millia Idumæorum: in lib. autem 1. Paral. 18. dicantur caesi Idumæi ei ab Abisai fratre Ioab, ad decem & octo millia. Sed non est necesse, ut de eadem eade intelligamus titulum huius Psalmi, & locum Paralipom. Potest enim fieri, ut & Ioab interfecerit duodecim millia, & Abisai alio tempore decem, & octo millia.

## EXPLICATIO PSAL. LIX.

**D**eus repulisti nos, & destruxisti nos  
iratus es, & misertus es nobis.

Incipit narrare præteritas afflictiones populi Israelitici, Deus, inquit, repulisti nos à paterna cura, & protectione, & destruxisti nos, permittens nos destrui, opprimi, & vexari à Philistæis, Idumæis, Moabitibus, alijsque populis inimicis nostris. Iratus es, & misertus es nobis, id est, iratus es nobis ob peccata, quibus te ad iracundiam præuocauimus, & ideo tradidisti nos in manus hostium nostrorum: sed tamen paulo post misertus es nobis, dum nos per gratiam tuam ad poenitentiam reuocasti, & post poenitentiam à captiuitate, & persecutione liberaasti. Hæc verissima esse intelliget, qui leget librum Iudicum, & librum primum Regum. Vicissim enim Iudæi nunc ob peccata tradebantur in manus hostium, nunc ob poenitentiam liberabantur. Eadem contigerunt Ecclesiæ Christi: persecu-



tionum enim causa tribuitur peccatis Christianorum à S. Cypriano in serm. de lapsis, ab Eusebio libr. 8. hist. Ecclesiasticæ, à Victore African. libr. 1. de persecutione Vandalica, & ab alijs. Tanta autem erat interdum vis persecutionis, vt Ecclesia verissimè dicere posset, *Deus repulisti nos, & destruxisti nos: iratus es, & misertus es nobis.* Istud autem, *misertus es nobis*, potissimum tribui debet fortitudini Sanctorum Martyrum: quamuis enim Deus iratus peccatis Christianorum persecutiones permitteret: tamen valde miserebatur Ecclesiæ: dum insigni dono fortitudinis armaret plurimos Christianorum, vt maior esset Ecclesiæ gloria ob coronas innumerabilium Martyrum, quam depressio, & vastatio ob rapinas bonorum, & ruinas ædificiorum sacròrum.

II. *Commouisti terram, & conturbasti eam sana contritiones eius, quia commota est.*

Explicat magnitudinem persecutionis. *Commouisti*, inquit, *terram*. id est, nō vnum, aut alterum populum, non vnā, aut duas ciuitates, sed orbem terræ commouisti. Et quidem si respiciamus persecutiones Iudæicas, sensus erit; *Commouisti totam terram* promissionis, si verò cogitemus persecutiones Christianas, quæ sæpe vniuersales erant, sensus erit. *Commouisti terram* vniuersam, id est Ecclesiam toto orbe diffusam: *& conturbasti eam*, id est dirupisti (id enim propriè sonat vox Hebraica; *pazam*) siue scidisti, aut vulnerasti eam, multis Ecclesiæ membris amputatis, ac per hoc valde conturbasti eam. Magna enim turbatio erat in Ecclesia quando membra principalia. Episcopi, & Doctores trucidabantur: *Sana contritiones eius, quia commota est*, id est, tu Deus, qui non vt hostis, sed vt Medicus Ecclesiam, ferro, aut igne vexasti, sana etiam scissiones & vulnera eius, quoniam bona commotione mora est, admonita videlicet hoc flagello, conuersa est ad poenitentiam, & ad currendam deinceps viam mandatorum tuorum, quæ diuturna prosperitate languere, ac in via subsistere cœperat.

*Ostendisti populo tuo dura, potasti nos vino compunctionis.*

Perstistit in eadem narratione, ac dicit, *Ostendisti populo tuo dura*, id est, fecisti, vt populus tuus videret, & experiretur duras persecutiones, & afflictiones. *Potasti nos vino compunctionis*, id est, occasione huius flagelli, fecisti, vt rediremus ad cor, & biberemus calicem amarum, sed salubrem sanctæ compunctionis. In verbo, *ostendisti*, insinuitur benignitas Dei, qui tribulationes nobis, non tam immittit, quam ostendit, vt terreat, non vt noceat: vnde multo sunt minores, quam carnalibus videantur: idè dicit Apostol. 2. Corinth. 4. *Momentaneum hoc & leue tribulationis nostræ*, &c. In verbo autem, *potasti nos*, insinuat eadem benignitas Dei, qui donum saluberrimum poenitentiae, non ostendit, sed intra nos, atque ad eum inimum cordis infundit: quomodo vinum epotum ad viscera calefacienda descendit: non desunt qui legant, *vinum soporis*, & sic in Hebræo haberi contendunt. Sed vox Hebraica, *targhela*, ambigua est, & sicut *soporem* secundum aliquos significat, ita secundum alios *tremorem*, vel *flatum*, vel, vt Septuaginta viri peritissimi translulerunt, compunctionem. S. Augustinus legit, *vino stimulationis*, quod est idem, cum, *vino compunctionis*; stimulus enim ad pungendum fieri solet.

*Dedisti metuentibus te significationem, vt fugiant à facie arcus.*

Per illa omnia dura, (persecutiones videlicet, & afflictiones,) quibus in hoc mundo Iusti vexantur, Deus *signum dat* electis suis *metuentibus eum*, vt *fugiant à facie arcus*, qui sagittas lethiferas iaculabitur in omnes impios tempore suo, id est, in nouissimo die: tribulationes enim, quibus nunc purgantur electi à venalibus maculis, signa sunt grauissimarum poenarum, quas luunt impij post hanc vitam, atque hoc est, quod scribit Apostolus Petrus in priore epistol. cap. 4. *Tempus est, vt incipiat iudicium à domo Dei: si autem primum*

à no-



à nobis, quis finis eorum, qui non credunt Dei Evangelio? Et Coapostolus eius Paulus, I. Corint. II. Cum iudicamur à Domino corripimur, ut non cum hoc mundo damnemur. Deus igitur dum purgat electos, significat illis, ut à temporali sua tribulatione admoniti, intelligant, quæ supplicia maneat impios; & ideo iuste, & pie viuentes fugiant à facie arcus diuini; qui extensus nunc manet; sed in die nouissimo cum tanto impetu laxabitur, ut impios in ætèrnū perdat.

V. *Vt liberentur dilecti tui, saluum fac dextera tua, & exaudi me.*

Concludit orationem suam, ac si diceret, Vt ergo liberentur dilecti tui à persecutionibus, & angustis, in quibus tam diu versati sunt, *saluum fac dextera tua* me Regem populi tui, & exaudi me pro vniuerso populo deprecantem.

VI. *Deus locutus est in sancto suo: letabor & partibor Sichimam, & conuallem tabernaculorum metibor.*

VII. *Meus est Galaad, & meus est Manasses: & Ephraim fortitudo capitis mei.*

Iam incipit ostendere, exauditam fuisse orationem suam, & se victoriam obtinuisse de omnibus tère hostibus suis, ac dilatasse vehementer imperium suum. *Deus*, inquit, *locutus est in sancto suo*, id est, Deus locutus est per me sanctum Prophetam suum, & aperte prædixit quæ futura erant, & iam magna ex parte completa sunt. In textu Hebræo iuxta puncta Rabinorum legitur, *Deus locutus est in sanctitate sua*, siue in sanctuario suo. Sed eadem vox Hebraica cum aliis punctis significat, in sancto suo; nam, *codficio*, est, *in sanctitate sua*, & *chedofcio*, est, *in sancto suo*, & sic legerunt Septuaginta Interpretes, & omnes veteres, excepto S. Hieronymo, qui in versione ex Hebræo legit cum Rabinis, *in sanctuario suo*, sed in Commentario legit & interpretatur, *in sancto suo*, id est, in Christo, cuius typum Dauid gerebat. Erat autem notissima hæc prædictio toti populo: nam Abner Dux militiæ Saulis lib. 2. Reg. c. 3. dicit populo, *Dominus locutus est ad Dauid*, di-

*cens, in manu serui mei Dauid saluabo populum meum Israël de manu Philistim*, & omnium inimicorum eius. *Letabor, & partibor Sichimam*: post mentionem factam prophetiæ, incipit demonstrare, eam prophetiam magna ex parte esse adimpletam. *Letabor*, inquit, tanquam victor Imperio acquisito, & mirifice dilatato: ac primum *partibor Sichimam*, id est, Samariam, tamquam Dominus eius in partes suas diuidam, numerabo orbis, oppida, pagos, constituam in eis iudices, & magistratus. *Et conuallem tabernaculorum metibor*, id est, & idem faciam in regione proxima, quæ dicitur, *conuallem tabernaculorum*. Lege cap. 33. Gen. ibi enim dicitur regio illa appellata *Sochor*, id est, *tabernacula*, quia ibi primum Iacob fixit tabernacula, & emit partem agri in terra Sichimorum. Notandum hoc loco est, Dauidem enumeratum prouincias Regni sui, cœpisse à Sichima, quæ in Samaria est, & pro ipsa Samaria accipitur, & à valle tabernaculorum; quia ibi fuit initium possessionis Iacob, & filiorum eius in terra promissionis. Notandum etiam, Dauidem non meminisse hoc loco nisi Sichimæ, Sochor, Galaad, Manasse, & Ephraim, quæ omnia pertinebant ad tribum Ioseph; quia illa erat omnium maxima, & ideo sub nomine eius intellexit prouincias omnium decem tribuum, quæ pertinebant ad Regnum Israel. Seorsim postea meminit tribus Iuda, cum qua coniungebatur tribus Benjamin, & dicebatur Regnum Iuda, post diuisionem factam sub Roboam. Addit igitur, *Meus est Galaad, & meus est Manasses*, id est, mea est regio, quæ dicitur Galaad à viro sic nominato: & mea est regio, quæ dicitur Manasses à Manasse filio Ioseph. *Et Ephraim fortitudo capitis mei*, id est, & mea est regio, quæ dicitur Ephraim, ab altero filio Ioseph; quæ quidem regio plena est virorum fortium, ut dici possit *fortitudo capitis mei*, id est, in qua consistit præcipuum robur, & defensio capitis mei, seu vitæ meæ, & regni mei.

*Iuda Rex meus: Moab olla spei meæ.*

VIII.

Ss 3

Post



Post enumeratas provincias decem tribuum sub nomine Manasse, & Ephraim: nunc addit tribum Iuda, cum qua, vt dixi, coniungebatur tribus Benjamin. *Iuda*, inquit, *Rex meus*, id est, mea quoque est tota regio, quæ dicitur Iuda à Iuda filio Iacob, quæ tribus Iuda est tribus Regia: nam vt dixit idem Dauid lib. i. Paralip. cap. 28. *Deus de Iuda elegit Principes*: & ipse etiam Iacob moriens, & benedicens filiis, dixit de Iuda Gen. 49. *Non auferetur sceptrum de Iuda, & Dux de femore eius*, &c. ad quam promissionem hoc loco Dauid alludens vsus est eadem voce Hebraica, qua vsus fuerat Iacob: nam in Hebræo est vtrobique vox *mechohec*, pro qua hoc loco habemus, *Rex*, & in Genesi, *Dux*, significat autem proprie, mechohec, legislatorem: proprium enim Principis, siue Regis, siue Ducis est leges dare subiectis populis. Dicit igitur, *Iuda Rex meus*, id est, tribus Iuda, quæ principatum gerit in populo meo, vel ex qua prodierunt Principes, patres mei, & prodibunt principes filij mei. Post enumeratas provincias Regni proprij, enumerat provincias hostium debellatorum, quæ tributariæ factæ erant: ac primo loco ponit provinciam Moabitarum, quæ dicebatur Moab à Moab filio Loth nepote Abraham, *Moab*, inquit, *olla spei mea*, id est, provincia Moab mihi iam subiecta, est mihi instar ollæ plenæ carnibus, in cuius abundantia, & vbertate sperare possum. In Hebræo legitur, *Moab olla lotionis meæ*: & sensum esse volunt, qui ita legunt, Moabitas coactos fuisse ab Israëlitis victoribus seruire in humili ministerio lotionum. Sed in nulla historia legitur, Moabitas in tam humili ministerio seruasse Hebræis deinde, quamuis verbum *rachaz*, quod hic habetur, significet *lauare*, tamen Septuaginta Interpretes non erant tam imperiti, vt verterent, *olla spei mea*, si vox Hebræa solum lotionem significaret. Itaque credibile est, aut Septuaginta Interpretes aliquid aliud legisse, aut eam vocem significare non solum lotionem, sed etiam *spem*, ac *fiduciam*, quemadmodum apud Chaldæos significat.

*In Idumæam extendam calceamentum meum, mihi alienigena subditi sunt.*

Pergit referre, quas alias provincias hostium debellauerit, aut debellare cupiat. *In Idumæam*, inquit, *extendam calceamentum meum*. Idumæa est regio, quam possidebant, qui ab Esau fratre Iacob ortum ducebant. Et quamuis cum hic Psalmus scriberetur, iam obtinuisset Dauid vnam victoriam aduersus Idumæos, & occidisset ex ipsis duodecim milia, vt dicitur in titulo Psalms: tamen nondum totam Idumæam sibi subiecerat: quod postea factum est, vt patet ex illis verbis 2. Reg. 8. *Et facta est vniuersa Idumæa seruiens Dauid*. Ait igitur, *In Idumæam extendam calceamentum meum*, id est, pergam ad debellandam, & pedibus conculcandam Idumæam. *Mihi alienigena subditi sunt*, hoc est, iam enim Philistæos, qui alienigenæ sunt, debellauit. Philistæi dicuntur alienigenæ, quia nullam affinitatem habebant cum Israëlitis: Idumæi enim, Ammonitæ, & Moabitæ, quamuis non essent filij Iacob, tamen erant affinitate aliqua illis coniuncti, siquidem Idumæi descendebant ab Esau, siue Edom, qui erat frater Iacob: Ammonitæ, & Moabitæ descendebant à Loth nepote Abrahami. Ex Hebræo S. Hieronymus vertit, *Alienigena mihi confederati sunt*: & nota vulgata editio in Psal. 107. vbi repetuntur hi versiculi, sic habet, *Alienigena mihi amici facti sunt*: Vox Hebraica ambigua est, potest enim deduci à verbo *rahah*, quod significat subicere, & contere, & hanc significationem sequuti Septuaginta dixerunt, *Mihi subditi sunt*. Potest etiam deduci à verbo *raba*, quod significat pascere, & societatem, atque amicitiam contrahere: & hanc significationem amplexus est S. Hieronymus, & noster Interpres in Psal. 107. qui dixerunt, *confederati sunt*, vel *amici facti sunt*: sed vterque sensus est verus. Siquidem Philistæi deuicti bello, & tributarij effecti, ac per hoc subditi ad fœdus & amicitiam admissi sunt.

*Quis deducet me in ciuitatem munitam? quis deducet me vsque in Idumæam?*

Quo-



Quoniam hæc sola gens restabat omnino subicienda, quæ habitabat in locis munitissimis, ideo Dauid nunc dicit, *Quis deducet me in ciuitatem munitam?* id est, quo duce, quo auxiliante ingredi poterò victor in Regiam Idumææ, quæ est ciuitas valde munita? De munitione Regis Idumæorum scribit Abdias Prophetia, c. v. 1. 3. & 5. *Superbia cordis tui extulit te habitantem in scissuris petrarum, exaltantem solum tuum, qui dicis in corde tuo, quis detrahet me in terram? si exaltatus fueris ut Aquila, & si inter sidera posueris nidum tuum: inde detraham te, dicit Dominus.* Declarat autem Dauid de qua ciuitate munita loquatur, cum addit: *Quis deducet me usque in Idumæam?* id est, quis faciet, vt capiam Idumæam, & in eam victor ingrediar? Hæc omnia ad Christum & Ecclesiam mirifice accommodantur: nam Regnum Iuda est ipsa Ecclesia fidelium: Sichimitæ, siue Samaritani significant hæreticos, qui magno cum labore, sed tandem aliquando vincuntur, & subiciuntur omnes: Ephraim, & Manasse significant schismaticos, siquidem Hieroboam separauit eos à Hierosolyma, & templo Domini, & erexit aliud altare: & isti quoque tempore suo subiciuntur: Moabitarum & Philistæi significant Gentiles, qui & ipsi ab Ecclesia superabuntur: Denique Idumæi significant Iudæos, qui in Christum credere noluerunt, qui omnium obstinatissimi in fine mundi conuerterentur ad Christum. Quamuis enim Iudæi recentiores, nos Christianos, Idumæos vocent, se autem Israëlitas: tamen Apostolus ad Rom. 9. satis aperte declarauit, carnales Israëlitas secundum spiritum Idumæos esse, non Israëlitas: Christianos autem secundum spiritum veros esse Israëlitas: de qua re vide S. Augustinum in epist. 197. quæ est ad Afellicum, alias 200.

Nonne tu Deus qui repulisti nos? & non egredieris Deus in virtutibus nostris.

Respondet interrogationi per aliam interrogationem, quasi dicat, Non est aliud, qui me introducere possit in ciuitatem munitissimam Idumææ, nisi tu Deus, qui repulisti nos, & non egredieris ad bellum confusus in

virtutibus, id est, in exercitiis nostris: sicut enim te repellente, & deferente vincebamur, ita te solo præsentente, & adiuuante vincere poterimus non confidentes in viribus exercituum nostrorum, sed in tua solius omnipotentissima virtute.

Da nobis auxilium de tribulatione: quia vana salus hominis.

XII.

Ergo, inquit, tu qui solus potes, & in quo solo confidimus, da nobis auxilium, quo de omni tribulatione, & angustia liberemur, quia vana est salus, quæ ab hominibus expectari potest.

In Deo faciemus virtutem, & ipse ad nihilum deducet tribulantes nos.

XIII.

In Dei auxilio confisi faciemus virtutem, id est, fortiter agemus: & ipse erit, qui vt principalis auctor per instrumenta manuum nostrarum profligabit omnes inimicos, qui nos tribulant. Nomine virtutis in versu vndecimo intelleximus exercitum, in hoc autem versiculo intelligimus fortitudinem, quia verba Hebraica diuersa sunt, & illud exercitum, hoc fortitudinem significat. Quod si in bello corporali verum est, in solo Deo confidendum esse, tanquam in auctore præcipuo; multo magis id verum est in bello spiritali, quo Ecclesia pugnat aduersus hæreticos, schismaticos, Ethnicos, & Iudæos: & contra spiritualia nequitia in cælestibus, Ephes. 6.

## PSALMVS LX.

Titulus, & Argumentum Psalmi.

In finem, in hymnis Dauid.

Argumentum huius Psalmi ex sententia recentiorum quorundam est oratio Dauidis in exilio positi. Ex sententia Theodoret, & Euthymij est oratio populi apud Babylonem captiui. Sed ex sententia SS. Hilarij, Hieronymi, & Augustini, quos nos sequimur, est oratio hominis iusti, siue Ecclesia Christiana in peregrinatione inter tentationes varias laborantis, & ad patriam cælestem, & quietem perpetuam suspirantis.

EX.



## EXPLICATIO PSAL. LX.

I. **E**Xaudi Deus deprecationem meam,  
intende orationi meae.

Præfatio breuissima hæc est, qua vir iustus, siue populus Christianus petit audientiam à Deo, vt exaudiat deprecationem suam & ab ea audita non auertatur: sed benigne potius eam consideret. Vox Hebraica, *רנה*, significat *clamorem*, non simplicem deprecationem, proinde per deprecationem intelligere debemus orationem magno affectu prolatam, & cum ingenti clamore cordis; & ideo merito petit audiri, & attendi: oratio enim frigida, & solis labiis fusa non penetrat nubes, nedum cælum cælorum.

II. **A** finibus terræ ad te clamaui, dum anxietur cor meum: in petra exaltasti me.

Nunquam fuit David exul in finibus terræ, neque captiui ducti sunt vnquam filij Israël in fines terræ: quare vox hæc Ecclesiæ est, quæ occupauit orbem terræ vsque ad vltimos terminos eius, iuxta illud Psal. 2. *Positula à me. & dabo tibi gentes hereditatem tuam, & possessionem tuam terminos terræ.* Ait igitur, Ego propagata vsque ad fines terræ, ex ipsis finibus terræ, id est, ex toto orbe simul per voces membrorum meorum ad te clamaui, vbi per verbum, *clamaui*, declarauit vocem illam, *deprecationem*, nihil esse aliud, nisi ingentem clamorem. Potest etiam per *fines terræ*, intelligi distantia maxima ab eo, qui clamat, ad eum, cui clamatur. Deus enim cui clamat, est in finibus cæli, id est, in summo cælo; is vero, qui clamat, est in finibus terræ, id est, in ima terra; vt hæc sit ratio tanti clamoris. Quomodo in Psal. 129. dicitur, *De profundis clamaui ad te Domine.* Magna enim voce clamare debet, qui in imo positus exaudiri vult ab eo, qui sedet super Cherubin in altissimo cælo, id est, qui intelligens infinitam distantiam inter suum nihil, & diuinas perfectiones, tamen cum ipso Deo colloqui in oratione præsumit. Dum anxietur cor meum, in petra exaltasti me. Reddit rationem, cur magna fiducia clamet

ad Deum, quia videlicet, alias expertus est, auxilium diuinum sibi in tribulatione non defuisse. Dum alias, inquit, non raro anxietur cor meum, q̄b varias tentationes depri- mentes me: tu clamantem exaudisti, & in petra exaltasti me, id est, in altissimo, & munitissimo loco collocaisti: quem locum paulo post, *turris fortitudinis*, appellabit. Porro petra ista sublimis Christus est, in quem quicumque per contemplationem exaltatur; & quanta ipse prior passus sit, & quem exitum passionis eius habuerint, diligenter recogitat, facile vincit, & contemnit omnia. In Hebræo habetur, *in petra exaltabitur supra me*, quæ verba nullum sensum faciunt; ideo credibile est, Septuaginta non legisse, *iarum mimmenni, exaltabitur supra me*: sed iisdem literis, vna dempta, *ieromemenni, exaltabit me, siue exaltauit me*, vt habetur Psal. 26. nam futurum sæpe accipitur pro præterito, parum autem refert quod ad sensum attinet, siue dicatur, *in petra exaltasti me*, siue Deus in petra exaltauit me.

III. **D**eduxisti me, quia factus es spes mea, turris fortitudinis à facie inimici.

Declarat quod dixit, *in petra exaltasti me.* Deduxisti me, inquit, id est, Dux mihi fuisti, cum fugerem ab hoste, tentationibus me impugnante, Quia factus es spes mea, id est, hoc fuit me deducere, & Ducem mihi se præbere, implere me bona spe, quæ fecit, vt non caderem, sed magno animo omnia tolerarem. Itaque tu factus es spes mea, & turris fortissima à facie inimici: qui enim confidit in Deo, & recogitat, quid Christus ipse sit passus, & ad quantam gloriam resurgendo peruenerit; & ipsum esse caput nostrum, quem intiendo discimus, quid in terris agere, & pati; & quid in cælo expectare, & desiderare debeamus: ille sine dubio turrim munitissimam ascendit, vbi non solum iacula hostium vitare, sed etiam in hostes tela iaculari poterit.

IV. **I**nhabita in tabernaculo tuo in sacula, protegar in velamento alarum tuarum.

Docet



Docet, turrim istam fortissimam non esse caelestem habitationem, sed peregrinantium tabernaculum: nam, & vox Hebraea, *gur*, & Graeca, *παροικια*, quae hic habentur, significant, proprie, habitare more peregrinorum. Ait igitur, *Inhabitabo in tabernaculo tuo in saecula*, id est, in turri illa fortitudinis inhabitabo tanquam peregrinus, in tabernaculo; atque interim *protegar in velamento alarum tuarum*, ut pullus sub alis Gallinae, ne moribus miluorum pateam. Sanctus Hilarius exponit hanc habitationem tabernaculi de habitatione domus caelestis propter illud verbum, *in saecula*. Sed sanctus Augustinus exponit de habitatione peregrinantium, cui fauent proprietates vocabulorum, & etiam metaphora, quibus Propheta vititur; *Turris*, quae defendit ab impetu hostium; *tabernaculi*, quod defendit à pluuijs, & sole; & *velamento alarum*, quod defendit à moribus milui. Illud, *in saecula*, significat hoc loco, assidue, perpetuo, semper, ut sensus sit, ab hoc tabernaculo non recedam, quandiu periculum temptationis erit: quod verbis proprijs dicere potuisset, in tua protectione semper confidam quandiu vixero in hac carne mortali; vel, ut S. Augustinus exponit, illud, *in saecula*, significat, vsque ad finem saeculi: Ecclesia enim, quae hic loquitur, durabit vsque ad mundi consummationem, in velamento alarum Dei: quamuis enim vndique ab hostibus impetatur, tamen *porta inferi non praevalent aduersus eam*, Matth. 16.

*Quoniam tu Deus meus exaudisti orationem meam: dedisti hereditatem timentibus nomen tuum.*

Ratio fiduciae meae est, quia tu Deus meus semper exaudisti; id est, semper exaudire concessuisti orationem meam, exaudisti autem orationem meam, quia inter filios tuos numerasti me, quibus hereditatem iam dedisti, id est, firmiter promissisti: si enim Deus timentibus se filiis suis, hereditatem aeternam feruat, quomodo non defendet illos in via? quo modo non exaudiet eos de quacunque tribulatione clamantes ad se? quis

enim Pater filios probos vnquam despexit, aut deseruit? *Et si Deus pro nobis, quis contra nos?* Rom. 8. Itaque de hereditate in caelis, & de protectione in terris omnino securi, & certi sumus, si vere timuerimus eum.

*Dies super dies Regis adicies: annos eius vsque in diem generationis, & generationis.*

VI.

Quia Propheta meminit hereditatis Sanctorum, quae est vita aeterna, declarat hanc hereditatem toti Ecclesiae promissam, inchoandam esse in capite: & ideo dicit, *Dies super dies Regis adicies*, id est, Christo Regi multiplicabis dies super dies sine vilo fine, & similiter *annos eius multiplicabis vsque in diem generationis, & generationis*, id est, vsque in diem aeternitatis, qui dies, quamuis vnus sit, tamen aequialet generationi, & generationi; saeculo, & saeculo; temporibus & temporibus sine fine. Hac phrasi aeternitatem significari, perspicuum est ex Psalmo 118. vbi dicitur, *In aeternum Domine, verbum tuum permanet in caelo, in generatione, & generationem veritas tua*. Cui simile est quod dicitur in Psalmo 134. *Domine nomen tuum in aeternum, Domine memoriale tuum in generatione, & generationem*. In quibus locis pro eodem accipitur, *in aeternum, & in generatione, & generationem*. Ex his aperte colligitur, hunc Psalmum non conuenire Regi Dauid, sed soli Regi Christo. Dauid enim non vixit vltra septuaginta annos: neque Regnum permansit in domo eius, nisi ad certum, ac definitum tempus. Itaque aeternitas Regis, & Regni in Scripturis sanctis praedicta, in Christo adimpletur: nam *& Regni eius non erit finis*, ut dicitur Luc. 1. & *ipse resurgens à mortuis iam non morietur, mors illi vltra non dominabitur*, Rom. 6.

*Permanet in aeternum in conspectu Dei: misericordiam & veritatem eius quis requirit?*

VII.

Rex Ecclesiae Christus permanet in aeternum in conspectu Dei ad hoc enim introiit in calum, ut appareat vultui Dei pro nobis.

Te

nobis.



**ישיב** nobis, Apostolo teste: ad Hebr. 9. In Hebræo est, *iesheeb*, *sedebit*, *sive sedet in aeternum in conspectu Dei*; vt intelligamus, Christum permanere sedendo; vt decet Regem, non asistendo more ministrorum. *Misericordiam, & veritatem eius quis requirit?* id est, misericordiam, qua redemit genus humanum; & veritatem, qua promissa seruauit, & seruat, *quis inuestigabit?* Sunt enim abyssi multa, ac vt Apostolus dicit ad Ephes. 3. *Charitas Christi supereminet scientia*, id est, maior est: quam intelligi possit. Ita exponunt Theodoretus, & Euthymius: S. Hilarius, & S. Hieronymus hunc sensum esse volunt, *Misericordiam, & veritatem eius nemo requirit*, quia præsto erit omnibus. In Hebræo habetur, *Misericordiam, & veritatem para; seruabunt eum*. Sed septuaginta vocem, *man*, *para* legerunt, *mi*, *quis*, & verbum, *nat sar*, quod significat *seruare*, ipsi interpretari solent; *seruari*; vt perspicuum ex Psal. 118. v. 2. & alibi sæpe. Itaque dubium esse non debet, quin significet etiam *querere*, *inuestigare*, *scrutari*: alioqui non tam constanter Septuaginta viri doctissimi ita redderent: sed mirum est, quam varie legant Patres pronomen additum in Hebræo nam sanctus Hilarius legit, *Quis requirit eorum*. Sanctus Augustinus, *Quis requirit ei*. Sanctus Hieronymus in commentario, *Quis requirit eius*, at in versione ex Hebræo legit, *eum*. Septuaginta omiserunt pronomen in fine verbi, sed addiderunt ad nomen; veritatis, *veritatem eius quis requirit*. Et sine dubio versio Septuaginta Interpretum optima, & clarissima est, Ad litteram ex Hebræo sic verti deberet, *Misericordiam, & veritatem quis requirit eum*, & sensus est, *Misericordiam, & veritatem quis requirit ab eo, vel in eo*: quem sensum optime reddiderunt Septuaginta, dicentes, *Misericordiam, & veritatem eius quis requirit?*

VIII.

*Sic psalmum dicam nomini tuo in seculum seculi: vt reddam vota mea de die in diem.*

Quia misericordia Domini Christi tam abundanter mihi ad est, & veritas eius tam certa est, vt non sit opus eam requirere; ego

*sic psallam nomini tuo in seculum seculi*, id est, laudabo te Deum meum, non hic in terris tantum, sed etiam in cælis, æternis hymnis, & canticis celebrabo: vt hoc modo reddam vota gratiarum actionis *de die in diem*, id est, omnibus diebus præsentibus; futuris; vsque ad eum diem, cui nox nulla succedet. Potest enim sic accipi: *sic psallam voce nomini tuo semper*, vt etiam opete impleam promissa mea; legem tuam semper, & vbique seruando, sed prior expositio, quæ sancti Hilarij est, magis probatur.

## PSALMVS LXI.

*Titulus & Argumentum Psalmi.*

*In finem pro Idithum, Psalmus Danid.*

**D**E hoc titulo diximus in explicatione Psalmi tricesimi octau. *Argumentum Psalmi est exhortatio ad patientiam in aduersis, & confidentiam in Deo, cuius occasione agitur de vana confidentia in diuitijs.*

## EXPLICAT. PSAL. LXI.

**N**onne Deo subiecta erit anima mea? ab ipso enim salutare meum.

Vir iustus grauitèr impugnatus à concupiscentiis varijs; quarum quælibet animi humani sibi subiacere satagit, fortiter reluctans clamat, *Nonne Deo subiecta erit anima mea*, id est, nonne æquum est, & mihi vtilius, vt Deo subijciar, quam dominari avaritiæ, vel superbiæ, vel luxuriæ? *ab ipso enim salutare meum*. Nam concupiscentiæ, quæ mihi dominari affectant, nullum stipendium aliud polliceri possunt, nisi mortem sempiternam. Deus autem salutem pollicetur, & certissime præstabit, si fidelem illi subiectionem, & obedientiam exhibebo. In Hebræo ad litteram legitur, *Atamen ad Deum filebit anima mea*, quia *ab ipso salus mea*, sed idem est sensus, est enim ac si dicat, quamuis multa mihi dominari velint, tamen anima mea soli Deo sub-



subiecta ad omne mandatum, siue, ad omne eius beneplacitum, vt vera obediens silebit, non contradicet, non murmurabit.

*Nam & ipse Deus, meus, & salutaris meus; susceptor meus, non mouebor amplius.*

Non solum, inquit, ab ipso pendet salus mea, sed ipse est Deus meus, & salutaris meus. In Hebræo pro voce, *Deus*, est, *et sur*, quod proprie *petram* siue *fortitudinem* significat. Itaque sensus est. Ipse Deus mihi in hac vita est petra, ac robur, in alia erit Salus mea; in vtraque, *Susceptor meus est*, quippe qui nunc suscipit protegendum, tunc suscipiet coronandum. Ideo non multum mouebor, non nutabo, sed fortis permanebo, quamuis tentationibus quatiar. Illud, *amplius*, vt ex Hebræo cognoscitur, non significat, *deinceps*, aut *in posterum*, sed *multum*, siue *valde*.

*Quousque irruitis in hominem? interficetis vniuersi vos: tanquam parieti inclinato, & macerie depulsa?*

Posteaquam de se locutus est, conuertitur ad deplorandam stragem animarum, quam per arma variarum concupiscentiarum maligni spiritus quotidie faciunt. Vere enim innumerabiles sunt homines, quos dæmones deficiunt in peccatum, quod est mors animæ, per auaritiam, ambitionem, luxuriam, iracundiam, inuidentiam, & alias eiusmodi passiones. Itaque indignabundus aduersus malignos spiritus, dicit, *Quousque irruitis in hominem? & quia vox Hebraica, proprie, insidiari* significat; intelligimus, Prophetam, per, *irruere*, significare voluisse irruere per desiderium, & astutiam, vt sensus sit, *Quousque non cessatis, insidiando generi humano irruere in hominem impetu astutiae, & insatiabilis desiderij vestri? Interficetis vniuersi vos*, id est, vndique stragem editis animarum vniuersi vos maligni spiritus diuersis quidem in locis, & modis variis, sed ad malefaciendum coniuncti, *Tanquam parieti inclinato, & macerie depulsa*; hic subintelligitur vt-

bum accommodatum, vt sensus sit, *vim facitis humano generi, ex peccato originis fauciato, & ad malum prono tanquam parietij inclinato, & parieti non solido, sed ex luto, & paleis composito, vt maceria potius, quam murus dici possit, Quibus verbis miro modo descripsit Propheta, tum Dæmonum potentiam, & crudelitatem erga genus humanum, tum debilitatem, & fragilitatem ipsius generis humani, Vere enim homines post corruptam naturam similes facti sunt macerie impulsæ, & inclinatæ, quæ facillime deiici potest; cum & fragiles sint, & propensi ad malum ab adolescentia sua, vt dicitur Gen. 8. proinde merito clamat Apostolus, *Infelix ego homo, quis me liberabit de corpore mortis huius? & mox addit de potentia gratiæ, Gratia Dei per Iesum Christum Dominum nostrum, Rom. 7.**

*Verumtamen pretium meum cogitauerunt, repellere cucurri, in siti ore suo benedicebant, & corde suo maledicebant.*

Reuertitur vir iustus ad causam, vnde digressus erat ad apostrophas contra inimicos, atque ostendit, finem hostibus spiritualibus propositi, dum iustos impugnant, esse, vt priuent eos æternis honoribus, quos videlicet illis inuident, quoniam ipsi inde culpa sua exciderunt. *Verumtamen*, inquit, *pretium meum cogitauerunt repellere*, id est, ideo tentant, ideo impugnant, ideo concupiscentias excitant; vt pretium, quod redemptus sum, repellant à me; & dignitatem, atque honorem illum magnum æternæ gloriæ mihi auferant. Sed ego contra, *cucurri in siti*, id est, tanto ardore cucurri ad brauium supernæ vocationis, quanto illi cucurrerunt ad illud à me repellendum. *Ore suo benedicebant, & corde suo maledicebant*, id est, ore suo blandiebantur hortantes ad voluptates vitæ præsentis, tanquam res bonas, atque viles: atque interim corde maledicebant scientes, eas ipsas voluptates venenum esse animæ, atque ad impediendam lætitiā sempiternā instrumenta esse aptissima. In Hebræo, vt nunc legitur secundum puncta Rabinorum, sic habetur,



נשח

*Verum tamen exaltationem eius cogitauerunt repellere, complacuerunt mendacio, ore suo benedicebant, corde suo maledicebant. Itaque de quatuor vocibus est difficultas, quæ sunt, precium, meum, cucurri, in siti.* Vox precium, in Hebræo est, *masseoth*, quam vocem S. Hieronymus vertit, *partem*, Septuaginta vertunt *precium*, alij verterunt *exaltationem*, in Græco est, *πῦν* quæ honorem & precium significat. Hilarius, Augustinus, Theodoretus, Euthym. & Hieronym. in commentario legunt, *honorem*, & satis concordat vox Hebraica, quæ *exaltationem* significat. Basilii, & Ambrosii legunt, *precium*, & exponunt de precio redemptionis Christi. Sed vox, *precium*, significaretiam dignitatem, proinde possumus per *precium* intelligere dignitatem, honorem, & exaltationem. Et quod attinet ad sensum in idem recidit, siue accipiamus *precium* pro dignitate, siue pro precio redemptionis, siue pro utroque, vt supra in nostra explicatione ostendimus. Vox, *meum*, siue dubio recte posita est hoc loco, & eam habent omnes codices Græci, & Latini, & omnes tractatores, proinde illud, *eius*, quod esse in Hebræo, indicat vocem Hebraicam esse corruptam vitio scriptorum, quod facile fuit, cum litera quæ significat, *meum*, sit Iod, litera, quæ significat eius, sit Vau, quæ non differunt, nisi quod vna, est paulo longior altera. Vox *cucurri* vel *cucurrerunt*, vt alij legunt, bene posita est, & cum Hebraica concordat, si remouentur puncta Rabinorum, Rabini enim legunt *irrus*, *complacuerunt*: sed Septuaginta viri longe doctiores legerunt, *iarnusu*, *cucurrerunt*, vox Græca ἰσχυρὸν, ambigua est, & tam *cucurri*, quam *cucurrerunt* significare potest, Et quidem Hilarius, Augustinus, & Hieronymus in Commentario legunt *cucurri*. Basilii, Theodoretus, & Euthymius legunt, *cucurrerunt*, Ambrosius vtramque lectionem adducit, & exponit, vt & nos in nostra explicatione fecimus: nam vterque sensus est verus. Vox in siti, habetur in textu Græco, & in multis Latinis, & legitur ab omnibus expostoribus. Quid autem legant Septuaginta in Hebræo, vt verterent, in

siti, fateor me ignorare: nam vox Hebraica *cazab*, mendacium significat, neque est vlla literarum similitudo inter *siti*, & *mendacium* in lingua Hebraica, sitis enim dicitur, *tsama*. S. Ambrosius conatur concordare hanc diuersitatem textuum, dicens, *mendacium siti* habere, veritatem vbertatem. Sed verisimile est Septuaginta Interpretes aliter legisse, & in voce, *cazab*, pro *caph*, legisse, *beth*, quæ sunt literæ similes, & sic habuisse præpositionem, in pro alijs duabus literis, vel aliquid aliud legisse, vel sciuisse ea voce, *siti* significari.

כזב

צמא

כזב

כזב

*Verum tamen Deo subiecta esto anima mea, quoniam ab ipso patientia mea.*

V

*Quia ipse Deus meus, & saluator meus, adiutor meus, non emigrabo.*

VI

*In Deo salutare meum, & gloria mea, Deus auxilij mei, & spes mea in Deo est.*

VII

Redit ad primos duos versiculos, eosque repetit, vt ostendat, magnas quidem esse tentationes, quibus vrgetur, sed tamen se in Dei amore fundatum, atque eius auxilio fretum nihil metuere. *Verum tamen*, inquit, *Deo subiecta est anima mea*, id est, quantumuis hostes fremant, tu anima mea tacita, & subiecta obedias Deo. Est enim hoc loco eadem vox Hebraica, quæ in primo versiculo, nimirum, *Deo sublebit anima mea quoniam ab ipso patientia mea*, id est, tace Deo, quoniam ipse tibi præstabit auxilium. Nam hoc loco nomine patientiæ significatur, patiens expectatio auxilij diuini vt ex verbo Hebraico, & Græco constat. *Quia ipse Deus meus*, & cæt. hic versiculus sextus, est omnino idem cum secundo: quamuis enim interpres Latinus vocabula variauerit, tamen in Hebræo sunt omnino eadem. Itaque illud, *Deus meus*, est etiam hoc loco, *petra mea*, & illud, *Saluator meus*, est *salus mea*, siue *Salutaris meus*: & illud adiutor meus, est *suceptor meus*: & denique illud, *non emigrabo*, est eadem vox, quæ antea versa est, *non mouebo*: proinde non emi-

ידי  
ידי

H



emigrabo, significat hoc loco non deiciar de statu meo: non emigrabo ad patres hostium, sed immotus in castris Dei permanebo. Concludit in septimo versiculo, se omnia à Deo expectare finem videlicet & media. Finis est liberatio ab omnibus malis, & adeptio summi boni: illud significatum est per salutem, hoc autem per gloriam: media sunt auxilium Dei, & spes nostra, quæ proprie nominata sunt. In Deo, inquit, salutare meum, & gloria mea, id est, à Deo expecto salutem, id est, liberationem à malis. & gloriam æternam, quæ est, summum bonum: nam cum Deum videbimus, & similes ei erimus, perfecteque illi adhærebimus, tunc vere salvi, & beati erimus: potest tamen etiam cum S. Basilio exponi, In Deo solo, non in vlla realia gloriæ: non in diuitijs, non in honoribus, non in potentia humana, quia nihil excellentius cogitari potest, quam filium esse Dei. Nec solum in Deo finem vltimum repositum habeo, sed ipse etiam est Deus auxilij mei, id est, ipse est fons gratiæ, qua adiutus perueniam ad finem illum: & ideo tota spes mea in eo est. In Hebræo habetur, *petra roboris mei*, pro, *Deus auxilij mei*.

VIII.

*Sperate in eo omnis congregatio populi, effundite coram illo corda vestra: Deus adiutor noster in æternum.*

Hortatur nunc ceteros ad virtutem, quam ipse Dei dono acceperat: ac primum monet, sperandum esse in Deo, deinde addit, non esse sperandum in rebus creatis. *Sperate*, inquit, *in eo*, id est, in Deo, *omnis congregatio populi*, id est omnis cætus, omnis populus, omnes homines, non Iudæi solum, sed etiam gentes. In Hebræo est, *Sperate in eo omni tempore*: sed manifesta est corruptio in textu Hebræico per defectum vnius literæ: nunc enim legitur, *heth*, quod significat, *tempus*, sed esse debet, *hadath*: quod significat congregationem, & sic legerunt Septuaginta. *Effundite coram illo corda vestra*: effundi dicitur vas, cum euacuatur, & etiam liquor cum ex vase eijcitur. Itaque si cor accipiat pro vase, vt accipit S.

Basilius, *effundere cor* est euacuare cor à vitijs, affectibus malis, peruersis cogitationibus, & similibus quasi liquoribus noxijs: non enim impleri potest cor gratia Dei, sanctisque cogitationibus, & desiderijs, nisi euacuetur contrarijs: pulchre notat S. Ambrosius, admonitos esse homines vt effundant corda euacuantes ea sordibus: quia scriptum est, *Ioel. 2. Effundam de spiritu meo super omnem carnem*. Si cor accipiat pro actu cordis, id est, pro cogitationibus, & affectibus, tunc effunditur cor, quomodo effunditur aqua, vel vinum. Et hoc modo accipit S. Augustinus, qui vult effundendum esse cor, id est, non retinendum cor in corde, sed effundendum ad Deum, vt cogitationes nostræ, & affectus sint in Deo non in nobis. Significat etiam effusio cordis secundum Ambrosium confessionem synecram, & apertam, qua confitemur peccata, & miseras nostras, & ex intimo corde oramus Deum, vt misereatur: quomodo dixit Anna 1. Reg. 1. *Effudi animam meam in conspectu Domini*. Et de hac effusione videtur hic locus præcipue intelligendus: nam sequitur, *Deus adiutor noster in æternum*, id est, secure confitemini Deo ærumnas vestras, & orare eum, nam adiutor noster est, & non despicit orationes sperantium in se: Illud, in æternum, in Hebræo est, *selah*, quod Græci vertunt, *διαΐαλμα* noster autem Interpres aliquando omittit, aliquando vertit, *semper*, aut, *in æternum*: hæc est ratio cur Hilarius, Augustinus, & alij non legant, in æternum.

סה

*Verumtamen vani filij hominum, mendaces filij hominum in stateris, vt decipiant, ipsi de vanitate in idipsum.*

IX.

Quoniam animaduertit Propheta, paucos esse, qui consilium suum sequi velint, ideo inuehitur in multitudinem iniquorum. *Verumtamen*, inquit, *ij hominum, mendaces filij hominum*, ræo significantiùs dicitur, *vani*, *inimum*, quia maxima pars hominum est vera sapientia, quam prudenter Rom. 8. appellat, *ple-*

Tt 3



plenissima fit: ideo autem plerique homines vani, insipientes, & imprudentes sunt, quia mendaces sunt in stateris ad decipiendum, id est, in stateris dolosis, & fraudulentis. Nam ut recte observat S. Basilii, non agitur hic de stateris proprie dictis, quibus pauci videntur, illi videlicet soli qui vendunt carnes aut lanas, aut alia id genus: sed de stateris communibus toti humano generi, id est, de iudicio recte rationis, quod nobis datum est à Deo, ut discernamus, & quasi in statera appendamus vera bona, & vera mala, apparentia bona, & apparentia mala, & eligamus vera bona, & vitemus vera mala. Porro maxima pars hominum mentitur sibi, & alijs, decipitque se, & alios utens stateris dolosis, & quod miserius est, voluntarie stateris vitur dolosis, iuxta illud. *Video meliora proboque, deteriora sequor.* Nemo est enim qui negare audeat, maximum, verissimumque malum esse peccatum, & gehennam: maxima, verissimamque bona esse iustitiam, & beatitudinem: & tamen cum appenduntur in statera lucrum temporale, & offensio Dei, lucrum præponderat, & præligitur: & cum appenduntur temporale detrimentum, & mors aeterna, temporale detrimentum præponderat, atque ut illud euitetur, ignis gehennæ contemnitur. Addit Propheta, *Ipsi de vanitate in idipsum*, id est, ipsi vani, & mendaces, licet varijs modis vani sint, & mendaces, tamen in idipsum conveniunt, vñiti, & coniuncti sunt in hoc ut vani sint, & mendaces: vel brevius, *Ipsi de vanitate in idipsum*, id est, ipsi ex vanitate habent, ut vñum sunt. In Hebræo habetur paulo aliter. *Vanitas filij hominum, mendaces filij hominum in stateris ad ascendendum ipsi præ vanitate in idipsum*, id est, filij hominum non solum vanitas sunt, & mendacium, sed etiam positi in statera cum ipsa vanitate, ascendunt præ vanitate, ac per hoc leviores, & magis vani sunt, quam ipsa vanitas; quæ est elegantissima amplificatio. Sed tamen non existimo hunc esse literalem sensum; sed eum, quem paulo ante tradidimus: nam vox illa Hebraica, *laaloth*, ad ascendendum, cum alijs punctis legi potest, *laaloth*,

ad iniquitatem, siue ad deceptionem, & sic legerunt Septuaginta: imo etiam S. Hieronymus eodem modo legit, cum verterit, in stateris dolosis: & omnes Patres Græci, & Latini legunt, & interpretantur. Illud, ut decipiant, non debere coniungi, cum ipsi, perspicuum est ex Hebræo, & Græco textu. Sic enim legendum est, *mendaces in stateris ad decipiendum, ipsi de vanitate in idipsum.*

*Nolite sperare in iniquitate, & rapinas nolite concupiscere: diuitia si affluant, nolite cor apponere.*

Redit ad exhortationem, ac præcipue, ut caueatur avaritia, quæ est radix omnium malorum. Nolite, inquit, sperare in iniquitate, & rapinas nolite concupiscere: per iniquitatem intelligitur calumnia, ut proprie significat vox Hebraica: proinde prohibetur lucrum iniustum, tam ex occulta iustitia, quale est calumniantium, tum ex manifesta, quale est rapientium: & additur, *Diuitia si affluant, nolite cor apponere*, id est, ad opes etiam iusto titulo acquisitas nolite affectum ponere. Pulchre notat S. Augustinus, eos qui rapinis delectantur, videre quid rapiant, sed non videre, à quo rapiantur: rapiunt enim pecuniam fratri, & rapit illis Diabolus animam, notat etiam idem Augustinus, cum S. Basilio, diuitias fluere dum affluunt: cæcos autem cupidos considerare quod affluant, & non cogitare quod fluant. Ideo autem dictum esse, nolite cor apponere, ne videlicet cum fluentibus fluat, & pereat. Oportet igitur cum affluunt diuitiæ, corde immoto, & stabilito apud Deum, disponere fluxum earum, ut vtiliter fluant: quomodo prudens agricola disponit fluxum aquarum ad irrigandum hortum, ad molam vertendam: & ad alia eiusdem generis opera, sed non labitur ipse cum aquis labentibus.

*Semel locutus est Deus: duo hæc audimus; quia potestas Dei est, & tibi Domine misericordia; quia tu reddes unicuique iuxta opera sua.*

XL

Cor-

לעלות  
לעלות



Concludit rationem reddens, cur non sint appetendæ diuitiæ; & cur ab omni peccato cauendum sit. Semel, inquit, locutus est Deus, duo hæc audiui. In Hebræo est, *Vnum locutus est Deus*, quod non videtur coherere cum sequentibus. Duo hæc audiui: sed illud, *semel*, vel *vnum*, significat immobilitatem verbi Dei, vt docet S. Hieronymus in Commentario huius Psalmi, quasi dicat, *semel Deus loquitur, & fit omnino quod loquitur*, obediunt enim omnia Deo ad nutum, vt non sit opus repetere. Vel per *vnum*, quod Deus locutus dicitur, non intelligitur vnum verbum, sed vnus sermo, quod multa continentur, vt docet S. Basilus. Vel per *vnum*, intelligitur verbum æternum; vt S. Augustinus exponit, Deus enim vnum verbum tantum dixit ab æterno, & illud manet in æternum, & æquiualeat innumerabilibus verbis. Duo autem, quæ Dauid audiuit, & nobis omnibus nuntiavit, hæc sunt: Vnum, quod potentia, & misericordia in Deo sint illa vt timeatur, ista vt ametur: alterum, quod unicuique reddet secundum opera sua, ita vt neque iniuste oppressus sit aliquis per potentiam, neque misericordia eius sit præiudicatura iustitiæ. Et vere, qui ista duo serio cogitant, atque illis cor suum apponunt, sapientissimi sunt.

## PSALMVS LXII.

Titulus, &amp; Argumentum.

Psalmus Dauid, cum esset in deserto Idumææ.

**N**on legitur Dauid latuisse vnquā in deserto Idumææ, sed in deserto Iudææ 1. Reg. 22. & 23. & in textu Hebræico, & Græco habetur, in deserto Iudææ: tamen quoniam Sancti Patres Hilarius, Hieronymus, & Augustinus in Commentario legunt, in deserto Idumææ: non est contemnenda lectio vulgata editionis. Euthymius conatur concordare has lectionum varietates, dicens: Desertum in quo latuit Dauid olim ad Idumæam pertinuisse. Postea

ad Iudæam: sed hoc diuinare est: probabilius videtur, desertum Iudææ vocatum esse desertum Idumææ amplificandi gratia: quomodo Hierusalem aliquando vocatur Sodoma. Nam desertum Idumææ est longe maius deserto Iudææ: imo tota Idumæarum regio in montibus, & solitudine est, vt intelligi potest ex cap. 1. Malachia, vbi loquens Deus de possessione Edom, Posui, inquit, montes eius in solitudinem, & hereditatem eius in dracones deserti. Item colligitur ex lib. 4. Reg. 6. 3. vbi describitur desertum Idumææ itineris septem dierum, & carens aqua, & cæc. Argumentum Psalmi est oratio Dauidis, qui occasione deserti in quo tunc latebat, deplorat peregrinationem suam, & sibi similitum iustorum, & desiderium suum, ostendit migrandi aliquando ex deserto Mundi huius ad patriam cælestem.

## EXPLICATIO PSAL. LXII.

**D**eus Deus meus ad te de luce vigilo.  
Sitiuit in te anima mea, quam multipliciter tibi caro mea.

Describit vir iustus, quæ sint prima opera sua oriente die, ac dicit esse, querere Deum, Desiderare Deum, miseras suas confiteri Deo. *Deus Deus meus*, id est, Tu Deus es fortitudo, & robur meum, quia sine te nihil sum, & nihil possum: in Hebræo sunt duo nomina, vnum significat Deum, alterum significat fortem, sed verti solent etiam per vocem, Deus. Itaque editio Græca & Latina quæ habent, *Deus Deus*, reprehendi non possunt: tamen sensus est, quem diximus, quia vox, *El*, significat Deum, vt fortem. *Ad te de luce vigilo*, id est, cum primum lucem aspicio corporalibus oculis, aperio pariter oculos mentis ad te lucem spiritualement, & incretam; atque ita ad te querendum vigilare incipio, non ad opera mundi huius. Id autem facio, quia sitiuit in te anima mea, id est, quia anima desiderat te, vt cibum & potum suum, vt lumen, & lætitiā suam. Ipsa etiam caro mea multis modis sitiuit ad te fontem omnium bonorum: quamuis enim caro non proprie Deum sitiat,

I.  
II.

428



tamen fitire dicitur, quia indiget eius misericordia ob multiplices suas miseras: quomodo dicitur terra arida fitire pluuiam, sine qua nihil boni producere potest. Quot sunt autem carnis huius corruptibilis necessitates, & miseriae, quibus ille solus mederi potest, de quo dicitur in Psal. 102. *Qui sanat omnes infirmitates tuas*: nemo est, qui non experiatur. In Hebraico codice post illa verba, Deus Deus meus, est pronomen tuum: quod Septuaginta omiserunt, sed subintelligi debet, ut sensus sit, *tu es Deus meus*, & indeo conficenter ad te confugio, & te alloqui praesumo. Illud autem, *Ad te de luce virgilo*, in Hebraeo est unica dictio, *asciacharecha*, quae significat sub auroram te quaero; siue in crepusculo matutino, cum incipit misceri lux aurorae tenebris noctis, ego euigilo, ut te quaeram: ex quo intelligimus continuum, & vehemens fuisse in Dauide desiderium Dei. & merito cum ipse sit omne bonum nostrum, & ingrati sint omnes homines, qui obliuiscuntur Deum, iuxta illud Luc. 6. *Qui benignus est super ingratos & malos*. Denique illud *quam multipliciter*, est in Hebraeo, *camal*, quae vox non habetur, nisi hoc loco: S. Hieronymus vertit, *desiderauit*, sed frustra laboramus de significatione vocis, quae nusquam habetur alibi, & nemo potest reprehendere primos Interpretes.

*In terra deserti inuia, & inaquosa, sic in sancto apparui tibi, ut viderem virtutem tuam, & gloriam tuam.*

Describit proprietates deserti, quae tres sunt, *terra deserta* ab habitationis, *terra inuia*, *terra sine aqua*: quarum secunda est effectus, & tertia est causa primae: nam terra aliqua deserti solet ab habitatoribus praecipue propter carentiam aquae, quae carentia terram arentem, & sterilem reddit: sed cum terra desertitur, & inhabitabilis efficitur, hoc ipso fit inuia: quamuis hoc loco, *inuia*, non est solum terra sine via, sed terra inaccessa, & per quam difficulter ambulari potest: nam vox Graeca, *ἀβατος*, inaccessum significat, & vox Hebraea *sieph*, signifi-

cat *lassum, fatigatum, laboriosum*, ac per hoc significat terram, quae magno cum labore, & fatigatione transmittitur. Videtur autem Propheta significare voluisse, terram illam incultam & rebus necessarijs, nedum delicijs carentem vtilem sibi fuisse ad inueniendum Deum. Anima enim quo magis destituitur carnalibus bonis, vel certe quo magis affectum remouet à rebus terrenis, & se in quodam deserto mentis constituit; eo facilius ascendit ad caelestia contemplan- da, & gustanda. Ego, inquit, *in terra ista deserta, inuia, arida, & sitiente* constitutus, *sic apparui tibi*, id est, sic apparui coram te per ascensionem mentis, quasi in sanctuario tuo essem, ita ut desertum loco sanctuarij mihi fuerit. Apparui autem coram te, *ut viderem virtutem tuam, & gloriam tuam*, id est, potentiam tuam, & maiestatem tuam. Illud enim, *in sancto*, in Hebraeo est *in sanctitate*, per quam sanctuarium Hebraei significare solent. Sanctus Augustinus paulo aliter exponit, & eum sequentes dicere possumus, per desertum intelligi mundum, qui desertus est à veris hominibus, & inhabitatur à bestijs, hominibus videlicet carnalibus & animalibus, ut eos vocat Apostolus: item est inuius, quia difficilissimum est inuenire viam, quae exeat: denique est inaquosus, quia quamuis lacunas habeat aquae putrefactae, quae est sapientia carnalis, caret tamen aqua de caelo; quae est sapientia vera: nisi Deus ex magna gratia sua peregrinantibus in hoc deserto viam ostendat, & rorem de caelo aspergat. Ait igitur David in persona sua, & sanctorum peregrinorum, comitum suorum. Ego in hoc deserto positus, & sitiens aquam de caelo & exitum inuenire cupiens, de mane vigilans mente conscendi ad sanctuarium tuum caeleste, & sic in sancto apparui coram te, ut meditando & contemplando viderem virtutem tuam, & gloriam tuam, quoniam in deserto mundi non videmus nisi temporalia, fragilia, & vilia. *Ut viderem*, inquit, *virtutem tuam*, quae de nihilo omnia fecisti, & portas ea verbo virtutis tuae: viderem quoque gloriam tuam, quae longe,

ac

אשרך

במה

עף



ac longe superemines vniuersis, & nihil est simile tibi, & omnia velint, nolint, seruiunt tibi: & ex hac visione irrorari corpori, & manna gustare, & viam, quæ Christus est, inuenire.

IV. *Quoniam melior est misericordia tua super vitas, labia mea laudabunt te.*

Illud quoniam, non videtur referendum esse ad superiora; sed ad sequentia, vt sensus sit, Non solum videbo virtutem tuam, & gloriam tuam; sed etiam laudabunt te assidue labia mea, quoniam misericordia tua melior est mihi præ ipsa vita: nam misericordia, vitam conseruat, & si ipsam vitam propter te perdidero, misericordia tua illam mihi multo feliciter restituet: sed si vt vitam conseruem à misericordia tua, & gratia excidero, & vitæ & misericordiæ iacturam faciam. In Hebræo, habetur quidem, *chatim*, vitas, in numero multitudinis, sed vox illa etiam pro vita in singulari accipitur: quo modo multa vocabula habent formam numeri multitudinis, & significationem numeri singularis: & in versic. sequenti, *Sic benedicam te in vita mea*, habetur eadem vox in numero multitudinis, & tamen Interpretes verterunt in numero singulari. Itaque possumus hoc loco simpliciter per *vitas*, vitam interpretari, vt interpretantur sancti Patres, Hilarius, & Hieronymus in Commentario: & sicut legit in textu S. Hilarius: tamen si magis placeat accipere in significatione numeri multitudinis, per vitas accipiemus varias functiones viuientium, vt vitas mercatorum, vitas militum, vitas clericorum, vitas agricolarum, & similes, vt accipit S. Augustinus: vel vitas quantumlibet longas, & felices in hoc mundo: vel denique vitas, tum nostram, tum nobis coniunctorum, & charorum, vt parentum, fratrum, filiorum.

V. *Sic benedicam te in vita mea, & in nomine tuo leuabo manus meas.*

*Sic laudando assidue benedicam te in vita mea*, id est, quicquid mihi acciderit, siue

prosperum, siue aduersum, benedicam tibi in omni tempore, & in nomine tuo leuabo manus meas, id est, in inuocatione nominis tui leuabo in oratione manus meas, à te solo expectans auxilium in aduersis. Et tibi vicissim gratias agens in prosperis. Porro ritus leuandi manus in oratione, in vtroque testamento in vñ fuit. Nam cum Moyses Exod. 17. leuaret manus ad Deum, populus vincebat, cum deponeret vincebatur. Et Apostolus 1. Timoth. 2. *Leuantes*, inquit, *puras manus*. Monet autem S. Augustinus eos, qui leuant manus ad Deum in oratione, si impetrare velint, debere etiam leuare manus ad opera bona facienda. Significat etiam in Scripturis leuare manus, idem quod iurare per Deum, sic legimus Gen. 14. dicentem Abrahamum, *Leuo manum meam ad Deum possessorem cæli, & terra*, quod à filio subregimini vsque ad corrigiam caligæ non accipiam ex omnibus, quæ tua sunt. Et Apoc. 10. *Angelus leuauit manum suam ad cælum, & iurauit per viuentem in secula seculorum*. Posset igitur illud, *In nomine tuo leuabo manus meas*, exponi hoc modo, per nomen tuum iurabo, ac per hoc te solum pro vero Deo colam: sed prior expositio communior est.

*Sicut adipe, & pinguedine repleatur anima mea, & labijs exultationis laudabit os meum.*

VI.

Hoc est quod petebat cum leuaret in oratione manus suas ad Deum. Hoc, inquit, peto, vt anima mea repleatur quasi adipe, & pinguedine, id est, repleatur adipe & pinguedine spiritali, quæ non est adeps, & pinguedo proprie (idenim corporale quid est) sed quasi adeps & pinguedo. Nam sicut qui adipe bona, & pinguedine naturali præditi sunt, non autem inflati, aut vento distenti, sani, fortes, rubicundi, & hilares sunt: & contra macie confecti, aridi, debiles, tristes, deformesque sunt: sic qui gratia spiritali, quasi bona adipe pleni sunt, deuoti, feruentes, ac semper gaudentes sunt: & contra qui spiritu carent,

Vu

ad om-



ad omnia spiritualia nauscent, acidia confumuntur infirmi ac debiles nihil boni facere, nihil mali tolerare valent. Sed, vt recte monet sanctus Augustinus, in hac eremo saginam sapientiae, & iustitiae desiderare, & petere possumus; sed tunc demum obtinebimus, cum ad patriam peruenerimus: tunc enim implebitur illud Psalm. 147. *Frumenti adipe saturat te Dominus*, & illud Matthaei 5. *Beati qui esuriunt, & sitiunt iustitiam, quoniam ipsi saturabuntur*: & tunc vere ac perfecte, & sine villo sine, vel tadio labijs exultationis, id est, labijs exultationem resonantibus laudabit Deum *os n. strum*: tunc enim succedet orationi laudatio, quando ita pleni erimus, vt nulla re indigeamus, quod fiet cum Deus erit omnia in omnibus: nunc autem nunquam multa habemus, quin pluribus egeamus, ac per hoc oratione assidua opus habemus.

VII.

*Si memor fui tui super stratum meum in matutinis meditabor in te, quia fuisti adiutor meus.*

Ostendit, in hac etiam vita se perpetuo recordaturum Dei, & beneficiorum eius, & non solum in patria, quando repletus adipe, labijs exultantibus laudabit Deum. *Sz*, inquit, *memor fui tui* nocte etiam profunda dum adhuc iacerem *super stratum meum*, multo magis interdiu, atque adeo tempore matutino surgens meditabor in te, id est, de te cogitabo, & considerabo potentiam tuam, & gloriam tuam; quia tu semper fuisti *adiutor meus*, id est, ideo semper recordabor tui in gratiarum actione, quia tu semper recordatus es mei in auxilio, & protectione. Sanctus Augustinus colligit ex hoc loco, vtilissimum documentum, vt si quis velit inter operandum recordari Dei, atque eius amorem, & timorem semper ante oculos habere, dum operatur: necesse esse, vt antea super stratum, id est, in quiete recordetur Dei, & beneficia eius, ac promissa consideret. Ideo enim plerique mortales inter operandum ita se gerunt, ac si Deum non haberent; quia non ha-

bent tempus aliquod feriatum, in quo colligant se, & meditationi rerum coelestium vacent. Quodam Codices latini habent. *Sic memor fui*: sed recte habet nostra lectio, *Si memor fui*; quoniam sic legunt codices Hebraici, & Graeci, & sancti Patres Hilarius, & Augustinus.

*Et in velamento alarum tuarum exultabo; adhæsit anima mea post te, me suscepit dextera tua.*

Quia dixerat, *tu fuisti adiutor meus*; ne putaretur: iam securus, & de Dei protectione non amplius laborare, subiungit, *Et in velamento alarum tuarum exultabo*, id est continebo me sub vmbra alarum tuarum, & in protectione tua sperans, *exultabo*, securus à Miluo, dum sub omnipotentis Aquilæ pennis latebo. *Adhæsit anima mea post te*. Ex hac protectione, & tam ingentibus beneficijs prouocata *anima mea adhæsit* glutino fortissimæ charitatis post te, id est, vestigijs tuis inhæsit, ab illis nulla tentationum vi separari se patiens. Porro adhærere vestigijs Domini glutino charitatis, non est sterili quodam affectu Deum diligere, sed eius præcepta ex charitate seruare, nam qui diligit me, ait Dominus, *sermonem meum seruabit*: ideo non dixit, *adhæsit tibi* sed *post te*, tibi videlicet obediens, ac subiecta. Ac ne videatur sibi tribuere, quod tam ardentem Deo inhæserit, addit, *me suscepit dextera tua*: id est: ideo sequor te, quia tu me traxisti: ideo te diligo, quia tu prior dilexisti me, ac vt te diligerem, tu me diligendo fecisti. Beatus plane, qui quantumuis in virtute proficiat, sub Deo proficere se intelligit, & semper vt paruulum, & quasi pullum Gallinæ sub alis Dei se collocat. Beatior autem, qui vere dicere potest, *Adhæsit anima mea post te*, qui non solum sperat in velamento alarum Dei; sed etiam ex toto corde ita diligit, vt cum Apostolo dicere possit, *Quis nos separabit à charitate Christi?* Rom. 8. Beatissimus vero, qui proprio experimento, vel potius testimonio reddente spiritu Dei spiritui suo, didicit, se à dextera Dei esse susceptum: ipse enim Dominus de talibus

VIII



bus dicit Ioannis 10. Non rapiet eos quisquam de manu mea. Et nemo potest rapere eos de manu Patris mei. Ego & Pater unum sumus.

XI.

*Ipsi vero in vanum quaesierunt animam meam, introibunt in inferiora terra, tradentur in manus gladij. partes vulpium erunt.*

In duobus ultimis versiculis praedicat Prophetam interitum, & exterminium ultimum eorum, qui persequuntur iustos; & felicitatem, ac beatitudinem sempiternam iustorum. Ipsi vero, videlicet impii persecutores, in vanum quaesierunt animam meam: nam ideo impij persequuntur iustos, ut ipsi soli secure possideant terram, & fruuntur delicijs, & imperio terreno: sed frustra laborant: nam ipsi non possidebunt terram, sed a terra absorbebuntur; & absorpti a terra, & in inferno constituti, non ibi delicijs, aut imperio fruuntur, ac ne quiescent quidem sed addicti erunt perpetuis supplicijs & subiecti erunt daemonibus, quasi lupis, & vulpibus crudelissimis. In vanum quaesierunt animam meam, id est frustra conati sunt vitam meam tollere, neque interficere. Hoc dicere potest quilibet iustus, siue Christus pro se, & pro membris suis. Introibunt in inferiora terra: ecce cur in vanum quaesierunt, nam finis eorum erat, libere terram possidere, sed infra terram deiicientur, in corde terrae, in inferno inferiore cogentur perpetuo habitare. Tradentur in manus gladij, id est, in inferno non quiescent, multo minus fruuntur bonis terrae, sed tradentur in manus gladij, id est, in potestatem tormentorum: supplicia enim, ut instrumenta Dei Iudicis super premi, & irati in miseros sine cessatione descendent. Partes vulpium erunt, id est, non dominabuntur amplius super homines iustos, sed ipsi subiecti erunt daemonibus iniustis, quasi pars, & hereditas ipsorum. Vocantur autem vulpes potius, quam lupi, vel leones, ipsi daemones, quia magis versutia vulpina, quam vi leonina peccatores capiunt, si bique subijciunt. In Hebræo nunc habetur.

Ipsi vero interficere quaesierunt animam meam, pro eo quod habemus, Ipsi vero in vanum quaesierunt animam meam. Sed facile est videre, quid nostri Interpretes secuti sint. Eadem enim vox Hebraica *lesuah*, si legitur cum alijs punctis, & vltima littera tollatur, fiet *lesue in unum*: & hæc videtur esse verissima lectio, quam habuerunt in suis codicibus Septuaginta Interpretes.

לשוא  
לשוא

*Rex vero letabitur in Deo, laudabuntur omnes, qui iurant in eo, quia obstructum est os loquentium iniqua.*

X.

Ecce quomodo omnino in vanum impij laborauerunt: nam non solum ipsi non consequentur bona, quæ optabant, sed neque potuerunt iustos bonis suis priuare. Nam Rex ipsorum Christus, de quo dixerunt Iudæi, *Tolle tolle crucifige eum*, & cuius nomen pagani delere totis viribus laborauerunt, & cui omnes impij contradicebant; viuet, & regnabit in secula, & letabitur in Deo, sedens in dextera Patris gloriosus: & laudabuntur (in die iudicij) omnes qui iurant in eo, qui videlicet hoc tempore, non obstantibus persecutionibus, eum tamquam verum Deum religiose colunt, & per nomen eius iurant, siue illi fidelem obedientiam iurant. Laudabuntur, inquam, omnes Christi fideles, quoniam obstructum est os loquentium iniqua, id est, obstruetur in die nouissimo os omnium iniquorum: tunc enim veritas manifesta erit, & nemo erit, qui eam inficiari possit: proinde impij dicent, ut habetur in lib. sap. c. 5. Ergo errauimus a via veritatis. &, Hi sunt quos habuimus in derisum; & in similitudinem improperij. Nos insensati vitam illorum aestimabamus insaniam, & finem illorum sine honore. Ecce quomodo computati sunt inter filios Dei, & inter Sanctos fors illorum est. Itaque laudabuntur Iusti etiam ab inimicis, quando veritas per diuinum iudicium patefacta, obstruet ora omnium, qui nunc blasphemantes, maledicentes, calumniantes, detrahentes, conuiciantes, mentientes iniqua loquuntur. Hos duos

Vu z

ver-



versiculos aliqui exponunt de Dauide, aliqui de Christo. Vere enim Saul, & ceteri inimici Davidis, qui eum interficere cupiebant, ut ipsi secure regnarent, in vanum laborauerunt: nam & ipsi extincti sunt, & Dauid gloriose regnavit. Sic etiam Iudæi, qui Christum occidere satagebant, ne venirent Romani, & tollerent locum eorum, gentem, ut dicitur Ioan. 11. Noluerunt Agnum habere Regem, & habuerunt vulpem simul & leonem: nam & Romani ciuitatem eorum euerterunt, & Regnum abstulerunt, ipsis maxima strage ferre deletis, & Christus resurrexit, & gloriosissime regnavit, & regnat, & Regni eius non erit finis. Nos tamen sanctum Hilarium, & sanctum Augustinum sequuti, exposuimus de Iustis in vniuersum, & eorum capite ac Rege Christo, ut doctrina, & consolatio Scripturarum ad plures pertineret.

# PSALMVS LXIII.

Titulus, & Argumentum Psalmi.

In finem Psalmus Dauid.

**H**VNC Psalmum de solo Dauide aliqui explicant, qui liberari à persecutoribus cupiebat: aliqui ad solum Christum referunt, cuius passio in hoc Psalmo ex parte describi videtur. Sed nihil impedit, quo minus de Dauide, & de Christo, cuius typum Dauid gerebat Psalmum intelligamus, imo etiam de Martyribus alijsq; iustis, quorum caput Christus est, & in Psalmis, nunc in persona sua, nunc in persona membrorum suorum loquitur. Nos tamen persequemur expositionem sanctorum Patrum, qui de Christo potentissimum totum hunc Psalmum explicauerunt.

## EXPLICAT. PSAL. LXIII.

**E**Xaudi Deus orationem meam, cum deprecor, à timore inimici eripe animam meam.

More suo Propheta primum petit exaudiri, deinde exponit quid cupiat Exaudi, inquit, orationem meam cum deprecor, id est, fac obsecro ne frustra deprecor. S. Hilarius legit, Cum tribulor, pro eo, quod nos habemus, cum deprecor: sensus est idem; sed nescio quid sequutus sit: nam vox Hebraica *beschicchi*, significat, submisce loqui, quod est signum humilitatis, & reuerentiae: & sic Anna orabat, 1. Reg. 1. ut tantum labia mouerentur, & vox penitus non audiretur: vox etiam Græca precari, nō tribulari significat. A timore inimici eripe animam meam: hæc est petitio, quæ duobus modis intelligi potest, primum, ut petat liberari à timore inimici volentis occidere, tollendo materiam timoris, efficiendo videlicet, ut inimicus non possit, vel non velit occidere: & hæc videtur literalis expositio: secundo, ut petat liberari ab ipso timore humano, non tollendo materiam timoris, sed augendo charitatem, & constantiam, ut non timeat mortem carnis, sed timeat mortem peccati: siue, ut non timeat homines, qui possunt corpus occidere, & post hac non habent amplius, quid faciant: sed timeat Deum, qui potest, & corpus, & animam perdere in gehennam, ut Dominus monet Matt. 10. Et hæc est expositio sancti Augustini spiritualis, & vtilissima: nam liberari à timore mundano, & radicari in timore diuino in omni tribulatione, optimum est. Sed in hoc posteriore sensu Christus in persona membrorum suorum infirmorum loquutus est: in priore autem, in persona etiā sua loquutus esse videtur: sic enim in horro pridie passionis timere, & pauere dignatus est, & orare, Matth. 26. Pater si fieri potest, transfer calicem hunc à me: sic hoc ipsum per Prophetam prædicere voluit.

Protegi me à conuentu malignantium, à multitudine operantium iniquitatem.



In hoc versiculo exaudium se fuisse Christus ostendit, & quod de se dicit in præterito, idem membris suis promittit in futurum: *Protexisti, inquit, me à conuentu malignantium.* Notum est ex Euangelio, quam sæpe conuenerint Principes Iudæorum aduersus Iesum, ut eum morti traderent, ac doctrinam eius & nomen extinguere: nec solum Principes in Concilium conuenerunt ad consultandum, sed etiam multitudo militum ac satellitum conuenit ad operandum iniquitatem, ad Christum videlicet illudendum, flagellandum & crucifigendum. Sed protexit eum Deus, ut neque conuentus malignantium Iudæorum, neque multitudo Gentium operantium iniquitatem illi noceret. Permisit quidem Deus Christi carnem flagellari & cædi, sed & flagella & mors mundi salutem operata, in gloriam & triumphum versa sunt: & quod in capite præcessit, in membris quoque factum est, & fiet. Martyres enim protexit Deus, ut occisio corporis non solum non eis obesset, sed etiam prodesset ad gloriam sempiternam: & pios omnes Deus proteget, ut tribulatio ac persecutio cooperetur eis semper in bonum. Illud, *protexisti*, in Hebræo est, *proteges*, siue *abscondes*: in Græcis plerisque est, *protege*, & sic legunt Theodoretus & Euthymius: tamen Hilarius, Hieronymus & Augustinus in Commentario legunt, *protexisti*: quæ lectio facile cum Hebraica concordatur: nam apud Hebræos sæpe futurum ponitur pro præterito, & contra: sed in sensu nulla varietas est.

III.

*Quia exaceruerunt ut gladium linguas suas, intenderunt arcum rem amaram, ut sagittent in occultis immaculatum.*

Hæc referuntur ad conuentum malignantium, qui lingua pugnarunt, non manibus, nimirum consultando, accusando, insistendo apud Iudicem Pilatum, ut Christum de medio tolleretur: comparat autem Propheta verba malignantium Iudæorum gladio & sagittis, quoniam gladius de proximo ferit, & præsentem: sagitta longe positum, & absen-

tem vulnerat: sic igitur Iudæi palam præsentem Christum gladio linguæ occiderunt, cum eum coram in concilium suum adductum accusarunt, & quasi conuictum damnarunt, dicentes: *Reus est mortis*, & postea ad tribunal Pilati iterum accusarunt, quasi seductorem, & ut crucifigeretur, sæpe ac sæpius institerunt, & hoc modo gladio linguæ iterum interfecerunt: *Quia, inquit, exaceruerunt ut gladium linguas suas, ut acutis interrogationibus eum ferirent, dum eum examinerunt, & lethifero istu eum occiderent, dum condemnarunt. Intenderunt arcum rem amaram, id est, insidias tetenderunt, quæ insidiæ res amaræ ac lethiferæ erant, ut sagittent, id est, ut sagittarent in occulto, id est, ex insidiis immaculatum: hic enim erat finis, & quasi scopus insidiarum, ut Christum maculatum & peccatorem, id est, blasphemum & seductorem falsis testimoniis & accusationibus ostenderent, qui tamen reuera immaculatus erat, & ad hoc venerat in mundum, ut maculas peccatorum ab aliis abstergeret. Illud, *quia*, non est in omnibus codicibus: nam in Græcis & quibusdam Latinis habetur, *qui*, res est parui momenti, & vox Hebræa ambigua est, & tam *qui*, quam *quia*, significare potest. S. Hilarius legit, *qui*, S. Hieronymus & S. Augustinus, *quia*.*

*Subito sagittabunt eum, & non timebunt, firmauerunt sibi sermonem nequam.*

IV.

Dixerat, conuentum malignantium iam intendisse arcum, ut sagittarent immaculatum: nunc addit, omnino id futurum, eo quod obfirmati & obdurati sint in malo: præuidebat enim Spiritus sanctus, & prædicebat, obstinationem pene incredibilem



Iudæorum, quam etiam clarissime prædixit Isaias cap. 6. Cuius vaticinii meminit S. Ioannes c. 12. *Subito, inquit, sagittabunt eum*, id est, de improviso sagittas insidiarum emittent, & *non timebunt*, id est, audacter sagittabunt, non cogitantes timorem Domini, non formidabunt diuinum iudicium, non reuerebuntur oculos Dei omnia videntis. *Firmauerunt sibi sermonem nequam*, id est, ideo non timebunt sagittare immaculatum, quia obstinati & obdurati sunt, & iam stabilierunt firmiter sententiam illam plenam iniustitiæ, qua semel dixerunt: *Reus est mortis*. Hinc enim postea cum Pilatus multis rationibus conaretur eos à seclere reuocare, semper obstinate clamauerunt: *Crucifigatur*.

V. *Narrauerunt, vt absconderent laqueos, dixerunt, quis videbit eos?*

Addit Propheta ad obstinationem malignantium Iudæorum, etiam hypocrisim, qua tegere voluerunt inuidiam & malignitatem suam sub tegumento obsequij ad Cæsarem. Christum enim propter inuidiam persequebantur, quod Pilato quoque notum erat. *Sciebat enim* (inquit S. Matthæus c. 27.) *quod per inuidiam tradidissent eum*: sed illi hanc inuidiam tegebant, dicentes: *Hunc inuenimus subuertentem gentem nostram, & prohibentem tributa dari Cæsari*: & rursum: *Si hunc dimittis, non es amicus Cæsaris: omnis enim, qui se facit Regem, contradicit Cæsari*. Hoc ergo est, quod dicit: *Narrauerunt, vt absconderent laqueos*, id est, dixerunt intra se, abscondamus insidias, fingamus nos moueri ob iniuriam Cæsaris: quis videbit hanc simulationem? quis propterea nos punit? quasi vero Deus non omnia videat: vel parum sit, videri à Deo, qui supremus est Iudex.

VI. *Scrutati sunt iniquitates, defecerunt scrutantes scrutinio.*

Pergit Propheta in explicanda & amplificanda malignitate Iudaica, ac dicit, Iudæos

non contentos insidiis & hypocrisi, addidisse, vt diligentissime scrutarentur & inuestigarent iniquitates, si quas inuenire possent in Christo. Hinc enim *Principes Sacerdotum, & omne concilium quærebant falsum testimonium contra Iesum*, & quamuis testimonia conuenientia non erant, dicebant tamen: *Nihil respondes ad ea, quæ isti contra te testificantur?* Matthæi 26. Id enim est *scrutari iniquitatem*, quærere falsa testimonia, & iis quasi veris scienter abuti. *Defecerunt autem scrutantes scrutinio*, quia nihil inuenerunt, quod colorem veritatis habere videretur: & quia Dei iudicio tanta cecitate percussi sunt, vt non aduerterent se ab omnibus deridendos, quod etiam dormientes testes adduxissent, cum ad custodes sepulchri dixerunt: *Dicite quia vobis dormientibus venerunt discipuli noctu, & furati sunt eum*, quam cæcitate notauit & expendit S. Augustinus. Parum autem refert, siue legamus, *scrutantes scrutinio*, siue *scrutantes scrutinia*, siue *scrutantes scrutationes*: omnia enim in idem recidunt.

*Accedet homo ad cor altum, & exaltabitur Deus.*

VII.

Exposita peruersitate malignantium inimicorum, prædicit nunc Propheta, quid Christus egerit tempore tantæ persecutionis. *Accedet, inquit, homo ad cor altum*, id est, Christus, quia homo est, accedet, offeret, atque obiciet se quasi infirmus, & quasi nesciens, & tamen vere penetrans profunda cordis ipsorum accedet ad illas omnes passionem, quas in occulto corde suo disposuerunt, id est, perferet patienter & humiliter iniurias, quas illi alto, profundo & prauo corde machinati sunt. Potest etiam per *cor altum*, intelligi cor ipsius Christi, vt sensus sit, *Accedet homo Christus ad cor altum*, id est, ingreditur cor suum profundum & secretum, quo disposuit obicere Iudæis formam serui percutiendam, & celare intus formam Dei, per quam resuscitandus erat. Vtramque expositionem attingit S. Augustinus. *Et exaltabitur Deus*, id



id est, humiliabit se vt homo, exaltabitur vt Deus, quia tunc maxime demonstrabitur Sapientia diuina vincens malitiam humanam, quando apparebit, Christum moriendo mortem destruxisse, & resurgendo vitam reparasse. Hæc est expositio verborum editionis nostræ vulgatæ, sed sciendum est, hanc lectionem nostram à multis oppugnari & reici, quoniam textus Hebraicus & Græcus repugnare videntur. In Hebræo sic legitur ad verbum: *Et cogitatione viri, & corde profundo, & sagittabit eos Deus: pro eo quod nos habemus: Accedet homo ad cor altum, & exaltabitur Deus.* Sed facile conciliabitur hic textus cum nostra editione: nam vox Hebraica, *chereb*, quæ *intimum*, siue *cogitationem* significare potest, si legatur cum aliis punctis, *charab*, significabit, *accescit*, siue *accedet*, & sic leguntur LXX. Interpretes, qui vetterunt, *Accedet homo.* Illud autem, *& corde alto*, potest etiam legi, *& cor altum*, quia non habent Hebræi diuersos casus, & tota difficultas est in particula, *&*, pro qua nos habemus, *ad*, & quamuis in Græcis libris, qui nunc extant, habeatur, *& cor altum*: tamen cum veteres Patres Hilarius, Hieronymus & Augustinus legant in Commentario, *ad cor altum*, credibile est, eos ita in Græcis textibus inuenisse: nam erant periti linguæ Græcæ, & ex iis Hieronymus in Commentario Psalmos exponit ex interpretatione Septuaginta virorum. Mirum autem est, quod Cornelius Iansenius, vir doctissimus, conetur ostendere, ab Augustino lectum fuisse, *& cor altum*: cum Augustinus sæpissime repetat, *ad cor altum*, & ne semel quidem, *& cor altum*: corruptum autem fuisse textum Augustini in tam multis locis, & in omnibus editionibus, verisimile non est, credibilis autem est, corruptum fuisse textum Hebraicum post interpretationem Septuaginta virorum, in particula, *&*, sicut corruptum esse constat in particula, *chereb*, vt ostendimus, præsertim cum ista lectio (*Accedet homo, & cor altum*) nullum fere sensum commodum recipiat: quid enim significat, *Acce-*

*det homo & cor altum?* Illud autem, *& sagittabit eos Deus*, pro, *& exaltabitur Deus*, ex errore Rabinorum natum esse videtur: nam vox Hebraica, *vaiozem*, si deducatur à verbo, *iarah*, significat, *sagittabit eos*: si deducatur à verbo, *rum*, in coniugatione, *hophal*, significat, *exaltabitur*, & sic acceperunt eam vocem Septuaginta viri Rabinis omnibus doctiores.

*Sagitta paruulorum factæ sunt plagæ eorum, & infirmata sunt contra eos linguæ eorum.*

Hoc fecit potentia & sapientia Dei, de qua dictum est, *& exaltabitur Deus*, vt plagæ ab aduersariis Christo inflictæ, tam parum illi nocuerint, ac si factæ essent à sagittis infantium paruulorum: nam & tela infantium leues festucæ sunt, & manus eorum infirmæ ac teneræ, quæ nihil detrimenti adferre possunt. Et verè quales plagas Christo intulerunt Iudæi, cum triduo, vel potius in momento post triduum, ita curatæ sint, vt corpus eius impassibile & immortale surrexit? *Sagitta*, inquit, *paruulorum* fuerunt, quibus *factæ sunt plagæ ac vulnera eorum.* Et *infirmata sunt contra eos linguæ eorum*, id est, & calumniæ ac blasphemix eorum infirmatæ sunt, quia nihil ei nocere potuerunt, ac si gladij plumbei fuissent, sed *infirmata sunt contra eos*, id est, in detrimentum & poenam ipsorum calumniantium & blasphemantium. Aludit Propheta ad illud, quod supra dixerat: *Exacuerunt vt gladium linguas suas, intenderunt arcum, rem amaram*, ac si diceret, laborauerunt, vt gladium linguæ exacuerent, atque vt sagittas lethales ex arcu iacerent, sed linguæ, gladius plumbeus, & sagittæ, tela infantium euaserunt. Atque hoc ipsum de persecutoribus Martyrum, omniumque iustorum dici potest: dies enim Iudicii ostendet, quam parum, ac potius nihil eis nocuerit crudelitas persecutorum, quando stabunt in magna constantia aduersus eos, qui se angustauerunt.

Ex

יוזם  
יה  
רום

VIII.

קרב  
קרב



Ex Hebræo iuxta puncta Rabinorum non legitur, *sagitta paruulorum*, sed, *sagitta repentina*. Facile autem est videre, unde sit nata diuersitas: nam vocem Hebraicam legerunt, *pitheom*, quod significat, *repente*, aut, *repentinum*: cum Septuaginta legerint, *pethaim*, quod paruulos significat.

IX.

*Conturbati sunt omnes, qui videbant eos, & timuit omnis homo.*

Explicat Propheta, quid consecutum sit ex eo, quod per Christi resurrectionem factæ sint Iudæorum sagittæ, sagittæ paruulorum, & infirmatæ sint, ac prorsus euauerint calumniæ & contumeliæ eorum. *Conturbati sunt*, inquit, *omnes, qui videbant eos*, Iudæos videlicet, attonitos & confusos, quando ab Apostolis audiebant, eum, quem occiderant, surrexisse à mortuis, in cælum ascendisse, & venturum Iudicem viuorum & mortuorum; & ea quæ audiebant, signis magnis ac diuinis approbari cernebant: & tunc *timuit omnis homo*, id est, omnes, qui recta ratione utebantur, cœperunt contremiscere, & expauescere, & dicere: *Quid faciemus viri fratres?* De hoc timore sancto sic scribit S. Lucas Act. 2. *Fiebat autem omni anima timor*: multa quoque prodigia & signa per Apostolos in Ierusalem fiebant, & motus erat ingens in vniuersis. Parum autem refert, quod S. Hieronymus ex Hebræo vertit: *Fugerunt omnes, qui videbant eos*: nam vox Hebraica, *nadad*, quæ hoc loco habetur, vtrumque significat, & fugere, & commoueri: & omnis qui commouetur ac turbatur, fugit, si non pedibus, saltem affectu; contrahit enim se, & latebras quærit: timor enim fuga quædam est hominis ad se ipsum: sicut è contratio desiderium & amor effundunt hominem extra se.

X.

*Et annunciauerunt opera Dei, & facta eius intellexerunt.*

Illi, qui sancto timore correpti sunt, ac in primis Apostoli, qui primi Christo resurgente, atque eis apparente timuerunt, vt dicitur Luc. 24. Illi, inquam, *annunciauerunt opera Dei*, id est, prædicare cœperunt Christi Incarnationem, Passionem, Resurrectionem, Doctrinam, Miracula, & similia. *Et facta eius intellexerunt*, particula enim, &, passim in Scripturis accipitur pro *quia*. Apostoli ergo edocti, tum ab ipso Christo, qui post resurrectionem aperuit illis sensum, vt intelligerent Scripturas, Lucæ 24. tum à Spiritu sancto, qui superueniens in eos, docuit illos omnem veritatem, Ioan. 16. *Facta eius intellexerunt*, & eadem ipsa toti mundo annunciauerunt.

*Letabitur iustus in Domino, & sperabit in eo, & laudabuntur omnes recti corde.*

XI.

Ex illa Apostolica prædicatione id consequetur, vt omnis vere iustificatus, id est, iustus ex impio factus, *letetur deinceps in Domino*, & *speret in eo*, deposito metu serui & mundano; *fructus enim spiritus iustificantis est charitas, gaudium, pax*, Galat. 5. Et tandem in fine sæculorum *laudabuntur omnes recti corde*; omnes, qui in iustitia perseuerauerunt, & per hoc rectum cor habuerunt ad Deum, non sapientes, neque volentes, nisi quæ Deo placeant, illi à Deo laudabuntur in theatro totius Mundi, quando è contrario omnes prauī corde in theatro eodem cum

summa ignominia confundentur.

\* \*  
\*



## P S A L M V S LXIV.

## Titulus, &amp; Argumentum.

In finem Psalmus David. Canticum Hieremias, & Ezechielis populo transmigrationis: cum inciperent exire.

**T**itulus huius Psalmi in codicibus Hebraicis, non continet nisi prima illa verba, In finem Psalmus David. Apud Hilarium quoque non habentur alia verba Theodoretus autem affirmat, nihil aliud haberi in editione Græca Septuaginta Interpretum; cetera addita esse à Posterioribus. Tamen non videtur contemnendum, quod additur, Canticum Hieremias, & Ezechielis populo transmigrationis cum inciperent exire: nam hæc verba habentur in antiquis codicibus, & leguntur à S. Hieronymo; & Augustino in Commentario huius tituli. Quicunque autem addidit hanc partem tituli, non voluit significare ne ipsa cantatū fuisse hunc Psalmū à Hieremia, & Ezechiele, quando populus incipiebat exire ex captivitate Babylonica. Nam Hieremias nunquam fuit in Babylonia; & sine dubio mortuus erat quando cepit solui captivitas. Credibile est etiam Ezechielem tunc fuisse defunctum, ut Epiphanius testatur in vita Ezechielis. Tribuitur igitur hic Psalmus (qui re vera Davidis est) Hieremia, & Ezechieli, quoniam isti duo Propheta prædixerunt reversionem populi de Babylone in Hierusalem: & fingitur decantatus ab his Prophetis initio egressionis Hebræorum de captivitate, ut intelligeremus hunc Psalmum exponi debere de reditu filiorū Israel à captivitate in patriā. Et quoniam ea liberatio de captivitate typus fuit liberationis generis humani de captivitate Diaboli, altiore sensu Ps. prædicat conversionem infidelium ad Ecclesiam, & reditū spiritualium peregrinorum ad patriam cælestē: nam & Ecclesia, & cælestis patria per Hierusalem in sacris literis significari solent.

## EXPLICAT. PSAL. LXIV.

**T**E decet hymnus Deus in Sion, & tibi reddetur votum in Hierusalem.

Incipit Propheta in Persona populi Dei à quodam verissimo principio, ex quo colligitur desiderium iustum redeundi ad patriam. Principium verissimum est conveniens esse, ut populus Deum laudet, & vota illi offerat in Hierusalem. Laus enim debetur bono, & summa laus summo bono, quod est Deus: & hæc laus debet exhiberi, ubi bonum, quod laudatur, est notum. Deus autem notus non erat in Babylone, sed in Hierusalem, Ideo in Hierusalem Deus à populo laudandus erat. Sic etiam vota, ac præsertim sacrificiorum, ibi soluenda sunt, ubi templum, & altare inuenitur: templum Dei, & altare non erat nisi in Hierusalem; igitur in Hierusalem vota populi Dei soluenda erant. Ex hoc principio recte colligitur, populum Dei iure desiderare, ac petere reditum in patriam. Et si hoc erat verum de reditu ad terrenam Hierusalem, multo verius est de reditu ad cælestem Hierusalem, ubi multo notior est magnitudo divinæ bonitatis, & ubi est tabernaculum non manufactum, & altare aureū, in quo igne perfectissimæ charitatis sese toros offerunt omnes ciues Hierusalem in holocaustum Deo. Veniamus ad verba Psal. *Te decet hymnus Deus in Sion*, id est, convenit omnino, ut populus tuus tibi Deo suo laudes canat in Sion, id est, ubi nota est magnitudo tua, non in terra aliena, ubi Dij lignei, & lapidei, aurei, & argentei laudantur. *Et tibi reddetur votum in Hierusalem*, id est, convenit quoque ut idem populus tibi soluat vota gratiarum actionis in Hierusalem, ubi nota sunt beneficia tua, & vota sacrificiorum, ubi est templum, & altare tuo nomini dicatum, non in Babylone, ubi nec agnoscuntur beneficia tua, neque sunt templa, & altaria, nisi Idolorum, vel Dæmonum: nam omnes Dij gentium Dæmonia, ut dicitur in Psal. 95. In Hebræo pro verbo, *decet* est nomen, silentium. Sic enim vertit Sanctus Hieronymus. *Tibi silentium, laus Deus in Sion*. Sed Septuaginta Interpretes viri doctissimi per vocem, *dumina*, non existimaverunt significari *silentium*, quod deducitur à verbo, *dum*, sed convenientiam, ut sic loquar, à verbo, *dama*, quod significat,



cat, assimilari. Similitudo enim nihil est aliud, nisi conformitas, & conuenientia vnius ad aliud. Laus autem conuenit maxime bonitati, & ideo soli Deo propriissime conuenit laus, quia solus Deus propriissime bonus est, dicente Domino, *Nemo bonus, nisi solus Deus*, Luc. 18. Sed tamen vox, *silentium*, quamuis non sit ex mente Septuaginta Interpretum, tamen vtilissimum documentum continet: nam laus Dei, quæ ore cantatur, deberet sequi ex præcedenti silentio, atque attenta admonitione magnitudinis Dei: qui enim cantant absque præuiotali silentio, *labijs Deum honorant, cor autem eorum longe est à Deo*. Itaq; recte dicitur, *Tibi silentium, laus Deus in Sion*, id est, tibi Deus primum conuenit tacita admiratio magnitudinis tuæ: deinde constituto corde in hoc silentio, debetur tibi laus in Sion, & votum in Ierusalem. Porro vox, *Ierusalem*, non habetur in Hebræico codice: sed vel excidit vitio librariorum: vel addita est ab Interpretibus explicandi gratia.

II. *Exaudi orationem meam: ad te omnis caro veniet.*

Ex eo quod debetur Deo laus in Ierusalem, orat populus, vt sibi concedatur ex captiuitate redire in Ierusalem ad ipsum Deum laudandum: & non solum optat sibi reditum concedi, sed vt omnes homines conuertantur ad Deum, & veniant per fidem in Ierusalem, quæ est in terris, id est ad Ecclesiam, & postea per visionem in Ierusalem, quæ est in cælis: sicut enim Deus vult omnes homines saluos fieri, & ad agnitionem veritatis venire, 1. Timot. 2. sic etiam populus Dei cupit, & orat, vt omnes homines veniant ad Deum agnoscendum, & laudandum. *Exaudi*, inquit, *orationem meam*, quæ est, vt te auxiliante quam citissime canam tibi hymnum in Sion, & reddam tibi votum in Ierusalem. *Ad te omnis caro veniet*, id est, si me exaudieris, non ego solus, sed omnes homines ad te laudandum, & vota tibi reddenda venient. Id. n. cupio, & peto, & quod in me erit, verbis, & exemplo, vt id fiat, laborabo. Quod omnis caro per figuram intellectio-

nis omnes homines significet; perspicuum est ex multis Scripturæ locis. Gen. 6. *Omnis caro corruerat viam suam*. Ioel. 2. *Effundam de spiritu meo super omnem carnem*. Isai. 40. *Videbit omnis caro salutare Dei*. Matth. 24. *Nisi breuiati fuissent dies illi, non fieret salua omnis caro*. Ioann. 17. *Dedisti ei potestatem omnis carnis*. Sanctus Augustinus per omnem carnem intelligit omne genus hominum, quia de omni genere aliqui veniunt ad Deum per fidem, & saluantur, videlicet, ex diuitibus, ex pauperibus, ex doctis, ex indoctis, ex viris, ex feminis, ex Iudæis, ex Romanis, ex Græcis, ex Barbaris, &c. Non enim omnium est fides, neq; omnium est salus, sed eorum, qui præordinati sunt ad vitam æternam, vt dicitur Act. 13. In Hebræo habetur, *Donec tibi omnis caro veniat*: sed Septuaginta Interpretes non legerunt, *hadecha*, *donec tibi*: sed *hadecha*, *ad te*: & hæc est verior lectio.

*Verba iniquorum præualuerunt super nos, & impietatibus nostris tu propitiaberis.*

Hæc est altera ratio, cur populus Dei petat à Deo liberationem de captiuitate, & reditum in patriam, quia videlicet ex peccatis parentum traditus sit in captiuitatem: qui enim erant in Babylone, cum soluta est captiuitas, fere omnes in captiuitate nati erant, ac per hoc parentum peccatis captiuitatem suam tribuere poterant: sicut nos omnes captiuitatem sub Diabolo primis parentibus debemus. *Verba iniquorum præualuerunt super nos*, id est, mala opera iniquorum parentum nostrorum præualuerunt super nos filios eorum, nosque grauauerunt iugo durissimæ captiuitatis: sed tu Pater misericordissimus propitiaberis impietatibus nostris, quas à parentibus hereditauimus, & quas ipsi eorum exempla imitati superaddidimus. Quod autem per *verba*, interpretati sumus, *opera*, nemo mirabitur, qui in Scripturis verisatus sit. Sic Luc. 2. *Videamus*



deamus hoc verbum, quod factū est, quod fecit Dominus, & ostendit nobis. Psal. 21. Verba delictorum meorum. Psal. 104. Posuit in eis verba signorum suorum. 2. Reg. 1. Quod est verbum quod factum est, indica mihi.

Beatus quem elegisti, & assumpsisti: inhabitabit in atriis tuis.

Hæc est tertia ratio, cur populus Dei desideret, & oret reuocari in patriam: quæ ratio ducitur à felicitate patriæ. Beatus, inquit, est omnis ille, quem tu elegisti ab æterno, & assumpsisti in tempore ad tantam dignitatem, vt sit ciuis Sanctorum, & domesticus Dei. Is enim inhabitabit in atriis tuis, id est, in domo tua manebit: ponitur enim pars pro toto, atrium pro palatio.

Replebimur in bonis domus tuæ: sanctum est templum tuum mirabile in æquitate.

Bona spe fretus populus Dei, iam numerat se inter beatos illos, qui habitabunt in domo Dei, ac dicit in ea domo se bonis omnibus abundaturum, imo ita satiandum, vt nihil desideret amplius, hic enim versiculus etiam si vtrumque conuenire possit terræ Ierusalem, vel Ecclesiæ militanti, tamen absolute soli cælesti patriæ conuenit. Replebimur, inquit, in bonis domus tuæ, id est, replebimur ex bonis domus tuæ, vt nihil nobis desit, quod foris querendum sit. Quid enim boni deesse poterit in domo illius, qui fecit omnia, cui seruiunt omnia, qui erit omnia in omnibus, in quo sunt thesauri bonorum infiniti? De hoc dicitur in Psal. 102. Qui replet in bonis desiderium tuum, & in Psal. 16. Satiabimur, cum apparuerit gloria tua. Sanctum est templum tuum, mirabile in æquitate. In illa sancta ciuitate Ierusalem hoc erit prorsus mirabile, & amabile, quod nos in Deo habitabimus, tanquam in domo, & ipse habitabit in nobis tanquam in templo: ipse erit domus nostra, & nos domus eius:

iuxta illud, Manete in me & ego in vobis, Ioan. 15. Et illud, Qui manet in charitate, in Deo manet, & Deus in eo, 1. Ioan. 4. Et si hæc reciproca mansio inchoatur in via; certe multo magis perficitur in patria. Porro templum hoc Dei sanctum, est mirabile in æquitate, id est, in iustitia, vt vox Hebrææ, *bersedek*, demonstrat. Mirabile enim valde erit, videre homines in peccato natos, & peccatis ita obnoxios, vt de illis diceretur, Psal. 13. Corrupti sunt, & abominabiles facti sunt in iniquitatibus, non est qui faciat bonum, & Prou. 28. Septies in die cadet iustus, & Psal. 142. Non iustificabitur in conspectu tuo omnis viuens: qui tamen postea ad illam sanctitatem, iustitiamque perueniunt, vt neque peccatum vllum habeant, neque habere possint, & euadant in templum sanctum, cuius sanctitatem, & iustitiam ipsi etiam sancti Angeli admirentur in cælis. In Hebræo, pro, mirabile, habetur terribile. Sed quoniam admirabilia terrorem venerationis incutiunt, recte Septuaginta Interpretes, mirabile, posuerunt, vt indicarent, terribile, quod legitur in Hebræo, non esse terribile, quia terreat, sed quia admirationem magnam pariat.

Exaudi nos Deus salutaris noster, spes omnium finium terræ, & in mari longe.

Redit ad orationem, & adfert nouum motuum, vt exaudiri debeat, videlicet, quia Deus Saluator est, & in eo sperant omnes gentes. Exaudi, inquit, nos Deus, dum à te petimus liberationem à captiuitate, & reuocationem in patriam: exaudiri autem petimus confidenter, quia tu es Saluator noster, quippe qui sæpe ab hostibus, & persecutoribus nos saluasti: tu etiam es spes omnium finium terræ, id est, in te sperant omnes gentes totius terræ vsque ad vltimos eius fines: nec non tu spes es in mari longe, id est, omnium habitantium Insulas maris longissime positas. Hæc dicit Propheta præuidens conuersionem omnium gentium ad cultum veri Dei: & dicit in præsentem, Tu es spes omnium



VII.

*finium terræ*, quia Prophetis erant Præsentia, quæ in se futura erant.

*Præparans montes in virtute tua, accinctus potentia qui conturbas profundum maris: sonum fluctuum eius.*

Addit aliam rationem à potentia Dei maxima, cui facile est, si velit, populū suum de captiuitate liberare, atque ad patriam, vnde pulsus fuerat, reducere. Ostendit autem omnipotentiam Dei ex duobus contrariis: nam Deus omnipotentia sua ita firmiter stabiluit terram, vt montes eius nulli ventī commouere possint: & contra ita fecit elementum aquæ liquidum, & mobile, vt quauis aura inoueat, *Præparans montes in virtute tua*, id est, tu es Deus qui præparasti, siue stabiluisti (vtrunque enim significat vox Hebraica, *cum*) montes altissimos in virtute tua, *Accinctus potentia*, id est, potentia tua firmasti montes, quia accinctus es potentia, id est, ab omni parte circumdatus, & armatus potentia. *Qui conturbas profundū maris, sonum fluctuum eius.* In Hebræo habetur, *qui mitigas sonitum maris sonitum fluctuum eius*. Sed Septuaginta videntur non legisse, *masbiach*, quod est *mitigās*, siue *compescens* sed, *mauhhiach*, quod est, *conturbans*, & tunc sensus erit, tu conturbas profundum maris, excitans sonitum fluctuum eius. At si non videatur verisimile Septuaginta legisse, *mauhhiach*, pro *masbiach*, vt textus Græcus, & Latinus cum Hebræo conueniant, & vnus explicetur per alium, per illud verbū *conturbas*, non erit intelligenda commotio & concitatio tempestatis maris; sed comminatio & terrefactio, qua compescatur fremitus maris: quomodo Dominus comminatus est mari turbato dicens, *Tace opumtesce*, Marc. 4. Confirmatur hæc expositio ex eo; quod idem verbum, *conturbas*, refertur etiam ad sonitum fluctuum eius, *Qui conturbas*, inquit, *profundum maris, & conturbas sonitum fluctuum eius*: non recte autē diceretur, qui conturbas sonitum fluctuum nisi sensus esset, qui terrendo, & comminando compescis sonitum turbati maris. In Hebræo eadem vox habetur, cum dicitur in

Latino; *profundum*, & cum dicitur sonitus, quare per profundum intelligere debemus hoc loco, fremitum maris; qui ex imo mari erumpit: deinde per sonitum fluctuum, altiore vocem, quam fluctus turbati maris emittunt. Illud etiam non est omittendum, in Hebræo haberi omnia in tertia persona. *Præparans montes in virtute sua*, Deus videlicet, *accinctus potentia*; *conturbans*, siue compescens fremitū maris, sonitum fluctuum eius. In editione Latina habentur in secunda persona, sed, sensus est omnino idem.

*Turbabuntur gentes, & timebunt, qui habitant terminos à signis tuis, exitus matutini & vespere delectabis.*

Quemadmodum versiculo superiore potentiam Dei Propheta ostenderat ex montium stabilitate, & fluctuatione maris: ita in hoc versiculo demonstrat sapientiam Dei, qui cœlestibus signis nunc terret; nunc exhilarat humanum genus. *Turbabuntur*, inquit, *gentes*, omnes videlicet gentes vniuersæ terræ, Id quod explicat clarius, cum subiungit, *& timebunt, qui habitant terminos*, id est, turbabuntur; & timebunt omnes homines, vsque ad illos, qui habitant terminos terræ, *Turbabuntur autem*: & timebunt à signis tuis, id est, à conuersionibus, tonitruiis, & fulminibus cœlestibus, iuxta illud 1. Reg. 2. *Formidabunt Dominum aduersarij eius, super ipsos in cœlis tonabit*: nihil est enim horribilius, & formidolosius, & quod fortissima etiam pectora metu concutiat, & dissoluat, quam fulmen cœlestē. Sed idem Deus per ortum, & occasum solis humanum genus mirifice recreat: nam oriente sole relictis artibus homines læti ad opera exeunt, & occidente sole fatigati respirare incipiunt, & rursum nihil iucundius ortu fulgentissimi; & pulcherrimi luminis: nihil item delectabilius conspectu cœli syderibus innumerabilibus; quasi gemmis preciosissimis ornati. *Exitus*, inquit, *matutini, & vespere delectabis*, id est, exortum auroræ, & crepusculi vespertini delectabiles facies. In Hebræo, pro, *turbabuntur gentes*, habetur, *multitudo gentium*, sed

משבית  
מבעת

כן



המון  
המו

sed Septuaginta Interpretes non legerunt, *hamon*, quod multitudinem significat; sed *hamu*, quod significat turbati sunt. Illud autem, *delectabis*, in Hebræo est, *laudare*, siue *inubilare facies*: quod intelligi debet efficeret, non formaliter: dicitur enim aurora, & vespera *laudare*, seu *inubilare*, quia facit homines præ lætitia exultare, & laudare. Sicut etiam cum dicitur in textu Latino, *Delectabis exitum matutini, & vespera*, intelligi debet per figuram, quia exortus auroræ, & vesperæ delectat homines illa varietate, & vicissitudine nocturni, ac diurni. Miratus sum, cur quidam ex recentioribus, vir doctus scripserit pro voce exitum, in Hebræo esse vocem, quæ ad solum diei exitum referatur, & non possit referri etiam ad exitum noctis, nam, *mot sab*, exitum in genere significat, à verbo, *iasa* quod est exire. Et h exitus in Hebræo significaret ortum diei, non fuisset opus addere, *bocher*, quod tempus matutinum significat, ut revera in textu Hebræo est additum. Sic enim habetur ad verbum, *exitus ipse mane, & ipse vespera laudare facies*.

IX.

*Visitasti terram, & inebriasti eam, multiplicasti locupletare eam.*

Laudavit potentiam, & sapientiam Deinunc adiungit laudes bonitatis, siue beneficentiæ eiusdem, quæ maxime ostenditur in admisione terræ, & aquæ, ex qua oriuntur omnes fructus terræ, sine quibus hæc vita non ducitur. Terra enim si non irrigetur aquis, & aqua nisi misceatur terræ, nihil omnino producit. *Visitasti*, inquit, *terram*, quæ per te erat inanis, & vacua; sed visitatione tua facta est fecunda, & plena. Visitatio enim Dei efficitur est, & non simplex visio, sed prouisio. Explicat quomodo visitauerit terram, dum adiungit, & *inebriasti eam*, id est, aquis ad facietatem irrigasti, & hac irrigatione *multiplicasti locupletare eam*, id est, multum valde illam locupletem, & copiis omnibus refertam reddidisti.

X.

*Flumen Dei repletum est aquis, parasti cibum illorum: quoniam ita est preparatio eius.*

Explicat id ipsum clarius, per flumen riuu aquarum intelligendi sunt: nam in Hebræo est, *pheleg*, quod diuisionem significat. Itaque sensus est, *Flumen Dei*, id est, riuu aquarum à Deo effecti ad irrigandam terram, pleni sunt aquis ex diuina prouidentia, & benignitate: sic enim ita tu Deus *preparasti cibum eorum*, id est, hominum, & animantium cæterorum: *quoniam ita est preparatio eius*, id est, quoniam sic fundata, & disposita est terra, ut per aquarum irrigationem fecundetur, & fructus suos pariat.

פלה

*Riuos eius inebria, multiplica genimina eius, in stillicidiis eius letabitur germinans.*

Rursus alii, atque aliis verbis idem beneficium Dei extollit. Sed hoc loco per riuos intelliguntur sulci terrarum, ut ex Hebræo textu perspicitur; & textus, quem sanctus habuit Augustinus, *sulcos eius legit*. Ait igitur, *Riuos eius inebria*, id est, perge Domine, & sulcos terræ abundanter riga fluentibus aquis, & sic *multiplica genimina eius*, herbas, fruges, plantas: *in stillicidiis eius*, id est, pluuia Dei desuper cadente letabitur terra *germinans*.

XI.

*Benedices corona anni benignitatis tue, & campi tui replebuntur vbertate.*

Benedicendo, benefacies totius anni reuolutioni, quæ *instar corona* variis floribus ornata à tua benignitate quasi semper renouatur: & ex hac benedictione *campi tui* à te conditi, & fecundati *replebuntur* abundantia omnium bonorum.

XII.

*Pinguescent speciosa deserti, & exultatione colles accingentur.*

Nec solum campi aratione, & satione culti replebuntur vbertate frugum, sed etiam loca deserta, quæ solis pascuis deseruiunt, & speciosa præ cæteris sunt ex multitudine, & varietate herbarum, & florum, quæ sponte funduntur à terra; *pinguescent caelesti rore*, & colles pariter deserti, & inculti herbescente viriditate ita vestientur,

XIII.



XIV.

ut ex omni parte letari, & exultare videantur.

*Induti sunt arietes ouium, & valles abundabunt frumento: clamabunt, etenim hymnum dicent.*

In summa fecunditas erit maxima, & multiplicatio tum pecorum, tum frugum. In Hebræo sic legitur ad verbum, *Induti sunt agni pecore*, id est, pusillus grex, qui quasi nudus ob paucitatem videbatur, tanta multitudinis pecoris circumdabitur, ut vestitus multiplici indumento videatur. *Induti sunt arietes ouium*, id est, ouibus multiplicatis vestiti sunt arietes, siue agni, qui pauci antea erant. Alij tamen referunt hæc verba ad vellera, quibus induuntur pecora, quando bona pascua inueniunt. Sed qui ita exponunt, non considerant verba Hebraica, quæ non habent, *arietes ouium*, sed, *arietes*, siue potius *agni pecore*, siue *oue induti sunt*. *Et valles abundabunt frumento*, id est, loca deserta abundabunt pecore, & valles cultæ abundabunt frumento: omnia autem, siue colles, siue valles, siue campi ex culti, siue deserti, siue pecora, siue fruges, suo modo clamabunt in laudem Dei, imo etiam quodammodo hymnum cantabunt conditori, & benefactori suo. Porro res omnes create specie sua clamant, & canunt: vel homines, quorum vsui deseruiunt, & mente, & voce Deum laudent, eique perpetuo gratias agant. Hæc omnia sanctus Propheta in laudem potentiae, & sapientiae, & bonitatis Dei cecinit, ut inde argumentum duceret, quo probaret, sperandum esse, & cum fiducia petendam liberationem à captiuitate, & reuocationem in patriam. Sed possunt etiam mystice exponi de vocatione gentium, & beneficijs Dei in Ecclesiam, vt S. Aug. & Theodoretus tradit: qui Theodoretus recte Iudæos redarguit, quod fabulenter, hæc omnia impleta fuisse in terra Palestina post reuersionem ex captiuitate: tantum enim abest, ut post reditum ex Babylone terra illa fecundior fuerit, & beatior; ut potius in deterius semper abierit.

# PSALMVS LXV.

*Titulus & Argumentum Psalmi.*

*In finem, Canticum Psalmi Resurrectionis.*

**N**on habetur in Hebræo nomen resurrectionis, neq; legitur apud Hilarium: & Theodoretus testatur non esse in editione Septuaginta Interpretum, sed postea additum. Legitur tamē à sanctis Patribus Hieronymo, & Augustino in Commentario huius Psalmi: & videtur hæc unica vox, à quocunq; addita sit, prudenter addita, ut indicaret argumentum Psalmi. Argumentum enim Psalmi est gratiarum actio pro beneficijs Dei, sed potissimum pro perfecta felicitate post omnes finitas calamitates: quod sine dubio in resurrectione erit.

## EXPLICATIO PSAL. LXV.

**I**ubilate Deo omnis terra: psalmum dicite nomini eius: date gloriam laudi eius.

Inuitat ad iubilandum, & psallendum Deo omnem terram, id est, omnes Electos ex vniuersa terra vocatos, quia communis erit causa lætandi in communi resurrectione iustorum. Triā vult exhiberi, iubilum, sonum psalterij, & vocem humanam. Iubilum, quod magis in affectu, quam in verbis positum est, recte tribuitur Deo, *Iubilate Deo*. Deo enim, qui spiritus est, spirituale desiderium maxime conuenit. Sonitus Psalterij debetur nomini, id est fame, siue gloriæ Dei: *psalmum dicite nomini eius*, vel, ut clarius habetur in Hebræo, *psallite gloria eius*, id est, pulsate psalterium in gloriam eius. Deniq; vox humana diuinæ laudi tribuenda est. *Date gloriam laudi eius*, id est, nolite gloriam vobis sumere, vel tribuere, sed totam date laudi eius; vel ut habetur in Hebræo, *ponite gloriam in laude eius*, id est, hæc sit gloria vestra Deum perpetuo laudare, & in eius laudibus gloriam.

*Dicite Deo, quam terribilia sunt opera tua Domine? in multitudine virtutis tue, mentientur tibi inimici tui.*

Hæc est materia laudis Dei, opera summæ potentiae, & sapientiae. *Dicite Deo*, dum eum laudare vultis, *quam terribilia sunt opera tua Domine?* id est, opera tua præ magnitudine sua terrorem omnibus incutiant. *In multitudine virtutis tue, mentientur tibi inimici tui*, id est, tanta est virtus, & poten-

I.

II.



etiam tua, vt mendaces ostendat omnes inimicos tuos; qui te multo etiam minora non posse iactabant: exempla sunt in Scripturis non pauca. Psal. 77. Male, inquit, locuti sunt de Deo: dixerunt, Nunquid poterit Deus parare mensam in deserto? Deus autem in multitudine potentie sue, fecit, vt tanta multitudo coturnicum deferretur in desertum, vt omnibus abunde sufficeret, atque hoc modo mendaces eos ostendit, & vt mendaces terribiliter puniuit, vt dicitur in eodem Psalmo, & fusius in lib. Num. c. 11. Item lib. 4. Reg. 7. cum Eliseus Propheta tempore grauissimæ famis dixisset, *Audite verbum domini, cras modius simila statere vno vendetur in porta Samariæ*: Dux quidam respondit, *etiam si Deus faciat cataractas in calo, non poterit verum esse, quod dicis*. Sed Deus in multitudine virtutis sue mendacem illum ostendit. Vere enim sequente die tanta fuit abundantia rerum omnium, vt modius similæ statere vno in porta Samariæ venderetur; & Dux, qui contra Deum mentitus fuerat, in ipsa porta conculcatus à populo transiūte miserrime perijt. Simile est mendacium Iudæorum aduersus Christum, cum pendent in Cruce insultarent. *Si filius Dei es, descende de Cruce*. Ille autem in multitudine virtutis suæ fecit miraculum longe maius, quia surrexit de sepulchro, quod est multo maius, quam de Cruce descendere. Itaque mendacij coarguit inimicos suos potentia virtutis suæ. Posset etiam cum Theodoro dici, *in multitudine virtutis tuæ mentiantur tibi inimici*; hoc significare, multos fore, qui mentiantur Deo se illius esse cultores ob metum terribilium operum ipsius: multos item Christi fidem, non sincero, sed ficto corde suscepturos propter eandem rationem.

III.

*Omnis terra adoret te, & Psallat tibi, Psalmum dicat nomini tuo.*

IV.

*Venite, & videte opera Dei, terribilis in consilijs super filios hominum.*

Iterum excitat Propheta vniuersos homines, qui terram incolunt ad Deum vero corde adorandum, & laudandum. Atque vt maiore affectu id faciant, hortatur ad con-

sideranda opera Dei, qui terribilis est in consilijs rerum agendarum supra omnes filios hominum.

*Qui conuertit mare in aridam, in flumine pertransibunt pede: ibi letabimur in ipso.*

Ponit duo exempla operum mirabilium Dei, quæ nullo humano consilio vnquam fieri potuissent. *Qui conuertit, inquit, mare in aridam*, hoc est primum opus, quod narratur Exod. 14. Fecit enim Deus, vt siccaretur mare rubrum, vt filij Israel libere pertransirent. *In flumine pertransibunt pede*; hoc est alterum, quod refertur Iosue 3. Rursus enim Deus fecit, vt Iordanis fluuius siccaretur, vt filij Israel non ponte, aut nauicula, sed pede flumen traicerent. *Ibi letabimur in ipso*, id est, vbi hæc facta sunt, ibi lætati sumus in ipso; nō in nobis gloriati sumus, quasi nostra hæc essent opera, sed in Deo lætati, & gloriati sumus, Deumque laudauimus, vt narratur Exod. 5. Vt utrumque Propheta tempore futuro, pro præterito; nisi forte hoc loco vti voluerit verbo futuri temporis, vt indicaret, miracula illa præterita fuisse figuras maiorum miraculorum futurorum. Maius enim miraculum est, quod homines transcant mare amarum huius sæculi, quod in maligno positum est, & transmittant flumen temporalitatis, & mortalitatis huius, quæ nunquam stat, & plurimos absorbet, & suffocat; & perueniant vini; & salui ad terram æternæ promissionis, & ibi lætentur in ipso Deo ipsum videntes facie ad faciem: & tamen hoc maius miraculum ita facit per gratiam suam Deus, vt multi iam transcant per hoc mare, quasi per aridam, & flumen pertranscant pede; id est, facillime, temporalia omnia, siue bona, siue mala despicientes, id est, nec bonis adherentes, nec mala pertimescentes, vt securi perueniant vsque ad ipsam celestem Hierusalem, vbi lætabimur in ipso, non spe gaudentes, sed ipso in æternum fruantes.

*Qui dominatur in virtute sua in æternum,*

VI.



num, oculi eius super gentes respiciunt, qui exasperant, non exaltentur in semetipsis.

Hæc videtur digressio ad impios, qui Deo subitici, eumque laudare contemnunt. Eos enim admonet omnipotentiae, & omniscientiae Dei, ut vel timore poenae resipiscant. *Qui dominatur*, inquit, *in virtute sua in aeternum*, id est, ille, qui ex potentia sua, non aliunde accepta, sed sibi propria, dominatur aeterno imperio, is quoque videt omnes gentes, & ex alto speculatur omnia. Ideo *qui exasperant* tam potentem, & sapientem Dominum, *non exaltentur in semetipsis*, non superbiant; non glorientur de suis viribus, quia non effugient manus omnipotentis, & omnia videntis Dei.

VII.

*Benedicite gentes Deum nostrum, & auditam facite vocem laudis eius.*

Illa digressione praemissa, repetit exhortationem, quam in primo, & in tertio versiculo posuerat. Itaque tertio iam inuitat omnes gentes ad benedicendum Deo nostro, qui solus est verus Deus, & ad praedicandas laudes eius iam clara voce, ut ab omnibus audiat.

VIII.

*Qui posuit animam meam ad vitam, & non dedit in commotionem pedes meos.*

Aperit nunc causam, cur tanto ardore cupiat, Deum ab omnibus laudari, quia videlicet de maximis periculis vitam suam liberauerit. *Qui posuit animam meam ad vitam*, id est, laudari cupio Deum, qui fecit, ut anima mea non periret, & qui me titubare, & labi non permisit. Hæc dicuntur ab electis, qui post multas, variasque tentationes ad portum salutis tandem aliquando perueniunt. Per, *animam*; intelligitur totus homo; quod frequens est in Scripturis sanctis: ac ut alia loca omittamus in lib. Gen. c. 46. Plusquam sexies ponitur anima pro toto homine. Illud autem, *posuit*, significat, ordinauit, siue praedestinavit, vel praedestinavit, ut sensus sit, *Qui me praedestinavit ad vitam*; siue qui me posuit in numero eorum, qui victuri sunt in aeternum. Quod au-

tem sequitur, *Et non dedit in commotionem pedes meos*, ad donum perseverantiae pertinet, quod est proprium praedestinatorum ad vitam; quos enim Deus praedestinavit, eos etiam conseruat, protegit, ac dirigit, ut non cadant ad dexteram, vel sinistram. In Hebraeo habetur, *animam nostram, & pedes nostros*, in numero multitudinis. Sed idem est sensus: nam per, *animam meam, & pedes meos*, non intelligitur vnus tantum homo, sed vnus populus, cætus videlicet omnium Electorum.

*Quoniam probasti nos Deus, igne nos examinasti, sicut examinatur argentum.*

IX.

Varijs metaphoris explicat Propheta tribulationes iustorum; ac primum metaphora fornacis probatis argenti, ut significet, iustis à Deo permitti tribulationes: non ut ledantur, sed ut probentur, vel probati, & puri, sinceri, fideles ostendantur. Ignis enim paleas consumit, argentum, & aurum purius reddit: & palea in igne fumat, argentum in igne lucet. Hinc Angelus sanctus dicit Tob. 12. *Quia acceptus eris Deo, necesse fuit, ut tentatio probaret te*, & Sap. 3. *Deus tentauit illos, & inuenit eos dignos se, tanquam aurum in fornace probauit illos*. Et Ecclesiastici 27. *Vasa figuli probat fornax, & viros iustos tentatio tribulationis*. Et 1. Petri 1. *Ut probatio vestra fidei multo preciosior auro, quod per ignem probatur, inueniatur*.

*Induxisti nos in laqueum, posuisti tribulationes in dorso nostro, imposuisti homines super capita nostra.*

X.

Descendit nunc ad particulares afflictiones sub alijs metaphoris. *Induxisti nos in laqueum*, id est, in captiuitatem nos tradidisti hostibus nostris, in vincula, in catenas, in compedes, in carceres. Sicut enim aues, & ferae, cum laqueis comprehenduntur, libertate sua priuantur; ita dici possunt homines induci in laqueos cum captiui effecti, carceribus includuntur, vel catenis, & vinculis constringuntur. *Posuisti tribulationes in dorso nostro*, id est, vos more iumentorum.



mentorum onerati, & cædi verberibus permisisti: quibus oneribus, & verberibus intelliguntur varij labores, & dolores, quos Sancti in hoc mundo ab impiis pertulerunt, vt cum ad metalla fodienda, ad marmora secanda; ad onera pro extruendis ædificiis portanda; aliq; id genus laboriosa opera facienda, non sine flagellis, & verberibus adigebantur. *Imposuisti homines super capita nostra*, id est, fecisti vt homines pedibus suis capita nostra calcarent, quasi nobis iure belli deuictis, & triumphatis. Sed hæc etiam metaphora est, qua per similitudinem conculcationis caput deuictorum significatur tyrannica, & crudelis potestas Principum in miseris subditos, nam Principes modesti, & æqui præfident quidem capitibus subditorum, sed ita leuiter premunt, vt onus obedientiæ suauiter ferri possit. Tyranni vero, & seui, atque inhumani Principes, quales erant persecutores Christianorum, & quondam Pharaon Aegyptius, & Nabuchodonosor Assyrius, ita premunt subditos exactionibus, edictis, pœnis, vt respirare non possint. Hoc versiculo Propheta miro artificio personas iustorum toto corpore afflictas demonstrauit: nam laquei ad manus & pedes, onera & verbera ad dorsum, conculcatio ad capita pertinent.

XI.

*Transuimus per ignem, & aquam, & eduxisti nos in refrigerium.*

Hæc est vltima metaphora, qua Prophetæ pulcherrimis similitudinibus sub aspectum ponit supplicium Sanctorum. Ignis enim & aqua contraria sunt; ignis ardet, aqua congelatur, ille acerrimus, ista molliissima, ignis desiccatur aquam, & aqua extinguit ignem: quare si ignis dolore afficit hominem, aqua consolari, & mulcere deberet. Et tamen in pœnam iustorum seruorum Dei, ignis, & aqua coniurasse videntur; ignis consumendo, aqua suffocando. Igitur *per ignem*, intelliguntur actiōes supplicia, flagella, vulnera, cædes, combustio: *per aquam* supplicia lenta, sed diuturna, vt exilia, carceres, nuditas, fames. Sanctus tamen August. per ignem intelligit omne ge-

nus angustiarum, & molestiarum contristantium hominem: per aquam vero omne genus voluptatum, & abundantiam temporalium bonorum, quæ spiritum suffocant. Sed sicut ignis consumit lignum, non aurum, sic etiam aqua corrumpit; & putrefacit lignum, non aurum: & sicut aurum per ignem purgatur à scoria, sic idem aurum per aquam lauatur à sordibus. Itaque iusti, & sancti qui sunt auro similes, sine detrimento transeunt per ignem, & aquam, quia in tribulatione patientiam, in prosperitate modestiam seruant. Sed filij huius seculi similes ligno putrido in igne consumuntur, in aqua suffocantur, quia impatientes in tribulatione murmurant, maledicunt, blasphemant: dissoluti in prosperitate mollescunt, luxuriantur, superbiunt. Dicunt igitur Electi, *transuimus per ignem, & aquam, & eduxisti nos in refrigerium*: quoniam etiam si in cœlesti patria non deerunt ignis, & aqua, tamen ille ignis calefaciendo recreabit, non comburendo consumet, & illa aqua sitim extinguet, non vitam. Ita vtrunque suo modo refrigerabit, id est, erunt in cœlo ardores charitatis, erit ignis diuinus feliciter consummans, non consumens, perficiens, non destruens, transformans in Deum, non conuertens in cineres: erit aquarum abundantia, erit vbertas bonorum æternorum, erunt gaudia immensa, & inefabiles iucunditates, sed non mollem, aut pigrum efficiet animum, non carnis aduersus spiritum concupiscentiam nutrient, denique refrigerando delectabunt, non obruendo suffocabunt.

*Introibo in domum tuam in holocaustis, reddam tibi vota mea, quæ distinxerunt labia mea.*

XII.

Hæc videtur esse conclusio ex iis, quæ dicta sunt, quasi dicat, *in eduxisti nos in refrigerium, postquam transuimus per ignem, & aquam. Introibo igitur in domum tuam*, ad quam te Duce, te defensore perueni. *Introibo autem in holocaustis*, id est; offeram sacrificium gratiarum actionis: holocaustum est enim proprie ad gratias

Yy

agen-



# EXPLICATIO

agendas pro acceptis beneficiis. Et vere holocaustum nusquam perfectius offertur, quam in cœlo, ubi Sancti omnes totos se offerunt Deo in igne perfectæ charitatis, nulla parte animæ repugnante: tota enim actio, totum negotium in cœlo erit laudare Deum. *Reddā tibi vota mea, quæ distinxerūt labia mea*, id est, ista oblatio holocausti debita est, quoniam id voui, dum essem in tribulatione positus. Itaque introibo in domum tuam cum holocaustis, ut sic reddam vota mea, quæ non alius pro me, sed ego ipse labiis meis distincte promisi. S. Augustinus more suo ad ædificationem populi psalmos exponens, notat, illud *distinxerunt*, significare distinguenda esse vota, ut placeant Deo. Distinctio autem talis esse debet, ut cōfiteamur nos Deo indigere, Deum bonorum nostrorum non egere, nos mutabiles, illum immutabilem, nos creaturas, illum creatorem, nos ex nobis nihil esse, illum ex se perfectum esse.

XIII.

*Et locutum est os meum in tribulatione mea.*

XIV.

*Holocausta medullata offeram tibi cum incenso arietum: offeram tibi boues cum hircis:*

Explicat, quæ vota vouerit in tribulatione sua; & dicit se vouisse sacrificia pinguium omnium pecorum, quæ in holocaustum secundum legem offerri possunt. Ea vero tria tantum erant, Arietes, Boues, & Hirci. Sed nomine Arietum intelliguntur etiam Vituli, & nomine Hircorum, intelliguntur etiam Hædi. *Et locutum est os meum in tribulatione mea*, id est, hoc est, quod dixi, *Reddā vota*, quæ distinxerunt labia mea; quia locutum est os meum dum tribularer, & auxilio Domini indigerem, atque illius opem cum lacrymis implorarem. *Holocausta medullata offeram tibi cum incenso arietum*, id est, immolabo tibi agnos pingues; & medullis plenos cum bono odore ex arietibus pariter in holocaustum oblati: *offeram tibi boues cum hircis*, id est, ad holocaustum

Agnorum, & Arietum addam holocaustum vitulorum, & hircorum. In textu Græco legitur, *holocausta medullata offeram tibi cum incenso: & Arietibus*: & sic legit etiam sanctus Augustinus: & per incensum intelligit thus. Sed S. Hieronymus in epist. ad Suniam, & Fretellam improbat hanc lectionem, & veram lectionem esse dicit, *cum incenso arietum* (ut nos in nostra Latina editione habemus) cui concordat lectio Hebraica: per incensum autem non intelligitur thus, sed odor, qui ex incensis arietum carnibus emanat, qui odor suauissimus dicitur Leuitici 1. Odor autem ex incensis carnibus sacrificiorum suauissimus dicebatur, quoniam figura erat odoris vere, ac proprie suauissimi patientiæ, & humilitatis; obedientiæ, & charitatis filij Dei, qui ut Patrem glorificaret, & mundum redimeret, *humiliatus est usque ad mortem, mortem autem Crucis*, Phil. 2. Dicuntur vero holocausta medullata, quæ offeruntur in cœlis, actiones gratiarum, confessiones, & laudes ex intimo corde, & ex pinguedine veræ charitatis profectæ.

*Venite, audite: & narrabo omnes, qui timetis Deum, quanta fecit anima mea.*

XV.

Hortatur in fine Psalmi Propheta in persona beatorum electorum Dei, nos omnes, ut intelligamus beneficia Dei in Sanctos collata, & quid illi contra rependerint, ut eos imitantes similia beneficia recipiamus, & ad eandem quietem, & gloriam aliquando perueniamus. *Venite, inquit, audite, & narrabo, omnes, qui timetis Deum, quanta fecit anima mea*, id est, venite omnes qui timetis Deum, & audite, & ego narrabo vobis: quanta fecit animæ meæ: oratio enim in Hebræo, & Græco textu perturbata est quantum ad ordinem verborum, & Latinus Interpres non est ausus ordinem codicum originalium commutare. Vocat *timentes Deum*, quoniam *timor Domini est initium sapientiæ*, Psal. 110. ipse soluit pedes, ipse aperit aures: proinde, qui nullo Dei timore tangitur frustra vocatur, ut veniat, vel ut audiat.



XVI.

*Ad ipsum ore meo clamaui, & exaltaui  
sub lingua mea.*

Hoc est primum donum Dei, quod animæ suæ datum dicit electorum cætus, qui in hoc Psalmo loquitur. *Hoc, inquit, fecit Deus anima mea: dedit fidem, & spiritum orandi. Quomodo enim inuocabunt in quem non crediderunt?* inquit Apostolus Roman. 10. Igitur ex dono Fidei cognoui miseram captiuitatem in qua detinebat, cognoui liberatorem, & Redemptorem, & sic *ad ipsum ore meo clamaui.* Addit deinde secundum beneficium, & *exaltaui sub lingua sua*, id est, non solum oraui, sed etiam laudauimus Deum meum, & pro acceptis beneficiis gratias egi, ut rursus alia mererer accipere, quæ mihi deerant. Atque hoc totum, ut laudarem, & orarem, ipse fecit, ut facerem. Quamuis autem illud, *sub lingua mea*, vel *in lingua mea*, idem sit quod *lingua mea*, vel *in lingua mea*: tamen annotauit S. Augustinus fortasse dictum, *sub lingua*, ut intelligeremus, iustum non solum lingua ad aures hominum, sed etiam *sub lingua*, in silentio ad aures Dei, exaltare solitum ipsum Deum.

XVII.

*Iniquitatem si aspexi in corde meo, non  
exaudiet Dominus.*

Hoc est beneficium tertium, quod accipit à Domino, ut videlicet Deo illuminante cognosceret, quid sit quod impedit, ne oratio exaudiat. *Iniquitatem, inquit, si aspexi in corde meo, non exaudiet Dominus.* Aspicere iniquitatem in corde, est in secreto cordis diligere iniquitatem, siue aspicere ad concupiscendum eam, quomodo dicitur in Euangelio. *Qui viderit mulierem ad concupiscendum eam.* Multi enim, & verbis & factis videntur odisse peccata; reprehendunt, & puniunt peccatores; & ipsi tamen in secreto cordis, ubi nemo videt, quid agatur, cum delectatione aspicunt iniquitatem, & si impune possent, exercerent. Hos hypocritas non exaudit Dominus, sed eos

exaudit, qui ex corde iniquitatem odio habent, & si forte peccant, consentuntur peccata sua, & Medicum querunt à quo sanentur. Et quoniam tales sunt omnes electi, id eo subiungit Propheta in persona populi electi.

*Propterea exaudiuit Deus, & attendit  
voci deprecationis meæ.*

*Propterea exaudiuit Deus*, quia ipse scrutatur corda, & vidit mihi serio displicere peccata, meque non aspicere iniquitatem in corde, sed faciem cordis auertere ab omni iniquitate. *Et attendit voci deprecationis meæ*, quia vidit, me attendere voci præceptorum suorum, non voci serpentis prauaricationem suadentis.

*Benedictus Deus, qui non amouit orationem meam, & misericordiam suam à me.*

*Ergo benedictus sit*, & in perpetuum laudetur Deus, qui tanta fecit animæ meæ, quorum summa est, quod non amouit à se orationem meam, nec amouit à me misericordiam suam. Ita misericordia eius perseverante mecum, perseveraui, & ego in via mandatorum ipsius, & perseverantiæ præmium iam obtinui, liberationem à captiuitate, & reditum in cœlestem Hierusalem. Sanctus Augustinus paulo aliter exponit, & quamuis fortasse non omnino ad litteram, tamen vtilissime ad mores. Vult igitur, illud, *non amouit deprecationem meam*, sic intelligi, *non amouit à me deprecationem meam*, id est, fecit, ut non intermitterem vnquam orationem, & per hoc implerem dominicum præceptum, *Operte semper orare, & nunquam deficere*, Luc. 18. Est autem insigne donum Dei perseverantia in oratione, quia securum reddit hominem de perseverantia miserationis. Cum videris, inquit S. Augustinus, non à te amotam deprecationem tuam, securus esto, quia non est à te amota misericordia eius.

XVIII.

XIX.



## PSALMVS LXVI.

Titulus, &amp; Argumentum.

In finem, in hymnis Psalms Cantici  
ipsi Dauid.

**I**N Hebræo codice non habetur nomen dauid  
& ideo non desunt, qui auctore huius Psal-  
mi nolint esse Dauidem: sed cum in codice Gra-  
eco, & Latino habeatur, & sic legant Hilarius,  
Hieronymus, Augustinus, & alij in commen-  
tariis in Psalmos: credibile est, aut ex codice  
Hebraico vocem illam excidisse, vel à Septua-  
ginta Interpretibus additam fuisse, ne quis su-  
spicaretur Psalmum non esse à Dauid compo-  
situm, quia non legatur nomen eius in titulo.  
Argumentum Psalmi est expressio desiderij ve-  
hementis, quo Dauid tenebatur videndi ad-  
uentum Messie, & redemptionem generis hu-  
mani, iuxta illud Luc. 10. Multi Prophetæ,  
& Reges voluerunt videre, quæ vos videtis  
& non viderunt: existimo enim Dominum lo-  
qui de Prophetis, qui simul etiam Reges fue-  
runt, alioqui non dixisset, multi Prophetæ,  
sed omnes Prophetæ. Nomine autem Regis in-  
telligendi videntur omnes Principes, qui regiū  
ius in populum suum habebant, quales fuerūt  
Adam, Noe, Abraham, Isaac, Iacob, Moses,  
Iob, & alij, qui simul Prophetæ fuerunt, &  
Christum videre desiderauerunt: sed inter om-  
nes excellit Dauid, qui proprie Rex, & Prophe-  
ta fuit, & desiderium Messie in multis Psalmis  
expressit, sed in hoc potissimum, qui totus in  
hoc desiderio explicando consumitur.

## EXPLICAT. PSAL. LXVI.

**D**Eus misereatur nostri, & benedicat  
nobis: illuminet vultum suum super  
nos, & misereatur nostri.

Vox optantis & desiderantis est, quasi  
dicat, Vtinam deus misereatur nostri secun-  
dum magnam illam misericordiam, qua  
mittat ad nos quem missurus est. Et hoc af-  
fectu misericordiae paternae, benedicat nobis:  
benedictio autem fit non solum vbertas tē-  
poralium rerum, sed illuminatio vultus sui

super nos. Illuminatio vultus Dei super nos,  
multa significare potest. Primum enim di-  
citur Deus illuminare vultum suum super  
nos, quando remotis nubibus iræ, & indi-  
gnationis sereno vultu nos respicit ut filios,  
ut amicos, ut ad gratiam reuocatos. Deinde  
dicitur etiam illuminare vultum suum  
super nos, quando nos illuminat, & calefacit,  
sapientiam, & charitatem infundens,  
quomodo Sol iste: corporalis facere solet,  
quando nullis nubibus tegitur. Denique dicitur  
illuminare vultum suum super nos, quando  
prestat, ut eū, quasi remoto velamine, intue-  
amur: quod maxime prestat, quando per  
incarnationis mysterium in terris visus est,  
& cum hominibus conuersatus est, ut dicitur  
Baruch. 3. Atque hoc videtur hoc loco pe-  
tere sanctus Propheta, ut Deus vultum suum  
in forma Dei, saltem in forma  
hominis nobis ostendat. Quod etiam petiit  
cum ait in Psalm. 79. Qui sedes super Cha-  
rubim, manifestare coram Ephraim, Benia-  
min, & Manasse. Et quoniam hæc est mise-  
ricordia, quam initio petiit, ideo repetit,  
Et misereatur nostri, id est, & sic, illuminan-  
do videlicet vultum suum super nos, mise-  
reatur nostri. In Hebræo non habetur hæc  
repetitio, & misereatur nostri, neque legi-  
tur à S. Augustino, & S. Hieronymo: tamen  
habetur in codice Græco, & legitur à S. Hi-  
lario, ab Euthymio, & aliis.

*Vt cognoscamus in terra viam tuam, in  
omnibus gentibus salutare tuum.*

Hæc est ratio, cur tanto ardore deside-  
retur illuminatio vultus Dei, ut in lumine  
illo diuino cognoscamus in hac terra tene-  
broso viam Dei, id est, viam ad patriam à  
qua tandiu peregrinamur ambulantes in  
tenebris, & umbra mortis: hæc autem via  
sine dubio Christus ipse est, qui ait, Ioan. 16.  
Ego sum via, & non solum via, sed etiam lux,  
qua via ipsa cognoscatur, de qua dixit Isaias  
cap. 9. & explicuit S. Matthæus cap. 4. Popu-  
lus, qui ambulabat in tenebris, vidit lucem  
magnam, sedentibus in regione umbra mor-  
tis, lux orta est eis. In omnibus gentibus salu-  
tare tuum, hæc est explicatio verborum  
supra-



superiorum. *Vt cognoscamus in terra viam tuam*, id est, vt cognoscatur inter omnes gentes Saluator tuus: clarius habetur in Hebræo, *Vt nota fiat in terra via tua, in omnibus gentibus saluator tuus*: quod etiam Isaias prædixit, cum ait, *Videbit omnis caro salutare Dei*, vt refert S. Lucas cap. 3.

III. *Confiteantur tibi populi Deus, confiteantur tibi populi omnes:*

Quoniam desiderium prophetæ secundum veram charitatem ordinatum erat, cupiebat Christum venire in terras, primum propter gloriam Dei, deinde propter utilitatem generis humani. Ideo de gloria Dei dicit, *Confiteantur tibi populi Deus*: deinde adiungit, *Latentur, & exultent gentes*, &c. Ait igitur, *confiteantur tibi populi Deus, confiteantur tibi populi omnes*, id est, ob hoc tam insigne, & tam vniuersale donum, omnes populi confiteantur tibi confessionem laudis, & gratiarum actionis. Cesset cultus, & veneratio falsorum Deorum, tibi vni vero Deo ab omnibus populis honor diuinus habeatur.

IV. *Latentur, & exultent gentes, quoniam iudicas populos in aequitate, & gentes in terra diriges.*

Post laudem Dei agnoscatur etiam utilitas populorum, ideo *latentur, & exultent gentes*, omnes videlicet homines gaudeant, quoniam tu Deus per Christum tuum, iudicas populos in aequitate, id est, ablato iugo tyrannicæ potestatis Principis tenebrarum harum, Regnum iustissimum in Ecclesia tua constituisti. *Et gentes in terra diriges*, regens eas, & diriges per saluberrimas leges tuas ad portum æternæ salutis. In Hebræo, & Græco codice hæc habentur in futuro. *Quoniam iudicabit populos in aequitate, & gentes in terra diriges*. Sed non ideo falsum est, quod habetur in Latino, quoniam & si futura erant tamen Propheta spiritu Dei videbat ea tanquam præsentia. Sanctus Augustinus refert ad vltimum iudicium id, quod dicitur, *iudicabis populos in aequitate*; & ad præsentis vitæ directionem, quod additur,

*Gentes in terra diriges*: vt sensus sit, *Latentur, & exultent gentes*, quoniam si quid mali hic ab hominibus patiantur, veniet tempus quod tu Deus iudicabis populos in iustitia: & interim gentes tibi subiectas, & deuotas in terra diriges.

V. *Confiteantur tibi populi Deus, confiteantur tibi populi omnes: terra dedit fructum suum.*

Iterum repetit exhortationem, vt populi omnes Deum laudent, & addit nouam rationem, quoniam *terra dedit fructum suum*, id est, quoniam iam tandem terra protulit fructum illum, cuius gratia facta erat, id est, Christum in carne. *Hic est enim fructus terra sublimis*, de quo dicitur in cap. 4. Isaiæ, *Erit germen domini in magnificentia, & gloria, & fructus terra sublimis*. Et in Psalmo 84. *Et terra nostra dedit fructum suum*: tantum enim hic fructus fuit, vt comparatione eius nihil vnquam terra nostra protulisse videatur, nisi spinas, & tribulos. Vtitur autem Propheta tempore præterito pro futuro, quoniam in eius prænotione iam factum erat, quod nobis futurum prædicebat. Potest tamen hic versiculus cum S. Augustino exponi de fructu bonorum operum, quem homines habitantes in terra facturi erant per gratiam Christi reconciliati, & iustificati; de quo dicit Apostolus ad Tit. 2. *Qui tradidit semetipsum pro nobis, vt nos redimeret ab omni iniquitate, & mundaret sibi populum acceptabilem sectatorem bonorum operum*. Terra enim olim arida, & sterilis, id est, genus humanum per peccatum primi hominis gratia Dei destitutum, non nisi spinas, & tribulos, id est, peccata, vel opera inutilia ad salutem germinare nouerat: sed à Sole iustitiæ postea calefacta, & imbre doctrinæ caelestis compluta per Iesum Christum, qui & Sol, & Verbum est, fecunda effecta producere cœpit fructum bonum iustitiæ, fidei, & operum sanctorum, quibus merces deberetur corona iustitiæ, & brauium salutis æternæ.



*Benedicat nos Deus Deus noster, benedicat nos Deus; & metuant eum omnes fines terræ.*

Ergo deinceps hæc fit grata vicissitudo, ut Deus aperiat manum suam, & impleat nos omnes benedictione, id est, copia bonorum omnium, præcipue spiritualium, & celestium: & contra, omnes homines usque ad ultimos terræ fines habitantes, Deum verum timeant timore sancto, reddentes ei tributum obedientie, & laudis usque in æternum. Porro trina illa repetitio nominis Dei quæ in hoc versiculo habetur, quamvis affectum Prophetæ significet, tamen insinuat etiam mysterium sanctissimæ Trinitatis, quæ per Christum, & Apostolos manifestissime prædicata est.

Euthymius. Sed S. Hilar. & qui eum sequitur S. Hieronymus, docent in hoc Psalmo decantari mysteria utriusque Testamenti, quod verissimum nobis esse videtur, cum negari non possit, in hoc psalmo describi descensum Domini in montem Sina ad legem populo dandam; & Christi Ascensionem in calum, & alia id genus mysteria. Est autem Psalmus plenus figuris, & metaphoris, & poeticis descriptionibus admirabilibus, ut propterea, quanto est pulchrior, tanto sit etiam difficilior: augent vero obscuritatem lectionum varietates, & diffusiones, quæ inter codices Hebraicos & Græcos, ac Latinos esse videntur.

## EXPLICAT. PSAL. LXVII.

## PSALMVS LXVII.

*Titulus, & Argumentum.*

*In finem Psalmus Cantici ipsi David.*

**A**rgumentum huius Psalmi volunt aliqui esse victoriam Ezechie de Assyrijs, aut aliquam aliam similem, quæ post tempora Davidis contigerit: quoniam in hoc Psalmo fit mentio templi Domini dum dicitur, A templo tuo, quod est in Ierusalem, quod tamen post mortem Davidis à Salomone eius filio constructum fuit. Sed hoc argumentum non convincit: nam tabernaculum Domini quod erat in Silo, & postea in Ierusalem, templum dicitur. I. Reg. 3. v. 3. Samuel dormiebat in templo; & habetur eadem vox Hebraica, quæ habetur in hoc Psalmo. Alij volunt, Psalmum compositum, & decantatum quando translata est arca Domini in Ierusalem, quod eam ratione confirmant, quia verba primi versus, Exurgat Deus, & dissipentur inimici eius; dici solebant, quando eleuabatur Arca, ut alio transferretur, ut notum est ex cap. 20. Num. Alij totum Psalmum referunt ad Christum resurgentem, & ascendentem in calum, & ad Ecclesiam, quæ est corpus eius, ut S. August. &

**E**xurgat Deus, & dissipentur inimici eius, & fugiant qui oderunt eum à facie eius.

Hæc sunt verba quæ à Mose dici solebant, cum eleuaretur Arca, & populus migrare inciperet: quibus verbis Moses precabatur Deum, ut Arca exurgente, & præcedente populum, ipse quoque surgere dignaretur, & defensione securum populum redderet. David igitur Mosem imitatus, & præuidens Christi resurrectionem, per quam Arca humanitatis eius eleuanda erat, & ipse Dux futurus erat omnibus Electis ad terram veræ promissionis, dicit, Exurgat Deus, id est, Resurgat à mortuis Christus Deus, & sic eleuetur Arca, & populum Dei præcedat ad cælestem Ierusalem, sic exponunt communiter Patres, Hilarius, Hieronymus, Augustinus, & alij. Et dissipentur inimici eius, id est, Iudæi, qui dixerunt, Nolumus hunc regnare super nos, Luc. 19. Atque hoc iam impletum videmus: nulla enim gens magis dissipata est per omnes terras, quam Iudæorum. Et fugiant, qui oderunt eum à facie eius, id est, & Damones inimici eius iam deuicti, & superati, fugiant à facie Dei, Christi videlicet, triumphantis, & per resurrectionem verum se Deum esse demonstrantis.

*Sicut*



*Sicut deficit fumus, deficiat: sicut fluit  
cera à facie ignis, sic pereant peccatores à  
facie Dei.*

Celeritas, & facilitas, qua presentia Christi dissipat, peccatores, non poterat aptius depingi, quam similitudine fumi, qui à vento dispergitur, & cera, quæ coram igne liquefcit, atque consumitur. Quod si per peccatores intelligantur Dæmones, quod dicitur, *pereant*, significat interitum virium, & roboris, non substantiæ: & hoc modo intellexisse hos duos versiculos sanctum Antonium testis est sanctus Athanasius, qui describens vitam eius, dicit eum, cum à Dæmonibus oppugnaretur, cantare solitum, *Exurgat Deus*, &c. quod si ad homines referatur hæc sententia, tunc sensus erit homines peccatores, qui iustos iniuste persequuntur, maxima celeritate, & facilitate à Deo tollendos de medio.

*Et iusti epulentur, & exultent in conspectu Dei, & delectentur in lætitia.*

Iniquis persecutoribus deturbatis, hoc sequitur, ut iusti fruenter presenti auxilio Dei, *securi epulentur*, id est, reficiantur alimonia tum corporali, tum spiritali. *Et exultent coram deo*, id est, gestiant præ gaudio, sed ea modestia, & gravitate, quæ decet eos, qui sciunt se à Deo semper videri, utpote in conspectu eius iugiter constitutos. *& delectentur in lætitia*, id est, & ex lætitia delectationem capiant, ut non sit eis necessarium ob inopiam consolationis celestis, carnalem, atque mortiferam querere voluptatem.

*Cantate Deo, psalmum dicite nomini eius; iter facite ei, qui ascendit super occasum, Dominus nomen illi.*

Hæc dicuntur ad Apostolos, aliosque primos fideles ex sententia non solum veterum Latinorum, sed etiam Græcorum, Theodoretii, & Euthymij. *Cantate Deo,*

*vos primitiæ credentium. Psalmum dicite nomini eius*, laudate Deum voce, & opere vos qui digni facti estis cognitione tantorum mysteriorum. *Iter facite ei, qui ascendit super occasum*, id est, parate viam Domino prædicationibus vestris, ut is qui iam ascendit super occasum, qui supergressus est omnem corruptionem, & mortalitatem, & habitaturus est per fidem in cordibus omnium gentium, per vestras prædicationes aditum apertum, & paratum inueniat. *Dominus enim nomen est illi*, & ideo iure suo regnare debet. Dominus autem est, quia condidit, & redemit. Quod attinet ad verba, iter facere, hoc loco non est, ambulare, sed ponitur iter pro via, ut sensus sit, facite viam, ubi non est, parate transitum liberum remouendo impedimenta, quomodo dicitur, *Isai. 40. Parate viam Domino*: & declaratur cum additur, *Omnis vallis implebitur, omnis mons, & collis humiliabitur*: quod spiritualiter significat, debere pusillanimes erigi in spem salutis, & superbos deprimi ad humilitatem terrore diuini iudicii. Illud, *qui ascendit*, non significat ascendere in altum, sed equitare, siue curru vehi, id est, ascendere super rem aliquam eam conculcando pedibus equorum, aut rotis currus. Id patet ex Hebraica voce, *rocheb*. Illud, *super occasum*, Hebraice est, *super vesperam*, siue *tenebras noctis*, vel etiam *super desertum*: quæ omnia significant corruptionem mortalitatis, quæ plena est tenebris, & ariditate. Dicitur igitur Christus resurgens ascendere super occasum, quia quodammodo equitat, & curru inuehitur super omnia mortalia, triumphans de morte, de tenebris, de deserto Mundi huius inferioris, & sic exponunt non solum Patres citati, sed etiam S. Gregorius in homilia de Ascensione Domini.

*Exultate in conspectu eius: turbabuntur à facie eius, patris orphanorum, & iudicis viduarum.*

Vos qui paratis viam Domino, *exultate in conspectu eius*: nec timeatis eos, qui  
vos



vos turbant persecutionibus suis: nam & ipsi *turbabuntur à facie eius*, id est, tempore suo, cum dies *Iudicij venerit*, aut etiam antea, quando tempus opportunum Deo esse videbitur grauissime *turbabuntur à facie iræ Dei*, qui est *Pater orphanorum*, & *Iudex viduarum*, id est, omnium desolatorum, & afflictorum. In Hebraico textu desunt illa verba. *Turbabuntur à facie eius*, & legitur. *Exultate in conspectu eius*, *Patris orphanorum*, & *Iudicis viduarum*, unde aliqui existimant interpretationem illius sententiæ, *Exultate in conspectu eius*: nam verba Hebraica literis paululum immutatis, possunt etiam facere hanc sententiam. *Turbentur à facie eius*. Sed non video, cur non possimus dicere, excidisse ex textu Hebraico illa verba, *turbabuntur à facie eius*, id enim facilius est, quam ut Septuaginta Interpretes in eodem loco duplicem interpretationem posuisse credantur.

VI.

*Deus in loco sancto suo, Deus qui inhabitare facit vnus moris in domo.*

Quia dixerat Propheta, Deum esse Patrem orphanorum, & Iudicem viduarum, ut ostendat se potissimum loqui de orphanis, & viduis spiritualibus, de ijs videlicet hominibus, qui non agnoscunt in terris Patrem: neque Sponsum, sed Deum solum habent pro Patre, & Sponso, & in illo solo confidunt, eum solum diligunt, ad eius visionem suspirant: ideo addit, *Deum habitare in loco sancto suo*, id est, in mentibus horum orphanorum, & viduarum, horum peregrinorum in terra aliena & ipsum esse, qui facit sibi hanc domum, *dū habitare facit vnus moris in domo*, Verbum Hebraicum, pro quo nos habemus, vnus moris, est, *iechidim*, quæ vox proprie significat vnitos, & ideo recte verterunt Septuaginta *vnus moris*, id est, vnus sensus, vnus voluntatis vnus fidei, spei, dilectionis, quales erant in Hierusalem primi Christiani, qui dicebantur esse *cor vnum*, & *animus vna*, Act. 4. Sed potest etiam eadem vox significare *vnicos*, & *solitarios*, ut S. Hieronymus vertit; & tunc sensus erit, *Qui ha-*

*bitare facit vnicos*, & *solitarios*, destitutos aliorum auxilio, facit, inquam, habitare in domo sua sine timore, & periculo, quia ipse Pater orphanorum, eos protegit. Potest etiam sensus esse secundum alios, *Qui habitare facit vnicos in domo*, id est, facit ut quivnicus erat, multa prole procreata, amplam familiam habere incipiat. Denique non est absurdus sensus eorum, qui hæc referunt ad Monachos, qui relictis mundi curis solitarij habitant. Isti sensus veri sunt omnes, & vnus alium non destruit: sed primus videtur maxime literalis, & eum sequuntur omnes fere Patres, Græci, & Latini, qui hunc locum tractauerunt, qui etiam per vnus moris interpretantur, vnanimis. Sic exponit Sanctus Hilarius, sic etiam Sanctus Augustinus, Theodoretus, Euthymius, & alij.

*Qui educit vinctos in fortitudine, similiter eos, qui exasperant, qui habitant in sepulchris.*

Declarat magnam pietatem Dei, qui non solum vnanimis facit habitare in domo, sed etiam *educit vinctos in fortitudine*, id est, ligatos vinculis peccatorum educit de captiuitate in fortitudine brachij sui; & quod magis est admirandum, eos *qui exasperant* per incredulitatem ipsum Deum, & qui habitant quasi iam mortui in sepulchris profundissime iniquitatis, eos quoque potentia gratiæ sue educit de sepulchris, reducit ad vitam, & habitare facit vnanimis in domo. Notat autem S. Augustinus discrimen inter vinctos, & sepultos: vincti enim dicuntur, qui ligati quidem sunt vinculis concupiscentiæ, & in peccatis hærent, sed cupiunt liberari; & petunt auxilium. Sepulti autem dicuntur illi, qui cum in profundum malorum venerint, contemnunt salutem, & incredulitate sua Deum valde exasperant. Et tamen vtroque interdu magna Dei pietas emollit ad penitentiam, & liberat à miseria illa diabolicæ captiuitatis, qua maior non inuenitur. Possunt etiam hæc intelligi de liberatione à malis temporalibus,

ut à

יחידים

VIII.

IX

VII

X.



ut à captiuitate Ægyptiaca, & Babylonica, & similibus, & per sepulchra metaphorice intelligenda erunt loca arida deserti, vt sonat vox Hebraica hoc loco posita, *zechihā*, quæ locum arentem proptie significat; vel ipsa terra captiuitatis per sepulchra intelligenda erit: quomodo Ezech. c. 37. captiuitatem Babyloniam non semel appellat sepulchra Hebræorum.

*Deus cum egredereris in conspectu populi tui, cum pertransires in deserto.*

*Terra mota est, etenim cœli distillauerunt à facie Dei Sinai, à facie Dei Israël.*

Iam vt credibilia faciat Propheta beneficia redemptionis Christi, commemorat beneficia antiqua, quæ figura erant futurorum beneficiorum. *Deus*, inquit, *cum egredereris in conspectu populi tui*, id est, cum coram populo tuo præcederes in columna nubis per diem, & in columna ignis per noctem; eo tempore *cum pertransires in deserto*, post transitum maris rubri: tunc *terra mota est*, & etiam *cœli distillauerunt*, sed *terra mota est à facie Dei Sinai*, & *cœli distillauerunt à facie Dei Israël*. Sic enim ordinanda sunt verba huius versiculi: Porro *terra mota est*, quando tremere cœpit à conspectu Dei descendens in montem Sinai, vt perspicuum est ex libro Exodi cap. 19. vbi dicitur: *Eratq; omnis mons terribilis*: nam pro voce, *terribilis*, est in Hebræo, *tremens*, siue *saluens*. Dicitur autem Deus Sinai, Deus qui apparuit in monte Sinai. Cœlum autem distillauit, quando pluit manna, & dicitur distillasse à facie Dei Israël, quoniam Deus in gratiam populi sui Israël fecit, vt manna de cœlo descenderet.

*Pluuiam voluntariam segregabis Deus hereditati tue, & infirmata est; tu vero perfecisti eam.*

Patribus in deserto cœlum distillauit te iubente pluuiam quandam, id est, manna: sed *hereditas tua*, id est, Ecclesiæ tuæ,

quam tibi tanquam propriam hæreditatem vindicasti, *segregabis pluuiam voluntariam*, id est, pluuiam spontaneam, quæ ex se descendit: hæc vero pluuiæ, gratia est Spiritus sancti, quæ voluntaria, siue spontanea dicitur, quia non descendit ex meritis operum, quasi vaporibus terræ sursum eleuatis, sed sponte sua Spiritus sanctus infundit corda fidelium aqua cœlesti: & dicitur segregata hæreditati Dei; quia bona temporalia sunt communia fidelibus & infidelibus, sed gratia Spiritus sancti segregata est, vt detur solum fidelibus in Ecclesia, extra quam non est salus. Possit etiam per pluuiam voluntariam intelligi doctrina cœlestis, quæ non solum voluntaria est respectu Dei, sed etiam (vt Theodoretus obseruauit) respectu hominum, qui eam recipiunt, si volunt; reiciunt, si nolunt. *Et infirmata est*, tu vero perfecisti eam. Illud, &, ponitur pro quia, vt sensus sit, Pluuiam voluntariam segregabis hæreditati tuæ; quia hæreditas tua infirmata est iam dudum: videlicet ob ignorantiam Dei, & inualescentes concupiscentias debilitata erat, cum idolis seruaret, & vitiis omnibus laboraret: sed tu per gratiam Spiritus sancti, tanquam per pluuiam salutarem confirmasti & roborasti eam.

*Animalia tua habitabunt in ea: parasti in dulcedine tua pauperi Deus.*

In ea hæreditate, id est, Ecclesia, quæ irrigatur aqua cœlesti, *habitabunt animalia tua*, id est, oues pascuæ tuæ, quas pascendas, regendasq; suscipies: tu enim *Deus parasti*, cibum videlicet *pauperi*, id est, egeno populo tuo, *in dulcedine tua*, id est, iuxta bonitatem & misericordiam tuam, quæ dulcissima est miseris & egentibus.

*Dominus dabit verbum euangelizantibus virtute multa.*

Declarat, quis sit cibus, quem parauit Deus pauperi populo suo, ac dicit esse verbum suum. *Dominus*, inquit, *dabit verbum*



*euangelizantibus*, id est, efficiet Deus, ut qui annunciant verbum Dei, quod est cibus animarum, abundant copia sermonis, *virtute multa*, id est, multa cum efficacia & libertate, ut non possint resistere & contradicere omnes aduersarii eorum. Posset etiam per multam virtutem, intelligi efficacia signorum & prodigiorum, quibus Deus prædicationem Euangelij confirmabat. In Hebræo habetur in fœminino genere *annunciantibus*, sed non est inusitatum apud Hebræos ponere genus fœmininum pro masculino: nam in libr. Eccles. cap. 1. iuxta Hebræicum textum legitur: *Verba concionatricis filij David, Regis Hierusalem Vanitas vanitatum dixit concionatrix*: ubi ponitur *concionatrix*, pro *concionator*. Itaque Septuaginta, qui hæc non ignorabant, recte verterunt, *euangelizantibus*. Illud autem, *virtute multa*, contendunt nonnulli, vertendum fuisse, *exercitiis multis*: sed non est necesse ita vertere, nam vox, *zava*, significat *exercitum*, sed significat etiam *robur & fortitudinem*: imo credibile est, exercitum dici, *zava*, siue virtutem, quia exercitus res est magnæ fortitudinis & multarum virium. Denique non solum Septuaginta hoc loco verterunt, *multa virtute*, siue *potentia*, sed etiam S. Hieronymus vertit, *fortitudinis plurima*. Quare incepta videtur expositio illorum, qui docent, in hoc versiculo significari, datum esse sermonem fœminis Hebræis, ut concinendo annuntiarent victoriam exercitibus multis.

XIII

*Rex virtutum dilecti, dilecti: & speciei domus diuidere spolia.*

Hoc loco ridet Ioan. Calvinus hæresiaracha in antidoto Concilij Tridentini hanc lectionem editionis Latinæ vulgatæ, & vult ipse legendum esse: *Reges exercituum fugerunt, fugerunt, & habitatrices domus diuiserunt spolia*. Sed Interpres Latinus non ex Hebræo, sed ex Græco traduxit Psalmos: Græcus autem textus (qui LXX. Interpretum esse censetur) habet id ipsum, quod Latinus Interpres fideliter reddidit. Sanctus quoque

Hieronymus non vertit, *fugerunt, fugerunt*, sed, *fœderabuntur, fœderabuntur*. Proinde Calvinus ridere potuisset non solum editionem vulgatam, sed etiam interpretationem S. Hieronymi, & Septuaginta virorum sapientissimorum; ipse pro tam impia temeritate descendendus potius, quam ridendus. Adde quod non est difficile videre quid in textu Hebræico legerint LXX. Interpretes, & eos recte vertisse hunc locum, & Latinum Interpretem eundem locum fideliter reddidisse: ac primum pro, *Rex virtutum*, in Hebræo sunt duo verba, quæ si legantur, *malchi zebaoth*, significant, *Rex virtutum*, ut noster Interpres vertit: si legantur cum aliis punctis, *malchi zebaoth*, significant, *Reges virtutum*, siue *exercituum*. Sed, ut sæpius diximus, credibile est, melius legisse LXX. Interpretes, quam Rabinos, qui puncta literis addiderunt. Illud autem, *dilecti*, in Hebræo nunc est, *iddodun*, quod significat, *fugient*: sed LXX. Interpretes non habuerunt hanc vocem in suis Codicibus, ut neque etiam S. Hieronymus; videntur enim Septuaginta legisse, *iedidorth*, quod significat, *dilectum*: hæc enim vox habetur in titulo Psalmi 44. quam Septuaginta verterunt, *dilecto*, & S. Hieronymus, *amantissimo*. Denique illud, *neutha bait*, significat quidem *habitatricem domus*, sed significat etiam *mulierem speciosam & delicatam*, quæ fere semper domi manet: & inde translato vocabulo, significat *speciem & pulchritudinem*, ut hoc loco non solum Septuaginta, sed etiam B. Hieronymus reddiderunt, quibus maior fides debetur, quam Rabinis, aut Caluino. Sensus igitur ex Patrum expositione hic erit, *Rex virtutum*, id est, *Rex exercituum multorum, dilecti, dilecti*, id est, *dilectissimi, Christi videlicet, dilectissimi Deo & hominibus*; ipse dabit speciei domus, id est, ad speciem & decorem domus Dei, quæ est Ecclesia, diuidere spolia, gentium videlicet ad fidem Christi conuersarum per euangelizantes Apostolos. Vbi verbum, *dabit*, subintelligitur ex versiculo præcedenti, ut hic sit integer sensus, *Dominus dabit verbum euangelizantibus*.



virtute multa, & ipse idem Dominus Rex virtutum dilectissimi, dabit ad speciem domus diuidere spolia. Illud autem, *dilectissimi*, conjungitur cum nomine, *virtutum*, Rex *virtutum*, id est, exercituum, qui exercitus sunt Christi filii Dei dilectissimi. Neque obstat, quod nomine Regis, idem Christus intelligatur, nam phrasi Hebraica consuetum est dicere, Christus Rex exercituum Christi, pro quo nos diceremus, Christus Rex exercituum suorum, ut notat S. Augustinus, & sunt exempla in Scripturis plurima, ut Rom. 1. *Qui predestinatus est Filius Dei in virtute secundum spiritum, satisfactionis ex resurrectione mortuorum Iesu Christi*, id est, ex resurrectione eius à mortuis: & Exod. 16. *Dixit Moyses ad Aaron, Sume vas, &c. sicut praecepit Dominus Moysi*, id est, sicut praecepit Dominus mihi. Denique in Pentateuico saepe legitur, fecit Moyses hoc aut illud, sicut praecepit Dominus Moysi, id est, sicut praecepit ei Dominus. Porro rectissime dicitur Christus Rex exercituum: nam Apocal. 19. vidit Ioannes quendam insignem equitem, qui habebat vestem sanguine aspersam, & nomen eius erat Verbum Dei, & sequebatur eum exercitus, qui sunt in caelo.

co: S. Hieronymus utrobique vertit, *inter terminos*. Et huic loco nullo modo ollae interferi possunt, cum sequatur: *Vidit requiem, quod esset bona, & terram, quod optima, & supposit humerum suum ad portandum, & factus est tributis seruans*. Vbi per *cleros*, siue *terminos*, intelliguntur sortes, siue possessiones duae, inter quarum terminos contigit Isacharo possessio siue hereditas: & quoniam ea visio est illi satis fecunda & pinguis, maluit laborare in cultura terrae, & tributa pendere, quam bello excutere iugum dominantium. Adde etiam, quod vox Hebraica, *sephataim*, habet numerum dualem, quo non vtuntur Hebraei, nisi ad significandas res geminas; ut duo labia, duas manus, duos pedes, duos oculos, duas aures, duas malas, & similia: olla autem non sunt geminae ex natura sua, sed & una, & plurimae esse possunt. Denique qui inter ollas dormiunt, non solent instar argenti dealbari, sed instar fuliginis denigrari. Igitur Caluino cum Rabinis inter suas ollas dimisso, existimamus sensum huius versiculi hunc esse: *Si dormiatis inter medios cleros*, id est, si vos, qui euangelizatis verbum Domini, dormiatis, id est, quiescat in medio duorum testamentorum noui, & veteris, acquiescentes, videlicet veritati diuinitus inspiratae Prophetis, & Apostolis; tunc *penna columba*, id est, Ecclesiae fides, & mores erunt *deargentata* puritate sapientiae, & deauratae seruire charitatis. Nam per duos cleros, intelligenda esse duo testamenta, scribunt communis consensu Latini & Graeci expositores, S. Augustinus, & S. Hieronymus, Theodoretus, & Euthymius. Neque absurdum est, per duos cleros, intelligi duo testamenta, quoniam clerus sortem, possessionem, & hereditatem significat, sunt autem Scripturae diuinae possessio quaedam, & hereditas Ecclesiae. Quod si etiam per cleros intelligamus cum S. Hieron. terminos, rectissime duo testamenta duo termini erunt, extra quos egredi non licet, nisi veritatis semitam perdere velimus. Possent etiam per duos cleros, intelligi possessio coelestis & terrena.

ספתי

XIV. *Si dormiatis inter medios cleros, penna columbae de argentata, & posteriora dorsi eius in pallore auri.*

Hunc versiculum fateor obscurissimum esse, sed interim mirari satis non possum temeritatem recentiorum, quorum vnus Caluinus est, qui sequuti Rabinos legendum esse contendunt: *Si dormiatis inter medias ollas, eritis sicut penna columbae, quae tecta est argento, & cuius ala tecta sunt auro*. Ad refutandam horum temeritatem sufficere deberet auctoritas S. Hieronymi & LXX. Interpretum, quibus ista olla nunquam in mentem venerunt. Sed accedit, quod eadem vox habetur in Genes. c. 49. ubi dicitur: *Isachar Asinus fortis accumbans inter terminos*: quo loco Septuaginta verterunt, *inter medios cleros*, ut hoc loco



Debent enim prædicatores Euangelij non toti esse affixi contemplationi cœlestium bonorum; neque toti addicti vitæ actiue, & operibus charitatis erga proximos, sed in medio vtriusque sortis quiescere, & nunc per contemplationem erigi in Deum, nunc per charitatis obsequium descendere ad proximos. Potest denique cum S. Augustino sic exponi versiculus: Si dormiatis inter medios clericos, si moriamini inter felicitatem terrenam contemptam, & felicitatem æternam speratam, & nondum adeptam, tunc erunt pennæ columbæ deargentatæ: quia quando sancti Prædicatores perseuerant vsque ad mortem contemnentes terrenam felicitatem, & sperantes æternam, & sic dormientes dormitione mortis inter has duas hereditates constituti, tunc fama Ecclesiæ quasi pennis deargentatis volat ybique, & exaltatur ac magnificatur.

XV. *Dum discernit cœlestis Reges super eam, niue dealbabitur in Selmon, mons Dei, mons pinguis.*

XVI. *Mons coagulatus, mons pinguis: vt quid suspicamini montes coagulatos?*

XVII. *Mons, in quo beneplacitum est Deo habitare in eo: etenim Dominus habitabit in finem.*

Descripsit Propheta Prædicatores per similitudinem dormientium inter clericos, & Ecclesiam per similitudinem columbæ deargentatæ & deauratæ: nunc describit eisdem Prædicatores per similitudinem Regum à summo Rege constitutorum, & Ecclesiam per similitudinem montis altissimi candidi propter niues, & vberissimi propter abundantiam lactis. Selmon enim mons est altissimus, & ideo niuibz in vertice cooperatus, sed in imo fertilis, cuius fit mentio in libro Iudicum cap. 9. Ait igitur: *Dum discernit cœlestis Reges super eam*, id est, Dum cœlestis, vel, vt est in Græco, supercœlestis, & vt est in Hebraico, *Sadat*, omnipotens, Deus videlicet Christus, Rex cœlestis & omnipo-

tens, discernit, id est, diuidit, ac segregat vnicuique provinciam suam Regem super eam, id est, Apostolos super Ecclesiam, per columbam antea designatam: eos enim constituit Principes super omnem terram, vt regant ac dirigant populos. *Niue dealbabitur in Selmon*, id est, tum populi multi iustificabuntur, & nigrore peccatorum in candorem iustitiæ commutato, super niuem dealbabitur in Selmon monte altissimo, qui Ecclesiam significat. Qui mons Selmon est mons Dei, mons pinguis, quoniam Ecclesia est mons propter excellentiam dignitatis, & est mons Dei, quia in ea Deus habitat, elegit enim eam in habitationem sibi, & est mons pinguis ob abundantiam gratiæ & donorum Spiritus sancti. Et est etiam mons coagulatus, & per hoc pinguis, quia lac diuinæ gratiæ non defluit, sed quasi coagulatum in ea semper manet. *Vt quid suspicamini montes coagulatos?* id est, quare igitur suspicamini, vel opinamini esse alios montes æque coagulatos & pingues? quasi dicat, Non est, quod existimetis esse alios montes æque pingues, atque hic Selmon. Hic enim est vnicus mons, in quo beneplacitum est Deo habitare in eo: nec in eo habitabit ad tempus, vt fecit in monte Sina, sed habitabit in finem, id est, semper. Hæc videntur dici aduersus Hæreticos, qui alias Ecclesias erigere conantur. Pro voce, *suspicamini*, legunt aliqui, *amulamini*, vel *contenditis*, sed idem est sensus. Significat enim illæ voces, frustra alios montes contendere cum isto monte, vel ei invidere. De hoc monte legimus apud Isaiam cap. 2. *Erit in nouissimis diebus preparatus mons domus Domini in vertice montium, & eleuabitur super colles, & fluent ad eum gentes, & ibunt populi multi, & dicent, ascendamus in montem Domini, & ad domum Dei Iacob, & docebit vos vias suas, & ambulabimus in semitis eius: quæ sine controuersia intelliguntur de Ecclesia.*

*Currus Dei decem millibus multiplex, millia letantium: Dominus in eis in Sinai in sancto.* XVII

Ascen-



*Ascendisti in altum, cepisti captiuitatem, accepisti dona in hominibus.*

*Etenim non credentes inhabitare Dominum Deum.*

Nunc comparat Prop heta descensum Dei in montem Sina, vt daret legem veterem populo Iudaico, cum ascensione Christi in cælum, vt inde mitteret donum Spiritus sancti, & legem nouam populo Christiano: quam comparationem facere videtur Propheta, vt ostendat, vnde tanta abundantia lactis, & tantus candor Ecclesie data sint. *Currus Dei decem millibus multiplex*, currus quo vehebatur Deus cum descenderet in montem Sina, erant multa millia sanctorum Angelorum: quæ omnia non erant gementia sub pondere, sed lætancia, & plaudencia præ voluptate vehendi Dominum. Dominus enim in eis sedens fuit in Sinai, in monte sancto. Quod autem sancti Angeli sint, qui cum Deo descendierint in montem Sinai, dicitur apertius in Deutern. cap. 33. *Dominus de Sinai venit, & de Seir ortus est nobis, apparuit de monte Pharan, & cum eo sanctorum millia.* Quod autem currus Dei sint Angeli, Scriptura passim docet, cum ait, *Qui sedes super Cherubim.* Porro illud, *decem millibus multiplex*, in Hebræo est vnica vox, *rabbothaim*, quæ proprie significat, bis decem millia, sed accipitur pro pluribus millibus. Itaque decem millibus multiplex, significat, plus decem millibus, id est, innumerabilis multitudo. Illud, *millia latantium*, vertit S. Hieronymus, millia abundantium; & sic legit etiam ex Græco Euthymius, & interpretatur, millia abundantium virtute, & gratia, & omnibus bonis, quales sunt Angeli beati, qui cum bonis omnibus abundant lætissimi semper sunt. Sed vox Hebræa, *Sinaan*, est vox quatuor literarum; & valde obscura, vnde alij ex Hebræis putant significare Angelos, alij duplicata millia, alij etiam vertunt nobiscum, *millia latantium*. Quod sequitur, *Ascendisti in altum*, S. Paulus de Ascensione Christi interpretatur ad Ephes. 4. Itaq; sensus est, Domi-

nus olim descendit in montem Sina cum multis millibus Angelorum; sed tu Messias ascendisti in altum, id est, in summum cælum, *cepisti captiuitatem*, id est, captiuos Diaboli fecisti captiuos tuos, miseram captiuitatem, in captiuitatem felicissimam commutasti: & sic triumphator multis millibus Sanctorum, quos ab inferis eduxisti, comitatus in Regnum tuum intraisti. *Accepisti dona in hominibus*, id est, accepisti à Patre dona Spiritus sancti in hominibus, id est, pro hominibus à te redemptis, & ea dona à Patre accepta dedisti hominibus. Sic explicat S. Paulus, qui hunc locum his verbis refert, *Ascendens in altum captiuam duxit captiuitatem, dedit dona hominibus.* Et est expositio conformis Euangelio: nam Ioan. 14. dicitur, *Ego rogabo Patrem, & alium Paraclitum dabit vobis.* Et cap. 15. *Cum venerit Paraclitus, quem ego mittam vobis à Patre.* Porro inter dona à Christo in terras effusa, præcipuum est charitas quæ est lex noua, dicente Apostolo ad Rom. 5. *Charitas dei diffusa est in cordibus nostris per spiritum sanctum, qui datus est nobis.* Et ad Gal. 5. *Fructus autem Spiritus est charitas, gaudium, pax, &c.* Denique illud, *Etenim non credentes inhabitare Dominum Deum*, significat, etiam incredulos per dona Spiritus sancti conuersos esse ad Christum, & ad bonam captiuitatem pertinere cepisse. Vbi illud, *etenim*, ponitur pro, etiam: nam in Hebræo non est, *chi*, sed, *aph*, quod significat, etiam, verumtamen, insuper. Vnde S. Hieronymus vertit, insuper, & non credentes inhabitare Dominum Deum. Itaq; sensus est, *cepisti captiuitatem, accepisti dona in hominibus*, etiam eos cepisti captiuos, & pro ijs accepisti dona, qui antea non credebant Dominum Deum inhabitare in homine, id est, non credebant; verbum carnem factum esse, & inhabitasse in nobis: vel, non credebant Dominum Deum inhabitare in monte sancto, id est, in Ecclesia Christianorum.

*Benedictus Dominus die quotidie: prosperum iter faciet nobis Deus salutaris Deus salutarium nostrorum.*

Z z 3

Deus

XXI



XXII.

*Deus noster, Deus saluos facienti, & Domini, Domini exitus mortis.*

Græci coniungunt duo verba præcedentia cum hoc vericulo, hoc modo, *Dominus Deus benedictus Dominus*, & finiunt præcedentem versiculum in illis verbis, *Etenim inhabitare*. Et sic legunt etiam S. Augustinus, & S. Hilarius. Sed noster Interpres vertit conformiter ad Hebraicum codicem. Et S. Hieronymus in epist. ad Suniam, & Fretellam reprehendit lectionem Græcorum, & confirmat nostram, ut veriozem. Igitur Propheta posteaquam descripsit Ascensionem Christi, qui nobis Dux fuit ad patriam celestem: agit gratias Deo, ac dicit, *Benedictus sit Dominus per singulos dies*: id enim significat, *die quotidie*: nam Interpres Latinus reddidit ad verbum quod inuenit in Græco; sed in Hebræo est, *die, die*, id est, omni die; siue de die in diem. Benedicimus autem Deum omni die, quia omni die nobis benefacit. *Prospere iter faciet nobis*, id est, benefaciet nobis omni die, quia non deseret nos in hoc itinere, quod facimus omni die, donec ad æternitatis diem peruenerimus. Vox Hebraica, *יֵאָמֵר*, significat portabit, quam vnā vocem exprellit interpres tribus vocibus, prosperum iter faciet; vere enim prospere ambulat, qui portatur à Deo. In Græco est etiam vnicum verbum, quod significat prosperare iter, complanando, videlicet viam, & impedimenta remouendo. Itaq; promittitur hoc loco continua assistentia gratiæ Dei, dum peregrinamur à Domino. *Deus salutarium nostrorum*, id est, prosperabit nobis iter Deus, qui est auctor totius nostræ salutis: non enim indigemus simplici salute, sed multiplici, qui multiplici periculo sumus obnoxij. *Deus noster, Deus saluos facienti*, id est, non sine causa dixi, Deum prosperaturum iter nobis, & salutes multas allaturum: nam hoc est illi proprium, hæc est eius natura; ipse enim Deus noster, est Deus saluans, Deus misericors, & pius. *Et Domini, Domini exitus mortis*, id est, & ab ipso prouenit euasio mortis, siue egressio à morte. Pro illud, *Domini, Domini*, in Hebræo sunt duo nomina; vnum

quatuor literarum, quod est proprium Dei, & in Scripturis non pronunciat, sed loco eius legitur, *Adonai*; alterum nomen est *Adonai*, quod Dominum significat. Itaq; sensus est, & Dei nostri, qui est verus Dominus omnium rerum, sunt exitus mortis, id est, liberatio à morte, siue euasio mortis. Ipse enim est vita æterna, & eam nobis communicabit, cum finita peregrinatione transferet nos de morte ad vitam.

*Veruntamen Deus confringet capita inimicorum suorum: verticem capilli perambulantiū in delictis suis.*

Docuit, quid faciet Dominus amicis suis: docet nunc, quid faciet inimicis, qui increduli permanserint, atque à Regno eius alieni esse voluerint. *Confringet*, inquit, *Deus capita inimicorum suorum*, id est, superbiam inimicorum suorum humiliabit, dum eos ad inferos æternis cruciatibus puniendos damnabit. *Verticem capilli perambulantiū in delictis suis*, idem aliis verbis repetit ac declarat, more suo Propheta: nam quod dixerat, *capita*, nunc dicit, *verticem capilli*, id est, verticem crinitum superbum, ac vanum confringet, quod dixerat *inimicorum*, nunc dicit *perambulantiū in delictis suis*: illi enim soli sunt inimici Dei, qui non ambulant in lege Domini, sed in delictis suis, hoc est, qui tempus vitæ suæ peccando consumunt. Paulo aliter exponit S. Hilarius: vult enim per capita inimicorum Dei, intelligi Principis tenebrarum, id est, Principes demonum, quos Dominus dicit perambulare verticem capilli, id est, insidere, & dominari capitibus hominum peruerforum; in delictis suis, quia ad hoc solum insident, & dominantur capitibus hominum impiorum, ut eos ad varia delicta alliciant.

*Dixit Dominus, ex Basan conuertam, conuertam in profundum maris.*

*Vt inringatur pes tuus in sanguine, lingua canum tuorum ex inimicis ab ipso.*

Con-

XXII

XXV

XXV

XXV



Confirmat Deus sententiam Propheta de perditione impiorum. *Dixit Dominus, ex Basan conuertam, conuertam in profundum maris*, id est, Ego Dominus abstraham inimicos meos ex Basan, regione vberissima, & pinguiissima, & projiciam in profundum maris, vt olim egi cum Pharaone. Conuertam videlicet impios à delicijs, & voluptatibus in vltimam perditionem, tantaq; erit hostium strages, vt pes tuus o popule meus, tingatur in sanguine occisorum, & lingua canum tuorum tingatur ab ipso sanguine ex inimicis effuso. Hæc mihi videtur sententia apte coherens cum superioribus. In Hebræo habetur, ex profundis maris, quæ videtur lectio contraria lectioni nostræ editionis vulgatæ, quam tamen habuerunt S. Hilarius, S. Augustinus, & S. Hieronymus in commentario.

Et quamuis in Hebræo sit præpositio, *min*, quæ significat *ex*, vel, *ab*: tamen ponitur aliquando pro, *be*, quæ significat, *in*, & contra, *in*, ponitur pro, *ab*: nam Ecclesiastæ 2. vbi legimus, *Cogitavi abstrahere à vino carnem meam*: in Hebræo est, *invinum*. Sed S. Hieronymus recte iudicauit, *in*, positum esse pro, *a*, vel, *ab*; & contra, Deuteronom. 33. vbi legimus *Dominus de Sina venit*, Rabbi David existimauit positum esse, *de*, pro, *in*, quia Dominus in Sina montem venit, non de Sina, quando legem dedit. Scio hos versiculos varie explicari, & tot esse expositiones, quot sunt auctores. Ideo in tanta obscuritate licitum mihi esse duxi, nouam expositionem excogitare, quam lectorum iudicio permitto.

*Viderunt ingressus tuos Deus, ingressus Dei mei, Regis mei, qui est in sancto*

Explicata victoria, & triumpho Christi de hostibus eius, docet Propheta, eos qui testes fuerunt tantarum rerum, cõpisse illa toti Mundo cum cantu, & lætitia publicare. *Viderunt*, inquit, *ingressus tuos Deus*, id est, non desunt qui viderint itinera tua, Christe Deus, actiones tuas, prælia tua, victorias tuas. *Ingressus*, inquit, *tuos*, qui es Deus meus,

& Rex meus; qui nunc es in sanctuario tuo: siue summum cælum, siue Ecclesia sanctum habitaculum eius dicatur: nam vtrumque est verum; est enim Christus in cælo per præsentiam visibilem, in Ecclesia per fidem, & prouidentiam.

*Præuenerunt Principes coniuncti psallentibus, in medio iuencularum tympanistriarum.*

Alludit Propheta ad id quod fecerunt filij Israel, quando Deus liberauit populum suum de manu Pharaonis: tunc enim Moses Princeps populi cum alijs filiis Israel cantauit canticum illud, *Cantemus domino, gloriose enim magnificatus est*. Et Maria soror Moysis, cum sequentibus se mulieribus sumpsit tympanum, & ludebat, laudans Deum, Exo. 15. Sic igitur quando viderunt principes Ecclesiarum Christi victoriam, & triumphum, quo de potestate Satane liberati sumus, præuenerunt ipsi alias gentes & populos, vt Christi laudes prædicarent, & resonarent. *Coniuncti psallentibus*, id est, coniuncti sanctis Angelis in cælo psallentibus ob eandem victoriam, *in medio iuencularum tympanistriarum*, id est, psallentibus Angelis in medio animarum sanctarum, quæ cum Christo in cælum ascenderunt, quæ dicuntur iuenculæ, quoniam recens vitam beatam ducere, & cum Angelis Deo assistere, ei; psallere, & cantare cœperunt.

*In Ecclesijs benedicite Deo, Domino de fontibus Israel.*

Hic versiculus est quasi parentesis, quæ Propheta præuidens futuram lætitiæ Principum Ecclesiæ, hortatur eos, vt in Ecclesijs, quas fundaturi erant, pergant benedicere Domino Deo, de fontibus Israel materiam laudis haurientes; vocat autem fontes Israel promissiones Dei ad Patriarchas, & vaticinia Prophetarum prædicentium ea, quæ nunc impleta esse videmus, & gaudemus. Illud, *Deo domino*, legi debet cum distinctione hoc modo, *in Ecclesijs benedicite Deo, Domino de fontibus Israel*, id est, benedicite Deo in Ec-

XXVII.

XXVI.

XXV.

XXV.



in Ecclesijs, benedicite, inquam Domino, de fontibus Israel. Sic enim distinguitur hic versiculus in codicibus Hebraicis, & hoc modo distinctus maiorem habet venustatē.

XXIX. *Ibi Benjamin adolescentulus in mentis excessu.*

XXX. *Principes Iuda, duces eorum, Principes Zabulon, Principes Nephtalim.*

Redit ad superiorem narrationem, & explicat, qui sint illi Principes, de quibus dixit, *Praeueniunt Principes.* Isti, inquit, sunt Benjamin adolescentulus, Principes Iuda, & Principes Zabulon, & Nephtali: per quae nomina intelligunt communiter Latini Patres, Hilarius, Hieronymus, & Augustinus, & Graeci expositores Theodoretus, & Euthymius, sanctos Apostolos, qui constituti sunt à Deo Principes super omnem terram: ac primo loco nominatur Benjamin adolescentulus, per quem intelligitur Apostolus Paulus, qui erat de tribu Benjamin, & qui nouissimus fuit vocatione, sed plus omnibus laborauit praedicando, & laudando victoriam Christi: & is in mentis excessu ita coniunctus fuit psallentibus in tertio caelo, & in paradiso, ut nesciret an tunc in corpore esset, vel extra corpus, ut ipse testatur 2. Corinth. 12. Per Principes Iuda, intelliguntur Apostoli, qui erant de tribu Iuda, & Christi fratres dicuntur in Euangelio, quod essent filij Cleophae fratris Ioseph sponsi B. Virginis, ut ex Egesippo refert Eusebius lib. 3. hist. cap. 11. iuxta versionem Ruffini, videlicet Iacobus, Simeon, Iudas, Principes Zabulon, & Nephtali, dicuntur Apostoli ceteri, Petrus, & Andreas, Iacobus, & Ioannes, Philippus, Matthaeus, & ceteri, qui erant à Bethsaida, vel Capharnaum, & vicinis ciuitatibus, ad sortem Zabulon, & Nephtali pertinentibus: quod colligitur ex Euangelio sancti Matthaei, qui scribit cap. 4. Cum autē audisset Iesus, quod Ioannes traditus esset, secessit in Galilaam, & relicta ciuitate Nazareth habitauit Capharnaum maritima in finibus Zabulon, & Nephtali, ut adimpleretur quod dictum est per Isaiam Prophetam, Terra Zabulon, & terra Nephtali via maris trans

Jordanem Galilae gentium, populus qui sedebat in tenebris, vidit lucem magnam, sedentibus in regione umbrae mortis lux orta est eis, sed quoniam ex captiuitate non redierunt decem tribus, sed sola tribus Iuda & Benjamin cum Leuitis, ut colligitur ex lib. 1. Esdræ: Apostoli dicuntur Principes Zabulon, & Nephtali, vel quia in sortibus horum duorum Patriarcharum habitabant; vel quia forte pauci aliqui ex his tribus redierint admixti Iudæis: quod cogimur dicere de Anna prophetissa, quæ dicitur fuisse de tribu Aser, Luc. 2. Miratur Caluinus hæresiarcha in antidoto Concilij Tridentini, quid cogitauerit Interpres noster Latinus, quando vertit, Benjamin adolescentulus in mentis excessu, cum in Hebræo non habeatur, in mentis excessu, sed, dominator eorum. At nos miramur, Caluinum non cogitasse, à Latino Interprete redditum fidelissime fuisse, quod est in Græco: vulgata enim Latina editio Psalterij ex Græco expressa est, non ex Hebræo. Sed neque dissentit lectio Græca, vel Latina ab Hebraica bene intellecta, ut eam intellexerunt Septuaginta Interpretes. Vox enim Hebraica, *radem*, si deducatur à verbo, *rada*, significat dominator eorum, ut Caluinus dicit secutus Rabinos. Sed si deducatur à verbo, *radam*, ut eam deduxerunt Septuaginta Interpretes, significat, altissime dormiens, siue mentis excessum patiens. Pro illo autem, duces eorum, vertunt alij, in purpura sua, sed vox Hebraica utroque modo reddi potest, & sensus est idem.

Manda Deus virtuti tue; confirma hoc Deus, quod operatus es in nobis. XXXI

Descripta victoria Christi, & lætitia Apostolorum: petit à Deo Propheta, ut potentiam suam, quam exercuit in superandis hostibus, & constituenda Ecclesia, iterum exerceat in confirmando, & conseruando opere suo. Manda, inquit, virtuti tue, id est, impera potentiae tuæ, ut operi inchoato assistat, illudque conseruet, & augeat. Explicat deinde hoc ipsum clarioribus verbis.



verbis, dicens, *Confirma hoc Deus, quod operatus es in nobis*, id est, liberaſti nos de potestate Satanae, tranſtulisti in Regnum filij tui plantaſti Eccleſiam ſanguine eiufdem filij tui; effudiſti in nos Spiritum adoptionis filiorum; *confirma hac omnia*, quæ opera ſunt miſericordiæ tuæ. In Hebræo habetur, *Mādauiſt Deus tuus virtuti tuæ*: ſed vox Hebræica, *ſiuaḥ*, poteſt eſſe præteritum, *mandauit*, & imperatiuum, *manda*. Sed illud pronomen additum nomini Deus, cum dicitur, Deus tuus, totam ſententiam obſcurat. Itaque ſuſpicio eſt addititium, & non fuiſſe in codicibus, quos habuerunt Septuaginta Interpreteres: nam omnes veteres, Græci, & Latini legunt, *Manda Deus virtuti tuæ*, dū exponunt hunc verſiculum ex Interpretatione Septuaginta. Sanctus enim Hieronymus vertit quidem ex Hebræo, *præcepit Deus tuus de fortitudine tua*: tamen in commentario legit, & exponit cum alijs Patribus, *Manda Deus virtuti tuæ*.

multa prædicit Iſaias capit. 60. & 66.

*Increpa ſeras arundinis, congregatio taurorum in vaccis populorum, vt excludant eos, qui probati ſunt argento.* XXXIII.

Conuertit nunc orationem ad hoſtes Eccleſiæ, qui pacem eius perturbare ſatagunt, ne munera laudum, & ſacrificia bonorum operum offerantur Deo: ac primum loquitur de hoſtibus inuiſibilibus, vt exponunt S. Hilarius ex Latinis, & Euthymius ex Græcis. Ait igitur, *increpa*, id eſt, exterre, coërce, reprime *ſeras arundinis*: per ſeras arundinis intelliguntur beſtiæ ſylveſtres, quæ latent inter arundineta: & per has beſtias deſcribuntur Dæmones, qui libenter verſantur inter homines vanos, & leues, & in locis humentibus, vbi regnat luxuria. Sic enim de Diabolo ſub figura Behemoth loquitur Dominus in libro Iacob. cap. 40. *Sub umbra dormit, in ſecreto calami, in locis humentibus*. Deinde addit de hominibus, *Congregatio taurorum in vaccis populorum*, id eſt, Congregatio Principum impiorum ſauientium, inſtar taurorum. *In vaccis populorum*, id eſt, in medio populorum inſipientium, & inſanientium inſtar vitulorum, ſiue iuuenearum: (nam in Hebræo exprimitur non ſolum genus femininum, ſed etiam iuuentus.) *Congregatio*, inquam, *facta eſt, vt excludant eos, qui probati ſunt argento*, id eſt, conuenerunt Principes, & populi impij, Satana inſtigante, & impellente, vt excludant, reiſciant, ad nihilum redigant prædicatores Fidei, qui probati ſunt inſtar argenti in fornace ignis, & inuenti puriſſimi, & fideliffimi. Itaque ſignificantur his verbis perſecutiones grauiffimæ, tum Iudæorum, tum Paganorum, quæ exorta ſunt poſt Chriſti Aſcenſionem in cælum. S. Auguſtinus per ſeras arundinis, ſiue calami, vt ipſe legit, intelligit hæreticos, qui calamo, id eſt, ſcriptura vexant Eccleſiam. Et illud, *vt excludant eos, qui probati ſunt argento*, exponit in hunc ſenſum, vt faciant eminere eos, qui probati ſunt, vt argenti excluditur ab artiſ-

XXXII. *A templo tuo in Hieruſalem, tibi offerent Reges munera.*

Poteſt hic verſculus intelligi de regibus, qui in cælo cum Chriſto regnant, & tunc ſenſus eſt, *A templo, quod eſt in cæleſti Ieruſalem, tibi Deo ſancti, qui regnant cum Chriſto, offerent munera*, id eſt, ſacrificia laudis perpetuæ. Poteſt etiam intelligi de Regibus ſpiritualibus, id eſt, de ſacerdotibus Eccleſiæ, de quibus paulo ante dictum eſt, *Dum diſcernit cæleſtis Reges ſuper eam*; & tunc ſenſus eſt, *A templo, quod eſt in Eccleſia Catholica, tibi Deo ſacerdotes, qui ſunt miniſtri Regni tui, & populum vice tua regunt, offerent munera*, id eſt, ſacrificia euchariſtica, ſacrificia item laudum & precum, ſacrificia denique conuerſionis animarum. Poſtremo poteſt intelligi de Regibus temporalibus, & tunc illud, *a templo*, exponendum eſt, propter templum, id eſt, propter ſanctitatem templi tui, quod eſt in Eccleſia, offerent tibi Reges terræ munera præcioſa ad iplius templi ornatum, & ad alendos templi miniſtros: de qua oblatione Regum



cibus, quando est massa impolita excludant vas argenteum, id est, apparere & eminere faciunt. Hæretici enim exercent Ecclesiam & occasionem præbent, ut multi viri docti, & probi emineant, in intelligentia Scripturarum.

XXXIV.

*Disipa gentes, quæ bella volunt: venient legati ex Egypto, Æthiopia præueniet manus eius Deo.*

Prædicit nunc victoriam aduersus persecutores. *Disipa, inquit, gentes*, id est, tu dissipabis omnes, qui bella mouent aduersus populum tuum: & tunc *venient legati ex Egypto* pacem petentes, & subiectionem proferentes: & *Æthiopia*, quæ longius distat, *præueniet manus eius Deo*, id est, præueniet apud Deum manum Egypti offerentis munera. Nominat Propheta Egyptum, & Æthiopiam, istam, ut valde inimicam veræ religionis, istam, ut valde longinquam. Volunt autem Patres, per Æthiopiam præuenientem, significari Eunuchum Candacis Reginae Æthiopum, quid ad fidem Christianam adiunctus est multo antea, quam eadem fides ad Egyptum, aliasque gentilium regiones peruenisset: de quare lege cap. 8. Actorum Apost.

XXXV.

*Regna terra cantate Deo, psallite Domino, psallite Deo, qui ascendit super cælum cæli ad orientem.*

Pergit prædicare; per modum exhortatus, conuersionem Gentilium: ad fidem Christianam. *Regna terra*, id est, totius terræ, non solum Regnum Israel, aut Iuda, *cantate Deo*, ex fide agnoscetes verum Deum, *cantate laudes eius*: *Psallite Domino*, non solum verbis cantate, sed etiam bonis operibus, *psallite Domino, qui ascendit super cælum cæli ad orientem*, id est, qui posteaquam ascendit in altum, sedet in summo cælo ad fontem lucis, unde oritur omne lumen. In Hebræo, & Græco codice non sunt illa duo verba, *psallite Deo*; & S. Hieronymus in epistola ad Suniam, & Fretellam, dicit, esse superuacanea: tamen nihil obest, quod in nostra editione legantur, cum nihil sint, nisi repetitio præcedentium verborum. Illud ag-

tem, *ascendit super cælum cæli*, non significat, ascendit in cælum, sed sedet super cælum, vox enim Hebræica est, *rocheb*, quæ non significat, *sursum ascendere*, sed *equitare*, vel *curru vellis*, ut supra diximus ad illa verba, *Qui ascendit super occasum*. Itaque significat Propheta, Christum Dominum post ascensionem in cælum de qua loquutus est, cum ait, *Ascendisti in altum*: esse cœpisse ipsō cælo altiore, & superiore, quippe qui sedet super cælum, ut eques super equum vel auriga super currum, vel Rex super solium. Illud autem, *ad orientem*, optime coheret cum eo quod supra dictum est, *Qui ascendit super occasum*, i. quia sub se habet tenebras omnes; ipse est in luce, vel ad lucem inaccessibilem, unde oritur lumen omne, quod communicatur Angelis, & hominibus. S. Hieron. vertit, *Qui ascendit super cælum cæli à principio*: & vere vox Hebræica, *chedem* vtrunq; significat, & orientem, & principium, & vtrunq; est verum. Christus enim ut Deus, à principio sedet super cælum cæli, & ut homo, post resurrectionem ascendit in cælum, & nunc est super cælum cæli ad orientem, assistens æterno, & supremo Orienti, id est, fonti lucis.

*Ecce dabit voci suæ vocem virtutis: date gloriam Deo super Israel: magnificentia eius, & virtus eius in nubibus.* XXXV

*Mirabilis Deus in sanctis suis Deus Israel, ipse dabit virtutem, & fortitudinem plebi suæ, benedictus Deus.* XXXVI

Hos duos versiculos referunt Græci, Theodororus, & Euthymius ad missionem Spiritus sancti, quando post ascensionem Domini, induti sunt Apostoli virtute ex alto. Sed Latini, Hilarius, Augustinus, & Hieronymus referunt ad secundum aduentum Christi: & hoc magis probo. Hic enim Psalmus (ut initio diximus) omnia mysteria vtriusque testamenti complectitur. *Ecce inquit, dabit voci suæ vocem virtutis*, i. ille, qui humilis apparuit, & sicut Agnus corā tondente obmurrui, ut dicit Isaias c. 53. nunc sedet super cælum cæli, & paulo post *dabit voci suæ*



ut sit vox virtutis, id est, vox potentissima: & efficacissima: quod fiet quando omnes mortui audient vocem filij Dei, & resurgent qui bona fecerunt in resurrectione viva, qui vero mala egerunt, in resurrectione Iudicii, nulla enim vox potentior cogitari potest. Vox quidem virtutis fuit, quæ dixit, *Adolescens tibi dico surge, & Lazaro veni foras*. Sed vox, quæ cineres omnium hominum ab initio Mundi defunctorum, subito formabit, animabit, excitabit, quantæ tandem virtutis erit? Vox item maximæ virtutis erit, quæ dicet, *Ite maledicti in ignem æternum*, Matt. 25. & *Venite benedicti, possidete paratū vobis Regnum*, cui voci absque ulla resistentia, vel retractatione respondebit effectus. Certe comparatione ad hanc vocem, omnia omnium Principum edicta, & imperia nullius virtutis existimanda sunt. Recte igitur subiungit, *Date gloriam Deo super Israel*, id est, glorificate Deum super beneficia in electos eius collata. Omnia enim propter electos, inquit Apostolus, 2. Timoth. 2. Magnificentia eius, & virtus eius in nubibus, id est, date gloriam Deo super Israel, quoniam magnificentia Dei, & potentia Dei manifestabitur maxima super Israel in nubibus cali, quando videlicet, rapiuntur electi in nubibus obuiam Christo, & in ipsis nubibus erunt sedentes, quasi in solijs celestibus, & sublimissimis omnes electi Dei à dextris, & à sinistris Iudicis omnipotentis. Quare exclamare licet, *Mirabilis Deus in sanctis suis*: tunc enim vere totus Mundus intelligit, Deum in sanctis suis prouehendis ab imo ad summum, à summa humilitate ad summam & celsissimam gloriam, plane admirabilem fuisse: nam Deus Israel, Deus electi populi sui, tunc dabit virtutem, & fortitudinem plebi suæ, cum electos suos vera immortalitate, & impassibilitate donabit. Neque obstat, quod in Hebræo legatur, *Mirabilis Deus in sanctuarijs*: ipsi enim sancti viri sunt verissima sanctuaria Dei, neque etiam quod in Hebræo sit in secunda persona, in sanctuarij suis. Videtur enim errore scriptorum id accidisse. Nam non solum Septuaginta verterunt in tertia persona, sed etiam sanctus Hiero-

nymus verit, sanctuario suo. Denique parum refert, quod in Hebræo sit, *Terribilis Deus*, pro quo nos habemus, *Mirabilis Deus*: nam vtrunque est verum, & vna lectio explicat aliam: discimus enim ex lectio. Hebræica, Christum in die nouissimo fore mirabilem in sanctis suis, cum magno terrore impiorum: quanquam omnis admiratio terrorem quandam incutere solet. Concludit Propheta illis verbis, *Benedictus Deus*: id enim sequitur ex prædictis in toto Psalmo, ut omnes Deum benedicere debeant, cum eius misericordia, & iustitia, potentia, & sapientia, ex tot mysterijs mirifice declarata sint.

## P S A L M V S LXVIII.

## Titulus &amp; Argumentum.

In finem, pro ijs, qui commutabuntur  
David.

DE hoc titulo dictum est in explicatione Psalm. 44. quæ non sunt repetenda. Consentunt fere omnes expositores veteres, ut Hilarius, Augustinus, Hieronymus, & recentiores, ut Genebrardus, Iansenius, Agellius, & alij, in hoc Psalmo prædici passionem Christi plane ad literam, nec non euersionem Iudeorum, & adificationem Ecclesiæ, quæ constat ex ijs, qui feliciter commutabuntur de iniquitate ad iustitiam, & de miseria temporali ad gloriam sempiternam. Vnus est Theodoretus, quem sequitur Euthymius, qui Psalmum exponendum censuit de captivitate Babylonica Iudeorum: sed beatus Augustinus constanter reprehendit eos, qui audent aliter exponere, quam Apostoli exposuerint. Apostoli enim de Christo prædicta esse affirmant illa, *Qui oderunt me gratis*, Ioan. 15. & illa, *Zelus domus tuæ comedit me*, Ioan. 2. item illa, *Opprobria exprobrantium tibi ceciderunt super me*, Rom. 15. & illa, *In siti mea potauerunt me aceto*, Ioan. 19. & illa, *Fiat habitatio eorum deserta*, & non sit, qui habitet in ea, Act. 1.



I. **S**aluum me fac Deus, quoniam intra-  
suerunt aque vsq; ad animam meam.  
II. Infixus sum in limo profundi, & non est  
substantia.

III. Veni in altitudinem maris, & tempe-  
stas demersit me.

Passio Domini nostri Iesu Christi in Eu-  
uangelijs ita describitur, vt non multa di-  
cantur de vehementia doloris eius. Volue-  
runt enim Euangelistæ declarare, passionem  
illam fuisse voluntariam, & summa constan-  
tia toleratam à Christo, sed quoniam oport-  
tebat etiam, vt Mundus intelligeret; acer-  
bitatem doloris in Christo fuisse maximam,  
atque inde colligeret quantum debeat Re-  
demptori, ideo Spiritus sanctus hanc dolo-  
ris vehementia multo antea Prophetis reue-  
lauit, ac per eos, vt testes fide dignissimos,  
& ab omni adulatione alienos; scribi voluit.  
Itaque multa de hac re scripsit Isaïas, mul-  
ta Hieremias, sed nullus plura quam Dauid.  
Igitur in primis tribus huius Psalmi versi-  
culis, describitur passio Christi per simili-  
tudinem demersionis in aquas. Iululentas,  
& profundissimas. *Saluum me fac Deus*, sa-  
lutem petit Saluator à Deo Patre, non sa-  
lutem animæ, quam habebat, & perdere non  
poterat cum beatus esset: sed salutem cor-  
poris, eamq; non absolute petit, sed vt osten-  
dat magnitudinem doloris, & contrarieta-  
tem naturalis appetitus ad mortem, eo pror-  
sus modo; quo in horto dixit, *Pater, si vis,*  
*transfer calicem hunc à me*, Luc. 22. *Quo-*  
*niam intrauerunt aquæ vsque ad animam*  
*meam*. Hic incipit similitudo demersionis in  
aquas, Quoniam, inquit similis factus sum  
ei, qui proiectus in aquas, incipit sentire a-  
quas penetrantes ad vitalia, vt iam respira-  
re, & viuere non possit. *Infixus sum in limo*  
*profundi & non est substantia*, id est, similis  
factus sum, non solum homini præcipitato  
in aquas, sed in aquas limosas, & sine fun-  
do, vt non liceat emergere, neque subsistere.  
Illud *Et non est substantia*, significat, & non

est fundamentum, siue fundus, vbi subsisti  
possit: nam Græce est *ὁ δῶτος* & Hebraice,  
*mahamad*, quæ stationem siue consistentiam,  
vel subsistentiam significant. *Veni in altitudi-*  
*nem maris*, id est non in paruum gurgitem  
demersus sum, sed in mare magnum, & pro-  
fundissimum, vt aquarum imensa multi-  
tudo super me sit. *Et tempestas demersit me*,  
id est, quia tempestas vehementissima ven-  
torum, & fluctuum demersit me. In hac si-  
militudine per multitudinem aquarum vsq;  
ad animam penetrantium, intelliguntur pœ-  
næ multæ, quas Christus perculit, quæ vsq;  
ad mortem leuierunt: non enim simplici  
more defunctus est, sed innumeras pœnas,  
doloresque sustinuit. *Per limum profundum*  
cui infixus inhaesit, significantur peccata  
totius humani generis, quæ illum in pœnis  
detinuerunt: *per tempestatem*, quæ demersus  
fuit in aquas, intelliguntur iusticia, decre-  
tumque diuinum, quod expiari peccata vo-  
luit: intelligitur quoque rabies, & crudeli-  
tas Iudæorum: intelligi denique potest, &  
maxime proprie vehementia amoris ipsius  
erga genus humanum. Nam per eam tem-  
pestatem, intelligitur causa efficiens passio-  
nis, quæ multiplex fuit, vt Theologi docent  
ex diuinis scripturis. Nam Apostol. ad Rom.  
8. dicit, *Qui proprio filio suo non pepercit, sed*  
*pro nobis omnibus tradidit illum*. Et Act. 3. di-  
cit S. Petrus ad Iudeos, *Auctorem vitæ inter-*  
*fecistis*. Et rursus B. Paulus ad Ephes. 5. *Chri-*  
*stus dilexit Ecclesiam, & tradidit semetipsum*  
*pro ea*. Itaque tempestas valida: quæ Christum  
demersit in profundum passionis, & mortis,  
fuit partim bona, & laudabilis, partim mala,  
& reprehensione dignissima.

IV. Laboranti clamans, raucae factæ sunt  
fauces meæ: defecerunt oculi mei dum spe-  
ro in Deum meum.

Ex hoc versiculo intelligimus, quæ di-  
cta sunt in tribus versiculis superioribus,  
accipienda esse per similitudinem: nam si  
proprie Christus demersus fuisset in aquas,  
non potuisset clamare. Sed hic etiam ver-  
siculus.



sculus quartus per similitudinem accipien-  
 dus est: Christus enim clamauit quidem in  
 passione, cum ait, *Deus meus, Deus meus, ut  
 quid dereliquisti me?* Matth. 27. & rursum  
 clamauit, cum ait, *Pater in manus tuas com-  
 mendo spiritum meum*, Luc. 23. Sed hi clamo-  
 res tam breues fuerunt, vt non potuerint  
 rancedinem facere. Quod autem Christus in  
 passione defecerit aspiciendo, & expectan-  
 do auxilium à Deo, nusquam legimus. Ita-  
 que sensus est, Tanta fuit acerbitas, & pro-  
 lixitas doloris mei, quantam intelligimus  
 esse in illis, qui vsque ad rancedinem auxi-  
 lium implorantes vociferantur, & clamant:  
 & quanta in illis esse solet, quorum oculi de-  
 ficiunt aspiciendo in cælum, & expectando  
 auxilium à Deo. Quod igitur Christus in  
 passione semper fere tacuit, vt *agnus mæ-  
 suetus qui portatur ad victimam*, vt dicit.  
 Hier. cap. 11. & adiuuantem non requisierit,  
 quasi nihil acerbi pateretur, non fecit leui-  
 tatis passionis, sed magnitudo constantiæ; &  
 flamma charitatis. Si enim iuxta magnitu-  
 dinem dolorum, lamentatio esse debuisset,  
 sine dubio rauce factæ fuissent fauces eius  
 ob continuam vociferationem, & oculi ei-  
 us caligassent, dum aspiceret in auxiliato-  
 rem. Quare (vt supra indicauimus) Prophe-  
 ta expressit magnitudinem passionis. Euan-  
 gelista vero constantiæ magnitudinem de-  
 monstrauit.

V. *Multiplicati sunt super capillos capitis  
 mei, qui oderunt me gratis.*

VI. *Confortati sunt, qui persecuti sunt me  
 inimici mei iniuste, quia non rapui, tunc  
 exolvebam.*

Explicat nunc Propheta in persona Chri-  
 sti, proprijs verbis, quæ hactenus dixit per  
 similitudines. Comparauit enim persecuto-  
 res Christi multitudini aquarum, & violenti-  
 æ tempestatis: nunc aperte dicit inimicos  
 suos fuisse prope innumerabiles, & violenti-  
 ssimos; & absque vlla iusta causa, imo sine  
 vlla causa ita sequebatur. *Multiplicati sunt super  
 capillos capitis*, id est, plures fuerunt, quam sit  
 numerus capillorum capitis, qui numerari  
 vix possunt. *Qui oderunt me gratis*, id est, plu-

rimi fuerunt, qui oderunt me absque vlla  
 causa. Quod plurimi fuerint perspicuum est  
 ex Euangelio: nam præter concilium Senio-  
 rum, Pontificum, Scribarum, & Phariseo-  
 rum: accessit turba populi maxima, quæ cla-  
 mauit, *crucifige eum*. Accesserunt integræ co-  
 hortibus militum paganorum: *spernit enim eum  
 Herodes cum exercitu suo*. Et in domo Pilati  
 conuenit vniuersa cohors militaris ad Chri-  
 stum illudendum. Accessit etiam Iudas su-  
 per numerum odientium Christum: Quod  
 autem gratis eum oderint, dubitari non po-  
 test, cum pertransieris benefaciendo & sanando  
 omnes oppressos à Diabolo, Act. 10. & nemine  
 vnquam læserit. Causa vero, quam allegabāt  
 in Concilio, Ioan. 11. *Sz dimittimus eum sic,  
 venient Romani, & tollent locum nostrum, &  
 gentem*; euentus docuit, quā fuerit vana, &  
 ex falsa prudentia prodierit: nam non dimi-  
 serunt eum, imo impediuerunt, quantum  
 potuerunt Euangelij progressum; & tamen  
 venerunt Romani, & tulerunt locum eorum,  
 & gentem; quod non accidisset, si Christum,  
 qui pacis, & mansuetudinis, & charitatis  
 doctor; & auctor erat, fideliter recepissent.  
 Addit Propheta de violentia inimicorum  
 Christi, *Cōfortati sunt, qui persecuti sunt me  
 inimici mei iniuste*, id est, iniusti persecuto-  
 res mei roborati sunt, fecerunt sibi animum,  
 præualuerunt & ideo iniusti fuerunt, quia  
 coegerunt, vt soluerem, *quia non rapui*, id est,  
 penam darem sine merito culpæ. Omnis ini-  
 quus, raptor dici potest, quia rapit gloriam  
 Dei, & ideo cum punitur, soluit quod  
 rapuit: sed Christus nihil rapuit, quia nun-  
 quam peccauit: & tamen poenas grauissimas  
 dedit. Agnouit id latro pendens in cruce,  
 cum ait, *nos quidem iuste*, (crucis videlicet  
 supplicium patimur) *nam digna factis re-  
 cipimus, hic autem nihil mali gessit*, Luc.  
 23.

*Deus tu scis insipientiam meam, & de-  
 licta mea à te non sunt abscondita.*

Quia dixerat, iniuste se pati, & soluere  
 quæ non rapuit reddit nunc rationem, cur



voluerit pati, cum facile posset ab iniusta persecutione se liberare, causam autem esse dicit insipientiam suam, & delicta sua, quæ Deo notissima, sed mundo occultissima erant. *Insipientiam suam*, vocat, insipientiam Adami, quam in se suscepit, & *delicta sua*, vocat delicta eiusdem Adami, & cæterorum hominum, quæ portauit, non commisit. *Deus*, inquit, *tu bene nosti, quæ sit insipientia mea*, & quæ *delicta mea*, id est, tu scis me pati propter insipientiam primi hominis, qui seductori credidit, similem Deo se futurum, si ligno vetito vesceretur: & propter inobedientiam eiusdem, quæ insipientiam illam consecuta est. Addit sanctus Augustinus, insipientiam Christi dici posse eam, quæ apud homines insipientia visa est, cum tamen sapientia esset maxima, videlicet quod cum posset vnicuique verbo à morte se liberare; voluit tamen pati acerbissima tormenta, & mortem ipsam crucis ut seruulos, & ipsos inimicos à tormentis & morte redimeret. Hæc stultitia visa est hominibus, sed Deus nouit, hoc genus stultitiæ sapientius esse omni humana sapientia. Quomodo stultitia videri potest ignorantibus artem agriculturæ, cum grana optima proiciuntur in campos, & amitti irreparabiliter videntur, sed cum eadem grana multiplicata colliguntur in messe, tunc apparet, non stultitiam, sed sapientiam fuisse proicere eo modo grana in sulcos terre.

VIII. Non erubescant in me, qui expectant te Domine, Domine virtutum.

IX. Non confundantur super me, qui quarunt te Deus Israel.

X. Quoniam propter te sustinui opprobrium, operuit confusio faciem meam.

Sollicitus pro membris suis, orat, ut hæc ipsius passio, non sit scandalum fidelibus suis, aut certe non desperent: nam ipse dixit, *Beatus qui non fuerit scandalizatus in me*, Matth. 11. & ad discipulos passionem iam imminente, *Omnes vos scandalum patiemini in me nocte ista*, Matth. 26. Ideo nunc ait, *Non erubescant in me, qui expectant te Domine*, id est, non erubescant propter me, qui

sperant in te, quasi ego derelictus à te sup. & spes mea vana fuerit: ne dicant, Quis audebit spectare Dominum, id est, sperare in Domino, si filium suum Dominus ita negligit, ita deserit? Ac deinde repetit, & declarat, addens, *Non confundantur super me, qui quarunt te Deus Israel*: nam qui confunduntur, erubescunt, & qui sperant, quarunt: quod ergo dixerat, *Non erubescant in me*, declarat per illa verba, *Non confundantur super me*, id est, mei causa. Et quod dixerat, *qui expectant te*, explicat per illa, *Qui quarunt te*, id est, qui sperantes in te quarunt auxilium tuum: & ad id quod dixerat, *Domine virtutum*, addit, *Deus Israel*, ut ostendat, merito homines confidere in Deo, quia Dominus est virtutum, id est, exercituum, ac per hoc potentissimus: & simul est Deus Israel, id est, amator, & protector populi sui, ac per hoc benignus, & qui non solum potest, sed etiam vult, & solet defendere suos. Reddit postremo causam, cur id iuste petat. *Quoniam*, inquit, *propter te sustinui opprobrium*, id est, hæc iuste peto, quia ignominiam, quam passus sum, non propter culpas meas, sed propter honorem tuum passus sum. Propter te, inquam, *operuit confusio faciem meam*, id est, propter gloriam tuam, ego sustinui contumelias, flagella, irrisiones, sputa in faciem, & alia id genus, quæ verecundia, ac rubore vultum meum impleuerunt.

Extranens factus sum fratribus meis, & peregrinus filius matris meæ. XI.

Quoniam zelus domus tuæ comedit me, & opprobria exprobrantium tibi, ceciderunt super me. XII.

Explicat Propheta in persona Christi occasionem persecutionis Iudæorum. Occasio enim fuit, quia Dominus reprehendebat mala opera eorum: sic enim ipse ait, Ioan. 7. *Non potest Mundus odisse vos, me autem odit, quia ego testimonium perhibeo de illo, quod opera eius mala sunt*. Et in libro Sapientie capite secundo, dictum est, *Circumueniamus iustum, quoniam inutilis est nobis, & contrarius operibus nostris, & improperat nobis*.



nobis peccata legis, & diffamat in nos peccata disciplina nostra, &c. Dicit igitur, *Extraneus factus sum fratribus meis*, id est, tanquam extraneum me reputauerunt fratres mei, Iudeis: & peregrinus filius matris meae, id est, & tanquam hospes, vel alienigena existimatus sum à filiis matris meae synagogæ. Et hoc est quod initio Euangelij scripsit sanctus Ioannes, *In propria venit, & sui eum non receperunt*: nam etiam si dixerant Ioanni. 7. *Nunc scimus unde sit*; Et Dominus eis. Et me scitis, & unde sim scitis: tamen Ioannis 9. dicunt, *Scimus quia Moysi locutus est Deus, hunc autem nescimus unde sit*, id est, non nouimus eum, extraneus est nobis. Reddit autem rationem cur tanquam extraneum illum habuerint: cum addit, *Quoniam zelus domus tue comedit me*. Zelus enim domus Dei tum corporalis, id est, templi, quod profanabant Iudæi negotiationibus, tum spiritualis, id est, congregationis fidelium, quam vitijs varijs inquinabant, comedeat, id est, consumebat; vtebat, doctore afficiebat ipsum: ac propterea ipse zelo illo permotus grauissime Iudæos arguebat, vt perspicuum est ex cap. 23. Matth. & cap. 11. Luc. & cap. 8. Ioan. & sicut ipse iuste eos arguebat, vt emendaret; sic vicissim illi eum blasphemabant, eique conuiciabantur, dicentes *Demonium habes Samaritanus es*; & *In Beelzebub Principe demoniorum eiecit demonia*; & *Scimus quia hic homo peccator est*, Ioan. 8. & ideo subiungit in Psalmo, *Opprobria exprobrantium tibi ceciderunt super me*. Dicit autem opprobria exprobrantium tibi; quia iniuriæ Filij pertinent ad Patrem, præsertim cum in diuinis, Pater, & Filius vnum sint in essentia: & quamuis communes essent omnes iniuriæ Patri, & Filio, tamen ex præcipue pertinebant ad Patrem, quæ ad miracula pertinebant, quæ sunt opera diuina, de quibus ipse dicebat, *Opera quæ dedit mihi Pater, vt faciam illa, testimonium perhibent de me*, Ioan. 5. & *Pater in me manens ipse facit opera*, Ioan. 14. Illa ergo calumnia. *In Beelzebub Principe demoniorum eiecit demonia*, propriissimè ad Patrem pertinebat, cum opera Dei,

quæ Filius faciebat in nomine Patris sui, & quæ Pater per Filium operabatur, ipsi tribuerent Diabolo. Ista ergo opprobria exprobrantium Patri cadebant super filium, tum quia intentio Iudæorum erat Filium calumniari, non Patrem: tum quia ipse Filius libenter super se accipiebat iniurias quæ ad Patrem pertinebant, & in hoc sensu allegatur hic versiculus ab Apostolo ad Rom. 15.

*Et operui in ieiunio animam meam, & factum est in opprobrium mihi.*

XIII.

*Et posui vestimentum meum cilicium, & factus sum illis in parabolam.*

XIV.

Prior versiculus obscurissimus est, tam quo ad verba, quam quo ad sententiam. Et obscurior etiam esse videtur iuxta verba Hebraica, vbi legimus, *Et fleui in ieiunio animam meam*: neque satis faciunt, qui contendunt lectionem puram esse in quodam codice Vaticano, vbi legitur, *Et incuruavi in ieiunio animam meam*, & verba Hebraica esse immutata, & pro *echpe*, legendum esse, *echpe*. Isti, inquam, non satis faciunt; tum quia vulgata editio habet, & operui, tum quia omnes tractatores Græci, & Latini legunt, & operui. Neque vox Hebraica *echpe*, significat incuruari, vt ipsi volunt, non enim; *chapha*, sed, *chaphaph*, significat incuruare. Igitur his omisissis, primo anima ponitur pro toto homine, &, *operui animam meam*, significat, operui me, Id est, operui caput meum ieiunando. Operire autem caput ieiunando, est cum luctu, & mœrore in signum humilitatis, & penitentiz ieiunare, vnde dicitur in alio Psalmo, humiliabam in ieiunio animam meam. Quod autem lugentes & mœrentes soleant operire caput, perspicuum est ex multis locis Scripturæ sacræ, lib. 2. Reg. cap. 15. Porro David ascendebat oliuam oliuarum, scandens, & flets, nudis pedibus, & aperto capite. Et eodem lib. cap. 19. Porro Rex operuit caput suum, Absalon fili mi. Esther. 6. Aman festinauit in domum suam lugens, & aperto capite. Et de ritu ieiunandi

אכפה  
אכפה  
כפה  
כפה



Isaie 58. *Nunquid hoc est ieiunium quod elegi, per diem affligere hominem animam suam? Nunquid contorquere quasi circulum caput suum, & saccum, & cinerem sternere? ubi contorquere caput quasi circulum, est, caput cooperire undique, & regnum archæ constringere. Atq; hinc conciliari potest lectio Hebraica cum Græca, & Latina. Quod enim habetur in Hebraico, Et fleui in ieiunio animam meam, existimant Septuaginta Interpretes, intelligendum esse non proprie de fletu, sed de signo, & ritu fletus, & doloris, & ideo verterunt, *operui in ieiunio animam meam*. Neque est nouum, quod fletus accipitur pro signo fletus: nam in Scriptura passim legimus, defletos fuisse mortuos multis diebus, quod significat, signa mœoris multis diebus portata. Et quod legimus in Genesi cap. ultimo, quod Ægyptus fleuerit Iacobi Patriarchæ mortem septuaginta diebus, sine dubio de signis luctus intelligitur, vt notat sanctus Hieronymus. Iam quod attinet ad *sententiam*, non legimus Christum ieiunasse operto capite, neque saccum induisse, multo minus ea canila fuisse derisum: sed contra legimus, dictum de eo Matt. 11. *Ecco homo vorax, & potator vini*, & discipulos eius reprehensos, quod non ieiunarent, vt discipuli S. Ioannis, & Phariseorum ieiunabant, Matth. 9. Ieiunauit quidem Dominus quadraginta diebus in deserto, sed hoc fuit occultum ieiunium, vt non potuerit inde opprobrium pati. Ieiunauit quoque sæpissime totos dies occupatus in prædicatione, quemadmodum vigilabat sæpe totas noctes orationi vacans, sed non inde opprobrium illi accessit. Deniq; ieiunauit in passione sua à vespere feriæ quintæ, vsque ad horam nonam feriæ sextæ, & ob defatigationem, & flagella sine dubio esuriuit, & sitiuit: nec defuit ritus operiendi caput: nam spinco galero coopertus ieiunauit, nec sine opprobrio, cum in fame sua felle cibatus, & in aceto potatus fuerit: tamen de cilicio, siue sacco nihil in Euangelio legimus. Quare cum sancto Augustino duo isti vetusculi exponendi esse videntur spiritualiter, vt per ieiunium cum fletu, & mœore, intelliga-*

mus esuriam, & sitim ardentissimam salutis animarum, pro quibus angebatur, & gemit: per cilicium vero intelligatur caro mortalis, & passibilis, qua Verbum indutum Mundo apparuit, vt humilitate sua mortales adduceret ad contemptum rerum transæuntium, & desiderium æternarum: & ob ista opprobrium factus est, & fuit Iudæis in parabolam, id est, in irrisionem, inquit S. Augustinus. Parabola enim est similitudo, quæ potest esse in bono, & in malo, sed hoc loco intelligitur in malo, quomodo Sap. 5. dicuntur sancti fuisse in similitudinem improperij. Fuisse autem Christum irrisum in terris manifestum est: nam Marci 5. cum diceret, *Non est mortua puella, sed dormit*, irridebant eum. Et Luc. 16. cum loqueretur de eleemosynis large faciendis, audiebant Pharisei auari, & deridebant eum. In Passione autem irrisus fuit à militibus, ab Herode, à Principibus Sacerdotum, ab alijs.

*Aduersum me loquebantur, qui sedebant in porta, & in me psallebant, qui bibebant vinum.*

Hæc est quasi appendix ad ea quæ dicta sunt, quasi dicat, Accedit præterea, quod *aduersum me loquebantur, qui sedebant in porta*, id est, Principes, ac Iudices in concilijs suis de interitu meo consultabant, & falsa testimonia quærebant, ac me denique ad mortem condemnabant. Iudicia enim in portis ciuitatum apud Hebræos exercebantur, vnde est illud Prouerb. 31. *Nolui in portis vir eius, cum sederit cum senatoribus terra. Et in me psallebant qui bibebant vinum*, id est, non solum publice in consilijs, sed etiam priuatim in domibus tempore conuiuiorum inter pocula de me garriebant, & cantabant ludentes, & irridentes.

*Ego vero orationem meam ad te Domine, tempus beneplaciti Deus.*

Expouit hæcenus Propheta magnitudinem passionis dominicæ, nunc exponit orationem Christi ad Patrem pro liberatione à tantis malis, de qua scribit Apostolus ad Hebr. 5. *Qui in diebus carnis sue præ-*

XV.

XVI.



et supplicationesq; ad Deum, qui posset illum saluum facere à morte cum clamore valido, & lacrymis offerens, exauditus est pro sua reuerentia. Ex quo intelligimus, orationem Christi absolutam non fuisse, vt non pateret, aut non moreretur, sed vt in passione, vel morte non detineretur, aut non moreretur, sed in passione, vel morte non detineretur, in quo exauditus fuit; nam oratio illa fusa est in cruce, & mox emissio spiritu liberatus est à passione, & post triduum resurgens gloriosus liberatus est omnino à morte, & omni tribulatione. Ego vero, inquit, orationem ad te Domine id est, illi mihi insultabant, & opprobria in me iaciebant: ego vero orationem pro illis, & pro me tibi Deo Patri cum lacrymis offerebam dicens, Tempus beneplaciti Deus, id est, iam aduenit tempus beneplaciti, tempus à te definitum, vt complacere tibi me ab his cruciatibus liberare, & Mundum hoc tanto oblato sacrificio reconciliare, hoc idem legimus Ioan. 17. Pater venit hora, clarifica Filium tuum, & Ioan. 19. Consummatum est.

*In multitudine misericordie tue exaudi me in veritate salutis tue.*

Pergit in oratione, ac petit vt quandoquidem iam venit tempus beneplaciti exaudiat orationem eius, in multitudine misericordie, & in veritate salutis tue, id est, propter multitudinem misericordie, ex qua mortuus est ad promittendam reconciliationem per passionem Filij sui, & propter veritatem, id est, veracitatem, & fidelitatem salutis, quia Deus, non minus pius, & misericors est in promittenda salute, quam fidelis, & iustus in præstanda salute, quam promissit.

*Eripe me de luto, vt non infigar, libera me ab ijs, qui oderunt me, & de profundis aquarum.*

Non me demergat tempestas aque, neq; absorbeat me profundum: neq; vrgeat super me puteus os suum.

Petit liberationem sub eadem metaphora aquarum, & luti, & tempestatis, de qua dixerat in primis tribus versiculis. Eripe me

de luto, vt non infigar, id est, vt non tam alte infigar, vt non emergam: dixerat enim, Infixus sum in limo profundis; nunc petit, non detineri in eo luto. Libera me ab ijs, qui oderunt me, ab iniquis persecutoribus, & de profundis aquarum, id est, de magnis tribulationibus, in quas illi me coniecerunt. Non me demergat tempestas aque, antea dixerat, tempestas demersit me; ideo nunc petit, non demergi, id est, non detineri in illa immersione: quod declarat, dicens, Non ita me absorbeat profundum, vt nunquam emergam. Ego non vrgeat super me puteus os suum, id est, non claudat puteus in quem cecidi, os suum: nam dum patet os putei, spes est euadendi, sed clauso, atque obturato ore putei, nihil nisi desperatio superest. Verbum Hebraicum, *at ar*, proprie significat, claudere, & sic legit sanctus Augustinus, Non coarctet puteus os suum; & exponit, non claudat. Sanctus Hilarius legit, Non contineat, S. Hieronymus, Non coronet. Quare nostra lectio, quæ habet, Non vrgeat, exponenda est, non comprimatur os suum, id est, non claudat. Quomodo etiam exponunt Græcam vocem *auxitw*, Theodoretus, & Euthymius, id est, non concludat. In summa petit celerem resurrectionem à mortuis, & liberationem ab omni malo, primum sibi, deinde membris suis.

*Exaudi me Domine, quoniam benigna est misericordia tua: secundum multitudinem miserationum tuarum respice in me.*

*Et ne auertas faciem tuam à puero tuo, quoniam tribulor, velociter exaudi me.*

*Intende anima mea, & libera eam, propter inimicos meos eripe me.*

Multiplicat Propheta verba orationis in persona Christi patientis, vt ostendat magnitudinem passionis. Exaudi me Domine, quoniam benigna est misericordia tua, proponit tres rationes, ob quas debet exaudiri, vnam ex parte misericordie Dei: alteram ex parte magnitudinis doloris sui; tertiam ex parte inimicorum persequentium.



Prima ratio est in hoc versiculo, vbi dicitur. misericordia Dei benigna, & multa esse. S. Augustinus legit, *Quoniam suavis est misericordia tua*, & dicit, misericordiam miseris: suauissimam esse, quemadmodum. cibus suavis est esurientibus, non autem saturis, à quibus contemnitur. Itaque vult sensum esse, *Exaudi me Domine, quoniam mihi in tribulatione constituto, suavis est misericordia tua*: iam enim incipio experimento discere, quam dulciter sapiat misericordia tua. In Hebræo est vox generalis, nimirum *bona est misericordia tua*: quæ vox potest, & benigna, & suauem significare. Altera ratio est in sequenti versiculo, *Et ne auertas faciem tuam à puero tuo, quoniam tribulor, velociter exaudi me*. Nusquam Deus faciem suam auertit à Filio suo, sed visus est auertisse, quando eum in cruce pendentem in fummi doloribus dereliquit, dicente ipso Domino, *Deus meus, Deus meus, vt quid dereliquisti me*, Matt. 27. Huc igitur respicit, cum dicit, *Ne auertas faciem tuam à puero tuo*, id est, ne diutius me in his doloribus derelinquas. Per vocem puerum, S. Augustin. intelligit, paruulum, quia Christus humiliauit se vsq; ad mortem, & sic paruulum, abiectum, & humilem se fecit. Vox Hebraica, seruum significat, & est hoc loco valde ad rem, vt ostendat, Christum in forma serui orasse, & dixisse, *quoniam tribulor*, vehementissima videlicet, & intolerabili passione, *velociter exaudi me*. Tertia ratio est in sequenti versiculo, *Intende anima mea, & libera eam, propter inimicos meos eripe me*. Quid petierit, cum ait, *Velociter exaudi me*, explicat per sequentia verba, *Intende anima mea*, id est, vitæ meæ ad extremum perductæ; & libera eam per celerem resurrectionem. Et subiungit rationem, quæ tertia est, vt diximus, cum ait, *Propter inimicos meos eripe me*, id est, eripe me à doloribus, & à morte resuscitans me in vitam immortalē, vt inimici mei videntes se præualere non potuisse, vel confundantur, vel conuertantur: quod factum esse legimus, Act. 2. vbi audientes populi Christum resurrexisse, & videntes id manifestissimis signis, & prodigijs confirmari, multi compuncti di-

cere ceperunt, *Quid faciemus viri fratres?* & conuersi sunt ad tria millia. Alij obstinati in malo ita confusi sunt; vt dicerent Act. 4. *Quid faciemus hominibus istis? quoniam notum signum factum est per eos, omnibus habitantibus Ierusalem, manifestum est, & non possumus negare.*

Tu scis improprium meum; & confusionem meam, & reuerentiam meam. XXIII

In conspectu tuo sunt omnes, qui tribulant me, improprium expectauit cor meum, & miseriam. XXIV

Vocat ipsum Deum in testem passionis suæ, ac præcipue eius passionis, quæ in ignominia consistit: nobiles enim animi pluris faciunt ignominiam, quam dolorem corporis. Tu, inquit, scis improprium meum, id est, quæ impropria in me iaciant aduersarij, & confusionem meam, id est, confusionem, quæ nascitur ex opprobriis: confunditur enim apud alios, non solum, qui culpam veram agnoscit, sed etiam qui sine culpa est, sed videt credi ab aliis crimina, quæ sibi falso obiciuntur. Et reuerentiam meam, id est, verecundiam, quæ ex confusione oriri solet: erubescunt enim, qui apud alios confunduntur: etiam si iniuste confundantur. In Hebræo est vox, *chelimma*, quæ verecundiam significat, & verecundiam hoc loco legunt S. Hilarius & S. Augustinus, Euthymius, & alij: quare vox, reuerentia, quæ habetur in nostra editione, non significat reuerentiam, quæ debebatur Christo, sed reuerentiam, quam ipse in se habebat. i. erubescentiam, & verecundiam. In conspectu tuo sunt omnes qui tribulant me, id est, sicut non te latet afflictio mea; ita non te latent, qui me affligunt: à quibus nihil expectare possum, nisi improprium, & miseriam, sicut semper expectauit cor meum: multo antea quam aduenirent. Ex Hebræo S. Hieronymus vertit, *Opprobrio contritus est cor meum, & desperatus sum*. Sed facile est videre, quid Septuaginta legerint, vt vertent, *Improprium expectauit cor meum, & mi-*



*Et miseriam* : nam, *sciebar*, si legatur cum puncto in dextro cornu, significat, *contritum est*, vt vertit S. Hieron. sed si legatur, *sabar*, cum puncto in sinistro, significat, *expectauit*, & sic legerunt Septuaginta. Sic etiam vox Hebraica, *annuscha*, & nomen esse potest, & verbum, si nomen sit vt Septuaginta crediderunt, significat *grauem afflictionem*, quam ipsi *miseriam* dixerunt : si verbum sit, vt credidit S. Hieronymus, significat *valde dolui*, vel etiam, vt ipse vertit, *desperatus sum*. Itaq; lectio Græca, & Latina non discordat ab Hebraica, si legatur : vt eam Septuaginta Interpretes legerunt.

*Et sustinui, qui simul contristaretur & non fuit, & qui consolaretur & non inueni.*

*Et dederunt in escam meam fel, & in siti mea potauerunt me aceto.*

Addit ad extremum, in tantis passionibus suis, non solum se nullum habuisse consolatorem, & compatiensem, sed in fame fel sibi datum in escam, & in siti acetum in potum. Non defuerunt, qui contristarentur in morte Christi, sed defuerunt, qui simul cum illo contristarentur, id est ob eam causam tristarentur, vnde ipse tristabatur. Nam Apostoli, & piæ mulieres tristabantur ob mortem Christi temporalem; ipse vero tristabatur ob mortem spiritualem; & spiritualem cæcitatem Iudæorum, qui insaniebant in Medicum, qui venerat curare eos. Sic etiam *quasiuit consolantem, & non inuenit*, quia consolatio, quam quærebat erat conuersio impiorum. In passione autem eius multi peruersi sunt, pauci, aut nulli conuersi. Nam latro conuersus quidem est, sed sub finem passionis : at in ipsa passione turbæ clamauerunt, *Tolle, tolle, crucifige eum* : Apostoli scandalum passi, fugerunt, Petrus negauit, Iudas desperauit. Quod autem dicitur de felle dato in escam, ad literam non legitur in Scriptura, quia Matth. 27. fit quidem mentio fellis, sed dati in potum, non in escam, *dederunt*, inquit, *ei bibere vinum cum felle mixtum* : & fortasse non fuit proprium fel, sed dictum est fel, quia erat potio

amara. Marcus enim cap. 15. hoc idem refertens dicit, *dabant ei bibere myrrhatum vinum*, & hæc est causa fortasse, cur Matthæus non allegauerit scripturam istam Psalmi, vt semper solet diligenter notare, quando scriptura aliqua impletur in actionibus, & passionibus Christi. Probabile igitur est, escam istam fellis intelligendam esse spiritualiter, vt per escam fellis intelligatur amaritudo peccatorum, quæ Christo in passione ieiunanti loco cibi ingesta est. Quod denique dicitur de potu aceti, non solum spiritualiter, sed etiam ad literam impletum est, vt perspicuum est ex cap. 19. Ioannis, vbi notat Euangelista, Christum dixisse : Sitio, & accepisse acetum sibi in sponsia porrectum, vt impleretur Scriptura. Scriptura autem implenda hæc erat. *In siti mea potauerunt me aceto.*

*Fiat mensa eorum coram ipsis in laqueum, & in retributiones, & in scandalum.* XXVII.

*Obscurentur oculi eorum ne videant, & dorsum eorum semper incurua.* XXVIII.

*Effunde super eos iram tuam, & furor ira tua comprehendat eos.* XXIX.

*Fiat habitatio eorum deserta & in tabernaculis eorum non sit, qui inhabitet.* XXX.

Incipit nunc Propheta per modum imprecationis, prædicere mala, quæ euentura erant Iudæis, ob ingratitudinem, & crudelitatem in Christum, qui ad eos missus fuerat Saluator, & Redemptor. Describit autem poenas spirituales, & corporales, quas in Iudæis manifestissime cernimus. *Fiat mensa eorum coram ipsis in laqueum* : per mensam intelligunt Patres lectionem scripturarum, vnde pascuntur animæ fidelium veritate diuina. Vocat autem mensam, vt opponat escæ fellis, quasi dicat, Illi mihi dederunt fel in escam; tu facies, vt eorum mensa, & esca vertatur eis in laqueum: hæc mensa coram Iudæis est, quia assidue legunt Moysen, & Prophetas, sed facta est illis in laqueum, quia perperam intelligentes



capuntur laqueo infidelitatis, & illa ipsa Scriptura, quæ fideliter considerata poterat eis salutem adferre, adfert eis perditionem, quia detinet illos in incredulitate. Eadem facta est illis in retributiones, quia quod mensa scripturarum versa sit illis in laqueum, permisit Deus, ut retribuere illis quod merebatur. Nam iustum est, ut qui lucem aspicere noluerunt, in tenebris manerent. Facta quoque est illis in scandalum, quia lapidem angularem à Deo missum, non agnouerant, sed in eum potius impigerunt, & offenderunt, unde factus est illis lapis offensionis & petra scandali, Isaïæ 8. & Rom. 9. Obscurantur oculi eorum ne videant, & dorsum eorum semper incurua. Hæc est radix malorum supradictorum, quia permittebat Deo deprauatus est intellectus, & affectus eorum. Obscurati sunt oculi eorum interiores, imo velamen est super cor eorum, teste Paulo 2. Corinth. 3. imo excacati sunt, ut dicitur Isaïæ 6. Matth. 13. Ioan. 12. & Rom. 11. Deprauatus quoque est eorum affectus, ut nihil appetant, nisi terrena, quod significat illud, Dorsum eorum semper incurua, id est, te permittente, ac per hoc puniente eorum ingratitudinem, semper curui incedent, ut nihil nisi terram aspiciant. Ut autem intelligamus hanc eorum cæcitatem, & prauitatem de ira Dei descendere, subiungit Propheta, Effunde iram tuam super eos, id est, effundes super eos iram tuam: quod Apostolus confirmat, 1. Thesal. 2. Qui dominum occiderunt Iesum, & Prophetas, & nos persecuti sunt, & Deo non placent, &c. & paulo post, Peruenit enim ira Dei super illos usque in finem. Ex hac ira Dei processit spiritualis plaga primum, deinde etiam temporalis, quia expulsi de terra promissionis toto orbe exules, & profugi vagantur: quod subiungit Propheta dicens, Fiat habitatio eorum deserta, & non sit qui in tabernaculis eorum inhabitet: id impletum est ad literam, cum Tito Imperatore iubente euerfa est Ierusalem, & inhabitabilis reddita: postea vero reedificata quidem est, & habitari cœpta, sed à Gentilibus, vel Christianis, vel Sarracenis, non autem à Iudæis:

Vnde quod ad Iudæos attinet, adhuc deserta est, quia ibi non permittuntur habitare, nisi pauci admodum, prædixit hoc etiam Dominus, Matth. 23. Ecce relinquetur vobis domus vestra deserta.

Quoniam quem tu percussisti, persecuti sunt, & super dolorem vulnerum meorum addiderunt. XXXI

Appone iniquitatem super iniquitatem eorum, & non intrent in iustitiam tuam. XXXII

Doleantur de libro viventium, & cum iustis non scribantur. XXXIII

Quemadmodum paulo ante propter escam sellis Christo exhibitam, Iudæi puniti sunt, ut mensa eorum fieret illis in laqueum, ita nunc dicit Propheta, Iudæos sic puniendos, ut apponantur peccata ad peccata eorum, quemadmodum ipsi addiderunt Christo pœnas ad pœnas, & dolores ad dolores. Sed explicandum est quomodo sit intelligendum, Iudæos persecutos esse quem Deus percussit, & addidisse dolores super dolores vulnerum Deo percutiente acceptorum, Deus enim non videtur percussisse Christum, nisi permittendo, ut à Iudæis percuteretur, proinde videntur eadem omnino vulnera fuisse, quæ Christus à Deo, & à Iudæis accepit. Sciendum igitur est, quandam percussione, & quædam vulnera à solo Deo inflicta fuisse Christo sine vlla cooperatione Iudæorum: aliam fuisse percussione, & alia vulnera à Iudæis proprie Christo inflicta, Deo permittente, & ut illa Christus pateretur, decernente, & volente. Percussio, & vulnera à Deo inflicta, sine cooperatione Iudæorum, fuit assumptio carnis passibilis, & mortalis, unde secuta est fames, sitis, fatigatio, frigoris, & æstus perpressio, & alia permulta incommoda. Porro incarnatio, unde ista secuta sunt; facta est opera Spiritus sancti, ac per hoc Deus solus Christum percussit, dū sine culpa eius propria tam multas peccati originalis pœnas, illum subire voluit. Ad has pœnas, siue percussiones addiderunt Iudæi persecutiones, & vulnera. Nam etiam si Deus definito

confi-



consilio voluerit Christum illa pati, & bene  
 vsus sit mala voluntate Iudæorum: tamen  
 vere, & proprie Iudæi ex propria maligni-  
 tate, & inuidia Christum persecuti sunt, &  
 vulneribus, ac morte affecerunt. Attingitur  
 Propheta, *Quoniam quem tu percussisti*, mit-  
 tens in Mundum similitudinem carnis pec-  
 cati, fami, & siti, frigori, & aestui, aliis-  
 que innumerabilibus incommodis obno-  
 xium, *persecuti sunt* calumniis, conuicijs,  
 falsis testimonijs. Et *super dolorem vulne-  
 rum meorum addiderunt*, id est, super dolo-  
 rem, quem capiebam ex consideratione in-  
 numerabilium peccatorum, quæ quasi vul-  
 nera mea essent, curanda & purganda susce-  
 peram, *addiderunt* dolorem flagellorum,  
 spinarum, clauorum: & cum iam mortuus  
 essem, *addiderunt* vulnus lateris mei: & cum  
 è sepulchro surrexissem, & in me quid am-  
 plius facerent, non haberent, *addiderunt*  
 persequi, & vulnerare me in membris meis,  
 discipulos meos lapidando, & occidendo.  
 In Hebræo habetur, *Et super dolorem vulne-  
 rum tuorum narrauerunt vel numerauerunt.*  
 Sed idem est sensus; nam vulnera illa dici  
 possunt à Christo vulnera mea, & vulnera  
 tua; mea, quia mihi inflicta. Illud autem,  
*narrauerunt, vel numerauerunt*, à Septua-  
 ginta acceptum est, in significationem nu-  
 merationis, non narrationis, & ideo ver-  
 terunt, *addiderunt*: quia idem est addere  
 ad numerum percussionum, seu vulnerum;  
 & numerare super vulnera, & percussiones,  
 non enim quis potest numerare super vul-  
 nera inflicta; nisi addendo noua vulnera.  
*Appone iniquitatem super iniquitatem eorū.*  
 Quoniam, inquit, illi addiderunt vulnera  
 super vulnera, ideo tu iuste Iudex, *appone ini-  
 quitatem super iniquitatem*, id est, iusto iu-  
 dicio tuo non eos liberares à prima iniquitate,  
 sed sine vt addant iniquitatem, sine vt im-  
 plement mensuram Patrum suorum; Matth.  
 23. *ut veniat super illos omnis sanguis iustus.*  
 Dicitur enim Deus facere, quando permit-  
 tit fieri id quod sine eius permissione non  
 fieret, & hoc non casu, sed ex certo decreto  
 ad puniendā peccata eorum, qui merentur

sic deseri, & exsecari. Nulla enim est poena  
 grauior, quam cum peccatum est poenā  
 peccati. De quare vide sanctum Augusti-  
 num lib. 4. in Iulianum. *Et non intrent in ius-  
 titiam tuam.* Hec est explicatio superio-  
 rum verborum: illi enim, qui non intrant  
 in iustitiam Dei, id est, qui non admittun-  
 tur ad iustificationem, quam Dei gra-  
 tia gratis operatur in vasis misericordiæ,  
 illi de peccato in peccatum ruunt, & pec-  
 cata peccatis apponunt, *Deleantur de libro  
 viuentium.* Aliqui hæc exponunt de libro  
 vitæ temporalis, vt deleri de libro viuen-  
 tium, nihil sit aliud, nisi interfici. Sed  
 huic expositioni repugnant verba sequen-  
 tia, *Et cum iusti non scribantur*: nam ex  
 vsu Psalmorum vna pars versiculi alte-  
 ram explicat: proinde idem esse videtur,  
*deleri de libro viuentium, & non scribi in li-  
 bro iustorum*, vt per deleri, vel non scribi,  
 intelligatur non computari: & per viuen-  
 tes intelligantur iusti, qui soli vere viuunt,  
 cum iniusti mortui sint in peccatis, & de-  
 lictis suis. Sanctus Augustinus intelligit  
 hæc omnia de libro æternæ prædestinatio-  
 nis, de quo deleri dicuntur, qui tandem in-  
 telligunt, sed in eo scriptos non fuisse. Sed  
 quoniam liber ille vitæ ante merita præuisa  
 scriptus fuit, vt ipse in primis S. Augustinus  
 affirmat; non video, quomodo in poenam  
 istorum nunc dicatur, *Deleantur de libro vi-  
 uentium, & cum iusti non scribantur.* Pro-  
 babilior videtur eorum sententiā, qui per  
 librum populi Dei, in quo scripti sunt  
 veri cultores Dei, quibus solis vera iustifi-  
 catio contingit, & qui sunt filij & hæredes.  
 Vere enim Iudæi, qui olim erant populus  
 Dei, nunc deleri de libro viuentium & ius-  
 torum, non sunt amplius populus Dei,  
 neque partem habent in hereditate filio-  
 rum Dei: & contra, gentiles, qui non erant  
 populus Dei, per fidem in Christum cœ-  
 perunt esse populus Dei, & partem habe-  
 re in Regno Dei. Hoc prædixit Ezechiel  
 cap. 13. *In concilio populi mei non erunt, &  
 in Scriptura domus Israel non scribentur.*  
 Et Daniel cap. 9. *Non erit eius populus,*  
 qui



qui eum negaturus est: Et Osee 1. Non populus meus: & ego non ero vester deus. Et Dominus in Euangelio sapissime hoc prædixit Iudæis, forte, ut auferretur ab eis Regnum Dei, & filij Regni eijcerentur foras: & in locum eorum venirent gentes ab oriente, & occidente, & recumberent cum Abraham, Isaac, & Iacob in regno eorum. Hanc expositionem attingit breuiter S. Hilarius; sed fusius S. Hieronymus, qui dicit, Iudæos, persecutores Christi deletos esse de libro in quo scribebantur Patriarchæ, & Prophetæ, & non esse scriptos in libro eorum, qui iustificantur per fidem Christi, quorum nomina scripta sunt in cælis.

XXXIV. *Ego sum pauper, & dolens: salus tua Deus suscepit me.*

Nunc tandem in fine Psalmi prædicit Prophetæ Christi gloriam, & Ecclesiæ adificationem. Loquitur autem in persona ipsius Christi, ut etiam in superioribus fecit. Ego, inquit Dominus, sum pauper, & dolens, id est, in cruce sui pauper, & dolens, nudus vestibus, coopertus plagis. Ita nihil habuit ex hoc nostro mundo, exiens, nisi mala nostra: exemplum nobis præbens, ut sequamur vestigia eius, continententes cum gaudio bona mundi, & tolerantes eum patientia mala mundi. Salus tua Deus suscepit me, cum talis essem, egens bonis, diues malis, salus tua me resuscitans à mortuis absterfit omnia mala, repleuit omnibus bonis. Quid enim mali hæere possit in eo, quem ipsa salus suscipit, & vndique complectitur? In Hebræo non est verbum, sum, sed, Ego pauper, & dolens; debet autem illud verbum explicari accommodate ad sententiam, ut sentus sit; Ego pauper, & dolens, vel, Ego sum ille pauper, & dolens, quem salus tua suscepit.

XXXV. *Laudabo nomen Dei cum cantico, & magnificabo eum in laude.*

Christus in forma hominis resuscitatus, & glorificatus à Deo Patre gratias illi agit,

& ager in æternum; ideo dicit, *Laudabo nomen Dei cum cantico*, defunctus videlicet laboribus, & doloribus, non cessabo laudare nomen Dei, id est, potentiam Dei, cum cantico, id est, tum lætitia, & gaudio. Et magnificabo eum in laude: quod est idem aliis verbis repetitum, ad effectum indicandum.

*Et placebit Deo super vitulum nouellum, cornua producentem, & vngulas.* XXXVI

Sacrificium laudis in cælo exhibitum Deo multo est excellentius sacrificiis, quæ in lege præstantissima habebantur: sacrificium enim omnium præstantissimum erat immolatio vituli iuuenis, incipientis cornua, & vngulas emittere. Ideo dicit, *Et placebit Deo canticum meum, super vitulum nouellum*, id est, magis, quam placeat immolatio vituli iuuenis, atque ad significandum non debilem, ac tenerum, sed, perfectum & validum, adiungit, *cornua producentem & vngulas*. In Hebræo est elegans allusio nominum: nam canticum vocauit, *sehir*, vitulum vocauit, *sehior*, quasi dicat, magis placebit *sehir*, quam, *sehior*, id est, canticum, quam vitulus, siue, sacrificium laudis, quam sacrificium pecoris.

*Videant pauperes, & latentur: quærite Deum, & viuât anima vestra.* XXXVII

Laudationi admiscet exhortationem. *Videant*, inquit, id est, intelligant, & considerent hæc pauperes, & latentur in paupertate sua. Alloquitur autem pauperes, sibi similes, qui magis voluntate, quam necessitate sunt pauperes, qui si diuitias forte possident, habent eas ad dispensandas secundum voluntatem Dei, ut œconomi, non ut Domini; ad promerendum, non ad superbiendum; ad opera charitatis, non ad passionis desiderij: denique, qui non minori lætitia dicant, *Sit nomen Domini benedictum*, cum egent, quam cum abundant. *Quærite Deum, & viuât anima vestra*. O vos pauperes spiritu, qui terrena despiciitis omnia, tanto onere leuati, erigite animum, quærite Deum, & anima vestra, quæ ex rebus



bus caducis viuere non potest, vere uiuet. *Cauere*, (inquit Dominus Luc. 12.) *ab omni auaritia, quia non in abundantia cuiusquam vita eius est ex his quæ possidet*. Contra autem, de Deo dicitur, *In ipso vita erat*, Ioan. 1. & in Psal. 35. *Apud te est fons vita*. Et Ecclesiastici primo. *Fons sapientia Verbum Dei in excelsis*, & Prou. 8. *Qui me inuenerit, inueniet vitam*. Nam animæ rationali viuere, sapere est: tunc autem sapientissima erit anima, ac per hoc perfectissime uiuet, cum primam, atque altissimam causam in seipsa sine ullo medio cernet. Ergo querite Deum per viam mandatorum eius incedendo, & non declinando ad dexteram, vel sinistram, & cum peruenieritis, uiuet anima uestra.

autem proprie *reptilium*, quæ degunt in aquis: non autem Angelorum, qui degunt in cælis, & hominum, qui viuunt in terris: quoniam dubium esse non poterat, an Angeli, & homines ad laudem Dei excitarentur.

*Quoniam Deus saluam faciet Sion, & ædificabuntur ciuitates Iuda.* XL.

Hic iam prædicitur ædificatio Ecclesiæ, quæ passionem, & resurrectionem Christi consecuta est: vel ut alij volunt, ædificatio cælestis Ierusalem, vel vtrunque simul. *Quoniam Deus saluam faciet Sion*, id est, Ecclesiam suam primitiuam ex Iudæis collectam, id est, cœtum illum Apostolorum, ac discipulorum primorum, saluabit ab omni periculo, & persecutione in terris, & postea saluabit illā perfectā salute in cælis. *Et ædificabuntur ciuitates Iuda*, id est, propagabitur prima illa Ecclesia, dum multi lapides viuī accedunt, & multæ Ecclesiæ toto orbe ædificabuntur, quæ dicuntur ciuitates Iudæ, id est, confessionis: quia confessio veræ Fidei Ecclesiam ædificat, & propagat. Iuda enim confessionem significat.

*Et inhabitabunt ibi, & hereditate acquirant eam.* XLI.

*Et semen seruorum eius possidebit eam, & qui diligunt nomen eius habitabunt in ea.* XLII.

Hic vero prædicitur firmitas, & beatitudo Ecclesiæ. Nam ciuitates Iuda, id est, ciues ciuitatum Iuda *habitabunt ibi*, id est, in Sion. *Et hereditate acquirant eam*: omnes enim veri fideles Ecclesiarum particularium adhærent Ecclesiæ Apostolicæ, quæ est Sion, & hereditate acquirant eam. Ad quam hereditatem non pertinent sceleris hæreticorum, & schismaticorum. Et iusti iudem veri fideles, si permanserint in Fide, quæ per dilectionem operatur, Gal. 5. inhabitabunt quoque Sion cælestem, & hereditate acquirant eam, quia, si filij, & hæredes. *Et semen seruorum eius possidebit eam*, id est, istam Sion, siue in terris, siue in cælis, non soli pri-

XXVIII. *Quoniam exaudiuit pauperes Dominus, & victos suos non despexit.*

Reddit rationem cur bonum sit querere Deum, ut viuamus: & ratio sumpta est ab experimēto sanctorum Patrum, quos Christus descensu suo ad inferos viuificabit. Illi enim diu quæsierunt Deum, & primi fuerunt, qui cum per Christum vitæ æternæ aditu patefacto, inuenerunt, & ex eius visione vitam æternam acceperunt. *Quoniam*, inquit, *exaudiuit pauperes Dominus*: Patriarchæ enim, & Prophetæ omnes pauperes spiritu fuerunt, & in hoc mundo, tanquam hospites & peregrini habitauerunt, patriam cœlestem inquirentes, ut dicit Apostolus ad Hebr. 11. Hos ergo pauperes exaudiuit Dominus, & quia exaudiuit, *victos suos non despexit*. Idem enim ipsi victi erant, & quasi compediti, quoniam ex inferno ad cœlestem patriam transire non poterant, nisi Christus inferni claustra perumperet, veteresq; ferreos sua morte confringeret.

XXXIX. *Laudent illum cæli, & terra, mare, & omnia reptilia in eis.*

Ob communia beneficia ipsa rerum vniuersitas ad agendas gratias inuitatur, *laudent illum* (Deum videlicet) *cæli, terra, & mare, & omnes qui habitant in eis*. Meminit



primi fideles possidebunt, sed etiam posteri eorum. Non enim perit Ecclesia Christi quæ fundata est supra firmam petram. Et qui diligunt nomen eius, habitabunt in ea, id est, illi ex posteritate fidelium permanenter habitabunt in Ecclesia, & peruenient ad cælestem Sion, qui diligunt nomen eius. Qui enim sine charitate inueniuntur in fine, tanquam paleæ segregabuntur à frumento, & igni tradentur, ut comburantur. Salus enim æterna charitatis est præmium, dicente Apostolo Iacobo, cap. 1. *Beatus vir qui suffert tentationem, quoniam cum probatus fuerit, accipiet coronam vitæ, quam repromisit deus diligentibus se.* Poterunt igitur ad tempus cū sola fide, absq; charitate, peccatores cum iustis esse in Ecclesia, ut paleæ cum tritico in area, & pisces boni cum malis in rete, sed non permanebunt vsque in finem, neque hereditate acquirant cælestem Sion, ut in æternum habitent in ea.

## PSALMVS LXVII.

### Titulus, & Argumentum.

In finem Psalmus Dauid, in rememorationem, quod saluum fecerit eum Dominus.

**I**n hoc titulo apud Hebræos habetur tantum. In finem Dauid in rememorationem: sed Septuaginta Interpretes addiderunt, explicandi gratia, illa verba, quod saluum fecerit eum Dominus. Quod enim quidam bonus auctor, sed modernus, scripsit, à Septuaginta Interpretibus posita fuisse in titulo aliqua verba primi versiculi, non est probabile, tum quia in Hebræo non ponitur in titulo pars vlla primi versiculi, tum quia in primo versiculo mentio fit auxilij, non salutis, quæ tamen expresse nominatur in titulo, tum denique, quia si vlla pars primi versiculi pertineret ad titulum, certe prima esset: at prima pars, videlicet, Deus in adiutorium meum intende, in omnibus codicibus Hebræicis Græcis, & Latinis inuenitur in principio Psalmi, non in titulo. Argumentum Psalmi idem est cum argumento Psalmi trigessimoni, cuius sex ultimi versicu-

li sunt iidem cum sex ultimis versiculis huius Psalmi igitur continet hic Psalmus orationem Christi in cruce pendens pro salute sua, id est pro celerè resurrectione corporis sui, & pro salute populi sui, quod est etiam corpus ipsum, sed mysticum. Dicitur autem Psalmus compositus in rememorationem salutis acceptæ quoniam Dauid spiritu prophetico, ut præuidit orationem Christi pro salute fundendam, sic etiam præuidit salutem sine dubio secuturam, & in eius memoriam Psalmum Deo cecinit.

### EXPLICAT. PSAL. LXIX.

**D**eus in adiutorium meum intende?  
Domine ad adiuuandum me festina.

Hic versiculus in Ecclesia Catholica celeberrimus est: inde enim incipiunt officia diuina omnium horarum. Quamuis enim præcipue conueniat Christo in cruce pendenti, potest tamen usurpari ab omnibus fidelibus in periculo versantibus: & quoniam semper in multis, magnisque periculis versamur, dum peregrinamur à Domino, & dum aduersarius noster diabolus tanquam leorugiens circum quærens quem deuoret: ideo non solum licet, sed etiam expedit assidue hunc versiculum frequentare: ad quod faciendum hortatur monachos Ioan. Cassianus collatione 10. cap. 9, ubi fusissime persequitur utilitatem, & virtutem huius versiculi. Petitur igitur in hoc versiculo auxilium Dei magnum, & velox ad auertendum malum graue & imminens: de priorè dicit, *Deus in adiutorium meum intende*, id est, incumbere diligenter in me iuuando, ut grauitas mali requirit: de posteriore dicit, *Domine ad adiuuandum me festina*, id est, non solum diligenter incumbas in me iuuando, sed etiam velociter, & nulla interposita mora, quoniam periculum imminet S. Hilarius, & S. Augustinus exponunt solum prima illa verba, *Deus in adiutorium meum intende*. Reliqua eiusdem versiculi omittunt: quæ fuit causa, cur auctor ille, de quo supra loquuti sumus, existimauerit, posteriora verba huius versiculi



non fuisse apud Hilarium & Augustinum in ipso Psalmo, sed in titulo. Sed apud Hilarium inuenitur integer titulus, & integer Psalmus descriptus, & in primo versiculo non desunt illa verba, *Domine ad adiuuandum me festina*. Cur autem non exposuerint hæc verba S. Hilarius, & Augustinus, ratio est, quia sunt eadem, vel fere eadem cum superioribus, præsertim si quis consulat Hebræum textum, ubi vnicum est verbum, hoc modo, *Deus ad me liberandum, Domine ad me adiuuandum festina*.

*Confundantur, & reuereantur qui querunt animam meam.*

Hic versiculus idem est cum versiculo decimo nono Psalmi trigessimini, & sensus est, ut per Christi resurrectionem, & fidelium liberationem de potestate inimicorum, inimici videntes se frustra laborasse, confundantur, & erubescant: quod partim iam est factum, partim complebitur in nouissimo die.

*Auertantur retrorsum, & erubescant, qui volunt mihi mala.*

Idem est hic versiculus cum vicefimo versiculo Psalmi trigessimini, nisi quod hic dicitur, *Auertantur ibi, conuertantur*. Sed idem est sensus: repetitio videlicet eiusdem precationis ad rem magis explicandam, & confirmandam.

*Auertantur statim erubescantes, qui dicunt mihi; euge, euge.*

Et hic versiculus idem est, quo ad sensum, cum versiculo vicefimo primo Psalmi trigessimini: ubi res eadem tertio repetitur, ut videlicet hostes Christi, & Ecclesiæ cito confundantur, qui nunc exultant, dicentes inter se, *Euge, euge*.

*Exultent, & latentur in te omnes, qui querunt te: & dicant semper magnificetur Dominus, qui diligunt salutare tuum.*

Idem est hic versiculus cum versiculo vicefimo secundo Psalmi trigessimini, in quo per modum precationis prædicatur victoria, & exultatio Christi & Ecclesiæ.

*Ego vero egenus & pauper sum, Deus adiuna me.*

Hic quoque idem est cum versiculo vicefimo tertio Psalmi trigessimini, in quo reuertitur Christus ad statum illum describendum, quem habuit in cruce, cum vere pauper, & nudus Patri dicebat, *Deus meus, ut quid dereliquisti me?*

*Adiutor meus, & liberator meus es tu, Domine ne moreris.*

Hic denique versiculus idem est cum vltimo versiculo Psalmi trigessimini, in quo repetitur prima petitio celeris auxilij. Vide plura in explicatione Psalmi trigessimini.

## PSALMVS LXX.

### Titulus, & Argumentum.

Psalmus Dauid, filiorum Ionadab, & priorum captiuorum.

**H**ic Psalmus titulo caret apud Hebræos: sed interpres aliquis titulum supra scriptum addidit; ad quem intelligendum sciendum est, filios Ionadab fuisse homines ab obediencia celebres. Scribit enim Hieremias cap. 53 eos habuisse præceptum parentis sui, ut vinum non biberent, & in domibus non habitarent, idq; diligentissimo obseruasse. Sciendum præterea filios Israel bis fuisse captiuos factos à Rege Nabuchodonosor, semel tempore Ioachim Regis Hierusalem, & iterum tempore Sedechia; sed priores captiuos ad verbum Domini per Hieremiam prædicatum, sponte se tradidisse in captiuitatem; posteriores vi coactos fuisse, ut perspicuum est ex quarto libro Regum, & ex ipso Hieremia. Credibile autem est filios Ionadab fuisse ex primis qui obediuerunt Deo ad verbum Hieremia, ut se traderent Regi Babyloniarum, ceteros autem eorum exempli esse secutos. Et congruit ethymologia nominis: Ionadab enim spontaneum significat. Hic igitur Psalmus canitur in persona filiorum Ionadab, & ceterorum qui sponte in priorem captiuitatem cum Rege Ioachim profecti sunt. Virum autem Dauid ad hanc captiuitatem



repperit, an interpret, aut ipsa Ecclesia testamenti veteris accommodauerit Psalmum ad hanc captiuitatem, quomodo Ecclesia Christiana accommodat Psalmos varios ad varias celebritates, incertum est. Tractatores ut plurimum volunt hunc Psalmum à Dauide compositum ob persecutionem, quam ab Absalone filio in senectute sua perpeffus est. Quod etiam confirmari potest ex eo, quod hic Psalmus idem habet principium, quod Psalmus 30. & in ceteris partibus cum eodem satis conuenit. Psalmum autem trigessimum nos etiam cum alijs exposuimus de persecutione Absalonis. Neg. titulus repugnat: David enim sponte in exilium profectus est, agnoscens illam esse Dei voluntatem, ut electionem illam è Regno, & fugam atque exilium patienter ferret, & gratiam liberatoris, cum paulo post in Regno reduceretur, agnosceret. Quod exemplum Davidis secuti postea sunt filij Ionadab, & priores captiui, de quibus titulus loquitur. S. Augustinus monet, in hoc Psalmo mirifica commendari gratiam Dei, & sub exemplo Davidis, omnes pios debere in hoc Psalmo cantare laudes gratia Dei, per quam liberamur à captiuitate Diaboli, & gratiam iterum, atq; iterum implorare, ut proficiamus, & perseueremus in bono, non presumantes de proprijs viribus, sed de adiutorio Dei in omni tentatione confidentes. Sic enim tutissime ad perfectam libertatem, qua est libertas gloria filiorum Dei perueniemus.

## EXPLICATIO PSAL. LXX.

I. **I**N te Domine speraui, non confundar in aeternum: in iustitia tua libera me, & eripe me.

Memor sanctus Propheta promissionum Domini erga sapientes in eum, & de suis proprijs viribus non presumens, ait; In te Domine, non in me, vel in alia creatura speraui, ideo securus quod non confundar in aeternum, ad te in praesenti tribulatione confugio, ac peto, ut in iustitia tua, id est, secundum iustitiam tuam, qua impios punire, & innocentes liberare soles, libera me, & eripias de manibus persequentium me.

Inclina ad me aurem tuam, & salua me.

Coniungitur hic versiculus cum secunda parte versiculi superioris. Idipsum enim repetit ad affectum ostendendum. Inclina aurem tuam, id est, audi vocem humilem, siue de imo sonantem, & salua me à praesenti periculo.

Esto mihi in Deum protectorem, & in locum munitum, ut saluum me facias.

Explicat clarius, quid à Deo desideret, nimirum, ut Deus eum protegat instar arcis munitissimae, ad quam hostes sui penetrare non possint. Nam in Hebræo pro, in Deum protectorem, habetur, in petram fortissimam; sed Interpretes explicauerunt metaphoram, & dixerunt, in Deum protectorem, id est, in Deum protegentem, instar arcis in petra sublimi locatæ; quod exponitur per verba sequentia, & in locum munitum. Vere autem nulla est facilior via euadendi omnes tribulationes, quam si quis sciat mente conscendere in Deum, & bona terrena contemplari: inde enim omnia humana facile despiciet. Sic B. Paulus vocat momentaneas, & leues tribulationes suas, quæ alioqui grauissime videri poterant, quia subiungit, Non contemplantibus nobis quæ videntur, sed quæ non videntur, quæ enim videntur, temporalia sunt, quæ non videntur, aeterna sunt, 2. Cor. 4. In Hebræo pro, in locum munitum, habetur, ad ingrediendum iugiter iussisti, sed apparet corruptio ex loco simili in Psalmo trigesimo: nam pro, labo, ad ingrediendum, est in Psalmo trigesimo, lebeth, in domum, siue in locum, ut Septuaginta hic, & ibi verterunt: pro, tamid ziuita, iugiter præcepisti, est in Psalmo trigesimo, mezudoth, quæ sunt eadem litteræ, sed aliter dispositæ, & significant munitionem. Itaq; ex Psalmo trigesimo, & ex interpretatione Septuaginta videtur manifeste colligi, lectionem Hebraicam hoc loco esse mutatam.

Quoniam firmamentum meum, & refugium meum es tu.

Esto mihi, inquit, tu Domine in Deum pro-

II.

III.

אמר  
לדוד  
במקום  
הזה

IV.



*profectorem, & in locum munitum: quoniam tu solus es firmamentum meum, id est, domus firma, & stabilis, utpote lapidea (ut clarius habetur in Hebræo) ad quam confugere possim, Cætera enim omnia, siue respiciam ad fauores hominum, siue ad industriam meam, domus sunt luteæ, & super aream ædificatæ, siue baculus arundineus. Quid enim sunt mortalia omnia, nisi res caducæ, & fragiles, in quibus non nisi stulti confidunt. Beati qui hæc intelligunt, beatiores qui experiuntur.*

*Deus meus eripe me de manu peccatoris, & de manu contra legem agentis, & iniqui.*

Descendit magis ad particularia, ac petie liberari *de manu*, id est, de potestate peccatoris, *contra legem agentis, & iniqui*, quibus nominibus intelligit ad literam Absalonem, Achitophelem, & ministros eorum: nam hic Psalmus conuenit omnino cum Psalmo 30. in quo omnium consensu agitur de persecutione Absalonis. S. Augustinus, per peccatorem, intelligit peccatorem in genere, quem dicit diuidi in præuicacatorem legis, quales sunt Iudæi, & Christiani, qui legem à Deo sibi datam non seruant; & iniquum non præuicacatorem, quales sunt Pagani, qui legem scriptam à Deo non acceperunt, & ideo iniqui sunt, quia male agunt, & peccant contra rationem naturalem, sed præuicacatores legis scriptæ non sunt, quia ubi non est lex, nec præuicacatio. Sed verba Hebraica non recipiunt istam explicationem: nam vox Hebræa, pro qua habemus, *iniquum*, significat proprie violentum raptorem; & pro qua habemus, *contra legem agentis*, significat iniquum simpliciter. Videtur igitur Propheta per peccatorem, intelligere hominem prauum, siue improbum, qualis erat Absalon, per iniquum, eum, qui occulte, & ex insidiis nocet, quales sunt fraudulentis, Achitophel, & alij; per raptorem, eum qui palam, & aperte opprimit, qualis erat tunc populus armatus contra Regem suum. Spiritualiter per peccatorem intelligere pos-

sumus Diabolum, per iniquos, hæreticos, per raptores, tyrannos & persecutores. Cupit autem vir iustus liberari non solum à vexatione corporali, sed multo magis à periculo spirituali; ne forte consentiens peccato ob persecutionum immanitatem incidat in periculum mortis æternæ.

*Quoniam tu es patientia mea Domine, Domine spes mea à iuuentute mea.*

*In te confirmatus sum ex utero, de ventre matris meæ. tu es protector meus.*

S. Augustinus per patientiam, intelligit tolerantiam dolorum, & persecutionum, ut sensus sit, Eripe me de manu peccatorum, dando mihi patientiam, ne per impatientiam consentiam peccato. Et quidem verbum græcum, & latinum hanc expositionem patiuntur; sed vox hebraica significat expectationem, & spem, ac per hoc patientia hoc loco, significat patientiam in expectando potius, quam in tolerando dolores: iuxta illud, *Per patientiam expectamus*, Rom. 8. & Iacobi; Ecce Agricola expectat preciosum fructum terræ, patienter ferens, donec accipiat temporaneum, & ferotinum: patientes estote, & vos, & confirmate corda vestra, quoniam aduentus Domini appropinquabit. Ait igitur: *Eripe me de manu peccatoris, quoniam tu es patientia mea*, quoniam à te patienter expecto auxilium. *Tu es spes mea à iuuentute mea*, id est, quia semper in te speraui ab eo tempore, quo tenoscere cœpi; sed tamen multo ante, quam ego in te sperare inciperem, tu pro tua misericordia protector meus fuisti: nam *ex utero matris meæ in te confirmatus sum*, id est, in te stabilitus robur accepi, cum ex me infirmissimus essem; *ex utero matris meæ protector meus es*, id est, vix natus protectione tua frui cœpi, cum adhuc te inuocare non possem. Hæc beneficia Deus omnibus hominibus conferre solet, præsertim in ætate, quia sibi ipse homo nullam opem adferre potest: sed pauci admodum sunt, qui hæc beneficia agnoscunt, & pro ijs debitas Deo gratias agant. Ideo Propheta, qui Spiritus illustratione hæc

Ccc 2 agno.

VI.

VII.



agnoscebat, magno cum animi sensu dicit, *In te firmatus sum ex utero, & ab utero matris meae protector meus es*: quasi dicat, Scio Domine, & confiteor me tibi curæ fuisse ab ipso primo ortu; ideo fiduciam habeo, multo magis te mihi protectorem fore cum te inuocauero.

VIII.

*In te cantatio mea semper: tanquam prodigium factus sum multis, & tu adiutor fortis.*

His de causis, & ob tanta beneficia, *in te erit cantatio mea semper*, id est, te semper laudibus celebrabo in prosperis, & in aduersis, in hoc seculo, & in futuro. Et nunc quidem *tanquam prodigium factus sum multis*, id est, expulsus à Regno à proprio filio; & dum misere fugio, qui antea gloriose hostes fugabam, factus sum admirationi omnibus hominibus, præsertim cum à te desertus videar, quem semper colui, & in quo speraui; sed tamen *tu adiutor fortis* & constans es: & quamuis ad tempus secundum consilium sapientiae tuae, hostes in me præualere permiseris, tamen tempore suo mihi adiutor eris. S. Augustinus spiritualiter exponens dicit, illum fieri prodigium, siue portentum multis, qui contemnit temporalia, & patienter fert iniurias, & per hoc ambulat contraria via, atque ambulant ceteri homines. Talis fuit Ioannes Baptista, talis Christus ipse, talis S. Petrus, S. Paulus, Apostoli ceteri, tales Martyres omnes, & plerique sancti Confessores, S. Antonius, S. Hilarion, S. Franciscus, & alij, qui à sapientibus Mundi stulti habiti sunt: sed vere dicere poterant, etiamsi prodigium factus sum multis, tamen tu adiutor meus fortissimus es, quo duce viam angustam perambulabo, & Regno caelorum vim inferam, & tunc apparebit, stultus an sapiens fuerim.

IX.

*Repleatur os meum laude, vt cantem gloriam tuam, tota die magnitudinem tuam.*

Ergo, inquit, quicquid homines de me sentiant, & dicant, ego opto, vt os meum repleatur laude tua, vt nihil mihi aliud placeat, nihil me delectet, nisi te diligere, & laudare

gloriam tuam, & tota die, id est, omni tempore decantare magnitudinem tuam. Porro illi soli, & omnes similes sunt huic sancto Regi, & Prophetæ, qui vere cogitant, & sentiunt, ac intima consideratione penetrant, & persuadentur, nihil esse magnum, nihil admirandum, præter Deum.

*Ne proicias me in tempore senectutis: cum defecerit virtus mea, ne derelinquas me.*

Cum Dauid persecutionem Absalonis pateretur, senex erat, ideo memor victoriarum, quas in iuuentute, & in ipsa pueritia obtinuerat, dicit, *Ne proicias me in tempore senectutis*, id est, ne deferas in hoc vltimo tempore, quem adhuc semper iuuisti. *Cum defecerit iam virtus mea*, robur, ac vires meae debilitate sint, *ne derelinquas me*, qui auxilio tuo magis egeo, quam alias vnquam eguerim. Possunt hæc omnia spiritualiter accommodari homini, qui à feruore charitatis, quo aliquando flagrauit, repescere incipit, & tamen cupit in eodem studio perfectionis perseuerare.

*Quia dixerunt inimici mei mihi, & qui custodiebant animam meam, consilium fecerunt in vnum.*

*Dicentes, Deus dereliquit eum, persequimini, & comprehendite eum, quia non est, qui eripiat.*

Hæc ad literam Dauidi conueniunt, aduersus quem populus Absalone duce, & Achitophel consiliario rebellauit, quoniam vidit iam senuisse, & debilem effectum, atque à Deo destitutum esse credidit. *Quia dixerunt inimici mei mihi*, id est, de me. *Et qui custodiebant animam meam*, id est, qui antea custodes mei erant, vel consilio, vel armis, illi consilium fecerunt in vnum, id est, simul vniti inter se consultauerunt de perditione mea, dicentes, *Deus dereliquit eum*. Ad hoc refertur illud, *Inimici mei dixerunt mihi*, id est, dixerunt de me, *Deus dereliquit eum*: & hoc dixerunt consultantibus simul, *Persequimini, & comprehendite eum, quia non est qui eripiat*. Hoc fuit

con-



consilium Achitophelis, quod non habuit effectum, quia Deus non permisit, vide lib. 2. Reg. c. 17. Illud, *qui custodiebant animam meam*, potest etiam significare, qui obseruabant animam meam, ut illam perderent, & hic sensus conuenit homini iusto in tentationibus posito. Dæmones enim, inimici nostri, qui perpetuo vigilant, & obseruant occasiones nos perdendi, consilium faciunt inter se, tunc maxime, cum nos à Deo gratia destitutos existimant.

vult, confundantur, qui committunt cum Deo animam meam, id est, qui faciunt, ut cum Deo contendam, quasi illi iniuste mecum agat, dum tribulationibus me affligit: sed non video unde eam lectionem acceperit.

*Ego autem semper sperabo, & adiciam super omnem laudem tuam.*

XV.

*Os meum annuntiabit iustitiam tuam, tota die salutare tuum.*

XVI.

XIII. *Deus ne elongeris à me, Deus meus in auxilium meum respice.*

XIV. *Confundantur, & deficiant detrahentes anima mea; operiantur confusione & pudore, qui querunt mala mihi.*

Illi consultant aduersus Dauidem, & ille recurrit ad Deum, qui nullo negotio potest dissipare consilium eorum, ut re ipsa fecit. Deus, inquit, *ne elongeris à me*, ut illi iactant, te iam fecisse: imo potius *in auxilium meum respice*, id est, per auxilium tuum mihi propinqua. Illud, *respice*, in Hebræo est, *festina*; in Græco, *intende*. Fieri potest, ut Septuaginta non legerint, *chuscia*, id est, *festina*, sed, *chasciob*, id est, *considera*, siue *attende*: sed tamen sensus est idem, & vna lectio explicat aliam, quod enim Hebraica lectio habet, *festina*, intelligitur per prouidentiam: Deus enim vbique est, neque proprie festinare debet, ut alicubi esse incipiat. Festinare per prouidentiam, idem est, quod attendere & respicere. *Confundantur, & deficiant detrahentes anima mea*, id est, te in auxilium meum festinante, confundantur consiliarij Absalonis, & deficiant in consilijs suis, euanescent, infatuentur, *detrahentes anima mea*, id est, calumniantes me. *Operiantur confusione & pudore, qui querunt mala mihi*. Idem alijs verbis repetit. Pro verbo, *detrahentes mihi*, in Hebræo est, *aduersantes mihi*, sed idem est sensus: nam qui calumniantur, sine dubio calumniando aduersantur. S. Augustinus legit: *Confundantur & deficiant, qui committunt animam meam*, & sensum esse

Illi confundantur & deficiant: ego autem semper sperabo, magis ac magis in te confidam, experimento edoctus, quanta sit virtus auxilij tui: & semper adiciam laudes ad laudes tuas, pro nouis beneficijs nouos hymnos tibi decantans. *Os meum non cessabit annuntiare iustitiam tuam*, quia punis impios, & tota die, id est, assidue prædicabo salutare tuum, quo innocentes liberas & saluas. S. Augustinus querit hoc loco, quomodo possit fieri, ut adiciatur aliquid super omnes laudes Dei; & respondet, omnes laudes, dici perfectam laudem, cui nihil desit: qualis fuisset, si Deus totum genus humanum post lapsum Adami damnare voluisset: fuisset enim ea perfecta laus iustitiæ, cui perfectæ laudi nihil adici potest, quod ad iustitiam attinet; sed tamen adici potest noua laus misericordiæ, quia placuit Deo gratis iustificare impios. Caterum facilius dici potest, Prophetam adicere velle laudem ad omnes laudes Dei, non ad omnes simpliciter, sed ad omnes, quas ad illud vsque tempus cecinerat.

*Quoniam non cognoui literaturam, introibo in potentias Domini, Domine memorabor iustitiæ tuæ solius.*

XVII.

Hic sunt duæ difficultates, prior, an illa verba, *Quoniam non cognoui literaturam*, debeant coniungi cum superiore versiculo, ut coniunguntur in textu Hebraico, an potius cum sequentibus verbis, ut coniunguntur in Græco & Latino. Sed nos existimamus, distinctionem Hebraicam non esse at-



tendendam, quando discrepat à Græca: quoniam distinctionem addiderunt in textu Hebraico Rabini posteriores, qui non sunt villo modo comparandi cum Septuaginta Senioribus, qui aliter legerunt & distinxerunt. Accedit, quod hoc loco sunt quædam similiter cadentia ita posita in textu Hebraico, ut videatur omnino Propheta voluisse legi hunc versiculum; ut nos cum Græcis legimus, non ut alij cum Rabinis legunt. Sic enim ait: *Quoniam non cognoui sopheroth*,

ספרות  
גבורות

ספר  
ספרות

*introibo in gheburth*: ac si nos diceremus, quoniam non cognoui literas, adibo potentias. Posterior quæstio est, de nomine literaturæ; nam vox Hebraica *sapher*, unde est nomen *sopheroth*, significat scribere, narrare, numerare, & alia, ac per hoc nomen *sopheroth*, potest significare scripturas, numerationes, libros, literas, siue literaturas & similia. Aliqui igitur volunt, ut literatura accipiat pro numeratione, & hic sit sensus: Quoniam non cognoui numerationem mirabilium tuorum, id est, quoniam non possum assequi numerum, cum sint innumerabilia, introibo, id est, ingrediar ad narrandas potentias, siue fortitudinem & vires Domini potentissimas & robustissimas. Sed hanc expositionem probare non possum: nam & LXX. Interpretes, & S. Hieronymus bene nouerant vim Hebraicæ vocis, & tamen non verterunt numerationem, sed literaturam: neque deerant illis voces Græcæ, vel Latine, quibus numerationem exprimerent, si voluissent. Alij simpliciter dicunt, Dauidem non nouisse literaturam, id est, doctrinam quæ literis continetur, quoniam pastor ouium erat, & ex pastoritio illo munere assumptus fuit ad militiam & ad Regnum, ut dicitur in Psal. 97. de post fortantes accepit eum pascere Iacob populum suum. Sed huic expositioni repugnat, quod ipse de se dicit in Psal. 118. *Super omnes docentes me intellexi*; & liber Psalmorum indicat, eum excultum fuisse omni doctrina diuina & humana; quamuis enim pastor ouium, & postea miles esset, non tamen ita totus intentus erat pascendis ouibus, aut bellis gerendis, quin etiam studiis & contemplationi vacaret. Exi-

stimo igitur, Dauidem hoc loco per literaturam intelligere humanam sapientiam & astutiam, quali abuadabat Achitophel, qui contra ipsum consilium dederat; & per verbum, *cognoui*, non accepisse scientiam simpliciter, sed approbationem & vsum. Quomodo dicimus, non noui te, & quemodo Apostolus dicit, se nihil scire, nisi Christum, & hunc crucifixum. Itaque sensus est, *non cognoui literaturam*, id est, non noui sapientiam huius mundi, non confido in humanis consiliis, non approbo astutiam & prudentiam sæculi, sed *introibo in potentias Domini*, id est, adhærebo penitus omnipotentiae Dei, in illa confidam, in illa quasi in arce munitissima abscondar: Et sic *memorabor iustitiæ tuæ solius*, id est, non recordabor humanorum consiliorum, aut vitium meorum, vel amicorum meorum, sed recordabor & mente retinebo iustitiam tuam, qua seruas promissam, qua punis impios, qua pios coronas. S. Augustinus legit, *non cognoui negotiationes*: verisimile enim est in aliquo Græco codice pro *πραγματίας*, fuisse *πραγματίας*, & inde fluxisse in Latinum aliquem codicem, *negotiationes*. Fatetur tamen idem S. Augustinus in aliis codicibus legi, *literaturam*: & exponit tam per negotiationem, quam per literaturam, confidentiam in operibus factis ex propriis viribus, quasi ad iustitiam faciendam sufficiat litera legis sine gratia, aut negotiatio liberi arbitrij sine adiutorio Dei, & ideo ponderat illud: *Memorabor iustitiæ tuæ solius*, id est, non meæ iustitiæ, sed tuæ solius, quam dare soles per gratiam tuam, cum iustificas impium. Quæ sententia, ut est optima ad ædificationem, ita parum videtur facere ad sensum literalem.

Deus docuisti me à inuenture mea, & XVIII  
vsque nunc pronuntiabo mirabilia tua.

Tu, inquit, *docuisti me*, ut contempta literatura humana, considerem in potentia tua, *docuisti autem à inuenture mea*; & secundum hanc doctrinam eruditus pugnaui cum vrsu & leone, & cum gigante Goliath, iner-



inermis adolescens, & victoriam reportauit. *Et vsque nunc pronuntiabo mirabilia tua*, id est, & dum viuam, vsque ad vltimum finem vitæ meæ pronuntiabo hæc mirabilia tua, quæ per me fecisti à iuuentute mea.

XIX.

*Et vsque in senectam & senium, Deus ne derelinquas me.*

XX.

*Donec annunciem brachium tuum generationi omni quæ ventura est.*

Et simul rogo, vt vsque ad senectam non derelinquas me, sed mihi semper ad sis auxilio tuo, donec annunciem, id est, donec perficiam librum Psalmorum, per quem annunciem brachium tuum, id est, fortitudinem tuam, omni posteritati; per senectam & senium, idem significari videtur: nam in Hebræo est, vsque ad senectutem & canos, cani enim indicant senectutem. Quomodo autem Dauid dicat, se annunciatum potentiam Domini omni posteritati, sæpe diximus, quia videlicet præuidebat, Psalmos à se compositos in toto orbe vsque ad consumptionem sæculi decantandos.

XXI.

*Potentiam tuam & iustitiam tuam, Deus vsque in altissima, quæ fecisti magnalia: Deus quis similis tibi?*

Explicat quid sit brachium, quod se annunciatum dixit generationi venturæ, & ait: *Potentiam tuam & iustitiam tuam*, id est, annuntiabo brachium tuum, quod est potentia tua coniuncta cum iustitia tua, Omnipotens Deus est, sed simul iustissimus est: potest quicquid vult, sed nihil iniuste vult. Hæc autem potentia cum iustitia extenditur vsque in altissima magnalia, quæ Deus fecit; non enim Deus potentia sua creauit solum terram, & maria, & habitantes in eis, sed etiam creauit cælum & cælos cælorum, & habitantes in eis millia millium Angelorum. Itaque vsque ad hæc altissima magnalia extenditur brachium potentie Dei. Neque solum iustitia Dei punit homines peccatores, qui sunt puluis & cinis. Sed pu-

nuit etiam altissimos Angelos, quos de cælo ob superbiam præcipitavit in abyssum: deinde brachium diuinæ iustitiæ vsque ad altissima magnalia peruenit, vt exclamare liceat: *Domine quis similis tibi?* neque hoc repugnat Scripturæ, quæ dicit: *Fecit Deus hominem ad imaginem & similitudinem suam*, Genes. 1. Et, *scimus quia cum apparuerit, similes ei erimus, quia videbimus eum*, sicuti est, 1. Ioan. 3. Nam cum dicitur: *Quis similis tibi?* accipitur similitudo pro æqualitate, ac si dictum esset: *Quis est similis tibi in potentia, id est, æque potens, ac tu?* *Quis est similis tibi in essentia, id est, qui à nullo pendeat, & à quo omnia pendeant, qualis es tu?*

*Quantas ostendisti mihi tribulationes multas & malas: & conuersus viuificasti me, & de abyssis terra iterum reduxisti me. Multiplicasti magnificentiam tuam, & conuersus consolatus es me.*

XXII.

XXIII.

Consolatur Dauid præsentem calamitatem suam ex eo, quod alias calamitates, Deo iuuante sæliciter euaserit. *Quantas*, inquit, *ostendisti mihi tribulationes multas & malas*, id est, magnas varietate & amaritudine, quas pertuli in persecutione Saulis. *Et conuersus viuificasti me*, cum pene ad portas mortis peruenissem. *Et de abyssis terra iterum reduxisti me*, id est, & de extremis malis, cum pene ad inferos descendissem, liberaisti me. *Multiplicasti enim magnificentiam tuam* secundum multitudinem dolorum meorum, & conuersus ad misericordiam, cum me paterne castigasses, *magnifice consolatus es me*, cum ex misero exule Regem beatissimum feceris. Spiritualiter significat hic locus, hominem peccatorem cum Christo resurrexisse à morte peccati, & mixtice consolationem spem vitæ æternæ.

*Nam & ego confitebor tibi in vasis Psalmi veritatem tuam Deus, psallam tibi in cithara sanctus Israël.*

XXIV.

*Exultabunt labia mea, cum cantauero tibi: & anima mea, quam redemisti.*

XXV.

Sed



XXVI.

*Sed & lingua mea tota die meditabitur iustitiam tuam: cum confusi & reueriti fuerint, qui querunt mala mihi.*

In fine Psalmi prædicit ipse sibi Propheta David liberationem de manu Absalonis, & pollicetur gratiarum actionem corde & ore, & instrumentis musicis, psalterio & cithara. Nam & ego, adepta scilicet victoria, confitebor tibi veritatem tuam, id est, laudabo iustitiam tuam, siue forlicitatem tuam, in vasis Psalmi, id est, in instrumento Psalmi concinendi, quod psalterium vocatur. Addam etiam psallere tibi o sanctus Israël, in instrumento citharæ. Illud, sanctus Israël, est cognomen Dei, qui vocatur Sanctus Israël, quoniam sanctificari debeat à populo Israël, sanctificatione cultus & honoris, & ipse sanctificabat populum Israël sanctificatione gratiæ. Neque solum per psalterium & citharam tibi gratias agam, teq; laudabo: sed etiam exultabunt labia mea, id est, os meum iubilabit, cum cantabo tibi, & ipsa anima mea, & vita mea, quam redemisti ab interitu, exultabit tibi, id est, exultans laudabit te. Denique non semel, aut iterum lingua mea laudabit iustitiam tuam; sed tota die, omni tempore meditabitur, id est, exercebit se in cantanda iustitia tua, quando confusi erubuerint omnes inimici mei, qui querunt nocere mihi. Hæc omnia multo verius conueniunt homini iusto, qui toto corde & pleno ore, & per totam æternitatem laudabit Deum, cum in die Iudicij fuerint omnes persecutores eius, & ipse redemptus fuerit, & liberatus ab omni malo corporis & animæ.

# PSALMVS LXXI.

*Titulus & Argumentum.*

*In Salomonem.*

**H**ic Psalmus videtur esse omnium postremus, quoniam non sit collocatus in ultimo loco. Scriptus est enim eo tempore, quo David vicinus morti tradidit Regnum Salo-

moni filio suo. Vnde etiam ad finem huius Psalmi leguntur hæc verba: Defecerunt laudes David, filij Iesse. Cur autem non sit positus hic Psalmus in fine libri, fortasse causa fuit, quia visum est ei, qui Psalmorum ordinem disposuit, ut librum concluderent Psalmi, qui solius Dei laudes continent, & incipiunt & desinunt in vocem Alleluia, quales hymni continuabuntur post hanc vitam in seculum seculi. Titulus est, In Salomonem, quia occasio scribendi, vel canendi hunc Psalmum fuit, ut bene precaretur Salomoni filio suo, quem in Regni solium extulerat. Et vere primi versiculi satis apposite Salomonem conueniunt. Sed mox à Spiritu sancto eleuata mens & lingua Prophetæ transtulit sermonem ad Christum, qui per Salomonem significabatur. Fuit enim Salomon apertissima Christi figura, & tria nomina Salomonis, Salomon, id est, pacificus, Ecclesiastes, id est, concionator, & Idida, id est, dilectus Domino, magis proprie Christo conueniunt, quam Salomoni. Ipse enim est pax nostra, qui reconciliauit mundum Deo; ipse est Verbum incarnatum ad euangelizandum pauperibus missum; denique ipse est, de quo Pater non semel dixit: Hic est filius meus dilectus, in quo mihi bene complacui. Vide S. Augustinum in lib. 17. de ciuitate Dei cap. 8. Describit nuntium David in hoc Psalmo elegantissimis similitudinibus aduentum Christi, & propagationem Regni eius, necnon rectitudinem gubernationis eius.

## EXPLICATIO PSALMI LXXI.

**D**eus iudicium tuum Regi da, & iustitiam tuam filio Regis.

*Iudicare populum tuum in iustitia, & pauperes tuos in iudicio.*

Hæc est bona precatio, qua precatur David Salomoni filio suo gratiam Dei ad iuste iudicandum. Vir enim sanctus non precatur filio suo abundantiam auri & argenti, neque propagationem imperij, ut filij huius seculi facere solent, sed precatur ei

gra-



gratiam bene fungendi officio suo. Sciebat enim Regem esse propter populum, non populum propter Regem: & ideo illum esse bonum Regem, qui bene regit populum iuste iudicando. Quod ipsum & Salomon filius à Dauide patre edoctus postulauit à Deo, 3. Reg. cap. 3. Ait igitur: *Deus iudicium tuum Regi da*, id est, da Salomoni Regi recens instituto, *iudicium tuum*, id est, iudicium tale, quale est tuum, rectum, sapiens, iustum, siue gratiam iudicandi, vt tibi placeat, vel secundum leges tuas. Et idem repetens addit: *& iustitiam tuam filio Regis*, id est, da Salomoni, qui est Rex, & filius Regis, *iustitiam tuam*, id est, iustitiam talem, qualis est tua, vt iuste iudicet ad imitationem tuam, qui semper iustissime iudicas. Da, inquam, Salomoni iudicium tuum, & iustitiam tuam. *Iudicare populum tuum in iustitia*, id est, iusto iudicio, *& pauperes tuos*, id est, eundem populum tuum, *in iudicio*. Est enim hic etiam repetitio eiusdem sententiae. Vocat autem populum Dei, pauperes Dei, quia omnes homines quantumuis diuites esse videantur, tamen pauperes Dei sunt. Egent enim auxilio eius in omnibus rebus, & quicquid habent, à Deo habent non tam donatum, quam commodatum, vnde & repetere & auferre sine vlla iniuria Deus potest: & quamuis populi gentium hæc non intelligant, tamen populus Dei intelligere & profiteri debet. Hic mihi videtur sensus literalis: tamen non repugno, quin possit etiam hic locus intelligi de auctoritate Regia & iudiciaria, vt sensus sit, Da Deus Regi à me electo, & filio meo iudiciariam potestatem, vt iuste iudicet populum tuum. Vel si de Christo hos etiam primos versiculos exponere placeat, sensus sit, Da Deus Pater Regi Christo filio tuo potestatem iudicandi; iuxta illud Ioan. 5. *Pater non iudicat quengquam, sed omne iudicium dedit Filio*. Porro inter iudicium & iustitiam est quidem differentia, quod iustitia est virtus, iudicium autem actus est iustitiæ, tamen hoc loco accipiuntur pro eodem, videlicet pro iudicandi potestate, vel pro gratia bene iudicandi, vel pro ipso actuali iudicio.

Siquidem, vt obseruat hoc loco S. Augustinus, & confirmat ex aliis locis, in singulis fere versiculis repetitur bis eadem sententia: neque solum hoc loco, sed etiam alibi passim accipiuntur pro eodem iudicium & iustitia, vt 2. Reg. 8. *Faciebat Dauid iudicium & iustitiam omni populo suo*: & Psal. 118. *Feci iudicium & iustitiam, non calumniatur mihi superbi*.

*Suscipiant montes pacem populo, & colles iustitiam.*

III.

*Iudicabit pauperes populi, & saluos faciet filios pauperum, & humiliabit calumniatorem.*

IV.

Hi quoque versiculi pertinent ad bonam imprecationem Regi Salomoni, quasi dicat Dauid: Precor Deum, vt regnante filio meo Salomone descendant pax & iustitia in omnem terram huius Regni, & ad omnes populos, qui habitant in ea: & quia terra illa maxima ex parte in montibus & collibus sita erat, ideo dicit: *Suscipiant montes pacem populo*, id est, descendant pax ad omnes montes huius terræ promissionis, & suscipiatur ab eis pro populo in eis habitante: *& colles huius terræ suscipiant iustitiam*, quæ est causa pacis: nam ex iustitia oritur pax, Isaia c. 32. *Erit opus iustitiæ pax*. Vel per montes intelligi possunt homines Regni maiores & nobiliores, per colles vero viliores & humiliores: nam cum maiores inter se pacem habent, & communi consilio Rempublicam gerunt, facile continent humiliores intra cancellos iustitiæ. Itaque si montes suscipiant pacem, colles quoque suscipiant iustitiam. *Iudicabit pauperes populi*, id est, si pax & iustitia vigeant in Regno, ita vt pauci admodum inueniantur oppressores aliorum, facile Rex ipse iudicabit pauperes populi à calumniis & oppressionibus paucorum potentiorum, qui in tanta multitudine deesse non possunt. *Iudicabit, Rex videlicet, pauperes populi, & iudicio suo saluabit filios pauperum*.

D d d

rum



rum de manu calumniatorum, & ipsos calumniatores humiliabit, deprimet & confundet.

V.

*Et permanebit cum Sole, & ante Lunam in generatione & generationem.*

Iam incipit Propheta transitum facere à Salomone ad Christum: dicit enim Salomonem Regem permanfurum in Regno, quamdiu Sol & Luna permanebunt in celo, id est, quamdiu tempus durabit. Et quoniam de persona Salomonis hæc dici non possunt, cogit nos Spiritus sanctus, ut hæc intelligamus de Salomone, non per se, sed per Christum, ut sensus sit, Continuabitur Regnum Salomonis per Christum, qui ex progenie eius nascetur, usque ad mundi consummationem. *Et permanebit Rex Salomon in filio suo*, qui verissimus erit pacificus, & amabilis Domino: *cum Sole*, id est, quamdiu Sol erit, & *ante Lunam*, id est, & coram Luna, in generatione & generationem, id est, usque ad finem sæculi. Hic multa notanda sunt; primo illud: *Et permanebit*, in Hebræo habetur, *timebunt te*, sed Septuaginta videntur legisse *virauch*, & prolongabit, vitam videlicet, quod est idem cum *permanebit*, pro *viraucha*, & *timebunt te*. Solum enim vna litera mutat locum, & fit lectio, quam habemus; sensus tamen est idem: nam *timebunt te*, significat, timendum Salomonem, ut Regem à populis, ac per hoc permanfurum in Regno. Secundo illud, *cum Sole*, non solum significat, permanfurum Regem, quamdiu Sol erit; sed permanfurum in terris Regnum eius, dum Sol peragit dies, id est, usque ad mundi consummationem: nam post mundi consummationem, non erit Regnum Christi cum Sole, sed supra Solem, neque Sole villo modo indigebit. Tercio illud, *ante Lunam*, in Hebræo est, *liphne*, coram Luna, siue ante faciem Luna, quod recte coheret cum illo, *cum Sole*: quasi dicat, permanebit in conspectu Solis & Luna, quamdiu Sol & Luna dies noctesque distinguunt: tamen in Græco est, *πρὸς αὐτὸν*, id est, antequam esset Luna, & hinc colligunt

S. Augustinus, Euthymius, & alij hic significari æternitatem Christi, qui fuit ante Lunam. Cæterum non desunt, qui illud *πρὸς*, velint significare ante, id est, coram, ut concordet Græca lectio cum Hebræica, præsertim cum non cohareat verbum *permanebit*, cum illo *antequam Luna esset*, sed bene cohareat cum illo, *coram Luna*. Rectissime enim dicimus, *permanebit coram Luna*, sed non nisi absurde diceremus, *permanebit antequam esset Luna*. S. Hieronymus vertit, *ultra Lunam*, sed fateor me ignorare, quid sequutus sit: nam neque vox Hebræica, neque Græca hoc significat. Quarto illud, in generatione & generationem, potest accipi pro æternitate, ut alias notauimus, sed hoc loco accipiendum est proprie pro spatio temporis, quo durat sub Sole vicissitudo generationum. Neque hinc sequitur, Christum aut eius Regnum non permanfurum, nisi usque ad finem generationum, & Mundi consummationem: Solum enim hic significatur, Christum & eius Regnum duraturum usque ad finem sæculi, sed non significatur, ibi finem esse habiturum, quomodo intelligimus illud Matth. 28. *Ecce ego vobiscum sum usque ad mundi consummationem*. Hic enim significatur, Christum futurum nobiscum usque ad mundi consummationem per gratiam & auxilium; sed in æternum futurum per gloriam & felicitatem. Sic etiam Christus & eius Regnum permanebit in terris coram Sole, Luna, per temporum vicissitudines, donec Sol & Luna mouebuntur super terram, & generationes præteribunt, & generationes aduenient. Sed his finitis Christus & Regnum permanebit supra Solem & supra Lunam, sine vlla varietate in æternum: nam *Regni eius nullus erit finis*, Daniel. 2. & Luc. 1.

*Descender sicut pluvia in vellus, & sicut stillicidia stillantia super terram.*

Quia dixerat, Regem Salomonem permanfurum usque ad finem mundi, & hoc intelligendum erat, non in persona propria, sed in illo suo Christo: ideo nunc Propheta

VI.



describit aduentum Christi, & propagationem, ac proprietates Regni eius. Aduentum Christi ad Iudæos primum, deinde ad Gentes describit similitudine pluuiæ, velleris, & terræ, iuxta signum liberationis populi datum olim Gedeoni, Iud. 6. nam petente Gedeone signum à Deo, factum est, vt vellus in area positum impleretur rore cœli, area tota sicca permanente, deinde sequenti nocte area tota compluta est, solo vellere in medio aræ remanente arido: sic igitur descendit primo Christus ad Iudæos per vellus significatos, tota reliqua terra permanente arida, dicente ipso: *Non sum missus, nisi ad oues, quæ perierunt domus Israël*, Matth. 15. Deinde venit ad Gentes per Apostolorum prædicationem, & sic compluta est terra pluuiâ doctrinæ salutaris, & gratia Baptismi, dicente eodem Domino: *Euntes docete omnes gentes, baptizantes eos in nomine Patris, & Filij, & Spiritus Sancti*, Matth. 28. & solum vellus remansit aridum, ariditate incredulitatis, vt etiam hodie cernimus. Ita S. Augustinus. Addit S. Bernardus serm. 2. super, *Missus est*, Christum descendisse sicut pluuiam in vellus, per incarnationem, & sicut stillicidia stillantia super terram, per prædicationem, quia sicut ros cadit de cœlo in vellus cum maximo silentio, ita Christus descendit in Virginem, vt lanam purissimam, maximo cum silentio, & cœlesti solum virtute: & sicut stillicidia stillantia super terram magno sonitu guttas demittunt in terram, sic idem Christus venit per prædicationem suam & Apostolorum, cum magno strepitu verborum & miraculorum.

VII.

*Orietur in diebus eius iustitia, & abundantia pacis, donec auferatur Luna.*

Hic erit primus fructus aduentus Christi, vera iustificatio, & verissima pax cum Deo, & cum omnibus hominibus. *Orietur in diebus eius iustitia*, id est, cum venerit Saluator, abolebitur peccatum, & in locum eius adducetur iustitia sempiterna, vt prædixit Daniel cap. 9. Quamuis enim non defuerint ab initio mundi multi vere iusti, vt

Abel, Henoch, Noë, Abraham, & alij, tamen omnes iustificati sunt ex meritis Christi præiustis. Vere enim dixit Angelus Iosepho, Matth. 1. *Vocabis nomen eius Iesum: ipse enim saluum faciet populum suum à peccatis eorum*: & hoc est gaudium, quod Angelus euangelizauit pastoribus, Luc. 2. *Quia natus est vobis hodie Saluator*. Orietur ergo iustitia in cordibus hominum per fidem Iesu Christi: & inde sequetur abundantia pacis, quia vera iustitia in charitate consistit, charitatis autem proles est pax, & pax quam mundus dare non potest, sed vera, stabilis, & in tanta copia, vt cœlum & terram repleat. In cuius rei signum nascente Christo quieuerunt bella in toto orbe terrarum sub Augusto Cæsare. Durabit autem hæc iustitia & pax in terris, donec auferatur Luna, id est, durabit iustitia Fidei, & pax conscientiæ, non sine externis persecutionibus, donec tollatur è medio omnis corruptio & mortalitas, quæ per Lunam significatur: siue, donec tollatur Lunæ varietas & transmutatio: nam post mundi consummationem Luna semper erit plena, & iustitia Fidei mutabitur in iustitiam gloriæ, & pax non solum erit in corde, sed & in corpore interior & exterior, sine vllò hoste. In Hebræo, pro *oriatur iustitia*, habetur, *oriatur iustus*, sed facile est Septuaginta legisse, *et sedech, iustitia*, non vt nunc legitur, *et sedech, iustus*: sensus tamen est idem: nam cum oritur iustitia, oritur iustus: neque iustus oriri potest, nisi in eo oriatur iustitia: pro, *donec auferatur Luna*; in Hebræo est, *donec non sit Luna*, ex quo tollitur ambiguitas vocis Græcæ: nam, vt S. Augustinus notauit, vox Græca significare potest Lunam tollendam, vt non sit: & Lunam extollendam, vt altior sit. Sed vera sententia est, tollendam, vt non sit. Id enim coheret cum lectione Hebræica & Latina. Intelligimus autem, Lunam tollendam, vt non sit, qualis nunc est, modo clara, modo obscura, modo magna, modo parua: sed & illa lectio, *donec extollatur Luna*, optimum sensum habet, videlicet, donec Ecclesia per Lunam significata, extollatur per resurrectionem & glorificationem.

צדק  
צדק



VIII.

*Et dominabitur à mari vsque ad mare, & à flumine vsque ad terminos orbis terrarum.*

Describitur nunc propagatio Regni Christi, quod est ipsa Ecclesia toto orbe diffusa. Videtur autem hic describi terra habitabilis secundum longitudinem à mari Indico siue Orientali, vsque ad mare Gaditanum siue Occidentale: & per latitudinem à flumine Tanai Septentrionali, vsque ad fines Æthiopie, quæ est vltima prouincia ad Meridiem. Alij existimant, per flumen intelligi Euphratem, qui erat vltimus terminus Regni Salomonis. Sed hoc non est probabile, quoniam Regnum Christi non incipit ab Euphrate, neque terminatur ad Euphratem, sed vltra & citra Euphratem extenditur. Melius S. Augustinus & Theodoretus per flumen intelligunt Iordanem, in quo dictum est Christo: *Hic est filius meus dilectus*, Matt. 3. Luc. 3. & in quo Baptisma dedicatum est, & circa quem prædicatio Domini, ac per hoc propagatio Regni initium habuit. Itaque secundum Augustinum illa verba: *A flumine vsque ad terminos orbis terrarum*, explicantur quod antea dictum erat: *à mari vsque ad mare*; quasi dicat: Dominabitur per totam terram à mari vsque ad mare; quia terra vndique cingitur mari Oceano, id autem fiet, quia à Iordane flumine incipiet prædicatio, & diffundet per omnes terras vsque ad mare Oceanum, quod vndique terminat orbem terræ.

IX.

*Coram illo procident Æthiopes, & inimici eius terram lingent.*

Nominantur Æthiopes in particulari, vel quia paulo ante dictum erat, *à flumine vsque ad terminos orbis terrarum*, & secundum latitudinem ipsi Æthiopes sunt in finibus orbis terræ, vt supra diximus, vel quia primus fuit Eunuchus Candacis Reginae Æthiopum, qui ad fidem Christi conuersus est, ex iis, qui extra terram promissionis habitabant; vel quia Æthiopes, vt nigerrimi corpore, ita feri moribus, longissime videbantur

abesse à cultu veri Dei. Quod autem subditur: *Et inimici eius terram lingent*, explicatio est verborum superiorum: nam procidere est prosterni vsque ad terram, quod faciunt qui terram lambere volunt. Itaque significatur humillima subiectio & adoratio, quæ proprie debetur Deo, & quam deferent Christo inimici eius, id est, infideles & peccatores conuersi ad fidem & penitentiam: Et qui noluerint sponte procidere Christo, eumque pie & fideliter adorare, cogentur in nouissimo die inuiti procidere & subiici sub scabellum pedum eius.

*Reges Tharsis & Insula munera offerent, Reges Arabum & Saba dona adducent.*

Quia dixerat, Christum dominaturum à mari vsque ad mare, id est, per vniuersam terram, quæ mari cingitur: ne putaremus, ab eius dominio excludendas Insulas, quæ sunt in medio mari, adiungit: *Reges Tharsis & Insula munera offerent*. Quid significet *Tharsis*, diximus in explicatione Psalmi 47. Probabilissima sententia est, ea voce significari Insulas maris Orientalis, quæ plurimæ & maximæ sunt, & vnde tertio quoque anno adferebatur Salomoni maxima copia auri & aromatum, vt legimus 3. Reg. 10. Sensus igitur est: *Reges Tharsis*, id est, Insularum Orientalium, & ipsæ etiam *Insula*, id est, populi earum, *munera pretiosa Regi Christo offerent*. Adiungit deinde his Regibus & Insulis, *Reges Arabum & Saba*, quia hæc sunt loca, vnde eruitur copia rerum pretiosarum, auri, argenti, lapidum pretiosarum, & omnis generis aromatum. Nam vt legimus loco citato 3. Reg. 10. *Regina Saba attulit Salomoni infinitam copiam auri, argenti, lapidum pretiosorum & aromatum*. In Hebræo est: *Reges Scheba & Saba*, quæ solum differunt, quod prior habeat *s* durius, nimirum *Schin*, posterior *s* mollius, *samech*. Quamuis autem aliqui velint, priorem Sabam hoc loco nominatam, significare Æthiopiam; posteriorem, Arabiam; tamen LXX. Interpretes & S. Hic-

כש  
כס



S. Hieronymus, per priorem intellexerunt Arabiam, per posteriorem ipsam Sabam,

quo nomine videntur etiam Græci & Latini,

& nisi ego valde decipior, *Saba*, per *schin*, est Arabia felix. Nam etiam paulo post, cum dicitur: *Dabitur ei de auro Arabia*, in Hebræo est, *Scheba*:

& Isaia 60. cum dicitur: *Omnes de Saba venient, aurum & thus deferentes*, in Hebræo est, *Scheba*. *Saba* autem per *samech*, latius patet, & significat Arabiam,

Madiam, & Ephā, ut S. Hieronymus indicat in commentario ad cap. 60. Isaia. Itaque Reges Arabum & *Saba*, significat Reges Arabiæ,

& totius regionis, quæ dicitur *Saba*. Atque huius totius regionis Reginam fuisse existimamus Reginam *Saba*, quæ venit ad Salomonem lib. 3. Reg. cap. 10. Nam dicitur:

Regina *Saba* per *schin*, id est, *Scheba*, & hoc nomine LXX. Interpretes, & S. Hieronymus in versione huius Psalmi intelligunt Arabiam,

& rursus idem Hieronymus in commentario Isaia cap. 43. & cap. 60. dicit Reginam *Saba* fuisse Reginam *Saba*, quæ scribitur per *samech*, Isaia 60. proinde fuit Regina Arabiæ felicis, & præterea Madiam & Ephā,

& totius regionis Sabæorum. Neque his repugnat, quod Regina *Saba* dicitur Matt. c. 12. *Regina Austri, & venisse à sinibus terra*: nam Arabia felix ad Austrum porrigitur, & pertinet ad mare Æthiopicum, & ad zonam torridam: proinde rectissime dicitur, *Regina Austri venisse à sinibus terra*. Quod autem quidam dicit, Reginam *Saba* imperasse Ægypto & Æthiopiæ, cuius regia est Meroë, nescio unde probari possit: nam tempore Salomonis regnabat Pharaon in Ægypto, cuius filiam Salomon duxit uxorem: non igitur Regina *Saba*, quæ venit ad Salomonem, regnabat in Ægypto. Sed his omis- sis, illud vtilius considerandum est; munera, quæ Christo Regi offerenda sunt, quæq; illi maxime placent, esse aurum charitatis, thus orationis, & myrrham patientiæ; siue, esse fidem cum inuocatione, spem cum desiderio rerum supernarum, charitatem cum fructibus bonorum operum: ex qua charitate fit, ut qui ea flagrant, non diffculter omnes terrenas opes, nec non duos corporis labores, & ipsam vitam Christo offerant.

Et adorabunt eum omnes Reges terra, omnes gentes seruient ei.

Hæc omnia in Christo impleta sunt in aliquo sensu, & in alio sine dubio implebuntur. Nam si intelligantur de adoratione & seruitute fidelium, impleta sunt per figuram intellectiōis: Scriptura enim tribuit omnibus ea, quæ conueniunt multis; Genes. 6. *Omnis caro corruperat viam suam*: & tamen ibidem dicitur: *Noë vir iustus atque perfectus*. Matth. 2. *Turbatus est Herodes, & omnis Ierosolyma cum illo*: & tamen non deerat Simeon iustus, & Anna prophetissa, & ceteri iusti, qui non turbati cum Herode, sed gaudio magno cum Magis affecti sunt. Sic igitur dicuntur omnes Reges adoraturi Christum, & omnes gentes ei seruituræ, quia plurimi Principes cum populis suis ad Christi cultum & obsequium conuertendi erant. Sed si intelligatur hic locus de adoratione siue spontanea, siue coacta; in die iudicii adimplebitur perfectissime: tunc enim Christo curuabitur omne genu. Denique si intelligatur de potestate Christi, quam habet in omnes Reges & populos, ut siue ipsi sciant, siue nesciant, & siue velint, siue nolint, ipse de ipsis agat, quicquid sibi placet, ac per hoc seruiant omnes eius voluntati; adimpletur semper hæc prophetia: *Data enim illi est omnis potestas in cælo & in terra*, Matth. 28. *Et ipse est Princeps Regum terra*, Apoc. 1. *Et habet in femore suo scriptum, Rex regum, & Dominus dominantium*, Apoc. 19.

Quia liberabit pauperem à potente, & pauperem, cui non erat adiutor.

Hæc est ratio, cur Reges & populi seruiant Christo, quia per ipsum liberabuntur à potestate Diaboli, à crudelissima tyrannide Principis tenebrarum, & transferentur in pacatissimum Regnum eius. Per *pauperem*, intelligitur genus humanum spoliatum à Diabolo omnibus bonis suis, quibus in statu innocentiae abundabat: per *potentem*, intelligitur Diabolus, quem ex astuto potentem fecit.



iniquitas nostra: si enim homo persuasione eius consentire nolisset, nunquam eum Diabolus debellare potuisset. Sed post peccatum captiuus Diaboli factus est homo, & Diabolus potentiam in eum acquisiuit. Incipit autem homo liberari, cum incipit cognoscere paupertatem suam, ac per hoc humiliari, & non in se, sed in Domino confidere. *Liberabit ergo pauperem hominem à potente Diabolo, & pauperem cui non erat adiutor, id est, quem neque alius homo, neque Angelus, neque vlla creatura poterat adiuuare.* In Hebræo pro, à potente, est, *clamantem*, vt sit adiectiuum pauperis. Sed Septuaginta non legerunt, *mesaucahh*, sed cum aliis punctis, *misuabb*, à potente siue diuite clamoso, & hoc eodem modo legit S. Hieronymus, qui vertit, à potente.

משוע  
משוע

## XIII.

*Parcet pauperi & inopi, & animas pauperum saluas faciet.*

Explicat modum, quo Christus liberabit homines à Diabolo: modus enim erit condonando eis peccata, & restituendo gratiam; cum enim remittuntur peccata, rumpitur catena, quæ captiuos tenebat sub Diaboli potestate. *Parcet ergo Rex noster pauperi & inopi*, id est, condonabit delicta agnoscen- tibus debita sua, & consentientibus paupertatem suam, ob quam soluendo non erant; nec solum ignoscet peccatis, sed etiam donabit gratiam siue iustitiam, & per hoc *animas pauperum saluas faciet.*

## XIV.

*Ex vsuris & iniquitate redimet animas eorum, & honorabile nomen eorum coram illo.*

Homo per originale peccatum debitor factus est mortis æternæ. Atque hoc est debitum capitale; sed dum huius debiti solutio differtur, iniquus exactor Diabolus exigit vsuras, impellens quotidie ad noua peccata, quæ sunt pœnæ primi peccati; & dum horum peccatorum pœna differtur, vsuræ trans- eunt in sortem principalem. Ita quo diutius peccator viu- it, eo magis debitum crescit.

Christus ergo benignissimus Dominus, non solum peccatum originis, quod fuit primum capitale debitum, per gratiam suam remittet; sed etiam *ab vsuris*, id est, ab actualibus peccatis, & *ab iniquitate* tam duri exactoris redimet. Hoc prædixit etiam Isaias cap. 9. cum ait: *Iugum enim oneris eius, & virgam humeri eius, & sceptrum exactoris eius superasti.* S. Augustinus dicit, peccati pœnam reddi cum vsura, quia plus peccator reddit, quam accepit. Homicida occidit carnem proximi, ipse peribit in corpore & in anima; fur accipit pecuniam, & perdet vitam æternam: fornicator sumit modicam & breuem voluptatem, reddet supplicia grauissima & sempiterna. *Et honorabile nomen eorum coram ipso*: hæc est causa tantæ pietatis Domini, quia nomen istorum pauperum fuit honorabile coram Deo. Vbi, &, accipitur pro, *quia*; & nomen significat naturam humanam creatam ad imaginem Dei: quamuis enim homo per peccatum vilis & despectus valde factus sit, tamen natura humana, & nomen hominis non est vile apud Deum, neque despicit Deus imaginem suam. Et vere incarnatio filij Dei manifeste ostendit, quam pretiosa sit natura humana apud Deum: quod certe deberet omnes homines rapere in amorem Dei, à quo tanti se fieri præter omne meritum suum intelligunt. In Hebræo habetur, *Sanguis ebrum*, pro eo quod nos habemus, *Nomen eorum*. Sed idem est sensus; nam Deus magni fecit sanguinem nostrum, id est, vitam nostram, quam ideo de interitu redemit, quia pretiosum fuit coram eo nomen nostrum, natura nostra, genus nostrum.

*Et viuet, & dabitur ei de auro Arabia, & adorabunt de ipso semper: tota die benedicent ei.*

Quoniam dicens, *Redimet animas eorum*, insinuauerat mortem Christi, quæ fuit redemptio & propitiatio pro peccatis nostris: addere voluit etiam resurrectionem & vitam eius æternam; ideo subiunxit, *& viuet*, id est, & postea quam per mortem redemerit, iterum viuet. *Et dabitur ei de auro Arabia*, id est,

XV.



est, pretiosis muneribus coletur: quod autem S. Augustinus legit: *Dabitur ei de auro Abrahæ*, videtur manifesta corruptio. Et adorabunt de ipso semper, id est, & redempti ab ipso adorabunt Deum verum ex ipsius ritu, doctrina & institutione usque ad mundi consummationem. Et tota die, id est, iugiter & assidue benedicent ei, hoc est, laudabunt & glorificabunt eum. In Hebræo habetur in numero singulari, *ithpallel, orabit*. Sed Septuaginta & S. Hieronymus verterunt in numero multitudinis, *orabunt*, & omnes tractatores exponunt verbum in numero multitudinis. Quare videndum est, an fortasse in verbo Hebræico una litera in fine, videlicet *vau*, desideretur. Quod autem in Hebræico & Græco sit verbum, *orabunt*, in Latino, *adorabunt*, non variat sensum: nam qui orat, adoratur, & qui adorant, ut plurimum id faciunt, ut orent: ergo adorabunt, exponendum est, adorantes orabunt, vel, orantes adorabunt. Illud, *de ipso*, varie exponitur: aliqui enim volunt, *de ipso*, significare, *pro ipso*, id est, pro felici progressu ipsius, vel Regni eius. Alij, *de ipso*, hoc est, pro salute, quæ est ab ipso. Alij, *de ipso*, id est, per ipsum orabunt Patrem: sed si præpositio, *de*, proprie accipienda sit, ut eam accipiendam esse arbitramur, iam diximus, quis nobis sensus esse videatur.

XVI.

Et erit firmamentum in terra in summis montium, superextolletur super Libanum fructus eius: & florebut de civitate sicut fœnum terræ.

Hic iam describitur fructus Apostolicæ prædicationis post Christi resurrectionem & ascensionem in cælum. Sed primum declaranda est vox *firmamentum*, pro qua in Hebræo est, *pissath bar*, Rabini, & qui eos sequuntur, volunt, *pissath bar*, significare *pugillum frumenti*, siue quantum vola manus potest capere frumenti, vel etiam *placentulam panis*: sed non possunt ex Scripturis hanc suam expositionem probare. S. Hieronymus venit ex Hebræo contrariam sen-

tentiam, videlicet, *memorabile triticum*, id est, abundantiam optimi frumenti, & potest confirmari hæc expositio ex cap. 37. Genesis, ubi dicitur, Iacob fecisse Iosepho filio suo vnice dilecto vestem egregiam variorum colorum: & habetur vox Hebræa, ex hac eadem radice, unde hic habemus, *pissath*, quomodo ergo in eo loco non significatur vestis angusta, aut brevis; sed talaris & pulcherrima: ita hoc loco significatur frumentum non modicum, quod pugilo aut vola contineatur, sed *abundans & memorabile*, ut S. Hieronymus recte vertit. Atque huc respexerunt Septuaginta, qui transulerunt, *firmamentum*, id est, firmamentum panis, ut dicitur in Psalmo 104. *Omne firmamentum panis contriuit*. Est enim abundantia frumenti firmamentum familie, ut non cogatur mendicare, iuxta illud Genes. 27. *Frumento, vino & oleo stabiliui eum*. Per abundantiam autem frumenti, hoc loco non intelligitur abundantia frumenti corporalis, sed abundantia Verbi Dei, ut colligitur ex illis verbis: *Et florebut de civitate sicut fœnum terræ*: ubi explicatur metaphora superiorum verborum. Hic igitur est sensus huius loci, alioqui valde obscuri, *Erit in terra firmamentum*, id est, abundantia frumenti spiritualis, quod est Verbum Dei. *In summis montium*, id est, etiam in locis ex se sterilibus; valles enim, non montes abundare solent frumento. *Superextolletur fructus eius*, id est, crescet & multiplicabitur fructus huius frumenti in terra sati, *super Libanum*, id est, fructus huius frumenti exercecet supra altitudinem cedrorum Libani, vel supra fructum Libani, qui producit arbores plurimas & altissimas. *Et florebut de civitate sicut fœnum terræ*, id est, & hic fructus frumenti non consistet in specieis corporalibus, sed in multiplicatione credentium: nam ex civitate Dei, quæ est Ierusalem, de qua dictum est ab Isaia cap. 2. *De Sion exibit lex, & Verbum Domini de Ierusalem*, florebut & germinabunt credentes in tanta copia, ut fœnum in terra germinare solet. Et quod ita factum sit, docet S. Lucas Act. 6. ubi dicit: *Et verbum Dei*

פס  
סס

XV

פסס  
בר



*Dei crescebat, & multiplicabatur numerus credentium valde.* Scio quid Paulus Burgenfis ex paraphrasi Chaldaica adferat ad probandum ex hoc loco sacrificium Missæ: sed scio etiam quam multis fabulis Iudaicis paraphrasis illa scateat. Ideo piget ex lacunis expositionum Iudaicarum haurire, quæ nobis ex purissimis fontibus sacrarum Scripturarum abundant.

XVII.

*Sit nomen eius benedictum in sæcula, ante Solem permanet nomen eius.*

Concludit Psalmum Propheta orando & laudando futurum Messiam. *Sit, inquit, nomen eius benedictum in sæcula*, id est, ab omnibus, ubique, & semper benedicatur nomen Christi: quod nomen *ante Solem permanet*, id est, coram Sole, siue quamdiu Sol erit, permanebit. Conabuntur quidem persecutores illud extinguere, sed non præualebunt. In Hebræo non habetur illud, *benedictum*, sed simpliciter legitur: *Erit nomen eius in sæculo*, & idem aliis verbis repetitur, *quamdiu Sol erit, nomen eius permanebit*. Testatur quoque Theodoretus, à nullo Interprete, id est, neque ab Aquila, neque à Symmacho, neque à Theodotione illud, *benedictum*, in textu esse positum, neque haberi in Exaplis apud LXX. Interpretes: tamen habetur in Græcis & Latinis antiquis libris, & legitur in Commentariis Hieronymi, Augustini & Euthymij. Illud, *permanet*, seu, *permanebit*, in Hebræo est, *innon*, quod verbum, *filiabitur*, dici posset, id est, propagabitur: quod satis proprie conuenit nomini Christi, quod per Prædicatores propagatur, & propagabitur vsque ad mundi consummationem.

יב

XVIII.

*Et benedicentur in ipso omnes tribus terre, omnes gentes magnificabunt eum.*

Hoc desumptum est ex Genesi c. 22. *In semine tuo benedicentur omnes gentes terre.* Et explicatur ab Apostolo ad Gal. 3. *Non dictum est, inquit, in seminibus, tanquam in multis, sed tanquam in vno, & semini tuo, quod est Christus.* Omnes ergo gentes benedicentur à Deo in Christo, id est, nemo benedicetur, nisi in Christo, & in ipso benedicentur, quotquot ex ipso renati fuerint, & in ipso perse-

uerauerint. Ipsis enim dicetur in Iudicio: *Venite benedicti Patris mei, possidete paratum vobis Regnum à constitutione mundi*, Matth. 25. Proinde benedictio ista, est iustificatio & adoptio filiorum per Christum. Sicut autem *in ipso benedicentur omnes tribus terre*, sic etiam vicissim *omnes gentes magnificabunt*, id est, laudabunt & glorificabunt eum.

*Benedictus Dominus Deus Israël, qui facit mirabilia solus.*

XIX

Hæc est laus, qua magnificabunt eum omnes gentes: noscent enim & prædicabunt hæc mirabilia, quæ fecit Deus Christus iustificando impios, & eruendo eos de potestate tenebrarum, & transferendo in Regnum suum, ab ipso solo fieri potuisse.

*Et benedictum nomen maiestatis eius in æternum, & replebitur maiestate eius omnis terra: fiat, fiat.*

XX.

Oportet in fine Propheta, ut nomen diuinæ Maiestatis in æternum ab omnibus benedicatur, non in celo tantum, ubi semper ab Angelis benedicatur, sed etiam in terra, ita ut repleatur omnis terra gloria Domini, & omnes homines agnoscant & laudent Dominum. Addit ex magno affectu, *fiat, fiat*, siue Hebraice, *Amen, amen; vere ita sit, vere ita sit.* Atque hic est finis libri secundum Hebræos.

## PSALMVS LXXII.

Titulus & Argumentum.

Psalmus Asaph.

**D**E hoc Titulo diximus aliquid in explicatione Psalmi quadragesimi noni, & in præfatione. Argumentum est exhortatio ad infirmos fideles, ut non scandalizentur, si videant improbos in hoc mundo florere: quæ adhortatio semper utilis, sæpe etiam necessaria est; tum videlicet cum populus Dei



lus Dei, vel iustus quicumque persecutionem patitur, & iniusti maxima pace & tranquillitate fruuntur.

## EXPLICATIO PSAL. LXXII.

**Q**uam bonus Israel Deus, his qui recto sunt corde.

Explicaturus David tentationem, & scandalum pusillorum, quorum personam in hoc Psalmo induerat, primò iacit fundamentum rectæ Fidei, ut intelligamus, neque ipsum, neque illos, quorum personam induerat, circa fidem diuinæ providentiæ naufragasse. Quod idem fecit Propheta Hieremias cap. 12. primum enim ait, *Iustus quidem tu es Domine, si disputem tecum*; deinde hoc fundamentoposito, subiungit, *Verumtamen iustitia loquar ad te: quare via impiorum prosperatur? bene est omnibus, qui prauaricantur, &c.* Sic igitur hoc loco David primum affirmat, Deum bonum esse, ac per hoc iustum; sed bonum ut est, videri bonis, qui sano iudicio præditi sunt; quamuis peruersis peruersus videatur. Ait igitur, non interrogando, sed affirmando, *Quam bonus Israel Deus, his qui recto sunt corde*, id est, Perquam bonus est Deus Israeli, Israelitis, inquam, qui recto sunt corde. In Hebræo sic legitur ad verbum, *Certè bonus est Deus Israel his, qui puro sunt corde*. Itaque Deus, qui in se semper est bonus, rectus, & iustus; est etiam talis Israelis iudicio, non tamen omnis Israelis, sed ijs ex Israele, qui purum cor habent, id est, liberum à fumo passionum, ut rectè possint iudicare, siue ijs, qui recto sunt corde, ut conforme sit rectitudini Dei; distortis enim, quod rectum est, distortum esse videtur.

*Mei autem penè moti sunt pedes, penè effusi sunt gressus mei.*

Incipit nunc exponere tentationem infirmorum, quorum personam, ut diximus, in hoc Psalmo gerit. Boni, inquit, fideles, qui puro, & recto sunt corde, bonum, & iustum Deum esse non dubitant, quicquid illis accidat: sed ego infirmus, qui cor habeo non usquequaque purum, & rectum, penè cecidi

in dubitationem de iustitia Dei. Hanc enim dubitationem metaphoricè significat motio pedum, & effusio gressuum. Sicut enim qui nutare incipit pedibus, & qui labitur dum ambulat, deficit à firmitate & stabilitate sua; sic ille, qui agitur dubitationum tentationibus contrarijs veritati, deficere incipit, & quasi nutat à constantia Fidei. *Mei autem, inquit, penè moti sunt pedes*, id est, nutare cœpi, non tamen omnino cecidi, *Penè effusi sunt gressus mei*, id est, labi cœpi, dum ambularem, non tamen cui usque ad terram: denique significat, se parum abfuisse à lapsu in dubitationem circa iustitiam, & providentiam Dei.

*Quia zelavi super iniquos pacem peccatorum videns.*

Aperit causam suæ tentationis, ac dicit esse, quia viderit iniquos, quos puniri à Deo oporteret, frui altissima pace, alijsque bonis permultis. Illud, *zelavi super iniquos*, significat zelo indignationis exarsisse, *super iniquos*, id est, aduersus iniquos, quos vidi prosperitate & pace gaudere, quam non merentur.

*Quia non est respectus morti eorum, & firmamentum in plaga eorum.*

Pergit in explicanda felicitate iniquorum; ac dicit, eos frui pace, & prosperitate, quoniam tanta sanitate vtuntur, ut de morte non cogitent, quasi semper essent victuri; & si fortè plaga aliqua, siue morbus illis contingat, ea plaga non habet firmamentum, sed continuo evanescit. Illud, *non est respectus morti eorum*, hunc sensum habere videtur, non respiciunt iniqui in mortem suam, neque alij, qui eos vident, in mortem ipsorum, id est, non videntur vnquam morituri, propter diuturnam, & stabilem sanitatem, qua fruuntur. In textu Græco legitur, *non est abnutio mortis eorum*, vel, ut legit S. Augustinus, *non est declinatio mortis eorum*; quæ verba eundem sensum facere possunt, videlicet, Iniqui non declinant, neque abnuunt mortem, quia de ea non cogitant, confidentes in optima constitutione corporis sui. Ex Hebræo S. Hieronymus vertit,

Ecc Non



*Non cogitant mortem suam:* quæ lectio nihil ferè differt à nostra. Alij ex Hebræo vertunt, *non sunt vincula in morte ipsorum;* & potest sensus esse, Non trahuntur iniqui ad mortem vinculis variorum morborum, vt sæpè accidit iustis. Hæc nobis videtur explicatio loci obscurissimi, quia cohæret cum verbis sequentibus: quod enim sequitur, *Et firmamentum in plaga eorum;* sine dubio requirit repetitionem negantis particulæ initio positæ, vt sit sensus, & non est firmamentum, id est, firmitas, & stabilitas in plaga eorum, quia si qua plaga illis accidit, facillimè curatur.

V.

*In labore hominum non sunt, & cum hominibus non flagellabuntur.*

Ad sanitatem iniquorum, quæ est pax cum morbis, & plagis corporalibus; accedit etiam abundantia omnium rerum, vt non necesse habeant consistere cum inopia, satiatione, litibus, angoribus, alijsque tribulationibus, quibus flagellantur plerique hominum, qui in sudore vultus sui vescuntur pane suo, & calumnijs potentiorum opprimuntur. Sed rectè admonet S. Bernardus in declamatione sua, qui cum hominibus in hac vita non flagellantur, cum dæmonibus flagellabuntur in gehenna: nam generale est quod dicit Apostolus 2. Tim. 3. *Omnes, qui volunt pie vivere in Christo Iesu persecutiones patientur.* & ad Heb. 12. *Quem diligit Deus, castigat: flagellat autem omnem filium, quem recipit.*

VI.

*Ideo tenuit eos superbia, operati sunt iniquitate, & impietate sua.*

Declarat Propheta, quem fructum producat prosperitas in impijs; superbiam videlicet, & cumulum iniquitatum. Utuntur enim copia rerum temporalium ad explendas, libidines suas, & ad opprimendos debiliores: cum è contrario viri pii valdè timeant, & humiliantur, cum aridet prosperitas; suspectam enim habent prosperitatem, ne forte sit merces eorum, & excidant à mercede sempiterna, quam toto corde sitiunt: sed notanda sunt verba. *Tenuit, inquit, eos superbia:* non enim superbiam tenent, sed

tenentur à superbia, quasi vniculo quodam. Nam qui facit peccatum seruus est peccati, Ioan. 8. & vox Hebræa hoc sonat, *Circundedit eos superbia, velut torques collo alligatus: Et operati sunt iniquitate, & impietate.* Hoc significat, iniquos in prosperitate non habere peccatum solum intus in corde, vt sæpè habent pauperes, & miseri, qui corde concupiscunt furta, adulteria, pompas seculi; sed opere non implent, quod libenter implerent, si possent; itaque latet intus peccatum eorum. Iniqui autem rebus omnibus abundantes toti cooperti sunt iniquitate, quia non solum cogitatione, & desiderio, sed oculis, manibus, pedibus, lingua, visu, verbo, & opere peccant.

*Prodiit quasi ex adipe iniquitas eorum, transferunt in affectum cordis*

VII.

Ostendit originem iniquitatis natam esse ex malo vñ rerum temporalium abundanter illis à Deo concessarum: quoniam enim non dispensarunt diuitias magis egentibus, vt par erat; sed ipsi sibi omnia retinuerunt, inde pingues effecti, velut tauri, aut equi indomiti pauperes opprefferunt. Pulchre notat S. Aug. in pauperibus ex macie prodire iniquitatem, in diuitibus ex adipe: pauperes enim interrogati cur furentur, respondent, ob inopiam rerum necessariarum: diuites interrogati, cur alienum agrum inuadant, respondent, si tamen respondere dignantur, quia multos habent agros vicinos, quibus hunc etiam adiungi congruum est. Sic Achab Rex, 3. Reg. 21. abstulit vineam Naboth, non quod ipse vineis indigeret, sed quia vicina erat palatio suo. Porro abundantiam esse causam iniquitatum, quando non fiunt inde eleemosynæ pauperibus, docet Ezechiel cap. 16. *Hæc fuit, inquit, iniquitas Sodoma, id est, occasio siue causa iniquitatis grauissimæ, ob quam igne de celo consumpta fuit, superbia, saturitas panis, & abundantia, & oculum ipsius, & filiarum eius: & manum egono, & pauperi non porrigebant: & eleuata sunt; & fecerunt abominabiles coram me, & abstuli eas.* In Hebræo non legitur, *iniquitas*, sed *oculus*: hunc



sensum esse volunt Hebraei. *Prodiit quasi ex  
 adipe oculus eorum*, id est, ex nimia pingue-  
 dine, oculus eorum prominebat, quasi exire  
 vellet. Sed Septuaginta Interpretes viti do-  
 ctissimi non legerunt, *ham*, quod significat  
 77 *oculum*, sed, *hauon*, quod significat, *iniqui-*  
 77 *tatem*. Facile autem fuit vitio librariorum  
 mutari *vau* in *iud*, cum non differant, nisi  
 quod una litera est paulo longior, quam al-  
 tera. Quod sequitur, *Transferunt in affectu  
 cordis*, difficile admodum est: nam in He-  
 braeo secundum versionem S. Hieronymi  
 pro, *affectu*, ponitur, *cogitatio*, secundum al-  
 ios, *pictura*, in Graeco est, *dispositio*, & sic le-  
 git S. Augustinus. Aliqui tollunt praeposi-  
 tionem, *in*, & legunt, *transferunt affectum*, si-  
 ne *cogitationem cordis*; & sensum esse volunt,  
 iniquos transgressos esse, quo ad abundan-  
 tiam bonorum temporalium, ipsum deside-  
 rium & cogitationem suam, id est, plus ac-  
 cepisse, quam desiderarent, vel cogitarent,  
 quae expositio non placet: experientia enim  
 docet, iniquos amatores mundi, non satiari  
 rebus temporalibus, nec fieri posse, ut ha-  
 beat plus, quam desiderant, cum res tem-  
 porales sint modice, & cito finiantur: & de-  
 siderium humanum vastissimum sit, nec sa-  
 tiari possit, nisi summo, & infinito bono, ut  
 dicit S. Augustinus lib. 1. Confess. c. 1. Adde  
 quod praepositio, *in*, non debet tolli cum ha-  
 beat in textibus omnibus Graecis, & La-  
 tinis. Existimo igitur, *transire in affectum  
 cordis*, esse transmutari, & conuertere in carna-  
 les passionem, & effici hominem, totum car-  
 nalem, & animale: quod alijs verbis dicitur  
 ad Rom. 1. *Tradidit eos Deus in desideria  
 cordis sui*. & infra, *Tradidit eos in passionem  
 ignominiae*, & ad hanc expositionem accom-  
 modari possunt omnes lectiones: nam affe-  
 ctus, & cogitatio coniunctissimae sunt, &  
 pro eodem accipiuntur. Nihil enim homo  
 desiderat, nisi quod cogitat, & cognoscit. Sed  
 significantius est nomen *pictura*, quam di-  
 cunt periti linguae Hebraicae proprie signifi-  
 care vocem, *ma'chiorik*, quam nomen cogi-  
 tationis: quia Mundi amatores non debide-  
 rant quod verum bonum, & pulchrum est,  
 sed quod ipsi sibi pingunt, & fingunt in cor-

de suo peruerso bonum, & pulchrum esse.  
 Adulter enim, qui summo affectu diligit  
 adulteram, & eam rebus omnibus antepo-  
 nit, etiam aeterna felicitati, non id facit, quia  
 reuera illa sit res pulcherrima, & pretiosissi-  
 ma: sed quia ita ipse iudicat, & talem sibi ipse  
 eam in corde pingit, & fingit. Itaque *transfe-  
 runt iniqui* abundantes rerum temporalium  
*in affectum, & cogitationem, & picturas cor-  
 dis sui*: quia conuersi sunt, & transformati in  
 concupiscentias & figmenta cordis sui: quo  
 etiam referri potest vox Graeca *diatris*, id  
 est, dispositio, nam tales effecti sunt, qualis  
 est dispositio cordis ipsorum, id est, toti car-  
 nales.

Cogitauerunt, & locuti sunt nequi-  
 tiam, iniquitatem in excelsis locuti sunt.

VIII.

Pergit in explicanda peruersitate iniquo-  
 rum abundantium rebus temporalibus, ac  
 dicit, eos cogitasse apud se iniquitatem ad-  
 uersus Deum, & homines, & non timuisse  
 eam palam etiam praedicare, irridendo Dei  
 maiestatem, & qui illum colunt. Illud, *cogi-  
 tauerunt*, S. Hieronymus vertit, *irriserunt*,  
 & potest fieri ut vox Hebraica, *nik*, utrunq;  
 significet: nam raro hoc verbum occurrit in  
 sacris libris. Fortasse etiam significat, irri-  
 dendo in corde suo cogitasse nequitiam,  
 quam postea loquendo propalauerunt. Quae  
 autem audacter locuti sunt nequitiam, expli-  
 cat Propheta, dicens *iniquitatem in excelsis  
 locuti sunt*, id est, iniquitatem, siue blasphemiam  
 iniquissimam in excelsis positi palam,  
 & aperte locuti sunt. Illud, *enim in excelsis*,  
 Hebraice est, *de excelsis*, siue ex excelsis: pro-  
 inde sensus est, istos iniquos diuites in sub-  
 limi locatos, ut superbiam eorum decebat,  
 ex excelsis illo loco blasphemiam promul-  
 se: sed haec clariora erunt in versu sequenti.

מ'ק

Posuerunt in calum os suum, & lin-  
 gua eorum transiit in terra.

IX.

Haec est nequitia impiorum. *Posuerunt in  
 calum*, id est, supra calum, os suum, non ti-  
 mentes Deum, & Angelos blasphemare. *Et  
 lingua eorum transiit in terra*, id est, & lingua  
 eorum perambulavit (ut sonat vox Hebraica)

Ecc 2

in ter-

VII

משכח



in terra detrahens cultoribus Dei; eosque irridens, quasi vana sit spes eorum.

X. Ideò conuertetur populus meus hic, & dies pleni inuenientur in eis.

XI. Et dixerunt quomodo scit Deus, & si est scientia in excelsis?

Reuertitur Propheta in persona infirmorum in Fide, ad explicandam tentationem, & scandalum ipsorum ex felicitate, qua fruuntur peccatores. Ideò, inquit, conuertetur populus meus hic, id est, propter tanta scelera, & tantam felicitatem iniquorum populus meus, qui est populus fidelis, & timens Deum, conuertetur hic, id est, conuertet se ad consideranda hæc. Et dies pleni inuenientur in eis, id est, confidendo inueniet, verè felices esse impios, ita vt etiam diutissimè uiuant, & impleant dies suos peruenientes ad vltimam senectutem. Et dixerunt, Quomodo scit Deus, & si est scientia in excelsis? id est, & turbantes in fide dixerunt, Quomodo potest fieri, vt Deus hæc sciat, & permittat; est ne scientia in Deo excelsis? an potius hæc ignorat, vel non considerat? Hanc existimo veriorum esse huius loci explicationem. Theodoretus enim docet verba versiculi decimi dicta esse per parenthesim in consolationem populi iusti, & verba versiculi vndecimi, esse verba iniquorum, qui posuerunt os suum in cælum. Quam expositionem nō reprobō, sed priorem, vt faciliorem, & magis connexam cum sequentibus & præcedentibus præfero. In Hebræo non habetur, populus meus, sed, populus eius; videlicet Dei. Sensus est idem, sed lectio nostra est clarior, & credibile est Septuaginta Interpretes non legisse, ammi, populus eius, sed ammi, populus meus. Facile enim fuit librarijs errorem committere in scribendo vau, pro, iod, quæ sunt literæ similes: sic etiam in Hebræo non habetur nunc, dies pleni, sed vel, vt S. Hieronymus vertit, quis plenus, vel vt alij legunt, aquæ pleni, supple calicis. Sed Septuaginta Interpretes non erant tam imperiti: vt per aquas intelligerent, & verterent, dies, ergo necesse est dicere, eos nō habuisse in suis codicibus,

מי מי, id est, quis, neque, me, id est, aqua, sed

ieme, id est, dies. Neque mirum est, si tam longo tractu temporis exciderit vna litera, quæ minima est omnium literarum. Illud est verum, legendum esse ex Hebræo, dies plenitudinis potius, quàm, dies pleni: sed dies plenitudinis, significat dies plenissimos vel plenos, vt verterunt Septuaginta.

Ecce ipsi peccatores, & abundantes in seculo, obtinuerunt diuitias.

Et dixi, ergo sine causa, iustificauit cor meum, & laui inter innocentes manus meas.

Et fui flagellatus tota die, & castigatio mea in matutinis.

Aperit causam dubitationis, an Deus sciat quæ aguntur in terris: & loquitur in persona infirmorum, quasi vnus esset ex illis, vt facilius eorum infirmitati medeatur. Ecce, inquit, ipsi peccatores, & abundantes in seculo obtinuerunt diuitias, id est, hæc ratio est, cur incipiam dubitare de prouidentia Dei, quia peccatores, qui flagellari deberent, abundantes sunt in seculo, & obtinent diuitias magnas. Et dixi apud me ista considerans, Ergo sine causa iustificauit cor meum, id est; frustra cor meum purum a peccatis seruare studui: & frustra laui manus meas cum innocentibus, innocenter operans, & viuens: frustra, inquam, quoniam Deus non benefacit iustis, sed peccatoribus: imò non solum Deus non benefacit iustis, sed eos affligi patitur. Ego enim, qui iustitiæ studeo, fui flagellatus tota die, id est semper in tribulationibus versor. Et castigatio mea in matutinis, id est, summo mane incipit vexatio, & tribulatio mea, non differtur saltem ad tempus, vt vel modicum requiescam. Hæc est sententia horum versiculorum: sed verba consideremus. Illud, abundantes in seculo, in Hebræo, significat propter pacem, & quietem habentes, ac per hoc abundantes sanitate, robore, amicis, & similibus rebus. Illud, obtinuerunt diuitias; poterat etiam verti, multiplicauerunt & conseruauerunt substantiam: quo declaratur id, quod.



id quod nos legimus, *obtulerunt diuitias*: nam qui multiplicat diuitias, illi vere eas obtinent, id est, tenent ne dilabantur, tenuis enim substantia facile euanesceat. Illud, *iustificauit cor meum*, in Hebræo est, *purificauit cor meum*, id est, maculas peccatorum terfi per penitentiam, vel mundum & iustum conseruauit. Illud, *laui inter innocentes manus meas*, significat, vnum ex innocentibus me probauit, vt vere innocens eram opere, & purus corde. Nam lotio manuum signum erat innocentie, cum querebatur reus homicidij, vt legimus Deut. 21. ex quo etiam Pilatus lauit manus coram populo, Matth. 27. vt se innocentem demonstraret in passione Christi.

relinquere, deficere, præuicari, fidem fallere. Itaque S. Hieronymus vertit, *generationem filiorum tuorum reliqui*, ab eis defeci, S. Augustinus legit, *non concinui, dissonui*, id est, non conueni in sententia cum filiis Dei. In eundem sensum exponendum est, *reprobauit*, id est, spreui eos, neque fidem eis seruauit, quam debebam.

*Existimabam vt cognoscerem hoc, labor est ante me.*

XVI.

*Donec intrem in sanctuarium Dei, & intelligam in nouissimis eorum.*

XVII.

*Si dicebam, narrabo sic, ecce nationem filiorum tuorum reprobauit.*

Incipit adhibere medicinam infirmis. Exposuit hactenus eorum querelas, & causam scandali, quod patiebatur ex prosperitate impiorum & aduersitatibus piorum: nunc quasi compunctus & penitens ait: *Si dicebam, narrabo sic*, id est, si dicebam apud me, narrabo, id est, pergam narrare prosperitates piorum, quasi iniustas, & hanc iniustitiam in Deum referre. *Ecce nationem filiorum tuorum reprobauit*, id est, hoc ipso reprobauit & damnaui omnes filios Dei, Abraham, Isaac, Iacob, Moysem, & cæteros. Omnes enim confitebantur, habere Deum prouidentiam rerum humanarum, & iusto iudicio peccatoribus interdum dare prosperitates, & iustis afflictiones. Vel, reprobauit & damnaui omnes filios Dei, quasi insipientes, qui frustra iustitiæ studeant. Vel denique, reprobauit omnes filios Dei, quia iudicaui eos omnes, à Deo derelictos esse: quæ omnia falsa sunt, & reprehensione dignissima. Atque hæc est prima ratio, qua persuadet Propheta infirmis, vt non dubitent de prouidentia Dei, ne videlicet contrarij sint omnibus filiis Dei, sanctis videlicet Patriarchis & Prophetis, neve illos insipientes fuisse credant, aut à Deo derelictos. Vox Hebræa, *bagadi*, pro qua habemus, *reprobauit*, significat spernere,

Ad primam illam rationem addit secundam petitam à difficultate huius questionis, quæ detertere deberet homines, ne prompti essent ad reprehendenda, quæ non intelligunt. *Existimabam*, inquit, *vt cognoscerem hoc*, id est, reputabam mecum, & cogitando inuestigabam, vt ad huius rei cognitionem peruenirem: sed *labor* magnus & difficultas mihi obieiebatur, *donec intrarem in sanctuarium Dei*, & per orationem à Deo lumen obtinerem: & eo lumine ad nouissima iniquorum abundantium adspicerem, nam ex nouissimis, id est, ex diuino iudicio, quod post mortem impios manet, manifeste declarabitur, illos non fuisse vere felices. Illud, *existimabam, vt cognoscerem hoc*, obscurum est ex ambiguitate verbi, *existimabam*: nam hoc loco non significat opinabar, vel arbitrabar, sed *reputabam*, siue discutendo iudicabam, quomodo dicimus, ex præteritis futura existimare possumus. Verbum Hebræum, *chafab*, quod hoc loco habetur, significat cogitare, existimare, reputare, & S. Hieronymus vertit, *cogitavi, vt intelligerem hoc*, id est, cogitavi, apud me discutiens questionem istam, vt eius solutionem inuenirem. Illud, *labor est ante me*, in Hebræo habetur, *labor in oculis meis hoc*, id est, dum inquito notitiam huius rei, opponitur oculis mentis meæ labor penetrandi, quasi murus quidam impenetrabilis. Illud, *intelligam in nouissimis eorum*, vel significat, intelligam solutionem

Ecc 3

tionem



tionem quæstionis in nouissimis eorum, id est, considerando nouissima eorum cognosciam, Deum habere prouidentiam rerum humanarum, vel significat, intelligam nouissima eorum, id est, considerando vitam eorum perueniam ad intelligendum exitum & vltimum finem ipsorum, & inde colligam quæstionis solutionem.

XVIII. *Veruntamen propter dolos posuisti eis, deiecisti eos, dum alienarentur.*

Hic iam Propheta ostendit, ex nouissimis intelligi posse iniquos abundantes in sæculo non esse felices, & Deum iustum esse Iudicem. Sed quia lectio nostra, quæ fideliter ex Græco translata est, multum dissentire videtur ab Hebraica, quod ad verba, licet in sensu conueniant, utramque explicemus. *Veruntamen*, inquit, *propter dolos posuisti eis*, subintellige *dolos*, aut *mala*, vt addunt aliqui textus Græci, id est, propter dolos, quibus vsi sunt erga proximos suos illi iniusti, vt multiplicarent diuitias, tu Domine secundum prouidentiam tuam fecisti, vt ipsi doli ipsorum verterentur ipsis in dolos longe maiores: nam dum per dolos lucrati sunt pecunias, aut agros, aut vestes, per eosdem dolos imprudentes ipsi iacturam fecerunt æternæ vitæ. *Et deiecisti eos, dum alienarentur*, id est, & dum extollerentur ad honores & dignitates, per eas deiecti sunt in præcipitium mortis æternæ, iusto iudicio tuo. Hebraica lectio, quæ est apud S. Hieronymum, sic habet: *Veruntamen in lubrico posuisti eos, deiecisti eos in interitum*, id est, dum iniustis dedisti magnas diuitias, posuisti eos in loco, vnde facile labi possent in interitum, & quia non sciverunt in lubrico caute ambulare, lapsi sunt iusto iudicio tuo in interitum. Vtraque lectio congruit cum Apostoli sententia in epist. 1. ad Tim. c. 6. *Qui volunt diuites fieri, incidunt in tentationem, & laqueum Diaboli, in desideria multa inuilia & nocua, quæ mergunt hominem in interitum & perditionem.* Quod si velimus concordare lectionem Latinam cum Hebraica, sciendum est, propter dolos, in Hebraico es-

se, *bachalacoth*, quæ vox non significat proprie, propter dolos, neque, in lubrico, sed significat in rebus lenibus, politis, blandis, quales sunt lapides valde politis, specula, & similia: nam, *calach*, est diuidere, lenire, &c. Itaque potuisset verti hic locus, in blanditiis, vel propter blanditias, quales sunt doli & insidiæ decipientium, & huc respexerunt LXX. Interpretes: potuit etiam verti, in lubrico loco, quia locus lubricus, blandus & lenis est: & hanc significationem secutus est S. Hieronymus. Illud autem, *dum alienarentur*, non diffculter inuenitur in textu Hebraico. Nam vox illa, *massuoth*, si scribatur cum *scin*, habente punctum in sinistro cornu, deriuabitur à verbo, *nasa*, quod eleuare significat, & huc respexerunt LXX. Interpretes: si vero scribatur cum *scin*, habente punctum in dextro cornu, deriuabitur à verbo, *nascia*, quod significat desolare, & hanc lectionem secutus est S. Hieronymus.

XIX. *Quomodo facti sunt in desolationem? subito defecerunt, perierunt propter iniquitatem suam.*

Declarat, quod obscure dixerat, & admirans celerem ruinam iniquorum, quorum felicitas vix exorta atesceat, vix apparuit, & euanesceat. *Quomodo*, inquit, *facti sunt in desolationem subito?* id est, quomodo, qui videbantur rebus omnibus abundare, repente facti sunt instar ciuitatis desolatæ, vbi præter ruinas nihil cernitur? *defecerunt*, qui videbantur in æternum super terram victuri? *perierunt propter iniquitatem suam.* Illud, *subito*, in Hebræo, Græcoq; textu coniungitur cum verbis, *Facti sunt in desolationem*, & sic etiam legunt S. Augustinus & Euthymius. Dicuntur autem iniqui subito perisse, quia prosperitas eorum breuissima est, si cum futura æternitate peccatorum comparetur: videtur quidem prosperitas eorum diuturna esse, dum permanet, sed cum finem acceperit, tunc sentietur, quam brevis & momentanea fuerit. Illud, *propter iniquitatem suam*, S. Hieronymus vertit ex Hebræo, *Quasi non sint*.



*sint, id est, ad nihilum redacti sunt. Alij ver-  
tunt, ab horroribus, vel terroribus. Sed vox il-  
la, ballahoth, obscura significationis est, & in  
tanta varietate versionum, sua remanere de-  
bet LXX. Interpretibus auctoritas.*

*Velut somnium surgentium Domine,  
in ciuitate tua imaginem ipsorum ad ni-  
hilum rediges.*

Comparat Propheta eleganti similitudine  
prospicitatem iniquorum somnio. Somnium  
non est res vera, sed apparens: qui somniat se  
diuitem esse, cum euigilat, intelligit se delu-  
sum inani spectro fuisse. Sed omnes iniqui  
abundantes in sæculo, felices sibi esse viden-  
tur, sed cum transierit nox huius sæculi, in-  
telligent vere se felices non fuisse, & tunc  
imago ipsorum, id est, imaginaria eorum fœ-  
licitas, ad nihilum redigetur; quia in ciuitate  
Dei, vbi vera & sempiterna fœlicitas est, nul-  
lum locum habebit fœlicitas ista imaginaria  
& momentanea, quæ in auro & argento, in  
famulis & equis, in palatiis & hortis, in ho-  
noribus & dignitatibus, in conuiujs & luxu-  
ria posita est; hæc enim omnia peribunt, &  
amatores suos infelicitissimos reddent. Ideo  
rectissime admonet Apostolus Paulus: *ut  
qui habent bona huius mundi, tanquam non  
habentes sint, non de iis glorientur, non in illis  
confidant, quia præterit figura huius mundi,*  
1. Cor. 7. *Velut somnium, inquit, surgentium,*  
quod euigilando euanesceat, sic tu Domine  
in ciuitate tua, quæ in nouissimo demonstra-  
bitur & aperietur, imaginem impiorum, id est,  
imaginariam eorum fœlicitatem, ad nihilum  
rediges, umbratilis enim fœlicitas euanesceat,  
cum vera fœlicitas apparebit. Iuste, inquit  
S. Augustinus, Deus in ciuitate sua cœlesti  
imaginem iniquorum ad nihilum rediget,  
qui in ciuitate sua terrena imaginem Dei ad  
nihilum redigere satagerunt.

*Quia inflammatum est cor meum, &  
renes mei commutati sunt, & ego ad ni-  
hilum redactus sum, & nesciui.*

*Ut iumentum factus sum apud te, &  
ego semper tecum.* XXII

*Tenuisti manum dexteram meam, &  
in voluntate tua deduxisti me, & cum  
gloria suscepisti me.* XXIII

Exponit nunc Propheta, vnde nouerit so-  
lutionem quæstionis, & apud Deum multum  
profecerit. *Quia inflammatum est cor meum.*  
Causalis est vox, quia, non reddit rationem  
superiorum, sed inferiorum, quæ habentur  
versic. 23. *Tenuisti manum dexteram meam.*  
*Quia, inquit, inflammatum est cor meum, in*  
Deum videlicet, & renes mei commutati sunt,  
id est, affectio mea carnalis mutata est in spi-  
ritualem. *Et ego ad nihilum redactus sum, &  
nesciui, id est, humiliatus sum, & ignoran-  
tiam meam confessus sum. Imo insipiens  
iumentum factus sum apud te, id est, obedire  
tibi sine contradictione constitui, & onus  
quodcunque portare decreui, more iumen-  
ti. Et ego semper tecum, id est, à fide & chari-  
tate tua non recedam propter has omnes vir-  
tutes meas, quæ dona tua sunt, tenuisti ma-  
num dexteram meam, ne forte tentatio illa  
grauissima me aberrare faceret à te. Et in vo-  
luntate tua, id est, secundum beneplacitum  
tuum, deduxisti me per viam rectam, & cum  
gloria suscepisti me, in ciuitatem tuam, nunc  
quidem in spe, suscepturus postea in re. Il-  
lud, inflammatum est cor meum, aliqui expo-  
nunt in deteriore partem, id est, exarsit in-  
dignatione cor meum; & sic etiam illud, ad  
nihilum redactus sum, & nesciui, exponunt  
de peccato & ignorantia Davidis; ut etiam  
illud, ut iumentum factus sum, exponunt  
de stultitia eiusdem, quod more brutorum  
non intellexerit mysteria diuina: sed nos  
in bonam partem cum S. Hieronymo, qui  
hæc omnia tribuit Christo, & ex parte cum  
S. Augustino, interpretati sumus, non  
præiudicantes aliorum Commentariis, si  
forte lectoribus magis arrideant. Quod ar-  
tinet ad verba, S. Hieronymus ex Hebræo  
vertit, *Quia contractum est cor meum, nos*  
cum Græcis legimus, *inflammatum est:*  
& verisimile est, LXX. Interpretes non ha-*



habuisse in suis codicibus Hebraicis, *itchamez*, sed, *itchamem*, vitima litera immutata, hoc enim significat, *calefactum est*. Illud, *renes mei commutati sunt*, S. Hieronymus ex Hebræo vertit, *Lumbi mei velut ignis fumigans*, quia fortasse deriuauit vocem, *estonan*, ab, *es*, quod significat, *ignem*. Sed eadem vox, *estonan*, rectius deriuatur à verbo, *scianah*, quod est, *mutare*, & significat, *commutati sunt*, vt LXX. Interpretes reddiderunt. Illud, & ego ad nihilum redactus sum, ex Hebræo vertit S. Hieronymus, *Et ego inspiens*, & vere in Hebræo non est nisi vna vox trium literarum, *baar*, pro tribus illis vocibus, ad nihilum redactus sum. Significat autem, *baar*, insipientem, quasi iumentum: proinde illud, ad nihilum redactus sum, videtur exponendum, ad nihilum sapientie redactus sum, quasi iumentum factus sum ex homine, ac per hoc nihil hominis in me remansit: & videtur explicatio hæc confirmari per sequentia, & nesciui: & vt iumentum factus sum: quæ omnia dicuntur à Dauide ex profunda humilitate, quæ se coram Deo insipientissimum esse iudicabat: quare non repugnat hæc expositio accommodata ad verba Hebraica, cum ea, quam supra tradidimus ex simplici lectione Latina & Græca.

XXIV. *Quid enim mihi est in cælo: & à te quid volui super terram?*

Quia dixerat, cum gloria suscepisti me, oculo cordis in gloriam illam defixo ita raptus à spiritu est, vt iam omnia creata despiciat. *Quid mihi*, inquit, *est in cælo?* quid pulchri, quid pretiosi est, quod appetam in cælorum? à te quid volui super terram? quid pulchri, quid pretiosi est, quod appetam, & à te expetam super terram? quasi dicat, Nihil creatum inuenio, quod mihi satisficiat, nihil in quo cor meum penitus acquiescat, neque in cælo, neque in terra. In Hebræo legitur, *mi*, non, *ma*, id est, *quis mihi est in cælo?* non, *quid mihi est in cælo?* Sed cum LXX. Interpretes, & ipse etiam S. Hieronymus verterint, *quid*, omnino est retinenda nostra lectio, ac dicendum, in antiquis codicibus

fuisse, *ma*, non, *mi*. Quod autem in Hebræo *מה מי* sequitur, & tecum non volui super terram, hunc sensum facit, Nihil mihi est in cælo quod cupiam, super terram autem non volui quicquam etiam tecum, quia te solum habere desidero. Sensus igitur idem est, etiam si verba diuersa sint.

*Defecit caro mea, & cor meum: Deus cordis mei, & pars mea Deus in æternum.*

Reddit rationem, cur nihil cupiat præter Deum, quia vbicumque posuerit cor suum, aut carnem suam, putrescent & deficient, nisi quiescerint in Deo. *Defecit*, inquit, *cara mea, & cor meum*, si quando per amorem ea collocaui in creatis rebus, putruerunt & corrupta sunt. *Deus cordis mei, & pars mea Deus in æternum*. In Hebræo est, *petra cordis mei, & pars mea Deus in æternum*, id est, Deus solus est petra, in qua quiescit secure cor meum, vt neque cadere, neque deficere possit, ipse est centrum omnium desideriorum meorum: ipse est pars mea, portio mea, hæreditas mea, id totum quod prætereendere possum in æternum: habeant alij partes alias, siue aurum & argentum, siue delicias carnis, siue superba palatia, siue Regna & Imperia, mihi Deus sufficit in hac vita & in futura.

*Quia ecce qui elongant se à te, peribunt: perdidisti omnes, qui fornicantur abs te.*

Recte elegit consistere in Deo, petra sua, quoniam omnes, qui per iniquitatem separantur à Deo, peribunt omnino, quo modo perit corpus, cum separatur à spiritu, & ruit ædificium, cum subducitur fundamentum. *Perdidisti omnes, qui fornicantur abs te*: non solum pereunt, qui auertuntur à Deo, quia carent hoc ipso gratia Dei, quæ dat vitam animæ: sed etiam quia Deus zelotes est, & animas sibi primus desponsauit: & ideo grauissime punit morte sempiterna eos, qui fornicantur à Sponso tam bono, & tam potente.

*Mihi*



*Mihi autem adharere Deo bonum est, ponere in Domino Deo spem meam.*

*Vt annunciem omnes predicationes tuas in portis filie Sion.*

Concludit Psalmum, dicens: *Mihi adharere Deo bonum est*, id est, viderint alij quid eis bonum sit, mihi certe bonum est, vtile, iucundum, honorificum, adharere Deo: & quoniam adharere per amplexum in hac vita non datur, bonum mihi nunc est ponere in Domino Deo spem meam, id est, adharere per spem, & in spe perfectæ adhesionis interim gaudere. *Vt annunciem omnes predicationes tuas in portis filie Sion*, id est, vt per hanc adhesionem ad Deum, liberatus ab omni captiuitate terrena, totus occuper in laudibus eius, idq; in portis filie Sion, coram multitudine infidelium, vt multos erudiam, quam sit inane & noxium adharere in temporalibus bonis, & quam bonum adharere Deo, & ponere in Domino Deo spem suam. Illud, *omnes predicationes*, in Hebræo est, *omnia opera tua*: ex quo intelligimus sensum esse, vt annunciem prædicationem operum tuorum; siue, vt prædicem omnia opera iustitiæ & misericordiæ tuæ, vnde & tu lauderis, & populus erudiatur. Illud, *in portis filie Sion*, non est in Hebræo, proinde vel excidit, vt quædam alia, vel huc translatus est ex Psal. 9 v. 14. vbi habetur: *Vt annunciem omnes laudationes tuas in portis filie Sion.*

## P S A L M V S LXXIII.

*Titulus & Argumentum.*

*Intellectus Afaph.*

**I**N hoc Psalmo prædicatur & deploratur desolatio Hierosolyma: & ideo dicitur in Titulo, Intellectus, siue, vt alij vertunt, eruditio Afaph; vt admonerentur Iudæi, diligenter cogitare & intelligere, quæ in hoc Psalmo de ipsis dicuntur. Quæstio est inter expositores, an Psalmus intelligi debeat de persecutione Nabuchodonosor, an Antiochi, an Titi & Vespasiani, an Diocletiani & Maximiani, an Antichristi: nam his omnibus persecutionibus aliquo modo verba Psalmi applicari posse videntur. Sed verior sententia omnibus consideratis videtur eorum, qui hunc Psalmum exponunt de persecutione Antiochi illustris, de quo agitur in libris Machabæorum: alii enim aliorum sententia non videntur commode sustineri posse. Nam tempore captiuitatis Babylonica non deerant Propheta; & tamen hic dicitur: *Iam non est Propheta*. Tempore Diocletiani non fuit populus Christianus repulsus à Deo, & derelictus in finem; sed contra multis miraculis illustratus & propagatus: quod idem dici potest de tempore Antichristi; eminebit enim tunc Ecclesia in fortissimis Martyribus suis: hic autem dicitur: *Vt quid Deus repulisti in finem?* In tempus Titi & Vespasiani omnia conuenire videntur: nam tunc nulli amplius erant Propheta in Israël, & templum incensum fuit, & facta est desolatio, quæ durabit vsque in finem, & ideo hanc expositionem amplexi sunt S. Augustinus, Theodoretus & Euthymius. Sed verba huius Psalmi non conueniunt Iudæis perfidis, qui non erant oues pascuæ Dei, neque vere confitebantur Domino, sed erant inimici & rebelles; & tamen in hoc Psalmo dicitur: *Iratus est furor tuus super oues pascuæ tuæ. Et infra: Ne tradas bestiis animas confitentium tibi, & animas pauperum tuorum ne obliuiscaris in finem: neque Ecclesia frequentaret hunc Psalmum, si contineret voces infidelium Iudæorum; quare improbabili est expositio Theodoreti & Euthymij, qui verba Psalmi tribuunt populo Iudaico. S. autem Augustinus aliqua tribuit Apostolis, aliqua Iudæis, alia aliis. Itaque si quis uniformem explicationem velit, & liberum ab omni scrupulo, eligat sententiam, quæ totum Psalmum ad literam exponit de persecutione Antiochi.*



## EXPLICATIO PSALMI LXXIII.

**I.** **V**T quid Deus repulisti in finem? iratus est furor tuus super oves pascue tue.

Deplorat S. Propheta in persona populi Iudaici vniuersalem illam calamitatem, quæ totus populus Iudaicus miserrime oppressus fuit à Gentilibus sub Antiocho Rege, qui dictus est Epiphanes. *Vt quid, inquit, tu Deus repulisti, supple, populum, in finem*, id est, in æternum, & generaliter, quasi non amplius curaturus eum, aut pro populo tuo habiturus. *Iratus est furor tuus*, id est, accensus est furor tuus, *super oves pascue tue*, id est, contra populum tuum, quem singulari providentia regere solebas, vt pastor proprias oves pascit & regit. Illud, *repulisti in finem*, non significat reuera Deum, fixo decreto repulisse in æternum populum suum; sed populum dubitasse, ne forte reiectus esset in finem; & ideo lamentando dixisse: *Vt quid repulisti in finem*, id est, quare ita te geris, vt videaris repulisse in finem. Nam versu 20. cum dicitur in eodem Psalmo: *Animas pauperum tuorum ne obliuiscaris in finem*, satis apparet, non fuisse certum, an essent repellendi in finem. Illud autem, *iratus est furor tuus*, in Hebræo eleganti metaphorâ dicitur, *fumavit nasus tuus*, quam metaphoram recte explicauerunt LXX. Interpretes.

**III.** *Memor esto congregationis tue; quam possedisti ab initio.*

Cur idem populus Deum, vt non repellat in finem, adducens pro argumento, quod olim, id est, in egressu de Ægypto, ipse idem Deus populum Iudaicum congregauerit in formam populi, dâns ei magistratus & leges, & iudicia: quasi dicat; non videri bonum, vt Deus dispergat & abiiciat eum populum, quem ipse congregauit; & cui formam Reipublicæ tribuit. *Memor, inquit, esto congregationis tue*, id est, populi à te congregati, quem possedisti ab initio, id est, qui nullum habuit Regem & Dominum ante te, sed tu primus ab initio congregationis tuæ in v-

nam quasi Rempubl. eum possedisti, vt Rex & Dominus eius. Possset etiam illud, *ab initio*, referri ad Abraham, qui fuit pater Hebræorum: vel ad Seth, qui cœpit inuocare nomen Domini, & cuius filij dicebantur filij Dei ad distinctionem filiorum Cain, qui erant filij huius sæculi. Sed congregatio, siue Synagoga proprie initium habuit sub Moyse, vt dictum est.

*Redemisti virgam hereditatis tue, mons Sion, in quo habitasti in eo.*

Hoc est alterum argumentum, quo probatur, æquum esse, vt Deus non repellat populum suum: quia non solum primus congregauit & possedit eum, sed etiam in Regnum exaltauit, eiiciens Chananæos ex terra promissionis, & dâns eam populo suo. *Redemisti virgam hereditatis tue*, id est, acquisuisti bellando sceptrum Regni terræ promissionis, & propriè redemisti eiiciens iniustos possessores ab ea terra; quam promiseras Abraham & nepotibus eius, filiis Israël. Dicitur autem, *virga hereditatis Domini*; quia sceptrum illud, & Regnum terræ promissionis acquisiuit Deus pro hereditate sua, id est, pro populo suo peculiari, quem vt propriam hereditatem, possessionem & partem sibi vendicabat. Alij tamen volunt, hac parte versiculi, significari, redemptum fuisse populum à seruitute Ægyptiaca, & per virgam hereditatis suæ, intelligi sceptrum Regni in populum Iudaicum, quem Deus in hereditatem sibi elegerat. Non desunt, qui per *virgam hereditatis*, accipiant virgam dimensoriam, qua distinguebantur possessiones. Sed veteres, Augustinus, Theodoretus & Euthymius, per virgam, nihil aliud nisi sceptrum Regum intelligi voluerunt. Illud, *Mons Sion, in quo habitasti in eo*, potest referri tum ad virgam, tum ad hereditatem. Itaque sensus erit, *Mons Sion est virga, quam redemisti*, id est, *Mons Sion est Regnum*, siue caput Regni tui, in quo habitasti, vt Rex in Regia ciuitate sua. Vel, *Mons Sion est Regnum*, siue caput Regni tui, in quo habitasti, vt Rex in Regno. Prior sensus confit-



confirmatur ex Psal. 109. *Virgam virtutis tua emittet Dominus ex Sion*: posterior ex Psal. 2. *Ego autem constitutus sum Rex ab eo super Sion montem sanctum eius.*

ptuaginta expresse runt hunc sensum per admirationem: *Quanta malignatus est*, id est, quanta mala fecit inimicus in sancto! id est, in sanctuario.

IV.

*Leua manus tuas in superbias eorum in finem: quanta malignatus est inimicus in sancto!*

*Et gloriati sunt, qui oderunt te; in medio solemnitate tua.*

V.

Propter causas iam dictas orat populus Dei, vt Deus conuertat manum suam in hostes populi sui, & confundat superbiam eorum in perpetuum, vt non audeant ultra erigere se contra seruos Dei. Fuisse autem Regem Antiochum superbissimum, testatur liber primus Machabæorum cap. 1. *Et intravit*, inquit, *in sanctificationem cum superbia.* Et paulo post: *Et locutus est*, inquit, *cum superbia magna.* Quod attinet ad verba, S. Hieronymus ex Hebræo vertit: *Sublimitas pedum tuorum dissipata est usque ad finem.* Et sensus esse videtur, quod arca Dei, vel sanctuarium, in quo tanquam in scabello excelsi solij stabant pedes Dei, dissipatum fuerit ab inimicis; & verba Hebraica eum sensum ferre possunt. Sed recte etiam verterunt Septuaginta, vnde nostra lectio translata est. Nam vox, *harima*, significat *eleva*, & etiam *sublimitas*; vox, *peamecha*, significat *pedes tuos*, vel *pedum tuorum*. Septuaginta vero transtulerunt, *manus tuas*, magis ad sensum, quam ad verba respicientes. Et semper idem sensus est, siue dicamus, *Eleua pedes tuos*, & contere superbiam eorum; siue, *Eleua manum tuam*, & deprime superbiam eorum. Vox, *lema suoth*, si scribatur per *scin*, significat *ad dissipationes*, & sic legit S. Hieronymus; si scribatur per *sin*, significat *superbias* & *elevationes*, & sic legunt LXX. Interpretes. Sequitur: *Quanta malignatus est inimicus in sancto.* Vbi redditur ratio, cur iustum sit, vt Deus comprimat superbiam inimici, quoniam multa mala fecit in sanctuario Dei: quæ conueniunt aptissime Regi Antiocho, qui (vt legimus 1. Machab. 1.) spoliavit & profanauit sanctuarium Dei, quod hoc loco sanctum appellatur. In Hebræo est, *omne malum fecit inimicus in sanctuario.* Sed Se-

Ex hoc loco præcipue deducunt aliqui, Psalmum hunc esse intelligendum de Tito & Vespasiano; quoniam obsidere cœperunt Hierusalem in solemnitate paschali: sicut enim Iudæi Christum occiderunt in Paschate, sic & ipsi occisi sunt in Paschate. Sed hæc ratio non conuincit; tum quia non constat, de qua sollempnitate loquatur hoc loco Dauid, nam multe erant Iudæorum sollempnitates: tum quia vox Hebraica, *mohad*, non solum significat tempus sollempne, sed etiam locum sacrum, imo etiam pactum, vt S. Hieronymus vertit. Denique Titus & Vespasianus non oderunt Deum Iudæorum, quem non nouerant, sed oderunt Iudæos factiosos & rebelles, & sine dubio non euerterunt Hierusalem propter odium Dei, sed propter odium Iudæorum; quod idem dici potest de Rege Babylonis. Antiochus autem Deum Iudæorum oderat, & ceremonias legis, & conabatur omnes Iudæos peruertere, & inducere ad cultum Idolorum, vt legimus 1. Machab. 1. Itaque de Antiocho & militibus eius proprie dicitur: *Et gloriati sunt*, rugitu & fremitu plane barbaro, vt sonat vox Hebraica: *qui oderunt te*, id est, qui oderunt sacra tua, & ceremonias legis tuæ; idq; in medio solemnitate tua, id est, ingressi templum & sanctuarium tuum, dum sacra sollempnia peragerentur, ibi gloriati sunt, & fremuerunt (vt vertit S. Hieronymus) quasi victores capta præda.

מועד

*Posuerunt signa sua signa, & (non cognouerunt) sicut in exitu super summum.*

VI.

Clarius hæc omnia vertit S. Hieronymus. *Posuerunt*, inquit, *signa sua* in trophæum manifesta in introitu desuper, id est,

Fff 2

posue-

III.

הרימה  
פעמיד

למשואת

ש  
ש



posuerunt vexilla sua, quasi trophæa manifesta in suprema parte portarum vel turrium ciuitatis, vnde intratur in urbem. Illud, *non cognouerunt*, legendum est per parenthesesim, & in Hebræo caret particula negante, & positum est secundum formam participij, vt S. Hieronymus vertit. Sed LXX. Interpretes in libris suis Hebraicis inuenerunt negationem, & mutatis punctis, ac vna litera transposita, pro *inuadag*, legerunt *iadegu*, *cognouerunt*, & addita negatione, *non cognouerunt*. Significata autem, *non cognouerunt*, hostes Dei non cognouisse quid facerent, cum ciuitatem & templum Dei omnipotentis ita propharent. Illud autem, *quasi in exitu*, in Hebræo est, *in introitu*, sed exitus & introitus idem sunt; nam vnde intratur, inde etiam exitur. Aduerbium, *sicut*, non est in Hebræo, sed additum est ab Interpretibus declarandi causa: vere enim signa non sunt posita in exitu, siue in introitu, sed quasi in exitu, id est, quasi in portis ipsis, id est, in locis publicis & notissimis.

ידע  
ידע

VII.

*Quasi in sylua lignorum securibus exciderunt ianuas eius in idipsum, in securi & ascia deiecerunt eam.*

Pergit explicare malâ, quæ fecerunt hostes in Ierusalem, ac dicit, eos euertisse portas eius, *quasi in sylua lignorum* versarentur, *securibus exciderunt ianuas eius*, videlicet ciuitatis Hierusalem, *in idipsum*, id est, omnes simul, vno animo, vno conatu. *In securi & ascia deiecerunt eam*, videlicet ipsam Hierusalem. Id autem fecit Antiochus, qui deiecit portas & muros Hierusalem. Illud, *exciderunt*, in Hebræo est, *vear*, quod S. Hieronymus vertit, & *nunc*, LXX. Interpretes vterunt, *exciderunt*: sed nisi aliquid addatur vel mutetur, vox illa non significat, *exciderunt*, neque, & *nunc*. Itaque confitendum est, aliquid erroris esse in textu Hebraico, qui vitio librariorum irrepperit. Et quidem qui vertunt, & *nunc*, addant vnam literam, & faciant, *veatta*, & *nunc*. Qui vertendum existimant, *exciderunt*, cum LXX. Inter-

ועתה

pretibus, non conueniunt inter se; sed alij legunt *kathathu*, alij *patru*, alij aliter, quæ sunt valde diuersa ab illa voce, quæ est in textu Hebraico: proinde existimarem posse legi, *hauat*, transponendo solum primam litteram in secundum locum. Significat enim *hauat*, *inuertere*, siue *euertere* & *peruertere*: & sensus erit, *Quasi in sylua lignorum euerit, hostis videlicet, ianuas eius in idipsum, id est, simul & coniunctim.*

התרו  
כחו  
עזת

*Incenderunt igni sanctuarium tuum, in terra polluerunt tabernaculum nominis tui.*

VIII.

Hic vnicus locus videtur impedire, quominus Psalmus intelligatur de persecutione Antiochi, cui alioqui reliqua aptissime conueniunt. Sed meo iudicio hic locus non impedit: quamuis enim tempore Nabuchodonosor, & tempore Titi totum templum crematum & euersum fuerit, quod factum non est sub Antiocho: tamen tempore Antiochi portæ templi exustæ fuerunt: sic enim legimus 1. Machab. 4. *Et viderunt Machabæi sanctificationem desertam, & altare prophanatum, & portas exustas, & in atrijs virgulia nata sicut in saltu, vel in montibus, & pastophoria diruta.* Et paulo post loquens Scriptura de renouatione templi: *Dedicauerunt*, inquit, *portas, & imposuerunt ianuas.* Illud igitur, *Incenderunt igni sanctuarium*, potest intelligi de parte, non de toto; & videtur id satis aperte colligi ex sequentibus: nam si totum sanctuarium concremassent, non diceret Dauid in altera parte versiculi: *In terra polluerunt tabernaculum nominis tui*: quod enim crematum fuisset, pollui non potuisset. Incenderunt ergo portas, & ipsum templum seu tabernaculum polluerunt, ponentes in eo idolum abominationis, & sacrificantes idolis, vt dicitur 1. Machab. 1. Adde etiam, quod in Hebræo ad verbum dicitur: *Posuerunt ignem in sanctuarium*: quæ verba non significant totum sanctuarium fuisse exustum, sed aliquid eius: quid autem sanctuarij ex igne applicato consumptum fuerit, declarat.



claratur (vt diximus) 1. Machab. 4. vbi dicuntur portæ fuisse exustæ, & à Machabæis reparatæ. Ait igitur: *Incenderunt igni sanctuarium tuum*, id est, hostes nostri tempore Antiochi iniecerunt ignem in sanctuarium, & portis eius exustis polluerunt idem sanctuarium, quod est habitaculum nomini tuo dicatum: *polluerunt autem in terra*, id est, polluerunt sanctuarium, quod habes in terra: quia cœleste tabernaculum polluere non potuerunt. Aliqui existimant, polluere tabernaculum in terra, esse, deiicere tabernaculum in terram, id est, funditus destruere: sed neque S. Hieronymus ex Hebræo vertit, in terram, sed, in terra: & vox Hebræa, *chalal*, non significat deiicere, siue euertere, sed polluere & contaminare, vt Græci Latiniq; verterunt.

*Dixerunt in corde suo cognatio eorum simul, Quiescere faciamus omnes dies festos Dei à terra.*

Hæc proprie conuenire videntur Paganis, qui tempore Antiochi conati sunt totis viribus delere religionem veri Dei, vt patet ex lib. 1. Machab. 1. *Dixerunt*, inquit, *in corde suo*, id est, decreuerunt apud se tota natio Gentilium, qui Antiocho seruebant, dicentes: *Quiescere faciamus omnes dies festos Dei à terra*, id est, contaminemus sanctuarium, repleamus omnia idolis, tollamus omnia signa religionis, & hoc modo quiescent, id est, deficient & cessabunt omnes sollempnitates Dei in terra Israël. Quod attinet ad verba, S. Hieronymus in epist. ad Suniam & Fratellam testatur, se vertisse ex Græco, vt habet nostra editio: *Quiescere faciamus omnes dies festos Dei à terra*; quamuis non ignoraret in Hebræo esse, *Incenderunt omnes dies festos Dei à terra*; & in exemplis Origenis, versionem Septuaginta habere: *Incendamus omnes dies festos Dei à terra*; & monet has varias lectiones notandas fuisse ad marginem; sed antiquam lectionem non debuisse mutari. Itaque constat ex verbis S. Hieronymi, vnam lectionem Græcam fuisse, *καταπύσωμεν, quiescere faciamus*: aliam autem, *κατακαύ-*

*σωμεν, incendamus*: sed quoniam LXX. Interpretes per vocem Hebraicam, *moad*, non intellexerunt Synagogas, vt nunc recentiores intelligunt, sed dies festos topas; probabilissimum est, eos non vertisse, *incendamus* (vt sonat vox Hebraica) sed, *quiescere faciamus*; vt verbum conueniret eum nomine: non enim dies festi proprie incendi possunt, sed cessare & tolli possunt: ac per hoc LXX. Interpretes non reddiderunt verbum, sed sensum, explicantes metaphoram verbi Hebraici: neque improbable est, lectionem Græcam postea fuisse mutatam, vt cum voce Hebraica consentiret. At in exemplis erat, *incendamus*: & illa erat purissima lectio LXX. Interpretum. Respondeo, in exemplis vt plurimum fuisse lectionem purissimam: sed non est necesse, vt vbique esset purissima: certe Ecclesia antiqua, & moderna magis probauit aliam lectionem; & S. Hieronymus aperte dicit, se vertisse ex editione Septuaginta: *Quiescere faciamus*: & sic monet esse psallendum, vt Septuaginta transtulerunt.

*Signa nostra non vidimus, iam non est Propheta, & nos non cognoscet amplius.*

Ponit nunc verba populi fidelis in tanta afflictione: pene desperantis de auxilio Dei. Et proprie conueniunt hæc in tempora Antiochi, quando & miracula antiqua, & Prophetarum oracula defecerant, vt videretur Deus non amplius cognoscere populum suum, quod de Babylonica captiuitate dici non potest, cum eo tempore esset Hieremias in Hierusalem, & Daniel & Ezechiel in Babylone. Neque possum probare, quod aliqui dicunt, verba huius Psalmi, non dici à populo Iudaico, sed à Gentilibus: hæc enim est nimis dura expositio. At, inquires, Daniel. 3. dicunt tres pueri: *Et non est in tempore hoc Princeps, & Dux, & Propheta*: igitur in captiuitate etiam Babylonica, non erat Propheta, ac per hoc de illa captiuitate possunt intelligi hæc verba, *Iam non est Propheta*. Respondeo, antequam Hierusalem euerteretur à Nabuchodonosor, tempore Regis Ioachim, non fuisse in Babylone vllum Prophetam, & de illo



illo tempore & loco posse intelligi verba trium puerorum : sed eodem tempore erat in Hierusalem Hieremias Propheta, & post captam & euersam Hierusalem, toto tempore captiuitatis fuerunt in captiuitate Babylonica Daniel & Ezechiel Prophetae : Ezechiel enim cepit prophetare anno quinto captiuitatis Ioaehim Regis, qui fuit annus sextus ante euerfionem Hierosolymæ, & perseuerauit prophetare vsque ad vicefimum quintum captiuitatis, vt dicitur Ezech. 40. Daniel autem Propheta fuit in Babylone ab anno primo Nabuchodonosor, vsque ad annum primum Cyri, id est, toto tempore captiuitatis, vt dicitur Daniel. 1. & prophetare cepit adhuc adolescens: successerunt autem Danieli Aggeus & Zacharias Prophetae. Porro Psalmus præfens cum dicit: *Iam non est Propheta*, loquitur de tempore post Hierusalem vastatam, & templum prophanatum, ac per hoc non loquitur de captiuitate Babylonica, in qua nunquam defuerunt Prophetae post ciuitatem vastatam, & templum incensum: sed de persecutione Antiochi, quo tempore defecerunt omnino Prophetae.

populum suum, vt antea faciebat, & non excludat à sinu suo paterno filios suos. *Vt quid*, inquit, *auertis manum tuam*, sinistram videlicet, & *dexteram tuam de medio sinu tuo*, vt videlicet sinas nos cadere à sinu tuo, vel non complectaris in sinu tuo, *in finem*, id est, in perpetuum: qui enim complectitur aliquem, admouet vtramque manum ad sinum; qui reiecit, vel non vult complecti, manus à sinu remouet. Hæc mihi videtur literalis expositio. Alij existimant, auertere manum à sinu, significare, non velle bona, quæ sunt in sinu, communicare cum aliis, intelligentes per sinum Dei, thesaurum bonorum omnium, qui est apud Deum. Omitto aliam expositionem, quod auertere manum à sinu, sit manus post tergum conuerrere, in signum negantis auxilium. Pro, *in finem*, in Hebræo est, *calle*, quam vocem S. Hieronymus vertit, *consuetudo*: sed potest optime verti perfecte & absolute, quod est idem cum, *in finem*, præsertim si deducatur à verbo, *calal*, quod est perficere: vnde, *calla*, sponsa, quia perfecta omni decore & ornatu esse solet.

XI.

*Vsquequo Deus improperabit inimicus? irritat aduersarius nomen tuum in finem.*

Pergit populus Dei exorare Dei clementiam, vt memor populi sui conuertat iram in aduersarias, qui improperabant Deo infirmitatem, quasi non valeret saluare populum suum. Hæc videntur dici de Nicanore, qui superbe irridebat populum Dei, & irritabat nomen Domini, vt dicitur lib. 1. Machab. c. 7. Et de ipso Rege Antiocho, & Rege Demetrio, & Ducibus eorum inimicis Dei & populi sui, vt cognosci potest ex 1. & 2. lib. Machabæorum.

XII.

*Vt quid auertis manum tuam, & dexteram tuam de medio sinu tuo in finem?*

Orauerat populus Deum, vt irasceretur in hostes suos: nunc orat, vt complectatur

Deus autem Rex noster ante sæcula, operatus est salutem in medio terræ.

Communis expositio literalis est, in hoc versu, & quinque sequentibus explicari potentiam, quam olim Deus ostendit tum in liberatione filiorum Israël de Ægypto, tum in creatione mundi; vt ostendat, posse Deum, si velit, liberare eosdem filios Israël à præsentī calamitate. Deus, inquit, *Rex noster ante sæcula*, id est, Deus Rex noster, qui est ante sæcula Deus, *operatus est salutem*, Iudæorum videlicet, *in medio terræ*, id est, in terra promissionis, in quam eos introduxit, ex captiuitate Pharaonica. Illud, *ante sæcula*, coniungit quidam auctor cum verbo, *operatus est salutem*: sed repugnant omnes codices Hebræi, Græci & Latini. Omnes enim distinctionem ponunt post vocem, *sæcula*: neque intelligi potest, quomodo Deus ante sæcula operatus sit salutem in medio terræ, cum terra non fuerit ante sæcula: neq; testimonium, quod ille adducit ex Isaia, pro ipso facit: aliud enim



enim est à *saeculo*, quod habetur in Isaia, aliud *ante saecula*, quod hic habetur. Multo aptius S. Augustinus coniungit cum voce, *Deus*, ut sensus sit, Rex noster, qui est ante saecula Deus. Illud, *in medio terræ*, exponunt nonnulli, publice & palam, quod non improbo. Sed etiam verum est, Palaestinam esse in medio terræ olim notæ & habitabilis: nam est in finibus Asiæ, Africæ & Europæ; ut vere dici possit, esse in medio Asiæ, Africæ & Europæ. Vnde etiam opus Redemptionis operatus est Saluator noster in medio terræ, ut commodissime deferretur eius prædicatio ad omnes tres partes orbis terrarum.

*Tu confirmasti in virtute tua mare, contribulasti capita draconum in aquis.*

Explicat, quomodo Deus operatus sit salutem Iudæorum, & ait: *Tu Deus confirmasti mare in virtute tua*, id est, potentia tua fecisti, ut mare rubrum firmissime quasi murus confisteret, dum transirent per medium eius diuina virtute siccatum filij Israël. Et eadem potentia obruisti in aquis eiusdem maris, ad locum suum reuocatis, capita Ægyptiorum, qui instar draconum filios Israël insequabantur. In Hebræo habetur: *Dissipasti, siue rupisti, & diuisti in virtute tua mare*: sed LXX. Interpretes docere voluerunt, mare rubrum ita diuisum & disruptum fuisse, ut firmissime diuisum maneret, dum transiret populus Dei, quasi dicerent: *Tu diuisum mare confirmasti*. Illud, *contribulasti*, est in Hebræo, *contrinisti*, siue confregisti: sed LXX. Interpretes explicauerunt metaphoram; qui enim suffocantur in aquis, non proprie pereunt ex contritione capitis; quod ergo Hebræice dictum est: *Contrinisti capita draconum*, id est, interemisti draconem. Septuaginta dixerunt: *Contribulasti capita draconum*, id est, mortifera tribulatione affecisti capita draconum.

*Tu confregisti capita draconis, dedisti eum escam populo Æthiopum.*

Hunc versum proprie ad Pharaonem referunt fere omnes expostores: nam in Hebræo non est idem nomen draconis in hoc

versu & in superiore. In hoc enim versulo est, *Leuiatan*, qui draco maximus, & princeps draconum marinorum est. Illud autem, *dedisti eum escam populo Æthiopum*, significat secundum aliquos, Regnum Ægypti post submersionem Pharaonis datum fuisse in prædam Æthiopibus: secundum alios, ipsum Pharaonem, & capita eius, id est, Principes eius mortuos, & ad littus eiectos, fuisse spoliatos ab Arabibus, qui in Scriptura Æthiopes dicuntur. Denique secundum alios, ipsum Pharaonem mortuum, & in littore expositum, factum esse escam coruis, qui à nigro dicuntur populi Æthiopum. Non multum refert, quid proprie his verbis significetur, dum constat, explicari poenam de Pharaone sumptam.

*Tu dirupisti fontes & torrentes, tu siccasti fluuios Echan.*

Hic iam describitur potentia Dei, qua paulo post in deserto ex petra excitauit fontem, & riuum aquæ instar fluminis: & deinde siccauit Iordanem, ut populus transiret in terram sibi promissam. *Tu dirupisti fontes*, id est, dirupta petra fecisti scaturire fontes, & *torrentes*. *Tu siccasti fluuios Echan*, id est, siccasti flumen Iordanis, quod flumen maximum est. *Echan* enim, fortem significat, vnde S. Hieronymus vertit, *flumina fortia*. Sed Interpretes ceteri relinquere maluerunt ipsam vocem Hebraicam non interpretatam.

*Tuus est dies, & tua est nox: tu fabricatus es Auroram & Solem.*

Transit ad potentiam, quam Deus in creaturae monstrauit: & quoniam creatio in summa complectitur duas partes principales, cælum & terram, iuxta illud: *In principio creauit Deus cælum & terram*: de his duabus partibus tantum loquitur. *Tuus, inquit, est dies, & tua est nox*; & reddens rationem, addit: *in fabricatus es Auroram & Solem*, id est, tu fecisti initio lucem similem Auroræ, deinde quarto die fecisti Solem, ut distingueret dies & noctes. In Hebræo non est nomen Auroræ, sed nomen Iumidis, siue

XIV.

XVI.

XVII.

XVII.

XV.



siue lucis, vt etiam in Græco textu. Et quidem multi per lumen hoc, intelligunt Lunam, vt sensus sit, Tu fecisti Lunam & Solem: & quoniam hic videbatur inuersus ordo, correxerunt aliqui, & fecerunt, Solem & Lunam, & sic legit S. Augustinus; sed Interpres noster rectissime vertit, *Auroram & Solem*: quoniam explicare voluit, lucem, quam Deus initio creauit, non fuisse Solis, neque Lunæ, sed simplicem lucem, quæ præcedebat Solis creationem, quasi quædam aurora mundi.

XVIII.

*Tu fecisti omnes terminos terra, æstatem & ver tu plasmasisti ea.*

Attingit creationem cæli, mentione facta lucis & Solis; nunc attingit creationem terræ, dicens: *Tu fecisti omnes terminos terra*, id est, tu fecisti totam terram vsque ad omnes eius vltimos fines, id est, ab ortu ad occidentum, ab Aquilone ad Austrum. *Æstatem & Ver tu plasmasisti*, id est, tu fecisti vicissitudines temporum, in quibus terra nunc fructus concipit, nunc parit: nam in fine æstatis, id est, in Septembri in terra promissionis reconduntur omnes fructus: & tunc incipit terra iterum concipere, & præparare se ad nouum partum: & initio Veris iterum incipit parere flores, ac deinde fructus. S. Hieronymus vertit: *Æstatem & hyemem tu plasmasisti*: & vere vox Hebraica, *choreph*, Hyemem significat, vt perspicuum est ex c. 8. v. 22. Geneseos. Et ideo existimamus hic accipiendam esse æstatem, pro fine æstatis, quo terra deposito onere iterum concipere incipit: & Ver pro fine hyemis, siue initio Veris, quando flores apparere incipiunt.

XIX.

*Memor esto huius, inimicus impropertuit Domino: & populus insipiens incitauit nomen tuum.*

Explicata potentia Dei, redit ad orationem, ac precatur, vt Deus dignetur recordari, quemadmodum inimicus blasphemaue-rit Deum, quasi impotentem & infirmum. Videntur autem verba huius versiculi & cæterorum vsque in finem alludere ad super-

biam Antiochi, de qua dicitur lib. 1. Mach. c. 1. *Et locus est cum superbia magna*. Et li. 2. c. 5. cum dixisset Scriptura, Antiochum indigne contraxisse sacra vasa, & templum diripuisse, addit: *Igitur Antiochus mille & octingentis ablati à templo talentis, velociter Antiochiam reuersus est, existimans se præ superbia terram ad nauigandum, pelagus vero ad iter agendum deducturum propter mentis elationem*. Ait igitur Psalmista: *Memor esto huius*, id est, recordare Domine huius rei, quam dicturus sum. *Inimicus impropertuit Domino*, id est, hostis noster impropertuit tibi Domino impotentiam: & *populus eius insipiens incitauit blasphemando nomen tuum*.

*Ne tradas bestiis animas confitentes tibi, & animas pauperum tuorum ne obliuiscaris in finem.*

Hinc etiam cognosci potest, hunc Psalmum scriptum esse magis contra Antiochum, quam contra Nabuchodonosor, vel Titum aut Vespasianum: siquidem tempore Antiochi sæpe fuerunt in maximo periculo Iudæi, ne omnino in manus eius deuenirent, & vel occiderentur omnes, vel captiui abducerentur; & ideo orabant, vt non traderentur bestiis deuorandi, id est, Antiocho & militibus eius penitus destruendi; sicut reuera nunquam fuerunt vniuersaliter ab Antiocho subiugati. At Nabuchodonosor, & Titus & Vespasianus vniuersaliter Iudæos oppresserunt, partim occidendo, partim captiuos abducendo. *Ne tradas, inquit, bestiis*, id est, hominibus insipientibus & crudelibus more ferarum, *animas confitentes tibi*, id est, homines qui te colunt, & confitentur laudes tuas: & easdem *animas pauperum tuorum ne obliuiscaris in finem*, id est, ne obliuiscaris defendere & liberare animas pauperum tuorum, qui ad ianuam misericordiae tuæ panem mendicant. In Hebræo, pro, *confitentes tibi*, nunc est, *thoreca*, quod S. Hieronymus vertit, *Eruditos in lege tua*, alij, *Turturis tuae*: sed LXX. Interpretes non legerunt, *thoreca*, sed *thodecha*, fuit autem facillimum librariis, ob similitudinem literarum, *res*, & *daleth*.

scilicet



scribere, *thoreca*. pro, *thodecha*: neque est causa, cur antepo namus textum, quem nunc habemus, textui, quem habuerunt LXX. Interpretes; neque est in sensu diuersitas: nam per turturem posset intelligi populus Dei gemens, & confitens Deo tribulationem suam.

*Respice in testamentum tuum, quia repleti sunt qui obscurati sunt terra domibus iniquitatum.*

Adducit duo alia argumenta ad placandum Deum, vnum ex parte fœderis initi cum Patribus, alterum ex iniquitate aduersariorum; qui cum essent homines vilissimi, obtinebant iniuste palatia ipsorum. *Respice, inquit, in testamentum tuum*, si non vis nos respicere, saltem respice pactum, siue testamentum, quod fecisti cum Patribus nostris, vt esses nobis in Deum, nosq; protegeres atque defenderes in terra, quam nobis dedisti. Quoniam *qui obscurati sunt terra*, id est, qui obscuri sunt in terra, viles & barbari homines, *repleti sunt domibus iniquitatum*, id est, abundantiam domibus, siue palatiis inique nobis ereptis. Illud, *obscurati terra*, obscurum est, & ideo variis modis exponitur, sed res non est magni momenti, & facile est, vt Latinus Interpres dixerit, *obscurati*, pro, *obscuri*. Obscuri autem terræ, ij dicuntur, qui non sunt vilius nominis in terra. Illud autem, *domibus*, in Hebræo non est, *domibus*, sed *habitationibus desiderabilibus*, & pulchris, qualia sunt egregia palatia.

*Ne auertatur humilis factus confusus: pauper & inops laudabunt nomen tuum.*

Pergit in oratione, ac petit, ne humilis populus cogatur reuerti ab orando Deo confusus, si non impetrauerit, quod postulat: & rationem reddit, cur non debeat dimitti confusus, quoniam ipse est, qui laudare solet nomen Domini. *Ne auertatur*, quasi à te repulsus & reiectus, *humilis factus confusus*, id est, ne auertatur confusus is, qui se humiliat coram te. Illud enim, *factus*, coniungitur cum voce, *humilis*; vnica enim vox est tum in Hebræo, tum in Græco, pro eo quod nos habemus,

*humilis factus*. *Pauper & inops laudabunt nomen tuum*, id est, ne dimittas humilem confusum, quoniam humilis, qualis est pauper, inops laudabunt nomen tuum, quod à diuitibus & superbis despicitur.

*Exurge Deus, iudica causam tuam; memor esto improperiorum tuorum, eorum quæ ab insipiente sunt tota die.*

Addit aliam rationem, quoniam causa populi, est causa Dei; quoniam improperia, quæ dicuntur ab inimicis, in ipsum Deum recidunt. *Exurge, inquit, Deus, iudica causam tuam*, id est, defende causam tuam: nam in Hebræo est ad verbum, *litiga litem tuam*, hoc est, sis tu patronus causæ tuæ. *Memor esto improperiorum tuorum, quæ ab insipiente sunt tota die*, id est, quæ iugiter in te iactantur ab insipientibus populis, inimicis tuis. Illud, *iudica causam tuam*, quamuis ad literam ex Hebræo significet, *litiga litem tuam*, tamen quia Deus non potest litigare, nisi apud tribunal iustitiæ suæ, cum non habeat superiorem, ideo ad ipsum pertinet iudicare, id est, iudicium ferre de lite, quam habet cum iniquis: proinde recte versio Septuaginta & vulgatæ editionis habet, *iudica causam tuam*. S. Augustinus legit, *iudica causam meam*: sed nescio quid secutus sit: nam Hebræus & Græcus codex habet secundam personam, & sic inuenitur in Latinis libris.

*Ne obliuiscaris voces inimicorum tuorum: superbia eorum qui te oderunt, ascendit semper.*

Concludit rogans Deum, vt non obliuiscatur punire hostes suos, quia illi non obliuiscuntur peccare. *Ne obliuiscaris, inquit, voces inimicorum tuorum*, id est, ne impunitas dimittas blasphemias inimicorum tuorum: quoniam *superbia eorum, qui te oderunt, ascendit semper*, id est, superbiæ voces inimicorum tuorum, nunquam cessant, sed iugiter ascendunt à linguis eorum tanquam scintillæ à fornace maligni cordis eorum. Illud, *inimicorum*, in Græcis libris est, *seruorum*, siue



*Supplicum tuorum*; & sic etiam legit S. Augustinus. Sed in Hebræo est, *inimicorum*, & sic etiam vertisse LXX. Interpretes, testatur S. Hieronymus in epist. ad Suniam & Fretellam: proinde necesse est in textibus Græcis irrepsisse errorem, & positum esse ἐχθρῶν, pro ἰχθρῶν. Illud, *superbia eorum*, in Hebræo est, *sonitus*, siue *tumultus insurgentium in te*. Ex quo intelligimus, per superbiam hoc loco accipiendam esse vocem superbam & elatam, ut diximus.

## PSALMVS LXXIV.

### Titulus & Argumentum.

In finem, ne corrumpas, Psalmus cantici Asaph.

**O**Mnes partes huius tituli sunt alibi explicatae; si tamen plane explicari possunt. Tanta est enim titularum obscuritas, ut diuinatore opus sit potius, quam explicatore. Argumentum est admonitio ad humanum genus ut iuste viuant omnes, & superbia tumorem deponant, quoniam imminet iudicium Dei severissimum atque iustissimum. Videtur autem Psalmus compositus per modum dialogismi; quamuis non indicetur mutatio personarum, nisi per ipsa verba, qua nunc populi iustorum, nunc Propheta, nunc Dei esse ipsa se produnt.

### EXPLICATIO PSALMI LXXIV.

- I. **C**onfitebimur tibi Deus: confitebimur. & inuocabimus nomen tuum.  
II. Narrabimus mirabilia tua, cum accipero tempus, ego iustitias iudicabo.

Vox est populi electi, qui ex notitia Dei, quam habet præ cæteris hominibus, dicit, suum officium esse laudare, orare, & prædicare Deum. Confitebimur, inquit, tibi, id est, laudabimus te; confitebimur & inuocabimus nomen tuum, id est, non solum laudabimus in hac vita, sed etiam inuocabimus: pura e-

nim laudatio non est vitæ præsentis, sed futuræ. Narrabimus mirabilia tua, id est, non solum laudabimus in corde nostro, & orabimus, sed etiam prædicabimus aliis omnibus mirabilia opera tua, ut etiam cæteri discant timere & amare te. Quod attinet ad verba, non levis difficultas est. Nam in Hebræo pro inuocabimus nomen tuum, legitur ad verbum & propinquum nomen tuum. Verisimile est Septuaginta legisse, *vecaro besmach*, & inuocare in nomine tuo: non autem, ut nunc habetur, *vecarob scemecha*, & propinquum nomen tuum. Facile enim fuit librariis coniungere literam primam vocabuli sequentis cum vltima præcedentis. Cum accipero tempus, ego iustitias iudicabo. Hæc est pars versiculi secundi, & continet verba Dei summi Iudicis, qui approbans verba iustorum, promittit suo tempore, se redditurum illis præmium, ut etiam impiis non contentibus, nec inuocantibus, poenam. Cum, inquit, accipero tempus, id est, cum venerit hora ab æternitate determinata iudicii mei, tunc ego iustitias iudicabo, id est, iustissime, siue rectissime iudicabo. Diem iudicii, ut etiam horam, esse certo definita, docet Apostolus Act. 17. Nunc, inquit, annunciat hominibus, ut omnes ubique poenitentiam agant; eo quod statuit diem, in quo iudicaturus est orbem in aequitate in viro, quem statuit, fidem præbens omnibus, suscitans eum à morte: docet S. Ioannes in Apocalypsi c. 14. Time Deum, & date illi honorem, quia venit hora iudicii eius. Magnæ gratiæ, ut inquit S. Augustinus, agendæ sunt Deo, quod non statim post peccatum iudicat, sed expectat homines ad poenitentiam, interim exhortari & inuitare non cessans multis & variis modis, donec statuta dies & hora adueniat. Illud, iustitias iudicabo, non significat, Deum iudicaturum opera iusta, ut aliqui existimant, sed Deum recte iudicaturum: nam eadem vox Hebræa, *mescharim*, habetur in Psalmo 57. Si vere utique iustitiam loquimini, recta iudicate filij hominum. Quod hic dixit, iustitias, ibi dixit, recta, & sicut ibi sensus est, Iustam sententiam proferre; ita hic sensus est, Iustam sententiam proferam.

Lique-



*Liquefacta est terra, & omnes qui habitant in ea: ego confirmaui columnas eius.*

Iterum loquitur populus iustorum dicens: Si iuste iudicabis, Domine, quis sustinebit? nam *liquefacta est terra*, id est, defluxit, corrupta est, dissipata est propter iniquitates habitantium in ea, & omnes habitantes in ea deflexerunt & corrupti sunt, non est qui faciat bonum, non est usque ad unum. Respondet Dominus: *Ego confirmaui columnas eius*. Quasi dicat, non omnis terra omnino corrupta est; nam ego confirmaui columnas eius, viros perfectos, ob quos terra consistit: semper enim habuit Deus seruos suos electos & perfectos. Nam Genes. 6. ubi dicitur, *terra corrupta ob iniquitatem inhabitantium*, ibi dicitur, *Noë vir iustus atque perfectus*.

*Dixi iniquis, nolite inique agere; & delinquentibus, nolite exaltare cornu.*

*Nolite extollere in altum cornu vestrum, nolite loqui aduersus Deum iniquitatem.*

Nunc iam loquitur Propheta, vt vnus de numero iustorum, & admonet iniquos, vt desinant ab iniquitate, cum adhuc spes remaneat salutis, & propterea differatur iudicium, vt locus sit penitentiae. *Dixi, inquit, iniquis, nolite inique agere*, id est, nolite persenerare in iniquitate. Verba Hebraica possent etiam verti: *Dixi stultis, nolite stultescere*: sed quamquam interpretatio LXX. Seniorum optima est, quam etiam in sua versione secutus est S. Hieronymus, ramen vtraque vera est. Omnes enim iniqui stulti sunt, cum errent à vero itinere, & ridentes ac ludentes ruant in præcipitium. Addit Propheta: *Et delinquentibus, nolite exaltare cornu*, id est, dixi delinquentibus, nolite gloriari in iniquitate, nolite superbe defendere peccata vestra. Cornu enim superbiam significat, & illi longius à salute recedunt, qui non solum peccant, sed etiam gloriantur, cum malefecerint, & laudari volunt in sceleribus suis. *Nolite extollere in altum cornu vestrum*, id est, nolite in pro-

fundo malorum tam alte descendere, vt etiam Deum contemnatis, & in ipsum Deum verba blasphemiae euomatis. Vox Hebraea vt nunc legitur, non habet, *aduersus Deum*, sed, vt S. Hieronymus vertit, *in ceruice veteri*, vel, vt alij legunt, *collo duro*. Sed Septuaginta non videntur legisse, *bet sauar*, sed, *bet sur*: quod est vnum ex nominibus Dei, & proprie significat *petram*, quia Deus fortissimus est: & per vocem, *hathac*, quæ significat *durum*, non intellexerunt Septuaginta *collum durum*, sed *verba dura & iniqua*, & ideo verterunt: *Nolite loqui aduersus petram verba dura & iniqua*, id est, aduersus Deum fortissimum verba dura, id est, iniqua, quales sunt blasphemiae. Et sane eleganter alludit Propheta à verbis duris ad petram duram; quasi dicat, *Nolite contendere verbis duris cum Deo, qui est petra durissima, quia petra conteret vos, & verba vestra inania esse monstrabit.*

*Quia neque ab Oriente, neque ab Occidente, neque à desertis montibus; quoniam Deus Iudex est.*

Reddit rationem, cur non oporteat aduersus Deum loqui iniquitatem; quia videlicet ab illius iudicio nusquam erit effugium: non enim ab Oriente iudicabit, vt possis fugere in Occidentem; neque ab Occidente, vt possis latere in Oriente: neque à desertis montibus, vt abscondas te in aliqua valle inter arborum ramos. Iste enim *Iudex Deus est*, qui vbique est, & nullo excluditur loco, cum nulum occupet locum. Ira S. Augustinus. Alij exponunt, quia neque ab Oriente expectandum est auxilium, neque ab Occidente, neque à desertis montium, quia *Deus Iudex est*, cui nemo resistere potest.

*Hunc humiliat, & hunc exaltat: quia calix in manu Domini vini meri plenus misto.*

*Et inclinauit ex hoc in hoc: verumtamen sax eius non est exinanita: bibent omnes peccatores terra.*

Ggg

Dixe-

כצואר  
כצור  
התק

VI.

VII.

VIII.



Dixerat non esse effugium à iudicio Dei, nunc declarat, dicens: *Hunc humiliat*, superbum videlicet, & *hunc exaltat*, scilicet humilem. *Quia calix in manu Domini vini meri*, id est, quia in potestate Dei est iustitia vindicatiua, quæ dum peccatores superbos punit, simul exaltat & consolatur iustos humiles, quos ab oppressione impiorum liberat. Porro, calix vini meri, dicitur iustitia vindicatiua in Scripturis passim, vt Isaiæ 51. Hieremiæ 25. Threnorum 4. Ezechielis 23. Apocalypsis 14. & alibi. Ratio huius metaphora est, quoniam vinum merum epotum debilitat adeo totum hominem, vt nec sciat, nec possit se iuuare: ebrius enim amittit iudicium, tremit, cadit, soporatur. Qui punitur ab homine, sæpe remedium habet, vel fauoris, vel fugæ, vel violentiæ: qui autem punitur à Deo, tanquam multo vino mero inebriatus repente cadit, & omni prorsus remedio caret. Addit Propheta: *plenus misto*, id est, plenus est calix Domini non simplici vino vnius generis, sed mistione variorum generum vini meri, qua mistione non temperatur vinum, sed fortius redditur. Id significat, iustitiam Dei vindicatiuam abundare multitudine & varietate poenarum. *Ignis, & sulphur, & spiritus procellarum pars calicis eorum*, Ps. 10. Aliqui dicunt, vinum calicis Dei dici mistum, quia turbidum, aut sæculentum. Alij mistum interpretantur, *infusum*, quia miscere vinum, aliquando significat, infundere. Alij fingunt duos calices, vnum plenum mero, alium plenum misto. Sed quod nos diximus, probabilius videtur, & plures habet auctores. *Et inclinauit ex hoc in hoc*, id est, iam Deus propinauit multis hunc calicem iræ suæ, inclinauit calicem ex hoc ore in hoc, os transtulit ad varias gentes, punituit Sodomitas, Chaldaeos, & gyptios, & alios. *Veruntamen fax eius non est exinanita*, id est, adhuc remanet grauissima pars iustitiæ vindicatiuæ, quæ seruetur in diem vltimi iudicij: & tunc ex ea *bibent omnes peccatores terræ*. Tunc enim non erit amplius locus misericordiæ, sed omnes, qui peccatores in illa die inuenientur, cogentur bibere fæces calicis iræ Domini.

Ego autem annuntiabo in sæculum  
cantabo Deo Iacob.

Vox hæc Propheta est, qui descripto iudicio Dei, & supplicio impiorum, pollicetur se annuntiaturum laudes Dei in æternum Illi, inquit, bibent calicem iræ Dei, ego autem liberatus per gratiam Dei, *annuntiabo in sæculum*, deinde declarans, quomodo annuntiabit, *cantabo*, inquit, *Deo Iacob*: hæc erit annuntiatio mea, hymnus laudis, & gratiarum actionis Deo Iacob, quem in æternum cantabo.

Et omnia cornua peccatorum confringam, & exaltabuntur cornua iusti.

Hæc vero Dei vox est, qui subiungit, & concludit Psalmum, dicens: *Et ego confringam omnia cornua peccatorum*, omnem superbiam, omnem gloriam, omnem potentiam. *Et exaltabuntur cornua iusti*, & faciam, vt exaltetur gloria & potentia iusti cuiuscunque, sed præcipue Christi, qui sic fuit eminenter iustus, vt multos iustificauerit; vt dicitur Isaiæ 52. *Iustificabit ipse iustos seruus meus multos*. Posset hic versiculus coniungi cum superiore, ita vt Propheta intelligatur vtrumque dicere: *Annuntiabo in sæculum, & omnia cornua peccatorum confringam*. Dicitur enim confringere cornua peccatorum non solum, qui re ipsa peccatores humiliat, sed etiam qui denunciat peccatores humiliandos esse, ad quem modum dicitur Hieremias *constitutus super gentes & regna, vt destruat & euellat, ædificet & plantet*, Hier. 1. Videtur tamen prior expositio magis accommodata huic Psalmo, qui secundum formam dialogismi compositus est, vt S. Hieronymus in Commentario docet.

P. S. A. L. M. V. S. LXXV.

Titulus & Argumentum.

In finem; in laudibus Psalmus Asaph,  
canticum ad Assyrios.

Pro-



**P**ropter ultima verba Tituli canticum ad Assyrios, quæ non sunt in codice Hebraico, existimant Theodoretus, Euthymius, & multi recentiores in hoc Psalmo prædici victoriâ, quam obtinuit Ezechias de Sennacherib Rege Assyriorum. Sed non dubiū est, altiore sensu prædici victoriâ electorum Dei aduersus omnes hostes tum visibiles, tum inuisibiles.

EXPLICAT. PSAL. LXXV.

**N**otus in Iudæa Deus, in Israel magnum nomen eius.

Propter hæc verba valde superbiunt carnales Iudæi, sed frustra. Notus enim erat Deus in Iudæa terrena, quando in ea degebant Prophetæ, & populus Prophetis acquiescens: & pari ratione in Israel secundum carnem magnum erat nomen Dei, quando populus Israel non solum carne, sed etiam corde circumcidebatur: sed posteaquam Dei filiū, quem omnes Prophetæ annunciauerant, negauerunt, & eius populus esse desierunt, non est amplius in Iudæa terrena notus Deus, neque in Israel secundum carnem, magnum est nomen eius. Quia tamen hic Psalmus in titulo habet, in finem, & ideo respicit Christum, qui est finis legis; & vsq; in finem mundi canendus est: nunc etiam verum est, & semper erit verum, quod hic dicitur, Notus in Iudæa Deus, in Israel magnum nomen eius. Sed per Iudæam Ecclesia accipienda est, in qua sunt veri Iudæi, circumcisi corde, non carne de quibus Apostolus ad Rom. 2. Non qui in manifesto Iudæus est, neque, qui in manifesto in carne est circumcisio: sed qui in abscondito Iudæus est, & circumcisio cordis in spiritu, non litera. Et cap. 9. Non omnes, qui ex Israel, hi sunt Israelitæ, &c. In Ecclesia igitur Christiana notus Deus est, & in populo Christiano magnum est nomen eius: maior enim sapientia est in paruulis Christianis callentibus breuissimum Catechismum, quam olim fuerit in Philosophis Gentium, vel in magistris in Israel. Sed præcipue notus Deus est viris perfectis in Ecclesia Dei, qui totos se contemplationi rerum diuina-

rum dediderunt, & ex contemplatione in confessionem diuinæ magnitudinis toto corde erumpunt. Iudæa enim confessionem significat.

*Et factus est in pace locus eius, & habitatio eius in Sion.*

Ad literam redditur ratio cur in Iudæa potius, quam in alijs locis olim Deus notus esset: quia videlicet Ierusalem; quasi Regiâ suam, & Sion, quasi arcem sibi Deus elegerat. Et factus est, inquit, in pace locus eius, id est, Deus elegit sibi locum peculiare, in quo tabernaculum suum collocaret, in ciuitate Salem, quæ pacem significat. Et habitatio eius in Sion, id est, elegit sibi habitationem in Sion; quæ est pars altissima, & nobilissima, ciuitatis Ierusalem. In Hebræo pro, in pace: habetur, in Salem, quod est nomen ciuitatis Ierosolymæ; sed Septuaginta interpretati sunt nomen, & ideo verterunt, in pace: nam, ut dicitur ad Hebr. 7. Rex Salem, est Rex pacis. Itaque hoc loco ad literam, in pace, non significat virtutem, sed ciuitatem: quod satis facile intelligitur ex verbis sequentibus. Et habitatio eius in Sion. Sed altiore sensu significatur, ideo Deum notum esse viris perfectis, quia Deus præcipue habitat in mentibus pacem habentium, & contemplantium: nam ut Salem significat pacem, ita Sion speculam. Et nisi quis per mortificationem carnis pacem habeat ad Deum, ad proximum, & ad seipsum: non facile per contemplationem transcendit res omnes creatas; & vni Deo coniungitur.

*Ibi confregit potentias arcuum, scutum gladium, & bellum.*

Hic iam describit victoriâ aduersus Assyrios, de quibus in titulo Psalmi. Historia huius victoriæ habetur libr. 4. Reg. 19. Vbi Deus liberauit Hierusalem ab obfidione Regis Sennacherib sine vlla pugna Iudæorum. Angelus enim Domini vna nocte occidit octoginta quinque millia Assyriorum, & eo modo confregit Deus potentias arcuum, id est, sagittas, quas Assyrij parauerant, ut iacerent in Hebræos, & scutum

Ggg 3. quod



quod parauerant, vt se defenderent ab Hebræis, & gladium, quem exacuerant, vt cominus pugnarent aduersus eos, aduersus quos sagittis eminus pugnassent; denique bellum totum confregit, id est, auertit ab vrbe Ierusalem. In Hebræo pro vocibus potentias arcuum habetur, *rispe cheseth*, quæ voces proprie significant carbones arcuum, id est, iacula ignita arcuum; sed Septuaginta verterunt, *Potentias arcuum*, quia potentia arcus in sagittis eiaculandis consistit. Altiore sensu per iacula ignita, & gladios, significantur tentationes dæmonum, & persecutiones hominum. Persecta intelliguntur prætextus varij, quibus se tegunt hostes nostri spirituales, cum nos oppugnant: sed in animis perfectorum seruatorum suorum Deus victorias maximas obtinet, vt perspicuum est ex historijs sanctorum Martyrum, & perfectorum Monachorum.

## IV.

*Illuminans tu mirabiliter à montibus æternis; turbati sunt omnes insipientes corde.*

Ostendit Propheta, vnde potissimum orta sit victoria Hebræorum aduersus Assyrios; id autem facit per apostrophem ad Deum, *illuminans*, inquit, *tu mirabiliter à montibus æternis*, id est, confregit Dominus in Ierusalem arma offensiuæ, & defensiuæ Assyriorum: ille autem Dominus tu es, qui hæc fecisti, dum ex cælis tanquam æternis quibusdam montibus tuis, ac veluti altissima specula, & arce tua, mirabiliter, fulgurasti, & Angelum tuum tanquam cæleste fulmen misisti in exercitum Assyriorum. Vnde turbati sunt omnes illi milites Sennacherib, tanquam amisso iudicio obtenebrati, & præ stupore mentis *insipientes corde* effecti. Quod ad verba attinet, in Hebræo pro voce, *æternis*, est, *tereph*, quæ prædam significat, vel ad captiuitatem, non æternitatem. Sed omnino necessarium est, vt Septuaginta Interpretes aliquid aliud legerint: neque enim fieri potest, vt viri doctissimi, & vtriusque linguæ peritissimi verterent, à montibus æternis, vel Græcè ἀνὰ ἐπὶ τῶν ἀμείνων, si legissent, me-

habere *tereph*. Itaque suspicor eos legisse, *terem*, non *tereph*, significat autem, *terem*, ante vel, *antequam*, siue *priusquam*: & fieri potest, vt non solum sit aduerbium, sed etiam nomen, & significet, antiquitatem, vel antiquum: quomodo, *chedem*, significat, ante, & significat etiam antiqua, vt patet ex Psalmo 76. versu 6. *Cogitauit dies antiquos*, Et Psalmo 43. versu 2. *Quod operatus es in diebus antiquis*. Idem autem est, *À montibus æternis*, & à montibus antiquis; quemadmodum Daniel. 7. *Antiquus dierum* dicitur Deus, quia æternus est. Illud autem, *turbati sunt omnes insipientes corde*, sanctus Hieron. vertit ex Hebræo, *Spoliati sunt superbi corde*. Sed Septuaginta Interpretes sensum verterunt. Illud enim, *spoliati sunt*, non significat, spoliati sunt vestibus, sed spoliati sunt iudicio, etrauerunt, stupefacti sunt: quod est idem cum illo, *turbati sunt*, Pro insipiens corde. S. Hieronymus vertit, *superbi corde*, quia legit, *abbire leb*: Septuaginta legerunt, *abbide leb*: facile autem fuit mutari vnā litteram in aliam similem, id est, *dalet* γ, in res γ. Iam vero in sensu spiritali significat hic versiculus, principium victoriæ aduersus hostes inuisibiles esse illuminationē internam Dei, per quam videre nos facit Deus tum ipsos hostes, tum ipsorum fraudes; nec non bona inuisibilia, quæ preparauit Deus diligentibus se; & mala inuisibilia, quæ preparauit odio habentibus se. Et quemadmodum Deus illuminans mirabiliter à montibus æternis cælestis habitaculi sui, fortissimos reddit seruos suos; sic è contrario conturbat hostes suos, insipientes corde, qui videntes viros sanctos & perfectos contemnere visibilia, condonare iniurias, bonum pro malo reddere, durissima quæque propter Deum libenter pati, obstupescunt, & irascuntur, sed in fine dicturi sunt, *Nos insensati vitam illorum æstimabamus in saniam, & sinem illorum sine honore*. Sap. 5.

*Dormierunt somnum suum, & nihil inuenerunt omnes viri diuitiarum in manibus suis.*

Com.

רשפי קשה

טרם

קדם

אכרי כל אכרי לב

טרף

V.

דכנ



Communis expositio, est quod Propheta describat mortem Assyriorum, qui ab Angelo interfecti sunt, vt hic fit sensus, *dormierunt somnum suum*, id est, somno mortis soporati sunt, qui Ierusalem desiderabant inuadere, & se breui eam capturos, & spoliaturos esse sperabant: & omnes viri diuitiarum nihil inuenerunt in manibus suis, id est, & isti Assyrij, qui ditissimi erant, & maiores diuitias appetebant, post mortem illam repentinam in infernum detrusi, nihil inuenerunt in manibus suis, neque ex ijs, quæ habebant, neque ex ijs, quæ sperabant. Sed altiore sensu doctrina generalis traditur aduersus insipientes corde, qui magni faciunt bona temporalia, & despiciunt viros sanctos, & perfectos, qui ista contemnunt. *dormierunt*, inquit, *insipientes corde somnum suum*, id est, toto tempore vitæ huius quasi sopore graui concupiscentiæ, & ignorantie oppressi quiete dormierunt, somniantes se diuites, & beatos esse: sed vbi per mortem euigilauerunt (pœna enim aperit oculos, quos culpa clauferat) nihil inuenerunt in manibus suis: & tunc intellexerunt, bona huius vitæ non vera bona, sed ludibria somniantium fuisse, & ex ijs nihil sibi remansisse, nisi vermin conscientia, & pœnæ sempiternæ reatum.

VI. Ab increpatione tua Deus Iacob dormitauerunt, qui ascenderunt equos.

Declarat mortem Assyriorum, non fuisse naturalem, sed ab ipso Deo irato immisam. *Ab increpatione tua Deus Iacob dormitauerunt*, illi videlicet, de quibus dictum est versu superiore, *Dormierunt somnum suum*, illi, inquam, dormierunt somnum suum *ab increpatione tua* prostrati, & interfecti soporem mortis acceperunt: nam increpatio Dei efficacissima est, & eam continuo effectus sequitur. Si enim B. Petri increpatio Ananiæ, & Saphiræ occidit, Act. 5. quanto magis increpatio Dei omnipotentis? Illud, *qui ascenderunt equos*, est descriptio superbæ, & arrogantia Assyriorum, qui in equitatu suo confidebant. In Hebræo ad verbum habetur, *currus*, & *equus*. sed Septuaginta non legerunt, *recheb*, id est, *currus*, sed: *rocheb*, id est,

*eques*, vt sensus sit, Confopiti sunt eques & equus. In sensu autem spiritali significatur, morte sempiterna plectendos ab irato Deo, & demonem tanquam equitem, & hominem peccatorem tanquam equum, qui demonem sibi insidere, & ab eo regi se turpiter passus est

Tu terribilis es, & quis resistet tibi? ex tunc ira tua?

VII.

Alloquitur nunc Propheta Deum, & ex vltione & supplicio Assyriorum admittitur potentiam Dei erudiens nos, vt similiter admitemur, & timeamus. *Tu, inquit, terribilis es, & quis resistet tibi?* quando iratus fueris? Illud enim, *ex tunc ira tua*, significat, ex quo tempore incipit ira tua, & coniungendum est cum præcedentibus, vt coniungit etiam S. Augustinus. Sed in textu Latino ponitur distinctio & interpunctio sæpe ob commoditatem canentium. Illud: *Quis resistet tibi*, in Hebræo est ad verbum: *Quis stabit ante faciem tuam?* quod aliquid amplius significat, quam resistantiam, quasi dicat, Quis audebit faciem tuam iratam intueri? Sed Septuaginta sensum verum transtulerunt.

De celo auditum fecisti iudicium, terra tremuit & quieuit.

VIII.

Cum exurgeret in iudicium Deus, vt saluos faceret omnes mansuetos terra.

IX.

Occasione accepta ex ira Dei in Assyrios, transitum facit ad iram, quam ostendit idem Deus in die Iudicii generalis: tunc enim vere & proprie nemo impiorum sustinere poterit vultum irati Iudicis; loquitur autem de rebus futuris per verba temporis præteriti more prophetico. *De celo auditum fecisti iudicium*, id est, de celo annuntiabis per varia signa, quæ erunt in Sole, & Luna, & stellis, & tandem per horribilem tubam Angelicam, ad iudicium nouissimum te esse venturum: & tunc terra contremiscent, & præ timore silebit, id est, omnes habitantes in terra silebunt, *rescences præ timore*, & *expectatione eorum*, qua superuenient in uniuerso orbi, *Lucæ 21. Illud quieuit*, non significat requiem à labore, sed



sed taci turnitatem, & silentium ob timorem. S. Hieronymus optime sensum vertit, *Terra timens tacebit*; sed Septuaginta verterunt ad verbum, *Terra tremuit, & quieuit*, sic enim est in Hebræo. *Cum exurgeret in Iudicium deus*, id est, de cælo auditum facies iudicium, cum tu Deus exurges in iudicium surges de solio tuo cælesti, & venies ad iudicandum orbem terrarum, *ut saluos facias omnes mansuetos terra*: hic enim erit finis Iudicij, ut omnes mansueti, qui sunt in terra, non amplius vexentur à crudelibus, & superbis persecutoribus; sed omnibus impiis, & peccatoribus, iusto iudicio condemnatis, omnes pij & iusti salutem æternam, requiem videlicet, & felicitatem sempiternam possideant. Illud, *omnes mansuetos terra*, satis aperte significat, non posse referri ad liberationem Hebræorum de manu Sennacherib Regis Assyriorum, sed referenda esse, ad vniuersalem liberationem omnium iustorum. Vocat autem Scriptura *mansuetos*, eos qui liberabuntur; quoniam mansuetudo opponitur crudelitati persecutorum; & quoniam mansuetudo propria est discipulorum Christi, qui ut Agnus mansuetus in hoc mundo versatus est, & coram tondente, & ingulante se obmutuit; denique quia mansueti non resistunt Deo reuelati, quæ credenda sunt neque promittenti, quæ speranda sunt neque iubenti, quæ facienda sunt, ac per hoc mansuetudo omnes virtutes includit.

X.

*Quoniam cogitatio hominis confitebitur tibi: & reliquæ cogitationis diem festum agent tibi.*

Hoc sequetur ex Iudicio ultimo, ut mansueti liberati ab omni oppensione persecutorum, hoc tantum beneficium cogitantes perpetuo Deum laudent, & festos dies celebrent in cælo, memoria retinentes hæc Dei magnalia. Illud, quia, non reddit rationem hoc loco, sed accipitur pro, *quare*, vel, *propter quod*, ut sensus sit, Quare cogitatio hominis liberati confitebitur tibi laudes, imo ipsa iugis cogitatio tanti beneficii, erit iugis, & assidua laudatio: & reliquæ,

*cogitationum*, id est, perpetua memoria, quæ in ipsis relinquetur cogitatio tantæ rei, *diem festumaget tibi*, in æternum tibi cantabit, & iubilabit. Quod attinet ad verba sanctus Hieronymus ex Hebræo vertit, *quia ira hominis constebitur tibi, reliquæ ira accingeris*: quæ verba nullum commodum sensum facere videntur, cum reuera satis aperte respondeant verbis Hebraicis, quæ nunc in Biblijs excusis habentur. Sed sciendum est vocem, *chama* posse deduci à verbo, *nacham*, quod *pœnitere, & consolari*, & secundum Septuaginta etiam *cogitare* significat: nam Gen. 6. vers. 6. ubi nos habemus, *Pœnituit deum, quod hominem fecisset in terra*: Septuaginta Interpretes verterunt, *Cogitauit Deus, quod hominem fecisset in terra*. Quare illud, *chama* non solum significat iram, sed etiam cogitationem ex sententia Septuaginta Interpretum, quibus maior fides habenda est, quam omnibus dictionarijs. Illud autem, *thahgor*, quod significat, *accingeris*, à verbo, *chagar*, Septuaginta Interpretes legerunt sine vlllo dubio, *thichgog*, à verbo *chagar*, *festum agere* significat. Imperitissimi enim fuissent, si vertissent, *festum agere*, & dictionem, quam inuenerunt non deriuassent à radice, *chagag*, sed à radice, *chagar*, quæ similes sunt, & facile per errorem librariorum mutari potuerunt. Itaque retinenda est lectio, & interpretatio Septuaginta Seniorum, quam fideliter Interpres Latinus expressit.

*Vouete, & reddite Domino Deo vestro omnes, qui in circuitu eius assertis munera.*

*Terribili, & ei, qui aufert spiritum Principum, terribili apud Reges terræ.*

Concludit Propheta Psalmum exhortans fideles populos, ad vouendum, & reddendum, ut eo modo placatum habere possint Deum, qui terribilis est, adeo ut ipsis etiam Regibus vitam adimat, quando ei libitum fuerit: *Vouete*, inquit, & *reddite*, id est, promittite Deo sacrificia, & dona, quæ illi grata sunt, sed simul fideliter reddite, quæ

חמה  
נחם

חמה

חגג  
חג  
חגג

חגג

XI.

XII.



quæ promissistis. Vouete, inquam, & reddite vos omnes, qui in circuitu eius offeritis munera, id est, vos omnes, qui frequentatis aras dominicas, & in circuitu altaris consistentes offerre soliti estis munera: vouete autem, & reddite Deo vero, qui terribilis est in iudicijs suis, & à nemine irrideri, aut falli potest: nec solum terribilis est erga priuatos homines, sed etiam in Reges, & Principes, qui alijs hominibus terribiles esse solent. Ex illis verbis, Vouete & reddite, refellitur hæresis modernorum hæreticorum, qui vota rerum non imperatarum à Deo, omnino contemnant. Sanctus enim Augustinus exponens hunc locum scribit, rectissime voueri Deo perpetuam virginitatem, spontaneam paupertatem, & alia id genus, quæ à Deo non imperantur. Illud, in circuitu eius sunt, exposuimus de circuitu altaris; iuxta illud Ps. 25. Circundabo altare tuum Domine. S. Augustinus docet, illos esse in circuitu Dei, qui communem habent Deum, quod enim commune, & publicum est; in medio ponitur, ut omnes ex eo participant. Illi autem non sunt in circuitu Dei, qui si quid sciunt de Deo, quasi proprium habere volunt. Illud, offeritis munera. In Hebræo, & Græco legitur in terra persona, qui in circuitu eius sunt, offerunt illi munera, sed idem est sensus. Illud, qui auferit spiritum Principum, exponunt aliqui de spiritu superbiæ; id est, qui humiliat Principes. Sed nostra expositio confirmatur ex Psalmo 103. Auferes spiritum eorum, & deficiet, & in puluerem suum reuertentur: & in hoc vere ostenditur terribilis Deus, quod potentissimos Reges ad nutum in momento interimere possit.

## PSALMVS LXXVI.

Titulus, &amp; Argumentum Psalmi.

In finem pro Idithun, Psalmus Asaph.

**C**Pr dicatur in titulo, pro Idithun Psalmus Asaph, omnino difficile est diuinare Euthymius existimat, Psalmum datum esse ad decantandum ipsi Asaph, pro Idithun, id est, vice Idithun, qui forte cantare impediebatur: nimis humilis explicatio est, neque vox

Hebraica, hal leduthun, patitur, ut, præ, significet, vice, cum ad literam sonet: super Idithun Psal. Asaph. Alij existimant, Psalmum compositum ab Asaph, & datum ipsi Idithun ad canendum. Sed neque id probabile est, cum Idithun fuerit unus ex principibus cantorum, non minus quam Asaph. Alij volunt Psalmum cantatum esse alternatim ab Idithun, & Asaph. Alij denique nomen Idithun, hoc loco volunt non esse nomen cantoris, sed instrumenti musici, vel certi generis modulationis, ad cuius formam Psalmus canendus esset, atq; huic expositioni satis conuenit illa phrasis, Psalmus Asaph super Idithun. Argumentum est oratio aduersus tribulationes: quæ sit autem tribulatio de qua Psalmus hic loquitur, non conuenit inter auctores: alijs existimantibus hic agi de captiuitate Babylonica, alijs de persecutione Antiochi, quæ contigit tempore Machabæorum, alijs de incerta, & nobis incognita tribulatione, sed S. Augustinus vtilissime exponit Psalmum de miseria humana generatim, ac præsertim de ea, quam sentiunt viri perfecti, qui dum anhelant ad patriam cælestem molestissime ferunt moram exilij, & peregrinationis.

## EXPLICATIO PSAL. LXXVI.

**V**Oce mea ad Dominum clamaui, voce mea ad Deum, & intendit mihi.

I.

Indicat hoc primo versiculo anima viri sancti, quam moleste ferat moram, & pericula huius peregrinationis. Dicit enim, voce mea, id est, non per nuncios, non per amicos, non etiam per linguam corporis mei, sed voce mea; proprio animæ desiderio pulsaui aures Dei. Dicit ad Dominum, vel, ut est in hebræo, ad Deum, & repetit secundo, ad Deum, quia videbar à nulla re creata posse obtineri quod cupiebat, ideo transiliens omnia ad ipsum Deum accessit. Dicit, clamaui; quia se videbat in regione dissimilitudinis longe separatam à Deo, magna voce; magno affectu sibi opus esse, ut de tanto profundo, ad tantam sublimitatem vocem suam transmitteret. Addit, &

H h h

intens.



*intendit mihi, ostendens sibi profuisse eiusmodi clamorem. In Hebræo ad verbum est, & aures mihi præbuit.*

II.

*In die tribulationis meæ Deum exquisiui, manibus meis nocte contra eum, & non sum deceptus.*

Declarat cur, & quomodo Deum quæsierit, & inuenerit, *In die tribulationis meæ, Deum exquisiui*, id est, in tempore huius vitæ mortalis, *quæ est tota tentatio*, ut dicit sanctus Iob, cap. 7. vel, ut in nostro textu habetur, *militia*, id est, perpetua colluctatio cum vitij, & concupiscentijs, nec non cum principibus, & potestatibus aeris: ut dicitur ad Eph. 6. unde exclamat Apost. Rom. 7. *Quis me liberabit de corpore mortis huius? Manibus meis nocte contra eum*, id est, in nocte huius vitæ manibus contra Deum extensis illum quæsiui attingere, & apprehendere, & non sum deceptus: tempus huius vitæ non est dies, sed nox, quia per fidem ambulamus, & non per speciem, 2. Corinth. 5. & opus habemus attendere ad lucernam scripturæ lucentem in caliginoso loco, ut dicitur 2. Petr. 2. Noctem autem melius quærimus manibus tentando, quam oculis vestigando; unde dicit Apostolus Act. 17. *Quærere Deum, si forte attingent eum, aut inueniant.* Porro manibus quærere Deum in nocte, nihil est aliud, nisi per opera bona, per obedientiam mandatorum, per vitæ puritatem in hoc exilio caliginoso Deum quærere: & sæpe contingit, ut qui ita quærunt, Deum attingant, quem speculando, vel legendo inuenire non poterant: testimonium enim conscientie bonæ, & patientia in tribulationibus, & frequentes victoriæ aduersus tentationes, efficiunt, ut anima experimento quodam dulcedinem Dei sentiat, & testimonium spiritus in se habeat, quod sit filius Dei. In Hebræo pro, contra eum, habetur, *niggera*, id est, *extenta*, ut sensus sit, nocte manus mea, extenta est ad eum; & idem est sensus, sed Septuaginta non videbatur legisse, *niggera*, sed *negda*, id est, contra, vel è regione, voces enim similes sunt, ut patet. Rursus ubi nos ha-

bemus, & non sum deceptus, ex Hebræo vertunt alij, & non quiescit, vel non remittitur: manus mea videlicet, id est, manus mea extenta, & non debilitata, aut fatigata quieuit. Sed Septuaginta vertunt sensum, non verba. Significaverunt enim, manum viri iusti ad Deum quærendum extentam non quieuisse præ lassitudine, quia inuenit cito, quod quærebatur, & ideo virum iustum manibus quærendo non fuisse deceptum, hoc est, spe sua frustratum. Multi hunc versiculum exponunt de extensione manus in oratione tempore nocturno, quorum expositionem non reprehendo, sed malui S. Augustinum, sequi, qui etiam satis apte adducit hoc loco factum S. Thomæ Apostoli, qui manibus tangendo Christi cicatrices, Deum quæsiuit in nocte dubitationis, & non est deceptus: nam inuento Deo exclamavit, *Dominus meus, Deus meus*, Ioan. 20.

*Renuit consolari anima mea, memor fui Dei, & delectatus sum: & exercitatus sum, & defecit spiritus meus.*

Quia quærens Deum non fuit deceptus: renuit deinceps anima eius consolationem accipere à rebus mundi huius, quoniam videbat in omnibus esse deceptionem. *Renuit*, inquit, *consolari anima mea*, id est, quantumvis blandirentur carnales voluptates, noluit inde gaudere anima mea, sciens eas secum trahere grauiores tristitias. *Memor fui Dei, & delectatus sum*, id est, ne tamen sine omni consolatione essem, *memor fui Dei*, qui nullum decipit, & in quo solo solidum gaudium reperitur, quod nemo potest tollere à nobis; & *delectatus sum*. Magnum est hoc arcanum sapientie Dei, quod in hoc exilio plus delectet memoria Dei, quam præsentia carnalium voluptatum: & si in medio illecebrarum carnalium tantum delectat memoria Dei, quantum delectabit ipsa præsentia Dei, quando nullæ erunt carnales illecebræ? Et *exercitatus sum, & defecit spiritus meus*, id est, post memoriam Dei, & voluptatem inde haustam exercitatus sum meditando, & mecum ipso collo-

נגרה  
נגרה  
נגרה

quendo.



quando de meroribus exilii, & de iucunditate patriæ, & præ desiderio defecit spiritus meus. In Hebræo, pro, *delectatus sum*, habetur, *veehemaiab*, quod proprie significat, *sonui*, siue *clamaui*: quod potest intelligi de clamore lætitiæ, ut Septuaginta intellexerunt, & de clamore turbationis, ut intellexit S. Hieronymus, qui vertit, *conturbabar*. Pro illo, *exercitatus sum* sanctus Augustinus legit, *garrui*, quod vox Græca significare videtur: sed vox Hebraica, *asicha*, quæ frequens est in Psalmis, significat *summisso loqui*, siue *secum loqui*, quod est proprium meditantium, & se in consideratione exercentium. Illud, *defecit spiritus meus*, exponunt nonnulli de defectu ob ingruentes tribulationes, quasi eas diutius ferre non posset; sed non minus proprie dicitur spiritus deficere, quando magno desiderio alicuius rei tenetur, quo modo etiam languere, & lique fieri dicitur, iuxta illud Ps. 83. *Concupiscit, & deficit anima mea in atria Domini*.

IV. *Anticipauerunt vigilias oculi mei, turbatus sum, & non sum locutus.*

Declarat quod dixit, *exercitatus sum*, & ait. *Anticipauerunt vigilias oculi mei*, id est, noctu surgebam ad meditandum, antequam excubia militares vigilare inciperent: nam per vigilias intelliguntur *custodia*, siue *excubia*, ut perspicue habetur in codice Hebraico, & Græco. Similis est locus in Psal. 118. *Præuenerunt oculi mei ad te diluculo, ut meditarer eloquia tua*. Quod sequitur, *Turbatus sum, & non sum locutus*, significat ex meditatione periculorum huius vitæ. Prophetam turbatum fuisse autem aliquid loqui, quod sciret, iudicia Dei esse iustissima, quamuis occulta. In Hebræo pro, *Anticipauerunt vigilias oculi mei*, habetur, *tenuisti custodias oculorum meorum*. Sanctus autem Hieronymus vertit, *Prohibebam suspectum oculorum meorum*. Sanctus denique Augustinus legit, *Anticipauerunt vigilias inimici mei*, sed illud *inimici mei*, non habetur in Hebræo, neque in Græco, neque in Latina editione vulgata, proinde facile contemni

potest. Vox Hebræa, *achasta*, quæ significat *tenuisti*, non fuit in codice S. Hieron. neque Septuaginta Interpretum. Manifeste enim est verbum temporis præteriti secundæ personæ à radice, *achaz*, quæ significat *tenere, apprehendere possidere*, & similia: quare S. Hieronymus, qui vertit, *prohibebam*, & Septuaginta, qui verterunt, *anticipauerunt*, sine dubio aliquid aliud legerunt. In re autem tam obscura nihil est tutius, quam antiquissimæ versioni Septuaginta Interpretum adherere, quam nobis fideliter Interpres Larianus expressit. Verum est tamen. Hebraicam lectionem, qualis nunc est, in sententia non discrepare à lectione editionis vulgatæ. Illud enim, *tenuisti custodias oculorum meorum*, ita exponi potest, tu Deus tenuisti palpebras oculorum meorum, ne clauderentur in somnum, ac per hoc fecisti, ut tota nocte vigilarem, & sic vigilas omnium excubiaturam anticiparem.

V. *Cogitavi dies antiquos, & annos æternos in mente habui.*

Ecce quid meditaretur quando præueniebat vigilias. *Cogitabat dies antiquos*, id est dies huius vitæ temporalis à principio usque ad finem: & simul cogitabat *annos æternos, vitæ futuræ*, qui non prætereunt, sed stabiles permanent: neque sola spacia cogitabat, sed quæ habemus, & quæ agimus in his diebus, qui mox antiquantur, & pereunt; & quæ habebimus, & agemus in annis æternis, qui semper in eodem statu permanent. Digna plane cogitatio, quæ totas noctes occupet meditantem.

VI. *Et meditatus sum nocte cum corde meo, & exercitabar, & scopebam spiritum meum.*

Id ipsum alijs verbis repetit, & inculcat, dicens, *Et meditatus sum nocte cum corde meo*, id est, & cōsumpsi integras noctes mecum ipse colloquendo, non ore, sed corde, & *exercitabar*, cogitando videlicet, ac mecum ipse discurrendo. *Et scopebam spiritum meum*, id est, & hoc modo quasi scopis cogitationum versabam huc atque illuc spiritum meum. In Hebræo pro, & *medi-*

Hhh 2 tatus



נִגְיָתִי

וְהִגִּיתִי

יִחְפֶּה

tatus sum, habetur, *neghinathi*, quod significat *canticum meum*, vel *psalmum meum*, vt vertit S. Hieronymus. Sed Septuaginta sine dubio legerunt, vt infra versiculo duodecimo, *vehaghihi*, quod significat; *Et meditatus sum*: & facile fuit librarijs in hac re errare cum similes voces sint, nec sit vlllo modo credibile Septuaginta viros, aut vllum aliū. Interpretem redditurum, *Et meditatus sum*, si legisset, *neghinathi*. Illud autem, *Et scopebam*, S. Augustinus legit, *Et scrutabar spiritum meum*, & hoc proprie significat vox Hebraica, *iechappes*, quæ hoc loco habetur: tamen sanctus Hieronymus nouo, & inusitato vocabulo vertere maluit, *scopebam spiritum meum*. Intelligimus autem ex vtraque lectione illud, *scopebam*, non significare, *scopis mundabam*, aut *purgabam*, sed *scopis verrebam*, *Et agitabam*: vt enim mulier illa in Euangelio domum verrebam, vt drachmam perditam inueniret: sic iste spiritum suum scrutabatur, & quasi scopis verrebam, vt veritatem absconditam inueniret. Idem S. Hieronymus in commentario dicit, *scopebam*, id est, fodiebam: & in epist. ad Suniam, & Fretellam dicit, *scopebam*, idem esse, quod *sarculo sariebam*: quare perspicuum est, *scopebam*, non esse, mundabam, sed verrebam. In Hebræo habetur, *scopebat*, vel *scrutabatur spiritus meus*: tamen S. Hieronymus vertit in prima persona, *scopebam*, & in epist. ad Suniam, & Fretellam dicit. Septuaginta vertisse in prima persona; non in tertia, *ἵκαλλεν* non, *ἵκαλλε*; sic etiam legit S. Augustinus. Proinde videtur error librariorum esse. tum in Hebraico, tum in Græco codice, quoad mutationem personæ.

VII.

Nunquid in æternum projiciet Deus? aut non apponet, vt complacitior sit adhuc?

VIII.

Aut in finem misericordiam suam abscindet, à generatione in generationem?

IX.

Aut obliuiscetur misereri Deus? aut continebit in ira sua misericordias suas?

Hæc est meditatio, & agitatio mentis. In qua noctu exercebatur. Videns enim multitudinem hominum peccatorum prope infinitam, & quod vix inueniretur qui faceret bonum, dicebat intra se, num Deus projiciet omnes homines in interitum sempiternum: vbi est igitur infinita misericordia eius? Sed his interrogationibus contrariam sententiam concludere intendit; videlicet futurum aliquando tempus redemptionis generis humani, quo per misericordiam Dei, non solum reliquæ Iudæorum, sed etiam multitudo gentium saluaretur: ait igitur: *Nunquid in æternum projiciet Deus*, id est, nunquid Deus tantam multitudinem generis humani in æternum projiciet à misericordia sua, & in infidelitate, & cecitate, dimittet? quasi dicat, non projiciet, sed tempore suo visitabit. *Aut non apponet, vt complacitior sit adhuc*, id est, nunquid Deus non addet aliquando ad iram suam misericordiam suam vt incipiat sibi complacere in gentibus, quas nunc odio prosequi videtur: addet omnino propitiationem. *Aut in finem misericordiam suam abscindet, à generatione in generationem*: id est, nunquid, remouebit misericordiam suam ab hominibus? in æternum non remouebit. *Aut obliuiscetur misereri Deus? aut continebit in ira sua misericordiam suam*: id est, non obliuiscetur, & non continebit. Facilius est enim Deo continere iram suam, quam misericordiam suam, & ideo quamuis iuste irascatur in peccatores, tamē in ipsa ira non continebit misericordiam suam, sed effundet misericordiam, quæ iram mitiget. Quod attinet ad verba, illud, *non apponet, vt complacitior sit adhuc*? S. Hieron. ex hebræo clarius reddit, non propitiabitur ultra? ad verbum enim in hebræo habetur, *non addet ad complacendum adhuc*? id est, non addet complacentiam, siue propitiationem aliquando: illud, *non abscindet misericordiam suam*. S. Hieronym. ex Hebræo vertit, ergo non complebit misericordiam suam? quæ sententia omnino contraria videtur; sed non est, nam vox Hebraica, *aphes*, significat consumere, vel consumit, dedecere, perire, & similia: quare S. Hieronymus verbum,

אֶפֶס



verbum, *complebit*, non accepit in bonam partem, pro eo quod est, *perficere*, sed in malam, pro eo quod est, *finire*, vt non vltra pergar: quomodo dicitur Danielis; *Numerauit Deus Regnum tuum, & compleuit illud*, id est, finiuit Regnum tuum, iam non vltra regnabis. Additur in Hebræo: *Consummabitur verbum*, sic enim habetur ad literam in Hebræo: *Nunquid peribit in finem misericordia eius, consummabitur verbum à generatione in generationem?* vbi illud, *consummabitur verbum*, omisum est à LXX. Interpretibus, & ab omnibus antiquis Interpretibus, & vt testatur S. Hieronymus in Epist. ad Suniam & Fretellam, qui etiam addit, recte non haberi in Latino. Ex quo intelligimus, duo illa verba additicia esse non solum in Græco, sed etiam in Hebræo. Theodoretus quidem scribit, haberi hæc duo verba apud Symmachum; sed nos maiorem fidem habemus S. Hieronymo, quam Theodoro. Denique illud, *Continebit in ira sua misericordias suas*, S. Hieronymus ex Hebræo vertit, *Complebit in furore suo misericordiam suam*. Sed non sunt contraria, quia S. Hieronymus per *comple*, intelligit *finire*, & verbum, *caphaz*, quod habetur hoc loco, significat *claudere*, ac per hoc continere, ne exeat, ne fluat. Idem autem est *comple* misericordiam, id est, *finire*, vt iam non sit; & *continere*, vt non fluat, & *claudere*, vt non exeat.

*Et dixi, nunc cæpi: hæc mutatio dextere Excelsi.*

Præuisa & prædicta redemptione, dicit Propheta, se respirare cæpisse à tædio & mœrore, quo antea tenebatur. *Et dixi*, inquit, *nunc cæpi*, id est, nunc incepi respirare, posteaquam meditando & vigilando, Deo reuelante cognoui, misericordiam Domini effundendam super genus humanum, *hæc est mutatio dextere Excelsi*, id est, mutatio, quam prævideo & prædico, iræ diuinæ in misericordiam, iniquitatis hominum in iustitiam, captiuitatis in redemptionem, poenæ sempiternæ in gloriam æternam, mutatio est

admirabilis, quam nemo poterat efficere, nisi dextera Excelsi, quæ Christus est: ipse enim placauit iram Patris, & in beneuolentiam commutauit, ipse iustificauit impios, ipse redemit captiuos, ipse glorificauit miseros; & quod mirabilis est, hanc mutationem fecit dextera Excelsi quodam modo per suam mutationem, vt notat S. Hieronymus in Commentario; ipsa enim dextera Excelsi infirmata est, vt nos roboraret; & cum esset in forma Dei, formam serui accepit, vt nos à seruitute redimeret. Pro, *nunc cæpi*, S. Hieronymus vertit ex Hebræo, *imbecillitas mea*: alij, *dolor meus*, alij aliter. Sed vox Hebraica ambigua est, & omnes interpretationes admittit: in re autem ambigua, mirum est, cur non anteponatur omnibus Interpretibus auctoritas LXX. Seniorum, qui sapientia, antiquitate, & admirabili inter se concordia omnibus præstant.

*Memor fui operum Domini, quia memor ero ab initio mirabilium tuorum.* XI.

*Et meditabor in omnibus operibus tuis, & in adinventionibus tuis exercebor.* XII.

Respirans iam Propheta in spem futuræ redemptionis, dicit, se memorem futurum operum Domini mirabilium, & incipit enarrare mirabilia quædam opera. *Memor fui*, inquit, *operum Domini, quia memor ero ab initio mirabilium tuorum*, id est, antea quidem memor fui aliquorum operum Domini, quæ fecit in Ægypto coram Patribus nostris; sed nunc, ô Domine, memor ero ab initio Mundi omnium mirabilium tuorum. *Et meditabor in omnibus operibus tuis*, considerans videlicet opera iustitiæ & misericordiæ; opera potentie & sapientiæ; opera naturæ & gratiæ: *& in adinventionibus tuis exercebor*, mente reuoluens & admirans arcanæ consilia, & admirabiles rationes curandi genus humanum, quas sapientia tua adinuenit. Illud, *quia*, non est semper particula causalis, sed ex Hebraica phrasi interdum redundat, interdum exponenda est iuxta exi-



חִיִּי

gentiam loci, hoc loco videtur exponenda per sed, vel etiam, vel quin etiam. Illud, adinventionibus, Hebraice *haliloth*, significat opera, & cogitationes, sed opera egregia, & cogitationes prudentes: hoc loco, ut etiam Isaia 12. & 2. Paralip. 16. accipitur pro adinventionibus sapienter & subtiliter excogitatis ab ipso Deo, quæ nunquam venissent hominibus in mentem, nisi eas opere completas vidissent: talis adinuentio fuit Incarnatio Verbi, Passio Christi, Mysterium Eucharistiae, & similia.

XIII.

*Deus in sancto via tua; quis Deus magnus, sicut Deus noster? tu es Deus, qui facis mirabilia.*

קדש

Incipit laudare opera Domini mirabilia, in quibus cogitandis exerceri solebat: ac primum generatim dicit, opera Domini esse sancta, magna & mirabilia, id est, facta sancte, potenter & sapienter, sicut ipse sanctus, omnipotens & sapientissimus est. *Deus*, inquit, in sancto via tua, id est, actio tua, siue operatio tua, per quam ad nos quodammodo exis, in sanctitate efficitur: nihil enim agis, quod non rectum & iustum sit. In Hebraeo est, *chodes*, quod proprie sanctitatem significat: proinde exponendum est, in sanctitate, quod nos legimus, in sancto. *Quis Deus magnus, sicut Deus noster?* id est, non solum Deus noster sanctus est, & sancta via eius, sed etiam magnus, & magna opera eius. *Tu es Deus, qui facis mirabilia*, id est, non modo sancta & magna; sed etiam mirabilia sunt opera tua ob sapientiae profunditatem, quæ in ipsis cernitur. S. Augustinus legit: *Qui facis mirabilia solus*. Sed nostri codices Hebraici, Græci & Latini non habent hanc vocem, *solus*. Verissimum tamen est, Deum solum mirabilia facere, quia ipse solus non eget auxilio aliorum; & omnes alij, qui mirabilia faciunt, ut Apostoli & Prophetæ, & alij sancti viri dono miraculorum præditi, nunquam faciunt mirabilia soli, quia sine Deo nihil facere possunt. Illud, in sancto via tua, potest etiam congruere cum textu He-

braico ad literam, si mutantur puncta, & legamus, *chados*, non, *chodes*. Et hac lectione posita secundum Augustinum, sanctus est Christus, & via Dei dicitur esse in sancto, quia per Christum imus ad Deum, & Deus per Christum venit ad nos: secundum Hieronymum via est Christus, & Christus in sancto habitat, quia in maleuolam animam non introibit sapientia: proinde sanctus sit, qui Christum in se habitantem habere desiderat.

*Notam fecisti in populis virtutem tuam; redemisti in brachio tuo populum tuum, filios Iacob & Ioseph.*

XIV.

Descendit ad particulare opus Dei magnum & mirabile, videlicet ad liberationem populi sui de Ægypto. *Notam, inquit, fecisti in populis virtutem tuam*, id est, potentiam tuam manifestasti populis Ægyptiorum, acque aliarum gentium, quæ audierunt plagas Ægypti. *Redemisti in brachio tuo populum tuum*, quando per multa signa & prodigia liberaisti populum tuum, qui miseram seruitutem seruiebat in Ægypto. Liberaisti autem in brachio tuo, id est, propria tua potentia & fortitudine; quia non eges aliorum auxilio. *Filios Iacob & Ioseph*, id est, liberaisti populum tuum, qui constat ex filiis Iacob & Ioseph. Nominatur autem Ioseph cum ipso Iacob patre suo, quia populus Israël constabat ex tredecim tribubus, quarum vndecim descendeant ab vndecim filiis Iacob, duæ autem à filiis Ioseph, Ephraim videlicet & Manasse. Spiritualiter notam fecit Deus virtutem, id est, potentiam suam in populis omnium gentium, quia redemit ex omnibus gentibus populum suum à tyrannide Diaboli, in brachio suo, quod est Christus. De quo dicitur Isaia 53. *Brachium Domini cui reuelatum est?* Sunt autem in populo Dei filij Iacob & filij Ioseph, id est, ut S. Augustinus exponit, Iudæi & Gentiles ad fidem conuersi. Per filios enim Iacob intelliguntur carnales Israëlitarum, per filios Iosephi ij qui in Christo renati sunt; Ioseph enim inuidiâ fratrum

in



in Ægyptum venditus, ibiq; primum humiliatus, deinde exaltatus Christum significat, qui inuidiā Iudæorum extra Synagogam eiecit, venditus & humiliatus, deinde per Resurrectionem & Ascensionem ita exaltatus est, vt impletum sit, quod in Psalmo dicitur: *Adorabunt eum omnes Reges terra, omnes gentes seruient ei.*

XV.

*Viderunt te aqua Deus, viderunt te aqua, & timuerunt, & turbatae sunt abyssi.*

Describit scissionem maris rubri, quæ facta est, quando Deus liberauit populum suum à seruitute Pharaonis. Describit autem more poetico, tribuens aquis & sensum & tremorem, quasi ob timorem præsentis Dei aquæ recesserint: quo modo etiam dicitur in Psal. 113. *Mare vidit, & fugit. Viderunt, inquit, te aqua Deus, viderunt te aqua, & timuerunt*, id est, aquæ maris rubri ita siccatæ sunt iubente te, ac si maiestatem tuam vidissent, & ob timorem & reuerentiam fugissent. *Et turbatae sunt abyssi*, id est, non solum in superficie, sed etiam in imo profundo existentes aquæ, quasi à præsentia tua conturbatæ recesserunt. Abyssus enim nihil est aliud, nisi altitudo, siue profunditas aquarum. Spiritualiter aquæ, populos significant. Iuxta illud Apocal. 17. *Aqua multa, sunt populi multi.* Aquæ igitur, id est, populi gentium viderunt Deum, quando liberauit Dominus populum suum, quia vidit omnis caro salutare Dei, viderunt autem per fidem, non per speciem, & timuerunt agnoscētes peccata sua & iudicia Dei, nam per Euangelium (vt dicit Apostolus ad Rom. 1.) sicut reuelatur gratia Dei super poenitentes & credentes, ita reuelatur ira Dei super omnem impietatem & iniquitatem. Et præcipue turbatæ sunt abyssi, id est, maiores & altiores in gentibus, quia per fidem agnouerunt iudicia Dei esse abyssum multam, & potentes potenter tormenta passuros. Vnde in Actis Apostolorum c. 24. prædicante Paulo de iustitia, & castitate, & iudicio futuro, *Preses Romanorum Felix tremefactus est.*

*Multitudo sonitus aquarum, vocem derunt nubes.*

XVI.

*Etenim sagittæ tuæ transcunt, vox tonitruui tui in rota.*

XVII.

Descripserat mirabile opus Dei in scissione maris rubri: nunc describit reuersionem maris, & tempestatem ad obruendos Ægyptios: quod fuit etiam opus mirabile eiusdem Dei. *Multitudo*, inquit, *sonitus aquarum*, id est, maximus sonitus & fremitus aquarum postea successit, cum iubente te Deo, aquæ maris, quæ steterant instar murorum, dum transiret populus Dei, magno impetu cadentes submerserunt & suffocauerunt Ægyptios, quando etiam sagittæ tuæ cœlestes, id est, fulmina discurrentia transibant super eos, & vox tonitruui tui super rotas curruum Pharaonis, eas subuertebat, & in profundum deiiciebat. Habetur hæc historia in Exodo c. 14. Quod attinet ad verba, illud, *Multitudo sonitus aquarum*, ex Hebræo vertit S. Hieronymus, *Excusserunt aquas nubila*, & hunc sensum manifeste recipiunt Hebraica verba. Possunt tamen tres illæ voces Hebraicæ, *zoremu maim hauoth*, esse tria nomina distincta, & in casu recto, si solum inuenitur vnum punctum primæ vocis, & pro *zoremu*, legatur *zoremo*, quæ sic comode redduntur: *Inundatio eius, aquæ, nubila*, & sic videntur legisse LXX. Interpretes, & accepisse per inundationem Dei, multitudinem aquarum obruentium Ægyptios, per aquas & nubila, accepisse causas illius inundationis, quæ fuerunt aquæ maris reuertentes in locum suum, & nubila desuper fundentia aliam aquam, vt facilius inuoluerentur in aquis Ægyptij. Hæc autem omnia significarunt breuiter per illa verba: *Multitudo sonitus aquarum*: nam & aquæ maris redeunt, & aquæ descendentes è nubibus magnum sine dubio sonitum edebant. Illud, *vox tonitruui tui in rota*, varie admodum exponitur. S. Hieronymus ad litteram dicit, *vocem tonitruui in rota*, esse sonitum tonitruorum in orbe terrarum, & hoc dicit confirmari ex verbis sequentibus: *Illuxerunt conuersiones tuæ orbi terræ.*

Alij

ורמו  
מים  
עבות  
דרמו



Alij volunt dici, *vocem tonitruui in rota*, id est, in æthere, siue in cælo, quod rotundum est. Posset etiam dici, *vox tonitruui in rota* id est, in nube, quæ est quasi rota, siue currus Dei, vt ostendimus in explicatione Psalmi 17. Sed communior expositio est, quam supra posuimus, vt per, *rota*, intelligantur rotæ currum Pharaonis; quam expositionem tradit Theodoretus, & eam plurimi alij sequuntur. Spiritualiter sonitus aquarum, est confessio populorum, vox nubium est vox Prædicatorum Euangelij; fulmina & tonitrua, sunt probitas vitæ & miracula, quibus veritas Fidei confirmatur. Sed illud, *Vox tonitruui in rota*, pulchre admodum exponitur à S. Hieronymo, qui notat vocem tonitruui Euangelici tunc valde commouere populos, quando est in rota, id est, in homine plane spiritali & contemptore rerum terrenarum, qui terram vix tangat & transeat, quomodo currens rota in puncto terram contingit, & mox deserit, & ad altiora desertur.

XVIII.

*Illuxerunt coruscationes tue orbi terre, commota est & contremuit terra.*

Addit Propheta animaduersionem Dei in Pharaonem, non solum innotuisse Iudæis præsentibus, sed etiam instar coruscationis cœlestis notam factam esse orbi terrarum, & inde commotionem & tremorem gentibus longe positis attulisse, quod verum esse testatur liber Iosue cap. 2. vbi Raab dicit: *Audiuimus quod seccauerit Dominus aquas maris rubri ad introitum vestrum, & perimimus, &c.* Illuxerunt, inquit, coruscationes tue orbi terra, id est, hæc mirabilia magna, hæc coruscationes, hæc signa, hæc miracula illuxerunt non solis Ægyptiis & Iudæis, sed orbi terrarum, longe lateq; nota facta sunt, & ideo, *commota est & contremuit terra*, id est, habitantes in terra perturbati sunt, & populum Israëliticum formidare cœperunt. Spiritualiter significatur his verbis, quod in Psalmo 18. clarius habetur de prædicatoribus Euangelicis: *In omnem terram exiit sonus eorum, & in fines orbis terræ verba eorum.*

*In mari via tua, & semite tue in aquis multis, & vestigia tua non cognoscentur.*

XIX.

Hic aperte describitur transitus filiorum Israël duce Deo, per nouam & inusitatam viam, id est, per medium mare sicco vestigio. *In mari via tua*, id est, in mari, nouo & insolito modo inuenisti populo tuo viam, & *semite tue in aquis multis*, id est, & semitam fecisti eidem populo inter aquas multas. *Et vestigia tua non cognoscentur*, id est, sic admirabili ratione duxisti populum tuum per medium maris, vt nullus deinceps vestigia tua & eandem viam inuenire potuerit. Spiritualiter significatur his verbis, opera Domini non solum esse admirabilia, sed etiam inuestigabilia, quomodo via in mari inuestigabilis est, quia nulla in ea vestigia relinquuntur.

*Deduxisti sicut oves populum tuum in manu Moyse & Aaron.*

XX.

Hic fuit finis omnium operum mirabilium Dei in Ægypto, & in mari rubro, vt populum suum inde liberaret, & in terram promissionis introduceret: quod fecit per Moysem & Aaron primos pastores Synagogæ. *Deduxisti*, inquit, *sicut oves populum tuum*, id est, magna facilitate, magna charitate, indefessa prouidentia deduxisti per desertum, & vsque ad promissionis terram, quasi ad paschaverrima populum tuum, *in manu Moyse & Aaron*, id est, sub potestate & regimine duorum optimorum Principum. Spiritualiter admonemur, eos, qui ad terram promissionis, id est, cœlestem patriam peruenturi sunt, deducendos esse sicut oves in manu Moyse & Aaron; ita vt sint mites & patientes sicut oves in medio luporum: nam, vt dicitur Matth. 5. *Beati mites, quoniam ipsi possidebunt terram.* Et Luc. 25. *In patientia vestra possidebitis animas vestras.* Item, vt sinant se regi à Magistratu Ecclesiastico & ciuili; Deus enim etiam si paucos quosdam per se doceat & regat: tamen ordinarie per Vicarios suos regit & docet, & filios obedientie vult esse electos suos. Nominatur autem hoc loco Moyse ante Aaronem, non quod



quod Princeps politicus tantum esset Moy-  
ses, & Princeps Ecclesiasticus Aaron : sed  
quia Moy ses primarius erat Princeps Eccle-  
siasticus, & politicus, Aaron autem solum  
erat Princeps Ecclesiasticus, & à Moy se, vt  
maiore consecratus, & ordinatus. Quod e-  
nim Moy ses Sacerdos esset, perspicuum est  
ex Psal. 98. *Moy ses & Aaron in Sacerdotibus*  
*eius: & ex plurimis actionibus Sacerdotali-*  
*bus, quas exercuit consecrans Sacerdotes, &*  
*tabernaculum, offerens sacrificia, imo insti-*  
*tuens ritus sacrificandi, & omnes ceremoni-*  
*as diuini cultus.*

## PSALMVSLXXVII.

Titulus, &amp; Argumentum.

Intellectus Asaph.

**H**ic titulus admonet, Psalmum non esse  
ita facile, & apertum vt in superficie  
apparet. Videtur enim Psalmus totus histori-  
cus esse, atq; ad hoc solum compositus, vt po-  
pulus agnoscens beneficia Dei, & ingrati-  
tatem veterum Israelitarum, qui propterea  
grauius puniti sunt, discat sequi potius legem  
Dei, quam exempla maiorum. Caterum non  
hoc solum Dauidi propositum est in hoc Psal-  
mo; sed etiam adumbrare Regnum Christi,  
qui ex tribu Iuda & familia Dauid existens  
finem dedit veteri testamento, & nouum lon-  
ge excellentius, & felicius inchoauit. Id enim  
significat Dauid in extremo Psalmo, ubi po-  
stequam varia peccata, & varia flagella  
populi enarrauit: tandem concludit, Deum e-  
legisse Iudam, non Ephraim, & ex Iuda ipsum  
Dauidem, quia deinceps magna tranquillita-  
te populum Dei regeret, & gubernaret. Hoc i-  
gitur admonet titulus, Intellectus Asaph,  
cui Psalmus cantandus dabatur, intelligeret,  
& alios intelligere faceret mysterium futuri  
Messia, & hoc indicant nomina parabola-  
rum, & propositionum, qua habentur in se-  
cundo versiculo Psalmi.

## EXPLICATIO PSAL. LXXVII.

**A**t tendite popule meus legem me-  
am. inclinate aurem vestram in  
verba oris mei.

Dauid hortaturus populum longissimo  
sermone, capiat initio attentionem osten-  
dens, se vtilia, & magna loquuturum. *At-*  
*tendite, inquit, legem meam*, id est, praece-  
ptiones meas, quae vos dirigere poterunt ad  
veram felicitatem, instar legum optimarum,  
& sapientissimarum. Atque id ipsum repe-  
tens, & declarans addit, *Inclinate aurem ve-*  
*stram in verba oris mei: quod dixerat, Atten-*  
*dite, nunc dicit, Inclinate aurem vestram,*  
& quod dixerat, *legem meam*, nunc dicit,  
*verba oris mei*; proinde per legem non intel-  
ligit legem Moysis, quae proprie dicitur  
lex; sed verba sua, quibus populum instrue-  
re, & exhortari volebat: quomodo accepit  
nomine legis Dominus cum ait Ioa. 15. *Vt ad-*  
*impleatur sermo, qui in lege eorum scriptus*  
*est, quia odio habuerunt me gratis.* Porro in-  
clinare aurem, significat obedienter, & hu-  
militer audire, quando dicitur populo, incli-  
na aurem tuam; sed cum dicitur Deo, incli-  
na aurem tuam, significat clementer, & mi-  
sericorditer audire S. Augustinus hunc pri-  
mum versiculum tribuit Deo, non Dauidi;  
quia Deus legem suam dedit populo, non  
Dauid. Sed, vt diximus, hic non agitur de  
lege proprie dicta, sed sermone hortatorio.  
S. Hieronymus hunc eundem versiculum  
vult esse verba Christi, non Dauidis:  
quia S. Matthaeus cap. 13. scribit, Christum  
loqui solitum in parabolis, vt adimplere-  
tur, quod scriptum est, *Aperiam in*  
*parabolis os meum, eructabo abscondita à*  
*constitutione Mundi: quae verba habentur*  
*in secundo versiculo huius Psalmi: sed S.*  
*Matthaeus allegauit hunc locum, non vt o-*  
*stenderet, verba huius Psalmi esse verba*  
*Christi, non Dauidis: sed vt significaret, Da-*  
*uidem loquentem in parabolis figuram fuisse*  
*Christi, qui in parabolis loquuturus erat:*  
*quemadmodum cum Ioannes dicit cap. 19.*  
*Facta sunt haec vt Scriptura impleatur. Os*  
*non comminuetis ex eo: non vult negare*  
*de agno Paschali dicta esse verba illa. Exod.*  
*12. Os non comminuetis ex eo: sed indicare*  
*vult, agnum paschalem figuram Christi*  
*fuisse, & ideo Deo prouidente factum esse,*  
*vt non frangerentur crura Christi crucifixi.*



quando conſracta ſunt crura duorum latro-  
num, qui cum ipſo crucifixi fuerant. Quod  
autem nos diximus, ſecuti Theodoretum ex  
veteribus, & multis recentioribus, verba hu-  
ius verſiculi, vt etiam ſequentium, eſſe Da-  
uidis, colligitur ex tertio verſiculo, vbi Pro-  
pheta continuans ſermonem ſuum addit,  
*Quanta audiuiſimus, & cognouiſimus ea*, &  
*Patres noſtri narrauerunt nobis*, quæ certe  
neque Deo, neque Chriſto conueniunt.

II. *Aperiam in parabolis os meum, lo-  
quar propoſitiones ab initio.*

Hæc eſt ratio, cur Dauid petat attente, &  
humiliter audiri verba ſua, quia videlicet  
verba huius Pſalmi continent res obſcuras,  
& ſecretas, quæ non poſſunt intelligi, niſi at-  
tente, & humiliter audiantur. Per parabolas  
intelliguntur hoc loco ſimilitudines, ſive  
prouerbia, quæ breuia, & metaphorica eſſe  
ſolent. Per propoſitiones intelliguntur ænig-  
mata, quæ obſcuriſſima ſunt, id enim ſigni-  
ficat vox hebraica, *chidoth*, & græca  
*ᾠδὴ μυστήρια*, vt perſpicuum eſt ex cap. 14. Iu-  
dicum, vbi ænigma illud Sampſonis, *Ne co-  
medente exiit cibis*, & *de forti egreſſa eſt  
dulcedo*: vocatur hebraice, *chida*, & græcè  
problema. Multa ſunt autem in hoc Pſalmo  
prouerbia, & ænigmata, vt ſuis locis videbi-  
mus: ſed illud potiſſimum ænigma hic ſigni-  
ficare videtur, quo per Regnum Dauidis ſi-  
guratur Regnum Chriſti, & per montem  
Sion adumbratur Eccleſia. Per illud, ab ini-  
tio, ſi corticem Pſalmi reſpiciamus, videtur  
intelligi tempus liberationis populi à capti-  
uitate Ægyptiaca, quo tempore cœpit po-  
pulus Iſrael ſub Moyſe formam habere Rei-  
publicæ, & regi legibus, & iudicijs. Sic enim  
habetur verſu ſexto, *Et ſuſcitauit testi-  
monium in Iacob, & legem poſuit in Iſrael*: ſed  
ſanctus Matthæus cap. 13. citans hunc locum,  
declarat hoc initium intelligendum eſſe de  
initio Mundi, dicens, *Vt adimpleretur quod  
ſcriptum eſt. Aperiam os meum in parabolis,  
eructabo abſcondita à conſtitutione Mundi.*  
Itaque ſenſus eſt, Proferam ſententias, quæ  
fuerunt abſconditæ, & quaſi ænigmata à  
principio Mundi: quamuis enim myſteria

Chriſti omni tempore prædicta, & adum-  
brata fuerint; tamen velata erant, & pauciſ-  
ſimis aperte reuelata. De qua re ſic loquitur  
Apoſtolus ad Eph. 3. *Mihi autem omnium  
Sanctorum minimo data eſt gratia hæc, in gē-  
tibus euangelizare inueſtigabiles diuinitas  
Chriſti, & illuminare omnes, quæ ſit diſpen-  
ſatio ſacramenti abſconditi à ſeculis in Deo.*  
Proprie autem S. Matthæus dixit, *eructabo*:  
nam vox hebraica hoc loco poſita, *abigab*,  
non ſignificat loqui quocumque modo, ſed  
ebullire, profundere, ex imo corde proferre:  
quod per vocem eructare ſatis aperte expli-  
catur. ruſtus. n. ex plenitudine oritur.

*Quanta audiuiſimus, & cognouiſimus  
ea: & Patres noſtri narrauerunt nobis.*

*Non ſunt occultata à filiis eorum in  
generatione altera.*

*Narrantes laudes Domini, & virtu-  
tes eius, & mirabilia eius quæ fecit.*

Narraturus hiftoriam rerum geſtarum,  
ſub quibus tegebantur myſteria abſcondita  
à conſtitutione Mundi; docet eam hiftoriam  
accepiſſe ſe à Patribus, qui & ipſi à maiori-  
bus ſuis acceperant. Loquar, inquit, propoſi-  
tiones ab initio, quanta videlicet audiuiſimus,  
& cognouiſimus: quoniam Patres noſtri nar-  
rauerunt nobis, tum ſcriptis literis, tum ore  
proprio: non enim occulta eſſe voluerunt ea  
filijs ſuis, quos poſt ſe in generatione altera  
relinquebant: qui quidem Patres narrantes  
erant laudes Domini, & virtutes eius, id eſt,  
potentiam eius admirabilem, & mirabilia  
opera, quæ fecit: ob quæ digniſſimus eſt  
omni laude. Illud, quanta, in hebræo eſt,  
quæ; quare in græco, & latino codice poni-  
tur, quanta, pro, quantacumque, vel quot-  
cumque. Illud, ea, redundat apud latinos, ſed  
vſitate ponitur apud hebræos. Illud, *Et pa-  
tres noſtri*, videtur poſitum, pro, Nam Patres  
noſtri. Si quidē, &, ſæpiſſime vſurpatur apud  
hebræos, pro, enim, vt alias admonuiſimus. Il-  
lud, non ſunt occultata, non repugnat verbis  
S. Matthæi, *Eructabo abſcondita*: nam res ge-  
ſtæ non ſunt occultatæ à filiis narrantium  
eas: ſed myſtica ſignificatio abſcondita erat  
ab eis



ab eis. Denique illud, *narrantes*, coniungitur cum nomine, *Patres*, vt S. Augustinus notauit: ac per hoc verba interpolita deberent claudi per parentheſim hoc modo. *Patres nostri narrauerunt nobis* (non ſunt occultata à filiis eorum in generatione altera) *narrantes laudes Domini*, &c. poſſet etiam illud participium, *narrantes*, coniungi cum pronomine ſubintellecto, hoc modo. Nos igitur narrantes erimus laudes Domini, & virtutes eius, &c.

Et ſuſcitauit teſtimonium in Iacob, & legem poſuit in Iſrael.

Quanta mandauit Patribus noſtris nota facere ea filiis ſuis, vt cognoscat generatio altera.

Filij qui naſcentur, & exurgent, & narrabunt filiis ſuis.

Hic incipit narrare geſtas à Deo, quas à Patribus accepit: ac primo loco ponit, quod Deus dederit populo Iſraelitico legem, & mandata per Moſem: & iuſſerit eam legem, & mandata tradi filiis à parentibus, & ſic propagari ad poſteritatem. Illud, & potuiſſet omitti, vt S. Hieronymus omiſit: nam habetur quidem in hebræo, ſed nihil coniungit. Additur enim ornatus gratia non ſolum in principio periodorū, ſed etiā in principio librorum, vt initio Leuitici, Numeri, Ioſue, Ruth, Ezechielis, & aliorum. Illud, *ſuſcitauit*, ſumptum eſt ad verbum ex hebræo, ſed potuiſſet etiam verti, ſtare fecit, ſive conſtituit, ſive poſuit. Vox, teſtimonium, nihil aliud hoc loco niſi legem ſignificat. Vocatur autem lex Dei teſtimonium, quia teſtificatur hominibus quæ ſit voluntas Dei, vt ſuſius diximus in explicatione Pſalmi decimo-octauo, verſiculo octauo. Itaque idem omnino eſt, *ſuſcitauit teſtimonium in Iacob*, eū eo quod ſequitur, *Legem poſuit in Iſrael*, id eſt, dedit Deus legem ſuam filiis Iacob, qui & Iſrael dictus eſt. Illud, *quanta mandauit*, in hebræo eſt, quæ mandauit: proinde vox, *quanta*, accipienda eſt, pro quantacunque, ſive quocunque: ex quo intelligimus no-

mine legis ſignificari hoc loco non ſolum legem Decalogi, ſed omnia mandata moralia, ceremonialia, & iudicialia, quæ habentur in quinque libris Moſis.

Vt ponant in Deo ſpem ſuam, & non obliuiſcantur operum Dei, & mandata eius exquirant.

Ne ſiant ſicut Patres eorum generatio praua, & exaſperans.

Generatio, quæ non direxit cor ſuum, & non eſt creditus cum Deo ſpiritus eius.

Explicat Propheta, cur Deus legem dederit populo ſuo, & mandauerit, vt parentes docerent filios ſuos, & illi nepotes Patrum ſuorum. Ratio enim fuit, vt filij Iſrael non ſperarent in Dijs falſis, & idolis gentium, ſed in Deo vero, qui legem ſanctam de cælo illis dederat, non ſine ingentibus prodigijs: nec non vt nunquam obliuiſcerentur mirabilem operum Dei, quæ fecit in liberatione eorum de ſeruitute Pharaonis. Præterea vt ſollicite quærerent quid vellent ab eis Deus, atque id opere impleant. Denique vt non imitarentur ingratitudinem, & infidelitatem maiorum ſuorum, qui affectu maximis beneficijs à Deo per Moſem, ingratiffimi fuerunt. Nam & in Ægypto cum eſſent, ægre adduci potuerunt, vt crederent Moſi: & egreſſi de Ægypto, ſæpiſſime defecerunt ab obedientia Moſis, & Dei, aſidue murmurantes, & (quod grauius eſt) vitulos aureos adorantes. Illud, generatio, quæ non direxit cor ſuum: ſignificat, populum hebræorum, non habuiſſe cor directum firmiter ad Deum, ſed ad varia auxilia reſpexiſſe. Illud, autem, & non eſt creditus cum Deo ſpiritus eius, clariuſ eſt, in hebræo codice: ſic enim verti poteſt ad verbum, Et non fuit fidelis ad Deum ſpiritus eius. Vox autem latina accipienda eſt in ſignificatione non paſſiua, ſed actiua, ac ſi eſſet deponentis coniugationis. Non eſt creditus cum Deo, id eſt, non credidit Deo ſpiritus eius: ſic enim exponit S. Auguſtinus. vel accipiendum eſt verbum, *creditus*, pro *fidelis*, vt accipiunt verbum Græcum *πίστευον*, Theodoretus, Eu-

IX.

X.

XI.



thymius. Itaque sensus erit, non fuit fidelis spiritus populi cum Deo, quia sæpe defecit à fide, & obedientia.

XII.

*Filij Ephrem imitantes & mittentes arcum, conuersi sunt in die belli.*

Plerique notari putant in hoc versiculo pugnam aliquam infelicem Hebræorū de tribu Ephraim: sed neque facile est inuenire in diuinis literis, quæ illa pugna fuerit: neque credibile est, Prophetam quasi ex abrupto inferere voluisse hoc loco particulare aliquod factum, cum generatim describit vitia totius populi de Ægypto mirabiliter educti, ac de seruitute liberati. Igitur probabilis est, per quandam similitudinem explicari quod dictum est, populum Hebræū non fuisse constantem in fide, & obedientia Dei; vt sensus sit. *Filij Ephrem*, id est, Israelitæ similes fuerunt militibus. incipientibus præliari cum hostibus, & mox dimisso prælio terga vertentibus, sic enim Israelitæ in deserto, non semel promiserunt, se Deo parituros, & facturos quæcunque ille mandasset: & statim mutata voluntate cogitabant de reditu in Ægyptum, & contra Deum & Moysem murmurabant. Nominat autem Dauid filios Ephrem, id est, tribū Ephraim, & per illam intelligit totum cœtum Israelitarum: quia tribus Ephraim erat numerosissima, & potentissima post tribum Iuda: & per hoc æmula tribui Iuda: & in Scripturis vt plurimum reprehenditur tribus Ephraim, & laudatur tribus Iuda; & ideo mala vniuersi populi describuntur Potius sub nomine Ephraim, quam sub nomine aliarum tribuum. Et in fine huius Psalmi dicit, tribum Ephraim non elegit sed elegit tribum Iuda. Vide Oseam Prophetam.

XIII.

*Non custodierunt testamentum Dei, & in lege eius noluerunt ambulare.*

XIV.

*Et obliui sunt benefactorum eius, & mirabilium eius, quæ ostendit eis.*

XV.

*Coram Patribus eorum fecit mirabilia in terra Ægypti, in campo Taneos.*

Explicat quod metaphorice dixerat, filios Ephraim, id est, Israelitas, conuersos fuisse

fuisse retrorsum: nam cum professi essent, se obedituros Deo, non seruauerunt pactū, nec legem Dei impleuerunt, & cito obliui sunt beneficiorum Dei, & mirabilium operum, quæ Deus fecerat in Ægypto pro ipso, quæque à Patribus suis narrari audierant. Illud, *non custodierunt testamentum Dei*, significat, non steterunt promissis, siue non seruauerunt pactum: nam in Hebræo est vox, *berith*, quæ significat pactū: sed LXX. Interpretes verterunt, *testamentum*, vt alias sæpe diximus. Illud, *in campo Taneos*, significat in planitie Ægypti, cuius regia dicitur Tanis. Mirabilia enim, quæ fecit Moyses coram Pharaone, non facta sunt in loco obscuro, sed in loco celeberrimo, & apertissimo, in agro videlicet Urbis Regiæ.

*Interruptit mare, & perduxit eos, & statuit aquas, quasi in vires.* XVI.

*Et deduxit eos in nube diei, & tota nocte in illuminatione ignis.* XVII.

*Interruptit petram in Eremo, & adauit eos velut in abyssu multa.* XVIII.

*Et eduxit aquam de petra, & deduxit tamquam flumina aquas.* XIX.

*Et apposuerunt adhuc peccare ei in iterum, excitauerunt excelsum in iniquo.* XX.

Posteaquam attigerat Dauid mirabilia facta in Ægypto coram Pharaone: describit alia facta in egressu, id est, diuisionem maris rubri, vt transiret populus sicco vestigio per medium maris: & alia patrata post egressum de Ægypto in solitudine, videlicet columnam nubis, quæ præeundo ostendebat iter per diem, & columnam ignis, quæ ostendebat iter per noctem; ac postea sitienti populo eductas aquas de petra in maxima copia. Addit vero Dauid. post hæc omnia mirabilia, populum incredulum iterum prouocasse Deum ad iracundiam in deserto iniquo ob aquæ penuriam. Quæ iterum educta est de petra, vt habetur. Num. 20. Nam illa prior eductio contigerat anno superiore, vt habetur Exod. 17. Illud.

*statuit:*



*statuit aquas quasi in vtre, significat Deum ea facilitate fecisse, vt mare consisteret, & non operiret Hebræos, qui per fundum maris inter faciebant, qua facilitate potest homo continere modicam aquam inclusam in vtre, vt non defluat in terram. Illud, in nube diei, potuisset clarius verti, in nube per diem: nam in Hebræo non habet formam genitiui. In Græco est quidem *in* genitiuo, sed accipitur pro ablatiuo, quo Græci carent. Illud, *veluti in abyssu multa*, significat ex petra fluxisse tantam cōpiam aquarum, ac si petra conuersa fuisset in lacum profundissimum, vel in magnum & profundum flumen, vt dicitur in sequenti versiculo: abyssus enim est profunditas magna. Denique illud, *& apposuerunt adhuc peccare*, potest referri ad secundam educationem aquæ ex petra; vt sensus sit, olim peccauerunt murmurantes ob inopiam aquæ, & Deus dedit illis aquam de petra, Exod. 17. & obliti illius miraculi apposuerunt secundo murmurare, & de potentia Dei debitare, ob similem aquæ penuriam, vt habetur Numer. 20. vbi rursum dedit eis Deus aquam de petra. Potest etiam, vt alij volunt, coniungi cum sequenti versiculo, vt commemoretur peccatum murmurationis de inopia panis, non de penuria aquæ. Sed prior expolitio mihi magis placet, tum propter vocabulum, *in aquoso*, quod denotat carentiam aquæ; tum ne desit in hoc Psalmo memoria peccati illius celeberrimi, quo populus bis murmurauit contra Deum & Moysen ob aquæ penuriam. Et secundum hanc expositionem illa verba, *& eduxit aquam de petra*, continent repetitionem sententiæ versiculi superioris: non autem narrationem secundæ educationis aquæ ex petra.*

XXI. *Et tentauerunt Deum in cordibus suis,*  
XXII. *vt peterent escas animabus suis.*

*Et male locuti sunt de Deo: dixerunt,*  
XXIII. *Nunquid poterit Deus parare mensam in deserto?*

*Quoniam percussit petram, & fluxerunt aqua, & torrentes inundauerunt.*

*Nunquid & panem poterit dare, aut parare mensam populo suo?* XXIV.

*Ideo audiuit Dominus & distulit, & ignis accensus est in Iacob, & ira ascendit in Israel.* XXV.

*Quia non crediderunt in Deo, nec sperauerunt in saluari eius.* XXVI.

*Et mandauit nubibus de super, & ianuas cæli aperuit.* XXVII.

*Et pluit illis Manna ad manducandum, & panem cæli dedit eis.* XXVIII.

*Panem Angelorum manducauit homo, cibaria misit eis in abundantia.* XXIX.

*Transsulit Austrum de cælo, & induxit in virtute sua Africum.* XXX.

*Et pluit super eos sicut puluerem carnes, & sicut arenam maris volatilia penata.* XXXI.

*Et ceciderunt in medio castrorum eorum circa tabernacula eorum.* XXXII.

*Et manducauerunt, & saturati sunt nimis: & desiderium eorum attulit eis, non sumi fraudati à desiderio suo.* XXXIII.

Coniungit Propheta beneficium panis cælestis cum beneficio aquæ productæ ex petra: quoniam hæc erat figura insignis passionis Christi, & sacrosanctæ Eucharistiæ; vt explicat Dominus ipse Ioan. 6. & Apostolus 1. Corinth. 10. Aqua enim ex petra, est sapientia ex stultitia. Non enim minus contraria est sapientia stultitiæ, quam aqua res mollis & fluida petræ arenti & duræ: sapientia ex stultitia est mysterium Crucifixi. Christus enim crucifixus, id est, petra percussâ, gentibus stultitia erat & Iudæis scandalum: & tamen hominibus fide illustratis producit altissimam sapientiam. Et quia non cognouit mundus per sapientiam Deum, placuit Deo per stultitiam prædicationis saluos facere credentes. Panis autem de cælo verus, non erat manna pluens ex cælo æreo; sed caro Christi, qui de cælo cælorum







XXXIV. *Adhuc esca eorum erant in ore ipso-  
rum: & ira Dei ascendit super eos.*

XXXV. *Et occidit pingues eorum, & electos  
Israel impedivit.*

XXXVI. *In omnibus his peccauerunt adhuc, &  
non crediderunt in mirabilibus eius.*

XXXVII. *Et defecerunt in vanitate dies eorum,  
& anni eorum cum festinatione.*

XXXVIII. *Cum occideret eos, quarebant eum,  
& reuertebantur, & diluculo veniebant  
ad eum.*

XXXIX. *Et rememorati sunt, quia Deus adiu-  
tor est eorum, & Deus excelsus redemptor  
eorum est.*

XL. *Et dilexerunt eum in ore suo, & lingua  
sua mentiti sunt ei.*

XLI. *Cor autem eorum non erat rectum cum  
eo, nec fideles habiti sunt in testamento  
eius.*

Demonstrat in his versiculis Propheta, Deum magno miraculo satisfecisse desiderio Hebræorum, ut ostenderet potentiam suam: sed non dimisisse impunitam infidelitatem & contumaciam eorum: Hebræos autem tum ob miraculum, tum ob flagellum conuersos fuisse ad obedientiam & fidem, sed non stabili corde, neque perseveranter, ut par erat. *Adhuc*, inquit, *esca erant in ore eorum*, id est, nondum consumplerant coturnices, & ira Dei excitata est aduersus eos, & occidit ex eis partem maximam, ita ut appellaretur locus ille, sepulchra concupiscentiæ, ut dicitur Numer. 11. Quomodo eos Deus occiderit, Scriptura non docet, sed credibile est, morbo aliquo ex nimia auaritia & satietate comedentium exorto. Occidit autem Deus præcipue pingues & electos, id est, magis deditos voluptatibus, & iuuentute ac viribus robustiores: quos electos dicit impeditos, quia morbus deciecit eos, & impedivit, ne à morte fugere possent, quamuis aliqui robustissimi essent. Hoc autem illis accidit, quia peccauerunt in

Deum infidelitate sua, non credentes mirabilia illa à Dei omnipotentia fieri, sed eas accidis, ut coturnices ad eos deferrentur. Ideo morte puniti sunt tanta velocitate, ut defecerint dies eorum in vanitate, id est, velut fumus, aut umbra, quæ celerrime transit, & vestigium nullum relinquit. Ipsi autem cum flagellaretur à Deo, & morte afficerentur, redibant ad cor, & querebant adiutorium Dei, & diluculo, id est, continuo, statim, cum primum flagellum sentire inciperent, veniebant supplices ad misericordiam Domini implorandam: & tunc ad memoriam reuocabant beneficia Dei priora: sed non erat stabilis & vera conuersio eorum, sed metu extorta & ficta: nam ore quidem amorem & deuotionem erga Deum profitebantur, sed mentiebantur, quia cor eorum non erat vere directum ad Deum, neque fideles permanebant in seruanda promissione & pacto cum Deo inito. Vtinam non imitaremur & nos Christiani hanc Hebræorum inconstantiam! quam multi enim sunt ex nobis, qui in periculo vitæ constituti promittunt & fouent Deo & Sanctis eius morum emendationem, & periculo euitato, redeunt ad pristinam vitiorum consuetudinem: sed Deus non irridetur, & qui tales sunt, non effugient iudicium Dei.

*Ipse autem est misericors, & propitius fiet peccatis eorum: & non disperdet eos.* XLII.

*Et abundauit ut auerteret iram suam, & non accendit omnem iram suam.* XLIII.

*Et recordatus est quia caro sunt, spiritui vadens, & non rediens.* XLIV.

*Quoties exacerbauerunt eum in deserto? in iram concitauerunt eum in iniquo.* XLV.

*Et conuersi sunt, & tunc auerunt Deum, & sanctum Israel exacerbauerunt.* XLVI.

*Non sunt recordati manus eius, die qua redemit eos de manu tribulantis.* XLVII.

Con-



Confert nunc Propheta bonitatem Dei cum nequitia hominum, ac dicit, Deum quidem flagellasse populum suum, sed non esse oblitum misericordis naturæ suæ: & ideo non tam seuerè in illos animaduertisse, ut eorum peccata merebantur. Nam *propitius erit peccatis eorum, & non disperdet omnino populum suum*. Ipsi quidem digni erant ultimo exterminio, sed misericordia Dei fecit, ut aliqui remanerent: ut reuera ex numero eorum, qui exierant ex Ægypto, duo remanserunt Iosue & Caleb: qui figuram gerébant Electorum, qui salui fient: nam, ut Apostolus loquitur ad Roman. 11. *Non repulit Deus plebem suam, quam præsciuit: sed reliquia secundum electionem gratia salua facta sunt*. Itaque non repugnat hic versiculus dispersioni Hebræorum, quam videmus: nam impleta est hæc promissio in Apostolis, qui ex Hebræis erant; & non solum dispersi non sunt, sed collegerunt multitudinem magnam Deo in populum electum: de quo prophetauit Osè. cap. 1. & 2. & explicat Apostolus Petrus 1. Epist. cap. 2. *Qui aliquando non populus Dei, nunc autem populus Dei; qui non consecuti misericordiam, nunc autem misericordiam consecuti*. Pergit Propheta, ac dicit: *Et abundauit ut auerteret iram suam*, id est, abundanter & copiose auertit iram suam, quia multum remisit de pœna, quam populi peccata merebantur: & hoc modo temperauit, siue auertit iram, quia *non accendit omnem iram suam*, ut iuste facere potuisset. *Et recordatus est, quia caro sunt, spiritus vadens, & non rediens*: accessit ad rationem miserationis naturæ hominis post peccatum primi hominis infirma & mortalis, obnoxia carnalibus concupiscentiis. Ipse enim nouit figmentum nostrum, quod caro sumus, id est, carnales, infirmi, ac debiles; & quod spiritus sumus vadens, & non rediens, id est, vitam habemus mortalem, quæ continuo progreditur à pueritia ad iuuentutem, & non reuertitur ad pueritiam: progreditur à iuuentute ad senectutem, & non reuertitur ad iuuentutem, sed breui compendio tendit ad mortem. Itaque similis est floribus,

aliisq; rebus caducis: non autem Soli, & Lunæ, & stellis, quæ in circulos suos reuertuntur, & semper sunt eadem, quia solidæ sunt & æternæ. Non desunt qui velint, hoc loco per *spiritum*, intelligi animum, qui exit de corpore per mortem, & non reuertitur vi sua ad corpus. Sed non videtur ad rem præsentem facere tractatio de resurrectione, ubi solum describitur infirmitas & breuitas humanæ vitæ. Proinde hoc loco per *spiritum* intelligendus est spiritus vitalis corporis nostri, siue corporalis vita, quæ progrediendo consumitur, & mutabilis atque instabilis est. Quod autem sit talis vita hominis, probat Propheta sequentibus versiculis. *Quoties, inquit, exacerbauerunt eum in deserto? in iram concitauerunt in inagnoso? in stabilitate sua videlicet nunc promittendo fidem & obedientiam; nunc contra obloquendo & recalcitrando: nam conuersi sunt à bono proposito & promissis, & tentauerunt Deum*, experiri volentes an vere Deus omnipotens esset: & hoc modo *sanctum Israël*, id est, Deum *exacerbauerunt*. Vocatur autem Deus Israël, *sanctus*, non solum à Dauide, sed etiam ab Isaia in plurimis locis; quoniam solus Deus verus est proprie sanctus, id est, purus & inuiolabilis: Dij enim gentium immundi Dæmones sunt. Denique tanta fuit mutabilitas & stultitia Hebræorum, quos Deus eduxit de Ægypto, ut statim obliuisci signorum & prodigiorum maximorum & plurimorum, quæ manus Dei fecit, cum eos de seruitute Ægyptiaca liberaret.

*Sicut posuit in Ægypto signa sua, & prodigia sua in campo Taneos.* XLVIII

*Et conuertit in sanguinem flumina eorum, & imbres eorum ne biberent.* XLIX

*Misit in eos coenomyiam, & comedit eos; & ranam, & disperdidit eos.* L

*Et dedit erugini fructus eorum, & labores eorum locustæ.* LI

Et



LII. Et occidit in grandine vineas eorum,  
& moros eorum in pruina.

LIII. Et tradidit grandini iumenta eorum,  
& possessiones eorum igni.

LIV. Misit in eos iram indignationis suae,  
indignationem & iram, & tribulationem  
immissiones per angelos malos.

LV. Viam fecit semita irae suae: non peper-  
cit à morte animabus eorum, & iumenta  
eorum in morte conclusit.

LVI. Et percussit omne primogenitum in  
terra Aegypti: primitias omnis laboris eo-  
rum in tabernaculis Cham.

LVII. Et abstulit sicut oves populum suum,  
& perduxit eos tanquam gregem in de-  
serto.

LVIII. Et eduxit eos in spe, & non timuerunt,  
& inimicos eorum operuit mare.

Occasione versiculi quadragesimi septi-  
mi, vbi dixerat Propheta, non fuisse recor-  
datos Hebræos mirabilium, quæ fecit Deus  
cum educeret eos de Aegypto: describit his  
vndecim versiculis signa & prodigia, quæ fe-  
cit Deus aduersus Pharaonem, donec tan-  
dem cum exercitu suo demersit in ma-  
re. Quæ omnia narrantur in Exodo à cap. 7.  
ad 14. Porro David non meminit omnium  
signorum, sed præcipuorum; neque ordine  
illa enumerat, sed vt sibi visum est. Sic igi-  
tur loquitur: *Non sunt recordati* Hebræi in  
deserto *manus Domini*, id est, potentiae vel  
operis Domini, quo liberauit eos de manu  
Pharaonis tribulantis. *Sicut posuit in Aeg-  
ypto signa*, id est, non sunt recordati, quem-  
admodum statuerit Deus ingentia mira-  
cula, signa potentiae suae in Aegypto, ac po-  
tissimum in parte nobiliore Aegypti, vbi est  
Tanis Regia Pharaonis. *Et conuertit*, id est,  
quia conuertit in sanguinem flumina eorum,  
& imbres eorum ne biberent. De hoc si-  
gno scribit Moyses Exod. cap. 7. Vocat  
Propheta flumina Aegypti varios ramos  
Nili fluminis, qui per Aegyptum fluunt:  
per imbrem non intelligitur pluuia, quæ in

Aegypto videri non solet, sed ponitur im-  
ber pro aqua, species videlicet pro genere.  
Quomodo Virgilius libr. 1. Aeneidos dixit:  
*Accipiunt inimicum imbrem, remigesq; fa-  
tiscent.*

Vbi per imbrem intelligit aquam mari-  
nam, quæ in nauim per rimas ingrediebatur.  
Itaque David more suo idipsum bis repetit,  
& quod in priore parte versiculi vocauit *flu-  
mina*, in posteriore vocat *imbrem*. *Misit*  
*in eos cænomyiam*, & comedit eos; & ranam,  
& disperdidit eos, de hoc agitur Exodi c. 8.  
Vulgaris quæstio hic est, an sit legendum  
*cænomyia*, id est, musca communis, siue o-  
mne genus muscarum, an *cynomyia*, id est,  
musca canina. Vulgata editio correctæ ha-  
bet, *cænomyiam*, cui fauet S. Hieronymus  
tum in versione sua ex Hebræo, tum in epi-  
stola ad Suniam & Fretellam. Græci tamen  
libri communius habent, *cynomyiam*, & sic  
legit & exponit idem S. Hieronymus in com-  
mentario. Vox Hebræa, *bharob*, missionem  
significat, & satis conuenit lectioni vulgatæ  
correctæ: sed res non est magni momenti.  
*Et dedit ærugini fructus eorum*, & labores eo-  
rum locustis, hoc signum habetur Exod. 30.  
vbi fit tantum mentio locustarum: proinde  
per æruginem intelligendæ sunt locustæ, vel  
bruchii (vt vertit S. Hieronymus) quæ ani-  
mantia deuorant herbas ad modum ærugi-  
nis. Itaque nomen æruginis, quod proprie  
significat vitium ætis, hoc loco accipitur me-  
taphorice. *Et occidit in grandine vineas eo-  
rum*, & moros eorum in pruina, de hac re agi-  
tur Exod. 9. vbi non fit mentio pruinae, sed  
solum grandinis. S. Hieronymus vertit, &  
*scymoros eorum in frigore*: vbi per frigus  
posset intelligi frigus grandinis, vt sit repeti-  
tio eiusdem rei: vel certe grandine & pruina  
afflixit Deus vineas & arbores Aegypti: sed  
David addidit, quod Moyses omiserat. *Et*  
*tradidit grandini iumenta eorum*, & posses-  
siones eorum igni. Grando enim cum igne  
fulgurum & fulminum descendebat, nec so-  
lum herbas, sed etiam iumenta perdebant, vt  
ibidem legimus. *Misit in eos iram indignatio-  
nis suae*, indignationem & iram, & tribu-  
lationem, immissiones per Angelos malos.

K k k

In

ערב



In hoc versiculo generatim complectitur Propheta omnes alias plagas, quas omiserat, ut vlcera, vesicas, & alia id genus, & simul attingit postremam & grauissimam plagam, occisionem videlicet primogenitorum omnium, quæ facta est per Angelum percutientem, ut dicitur Exodi 12. *Non sinam*, inquit, *percussorem ingredi domos vestras*, &c. *Misit iram indignationis suæ*, id est, effectum iræ furoris sui, tribulationem videlicet magnam, & hoc idem repetens, ait: *Iram & indignationem*, id est, effectum iræ & furoris, qui effectus est tribulatio. *Immissiones per Angelos malos*, id est, quæ tribulatio fuit per immisionem Angelorum malorum. Ex quo intelligimus, plagas Ægypti, ac præcipue occisionem primogenitorum factas esse opera Angelorum, qui non nocent, nisi quantum Deus permiserit, cum Dei summi iudicis administrari sint. Possunt autem Angeli mali dici Angeli sancti, qui dicuntur mali ab effectu, quia puniunt quos Deus vult puniri. Possunt etiam dici Angeli mali, Dæmones impuri; qui sunt vere mali malam voluntatem gerentes. Deus enim vtrisque vtitur: nam per Angelos sanctos puniuit Sodomitas igne cælesti: & per Angelos impuros flagellauit Iobū igne pariter cælesti. Vide S. Aug. in hunc locum: *Viam fecit semita iræ suæ, non pepercit à morte animabus eorum*. Insignis metaphora est, quasi dicat: Ira diuina ultionem parans detinebatur à diuina misericordia, ne usque ad mortem descenderet: sed tandem remoto obice misericordiæ, *viam aperuit iræ suæ*, & non pepercit vita ipsorum à morte: sed occidit omnia primogenita hominum & iumentorum, quæ erant primitiæ laborum eorum, id est, Ægyptiorum: laborant enim plurimum homines in educandis filiis suis, & iumentorum suorum, sed primitiæ laboris erga primogenita exercentur: ac per hoc dicuntur primogenita *primitiæ laborum*. Illud, *in tabernaculis Cham*, significat in Ægypto. Cham enim fuit filius Noë, & Mizraim fuit filius Cham: & ab hoc filio Cham dicta est Ægyptus *Mizraim*. Itaque dicitur Ægyptus tabernaculum Cham à parente primi habitatoris & possessoris Ægypti. Et abstulit sicut

omnes populum suum: & perduxit eos sicut gregem in deserto. Occisus primogenitus Ægyptiorum dedit Pharaon facultatem Hebræis abundi ex Ægypto, ut habetur Exod. 12. Et tunc Deus eduxit populum suum ex Ægypto, & duxit in desertum Arabiam. Et eduxit eos in spe, & non timuerunt, id est, cum fiducia magna, & inimicos eorum operuit mare: quæ fuit vltima plaga Ægyptiorum, & in qua finem accepit captiuitas filiorum Israel, ut habetur Exodi 14.

Et induxit eos in montem sanctificationis suæ, montem quem acquisiuit dextera eius.

LIX

Et eiecit à facie eorum gentes, & sorte diuisit eis terram in funiculo distributionis.

LX

Et habitare fecit in tabernaculis eorum tribus Israel.

LXI

Et tentauerunt & exacerbauerunt Deum excelsum, & testimonia eius non custodierunt.

LXII

Et auerterunt se, & non seruauerunt pactum: quemadmodum patres eorum, conuersi sunt in arcum prauum.

LXIII

In iram concitauerunt eum in collibus suis, & in sculptilibus suis ad emulationem eum prouocauerunt.

LXIV

Transit nunc Propheta ad historiam libri Iosue & Iudicum, atque ostendit, fuisse Hebræos introductos à Deo in terram promissionis, quam vocat *montem sanctificationis suæ*, quia erat terra montuosa, & quam Deus sibi ipse sanctificauerat & dedicauerat, ut in ea coleretur à populo suo: dicit quoque eam terram acquisitam à Deo, quia Deus fecit euidentibus miraculis, ducere Iosue, ut Israël ita vincerent bello, & expellerent pristinos habitatores cultui Idolorum addictos. Addit vero Propheta, Hebræos in terram promissionis introductos non fuisse meliores Patribus suis, qui in deserto perierant: nam ipsi quoque tentauerunt & exacerbauerunt Deum seruientes Idolis, & verum Dei cultum deserentes.

reates.



rentes. Illud, *conuersi sunt in arcum prauum*, significat, eos imitatos esse arcum distortum, qui non iacit sagittas, quo iaciendæ sunt, sed in aliam partem, vbi non oportebat. Sic enim Hebræi promittebant, obseruantiam legis Dei, sed videbantur sagittas operum suorum dirigere ad cultum veri Dei; sed interim sacrificabant Diis alienis: id quod propriis verbis explicat Propheta in sequenti versiculo, cum ait: *In iram concitauerunt eum in collibus suis*, & *in sculprilibus suis ad emulationem eum prouocauerunt*: siquidem in excel. sis collibus, præsertim in montosis collocabant altaria Idolorum, ibique eis sacrificabant.

tabat inter homines, quia inde dabat responsa hominibus. *Et tradidit in captiuitatem virtutem eorum*, & *pulchritudinem eorum in manus inimici*, id est, permisit capi Arcam à Philistæis, quæ Arca erat virtus, id est, potentia & robur, & simul pulchritudo, id est, decor & gloria Israël. *Et conclusit in gladio populum suum*, & *hereditatem suam spreuit*, id est, permisit circumueniri & vndique circumdari gladiis hostium populum suum, quem elegerat sibi in hereditatem, id est, in populum peculiarem & proprium. *Iuuenes eorum comedit ignis*, id est, ardor belli, siue ignis iræ Dei consumpsit præstantissimos quoque, quales solent esse homines in flore iuuentutis: & *virgines eorum non sunt lamentata*, id est, occisus iuuenibus in bello, virgines eis desponsatæ non habuerunt, qui earum sortem lugerent, quoniam in communi strage quisque habuit, quod domi suæ lugeret. Itaque illud, *lamentata*, passivè accipiendum est, vt indicat S. Hieronymus, qui vertit: *Et virgines eius nemo luit*. Rabini legunt: *Et virgines eorum non sunt laudata*, carmine videlicet nuptiali. Sed vox Hebræa, *hullalu*, vtrunque significare potest, *desfleta*, & *laudata*, nos autem anteponimus LXX. Seniores, & S. Hieronymum omnibus Rabinis. *Sacerdotes eorum in gladio ceciderunt*, videlicet Ophni & Phinees filij Heli, qui nominatim referuntur inter mortuos, 1. Reg. 4. *Et vidua eorum non plorabantur*, id est, relictas vxores eorum nemo fuit qui desiendo consolaretur, quoniam, vt dictum est, omnes occupati erant in propriis sanguineis deplorandis, quos ruina communis oppresserat. In Hebræo & Græco habetur in futuro, *non plorabuntur*: sed S. Hieronymus intelligens futurum poni pro præterito, vertit, *non sunt desfleta*: & eodem modo noster Interpres vertit, *non plorabantur*.

*Et excitatus est tanquam dormiens Dominus, tanquam potens et apulatus a vino*  
*Et percussit inimicos suos in postero- ra, opprobrium sempiternum dedit illis.*

Kkk 2

Et

LXV. *Audiuit Deus & spreuit, & ad nihilum redegit valde Israel.*

LXVI. *Et repulit tabernaculum Silo, tabernaculum suum, vbi habitauit in hominibus.*

LXVII. *Et tradidit captiuitatem virtutem eorum, & pulchritudinem eorum in manus inimici.*

LXVIII. *Et conclusit in gladio populum suum, & hereditatem suam spreuit.*

LXIX. *Iuuenes eorum comedit ignis, & virgines eorum non sunt lamentata.*

LXX. *Sacerdotes eorum in gladio ceciderunt, & vidua eorum non plorabantur.*

Hic iam explicat Propheta ultionem diuinam in peccata populi sui; ac præcipue commemorat tempus illud, quo Philistæi fuderunt exercitum populi Dei, & Arcam Domini captiuam duxerunt Sacerdotibus occisis, qui eam custodiebant; quæ historia narratur in 1. Reg. c. 4. Ait igitur: *Audiuit Deus*, id est, cognouit peccata populi sui clamantia in cælum: & *spreuit populum suum*, tanquam inutilem, & tanquam morte dignissimum, *redegit valde ad nihilum*, id est, valde humiliavit, concessa victoria maxima hostibus eorum. *Et repulit tabernaculum Silo*, id est, abiecit tabernaculum, in quo erat Arca, quod tabernaculum tunc erat in Silo: & in quo tabernaculo Deus quodammodo habi-

ללל

LXXI.

LXXII.



- LXXIII. *Et repulit tabernaculum Ioseph, & tribum Ephraim non elegit.*
- LXXIV. *Sed elegit tribum Iuda, montem Sion, quem dilexit.*
- LXXV. *Et aedificauit sicut Vnicornium sanctificium suum in terra, quam fundauit in scacula.*
- LXXVI. *Et elegit Dauid seruum suum, & sustulit eum de gregibus ouium, de post factantes accepit eum.*
- LXXVII. *Pascere Iacob seruum suum, & Israel hareditatem suam.*
- LXXVIII. *Et paut eos in innocentia cordis sui, & in intellectu manu suarū deduxit eos.*

In hac postrema parte Psalmi, Dauid ostendit, Deo placuisse afflictionem populi sui, quatenus poena erat peccatorum, sed nō placuisse superbiam, & iniquitatem Philistinorum, qui eos, afflixerunt: & ideo vindictam ab ipso Deo sum, tam de Philistæis, vt narratur in eodem 1. lib. Reg. cap. 5. Deus enim sepe utitur malā voluntate impiorum ad aliquos puniendos, & deinde punit eosdem impios, non tam attendens quod per illos ipse fecit bonum, quam malam nocendi cupiditatem, quam in eis ipse non fecit. Addit deinde, noluisse Deum, vt tabernaculum esset amplius in Silo, ciuitate de tribu Ephraim, neque vt summa Imperij esset in tribu Ioseph, sed voluisse, vt tabernaculum statueretur in monte Sion, & Imperium pertineret ad tribum Iuda, & ex tribu Iuda Dauidem elegisse Regem populo suo: quod est vaticinium de Christo, & Ecclesia, vt initio Psal. diximus. Nam vt hoc loco diligenter obseruauit S. August. non repulit Deus Ioseph, & elegit Iudam ob meritum personarum. Nam Ioseph melior fuit multo, quā Iudas; siue castitatem, siue patientiam, siue sapientiam, siue prudentiam, siue dilectionē inimicorum consideres: sed elegit Iudam propter Dauidem, & Dauidem propter Christum, & Synagogam destruxit, vt Ecclesiam ædificaret. Sed ipsa verba explicemus,

*Et repulit tabernaculum Ioseph, & tribum Ephraim non elegit:* id est, prauauerunt Philistæi in Hebræos, non ob Philistæorum, potentiam, vel Domini impotentiam, sed quia dominus dormiebat: & dormiebat sopore graui: tamquam crapulatus à vino. Ebrietas enim alte dormire facit. Sed à sopore illo excitatus potentiam suam in Philistæos mirifice demonstrauit. Dicitur autem Deus dormire metaphorice, quando ita se gerit, ac si non aduertat iniurias, quas illi faciunt iniqui, & dicitur dormire vt crapulatus à vino, quando patienter agit erga grauissimos peccatores, ac si ita alte dormiat, vt non aduertat iniurias maximas contra se fieri, qualis iniuria fuit captiuitas Arcae. Non desunt, qui metaphoram ebrietatis ita explicent, vt sensus sit, Deū excitatum à somno potenter, & furiose egisse in aduersarios, vt solent ebrij, qui valentissimi, & audacissimi sunt, cum non aduertant, quid faciant. Sed non placet ista expositio; tum quia ebrietas facit quidem audaces homines, sed non potentes, imò debilitat potius, & qui à somno exurgunt non surgunt ebrij, sed sobrij: maneat ergo prior expositio, quæ S. Augustini est. *Et percussit inimicos suos in posteriora:* immisit enim morbum grauissimum, & pudendum in posteriora corporis Philistinorum, ac, vt Scriptura loquitur, in secretionem parte natum, vt simul cruciarentur dolore, & rubore, vt legitur 1. Reg. cap. 5. *Opprobrium sempiternum dedit illis,* quia prouidentia Dei fecit, vt ipsi Philistæi annos aureos appenderent arcae ad memoriam sempiternam morbi pudendi, quo Deus illos affecerat, 1. Reg. ca. 6. *Et repulit tabernaculum Ioseph,* id est, noluit deinceps tabernaculum sacrum, in quo seruabatur Arca, esse in Silo, quæ est ciuitas in tribu Ephraim, qui filius erat Ioseph, *Et tribum Ephraim non elegit:* id est, constitutus Regnum in populo suo: non elegit Regē ex tribu Ephraim, quæ erat vna ex duabus tribubus Ioseph, & quidem, numerosissima, & potentissima. *Sed elegit tribum Iuda, montem Sion, quē dilexit,* id est, elegit tribum Iuda, ex qua daret populo suo Principes: & elegit montem Sion, in locum tabernaculi.



bernaculi, & postea templi, in quo seruare-  
tur Arca, & fierent sacrificia. *Et edificauit  
sicut unicornium sanctificium suum in terra,  
quam fundauit in secula*, id est, edificauit  
Deus in monte Sion, siue in Hierusalem,  
quæ est terra duratura in æternum, sanctua-  
rium suum firmissimum, quasi cornu Mo-  
nocerotis. Hæc est parabola præcipua, &  
propositio, siue ænigma potissimum, quod  
initio Psalmi propheta promisit, æque e-  
nim sanctuarium testamenti veteris fuit fir-  
mum, vt cornu Monocerotis, nisi in typo  
sanctuarij testamenti noui: neque mons Si-  
on; aut Hierusalem fuit terra fundata in se-  
cula cum breui eueris fuerit; nisi in figura  
Ecclesiæ Christianæ, *aduersus quam porta in-  
feri non praualebunt*, & cuius religio & sa-  
cramenta non mutabuntur vsque ad Mundi  
consummationem. Vox, *unicornium*, græce  
*μονοκέρως*; in Hebræo legitur, *ramin*, quod  
significat excelsio, sed. Septuaginta, &  
S. Hieronymus non legerunt, *ramin*; sed, *re-  
min*, quod *monocerotus*. id est, bestias, quæ  
solum vnum cornu, sed firmissimum, & ro-  
bustissimum gerunt: & sine dubio hæc est  
vera lectio. *Et elegit Dauid seruum suum*, &  
*sustulit eum de gregibus ouium*, de post factan-  
tes accepit eum pascere *Iacob seruum suum*, &  
*Israël hereditatem suam*. Omisit Propheta  
Regnum Saulis, quia modicum duraturum  
erat, & quia quasi exortum fuit à Deo cla-  
moribus populi: sed Regnum Davidis po-  
suit, qui Christi figuram gerebat, & ex pro-  
pria Dei voluntate duraturum in æternum  
erat. Elegit ergo Dauid seruum suum, & su-  
stulit eum de humili loco, ne forte eius vir-  
tuti tribueretur tanta exaltatio. *Sustulit*, in-  
quam, *de gregibus ouium*, id est, de officio, &  
munere pastoritio. quod re ipsa exercebat,  
cum oues foetas sequeretur. Pascere *Israel  
seruum suum*, & *Iacob hereditatem suam*  
id est, transtulit de ministerio pascendi,  
oues, ad ministerium pascendi homi-  
nes: proposuit enim illum Regem populo  
suo, & hereditati suæ, quæ *Israel*, & *Iacob*  
appellatur. In Hebræo habetur, *Iacob popu-  
lum suum*, non vt nos habemus, *seruum suum*.  
Alioqui suspicantur Septuaginta Interpre-

tes vertisse λαόν, non δούλον. At cur non veri-  
similius sit: in hebræo olim fuisse *habdo*,  
seruum suum & postea successu temporis à  
sciolis mutatum in *hammo*, populum suum?  
In sensu nulla est dissensio. Populus enim  
Israeliticus, est populus Dei, & seruus Dei  
dici potest. *Et pauit eos in innocentia cordis  
sui*, & *in intellectibus manuum suarum de-  
duxit eos*, id est, optimam fuisse diuinam e-  
lectionem euentus probauit Dauid enim  
pauit, & rexit populum Dei in innocentia  
cordis, & sapientia operis: in innocentia cor-  
dis, quia cor durum, & immaculatum ge-  
rens non affectabat gloriam suam, sed Dei,  
non vtilitatem suam, sed populi, cupiebat  
non tam præesse, quam prodesse, pascere  
oues, non vt suas, sed vt Domini sui, vt mi-  
nister, non vt herus: in sapientia operis, vel;  
vt Dauid loquitur, *in intellectibus manuum  
deduxit populum*, quia considerate agebat,  
quicquid agebat, non temere, non sine con-  
silio, non absque maturitate. Quæ omnia et-  
iam si vtrunque Dauidi conueniunt, abso-  
lute tamen & perfecte non nisi Christo con-  
ueniunt. Alioqui non reprehenderetur in  
Scriptura Dauid, quod vxorem alienam  
concupierit, quod adulterium, & homici-  
dium perpetraverit, quod populum sine  
causa numerari voluerit, quod Miphibose-  
th inauditum damnauerit, & bona ipsius im-  
prudens calumniatori donauerit. Christus  
autem vere innocens corde, & sapiens in o-  
pere fuit, qui peccatum non fecit, nec in-  
ueniens est dolus in ore eius, 1. Petri 2. Quique  
audacter dicere poterat, *Quis ex vobis ar-  
guet me de peccato?* Ioan. 8.

PSALMVS LXXVIII.

Titulus, & Argumentum Psalmi.  
Psalmus Asaph.

**D**E hoc Titulo nihil dicendum occurrit:  
Argumentum est deploratio calamita-  
tis, quæ accidit Hebræis sub Antiocho, & cæ-  
teris Regibus tempore Machabæorum, vt com-  
muniter docent S. Aug. Theodor. Euthym. &



multi recentiorum, & ipse etiam auctor libri Machabaeorum primi cap. 7. allegat hunc Psalmum, tanquam vaticinium earum calamitatum. Potest tamē accommodari idem Psalmus, ut eum accommodat S. Augustinus, ad persecutiones, quas passa est Ecclesia à Regibus, & Imperatoribus paganis. In hoc Psalmo concordant textus Hebraici, Graeci, & Latini, & totus Psalmus facillimus est.

## EXPLICATIO PSAL. LXXVIII.

I. **D**us venerunt gentes in hereditatem tuam: polluerunt templum sanctum tuum, posuerunt Ierusalem in pomorum custodiam.

Alloquitur Propheta Deum; & in persona populi Dei, qui futurus erat tempore Machabaeorum, conqueritur de vastatione templi, & ciuitatis. Narrat autem hic Propheta Deo, nō ut eum doceat, quasi ignorantem, cum potius ab eo sibi reuelata didicerit: sed ut hac commemoratione moueat ipse se ad orandum ardentius. Deus, inquit, venerunt gētes, pagani videlicet Idololatrae, in hereditatem tuam, id est, in eam ciuitatē, & prouinciam, quam elegisti de toto orbe terrarum in propriam possessionem. Hereditas enim, & possessio in Scripturis pro eodem accipiuntur. Explicat deinde, ad quid venerint gentes in hereditatem Dei, Polluerunt, inquit, templum sanctum tuum. Quod factum est sub Antiocho, ut dicitur lib. 1. Machab. c. 1. tunc enim Idolum in templo collocatum est, & altaria prophanata, atque Idolis consecrata. Posuerunt Ierusalem in pomorum custodiam, id est, ipsam regiam ciuitatem adeo desolauerunt, ut non videretur amplius ciuitas, sed tugurium desertum, qualia sunt quae eriguntur ad custodiam pomorum in hortis, aut vineis, & pomis collectis deferuntur. Id accidisse sub Antiocho testatur lib. 1. Machab. c. 3. vbi sic legimus, Et Ierusalem nō habitabatur, sed erat sicut desertum, Vox Hebraea, pro qua habemus, pomorum custodiam, significat, vastationē, desolationem, desertum, & similia. Sed Interpretes Septuaginta, ut rem declararent per similitudinem, dixerunt, In pomorum custodi-

am, sanctus Hieronymus vertit, In aceruum lapidum. Sed melior videtur interpretatio prior, quam Latinus interpres secutus est. Ciuitas enim reducitur in aceruum lapidū, quando omnino destruitur, & lapides domorum in locum vnum colliguntur: at Ierusalem non ita funditus euerfa fuit, ut habitari non posset sed muri deiecti fuerunt, & ciuitas ex parte incensa, & habitatores fugati, ut habetur lib. 1. Machab. c. 1. Sed tamen adhuc retinebat formam ciuitatis, & habitari potuisset, ut colligitur ex eodem lib. 1. c. 3. & 4. proinde rectius comparatur pomorum custodiā, id est, tugurio semidiruto, & deserto, quam aceruo lapidum.

Posuerunt morticina seruorum tuorum escas volatilibus caeli: carnes sanctorum tuorum bestijs terrae.

Effuderunt sanguinem eorum, tanquam aquam in circuitu Hierusalem, & non erat qui sepeliret.

Deplorauit vastationem templi, & ciuitatis, nunc deplorat eandem hominum, & barbariem, ac feritatem hostium, qui cadauera sepeliri non patiebantur. Posuerunt inquit, morticina, id est, cadauera occisorum Iudeorum non dederunt sepulturae, sed exposuerunt in escam coruis, & canibus, Morticina proprie dicuntur cadauera eorum, qui morbo interierunt: tamen hoc loco extenditur vocabulum ad cadauera occisorum. Nam in sequenti versiculo explicatur, quae sint illa morticina cum additur, Effuderunt sanguinem eorum, id est, seruorum tuorum, siue sanctorum tuorum, id est, hominum tibi sanctificatorum per fidei professionem, In circuitu Hierusalem tanquam aquam, id est, in magna copia, sine defectu personarum, sine timore aliquo: & non erat, qui sepeliret: & ideo relinquebantur cadauera illa auiibus caeli, & bestijs terrae. Hoc impletum est tū in alijs multis, tum potissimum in illis sexaginta viris primarijs, quos vna die curauit occidi Alcimus prope Hierusalem, ut dicitur lib. 1. Machab. c. 7. Ibi n. citatur hic versiculus, vbi caedes illorum describitur.



IV. *Facti sumus opprobrium vicinis nostris, subsannatio, & illusio his, qui in circuitu nostro sunt.*

Deplorat nunc etiam infamiam, quæ ex persecutione illa est sequuta. *Facti sumus*, inquit, *opprobrium vicinis nostris*, id est, vicinis Regnis Idumæorum, Moabitarum, Ammonitarum; & aliarum gentium, quæ despiciebant, & irridebant Hebræos ut homines imbelles, & contemptibiles.

V. *Vsq; quo Domine irasceris in finem, accenditur velut ignis furor tuus?*

Videbat Propheta, iram Dei in populum suum accensam adeo vehementer, ut videretur periculum imminere, ne populus funditus interiret; ideo in persona populi precatur finem tantæ indignationis. *Vsq; quo?* inquit, *irasceris in finem?* id est, quousque crescet ira tua, & crescendo minabitur nobis ultimum exterminium. Id ipsum, repetens addit, *Vsq; quo accendetur velut ignis zelus tuus*; ubi comparat indignationem Dei, igni, qui nisi celeriter extingatur, crescere solet in immensum, & in cinerem omnia redigere: Per iram non intelligitur perturbatio, sed voluntas exigendi spiritualem castitatem, & puniendi eos, qui fornicantur ab ipso.

VI. *Effunde iram tuam in gentes, quate nō nouerunt, & in Regna, quæ nomen tuum non inuocauerunt.*

Orat, conuerti iram Dei in hostes populi sui, quasi, dicat, Nos etsi mali filij sumus, tamen filij sumus; te nouimus Deum verum, colimus, & inuocamus. *Effunde igitur potius iram tuam in hostes tuos, qui te non nouerunt*, id est, non habent pro Deo, & non inuocant nomen tuum, quia omnipotentem te esse nō credunt. Sed occurrit quæstio ex cap. 12. Lucæ, ubi dicitur, *Seruus qui non nouit voluntatem Domini sui, vapulabit paucis*; qui autē nouit, & non fecit, vapulabit multis. Respondet sanctus Augustinus, Euangelium loqui de seruis, qui sunt in eadē familia: inter eos enim grauius peccant, & seuerius puni-

untur, qui scientes peccant, quam qui peccant nescientes: sed vtriusque multo grauius peccant, & longe asperius puniendi sunt, qui de familia nō sunt, sed hostes iurati sunt, & seruunt creaturæ potius quam creatori, & familiam totam grauiissime persequuntur, quales erant illi, de quibus in hoc Psalmo agitur versiculo sequenti.

VII. *Quia: omiserunt Iacob, & locum eius desolauerunt.*

Non solum enim isti Deum non inuocant, verum etiam populum eius quasi panem consumpserunt, spoliantes, fugantes, interficientes, vel etiam minis, & terroribus in corpus suum traicientes per Fidei abnegationem: quomodo ē contratio dicitur S. Petro Act. 10. *Maccha, & manduca*, id est, in corpus Ecclesiæ recipe per conuersionem ad veram Fidem. *Et locum eius desolauerunt*, id est, ciuitatem Ierusalem desolantes in solitudinem redegerunt. In Hebræo habetur, *decorem eius, siue pulchram habitationem eius desolauerunt*.

VIII. *Ne memineris iniquitatum nostrarum antiquarū: cito anticipent nos misericordia tue, quia pauperes facti sumus nimis.*

Ne videretur populus Dei, dum hostes accusat, & dignos pœna esse iudicat, seipsum voluisse iustificare, quasi non meritis pœnas daret, & quasi potentia aduersariorum, non iustitia Dei attereretur, confitetur in hoc versiculo peccata sua, & parentum suorum, & ad misericordiam Patris, non iustitiam Iudicis appellat. *Ne memineris, inquit, iniquitatum nostrarum antiquarum*, id est, ne punias nos ob iniquitates antiquas, tum nostras, tum parentum. Solet enim Deus aliquando reddere iniquitatem patrū in filios in tertiam, & quartam generationem, ut dicitur Exod. 20. Imo & Dominus dicit Matth. 23. *Implete mensuram patrū vestrorum*. & paulo post, *Vi veniat super vos omnis sanguis iustus, qui effusus est super terram a sanguine Abel iusti vsque ad sanguinem Zacharia filij Barrachia*, & Nequē contraria est hæc sententia Ezechiel cap. 18. qui dicit, *Filius non portabit iniqui-*



*iniquitatum patris*, filius enim proprie puni-  
tur ob peccata sua, sed dicitur aliquando  
puniri ob peccata parentum quoniam Deus  
non puniuerit illum, quantum iuste eum  
punire potuisset, nisi iratus peccatis paren-  
tum. Quod autem filius non portet iniqui-  
tatem patris, nisi sequatur iniquitatem pa-  
tris; docent SS. Patres. Hieronymus in cap.  
18. Ezechielis, Augustinus in Psal. 118. Gre-  
gorius lib. 15. Moral. cap. 22. & Chrysosto-  
mus homil. 29 in Genes. *Cito anticipent in  
misericordia tua*, id est, iam ruimus in interi-  
tum, nisi velocissime misericordia tua præ-  
ueniat nos: anticipare enim hoc loco, est  
præoccupare, siue præuenire ultimam rui-  
nam, ad quam velocissime currimus: Addit,  
& declarat cur tanta celeritate auxilij sit o-  
pus, *Quoniam*, inquit, *pauperes facti sumus*;  
Vbi per *pauperes*, intelliguntur afflicti, hu-  
miliati, attenuati, egeni non solum diuitia-  
rum, sed etiam virium, & auxilij.

IX.

*Adiuua nos Deus salutaris noster; &  
propter gloriam nominis tui Domine li-  
bera nos, & propitius esto peccatis nostris  
propter nomen tuum.*

Explicat, quomodo misericordia Dei  
anticipet nos? explicat autem per modum  
orantis, non per modum docentis. *Adiuua*  
inquit, *nos Deus salutaris noster*, id est, anti-  
cipet nos misericordiae tuæ adiuuando nos  
in facienda iustitia, ad euitanda peccata fu-  
tura, & in agenda pœnitentia & expianda  
peccata præterita. Dicit autem, *adiuua*, vt  
ostendat, non tolli arbitrij libertatem per  
auxilium gratiæ, sed stabiliri: non enim pro-  
prie adiuuatur, nisi qui aliquid agit coope-  
rando gratiæ. Declarat deinde vtrumque.  
*Et propter gloriam nominis tui libera nos*, id  
est, non propter merita nostra, sed propter  
gloriam tuam libera nos à morte peccati  
futuri, quod facis dum adiuuas in facienda  
iustitia. *Et propitius esto peccatis nostris pro-  
pter nomen tuum*, id est, & propter eandem glo-  
riam tuam, non propter merita nostra re-  
mitte peccata præterita, quod facis dum ad-  
iuuas in agenda pœnitentia. Potest etiam  
sic exponi, & fortasse magis ad literam, *Ad-*

*iuua nos Deus salutaris noster* in hac præsen-  
ti calamitate, quod vt facias duo sunt necessa-  
ria, & vt liberares nos à persecutione, & vt  
ignoscas peccatis, propter quæ in persecu-  
tionem incidimus. Vtrumque autem peti-  
mus non propter iustitiam & merita nostra,  
sed propter nomen, & gloriam tuam.

*Nasorte dicant in gentibus, vbi est  
Deus eorum? & innotescat in nationibus  
coram oculis nostris.*

Ecce cur dixerit in præcedenti versiculo  
propter gloriam nominis tui; mirum, ne  
*forte dicant in gentibus, Vbi est Deus eorum*;  
id est, ne forte dicant gentes; sic enim habent  
Hebræi, & Græci codices; vel (quod est idē)  
ne dicatur inter gentes, *Vbi est Deus*, qui so-  
lebat adesse Iudæis, & blasphemetur poten-  
tia, vel sapientia Dei, quasi fugerit, aut ab-  
sconderit se tanquam imbecillus; aut igno-  
rauerit, quid acciderit populo suo. *Et inno-  
tescat in nationibus coram oculis nostris*, id  
est, & non solum aliqui ita blasphemēt, sed  
diuulgetur hæc blasphemia inter nationes,  
nobis ipsis videntibus, & audientibus, ac per  
hoc etiam grauiter erubescantibus.

*Vltio sanguinis seruorum tuorum, qui  
effusus est, introeat in conspectu tuo ge-  
mitus compeditorum.*

Ergo ne blasphemetur nomen tuum, in-  
troeat in conspectu tuo vltio sanguinis seruorū  
tuorum, tam immaniter effusi: introeat etiā  
gemitus seruorum tuorum captiuorum,  
& in compedibus constitutorum, id est,  
respice aliquando sanguinem effusum  
seruorum tuorum occisorum, & vlciscere:  
respice, & vlciscere seruos tuos, qui reliqui  
sunt, & in cōpedibus viuentes gemunt ad te  
Domine, in codicibus græcis, coniungitur  
illud, *vltio sanguinis*, cum verbo præceden-  
te, *innotescat in nationibus*; vt sensus sit, *In-  
notescat in nationibus vltio sanguinis seruo-  
rum tuorum, qui effusus est, & introeat in  
conspectu tuo gemitus compeditorum*: sed  
quia in textu originali verbum, *innotes-  
cat*, est generis masculini, & ver-  
bum,

X.

XI.



hum, introcat, est generis feminini, & nomen, *ultio*, ut etiam *gemitus*, sunt generis feminini apud Hebræos; oportet coniungere nomen, *ultio*, cum verbo, *introcat*, non cum verbo, *immorescat* ut recte coniunxit latinus Interpres; & credibile est, sic etiam coniunxisse Septuaginta Interpretes, quamvis postea interpunctionem mutauerint, qui hæc non aduerterunt. Vtraque tamen lectio verum sensum continet, & posset dici pro lectione græca, non esse vniuersale, ut nomen generis feminini semper coniungatur cum verbo generis feminini apud Hebræos. Nam ipse etiam S. Hieronymus coniunxit nomen, *ultio*, cum verbo, *immorescat*.

*Secundum magnitudinem brachij tui, posside filios mortificatorum.*

*Et redde vicinis nostris septuplum in sinu eorum: improprium ipsorum quod improbauerunt tibi Domine.*

Duo supra perierat Propheta in persona populi Dei, ut vlcisceretur sanguinem occisorum, & ut liberaret captiuos: morti destinatos nunc eadē duo petit, sed ordine conuerso, primum n. petit conuersationem viuorum, deinde vltionē interemptorum. *Secundum magnitudinem*, inquit, *brachij tui posside filios mortificatorum*, id est, quemadmodum brachium tuum robustissimum est, ita fortiter resiste persecutoribus nostris, & posside, ut propriam hæreditatem, reliquias populi tui filios videlicet eorum, qui ab hostibus occisi sunt. *Et redde vicinis nostris septuplum in sinu eorum*, id est, retribue vicinis hostibus nostris penam longe maiore, quā penam reconde in sinu eorum, ut non facile eam excutere possint. *Retribue*, inquam, *illis improprium*, quod improbauerunt tibi Domine, id est, sicut exprobrauerunt tibi imbecillitatem, & insipientiam, quasi verus Deus non esses; sic ostende illos vere fuisse imbecilles, & insipientes, & non tam homines, quam vermiculos terræ, aut puluerem, & cinerem. Illud, *posside*, in Hebræo est reliquos fac, siue, *fac ut supersint, & remaneant*: quare Septuaginta verterunt sensum, non verbū. Illud, *filios mortificatorum*, in Hebræo est,

*filios mortis*, quod potest significare homines morti destinatos, & sic multi exponunt. tamen Septuaginta Interpretes per *filios mortis*, intellexerunt filios occisorum, vel, ut habet alia lectio, filios morte punitorum, & hanc putamus veram huius loci sententiam, nam non solum hoc loco; sed etiam in Psal. 101. vbi legimus, *Ut audiret gemitus compeditorum, ut solueret filios interemptorum*, habentur eadem verba Hebraica, quæ ad literam significant, *filios mortis*: & tamen Septuaginta constanter verterunt. *filios interemptorum*, & sic exponunt Hieronymus, Augustinus, & alij veteres. Per illud, vicinis nostris, aliqui intelligunt, Idumæos, & Philistæos, & alios vicinos, qui videbant ærumnas Iudæorum, & non mi-erebantur; sed verius exponunt alij, qui per vicinos intelligunt Antiochenos, qui cum Antiocho Rege Syriæ incenderunt Ierusalem, templum profanauerunt, & Iudæos à vera religione crudelissima persecutione abstrahere, conati sunt: isti enim, & vicini erant, & hostes iurati. Illud *septuplum*, non proprie septuplum, sed generatim *maius & multiplex*, significat. Denique illud, *in sinu eorum*, significat punitionem inimicorum non futuram exteriorem, & breuem; sed internam, & perpetuam quam velint, nolint, intra se retinere debeant.

*Nos autem populus tuus, & oues pastua tua, confitebimur tibi in seculum.*

*In generationem, & generationem annuntiabimus laudem tuam.*

Vere scribit S. Augustinus, illa verba, *Redde vicinis nostris septuplum*, & similia esse, potius prædictionem, quam imprecationem: ex illa enim certissima prædictione concluditur Psalmus, promittens Deo sempiternam laudem. Illi, inquit, ut meriti sunt, recipient in finem suum grauissimam vltionem: nos autem *confitebimur tibi in æternum*, id est, laudabimus te, & prædicabimus gloriam tuam in secula. Quod quidem adumbratum est in Hebræis, apud quos



Machabæi utrunque longo tempore post persecutionem Antiochi principatum feliciter tenuerunt. Sed verius multo impletur in Ecclesia Christiana, quæ post superatas multas & varias persecutiones, videbit in die Iudicii omnes persecutores suos recipere in finem suum mercedem iniquitatis, & ipsa cum Rege suo Christo in cœlesti Hierusalem in secula seculorum laudabit Dominum.

### PSALMVS LXXIX.

Titulus, & Argumentum Psalmi.

In finem pro his, qui commutabuntur, testimonium Asaph, Psalmus.

**D**E hoc titulo, quoad particulam, in finem, & pro his, qui commutabuntur, diximus in explicatione Psalmi 44. & alibi. Illud, testimonium Asaph, significat hunc Psalmum esse testimonium per Asaph decantatum, quo Spiritus sanctus testificatur captiuitatē Israel, & liberationem. In Græco additur, pro Assyrijs, quoniam captiuitas, de qua agitur in hoc Psalmo, fuit primum sub Rege Assyriorum Salmanassar, qui transtulit decem tribus in Assyriorum regionē captiuas, ut scribitur lib. 4. Reg. ca. 17. & deinde sub Rege Nabuchodonosor, qui captiuum duxit reliquum populum in Babylonem, ut dicitur eodem lib. 4. Reg. c. 24. & 25. Argumentum ex titulo cognoscitur: prædicatur enim captiuitas, & liberatio Hebræorum. Quæ figura sunt captiuitatis generis humani per Diabolum, & liberationis per Iesum Christum Saluatorem nostrum.

### EXPLICAT. PSAL. LXXIX.

**Q**ui regis Israel, intende, qui deducis velut ouem Ioseph.

Incipit Propheta ab inuocatione Dei, atque orat, ut exaudiat orationem, & respiciat populum suum. *Qui regis Israel intende*, id est, tu Deus, qui es proprius Rector. & pastor populi Israelitici audi orationem, quam fundo pro ipso populo tuo. Deinde repetit primam partem, & subintelligit secundam.

*Qui deducis velut ouem Ioseph*, id est, tu Deus qui deducis ad pascua velut ouium gregem, populum descendentem ex Ioseph; audi orationem, quam fundo pro ipso populo tuo, qui & Israel, & Ioseph dicitur. *Ilud, qui regis, in hebræo ad literam est*, qui pascis: tamen hoc verbum non significat solum pascere corporali cibo, sed etiam regere, quod est officium Principis, nam in Psalm. 2. ubi legimus, *Reges eos in virga ferrea*, habetur hoc idem vocabulum: illud, *intende*, significat, *intende auribus*, siue *ausculta*, nam vox hebraica proprie sonat, *auribus percipe*. Cur autem meminerit Propheta Israel; & Ioseph, & non aliorum filiorum Israel, ratio est, quia per Israel intelligitur totus populus Dei. Per Ioseph similiter intelligitur hoc loco totus populus Dei. Nam in secunda parte versiculi, repetitur quod dictum est in prima parte, ut alias cum S. Augustino admonuimus. Et quidem cur Israel totum populum significet, notum est, quia omnes Israelitæ Israelem ut patrem agnoscunt. Cur autem Ioseph, qui vnus erat ex duodecim filiis Israel, totum populum significet, ratio est, quia Ioseph in Egypto totum populum pascuit, & toti populo præfuit: & postea duo eius filij, Ephraim, & Manasse duas tribus constituerunt, quod nulli alij contigit. Singuli enim filij Israel, singulas tribus fecerunt, excepto Ioseph, qui singulari prærogatiua duas fecit: denique diuiso Regno post mortem Salomonis, in Regnum Israel, & Regnum Iudæ primus Rex Israel, qui præfuit decem tribubus, Hieroboam fuit de tribu Ephraim filij Ioseph.

*Qui sedes super Cherubim manifestare coram Ephraim, Benjamin, & Manasse.*

Rogauit Propheta Deum, ut intenderet aurem ad orationem populi sui: nunc addit, ut regat, & intendat etiam oculos, & pie respiciat, atque ostendat serenam faciem populo suo. Dicitur autem Deus respicere aliquem, vel faciem illi ostendere, quando ei

placat.



placatur: contra autem dicitur auertere oculos, vel tegere faciem suam nube, quando irascitur. *Qui sedes*, inquit, *super Cherubim*, id est, tu Deus, qui sedes in coelo super primarios Angelos, qui Cherubim appellantur, & in typum huius rei in sanctuario, super imagines Cherubim propitiatorium, quasi thronum tuum habes, ubi & arca est quasi scabellum pedum tuorum, *manifestare coram Ephraim, & Benjamin, & Manasse*, id est, ostende faciem tuam, & respice, hoc est, placare populo tuo, filijs Israel. Cur autem populum Israel significet per Ephraim, & Manasse, & Benjamin, ratio esse videtur, quia Ephraim, & Manasse erant filij Ioseph, per quem diximus paulo ante totum populum significari. Benjamin erat frater vterinus Ioseph, & ideo ab illo separandum non esse duxit; praesertim cum in castris, quando Hebraei armati ordine procedebant, simul incederent, tribus Ephraim, tribus Manasse, & tribus Benjamin. vid. l. Num. c. 2. & c. 10. fortasse etiam nominavit Propheta hos tres potissimum, ut comprehenderet praecipuas partes terrae promissionis. Nam in tribu Ephraim erat Samaria caput Regni Israel, in tribu Benjamin erat Hierusalem, caput Regni Iuda; in tribu Manasse erat regio trans Iordanem. Cur autem inter Ephraim, & Manasse fratres, posuerit Propheta medium Benjamin fortasse casu fuit, ut nepotes patrum honorare viderentur. Erant enim Ephraim, & Manasse filij Ioseph fratris vterini Benjamin.

III.

*Excita potentiam tuam, & veni: ut saluos facias nos.*

Explicat clarius, cur velit Deum intendere autem, & oculos ad populum suum, ut videlicet eum de tribulatione liberet. *Excita*, inquit, *potentiam tuam*, id est, potentia tua quasi sopita videtur, dum nos affligi finis ab iniustis persecutoribus nostris: ideo *excita potentiam tuam, & veni*, per auxilium tuum potentissimum, *ut saluos nos facias.*

IV.

*Deus conuertere nos, & ostende faciem tuam, & salui erimus.*

Cur Deus saepe nos non respiciat, causa est, quia nos auertimus ab eo faciem, & conuertimus ad res creatas: sed quia sine auxilio Dei non possumus ad eum conuertere, ideo Propheta utrumque petit in persona populi Dei. *Deus*, inquit, *conuertere nos*, id est, inspira nobis amorem tuum, ut auerfi à rebus creatis ad te iterum conuertamur. *Et ostende faciem tuam*, id est, & simul conuertere ad nos faciem tuam, ut hoc modo sanctae charitatis vinculo tecum vniti ab hostibus omnibus, qui nos impugnant, *salui esse possimus*: te enim auertente faciem, aegrotamus, & perimus; te conuertente faciem resurgimus, & sanamur.

*Domine Deus virtutum, quousque irasceris super orationem serui tui?*

Videbat Propheta magnam iram Dei exarsisse in populum peccantem, & ideo se non facile posset exaudiri: ideo vehementius orat, & precatur, dicens, *Domine Deus virtutum*, id est, Domine Deus exercituum, id enim sonat vox Hebraica, qui terribilis es, militia caelesti innumerabili circumdatus, *quousque irasceris etiam mihi oranti*; sic etiam legimus dixisse Hieremiam, Thren. 2. *Opposisti nubem tibi, ut non transeat oratio.* In Hebraeo non habetur, *serui tui*, sed *populi tui*: sed idem est sensus. Propheta enim seruus Dei in persona populi orabat; ac per hoc Deus nolens exaudire irascebatur super orationem serui sui, qui eam fundebat, & super orationem populi sui, quae per Prophetam ipsius populi nomine fundebatur: potest etiam fieri, ut Septuaginta non legerint, *hammecha*, populi tui; sed *haudecha*, serui tui. In graecis quibusdam legitur, *seruorum tuorum*, & sic legit Euthymius: tamen S. Augustinus, & Theodoretus legunt, *serui tui*. Illud, *irasceris*, in Hebraeo est, *fumabis*: sed Septuaginta declarare voluerunt metaphoram; fumus enim narium indignationis est signum, & ideo per fumum ira significatur.

*Cibabis nos pane lacrymarum, & potum dabis nobis in lacrymis in mensura.*

LII 2

Con.

V.

עבדך  
עבדך

VI.



Comiungitur hic versiculus cum superiore, & subintelligitur illud, *quousque*, ut sensus sit, *quousque irasceris super orationem serui tui? quousque cibabis nos pane lacrymarum, & potum dabis nobis in lacrymis*, id est, quousque fines nos in tanta afflictione morari, ut nihil magis, quam lacrymari nobis libeat, & sic lacrymis quasi cibo, & potu sustentemur? Illud autem, *in mensura*, non significat, ut aliqui putant, cum moderatione, sed è contrario, in mensura plenissima, & supereffluente: nam vox Hebræa *salis*, significat aliquid *magnum*, & *triplicatum*; & cum ad mensuram refertur, significat mensuram magnam, vel potius, ter magnam, id est, maximam.

וְיִשְׂרָאֵל

VII.

*Posuisti nos in contradictionem vicinis nostris, & inimici nostri subsannauerunt nos.*

Explicat populus Dei causam tanti mororis, & lacrymarum, ac dicit esse, quia vndique à vicinis gentibus oppugnatur, & separatur, & victus deridetur, & subsannatur. *Posuisti nos*, inquit, *in contradictionem vicinis nostris*, id est, cum nos auxilio tuo destituisi, fecisti, ut omnes vicinæ gentes audent nobiscum contendere, & pugnare: nam illud, *in contradictionem*, in Hebræo, est, *in contentionem*, ac per hoc significat, contradictionem non verborum tantum, sed etiam factorum, id est, concertationes, & praelia. *Et inimici nostri subsannauerunt nos*, id est, inimici nostri nobiscum, contententes vincunt, & debellant nos, atque ut victis insultant, & exprobrant debilitatem. In Hebræo est, *subsannauerunt eos*, sed omnino credibile est, textum esse mutatum, vnius literæ corruptione: nam & ipsi Septuaginta, & S. Hieronymus venterunt ex Hebræo, *subsannauerunt nos*. Itaque legerunt, *lanu*, non ut nunc legitur, *lamo*.

VIII.

*Deus virtutum conuerte nos, & ostende faciem tuam, & salui erimus.*

Versiculus hic est idem cum quarto, qui repetitur etiam in fine Psalmi, sed hic additur vox *virtutum*, id est, exercituum, & in

sine additur, *Domine*. Hæc repetitio significat hunc versiculum esse conclusionem præcipue intentam in toto Psalmo. Et vere nihil melius peti potest à Deo, quam ut conuertat nos ad se, & ipse conuertatur ad nos. Hæc enim gratia fons est omnium bonorum. Illa vero additio vnius vocis in prima repetitione, & duarum in secunda, signum est crescentis affectus, & desiderij in oratione.

*Vineam de Aegypto transtulisti, eiecisti gentes, & plantasti eam.*

IX.

Ut impetret quod petit, commemorat beneficia Dei erga populum Iudaicum, quem de captiuitate Aegyptiaca liberauit, & in Regna Chananzorum introduxit. Vtitur autem metaphora vineæ, qua vsi sunt postea etiam Itaias c. 5. & Ezechiel. ca. 15. & Act. 19. & postremo etiam Dominus in Euangelio Matth. 21. Est autem aptissima similitudo vineæ ad populum Dei significandum propter multa: sed præcipue: quia sicut lignum vitis aut producit fructum optimum, & dulcissimum; & ideo gratissimum est Domino suo, & diligentissime colitur; aut si sterile sit, ad nullum opus utile est, & ideo in ignem projicitur: sic vnusquisque nostrum, aut ad Regnum æternum perueniet, si fructum bonorum operum adterat: aut in ignem æternum mittetur, si bonis operibus careat. *Vineam*, inquit, *de Aegypto transtulisti*, id est, populum tuum, quasi vineam de terra sterili Aegypti in terram fecundam Palestinæ transtulisti. Et quoniam terra illa optima occupabatur ab inutilibus, & syluestribus vitibus, *eiecisti gentes*, idololatras tanquam inutiles vites, & *plantasti eam*, vineam tuam videlicet.

*Dux itineris fuisti in conspectu eius: plantasti radices eius, & impleui terram.*

X.

Ut intelligeremus de vinea rationali, id est, de hominibus sermonem hoc loco haberi, admiscet Propheta aliqua verba propria multis metaphoricis. *Dux*, inquit, *itineris fuisti in conspectu eius*, id est, cum transferres vineam de Aegypto in Palestinam, &

vineam



vineæ ipsa, utpote rationalis progredetur, tu viam ostendebas quasi dux itineris præcedens eam per diem in columna nubis, & per noctem in columna ignis, ut dicitur in Exodo c. 13. & Num. 14. Moraliter etiam dux itineris fuit Deus vineæ suæ, id est, populo suo ad terram promissionis pergenti, dum ei legem dedit. *Plantaſti radices eius, & impleuit terram*, id est, confirmasti populum tuum in terra promissionis, & propagasti eum, ita ut totam illam terram habitatoribus repletet.

XI.

*Operuit montes vmbra eius, & arbuſta eius cedros Dei.*

XII.

*Et extendit palmites ſuos vſque ad mare, & vſque ad flumen propagines eius.*

Describit hoc loco incrementum & propagationem populi Iſraëlitici quo ad altitudinem & multitudinem, id est, quoad gloriam & multitudinem, & admisceat metaphoris hyperbolas. *Operuit*, inquit, *montes vmbra eius*, id est, creuit in altum hæc vinea adeo sublimiter, ut eſſet altior montibus, eosq; vmbra ſua tegetet, imo etiam in tantam altitudinem eleuata eſt, ut eius palmites eſſent altiores Cedris Libani, quæ ſunt arbores ceſſiſſimæ, in vertice montis altiffimi, ita ut palmites huius vineæ, *Cedros Dei*, id est, Cedros altiffimas obumbrarent. Significat autem hæc altitudo potentiam & gloriam Regni Iſraëlitici, quæ ſuperauit potentiam & gloriam multorum Regnorum. Nam ſub Moſe populus Iſraël debellauit Amorrheos, ſub Ioſue vicit triginta & vnum Reges, ſub Dauide domuit Philiſtæos, Idumæos & Moabitas. Describit poſtea propagationem, dicens: *Extendit palmites ſuos vſque ad mare, & vſque ad flumen propagines eius*, id est, propagata eſt gens Iſraëlitica & multiplicata valde, ut repletet terram promiſſionis ad Occidentem vſque ad mare Mediterraneum, & ab Oriente vſque ad flumen magnum Euphratem. Et ſic impleta eſt promiſſio Dei Deuter. 11. *A flumine magno Euphrate vſque ad mare Occidentale erunt termini veſtri.*

*Vt quid deſtruxiſti maceriam eius, & vindemiant eam omnes, qui prætergreſſi ſunt viam.*

Explicata magnitudine & excellentia populi Iudaici per ſimilitudinem vineæ; nunc perſiſtens in eadem ſimilitudine, deplorat miſeriam eiſdem populi, in quam incidit ex indignatione Dei. *Vt quid*, inquit, *deſtruxiſti maceriam eius*? id eſt, quare remouisti ab hoc populo auxilium tuum, quod erat quaſi maceria claudens vndique vineam. *Et vindemiant eam omnes, qui prætergreſſi ſunt viam*? id eſt, quare ſinis, ut omnes inimici huius populi in illum præualeant, eumq; diripiant, quomodo diripiuntur vineæ ab omnibus iter facientibus, quando deſtructa eſt maceria? Sæpe enim Regnum Iſraëlitarum, deferente eos Domino ob peccata populi prouocato, datum eſt in prædam Philiſtæis, aut Madianitis, aut aliis vicinis gentibus.

*Exterminauit eam aper de ſylua, & ſinguli aris ferus depaſtus eſt eam.*

XIV.

Deplorat nunc in particulari ſub eadem vineæ metaphora, grauiffimam captiuitatem, quæ contigit ſub Rege Aſſyriorum, ſive Salmanaſar, qui totas decem tribus, ſive Nabuchodonofor, qui reliquas duas captiuitate tranſtulit in Aſſyrios, euerſa penitus ciuitate Regia, incenſo templo, & Regni ſolio deturbato: hunc enim Regem vocat apum ſylueſtrem & ſingularem ferum, qui non vindemiauit, ſed eradicauit penitus vineam. Apum ſylueſtrem inimicum eſſe viribus ſcribit hoc loco Theodoretus; & Nabuchodonofor Regem ob carnalia vitia porco ſimilem fuiſſe ſcribit Euthymius: vtraque de cauſa rectiffime perſecutorem populi Dei apro comparatum dicere poſſumus. Illud autem, *ſingularis ferus*, in Hebræo eſt, *זאב סודאי*, de qua voce diximus in explicatione Pf. 49. hoc loco verti poteſt, *beſtia agri*, quod idem eſt cum apro de ſylua: nam idipſum etiam repetiuit Propheta, ut ſolet. In Græco eſt, *μοιρος αγριος*, id eſt, porcus agreſtis: proinde vbi nos habemus in Latino, *ſingularis ferus*, illud, *ſingularis*,



*gularis*, est potius etymologia nominis, quam significatio. Dicitur enim bestia illa *avis*; quia solitaria esse solet. Itaque per vocem, *singularis*, hoc loco intelligendus est porcus syluester, qui singularitate & solitudine gaudet. Per vocem, *ferus*, intelligendum est, quod porcus ille ferus & agrestis sit, & in campis sylvarum, non in stabulis & domibus habet.

XV. *Deus virtutum convertere, respice de cælo, & vide, & visita vineam istam.*

Hic iam prædicit per modum orantis Prophetam aduentum Christi, qui vineam reformavit, & aliis colonis custodiendam tradidit, sicut legitur Matth. 21. *Malos male perdet, & vineam suam aliis agricolis locabit: & clarius explicante Domino parabolam: Aufertur à vobis Regnum Dei, & dabitur genti facienti fructus eius.* Non enim Ecclesia veteris Testamenti, quæ erat vinea Dei, funditus perierit, sed mutata est in melius. Primitiæ enim Ecclesiæ Apostoli fuerunt, qui utique ex Israël erant. Et multa illa millia, quæ initio prædicante Petro conversi sunt ad Dominum, ex Israël etiam erant. Et Apostolus Paulus ad Rom. 11. aperte demonstrat, gentes esse veluti ramos insertos in bonam oliuam, id est, adiunctos ad Ecclesiam ex Iudæis initio congregatam. Ait igitur: *Deus virtutum convertere*, id est, Deus exercituum, cui multa millia Angelorum, imo omnes res creatæ militant, ac per hoc potentissimus es, convertere per misericordiam ad vineam tuam, ad populum tuum, à quo per indignationem iustam iam dudum auersus es. *Respice de cælo, & vide*, id est, quando longe recessisti à vinea tua, saltem de cælesti habitaculo respicere dignare, & vide quam deformata sit vinea tua ab apro sylvestri. *Et visita vineam istam*, id est, & veni, ac visita per te ipsum vineam istam. De hac visitatione dixit Zacharias, Luc. 1. *Visitavit, & fecit redemptionem plebi suæ.* Et Christus ipse, Luc. 19. quando venit Ierusalem illam terrenam, & prædixit ruinam illius, addidit rationem: *Eo quod non cognoveris tempus visitationis tuæ.*

*Et perfice eam, quam plantavit dextera tua; & super filium hominis, quem confirmasti tibi.*

Clarius prædicit aduentum Messie. *Et perfice* inquit, *eam, quam plantavit dextera tua*, id est, inchoatum opus perfice, Ecclesiam Testamenti veteris pene destructam reforma, & meliorem redde; quoniam tu eam initio fundasti, & quasi vineam plantasti, non ut periret, sed ut fructum faceret. *Et super filium hominis, quem confirmasti tibi*, id est, & respice etiam super Messiam, qui filius hominis dicitur, cum sit etiam verus filius tuus: *quem confirmasti tibi*, in colonum præcipuum vineæ tuæ, id est, in Ducem & Principem Ecclesiæ tuæ: hunc enim locum de Christo intelligunt ad litteram, non solum S. Hieronymus & Augustinus, sed etiam Theodoretus & Euthymius Græci, Amobius & alij, & ipse quoque Paraphrastes Chaldaeus; & accedit manifesta ratio: nam post captivitatem Babylonicam non fuit melior Resp. Iudæorum, quam antea, sed longe deterior, ut S. Augustinus demonstrat in lib. 18 de Ciuit. Dei, c. 45. Quare si hæc prophetia de perficienda vinea, implenda sit, oportet eam ad Christum necessario referre. Sicut etiam refertur illa Aggæi, c. 2. *Magna erit gloria domus huius nouissima plus quam prima.* Quod autem ad verba attinet, illud, *& perfice*, ex Hebræo S. Hieronymus reddidit, *& radicem*: sed vox Hebræa, *veanna*, quamvis possit esse nomen, & significare radicem, aut plantulam: tamen potest etiam esse verbum à radice, *con*, quod stabilire & perficere significat, & sic intellexerunt hanc vocem LXX. Interpretes. Illud, *& super filium hominis*, in Hebræo est, *& super filium*, sed quoniam paulo infra habetur, *super filium hominis*, visum est LXX. Interpretibus, hic etiam addere, *hominis*, explanationis gratia. Incertum autem est, an sensus sit, *Respice super filium hominis*, ut nos exposuimus; an, *perfice super filium hominis*; sed utrumque recte dici potest. Orat enim Propheta, ut Deus impleat promissionem suam de mittendo Messia; & quoniam, si genus Hebræorum omnino periret.

וכנה

כיו



periisset, Messias sine dubio non venisset, ideo rogat, vt non permittat vineam istam omnino destrui: sed respiciat super Messiam futurum de semine Abraham, & ideo conseruet gentem Hebraicam, vnde tantum bonum expectatur, vel perficiat super Messiam, id est, adimpleat, quod promisit circa Messiam, quem ipse sibi ab æternitate stabiluit.

XVII. *Incensa igni & suffossa, ab increpatione vultus tui peribunt.*

Declarat effectum, quem patiet aduentus Messie, futurum videlicet esse, vt vinea Domini incensa & eradicata continuo iterum vireseat & floreat: nam increpante Deo vastatio illa vineæ subito euanesceat: quomodo quando Dominus increpabat tempestates, statim euanescente tempestate succedebat tranquillitas maris, & quando imperabat morbis, morti, & statim euanescente morbo succedebat sanitas, & euanescente morte succedebat vita. *Incensa*, inquit, *& suffossa*, id est, vinea incensa igni, & suffossa ab hostibus eradicantibus vites; *ab increpatione vultus tui peribunt*, id est, imperante te vt cesset vastatio, & quasi increpante ipsam vastationem, continuo peribunt incensio & suffossio, redibit viriditas & integritas vineæ. S. Augustinus more suo exponit per incensionem, cupiditatem malam; per suffossionem, timorem malum: nam amor inflammat, timor humiliat: sunt autem cupiditas & timor radices omnium peccatorum. Quicunque enim peccat, aut id facit, vt lucretur bonum temporale; quod amat, vel vt euitet malum temporale, quod timet. Porro Christus aduentus increpauit, & increpando expulit cupiditatem & timorem, & contra accendit amorem bonum, & introduxit timorem bonum, id est, amorem Dei & bonorum æternorum, & timorem iræ Dei & malorum æternorum. Dixit enim: *Ignem veni mittere in terram*, Luc. 12. & *Nolite timere eos, qui occidunt corpus*, Matth. 10. Neque est aliud remedium potentius ad pellendum amorem mundi, vel timorem mundi, quam si quis serio cogitet & firmissime credat, multo maio-

ra bona daturum esse Deum amantibus se, & multo maiora supplicia offendentibus se, quam ea sint, quæ mundus polliceri aut minari potest. Alij versiculum presentem ita exponunt: *Incensa igni & suffossa vinea tua est*, sed hostes eius ab increpatione vultus tui peribunt. Alij, *incensa igni & suffossa vinea tua est*, & si ita pergas indignari vineæ tuæ, omnes filij Israël ab increpatione vultus tui peribunt: sed faciliior & planior videtur expositio, quam attulimus. Illud certum est, *incensa & suffossa*, non esse generis neutri & numeri multitudinis, sed generis fœminini & numeri singularis tam in Hebraico textu, q̃ in Græco, vt ad vineam omnino referri debeant.

XVIII. *Fiat manus tua super virum dextera tua, & super filium hominis, quem confirmasti tibi.*

Securus de aduentu Messie, fausta illi precatur Propheta. *Fiat*, inquit, *manus tua super virum dextera tua*, id est, fiat manus tua ad protegendum semper & vbique virum dextera tuæ, id est, virum, quem dextera tua sola proprie formauit & præfecit Ecclesiæ. Christum enim, vt hominem, non cooperatio viri, sed sola diuina virtus in vtero Virginis formauit. Sic enim dicitur Luc. 1. *Spiritus Sanctus superueniet in te, & virtus Altissimi obumbrabit tibi*. Et eundem Christum non electio humana, sed sola voluntas diuina Regem Ecclesiæ fecit, vt ipse dicit in Psal. 2. *Ego autem constitutus sum Rex ab eo super montem sanctum eius*.

XIX. *Et non discedimus à te, viuificabis nos, & nomen tuum inuocabimus.*

Christo nos regente, non amplius discedimus à te, quia Regnum Christi æternum erit, & portæ inferi non præualebunt aduersus Ecclesiam, Matt. 16. *Viuificabis nos* vita gratiæ hic in terris, & vita gloriæ postea in cælis; & nos tributum reddemus inuocationis & laudis, & actionis gratiarum in æternum.

XX. *Domine Deus virtutum conuertere nos: & ostende faciem tuam, & salui erimus.*

Hæc est vltima conclusio Psalmi, de qua supra diximus in versiculo octauo.



## PSALMVS LXXX.

## Titulus &amp; Argumentum Psalmi.

In finem pro torcularibus: Psalmus  
ipsi Ataph.

**Q**uid sit, pro torcularibus; diximus in  
explicatione Psalmi 8. hoc solum adden-  
dum videtur hoc loco, non esse probabile quod  
Theophilactus scribit ad cap. 7. S. Ioan. hunc  
Psalmum inscribi, pro torcularibus, quod in  
eo gratia agantur Deo pro collectione vinarum  
& aliorum fructuum, quae fit mense Septembris.  
Hoc, inquam, non est probabile, quoniam in  
toto hoc Psalmo, ut etiam annotauit S. Augu-  
stinus, nulla fit mentio collectionis vinarum,  
aut aliorum fructuum. Deinde non solum hu-  
ius Psalmi, sed etiam Psalmi 8. & 83. titulus  
est, pro torcularibus, in quibus Psalmis nulla  
mentio fit Septembris, aut collectionis vinarum.  
His ergo omis, argumentum est cohortatio  
ad festos dies rite celebrandos: & simul com-  
memoratio beneficiorum Dei, ob quae dies festi  
celebrantur, & reprehensio negligentiae & in-  
gratitudinis Hebraeorum. In quibusdam codi-  
cibus additur ad titulum, quinta Sabbati,  
sed in Hebraicis codicibus & in correctioribus  
Graecis & Latinis non habetur.

## EXPLICATIO PSALMI LXXX.

I. **E**xultate Deo adiutori nostro, iubilate  
Deo Iacob.

Hortatur Propheta, ut cum Deum lauda-  
mus, cum magna cordis laetitia id agamus:  
hilem enim datorem diligit Deus, ut ait A-  
postolus in 2. Cor. 9. & si hilem datorem,  
multo magis hilem laudatorem. Hilaritas  
autem cordis ex desiderio & amore nascitur,  
proinde qui cum aedia psallit, & qui diui-  
num officium non dulce canticum, sed graue  
onus iudicat, iudicat se parum amare cui  
psallit. Exultate, inquit, Deo adiutori nostro,  
id est, cum exultatione laudate Deum, qui

potens est & fortis ad nos in omnibus rebus  
iuuandos. Iubilate Deo Iacob, id est, magna &  
leta voce canite laudes Dei nostri. In Hebraeo  
pro adiutori nostro, est fortitudini nostra, sed  
idem est sensus: nam fortitudinem Dei cele-  
bramus, quam in nostro auxilio quotidie  
experimur.

Sumite Psalmum, & date tympanum,  
psalterium iucundum cum cithara.

Hortatur, ut non solum voce, sed etiam in-  
strumentis musicis Deum celebremus, quod  
etiam si ad literam de corporalibus instru-  
mentis intelligatur, tamen in nouo testa-  
mento praecipue intelligi debet de sonitu bo-  
norum operum, quae verbis laudatoriis qua-  
si ex altera parte respondere & consonare de-  
bent. S. Augustinus exponit prima verba,  
quasi Sacerdotes dicant plebi: Sumite psal-  
mum à nobis, & date nobis tympanum, id est,  
sumite à nobis spiritualia, & date nobis car-  
nalia. Sed quamquam id iustissimum sit, &  
confirmatum ab Apostolo 1. Cor. 9. Si nos  
spiritualia vobis seminauimus, magnum est  
si carnalia vestrametamus, tamen hoc loco  
secundum literam, sumite psalmum, & date  
tympanum, iisdem personis dicitur, Leuitis  
videlicet, quorum officium erat canere psal-  
mos, & pullare tympana, psalteria & citharas.  
Itaque sumite psalmum, significat, assumite  
psalmum, & incipite canticum: date tympa-  
num, significat, proferte tympanum, & inci-  
pите pulsationem, nec solum tympanum, sed  
etiam psalterium & citharam proferte, & iu-  
cunde pulsate. In Hebraeo legitur inuerso or-  
dine: Citharam iucundam cum psalterio, pro  
quo Graeci & Latini habent: Psalterium iu-  
cundum cum cithara, sed in sensu nulla di-  
uersitas est. Illud, iucundum, videtur opponi  
sono graui & rudi tympanorum, psalterium  
enim & cithara iucunde & dulciter sonant,  
tympanum aspere & incondite.

Buccinate in neomenia tuba, in insigni  
die solemnitatis vestrae.

Explicat, quo tempore sit praecipue iu-  
bilandum, & ait: Buccinate in neomenia  
tuba,

II.

III.



*tuba*, id est, initio mensis, quod Græce dicitur, *νομῖα* quasi noua luna, quia in noui lunij Hebrea incipiebant menses, & festa celebrabant. *In insigni die solemnitate vestra* id est, *buccinate in neomenia*, quæ est insignis dies solemnitate vestra. Disputant hoc loco tractatores, an Propheta hoc loco loquatur de omnibus neomenijs, an de neomenia Septembris: nam omnes neomeniæ, id est, omnia initia mensium lunarium erant dies festi apud Hebræos, & in illis clangebatur tubis, vt habetur in lib. Num. cap. 10. tamen neomenia Septembris erat celeberrima omnium, quia in eam diem incidebat festum tubarum, vt habetur Leuit. 23. & Nu. 29. Qui voluit, Prophetam loqui de sola neomenia Septembris, nituntur potissimum sequentibus verbis, *In insigni die solemnitate vestra*. Vbi videtur restringi nomen neomeniæ ad unam neomeniam insignem, & solemnem; in qua potissimum erat usus tubarum, quæ sine dubio erat neomenia Septembris, quæ dicitur Num. 29. *Dies clangoris, & tubarum*, & Leuit. 23. dicitur *sabbatum memoriale clagentibus tubis celebrandum, & vocandum sanctum*, atque in eo ab omni opere seruii esse vacandum. Qui autem existimant, Prophetam loqui de Neomenia cuiuscunque mensis, dicunt verba sequentia, *In insigni die solemnitate vestra*, non intelligi de Neomenia, sed de alijs festis, vt Pascha, Pentecoste, tabernaculorum, & alijs, vt sensus sit, *Buccinate tuba in neomenia*, & buccinate etiam tuba in omni alia insigni die solemnitate vestra. Res est parui momenti: tamen prior sententia mihi probabilior videtur, quoniā vt plurimum in Psalmis, quod passim obseruat S. Augustinus, posterior pars versiculi, repetit, aut declarat partem priorem. Quod attinet ad verba, illud, *in insigni*, Hebraice est, *bachese*, quod proprie significat, in operimento, siue tegmine, vel, vt alij dicunt, in tempore constituto, siue solemnem, & ad verbum verti posset hæc sententia: *Buccinate in neomenia tuba, in tempore solemnem ad diem festum vestrum*: quod idem est cum eo; quod vertunt Septuaginta quantum ad sensum attinet, idem enim est, *in insigni die festiuita-*

*tis*, & in tempore solenni ad diem festum, nisi quod in Hebræo est prima persona pronominis, in Græco, & Latino est secunda. Nam in Hebræo est, *solemnitatis nostra*, in Græco *vestra*. Sed vtrunque est verum, & fortasse Septuaginta legerunt in secunda persona; etiam in Hebræo: aduertimus enim non raro aliter legisse Hebraicum textum Septuaginta Interpretes, quam nunc habeatur in nostris libris.

*Quia præceptum in Israel est, & iudicium Deo Iacob.*

IV.

*Testimonium in Ioseph posuit illud, cum exiret de terra Aegypti, linguam, quam non nouerat, audiuit.*

V.

Reddit rationem, cur oporteat cum exultatione cantare; & instrumenta musica pulsare in die festo: quia videlicet hoc Deus ipse mandauit, quando eduxit populum de captiuitate Pharaonis, vult enim Deus, qui nulla re indiget, hoc tributum laudis, & memoriæ beneficiorum suorum. *Quia*, inquit, *præceptum in Israel est*, id est, psallere, & tympana cum alijs instrumentis pulsare oportet in signum lætitiæ, & gratiarum actionis, quia hoc præcepit Deus populo suo Israel: & hoc præceptum habetur, & conseruatur in Israel, id est, in populo Dei, qui à parente dicitur Israel. *Et iudicium Deo Iacob*, idem repetit alijs verbis: idem enim est præceptum, & iudicium hoc loco, vt etiam in Psalmis 18. & 118. & alibi, idem quoque est Israel, & Iacob. ait igitur, *Et iudicium Deo Iacob*, id est, & hoc ipsum est decretum, quod seruandum est à populo Iacob erga Deum suum. *Testimonium in Ioseph posuit illud, cum exiret de terra Aegypti*. Id ipsum secundo repetit cum additione temporis. Idem enim intelligitur per Israel, per Iacob, & per Ioseph. populus videlicet Dei, qui totus constabat ex filijs Iacob, & Ioseph, vt supra diximus in Psalm. 76. & Psalm. 79. Idem quoque est præceptum, iudicium, & testimonium, vt dicitur in Psalm. 18. & 118. *Posuit*, inquit,

M m m

testimo-



*testimonium in Ioseph*, id est, constituit, hoc præceptum in populo suo, qui Ioseph dictus est à Patriarcha Ioseph, qui pater fuit naturalis duarum tribuum, & pater protectione & providentia in Ægypto omnium filiorum Israel. Poluit autem hoc præceptum Deus in populo suo, quando eduxit eum de Ægypto. Si quidem omnia præcepta, & hoc unum cum cæteris data sunt à Deo per Moysen in deserto, paulo post egressione de Ægypto, ut notum est ex lib. Levit. & Nu. *Linguam, quam non nouerat, audiuit.* Hæc pars vltima versiculi duobus modis exponi solet. Prior expositio est veterum scriptorum Hieronymi, Augustini, Theodoret, Euthymij, & aliorum, quod per linguam, quam non nouerat populus Dei; intelligatur vox audita de monte Sina: non enim audierat vnquam antea populus vocem Dei loquentis: & spiritualiter intelligitur vox Euangelij, quam incipiunt audire, & credere, qui exeunt de Ægypto, & serio conuertuntur ad Deum. Posterior expositio est aliorum recentiorum, quod per vocem, qui non audierat, intelligitur lingua Ægyptiaca, ut sensus sit, *linguam, quam non nouerat audiuit*, id est, populus Dei in Ægypto, unde per gratiam Dei eductus fuit, *linguam, quam non nouerat audiuit*, ac per hoc cum barbaris ignotæ linguæ conuersatus est. In Hebræo habetur in prima persona, *Linguam, quam non noueram, audiui.* Sed credibile est LXX. Interpretes legisse in tertia persona, & sic fuisse in antiquis codicibus.

VI. *Diuertit ab oneribus dorsum eius, manus eius in cophino seruierunt.*

Hoc est alterum beneficium Dei erga Hebræos in exitu eorū de Ægypto. Si quidem Ægyptij Hebræos cogeant seruiliter laborare in operibus duris laterum faciendorum, & coquendorum, ut perspicuum est ex lib. Exod. cap. 1.2. & 5. Ait igitur, *diuertit ab oneribus dorsum eius*, id est, Deus diuertit ab oneribus dorsum Israel, siue Jacob, siue Ioseph, id est, dorsum populi sui, liberans eū ab oneribus duris luti, & laterum, quibus

opprimebatur ab Ægyptijs. *Manus eius in cophino seruierunt*, id est, diuertit Dominus ab oneribus dorsum populi sui, cuius populi manus longo tempore in gestandis cophinis plenis luto, vel lateribus seruierunt. In Hebræo habetur in prima persona, Diuertit ab onere dorsum eius: & quamvis sensus idem sit, siue loquatur Propheta, siue Deum loquentem introducat: tamen omnino credibile est, in codicibus antiquis, quos habuerunt LXX. Interpretes, fuisse in tertia persona, nulla enim est ratio, cur vertere voluerint aliter quam in textu inuenerint. Illud autem, in cophino seruierunt, in Hebræo est, *à cophino recesserunt.* Sed manifesta est ratio diuersitatis ob vnus literæ similitudinem: nam Septuaginta legerunt, *ta auodena*, quod est *seruierunt*. & nunc legitur, *tahauodena*, quod est, *recesserunt*, sunt enim literæ similes *מא* & *ר*.

*In tribulatione inuocasti me, & liberaui te exaudiui te in abscondito tempestatis: probaui te apud aquam contradictionis.*

Ab hoc versiculo vsque ad finem vicissim commemorat Deus beneficia sua in populum, & ingratitudinem, populi in Deum. *In tribulatione inuocasti me, & liberaui te*, id est, dum in Ægypto tribulationem grauissimam patereris, inuocasti me, & liberaui te, educens de terra illa, & liberans de durissima seruitute. *Exaudiui te in abscondito tempestatis*, id est, exaudiui te non solum cum timeres iram Pharaonis, sed etiam cum timeres tempestates, & plagas, quibus percussus Ægyptum: tunc enim abscondi te, & protexi, ne plagæ illæ tibi nocerent. Vel, ut alij volunt, *exaudiui te*, cum transisses per mare rubrum, & Pharaon cum curribus, & equitibus te sequeretur, ego latens in columna nubis, & ignis excitavi tempestatem in mari, & subuerri rotas curruum Pharaonis, & vniuersum exercitum interfeci. Itaque illud, *in abscondito*, potest referri tum ad populum absconditum a Deo, tempore tempestatis; tum etiam ad ipsum Deum abscon-



abfconditum in columna nubis, & inuisibiliter pugnante cum Pharaone, & exercitu eius. *Probaui te apud aquam contradictionis*, id est, post hæc tam magna beneficia tentauit te per aquæ penuriam, ut explorarem fidem, & patientiam tuam: sed inueni te impatientem, & infidelem. Scribitur hæc historia Exod. 17. & Num. 20, ubi Deus permittit ad modicum tempus, ut populus aquæ penuria laboraret; & populo murmurante, & verso in seditionem, Deus ex petra eduxit aquas largissimas. Vocata est autem aqua illa contradictionis, quoniam propter aquam populus contradicere cepit Moyfi, atque eius imperium detrectare.

VIII.

*Audi populus meus, & contestabor te, Israel si audieris me, non erit in te Deus recens, neque adorabis Deum alienum.*

IX.

*Ego enim sum Dominus Deus tuus, qui eduxi te de terra Aegypti, dilata os tuum, & implebo illud.*

Refert Propheta in persona Dei, quam æquas condiciones Deus populo suo proposuerit, & quam amplas pollicitationes addiderit, si pactis conuentis stare voluisset. In quo apparet ineffabilis benignitas Dei. *Audi*, inquit, tu gens Hebræa, quæ es *populus meus*: & palam admonebo te, siue testamentum faciam tibi, quid à te requiram, & quid tibi redditurus sum. *Israel si audieris me, non erit in te Deus recens*, id est, si me audire, & mihi obedire volueris; hoc à te requiro, hoc in primis tibi maando, ut non sis apud te *deus recens*, id est, Deus, quem non coluerunt patres tui, sed recens introductus. Sic enim hoc explicatur in cantico Moysi, Deuteron. 32. Vere tamen scribit sanctus Augustinus, omnes Deos falsos esse Deos recentes, quia non sunt æterni, nec sine principio, sed nuper in officina sculptoris effecti, vel in cerebro humanæ vanitatis formati. *Neque adorabis Deum alienum*: est declaratio, vel repetitio eiusdem rei: dicuntur enim Dij alieni, Dij aliarum gentium, quos non coluerunt Patriarchæ Hebræorum. *Ego enim sum do-*

*minus Deus tuus, qui eduxi te de terra Aegypti*. Optima ratio, cur non debeat gens Iudaica colere Deos alienos; quoniam, inquit, *Ego sum Dominus Deus tuus, quia redemi te de captiuitate*, ac transtuli à seruitute Pharaonis ad seruitutem meam. Quæ ratio multo etiam magis conuincit Christianos, non debere colere Deos alienos: quia Deus verus, atque æternus, non solum nos cum cæteris creauit, sed per Christum filium suum liberauit de captiuitate Diaboli, & transtulit in Regnum filij dilectionis suæ. *Dilata os tuum, & implebo illud*. Hæc est promissio amplissima Dei cultoribus suis, quæ sumpta est à metaphora cibi. *Dilata*, inquit, quantum potes, os, & fauces desiderij tui, quia replebo cibo suauissimo famen tuam. Hanc promissionem solus Deus implere potest. Quicquid enim creatum nobis detur, non satiat, neque explere potest appetitum cordis humani. Sola Dei visio, atque fruitio, quæ bonum est infinitum, & omnia omnino bona comprehendit, satiare nos poterit. Recentiores referunt hunc versiculum ad orationem, ut sensus sit, *Aperi os tuum, & pete quod vis, & implebo petitionem tuam*. Sed veteres, sanctus Hieronymus, S. Augustinus, Theodoretus, & Euthymius referunt ad cibum, ut nos exposuimus, & vere dilatare os, & implere eos ad comestionem potius pertinent, quam ad locutionem. Sensus autem idem est.

*Et non audiuit populus meus vocem meam, & Israel non intendit mihi.*

Queritur nunc Deus de ingratitudine populi sui, quod tam æquis conditionibus non acquieuerit. Et mirum est valde, quod cum in terris seruuli ambient gratiam Domini sui, & pro magno beneficio repudent, si cum eis Dominus loqui, vel eos respicere dignetur: Israel tamen, id est, puluis, & cinis Deum Deorum audire, & in eum intendere dedignetur. Sed vere dixit in Euang. Luc. 16. Dominus, *Prudentiores esse filios huius sæculi filijs lucis in generatione sua*. Vox hebraica pro eo, quod nos habemus; *non intendit mihi*, habet, *lo uali non uoluit me*, id est,

Mmum 2

reiecit

X.

לֹא־יָשָׁעַ



reiecit me, contempsit me, in me respicere non est dignatus.

XI.

*Et dimisi eos secundum desideria cordis eorum, ibunt in adinventionibus suis.*

Horrendum, sed iustissimum flagellum minatur Deus contemptoribus suis, ut videlicet fiat eis peccatum poena peccati, id est, sinantur in peccata semper grauiora probabi, donec ad profundum malorum deueniant, hoc est, quod dicit Apostolus ad Rom. 1. Tradidit illos Deus in desideria cordis eorum, & paulo post. Tradidit illos in passionem ignominiam, & iterum. Tradidit illos in reprobum sensum, ut faciant quae non conueniunt. Haec est illa obduratio cordis, de qua dicit Ecclesiastes cap. 7. Considera opera Dei, quia nemo potest corrigere, quem ille despexerit. Et dimisi, inquit, eos secundum desideria cordis eorum, id est, permisi, ut ambularent, & operarentur iuxta concupiscentias suas; non dedi eis, ut filijs, disciplinam; sed ut alienos dimisi, ut praecipitarentur, & colliderentur. Ibunt in adinventionibus suis, id est, sequentur non semitas Patrum suorum, non vias rectas legis meae, sed cogitationes cordis sui in cultu Deorum, quos humana curiositas adinuenit; & in omni genere turpitudinis vitiorum, quibus corrumpi solet humana natura, cum Dei lumine non dirigatur, & Dei dextera non tenetur, & Dei efficaci gratia non iuuatur.

XII.

*Si populus meus audisset me, Israel si in vijs meis ambulasset.*

XIII.

*Pro nihilo forsitan inimicos eorum humiliasset: & super tribulantes eos misisset manum meam.*

Iterum redit ad promissiones per modum optantis, ut ostendatur innata Deo nostro misericordiae affluentia. Vere enim Deus noster. Pater misericordiarum est, & Deus totius consolationis. Nam ubi legimus, Si populus meus audisset me, in Hebraeo est, *la*, quae est particula optantis, *Utinam populus meus audisset me*. Sed quia in Deum proprie non cadit talis affectio, & est ea metaphorica locutio, Septuaginta Interpretes

verterunt, *Si populus meus audisset me, & in vijs meis*; id est, in legibus meis ambulasset, pro nihilo forsitan inimicos eorum humiliasset, id est, facillime, & celerrime omnes hostes populi mei, qui nunc eum tantopere vexant, humiliasset, & deiecisset, ut caput attollere non valerent. Et super tribulantes eos misisset manum meam, id est, quia super persecutores populi mei misisset manum potentiae meae, atque eos contriuissem. Illud, *pro nihilo*, in Hebraeo est, *quasi modicum*, vel, ut sanctus Hieronymus vertit, *quasi nihilum*. Et sensus est, Deo non esse difficile debellare quoslibet inimicos, quoniam omnis humana potentia, quasi nihil est coram Deo, ac per hoc potest facillime, & velocissime id agere, quia nihil ei resistit. Itaque illud, *pro nihilo*, exponendum est, ac si nihil essent omnes inimici, ita eos humiliasset. Illud, *forsitan*, non habetur in Hebraeo, sed additum est à Septuaginta declarationis gratia, ut intelligeremus Deum non necessario, sed libere agere & posse pro arbitrio, si velit, non agere.

*Inimici Domini mentiti sunt ei, & erit tempus eorum in saecula.*

XIV.

Hic iam loquitur Propheta, & confirmat quod Deus dixerat, *Et non audiuit populus meus vocem meam*: proinde per inimicos intelligit Iudaeos, qui ex filijs inimici facti sunt, ac tum praesertim cum Christum negauerunt coram Pilato, Regem suum esse, de qua re Daniel cap. 9. diserte ait, *Et non erit eius populus, qui eum negaturus est*. Ita exponunt omnes veteres, Hieronymus, Augustinus, Theodoretus, Euthymius, & alij. Recentiores nonnulli cum Rabinis exponunt de inimicis Iudaeorum: sed nos maius Patres nostros, quam Rabinos sequi. Ait igitur, *Inimici Domini*, id est, Iudaei rebelles, & increduli mentiti sunt ei, quia promiserunt ad radices Montis Sinai, se facturos omnia, quae Dominus imperasset, Exod. 24. *Omnia verba, inquit, quae locutus est dominus, faciemus*: & tamen nihil eorum opere compleuerunt. Ex Hebraeo posset etiam verti, *negauerunt ei*, veli



vel eum: sed rectissime etiam vertitur, *mentiti sunt ei. Et erit tempus eorum in sæcula*, id est, & erit tempus defectionis & rebellionis eorum in sæcula, quia vix in fine mundi reliquiae Iudæorum conuertentur, vel, iuxta S. Augustinum, erit tempus supplicij eorum in sæcula, quia ignis gehennæ non exstinguetur. Theodoretus & Euthymius notant apud Syros per tempus interdum significari supplicium siue calamitatem: quod S. Augustini expositionem confirmat.

XV.

*Et cibavit eos ex adipe frumenti, & de petra melle saturavit eos.*

Hic notatur maxima Iudæorum ingratitude, qui mentiti sunt Domino, cum tantis eos beneficiis affecisset. Possunt autem hæc verba referri ad manna, quod pluebat Iudæis in deserto, & aquam, quæ in eodem deserto scaturivit de petra, nam cibus ille recte dicitur adeps frumenti, quia erat panis Angelorum, ut dicitur in Psal. 77. & habebat omnem saporem, ut dicitur Sap. 16. *Mel de petra*, non absurde dicitur aqua illa, quam de petra Moyses eduxit, quia, ut Theodoretus dicit, sicut in Hebræis instar mellis videbatur. Potest tamen etiam referri totus hic versiculus ad vbertatem tritici, vini & olei, quæ erat in terra promissionis, quamvis magna ex parte montuosa & saxosa esset. Sic enim scribit Moyses Deuter. 32. *Constituit eum super excelsum terram, ut comederet fructus agrorum, ut sugeret mel de petra, oleumq; de saxo durissimo.* Vbi per fructus agrorum intelligitur præcipue frumentum, de quo paulo infra dicit: *Et hircos cum medulla tritici.* Per mel de petra, intelligitur mel ipsum, quod apes in cavernis petrarum producebant, nec non ficus, vux, & reliqua dulcia, quæ in montibus illis petrosus gignebantur. Sed adeps frumenti, & mel de petra multo preciosiora sunt apud Christianos, quibus adest sub specie panis corpus Redemptoris, & mel sapientiæ cœlestis de petra, quæ idem Christus est, & tamen non pauci post abrenunciationem Diabolo & pompis & operibus eius factam

in baptismo, mentiuntur Deo reuerentes ad ea, quibus renunciauerunt, & post gustatum panem de cœlo & mel de petra, reuertuntur ut canes immundi ad vomitum suum. Qui timere debent aternitatem futuri supplicij, ignis qui non exstinguitur, & vermis qui non moritur.

PSALMVS LXXXI.

*Titulus & Argumentum.*

Psalmus Asaph.

**A**rgumentum huius Psalmi est exhortatio ad Iudices, ut iuste iudicent. Sed *ut maiorem efficaciam habeat exhortatio, inducitur Deus summus Iudex, increpans Iudices minores.*

EXPLICATIO PSALMI LXXXI.

**D**eus stetit in Synagoga Deorum, in medio autem Deos diiudicat.

Pronunciat sanctus Propheta, Deum semper adesse, cum Iudices sententias ferunt, & de ipsis eorum sententiis iudicare, rectæ ne an iniquæ sint. Quod certe multum prodesset Iudicibus, si serio cogitarent, in conspectu summi Iudicis omnes causas iudicari. *Deus*, inquit, *stetit*, id est, semper assistit præsens inuisibili maiestate, *in synagoga Deorum*, id est, in conuentu & consensu Iudicum, dum causas populi iudicant: & dum illi iudicant populos, Deus in medio eorum præsens assistens iudicat ipsos iudices. Hic sunt aliqua dubia breuiter dissoluenda. Primum est, quia in Hebraico textu ubi dicitur, *Deus stetit*, vox *Deus* est *Elohim*, quæ est numeri multitudinis, & significat Deos, siue Iudices: vox autem *Deorum*, cum dicitur, *in synagoga Deorum*, est numeri singularis *El*, & significat Deum. Quare videntur LXX. Interpretes non recte vertisse, *Deus stetit in synagoga Deorum*. Respondetur primo, fieri posse, ut verba illa in nostris codicibus sint transposita, & in codi-

אלהים

אל



dicibus antiquis fuerit in primo loco *El*, & in nouissimo *Elohim*, vt Septuaginta reddiderunt. Secundo, posse hunc locum Hebraice ita legi: *Deorum stetit in synagoga Deus*, carent enim Hebræi casibus; tamen LXX. Interpretes, vt sensum clariorem redderent, vertisse, *Deus stetit in synagoga deorum*. Tertio, posse verti cum S. Hieronymo, *deus stetit in synagoga dei*, id est, in synagoga sua: tamen LXX. Interpretes vertisse, *In synagoga deorum*, quia synagoga Dei nihil est aliud, nisi conuentus Iudicum à Deo constitutorum, quibus etiam nomen suum impertiuir, quia communicauit cum illis auctoritatem iudicandi, quæ est ipsius propria, dicente S. Iacobo cap. 4. *Vnus est legislator & Iudex*.

אלהים

Neque obstat, quod *Elohim*, sit numeri multitudinis: recipit enim vltimate significationem numeri tum singularis, tum multitudinis. Alterum dubium est, cur dicatur in præterito, *Deus stetit*, & non potius, *Deus stat*. S. Augustinus querit, si Deus stetit in synagoga Deorum, quando id fuit quando stetit? & non inueniens, quando Deus Pater steterit, refert hunc locum ad Deum Filium, qui in carne stetit in synagoga Scribarum & Pharisæorum. Sed non est necesse, restringere hæc verba ad tempus Christi, cum hoc perpetuum sit, vt Deus semper assistat iudicantibus. Vnde etiam sequitur: *In medio autem deos diiudicat*, vel, vt est in Hebræo, *diiudicabit*. Itaque illud, *stetit*, significat, ab initio stare consuevit, siue, constituit se præsentem. Et quia Deus non mutatur, sicut ab initio stetit, ita semper stat, & stabit, & semper iudicabit. Tertia dubitatio, cur dicit, *stetit*, & non potius, *sedet*; Iudicis enim sedere est, non stare. Sed facilis est responsio: nam vox illa, *stetit*, non significat hoc loco stare, vt distinguitur contra sedere, sed adesse, vt distinguitur contra abesse, & præsertim hoc significat vox Hebraica, *iat sab*, vt perspicuum est ex libro Iudicum c. 3. v. 22. nam vbi legimus: *Infixit sicam in ventrem eius tam valide, vt capulus sequeretur ferrum in vulnus*, in Hebræo est, *vt sequeretur, quod stetit post ferrum*: vbi describitur capulus, qui est in gladio post ferrum, quo loco vox, *stetit*,

quam etiam hic habemus, non significat stare, id est, non sedere, sed adesse, vel manere.

Vsq̃ue quo iudicatis iniquitatem, & facies peccatorum sumitis?

II.

Vtrum hæc dicantur à Propheta, qui reprehendit Iudices, propterea quod non cogitent, Deum assistere iudicis ipsorum, & ideo iniuste iudicent; an potius dicantur à Deo, qui assistens iudicantibus, & sententias eorum diligenter examinans, arguit malos Iudices de præcipuo & frequentissimo eorum crimine, videlicet de acceptione personarum, ob quam plerumque iniuste iudicant; incertum est, sed siue Propheta, siue Deus hæc dicat, diuina reprehensio est, quia per os Prophetæ Spiritus Sanctus sine dubio loquebatur: & quia raro accipitur persona hominis pauperis & iniusti, frequentissime autem persona diuitis & iniusti; ideo de hac acceptione potissimum eos reprehendit: *Vsq̃ue quo, inquit, iudicatis iniquitatem*, id est, quamdiu persecrabitis in hoc peccato iniuste iudicandi? & addit causam præcipuam iniquorum iudiciorum, dicens: *Et facies peccatorum sumitis*, id est, quia facies, siue personas peccatorum accipitis: hinc enim oriuntur iniqua iudicia, quia Iudices non attendunt ad merita causæ, sed ad gratiam hominum diuitum & potentium, qui hoc ipso peccatores sunt, quod cupiant à Iudicibus gratiam suam iustitiæ anteponi. Porro sumere faciem alicuius in iudicio, nihil est aliud, nisi talem sententiam ferre, non qualem iustitia exigit, sed qualem requirit amicus, vel benefactor, vel cognatus. Et hoc idem est respicere in faciem hominis, non in regulam iustitiæ.

Iudicate egeno & pupillo, humilem & pauperem iustificare.

III.

Reprehendit Deus siue Propheta primo loco vitium acceptionis personarum: nunc secundo addit vitium oppressiōis pauperum, quos Iudices opprimunt, tum quando

diff.



II. differunt eis iustitiam facere, tum quando damnant eos iniuste, ut aduersariis potentioribus non displiceant. *Iudicate*, inquit, *egeno & pupillo*, id est, causam pauperis, & praesertim pupilli libenter admittite, diligenter discutite, sollicite expedite, ne cogantur bona sua litigando consumere: *humilem*, id est, hominem abiectum, atque afflictum, *& pauperem iustificare*, id est, absoluite, & iustum declarate. Hoc tamen intelligitur, si vere iustus sit; scriptum est enim Leuit. 19. *Non consideres personam pauperis, nec honores vultum potentis: iuste iudica proximo tuo.* Sensus igitur non est, ut semper pro paupere, siue in fauorem pauperis iudicetur: sed ut quando pauper ipseus est, & iniuste accusatur, Iudex efficiat, ut iustitia pauperis emineat, & non opprimatur potentia aduersariorum.

IV. *Eripite pauperem, & egenum de manu peccatoris liberate.*

Non satisfacit Iudex officio suo, si solum proferat iustum iudicium, nisi etiam cogat diuites & potentes, ut pauperibus & egenis re ipsa satisfaciant, siue restituendo ablata, siue refarciendo detrimenta, quae ob calumnias & lites passi sunt; ideo siue Deus, siue Propheta adiungit, dicens: *Eripite pauperem, videlicet de manu potentis, & egenum de manu eiusdem potentis liberate.* Idem enim bis repetit more suo, ut res menti altius infigatur. Eripere autem pauperem de manu potentis, est sententiam aduersus potentem pro paupere iuste pronunciatam executioni mandare, & re ipsa efficere, ut pauper nihil detrimenti à potentiore inimico patiatur. In hoc igitur potissimum deberent Iudices & Principes auctoritatem suam demonstrare. Sic enim & gratiam Dei, & beneuolentiam populorum sibi compararent: sed quoniam ut plurimum id non faciunt, sequitur Propheta, & dicit:

V. *Nescierunt, neque intellexerunt: in tenebris ambulant, mouebuntur omnia fundamenta terrae.*

Deplorat Propheta voluntariam cecitatem Iudicum, ob quorum iniustitias totus orbis terrarum conturbatur. Nam, ut Dominus dicit in Euangelio: *Si sal uauerit, in quo salietur? & alibi: Si lux, quae in te est, tenebrae sint, ipsa tenebrae quantae erunt?* Sic etiam dicere possumus, Si apud eos, qui ex officio iustitiam administrant, iustitia non inuenitur, ubi tandem inuenietur? nonne iniquitas omnia confundet? *Nescierunt*, inquit, *neque intellexerunt*, id est, neque cognouerunt quid facti, neque intellexerunt quid iuris esset in causa. Hoc enim interest inter duo verba Hebraica, quae hic habentur, quod inter *cognoscere* & *intelligere*, apud Latinos. Cognoscere latius patet, ut etiam ad notitiam sensum pertineat, intelligere proprium est mentis & rationis: quare proprie dixit Propheta Isaia c. 1. *Cognouit bos possessorem suum, & asinus praesepe Domini sui*, non autem proprie dixit: *Intellexit bos possessorem suum, & asinus praesepe Domini sui.* Ex hac ignorantia Iudicum fit, ut in tenebris ambulent, id est, errent in iudicando, quomodo caeci errant interambulandum. Ex hoc autem errore & iniustitia sequitur perturbatio & tumultus, seditio & defectio populorum, quod significatur verbis sequentibus: *Mouebuntur omnia fundamenta terrae*, id est, totus orbis terrarum turbabitur, & quasi fluctuabit, neque alia fuit causa, cur totum Regnum Israel deficeret à Rege Dauid, nisi quia persuasit Absalon populus, Regem Dauidem non intendere causis cognoscendis, ut patet ex libro 2. Regum c. 15. Cur autem Iudices permulti caeci sunt, causam refert Scriptura in cupiditatem munerum. Isaia 1. *Omnes diligunt munera, sequuntur retributiones, pupillo non iudicant, & causa uiduae non ingreditur ad eos.* Exo. 23. *Nec accipias munera, quae excacant prudentes.* Deut. 16. *Munera excacant oculos sapientum.* Ecclesiastici 20. *Dona excacant oculos Iudicum.*

*Ego dixi Dilectus, & filij excelsi omnes.*

VI. Reprehendit haec Propheta, siue Deus



# EXPLICATIO

Deus ipse, Iudices, acceptionis personarum, iniustitiæ & ignorantia: nunc ostendit, quam indigna sint hæc vitia eo sublimi honore, in quo Deus illos constituit. *Ego, inquit, dixi, pronunciaui, asserui, Dij estis, & filij excelsi omnes, vos Iudices & Principes terræ. Vocat autem filios excelsi, vel comparans eos cum Angelis, qui apud Iob cap. 1. & 38. Filij Dei dicuntur: vel, ut ostendat, Iudices non esse Deos proprie, ut est verus & summus Deus, qui caret principio; sed esse Deos, quia filij Dei, id est, ab vno vero Deo, Dij constituti per participationem auctoritatis iudicandi & iubendi. In Euangelio Ioan. cap. 10. Dominus hunc locum adducens dicit, vocari Deos, quia sermo Dei ad illos factus est. Si illos, inquit, dixit Deos, ad quos sermo Dei factus est, quem Deus sanctificauit, & misit in mundum, vos dicitis, quia blasphemias, quia dixi, filius Dei sum? Sermonem Dei ad aliquem fieri, est, Deum committere alicui officium aliquod; sic enim dicitur, factum verbum Dei ad Prophetas, quos mittebat ad predicandum. Et Luc. 3. dicitur: Factum est verbum Dei super Ioannem Zacharia filium in deserto: & mox adiungitur executio: Et venit in omnem regionem Iordanis predicans, &c. Et quod Lucas dixit: Factum est verbum Dei super Ioannem, Ioannes cap. 1. explicuit, dicens: Fuit homo missus à Deo, cui nomen erat Ioannes. Atque hinc manifeste colligitur vis argumenti Christi, Si illos dixit Deos Scriptura, ad quos sermo Dei factus est, id est, quos Deus misit ad aliquid faciendum, communicans illis auctoritatem suam; quanto magis ego Filius Dei & Deus dici possum, quem de cælo Pater æternus misit in mundum cum plenaria potestate? Neque ex hoc loco colligi debet, omnes Iudices & Principes habere à Deo immediate potestatem suam. Satis enim est, si eam habeant vel immediate, ut habuit Moyses in Testamento veteri, & S. Petrus in nouo; vel mediante consensu populi, ut habent Reges & Principes terræ, in quo transtulit populus auctoritatem suam, quam accepit à Deo iure naturæ: Non enim est potestas, nisi à Deo, ut Apostolus scribit ad Rom. 13.*

Vos autem sicut homines moriemini, & sicut vnus de Principibus cadetis.

VII.

Ego, inquit, dixi, quid estis dignatione Dei; sed nunc addam, quid sitis vitio vestro: ex Dei munere Dij estis, & Angelis similes; sed ex peccato, quod habetis ex primo homine, sicut ceteri homines moriemini, & ex proprio vestro vitio, quo abutimini potestate vobis tradita, sicut vnus de Principibus celestibus, id est, de Angelis apostaticis, cadetis, & sic de summo gradu ad imum, de magna gloria ad extremam miseriam præcipitabimini. Illud, sicut homines, in Hebræo est, sicut Adam, & S. Hieronymus in commentario exponit: Sicut primus homo mortuus est, ita & vos eius filij secundum carnem peccatricem moriemini. Non potest tamen LXX. Interpretum versio improbari, quoniam vocabulum, Adam, ita proprium est primi hominis, ut etiam sæpe toti generi humano accommodetur. Illud autem, sicut vnus de Principibus, refertur ad Diabolum, non solum à S. Hieronymo, sed etiam à S. Augustino, Theodoro, Euthymio & aliis.

Surge Deus, iudica terram, quoniam tu hereditabis in omnibus gentibus.

VIII.

Hæc Psalmi conclusio duplicem habet sensum: vnum, ut Propheta imploret auxilium Dei aduersus iniustitias Principum & Iudicum terræ; ut videlicet ipse, qui est verus Dominus & possessor totius orbis, emendet iudicia hominum, puniat improbos Iudices, & pauperes oppressos subleuet iuxta sapientiam & potentiam suam: alterum, ut hæc sit prædictio per formam precationis, qua prædicatur aduentus Messia, qui sicut hereditabit orbem terræ, ita etiam iudicabit terram iusto iudicio per suos administratos, id est, fideles Pontifices & Reges, dum sæculum durat, & postea per se in nouissimo die. Surge Deus, iudica terram, id est, quandoquidem abutuntur Iudices potestate sua, tu Deus summe Iudex exurge, & iudica terram, exercens iudicia in ipsos



ipſos Iudices, & liberans pauperes innoxios ab oppreſſione potentium iniquorū. *Quoniam tu hereditabis in omnibus gentibus*, id eſt, quoniam poſſeſſio tua ſemper erit, ſicut fuit, in omni humano genere. Non enim ſic diſtribuis Regna filijs hominum, vt tu ſupremam poteſtatem non ſemper retineas. Vel, *ſurge Deus Chriſte*, veni in terras, *iudica terram*, vindica eam à poteſtate tenebrarum, trade eam miniſtris tuis fidelibus, quoniam tu *eris hares vniuerſorum*, vt verus, & naturalis filius Dei. Et demum ſurge iterum, & veni de cælo cum Sanctis tuis, & iudica terram iudicio vltimo, à quo nulla dari poterit appellatio; quia *hereditabis in omnibus gentibus*, quando, omnes inimici tui ſubiecti erunt ſub ſcabellum pedum tuorum; & ſublato omni principatu; & poteſtate, tu ſolus pacifice cūm Patre & Spiritu ſancto regnabis per omnem æternitatem.

## PSALMVS LXXXII.

Titulus, &amp; Argumentum Pſalmi.

Canticum Pſalmi Aſaph.

**H**ic eſt poſtremus Pſalmus ex ijs, qui inſcribuntur Aſaph. De argumēto tres inuenio ſententias, Recētioreſ volūt in hoc Pſalmo deſcribi orationē Regis Joſaphat aduerſus Moabitā, Ammonitā, & Idumæos, qui aduerſus eum conſpirauerant, vt dicitur 2. Paralip. 20. Sed contra hanc ſententiam facit, quod in hoc Pſalmo non tantum nominantur tres illæ gentes, ſed alia ſex, vel ſeptem. Theoderetus, & Euthymius exiſtimant, hunc Pſalmum continere bella gentium, quæ erant in circuitu terre promiſſionis aduerſus Iudeos, qui redierant ex captiuitate Babylonica, neq; illæ gentes tam multæ erant, quam multæ hic numerantur; ſolum enim 2. Eſdræ 4. nominatur Ammonitæ, Arabes, & Azotij. Probabilis eſt hæc omnia contigiſſe tempore Machabæorum, vt colligitur ex lib. 1. cap. 5. Machab.

Sanctus Auguſtinus omnino contendit hunc Pſalmum intelligendum eſſe de bellis Antichriſti aduerſus Eccleſiam, quæ ſententia probabiliffima videtur. Nam ſine dubio cum Antichriſto conuenient omnes barbara nationes, ac præſertim orientales Agareni, & Iſmaelitæ, à quibus Mahumetani originem ducunt. Sed quicquid ſit de ſenſu hiſtorico, non poteſt, nec debet negari, quin præcipua intentio Spiritus ſancti ad Chriſtum in Eccleſiam dirigatur.

## EXPLICAT. PSAL. LXXXII.

**D**eus, quis ſimilis erit tibi? ne taceas, neque compeſcaris Deus.

I.

Precatur Deum Propheta in perſona populi, vt quoniam ipſe eſt potentior omnibus inimicis, non amplius diſſimulet vindictam ſumere de perſecutoribus populi ſui. *Deus, quis ſimilis erit tibi?* id eſt, nemo tibi comparari poterit in potentia & robore, eſt tu ſolus ſis omnipotens: ideo *ne taceas*, id eſt, ne diſſimules, neque compeſcaris, id eſt, ne te ipſe mitiges, & compeſcas à ſumenda vindicta, tu qui Deus es, cui nemo reſiſtere poteſt. S. Auguſt. ſatis apte ad Chriſtum accommodat, qui in hoc mundo ſimilis alijs hominibus videbatur; ſed in die Iudicii nemo ſimilis illi erit, quando apparebit in gloria Patris ſui, & ſedebit in ſede Maiestatis ſuæ, vt habetur Matth. 25. Qui etiam tempore paſſionis tacuit, ſicut Agnus maſuetus, & compeſcuit ipſe ſe, ſed in die Iudicii non tacebit, neque iuſtiſſimam iram compeſcet, quando dicet, *Ite maledicti in ignem æternū.* Quod attinet ad verba, ex Hebræo S. Hieronymus ſic vertit totum hunc verſiculum, *Deus ne taceas, ne ſileas, & nō quieſcas Deus.* Et quidem voces Hebræicæ hunc ſenſum facere poſſunt, ſicut etiam hunc, *Deus ne ſilentium tibi ſit.* Sed etiam recipiunt hunc alium ſenſum; *Deus, non ſimilis tibi*, id eſt, nemo ſimilis tibi eſt: quod Septuaginta per interrogationem eleganter expreſſerunt, *Deus quis ſimilis erit tibi?* vox enim, *domi*, deducitur à verbo, *damah*, quod & ſimilem eſſe, & ſilere ſignificat. Illud, neque compeſ-

דמי  
דמה

Nnn

caris,



caris, in Hebræo propriè est, neque quiescas. Sed idem est sensus, vltima vox, Deus, in Hebræo est, *El*, quæ vox Deum significat, vt fortem; & robustum, ex qua intelligimus illud; *Quis similis tibi*, accipiendum esse de similitudine in potentia, & robore.

II. *Quoniam ecce inimici tui sonuerunt, & qui oderunt te, extulerunt caput.*

Magna ratio cur Deus silere non debeat hic adducitur, quoniam inimici eius tumultum insolitum excitauerunt conuenientes ex varijs nationibus in maxima multitudine aduersus populum Dei, & qui aliquando dissimulauerant, apertè se hostes professi sunt. Illud, *sonuerunt*, non significat sonitum tubæ: aut tympani tantummodo, sed tumultum grauem, vnde existit sonitus inconditus multitudinis, id enim propriè significat vox hebraica, *hamab*: quare S. Hieronymus vertit, *Quoniam ecce inimici tui tumultuati sunt*. Illud, *extulerunt caput*, sanctus Augustinus refert ad Antichristum, qui erit caput hostium Christi: ipso enim apparente, plurimi, qui non audebant se hostes Ecclesiæ profiteri, palam se Antichristo adiungent, & tum ipsi afferent audacter caput suum proprium, tum etiam extollent caput commune omnium iniquorum, id est, Antichristum.

III. *Super populum tuum malignauerunt consilium, & cogitauerunt aduersus sanctos tuos.*

IV. *Dixerunt, venite, & disperdamus eos de gente, & non memoretur nomen Israel vltra.*

Hic explicat magnitudinem periculi, vt Deus non expectet diutius, neque differat auxilium: quoniam hostes non moliuntur excursionem, aut deprædationem aliquam, sed vltimum extremum, & perferendam desolationem Ecclesiæ Dei. Ex hoc loco probabile fit hæc adimpleta esse vtrumque, id est, tamquam in typo, & figura tempore Machabæorum. Dicitur enim lib. 1. cap. 3. conuenisse omnes gentes, quæ erant in circuitu, vt tollerent genus Iacob. Sed propriè

pertinent hæc omnia ad tempus Antichristi: tunc enim omni conatu contendunt omnes impij simul congregati delere castra Sanctorum. Sed verba consideremus. *Super populum tuum malignauerunt consilium*, id est, malignum consilium inierunt aduersus totum populum tuum: sed per malignum intelligi debet malitiosum, & astutum: nam verbum, *iabarinu*, propriè significat, astute, & secreto consu tauerunt, sicut etiam vox, *sod*, quam, *consilium* verterunt Septuaginta significat secretum, ac per hoc consilium, quatenus secretum esse solet. Hoc autem consilium astutum, & secretum erit multiplex apud Antichristum: nam & consilium secretum habebit cum Diabolo, quem occulte colet: & astuto consilio finget se Christum esse, vt Christianos decipiat, & simul circumcisionem, & sabbata probabit, vt seducat Hebræos. *Et cogitauerunt aduersus sanctos tuos*, id est, malitiosum illud consilium excogitauerunt in perniciem fidelium tuorum, qui sanctificati sunt per sanguinem Vnigeniti, & tibi propriè sanctificati, & dedicati sunt, vel certe sancti tui sunt per sanctam fidem, & religionem, quam susceperunt. In Hebræo legitur *aduersus absconditos tuos*, vel *abscondita tua*, vel *arcana tua*: proinde non desunt qui intelligant per hanc vocem, sanctuarij interiora: neque ab hac expositione dissentit Græca lectio, nam *ἐν τῷ σὺν*, tam significare potest sancta tua, quam sanctos tuos. Caterum editio Latina vulgata antiquissima, quæ sine variatione legit, sanctos tuos; declarauit ambiguitatem, quæ in Hebræo, & Græco esse poterat: Rectè autem fideles Dei, dicuntur absconditi Dei, quoniam Deus sub vmbra alarum suarum protegit eos: & quoniam (vt Apostolicè ad Coloss. 3.) *abscondita est vita nostra cum Christo in Deo*, &, *Cum apparuerit Christus vita nostra*, tunc & nos apparebimus cum illo in gloria, cui subscribit S. Ioannes in epist. 1. ca. 3. dicens, *Nunc filij dei sumus, & nōdum apparuit quid erimus*. Itaque sancti Dei rectè dicuntur absconditi, quoniam etsi Fidei professio non sit abscondita, tamen gloria, & pre-

עירי  
דוד



& precium inestimabile huius professionis abscondita sunt, & suo tempore reuelanda. *Venite, & disperdamus eos de gente*, id est, efficiamus, vt non sint amplius gens, & populus, vel, vt S. Augustinus exponit, *Disperdamus eos de gente*, id est, de gentibus, vt inter gentes, siue homines nullum locum habeant. *Et nomen Israel non memoretur amplius*, id est, ne nomen quidem populi Dei supersit. Iam enim sepè monuimus per Israellem intelligi populum Dei, siue secundum carnem, siue secundum spiritum ab Israele descendat.

*Quoniam cognouerunt vnanimiter simul, aduersum te testamentum disposuerunt tabernacula Idumæorum, & Ismaelitarum.*

*Moab, & Agarenis; Gebal, & Ammon, & Amalech: alienigenæ cum habitantibus Tyrum.*

*Etenim Assur venit cum illis, facti sunt in auditorium filijs Loth.*

Describit gentes, quæ delere nitebantur populum Dei de terra. *Quoniam*, inquit, *cogitauerunt vnanimiter simul*, id est, consiliū coeperunt vno animo omnes inimici Israel simul: vbi enim nos legimus, *cogitauerunt*, in Hebræo est *consultauerunt*, ac per hoc illud, *cogitauerunt*, significat, inito consilio cogitauerunt. *Aduersus te testamentum disposuerunt*, id est, fœdus inierunt aduersus populum tuum, vox enim, testamentum, in sacris literis pactum significat, & in textu hebraico expresse *pactum*, siue fœdus, legitur *Tabernacula Idumæorum, & Ismaelitarum, &c.* Isti sunt qui consulando inter se cogitauerunt, & pactum inierunt aduersus populum Dei. Primum quidem Idumæi, siue potius tabernacula Idumæorum, id est, integra castra Idumæorum. Sunt autem Idumæi populi qui descendunt ab Esau, qui alio nomine dicebatur Edom. Deinde Ismaelitæ, id est, populi, qui descendunt ab Ismaele filio Abraham ex Agar ancilla. Tertio Moab, id est, populus, qui descendit a filio Loth, qui dictus est Moab. Quarto Agarem, id est, populi, qui descendunt ex Agar ancilla A-

brahæ, sed ex alio marito cui nupsit postquam dimissa fuit ab Abraham. Quinto Gebal, id est, populus qui descendit a Gebal. Vtrum autem Gebal sit nomen viri, an regionis, incertum est, cum hoc nomen non inueniatur in Scripturis, nisi hoc loco, fortasse idem est Gebal cum Gebelem, cuius sit mentio lib. 2. Reg. c. 8. vbi dicitur, *Fecit quoque sibi David nomen, cum reuertetur castra Syria in valle salinarum, castris decem & octo millibus, & in Gebelem ad viginti tria millia*: vel est idem cum Geba, de qua dicitur lib. 2. Esdræ cap. 12. de domo Galgal, & de regionibus Geba. Theodoretus, & Euthymius dicunt, Gebal fuisse gentem vicinam Idumæis. Sexto Ammon, id est, populus, qui descendebat ab Ammon filio Loth, ex fratre Moab: hos enim duos genuit Loth ex filiabus suis, Genes. 19. Septimo Amalech, id est, populus, qui descendebat ab Amalech, qui fuit nepos Esau, vt legitur Gen. 30. Octauo Alienigenæ, id est, populus Philistinorum, de quibus frequentissima mentio est in libris Regum. In Hebræo habetur, Palæstina, sed Septuaginta hanc vnam gentem perpetuo alienigenas vocare solent. Nono habitantes Tyrum, id est, Tyrij, qui sunt populi ad mare sic dicti a Tyro ciuitate, atque emporio nobilissimo. Decimo Assur, qui venit in auxilium filijs Loth, id est, populus Assyriorum, qui iuuabant Moabitas, & Ammonitas aduersus Iudæos. Per hos Assyrios, rectè Theodoretus interpretatur Samaritanos, id est, Assyrios, quos constituit Salmanasar Rex Assyriæ in Samaria, quando transtulit decem tribus in Assyriam, vt habetur lib. 4. Reg. c. 17. Non enim legitur in Scripturis, quod aliquando venerint aliqui ex Assyria in auditorium filijs, Loth id est, Moabitis, & Ammonitis: sed legimus in primo libro Machabæorum cap. 5. quod gentes, quæ erant in Galilæa, & Samaria coniunxerint arma cum Moabitis, & Ammonitis aduersus Iudæos. Porro isti decem populi significant, vt supra diximus, gentes quæ pugnaverunt cum Machabæis, vel potius multitudinem orientaliū barbarorum, qui cum Antichristo grauissimam persecutionem mouebant aduersus Ecclesiam.



VIII.

*Fac illis sicut Madian, & Sisara, sicut Iabin in torrente Cisson.*

Prædicit nunc Propheta per modum imprecationis exterminium gentium, quæ cum Machabæis præliabantur, sed præcipue Antichristi, & exercitus eius, comparans illos alijs persecutoribus, qui similiter perierunt. *Fac illis, inquit, sicut Madian*, id est, disperse eos, sicut olim tempore Gedeonis Iudicis dispersisti, ac penitus profligasti Madianitas. Historia hæc habetur in lib. Iud. cap. 6. & 7. *Et Sisara*, id est, sicut tempore Baruch Iudicis perdidisti Sisaram Principem militiæ Iabin Regis. *Et Iabin in torrente Cisson*, id est, sicut deleuisti ipsum Iabin Regem Chanaam cum exercitu suo prope torrentem, qui dicitur Cisson. Habetur hæc historia in lib. Iud. cap. 4. & 5. Meminit autem Propheta horum Principum præter cæteros; quoniam deuicti sunt, non sine miraculo à paucis hominibus, & magis terrore à Deo immisso, quam viribus Iudeorum.

IX.

*Disperierunt in Endor, facti sunt, vt stercus terræ.*

Describit locum, ubi perierint Iabin, & Sisara cum exercitu suo; locus enim fuit Endor, cuius fit mentio in libro Iosue cap. 16. Ibi ergo perierunt, & facti sunt vt stercus terræ, quia insepulti computruerunt, & à maxima gloria ad summam ignominiam redacti sunt.

X.

*Pone Principes eorum, sicut Oreb, & Zeb, & Zebea, & Salmanna.*

Reuertitur ad historiam Gedeonis, qui non solum exercitum Madianitarum profligauit; sed etiam paulò post interfecit duos Principes Madianitarum *Oreb, & Zeb*, & duos Reges *Zebea, & Salmanna*. vide in lib. Iud. cap. 7. & 8.

XI.

*Omnes Principes eorum, qui dixerunt: Hæreditate possideamus sanctuarium Dei.*

Pone, inquit, sicut Reges, & Principes Madianitarum omnes Principes eorum populorum, qui dixerunt, Hæreditate possidea-

mus; id est, tanquam hæreditatem, & propriam possessionem vindicemus nobis *sanctuarium Dei*, id est, ciuitatem Hierusalem, quæ erat sanctificata Deo, vt proprium eius habitaculum. Significat autem Hierusalem (vt sæpè diximus) Ecclesiam Dei, quæ totis viribus sibi subicere, & captiuare conabitur Antichristus. In Hebræo pro, *sanctuarium*, habetur, *nehor*, quam vocem S. Hieronym. vertit, *pulchritudinem Dei*; sed commodius verti posset, pulchra habitacula Dei. Septuaginta verterunt sensum. Habitacula enim Dei, sanctuaria sunt.

יהוה

*Deus meus pone illos, vt rotam, & sicut stipulam ante faciem venti.*

Apertissima similitudine describit Prophetam instabilitatē, & interitum impiorum, quæ procedunt ex iusto iudicio Dei. Rota enim semper circumuoluitur, cum ruit in præceps, nec ad punctum temporis consistere potest, & tandem tota confringitur, sicut etiam stipulae flante vento huc illucque iactantur, donec dissipatae non amplius compareant: Ad hunc modum prædicit. Prophetam esse cum impijs persecutoribus iustorum: & re vera sic fieri experientia testis est, nihil enim instabilius est prosperitate impiorum, & finis eorum mors æterna erit.

XII.

*Sicut ignis, qui comburit syluam, & sicut flamma comburens montes.*

XIII.

*Ita persequeris illos in tempestate tua, & in ira tua turbabis eos.*

XIV.

Prædixit supplicium impiorum, instabilitatem in hoc seculo, & interitum in futuro: nunc prædicit velocitatem, & facilitatem, qua Deus illos puniet: nam non contentus similitudine venti dissipantis stipulas: & comparat iram Dei igni comburenti ligna sylvarum, aut fœnum camporum. Sicut, inquit, ignis qui comburit ligna sylvarum, inter quæ multa sunt arida, & velocissimè absumuntur, & sicut flamma comburens montes, id est, fœnum in montibus.



bus, præcipue cum sicum fuerit, *Ita persequeris eos*, id est, pari facilitate & celeritate persequeris, & perdes eos *in tempestate tua*: quod declarans addit, *& in ira tua turbabis eos*. Idem enim est tempestas & ira; vtrumque enim iustum Dei iudicium significat, quod instar vehementissimæ tempestatis & turbæ, cui resisti nullis viribus potest, impios percellat, conturbabit & dissipabit. S. Augustinus notat, impios comparari montibus propter elationem ac superbiam; & lignis sylvarum propter sterilitatem & carentiam fructuum bonorum, ob quæ iure sempiternus ignis illis debeat.

telligant, tibi soli nomen Domini proprie conuenire, cui ad nutum seruiunt omnia, & tu nulli necessitati seruis, qui nulla te indiges, in te ipso habens omnia. Ceteros autem qui dicuntur Domini, vel vsurpasse nomen alienum, vel improprie Dominos dici, cum & ipsi multis rebus indigeant, ac per hoc multis necessitatibus seruiant. *Tu solus altissimus in omni terra*, id est, & cognoscant, quia tu solus præmines potestate super omnes Principes vniuersæ terræ, neque vllus est, qui tecum contendere vel vlllo modo comparari possit. Hæc prophetia nunc ex parte impletur, sed in die iudicii omnino & absolute implebitur.

XV. *Imple facies eorum ignominia, & quærent nomen tuum Domine.*

XVI. *Erubescant & conturbentur in sacculum sæculi, & confundantur & pereant.*

XVII. *Et cognoscant, quia nomen tibi Dominus, tu solus altissimus in omni terra.*

Prædicit in fine Psalmi, alios ex persecutoribus per flagella, erudiendos & conuertendos ad Deum: quales erunt plurimi Iudæi, qui tunc demum agnoscent errorem suum, & pudefacti conuertentur ad Deum: alios in pertinacia & obstinatione sua permauros; sed eos quoque confundendos, & vel inuitos cognituros potentiam Dei singulare, & quod ipse solus sit verus Dominus omnium rerum. *Imple, inquit, facies eorum ignominia*, id est, confusione, ut ignominiam suam intelligentes verecundati *quærant nomen tuum*, id est, quærant te: sæpe enim nomen ponitur pro persona: vel, *quærant nomen tuum*, id est, inuocent nomen tuum; vel, *quærant nomen tuum*, id est, quærant gloriam tuam, non amplius suam, ex inimicis amici facti, & ex seruis filij. Illi autem, qui ex flagellis non molliuntur, sed obdurantur ad imitationem Pharaonis, *erubescant & confundantur in sacculum sæculi*, id est, æterna confusione repleantur; nec solum confundantur, sed etiam pereant in æternum. *Et cognoscant inuiti, quia nomen tibi Dominus*, id est, iam propria experientia edocti in-

PSALMVS LXXXIII.

Titulus & Argumentum.

In finem, pro torcularibus, filiis Core; Psalmus.

DE hoc Titulo alibi diximus. Argumentum idem fere est, quod Psal. 41. cuius initium est: Quemadmodum desiderat ceruus ad fontem aquarum. Vtrumque Psalmum videntur nonnulli nimis humiliter exponere, dum docent, vel Dauidem, vel populum in hoc Psalmo exprimere desiderium redeundi ad terram Ierusalem, ut tabernaculum Domini visitare posset: longe autem humiliter exponunt, qui docent Coruas in hoc Psalmo proferre desiderium suum redeundi ex Babylone in Ierusalem, ut possent deseruire tabernaculo, unde victum capiebant. Nos cum Patribus existimamus, tam ardens desiderium, quale in hoc Psalmo legimus, etiam ad literam, ad cœlestia tabernacula pertinere; & nihil terrenum, nihil humanum, nihil corporale Spiritum Sanctum his suis vocibus exprimere voluisse: & ideo ab Ecclesia Catholica peregrinante cantica ista frequentari, etiam si tabernaculum, quod erat in Ierusalem, iam dudum conflagrauerit, & ipsa Ierusalem funditus euerfa fuerit.



## EXPLICATIO PSALMI LXXXIII.

I. **Q**uam dilecta tabernacula tua Domine virtutum, concupiscit & deficit anima mea in atria Domini.

Hæc vox est hominis pij petegrintantis ad patriam, & desiderium perueniendi declarantis: nescitur autem hoc desiderium, tum ex felicitate, quæ est in patria, tum ex miseria, quæ est in peregrinatione. Vir enim pius, quantumvis in hoc exilio abundare videatur terrenis rebus, intelligit tamen se miserum esse, & persecutionem pati, ut Apostolus dicit 2. ad Tim. 3. Quoniam ipsa etiam terrena prosperitas magna tentatio & persecutio est. At igitur: *Quam dilecta tabernacula tua Domine virtutum*, vox est admirantis, quasi dicat, ô quantum diligunt omnes pij tabernacula tua, cœlestes videlicet mansiones tuas, ô Domine exercituum: vocat autem Dominum exercituum, quia hoc ipsum facit pulchra valde & amabilia tabernacula cœlestia, quod ibi sunt innumerabiles exercitus Angelorum, id est, civium sapientissimorum, optimorum, potentissimorum, pulcherrimorum; quorum vel unus sufficeret lætificare peregrinationem nostram, si cum toto suo decore nobis apparet, sed totum exercitum tantum tantorum Principum: ibi videtur facie ad faciem Dominus virtutum, cuius comparatione fulgor omnium Angelorum tenebræ sunt. Recte notat hoc loco Theodoretus, non fuisse in terrena Hierusalem plura tabernacula Dei, sed vnicum: ac propterea non de illo vno ligneo & deaurato, ac manibus hominum constructo tabernaculo, Prophetam hoc loco intelligendum esse, sed de cœlestibus tabernaculis, non manufactis, de quibus Dominus dicit, Ioan. 14. *In domo Patris mei mansiones multe sunt*. *Concupiscit & deficit anima mea in atria Domini*. Dixerat in genere, tabernacula Domini multum diligere à pijs peregrinis: nunc se in eorum numero ponit, ac dicit: *Concupiscit & deficit anima mea*, quasi dicat, Ego certe ita desidero atria illa,

ut præ amore langueam, & anima mea deficiat, ac deliquium patiat, in atria Domini intendens, & pulchritudinem eorum considerans.

*Cor meum, & caro mea exultauerunt in Deum viuum.*

Declarat vim amoris & desiderij sui per effectum, qui enim vehementer amat & desiderat, corde recogitat & ore laudat, quod desiderat. *Cor meum*, inquit, & *caro mea*, id est, mens & lingua exultando laudauerunt Deum viuum; ipse enim est pulchritudo increata & intinita, cui suspiro. In Hebræo pro *exultauerunt*, est *ieramenu*, *iubilauerunt*, siue magna voce laudauerunt: proinde illud *exultauerunt*, non debet accipi pro sola lætitia, sed pro lætitia prorumpente in vocem iubilationis. Neque repugnat hic versiculus cum superiore, etiam si ibi anima deficiat, hic exulter; varij sunt enim amantissimi affectus, nunc desunt absentiam rei amate, & præ amore deficiunt, nunc exultant ob spem potiundæ rei tam pulchræ, & in laudes eius prorumpunt. Deum viuum, seu viuentem appellat, non solum ad distinctionem Idolorum, quæ oculos habent, & non vident, aures habent, & non audiunt, quia res inanimæ sunt; sed etiam, quia Deus solus propriissime viuit: viuere enim est moueri non ab alio, sed à se: res autem creatæ, quæ viuere dicuntur, quia habent in se principium aliquod motus, tamen sine Deo non mouentur: *in illo enim viuimus, mouemur & sumus*, Act. 17. Solus Deus ita viuit, ut à nullo moueatur, id est, à se solo habet intelligere & velle, & ideo ipse solus est vita, ipse fons vitæ, non aliunde accipiens, sed omnibus tribuens. *In ipso*, inquit Ioan. cap. 1. *vita erat, & vita erat lux hominum*.

Etenim passer inuenit sibi domum, & turtur nidum, ubi ponat pullos suos.

Altaria tua Domine virtutum, Rex meus & Deus meus.

Hi versiculi obscuri sunt, & ab alijs aliter expo.

II.

III.

IV.



exponuntur. S. Hieronymus & Theodoretus videntur satis commode eos explicuisse. Eos secutus hunc sensum esse existimo, optauerat sanctus peregrinus domum coelestem; sed interim dum eius possessio differtur, consolatur se, quod vel nidulum in terris inuenit, altaria videlicet Domini sui, nihil enim habemus in terris, quod melius nobis repræsentet tabernaculum coeleste, quam sacrum altare. Ibi enim adest multiplex memoria rerum coelestium; ibi quotidie immolatur Agnus Dei, qui sanguine suo aperuit credentibus regna cælorum; ibi futurae gloriae nobis pignus datur; ibi Deo propius astamus, eiq; intentius supplicamus; ibi effundimus corda nostra, & diuinas laudes deuotius & attentius, quam vsquam alibi decantamus. Attingitur: *Etenim passer inuenit sibi domum*, id est, omnia animantia quaerunt sibi locum aliquem quietis, & ipse etiam passerulus inuenit sibi domum, id est, nidulum aliquem: *& turtur nidum sibi*, id est, non solum animalia, quæ delectantur frequentia, vt passer, sed etiam animalia solitaria, vt turtures, parant sibi nidos, *vbi ponant pullos suos*, & cum eis quasi secure quiescant. *Altaria tua Domine*, id est, mihi vero siue actiuam vitam ducam, more passerum, siue contemplatiuam, more turturum, altaria tua nidi sunt, vbi interim paulisper quiescam, & vbi vota mea, & casta desideria, piasq; meditationes, & preces, & laudes, quasi pullos, reponam. *Altaria, inquam, tua, Rex meus, & Deus meus*, id est, qui me regis, dum vt passer huc & illuc vagor, & qui me consolaris, dum vt turtur solitarius gemo, siue, *Rex meus*, cui milito, dum aucupes mihi, vt passer laqueos tendunt; & *Deus meus*, cui vaco, dum vt turtur viduus diuina contemplan. In Hebræo non habetur proprie nomen turturis, id est, *thor*, sed *deror*, quod proprie libertatem significat, & quia auicula libere volant per aërem, Hebræi hoc nomine, *auem*, significari volunt. Cæterum fieri potest, vt Septuaginta legerint, *thor*, non, *deror*, facile enim fuit successu temporis, vt ex litera *ת*, sint factæ duæ literæ, *ד*, res & *ד*, daleth,

vel si hoc non placeat, dicemus, LXX. Interpretes nomen generale, *auis*, restrinxisse ad turturem; quomodo nunc Rabini illud idem nomen restringunt ad hirundinem: nec enim minus libere volant per aërem turtures, quam hirundines, & mystica significatio requirebat, vt nomen turturis hoc loco, non hirundinis poneretur.

*Beati qui habitant in domo tua Domine, in sacula seculorum laudabunt te.*

V.

Dixerat, se inuenisse nidum, vbi interim requiesceret: sed ex ipso nido admonitus quanto melior sit domus æterna nidulo temporali, exclamat: *Beati, qui habitant in domo tua Domine*, id est, ego quidem in hoc nidulo paululum quiesco, sed illi vere beati sunt, illi felicissime requiescunt, qui habitant in domo tua, vbi diuitiæ & gloria, vbi mansiones multæ, vbi pax & securitas sempiterna est. Et quoniam non habent necesse in sudore suæ velsi pane suo; neque in aliorum gratiam laborare, vbi nulli sunt egeni; id solum illis superest negotium, vt in sacula seculorum laudent te: neque periculum est, vt tædeat semper laudare, quem nunquam tædebit semper amare, & quem sine labore, sine fatione, sine satietate laudabunt.

*Beatus vir cuius est auxilium abste, ascensiones in corde suo disposuit: in valle lachrymarum, in loco quem posuit.*

VI.

Dixit beatum esse, qui habitat in domo Domini: nunc addit, beatum etiam esse, si non in re, saltem in spe; eum, qui frater diuino auxilio decernit firmiter in corde suo non hære in valle, sed ascendere semper magis, ac magis per gradus virtutum, donec ad locum perueniat, quem posuit Deus finem omnium laborum, quæ est æterna beatitudo. Duæ sunt autem huius versiculi expositiones; vna si solum Latinum contextum inspicimus; altera si eum cum Græco & Hebræo concordare velimus. Prior hæc: *Beatus ille*

Vir



vir est, cuius auxilium non in propriis viribus, sed in te Domine est: hic enim ascensiones in corde suo disposuit, in valle lachrymarum, id est, disposuit semper ascendere, ad maiorem virtutis perfectionem, dum est in hac mortali vita, quæ est vallis lachrymarum. In loco, quem posuit, id est, in valle lachrymarum, quem locum ipse sibi peccando constituit. Deus enim in Paradiso eum posuerat, sed ipse sibi locum posuit in valle lachrymarum. Posterior expositio hæc est: *Beatus vir, cuius est auxilium abs te*, id est, qui non confidit in viribus suis, sed à te auxilium expectat. *Ascensiones in corde suo disposuit*, id est, Deus disposuit in corde eius nunquam stare, vel retrocedere, sed de gradu inferiore ad superiorem ascendere. In valle lachrymarum, id est, per vallem lachrymarum, dum videlicet peregrinatur in hac valle plena periculis & temptationibus. In loco, quem posuit, id est, usque ad locum, siue habitaculum, quod idem Deus statuit, tanquam metam & finem peregrinationis. Quod attinet ad verba, in Hebræo multo aliter legitur hic versiculus: ac primum pro illis verbis, *cuius est auxilium abs te*, in Hebræo habetur, *fortitudo ei in te*: sed idem est sensus. Idem enim est, *cuius auxilium abs te est*, &, *cuius fortitudo in te est*. Pro, *ascensiones*, in Hebræo habetur, *semitas*, sed per *semitas* intelliguntur altæ *semitæ*, vel etiam exaltationes & gradus: nam, *salal*, exaltare significat, inde *mesilloth*, ascensiones & altas *semitas* significat. Pro, *in corde suo*, in Hebræo est, *in corde eorum*, tamen & Septuaginta, & S. Hieronymus verterunt in singulari, *in corde eius*: & sic etiam legit S. Augustinus, qui refert verbum, *disposuit*, & verbum, *posuit*, ad Deum. Ipse enim disponit in corde nostro ascensiones ad locum, quem ipse posuit: & non est nouum, vt in Latina editione accipitur, *suo*, pro, *eius*: sicut etiam aliquando accipitur, *eius*, pro, *suo*, vt Ioan. 8. *Patrem eius dicebat Deum*, id est, Patrem suum. Pro, *disposuit*, in Hebræo est, *transcentes*: sed Septuaginta vocem Hebraicam, *hhobre*, non deduxerunt à verbo, *hhabar*, quod est

transire, sed à verbo, *hhabad*, quod est seruire, facere, operari, & legerunt sine vltima litera, *habad*, operatus est, quod est idem cum verbo, *disposuit*, sic legendam esse hanc vocem, non solum colligimus ex literarum similitudine, & ex convenientia cum textibus Græcis & Latinis, sed etiam quia si legeremus, *transcentes*, vix diuinari posset, quis esset sensus huius loci. Denique pro, *loco*, in Hebræo est, *fontem*. Sed LXX. Interpretes non legerunt, *mabbetan*, id est, fontem; sed, *mabbon*, locum, siue habitaculum: ex quo etiam intelligimus, per *locum*, non intelligi quemlibet locum, sed locum commodum ad habitandum, & recte à S. Augustino referri ad mansionem celestem; & quod nos legimus: *In loco, quem posuit*, clarius habetur in Græco, *eis tòn tòn πόν*, in locum, quem posuit, & sic legit S. Augustinus. Interpres enim Latinus aliquando non seruat construtiones Grammaticales: nam & apud Ioan. cap. 7. legimus: *Ambulabat Iesus in Galilaam, non enim volebat in Iudaam ambulare*: pro, in Galilæa, &, in Iudæa.

Etenim benedictionem dabit legislator, ibunt de virtute in virtutem, videbitur Deus Deorum in Sion.

Declarat Propheta, quomodo vir iustus ascendens per vallem lachrymarum perueniet ad locum quietis, quem Deus posuit: ac demonstrat initium, medium & finem huius ascensionis. Initium est iustificatio, sine qua lex impleri non potest; medium est impletio legis: finis est visio Dei, in qua beatitudo consistit. Etenim benedictionem dabit legislator, id est, legislator Deus, qui dedit legem, & eam viam esse voluit ad vitam, iuxta illud Matth. 19. *Si vis ad vitam ingredi, serua mandata*: dabit etiam benedictionem, abundantem videlicet gratiam per Spiritum sanctum, iustificando à peccatis, infundendo charitatem, pellendo timorem. *Ibunt de virtute in virtutem*, id est, accepta gratiæ benedictione

עבר

מעין מעין

סלי מסלות

עבר עבר

VII.



ne proficient quotidie in melius, magis ac magis roborabuntur, superantes omnem difficultatem, & resistentes omni tentationi: per virtutem enim hoc loco intelligitur robur, & potentia. *Videbitur deus Deorum in Sion*, id est, sic tandem peruenient ad montem Sion celestem, ubi videbitur facie ad faciem Deus vnus, & verus, qui est Deus nō solum cœli, & terræ, sed etiam Angelorum, & Beatorum, qui participatione sunt Dī. In Hebræo, & Græco textu habetur in numero multitudinis, benedictiones, vt intelligamus, multiplicem esse gratiam Dei quæ non solum delet peccata, sed etiam iuuat ad opera bona faciendā, & legem implendam. Illud autem, *dabit legislator*, S. Hieron. ex Hebræo vertit, *amicietur Doctor*, vt sensus sit, Benedictionibus vestiatur, qui docet legem Dei. Sed LXX. Interpretes verbum, *יִהְיֶה*, acceperunt actiue, vt re vera est, nō passiuē; vt sensus sit, Benedictionibus vestiatur Legislator ascendentes in conualle lacrymarum. Idem autem est, dare benedictionem, & vestire benedictionibus, nisi quod prior sententia est propria, posterior metaphorica. Solent enim LXX. Interpretes vertendo verba Hebraica in Græcā, explicare metaphoras, vt sententia facilius intelligatur. De voce legislatoris, & Doctoris, non debet fieri quæstio: omnis enim Legislator est Doctor, quia dum leges condit, & præbet, hoc ipso docet, quæ sit recta via: & quoniam hoc loco de Deo sermo est, maluerunt Septuaginta vertere, *Legislatorem*, quam simpliciter Doctorem; quia Deus non docet explicando legem ab alio datam, sed ipse dedit leges, ipse explicat, ipse iuuat, vt impleatur. Illud, *ibunt de virtute in virtutem*, quamuis sit explicandum de vi, & robore, vt sonant voces Hebraicæ & Græcæ hoc loco positæ: tamen non male S. Aug. exponit de virtutibus moralibus, iustitia, prudentia, fortitudine, & temperantia: & de virtute contemplationis diuinæ, quia istæ virtutes roborant animum aduersus tentationes, & vitia: vt sensus sit, *ibunt de virtute in virtutem*, id est, de virtute actionis ad virtutem contemplationis, siue, de virtutibus necessarijs in via, ad

virtutem quæ habebitur in patria, ubi non erit necessaria ista prudentia, cum nulla mala vitanda occurrent; neque iustitia ista, cum nulla sit futura iniustitia; neque ista fortitudo, cum nullus instabit timor; neque ista temperantia, cum nulla erit frænanda libido.

*Domine Deus virtutum, exaudi orationem meam, auribus percipe Deus Iacob.*

VIII.

Reuertitur ad gemitum suum cupiens esse ex illis, qui ascendunt ex conualle plorationū, & pergunt felici itinere de virtute in virtutē. *Domine Deus virtutū*, tu qui fortissimus, & potentissimus, ac virtute plenissimus es, exaudi orationem meam, qua peto gratiam ambulandi de virtute in virtutem, & virtute corroborari in interiori homine. *Auribus percipe Deus Iacob*, tu, inquam, qui es Deus fidelium tuorum, quorum Pater est sanctus Iacob, exaudi orationem meam, qui vnus sum ex populo tuo, ex filijs Iacob secundum spiritum.

*Protektor noster aspice Deum, & respice in faciem Christi tui.*

IX.

Implorauit Dei auxilium, sumens argumenta ad impetrandum, quod ipse potentissimus sit, & curam gerat populi sui: nunc eadem repetit alijs verbis, sed maiori efficacia. Quod enim dixit, *Deus virtutum*, nunc dicit, *protektor noster*, & in Hebræo, *clypeus noster*: ubi ostendit, Deum esse potentissimum ad protegendum populum suum, esse videlicet Deum quasi fortissimum clypeum populi sui. Ibi dixerat, *exaudi orationem*; hic dicit, *aspice*, quasi dicat, *non solum audivisti me, sed tu ipse vide, & considera pericula, in quibus versor*. Ibi dixerat, *auribus percipe Deus Iacob*, hic dicit, *respice in faciem Christi tui*, id est, respice verum principem populi tui, Messiam videlicet, Agnum sine macula, qui tollit peccata mundi, ac propter eum protege nos. S. August. exponit, *respice in faciem Christi tui*, id est, fac vt omnes respiciant in faciem Christi, agnoscant eum, credant in eum, obediant ei. Sed prior sensus est magis



litalis, & magis communis. Neque obstat quod tempore Dauidis nondum esset Verbum incarnatum, neq; mediator Dei, & hominum homo Christus Iesus interpellare cepisset pro nobis. Merita enim Christi ab æternitate fuerunt in conspectu Dei, vnde dicitur in Apoc. 13. *Agnus occisus ab origine mundi*, quoniam ab origine Mundi Deus propter merita passionis præuisa, multa beneficia, præsertim spiritualia seruis suis concessit. *Qui benedixit nos*, inquit Apostolus ad Ephes. 1. *omni benedictione spirituali in cælestibus in Christo, sicut elegit nos in ipso ante Mundi constitutionem.*

X.

*Quia melior est dies vna in atrijs tuis super millia.*

XI.

*Elegi abiectus esse in domo Dei mei, magis quam habitare in tabernaculis peccatorum.*

Vt ostendat S. Peregrinus Dei, se non petiuisse protectionem aduersus temporalia mala: sed aduersus tentationes, & pericula spiritualia, quæ impediunt ascensum ad domum Dei, subiungit, tantam esse cælestis patriæ felicitatem, vt optabilius sit vni die tatum ibi manere, quam mille diebus alibi: & melius sit in eo loco inter vltimos sedere, quam alibi inter primos: quæ duæ comparationes si serio cogitentur, magnum affe-  
rum in corde puro gignere possunt. Illud, quia, reddidit causam, cur tanto affectu dixerit, *Protektor noster aspice*, &c. quasi dicat. Ideo cupio valde protectionem tuam in hac ascensione ad patriam, quia nimis magna esset iactura, si ad patriam illam non peruenirët. *Melior est enim habitatio vnius diei in atrijs illis cælestibus, quam mille, id est, innumerabilium dierum alibi*, sic exponit S. Augustinus in lib. 3. de libero arb. c. vlt. *Tanta, inquit, est pulchritudo iustitiæ, tanta iucunditas lucis æternæ, hoc est, incommutabilis veritatis, atque sapientiæ, vt etiam si nō liceret amplius in ea manere, quam vnius diei mora; propter hoc solum innumerabiles anni huius vitæ pleni delicijs, & circumstantia temporalium bonorum recte, merito-*

que contemnerentur: non enim falso, aut prauo affectu dictum est, *Quoniam melior est dies vna in atrijs tuis super millia.* Idem tamen S. August. & hoc loco, id est, in comment. huius Psalmi, & in lib. citato de liber. arbit. scribit, per vnā diem, intelligi posse diem æternitatis, quæ vna est, & eadem semper manens, per, millia dierum, tempora volubilia, & instabilia huius vitæ, quæ quantumuis multiplicentur. Semper longe inferiora erunt die semper manentis æternitatis. Sed prior sensus est magis literalis, & magis cohæret cum sequenti comparatione. *Elegi, inquit, abiectus esse in domo Dei mei*, id est, tanta est dignitas domus æternæ in cælis, vt malim ibi sedere ad ianuam cum vltimis, quam habitare in tabernaculis peccatorum: vox enim Hebraica, quam noster interpres vertit, abiectus esse, est *hastophoph*, quæ proprie significat, sedere ad ianuam more ianitoris, nam, *soph*, limē significat, &educta est similitudo à ianitoribus tabernaculi, qui erant infimi omnium ministrorum domus Dei, vt patet ex lib. 1. Paralip. ca. 9. Recte autem vocat. Propheta palatia huius mundi, tabernacula peccatorum, tum quia in domo cælesti nulla inuenitur iniquitas, hic autem nemo est, qui non peccet: tum quia respectu domus cælestis, sunt veluti tentoria quædā, quæ facile mutantur, & fundamento carent: non enim hæc est eadem vox, quæ in principio Psalmi. Ibi enim vox Hebræa significat stabilem mansionem: hic autem est vox, quæ proprie significat tabernacula, siue tentoria, quæ transferuntur de loco ad locum.

*Quia misericordiam, & veritatem diligit Deus, gratiam, & gloriam dabit Dominus.*

Consolatur hoc versiculō, & sequenti Propheta virum iustū ascendente in valle lacrymarum, atque ad patriam anhelantem: promittit enim illi a Deo gratiam, & gloriam: gratiam per quam iustificetur, & in iustitia proficiat; dum de virtute in virtutem ascendit: & gloriam per quam glorificetur; cū ad Sion mōtem peruenierit, vbi Deus Deorum, inquam, per fidem, sed per speciem se-  
videt.



videndum præbebit. Probat autem, gratiam, & gloriam dandam à Deo iustis hominibus, quia misericordiam, & veritatem diligit Deus. *Quia enim misericordiam diligit, miseretur, & miserendo gratiam dabit: quia veritatem, id est, iustitiam diligit, reddet fideliter quod promissit diligentibus se, ut S. Iacob, scribit cap. 1. In Hebræo, pro his verbis, Misericordiam, & veritatem diligit Deus, habetur, Sol, & scutum Dominus Deus, & quidem probabile est Septuaginta Interpretes, pro voce, *scemes*, quæ Solem significat, legisse, *scemen*, quæ significat, oleum. Sic etiam pro voce, *דליל*, quæ significat, diligeret. Denique probabile est, eos per oleum, & scutum, intellexisse misericordiam, & veritatem: quia oleum misericordiam significare solet, & de veritate scriptum est in Psal. 90. *Scuto circumdabit te veritas eius*. Tamen si quis contendat, omnino esse legendum in Hebræo. *Quia Sol, & scutum Dominus Deus gratiam, & gloriam dabit dominus*; idem sensus erit: nimirum, quia Dominus Deus Sol, & scutum est, ut scutum dabit gratiam protectionis in via, ut Sol dabit gloriam manifestæ visionis in patria.*

XIII. *Non priuabit bonis eos, qui ambulant in innocentia Domine virtutum, beatus homo qui sperat in te.*

Confirmat quod dixit, & restringit promissionem gratiæ, & gloriæ ad eos, qui ambulant in innocentia: quasi dicat Deus misericors, & iustus, non priuabit bonis gratiæ, & gloriæ, quæ sola sunt verè, & absolute bona, eos qui semel iustificati ambulant in innocentia, perseverantes, & proficientes in fide, Spe, & Charitate. Alioqui enim, si retrocedant, & ambulent in iniquitate, à gratia excident, & pro gloria conclusionem accipiant. Concludit Psalmum conuersus ad Deum. *Domine, inquit, virtutum, id est, exercituum, beatus eris, qui in te confidit, confidentia vera, ac solida, quam fides vera, & conscientia bona gignere solet.*

## PSALMVS LXXXIV.

Titulus, & Argumentum.

In finem, filijs Core, Psalmus.

**D**va sunt de argumento huius Psalmi tractatorum sententia. Alij enim volũt commemorari à Propheta liberationem populi ab una captiuitate, & inde argumento sumpto orari pro liberatione ab alia captiuitate, commemorari videlicet liberationem à captiuitate Ægyptiaca, & orari pro liberatione à captiuitate Babylonica; vel commemorari liberationem à captiuitate Ægyptiaca & Babylonica, & orari pro liberatione à captiuitate diaboli, quæ per illas figurata fuerat. Alij, & fortasse rectius, existimant, in hoc Psalmo de una tantum captiuitate agi, id est, de captiuitate generis humani sub Principe tenebrarum, à qua liberamur per Christum Dominum nostrum, sed in primis tribus versiculis prædicere liberationem ab hac captiuitate, in reliquis orari pro executione prædictionis. Cur autem prædictio de re futura exponatur per verba temporis præteriti, causa est, quoniam quæ nobis futura sunt, in Dei præsentia, & decretis iam facta sunt.

## EXPLICATIO PSAL. LXXXIV.

**B**enedixisti Domine terram tuam, I. *Bauertisti captiuitatem Iacob.*

Initio Psalmi Propheta, Spiritu sancto reuelante æternum Dei decretum de futura liberatione nobis aperit: ac primum docet primam causam, & vltimum effectum nostræ liberationis. Prima causa fuit dilectio, qua Deus dilexit genus humanum. Cur enim Deus sic mundum dilexerit, ut filium suum vnigenitum daret, per quem redimeremur, & omni benedictione benediceremur, ut loquitur Dominus Ioh. 3. & Apostolus ad Ephes. 1. nulla ratio reddi potest, nisi ipsa Dei bona voluntas, siue beneplacitum & misericordia. Vltimus effectus erit perfecta liberatio à captiuitate, quam habebimus in Resurrectione, quando perueniemus

O o o 2 ad li.



id libertatem gloriæ filiorum Dei. Nunc enim ex parte liberati sumus, sed expectamus redemptionem corporis nostri, per quam liberabimur ab omni corruptione, & necessitate. Attingitur, *Benedixisti Domine terram tuam*, id est, propter peccatum primi hominis maledixisti terræ, quam ipse feceras, & hominibus inhabitandum dederas: sed scio etiam, te reuelante, quod in mente tua, in decreto tuo, *Benedixisti terram tuam*, decreuisti enim in æterno beneplacito tuo, terram tuam quam fecisti, visitare, & benedicere omni benedictione, & gratia, mittens ad eam vnigenitum tuum *plenum gratia, & veritatis*. Hebræus, & Græcus codex clarius explicant hanc primam causam omnium bonorum nostrorum, quæ est bona voluntas Dei. Vox Hebræa est, *rahisibab*, quæ significat proprie, *bene tibi placuisti in terra tua*, siue bene voluisti terræ tuæ. Vox Græca *ἐνδοξαστα* significat, bene voluisti terræ tuæ. Inde est *ἰνδοξία*, quam sæpiissime legimus in Euangelio, & in Apostolo commendatam, ut initium, & radicem omnium beneficiorum Dei. Sicut autem maledixit Deus terræ, non propter ipsam, sed propter inhabitantes, sic etiam benedixit terram propter habitantes: quare tota ista benedictio ad homines referenda est. *Auertisti captiuitatem Iacob*. Hic exprimitur vltimus effectus misericordiæ Dei, qui erit perfecta liberatio à captiuitate, in quam incidimus per peccatum. *Auertisti*, inquit, *captiuitatem Iacob*, id est, iam in æterno decreto tuo per mortem filij tui præuisam placatus, remouisti, siue dissoluisti captiuitatem populi tui Iacob, ut deinceps fruatur libertate gloriæ filiorum Dei. Ex Hebræo pro, auertisti, S. Hieronymus vertit, *reduxisti*, sed idem est sensus. Nomine autem Iacob, intelligitur, teste S. Augustino totus populus Dei, siue ex Iacob descendat secundum carnem, quales sunt Iudæi credentes in Christum, siue secundum spiritum fidei, quales sunt gentiles conuersi ad Christum, qui sunt quasi *rami oleastri inserti in bonam oliuam*, & quasi *lapides viui superadificati super fundamentum Apostolorum, & Prophetarum*, ut Apostolus

docet ad Rom. 9, & 11. & ad Ephes. 2.

*Remissisti iniquitatem plebis tuæ, operuisti omnia peccata eorum.*

II.

Declarat nunc modum, quo Deus benedicens terræ suæ dissoluit captiuitatem Iacob: ac dicit id eum fecisse remittendo peccata populi sui. Sicut enim peccatum fuit causa captiuitatis, ita remissio peccati fuit causa liberationis à captiuitate. *Remissisti*, inquit, *iniquitatem plebis tuæ*, id est, in mente, & decreto tuo condonasti iniquitatem populo tuo, ob quam iniquitatem tradideras eundem populum diabolo tanquam administro iustitiæ tuæ. *Operuisti omnia peccata eorum*, hæc est repetitio, & declaratio eiusdem rei, *Operuisti*, id est, abscondisti à facie tua, ut non videres ad puniendum; quia vero Deus non potest non videre id, quod re vera est, quantumuis abscondatur, & tegatur; ideo quando Deus tegit peccata, omnino illa delet & remittit, ut nusquam sint, & ut alibi diximus, tegit Deus peccata, quando ea remittit, non quasi velo occultante, sed quasi emplastro curante, & sanante. Dicit autem *omnia peccata eorum*, ut explicet quod dixerat, iniquitatem plebis tuæ, non significare vnicam iniquitatem communem toti plebi, quale est peccatum originis, sed omnem iniquitatem tum communem omnibus, tum propriam singulis. In Græco habetur, *Remissisti iniquitates*, sed in Hebræo habetur in singulari, *iniquitatem*, sed idem est sensus.

*Mitigasti omnem iram tuam, auertisti ab ira indignationis tuæ.*

III.

Hic vero reddit causam, cur Deus dimiserit iniquitatem plebi suæ: ac dicit, ideo dimisisse quia placatus fuerat, & iram deposuerat. Quemadmodum enim ira Dei causa erat ultionis, sic etiam placatio Dei causa fuit remissionis: placauit autem iram Dei, id est, iustitiam punitiuam Dei, *Agnus occisus ab origine Mundi*. Apocal. 3; Agnus autem



autem immaculatum dedit nobis misericordia, & bona voluntas illius, qui sic dilexit Mundum, ut filium suum unigenitum daret, Ioan. 3. Hic igitur est ordo liberationis; Benedictio, siue bona voluntas Dei dedit filiū liberatorem: filius morte sua placavit iram Dei, satisfaciendo iustitiæ pro peccatis totius mundi, placatus Deus remisit peccata: remissio peccati soluit captiuitatem. Atque hoc totum mysterium absconditum in mente Dei reuelauit Spiritus sanctus Propheta suo, & ille nobis in tribus his versiculis descripsit. Illud, *omnem iram tuam*, significat, Christi redemptionem sufficientissimam fuisse ad plenam satisfactionem. Significat etiam libertatem, quam habebimus tempore suo, id est, in nouissimo die, futuram omnino plenam, & absolutam, ut nihil pœnæ, nihil miseriæ relinquatur, omnis enim pœna ex ira Dei procedit. Illud, *auertisti ab ira indignationis tuæ*, id ipsum repetit, & hunc sensum habet. Avertisti te ab ira, & indignatione tua. In Hebræo habetur, *conuertisti te, siue conuersus es ab ira furoris tui*.

*Conuertere nos Deus salutaris noster, & auerte iram tuam à nobis.*

Incipit nunc Propheta in persona populi Dei orare pro executione, atque adimplerone decreti diuini. Ac primum petit, ut Deus incipiat mitigare iram suam, cuius mitigationis primus effectus est, initium salutis nostræ, id est, auxilium diuinum, per quod incipiamus conuerti ad Deum. Neque enim conuerti possumus ab iniquitate ad Deum, nisi gratia eius præueniat nos, & vocando, illuminando, adiuuando, mouendo conuertat. Aitigitur, *Conuertere nos Deus salutaris noster*, id est, incipe salutem nostram operari tu Deus saluator noster, quo facies, si nobis bonam voluntatem conuersionis inpires. Et ut hoc misericorditer facere incipias, *auerte iram tuam à nobis*, id est, reconciliare nobis, obliuiscere offensionum, quæ te nobis inimicum reddiderunt.

*Nunquid in æternum irasceris nobis? aut extends iram à generatione in generationem.*

Persistit in eadem petitione, quasi dicat, satis diu iram tuam portauimus, ne differas misericordiā impetiri, & pacem nobis reddere. *Nunquid in æternum irasceris nobis?* id est, num æterna erit inimicitia tua ad genus humanum? num à generatione in generationem sine fine extendetur ira tua? quasi dicat id non conuenit infinitæ clementiæ, & bonitati tuæ. In Hebræo non habetur particula, *aut*: sed omnino subintelligitur, id eodè Septuaginta Interpretes eam expresse-  
runt.

*Deus tu conuersus uiuificabis nos, & plebs tua letabitur in te.*

Declarat effectum, qui sequetur ex reconciliatione; inde enim fiet, ut homo lucretur vitam, & Deo reddatur laus. *Deus tu conuersus ad nos*, per depositionem iræ, & reconciliationem *uiuificabis nos*: nam *stipendium peccati mors*, gratia autem Dei *vita æterna*, Rom. 6. & *plebs tua* uiuificata, & respiciens ob tam ingens beneficium, *letabitur in te*, ac lætabunda cantabit laudes tuas. In Hebræo pro voce, Deus; habetur, *nonne*: & sic vertit S. Hieronymus, *Nonne tu reuersus uiuificabis nos?* Sed facile est videre, quid Septuaginta habuerint, & legerint in suis codicibus, non enim tam imperiti erant, ut verterint, *Deus*, si habuissent, *halo*, sed habuerunt, *eloha*, quod significat Deus: & sunt eadè littere, sed transpositæ. Pro, *conuersus*, S. Augustinus legit, *conuertens*, ut etiam sonat vox Græca *ἐπιστρέφεις*, sed sensus non est, *Tu conuertens nos, uiuificabis nos*, sed *tu conuertens te ad nos, uiuificabis nos*, & hoc modo conciliatur hæc lectio cum Hebraica, & Latina.

*Ostende nobis Domine misericordiam tuam, & salutare tuum da nobis.*

Petit Propheta mitigationem iræ diuinæ, petit reconciliationem, & uiuificationem, quæ fit cum per gratiam remittuntur peccata: petit nunc aduentum Saluatoris, per quem factum est, ut planè perspicere-  
mus, & videremus Dei benignitatem, & misericordiam erga nos. De qua manifesta-  
tione dicit Apostolus, *Apparuit gratia Dei*  
omni-



*omnibus hominibus*, ad Tit. 2. & rursum, *Benignitas & humanitas apparuit Saluatoris nostri Dei*, ad Tit. 3. Quis enim dubitare potest, an Deo curæ sit genus humanum, nosque verissimè Deus diligit, posteaquam misit Filium suum vnigenitum, vt nos pretioso sanguine suo de diabolica captiuitate redimeret? *Ostende*, inquit, *nobis misericordiam tuam*, id est, fac, vt planè cernamus, & experimento certo discamus misericordiam illam, qua in mente tua ab æterno benedicere decreuisti terram tuam. *Et salutare tuum da nobis*, id est, & mitte nobis Saluatorem Filium tuum; tunc enim vere ostendes omnibus hominibus misericordiam, & benignitatem, & gratiam tuam. Ex Hebræo verti posset, *Et Iesum tuum da nobis*: nomen enim, *Iesus*, Saluatorem significat, vt notum est. Potest etiam hic verticulus exponi rectissimè, & ad literam de salute perfecta, quæ erit in Resurrectione; tunc enim propriissime ostendet nobis Deus misericordiam suam; ita vt eam videamus, & quasi tangamus, quando coronabit nos in misericordia, & miserationibus, & sanabit omnes infirmitates nostras, & replebit in bonis desiderium nostrum, & renouabit, vt Aquila iuuentutem nostram, vt dicitur Psalm. 102. Et nunc dabit possidendum in æternum salutare suum, quando manifestabit nobis seipsum. Sed prior expositio pertinet ad Patres Testamenti veteris, qui expectabant Christum in carne venturum: posterior pertinet ad nos, qui expectamus Christum venturum in gloria, vt reformet corpus humilitatis nostre cōfiguratur corpori claritatis sue. S. Augustinus, vtiliter ad mores dicit, tunc Deum ostendere misericordiam suam, quando persuadet nobis, nosque intelligere, & quasi cernere facit, nihil nos esse, aut posse ex nobis, sed ex misericordia eius esse quod sumus, & posse quod possumus. Ita enim non extollimur, nec superbimus, sed humiles sumus in oculis nostris: humilibus autem datur gratia Saluatoris

Vt certos nos reddat Propheta eorum, quæ dicturus est, admonet in hoc versiculo, se non loqui ex se, sed ex reuelatione Domini; ea solum canere, quæ ipse prius à Domino audit. *Audiam*, inquit, *quid loquatur in me Dominus Deus*, id est, ego quod audio à Deo, hoc loquor, ideo & nunc exposita petitione, audiam quid Dominus respondeat, vt id ipsum cæteris manifestem. Dicit autem, *Quid loquatur in me*, vt significet, loquutionem Dei ad Prophetas, esse interiore, & spirituale. Spiritus enim sanctus Prophetas inhabitans in illis loquebatur, quod ipsi primi aure cordis audirent, & deinde per ipsorum linguam ad aures corporis aliorum perueniret. Non habetur quidem in textu Hebraico illud, *in me*, sed Septuaginta Interpretes addiderunt, vt explicarent modum loquendi Dei in Prophetis, iuxta illud Osee. 1. *Principium loquendi domino in Osee, & Zachar. 1. Et dixit ad me Angelus, qui loquebatur in me*. Porro illud, *audiam*, significat præterea attentionem, & desiderium audiendi, quasi dicat, libenter, & attentissimè audiam, quoniam Deus more suo loquetur bonæ, & veritatis. *Quoniam*, inquit, *loquetur pacem in plebem suam*, id est, scio, Deum locuturum esse pacem in plebem suam, ideo libenter, & attente audiam quid loquatur in me Dominus Deus. Itaque summa verborum Dei est, annunciatio, & promissio pacis per aduentum Messie, quem Propheta petierat dicens, *Ostende nobis domine misericordiam tuam, & salutare tuum da nobis*. Dabit igitur Deus Saluatorem, & per eum annuntiabit, & præstabit verissimam pacem; vnde & *Princeps pacis* dicitur Isai. 9. *Et pacificabit omnia, siue quæ in cælis, siue quæ in terris sunt*, vt dicitur ad Coloss. 1. Pax autem completitur complementum omnium beneficiorum Dei, neque antea perfectam pacem habebimus, quam perueniamus ad cœlestem Hierusalem, quæ interpretatur *visio pacis*. Pax enim oppositur bello, bello autem non carebimus donec absorpta fuerit mors in victoria, & mortale hoc induerit immortalitatem; tunc enim cessabit bellum cum vitijs, &

## VIII.

*Audiam quid loquatur in me Dominus Deus: quoniam loquetur pacem in plebem suam.*

con-



concupiscentijs. cum Principibus tenebrarum harum cum necessitatibus, & difficultatibus omnibus. Dum autem hic viuimus, *militia est vita hominis super terram*, Iob 7. quantumuis quod in nobis est, pacem cum omnibus habere cupiamus.

EX.

*Et super sanctos suos, & in eos qui conuertuntur ad cor.*

Explicat, quod dixit, *in plebem suam*, promittit enim Deus pacem plebi suæ, sed non toti: non in plebe Dei sunt boni, & mali, malis autem pax non conuenit, sed bonis; *Pax enim multa diligentibus legem domini*, Plal. 118. & *Non est pax impijs*, dicit Dominus Isaia, 48. Qui autem sint sancti, quibus promittitur pax, explicatur per verba sequentia, *Et in eos qui conuertuntur ad cor*. Tunc enim incipit sanctitas, & consequenter inchoatur pax, cum homo ab exterioribus ad interiora conuertitur, vnde dicitur, *Redite prauaricatores ad cor*, Isa. 46. & de filio prodigo dicitur Luc. 15. *In se autem reuersus*. Tunc autem incipit homo reueri ad se, siue redire ad cor, quando apud se cogitare incipit vanitatem rerum temporalium, & quam sit breuis, & modica dulcedo peccati; & contra, quanta sit nobilitas virtutis, quam ingens pretium bonorum æternorum: sed proficit postea paulatim homo, cum secum habitare incipit, & de rebus, quæ foris sunt, nō credidit iudicio sensuum externorum, neque sermonibus filiorum huius sæculi: sed conuersus ad cor consulit de omnibus rectam rationem, consulit fidem diuinitus inspiratam, consulit veritatem ipsam, quæ Deus est. Denique perfecte ad cor suum ille conuertitur, & pacem, quæ superat omnem sensum, gustare incipit, qui in corde suo tabernaculum erigit Deo, & ex imagine, quæ est anima rationalis, ad exemplar, quod est ipse Deus, alis contemplationis ascendit: & ibi pulchritudinem infinitam Creatoris attendens, in eius amorem ita rapitur, & accenditur, vt omnia quæ foris sunt, nihil ducat; ita vni Deo vinculo charitatis inheret, vt rerum aliarum penitus obliuiscatur. *Homini autem sic affecti nul-*

la mundi pressura pacem, quam in Deo habet, perturbare potest, sed veniamus ad verba; Codex latinus in secunda parte huius versiculi, neque cum Hebraico, neque cum Græco concordare videtur. Hebraicus codex sic habet, *Et super sanctos, & non reuertentur ad stultitiam*. Græcus autem, *Et super sanctos suos, & in eos, qui conuertuntur cor ad ipsum*. Lectio tamen nostræ latinæ vulgata editionis antiquissima est, & eam sequitur S. Hieronymus in textu, & in commentario Psalmorum: nec non S. Bernardus in sermone super hæc verba, *Audiam quid loquatur in me dominus deus*, neque in sensu vlla diuersitas est. Conuerti enim ad cor, & conuerrere cor ad Deum, idem significant, siquidem qui conuertitur ad cor, desinit attendere ad externa, & visibilia, quæ temporalia sunt, & incipit considerare interna, & inuisibilia, quæ æterna sunt, in quibus primum locum obtinet Deus, sic etiam conuerti ad cor, & non conuerti ad stultitiam, pro eodem accipi possunt. Neque difficile est, si quis velit voces Hebraicas cum Latina editione recordare: nam vox, *al*, quæ significat, *non*, potest legi, *el*, solius puncti facta mutatione, & significat, *in*, sic etiam vox, *le chislah*, quæ significat *ad stultitiam*, potest legi, *leb, sela*, & significat *cor selah*, enim adiungitur passim in Psalmis: & vel nihil significat, vel significat, *semper*, quod hoc loco optimè quadrat, vel significat aliquid nobis incognitum, vnde ab interpretibus omitti solet. Itaque sic reddi possunt verba Hebraica. *Et in eos, qui conuertuntur corde siue ad cor, semper.*

אל  
אל  
לכסלה  
לכסלה

*Veruntamen propè timentes eum salutare ipsius, vt inhabitet gloria in terra nostra.*

X.

Adueniente Messia prædicabitur pax. sed diu postea exhibebitur: veruntamen salus, id est, gratia sanitatis, & aliorum miraculorum præsentissima erit, & vicinissima omnibus credentibus in eum, ac timentibus eum timore reuerentiæ & pietatis. Inde vero maxima gloria Deo exurget, laudantibus, & magnificentibus Deum omnibus, qui



qui mirabilia eius videbunt, eius rei plurima testimonia legi possunt apud Euangelistas. Hoc igitur est, quod nunc Propheta subiungit, *Verumtamen prope timentes eum salutare ipsius*, id est, salus Dei, siue Christus ipse Saluator prope erit ad sanandum per omnipotentiam suam omnes timentes eum, omnes videlicet colentes eum timore sancto, *ut inhabitet gloria in terra nostra*, id est, fiat ista magnalia saluatoris frequentissima, ut gloria Dei manifestetur, & inhabitet in terra promissionis, ad quam proprie Saluator mittetur. Sed si corporalis salus vicina erit timentibus eum, & inde gloria Dei magnifice orietur, multo magis salus spiritualis prope timentes eum erit: *quotquot enim recipient eum, dabit eis potestatem filios Dei fieri*, Ioan. 1. & inde manifestabitur gloria eius, *quasi unigeniti à Patre, pleni gratia, & veritate*.

XI.

*Misericordia, & veritas obuauerunt sibi: iustitia, & pax osculatae sunt.*

Aperit hoc loco Propheta mysterium aliud in aduentu Messiae complendum; misericordiam videlicet, & iustitiam, quæ contrariae videntur, cum vna ignoscat, altera puniat, simul esse coniungendas. Futurum enim erat per Christi passionem, ut & genus humanum misericorditer liberaretur, & tamen diuinæ iustitiæ plenissime satisfaceret. *Misericordia*, inquit, *& veritas obuauerunt sibi*, id est, obuauerunt sibi tempore Messiae, cum alias in diuersa pergere viderentur. *Iustitia, & pax osculatae sunt*, id est, iustitia punitiua, quæ paulo ante veritas nominata est, & pax sub nomine misericordiae significata, amicissime coniungentur, & quasi inter se osculabuntur. Hunc sensum, qui mihi liberalis videtur, eleganter prosequitur S. Bernardus in serm. 1. de annunciatione. S. Hieronymus per misericordiam, intelligunt misericordiam, qua usus est Deus erga Gentiles, quibus dedit Saluatorem, quem non promiserat; per veritatem autem intelligunt iustitiam, siue fidelitatem, qua exhibuit Iudæis Messiam, quem patribus

eorum pollicitus fuerat, vnde est illud Apostoli Rom. 15. *Dico Christum Iesum ministrum fuisse circumcisionis ad confirmandas promissiones patrum: gentes autem super misericordiam honorare Deum*; tunc enim misericordia, & veritas obuauerunt sibi, cum in vnam Ecclesiam conuenerunt Gentiles, & Iudæi, illi per misericordiam, isti per veritatem adducti. Per iustitiam, quæ osculatur pacem, intelligit idem S. Augustinus iustitiam, quæ reddit unicuique suum, ex cuius obseruatione pax oritur, quemadmodum ex violatione iustitiæ oritur bellum; & rectissime admonet, frustra illos querere pacem, qui sororem pacis iustitiam complecti recusant. Alij hunc versiculum exponunt de virtutibus, quæ floreant in populis tempore Messiae, vel de virtutibus, quæ in ipso Messia maxime eminebunt.

*Veritas de terra orta est, & iustitia de*

XII.

*cælo prospexit.*  
Hic iam explicat Propheta mysterium incarnationis, vtens verbo temporis præteriti pro verbo temporis futuri more Prophetarum. *Veritas*, inquit, *de terra orta est*, hoc est, Christus, qui veritas est, de Virgine Maria nascetur. *Et iustitia de cælo prospexit*, id est, & tunc iustitia de cælo manifestabitur tum quia nato Christo cœpit vera iustitia de cælo descendere, & homines per fidem Christi iustificare; tum quia per aduentum Christi reuelari cœpit ira Dei de cælo super omnem iniquitatem, vt dicitur ad Rom. 1. Nunquā enim plenè cognitum fuisset, quanta sit ira Dei aduersus peccatum, nisi expiari Deus voluisset illud morte vnigeniti Filij sui: & etiam nunquam plenè cognitum fuisset, quanta sit ira Dei futura in die iudicij aduersus iniquos, nisi vidissemus, quanta fuerit Christi passio pro peccatis alienis expiandis, nam *si in signo viridi hac faciunt, in arido quid fiet?* ait ipse Dominus, Luc. 28.

*Etenim Dominus dabit benignitatem, & terra nostra dabit fructum suum.*

XIII.

Pergit explicare mysterium incarnationis, atque ostendit veritatem ex terra nascituram



terram, non quomodo noscuntur fruges ex terra arata, & fata opera hominum, sed quomodo nascuntur flores in campis sylvestribus sine cultura humana ex pluvia de caelo, & radijs in eam cadentibus, Etenim, inquit, dominus dabit benignitatem, id est, emittet de caelo Spiritum sanctum suum, qui Virginem obumbrabit, & sic terra nostra neque arata, neque fata; sed omnino Virgo intacta dabit fructum suum, Vnde in Cantico canticorum ipse dicit, *Ego flos campi, & lilium conualium.*

rens illi quasi faciem, legem Domini, ne ambulet in tenebris, & sic securus, & gaudens ponet in via gressus suos, vt felicitat ad patriam aliquando perueniat.

PSALMVS LXXXV.

Titulus, & Argumentum.

Oratio ipsi Dauidi.

XIV.

*Iustitia ante eum ambulabit, & ponet in via gressus suos.*

Concludit Propheta demonstrans, Christum omnino iustum, & sanctum futurum, ita vt radios iustitiae suae ante se praemittat, & luce sua sibi viam aperiat ad omnem progressum in hac valle tenebricosa huius nostrae mortalitatis. *Iustitia*, inquit, *ante eum ambulabit*, id est, Christus quasi sol quidam, & vere lux Mundi radios iustitiae, & sapientiae suae praemittet, sicut etiam scriptum est in Ps 88. *Misericordia, & veritas praecedent faciem tuam* & Isaia 58. *Anteibit faciem tuam iustitia tua; & sic ponet in via gressus suos*, id est, aggredietur iter peregrinationis suae, vt multos peregrinos perducatur ad patriam. Possunt hi tres versiculi exponi etiam de iustificatione, & bonis operibus hominum credentium in Christum: nam utroque modo exponit S. August. *Veritas de terra orta est, & iustitia de caelo prospexit*, id est, veritas confessionis peccatorum, & laudis Dei excipit per Christum oriri ex ore hominum, & tunc *iustitia Dei de caelo prospexit*, vt confidentes peccata sua, & laudem dantes gratiae Dei iustificaret, sed haec ipsa veritas confessionis non orietur ex terra per vires ipsius terrae, sed per auxilium gratiae Dei praeuenientis: nam *Dominus dabit benignitatem*, qui dulcescere faciet iustitiam in corde peccatorum, & sic *terra nostra dabit fructum suum*. Porro iustificatus homo per Christi gratiam, semper iustitiam ante oculos suos habebit, vt omnia faciat iuxta regulam iustitiae: sic *iustitia ante eum ambulabit* praef-

**T**itulus indicat, hunc Psalmum nihil esse aliud, nisi orationem Dauidi à Deo inspiratam, cum amaro esset animo. & consolatione diuina indigeret. Dauid enim, vt erat homo spiritalis, & in schola Spiritus sancti eruditus, cum varijs tribulationibus premere-  
tur non quarebat consolationem à rebus creatis, in quibus vera consolatio animae inueniri non potest, sed ad Deum fontem omnis suauitatis per contemplationem, & orationem confugiebat. Proinde nos etià hoc Psalmo vti debemus, cū tentationibus varijs, vnde cūq; ille veniant, fatigati, mœrore tabescimus.

EXPLICATIO PSAL. LXXXV.

**I**nclina Domine aurem tuam, & exaudi me quoniam inops, & pauper sum ego.

Incipit orationem à magnitudine Dei, & vilitate sua, quæ est optima ratio precandi apta ad impetrandum: orationem humilantem se penetrat nubes, Eccl. 35. *Inclina*, inquit, *aurem*, id est, tu qui excelsus es, inclina ad me, qui in imis iaceo, *aurem tuam*. *Exaudi me quoniam inops, & pauper sum ego*: hæc est ratio, cur dixerit, *Inclina, quoniam*, inquit, *inops & pauper sum ego*, id est, quoniam mendicus iaceo ad portam diuitis, inclina ex alto aurem tuam ad humilem seruulum, & quia talis est, *exaudi eum*. Pauper enim, & inops hoc loco dicitur is, qui suæ habeat, siue non habeat opes terrenas, nō in illis confidit, non inde superbit, non alios contemnit, sed ipsas potius opes contemnit, si habet, neque se

Ppp

meli-



meliozem, aut maiorem reputat ijs, qui non habent. Rectissime admonet S. Augustinus, Lazarum non delatum fuisse ab Angelis in sinum Abraham propter inopiam, sed propter humilitatem: neque diuitem epulone[m] sepultum fuisse in inferno propter diuitias, sed propter superbiam. Alioquin ipse etiam Abraham, qui ditissimus fuerat, in inferno sepultus fuisset. Sed quoniam Abraham cinerem; & puluerem se esse arbitrabatur, & mandata Domini ita diligenter obseruabat, ut non solum opes, sed ipsum filium vnigenitum, cui seruabat opes, propter Deum sacrificare promptissimus erat, ideo non solum ad locum refrigerij post mortem ductus fuit, sed etiam ad eius sinum congregabantur omnes, qui eo tempore in Domino moriebantur. Ipse etiam Dauid diues erat, quo d ad terrenam substantiam attinet, sed quoniam non inde superbiebat, neque eam magnificiebat, & totus a Deo p[er]debat, in quo spem suam, & vires suas, & omnia bona sua collocauerat, & sine quo nihil se esse, aut posse sciebat, ideo se vere pauperem & inopem p[re]dicabat.

mundatus: saltem dicere potest, *sanctus sum*, id est, fidelis sum, sanctæ religionis, & fidei professor sum, Deo per Baptismum dedicatus, & sanctificatus sum. *Saluum fac seruum tuum Deus meus sperantem in te*. Idem tepetit alijs verbis. Ideo enim cupit custodiri animam suam, ut non perdat salutem æternam: sic enim loquitur S. Petrus in epist. i. c. i. *Qui in virtute Dei custodimini per fidem in salutem paratam reuelari in tempore nouissimo*. Petit igitur salutem, quam ne amitteret, petierat custodiam. Addit rationem, cum dicit, *Seruum tuum sperantem in te*, quia cum Deus saluum facit seruum suum, saluum facit rem suam: & cum saluum facit sperantem in se. fidelem, & iustum se demonstrat, quia implet, quod promissit.

*Miserere mei Domine, quoniam ad te clamaui tota die: latifica animam serui tui, quoniam ad te Domine animam meam leuaui.*

III

*Custodi animam meam quoniam sanctus sum, saluum fac seruum tuum Deus meus sperantem in te.*

Explicat in quo cupiat exaudiri, ac primum proponit id, quod est vere primum in intentione, & quod ipse Dominus primum queri iussit, cum ait: *Primum querite Regnum Dei, & iustitiam eius, & hac omnia adyicietur vobis*, Mat. 6. *Custodi*, inquit, *animam meam*, id est, conserua vitam animæ meæ, cui tam multi in hoc exilio infidantur. *Quoniam sanctus sum*, id est, ideo peto conseruari vitam animæ meæ a te, quoniam tu mihi eam dedisti, tu me in sanguine filij tui iustificasti, & sanctificasti, & per hoc viuificasti, qui in peccatis mortuus erā. Nam, ut recte dicit S. Aug. cum quis per sacramenta Christi iustificatum se esse confidit, & ex gratia Dei sanctum se nominat, non est superbia elati, sed confessio non ingrati, quod si quis dicere non audeat, *sanctus sum*, id est, iustificatus, &

Petit in secundo versiculo summum bonum, id est, salutem animæ, quæ est finis omnium desideriorum: nunc recto ordine petit medium ad finem; lætitiā, videlicet, spirituale, qua fortiter toleret tentationes, & pericula exilij, donec ad salutem perueniat, ubi nullæ erunt tentationes, nulla pericula. *Miserere mei Domine*, id est, misericorditer exaudi orationem meam, *quoniam ad te clamaui tota die*, id est, quoniam ardentem, & perseueranter orauī, nihil enim magis requiritur ad impetrandum, quam si oratio fundatur ex accenso desiderio, quod significatur in verbo, *clamaui*, & cum perseuerantia, quæ significatur in vocibus illis, *tota die*, *Latifica animam serui tui*, hæc est petitio, quam misericorditer exaudiri petit, & pro qua tota die clamauit. *Latifica*, inquit, *animam serui tui*, id est, vndique angustijs reparationum premor, nihil mihi in hac valle lacrymarum occurrit, nisi amarum, dum non minus prosperitas terret, quam aduersitas ipsa contristet. Ideo *latifica animam serui tui*, *quoniam ad te Domine animam meam leuaui*.



*leuauit*, id est, quoniam non inueniens requiem in vlla re creata, ad te creatorem pennis cogitationis, & desiderij animam meam leuauit. Amor animam nostram portat, & vere dictum est, anima magis est, vbi amat, quam vbi animat. Alæ amoris sunt cogitatio, & desiderium: qui enim amat, cogitando assidue, & desiderando rem amatâ, in illam fertur, & in illa manet. Qui vere, & ex corde Deum amat, cogitando, & desiderando Deum, animam suam ad Deum leuat. Contra qui terram amat cogitando, & concupiscendo terram, animam suam ad terram deprimat. Itaque ille solus cum Propheta vere dicere potest, *ad te Domine animam meam leuauit*, & iure petere potest consolationem spiritus, ac dicere, *Latifica animam serui tui* qui nulla tenetur concupiscentia rei creatæ, nec vlla terreno luto affixus inhæret. Recte S. Bern. serm. 6. de Ascensione Domini, explicans illa verba Domini, Ioh. 16. *Nisi ego abiero, Paracletus non veniet ad vos*, Quid est, inquit, *Nisi ego abiero*, *Paracletus non veniet*? nisi carnis præsentia vestris subtrahatur aspectibus, spiritualis gratiæ plenitudinem occupata mens non admittit, non recipit animus, non capit affectus. Quid vobis videtur fratres? si hæc ita sunt, imo quia ita sunt, audeat qui huic sterquilino semper inhæret: qui carnem fouet, carnem sapit, illam nihilominus consolationem supernæ visitationis sperare, quam ne cum ipsa quidem Verbi carne percipere vllatenus Apostoli potuerunt. Errat omnino si quis caelestem illam dulcedinem huic cineri, diuinum illud balsamum huic veneno, charismata illa spiritus misceri huiusmodi illecebris arbitratur.

IV.

*Quoniam tu Domine suauis. & mitis, & multa misericordie omnibus inuocantibus te.*

Hæc est ratio cur animam suam ad Deum leuauerit pro consolatione recipienda, quia *Deus suauis est, & dulcis*; & sicut dicit Ioannes epist. 1. ca. 5. *Deus lux est, & in eo te-*

*nebra non sunt vlla*: sic dicere possumus, suauis est Deus, & in eo amaritudo non est vlla: cum è contrario in carnalibus consolationibus, suauitas sit modica, & amaritudo plurima. Nec solum Deus suauis est, sed etiam mitis, vt ad se accedentes non repellat, & imperfectum nostrum toleret. Notat S. Augustinus, in eo planè perspicui mansuetudinem Dei, quod orantes nos patiarur, cum tam sæpè inter orandum ad alia cogitanda mentem auertamus; certè enim iudex homo non pateretur reum, si dum causam agit, ad colloquendum cum amicis, de rebus præsertim nullius momenti, auerteretur. Nec solum Deus suauis est in se, & mitis, quia non repellit accedentes ad hunc fontem suauitatis, sed etiam *multa misericordia est*, quia facile admittit, & recipit, & se gustandum præbet, omnibus inuocantibus se, non accipiens personas diuitum, aut pauperum; iudeorum, aut Gentilium. *Omnis enim quicumque inuocauerit nomen domini saluus erit*, Rom. 10. Quod si aliquos orantes non exaudit, neque eorum miseretur, causa est, quia non verè Deum inuocant, aut non sicut oportet, inuocant. Sæpè etiam exaudit, sed tempore opportuno, & non raro exaudit orantis desiderium, non verba loquentis, quando videlicet, qui orat, id petit, quod sibi non expedire ignorat, & si non ignoraret omnino non peteret, Quod attinet ad verba, illud *suauis*, in Hebræo est, *thob*, quod significat, *bonum*; & multi exponunt *benignum*, siue *beneficium*. Et quamuis Deus sit verè bonus, benignus, & beneficus: tamen noster interpretes, non solū hoc loco, sed etiam in Psal. 33. & 99. eandem vocem vertit, *suauis*, & hæc interpretatio concordat cū verbo, gustate, & videte, inquit, quoniam *suauis est dominus*; gustatur. n. propriè suauitas, nō benignitas, & hæc aludens S. Petrus in epist. 1. ca. 2. ait, Si tamen gustastis, quoniam dulcis est Dominus; illud autē *mitis*, in Hebræo est, *salla*, quod propriè significat propitiabilis, & sic vertit S. Hieronymus, & in sensu non est discordia; mitis enim facile propitiatur, & facile ignoscit, & sic exponit S. Augustinus, cum dicit.

Ppp 2

Deum



Deum esse mitem, quia facile ignoscit euagationibus nostris, cum oramus.

V. *Auribus percipe Domine orationem meam, & intende voci deprecationis mee.*

Repetit primam partem primi versiculi, sed alijs verbis, idem significantibus ad affectum ostendendum erga rem desideratam, & petitam.

VI. *In die tribulationis meae clamaui ad te, quia exaudisti me.*

Videtur hic versiculus addit us esse ad explicationem superioris, quia enim dixerat, *Auribus percipe orationem meam*: poterat Deus interrogare, quando orabis? quando vis percipiam auribus orationem tuam? respondet Propheta, omni die orauit, & omni die oro, & orabo, dum viuam in hoc exilio. Omnis enim dies peregrinationis, dies tribulationis meae est; cui enim dulcis est patria, non potest non amara esse peregrinatio. *In die ergo tribulationis meae*, id est, omni tempore peregrinationis tribulationem, & dolorē inueni, & ideo semper clamaui ad te: & ea fiducia clamaui, quia tu semper exaudisti me, id est, semper me exaudire solitus es.

VII. *Non est similis tui in Dijs Domine, & non est secundum opera tua.*

Reddit rationem, cur ad solum Deum cōfugiat, illum inuocet, atque ad eum animam suam leuare conetur, quia videlicet, nemo fit Deo similis, neque in essentia, neque in potentia, neque in sapientia, neque in bonitate, non tantum inter homines, sed etiam inter Deos, quod si per Deos intelligamus Deos falsos, nimirum Idola, & dæmones, de quibus dicitur in Psal. 95. *Dij gentium Dæmonia*, absolute verum est, quod hic dicitur, *Non est similis tui in Dijs Domine*: quoniam Idola oculos habent, & non vident, & ab hominibus pendent, ut sint, & ut custodiantur, & moueantur: Deus autem verus sine oculis corporalibus videt, & a nullo pēdet, sed omnia ab ipso pendent. *In ipso enim vivimus, mouemur, & sumus*, Actor. 17. De-

mones autem ad imaginem quidem, & similitudinem Dei facti sunt, sed per peccatum similitudinem perdiderunt, si vero per Deos intelligamus Deos, per participationem potentiae, & auctoritatis, quales sunt Principes & iudices terrae, vel per participationem sapientiae, & iustitiae, quales sunt omnes homines iusti, vel per vtranque participationem, quales sunt Angeli sancti: tunc id quod dicitur, *non est similis tui in Dijs Domine*, intelligendum erit de similitudine perfecta, quae requirit aequalitatem: illi enim vel sunt perfecte similes in potestate, vel sapientia vel iustitia, qui sunt aequi, potentes, aequi sapientes, & aequi iusti. Constat autem, Deum esse infinito modo potentiorē, sapientiorē, & iustiorē omnibus Angelis, & hominibus: proinde verum est, non esse vllum similem Deo in Dijs participatione, nisi imperfecta, & inaequali similitudine. Et non est secundum opera tua; non solum nemo ex Dijs est perfecte similis Domino Deo nostro, sed neque est vllum opus Deorum quorumcunque, quod possit comparari cum operibus Dei nostri. Deus enim fecit ex nihilo cælum, & terram, & omnia quae in eis sunt: Dij autem cæteri intra Mundum operantur, & ex ijs quae Deus fecit, materiam operandi sumunt. Ergo non est opus vllum, secundum opera Dei, id est, quod comparari possit operibus Dei.

*Omnes gentes quas cūq; fecisti, venient, & adorabunt coram te Domine, & glorificabunt nomen tuum.*

Ex hoc versiculo intelligimus, versiculū superiorem accipiendum esse de Dijs falsis, qui ab errantibus adorabantur tanquam veri, & summi Dij: probat enim Propheta, nullum ex Dijs esse similem Domino Deo nostro, ex hoc quod aliorum Deorum cultus tandem aliquando cessabit, & manifeste apparebit falsitas, & vanitas eiusmodi Deorum: cultus autem Domini Dei nostri sempiternus erit. Quod autē hic dicit Propheta partim impletū est in Ecclesia Christi, partim implebitur in die Iudicii: nam quāvis tēpore Davidis alij essent Dij Moabitarum,



Bitarum, alij Ammonitarum, alij Philistinorum, alij aliarum gentium, tamen adueniente Christi Euangelio in omnibus gentibus Idololatria cessare, & veri Dei cultus introduci cœpit. Itaque omnes gentes venerunt, id est, ex omnibus gentibus venerunt; & reliquis Diis falsis Deum verum adorauerunt: sed in die Iudicij omnes omnino homines, nullo excepto, apertissime cognoscent, Deos gentium fuisse Dæmonia, vel inania simulachra, & velint nolint, curuabunt genua coram Domino, & implebitur illud Isa. 45. *Mihi curuabitur omne genu*, quod applicatur Christo, vt vero Deo, ab Apostolo Rom. 14. & Philipp. 2. Illa phrasis, *adorabunt coram te Domine*, Hebraica est: vox enim, *istachauu*, proprie significat; *prosterne se*. Hoc autem verbum requirit particulam, *coram*, proster-nimur enim coram eo, quem adorare volumus. Itaque illud, *adorabunt coram te*, exponendum est, adorando prosterne se coram te. Illud, & *glorificabunt te*, ad omnes pertinet, sed vario modo; iusti enim ex amore & libentes, iniusti ex timore & inuiti glorificabunt in die iudicij Dominum, ac dicent: *Iustus es Domine, ac rectum iudicium tuum*, Psal. 118.

*Quoniam magnus es tu, & faciens mirabilia, tu es Deus solus.*

Hæc est ratio, cur cessabit cultus inani-um Deorum, & omnes gentes adorabunt & glorificabunt Dominum, quoniam ipse solus est Deus, vere magnus, & Deus faciens mirabilia, quæ nullus alius facere potest, quod in die Iudicij potissimum cognoscetur, cum ad nutum Domini omnes mortui resurgent, & congregabuntur ante tribunal Christi, & sine villo impedimento & resistencia iusti exaltabuntur ad Regnum, iniusti deprimuntur ad supplicium sempiternum. Hinc & Apostolus vtitur voce, *magni Dei*, cum de iudicio loquitur, quia in iudicio magnitudo Dei apertissime demonstrabitur. Expectantes, inquit, beatam spem, & aduentum gloriæ magni Dei, & Saluatoris nostri Iesu Christi, ad Tit. 2.

*Deduc me Domine in via tua, & in-*

*grediar in veritate tua: latetur cor meum, vt timeat nomen tuum.*

Reuertitur ad orationem, qua postulat: dirigi in hac peregrinatione & exilio, ne forte aberret à via, quæ ducit ad patriam: & simul postulat consolationem spiritualem, quasi refectioem, ne deficiat in via. *Deduc me Domine in via tua*, id est, per auxilium gratiæ tuæ ostende mihi viam tuam, nec solum ostende illuminando mentem, sed etiam mouendo voluntatem, & sic ingrediar iter in veritate tua, id est, iuxta veritatem fidei tuæ & legis tuæ. *Latetur cor meum*, hoc est, quod supra dixit, *Latifica animam meam*, ergo letetur te latificante & consolante cor meum, vt timeat nomen tuum, id est, non affecto consolationem propter consolationem, sed vt per eam quasi cibo recreatus, perseueret in timore sancto tuo, & timendo offensionem tuam, pergam recto itinere per viam mandatorum ad patriam, vbi sine timore seruiam tibi. Non displicet S. Augustini expositio, *Latetur cor meum*, sic tamen, vt etiam timeat nomen tuum, hic enim exultandum est, sed cum tremore, dum ad dulcem patriam, sed inter pericula temptationum currimus. In Hebræo, pro, *latetur cor meum*, legimus, *iachad lebabbi*, quod verti potest, *unum*, vel *unicum* sit cor meum, vel *uni cor meum*, siue cum S. Hieronymo, *unicum fac cor meum, vt timeat nomen tuum*: ex qua lectione colligitur optimus sensus, vt videlicet optet Propheta, cor suum vniri in timore Domini, vt totum cor suum timeat Dominum, & non pars Dominum, pars Mundum timeat. Cæterum nostra versio ex Græca fideliter deriuata est. Græci autem Interpretes viri Septuaginta antiquissimi & doctissimi nunquam sic vertissent, si legissent, quod nos in nostris Codicibus habemus, credibile igitur est, eos non legisse, *iachad*, sed *iechadade*, cum isdem literis, sed diuersis punctis, quod significat, *latabitur*, à verbo, *chada*, & habetur hæc ipsa vox Exod. c. 18. v. 9. & eam reddit S. Hieronymus, *latatus est*, accipiendo futurum pro præterito, propter literam, *au*, præcedentem.



Sed hoc loco, vbi non est *van* præcedens, rectissime vertit noster Interpres, *latetur*, & potuisset etiam *vettere*, *latabitur*.

XI. *Confitebor tibi Domine Deus in toto corde meo, & glorificabo nomen tuum in æternum.*

Orationi adiungit gratiarum actionem; nihil enim vrilius est ad impetranda noua beneficia, quam memorem & gratum se ostendere præteritorum. *Confitebor*, inquit, *tibi Domine Deus* meus confessionem laudis & gratiarum actionis, *in toto corde meo*, id est, ex vero & pleno cordis affectu. *Et glorificabo nomen tuum*, id est, potentiam tuam, *in æternum*, donec vixero, sine intermissione.

XII. *Quia misericordia tua magna est super me, & eruxisti animam meam ex inferno inferiore.*

Hoc est beneficium, pro quo gratias agit: quia videlicet ex magna misericordia sua Deus, non ex meritis ipsius hominis supplicantis, eruerit animam eius ex inferno inferiore, id est, iustificauerit eum à peccatis, ob quæ ad infernum inferiorem descendurus erat, nisi per gratiam liberarentur. Et vere tam magna misericordia Dei est ea, qua nos ex iniustis iustos facit, quam magna est pœna gehennæ perpetuæ, à qua liberamur, & quam magna est felicitas sempiterna, ad quam ius accipimus, & aditum apertum habemus. Vnde & Apostolus Petrus dicit: *Secundum misericordiam suam magnam regenerauit nos in spem viuam*, 1. Pet. 1. Cur gehenna dicatur infernus inferior, duplicem rationem reddit S. Augustinus, vnam, quod terra hæc plena periculis sit infernus quidam respectu cœli, sed superior respectu gehennæ. Alteram, quod in ipso inferno subterraneo sit pars superior, in qua erat Lazarus in sinu Abraham requiescens, & inferior, in qua diues Epulo cruciabatur in flammis. Addit S. Hieronymus infernum inferiorem dici gehennam respectu peccati, qui est infernus quidam, sed quasi superior. Non defunt ex recentioribus, qui hoc loco per infernum inferiorem, intelligant graues calamitates, &

pericula vitæ huius temporalis. Sed nos malimus sequi sanctos Patres Hieronymum & Augustinum, quibus addi potest S. Bernardus in 2. serm. de Assumpt. qui per *infernum inferiorem*, intelligit illum, vbi nemo confitetur Domino, & vnde non datur egressus: præsertim cum magna misericordia, non ad res temporales, quæ paruæ sunt & breues, sed ad sempiternas pertinere videatur.

*Deus, iniqui insurrexerunt super me, & synagoga potentium quasierunt animam meam, & non proposuerunt te in conspectu suo.*

Post actionem gratiarum reuertitur ad orationem, qua petit liberari à multitudine hostium, qui vitæ eius insidiabantur, & quamuis nonnulli exponant hæc omnia de hostibus corporalibus Davidis vel Ezechiae, alij de hostibus Christi, qui mortem illius procurauerunt; tamen magis coheret cum superioribus partibus Psalmi expositio S. Augustini, qui docet, hæc omnia esse intelligenda de membris corporis Christi, id est, de hominibus iustis, vel de quolibet homine iusto, qui patitur varias tribulationes ab hostibus animarum, siue sint heretici, siue schismatici, siue in ipsa Ecclesia perditæ viuentes, quibus addere possumus & dæmones, qui istis omnibus præstant. Ait igitur homo Dei, liberatus per gratiam Christi ab inferiore, & interim prælians cum hostibus animæ suæ, & grauiter ingemiscens: *ô Deus meus, ecce iniqui insurrexerunt aduersus me*, neque pauci, aut debiles sunt, sed *synagoga potentium*, id est, congregatio magna fortissimorum hostium *quasierunt animam meam*, vt eam perdant: & *exacerati atque obdurati non proposuerunt te ante conspectum suum*, id est, non cogitauerunt te esse protectorem iustorum, & quod non cum homine infirmo, sed cum Domino Deo exercituum bellare audeant. In Hebræo pro voce, *iniqui*, est, *zedim*, quæ proprie superbos significat, sed idem est sensus. Superbi enim præter ceteros omnes iniquissimi sunt.

*Et tu Domine Deus miserator & misericors,*

XIII

דלים

XIV.



*Reors, patiens, & multa misericordia, & verax.*

Dixit, quot & quales hostes haberet: nunc petit aduersus eos auxilium, ac primum predicat multis nominibus bonitatem Dei, ut ostendat se non temere à tam bono Domino auxilium sperare. Et tu, inquit, Domine Deus miserator & misericors, patiens, & multa misericordia, & verax. Miserator, Hebraice, *rachum*, significat proprie pio & paterno affectu miserantem filios. *Misericors*, Hebraice *channun*, significat proprie gratiæ largitorem, siue gratificantem, ut loquitur Apostolus ad Ephes. 1. *Qui ratificauit nos in dilecto filio suo*, id est, gratos nos sibi fecit, siue in gratiam recepit. *Patiens*, Hebraice, *longanimis*, *erech appaim*, proprie *longus naribus*, id est, longus, siue tardus ad iram; nares enim pro ira accipiuntur apud Hebræos. *Multa misericordia*, Hebraice, *rachmesed*, id est, multus misericordiæ, siue multus in misericordia. *Verax*, Hebraice, *emet*, veritatis, siue fidelitatis, & coniungitur cum voce, *multus*, ut sensus sit, multus misericordiæ & veritatis, id est, multus in misericordia & veritate, siue fidelitate. Ex his habemus, Deum esse amantem affectu paterno, inde esse facilem ad gratiam, inde esse tardum ad iram, inde denique esse multum, id est, liberalem & promptum ad misericorditer promittendum, & fideliter adimplendum; quæ omnia adferunt ineffabilem consolationem & fiduciam hominibus piis, & ipsi Deo ex corde adherentibus: hæc enim dicuntur timentibus Deum, ut clarius explicatur in Psal. 102. Qui enim Dei benignitate abutuntur, ij *thesaurizant sibi iram in die ire, & reuelationis iusti iudicii Dei*, ut dicit Apostolus ad Roman. 2. quibus etiam dicit ad Hebr. 10. *Horrendum est incidere in manus Dei uiuentis.*

*Respice in me, & miserere mei, da imperium tuum puero tuo, & saluum fac filium ancillæ tuæ.*

Explicata tot nominibus Dei benignitate, nunc petit, eam in se conuerri. *Respice*, inquit, in me oculis tantæ bonitatis tuæ, & mi-

serere mei, tu qui tam multus es ad miserendum. *Da imperium tuum puero tuo*, id est, in hoc peto, ut miserearis mei, ut non præualeant hostes tam multi in seruum tuum: sed contra des seruo tuo robur & fortitudinem, ad eos vincendos & subiiciendos: & hoc modo *saluum fac me filium ancillæ tuæ*, ab eorum siue occultis insidiis, siue manifestis persecutionibus. Pro voce, *imperium*, in Hebræo est, *robur*, siue potentiam: ex quo intelligimus, non peti hoc loco Regnum aliquod, aut Imperium, prout sonat verbum Latinum; sed peti gratiam fortiter resistendi hostibus, & illos subiiciendi, atque vincendi.

*Fac mecum signum in bonum, ut videant, qui oderunt me, & confundantur, quoniam tu Domine adiuuisti me, & consolatus es me.*

Concludit, petens aliquod externum signum, unde constet etiam apud aduersarios, Deum adiutorem & consolatorem esse seruatorum suorum fidelium. *Fac mecum signum in bonum*, id est, ostende in me signum aliquod, quod te bonam, id est, gratiam & fauorem tuum manifestet: ut videant illud signum, qui me oderunt, & confundantur, diffidentes videlicet de victoria. *Quoniam tu Domine adiuuisti me, & consolatus es me*, id est, quoniam reuera iam adiuuisti me in certamine, & consolatus es me in tribulatione per internam gratiam tuam, ostende etiam exterius signum aliquod fauoris tui erga me, ut qui oderunt me, videant hoc signum, & confundantur. Posset etiam cum Euthymio sic exponi: Ut videant qui me oderunt, quoniam tu Domine adiuuisti & consolatus es me, & confundantur; sed prior expositio videtur facillior, & conformis est interpositioni Hebræicæ, Græcæ & Latinæ, quæ non videtur admittere hyperbaton. Quærent Scriptores, quod sit illud signum, quod hoc loco Propheta requirit; S. Hieron. dicit, esse signum Crucis Christi; illud enim est signum in bonum, quia signum redemptionis; & cum illud aspiciunt demones, qui nos oderunt, sine dubio confunduntur.

S. Au.



S. Augustinus exponit hunc locum de signo, quod apparebit in die nouissimo, quod erit in bonum electis: & eo viso confundentur omnes inimici nostri. Alij intelligunt de signo, quod accepit ab Isaia Rex Achaz, cum ei dictum est: *Dabit Dominus ipse vobis signum. Ecce virgo concipiet, & pariet Filium, &c.* Isa. 7. Hoc enim signum vere fuit in bonum Dauidi, cuius filius futurus erat Messias, & toti Mundo, qui per Christum ab omnibus hostibus liberandus erat. Fortasse vocatur hoc loco, *signum in bonum*, lætitiæ spiritualis, quam initio petiuit Dauid, cum ait: *Lætifica animam serui tui*: hæc enim lætitia in homine iusto, atque in tribulatione posito signum clarissimum est gratiæ Dei, & hoc signo conspecto confunduntur non solum dæmones, sed etiam omnes alij persecutores, & tunc sensus erit: *Fac mecum signum in bonum*, id est, da mihi gratiam spiritualis lætitiæ, quæ etiam in ipsa vultus mei serenitate resplendet: & videant, qui oderunt me, hoc signum patientiæ & tranquillitatis animæ meæ, & confundantur: quoniam tu Domine adiuuisti certantem, & consolatus es moerentem, & tristitiam in gaudium internum iam conuertisti.

# PSALMVS LXXXVI.

Titulus & Argumentum Psalmi.

Filiis Core, Psalmus Cantici.

**I**N hoc Psalmo cantatur laus ciuitatis Ierusalem, per quam Ecclesia Christiana sine dubio intelligi debet: terrena siquidem ciuitas Ierusalem, etsi conuenit, quod initio dicitur, *Fundamenta eius esse in montibus*, tamen non conueniunt cætera, ac præsertim, quod in ea sit habitatio Babyloniorum, Ægyptiorum & Tyriorum. Ecclesia autem siue militanti siue triumphanti omnia conueniunt.

## EXPLICATIO PSALMI LXXXVI.

**L** **F**undamenta eius in montibus sanctis, diligit Dominus portas Sion super omnia tabernacula Iacob.

Incipit Propheta laudare ciuitatem Hierusalem à fundamentis, quæ sunt montes sancti: sed antequam progrediamur, soluenda est quæstio communis, quæ statim unicuique occurrere potest, quid igitur significat pronomen, *eius*? non enim videtur posse referri ad Hierusalem, vel Sion; tum quia non est antea nominata ciuitas Hierusalem, vel Sion; tum quia in textu Hebræo & Græco illud, *eius*, est generis masculini; Hierusalem autem & Sion sunt generis fœminini. Respondeo, illud, *eius*, referri ad nomen subintellectum Ciuitatis; quamuis enim nomen Ciuitatis sit regulariter generis fœminini; tamen habet terminationem ad modum masculinorum, dicitur enim, *hir*, & in numero multitudinis, *hirim*, & non desunt viri doctissimi, qui velint, esse etiam generis masculini: præterea sicut inueniuntur multa nomina, quæ præter ordinem coniunguntur cum verbis diuersi generis, vt ostendimus in Institutionibus linguæ Hebræicæ p. 4. cap. 4. sic etiam fieri potest, vt pronomen generis masculini præter ordinem coniungatur cum nomine generis fœminini; non enim ista sunt ita rata in lingua Hebræica, vt sunt in Græca & Latina. Itaque sensus est: *Fundamenta eius Ciuitatis*, quam mente intueor, & cuius laudes prædicare incipio, sunt in montibus sanctis. Omisit autem Propheta nomen Ciuitatis, & dixit: *Fundamenta eius*, vt ostenderet, se continuare verba externa cum interna admiratione: contemplans enim & admirans magnitudinem & pulchritudinem Ciuitatis nouæ descendens de cælo, prorumpit in verba illa: *Fundamenta eius in montibus sanctis*. Non placet autem quod aliqui dicunt, illud, *eius*, referri ad Christum; neque enim Christus pendet à fundamentis, sed omnia fundamenta pendunt ab ipso, qui est, vt recte monet S. Augustinus, *Fundamentum fundamentorum*, sicut est Pastor pastorum, & Rex regum, & Dominus dominantium. Ad Ephes. 2. *In quo omnis ædificatio constructa crescit in templum sanctum in Domino*. Multo minus placet quod dicunt Rabini, illud, *eius*, refer-

עיר  
ערים



referri ad Psalmum, & coniungi priorem partem huius versiculi cum titulo hoc modo, *Canticum Psalmi Fundamenta eius in montibus sanctis*, id est, fundamenta huius Psalmi sunt in montibus sanctis, hoc, inquam, non placet, quia Septuaginta Interpretes, viri doctissimi, aperte distinxerunt titulum à Psalmo, & Psalmum inchoarunt in illis verbis, *Fundamenta eius in montibus sanctis*, distinctio, & interpunctio Rabinorum est multo posterior, ac per hoc minorem habere debet fidem. Porro nomine fundamentorum, iuxta varias considerationes; res varias accipere debemus: si cogitemus eos, qui primi ad Ecclesiam conuenerunt, & primi eam propagarunt, fundamenta sunt Apostoli duodecim, iuxta illud Apocal. 21. *Ciuitas habebat fundamenta duodecim, & in eis nomina duodecim Apostolorum Agni*, si consideremus doctrinam, in qua fundatur fides Ecclesie, fundamenta sunt Apostoli, & Prophete, qui fuerunt immediati Ministri Verbi Dei. & de his dicit Apostolus ad Ephes. 2. *Superedificati supra fundamentum Apostolorum, & Prophetarum*, si denique respiciemus auctoritatem, & potestatem Ecclesiasticam, secundum quam, id est, fundamentum in domo, quod caput in corpore, fundamenta sunt Christus. & Petrus: Christus fundamentum primarium, Petrus secundarium. De Christo dicit Apostolus 1. Cor. 3. *Fundamentum aliud nemo potest ponere prater id, quod positum est, quod est Christus Iesus*. De Petro dicit Christus, Matth. 16. *Tu es Petrus, & super hanc petram edificabo Ecclesiam meam*, Isti sunt ergo montes sancti, super quos fundata est ciuitas Dei: qui dicuntur montes propter altitudinem, & excellentiam; sancti autem, quia non fuerunt alti altitudine superbie, sed altitudine sanctitatis, & sapientie, & auctoritatis. Neque obstat, quod Christus dicatur lapis angularis superpositus edificio, Psalm. 17. *Lapidem quem reprobauerunt edificantes, hic factus est in caput anguli*, & ad Ephes. secundo. *Ipsa summo angulari lapide Christo Iesu*, Nam lapis angularis est duplex, vnus in fundamento, & alius in sum-

mo edificio, & vterque connectit duos parietes, sed quamuis in edificio corporali non possit esse idem lapis angularis in fundamento sustentans totum edificium, & in vertice sustentatus à toto edificio: tamen in fabrica spiritali vnus & idem lapis, id est, vnus, & idem Prælati sustentat, & portat auctoritate sua totum edificium, & simul præst, & portatur per obedientiam à toto edificio, id est, ab omnibus lapidibus viuus: quæ duo officia conueniunt principaliter Christo, qui est absolute caput, & Princeps Ecclesie totius; sed conueniunt summo Pontifici, vt Vicario Christi generali; & suo modo omnibus alijs Prælati respectu eorum, quibus præsumt, debent enim omnes Prælati portare, & portari, portare infirmitates subditorum, & portari ab eis, dum imperant vel corripiunt. Sequitur alia laus ciuitatis Dei ducta à portis, *Diligit*, inquit Propheta, *dominus portas Sion super omnia tabernacula Iacob*. Dixerat, ciuitatem Dei fundatam esse supra montes sanctos, ac per hoc non posse ruere, vt solent edificia fundate super arenam: nunc addit, non solum non posse ruere, sed nec posse expugnari ab hostibus, quia munita est portis fortissimis, de quibus dicitur in Psalm. 147. *Quoniam confortauit seras portarum tuarum. Diligit ergo Deus portas Sion*, id est, diligit Deus Sion ob firmissimas eius portas, quæ eam faciunt inexpugnabilem: *super omnia tabernacula Iacob*, id est, magis quam diligit quæcunque tabernacula Iacob, quoniam etiam si tabernacula illa pulchra essent, & miro ordine disposita, quando iter faciebant Hebræi ab Ægypto in terram promissionis: tamen erant, sine fundamento, & sine portis, ac per hoc mutabilia, & temporalia. Significatur igitur his verbis stabilitas, & firmitas Ecclesie aduersus quam portæ inferi non praualebunt, ac præferunt, quando peruenerit ad patriam coelestem, ad quam etiam suspirabant Patriarchæ de quibus dicit Apostolus ad Hebr. 11. *Expectabant enim fundamenta habentem Ciuitatem, cuius artifex, & conditor Deus*. In Apocal. cap. 21. dicuntur *duodecim esse porta ciuitatis*



tatis noua Ierusalem, & in illis scripta esse nomina duodecim tribuum filiorum Israel. Per duodecim portas intelligunt communiter expositores illius loci, & S. Augustinus in expositione huius Psalmi, duodecim Apostolos, quia per illorum verissimam, & firmissimam prædicationem intramus omnes in Ecclesiam Dei, neque obstat, quod paulò post dicuntur Apostoli duodecim, esse duodecim fundamenta eiusdem ciuitatis; sunt enim Apostoli, & portæ, & fundamenta; portæ, prædicando, fundamenta sustinendo. Neque etiam obstat, quod Ioan. 10. Christus dicit, *Ego sum ostium, per me si quis introierit, saluabitur.* Nam Christus porta est ratione meriti, siquidem per eius meritum omnes intramus, & saluamur. Præterea (vt dicit sanctus Augustinus) huius ciuitatis vna porta est, & duodecim portæ sunt; quemadmodum vnum fundamentum est, & duodecim fundamenta sunt. Christus enim in Apostolis erat, & per Apostolos loquebatur, vt dicit Apostolus 2. ad Cor. ultimo, *An experimentum quaritis eius, qui in me loquitur Christus?* Itaque cum intramus per Apostolos, per Christum intramus, quia Apostoli non se ipsi, sed Christum prædabant; & Christus per eos prædicabat. & cum in Apostolis fundamur, & super eos ædificamur, in Christo fundamur, & super eum ædificamur. Quod autem in portis scripta erant nomina duodecim tribuum filiorum Israel; significatur, primos qui intrarunt in Ecclesiam per Apostolorum prædicationem, fuisse filios Israel, ex quibus etiam ipsi Apostoli erant; deinde intrasse gentium plenitudinem: nam & Apocalypsis 5. vbi describuntur electi, & saluandi, primo loco numerantur duodecim millia ex singulis tribubus filiorum Israel; deinde additur *turba magna, quam dinumerare nemo poterat ex omnibus gentibus, tribubus, & linguis.*

II.

*Gloriosa dicta sunt de te, Ciuitas Dei.*

Propheta David spiritu ebrius, & excel-

lentiam huius ciuitatis admirans, sicut ex abrupto cepit, *Fundamenta eius*, &c. sic mutat continuo formam dicendi, & ipsam ciuitatem alloquitur, dicens, *Gloriosa dicta sunt de te ciuitas Dei*, id est, non mireris, & sancta ciuitas, si ex abrupto loqui cepi, quoniam obtror copia encomiorum tuorum; multa enim gloriosa, magnifica præstantissima dicta sunt mihi à Spiritu sancto de te. Et verè quis posset ordine seruato narrare laudes illius ciuitatis, vbi erit Deus omnia in omnibus, & vbi bona illa seruantur electis, quæ oculus non vidit, auris non audiuit, & in cor hominis non ascenderunt? Quamuis autem propriè gloriosa dicta sunt de ciuitate Dei, quæ est in celis, & suo modo etiam de illa, quæ est in terris toto orbe diffusa: tamen de terrena etiam Hierusalem, vt typum gerebat Ecclesiæ, *gloriosa dicta sunt*, quod videlicet, ciuitas esset Regia, & sacerdotalis; quod in ea templum Domini, arca testamenti, & alia id genus multa conseruarentur; & quod omnium maximum est, quod in ea Rex Angelorum, & Dominus omnium docuerit, miracula fecerit, redemptionem generis humani operatus sepulchrum suum reliquerit, Spiritum S. de cælo miserit, & Ecclesiæ suæ perpetuo duraturæ fundamenta iecerit.

*Memor ero Raab, & Babylonis, scientium me.*

*Ecce alienigenæ & Tyrus, & populus Aethiopum, illi fuerunt illic.*

Laudat nunc Propheta sanctā ciuitatem à multitudine, & varietate nationum, quæ ad illam inhabitandam conuenerunt; non enim soli Iudæi, vt in testamento veteri ad Hierusalem pertinent; sed omnes nationes Ecclesiam Catholicam, quæ est vera Hierusalem in hoc Psalmo laudata, inhabitaturi erant. Nominat autem Raab, & Babylonem, Palæstinus, Tyrum, & Aethiopes, quæ erant nationes gentilium, sed notæ Iudæis. Per Raab intelligunt scriptores veteres Hieronymus, Augustin. Theodoretus, Euthymius, & alij in hunc locum meretricem illam, quæ dicebatur Raab, &

EXCE.



excipit exploratores Iosue in ciuitate Hie-  
rico, vt habemus Ios. 2. Sed recentiores re-  
ctè aduerterunt, meretricem illam, & in he-  
bræo, & in Græco vocari *Rahab*, cum aspi-  
ratione graui *ῥααβ*, in hoc autem loco scri-  
bi per senem aspirationem, *ῥααβ*: per Raab  
autem intelligunt Ægyptum, siue Regem  
Ægypti: vox enim Hebraica *Raab*, signifi-  
cat superbum, & sic vertitur in Psalm. 88. &  
Isai. 51. & in vtroque loco per superbum, in-  
telligunt scriptores Ægyptum. Hic igitur  
erit sensus, *Memor ero Raab, & Babylonis*  
*scientium me*, id est, ego Deus conditor ci-  
uitatis Ierusalem, in aduocandis, & conscri-  
bendis electis ciuibz Ierusalem, memor ero,  
non Iudæorum tantum, sed etiam Ægyptio-  
rum, & Babyloniorum, qui scient me,  
per fidem videlicet, & religiosum cultū co-  
gnoscent me. Ecce enim etiam *alienigena*, id  
est, Palæstini, & Tyrii, id est, populus Tyri,  
& populus Æthiopū, fuerunt illic, id est, istę  
quoque gentes, me vocante, & adducente e-  
runt in ciuitate sancta Ierusalem. Ponitur  
enim præteritum pro futuro, more Prophe-  
tico. In Hebræo pro, *scientium me*, habetur,  
*scientibus me*, & eodem modo habetur in  
Græco, sed articulus, *le*, qui habetur hoc lo-  
co, non solum deseruit datiuo, sed etiam ge-  
nitiuo, imo & accusatiuo, vt Grammatici  
docent. Quare si Græcam interpretationem  
sequi velimus, non erit vertendum, *Memor*  
*ero Raab, & Babylonis*, sed, *Commemorabo*  
*Raab, & Babylonem scientibus me*, id est, fi-  
delibus meis. Sed quia Latinus Interpres  
vertit, vt iure potuit, *memor ero Raab, &*  
*Babylonis*, rectissime addit, *scientium me*, &  
est hæc lectio antiquissima apud Latinos, vt  
perspicuum est ex commentario S. Hiero-  
nymi in hunc Psalmum. Illud autem, *hi fue-  
runt illic*, in Hebræo est, *iste natus est ibi*.  
In Græco habetur in numero multitudinis,  
*hi nati sunt illic*, & idem est sensus, nimirū,  
vnusquisq; horū natus est illic. Quare La-  
tina interpretatio explicari debet hoc mo-  
do, *hi fuerunt illic*, id est, hi omnes populi  
enumerati fuerunt, siue erunt in Ierusalem  
per nouam generationem: per antiquam e-  
nim generationem ciues erant Ægypti, vel

Babyloniæ, vel Tyri, vel Palæstinæ, vel Æ-  
thiopix, sed per nouam generationem rena-  
ti ex Deo per Christum, erunt omnes ciues  
vnus, atque eiusdem ciuitatis sanctæ Ieru-  
salem, *ubi non est gentilis, aut Iudeus, Bar-  
barus, & Scythæ, seruus, & liber, sed omnia,*  
& in omnibus Christus, Coloss. 3.

Nunquid Sion dicet homo, & homo  
natus est in ea, & ipse fundauit eam Al-  
tissimus.

Addit Propheta præcipuam laudem san-  
ctæ ciuitatis, quod in ea natus sit, qui fun-  
dauit eam *altissimus Filius Dei*. Hinc enim  
potissimum gloriosa dicta sunt de ea, quod  
ciuis eius esse voluerit, secundum naturam  
humanam, qui fundator eius est secundum  
naturam diuinam. Sic enim intelligunt  
hunc locum sancti Patres Hieronymus, &  
Augustinus, & post eos Theodoretus, &  
Euthym. Doctores Græci, & ante hos om-  
nes vetustissimus Latinorum Tertullianus  
in libro aduersus Praxeam. Nunquid Sion  
dicet homo, id est, num fieri poterit, vt ho-  
mo aliquis dicat Sioni rem tam nouam, &  
tam admirandam, & inauditam à sæculo.  
*Et homo natus est in ea, & ipse fundauit eam*  
*Altissimus*, id est, nunquid significabit ali-  
quis ipsi Sioni, quod homo natus sit in ea,  
& ipse idem fundauerit eam, cum sit *Altissi-  
mus*? Hanc tam euidentem prophetiam  
nonnulli cum Iudæis obscurare nituntur.  
Sed nos maiorem fidem habemus sanctis  
Patribz, quam omnibus Iudæis. Quod at-  
tinet ad verba, illud, *nunquid*, in Hebræo est,  
&. Sed fortasse textus Hebraicus corruptus  
est vitio scriptorum, & pro, *van*, legendum  
est, *he*, quod significat, *nunquid*: Ceterum  
etiam si maneat particula, &, idem est sen-  
sus: Si accipiat per modum interrogan-  
di, idem est enim, *Et Sion dicet homo?* &  
*Nunquid Sion dicet homo?* In textu Græco  
non habetur, *nunquid*; neque, &, sed, *Mater*:  
& sic legit etiam S. Augustinus, *Mater Sion*  
*dicet homo*, sed B. Hieronymus in com-  
mentario aperte docet, textum Græcum esse



corruptum, & Septuaginta vertisse *מתי* quod est, nunquid, sed ab aliquo sciolo additum esse, & factum esse *מתי*. Illud, *Sion*, est in casu dandi, ut ex articulo Hebraico notum est: & etiam ex eo, quod verbum, dicitur, in Hebræo est generis masculini, & *Sion* est generis feminini. Itaque homo dicitur *Sioni*, non ipsa *Sion* dicitur. Illud, dicitur, in Hebræo est, *יעמר*, dicitur, sed remotis punctis eadem literæ faciunt, *iomar*, quod significat dicitur, & sic legerunt Septuaginta, qui verterunt *ip̄a*, dicitur. Illud, *homo*, & *homo*, Rabini, & qui eos sequuntur, ita coniungunt, ut sensus sit, *homo*, & *homo*, id est, multi homines. Sed in textu Hebraico, & Græco primum *homo*, coniungitur cum verbo, dicitur, ut sensus sit, Dicit homo ad *Sion*: alterum, *homo*, coniungitur cum verbo, *natus est*: & hæc est vera interpunctio, & lectio; neque debemus propter Rabinorum glossas pervertere textum, & relinquere Patrum expositionem. Illud, & cum dicitur, *Et homo natus est in ea*, potest accipi pro, quia, ut sapissime alias in Scripturis. Si quis quærat, quomodo Christus dicatur natus in *Sion*, cum constet eum natum esse in *Bethlehem*! Respondebimus, hoc in loco per *Sion* significari Ecclesiam, siue populum Dei, Christum autem natum esse secundum humanitatem in populo Dei, siue in Ecclesia, quæ cœpit in *Abel*; cuius Ecclesiæ ipse est conditor secundum diuinitatem. Addimus, recte etiam posse dici; Christum natum esse in *Sio*, ratione parentum suorum, *Dauidis*, *Salomonis*, & aliorum, qui sedem suam posuerunt in *Sion*.

VI.

*Dominus narrabit in scripturis populorum, & Principum: horum qui fuerunt in ea.*

Respondet ad interrogationem, qua dixerat, *Nunquid Sion dicit homo*: dicit enim Propheta, Dominum ipsum hoc dicturum, imò scripturum ad æternam memoriam, in libro, in quo scribit populos, & Principes populorum, qui per nouam natiuitatem fuerunt in ipsa ciuitate, *Dominus*, inquit, *narrabit*, id est, annuntiabit, quod in *Sion*

natus sit homo, qui ipse idem sit fundator *Sionis*; *narrabit autem in scripturis populorum, & Principum, qui fuerunt in ea*, id est, narrabit in illis scripturis, in quibus continentur nomina populorum, & Principum renatorum in ipsa ciuitate: caput enim horum omnium est ille homo, qui simul est fundator *Sionis*, ac per hoc in capite libri scribetur. Porro publicatio huius libri fiet in die iudicii: tunc enim aperientur libri, & alius liber, qui est vite, ut dicitur *Apocal. 20.* de quo libro dicitur *Luc. 20. Gaudete autem, quia nomina vestra scripta sunt in caelo.* Per Principes intelligit *S. Augustinus*, *Apostolos*, quos constituit Dominus Principes super omnem terram. Quod attinet ad verba, In Hebræo, pro, *narrabit*, est verbum, *ispar*, quod *S. Hieronymus*, vertit, *nemera-bit*, Verbum enim, *sapar*, vtriusque significat, & *narrare*, & *numerare*: & vtriusque significatio hic locum habet: in libro enim vitæ narrantur res gestæ electorum, & eorum numerus describitur. Pro voce, *In scripturis*, In Græco habetur, *in scriptura*, sed numerus nō mutat sensum. In Hebræo habetur ad verbum, *in scribendo populos*, id est, narrabit, vel numerabit, dum scribet, populos atque hinc exposuimus verba vulgatæ editionis Latine, *in scripturis Populorum*, id est, in scripturis, in quibus scribuntur populi, siue nomina populorum: vna enim editio aliam explicat. Illud, & *Principum*, in Hebræo habetur transpositum post illa verba, *Horum qui fuerunt in ea*, imò, sequens versiculus apud Hebræos incipit per ista verba, *Et Principum*. Sed nos sequi debemus lectionē Septuaginta Interpretum, qui emendatiores libros habuerunt: ista enim transpositio videtur facta negligentia librariorum, & totum sensum obscurat. Illud *horum qui fuerunt in ea*, in Hebræo est in singulari, *hic natus est in ea*, sed idem est sensus, hic videlicet, Dominus narrabit cum describet populos, & Principes, quorum vnusquisque per nouam natiuitatem fuit in ea.

*Sicut latantium omnium habitatio est in te.*

VII.

Hæc



Hæc est conclusio Psalmi, quæ continet summam felicitatem habitantium in illa ciuitate, cuius fundamenta initio Psalmi descripta sunt. Hæc est enim felicitas propria ciuitatis sanctæ Ierusalem, quod in ea nullus est miser, nullus moriens, nullus gemens: quoniam *absterget Deus omnem lachrymam ab oculis eorum*, Apocal. 21. & quamuis hæc implenda sint re ipsa in cœlesti Ierusalem; tamen etiam in Ecclesia militante, qui sunt descripti ciues in cœlo, omnes sunt spe gaudentes; & illis dicit Saluator Ioan. 16. *Gaudium vestrum nemo tollet à vobis*: & Apostolus, Philip. 4. *semper gaudete*, & reuera si serui Dei gaudent etiam in tribulatione, quando mortui esse poterunt? Notat autem S. Augustinus, non esse dictum, *latantium*, sed *quasi latantium*, ne putaremus lætitiā patriæ esse lætitiā, qualem hic videmus in filiis huius sæculi, qui lætantur in acquisitione auri & argenti, vel in carnalibus deliciis, aut aliis eiusmodi rebus. Erit ergo habitatio in cœlesti Hierusalem similis habitationi, vbi conuiuium, vel nuptiæ cum lætitiā & canticis iucunde celebrantur, sed non erit eadem causā lætitiæ hic & ibi, ac si diceretur: Non erit habitatio tripudiantium vel potantium; sed sicut tripudiantium & potantium; neque erit habitatio latantium in nuptiali conuiuio, sed sicut lætantium in nuptiali conuiuio. Ex Hebræo S. Hieronymus vertit: *Et cantores quasi in choris, omnes fontes mei in te*. Sed vt supra diximus, LXX. Interpretes habuerunt codices magis correctos, & verba illa, *vesarim*, quæ S. Hieronymus legit in hoc vltimo versiculo, & vertit: *Et cantores*, ipsi legerunt in versiculo superiore, & verterunt: *Et Principum*: nam vox, *sarim*, si legatur cum puncto in dextro cornu primæ literæ, significat, *cantores*, à verbo, *sar*; si legatur cum puncto in sinistro, significat; *Principes*, à verbo, *sarah*. & sic legerunt LXX. Interpretes. Illud, *quasi in choris, cecholelim*, potest etiam recte verti, Sicut tripudiantium, vel lætantium, vt notum est. Denique illud, *Omnes fontes mei in te*, non habet difficultatem, nisi ratione duorum vocabulorum, *fontes mei*: sed vox Hebræica, *mahianai*, fon-

tes mei, lecta videtur à LXX. Interpretibus, *mahoni*, cum Iod paragogico, quæ significat habitationem: neque enim tam imperiti erant Septuaginta, vt pro, *fontibus*, ponerent, *habitationem*, nisi legissent verbum quod ita verti posset. Sed quamuis verā lectio sit, quam ex Septuaginta, Interpres noster Latinus expressit; tamen lectio quoque illa verum sensum habet, quam S. Hieronymus ex Hebræo transtulit. Vere enim beati omnes in cœlis sunt quasi cantores in choris laudantes Deum, quoniam omnes fontes bonorum diuinorum in cœlesti Ierusalem inueniuntur.

מַעוֹנִי

## P S A L M V S LXXXVII.

## Titulus &amp; Argumentum Psalmi.

Canticum Psalmi filiis Core, in finem pro Maheleth, ad respondendum, intelletus Eman Ezraitæ.

**O**bscurus titulus est, vt fere tituli ceteri esse solent. Illud, pro Maheleth, est ipsa vox Hebræica, quam LXX. Interpretes intactam reliquerunt, vt Amen, Alleluia, & similes, S. Hieronymus vertit, per chorum, alij volunt esse instrumentum musicum. Illud, ad respondendum, S. Hieronymus vertit, ad præcinnendum: vox tamen Hebræica, respondere, significat. Videtur autem Eman Ezraitæ ille esse, qui cantor dicitur libr. I. Paralip. cap. 6. & nepos Samuelis fuisse describitur: quamuis & alij fuerint, qui hoc nomine dicti sunt. Igitur sensus erit, Canticum Psalmi filiis Core datum ad canendum & frequentandum vsque in finem super choros, vel super instrumento Maheleth appellato, ad respondendum alternatim canendo, in quo explicatur eruditio, siue intelligentia mysterio plena, Eman Ezraitæ, siue ipse, siue Dauid in eius persona Psalmum composuerit. Argumentum Psalmi ex Hieronymo, Augustino & Euthymio, est passio Domini nostri Iesu Christi, quæ hoc loco manifeste prædicitur, vt in aliis multis Psalmis.



## EXPLICATIO PSALMI LXXXVII.

I.

**D**omine Deus salutis mea, in die clamaui & nocte coram te.

Propheta in persona Christi, ut ostendat magnitudinem passionis, multis & variis modis reperit & inculcat, quod Dominus in Cruce pendens dixit: *Deus meus, Deus meus ut quid dereliquisti me.* Incipit autem ab oratione inuocans Deum Patrem, ac dicens: *Domine Deus salutis mea*, id est, à quo salutem expecto per celere resurrectionem, *in die clamaui & nocte coram te*; clamauit enim in die passionis ex Cruce, dicens: *Deus Deus meus, ut quid dereliquisti me*: & nocte precedente in horto ter clamauit: *Pater mi, si fieri potest, transfer calicem hunc à me.*

II.

*Intret in conspectu tuo oratio mea, inclina aurem tuam ad precem meam.*

Exaudiatur, inquit, obsecro oratio mea, id enim significant omnia verba huius versiculi, sed metaphoris multis poetice admixtis. *Intret in conspectu tuo oratio mea*, id est, admittatur quasi orator quidam ad praesentiam tuam haec oratio mea. *Inclina aurem tuam ad precem meam*, id est, posteaquam oratio admissa fuerit ad praesentiam tuam, praebe illi benignam aurem, ut cum fiducia exponat petitionem suam. In Hebræo pro verbis, *ad precem meam*, habetur, *serinnathi*, id est, ad laudationem meam, siue ad hymnum meum. Est enim oratio cum admixta laude. Laus autem est in primis verbis Psalmi, ubi dicitur: *Domine Deus salutis mea.*

III.

*Quia repleta est malis anima mea, & vita mea inferno appropinquauit.*

Haec referri possent ad verba illa: *Tristis est anima mea usque ad mortem*; sed magis apte respondent illis, quae dicta sunt in Cruce: *Deus meus, ut quid dereliquisti me*: tunc enim plane repleta erat malis anima Christi ob ingentes dolores totius corporis sui, & astantis Matris suae, & vita ipsius propinquissima erat morti, ac per hoc inferno, ad quem

tunc omnes animae defunctorum descendebant. Non defunt, qui haec omnia, & sequentia referant ad morbum corporalem Davidis aut Oziae Regis: sed si ita esset, nihil mysteriorum in hoc Psalmo esset, neque in titulo diceretur, *Intellectus Eman*, neque Ecclesia Psalmum hunc cum ceteris frequentaret.

*Aestimatus sum cum descendentibus in lacum: factus sum sicut homo sine adiutorio, inter mortuos liber.*

Commemorauit dolores grauissimos corporis sui, ob quos iam vicinus erat morti; commemorat nunc ignominiam & contemptum, quem patiebatur iam mortuus ex opinione hominum: existimabant enim homines, illum esse quasi vnum de ceteris, qui inuitus descendisset in mortem, nec posset vilo modo seipsum iuuare, neque haberet à quo iuuaretur, cum tamen ipse vere esset inter ipsos etiam mortuos liber à dominatu mortis, & à captiuitate Diaboli, & posset quando vellet, mori, & quando vellet, resurgere. *Aestimatus sum*, inquit, *cum descendentibus in lacum*, id est, putauerunt homines me descendisse in locum animarum, sicut alij descendunt, inuitum videlicet & coactum; ac per hoc existimauerunt, me esse vnum de numero infirmorum mortalium: *factus sum*, opinione hominum insipientium, *quasi homo sine adiutorio*; nam ideo insultabant mouentes capita sua, & dicentes: *Alios saluos fecit, seipsum non potest saluum facere.* *Inter mortuos liber*, id est, ego qui inter mortui adiectos, & potestati eius subiectos solus liber sum, ut nemo me ad mortem cogere possit, & qui potestatem habeo ponendi animam meam, & potestatem habeo iterum sumendi eam, ut dicitur Ioan. 10. Ego, inquam, existimatus sum sicut homo sine adiutorio, infirmus & imbecillus, ut cetera turba mortalium.

*Sicut vulnerati dormientes in sepulchris, quorum non es memor amplius, & ipsi de manu tua repulsi sunt.*

Pergit explicare opinionem hominum de morte sua. Existimatus, inquit, sum sicut vulnerati dormientes in sepulchris, id est, sicut alij

לרנתי

IV.

V.



alij vulneribus occisi, & in sepulchris iacentes sopore mortis oppressi. *Quorum non es memor amplius*, id est, quorum tu Deus curam, quam de hominibus habes, deposuisti, cum amplius non sint inter homines. Quod idem repetit & declarat, dicens: *& ipsi de manu tua repulsi sunt*, id est, ideo tu Deus oblitus es eorum, neque de illis amplius cogitas, quoniam à manu prouidentiae tuae repulsi sunt, cum non sint amplius in rerum natura. Vbi non dicit Propheta, corpora defunctorum non pertinere ad curam Dei, sed homines mortuos, quia homines mortui, non sunt homines, neque indigent victu, vestitu, alijsq; rebus, quibus indigent homines. Porro Christus etiam in triduo mortis non fuerit homo, & vere vulneribus occisus iacuerit in sepulchro; tamen valde dissimilis erat alijs omnibus, quoniam ipse se resuscitare poterat, quod nulli alij possunt. S. Augustinus exponit illud, *quorum non es memor amplius*, in hunc sensum, Non es memor aliorum mortuorum, vt eos continuo resuscites: sed memor eris in fine saeculi: & illud, *& ipsi de manu tua repulsi sunt*, exponit de Iudeis existimantibus Christum similem fuisse alijs mortuis, non autem de mortuis iacentibus in sepulchris. Non reitico expositionem, sed quam supra posuimus, ea nobis videtur magis textui inhaerere. Qui Psalmum exponunt de egratatione Davidis, vel alijs eius calamitatibus, coguntur haec omnia explicare per tropos & similitudines, cum tamen Christo Domino proprie, & ad liberam aptissime conueniant.

*Posuerunt me in lacu inferiori, in tenebris, & in vmbra mortis.*

Haec referuntur ab Euthymio ad sepulchrum Christi, quod lapide superposito tenebrosum erat. Sed de sepulchro dictum est in versiculo superiore: & sepulchrum tenebrosum quidem dici potest, sed non profundum instar lacus. Itaque melius referentur ad limbum, qui est locus subterraneus, & infernus etiam dici solet, & sic exponit S. Hieronymus. S. Augustinus per locum inferio-

rem, siue infimum, vt ipse legit, intelligit summam miseriam, qua maior non sit, vt in Psal. 39. *Eduxisti me de lacu miseriae. Posuerunt me in lacu inferiore*, id est, inimici mei, qui me occiderunt, fecerunt, vt descenderem ad inferiores parres terrae secundum animam, qui iacebam secundum corpus occisus in sepulchro; describit autem locum inferni, dicens: *In tenebris, & in vmbra mortis*, id est, in locis tenebrosis, & in vmbra densissima, qualis est vmbra mortis, vide in explicatione Psalmi 22. v. 4. In Hebraeo habetur, *Posuisti me*, sed Septuaginta legerunt cum alijs punctis, non *sattani*, *posuisti me*, sed *sattani*, *posuerunt me*: sed etiam si legeretur, *posuisti me*, sensus esset verus: siquidem Deus Pater recte dici potest, posuisse Christum in limbo, quemadmodum etiam in cruce, & in sepulchro, quia *proprio filio suo non pepercit*, sed *pro nobis omnibus tradidit illum*, vt ait Paulus Rom. 8. Illud etiam, *in vmbra mortis*, in Hebraeo habetur, *hime soloth*, in profundis. Sensus est idem, & fortasse, vt alij ante nos obseruarunt, literae sunt transpositae, & Septuaginta legerunt, *bit sal maueth*, quod significat, *vmbra mortis*. Sunt enim literae omnino eadem.

*Super me confirmatus est furor tuus, & omnes fluctus tuos induxisti super me.*

Duabus metaphoris declarauit David in persona Christi magnitudinem passionis. *Super me confirmatus est furor tuus*, id est, furor tuus, quo indignabaris peccatis generis humani, siue zelus iustitiae, quo peccata omnia vindicari volebas, super me non solum effusus est, sed etiam confirmatus & roboratus, vt non inde recederet, donec plenissima satisfactio existeret. Haec est prima metaphora, ex qua intelligimus, tantam fuisse acerbiteriam Dominicae passionis, quantum requirebat furor Dei omnipotentis in peccata totius Mundi. Digna plane res, quam omnes redempti attentissime contemplantur. *Et omnes fluctus tuos induxisti super me*. Haec est altera metaphora, qua comparatur passio Dominica omnibus fluctibus totius maris obruentibus, siue agi-

סתר  
סתר

כמפלוג

כבד  
מות

VII.



rantibus & allidentibus ad varios scopulos hominem in mare præcipitatum. Sicut enim Dominus Iesus Christus omnia peccata hominum super se diluenda suscepit; sic etiam non vnus, aut alter fluctus pœnalis, sed omnes omniuo in eum irruerunt.

VIII. *Longe fecisti notos meos à me, posuerunt me abominationem sibi.*

Addit ad cæteras passionis auersionem notorum ab ipso. Per notos autem intelliguntur, qui eum nouerant inter ipsos conuersantem & docentem, sed non credebant esse Deum aut Messiam, de quibus dicitur Ioan. 1. *In propria venit, & sui eum non receperunt.* *Longe fecisti,* inquit, *notos meos,* id est, permixisti, vt qui me nouerant, longe recederent à me, *posuerunt me abominationem sibi,* id est, non solum recederent, tanquam si me non nossent, sed etiam execrarentur vt seductorem, & Samaritanum, & dæmontiacum, & amicum publicanorum & peccatorum; hæc enim omnia leguntur in Euangelio dicta esse à Phariseis de Christo. Posset tamen hic versiculus exponi de discipulis Domini, qui proprie noti eius dicuntur. Luc. 23. *Stabant,* inquit, *omnes noti eius à longe.* Et Matt. 26. *Tunc discipuli omnes relicto eo fugerunt.* Quod autem additur de abominatione, impletum videtur in S. Petro, qui Matt. 27. *cœpit detestari & iurare, quia non nouisset hominem,* vbi quamuis reuera S. Petrus in corde suo non abominaretur Christum, tamen visus est abominari, cum iuraret cum iuramento execratorio, se non nouisse illum. Denique discipuli eius, cum nondum intelligerent sacramentum Dominicæ passionis, & apprehenderent passionem & mortem Domini, vt rem noxiam & sibi & Christo, non mirum est, si tunc eam abominarentur. Vnde etiam ei dicebant: *Nunc te quarebant Iudei lapidare, & iterum vadis illuc,* Ioan. 11. Et S. Petrus audita prædictione passionis, abominatus eam dixit: *Absit à te Domine, non erit tibi hoc,* Matt. 16. Vtramque expositionem attingit S. Augustinus, sed anteponit primam. S. Hieronymus per *notos*, intelligit

Apostolos, per *abominantes*, intelligit Iudeos, vt & Euthymius. Sed difficile est ita diuidere, cum pronomen, *sibi*, referatur ad *notos*; illi enim posuerunt eum abominationem sibi, qui longe facti sunt ab eo, quamuis noti eius essent.

*Traditus sum, & non egrediebar, oculi mei languerunt præ inopia.*

*Clamaui ad te Domine tota die, expandi ad te manus meas.*

Explicata passionis magnitudine, reuertitur ad initium passionis, & ad initium Psalmi, id est, ad orationem, qua deprecatur mortem corporalem, vt fecit in horto; vel certe longiorem moram in morte. *Traditus sum,* inquit, *& non egrediebar,* id est, traditus sum quasi in carcerem, & conclusus vndique in decretum te passionem, vnde egredi non potero, & ideo *oculi mei*, lachrymis multis effusus, *languerunt*, vt quasi siccati sint *præ inopia* humoris. Illud enim, *traditus sum*, in Hebræo significat, *traditus sum in carcerem*, siue *conclusus sum in carcere*. Sed per carcerem intelligimus angustias passionis, & quoniam videbat, Dei præscientia & prædeterminatione se traditum in eiusmodi angustias, ideo dicit: *Et non egrediebar*, id est, non poteram, nec volebam egredi, stante decreto Patris æterni. *Clamaui ad te Domine tota die*, hoc idem habetur in principio Psalmi, & declaratur ab Apostolo ad Hebr. 5. *Qui in diebus carnis sue preces, supplicationesq; ad eum, qui posset illum saluum facere à morte, cum lachrymis & clamore valido offerens, ex auditus est pro sua reuerentia.* Dicitur autem clamasse tota die, quia & die & nocte clamaui, vt dicitur in primo versiculo: nam ex die & nocte completur dies naturalis; ac per hoc tota dies dicitur vtraque pars diei, quamuis non vtraque pars integra sit. *Expandi ad te manus meas*, orando videlicet, vel, expandi in Cruce manus meas, vt tanto oblato sacrificio facilius impetrarem, & mihi celerem resurrectionem, & corpori meo mystico liberationem à morte sempiterna. Neque obstat, quod non expandit

IX.

X.



ait Christus manus tota die. Illud enim, *tota die*, refertur solum ad clamorem, non autem ad expansionem manuum S. Aug. exponit omnia mystice, quoniam non existimabat posse ad literam ostendi, quomodo Christi oculi potuerint languere præ inopia, neque quomodo, tota die clamauerit; & extenderit manus suas.

*Nunquid mortuis facies mirabilia, aut Medici suscitabunt, & confitebuntur tibi?*

*Nunquid narrabit aliquis in sepulchro misericordiam tuam, & veritatem tuam in perditione?*

*Nunquid cognoscentur in tenebris mirabilia tua, & iustitia tua in terra obliuioni?*

Reddit rationem Propheta in persona Christi, cur à morte saluari petierit. Possunt autem hi tres versiculi tribus modis exponi, primum de morte æterna, quam Christus à membris suis, id est, fidelibus suis amoueri orauerit: & in hoc sensu facile est intelligere hos tres versiculos. Redditur enim ratio, cur petendum, & optandum sit, vt hæc mors amoueat à fidelibus, quia Deus erga damnatos ad mortem æternam, non ostendere solet, nec debet mirabilia sua: neque illi vquam resurgere debent ad vitam beatam, neque narrabunt cum laude misericordiam, & veritatem Dei: deniq; quia non solum nō narrabunt ista, sed neque cognoscent. Contra hanc expositionem facit, quod hic nominantur sepulchra; & Medici: sepulchra enim sunt corporum mortuorum, non animarum damnatarum, & Medici si experimentum vllum facere auderent, circa corpora, non circa animas auderent. Secunda expositio est, quod per mortuos, & sepultos intelligantur obstinati in peccato, apud quos parum valent mirabilia Dei, & quos Medici spirituales, quantumvis magni, non resuscitant. Hanc persequitur S. Augustinus, & ex parte etiam S. Hieronymus: sed mystica est

interpretatio; non literalis. Tertia est Theodreti, & Euthymij, quod intelligantur hæc omnia de morte corporali, quam Christus à se, & suis deprecatur, optans, & petens celerē resurrectionē, & tunc sensus hic erit, *Nunquid mortuis facies mirabilia?* id est, horreo mortem, cupio vitam conseruari, aut breui restitui mihi, & fidelibus meis: quoniam mortuis, qui non viuunt, nec sentiunt, frustra ostenderes mirabilia opera tua, quæ tamen mirabilia honorificum est testificare, & iustum est, vt agnoscantur & tibi gratiæ agantur. *Nunquid Medici suscitabunt, & confitebuntur tibi?* id est, mortui non solum non viuunt, nec sentiunt, sed neque arte vlla humana suscitari possunt, vt sentiant, & viuunt & tibi confiteantur confessionem laudis. *Nunquid narrabit aliquis in sepulchro misericordiam tuam, & veritatem tuam in perditione?* id est, ideo non facis mortuis mirabilia tua, quia illi in sepulchris iacent sine sensu, & mirabilia tua narrare non possunt, quæ mirabilia sunt misericordiæ, & veritatis tuæ opera. Perditio autem hoc loco amissionem vitæ corporalis significat: proinde iacere in sepulchro & in perditione idem est: soli enim in sepulchris iacent, quorum vita perditæ & extinctæ est. *Nunquid cognoscentur in tenebris mirabilia tua, & iustitia tua in terra obliuioni?* id est, ideo non narrabunt mortui in sepulchris mirabilia tua, quia non ea cognoscent, neque cognoscere possunt, cum degant in tenebris mortis, & in terra obliuionis, vbi nulla est memoria rerum præteritarum, sicut nec sensus rerum præsentium. Hæc expositio confirmari potest ex verbis Regis Ezechiae apud Isaiam c. 38 qui sine vllō dubio petebat vitam corporalem sibi conseruari à Deo, & dicebat: *Quia non infernus confitebitur tibi, neque mors laudabit te, viuens, viuens ipse confitebitur tibi.* sicut & ego hodie. Similia habentur in Psal. 113. *Non mortui laudabunt te Domine, neque omnes qui descendunt in infernum, sed nos qui viuimus benedicimus Domino.* Quod attinet ad verba, in Hebræo pro illis verbis, *aut Medici suscitabunt, habetur, aut Gigantes resurgent.* Sed hæc varietas nata est ex ambiguitate



רפאים  
רפאים

רפא

רפה

רפוא

vocis Hebraicæ, vt etiam S. Augustinus admonuit: nam vox, *rephaim*, quæ significat *Gigantes*, vel mortuos: si scribatur, *ropheim*, vno puncto duntaxat mutato, significat *Medicos*. Sic autem legisse LXX. Interpretes certissimum est. Quod autem recte legerint, & verterint, ex hoc etiam cognosci potest, quod radix huius vocabuli est, *rapha*, quæ significat, *mederi*, siue *sanare*. Quando enim *raphaim*; accipitur pro Gigantibus, vel mortuis, debet sumi aleph, pro he: nam radix est, *raphah*, quæ significat, *dissoluere*, vnde dicuntur mortui, *rephaim*, quasi resolute in cineres, & Gigantes dicuntur, *rephaim*; quasi qui terribili aspectu suo dissoluant intuentes. Illud autem, *iahumu*, similiter est ambiguum, & potest significare tam *resurgenti*, quam *suscitabunt*: & ideo Interpretes accommodare transtulerunt, siue *resurgenti*, siue *suscitabunt*. Illud; & *confitebuntur tibi*, aliqui referunt ad Medicos, quasi dicat Propheta, Nunquid Medici suscitabunt mortuos, & laudabunt te, quod tantam virtutem medicinæ tradideris? Sed rectius refertur ad mortuos: vt sensus sit. Nunquid Medici suscitare poterunt mortuos & ipsi mortui laudabunt te; Et sic exponit sanctus Augustinus. Denique illud, *in terra obliuionis*, ambiguum est: potest enim significare in loco, vbi est obliuio omnium rerum, & talis est regio mortis: vel in loco oblito, cuius loci videlicet, nemo amplius recordatur. Codex Hebræus ambiguus est, LXX. Interpretes, & sanctus Hieronymus interpretati sunt posteriore modo. Consequentia autem sermonis videtur requirere priorem sensum: sed vterque sensus in idem recidit, terra enim obliuioni data, est terra deserta, & desolata, ad quam nemo viuens accedit: proinde nemo est ibi, qui vilius rei recorderetur, cum nemo sit ibi viuens, & sentiens.

XIV. Et ego ad te Domine clamaui, & mane oratio mea præueniet te.

XY. Vt quid Domine repellis orationem meam? auertis faciem tuam à me?

Demonstrat in fine Psalmi diuino decreto confirmatam fuisse Christi passionem, vt mutanda omnino non esset: & pluribus verbis (vt initio diximus) explicatur illud in cruce breuissime dictum à Domino, Matth. 27. *Deus meus, vt quid dereliquisti me. Et ego ad te Domine clamaui*, vt videlicet calix passionis transiret à me, & mane oratio mea præueniet te, id est, satis tempestiue, in ipso exitu passionis oratio mea præueniet te: nam etiam si oratio Christi in horto fusa, nocturno tempore fuerit fusa; tamen dicitur mane fusa, quia tunc oriri incipiebat ipsa passio, & erat illud tempus quasi aurora passionis. *Vt quid repellis orationem meam*, id est, quare non exaudis, quare non facis; vt calix iste transeat à me, *Auertis faciem tuam à me?* id est, quare auertis faciem tuam à me, quasi alienus, quare derelinquis me? Hæc autem dicuntur, vt intelligatur magnitudo passionis, quam natura humana naturaliter horrebat: alioquin enim absolute Dominus ipse passionem; vt remedium ad tollenda peccata generis humani, omnino volebat, & eligebat, & Pater eum semper exaudiuit in eo, quod absolute petijt. In Hebraico, & Græco textu, habetur, *Vt quid Domine repellis animam meam?* pro eo quod nos habemus. *Vt quid Domine repellis orationem meam?* sed tamen etiam veteres Patres Hieronymus, & Augustinus legunt, *orationem meam*. Proinde latina vulgata lectio non est noua, & vna lectio aliam declarat. Sensus enim est, Vt quid Domine repellis orantem animam meam.

*Pauper sum ego, & in laboribus à iuventute mea: exaltatus autem humiliatus sum & conturbatus.*

Neputarent homines Christi passionem trium horarum, aut vnius diei tantum fuisse: reuelet hic nobis Spiritus sanctus, Christum in diebus carnis suæ quæquam sine passionem vixisse. Nam præter calicem mortis amarissimæ, quem semper ante oculos mentis habuit, in omni ætate sua, in laboribus & ætatem.



rumnis fuit. *Pauper*, inquit, *sum ego*, & in laboribus à iuuentute mea, id est, cum in forma Dei essem beatus, & diues, propter vos homines egenus factus sum, & in laboribus à iuuentute mea, siue à pueritia mea, quod significat vox hebraica. Poterat etiam vere dicere, ab infantia mea, vel à natiuitate mea; quod præsepe, & spelunca Bethlehemitica, & in Ægyptum fuga, exiliumque testantur. *Exaltatus autem in cruce*, tanquam in folio Regni, habens super caput titulum scriptum, *Iesus Nazarenus Rex Iudaorum*, humiliatus sum usque ad mortem, & conturbatus ob cecitatem, & ruinam populi mei. Vel, exaltatus autem à populis clamantibus, & dicentibus. *Benedictus, qui venit Rex in nomine Domini*, ut habetur Luc. 19. vel, *Benedictus qui venit in nomine Domini Rex Israel*, ut dicitur Ioan. 12. *humiliatus ea de causa usque ad flagella, & mortem crucis, & conturbatus sum* videns cecitatem populi mei. In Hebræo, pro, *exaltatus autem humiliatus sum*; habetur ex versione sancti Hieronymi, *Portaui furorem tuum*. Sed LXX. Interpretes aliter acceperunt verbum ambiguum *nasathi*, nam & portare, & exaltare, vel exaltari significat. Itaque S. Hieronymus, vnam significationem, aliam LXX. Interpretes sequuti sunt. Vocem autem, *emecha*, furorem tuum, Septuaginta legisse videntur à verbo, *macach*, quod humiliari, & depauperari significat.

*In me transierunt ira tua, & terrores tui conturbauerunt me.*

Reddit causam, cur exaltatus humiliatus sit; quia videlicet, ira Dei in peccata multa, & multiplicia totius generis humani, in ipsum Christum tranſierunt: nam propter scelus populi sui percussit eum Deus. Et ipse (ut sanctus Petrus ait) peccata nostra perulit in corpore suo super lignum. *In me*, inquit, *transierunt ira tua*, quæ super iniquos casura erat: & *terrores tui*, quibus iniqui percellendi erant, *conturbauerunt me*; inde est enim, quod in horrore & pauere, & tædere, & moestus esse, quia terrores Dei conturba-

bant eum, ut qui peccata totius Mundi expiaturus, diuinæ iustitiæ satisfactorus erat.

*Circumdederunt me sicut aqua tota die*, *circumdederunt me simul*.

Declarat iram illam, & terrores Dei fuisse instar maris deglutientis, & absorbentis hominem, quod supra breuiter dixerat, *Repleta est malis anima mea*. *Circumdederunt me torrentes tui*, sicut aqua tota die, id est, vndique, & semper me opprimebant, & absorbebant. Idem repetit, dicens, *Circumdederunt me simul*. vbi in Hebræo est aliud verbum, sed idem significans.

*Elongasti à me amicum, & proximum, & notos meos à miseria.*

Hoc denique ad cumulum malorum accedebat, quod solus calicem illum amarum bibere opus illi erat, nullo participare, & socio tantæ calamitatis. *Elongasti*, inquit, tempore passionis, à me amicum & proximum, Iudam videlicet, qui longissime ab illo recessit, factus proditor, & hostis ex amico, & proximo. Et omnes notos, Apostolos videlicet, elongasti à miseria mea: nam relicto eo omnes fugerunt, Matth. 26. Et quamuis postea mulieres, & Ioannes accesserint: illi non dolorem minuebant, sed augebant. Vere enim apud Isaiam loquitur Dominus, *Torcular calcaui solus, & de gentibus non est vir mecum circumspexi*, & non erat auxiliator, quia sui, & non fuit, qui adiuuaret, Isa. 63. In Hebræo pro, à miseria, habetur, à tenebris: sed idem est sensus; tenebræ si quidem miseriam significant, ut lux prosperitatem S. Aug. à versu quintodecimo usque in finem exponit omnia de corpore Christi quod est Ecclesia, non de ipso Christo in se.

## PSALMVS LXXXVIII.

Titulus, & Argumentum, Psalmi.

Intellectu, Ethan Ezraitæ.

**D**E Ethan Ezraitæ mentio fit lib. 3. Regum cap. 4. ubi is ponitur inter viros sapientes. Est etiam Ethan vnus ex

Rrr 2 Prim-

XVIII.

XIX.

נִסְתָּר

אֶמֶךְ  
אֶמֶךְ  
מֶכָה

XVII.

XVI.



*Principibus Cantorum lib. Paralip. cap. 6. Vtrum autem isti sint unus, & idē, an diuersi, & si diuersi, quis eorum in hoc titulo ponatur, incertum est. Graci legūt, Ethan Israelita, sed videtur id vitio librarium irrepisse: codices, enim hebraici, & latini habent, Ethan Exalta Argumentum Psalmi continet desiderium populi Dei in captiuitate positi, ut cito Christus tanto ante promissus adueniat. Itaq; primo loco ab initio Psalmi vsq; ad versiculum tricesimum septimum explicatur promissio facta Dauidi de perpetuitate Regni ipsius. Deinde à versiculo 37. vsq; ad versiculum 45. ostenditur, eam promissionem non fuisse adimpletam in filiis carnalibus, & Regno temporali Dauidis. Denique à versiculo quadragesimo quinto vsque ad finem ponitur desiderium & oratio, ut promissio adimpleatur in Christo, vero & sempiterno Rege, de quo intelligenda erat, non autem de terreno Regno. Nam ut S. Augustinus fuso docet in lib. 17. de ciuit. Dei cap. 9. 10. 11. 12. & 13. ea precipue de causa voluit Deus Regnum terrenum Dauidis finire in Iechonia, & Sedechia, ut promissio de Christo Iesu Domino nostro intelligeretur: atque hoc admonet vox, intellectus, in titulo posita.*

## EXPLICATIO PSAL. LXXXVIII.

I. **M**isericordias Domini in aeternum cantabo.

Hæc est propositio, & argumentum totius Psalmi. Dicunt enim Propheta, se in hoc Psalmo cantaturum misericordias Domini stabiles, & firmas, id est, beneficia misericorditer promissa, quæ nunquam deficient, quæ apud Isaiam dicuntur cap. 55. *Misericordia Dauid fideles.* Illud ergo, *in aeternum*, non coniungitur cum verbo, *cantabo*, sed cum nomine, *misericordias*. Non enim Dauid in aeternum cantare poterat: qui paulo post moriturus erat: sed cantaturum se dicit misericordias Domini in aeternum permanfuras, id est, beneficia firma & stabilia in aeternum. Parum autem refert quod in græco codice legatur, *Misericordias tuas Domine*: in hebræo autem & latino, *Misericordias Domini*: nam idem est sensus, & priorem lectio-

nem habet sanctus Augustinus, posteriorem sanctus Hieronymus.

*In generatione & generationem annuntiabo veritatem tuam in ore meo.*

Hic secundus versiculus est repetitio, & explicatio primi: idem enim est, *in aeternum*, quod *in generationem*, & *generationem*: idem quoque est, *cantabo*, quod, *annuntiabo in ore meo*: idem denique est *misericordias fideles*, quod *veritatem tuam*. Itaque in primo versiculo dicit, se cantaturum misericordias Domini, quæ in aeternum erunt: in secundo dicit, se cantaturum veritatem Domini, id est, fidelitatem in seruandis promissis, quæ in generationem, & generationem permanebit. Quod autem hoc loco illud, *In generationem, & generationem*, debeat coniungi cū nomine, *veritatem tuam*, non cum verbo, *annuntiabo*; perspicuum est ex illa additione, *in ore meo*: ne forte enim existimaremus, voluisse Dauidem dicere, se cantaturum, & annuntiatum in aeternum per ora fidelium, qui perpetuo Psalmos eius cantabunt, addidit, *in ore meo*, id est, ego ipse ore meo cantabo, & annuntiabo misericordiam, & veritatem Dei sempiternam. Sed hunc esse sensum horum versiculorum, manifestius intelligitur ex versiculo sequenti.

*Quoniam dixisti: In aeternum misericordia edificabitur in cælis, præparabitur veritas tua in eis:*

Probat aeternam esse misericordiam, & veritatem Dei, id est, in aeternum duraturas; quoniam Deus ipse hoc dixit, qui mentiri non potest. Ego, inquit, cantabo misericordiam, & veritatem tuam, quæ in aeternum erit, *quoniam tu dixisti*, & mihi Propheta tuo reuelasti, *In aeternum misericordia edificabitur in cælis*, id est, beneficia misericorditer Dauidi promissa in aeternum ædificum in cælis consurgent, id est, firma, & stabilia erunt, ut ædificum immobile, quod nulla temporum duratione destrui potest.



test. In cœlis autem hæc misericordiæ ædificium erit, ubi sunt omnia æterna. Non enim euentus pendeat à voluntate hominum mortalium neque consilij, & decretis mutabilibus nitetur, sed in cœlis fundamentum suum habebit. *Preparabitur veritas tua in eis*, id est, in iisdem cœlis fidelitas tua, qua promissa ad implens, preparabitur. Vox Hebraica ducitur à verbo, *cun*, quod significat, *parare, firmare, dirigere, ordinare*. Itaque sensus est. Fidelitas tua non poterit impediri ab ulla inferiore causa, quoniam in cœlis firmabitur, & stabilietur: & similis erit ipsis cœlis, qui permanent in seculum seculi. In hoc versiculo est aliqua varietas lectionis: nam in Hebræo legitur in prima persona, *Quia dixi*: in Græco, & Latino in secunda *Quoniam dixisti*: sed in Hebræo vnus solus literulæ; quæ scribitur sic 7, differentia est inter primam, & secundam personam. Itaque facile fuit literulam illam addere, vel demerere librarijs. Sensus est idem: nam si legatur, *dixi*, sensus erit, te inspirante dixi: si legatur, *dixisti*, sensus erit, per os meum dixisti, vel mihi dixisti. Illud, *in cœlis*, in Græco coniungitur cum verbo, *preparabitur*, & omittitur illud, *in eis*, hoc modo? *In cœlis preparabitur veritas tua*: sed quoniam in Hebræo habetur, *in eis*, distinctio, & lectio communis vulgæ editionis retinenda est; quæ coniungit, *in cœlis*, cum verbo *adificabitur*, & non omittit, *in eis*, Hebræus codex non concordat neque in Græco, neque cum Latino: sic enim S. Hieronymus ex Hebræo reddit, *Cœlos fundabis*, & *veritas tua in eis*. Et quidem hanc lectionem voces Hebrææ patiuntur: sed sententia non videtur apte coherere cum præcedentibus neque facile intelligi posse. quidem est; *Misericordia preparabitur: cœlos fundabis*, nonne cœli ab initio fundati sunt? cur debent iterum fundari? & quemadmodum de misericordia dicitur, *adificabitur*, nonne aptum erat, ut de veritate diceretur, *preparabitur*, vel, *firmabitur*. Et vox Hebraica, *tachin*, facile potest permutari in punctum, & iod in vau, verti in, *sichon*, quod est, præpa-

rabitur, vel firmabitur, & sic legisse credibile est Septuaginta Interpretes. De voce, *in cœlis*, non est facienda difficultas, quoniam etiam si in Hebræo desit præpositio, in, & ideo S. Hieronymus verterit, cœlos, tamen sæpè Hebræi præpositionem omittunt, eamque subintelligunt: & Septuaginta Interpretes eam addere solent, ut hoc loco fecerunt.

*Disposui testamentum electis meis: iuravi David seruo meo, vsque in æternum preparabo semen tuum.*

*Et edificabo in generationem, & generationem sedem tuam.*

Explicat nunc misericordiam fidem, quam initio cantaturum se dixit. Est autem hæc misericordia promissio quædam pacto, & iuramento firmata de posteritate Davidis, & Regia dignitate sempiterna, quæ promissio habetur. 2. Reg. 7. ubi David cupiuit ædificare domum Domino, id est, templum, ubi requiesceret Arca Dei, & sacrificijs Deus coleretur. Deus autem hoc bonum Davidis desiderium remuneravit per Nathan Prophetam, promissione domus eius ædificandæ, id est, propagandæ posteritatis, & Regni in domo eius stabilendi vsque in sempiternum. Hoc igitur significat, cum ait, *disposuisti testamentum electis meis*, id est, percussisti fœdus cum populo meo electo. *Iuravi David seruo meo*, id est, promisi cum iuramento Davidi Principi populi mei electi, *vsq; in æternum preparabo semen tuum*, id est, hoc erit pactum iuratum, ut stabiliam sobolem eius vsque in æternum, ut nunquam desit filius aliquis Davidis. *Edificabo in generationem, & generationem sedem tuam*, id est, & multiplicabo tempora Regni tui in æternum. Quæ ad modum enim ædificare domum Hebraica phrasi, est multiplicare sobolem: sic etiam ædificare sedem Regni, est multiplicare tempora Regni, siue efficere, ut Regnū diuturnum, vel potius æternum sit. Hæc omnia si ne dubitatione in Christum solum conue-



niunt, qui futurus erat de semine Dauid, & regnaturus in aeternum. Declarauit hoc Iſaias cap. 9. vbi ait, *Multiplicabitur eius imperium, & pacis non erit finis: Super solium Dauid, & super Regnum eius sedebit, vt confirmet illud, & corroboret in iudicio, & iustitia, à modo, & vsque in sempiternum.* Id etiam declarauit Angelus Gabriël Luc. 1. *Dabit ei Dominus Deus sedem Dauidis patris eius, & regnabit in domo Iacob in aeternum, & regni eius non erit finis.* Neque possunt hæc intelligi de Regno temporali, quod iam dudum euersum est, sed de Regno spiritali, & sempiterno, in quo Iudæi valde hallucinantur, & errant expectantes Messiam, qui Ierosolymis temporaliter regnet. In Hebræo legitur in singulari, *electo meo*, sed Septuaginta verterunt in numero multitudinis, *electis meis*, nam populus electus per vtrunque numerum significari potest. In eodem Hebraico codice legitur ad verbum, *pepigi pactum*, pro quo nos habemus, *disposui testamentum*. Sed Septuaginta plerumque pactum, testamentum vocant. Vulgatus quoque interpretis lib. 1. Macha. cap. 1. scribit, *disponamus testamentum in gentibus*, quod nihil aliud est, nisi pactum faciamus cum gentibus.

VI.

*Confitebuntur cæli mirabilia tua Domine, etenim veritatem tuam in Ecclesia Sanctorum.*

Exposita summa promissionis Dei, antequam fusius illam explicet, excurret in laudes eiusdem Dei, vt offerat sacrificium gratiarum actionis: ac primum sanctus Dauid videns se non esse idoneum ad agendas gratias pro tanto beneficio, dicit, Angelos in cælo Deum laudaturos, gratiasque acturos. *Confitebuntur*, inquit, *cæli mirabilia tua*, id est, ego par non sum tantæ laudi, quanta pro hac re tibi debetur, sed *confitebuntur*, id est, laudabunt cæli, id est, Angeli habitantes in cælis, *mirabilia tua*, id est, admirabilem misericordiam tuam: etenim veritatem tuam in Ecclesia sanctorum, id est, confitebun-

tur etiam laudes veracitatis, & fidelitatis tuæ in cætu sanctorum Angelorum, qui tibi innumerabiles semper assunt. Illi enim melius nouerunt magnitudinem misericordiæ, quæ in aeternum ædificatur in cælis, quam nos, qui in terra iacemus. Illud etenim, non est particula rationalis hoc loco, sed coniunctiua, idem valens, quod, &, vel, etiam: nam in Hebræo est, *aph*, quod significat, etiam.

78

*Quoniam quis in nubibus æquabitur Domino: similis erit Deo in filiis Dei?*

VII.

Probat Angelos non recusaturos officium laudandi Deum, quoniam sunt ipso Deo longe inferiores. *Quoniam*, inquit, *quis in nubibus æquabitur Domino?* id est, Quis eorum, qui super nubes cæli degunt, æquabitur Domino, quasi dicat, nullus cælitum conditori cæli æqualis est, omnes subiecti, omnes serui: ac deinde id ipsum repetit, dicens, *Similis erit Deo in filiis Dei*, id est, quis ex filiis Dei, quales sunt Angeli sancti, qui cum sint filij Dei, consequenter etiam Dij sunt, *similis erit*, similitudine æqualitatis ipsi vni verò Deo, qui Deus est per naturam, non per gratiam; per essentiam, non per participationem. Illud in nubibus, idem est, ac si dictum fuisset, in cælo. Vox enim Hebraica vtrunque significat; & tum Septuaginta, tum sanctus Hieronymus eandem vocem Hebraicam, *sciachac*, hic verterunt, nubes & paulò infra verterunt, *cælum*, vbi dicitur, *Et testis cælo fidelis*. Itaque non significatur hoc loco, quod Angeli propriè sint in nubibus, sed quòd sint in cælo. Nubes enim pro cælo ponuntur. Sanctus Augustinus existimauit sensum esse, nullam ex nubibus æquari posse Deo; & quia videbatur nimis humilis esse comparatio nubium ad Deum, per nubes significari voluit prædicatores, per Dominum vero, Deum incarnatum, id est, Christum: sed prior expositio magis literalis.

שחא

Deus



*Deus qui glorificatur in consilio San-  
ctorum, magnus, & terribilis super omnes,  
qui in circuitu eius sunt.*

Ostendit; vere nullum Angelorum san-  
ctorum conferri posse cum Deo, quoniam  
Deus est, qui glorificatur in consilio Sancto-  
rum, id est, qui in cœtu supernarum potesta-  
tum gloriosus agnoscitur; Magnus, est po-  
tentia, & sapientia, & ideo reuerendus, &  
metuendus super omnes Angelos, qui in  
circuitu eius sunt, ut milites in circuitu Re-  
gis, & serui in circuitu Domini sui. Verbū,  
glorificatur: in Hebræo propriè significat,  
robustus est, praualeat, eminet: sanctus Hie-  
ronymus vertit, inclytus est. Illud, in cōsilio,  
accipitur pro loco consilij secreti: nam in  
Hebræo est, *soa*, quod secretum significat.  
Sunt autem Angeli, quasi secretum consilij  
Dei, non quod Deo consilium dent, (*Quis  
enim eius consiliarius fuit*, inquit Isaias cap.  
40. & Apostolum Rom. 11.) sed quod Deus  
secreta consilia sua eis reuelet, & per eos ex-  
equatur: atque in hoc consilio Sanctorum  
Deus mirifice glorificatur, admirantibus  
supernis illis Senatoribus consilia, & iudicia  
infinitæ sapientiæ Dei. Illud, in circuitu eius  
sunt, non repugnat immensitati Dei, quæ  
omnia ambit, & replet: nam quamuis Deus  
sit vbique, tamen non extenditur per loca,  
sed est vbique totus, & ideo possunt Angeli  
esse in circuitu Dei, quatenus omnes illum  
intuentur, & eorum vident, quamuis & ipse  
sirin circuitu Angelorum, eosque vndique  
circumspiciat, & conseruet. Similis senten-  
tia est Apocalyp. 11. *Et omnes Angeli erant  
in circuitu throni.*

*Domine Deus virtutum, quis similis ti-  
bi potens es Domine, & veritas tua in  
circuitu tuo.*

Quod Propheta dixit in laudibus Dei  
per modum narrantis: nunc idē dicit ipsum  
Deum alloquendo, & copiosius laudes eius  
percutiendo. Domine, inquit, Deus virtutū,  
quis similis tibi, id est, tu Domine es Deus  
exercitū, multorum videlicet millium An-

gelorum, sed in his omnibus ita emines, ut  
nullus sit perfectè tibi similis. Potens es Do-  
mine, & veritas tua in circuitu tuo, id est, idē  
nullus est perfectè similis tibi, quia tu  
solus es potens, non potens facere hoc, aut  
aliud, sed absolutè potens; quia omnia po-  
tes, & nihil potestati tuæ resistit: nec solum  
potes omnia facere, sed etiam re ipsa facis,  
quod promittis te facturum; fidelis enim es  
in omnibus verbis tuis. Dicitur autem veri-  
tas, id est, veracitas, & fidelitas esse in circui-  
tu Dei, quoniam est veluti cingulum Dei;  
dicitur enim Isaiæ 11. *Et erit iustitia cingu-  
lum lumborum eius, & fides cinctorium re-  
num eius*; ut enim cingulum adstringit ve-  
stes, ut corpori firmiter adhæreant: sic vera-  
citas adstringit verba promissionum, ut  
non mutentur, sed impleantur, & quemad-  
modum cingulum facit hominem expeditū  
ad ambulandum, vnde dicitur Tobia: 5. An-  
gelum Raphaëlem apparuisse, ut iuuenem  
præcinctum, & paratum ad ambulandum,  
sic veracitas facit, ut omnibus remotis im-  
pedimentis homo expedite progrediatur ad  
implenda promissa.

*Tu dominaris potestati maris, motum  
autem fluctuum eius tu mitigas.*

Dixit Deum esse potentem, & fidelem:  
nunc probat Deum esse potentem, ex eo  
quod dominatur mari, & motus eius miti-  
gat. Mare siquidem horrendum in modum  
aliquando turbatur, & fremit; & quia latissi-  
mum, & profundissimum est, fluctus suos  
vsque ad cœlum extollere videtur, ideo  
creatoris omnipotentia in eo sedando, &  
compescendo cernitur. De qua re sic lo-  
quitur Dominus, Iob. 38. *Circumdedit illud  
terminis meis, & posui vestem, & ostia, &  
dixi vsque huc venies, & non procedes am-  
plius, & hic confringes tumentes fluctus tuos:*  
& Hierem. 5. *Me ergo non timebitis, & afa-  
cie mea non delebitis, qui posui arenam ter-  
minum mari præceptum sempiternum, quod  
non prateribit, & intumescant fluctus eius,  
& non transibunt illud.* sed maxime Deus

osca.



ostendit potentiam suam super mare, quando siccauit mare rubrum & motum eius ita mitigauit, vt staret quasi murus hinc atque hinc, dum transiret populus Hebræus per medium siccæ maris, vt dicitur Exod. 14. Illud, *potestati maris*, significat elationem, & quasi superbiam maris; vt sensus sit, Tu dominaris superbiæ maris, elationes eius comprimendo. Quod explicatur in verbis sequentibus, & *motum fluctuum eius tu mitigas*.

XI.

*Tu humiliasti sicut vulneratum superbum; in brachio virtutis tuae disperdisti inimicos tuos;*

Hæc ad literam videntur intelligenda de Pharaone, & exercitu eius: & rectè coniunguntur cum superioribus verbis. Eodem enim tempore Deus mitigauit mare vsque ad siccationem, & interfecit superbum Pharaonem, quasi vulneratum, & debilem, & disperfit exercitum eius. Quod clarius legitur apud Isaiam cap. 51. *Nunquid non tu percussisti superbum, vulnerasti draconem: nunquid non tu siccasti mare, aquam abyssi vehementis, vt transirent liberati*; Ergo inquit, *tu humiliasti superbum*, deiiciens illum in profundum maris, humiliasti autem nullo negotio, quemadmodum prostermitur facillime is, qui grauiter vulneratus est; *In brachio virtutis tuae*, id est, brachio tuo potentissimo disperdisti, per mare rubrum inimicos tuos, exercitum videlicet Pharaonis. Possunt etiam hæc omnia referri ad diabolum, qui per Pharaonem in scripturis significatur, & ad Angelos eius. Deus enim initio Mundi dominatus est potestati maris, mitigauit motum fluctuum eius, quando sedauit seditionem, & tumultum malorum Angelorum, quasi maris turbati, & æstuantis, cuius fluctus, id est, superbia vsque ad solium Dei eleuabatur; humiliavit superbum diabolum, quasi hominem per vulneribus debilem, & imbecillum, & disperfit omnes inimicos suos, qui diaboli superbiam imitari fuerant.

XII.

*Tui sunt cæli, & tua est terra, orbem*

*terrarum, & plenitudinem eius tu fundasti: Aquilonem, & mare tu creasti.*

Docet, non esse mirum, si Deus tam facile compescuit mare, & humiliavit superbū, quia Dominus est vniuersorum, & ideo Dominus, quia omnia fecit. *Tui sunt cæli*, & omnes habitantes in eo: *tua est terra*, id est, Mundus inferior, & quidquid in eo est: solet enim Scriptura per cælum & terram mundum vniuersum significare, vt Gen. 1. *In principio creauit Deus cælum, & terram.* Et Matth. 11. *Confiteor tibi Pater, Domine cæli, & terra. Orbem terra, & plenitudinem eius tu fundasti*, id est, ideo tui absoluti iuris est orbis terræ cum omnibus rebus, quibus plenus est, quia tu eum fundasti, id est, a fundamentis fecisti, nullo presupposito fundamento ab alio Architecto constituto. *Aquilonem, & mare tu creasti*, id est, tu fundasti omnem terræ, cum omnibus suis partibus, Septentrionali, Australi, Orientali, & Occidentali, Per Aquilonem intelligitur pars orbis Septentrionalis omnium consensu, sic dicta à vento, qui ab illa parte flare sentitur. Per mare aliqui intelligunt occidentem, sed refelluntur ab ipso Propheta in Psal. 116. *A solis ortu, & occasu, ab Aquilone & mari.* Igitur per mare intelligitur pars orbis Australis, quoniam mare Oceanum maxima ex parte iacet ad Austrum. In Hebræo non est, *iam*, quod significat mare, sed *iamin*, quod significat dextrum; ideo vel dicendum est, Septuaginta Interpretes legisse, *iammim*, quod est, *maria*, vt etiam legit S. Augustinus: vel reddidisse sensum non verba. Mare enim, siue Austrum, dextra pars mundi censetur, Aquila sinistra, Oriens anterior, Occidens posterior. Sed cur Propheta tam accurate meminit creationis orbis terræ, & partium eius, & de creatione cæli nihil dicit; Opinor, quia de hominibus habitatoribus terræ magis sollicitus erat, vt eis persuaderet, Deum esse verum eorum dominū, quàm de Angelis habitatoribus cæli, quibus ea persuasio necessaria non erat: quam etiam ab vna parte de toto iudicium fieri poterat.

Tabp



*Thabor & Hermon in nomine tuo exultabunt: tuum brachium cum potentia.*

Dixerat, Deum creauisse Aquilonem, & mare, id est, Austrum: nunc addit orientem, & occidentem. Sed more poetico describit orientem, & occidentem per montes *Thabor, & Hermon*, quorum vnus est terræ promissionis ad orientem, alius ad occidentem: sicut etiam poetico more describit creationem, per effectum exultationis; ac si diceret, oriens, & occidens à te creati *exultabunt*, & gestient, & in laudes tuas suo modo prorūpent, ob tam insigne beneficium creationis. His dictis concludit *tuum brachium cum potentia*, id est, ex creatione cœli, & terræ, vt etiam ex eo quod dominaris potentie maris, & humiliasti superbū, & dispersisti inimicos tuos; colligimus, tuum brachium esse fortissimū, coniunctū videlicet non cum debilitate, vel infirmitate, sed cum absoluta omnimodaque potentia.

*Firmetur manus tua & exaltetur, dextera tua; iustitia, & iudicium præparatio sedis tue.*

Duo quedam prædicauerat de Deo S. Propheta in octauo versiculo, potentiam, & veritatem; ac de potētia multa dixit in quinque versiculis, nono, decimo, vndecimo, duodecimo, & tercio decimo: nunc incipit explicare, & laudare veritatem, quæ iudiciū etiam & iustitia dicitur, & cum misericordia semper coniuncta esse solet. Ait igitur, *firmetur manus tua, & exaltetur dextera tua: iustitia, & iudicium præparatio sedis tue*, id est, opto quidem, & gaudeo quod manus tua firmetur, id est, roboretur, siue potens, & robustissima sit: & eadem dextera tua exaltetur, id est, laudetur & magnificetur ab omnibus vt æquū est; sed simul iustitia & iudicium, sit præparatio sedis tue, id est, misericordia, & iustitia præparet, ornent, & stabiliant thronum tuum. Existimamus hoc loco, per iustitiam, intelligi bonitatem, & misericordiam, quomodo accipitur nomen iustitiæ, Matth. 5. *Nisi abundauerit iustitia,*

*vestra plusquam Scribarum, & Pharisaorum* &c. Matth. 6. *Attendite ne iustitiam vestram faciatis coram hominibus.* Vbi per iustitiam significatur elemosyna, & ibidem. *Primum querite Regnum Dei, & iustitiam eius.* Nam hoc idem repetitur alijs verbis in sequenti versiculo, *Misericordia, & veritas præcedent faciem tuam.* Est autem hoc loco metaphora desumpta à corporali folio Regum: quem admodum enim antequam Rex procedat ad solium iura daturus, præcedunt famuli, qui solium præparant, stabilunt, & ornant; sic ad iudicium Dei præsupponuntur misericordia, & iustitia, quæ faciunt vt iudicia Dei iustissima sint, nec possint vilo modo esse iniqua. Deus enim primò exhibet misericordiam magnam hominibus omnibus docendo per leges, iuuando per gratiam, incitando ad bonum per præmium, promissionem, absterrendo à malis per comminationem pœnarum; & postea exhibet iustitiam remunerando bonos, & puniendo malos: nisi enim misericordia præcederet iustitiam, omnes periremus. Hinc etiam admonentur Reges, & principes terreni, thronos eorum multo melius ornari, & stabiliri misericordia, & iustitia, quam auro, & gemmis: nec minus debere bonos Principes dare operam, vt peccata non fiant, quam vt puniantur, cum facta sunt; non enim desunt aliquando si non Principes ipsi, at certe aliqui ipsorum Ministri, qui latentur multiplicatione delictorum, vt habeant occasionem lucri in exercenda iustitia: quique moleste ferant, cum à viris pijs excogitantur remedia ad impedienda, vel minuenda delicta, quasi hoc redundet in detrimentum causidicorum, & iudicum: sed vbi misericordia, & iustitia præparant thronum, cupiditas, & iniquitas locum non habent.

*Misericordia, & veritas præcedent faciem tuam: beatus populus, qui scit iubilationem.*

XV.

Prior pars huius versiculi apud hebræos, coniungitur cum superiori versiculo; ni-



hil enim est aliud, nisi repetitio illorum verborum, *iustitia & iudicium præparatio sedis tue*. Itaque sensus est, *Misericordia & veritas*, id est, *iustitia præcedent faciem tuam*, ut præparent sedem tuam, cum ad iudicium venturus eris, id est, certi sumus, te non iudicaturum, nisi iustissime, & præmissa misericordia, ut minus inuenias, quod punias, & fideliter reddas unicuique secundum opera eius. His explicatis de potentia & veritate Dei cum misericordia coniuncta, applicat hæc ad populum Israëliticum, & in particulari ad ipsum Dauidem, ostendens in populo Dei, & in persona Davidis maxime locum habere potentiam, misericordiam & iustitiam Dei. *Beatus*, inquit, *populus, qui scit iubilationem*, id est, vere præ omnibus populis felix est populus Israëliticus, qui scit per notitiam & experientiam has laudes Dei, & scit iubilare, id est, magno affectu laudare Deum. Hinc intelligimus, non esse beatum, qui voce tantum Deum laudat, nisi etiam vere intelligat, & cogitet, Deum esse laude dignissimum, imo digniorem, quam verbis exprimi possit, & ideo ad iubilum cordis recurrendum esse, dum utunque voce & cantu eum laudamus.

XVI.

*Domine in lumine vultus tui ambulant, & in nomine tuo exultabunt tota die, & in iustitia tua exultabuntur.*

Explicat quare beatus sit populus, qui scit iubilare: quoniam, inquit, homines eius populi, non ambulabunt in tenebris, sicut gentes, quæ ignorant Deum, sed conuersi ad Deum in lumine vultus eius ambulabunt viam huius vitæ: significat autem lumen vultus Dei tum illuminationem intellectus per notitiam legis, & voluntatis Dei, tum etiam fauorem gratiæ, qua inflammatur affectus, lux enim illuminat, & calefacit. Ex hac autem ambulatione in lumine vultus Dei, sequitur lætitia bonæ conscientie, & gratiarum actio, & ideo *in nomine Dei exultabunt tota die*, id est, iugiter exultabunt Deum laudantes, & gratias agentes. Et quoniam qui ita ambulant, quotidie magis, ac magis pro-

ficiunt, & ascendunt ad maiorem Dei notitiam, & amicitiam, & inde donis maioribus eumulantur, ideo addit, *& in iustitia tua exaltabuntur*, id est, exaltabuntur ad maiorem vitæ perfectionem & postea ad gloriam sempiternam, in iustitia Dei, qua seruat promissa, siue in iustitia, quam Dens nobis donat, cum nos quotidie magis magisque iustificat, id est, iustiores facit. Vbi admonemur, non in nostra scientia, aut viribus confidendum esse, siue cum incipimus ambulare, siue cum proficimus ambulantes: illud enim *in lumine vultus tui*, opponitur præsumptioni de proprio lumine: & illud, *in nomine tuo*, opponitur vanæ gloriæ de proprio nomine, & illud *in iustitia tua*, opponitur superbæ Pharisæicæ, qui ignorantes iustitiam Dei, propriam iustitiam statuere volunt, & ideo iustitiæ Dei non sunt subiecti.

*Quoniam gloria virtutis eorum tu es, & in beneplacito tuo exaltabitur cornu nostrum.*

Pergit humiliare superbiam humanam, quæ valde facile sibi tribuit, quæ Dei sunt, & inde meretur amittere, quæ acceperat. Dixi, inquit, in iustitia Dei exaltabuntur, *quoniam gloria virtutis eorum tu es*, id est, virtus, & robur eorum, unde proficiunt, & ascendunt, à te est, non ab illis, & ideo in te, non in se gloriari debent: tu enim es qui das illis virtutem, & gloriosos eos facis. Id autem facis, non quia illi merentur, sed quia tibi placet: nam *in beneplacito tuo*, id est, in bona voluntate tua erga nos, à qua bona omnia procedunt, *exaltabimus cornu nostrum*, id est, robusti, & fortes erimus aduersus inimicos nostros.

*Quia Domini est assumptio nostra, & sancti Israel Regis nostri.*

In hoc enim apparuit beneplacitum Dei, quod ex omnibus populis terrarum, placuit illi assumere populum Israel in suum, ac proprium: *Domini est assumptio nostra*, id est, Dominus ex beneplacito suo, non ex meritis nostris nos assumpsit in populum peculiarem.



culiarem, ac Rex noster esse dignatus est; ideo enim subiungit, *Et sancti Israel Regis nostri*. ubi Israel est genitui casus, vt apparet ex textu Hebraico. Dicitur autem Deus à Dauide, & ab Isaia, & alijs Prophetis *sanctus Israelis*, quoniam à populo Israel peculiariter sanctificari, id est, sanctus haberi, & dici, & nomen suum, nulla blasphemia, aut maledictione pollui volebat. In hebræo pro assumptione nostra, habetur protectio nostra; sed idem est sensus Deus enim assumpsit populum Israel, vt eum protegeret, & defenderet.

XIX.

*Tunc locutus es in visione sanctis tuis, & dixisti, posui adiutorium in potente, & exaltaui electum de plebe mea.*

Hic iam incipit descendere ad personam suam, tanquam caput populi à Deo peculiariter dilecti. Sed oritur hoc loco grauis quaestio, An hæc verba, & sequenti debeant exponi de Dauide, an de Christo, an partim de Dauide, partim de Christo S. Aug. exponit omnia de Christo: sed repugnat huic expositioni quod Apostolus Act. 13. exponit de ipso Dauide illa verba. *Inueni David filium Jesse virum secundum cor meum*; quæ verba sumpta sunt, partim ex hoc loco, partim ex lib. 1. Regum cap. 13. Præterea, quod dicit infra. *Et ponā in seculum seculi semen eius*; non videtur ad literam conuenire Christo, qui proprie non reliquit semen, id est, filios: sed optime conueniunt Dauidi cui Deus promisit. 2. Reg. 7. quod post mortem eius poneret de semine ipsius in throno Regni, & Regnum per ipsum semen æternum esset. Alij exponunt omnia de Dauide in persona sua; sed repugnat huic expositioni illa verba, *Ego primogenitum ponam eum, excelsus præ Regibus terræ*, & alia multa, vt infra demonstrabimus. Euthymius exponit partim de Dauide, partim de Christo: sed huic expositioni repugnat continuatio verborum omnia enim verba ita contexta sunt, & continuata, vt ad eundem pertineant. Existimo igitur omnia exponenda esse ad literam de

Dauide, sed implenda magna ex parte per Christum, ita vt dicatur *Dauid primogenitus Dei*, & *excelsus præ Regibus terræ*, non in se, sed in Christo filio suo, & hæc videtur esse Theodoretis sententia. Sed si hoc non placeat, adhærendum erit omnino sententiæ S. Augustini: quod enim omnia dicantur de Dauide in persona propria, iudaicus error est. Tunc, inquit, quādo assumpsit populum Israel in populum peculiarem, prouidisti etiam ei Regem peculiariter tibi placitum: nā locutus es in visione, siue reuelatione Sanctis tuis Prophetis, videlicet Samueli primum, & postea Nath. vt intelligi potest ex lib. 1. Reg. 16. & lib. 2. cap. 7. *Et dixisti posui adiutorium in potente*, id est, posui, siue constitui auxilium populo meo in homine robusto, & forti corpore, & animo, qui facile poterit liberare populum ab omnibus hostibus eius. *Et exaltaui electum, de plebe mea*, id est, constitui adiutorium populo meo in viro potente, quia exaltaui in Regem, & protectorem, ac defensorem populi hominem electum à me de omni plebe mea. S. Augustinus hæc etiam exponit de Christo, qui proprie potentissimus fuit, & electus, ac dilectus præ omnibus. In græco pro *sanctis tuis*, habetur filijs tuis, sed sanctus Hieronymus in Epist. ad Suniam, & Eretellam, dicit omnes interpretes vertisse, *sanctis tuis*, vt habetur in hebræo; excepto auctore sextæ editionis, quæ habet, Prophetis tuis, & auctore communis editionis, quæ habet, filijs tuis. Theodoretus tamen scribit, Simmachum vertisse, filijs tuis: sed in sensu nulla est diuersitas, idem enim & Prophetæ, & filij ei, & sancti dici possunt.

*Inueni David seruum meum, oleo sancto meo vnxi eum.*

XX.

Explicat quis sit ille vir potens, ac dicit, se ipsum Dauidem, quem inuenit dignum, qui eligeretur, & vngeretur in Regem: & quidem de Dauide ad literam hæc exponi possunt, quem constat vinctum fuisse à Samuele. Sed etiam per Dauidem hoc loco Sanctus Augustinus intelligit Christum, quem



quem Ezechiel c. 34. & 37. expresse Dauidem nominat: de cuius vnctione legimus Psal. 44. *Vnxit te Deus, Deus tuus.* Quod autem dicitur, Deum inuenisse Dauidem, metaphorice est: non enim Deus eget inquisitione, qui omnia quantumuis occulta, vno intuitu respicit: sed dicitur quærere, & inuenire, quia non eligit casu, neque accipit obuium quemque, sed facit sine labore inquirendi, quod facere solent homines, cum post longam & maturam inquisitionem inueniunt quod optimum est, id est, eligit eum, qui dignissimus, atque aptissimus est.

XXI. *Manus enim mea auxiliabitur ei, & brachium meum confortabit eum.*

XXII. *Nihil proficiet inimicus in eo, & filius iniquitatis non apponat nocere ei.*

XXIII. *Et concidam à facie ipsius inimicos eius, & odientes eum in fugam conuertam.*

Hæc quoque de Dauidè vtrunque exponi possunt, qui Dei auxilio multas victorias de inimicis suis obtinuit: tamen longe verius exponuntur de Christo. Nam in Dauidè profecit inimicus Diabolus, eumque, decepit, eum ad crimen adulterij, atque homicidij eum perduxit: profecit quoque in eo inimicus Absalon, & circumuenit, eum eum de regno expulit, & ad fugam compulit. Sed manus & brachium Domini, quod est ipsum Dei verbum, potentia & sapientia Patris, ita corroborauit humanitatem Christi hypostatice sibi vnitam, vt nihil in eo homine proficere potuerit vllus inimicus; neque eum vllomodo decipere aut circumueire: sed contra potius omnes, qui eum oderant, à facie eius cessi & victi in fugam conuersi sint: quamuis enim Christus flagellis cæsus & Cruci affixus fuerit ab inimicis, tamen hæc passus est, quia voluit, & hæc ipsa passione Diabolum vicit, & captiuos illi eripuit, & de illo gloriosissime triumphauit. Iudæos quoque inimicos Christi, videmus hodie dispersos per orbem terrarum, quasi exercitum fuscum & fugatum.

*Et veritas mea, & misericordia mea: cum ipso, & in nomine meo exultabitur cornu eius.* XXIV.

Hæc quoque in Dauidè vix adumbrata, in Christo perfectissime impleta sunt: nam veritas, & misericordia Dei cum Christo semper perseuerauerunt, misericordia fuit assumptio humanitatis ad vnionem hypostaticam, quæ nunquam distrumpi potuit, ne per ipsam quidem mortem: veritas autem fuit, in eo quod fideliter impleuit Deus, quod Angelus promisit, Luc. 1. *Regnabit in domo Iacob in æternum, & Regni eius non erit finis.* Ex hoc autem, quod veritas, & misericordia semper cum eo perseuerauerunt: factum est, vt in nomine Dei exaltaretur cornu eius, id est, potentia eius confique, vt in nomine eius omne genu flectatur cælestium, terrestrium, & infernorum. Dicitur autem exaltari potestas Christi in nomine Dei, quia gloria eius est tanquam vnigeniti à Patre, & ab omnibus adoratur, vt Filius æterni Patris, & ipse venit in nomine Patris sui, & Deus Pater exaltauit illum; & dedit illi nomen, quod est super omne nomen. Phil. 2.

*Et ponam in mari manum eius, & in fluminibus dexteram eius.* XXV.

Ab hoc loco conueniunt fere omnes, Augustinus, Hieronymus, Theodoretus, & multi recentiorum, non posse exponi verba Psalm. nisi de Christo. vel de Dauidè per filium eius Christum, ita vt tribuatur Dauidi, quod in Christo eius filio impletum est; non enim Dauid habuit potestatem in mari, sed in terra tantum, eaq; satis angusta. Terra enim promissionis extendebatur vsque ad mare Palæstinæ, & vsque ad flumen Euphratem, & non ultra. De hoc autem nostro Rege dicitur: *ponam in mari manum eius*, id est, dabo ei potestatem, etiam in ipso mari, & in omnibus fluminibus; ac per hoc in omni orbe terrarum: mare siquidem est in sinibus terræ, circumiciens totam terram.



flumina autem sunt in medio terræ. Itaque per mare & flumina, intelliguntur omnia, fines & medietullum: quod aliis verbis dictum est in Psalmis 71: *Dominabitur à mari usque ad mare*, id est, ab vno extremo ad aliud. Possunt etiam per mare & flumina intelligi omnes populi, Gentiles & Iudæi: nam *aqua multa, populi multi*, Apocal. 17. & mare amarum & vastissimum, significat gentilitatem, quæ maximam partem generis humani tunc comprehendebat: flumina aquæ dulcis & modicæ, si comparentur ad mare, significant populum Hebraicum, qui tunc erat populus Dei electus & peculiaris.

*Ipse inuocabit me Pater meus es tu, Deus meus & susceptor salutis meæ.*

Adhuc apertius loquitur Propheta de Christo, non de se, nisi, vt diximus, hæc conueniant Dauidi ratione Christi, filij eius. Dauid enim in toto Psalterio nusquam inuocat Deum sub nomine Patris: proinde non de ipso dicitur: *Ipse inuocabit me, Pater meus es tu*. Et fortasse particulari providentia Dei factum est, vt Dauid nunquam inuocaret Deum sub nomine Patris, vt fecit Isaias & alij Prophetae, vt hic locus non acciperetur de Dauid, nisi ratione Christi. Christus enim initium verborum suorum, quæ in Euangelio leguntur, indesumpfit. *Nesciebatis quia in his, quæ Patris mei sunt, oportet me esse?* Luc. 2. sic etiam vltima verba eius fuerunt in hac vita: *Pater in manus tuas commendo spiritum meum*, Luc. 23. In toto autem progressu vitæ, frequentissime Deum appellat, sub nomine Patris: *Ipse*, inquit, *inuocabit me, Pater meus es tu*, quoad diuinitatem; *Deus meus*, quoad humanitatem; *susceptor salutis meæ*, quoad mortalitatem. In Hebræo pro voce, *susceptor*, habetur *zur*, quod petram, siue arcem, siue fortitudinem & robur significat. Itaque sensus est, Tu es susceptor salutis meæ, id est, tu suscepisti salutem meam custodiendam, vt propugnaculum, siue arx munitissima.

*Et ego primogenitum ponam illum, excelsum præ Regibus terræ.*

Hic vero apertissime de Christo Propheta loquitur: Christus enim, qui secundum diuinitatem Vnigenitus est, secundum humanitatem primogenitus est inter multos fratres. Dicitur autem primogenitus tribus rationibus: Primo, quia primus est in prædestinatione: in illo enim tanquam in capite nos prædestinauit Deus, vt dicitur ad Ephes. 1. Secundo, quia primus est in secunda generatione ad vitam immortalem, vnde dicitur primogenitus ex mortuis, Coloss. 1. & primogenitus mortuorum, Apoc. 1. Denique, quoniam ipse habuit iura primogenitorum, quem constituit Pater heredem vniuersorum, Hebr. 1. Nec solum posuit illum Pater primogenitum, sed etiam excelsum præ Regibus terræ, id est, Principem Regum terræ, & Regem Regum, vt exponit S. Ioannes in Apocal. 1. & 19. Habetur in Hebræo vox, *helion*, quod est vnum ex nominibus Dei, & significat excelsum, siue altissimum, nec facile inuenietur tributum creaturis, hoc nomen habetur in Psal. 82: *Tu solus altissimus in omni terra*, & in Psal. 90: *Qui habitat in adiutorio altissimi*. Sunt igitur omnes Reges terræ subiecti Christo, vt Regi altissimo, quo nihil altius inuenitur: At certe hæc de Dauid, vel Salomone nullo modo dici possunt, nisi ratione Christi, qui ab illis descensurus erat. Non solum enim non erant altissimi absolute, sed erant inferiores multis Regibus terræ, ac præcipue Regibus Assyriorum, qui eo tempore Monarchiam tenebant.

*In æternum seruabo illi misericordiam meam, & testamentum meum fidei ipsi.* XXVIII.

Hic iam prædicit Propheta æternitatem Regni Christi, quemadmodum antea prædixerat excellentiam: quam æternitatem non habuit Dauid neque in se, neque in Salomone, neque in aliis filiis, vel nepotibus, qui temporaliter regnarunt in Hierusalem; defecit enim Regnum illud in Ichonia. *In æternum*, inquit, *seruabo illi misericordiam meam*, id est, misericordia, qua motus promisi Dauidi filium, per quem Regnum eius



æternum esset, semper manebit: nam testamentum meum, id est, pactum & promissio facta illi per Nathan, 2. Reg. 7. fidelissime conseruabitur. Sed si de Christo sint exponenda hæc omnia verba, hic erit sensus: *In æternum seruaabo illi misericordiam meam*, id est, misericordia, qua illum prædestinaui & elegi ante sæcula, ut esset filius Dei in virtute, primogenitus, & excelsus præ Regibus terræ, semper manebit; non enim soluetur vnquam vnio hypostatica humanitatis cum verbo, ac per hoc semper erit ille homo Christus, filius Dei, primogenitus, & excelsus præ Regibus terræ. *Et testamentum meum fidele ipsi*, id est, pactum meum cum ipso de stabilendo regno eius in æternum, fideliter semper obseruabitur. Expresit hanc promissionem Angelus Gabriel, Luc. 1. cum ait: *Regni eius non erit finis.*

XXIX.

*Et ponam in sæculum sæculi semen eius, & thronum eius sicut dies cæli.*

Explicat modum, quo vellet Deus conseruare Dauidi misericordiam suam in æternum: modus autem erit, quia dabit illi semen, id est, filium Christum, qui manebit & regnabit in sæculum sæculi, ac per hoc thronus eius, id est, Regnum Dauidis nunquam finem habebit, sed tempora eius erunt sicut dies cæli, id est, sicut tempus, quo durabit cælum: quod quidem Deus ipse statuit in æternum, & in sæculum sæculi, ut dicitur in Psal. 148. S. Augustinus per, *semen*, hoc loco, intelligit filios Christi regeneratos ex aqua, & Spiritu sancto, qui post resurrectionem manebunt in Regno Dei in sæculum sæculi. Sed magis conuenit literæ, ut per semen intelligatur ipse Christus, iuxta illud Psal. 131 *Iurauit Dominus Dauid veritatem, & non frustrabitur eum, de fructu ventris tui ponam super sedem tuam.* Et in hoc Psalmo paulo infra: *Semel iurauit in sancto meo, si Dauid mentiar, semen eius in æternum manebit.*

XXX.

*Si autem dereliquerint filij eius legem meam, & in iudiciis meis non ambulauerint.*

*Si iustitias meas prophanauerint, & mandata mea non custodierint.*

*Visitabo in virga iniquitates eorum, & in verberibus peccata eorum.*

*Misericordiam autem meam non dispergam ab eo, neque nocebo in veritate mea:*

*Neque prophanabo testamentum meum, & que procedunt de labijs meis, non faciam irrita.*

Respondet obiectioni, quæ fieri potuisset, ac dicit, quod si filij Dauidis iram Domini malis suis operibus prouocauerint; ipsos quidem peccantes puniendo corripiet, non tamen irritum faciet, quod iureiurando promissit. *Si autem dereliquerint filij eius*, id est, Dauidis posterij, *legem meam*, siue iudicalem, siue cerimonialem, siue moralem, & in iudicijs meis non ambulauerint, id est, si vel solam iudicalem legem sequi noluerint, *si iustitias meas prophanauerint*, id est, si vel solam cerimonialem legem polluerint, & *mandata mea non custodierint*, id est, si vel solam moralem legem non obseruauerint, *visitabo in virga iniquitates eorum*, & in verberibus peccata eorum, id est, non relinquam eorum scelera impunita, sed castigabo paterno flagello. *Misericordiam autem meam non dispergam ab eo*, id est, non propter peccata filiorum, remouebo à patre beneficium, quod misericorditer promissi: *neque nocebo in veritate mea*, id est, neque offendam veritatem meam, quam vtique offenderem, eiq; nocerem, si irritum facerem, quod promissi. Illud, *nocere in veritate*, accipiendum est pro, *nocere veritati*. In Hebræo clarius habetur, *neq; mentiar contra veritatem meam*. *Neq; prophanabo testamentum meum*, id est, non polluem pactum meum, illud non obseruando: & *que procedunt de labijs meis, non faciam irrita*, id est, non irritabo promissa mea. Hic duo sunt obseruanda. Vnum est, per filios Dauidis, intelligi posteros Dauidis secundum carnem, si per Dauidem accipiat persona ipsa Dauidis filij Iesse, ut nos ad literam accipimus: sin autem per Dauidem



videm intelligatur Christus, vt ad literam intelligit S. Augustinus, & nos spiritualiter intelligi posse existimamus: tunc per filios Dauidis, accipiendus erit populus Christianus, qui per baptismum in Christo regeneratur. Alterum est, ex hoc loco non esse colligendum, filios Dauidis, siue Iudæi, siue Christiani sint, non posse perire in æternum, si mali sint, quemadmodum hæretici aliqui docuerunt; non enim dicit per Psalmistam Deus: *Misericordiam meam non dispergam ab eis, sed non dispergam ab eo.* Itaque si mali filij flagello paterno correpti corrigi voluerint, hæreditatem non amittent, imo in gratiam instar filij prodigi amantissime recipiuntur: sed si obstinate in malo perseverauerint, ipsi quidem ab hæreditate paterna excident, sed veritas Domini stabit, neque Regnum Christi peribit; quoniam potens est Deus, de Lapidibus suscitare filios Israël, quamquam qui præcogniti sunt, & prædestinati in Christo ante Mundi constitutionem, sine dubio ad finem vsque in fide, spe & charitate perseverabunt.

XXXV. *Semel iuravi in sancto meo, si Dauid mentiar, semen eius in æternum manebit.*

XXXVI. *Et thronus eius sicut Sol in conspectu meo, & sicut Luna perfecta in æternum, & testis in cælo fidelis.*

Reddit rationem, cur velit adimplere promissionem de stabiliendo Regno Dauidis, etiam si filij eius non adimpleant præcepta ipsius: & ratio est, quia iuravit, id est, firmissime, & sine retractatione promisit. *Semel*, inquit, *iuravi in sancto meo*, id est, irrevocabiliter & immutabiliter iuravi per sanctitatem meam. Illud, *semel*, significat immutabilitatem, quia vnicum Dei iuramentum æquivaleret innumerabilibus aliorum iuramentis. Illud, *in sancto meo*, potuisset verti, *in sanctitate mea*, sed idem est sensus: *in sancto meo*, id est, in sancto nomine meo, siue in sancto nomine meo; quod Genes. 22. dicit:

*Per memetipsum iuravi. Si Dauid mentiar:* existimant aliqui, hæc esse verba iuramenti, quasi dicat, si Dauidi mentiar, hoc aut illud mihi contingat. Sed improbable est, Deum iurare iuramento execratorio. Verius est, illud, *scilicet*, æquivalere particulæ neganti; & sensum esse, si Dauid mentiar? id est, non mentiar Dauidi; quomodo dicitur in Psalm. 132: *Iuravit Dominus Dauid veritatem, & non frustrabitur eum.* Similis locutio est apud Isaiam cap. 22: *Si dimittetur iniquitas hæc vobis, donec moriamini, dicit Dominus exercituum.* Verba iuramenti sunt quæ sequuntur: *Semen eius in æternum manebit, Et thronus eius sicut Sol, &c.* id est, Iuravi, & non mentiar Dauidi, quod filius eius Christus in æternum viuet, & Regnum quoque eius sempiternum erit. Illustrat autem hanc iuram promissionem tribus similitudinibus, Solis, Lunæ plenæ, & arcus cælestis. *Thronus*, inquit, *eius in conspectu meo in æternum manebit, sicut Sol, sicut Luna perfecta, & sicut testis in cælo fidelis:* quæ significant Regnum Christi, ac per hoc Ecclesiam eius, fore semper illustrem & perspicuam; non obscuram vel inuisibilem, vt hæretici somniant: nihil enim clarius & pulchrius Sole interdiu; nihil item clarius & pulchrius Luna plena nocturno tempore; denique nihil clarius & pulchrius in nubibus arcu cælesti, qui testis est fidelis à Deo datus hominibus, nunquam amplius fore diluvium aquarum. Per testem in cælo fidelem aliqui ipsam Lunam intelligunt: sed videtur probabilius, vt intelligatur Iris: siquidem hoc loco vox, *in cælo*, non est, *sciamaïm*, sed, *sciachak*, quod nubes aut cælum ærium propriè significat, vt perspicuum est ex illo Psalm. 17. *Tenebrosa aqua in nubibus ævis: & ex illo Deuter. 33. Magnificèntia eius discurrunt nubes.* Porro Regnum Christi in communi prosperitate lucet vt Sol in die vndique sereno: in communi persecutione fulget vt Luna plena in tenebris noctis. Vbi vero admixta est persecutioni prosperitas, similis est Iridi in nubibus. Illud, *Luna perfecta*, in Hebræo est, *iccon*, stabilietur, siue præparabitur. Ex quo intelligimus, vocem, *perfecta*, explicandam

שמים  
שחק

יבון



dam esse, ac si dictum esset, Luna stabilis, siue præparata: & siquidem agatur de stabilitate luminis, vt idem sit Luna perfecta, quod Luna plena, tunc id, quod sequitur, *in æternum*, non est coniungendum cum *Luna*, sed cum *thronus tuus*: vt sensus sit, Thronus tuus erit in conspectu meo in æternum, sicut Sol, & sicut Luna plena: & hunc sensum supra persecuti sumus; sed si agatur de stabilitate substantiæ Lunæ, quæ incorruptibilis est, tunc, *in æternum*, iungi poterit cum *Luna perfecta*, vt sensus sit, Thronus tuus erit in conspectu meo sicut Sol, & sicut Luna, quæ perfecta est quoad substantiam, & stabilis in æternum.

XXXVII. *Tu vero repulisti, & despexisti, distulisti Christum tuum.*

Hæc est altera pars Psalmi, in qua Prophetæ in persona populi captiui, orat pro adimplerione promissionis diuinæ; quamvis enim Deus firmiter, & cum iuramento promiserit, vult tamen rogari, vt faciat quod promisit: sic Isaac Genes. 25. deprecatus est Dominum pro vxore sua, eo quod esset sterilis; & tamen Genes. 20. promiserat Deus Abraham sobolem copiosam ex filio. *Multiplacabo*, inquit, *semen tuum, sicut stellas cæli*: & ibidem: *In semine tuo benedicentur omnes gentes*. Orat autem Propheta Deum, illum quodammodo admonendo, quod si tamdiu differat implere promissum, videbitur non velle seruare pactum & iuramentum suum. Itaque sensus est huius versiculi, & sequentium, Tu Domine promissisti cum iuramento filium Davidis perpetuo regnaturum; nunc autem videmus Regnum ablatum esse à filiis David, & occupatum à Rege Assyriorum: ergo, vt confirmes verbum tuum, mittere filium illum Davidis quem promissisti, & da illi Regnum sempiternum, vt iurasti, alioqui ridebunt nos inimici nostri, & in te redundabit opprobrium nostrum: *Tu vero repulisti, & despexisti*, id est, promissisti bona, nunc vero reddis mala, quia repulisti nos à protectione tua, & despexisti nos, quos magnificere videbaris. *Distulisti Christum*

*tuum*, id est, elongasti à te Regem populi tui, Iechoniam videlicet & Sedechiam, qui captiui ducti sunt in Babylonem. S. Augustinus aliter exponit, videlicet, distulisti mittere ad nos Christum tuum, illum qui perpetuo regnaturus est. Vox Hebraica, *hithabarta him mescicheca*, vertitur à S. Hieronymo & Hebræis, *iratus es cum Christo tuo*: cum qua sententia cõhæret prior expositio; *distulisti Christum tuum*, id est, elongasti Regem à fauore tuo, & à Regno suo, quod est signum iræ & indignationis in eum: tamen sententia S. Augustini, quæ est conformis Græcæ & Latinæ lectioni, potest etiam concordari cum voce Hebraica: nam eandem vocem in Psal. 77. S. Hieronymus vertit, vt hoc loco verterunt LXX. Interpretes vers. 59 alias 62. vbi nos legimus: *Audiuit Deus, & spernit*, S. Hieronymus ex Hebræo vertit: *Audiuit Deus, & distulit*. Itaque videmus eandem vocem Hebraicam, & à Septuaginta, & S. Hieronymo nunc verti, *differre*, nunc *spernere*, nunc *irasci*. Illa verba, *repulisti, & despexisti*, non necessario coniunguntur cum sequentibus, vt sit sensus, repulisti Christum tuum, despexisti Christum tuum, distulisti Christum tuum: nam in Hebraico ponitur interpunctio post verbum, *despexisti*: & ideo potest facile defendi expositio S. Augustini, qui vocem, *Christum tuum*, solum coniungit cum verbo, *distulisti*, non cum antecedentibus, *repulisti, & despexisti*, ad quæ subintelligitur, *nos*, aut, *populum tuum*, aut aliquid eiusmodi; vt sensus sit, repulisti & despexisti populum tuum; & distulisti mittere Christum tuum. Vtrique expositio bonum sensum habet.

*Euertisti testamentum serui tui, prophanasti in terra sanctuarium eius.* XXXIX.

Explicat, quomodo Deus repulerit & despexerit populum suum; ac primum dicit, Deum euertisse testamentum serui sui, id est, retractasse pactum initum cum seruo suo David: quod intelligendum est de euerfione, siue retractione, quo ad apparen-  
enim



enim, Deus non velle Regnum Davidis esse perpetuum, quia permisit occupari ciuitatem Hierusalem, & totam Palestinam à Rege Assyriorum. Sed re vera non de illo terreno Regno intelligenda erat promissio, sed de spirituali, & coelesti. *Prophanasti in terra sanctuarium eius*, id est, proiecasti in terram, & hoc modo prophanasti sacrum diadema eius, quod factum est quando cessauit Regnum Davidis, deturbatis de folio Iechonia, & Sedechia, & ablato eius Regio diademate: nam in Hebræo habetur, *nizro*, quod propriè significat diadema Regum, quod sanctum, & sacrum habebatur; in Græco est, *ἀγίασμα*, quod sanctitatem, & sanctuarium, & sanctificationem significat. Noster interpres hoc loco vertit sanctuarium, sed in Psal. 137. vertit sanctificationem. ubi apertissimè loquitur Propheta de diademate, non de templo; sic enim loquitur, *Super ipsum efflorescit sanctificatio mea*. Itaque per sanctuarium, videtur intelligenda sanctitas diadematis: Si tamen quis velit Theodoretum, & Euthymij expositionem sequi, qui per *sanctuarium prophanatum*, intelligunt templum Salomonis per Nabuchodonosor Regem euersum, & incensum; dicere poterit, ipsum templum vocatum esse diadema populi Iudaici, quoniam re vera erat illis instar coronæ gloriosissimæ, & eo maximè, tamquam insigni diademate gloriabantur.

XXIX. *Destruixisti omnes sepes eius, posuisti firmamentum eius formidinem.*

XL. *Diripuerunt eum omnes transeuntes viam, factus est opprobrium vicinis suis.*

XXXI. Comparat populum Iudaicum per Dauidem significatum, vineæ, quæ destructa sepe sit omnium transeuntium prædæ; ita enim populus ille, Deo non protegente, factus est in directionem Assyrijs non semel, sed sæpius capientibus, & spoliantibus Hierusalem. Historia nota est ex 4. libri Regum. *Destruixisti*, inquit, *omnes sepes eius*, id est, tu Deus nos auxilio, & protectione tua destituens, in causa fuisti, vt instar vineæ, destru-

ta sepe, diriperemur ab hostibus. *Posuisti firmamentum eius formidinem*, id est, fecisti vt in locum munitonis firmissimæ succederet in Davidis regno, & ciuitate, formido; erant enim antea in eo Regno fortissimi milites, sed Deo deserente facti sunt timidi, & imbelles, vt ab hostibus nullo modo resistere possent. Tribuit autem populus Deo causam horum malorum, quoniam intelligebat, sine Dei voluntate non fieri, & facillimum esse Deo, si velit, omnia impedire. *Diripuerunt eum omnes transeuntes viam*, id est, diripuerunt populum Dei hostes eius sine vlla prohibitione, quomodo diripiunt vineas omnes transeuntes per viam, quando disiectæ sunt sepes, vel maceræ, quæ aditum prohibebant. *Factus est opprobrium vicinis suis*, id est, inde factum est, vt omnes populi vicini irrideant populum Dei, qui tam imbellis factus est, vt nulli hosti resistere valeat.

*Exaltasti dexteram deprimentium eum, laetificasti omnes inimicos eius.*

*Auertisti adiutorium gladij eius, & non es auxiliatus ei in bello.*

Pergit narrare calamitates populi Dei, in quas incidit desertus ab adiutorio diuino. *Exaltasti dexteram deprimentium eum*, id est, iuisti hostes populi tui, vt facilius deprimerent populum tuum. *Exaltare*, hoc loco, significat magnificare, roborare, excelsum facere. Inde verò secuta est lætitia magna apud hostes, ob tam facilem victoriam; idè subiungit, *laetificasti omnes inimicos eius*. Contra verò *auertisti adiutorium gladij eius*, id est, auertisti adiutorium tuum à gladio eius, Regis videlicet, vel exercitus populi tui; quod clarius explicat dicens: *& non es auxiliatus ei in bello*; idè Reges Iuda resistere nequierunt Assyrijs, hostibus suis.

*Destruixisti eum ab emundatione, & sedem eius in terram collisti.*

Obscurus est hic locus, sed ex posteriore parte versiculi apparet sermonem esse de priuatione cultus Regij, qui mundissimus,

T t t & sple-

XXI.

XLII.

XLIII.



& splendidissimus esse solebat. Hebræus textus est clarior; sic enim ad litteram verti posset. *Cessante fecisti munditiam eius, & thronum eius in terram detraxisti.* Græcus autem sic verti potest, *Disso' uisti eum à munditia sua, & sedem eius in terram collidisti.* Igitur hic videtur esse sensus, Spoliasti Regem vestibus regijs & hoc modo destruxisti, & cessare fecisti munditiam eius, induens illum lordidis, & attris vestibus, & thronum Regni eius detraxisti in terram, & confregisti, ut neq; cultus, neq; thronus regius illi superesset. Alij volunt, per emundationem, intelligi templum, in quo per sacrificia mundabantur Iudæi. S. Augustinus intelligit hunc locum de emundatione cordis par fidem Christi, à quo destructi sunt Iudæi, qui in Christum credere noluerunt. Sed ad litteram probabilius est accipi emundationem pro munditia, & nitore vestium regiarum, quas cum throno reges illi amiserunt.

XLIV.

*Minorasti dies temporis eius: persudisti eum confusione.*

Hæc est vltima, & principalis calamitas, quod cum Deus promississet Dauidi Regnum perpetuum, iam videretur illam promissam æternitatem ad breuissimum tempus contraxisse: nam in Iechonia & Sedechia finitum est Regnum illud: temporale Dauidis, quod sperauerat nullum finem habiturum: ex hac autem diminutione temporis repletus est Dauid in posteris suis magna confusione. In Hebræo habetur. *Abbreniasti dies adolescentie eius.* Sed Septuaginta non videntur legisse, *aluman*, quod est adolescentie eius, ut S. Hieronym. vertit, sed, *olamau*, vnica litera transposita, quod significat seculorum eius, vbi etiam indicatur promissio seculorum, sed abbreviata postea, & contracta: qui autem legi volunt *adolescencia eius*, intelligunt per adolescentiam, tempus virentis, & florentis Regni, quasi Deus non permiserit Regnum saltem peruenire ad senectutem, sed in ipso quasi flore ætatis illud occumbere voluerit.

XLV.

*Vsquequo Domine auertes in finem? exardescet sicut ignis iratus?*

Hic iam incipit oratio pro acceleratione aduentus Messie, ut impleatur promissio iurata Dei. *Vsquequo Domine auertes in finem*, id est, quamdiu auertes te, aut faciem tuam, vsque in finem, id est, vsque ad vltimam perniciem, & consumptionem, sine spe reconciliationis? quamdiu exardescet indignatio tua, quasi ignis, qui non cessat, donec in cinerem redegerit quod cremandum suscepit. In hebræo habetur, *Vsquequod absconderis*; ex quo intelligimus illud, vsquequod auertes, require, ut subintelligatur, faciem tuam, vel te; tunc enim Deus abscondi dicitur, cum auertit à nobis faciem suam; & sic cessat nos illuminare, & calefacere lumine gratiæ suæ, quæ est vita vera animarum.

*Memorare quæ mea substantia, nunquid enim vanè constituisti omnes filios hominum.*

*Quis est homo qui viuet, & non videbit mortem? eruet animam suam de manu inferi?*

Nonnulli sic exponunt hos versiculos, ut sensus sit, Vita nostra breuissima est, & mors omnibus viuentibus imminet: proinde, nisi in vanum constituisti filios hominum, da nobis Domine solatium aliquod dum viuimus, & accelera consolationem, ne ante rapiamur à morte, quam adueniat consolatio tua. Nimis humilis videtur hæc interpretatio, & Iudaismus sapit; cum vltra præsentis vitæ bona non assurgat. S. Augustinus de Christo exponit, ut sensus sit, Memorare Domine, quod Christi natura humana, mea substantia est, & propter illam non vanè constituisti filios hominum: ille est, qui viuet, & non videbit mortem, quia ipse solus eruet animam suam de manu inferi, & resurgens à mortuis viuet, & non videbit amplius mortem. Sed hæc expositio non est literalis, nam vox, substantia, hoc loco non significat, naturam, sed tempus vitæ, siue subsistentiam: nam in Hebræo ad verbum sic legitur, *Memorare ergo quantæ temporis sim*, id est, quàm sit brevis vita mea, quàm breui tempore subsistam in vi-

uis.

עולם  
עולמי

XLVIII.



uis, cui sententiæ rectè connectitur quod sequitur, *Quis est homo qui uiuet, & non videbit mortem?* id est, nemo uiuit in terris, qui non sit moriturus: & non est diuturnum, quod finem habet. Idem repetitur, cum additur, *eruet animam suam de manu inferni* id est, quis est homo, qui non sit iturus ad locum mortuorum? quasi dicat, nemo uiuit super terram, qui possit euadere mortem, per quam descendunt corpora sub terram, & animæ ad inferos. Eo siquidem tempore nondum apertum erat cælum, quò nunc ascendunt animæ iustorum perfectorum. Existimo igitur Prophetam, qui spiritalis erat, ex breuitate uitæ humanæ, & caducitate rerum humanarum exarsisse in desiderium uitæ futuræ æternæ in cælis, ac Deum precari uoluisse, ut Messiam cito mitteret, Patrem futuri seculi, qui aperiret credentibus Regna cælorum; nisi enim, saltem pars aliqua generis humani ad uitam illam æternam & beatam per Christum perueniret: verè in vanum condidisse videretur Deus omnes filios hominum. Ait igitur, *memorare, quæ sit mea substantia*, id est, quàm breuis, quàm fragilis, quàm ærumnosa sit subsistentia mea in terris. *Nunquid enim vanè constituisti, omnes filios hominum?* id est, num constituisti, & creasti filios hominum, ut solum hanc uitam uiuerent, eamq; tam breuem, & ærumnis plenam? id enim esset frustra condidisse genus humanum, si nulla eius pars finem ultimum attingeret. *Quis est homo qui uiuet, & non videbit mortem?* id est, quod sit breuis, & ærumnosa hæc vita nostra, vel ex eo constat, quòd nemo potest mortem euadere: nemo eruet animam suam de manu inferi, inferus enim sine ulla exceptione, omnes mortales ad se trahit.

*Vbi sunt misericordia tua antiqua Domine, quas iurasti David in veritate tua?*

Hic iam apertè Deum precatur, ut impleat promissum de Rege mittendo ex semine David, qui populum suum in æternum regat. *Vbi sunt misericordia tua anti-*

*qua Domine*, id est, promissiones ex misericordia tua magna olim factæ Dauidi, quas etiam iuramento confirmasti per ipsam tuam veritatem iurans, ac dicens, *Semen eius in æternum manebit, & thronus eius, sicut dies cæli?*

*Memor esto Domine opprobrii seruorum tuorum, quod continui in sinu meo multarum gentium.*

Addit aliam rationem, cur tanto affectu postulet aduentum Messie: quoniam populi infideles exprobare non cessant populo Dei, quòd frustra sperauerit Regem æternum ex semine David. *Memor, inquit, esto Domine opprobrii seruorum tuorum*, id est, vituperationis, quam patiuntur serui tui ab infidelibus. *Quod continui in sinu meo multarum gentium*, id est, quod opprobrium ego populus tuus continui, siue portauit, ut sonat vox Hebraica, *in sinu meo multarum gentium*, id est, à multis gentibus: dicitur autem portari in sinu, siue contineri in sinu opprobrium, quando non potest excuti per manifestam responsionem. Ita populus ille tacens, & dolens ferebat opprobrium à multis gentibus sibi obiectum, quia non poterat ostendere promissionem Dei fuisse impletam, vel breui, ac certò implendam.

*Quod exprobrauerunt inimici tui Domine, quod exprobrauerunt commutationem Christi tui.*

Hoc videlicet est opprobrium, quod portabat in sinu suo; quòd inimici Domini exprobrarent populo Dei commutationem Christi sui, id est, qualem compensationem habuisset Dauid à Deo, pro tam amplis promissis, destructionem videlicet Regni sui: nam commutatio hoc loco accipitur, pro compensatione, ut Matth. 16. *Quam commutationem dabit homo pro anima sua?* nam vox Hebraica, *bikeuoth*, significat propriè calcaneum, & inde accipitur pro vestigio: nec desunt qui hic verant, vestigia Christi tui: denique significat etiam mercedem, quæ datur in compensationem, siue commutationem meriti; ac per hoc pro compensatione,

XLIX.

L.

עבדך



latione, & commutatione accipi potest. Atque hæc facillima ratio est concordandi textum Græcum cum Hebraico: qui enim vertunt, vestigia, siue itinera Christi tui, nullam rationem reddere possunt, cur Septuaginta verterint commutationem.

LI.

*Benedictus Dominus in æternum: fiat, fiat.*

Hæc Psalmi conclusio, satis apertè docet. Prophetam intellexisse, promissionem factam Davidi stabilem, & firmam fuisse, & omnino implendam tempore suo, quantumvis contrarium suadere viderentur quæ fiebant tempore Nabuchodonosor. Imò etiam eadem hæc conclusio docet, cognouisse Davidem, idèò diuinam prouidentiam effecisse, ut Regnum illud terrenum euertetur, ne putarent carnales Iudæi in Salomone, aut alio ex Regibus Iudæ, promissionem diuinam impletam fuisse. Ait igitur, *Benedictus Dominus in æternum*, id est, laus & gratiarum actio semper Domino deferatur, quoniam omnia benefacit, & iustus est in omnibus verbis suis, & sanctus in omnibus operibus suis. *Fiat, fiat.* In Hebræo, *Amen, Amen*, id est, sic est, & sic opto ut fiat, ut videlicet Dominus benedicatur in æternum. Atque hic est finis libri tertij secundum Hebræos.

## PSALMVS LXXXIX.

*Titulus, & Argumentum.*

*Oratio Moysi hominis Dei.*

**S**anctus Hieronymus in epistola ad Cyprianum constanter affirmat, hunc Psalmum cum aliis decem sequentibus à Moysse fuisse compositos: id colligit ex titulo. Sanctus tamen Augustinus hunc Psalmum exponens, constanter id negat, ea ratione, quia si hic Psalmus à Moysse compositus fuisset, haberetur in eius libris, id est, in Pentatheuco, ubi habentur alia cantica eiusdem auctoris. Adde possimus aliam rationem, quoniam in hoc Psalmo desinitur vita hominis, ut plurimum annis septuaginta, & in robustioribus, annis octoginta: at Moyses tempore plurimi-

centesimum annum transcendebant: ipse enim Moyses obiit annorum centum viginti, ut dicitur Deuter. xli. & octoginta annorum erat, quando fecit eum Dominus Ducem populi sui, & Aaron frater eius erat annorum octoginta trium antequam fieret summus Sacerdos, ut intelligi potest ex c. 7. Exodi, & tamen non est credibile electum fuisse aut Moysen Ducem populi, aut Aaronem summum Sacerdotem, homines decrepitos, & morti proximos. Itaq; ætas octoginta annorum non erat tunc extrema decrepitas, sed ætas matura, & vi-gens, atque ad res maximas gerendas aptissima. Neque probabile est, quod reliqui decem Psalmi sequentes sint compositi à Moysse, cum in Psalm. 98. fiat mentio Samuelis, qui diu post mortem Moysis natus est. Neque satisfacet huic obiectioni S. Hieronym. dicens, nomen Samuelis fuisse prophetatum à Moysse, ut lib. 3. Reg. c. 13. pradicatur nomen Iosia Regis: nam de Iosia sic loquitur Propheta, Nascetur filius domui David, Iosias nomine, &c. ubi est manifesta predictio de futuro: at in Psalm. 98. narrantur res præteritæ, his verbis, Moyses, & Aaron in sacerdotibus eius, & Samuel inter eos, qui inuocant nomen eius. Inuocabant Dominum, & ipse exaudiebat eos, custodiebant testimonia eius, &c. Non igitur hic pradicatur nomen Samuelis, quemadmodum nec Moysis, aut Aaronis, sed narrantur res ab ipsis gesta, antequam hic Psalmus scriberetur. Quare videtur nobis, titulum huius Psalmi inscribi Moysi, quod Moysen loquentem David introducat. Introducitur autem Moyses fortasse, quod ipse scripserit creationem Mundi, peccatum primorum parentum, & poenæ inde secutas. Argumentum enim huius Psalmi est oratio ad Deum pro humano genere, quod ob peccatum primorum parentum in maximas incidit calamitates, & auxilio gratia assidue indiget, cum ut arumnas huius vitæ facilius toleret, tum ut ad gaudia sempiterna perveniat.

## EXPLICATIO PSAL. LXXXIX.

**D**omine refugium factus es nobis & generatione in generationem.

Ordin-



Orditur Propheeta orationem à gratiarum actione pro acceptis beneficiis: hæc enim est Spiritus sancti vtilissima Rhetorica, vt gratum se gratiæ ostendat, qui noua beneficia petit. *Domine, inquit, refugium factus es nobis*, id est, fatemur nos multis variisq; periculis esse obnoxios: sed in nobis te protectorem & adiutorem experti sumus; idq; non semel, aut iterum, sed omni tempore per omnes generationes sibi inuicem succedentes.

Vox Hebraica, *mabon*, proprie habitatio nem significat. Itaque per refugium hoc loco, intelligitur domus bene munita & loco edito posita, ad quam qui refugiant, tutissimi sunt ab omni iniuria siue hostium, siue bestiarum, siue pluuiæ, aut ventorum. Et vere qui confugiunt ad Deum, & in eo tanquam in arce munita per Fidem, Spem & Charitatem, cogitatione assidua & iugi desiderio habitant: securissimi sunt ab omni incurfu malo, quoniam eis omnia cooperantur in bonum.

מעון

II.

*Priusquam montes fierent, aut formaretur terra & orbis: à sæculo, & vsque in sæculum tu es Deus.*

Probat eundem ipsum Deum in omni generatione & generatione refugium esse potuisse sperantibus in eum; quoniam ipse semper est, videlicet æque potens, æque sapiens, æque benignus. Vt autem ostendat, Deum esse ante omnes res creatas, in quibus homines confidere solent, primum nominat montes. *Priusquam, inquit, montes fierent.* Montes enim, cum altissimi & solidissimi sint, multis modis refugium hominibus præbent. Fortasse etiam primo loco nominat montes, quia primi apparuerunt, cum terra dis cooperiri cœpisset ab aquis, à quibus initio creationis vndique cooperiebatur: vel denique, quia montes sunt pars terræ maxime eminens & conspicua. Deinde subiungit formationem terræ, cuius partes quædam sunt montes. Sed obseruanda est proprietas vocum Hebraicarum: nam de montibus dicit, *fierent*, in Hebræo, *nascerentur, iuladu*, de terra dicitur in Hebræo, *parturiretur*,

תהלה

*theoleh*; itaque sensus est, Priusquam montes nascerentur, imo priusquam ipsa terra parturiretur. Parturitio enim natiuitatem præcedit. Addit, *& orbis*, nimirum habitabilis: hoc enim significat, *thebel*, ex quo intelligimus, per terram hoc loco intelligi terram incultam & desertam; per orbem, terram cultam & habitabilem: montes enim in vtraque parte terræ inueniuntur. Addit vltimo, *à sæculo, & vsque in sæculum tu es Deus*, id est, non solum tu es ante montes, & terram tum incultam, tum habitabilem, sed es à sæculo, id est, ab æterno, & vsque in sæculum, id est, vsq; in æternum. Nec dicit, tu eras à sæculo, & eris vsque in sæculum, sed *tu es*, vt ostendat veram æternitatem Dei, quæ est duratio sine vlla varietate & mutatione, quod in Psal. 101. dicit: *Tu autem idem ipse es, & anni tui non deficient.* Vox, *Deus*, in Græco codice non habetur, sed in Hebræo habetur, & S. Hieronymus testatur in epist. ad Suniam & Fretellam, haberi apud Septuaginta & apud alios quoque Interpretes. Videtur autem esse vocatiui casus, vt sit sensus, Tu ô Deus à sæculo, & vsque in sæculum es, & idem ipse semper es.

*Ne auertas hominem in humilitatem, & dixisti, Conuertimini filij hominum.*

III.

Hic incipit oratio, qua precatur Propheeta Deum, vt non sinat genus humanum abire in extremam vilitatem & ruinam. Videbat enim hominem per peccatum primi hominis auersum à Deo præcipientem rueri in deterius; ideo clamat: *Ne auertas hominem in humilitatem*, id est, ne sinas auerti humanum genus à lûminæ vultus tui ad vilitatem & abiectionem extremam, vt oblitum veri boni amplectatur terram & lutum sæcularium desideriorum, & per ea demergatur in interitum sempiternum. Nam vox Hebraica non significat virtutem humilitatis, sed attenuationem & miseriam. Addit rationem cur conueniat, vt Deus non sinat perire tam nobilem creaturam. Nam inquit, *tu dixisti, conuertimini filij hominum*, id est,

Tut 3

tut



tu hortatus es per Prophetas tuos externa prædicatione, & per internam quoque tuam inspirationem ad conuersionem peccatores; decet igitur, vt potenti auxilio gratiæ tuæ iuues hominem ad conuersionem, & non finas eum auerti ad extremam vilitatem. Illud, & ponitur pro, quia, cum dicitur: *Et dixisti, conuertimini filij hominum*, id est, quia tu dixisti, & inuitasti ad conuersionem; non enim vis mortem peccatorum, sed vt conuertantur & viuant. In Hebræo non habetur negatio, sed affirmatio: *Conuerteris hominem in abiectionem*. Nisi S. Hieronymus diceret LXX. Interpretes posuisse in versu superiore vocem illam, *Deus*, possemus suspicari, Septuaginta non legisse, *et*, quod est, *Deus*, sed, *et*, quod est, *ne*; & posuisse hanc vocem in principio huius versiculi: sed quoniam non audemus S. Hieronymo contradicere, existimamus vel excidisse ex codice Hebraico particulam illam negantem, quod facile fieri potuit, cum eadem litera bis repetentur: vel esse legendam literam Hebraicam cum interrogatione: *Conuerteris, vel auertes hominem in humilitatem?* quæ sententia eadem est cum illa, *Ne auertas hominem in humilitatem*.

IV. Quoniam mille anni ante oculos tuos, tanquam dies besterna, quæ præterit.

V. Et custodia in nocte, quæ pro nihilo habentur, eorum anni erunt.

Describit abiectionem generis humani post peccatum primi hominis ex breuitate vitæ comparatæ cum æternitate Dei: nam Dei æternitas sic immensa est, vt mille anni apud Deum, sint vt vnus dies, vel vna pars diei apud nos: & tamen vita nostra post peccatum, non est mille annorum, neque centum, sed vix septuaginta, aut in robustioribus octoginta. Quare vita nostra comparata cum æternitate Dei, minor est quam vnus dies, aut notabilis aliqua pars diei, proinde fere nihil est: & tamen si homo non peccasset, sine vilo fine in æternum vixisset. Sed explicemus verba: *Quoniam*, inquit, *mille anni*

*ante oculos tuos, tanquam dies besterna, quæ præterit*, id est, in vilitatem maximam conuersi sumus, quoniam tu quidem æternus es, ita vt apud te mille anni sint velut vna dies, quæ statim præterit, aut veluti custodia in nocte, id est, vna nocturna vigilia, quæ tribus horis absoluitur: hominum autem, qui ad tuam imaginem creati sunt, ac per hoc semper viuere deberent, anni tam breues erunt, vt in nihilum reputari possint: sic enim intelligimus illa verba, *quæ pro nihilo habentur, eorum anni erunt*, id est, anni hominum post peccatum erunt numerandi inter ea, quæ pro nihilo habentur, id est, breuissimi, ac pene nulli. In textu Græco habetur *ἐτι*, id est, adhuc, & sic legit Euthymius, *adhuc erunt*; sed verior lectio est *ἐτι*, id est, anni erunt: nam in Hebræo habetur, *sanim*, quod annos significat, non adhuc. Ex Hebræo sic vertit S. Hieronymus hæc vltima verba, *Percutiente te eos in somnium erunt*. Pro quos nos habemus, *quæ pro nihilo habentur, eorum anni erunt*. Et quidem de voce *somnij*, & annorum, non magna est difficultas: nam eadem vox Hebræa, si legatur, *senâ*, significat somnium, siue somnium: & sic legit S. Hieronymus, & legitur hodie in textu Hebraico, iuxta puncta Rabinorum: sed si legatur, *sanâ*, significat annum, & sic legerunt Septuaginta, & vulgatus noster Interpres. Illud autem, *Percutiente te eos*, in Hebræo est, *zeramtam*, quod ad literam reddi potest, *inundasti eos*. Sed potest etiam legi cum aliis punctis, *zirmatam*, id est, *inundatio eorum, siue fluxus eorum*: & sic legisse videntur Septuaginta, qui nomen, non verbum verterunt, *τὰ ἔσθ-δενώματα αὐτῶν*, id est, *contemptibilia ipsorum*, quod recte noster Interpres Latine reddidit, *quæ pro nihilo habentur eorum*: verterunt autem Septuaginta non tam verbum, quam sensum. Illa enim quæ fluunt & transeunt, pro nihilo habentur, quia mox euanescent. Illud pronomen, *eorum*, in Hebræo coniungitur cum nomine, *inundatio*, siue *fluxus*, non cum nomine, *anni*. Quare sensus est, inter ea quæ fluunt, & pro nihilo habentur eorum, id est, hominum, anni sunt: vel clarius anni vitæ, siue tempora vitæ computantur inter

שנים

שנה

שנה

זמנתי

זמנתי



inter eas res humanas, quæ contemptibiles sunt, quia celerrime finiuntur.

VI.

*Mane sicut herba transeat, mane floreat, & transeat: vespere decidat, induret & arescat.*

Declarat annos vitæ esse vere contemptibiles per similitudinem fœni, quod vna die oritur, viret, floret, exarefcit & perit. In Hebræo sunt verba futuri temporis, & eodem modo videntur accipienda verba Latina, vt hic sit sensus: Mane, id est, prima parte diei homo, quasi herba virens apparebit in pueritia, & non ibi sistet, sed mox transibit. Mane item in eadem prima parte diei florebit in iuuentute, & nec ibi consistet, sed mox transibit. Vespere, in altera parte eiusdem diei decidet in virilitate, flore scilicet iuuentutis cadente; indurabitur in senectute, amisso vigore virilitatis; & arefcet in morte, siccato humore vitæ: Vel, vt exponit S. Augustinus, mane virefcet, & florebit in vita, & vespere decidet in morte; indurabitur in cadauere, arefcet in puluere; & qui de puluere factus est, in suum puluerem continuo reuertetur, vt non sit aliud tempus nostrum, quam nasci & mori, incipere & finire. Væ cæcitati hominum, qui vitam vnius diei, quæ pro nihilo duci deberet, sic amant, ac si esset æterna: & vitam vere sempiternam sic contemnant, ac si esset vnius diei, & pro nihilo habenda. Neque solus Dauid hæc docet, sed ante eum S. Iob c. 14. *Homo natus de muliere breui viuens tempore, repletur multis miseriis, qui quasi flos egreditur, & conteritur, & fugit velut umbra, & nunquam in eodem statu permanet.* Et post eum Isaias c. 40. *Omnis caro fœnum, & omnis gloria eius quasi flos agri. Exsiccatum est fœnum, & cecidit flos; quia spiritus Domini sufflauit in eo.* Quod si non placeat accipere verba illa, transeat & floreat, pro transibit & florebit; oportebit ali- quid subintelligere, vt, tu Deus iussisti, vt homo sicut herba transeat & floreat, &c. Vel, Ergo homo iuxta sententiam Dei, sicut herba transeat, &c.

*Quia defecimus in ira tua, & in furore tuo turbati sumus.*

Reddit causam breuitatis vitæ nostræ, ac dicit esse iustissimam iram Dei, quam iniquitas humana succendit. *Defecimus*, inquit, *in ira tua*, id est, consumpti sumus, & mortales effecti, quoniam irritauimus iram tuam: & conturbati sumus mortis horrore & terrore, ob furorem tuum, qui securi & quieti antea vivebamus. Non est in Deo proprie furor, vel ira, vel alia perturbatio, sed metaphorice dicitur ira & furor in Deo, quando non parit peccatori, sed eum pro meritis punit.

*Posuisti iniquitates nostras in conspectu tuo: saculum nostrum in illuminatione vultus tui.*

VIII.

Dixerat causam breuitatis vitæ nostræ fuisse iram Dei: nunc dicit, causam iræ Dei fuisse iniquitates nostras. Vocat autem nostras iniquitates peccatum primorum parentum, quod nobis commune fuit, & in quo multæ fuerunt iniquitates, iuxta doctrinam S. Augustini in Enchiridio c. 45. & aliis in locis. Fuit enim in eo peccato superbia, inobedientia, infidelitas, curiositas, & alia. Fortasse etiam respicit Dauid ad iniquitates posterorum, ob quas magis contracta est breuitas humanæ vitæ: nam vsque ad diluuium vivebant homines ad nongentos annos: deinde post diluuium ad ducentos vel trecentos. Postea tempore Moysis ad centum viginti. Denique tempore Dauid ad octoginta. Ait igitur: *Posuisti iniquitates nostras in conspectu tuo*, id est, noluit parcendo abscondere peccata nostra à facie tua, sed ea ante conspectum tuum posuisti, vt ea diligenter considerares, & punires. Quod enim Deus intelligatur ignoscere, quando auertit faciem à peccatis, docet idem Propheta, cum ait in Pl. 50. *Auerte faciem tuam a peccatis meis, & omnes iniquitates meas dele.* Quod autem additur, *saculum nostrum in illuminatione vultus tui*, est repetitio eiusdem rei: nam per *saculum nostrum* intelliguntur iniquitates vitæ, siue temporis nostri, quas, ne laterent, posuit Deus.



Deus in illuminatione vultus sui, id est, luce vultus sui detexit & illuminavit, vt earum turpitudine nota esset, & iusto Dei iudicio puniretur. Vox Hebraica, *alumen*, tria significare potest, occulta nostra, adolescentiam nostram, & saeculum nostrum. Omnia enim haec deriuantur à verbo, *alam*, quod est occultare. Addit S. Hieronymus, etiam quartum, videlicet negligentias nostras: sed omnia in idem recidunt. Nam multa sunt propria peccata cordis, vel etiam omnia peccata, quatenus à corde exeunt: & huic voci aptissime respondet illud: *In illuminatione vultus tui*: nam qui male agit, odit lucem; sed Deus luce sua omnia detegit. Vnde dicit Apostolus 1. Cor. 4. *Illuminabit abscondita tenebrarum, & manifestabit consilia cordium*. Per adolescentiam, intelliguntur peccata adolescentie, id est, primum peccatum Adami, quod factum est in prima adolescentia generis humani. Denique per saeculum nostrum (vt diximus) significantur peccata temporis nostri

IX. *Quoniam omnes dies nostri defecerunt: & in ira tua defecimus.*

Quod Deus viderit & condemnauerit peccata nostra, poena ipsa mortis nobis inflicta demonstrat. *Quoniam omnes dies nostri defecerunt*, id est, omnes dies nostri abierunt, vt nulli iam supersint. *Et in ira tua defecimus*, id est, non solum dies nostri abierunt, sed & nos cum illis consumpti sumus. Nam si Adam non peccasset, dies quidem praeteriissent, sed nunquam fluere cessassent, neque nos cum illis defecissemus: at nunc dies nostri ita fluunt, vt finem accipiant, morte illorum cursum interruptente, & nos ipsi cum illis finem viuendi accipimus, & consumimur, ira Domini peccatum illud iustissime puniente.

X. *Anni nostri sicut aranea meditantur: dies annorum nostrorum in ipsis septuaginta anni.*

XI. *Si autem in potentatibus, octoginta anni, & amplius eorum labor & dolor.*

Dixit, mortem esse poenam peccati: nunc addit, vitam ipsam, quam agimus ante mortem esse miseram & breuem; iuxta illud Patriarchae Iacob, Genes. cap. 47. *Dies peregrinationis meae, anni centum triginta sunt, parui & mali*. De miseria dicit: *Anni nostri sicut aranea meditantur*. In Hebraeo solum habetur: *Anni nostri sicut meditatio*, id est, anni nostri nihil sunt, nisi quaedam continua exercitatio, & laboriosa meditatio. Sed LXX. Interpretes, vt clarius rem explicarent, addiderunt, *sicut aranea, & pro, meditatio*, posuerunt, *meditantur*; & sensus est: Anni nostri, id est, tempus vitae nostrae exercebitur vanis laboribus, & doloribus, timoribus, suspicionibus in temporalibus bonis procurandis, & temporalibus malis cauendis, sicut aranea exerceatur in texendis retibus omni re fragilioribus, non sine propria substantiae consumptione. Transiit postea à miseria ad breuitatem, dicens: *Dies annorum nostrorum in ipsis septuaginta anni*, id est, tempus vitae nostrae in seipso conclusum & definitum, non transcendit ultra septuaginta annos: & in robustioribus vsque ad octoginta: & si quid ultra sit, erit labor & dolor, aetas videlicet infirma, & variis malis & arumnis obnoxia. Hic aliqua notanda sunt. Primum illud, *in ipsis*, obscurum est propter phrasim propriam linguae Hebraicae, quae interdum ponit casum nominandi, cui nullum verbum respondet, vt in Psal. 10. *Dominus, in caelo sedes eius*: nos diceremus: Dominus in caelo sedem habet: vel, Domini sedes in caelo est: sic etiam in Psal. 17. *Deus, impolluta via eius*: nos diceremus: Dei impolluta via est. Sic igitur hoc loco nos dicemus: *Dies annorum nostrorum septuaginta anni sunt*: Vel, in diebus annorum nostrorum septuaginta anni. Itaque absolute legendum est: *Dies annorum nostrorum*, & postea subiungendum, *in ipsis*, diebus videlicet annorum nostrorum, *septuaginta anni* numerantur. Vel dicendum est, illud, *in ipsis*, redundare, vt in Psal. 121. redundat pronomen, *eius*, cum dicitur: *Cuius participatio eius in idipsum*. Secundo illud, *in poten-*



**כחכ** **רוח** potentatibus, in Hebræo est, *bigburoth*, in fortitudine sue robore, id est, in homine robusto: in Græco est, *Av Svasias* quod significare posset in principatibus, siue Imperijs; sed hoc loco ista significatio, non facit ad propositum: non enim Principes diutius viuunt, quam alij: quin potius contra scriptum est in Ecclesiastico cap. 10. *Omnis potentatus brevis vita*. Ergo hoc loco vox illa, significat vim, & potentiam complexionis, & sic exponunt omnes Interpretes. Tertio illud, & *amplius eorum*, communiter exponitur, ut nos diximus, de vita, quæ producitur ultra annos octoginta: quidam tamen minus probabiliter intelligunt, quod potissima pars vitæ intra ipsos septuaginta, vel octoginta annos sit labor, & dolor. Prior expositio est Hieronymi, Augustini, Theodoret, & aliorum grauium auctorum. Quarto, S. August. videtur subdubitare, an ad litteram hic locus intelligi debeat de vita contracta ad septuaginta, vel octoginta annos, tum quia multi robusti inueniuntur ultra annum octogesium, & plurimi valde infirmi, ante annum septuagesimum: tū quia ante diluuium vivebant homines vsque ad annos nongentos; & tamen illi grauissime peccarunt in Deum, & propter ipsos potissimum contrahi debuit humanæ vitæ tempus. Cæterum communis sententia Hieronymi, Theodoret, Euthymij, & recentiorum est, quod ad litteram hic definitur vita hominis septuaginta, vel octoginta annis, quæ utcumque longa est, si comparatur ad vitam multarum bestiarum; tamen breuissima, si ad æternitatem conferatur. Neq; mirum est, aliquos ultra annum octogesimum robustos inueniri: nam, & paucissimi sunt, & omnis regula patitur exceptionem. Multo minus est mirum, quod aliqui reperiantur infirmi ante annum septuagesimum: nam etiam ante annum quadragesimum, & trigessimum ob complexionis vitium plurimi reperiuntur imbecilli. Propheta vero loquitur de solo vitio ætatis, & dicit secundum communem, & ordinarium cursum homines vivere consueuisse integris viribus, & sensibus vsque ad annum septuagesimum,

vel octogesimum. Tempore S. Augustini credibile est communem, & ordinarium vitæ robustæ cursum fuisse paulo breuiorem: nunc vero experimur communem, & ordinarium cursum vitæ robustæ, & integræ ad quinquagesimum annum, & in robustioribus ad sexagesimum pertinere. & ex eo tempore laborem, & dolorem; quamuis non desint hoc etiam tempore pauci quidam satis vegeti, & robusti annorum septuaginta, vel octoginta, vel etiam nonaginta. Quod autem ante diluuium proxime post diluuium homines diutissime vixerint, factum est ex prouidentia Dei, ut genus humanum facilius propagaretur, quemadmodum postea pertinuit ad prouidentiam Dei, ut contraheret tempus humanæ vitæ, tum quia æquum est, ut sicut multiplicatur peccata, sic contrahatur tempus vitæ: tum etiam quia si propagato humano genere adhuc homines diutissime viverent; mundus eos non caperet.

*Quoniam superuenit mansuetudo, & corripiemur.*

XII.

Ex ærumna senectutis hoc boni consequimur, ut deposita superbia & fastu iuuenili humiliemur, & mansuescamus conscij propriæ infirmitatis, & miseræ, & corripiamur, id est, erudiamur ad subiectionem sub potenti manu Dei. Illud, *quoniam*, accipitur hoc loco pro, *veruntamen*, aut, *certe*: non enim apud Hebræos, *chi*, semper est particula causalis. Ait igitur David, *Veruntamen*, ex labore, & dolore senectutis *superuenit in nos mansuetudo*, humilitas, & modestia; & inde corripiemur, & discemus subiecti esse Deo, & id parum temporis, quod superest, in eius timore, & amore consumere. Aliqui per mansuetudinem intelligunt, mansuetudinem Dei, quia nos in senectute, laboribus, & doloribus clementer erudit. Sed prior expositio videtur anteposenda, cum in sequenti versiculo dicatur, *Quis nouit potestatem iræ tuæ, & præ timore tuo iram dinumerare?* non enim recte coniunguntur mansuetudo, & ira: In Hebræo, ut nunc se habet, longe alius est sensus: sic enim ad verbum legitur, *Quo-*

Vuu *niam*



niam confio celeriter, & auolabimus; & sen-  
sum esse voluit, quod senes, ac praesertim  
decrepiti facillime extinguuntur, quomodo  
foenum aridum facile demetur, & auolat.  
Miratur S. Hieronymus in epist. ad Cypria-  
num, quid legerint in codicibus Hebraicis  
Septuaginta Interpretes, vt vertere potue-  
rint, Quoniam superuenit mansuetudo & cor-  
ripiemur. Sed aliquid eos legisse quod recte  
in eam sententiam verti posset, dubitate non  
debemus, cum viri doctissimi, & fidelissimi  
essent, & cum eis consentiant Theodotio, &  
secta editio, eodem S. Hier. teste.

XIII.

Quis nouit potestatem ira tua: & pra  
timore tuo iram tuam dinumerare?

Ex grauitate poenae redditae peccato pri-  
mi hominis, colligit Propheta, magnam val-  
de esse iram, & seueritatem Dei aduersus  
peccata; sed poetico more, & eleganti meta-  
phora ita magnitudinem irae diuinae descri-  
bit, Quis nouit potestatem ira tua, id est, quis  
cogitando poterit assequi quanta sit vis, po-  
tentia, & efficacia irae tuae Domine? & pra  
timore tuo iram tuam dinumerare, id est, &  
quis poterit te tantum timere, quantum ti-  
mendus es, & iuxta hunc timorem mensu-  
rare magnitudinem irae tuae, vel omnes eius  
puniendi modos enumerare? Nam ex eo  
quod propter unum peccatum primi paren-  
tis Deus iratus est vniuerso humano gene-  
ri, & omnes homines ad vitam laboribus, &  
doloribus plenam, & postea ad mortem  
damnauit, ac voluit, vt omnes homines post  
multas & rumas in puluerem suum rediret:  
certe recte colligitur, immensam esse indi-  
gnationem diuinam contra peccatum, & in-  
finitos esse in ipsa diuina indignatione mo-  
dos puniendi peccatores. Ac si ex morte ista  
corporis recte colligitur magnitudo irae di-  
uinae contra peccatum: quanto magis col-  
ligi deberet ex eo, quod animas & corpora  
iniquorum post diem iudicii mittet Deus in  
ignem inextinguibilem, & sempiternum; id  
enim omnem humanam intelligentiam lon-  
ge superat. In Hebraeo illud, dinumerare,  
coniungitur cum versiculo sequenti: sed nos  
non sequimur interpunctionem Rabino-

rum recentiorum, sed Septuaginta interpre-  
tum antiquissimorum. Illud, pra timore tuo,  
aliqui ita exponunt. Quis impeditus timo-  
re, & terrore tuo poteris mensurare iram  
tuam? Sed prima expositio videtur melior:  
quoniam propositum Prophetae est osten-  
dere magnitudinem irae Dei; non autem osten-  
ditur ex eo quod aliquis perturbatus timo-  
re, non potest in eam intendere aciem men-  
tis; sed ex eo, quod homo valde timet, & ex  
magno timore colligit magnitudinem irae.  
Itaq; illud, pra timore, accipiendum est pro,  
à timore, vel, propter timorem, vel secundum,  
aut, iuxta timorem, vt clarius habetur in  
Hebraeo.

Dexteram tuam sic notam fac & eru-  
ditos corde in sapientia.

XIV.

Ab hoc versiculo vsq; ad finem orat Pro-  
pheta pro genere humano, vt sicut illud  
Deus iuste puniuit poena mortalitatis, ita  
misericorditer respicere, & adiuuare digne-  
tur in huius vitae mortalis peregrinatione.  
Dexteram tuam sic notam fac, id est, fac Deus,  
vt iam tandem innotescat nobis dextera tua,  
qua nos suscipias, & sustentas, & qua mune-  
ra gratiae tuae nobis abundanter tribuas. For-  
tasse etiam per dexteram significatur Chri-  
stus, quem Propheta promissum sciebat, &  
vt cito veniret, assidue precabatur. Et eru-  
ditos corde in sapientia, id est, & simul notos  
fac nobis homines eruditos corde in sapien-  
tia, i. Prophetas & Apostolos, qui habebant  
cor vera sapientia eruditum, nō vt sapientes  
huius mundi, qui vel habent linguam erudi-  
tam, non cor, vel si cor eruditum gerunt, non  
sapientia diuina, & salutari, sed sapientia  
humana, & perniciosa, qua inflat, non adifi-  
cat. In Hebraeo, vt nunc legitur, sic habetur,  
Dies nostros sic notos fac, & veniemus corda  
sapienti. Sed facile est videre quid legerint  
Septuaginta Interpretes: nam non legerunt,  
iamemus dies nostros, sed, iaminecha, dextera  
tuā: nec legerūt, nabi, veniemus, sed, nebiim,  
Prophetas: tamen sensus, qui ex Hebraeo  
colligitur, nō est contemnendus; rogat enim  
Prophetas: vt notos faciat nobis Deus dies  
nostros, id est, faciat vt intelligamus breuita-  
tem.

מינו  
ימינו  
נביא  
נביא



tem dierum vitæ nostræ, & non ipsi nos saluamus iudicantes diuturnum, id est, quod est breuissimum; nam si hoc intelleximus veniemus ad Deum corde sapienti, & inquiremus bona futura, quæ sunt æterna, & contemnemus præsentia, quæ sunt breuissima.

XV. *Conuertere Domine vsquequo, & deprecabilis esto super seruos tuos.*

Idipsum petit, sed oratione magis generali. *Conuertere Domine vsquequo*, id est, tu Domine auertisti à nobis faciem tuam, iratus nobis propter peccata nostra; sed aliquando tandem placatus conuertere ad nos, & respice nos oculo benignitatis tuæ. *& deprecabilis esto super seruos tuos*, id est, exorabilis esto, sine te exorari à seruis tuis, quos ipse formasti, & alis, ac sustentas in obsequium tuum. Illud, *vsquequo*, possit accipi separatim, & cum interrogatione hoc modo, *Conuertere Domine, vsquequo non conuerteris?* Sed nulla est distinctio in textu Hebræo, vel Græco, vel Latino inter conuertere, & vsquequo: ideo præstat illud, *vsquequo*, accipere pro, aliquando, vt supra diximus.

XVI. *Repleti sumus mane misericordia tua, exultauimus, & delectati sumus omnibus diebus nostris.*

XVII. *Latati sumus pro diebus, quibus nos humiliasti, annis quibus vidimus mala.*

Hi duo versiculi possunt ex Hebræo verti per tempus præteritum, vt verterunt Septuaginta Interpretes: possunt etiā verti partim per modum imperandi, seu deprecandi, partim per tempus futurum, vt vertit S. Hieron. qui sic habet, *Imple nos matutina misericordia tua, & laudabimus, & latabimur in cunctis diebus nostris: latifica nos pro diebus, quibus afflixisti nos, & annis quibus vidimus mala.* Sed cum vertuntur per tempus præteritum, vel subintelligendum est aliquid, in hunc sensum, *Conuertere Domine aliquando, & deprecabilis esto super seruos tuos, vt aliquando dicere possimus, Repleti sumus mane misericordia tua, &c.* vel certe, vt explicat S. Augustinus, Propheta prænunciat res futuras per verba temporis præteriti pro-

pter certitudinem prædictionis. Itaque versiculi isti non ad tempus vitæ, sed ad tempus patriæ pertinent: tunc enim dicemus, *Repleti sumus mane misericordia tua*, id est, initio veræ illius diæ, quo Solem iustitiæ aspicere cepimus sine ullius nubis interpositione; & nocte, ac tenebris huius vitæ recedentibus, repleti sumus magna illa misericordia tua, quæ nullum locum miseriæ relinquit, de qua scriptum est in Psal. 132. *Qui coronat te in misericordia, & miserationibus, qui faciat omnes languores tuos, qui replet in bonis desiderium tuum: ideo exultauimus, & delectati sumus*, hoc enim solum restat hominibus beatis, & liberatis à malis omnibus, vt exultent laudantes Deum, & delectentur frucentes Deo. Nec solum latati sumus ob tantum cumulum bonorum, sed etiam *latati sumus pro diebus, quibus nos humiliasti, & pro annis quibus passi sumus mala*: tum quia dulciora sunt bona post experientiam malorum; tum etiam quia patientia in malis hæc nobis tanta bona promeruit, iuxta illud Apost. 2. Cor. 4. *Quod momentaneum est, & leue tribulationis nostra, supra modum in sublimitate æternæ gloriæ ponderatur in nobis.* Itaque nunc benedicimus dies illos, & annos, qui nobis materiam patiendi præbuerunt, & Deo gratias agimus, qui nobis in tempore non pepercit, vt patet etiam æternum.

*Respice in seruos tuos, & in opera tua, & dirige filios eorum.*

Posteaquam petiuit summum bonum, quod est finis vltimus humane naturæ, & omnium actionum nostrarum: nunc petit media, id est, gratiam bene operandi. Primum enim, iuxta præceptum Domini, Matth. 5. *quarendum est regnum Dei*, d. inde, iustitiam eius. Ait igitur, *Respice in seruos tuos*, id est, illumina seruos tuos, atque accende ad amorem tuum. Deus enim Sol est increatus, qui respiciendo illuminat, & calefacit. item, *Respice in seruos tuos*, id est, oculo beneuolentiæ, & fauoris tui respice illos, vt tuos, dirige, protege, auge, & in opera tua, id est, in opera bona, quæ tu operari cepisti in illis. Omnia enim bona opera nostra dicitur

XVIII.



Deus operari in nobis, quia ipso excitante & adiuuante fiunt, & sine illius gratia praueniente, & comitante nulla essent. Nec solum seruos tuos, sed etiam *filios eorum*, siue naturales, siue spirituales respice, & dirige, vt parentes cum filiis, te dirigente, in via mandatorum perseuerent, & ad patriam pertingere mereantur æternam. In Hebræo legitur paulo aliter, videlicet, *Appareat ad seruos tuos opus tuum, & gloria tua super filios eorum*: sed Septuaginta non legerunt, *irach*, *ראה* appareat, siue videatur, sed, *reeb*, dempta, prima litera, quod significat, *vide*, siue *respiice*: deinde explicandi gratia addiderunt coniunctionem, & verterunt, *Respice in seruos tuos, & in opera tua*: quamuis enim in Hebraico sit, *opus tuum*, licuit tamen interpretibus id exprimere numero multitudinis. Illud autem, *& gloria tua*, Hebraice, *hada-rech*, legerunt Septuaginta, *hadrech*, solis punctis mutatis, quod est, *dirige*, à verbo *darac*. Itaque lectio Græca non dissidet ab Hebraica, quam habuerunt Septuaginta Interpretes. Sed & ipsa lectio Hebraica, quam sequitur S. Hieronymus, bonum sensum habet, *Appareat opus tuum super seruos tuos*, id est, operare in seruis tuis per gratiam tuam opera bona, & sic manifeste operare, vt etiam alij videant opera eorum bona, & glorificent te Patrem eorum, qui in cælis es, & qui opera bona operatis in eis, & gloria tua similiter appareat super filios eorum, vt etiam in illis opereris opera bona, & per illos nomen tuum glorificetur.

XIX.

Et sit splendor Domini Dei nostri super nos, & opera manuum nostrarum dirige super nos: & opus manuum nostrarum dirige

Id ipsum petit alijs verbis, vt ostendat se valde optare, quod petit. Quod enim dixit, *Respice in seruos tuos*; repetit nunc dicens, *Et sit splendor Domini Dei nostri super nos*. Deus enim, vt diximus, respiciendo illuminat; auertendo faciem in tenebris nos relinquit. Quod autem dixit, *Et in opera tua*, nimirum respice; nunc repetit dicens, *Et opera manuum nostrarum dirige super nos*, id est, tu

presidens nobis fac, vt recte operemur, & regulam recti issimam, quæ est lex tua, & voluntas tua, semper sequamur. Addit. *Et opus manuum nostrarum dirige*, vt ostendat omnia opera reuocari ad vnum opus, quod est radix omnium, & in quo continentur omnia: hoc autem est opus charitatis: nam qui diligit, legem impleuit, Rom. 13. Et charitas patiens est, benigna est, &c. 1. Cor. 13. In Hebræo pro voce, splendor, est, *nabham*, quod significat decorem, & dulcedinem: sed decor, & splendor in idem recidunt: & recte Septuaginta verterunt, *sit splendor*, quoniam decor lucis splendor est. Deus autem lux est, & tenebra in eo non sunt vlla, 1. Ioan. 1. & Pater luxum est, Iacobi 1. Item pro verbo, *dirige*, est in Hebræo, *conena*, quod non solum dirigere, sed etiam stabilire significat. Itaque sensus erit, opus manuum nostrarum perseueranter dirige, vt non solum directio in bonis operibus, sed etiam perseuerantia postuletur.

## PSALMVS XC.

Titulus, &amp; Argumentum, Psalmi.

Laus Cantici David.

Hic Titulus non habetur in codice Hebraico, neque in omnibus codicibus Græcis, & S. Hilarius in Prologo Psalmorum, S. Hieronymus, & Theodoretus, & Euthymius in Commentario huius Psalmi disertis verbis dicunt, eum carere titulo. S. Ioannes Chrysostomus, & S. Augustinus nullam tituli mentionem faciunt. Quare credibile est titulum fuisse postea additum, vt intelligeremus, hunc Psalmum à Davide fuisse compositum, non à Moysse, vt Hilarius, & quidam alij tradiderunt. Et certe ratio, qua nonnulli adducti sunt, vt existimarent, hunc Psalmum non Davidis esse, sed Moysis, infirma omnino est. Dicunt, enim Psalmos qui cæcedens: Psalmum autem præcedentem esse Moysis, probant ex titulo illo, Oratio Moysis homi-



hominis Dei. At nos in explicatione Psalmi superioris ostendimus, Psalmum illum inscribi Moysi, non quod ille fuerit auctor, sed quod David Moysen loquentem introduxerit: *rationem adduximus, cur probabile non sit, Psalmos, qui carent titulo, eius auctoris esse, cuius nomen inuenitur in Psalmo precedente.* Argumentum Psalmi est cohortatio ad fiduciam in Dei auxilio firmissime collocandam. Id enim in principio ponitur, & per totum Psalmum variis rationibus confirmatur. Forma Psalmi est dramatica: nunc enim loquitur Propheta, nunc homo iustus, nunc ipse Deus. Psalmus est plenus metaphoris, & ideo non minus elegans, quam difficilis. Quam vero sit utilis, & ad mores formandos accommodatus, vel ex eo cognosci potest, quod ex vetusto Ecclesie instituto, quotidie in diuino officio frequentatur; idque ad initium noctis, ut Deo protegente nocturna pericula, hoc armati clypeo, propulsemus.

EXPLICATIO PSALMI XC.

**Q**ui habitat in adiutorio Altissimi, in protectione Dei celi commorabitur.

Hoc primo versiculo continetur insignis promissio, per quam Spiritus sanctus ceitos nos reddit, auxilium diuinum nunquam defuturum iis, qui verè spem suam in Deo positam habent. Sed verba singula explicemus: *Qui*, hæc prima vox significat promissionem esse generalem; quasi dicat Propheta: Quicumque sit, siue diues, siue pauper, siue doctus, siue indoctus, siue patricius, siue plebeius, siue iuuenis, siue senex; non enim Deus personam accipit, sed diues est in omnes, qui inuocant illum: *Habitat*, hoc significat promissionem hanc tam liberalem non requirere quamlibet fiduciam, sed assiduam, constantem, firmam, ita ut homo per fidem & fiduciam faciat sibi quasi domum in Deo, in quo habitet & quiescat; & eam quocunque ierit, circumferat, quo modo testudines faciunt. Vox Hebræa, *iaschab*, habet aliquid maioris energię, quam verbum; *habitat*, si-

gnificat enim etiam sedere, quiescere, durare; itaque sensus erit, *Qui habitat cum quiete & perseverantia. In adiutorio*, vox Hebræa, *beseiher*, proprie significat, *in abscondito*, siue in loco secreto: sed LXX. Interpretes explicauerunt metaphoram, cum dixerunt, *in adiutorio*, adiutorium enim Dei non est visibilis aliqua turris, sed arx inuisibilis & secretissima, quæ sola fide inuenitur & penetratur. Vocabulum tamen Græcum & Latinum admonet, confidendum quidem firmissime esse in Deo, sed non esse negligenda ea, quæ studio & labore humano adhiberi possunt: exemplo nobis esse possunt agricolæ, qui sperant in eo, qui dat pluias de cælo, & Solem suum oriri facit: sed interim laborant arando, serendo, metendo, quia sciunt eos adiuari, qui aliquid cooperando faciunt. *Altissimi*. Multa sunt nomina Dei, sed nomen *Altissimi*, hoc loco aptissime ponitur, nam quia Deus est altissimus, id est, in altissimo loco sedet, ideo omnia videt, & nullum nostrum periculum eum latet. Rursum, quia non solum est altissimus, quia omnia speculatur, sed etiam quia in altissimo throno sedet, & omnia subiecta habet, ideo potest ab omnibus periculis nos eruere. *In protectione Dei celi commorabitur*: hæc est altera pars versiculi, in qua promittitur merces confidentibus in Deo: & sensus est, qui vere confidit in auxilio diuino, spe sua non frustrabitur, sed omnino à Domino protegetur. Erpulchre respondent verba singula singulis; verbo, *habitat*, respondet, *commorabitur*, verbo, *in adiutorio*, respondet, *in protectione*, verbo, *Altissimi*, respondet, *Dei celi*: sed singula consideremus. *In protectione*, vox Hebræa, *beseiher*, proprie significat, *in vmbra*, siue in *vmbaculo*, vt S. Hieronymus vertit. LXX. Interpretes explicare voluerunt metaphoram, & ideo verterunt: *In protectione*. Deus enim, sub vmbra alarum suarum instat. Aquilæ, vel Gallinæ protegit confidentes in se, potest etiam vmbra significare gratiam & fauorem Principum, quæ vmbra facillime & longissime protegit, vt etiam certus quidam vbique securus libere vagaretur, quia scriptum gerebat ad collum, *Cæsaris sum*, noli me



*me tangere* : sic veri ferti Dei vbique tuti  
sunt, inter leones, vrsos, serpentes, ignes, a-  
quas, fulmina, tempestates ; quoniam o-  
mnes creaturae umbram Dei cognoscunt &  
reuerentur. Sed etiam vox Latina, *protectio*,  
hoc loco valde ad rem facit, *protectio* enim  
est procul tegere : potest autem homo pro-  
cul regi duobus modis, si vel protector pro-  
pe aditans sagittas procul venientes repellat;  
vel si protector quidem procul absit, sed ta-  
men repellat tela vicina, ut gladios, vel pu-  
giones. Vtrumque facit Deus, ipse enim  
manens in nobis repellit sagittas longissime  
venientes, videt enim prima initia periculo-  
rum, & ea, si vult, mirabili virtute in ipso pri-  
mo exortu extinguit : sic etiam ipse in caelo  
sedens pericula nobis quantumvis proxima  
remouet, habet enim oculos acutissimos, &  
manus longissimas, ut omnia mala nobis  
imminentia praeuenire possit, oculus eius in-  
telligentia eius, manus eius potentia eius,  
& potentia eius voluntas eius. Dei caeli,  
S. Hieronymus vertit, *omnipotentia*, sed vox  
Hebraica, *saddai*, non solum omnipoten-  
tem, sed sibi sufficientem, id est, in se, & per  
se omnipotentem significat : nam & Aposto-  
lus se omnipotentem esse dixit, sed in Deo,  
non in se. *Omnia*, inquit, *possum in eo, qui me*  
*confortat*, Philip. 4. LXX. Interpretes ver-  
terunt, *Dei caeli*, quia nullus est sibi suffi-  
ciens, nullo egens, & per se, atque in se o-  
mnipotens, nisi Deus verus, qui caelum ex  
nihil fecit : *Dij gentium damonia, Deus au-*  
*tem caelos fecit*, Psal. 95. Et quamvis etiam  
terra, & mare, & aer sint opera Dei magna &  
mirabilia : tamen nihil est in rebus corpora-  
libus maius & mirabilius caelo, siue molem,  
siue pulchritudinem, siue efficaciam, siue  
velocitatem, siue stabilitatem consideres.  
Quare idem Propheta de caelis singulariter  
dixit : *Caeli enarrant gloriam Dei*, Psal. 18.  
*Commorabitur*, hoc significat, confidentem  
in Deo, non semel, aut iterum, sed assidue  
protegendum à Deo, erit enim ei protectio  
Dei non tugurium in via, sed quasi domus  
paterna, ac propria. In Hebraeo est, *ithlman*,  
id est, pernoctabit, quia videlicet protectio  
nobis necessaria est in nocte, ac tenebris hu-

ius vite, non autem in caelesti patria, vbi nox  
nulla est, sed perpetuus dies, ut dicitur in A-  
pocal. c. 21. Hic admirari cogimur insipientem  
hominum, qui tantam promissionem  
tam paruifaciunt, certe enim Principes terrae  
multa insumunt in custodes corporis sui, aut  
arcium suarum : & tamen ab eis saepe pro-  
duntur. At nunc non homo mendax & fragi-  
lis, sed Deus omnipotens & verax dicit : *Con-*  
*sidera, & protegam* : & vix inuenitur, qui sicut  
oportet, illi se credere velit.

*Dicit Domino, susceptor meus es tu,*  
*& refugium meum, Deus meus, sperabo*  
*in eum.*

Explicat & probat Propheta propositio-  
nem suam testimonio iusti confidentis in  
Deum, qui de experimento suo testatur.  
*Dicit*, inquit, *Domino*, id est, gratias agens  
iustus, qui habitat in adiutorio Altissimi,  
confitebitur Domino beneficium protectio-  
nis acceptum. In Hebraeo est, *omar*, quod  
significat, *dicam*, sed S. Hieronymus vertit,  
*dicens*, videtur enim legisse, *omer*. LXX.  
Interpretes verterunt, *dicent*, quia lege-  
runt, *amar*, & acceperunt praeteritum pro  
futuro : sensus semper est idem : siue lega-  
mus, *dicam ego in persona omnium iusto-*  
*rum*, siue *dicens iustus*, siue *dicat iustus Do-*  
*mino*, absolute vocat Deum, Dominum,  
quia vere ac proprie solus Deus, Dominus  
est : tum, quia non habet superiorem, neque  
patrem, tum quia nulli necessitati seruit, cum  
nulla re indigeat, tum quia omnia seruiunt  
illi ad nutum, sine quo neque esse, neque  
moueri possunt ; tum denique quia solus  
potest res omnes mutare, destruere, repa-  
rare pro arbitrio. *Susceptor meus es tu*, ex  
Hebraeo S. Hieronymus vertit, *spes mea*. Et  
quidem vox Hebraica, *machse*, potest qui-  
dem significare, *spes mea*, sed potest etiam  
significare, *susceptor meus*, nam verbum,  
*chasa*, unde est illud nomen, significat spe-  
rare, & etiam recipere se in aliquem locum  
tutum, denique Septuaginta viri doctissimi  
non ignorabant vim huius vocis, & viden-  
tus

תלון

אמר

אמר

אמר

צורה

מחסי

חסה



tur tria ista vocabula, *susceptor meus, refugium meum, & deus meus*, continere tria beneficia Dei, pro quibus iustus gratias agit, vnum prateritum, alterum praesens, tertium futurum. Primum ergo beneficium est ineffabilis misericordia Dei, qua suscipit hominem iam lapsum in lethale peccatum, & ad gehennam fuentem, de quo dicitur in Psal. 117. *Impulsus euersus sum, ut caderem, & Dominus suscepit me*, sic enim hunc locum exponit S. Bernardus serm. 2. in Psal. 90. Signum huius susceptionis est, quando qui ceciderat, resurgit humilior, & fortior, & cautior, ut David, ut Petrus, ut Magdalena. Hoc primum beneficium commemorat homo iustus, & confidens in Deo, non quod oriatur ex fiducia (præcedit enim fiduciam, non sequitur) sed quia dicit apud se: Si tam bonus est Deus, ut suscipiat inimicum non confidentem, etq; poenitentiam & confidentiam inspiret, quam bonus & fidelis erit erga amicum & filium confidentem? Alterum beneficium est praesens, & continetur in illo verbo: *Et refugium meum*. Deus enim quem suscipit per gratiam iustificacionis, non statim assumit in celum, ubi nulla sunt pericula; sed constituit in acie præliantium militum suorum: sed si confidat in Domino, Dominus illi refugium erit in omni tentatione, & refugium optimum atque firmissimum, vox enim Hebraea, *mazura*, quæ hoc loco habetur, significat *munitiōem*, siue *arcem munitam*. Tertium beneficium est futurum & maximum, & significatur in illis verbis: *Et deus meus*; Deus enim est summum bonum: & quidem Deus semper in se est Deus, ac per hoc summum bonum: sed nobis tunc proprie erit Deus, quando *videbimus eum sicute est*, tunc enim summo bono fruemur. Iustus igitur, quia cogitat, & confitetur, Deum sibi fuisse aliquando susceptorem, nunc esse refugium, & post hanc vitam fore beatitudinem; ideo concludit: *sperabo in eum*, id est, firmiter statuo semper sperare in eum in omni periculo & tentatione, quod B. Iob faciebat, cum diceret: *Etiamsi me considerit, in ipso sperabo*, Iob. 13.

*Quoniam ipse liberauit me de laqueo venantium, & à verbo aspero.*

Variant hoc loco Codices: nam in Hebræo & Græco legimus, *liberabit te*. S. Hieronymus, & S. Augustinus in Commentario huius Psalmi, & S. Gregorius libr. 6. Moral. cap. 15 legunt, *liberabit me*. Editio nostra Vulgata habet, *liberauit me*, quomodo legit etiam S. Bernardus serm. 3. in hunc Psalmum. Res non est magni momenti: sed si legatur in secunda persona, verba erunt Prophetæ, & continuabuntur cum sequentibus: si legatur in prima persona, erunt verba hominis iusti, & continuabuntur cum præcedentibus: sic etiam, si legatur verbum temporis futuri, erit promissio; si temporis præteriti, erit confessio: beneficium autem, quod hic commemoratur, idem omnino est, siue exprimitur in prima persona, siue in secunda; siue in præterito, siue in futuro. Nos editionem nostram sequimur. Ergo vir iustus, qui dixerat, *sperabo in eum*, subiungit rationem, *Quoniam ipse liberauit me de laqueo venantium, & à verbo aspero*. Quibus verbis duo beneficia continentur, vnum temporale, spirituale alterum: beneficium temporale est liberatio ab insidiis, dolis, fraudibus malorum hominum, ex quibus detrimenta temporalia oriuntur: fraudes enim sunt laquei, verbum asperum est detrimentum, quod inde sequitur, verbum enim apud Hebræos passim accipitur pro ipsa re. Et quoniam fraudes & doli plerumque fiunt per instrumentum linguæ, ideo Ecclesiasticus cap. 51. dicit: *Liberaisti me à laqueo lingua iniqua*. Deus igitur singulari providentia sua fecit, & faciet deinceps, ut iustis confidentibus in adiutorio Altissimi, non obstant fraudes & insidiae impiorum. Alterum beneficium est longe majus, liberatio videlicet à tentationibus Dæmonum: tanta est enim Dæmonum verusutia, ut non immerito homines quantumvis prudentes cum Dæmonibus comparati bestiolarum esse videantur. Igitur venatores Dæmones sunt, de quibus Apostolus dicit: *Qui volunt diuites fieri, incidunt in tentationem,*



tionem, & in laqueum Diaboli, 1. Tim. 6. & Respiciant à Diaboli laqueis, à quo captiui tenentur, 2. Tim. 2. Sunt autem Dæmones, & plurimi numero, vt aërem istum caliginosum ferme totum replent, teste S. Hieronymo in c. 6. ad Ephes. & potentissimi ac ferocissimi, vt in Scripturis leonibus & draconibus conferantur, 1. Petr. 5. & Apocal. 12. neque aliud negotium habent, quam assidue rugiendo circuire, quærentes, quem deuorent, quæ si serio & attente cogitaremus, cum timore & tremore magno vigilarem in orationibus, non minus, quam fecisse Danielem, credibile est, cum esset in lacu leonum, & tres pueros in camino ignis ardentis. Laquei sunt omnes res creatæ, quæ sensus humanos oblectare possunt, siue quæ concupiscentiam carnis, vel concupiscentiam oculorum, vel superbiam vitæ irritare solent, de quibus dicit Sapiens: *Creatura facta sunt in mscipulam pedibus insipientium*, Sap. 14. &: *In medio laqueorum ingredieris*, Eccles. 9. Verbum asperum, est mors animæ, quam incurrit, qui laqueis istis capitur. Sic enim vertit ex Hebræo S. Hieronymus: *Liberabit te de laqueo venantium, & de morte insidiarum*: nam, vt supra diximus, per verbum res ipsa intelligi debet, quod si quis per verbum asperum, proprie verbum ipsum accipere, poterimus per verbum asperum intelligere sententiam Iudicis supremi: *Ite maledicti in ignem æternum*, vel, vt docet S. Bernardus ser. 3. in hunc Psalm. *Tollatur impius, ne videat gloriam Dei*, hoc enim verbo nihil asperius cogitari potest, cum eo significetur priuatio omnium bonorum, & cumulus omnium malorum, non temporalis, sed æternus, hanc enim sententiam iustissimi Iudicis Dei iuste merentur, qui voluntarie, laqueis venatorum Dæmonum se implicari sinunt.

IV.

*Scapulis suis obumbrabit tibi, & sub pennis eius sperabis.*

Incipit nunc Propheta ipse loqui, & confirmat verba hominis iusti, ac si dicat, Meri-

to dixisti, *sperabo in eum*, quoniam ipse liberavit me de laqueo venantium, & à verbo aspero. Vere enim liberavit te, & deinceps semper liberabit ab omni periculo: nam dum eris paruulus, & impar hostibus tuis, fouebit te sub alis suis, quomodo aquila vel gallina fouet pullos suos: quando autem creueris, & per te pugnare poteris, dabit tibi scutum firmissimum, per quod invulnerabilis esse poteris: sed in hoc versiculo explicatur solum prior similitudo, in sequenti explicatur posterior. In Scripturis sanctis duabus auibus comparatur Deus, aquilæ & gallinæ. Deuter. 32. *Sicut aquila promouens pullos suos, & super eos volitans*. Matth. 23. *Quoties volui congregare filios tuos, quemadmodum gallina congregat pullos suos*. Aquila erat Deus ante incarnationem, gallina factus est post incarnationem: vel si placeat ad Christum omnia referre, Christus vt Deus, est aquila, vt homo, gallina, vt Christus homo tempore mortalitatis suæ gallina fuit, post resurrectionem aquila. Ait igitur: *Scapulis suis obumbrabit tibi*, id est, Deus instar aquilæ vel gallinæ, sub alis suis te colliget, & sic scapulis suis obumbrabit tibi, vt neque ab ardore Solis, neque à pluuia & ventis, neque à morsibus miluorum timeas: quare tutissime sub pennis eius, id est, sub eius protectione & defensione constitutus, sperare poteris liberationem & incolumitatem.

*Scuto circumdabit te veritas eius, non timebis à timore nocturno.*

*A sagitta volante in die, à negotio perambulante in tenebris, ab incursu & demonio meridiano.*

Explicat nunc Propheta alteram similitudinem pro maioribus, qui per se pugnare possunt, hos enim Deus armat scuto admirabili. Finxerunt Poëtæ, Achillem & Æneam scuto quodam cœlesti donatos fuisse, vt invulnerabiles fierent: sed illæ fabulæ sunt. Hic autem clypeus, de quo loquitur Dauid, vere clypeus cœlestis est, & invulnerabiles reddit eos, qui ipso bene vt sciunt; & di-



& dicit Propheta, *Scuto circumdabit te*, quoniam scutum non est simile galeæ, quæ solum caput tegit, vel loriceæ, quæ tegit pectus, & scapulas, sed est generalis quædam defensio, cum possit attonsi, demitti, conuerti ad omnes partes, & opponi omnibus ictibus, *In omnibus* (inquit Apostolus ad Ephes. 5.) *sumentes scutum Fidei, in quo possitis omnia tela nequissima ignea extinguere.* Sanctus Hieronymus ex Hebræo vertit, *scutum & protectio veritas eius.* Sed facile est videre, quæ fuerit causa diuersæ translationis: nam sanctus Hieronymus legit, *veschoera, & protectio* Septuaginta vero Interpretes legunt, *ischorecha, circumdabit te.* Facile autem fuit negligentia librariorum mutari primam & ultimam literam. Melior est autem lectio, quam Septuaginta Interpretes habuerunt, quam ea sit, quam habuit S. Hieronymus: nam verbum, *sachar*, circuire, & circumdare significat: nomen, *sochera*, scutum rotundum proprie designat: non est autem verisimile. Prophetam scripsisse, *scutum & scutum*, ad quam repetitionem vitandam, S. Hieronymus vertit, *scutum & protectio*: quamuis illa vox proprie non protectionem, sed scutum significet. Porro scutum hoc veritas est, sic enim dictum est, *Scuto circumdabit te veritas eius*, ac si dictum esset, *Circumdabit te veritas Domini instar scuti, vel clypei.* Veritas Domini in Scripturis sacris duobus modis accipitur, vno modo pro veracitate, & constantia in seruandis promissis, vt in Psal. 88. *Veritas mea, & misericordia mea cum ipso*, & infra, *Misericordiam meam non dispergam ab eo, neque nocebo ei*, id est, non decipiam eum in veritate mea: altero modo pro veritate Fidei reuelata per Apostolos, & Prophetas: de qua dicitur Ioan. 17. *Sermo tuus veritas est*, & Proverb. 31. *Omnis sermo Domini clypeus ignitus est*, & ad Ephes. 6. *In omnibus sumentes scutum Fidei*, id est, veritatis, quæ sola Fide percipitur, cum sit veritas supernaturalis. Vtraque veritas clypeus est optimus ad propulsanda iacula omnia inimici, siue in prosperis, siue in aduersis: nam veritas promissionum Dei est immobilis, &

firma, vt de ea dici possit, *Calum & terra transibunt, verba autem mea non prateribunt.* Luc. 21. Est enim veritas Dei, quasi terra solida, in qua anchora Spei tutissime figitur. Anchora, dum per aquam descendit, non firmat nauim, quoniam aqua est elementum liquidum, & instabile: at dum terræ adhæret, firmissime nauim retinet: Sic spes nostra dum adhæret promissionibus hominum, non potest non semper nutare, sed cum in Dei veritate figitur, firmissima permanet. *Est enim Deus verax, omnis autem homo mendax*, inquit Apostolus, ad Rom. 3. Et quis ei nocere poterit, cui protectionem promittit Deus, qui mentiri non potest? Nec minus veritas Fidei, instar scuti protegit, dum nos certos reddit, esse post hanc vitam paratam iustis felicitatem æternam, & impijs supplicia sempiterna: futurum iudicium in nouissimo die, in quo singuli homines rationem exactissimam reddent Iudici Deo omnium operum, verborum, cogitationum, desideriorum, omissionum denique ociosi cuiuslibet, breuissimique sermonis. Hæc enim & similia, quæ veritas Fidei nobis ostendit, facile protegere non possent ab omni tentatione tam in rebus prosperis, quam in aduersis, si hoc scuto assidue vteremur, id est, si veritates Fidei assidue, & fideiter cogitaremus. Quis enim non fortiter aduersus terrores omnes persistet, si attente cogitet illa verba Domini, Matt. 10. *Nolite timere eos, qui occidunt corpus, animam autem non possunt occidere, sed potius timete eum, qui potest corpus & animam perdere in gehennam?* Et quis vana blandimenta seculi, & iniusti lucri occasiones non facile spernet si verba illa cælestis Magistri serio considerare voluerit, Matt. 16. *Quid prodest homini, si Mundum vniuersum lucretur: anima vero sua detrimentum patiatur? aut: Quam dabit homo commutationem pro anima sua?* Sequitur, *Non timebis à timore nocturno, &c.* In quibus verbis Propheta explicat generatim pericula, in quibus auertendis scuto veritatis opus habemus. Sunt autem verba valde obscura, & à scriptoribus varie exponuntur. Duæ



videntur expositiones præcipuæ. Vna S. Augustini, qui, per, *timorem nocturnum*, intelligit tentationem leuem, sed occultam per, *sagittam volantem in die*, tentationem leuem, sed manifestam; per, *negocium perambulans in tenebris*, tentationem grauem sed occultam, per, *daemonium meridianum*, tentationem grauem, sed manifestam. Altera est S. Bernardi serm. 6. in hunc Psalmum, qui per *timorem nocturnum* intelligit tentationem pusillanimitatis, per, *sagittam volantem in die*, tentationem vanæ gloriæ, per, *negocium ambulans in tenebris*, tentationem ambitionis, vel avaritiæ, per, *daemonium meridianum* tentationem operis mali sub specie boni. Possumus addere tertiam expositionem, quæ ex parte S. Ioannis Chrysostomi esse videtur, vt per noctem intelligatur tempus aduersitatis, per diem, tempus prosperitatis: & hic sit sensus, *Non timebis à timore nocturno*; id est; in nocte aduersitatis non timebis ab ijs rebus quæ non lædunt, si non timeantur: talia sunt distractiones, conuicia, concumeliæ, quæ nocent illi, à quo dicuntur, non illi, in quem dicuntur, nisi ipse timendo, & eas magnificando seipsum lædat. *A sagitta volante in die*, id est, in die prosperitatis non timebis verba laudantium, & adulantium; quæ superbiam gignunt; & instar sagittarum occidunt incautos. *A negotio perambulante in tenebris*, id est, in tenebris aduersitatis non timebis veras calamitates, & persecutiones, quas homines impij negociando negocia iniquitatis inferunt iustis. *Ab incurso, & demonio meridiano*, id est, in meridie prosperitatis, non timebis à grauissimis, & notissimis sceleribus; ad quæ nimia opulentiæ, vel potentia; illos impellit. Possumus & quartam expositionem adiungere, quæ præter cæteras simplex, & literalis esse videtur, vt sensus sit, Non timebis vlla pericula; neque nocturna, neque diurna. Illud enim *Non timebis à timore nocturno*, significat; non afficeris timore ab vlla re, quæ nocturno tempore timorem incutere potest, Accipitur enim timor pro re quæ timetur, vt i. Petri 3. *Timorem eorum non dimueritis*; Sicut spes accipitur pro re spera-

ta, & desiderium pro re quæ desideratur, ad Tit. 2. *Expectantes beatam spem*, id est, beatitudinem, quæ speratur, & Psal. 77. *Desiderium eorum attulit eis*, id est, rem, quam desiderabant. Illud autem, *A sagitta volante, in die*, significat, non timebis offensionem siue calamitatem vllam diurnam, ponitur enim sagitta pro quacumque re, quæ lædere potest interdiu, species videlicet pro genere. Illud vero, *A negotio perambulante in tenebris*, est repetitio, & explicatio illorum verborum, non timebis à timore nocturno: significat enim negotium perambulans in tenebris nocturnis. Vox Hebraica, דבר, דבר, דבר, significat proprie verbum, sed accipitur, pro re quacumque, quomodo etiam accipitur negotium pro quacumque actione, quæ lædere potest S. Hieronymus vertit, à peste in tenebris ambulante, quia legit, *deuer*, quod significat pestem: sed Septuaginta Interpretes legerunt, *dauar*, quod significat verbum, id est, rem omnem. Illud denique, *ab incurso, & demonio meridiano*, est repetitio, & explicatio illorum verborum, *A sagitta volante in die*, significat enim incursum, & daemonium meridianum, omnem occursum malum, siue omnem læsionem, omnem ærumnam, quæ accidere potest, in die, atque adeo in ipso tempore meridiano S. Hieronymus vertit, *A morsu insantis meridie*. Sed verbum Hebraicum, קטב, קטב, קטב, significat morsum, & excidium, & ruinam: ideo Septuaginta Interpretes non male venterunt incursum, vt designarent generatim omnem occursum malum. Vox autem *insud*, quam S. Hieronymus vertit, *insantis*, videntur Septuaginta Interpretes legisse litteris transpositis, *vesed*, quod significat, & *דמוניו*, Vocata autem David Daemonium meridiei, siue meridianum, omnem aggressorem robustum, & potentem, qui non timeret in ipso meridie nocere, & lædere. Quoniam enim Dæmon princeps est omnium iniquorum, & malefactorum recte transfertur hoc nomen ad omnes iniquos, & malefactores, præsertim audaces, & robustos. In summa, continetur in omnibus his verbis generalis promissio, qua securi redduntur ab omni peti-



periculo nocturno, & diurno qui confidunt in Deo, & armati sunt clypeo veritatis: nam si Deus pro nobis, quis contra nos? Rom. 8. Et quis est, qui vobis noceat si boni amulatores fueritis. Pet. 3.

VII.

*Cadent à latere tuo mille, & decem millia à dextris tuis: ad te autem non appropinquabit.*

Pergit Propheta, & describit victoriam hominis iusti confidentis in Deo, & rite videntis clypeo veritatis. Possunt autem illa verba, *Cadent à latere tuo*, exponi de sagittis vt vult Euthymius; & S. Bernardus; vel de commilitonibus, vt indicat S. Augustinus. Omnia sunt vera, sed expositio sancti Augustini videtur anteposenda. Nam sagittæ quidem repercutiunt à securo, cadent in magna copia; sed non satis est ad victoriam, sagittas repellere, nisi etiam occurratur timori nocturno, negotio perambulanti in tenebris, & dæmonio meridiano. Itaque prima expositio non plene hunc locum explicat. Altera expositio melior, duobus modis potest intelligi: vno modo, vt hostes dicantur casuri felici casu: quod tunc fit, cum infideles conuertuntur ad fidem, & peccatores conuertuntur ad iustitiam, & sic prosternuntur, & occiduntur, vt moriantur peccato, & de hostibus fiant amici. Altero modo, vt hostes dicantur casuri infelici casu; quod fit cum hostes iustorum, siue dæmones, siue homines mali, repelluntur à iustis, & non solum non obtinent victoriam, sed etiam victi prosternuntur & cadunt: nec solum non luantur noua gaudia: sed grauiora sibi ipsi præparant supplicia. Tertia expositio verissima est, & simplex, ac literalis; vult enim Propheta iustos admonere, vt magnificent gratiam huius victoriæ, eum rara sit, & ad paucos omnino pertineat. *Cadent enim in hoc prælio ex commilitonibus mille à latere, & decem millia à dextris: ad ipsum autem non appropinquabit neque timor nocturnus, neque sagitta vo-*

lans in die, neque negotium perambulans in tenebris, neque dæmonium vastans, & sæuens in meridie. Porro per latus videtur intelligi sinistra, cui opponitur dextera: & quidem mille dicuntur casuri à latere, id est à sinistra, & decem millia à dextris; quoniam per sinistram intelligitur aduersitas, per dextram prosperitas. Multo autem plures ex hominibus cadent, & pereunt ex prosperitate, quam ex aduersitate. Prosperitas enim dat occasionem superbix, delicijs, licentiæ, audaciæ, & alijs id genus malis: aduersitas vero reddit homines humiles castos, patientes. Tribulatio enim (vt ait Apostolus ad Rom. 5.) patientiam operatur, iam vero numerus ille mille, & decem millium, nihil aliud significat, nisi multos casuros à sinistris sed multo plures à dextris. Quo modo accipiuntur hi numeri lib. 1. Reg. c. 18. *Saul percussit mille, & dauid decem millia.* Et Deut. 32. *Quomodo persequatur vnus mille, & duo fugent decem millia.*

*Veruntamen oculis tuis considerabis, & retributionem peccatorum videbis.*

VIII.

Hæc est noua causa lætitiæ homini iusto, cui non solum promittitur victoria, sed etiam quod sit cum magna voluptate visurus proprijs oculis inimicos suos iacentes, & pro meritis punitos. Quæ promissio impletur aliquando in hac vita. Sic enim viderunt filij Israel Ægyptios mortuos, & iacentes in littore maris rubri, Exod. 14. Sic viderunt Moyses: & Aaron absorberi viuos à terra Dathan, & Abyron, Num. 16. Sic Ezechias vidit cadauera prostrata exercitus Sennacherib, 4. Reg. 19. Sic Iudith, & populus Dei vidit caput Olophernis amputatum, & exercitum eius fufum, & fugatum, Iud. 15. Sed plenissime implebitur hæc promissio in die nouissimo: tunc enim videbimus omnes inimicos nostros humi iacentes, inermes & nudes, & sine vllis viribus: & pænæ sempiternæ addictos, *Veruntamen*, inquit Propheta, *oculis tuis*, id est, non ex auditu & fama cognosces, sed tu

Xxx. 2 ipse



ipse cernes, illis ipsis oculis, quibus vidisti arma hostium, & pericula, qui quidem oculi tunc proprie tui erunt post resurrectionem; nunc enim quomodo tui sunt, quos te invito curiositas aperit, somnus claudit, fumus affligit, senectus obscurat, mors extinguat. *Considerabis*, id est, non obiter, & per transitum videbis, sed diligenter & accuratè considerabis omnes hostes tuos, qui sint, quot sint, quid meruerint, quid patiantur. *Et retributionem peccatorum videbis*, id est, & tunc plane perspicies quam mercedem habeant omnes impiorum labores. Ex quo existet pulcherrima species rerum: nunc enim omnia confusa, & perturbata esse videntur: nam cum pœna debeatur culpæ, & præmium virtuti, sæpe accidit, ut iusti affligantur, & iniqui honorentur, & per hoc iustitiæ copuletur dolor, & iniquitati coniungatur gaudium: sed in die nouissimo omnia ponentur suo loco, & pœna retribuetur culpæ, eique iungetur insolubili nexu, & maior pœna maiori culpæ reddetur, & minor minori: & contra, nexu pariter insolubili præmium adiungetur iustitiæ, & maiori iustitiæ maius præmium, & minus minori reddetur: & tunc implebitur, quod dicitur in Psal. 57. *Lætabitur iustus, cum viderit vindictam*, id est, cum retributionem peccatorum viderit, non quidem lætabitur ob calamitates miserorum; sed ob decorem iustitiæ, & sapientiæ diuinæ, quæ splendet mirum in modum in supplicijs impiorum.

IX.

*Quoniam tu es Domine spes mea, Altissimum posuisti refugium tuum.*

Hic versiculus facilis est quo ad verba, quæ sunt omnia declarata in explicatione primi, & secundi versiculi: sed de connexionne non levis quæstio est: nam in verbis præcedentibus loquebatur Propheta cum homine iusto, dicens, *Oculus tuus considerabis, & retributionem peccatoris videbis*: nunc videtur loqui cum Deo, dum ait, *Quoniam tu es Domine spes mea*: & non apparet, quorsum hæc dicat. Et rursus verba sequentia, *Altissimum posuisti refugium tuum*, ad ho-

minem iustum dirigi videntur, sed non apparet vlla connexio. Theodoretus, & quidam alij volunt subintelligi verbum, *dixisti*, ut hic sit sensus, *Quoniam dixisti: tu es Domine spes mea*, ideo altissimum posuisti refugium tuum. Euthymius, & alij nihil existimant subintelligi debere; sed verba priora huius versiculi esse hominis iusti; verba posteriora esse Prophetæ; iam enim admonuimus Psalmum esse dramaticum, & ad formam dialogi factum, ut quamvis non designentur nominatim personæ, tamen nunc Propheta, nunc homo iustus, nunc Deus loqui intelligatur. Igitur posteaquam Propheta viro iusto dixit, *Scapulis suis obumbrabit tibi Deus*, ut gallina pullo; &, *scuto circumdabit te*, ut Imperator militem; &, *non timebis à timore nocturno*, vel diurno; & multi hinc inde à dextris, & à sinistris cadent: sed tibi malum non appropinquabit, quin potius deuictos hostes oculis tuis videbis; iustus vir his auditis interloquitur, & ad Deum conuersus dicit, *Quoniam tu es Domine spes mea*, id est, vera sunt, quæ auidini; sed ideo vera sunt, quoniam tu es Domine spes mea, non confido in viribus, & armis meis, non in viribus & armis amicorum meorum, sed in te vno confido, qui es vnica, & tota spes mea, dicitur autem Deus ipse spes iustorum, quoniam iusti non sperant solum auxilium à Deo, sed ipsum Deum sperant sibi fore, veluti arcem munitissimam, ad quam confugientes tempore persecutionis, & in qua per fidem, spem, & charitatem, perque orationem, & contemplationem habitantes, nihil aduersi pati possint. Atque hoc bene Propheta intellexit & ideo subiunxit, *Altissimum posuisti refugium tuum*: quasi diceret, rectè, ac sapienter posuisti Deum spem tuam, sic enim refugium tuum constituisti in arce omnium altissima, & munitissima, ad quâ (ut in versiculo sequenti dicitur) nullum malum pertingere poterit. Vbi obseruandum est, per Altissimum, non intelligi rem aliquam altissimam, sed ipsum Deum, cuius vnum ex nominibus est, *Altissimus*: nam in Hebræo habetur *hhehion*, quod est vñ ex decem nominibus.



minibus Dei, & significat *Altissimum*; siue *excellsum*: & in Græco habetur, ὕψιστος, generis masculini, & κατὰ φύσιν, generis feminini. Ex quo intelligimus, nomen *Altissimum*, non esse adiectiuum, quod cum substantiuo, *refugium*, concordari debeat, vt sensus sit, Posuisti tibi *refugium altissimum*; sed, Elegisti tibi Deum, qui dicitur & est *Altissimus*, in domum siue arcem *refugij*.

*Non accedet ad te malum & flagellum non appropinquabit tabernaculo tuo.*

Explicat nunc Propheta, quid boni consequatur iustus ex eo, quod *refugium* sibi constituit in *Altissimo*, ac dicit, eum tutissimum fore ab omni malo. Duplex est malum, culpæ & pœnæ. Malum culpæ absolute & simpliciter malum est, ideo de malo culpæ intelligimus, *Non accedet ad te malum*, malum pœnæ non est simpliciter malum, propterea de malo pœnæ explicandum existimamus id, quod sequitur, *Et flagellum non appropinquabit tabernaculo tuo*. Malum culpæ esse malum absolute & simpliciter, malum pœnæ non item, ex eo constat, quod malum culpæ facit hominem malum; malum pœnæ non facit malum, sed miserum: malo culpæ nemo bene uti potest; malo pœnæ bene uti possumus: malum culpæ non potest dici bonum, quia non est iustum, cum sit iniquitas; neque est utile, cum is qui peccat, semper plus perdat, quam lucratur; malum pœnæ bonum dici potest, cum sæpe sit iustum & utile: mali culpæ non est auctor Deus, qui est auctor omnis boni; malum pœnæ à Deo est Iudice iusto. Denique id etiam colligitur ex verbis Prophetae; nam cum dicit, *Non accedet ad te malum*, loquitur de malo, quod in nobis est, & extra nos esse non potest, & tale est malum culpæ, quod non nisi intra nos, id est, in libero nostro arbitrio esse potest, cum addit, *Et flagellum non appropinquabit tabernaculo tuo*, loquitur de malo, quod potest locum habere in rebus nostris, in liberis, in seruis, in domo,

in agris, in substantia reliqua, & tale est malum pœnæ. Sed existit non leuis dubitatio, de veritate huius promissionis: nam David vnus erat ex iustis, & confidentibus in Deo; & tamen ad eum accessit malum culpæ, adulterium & homicidium; & flagellum, imo flagella multa appropinquauerunt tabernaculo eius: sic enim ipse dicit in Psal. 72. *Lavi inter innocentes manus meas, & fui flagellatus tota die*: quod idem dici potest de Iob, Tobia, Prophetis & Apostolis, & de ipso Christo, quod ad flagellum attinet: omnes enim flagellati sunt; imo Deus ipse *flagellat omnem filium, quem recipit*, ad Hebræos c. 12. Duæ sunt responsiones, quæ dari possunt ad hanc dubitationem. Prior est, hanc promissionem non pertinere ad hanc vitam, sed ad futuram, quando impletum erit illud: *Oculus tuus considerabis, & retributionem peccatorum videbis*: tunc enim in tabernaculum cœleste ingressi tutissimi erimus ab omni malo tam culpæ, quam pœnæ: nam ideo *confortauit Deus seras portarum cœlestis Ierusalem*, vt dicitur in Psal. 147. *& posuit fines eius pacem*: vt flagellum ad ipsum appropinquare non possit. Posterior solutio est, pertinere quidem hanc promissionem ad tempus huius vitæ; sed sano modo esse intelligendam: nam non accedet malum culpæ ad electos iustos, & in Deo confidentes, non quod peccare non possint, sed quia per diuinam & singularem prouidentiam ipsum etiam peccatum ipsis cooperabitur in bonum: quoniam permittet Deus eos in peccatum labi, vt inde fiant humiliores & cautiores, & tanto magis accendantur in amorem Dei, quanto se agnoscent eius gratiæ & misericordiæ magis debitores: sic de S. Petro dicit B. Gregorius homil. 21. in Euangelia, quod idem de S. Apostolo Thoma, & S. Maria Magdalena, alijsq; permultis dici potest. Flagellum vero, id est, malum pœnæ non appropinquabit tabernaculo ipsorum, quoniam ipsi habitantes per desiderium in cœlesti tabernaculo, & conuersantes, cum Apostolo Paulo, per assiduam contemplationem in cœlo, mala ista temporalia vix



sentient, & omnino contemnent; imo mala esse non reputabunt, sed bona, cum materiam patientiæ, & segetem gloriæ illis præbeant: hoc certe sentiebat Apostolus, cum diceret: *Repletus sum consolatione, superabundo gaudio in omni tribulatione nostra*, 2. Corinth. 7.

XI.

*Quoniam Angelis suis mandauit de te, vt custodiant te in omnibus viis tuis.*

Hunc versiculum & sequentem allegauit Diabolus in disputatione cum Christo, Matth. 4. sed perperam; quoniam Christus non eguit custodia Angelorum, vt S. Thomas docet in 1 p. q. 113. artic. 4. ad primum. Christus enim ratione diuinitatis custos est Angelorum & hominum, & omnia portat verbo virtutis sue, ad Hebr. 1. Ratione animæ, beatus erat, ac per hoc custodia non egebat, quemadmodum neque nos egebimus, cum beati erimus. Denique ratione carnis, eguit quidem tempore mortalitatis suæ protectione aliqua, sed eam illi exhibebat. Verbum diuinum, cum quo hypostatice vnita erat, sed his omisissis, quoniam poterat homo iustus dicere: Iam quidem securus sum, nihil mihi mali euenturum, cum ero in coelesti tabernaculo; sed audire cupio, quis me custodiet in via, ne forte errem à recto itinere, vel incidam in latrones, aut in foueam aliquam ruam: respondet Propheta, Ne timeas; quoniam Angelis suis mandauit de te, vt custodiant te in omnibus viis tuis. Sed verba singula consideremus. Quoniam, hæc particula reddit rationem verborum sequentium, non præcedentium: est enim sensus, Quoniam Deus mandauit Angelis, vt custodiant te in via, ideo ipsi Angeli in manibus te tollent, ne vnquam offendas ad lapides pedem tuum. Angelis, Angeli sunt spiritus beati, & Principes nobilissimi, & eorum custodia tutissima est, quoniam potentissimi, sapientissimi & optimi sunt: ex quo admoneamur, quanti Deus faciat genus humanum, cui tam magnos Principes attribuit quasi pædagogos: sed cur dicit, Angelis, &

non potius, Angelos? quoniam habemus quidem singuli singulos Angelos custodes proprios, vt colligitur ex verbis Domini Matth. 18. *Angeli eorum semper vident faciem Patris mei*, & ex Actis Apostolorum cap. 12. *Angelus eius est*: tamen habemus etiam Angelos alios custodes communes, eos videlicet, qui præsunt ciuitatibus, aut Regnis, de quibus vide Daniele cap. 10. & S. Basilium libr. 3. in Eunomium. Suis, hoc additur, quoniam sunt etiam Angeli mali, de quibus dicitur Apoc. 12. *Et Draco pugnat, & Angeli eius*: Deus ergo mandauit Angelis suis, vt te custodiant, non mandauit Angelis alienis, qui non custodire, sed perdere tantum nouerunt. Origenes homil. 35. in Lucam, & ex eo Ioan. Cassianus collatione 13. docent, Deum vnique nostram duos Angelos attribuisse, vnum bonum, qui nos protegendo custodiat, alterum malum, qui nos tentando exerceat. Sed falsa ista sententia est: Deus enim intentator malorum est, Iacob. 1. & mali Angeli non egent mandato Dei, vt nos tentent; satis enim per se ad hoc agendum prompti sunt. Mandauit, hæc est præcipua causa, cur Angeli diligentissime nos custodiant, quia videlicet Deus id eis mandauit; quamuis enim libenter id faciant, quia nos amant, & quia malos Angelos oderunt, & quia cupiunt instaurari sedes coelestis Ierusalem, & quia sciunt id esse gratissimum Regi suo Christo Domino: tamen nihil magis eos mouet, quam præceptum Domini: intelligunt enim se esse ministros Dei, & Deum nihil magis requirere à ministris suis, quam promptam ac simplicem obedientiam. De te, hoc significat, Deum quidem omnium hominum prouidentiam gerere, & omnibus, ac singulis hominibus Angelum custodem dedisse: tamen peculiari affectu prosequi homines iustos, atque in se confidentes, & ideo peculiari studio mandauisse Angelis suis de te, id est, de te homine iusto & confidente in auxilio eius. Vt custodiant te, hoc est, quod Deus Angelis bonis mandauit, vt custodiant iustum ab hoste inuisibili, id est, ab Angelis malis; quandoquidem homo, qui carne circumdatus est, & nihil cernere potest,



potest, nisi quod oculis carnis manifestatur, impar est ad prælum cum Dæmonibus, nisi à potentiore adiuuetur. *In omnibus viis tuis*, non dicit, *in via*, sed, *in viis*, & *in omnibus viis*, quia multæ sunt viæ hominis, & in omnibus auxilio Angeli custodis eget. Via est lux, iuxta illud Psal. 118. *Beati immaculati in via, qui ambulant in lege Domini*: & ibidem: *Viam mandatorum tuorum cucurri*. Via quoque est operatio, iuxta illud Prou. 8. *Dominus possedit me in initio viarum suarum*. Denique vita præsens est quedam via, vt S. Basilii pulchre docet in explicatione Psalmi primi. Via legis est multiplex, quia multæ sunt leges; via operationis est etiam multiplex, quia multæ sunt operationes; via quoque vitæ est multiplex, quia multæ sunt partes vitæ, multæ ætates, multi status. In omnibus ergo istis viis egemus custodia, quoniam labi possumus in omni lege, in omni operatione, in omni ætate, & statu vitæ nostræ.

*In manibus portabunt te, ne forte offendas ad lapidem pedem tuum.*

Hic versiculus plenus est metaphoris, sed alioqui facillimus est. Itaque solum explicandum est, quæ sint manus Angelorum, qui lapides in via, qui pedes hominum. *Manus Angelorum*, sunt intellectus & voluntas, siue sapientia & potentia: nam intelligendo & volendo, omnia faciunt. *Lapides in via*, sunt omnia impedimenta, quæ occurrunt in hac vita, siue temporalia, siue spiritualia; scandala, tentationes, persecutiones, & similia. *Pedes*, quibus ad lapides offendere solemus, sunt affectus humani. *Pes tuus*, inquit S. Bernardus serm. 13. affectio tua, & S. Augustinus in Psalm. 94. *Pedes nostri*, inquit, in hoc itinere affectus nostri sunt. Duo sunt autem principales affectus, quasi duo pedes, amor & timor: & quocunque homo operando, loquendo, desiderando pergit; vel amore mouetur, vel timore: amore acquirendi aliquid boni, vel timore illud amittendi, siue amore cauendi malum,

vel timore in illud incidendi. Tunc autem offendimus pedem ad lapidem, cum oblata occasione temporalis boni acquirendi, vel temporalis mali euadendi labimur in peccatum, vnde bonum æternum amittimus, & sempiternum supplicium incurrimus: sed qui habitant in adiutorio Altissimi, ab Angelo custode ita iuuantur, vt vel occasio illa tollatur, id est, lapis ille de via remoueatur; vel animus ita illustretur ad vera bona & vera mala internoscenda, vt pede, id est, affectu eleuato à terra, occasio temporalis boni, quod sine peccato acquiri non potest, facile contemnatur; & malum temporale, quod sine peccato vitari non potest, patientissime toleretur.

*Super Aspidem & Basiliscum ambulabis, & conculcabis Leonem & Draconem.*

XIII.

Posteaquam Propheta locutus est de Angelis bonis, qui iustum in Deo confidentem custodiunt; adiungit de Angelis malis; ac dicit, eos iusto confidenti non preualituros, sed à contrario ab eo conculcandos & conterendos, iuxta illud Apostoli, Rom. 16. *Deus autem pacis conterat Satanam sub pedibus vestris velociter*. Vocat autem Satanam Propheta Serpentem propter astutiam, & Leonem propter ferociam: & quoniam multa sunt genera serpentium, vocat eum aspidem, basiliscum & draconem, quoniam cum astutia (quæ omnibus serpentibus communis est) habet aspis coniunctam obstinationem, basiliscus crudelitatem, & draco potentiam & vires maximas: quæ omnia Diabolo mirifice conueniunt. Neque solum hoc loco Diabolus vocatur serpens & leo, sed etiam alibi sepe: nam Iob 26. & Isaia 28. *Serpens siue anguis tortuosus* nominatur: Apoc. 12. dicitur *draco*, & cap. 20. *Serpens antiquus*: 1. Petr. 5. *Leo rugiens*; atque hæc videtur esse expositio literalis, quam sequuntur S. Patres Chrysostomus, Augustinus & alij: tamè reiciendæ non sunt aliæ tres expositiones, quæ ad hunc locum adferri solent. Vna est Theodoret & Euthymij, quod



quod hoc loco promittatur subiectio verorum serpentum & leonum hominibus iustis, atque in Deo confidentibus. Scimus enim, Danieli non nocuisse leones, neque S. Paulo viperam, & in historiis SS. Patrum à S. Gregorio, Sulpitio, Palladio, aliisque bonis auctoribus descriptis, non rara sunt exempla subiectionis exhibitæ sanctis viris à leonibus & serpentibus, aliisque sylvestribus feris. Altera est, per ista quatuor nomina intelligi quatuor persecutiones Ecclesiæ: persecutionem Iudæorum, qui instar aspidum sordidarum obstinatissimi sunt; persecutionem hæreticorum, qui per basiliscum designantur; persecutionem Paganorum, qui leonibus comparari possunt; & persecutionem Antichristi, qui satis apte draco nominari potest. Hanc explicationem ex parte indicavit S. Augustinus. Tertia est S. Bernardi & aliorum, qui per quatuor ista animalia quatuor vitia significari docent; per aspidem videlicet obstinationem, vel avaritiam; per basiliscum invidentiam; per leonem superbiam, per draconem iracundiam. Sed vit iustus, & non suis viribus, sed auxilio Dei factus, facile per charitatem super aspidem & basiliscum ambulabit, & per humilitatem conculcabit leonem & draconem.

XIV. *Quoniam in me speravit, liberabo eum; protegam eum, quoniam cognovit nomen meum.*

*Quoniam in ore duorum vel trium testium stat omne verbum:* Propheta sanctus tribus testimoniis probare voluit, quod initio promisit, eos omnes protegendos à Deo, qui vere confidunt in Deo. Primum testimonium fuit hominis iusti, qui ex proprio experimento testimonium reddidit veritati, dicens: *Quoniam ipse liberavit me de laqueo venantium,* &c. Alterum testimonium fuit ipsius Prophetæ, qui ve Spiritus sancti tuba vel præco dixit: *Scapulis suis obumbrabit tibi,* &c. Testimonium tertium est ipsius Dei, qui in tribus ultimis versiculis confirmat omnia, quæ supra dicta sunt, & multa

etiam addit. Sunt enim in his tribus versiculis octo promissa Dei, quæ optimo ordine incipiunt à liberatione à malis, & procedunt usque ad exaltationem ad summum bonum; & quidem quatuor pertinent ad hanc vitam, *Liberabo eum, protegam eum, exaudiam eum, cum ipso sum in tribulatione:* quatuor reliqua ad vitam futuram, *eripiam eum, glorificabo eum, longitudine dierum replebo eum, ostendam illi salutare meum.* Ait igitur: *Quoniam in me speravit, liberabo eum:* libertas, quæ hic promittitur, siue liberatio, potest intelligi generatim ab omnibus malis, & potest referri ad liberationes supra dictas per Angelos, per seutum, & per alias res, ut sensus sit, non putet iustus liberari se posse per seutum, vel per Angelos sine me, illa enim sine me nihil possunt: sed ego liberabo eum per seutum, per Angelos, & sæpe etiam per me ipsum sine illis, quoniam in me, non in illis potissimum speravit. Cæterum potest etiam altiore sensu significari hoc loco libertas à tyrannide vitiorum, quæ est libertas propria hominum iustorum perfectorum, & præter cæteras omnes maxime expetenda, de qua Dominus dicit in Euangelio, Ioan. 8. *Qui facit peccatum, servus est peccati: &, Si vos filius liberavit, vere liberi eritis.* Hæc vero libertas non datur omnibus, sed sperantibus in Deo. *Quoniam,* inquit, *in me speravit, liberabo eum,* ubi vox Hebræa, *chasak,* adhærere, diligere, placere significat: quare non quæcunque spes, sed ea fiducia, quæ oritur ex bona conscientia, & ex dilectione & filiali adhæsiōne nascitur, liberat hominem à tyrannide vitiorum: nam quem admodum cupiditas ligat & captivum facit, ita charitas solvit & liberum facit, & quo magis charitas crescit, eo magis cupiditas minuitur: & cum perfectissima erit charitas & adhæsiō ad summum bonum, tunc perfectissima erit libertas, quæ ab Apostolo dicitur *libertas gloria filiorum Dei,* ad Roman. cap. 8. Sequitur altera promissio, *Protegam eum, quoniam cognovit nomen meum.* Nam qui liberatur in hac vita à tyrannide vitiorum, non perfecte liberatur, sed eget protectione Dei, tum ut

non



non iterum captiuus ducatur ab hostibus, tum vt proficiat in acquisita libertate gratiæ, donec perueniat ad libertatem gloriæ, ideo Deus protectionem continuam pollicetur ijs, qui cognouerunt nomen eius: dicitur autem cognoscere nomen Domini, qui eius potentiam, & sapientiam, & bonitatem cognoscit, vnde in spem, & fiduciam firmissimam erigitur. Dicitur etiam cognoscere nomen Domini, qui ex intima familiaritate nouit Deum, vt pastorem, amicum, & patrem: de qua notitia dicitur in Euangelio, Ioan. 10. *Ego sum pastor bonus, & cognosco oues meas, & cognoscunt me mea* & contra de alijs dicitur Matt. 25. *Non noui vos*, & 2. Thess. 1. *Dantes vindictam ijs, qui non nouerunt Deum*. Ineffabilis omnino benignitas Dei est, qui non solum innotescere dignatus est, vt Dominus, sed etiam vt amicus, quod miratur Dauid, cum ait, *Quid est homo, quia innotuisti ei?* Psal. 143.

*Clamabit ad me, & ego exaudiam eum, cum ipso sum in tribulatione eripiam eum, & glorificabo eum.*

In hoc versiculo quatuor alia promissa continentur. Primum est exauditio generalis, quæ soli Deo, qui omnipotens est, conuenire potest: quod autem hæc sit promissio generalis exaudiendi omnes preces confidentium in Deo, perspicuum est ex eo, quod nulla restrictio adhibetur, sed absolute dicitur, *exaudiam eum*. Deinde alia loca Scripturæ confirmant hanc promissionem. Deuteronomij cap. 4. *Non est alia natio tam grandis, qua habeat Deos appropinquantibus sibi, sicut Deus noster adest omnibus obsecrationibus nostris*. Ioan. 15. *Quodcumque uolueritis, & petetis, fiet uobis*. Marc. 11. *Omnia quaecumque orantes petitis, credite, quia accipietis, & conuenient uobis*. 1. Ioan. 3. *Fiduciam habemus ad Deum, & quicquid petierimus accipiemus ab eo*. Quamuis autem conditiones nonnullæ requirantur, vt semper oratio exaudiat: tamen præcipua est, quæ habetur hoc loco; cum dicitur, *Clamabit ad me*; clamor enim significat vehementiam desiderij ex

dilectione, & fiducia procedentem. Sequuntur tria promissa, *Cum ipso sum in tribulatione, eripiam eum; & glorificabo eum*, quæ promissa aptissime respondent tribus diebus totius anni celeberrimis, Ferie sextæ, in qua Dominus in cruce pendens in maxima tribulatione, fuit, Sabbato, in quo erutus de omni tribulatione suauiter requieuit, & diei Dominico, in quo resurgens ex mortuis gloriosissime triumphauit. Eiusmodi tres dies ad omnes iustos, & electos pertinent, omnes enim cum Christo tribulationes ferre debemus. Ferie sexta, id est, in hac vita, quæ breuissima est, & pro vno die computatur: deinde requiescere in sepulchris die sabbati: denique resurgere die dominica, & cum Christo in æternum glorificari. Ait igitur Dominus, *Cum ipso sum in tribulatione*, qui enim clamabat, ante omnia donum patientiæ postulabat, quæ necessaria est, vt reportemus promissiones Dei, ad Hebr. 10. Dominus autem, qui dixit, *exaudiam eum*, primo loco promittit donum patientiæ dicens, *Cum ipso sum in tribulatione*: in qua sententia singula verba suum pondus habent. Illud, *cum ipso*, significat, Deum quidem esse cum rebus omnibus multis modis, sed speciali quodam modo, per internam consolationem, & influxum ineffabilis dulcedinis esse cum ijs, qui tribulantur quomodo mater ægrotanti filiolo maiora signa beneuolentiæ exhibet quam cæteris filiis bene ualentibus: & nos omnes membrum male affectum diligentius fouemus, quam cætera membra sana. Illud, *sum*, est verbum temporis præsentis cum cætera omnia sint temporis futuri, *liberabo, protegam, exaudiam eripiam, glorificabo, replebo, ostendam*: hoc autem significat, tribulationem huius uitæ esse momentaneam, quia de tempore præsentis nihil habemus, nisi momenta impartibilis: preinde proprie Apostolus dixit, 2. Cor. 4. *quod in præsentis est momentaneum & leue tribulationis nostra, supra modum in sublimitate æternum gloria pondus operatur in nobis*. Itaque misericordia Dei nostri facit, vt tribulatio non nisi guttatim instilletur uobis: cum futura gloria sit quasi flumen



inundans, iuxta illud Psal. 36. *Torrente voluptatis tua potabis eos.* Illud, in tribulatione significat, Deum in hac vita donare quidem consolationes multas amicis suis siue corporales, siue spirituales, sed non sine admixtione tribulationis. S. Basil. hom. 5. in Exameron, scribit, in statu innocentiae nasci solitas in campis rosas sine spinis; sed post peccatum inuentas quidem fuisse spinas sine rosis, sed non rosas sine spinis, vt impleteretur illud. Gen. 3. *Spinās & tribulos germinabit tibi.* Sed quicquid sit de veritate historię, moralis significatio verissima est: nam tribulationes siue consolationibus aliqui habent, præsertim ex impijs: sed consolationes siue tribulatione in hac vita nulli habent, neque impij, neque pij: sed hoc est discrimen inter pios, & impios, quod pij cum tribulationibus veras, & solidas à Spiritu S. consolationes habent; impij cum consolationibus breuib; & apparentibus magis, quam veris veras, & solidas tribulationes habent, *Frustratus Spiritus est charitas; & gaudium, ex* Apost. Ad Gal. 6. qui autem spiritum non habent, quo modo fructum eius habere possunt? Sequitur, *eripiam eum*, quæ promissio proprie spectat ad vitam futuram: iusti enim in morte liberantur ab omni tribulatione præsentī, & futura, sic enim scribit S. Ioan. Apoc. 14. *Beati mortui, qui in Domino moriuntur, amodo iam dicit spiritus, vt requiescant à laboribus suis.* & Apoc. 21. *Absterget Deus omnem lacrymam ab oculis eorum, & mors ultra non erit, neque luctus, neque clamor, neque dolor erit ultra.* Impij vero videntur quidem eripi per mortem à tribulationibus huius vitæ, sed non vere eripiuntur à tribulatione, sed transeunt de tribulatione temporaria ad æternam: quomodo, non dicuntur proprie de carcere liberari, qui educuntur de carcere ad patibulum. Aliquando tamen sancti viri etiam in hac vita eripiuntur ab aliqua tribulatione, vt contigit Patriarchæ Ioseph, Iob, David, Tobie, Danieli, tribus pueris, Susannæ, & alijs: sed illa modica, & temporalis liberatio fuit. Restat 4. promissio, *Et glorificabo eum*, quæ interdum in vita vtunque adimpletur. S. enim

Iob post grauissimam tribulationem non solum ab illa creptus, & liberatus fuit, sed etiam valde glorificatus, quod idem legimus de Patriarcha Ioseph; & de Rege David. Caterum vera glorificatio ad aliam vitam siue dubio pertinet: *tunc enim iusti fulgebunt sicut sol in Regno patris eorum*, Mat. 13. *Et sedebunt super sedes iudicantes mundum vniuersum*, Mat. 19. & 1. Cor. 9. de quorum gloria Propheta canit Psal. 138. *Mihi autem nimis honorificati sunt amici tui Deus, nimis confortatus est principatus eorum.* Et Apostolus concinit ad Rom. 8. *Non sunt condigna passionibus huius temporis ad futuram gloriam, quæ reuelabitur in nobis.*

*Longitudine dierum replebo eum, & ostendam illi salutare meum.*

Hæc sunt duo postrema beneficia, quæ promittuntur ijs, qui habitant in adiutorio altissimi, & continent explicationem beneficij sexti, in quo dictum est, glorificabo eum. gloria enim sanctorum nascetur ex adeptione summi boni: summum vero bonum est æterna felicitas: nam felicitas siue æternitate, est felicitas misera, & æternitas siue felicitate est æterna miseria. Primum ergo describitur in hoc versiculo vera æternitas, cū dicitur, *Longitudine dierum replebo eum*: deinde vera felicitas, cum additur, *Et ostendam illi salutare meum.* Per longitudinem dierum; intelligitur diuturnitas temporis, sed tanta, vt plane repleat desiderium humanum, hoc enim promittit, qui dicit, *longitudine dierum replebo eum*, quia vero non potest repleti desiderium humanum, nisi æterna duratione, ideo per hanc longitudinem dierum significatur æterna duratio, Vtitur autem scriptura eiusmodi verbis in designanda æternitate, quia nobis loquitur, qui non nouimus aliam longam durationem, nisi in diebus multis, aut longis, alioqui enim in vera æternitate non erit successio dierum sed vna dies semper manens, vel potius vnum momentum semper durans absq; vlla mutatione, aut vicissitudine. At, inquires, vicissitudo temporum mirifice delectat, & videmus homines varijs oblectationibus,



nibus fallere tedium longitudinis dierum in æstate, & longitudinis noctium in hyeme. Respondeo, id accidere, quia tempora huius vitæ sunt omnia varijs incommodis plena, & ideo semper anhelamus ad futura: sed quando veniet illa dies, qua nulla expectari poterit melior, votum omnium erit, ut illa semper duret. Et ostendam illi salutare meum, si per salutare intelligamus salutem, sensus erit, ostendam illi salutem meam, id est, efficaciam, ut vir iustus non amplius ex fide viuat, credendo quod non videt: sed plane videat, & sentiat, atque experimento proprio cognoscat salutem, quæ ex me est: est autem salus hæc, quæ nobis promittitur, ipsa Dei visio, quæ perfecta, & perpetua sanitas totius hominis erit: tunc enim sanabitur mens ab omni errore, & ignorantia, cum ad summam sapientiam perueniet, quæ in visione supremæ, atque altissimæ causæ posita est. Ex illa sapientia nascetur in voluntate amor erga summum bonum ardentissimus, & stabilis, unde perfecte sanabitur affectus ab omni mala cupiditate. Redundabit autem hæc sanitas in partem inferiorem, quæ superiori sine ulla resistentia, vel rebellionē subijciatur, & in ipsum corpus, quod immortale, impassibile, formosissimum, & sole fulgentius resurget. Quod si per salutare intelligatur Saluator, ut S. Augustinus magis probat; tunc sensus erit, Ostendam illi Saluatorem meum, id est, Saluatorem, quem ego misi, & faciam, ut vir iustus oculis mentis cernat eum, quia Deus est; & oculis corporis cernat eundem, quia homo est: quam ostensionem suæ diuinitatis promissit Christus, Ioan. 14. cum ait, *Qui diligit me, diligitur à Patre meo, & ego diligam eum, & manifestabo ei me ipsum.* Hæc autem manifestatio diuinitatis, ipsa est vita æterna, & summum bonum, & salus, siue sanitas perfecta totius hominis. Quare sententia huius loci in idem recidit, siue per salutare, intelligamus salutem, siue Saluatorem. Sed liber in fine huius Psalmi admirari cæcitatem generis humani: nam cum omnes cupiant felicitatem æternam, neque possint eam non vehementer optare: tamen pro temporali, & parua prosperitate siue in diui-

tijs acquirendis, vel cumulandis; siue in honoribus, & dignitatibus adipiscendis, vel conseruandis, siue in delectationibus carnis, ac sensuum vndeunque captandis; nihil non faciunt, currunt, discurrunt, vigilant, laborant, sudant, ingenium acuunt, linguam expolunt, animum intendunt: & pro vera, & solida, & sempiterna felicitate, pro veris diuitijs, pro summis honoribus, pro ineffabili iucunditate, quæ parata sunt diligentibus Deum, ita pigri sunt, ut pro his vix digitum mouere dignentur. Horror est omnino cogitare, hominem ratione, & intelligentia præditum, ijs rebus consecrandis toto vitæ suæ tempore occupari, quibus sæpe aditum ad æterna, & summa bona sibi ipse præcludit. Orandus est Deus, ut qui promittere dignatus est tam ingentia bona, idem spiritum bonum nobis infundat, & illuminatos oculos cordis habere nos faciat, ut sciamus, quæ sit spes vocacionis eius, & quæ diuitia gloriæ hereditatis eius in sanctis, ut Apostolus admonet Ephes. 1.

PSALMVS XCI.

Titulus, & Argumentum.

Psalmus cantici in die Sabbati.

**H**ic titulus habetur in omnibus codicibus Hebraicis, Græcis, & Latinis: & continet argumentum Psalmi; est enim compositus Psalmus, ut canteretur in die Sabbati, ad erudiendum populum, ut discat die Sabbati vacare laudibus Dei, præsertim ob creationem, & gubernationem mundi. Errant Iudæi, qui otium Sabbati sibi datum esse existimant ad vacandum conuiujs, & deambulationi. Et Iudeos imitantur Christiani, quando ignorantibus Sabbathum cordis, in sola abstinentia ab operibus, & labore manuum sanctificationem festorum constituunt; hæc enim oportet facere, & alia grauiora non omittere, hoc est, sanctificandis sunt dies festi abstinendo ab operibus seruilibus, sed otium illud ponendum est in considerandis operibus Dei, ex qua consideratione accenditur amor diuinus, & fit in corde quies, & tranquillitas ineffabilis, quæ dicitur Sabbathum cordis, Sabbathum vere delicatum, & sanctum.



## EXPLICATIO PSAL. XCI.

I. **B**onum est confiteri Domino, & psallere nomini tuo altissime:

Hæc est exhortatio ad laudandum Deum, & psalterio, & voce Bonum, inquit, est confiteri Domino, id est, iustum; utile, delectabile, & honorificum est confiteri Domino confessionem laudis; iustum, quia debitum, utile, quia meritorium, delectabile, quia dulce est amanti laudare dilectum, honorificum, quia munus est quasi proprium cælestium potestatum. Et Psallere nomini tuo altissime, id est, non solum bonum est confiteri corde, & lingua; sed etiam instrumentis musicis, quale in primis psalterium est, laudes personare nomini tuo, id est, gloriæ tuæ ô altissime.

II. Ad annuncian- dum mane misericordiam tuam, & veritatem tuam per noctem.

Hæc est materia confessionis, de qua dictum est, bonum est confiteri. Bonum igitur est confiteri, ad annuncian- dum mane misericordiam tuam, id est, ut annuncietur & prædicetur omnibus misericordia tua, qua mundum creasti, & veritas, siue iustitia qua mundum gubernas: & quoniam opus misericordiæ manifestum est, annuncietur de die, quis enim ignorat, cælum, & terram & quicquid in eis est à Deo fuisse condita ex misericordia, & bonitate, non ex necessitate, vel debito: quia vero opus iustitiæ occultum est; cum arcano Dei iudicio sæpe iusti affligantur, & iniqui exultentur, ideo hoc opus annuncietur per noctem, in obscuro fidei non in luce cognitionis. Item annuncietur mane misericordia, & per noctem iustitia, ut homines in luce prosperitatis gratias agant misericordiæ Dei, & in tenebris tribulationis gratias agant iustitiæ Dei: nam, ut S. Augustinus hoc loco docet, non minus pater amat filios, quando blanditur, quam quando minatur: nec minus grati esse debemus Deo disciplinam correptionis danti

tempore tribulationis, quam beneficia conferenti tempore prosperitatis. Quare imitari debemus hunc eundem Prophetam, qui alibi canit, Benedicam Dominum in omni tempore: semper laus eius in ore meo. Psal. 33.

In decachordo psalterio cum cantico, in cithara.

Explicuit materiam confessionis, de qua dictum erat, Bonum est confiteri Domino: nunc explicat quod adiunxit: & psallere nomini tuo; dicit enim psallendum esse in psalterio, & cithara, sed non sine dulci cantico vocis humanæ. In Hebræo videtur distingui decachordum à psalterio; sic enim vertit S. Hieronymus, in decachordo, & in psalterio; & vere habetur distinctio in Codice Hebraico: sed tamen constat psalterium fuisse instrumentum decem chordarum; sic enim legimus in Psalm. 32. Constitimini Domino in cithara, in Psalterio decem chordarum psallite illi. & in Psalm. 143. In psalterio decachordo psallam tibi; & concordat textus Hebraicus cum Græco, & Latino quare hoc loco ubi dicitur in Hebræo, in decachordo, & in psalterio; vel abundant illæ particula, &, in, & eas Septuaginta in suis libris non inveniunt: vel certe significant non distinctionem, sed explicationem, ac si dictum esset, in decachordo, psalterio inquam, sed res non est magni momenti. Quid spiritualiter significet psalterium & cithara, diximus in explicatione Psal. 32. vers. 2.

IV. Quia delectasti me Domine in factura tua, & in operibus manuum tuarum exultabo.

Incipit nunc prædicare opus creationis, quoad misericordiam pertinet, contemplatus, inquit, pulchritudinem, varietatem, excellentiam, virtutes, utilitates facturæ tuæ cæli, terræ, aquarum, siderum, animalium, plantarum, admirabilem animo voluntatem percepi: sed in his omnibus non ipsa factura tua me delectavit, quoniam non substiti in ea, sed tu me delectasti in fa-



*ura tua*; ex ea enim ascendit animus ad infinitam pulchritudinem tuam considerandam, & in amorem tantæ pulchritudinis raptus cœpi vehementius admirari & delectari; ac propterea iugiter *exultabo*, & exultans laudabo te in operibus tuis. Nota diligenter, non dixisse Prophetam, *delectauit me factura tua*; sed, *delectasti me in factura tua*: quando enim sistimus in delectatione creaturarum, sunt creaturæ muscipulæ pedibus insipientium, quomodo facta est Bethsabee pulchritudo muscipula pedibus eiusdem Prophetæ, quando eam videns in ea delectari voluit. Nota præterea, pro voce, *exultabo*, in Hebræo esse, *arannem*, quod significat, *exclamabo*, quare, *exultabo*, exponendum est præ lætitiâ & admiratione exultans cantabo laudes tuas magna voce cordis & corporis.

*Quam magnificata sunt opera tua Domine, nimis profunda facta sunt cogitationes tue.*

Quia dixerat, se valde delectatum esse in operibus Domini; ne quis existimaret, cum plane comprehendisse, ac penitus inspersisse omnem excellentiam operum Domini; addit opera Domini maiora, & sapientiam, per quam facta sunt, profundiorum esse, quam ut ad eorum perfectam cognitionem peruenire in hac vita possimus. *Quam magnificata*, inquit, *sunt opera tua Domine*, id est, admiror magnitudinem & excellentiam operum tuorum: non comprehendo animo vel cognitione tantam magnitudinem; vere enim dixit Ecclesiasticus c. i. *Arenam maris, & pluuia guttas, & dies speculi quis dinumerauit? Altitudinem cœli, & latitudinem terræ, & profundum abyssi quis dimensus est?* Sed hæc licet magna sint valde, tamen sine comparatione maior est sapientia opificis, de qua subiungit Ecclesiasticus, *sapientiam Dei præcedentem omnia, quis inuestigauit?* & David hoc loco, *nimis profunda facta sunt cogitationes tue*, id est, sapientissimæ illæ cogitationes, quibus adinuenisti res tam mirabiles & tam perfectas, quibus nihil addi vel detrahi potest, tam sunt occultæ, ut omnem intelli-

gentiam superent. Ac ut in rebus minimis & vulgaribus exemplum ponamus: quis capiat quomodo in exiguo semine lateat tanta proceritas arboris, varietas ramorum, viriditas frondium, decor florum, utilitas fructuum, & ipsum etiam semen ad speciem propagandam? quis comprehendat, qua arte Dominus in minimis animalculis inseruerit vitam, & sensum, & motum? & præterea in formicis prudentiam, astutiam in araneis, in culicibus & pulicibus tantam vim fodiendi instrumento tam fragili?

*Vir insipiens non cognoscet, & stultus non intelliget hæc.*

Concludit hanc partem Psalmi, quæ ad creationem rerum pertinet, affirmans non esse hominum insipientium, sed sapientium cognoscere, quam sint magna & inscrutabilia opera Domini. Stulti enim non cogitant in rebus creatis nisi voluptatem vel utilitatem, quam ex illis capiunt: quod illis commune est cum iumentis insipientibus, quæ neque intelligentiam habent, neque ignorantiam suam norunt. Sapientes autem tametsi non assequantur magnitudinem operum Dei, tamen intelligunt ea se assequi non posse, & ignorantiam suam intelligunt, & quo perfectius ignorantiam suam intelligunt, eo magis admirantur opera Dei, & ad veram sapientiam propinquant. *Vir*, inquit, *insipiens non cognoscet*, quam videlicet magnificata sint opera Domini, & *stultus non intelliget*, quam profunda factæ sint cogitationes eius; hæc enim docta ignorantia sapientium tantum est.

*Cum exorti fuerint peccatores sicut fœnum: & apparuerint omnes, qui operantur iniquitatem.*

Transit nunc Propheta ad opus gubernationis & providentiæ diuinæ, in qua præcipue iustitia, siue veritas elucet. In hoc autem summa providentiæ consistit, quod impij ad tempus florere permittuntur, ut æterna ariditate damnentur: iusti contra, ad tempus ariditate mulcantur, ut in æternum floreat.



יצי צי

Cum exorti fuerint peccatores sicut fœnum, id est, cum repente & in magna copia germinauerint & creuerint peccatores, ut solet fœnum, quod statim & multum crescit. Et apparuerint omnes, qui operantur iniquitatem, id est, cum non solum germinauerint, sed etiam floruerint, ut sonat vox Hebraica, *valet si* *ests*, & valde conspicui apparuerint, in sublimitate videlicet positi, & in diuitiis abundantes.

VIII.

*Vt intereant in sæculum sæculi, tu autem altissimus in æternum Domine.*

Pendet sententia versiculi superioris ab hoc versiculo; & subintelligitur aliquid, ut, *hoc fiet*, vel, hoc diuina prouidentia permittet, *ut intereant in sæculum sæculi*, id est, ideo dabit iniquis Deus prosperitatem temporalem, ut remunerentur aliqua bona opera eorum, & propter scelera sua iuste puniantur morte sempiterna. *Tu autem altissimus in æternum Domine*, id est, tu Domine valde dissimilis es iniquis; quoniam illi ad breue tempus emergunt ad aliquam altitudinem, tu autem in æternum altissimus es.

IX.

*Quoniam ecce inimici tui Domine, quoniam ecce inimici tui peribunt, & dispergentur omnes, qui operantur iniquitatem.*

Probat iniquos ad tempus solum, id est, breue prosperandos. *Ecce, inquit, inimici tui, ecce, inquam, inimici tui peribunt.* Illud, *ecce*, significat repentinam mutationem; quasi dicat, *Qui virebant & florebant, subito peribunt.* Illa vero repetitio, *Ecce inimici tui, ecce inimici tui*, auget execrationem; quemadmodum è contrario illud Psal. II. 5. *O Domine ego seruus tuus, ego seruus tuus, & filius ancillæ tuæ*, auget pietatis affectum. Vere enim valde execrandus est, qui ut amicus sit huius Mundi, non timet inimicus Dei constitui: sic enim scribit S. Iacobus in 4. cap. epistolæ suæ: *Quicumque voluerit amicus esse sæculi huius, inimicus Dei constituitur.* Quanta autem peruersitas est propter amicitiam rei

creatae continere amicitiam Creatoris? *Et dispergentur omnes, qui operantur iniquitatem.* Hæc posterior pars versiculi est repetitio & declaratio prioris. Quos enim vocauit inimicos Dei, nunc vocat operantes iniquitatem: & quos dixit perituros, nunc dicit dispergendos: nam hoc ipso fiunt homines inimici Dei, quod contrarij esse incipiunt voluntati eius, quæ nobis per legem diuinam declarata est. Illi autem contrarij sunt legi Dei, qui operantur iniquitatem. Lex enim Dei rectissima est, & rectitudinis regula: iniquitas autem curuius est, & recessus à regula. Porro dispergendi dicuntur impij ad similitudinem aridi fœni, cui paulo ante comparati sunt. Sicut enim fœnum aridum à vento ita raptatur & dispergitur, ut non amplius compareat, sic impij ubi modicum creuerint & floruerint, volente Deo exciduntur, & de terra tolluntur, ut etiam memoria eorum pereat.

*Et exaltabitur sicut Vnicornis cornu meum, & senectus mea in misericordia vberi.*

Opponit nunc iustos impijs, atque ostendit, eos tandem à diuina prouidentia & iustitia vere exaltandos; loquitur autem in persona sua, bene sperans de se, quod videlicet sit ipse vnus de numero iustorum. *Et exaltabitur sicut Vnicornis cornu meum*, id est, cornu meum, potentia videlicet, & gloria, ac felicitas mea crescit in altum, non sicut fragile fœnum, sed ut cornu Vnicornis; Vnicornis enim animal est gerens in fronte cornu vnicum, sed excelsum & robustum valde. *Et senectus mea in misericordia vberi*, id est, non solum potentia mea, & gloria, ac felicitas magna erit, sed etiam diuturna & constans vsque ad vltimam senectutem: nam & senectus mea erit in abundanti misericordia apud Deum. S. Augustinus mystice per senectutem intelligit vitam futuri sæculi, quæ erit post hanc vitam temporalem, sicut senectus est post iuuentutem. Vere enim vita futura sanctorum erit in misericordia vberi, tollente omnem ab eis miseriam: & erit similis senectuti ob maturitatem iudicij, & vacuitate



tem passionum, & habebit caput ab omni parte candidum, ubi ne vnus quidem capillus niger, id est, nulla cogitatio, nulla cupiditas, nulla voluntas terra inueniri poterit.

**102** In Hebræo pro, *miseriordia*, habetur, *scemen*, oleo, & *senectus mea in oleo vberi*. In Græco quoque legitur, *iv ilaiw*, id est, *in oleo*. Sed noster Interpres videtur legisse, *iv ilaiw*, in *miseriordia*. Dicitur autem senectus in oleo vberi, quando abundat humore, qui facit eam esse diuturnam: quia vero per oleum *miseriordia* intelligitur, recte Interpres verit, in *miseriordia vberi*, etiam si forte legerit, *in oleo*.

**XI.** Et despexit oculus meus inimicos meos, & in insurgentibus in me malignantibus audiet auris mea.

Adiungit iustus ad felicitatem suam, quod non timebit amplius inimicos suos. Et despexit oculus meus inimicos meos, id est, vidi & contempsi præsentis inimicos, quoniam diuina providentia fecit, ut mihi nocere non possent. Et in insurgentibus in me malignantibus audiet auris mea, id est, & quantum ad inimicos absentes, qui maligni cum sint, in me insurgere cogitant, audiet auris mea nuncium interitus eorum. In Hebræo pro, *despexit*, est, *respexit*, sed idem est sensus: significatur enim eo verbo, quod iustus aspexit libere & sine timore inimicos suos. Qui enim timent vim inimicorum, non audent eos aspicere, sed oculos demittunt & fugiunt; qui vero eos contemnit, libere illos intuetur: & eodem modo possit exponi quod sequitur, videlicet quod iustus sine timore audiet aggressionem malignantium in se futuram, quoniam non dubitat de victoria.

**XII.** Iustus vt palma florebit, sicut Cedrus Libani multiplicabitur.

Quod de se Propheta dixerat, transfert nunc ad alios iustos, quos eleganti similitudine comparat Palmæ & Cedro, vt opponat iniquis, quos comparauerat fœno. Nam fœnum mane floret, vespere arefcit, & nullo negotio secatur à mellioribus, vel à vento dis-

pergitur, & ad nihil vtile est nisi ad ignem. Palma vero stabilis est, & longo tempore florens, & fructus conferuat: sicut etiam Cedrus Libani celsissima & robustissima est, & ex ea ornantur palatia & laquearia Regum: sic impij breuissimo tempore virent & florent, & paulo post in clibanum gehennæ mittuntur. Iusti vero instar Palmæ in æternum virebunt & efflorescent, & fructus dulcissimos adferent; nec facile succumbent oneribus, sed virtute omnia superabunt: nec non vt Cedri Libani multiplicabuntur, id est, augebuntur & crescent in maximam alitudinem, multiplicatis ramis bonorum operum, & similibus radicibus perseverantiæ innixi nullo tentationum vento deicientur: & tandem viles erunt instar ligni cedrini ad ornanda laquearia Regis Regum in cœlesti Hierusalem.

**XIII.** Plantati in domo Domini, in atrijs domus Dei nostri florebut.

Reddit rationem, cur iusti instar Palmarum & Cedrorum sint futuri: quoniam non in campis sylvæ, aut in desertis montibus, sed in domo Domini plantati erunt, & in atrijs Dei nostri florebut, id est, in Ecclesia Dei per rectam Fidem plantati, & aquis Sacramentorum & verbi Dei rigati, in charitate fundati & radicati, flores honestatis & fructus bonorum operum parient. Siquidem extra Ecclesiam, & sine fundamento Fidei omnis plantatio eradicabitur, quippe quam non plantauit Pater cœlestis.

**XIV.** Adhuc multiplicabuntur in senectute vberi, & bene patientes erant, vt annuncient.

Quod de se paulo ante dixerat Propheta, quod habiturus esset senectam in misericordia vberi, idem nunc dicit de alijs iustis, quod non solum sint prosperandi in iuuentute & ætate matura, sed etiam senectutem bonam & diuturnam habituri sint. Adhuc, inquit, multiplicabuntur in senectute vberi, id est, præterea iusti multiplicabuntur in diebus vitæ, id est, multiplicabuntur dies vitæ suæ vsq; ad senectutem pinguem humore vitali,



id est, viridem senectam: & bene patientes erunt, id est, in ipsa quoque senectute facile patientes erunt laborum, ob firmam corporis constitutionem. Illud, *vberi*, S. Hieronymus cum Hebræis iungit cum sequentibus sic legens: *Fructificabunt in senectute pingues*

דשנים

& frondentes erunt. Sed vox, *desenim*, quæ significat, *pingues*, potest etiam recte coniungi cum superioribus, ut Septuaginta voluerunt, ut hæc sit translatio ad verbum, *Multiplicabuntur pingues in senecta*, id est, conseruantes pinguedinem vitalis humoris in ipsa senectute, quod est idem cum nostra lectione, *Multiplicabuntur in senecta vberi*. Illud autem,

רעננים

*frondentes*: & vere vox Hebraica, *rahbannim*, significat proprie virentes & florentes, ac per hoc etiam frondentes: sed LXX. Interpretes explicauerunt metaphoram, & vertunt, *ἐπαύριον*, quod significat *homines bene affectos*: Interpres vero Latinus vertit, *bene patientes*, quia magis respexit ad significationem vocis, quam ad proprietatem sermonis: sed sensus semper est idem. Illud, *ut annuncient*, pertinet ad versiculum sequentem.

XV.

Quoniam rectus Dominus Deus noster, & non est iniquitas in eo.

Hæc omnia, inquit, euenient iustis, ut annuncient, & notum faciant omnibus, aut verbo, aut exemplo suo, quod Dominus Deus noster iustus & rectus est, & nulla in eo iniquitas, quoniam etiam ad tempus impios prosperari sinit; tamen suo tempore iustitiz suæ iudicia exercet, remunerando iustos, & puniendo iniquos.

## PSALMVS XCII.

Titulus, & Argumentum Psalmi.

Laus cantici ipsi David in die ante Sabbatum quando fundata est terra.

Titulus huius Psalmi non habetur in Hebraicis codicibus, sed solum in Græcis & Latinis, iisq; non omnibus. Videtur autem, qui

titulum addidit, voluisse Psalmum decantari feria sexta; qua est dies ante Sabbatum, propterea quod in hoc Psalmo narretur, terram à Deo fuisse firmatam, vel, ut alij codices habent, *inhabitata*: quod recte dicitur factum esse feria sexta. Illo enim die formatus est homo dominus terra, ac per hoc tum primum stabilita est terra, quæ propter hominem creata fuerat. Eodem die non solum homo, sed etiam animantia cetera, quæ terram incolunt, creata sunt, proinde illo die primum inhabitari cœpta est terra. Eodem die per Christi passionem & mortem renouata ac reparata est terra, & stabilita in Regnum Christi, deusit ac triumphato Mundi Principe, iuxta illud: Nunc iudicium est mundi, nunc Princeps huius mundi eicietur foras, & ego si exaltatus fuero à terra, omnia traham ad me ipsum, Ioan. 12. Porro Ecclesia Christiana Psalmum hunc canere solet in aurora diei Dominica, ad Laudes; quoniam Christus etsi Regnum acquisierit per Passionem, & fundamenta nouæ terre iecerit feria sexta; tamen possessionem Regni accepit quando resurrexit, & tunc induit decorem & fortitudinem, quod in aurora Dominica diei factum esse credimus.

## EXPLICATIO PSALMI XCII.

Dominus regnauit, decorem indutus est, indutus est Dominus fortitudinem, & pracinxit se.

Hoc principium Psalmi recte potest tum ad creationem, tum ad redemptionem accommodari; neque nouum est, ut sententiæ Scripturæ diuinæ plures habeant sensus literales. Dominus regnauit, idem est, ac si dictum fuisset, Dominus Regnum acquisiuit, siue regnare cœpit. Decorem indutus est, gloriam videlicet & maiestatem Regiam. Indutus est Dominus fortitudinem, id est, non solum gloriam, sed & potentiam ac robur accepit, quod Regiæ maiestati necessarium est. Et pracinxit se, id est, accinxit se ad regnandum & gubernandum. Quod si hæc ad creationem referantur, dicitur Deus regnare cœpisse, quando Mundum creauit, quoniam tunc primum cœpit



pit habere subditos: si referantur ad reparationem, Christus in Resurrectione Regnum accepit, & tunc indutus est decorem gloriosi corporis, & fortitudinem quoque indutus est, quia data est illi omnis potestas in cælo, & in terra, ut deinceps nulli creaturæ subiectus sit, sed omnia habeat sub pedibus suis. Denique præcinxit se ad propagandum Regnum suum per Apostolorum prædicationem usque ad fines terræ.

*Etenim firmavit orbem terræ, qui non commouebitur.*

Regnare coepit Deus ab initio Mundi, quia tunc constituit ab imis fundamentis orbem terræ, & firmavit, ac stabilivit, ut commoueri non possit; ac per hoc præbuit hominibus, qui Deum Regem agnoscere, eique seruire debent, stabilem mansionem. Christus quoque per passionem, & resurrectionem suam orbem terræ, qui varijs motibus à Dæmonibus agitabatur, dum alij alijs Dijs seruiebant, firmavit, ac stabilivit in vna, ac verissima religione, & fide.

*Parata sedes tua ex tunc: à seculo tu es.*

Quamuis, inquit, sedes Regni tui parata sit ex tunc, id est, ex icum creatione: vel ex resurrectione: tu tamen non tunc esse coepisti, sed à seculo, ab æternitate, sine principio es. vbi illud, *es*, non significat simplicem existentiam naturæ diuinæ, sed plenitudinem essendi, in qua omnia continentur: non enim Deus antequam Mundum conderet, pauper erat, aut aliqua re indigebat: neque posteaquam Mundum condidit, ditior aut locupletior factus est. Mundum enim Deus creauit, non ut ipse cresceret, sed ut nobiscum bona sua communicaret. Itaque non coactus aliqua necessitate, sed charitate, & misericordia motus, Mundum creauit, & eadem charitate, & misericordia Mundum reparauit. Sic enim Deus dilexit Mundum, ut filium suum unigenitum daret, ut omnis qui credit in ipsum non pereat, sed habeat vitam æternam. Ioan. 3.

*Eleuauerunt flumina Domine, eleuauerunt flumina vocem suam.*

*Eleuauerunt flumina fluctus suos, à vocibus aquarum multarum.* V.

*Mirabiles elationes maris, mirabilis in altis Dominus.* VI.

Hæc omnia, si ad creationem referantur, ut referri debent iuxta priorem sensum, significant modum, quo Deus terram habitabilem fecit, ut esset firma sedes generis humani, Initio enim creationis, aquæ terram vniuersam operiebant, & magno motu inundationes aquarum eleuabantur; sed Deus altior, & excelsior, & in infinitum potentior inceptuit, & compescuit aquas, easque in cauernas terræ conclusit, eisque præcepit, ut non reuerterentur operire terram. Hoc dicitur clarius in Psal. 103. *Qui fundasti terram super stabilitatem suam, non inclinabitur in seculum seculi, Abyssus, sicut vestimentum amictus eius, super montes stabunt aquæ*, id est, ita initio terra formata est, ut abyssus aquarum illam vndique tegetet, ita ut super ipsos montes starent aquæ. *Ab increpatione tua fugient, à voce tonitru tui formidabunt*, id est, sed tu Deus omnipotens increpasti aquas, & quasi tonitru imperij tunc illas ita turbasti, ut fugerent, & absconderent se intra profunda loca terræ. *Terminum posuisti, quem non transgredientur, neque conuertentur operire terram.* Eadem descriptio habetur in lib. Iob cap. 38. sed hic breuissimè Prophetæ hæc omnia illis verbis complexus est. *Mirabiles elationes maris, mirabilis in altis Dominus*, id est, omnes aquæ maris, atque omnis abyssus aquarum magno stremitu eleuabuntur super terram; sed mirabilis Deus in excelsis habitans, & omni altitudine superior aquas compescuit, & terram habitabilem reddidit. Sed quo ad sensum posteriorem, describitur hoc loco magnitudo persecutionum Iudæorum, & Paganorum aduersus Christi Regnum in Resurrectione inchoatum, & victoria Christi de omnibus hostibus suis. *Eleuauerunt, inquit, flumina voces suas, & fluctus suos*: Per flumina intelligo persecutiones Iudæorum, qui continuo coeperunt eleuare voces suas aduersus Euangelium, illique vbique contradicere.

Zzz Mira



*Mirabiles elationes maris*: per mare, quod fluminibus multò est maius, intelligo persecutiones Neronis, Domitiani, aliorumque Principum Romanorum. *Mirabilis in altis Dominus*, id est, sed Dominus in altis habitans mirabilior apparuit, cum de omnibus persecutoribus victoriam reportauerit, & inuitis omnibus, Regnum suum per omnes terras propagauerit. S. Augustinus per *flumina* intelligit Apostolos, qui pleni Spiritu sancto tanquam caelestia flumina per Mundum discurrebant, & voces prædicando liberrimè eleuabant. Per *maru elationes*, intelligit infidelium persecutiones: quemadmodum enim cum flumina intrant in mare, aquæ illæ falsæ ad introitum aquarum dulcium intumescunt, & fremunt; sic infideles ad prædicationem Apostolorum tanquam contrariam doctrinæ, & moribus ipsorum fremere, & tumultuari cœperunt. Vtraque expositio optima est.

VII.

*Testimonia tua credibilia facta sunt nimis; domum tuam decet sanctitudo Domine in longitudine dierum.*

Quantum attinet ad sensum priorem, respondet Propheta tacitæ obiectioni, quæ occurrere poterat: vnde videlicet sciamus ea, quæ dicta sunt de foundatione terræ, de abyssu aquarum, & reductione aquæ in loca humiliora, quibus rebus nullus testis adfuit, cum præcesserint hominum omnium creationem. Respondet igitur Propheta, id habere ex testimonio Dei, qui hæc reuelauit seruo suo Moyse: & testimonium illud valde credibile esse, cum Moyse multis signis, & prodigijs, alijsq; modis seruum Dei fidelem, & Prophetam verum se esse probauerit. Idem dici potest de sensu posteriore; *testimonia enim Christi per Apostolos ad nos delata credibilia facta sunt nimis*, tum ob signa, & prodigia Christi, & Apostolorum; tum quia videmus impleta, quæ prædicta sunt; tum ob infinita alia, quæ fidem Christianam omnino credibilem faciunt, ut nemo possit, posteaquam prædicatores audierit, sine magna temeritate non credere. Ex quibus concludit Propheta, domum Dei, id

est, Ecclesiam Dei, in qua talia testimonia continentur, & prædicantur, debere sanctam, & inuiolabilem conservari usque ad Mundi consummationem. *Domum tuam*, inquit, *decet sanctitudo*, id est, decet, ut eam omnes ut sanctam venerentur: item decet, ut qui in illa sunt, sancti sint, & moribus sanctis respondeant sanctitati doctrinæ testimoniorum tuorum: Denique decet, *ut à te Domine inuiolata, & sancta conservetur in longitudine dierum, ut porta inferi nunquam præualeant aduersus eam.*

## PSALMVS XCIII.

Titulus, &amp; Argumentum.

Psalmus ipsi David, quarta Sabbati.

**I**N Hebræo nullus est titulus Legunt tamen hunc titulum, tanquam olim vel à Septuaginta, vel ab alijs adiectum, sanctus Hieronymus, S. Augustinus, Theodoretus, Euthymius, & alij omnes: habetur enim in Græcis, & Latinis codicibus. Illud, quarta Sabbati, significat, cantari solitum ab Hebræis, quarta die post Sabbatum, id est, in medio hebdomadae. Reprehendit occasione huius nominis sanctus Augustinus homines Christianos, qui ex antiqua paganorum consuetudine diem quartam vocant diem Mercurij, ut etiam diem tertiam, diem Martis; diem quintam, diem Iouis; diem sextam, diem Veneris; & diem Sabbati, diem Saturni: cum deberent Christiano more dicere, secundam feriam, tertiam feriam, &c. quamvis enim illa sint nomina stellarum: tamen apud Paganos stelle illa à certis hominibus nomina acceperunt, quos homines benevolentia populorum Deos fecit, & in calum transtulit. Argumentum huius Psalmi est providentia Dei punientis tandem malos, & remunerantis bonos, quamvis aliquamdiu iusto iudicio sinat prosperari malos, & opprimi bonos.

## EXPLICATIO PSAL. XCIII.

**D**eus ultionum Dominus: Deus ultionum liberè egit.

Ponit initio David propositionem vnam, ex qua



ex qua possent omnes, si vellent, plane cognoscere nullos malos impunitos fore. Propositio hæc est, Dominus Deus, Iudex summus, iustissimus, & potentissimus est, ut ei nemo resistere possit. Nam vindicta ad Iudicem pertinet, & ideo priuatis hominibus prohibetur. Rom. 12. *Non vos defendentes, id est, vindicantes, charissimi, sed date locum ira: scriptum est enim, Mihi vindicta, & ego retribuam.* Et quamuis ad omnes Iudices pertineat vindicta scelerum; tamen absolute dicitur vindicta Dei esse, quia ipse supremus Iudex est, & vindictam sumet de omnibus sceleribus, non solum populorum, sed etiam Iudicum, Principum, & Regum omnium. At igitur, *Deus ultionum Dominus*, id est, Dominus noster, qui proprie solus Dominus est, cui omnia seruiunt in celo, & in terra: hic, inquam, Dominus, est Deus ultionum, id est, summus Iudex, ad quem ultio scelerum omnium pertinet. *Deus ultionum liberè egit* quodcumque; punire voluit peccatores; quia neminem timet, nullius personam accipit, nemo illum impedire, nemo ei resistere potest. Id patuit in deiectione Diaboli, & Angelorum eius de celo; in diluuiio quo genus humanum extinxit, exceptis paucis, quos ipse saluos esse voluit; in incendio Sodomæ, & Gomorræ; in demersione Pharaonis in mari rubro; in alijs iudicijs eius permixtis. Quod attinet ad verba, vox *Deus*, in Hebræo est, *El*, quod significat Deum, ut fortem, & robustum, & rectè coniungitur cum ultione, ut significetur, Deum esse fortissimum vltorem scelerum. Vox ultionum, vel ponitur loco superlatiui, quo modo Deus scientiarum, id est, scientissimus; Deus misericordiarum, id est, misericordissimus: vel significat, Deum esse auctorem ultionum, quo modo ab Apostolo dicitur Deus pacis, Deus spei, Deus salutis. Verè enim Deus, ultionum Deus est, quia non solum ipse per se iudicando vltiscitur scelera, sed etiam per creaturas suas, innumerabilibus, & occultissimis modis ultionum causa est: nam & peccatum sæpè ex diuino iudicio est pœna peccati, & ea quæ maxime homines aliquando appetunt, & quarunt,

Deus facit, ut pœnalia ipsis reddantur. Illud, *liberè egit*: in Hebræo est, *hophiag*, quod S. Hieronymus vertit in imperatio, ostendere: sed potest etiam verti, ostensus est, siue apparuit, spanduit, illuxit: quod est idem cum illo, *liberè egit*: nam qui timet, tenebras quatit: sed qui nihil timet, & liberè ultionem facit; palam, & apertè illam facit. Itaque sensus est, Deus ultionum auctor apparuit, siue ultionem scelerum liberrimè, & in luce coram omnibus fecit. Potest etiam fieri ut Septuaginta non legerint, *hophiag*, sed *hophiach*, vltima litera mutata. Hanc enim vocem habemus in Psal. 11. vers. 6. sed in futuro: & Septuaginta verterunt, *παρρησιασται*, fiducialiter agam, & poterat etiam Latine reddi *liberè agam*. Nam hoc loco habemus in Græco idem verbum, sed in præterito *παρρησιασται*, & noster Interpres vertit, *liberè egit*.

*Exaltare qui iudicas terram, redde retributionem superbis.*

Quia dixit, Dominum esse vltorem scelerum: precatur nunc consequenter; ut officio suo fungatur, & puniendo impios claudat ora eorum, qui prouidentiam eius in dubium reuocant. *Exaltare*, inquit, *qui iudicas terram*, id est, *ascende solium tuum, qui Iudex es vniuersæ terræ*; & *redde retributionem superbis*, id est, profer sententiam damnationis in homines superbos, & hoc modo vindictam sume de præcipuo scelere generis humani. Superbia enim est Regina vitiorum & ea debellata, vniuersitas vitiorum debellata erit. Nominat quoque Psalmus superbos, quoniam illi soli tandem puniuntur in iudicio, qui noluerunt humiliari ad pœnitentiam: omnes enim peccauerunt, & egent gloria Dei: sed qui humiliantur sub potenti manu Dei, & cor contritum & humiliatum gerunt, saluantur: qui ceruicem erigunt, & peccata sua defendunt, retributionem vindictæ accipient.

*Vsquequo peccatores Domine, vsquequo peccatores gloriabuntur.*

222 2

Effa-

הועות

הועות  
הופה

II.

III.



IV.

*Effabuntur, & loquentur iniquitatem, loquentur omnes, qui operantur iniustitiam.*

Reddit causam, cur petat iudicium in impios superbos: & causa est, quia nimium diu iam videtur superbia, & impietas eorum durasse. Sed precatio ista Prophetæ, prædictio est per modum precationis; ad consolationem enim iustorum afflictorum, prædicat sanctus Propheta, breui futurum, ut superbi, atque impij dispareant, quamuis in præfenti tempore diuturna videatur eorum potentia. *Vsquequo peccatores gloriabuntur de viribus suis, de prosperitate sua, de sceleribus suis? Effabuntur, & loquentur iniquitatem*, id est, iactabunt; & prædicabunt iniusta opera sua. *Loquentur omnes, qui operantur iniustitiam*, id est, liberè, & sine timore villo loquentur de rebus suis gestis, vel gerendis homines impij, qui operantur iniustitiam. Illud, *effabuntur*, in Hebræo habet maiorem vim: significat enim fundent sermonem, siue diffuent eloquio, quasi dicat, ex abundantia cordis fluat in eis abundantia verborum; itaq; rectè S. Hieronymus vertit, *garrient*. Pro voce, iniquitatem, cum dicitur, loquentur iniquitatem, in Hebræo est, *hatac*, quod verus, & durum significat. Sed Septuaginta non solum hoc loco, sed etiam in Psal. 74. vers. 6. verterunt hanc vocem, iniquitatem: *Nolite loqui aduersus Deum iniquitatem*. Quare, vel hæc vox, *iniquitatem* etiam significat, vel Septuaginta explicare voluerunt vocem Hebraicam: verè enim nihil est durius iniquitate, quæ facit cor lapideum ex carneo: nec malè dicitur iniquitas antiqua, quia hominem ex nouo veterè fecit, mortique addixit, quia quod antiquatur, & senescit, prope interitum est, ad Hebr. 8.

V.

VI.

*Populum tuum Domine humiliauerunt, & hereditatem tuam vexauerunt. Viduam, & aduenam interfecerunt, & pupillos occiderunt.*

Explicat iniustitiam, quam operantur impij, dum furere permittuntur. *Populum*,

*inquit, tuum humiliauerunt*, id est, cœtum piorum, qui propriè populus tuus est à te electus, & segregatus, & tibi vni dedicatus, humiliauerunt affligentes, & persequentes. *Et hereditatem tuam vexauerunt*, id est, eundem cœtum piorum, quem tuam possessionem, & hereditatem esse voluisti, vexauerunt iniuste opprimentes. Nec solum populum in commune vexauerunt, sed in personas miserabiles, & omni auxilio destitutas furem suum præcipuè effuderunt: occiderunt enim viduas maritorum solatio destitutas: & aduenas, qui procul à patria inter ignotos versantur: & pupillos, qui parentibus, dum adhuc auxilio eorum indigerent, orbatii sunt. In Græcis libris legitur, *Viduam, & pupillum occiderunt; & aduenam interfecerunt*, sed nostra lectio conformis est Hebræico textui & sensus est idem.

*Et dixerunt, non videbit Dominus, nec intell. get Deus Iacob.*

Reddit rationem cur iniqui tam audacter peccent; quia videlicet, ita stulti sunt, ut existiment Deum non habere prouidentiam rerum humanarum, & nullum esse Iudicem, cui rationem operum suorum reddere teneantur. *Et dixerunt*, id est, quia dixerunt apud se, *Non videbit Dominus, nec intelliget Deus Iacob*, id est, neque sensu videndi, aut audiendi cognosceret opera nostra; neq; mentis intelligentia illa considerabit, vel examinabit. Et quidem possent hæc intelligi hoc sensu, ut iniqui existiment Deum quidem posse, si velit, videre, & intelligere opera nostra; sed ea non curare, neque ad ea attendere: tamen verba sequentia cogunt, ut dicamus iniquos in tantam cæcitatem animi aliquando deuenire, ut confidentissimè peccet, ac si existimarent, Deum neq; videre, neque audire, neque intelligere. Sequitur enim,

*Intelligite insipientes in populo, & stulti aliquando sapite.*

*Qui plantauit aurem, non audiet? aut qui sinxit oculum; non considerat?*

*Qui corripit gentes, non arguet, qui docet hominem scientiam.*

Illud

VII

VIII

IX

X



Illud, *qui plantauit aurem, non audiet? aut qui finxit oculum, non considerat?* est refutatio eius, quod supra dictum est: *Non videbit Dominus*; vbi videre positum est, pro cognoscere sensu exteriori, per aures videlicet, aut per oculos. Probat autem Propheta, Deum audire & videre, quia ipse dedit hominibus aures quibus audiunt, & oculos quibus vident: proinde multo magis ipse audit & videt: nemo enim dare potest, quod non habet. Quod autem sequitur: *Qui corripit gentes, non arguet? qui docet hominem scientiam?* est refutatio eius, quod impij dixerant: *Nec intelliget Deus Iacob*. Probat autem Propheta, Deum intelligere, ac per hoc mente & intelligentia præditum esse, quia ipse auctor est hominibus, vt intelligant: ipse enim eos erudit, ipse docet, dum in creatione dat eis mentem rationis capacem, & intelligentiæ lumen infundit. Quod attinet ad verba, illud, *insipientes in populo*, significat iniquos esse homines insipientiores toto reliquo populo: quod verissimum est, cum falsa bona veris anteponan, & temporaria sempiternis. Illud autem, *qui plantauit aurem*, est insignis metaphora, significans sensum audiendi, vt etiam alios sensus non nasci ex corpore tereno, sed plantari à Deo: quemadmodum arbores non oriuntur à terra, vi ipsius terræ, quæ inanima est, sed plantantur ab hominibus in terra, & in ipsa terra crescunt. Itaque aures accipiuntur hoc loco non pro solo organo, sed pro organo, & sensu audiendi, qui in eo insertus est. Quod sequitur, *non audiet?* non significat, Deum habere sensum audiendi corporalem, sed Deum cognoscere per suam essentiam, quæ nos per sensum audiendi cognoscimus; ideo enim non dixit: *Qui plantauit aurem, non habet aures?* sed, *Qui plantauit aurem, non audiet?* Illud, *qui finxit oculum*, est alia metaphora, per quam intelligimus, mirabilem structuram oculi, & mirabiliorem vim, quæ in ipso viget ad res videndas, à Deo factam esse ea facilitate qua figulus vas quodcumque fingere solet. Illud, *non considerat*, poterat etiam verti, *non videt*, hoc enim significat vox Hebraica, *iabbat*, sed LXX. Interpretes maluerunt vertere,

*non considerat*, vt intelligeremus, Deum non videre oculis carneis, sed mente considerare. Illud, *qui corripit gentes*, potuisset etiam verti, *qui erudit gentes*: nam hanc significationem optime patitur verbum Hebraicum & Græcum. Recte tamen noster Interpres vertit: *Qui corripit gentes*, quia sequitur, *non arguet?* sensus est, *Qui corripit omnes gentes*, dum per sinderesim in eorum animis insertam, eos admonet, vt à malo desistant; sæpe etiam manifesta ultione peccata eorum punit: non arguet etiam populum suum, castigans eum per verba Prophetarum, vel etiam per flagella tribulationum? & si Deus corripit & arguit, certe intelligit & cognoscit, quæ ab hominibus aguntur; & falso dicunt impij: *Non intelliget Deus Iacob*.

*Dominus scit cogitationes hominum, quoniam vana sunt.*

XI.

Posteaquam refutauit Propheta verba illa iniquorum: *Non videbit Dominus, nec intelliget Deus Iacob*; addit hanc calumniam impiorum Deo non esse nouam; ipse enim *scit cogitationes hominum*, quod *vana sint*. Homo enim post corruptam naturam peccato primi hominis, vanus factus est, & similis iumentis insipientibus, quæ non cogitant, nisi præsentia. Quare admonemur hoc versiculo; non de nobis præsumere, sed humili prece à Deo sapientiam petere. *Vani enim sunt omnes homines, in quibus non subest scientia Dei*, Sap. 13. & ideo monet S. Iacobus cap. 1. *Si quis indiget sapientia, postulet à Deo, qui dat omnibus affluenter, & non impropere*, id est, nunquam exprobrat importunitatem, quasi nimium sæpe, & nimis multa petamus. Diues enim est in misericordia, & vsque adeo liberalis & magnificus, vt non solum libenter tribuat quæ postulamus, sed etiam mercedem reddat, quia postulamus: *Ora Patrem tuum in abscondito*, & *Pater tuus, qui videt in abscondito, reddet tibi*, Matth. 6.

*Beatus homo, quem tu erudieris Domine, & de lege tua docueris eum.*

XII.

Z z z 3

Hos



Hoc sequitur ex versiculo superiore: nam sic cogitationes hominum vanę sunt, quas nimirum ex se habent; certe sequitur, ut ille solus beatus sit, id est, non vanus, seu inani vento distentus, sed plenus veris & solidis bonis, quem Deus erudiri dignatur, id est, cui Deus oculos aperit ad ea, quę vere bona sunt, aspicienda; atque ut ad ea perueniat, de lege sua docet eum, id est, intime illis persuadet, obedientiam legis diuinę toto affectu mentis amplectendam esse: non enim dicit proprie legem Dei, qui solum nouit, quę sint, & quot legis Diuinę pręcepta; sed qui per diuinam illustrationem & charitatis infusionem ita affectus est erga legem Dei, ut libentissime illam impleat amore iustitię, non timore pęnę, & sit illi eadem ipsa lex iugum suauis & onus leue. Illud, *de lege tua*, in Gręco est, *ex lege tua*: ex Hebręo posset verti, *ā lege tua*, siue, *ex lege tua*, siue, *de lege tua*. Sensus igitur est, Beatus est, quem tu, Deus, docueris ex lege tua, quasi dicat, ex libro tuo: ut non solum Deus sit Doctor, sed ex libro suo doceat, librum legis suę ipse explanet, & illam ipsam legem obseruandam esse ei, qui vere beatus esse velit, intus per gratiam loquendo persua-deat.

XIII.

*Ut mitiges ei ā diebus malis, donec fodiatur peccatori fouea.*

Subiungit Propheta vnum ex fructibus doctrinę diuinę, qui est, ut homo doctus ā Deo moderatius ferat persecutiones impiorum, donec adueniat impiorum ruina. *Ut mitiges ei ā diebus malis*, id est, ad hoc utilis erit doctrina tua diuina homini iusto, ut mitiges ei tristitiam, quę oritur ā diebus malis, ā tempore videlicet persecutionis & tribulationis, & quamdiu mitigatione ista opus erit? *donec fodiatur peccatori fouea*, id est, donec perficiatur effossio foueę, in quam deiicienti sunt impij: tunc enim cessabit mitigatio doloris, quia nulli erunt, qui dolore afficiant iustos, cum omnis dolor fugiet ā iustis, & reciderit in iniustos. Notandum est hoc loco, delectationem legis & gaudium spirituale,

quo fruuntur in hac vita iusti, non esse purum & simplex, ut erit in patria cęlesti, sed admixtum tristitię: mitigatur enim hic nobis tristitia, sed non tollitur omnino. Audi Apostolum, 2. Cor. 1. *Sicut abundante passionibus Christi in nobis, ita & per Christum abundat consolatio nostra*: & cap. 6. *Quasi tristes, semper autem gaudentes*: vbi non dicit, *tristes absolute*, sed *quasi tristes*, quia gaudium superabundat, ut dicitur cap. 7. *Repletus sum consolatione, superabundo gaudio in omni tribulatione nostra*. Notandum pręterea, eodem tempore texti coronam iustis, & fodi foueam impiis: & non esse mirandum, si non statim impij puniantur, quoniam nondum est fouea eorum plane effossa: quemadmodum nec mirandum est, si non statim iusti coronentur, quia nondum finita est coronę ipsorum textura. Sed hoc vere mirandum est, quod fœlicitas & exaltatio impiorum sit effossio foueę ipsorum; & quo altius euehuntur, eo profundius fouea fodiatur. Impij enim quo magis exaltantur, eo magis superbiunt, & hoc ipso coram Deo profundius cadunt, iuxta illud: *Deiecisti eos, dum alienarentur*.

*Quia non repellet Dominus plebem suam: & hereditatem suam non derelinquet.*

Reddit rationem, cur dixerit: *Donec fodiatur peccatori fouea*. Pręparatur enim interitus peccatoribus ā prouidentia diuina, quoniam Dominus non repellet plebem suam; quamuis ei videatur ad tempus irasci, & affligi eam sinat. Atque idem aliis verbis repetit, dicens: *Et hereditatem suam non derelinquet*. Vocatur autem plebs & hereditas Dei cętus piorum electorum. Illi enim vere sunt populus Israel electus in hereditatem.

*Quoadusque iniustitia conuertatur in iudicium, & qui iuxta illam, omnes qui re-  
cti sunt corde,*

Declarat Propheta, cętum iustorum non repellendum, nec derelinquendum ā Deo vsque



que ad diem vltimi Iudicij, id est, quamdiu versamur in periculis tentationum. Quoad-  
usq, inquit, iustitia conuertatur in iudicium,  
id est, vsque ad illum diem, in quo iustitia di-  
uina, quæ nunc videtur esse quasi in habitu,  
vel in potentia, dum non punit impios, nec  
remuneratur pios, prodibit in actum iudicij,  
& quæ erat iustitia quasi habitualis, fiet iu-  
stitia actualis, reddens omnibus pro meritis  
siue coronam iustitiæ, siue stipendium mor-  
tis æternæ. Et qui iuxta illam, omnes qui re-  
cti sunt corde, id est, & tunc iuxta diuinam  
iustitiam, quæ in nubibus admirabilis appa-  
rebit, qui proximi sedebant, erunt omnes e-  
ius amatores, qui eam non timebunt, sed di-  
ligent, cum sint recti corde, id est, confor-  
mes rectitudini eius, ac per hoc iusti. S. Hieronymus ex Hebræo vertit: Quoniam ad iu-  
stitiam reuertetur iudicium, id est, iudicium,  
quod nunc sæpe iniustum esse perspicitur,  
tunc reuertetur ad iustitiam, id est, iustissi-  
mum erit, quia tunc non iudicabunt am-  
plius homines mortales, sed iudicabit Chri-  
stus Iudex supremus & iustissimus, qui om-  
nia iudicia iniusta retractabit & irritabit,  
& vltimum iudicium cum exactissima iusti-  
tia copulabit. Hic sensus verus est, neque  
à superiore dissentiens: & verba Hebraica  
vtrumque sensum ferre possunt. Illud enim,  
chi ad, significari potest, quousque, quem-  
admodum si dictiones inuertantur, & lega-  
mus, ad chi, significabit, vsquequo. Se-  
quentia verba æque bene legi possunt cum  
Septuaginta: Iustitia conuertatur in iudi-  
cium, & cum S. Hieronymo: Ad iustitiam  
reuertatur iudicium. Nam in Hebræo non  
habentur particule illæ, in, vel, ad: & no-  
mina non recipiunt varietatem casuum. De-  
nique illud: Et qui iuxta illam, omnes qui re-  
cti sunt corde, clarius est in Hebræo & Græ-  
co: nam in Hebræo ad verbum sic legitur:  
Et post illud, iudicium videlicet, omnes recti  
corde. In Græco vero sic: Et qui habent eam,  
iustitiam videlicet, omnes recto sunt corde.  
Sed in Latina editione si subintelligatur in-  
terrogatio: Et qui iuxta illam? omnes qui re-  
cto sunt corde: vel si addatur verbum, quod  
sæpe apud Hebræos omittitur, & legamus:

Et qui iuxta illam sedent, sunt illi omnes qui  
recto sunt corde: vel denique si detrahatur  
pronomen relatiuum, quod in Hebræo non  
habetur, & legatur: Et iuxta illam omnes, qui  
recto sunt corde, sententia perspicua erit.

Quis consurget mihi aduersus mali-  
gnantes? aut quis stabit mecum aduersus  
operantes iniquitatem?

XVI.

Dixerat in vltimo iudicio cessaturam om-  
nem iniustitiam, & contra perpetuo re-  
gnaturam esse iustitiam, nunc dicit, interea  
temporis, dum videlicet differtur conuersio  
iustitiæ in iudicium, valde necessarium esse  
diuinum adiutorium aduersus iniustorum  
persecutores. Quis, inquit, consurget mihi,  
id est, pro me, aduersus malignantes? Quis  
me à tanto numero malignorum hominum,  
ac dæmonum proteget? aut quis stabit me-  
cum, vt me videlicet defendat, aduersus ope-  
rantes iniquitatem? Vbi posterior pars versi-  
culi prioris repetitio & explicatio est. Illud,  
mihi, S. Hieronymus recte interpretatur,  
pro me.

Nisi quia Dominus adiunxit me, pau-  
lo minus habitasset in inferno anima  
mea.

XVII.

Declarat magnitudinem periculi, in quo  
versamur ob multitudinem malignantium,  
qui vndique nobis occurrunt. Induit autem  
Prøpheta personam omnium piorum, & ait:  
Nisi quia Dominus adiunxit me, id est, nisi  
Dominus adiuuisset me, paulo minus habi-  
tasset in inferno anima mea, id est, parum  
abfuissem à morte sempiterna: quia videli-  
cet tentationibus succubuissem, & de ipsa di-  
uina prouidentia dubitarem. Phrasis illa,  
Nisi quia Dominus adiunxit me, Hebraica est,  
& Dauidi familiaris, vt perspicuum est ex  
Psal. 123. & supplenda est hoc modo, Nisi  
id accidisset, quod Dominus adiuuaret me, &c.  
& planius, Nisi Dominus adiuuisset me.  
Illud autem, paulo minus habitasset in in-  
ferno.



*ferno anima mea*; potest intelligi de morte corporali, per quam eo tempore omnes animæ descendebant ad aliquam mansionem subterraneam: sed verius existimo, ut intelligatur de morte animæ, & de inferno damnatorum. At, inquires, ex hac sententia videtur sequi, ut auxilium Dei non sit necessarium ad superandas tentationes, sed solum ad facilius superandas: quod est dogma Pelagianum, ex S. August. lib. de gratia Christi cap. 27. Si enim nisi Dominus iuuisset, vix mortem animæ euasissem, certe sequi videtur, ut nisi Dominus iuuisset, mortem quidem animæ euadere potuissem, sed valde ægre & difficulter. Respondeo, paulo minus, non referri hoc loco ad difficultatem rei, sed ad breuitatem temporis, ut sensus sit, Nisi Dominus adiuuisset me, paulo post habitasset in inferno anima mea. Vox enim Hebraica & Græca hunc sensum faciunt, & iuxta eum explicanda est vox Latina, paulo minus, id est, paulo post habitasset in inferno anima mea, siue parum abfuisset à casa in infernum anima mea.

XVIII. *Si dicebam, motus est pes meus, misericordia tua Domine adiuuabat me.*

Explicat, in quo consistat auxilium illud, sine quo in inferno habitasset anima eius. *Si dicebam*, inquit, *motus est pes meus*, id est, si agnoscebam & confitebar infirmitatem meam, & me ex meipso non sufficere ad superandas tentationes, tunc misericordia tua adiuuabat me, illuminans intellectum & purificans affectum, & vires tribuens voluntati, quæ sufficerent ad stabiliendos pedes animæ meæ in via mandatorum tuorum.

XIX. *Secundum multitudinem dolorum meorum in corde meo, consolationes tuæ latificauerunt animam meam.*

Non solum Deus iustis per prouidentiam suam tribuit patientiam, sed etiam consolationem magnam & ineffabilem, quæ non tollit tribulationes, sed cum iis consistit, easque vertit in materiam gaudiorum. Sic enim di-

cit Apostolus, 2. Cor. 7. *Superabundo gaudio in omni tribulatione nostra*: quia videlicet vir iustus, dum tribulatur, intelligit se purgari à scoria vitiorum, si adest; vel, se probari à Domino, si ea non adest: intelligit se conformem fieri Christo patienti, ut cum eo postea glorificetur; intelligit denique magnum esse, & supra modum excellens præmium patientiæ, iuxta illud Apostoli, 2. Corinth. 4. *Quod in presenti est momentaneum, & leue tribulationis nostræ supra modum in sublimitate, æternum gloriæ pondus operatur in nobis*. Ait igitur: *Secundum multitudinem dolorum meorum in corde meo*, id est, iuxta mensuram dolorum, qui tristitiam in corde meo gignebant: *consolationes tuæ latificauerunt animam meam*, non enim iuxta mensuram dolorum in carne, reddit Deus iustis in hac vita consolationes in carne: neque enim simul esse possunt dolores in carne, & consolationes in carne: sed iuxta mensuram dolorum in carne, tribuit Deus consolationem in anima, quæ mitigat tristitiam cordis ex doloribus carnis prouenientem. Neque repugnat hoc dictum Prophetæ: *Secundum multitudinem* &c. cum illo dicto Apostoli: *Superabundo gaudio*, &c. vere enim gaudium spirituale, maius est omni tristitia corporali, sed maius est seruata proportionem, ut minori tribulationi minus gaudium, & maiori maius respondeat. S. Hieronymus ex Hebræo vertit, *In multitudine cogitationum mearum*; pro eo quod nos habemus ex versione LXX. Interpretum: *Secundum multitudinem dolorum meorum*. Vox Hebraica, *sciaraaph*, est vox inusitata quatuor litterarum, quæ forte non habetur nisi hoc loco. Videtur deduci à verbo, *sciarah*, quod est exercere, & secundum Rabinos significat summas frondes arborum, quæ excrescunt in magna copia, & ab omni flatu ventorum mouentur. Metaphorice igitur hoc loco significant dolores cordis, id est, cogitationes affligentes, & torquentes ipsum cor, quæ quidem multæ & molestæ nasci solent ex inopia, infamia, morbo, aliis erumnis corporalibus; & ideo recte dicitur: *Secundum multitudinem*, quia plurimæ sunt; & recte comparan-



parantur excreſcentibus in arbore, quia vana ſunt, & inſtabiles.

*Nunquid adheret tibi ſedes iniquitatis, qui ſingis laborem in præcepto.*

Reddit rationem, cur Deus conſoletur iuſtos in tribulationibus eorum: & ratio eſt, quia Deus iuſtiſſimus cum ſit, & præcepta laborioſa hominibus dederit, æquum fuit, vt iugum legis alioqui aſperum, & durum, oleo conſolationis leniret, & ſuaue redderet. *Nunquid adheret tibi ſedes iniquitatis*, id eſt, nunquid adheret, ſive adiungitur tibi tanquam ſocius thronus inique iudiciũ. *Qui ſingis laborem in præcepto*, id eſt, tibi qui in præcepto tuo obſervando laborem inferis, ſive facis vt præcepta tua non ſine magno labore poſſint impleri? Hæc mihi videtur huius loci ſatis obſcuri literalis expoſitio: ſunt tamen duæ aliæ expoſitiones. Vna eſt eorum, qui conſiderantes illud, qui ſingis, in textu Hebræo, & Græco eſſe participium, omittunt relatiuum, qui, & coniungunt participium, ſingens, cum ſede, ſive throno iniquitatis. Itaque ſenſum eſſe volunt, Nunquid adiungitur tibi thronus iniquitatis, id eſt, nunquid particeps es iniqui iudicii, quod ſingit laborem in præcepto, id eſt, quod iudicium iniquorum facit præcepta diuina nimis laborioſa, & impoſſibilia, & ideo non punit præuaticatores. Hæc expoſitio repugnat editioni vulgæ, quæ per pronomen, qui, declarauit, participium, quod eſt in textu Hebræo, & Græco: & illud ſingens, voluit referri ad Deum, non ad thronum, ſive ad ſecundam perſonam, non ad tertiam: Alia eſt expoſitio S. Auguſt. qui dicit Deum ſingere laborem, ſive dolorem in præcepto, quia facit, vt ex laboribus, & doloribus, quos in hac vita patiuntur iuſti, erudiamur, & intelligamus, quo ſupplicio afficiendi ſint in iuſti à Deo, qui iuſtos ſic affligi permittit. Itaque S. Auguſtinus ita exponit, quaſi dictum eſſet, Qui ſingis laborem in præcepto, id eſt, ex labore facis præceptum, & per præceptum non intelligit mandatum, ſed eruditionem, qualia ſunt præcepta Sapientium, non mandata Principum.

*Captabunt in animam iuſti, & ſanguinem innocentem condemnabunt.* XXI.

Concludit Pſalmum affirmans, irapios inique acturos aduerſus iuſtos: ſed prouidentiam Dei vigilaturam, & vtriſq; pro meritis retributuram. *Captabunt*, inquit, *in animam iuſti*, id eſt, homines iniqui more ſuo inſidiabuntur iuſtis, vt capiant eos, vt venatores prædam capiunt. *Et ſanguinem innocentem condemnabunt*, id eſt, & poſteaquam laqueo ſuo irretierint; morti eum addicent, quamuis innoxium eſſe non ignorent. Hæc poſſunt intelligi tum de malis Iudicibus, tum de malis iudicibus, tum de malis accuſatoribus, tum etiam de quibus ſuis ſceleratis homicidis, & eorum magiſtris, & Principibus Dæmoniis. Verbum, *captabunt*, in Græco eſt, *ὑπονοεῖν*, quod ſignificat, venabuntur; & ideo ſenſus eſt, captabunt per inſidias, vt venatores faciunt. In Hebræo eſt, *ingbeddu*, id eſt, conuenient, ſive congregabuntur aduerſus animam iuſti, ſed credibile eſt, Septuaginta Interpretes legiſſe *iagudu*, vna littera mutata, quod ſignificat, venabuntur: particula, in, abundat apud Latinos, cum dicitur, *Captabunt in animam iuſti*. Proinde ſenſus eſt, captabunt, id eſt, venando capient animam, id eſt, vitam iuſti.

*Et factus eſt mihi Dominus in reſugium: & Deus meus in adiutorium ſpei meæ.* XXII.

Loquitur Propheta in perſona iuſtorum, & ſicut dixerat in numero ſingulari, *captabunt in animam iuſti*: ſic etiam introducit iuſtum loquentem in numero ſingulari; ac ſi dicat, illi quidem inſidiabuntur mihi homini iuſto, meque ad mortem condemnabunt: ſed *Dominus factus eſt mihi reſugium*, vt non mihi noceant inſidiæ illorum. *Et Deus meus factus eſt in adiutorium ſpei meæ*, id eſt, Deus factus eſt quaſi petra ſolida, in qua tuto inſtitur ſpes mea; ſic enim habetur in Hebræo, Deus meus, *letſur*, id eſt, in petram ſpei meæ. Itaque poſuerunt Septuaginta, & noſter Interpres vocem ad-

Aaaa

iuto.



itorium spei, pro fundamento spei: adiuuat enim fundamentum ipsam spem, dum facit, vt non vacillet.

XIII.

*Et reddet illis iniquitatem ipsorum, & in malitia eorum disperdet eos; disperdet illos Dominus Deus noster.*

Hæc est iustissima prouidentia Dei, vt tandem iustos adiuuet, & iniquos disperdat. *Reddit illis*, inquit, *iniquitatem ipsorum*, id est, Deus faciet, vt iniquitas impij reueratur in caput ipsius impij, dum iusto non nocet, qui ob patientiam coronatur: & ipsi impio nocet, qui ob malitiam punitur. Quod explicatur sequentibus verbis. *In malitia eorum disperdet eos*: vbi notat S. Augustinus recte dici, in malitia; quia Deus non tam punit eos ob id, quod fecerunt, quam propter malitiam, qua id fecerunt. Tradidit enim Christum ad mortem Iudas, tradidit etiam Deus Pater: sed Patri gratias agimus, quia ex nimia charitate proprio filio non pepercit, sed pro nobis tradidit illum: Iudam detestamur, quia ex cupiditate, non ex charitate; & pro pecunia sua, non pro salute nostra tradidit illum. Addit Propheta, *Disperdet illos Dominus Deus noster*, vt explicet quis sit, qui disperdet impios: dixerat enim, *Reddit illis iniquitatem ipsorum*, & *in malitia eorum disperdet eos*; & non dixerat, quis hæc facturum esset: explicat igitur, ac dicit, *Disperdet illos Dominus Deus noster*, cuius prouidentiam, aut negauerant, aut contempserant.

## PSALMV S XCIV.

*Titulus, & Argumentum.*

*Laus cantici ipsi Dauid.*

**I**N Codice Hebreo nullus est titulus: sed vel excidit, vel hunc titulum addiderunt Septuaginta viri, vt indicarent, argumentum huius Psalmi esse laudem Deo, voce, non instru-

mentis muscis decantatam. Theodoretus censet, Psalmum compositum esse à Davide in persona Iosia Regis, quem spiritus prauiderit repurgaturum templum, & altare, remotis cultibus Idololatriæ, & ipsis Sacerdotibus Idololatriis interfectis: sed non est necesse ad Iosiam recurrere: Psalmus enim omni tempore, omnibus locis, & omnibus fidelibus, tum Iudais, tum Christianis, conuenit. Continet enim inuitationem ad laudandum Deum, corde, voce, & opere. Quare Ecclesia Catholica rectissime hunc Psalmum esse, voluit initium nocturna Psalmodia, quæ vt longissima est, ita ista præparatione & exhortatione indigebat.

## EXPLICAT. PSAL. XCIV.

**V**enite exultemus Domino, iubilemus Deo saluari nostro.

Inuitatio, & exhortatio est ad laudandum Deum. Illud, *venite*, est exhortatio, & excitatio ad coniungendos animos, & voces in laudem Dei, quomodo, Genes. II. est exhortatio & excitatio ad coniungenda studia, & operas in ædificanda ciuitate, & turri: *venite* faciamus lateres: & ibidem. *Venite*, faciamus nobis ciuitatem: & ibidem, Dominus dicit, *Venite* descendamus, & confundamus ibi linguas eorum. *Exultemus Domino*, inuitat primum ad exultationem spiritus, deinde ad iubilationem vocis: nō enim recte iubilamus voce; nisi prius mens excitata sit in Deum per internam læticiam, & admirationem: vnde, & de Domino scriptum est Luc. 10. *Exaltauit spiritu, & dixit*, Confiteor tibi Pater, & Mater Domini de se dixit. Luc. 1. *Magnificat anima mea Dominum. & exultauit spiritus meus*: Ait igitur, *Venite exultemus Domino, iubilemus Deo saluari nostro*, id est, omnes simul vniti exultemus spiritu, coram Domino præ lætitia gestientes, & voce iubilemus Deo: qui est salus nostra. S. Augustinus per iubilationem, intelligit vocem lætitiæ, quæ non potest exprimere quod intelligit. Sed vox Hebræa significat potius magnum clamorem, læ-



tarum tamen, qui magnus clamor magnum potius affectum, quam magnum strepitum hoc loco significat.

II.

*Præoccupemus faciem eius in confessione, & in Psalmis iubilemus ei.*

Duobus modis potest hic versiculus intelligi. Vno modo, vt Propheta admoveat vt summo mane appareamus coram Domino ad laudandum eum, quasi dicat, ante quam alij surgant, nos primi sumus ante faciem Domini: & hoc satis conuenit tempori, quo hunc Psalmum in Ecclesia canimus. Altero modo, vt Propheta doceat, miscendam esse confessionem propriæ miserie cum confessione misericordiæ Dei, vt sensus sit: *Præoccupemus faciem eius in confessione*, id est, antequam Dominus ad iudicium veniat, & vindictam de peccatis sumat, præueniemus eum confitendo peccata nostra, vel præueniamus iram eius (potest enim facies in Hebræo sumi pro ira) & antequam Deus irascatur, confiteamur peccata, & simul iubilemus in Psalmis, magnis vocibus extollendo misericordiam eius. Et videtur hæc posterior expositio magis ad mentem Patrum, S. Hieronymi, S. Augustini, Theodoret, & Euthymij in Com. Psal. & S. Gregorij Nazianzeni in oratione deplagrandinis.

III.

*Quoniam Deus magnus, Dominus, & Rex magnus super omnes Deos.*

Reddit quinque rationes, cur Deus à nobis laudandus sit. Prima est, quia Dominus noster est magnus Deus super alios omnes Deos, & magnus Rex super alios omnes Reges, qui etiam Dij dici solent. Quo loco pro voce, Dominus, est in Hebræo nomen quatuor litterarum, quod est proprium Dei veri; & ideo nomen appellativum, magnus, non debet coniungi cum, Dominus, sed cum, Deus, vt diximus. Porro per Deos, intelligendi sunt primo loco Dij falsi, id est, Dæmonia, quæ sibi apud gentiles usurpabant cultum veri Dei, vt dicitur in Psalmo 95. *Omnes dij gen-*

*tium Dæmonia.* Deinde intelligendi sunt Reges, & Iudices terræ, de quibus dicitur in Psal. 81. *Ego dixi Dij estis.* In Græco legitur, super omnem terram; & sic legunt Theodoretus, & Euthymius sed in Hebræo est, *super omnes deos*: & sic legunt S. Hieronymus, & August. credibile est Græcum esse corruptum.

*Quia in manu eius sunt omnes fines terre, & altitudines montium ipsius sunt.* IV.

Altera ratio est, quia Dominus habet in potestate sua orbem terræ, siue longitudinem, & latitudinem, siue etiam altitudinem consideres; proinde omnes, qui terram incolunt illi subiecti sunt, & sacrificium laudis illi debent. *Quia*, inquit, *in manu eius*, id est, in potestate eius *sunt omnes fines terre*, id est, tota terra vsque ad ultimos eius fines. *Et altitudines montium ipsius sunt*, id est, non solum longitudo, & latitudo terræ, sed etiam omnis altitudo vsque ad altissimos montes ad eius ditionem pertinet. In Codice quodam antiquo, ex quo legitur hic Psalmus communiter in Ecclesia, præmittitur huic versiculo, *Quia non repellet Dominus plebem suam*, & hæc verba leguntur, & exponuntur à Sanctis, Hieronymo, & Augustino in Commentario Psalmorum. Sed in codice Hebræo, & Græco, & in Latina vulgata editione non habentur, & vere hoc loco superuacanea esse videntur, sed in Psal. superiore locum suum habent, & inde huc translata sunt, verissima autem esse dubitari non potest: In eodem antiquo codice legitur, *altitudines montium ipse conspiciat*, pro, *ipsius sunt*. Sed in Hebræo, & Græco habetur, *ipsius sunt*, & sic legunt Patres. Cæterum illa lectio, *altitudines montium ipse conspiciat*, nihil aliud significat, nisi Dominum esse quolibet altissimo monte altiorum, ita vt commode respiciat ea quæ sunt in verticibus montium altissimorum, ad quos nullus vnquam hominum penetrauit. In Hebræo pro, *fines terre*, habetur, *inuestigationes terræ*, à verbo, *chacar*, quod

Aaaa 2

est

חקר



est inuestigare; & scrutari. Inde aliqui existimant significari profundas terræ caernas, quæ opponuntur altitudini montium, ut sensus sit, in manu Dei esse tum profunditatem, tum altitudinem terræ. S. Hieron. vertit, *in cuius manu fundamenta terræ, & excelsa montium ipsius sunt*: cum qualectione potest concordare lectio Græca, & Latina, si per fines terræ, intelligamus fines, quo ad profunditatem, non quo ad longitudinem, vel latitudinem, sed uterque sensus est verus.

V.

*Quoniam ipsius est mare, & ipse fecit illud, & siccā manus eius formauerunt.*

Tertia ratio est, quoniam Deus noster non solum terræ, sed etiam maris Dominus est, quippe, qui fecit illud, & arenam siccā illi circumdedit in qua tanquam in vase continetur. Quare æquum est, ut homines, qui ex mari maxima commoda percipiunt, illi gratias agant eumque laudibus efferant.

VI.

*Venite adoremus, & procidamus, & ploremus ante Dominum, qui fecit nos.*

Quarta ratio est, quia idem Dominus non solum fecit terram, & maria, sed etiam nos homines fecit; nos autem factorem nostrum peccatis nostris offendimus. *Venite, inquit, adoremus, & procidamus, & ploremus* desidentes in gratitudinem, & peccata nostra ante Dominum, qui fecit nos, ac per hoc omni iure Dominus noster est, atque illi omnem obedientiam debemus. Ex Hebræo S. Hieronym. vertit, *genua flectamus*; pro eo quod nos habemus, *ploremus*. Sed omnes codices Græci, & Latini habent, *ploremus*, & sic legunt, & explicant omnes veteres tractatores: neque est verisimile, Prophetam dicturum fuisse, *genua flectamus*, posteaquam dixerat, *adoremus, & procidamus*: nam adorare in Hebræo significat prosterni, & procumbere, quod explicatur per vocem sequentem, *procidamus*. Plus est autem prosterni, & toto corpore prosterni,

quam genua flectere. Itaque probabile est veram Hebraicam lectionem, quam habuerunt Septuaginta fuisse, *miucha*, quod significat, *ploremus*: sed successu tempore irrepisse vnam litteram, & factum esse, *murecha*, quod est genua flectamus. Neque vilo modo credibile est, Septuaginta Interpretes, homines doctissimi reddiduros fuisse, *ploremus*, si ita legissent, ut nunc in codicibus Hebraicis legimus.

*Quia ipse est Dominus Deus noster, & nos populus pascuæ eius, & oves manus eius.*

VII.

Hæc est quinta & vltima ratio, quia Dominus non solum nos fecit, sed particulari providentia nos regit, quo modo pastor proprium gregem. Observat S. Augustinus elegantem transpositionem verborum; videtur enim Propheta coniungere debuisse *oves cum pascua*, & *populum cum manu*, ac dicere, & *nos populus manus eius, & oves pascuæ eius*: sed coniunxit *populum cum pascua*, & *oves cum manu*, ut significaret, *populum esse respectu Dei instar ovium, quæ pastore indigent*: & tamen non esse oves expertes rationis, quæ baculo cogi debeant: dicuntur autem oves istæ, oves manus Dei, vel quia Deus eas fecit, ut exponit S. Augustinus, vel ut alij communiter docent, quia Deus quasi manu propria eas regit; quamvis enim *populus Dei* habeat Pastores, & Doctores, à quibus pascitur, & regitur: tamen ipse etiam Deus peculiarem curam illius habet, & non finit, ut negligentia, vel ignorantia, vel etiam malitia Pastorum illis noceat. Ex quo intelligimus, debere *populum Dei* in Deo summo Pastore fiduciam ponere, atque ad illum per orationem recurrere, quando pastor minus idoneus illis contingit; ipse enim per Ezechielem cap. 34. dicit, Ego pascam oves meas.

*Hodie si vocem eius audieritis, nolite obdurare corda vestra.*

VIII.

Hæc est secunda pars Psalmi, qua Prophetæ exhortatur *populum Dei*, ut non solum

VOCE



voce, sed etiam opere Deum laudet. Sacrificium autem operis Deo gratissimum est obedientia, quam exhibemus præceptis eius, iuxta illud primi Regum 15. *Nunquid vult Deus holocausta & victimas; & non magis ut obediatur voci Domini*: Introducit autem Propheta Deum loquentem, ut exhortatio maiorem vim habeat. Neque obstat illud eius: nam in scriptura sæpe Deus loquitur de se, ac si de alio loqueretur, ut in loco proxime citato, *Nunquid vult Deus holocausta, & non magis, ut obediatur voci Domini*; sic igitur hoc loco dicit Spiritus sanctus, *Hodie si vocem eius*, id est, Domini, *audieritis*, id est, si vocem meam audieritis, qui Dominus vester sum, *nolite obdurare corda vestra*. Illud, *hodie*, significat, *hoc tempore*. &, ut Apostolus declarat ad Hebr. 3. habet locum hæc exhortatio, *donec hodie cognominatur*, id est, dum tempus huius vite durat; nam post hanc vitam non erit amplius tempus, sed æternitas. Illud autem, *si*, videtur significare, Deum non singulis momentis nobis loqui, sed pro loco & tempore nos admonere, vel per internas inspirationes, vel per voces prædicatorum, vel per lectionem scripturarum, vel alio quocunque modo nobis voluntatem suam patefaciat. Illud; *nolite obdurare corda vestra*, significat, parum prodesse audire vocem Domini, nisi ea vox penetret intima cordis, & inflectat ad fidem, & obedientiam, cur autem vox Dei non penetret, causa est durities cordis. Induratio autem cordis aliquando tribuitur homini, aliquando Deo: nam Exod. 7. dicit Dominus, *Ego indurabo cor Pharaonis*, & i. Reg. 6. dicitur, *Cur aggrauatis corda vestra, sicut aggrauauit Ægyptus, & Pharaon cor suum?* Porro Deus indurat corda non impartiendo malitiam, sed non impartiendo misericordiam, ut S. Augustinus dicit in epistol. 105. ad Sixtum qui etiam tractatu 53. in Ioannem scribit, sic obdurat Deus, deserendo, & non adiuuando, quod occulto iudicio facere potest, iniquo non potest. Cui subscribit S. Gregorius li. 11. Moral. cap. 5. Obdurare per iustitiam dicitur Deus, quando cor reprobum per gratiam

non emollit. Homo autem obdurat cor suum, quando resistit inspirationibus, & vocibus Dei, iuxta illud Actor. 7. *Vos semper Spiritui sancto resistitis*: inducit autem hominem ad resistendum Deo, & claudendas aures interiores, peccati præsens dulcedo, quam Apostolus ad Hebr. 3. vocat fallaciam peccati, cum ait, ut non obduretur quis ex vobis fallacia peccati. In Hebraico textu verba illa, *Hodie si vocem eius audieritis*, coniunguntur cum superioribus, *nos autem populus pascua eius, & oues manus eius, hodie si vocem eius audieritis*. Deinde incipit alius versiculus, *Nolite obdurare corda vestra, sicut in irritatione*. Sed Apostolus ad Hebr. 3. citat hunc locum, ut nos in codicibus Græcis, & Latinis habemus. Itaq; Apostolo Iudice melior est lectio Septuaginta & nostræ vulgatæ editionis, quam Hebraica, ut nunc se habet, quidquid hæretici moderni blaterent.

*Sicut in irritatione secundum diem tentationis in deserto; ubi tentauerunt me Patres vestri, probauerunt me, & viderunt opera mea*.

Ponit exemplum obdurationis: nam Patres antiqui educti per Moysen de Ægypto, dum in itinere essent & desertum pertransirent, non semel obdurauerunt cor suum nolentes credere promissis Dei, neque ille obedire; vnde irritauerunt eum, & exacerbauerunt, ut habet alia lectio: tentarunt etiam potentiam eius, & experti sunt, ac viderunt mirabilia opera eius; qualia fuerunt manna de celo pluens, & aqua de petra scaturiens. vide Numer. 14. *Sicut*, inquit, *in irritatione*, id est, quando Deum ad iracundiam prouocauerunt, *secundum diem tentationis in deserto*, id est, iuxta diem illum quo Deum tentauerunt: tunc enim tentantes Deum, illum irritauerunt, non est necesse, vnâ diem particularem hic notari, cum multis vicibus Deum Iudæi tentauerint in deserto, sed potest accipi dies pro tempore, ut sensus sit, sicut in irritatione, quæ tacta est in tempore illo, quo me sæpius tentauerunt in deserto. *Ubi tentauerunt me,*

IX.



id est, ubi explorare voluerunt, utrum ego vere Deus essem, possemque illis in deserto panem, & aquam, & carnes parare, quibus rebus desertus locus ille carebat. *Probauerunt me, & viderunt opera mea*, id est, ubi etiam experti sunt me esse omnipotentem, quia viderunt opera mea, qualia solus Deus verus, vereque omnipotens facere potest.

X.

*Quadraginta annis offensus fui generationi illi, & dixi, semper hi errant corde.*

Explicat clarius tempus irritationis, & tentationis in deserto. *Quadraginta annis*, inquit, *offensus fui generationi illi*, id est, toto tempore, quo duxi eos per desertum, ut introducerem in terram promissionis, *offensus fui generationi illi*, id est, offensus fui ab illis, siue infensus illis fui: ut explicat Apostolus Hebr. 3. vox Hebraica, *acur*, significat litigavi cum illis, vel abominatus sum illos: sed omnia in idem recidunt: in quem sensum explicanda est etiam lectio Psalterij Romani, *Quadraginta annis proximus fui generationi huic*, id est, propinquavi illis, ut de proximo illorum querelas audirem, eosque varijs plagis flagellarem: & quia de proximo vidi, & audiui quid agerent, aut loquerentur, *dixi, semper hi errant corde*, id est, ducuntur varijs desiderijs, & ideo errant, & vagantur extra rectam viam salutis. Apostol. ad Heb. 3. aliter distinguit, *probauerunt*, inquit, *& viderunt opera mea quadraginta annis*: propter quod infensus fui generationi huic. Sed quia neque Hebraei, neque Graeci, neque Latini, ita distinguunt; dicendum est Apostolum declarare voluisse verba huius Psalmi, & ideo addidisse illud, propter quod, ut sensus sit, *Viderunt opera mea quadraginta annis*, propter quod totidem annis infensus fui generationi huic.

XI.

*Et isti non cognouerunt vias meas; ut iuravi in ira mea si introibunt in requiem meam.*

Declarat, cur corde errauerint; quia non cognouerunt vias, id est, leges meas, quae sunt rectae viae, per quas qui incedunt, errare

non possunt: Loquitur autem de cognitione approbationis, non de simplici notitia. *Ut iuravi in ira mea*, subintelligitur, non peruenerunt ad requiem, *sicut iuravi in ira mea, si introibunt in requiem meam*. Itaque sensus est. Isti, qui semper errant corde, non cognouerunt vias meas, quibus itur ad requiem, ac per hoc in illam non introierunt, prout iuravi in ira mea, *si introibunt*, id est, quod non introibunt, *in requiem meam*. Per requiem in sensu historico intelligitur terra promissionis, in quam non introierunt nisi paucissimi ex illis, qui exierunt ex Aegypto, sicut Dominus iurauit illis. Num. 14. *Viuo ego dicit Dominus, sicut loquuti estis audiente me, sic faciam vobis*, in solitudine hac iacebunt cadauera vestra. In sensu anagogico, Apostolo teste ad Hebr. 4. intelligitur caelestis patria, ubi erit perfecta requies. Iuramentum autem Dei significat, rem esse certissimam, & immutabilem. In Hebraeo habetur, *aser*, quod recte verti potest, tam ut quibus. In Graeco habetur *as*, ut etiam in Epistola Graeca S. Pauli ad Hebraeos: tamen in editione Latina eiusdem Epistolae cap. 3. habetur, *quibus iuravi*, sed ca. 4. *sicut iuravi*. In Psalterio Romano, & apud Augustinum, habetur, *quibus iuravi*. Sensus semper est idem, tamen communior lectio est quae habetur in editione vulgata: & sic legit Apostolus, quando proprie citat verba Psalmi dicens, *Quemadmodum dixit, sicut iuravi, &c.* ad Hebr. 4.

## PSALMVS CXV.

*Titulus, & Argumentum.*

Canticum ipsi Dauid, quando domus aedificabatur post captiuitatem.

**H**ic Psalmus apud Hebraeos titulo caret: neque mirum est, quoniam videtur esse pars quadam Psalmi centesimi quarti, ut perspicuum est ex lib. 1. Par. cap. 16. ubi in reductione Arca Domini canitur Psalmus, cuius prior



prior pars est principium Psalmi 104. posterior est Psalmus 49. Videtur enim Esdras, vel si quis alius fuit, qui librum Psalmorum collegit, & ordinavit, ut numerum centum quinquaginta Psalmorum compleret, ex parte Psalmi 104. fecisse hunc Psalm. 95. quem admodum ex fine Psalmi 56. & ex fine Psalmi 59. composuit Psalm. 107. qui incipit, Paratum cor meum, & ex fine Psalmi 39. fecit Psalm. 69. qui incipit, Deus in adiutorium meum intende. Titulum ergo quod habemus in codicibus Græcis, & Latinis, vel addiderunt Septuaginta Interpretes, vel quod verius reor, Esdras ipse addidit, & iussit cantari, cum templum reedificabatur post captiuitatem Babylonicam. Quamuis autem David hunc Psalmum composuerit occasione reductionis Arce Domini, & Esdras eundem Psalmum cantari iusserit in reedificatione templi: tamen certum est, intentionem primariam Davidis, & ipsius Spiritus sancti fuisse predicere aduentum Christi, & Regnum eius, quando Deus eripuit nos de potestate tenebrarum, & transtulit in Regnum filij dilectionis sue, ut scribit Apost. ad Coloss. 1. Recte enim obseruauit S. August. in toto hoc Psalmo nullam fieri mentionem adificationis templi, nec reductionis arce, ac per hoc, vel Psalmum non conuenire cum titulo, vel exponendum esse ut verba sonant, de Regno Christi, in toto terrarum orbe propagando; hoc est de Ecclesia in omnibus gentibus adificanda. Atque in hanc sententiam conueniunt scriptores veteres, Hieronymus, Augustinus, & Ambrosius Latini; Chrysost. Theodoretus, & Euthymius Græci.

## EXPLICAT. PSAL. XC.

**C**antate Domino canticum nouum,  
Cantate Domino omnis terra.

Incipit ab exhortatione, ut pro communis beneficii communiter ab vniuersa terra gratiæ agantur Deo, ter autem repetit *cantate*, ut etiam infra ter repetit, *afferte Domino*, ut obscure insinuat mysterium sanctissimæ Trinitatis, quod aperte in testamento nouo prædicandum erat. *Cantate*, in-

quit, domino canticum nouum, id est, laudate, & gratias agite cum cantu, & lætitia. Vocat autem canticum nouum, canticum pulchrum, & sapienter compositum: item canticum pro nouo beneficio: item canticum, quod à renouatis hominibus cani debet, in quibus non amplius regnet cupiditas, sed charitas. Denique, ut exponit Chrysostomus, canticum, non quale fuit canticum Moylis, aut Deborah, aut alia vetera cantica, quæ non poterant cantari extra terram promissionis, iuxta illud, *Quomodo cantabimus canticum Domini in terra aliena?* sed canticum nouum, quod per vniuersam terram celebrari queat. Ideo enim subiungitur, *Cantate Domino omnis terra*, id est, non solum Iudæa, sed orbis terrarum vniuersus.

*Cantate Domino, & benedicite nomini eius: annunciate de die in diem salutem eius.*

Præmissa exhortatione generali, incipit explicare materiam cantici, & laudationis, quæ est Saluatoris aduentus. *Cantate*, inquit, domino, & benedicite nomini eius, id est, cantando laudate potentiam eius, quæ per nomen significatur: nisi forte per nomen insinuetur nomen Saluatoris, de quo clarius fit mentio in verbis sequentibus, *Annunciate de die in diem salutare eius*, id est, prædicante cum cantu, & laudibus venturam salutem; idque *de die in diem*, id est, omni die: quemadmodum enim sine cessatione dies dei succedit, sine æquum est, ut laudatio laudationi sine cessatione succedat. Verbum Hebraicum, *basseru*, significat bonum nuncium afferte: quod Septuaginta recte verterunt, *euangelizate*, & interpres noster vertere potuisset, euangelizate, vel bene nunciate, ut legit S. August. Itaque ex Hebræo & Græco exponi debet verbum Latinum, *annunciate*, id est, bonum nuncium afferte.

*Annunciate inter gentes gloriam eius, in omnibus populis mirabilia eius.*

Dixit, Deum ob tam ingens beneficium omni tempore laudandum: addit nunc etiam

II.

119

III.



etiam in omni loco laudandum. *Annunciate*, inquit, *inter gentes gloriam eius*, id est, notam facite non solum Iudæis, ut faciebant Prophetæ veteres, sed etiam gentilibus gloriam Dei: & hoc ipsum clarius explicans ait, *annunciate in omnibus populis*, id est, omnibus gentibus, *mirabilia eius*, id est, admiranda opera Dei, ex quibus manifestatur gloria eius. Quamvis autem hæc exhortatio pertineat ad omnes, qui nouerunt mirabilia Dei; tamen præcipue pertinet ad Apostolos Domini: illi enim sunt, qui omnibus gentibus notam fecerunt gloriam Dei, & mirabilia opera non solum Creatoris, sed etiam Redemptoris, & sanctificatoris, id est, Patris, & Filij, & Spiritus sancti.

IV.

*Quoniam magnus Dominus, & laudabilis nimis: terribilis est super omnes Deos.*

V.

*Quoniam omnes Dij gentium Dæmonia, Dominus autem celos fecit.*

Declarat, quæ sit gloria Domini, quæ mirabilia opera eius, quæ paulo ante prædicanda semper, & ubique esse dicebat. *Quoniam magnus Dominus, & laudabilis nimis, terribilis est super omnes Deos.* Hæc est gloria Domini, quod magnus sit absolute, siue potentiam, siue sapientiam, siue bonitatem, siue imperium, siue diuitias, siue quæcunque alia consideres; quod iuxta hanc magnitudinem sit laudabilis valde, & re ipsa ab omnibus laudetur: hinc enim pleni sunt cæli, & terra gloria eius; quod denique terribilis sit super omnes Deos, id est, quod vsque adeo emineat super omnes, qui illo modo dicuntur Dij, ut non solum non audeant ei se conferre, sed ut serui, vel potius mancipia Maiestatem eius contremiscant: nam de bonis Angelis, qui sunt Dij per participationem canit Ecclesia, Maiestatem tuam laudent Angeli, adorent Dominationes tremunt Potestates. De malis Angelis, qui sunt Dij per errorem gentium dicit B. Iacobus in Epist. cap. 2. *Dæmones credunt & contremiscunt:*

& quoniam præcipue de falsis Dij loquitur hoc loco David, ideo subiungit rationem, cur Deus noster terribilis sit super omnes Deos, dicens, *Quoniam omnes Dij gentium Dæmonia, Dominus autem celos fecit*, id est, propterea Dominus terribilis est super omnes Deos, falsos videlicet, & à gentibus per errorem adoratos, quoniam Dij gentium non sunt veri Dij, sed Dæmonia, id est, spiritus mali, qui à Deo creatore per superbiam recesserunt, & ab eodem æternis suppliciis destinati sunt: Dominus autem non est spiritus creatus, sed spiritus creator, qui celos fecit, corpora omnium maxima, & pulcherrima, & omnia, quæ cæli ambitu continentur, id est, res omnes creatas. Ex Hebræo S. Hieronymus vertit, omnes Dij populorum sculptilia. Sed Sciendum est, vocem Hebraicam, quæ hic habetur, *elilim*, non significare proprie neque Dæmonia, neque sculptilia, Dæmon enim dicitur, *seel*, sculptile, *pesel*, vox autem *elilim*, significare videtur Deiculos, ut sit diminutiuum ab, *el*, quod significat Deum ut sensus sit, Dij gentium non sunt Dij, sed Deiculi, vel Deastri inutiles, & vani: Dominus autem est Deus verus, & potens qui celos fecit. Itaque vocem illam Septuaginta Interpretes retulerunt ad Dæmonia potius, quam ad simulachra; quoniam Dæmonia habitabant in simulachris, & erant ij, qui potissimum à gentibus adorabantur, iuxta illud Apostoli 1. Corint. 10. *Quæ enim gentes immolant, dæmonibus immolant, & non Deo.*

*Confessio & pulchritudo in conspectu eius: sanctimonia, & magnificentia in sanctificatione eius.*

Dixerat, Deum esse magnum, & terribilem: nunc addit, eundem esse vndique laudabilem, pulcherrimum, gloriosum, & sanctissimum: idque præcipue cerni in cælesti sanctuario, ubi spectandum se præbet oculis angelorum, alijsque spiritibus beatis. Illustrabit hunc versiculum, alioqui satis obscurum versiculus secundus Psalmi ceterosimilitertij. *Confessionem, & decorem induisti amictus lumine, sicut vestimento: dicitur enim Deus*



Deus induisse confessionem, & decorum, quia ab omni parte conspicitur laudabilis, & ideo laudabilis, quia pulcher, & decorus torus, siue quis essentiam, siue attributa, siue iudicia, siue cogitationes, siue opera eius attendat. quod breuissimè dixit Sanctus Ioannes I. Epist. cap. I. *Deus lux est, & in eo tenebra non sunt ulla.* Dicit ergo Propheta de Deo, *Confessio, & pulchritudo in conspectu eius*, id est, laus, seu materia laudis. & pulchritudo, siue decor, & gloria, est in circuitu Dei, quia confessionem & pulchritudinem induit; ac per hoc vndiq; conspicit laudem, & pulchritudinem suam, & vndique conspicitur decorus, & laudabilis: quomodo sol, si sensum videndi haberet, vndique conspiceret radios lucis suæ, sicut vndique conspicitur micans, & lucidus. *Sanctimonia, & magnificentia in sanctificatione eius*, id est, sanctitas, siue puritas, & gloria, siue maiestas, & gloria, quibus Deus, quasi vestimentis indutus est, conspicitur in sanctificatione eius, id est, in sanctuario, siue in templo sancto, quod in cælis ipse Deus habet. Posset etiam hic vericulus sic exponi. *Confessio, & pulchritudo in conspectu eius*, id est, offeratur in conspectu Dei confessio laudis & pulchritudo iustitiæ, *sanctimonia, & magnificentia in sanctificatione eius*, id est, sanctitas vitæ, & magnificentia operum bonorum in sancto templo eius similiter offeratur. Sanctus Augustinus per confessionem inteligit confessionem peccatorum, per quam homo deformis incipit pulchrescere, & sanctificari, & placere sponso celestis, qui pulcherrimus, & sanctissimus est. Quod attinet ad verba, pro vocabulo, *sanctimonia*, in Hebræo est, *oz*, quod propriè robur, & fortitudinem significat; sed accipitur etiam pro gloria, honore, substantia, opibus. Videntur igitur Septuaginta Interpretes, eam vocem accepisse pro gloria, & puritate, quæ sanctitatis propria est: vt in sequenti versiculo acceperunt pro honore, & coniunxerunt cum gloria. Pro vocibus, *in sanctificatione eius*, in Hebræo habetur, *in sanctuario eius*, & sic etiam vertit S. Hieronymus. Neque est nouum in scripturis, vt

sanctificatio accipiatur pro sanctuario: sic enim legitur lib. I. Machab. cap. I. *Et intravit in sanctificationem cum superbia, & accepit altare aureum, &c.*

*Afferre Domino patriam gentium, afferre Domino gloriam & honorem, afferre Domino gloriam nomini eius*

VII.

Prædixerat, prædicandam esse notitiam Dei omnibus gentibus per Christi aduentum: nunc prædicit conuertendas esse omnes gentes. & glorificaturas Deum. Sed sicut illud prædixerat per modum hortantis dicens, *Annunciate inter gentes gloriam eius*; sic etiam nunc prædicit hoc per modum hortantis dicens, *Afferre Domino patriam gentium*, id est, & familiæ gentilium toto orbe diffusæ, cum vobis annuntiata fuerit gloria Domini, qui de cælo ad terram descendit, & peracta redemptione iterum ad calum gloriosus ascendit: non sitis duræ ad credendum, nec pigre ad operandum, sed accurrete ad tabernaculum Domini, & afferre gloriam, & honorem, glorificando. & honorificando verbis, & operibus Deum & sanctum nomen eius. Illud, *patria gentium*, Hebræicè est, *mispechoth*, quod propriè significat *familias*. Sed Latinus interpres reliquit hoc loco vocem Græcam, *πατρις*, quæ significat *familiam*. Quare per, *patrias gentium*, non debemus hic accipere id, quod significat nomen Latinum, sed quod significat Græcum. Cur autem Propheta nomet familias, ratio esse videtur, vt alluderet ad ritum Hebræorum, qui distincti per familias suas ascendeabant festis diebus ad templum Domini, quod erat in Hierusalem. Significat igitur Spiritus sanctus, quod faciebant familias Iudæorum corporaliter, faciendum esse a familijs omnium gentium spiritualiter, vt videlicet, omnes ad Ecclesiam veniant, & Deo tribuant gloriam, & honorem omnium mirabilium, quæ facta sunt in redemptione generis humani; non enim nostra industria, aut meritis euecti sumus ad filiorum Dei adoptionem, & gratiam, sed ex

Bbbb

mife.



miseriordia Dei, cui proinde debetur omnis honor, & gloria. Pro illa voce, *gentium*, in Hebræo est *populorum*. sed Septuaginta Interpretes maluerunt vertere, *gentium*, quam *populorum*, ne Iudæi dicerent, de populis suis tantum Prophetam esse loquutum. Itaque sustulerunt ambiguitatem vocis, & docuerunt, Spiritum sanctum locutum esse de populis gentium, de quibus paulo ante dixerat, *Annunciate inter gentes gloriam eius*, & paulo infra, *Dicite in gentibus, quia Dominus regnavit*: nam utrobique in Hebræo habetur vox, *goim*, quæ proprie significat gentiles.

גוים

VIII.

*Tollite hostias, & introite in atria eius, adorate Dominum in atrio sancto eius.*

Hic etiam alludit ad morem Hebraicum, iuxta quem Iudæi cum ascendebant ad templum, offerebant victimas, & adorato Deo reuertebantur in ciuitates suas. Sed quia hoc loco inuitantur gentiles, ut ad Ecclesiam Domini veniant; intelligenda est hæc oblatio de spiritualibus hostijs, de quibus loquitur S. Petrus in prima Epistol. cap. 2. *Offerte spirituales hostias, acceptabiles Deo per Iesum Christum*. Sunt autem spirituales hostiæ, sacrificium cordis contriti, confessio peccatorum, oratio, ieiunia, elemosynæ, & similia. Potest etiam hic locus intelligi de sacrificio Missæ, quod successit omnibus sacrificijs Hebræorum, & quod, iuxta prophetiam Malachiæ, *offeretur Deo ab ortu solis usque ad occasum a gentibus conuersis ad Deum per manus Sacerdotum testamenti noui*. Nam non sine mysterio in Hebraico textu non habetur vocabulum, *zebach*, quod significat hostiam, quæ occiditur, dum immolatur; qualia erant sacrificia ouium, & bouum; sed, *mincha*, quod significat hostiam inuentam, ac præsertim ex farina confectam. Phrum autem refert quod pro *atrio sancto*, in Hebræo habetur in decore sanctitatis; nam idem est sensus; vocat enim scriptura, decorem sanctitatis, ipsum sanctuarium, quod esset decore, & sanctitate plenum.

זבח

מנחה

*Commoueatur à facie eius vniuersa terra, dicite in gentibus, quia Dominus regnavit.*

Hactenus quasi longe præuidit Regnum Messia, & hortatus est prædicatores ad annuncianum, & populos ad recipiendum nouum Regem: nunc quasi propius intueatur, & ipsum venientem cernat, spiritu exultat, & hortatur ad venerationem, & lætitiā, non solum gentes, sed etiam terram, cælum, maria, arbores ipsas: non quod ista sensu prædita sint, sed ut declaret affectum suum, & vniuersalem lætitiā, quæ in toto mundo futura erat in aduentu Christi. Quamuis autem aliqui hæc referant ad secundum aduentum, quando veniet iudicare viuos, & mortuos: alij ad primum aduentum, quando venit quærere, & saluum facere quod perierat; tamen Sancti Patres Hieronymus, & Augustinus, nec non Græci scriptores, Theodoretus, & Euthymius ad utrumque aduentum referunt. quod & nobis probabilius esse videtur. Ait igitur, *Commoueatur à facie eius vniuersa terra*, id est, commoueantur commotione timoris, & reuerentiæ omnes habitatores terræ ante faciem Domini venientis. In Hebræo est, *paueant à facie eius omnis terra*. vbi numerus multitudinis indicat, per terram; non intelligi elementum terræ, sed habitantes in terra. *Dicite in gentibus, quia Dominus regnavit*, id est, ut commoueatur terra, prædicat gentibus omnibus, quod Dominus adueniens regnum suum auspicatus est. Intelligitur autem nomine Regni, Regnum spirituale, quo regnat per fidem in cordibus hominum: semper enim Deus regnat in cælo, & in terra regno potentia, & maiestatis: sed per fidem regnare cepit in gentibus ab aduentu Messia. antea siquidem Diabolus regnabat per errores Idololatriæ: vnde, & Dominus Ioan. 12. ait, *Nunc Princeps huius mundi vicietur foras*. S. Augustinus legit, quia Dominus regnavit à ligno: quam lectionem fuisse olim in Septuaginta viro- rum interpretatione, & ab Hebræis fuisse ablatam, & sublatam, testatur Sanctus Iu-  
stinus.



Minus in dialogo cum Triphone; & Fortunatus in hymno, qui ab Ecclesia frequentatur tempore passionis, ex hac lectione accipit illud,

*Impleta sunt qua concinit.*

*David fideli carmine,*

*Dicens de nationibus*

*Regnavit à ligno deus.*

quamvis autem hæc lectio optimum sensum habeat; tamen in libris Græcis, hodie non habetur nec habebatur tempore S. Hieronymi, Theodoret, & Euthymij, ut ex eorum commentarijs perspicuum est: nec habetur in codicibus Hebraicis, nec in editione Latina vulgata.

*Etenim correxit orbem terræ, qui non commovebitur; iudicabit populos in aequitate.*

Hoc Regnum merito convenire Christo, probat duplici ratione. Primum quia ipse est, qui cum in forma Dei esset, orbem terrarum condidit, confirmavit, & stabilivit, ut commoveri non posset; iustum enim est, ut ipse regnet in terra, qui terram ipsam condidit. In Hebræo est, *ticcon*, à verbo, *cun*, quod est stabilire, firmare, dirigere. & hoc idem verbum habetur in Psalm. 92. ubi legimus, *Etenim firmavit orbem terræ, qui non commovebitur*. Itaque potest referri hæc pars versiculi ad creationem mundi: & tunc, correxit, idem erit, quod, ita directè fundavit, ut nutare non possit: potest etiam idem verbum exponi de correctione morum per optimas leges, & instituta; & tunc sensus erit, Christum iure, ac merito regnare debere in orbe terrarum, quia orbem terræ nutantem ob pravas institutiones gentiliū, ita correxit per legem suam Evangelicam, quæ prohibet omnia vitia, ut iam commoveri non possit, si leges illas sequatur, & observet. Vnicum enim Domini præceptum de dilectione, si observetur, totum orbem terrarum corrigit, & in summa pace constituit. Secunda ratio est, in verbis sequentibus, *iudicabit populos in aequitate*, id est, non solum correxit orbem terræ sanctif-

simis legibus suis; sed etiam tempore suo iudicabit orbem iustissime; tribuet enim ijs, qui legem Evangelij servauerint, amplissima præmia; & ijs, qui servare noluerint, iustissimas poenas.

*Latentur cæli, & exulter terra, commoveatur mare, & plenitudo eius: gaudebunt campi, & omnia quæ in eis sunt.*

*Tunc exultabunt omnia ligna sylvarum à facie Domini, quia venit, quoniam venit iudicare terram.*

Excitat ad lætitiā omnes res creatas propter aduentum Domini, tum primum, tum secundum. Primus enim aduentus omnia consecravit; secundus omnia glorificabit: nunc enim omnis creatura ingemiscit, & parturit subiecta corruptioni, sed postmodum liberabitur à servitute corruptionis, in libertatem gloriæ filiorum Dei, ut dicitur ad Rom. 8. *Latentur ergo cæli, & exulter terra, quæ sunt partes mundi principales: commoveatur etiam mare motu exultationis, & plenitudo eius*, id est, omnia quæ continentur in eo, siue insulæ, siue pisces. *Gaudebunt campi, & omnia, quæ in eis sunt*, id est, sic erit, ut optavi: nam optavi, ut terra exultaret; ipsa vero omnino exultabit, quia gaudebunt campi, & omnia quæ in eis sunt, siue pecora, siue plantæ: imò etiam ipsa ligna sylvarum quantumvis sterilia, & inculta exultabunt à facie Domini, ad præsentiam videlicet conditoris; exultabunt autem, quia venit Dominus redempturus orbem terræ in misericordia; & quoniam iterum venit iudicare orbem terræ in iustitia. Sic enim exponunt S. Hieronymus, S. Augustinus, Theodoretus, & Euthymius, qui referunt illud, quia venit, ad primum aduentum, illud, quoniam venit iudicare terram, ad secundum aduentum. Sed si magis placeat iuxta morem Hebræum, utrunque referre ad iudicium, quæ est simplicior, & fortasse magis literalis expositio; tunc dicendum erit, iudicium novissimum



mum fore simul, & terribile, & latissimum; terribile impijs, latissimum iustis. Nam ea de causa in scripturis nunc describitur, vt quid lugubre; horrois, & timoris plenum iuxta illud Luc. 21. *Erunt signa in sole, & luna; & stellis, & in terris pressura gentium praefusione sonitus maris, & fluctuum, arescentibus hominibus praetimore, & expectatione qua superueniet vniuerso orbi; nam & virtutes caelorum mouebuntur: nunc vero describitur, vt quid iucundum, & latum propter gloriam electorum, quae redundabit in ipsum caelum, & terram, & maria, quae renouabuntur, & statum omnino meliorem acquirant. vnde dicitur paulo infra in eodem loco Euangelij, *His autem fieri incipientibus, respicite, & leuate capita vestra, quoniam appropinquat redemptio vestra.**

XIII.

*Iudicabit orbem terra in equitate, & populos in veritate sua.*

Concludit, praedicens quale futurum sit iudicium. *Iudicabit*, inquit, *orbem terra in equitate*, id est, *in iustitia*; id enim sonant vox Hebraica, & Graeca: proinde non est accipienda hoc loco aequitas proprie, sed pro vera iustitia. Repetit, & declarat hoc ipsum cum addit, *& populos in veritate sua*, vbi quod dixerat, *iudicabit orbem terra*, explicat cum dicit, *iudicabit populos*; non enim terram ipsam, sed populos habitantes in ea iudicabit. Quod autem dixerat *in equitate*, explicat, cum dicit *in veritate sua*, id est, in ea veritate, & fidelitate, qua semper adimplet quod promissit, promissit autem, se redditurum vnicuique secundum opera sua, non accepturum personas, iuste denique iudicaturum. Hoc igitur modo iudicabit, & non aliter. Haec certe sententia deberet somnum, & torporem mortalium excutere, neque quia differtur iudicium, & Deus interim patienter agit; credere debemus, iudicium non esse futurum. Qui enim tam multa promissit antequam fierent, & re ipsa praestitit: non decipit nos in hoc vno, quod tanti momenti est. An vero, inquit, S. Augustinus, exhibuit nobis Deus omnia quae promissit, & de solo die iudicii nos fefellit? Vide explicationem

S. Augustini ad Psalmum septuagesimum tertium prope finem, vbi copiose de hac re tractat.

## PSALMVS XCVI.

*Titulus, & Argumentum.*

Huic David, quando terra eius restituta est.

**H**VNC titulum non habent Hebraici codices; proinde vel excidit incuria scriptorum, vel eum addiderunt Septuaginta Interpretes: habetur enim in Graecis, & Latinis editionibus, & ab antiquis Patribus exponitur. Et quamuis in libris Graecis non sit proprie, restituta, sed constituta: tamen idem est sensus, cum enim restituta fuit terra Davidi, quam ei Absalon filius abstulerat, tunc ipsa terra constituta fuit, id est, confirmata, & stabilita, quae antea quodammodo fluctuauerat. vocatur enim terra hoc loco, possessio terrae, sine Regno terrenum. Sed non videtur Psalmus ad literam intelligendus de restitutione, aut constitutione Regni Davidis; nihil enim eiusmodi in Psalmo legimus, sed videtur sanctus Propheta occasione terra à se recuperata, Spiritu sancto afflatus cecinisse restitutionem, & constitutionem perfectam Ecclesiae, quae futura est post vltimum iudicium, quando remotis persecutionibus omnibus, & omnibus inimicis Christi sub pedibus eius constitutis, Ecclesia pace perpetua, & tranquillitate fruetur, & Christus ipse pacifice in vniuersa creatura regnabit.

## EXPLICATIO PSALMI XCVI.

**D**ominus regnauit, exultet terra, letentur insulae multae.

Duobus modis ad literam potest hic Psalmus exponi, primum de Regno Dei absolute, deinde de Regno Christi post Resurrectionem, vt exponunt Augustinus, Theodoretus, & Euthymius: iuxta priorem intelligentiam hic sensus erit, *Dominus regnauit, id est, Dominus Deus est verus, & supremus*



mus Rex ; & omnes alij Reges serui eius sunt: idē exultet terra, latentur in sula multa, id est, exultent, & latentur omnes habitantes orbem terrarum, siue habitent continentem terram, siue insulas, quæ plurimæ sunt in mari : quia si fortē opprimantur à Regibus terrenis, non deerit illis Dominus, qui Rex est supremus, & inferiores Reges nullo negotio coërcere, & in ordinem redigere potest. Iuxta posteriorem intelligentiam hic sensus erit, Dominus Christus, qui aliquando humilis ante Reges iudicandus stetit, iam regnauit : quia data est ei omnis potestas in cælo : & in terra, vt iam nulli potestati nec de iure, nec de facto subijciatur, sed omnibus præsit, vt Princeps Regum terræ, & Rex Regum, ac Dominus dominantium : idē exultet terra, & latentur in sula multa, quia Dominus, qui regnum Mundi adeptus est, frater noster est dignatione, quamuis & Deus noster sit creatione, & Dominus redemptione.

à verbo, cum, vt diximus in explicatione Psalmi superioris. Itaque illud; correctio, significat hoc loco rectitudinem, siue directionem, vt sensus sit rectitudo, siue directio sedis Dei consistit in iustitia, & iudicio: rectissima enim est potestas iudiciaria Dei, quæ per sedem significatur, quia Deus semper iustè iudicat, nec potest vilo modo iniustè iudicare, cum sit ipsa sapientia, & iustitia. est autem hoc proprium Dei; nam sedes aliorum Regum non carent obliquitate aliqua, cum faciliè illis error obrepat, vel ex ignorantia, vel ex falsa informatione, vel ex passione. Iuxta posteriorem sensum, significatur aduentus Christi ad Iudicium: veniet enim in nubibus cæli, splendore magno circumdatus, vt ipse dixit in Euangelio Matth. 24. & 26. & vt Ioannes scripti Apocal. 11.

*Ignis ante ipsum præcedet, & inflammabit in circuitu inimicos eius.*

III.

*Nubes, & caligo in circuitu eius, iustitia, & iudicium correctio sedis eius.*

Iuxta priorem sensum explicatur natura Dei, qui cum inuisibilis sit, tamen gubernat, & regit mundum visibilem, summa iustitia. Nubes & caligo in circuitu eius, id est, Dominus Rex noster inuisibilis est, quia lucem habitat inaccessibilem, & similis est soli, qui quando nube, & caligine tectus est, non potest videri, & tamen lumen, & calorem eius sentimus. sic in Psal. 17. describitur Deus, posuit, inquit, tenebras latibulum suum, in circuitu eius tabernaculum eius tenebrosa aqua in nubibus aeris, sic in monte Sina apparuit tectus nubibus, & caligine, vt dicitur Exod. 20. iustitia, & iudicium correctio sedis eius, id est, quamuis inuisibilis sit, verè tamen adest, & iudicat populos iustissimo iudicio. Illud, correctio, potuisset etiam verti, firmamentum, vt vertit S. Hieronymus, nec non stabilitas, rectitudo, præparatio, vt alibi vertunt iidem Septuaginta Interpretes: nam hæc omnia significat vox Hebraica, mecon,

Iuxta priorem sensum significatur admirabilis potentia, efficacia, & celeritas punitionis, quam Deus exercet in impios, quando vult eos punire in hoc Mundo. Ignis ante eum præcedet, id est, quandoque voluerit iudicare, & punire impios, ignem à sede sua emittere, id est, virtutem efficacissimam, & velocissimam, quæ subito inflammabit, & consumeret in circuitu, vndique, vt non sit vllum effugium omnes inimicos eius. Potest etiam per ignem intelligi Angelorum ministerium: nam vt dicitur in Psal. 103. Facit Angelos suos spiritus, & ministros suos ignem vrentem. De hoc igne dicitur Psal. 17. Ignis à facie eius exarsit, & Danielis 17. Fluius igneus, rapidusq, à facie eius egrediebatur. Iuxta sensum posteriorem significatur ignis ille, qui præbit ante iudicium, & comburet omnia quæ in terra sunt, homines, domos, hortos, vineas, animantia, & cætera: de qua re scribit Apostolus Petrus in 2. Epist. cap. ultimo, quemadmodum tempore Noe mundus aquis inundatus perijt, ita in aduentu Christi ad iudicium, terram, & omnia quæ in ea sunt, igni exurenda, & consumenda.

Bbbb 3 menda



menda esse. Quod autem dicit Psalmus, solos inimicos Dei, illo igne inflammandos; ideo dicit, quia solis impijs ignis ille nocet, quippe qui thesaurum suum, & cor suum habent in terra. Illi enim molestissimè ferent, per ignem illum occidi, & absumi opes omnes terrenas, quas diligebant: Iustis autem non nocebit, quia bona terrena iam spreuerant, seque ad meliora transferri per mortem videbunt.

IV. *Illuxerunt fulgura eius orbi terra, vidit & commota est terra.*

Iuxta priorem sensum pergit David explicare potentiam Dei in impios. Deus enim non solum igne virtutis suæ, aut Angelorum sanctorum, sed etiam corporalibus fulguribus terret, quando ei placet, vel etiam tanta velocitate interimit hostes, ut tela eiusmodi nulla arte præcaueri, aut repelli possint. De hoc etiam dicit in Psal. 17. *Intonuuit de cælo Dominus, & altissimus dedit vocem suam, misit sagittas suas, & dissipauit eos, fulgura multiplicauit, & conturbauit eos, ait igitur, Illuxerunt fulgura eius orbi terra, id est, quando placuit illi, in promptu habuit sagittas fulgurum iacere, & ubi illa aluxerunt orbi terra, terra ipsa, quasi sensum haberet, & videret horrendam speciem cœlestium, tota contremuit, & tremore commota est. Est hæc poetica descriptio, qua vis maxima fulgurum demonstratur. Iuxta sensum posteriorem declaratur modus, quo ante iudicium ignis maximus exorietur, & consumet omnia, id enim fiet per instrumenta fulgurum, quæ frequentissima erunt, sic legimus Sap. cap. 5. *Ibunt directæ emissiones fulgurum, & tanquam à bene curuato arcu nubium exterminabuntur, & ad certum locum insilient.**

V. *Montes sicut cera fluxerunt à facie Domini, à facie Domini omnis terra.*

Hic explicat Propheta iuxta vtrunque sensum potentiam Domini per effectum, & persistit in eadem similitudine ignis: quomodo enim cera non potest subsistere ante faciem ignis, quin statim liquefiat, & pe-

reat: sic montes, quantumuis maximi, & durissimi sint, imò omnis terra, quæ solidissima est omnium elementorum, vim diuinæ potentie sustinere non posset, si Deus eam repente consumere, & ad nihilum redigere vellet. Itaque verba huius versiculi non ita sunt accipienda, quasi re ipsa montes fluxerint, sicut cera; sed quia ita fieret, si Deus vellet. Alij exponunt, montes fluxisse veluti ceram, per apparentiam, quia visi sunt liquefcere, & consumi, quamuis re vera non consumerentur. Alij volunt, per montes, significari homines superbos, qui in iudicio præ timore liquefcant instar cere ante faciem ignis. Illud, *omnis terra*, in Græco est *omnis terra*, & sic legit S. Augustinus, & concordat cum Hebraica lectione, quam sic reddit S. Hieronymus, à facie dominatoris omnis terræ. Fieri potest, ut nostra lectio vitio librariorum sit mutata, quod facillimè contingere potuit: vterque tamen sensus est verus, neque est varietas hæc alicuius momenti.

*Annunciauerunt cœli iustitiam eius, & viderunt omnes populi gloriam eius.*

Iuxta priorem sensum cœli annunciarunt iustitiam eius, quia ex conspectu Solis, & Lunæ, & Stellarum, & continuis conuersionibus eorum, potuerunt homines intelligere Deum esse moderatorem iustissimum orbis terræ. Sicut etiam dicitur in Psal. 18. *Cœli enarrant gloriam Dei*, & idem affirmat Apost. ad Rom. 1. & Sapiens in libr. Sap. cap. 14. Possunt etiam, per cœlos annunciatōres iustitiæ Dei, intelligi Apostoli, & Prophetæ, ex quorum prædicatione viderunt omnes populi gloriam eius, id est, cognouerunt, vel certe cognoscere potuerunt magnitudinem potentie, sapientie, bonitatis Dei, ex quibus consequitur gloria, id est, claritas nominis eius. Iuxta sensum posteriorem, significatur his verbis angelica tuba, quæ de cœlo annunciabit venturum Iudicem Mundi totius, & rigorem iustitiæ eius in eos, qui misericordem Redemptorem suscipere noluerunt; & tunc videbunt omnes populi gloriam Domini, cum apparebit in nubibus cum



eum omnibus Angelis in maiestate sua. De hoc aduentu scribit Apostolus 1. Thessal. 4. *Ipse dominus in iussu, & voce Archangeli, & in tuba dei descendet de caelo.* Ipse etiam Dominus Matth. 24. *Mittet, inquit, Angelos suos cum tuba, & voce magna, & Apocal. 1. scribit iohannes, Ecce venit cum nubibus, & videbit eum omnis oculus, & qui eum pupugerunt. Annuntiabunt ergo caeli,* id est, Angeli de caelo, *iustitiam eius,* qui veniet redde- re unicuique secundum opera eius : & tunc videbunt omnes populi, omnes omni- no, nullo excepto, gloriam eius, quando omne genu flectetur ei, celestium, terre- strium, & infernorum. Philip. 2.

*Confundantur omnes, qui adorant sculptilia, & qui gloriantur in simulacris suis.*

Iuxta priorem sensum colligit Propheta ex iam dictis, merito confundi debere omnes Idolorum cultores, cum iam satis constet vnum solum esse verum Deum, qui do- minatur, & regnat in caelo, & in terra, quiq; summa potentia, sapientia, & iustitia prae- ditus gubernat omnia. *Confundantur omnes, qui adorant sculptilia,* quae Dij sunt inanes, & nec se, neque alios iuuare possunt, & mul- to magis confundantur, *qui gloriantur in si- mulacris,* id est, in Idolis suis, cum errore de- cepti gloriantur in ea re, ob quam maximè erubescere deberent. Iuxta sensum postero- rem, per modum imprecationis praedicatur confusio maxima, quae operiet in die Iudicii omnes Idololatrias : tunc enim apertissime cognoscent, Idola nihil fuisse, & Idolorum habitatores fuisse spiritus immundos, cum quibus ad aeterna supplicia damnabuntur.

*Adorate eum omnes Angeli eius; audi- uit, & letata est Sion.*

*Et exultauerunt filiae Iudae propter iu- dicia tua Domine.*

Iuxta priorem sensum, ut probet Prophe- ta merito se dixisse, *Confundantur qui ado- rant sculptilia,* conuertit se ad Angelos, &

inuitat eos ad adorandum Deum. Si enim Angeli, qui sunt nobilissimae creaturae, non debent adorari tanquam Dij, sed ipsi Deum adorare debent, ut eius serui, quanto minus Dæmones, vel Idola colenda sunt? *Audiuit, & letata est Sion,* id est, audiuit populus Dei, Deum ubique regnare, Idola nihil esse, ipsos etiam Angelos subiectos esse Deo nostro; & ideo his auditis valde læ- tatus est, quod tantum habeat Regem : *& exultauerunt filiae Iudae propter iudicia tua Domine,* id est, idem populus Dei, qui & no- mine Sion, & nomine filiorum Iudae intelli- gitur, exultauit propter iudicia tua, id est, quia tu Deus iudicas omnes iusto iudicio. Iuxta sensum posteriorem, demonstrat Pro- pheta maiestatem Christi venientis ad iudi- cium, ex eo quod in iudicio manifestè ap- parebit, Christum verè esse Deum ex mini- sterio, quod illi exhibebunt omnes Angeli. Astabunt enim Angeli, ut ministri, eumque adorabunt, & obediunt missi ab ipso ad di- uersa ministeria: ex quo sequetur maxima lætitia, & exultatio in viris fidelibus, cum viderint tanta gloria coram toto Mundo af- fici Dominum suum. Vritur autem Prophe- ta apostrophe ad Angelos, & quasi exhor- tans ad faciendum, quod sua sponte factu- ros eos praeuidebat. *Adorate, inquit, eum,* id est, Christum pro tribunali sedentem, *omnes Angeli eius.* Confirmat hanc exposi- tionem Apost. ad Heb. 1. dicens, *Et cum ite- rum introducit Primogenitum in orbem terrarum, dicit, & adorent eum omnes Angeli dei.* Vi- detur enim Apost. per illud, iterum signifi- care voluisse secundum aduentum Christi, & ad illum aduentum applicare ista verba Psalmi, *Adorate eum omnes Angeli eius:* non enim alibi similia verba inueniuntur. Cerrè Theodoretus ex hoc Psalmo Apostolum ac- cepisse testimonium illud, disertè affirmat. Quod autem quidam auctor dicit, verba cita- ta ab Apostolo, sumpta esse ex vltimo ver- siculo cantici Moysis, quod habetur in Deu- teronomio c. 32. non videtur probabile, cum neq; in textu Hebraico, neq; in versione Septuaginta fiat mentio adorationis. Per fi- lias Iudae, aliqui intelligunt oppida subiecta ciuitati.



ciuitati Hierusalem: sed quicquid sit de verbis, certum est, sensum pertinere ad populum Dei electum.

X. *Quoniam tu Dominus altissimus super omnem terram, nimis exaltatus es super omnes Deos.*

Redditationem, cur populus Dei exultare cepit auditis illis, quæ dicta sunt: ratio autem est, quia ex illis colligitur, Dominum populi Dei esse verè supremum Dominum, altissimum super omnem terram, id est, super omnes Reges, & Principes terræ, & eleuatum & exaltatum nimis, id est, maximè, *super omnes Deos*, id est, super omnes Angelos, qui sunt Diij per participationem, & super omnes Deos falsos, qui per errorem colebantur à gentibus. Et quamuis hæc sint vera iuxta priorem sensum, qui varijs miraculis Deus noster se superiorem omnibus Regibus terræ, & omnibus dijs manifestè probauit; tamen iuxta sensum posteriolem non minus vera, & magis clara sunt. Nunquam enim Deus manifestauit gloriam suam apertius, quam faciet in nouissimo die, quando vt supra diximus, omnes omnino homines, & Angeli tam boni, quam mali curuabunt genua ante illum.

XI. *Qui diligit Dominum, odite malum, custodit Dominus animas Sanctorum suorum, de manu peccatoris liberabit eos.*

Concludit Psalmum exhortans populum Dei ad sectandam vitæ puritatem, & sanctitatem, quæ, & in hoc tempore, & in futuro magnum præmium habebit. *Qui diligit Dominum, odite malum.* Non poterat breuius, & plenius exhortari Propheta sanctus, populum Dei electum: nam cum ait, *Qui diligit Dominum*, appellat omnes verè iustos: charitas enim Dei complectitur omnes virtutes: *nam qui diligit, legem impleuit*: & plenitudo legis est dilectio. Rom. 13. Itaque illud, *Qui diligit Dominum*, significat, o vos omnes, qui verè, non fictè, qui non ore tantum, sed etiam corde, qui secundum legis

antimum, non secundum externam superficiem iusti, & sancti, & Deum timentes estis. Illud, *odite malum*, comprehendit summam perfectæ exhortationis, quoniam non ait, fugite malum, vel, declinate à malo, quod utcumque actu externo fieri potest: sed, *odite malum*, quod nisi corde fieri non potest.

Cur autem fons est omnium actionum bonarum, & malarum: vt enim ex corde procedit amor summi boni, ita ex corde procedunt cogitationes malæ, homicidia, adulteria, fornicationes, furta, falsa testimonia, blasphemix. Matth. 15. Subiungit deinde præmium, dicens, *Custodit Dominus animas sanctorum suorum, de manu peccatoris liberabit eos*, id est, custos est Dominus fidelis, & diligens, fortis, & prudens diligentium se, vt vitam ipsorum defendat, & liberet de potestate iniquorum, qui ordinariè inimici sunt hominum iustorum. Hæc autem promissio impletur quidem in hac vita secundum priorem sensum: quoniam Deus custodit sæpè vitam corporalem sanctorum suorum; semper autem custodit vitam spiritualem, quod est beneficium longè maius; & ideo fortasse dixit, *custodit animas*. Facit enim, vt omnia cooperentur in bonum his qui secundum propositum vocati sunt sancti, Rom. 8. Sed iuxta sensum posteriorem, custodiet animas sanctorum suorum in die nouissimo, vt nihil eis noceant accusationes inimici: & perfectissimè de manu peccatoris liberabit eos, quia post vltimam illam sententiam nihil amplius poterunt peccatores aduersus iustos.

*Lux orta est iusto, & rectis corde laetitia.*

Hoc est alterum præmium iustorum, quod non solum liberabuntur à malis, sed etiam implebuntur bonis. Per lucem hoc loco potest intelligi lux fauoris diuini, vel, quod verius videtur, lumen iustitiæ, & intelligentiæ, de quo dicitur Sap. 5. Ergo errauimus à via veritatis, & lumen iustitiæ non luxit nobis, & sol intelligentia non est ortus nobis. Dicitur autem lux iustitiæ, & intelligentiæ ortiri alicui, quando cognoscere incipit



incipit non theoricè tantum, sed etiam practicè iustam, & iniustum, bonum, & malum; & illud iudicat, & eligit quod verè iustum & bonum est; non quod apparet iustum, & bonum menti male affectæ ex perturbatione passionum. Hæc igitur lux orta est iusto, sine qua non esset iustus; & quia gaudium est iusto facere iustitiam, vt Philo- sophus docet, rectè subiungitur, *Et rectis corde lætati*: iustitia enim dirigit cor, & recto cordi ineffabilis infunditur lætitia ex eo quod conforme redditur voluntati Dei, & omnia ei placent, quæ placent Deo, à cuius nutu pendent omnia. Itaque nihil est, quod iustum contristare possit; sed inter ipsas etiam grauissimas tribulationes, gaudet, & gaudium eius nemo tollit ab eo. In Hebræo legitur, Lux seminata est iusto: sed corrupta videtur litera Hebraica vnius literæ mutatione, nam *zarag*, significat seminare, & sic legitur hodie: *zarach*, significat oriri, & sic legerunt Septuaginta Interpretes, & S. Hieronymus: & id ipsum confirmat ratio metaphoræ, non enim lux rectè dicitur seminari, sed oriri rectissime dicitur. Itaque lectio nostræ vulgatæ editionis non est corrigenda ad Hebraicam; sed contra, Hebraica ad nostram.

*Lætamini iusti in Domino, & confitemini memoria sanctificationis eius.*

Hoc sequitur ex ijs, quæ dicta sunt in superiori verticulo. Si enim lætitia orta est rectis corde, vtrique hoc sequitur, vt recti corde, id est, iusti lætentur, non in vanitatibus sæculi, in quibus lætantur iniusti; sed in Domino, qui eis iustitiam, & lætitiā donat, imò qui est ipsorum gaudium verum, & solidum, cum sit lux pulcherrima oculis interioribus, & dulcedo maxima interno palato. Nec solum lætari debent iusti in Domino, sed etiam *confiteri memoria sanctificationis eius*, id est, laudibus celebrare memoriam sanctificationis à Deo acceptæ: non enim decet vnquam obliuisci tanti beneficii, quo Deus nos ex impijs, & iniquis sanctos, & iustos effecit. Potest etiam per sanctificationem intelligi sanctitas Dei, qua

ipse sanctus est, quæ est summa, & excellentissima sanctitas. vnde dicitur Isai. 6. *Sanctus, sanctus, sanctus*. Est autem, *confiteri memoria sanctitatis Dei*, cum laudibus semper recordari Deum nostrum sanctissimum esse, ac per hoc debere nos summo studio sanctitati studere, hæc est enim voluntas Dei sanctificatio nostra, 1. Thel. 4. *Et sancti estote* (inquit Dominus) *quoniam ego sanctus sum*. Leuit. 11. & 1. Petri 1.

## P S A L M V S XCVII.

*Titulus, & Argumentum.*

Psalmus ipsi Dauid.

**I**N Hebræo non habetur nomen Dauidis, sed simpliciter legitur, Psalmus. Quis addiderit ipsi Dauid, ignoratur, credibile est Septuaginta Interpretes addidisse. Argumentum est idem serè, quod Psalmi nonagesimi quinti. Prædicat enim Dauid Christi aduentum primum, & secundum, illum ad saluandum, istum ad iudicandum.

## EXPLICATIO PSAL. XCVII.

**C**antate Domino canticum nouum, quia mirabilia fecit.

Inuitat homines ad Deum laudandum ob mirabilia quæ fecit. *Cantate*, inquit, *Domino canticum nouum*, quia videlicet nouum offertur argumentum carminis. nec solum nouum, sed magnum, & admirabile. *Quia mirabilia*, inquit, *fecit Dominus*: mirabiliter enim & nouo modo conceptus de Spiritu sancto, natus de Virgine, peccatum nullum fecit, peccatores iustificauit, surdos fecit audire, & mutos loqui: quin etiam cæcos videre, claudos ambulare, ægros bene valere, mortuos viuere, & quod omnium est maximè nouum, & mirabile, mortuus ipse se tertia die viuum exhibuit, cælum cum corpore penetrauit, Spiritum sanctum de cælo misit, per homines idios & viles, sapientibus, & prudentibus persuasit Crucifixum colere, præsentia spernere, futura desiderare: denique (vt loquitur

Cccc

S. Au.



S. Augustinus) domuit orbem, non ferro, sed ligno. Possunt etiam hæc referri ad Deum Patrem, qui in Filio suo, & per Filium suum hæc mirabilia fecit: ait enim Dominus Ioan. 14. *Pater in me manens ipse facit opera.*

II.

*Saluauit sibi dextera eius, & brachium sanctum eius.*

Explicat quæ sint illa mirabilia, & proponit vnum, in quo continentur omnia. Hoc mirabile fecit Dominus, quod ipse solus virtute sua saluauit Mundum, non egiit socijs, non exercitu, non armis: ipse solus Principem Mundi eiecit foras, & vniuersitatem generis humani de ipsius potestate liberauit. Hic finis erat omnium mirabilium, quæ paulò ante numerauimus, ac per hoc in isto vno intelliguntur omnia. Illud, *saluauit*, potest referri ad filium, qui sua virtute mundum saluauit, & ad Patrem, qui per dexteram suam, id est, per Christum Mundum saluauit: sed in idem recidunt omnia. Illud, *sibi*, secundum Hebraicam phrasim, idem significat, quod *ipsa*, ac si dixisset Propheta, *Dextera ipsius ipsa saluauit*, siue ipsa salutem Mundi operata est. Sic legimus in Canticis cap. 1. *Abi post vestigia gregum tuorum*; ubi est in Hebræo, *abi tibi*, & cap. 2. *Imber abiijt*, in Hebræo, *imber abiijt sibi*: sed illud, quia redundat, & in ipso verbo subintelligitur. Sed Isaiæ 59. expressit Interpretes illud *sibi*, cum ita vertit, *Saluauit sibi brachium suum*, & cap. 63. *Saluauit mihi brachium meum*. Alij tamen volunt illud, *sibi*, positum esse pro *seum*, vt sensus sit, *Saluauit eam dextera eius*, quia propria virtute resurrexit à mortuis. S. Augustinus refert illud, *sibi*, ad Christum, vt ad finem, vt sensus sit, *Saluauit Christus homines, sed sibi*, id est, ad gloriam suam. Omnes sunt expositiones veræ, sed prima est maximè literalis. Quod additur, *Et brachium sanctum eius*, est repetitio, & declaratio præcedentium. idem enim est dextera, & brachium, id est, virtus & potentia; sed additur, *sanctum*, vt intelligamus,

roborem huius brachij non esse aliquid carnale, sed spirituale. non enim Christus armis, aut viribus corporis hostem deiecit, sed charitate, & patientia, humilitate, & obedientia, meritis vitæ sanctissimæ, sanguine precioso ex charitate fuso; non hasta, & gladio victoriam de hoste potentissimo reportauit. Sic enim ait Apostolus Philip. 2. *Humiliauit semetipsum factus obediens vsque ad mortem, mortem autem Crucis.*

*Notum fecit Dominus salutare suum: in conspectu gentium reuelauit iustitiam suam.*

Potest hic etiam versiculus referri ad Patrem, qui *notum fecit salutare suum*, id est, Saluatorem, quem misit, primo per Prophetas, deinde per Apostolos; & per eisdem reuelauit *iustitiam suam*. Potest etiam referri ad ipsum Filium, qui salutem, quam operatus est, ipse idem per se, & suos notam fecit: prædicauit enim ipse palam totos tres annos, & amplius; deinde misit Apostolos, qui omnibus gentibus Euangelium annuntiauerunt. Itaque Dominus ipse prædicando, *notum fecit salutare suum*, id est, salutem suam, quam attulerat, & dabat credentibus in eum. deinde *in conspectu gentium* per Apostolos suos reuelauit *iustitiam suam*, id est, mysterium abconditum, & velatum à seculo reuelauit, & manifestauit Gentibus: est autem hoc mysterium, *iustitia sua*, id est, adimpletio promissionis olim facta patribus de redemptione generis humani. Sic enim intelligendam puto hoc loco iustitiam, quoniam in versu sequenti declaratur hæc iustitia per nomen veritatis, vt mox videbimus. Siquis tamen velit, per iustitiam accipi hoc loco satisfactionem Christi ex rigore iustitiæ pro peccatis totius mundi, non repugno; siue hæc referantur ad Patrem, siue ad Filium. Verè enim Pater per passionem Filij, & Filius per passionem suam reuelauit, quanto zelo puniendâ sit iniquitas, & quanto rigore iustitiæ eam ipse expiare voluerit. De hoc mysterio scribit Apost. ad Ephes. 3.

Adhuc.



Mihi omnium Sanctorum minimo data est gratia hæc, in gentibus euangelizare inuicem, & illuminare omnes, quæ sit dispensatio Sacramenti absconditi a sæculis in Deo.

Recordatus est misericordie sue, & veritatis sue domui Israel.

Reddit rationem, cur Deus notum fecerit salutare suum, & reuelauerit iustitiam suam, Ratio autem est, quia promiserat hoc Patribus: & quamuis aliquandiu distulerit implere: tandem tamen recordatus est, id est, fecit, quod faciunt ij, qui recordantur: non enim in Deo cadere potest obliuio, sed metaphorice dicitur recordari, cum implet, quod distulerat implere, quasi oblitus esset. Eadem metaphora vitur passim Scriptura, vt Gen. 8. Recordatus est Dominus Noë, & Luc. 1. Recordatus misericordie sue. Recordatus est igitur Deus Pater misericordie sue, quæ promissit Patribus Saluatorem; & recordatus est Deus Filius misericordie sue, quæ venturum se esse pollicitus est: & simul recordatus est uterque veritatis sue, id est, fidelitatis, & iustitiæ in adimplenda promissione. Addit Propheta, domui Israel, promissio enim domui Israel facta est, non gentibus; tametsi gentium quoque misereri Deus decreuerat, & per Prophetas sæpè prædixerat. Hinc Dominus Matth. 15. dicit, Non sum missus, nisi ad oves, quæ perierunt domus Israel, & Apostol. Rom. 15. dico, Christum Iesum ministrum fuisse circumcisionis propter veritatem Dei ad confirmandas promissiones Patrum, gentes autem super misericordiam honorare Deum, sicut scriptum est, Propterea confitebor tibi in gentibus Domine.

V. **Viderunt omnes termini terræ salutare Dei nostri.**

Hic declaratur fructus prædicationis Apostolicæ; non enim frustra notum fecit Dominus per euangelicam prædicationem salutare suum. Audierunt enim gentes prædicatores Dei, & crediderunt, atque eo modo purificato cordis oculo per Fidem, & expectantem gratiæ, viderunt omnes termini

terra, id est, tota terra usque ad terminos suos, salutem, siue saluatorem, Illud, viderunt, energiam habet: significat enim fidem actualem, cum notitia coniunctam, quæ mouet voluntatem ad amandum, & desiderandum: non enim dici possunt vidisse salutare Dei, qui fide habituali contenti de Saluatore non cogitant, neque de salute (quæ ab ipso est) acquirenda solliciti sunt. Illud, omnes termini in terra, non significat omnes, & singulos homines, sed multos ex omni natione, & gente.

**Iubilare Deo omnis terra, cantate, & exultate, & psallite.**

Signum fidei est gratias agere Deo, & præ lætitiâ spirituali exultare, & iubilare. Sic ille, qui inuenit thesaurum, Matth. 13. abiit, & præ gaudio vendidit omnia, quæ habuit. Sic Act. 8. cum prædicasset Philippus in Samaria, & recepissent Samaritani Verbum Dei; factum est gaudium magnum in illa ciuitate, & ibidem conuersus, & baptizatus Eunuchus ibat per viam suam gaudens. Sic 1. Pet. 1. Credentes exultatis lætitiâ inenarrabili, & glorificata. Hoc igitur gaudium prædicat nunc Propheta per modum inuitantis, & cohortantis. Iubilare, inquit, omnis terra, id est, omnes fideles ex vniuersa terra conuersi de tenebris ad lumen admirabile, ad notitiam veri Dei, & Saluatoris Iesu Christi, magna voce laudate, & gratias agite, cantate linguis, exultate animis, psallite moribus: & quia mores, siue virtutum opera multiplicia sunt: ideo multa hic subiiciuntur genera instrumentorum.

**Psallite Domino in cithara, in cithara, & voce psalmi, in tubis ductilibus, & in voce tubæ corneæ.**

Quatuor instrumenta numerantur, quibus Deo psallere debent, qui viderunt salutare Dei per fidem, & videre cupiunt per speciem; cithara, psalterium (idem enim significat, in voce psalmi, & in sonitu psalterij) tuba ductilis, & tuba cornea. Hæc instrumenta erant in vsu apud Hebræos secundum literam: sed à nostris variè explicatur eorum significatio spiritualis. Mihi viden-



tur posse satis commodè applicari quatuor virtutibus cardinalibus; *cithara prudentia, psalterium iustitia, tuba ductilis fortitudini, tuba cornea temperantia.* Cithara variarum chordarum sonos miscens. vnum. dulcem concentum efficit: Sic prudentia varias circumstantias operis boni coniungens perfectum opus reddit. Psalterium decem chordis instructum decalogum nobis representat, id est, omnia præcepta iustitiæ. Tuba ductilis malleorum ictibus extenditur, & formatur, vt sonum suauissimum edat: Sic fortitudo tribulationes, & angustias patienter ferendo ita extendit, & perficit hominem Dei, vt suauem illum sonum edat cum S. Iob, *Si bona suscepimus de manu Domini, mala quare non sustineamus?* Denique temperantia quasi durum cornu carnem mollem excedens, & superans, id est, corpus castigans ieiunijs, atque vigilijs, & in seruitutem spiritus redigens, tubam spiritualem efficit: qualis erat præcursor Domini, qui melle syluestri, & locustis contentus, & pillos camelorum indutus, ac zona pellicea præcinctus dicebat, *Ego vox clamantis in deserto.* qualis & beatissimus Paulus, qui diuturna temperantia exercitatione edoctus dulcissimos illos edebat sonos, Habentes victum, & quibus tegamur, his contenti sumus, & Esca ventri, & venter escis, Deus autem hunc, & has destruet, & verè magnus quæstus est pietas cum sufficientia.

VIII. *Iubilare in conspectu Regis Domini: moueatur mare, & plenitudo eius, orbis terrarum, & qui habitant in eo.*

Quoniam aduentus Domini communiter omnibus utilis erit, idèd Propheta inuitat ad iubilandum non solum terram in genere, sed omnes partes eius. *Iubilare*, inquit, *in conspectu Regis Domini*, id est, cum aduenerit Rex magnus, qui Dominus omnium est, utpote verus Deus, *iubilare in conspectu eius*, id est, ipso vidente & audiente. *Moueatur ergo mare motu exultationis*, ac si sensu præditum esset, & simul exultet plenitudo eius, id est, quicquid in eo est aquarum insu-

larum, piscium. *Moueatur quoque simili exultationis motu orbis terrarum, & vniuersi qui habitant in eo*, id est, omnes homines; quia Dominus Saluator est omnium hominum, maximè fidelium, vt Apostolus loquitur. 1. Tim. 4. Et S. Leo serm. 1. de natali Domini, *Pro liberandis omnibus venis.*

*Flumina plaudent manibus, simul montes exultabunt à conspectu Domini, quoniam venit iudicare terram.*

Mare, & terram inuitauit: inuitat nunc flumina & montes, vt similiter signa lætitiæ edant: sed de mari dixit, *Moueatur mare*, & in Hebræo *tonet mare*, id est, magno stremitu quasi tonet: de fluminibus dicit, *Flumina plaudent manibus*; quia sonitus fluminum multo leuior est, quàm stremitus maris; proinde rectè ille comparatur tonitruo, iste complosioni manuum. Quod autem dicitur, *montes exultabunt*; in Hebræo est, *Montes laudabunt*, sed omnia sunt metaphorica, siue dicantur monter exultare, siue laudare, & semper idem significant, videlicet: Prophetam ex amore, & desiderio erga Messiam venturum, optare, vt omnes res creatæ latentur, & laudent eo modo quo possunt. Illud, *quoniam venit iudicare terram*, potest referri tam ad primum, quàm ad secundum aduentum, vt diximus in explicatione. Plati mi nonagesimi quinti. Si ad primum aduentum referatur, sensus erit, Exultent, & latentur terra, & mare, montes & flumina, quoniam Dominus venit iudicare, id est, regere, & moderari optimis, & iustissimis legibus orbem terrarum, non solum, vt olim maiesta te inuisibilis diuinitatis, sed etiam corporali, & visibili forma, in similitudinem hominum factus, & habitu inuentus vt homo. Si referatur ad secundum, sensus erit, Exultet terra, & mare, montes, & flumina, quoniam Dominus venit iudicare terram, & exterminabit omnes peccatores de ea, & renouabit omnia elementa, & liberabit ea de seruitute corruptionis, sub qua nunc ingemiscunt, & parturiunt, vt ait Apostolus ad Rom. 8.

Iudi-



*Iudicabit orbem terrarum in iustitia,  
& populos in aequitate.*

Hæc conclusio eadem est cum conclusio-  
ne Psalmi nonagesimiquinti; excepto vlti-  
mo vocabulo. Ibi enim erat, in veritate; hic  
est, in æquitate: & per æquitatem intelligitur  
hoc loco directio, siue restructio, vt sonat  
vox Hebraica: & est repetitio, siue declara-  
tio vocabuli iustitiæ. Quod enim dixit, in  
iustitia, repetit, & declarat, cum dicit, in æ-  
quitate, siue restructio: quemadmodum  
quod dixit orbem terrarum, repetit, & de-  
clarat, cum dicit, populos. Itaque sensus est,  
*Iudicabit orbem terrarum*, id est, omnes po-  
pulos, *in iustitia*, id est, in restructio iudi-  
cij, in quo nihil erit obliquum, nihil ini-  
quum.

## PSALMVS. XCVIII.

*Titulus, & Argumentum.*

Psalmus ipsi Dauid.

**I**N hoc Psalmo nullus omnino titulus est.  
Apud Hebræos: apud Græcos, & Latinos ti-  
tulus est. Psalmus ipsi Dauid, quem eundem  
titulum inuenimus in Psalmo superiore. Ar-  
gumentum est cohortatio Prophetæ ad agnos-  
cendum Regnum Dei, eundemq; Deum ad-  
orandum, & inuocandum, vt fecerunt ma-  
gna cum sua utilitate Moyses, Aaron, & Sa-  
muel. Est autem duplex sensus in verbis hu-  
ius Psalmi, vnus deseruiens tempori Dauidi,  
cum Regnum stabilitum esset in domo Dauid;  
neque enim negari potest, quin in hoc Psalmo  
sermo sit de vero monte Sion, de vera arca  
Dei, de Patribus illis, qui hic nominantur.  
Alter sensus est de Regno Christi, & de sacro  
sancta eius Ecclesia, & de glorioso corpore  
eius: quorum typi fuerunt Regnum Dauid,  
mons Sion, & arca testamenti. Verum, sen-  
sum breuiter aperiemus, vt fecimus in expli-  
catione Psalmi 96.

## EXPLICATIO PSALMI XCVIII.

**D**ominus regnauit irascatur populi:  
qui sedet super Cherubim, mouea-  
tur terra.

Iuxta priorem sensum significatur in hoc  
primò versiculo, stabilitum fuisse Regnum  
Dei in Hierusalem tempore Dauidis, quan-  
tumuis inimici eius Idololatæ indignaren-  
tur, & turbarentur. Dominus, inquit, regna-  
uit, id est, iam Dominus expulsi seculis,  
& Chanaanis Idololatæ Regnum suum  
stabiliiit in Hierusalem. Quamuis enim  
Dauid Rex esset, tamen sub Deo regnabat,  
& ipsi Deo principaliter Regnum suum at-  
tribuebat. Irascantur populi, id est, Dominus  
regnauit inuitis, & repugnantibus popu-  
lis idololatæ; regnauit, inquam, quantum-  
uis irascantur, & indignantur populi: vel, vt  
exponit S. Augustinus prophetia est, non  
iussio, & sensus est, Regnauit Dominus, iras-  
centur populi, qui regnum eius ferre non  
possunt. Qui sedet super Cherubim, mouea-  
tur terra, id est, ille Dominus regnauit, qui  
sedet super Cherubim, moueatur licet, &  
turbetur terra. Dicitur Dominus ad literam  
sedere super Cherubim, quia sedem sibi ele-  
gerat propitiatorium, quod sustinebatur à  
duobus Cherubim ligneis, sed deauratis,  
sub quibus erat arca, quasi scabellum pe-  
dum Domini. Dicebatur autem Dominus  
sedere inuisibiliter in propitiatorio, quia in-  
de responsa dabat. Vnde dicitur 1. Paralip.  
13. Arca Dei sedentis super Cherubim. Sed al-  
tiore sensu dicitur Deus sedere super Che-  
rubim, quia præsidet spiritibus Angelicis:  
vel, vt S. Augustinus exponit, quia Cheru-  
bim interpretantur plenitudo scientiæ, &  
Deus supereminet omnem scientiæ pleni-  
tudinem. Vbi etiam monet, posse nos fieri  
Cherubim, & habere in nobis præsentem  
Deum, si habuerimus plenitudinem scienti-  
æ, non cuiuscunque, sed eius quam in no-  
bis Deus requirit, quæ est scientia volunta-  
tis eius: id est, scientia legis ipsius. Et quo-  
niam plenitudo legis est dilectio; tunc eri-  
mus Cherubim, & habebimus præsen-  
tem Deum, si dilectionem habuerimus,  
sicut scriptum est, Anima iusti sedes est sa-  
pientia. Illud, moueatur terra, declaratio est  
verborum præcedentium, irascantur populi:  
Voluit enim Spiritus S. ostendere eos qui  
irascantur contra Deum nihil esse, nihil ter-  
ram,



ram, & ideo nihil posse aduersus Deum, qui sedet in cœlo super Cherubim, neque esse timendos à nobis, si & ipsi fuerimus Cherubim, & Deum in nobis sedentem habuerimus. Iuxta sensum posteriorem, significatur hoc loco, Regnum Christi declaratum post eius Resurrectionem & Ascensionem: tunc enim prædicari cœpit per omnem terram, & continuo irati sunt populi, & commota est terra pugnantibus pro idolis suis contra Dominum suum: sed illis inuitis & repugnantibus regnauit Dominus Christus, & contrita sunt idola. Quamuis autem ira populorum infidelium videatur præualuisse aduersus corpora Sanctorum Martyrum: reuera tamen non præualuit, quoniam corpora illa reformabuntur ab eo, qui mortem in se ipse occidit: & uiuent in æternum: idola uero semel contrita, nunquam reficiuntur.

II. Dominus in Sion magnus, & excelsus  
super omnes populos.

Iuxta priorem sensum redditur ratio, cur frustra irascantur populi aduersus Deum, qui Regnum suum stabiluit in Sion. Ratio enim est, quoniam Dominus in Sion regnans, magnus est, & excelsus super omnes populos, id est, excellit omnes magnitudine, potentia & sapientia, ut nullo modo superari possit. Iuxta sensum posteriorem significatur, Christum, qui regnat in Ecclesia tum militante, tum triumphante, quæ per Sion & Hierusalem intelligitur, magnum esse, & excelsum super omnes populos, ut nullus ei resistere ualeat.

III. Confiteantur nomini tuo magno. quoniam  
terribile & sanctum est, & honor  
Regis iudicium diligit.

Iuxta utrunque sensum hortatur Prophetæta populos, ut non solum non irascantur aduersus Dominum, sed potius ad illum conuersi laudibus celebrent nomen eius, quoniam terribile & sanctum est. Dicitur autem nomen Domini terribile & sanctum, quo-

niam nomen est Iudicis siue Regis potentissimi & iustissimi: & qua potentissimi Regis nomen est, terribile est, & qua iustissimi, sanctum ac venerabile. Id quod sequitur: *Et honor Regis iudicium diligit*, est quasi ratio quædam, cur nomen Dei siue Christi sit terribile & sanctum; hic enim est sensus: Terribile & sanctum est nomen Domini, qui Rex iustissimus est, quoniam dignitas Regia, vel sanctitas Regia, vel auctoritas Regia id proprie requirit, ut Rex iudicium diligit, hoc est, amore iustitiæ recte iudicet, non timore, aut necessitate aliqua, vel passione coactus. Itaque illud, & ponitur pro, quia, ut alibi passim in Scripturis. Illud autem, *honor Regis*, significat Regiam dignitatem, siue auctoritatem: vox enim Hebræa, *haz*, multa significat, robur, auctoritatem, honorem, sanctitatem, substantiam, & similia.

Tu parasti directiones, iustitiam & iudicium in Iacob tu fecisti.

Ostendit verum esse, quod paulo ante dixit: *Honor Regis iudicium diligit*: ostendit autem per apostrophon ad Deum, siue Christum, quasi dicat: Vere tu, ut Rex optimus & iustissimus iustitiam diligis: nam tu parasti directiones, id est, leges rectissimas, & ad dirigendos mores hominum apertissimas parasti & confirmasti: & præterea tu non solum leges ferendo, sed etiam iudicia rectissima exercendo demonstrasti, te iustitiam diligere: nam in populo tuo Iacob iustitiam & iudicium fecisti, puniendo peccata, & remunerando benefacta: cuius rei multa sunt exempla in utroque Testamento; quamuis enim ad tempus patitur Deus pios affligi, & impios exaltari: tamen postea pios liberat & coronat, impios damnat & cruciat; sæpe hic in terris, semper autem in sæculo futuro.

Exaltate Dominum Deum nostrum,  
& adorate scabellum pedum eius, quoniam  
sanctum est.

Ex his colligit Prophetæta, adorandum esse Deum,



Deum; & hortatur ad id studiose faciendum; & quidem iuxta priorem sensum hortatur ad Deum adorandum, non solum in seipso, sed etiam in arca fœderis, quæ scabellum erat pedum eius, sic enim legimus 1. Paral. 28. *Vt requiescat arca Domini, & scabellum pedum eius.* Neque mirum est, quod arca dicatur scabellum pedum Dñi, cum propitiatorium, quod sustentabatur à duobus Cherubim, esset sedes Dei, ut in primo versiculo dictum est: erat enim arca sub ipso propitiatorio, quasi scabellum subpedaneum sub folio. Ait igitur: *Exaltate dominum deum nostrum,* corde videlicet, & voce laudando, & magnificando maiestatem eius: *& adorare scabellum pedum eius,* corpore scilicet incurvantes, & prostermentes vos ad arcam fœderis, quæ est scabellum pedum eius: Quoniam arca, siue scabellum huiusmodi sanctum est; propter relationem ad Deum, cui dicata est, & propter eius honorem adoratur. Ex hoc loco satis aperte colligitur aduersus hæreticos nostri temporis, res sacras, ut imagines Christi & Sanctorum, reliquias eorundem & altaria, sacra vasa, & similia propter relationem ad Deum vel Sanctos, sanctas esse, & honoraria adoratione dignas. Neque obstat, quod in Hebræo ad verbum legatur, *adorate ad scabellum*, non, *adorate scabellum*: nam vox Hebraica, *bisfachaui*, pro qua habemus, *adorate*, significat proprie prosternere se: idem est autem, *prostermite vos ad scabellum*, &, *adorate scabellum*. Neque etiam obstat, quod in Græco legatur, *quoniam sanctus est*, non autem, *quoniam sanctum est*: nam vox Hebraica ambigua est, & potest referri ad scabellum, & verti, *quoniam sanctum est*: & potest etiam referri ad Deum, & verti, *quoniam sanctus est*: utroque autem modo significatur, scabellum esse adorandū propter relationem ad Deum, qui sanctissimus est; & sanctitatem impertitis, quæ ad eum pertinent, quatenus ipsius sunt. Nostra autem lectio reprehendi non potest: nam S. Hieronymus in commentario, ubi exponit Psalmos iuxta versionem Septuaginta, legit in textu & in commentario, *quoniam sanctum est*: & S. Augustinus, quamvis vno in loco legat, *quoniam sanctus*

est, tamen in textu & in commentario pluribus in locis legit, *quoniam sanctum est*: ex quo intelligimus, Græcum textum varium fuisse. Neque obstat, quod in fine Psalmi diceatur, *quoniam sanctus dominus deus noster*: nam in fine Psalmi non dicitur, *adorate montem*, sed, *in monte*; & iam dictum erat, *in monte sancto*: unde non erat opus iterum repetere, *quoniam sanctus mons est*. Iuxta sensum posteriorem, hortatur Propheta, ut omnes adorent humanam Christi naturam, quæ scabellum est diuinitatis longe nobiliore modo quam esset arca lignea. In illa enim erat verbum Dei scriptum in tabulis lapideis, in hac autem est ipse Deus Verbum: illi coniunctæ erant tabule legis sola vnione extrinseca, quia continebantur in illa, ut in vase: isti vnium est Verbum hypostice, ut vere dictum sit à Ioanne: *Verbum caro factum est*. Neque solum adorandam esse Christi humanitatem, ut est in propria forma, sed etiam ut latet sub speciebus sacramentalibus in Eucharistia; docent ex hoc loco Psalmi S. Ambrosius lib. 3. de Spiritu sancto c. 12. & S. Augustinus in explicatione huius versiculi. Ex quo refellitur alius error hæreticorum, qui negant, Christum in Eucharistia esse adorandū.

*Moses & Aaron in Sacerdotibus eius, & Samuel inter eos, qui inuocant nomen eius.*

xi.

Hic iam ponit Propheta exemplum, quod imitemur, trium insignium virorum, qui Dominum exaltauerunt, & adorauerunt scabellum pedum eius, atque adorantes inuocauerunt Dominum, & audiuit eos Dominus, & mirabilia per eos operatus est. Nominat autem tres Principes viros, qui super omnes eminuuerunt post Remp. Iudaicam constitutam; Moses enim fuit summus Princeps politicus, & summus Sacerdos Hebræorum; Aaron fuit summus Sacerdos tantum; Samuel summus Princeps politicus tantum. Quamvis enim nonnulli Patres Samuelem Sacerdotem appellent, ut S. Ignatius in epist. ad Magnesianos, S. Cyprianus in epist. 65. ad Ro-



Rogantium. S. Athanasius in hom. de se-  
mente. S. Ioan. Chrysostom. hom. 2. in  
epist. 2. ad Timotheum. & S. Augustinus lib.  
17. de ciuit. Dei cap. 4. & lib. 2. Retract. c. 43.  
& in explicatione huius Psalmi contra ta-  
men S. Hieronym. lib. 2. in Iovinianum, &  
auctor. quæstionum veteris Testamenti,  
(apud Augustinum tom. 4.) quæstion. 46.  
constanter docent, *Samuelem non fuisse Sa-  
cerdotem, sed simplicem Leuitam*, & probant  
his argumentis. Primò, *quia non erat de filiis  
Aaron*, vt manifestum est ex genealogia  
ipsius lib. 1. Paralip. cap. 6. versu 34. *qua est  
conformis genealogia patris sui Elcana* lib. 1.  
Reg. cap. 1. versu 1. constat autem solos po-  
steros Aaronis fuisse Sacerdotes: ceteros ve-  
rò Leuitas, ministros Sacerdotum, Num. 16.  
& 18. Deinde *quia Samuel ministrabat ami-  
ctus epod lineo*, vt patet ex lib. 1. Reg. cap. 2.  
Is verò *habitus proprius erat Leuitarum, non  
Sacerdotum*. Tertiò, *quia Elcana pater Sa-  
muelis, erat Leuita, non autem Sacerdos*.  
Quartò, *quia David in hoc Psalmo distin-  
guat Samuelem à Moyse, & Aaron Sacerdo-  
tibus*, dum eum non numerat in Sacerdoti-  
tibus, sed in ijs, qui inuocant nomen Domini,  
id est, qui studiosè Deum colebant, & inuoca-  
bant pro se, & populo.

VII.

*Inuocabant Dominum, & ipse exau-  
diebat eos, in columna nubis loquebatur  
ad eos.*

Ostendit, viros istos fuisse amicos Dei:  
nam inuocabant Dominum pro se, & pro po-  
pulo. & ipse vt amicos fideles exaudiebat  
eos. Id constat ex testimonio scripturarum.  
de Moyse quidem Exod. 32. de Aaron Num.  
16. de Samuele 1. Reg. 7. Quod autem in co-  
lumna nubis loqueretur Deus ad Moysem,  
constat ex lib. Exod. c. 33. quod etiam ad  
Aaronem, constat ex lib. Num. c. 12. de Sa-  
muele nusquam legitur. Itaq; vel illud, *Lo-  
quebatur ad eos in columna nubis*, intelligen-  
dum est, ad aliquos eorum: vel, vt exponit S.  
Augustinus, per columnam nubis significa-  
tur obscura locutio, quomodo certum est, ad

Samuelem quoque Deum esse loquentum.  
Nam. 1. Reg. 3. *Deus in tenebris noctis Samue-  
li loquebatur, ita vt vocem Dei loquentis au-  
diret, neminem autem loquentem videret.*

*Custodiebant testimonia eius, & præ-  
ceptum quod dedit illis.*

Hæc est ratio, cur Deus promptè audi-  
ret Moysem, Aaronem, & Samuelem, quo-  
niam obediens erat imperio eius. Nam,  
vt Dominus ait in Euangelio, *Si quis diligit  
me, sermonem meum seruabit*: & ideò qui  
vult audiri à Deo in orationibus suis, debet  
audire Deum in præceptis ipsius. Custodie-  
bant, inquit, *testimonia eius*, id est, omnia  
mandata, quæ communia erant omnibus. Et  
præceptum quod dedit illis, id est, non solum  
custodiebant præcepta communia toti po-  
pulo de non colendis Idolis, de sanctifican-  
do Sabbato, de parentibus honorandis, de  
non occidendo, non mœchando, & cætera  
eiusmodi, sed etiam præceptum de rectè gu-  
bernanda, & docenda multitudine, quod  
proprie ad ipsos, vt Principes populi perti-  
nebat. Principes enim non sunt exempti à  
præceptis diuinis, imò debent in ijs custo-  
diendis toti populo præluere,

*Domine Deus noster tu exaudiebas eos:  
Deus tu propitijs fuisti eis, & vlciscens  
in omnes adinventiones eorum.*

Hæc verba dupliciter exponi solent, S.  
Augustin. ita exponit, vt velit hic significari:  
viros etiam perfectos in conspectu hominū  
habere aliquid purgandum coram Deo, &  
Deum hoc ipso beneuolentiam erga illos o-  
stendere, quod non sinit impunita eorum er-  
rata, quamuis leuia. Ponit exemplum in opi-  
ficijs, quæ oculis imperitorum videntur om-  
nino perfectæ, & tamen ab artifice adhuc po-  
liuntur, quoniam aliter iudicat peritus arti-  
fex, aliter imperitus inspector. Sic igitur ex-  
ponit S. Augustin. *Domine Deus noster tu ex-  
audiebas eos*, cum iusta peterent, *Deus tu  
propitijs fuisti*, facilis ad ignoscendum cum  
in te peccarent: & *vlciscens in omnes adin-  
ventiones*



*mentiones eorum*, non sinens impunita peccata eorum. Quia vero Samuelis peccatum nullum legitur in Scriptura; ut neque etiam aperta vindicta, sanctus Augustinus recurrit ad communem poenam omnium Prælatorum sanctorum, quam patiuntur dum vident peccata populorum; & coguntur tolerare infirmitates eorum, & cum Apostolo dicere: *Quis infirmatur, & ego non infirmor? quis scandalizatur, & ego non uror?* Posset etiam dici, quod hic legimus de propitiacione, & vindicta peccati, referendum esse ad Mosem, & Aaronem tantum, quemadmodum ad costantum proprie referendum est, quod supra dictum est, *In columna nubis loquebatur ad eos*. Nam Moyses, & Aaronis peccatum, & poena peccati legitur Num. 20. ubi cum non nihil hæsitassent in educenda aqua de petra, dixit Dominus ad Mosem, & Aaron, *Quia non credidistis mihi, ut sanctificaretis me coram filiis Israel; non introducetis hos populos in terram, quam ego dabo eis*. Altera expositio est Græcorum Theodoreti, & Euthymij, qui non admittunt hoc loco reprehendi villo modo Mosem, Aaronem, & Samuelem. Sic igitur exponunt, *deus tu propitiuss fuisti eis*, quando te inuocabant pro peccato populi nam in eorum gratiam toti multitudini parcebas: & *ulciscens in omnes adinventiones eorum*, id est, & ulciscens fuisti omnes iniurias, quas ipsi patiebantur ab iniquis, qui adinueniebant varias calumnias, & insidias aduersus sanctos Principes suos. Vbi illud, *adinventiones eorum*, volunt accipi passiuè, id est, *adinventiones*, quas Moyses, Aaron, & Samuel, non faciebant, sed patiebantur. Vtraque expositio probabilis est, sed prior videtur simplicior, & facilior.

*Exaltate Dominum Deum nostrum, & adorete in monte sancto eius: quoniam sanctus Dominus Deus noster.*

Concludit propheta repetens versiculum quintum, quoniam in hoc versiculo continetur summa totius Psalmi, siue finis, & quasi scopus, quo omnia diriguntur. Hoc solum interest, quod in quinto versiculo dicebatur, *Adorate scabellum pedum eius*, quo-

*niam sanctum est*: hic dicitur, *Adorate in monte sancto eius*, quoniam sanctus Dominus deus noster: in Hebræo, sicut in quinto versiculo dicebatur ad verbum, *Prosterne vos ad scabellum pedum eius*, id est, ad arcem; ita hic dicitur, *Prosterne vos ad montem sanctum eius*: & potuisset Latine verti, *Adorate montem sanctum eius*, id est, montem Sion, ubi erat tabernaculum, & arca. Sed Latinus interpretes imitari voluit Græcam interpretationem: Græci enim de scabello dixerant, *Adorate scabellum*: de monte autem dixerant: *Adorate in monte*. Nec solum Græci, sed etiam S. Hieronymus in sua versione ex Hebræo posuit, *Adorate scabellum*: & postea, *Adorate in monte sancto eius*. Quare credere debemus versiculum Hebraicum non debere in utroque loco eodem modo accipi & retinendam esse lectionem vulgatæ Latinæ editionis, quæ & à Græca, Septuaginta Interpretum, & à S. Hieronymo testimonium habet. Igitur iuxta priorem sensum hostatur Dauid Hebræos, ut adorent Dominum in monte Sion, ubi erat tabernaculum, & ubi futurum erat templum. Iuxta sensum posteriorem hortatur Christianos, ut adorent Deum in Ecclesia Catholica, quæ mons est sanctus, & Sion spiritualis, & fugiant conuenticula schismaticorum, & hæreticorum: quoniam sanctus est Dominus Deus noster, ac per hoc odit montes pollutos sordibus falsarum religionum, & sicut ipse sanctus est, ita in monte sancto, in cœtu fidelium adorari vult.

## P S A L M V S XCIX.

*Titulus, & Argumentum Psalmi.*

*Psalmus in confessione.*

**H**IC titulo, qui est in Hebræis codicibus, Græci addunt nomen Davidis. Argumentum ex titulo cognoscitur. Hortatur enim Propheta populum Dei, ut frequenter, & diligenter Deo confiteatur confessionem laudis, tum quod deus nos condiderit, tum quod pascat: tum quod dulcissima sit

D d d

cine



*ais commemoratio, & perpetua erga nos eius  
misericordia, & fidelitas.*

## EXPLICATIO PSAL. XCIX.

**I**ubilare Deo omnis terra : seruite Do-  
mino in lætitia.

Iubilare, vt sæpe diximus, est magna, &  
læta voce laudare, seruiret autem in lætitia,  
est non ex timore, sed ex dilectione obedire.  
*Iubilare deo omnis terra*, id est; omnes qui  
Deum verum colitis, vbicunque sitis in vni-  
uersa terra, Deum laudare: nam & boni, &  
mali sunt in vniuersa terra, admixta enim  
sunt zizania tritico, & spinis lilia. Et sicut in  
vniuersa terra blasphemant, & murmurant  
contra Deum mali, si quid eis non pro voto  
successerit: ita par est; vt in vniuersa terra  
laudent, & benedicant Dominum boni,  
quicquid illis acciderit: *quoniam omnia co-  
operantur in bonum his, qui secundum propo-  
situm vocati sunt sancti.* Seruite domino in  
lætitia, id est, seruite obediendo Deo, non  
coacte, sed spontanee, non cum amaritudi-  
ne, vt mancipia, sed cum lætitia, vt liberti,  
nam vt pulchre dicit S. August. Veritas non  
liberauit, sed charitas seruos fecit: & qui ser-  
uit ex charitate, cum lætitia seruit. Causa  
vero potissima, cur Deo cum lætitia serui-  
endum sit, ea est, quia summa præceptorum  
eius dilectio est, & dilectione nihil dulcius:  
accedit, quod seruitus Dei nobis utilis est,  
non Deo, vt vere dictum sit, *Seruire Deo re-  
guare est.*

**II.** Introite in conspectu eius in exulta-  
tione.

Vbiq; quidem Deum laudare debemus,  
sed præcipue cum intramus in domum eius  
quæ domus orationis est, vbi, & ipsum De-  
um in sacris rebus conspiciamus, & ipse nos  
speciali prouidentia respicit, & audit, iuxta  
illud 1. Paralip. 7. *Erunt oculi mei aperti, &  
aures mea erectæ ad orationem eius, qui in lo-  
co isto orauerit.* Idcirco igitur monet Pro-  
pheta, *Introite in conspectu eius, in domum*

Dei, vbi peculiari modo conspiciatur Deus,  
& conspiciat vos Deus, sed introite in exul-  
tatione cordis, animo erecto, & inflamma-  
to, vt Deus vos præ desiderio sui exultantes  
videat.

*Scitote, quoniam Dominus ipse est  
Deus, ipse fecit nos, & non ipsi nos.*

Ad excitandam deuotionem, quæ in do-  
mo Dei requiritur, nihil magis prodest,  
quam attenta consideratio magnitudinis  
Dei, & beneficiorum eius. *Scitote, inquit,  
quoniam Dominus ipse est deus.* id est, confi-  
derate, & attenta cogitatione cognoscite,  
quoniam Dominus, quem colitis, & ad  
quem orandum, & laudandum acceditis,  
ipse est verus Deus, quo nihil maius, vel  
melius cogitari potest. Ipse est etiam, cui vi-  
tam vestram: & totum quod estis, debetis.  
*Ipse enim fecit nos, & non ipsi fecimus nos,* id  
est, non caremus principio efficiente, neque  
aliud habemus, quam ipsum Deum: quani-  
uis enim parentes gignant filios, tamen pri-  
ma causa, sine qua parentes nihil efficerent,  
Deus est. Quam multi dant operam libe-  
ris, & nullum gignere possunt: quam multi  
contra vellent latiare libidinem, & liberos  
non gignere, quibus tamen licet inuitis li-  
beri nascuntur? Recte mater sanctorum  
Machabæorum filijs suis dicebat, *Nescio  
qualiter in vtero meo apparuistis: neq; enim  
ego spiritum, & animam donaui vobis, & vi-  
tam, & singulorum membra non ego ipsa  
compegi: sed enim mundi creator formauit  
hominum natiuitatem, & omnium inuenit  
originem.* 2. Mac. 7. S. Hieron. ex Hebræo  
vertit, *Ipse fecit nos, & ipsius nos.* Sed videtur  
corruptum textum habuisse; codices enim  
nostri habent, *lo*, per aleph, quod significat  
non: & sic legerunt Septuaginta Interpretes,  
qui verterunt ad verbum *Ipse fecit nos, &  
non ipsi nos.* S. Hieronymus videtur legisse,  
*lo*, per vau, quod significat ipsius, sive ipsi in-  
datiuo: & ideo vertit, *Ipse fecit nos, & ipsius  
nos.* Quidam recens auctor reprehendit vul-  
gatam latinam editionem dicens, aliquem  
sciolum.



scilicet coniunxisse in Latino codice duas  
Hebraicas lectiones; & fecisse, *Et non ipse  
nos*; & sic omnia confudisse: sed immerito  
reprehendit hanc lectionem; quæ optima  
est, & quam habent S. Augustinus, & ipse S.  
Hieronymus in commentario huius loci, &  
alii fere omnes. Latinus enim Interpres ad-  
didit illud, ipsi, ad vitandam cacophoniam,  
quæ sentitur, cum dicitur, *Ipse fecit nos, &  
non nos*. nec voluit illud, *ipsi*, accipi in dati-  
uo, ut iste scriptor existimat, sed in nomina-  
tuo. Itaque non coniunxit scilicet duas le-  
ctiones; sed interpres vnam expreslit, quam  
inuenit in Græco, quæque congruit cum  
Hebraico magis correcto. At, inquit ali-  
qui, nemo nescit, se non esse à se factum,  
proinde non erat, quod admoneret nos Spi-  
ritus sanctus, dicens, *Ipse fecit nos, & non ipse  
nos*: proinde melior est illa lectio, *Ipse fecit  
nos, ipsius nos*. Respondeo, etiam si nemo  
ignorare possit, se non esse sibi vitæ aucto-  
rem: tamen multos esse, qui non considerent  
à quo facti sunt, & qui ita se gerant, ac si  
neque Deum, neque vllum alium auctorem  
haberent, propterea vtilissimum fuisse, ut  
senio admonerentur homines cogitare, se  
non esse sibi auctores vitæ, sed vitam, &  
omnia vni debere Deo.

*Populus eius, & oues pascua eius, in-  
troite portas eius in confessione, atria eius  
in hymnis confitemini illi.*

Commemorat alterum beneficium Dei,  
ob quod iustum est, ut ei confessionem lau-  
dis persoluamus: quia videlicet non solum  
fecit nos, sed etiam regit, & pascit nos. *Popu-  
lus eius*, id est, populus, quem Deus pecu-  
liari prouidentia regit, & *oues pascua eius*,  
id est, & quos veluti rationales oues in pas-  
cuis iuis doctrinæ pabulo reficit, & corpo-  
ralibus etiam alimentis pascit; *introite por-  
tas domus eius*, siue tabernaculi eius, *in con-  
fessione laudis, & atria eius in hymnis*, & sic  
confitemini illi, vox omnia ei debere, ac de  
manu eius bona omnia suscepisse.

*Laudate nomen eius, quoniam suauis*

*est Dominus; in aeternum misericordia  
eius, & vsque in generationem, & gene-  
rationem veritas eius.*

Addit Propheta tres proprietates Dei,  
quasi tres rationes, cur dignus sit, ut ab om-  
nibus laudetur, quia suauis, quia miseri-  
cors, quia verax; quæ tria ita connexa sunt,  
ut vnum nascatur ab alio. *Suauis est deus,*  
& quia suauis, facile miseretur; quia misere-  
tur, promittit liberationem; quia verax im-  
plet promissa, *Laudate*, inquit, *nomen eius*,  
id est, laudate Deum: nomen enim pro re  
nominata poni solet in Scripturis. *Laudate  
autem, quoniam suauis est Dominus.* Mira  
proprietas omnipotentis, ac tremendæ Ma-  
iestatis, quæ lucem habitat inaccessibilem;  
& quæ terribilis est super omnes Deos, &  
anfert spiritum Principum, & de quo Apo-  
stolus dicit, Heb. 10. *Horrendum est incidere  
in manus Dei viuentis*: & tamen verissime  
dictum est, *Quoniam suauis est Dominus*,  
quod non semel in Psalmis, aliisque diuinis  
Scripturis repetitur Psal. 34. *Gustate, & vi-  
dete quoniam suauis est Dominus.* Psal. 83.  
*Quoniam tu Domine suauis, & mitis, & mul-  
tae misericordiae*, 1. Pet. 2. *Si tamen gustastis,  
quoniam dulcis est Dominus*. 2. Cor. 1. *Pater  
misericordiarum, & Deus totius consolatio-  
nis.* Sed facile concordantur ista; quæ viden-  
tur contraria: Deus enim suauis est rectis  
corde, ac timentibus eum: asper autem, &  
terribilis distortis corde, & contemnenti-  
bus eum, *Quam bonus Israel deus his, qui  
recto sunt corde*, inquit Dauid in Psalmo 72.  
nam planum, asperum videtur distorto,  
quia coniungi non possunt. Sunt autem  
distorti siue prauis corde, qui nolunt con-  
formari rectissimæ voluntati diuinæ: qua-  
les sunt contemptores, & ideo dicitur in  
Psal. 102. *Sicut miseretur pater filiorum,  
miserus est Dominus timentibus se*; & *mi-  
sericordia eius ab aeterno, & vsque in aeternum su-  
per timentes eum*; quod etiam in cantico suo  
Virgo Dei para posuit, dicens. *Et misericor-  
dia eius à progenie in progenies timentibus est.*  
Itaque si quis incipiat cor suum dirigere, &



conformare ad beneplacitum Dei, & nihil magis timere, quam ne Deum offendat, mox gustare incipiet, quam dulcis sit Dominus: & implebitur erga eum quod sequitur. In aeternum misericordia eius, & usque in generationem, & generationem veritas eius, id est, veracitas & fidelitas eius.

## PSALMVS. C.

### Titulus & Argumentum Psalmi.

Ipsi David Psalmus.

**I**N hoc Psalmo David explicat exemplo suo, qualis debeat esse bonus Princeps, tum erga familiares, & priuatam suam domum; tum erga Rempublicam. Et quidem in textu Hebraico omnia dicuntur per verba temporis futuri; ex qua intelligimus, Prophetam Regium, non iam cantare laudes proprias, quam optare, & sperare à Deo gratiam bene imperandi, & proponere, ac statuere sic viuere, ut pium Regem decet. Sed quoniam Septuaginta Interpretes verterunt fere omnia in tempus prateriti imperfecti, & eorum interpretacionem sequutus est latinus interpres, non oportet negare, quin etiam Prophetia Regius narret bona opera sua ad informandos successores, ac potissimum filium; neque id superbia, vel arrogancia tribui debet, quando vera dicuntur coram Deo, & ad finem bonum sic enim idem David in Psalm. 17. multa cecinit de sua innocentia. Sic Iob. 29. plurima de suis beneficiis predicauit. Sic Hester cap. 14. sic Nehemias cap. 6. sic Ezechias 4. Reg. 20. sic alij. Porro Phariseus in Euangelio, non reprehenditur quod gratias egerit Deo de suis operibus bonis; sed quod superbe illa iactauerit, & proximum suum contempserit Luc. 18. Adde, quod David ideo incipit Psalmum ab illis verbis. Misericordiam, & iudicium cantabo tibi Domine, ut ostendat, bonorum operum suorum causam efficientem fuisse tum misericordiam Dei, cuius dona sunt opera nostra bona; tum iudicium Dei, cuius timore adductus iustitiam coluit.

## EXPLICAT. PSAL. C.

**M**isericordiam, & iudicium cantabo tibi Domine.

Hæc est quasi præfatio totius Psalmi, quæ significat Prophetam; se cum cantu celebraturum misericordiam, & iudicium Domini, cuius rei multæ sunt causæ: prima, ut omnes intelligant benefacta Davidis, quæ in Psalmo commemorantur, esse dona misericordiae Dei, coronanda postea per iustum iudicium Dei: secunda, ut Principes admoneantur; Deo maxime placere misericordiam, & iudicium, & ideo ipsi quoque misericordes sint, sed non iniusti, iusti, sed non crudeles: tertia ut omnes homines sperent de misericordia Dei, & timeant iudicium Dei; non ita sperent, ut præsumant; non ita timeant, ut desperent. Posuit autem David primo loco misericordiam, deinde iudicium, quia hoc tempus præsens misericordiae est, futurum erit iudicii, & ideo nemo miretur, si hoc tempore deus solem suum oriiri facit super bonos & malos, & plus super iustos & iniustos, Matth. 5.

*Psallam, & intelligam in via immaculata, quando venies ad me.*

Hic versiculus pars est præfationis, dicit enim Prophetam se non solum voce cantaturum misericordiam, & iudicium Dei: sed etiam per instrumentum, id est, psalterium celebraturum, & mente consideraturum, & contemplaturum. *Psallam*, inquit, id est, psalterium manu pulsabo. ut voce mea, & voce psalterij decantem misericordiam, & iudicium: & intelligam in via immaculata, id est, considerabo, attendam, cogitabo viam immaculatam, & perfectam, quæ consistit in misericordia, & iudicio: nam omnes viæ Domini misericordia & veritas: similis est locutio in Psalm. 40. *Beatus qui intelligit super egenum, & pauperem*, id est, qui attente considerat miseriæ pauperis, ut eam subleuet. Sic igitur hoc loco dicitur, *intelligam in via immaculata*, id est, attente considerabo viam immaculatam, ut ambulem per eam, *Quando venies ad me*, id est,



id est, id autem faciam non viribus meis; sed auxilio gratiæ tuæ, quando venies ad me, vt me illumines, & doceas, & accendas, & moueas. Hanc vltimam particulam aliqui legunt cum interrogatione, quando venies ad me? sic S. Hieronymus in Commentario, & Theodoretus, atque Euthymius, & textus Hebraicus & Græcus huic lectioni fauent: & tunc est vox optantis, vt sensus sit: *Intelligam in via immaculata, & quando venies ad me, vt perfecte intelligam, & intelligens ambulem in via immaculata?* Sed quamuis hæc lectio verum sensum contineat, non tamen est necessarium ita legere, neque reicienda est Latina & vulgata lectio; siquidem vox Hebraica, *mathai*, significat, quando, & potest cum interrogatione, & sine interrogatione legi, certe S. Hieronymus in sua versione ex Hebræo ita reddidit: *Erudiar in via perfecta, quando venies ad me.*

*Perambulabam in innocentia cordis mei in medio domus meæ.*

Hic iam incipit explicare mores suos laudabiles, vt ceteri imitentur, tum successores, tum subditi. Ad hoc enim Princeps in sublimi loco sedet, vt tanquam lucerna in candelabro posita omnibus luceat, ac primum declarat, qualis fuerit apud se, & in oculis Dei: deinde qualis fuerit erga alios, & in oculis populi. At igitur: *Perambulabam in innocentia cordis mei*, id est, vitam ducebam; siue perambulabam vitam huius præsentis vitæ, conseruans in primis cordis innocentiam, cogitabam bona, appetebam bona, delectabar in bonis; cauebam ne cor vitiosis cogitationibus aut desiderijs inquinarem: sciebam enim à corde vitam mortemque procedere. Hinc filius eius Salomon à patre institutus postea scripsit Prouerb 4. *Omni custodia serua cor tuum, quoniam ab ipso vita procedit.* Illud, *in medio domus meæ*, significat in penetralibus domus meæ, vbi non erat, qui me reprehendere posset. Multi enim in foro & plateis modeste & temperate se gerunt; sed in cubiculo, ac præsertim in cubiculo cordis, per omnia scelera voluntantur: sed Dauid et-

iam in penetralibus domus, etiam in cubiculo cordis innocentiam custodiebat.

*Non proponebam ante oculos meos rem iniustam: facientes prauaricationes odiui.*

Dixit de innocentia cordis, nunc addit de innocentia oculorum & manuum. *Non proponebam ante oculos meos rem iniustam*, id est, auertebam oculos, tum mentis, tum corporis, ab omni iniustitia, siue in iudicando subditos, siue in distribuendis honoribus & premiis, siue in commutationibus & contractibus. Potest etiam latius hic locus explicari, vt sensus sit, Auertebam oculos ab omni spectaculo vitioso, à ludis illicitis, à choreis impudicis, ab omni aspectu rerum, quæ mentem inquinare possunt. Codex Hebraus pro *rem iniusta*, habet verbum *Belial*, vbi verbum, pro re, ponitur, & *Belial*, significat absque iugo, quibus duabus vocibus significatur omne genus vitij. Dicuntur viri *Belial*, homines indisciplinati, immorigerati, peruersi. *Facientes prauaricationes odiui*, id est, non solum oculos auerti à rebus illicitis, nec tantum prauaricationem legum operari nolui; sed odio habui omnes prauaricationes facientes; ac per hoc ipsam prauaricationem maxime detestatus sum. In Hebræo clarius dicitur, *facere prauaricationem odiui*, id est, ego rem iniustam nec videre, nec facere volui.

*Non adhasit mihi cor prauum, declinans à me malignum non cognoscebam.*

Docuit, qualis esset apud se; docet nunc, qualis esset apud alios: ac primum dicit talem se fuisse, vt peruersi homines non audent se illi adiungere. Magna virtus hæc est, cum tanta est apud homines opinio de sanctitate alicuius, vt iniqui non audeant coram illo apparere: & tales omnino esse deberent Principes & Prelati, qui sunt dati à Deo alius in exemplum. *Non adhasit mihi cor prauum*, id est, non adiunxit se mihi homo prauus cordis, sic interpretatur Theodoretus.



EXPLICATIO

Alij petcor prauum intelligunt affectum vitiosum: sed de cordis puritate & innocentia supra dictum est, neque verisimile est, idem hoc loco repeti: & sequentia verba melius coherent cum expositione Theodoret, neque est inusitatum, vt homo valde peruersus dicatur *cor prauum*, & homo scelestus dicatur *scelus*, & homo carnalis dicatur *caro*. *Declinantem à me malignum non cognoscebam*, id est, declinabant à me maligni etiam me ignorante: vel, si declinabat à me malignus, non curabam, nihilique faciebam; vel, declinantem à me malignum, non cognoscebam, id est, non approbavam, neque amabam, ac per hoc non laborabam, vt rediret ad amicitiam meam. S. Hieronymus aliter ex Hebræo distinguit, & vertit: *Cor prauum recedet à me: malum non cognoui*. Sed voces Hebraica vtramque distinctionem & versionem recipiunt, & sensus in eandem sententiam recidit: tractatores autem Græci & Latini editionem nostram communiter sequuntur.

VI.

*Detrahentem secreto proximo suo: hunc persequabar.*

Alia virtus plane Regia hic aperitur, in qua mirifice lucent misericordia & iudicium; quoniam enim Reges potestatem habent puniendi iniquos: multi non zelo iustitiæ, sed odio proximorum, deferunt ad Reges, quasi noxios eos, quos perdere volunt, & falsis querelis, vel potius calumniis eos grauant: Dauid Rex sapiens & iustus, eiusmodi delatores iniquos grauissime puniebat, & eo modo misericordiam exercebat in iniuste delatos, & iudicium in delatores iniustos. *Detrahentem*, inquit, *secreto proximo suo*, id est, eum, qui falsi criminis accusabat proximum suum, & secreto apud me detrahebat de fama eius, eum, inquam, non modo non audiebam, sed grauiter persequabar, & puniebam. In Hebræo pro voce, *persequabar*, est, *אֶמֶת* *azmith*, quam S. Hieronymus vertit, *interficiam*, proprie autem significat *excindam*, siue *excindebam*, & potest exponi variis modis pro varietate criminis delatorum, vt sensus sit, excindam ab amicitia, vel ab aula,

vel à ciuitate, vel à prouincia, vel denique à vita: non enim omnis iniusta delatio meretur mortem. Itaque prudenter LXX. Interpretes posuerunt verbum generale, *persequabar*, quod potest exponi, vsque ad exilium, vel vsque ad necem, vel ad poenas mitiores pro grauitate, vel leuitate criminis. Extat etiam apud Ethnicos laus Imp. Traiani, quod delatoribus operam non daret; & contra, Maximini reprehensio; quod delatoribus nimium indulgeret.

*Superbo oculo, & insatiabili corde, cum hoc non edebam.*

Non solos detractores, sed etiam superbos & cupidos Dauid detestabatur; & merito: Nihil enim tristius accidere populis potest, quam si ministri Regum superbi aut auari sint, abutuntur enim eiusmodi ministri publica potestate ad expendas cupiditates proprias, non sine magno detrimento subditorum. At igitur: *Superbo oculo, & insatiabili corde, cum hoc non edebam*, id est, non conuescebam quasi domestico & familiari, homini superbo oculo, id est, homini, qui oculis, vel supercilii elatis superbiam ostendit, neque conuescebam homini insatiabili corde, cuius cupiditas nullis opibus satiabitur. S. Hieronymus & Euthymius per insatiabilem corde, auarum intelligi volunt. Alij cum S. Augustino, per insatiabilem corde, & superbum oculo, eundem significari docent, hominem videlicet elatum & tumidum. Vox Hebraica vtrunq, sensum recipit: nam *rehab leuab*, proprie significat, *latum corde*, dicitur autem *latum cor*, quod impleri non potest, siue id referatur ad diuitias, siue ad honores. Pro, *non edebam*, S. Hieronymus ex Hebræo vertit, *non potero*. Sed LXX. Interpretes vocem, deduxerunt à verbo, *אָכַל*, quod significat *comedere*, & legerunt, *ocal*. S. autem Hieronymus eandem vocem deduxit à *rocal*, quod significat *posse*. Quod autem solerent ministri principales comedere in eadem mensa cum Rege apud Hebræos, intelligi potest ex lib. 1. Reg. c. 20. vbi Dauid, qui tunc dux militiæ erat, sedere solitum se dicit

de



de more in mensa iuxta Regem : & ibidem dicitur, Abner, qui erat etiam Princeps militum, sedisse in mensa ad latus Saul Regis.

VII.

*Oculi mei ad fideles terra, ut sedeant mecum : ambulans in via immaculata, hic mihi ministrabat.*

Explosis detractoribus, superbis & avaris à familiaritate & ministerio suo ; David adiungit, eligere se fuisse solitum fideles & probos : hæc enim duo præcipue requiruntur in bonis ministris, ut fideles sint Domino suo, & probi ad propriam & aliorum salutem. Sæpe à Principibus ministri retinentur & chari habentur, qui fideles sunt ; quamvis alioqui impuri & scelesti, & se ipsi perdant propria culpa, & alios malo exemplo ; sed sanctus David non solum fideles sibi ministros quærebat, sed etiam omni ex parte innocentes & probos, ac sibi per omnia similes. Ait igitur : *Oculi mei ad fideles terra*, id est, oculi mei quærebat & inuestigabant fideles, qui erant in terra, siue, ad eos, quos tales noveram, benigne respiciebam, eosque eligebam, ut *sederent mecum* in mensa, ut domestici & familiares. *Ambulans in via immaculata, hic mihi ministrabat*, id est, si quis erat in ciuitate, vel in Regno meo non solum fidelis, sed etiam perfecte conuersans, innocentem viuens, immaculatis moribus vitam ducens, is mihi præcipuus minister erat.

*Non habitabit in medio domus meæ, qui facit superbiam ; qui loquitur iniqua, non direxit in conspectu oculorum meorum.*

Supra eos detestatus est, qui superbo oculo arrogantiam ostentabant : hic iam detestatur eos, qui manibus superbi sunt, id est, qui superbe alios opprimunt, sic etiam supra reprehendit eos, qui detrahebant secreto proximo suo ; nunc reprehendit, & à suo consortio reicit eos, qui loquuntur mendacia ad fallendos quoscunque homines. *Non habitabit in medio domus meæ*, id est, non erit inter intimos familiares meos, qui facit

*superbiam*, id est, qui facit opera superba, qui superbe insultat aliis, vel opprimit alios. *Qui loquitur iniqua*, id est, mendacia, quibus iniuste alios fallat, siue in commerciis, siue in aliis negotiis, non direxit in conspectu oculorum meorum, id est, non placuit oculis meis, siue non direxit cursum desiderij sui, non prosperatus est coram me ; non enim inuenit gratiam in oculis meis. In Hebræo pro *superbia*, *dolus* legitur. Sic enim vertit S. Hieronymus : *Non habitabit in medio domus meæ faciens dolum*. Sed LXX. viri non videntur legisse, *remija*, quæ vox significat, *dolum*, sed *rama*, quæ significat, *alta*, siue excelsa, nisi forte ipsum, *remija*, deduxerint à verbo, *rum*, quod significat, *exaltari*, & ideo venterint, *superbiam*.

*In matutino interficiebam omnes peccatores terra, ut disperderem de ciuitate Domini omnes operantes iniquitatem.*

Concludit Psalmum, demonstrans zelum suum in purganda ciuitate Domini, in qua purificatione faciebat misericordiam erga bonos ciues, quos liberabat ab oppressionibus & scandalis iniquorum, & iudicium erga malos, quos meritis poenis afficiebat. *In matutino*, id est, mature, celeriter, antequam mala radicerentur, *interficiebam omnes peccatores terra*, eos videlicet, qui morte digni erant, & quibus vita concedi non poterat sine periculo innocentium. Id autem faciebam, ut *disperderem de ciuitate Domini omnes operantes iniquitatem*, id est, ut ciuitati sanctæ & pacificæ pacem suam & tranquillitatem restituerem, exturbatis inde omnibus perturbatoribus. Hæc omnia, quæ dicta sunt in persona Davidis, aptius conueniunt Christo Regi, ac præsertim hic ultimus versiculus : David enim conabatur disperdere de ciuitate Domini omnes operantes iniquitatem : sed non poterat, nec potuit vnquam. Christus autem in matutino futuri sæculi vere & proprie disperdet omnes operantes iniquitatem, & deinceps ciuitas sancta Ierusalem cœlestis erit secundum nomen suum, *visio pacis*.



## PSALMVS CI.

## Titulus &amp; Argumentum.

Oratio pauperis, cum anxius fuerit, & in conspectu Domini effuderit precem suam.

**H**unc titulum habent omnes codices, Hebraici, Graeci & Latini: ex quo titulo habetur argumentum Psalmi. Est enim hic Psalmus formula quadam orandi, qua uti poterit unus quisque pauper & afflictus, cum valde anxius fuerit, & effundere voluerit precem suam ad Deum. & Augustinus & S. Gregorius per pauperem hoc loco, intelligunt Christum, qui partim in sua persona, partim in persona corporis sui loquatur, eo modo quo caput loqui solet pro toto corpore. Theodoretus & Euthymius per pauperem, intelligunt populum captivum in Babylone, & petentem liberationem à captivitate. Alij volunt, pauperem, qui in hoc titulo ponitur, fuisse sanctum aliquem virum, qui anxietate pro liberatione populi, qualis fuit Daniel. Et quidem ad hos omnes accommodari possunt verba Psalmi: sed tamen Propheta generatim instruere voluisse videtur omnes oratores in afflictione positos; non enim ait: Oratio pauperis cuiusdam, cum anxietur, sed, oratio pauperis, cum anxius fuerit. Et hoc videtur sensisse B. Hieronymus, qui in commentario scribit, Prophetam loqui in persona peccatoris. Vere enim nullus est pauperior & miserior eo, qui indiget gratia Dei. Unde & Ecclesia hunc Psalmum numerat inter septem poenitentiales. Hic igitur erit sensus tituli: Oratio pauperis, cum anxius fuerit, id est, Hic Psalmus docet formam orationis, qua uti poterit omnis pauper, ac praecipue is, qui ob admissa peccata, debitor est decem millium talentorum, & non habens unde reddat, anxietur simulante conscientia, timens iudicia Dei, anhelans ad reconciliationem. Et in conspectu Domini effuderit precem suam, id est, hac formula orandi uti pauper debet anxius, non quocumque tempore, neque apud quemcumque iudicem, sed cum in conspectu Domini Dei, supermi iudicis, & Patris omnium, effundere

voluerit ex vase cordis contriti & humiliati cum abundanti fletu preces suas, vel, ut habetur in Hebraeo, schicho, eloquium suum.

## EXPLICATIO PSALMI CI.

**D**omine exaudi orationem meam, & clamor meus ad te veniat.

Hunc versiculum assidue pronunciat Ecclesia, tanquam præparationem ad reliquas petitiones; didicit enim ex Propheta, petendam esse à Deo audientiam, antequam petitiones particulares explicentur, non quod Deus quasi ad alia intentus egeat excitari ad audiendum; sed quia nos egemus, ut Deus det nobis spiritum precum, imo spiritus eius sit, qui postulet pro nobis gemitibus inenarrabilibus, id est, faciat nos clamare, & postulare cum inenarrabili gemitu. Domine, inquit, exaudi orationem meam, id est, fac me sic orare, ut dignus sim exaudiri. Et rursus idem repetit ad indicandum affectum: & clamor meus ad te veniat, id est, fac me sic orare, ut oratio mea sit vehemens clamor cordis, & ita vehemens & accensus, ut non deficiat in via, sed ad te, qui in altissimo throno sedes, quamvis profecta ex imo profundo, tandem perueniat. Multa sunt enim, quæ impediunt, ne oratio nubes penetret, ut sunt defectus fidei, fiducia, humilitatis, desiderij, & similia. Itaque petit gratiam bene orandi, hoc est, apte ad impetrandum.

Non auertas faciem tuam à me in quacunque die tribulor, inclina ad me aurem tuam.

In quacunque die inuocauero te, velociter exaudi me.

Hæc est prima & principalis petitio pauperis tribulati, siue peccatoris poenitentis: nemo enim potest corrigere, quem deus desperet, ut dicit Sapiens, Eccles. 7. Et prima gratia, & fons gratiarum est respectus Dei; ideo iste primum omnium petit respici à Deo, quasi dicat: Non auertas faciem tuam à me, quantumuis scodus & turpis sim; & si



& si non prouocat te ad me respiciendum  
 imago tua, quoniam fœdauit eam, prouocet  
 misericordia tua, quia quo turpior sum, eo  
 miserior, & miserabilior sum, & nisi me res-  
 pexeris, nunquam ego ad te respiciendum  
 conuertar, sed quotidie magis ac magis in  
 peccatis tabescam, & semper fœdior, ac tur-  
 pior fiam. Itaque qui hæc dicit, iam cepit  
 respici à Deo, sed à Deo adhuc subirato, &  
 subinde faciem auertente: ideo gustata vt-  
 runque gratia luminis, & respectus Dei, cla-  
 mat, *Non auertas faciem tuam à me, ne projici-  
 as me à facie tua*, peritice quod cepisti,  
 conuertens te ad me, vt ego perfecte con-  
 uertar ad te. *In quacunque die tribulor, incli-  
 na ad me aurem tuam*. Hæc est altera peti-  
 tio, sed consequens ad primam: nam ex res-  
 pectu vultus Dei, incipit homo agnoscere  
 turpitudinem, & nuditatem, ac per hoc ve-  
 ram paupertatem suam. Inde incipit affligi,  
 & tribulari, & medicum supremum, qui di-  
 ues est in misericordia, inuocare. Scit enim à  
 Deo cor contritum, & spiritum contritula-  
 tum nunquam despici. Ait igitur confiden-  
 ter, *In quacunque die tribulor, inclina ad me  
 aurem tuam*, id est, quandocunque ex respe-  
 ctu gratiæ tuæ spiritum contritulum ge-  
 ro, & inde clamo ad te, peto vt benigne ex-  
 audias me. Et idipsum explicans addit, *In  
 quacunque die inuocauero te, velociter exau-  
 di me*, id est, quandocung; tribulor, & ex tri-  
 bulatione inuoco te medicum omnipoten-  
 tem, exaudi me, & quidem velociter, ne si  
 forte tardaueris, non inuenias, quem sanes.

*Quia defecerunt sicut fumus dies mei,  
 & ossa mea sicut cremum aruerunt.*

Reddit rationem, cur dixerit, *velociter  
 exaudi me*. Ratio enim est, quia vita huma-  
 na velocissime tendit ad interitum, & ideo  
 nisi peccati vulnus velociter curetur, peri-  
 culum est, ne plaga incurabilis fiat. *Quia de-  
 fecerunt sicut fumus dies mei*, id est, tempus  
 vitæ meæ hucusque transactum, velocissime  
 præterit instar fumi, qui quamuis in mag-  
 nam molem intumescendo excrescat, tamen  
 subito dissipatur, & euanesceat in auras: &  
 sine dubio sic transibit id quod superest, &

*ossa mea*, quæ sunt quasi columnæ totius  
 corporis; breuissimo tempore aruerunt, ac  
 per hoc debilitata sunt, vt breui ruinam mi-  
 nentur. Per cremum intelligitur lignum,  
 seu virgultum aridum, quod facile cremari  
 potest, vt sanctus Hieronymus docet in  
 commentario ad cap. 10. Osee, vel, vt alij  
 volunt lignum semustum, ac fere crema-  
 tum, vtrunque autem fragile est, ac debile, vt  
 pondus superpositum diu sustinere non pos-  
 sit. S. Augustinus legit, *ossa mea sicut in fri-  
 xorio confixa sunt*, quam lectionem inue-  
 nimus in editione antiqua Romana. S. Hie-  
 ronimus ex Hebræo vertit, *ossa mea, quasi  
 fixa contabuerunt*. Vox Hebræica, *moked*,  
 non habetur, nisi hoc loco; ideo vnusquis-  
 que pro suo arbitrio eam interpretatur. Se-  
 ptuaginta verterunt, *os si confixum fuerit  
 confixum*, quæ verba vtrunque significare pos-  
 sunt, nimirum, *quasi cremum aruerunt*, &  
*quasi in frixorio confixa sunt*. Possunt hæc  
 referri etiam ad deplorandum tempus in  
 peccatis misere consumptum, vt sensus sit,  
*Dies mei*, in quibus videlicet voluntatem  
 meam faciebam, & quos pro arbitrio, sine  
 timore Dei, in voluptatibus consumebam,  
 illi, inquam, *dies defecerunt sicut fumus*,  
 quia tenebrosi, & breuissimi fuerunt, neq;  
 vllum tui vestigium reliquerunt. *Et ossa  
 mea*, id est, fundamenta, & quasi columnæ  
 prosperitatis meæ, sicut cremum aruerunt:  
 citissime enim transit omnis mundana feli-  
 citas, neque aliquid post se relinquit, nisi  
 tetrum odorem quasi rei concrematæ, aut  
 fixæ, malam videlicet famam, & omnium  
 execrationem.

*Percussus sum vt fœnum, & aruit cor  
 meum, quia oblitus sum comedere panem  
 meum.*

Pergit deplorare statum suum præteri-  
 tum, ac dicit, *percussus sum vt fœnum*, id  
 est, à sole prosperitatis mundanæ percussus  
 sum, *vt fœnum*, quod facillime exarescit,  
 & *aruit cor meum*, quia occupatus in cu-  
 ris huius mundi oblitus sum comedere  
 panem meum, panem videlicet veritatis

Ecce

ecce.



caelestis, qui proprie panis noster est, non communis cum bestiis: nam cibus corporalis non est proprie panis noster. Verissima sententia, & ab ijs, qui prosperitate fruuntur, assidue consideranda; nisi enim qui in prosperitate sunt, sed umbra alarum Dei commorentur, vel imbre diuinæ gratiæ continuo perfundantur, fieri non potest, quin ut foenum pereuntiantur, & cor eorum nauscescat ad caelestem panem, non penitus exarescat. *Videte*, Dominus ait Luc. xi. *ne grauentur corda vestra in crapula, & ebrietate, & curis huius vite*; qui enim tales sunt, obliuiscuntur comedere panem verum, & ab omni deuotionis gratia aridi fiunt.

*A voce gemitus mei, adhaesit os meum carni meae.*

Explicat nunc dolorem vite præteritæ, & fructus dignos penitentiae, quemadmodum enim antea vivebat caro in delicijs, & arescebat cor oblitum comedere panem suum: ita nunc è contrario à voce gemitus sui, id est, à continuo fletu obliuiscitur caro comedere panem suum. *& sic adhaerent ossa carni*, id est, pelli suæ; accipitur enim hoc loco caro pro pelle, ut S. Hieronymus admonet. Itaque commendantur hoc loco fletus, & ieiunia, quæ veræ penitentiae fructus & signa sunt.

*Similis factus sum Pelicano solitudinis; factus sum sicut nycticorax in domicilio.*

*Vigilanti, & factus sum sicut passer solitarius in tecto.*

Addit ad fletum, & ieiunia solitudinem, & vigilias; quæ propria sunt vere penitentium; nisi enim quis à frequentia hominum ad tempus se subducatur, & serio vigilans recogitet magnitudinem, & multitudinem peccatorum suorum, vix fieri potest, ut ea digne desceat. Tres aues commemorat Prophetæ, quibus penitentem similem facit. *Pelicanus*, alias *Onocrotalus*, avis est in solitudine degens; *Nycticorax*, alias noctua, siue bubo degit in domibus dirutis, siue in parietibus tecto carentibus: & quod nos le-

gimus, *in domicilio*, suppleendum est, dirutus. Sic enim habetur in textu Hebraico. S. August. legit, *in parietinis*, & explicat, in ædificijs, ubi muri stant sine habitatore: *Passer solitarius* habitat quidem in domibus, sed in parte domus suprema, ut magis supra domos, quam in domibus habitare dicendus sit. In Græco habetur *ἐν τῷ οὐρανῷ*, notat S. Hieron. in Epist. ad Suniam, & Fretellam, in Palæstina, & in Ægypto non esse in usu tecta acuminata, sed plana, quæ etiam solaria dicuntur, in quibus frequenter conueniunt homines ad fabulandum, apicandum, & conuescendum; proinde idem esse in domate, & in tecto, quia quod Romanis est tectum, Palæstinis est *doma*: & quod dicitur Matth. 10. *Prædicate super tecta*, intelligendum esse de eiusmodi solarijs, siue domatibus; ut etiam quod dicitur Act. 11. de S. Petro, *Ascendit in superiora domus, ut oraret*. Significant autem hæc tres aues tria genera penitentium; aliqui enim omnino loca deserta petunt, ut Maria Magdalena, Maria Ægyptiaca Paulus primus Eremita, Antonius, Hilarion, & alij plurimi, qui dicere possunt cum Prophetâ, Pl. 54. *Elongaui fugiens, & mansi in solitudine*, & quemadmodum Pelicanus cum venenatis animantibus, ac potissimum cum serpentibus bellum gerit, ut S. Hieron. scribit; sic anachorita cum demonibus assidue luctantur, & ex victorijs aduersus demones quasi pascuntur. Alij penitentiam agunt intra ciuitates, sed in cœnobijs, & exiguis cellulis, quasi in tugurijs, & à Mundo separati quasi nycticoraces magnam noctis partem in diuinis laudibus decantandis consumunt: nycticorax enim dicitur, quasi noctu clamans, & sicut nycticoraces ex amore clamant; ita penitentiam agentes ex timore iudiciorum diuinorum in orationibus, & hymnis, & canticis spiritualibus clamant. Deniq; alij, qui vel alligati vxoribus, vel officio publico fungentes, non possunt corpore ab hominum frequentia separari, veluti passer solitarius in tectis habitat, eminentes animo non solum super turbas, sed etiam super ipsas domos. Hi quidem in mundo sunt, sed de mundo non sunt, dum non subi-

ciuntur.



ciuntur opibus, aut honoribus, aut seculi negotijs, sed ea sibi subijciunt, illis præfunt, eaq; disponunt, atq; dispensant, & non solum se ita capi, aut illaqueari quin animus libere in solitudine degat, & in cælis subinde versetur. Horum est proprium vigilare, & prædicare super recta; vigilare aduersus tentationes, & pericula sua, & suorum, & verbo, atq; exemplo prædicare ijs quibus præfunt. Estque hoc genus vtilissimæ pœnitentiæ, in sublimi loco humilitatem seruare in amplis opibus sobrio victu, & tenui vestitu contentum esse, vt abundanter tribui possit ijs, qui necessitatē patiuntur, in magna peccandi licentia corpus castigare ieiunijs, & vitæ asperitate in seruitutem redigere: denique proximis ex charitate seruire, eorum infirmitatibus compari, eorum molestias, & scandala sustinere.

*Tota die exprobrabant mihi inimici mei, & qui laudabant me, aduersum me iurabant.*

Semper vita eorum, qui serio pœnitentiam agunt, displicet peccatoribus, qui in peccatis hæreere volunt, *Gravis est nobis, inquit impij Sap. 2. etiam ad videndum, quoniam dissimilis est alijs vita illius, & immutat & sunt via eius;* quamuis enim hæc dicantur de iusto: tamen conueniunt etiam in peccatorem pœnitentem, qui ad iustitiam anhelat. At igitur, *Tota die exprobrabant mihi inimici mei,* id est, qui mihi erant amici ob communia studia iniquitatis, iam mihi in alterum hominem mutato, facti sunt inimici & omni tempore exprobrabant mihi hanc mutationem, quasi insipienter agerem: & qui antea laudabant me, vt prudentem, & fortem socium eorum, quia laudatur impius cum male fecerit, postea *aduersum me iurabant,* id est, iuramento inter se præstato conspirabant. Sanctus Hieronymus ex Hebræo vertit, *per me iurabant.* Sed vox Hebraica; *bi,* significat proprie, *in me,* ac per hoc recte habet nostra editio, *aduersum me,* idem enim est, in me iurabant, & aduersum me iurabant.

*Quia cinerem tanquam panem man-*

*ducabam, & potum meum cum fletu miscbam.*

Reddit causam cur exprobrarent ei inimici ipsius. *Quia,* inquit, *cinerem tanquam panem manducabam, & potum meum cum fletu miscbam,* id est, quoniam insipientiam esse arbitrabantur tantam asperitatem vitæ sponte assumptam. Porro cinerem tanquam panem manducare, est vesi pane sordido, & in cinere asperso; quod præcipue contingit, cum comeditur panis subcinericius non diligenter excusso cinere, quod solent pœnitentes: vesi videlicet, cibis male præparatis, pane hordeaceo, vel surfureo, & admisto cinere, vel terra, quod de S. Francisco testatur S. Bonauentura cap. 5. vitæ ipsius, Cocta, inquit, cibaria, tempore sanitatis vix admittebat; admissa vero conficiebat cinere, &c. potum autem fletu miscere, nihil aliud est, nisi inter bibendum vinum, quod latificat cor hominis, non lætare, sed flere ob memoriam admixtæ offensionis diuinæ. Posset etiam per, cinerem, intelligi pœnitentia ipsa, & sensus esset, *cinerem tanquam panem manducabam,* id est, actione pœnitentiæ reficiebam animam, vt pane refici solet corpus: *& potum meum cum fletu miscbam,* id est, lacrymarum effusione sitim internam reconciliationis temperabam, quomodo potu aquæ, aut vini temperatur sitis corporalis. Denique quomodo dicitur in Psalm. 41. *fuertunt mihi lacryma mea panes, die ac nocte;* & Thren. 3. *Cibauit me cineres;* ita potest hic locus intelligi, vt sensus sit, Quotidie in amaritudine eram, & ipsa amaritudo, quæ per cinerem significatur, erat mihi panis quotidianus; & assiduus fletus erat mihi quotidianus potus: sustentabat amaritudine, reficiebar lacrymis doloris, & desiderij.

*A facie ira, & indignationis tua, quia eleuans alligasti me.*

Ecce cur verus pœnitens cinere saturari, & lacrymis refici eligat, non ex insipientia, non ex inopia, sed quia recogitat indignationem altissimi, cui per hanc humiliationem, & veræ pœnitentiæ signa aliquo modo

Eccc 2 satisfacta-



satisfacere cupit. *Manducabam*, inquit, *cinerem* tanquam panem, & *potum* cum fletu *miscebam a facie ira*, & indignationis tuae, id est, quia conspiciebam iram, & indignationem tuam aduersus me succensam ob admissa peccata. Cernebam autem iram, & indignationem tuam, quia eleuans allisisti me, id est, quia eleuans ex gratia tua ad maximam dignitatem amicitiae, & filiationis tuae, postea merito peccati mei allisisti me ad terram, deturbans de dignitate amici, & filij ad sortem inimici, & serui rebellis, & fugitiui. Ne putarent homines peccatores modicam esse iacturam gratiae, quam peccando faciunt: utitur scriptura verbo allisionis: vas enim quod ex alto loco in terram alliditur, non solum amittit dignitatem loci, sed omni ex parte confringitur, ut nihil sani, nihil boni remaneat. Sic homo peccator, quamuis amore carnali caecatus non videat detrimentum animae suae: vere tamen totum amittit, cum & corpus, & anima eius deputata sit ad gehennam ab eo, cui nemo resistere potest.

XII.

*Dies mei sicut umbra declinauerunt, & ego sicut foenum arui.*

Signum, & pars quaedam allisionis est haec ipsa nostra mortalitas: nam cum primus homo eleuatus esset ad gloriam magnam, ut posset in aeternum viuere; per peccatum tamen allisus est cum tota posteritate, & mortalitatis effectus, declinantibus diebus eius, velut umbra, ipse quoque sicut foenum arui. Ait igitur Propheta in persona poenitentis, non solum ego ab ira tua allisus sum in terram ob mala merita mea propria, sed etiam ex antiqua, & communi allisione *dies mei sicut umbra declinauerunt*, id est, velociter, & sine quiete vlla, insensibiliter transierunt, quomodo umbra insensibiliter, & continuo mouetur, donec occidente sole, penitus euanescat, & in tenebras noctis quodammodo transeat. *Et ego sicut foenum arui*, id est, qui creatus eram, ut semper sicut palma virerem; nunc allisus in mortalitatem, sicut foenum, quod facillime siccat, exarui.

*Tu autem Domine in aeternum permanes, & memoriale tuum in generationem, & generationem.*

Haec est altera pars Psalmi, in qua Propheta in persona pauperis poenitentis post explicatam miseriam suam, spem reconciliationis concipit, & spiritu diuino illustratus praedicat reparationem, & renouationem Ecclesiae futuram per Christum: & verba sua ad ipsum Christum dirigit: ut Apostolus exponit ad Hebr. 1. volens enim Apostolus eo loco demonstrare Christi diuinitatem, allegat primo loco verba Psalmi: 44. *Thronus tuus Deus in saeculum saeculi*. deinde Psalmi 95. *Adorent eum omnes Angeli Dei*. postremo Psalmi huius 101. *Tu Domine initio terram fundasti*, &c. quae verba ad eundem dicuntur, ad quem dicuntur ista, *Tu autem Domine in aeternum permanes*. proinde si illa dicuntur ad filium Dei, ista quoque dicuntur ad filium Dei. Neque videntur satisfacere huic rationi, qui dicunt, haec verba dici ad Deum simpliciter, sed posse tribui filio, quia filius Dei Deus est, si enim ita esset, Apostolus non probaret, sed poneret, ut concessum, Christum Deum esse. Igitur sensus erit, Ego quidem ut foenum arui: tu autem Domine, quem expectamus Messiam, in aeternum permanes; & nostra quidem memoria cum sonitu perit, memoriale autem tuum, id est, memoria tua propagabitur semper in generationem, & generationem, quia semper erunt per temporum successiones qui recordentur mirabilem operum tuorum.

*Tu exurgens misereberis Sion, quia tempus miserendi eius, quia venit tempus.*

Idcirco memoriale tuum propagabitur in generationem, & generationem, quia tu quoque non obliuisceris miseri populi tui: sed exurgens quasi a longo somno misereberis Sion, & misertus aduenies, & saluabis nos: quia per spiritum video, quia tempus miserendi iam venit, id est, iam prope est ut veniat, iam propinquat; imo in mente mea iam venit quoniam rem futuram ex certitudine luminis Prophetici cerno ut praesentem. Hoc est tempus de quo Apostolus ad Gal. 4.

XIII.

XIV.



Galat. 4. *Cum venit plenitudo temporis misit deus filium suum, & de quo Isaias cap. 49. Tempore accepto exaudiui te, & in die salutis adiuui te, quod explicans Apostolus. 2. ad Corinth. 6. ait, Ecce nunc tempus acceptabile, ecce nunc dies salutis.*

*Quoniam placuerunt seruis tuis lapides eius, & terra eius miserebuntur.*

Præuidit, & prædixit Propheta renouationem sanctæ Sion, ex eo quod præuidit, seruos Dei iam desiderio accensos ad Ecclesiæ ædificationem, præuidit videlicet, sanctos Apostolos, qui antea piscationi, & rebus vilissimis intendebant, postea à Christo edoctos, & Spiritu sancto repletos relictis omnibus alijs curis, totos se dedisse Ecclesiæ ædificationi. *Quoniam, inquit, placuerunt seruis tuis, id est, ijs, quos tibi in seruos elegisti, & prædestinasti, placuerunt lapides eius, id est, placuit ædificatio nouæ Ierusalem, placuit colligere, & congregare lapides viuos, qui super fundamentum iam positum superædificarentur; & terra eius miserebuntur, & terram ipsam nouæ Ierusalem fouebunt, & amabunt, vt mater fouet, & diligit infantem vteri sui: nam in Scriptura verbum, miserendi, significat paterno, vel materno affectu diligere Isai. 49. Nunquid obliuisci potest mulier infantem suum, vt non misereatur filio vteri sui? Per lapides intelliguntur viri constantes, & perfecti, per terram siue puluerem, vt sonat vox Hebraica, *khaphar*, intelliguntur infirmi, & instabiles: de quibus Apostolus Rom. 14. *Infirmum in fide assume. & Rom. 15. Debemus nos firmiores imbecillitates infirmorum sustinere, & c. 2. Cor. 11. Quis infirmatur & ego non infirmor?**

*Et timebunt gentes nomen tuum Domine, & omnes Reges terra gloriam tuam.*

Ex hoc loco intelligimus: minus recte exponi hunc Psalmum ab ijs, qui docent in versiculis præcedentibus prædici euerzionem Iudæorum ex captiuitate Babylonica, & reædificationem Ierusalem eueris à Rege.

Nabuchodonosor; non enim tunc omnes gentes terræ timuerunt nomen Dei, neque omnes Reges gloriam eius. Siquidem hæc aduentui, & glorificationi Messiae reseruebantur, & vt prædictum fuit, sic & adimpletum fuisse constat. Ait igitur, *Et timebunt gentes, id est, & tunc cum ædificabitur noua Sion, gentiles conuertentur, & timebunt timore sancto, piaque veneratione nomen tuum Domine Iesu Christe, & omnes Reges terra pariter conuertentur, & timebunt gloriam tuam, id est, Maiestatem tuam, vt Regis Regum, & Principis, Regum terræ sedentis ad dexteram Patris, donec subijciatur sub scabellum pedum tuorum omnes inimici tui, & postea venturi Iudicis omnium viuorum, & mortuorum, & reddituri singulis secundum opera ipsorum.*

*Quia ædificauit dominus Sion, & videbitur in gloria sua.*

XVII.

Ecce cur timebunt omnes gentes, & omnes Reges gloriam Christi. *Quoniam ædificauit Sion, id est, in presenti, inuitis licet, & repugnantibus gentibus, & regibus ædificauit Ecclesiam suam, aduersus quam porta inferi non praualebunt, Matth. 16. & in futuro videbitur in gloria sua, quando veniet cum omnibus Angelis, in nubibus cæli, cum potestate magna iudicare sæculum. Quando cœpit ædificare Sion, visus est in humilitate sua, dicente Isaias cap. 53. Vidimus eum, & non erat ei species: sed quando veniet iudicare, tum plane videbitur in gloria sua.*

*Respexit in orationem humilium, & non spreuit preces eorum.*

XVIII.

Hæc referuntur ab aliquibus ad preces sanctorum Prophetarum, & piorum virorum Testamenti veteris, qui expectabant aduentum Messiae, sed fortasse rectius sentiunt, qui referunt ad preces sanctorum Martyrum, qui dicunt in Apoc. c. 6. *Vsq̃ue quo Domine non iudicas, & non vindicas sanguinem nostrum de his qui sunt in terra? Videbitur ergo Filius Dei in gloria sua, quia respexit in orationem humilium Martyrum, aliorumq; piorum seruorum suorum, & non spreuit preces eorum, & ideo veniet iudicare.*

Ecce 3

catu-



caturus & vindicaturus sanguinem eorum de his, qui sunt in terra: hæc expositio melius connectit verba Psalmi: nam secundum priorem expositionem, præfens versiculus reddit rationem verborum illorum: *Tu exurgens misereberis Sion*, quæ habentur in versic. 14. at secundum expositionem posteriorem reddit rationem verborum, quæ habentur in versiculo proxime præcedenti; imo in secunda parte versiculi, videlicet, *Et videbitur in gloria sua.*

XIX.

*Scribantur hæc in generatione altera, & populus qui creabitur, laudabit Dominum.*

Ne Iudæi sibi tribuerent hanc Prophetiam, & ne forte intelligerentur quæ supra dicta sunt de solutione captivitatis Babylonice, & ædificatione Ierusalem terrenæ, placuit Spiritui sancto disertis verbis admonere, quod postea scripsit S. Petrus in epist. priore c. 1. *Propheta de futura in vobis gratia prophetauerunt, & infra, quibus reuelatum est, quia non sibi metipsis, vobis autem ministrabant ea, quæ nunc annunciata sunt vobis per eos qui euangelizauerunt vobis.* Ait igitur Spiritus sanctus per os David: *Scribantur hæc in generatione altera.* i. notentur hæc mysteria pro generatione olim futura: dicitur enim, *in generatione altera*, pro, *in generationem alteram*, vt habetur in Græco: vel pro, *generationi alteri*, siue, *ad generationem alteram*, vt verti potest ex Hebræo. Neque multum refert, quod in Hebræo & Græco habetur in numero singulari, scribatur hæc: nam idem omnino est sensus. *Et populus qui creabitur*, id est, populus, qui erit futuris temporibus, *laudabit Dominum*, cum viderit impleta, quæ tanto antea prædicta sunt. Fortasse etiam, vt notat S. Augustinus, insinuat per populum, qui creabitur, noua creatura, de qua dicit Apostolus ad Gal. 6. *In Christo Iesū neque circumciso aliquid valet, neque praputium, sed noua creatura;* & ad Ephes. 2. *Creati in Christo Iesū in operibus bonis.*

XX.

*Quia prospexit de excelsis sancto suo: Dominus de cælo in terram aspexit.*

Hæc est ratio, cui populus noui Testamenti laudabit Dominum, quia Dominus de excelsis sanctuario suo dignatus est aspicere vallem nostræ miseriæ, id est, de cælo in terram aspexit; non oroso intuitu, sed, vt de excelsis fieret humilis, & in terris videretur, & cum hominibus versaretur.

*Vt audiret gemitus compeditorum, vt solueret filios interemptorum.*

Cur autem Dominus excelsus vsque ad terram humiliaretur, ea causa fuit, vt de proximo, audiret gemitus compeditorum; quos Princeps huius mundi captiuos fecerat, & compeditos retinebat: & vt audito gemitu solueret eos, liberosq; dimitteret, quod impletum fuisse in suo aduentu Dominus testatus est Lucæ 4. In Hebræo pro, *compeditorum*, habetur, *vincti*, vt audiret gemitu *vincti*, sed idem est sensus. Pro, *filios interemptorum*, habetur in Hebræo, *filios mortis*, id est, homines ad mortem damnatos: quomodo etiam habetur in Psal. 78. vbi nos legimus, *filios mortificatorum*, sed, vt eo loco diximus, LXX. Interpretes per *filios mortis* intellexerunt in his locis filios parentum occisorum. Potest etiam fieri, vt Septuaginta in Hebræo suo textu haberint, *interemptorum*, quod per vnius literæ mutationem fieri potuit. Porro per, *compeditos*, hoc loco intelligimus homines opera Diaboli alligatos propriis concupiscentiis, & gementes sub iugo passionum suarum. Per, *filios interemptorum*, intelligimus filios veteris Adami & Heuæ, qui fuerunt primi occisi ab astutia serpentis: nam, vt dicitur Sap. 2. *Inuidia Diaboli mors introiit in orbem terrarum;* & Dominus in Euangelio de Diabolo dicit, Ioan. 8. *Ille homicida erat ab initio, & in veritate non stetit.*

*Vt annuncient in Sion nomen Domini, & laudem eius in Ierusalem.*

Venit Dominus saluare compeditos, & erugere de potestate tenebrarum, vt annuncient in Sion nomen Domini, id est, vt conuerſi ad Deum viuum & verum, glorificent nomen Domini in spiritali Sion, quæ est Eccle-



Ecclesia, quod idem reperit dicens, & lau-  
dem eius, supple annuncient, in Ierusalem;  
laudantes & benedicentes Deum, gratiasq;  
agentes pro tam insigni beneficio in Ecclesia  
Catholica, quæ est noua Ierusalem. Exponit  
hoc S. Petrus in priore epist. cap. 2. vbi dicit:  
*Vos autem genus electum, regale sacerdotium,  
gens sancta, populus acquisitionis, ut virtutes  
annunciatis eius, qui vos de tenebris vocauit  
in admirabile lumen suum.*

*In conueniendo populos in vnum, & Re-  
ges, ut seruiant Domino.*

Explicat tempus, quo liberati à potestate  
tenebrarum, laudare debeant nomen Domi-  
ni. In conueniendo, inquit, populos in vnum, id  
est, quando populi nationum, qui antea diui-  
si erant ambulantes post varios Deos, con-  
uenient in vnum, & efficiuntur vnum cor-  
pus, & erit eis vnus spiritus, vnus Deus, vna  
fides, vnum baptisma, imo etiam per chari-  
tatem erunt cor vnum & anima vna: quando  
non solum populi, sed etiam Reges eorum  
conuenient in vnum corpus Ecclesiæ, vt & i-  
psi seruiant Domino. In Hebræo habetur,  
Regna, & sic legit etiam S. Augustinus: tamen  
in Græco habetur, Reges, & sic legunt in com-  
mentario S. Hieronymus, & S. Gregorius, &  
alii. Sensus est idem: nam cum dicitur, Regna  
seruiant Domino, sensus est, Reges cum po-  
pulis seruiant Domino. Fortasse etiam Se-  
ptuaginta legerunt, melachim, Reges, non  
mamlaoth, Regna.

*Respondit ei in via virtutis sue, pauci-  
tatem dierum meorum nuncia mihi.*

Hic versiculus obscurissimus est, quo ad  
verba, & quo ad sensum. S. Hieronymus ex  
Hebræo vertit: *Affixit in via fortitudinem  
meam.* Sed facile est videre rationem diuersi-  
tatis: nam vox Hebræa, *hinne*, deducitur à  
verbo, *hinna*, quod & respondere, & affigi si-  
gnificat, ac per hoc si legatur cum puncto in  
secunda littera, vt legit S. Hieronymus, signi-  
ficabit, *affixit*; si legatur sine puncto, vt ie-  
gerunt LXX. Interpretres, significabit, re-  
spondit. Sic etiam illud, *cochi*, si legatur cum  
Iod, vt legit S. Hieronymus, significat, *forti-  
tudo mea*; si legatur cum Van, *cocho*, vt lege-

runt Septuaginta, significat, *fortitudo eius*, si-  
ue *virtutis eius*. Neque refert, si veritas: In  
via virtutis eius, siue, in via virtutis eius,  
quia nomina Hebræorum non declinantur  
per casus. Itaque recta est nostra lectio: Re-  
spondit ei in via virtutis sue, sed difficile est  
iudicare, cum quo nomine coniungatur ver-  
bum, respondit. S. Hieronymus in commen-  
tario scribit sensum esse, Respondit Domi-  
nus ad Ierusalem. S. Augustinus contra vult  
sensem esse, Respondit Ierusalem ad Domi-  
num. Euthymius dicit, respondisse paupe-  
rem, de quo in titulo Psalmi. Quid si adda-  
mus quartam expositionem, & dicamus re-  
spondisse Prophetam ad eum, qui imperauit  
illi, vt scriberet hæc in generationem alter-  
am? Videtur enim hæc esse contextio horum  
versiculorum. Dixit Dominus Propheta:  
*Scribantur hæc in generationem alteram, &  
populus qui creabitur, laudabit Dominum &c.*  
*Respondit ei Propheta: In via virtutis sue, id  
est, in flore ætatis sue, cum esset in via vitæ  
sue robustissima, paucitatem dierum meo-  
rum nuncia mihi, id est, fac, vt intelligam, &  
serio mihi persuadeam, paucos fore dies vitæ  
meæ, ne forte deceptus hoc flore ætatis, abi-  
trer me longissimam vitam habiturum, & ra-  
piar hinc, quando minus cogito immaturus  
& imparatus, & non perueniam ad populum,  
qui creabitur, & qui perpetuo te laudabit in  
cœlesti Ierusalem.*

*Ne reuoces me in dimidio dierum meo-  
rum: in generationem & generationem  
anni tui.*

Dimidia pars huius versiculi pertinet ad  
versiculum superiorem; quia enim dixe-  
rat: *Paucitatem dierum meorum nuncia  
mihi*, addit orans; *Ne reuoces me in dimi-  
dio dierum meorum*, id est, ne reuoces me  
de curriculo vitæ in medio cursu, quando  
minus expecto mortem, quando nihil mi-  
nus cogito, quando paratum me non in-  
uenires. In Hebræo distinguuntur aliter  
isti versiculi, ideo sanctus Hieronymus ver-  
tit: *Dicam, Deus meus, ne rapias me  
in medio dierum meorum.* Sed illud;  
*Dicam, Deus meus*, mutatis punctis  
potest



potest legi, *dic ad me*, & sic legerunt Septuaginta, & coniungentes cum superiore versiculo verterunt, *nuncia mihi*: neque vlla ratio est, cur non sequamur distinctionem, & lectionem Græcam, & Latinam, cum eam optime ferant verba Hebraica, demptis punctis, quæ à Rabbiniis addita fuerunt. Quod sequitur, *In generationem & generationem anni tui*, ratio est, cur æquum sit, vt Deus hominem permittat tamdiu viuere, quamdiu necesse est, vt bene, & sancte moriatur, quasi dicat, Anni tui Domine æterni sunt, & generationi, ac generationi coexistunt sine vilo fine: æquum igitur est, vt imaginatiuæ spatium viuendi indulgeas amplum, & commodum; vt requiritur ad salutem æternam acquirendam.

XXVI. *Initio tu Domine terram fundasti, & opera manuum tuarum sunt cæli.*

XXVII. *Ipsi peribunt, tu autem permanes, & omnes sicut vestimentum veterascent.*

XXVIII. *Et sicut opertorium mutabis eos, & mutabuntur: tu autem idem ipse es, & anni tui non deficient.*

Probat Deum solum esse æternum ex eo quod solus ipse est immutabilis: quæ est ratio plane theologica, & à priori, vt scholæ loquuntur. Deum autem solum esse immutabilem, probat ex eo quod ipse idem semper manens mutabit cælos de non esse ad esse, & rursus mutabit de esse ad non esse: & quod de cælo dicitur, de toto Mundo intelligitur, cuius maxima, & nobilissima pars est cælam. *Initio tu Domine terram fundasti*, id est, à principio antequam Mundus esset, tu Domine eras, & terram, quæ est inferior Mundi pars, à fundamentis fecisti, non super fundamentum aliquod præexistens posuisti. *Et opera manuum tuarum sunt cæli*, id est, non solum terram, sed etiam cælos qui sunt Mundi pars superior, tu solus non per Angelos, aut alios quoscunque opifices, sed manibus proprijs, id est, propria potentia, & sapientia condidisti. Itaque Mundum vniuersum ex non esse ad esse perduxisti. Ipsi, cæli videlicet, *peribunt*, tu autem *permanes*,

Duobus modis hæc intelligi possunt. Primum ex hypothesi hoc modo, etiam si cæli veterascerent, mutarentur, & perirent: tu idem semper maneres. Sic in Euangelio quod dicitur Matt. 5. *Donec transeat cælum, & terra, iota vnum, aut vnus apex non præteribit à lege, donec omnia fiant*, exponitur Luc. 16. *Facilius est cælum, & terram præterire, quam de lege vnum apicem cadere*. Deinde absolute, sed de mutatione non quo ad substantiam, sed quoad modum. Peribunt enim cæli, veterascent, & mutabuntur, quoad motum stellatum; quoad influxum caloris, quoad generationes rerum inferiorum; quomodo etiam terra peribit quoad productionem herbarum, & animalium, & Mundus totus consummabitur quoad figuram, & statum, quem nunc habet, scilicet enim Apostolus, *Præterit figura huius Mundi*, 1. Corinth. 7. & *Quæ videntur temporalia sunt, quæ non videntur æterna sunt*, 2. Corinth. 4. Vbi omnia quæ videntur, temporalia esse dicit, quia ipsa etiam elementa, & cæli secundum eum modum, qui nunc à nobis conspicitur; finem habitura sunt. Videmus enim terram vestitam arboribus, plenam pecudibus, ornatam ædificijs: videmus aquas fluentes, & sæpe turbatas: videmus aerem, nunc serenum, nunc nubilum: videmus sydera in perpetuo motu: quæ omnia temporalia sunt, & finem habitura: *novos autem cælos, & novam terram secundum promissionem eius expectamus*, vt B. Petrus scribit in epist. posteriore cap. 2. *Et omnes sicut vestimentum veterascent*, id est, omnes cæli, quoad externam figuram, & modum consumentur. *Et sicut opertorium mutabis eos, & mutabuntur*? id est; sicut pallium aliquod vetus, remouebis à cælis externum istum habitum cælorum, & nouo indues: sic mutabuntur cæli, quomodo mutatur homo cum vestimenta mutat, quoad externam faciem, non quoad internam substantiam. *Tu autem idem ipse es, & anni tui non deficient*, id est, tu nullo modo mutaberis quantauis longitudine annorum. Cur autem Deus nulla ratione mutari possit, ratio manifesta est, quoniam

omne



omne quod mutari potest, est in potentia ad aliquid aliud acquirendum: Deus autem actus est purus, & perfectissimus, imo infinitæ perfectionis: proinde nihil acquirere potest, cum nihil ei desit.

*Filij seruorum tuorum habitabunt & semen eorum in seculum dirigetur.*

Descripta æternitate Dei, & Mundi consummatione, ac renouatione; prædicit in Mundo renouato participes fore æternitatis eius serui ipsius, & filios, ac filios seruorum vsq; in sempiternum: non quod in futuro sæculo sit futura propagatio filiorum, sed quod ad beatam illam requiem peruenturi sint omnes fideles serui Dei cum omnibus posteris, qui eorum pietatem imitati fuerint: atque hæc est promissio facta olim Ad Abraham, Gen. 17. *Si autem pactum meum inter me, & te; & inter semen tuum post te facere sempiterno.* Per seruos Dei intelligimus Patriarchas, per filios Apostolorum, reliquos pios Christianos. *Filij seruorum tuorum habitabunt;* id est, Apostoli, cum parentibus eorum Patriarchis habitabunt in Regno tuo, in renouatis coelis, in caelesti Ierusalem: *& semen eorum in seculum seculi dirigetur,* id est: neque illi solum, sed etiam quotquot illi per Euangelium genuerint, si in Fide, & in dilectione permanerint, in seculum dirigentur, id est, in æternum recti, & stabiles in omni prosperitate permanent. In Hebræo habetur, *Et semen eorum ante faciem tuam perseverabit:* sic enim vertit sanctus Hieronymus. Sed vox Hebraica, *iccon*, amplissima significationis est, vt dirigi, stabiliri, permanere, & perseverare significare possit. Illud autem, *lepanecha*, proprie non significat, in æternum, sed, *coram te*, siue, *ad faciem tuam*. Sensus tamen est idem: nam permanere ante Deum, est permanere, quandiu manebit Deus, quod erit sine fine. Similis habetur loquutio in Psal. 71. *Permanet cum Sole, & ante Lunam,* id est, quandiu manebunt Sol, & Luna. En lector, quo perducatur vera poenitentia, quæ initio Psalmi descripta est: perducit enim ad æternam felicitatem cum Deo, siue qua

peccator in æternis supplicijs mansisset cum Diabolo.

PSALMVS CII.

Titulus & Argumentum Psalmi.

Ipsi David.

**T**itulus significat, Psalmum hunc ipsi Davidi à Spiritu sancto inspiratum; vt eum ad solatium timentium Deum in hac lachrymarum valle decantaret. Et sane necesse fuit nobis reuelari, hunc Psalmum de cælo allatum fuisse: aliqui nemo facile fidem haberet promissionibus diuinis, quæ in hoc Psalmo declarantur: superant enim longissimo interuallo capacitatem animi nostri. Primum igitur exponit propheta beneficia Dei erga electos suos; quæ in hac vita inchoantur, & in alia perficiuntur: deinde ostendit, unde veniant ista beneficia, & ad quos pertineant, quod videlicet sint opera ineffabilis misericordiae diuinæ erga timentes Deum. Denique cum impar sibi esse videretur ad agendas gratias, inuitat omnes Angelos, imo omnes creaturas, vt benedicant Dominum, eiq; pro nobis gratias agant. Psalmus dulcissimus est, & ad fiduciam in Deum erigendam, & collocandam aptissimus; modo post actam de peccatis quantumuis grauibus poenitentiam; Deum vere & ex corde timeamus.

EXPLICATIO PSALMI CII.

**B**enedic anima mea Domino, & omnia quæ intra me sunt nomini sancto eius.

David pie credens, vnum se esse de numero Electorum Dei, excitat ipse se in persona omnium Electorum ad benedicendum Dominum. *Benedic, inquit, anima mea Domino.* cogita beneficia, lauda benefactorem, tu potissimum anima mea, quæ non solum beneficia recipere, sed etiam ea cognoscere ex dono Dei meruisti. Neque tu sola anima mea laudes Dominum, sed omnia quæ intra me sunt, vertantur in linguas, & benedicant.



*benedicam nomen sanctum dei.* Per ea, quæ intus sunt, S. Augustinus animam ipsam intelligit, ut sit repetitio, vel expositio eiusdem sententiæ, & quod dictum est, *Benedic anima mea Domino*, repetatur, & explicetur per sequentia. *Et omnia interiora mea*, id est, omnes cogitationes, & affectiones, quæ in imo corde latent, benedicant nomen sanctum eius. Recte hæc dicuntur, sed non est absurdum, si per interiora, intelligamus totum quod est in homine, & exteriore hac nostra pelle contegitur: nam & alibi dicitur, *Cor meum, & caro mea exultauerunt in Deum vivum*: & alibi, *Omnia ossa mea dicent. Domine quis similis tibi?* tribuitur autem laus Dei rebus inanims, & non sentientibus Deum, vel eo modo, quo omnia opera opificem laudare dicuntur: vel ex affectu animæ; quæ si fieri posset, optaret, ut omnia Deum cognoscerent, & laudarent.

II.

*Benedic anima mea Domino: & noli obliuisci omnes retributiones eius.*

Iterum repetit, *Benedic anima mea Domino*, cum ut vehementiam affectus ostendat, tum quia nouit infirmitatem cordis humani, quod facillime frigescit in ijs, quæ per sensus corporis non percipiuntur, qualis in primis est Deus, qui lucem habitat inaccessibilem, ideo adiungit, *Et noli obliuisci omnes retributiones eius*, Vocat autem beneficia Dei, *retributiones*, quoniam non sunt beneficia simplicia, sed (ut sic loquar) sunt omnia duplicia: nam & beneficium est, quod non tribuit nobis debitas pœnas, ut peccata nostra quotidiana merentur, & rursus beneficium, est, quod pro tot malis nostris tanta bona nobis retribuit. Qui numerare poterit peccata hominum, quibus assidue retribuimus Deo mala pro bonis: is fortasse aliquo modo intelliget, quanta sit pietas Dei, quæ assidue nobis retribuit bona pro malis, iuxta illud Domini Luc. 6. *Qui benignus est super ingratos & malos.*

III.

*Qui propitiatur omnibus iniquitatibus tuis, qui sanat omnes infirmitates tuas.*

Incipit enumerare beneficia Dei, & ordine progreditur à primo usque ad vltimum. Primum est remissio peccatorum, qua nos de iniustis iustos, & de inimicis amicos, & de mancipijs filios facit. *Qui propitiatur, inquit, omnibus iniquitatibus tuis*, id est, gratis debita condonat, quantumuis multas: gratis ignoscit culpis, quantumuis ingentibus, quantumuis innumerabilibus. Nec solum propitiatur iniquitatibus, sed sanat omnes infirmitates, ut abscindat radices peccatorum, Radix enim peccatorum cupiditas est, siue, ut S. Ioannes loquitur, *Concupiscentia carnis, concupiscentia oculorum, & superbia vita*. Porro infirmitatem hanc, siue languorem ex peccato primi hominis in natura humana relictum curat Deus in nobis in hac vita, sed perfecta sanitas post hanc vitam erit. Attendat vnusquisque an hanc infirmitatem in se minui sentiat; & an manus Medici celestis æquo animo ferat, qui enim Medici manus repellunt & concupiscentiæ languorem in se nutriunt, non possunt animæ suæ vere dicere, *Qui sanat omnes infirmitates tuas*: & qui hoc dicere nequeunt, frustra ad sequentia Dei dona aspirant.

*Qui redimit de interitu vitam tuam, qui coronat te in misericordia, & miserationibus.*

Transit à beneficijs gratiæ ad beneficia gloriæ, *Qui redimit de interitu vitam tuam*, id est, qui per redemptionem, quæ est in Christo, liberat vitam tuam à morte sempiterna, & transfert in Regnum suum, coronans te corona gloriæ in misericordia & miserationibus: nam ut coronam iustitiæ accipere mereris, præuenit te misericordia gratis iustificans, & miserationes plurimæ dirigentes & protegentes in via, sine quibus in accepta iustitia non perseverares. Nonnulli, præsertim recentiores, per, *coronat te*, intelligunt protectionem circumdantem nos, ut sit misericordia Dei; quasi clypeus vndique nos tegens aduersus tela inimicorum: sed nos sequuti sumus veteres expositores, Hieronymum, Augustinum, Theodoretum, Euthymium, & alios, qui de corona



rona gloriæ hunc locum exponunt; quæ corona redditur meritis, sed merita dona sunt miserentis Dei.

*Qui replet in bonis desiderium tuum, renouabitur vt aquila iuuentus tua.*

Explicat quid in se contineat corona gloriæ. Duo enim continet, satietatem desiderij, & corporis immortalitatem; siue plenam felicitatem animi, & corporis: tunc enim desiderium animæ conquiescet, & famem cordis satiabitur, cum fructur summo bono, quod, ita continet omnia bona, vt animus eo bono plenus non habeat quod appetat, vel requirat amplius. Accedet autem per gloriosam resurrectionem renouatio corporis in beatam, & nunquam senescentem iuuentutem. Comparatur autem hæc renouatio renouationi Aquilarum, non quod Aquila per innouationem vitam perpetuare possit, sed quod vteuq; adumbrare soleat corporum beatorum resurrectionem, præsertim cum Aquila altissime volet, acutissime videat, & diutissime viuatur, quæ erit beatorum hominum felicitas, vt supra cælos conscendant, & ipsam lucem inaccessibilem cernant, & aeo sempiterno fruuntur. Quomodo autem aquilæ renouentur, incertum est. S. Hieronymus in cap. 40. Isaiæ, scribit, Aquilas renouari crebra mutatione pennarum. Sanctus Augustinus in hunc locum narrat, Aquilas renouare rostrum, quod cum nimium creuerit impedit sumptionem cibi, & interitum adfert, nisi ad petram allidatur, & reformetur. Rabini more suo fabellas texunt. Quod attinet ad verba, illud, *qui replet in bonis desiderium tuum*, à S. Hieronymo sic redditur, *Qui replet bonis ornamentum tuum*. Vox Hebraica, *hhedech*, ambigua est: nam & ornamentum, & os significare potest. S. Hieronymus priorem significationem sequutus est, & videtur ornamentum ad coronam retulisse, vt sensus sit, qui coronam tuam ornatissimam reddit, replens eam auro purissimo, & lapidibus pretiosissimis, & vere corona gloriæ Beatorum incomparabili varietate de-

coratur. Tamen Septuaginta Interpretes posteriorem significationem magis probauerunt, & per os, siue buccam, non os corporis, sed animæ intellexerunt; nimis enim abiecte & humiliter hunc locum exponunt, qui volunt, sensum esse, *Qui replet optimis cibis os tuum corporale*. Ergo per os recte Interpres noster vertit, *desiderium*, & nos per, *desiderium*, famem cordis accipimus, quæ tunc satiabitur bonis, cum appa-uerit gloria Domini.

*Faciens misericordias Dominus, & iudicium omnibus iniuriam patientibus.*

Declarauit Propheta bona, quæ iustis parata sunt: declarat nunc fontem horum bonorum esse misericordiam Dei; ne quis cum Pelagio hæresiarcha delirans sibi tribuat, quæ Dei sunt, & hoc ipso per superbiam amittat, quæ humilis accepisset. *Faciens*, inquit, *misericordias Dominus*, id est, Dominus noster ipse est, qui benefacit, qui largitur munera, qui liberaliter tribuit bona sua: & idem ipse ex bonitate sua liberat omnes oppressos de manibus iniquorum. In Hebræo habetur ad litteram, *Faciens iustitias Dominus*; & sic etiam vertit sanctus Hieronymus. Sed iustitia hoc loco accipitur pro opere bono, siue pro actu charitatis, quo modo Matth. 6. Dominus eleemosynam vocat iustitiam, dicens, *Attendite ne iustitiam vestram faciatis coram hominibus, vt videamini ab eis: alioqui mercedem non habebitis apud Patrem vestrum, qui in calis est: cum ergo facis eleemosynam, noli tuba canere ante te, &c.* quo sensu scripsit S. Augustin. in lib. de natura, & gratia cap. vii. Inchoata charitas, inchoata iustitia est; perfecta charitas, perfecta iustitia est. Non ergo errauerunt à propria significatione, neque Græcus, neque Latinus Interpres, qui verterunt, *Faciens misericordias Dominus*, id est, qui facit eleemosynas multas, & magnas Dominus est. Vna vero ex præcipuis eleemosynis eius est, quod facit *iudicium omnibus iniuriam patientibus*,



nam & ipsos patientes iniurias, liberat; & facientes iniurias, non relinquit impunitos.

## VII.

*Notas fecit vias suas Moysi, filiis Israël voluntates suas.*

Explicat quod dixit in versiculo superiore: nam Moysi, singulari seruo suo, *notas fecit vias suas*, quæ sunt misericordia, & veritas, iuxta illud, *Vniuersa via Domini misericordia, & veritas*. *Notas autem fecit vias suas*, quia dedit ei legem sanctissimam, per quam tum ipsi Moysi, tum omnibus filiis Israël declarauit voluntates suas, quæ sunt, vt sicut ipse misericors est, & iustus; ita & nos simus; & hæc ipsa fuit magna Dei misericordia, quod nos ita instruere dignatus sit. Sed præterea *notas fecit Moysi vias suas, & filiis Israël voluntates suas*, quia liberauit populum suum de captiuitate Pharaonis misericorditer, & Pharaonem cum exercitu suo interfecit iuste: ita misericordiam, & iustitiam suam euidenti facto demonstrauit.

## VIII.

*Miserator & misericors Dominus, longanimis, & multum misericors.*

Hæc nomina Dei, quæ veracissima Scriptura nobis insinuat, mirum in modum consolari possunt homines bonæ voluntatis. Dicitur Deus *miserator*, Hebraice, *rachum*, quia paternum affectum habet ad homines pios. siquidem *racham*, significat tenere, & ex visceribus diligere. Dicitur quoque *misericors*, Hebraice, *channum*, id est, gratia & donorum largitor, qui enim diligit affectu paterno, non potest non multa liberaliter donare. Sic igitur Deus, qui ab æterno complacuit sibi in electis suis, eosque præsciuit, & prædestinauit conformes fieri imaginis filij sui; in tempore p'urima eis beneficia contulit, tum naturæ, tum gratiæ. Dicitur tertio, *longanimis*, id est, tolerans, patiens, tardus ad iram: sustinet enim Deus infirmitatem, & imperfectionem nostram. in hoc itinere ad patriam, quo modo parentes, ac matres potissimum tolerant insipientiam & nugas, offensiones, & ingratitudinem infantum; & pueritiam filiorum suorum. Quis enumeret euagationes nostras, dum

cum Deo in oratione colloquimur? quis instabilitates cordis, appetitiones varias, ingratiuitudines, lapsus; delicta digne consideret; & tamen tolerat nos bonitas Dei: pro qua Dei longanimitate certe par esset, vt frequentissime; & intentissime gratias ageremus. In Hebræo habetur, *erech appaim*, quod proprie significat, *longus naribus*, sed nasus accipitur pro ira; & ideo recte vertitur, longanimis, siue tardus ad iram. Dicit ultimo, *Et multum misericors*, quod referendum videtur ad magnam illam, & ineffabilem misericordiam, qua nos Deus euehet ad æqualitatem Angelorum, & similitudinem Dei, quam tunc accipiemus, cum videbimus eum sicuti est. Itaque quatuor ista nomina significant omnia beneficia Dei, à primo vsque ad vltimum. Primum est gratia prædestinationis, siue æternus amor Dei deinde sequuntur dona iustificationis, & remissionis offensionum variarum: postremo accedit corona gloriæ.

*Non in perpetuum irascetur, neque in æternum comminabitur.*

Explicat per partes nomina illa Dei, quæ in superiore versiculo posuit: ac primo loquitur de pio affectu Dei, erga timentes se. *Non in perpetuum*, inquit, *irascetur*, id est; irascetur quidem interdum Deus peccantibus electis suis, eosque flagellabit: sed breui reconciliabitur eis. Manet enim in corde patris paterna pietas, vnde, & ipsa flagella procedunt. Idipsum alijs verbis repetit dicens, *Neque in æternum comminabitur*, id est, non semper iratus minas intentabit: sed vicissim eos blande consolabitur. Hæc autem promissio non fauet villo modo errori illorum, qui damnatorum pœnas aliquando finem habituras existimant, non enim ad omnes pertinet, sed restringitur ad Electos timentes Deum timore filiali, vt non semel in hoc Psalmo explicatur. In Hebræo sunt alia verba, sed idem est sensus: sic enim ad verbum sonat Hebraicus textus, *Non vsque in finem ligabit, neque in perpetuum reueruabit*, id est, non semper contendet nobiscum obiurgans, & reprehendens facta nostra,



nostra, neque, in perpetuum reseruabit iram semel conceptam.

*Non secundum peccata nostra fecit nobis, neque secundum iniquitates nostras retribuit nobis.*

Transit ad secundum nomen, ac dicit, Deum ex infinita misericordia tua, non redidisse nobis pœnas, quas merebamur, sed dona multiplicasse, quæ non merebamur, quid enim meretur iniquus & peccator, nisi mortem? nam *stipendium peccati mors*. Rom. 6. Deus autem non solum non retribuit mortem, sed vitam gratiæ tribuit, & vitam æternam promisit, & interim adiecit abundanter omnia; quibus in hac peregrinatione indigemus.

*Quoniam secundum altitudinem cæli à terra, corroborauit misericordiam suam super timent. etc.*

*Quantum distat ortus ab occidente, longe fecit à nobis iniquitates nostras.*

Hæc pertinent ad idem nomen secundum: probat enim Propheta, Deum non retribuisse Electis secundum peccata ipsorum, quoniam corroborauit misericordiam suam in beneficijs cumulandis, & in iniquitatibus longissime remouendis. Vtitur autem comparationibus distantie cæli à terra, & ortus ab occasu, siue maximæ altitudinis, & maximæ longitudinis, vt ostendat remissionem peccati, & infusionem iustitiæ esse verissimam, & maximam; non autem (vt Lutherani somniant) esse solam non imputationem peccati, & imputationem iustitiæ. *Secundum altitudinem*, inquit, *cæli à terra*, id est, secundum mensuram distantie cæli à terra, quæ est maxima, & verissima: *Deus confirmauit, & stabiliiuit misericordiam vera, summæque iustificationis*; & *Gratiæ super timentes se, quantum distat ortus ab occidente*, id est, secundum mensuram distantie ortus ab occasu, quæ est verissima, & maxima, *longe fecit Deus à nobis timentibus eum omnia peccata nostra*, vere

ac proprie illa delens, & remittens, ac si nunquam commissa fuissent.

*Quomodo miseretur pater filiorum, misertus est Dominus timentibus se: quoniam ipse cognouit figmentum nostrum.*

Explicat Propheta hoc versiculo; & duobus sequentibus tertium nomen, videlicet, *longanimis*, & vtitur aptissima comparatione: nulli enim hominum magis patientes & longanimes sunt, quam parentes in tolerandis ineptijs, & leuitatibus infantum filiorum. Siquidem amor paternus, vel maternus cogit parentes assiduo, & incredibili labore seruire paruulis filijs, atque eorum ingratitude, atque iniurias inuicto animo tolerare. *Quomodo*, inquit, *miseretur pater filiorum misertus est Dominus timentibus se*, id est, quomodo parentes carnis nostræ intimo, & inuicto quodam affectu misereantur miseriarum infantium suorum, eorumque infirmitates, & insipientiam tolerant: sic Dominus noster *miseretur timentium se*, dum eorum errata quotidiana non vt iniurias suas respicit, sed vt ægritudines filiorum considerat. *Ipsæ enim nouit figmentum nostrum*, id est, quia probe nouit, nos ex terra plasmatos, carnem mortalem, & concupiscentijs varijs obnoxiam gerere: ac per hoc valde miserabiles esse.

*Recordatus est, quoniam pulvis sumus? homo sicut fœnum, dies eius tanquam flos agri sic effloret.*

*Quoniam spiritus pertransibit in illo, & non subsistet, & non cognoscet amplius locum suum.*

Declarat quod dixit, nos esse figmentum, ac dicit, *Recordatus est quoniam pulvis sumus*, id est, considerauit, misericordia nos dignos esse, quoniam ex puluere compositi, & plasmati sumus, & per hoc pulvis sumus, quantum ad materiam ex qua ipse nos finxit; & cum pulvis simus, instabiles, & fragiles sumus. Dicitur autem Deus recordari,

F f f f 3 non

XIII.

XIV.

XV.



non quod nunquam obliuisci possit, sed quod aliquando ita se gerat, ac si oblitus esset. Addit ad maiorem fragilitatis nostrae declarationem aliam similitudinem dicens, *Homo sicut fœnum dies eius*, id est, hominis dies breuissimi sunt, ac per similes diebus, quibus fœnum in agro perseverat, nunquam enim fœnum integrum annum permanet: nascitur enim in Vere, & mox in æstate proxima metitur, & colligitur: & sicut fœnum non in toto illo tempore, quo est in agro, floret, sed mane floret, & vespere arefcit, sic etiam homo breui tempore vivit, sed multo brevior durat in flore adolescentiæ, & mox arefcit in senectute. Verba textus seruant phrasim Hebraicam, sed hoc modo supplenda sunt. *Homo sicut fœnum dies eius*, id est, homo sic se habet, ut dies eius sint veluti dies fœni, vel duratio vitæ eius similis sit durationi viriditatis fœni. *Tanquam flos agri sic effloretur*, id est, & idem homo floret flore adolescentiæ, sicut floret flos fœni in agro, id est, tempore breuissimo. Quod additur de spiritu transeunte, significat, vitam hominis, non solum esse breuissimam, sed etiam semper mutari, donec extinguatur, hic igitur est sensus, *Quoniam spiritus pertransiit in illo, & non subsistet*, id est, spiritus vitalis, siue ipsa vita corporalis non permanebit in homine, sed transiens in eo erit, & nunquam subsistet in eodem statu, quia semper mutabitur de infantia ad pueritiam, de pueritia ad adolescentiam, de adolescentia ad iuuentutem, de iuuentute ad maturitatem, de maturitate ad senectutem, de senectute ad mortem. *Et non cognoscet amplius locum suum*, id est, non redibit ad locum, unde discessit, nec videbit amplius ætatem, quam semel dimisit. In quo multum distant corruptibilia ab incorruptibilibus, cælestia à terrenis: siquidem Sol & Luna, & stellæ oriuntur mane in oriente, & occidunt vespere in occidente: sed iterum reperiuntur in circulos suos, & nihil immutata vident locum, unde discesserunt: quæ verò oriuntur ex terra, cursum suum peragunt, sed currendo mutantur, & non redeunt nunquam ad locum, unde cursum

inchoarunt, sed senescunt, & pereunt. Itaque per spiritum, hoc loco non intelligo animam rationalem, quæ immortalis est, & in die nouissimo redibit ad corpus, sed spiritum vitalem, siue, ut dixi, vitam corporalem. Quod si quis velit per spiritum, hic significari animam rationalem: dicere debet, eiusmodi spiritum, non rediturum ad locum suum, id est, ad corpus, vi sua, sed omnipotentia Dei: nec cognosciturum amplius locum suum, quia immutatum inueniet, videlicet corpus immortale reperiet, cum mortale reliquerit. sic Euthymus. Ex Hebræo S. Hieronymus sic vertit, *Quia spiritus pertransiit eum, & non subsistet, & non cognoscet eum ultra locus eius*. Quam sententiam Rabbini sic exponunt, spiritus, id est, ventus pertransiit eum, id est, florem fœni, & non subsistet flos fœni, sed mox vento flante siccabitur, & non cognoscet eam ultra locus eius, id est, non apparebit, ubi fœnum floruerit: flos enim arefcens nullum vestigium pulchritudinis suæ relinquit. At nos sequimur Septuaginta Interpretes, qui verba Hebraica, quæ ambigua sunt, & utrunque sensum recipere possunt, non de vento, & flore, sed de spiritu vitali, & corpore humano intellexerunt. Ad quam sententiam corroborandam multum valet similis locus ex Psal. 77. *Recordatus est, quia caro sunt, spiritus vadens, & non rediens*. Vbi per spiritum, non potest intelligi ventus, sed vita humana.

*Misericordia autem Domini ab æterno, & usque in æternum super timentes eum.*

Hic tandem explicatur quartum nomen versiculi octauæ, *Et multum misericors*, pertinet autem quartum hoc nomen ad beneficium glorificationis, quod est postremum, & maximum. Igitur *misericordia Domini*, quæ fuit ab æterno super timentes eum in prædestinatione, durabit usque in æternum in glorificatione: arque ita erit Deus multum misericors, siue multitudinem be-

XV

XIX.



efficiorum, siue magnitudinem, siue durationem consideremus. Quis aurem digne recogitet quid sit, quod Dominus vniuersorum, qui bonorum nostrorum non eget, iam inde ab aeterno miseri de creuerit, pulueris huius, id est, hominis; eumque caelestibus spiritibus coaequare, atque in aeternum sibi, summo bono felicissime inherere voluerit; certe par esset, vt tantae misericordiae, ne ad momentum quidem obliuisceremur, & perpetuas ei gratias ageremus.

*Et iustitia illius in filios filiorum, his qui seruant testamentum eius.*

*Et memores sunt mandatorum ipsius ad faciendum ea.*

Hæc est quasi appendix magnæ illius misericordiae, quam exercet Deus erga timentes se. Addit enim Propheta, non solum timentes Deum exaltandos, & protegendos ab aeterna misericordia Dei: sed etiam eam misericordiam extendendam esse ad posteritatem timentium Deum, modo ipsi parentum, & maiorum suorum pietatem imitentur. *Et iustitia illius*, id est, veracitas, & fidelitas Dei, qui semper reddit quod promittit; conseruabitur in filiis filiorum his, qui seruant testamentum eius; id est, qui obseruant pactum cum Deo initum, vt sint ipsi populus Dei; & Deus sit eorum Deus. *Et memores mandatorum eius*, non vt solum ea mente, & cogitatione reuoluant, sed vt ea diligenter adimpleant. S. Augustinus per filios timentium Deum, intelligit opera bona ipsorum, & per filios filiorum, mercedem, quæ debetur operibus bonis. Iusti enim pariant opera iusta, & opera iusta pariunt coronam iustitiæ.

*Dominus in calo parauit sedem suam, & Regnum ipsius omnibus dominabitur.*

Demonstrat Propheta, posse Deum facere quæ promissit timentibus se, & filiis filiorum ipsorum; quoniam Deus Iudex est omnium, & ideo parauit, & stabiliiuit (vtrumque significat vox Hebræa) *sedem suam*, id est, thronum tuum iudicium, in altissi-

mo loco, id est, in summo celo, vnde omnes prospicere, & iudicare possit: & ne forte suspicemur, Deum esse Iudicem ab aliquo Rege constitutum, addit, *Et regnum ipsius omnibus dominabitur*, id est: sedem habet in celo, nō vt Iudex sub Rege; sed vt Iudex supremus, & Rex super omnes Reges Regnum enim ipsius, id est, regia eius potestas, omnibus omnino rebus creatis dominabitur.

*Benedicite Domino omnes Angeli eius, potentes virtute, facientes verbum illius, ad audiendam vocem sermonum eius.*

In extrema parte Psalmi inuitat Propheta omnes alias creaturas ad benedicendum Domino, & prædicandas laudes eius, quoniam videbat, se non esse vilo modo parum ad agendas gratias tanto Benefactori; ac primum inuitat Angelos, qui sunt nobilissima creatura, & idonei maxime ad Deum laudandum. Nos enim minus idonei sumus, tum quia debiles, ac fragiles sumus, tum quia frequenter peccamus, & non est speciosa laus in ore peccatoris. Angeli vero fortissimi sunt, neque vnquam fatigantur, & semper obediunt Deo, ac per hoc nunquam peccant, semper grati & amici sunt.

*Benedicite Domino omnes Angeli eius*, id est, laudate communem Dominum vos Angeli, qui propius illi assistitis, & magnitudinem eius perfectius nostis: & non vnus, aut duo, sed omnes omnino, quotquot estis, qui prope innumerabiles estis, conuenite ad laudandum: omnes, inquam; qui Angeli eius estis, qui ab illo non solum conditi fuistis, sed etiam cum illo, cæteris cadentibus, permanistis, illique in æternum felicissimi inhaeritis. *Potentes virtute*, id est, præditi robore maximo ad exequenda omnia mandata Dei, quique casum nullum timeris, neque est, qui vos à iudiciis Dei prohibere possit. *Facientes verbum illius*, id est, qui Dei mandata semper accurate perficitis. Ad audiendam vocem sermonum eius. Hæc vltima particula duobus modis potest intelligi. Vno modo, vt sensus sit, *Facientes verbum illius*

XX.

XV.

XIX.



*illius ad audiendam vocem sermonum eius;* id est, mox vt audierint vocem sermonum eius: ita vt significetur celeritas obediendi, ac si dictum esset, *Facientes verbum illius in audiendo vocem sermonum eius.* Altero modo, vt significetur causa finalis executionis mandatorum Dei, quæ est desiderium obediendi Deo; & sensus sit, *Facientes verbum illius ad audiendam vocem sermonum eius,* id est, exequentes mandata Dei ad hunc finem vt obediant voci eius, & se fideles seruos probent, non ob aliquam suam vtilitatem, vel necessitatem. Atque hæc videtur expositio literalis: nam textus Hebræus, & Græcus, non facile admittunt illum sensum, *Ad audiendam vocem,* id est, in audiendo vocem.

XX.

*Benedicite Domino omnes virtutes eius, ministri eius, qui facitis voluntatem eius.*

Ne forte per Angelos, qui inuitantur ad benedicendum Deum, intelligeremus solos Angelos ultimi chori, addit Propheta in hoc versiculo, *omnes virtutes Domini,* id est, omnes exercitus cælestes, videlicet Archangelos, Principatus, Dominationes, & cæteros ordines superiores: nam in Hebræo habetur, *omnes exercitus eius,* & quod Angeli sint militia cælestis exercitus, docet S. Lucas cap. 2. Sunt quidem milites, & ministri Dei omnes res creatæ: sed in Scriptura, vt plerumque per virtutes, intelliguntur Angeli ac præsertim in Psalm. 148. *Laudate eum omnes Angeli eius, laudate eum omnes virtutes eius,* & hunc locum ita exponunt Theodoretus, & Euthymius, & alij. Nam de alijs rebus creatis agitur in sequenti versiculo. Ait igitur, *Benedicite Dominum omnes virtutes eius,* id est, non solum Angeli proprie dicti, sed omnis militia cælestis exercitus, qui omnes ministri Dei estis, & impletis diligenter, & assidue quicquid ille vobis mandat.

XXI.

*Benedicite Dominum omnia opera eius, in omni loco dominationis eius. Benedic anima mea Domino.*

Posteaquam inuitauit Propheta ad laudes Dei homines, & Angelos, qui Dei notitiam habent, & cum proprie laudare possunt; inuitat etiam omnes alias res creatas, quamuis mente, vel sensu, vel vita careant, vt etiam ipsæ suo modo opificem suum laudent. Ac ne quis exciperet aliquid, & intellexeret Prophetam loqui de omnibus operibus, quæ sunt in cælo, aut in terra, aut in mari, addit, *In omni loco dominationis eius,* id est, *Benedicite Dominum omnia opera eius,* omnia omnino vbicunque sitis: nam omnia ipse fecit, & omnibus dominatur, & ipse cum eis vbique est, omnia replens, omnia portans, omnia conseruans, omnia mouens. Tu vero anima mea, quæ omnia ad laudem inuitasti. *Benedic Dominum in omni tempore; semper laus eius in ore tuo sit.*

## PSALMVS CIII.

## Titulus &amp; Argumentum.

Ipsi Dauid.

**H**ic Psalmus apud Hebræos non habet titulum. Apud Græcos inuenitur hic titulus, Ipsi Dauid pro Mundi constitutione. Sed eiusmodi titulum, neque sanctus Hieronymus, neque sanctus Augustinus, neque Theodoretus in suis codicibus inueniunt. proinde à recensitoribus additus videtur. In latinis codicibus habetur, Ipsi Dauid, vel, psalmus Dauid. Videtur autem hic Psalmus recto ordine positus post Psalmum præcedentem: in illo enim aguntur gratia Deo pro beneficijs gratia, in isto pro beneficijs natura: ibi laudatur Dei misericordia, hic prædicatur Dei sapientia: Ac primum cantatur gloria Dei ex mirabilibus quæ sunt in cælo: deinde ex ijs quæ sunt in aere: tum ex ijs, quæ sunt in terra: postremo ex ijs, quæ sunt in mari.

EX-



## EXPLICATIO PSALMI CIII.

**B**enedic anima mea Domino, Domine Deus meus magnificatus es vehementer.

Excitat Propheta animam suam ad benedicendum, id est, laudandum Deum, & mox anima excitata exurgit in admirationem & laudem, dicens: Domine Deus meus magnificatus es vehementer, id est, ex operibus tuis, magnus valde factus es in oculis omnium, qui quoquo modo gloriam tuam aspicere possunt: non enim Deus in se crescere potest, cum sit immensus & infinitus; sed apud Angelos & homines tanto fieri potest maior, quanto magis notitia eius crescit ex contemplatione potentiae, & sapientiae, & bonitatis, quae lucet in operibus eius.

Confessionem & decorem induisti, amictus lumine, sicut vestimento.

Declarat, quomodo Deus magnificatus sit, adhibita insigni similitudine vestimenti, quomodo enim ex gloriosa veste cognoscimus Pontificem, Regem, atque alias sublimis potestates; sic etiam ex gloria, qua Deus quasi circumdatus est, cognoscimus eius potentiam & sapientiam: & quidem Deus in se lux est, & tenebra apud eum non sunt ulla, ut scribitur 1. Ioan. 1. tamen ea lux inaccessibilis est, & eam nullus hominum vidit, sed nec videre potest, ut dicitur 1. Timoth. 6. Sed praeter eam lucem, est alia quaedam lux gloriae, id est, splendor, qui ex operibus eius micat: & de hoc loquitur Propheta, cum ait: Confessionem & decorem induisti, id est, confessionem laudis, quam assidue decantant opera tua, tibi quasi vestimentum vndique circumdediti: & quoniam nihil pulchrius est luce, siue gloria; ideo induisti decorem & pulchritudinem, dum amictus es lumine gloriae, quod ex operibus tuis emicat. Hic admonendi sumus, mirum valde esse, quod oculi corporis nostri, etiam si Solem ipsum intueri nequeant: tamen ex lumine quo cinctus est Sol, facillime & adesse; & pulcherrimum

esse indicent: & oculi cordis nostri tam difficulter erigantur ad Deum, & eius immensam pulchritudinem vix tenuiter sentiant, cum tamen vndique cinctus sit splendore maximo & pulcherrimo, qui ex admirandis eius operibus lucet, & ipse sit, qui illuminat omnem hominem venientem in hunc mundum. Sed huius rei nulla videtur esse alia ratio, nisi quia cor gerimus pulvere carnalium cogitationum & affectionum quasi cecatum. Beati enim mundo corde, quoniam ipsi Deum videbunt. Certe enim, si cor mundum haberemus, Deum in operibus suis & gloriam eius omnia replentem facile intueremur; & cum Abrahamo, Elia & Eliseo diceremus: Deus in cuius conspectu sto. Vide Genes. 24. 3. Reg. 17. & 4. Reg. 3.

Extendens caelum sicut pellem, qui tegis aquis superiora eius.

III.

Incipit demonstrare lumen potentiae & sapientiae Dei, quod cernitur in creatione firmamenti, siue caeli; & duo quadam valde admiranda in eo considerat, & a nobis consideranda proponit. Vnum est, quod Deus tanta facilitate extenderit immensam molem firmamenti, & eo circumdederit omnia corpora inferiora, quanta solent homines extendere tabernaculum vnum, siue tentorium ex pellibus confectum. Alterum est, quod Deus miro artificio posuerit aquas supra caelum, quasi aquas super ignem, & tamen neque aquae extinguant ignem, neque ignis consumat aquas. De his aquis multa Scholastici disputant: sed communis Patrum sententia esse videtur, aquas esse super aethereum caelum, quod Firmamentum dicitur; non autem supra caelum aethereum tantum, ubi sunt nubes. Vide inter ceteros Basilium hom. 3. Hexameron, Chrysostomum hom. 4. super Genes. Ambrosium lib. 2. Hexameron cap. 3. & 4. Augustinum lib. 2. super Genes. cap. 4. & in hunc Psalm. 103. Eucherium lib. 1. in Genes. cap. 3. Procopium in 1. cap. Genes. Theodoretum q. 11. in Gen. Bedam libr. de natura rerum cap. 7. & 8.

Gggg

Quod



Quod ad verba attinet, illud, *Extendens*, valde proprie dictum est, quoniam *Firmamentum*, Hebraice dicitur, *rachia*, id est, extensio, siue expansio. Illud, *qui tegis*, contendunt aliqui recentiores, legendum esse, *qui tegit*, ex textu Hebraico & Græco, & mirantur, quod Latini codices habeant, *qui tegis*. At Hebræi & Greci codices habent participium, *regens aquis*, quod ambiguum est, & potest referri tam ad secundam personam, quam ad tertiam. Congruentius autem est, ut ad secundam referatur, cum præcesserit: *Confessionem & decorem induisti*; ubi est expressa secunda persona, etiam in codicibus Græcis & Hebraicis. Alloquitur ergo Propheta Deum, & illi dicit: Tu qui induisti confessionem & decorem, tu extendis cælum sicut pellem; tu tegis aquis superiorem partem cæli, &c. Adde quod S. Hieronymus vertit ex Hebræo, *Qui tegis*, & sic etiam legit in textu, quem exponit ex versione LXX. Interpretum; & in epistola ad Sumiam & Fretellam, contendit, hunc locum & sequentes, esse legendos in secunda persona, ut nos in editione Latina vulgata legimus.

IV.

*Qui ponis nubem ascensum tuum, qui ambulas super pennas ventorum.*

De cælo æthereo descendit Propheta ad cælum æthereum, & canit admirabilem Dei sapientiam in velocitate nubium, quæ vi ventorum stupenda celeritate transeunt ab una parte mundi ad aliam. Aliquando enim sereneum ætherem conspiciamus, & mox in ictu oculi, flante Austro, cernimus eundem ætherem obductum nubibus: & contra; videmus interdum nubibus undique coopertum, & mox flante Aquilone, cernimus nubes omnes in puncto temporis dissipari. Describit autem hæc omnia more poetico, ac si Deus insideat nubibus, quasi in curru, & utatur ventis, quasi equis pennigeris. Sed hæc metaphoram nihil significatur aliud, nisi Deum esse principalem auctorem omnium rerum, & eius nuntios ventos moveri, & nubes adduci, vel abduci. In Hebræo & Græco habetur in

tertia persona, *Ascensum eius*, siue *currum eius*. Sed S. Hieronymus ex Hebræo vertit, *Currum tuum*; ex quo apparet, eum sic legisse in suo codice Hebraico. Sic etiam legit in commentario; & sic docet esse legendum in epistola ad Sumiam & Fretellam: proinde nostra lectio non est mutanda, cum à tanto Doctore præponatur cæteris.

*Qui facis Angelos tuos spiritus, & ministros tuos ignem vrentem.*

Nisi obstaret auctoritas Apostoli, potuisset hic locus intelligi de procellis & fulgurbus, quæ sunt in aëre, ut sensus esset, *Qui facis*, ut spiritus procellarum sint Angeli tui, id est, nuntij tui ad homines admonendos, & ut ignis vrens, id est, ecclesiæ fulgura aut fulmina sint ministri tui ad homines puniendos. Sed quoniam Apostolus ad Hebr. i. exponit hunc locum de Angelicis spiritibus, & hinc argumentum ducit ad probandam Christi divinitatem, & præstantiam super Angelos, dicendum est, Prophetam loqui de veris Angelis, ac dicere voluisse, non solos ventos, ac nubes velocissime discurrere per aërem, ut Deo iubenti seruiant; sed habere Deum ministros longe sublimiores & potentiores, Angelos videlicet, quos mittat ad homines, vel admonendos, vel puniendos. Potest autem duobus modis intelligi hæc sententia. Vno modo sic: *Quis facis Angelos tuos spiritus*, id est, qui facis, ut spirituales creaturæ, quæ tibi in cælo semper assistunt, fiant Angeli tui, id est, fiant nuntij tui ad homines instruendos; & *ministros tuos ignem vrentem*, id est, qui facis, ut eadem illæ spirituales creaturæ, quæ charitate semper ardent, fiant ministri tui ad efficienda celeritate & efficacissime quæcunque iusseris. Atque hæc est expositio S. Augustini hoc loco, & S. Gregorij hom. 34. super Euangelia. Altera expositio faciliior, & fortasse magis literalis, est Theodoret in hunc locum, & S. Thomæ in c. i. ad Hebr. qui sic exponunt: *Qui facis Angelos tuos spiritus, & ministros tuos ignem vrentem*, id est, facis ut Angeli ministri tui habeant

VI.



beant velocitatem spirituum, id est, ventorum, & efficaciam ignis vrentis: atque ita sint veluti quidam spirituales in discurrendo, & veluti quidam ignes diuini in operando. Comparat autem Propheta sanctos Angelos ventis & ignibus, non quod non sint velociores ventis & potentiores ignibus; sed quia nos nihil nouimus inter hæc corporalia, quibus aptius Angelorum velocitas & efficacia conferri possit. Fauet huic expositioni etiam S. Hieronymus in Commentario huius loci: & quod maius est, textus Græcicus in Psalmo, tum in Apostolo ad Hebr. 1. nam in utroque loco videmus articulum addi ad nomina, *Angelos & ministros*, non autem ad nomina, *spiritus & ignem*. Vna restat difficultas, quod apud Apostolum etiam in editione Latina vulgata legitur in tertia persona: *Qui facit Angelos suos spiritus*; quo modo etiam legitur in textu Hebræo & Græco, in libris, quos nunc habemus. In editione autem Latina vulgata legitur in hoc Psalmo in secunda persona: *Qui facis Angelos tuos spiritus*: quam lectionem probat S. Hieronymus in epistola ad Suniam & Fretellam. Sed responderi potest, Apostolum non fuisse sollicitum de verbis, sed de sensu: sensus autem idem est, siue illum exprimamus alloquendo Deum, siue narrando.

*Qui fundasti terram super stabilitatem suam, non inclinabitur in seculum seculi.*

Ab aëre descendit ad terram Propheta; & quoniam ea est sedes nostra, & nobis notior, quam sint aliæ partes mundi, diutius in ea consideranda, & admiranda opera Dei, quæ in ea conspiciuntur, describenda immoratur: ac primum incipit ab eius creatione, & considerat admirabilem Dei potentiam, quæ terram, molem utique maximam & grauissimam, sine vilo fundamento posuit in medio mundi, ita ut ipsa non in fundamento aliquo, sed in sua stabilitate nitatur. *Qui fundasti*, inquit, *terram super stabilitatem suam*, id est, non crexisti terram super aliquod funda-

mentum, sed voluisti, ut suo pondere niteretur. *Non inclinabitur in seculum seculi*, id est, præceptum tuum solidius est omni fundamento, & ideo quia sic iussisti, sic fiet, ut videlicet terra suo pondere innixa, æterna stabilitate consistat.

*Abyssus sicut vestimentum amictus eius,* VII.  
*super montes stabunt aquæ.*

*Ab increpatione tua fugient, à voce tonitru tui formidabunt.* VIII.

*Ascendunt montes, & descendunt campi, in locum quem fundasti eis.* IX.

*Terminum posuisti, quem non transgredientur, neque conuertentur operire terram.* X.

Deinde considerat Propheta, qualis fuerit terra initio creationis suæ; quod videlicet fuerit vndique cincta aquis, quasi vestibus: & tamen solo imperio voluntatis suæ, Deus aquas concluderet in locis terræ humilioribus, & potentia & sapientia sua fecerit, ut magna ex parte terra emineret, & redderetur apta ad gignendas herbas & fruges, & ad animalia sustentanda & alenda. Id autem factum est, ex condensatione aquarum: initio enim aquæ non tam erant perfectæ aquæ, quam vapores aquei, qui condensati descenderunt ad concauitates terræ; & fortasse hoc significauit Sapientia apud Ecclesiasticum cap. 24. cum ait: *Ego sicut nebula texti omnem terram*. Sed David more poetico hæc describit: *Abyssus, inquit, sicut vestimentum amictus eius*, id est, initio creationis, terra erat cincta, & veluti amicta profunditate aquarum, quasi vestimento quodam vndique cooperta. Abyssum enim vocat profunditatem aquarum, de qua dicitur Genes. 1. *Tenebræ erant super faciem abyssi*: & tunc super montes stabant aquæ, id est, vapores aquei, siue nebula illa altissima ipsos etiam montes, cooperiebat: dicit autem, *stabunt, pro, stabant*.



Hanc enim vim habet futurum apud Hebræos, vt significet continuationem, qualis apud nos significatur per præteritum imperfectum. *Ab increpatione tua fugient, à voce tonitruus tui formidabunt*, id est, aquæ, quæ vndique terram operiebant, solo Dei nutu condensatæ descenderunt ad loca decliuiora; fuit enim nutus diuinus aquis, instar terribilis increpationis, & quasi tonitruum rebus sentientibus. *Ascendunt montes, & descendunt campi in locum quem fundasti eis*, id est, tunc cœperunt apparere montes in loco sublimi, quasi ascendissent; & simul cœperunt apparere campi in loco humili, quasi descendissent: omnia vero confiterunt in loco, quem constituisti eis: vel ascendunt montes aquarum, & descendunt campi aquarum, dum ab increpatione Dei timentes aquæ magno fremitu attollunt fluctus suos, & deponunt, donec ad locum sibi paratum perueniant; nam & Poëta dixit: *Quanti montes voluuntur aquarum. Terminum posuisti, quem non transgredientur, neque conuertentur operire terram*, id est, aquis recedentibus & in cauernis terræ conclusis terminum posuisti; quem non transgredientur, neque conuertentur ex se, aut vi sua, cooperire terram. Nam quod tempore diluuii conuersæ sint, & terram cooperuerint; id factum est diuino iussu & virtute. Porro terminus, quem Deus posuit aquis, est arena ex Iob c. 39. & ex Hieremia c. 5. arena videlicet litto-  
 ris altioris: tunc autem Deus hunc terminum posuit, quando instituit naturas elementorum: aquæ siquidem, cum sint naturaliter grauioræ aëre, semper descendunt ad loca decliuiora, & relinquunt aëri loca sublimiora.

XI. *Qui emittis fontes in conuallibus, inter medium montium petransibunt aquæ.*

XII. *Potabunt omnes bestie agri, expectabunt onagri in siti sua.*

XIII. *Super ea volucres cœli habitabunt, de medio petrarum dabunt voces.*

Tertio considerat Propheta mirabilem Dei sapientiam in productione fontium & fluminum: nam si aquæ recedentes à terra, aridam illam omnino dimississent, animantia terræ siti consumerentur; ideo sapientia Dei produxit fontes aquarum dulcium, & ex fontibus fluuios, qui vbique discurrant, & potui animantium omnium deseruiant. Porro fontes in montibus originem habent; sed aquæ fontium ad conualles defluunt, & hic videtur esse sensus verborum, *Qui emittis fontes in conuallibus*, id est, qui facis, vt aquæ fontium, ad conualles defluant, & inter medios montes riuuli earum petranscant. *Potabunt omnes bestie agri*, & præsertim onagri, asini videlicet syluestres, qui in montibus degunt, & natura siticulosi sunt, anhelabunt ad eiusmodi aquas. Nec solum animalia quadrupedia de fontibus bibent, sed etiam volucres cœli iuxta aquas in locis editioribus nidos suos ponent; vt eisdem aquis frui possint, & ex cauernulis suis voces dabunt, canentes, quomodo possunt, laudes Domino. Illud, *onagri expectabunt in siti sua*, ex Hebræo S. Hieronymus vertit, *Onager resiciat sitim suam*. S. Augustinus vero legit, *Suscipient onagri in sitim suam*. Vox Hebraica, *isberu*, vt nunc legitur cum puncto in sinistro cornu, significat, *frangenti sitim*, id est, sedabunt & resicient: sed Septuaginta legerunt cum puncto in dextro cornu, quod significat, *sperabunt*, siue *expectabunt*; & sensus est, Onagri, ad sitim suam sedandam, expectabunt, hoc est, desiderabunt, sperabunt, quærent aquas fontium. In Græco nunc legitur, *πρὸς ἵσον*, id est, *suscipient*, sed verisimile est, eos scripsisse *πρὸς ὄσιν*, id est, *expectabunt*: certe noster Interpres ita omnino legisse videtur. Illud, *super ea*, refertur ad fontes & aquas inter montes discurrentes. Illud, *in medio petrarum*, S. Hieronymus vertit, *de medio nemorum*. Vox Hebræa, *baphaim*, significat frondes & ramos arborum. Sed LXX. Interpretes, aut legerunt, *cephaim*, quod significat petrarum: aut quod verius censeo, sensum respexerunt, non verba: volucres enim inter frondes quidem & ramos arborum, sed in rupibus & petris



montium nidulos ponunt: proinde vtrunque est verum, & quod ex mediis frondibus, & quod ex mediis petris cantus suos edant.

XIV. *Rigans montes de superioribus suis: de fructu operum tuorum satiabitur terra.*

XV. *Producens fœnum iumentis, & herbam seruituti hominum.*

XVI. *Vt educas panem de terra, & vinum lætificet cor hominis.*

XVII. *Vt exhilaret faciem in oleo, & panis cor hominis confirmet.*

Quarto considerat & canit Propheta aliam admirabilem providentiam Dei, qui præter fontes & flumina, quæ non possunt irrigare loca superiora montium & collium, neque ad omnes agros derivari, excogitavit pluuias, quæ ex nubibus, tanquam fontibus cœlestibus omnia omnino loca terrestria irrigare possunt, vt inde satiata terra, possit herbas & fruges producere in alimenta viventium super terram. *Rigans, inquit, montes de superioribus suis*, id est, Deus rigans est, siue irrigat montes, ad quos flumina non pertingunt, *de superioribus suis*, id est, de nubibus, quæ sunt in aëre superiore. *De fructu operum tuorum satiabitur terra*; id est, de aquis, quas tu ex nubibus tuis exprimis, terra arida & sitibunda satiabitur. *Producens fœnum iumentis, & herbam seruituti hominum*, id est, per hanc providentiam tu Deus producis es, siue producis ex terra fœnum in cibum iumentorum: & herbam, vnde fruges, & vites, & arbores existunt, in cibum hominum. *Vt educas panem de terra*, id est, vt hac ratione producas ex terra cibum. Panis enim sæpe accipitur in Scriptura pro cibo generatim sumpto: hoc autem loco dicimus accipi pro cibo, tum quia ita explicat Theodoretus, tum quia de pane proprie dicto paulo infra fit mentio: subiungit enim Propheta: *Et vinum lætificet cor hominis*, id est, & vinum à te productum lætificet cor hominis. *Vt exhilaret faciem in oleo*, id est,

vt homo exhilaret faciem suam in oleo à te producto; & panis cor hominis confirmet, id est, panis sustentet & roboret vitam humanam. Hoc loco pauca quædam annotanda sunt. Primum, Deum esse auctorem omnium bonorum, quæ ad vitam corporalem sustentandam & delectandam pertinent; quamvis enim laborent homines fodiendo terram, seminando fruges, plantando arbores, ponendo ac putando vites; tamen nisi Deus Solem suum oriri faceret, & nisi de cœlo plueret, & nisi fecunditatem terræ præberet, & nisi vires hominibus suppeditaret & cum iis cooperaretur, nihil omnino fieret: & quoniam potest Deus sine causis secundis omnia facere, vt fecit initio mundi; & secundæ causæ nihil sine Deo possunt efficere; verissime dicit Apostolus: *Neque qui plantat, est aliquid, neque qui rigat, sed qui incrementum dat Deus*, I. Cor. 3. & *Non sine testimonio semetipsum reliquit benefaciens*, de cœlo dans pluuias, & tempora fructifera, implens cibo & lætitia corda nostra, Act. 14. & rursum, *Ipse dat omnibus vitam, & inspirationem, & omnia*. Et in ipso vivimus, mouemur & sumus; Act. 17. Verissime quoque canit hoc loco Psalmographus, Deum esse, qui producit fœnum iumentis, panem, vinum & oleum hominibus. Ex quo apparet incredibilis multorum hominum ingratitudo, qui cum tanta bona, imo omnia bona à Deo recipiant, nunquam tamen erigunt oculos mentis in cœlum, vt agnoscant Patrem amantissimum, à quo tanquam filij ex paternis bonis aluntur & sustentantur. Secundo notandum est, Deum, vt Parentem verum, & amantem filiorum, non solum nobis dedisse, quæ necessaria sunt ad vitam sustentandam, panem videlicet, & aquam: sed etiam addidisse, quæ iucundiores & suaviorem potum & cibum facere poterant, vt solatium aliquod in laboribus haberemus: dedit enim vinum ad cor lætificandum, iuxta illud Prou. 31. *Date vinum his, qui amara sunt animo*: dedit & oleum, vel ad vngendam & illustrandam faciem; vel etiam ad cibum, vt Theodoretus docet: vt videlicet admixtum herbis & leguminibus, suaviorem ci-



bum efficiat, & homo exhilaret faciem suam in eo cibo percipiendo; vel, vt Deus exhilaret faciem hominis in oleo, dum ei cibum oleo conditum porrigit; facies enim nitidior apparet, cum homo nutritur iis, quæ sapiunt. Hinc Monachi veteres apud Cassianum in collationibus, vt hospitibus lautiorum cibum apponerent, olera vel legumina oleo condiebant. Tercio notandum est, hinc admoneri homines, frugali victu, & potu sobrio contentos esse debere: moderata enim iucunditas à Deo est; superuacaneæ deliciae, & varia irritamenta gulæ, ac multo magis crapula & ebrietas à Diabolo sunt.

XVIII. *Saturabuntur ligna campi, & Cedri Libani, quas plantauit: illic passeret nidi-  
ficabunt.*

XIX. *Herodij domus dux est eorum, montes  
excelsi Ceruis, petra refugium herinacis.*

Quinto, considerat Propheta diuinam prouidentiam in eo, quod Deus ipse sine vlla opera hominum producit & nutrit arbores valde præceras, quales sunt Cedri Libani: quæ arbores deseruiunt habitationi & latibulo auium quarundam; quemadmodum montes refugium præstant ceruis, & petra herinacis. *Saturabuntur*, inquit, *ligna campi*, id est, ex pluuiis humorem sibi debitum fument arbores syluestres, & præcipue Cedri Libani, quas Deus ipse plantauit. In Hebræo legitur, *ligna Domini*, sed LXX. Interpretes explicare voluerunt, cur dicantur *ligna Domini*, & ideo posuerunt *ligna campi*; dicuntur enim ligna Domini, quia non plantantur, nec irrigantur ab hominibus; sed iubente Domino sponte nascuntur in campis, & irrigantur pluuiis de cælo cadentibus. Et Cedri Libani, quas plantauit. In Hebræo & Græco textu non habetur, &, sed explicatur, quæ sint illa ligna campi, siue Domini, & dicitur, *Cedri Libani, quas plantauit*, id est, ligna illa Domini, sunt Cedri Libani, quas Dominus ipse plantauit in campis: quare vel in textu Latino irrepsit, &, vitio scriptorum;

vel explicandum est, vt nos diximus, ligna campi, & præcipue Cedri Libani, quas Dominus plantauit, id est, sponte nasci voluit, absque hominum industria. *Illic passeret nidi-  
ficabunt*, id est, in his agrestibus arboribus nidos suos ponent aues, vt tutiores sint ab aucupibus. Nam apud Hebræos nomine passerum intelliguntur omnes auiculæ. *Herodij domus dux est eorum*, id est, milui, aut fulicæ, aut ardeæ, aut ciconiæ nidus præminet nidulis aliarum volucrum, tum magnitudine, tum altitudine. Vox Hebræa, *chafida*, & Græca, *Herodius*, significat miluum apud Hieronymum, fulicam apud Augustinum, ciconiam apud Suidam, ardeam apud Plinium: certe magna auis significatur, quæ nidum maiorem & altiorum habeat, quam aues cæteræ. In Hebræo habetur, *Herodij abietes domus ipsius*, id est, Herodius in abiete nidum ponit. Cæterum LXX. Interpretes non videntur legisse, *beroscim*, id est, abietes, sed, *beroscem*, id est, dux eorum, siue in ducem eorum: sed res non est magni momenti. *Montes excelsi ceruis*, petra refugium herinacis, id est, sicut magnæ arbores præbent refugium volucris, sic montes ceruis, & lapideæ cauernæ herinacis. In Græco habetur *leporibus*, pro, *herinacis*, & sic legit S. Augustinus: sed S. Hieronymus in epistola ad Suniam & Fretellam, dicit, voce Hebræica significari animal quoddam simile muri & vris, non maius ericio, quod in Palæstina frequens est, & in cauernis petrarum habitat.

*Fecit Lunam in tempora, Sol cognouit  
occasum suum.*

*Posuisti tenebras, & facta est nox: in  
ipsa petra transibunt omnes bestia syluæ.*

*Catuli Leonum rugientes, vt rapiant,  
& querant à Deo escam sibi.*

*Ortus est Sol, & congregati sunt, & in  
cubilibus suis collocabuntur.*

*Exibit homo ad opus suum, & ad opera-  
tionem suam vsque ad vesperam.*



Sexto confiderat & laudat Propheta diuinam prouidentiam, quæ diuifit tempora operibus hominum & ferarum. Siquidem feris attribuit noctem, vt querant ſibi prædam in cibum; hominibus attribuit diem, vt operando victum ſibi parent. *Fecit, inquit, Lunam in tempora, Sol cognouit occaſum ſuum*, id eſt, Dominus Deus ad uſum hominum & animantium cæterorum *fecit Lunam in tempora*, id eſt, vt tempore opportuno luceret, per noctem uidelicet; nam vox Hebraica, *mohadim*, & Græca, *καρπός*, non ſignificant quælibet tempora, ſed tempora opportuna & apta ad opera facienda. *Sol cognouit occaſum ſuum*, id eſt, Sol quoque non ſemper eſt ſuper terram, ſed nouit ſuo tempore occumbere, vt det locum nocti, quemadmodum diuina prouidentia diſpoſuit. *Posuiſti tenebras, & facta eſt nox, in ipſa pertranſibunt omnes beſtia ſylua*, id eſt, ex hac uiciſſitudine Solis & Lunæ, tu Domine feciſti, vt ſuo tempore, occumbente Sole, exiſterent tenebræ, & ſic fieret nox; & ipſam dediſti ſylueſtribus animantibus, vt per ſyluas diſcurrerent: & poſſimum *catuli leonum rugientes* præ fame, in rapinam incumbant, & hoc modo *querant à Deo eſcam ſibi*, id eſt, quærant ſibi cibum eo modo, quem diuina prouidentia ſtatuit. *Ortus eſt Sol, & congregati ſunt, & in cubilibus ſuis collocabuntur*, id eſt, diuina prouidentia facit, vt oriente Sole, feræ ſylueſtres, per noctem diſperſæ ad prædam, congregentur in ſpeluncis ſuis, & in ſuis quaſi cubilibus collocentur. *Exibit homo ad opus ſuum, & ad operationem ſuam uſque ad uesperam*, id eſt, exorto Sole, & feræ in antra ſua cogente, ſurget homo, & in agrum exibit ad opus ſuum, ad agriculturam uidelicet, & ad operationem ſuam, id eſt, ad laborem ſuum, ſiue vt habetur in Hebræo, *ad ſeruitutem ſuam uſque ad uesperam*. Hinc admonemur, beſtiis, quæ ratione & manibus carent, datum eſſe à Deo, vt per inſidias nocturnas ex rapto uiuant: hominibus uero, qui ratione & manibus ornat ſunt, prohibitas eſſe rapinas & inſidias, cum poſſint ex iuſto labore manuum ſuarum terram exercendo, vel merca-

turam faciendo uiuere. Proinde fures & latrones, & quicunque inſidiando, decipiendo, mentiando, rapiendo vitam ducunt, ordinem diuinæ prouidentię, quantum in ſe eſt, perturbant, & de illis recte diei poteſt: *Homo cum in honore eſſet, non intellexit, comparatus eſt iumentis inſipientib. & ſimilis factus eſt illis.*

*Quam magnificata ſunt opera tua Domine! omnia in ſapientia feciſti: impleta eſt terra poſſeſſione tua.*

XXV.

Hæc eſt exclamatio ex admiratione operum Dei circa terram, & quaſi conſeſio ſex conſiderationum præcedentium: miratur autem Propheta excellentiam, rationem, & numerum operum Dei; de excellentia dicit: *Quam magnificata ſunt opera tua Domine!* id eſt, quam ſunt eximia, præſtantia, & laudæ prædicatione digna. Ex Hebræo S. Hiero. uertit, *quam multiplicata ſunt*, ſed vox Hebraica, *rabbu*, utrumque ſignificat, multiplicata ſunt, & etiam magna, ſiue magnificata ſunt, quaſi multæ excellentiæ. Quomodo nomen, *Rabbi*, ſignificat *Magiſtrum*, quaſi multæ ſcientiæ, ſiue magnum in ſcientia. Recte autem LXX. Interpretes, quos Latinus ſequutus eſt, uerterunt, *magnificata ſunt, non multiplicata ſunt*; quoniam de multitudine agitur in fine uerſiculi. De ratione dicit: *Omnia in ſapientia feciſti*, id eſt, nihil in operibus Dei factum eſt temere, aut caſu, ſed omnia facta ſunt cum maxima ratione & iudicio: nihil deeſt, nihil abundat, nihil denique eſt cuius non ſit ratio in ſapientia Dei. Demonſtrauit hoc Galenus in lib. de partib. ubi ſtupore maximo admiratur artificium authoris naturæ, in fabricatione manus & aliorum membrorum corporis humani. De numero dicit: *Impleta eſt terra poſſeſſione tua*, id eſt, hæc opera tam eximia, & tam ſapienti artificio condita, non pauca ſunt, ſed ſere innumerabilia, ita ut terram uniuersam repleuerint. Vocat autem Propheta res creatas, quibus plena eſt terra, *poſſeſſionem Dei*, quoniam Deus eſt Dominus omnium rerum, & ideo Dominus, quia omnia fecit, hanc enim vim habet vox Hebraica, *kinianecha*.

deni-

קנין



deriuatur enim à verbo *kana*, quod significat possidere ex productione, vt Gen. 4. *Pofedi hominem per Deum*, id est, genui filium, & sic possedi illum. Impleta est ergo terra possessione Dei, quia plena est rebus, quas Deus possidet, & possidet, quia fecit.

XXVI. *Hoc mare magnum & spatiosum manibus: illic reptilia, quorum non est numerus.*

XXVII. *Animalia pusilla cum magnis, illic naues pertransibunt.*

XXVIII. *Draco iste, quem formasti ad illudendum ei: omnia à te expectant, vt des illis escam in tempore.*

Laudauit Propheta Dei sapientiam ex operibus eius in cælo, in aëre & in terra: nunc tandem descendit ad mare, & decantat sapientiam Dei ex amplitudine maris, ex multitudine & varietate piscium, ex utilitate quam adfert nauigatio, & ex inusitata magnitudine ceti, qui in eo degit, & concludit, omnia illa animalia, quin etiam omnia omnino animalia, quamuis innumerabilia à Deo nutriri & conseruari. *Hoc mare magnum & spatiosum manibus*, id est, spectandum præterea se offert in operibus mirabilibus Dei, hoc mare, quod est magnum profunditate, & extensum latitudine: illud enim, *spatiosum manibus*, metaphoricum est, & metaphora sumpta est à similitudine hominis, cuius latitudo sumitur ab extensione brachiorum, & distantia vnus manus ab altera; quemadmodum longitudo sumitur à distantia verticis à planta pedis: declarauerunt hanc metaphoram LXX. Interpretes, qui verterunt, *ἡρῶς ἄνθρωπος*, id est, amplas habens regiones: dicitur igitur mare spatiosum manibus, quia est latissimum, & maximum spatium intercedit inter eius extremas regiones. Quod alij volunt per manus maris, intelligi sinus angustiores, qui multi inveniuntur in medio terræ, vt mare Ligusticum, mare Adriaticum, mare Rubrum, mare Pon-

ticum, & alia quæ sunt veluti brachia vel manus maris Oceani; non improbo: sed verius existimo, quod supra dixi: hæc enim est ratio, cur in textu Græco desit vox, *manibus*, quæ expresse habetur in Hebraico; omiserunt enim illam vocem LXX. Interpretes, quia intellexerunt, per eam non significari aliud, nisi magnam extensionem. *Illic reptilia, quorum non est numerus*: hoc est alterum Dei opus valde mirabile, quod in mari, vbi nullus homo dat operam conseruandis piscibus, sed potius dat operam capiendis; inueniatur & perpetuo conseruetur tanta multitudo piscium, vt à nullo hominum numerari possint. Hanc fecunditatem significauit benedictio illa conditoris, de qua dicitur Genesi. 1. *Benedixit illis Deus, & ait, crescite, & multiplicamini, & replete aquas maris*. Nec solum viuunt in mari infinita multitudo, sed etiam prope infinita varietas piscium, quod significatur in verbis sequentibus: *Animalia pusilla cum magnis*. Addit tertio Propheta: *Illic naues pertransibunt*: est enim admirandum opus Dei, quod per elementum liquidum deferantur naues onustæ grauissimis rebus, & inde afferantur humano generi maxima comoda, dum summa celeritate transmutantur merces: tribuitur autem Deo adinuatio nauium, tum quia ipse primus docuit Noë ædificationem arcæ: tum quia ipse dedit aquis eam naturam, vt naues ferre possint, & homini ingenium, quo naues apte componeret. Adiungit quarto: *Draco iste, quem formasti ad illudendum ei*: quasi dicat, non solum naues quantumuis magnæ, & onustæ per liquidum elementum maris transibant: sed etiam Draco, id est, piscis quidam maior & grauior omni naui, non solum pertransibit per aquas maris, sed etiam in illis ludet, huc atque illuc se circumuoluens. Hunc piscem, quem Græcus & Latinus interpretes vocat draconem, Hebraica lectio vocat *Leuiathan*; esse autem *Leuiathan* piscem maximum, & horrendum valde, scribit Iob cap. 40. & inde hoc nomen tribuit Diabolo Isaias cap. 27. vocans eum *Leuiathan serpentem tortuosum*. Significantur igitur hoc



hoc nomine cete grandia, siue balenæ, quæ magnitudinem tam immoderatam habent, vt Olaus magnus scribat, balenam quandam, insulam fuisse creditam. Illud autem, *ad illudendum ei*, variis modis exponitur tum à Rabinis, tum à nostris: sed simplicissima explicatio videtur, vt sensus sit, ad ludendum in eo, id est, in mari: nam in Hebræo sic habetur ad verbum, *Leuiathan, quem formasti ad ludendum in eo*; & sic exponit Theodoretus & Euthymius verba Græca *ἡ παιστὰ αὐτοῦ*, & notat Theodoretus, mare apud Græcos esse generis fœminini; tamen Interpretem vertisse *αὐτοῦ*, quia sic inuenit in Hebræo, vbi tam nomen maris, quam pronomen ibi positum, est generis masculini: adde quod explicatio eorum, qui volunt sensum esse, Leviathan formatum esse à Deo, vt illudatur ei ab hominibus, dum eum capiunt, & inter se diuidunt; videtur repugnare Scripturæ in lib. Iob cap. 40. vbi Deus ipse describit magnitudinem Leviathan, & ostendit, difficillimum esse illum capere, aut ex aquis extrahere: & formatum potius esse, vt potentia Dei per eum agnoscat, quam vt ei illudatur ab homine. Addit postremo Propheta, ista omnia animalia, quæ viuunt in mari, non solum à Deo condita fuisse, sed etiam à Deo nutriti. *Omnia, inquit, à te expectant, vt des illis escam in tempore*: Deus enim tempore congruo, admirabili ratione & modo, cibum procurat, vnde animalia ista viuunt.

*Dante re illis, colligent, aperiente te manum tuam, omnia implebuntur bonitate.*

*Auertente te autem faciem, turbabuntur; auferes spiritum eorum, & deficient, & in puluerem suum reuertentur.*

Declarat Propheta paulo fufius, vitam omnium animalium ita pendere à Deo, vt si Deus aperiat manus, & cibos distribuat, omnia viuunt: si Deus auertat faciem, & alimenta dare cessat, omnia intereant. Et quamuis proprie loquatur de aqualibus, tamen ad omnia omnino animalia hæc verba perti-

nent, cum sit eadem omnium ratio. *Dante re illis, colligent*, id est, si tu cooperando cum secundis causis, vel potius mouendo secundas causas, illasq; in omnibus adiuuando, dederis animalibus cibum ipsis congruentem; colligent, & inde viuent: *aperiente te manum tuam, omnia implebuntur bonitate*. Id ipsum repetit aliis verbis, quæ plane demonstrant, omnium bonorum auctorem esse Deum, siue quo nihil valeret terræ fecunditas, & humana industria. Illud, *replebuntur bonitate*, significat, replebuntur bono, siue bonis, vt aperte est in Hebræo. Itaque bonitas hoc loco non significat probitatem, sed substantiam, vnde homines, & animalia cætera sustentantur. Vox Græca, *χρηστότης*, ambigua est: nam & utilitatem & benignitatem significat: hoc autem loco ad priorem significationem referenda est, si cum voce Hebraica conuenire debeat. *Auertente autem te faciem, turbabuntur*. Contra vero, inquit, si tu auertas faciem, & quasi iratus definas ea respicere fauore tuo, & subtrahas auxilium; continuo turbabuntur, & quasi languebunt, & mox deficient; *auferes enim spiritum tuum*, id est, spiritum vitalem, quem eis dedisti: & illa in puluerem suum reuertentur, id est, redibunt in puluerem aridum & inanimem, vt antea erant.

*Emittes spiritum tuum, & creabuntur, XXXI. & renouabis faciem terræ.*

Ostendit potentiam Domini inde etiam valde laudandam & prædicandam esse, quod potest etiam restituere spiritum vitæ iis rebus, quibus abstulerat, & quamuis possit Deus restituere spiritum in indiuiduo, vt vere restituet hominibus in resurrectione mortuorum; tamen hoc loco loquitur Propheta ad literam de restitutione in specie. Deus enim aufert spiritum vitalem ab animantibus, cum ea variis modis interire sinat: & rursum emittit spiritum vitalem in animantia per nouam generationem, & sic renouat faciem terræ, cum terra iterum repletur animalibus omnium generum. Vox illa, *& creabuntur*, non est accipienda proprie pro productione ex

H h h h

nihil,



nihilo, sed pro formatione siue productione in genere. Quamuis autem hæc sit expositio literalis, non repugnat tamen veritati, vt hic versiculus exponatur mystice, vel pro resurrectione corporum humanorum, vel pro inspiratione Spiritus sancti, vt qui mortui fuerant peccato, viuere incipiant Deo per gratiã.

XXXII.

*Sit gloria Domini in seculum: latabitur Dominus in operibus suis.*

Explicatis admirandis operibus Dei in cœlo, in aëre, in terra, & in mari; concludit Psalmum oratione, ac primum petit, vt sanctificetur nomen Domini, quæ est etiam prima petitio in oratione Dominica. *Sit*, inquit, *gloria Domini in seculum*, id est, semper laudetur Dominus, non solum voce, sed etiam vita & moribus seruorum suorum. *Latabitur Dominus in operibus suis*, id est, & inde fiet, vt Deus semper laetetur in operibus suis, & non habeat occasionem dolendi & poenitendi, quod fecerit ea; dicitur enim Genes. 6. *Videns Deus malitiam hominum, tacitus dolore cordis intrinsecus delebo*, inquit, *à facie terra ab homine usque ad animalia, à reptili usque ad volucres cœli: poenitet enim me fecisse eos.* Et quidem in Deum neque dolor, neque poenitentia, neque noua lætitia cadere potest: sed hæc dicuntur more humano, ad significandum, Deum in penam peccatorum destruere opera sua; quod faciunt ij, quos poenitet ea fecisse: & contra, fouere & augere opera sua in præmium iustorum; quod faciunt ij, qui ea se fecisse lætantur.

XXXIII.

*Qui respicit terram, & facit eam tremere, qui tangit montes, & fumigant.*

Quia dixerat, res creatas esse opera Domini; id breuiter probat ex eo, quod tanta est potentia Dei in res creatas, vt solo aspectu minaci terram concutiat, & solo contactu montes ardere faciat. Alludit David ad c. 19. Exodi, vbi deferibitur mons Sinai terribilis, & fumigans descendente Domino.

XXXIV.

*Cantabo Domino in vita mea, psallam Deo meo quamdiu sum.*

XXXV.

*Iucundum sit ei eloquium meum: ego vero delectabor in Domino.*

Hæc est altera petitio, vt placeat Deo laus eius. Ego, inquit, quemadmodum opto, vt ab omnibus Deus laudetur; sic ipse *cantabo Domino, dum vixero*; & non sola voce, sed etiam Psalmeterij sonitu celebrabo laudes eius: hoc autem oro & peto, vt *iucundum sit ei eloquium meum*, id est, hymnus, quem in eius laudem assidue decanto, gratus sit maiestati eius: & ego quoque delectabor in amore Dei, & deliciæ meæ erunt meditatio assidua bonitatis eius.

*Deficiant peccatores à terra, & iniqui ita vt non sint: Benedic anima mea Domino.*

Hæc est vltima petitio, vt peccatores, qui Deum laudare nesciunt, deficiant de terra, ita, vt vel conuersi ad Dominum non sint amplius peccatores, vel si conuerti noluerint, deliciantur infra terram, & ultra non compareant.

## PSALMVSVS CIV.

*Titulus, & Argumentum.*

**T**itulus huius Psalmi est, Alleluia. Quamuis enim non habeatur apud Hebræos, Alleluia, in principio Psalmi; habetur tamen in fine Psalmi superioris: sed LXX. Interpretes posuerunt Alleluia in principio huius Psalmi, non in fine superioris: & idem fecerunt in Psalmis 106. 113. 114. 116. 117. 145. & 146. semper enim posuerunt in titulo Alleluia, cum in Hebræo habeatur in fine Psalmi superioris: credibile autem est LXX. Interpretes ita inuasisse in suis codicibus Hebræis: Certe S. Augustinus monet in præfatione Psalmi sequentis, celeberrimam Ecclesiæ consuetudinem habere, vt Alleluia ponatur in titulo Psalmorum potius quam in fine. Rectissime autem conuenit Alleluia in titulo huius Psalmi, & duorum sequentium: quoniam Alleluia significat, laudate Dominum, & in his Psalmis narrantur beneficia præstata populo Dei, ob quæ omni laude dignus est. Habentur primi quindecim versiculi huius Psalmi in lib. 1. Paralip. cap. 16.

deia.



deinde subnectuntur eo loco duodecim versiculi ex Psalmo 93. & rursum tres alij versiculi adduntur in fine ex Psalmo 103. Hic autem post quindecim versiculos, qui habentur in lib. Paralip. subiiciuntur alij 28. versiculi.

## EXPLICATIO PSALMI CIV.

**C**onfitemini Domino, & inuocate nomen eius: annunciate inter gentes opera eius.

Inuitat Propheta spiritu feruens populum Dei ad laudandum & inuocandum Deum, & ad annunciantia ceteris gentibus mirabilia opera eius, vt per hoc multiplicetur laus & inuocatio Dei: non enim contentus est verus amator, si solus ipse cognoscat & laudet dilectum; sed cupit à multis, vel ab omnibus omnino cognosci & laudari. Ait igitur: *Confitemini* confessionem laudis vos populi Dei, & *inuocate nomen eius*, vt recte laudare possitis; neque enim sine auxilio gratiæ eius id præstare sufficitis. *Annunciate inter gentes*, id est, spargite inter alias gentes sermonem de mirabilibus operibus Dei, vt illæ quoque ex operibus incipient cognoscere, laudare & inuocare factorem.

*Cantate ei & psallite ei: narrate omnia mirabilia eius.*

Explicat quod supra dixit, *Confitemini*, dicens, *cantate & psallite*, id est, confitemini laudes Dei, cantando vocibus & psallendo instrumentis musicis; siue laudando verbo & opere, bene dicendo & bene viuendo: explicat quoque quod supra dixit, *annunciate inter gentes opera eius*, dicens: *Narrate omnia mirabilia eius*, id est, annunciate gentibus opera Dei, quæ sunt omnia valde admirabilia, & laude dignissima.

*Laudamini in nomine sancto eius: lætetur cor quærentium Dominum.*

Inuitauit ad laudem & cantum exteriorum; nunc inuitat ad lætitiā & exultationem interiorem, ac primum dicit: *Laudamini in nomine sancto eius*, id est, gloriamini in corde vestro, quod Deum noueritis, aucto-

rem omnis boni. Vox Hebræa, *hallelu*, ad verbum reddi potest, *laudate vos ipsos*; sed quia sequitur, *in nomine sancto eius*, sensus est, *laudate vos ipsos, & bene fortunatos vos dicite*; siue, quod est idem, *gloriamini non in vobis, non ex virtute vestra, sed ob nomen sanctum Dei, vobis manifestatum*; iuxta illud Apostoli, 2. Cor. II. *Qui gloriatur, in Domino gloriatur*. Potest etiam vox illa accipi pro lætitiā & exultatione; vt idem sit, *laudamini*, quod, *lætamini*: sic enim vertit S. Hieronymus: *Exultate in nomine sancto eius*: per nomen Dei significatur notitia Dei, siue etiam ipse Deus. *Lætetur cor quærentium Dominum*, id est, cum lætitiā & exultatione, non cum tædio & dolore quærite Dominum; quia tantum bonum est Dominus, vt melius sit illum quærere, quam cætera omnia possidere: vel, *lætetur cor quærentium Dominum*, id est, lætabitur valde cor quærentium Dominum, quia desinet anxie quærere, quæ sunt mundi, & per hoc liberabitur à mordacibus curis & sollicitudinibus multis: deponet quinque iuga bouum, & tollet iugum suauē & onus leue, & inueniet requiem animæ suæ.

*Querite Dominum, & confirmamini: quærite faciem eius semper.*

Id ipsum vrget, vt serio & assidue quærat Deus; illud enim, *confirmamini*, significat proprie, *roboramini*, id est, non defatigemini in quærendo Domino; sed confirmate vires animi, & infatigabiliter quærite. S. Hieron. vertit: *Querite Dominum, & virtutem eius*; quia legit, *hūzo*, quod significat robur, siue virtutem eius: sed LXX. Interpretes, quos Latinus interpres secutus est, legerūt, *hoxze*, cum iisdem literis, mutatis tantum punctis; & ideo recte verterunt, *confirmamini*, siue *roboramini*. Quod sequitur, *quærite faciem eius semper*, duobus modis exponi potest. Si respiciamus ad homines Testamenti veteris, sensus erit, *Querite præsentiam Domini per gratiam & fauorem*, id est, procurete, vt Deus vos placito vultu semper aspiat, bene-



beneficiat vobis de cælo, non auertat faciem à vobis, neque vos iratus despiciat, & affligat. Sed si ad homines Testamenti noui referantur hæc verba, vt præcipue referri debent, sensus erit, *Quærite faciem eius semper*, id est, ascendite semper corde, amando & desiderando faciem Domini; donec ad eam videndam aliquando perueniatis, & quia nemo querit, quod non nouit, & quod aliquo modo per notitiam non inuenit; recte dicit S. Augustinus, eos, qui quærunt faciem Domini, iam inuenisse per fidem, & adhuc quærere per spem & desiderium. Ex quo intelligimus, ab illis non quæri faciem Domini, qui fidem vel non habent, vel non exercent: proinde initium quærendi faciem Domini, sumendum esse ab exercitatione fidei, cogitando & meditando eminentiam summi boni, sibiq; firmiter persuadendo ex diuinis literis, veram felicitatem, in qua sola quiescere possit desiderium nostrum, non esse nisi in visione infinitæ pulchritudinis Dei: & ad hanc visionem posse hominem pertingere, si quærat, sicut oportet, faciem Dei. Porro quærere, sicut oportet, in duabus rebus positum est, videlicet in remouendis impedimentis, & adhibendis medijs; quod Apostolus docuit ad Titum 2. *Abnegantes impietatem, & secularia desideria; sobrie, iuste & pie viuamus in hoc sæculo, expectantes beatam spem.* Impedimenta ergo sunt, prauæ cupiditates, affectusq; rerum terrenarum, quantum enim minuitur cupiditas, tantum crescit charitas. Itaque qui cupiunt diuites fieri, ac vt opes cumulent, non tribuunt necessitatem patienti; quiq; seruiunt gulæ aut luxuriæ: ij non ascendunt ad faciem Domini quærendam, sed descendunt & elongantur ab ea: quia non remouent, sed multiplicant impedimenta. Medium ad faciem Domini inueniendam, est vera iustitia, siue diuinæ legis impletio; dicente Domino, Matth. 5. *Quærite primum regnum Dei, & iustitiam eius;* illud, vt finem; istam, vt medium. Et, *Si vis ad vitam ingredi, serua mandata*, Matth. 19. Quare ille quærat faciem Domini semper, qui fidem cogitando & meditando exercet, quiq; mortificat membra sua, quæ sunt su-

per terram, & secularibus desideriis abnegatis, corde puro, & conscientia bona semper iuste viuit; & ad faciem Domini videndam semper anhelat.

*Mementote mirabilium eius, quæ fecit: prodigia eius, & iudicia oris eius.*

Docet nunc Propheta materiam laudis Dei, & quasi scalam ad ascendendum ad amorem & desiderium Dei; ad quæ duo nos inuitauerat in tribus versiculis præcedentibus. Materia latidis sunt opera Dei mirabilia, quæ nobis indicant omnipotentiam, & summam sapientiam, & suauissimam bonitatem Dei: quæ eadem, si, vt par est, pie fideliterq; cogitentur, euehunt mentem ad amorem & desiderium Dei. *Mementote*, inquit, *mirabilium eius, quæ fecit*, id est, reuocate ad memoriam, & recogitate mirabilia opera, quæ à Deo facta fuisse cognouistis. *Prodigia eius, & iudicia oris eius*, id est, mementote mirabilium, quæ fecit; quæ mirabilia sunt prodigia, & iudicia eius. Per prodigia intelliguntur miracula, quæ fecit Deus per Moylen, & Iosue, & Samuelem, & alios, quæ naturæ viribus fieri nequeunt. Per iudicia oris eius, possunt intelligi horrenda flagella, quibus Deus iusto iudicio puniuit Pharaonem & alios persecutores populi Dei; vt sint eadem prodigia & iudicia, quia prodigia illa facta sunt, vt per ea iudicaretur & puniretur superbia & iniustitia Pharaonis: sic enim exponit Theodoretus. Possunt etiam per iudicia oris eius, intelligi sanctissimæ leges, quas Deus populo suo dedit; iuxta illud Psal. 147. *Qui annunciat verbum suum Iacob, iustitias & iudicia sua Israël*, vt prodigia pertineant, ad potentiam Dei manifestandam; iudicia ad sapientiam. Sic videtur exponere S. August. & sic exponunt aliqui recentiores.

*Semen Abraham serui eius, filij Iacob electi eius.*

Declarat, quibus dixerit: *Mementote mirabilium eius*: quasi dicat, Vobis loquor Hebræi, qui estis semen Abraham, & filij Iacob, id est,



est, qui propagati estis ab Abraham per Iacob, ac per hoc etiam per Isaac, non per Esau. aut Ismaelem. Vos enim estis serui eius & electi eius; quia vos elegit Deus in proprios, & peculiare seruos, quibus legem daret, & quos doceret, quo ritu coli vellet. Recte autem additoner Sanctus Augustinus, hæc non pertinere solum ad filios carnis Abraham, & Iacob, sed potissimum pertinere ad filios fidei Abraham, & Iacob, dicit enim Apostolus, ad Rom. 4. *Signum accepit (Abraham) circumcisionis, signaculum iustitiæ fidei, quæ est in præputio: ut sit Pater omnium credentium per præputium, ut reputetur & illis ad iustitiam: & sit Pater circumcisionis non ijs tantum, qui sunt ex circumcisione; sed & ijs, qui sectantur vestigia fidei, quæ est in præputio Patris nostri Abraham, & ad Rom. 9. Non omnes, qui ex Israel, ij sunt Israeliti, neque qui semen sunt Abraham, omnes filij; sed in Isaac vocabitur tibi semen, id est, non qui filij carnis, ij filij Dei; sed qui filij sunt promissionis, estimantur in semine, & ad Gal. 3. Cognoscite, inquit, quia qui ex fide sunt, ij sunt filij Abraham. & infra, Prouidens autem Scriptura, quia ex fide iustificat gentes Deus, prænuñciauit Abraham, Quia benedicentur in te omnes gentes: igitur qui ex fide sunt, benedicentur cum fidei Abraham. & infra, Si autem vos Christi estis, ergo semen Abraham estis, secundum promissionem heredes. Quod attinet ad verba; illud, *serui eius*, in Hebræo est genitrius singularis; & sensus est, *Semen Abraham serui eius*, id est, qui Abraham est seruus eius. sed in Græco est, *δούλοι* nominatiuus numeri multitudinis, & refertur ad filios Abraham, qui sunt serui Dei. & hæc est verior lectio. nam quod sequitur, *electi eius*, tam in Græco, quam in Hebræo, est numeri multitudinis. Quod igitur nunc est in Hebræo; *אֲדָוָה*, quod significat, serui eius, in genitiuo singulari: legerunt Septuaginta interpretes, *אֲדָוָה*, serui eius, in numero multitudinis.*

*Memor fuit in seculum testamenti sui: verbi, quod mandauit in mille generationes.*

Incipit narrare mirabilia opera Dei: ac primo loco ponit, quod Deus vniuersæ terræ imperans, elegerit Abrahamum, & cum eo fœdus æternum percussit, de terra promissionis in perpetuum tradenda semini eius, quæ promissio in Christo impleta est, cuius Regnum nullum habebit finem: terrena enim possessio Palæstinæ non semper apud filios Abrahami permansit. Ipse, inquit, Dominus Deus noster, in vniuersa terra iudicia eius, id est, Deus, cuius iudicia sunt in omni terra, quique omnem terram vt summus Rex, & Monarcha iudicat; ipse, inquit, Deus tam magnus memor fuit in seculum testamenti sui; id est, memor fuit fœderis sui vt impleteret, quod æternum esse voluit. Verbi sui, id est, promissionis suæ, quam mandauit, id est, iussit, & voluit stabilem esse in mille generationes, id est, in æternum: ponitur enim numerus millenarius, qui longè excedit numerum omnium generationum; quæ fuerunt ab initio mundi, pro quadam perfectæ duratione, quæ non habet finem. Sic S. Augustinus hoc loco, & S. Gregorius li. 9. moral. cap. 3. & perspicuum est tum ex præcedentibus, & sequentibus, vbi dicitur, *Testamentum in seculum, & æternum*: tum ex eo, quod quocunque modo accipiat generatio, etiam si solum pro quindecim annis, in qua ætate homo incipit posse generare, quæ est minima duratio; credibile est, mundum à prima conditione, vsque ad vltimam consummationem non duraturum mille generationibus, id est, quindecim millibus annorum. Siquidem S. Ioan. in 1. epist. cap. 1. dicit nouissimam horam nunc esse: & tamen nondum effluxerunt sex millia annorum.

*Quod disposuit ad Abraham, & iuramenti sui ad Isaac.*

*Et statuit illud Iacob in præceptum, & Israel in testamentum æternum.*

H h h h 3 Di-

*Ipse Dominus Deus noster: in vniuersa terra iudicia eius.*

IX.

X.

VII.



X. *Dicens, Tibi dabo terram Chanaan, funiculum hereditatis vestre.*

XI. *Cum essent numero breui, paucissimi, & incola eius.*

Idipsum repetit, & declarat pluribus verbis, ad confirmationem veritatis. *Quod disposuit ad Abraham*, id est, memor fuit eiusdem pacti, quod disposuit ad Abraham; & memor fuit eiusdem pacti, quod cum iuramento confirmauit Isaac filio Abraham: & statuit illud pactum, siue promissum iuratum ipsi Jacob in præceptum, id est, in decretum, & statutum; & in testamentum æternum, hoc est, scdus in æternum duraturum. Verba autem promissionis, in pacto, siue decreto diuino inclusa fuerunt. Tibi dabo terram Chanaan, quæ dicitur terra promissionis, in qua Chananeæ tunc habitabant. *Funiculum hereditatis vestre*, id est, quam possidebunt filij tui, tanquam hereditatem funiculo illis diuisam. Pro illo verbo, in præceptum, in Hebræo habetur, *se hoc*, quod propriè statutum & decretum significat. Porro hæc promissio Dei ad Abraham habetur Gen. 17. ad Isaac habetur Gen. 26. ad Jacob, qui & Israel dicebatur, habetur Gen. 28. *Facta est autem hac promissio Hebræis*, cum essent numero breui, id est, paucissimi; & cum essent incolæ, id est, peregrini, & aduenæ in ipsa terra Chanaan. Quo magis admirandum est consilium Dei, & potentia, ac sapientia eius, & dignatio erga Patriarchas; quod elegerit ex toto mundo familiam vnā, eamque exiguam, cui promitteret, & postea re ipsa traderet regionem amplissimam, in qua multi Reges solium suum habebant. Sed multo magis admirandum est, quod pusillum gregem electorum ex vniuerso genere humano idem Deus elegerit, cui daret Regnum cælorum in æternam hereditatem, cuius Regni sempiterni figura erat terra promissionis. Pro verbo, *incola*, in Hebræo est *garim*, quod propriè peregrinos, & aduenas significat.

XII. *Et pertransierunt de gente in gentem, & de Regno ad populum alterum.*

*Non reliquit hominem nocere eis, & corripuit pro eis Reges.*

*Nolite tangere Christos meos, & in Prophetis meis nolite malignari.*

Hic recenset Propheta alterum beneficium Dei, quod videlicet Patriarchas singulari prouidentia custodierit, atque protexerit, attingit autem historiam Genes. c. 12. & 20. vbi Abraham bis in periculo fuit, propter pulchritudinem Vxoris suæ. & cap. 26. vbi Isaac simile periculum adiit, & cap. 31. & 32. vbi Jacob parum absuit, quin multa pateretur, primum à Laban, deinde ab Esau. Sed ab omnibus periculis eruit eos prouidentia Dei. Et pertransierunt, Patriarchæ, videlicet, Abraham, Isaac, & Jacob cum familia sua de gente in gentem, de vna prouincia in aliam; & de Regno vno ad populum Regni alterius, vt de Regno Palæstine ad Populum Regni Egypti. *Non reliquit*, id est, non permisit Deus, hominem vllum nocere eis, imò etiam corripuit pro eis Reges, Pharaonem videlicet Regem Egypti, & Abimelech Regem Geraræ. dixit enim Deus Regibus istis. *Nolite tangere Christos meos, Abraham videlicet, Isaac, & Jacob: & in Prophetis meis nolite malignari*, id est, & in eosdem istos, qui Propheta mei sunt, ac per hoc vncti, mihi que consecrati, nolite aliquid mali perpetrare, nolite eis nocere, nolite illos vexare. Prophetas fuisse sanctos Patriarchas non dubium est; nam Abraham prouidit captiuitatem populi Israelitici in Egypto, & quamdiu duratura, & quem exitum habitura esset; vt constat ex cap. 15. Gen. Isaac paulò ante mortem prædixit Esau filio suo, quod seruiturus esset Jacob fratri suo, & quod aliquando excusurus esset iugum illud seruitutis, quæ omnia prædicebantur de posteris eorum, non de personis ipsorum, vide cap. 24. Gen. quæ impleta esse testantur libri Regum. Denique Jacob plurima prædixit, quæ euentura erant singulis filiis, ac præsertim Iudæ, ex cuius tribu Messiam venturum prophetauit, vide cap. 49. Gen. Itaque Patriarchæ illi rectè propheta dicti sunt, & ea de causa dicti



dicti sunt *Christi*, id est, vincti, non quod vincti fuerint oleo visibili, quomodo postea Sacerdotes, Reges, & aliqui Propheta vincti fuerunt, sed quod spirituali, atque interna vinctio spiritus delibari fuerint: de qua vinctio dicitur Isaia 61. *Spiritus Domini super me, quod unxerit me.*

Et vocauit famem super terram, & omne firmamentum panis contriuit.

Misit ante eos virum, in seruum venundatus est Ioseph.

Humiliauerunt in compedibus pedes eius, ferrum pertransiit animam eius donec veniret verbum eius.

Floquium Domini inflammavit eum, misit Rex, & soluit eum: Princeps populorum, & dimisit eum.

Constituit eum Dominum domus suae, & Principem omnis possessionis suae.

Ut erudiret Principes eius sicut semetipsum, & senes eius prudentiam doceret.

Et intravit Israel in Aegyptum, & Iacob accolit fuit in terra Cham.

Hoc est tertium beneficium Dei erga populum suum, in quo est ingens materia laudis, propter admirabilem Dei sapientiam, qui ex magnis malis eruere nouit maxima bona, narrat igitur Propheta famem grauissimam, quae orta est super terram tempore Iacob: cuius occasione idem Iacob transiit in Aegyptum, ubi vixit cum tota familia sua tempore illius famis. Historia nota est ex lib. Gen. cap. 37. & seqq. Ait igitur Propheta. *Et vocauit famem super terram*, id est, Deus auctor fuit per providentiam suam, ut grauissima famis ex penuria frumenti opprimeret terram: loquitur autem more poetico, cum ait: *Vocauit famem super terram*; quasi famis esset exercitus aliquis armatus, qui de vno loco ad alium vocari posset, sed haec metaphora significat, omnia Deo feruire ad nutum, & quae videntur nobis fortuita, ex decreto Dei iustissimo pro-

uenire. Idipsum repetit & declarat ardens.

*Et omne firmamentum panis contriuit*, id est, fames illa exorta est super terram, quia Deus contriuit firmamentum panis, stabilitum videlicet victus humani, qui in pane consistit. Fecit enim, ut annis septem, nec arari, nec seri, nec meti posset, ut dicitur in Gen. cap. 45. In Hebraeo pro firmamentum panis, est *marie lechem*, id est, baculum panis. Sed Septuaginta Interpretes explicauerunt metaphoram baculi; dicitur enim baculus panis, sustentatio vitae ex pane.

*Misit ante eos virum*, id est, occasione illius famis venturae praemisit Deus in Aegyptum ante filios Israel, virum magnum, id est, Iosephum, qui liberaret ab ea fame Iraelem cum omni familia sua. Historia Genesis testatur cap. 37. *S. Iosephum venditum fuisse a fratribus ex inuidia mercatoribus pergentibus in Aegyptum*: sed Dauid recte dicit, eum missum fuisse a Deo, quia Dei providentia permisit eum vendi, & asportari in Aegyptum, ut per eum mirabili ratione, & modo introduceretur Iacob cum filiis in Aegyptum.

Explicat autem idem Propheta, quomodo Ioseph missus fuerit in Aegyptum, subdens. *In seruum venundatus est Ioseph*, id est, venditus a fratribus Ioseph mercatoribus euntibus in Aegyptum, sic in Aegyptum ipse quoque peruenit. *Humiliauerunt in compedibus pedes eius*, id est, in Aegypto positus Ioseph, & accusatus falsi criminis ab uxore Domini sui, coniectus fuit in carcerem, pedes compedibus ferreis alligatus. *Ferrum pertransiit animam eius*, donec veniret verbum eius, id est, ferrum compedum dolore afflixit animam Ioseph, & quodammodo eam pertransiuit, per multos dies, donec impleretur vaticinium eius, quo praedixit pincernae Regis Pharaonis liberationem ex carcere: nam ex adimplerione vaticinii processit liberatio ipsius etiam Ioseph, ut patet ex Gen. cap. 40. Illud, *ferrum pertransiit animam eius*, in Graeco legitur, ferrum pertransiit anima eius. In Hebraeo utroque modo legi potest: nam verbum, *naphso*, significare potest, animam eius, & anima eius, & quamuis sensus idem sit, tamen clarior est oratio



oratio, ferrum pertransijt animam eius, & similis illi, Luc. 2. *Tuam ipsius animam pertransibit gladius.* & sic legerunt SS. Hieronymus, & Augustinus in comment. & alij Latini, proinde non recte aliqui recentiores legere maluerunt, *ferrum pertransijt anima eius*, corrigentes sine causa Latinum textum ex Græco. Illud, *donec veniret verbum eius*, S. Hieronymus in commentario refert ad verbum Domini, quo Iosephum liberare constituit: sed planior sensus est, si referatur ad verbum ipsius Ioseph, qui prædixit liberationem pincernæ Pharaonis, quæ expositio est S. Augustini, & communior. *Eloquium Domini inflammavit eum*, id est, verbum illud Ioseph, quo prædicebat futura, non oriebatur ex eius ingenij sagacitate, sed ex virtute Dei: qui eloquium ignitum, & lucidum, & efficax illi tribuebat. *Eloquium enim Domini*, id est, à Domino immissum, & inspiratum, cum esset quasi facula ardens, ut dicitur de eloquio Eliæ Prophætæ, Eccl. 48. *Et ut lingua ignea, quæ sciat super Apostolos*, Act. 2. *Inflamavit pectus eius, ut liberè loqueretur, quæ per spiritum Domini prævidebat* S. Hieron. ex Hebræo vertit, eloquium Domini probavit eum. Et quidem vox Hebraica, *zeraphateu*, significat probare, sed Septuaginta interpretes legerunt, *seraphateu*, per *sein*, quod significat inflammare, & hanc existimamus veram esse lectionem, quæ postea incuria librariorum mutata sit. *Misit Rex, & solvit eum*, Princeps populorum, & dimisit eum, id est, Rex Pharaon Princeps omnium populorum terræ Egypti, audita sapientia Ioseph per pincernam suam, misit qui eum liberaret de carcere, & auctoritate sua solvit eum compedibus, & liberum dimisit. *Constituit eum Dominum domus suæ*, & Principem omnis possessionis suæ, id est, non solum liberavit eum de carcere, sed constituit eum præpositum domus suæ, & totius Regni sui, ut omnia, quasi Princeps, & Dominus administraret. *Ut erudiret Principes eius sicut semetipsum*, & senes eius prudentiam doceret, id est, ea de causa præposuit Rex Pharaon Iosephum domui suæ, non solum, ut corporibus alen-

dis tempore famis operam daret, sed etiam, ut erudiret principes Regni, & seniores consiliarios, qui cum Rege negotia Regni tractare solebant, ea sapientia, & prudentia, quæ ipse pollebat. Illud, *sicut semetipsum*, S. Hieronymus ex Hebræo vertit, secundum voluntatem suam, Vox Hebraica, *benaphso*, ad verbum significat, in anima sua; & potest sensus esse, in voluntate sua; sed Septuaginta videntur legisse per *caph, cennaphse*, non per *beith*; & tunc sensus est, secundum animam suam, id est, ad similitudinem sapientiæ; quæ erat in anima sua, quod propriè dictum est, sicut semetipsum. *Et intravit israel in Egyptum*, id est, hac occasione ingressus est Patriarcha Jacob cum omni familia sua in Egyptum; vocavit enim eum Ioseph, ut habetur Gen. 45. *Et Iacob accola fuit in terra Cham*, id est, hoc modo Iacob, id est, populus congregatus ex filiis, & nepotibus Iacob, coepit habitare in terra Egypti, quæ dicitur terra Cham, quia Mizriam filius Cham filij Noë, primus fuit, qui habitavit in terra Egypti.

*Et auxit populum suum vehementer: & firmavit eum super inimicos eius.*

*Conuertit cor eorum, ut odirent populum eius: & dolum facerent in servos eius.*

*Misit Moysen servum suum: Aaron quem elegit ipsum.*

*Posuit in eis verba signorum suorum, & prodigiorum in terra Cham.*

Sequitur quartum beneficium Dei erga populum suum, quem diuina prouidentia crescere fecit, & multiplicari valde in Egypto: & cum à Rege Pharaone opprimeretur idem populus Dei, misit Deus Moysen, & Aaronem cum potestate magna in signis, & prodigijs faciendis; ob quæ tandem populus Dei gloriose discessit ex Egypto. Ait igitur Propheta, *Et auxit populum suum vehementer, & firmavit eum super inimicos eius.* quid hoc significet; potest intelligi ex cap. 1. Exodi, ubi sic legitur, Filij israel

שרפתהו

שרפתהו



*Israel creuerunt, & quasi germinantes multiplicati sunt, ac reborati nimis impleuerunt terram. Surrexit interea Rex nouus in Aegypto, qui non nouerat Ioseph, & ait ad populum suum, Ecce populus filiorum Israel multus, & fortior nobis est. Vbi illud, germinauerunt, in Hebræo est, *isrefsu*, quod significat, *producere reptalia in maxema copia*: proinde comparatur Hebræorum multiplicatio in Aegypto multitudini formicarum, aut vermium, qui ita ebulliunt ex aliquo loco, vt numerari non possint. *Conuertit cor eorum*, id est, Deus conuertit cor Aegyptiorum inimicorum Israelitarum, vt odirent populum eius, & dolum facerent in seruos eius, id est, vt astute, & fraudulenter illos opprimerent. Porro Deus dicitur conuertisse cor Aegyptiorum in odium, & ruinam Hebræorum; non inferendo in cordibus eorum malam voluntatem (Deus enim non est causa peccati) sed benefaciendo populo suo, & fecunditatem in solitam illi donando, occasionem quodammodo præbuit peruersis cordibus Aegyptiorum, vt inuiderent alienæ felicitati, & inde illos opprimere desiderarent, benefecit autem Deus populo suo, præsciens inuidiam, & odium in Aegyptijs ea occasione nascitura, quia poterat, & volebat mala eorum voluntate, quam ipse non fecerat, bene vt ad punienda peccata Aegyptiorum, & ad populum suum de captiuitate liberandum. Sic exponit S. August. Si cupiat lector plenius explicari, quomodo Deus conuertat corda aliquorum, vt alios odio prosequantur, & tamen non sit causa peccati, videat, quæ scripsimus lib. 2. cap. 13. de amissione gratiæ, & statu peccati, tom. 4. contro- uersiarum. *Misit Moysen seruum suum, & Aaron, quem elegit ipsum*; id est, occasione afflictionis populi sui misit Deus in Aegyptum Moysen, & fratrem eius Aaronem legatos ad Pharaonem. Illud, *quem elegit ipsum* in Græco habetur, *quem elegit sibi*, ex Hebræo verti posse, *quem elegit ei*, id est, Moysi, vt sensus sit. Misit Deus Moysen seruum suum, & Aaronem, quem elegit ei socium, & adiutorem. Potest tamen vox Hebraica *bo*, quæ proprie significat, *in eo*, siue *in ipso*, ver-*

ti, ipsum, vt legunt hoc loco S. Augustinus, S. Hieronymus in commentario, & alij: & vt habent omnes codices vulgatæ editionis, ac vt recte monet S. Augustinus, apud Latinos redundat illud, *ipsum*, quod apud Hebræos eleganter additur. Similis est locus in Psalmo sequenti, vers. 5. *ad videndum in bonitate electorum tuorum*, vbi in Hebræo est eadem præpositio, *in*, vt etiam in Græco, & Latino; & S. Hieronymus vertit, *ut videam bona electorum tuorum*. Posuit in eis verba signorum suorum, & prodigiorum in terra Cham, id est, mittens Deus ad liberandos filios Israel. Moysen, & Aaron; posuit in eis verba signorum, potestatem videlicet edendorum miraculorum in terra Aegypti, vt tum filij Israel, tum etiam Aegyptij crederent, Moysen, & Aaron missos esse à Deo; & illis obedirent, vt nuncijs veri, atque omnipotentis Dei. Vox illa, *verba*, apud Hebræos latissime patet, vt non solum verba, sed etiam res quascunque significare possit. Itaque hoc loco, *verba signorum*, sunt vel ipsa signa, vel, vt dixi potestas signorum faciendorum.

*Misit tenebras, & obscurauit, & non exacerbauit sermones suos.* XXVII.

In hoc versiculo, & sequentibus octo describit in particulari prodigia edita in Aegypto, quibus Deus Pharaonem, & Aegyptios flagellauit, vbi notandum est, Prophetam non recensere omnes plagas, neque eodem ordine, vt habentur in Exodo: quoniam non historiam texit, sed carmen scribit, ad laudandum Deum, quod etiam obseruauimus in Psalmo septuagesimo septimo. Incipit igitur à prodigio tenebrarum, quæ tres integros dies occupauerunt Aegyptum, quæ plaga est vna ex postremis in Exodo, cap. 10. *Misit, inquit, tenebras*, id est, immisit tenebras in Aegyptum, & obscurauit eam regionem. Fuerunt autem illæ tenebræ tam horribiles, & crassæ, vt nemo alteram agnosceret: & quod mirabilius est, nemo se moueret de loco, in quo erat, quod



וְלֹא  
מִן  
כִּבְרִית

sequitur, *Et non exacerbauit sermones suos*, varie legitur in codicibus Hebraicis, Græcis, & Latinis. In Hebræo sic habetur, *velo mari; & non exacerbauerunt sermones eius*: vel, vt S. Hieronymus vertit, *Et non fuerunt increduli verbis eius*, id est, Moyses, & Aaron audacter impleuerunt mandata Domini, facientes signa, & prodigia; quorum vnum fuit, immissio tenebrarum. In Græco vero sic habetur, *ὅτι παρὰ πικρὰν τῶν λόγων αὐτῶν, quoniam exacerbauerunt sermones ipsius*; id est, misit Deus tenebras, quoniam Ægyptij exacerbauerunt sermones eius, obstinare resistentes mandatis ipsius. In Latinis varia lectio erat, tempore S. Augustini; nam vt ipse dicit, plerique codices habebant, *exacerbauerunt*; nonnulli, *non exacerbauerunt*. S. Hieronym. in commentario Psalmorum legit, *Et exacerbauit sermones eius*, id est, populus exacerbauit sermones Dei, illis non parendo. Nostra lectio, quæ habet, *Non exacerbauit sermones suos*, videtur repugnare omnibus alijs codicibus; sed facile conuenire potest cum Hebraica, & Græca: nam in Hebraica expressè habetur negatio, in Græca verisimile est, pro *ὅτι*, legendum esse *ὅτι*, quod est *neque*; & sic videretur Theodoretus, & sic absque dubio noster Interpres legit: non enim vertisset, *& non*, si legisset *ὅτι*, nisi imperitissimus fuisset. Quod autem Latinus habeat in singulari, *non exacerbauit*; Græcus, & Hebræus in plurali, *non exacerbauerunt*, non mutat sensum; nam iuxta Latinam lectionem sensus est, *Non exacerbauit Moyses, aut Aaron sermones suos*, id est, Dei Confundit n. Latinus interpres pronomen, *suum* cum pronomine *eius*, quemadmodum in Græco, & in Hebræo confunduntur: at iuxta lectionem Hebraicam, & Græcam sensus est, *non exacerbauerunt Moyses, & Aaron sermones suos*, id est, *eius*, Dei videlicet, qui iussit eos mirabilia signa facere. Cum igitur lectio, quæ nunc habetur in omnibus libris vulgatæ editionis Latinæ concordet cum Græca, & Hebraica, nullo modo corrigenda, aut mutanda est, vt aliqui nimis audacter faciunt.

Conuertit aquas eorum in sanguinem  
& occidit pisces eorum.

Edidit terra eorum ranas, in penetralibus Regum ipsorum.

Dixit, & venit Cænomyia, & cinifes in omnibus finibus eorum.

Posuit pluuias eorum grandinem, ignem comburentem in terra ipsorum.

Et percussit vineas eorum, & ficulneas eorum, & contriuit lignum finium eorum.

Dixit, & venit locusta; & bruchus, cuius non erat numerus.

Et comedit omne fœnum in terra eorum, & comedit omnem fructum terræ eorum.

Et percussit omne primogenitum in terræ eorum, primitias omnis laboris eorum.

Hæc omnia, quæ ad plagas Ægypti pertinent, explicata sunt in explicatione Psalmi septuagesimi septimi, à versiculo quadragesimonono, & deinceps, & nota sunt ex libro Exod. cap. 7. & sequentibus: neque est in his octo versiculis vlla dissensio inter codices.

Et eduxit eos cum argento & auro, & non erat in tribubus eorum infirmus.

Hoc est beneficium quintum, quo Deus affectit populum suum, quia non solum liberauit eum de captiuitate Pharaonis, sed etiam ditauit eum magnis opibus; iussit enim vt Hebræi peterent à vicinis suis Ægyptijs viri à viris, & mulieres à mulieribus vasa argentea, & aurea, & vestes pretiosas, & simul dedit gratiam populo suo coram Ægyptijs, vt facile illis crederent, & commodarent omnia, quæ perebant, vt habetur Exodi 11. & 12. atque hoc est, quod Propheta commemorat, dicens, *Et eduxit eos de Ægypto videlicet, cum Argento, & auro*, id est,



est, cum ingenti copia vasorum aureorum, & argenteorum, quæ commodato acceperant ab Ægyptijs. Disputant Theologi, an dispensauerit Deus in præcepto, *Non furaberis*, quando iussit Hebræis, vt per speciem mutui, vel commodati spoliarent Ægyptios, sed non opus erat dispensatione in præcepto naturali, cum Deus, vt Dominus absolutus rerum omnium, potuerit transferre bona illa Ægyptiorum in Hebræos: & etiam quia potuit, vt summus Iudex, tradere bona illa Ægyptiorum Hebræis loco mercedis, quam illis debebant Ægyptij ob labores, in quibus eos seruire coegerant. Sic S. Augustinus q. 39. in Exodum, & libr. 22. contra Faustum, c. 71. & videtur hoc ipsum affirmare lib. Sap. c. 10 in illis verbis, *Et reddidit iustis mercedem laborum suorum, & deduxit illos in via mirabili.* His accessit aliud beneficium, quod cum Ægyptij varijs morbis affecti fuerint, & tandem primogenita omnia eorum occisa, apud filios Israhel nulla plaga defecit, & hoc est, quod cantat hoc loco Propheta, cum addit, *Et non erat in tribubus eorum infirmus.*

XXVI. *Latata est Ægyptus in profectione eorum: quia incubuit timor eorum super eos.*

Hoc pertinet ad cumulum beneficii superioris: quia non solum Ægyptij non retinuerunt Hebræos propter vasa aurea, & argentea, quæ illis commodauerant: sed lætati sunt in eorum discessu ob timorem maioris mali, ne videlicet omnes perirent, sicut iam perijsse viderant omnia primogenita: sic enim legitur in Exodo c. 12. *Vrgebant Ægyptij populum de terra exire velociter, dicentes, Omnes moriemur.* Itaque non est opus cum sancto Augustino anxie quærere, cur lætata sit Ægyptus in profectione Hebræorum; cum antea semper resisterit eorum profectioni: & cur non saltem repetierit vasa, quæ commodauerat: neq; opus est hoc referre ad tempus illud, quod securum est post demersionem Pharaonis in mari;

nam tantus timor mortis incubuerat super Ægyptios, cum viderunt vna nocte occisa fuisse omnia primogenita hominum, & iumentorum, vt existimauerint paulo post omnes Ægyptios occidendos, & delendam omnino Ægyptum, nisi Hebræi subito dimitterentur.

*Expandit nubem in protectionem eorum & ignem vt luceret eis per noctem.* XXXVII.

Sextum beneficium fuit columna nubis per diem, & columna ignis per noctem, quam Angelorum ministerio erexit Deus populo suo, cum exisset de terra Ægypti. Quod autem hic dicitur, *expandit nubem in protectionem*, non videtur significare, nubem tectos fuisse Hebræos, ne læderentur à sole per diem, vt multi existimant, & in eis Theodoretus: nam columna nubis præcedebat populum interdium, & columna ignis noctu, non autem operiebat eos instar nubis super eos expanfa, alioqui viam ostendere non potuisset, neque figuram columnæ prætulisset. Sic autem legitur Exodi 13. *dominus præcedebat eos ad ostendendam viam per diem in columna nubis, & per noctem in columna ignis, vt dux esset itineris utroque tempore: nunquam defuit columna nubis per diem, nec columna ignis per noctem coram populo, quid ergo sibi vult illud, expandit nubem in protectionem?* explicatur hoc in Exodo, cap. 14. vbi: cum Pharaon, & exercitus eius persequeretur Hebræos recedentes, Angelus Domini cum columna nubis interpoluit se inter exercitum Pharaonis, & populum Israhel, vt ad se inuicem accedere non possent: & hoc modo expanfa nubes illa inter vtrumque populum, protexit Hebræos, ne læderentur ab Ægyptijs, atque hæc dicta sint, si per nubem hoc loco intelligatur columna nubis, de qua fit sermo in Exod. cap. 13. & 14. nam potest etiam dici præter illam nubem columnam, fuisse aliam nubem, quæ expanfa super Hebræos protegeret illos ab aestu in itinere; cuius nubis non fit mentio in



Exodo, atque hanc intelligentiam iuvat lectio Hebraica, quam sic vertit S. Hieronymus, *Expandit nubem in tentorium, & liber Sapientiae cap. 10. Et fuit illis in velamentum diem, & in luce stellarum per noctem.*

XXXIX.

*Petierunt, & venit coturnix, & panis calisaturavit eos.*

Septimum hic recolitur beneficium; quo Deus p.uit in deserto populum suum panis caeli; id est, manna, quod pluebat è caelo, & carnibus coturnicum, quas Deus ministerio venti in desertum adduxit. Vbi notandum est, bis Deum dedisse populo coturnices, semel Exodi 16. & iterum Num. 11. & prima vice non fuisse populum à Deo punitum, ob petitionem carnum, sed altera vice grauissime fuisse punitum. In hoc ergo Psalmo, ubi sola beneficia commemorantur, mentio sit prioris tantum petitionis, quae habetur Exodi 16. non posterioris: quae habetur Num. 11.

XLI.

*Dirupit petram: & fluxerunt aquae, abierunt in sicco flumina.*

Octauum beneficium hic adiungitur, quo Deus ex petra copiam aquarum eduxit in solitudine, ex qua nui initar fluminum decurrebant. Vide cap. 17. Exodi, & cap. 20. Numerorum.

XLII.

*Quoniam memor fuit verbi sancti sui, quod habuit ad Abraham puerum suum.*

Ratio praecedentium, & futurorum beneficiorum tribuitur promissioni factae ad Patriarcham Abraham, singularem puerum, id est, seruum Domini, quamuis enim haec non fuerint illi promissa in particulari: tamen continentur in genere in illis verbis Gen. 15. dictis ad Abraham, *Scito praeoscens, quod peregrinum futurum sit semen tuum in terra non sua, & subicient eos seruituti, & affligent quadringentis annis. Peruntamen gentem, cui seruituri sunt, ego iudicabo, & post hac egredientur cum magna substantia.*

XLIII.

*Et eduxit populum suum in exultatione, & electos suos in letitia.*

Nonum est hoc beneficium, quo Deus submerso Pharaone in mari rubro, eduxit de seruitute populum suum canentem cum exultatione, & letitia magna, *Cantemus domino: gloriose enim magnificatus est.* Exodi 15.

*Et dedit illi regiones gentium, & labores populorum possederunt.*

Hoc est beneficium vltimum, introductio videlicet duce Iosue Hebraeorum in regiones gentium multarum, & in labores earum. id est, in vrbes, quas edificauerant, & arua, quae coluerant gentes illae. Apostolus, Act. 13. narrat, fuisse gentes septem, quas Deus eiecit è terra promissionis, vt in eas introduceret populum suum.

*Vt custodiant iustificationes eius, & legem eius requirant.*

Hoc est quasi tributum, quod Deus requirit à suis, pro tam multis bonis in eos collatis: nimirum, vt obediant mandatis eius, quae obedientia ipsis obedientibus vtilissima est, quia perducit ad bona multo maiora, quam sit terra promissionis adeptio. Per, *iustificationes*, intelliguntur hoc loco cetimoniae, & iudicia, quae multa erant. Per, *legem*, intelligitur lex moralis, quae reducitur ad vnum praeceptum, quod est dilectio. In Hebraeo habetur, *Et legem eius seruarent*, sed idem est sensus, nam legem requirere, nihil est aliud, nisi in omni actione legem consulere, eamque seruari, vt iuxta eam omnia nant.

## PSALMVS CV.

### Titulus & Argumentum.

Alleluia.

**T**itulus huius Psalmi est Alleluia, & iuxta hunc titulum laudatur Deus, non vt in superioribus, ob sola beneficia, sed etiam ob misericordiam praestitam erga ingratos, qui prauenti à Deo in benedictionibus tanta



*santa dulcedinis, Deo frequenter inobedientes; & rebelles fuerunt, & tamen per penitentiam reconciliati in gratiam redierunt. Huius quoque Psalmi mentio fit in libr. 1. Paralip. cap. 16. ubi ponitur prima pars Psalmi superioris, & in fine adduntur tres ultimi versiculi huius Psalmi.*

## EXPLICATIO PSAL. CV.

**C**onsitemini Domino, quoniam bonus: quoniam in seculum misericordia eius.

Loquitur Propheta in persona fidelis populi penitentis, & gratias Deo agentis. Inuitat autem omnes ad laudes Dei: tum quia bonus est, & praeuenit homines, beneficia multa in illos conferens, tum quia misericordia eius in recipiendis peccatoribus ad penitentiam reuertentibus semper inuenta manet; vincit enim misericordia Dei miseria nostras, ad quas miseriae pertinent praecipue scelera nostra, & quidem miseriae nostrae, Deo propitio, breui euanescent, sed misericordia eius manet in seculum seculi, Psal. 110.

*Quis loquetur potentias Domini? auditas faciet omnes laudes eius?*

Inuitat omnes ad confessionem laudis, nunc obicit sibi, vix inueniri qui sit idoneus ad praedicandas laudes Dei. *Quis* (inquit) *loquetur*, id est, loqui sufficiet, *potentias Domini*, id est, opera potentiae, siue potius omnipotentiae eius? & mox idem repetit alijs verbis, *Quis auditas faciet*, id est, quis loquendo faciet, ut audiantur omnes laudes eius: Quae videlicet laudes ex cognitione operum potentiae eius oriuntur. Nominat hoc loco Dei potentiam Propheta cum de omnibus operibus Dei laude dignis loquitur quia omnia opera Dei mirabilia ad potentiam reuocari possunt. Nam de sapientia scriptum est; Sap. 8. *Attingit a fine usque ad finem fortiter, & disponit omnia suauiter, & vere fortissima est Dei sapientia, quae in sua dispositione impediri non potest; & quia impediri non potest, ideo nec falli potest.* Pa-

ri ratione opera misericordiae ad potentiam reuocantur, quoniam ideo Deus solus absolute misericors est, quia solus potest omnes miseriae tollere; ac per hoc ideo solus proprie misericors est, quia solus omnipotens est. Ergo qui loqui posset omnes potentias Domini, posset etiam auditas facere omnes laudes eius. Sed quis ad haec idoneus erit? Vir iustus in hac vita utique, & pro modo suo, sed longe melius, & plenius, qui beatus erit, in vita futura. Ideo subiungit Propheta, respondens interrogationi suae, ac dicit.

*Beati qui custodiunt iudicium: & faciunt iustitiam in omni tempore.*

Quasi dicat, soli illi beati sunt, ac per hoc loqui possunt potentias Domini, & auditas facere omnes laudes eius, *qui custodiunt iudicium, & faciunt iustitiam in omni tempore*; id est, qui semper recte iudicant de omnibus rebus, quas agunt, quia regulam diuinae legis in omnibus sequuntur, & semper iuste viuunt, declinantes a malo & facientes bonum. Potest etiam hic versiculus ita exponi, ut idem bis repetatur, & idem sit custodire iudicium, & facere iustitiam: nam pro eodem accipiuntur in multis locis Psalmorum iudicium, & iustitia. Porro iusti soli loqui possunt laudes Domini, tum quia ipsi non solum lingua, sed etiam vita laudant Dominum, ut scriptum est in Psalmo 32. *Rectos decet collaudatio*; tum quia ipsi soli beati sunt, & habitant in domo Domini, vel in spe, dum hic viuunt, vel in re, cum ad patriam perueniunt, & talium officium est Deum laudare, iuxta illud Psal. 83. *Beati qui habitant in domo tua Domine, in saecula saeculorum laudabunt te.* Quod autem hic dicitur, *Beati qui custodiunt iudicium, & faciunt iustitiam in omni tempore*; potest intelligi de vtriusque, id est, tam de beatis in spe, quam de beatis in re: beati enim in spe, custodiunt iudicium, & faciunt iustitiam in omni tempore, pro modo fragilitatis humanae viuentes sine crimine, & pro peccatis quotidianis veniam precantes: beati autem in re custodiunt iudi-



cium, & faciunt iustitiam in omni tempore, tanta perfectionis plenitudine, vt peccare nullo modo possint. Atque utrosque quidem decet collaudatio, sed pro modo perfectionis iustitiæ, & iuxta differentiam beatitudinis.

IV. *Memento nostri Domine in beneplacito populi tui: visita nos in saluari tuo.*

V. *Ad videndum in bonitate electorum tuorum: ad latandum in letitia gentis tue, vt lauderis cum hereditate tua.*

Posteaquam Propheta dixit, iustorum, ac beatorum esse officium laudandi Deum: optat & precatur sibi, & suis hanc felicissimam sortem; & breuiter attingit prædestinationem, justificationem, & glorificationem, quæ sunt initium, medium, & finis beatitudinis humanæ. *Memento, inquit, nostri Domine in beneplacito populi tui*, id est, adimple Domine beneplacitum illud, quo tibi complacui in populo tuo, in cœtu videlicet electorum, quos elegisti ante mundi constitutionem ex bona voluntate tua, in qua complacuit tibi dare pusillo gregi tuo Regnum sempiternum. *Visita nos in saluari tuo*, id est, vt impleas beneplacitum æternæ prædestinationis: visita nos in Christo Saluatore, iustificans nos à peccatis per merita eius; siue, *Visita nos* per gratiam justificationis, quæ est salus inchoata, & veluti semen salutis æternæ. Nam salutare vtrumque significat; & Saluatorem, & salutem, & vna significatio alteram includit. Vera enim salus siue inchoata per gratiam, siue consummata per gloriam, non potest haberi; nisi per Saluatorem Iesum Christum Dominum nostrum, non enim est aliud nomen sub cælo datum hominibus, in quo oporteat nos saluos fieri, vt dicit S. Petrus Act. 4. *Ad videndum in bonitate electorum tuorum*, id est, vt prædestinati, & iustificati perueniamus ad videndum bonum electorum tuorum; quæ est ipsa facies Domini conspicua: tunc enim similes ei erimus, cum videbimus eum, sicuti est. vt ait B. Ioann. 1. c. 3. Per

bonitatem electorum, non intelligitur hoc loco probitas, sed ipsum bonum: & S. Hieronymus recte vertit, *Vt videam bona electorum*: id enim significat, *tona*. *Ad latandum in letitia gentis tue*, id est, ad participandam inenarrabilem illam letitiam, quæ nascitur ex visione diuina, quæ est letitia propria gentis tuæ, populi; tui electi, quam extranei gustare non possunt, de qua dicitur in Euangelio, Matth. 23. *Intra in gaudium Domini tui. Vt lauderis cum hereditate tua*, id est, vt finis vltimus sit omnium beneficiorum tuorum, perpetua laus tua, & hereditatis tuæ; vt sine fine lauderis tu, vt opifex, & hereditas tua, vt opificium; tu vt summus, potentissimus, sapientissimus, & optimus artifex, cui nullus est similis; & hereditas tua, vt opus egregium, & incomparabile, cui nullum est simile. Per hereditatem autem intelligitur cœtus iustorum, quem sibi Deus elegit quasi propriam possessionem. Hereditas enim, & possessio pro eodem accipiuntur in Scripturis. Hic duæ sunt difficultates; vna, quod in Hebræo omnia sunt in numero singulari, *Memento mei visita me, vt videam, vt later, vt laudet*; in Græco, & Latino sunt omnia in numero multitudinis, *Memento nostri, visita nos, &c.* sed facilis est concordia; quia in his verbis loquitur populus Dei, qui & vnus est, vt possit loqui in numero singulari, & multitudinem continet, vt possit loqui in numero multitudinis. Præterea non est improbabile, Septuaginta Interpretes legisse voces Hebræas in numero multitudinis, quæ nunc habentur in numero singulari; sola enim differentia est inter hos numeros, quod in singulari est in fine litera *Iod*, in plurali est litera *Vau*, quæ solum differunt; quod vna est paulo breuior, quam altera, sic enim scribitur *iod*, & sic scribitur *vau*; itaque facile fuit librarijs mutare vnam in alteram. Altera difficultas est in illis verbis, *vt lauderis cum hereditate tua*: nam in Hebræo, & Græco sunt tria verba modi infiniti, ad videre, ad latari, ad laudari, quæ nos Latini efferimus per gerundia, ad videndum, ad latandum, ad laudandum: noster autem



Autem interpres vertit per gerundia, duo priora verba, & retulit ad nos, quasi diceret *ad videndum*, id est, *ut videamus ad latandum*, id est, *ut latemur*; & tertium variavit, dicens, *Ut lauderis*, cum debuisset vertere, *ad laudandum*, id est, *ut laudemur*, siue gloriemur. Hanc difficultatem notavit S. Augustinus, ut miratur valde, cur interpres latinus tertium membrum sententiæ ita variaverit. Ad hanc difficultatem respondemus, interpretem Latinum variasse modum interpretationis, ut sententiam redderet clariorem: nam si vertisset, *ad laudandum cum hereditate tua* ambiguum fuisset, quid significaret illud, *ad laudandum*, an *ut laudemur*, vel *ut lauderis*: sed elegit hoc posterius, ut non solum clarius, sed etiam magis indubitata sententia esset. Cæterum quicquid sit de verbis, sensus semper est idem, nam si interpres vertisset, *ut laudemur*, vel, *ut magis sonat vox Hebraica le hallel, ut laudemus nos ipsos*, siue *ut gloriemur*; oporteret subintelligi, *in domino*, iuxta illud Psalmi superioris, *Laudamini in nomine sancto eius*: & illud Apostoli. I. Cor. I. *Qui gloriatur, in domino gloriatur*: quare omnis laus tandem ad Dominum referenda est, & ideo recte vertit interpres, *Ut lauderis cum hereditate tua*; ut omnis obscuritas, & ambiguitas tolleretur. Fateor, hos duos versiculos potuisse etiam exponi de bonis temporalibus, qualia promittebantur, & expectabantur in testamento veteri, sed malui persequi sensum altiorum, & magis intentum à Spiritu S. & ab ipso Propheta, in quem sensum accepit hæc verba S. Bernardus serm. 13. super Cantica.

*Peccauimus cum Patribus nostris, iniuste egimus, iniquitatem fecimus.*

*Patres nostri in Ægypto non intellexerunt mirabilia tua: non fuerunt memores multitudinis misericordie tue.*

*Et irritauerunt ascendentes in mare, mare rubrum.*

*Et saluauit eos propter nomen suum, ut notam faceret potentiam suam.*

*Et increpuit mare rubrum, & exicca-*

*tum est, & eduxit eos in abyssis, sicut in deserto.*

*Et saluauit eos de manu obsequentium, & redemit eos de manu inimici.*

*Et operuit aqua tribulantes eos, vnus ex eis non remansit.*

*Et crediderunt verbis eius, & laudauerunt laudem eius.*

Hic iam incipit Propheta in persona aliorum fidelium minus perfectorum, sed vere poenitentium confiteri peccata sua, & peccata Patrum ab egressu de Ægypto vsque ad sua tempora; ut simul commemoret laudes misericordie Dei, quæ nunquam poenitentibus claudit. Sunt autem hi octo versiculi satis noti ex historia libri Exodi, & ex Psal. 77. neque est hic vlla dissensio inter codices Latines, Græcos, & Hebraicos. Illud *peccauimus cum Patribus nostris*, significat, socij fuimus Patrum nostrorum in peccatis, quia imitati sumus peccata eorum; & sic impleuimus mensuram eorum. Illud *non intellexerunt mirabilia*, refertur ad illud tempus, quo filij Israel egressi de Ægypto, cum vidissent exercitum Pharaonis post se venientem, adeo desponderunt animum ut etiam quærentur de Moyse, qui eos eduxerat de Ægypto, vide cap. 14. Exodi. Nam si intellexissent mirabilia Dei tam multa, quæ præcesserant, omnino confisi fuissent de potentia, & auxilio Domini. Illud, *& irritauerunt*, significat, filios Israel in angustijs illis constitutos, cum ante scernerent mare rubrum, post se Pharaonis exercitum, irritasse Deum diffidentia, & incredulitate sua. Illud, *ascendentes in mare; mare rubrum*, difficile est, nam mare est inferius terra, ac per hoc descenditur in mare, vel ad mare, non ascenditur S. August. respondet, illud, *ascendentes*, referri ad Ægyptum, ut sensus sit ascendentes ex Ægypto, & in mari rubro, id est, ad littus maris rubri constitutos, ibi irritasse iram Dei, itaque notandam esse virgulam post vocem, *ascendentes*. Sed quia in textu Latino non habetur *in mari*, sed *in mare*, & additur

XI.

XII.

XIII.

mare



mare rubrum, dicendum est, illud, *in mare*, positum esse pro *ad mare* ut sensus sit, Hebraei ascendentes de Aegypto irritauerunt Deum ad mare rubrum, siue ad littus maris rubri. In Hebræo clarior est sensus, vbi sic legitur ad verbum, *Irritauerunt super mare, mare rubrum*, id est, irritauerunt Deum, cum essent super mare rubrum, id est, proximi mari rubro. Illud, *in crepuit mare*, metaphorice est, significatur autem, mare, recessisse ad nutum Dei, quo modo recedit velociter, qui timet indignationem, & minas viri potentis. Illud, *in abyssis*, sicut in deserto; est locutio similis illi, Matt. 11. *Cæci vident, surdi audiunt*, id est, qui erant cæci, nunc vident, & qui erant surdi, nunc audiunt. Abyssus enim significat profunditatem aquarum, quæ contraria est locis desertis, & arentibus. Itaque sensus est, *deduxit eos in abyssis*, id est, in locis vbi solebant esse aquæ profundissimæ, ac si eos deduceret per desertum, vbi nullæ sunt aquæ. Illud *laudauerunt laudem eius*; in Hebræo est, *cantauerunt laudem eius*: proinde *laudauerunt*, quod nos habemus; significat, celebrauerunt concinentes laudem eius: quid autem cantauerint, habetur Exod. 15. vbi ponitur canticum illud, *Cantemus domino, gloriose enim magnificatus est, &c.*

XIV. *Cito fecerunt, obliui sunt operum eius,*  
XV. *& non sustinuerunt consilium eius.*

*Et concupierunt concupiscentiam in deserto: & tentauerunt Deum in inaquoso.*

XVI. *Et dedit eis petitionem ipsorum, & misit saturitatem in animas eorum.*

Pergit Propheta in enarranda ingratitude populi, qui cum vidisset miraculum tam insolitum in mari rubro, & Deum tam eximie inde laudasset: mox occurrente penuria panis, & aquæ, obliui sunt omnipotentis & providentiæ Dei, & in verba impatientiæ, & infidelitatis proruperunt. *Cito fecerunt*, id est, festinauerunt, siue accelerauerunt,

ut clarius habetur in textu Hebræo, & Græco. Quid autem cito fecerint, & in quo festinauerint, explicat dicens, *obliui sunt operum eius*, id est, festinauerunt obliuisci operum Dei mirabilium, quæ viderant. *Et non sustinuerunt consilium Dei*, id est, non patienter expectauerunt finem diuino consilio constitutum. Deus enim permittens illos ad tempus affligi, tentabat fidem, & spem, & dilectionem ipsorum: sed ipsi non intelligentes consilium Dei, murmurabant, quasi Deus curam illorum non haberet, aut eos iuuare non posset. Explicat deinde in particulari, in qua re impatientes fuerint, dicens, *Et concupierunt concupiscentiam in deserto, & tentauerunt Deum in inaquoso*, id est, non potuerunt, vel ad modicum tempus tolerare famem, & sitim in deserto inaquoso, vbi decrant panis, & aqua. *Illud concupierunt concupiscentiam*, est phrasis non omnino inusitata etiam apud Latinos; sic enim dicimus, *vivere vitam, & seruare seruitutem*, sed apud Hebræos frequens est ponere concupiscentiam pro re concupita, desiderium pro re desiderata, & petitionem pro re petita. vnde sunt illa, *Desiderium eorum attulit eis*. Psalm. 77. *& dabit tibi petitiones cordis tui*, Psalm. 36. & in hoc ipso Psalmo, versiculo sequenti, *Et dedit eis petitionem ipsorum*, id est, panes, carnes, & aquam, quæ petierant. *Et misit saturitatem in animas eorum*, id est, satiauit appetitum ipsorum abundantia panum, & carnum, & aquarum copia, ut perspicuum est ex cap. 16. & 17. Exodi & ex cap. 11. & 20. Numeri. In Hebræo pro, *saturitatem*, habetur, *tenuitatem*, siue *maciem*. Sed Septuaginta Interpretes non legerunt, *razon*, quod significat *maciem*, sed *razon*, quod significat *complacentiam*, quod recte positum est pro saturitate, quia illis cibis saturamur, qui nobis valde placent. & hanc esse veram, lectionem perspicuum est; quia est conformis historiæ; sic enim legimus Exod. 12. *Vespere comederis carnes, & mane saturabimini panibus*, & in Psalm. 77. legimus, *Comederunt, & saturati sunt nimis: desiderium eorum attulit eis, & non sunt fraudati à desiderio suo.*

Et irri-



*Et irritauerunt Moysen in castris, Aaron sanctum Domini.*

*Aperta est terra, & deglutiuit Dathan, & operuit super congregationem Abiron.*

*Et exarsit ignis in synagoga eorum, flamma combussit peccatores.*

Attingit hoc loco Propheta historiam Dathan, & Abiron, quæ habetur c. 16. libri Numeri. *Et irritauerunt Moysen, in castris, id est, Core, Dathan, & Abiron, irritauerunt Moysen, obijcientes ei, quod imperium si bi surpasset super filios Israel. Aaron sanctum Domini, id est, non solum Moysen, sed etiam Aaron fratrem eius irritauerunt, quem Deus sibi sanctificauerat, ut sacerdotio fungeretur. Aperta est terra, & deglutiuit Dathan cum sociis eius Core, & Abiron, & omnis familia & substantia eorum. Et operuit super congregationem Abiron, id est, terra disrupa posteaquam deglutiuit schismaticos, iterum clausa est, & cooperuit omnem congregationem Abiron, & sociorum eius. Illud, super, redundat quamuis enim habeatur in Hebræo; tamen S. Hieron. vertit, *Et operuit synagoga Abiron*: sed Latinus interpretes imitari voluit phrasim Hebraicam, quod etiam fecerunt LXX. Interpretes. *Et exarsit ignis in synagoga eorum, flamma combussit peccatores*: nam, ut narratur in eodem cap. 16. Numeri, cum deglutisset terra Core, Dathan, & Abiron cum tabernaculis ipsorum, diuino iussu excitatus est ignis qui combussit ducentos quinquaginta viros, qui præsumperant incensum offerre Deo; quod ad eorum officium non pertinebat: & paulo post cum murmuraret populus contra Moysen, quasi ipse viros illos occidisset, iterum exarsit ignis immissus à Deo, qui concremauit quatuordecim milia, & septingentos viros. Pro voce, *peccatores*, in Hebræo est, *resabim*, quod impios significat. Itaque non significantur hoc loco quicunque peccatores, sed grauissimi, schismatici videlicet, & eorum fautores.*

*Et fecerunt vitulum in Horeb, & adorauerunt sculptile.*

*Et mutauerunt gloriam suam in similitudinem vituli comedentis fenum.*

*Obliti sunt Deum, qui saluauit eos, qui fecit magnalia in Ægypto, mirabilia in terra Cham, terribilia in mari rubro.*

*Et dixit, ut disperderet eos si non Moyses electus eius stetisset in confractione in conspectu eius.*

*Ut auerteret iram eius, ne disperderet eos: & pro nihilo habuerunt terram desiderabilem.*

Detestatur nunc Propheta Idololatriam populi, qui vitulum aureum fieri iussit, eumque tanquam Deum adorauit: & simul laudat misericordiam Dei, qui ad preces Moysis placatus, tam immane peccatum populo condonauit, habetur hæc historia in libro Exod. c. 32. *Et fecerunt vitulum in Horeb, i. vitulum aureum, ad similitudinem Idoli Ægyptiaci fieri curauerunt ab Aaron, qui metu compulsus obtemperauit vocibus populi. Fecerunt autem illud idolum in Horeb, id est, in regione adiacente monti, qui vocatur Horeb, & idem est cum monte Sinai, ut Theodoretus docet, & notum est ex Deut. c. 4. vers. 15. & Exod. cap. 19. vers. 28.*

*Et adorauerunt sculptile; vitulum videlicet aureum: quamuis enim vitulus ille opere potius conflatoris, quam sculptoris factus fuerit, ut habetur in textu Hebræo; tamen sculptile dictum est significatione generali, ut comprehendat omnes imagines solidas, siue ligneas & marmoreas, quæ propriè sculpuntur, siue aureas, & argenteas, quæ propriè conflantur. Meminit autem David montis Horeb, & sculptilis, cum notat idololatriam populi, quia in monte Horeb non multo antea Deus apprensus, initio diuinæ legis dixerat, non facies tibi sculptile, non adorabis ea, neque coles. Itaque multum auget crimen Hebræorum, quod in ipso loco fecerint, & adorauerint sculptile, siue conflatile, vbi hoc ipsum præcisè veritum fuerat. Et mutauerunt gloriam suam in similitu-*



*dinem vituli comedentis fœnum.* Exaggerat Prophetâ stultitiam Hebræorum, quod substituentes idolum in forma vituli Deo vero, commutauerint gloriam suam, id est, Deum verum, qui erat gloria ipsorum, in imaginem animantis bruti: nec dicit, Deum in vitulum, sed quod vilis est, in imaginem vituli, id est, rem preciosissimam in rem vilissimam. *Obliti sunt Deum, qui saluauit eos, qui fecit magnalia in Ægypto, mirabilia in terra Cham, terribilia in mari rubro.* Hoc etiam pertinet ad augendam stultitiam Hebræorum, qui obliti sunt Dei, qui eos saluauerat de captiuitate Pharaonis, vt colerent Deum, qui neque se, neque alios saluare poterat; nam Moyses contriuit vitulum aureum, & redegit in puluerem; ipso vitulo non se defendente, ac ne sentiente quidem. Item obliti sunt Hebræi Dei omnipotentis, qui fecit magnalia in Ægypto, id est, mirabilia signa, & prodigia in tota terra Ægypti, quæ etiam dicitur terra Cham, & terribilia in mari rubro, sicans mare illud, vt transirent filij Israel, & iterum aquis replens, vt suffocarentur Ægyptij, vt coluerunt Deum inanem, & imbellem, simulachrum videlicet mutum, & inutile. Hic notanda est temeritas Io. Caluini hæresiarchæ, qui scripsit Hebræos in vitulo aureo coluisse Deum verum; cum Dauid apertè dicat. *Obliti sunt Deum, qui saluauit eos.* Et paulò ante, *Mutauerunt gloriam suam in similitudinem vituli comedentis fœnum.* Vide quæ scripsimus in libro de Reliquijs, & imaginibus cap. 13. *Et dixit, vt disperderet eos, si non Moyses electus eius stetisset in confractione in conspectu eius,* id est, tunc Deus dixit, ac pronunciauit voluntatem suam esse, vt disperderet populum Hebræorum; & fecisset, nisi Moyses electus famulus eius intercessione sua obstitisset, vt auerteret iram eius, ne disperderet eos. Illud, in confractione, in Hebræo est, *baperez*, quod significat, in diuisione, siue in diruptione. S. Hieronymus secutus priorem significationem vertit, nisi Moyses stetisset medius contra faciem illius, id est, nisi opponens se medium, diuisisset Deum à populo, & comodo fecisset ne gladius iræ

Dei ad populum perueniret: sed Septuaginta Interpretes secuti posteriorem significationem, verterunt, *vt non discederent*, nisi stetisset in fractura, & diruptione, hoc est, nisi opposuisset seruiux imminenti: vel, nisi dirupto iam muro stetisset in medio, vt impediret irruptionem iræ Dei. Itaque metaphora sumpta est vel ab eo, qui sustinet ruentem fabricam, & impedit, ne penitus ruat: vel ab eo, qui dirupto iam muro opponit se loco muri, vt arceat ingressum hostium: summa est, magnam vim habere intercessionem Sanctorum apud Deum, vt hoc loco S. Augustinus annotauit. Et certè si non essent preces affidux seruatorum, & amicorum Dei, quibus Deus p'acari se patitur, Mundus, qui totus in maligno positus est, non tam diu subsisteret.

*Et pro nihilo habuerunt terram desiderabilem.*

*Non crediderunt verbo eius, & murmurauerunt in tabernaculis suis: non exaudierunt vocem Domini.*

*Et eleuauit manum suam super eos, vt prosterneret eos in deserto,*

*Et vt deiceret semen eorum in nationibus, & disperderet eos in regionibus.*

In parte versiculi vigesimi quarti, in qua nouum versum incipiunt Hebræi, & tribus sequentibus versiculis, commemorat Prophetâ peccatum illud populi Hebræi, quo spreuerunt terram promissionis, quam Deus esse dixerat, fluentem lacte, & melle. Habetur hæc historia in libr. Num. c. 13. & 14. & clarius Deut. 1. *Et pro nihilo*, inquit, *habuerunt terram desiderabilem*, id est, terram promissionis, quam vti felicissimam desiderare debuissent, ipsi contempserunt, & pro nihilo habuerunt, dicentes, *Terra hæc deuorat habitatores suos.* S. Hieron. vertit, *Et desperauerunt terram desiderabilem.* *Non crediderunt verbo eius*, id est, Dei, qui toties dixerat, terram esse optimam, & murmuraue-



erunt in tabernaculis suis aduersus Domi-  
num, qui de Ægypto illos eduxerat, vt in  
terram promissionis induceret. *Non exau-  
dierunt vocem Domini*, id est, non obedi-  
erunt præceptis eius. *Et eleuauit manum  
suam super eos, vt prosterneret eos in deserto:*  
*Et vt deijceret semen eorum in nationibus, &  
disperderet eos in regionibus*, id est, leuauit  
manum suam gladio iustitiæ armatam su-  
per peccatorem populum suum, vt eos qui  
tunc murmurauerant, occideret in deserto:  
& filios eorum deiectos, & abiectos, disper-  
geret inter gentes, vt non essent amplius po-  
pulus, aut Resp. Et quidem illud prius exe-  
cutioni mandauit Deus: omnes enim, qui  
murmurauerant, mortui sunt in solitudine,  
vt Scriptura refert Numer. 14. Illud autem  
posterius non mandauit tunc executioni  
propter preces Moysis: sed postea irritatus  
maioribus sceleribus omnino impleuit tum  
sub Rege Babylonis, tum præcipue sub Ti-  
to, & Vespasiano, vt nos videmus. Quo lo-  
co notandum est, quàm grauitè irascatur  
Deus in eos, qui spernunt Regnum cælo-  
rum nobis à Deo filio prædicatum, & pro-  
missum: si tam grauitè iratus est Hebræis,  
quod spreuerint terram promissionis præ-  
dicatam à Moysè, quæ nihil aliud, nisi terra  
erat, & figura Regni cælorum.

*Et initiati sunt Beelphegor, & com-  
ederunt sacrificia mortuorum.*

*Et irritauerunt eum in adinuentioni-  
bus suis, & multiplicata est in eis ruina.*

*Et stetit Phinees, & placuit, & cessa-  
uit quassatio.*

*Et reputatum est ei in iustitiam, in ge-  
nerationem & generationem vsque in  
sempiternum.*

Attingit hoc loco Dauid aliud peccatum  
populi, cuius historia habetur Nu. 25. Nam  
vt ibi legimus, filij Israel decepti à filiabus  
Moab, coeperunt fornicari cum eis, & cole-  
re Idolum earum, dictum Beel phegor: ex  
quo iratus Dominus iussit suspendi in pa-  
ribulis omnes Principes populi. Sed cum

Phinees filius Eleazari, nepos Aaronis Sa-  
cerdotes, zelo Dei ductus, occidisset vnum  
de filijs Israel vna cum muliere Madianiti-  
de, in ipso actu fornicationis, placatus fuit  
Deus, ob meritum zeli ipsius, toti populo.  
*Et initiati sunt Beelphegor*, id est, & addide-  
runt filij Israel ad alia peccata, vt initiaren-  
tur, siue consecrarentur in honorem idoli  
Moabitarum, quod vocabatur Beelphegor.  
Dicebatur autem idolum Moabitarum  
Beel Phegor à monte Phogor, cuius montis  
mentio fit Num. 23. quasi diceretur, Domi-  
nus Phegor. Baal enim Dominum signifi-  
cat. Baal, & Beel idem sunt: sed Hebræi di-  
cunt, Baal Phegor, Græci, Beel Phegor. *Et  
comederunt sacrificia mortuorum*, id est, co-  
mederunt sacrificia obolata Dijs mortuis,  
non Deo viuo, qui vnus verus est Deus: di-  
cuntur autem Dijs mortui, vel ipsa idola,  
quæ veluti mortua oculos habent, & non vi-  
dent, aures habent, & non audiunt: vel ho-  
mines mortui, qui à paganis referebantur in  
Deos, quales erant in Ægypto Apis, &  
Serapis; apud Græcos Iupiter, & Apol-  
lo; apud Romanos Romulus, & alij.  
*Et irritauerunt eum in adinuentionibus suis,*  
*& multiplicata est in eis ruina*, id est, ir-  
ritauerunt Deum in cultu nouorum Deo-  
rum, quem ipsi excogitauerunt; non quod  
ipsi primi fuerint inuentores Idoli Beel-  
phegor, sed quod fuerint primi, qui cul-  
tum illius idoli à Moabitis acceptum in-  
troduxerunt in populum Israeliticum. *Et  
multiplicata est in eis ruina*; id est, pro-  
pter hoc peccatum multiplex ruina facta  
est in populo, plurimis videlicet miserè in-  
teremptis. *Et stetit Phinees, & placu-  
it, & cessauit quassatio*, id est, Phi-  
nees zelo diuini honoris accensus stetit in-  
trepidus aduersus impios desertores an-  
tiquæ religionis, & placauit zelo suo  
Deum, & sic cessauit inchoata strages in  
populo Dei: vox Hebraica, *palal*, ambigua  
est: nam & iudicare, & orare, atque ora-  
tione placare significat. Sanctus Hiero-  
nymus primam significationem secutus  
vertit, Stetit Phinees, & diiudicauit. Sep-  
tuaginta Interpretes secuti tertiam signi-  
fica-



ficationem verterunt, *Stetit Phinees, & placuit*: uterque sensus est verus. Phinees enim dijudicando, & damnando, ac puniendo impios, hoc facto quasi sacrificio Deo gratissimo Deum placavit. *Et reputatum est ei ad iustitiam*, id est, à Deo, qui scrutatur corda, & qui probe novit optimam intentionem Phinees, reputatum est hoc factum non iniusta cædes, sed iusta punitio, quæ non poenam mereretur, sed laudem, & præmium: idque in generationem & generationem usque in sempiternum. Hoc dicit Propheta, quia propter meritum illius facti, ut habetur Numer. 25. *Stabilivit Deus dignitatem summi Sacerdotij ipsi Phinees, & posteris eius in æternum*, id est, toto tempore, quo duraret Respubl. Iudaica.

XXXII.

*Et irritauerunt eum ad aquas contradictionis: & vexatus est Moyses propter eos, quia exacerbauerunt spiritum eius.*

Transit Propheta ad aliud peccatum Iudæorum, quod habetur in lib. Num. ca. 20. Vbi populus altercari cœpit cum Moysse propter aquæ penuriam: Moyses autem perturbatus nonnihil hæsitasse videtur dicens. Num de petra hac aquam vobis poterimus elicere? percussit tamen bis virga petram, & egressæ sunt aquæ in maxima copia. Sed Deus subratus Moysi propter hæsitacionem, puniuit illum ea pœna, ut non introduceret ipse populum in terram promissionis, sed moreretur in itinere. *Et irritauerunt eum*, id est, Hebræi, Deum, *ad aquas contradictionis*, id est, in eo loco vbi propter aquæ penuriam contradixerunt Moysi, & iurgati sunt aduersus eum. Et vexatus est Moyses propter eos, id est, & anxius est, atque afflictus Moyses propter iurgia populi. *Quia exacerbauerunt spiritum eius*, id est, quia iurgando, & murmurando aduersus Moysen, ad amaritudinem, & tristitiam adduxerunt spiritum eius, qui alias alacer, & promptus esse solebat ad omnia Dei mandata sine vlla hæsitacione complenda.

XXXIII.

*Et distinxit in labijs suis; non disperdi-*

*derunt gentes; quas dixit Dominus illis.*

*Et commixti sunt inter gentes, & didicerunt opera eorum, & seruiuerunt scriptilibus eorum, & factum est illis in scandalum.*

Aliqui coniungunt primam partem versiculi trigessimij tertij, cum versiculo superiore, ut sensus sit, Moyses non plena fide imperavit petræ, ut aquas funderet, quemadmodum iusserat Deus dicens Moysi, & Aaroni, loquimini ad petram, & ipsa dabit aquas: sed cum distinctione, & dubitatione dixit; Num de petra hac vobis aquam poterimus elicere? Itaq; illud, *distinxit in labijs suis*, significare volunt, Moysen non absolute imperasse petræ, sed distinguendo, & diuidendo verba, hæsitasse; sic enim hunc locum intellexit S. Augustinus, & auctores Græci, Theodoretus, & Euthymius: Ceterum aduersus hanc expositionem duo pugnant. Vnum, quod verba sic exposita, non coherent cum sequentibus, non disperdiderunt gentes, &c. Alterum, quod verbum tum Græcum, tum Hebraicum, tum etiam Latinum, distinguere labijs, in alijs locis Scripturæ, non significat; dubitare, vel hæsitare, sed absolute pronuciare. Psal. 65. *Reddam tibi vota mea, quæ distinxerunt labia mea.* vbi habetur idem verbum Græcum, *ἔκτανεν*, quod habetur hoc loco: ut etiam habetur Num. 30. & Leuit. 15. vbi agitur de promissione voti, vel iuramenti. Sic etiam vox Hebraica, *bata*, quæ habetur hoc loco, significat loqui, promittere, pronuciare, ut patet ex c. 1. Leuitici, & c. 30. Num. supra citatis: nusquam autem dubitare, vel hæsitare. Denique vox Latina, distinguere labijs, & distincte loqui, non videtur ad ambiguitatem, sed ad perspicuitatem potius pertinere. Existimo igitur, saluo meliore iudicio, in hoc versiculo inchoari aliam historiam, quæ habetur in libro Iudicum, vbi legimus, Hebræos non disperdidisse omnes gentes idololatrias ex terra promissionis, quemadmodum Dominus iusserat, sed habitasse cum illis, & didicisse superstitiones, & sa-



& sacrilegia eorum. Ait igitur David: *Et distinxit in labiis suis*, id est, Deus aperte pronuntiavit, & reprehendit Hebræos, quod non exterminauerint gentes, quas dixit Dominus illis, id est, quas ipse idem Dominus iusserat exterminari, Deut. 7. Videtur David alludere ad verba Angeli, qui in persona Domini sic loquitur in cap. 2. Iudicum: *Eduxi vos de Aegypto, & introduxi in terram, pro qua iuravi patribus vestris, & pollicitus sum, ut non facerem irritum pactum meum vobiscum in sempiternum, ita duntaxat, ut non feriretis foedus cum habitatoribus terra huius, & aras eorum subuerteretis; & nolistis audire vocem meam. Et commissi sunt inter gentes, & didicerunt opera eorum, & seruiunt sculptilibus eorum.* Id notum est ex toto libro Iudicum, *Et factum est illis in scandalum*, id est, in ruina: ea enim causa fuit, ut traderentur à Deo in potestatem diuersorum Regum idololatrarum, ut patet ex a. 2. Iudicum, vel potius ex toto libro. Iustum enim fuit, ut qui Diabolum pro Deo elegerant, traderentur in seruitutem eorum, quibus Diabolus dominabatur.

Et *erant filios suos, & filias suas* Dæmoniorum.

Et effuderunt sanguinem innocentem, sanguinem filiorum suorum, & filiarum suarum, quas sacrificauerunt sculptilibus Chanaan.

Et infecta est terra in sanguinibus, & contaminata est in operibus eorum, & fornicati sunt in adinuentiombus suis.

Hæc non habentur in libro Iudicum; tamen vera esse, necesse est, cum à Spiritu S. per Prophetam dicantur: & credibile est, ea per traditionem à maioribus ad Dauidem peruenisse. Semel Deus verus imperauit Abrahamo, ut filium immolaret; quod tamen perfici noluit, contentus præparatione mentis ad obediendum: Dij vero falsi, Dæmones videlicet, inimici crudelissimi generis humani, inuidentes Deo tantam ferui sui Abrahami obedientiam, non contenti promptitudinæ voluntatis, re ipsa filios & filias sibi sacri-

ficari à propriis parentibus voluerunt. Et tanta erat cæcitas hominum, ut non agnoscerent tyrannidem Dæmoniorum, & quantum interesset inter iugum suauis conditoris, & compedes ferreas & durissimas destructoris. Illud, *infecta est terra in sanguinibus*, in Græco est, *ἡ πόλις μόνη*, id est, interfecta est terra. Sed in Hebræo est, *thechenaph*, id est, infecta, siue polluta; sensus autem idem est: dicitur enim terra interfecta, id est, destructa in sanguinibus, quando ob multitudinem interfectorum, & copiam sanguinis effusi desolatur: siue autem dicatur terra destructa, siue polluta sanguine, significatur cædes facta filiorum & filiarum in sacrificium Dæmoniorum, sed per verbum, *destructa*, siue *desolata*, significatur maior cædes, quam per verbum, *infecta*. Illud vero, *& fornicati sunt in adinuentiombus suis*, significat spirituales fornicationem, quam committebat Synagoga Iudæorum; quæ Deo desponsata fuerat, cum adorabat idola, illisq; tanquã adulteris viris se subiciebat. Dicitur vero cultus idolorum propria ipsorum adinuentio, quia non eam didicerat à Moyse legislatore, sed ipsi per se cogitauerat bonũ esse imitari gētes idololatræ.

Et iratus est furore Dominus in populum suum, & abominatus est hereditatem suam.

Et tradidit eos in manus gentium, & dominati sunt eorum, qui oderunt eos.

Et tribulauerunt eos inimici eorum, & humiliati sunt sub manibus eorum, sepe liberauit eos.

Ipsi autem exacerbauerunt eum in consilio suo: & humiliati sunt in iniquitatibus suis.

Et vidit, cum tribularentur, & audiuit orationem eorum.

Et memor fuit testamenti sui, & penituit eum secundum multitudinem misericordiæ suæ.

Et dedit eos in misericordias, in conspectu omnium, qui ceperant eos.

Kkkk 3

Id

תחנף

XXXVIII.

XXXIX.

XL.

XLI.

XLII.

XLIII.

XLIV.



In his septem versiculis declarat Prophe-  
ta historiam libri Iudicum, in qua narratur,  
Hebræos ob peccata sua, quibus Deum ad i-  
racundiam prouocabant, traditos fuisse  
à Deo frequenter in potestatem hostium,  
Moabitarum, Ammonitarum, Philistinor-  
um, & aliorum: sed cum ad pœnitentiam  
redirent, solitum quoque fuisse Deum, exci-  
tare virum aliquem strenuum, per quem li-  
berarentur, vt Iephthæ, Gedeonem, Sampso-  
nem, & alios. Versiculus 41. vbi dicitur, *ex-  
acerbauerunt eum in consilio suo*, non signifi-  
cat in consilio Dei de liberandis Hebræis, vt  
multi existimant, sed in consilio ipsorum Iu-  
dæorum, qui sæpe consilium inibant reced-  
endi à Deo: nam in Hebræo habetur ex-  
presse, *In consilio ipsorum*. Proinde illud, *suo*,  
quod apud Latinos est ambiguum, expli-  
candum est per textum Hebræum, vbi nul-  
la est ambiguitas. Vltimus versiculus, *Et de-  
dit eos in misericordias, in conspectu omnium*,  
*qui ceperant eos*, duobus modis exponi po-  
test. Primum vt sensus sit, fecit Deus per  
providentiam suam, vt qui captiuos duxerant  
Hebræos, eorum miserentur, & vel relaxa-  
rent, vt fecit Cyrus & Darius; vel benigne  
tractarent, vt fecit Nabuchodonosor cum  
multis Hebræis. Ita exponit Theodoretus.  
Sed exempla huius misericordiæ non facile  
inueniuntur, nisi post tempora Dauidis. Et  
præterea Dauid dicit, *in conspectu omnium*,  
*qui ceperant eos*; non est autem verum, om-  
nes qui ceperant Hebræos, habuisse erga  
eos misericordiam, neque ante tempora Da-  
uidis, neque postea. Videtur igitur probabi-  
lior sententia S. Augustini, quam etiam at-  
tingit Euthymius, vt sensus sit, *dedit eos in  
misericordias*, id est, fecit cum eis Deus mise-  
ricordiam, siue posuit eos in sinum miseri-  
cordiæ suæ, *in conspectu omnium, qui ceperant  
eos*, id est, videntibus & mirantibus iis, qui  
eos ceperant; semper enim Deus tam eui-  
denti signo misericordiæ suæ liberauit popu-  
lum suum siue de Ægypto, siue de potestate  
Moabitarum, vel Philistinorum, vel aliorum,  
vt ne hostes quidem negare possent, Deum  
pugnare pro populo suo. Reliqui versiculi  
nullam habent difficultatem.

*Saluos nos fac Domine Deus noster, &  
congrega nos de nationibus.*

*Vt consiteamur nomini sancto tuo: &  
glorietur in laude tua.*

*Benedictus Dominus Deus Israël à sa-  
culo, & vsque in sæculum: & dicet omnis  
populus, fiat fiat.*

Hæc est conclusio Psalmi, qua precatur  
Deum Propheta, vt omnem populum fide-  
lem congreget de nationibus, id est, reducat om-  
nes dispersos ad cœtum piorum, vt omnes  
simul gratias agant Deo, eumq; laudent, &  
glorietur in laude ipsius. Existimant qui-  
dem aliqui, Dauidem loqui de dispersione  
& captiuitate Babylonica, quam per spiri-  
tum præuidebat futuram; sed credibilis est,  
eum loqui de dispersione inter gentes, quæ  
adhuc supererat in terra promissionis, ini-  
tio Regni Dauidis, aduersus quas gentes  
multa ipse bella gessit, vt perspicuum est ex  
lib. 1. & 2. Regum. Concludit postremo Da-  
uid Deum laudans, & dicens: *Benedictus sit  
Dominus Deus Israël omni tempore*, vel potius  
in æternum: & *omnis populus confirmet be-  
nedictionem, dicens, fiat, fiat*, siue Amen, A-  
men. Atque hic est finis libri quarti secun-  
dum Hebræos.

## PSALMVS CVI.

*Titulus, & Argumentum.*

*Alleluia.*

**T**itulus est, Alleluia, quam vocem codices  
Hebræici nunc habent in fine Psalmi su-  
terioris. Sed LXX. Interpretes ponunt eam ini-  
tio huius Psalmi, quoniam ita in suis codicib.  
Hebræicis inueniunt. Recte autem titulus  
Psalmi est, Alleluia, id est, laudate Dominum;  
quoniam in hoc Psalmo laudatur primo mise-  
ricordia Dei, qua liberat homines à quatuor  
communibus miseriis, quas paulo post enume-  
rabimus: & ideo quater repetuntur duo ver-  
suli, Clamauerunt ad Dominum, cum tri-  
bularentur, & de necessitatibus eorum libe-  
rauit eos, & Configeantur Domino miseri-  
cordiæ



cordie eius, & mirabilia eius filiis hominum. Deinde in altera parte salmi laudatur omnipotentia Dei, quæ solo nutu inuitat rerum naturas. Dissensio quidem est inter expositores de quatuor illis miseris: alij enim volunt eas esse corporales, & ad populum Hebræorum proprie pertinere. Alij existimant corporales esse, sed pertinere ad humanum genus vniuersum, non ad solos Iudaos. Alij spirituales esse censent, & liberationem ab illis, esse propriam Electorum. Alij denique spirituales esse dicunt, & liberationem ad omnes pertinere. Sed videntur sententia ista facile posse ad concordiam redigi, si dicamus ad litteram de miseris corporalib. agi, mystice de spiritualibus; & ad genus humani vniuersum pertinere: sed exempla poni in iis rebus, quæ populo Hebræorum proprie contigerunt: liberationem vero perfectam ad solos Electos, imperfectam ad omnes pertinere.

## EXPLICATIO PSALMI CVI.

**C**onfitemini Domino, quoniam bonus; quoniam in saculum misericordiae eius.

Dicant, qui redempti sunt à Domino, quos redemit de manu inimici, & de regionibus congregauit eos.

A Solis ortu, & occasu, ab Aquilone & mari.

Hæc est præfatio totius Psalmi, in qua Dauid hortatur omnes, qui experti sunt misericordias Domini, vt confiteantur laudes Domini; ac potissimum confiteantur ipsi Domino, quod ipse sit vere bonus & misericors, & misericordia eius nunquam deficiat. Et quidem maxime proprie inuitat fideles, quos redemit sanguine Vniuenti sui: de manu inimici potentissimi, à quo captiui tenebantur ad ipsius voluntatem, id est, Principis tenebrarum; quosq; congregauit in vnum populum, in vnam Ecclesiam, in vnum Regnum filij dilectionis suæ, non ex Ægypto, vel Babylone, vt olim Hebræos, sed ab ortu Solis, & occasu, ab Aquilone & mari, id est, à quatuor mundi partibus, siue ex toto orbe terrarum, iuxta illud Ioan. 10. Alias oues ha-

bes, quæ non sunt ex hoc ouili, & illas me oportet me adducere, & vocem meam audient, & fiet vnum ouile & vnus pastor. Et Ioann. 11. Quia Iesus moriturus erat pro gente, & non solum pro gente, sed vt filios Dei, qui erat diffusi, congregaret in vnum. Quamuis autem maxime proprie inuitentur fideles, siue ex Hebræis, siue ex Gentibus: tamen inuitantur etiam generatim omnes homines, quos quocunque loco & tempore liberauit Dominus de quacunque vexatione: nam redemptio in Scripturis accipitur passim pro liberatione; etiam si non fiat pretio interueniente: item quos liberauit de manu, id est, potestate cuiuscunque inimici: denique nos liberauit de quocunque exilio, de quacunque dispersione, de quacunque extremitate terræ, & reuocauit in patriam, atque ad populum suum congregauit. Porro illa descriptio, à Solis ortu, & occasu, ab Aquilone & mari, continet, vt notum est, longitudinem & latitudinem terræ: nam longitudo incipit ab ea regione, vnde oritur Sol, & desinit in eam, vbi Sol occidit: latitudo incipit ab ea parte, vnde flat ventus, qui dicitur Aquilo, & desinit in eam, quæ alluitur mari magno, quod Oceanus vocatur, quæ pars Australis etiam dici solet, quia ventus Ausfer, Aquiloni oppositus, inde oritur.

Errauerunt in solitudine, in inagnoso, viam ciuitatis habitaculi non inuenerunt.

Esurientes & sitientes: anima eorum in ipsis defecit.

Et clamauerunt ad Dominum, cum tribularentur, & de necessitatibus eorum eduxit eos.

Et eduxit eos in viam rectam, vt irent in ciuitatem habitationis.

Confiteantur Domino misericordie eius, & mirabilia eius filiis hominum.

Quia satiavit animam inanem: & animam esurientem satiavit bonis.

Hæc

IV.

V.

VI.

VII.

VIII.

IX.



Hæc est prima pars Psalmi, in qua explicatur liberatio à prima miseria. Quatuor sunt miseriæ communes corporales, & quatuor etiam spirituales. Corporales miseriæ sunt, primo fames & sitis, quæ oriuntur à sterilitate terræ, vel penuria pluviæ cœlestis, id est, à principio extrinseco naturali: secundo captiuitas, quæ oritur ab aliena violentia, id est, à principio extrinseco voluntario: tertio morbus siue ægrotatio, quæ oritur ab interna mala constitutione, id est, à principio interno naturali: quarto periculum naufragij, quod oritur à principio externo naturali, id est, ab impulsu ventorum, & à principio interno voluntario, id est, à curiositate hominum, qui non contenti solido elemento terre, per liquidum etiam iter facere voluerunt. Miseriæ quatuor spirituales hæc sunt, quæ à Theologis dicuntur vulnera naturæ, relicta in nobis ex peccato originali: ignorantia in mente, concupiscentia in appetitu concupiscibili, infirmitas in appetitu irascibili, & malitia in voluntate: quorum vulnere contraria sunt, prudentia in mente, temperantia in appetitu concupiscibili, fortitudo in irascibili, iustitia in voluntate, quæ dicuntur virtutes quatuor Cardinales. Vide S. Thomam in p. 2. q. 85. artic. 3. Igitur in hac prima parte Psalmi cantatur à Propheta misericordia Dei liberans à prima miseria tam corporali, quam spirituali. Videtur autem alludere ad famem & sitim, quam passi sunt Hebræi in deserto: sed tamen doctrina communis est, atque ad omnes pertinens, vt supra diximus. Sic igitur ait: *Errauerunt in solitudine, in inaquoso*, id est, multi homines quærentes patriam suam, errauerunt aliquamdiu per inuiam, & inaquosam solitudinem, quod Iudæis contigit per annos quadraginta; & *viam ciuitatis habitaculi non inueniunt*, id est, longo tempore vagantes non inueniebant viam, quæ ducit ad ciuitatem propriæ habitationis, vbi tuto habitare & requiescere possent. *Esurientes & sitientes, anima eorum in ipsis defecit*, id est, errauerunt in solitudine esurientes & sitientes, quia neque panis ibi reperitur, neque aqua: & ideo anima, id est, vita eorum in ipsis præ fame

& siti deficiebat. *Et clamauerunt ad Dominum, cum tribularentur*, id est, deficiente omnino humano auxilio conuersi sunt ad implorandum adiutorium Dei: & *de necessitatibus eorum eripuit eos*, id est, non defuit inuocatus Deus, sed pro innata sibi misericordia liberauit eos. *Et deduxit eos in viam rectam*, vt irent in ciuitatem habitationis, id est, hoc modo eripuit eos de necessitatibus suis, quoniam ostendit eis viam rectam; imo in eam eos deduxit, vt per eam breui itinere peruenirent ad ciuitatem suæ habitationis. *Confiteantur Domino misericordia eius*, id est, iustum est igitur, vt tanta beneficia misericorditer præstata hominibus, confiteantur Deo laudem, siue agnoscantur ab omnibus, vt vere beneficia Dei: & *mirabilia eius filiis hominum*, id est, mirabilia opera Dei exhibita filiis hominum ad eorum liberationem, confiteantur Deo auctori laudem suam; in-textu Hebraico clarius habetur: *Confiteantur Domino misericordiam eius*, id est, homines liberati confiteantur Domino misericordiam eius. Textus Græcus utroque modo intelligi potest, cum vox, *ἐκιν*, possit esse tam in casu nominandi, quam accusandi: sed res non est magni momenti. *Quia satiauit animam inanem*, id est, quia mirabili modo alimoniam parauit in solitudine, & inde repleuit animam inanem, homines videlicet ieiunos; & *esurientes saturauit bonis*, id est, & eosdem homines valde esurientes non solum pavit, sed etiam satiauit optimis cibis, pane de cœlo, Angelorum manibus allato. Hæc omnia, vt dixi, de cibo corporali Iudæis præstato, possunt satis commode exponi; sed non dubium est, quin hoc exemplo docere velit Propheta, omnes alios, qui de errore viæ, & à miseria famis & sitis liberantur, à Deo liberari, & misericordiae eius gratias debere. Neque dubium esse potest, quin Propheta respexit præcipue ad ignorantiam salutis, qua plurimi laborant, & quasi extra viam in deserto vagantur, esurientes & sitientes veritatis cognitionem, fontem sapientiæ & prudentiæ. Omnes enim naturaliter bonum appetunt, neque



neque vllus est, qui non optet beatitudinem, ac per hoc etiam notitiam viæ, quæ ad illam ducit: sed tamen plurimi præoccupati cognitione & concupiscentia temporalium bonorum, beatitudinem quærunt, vbi non est, imo etiam beatitudinem esse opinantur eam, quæ vere non est: & ignorantes finem, viam quoque ad eum ignorare coguntur. Ita vagantes & errantes ciuitatem veræ habitationis non inueniunt, & semper esuriunt ac sitiunt, quia bona terrena, exigua & temporalia cum sint, desiderium animæ immortalis & capax infiniti boni, satiare nullo modo possunt. Sed ij, quos Deus redemit de manu inimici, & de variis regionibus congregauit, ex magno misericordiæ diuinæ munere agnoscere incipientes cæcitatem suam, clamant ad Dominum, & exaudiuntur ab eo; diriguntur in viam rectam, quæ ducit ad ciuitatem; intelligunt, finem vltimum esse Regnum Dei; & medium ad finem, esse iustitiam eius: inde esurientes & sitientes iustitiam, ad fontem gratiæ currunt; eoq; fonte interim refecti ad ciuitatem cælestem perueniunt, vbi replentur & satiantur bonis omnibus, vt nunquam amplius esuriant, neque sitiant in æternum.

*Sedentes in tenebris, & vmbra mortis, vinctos in mendicitate & ferro.*

*Quia exacerbauerunt eloquia Dei, & consilium Altissimi irritauerunt.*

*Et humiliatum est in laboribus cor eorum: & infirmati sunt, nec fuit, qui adiuuaret.*

*Et clamauerunt ad Dominum, cum tribularentur, & de necessitatibus eorum liberauit eos.*

*Et eduxit eos de tenebris, & vmbra mortis: & vincula eorum dirupit.*

*Constituantur Domino misericordiæ eius, & mirabilia eius filijs hominum.*

*Quia contriuit portas areas, & velles ferreos confregit.*

Hæc est altera pars, in qua proponitur liberatio à secunda miseria tam corporali, quam spiritali. Secunda miseria corporalis est captiuitas, per quam miseri homines clauduntur in obscuris carceribus alligati vinculis, & onerati ferro. Et videtur Propheta alludere ad captiuitatem Hebræorum sub diuersis persecutoribus, tempore Iudicum, vel etiam tempore Pharaonis. Dauid enim in Psalmis nō multum laborat, vt historias ordine temporum commemoret, sed tamen hæc eadem transferri & accommodari possunt omnibus captiuis, & in vinculis & compedibus constitutis, quos misericordia Domini postea liberauit. Explicemus verba: *Sedentes in tenebris, & vmbra mortis, vinctos in mendicitate & ferro*, id est, noui alios, qui capti ab hostibus, & tetricis carceribus inclusi sedebant in tenebris, & tenebris valde densis, quales significantur in Scripturis per vmbra mortis, vt diximus in explicatione Psalmi 22. vers. 4. & Psalmi 43. vers. 21. qui simul erant alligati vinculis, redacti ad mendicitatem, & onerati ferreis catenis & compedibus. Illud, *sedentes*, cum sit accusatiui casus, non habet, vnde regatur. Ideo supplendum, *noui*, aut aliquid simile: nam quod alij dicunt, iungi posse cum verbo præcedente, *satiavit bonis*, vel cum sequente, *liberauit*, nimis durum mihi esse videtur. Illud, *vinctos in mendicitate & ferro*, existimo legendum cum distinctione, vt tria sint membra, & sensus sit, *Sedentes vinctos, sedentes in mendicitate, & sedentes in ferro*, id est, in compedibus ferreis. *Quia exacerbauerunt eloquia Dei, & consilium Altissimi irritauerunt*, id est, merito traditi fuerant in captiuitatem, & afflicti carcere, tenebris, vinculis, mendicitate & compedibus, quoniam non obtemperauerunt præceptis Dei, & consilium eius contempserunt. Exacerbare eloquia Dei, significat hoc loco, ad iram prouocare Deum loquentem, siue præcipientem, quod facit, qui præcepta eius non seruat. Potest etiam dici, exacerbare eloquia Dei, qui prouocat ad iram ipsa Dei præcepta; quemadmodum enim præcepta Dei coronant obseruantes, ita puniunt præuariantes; ac per hoc qui præcepta præuariantur,



er, prouocant aduersus se ipsa præcepta. I-  
taque in his verbis figura quædam necesse-  
rio admittenda est, vel in verbis, *eloquia Dei*,  
quæ accipiuntur pro Deo loquente & præci-  
piente; vel in verbo, *exacerbauerunt*, quasi  
eloquia, id est, præcepta Dei dicantur pro-  
uocari ad iram, dum præuariantes puniunt.  
Similis est figura in verbis sequentibus, &  
*consilium Altissimi irritauerunt*: nam vel  
*consilium Altissimi* accipiendum est pro ipso  
Deo Altissimo bene consulente, quem irri-  
tauerunt, id est, ad iram concitauerunt, qui  
consilio eius aduersari sunt: vel *irritau-  
erunt*, positum est pro contempserunt, siue  
spreuerunt: qui enim aliquem contemnit,  
hoc ipso eum irritat, id est, prouocat ad iram.  
*Et humiliatum est in laboribus cor eorum*, id  
est, superbia cordis eorum humiliata est ob  
labores captiuitatis, vinculorum & compe-  
dum. Captiui enim, velint nolint, humiles  
esse coguntur. *Infirmati sunt, nec fuit, qui  
adiunaret*, id est, debiles facti sunt, vt non  
possent resistere aduersariis; neque fuit qui  
eos iuuaret, ne ab hostibus caperentur, & ca-  
ptiui abducerentur, & in ipsa captiuitate du-  
riter haberentur. *Et clamauerunt ad Domi-  
num, cum tribularentur*, &c. Hic iam poni-  
tur imploratio diuini auxilij, & liberatio  
tum à carcere tenebroso, tum à vinculis &  
compedibus. Ac vt ostendat magnitudinem  
beneficii, addit, *contriuit portas æreas, & ve-  
stes ferreos confregit*: qua metaphora signifi-  
catur liberatio à captiuitate tali, qualis est  
eorum, qui clausi sunt intra portas æreas,  
quarum vectes ferrei sunt, ita vt non nisi ma-  
xima vi referari possint. In summa describi-  
tur liberatio à captiuitate durissima & maxi-  
ma. Porro secunda spiritualis miseria est  
concupiscentia rerum terrenarum, id est, ho-  
norum, opum, voluptatum: quæ concupi-  
scentia instar cathenæ, & vinculorum, ac  
compedum hominem ita constringit, vt  
quamuis non ignoret, veram felicitatem esse  
querendam in Deo, & mortificanda esse  
membra, quæ sunt super terram: tamen ca-  
ptiuus maneat, & progredi non possit, nisi  
gratia Dei vincula illa disrumpat. Initium  
liberationis ducendum est ab humilitate, vt

homo intelligens captiuitatem suam, & de-  
bilitatem virium suarum, humiliatum ha-  
bens cor in laboribus, & videns non esse a-  
lium, qui adiuuet, præter vnum cælestem  
Patrem, corde contrito & humiliato cum in-  
timo gemitu dicat: *Domine vim patior; re-  
spice, & miserere. Infelix ego homo, quis me li-  
berabit de corpore mortis huius?* Aderit enim  
sine dubio misericordia Patris, & educet vin-  
ctum de carcere, & vincula disrumpet, vt ho-  
mo per gratiam Dei liberatus cum lætitia di-  
cat: *Disrupisti Domine vincula mea, tibi sa-  
crificabo hostiam laudis.* Vide exemplum  
huius liberationis, maxime à concupiscentia  
carnalium voluptatum, in S. Augustino in fi-  
ne libri octauo, & in principio lib. 9. Confess.

*Suscepit eos de via iniquitatis eorum:*  
*propter iniustitias enim suas humiliati*  
*sunt.*

*Omnem escam abominata est anima*  
*eorum: & appropinquauerunt vsque ad*  
*portas mortis.*

*Et clamauerunt ad Dominum, cum*  
*tribularentur: & de necessitatibus eorum*  
*liberauit eos.*

*Misit verbum suum, & sanauit eos, &*  
*eripuit eos de interitionibus eorum.*

*Confiteantur Domino misericordia e-*  
*ius, & mirabilia eius filiis hominum.*

*Et sacrificent sacrificium laudis, & an-*  
*nuntient opera eius in exultatione.*

Hæc est pars tertia Psalmi, in qua narra-  
tur tertia miseria corporalis, quæ est morbus  
& languor grauissimus, qualis fuit filiorum  
Israël, cum percussit eos Dominus plaga ma-  
gna per serpentes ignitos, ita vt plurimi con-  
tinuo morerentur; sed cum clamarent ad  
Dominum, liberati sunt: & eodem modo  
quicumque à morbis & plagis variis crucian-  
tur, si Dominum serio ex corde, firma fide,  
& cum aliis requisitis inuocauerint, sine du-  
bio liberabuntur. Sed verba consideremus,  
atque ea præcipue, quæ non sunt antea ex-  
plicata.



*applicata. Suscepit eos de via iniquitatis eorum: propter iniustitias enim suas humiliati sunt. Hic aliquid necessario subintelligendum est, vt, Vidit Deus quosdam prostratos iacere, & suscepit eos, id est, erexit de via iniquitatis eorum, in qua miseri iacebant: nam propter iniustitias suas humiliati sunt vsque ad terram. In Hebraico textu legitur secundum versionem S. Hieron. Stultos propter viam sceleris eorum, pro eo quod nos habemus, Suscepit eos de via iniquitatis eorum. Sed vox, auilim, vel, euilim, quæ stultos significat, non videtur fuisse in libris antiquis, quos habuerunt LXX. Interpretes, sed vox, aialim, quod est, suscepit eos, quamuis enim à radice, aial, in dictionariis deducatur, fortitudo, aries, ceruus, & alia id genus: tamen apud LXX. Interpretes eā vox etiam suscipere significat. Hic enim in titulo Psalmi vigesimi primi posuerunt, pro susceptione, quod est in Hebræo, aieleth: & sane maior fides habenda est LXX. Interpretibus, quam omnibus dictionariis. Omnem escam abominata est anima eorum, & appropinquauerunt vsque ad portas mortis. Hoc demonstrat grauissimum morbum, qui cum cibum non admitrat, quo vita sustentatur, mors imminet necesse est. Misit verbum suum, & sanauit eos, explicat modum, quo sanauit aegrotos illos, dicens, eos sanatos verbo, id est, iussu Domini, siue Dei voluntate, non à serpente æneo, vel aliqua alia re creata: non quod res creatæ, vt pharmaca, & medicamenta cetera nullam vim habeant, sed quia vim suam à Deo habent, & siue Dei cooperatione nihil efficere possunt: Deus autem sine illis solo verbo & imperio suo omnia sanare potest: & hoc modo intelligimus illud Sap. 16. Etenim neque herba, neque malagma sanauit eos, sed tuus Domine sermo, qui sanat omnia. Et paulo ante loquens de iis, qui per aspectum serpentis ænei curabantur à moribus serpentium ignitorum: Qui enim, inquit, conuersus est, non per hoc quod videbat, sanabatur, sed per te omnium saluatorem. Vtitur autem Dauid figurata locutione, cum ait: Misit verbum suum, & sanauit eos, quasi verbum siue imperium Dei sit persona ali-*

qua de cælo missa ad sanandos ægrotos. Nisi forte predicere voluerit missionem Verbi incarnati ad homines, per quod plurimi sanati sunt à corporali morbo: & à morbo spirituali, id est, à peccato, nemo sanatur, nisi per ipsum. Non enim est aliud nomen sub cælo datum hominibus, in quo oporteat nos saluos fieri, vt dicitur Act. 3. Tertia vero miseria spiritualis est infirmitas, siue debilitas & fragilitas humanæ naturæ per peccatū corruptæ. Multi enim sunt, qui satis intelligunt quid sit agendum, & cupiunt interdum illud perficere, sed vires non habent, vel infirmas habent, donec induantur virtute ex alto. Sæpe etiam tædio, vel languore quodam affecti, omnem cibum renuit anima eorum; quia quamuis iam eos neque error seducat, neque concupiscentia mala illiciat: tamen non delectat eos verbum Dei, neque ad cælestia suspirare norunt; & periculum est, ne fames eos non ex inopia, sed ex fastidio perimat: neque leuis, aut rara hæc tentatio est. Ideo & isti clamare debent ad Deum, vt sanetur palatum cordis eorum, & assuescant lac diuinæ consolationis concupiscere: & cum inceperint sapere, quæ sursum sunt, & gustare quam dulcis sit Dominus, non sibi hoc tribuant, sed confiteantur Domino misericordias eius: & sacrificent ei sacrificium laudis, & annuncient opera eius in exultatione. Diuinum enim plane opus est, non humanum, cum homo solis visibilibus & terrenis assuetus, incipit inuisibilia & cælestia dulciter sapere, & ardentem requirere.

Qui descendunt mare in nauibus, facientes operationem in aquis multis. XXIII.

Ipsi viderunt opera Domini, & mirabilia eius in profundo. XXIV.

Dixit, & stetit spiritus procella; & exaltati sunt fluctus eius. XXV.

Ascendunt vsque ad cælos, & descendunt vsque ad abyssos: anima eorum in malis tæbescebat. XXVI.



- XXVII. Turbati sunt, & moti sunt sicut ebrius,  
& omnis sapientia eorum deuorata est.
- XXVIII. Et clamauerunt ad Dominum, cum tribularentur, & de necessitatibus eorum eduxit eos.
- XXIX. Et statuit procellam eius in auram: & siluerunt fluctus eius.
- XXX. Et letati sunt, quia siluerunt: & deduxit eos in portum voluntatis eorum.
- XXXI. Confiteantur Domino misericordiae eius, & mirabilia eius filiis hominum.
- XXXII. Et exaltent eum in Ecclesia plebis, & in cathedra seniorum laudent eum.

Hæc est pars quarta Psalmi, in qua iamdudum Deus ob liberationem periclitantium in mari. Huius miserie non occurrit exemplum in Scripturis ante tempora Dauidis; sed post illa tempora habemus exemplum in libro Ionæ cap. 1. & in Euang. S. Matth. cap. 8. & 14. & in Actis cap. 27. Explicemus verba: *Qui descendunt mare in nauibus, facientes operationem in aquis multis, ipsi videntur opera Domini.* & mirabilia eius in profundo; id est, qui nauigant mare, ac per hoc operantur in aquis remigando, vel vela tendendo, vel contrahendo; experimento cognoscunt multa mirabilia opera Dei, quæ aliis plurimis nota non sunt, nisi forte ex relatione aliorum; videlicet quanta sit vis procellæ; quanta eleuatio vndarum & fluctuum; quanta vastitas & profunditas maris; quam ingentia & frequentia mortis pericula; quantus denique timor & horror inuadat pectora hominum, etiam fortissimorum. Proprie autem dictum est qui descendunt mare in nauibus; non enim, ut quidam Interpres Psalmorum hoc loco ait, ratione probatum est, altius esse mare, quam terram: sed contra, probatum est manifesta demonstratione, inferius esse mare, quam terram; quoniam alioqui terram operiret aqua, cum natura sua ad loca semper decliuiora descendat. *Dixit, & stetit spiritus procellæ*, id est, dixit Deus, & dicens iussit, ut ventus procellæ existeret,

& continuo procella obediens creatori stetit, id est, exiit, exurrexit, exorta est: non enim, *stetit*, hoc loco significat quietem, sed exortum: & inde exaltati sunt fluctus eius, id est, maris, & ascendunt usque ad cælos, & descendunt usque ad abyssos, poetica hyperbole est; quomodo etiam Latinus Poeta dixit: *Fluctusq; ad sidera tollit*. Anima eorum in malis tabescebat, id est, iis visis animæ nauigantium, spiritus videlicet vitalis, vigor omnis in ipsis existens præ timore & horrore tabescebat. *Turbati sunt*, & moti sunt, sicut ebrius, & omnis sapientia eorum deuorata est. Aptissimis similitudinibus describit Propheta, quid animi gerant homines imminente naufragio: nam neque vires, neque consilium suppetit. Vacillant pedes, nutat iudicium, imo omnis sapientia, id est, ars & peritia nauigandi à timore nimio quasi absorpta videtur. *Et clamauerunt ad Dominum*; & hic est versus intercalaris, supra explicatus, & versiculi sequentes facillimi sunt; nisi forte aliquem moueat illud, & statuit auram in procellam, quod significat Deum conuertisse ventum furiosum in ventum placidum, siue tempestatem in tranquillitatem, ut magis proprie sonat vox Hebraica, *demama*. Illud, *statuet*, ex voce Hebraica, *iakem*, significat proprie, *surgere fecit*, id est, fecit, ut procella surgeret in auram, hoc est, mutaretur in auram leuem, siue, ut paulo ante dixi, in tranquillitatem. Iam vero quarta miseria spiritusalis est, ut supra diximus, malitia voluntatis, quæ præcipue sita est in superbia, quæ Regina est vitiorum. Et vere cum ventus superbiæ exagitare incipit mare cordis humani, tunc extolluntur fluctus desideriorum usque ad cælum: notæ sunt voces illius, qui est Rex super omnes filios superbiæ, *In cælum conscendam, super astra Dei exaltabo solium meum: ascendam super altitudinem nubium, similis ero Altissimo*, Isaia 14. Ab illo didicerunt antiqui Gigantes turrim Babel ædificare, quæ cælum contingeret, Genes. 11. Horum nepotes sunt, qui Regna Regnis & Imperia Imperiis adiungere satagunt, neque ullus est finis cupiditatis eorum: quod

fi il-



st illi ipsi intrarent in corda sua, & attentè considerarent quantis cogitationum, suspirationum, timorum, desideriorum, presumptionis quoque, & desperationis procellis continuo agitentur, & tandem demergantur in abyssum: sine dubio clamarent ad Dominum, & ipse misericors, & pius de tantis periculis liberaret eos: mitteret enim spiritum filij sui in corda eorum, ut doceret eos mansuetudinem, & humilitatem, & eo modo sedatis fluctibus desideriorum inuenirent requiem animabus suis, & deducerentur in portum voluntatis sue, id est, in portum tranquillitatis, quem omnis homo naturaliter cupit. Et quoniam hoc est maximum beneficium misericordiae Dei, iure optimo cantarent, *Confiteantar Domino misericordia eius; & mirabilia eius filiis hominum.* *Et exultent eum, Deum videlicet, in Ecclesia plebis,* id est, in cœtu populi totius congregati ad laudes Domini celebrandas, & non solum in cœtu plebis, sed etiam in cathedra seniorum, id est, in consensu maiorum, principum videlicet populi, & sapientium Senatorum, *laudant eum.*

*Posuit flumina in desertum, & exitus aquarum in sirim.*

*Terram fructiferam in salsuginem & malitia inhabitantium in ea.*

Hæc est altera pars huius Psalmi, in qua post decantatas misericordias Domini in depulsione quatuor miseriarum: laudat Deum ab omnipotentia & providentia, quæ naturas rerum aliquando permutat. quæ mutatione manifestè indicat, se verum, & solum esse illarum conditorem, & gubernatorem. Ac primum dicit, Deum aliquando posuisse flumina in desertum, & exitum aquarum in sirim, id est, quando illi placuit, sicasse flumina, & fecisse, ut ubi riui aquarum abundanter decurrebant, ibi fieret desertum aridum, & siticulosum. *Terram quoque fructiferam vertisse in salsuginem,* id est, in terram sterilem, qualis est terra operata sale, *à malitia inhabitantium in ea,* id est, in poenam peccati eorum, qui terram illam in-

colebant. Exemplum huius mutationis habemus in Genesi c. 13. ubi dicitur. Eleuatis Loth oculis vidit omnem terram circa regionem Iordanis, quæ vniteris irrigabatur, antequam subuerteret Dominus Sodomam, & Gomorrhā, sicut paradisus Domini, hanc verò terram irriguam, & fructiferam, instar paradisi, Deus sulphure, & igne de cœlo demisso totam siccauit, & sempiterna sterilitate damnavit. ut legitur in eodem libr. c. 19.

*Posuit desertum in stagna aquarum, XXXV.*  
*& terram sine aqua in exitus aquarum.*

*Et collocavit illic esurientes, & constituerunt ciuitatem habitationis. XXXVI.*

*Et seminauerunt agros, & plantauerunt vineas, & fecerunt fructum nativitatis. XXXVII.*

*Et benedixit eis, & multiplicati sunt nimis; & iumenta eorum non minoraui. XXXVIII.*

Hæc est altera mutatio in contrarium: secundum quam Deus, quando voluit, posuit desertum in stagna aquarum, id est, fecit, ut in locis desertis, & arentibus existerent flumina; & terra, quæ erat sine aqua, abundaret riuis aquarum. Et in ijs locis, alias incultis, & desertis, fecit ut frequentes homines habitarent, ciuitates construerent, terram colerent, fructus inde perciperent, multiplicarentur deniq; valde, tum homines, tum iumenta ipsorum: hoc enim significat illud, *non minoraui iumenta ipsorum,* id est, fecit, ut non esset exiguus numerus iumentorum, sed plenus, & copiosus. Ad quam historiam respiciat hoc loco Propheta, non est aded certum: nam fecit quidem Deus in deserto propter filios Israel ex rupe saxea nasci flumina, ut habemus Num. 11. sed non collocavit illic populum suum, neq; sunt illic vrbes ædificatæ, neque seminati agri, neque plantate vineæ. In terra verò promissionis collocavit quidem populum suum Deus, sed iam antea erant in ea terra flumina, Vrbes, agri culti, & vineæ. Existimo igitur Prophetam

LIII; respi-



respicere ad antiquas historias, & primordia propagationis generis humani post diluvium. quemadmodum enim mutavit terram Sodomorum ex irrigua & fertili, in aridam & desertam; sic etiam in alijs locis fecit existere flumina, & edificari ciuitates, & coli campos, & plantari vineas, & propagari homines, & iumenta. Quia verò Isaias Propheta cap. 41. hunc locum Psalmi notare videtur, cum ait, *Ponam desertum in stagna aquarum, & terram inuiam in riuos aquarum.* & verba Isaiæ à S. Hieronymo. & alijs intelliguntur de gentilitate. quæ olim deserta, & inculta, sine fide, sine lege, sine prophetis, sine sacerdotio; futura erat per Christum irrigua Spiritus sancti donis; ideo totum hunc locum rectè S. Augustinus in sensu vel literali, vel certè allegorico exponit de synagoga Iudæorum, & Ecclesia gentium: synagoga enim quæ olim abundabat aquis verbi Dei, & veluti terra fecunda, & culta proferebat Prophetas, & Sacerdotes, & habebat altaria, sacrificia, miracula, visiones; nunc deserta & arida versa est in saluginem; & his tribus caret. contra verò gentilitas, quæ deserta, & inaquosa erat, conuersa est in stagna aquarum, & facta est fecunda, ac fructibus omnium generum refertissima, id est, cœpit esse populus Domini, Ecclesia Dei viui, gens sancta, Regnum sacerdotale, in quo solo verum est sacrificium, verisacerdotes, vera miracula, vera sanctificatio, vera sapientia, denique Spiritus S. charitatemata omnia.

XXXIX. *Et pauci facti sunt, & vexati sunt à tribulatione malorum, & dolore.*

XL. *Effusa est contemptio super Principes, & errare fecit eos in inuito, & non in via.*

XLI. *Et adiuuit pauperem de inopia, & posuit sicut oues familias.*

LXII. *Videbunt recti & latabuntur, & omnis iniquitas oppilabit os suum.*

Docet nunc Propheta, nihil in terris esse perpetuum, aut stabile. Nam illi, quos Deus aliquando benedixit, & benedicendo mul-

tiplicauit: paulò post exigentibus peccatis eorum, imminuti sunt, & ad paucitatem reducti; & qui paulò ante florebant omnibus bonis, iidem cœperunt angustijs, & persecutionibus premi: nec solum priuatis hominibus hoc accidit, sed etiam Principibus; quos Deus propter eorum peccata contemptibiles reddidit, quoniam sapientia, ac prudentia eos priuatos, permisit in multis, magnisq; rebus errare. Sed eodem tempore non defuerunt viri probi, quos Deus subleuauit de inopia, & pauit, ac rexit vt proprias oues, Ex quo factum est per diuinam prouidentiam, vt tandem viri iusti latarentur, & iniqui confusi remanerent. Hoc autem, quod dictum est generatim de prouidentia Dei erga genus humanum, potest etiam dici de prouidentia Dei speciali erga Ecclesiam, quæ breui tempore creuit, & paulò post per schismata, & hæreses imminuta est, & vexata, atq; afflicta, & Principes eius, id est, Episcopi, & sacerdotes contemptibiles redditi, quia multi eorum longè recessissent à via maiorum suorum, qui in omni sanctitate, & iustitia populo suo præluxerant. Cæterum non sic imminuta est Ecclesia, quin multi etiam manserint tum ex principibus, tum ex priuatis, tum ex sacerdotibus, tum ex laicis, viri sancti, quos Deus bonis spiritualibus ditauit, & vt proprias oues ad optima pascua duxit, & crescere fecit: sed verba consideremus. *Et pauci facti sunt,* id est, & postea cum multum creuissent, vicissim minui cœperunt: *& vexati sunt à tribulatione malorum, & dolore,* id est, & cum aliquamdiu prosperitate vigente læti fuissent, cœperunt vexari à tribulatione, & dolore ob mala, quæ illis aduenerunt. Illud enim, *malorum,* non significat malorum hominum, sed malarum rerum, id est, calamitatum, ærumnarum, infortuniorum. *Effusa est contemptio super Principes.* Rectè editio vulgata correctæ est hoc loco: nam vitio librariorum legebatur *contentio* in omnibus ferè latinis codicibus. Sed ex textibus Græcis, & Hebraicis, & ex lectione veterum Hieronymi, Augustini, & aliorum certum est legi debuisse. *Effusa est contemptio.* acce-



directam, quod hic idem versiculus legitur apud Iob cap. 12. v. 21. *Effundit despectionem super Principes*; & credibile est, Davidem ex Iob hunc versiculum accepisse. Grauis hæc pœna est, tum populis, tum Principibus, & magni criminis præcedentis indicium, quando Deus effundit contemptionem in Principes, id est, providentia sua facit, ut Principes siue Ecclesiastici, siue seculares sint valde contemptibiles. (Illud enim verbum, *effundit*, significat abundantiam siue magnitudinem contemptionis) tunc enim laxatur disciplina, & omnia in deterius ruunt. *Et errare fecit eos in inuito, & non in via.* hæc est causa contemptus, quia Principes ob suam, & populi peccata deserti lumine sapientiæ, & gratiæ per devia incedunt, & non per vias rectas, id est, vitiose viuunt, exemplo malo populum scandalizant, vel etiam leges ini- quas constituunt, fauent malis, vexant bonos. Dicitur autem Deus eos errare facere, quia in penam peccati non eos illuminat, neque bonam voluntatem eis inspirat. S. Augustinus in epist. 105. ad Sixtum, Non obdurat Deus impartiendo malitiam, sed non impartiendo misericordiam, & tract. 53. in Ioan. Sic excæcat, sic obdurat Deus, deferendo, nec adiuuando, quod occulto iudicio facere potest, iniquo non potest. & libr. 1. ad Simplic. quæst. 2. Non ab illo irrogatur aliquid, quo sit homo deterius, sed tantum quo sit melior non erogatur. Deniq; libr. de gratia, & libero arbitrio c. 23. Quando auditis dicentem Dominum, *Ego Dominus seduxi Prophetam illum*; in eo quem seduci permittit, mala eius merita credite. *Et adiunxit pauperem de inopia*, id est, sicut Deus superbos Principes errare permittit, & contemptibiles reddit: sic è contrario pauperes & humiles adiuuat, & de inopia siue temporali, siue spiritali subleuat. *Et posuit sicut oves familias*, id est, posuit Deus familias pauperum iustorum sicut oves, ita ut eas & multiplicauerit, & in vnum congregauerit, & Pastorem eis dederit, & singulari providentia gubernauerit. *Videbunt iusti, & latabuntur, & omnis iniquus opprobriabit os suum*, id est, ex hac providentia Dei tandem fiet,

ut iusti latentur, & ex lætitia exultent & laudent Deum: & *omnis iniquitas*, id est, omnes iniqui obmutescant, nec audeant villo modo contradicere. Id verò quamvis aliquando conspiciatur, in particularibus iudicijs: tamen absolute, & vniuersè apparebit in iudicio vniuersali.

*Quis sapiens, & custodiet hæc, & intelliget misericordias Domini?*

XLIII.

Hæc est conclusio totius Psalmi, in qua colligit Propheta ex dictis illum esse verè sapientem, qui obseruabit, & custodiet in corde suo supradictas vicissitudines rerum, & intelliget, quemadmodum in omnibus appareat ineffabilis misericordia Domini erga pios homines, & timentes Deum. dicit autem, *Quis sapiens*, quoniam paucorum est ista sapientia, & stultorum infinitus est numerus.

## PSALM. CVII.

Paratum cor meum Deus.

**H**ic Psalmus non eget explanatione: constat enim ex parte extrema Psalmi quinquagesimi sexti, & quinquagesimi noni. Cur autem Psalmus hic additus sit ad alios, cum nihil noui contineat, ratio videtur fuisse, ut compleretur numerus centum quinquaginta Psalmorum: nisi fortè subsit aliqua ratio magis recondita, quam mihi fateor, notam non esse.

## PSALM. CVIII.

Titulus, & Argumentum.

In finem Psalmus David.

**N**on desunt ex recentioribus, qui hunc Psalmum exponunt ad literam de persecutoribus David, qualis fuit Deog Idumaus, Architophel, & alij: sed cum nulla fiat in titulo mentio persecutorum David; & veteres expositores, Chrysostomus, Hieronymus, Augustinus, Theodoretus, & Euthymius, simpliciter de Iuda



Iuda proditore, & Iudais exponant; & S. Petrus in Actis Apostolorum cap. 1. de Iuda proditore Psalmum hunc scriptum esse confirmet: nos quoque de Iuda, & Iudais Psalmum totum simpliciter exponemus. Igitur argumentum Psalmi est Prophetia per modum imprecationis aduersus Iudam, & Iudaeos Christi persecutores.

## EXPLICATIO PSAL. CVIII.

I. **D**eus laudem meam non tacueris; quia os peccatoris, & os dolosi super me apertum est.

Verba Christi, sunt similia illis, quæ habentur in Evangelio Ioan. 17. Clarifica me tu Pater. Rogat igitur Christus homo Deum patrem, ut laudem eius, id est, Innocentiam, charitatem, aliasque virtutes non taceat. quod impletum est per Apostolos Spiritu sancto plenos, qui omnibus linguis toti mundo Christi laudes prædicauerunt. impletum quoque est per sequentes Martyres, & Confessores, & Doctores, qui vel sanguine, vel moribus, vel literis, vel miraculis, vel præconio vocis Christi encomia omnibus seculis, & omnibus gentibus nunciauerunt. Reddit deinde causam cur gloriam istam à Deo petat, quoniam non desunt, qui eam falsis criminationibus obscurare conentur. Quia, inquit, os peccatoris, & dolosi; Caiphæ videlicet, & Iudæ, vel generatim populi Iudaici, super me apertum est: dicit autem peccatoris, & dolosi, quoniam persecutores Christi odio, & inuidia pleni erant, & tamen dolo simulabant amicitiam, cum dicerent, Magister scimus, quia verax es, & viam Dei in veritate doces, &c. Itaque peccatores erant, quia oderant, quem diligere debuisset; & dolosi erant, quia fingentes amicitiam capere volebant in sermone: vel, alij peccatores erant manifesti, qui apertè blasphemabant eum seductorem esse, & in Beelzebub eijcere Dæmonia; alij dolosi erant, ac per hoc peccatores occulti, qui sub specie interrogationum, quasi discere cupientes, insidiabantur famæ, & vitæ eius. Ex Hebræo nonnulli vertunt, Deus laudis mea. quia legunt in Hebræo, elohé,

non elohim. sed falluntur: nam vox, elohé, non semper est in regimine, sed est vnum ex nominibus Dei, vt S. Hieronym. docet in Epistola ad Marcellam. adde quod nec Septuaginta Interpretes, nec S. Hieronym. agnouerunt istud regimen in nomine Dei, vt patet ex versionibus ipsorum. S. Hieronym. ex Hebræo vertit, Deus laudabilis mihi ne taceas. Sed vox Hebræa, theillati, significat, laus mea, vel laudem meam: non enim Hebræi declinant nomina per casus. Septuaginta Interpretes intellexerunt ea voce significari, laudem meam. S. Hieronym. autem significari credit, laus mea, & ideo reddit, laudabilis mihi; idem enim est, Deus est laus mea, & Deus est laudabilis mihi. Latinus interpres Græcam lectionem secutus est, quæ reprehendi non potest, cum Hebræicæ lectioni aptissime conveniat. Illud, Ne tacueris, opponitur illis, os peccatoris apertum est; æquum enim est, vt veritas non taceat, quando falsitas clamat.

Locuti sunt aduersum me lingua dolosa, & sermonibus odij circumdederunt me, & expugnauerunt me gratis.

Declarat quod dixit, os peccatoris, & os dolosi apertum est super me. Apertum est, inquit, os dolosi, quia locuti sunt aduersum me lingua dolosa, laudantes, vt Magistrum bonum, & interim insidiantes mihi, vt caperent in sermone. apertum quoque est os peccatoris, quia sermonibus odij circumdederunt me, manifestantes verbis apertis odium, quod gerebant in corde, dicentes, Non est hic homo à Deo; ecce homo vorax, & potator vini: Tolle, tolle, crucifige eum. Sed siue dolosa lingua, siue sermonibus odij me oppugnarent, gratis me oppugnabant, quia sine vlla iusta causa, cum redderent mala pro bonis. Illud, expugnauerunt, positum est pro, oppugnauerunt. Verbum enim Hebræicum, & Græcum, bellare, & pugnare significat. In eadem significatione ponitur hoc verbum in Psal. 128. Sæpe expugnauerunt me à iuventute mea; etenim non potuerunt mihi

אלהים

תהלה

II

IV

vbi



vbi illud, *Non potuerunt mihi*, demonstrat, *expugnaverunt*, positum esse pro *pugnauerunt*.

III. *Pro eo vt me diligere detrahebant mihi: ego autem orabam.*

Explicat vltimam illam particulam, *gratiis*: nam cum rependere deberent amorem amori, illi vice dilectionis detrahebant mihi; ego tamen non reddidi mala pro malis, sed orabam Deum pro illis. Id aperte fecit Dominus in cruce, cum ait, *Pater ignosce illis*: sed credibile est, id eum occulte fecisse, quotiescunque detractiones audiebat. Ex Hebræo S. Hieronymus vertit, *Pro eo quod eos diligebam*, vbi nos habemus, *pro eo vt me diligere*. Sed vox Hebraica ambigua est; potest enim esse nomen, vt est in sequenti versiculo, & significare, *dilectio mea*: & potest esse verbum, & significare, *dilexi*, vel *diligebam*: nam à verbo, *ahab*, quod est *diligere*, fit, *ahanti*, quod *dilexi*, & *dilectio mea*, significare potest. Græca vox, ἀγαπήμι, quæ significat, *diligere me*, est etiam ambigua; & potest accipi tam actiue, quam passiue; pro diligere me, id est, pro dilectione, quam eis impendebam; & pro diligere me, id est, pro dilectione; quam mihi debebant. sed Latinus interpres sustulit istam ambiguitatem, & vertit, *pro eo, vt me diligere*: & hanc intelligentiam sequuti sunt expositores veteres tum Græci, vt Chrysostomus, & Theodoretus, tum Latini vt Hieronymus, & Augustinus. Itaque veteres expositores vulgatam Latinam versionem suis expositionibus probauerunt.

Et posuerunt aduersum me mala pro bonis, & odium pro dilectione mea.

Id ipsum clarius repetit; quasi dicat, rependerunt mihi maledictionem pro benedictione, odium pro amore, vulnera multa pro curationibus multis, mortem corporalem pro vita spirituali.

Constitu super eum peccatorem, & diabolus stet à dextris eius.

Transitum facit Propheta ad Iudam, quem præuidebat ducem futurum eorum, qui comprehenderunt Iesum, vt loquitur S. Petrus Act. 1. & per modum imprecantis prædicit, quæ illi euentura prospiciebat. Ac primum inquit, *constitue super eum peccatorem*, id est, noluit Iudas super se Christum, Dominum vtique iustissimum, & mitissimum; ideo constitues super eum spiritum auaritiæ, cui seruiet infelicititer vsque ad mortem. Iudas enim seruire voluit Mammonæ, ac per hoc seruire non potuit Christo: quia nemo potest duobus Dominis seruire. Porro spiritus auaritiæ iniquissimus est, cum honorem Deo debitum idolo tribuat, dicente Apostolo ad Ephes. 5. de auaritia, quod est idolorum seruitus. Et *Diabolus stet à dextris eius*, id est, & Diabolus erit Dux eius in operibus malis, & illi perpetuo assistet, vel potius tanquam canem alligatum vinculo cupiditatis illum trahet; & ad nocendum proprio etiam Magistro incitabit. S. August. per peccatorem præpositum Iudæ, intelligit eundem diabolum, qui tanquam eius Dominus stabat à dextris eius. Idem S. Augustinus recte monet, Iudam gessisse personam totius synagogæ; quemadmodum S. Petrus gerebat personam totius Ecclesiæ: & ideo, quæ hic dicuntur de Iudæ, illi quidem conuenire, sed conuenire etiam & illustrius, toti synagogæ, quæ recusans habere Christum Regem, habuit Diabolum, & Cæsarem, & eius loco Pilatum.

Cum iudicatur exeat condemnatus, & oratio eius fiat in peccatum.

Prædicit nunc Propheta infelicissimum exitum Iudæ, ad quam Prophetiam respexisse videtur Dominus Ioan. 17. cum ait, *Quos dedisti mihi custodiri, & nemo ex eis perijt, nisi filius perditionis, vt scriptura impleatur*. Ergo inquit, *cum iudicatur à Deo in exitu de hac vita, exeat*, id est, exhibet condemnatus. & si fortè orauerit Deum, oratio eius non solum non impetrabit remissionem peccati; sed ipsa oratio fiet illi

M m m m in pec-



*in peccatum.* Cur oratio Iudæ facta sit illi in peccatum, rationem reddit S. Hieron. quia orauit sine spe indulgentiæ, & desperans laqueo se suspendit. S. Augustin. dicit, factum esse in peccatum, quia non est facta per Christum mediatorem. Euthymius addit, factam esse in peccatum, quia Iudas, ut etiam cæteri persecutores Christi, orabant Deum pro exterminatione nominis Christiani. Posset etiam addi, Iudæ orationem factam esse in peccatum, quia Iudas non à Deo, sed à Diabolo auxilium petijt, Diabolus autem suspendium illi suavit. Quo loco admonendi sunt lectores, orationem peccatoris, non semper esse peccatum, sed sæpe multum valere ad remissionem peccatorum, ut intelligi potest ex oratione Publicani Lucæ 18. tunc autem fieri in peccatum, & verè esse peccatum, cum is, qui orat, vel non orat quem debet orare, id est, Deum verum, sed Idola, vel Diabolum: vel non orat pro re bona, quam æquum est à Deo peti, sed pro re mala, quæ Deo displicet, ut pro ruina inimicorum: vel non orat per vnicum Mediatorem, qui est Christus, sed per merita sua, quæ superbè se habere præsumit: vel denique non orat cum spe, aut fide, aut alijs necessarijs bonæ orationis comitibus. Eadem quæ hic dicuntur de Iuda, conueniunt Iudæis, quorum ille typum gerebat. Iudæi enim qui credere nolunt in Christum, exeunt de hac vita condemnati ad mortem sempiternam; & oratio eorum, quam assidue fundunt in synagogis suis, sit illis in peccatum: quia non orant Patrem per Filium, cum nec Filium, nec Patrem norint, & quia postulant quæ Deo non placent, excidium videlicet Christianorum, & celerem aduentum Antichristi: hunc enim illi pro Christo recipient, ut dicitur Ioan. 5.

VII.

*Fiant dies eius pauci, & Episcopatum eius accipiat alter.*

Hæc est locus, quem S. Petrus allegauit Act. 1. ut ostenderet, necessarium fuisse ut in locum Iudæ aliquis substitueretur; &

cum omnes Apostoli, & discipuli iudicio S. Petri acquieuerint, ac per hoc vnanimi consensu locum istum Psalmi de Iuda intellexerint, nemini licet aliter exponere. Oportet, inquit Apostolus Petrus Act. 1. *Impleri scripturam, quam prædixit Spiritus sanctus per os David de Iuda, qui fuit dux eorum, qui comprehenderunt Iesum.* Videmus autem impletum fuisse hoc vaticinium in Iuda perfectissime: nam facti sunt dies eius pauci, siue cum S. Augustino intelligamus dies Apostolatus; siue cum S. Hieron. dies vitæ; siue cum Euthymio, dies eius post peccatum commissum. *Et Episcopatum*, id est, Apostolatam eius accipiat alter, Matthias videlicet, qui omnibus modis erat alter, id est, non consanguineus, non familiaris, non amicus, non similis vitæ, ac morum. Nomen, *Episcopatus*, in Hebræo est, *pecuda*, quod ab inspiciendo, & visitando deducitur. Debet enim Episcopus assidue inspicere, & visitare oues suas, de quibus rationem Domino redditurus est. Id quod, qui longè absunt ab Episcopatu suo, certè præstare non possunt. Hoc idem impletum est in Iudæis: nam post Iudæ peccatum pauci fuerunt dies Iudæorum in Episcopatu; id est, in Sacerdotio, siue Pontificatu: & Episcopatum eorum accepit alter, quia translatus est sacerdotium Aaronicum ad sacerdotium secundum ordinem Melchisedech, & nulli sunt hodie Pontifices Iudæorum; & multi sunt Pontifices Christianorum.

*Fiant filij eius orphani, & vxor eius vidua.*

Ne quis fortè existimaret, Iudam condemnandum ad poenam aliquam, vita durante; & ut fierent dies eius pauci in Episcopatu, non in corpore; Propheta declarat, dies eius futuros etiam paucos ob imminentem veram mortem, per quam filij eius orphani, & vxor vidua remaneret. Quod impletum est, quia eadem die laqueo se suspendit, & non diu postea in excidio Hierosolymæ omnes ferè viri interierunt: & relictæ sunt plurimi orphani, & plurimæ viduæ.

Nutant



*Nutantes transferantur filij eius & mendicent; & ejciantur de habitationibus suis.*

Explicat ærumnas filiorum Iudæ, ac dicit eos instabiles vagaturos, & mendicatos in aliena regione; quoniam ab habitatione sua ejciantur. In Hebræo paulò aliter leguntur vltima verba huius versiculi. Sic enim vertit S. Hieron. *Et quærentur in parietinis suis.* Sed Septuaginta Interpretes, quos Latinus sequitur, non legerunt in Hebraico, *dare su*, quod significat *quærere*, sed, *gare su*, quod significat *ejcere*. Et, ut sæpè diximus, lectio quam habuerunt in suis codicibus Septuaginta seniores omnino præferenda est lectioni Rabinorum. Illud, *in parietinis suis*, optimè translaturum est à LXX. Interpretibus, *ἐκ τῶν οἰκῶν αὐτῶν*, id est, ex ruinosis habitationibus suis. Nam idem significant parietina, id est, domus dirutæ, ubi soli remanent parietes. Particula, *ex*, quam habent Septuaginta Interpretes habetur satis apertè in Hebræo, quamvis S. Hieronymus verterit, *in* quoniam particula, *min*, utrunq; significare potest, sed frequentius accipitur pro, *ex*, vel, *ab*. Itaq; sensus nostræ lectionis est, quòd Iudæ filij, & cæteri Iudæi, non solùm non permittentur habere integras domos, quia Hierusalem euertenda erat, sed ejciantur etiam de habitationibus dirutis, ut ne ruinas quidem domorum suarum possidere eis liceat, quod impletum esse res ipsa testatur.

*Scrutetur fenerator omnem substantiam eius: & diripiant alieni labores eius.*

Redditur hoc loco ratio, cur filij Iudæ, & Iudæi cæteri sint futuri pauperissimi, ac planè mendici: quia videlicet creditores eorum, quibus soluendo non erunt diligentissimè quærent, & accipient substantiam eorum; & si quid superfuert ex labore eorum quæsitum, diripient alieni, milites scilicet Titi Imperatoris, qui (ut scribit Iosephus

lib. 6. de bello Iudaico cap. 15.) scrutabantur aurum etiam in visceribus hominum, ad hunc finem illos dissecantes. Et hæc quidem olim passi sunt Iudæi; sed nunc feneratorum effecti ex bonis pauperum Christianorum ditescunt. Illud, *scrutetur*, nunc est in codice Hebraico, *ienaches*, quod illaqueare, vel irretire significat. Sed Septuaginta, & S. Hieronymus, qui verterunt, *scrutetur*, videntur legisse, *ienaches*, quod est diligenter quærere. proinde post tempora S. Hieron. locus hic vitio librariorum corruptus videtur.

*Non sit illi adiutor, nec sit qui misc-  
reatur papillis eius.*

Est hoc manifestè impletum in Iuda, & Iudæis. Iudas enim ad Principes Sacerdotum accessit, & pecunias retulit, ac se peccasse confessus nihil auxilij, vel consolationis accepit. responderunt enim, *Quid ad nos: tu videris*, Matt. 27. Quare reiectus à Sacerdotibus, & à Christo veniam non sperans, abiens laqueo se suspendit. Porro Iudæi à Romanis obfessi neminem habuerunt, qui eos iuuare auderet.

*Fiant nati eius in interitum, in generatione vna deleatur nomen eius.*

Prædicit Propheta, filijs Iudæ mortuis, delendum omnino nomen eius in generatione vna, quia videlicet non remanebunt filij filiorum, id est, secunda, vel tertia generatio. Et hoc quidem de filijs carnis Iudæ impletum esse credimus: sed sciimus etiam id impletum in filijs spiritualibus. Nam aliorum Apostolorum multi numerati sunt filij filiorum, quos illi per Euangelij prædicationem in Christo genuerunt; & posteritas eorum in æternum manebit. Iudæi verò spiritualis posteritas nulla est. Iudæi verò quamvis non omnino extincti sint, periit tamen in generatione vna Regnum, siue Respublica eorum: nam post euersam Hierosolymam dispersi fuerunt in gentes, & nunc impletur in eis quod prædixit Osee Propheta cap. 3. *Quia dies multas sedebunt filij Israel sine Rege, & sine Principe, & sine sacri-*

M m m m 2 ficio,



ficio, & sine altari, & sine Ephod, & sine Theraphim. Itaque illud, *interitum*, significat in interitum populi, siue Regni, vt non sint amplius vnus populus, siue Regnum, sed homines dispersi per omnes populos & Regnā. Ex Hebræo S. Hieronymus vertit, *Fiat nouissimum eius interitus*, in generatione altera deleatur nomen eius. Sed Septuaginta non male verterunt, *Fiant nati eius in interitum*; in generatione vna deleatur nomen eius. Nam vox Hebræa, *acharitbo*, significat ad literam, *reliquia eius*, siue, quod post eum remanet. Et quamuis possit hoc significare, *nouissimum eius*, vt vertit S. Hieronymus, quia nouissimum postea erit: tamen rectissimè verterunt Septuaginta Interpretes, *nati eius*, id est, reliquie eius, siue posteritas eius. Illud quoque, *in generatione vna*, rectè interpretatum est: quoniam Septuaginta non legerunt, *acher*, id est, altera, vt legit S. Hieron. sed, *achad*, id est, vna: literæ enim similitudinæ sunt, & facilè fuit librarijs vnam literam pro alia ponere.

אחריתו

אחד

אחד

XIII.

In memoriam redeat iniquitas Patrum eius, & peccatum matris eius non deleatur.

Addit Propheta, ad calamitates Iudæ, & Iudæorum: vt peccata parentum in eis puniantur. Vocat autem Patres non solum patrem eius naturalem, sed omnes eos Hebræos, qui peccauerunt in deserto, & postea in terra promissionis. vocat verò matrem non tantum matrem propriam, sed integram Synagogam, siue ipsam ciuitatem Hierusalem, de qua dicitur Thren. 1. *Peccatum peccauit Hierusalem*. Quod autem hic dicit Propheta, significauit etiam Dominus Matth. 23. cum ait, *Vt veniat super vos omnis sanguis iustus, qui effusus est super terram à sanguine Abel iusti, vsque ad sanguinem Zachariæ filij Barachie, quem occidistis inter templum, & altare. Amen dico vobis, venient hæc omnia super generationem istam*. Et hoc ipsum imprecati sunt impij Iudæi filijs suis, Matth. 27. *Sanguis eius super nos, &*

*super filios nostros*. Neq; repugnat hæc sententia verbis Ezechielis cap. 18. *Filius non portabit iniquitatem patris*: Ezechiel enim loquitur de filijs, qui non imitantur peccata parentum; Plalmus autem loquitur de filijs, qui peccata parentum imitantur. Deus enim irritatus peccatis parentum expectat quidem filios ad pœnitentiam, sed si illi pergant parentum iniquitates imitari, & sic implere mensuram Patrum suorum, tandem omnes exterminat, non solum considerans peccata præsentium, sed etiam præteritorum. Atque hoc est, quod Exod. 20. Deus dixit, cum legem populo daret, *Ego sum Deus tuus fortis zelotes, visitans peccata parentum in filios, in tertiam, & quartam generationem eorum, qui oderunt me*. Vide de concordia harum Scripturarum sanctum Thomam in 1. 2. quæst. 87. artic. 8. & Theologos cæteros apud Magistrum Sententiarum lib. 2. distinct. 33.

*Fiant contra Dominum semper, & disperat de terra memoria eorum, pro eo quod non est recordatus facere misericordiam.*

Repetit quod dixit de peccatis parentum, & eleganter opponit memoriæ peccatorum memoriam gloriæ Iudæ, & Iudæorum: quasi dicat. Viuet coram Deo memoria peccatorum patris, & matris ipsorum, vt pœna semper maneat: & contra, disperat de terra memoria gloriæ, & felicitatis ipsorum. Illud enim *contra Dominum*, significat coram Domino, siue ex opposito oculorum Domini, vt semper videantur à Domino peccata illa: hæc enim est vis vocis Hebræicæ, *neghed*, & Græcæ *ἐναντίον*. Illud autem, *memoria eorum*, non significat simplicem memoriam personarum, sed faustam commemorationem. Viget enim commemoratio aliorum Apostolorum, quæ quotannis renouatur cum honore, & laudibus ipsorum: Iudæ commemoratio nulla fit, & si quando nomen eius pronuntiandum est,

נגד

XIV.



est, cum execratione & horrore pronunciat-  
tur. Sic etiam gentis Iudæorum nulla fit  
commemoratio, nisi cum contemptu, vt  
gentis vilissimæ, quæ vbique seruit. Addit  
Propheta causam tot calamitatum Iudæ &  
Iudæorum. *Quoniam, inquit, non est recor-  
datus facere misericordiam:* nam, vt scribit  
B. Iacobus c. 2. *Iudicium sine misericordia illi,  
qui non facit misericordiam.* Hoc enim fuit  
peccatum Iudæ, quod cum videret Principes  
Iudæorum furere aduersus Christum, ipse  
nulla misericordia motus erga innocentem  
Magistrum & Dominum suum, crudelissime  
illum tradidit capiendum & occidendum.

xv.

*Et persecutus est hominem inopem, &  
mendicum, & compunctum corde morti-  
ficare.*

Explicat Propheta, in quo sita fuerit cru-  
delitas Iudæ & populi Iudæorum; quia vi-  
delicet *persecutus est Christum, hominem  
inopem, & mendicum, & compunctum corde  
mortificare*, id est, ad eum morti tradendum.  
S. Augustinus non audet hæc de Christo ex-  
ponere, quia Christus non potest dici com-  
punctus corde, cum compunctio sit propria  
eorum, quorum est poenitentia. Ideo per ho-  
minem compunctum corde intelligit Apo-  
stolos, & alios fideles, quos Iudæi vsque ad  
mortem persecuti sunt. Sed quia S. Hiero-  
nymus, Theodoretus, Euthymius, & alij de  
Christo hæc omnia intelligunt, & textus ipse  
quodammodo nos cogit, vt hunc versiculum  
de Christo potissimum exponamus; dicen-  
dum est, Christum dici hominem inopem,  
quia *cum esset dives, propter nos egenus factus  
est, vt nos inopia sua locupletaret*, vt dicit A-  
postolus 2. Corint. 8. Dicit etiam mendicum,  
quia ex aliena misericordia in hoc Mundo  
vivere voluit, vt verbo Dei prædicando, &  
orationi pro nobis faciendæ totus incumbet-  
ret; dici denique compunctum corde, non  
compunctione culpæ, sed compunctione  
poenæ, & anxietatis, ac sollicitudinis, quam  
pro salute generis humani assidue in corde  
gerebat. Notatur autem in his verbis summa  
crudelitas: nam qui hominem occidere que-

runt, vel moueri solent ab iracundia ob iniu-  
riam acceptam, vel à cupiditate spoliandi  
diuitem, vel ab inuidia alienæ felicitatis.  
Christus autem mitis & humilis corde ne-  
mini faciebat iniuriam; & cum esset adeo  
contemptor bonorum huius Mundi, vt vo-  
luntarie mendicus factus esset, non habebat  
vnde oculos cupidorum prouocaret. Deniq;  
cum assidue hominum peccata desieret, & ad  
poenitentiam agendam, ad felicitatem Mun-  
di spernendam, ad bona cœlestia desideranda  
hortaretur, nulla erat causa, cur eum ad mor-  
tem vllus quæreret.

*Et dilexit maledictionem, & venit ei,  
& noluit benedictionem, & elongabitur  
ab eo.*

xvi.

Nemo est qui diligere possit maledictio-  
nem, vel odio habere benedictionem, si sub  
ratione maledictionis & benedictionis vo-  
luntati proponantur: sed dicitur homo dili-  
gere maledictionem & nolle benedictionem,  
quando ipse sibi causa est malis suis operi-  
bus, cur maledicatur & non benedicatur. Sic  
Iudas tradendo Christum Iudæis ob cupidi-  
tatem modicæ pecuniæ, dilexit maledictio-  
nem, quia ipse sibi causa fuit, cur maledice-  
retur à Deo: & ipse idem deferendo Chri-  
stum, in quo benedicendæ erant omnes ge-  
nerationes, noluit benedictionem; quia ipse  
sibi causa fuit, cur non benediceretur à Deo.  
Quod idem de populo Iudæorum dici potest.  
Venit enim filius Dei de cœlo, vt benediceret  
populum suum, sed illi Christum occidendo,  
sibi ipsi causa fuerunt, cur pro benedictione  
maledictionem acciperent, & benedictio ad  
Gentes transferretur. Porro benedictio Dei  
cumulum bonorum omnium significat,  
quemadmodum & maledictio cumulum o-  
mnium malorum. Videmus autem hæc im-  
pleta fuisse primum in Iuda, qui continuo &  
pecunias quas acceperat, & vitam tempora-  
lem, & sempiternam amisit: deinde in popu-  
lo Iudæorum, qui Regnum & Sacerdotium  
perdidit, & excaecatus atque obstinatus in in-  
credulitate viuuit, donec ad tenebras extero-  
res, quæ sunt in gehenna, descendat,



XVII.

*Et induit maledictionem sicut vestimentum, & intrauit sicut aqua in interiora eius, & sicut oleum in ossibus eius.*

Declarat Propheta pulcherrimis similitudinibus, maledictionem diuinam esse cumulum omnium malorum tum exteriorum, tum interiorum, ita vt homo maledictus à Deo cunctis malis ita repleatur, vt nulli bono relinquatur locus. Primum comparat maledictionem diuinam vestimento, quod totum corpus vndique tegit: & quia vestimentum non intrat ad viscera, comparat etiam aquæ, quæ hominem demersum in mari, non solum exterius abluit, sed etiam intrat ad stomachum, ad ventrem, ad pectus, ad omnia interna corporis humani: & quoniam aqua non penetrat ossa, imo neque carnes, venas, nervos: addit comparationem olei, quod subtilissimum est, & non solum carnes, & venas, & nervos, sed ipsa etiam ossa peruadit. Sic igitur diuina maledictio, non solum Iudæ & Iudæorum, sed omnium illorum, quibus dicitur: *ite maledicti*, replebit malis corpus & omnia eius membra; replebit animam & omnes eius sensus; replebit & mentem, & vsque ad intimam intelligentiæ & voluntatis penetrabit. Quæ certe si homines mortales serio cogitarent, non sine magno horrore viuerent.

XVIII.

*Fiat ei sicut vestimentum quo operitur, & sicut zona qua semper praeingitur.*

Addit Propheta, maledictionem illam non solum vbique penetraturam, sed etiam sempiternam futuram. *Fiat*, inquit, *ei*, Iudæ videlicet, & populo Iudæorum, ea maledictio sicut vestimentum quo operitur, id est, semper illi adhaereat, quemadmodum vestis semper adheret homini, ne turpitudine eius appareat. *Et sicut zona qua semper praeingitur*, id est, non solum maledictio illi adhaereat, sed etiam firmissime adhaereat, quo modo cingulum firmissimis & multiplicibus nodis adstringi solet. Quis digne cogitare valeat, qualis sit nodus, quam firmus, quam insolubilis, decretum immutabile omnipotentis voluntatis Dei?

*Hoc opus eorum, qui detrahunt mihi apud Dominum; & qui loquuntur mala aduersus animam meam.*

Concludit Propheta prædictionem miseriarum Iudæ, dicens: *Hoc opus eorum*, id est, hæc erit merces operis eorum. Accipitur enim in Scriptura opus pro mercede operis, vt Leuit. 19. *Non morabitur opus mercenarij tui apud te vsque mane. Qui detrahunt mihi*, id est, qui me seductorem vocant, qui Filium Dei esse negant, &c. *apud Dominum*, id est, hæc erit merces eorum apud Dominum, siue à Domino, vt clarius habetur in textu Hebraico, quem S. Hieronymus sic reddidit: *Hæc est retributio à Domino his, qui mihi aduersantur, & qui loquuntur mala aduersus animam meam*, id est, qui obloquuntur de me mala. Est enim hæc pars posterior versiculi, repetitio & explicatio prioris.

*Et tu Domine Domine fac mecum propter nomen tuum, quia suauis est misericordia tua.*

In vltima parte Psalmi precatur Christus pro se & pro corpore suo, quod est Ecclesia; & præcando prædicit multa bona: quemadmodum in superioribus partibus per modum imprecationis prædixit multa mala Iudæ & Iudæis. Primum igitur orat Dominum, vt sibi semper adsit, seq; & corpus suum adiuuet propter gloriam nominis sui. *Et tu*, inquit, *Domine Domine*. Prima vox continet nomen quatuor litterarum, quod est proprium Dei, & deducitur ab esse, quia Deus est fons essendi: secunda continet aliud nomen, quod proprie Dominum significat. Itaque sensus est, Tu fons essendi, qui es Dominus omnium rerum, *fac mecum*, id est, mecum operare, mihi te adiunge, *propter nomen tuum*, id est, ad gloriam tuam. *Quia suauis est misericordia tua*, id est, quia misericordia tua benigna est, & facile inclinatur ad succurrendum miseris. Vbi loquitur tum pro se, tum pro corpore suo, quod est Ecclesia, & poscit auxilium Dei aduersus persecutores ex tribus capitibus: primo, quia Deus est Dominus omnium rerum, ac per hoc potest, si ve-

XXI.

XXII.



si velit, hostes reprimere: secundo, quia hoc postulat propter nomen Dei extollendum: tertio, quia Dei misericordia benigna est, ac per hoc Deus non solum potest, sed etiam vult misereri. Et quoniam, ut dixi, hæc est prædictio per modum precationis, vel simul precatio & prædictio: ideo certi sumus, Ecclesiam Christi semper à Deo protegendam & iuuandam esse, ut portæ inferi non præualeant aduersus eam.

*Libera me, quia egenus & pauper ego sum; & cor meum conturbatum est intra me.*

Pergit in oratione Propheta in persona Christi, & videtur respicere tempus illud, quo Christus dixit Ioan. 12. *Nunc anima mea turbata est, & quid dicam, Pater saluifica me ex hac hora:* vel cum in horto precatus est Patrem, & Apostolis dixit: *Tristis est anima mea usque ad mortem. Libera, inquit, me ab imminente morte; quoniam egenus & pauper ego sum*, id est, omni humano auxilio destitutus, non habeo, qui pugnet pro me; *& anima mea turbata est intra me*, id est, tristitia & horror ex consideratione mortis futuræ turbauit me. Hæc autem Christus dicebat, ut ostenderet, se vere esse hominem, qui mortem absolute consideratam, ut naturæ contrariam exhorrebat: cum tamen eandem mortem, ut precium redemptionis à Patre decretum & ordinatum maxime desideraret. Quare Ioan. 12. cum dixisset: *Saluifica me ex hac hora;* subiunxit: *Sed propterea veni in horam hanc.* Et Matth. 26. cum dixisset: *Transseat à me calix iste;* continuo addidit: *Sed non sicut ego volo, sed sicut tu.* Porro quod attinet ad corpus Christi, quod est Ecclesia; petitur liberatio à persecutionibus & temptationibus, quia cæterus Ecclesiæ egenus & pauper est, id est, non nititur viribus suis, aut meritis suis, sed tanquam vere mendicus, in solo Deo confidit.

*Sicut umbra cum declinat, ablatum sum, & excussus sum sicut locustæ.*

Hæc pertinent ad comprehensionem Do-

mini, quæ facta est post orationem in horto. Comparat vero Propheta comprehensionem umbræ deficienti, quoniam umbra sine vilo strepitu deficit, & maxime cum silentio. Sic enim & Dominus auulsus est à Discipulis, & captiuus ductus, imo etiam ad varia tribunalia, & ad ipsam Crucem adductus sine murmure, sine resistentia, sine defensione. *Sicut umbra, inquit, cum declinat, ablatum sum*, id est, ablatum sum à comitatu Discipulorum ad tribunal Caiphæ, Pilati & Herodis, eo silentio, quo declinans umbra deficere solet. *Et excussus sum*, id est, iactatus ab vno tribunali ad aliud; *sicut locustæ*, vilissima facili- cet animalia, à vento iactari solent ab vno loco ad alium. S. Augustinus priorem partem versiculi refert ad Christum in persona propria, posteriorem ad Christum in persona Discipulorum. Ille enim ablatum est sicut umbra, illi excussi velut locustæ.

*Genua mea infirmata sunt à ieiunio, & caro mea immutata est propter oleum.* XXIII.

Hic videtur describi debilitas Christi ex ieiunio, adiuncta vigilia & labore illius noctis, & sequentis diei, quo passio peracta est. Quamuis etiam toto vitæ tempore Dominum frequentissime ieiunasse credendum sit. *Genua mea, inquit, infirmata*, id est, debilitata sunt à ieiunio, *& caro mea immutata*, id est, macie & pallore confecta apparuit propter oleum, id est, propter pinguedinem suam amissam. In Hebræo clarius habetur, *Caro mea immutata est, miscemem*, id est, à pinguedine, id est, ex pingui, macilentia reddita est. Varie hic locus ab aliis explicatur, sed hæc nobis explicatio literalis maxime visa est.

*Et ego factus sum opprobrium illis, viderunt me, & mouerunt capita sua.* XXIV.

Hic concludit passionem: nam post illam summam debilitatem factus est Dominus opprobrium Iudæis; cum cum in medio latronum crucifixum viderunt, & viso eo mouerunt capita sua stantes ante Crucem, & dicentes: *Vah qui destruis templum Dei, &c.*

Ad-



XXV.

*Adiuua me Domine Deus meus, saluum me fac secundum misericordiam tuam.*

Precatur Dominus de corpore exiens auxilium Patris ad celerem resurrectionem, ut diximus in explicatione Psalm. 21. & 68. & simul precatur corpori suo mystico, id est, Ecclesiae veram salutem corporis & animae.

XXVI.

*Et scient quia manus tua haec, & tu Domine fecisti eam.*

Ne putarent homines Christum ad passionem & mortem ignominiae plenam inuitum peruenisse, & ne iactarent Iudaei, se potentia sua in Christum praualuisse, admonet Propheta in persona Christi, hoc totum à Deo factum esse, iuxta illud S. Petri Act. 3. *Deus, qui praeuocauit per os omnium Prophetarum, impleuit sic.* At igitur: *Et scient homines omnes, ac praesertim Iudaei, quia manus tua haec*, id est, quia haec res, haec passio, haec mors mea à manu tua, hoc est, voluntate & potestate tua processit: *& tu Domine fecisti eam.* Neque enim potuissent Iudaei aut Gentes Christo praualuere, eumque affligere & occidere, nisi Deus voluisset. Neque tamen excusantur à grauissima culpa, qui Christum occiderunt, quasi voluntatem Dei adimpleuerint: ipsi enim non voluntatem Dei, sed odium cordis sui implere voluerunt: Deus autem mala eorum voluntate, quam ipse non fecerat, usus est ad Mundum redimendum per obedientiam & charitatem, patientiam & humilitatem vnici sui. S. Augustinus per *manum Dei*, hoc loco intelligit Christum, quem Deus fecisse dicitur, quia humanitatem eius fecit. Alij per *manum Dei*, intelligunt potentiam Dei, sed per particulas illas, *haec, &, eam*, intelligunt salutem. Sed nos Theodoretum secuti sumus, cuius expositio maxime literalis nobis visa est.

XXVII.

*Maledicent illi, & tu benedices, qui insurgunt in me, confundantur, seruus autem tuus latabitur.*

Persecutores ignorantes haec, quae dicta sunt, *maledicent* mihi & Ecclesiae meae: ut reuera usque ad hanc diem Iudaei blasphemam

mate & maledicere pergunt: sed *tu benedices*, non solum mihi, me glorificando, & exaltando ad dexteram tuam, sed etiam propter me benedices omnes gentes, eas per Fidem & Baptismum in filios adoptando. Ex quo fiet, ut illi, qui me persequuntur & mihi maledicunt, tandem confundantur; *seruus autem tuus*, ego & fratres mei latitia sempiterna fruamur.

*Induantur, qui detrahunt mihi, pudore; & operiantur sicut diploide confusione sua.*

Confirmat quod dixit, & per modum imprecationis praedicat, omnes Christi & Ecclesiae aduersarios tandem cooperiendos confusione & pudore instar vestimenti duplicis vndique hominem operientis. Quod quidem in die Iudicii omnino implebitur. Vox Hebraica, *mehil*, significat vestem albam & honorificam, qualis erat tunica sacerdotalis, quae describitur Exod. 28. Sed LXX. Interpretes verterunt *διπλοῖδα*, vel quia vestis erat tam ampla & longa, ut duplicari posset: vel quia reuera, ea vox significat vestem suffultam alia veste, ac per hoc duplicem, ut sunt apud nos vestes permultae. Sensus autem est, confusione damnatorum in nouissimo die fore maximam, ita ut pleni sint futuri erubescencia & pudore. Et certe quae maior confusio cogitari potest, quam ingratitude, insipientiam, aliaque vitia damnatorum in theatro Mundi totius, coram Angelis & hominibus, qui ab initio saeculi fuerunt, apertissime detegi?

*Confitebor Domino nimis in ore meo, & in medio multorum laudabo eum.*

Hoc opponitur confusione impiorum. Illi enim praefusione obmutescunt: Christus autem & electi eius confitebuntur laudes Deo, *nimis in ore suo*, id est, magno clamore, magnoque iubilationis affectu, idque in medio multorum, in theatro orbis terrarum in die Iudicii, & postea in theatro caelestis Hierusalem in aeternum.

*Quia astitit à dextris pauperis, ut saluam faceret à persequentibus animam meam.*

Hæc



Hæc est ratio tantæ confessionis, & laudis: quoniam Deus auxilio suo astitit à dextris pauperis Christi, & populi eius, vt saluaret à persequentibus Iudæis vitam temporalem Christi, quod factum est per celestem resurrectionem, & à persequentibus tū hominibus, tū Dæmonibus, vitam æternam electorum eius. In Hebræo est, *misrio photo*. i. à iudicibus, pro eo quod nos habemus, à persequentibus. & quidem quod attinet ad Christum, præcipui persecutores Christi fuerunt Caiphas, & Pilatus, qui Christum morti adiudicauerunt. Sed sapientia Dei astitit Christo, tanquam optimus Patronus, & sententiam iniquam reuocare fecit à diuina potentia, quæ Christum ad vitam reuocauit. Quod verò attinet ad Ecclesiam, iudices qui persequebantur Ecclesiam, erant tum Imperatores, & Reges, ac magistratus Paganorum, qui multa millia Sanctorum Martyrum morti adiudicauerunt, tum præcipue dæmones, qui sententiam Dei in genus humanum latam proferebant, & ex illa genus humanum morti æternæ adiudicabant: sed astitit aduocatus potentissimus Christus, qui tulit de medio chirographum, quod erat cōtrarium nobis, illudq; deleuit, & affixit cruci; & pauperum animas saluas fecit, vt scribit Apostol. ad Col. 2. Hic illud annotandum est, Deum assistere à dextris pauperum, id est, eorum, qui agnoscunt paupertatem suam, debilitatem videlicet virium suarum, & ideo assidue pulsant ad ostium Dei, qui diues est in misericordia. Item à dextris pauperum, id est, eorum, qui exuerunt affectum rerum omnium creatarum, & spiritu pauperes effecti in solo Deo diuitias suas posuerunt.

PSALMVS CIX.

Titulus & Argumentum.

Psalmus Dauid.

**H**ic Psalmus celeberrimus est tum magnitudine mysteriorum, tum obscuritate sententiarum. Sed quamuis excacati Iudæi multa fabulentur, tamen apud Christianos

nos nulla dubitatio est, quin hic Psalmus de Christi Regno, & sacerdotio intelligatur, ita explicante Spiritu sancto in multis locis sanctarum Scripturarum, Matth. 22. Act. 2. 1. Corinth. 15. ad Hebr. 157. & 10.

EXPLICAT. PSAL. CIX.

**D**ixit Dominus Domino meo, sede à dextris meis.

Vidit in spiritu Dauid, Messiam post mortem, & resurrectione ascendentem in celū, & refert ad nos verba Dei Patris ad Filium, quibus eū inuitat ad consedendum, & cor regnandum. *Dixit*, in Hebræo est, *nehum*, quod propriè significat, dictum, & coniunctum cum nomine sequenti, verti potuisset. Dictum Domini ad Dominum meum. Sed sensus est idem, & gratia claritatis verterunt LXX. *Dixit Dominus*. Quamuis autem dixit, sit temporis præteriti, & tempore Dauidis id tempus nondum aduenisset, tamen rectè vtitur Dauid verbo temporis præteriti, quia vidit rem futuram, tanquam præteritā. *Dominus* in hebræo est nomē quatuor literarū, quod propriè soli Deo vero cōuenit; quod quāuis à modernis pronuncietur, *lehoua*, tamen ab antiquis non solebat pronuciari; sed loco eius pronuciabatur aliud nomen, quod Dominum significat. Ita LXX. Interpretes vbicunq; hoc nomē proprium Dei inuenerunt, verterunt *κύριος*, i. *Dominus*. de qua re scripsimus in exercitatione grammatica ad 1. vers. Psal. 33. *Domino meo*. In Hebræo est, *Ladoni*, quod propriè Domino meo significat: quamuis autē Rabbi per Dominum hoc loco intelligant Abraham, vt S. Hier. refert in com. ad cap. 22. Matthæi; vel Ezechiam, vt refert Iustinus in dialogo contra Triphonem, & Tertul. lib. 5. in Marcionem: tamen certum est, non aliū hoc loco Dominum vocari, nisi Messiam, qui fuit filius Dauid secundum carnem; & Dominus Dauid secundum diuinitatē. totus enim Psalmus id clamat, eū neq; Abraham, neque Ezechias federint ad dextram Dei, neq; geniti sint ante luciferum, neque sacerdotes fuerint secundum ordinem Melchisedech. Quare Iudæi interrogati à Christi

Nann sto



sto. Matth. 22. quomodo Dauid in spiritu vocet Messiam Dominum suum; non sunt ausi negare psalmum intelligendum esse de Messia. Cur autem non repetatur hoc loco nomen proprium Dei, non est ratio, quia filius non sit verus Deus, vt est Pater, vt Arianus docebant; sed quia hic non agitur de filio Dei simpliciter, sed de filio Dei incarnato. Filius autem Dei incarnatus in scripturis passim Dominus appellatur, & Pater Deus, cum simul nominantur: cuius rei ratio est, quia nomen Domini conuenit filio secundum vtramque naturam; nomen autem Dei, non conuenit ei nisi ratione naturæ diuinæ. Itaque si hoc loco idem nomen tributum fuisset Patri, & Filio, suspicari possemus, hæc dici filio tantum vt Deus est. Quod autem Filius Dei incarnatus, qui etiam Christus dicitur, in scripturis passim appelletur Dominus, & Pater Deus dicatur, perspicuum est ex illo 1. Cor. 8. *Vnus Deus Pater, & vnus Dominus Iesus Christus.* & 2. Cor. 1. *Gratia vobis & pax à Deo Patre, & Domino Iesu Christo.* & ad Eph. 6. *Pax fratribus, & charitas cum fide à Deo Patre, & Domino Iesu Christo.* & in ipsis Euang. atque Actis Apost. & Epist. eorundem Apostolorum cum ubique Christus dicatur Dominus, vix in vno, aut altero loco dicitur Deus. quia videlicet, vt diximus, nomen Dei conuenit Christo solum ratione diuinæ naturæ, nomen Domini conuenit secundum vtramque naturam; vnde etiam in Symbolo dicimus, *Credo in Deum, Patrem omnipotentem, & in Iesum Christum filium eius unicum, Dominum nostrum. Sede à dextris meis.* Sessio quietem, & auctoritatem, præcipue regiam denotat: hæc autem Christi sessio, est ineffabilis quies, & summa regia potestas. Illud autem, *à dextris meis*, significat æqualitatem, & consortium Regni Dei Patris super omnes creaturas. Quam æqualitatem semper habuit filius Dei ratione diuinæ naturæ, sed ad eam eleuatus est ratione naturæ humanæ, post humiliationem vsq; ad mortem, mortem autem crucis. Sic enim loquitur Apost. Phil. 2. *Propter quod & Deus exaltauit illum, & dedit illi nomen, quod est su-*

*per omne nomen, vt in nomine Iesu omne genu flectatur, cælestium, terrestrium, & inferorum, & omnis lingua constiteatur, quia Dominus Iesus Christus in gloria est Dei Patris.* Idem enim est esse in dextera Dei, & in gloria Dei: hoc est in maiestate Dei. hæc autem gloria est, quod habeat nomen super omne nomen, & illi omne genu flectatur. sic etiam 1. Cor. 15. ait idem Apostolus. *Oportet illum regnare, donec ponat omnes inimicos sub pedibus eius.* vbi explicat Apostolus illud, *sede à dextris meis*, vt idem sit, quod, regna mecum, donec ponam, &c. Idem quoque Apostolus ad Hebr. 1. *Cui dixit Angelorum, Sede à dextris meis? nonne omnes sunt administratorij spiritus in ministerium missi, &c.* Vbi per sedere à dextris Dei significatur differentia inter Christum, & Angelos, quod isti sint ministri, & serui, & ideo non sedeant, sed mittantur in ministerium: Christus autem vt Rex, & Dominus sedeat cum Patre, creaturis omnibus superior. Denique S. Petrus Act. 2. *Dextera, inquit, Dei exaltatus effudit hoc donum, quod vos videtis, & auditis; non enim Dauid ascendit in cælum; dicit autem ipse, Dixit Dominus Domino meo sede à dextris meis, donec ponam inimicos tuos scabellum pedum tuorum.* Certissime sciat ergo omnis domus Israel, quia & Dominum & Christum fecit Deus hunc Iesum, quem vos crucifixistis. Vbi S. Petrus docet, sedere à dextris Dei, esse ascendisse in cælum; dominari, & regnare ubique vt dominatur, & regnat Deus.

*Donec ponam inimicos tuos scabellum pedum tuorum.*

Hic versiculus continuatur cum primo apud Hebræos, iuxta Rabinorum distinctiones: sed LXX. Interpretes, qui Rabinos omnes præcesserunt, nouum versiculum esse debere iudicauerunt. Significat autem his verbis Propheta, Regnum Christi nunquam finiendum, neque periculum esse, vt ab inimicis euertatur, cum Deus statuerit paulatim omnes omnino inimicos illi subijcere, vt pacifice postea duret in æternum. Itaque illud, *donec*, non significat, Christum non



amplius cessurum, vbi fuerint omnes hostes debellati, sed significat Christi Regnum semper propagandum magis, & magis, donec nullus omnino super sit inimicus, qui illi gentia non flectat: quasi dicat; perge regnare mecum, nec desistas propagare Regnum, donec omnes hostes debellantur. Porro ista propagatio quotidie impletur, dum alij conuertuntur ad fidem, & obedientiam, & sponte subiiciuntur pedibus Christi, vt in eis, tanquam in scabello quiescat; & tandem finito exilio pergunt ad patriam, vbi feliciter sub Deo requiescunt: alij, vel peruertuntur, vel in peruersitate perdurant, & tandem per mortem ad iudicium rapiuntur, & damnati ad inferos detruduntur, vbi Christi pedibus perpetuo comprimuntur. In nouissimo die propagatio complebitur, & tum Christo flectetur omne genu, caelestium, terrestrium, & infernorum. At cur dicit Pater, donec ponam; nonne etiam filius ponit inimicos suos scabellum pedum suorum? Omnia quod Pater operatur, etiam Filius operatur: sed tribuitur haec actio Patri, quia per eam redditur merces obedientiae Filij vt paulo ante Apostolum dicentem audiui-  
mus, *Propter quod & Deus exaltauit illum.* Praeterea omnis actio quae ad potentiam pertinet, Patri solet tribui, quamuis etiam Filio sit communis, quoniam à Patre Filio communicatur, non Patri à Filio, & filio quidem, vt Deus est, communicatur per generationem; eidem filio, vt homo est, communicatur per gratiam hypostaticae vnionis. Quod autem filius Patri cooperetur in hac actione subiiciendi communes hostes, dicitur in sequenti versiculo.

*Virgam virtutis tuae emittet Dominus ex Sion: dominare in medio inimicorum tuorum.*

Propheta Dauid cum in spiritu audiuis-  
set Patrem loquentem ad Filium, ac dicen-  
tem, *Sede à dextris meis, donec ponam inimicos tuos scabellum pedum tuorum;* conuertit se ad Filium, & eodem spiritu reuelante demonstrat, vnde incipienda esset propagatio Regni Christi in terris. *Virgam,* inquit, *vir-*

*tutis tuae emittet Dominus ex Sion,* id est, Dominus Pater vt ponat inimicos tuos scabellum pedum tuorum, sceptrum Regalis potentiae tuae ex Ciuitate Hierusalem, & ex ipso monte Sion extendere incipiet, & propagabit vsque ad vltimum terrae. Concordat cum hac Prophetia verbum Domini, Luc. 24. *Oportebat Christum pati, & resurgere à mortuis tertia die, & predicari in nomine eius poenitentiam, & remissionem peccatorum in omnes gentes, incipientibus ab Hierosolyma. & Act. 1. Eritis mihi testes in Hierusalem, & in omni Iudaea & Samaria, & usque ad vltimum terrae.* Virga hoc loco sceptrum significat, & per sceptrum intelligitur Regalis potestas: per virtutem autem significatur robur, & fortitudo, vt clarius habetur in textu originali. Itaque *virga virtutis,* est sceptrum potentiae. dicitur autem haec virga emittenda ex Sion, quasi ex monte illo germinauerit, quoniam in Hierusalem cepit Regnum Christi spirituale; ibi enim fuerunt primi credentes; & ibi cepit propagatio fidei per Apostolos. *Dominare in medio inimicorum tuorum,* est quasi fausta acclamatio, & exhortatio ad propagandum imperium per omnes gentes, quasi dicat, tu igitur perge feliciter, infer vexillum crucis tuae in medium Paganorum; & Iudaeorum, vbi sunt confertissimi hostes tui, ibique in medio eorum dominare. i. illis inuitis, & repugnantibus Regnum tuum constitue. Quod certe breui factum videmus: nam intra paucos annos, frustra Iudaeis, & Paganis reluctantibus, Ecclesiae Christi in toto orbe terrarum constitutae fuerunt. Scribit enim Apostolus ad Col. 1. *Euangelium in vniuerso mundo est, & crescit, & fructificat.* & S. Irenaeus vicinis Apostolicis temporibus li. 1. cap. 2. *Ecclesia,* inquit, *per vniuersum orbem, usque ad fines terra seminata est,* & cap. 3. meminit Ecclesiarum Germaniae, Iberorum, Lybiae, Aegypti, Galliarum, Orientis, & earum quae in medio mundi erant, per quas intelligit Ecclesias Graeciae, & Italiae. Recte autem dicit Psalmus, *in medio inimicorum tuorum,* quia quantumlibet Ecclesia propagetur, & crescat, semper erit in medio inimicorum, id est,



Iudeorum, Paganorum, Hereticorum, & fal-  
forum Christianorum, dum in terris pere-  
grinatur. Sed in consummatione seculi fiet  
separatio bonorum à malis, & non erit am-  
plius Regnum Christi in medio inimicorum  
suum, sed eminebit & exaltabitur super o-  
mnes inimicos suos.

IV.

*Tecum principium in die virtutis tuae  
in splendoribus sanctorum: ex vtero ante  
Luciferum genui te.*

Dixerat, dominare in medio inimicorum  
tuorum, quod intelligitur in hoc tempore,  
dum Regnum Christi ab inimicis oppugna-  
tur: declarat nunc quid erit in nouissimo die,  
quando omnes inimici subiecti erunt ut sca-  
bellum, pedibus eius. *Tecum*, inquit, *princi-*  
*pium in die virtutis tuae*, id est, tecum erit  
principatus manifestus, tunc apparebit om-  
nibus, tuum esse Regnum, & apud te solum  
esse verum principatum. *In die virtutis tuae*,  
in die videlicet nouissimo, quando potentia  
tua cælum mouebit, Solem obscurabit, ter-  
ram concutiet, mortuos excitabit, & omnes  
ad tribunal tuum adducet. *In splendoribus  
sanctorum*, id est, quando circumdatus eris  
sanctis tuis, qui omnes fulgebunt sicut Sol.  
*Ex vtero ante Luciferum genui te*, id est, ideo  
tecum erit tantus principatus, quia ego Deus  
Pater omnipotens genui te, non ex nihilo, ut  
res creatas, sed ex vtero meo, ut filium ve-  
rum, naturalem & consubstantialem, idq;  
*ante Luciferum*, id est, antequam stellas crea-  
rem, ante omnem creaturam, ante omnia sæ-  
cula. Hæc est communis expositio Patrum,  
Hieronymi, Chrysostomi, Augustini, Theo-  
doreti, & Euthymij. Sed consideremus sin-  
gula verba: *Tecum*, ex Hebræo S. Hierony-  
mus vertit, *populus tuus*. Sed verbum He-  
braicum potest legi, *ammecha*, & significat  
*populus tuus*; potest etiam legi, *immecha*, &  
significat, *tecum*, & sic legerunt LXX. Inter-  
pretes, & recte verterunt, *principium*, in He-  
bræo est, *nedaboth*, quod proprie significat  
*Principes*, sed Septuaginta videntur legisse,  
*nedaba*, *principatus*: & sic exponit Chryso-

stomus hoc loco vocem Græcam ἀρχή, quæ  
& principium, & principatum significare po-  
test. Quod si placeat, non accipere princi-  
pium pro principatu, sed simpliciter pro  
principio; exponere poterimus: *Tecum prin-*  
*cipium*, id est, tecum est principium primum  
omnium rerum, quia tu es in Patre, & Pater  
in te. Sed prior expositio videtur præfere-  
nda, ut magis consentanea textui Hebræico.  
*In die virtutis tuae*: in his verbis nulla est di-  
crepantia inter codices, nisi quod in Hebræo  
per virtutem significatur proprie fortitu-  
do & potentia. *In splendoribus sanctorum*,  
in Hebræo legitur, in montibus sanctitatis.  
Sed videntur LXX. Interpretes non legisse,  
*habere*, per ח, quod significat montes, sed  
*hore*, per נ, quod significat splendores. I-  
dem autem est, in splendoribus sanctitatis,  
& in splendoribus sanctorum; dici siquidem  
possunt sancti homines splendores sanctita-  
tis, quia sanctitas in eis resplendet. *Ex v-*  
*tero*, ex hoc verbo probant sancti Patres  
efficacissime Christi diuinitatem: nam si  
Christus creatura esset, non posset dici ge-  
nitus ex vtero: nemo enim dicit, se genuisse  
ex vtero domum, vel scamnum, vel ali-  
ud quidpiam ex arte factum: neque Deus  
vnquam dixit, se genuisse ex vtero cælum,  
aut terram. Porro per vterum intelligitur  
essentia Dei secreta & intima; & quamuis  
vterus proprie ad matrem, non ad patrem  
pertineat: recte tamen Deus Pater dicitur  
ex vtero genuisse, tum ut clarius ostenda-  
tur filius consubstantialis genitori; (cla-  
rius enim filius est ex substantia matris,  
quam ex substantia patris) tum quia Deus  
non opus habuit vxore ad filium gignen-  
dum & pariendum. Ipse enim genuit, ipse  
peperit; vnde dicit Matæ ultimo: *Nunquid  
ego, qui alios parere facio, ipse non pariam?*  
*Ante Luciferum*: hinc significatur æterni-  
tas filij, qui genitus fuit ante Luciferi crea-  
tionem, ac per hoc ante omnes creaturas.  
Sed posuit nomen Luciferi, quoniam ipse  
etiam filius Dei, est quidam Lucifer increa-  
tus. Est enim lux vera, quæ illuminat om-  
nem hominem, & omnem Angelum. In He-  
bræo habetur, *mischar*, quod S. Hieronymus  
vertit,

עמך  
עמך

נדרות

נדרה

שחר



vertit, ex aurora. Sed potest etiam verti, præ aurora, id est, ante auroram. LXX. Interpretes posuerunt luciferum pro aurora, siue quia cum aurora solet oriri lucifer, siue quia ipsa aurora etiam est lucifer quare S. Hieronymus Iob 11. vers. 12. vertit, *orieris vt lucifer*. cum tamen in Hebræo sit, *mape*; Itaque luciferum accepit pro mane, siue pro aurora. *Genui te* in Hebræo nunc legitur, *Tibi ros natiuitatis tuæ*. Sed Septuaginta non habuerunt illa duo vocabula, *Tibi ros*; & pro natiuitatis tuæ, legerunt, *genui te*; quia verba Hebraica mutatis punctis vtroque modo legi possunt, *ialaut beca*, est natiuitatis tuæ. *ialadicha*, est, *genui te*. Potest etiam fieri, vt LXX. Interpretes legerint, *tibi ros natiuitatis tuæ*, sed verba obscura declarare voluerint per suam versionem, & ideo dixerint, *genui te*. Id enim obscure significant illa verba, *ex vtero ante luciferum* tibi ros natiuitatis tuæ; id est, ex vtero ante luciferum fuit tibi natiuitas ex me, vt est rori ex coelo S. Augustinus addit aliam expositionem minus principalem, quod videlicet Dauid Christo filio suo secundum carnem dicat, *Ego genui te ex vtero Virginis Mariæ, filia mea*, antequam lucifer oriretur, id est, media nocte. Tertullian. quoque lib. 5. in Marcionem exponit de partu Virginis, sed tribuit Deo illud, *genui te*, hoc modo, *Ego Deus Pater genui te ex vtero Virginis, nocturno tempore antequam lucifer oriretur*.

*Iurauit Dominus & non pœnitebit eum, tu es Sacerdos in æternum secundum ordinem Melchisedech.*

Transit nunc à dignitate Regia ad sacerdotalem, atq; ostendit, Christum esse sacerdotem æternum, non succedentem Aaroni, sed immediatè à Deo institutum, cuius figura fuerat sacerdotium Melchisedech *Iurauit Dominus, & non pœnitebit eum*. Iuramentum Dei promissionis stabilimentum est; id quod declarauit addens, *& non pœnitebit eum*, id est firmissimè statuit, nunquam mutaturus: significat enim Dauid his ver-

bis, sacerdotium Aaronicum fuisse mutandum, sed sacerdotium Christi nunquam esse mutandum. Pœnitentia. n. Dei dicitur per metaphoram, cum Deus facit id, quod faciunt homines, cum eos pœnitet facti. mutat enim quod eos fecisse pœnitet. sic Genes. 6. dicit Deus, *Delebo hominem, quem creauit, à facie terræ, ab homine vsq; ad animantia; pœnitet enim me fecisse eos.* & 1. Reg. 15. *pœnitet me* (ait Deus) *quod constituerim Regem Saul. Tu es sacerdos in æternum.* dicuntur hæc à Deo, non à Dauide: Apostolus enim ad Hebr. 5. non semel repetit, hæc esse verba Patris ad Filium. dicitur autem *Christus sacerdos in æternum*, tum quia effectus vnici sacrificij, quo corpus suum obtulit in cruce, manet in æternum, iuxta illud Apostoli ad Hebr. 10. *Vna oblatione consummavit in sempiternum sanctificatos*: tum quia viuens ipse in æternum sacrificium quotidie offert per manus ministrorum sibi inuicem in Ecclesia succedentium. quod idem Apostolus ad Hebr. 7. confirmat, dicens, *Et alij quidem plures facti sunt sacerdotes idcirco quod morte prohiberentur permanere*; hic autem eo quod maneat in æternum, sempiternum habet sacerdotium. *Secundū ordinem Melchisedech*, per ordinem intelligitur, ritus, lex, traditio, consuetudo; hæc enim significat vox Hebraica opponitur autem ordo Melchisedech ordini Aaron secundum Apostolum ad Hebr. 7. Distinguitur vero ordo Melchisedech ab ordine Aaron in multis. Primo Melchisedech non legitur successisse alteri, neque ei successisse alter legitur, nam ideo dicitur sine patre, sine matre, sine genealogia, neque initium dierum, neque finem vitæ habens, vt dicitur ad Hebr. 7. in sacerdotio autem Aaronis vnus alteri succedebat, quia singuli moriendo sacerdotium filijs relinquebant. secundo, Melchisedech erat sacerdos, & Rex; Aaron, simplex sacerdos. tertio, Melchisedech obtulit panem & vinum; Aaron oues, & boues quarto, Melchisedech erat sacerdos vniuersalis, non vnus gentis tantum; Aaron erat sacerdos duntaxat Hebræorum. quin Melchisedech non egebat tabernaculo vel templo ad sacrificandum; Aaron egebat, & ideo



nunc apud Hebræos cessauit sacrificium, quia euersum est templum. Christus igitur Sacerdos est secundum ordinem Melchisedech, quia reuera nulli successit, neque alius ei successit in amplissima dignitate sempiterni sacerdotij: & ipse vere ac proprie non habet Patrem vt homo, neque matrem vt Deus, idem Christus Rex est & Sacerdos, & obtulit panem & vinum in cena, id est, corpus suum sub specie panis, & sanguinem suum in specie vini: & non est Sacerdos Hebræorum tantum, sed Hebræorum & Gentium: neque alligatur sacerdotium eius vni templo vel tabernaculo, sed, vt prædixit Malachias cap. i. *à solis ortu usque ad occasum in omni loco sacrificatur & offertur oblatio munda.* Ex his satis aperte conuincitur hæresis Lutheranorum, qui negant sacrificium verum, proprièq; dictum extare in Ecclesia Dei: vel ostendant Lutherani, si possunt, quo modo prædictio sit adimpleta de sacerdotio secundum ordinem Melchisedech instituendo, & nunquam mutando.

VI.

*Dominus à dextris tuis confregit in die iræ sue Reges.*

S. Ioannes Chrysostomus, quem Græci sequuntur, per Dominum, hoc loco intelligit Patrem; S. Augustinus intelligit Filium: S. Hieronymus dicit quidem, Dominum hoc loco nominatum esse Patrem, tamen statim addit, illum, *qui confregit Reges, iudicabit in nationibus, implebit ruinas, & bibit de torrente,* esse Filium. Videtur autem nobis sententia S. Augustini esse aptior & facilior, non enim debet rationem reddere, quo modo Pater sit à dextris Filij, cum paulo ante dictum sit, Filium sedere à dextris Patris: neque quomodo Pater de torrente biberit, & caput exaltauerit. Denique melius continuatur contextus verborum Prophetæ, si expositionem S. Augustini sequamur. Igitur Propheta, posteaquam dixerat, Filium à Patre Sacerdotem æternum appellatum fuisse; conuertit sermonem ad Patrem, ac dicit, Christum vere fore Sacerdotem æternum:

quoniam, etiam si multi Reges terræ conspirabunt, vt sacerdotium totamq; eius Religionem euertant; ipse tamen sedens à dextris Patris confringet Reges aduersarios, & illis omnibus inuitis sacerdotium & sacra sua perpetuabit. *Dominus à dextris tuis*, id est, Christus à dextris tuis sedens, sicut illi dixisti, *sedes à dextris meis, confregit in die iræ sue Reges*, id est, in die qua irascetur inimicis suis, Regibus terræ, Ecclesiam suam persequentibus, confringet eos, & iam in prænotione mea confregit; iam enim præuideo per spiritum prophetiæ, Herodem ab Angelo percussum, Neronem destitutum sibi manus iniectis, Domitianum, Maximinum, Decium, & ceteros interfectos, Valerianum captiui in manus barbarorum deuenisse; Diocletianum, & Maximianum præ desperatione Imperium deposuisse; Iulianum, Valentem, Hunnericum, & omnes denique inimicos Reges misere perisse; atque in gehennam detrufos, meritis pœnas dare.

*Iudicabit in nationibus, implebit ruinas, conquassabit capita in terra multorum.*

Dixit, quid faciet Christus in præsentit tempore aduersus hostes suos, Reges & Principes terræ; nunc addit, quid faciet in die nouissimo aduersus omnes inimicos suos. *Iudicabit*, inquit, *in nationibus*, id est, is, qui hoc tempore confregit impetum Regum, & conseruauit Ecclesiam suam tempore persecutionum, postea in fine sæculi iudicabit omnes nationes, siue iudicium exercebit in nationibus omnibus; & condemnatis omnibus impiis, *implebit ruinas*, id est, consummabit vltimum exterminium, complementum ruinæ impiorum perficiet, ex Hebræo S. Hieronymus legit, *implebit foueas*; quod etiam est verum, quia tunc implebuntur foueæ inferorum, omnibus malis hominibus, & demonibus eo detrufis & conclusis; & hoc modo *conquassabit capita in terra multorum*, id est, humiliabit & conteret omnes superbos, qui nunc erecto capite aduersus

Deum



Deum incedunt; tunc enim conculcabit superbiam eorum, cum coram toto mundo ostendat infirmitatem eorum, & contemptibiles atque confusos efficiet: & hoc erit conquassare & conterere capita eorum. Dicit autem, *multorum in terra*, quia in terra paucissimi inveniuntur veri humiles & pii; respectu superbiorum & impiorum, qui prope infiniti sunt. In Hebræo habetur, *in terra multa*, id est, in magna parte terræ; sed idem est sensus, siue quis dicat, superbos multos inueniri in terra; siue, superbos occupare multum terræ. S. Augustinus exponit hæc omnia de præsentī tempore, & in bonam partem, ut implere ruinas, sit instaurare quod cecidit, & conquassare capita, sit humiliare ad salutem per contritionem: quæ pia est & vilis expositio, sed mystica: nam ad literam exponunt de ultimo iudicio Theodoretus, Euthymius, & alij communiter.

*De torrente in via bibet, propterea exaltabit caput.*

Hunc vltimum versiculum exponunt magno consensu omnes veteres de Christi humilitate in carne mortali, & exaltatione in gloria cœlesti, tum illi, qui verba superiora exponunt de ipso Christo, tum qui exponunt de Patre. Quare mirum est, aliquos recentiores aliter sensisse. Reddit igitur Dauid rationem, cur tanta sit Christi potentia, ut Reges confringere, nationes iudicare, implere ruinas, & conquassare capita possit; & dicit: *De torrente in via bibet, propterea exaltabit caput*; ac si diceret eum Apostolo: *Humiliauit semetipsum, factus obediens usque ad mortem, mortem autem Crucis, propter quod & Deus exaltauit illum, & dedit illi nomen, quod est super omne nomen*. Torrentem appellat cursum rerum humanarum: quo modo enim torrens magno impetu & sonitu fluit, & turbidus ac turbatus incedit, & paulo post cessat, & ne vestigium quidem sui relinquit; sic sunt res humanæ tempore huius mortalitatis: transeunt enim omnia, & ut plurimum turbida & turbata: audiuntur sæ-

pe maxima prælia, & turbationes gentium & populorum, ut tempore Alexandri Magni, & postea Cæsaris, & aliorum similium. Sed paulo post finem accipiunt, tum ipsi, tum posterī eorum, & vix inueniuntur vestigia potentiae ipsorum. Ad hunc torrentem descendit Filius Dei per incarnationem suam, & in via, id est, in spatio vitæ suæ mortalis & transeuntis, bibit aquam turbidam huius torrentis, pertulit æruinas nostræ mortali-tatis; imo etiam in profundum torrentis descendit per passionem, ita ut non biberit aquam ad refrigerium & delectationem; sed biberit molestissimam aquam, ut illi faciant, qui demerguntur in aquis; iuxta illud Ps. 68. *Intrauerunt aquæ usque ad animam meam. Infixus sum in limo profundi, & non est substantia: veni in altitudinem maris, & tempestas demersit me*. Merito igitur huius tantæ humiliationis sponte susceptæ pro gloria Patris, & salute generis humani, exaltauit postea caput suum ascendens in cœlum, & sedens ad dexteram Patris, constitutus Iudex viuorum & mortuorum. Aliqui legunt in præterito, *bibit*; sed textus Hebraicus & Græcus habent in futuro, *bibet*: proinde nostra communis lectio eum textibus originalibus concordat.

PSALMVS CX.

Titulus, & Argumentum.

Alleluia.

**H**ic Psalmus, ut etiam multi sequentes, nihil habet in titulo, nisi, Alleluia, quod significat, Laudate Dominum: ex quo intelligimus, argumentū Psalmi esse laudationem Dei. Notat S. Hieron. hunc esse primū Psalmum perfectē alphabeticū: nam Psalm. 24. 33. & 35. alphabeticī sunt, sed non perfectē, quia in eis aliqua littera deest, & eius loco altera ponitur. Psalmus etiam 38. alphabeticus est, sed non ita perfectē, ut hic, qui nunc est in manibus: nam in illo sub vna littera modo



modo ponitur unus versiculus, modo duo, modo tres: in hoc autem Psalmo tot sunt parvi versiculi, quot sunt literae alphabeti. Itaque Psalmus continet viginti duos versiculos, quales sunt apud Latinos versiculi iambici, & apud Italos versiculi septem syllabarum. Sed LXX. Interpretes magis ad sententias, & ad similitudinem aliorum Psalmorum, quam ad litteras respicientes, partiti sunt Psalmum in decem versus.

## EXPLIC. PSAL. CX.

Aleph. **C**onsitebor tibi Domine in toto corde meo.

Beth. In consilio iustorum, & congregatione.

Dauid sanctus incipit hymnum ab invocatione, & simul explicat modum, quo utiliter laudari debet Deus. *Consitebor tibi Domine*, id est, laudabo, siue confessionem laudis offeram tibi. *In toto corde meo*; haec est conditio bonae laudationis, ut non fiat solum voce, sed etiam corde: & non solum corde, sed toto corde, id est, toto affectu, nihil magis, vel aequè diligendo, & laudando. Est etiam, toto corde, summa attentione, nihil aliud cogitando: indignum est enim versantem in laude omnipotentis Dei, quem Cherubim, & Seraphim cum tremore adorant, mentem ad inferiora deflectere. *In consilio iustorum, & congregatione*, id est, laudabo te toto corde, tum inter paucos iustos, tum in cetero multorum, & eorum promiscua multitudine: nam per consilium iustorum videtur intelligendus locus secretus, ubi soli conveniunt sapientes ad consilium. Vox enim hebraica, *soð*, secretum significat, siue consilium, quod secretum requirat. Vox autem, *hedá*; synagogam significat, siue congregationem, ad quam totus populus venire solebat.

Gimel. Magna opera Domini:

Daleth. *Exquisita in omnes voluntates eius.*

Laudat primum ab operibus in commune, quod videlicet Deus laude dignus sit,

quod omnia opera eius magna sint, & quod sint ita perfecta, ut ad omnem usum Deo serviant. Magna laus, quod artifex non faciat alia opera magna, alia parva, alia preciosa, alia vilia, sed quod omnia omnino, quae ab eius ingenio, vel manu prodeunt, magna sint. Talia esse opera Dei certè cognosceret, qui cogitabit, in omnibus, etiam nobis praeter multitudinem viluerint, infinitam Dei potentiam, & sapientiam elucere, & nullum à nobis perfectè comprehendere. Verè enim scripsit Ecclesiast. c. 1. *Cunctes difficiles, non valet homo eas explicare sermone* & cap. 8. *Intellexi, quod omnium operum Dei nullam possit homo invenire rationem*. Neque solum magna sunt opera, sed exquisita in omnes voluntates eius, id est, quaelita, & parata in omnem usum Deo placitum, ut Deus de illis faciat quicquid voluerit, iuxta illud Psal. 118. *Quoniam omnia serviunt tibi*: nam, ut S. August. rectè disputat, nihil est, quod magis Dei voluntati repugnare videatur, quam liberum arbitrium, quo fiunt peccata, quae Deus prohibet: & tamen de ipso libero arbitrio Deus facit, quod vult. vel enim reformat illud per gratiam, vel puniunt per iustitiam; & nisi ipse permitteret, liberum arbitrium non peccaret. Praeclarissima laus, & soli Deo propria, facere opera, quae in omnem usum quæri, aptari, & accommodari possint, & de quibus Deus quicquid velit, possit efficere. Vide commentarium S. Ioan. Chrysostomi, qui haec omnia mira eloquentia tractat, descendens ad singula opera Dei. In Hebraeo habetur in numero multitudinis, *Exquisita in omnes voluntates eorum*: sed fortasse Septuaginta aliter legunt, vel certè ad insinuandam Trinitatem diuinarum personarum, in una essentia divinitatis, positum est pronomen in numero multitudinis cum nomine Domini, numeri singularis.

Hè. Confessio, & magnificentia operum eius.

Vau. Et instituta eius manent in seculum seculi.

Transit



Transit nunc Propheta ab opere creationis ad opus gubernationis, & ostendit hoc etiam opus omni laude esse dignissimum. *Confessio*, inquit, & *magnificentia opus eius*, id est, operatio eius, quæ regit, & gubernat Mundum, à se creatum, est confessio, id est, materiæ confessionis laudis, & gratiarum actionis; & etiam materia magnificentiae suæ omnibus declaranda. Simili modo loquitur Sapientia; cum ait, *Gloria filiorum patres eorum*, Prouerb. 17. Et de decore filij Pater sine honore, Ecclesiastici 3. Hic enim accipitur gloria, vel de decore pro materia gloriæ, vel de decore. Et iustitia eius manet in seculum seculi, id est, non solum Deus magnifice gubernando operatur; quia prospicit omnibus abundanter, sed etiam iustissime, vt nunquam magnificentia eius à iustitia disuncta inueniatur, semper enim Deus seruat promissa, & nulli facit iniuriam. Id quod videtur præcipue additum propter vulgatam illam querimoniam, cur Deus finit impios exaltari, & pios ærumnis, & calamitatibus premi? Iudicia enim Dei occulta esse possunt, iniusta esse non possunt. Quantumuis igitur nobis aliter videatur, semper tamen opera Dei iusta sunt, & omni laude digna.

**Zain.** *Memoriam fecit mirabilem suorum.*

**Cheth.** *Misericors, & miserator Dominus.*

Descendit ad particulare quoddam opus providentiæ diuinæ, quando videlicet pluit manna de cælo; quod fuit opus magnæ misericordiæ, non solum præsentibus, quos aluit in deserto, sed etiam posteris, quibus reliquit vnam manna plenam in memoriam miraculorum, quæ patrauerat in deserto. Sic enim habetur Exod. 16. & ad Hebr. 9. Manna vero illud figura fuit sacramenti Eucharistiæ, quod datum est populo Christiano in cibum spirituale, & in memoriam mirabilem, quæ operatus est Christus in terris, quorum præstantissimum est gloriosa passio, quæ mortem nostram moriendo destruxit, & de Principe huius mundi

triumphauit. Ait igitur, *Memoriam fecit mirabilem suorum misericors, & miserator Dominus*. Misericors, & miserator distingui videntur apud Latinos, quod misericors ad habitum, miserator ad actum pertineat: sed in Hebraico textu differunt in eo, quod, *channum*, significat, simpliciter misericordem, *rachum*, addit affectum paternum, ac tenerum, qualis est patris in filium. Itaq; misericors, & miserator, hoc loco significant misericors, & paterne misericors.

**Teth.** *Escam dedit timentibus se.*

**Iod.** *Memor erit in seculum testamenti sui.*

Hæc esca est manna, quod Deus pluit de cælo, & dedit timentibus se, id est, cultoribus suis Hebræis: quamuis enim plurimi in eo populo peccatores essent, tamen Deum verum colebant: nam timere Deum, in Scripturis colere significat. Et sicut Deus volebat, vt populus memore esset mirabilium suorum, quæ fecit quando eduxit populum de Ægypto, & per desertum in terram promissionis introduxit: ita vicissim promittebat, se memorem futurum pacti sui, quod cū illis inierat: ideo addit, *Memor erit in seculum testamenti sui*, id est, ostendit continua providentia, & protectione se memorem esse fœderis, & promissorum suorum.

**Caph.** *Virtutem operum suorum annuntiabit populo suo.*

**Lamed.** *Vt det illis hereditatem gentium.*

Præcipuum caput fœderis, quod cum Abraham pepigit Dens, fuit vt daret posteris eius Hebræis terram Chanaanæorum, quæ ideo postea dicta est terra promissionis. Explicat igitur quomodo *memor erit testamenti sui*, dicens, *Virtutem operum suorum annuntiabit populo suo*, id est, memor pacti sui notam faciet populo suo virtutem; hoc est, potentiam, & fortitudinem operum suorum, conuertendo Iordanem retrorsum, clangore tubarum euertendo muros Hierico, sistendo Solem, & Lunam



ad imperium Iosue, lapides de coelo super hostes Hebræorum pluendo, & similia multa mirabilia operando. *Vt det illis hereditatem gentium*, id est, vt daret illis, fidelibus suis terram Palæstinæ, quam gentiles Chananæi tanquam propriam hereditatem, & possessionem obtinebant.

**Mcm.** *Opera manuum eius veritas, & iudicium.*

**Nun.** *Fidelia omnia mandata eius.*

**Samech.** *Confirmata: in seculum seculi,*

**Hain.** *Facta in veritate, & aequitate.*

Ac ne quis iniustitiam suspicaretur in eo quod Deus terram Palæstinæ abstulit Chananæis, & donauit Iudæis: addit, *opera manuum eius veritas, & iudicium*, id est, opera Domini, & in iis hoc particulare opus expulsiōis Chananæorum, & introductionis Iudæorum, facta sunt cum magna fidelitate, & iustitia. Veritas enim hoc loco, vt etiam alibi passim fidelitatem significat seruandi promissa. Quoniam igitur promiserat Deus Abraham tertiam illam se daturum posteris eius, hoc opus Dei factum est *in veritate*: & quoniam idem Deus non ante expulit Chananæos, quam impleta esset mensura peccatorum, ob quæ expelli mererentur; ideo hoc idem opus factum est *cum iustitia*, quæ hoc loco dicitur iudicium, quod est iustitiæ actus. *Opera ergo manuum eius veritas, & iudicium*, id est, fideliter & iuste fiunt. Quod autem mererentur puniri Chananæi, & in penam priuari terra Palæstinæ, probat Propheta, quia non seruauerunt præcepta Dei naturalia, quæ sunt omnibus communia, & immutabilia, quia continent prima principia iustitiæ: nam Leuit. 18. prohibet Deus incestum, adulterium, vitium contra naturam, idololatriam, & similia, & addit, *Omnes execrationes istas fecerunt accola terræ, qui fuerunt ante vos, & polluerunt eam; cauete ergo, ne & vos similiter euomat, cū paria feceritis, sicut euomit gentem quæ fuit ante vos.* Ait igitur, *fidelia omnia mandata eius*, id est, omnia præcepta Dei, præsertim naturalia, fidelia sunt, quia neminem decipiunt, cum sint rectissima, & iustissima, & per hoc poenam

adferant præuicatoribus, & præmia obseruatoribus. Nec solum fidelia sunt, sed etiam immutabilia & indispensabilia, cum in nullo casu inueniri possint iniusta, ideo addit, *Confirmata in seculum seculi, facta in veritate, & aequitate*, id est, stabilita sunt æterna firmitate, quia condita sunt *in veritate*, id est, in rectitudine, & *aequitate*, id est, iustitia: nam, vt diximus, rectitudinem, & iustitiam absolutam continent. Vide S. Thomam in 1.2. quæst. 100. art. 8.

**Phc.** *Redemptionem misit populo suo,*

**Tfadc.** *Mandauit in æternum testamentum suum.*

Non desunt etiam ex veteribus, qui hæc referant ad literam ad liberationem populi de Ægypto: sed videtur omnino Prophetam altiore redemptionem intelligere, vt exponunt sanctus Augustinus, & Euthymius, nam de Iudæis iam dixerat, datum illis fuisse manna de celo, & hereditatem gentium; neque vlla erat ratio, cur reuerteretur ad antiquiora. Igitur post decantata beneficia Dei erga Patres testamenti veteris; transit ad beneficium longe excellentius Testamenti noui, quo vera, atque æterna redemptio continetur, *Redemptionem*, inquit, *misit populo suo*, quasi dicat, post hæc misit Redemptorem tam sæpe promissum, & tandiu expectatum, de quo prophetauit etiam Zacharias, cum ait Luc. 1. *Benedictus Dominus Deus Israel, quia visitauit, & fecit redemptionem plebi suæ.* Redemit autem Christus populum suum de captiuitate, & seruitute peccati, & potestate tenebrarum pretio sanguinis sui. Et hoc modo vere, & proprie mandauit in æternum testamentum suum, id est, iussit (hoc enim significat vox Hebræa, & statuit, vt Testamentum, siue pactum esset æternum, de vera & æterna salute, & possessione cælestis patriæ; nam Testamentum vetus, quo promittebatur terra Palæstinæ, non fuisse æternum experientia docet. Quare & Hieremias cap. 31. ait.



Ecce dies veniunt, dicit Dominus, & feriam domui Israel, & domui Iuda fœdus nouū non secundum pactum, quod pepigi cum patribus eorum, vt educerem eos de terra Ægypti: pactū quod irritum fecerunt, & ego dominatus sum eorum, dicit Dominus, sed hoc erit pactū, quod feriam cum domo Israel post dies illos dicit Dominus, Dabo legem meam in visceribus eorum, & in corde eorum scribam eam, & ero eis in Deum, & ipsi erunt mihi in populum.

Coph. Sanctum & terribile nomen eius.

Res. Initium sapientia timor Domini.

Docet consequenter modum permanenti in testamento Domini, vt assequamur promissiones eius, ac dicit, Sanctum & terribile nomen eius, id est, is qui mandauit in æternum testamentum suum, sanctus, & terribilis est, & ideo odit pollutionem, & immunditiam peccati, quia sanctus est, & dicit. Leuit. 11. Sancti estote, quia sanctus sum Dominus Deus vester: & simul punit pollutos, & immundos, quia terribilis est, & horrendum est incidere in manus Dei viuentis, Hebr. 10. & propterea, Initium sapientia timor Domini, id est, illi vere incipiunt sapere, qui timent Dominum, & ex timore illo eueniunt a peccatis, obseruant legem, operantur bona, vt paulatim ex timore ad amorem perueniant, & incipiant odisse malum non timoræ pœnæ, sed amore iustitiæ. Potest etiam hic locus intelligi de timore sancto, quo timemus offensionem Dei, quia diligimus Deum qui timor dicitur initium sapientia, quia pertinet ad primam, & magis necessariam partem sapientia. Sapientia enim perfecta duo requirit, cognitionem & amorem Dei, sed in hac vita priores partes tribuuntur amori, siue timori sancto filiali. Vnde Ecclesiasticus cap. 1. vbi dixit, Initium sapientia timor Domini, addit, plenitudo sapientia est timere Deum: vt intelligamus timorem Domini sanctum dici initium, quia est quasi caput, id est, pars prima; & potissima, vt dici possit etiam tota sapientia.

Scin. Intellectus bonus omnibus facientibus eum.

Tau. Laudatio eius manet in seculum seculi.

Declarat, quod dixit, initium sapientia esse timorem Domini. Est enim, ac si dicat, intelligentia quidem, quæ pars est sapientia, bona est, sed facientibus eam, id est, ex timore sancto facientibus, quod scientia docet esse faciendum: alioqui intelligentia sine timore, inutilis, vel perniciofa est: nam scienti bonum facere, & non facienti, peccatum est illi, Iacobi 4. Nomine intellectus, significatur hoc loco ipsa intelligentia, siue scientia, aut doctrina, vt voces Hebraica, & Græca clarius sonant: pronomen, eum, cum dicitur, facientibus eum, refertur ad intellectum vt referunt Chrysostomus, & Augustinus, in Hebræo habetur, Facientibus ea, nimirum ea quæ intelliguntur esse facienda. Itaque sensus in idem recidit. Quod autem sequitur, Laudatio eius manet in seculum seculi, aliqui referunt ad Deum, vt sensus sit, Laudatio eius, cuius nomen est sanctum & terribile, semper manebit: ita S. Chrysostomus. Sed videtur melius continuare textum expositio S. Augustini, qui hunc versiculum refert ad illum, qui timet Dominum, & qui facit quod intelligit esse faciendum: illius enim præmium erit, vt inhabitet in domo Domini omnibus diebus vitæ suæ, & sit vnus ex illis, qui laudabunt Deum in seculum seculi. Quare laudatio eius, est laudatio, qua ipse homo timens Deum, perpetuo laudabit Dominum. Potest etiam satis commode intelligi versiculus de laude, qua ipse timens Deum, & faciens quod intelligit esse faciendum, laudabitur a Deo, vt seruus bonus, & fidelis, & consequenter laudabitur ab Angelis, & aliis sanctis, & eiusmodi laus erit æterna, quia vt dicitur in Psal. 117.

In memoria æterna erit iustus, ab auditione mala non timebit.



## PSALMVS CXI.

Titulus, &amp; Argumentum.

Alleluia, reuerſionis Aggæi, &amp; Zachariæ.

**H**ic Psalmus recte coniungitur superiori, quia laudat virum iustum, ut ille laudabat Deum, & est alphabeticus, continens viginti duos versiculos incipientes à literis alphabeti ordine positis. Eundem quoque habet titulum, Alleluia, apud Hebræos, & Græcos: sed apud Latinos, teste Augustino, adduntur hæc verba, Alleluia, reuerſionis Aggæi, & Zachariæ. Videtur enim David in spiritu prauidiſſe, Aggæum, & Zachariam post expletum tempus captiuitatis, rediſſe ad populum, eumque admonuisse: quanta sit felicitas viri iusti, & timentis Deum, ut hoc exemplo exhortetur alios ad probitatem, ut non incidunt in similem captiuitatem.

## EXPLICAT. PSAL. CXI.

Aleph. **B**eatus vir, qui timet Dominum:

Beth. In mandatis eius volet nimis.

Hæc est propositio, quam per totum Psalmum variis argumentis probat, ut suadeat omnibus pietatem. *Beatus*, inquit, *est quicumque timet Dominum*. Sed quia non quicumque timor facit beatum, addit declarans, *In mandatis eius volet nimis*, ubi repetendum est, *qui*, ut hic sit sensus, *Beatus est vir ille, qui timet Dominum, qui ex eo timore in mandatis eius libentissime implendis versabitur*: nam in mandatis velle nimis, nihil est aliud, nisi mandata valde diligere, & ad mandata multum esse affectum, siue in adimplendis mandatis magnam habere voluntatem. In summa ille dicitur felix, qui & interius timet Deum timore sancto, & exterius promptus est ad implenda mandata, ac per hoc iustus, & pius est.

Gimel. Potens in terra erit semen eius.

Daleth. Generatio rectorum benedicetur.

INR.

Hæc est prima felicitas hominis timentis Deum, quod multam prolem consequatur. *Potens*, inquit, *in terra erit semen eius*, id est, robusta erit eius posteritas ob multitudinem filiorum; & rationem reddit, cum addit, *Generatio rectorum benedicetur*, quia videlicet generatio iustorum ex diuina benedictione fecundissima erit. Benedictio enim in Testamento veteri, ut plurimum ad fecunditatem pertinet. Hæc prima felicitas non erat in viris iustis perpetua, sed frequens. Scimus enim Abrahamum longo tempore in matrimonio sine liberis vixisse, ut etiam filium eius Isaac, & postea non paucos alios. Sed si exponatur Psalmus de fructu bonorum operum, ex semine gratiæ cælestis prodeunte, felicitas erit omnino perpetua: nemo enim est vere pius, & iustus qui non assidue seruat opera bona, ex quibus magnam omnino mercedem tempore suo collecturus sit.

He. Gloria, & diuitiæ in domo eius.

Vau. Et iustitia eius manet in seculum sæculi.

Secunda felicitas est honorum, & opum abundantia, quæ tamen non inducant ad peccatum, neque iustitiam corrumpant. Sæpe enim accidit, ut honores, & diuitiæ superbiam gignant, vel carnalibus voluptatibus deleruant, & tum non felicitati, sed calamitati potius deputandæ sunt. Ait igitur, *Gloria, & diuitiæ in domo eius*, id est, non solum multitudine filiorum; sed etiam honoribus, & diuitiis abundabit iustus, & tamen (quod est omnium felicissimum) non corrumpetur animus eius istis fortunæ bonis; & de iustitia; & probitas eius perseverabit usque in finem. Hæc etiam felicitas non est perpetua; si agatur de gloria, & diuitiis temporalibus: sed si de gloria interna, de bonæ conscientiæ testimonio, & de diuitiis fidei, ac de illo quæstu magno intelligatur, de quo Apostolus 1. Timoth. 6. *Quæstus magnus est pietas cum sufficientia*, id est, pietas sine sollicitudine temporalium, ita ut animus sit contentus iis, quæ habet;



bet, perpetua felicitas erit: nam, vt ille dixit, animus diues debet esse, non aera, tunc autem animus diues est, quando alimentis, & tegumentis contentus, nihil optat amplius, sed sibi ipse sufficit quod Apost. dixit *pietas cum sufficientia*, & Græco significanti *ἀνάρκεια*, quod declarauit idem Apostol. Philip. 4. cum ait, *Didici in quibus sum sufficiens esse: scio & abundare, & penuriam pati.*

**Zain.** *Exortum est in tenebris lumen rectis.*

**Cheth.** *Misericors, & miserator, & iustus.*

Tertia felicitas timentium Deum, est lumen prudentiæ, & consilij diuinitus affulgens in tenebris dubitationum, quæ passim occurrunt in rebus gerendis, item in discernendis fraudibus falsorum fratrum; denique lumen consolationis in omnibus calamitatibus, & ærumnis huius vitæ. *Exortum est in tenebris lumen rectis*, id est, affulsit rectis hominibus, quales sunt timentes Deum; lumen consilij, & consolationis in tenebris dubitationum, & tribulationum, quod lumen est ipse Deus *misericors, & miserator, & iustus*, qui misericordiam facit viris misericordibus, quia iustum est, vt misericordes misericordiam consequantur.

**Teth.** *Iucundus homo, qui miseretur, & commodat.*

**Iod.** *Disponet sermones suos in iudicio.*

**Caph.** *Quia in æternum non commouebitur.*

Quarta felicitas est lætitia spiritualis, quæ residet in corde timentium Deum. Qui enim Deum timet, facile indulgent offensiones miserando fragilitates humanas, facile etiam commodant egentibus, & sic implent Dominicum præceptum. Luc. 6. *Dimittite, & dimittimini, date & dabitur vobis.* Hæc autem bona opera maximam lætitiā pariunt: sicut è contrario qui retinent offensiones, vel negant proximo be-

neficiū, semper amaro sunt animo, tum quia conscientia pungit, tum quia cogitant se odio haberi. Illud, *miseretur*, à nonnullis refertur ad eleemosynas, quæ dantur egentibus; sed quia de eleemosyna paulo post fit specialis mentio, cum dicitur, *Dispersit dedit, pauperibus*; ideo malimus cum sancto Augustino, referre ad intelligentiam offensio-num, quod est genus eleemosynæ spiritualis. Quinta felicitas est prudentia in loquendo, propter quam euitantur incommoda maxima, inimicitia, rixæ, detractiones, & similia. Qui enim timet Deum, *disponet sermones suos in iudicio*, id est, dispensabit verba sua cum maturitate iudicij, vt neminem lædat, & inde plurima bona lucrabitur. Alij per sermones intelligunt rationes, & negocia. Sed quamuis vox Hebræa, & Græca id patiantur, tamen vox Latina non patitur; & verisimile est, Prophetam varia bona timentium Deum enumerare, non eadem sæpius repetere. De prudentia in negociis supra iam dixerat: de prudentia in loquendo nihil hætenus dixit. Reddit autem rationem, cur disponet sermones suos in iudicio, cum addit, *Quia in æternum non commouebitur*, id est, quia vir est constans in propositis suis, & stabilis, & præuidet prudenter omnia, vt quicquid accidat, eum commouere non possit.

**Lamed.** *In memoria æterna erit iustus.*

**Mem.** *Ab auditione mala non timebit.*

Sexta felicitas timentis Deum est, quod viuet semper in hominum memoria, & viuet non per memoriam insignis alicuius flagitij, quomodo viuunt Iudas, & Cain, Herodes, & Pilatus, Annas, & Caiphas, sed viuet per memoriam gloriosam: nam laudes eius enarrabit omnis Ecclesia sanctorum: neque solum *in memoria æterna erit* apud mortales, sed etiam nomen eius scriptum erit in libro vitæ, quod nunquam delebitur, & eo modo vere, ac proprie in memoria æterna erit apud Angelos in cælo; & ab au-



*ditione mala non timebit*, id est, non timebit à detractionibus, & reprehensionibus hominum impiorum: neque etiam timebit à sententia illa formidolosa Iudicis æterni; videlicet, *Ite maledicti in ignem æternum*, &c. Matth. 25.

Nun. *Paratum cor eius sperare in Domino.*

Samech. *Confirmatum est cor eius, non commouebitur.*

Hain. *Donec despiciat inimicos suos.*

Septima felicitas timentis Deum est, firma, atque stabilis diuina protectio, qua fretus nihil unquam malorum timebit. *Paratum cor eius sperare in Domino*, id est, in omni aduersitate, siue periculo imminenti, cor eius paratum habet refugium ad Deum; quia semper est promptum, & paratum sperare in Domino, nunquam obliuiscitur adiutorium Dei, nunquam diffidit, nunquam hæsitat. *Confirmatum est cor eius in hac fiducia*, ut nullum ei sit periculum, ne ab illa forte deficiat. *Non commouebitur donec despiciat inimicos suos*, id est, nunquam timebit, dum periculum ab inimicis durabit. Multo autem minus timebit, cum eos ut prostratos, & deuictos despiciet. In Hebræo pro, *non commouebitur*, habetur, *Non timebit*: sed idem est sensus: pro, *despiciat*, habetur, *videat*, ex quo sequitur, ut despiciere hoc loco non sit proprie contemnere, sed videre ex altiore loco, ut sit despiciere quasi deorsum inspicere, iuxta illud Virgilij, *Despiciens mare veluolum*. Sed quia respicere inimicos ex alto, contingit illis, qui vident inimicos deuictos, & prostratos ac per hoc illos contemnunt: recte potest exponi, *Donec despiciat*, id est, donec contemnat, ut iam deuictos & profligatos, quamuis vox illa immediate non contemnere, sed inspicere significet, si cum voce Hebraica conuenire debeat: Et quoniam durante hac vita mortali, nunquam cessabunt pericula ab hostibus pietatis, nec videbimus eos omnino prostratos, nisi cum in cælesti sede positi, longissime abiectiones despiciamus; ideo illud, *donec*, tandiu durabit, quamdiu præsens vita durabit.

Phe. *Dispersit, dedit pauperibus.*

Tfadc. *Iustitia eius manet in seculum seculi.*

Coph. *Cornu eius exaltabitur in gloria.*

Octaua felicitas est, gratia bene vtendi diuitiis: nam ex dono Dei habent amici Dei, ut intelligant, quanta sapientia sit per elemosynas transferre thesauros suos in cælum Matth. 6. *ubi nec timea demolitur, nec fures effodiunt, nec furantur*. *Dispersit, inquit, dedit pauperibus*, id est, iste homo timens Deum, opes suas non abscondit, neque augere studuit, sed sparsit in pauperes, id est, abundanter effudit; sed ea prudentia, ut dederit potius multis parum, quam paucis multum ut multis prouideret necessaria, nullis daret superflua. Simile est, quod habetur Isai. 58. *Frangite esurienti panem tuum*. & 1. Cor. 13. *Si distribuero in cibos pauperum omnes facultates meas*. Nec tamen negamus, quin aliquando melius sit multum vni dare, quam multis parum, ut cum virgo pauper tradenda est viro, vel Ecclesia exædificanda, vel captiuus redimendus. Vide S. Thom. in 22. q. 32. art. 10. & S. Gregorium de cura pastoralis par. 3. admonit. 21. Ex hac liberalitate duo bona lucratus est, vnde vere beatus dici potest: primum, si pecunias diminuit, iustitiam auxit, & *iustitia eius*, id est, bonum opus eius manet in seculum seculi, conseruandum apud Deum, ut suo tempore mercedem plenam accipiat: nam *Qui miseretur pauperis, foeneratur Deo*, inquit Sapiens Proverb. 29. Deinde *cornu eius exaltabitur in gloria*, id est, non solum mercedem habebit in vita futura; sed etiam in hoc sæculo potentia, & gloria augebitur, cornu in Scripturis potentiam & robur significat. Dicitur autem exaltari cornu alicuius, quando ille fit potentior, & fortior. *Exaltari autem cornu in gloria est*, hominem fieri non solum potentem, sed etiam gloriosum, quales sunt viri celebres: & honorati, quibus alij deferunt & cedunt. Significat



ficat igitur hic versiculus per eleemosynas non fieri homines tenuiores, & despectos, sed augeri diuitiis, potentia, & gloria, cuius rei multa sunt exempla in diuinis literis, præsertim in libro Iob, & in libro Tobie: & non pauca legi possunt in vitis Sanctorum, ac præcipue in vita sancti Ioannis Eleemosynarij, & in Prato spirituali Sophronij.

Res. *Peccator videbit, & irascetur,*  
Scin. *Dentibus suis fremet & tabescet,*  
Tau. *Desiderium peccatorum peribit.*

Postrema felicitas est, quod timens Deum omnem inuidiam superabit. *Peccator videbit*, id est, considerabit bona opera timentis Deum, & eius felicitate, & inuidia torquetur, & *irascetur* sorti eius. Et instar rabidi canis *fremet aduersus illum*, & præ dolore tabescet: sed interim *desiderium impij*, quo cupit perditionem iusti, non apimpletur, sed vna cum ipso impio breui peribit. Ergo beatus, & felix est, qui timet Dominum, miser & infelix, qui non timet.

## PSALMVS CXII.

*Titulus, & Argumentum.*

Alleluia.

**H**ic Psalmus brevis & facilis, hortatur cultores Dei ad ipsum Deum laudandum, ob id potissimum, quod cum sit altissimus, tamen non dedignatur ad nos oculos inclinare, & multis nos beneficijs afficere.

EXPLICAT. PSAL. CXII.

**L**audate pueri Dominum, laudate nomen Domini.

Nomine puerorum intelliguntur serui Dei, qui eum pure colunt: quamuis enim vox Græca παῖδες, & Latina, pueri, sint com-

munes ad seruos, & ad paruulos significandos, tamen vox Hebraica, *habde*, nihil significat, nisi seruum, & clarius etiam id apparet ex eo quod in Hebræo vox, *Domini*, est in casu gignendi, *Laudate serui Domini, laudate nomen Domini*. Magna tamen est infinitas seruus cum paruulis, vt non immerito serui dicantur pueri, & pueri serui; quoniam serui sinere debent se regi à dominis, quomodo paruuli reguntur à maioribus, vnde etiam B. Paulus ait ad Gal. 4. *Quanto tempore hæres paruulus est nihil differt à seruo* Admonemur igitur voce puerorum, seruos Dei simplices, & puros esse debere, & ad nutum Domini sine tergiversatione procedere. *Laudate pueri Dominum, laudate nomen Domini*, id est, o vos omnes, qui serui estis Dei, in hoc præcipue illi seruite, vt puta mente cogitetis magnitudinem Domini vestri, & toto cordis affectu laudatis nomen eius, potentiam videlicet, & gloriam eius infinitam. Similis exhortatio habetur in Psalmo 133. *Ecce nunc benedicite Dominum omnes serui Domini*, & in Psalmo 134: *Laudate nomen Domini laudate serui Dominum.*

*Sit nomen Domini benedictum, ex hoc nunc, & vsque in sæculum.*

II.

Declarat modum, quo serui laudare debent nomen Domini, ac dicit affectu saltem, & desiderio laudandum esse, quandoquidem re ipsa nos humi repentes laudare, vt oportet nescimus. Dicite ergo, ait, intimo cordis affectu, *Sit nomen Domini benedictum, & nunc à presentibus, & vsque in æternum*, à futuris, vt ab eius laudibus nunquam cessetur, vel potius, *ex hoc nunc incipite laudare, & vsque in sæculum laudate*, siue prospera, siue aduersa contingant, siue in hac vita, siue in futura, semper laus eius sit in ore vestro; & cum sancto Iob semper dicite, *Sit nomen Domini benedictum.*

*A Solis ortu vsque ad occasum, laudabit nomen Domini.*

III.

Declarat hoc versu, & sequentibus materiam



teriam laudis Dei, ac dicit, ubique inueniri materiam laudis Dei, cum omnia sint plena operibus eius magnis, & mirabilibus, quæ diligenter considerata laudabilem reddunt artificem. *A Solis ortu vsque ad occasum*, id est; per totam mundi amplitudinem à principio vsq; ad finem, *laudabile est nomen Domini*, propter opera eius, quibus ab omni parte plenus est Mundus.

IV.

*Excelsus super omnes gentes Dominus, & super celos gloria eius.*

Nec solum per amplitudinem Mundi, sed etiam per altitudinem ubiq; inuenitur materia laudis Dei: nam etiam si multi sint in terra magni Principes, & potentissimi Reges: tamen super omnes longe eminet Deus: neque solum *super omnes gentes terra*, sed etiam super omnes Angelos cæli excelsus est Deus; & gloria eius celos omnes; & qui habitant in eo, transcendit. S. Ioannes Chrysostomus in his duobus versiculis vult contineri prædictionem Ecclesiæ Christianæ, per quam factum est, *ut nomen Domini*, quod in sola fere Iudæa notum erat, nunc à *Solis ortu vsq; ad occasum* laudetur, & omnes gentes illi subiiciantur, & eo modo sit excelsus Dominus super omnes gentes.

V.

*Quis sicut Dominus Deus noster, qui in altis habitat, & humilia respicit in celo, & in terra.*

Laudat nunc Deum ab admirabili benignitate, quæ coniuncta cum tanta sublimitate mirabilior apparet. *Quis*, inquit, *est sicut Deus noster, qui in altis habitat*, videlicet in summo cælo, & tamen *humilia respicit*, homines videlicet, qui iacent in terra. Nam sic explicandus videtur ad literam hic versiculus iuxta distinctionem Hebraicam, & modum loquendi Scripturæ, ut illud, *in celo*, referatur ad illa verba, *in altis habitat*: & illud, *in terra*, referatur ad illa, *humilia respicit*, præsertim cum in Hebræo sint duo participia contraria, *Quis sicut Dominus Deus noster exaltans se ad sedendum*, & *humilians se ad respiciendum*, *in celo*, & *in terra*, id est;

ad sedendum in cælo, & ad respiciendum in terra. Similis est sententia, illa in primo capite Canticorum, *Nigra sum, sed formosa filia Sion, sicut tabernacula Cedar*, sicut pelles Salomonis, ubi, sicut tabernacula Cedar, coniungitur cum, *Nigra sum*: & sicut pelles Salomonis, coniungitur cum, *sed formosa*. Significatur autem hac phrasi, Deum per excellentiam naturæ omnia sub se habere: & tamen per clementiam rebus omnibus, quamuis humillimis, adesse, ac præcipue hominibus miribus, & corde humilibus se inclinare. Quod si non placeat hæc distinctio, potest etiam recte exponi, quod Deus quamuis naturæ sit excellentissimæ, & sublimissimæ, tamen à superbis, & tumidis oculos auertere, ad humiles, & mites libenter aspicere soleat, idq; tam in cælo, quam in terra: nam & in cælo superbos Angelos detestatus, humiles respexit, & ad gloriæ suæ participationem euexit: & in terra superbis Pharaonibus, Saulibus, alijsq; similibus contemptis, ad Moysen, Dauidem, aliosq; mites, & humiles respexit. Sed altiore, & prophetico sensu significatur his verbis, Deum in cælo sedentem non neglexisse genus humanum in terra humiliter abiectum.

*Suscitans à terra inopem, & de stercore erigens pauperem.*

*Vt collocet eum cum Principibus, cum Principibus populi sui.*

Declarat, cur Deus respiciat humiles: ac dicit, id eum facere, ut eos, exaltet, Quamuis autem hæc applicari possint singulis hominibus, quos ex infimo gradu Deus euexit ad summum, quales fuerunt Ioseph Patriarcha, Moyses, Dauid, & similes: tamen aptissime conveniunt hi duo versiculi humano generi, id est, toti gregi pusillo electorum, quibus Saluator ait, Luc. 12. *Nolite timere pusillus grex, quia complacuit Patri vestro dare vobis Regnum*: nam genus humanum iacebat in terra, & in stercore peccati originalis, & consequentium miserationum:

& ca-



& tamen Deus sedens in cœlo respexit in terram, & inde suscitauit inopem, hominem videlicet spoliatum à latronibus, & relictum semiuivum, & iacentem in stercore miserrimum, ut collocaret eum cum Principibus, non quibuscunque, sed cum Principibus populi sui, possessoribus cœlestis Hierusalem, & participibus Regni cœlorum. Nam exaltatio à paupertate temporali ad opes regni temporalis, etiam si nobis magna esse videatur; verum tamen exigua, ac penes nulla exaltatio est, cum opes Regni caducæ sint, & ad dispensandum traditæ, & cum obligatione reddendæ rationis in die iudicii, & coniunctæ cum magna afflictione spiritus, & periculo æternæ salutis amittendæ. At exaltatio à statu peccati & mortis, ad statum gloriæ & beatæ immortalitatis, ad æqualitatem Angelorum, ad consortium boni illius, quod ipsum Deum beatum facit; hæc vera, & vere magna, & appetenda maximè exaltatio est.

*Matrem filiorum letantem*, id enim est habitare in domo, esse matrem filiorum; ac per hoc esse letantem, ob filiorum multitudinem, quæ erat mœsta ob sterilitatem & solitudinem.

## PSALMVS CXIII.

*Titulus, & Argumentum.*

*Alleluia.*

**D**Ecantat in hoc Psalmo David mirabilia opera Dei, dum educeret filios Israël de Ægypto in terram promissionis: idq. ad eum finem, ut horietur populum ad permanendum in confessione unius veri Dei, & sperandum continuo in eius protectione.

## EXPLICATIO PSALMI CXIII.

*Qui habitare facit sterilem in domo, matrem filiorum letantem.*

**I**N exitu Israël de Ægypto: domus Iacob de populo barbaro.

*Facta est Iudæa sanctificatio eius, Israël potestas eius.*

I.

II.

Quemadmodum infelicitas virorum, est status humilis & despectus; ita infelicitas mul. erum, est sterilitas. Sed quomodo Deus respicit viros humiles, ut de statu infimo erigat ad Regnum; ita respicit humiles feminas, ut de sterilitate perducatur ad fecunditatem. Potest autem hoc totum referri ad singulas feminas, ut Saram, Rebeccam, Rachel, Annam, & similes. Sed altiore sensu pertinet ad Ecclesiam ex gentibus congregatam, quæ longo tempore mansit sterilis, sed in senectute peperit plurimos; iuxta illud Apostoli ad Gal. 4. ex cap. 54. *Isaia: Letare sterilis, quæ non parit, erumpe & clama, quæ non parturit, quia multi filij deserta magis, quam eius, quæ habet virum.* Quod autem ad verba attinet, cum dicitur: *Qui habitare facit sterilem in domo*, per domum intelligitur familia, siue abundantia filiorum, ut sensus sit, *Qui facis, ut sterilis, quæ manebat solitaria, iam habitet inter multas proles, in magna familia.* Id quod explicatur per verba sequentia:

Narrat initio Psalmi quemadmodum populus Hebræorum in egressu de Ægypto cepit habere formam populi peculiariter Deo subiecti, & à Deo singulari providentia gubernati, ac si Deus esset proprius eorum Rex. Nam antequam ingrederetur Ægyptum, erant vna familia, non vnus populus, dum autem manserunt in Ægypto, multiplicati sunt valde, sed admixti erant Ægyptiis, & Regi Pharaoni seruiebant: sed egressi de Ægypto formam propriam recipere cepit, Moysen, tanquam Dei Vicario & interprete, summum Magistratum apud eos gerente. Hoc igitur est quod dicit, cum ait: *In exitu Israël de Ægypto, domus Iacob de populo barbaro*; vbi cum dicitur, *Domus Iacob*, repetendum est, *in exitu*, hoc modo, *In exitu Israël de Ægypto, in exitu, inquam, domus Iacob de populo barbaro*: quæ pars secundi versiculi est explicatio primæ; declarat enim

P p p p

per



per nomen, *Israël*, se non intellexisse hominem illum, qui proprio nomine dicebatur *Israël*, sed totam familiam *Iacob*, id est, totam illam gentem, quæ à *Iacobo* Patriarcha, qui etiam *Israël* vocabatur, per carnalem generationem originem ducebat. Per populum barbarum intelligitur *Ægyptus*, significat autem vox *Hebræa*, *loez*, loquentem lingua ignota, & barbarus dicitur, cuius lingua non intelligitur, iuxta illud *Apostoli* *1. Corinth. 14. Si nesciero virtutem vocis, ero cui loquor barbarus, & qui loquitur mihi barbarus.* Dicitur igitur populus barbarus, populus *Ægypti*, quia alia lingua utebatur ab ea, qua utebantur *Hebræi*. *Facta est Iudæa sanctificatio eius*, hoc est, tunc primum, cum egressi sunt filij *Israël* de *Ægypto*, Deus sanctificauit, siue dedicauit sibi in populum peculiarem, populum *Iudaicum*. *Israël potestas eius*: idem repetit aliis verbis, id est, tunc assumpsit peculiarem potestatem ac dominium super filios *Israël*. Quod attinet ad verba, per *Iudæam*, intelligi debet hoc loco non terra, quæ dicitur *Iudæa*, sed gens *Iudaica*: nam in *Hebræo* est, *Iudas*, sicut paulo post, *Israël*. Solet autem Scriptura populum *Hebræum*, nunc vocare *Iudam*, de nomine principalis filij *Israël*, nunc *Israël*, de nomine patris: vnde etiam vocantur *Iudæi*, vel *Israëlitæ*. Per illud autem, *sanctificatio, & potestas*, intelligitur quasi materia sanctificationis & potestatis, vt sensus sit, *Facta est gens Iudaica siue Israëlitica, gens sanctificata Deo, & peculiariter subiecta potestati eius.* Pronomen relatiuum, *eius*, refertur ad Deum, siue Dominum, qui nominatus est in titulo, *Alleluia, laudate Dominum*: quasi dicat, *Laudate Dominum*, quia cum egredierentur filij *Israël* de *Ægypto*, tunc factus est populus *Israël*, populus sanctificatus ei, & subiectus peculiariter potestati eius.

III. *Mare vidit & fugit, Iordanis conuersus est retrorsum.*

IV. *Montes exultauerunt vt arietes, & colles sicut agni ouium.*

Narrat mirabilia, quæ acciderunt in egressu filiorum *Israël* de *Ægypto*, & commoratione in deserto, & ingressu in terram promissionis, vt hinc ostendat, Deum *Hebræorum* esse verum Deum, omnipotentem, quem iure ipsi colere & timere debeant: ac primum narrat miraculum, quo mare, iubente Deo, diuisum est, vt populus transiret, vt habetur *Exod. 14.* sed narrat poetica venustate, tribuens ipsi mari sensum, quasi videns maiestatem Domini, ex timore & reuerentia se subdlexerit. Coniungit deinde aliud miraculum circa *Iordanem*, quoniam ad idem elementum pertinet, quamuis multo posterius, id est, post annos quadraginta contigerit. *Iordanis* enim fluius diuisus quoque est tempore *Iosue*, vt populus per siccum alueum transiret, vt habetur *Iosue 4.* Deinde commemorat miracula, quæ acciderunt in terra, quando acceperunt legem, descendente Deo in montem *Sinai*: tunc enim terra mota est, & tremore concussa à maiestate Domini, quasi trepidare & saltitare videbatur. Quod enim legimus *Exod. 19. Erat totus mons terribilis*; significat montem tremore suo terrorem aliis incussisse, vt ex textu *Hebraico* & *Græco* clarius colligitur. Postremo addit aliud miraculum de aquis, in magna copia ex petra eductis, *Qui conuertit petram in stagna aquarum, & rupem in fontes aquarum.* Sed veniamus ad verba: *Mare vidit & fugit*, id est, ita recessit de loco suo pars illa maris rubri, ac si à conspectu Domini territa fugisset. *Iordanis conuersus est retrorsum.* In libro *Iosue* legitur, quod steterit flumen, & in altum instar montis excreuerit, sed ex interpretatione *Dauidis* intelligimus, non solum in altum creuisse, sed etiam ex parte refluxisse, & refluxus iste confirmari potest ex eo, quod longissimo spatio temporis cessauerit fluere, donec videlicet totus populus commode transiret, qui multa centena millia hominum complectebatur. Itaque si solum in altum creuisset, & non etiam simul ex parte refluxisset, non solum ad instar montis, sed in altitudinem multo maiorem excreuisset. Simul igitur refluebat, vt *Dauid* canit, & simul erigebatur & stabat,



bat, ne flueret in partem illam, per quam Israelitæ transibant. *Montes exultauerunt ut arietes, & colles sicut agni ouium*, id est, montes Sinai, partes videlicet maiores illius montis, & colles, partes minores eiusdem montis, contremiscere & subilire visæ sunt instar arietum vel agnorum repentino terrore saltantium & fugientium: quamuis enim vox, *exultare*, significare soleat gestire præ lætitia; tamen hoc loco videtur omnino referendum ad tremorem; tum quia eadem est causa maris, ut fugiat, & monti, ut saliat; fugere autem timoris est, non lætitiæ; tum quia paulo infra dicitur: *A facie Domini mota est terra*: quæ verba terrorem indicant, & hunc locum exponunt.

*Quid est tibi mare, quod fugisti? & tu Iordanis, quia conuersus es retrorsum?*

*Montes exultastis sicut arietes, & colles sicut agni ouium.*

*A facie Domini mota est terra, à facie Dei Iacob.*

*Qui conuertit petram in stagna aquarum, & rupem in fontes aquarum.*

More poetico interrogat mare, quare fugerit, & Iordanem, quare conuersus sit retrorsum, & montes & colles, quare tremuerint: & respondet, id fecisse præsentiam virtutis Dei, qui non solum hoc fecit, ut mare fugeret, & terra tremere, sed etiam, quod est mirabilius, vnum elementum in alterum transmutauit: conuertit enim terream rupem stantem, atque durissimam in aquas mollissimas, & velocissime discurrentes. *Quid est, inquit, tibi mare, quod fugisti? & tu Iordanis, quid habes, quod conuersus es retrorsum?* & vos montes quare exultastis ut arietes, & vos colles quasi agni ouium? *A facie Domini mota est terra.* Hæc nimirum est causa, quia Dominus apparuit, & vim suam & potentiam manifestauit, & ideo terra conspectum eius non sustinens, tota contremuit. *Qui Dominus conuertit petram in*

*stagna aquarum*, quando Moyse percutiente petram, Num. 20. egressæ sunt aquæ largissimæ; quod factum est, quia iubente Domino, conuersa est in fontem aquarum, quod repetitur, & declaratur, cum additur: *Et rupem in fontes aquarum.* Significatur enim his verbis, non paruam aliquam & mollem petram, sed rupem saxeam, duramq; instar filicis conuersam fuisse in fontem aquarum.

*Non nobis Domine, non nobis, sed nomini tuo da gloriam.*

Hic incipit secundum Hebræos alius Psalmus; sed nos sequimur distinctionem antiquam LXX. Seniorum, quam etiam sequitur S. Hieronymus in sua versione ex Hebræo: quod est argumentum, non in omnibus Hebraicis codicibus diuidi hunc Psalmum in duos. Igitur explicatis mirabilibus Dei, quæ facta sunt in exitu Israel de Ægypto; precatur Propheta Deum nomine totius populi, ut non respiciat demerita populi, sed gloriam suam, & pergat protegere cultores suos. *Non nobis, inquit, non nobis*, id est, non meritis nostris, quæ nulla sunt, gloriam siue laudem petimus, *sed nomini tuo da gloriam*, id est, propter gloriam nominis tui protege nos, non propter merita nostra.

*Super misericordia tua & veritate tua, ne quando dicant gentes, vbi est Deus eorum?*

Indicat breuissime tres rationes, cur Deus debeat nominis sui gloriam querere in conseruando populo suo. Prima est, quia ipse misericors est; secunda, quia verax est & fidelis in promissione seruanda; tertia, ne detur occasio gentibus blasphemandi, si cultores Dei destitutos videant. Ait igitur: *Super misericordia tua & veritate tua*, nimirum funda gloriam tuam, siue da gloriam nomini tuo: inde enim gloria tua demonstrabitur, si ostendes misericordiam erga populum tuum; & rursus, si implebis veritatem promissorum tuorum, quæ fecisti Patribus nostris.



*Ne forte dicant gentes, ubi est Deus eorum? i. ne detur occasio gentibus incredulis detrahendi de potentia, vel etiam de existētia tua.*

XI. *Deus autem noster in cælo, omnia quæcunque voluit, fecit.*

XII. *Simulacra gentium argentum & aurum, opera manuum hominum.*

XIII. *Os habent, & non loquentur; oculos habent, & non videbunt.*

XIV. *Aures habent, & non audient; nares habent, & non odorabunt.*

XV. *Manus habent, & non palpabunt; pedes habent, & non ambulant: non clamabunt in gutture suo.*

Propter id, quod dixerat, *Ne forte dicant gentes, ubi est Deus eorum;* adiungit pulcherrimam antithesim Dei veri, & falsorum Deorum. Quasi dicat, non est danda occasio gentibus blasphemandi: sed tamen si forte dixerint, ubi est Deus eorum? nos respondebimus, Deum nostrum esse in cælo, idq; testari mirabilia eius, quia fecit quicquid voluit: sed contra, Dij eorum iacent in terra, & vsque adeo nihil possunt facere, ut ne possint quidem exercere actiones membrorum, quæ habere videntur: nam cum habeant figuram humanam, & videantur habere membra omnia, & sensus omnes; tamen nec vident, nec audiunt, nec olfaciunt, nec palpant, nec ambulant, nec loquuntur, ac ne vocem quidem ullam ex gutture emittunt, si non ut homines, saltem ut iumenta.

XVI. *Similes illis fiant qui faciunt ea, & omnes qui confidunt in eis.*

Hæc prædictio est per modum imprecationis pronunciata, ut moris est Prophetarum. Vere enim qui faciunt idola, & qui confidunt in eis, similes illis fient in vita futura post resurrectionem; nam etiam si habebunt sensus & membra, tamen sic habebunt, quasi non haberent, imo etiam cupient non habere, nihil enim videbunt, nihil audient, nihil

olfacient, nihil palpabunt, nisi quod nollent: ligatis manibus & pedibus, proiecti in tenebras exteriores se commouere non poterunt. In hac etiam vita similes sunt idolis, quia videntur potius videre & audire, quam re vera videant & audeant, cum non videant neque audiant, quæ ad salutem pertinent, & quæ vera bona sunt, ut magis somnare, quam videre: vel audire dicendi sint, iuxta illud Marci 8. *Oculos habentes non videtis, & aures habentes non auditis.* Quod si etiam placeat hæc exponere per modum imprecationis, non poterunt Pagani conqueri, quia non sit illis iniuria, si eos fieri cupiamus similes Diis ipsorum. Monet autem S. Augustinus hæc quæ supra dicta sunt, pertinere ad eos Paganos, qui credunt ipsa idola esse Deos: quia vero nonnulli dicebant, non ipsa idola, sed numen in illis habitans esse colendum; ideo in alio Psalm. videlicet 95. dicit, *Dij gentium demonia, Dominus autem cælos fecit:* & apud Apostolum, 1. Cor. 10. *Quæ immolant gentes, demonibus immolant, & non Deo.* Ex his autem colligimus, Imagines Sanctorum non esse Idola, neque earum venerationem esse idololatriam: quoniam neque ipsas imagines Deos esse credimus, neque Sanctos viros, quos repræsentant, pro Diis habemus.

*Domus Israël speravit in Domino, adiutor eorum & protector eorum est.*

*Domus Aaron speravit in Domino, adiutor eorum & protector eorum est.*

*Qui timent Dominum, sperauerunt in Domino, adiutor eorum & protector eorum est.*

Quia dixerat, *similes illis fiant, qui confidunt in eis;* adiungit per antithesim, filios Israël confidisse in Domino, & ideo habuisse Deum protectorem: nominat autem primo domum Israël, id est, totam gentem Hebraicam: deinde domum Aaronis, id est, tribum sacerdotalem, quia Sacerdotes cum Levitis cæteris peculiaris portio Domini erant, & specialiter in Deo confidere debe-



debebant. Addit postremo omnes timentes Deum, quoniam non deerant aliqui extra filios Israel, qui Deum colerent & timerent, quamuis ii pauci essent: in his numerari solent Iob, & amici eius, & postea Naman Syrus, & alij.

*Dominus memor fuit nostri, & benedixit nobis.*

*Benedixit domui Israel, benedixit domui Aaron.*

*Benedixit omnibus qui timent Dominum, pusillis cum maioribus.*

Confirmat quod dixerat, Deum adiutorem & protectorem esse sperantium in se. Ac se ipse constituit in numero confidentium in Deo, quippe qui prater ceteros auxilium Dei & protectionem expertus fuerat. Deinde eodem ordine confirmat Deum benedixisse domui Israel, domui Aaron, & omnibus timentibus Deum, siue magnis, siue paruis: quod intelligi potest de omni magnitudine & paruitate; siue ætatis, siue potestatis, siue sapientiæ, siue diuitiarum. Memoria Dei significat hoc loco singularem prouidentiam erga cultores suos. *Memor*, inquit, *fuit nostri*, id est, singulari prouidentia demonstrauit se memorem esse nostri; & *benedixit nobis*, id est, benefecit nobis adiuuando, & protegendo. Explicat autem quid sit illud, nobis, cum addit *domui Israel, domui Aaron, & omnibus timentibus eum*.

*Adiciat Dominus super vos, super vos, & super filios vestros.*

*Benedicti vos à Domino, qui fecit cælum, & terram.*

Ex abundantia cordis os loquitur: quia pectus sancti Prophetæ ardebat desiderio gloriæ Dei & salutis proximorum; ideo multiplicat verba, nunc prædicando, nunc exhortando, nunc bene precando, ut hac ratione accendat homines ad Deum timentum timore sancto, & ad spem omnem in eo collocandam. Igitur conuersus ad timentes Deum, quibus dixit, Deum benedixisse, ait, *Adiciat Dominus super vos, nimirum*

benedictionem suam, id est, omnium bonorum copiam: nec solum, inquit, *super vos*, sed etiam *super filios vestros*. Et hoc modo fitis *vos benedicti*, plena atque perfecta benedictione, à Domino qui fecit cælum & terram, id est, ab eo, in cuius manu est ros cæli & pinguedo terræ. Solebant enim sancti testamenti veteris precari suis à Domino rorem cæli & pinguedinem terræ, quia omnes fructus terræ nascuntur ex fecunditate terræ, & ex pluuia cæli. Sed altiore sensu Deus benedicit de rore cæli, de pinguedine terræ, quos bonis cælestibus & terrenis cumulat, quod fecit erga Abrahamum, Isaacum, Iosephum, Dauidem, & similes.

*Cælum cæli Domino, terram autem dedit filiis hominum.*

*Non mortui laudabunt te Domine, neque omnes qui descendunt in Infernum.*

*Sed nos qui viuimus, benedicimus Domino ex hoc nunc & vsque in seculum.*

Hi tres versiculi duplicem sensum habent, vnum accommodatum Hebræis, secundum vetus testamentum: alterum accommodatum Christianis, secundum testamentum nouum. Igitur priore sensu posteaquam dixerat, *Benedicti vos à Domino, qui fecit cælum & terram*, docet æquum esse, ut ij, qui benedicti sunt à Domino, benedicant ipsi quoque Dominum, dum viuunt super terram; quam à Deo incolendam acceperunt, relinquentes Angelis officium benedicendi in cælo, vbi est domicilium Dei, & Ministrorum eius, qui illæcoram assistunt. *Cælum*, inquit, *cæli Domino*, id est, summum cælum, quod est super cælum æreum, Domino propriè dicatum est, & familiaribus ministris eius Angelis sanctis: *terram autem cum elementis, quæ illi coniuncta sunt, dedit filiis hominum* habitandam; ac pro tam insigni parte mundi debent filij hominum Deo assidue gratias agere, dum viuunt, & bonis terræ fruuntur. Nam *non mortui laudabunt te Domine*: mortui enim, cum sensibus corporis careant, neque fruuntur amplius terrenis bonis, imò nec viuunt secun-

pppp 3 dùm



dum corpus; non laudant Dominum ore corporali, neque pro rebus terrenis gratias agunt. *Neque omnes, qui descendunt in infernum*, id est, non solum mortui, qui iaceant in sepulchris, non laudant Dominum, sed neque illi, qui descendunt in infernum, id est, spiritus mortuorum, qui descendunt in varias inferni regiones, Dominum benedicerent pro terrenis bonis, quæ ad illos iam non pertinent: sed nos, qui vivimus in terris, & fruimur terrenis bonis, benedicimus Domino, ex hoc nunc & usque in seculum, per generationes sibi inuicem succedentes. At sensu Christianis accommodato, secundum promissiones testamenti novi, dicendum est, per *cælum cæli*, intelligi supremam partem cæli, ubi est domus filiorum Dei, de qua dicit Apostolus 2. Cor. 5. *Scimus, quoniam si terrestris domus nostra huius habitationis dissolvatur, ædificationem ex Deo habebimus, domum non manufactam æternam in cælis*: vel cum S. Augustino per *cælum cæli*, intelligere possumus mentes iustorum Angelorum & hominum, in quibus Deus habitat per cognitionem & amorem: hanc domum sibi Deus elegit; terram autem, id est, mundum hunc visibilem dedit filiis hominum, prout distinguuntur à filiis Dei: & ideo subiungitur. *Non mortui laudabunt te Domine*, id est, qui mortui sunt morte peccati, etiam si vivunt vita naturæ, non laudabunt te Domine, neque omnes qui descendunt in infernum, qui in morte peccati confirmati sunt, & ad pœnas æternas descenderunt: sed nos qui vivimus vita gratiæ, qui per fidem, & charitatem tibi inhaeremus, & iam cœlestis patriæ ciues sumus: quamvis interim ad tempus habitemus, in terra, nos, inquam, benedicimus tibi, & benedicimus usque in æternum.

Vide Chrysostomum hanc expositionem eleganter persequentem.

\* \*

## PSALMVS CXIV.

Titulus, & Argumentum.

Alleluia.

**P**salmm hunc exponunt aliqui cum Hebrais de temporali aliqua pressura, vel morbo, à quo liberari cupiebat Propheta. Sed nos cum Sanctis Patribus, Basilio, Chrysostomo, Hieronymo, & Augustino, existimamus intelligendum Psalmum esse de homine spirituali, sitiente salutem æternam, & gemente propter tentationes, & pericula.

### EXPLICAT. PSAL. CXIV.

**D**ilexi, quoniam exaudiet Dominus vocem orationis meæ.

Anima ardens desiderio Domini absolute dicit, *Dilexi*, & non explicat, quem: quoniam existimat, omnes alios similiter amare rem vndeunque amabilem, ac proinde scire quem dicere velit. Sic B. Maria Magdalena Ioan. 20. interroganti, *Quem quæris?* respondit, *Domine si tu sustulisti eum, dicito mihi*. & non declarat quem quærat, & quem sublatum doleat, quia putabat omnes amare quem ipsa amabat, & sollicitos de illo esse, de quo ipsa sollicita erat. Et verè cum omnia bonum appetant, ut dicitur initio Ethicorum, & in solo Deo sit omnis ratio boni, & absit ab eo omnis ratio mali, quod significavit B. Ioannes cum ait in prima Epist. cap. 1. *Deus lux est, & in eo tenebra non sunt ulla*: deberent homines solum Deum absolute amare; & cum audiunt, *Dilexi*, intelligere deberent dilectionem summi boni significari. Sed tamen David ex ratione, quam reddit, satis indicat, se de dilectione Dei esse loquutum; ait enim: *Dilexi, quoniam exaudiet Dominus vocem orationis meæ*, id est, dilexi Dominum, quoniam benignus & misericors est, & ex naturali sua benignitate exaudiet vocem orationis meæ. Magna causa diligendi, quod altissimus Dominus, & qui rerum nostrarum non indiget, tam facilis sit ad audiendas preces vilissimorum servorum,

vt



ut securè promittere nobis possimus audientiam. quod in Psalm. 85. clarius exprimitur cum dicitur, *Quoniam tu Domine suavis, & mitis, & multa misericordia omnibus inuocantibus te.* Sensus igitur est, Dilexi Dominum, quoniam certus sum, quòd exaudiet vocem orationis meæ.

*Quia inclinauit aurem suam mihi, & in diebus meis inuocabo.*

Declarat, vnde dicitur, Deum exaudientium preces suas dicens; inde scio, quia ipse præuenit me, ipse inuitauit, dum inclinauit ad me aures suas: quorsum enim inclinaret ad os meum aurem suam, nisi me audire paratus esset? Porro Deus inclinatur aures ad nos, quando inspirat nobis orationem: neque enim nos oraremus, nisi Deus per gratiam præuenientem inspiraret desiderium orandi. Igitur Dauid assuetus internis vocationibus, ex desiderio orandi sibi cælitus inspirato intellexit, aurem Domini ad se inclinatam; & idè etiam adiungit, *& in diebus meis inuocabo*, id est, dum affulgent mihi dies gratiæ Dei, & in hac luce video aurem Domini ad me inclinatam, non omittere occasionem, sed inuocabo Dominum. Vocat enim dies suos, dies illos, quibus luce præuenientis gratiæ fruebatur. absente enim luce gratiæ non succedit diei de qua dicitur: *Venit nox, in qua nemo potest operari.* Ioan. 9. S. Ioannes Chrysostomus per illud, *in diebus meis*, intelligit omnibus diebus vitæ meæ. S. Augustinus per *dies meos*, intelligit dies huius mortalitatis, qui nostri dies dicuntur, quia nos ipsi peccando nobis illos fecimus.

*Circumdede runt me dolores mortis, & pericula inferni inuenerunt me.*

Explicat nunc materiam suæ orationis, quæ sunt tentationes, & pericula salutis æternæ, quas solas tribulationes magni pendit anima verè Deum diligens. In Psalm. 17. similia verba exposuimus de periculis mortis corporalis; quoniam titulus Psalmi ad id coquebat: sed hic Psalmus, qui nihil habet in titulo, nisi *Alleluia*, ad sublimiorem intelligentiam nos inuitat. Attingitur, *Circum-*

*derunt me dolores mortis*, id est, vndique tentationes mortiferæ me circumstant, ut compellat clamare, *Quis me liberabit de corpore mortis huius?* In Hebræo est vox ambigua, quæ & funes, siue laqueos, & dolores significare potest: & verè tentationes mortiferæ funes sunt, siue laquei mortis, & etiam dolores mortis, quia ex illis viri pii dolorem concipiunt, qualis est in illis, qui mortem sibi vident imminere. Declarat paulò apertius cum addit, *pericula inferni inuenerunt me*: nam ex hoc periculo omnium periculorum maximo concipiunt dolores mortis, qui in illo adhuc se versari cogitant. Vox Hebraica propriè angustias inferni significat, quæ voce designatur locus angustus, per quem qui gradiuntur, in periculo præcipitij versantur, nisi singulos gressus vigilantissimè obseruent, & talis est via salutis, arcta, atque angusta, vnde nullo negotio in præcipitium inferni ruunt, qui non caute ambulant. Vnde monet Apostolus, *Videte quo modo caute ambuletis*, ad Ephes. 5.

*Tribulationem & dolorem inueni, & nomen Domini inuocaui.*

IV.

Multi sunt, qui circumdati sunt laqueis mortis, & periculis inferni, & non aduertunt, occupati fortasse prosperitatibus seculari, & quò magis circumdati sunt eiusmodi periculis, eò minus ea considerant, & idè neque timent, neque dolent: Dauid autem ea considerabat, & considerando inuenerat vbi esset, & idè tremens ac dolens dicebat, *Tribulationem, & dolorem inueni, & nomen Domini inuocaui*, id est, tribulationem, & dolorem inueni, quia blandiente licet seculi prosperitate, & felicitate, tamen adueri me circumdatum esse funibus, & doloribus mortis, & periculis inferni expositum esse; idè gemens nomen Domini inuocaui, & dixi, *O Domine libera animam meam.* S. Basilius paulò aliter exponit, ut sentius sit, *Circumdede runt me dolores mortis, & pericula inferni inuenerunt me*, id est, peccatum mortale cominisi, vnde in mortem animæ:



animæ incidi, & inferno propinquavi: sed ego tribulationem & dolorem pœnitentiæ salutaris inueni, & hoc modo corde contrito & animo contribulato nomen Domini inuocaui, dicens, *ô Domine libera animam meam.*

V. *O Domine libera animam meam, misericors Dominus, & iustus, & Deus noster miseretur.*

*NON* Dixerat, nomen Domini inuocaui: nunc subiicit ipsa verba inuocationis. *O Domine libera animam meam*, nimirum de doloribus mortis, & periculis inferni. In Hebræo est particula non solum vocantis, sed etiam obsecrantis, nimirum *ana*. Itaque potuisset verti, *Obsecro Domine, libera animam meam*: sed idem est sensus. Deinde, ut ostendat se bona spe inuocasse Dominum, addit quasi rationem, dicens, *Misericors Dominus, & iustus, tupplic, est, & Deus noster miseretur: misericors Dominus est*, quia præuenit peccatorem gratia sua, dum ei pœnitentiam & orationem inspirat: *Ipse*, enim prior dilexit nos, ut dicit Apostolus Ioannes. *Iustus etiam est*, quia non sine flagello dimittit, *flagellat enim omnem filium quem recipit*, & ijs ignoscit, qui sibi ipsi non ignoscunt, & tandem *Deus noster miseretur*, quia recipit quem flagellauit, & non solum peccata indulget, sed hæredem facit. S. Ioannes Chrysostomus scribit, Deum dici misericordem, & iustum, quia semper admiscet misericordiam iustitiæ, & iustitiam misericordiæ, & addit, *Deus noster miseretur*, quia Deus magis pronus est ad miserendum, quam ad puniendum.

VI. *Custodiens paruulos Dominus, humiliatus sum & liberauit me.*

Miseretur Dominus, ut paulò ante dictum est, sed præcipue paruulis timentibus eum: id enim in Psalm. 102. clarius habetur, cum dicitur: *Secundum altitudinem cæli à terra corroboraui Dominus misericordiam suam super timentes se.* item, *Sicut miseretur pater filiorum, misericors est Dominus timentibus se.* Quod idem legimus in cantico Virginis Deiparæ, *Et misericordia eius à proge-*

*nie in progenies timentibus eum.* Quoniam igitur verba illa vltima versiculi superioris, *Et Deus noster miseretur*; intelliguntur de miseratione paterna, ut sonat vox Hebraica, *merachem*, idèd nunc declarat quos respiciat ista paterna misratio, ac dicit respicere paruulos, id est, mites, & humiles, ac timentem Deum filiali timore. *Custodiens paruulos Dominus*, id est, Dominus ex paterna miseratione custodiens est paruulos suos, quasi teneros filios, quibus æternam hæreditatem parauit. Et quoniam Dauid non ignorabat, testimonium reddente Spiritu sancto spiritui eius, se vnum ex illis esse, addidit, *humiliatus sum*, id est, ex paruulis esse studui, & tandem conclusit, *liberauit me*, quod de liberatione in spe intelligi debet; præsertim cum in Hebræo sit in futuro, & *liberauit me*.

*Conuertere anima mea in requiem tuam, quia Dominus benefecit tibi.*

Liberatus homo iustus in spe, gratulatur sibi ipse tantum bonum dicens, *Conuertere anima mea in requiem tuam*, id est, festina passibus desiderij ad locum veræ ac sempiternæ quietis, ad cœlestem Hierusalem, ad sinum veri Abraham; quoniam Dominus benefecit tibi. In Hebræo habetur, *Quoniam Dominus retribuit super te*; quo verbo significatur vita æterna esse corona iustitiæ, & merces operum bonorum, ut hoc loco notauit S. Basilius. Itaque textum vulgati interpretis ex Hebraica proprietate explicare licebit.

*Quia eripuit animam meam de morte, oculos meos à lacrymis, pedes meos à lapsu.*

Declarat, quid sit bonum illud magnum, siue magna illa retributio, de qua dictum est, *benefecit tibi*, siue retribuit tibi; ac dicit esse vitam beatam, & sempiternam, *Quia eripuit animam meam de morte*, id est, eripuit à morte, & donauit vitam: *oculos meos à lacrymis*, id est, dedit vitam non subiectam vlli malo, sed cumulatam omni bono; *absterget enim Deus omnem lacrymam ab oculis*



oculis eorum, ut dicitur Apocal. 21. *Et pedes meos à lapsu*, id est, dabit vitam non solum felicem, sed etiam securam ac sempiternam, ut ab ea excidere nunquam possim. Ita liberabit à doloribus mortis, & à periculis inferni, & in vitæ felicissimæ æternitate & securitate constituet.

*Placebo Domino in regione viuorum.*

Concludit Psalmum dicens, quod quem admodum ipse securè possidebit vitam optimam, & dulcissimam, quæ vehementer ipsi placebit: ita etiam placebit ipse Domino vehementer, & securè in regione viuorum: dicitur regio viuorum, ubi omnes ab omni parte viuunt, & idèo placent omnibus modis Deo viuenti: nam in hac peregrinatione multi mortui sunt, & qui viuunt, secundum spiritum viuunt, non secundum corpus, quod propter peccatum mortuum est, Rom. 8. vnde clamat Apostol. Rom. 7. *Quis me liberabit de corpore mortis huius?* In Hebræo habetur, *Ambulo coram Deo in terra viuentium*; sed idem est sensus: nam ambulare coram Deo, est placere oculis Dei, rectè & iuste viuendo. Sic legimus Gen. 5. *Ambulauit Henoc cum Deo*, & Gen. 6. *Noe fuit vir iustus atque perfectus, cum Deo ambulauit*, & Gen. 17. *Ambula coram me*, & esto perfectus, & Luc. 1. *Ut sine timore de manu inimicorum nostrorum liberati seruiamus illi, in sanctitate & iustitia coram ipso omnibus diebus nostris.*

PSALM. CXV.

*Titulus, & Argumentum.*

Alleluia.

**H**unc Psalmum Hebræi partem esse volunt Psalmi superioris: sed nos distinctionem Septuaginta Seniorum sequimur: nec tamen negamus, hunc Psalmum immediatè subiungendum esse superiori, ut S. Basilius monet. Agit enim Propheta gratias Deo, & vota se persoluturum pollicetur pro salute æterna, quam bona spe iam possidere capit.

EXPLICATIO PSAL. CXV.

**C**redidi propter quod locutus sum: ego autem humiliatus sum nimis.

I.

Respicit ad verba illa, *Placebo Domino in regione viuorum*, & quasi aliquis interrogasset, vnde nosti regionem viuorum? respondisset se nouisse per spiritum fidei. *Credidi*, inquit, esse regionem viuorum quandam, licet oculis ea non videatur, & propter hanc fidem dixi, *Placebo Domino in regione viuorum*. Citauit hunc locum Apostolus 2. Cor. 4. *Habentes*, inquit, *eundem spiritum fidei*, sicut scriptum est, *Credidi propter quod locutus sum*, & nos credimus propter quod & loquimur, scientes quoniam, qui suscitauit Iesum, & nos cum Iesu suscitabit, & constituet vobiscum. Vbi B. Paulus docet, ex spiritu fidei, non ex vlla humana demonstratione, cognosci resurrectionem corporum, & veram viuentium regionem, in qua cum Domino Iesu constituendi sumus. Et quoniam hæc fides requirit animam verè humilem, quæ se Spiritui sancto plene subijciat ad obedientiam fidei, subiungit, *Ego autem humiliatus sum nimis*, id est, ego verò ideo credidi, quia non ingenio meo nitor, sed valde humilem ac docilem me Spiritui sancto præstiti. Sic enim & Dominus ait Matth. 11. *Confiteor tibi Pater, Domine cæli & terræ, quia abscondisti hæc à sapientibus & prudentibus, & reuelasti ea paruulis*. & in alio loco, *Quomodo vos potestis credere, qui gloriam ab inuicem accipitis?* Ioan. 5.

*Ego dixi in excessu meo, omnis homo mendax.*

II.

Variè admodum hunc versiculum exponunt auctores, ut alij referant ad quandam quasi desperationem Regni obtinendi, quod Samuel Dauidi promiserat, & in excessu quodam turbatus dixerit, *Omnis homo mendax*, videlicet, ut etiam Samuel mentitus videatur: alij referant ad populum in captiuitate Babylonica constitutum, & desperantem de promissis Prophetarum; alij aliter exponant. Sed non video, quomodo

Q999



modo ista, & alia id genus cohereant cum reliquis partibus huius Psalmi. Ideo magis probo sententiam Euthymij, qui hæc refert ad excessum mentis, per quem Propheta ascenderit ad notitiam regionis viuorum, & dixerit in comparatione eius regionis mendacium esse quicquid homines loquuntur de felicitate humana. Ego, inquit, qui humiliavi me valde, exaltatus à Domino ad mentis excessum, in eo excessu videns, quam falsa, & fallacia sint, quæ videntur hominibus vera & solida bona, dixi, *omnis homo mendax*, id est, omnis homo, qui humano affectu loquitur de felicitate, & magni æstimat bona mortalia & caduca, mendax est: vera enim & stabilia bona non inveniuntur, nisi in regione viuorum. Ex hac expositione cessat obiectio, quam nomine sophistarum sibi ipse proposuit magnus Basilii: Si omnis homo mendax, igitur & David, qui est homo mendax est: ergo mentitur, cum dicit, omnis homo mendax; ac per hoc sibi ipse contradicit, & dictum suum ipse destruit. hoc, inquam, sophisma cessat, quia per hominem, intelligitur hoc loco homo humano affectu loquens, non autem homo loquens spiritu diuino afflatus. Posset etiam dici, aliud esse, hominem semper mentiri, aliud esse mendacem: potest enim homo mendax aliquando vera loqui, præsertim si non ex se, sed spiritu Dei loquatur: mendax enim dicitur homo, quoniam ex natura sua obnoxius est errori & falsitati. Quomodo intelligitur, quod scribit Apostolus ad Rom. 3. *Est autem Deus verax, omnis autem homo mendax*, id est, solus Deus mentiri nequit, homines autem omnes mendacio sunt obnoxij, sed non continuo sequitur, ut perpetuo mentiantur.

III.

*Quid retribuam Domino, pro omnibus quæ retribuit mihi?*

Animaduertens tantis se bonis cumulatum, cum & regionem viuorum Dei beneficio agnouerit, & in eam se ingressurum sperare cœperit, imò ac si iam ingressus esset, præ lætitia exultauerit: querit, quid Domino retribuere possit. *Quid*, inquit, *retri-*

*buiam Domino pro his quæ retribuit mihi*; ille me de nihilo fecit, ille de iniquitate redemit, ille regionem viuentium demonstrauit, ille mihi etiam se daturum promisit: quid igitur illi retribuam? Quod autem dicit, *retribuit mihi*, potest simpliciter accipi pro, *tribuit*, ut exponit Euthymius: vel cum S. Augustino, notati liberalitas & misericordia Dei, qui tanta bona tribuit pro tantis malis.

*Calicem salutaris accipiam, & nomen Domini inuocabo.*

Non desunt, qui hunc calicem exponant de sacrificio legis veteris, quod liquoribus & libaminibus continebatur: vel de calice conuiuiali, quo in memoriam acceptæ salutis utebantur: sed ista leuia sunt, & Sancti Patres, Basilii, Chrysostomus, in 2. expositione, Hieronymus, Augustinus, & cum ijs Theodoretus & Euthymius magno consensu de calice patientiæ & passionis hunc locum intelligunt; de quo calice Dominus Matth. 20. dixit: *Potestis bibere calicem, quem ego bibiturus sum?* & Matth. 26. *Transseat à me calix iste.* & Ioan. 18. *Calicem quem dedit mihi Pater, non vis, ut bibam illum?* Nec solum in testamento nouo, sed etiam apud Prophetas passim accipitur calix pro amara portione tribulationis, ut Psalmo 74. *Quia calix in manu Domini vini meri plenus misto.* & Isaïa 51. *Eleuare Hierusalem, quæ bibisti de manu Domini calicem iræ eius.* & Hier. 25. *Sume calicem vini furoris huius de manu mea.* & Ezech. 23. *Hæc dicit Dominus Deus, calicem furoris tuæ bibes profundum, & latum: eris in derisum & in subannationem, & bibes illum, & epotabis usque ad facies.* & Habac. 2. *Repletus es ignominia pro gloria: bibe tu quoque, & consopire, circumdabit te calix dextere Domini, & vomitus ignominia super gloriam tuam.* Dicit igitur victus, & amator Dei, Cum nihil habeam præstantius, quod offeram Deo meo, pro tam multis bonis, quæ retribuit mihi, *calicem salutaris accipiam*, id est, bibam libenti animo calicem Domini, quantumuis amarum, siue tribulationes, siue pericula, siue mor-



mortem ipsam, pro suo honore sustinere me velit: scio enim calicem hunc amarum quidem, sed salutarem futurum. Et quia de meis viribus non confido, sed in Domini adiutorio omnia possum; ideo *nomen Domini inuocabo*, ut det mihi calicem suum intrepidè haurire. Vocat Propheta calicem salutaris, calicem salutis. id est, calicem salutiferum. Confirmat hanc expositionem consuetudo Ecclesiæ, quæ hunc Psalmum in Martyrum solemnitatibus cantare solita est.

*Vota mea Domino reddam coram omni populo eius: pretiosa in conspectu Domini, mors sanctorum eius.*

Paratus ad calicem passionis bibendum securus dicit: sacrificium laudis & confessionis Domini, non in angulis solum & in cubiculis, sed palam & publicè, *coram omni populo eius*, inimicis etiam presentibus immolabo, etiam si mortem inde mihi imminere intelligam: *pretiosa enim est in conspectu Domini mors sanctorum eius*, id est, magni æstimat Dominus mortem sanctorum pro suo honore & confessione susceptam; quomodo apud homines magni fiunt gemmæ pretiosæ, quibus Regum diademata ornari solent, & quibus nihil charius apud homines inuenitur. Expendit hoc loco S. Basilii gloriam Martyrum, quorum non solum animæ mox coronantur in cælis: sed etiam reliquæ corporum in maximo pretio habentur in terris. antea siquidem qui tangebatur cadauer hominis, immundus erat: nunc autem, qui ossa Martyrum contingit, sanctificationem acquirit.

*O Domine, quia ego seruus tuus, ego seruus tuus, & filius ancilla tue.*

Non superbit vir sanctus, qui se totum Deo in sacrificium offert, sed agnoscit debitum seruitutis, & iuxta mandatum Domini dicit, seruus inutilis sum; quod debui facere feci. *O Domine*, inquit, quid magnum feci, quod vota mea publicè reddidi, neque ob timorem mortis confessionem tuam omisi?

quod debui facere feci, *quia ego seruus tuus sum*, redemptus de captiuitate diaboli pretioso sanguine filij tui, ego, inquam, *seruus tuus sum*, non solum redemptionis gratia, sed etiam dono creationis: sed *& filius sum ancilla tue*, id est, non emptitiis tantum, sed & vernaculus, quia & mater mea ancilla tua est, duplici illo nomine creationis & redemptionis. Dicit autem, *filius ancilla tue*, non *seruus tui*; quia seruitus sequitur ventrem: nam si liber ex ancilla gignat filium, ille filius seruus nascitur. Vnde Sara Abrahamo dixit, *Eyce ancillam & filium eius: non enim erit haeres filius ancilla cum filio meo Isaac*, Gen. 21. Itaque Ismahel seruus erat, quia matrem habuit ancillam, quamuis Patrem habuerit liberum, videlicet Abrahamum. S. Augustinus per ancillam, intelligit Ecclesiam, quæ est mater nostra, ancilla ex naturæ debito, & libera ex gratiæ munere.

*Dirupisti vincula mea, tibi sacrificabo hostiam laudis, & nomen Domini inuocabo.*

VII.

Docet, seruum se Domini esse, sed seruitute bona, erutum autem à seruitute mala. Quomodo Dominus in Euangelio hortatur eos qui laborant, & onerati sunt, ut tollant iugum suum, quia iugum ipsius suauis est, & onus eius leue, Matth. 11. non liberat omnino à iugo, & onere, sed tollit iugum asperum, ut imponat iugum suauis, & aufert onus graue, ut imponat onus leue. Ita omnino dirupit Deus vincula, quibus à Satana alligabamur, vincula peccatorum, & onera cupiditatum, quibus ad inferos deprimebamur: & alligati iugo suauis legis diuinæ, & onere leuissimo charitatis, quo in altum euehimur, & exaltamur ad cælum. *Dirupisti*, inquit, *vincula mea*, id est, liberaisti à seruitute durissima, & seruum tuum esse voluisti, cui seruire, regnare est. Ideo *tibi sacrificabo hostiam perpetuæ laudis*, & non amplius inuocabo falsos Deos, mammonam videlicet, & ventrem, opes & honores, quibus antea seruiebam; sed *nomen Domini*, qui solus verus est Deus, assidue inuocabo.



VIII.

*Vota mea Domino reddam in conspectu  
omnis populi eius, & in atrijs domus Do-  
mini, in medio tui Hierusalem.*

Hæc repetitio est quinti versiculi, *Vota mea Domino reddam coram omni populo eius; additur autem in atrijs domus Domini in medio tui Hierusalem; ad significandum, ut S. Augustinus monet, debere seruum Dei offerre vota sua, confessionem suam, & seipsum Deo, intra Ecclesiam, quæ per Hierusalem significatur: qui enim extra Ecclesiam id faciunt, nihil faciunt: nam ut scribit S. Cyprianus in libro de unitate Ecclesiæ, Hæretici occidi possunt, coronari non possunt: & eorum mors non est fidei corona, sed peccata perfidiae. Posset fortasse hic versiculus referri ad cælestem Hierusalem; ut sicut supra dictum est, *Vota mea Domino reddam coram omni populo eius*, de confessione in terris: ita nunc in fine Psalmi tale aliquid dicatur de confessione laudis, & votis gratiarum actionis, quæ reddetur in cælis, ut hic sit sensus, *Vota mea Domino reddam*, id est, & tandem disruptis vinculis omnibus, & ad perfectam libertatem filiorum Dei vocatus, sacrificium laudis, & gratiarum actionis immolabo in conspectu omnis populi eius, iam glorificati in cælis; in atrijs domus Domini, id est, in ingressu domus Domini, de qua dicitur in alio Psalmo, *Beati qui habitant in domo tua Domine, in secula seculorum laudabunt te: nec solum in atrijs, sed etiam in domo, quæ domus in medio tui est, ô superna & gloriosa Hierusalem, quæ patria nostra es, ad quam ex peregrinatione quotidie suspiramus.**

## PSALM. CXVI.

*Titulus, & Argumentum.*

*Alleluia.*

**H**UNC Psalmum omnium brevissimum declarat Apostolus ad Rom. 15. ubi dicit, Christum fuisse ministrum circumcisionis ad confirmandas promissiones Patrum: gentes

autem super misericordia honorare Deum. & allegat hæc verba: Laudate Dominum omnes gentes, & magnificate eum omnes populi. Ex quo intelligimus, Prophetam hoc loco alloqui totam Ecclesiam ex Gentibus & Iudeis congregatam, eamque hortari ad laudandum Deum, quod misericordiam, & veritatem erga eam ostenderit. Sed observandum est, cum Apostolus dicit, gentes super misericordia debere honorare Deum, ad Iudeos autem pertinere veritatem, quam Deus ostendit confirmando promissiones Patrum; non esse sensum, ad Iudeos non pertinere misericordiam, sed ad gentes pertinere solam misericordiam, ad Iudeos autem misericordiam & veritatem, quia licet misertus Deus ad Iudeos Messiam, ut impleret promissiones Patrum, tamen promissiones non ex meritis eorum, sed ex mera misericordia processerunt. Sic enim cecinit Zacharias Luc. 1. Ad faciendam misericordiam cum Patribus nostris, & memorari testamenti sui sancti: & hoc tractat ac demonstrat Apostolus ad Rom. 3. Omnes peccauerunt, & egent gloria Dei. & persequitur hoc argumentum usque ad finem capitis undecimi; ubi dicit, Conclusit Deus omnia in incredulitatem, ut omnium misereatur. & idem docet in tota Epistola ad Galatas: & ad Ephes. 2. Eramus & nos naturæ filij iræ, sicut & cæteri.

## EXPLICAT. PSAL. CXVI.

**L**audate Dominum omnes gentes,  
laudate eum omnes populi.

Ecclesiam, ut dixi, totam alloquitur, & ad laudandum Dominum cohortatur. intelligit autem per gentes, ut Apostolus monuit, gentilitatem converfam ad fidem, quam primo loco posuit, quia videbat, multo maiorem partem Ecclesiæ ex gentibus, quam ex Iudeis congregandam. Per populos autem intelligere videtur populos, siue tribus Iudeorum, similiter ad fidem converforum, ut hoc loco notavit in commentario S. Hieronymus; & similia verba, Psalm. 2. Quare fremuerunt gentes, & populi meditati sunt inania; expoluerunt Apostoli A&.



Act. 4. per gentes, Gentiles; & per populos, Iudæos intelligentes.

*Quoniam confirmata est super nos misericordia eius: & veritas Domini manet in æternum.*

Ratio laudandi Deum est, quoniam misericordia Domini stabilita est per aduentum Messiae super gentes, & super Iudæos. Fundata enim est Ecclesia, aduersus quam portæ inferi non præualebunt, & constitutum est Regnum, cuius non erit finis. Nec solum misericordia confirmata est, sed etiam veritas promissionum adimpleta, in æternum amplius non mutabitur.

## PSALMVS CXVII.

*Titulus, & Argumentum.*

*Alleluia.*

**P**salms hic de Davide exponi potest ad litteram, ut facit S. Ioannes Chrysostomus; tamen conuenit etiam toti populo Christiano, cuius figuram David gerebat, & hanc expositionem persequitur S. Augustinus. Canit autem tum David, tum populus Dei, multa beneficia Dei, sed illud potissimum, quo Christum lapidem angularem extulit in summum adificium, ut duos parietes conduceret & contineret: quod factum est in die Resurrectionis, & ideo Ecclesia canit hunc Psalmum in Dominica die ad Primam: & verba illa ex hoc Psalmo, Hec dies quam fecit Dominus, exultemus & lætemur in ea, Resurrectioni applicat, & per octauā Pasche frequentissime cum iubilo canit.

## EXPLICATIO PSALMI CXVII.

**C**onfitemini Domino, quoniam bonus; quoniam in sæculum misericordia eius.

Inuitat David omnes ad laudandum Deum; & rationem reddit, quoniam bonus. Nihil

breuius, nihil grandius dici potuit; nam solus Deus proprie & simpliciter bonus est, & nihil iure laudari potest, nisi bonum. Addit: *Quoniam in sæculum misericordia eius*, ut ostendat ab effectu, Deum esse bonum, ac per hoc etiam laudabilem. Nam bonitas Dei, nulla in re magis cognosci potest à miseris, quam in misericordia: Misericordia enim nos creauit, misericordia redemit, misericordia protegit, misericordia coronabit: ita usque in sæculum misericordia eius.

*Dicat nunc Israël quoniam bonus, quoniam in sæculum misericordia eius.*

*Dicat nunc domus Aaron, quoniam in sæculum misericordia eius.*

*Dicant nunc qui timent Dominum, quoniam in sæculum misericordia eius.*

Explicat, qui sint, quos inuitauerat ad laudandum Deum, & nominat primo loco Israël, id est, populum Israëliticum, quoniam inde fuerunt omnes Apostoli, qui primi crediderunt, & Ecclesiam inchoarunt. Secundo nominat domum Aaron, quia post Apostolos magna turba Sacerdotum obedire cepit fidei, ut dicitur Act. 6. Denique addit, omnes, qui timent Dominum, quales fuerunt omnes Gentiles, qui crediderunt, & Ecclesiam inchoatæ se adiunxerunt. Itaque totam Ecclesiam ex Iudæis & Gentibus collectam inuitat ad laudandum Deum.

*De tribulatione inuocaui Dominum, & exaudiuit me in latitudine Dominus.*

Incipit declarare materiam laudis diuine, quod in angustia positus cum esset, inuocauit Dominum, & Dominus continuo exaudiens, posuit illum in latitudinem; opponit enim pulcherrime angustias latitudini. Ego, inquit, de tribulatione inuocaui Dominum, id est, cum essem in tribulatione, siue in angustia, ut sonat vox Hebraica, inuocaui Dominum, id est, non merita mea iactaui, non conquestus sum, quod iniuste paterer perfectioni.



curtionem, sed ad misericordiam Dei confugi, & exaudiuit me in latitudine Dominus, id est, exaudiuit me, & de angustiis in latitudinem transtulit. Sicut autem per angustias significatur tribulatio, ita per latitudinem significatur liberatio à tribulatione. Quod autem id possit Dauid de persona sua merito dicere, notissimum est ex Psal. 17. & 53. & ex alijs multis. Quod idem etiam conveniat Ecclesiae, non minus est notum. Certe initio nascentis Ecclesiae, cum Herodes S. Petrum Ecclesiae totius Pastorem & Principem inclusisset in carcerem, oratio fiebat ab Ecclesia sine intermissione ad Deum pro eo: & continuo exaudita est, & maximo miraculo de summis angustiis tribulationum in latitudinem magnae consolationis educta est, & quoties de angustiis variarum persecutionum Neronis, Decij, Diocletiani, & similium Tyrannorum ad latitudinem pacis & quietis Deo miserante transtulit; toties dicere potuit: *De tribulatione inuocaui Dominum, & exaudiuit me in latitudine Dominus.*

VI. *Dominus mihi adiutor, non timebo quid faciat mihi homo.*

VII. *Dominus mihi adiutor, & ego despiciam inimicos meos.*

Experimento proprio doctus Dauid, siue populus Dei magna fiducia exultat, & non dicit: Dominus mihi adiutor est, nihil deinceps patiar; scit enim se adhuc peregrinum inter hostes multa passurum, sed ait: *Dominus mihi adiutor, supple est, non timebo quid faciat mihi homo.* id est, non turbabor propter mala, quae mihi infert homo: quia Dominus omnia conuertet in bonum. Sic enim Dominus monuit: *Nolite timere eos qui occidunt corpus, & post haec non habent amplius quid faciant*, Matth. 10. Nam capillus de capite vestro non peribit, Luc. 21. & Apostolus: *Momentaneum & leue tribulationis nostrae aeternum gloria pondus operatur in nobis*, 2. Cor. 4. Quare merito addit, & ego despiciam inimicos meos, quippe qui saeuendo in corpus, gloriae meae deseruiunt.

*Bonum est confidere in Domino, quam confidere in homine.*

*Bonum est sperare in Domino, quam confidere in Principibus.*

Deducit ex dictis vtilem admonitionem, de spe collocanda in Deo, non in hominibus, quantumvis potentibus: Deus enim & potest & vult confidentes in se iuuare; homines autem saepe non possunt, saepe etiam variis passionibus acti nolunt. Quod expertus fuerat Dauid, qui aliquando sperauit in Saule Rege suo, alias in Achis Rege Gethco, alias in Achitophel consiliario prudentissimo, alias in alijs, & in nullo fidem inuenit: in Deo autem nunquam sine prospero euentu sperauit. Ait igitur monens omnes: *Bonum est confidere in Domino, quam confidere in homine*, id est, magis quam confidere in homine. *Bonum est sperare in Domino, magis quam sperare in Principibus*, terrenis videlicet. Haec comparatio accommodata est infirmitati humanae, cui nota est potentia hominum, & maxime Principum; Dei autem potestas occulta est plurimis, qui neque vident, neque considerant, fortasse etiam non credunt magnitudinem Dei; alioqui dicendum fuisset: *Bonum est sperare in Domino, malum autem sperare in homine*. Sic enim ait Hieremias cap. 17. *Maledictus homo qui confidit in homine*. Neque tamen malum est spem aliquam collocare in adiutorio Angelorum, vel hominum bonorum, quia haec spes ad Deum refertur, qui non solum per se, sed etiam per suos adiuuat confidentes in se.

*Omnes gentes circueuerunt me, & in nomine Domini, quia vltus sum in eos.*

*Circumdantes circundederunt me, & in nomine Domini, quia vltus sum in eos.*

*Circundederunt me sicut apes, & exarserunt sicut ignis in spinis, & in nomine Domini, quia vltus sum in eos.*

Osten-



Ostendit exemplo suo, quam sit bonum confidere in Domino, cum ipse non semel, sed sepius obsessus à magna multitudine hostium, Dei adiutorio ita liberatus fuerit, ut hostes suos prostratos viderit. Notum est, si de persona Davidis agatur, quam sepe à Saul cum magna manu obsessus fuerit, & mirabiliter liberatus: sed notius est, quam sepe populus Dei à Regibus potentissimis, & à populis innumerabilibus persecutiones gravissimas perpeffus, diuinam vltionem viderit. Verba sunt paulo obscuriora, quoniam vulgaris Interpres voluit omnes voces Hebraicas exprimere, & phrasim Hebraicam phrasim Latinam non respondet. Clarius reddidisset, ut Graeci fecerunt: si omisisset illud, *quia*, & illud, *in*, ac dixisset, *Omnes gentes circumdederunt me, & in nomine Domini vltus sum eas*. Illud enim, *quia*, & illud, *in*, redundant, & illud, *eos*, est masculini generis, quia vocabulum Hebraicum, quod gentes significat, est etiam generis masculini. Itaque Interpres fideliter vertit, & quod in Graeco de erat, addidit ex Hebræo. Sensus autem hic est, *Omnes gentes*, id est, tota fere multitudo gentium circumdederunt me, & in nomine Domini vltus sum eas, id est, in virtute Dei vidi vltionem, quia Deus vltus est innocentiam meam, dum hostes prostravit, ac deleuit. Addit autem, *Circumdantes circumdederunt me*, ut ostendat, non quomodocunque se fuisse circumdatum, sed ita atque obsessum, ut nullum pateret effugium; addit etiam, *Circumdederunt me sicut apes*, & *sicut ignis in spinis*: ut ostendat multitudinem & vehementiam hostium: nam apes in tanta copia circumdant fauam, ut numerari non possint: & ignis tanto impetu corripit spinas aridas, ut in puncto temporis eas consumat. In Hebræo habetur, *Exstincta*, vel *consumpta sunt*, gentes videlicet, *sicut ignis in spinis*. Sed non est verisimile LXX. Interpretes, vel auctorem vulgatae editionis Latinæ reddidisse contrarium sensum: neque satisfaciunt, qui dicunt, non esse contrarium sensum, exardescere ignem in spinis, & consumi ignem in spinis; quia utraque lectione significatur celeritas actionis ignis in spinas, qui mox, ut exarserit, ex-

tinguitur. Qui hoc dicunt, ideo non satisfaciunt, quoniam David subiungit, & in nomine Domini vltus sum in eos; quod non diceret, si inimici eius antea fuissent extincti, siue consumpti. Exitimo igitur LXX. Interpretes, vocem illam, *doacu*, accepisse in significatione actiua, qualem habet in coniugatione Piel & Poal, non in passiva: & ideo non vertisse, *extincta*, vel *consumpta sunt*, sed consumere cupierunt, siue exarserunt ad consumendum, *sicut ignis in spinis*.

*Impulsus euerfus sum ut caderem, & Dominus suscepit me.*

*Fortitudo mea & laus mea Dominus, & factus est mihi in salutem.*

Amplificauit hactenus multitudinem & atrocitatem inimicorum: nunc confitetur infirmitatem suam, quæ tanto robori par esse non poterat, ut hinc magis agnoscat gloria Domini. Ego, inquit, tantæ violentiæ resistere non poteram, ideo ab hostibus impulsus in ruinam, iam euerfus ruere ceperam, sed Dominus in tempore occurrens sustentauit me. Referri potest hoc ad pericula amittendæ vitæ corporalis, in quæ sepe incidit David. Referri etiam potest ad pericula spiritualia grauissimarum temptationum, in quæ incidebat populus Christianus tempore persecutionum, qui propterea agnoscens & confitens, non suis viribus, sed ex gratia Dei vicisse, dicit: *Fortitudo mea & laus mea Dominus*, id est, Dominus est fortitudo mea, quia viribus eius vinco, & ipse idem est laus mea, quia semper eum laudare debeo, & ipse factus est mihi in salutem, ipse Saluator meus fuit.

*Vox exultationis & salutis in tabernaculis iustorum.*

Ex liberatione Davidis gaudi sunt iusti, qui eam liberationem seire potuerunt: sed multo magis ex liberatione populi Christiani de ingenti persecutione orta est vox exultationis, & vox salutis, id est, salutem annun-

1374

XIII.

XIV.

XV.



annunciāns in tabernaculis iustorum: vbique enim resonat vox lætitiæ, & nuncius salutis. Notat S. Chrysostomus, iustos hic in terris non habere domos stabiles, sed tabernacula peregrinorum vel militantium.

XV.

*Dextera Domini fecit virtutem, dextera Domini exaltauit me: dextera Domini fecit virtutem.*

Hæc est vox exultationis & salutis, quæ resonat in tabernaculis iustorum, quod *dextera Domini*, id est, virtus & potentia Filij Dei *fecit virtutem*, id est, operata est fortiter ac potenter; nam Filius Dei dicitur in Scripturis brachium Domini, siue manus eius dextera, quia Pater per Filium omnia fecit & facit. *Omnia per ipsum facta sunt*, Ioannis 1. *Per quem fecit & sacula*, ad Hebr. 1. & Isaïæ 53. *Quis credidit auditu nostro, & Brachium Domini cui reuelatum est*, Luc. 1. *Fecit potentiam in brachio suo. Dextera Domini exaltauit me*, id est, in hoc dextera Domini fecit virtutem, quod depressit inimicos meos, & me exaltauit: siue id de Dauide, siue de populo Dei intelligatur. *Dextera Domini fecit virtutem*: id reperitur lætitiæ causâ. In Hebræo non habetur, *Dextera Domini exaltauit me*, sed, *Dextera Domini excelsa*, vt vertit S. Hieronymus; vel, *Dextera Domini exaltans*; vtrumque enim significat vox, *רומה* *memâ*. Hanc secundam significationem secuti sunt LXX. Interpretes, & addiderunt, *me*, vt sensus sit, *Dextera Domini exaltans me fuit*: quod est idem cum illo, *Exaltauit me*.

XVI.

*Non moriar, sed viuam, & narrabo opera Domini.*

XVII.

*Castigans castigauit me Dominus: & morti non tradidit me.*

Pergit idem, siue Dauid, siue populus Domini, commemorare beneficium Domini, qui persecutiones permittit, vt Pater, non vt hostis; ad purgationem, non ad mortem, quasi diceret, quantumuis magnas persecutiones passus sum, & forte iterum patiar: tamen *non moriar, sed viuam*, id est, non exter-

minabor, non deficiam omnino, vt aduersarij vellent; sed permanebo, & narrabo opera Domini; qui *castigans castigauit me* paterno flagello, sed *morti non tradidit me*.

*Aperite mihi portas iustitiæ, ingressus in eas confitebor Domino. Hæc porta Domini, iusti intrabunt in eam.*

Ex acceptis beneficiis sumit animum aspirandi ad maiora, ac petit introduci tandem in cœlestem Hierusalem, in qua nulli iniusti habitant. *Aperite*, inquit, *mihi portas iustitiæ*, id est, portas Regni cœlorum, quæ ex iustitia constant. Porta enim gloriæ, iustitia est. *Quarite*, inquit Dominus, Matth. 6. *primum Regnum Dei, & iustitiam eius. Ingressus in eas confitebor Domino*: quoniam qui habitant in domo Domini, in sacula sæculorum laudabunt te, Psal. 83. *Hæc porta Domini, iusti intrabunt in eam*. Hæc porta iustitiæ est vera porta, & vnica, quæ ducit ad Dominum: & ideo iusti soli intrabunt in eam. Alij aliter exponunt, videlicet de portis templi, vel ciuitatis Hierusalem. Sed nos secuti sumus Augustinum, Chrysostomum & Hieronymum: neque verum est, quod per portas templi, vel ciuitatis terrenæ Hierusalem, soli iusti intrarent.

*Confitebor tibi, quoniam exaudisti me, & factus es mihi in salutem.*

Declarat quod dixit, *ingressus in eas confitebor Domino*. Dicit enim, *confitebor tibi*, quando videlicet ingressus ero in cœlestem Hierusalem per portas iustitiæ, quoniam *exaudisti me*: nam etiam si multa & varia iusti petant in hoc mundo, tamen omnia tendunt ad vnā petitionem, de qua dicitur in Ps. 26. *Vnam petij à Domino, hanc requiram, vt inhabitem in domo Domini omnibus diebus vitæ meæ*. De hac igitur petitione dicit: *Confitebor tibi, quoniam exaudisti me*. Et clarius adhuc exponit, dicens: *Et factus es mihi in salutem*, id est, qui eras spes mea, factus es salus mea: qui eras viaticum, factus es præmium.



*Lapidem, quem reprobauerunt adificantes, hic factus est in caput anguli.*

*A Domino factum est istud, & est mirabile in oculis nostris.*

Hos versiculos aliqui recentiores de Dauide exponunt ad literam, quem dicunt factum fuisse in caput anguli, quando factus est Rex super Israël & Iudam; sed Dauidem figuram gessisse Christi, qui factus est in caput anguli, cum factus est caput Ecclesiae ex Iudaeis & Gentibus congregatae. Ceterum SS. Patres absolute exponunt de Christo, nulla mentione facta Dauidis. Imo S. Ioannes Chrysostomus, qui priores partes de Dauide exponit ad literam, hoc loco scribit, Prophetam de improviso mutasse argumentum, & de Christo prophetasse. Adde quod Christus ipse publice hunc locum tanquam ad se proprie spectantem allegauit Matth. 21. Marc. 12. & Luc. 21. neque vllus respondit, de Dauide hæc verba esse intelligenda. Sanctus etiam Petrus Act. 4. iterum coram omni populo hunc locum allegauit tanquam proprie de Christo scriptum, neque vllus contradixit. Sanctus etiam Paulus ad Roman. 9. & S. Petrus 1. epist. cap. 2. allegant Isaia cap. 28. de hoc lapide angulari, summo, electo, probato, &c. Denique idem Apostolus Paulus ad Ephes. 2. vocat Christum angularem lapidem summum. Certe non auderem, Scripturam ita celebrem, & decantatam à Christo, & Apostolis explicatam, vlllo modo cum Dauidis persona communicare. Accedit, quod Dauid non fuit primus, neque solus Rex super Israël & Iudam, vt ideo meruerit dici lapis angularis: nam ante ipsum fuit Saul Rex super vtrumque populum, & post eum Salomon: neque Israël & Iudas erant proprie duo populi, siue duæ gentes diuersæ, vt sunt Hebræi & Gentiles. Igitur omiſſa illa expositione, dicendum est, quod cum Dauid in persona sua & populi Dei decantasset liberationem à temporalibus malis, & petiisset introitum in æternam salutem, declarat nunc, quomodo Deus aperuerit viam ad hanc æternam salu-

tem, & sine dubio auctus maiore lumine prophetico hos versiculos scripsit: *Lapidem, quem reprobauerunt adificantes, hic factus est in caput anguli*, id est, misit Deus lapidem viuum, preciosum, electum in terras; sed Iudæi, ad quos tunc pertinebat officium adificandæ Ecclesiae, hunc lapidem reprobauerunt, dicentes de Christo: *Non est hic homo à Deo, qui Sabbatum non custodit, & non habemus Regem, nisi Caesarem; & Seducitor ille dixit, Post tres dies resurgam, & similia.* Sed hic idem lapis ab adificantibus reprobatus, quasi inutilis ad ædificium spirituale, à Deo principali Architecto factus est in caput anguli, id est, constitutus est super parietes, vt eos coniungeret & contineret, id est, factus est caput totius Ecclesiae ex Hebræis & Gentibus congregatae, & tale caput, vt qui sub eo non ædificatur, saluus esse non possit: & omnis, qui sub ipso tanquam lapis viuus ædificatur, omnino saluandus sit. Atque hoc à Domino factum est, id est, electione & potestate diuina, non consilio vel ope humana, & ideo mirabile est in oculis nostris. Quis enim non miretur, hominem crucifixum & mortuum ac sepultum, post tres dies resurgere immortalem cum amplissima potestate; & caput ac Principem declarari omnium hominum & Angelorum; & per eum aditum patefieri hominibus mortalibus ad Regnum cælorum, ad societatem Angelorum, ad beatam immortalitatem.

*Hæc est dies, quam fecit Dominus, exultemus, & letemur in ea.*

XXII.

*Hæc dies, qua id factum est, est proprie dies, quam fecit Dominus; & ideo ob tantum beneficium, exultemus & letemur in ea.* Hæc sine dubio est dies Resurrectionis Domini; quamuis enim ab ipsa conceptione propter vnionem hypostaticam Dominus Iesus fuerit Christus, & caput Ecclesiae; vnde pastoribus ab Angelo dictum legimus: *Annuncio vobis gaudium magnum, quia natus est vobis hodie Saluator, qui est Christus Dominus in ciuitate Dauid:* tamen debuit prius reprobati,

R r r

ab ho.



ab hominibus, & humiliari vsque ad mortem crucis, & postea exaltari per resurrectionem; & tunc declarari summus angularis lapis, & prædicari per omnes gentes, quod non esset in alio aliquo salus, vt dicitur Act. 4. Vnde ipse etiam dixit Matth. 28. *Data est mihi omnis potestas in cælo & in terra. Euntes ergo docete omnes gentes, baptizantes eos in nomine Patris, & Filij, & Spiritus sancti.* Dicitur autem dies Resurrectionis, dies quam fecit Dominus, vel quia Christus resurgens, vt Sol iustitiæ, nouo modo fecit eum diem: vel quia peculiariter Deus eam diem sibi consecrauit: vel, hæc est dies, quam fecit Deus ad hunc finem, vt exultemus & lætemur in ea.

XXIII.

*O Domine saluum me fac, ô Domine bene prosperare; benedictus qui venit in nomine Domini.*

Has laudes Christo dixerunt turbæ in die Palmarum, vt S. Hieronymus annotauit in Commentario ad cap. 23. Matthæi. Quod enim illi dixerunt: *O sanna, benedictus qui venit in nomine Domini*, in hoc versiculo nos habemus: sed in Euangelio relinquitur vox Hebraica, *O sanna*: hic explicatur per illa verba: *O Domine saluum me fac.* Itaque Dominus in die Palmarum voluit visibiliter exhibere, & quasi præoccupare triumphum, quem acturus erat inuisibiliter in die Resurrectionis. Non enim poterat illi iuste obici, quod triumphum ageret ante victoriam, quoniam de victoria certissimus erat. Propheta autem sicut præuidit, & prædixit, Christum vt lapidem reprobandum tempore passionis; & postea à Deo exaltandum in caput anguli tempore resurrectionis: ita præuidit & prædixit ipsa verba, quæ turbæ dicturæ erant in die triumphi Christi in die Palmarum, quo significaretur triumphus Resurrectionis: & optime accidit, quod vtraque dies, & Palmarum & Resurrectionis esset dies Dominica. Ait igitur: Exultemus & lætemur in hac die, dicentes: *O Domine saluum me fac.* In Hebræo non est illud, *me*, sed simpliciter, *O sanna*, id est, salua obsecro.

Græci tamen addiderunt explicandi gratia. *O Domine bene prosperare*, nimirum in incipato isto Regno tuo, *benedictus qui venit in nomine Domini*, id est, benedicatur ab omnibus Messias, Rex noster, factus in caput anguli, qui venit in nomine Domini, id est, non à se ipso venit, non sibi Regnum usurpauit, vt faciet Antichristus; sed venit missus à Patre suo, Domino cæli & terræ: sic enim explicauit Christus ipse, Ioan. 5.

*Benediximus vobis de domo Domini: Deus Dominus, & illuxit nobis.*

*Constituete diem solemnem in condensis, vsque ad cornu altaris.*

Explicata tota prophetia aduentus Christi, & triumphus eius: conuertitur propheta ad populum, atque illum exhortatur ad celebrandum diem festum solemnem in gratiarum actionem. *Benediximus*, inquit, *vobis de domo Domini*, id est, nos Propheta benediximus, vobis populis fidelibus annunciantes mysteria diuina in salutem vestram: *Benediximus autem de domo Domini*, id est, vobis qui estis de domo Domini; vel nos ex domo Domini, vnde hæc ex reuelatione didicimus, benediximus vobis. Summa autem est, *Deus Dominus, & illuxit nobis*, id est, Dominus noster ipse est verus Deus, & ipse illuxit nobis, ostendens nobis lucem miserationum suarum. Propterea *constituete diem solemnem*, id est, agite diem solemnem *in condensis*, id est, denis virides ramos adferentes, & ornantes templum *vsque ad cornu altaris*. Ista varie exponuntur secundum ritus Iudæorum, quæ ad nos nihil pertinent.

*Deus meus es tu, & confitebor tibi; Deus meus es tu, & exaltabo te.*

*Confitebor tibi, quoniam exaudisti me, & factus es mihi in salutem.*

*Confitemini Domino, quoniam bonus, quoniam in seculum misericordia eius.*

Hæc est repetitio dictorum, affectum Prophetæ demonstrans.



## PSALMVS CXVIII.

## Titulus, &amp; Argumentum.

Alleluia.

**H**ic Psalmus tribus in rebus omnibus aliis antecellit. Primo utilitate; est enim totius moralis, & hortatorius ad vitam secundum legem Domini instituendam, & ea causa est, cur quotidie ab Ecclesia frequentetur. Secundo longitudine; continet enim versus centum septuaginta sex, cum Psalmus septuagesimus septimus, qui ex reliquis longissimus est, non ascendat ultra versus septuaginta octo. Causa huius tantæ longitudinis fortasse fuit, ut populus haberet in quo pie & cum fructu occuparetur, dum ter in anno ex omni parte tabernaculum ascenderet: videtur enim Psalmus compositus, ut in itinere caneretur, quo Psalmo finito sequuntur Psalmi Graduales, qui ascensione graduum tabernaculi canebantur. Tercio elegantia, & artificio alphabetico: siquidem primi octo versus incipiunt singuli a prima litera alphabeti, sequentes octo a secunda, & sic deinceps, ita ut octies totum alphabetum repetatur. Huius rei causam non aliam esse arbitror, nisi ad memoriam adiuvandam, cum hic Psalmus memoriter recitandus vel concinendus esset. Explicant hunc Psalmum diligenter SS. Patres, Hilarius, Ambrosius, Augustinus, Hieronymus, & innumerales alij, tum veteres tum recentiores. Argumentum Psalmi est encomium legis diuinæ, & exhortatio ad eam seruandam, sed interim admiscetur varij affectus, & preces ad Deum.

## EXPLICAT. PSAL. CXVIII.

**B**eatissimi in via, qui ambulant in lege Domini.

Rectissimo ordine primum argumentum ad suadendam præstantiam & utilitatem di-

uinæ legis ducit Propheta à beatitudine, quæ est ultimus finis hominis: nam in scientia morali, id est, finis, quod sunt prima principia in scientia naturali. Est autem hic sensus primi versiculi, Beati sunt, quia in via huius vitæ non inquinantur luto, vel sordibus peccatorum; illi autem sunt, qui non inquinantur, ac per hoc beati sunt, qui ambulant in lege Domini, id est, qui dimissis aliis viis, eligunt viam legis Domini, quæ sola mundissima & nitidissima est. Sed singula verba expendamus. Illud, *beati*, significat tum felicitatem æternam, quæ sola est perfecta beatitudo; tum felicitatem temporalem, qualis in hac vita haberi potest. Itaque sensus est, Beati erunt æterna felicitate, & nunc etiam beati sunt, id est, læti atque quieti, nihil in hoc mundo cupientes, qui viuunt sine macula peccati, eo quod ambulant in lege Domini. Quod enim recta via ad cœlestem beatitudinem sit obseruantia legis Dei, docet Christus Matth. 19. Si vis ad vitam ingredi, serua mandata. Quod etiam in hac vita nulli sint feliciores iis, qui recte ac pie viuunt, notum est, tum experientia, tum ratione: nam beatus est, qui habet quicquid vult, & nihil mali vult. Viri iniqui multa mala volunt, & multa non habent eorum, quæ volunt. Viri iusti nihil mali volunt, & habent quicquid volunt, quia solum Deum volunt, & eius voluntatem implere cupiunt. Illud, *immaculati*, non significat carentiam omnis peccati, etiam venialis. Sic enim nulli essent in hac vita immaculati; sed significat carentiam peccati lethalis, quod solum proprie inducit maculam. Videtur autem sumpta metaphorā à maculis, quæ contrahuntur inter ambulandum, cum iter facimus per vias lutosas aut puluerulentas, aut alio modo sordidas. Illud, *in via*, significat in vita hæc mortali, quæ aptissime dicitur via, cum semper mutetur, & ut ait Iob, nunquam in eodem statu permaneat, sed ab initio nascendi decurrat sine intermissione vsque ad metam moriendi. Denique illud, *in lege Domini*, significat legem Domini esse quandam viam rectam, mundam, cum peccatum omne prohibeat. Opponitur autem lex Domini legi carnis,



de qua Apostolus ad Rom. 8. quæ est via cupiditatum, & plena pulvere superbiæ, corno luxuriæ, & aqua sordida auaritiæ.

II. *Beati qui scrutantur testimonia eius, in toto corde exquirunt eum.*

Declarat priorem versiculum, ac docet, non sufficere quamcunque legis obseruantiam ad beatitudinem acquirendam. Multi enim superficiei tenus obseruant legem, dum non occidunt, non furantur, non inechantur; sed non vere ambulant, vt oportet ad acquirendam felicitatem in lege Domini, quia forte oderunt proximum suum, retinent opes superfluas, cum meretricibus fornicantur. Oportet igitur, si quis beatus esse velit, vt scrutetur omnia testimonia Domini, id est, consideret diligenter sensum totius legis, quæ dicitur testimonium, quia testificatur nobis Dei voluntatem; qui enim scrutatur legem, inuenit, non solum prohiberi homicidium; per legem, non occides, sed prohiberi etiam odium & iram, vt Dominus exposuit Matth. 5. imo iuberi amorem, quia finis omnis legis est dilectio; & qui dicit, *non occides*, ideo dicit, ne lædatur dilectio, & hoc idem intelliget de alijs præceptis, qui ea scrutabitur. Ille autem scrutatur testimonia eius, qui ex toto corde exquirunt eum: qui enim serio Deum quærit, & toto corde desiderat eius gratiam in hoc mundo, & eius præsentiam in futuro: is sine dubio in omni opere suo diligenter scrutatur, quæ sit voluntas eius, & secundum eam ambulare conatur. Exemplum habemus in viatoribus, qui enim ad aliquam ciuitatem quam citissime peruenire cupiunt, ij sollicitè scrutantur & quærunt à quibuscunque obuijs, quæ sit recta & commoda via ad eam ciuitatem: qui vero deambulant à limi gratia, neque propositum habent locum, quo ire cupiant, non multum laborant de via. Ait igitur Prophetæ: *Beati qui scrutantur testimonia eius*, id est, dixi beatos, qui ambulant in lege Domini, sed explico, me beatos dicere voluisse illos, qui ita ambulant in lege Domini, vt dili-

genter scrutentur sensum totius legis, & voluntatem legislatoris: id quod soli faciunt, qui *ex toto corde exquirunt Deum*, nihil creatum illi antepontes vel equantes, neque amorem cordis inter Deum & creaturam diuidentes; sed solum Deum diligentes in se, & creaturas propter ipsum.

*Non enim qui operantur iniquitatem, in vijs eius ambulauerunt.*

Probat quod supra dixit, eos esse immaculatos, qui ambulant in lege Domini. Probat autem, quoniam nullus eorum, qui operantur iniquitatem, ac per hoc inquinati inueniuntur in itinere, *in vijs*, id est, legibus Domini ambulauit, id enim manifestum signum est, solam viam Domini præstare immaculatos ambulantes in se. Erit igitur argumentum à contrario sensu, qui operantur iniquitatem, & consequenter maculati inueniuntur, & non ambulauerunt in vijs Domini: igitur qui ambulant in vijs Domini, non operantur iniquitatem, & proinde immaculati sunt. Mouet hoc locus. Augustinus questionem, vt ipse dicit, grauissimam, Quomodo qui operantur iniquitatem, non ambulant in vijs Domini; cum omnes sancti ambulant in vijs Domini, & tamen dicant cum S. Ioanne 1. epist. cap. 1. *Si dixerimus quia peccatum non habemus, ipsi nos seducimus; & omne peccatum sit iniquitas*, eodem Ioanne teste 1. epist. cap. 3. Sed responderi potest, eos qui operantur iniquitatem, non ambulare in vijs Domini, quatenus operantur iniquitatem: qui enim operantur iniquitatem lethalem, ambulant contrariam viam viæ Domini: qui operantur iniquitatem venialem, ambulant præter viam Domini. Porro sancti viri ambulant in vijs Domini, quia voluntatem habent in lege Domini, & in ea semper habitualiter manent, & si quando diuertunt à via, quia operantur præter legem Domini; mox per poenitentiam & confessionem redeunt in viam.

*Tu mandasti mandata tua custodiri nimis.*



Alterum argumentum ducit Prophet a ab excellentia legislatoris, quasi dicat, hæc mandata non sunt mandata hominum, sed Dei, & Dei, qui omnino vult à seru is suis debitam obedientiam. Sed vt argumentum maiorem vim habeat, alloquitur ipsum Deum, dicens, *Tu mandasti mandata tua custodiri nimis*, id est, tu Domine, qui libere potes seru is imperare, & qui potes inobedientiam seuerissimè vlciisci, & qui non potes ignorare, vel obliuisci præuaricatores, tu, inquam, mandasti non consilium dando, sed planè imperando, mandata tua custodiri, non negligenter, & oscitanter, sed diligentissimè, & summo zelo. *Quis igitur erit, qui non continuo applicet animum ad parendum?*

*Vtinam dirigantur via mea ad custodiendas iustificationes tuas.*

Ex auctoritate tanti legislatoris, & tam seuerè iubentis, motus Propheta, optat quam diligentissimè Dei mandata seruare. Sed hoc proponit in persona sua, vt exemplo suo persuadeat omnibus alijs obedientiam exhibere Deo. Si enim ipse Rex, & Princeps supremus, iam tremit ad mandata Domini, & tanto affectu cupit illa implere, quid facere debent homines priuati? *Vtinam*, inquit, *dirigantur via mea*, id est, actiones meæ, consilia mea, sermones mei, *dirigantur*, id est, conformentur rectitudini legis tuæ. *Ad custodiendas iustificationes tuas*, id est, ad obseruandas leges tuas: lex enim Domini varijs nominibus in Scripturis, atque in hoc potissimum Psalmo appellatur, vt quoniam sapissimè mentio eius facienda est, verborum varietate Lectoris fastidium minuatur. Igitur nunc dicitur lex, nunc præceptum, nunc mandatum, nunc sermo, nunc eloquium, nunc verbum, nunc alia, quæ perspicua sunt: interdum dicitur testimonium, vt supra monuimus, quoniam lex testificatur voluntatem Dei: interdum iustificatio, vt hoc loco, quia iustificat obseruatores suos, id est, iustiores facit, iuxta illud Apost. Rom. 2. *Factores legis iustificabuntur.* Dixi

autem, iustiores fieri, qui legem obseruant, quoniam prima iustificatio, quæ ex peccatoribus efficitur iusti, non potest legi tribui, sed gratiæ, dicente eodem Apostolo Gal. 2. *Si ex lege iustitia, ergò Christus gratis mortuus est.*

*Tunc non confundar, cum perspexero in omnibus mandatis tuis.*

Colligit magnum fructum ex directione viarum suarum ad custodiendas iustificationes Domini. Qui enim attendunt magnitudinem tanti legislatoris, si fortè dum operantur, non respiciant ad regulam diuinæ legis, & inueniant postea opera sua distorta, & non conformia rectitudini legis Dei; miro modo confunduntur, & erubescunt, neque audent oculos ad Deum leuare, dicentes intra se, *Quis ego sum, qui opera mea, aut verba mea, aut cogitationes meas ausus sum non conformare rectitudini mandatorum summi legislatoris, qui ea tanto zelo custodiri iussit?* Dauid igitur magnum fructum existimat, vt verè est, non habere causam tantæ confusionis: ideo dicit, optauì dirigere vias meas ad custodiendas iustificationes Domini, quia *tunc non confundar*, neq; erit cur erubescam coram te Domine *cum perspexero in omnibus mandatis tuis*, id est, cum respexero in omnibus actionibus meis ad regulam mandatorum tuorum, vt rectitudini eius conformem omnes actiones meas. Porro phrasis est linguæ Hebraicæ, perspicere in mandatis, pro eo quod nos dicimus, perspicere ad mandata. Ex his intelligimus quantum distent à spiritu & pietate Dauidis, qui tam multa faciunt opera distorta, & nullo modo conformia legibus Dei; & tamen confusionem illam internam non concipiunt, quia magnitudinem legislatoris non considerant.

*Confitebor tibi in directione cordis, in eo quod didici iudicia iustitiæ tuæ.*

Addit, quod non solum non confundetur, sed etiam gratias agit Deo, quod eius gratia & adiutorio didicerit obseruantiam legis diuinæ. *Confitebor*, inquit, *tibi*, id est, laudabo te, & gratias agam tibi, siue confi-

Rrrr ; tebor

VI.

VII.



tebor laudes tuas & gratiam tuam: in *directione cordis*, id est, in rectitudine cordis, siue rectissimo corde; confitebor autem laudes tuas, in *eo quod didici*, id est, propterea quod gratia tua adiuuante didici, *iudicia iustitiae tuae*, id est, iustissimas leges tuas. Est autem hoc loco obseruandum, illud, *didici*, non significare simplicem cognitionem, quæ ad intellectum pertinet; sed certam persuasione & approbationem, quam illi solent habere, qui te ipsa legem obseruare firmissimè apud se constituunt: quomodo accipitur vox discendi Ioan. 6. ubi Dominus ait, *Omnes, qui audiunt à Patre, & didicerunt, venit ad me*: illi enim discunt à Patre cœlesti, qui intus in corde per infusionem Spiritus sancti certo persuadentur, bonum esse credere, vel conuertri, vel legem seruare, &c. nascitur autem hæc persuasio ex rectitudine cordis, quia rectis corde optimus videtur Deus, iuxta illud, *Quam bonus Israël Deus his, qui recti sunt corde*: quibus autem placet Deus, non possunt non placere omnes voluntates Dei, quæ per præcepta manifestantur: quare & ipsa præcepta mirificè placent. Porro per iudicia iustitiæ, intelliguntur eadem præcepta legis diuinæ, quæ nunc dicuntur iudicia, nunc iustitiæ, nunc etiam iudicia iustitiæ. Iudicia dicuntur, quia sunt quædam sententiæ à Deo iudicatæ optimæ, siue quædam decreta & statuta diuina: dicuntur etiam iustitiæ, quia sunt regulæ iustitiam continentes: dicuntur denique iudicia iustitiæ, quia sunt iudicia & decreta iustissima. Itaque sensus versiculi est, Laudabo te recto corde, ex eo quod persuasus sum leges tuas esse iustissimas, & omnino custodiendas; quod totum non ex me, sed ex gratia tua me habere confiteor.

VIII.

*Iustificaciones tuas custodiam, non me derelinquas vsquequaque.*

Hæc est conclusio primi octonarij, quasi dicat, Igitur cum lex tua custodita faciat beatos, & à te summo legislatore sit propostura, & seuerissimè obseruari mandata; ego *iustificaciones tuas custodiam*, id est, decreui & statui omnibus viribus custodire: sed

tu quoque, vicissim non me deferas auxilio, & gratia tua, sine qua nihil possum: & si forte iusto tuo iudicio ad modicum deferas me, vt intelligam infirmitatem meam, & ad te confugere, atque in te confidere discam, saltem *non me derelinquas vsquequaque*, id est, omnino, & in perpetuum. In Hebræo habetur, *Vsque nimis, siue, vsque valde*: quod in eandem sententiam recidit Sanctus enim Dauid bene nouerat, nullum esse in hac peregrinatione, qui aliquando non sentiat gratiæ subtractionem: ait enim in alio loco, *Ego dixi in abundantia mea, non mouebor in æternum; Auertisti faciem tuam, & factus sum conturbatus*, Psal. 29. & in hoc ipso Psalmo 118. sæpè Dauid repetit, se didicisse mandata Domini, & non minus sæpè rogat doceri eadem mandata.

Beth.

*In quo corrigit adolescentior viam suam? in custodiendo sermones tuos.*

Laudauit Dei legem à fine, & ab auctore: nunc laudat ab utilitate, quam adferri ei, cui datur: & quoniam nullus magis indiget lege, quam ingrediens iter viæ, id est, adolescens, ideo de illo peculiariter loquitur, Adolescens enim primò indiget lege Dei, quia in ipso maximè viget lex membrorum: secundò, quia nondum acquisiuit prudentiam proprio experimento: tertio, quia sicut viatori maximè prodest initio itineris inuenire rectam viam, ne posteaquam diu errauerit, cogatur maiore labore & dispendio reuerti ad principium viæ: sic etiam optimum est in adolescentia assuescere mandatis Domini, vt conseruet innocentiam. *Bonum est viro*, inquit Hieremias Thren. 3. *cum portauerit iugum ab adolescentia sua*. Quæritur hoc loco quid intelligendum sit per adolescentiorem. Non existimo Dauidem loqui de adolescente lapsò in varios errores, qualis erat filius prodigus de Euangelio: nam ad corrigendos similes errores necessaria est gratia poenitentiae, neque sufficit notitia, vel custodia legis: neque videtur Dauid loqui de iuniore, vt distingui potest, contra hominem veterem, id est, de homine reno-



renouato per gratiam; hic enim agitur de corrigendis erroribus, qui in homine renouato correcti censentur. Existimo igitur Dauidem simpliciter loqui de adolescente ratione ætatis, qui indiget remedio contra naturales impetus naturæ corruptæ, quæ prona est ad malum ab adolescentia sua. Est igitur sensus, *In quo corrigit*, id est, qua arte, quo modo, quo remedio corrigit adolescentior viam suam, id est, actiones, siue vitam suam corruptam naturali deprauatione ex peccato originis, & propensam ad malum? In Hebræo, & Græco habetur in futuro, *in quo corrigit*: sed in sensu nulla diffensio est: nam illud, *in quo corrigit*, idem est, ac si dictum esset, in quo corrigere potest, siue quid habet, unde corrigat errores, quos committit in adolescentia sua? Respondet, *In custodiendo sermones tuos*: qui enim ab adolescentia assuescit timere Deum, & ex eo sancto timore, sermones Dei, diuinas videlicet leges diligenter custodire; is haud dubie multos vitabit errores. Cuius rei exemplum habemus in Tobia iuniore, quem pater eius ab infantia timere Deum docuit, & abstinere ab omni peccato, Tob. i.

*In toto corde meo exquisiui te: ne repellas me à mandatis tuis.*

Ex hac tanta utilitate motus Dauid, petit à Deo gratiam seruandi mandata, & proponit omnino illa seruare; & exemplo suo idem nos facere docet. ac primum ponit rationem, cur exaudiri debeat; quæ est ratio Euangelij, *Quærite, & inuenietis*. & *Omnis qui quærit, inuenit*, Luc. ii. *In toto corde meo*, inquit, *exquisiui te*. Hæc est ratio exauditionis, quia exquisiuit Dominum toto corde, id est, quæsiuit gratiam eius, & cupiuit illi placere, eiusque voluntatem adimplere. *Ne repellas me à mandatis tuis*; hæc est mira petitio, quasi Deus, qui mandauit mandata sua custodiri nimis, repellere velit aliquem à mandatis suis custodiendis. Sed hic modus loquendi

significat necessitatem gratiæ, quam illi soli cognoscunt, qui cupiunt mandata seruare, & virium suarum imbecillitatem expeririuntur. Igitur, *ne repellas me à mandatis tuis*, hunc habet sensum, Ne deseras me gratia tua; alioqui idem esset, ac si repelleres me ab impletione mandatorum tuorum, cum sine auxilio gratiæ illa seruari non possint.

*In corde meo abscondi eloquia tua, vt non peccem tibi.*

*Benedictus es Domine: doce me iustificationes tuas.*

Addit aliam rationem, cur exaudiri debeat; & rursus petit gratiam legis implendæ. Ratio, cur exaudiri debeat, est magnum desiderium non peccandi, ac per hoc legis custodiendæ. *In corde meo*, inquit, *abscondi eloquia tua*, id est, in intimo recessu cordis posui legem tuam, siue, quod est idem, eloquia tua, vt nunquam obliuiscar eorum. Finis autem huius absconsonis est, *vt non peccem tibi*. Itaque desiderium non peccandi, facit, vt nunquam obliuisci velim legis diuinæ, & vt nunquam obliuiscar, abscondi eam in intimo corde, vt nulla res inde mihi illam eripere possit. Præmissa ratione exauditionis, addit petitionem, *Benedictus es Domine, doce me iustificationes tuas*; vbi illud, *doce*, vt supra diximus, non significat simplicem notitiam: hanc enim se habere testatur, cum dicit, in corde se abscondisse eloquia Domini, & supra dixit, *Didici iudicia iustitia*: sed significat gratiam implendæ legis. Tunc enim Deus docet iustificationes suas, cum per gratiam intus in animo inspirat delectationem legis, & facit, vt homo planè persuasus omnino velit legem seruare. Illud autem, *benedictus es Domine*, additur ad confirmandam rationem exauditionis, quasi dicat, tu Domine doce me iustificationes tuas, qui ab omnibus rebus creatis benedicis, quia imple omnia benedictione, & inde viuunt & florent: unde dicitur in Psal. 83. *Etenim benedictionem dabis legisla-*

III.

IV.



tor. Itaque Deus benedicitur, & benedicit; benedicitur dum laudatur, benedicit dum beneficia præstat.

- V. *In labijs meis pronunciaui omnia iudicia oris tui.*  
 VI. *In via testimoniorum tuorum delectatus sum, sicut in omnibus diuitiis.*  
 VII. *In mandatis tuis exercebor, & considerabo vias tuas.*  
 VIII. *In iustificationibus tuis meditabor, non obliuiscar sermones tuos.*

In his quatuor reliquis versiculis declarat amorem suum erga legem Domini; quia fortasse mox benedictionem legislatoris acceperat, quam paulò ante petierat. Dicit enim se habere legem Dei in ore, in voluntate, in intelligentia, & memoria, ac per hoc in omnibus partibus animæ. De ore dicit, *In labijs meis pronunciaui omnia iudicia oris tui*, id est, assidue loquutus sum, & prædico præcepta tua omnibus, qui audire volunt; per iudicia enim præcepta intelligimus, & per id quod additur, *oris tui*, intelligimus præcepta illa non esse humana sed diuina, cum ore Domini manifestata sint. De voluntate, & affectu dicit, *In via testimoniorum tuorum delectatus sum, sicut in omnibus diuitiis*, id est, delectatus sum ambulare in via testimoniorum tuorum, sicut delectantur auari in omni copia diuitiarum. Magnus sane affectus, & rarus apud homines; cum è contrario soleant plerique pro tenui lucro contemnere omnia mandata Dei. De intelligentia, siue cogitatione, dicit, *In mandatis tuis exercebor, & considerabo vias tuas*: nam, *exercebor*, hoc loco significat, exercebor meditando, ut ex voce Hebraica manifestum est, unde etiam subditur idem alijs verbis, *Et considerabo vias tuas*. Est igitur sensus, In mandatis tuis ruminandis, & sæpè mecum submissa voce repetendis, & diligenter considerandis exercebor. De alio affectu cordis dicit, *In iustificationibus tuis meditabor*. Ilud enim, *meditabor*, non est idem hoc loco cum, *exercebor*, quòd rectè verti potuisset,

*meditabor*: sed significat, delectabo me ipsum, ludendo, in iustificationibus tuis decantandis: vox enim Hebraica *estagafag*, significat ludere, & oblectare seipsum. Supra dixerat, *Delectatus sum in via testimoniorum tuorum, sicut in omnibus diuitiis*, ubi mentionem facit delectationis ex re vtili: nunc dicit, *Oblectabo me ipsum ludendo in mandatis tuis*, ut ostendat ex lege Domini sumi etiam delectationem, tanquam ex re dulci, & suaui. Quomodo etiam in Psalm. 18. comparata est lex Domini auro & melli, rei vtili & dulci. Hic igitur est sensus huius versiculi, *In iustificationibus tuis meditabor*, id est, in præceptis tuis decantandis exercebor, ut inde delectationem animo percipiam, qualis iucundè ludendo percipitur. Addit vltimo de memoria, *Non obliuiscar sermones tuos*, id est, ex tam crebra meditatione, & suaui decantatione fiet, ut sermones tuos, id est, legem tuam nunquam obliuiscar. Hinc colligimus legem Domini habentibus benedictionem Legislatoris, id est, spiritum veræ charitatis, non esse grauem, neque difficilem, sed esse, ut Dominus ait in Evangelio Matthæi 11. *ingum suauis, & onus leue*.

Gimel.

*Retribue seruo tuo, viuifica me, & custodiam sermones tuos.*

In hoc octonario enumerat impedimenta legis custodiendæ, & orat ut à se remoueantur. Primum impedimentum est mors animæ: non enim possunt homines mortui seruare mandata vitæ, eo modo, quo oportet, ad vitam æternam acquirendam. Dauid autem etiam si sperare poterat, se esse viuum, tamen quia nemo scit vtrum odio vel amore dignus sit, & quia transfigurabat personas peccatorum in se; ideò vel pro se. vel pro illis orat, & dicit, *Retribue seruo tuo, viuifica me, & custodiam sermones tuos*, id est, restitue seruo tuo, si fortè in peccatis mortuus sit, vitam animæ, & tunc sermones tuos custo-



custodire poterit. Illud, *retribue*, posset etiam explicari, pro, *tribue*; nam vox Hebraica id faciliè patitur: tamen hoc loco seruare possumus propriam significationem Latinam, si per, *retribue*, intelligamus, *restituere*, vel *reddere*. Illud, *vinifica me*, in Hebræo & Græco est, *viuam*, & tunc sensus est, *Retribue*, vt *viuam*, id est, *restituere*, vel *reddere* vitam. Verba nostra editionis sunt paulò obscuriora, sed in eundem sensum explicanda sunt; nimirum sic, *Retribue seruo tuo*, id est, iterum *tribue mihi seruo tuo per gratiam*, quod amisi per peccatum; & mox explicat, dicens, *Vinifica me*: hoc enim est, quod amisi; & vitam restitutus ambulare incipiam viam mandatorum tuorum, & sic *custodiam sermones tuos*.

*Reuela oculos meos: & considerabo mirabilia de lege tua.*

Alterum impedimentum sunt passioni animi, amor, timor, desiderium, ira, & similes perturbationes, quæ sæpè faciunt, vt homo non rectè iudicet: de hoc dicit, *Reuela oculos meos*, id est, tolle per infusionem luminis tui velamen passionum ab oculis mentis meæ, & tunc oculo interiore purificato *considerabo mirabilia de lege tua*, id est, mirabilem æquitatem, mirabilem sapientiam, mirabilem vtilitatem, & alia id genus mirabilia, quæ de lege tua emicant.

*Incola ego sum in terra, non abscondas à me mandata tua.*

Tertium impedimentum est terrena peregrinatio; nam qua parte peregrinamur in terra, carnales & terreni sumus: lex autem tota spiritualis est, vt dicitur Rom. 7. Quare nisi Deus per gratiam nos spirituales efficiat, legem spiritualem implere non possumus. *Incola*, inquit, *sum in terra*, id est, homo terrenus sum, animalis sum, in terra habito, dum peregrinor à patria; ideo peto, vt *non abscondas à me mandata tua*, id est, per gratiam efficias, vt capax fiam mandatorum tuorum. Potest etiam hoc referri ad ignorantiam viarum: vox enim Hebraica, *gher*,

proprie aduenam, & peregrinum significat; peregrini autem & aduenæ ignorantes sunt viarum, & faciliè decipiuntur à ciuibus regionis. Petit igitur aduenæ & peregrinus, vt Deus illi viam bonam ostendat, ac dicit, *Non abscondas à me mandata tua*, id est, fac vt me non lateat via mandatorum tuorum, quæ sola est recta via, quæ ducit ad vitam.

*Concupiuit anima mea desiderare iustificationes tuas in omni tempore.*

IV.

Quarum impedimentum est imperfectio. Pauci enim sunt viri perfecti, qui toto corde diligant legem Dei, & ex amore iustitiæ operentur bona. Plurimi autem bonis desiderijs tanguntur, sed ultra non proficiunt. In horum persona Propheta dicit, *Concupiuit anima mea desiderare iustificationes tuas in omni tempore*: non potuit dicere, *Concupiuit anima mea implere mandata tua*, sed imperfectionem suam confessus, ait, *Concupiuit desiderare*: & hæc ipsa confessio imperfectionis, est petitio perfectionis, quam Deus concedit, cum facit hominem ardentem desiderare custodiam mandatorum. Rectè docet S. Augustinus, aliud esse concupiscentiam desiderij extra potentiam concupiscentem: aliud concupiscentiam desiderij intra eandem potentiam: concupiscentia enim prior potest esse sine desiderio eius rei, quæ concupiscitur; posterior non potest: exempli gratia: ægrotus, qui laborat inappetentia cibi, concupiscit desiderare cibum, & tamen non habet desiderium cibi, quia concupiscentia desiderij est in voluntate rationali, desiderium cibi deberet esse in faucibus & palato, vbi tamen non est, dum ibidem manet in appetentia cibi. At concupiscentia desiderij mandatorum Domini, in voluntate rationali est, & in eadem esse debet desiderium mandatorum: quare fieri non potest, vt homo concupiscat desiderare, & non desideret; quia ipsa concupiscentia est desiderium mandatorum. Intelligendum igitur est per concupiscentiam desiderij, significari imperfectum desiderium, vt paulò

Ssss ante



ante diximus; qui enim imperfectè desiderat, vult & non vult, cupit & non cupit: & eiusmodi sunt plurimi, qui desiderant beatitudinem Regni cœlorum, sed ita frigide ac tenuiter, vt nullus inde sequatur effectus: qui, si ardore illo desiderarent, quo res tanta desideranda est, sine dubio non quiescerent, donec ad illam peruenirent: sed qui tales sunt, cum Dauide imperfectum suum in oratione Domino manifestent, ac dicant, Concupiui desiderare iustificationes tuas; adiuua vt perfectè, ardentèq; desiderem, vt desiderium in opus transeat; & mandata tua custodiam o mni tempore.

*Incipisti superbos, maledicti qui declinant à mandatis tuis.*

Quintum impedimentum omnium maximum superbia est, quæ non sinit collum iugo submittere; sed hoc impedimentum in se Dauid non agnoscebat, neq; in sui similibus, sed solum in hostibus Dei; ideo simpliciter illud execratur. *Incipisti*, inquit, *superbos*, qui videlicet ex contemptu mandata non seruent. Talis fuit initio mundi Lucifer, quem Deus increpatione sua ad inferos tanto impetu deturbauit, vt Dominus dicat, *Videbam Satanam sicut fulgur de cœlo cadentem*. Luc. 10. Talis fuit & Adam, qui ex superbia, qua fieri voluit sicut Deus, Deo non obediuit, & à Domino increpatus tulit sententiam mortis, pro se & pro toto humano genere. Vide S. Augustin. tract. 4. in epist. Ioannis, & in Psal. 58. vers. 6. & libr. 14. de ciuit. Dei cap. 13. Denique superbos omnes terribili increpatione Deus in iudicio feriet: & ideo subiungit Dauid, *Maledicti qui declinant à mandatis tuis*, nimirum, qui declinant potissimum ex superbia, & contemptu Legislatoris: illis enim præcipue dicitur, *Ite maledicti in ignem æternum*.

Superbi non solum obedire Deo recusant, sed etiam contemnunt, & contumelijs afficiunt eos, qui obediunt; sed tandem contemptus & opprobrium in eos recideret, vt hoc loco Dauid prædicit: nam vt sæpè ex Augustino monuimus, eæ quæ videntur in Psalmis imprecationes, prædictiones sunt per modum imprecationis. Ait igitur, *Aufer à me opprobrium & contemptum*, id est, tempus erit, cum auferes à me opprobrium & contemptum, & in superbos inobedientes reijcies: quia ego testimonia tua exquisiui, quæ illi videlicet exquirere contempserunt: In Hebræo habetur, *quia testimonia tua custodiui*: sed Septuaginta verterunt, *exquisiui*, quod exponi debet, exquisiui vt custodirem. Declarat autem sequenti versiculo, cur dixerit, *Aufer à me opprobrium & contemptum*, dicens, *Etenim sederunt Principes, & aduersum me loquebantur, seruus autem tuus exercebatur in iustificationibus tuis*. Principes enim superbi sederunt, vel congregati in concilium, vel in thronis suis iudicantes, vel quiescentes in diuitijs, & potentia sua, & aduersum me loquebantur exprobranter obedientiam mandatorum Dei. Ego autem seruus tuus, non respiciens ad minas, vel opprobria eorum, *exercebar in iustificationibus tuis*, videlicet considerandis, prædicandis, & adimplendis. De quibus Principibus Dauid loquatur ad literam, incertum est: mysticè autem hæc referuntur à Patribus ad Principes infideles, qui Martyres persequebantur.

*Nam & testimonia tua meditatio mea est, & consilium meum iustificationes tue.*

Explicat quod dixit, *Exercebar in iustificationibus tuis*. Dicit enim, Testimonia Domini, & iustificationes Domini, hoc est præcepta Domini; fuisse sibi loco dulcis consolationis in rebus aduersis, in dubijs autem loco fidelis consiliarij. In Hebræo habetur, *Nam testimonia tua, gaudium meum, viri consilij mei*, id est, lex tua mihi gaudium adse-

VI.

*Aufer à me opprobrium & contemptum, quia testimonia tua exquisiui.*

VII.

*Etenim sederunt Principes, & aduersum me loquebantur: seruus autem tuus exercebatur in iustificationibus tuis.*



adferbat, & erat quasi vir consiliarius: nam in ea cogitanda oblectabar, & cum ea consultabam negotia mea. Ad hunc sensum reducenda sunt verba nostræ editionis, vt cohæreant cum textu originali. Hic igitur erit sensus: *nam & testimonia tua meditatio mea est*, id est, lex tua est mihi dulcis exercitatio, quasi ludi, vel cantici, vnde consolationem accipio in rebus tristibus: *& consilium meum iustificationes tue*, id est, consilium meum, quasi senatus meus, quem consulto in rebus dubijs, sunt mihi iustificationes tuæ, id est, eadem lex tua.

Dalet.

*Adhæsit pauimento anima mea: viuifica me secundum verbum tuum.*

In hoc etiam octonario David induit personam hominis imperfecti, qui ex carnali concupiscentia retardatur à perfecta impletionem mandatorum, & petit gratiam, & adiutorium ad seruanda mandata. *Adhæsit*, inquit, *pauimento anima mea*, id est, adhæsit terræ, hoc est terrene substantiæ per amoris affectum anima mea. *Viuifica me secundum verbum tuum*, id est, da mihi vitam conformem legi tuæ: nam adhærendo terræ, factus sum terrenus, adhærendo carni factus, sum carnalis; sed si vixero secundum legem tuam, quæ spiritualis est, adhærebo Deo, & vnus spiritus fiam cum eo. In Hebræo habetur, *Adhæsi pulueri*, sed idem est sensus: nam pauimentum est terra, vel ex terra. Itaque qui adhæret pauimento, adhæret terræ. Notat S. Augustinus nunc animam adhære re carni, siue terræ, & ideo fieri carnalem & terrenam, & impediri ab obseruatione perfecta legis: sed post resurrectionem gloriosam, caro adhærebit animæ, & anima Deo, & ideo tunc caro fiet spiritualis, & anima quodammodo deificabitur, & sine vlla difficultate perfectissime legem obseruabit, imò non egebit lege, quia sine lege, ea, quæ sunt legis, implebit.

*Vias meas enunciaui, & exaudisti me: doce me iustificationes tuas.*

Pergit in confessione miseriæ, & petitione gratiæ. Ego, inquit, *vias meas enunciaui*, id est, actiones malas, quæ propriè meæ sunt, non erubui confiteri, sed palam enunciaui, & tu *exaudisti me*, parcens mihi, solita misericordia tua. *Doce me iustificationes tuas*, id est, nunc reconciliatus peto, vt doceas me *iustificationes tuas*, id est, præcepta tua seruare me facias. Illi enim, vt supra diximus, in hoc Psalmo doceri intelliguntur, qui ita persuadentur, vt faciant.

*Viam iustificationum tuarum instrue me, & exercebor in mirabilibus tuis.*

Proficere cupit in via Domini, ideo magis & magis precibus instat, vt doceatur à Deo. *Viam*, inquit, *iustificationum tuarum instrue me*, id est, diligentius doce me, quæ sit via præceptorum tuorum, quomodo videlicet ambulare debeam in lege tua. *Et exercebor in mirabilibus tuis*, id est, in schola tua edoctus exercebor in custodiendis illis etiam præceptis, quæ tam mirabilia sunt, vt præ altitudine vix per ea incedi posse videatur, qualia sunt, *Diliges Deum ex toto corde*, & *Non concupisces*, & *Diliges inimicum tuum*, & similia.

*Dormitauit anima mea præ tædio, confirma me in verbis tuis.*

Iterum redit ad infirmitatem carnis consistendam, & misericordiam postulandam. Nam in hac peregrinatione vix intenetur, qui non aliquando laxetur, & præ tædio continuæ luctæ, quam habet spiritus cum carne, dormitet, & tepidior fiat. *Dormitauit*, inquit, *anima mea præ tædio*, dum videlicet tædet ambulare viam laboriosam, carne concupiscente aduersus spiritum. *Confirma me in verbis tuis*, id est, in præceptis tuis sectandis confirma me, addito seruire gratiæ tuæ, quo excitatus ambulare non cessem. In Hebræo pro verbo *dormitauit*, est verbum, *distillauit*. Non est improbable Septuaginta Interpretes veritatis, *isaïa*, quod est, *distillauit*, & postea

S s s s 2 errore



errore librariorum factum esse, *ivósafiv*, quod est *dormitavit*. Certè S. Ambrosius vtriusq; lectionis meminit. In Hebræo autem nulla est similitudo literarum inter *dormitavit*, & *distillavit*: nam *distillavit*, scribitur, *dalepha*; *dormitavit* scribitur, *ianus*: *דלפה* *ינ* sensus tamen in idem recidit: nam *distillavit anima mea*, significat, defecit anima mea instar earum rerum, quæ liquefiunt, & distillant humorem suum. Qui autem deficiunt, & liquefiunt præ tristitia, solent etiam deficiendo dormire, Luc. 22. *Inuenit eos dormientes præ tristitia*. Vox, *tadium*, Græcè est, *ἀσθία*; acedia autem est tristitia de bono opere faciendo.

V. *Viam iniquitatis amoue à me, & de lege tua miserere mei.*

Declarat pluribus verbis, quod vno verbo dixerat, confirma me. *Viam*, inquit, *iniquitatis amoue à me*, id est, fac per gratiam tuam, vt longè recedam à via iniquitatis, id est, à lege peccati, quam ingredi incipiebam dormitando præ tædio: & contra, *de lege tua miserere mei*, id est, misericorditer operare, vt ambulem per legem tuam. In Hebræo habetur, *Viam mendacij amoue à me* & opponitur ei, quod dicitur in sequenti versiculo. *Viam veritatis elegi*, sed sensus est idem: nam via iniquitatis est via mendacij, quia est via falsa, & fallax, & potius deuium, quàm via, & peream ambulare, non est viam carpere, sed deuiare. Illud autem *de lege tua miserere mei*, est clarius in Hebræo, *Legem tuam dona mihi*, sed idem est sensus: est enim ac si dixisset, miserere mei donando legem tuam.

VI. *Viam veritatis elegi, iudicia tua non sum oblitus.*

Hactenus confessus est miseriam, quam ex se habet: nunc in sequentibus versiculis declarat, quid possit ex misericordia Dei, quasi dicat ex me viam mendacij elegi: sed ex misericordia tua, qua de lege tua miseratus es mihi, *viam veritatis elegi*, id est, iam serio propofui veram viam, quæ est via mandatorum tuorum, ambulare: & ex mise-

ricordia tua; *iudicia tua*, id est, legem tuam *non sum oblitus*, quamuis caro aduersus spiritum vehementer concupisceret.

*Adhæsi testimonijs tuis Domine, noli me confundere.*

Ex me adhæsi pauimento: sed ex misericordia tua *adhæsi testimonijs tuis*: & quamuis carne seruam legi peccati, tamen mente serui legi tuæ, & ideo noli me confundere: quod fieret, si auxilio tuo me destitueres.

*Viam mandatorum tuorum cucurri, cum dilatasti cor meum.*

Ex me dormitavi præ tædio, sed ex misericordia tua *viam mandatorum cucurri*, id est, alacriter, expeditè, cum delectatione legem tuam seruaui, cum dilatasti cor meum per infusionem charitatis, quæ facit iugum suaue, & onus leue.

He.

*Legem pone mihi Domine viam iustificationum tuarum: & exquiram eam semper.*

In hoc octonario petit ordine quodam primo desiderium obseruandæ legis, deinde lumen ad eam intelligendam, tertio gratiam adimplendam: postea verò petit remotionem contrariorum. Dauid enim in hoc longissimo Psalmo rem eandem sæpius repetit, sed sub varijs verborum formis, ad excitandum affectum, & tollendum fastidium, primi versiculi hic sensus est. Fac Domine, vt nullam aliam legem velim, nisi legem tuam. *Legem pone mihi Domine viam iustificationum tuarum*, id est, statue mihi pro lege *viam iustificationum tuarum*, id est, pone mihi in corde desiderium solius legis tuæ. In Hebræo clarius habetur, *Docce me viam preceptorum tuorum*. Sed Septuaginta Interpretes considerantes, quod à verbo, *iavah* sit vocabulum, *thorah*, quod legem significat, prudenter intellexerunt verbum, *horeni*, quod hoc loco habetur, non solum docere, sed etiam legem ferre significare posse, & ideo verterunt *πομπὴν διδασκαλίας*, quod Latinus vno verbo exprimere non potuit:

ידה  
תורה  
הורני



ruit: & ideo sensum obscuriorem fecit. Hinc cessant quæstiones, cur dicatur, *legem pone*; cum iam dudum lex tradita sit: & cur iustus roget, ut sibi lex ponatur, cum Apostolus dicat: *Iusto est lex posita*: hæc quæstiones cessant, quia non petit Propheta sibi legem absolute poni; sed petit, ut per gratiam Dei fiat, ut sibi non placeat lex peccati, vel mundi, vel carnis, sed sola lex Dei: illam solum sibi in corde, in desiderio, in affectu poni cupit; & ideo subdit: *& exquiram eam semper*, id est, si illam solum ex munere tuo desiderabo, fiet, ut in omni mea actione quæram quid iubeat lex tua: S. Hieronymus vertit, *vestigium*, pro eo quod nos habemus, *semper*: sed vox Hebræa est ambigua, & vestigium, & finem significat: & utroque modo sensus est bonus, siue dicat, exquiram vestigium, nimirum legis; hoc est, sequar eam; siue exquiram usque in finem, id est, semper.

*Da mihi intellectum, & scrutabor legem tuam, & custodiam illam in toto corde meo.*

Posteaquam petiuit desiderium siue affectum legis, petit etiam intellectum, ut recte illam intelligat, & scrutari possit eius utilitates & præstantiam, ac cæteras eius laudes; idque ut custodiat illam in toto corde suo; non enim cupit intelligere ad curiositatem, sed ad obseruantiam.

*Deduc me Domine in semitam mandatorum tuorum, quia ipsam volui.*

Nunc tertio postulat gratiam implendi legem: *Deduc me Domine in semitam mandatorum tuorum*, id est, fac me implere mandata tua, id enim est, incedere per semitam mandatorum. Vocantur autem semitæ, quia semitæ sunt viæ angustæ, breues, rectæ, mundæ, per quas non solent incedere, nisi homines pedites; non equi, non currus: & talis omnino est lex Domini, si comparatur ad leges carnis & mundi, quæ sunt viæ latæ, fordidæ, obliquæ, & pereas animalia expertiarationis, id est, homines animales & carnales incedunt. Ratio autem, cur debeat exaudiri, est in illis verbis, *quia ipsam volui*, id est,

quia hanc semitam elegi, & per eam ambulare desideravi, ex munere Dei: decet enim, ut qui dedit velle, det etiam perficere; iuxta promissionem Apostoli Phil. 2. *Qui operatur in vobis velle & perficere.*

*Inclina cor meum in testimonia tua, & non in auaritiam.* IV.

Hic versiculus respondet primo: ibi enim orauerat pro affectu cordis erga legem Dei; hic orat pro remotione affectus auaritiæ, qui maxime impedit affectum erga legem Dei. *Inclina cor meum in testimonia tua*, id est, infunde cordi meo copiosam gratiam, per quam inclinetur in custodiam legis tuæ, & non in auaritiam, id est, & non inclines cor meum in auaritiam. Dicitur autem Deus inclinare aliquem in malum, quando deserendo gratia sua, sinit illum inclinari in malum. Itaque isto modo loquendi Scriptura sancta demonstrat potentiam gratiæ, non autem quod Deus proprie inclinet aliquando ad malum. Similia sunt illa Rom. 1. *Tradidit illos in reprobum sensum*; & Isaia 63. *Quare nos errare fecisti de via tua?*

*Auerte oculos meos ne videant vanitatem, in via tua viuifica me* V.

Hic etiam versiculus recto ordine respondet secundo: nam ibi petit donum intelligentiæ, ad considerandam legem; hic petit, ne oculi mentis auertantur a lege ad vanitates. *Auerte oculos meos, ne videant vanitatem*, id est, ne occupentur in cogitandis temporalibus rebus, quæ vanæ sunt: sed potius effice, ut totus intendam legi tuæ, & sic *in via tua viuifica me*, id est, in via tuâ ambulantiem, hoc est, legem tuam custodientem viuifica, refice, & conserua.

*Statue seruo tuo eloquium tuum, in timore tuo.* VI.

Nonnulli significari existimant per eloquium Domini, promissâ Domini, & volunt sensum esse: *Statue eloquium tuum*, id est, imple promissâ tuâ. Nos autem existimamus cum S. Augustino per eloquium, intelligi legem, & sensum esse: *Statue seruo tuo*  
Ssss 3 elo-



*eloquium tuum in timore tuo*, id est, fac, vt per sanctum timorem tuum statuatur, confirmetur, solidetur lex tua in seruo tuo; vt immobiliter in illo hareat & perseueret. Itaque respondet hic versiculus tertio versiculo: ibi enim petitur gratia legis implendae; hic petitur remotio instabilitatis, & petitur gratia perseuerantiae.

VII. *Amputa opprobrium meum, quod suspicatus sum; quia iudicia tua iucunda.*

Magnum erit opprobrium in die iudicii, & nunc est etiam in conspectu Angelorum, non perseuerasse in lege seruanda, cum lex Domini non solum utilis, sed etiam suavis sit & iucunda. Ideo cum petiisset gratiam perseuerantiae, addit quasi rationem, timorem videlicet opprobrii, quod sequetur non perseuerantes. *Amputa*, inquit, *opprobrium*; *quod suspicatus sum*, id est, quod timui si non perseuerarem in lege tua, cum tam bona sit: iudicia enim in hoc Psalmo praecepta significant.

VIII. *Ecce concupiui mandata tua, in equitate tua viuifica me.*

Concludit petitiones huius octonarij, dicens, iam satis patere, quod ex corde cupiat mandata seruare. *Ecce*, inquit, *concupiui mandata tua*, quasi dicat, Ecce apparet, quod serio cupiam mandata tua: ideo *in equitate tua*, id est, in ipsis mandatis tuis, id est, in obseruatione mandatorum *uiuifica me*, id est, auge & conserua mihi spirituales vitam. Iustus enim iustificatur adhuc, dum mandata custodit.

Vau.

I. *Et veniat super me misericordia tua Domine, salutare tuum secundum eloquium tuum.*

Illud, &, nihil continuat, sed additur ad initium librorum vel capitulorum ornatus gratia apud Hebraeos; sic enim incipit liber Leuitici, liber Ruth, liber Ezechielis: sic incipiunt multa capitula, vt Isaia 7. *Et factum est*, & cap. 8. *Et dixit Dominus*. In hoc autem octonario ad singulos versus additur, *Et*, quoniam debent omnes versus incipere per

Vau, & per hanc literam nulla fere vocabula incipiunt excepta coniunctiua particula, &c. Petit autem Propheta initio octonarij misericordiam Dei, ac deinde in reliquis versibus declarat effectus huius misericordiae, qui potissimum pertinent ad legis diuinæ custodiam; quem finem & quasi scopum totus Psalmus respicit. Ait igitur: *Veniat super me misericordia*, id est, descendat ex alto gratia tua, & misericordia super me. Declarat autem, quæ sit hæc misericordia, addens, *salutare tuum secundum eloquium tuum*, id est, salus tua, siue misericordia sapans animam, secundum eloquium tuum, quo promissisti misericordiam & salutem sperantibus in te.

*Et respondebo exprobrantibus mihi verbum, quia sperauit in sermonibus tuis.*

Et cum venerit super me misericordia tua secundum promissionem tuam, non timebo aduersarios exprobrantes mihi, quod frustra Deum timeam: nam respondebo illis verbum verum, cui non poterunt contradicere, quod videlicet sperauerim in sermonibus tuis, qui promissa tua seruare potes, quia es omnipotens, & seruare vis, quia bonus es.

*Et ne auferas de ore meo verbum veritatis vsquequaque, quia in iudiciis tuis supersperaui.*

Oro autem, vt hoc verbum veritatis, quo glorior aduersus exprobrantes mihi, non auferas de ore meo, id est, non efficias, me destituendo gratia tua, vt non audeam hoc verbum loqui, non claudas ora de te confidentis, & promissa tua prædicantis: vel si auferas vsquequaque, non auferas omnino, vel in æternum. *Quia in iudiciis tuis supersperaui*, id est, quia in tua iustitia & fidelitate multum omnino speraui. S. Augustinus refert hoc ad electos Martyres, qui si ad tempus permisi sunt negare veritatem, non tamen vsquequaque negare permisi sunt, sed post negationem fleuerunt, & post confessionem coronam meruerunt, quales fuerunt S. Petrus, S. Marcellinus, & alij permulti.



*Et custodiam legem tuam semper, in  
seculum, & in seculum seculi.*

Hic iam subiicit effectum misericordiae  
sanantis animam, qui est perpetua legis diui-  
nae custodia.

*Et ambulabam in latitudine, quia  
mandata tua exquisui.*

*Et loquebar testimoniis tuis in conspe-  
ctu Regum, & non confundebam.*

*Et meditabar in mandatis tuis, quae di-  
lexi.*

*Et leuavi manus meas ad mandata tua,  
quae dilexi, & exercebar in iustificationi-  
bus tuis.*

His quatuor versiculis explicat per partes,  
quae sit perpetua legis custodia, quam pro-  
misit in quarto versiculo, dicens, se corde,  
verbo, mente & opere in lege Domini sem-  
per futurum: & quidem in Hebraico textu  
haec omnia habentur in futuro, *ambulabo,  
loquar, meditabor, leuabo, exercebor.* Sed quia  
tempora variant significationes apud He-  
braeos, non debent reprehendi Septuaginta,  
& Latinus Interpres, qui per praeteritum im-  
perfectum ista reddiderunt: Videtur autem  
Propheta, ut mox exauditur, mutasse mo-  
dum loquendi. Dicit enim: *Et ambulabam  
in latitudine*, id est, veniente misericordia  
Domini super me, iam ambulabam non in  
angustis timoris, sed in latitudine dilectio-  
nis, id est, libenter, cum gaudio, magno affe-  
ctu cordis legem seruabam, quia illam ex-  
quisui, ut rem valde desideratam & ama-  
tam, & loquebar libere & sine timore de ius-  
titia sanctissimae legis, etiam coram Regi-  
bus iniquis, *& non confundebam*; & assidue  
cum animo meo de ipsa lege cogitabam, &  
eius mysteria meditando considerabam, *&  
leuavi manus meas ad implenda mandata  
sublimia & excelsa*, id est, valde perfecta &  
ardua: vel, ut exponit S. Augustinus, *Leua-  
ui manus ad opera legis, quia propter finem al-  
tissimam legem custodui*; qui enim propter  
mercedem temporalem legem custodiunt,  
non leuant, sed deprimunt manus, dum ope-

rantur, neque dicere possunt, *ad mandata  
tua, quae dilexi*, non enim diligunt mandata,  
qui legislatorem non diligunt: denique his  
omnibus modis, id est, corde, mente, verbo  
& opere exercebar in iustificationibus tuis.

Zain.

In hoc octonario canit Propheta aeternam  
retributionem, quam Deus legem seruanti-  
bus repromisit: ac propter eam ipem dicit,  
se & legem seruasse, & in tribulatione conso-  
lationem accepisse, & de iniquorum praua-  
ricatione doluisse.

*Memor esto verbi tui seruo tuo, in quo  
mihi spem dedisti.*

Non potest obliuisci Deus, nec volunta-  
tem mutare, neque sententiam retractare:  
sed per figuram quandam sermonis humani,  
dicitur Deus obliuisci, quando differt imple-  
re, quod promissit, quasi promissi sui esset  
oblitos. Differt autem aliquando Deus im-  
plere promissa sua, non obliuione, sed iudi-  
cio: & quamuis facturus sit omnino Deus,  
quod facere decreuit, vult tamen rogari a fi-  
delibus seruis suis, & haec oratio est vnum  
ex medijs, per quae Deus promissa sua adim-  
plere decreuit. Orat igitur Dauid in persona  
sua, & aliorum fidelium dicens: *Memor esto  
verbi tui*, id est, promissi tui, *in quo mihi spem  
dedisti*, cum dixisti *seruo tuo Abraham*, & in  
illo omnibus filiis eius: *Ambula coram me,  
& esto perfectus*, ego ero merces tua magna ni-  
mis.

*Hac me consolata est in humilitate  
mea, quia eloquium tuum viuificauit me.*

Illud, *hac*, non potest proprie referri ad  
spem, ut communiter exponitur, quoniam  
in textu Hebraico, vnde ceterae editiones  
translatae sunt, non habetur nomen spei, sed  
verbum, & verti potuisset: *Memor esto verbi  
tui, in quo me sperare fecisti.* Sensus igitur  
est: Haec res, siue, hoc, me consolatione affe-  
cit in humilitate mea, id est, in afflictione &  
despectione mea, *quia eloquium tuum*, id est,  
promissio tua *uiuificauit me*, id est, vitam  
& spiritum mihi tribuit, vel roborauit &  
auxit.

Super-



III.

*Superbi inique agebant vsquequaque: à lege autem tua non declinaui.*

Vita & vigor, quem mihi tribuit promissio tua, in causa fuit, vt non declinarem à lege tua, etiam si superbi irrisores inique agerent valde, cum me irrisoribus suis à legis custodia auertere conarentur. In Hebræo pro, *inique agebant*, habetur, *irridebant me*. Sed idem est sensus.

IV.

*Memor fui iudiciorum tuorum à seculo Domine, & consolatus sum.*

In humilitate & irrisoribus *memor fui iudiciorum tuorum à seculo*, id est, iudiciorum, quæ ab initio sæculi exercuisti, exaltans humiles & superbos deprimens, reddens custodientibus legem tuam præmia magna, & præuaricatoribus magna supplicia; & hinc accepi in omni tribulatione mea solatium.

V.

*Defectio tenuit me pro peccatoribus derelinquntibus legem tuam.*

Eadem illa spes tantæ mercedis fecit, vt misereretur hominum peccatorum, qui derelinqunt legem tuam, tanto bono priuantur. Vox Hebræica, pro qua nos habemus *defectio*, significat horrorem, siue tremorem, ardorem, siue æstum. Sed noster Interpres vertit, *defectionem*, vt significaret tantum esse horrorem & æstum, de quo agit Prophetæ, vt *defectionem* inducat. Magnæ charitatis indicium est, contremiscere, ardere, deficere ex misericordia erga peccatores, vel ex dolore offensionis diuinæ: nam de vtraque *defectione* versiculus iste potest exponi.

VI.

*Cantabiles mihi erant iustificationes tua in loco peregrinationis meæ.*

Iniqui legem derelinquunt, quia insuauem esse iudicant: mihi autem scienti quanta merces reposita sit custodientibus legem tuam, *iustificationes tua*, id est, præcepta tua vsque adeo dulcia & suauia erant, vt in hac peregrinatione, qua peregrinamur à patria, dulce canticum fuerint. In Hebræo legimus, *Carmina mihi fuerunt præcepta tua*: quare illud, *cantabiles*, significat, leges Domini non fuisse sibi graues, quæ cum labore portandæ

essent, sed suauis, quæ instar carminum, oblectare possent.

*Memor fui nocte nominis tui Domine, & custodini legem tuam.*

Illā beatā spes tantæ promissionis non solum interdiu, sed etiam noctu mihi nomen tuum in memoriā reuocabat: & ex affectu *nominis tui*, id est, ex ardenti amore tuo perseueraui in custodia legis tuæ.

*Hac facta est mihi, quia iustificationes tuas exquisiui.*

Querunt Interpretes, quid sit illud, *hac*, an hæc spes, an hæc lex, an hæc promissio, an quid aliud. Sed apud Hebræos genus fœmininum ponitur pro neutro, quo illi carent. Itaque sensus est, Hoc totum mihi euenit, nimirum, vt promissiones Dei considerarem, & spem inde conciperem, & cetera bona, quæ inde nata sunt, *quia iustificationes tuas exquisiui*. Vult enim Prophetæ in hoc Psalmo, qui est encomium legis, omnia referre ad ipsam legem diligenter inuestigandam & amandam; vt hac ratione excitet homines ad considerationem & impletionem legis.

Cheth.

*Portio mea Domine, dixi custodire legem tuam.*

In hoc oratorio ponitur initio hæc propositio, Dominus est portio mea; inde deducitur desiderium legis diligenter custodiendæ, & preces ad Deum pro gratia legis implendæ, non obstantibus quibuslibet impedimentis. *Portio mea Domine*, subinteligitur, tu es. Quamuis enim aliqui coniungant cum sequentibus, vt sensus sit, Portio mea, ô Domine, dixi erit, custodire legem tuam; tamen multo verius est, sensum esse, Portio mea tu es Domine: nam in Græco additur verbum, *es*: & in Hebræo ponitur distinctio post vocabulum, *Domine*, & posset etiam legi, *Portio mea Dominus*: estq; id conforme aliis locis, vt Psalm. 15. *Dominus pars hereditatis meæ*; & Psalm. 72. *Pars mea Deus in æternum*; & Thren. 3. *Pars mea Dominus*. Et sic exponunt hunc locum SS. Patres, Hilarius, Ambrosius, Hic-



Hieronymus, Augustinus. Felix anima, quæ ex corde dicere potest: Portio mea tu es Domine, id est, omnibus rebus creatis abrenuncio, nihil iuris in eis habere cupio, occupet ea quicumque voluerit, mihi tu Domine solus sufficis, neque aliud requiro aut requiram in æternum: & quia, ut te aliquando possideam, tibi soli placere cupio, ideo dixi, statui, firmiter proposui *custodire legem tuam*: scio enim, quia non dignaris esse portio eorum, qui legem tuam non custodiunt.

*Deprecatus sum faciem tuam in toto corde meo, miserere mei secundum eloquium tuum.*

Dixit, custodire legem Domini; sed quia sine adiutorio Dei vires humanæ non sufficiunt, ideo deprecatur faciem Domini in toto corde suo, & dicit, *miserere mei secundum eloquium tuum*, id est, secundum promissionem tuam miserere mei, ut te adiuuante impleam, quod te inspirante decreui.

*Cogitavi vias meas, & conuerti pedes meos in testimonia tua.*

Non satis est Deum orare, sed oportet etiam cooperari auxilio Dei, ideo Propheta posteaquam precatus est Deum, addit, *Cogitavi vias meas*, recte ne, an secus ambulem, item consideraui actiones meas, an legi Dei conformes essent, & *conuerti pedes meos in testimonia tua*, id est, & conuerti affectus meos à lege carnis & peccati, ad legem tuam Domine, quæ sola est via recta.

*Paratus sum, & non sum turbatus, ut custodiam mandata tua.*

Nec solum legem custodire decreui, sed promptus fui statim aggredi opus iustum, neque vlla perturbatio me retardare potuit à custodia legis tuæ. In Hebræo legitur: *Festinaui, & non tardaui custodire mandata tua*. Sed idem est sensus: nam qui imparatus est, non potest festinare, & qui turbatur, hærere solet, & moram facere. Ideo illud, *paratus sum*, sic explicandum, Nullum tempus obseruandæ legis me imparatum inueniet, ut festinare non possim, sed semper paratus sum, & expeditus ad opus celeriter imple-

dum: & nunquam turbatus sum, ut propterea moram facere me oporteat.

*Funes peccatorum circumplexi sunt me, & legem tuam non sum oblitus.*

Non defuerunt tamen, qui me perturbare & retardare conarentur: nam *funes peccatorum*, id est, laquei siue retia variarum tentationum, quæ peccatores homines siue Dæmones tendere solent, *circumplexi sunt me*: & tamen *legem tuam non sum oblitus*, id est, facere non potuerunt tentationes illæ, ut legis tuæ obliuiscerer, & ab ipsa implenda retardarer.

*Media nocte surgebam ad confitendum tibi, super iudicia iustificationis tuæ.*

Quia tu es Domine portio mea, non solum interdiu, sed etiam noctu, imo etiam media nocte, quando summa quies est in terris, vacui legi tuæ considerandæ; *surgebam enim media nocte ad confitendum tibi*, id est, ad te laudandum super iustissima & sapientissima præcepta tua. S. Augustinus interpretatur hunc versiculum de tempore persecutionis, quod per noctem significari solet. Sed ad litteram videtur omnino intelligendus Propheta de laudibus nocturnis, ut exponunt Hilarius, Ambrosius, Hieronymus, Theodoretus, & alij fere omnes. Atque hinc didicit Ecclesia surgendum esse media nocte ad nocturnam Psalmodiam; hunc enim locum allegant auctores, qui de diuinis officiis scripserunt.

*Particeps ego sum omnium timentium te, & custodientium mandata tua.*

Hoc etiam deducitur ex prima illa propositione, *Portio mea Dominus*: omnes enim timentes Deum, & custodientes mandata eius, colligantur tanquam membra viua in vnum corpus, glutino charitatis, quæ dicit, *portio mea Dominus*: & hoc modo singuli sunt particeps omnium, quia charitas facit omnia communia; & si gaudet vnum membrum, congaudent omnia membra, & si dolet vnum membrum, condolent omnia membra. S. Augustinus exponit hunc versiculum de Christo, qui per assumptionem carnis humanæ

T t t t

factus

V.

VI.

VII.



factus est particeps omnium timentium Deum, iuxta illud Apostoli ad Hebr. 2. *Quia pueri communicauerunt carni & sanguini, & ipse participauit eisdem; & paulo ante: Vnde, inquit, non confunditur, fratres eos vocare.* Sed prior expositio est communis, & magis literalis.

VIII.

*Miserecordia tua Domine plena est terra: iustificationes tuas doce me.*

Ego quidem particeps sum omnium timentium te: sed misericordiae tuae participes sunt omnes, qui habitant in terra, & boni & mali, & homines & iumenta, & animata & inanimata. Proinde miserere mei, ut doceas me iustificationes tuas: haec enim summa miseria est, non scire legem tuam, ut sciunt, qui illam implent. Hanc miseriā tollat a me misericordia tua; quia hoc vnum ambio, hoc concupisco, cum tu sis portio mea Domine.

Teth.

I.

*Bonitatem fecisti cum seruo tuo Domine, secundum verbum tuum.*

II.

*Bonitatem & disciplinam & scientiam doce me, quia mandatis tuis credidi.*

In hoc octonario petit à Deo Propheta etiam dona necessaria ad custodienda praecepta Domini: & ostendit ex effectis, horum donorum necessitatem. Primum igitur vitur quodam quasi procemio, dicens: *Bonitatem fecisti cum seruo tuo Domine*, id est, suauitatem & benignitatem, siue mansuetudinem tuam exhibuisti seruo tuo, *secundum verbum tuum*, id est, iuxta promissiones tuas:

סו

סו

quamuis enim in Hebræo legatur, *tob*, quod significat bonum, & verti possit, ut vertit S. Hieronymus, *Bene fecisti seruo tuo*; tamen LXX. Interpretes legerunt, *tub*, bonitatem, ut etiam in sequenti versu; & utrobique venterunt, *χρηστότητα*, id est, bonitatem, siue suauitatem. Sequitur postea: *Bonitatem & disciplinam & scientiam doce me*, id est, sicut Domine bonitatem, siue suauitatem erga seruum tuum ostendisti; ita rogo, ut doceas me eandem bonitatem, siue suauitatem,

quam exhibeam proximis meis, ita ut nulli nocere, nullum decipere, nullum fraudare velim: sed addas etiam, ut doceas me disciplinam, id est, prudentiam, ut caueam deceptores & fraudulentos; & sic habeam suauitatem & bonitatem columbae, ut non desit mihi consilium & prudentia serpentis. Intellico autem per vocem, *disciplinam*, virtutem prudentiae, quia hoc requirit vox Hebraica, *tabam*, quae significat proprie saporem & consilium: neque vox Graeca & Latina hanc significationem respuunt, cum sint vocabula generalia. Denique post bonitatem & prudentiam, peto etiam scientiam, qua agnoscam mysteria legis tuae, quae scientia, sicut sine bonitate & prudentia inflat, ita habentibus bonitatem & prudentiam utilisima est. Sequitur: *Quia mandatis tuis credidi*, id est, quia credidi mandatorum tuorum promissionibus, siue credidi mandata tua diuina esse, & dignissima, quae diligentissime custodiantur. Obseruandum est hoc loco, plerisque homines scientiam querere, vel prudentiam, de bonitate parum laborare; sed Prophetam à Spiritu sancto edoctum rectum ordinem esse secutum, ut primo bonitatem, deinde prudentiam, ultimo scientiam postularet.

*Priusquam humiliarer, ego deliqui; propterea eloquium tuum custodiui.*

*Bonus es tu, & in bonitate tua doce me iustificationes tuas.*

Declarat necessitatem trium illorum donorum, quasi dicat, non sine causa peto bonitatem, disciplinam & scientiam: nam ex defectu horum donorum deliqui, & propter delicta humiliatus sum à Deo iusto iudice. *Priusquam humiliarer* per immissionem tribulationum, *ego deliqui* per ignorantiam, quia scientia carui: nam vox Hebraea, *sagag*, quae hoc loco habetur, significat ignorare, siue delinquere ex ignorantia. Sequitur: *Propterea eloquium tuum custodiui*, id est, propterea deinceps attentius custodiui legem tuam: sed tu qui *bonus*, id est, suavis & benignus es, in hac tua bonitate, id est, iuxta hanc



hanc mansuetudinem tuam doce me iustificaciones tuas, vt non amplius delinquam.

*V.* Multiplicata est super me iniquitas superborum: ego autem in toto corde meo scrutabor mandata tua.

*VI.* Coagulatum est sicut lac cor eorum, ego vero legem tuam meditatus sum.

Hic significatur necessitas alterius doni, videlicet prudentiæ. *Multiplicata est super me iniquitas superborum*, id est, superbi præuicatorum multiplicarunt super me mendacia sua, vt me ad transgressionem inducerent: vnde prudentiæ donum mihi necessarium fuit, quo dono adiutus in toto corde meo scrutabor mandata tua. In Hebræo pro vocabulo, iniquitas, habetur, *seher*, id est, mendacium: vnde intelligimus per iniquitatem, ipsum mendacium, quod sine dubio quædam iniquitas est, præcipue si mendacium sit perniciosum. *Coagulatum est sicut lac cor eorum*, id est, superbi illi induratum cor habent, sicut induratur caseus ex lacte coagulato confectus; ideo illis inmissis, legi tuæ meditandæ vacavi. In Hebræo legitur, *adeptus* pro lacte: sed eadem litera mutatis punctis vtrumque significant: nam *chalab*, est lac, & *cheleb*, est adeptus.

*VII.* Bonum mihi quia humiliasti me, vt discam iustificaciones tuas.

*VIII.* Bonum mihi lex dñi tui super millia auri & argenti.

Ex abundantia primi doni, quod iam confectus erat, dicit, *Bonum mihi, quia humiliasti me*: neque enim hoc dicere potest, nisi homo vere mitis & humilis corde, ac per hoc vere bonus, qui per experientiam iudicium de bono ferre potest. Existimat enim is, qui vere bonus est, magnum donum humiliacionem ex tribulatione venientem, quoniam causa est custodiæ legis, quæ quantum sit bonum, explicatur in versiculo sequenti: *Bonum mihi lex oris tui super millia auri & argenti*. Et vere ita est, quoniam per custodiã legis acquiritur vita æterna, cui nulli thesauri comparari possunt.

Iod.

*I.* Manus tuæ fecerunt me, & plasmauerunt me; da mihi intellectum, vt discam mandata tua.

In hoc octonario multis nouis argumentis polcit gratiam legis custodiendæ; ac primum ex eo, quod cum sit figmentum manuum Domini, debet illi summam obedientiam. *Manus tuæ fecerunt me, & plasmauerunt me*, id est, potentia tua & sapientia tua, quasi duæ manus tuæ fecerunt me, cum non essem, & plasmauerunt me ordinantes membra & potentias, cum essem initio quasi massâ lutî: vel fecerunt me quoad animam, & plasmauerunt quoad corpus. Ideo cum totus sim tuus, debeamq; tibi summam obedientiam, peto vt des mihi intellectum, vt discam mandata tua, vt non solum sciam, sed etiam faciam. In Hebræo pro, *plasmaui*, habetur, *paraui*, siue *firmaui*, per quod intelligitur perfecta formatio & distinctio membrorum, vnde fit, vt homo subsistat. Item pro, *da mihi intellectum*, in Hebræo & Græco est vna vox tantum, quæ significat intelligentem facere. Itaque illud, *da mihi intellectum*, non significat, da mihi vim intelligendi, quasi sine ea formatus esset; sed, da mihi lumen diuinum, quo mens mea perfecte discat mandata tua, & sibi persuaदेat, optimum esse illa complere.

*II.* Qui timent te, videbunt me, & letabuntur, quia in verba tua super speraui.

Hæc est secunda ratio, quæ sumitur ab ædificatione proximorū. *Qui timent te, videbunt me seruante mandata tua, & letabuntur*: quia videbunt me sperantem valde in verbis tuis, i. in promissis, quæ continentur in lege tua.

*III.* Cognoui Domine quia æquitas iudicia tua, & in veritate tua humiliasti me.

Tertia ratio à confessione propriæ culpæ. *Cognoui*, inquit, *quia æquitas iudicia tua*, i. quod iudicia tua iustissima sunt, & si quando me humiliasti destituens gratia tua, in veritate, i. in iustitia tua fecisti, quia ita commeriui; ideo non conqueror de tua iustitia, sed ad misericordiam tuam confugio, & dico:

Tttt 2

Fias



IV.

*Fiat misericordia tua vt consoletur me, secundum eloquium tuum seruo tuo.*

Consolatio, quam petit, est gratia seruandæ legis; qui enim dolet se humiliatum, quia destitutus gratia in peccatum incidit, consolationem magnam accipiet, si copiosa gratia persusus, legem Domini perfecte integreque seruabit.

V.

*Veniant mihi miserationes tue, & vi-  
uam, quia lex tua meditatio mea est.*

Petit gratiam seruandæ legis, vt consolationem acciperet: explicat nunc, quæ sit vera consolatio, quam desiderat. *Veniant mihi miserationes tue, & vi- uam*, id est, miserere mei secundum multitudinem miserationum tuarum, vt acquiram veram vitam, quæ sola est vita beata & sempiterna. Recte enim monet S. Augustinus, ybi sine addito ponitur nomen vitæ, vt plurimum intelligi vitam æternam, quæ sola est simpliciter vita. Ioan. 1. *In ipso vita erat.* Ioan. 5. *In resurrectionem vi- ta.* Matth. 19. *Si vis ad vitam ingredi, serua mandata.* Quia lex tua meditatio mea est: hæc est ratio, cur audeat petere misericordias Domini: decet enim, vt Deus misericorditer respiciat in eum, qui assidue meditatur in lege.

VI.

*Confundantur superbi, quia iniuste iniquitatem fecerunt in me, ego autem exercebor in mandatis tuis.*

Quarta ratio ad obtinendam gratiam seruandæ legis sumitur à confusione iniquorum, sicut secunda sumebatur ab ædificatione piorum. *Confundantur superbi*, id est, da mihi gratiam, per quam perfecte leges tuas custodiam, vt hinc confundantur superbi præuaricatores, qui vexando & persequendo iniuste efficere conantur, vt etiam alij præuaricentur. Interim autem dum illi confunduntur & erubescunt, ego multo alacrius exercebor in mandatis tuis cogitandis & implendis. Illud, *iniuste*, significat superbos iniquitatem fecisse scienter & studiose, non casu, non ex ignorantia, non ex inaduerentia, vnde ab iniquitate immunes videri possent.

*Conuertantur mihi timentes te, & qui nouerunt testimonia tua.*

Hortatur pios, vt si qui sunt, qui à præuaricatoribus decepti ad illos respicere cœperint, ad se redeant, & cum ipso iungantur. *Conuertantur mihi*, id est, conuertantur ad me, & mecum iuncti legem Dei custodiant timentes te, & qui nouerunt testimonia tua, id est, illi omnes, qui timorem Dei, & scientiam legis habent. Ex Græco textu legunt nonnulli: *Conuertant me*. Sed antiqua lectio id habebat, quod nos habemus, vt perspicuum est ex Patribus, Hilario, Ambrosio, Hieronymo, Augustino, & S. Hieronymus vertit ex Hebræo: *Reuertantur ad me*.

*Fiat cor meum immaculatum in iustificationibus tuis, vt non confundar.*

Concludit petens gratiam sæpe ac sæpius postulatam, qua corde perfecto mandata diuina custodiat, vt neque in hoc sæculo, neque in futuro iudicio, confusionis opprobrium timeat.

Caph.

*Defecit in salutare tuum anima mea, & in verbum tuum supersperavi.*

In hoc octonario inducit Dauid personam cupientis seruare mandata, & tamen inter tentationes grauius laborantis, atque auxilium de cælo miserabiliter postulantis. S. Augustinus totum octonarium Ecclesiæ Christum expectanti, & sanctis Martyribus accommodat: pie omnino & vere, sed quia totum Psalmum ad legis custodiam commendandam video pertinere, ideo hunc etiam octonarium ad literam de legis custodia explicare decreui. *Defecit in salutare tuum anima mea*, id est, anima mea præ magnitudine desiderij salutis æternæ iam pene defecit. Deficere enim in salutare, nihil est aliud, nisi expectando & desiderando salutem, laborare, languere, deficere. *Et in verbum tuum supersperavi*, id est, & ego tamen valde speravi in verbum promissionis tuæ. Itaque dilatio salutis deficere facit, sed spes firma promissionis erigit & confortat.

De-



Defecerunt oculi mei in eloquium  
tuum, dicentes, Quando consolaberis me?

Mira Prophetæ loquutio, quæ oculis of-  
ficium aurium & linguæ tribuit. Sed oculi  
interiores, & aures interiores, & lingua inte-  
rior idem sunt. Intellectus enim videt, audit,  
loquitur. *Defecerunt oculi mei in eloquium  
tuum*, id est, mens mea attendo auxilium  
promissum, dum diutius differtur, deficit  
præ desiderio, quo modo deficiunt oculi  
corporales, cum nimis diu respiciunt ad lo-  
cum, unde persona desiderata ventura spe-  
ratur. *Dicentes, quando consolaberis me?* id  
est, oculi interiores defecerunt præ expecta-  
tione, & defectum suum explicant dicentes,  
quando veniet consolatio illa perfecta, vt  
non amplius timeam casum, & legis sanctæ  
prævaricationem? Possent etiam hæc expli-  
cari de oculis exterioribus, qui calo inhæ-  
rentes videntur quasi deficere, & dicere Do-  
mino, Quando veniet auxilium de cælo  
promissum? sic enim S. Hieronym. in epist.  
ad Eustochium de seruanda virginitate de se  
loquitur, Post multas lacrymas, post cælo  
inhærentes oculos, &c. Videtur dicere de-  
buisse Prophetam secundum leges grammati-  
cæ, Quando consolaberis nos. Sed quia ocu-  
li sunt instrumenta animæ, de qua dictum  
erat, defecit anima mea, ideo per oculos  
queritur consolatio non tam oculorum,  
quàm animæ, quæ per illos respicit. Est igitur  
sensu, Quando consolaberis meam ani-  
mam, cuius oculi deficiunt attendendo &  
expectando.

Quia factus sum sicut vter in pruina.  
iustificationes tuas non sum oblitus.

Non sine causa dico, quando consolaberis  
me: quia præ desolatione, & angustijs ten-  
tationum, factus sum aridus, & destitutus  
humore gratiæ consolantis; vt est vter tem-  
pore frigidissimo in medio pruinæ constitutus.  
Similis est illa vox in Psal. 142. *Anima  
mea facta est sicut terra sine aqua tibi.* Sed  
quamquam tanta spiritus ariditate labo-

rem, tamen *iustificationes tuas*, id est, præ-  
cepta tua non sum oblitus. S. Ambrosius; &  
S. Augustinus per vterem in pruina, intelli-  
gunt carnem mortificatam, & castigatam, &  
pruina cælesti respersam, vt spiritui subji-  
ciatur. quasi dicat Prophetam, carnem castiga-  
ui & legem tuam non sum oblitus; æquum  
igitur est, vt confoletis animam meam.

Quot sunt dies serui tui? quando facies  
de persequentibus me iudicium?

IV.

Instat eidem petitioni optans consolatio-  
nem & liberationem à tentationibus. *Quot  
sunt dies serui tui*, quibus afflictio durabit?  
quando finientur dies tentationis & mise-  
riæ? *quando facies de persequentibus me iudi-  
cium?* quando iudicabis & condemnabis  
persequentes & tentantes me, vt ijs con-  
demnatis persecutio conquiescat? Non cu-  
riosè querit, quot anni super sint, aut vitæ  
sue, aut durationis mundi; sed explicat his  
verbis desiderium æternæ vitæ, quando om-  
nes impij ad inferos, detrusi cessabunt vexa-  
re pios, & pij summa atque æterna pace  
fruantes in sanctitate & iustitia Domini  
seruiant sine vilo timore cadendi.

Narrauerunt mihi iniqui fabulatio-  
nes, sed non vt lex tua.

V.

Hæc est causa, cur maximè cupiat ab  
iniquorum consortio liberari, quoniam ini-  
qui tentantes pios, narrant delectationes  
mundi, quæ sunt meræ fabulæ, id est, de-  
lectationes sordidæ, fugaces, magis contactæ,  
quàm veræ; & nihil habent simile cum lege  
Dñi, quæ piè custodita delectationes sta-  
biles & solidas adfert. Potest etiam fabulatio  
referri ad hæreticorum colloquia, vt refe-  
runt Ambrosius, & alij. S. Hieron. ex He-  
bræo vertit: *Foderunt mihi superbi foveas*, sed  
sciendum est vocè, *seichoth*, esse ambiguum,  
& posse significare *fabulationes*, à verbo,  
*suach*, & *foveas*, à nomine, *sacha*. S. Hieron.  
vt verteret consequenter ad verbū, *foderunt*,  
transiit, *foveas*: non enim coherent *fabula-*

שיחות  
שוח  
שחה

T t t t ;

tiones



tiones cum verbo, *foderunt*. At Septuaginta Seniores, quia per nomen *seichoth* intellexerunt *fabulationes*, noluerunt vertere *foderunt*, nec nimis impropria, & obscura esset oratio, sed sequentes non verba, sed sensum, maluerunt vertere *narrauerunt*. & verè sensum expresserunt; nam *fodere*, in Hebraica lingua significat emere, acquirere, præparare, eruerè. igitur sensus est, *foderunt* mihi *fabulationes*, id est, emerunt *fabulationes*, vt mihi eas venderent, vel parauerunt *fabulationes*, vt mihi eas narrarent; vel *foderunt*, & eruerunt ex fodina vanitatis *fabulationes*, vt eas mihi præberent. S. August. legit, *Narrauerunt mihi delectationes*. S. Ambrosius *exercitationes*, alij aliter. Sed verbum Hebraicum significat propriè confabulationem, & submurmurationem submissa voce editam, quæ ad colloquia clandestina hæreticorum, vel impudicorum hominum rectè accommodari potest. vox Græca *ἡδοναία* ab Ambrosio dicitur esse superflua loquacitas, ab Augustino, delectabilis in sermone exercitatio, ab Euthymio, garrulitas & auaritas.

VI. *Omnia mandata tua veritas; iniquè persecuti sunt me, adiua me.*

Quia dixerat, non sicut *lex tua*: dicit nunc, *Omnia mandata tua* sunt ipsa *veritas*, id est, verissimas promissiones continent, & inde verissimas delectationes obseruantibus legem tuam adferunt. Idè in iusti narrantes ipsas *fabulationes*, *iniquè persecuti sunt me*, & tu Deus contra eorum insidias *adiua me*.

VII. *Paulo minus consummauerunt me in terra, ego autem non derelinqui mandata tua.*

Tam gravis fuit persecutio istorum, qui per dulces sermones me subuertere nitebantur, vt penè me perdiderint in terra, & ad cælum aspirare nequirem: & tamen non obtinuerunt, quoniam non derelinqui *mandata tua*.

VIII. *Secundum misericordiam tuam viuifica me, & custodiam testimonia oris tui.*

Redit ad primam petitionem, & concludit octonarium dicens, *secundum misericordiam tuam magnam viuifica me* vita beata, & sempiterna, & tunc demum perfectissimè *custodiam legem tuam*. potest etiam hoc intelligi de vita gratiæ, per quam mandata Dei custodiuntur.

Lamed.

*In æternum Domine verbum tuum permanet in cælo.*

*In generationem & generationem veritas tua fundasti terram, & permanet.*

*Ordinatione tua perseverat dies, quoniam omnia seruiunt tibi.*

In hoc octonario à firmitate promissionum diuinarum sumit Propheta argumentum ad exhortandos homines ad legem seruandam, quæ habet promissiones vitæ præsentis, & future. *In æternum Domine verbum tuum*, id est, promissio tua, *permanet in cælo*, nam etiam si in terris videatur non permanere, dum iusti opprimuntur, & iniusti exaltantur: tamen in cælo apud Deum omnino permanet. Deus enim quod promisit, implebit. Faciet enim, vt iustis breues tribulationes vertantur in gaudium sempiternum, & brevis gloria impiorum vertatur in opprobrium, & supplicium sine fine duraturum. Idem autem repetit, vel explicat, dum addit, *In generationem & generationem veritas tua*, supple *permanet*, id est, semper manet veritas promissionum, dum semper verbum promissionis impletur, in omni generatione & generatione, id est, ab initio vsq; in finem, quod est idem, quod in æternum. Probat autem Propheta stabilitatem promissionum à stabilitate ordinationum diuinarum, duobus exemplis. *Fundasti terram, & permanet*. hoc est primum exemplum, quasi dicat, fundasti terram immobilem, & semper manet immobilis, vt ordinationi tuæ obediat. *Ordinatione tua perseverat dies*. hoc est alterum exemplum. Ordinavit enim Deus, vt è contrario cælum siue sol moueretur semper, & motu suo diem efficeret; & obtemperat, & sic semper ordinatione



tionē diuinā perseverat dies. In Hebræo coniungitur verbum numeri multitudinis cum nomine numeri singularis hoc modo, *Perseuerant hic dies*, siue *hodie*, ad significandum diem transeundo & fluendo permanere, transeunt dies, & nunquam stant, & tamen semper, *hodie*, permanet. ad quod alludens Apostolus, Hebr. 3. *Adhortamini*, inquit, *vosmetipsos per singulos dies, donec hodie cognominatur*. Ratio huius tantæ firmitatis est, quod sequitur, *Quoniam omnia seruiunt tibi*: nihil enim est in rebus creatis, quod Deo creatori ad nutum non pareat.

*Nisi quod lex tua meditatio mea est, tunc fortè perissem in humilitate mea.*

*Nisi*, inquit, *in lege tua assidue meditatus fuissē*, ubi veritatem promissionum tuarum didici, *fortè perissem in afflictione mea*, tentationibus aduersariorum superatus. Pro, *meditatio*, in Hebræo est, *delectatio*, ex quo intelligimus hic agi de iucunda & dulci meditatione, quæ valde recreat animum hominis in tribulatione constituti, dum promissa diuina ob oculos interiores ponit, & cordi intus infligit. Per humilitatem autem hoc loco non significatur virtus humilitatis, sed afflictio, siue pressura, vt S. Hieronymus ex Hebræo transtulit.

*In æternam non obliuiscar iustificationes tuas, quia in ipsis viuificasti me.*

Confortatus ex meditatione promissionum, quæ in lege continentur, confidenter iam dico, *In æternam non obliuiscar iustificationes tuas, quia in ipsis*, id est, super eorum obseruationem viuificasti me, vitam gratiæ augendo, & vitam gloriæ promittendo.

*Tuus sum ego, saluum me fac, quoniam iustificationes tuas exquisiui.*

Scriptum est in Psal. 23. *Domini est terra, & plenitudo eius, orbis terrarum, & vniuersi, qui habitant in eo*: ego tamen propriè tuus sum, quia agnosco me tuum esse, & volo

tuus esse, & nullius alterius Domini volo esse, cum nulli cupiditati seruire decreuerim; ideo rectè peto, vt *me saluum facias*, id est, rem tuam conserues, ne pereat. *Quoniam iustificationes tuas exquisiui*, id est, quoniam tuus sum, & tanquam tui solius mancipium, nihil aliud quæro, nisi mandata tua, vt illa perficiam. Verè pauci sunt, qui dicere possunt, *tuus sum ego*, quia pauci sunt, qui per affectum nulli rei seruiant, nisi Deo.

*Me expectauerunt peccatores, vt perderent me: testimonia tua intellexi.*

VII.

Non sine causa dixi, *saluum me fac*, quoniam peccatores in loco opportuno ad capiendum, *me expectauerunt*, vt tentationi consentire me facerent, & sic perderent me: sed ego gratia tua adiutus *testimonia tua intellexi*, id est, intellexi, quid lex tua in tali articulo præciperet, quid promitteret, quid minaretur.

*Omnis consummationis vidi finem, latum mandatum tuum nimis.*

VIII.

Intelligens testimonia tua, ex eis cognoui, & vidi finem consummationis omnium rerum, iudicium videlicet nouissimum, in quo consummatis meritis, bonis & malis, reddentur præmia bonis, & supplicia malis. Verè igitur *latum mandatum tuum nimis*, id est, verè amplum, & fecundum est mandatum tuum, siue lex tua, cum in ea conspiciantur regulæ bene viuendi, & præmia custodientium legem, & contra regulæ declinandi vitia & supplicia præuicatorum. Posset etiam sic exponi vericulus iste, Intelligens testimonia tua, id est, legem tuam, *vidi finem omnium consummationis*, id est, omnis perfectionis vitæ esse *mandatum tuum*, id est, præceptum dilectionis, quod est *latum nimis*, cum omnia mandata comprehendat, & cum ad Deum, & omnes Angelos, & omnes homines, etiam inimicos extendatur. Alij aliter exponunt, & vnusquisque propriam expositionem adfert Ambrosius & Hieronymus, *finem omnium consummationis dicunt esse Christum*.

Augu.



Augustinus, *finem omnis consummationis* dicit esse coronam Martyrij, quia consummata perfectio est, mori pro Christo. Theodoretus dicit, omnia humana, opes, honores, & similia, quantumvis consummata & perfecta, habere finem. Euthymius per, *omnem consummationem*, intelligit omnem interitum, tum bonorum, tum impiorum. Vidit enim Propheta finem mortis omnium, esse poenam, vel gloriam.

## Mem.

I. *Quomodo dilexi legem tuam Domine: tota die meditatio mea est.*

In hoc octonario iterum redit ad encomium legis, eamque laudat à multiplici utilitate, & delectatione, quam secum adfert. Ac primum testatur amorem suum erga divinam legem, deinde reddit causam amoris enumerans eius utilitates. *Quomodo dilexi*, id est, quam vehementer dilexi *legem tuam*: signum amoris est continua conuersatio cum re amata. *Tota die*, inquit, *meditatio mea est*.

II. *Super inimicos meos prudentem me fecisti mandato tuo, quia in aeternum mihi est.*

Hæc est prima utilitas legis, quia diligenter considerata, & factis adimpleta prudentem facit hominem, ut sciat quid & quomodo, & quando, & ubi debeat loqui, & agere, vel silesce, & quiescere: quam prudentiam non habent præuicinatores, qui regulam hanc rectissimam inter loquendum & agendum non respiciunt. At igitur, *super inimicos meos*, præuicinatores videlicet legis, *prudentem me fecisti mandato tuo*, id est, per mandatum tuum, dum illud assidue meditator, & adimpleo. *Quia in aeternum mihi est*, quia perpetuo mihi adest ante oculos mentis, neque vnquam illius obliuiscor.

III. *Super omnes docentes me intellexi, quia testimonia tua meditatio mea est.*

*Super senes intellexi, quia mandata tua quaesui.*

Hæc est altera utilitas legis: quia non solum prudentiam, sed etiam sapientiam gignit. Sed quoniam tamen videtur David nimium sibi tribuere anteponendo sapientiam suam sapientiæ omnium, qui illum præcesserunt, in quibus erat Adam, Noe, Abraham, Isaac, Iacob, Ioseph, Moyse, Samuel, & alij; S. Augustinus docet hæc dici in persona Christi, qui cum esset annorum duodecim, & videretur quasi discipulus audiens legis doctores, & seniores: tamen super omnes docentes se intelligebat. S. Ambrosius in persona populi Christiani. Sed fortasse non erit necesse ad ista confugere: nam per omnes docentes intelligere possumus eos solos, qui Dauidem puerum; vel adolefcentem docuerunt, parentes videlicet, & paedagogos suos familiares. Quamuis enim non sit discipulus super Magistrum, dum discipulus est: potest tamen is, qui discipulus fuit, diligentia & studio superare eum, qui Magister ipsius aliquando fuerat. Sic Dauid facile sapientia magistros suos vicit, propter continuam meditationem in lege Domini. Idem etiam intelligimus de senibus: non enim voluit Dauid dicere, se sapientem fuisse super omnes senes, qui fuerant ab initio mundi, sed se adhuc iuuenem sapientiore fuisse multis senibus, ob studium suum assiduum in lege Domini meditanda.

*Ab omni via mala prohibui pedes meos, ut custodiam verba tua.*

*A iudicijs tuis non declinaui, quia tu legem posuisti mihi.*

Hæc est tertia utilitas legis Domini, quia facit multa vitare peccata. *Ab omni via mala prohibui pedes meos*, id est, caui ne ambularem per vias iniquorum, qui pro lege habent cupiditatem suam, quæ est lex carnis, & peccati, id est, caui ne aliqua in re delinquerem: idque *ut custodirem verba tua*, id est, legem tuam, quæ contrarium iter ostendebant. *A iudicijs enim tuis*, id est, iustissi-



à iustissimis mandatis tuis *non declinaui, quia tu legem posuisti mihi*, id est, quia hanc sanctam legem tu Dominus meus mihi dedisti: siue, vt exponit S. Augustin. Quia tu legem in corde mihi posuisti, tu fecisti per spiritum tuum, vt legem sanctam ex intimo corde meo diligere.

*Quam dulcia faucibus meis eloquia tua, super mel ori meo.*

Hæc est quarta vtilitas, quod summam adfert lex Domini se custodientibus voluptatem. *Eloquia enim Domini*, id est, mandata Domini dulcia sunt faucibus animæ, magis quam mel faucibus corporis: nihil iucundius bona conscientia, & spe supernæ beatitudinis, quam parit obseruantia legis diuinæ.

*A mandatis tuis intellexi, propterea odiui omnem viam iniquitatis.*

Probat ex lege Domini magnam voluptatem se percepisse, eo quod lex Domini bonam conscientiam pariat. Nam, inquit, *a mandatis tuis intellexi*, id est, à mandatis tuis, eruditus, prudens, & sapiens factus sum; clarior est hæc sententia in hebreo, & græco textu. Propterea odiui omnem viam iniquitatis, id est, ex hac sapientia, & prudentia acquisita ex assidua meditatione legis non solum abstinui à peccatis, sed etiam magnum odium concepi aduersus omnes iniquas actiones. Hoc autem odium mirifice conseruat animi puritatem, & sanctitatem, & gignit magnam fiduciam in Domino, vnde oritur ineffabile gaudium, pax, & tranquillitas omnibus thesauris, & voluptatibus anteposenda.

Nun.

*Lucerna pedibus meis verbum tuum, & lumen semitis meis.*

In hoc octonario laudat legem diuinam Propheta ab eximia quadam vtilitate: deinde promittit se eam obseruaturum, non obstante qualibet tribulatione. Vtilitas eximia est, quod lex Domini sit nobis in via vitæ huius, instar lucernæ ambulantibus in tenebris. *Lex enim peccati*, id est cupi-

ditas excæcat homines, siue maximas tenebras effundit, vt vera bona, & vera mala non internoscantur; & hinc ij, qui hanc legem sequuntur, id est, qui passionibus animi rapi se sinunt, in varia præcipitia ruunt: sed lex Domini has tenebras dissipat, & vera bona, ac vera mala demonstrat; & ideo, qui eam sequuntur non errant, neq; cæcutiunt, sed recto tramite ad patriam cœlestem iter faciunt. Ait igitur. Ait igitur, *Lucerna pedibus meis verbum tuum*, id est, lex tua est lucerna pedibus meis. Et hoc ipsum repetens, & declarans addit, *Et lumen semitis meis*. Lucerna enim dum illuminat semitas per quas incedendum est, dirigit pedes ambulantium: sermo est metaphoricus, sed facile intelligitur.

*Iuravi, & statui custodire iudicia iustitiæ tuæ.*

Quia lex est lux, ac proinde res optima, & vtilissima, Propheta iurat, & statuit, id est, firmissimè apud se constituit custodire ipsam legem, quam vocat *iudicia iustitiæ*, id est, iudicia iustissima.

*Humiliatus sum vsquequaque Domine: viuifica me secundum verbum tuum.*

*Humiliatus*, id est, afflictus, & vexatus sum valde, occasione legis seruandæ: quia omnes qui volunt pie viuere, persecutionem patiuntur, vt dicit Apostolus 2. Tim. 3. *sed tu Domine, viuifica me*, id est, veram vitam, quæ malis omnibus libera erit, mihi aliquando tribue secundum promissum tuum, *Si vis ad vitam ingredi, serua mandata*, Matth. 19. Posset etiam hic locus exponi de virtute humilitatis. Qui enim humiliant se ipsos, vt iugo legis se omnino subijciant, illi secundum promissionem merentur exaltari ad vitam beatam, & sempiternam.

*Voluntaria oris mei beneplacita fac Domine, & iudicia tua doce me.*

Quod iuravi, & statui custodire legem, non obstante qualibet persecutione, est  
Vuuu volun-

II.

III.

IV.



voluntarium sacrificium oris mei: hoc igitur voluntarium sacrificium oro, ut tibi sit beneplacitum, & quia ex se id non meretur, tu Domine fac illud beneplacitum, dum benignè ex gratia tua illud approbare dignaris: ac ut ritè hoc sacrificium offeram, doce me iudicia tua, id est, doce me perfectè legem tuam obseruare. Alij referunt hæc voluntaria, ad sacrificia votiuorum ouium, & hircorum, alij ad sacrificia laudis, & confessionis: sed continuatio Psalmi videtur requirere, ut per voluntaria, intelligamus spontaneum iuramentum legis custodiendæ.

V.

*Anima mea in manibus meis semper:  
& legem tuam non sum oblitus.*

Quam seriò iurauerim custodire legem tuam, & hoc tibi sacrificium spontè obtulerim, ex hoc intelligi potest, quòd quotidie de vita periclitor propter legis tuæ custodiam, & tamen ipsam legem nō sum oblitus. S. Ambrosius, & S. Augustin. dicunt; in plerisque libris legi, Anima mea in manibus tuis, & hanc veriore lectionem esse iudicant. Eodem modo legunt S. Hilar. & S. Hieronymus & in commentario Psalmorum: & sensus optimus, & verissimus est, Animas nostras in manu Dei esse, à quo pendet vita nostra, & in cuius potestate est, ut viuamus, vel moriamur. Sed in hebræo textu aperte est, In manibus meis, ut nos in editione vulgata legimus. & S. Hieronymus non solum in sua versione posuit, in manibus meis, sed etiam in epistola ad Suniam, & Fretellam dicit, LXX. Interpretes vertisse, In manibus meis, & omnes veteres græcos tractatores explicasse hoc modo, Anima mea in manibus meis est. i. in periculo vitæ sum. Quod enim manibus tenetur, facile potest cadere, vel eripi, nisi fortiter custodiatur, & defendatur: & sic intelligitur illud Iud. 12. Posui animam meam, in manibus meis. hoc enim dicit Iephthæ dum ad prælium valde periculosum pergit. & illud 1. Reg. 19. de Dauide, Posuit animam suam in manu sua, & percussit Philistheum. Itaque credibile est, LXX. Interpretes vertisse, In mani-

bis meis, sed postea à scio aliquo textum fuisse mutatum, quod videretur lectio clarior, & facilior.

*Posuerunt peccatores laqueum mihi,  
& de mandatis tuis non erraui.*

Non sine causa dixi, animam meam in manibus meis semper fuisse, quia peccatores posuerunt laqueum mihi, ut me caperent, & occiderent, & tamen ego de mandatis tuis non erraui. i. non aberravi à mandatis tuis. Hoc impletum est, cum Dauid quæreretur à Saule ad mortem, & tamen ipse Dauid semel, & iterum, cum facile posset, Saulem occidere, seque ab omni periculo liberare, noluit id facere, ne peccaret in Deum. Videl. lib. 1. Reg. c. 23. & 26.

*Hereditate acquisui testimonia tua  
in æternum, quia exultatio cordis mei  
sunt.*

Cur de mandatis tuis non errauerim, ea causa est, quia hereditate acquisui testimonia tua in æternum, id est, elegi mihi in hereditatem æternam ipsam legem tuam, quia iucundissima, & dulcissima mihi est, & summa delectationis, & exultationis causa.

*Inclinaui cor meum ad faciendas  
iustificationes tuas in æternum, propter re-  
tributionem.*

Porrò causa tantæ delectationis est merces copiosissima, quam secum adfert legis custodia. Inclinaui cor meum ad faciendas iustificationes tuas, id est, cum ab una parte lex peccati traheret me, ab altera lex tua, ego inclinaui cor meum, tanquam staterem, aut balancem ad legem tuam faciendam, propter retributionem; quia videlicet consideravi stipendium legis tuæ esse vitam sempiternam. S. Hieronymus ex hebræo vertit, Inclinaui cor meum ad faciendas iustificationes tuas propter æternam retributionem. textus hebraicus utramque lectionem admittit.

Samechi.

*Iniquos odio habui, & legem tuam  
dilexi.*

In.



In hoc octonario Propheta detestatur prauaricadores legis diuinæ, & se contrariū eis esse demonstrat. Monet autem S. Aug. non dixisse Prophetam in primo versiculo, *Iniquitatem odio habui, & legem tuam dilexi*: vt videbatur requirere ordo verborum; sed dixisse, *Iniquos odio habui, & legem tuam dilexi*, vt ostenderet, se non solam iniquitatem, sed etiam iniquos odisse: & rursum non dixisse, *Iniquos odio habui*, & iustos dilexi, sed, *& legem tuam dilexi*, vt indicaret, se non odisse iniquos, nisi quia contrarij sunt legi diuinæ, quam dilexit. Itaque odio habuit iniquos, non ratione naturæ, sed ratione iniquitatis: sicut contra diligebat inimicos, ac per hoc iniquos, non ratione iniquitatis, sed ratione naturæ.

II. *Adiutor & susceptor meus es tu, & in verbum tuum supersperaui.*

Vt non timeam iniquos, quos odi, & legem adimpleam quam dilexi, *Adiutor & susceptor meus es tu*: adiutor in lege custodienda, & susceptor in euadenda persecutione iniquorum. Et ego vicissim in verbum promissionis tuæ valde speraui.

III. *Declinate à me maligni, & scrutabor mandata Dei mei.*

Vna ex causis, cur odio habeat iniquos Propheta, est, quia eorum consortium valde impedit meditationem Verbi diuini, quæ quietem & pacem animi desiderat. Ideo cupit eos à se recedere, vt muscas molestissimas.

IV. *Suscipe me secundum eloquium tuum, & viuam: & non confundas me ab expectatione mea.*

Vt cupio iniquos à me recedere, ita cupio vt tu Domine ad me accedas, & in sinum tuum suscipias secundum eloquium promissionum tuarum, & tum verissimè viuam, cum tibi, qui vita es, coniunctus ero. Et quia de benignitate tua, non de meritis meis, id expecto, *non confundas me ab expectatione mea*.

*Adiuua me, & saluus ero. & meditabor in iustificationibus tuis semper.*

Idem alijs verbis repetit: idem enim est, *Suscipe me, & viuam, & Adiuua me, & saluus ero*. Fructus autem huius susceptionis erit, vt sine impedimento semper meditari valeat in lege Domini.

*Spreuisti omnes discedentes à iudicijs tuis, quia iniusta cogitatio eorum.*

Ostendit nunc, quod si ipse odio habet iniquos, & à se recedere cupit, id facit exemplo Dei, qui iniquos iustissimè execratur. *Spreuisti*, inquit, tanquam rem nullius momenti, *omnes discedentes à iudicijs tuis*, id est, omnes iniquos, qui discedunt à via legis diuinæ. *Quia iniusta cogitatio eorum*, id est, quoniam ipsi cogitant, se non debere subdij legi Dei, nec ab ea pendere; qua cogitatione nihil iniquius esse potest, cū omnis creatura summo iure Creatori subijci debeat. Hæc fuit cogitatio Luciferi, qui similis altissimo, non autem ei subditus esse voluit. Eadem fuit cogitatio primorum parentum, qui cupierunt esse sicut Dij. Eadem est cogitatio omnium superbiorum, qui dicunt in corde suo; *Quis noster Dominus est?* Hos igitur spernit Deus, & non multum curat, si millia eorum pereant in æternum, quia quantò plures ipsi se æstimant, tantò minoris fiunt à Deo.

*Præuariantes reputaui omnes peccatores terræ; ideo dilexi testimonia tua.*

Mouet hoc loco magnam quæstionem S. August. Quomodo omnis peccator præuicator dici possit, cum Apostolus dicat, *Vbi non est lex, nec præuicatio*, Rom. 4. & rursum, *Qui sine lege peccauerunt, sine lege peribunt*, Rom. 2. Responder, illud, *Vbi non est lex, ne præuicatio*; intelligi de lege in vniuersum: illud autem, *Qui sine lege peccauerunt*; intelligi de lege scripta tantum: proinde omnes peccatores dicendi sunt præuicadores, quia omnes præuariantur legem naturalem scriptam in cordibus. Sed cur Propheta hoc dicit? vt ostendat peccatum, quod est maximum

Vuuu 2 malo-



malorum, non aliunde nobis accidere, nisi ex præuacatione legis. Subiungit, *Ideo dilexi testimonia tua*, id est, vt tam magnum malum effugiam, *dilexi legem tuam*. S. Hieronym. ex hebræo vertit, *Quasi scoriā reputasti omnes peccatores terra*. Sed LXX. Interpretes, per vocem, *fighim*, non intellexerunt scoriā à voce, *fig*, sed recedentes, quod est idem cum, præuacantes: nam verbum, *sug*, significat recedere, inde, *sughim*, significat recedentes. *Iod* autem & *vau* sunt literæ permutabiles, sic etiam non legerunt, *chisbatti*, quod est, *reputasti*, sed *chisbatti*, quod est *reputasti*.

ס'ג'ים  
ס'ג'  
ס'ג'  
ס'ג'ים  
ח'שבת  
ח'שבת  
VIII.

*Confige timore tuo carnes meas, à iudicijs enim tuis timui.*

Postulat in fine confirmationem in timore Dei, vt in custodia legis per eum timorem perseueret. *Confige*, inquit, *timore tuo carnes meas*, id est, cupiditates meas carnales, vt se commouere non possint, iuxta illud Apostoli, *Qui autem sunt Christi, carnem suam crucifixerunt cum vitijs, & concupiscentijs*, Gal. 5. *A iudicijs enim tuis timui*, id est, quoniam iam cœpi timere à iudicijs tuis penas horribiles, comminanti- bus, ideo cupio stabiliri in hoc sancto timore, vt ab eo nunquam diuellar. Ex hebræo S. Hieronym. vertit, *Horripilauit caro mea*: sed sciendum, quod verbum, *samar*, non solum significat horrere sed etiam clavis configere: nam ex hoc verbo deducitur nomen *masmer*, quod significat clauum. Parum autem refert, quod hic ponatur verbum præteriti temporis, & modi indicatiui; nam eadem literæ mutatis punctis faciunt imperatiuum: proinde recte Septuaginta vertunt, *confige*, vel, vt Patres legunt, *confige clauis*.

Hain.

I. *Feci iudicium, & iustitiam, non tradas me calumniatoribus me.*

In hoc octonario petit gratiam liberationis à calumniatoribus, & auxilium ad legē perfectē adimplendam. *Feci*, inquit, *iudicium, & iustitiam*, id est, reddidi unicuique

suum; ideo æquum est, vt non tradas me calumniatoribus mihi: calumniatores nostri perpetui, Dæmones sunt, quibus tradimur à Deo, quando permittimur tentari ab illis, vel potius quando Deo deserente superamur, & tentantibus consentimus.

*Suscipe seruum tuum in bonum, non calumnientur me superbi.*

*Feci*, inquit, *iustitiam*, sed vt semper faciam, & non deficiam faciendo, *suscipe seruum tuum in bonum*, illum dirigendo. Clarior est textus hebraicus, vbi habetur, *Dirige*, siue ordina; & apta seruum tuum ad bonum, vt semper placeat illi bonum: & hinc fiet, vt non calumnientur mihi superbi, siue homines, siue dæmones. Qui enim bene confirmatus est in bono, & bene aptatus, vt vbique, & semper bonum illi placeat, ita perseueranter bene se gerit, vt nihil sit cur timeat calumniatores.

*Oculi mei defecerunt in salutare tuum, in eloquium iustitiæ tuæ.*

Confirmat, se valde ardentem desiderare perfectam illam directionem ad bonum, quæ in vita æterna dabitur electis. *Oculi mei defecerunt* præ desiderio, respicientes assidue in salutem tuam, quæ de cælo nobis adueniet; & *in eloquium iustitiæ tuæ*, id est, in promissionem tuam fidelissimam. Vide quæ dicta sunt ad versiculum primum, & secundum literæ *Caph*.

*Fac cum seruo tuo secundum misericordiam tuam: & iustificationes tuas doce me.*

Pergit in oratione, ac petit, vt Dominus operetur secum; non secundum merita ipsius, sed secundum misericordiam suam, quæ in eo potissimum consistit, vt doceat *iustificationes suas*, id est, intimè persuadeat, bonum esse implere, & custodire legem Domini, atq; hoc modo doceat non tam scire, quam facere. Quod fit quando Deus infundit magnam charitatem, non quando solum donat scientiam, quæ sine charitate inflat, non ædificat.



*Servus tuus sum ego, da mihi intellectum, ut sciam testimonia tua.*

Ista tam frequens petitio eiusdem rei, signum est magni desiderij. *Servus tuus sum ego*, ac per hoc teneor mandatis tuis obedire: *da mihi igitur intellectum*, id est, fac me intelligere testimonia tua, ut illa perfecte addiscam. Vide primum versiculum literæ, *Id*, qui est huic similis.

*Tempus faciendi Domine; dissipaverunt legem tuam.*

Hic versiculus duobus modis exponi solet. sancti Patres Hilarius, Ambrosius, & Augustinus exponunt de gratia Saluatoris, ut sensus sit, O Domine iam tempus est faciendi, quia satis docuisti verbis, satis mandasti; nunc tempus est, ut facias, ut exemplo doceas, ut carnem sumas, ut obedientiam usque ad mortem crucis exhibeas, ut gratiam dones; qua iustificatio legis impleri possit à nobis: *nam dissipaverunt legem tuam*, Iudæi videlicet, quibus data erat. At Græci, Theodoretus, & Euthymius, quos plerique recentiorum sequuntur, exponunt de punitione sceleratorum, ut sensus sit, *Tempus est Domine*, ut facias iudicium aduersus impios, eosque punias, *quoniam dissipaverunt legem tuam*, id est, solum utcumque violauerunt, sed penitus dissipaverunt, cum nihil eius obseruent. Vtraque bona est expositio, sed videtur illa magis mystica, hæc magis literalis. S. Augustinus legit, *Tempus faciendi Domino*. S. Ambrosius, *Tempus faciendi Domine*, ut habet editio nostra vulgata. S. Hilarius utroque modo hunc versiculum legit. In hebraico, & græco textu habetur, *Domino*; sed idem est sensus, dummodo illud, *faciendi*, tribuatur Deo, non homini, & sensus sit, Tempus est, ut tu Domine facias.

*Ideo dilexi mandata tua super aurum, & topazion.*

*Propterea ad omnia mandata tua dirigebar: omnem viam iniquam odio habui.*

*Quia multi dissipaverunt legem tuam,*

& ob hoc video illis grauissimum imminere supplicium: ideo ego ex aduerso magis incensus sum amore legis tuæ, & pluris illam facio plus quam aurum, & lapides pretiosos: ideo etiam non solum legem diligebam, sed etiam custodire satagebam, *dirigebar enim ad omnia mandata tua*, id est, recte ambulabam per viam mandatorum tuorum, non declinans ad dexteram, vel sinistram: imo etiam *omnem viam iniquitatis*, id est omnem legem carnis, & peccati odio habui, & declinaui. Porro per vocem, *topazion*, quod est in Hebræo, *paz*, significatur lapis pretiosus, quem dicunt aurei coloris esse, & valde lucidum. vide Strabonem libr. 6. & Plinium libr. 37. cap. 8. eandem vocem habemus in Psalm. 18. vbi LXX. interpretes, & S. Hieronymus verterunt, *lapidem pretiosum*: quia videbant Prophetam in vna specie intellexisse genus ipsum lapidum pretiosorum.

Phe.

*Mirabilia testimonia tua, ideo scrutata est ea anima mea.*

In hoc octonario iterum Propheta reuertitur ad laudandum legem, & ad petendam gratiam ad eandem legem perfecte seruandam. Laudat igitur legem, quod admirabilis sit, & ideo eam scrutatus sit diligenter. At Deuter. 30. vbi legimus, *Mandatatum hoc non supra te est*; in hebræo habetur, *Mandatatum hoc non mirabile est*. Respondeo, leges Domini siue morales, siue iudiciales, siue ceremoniales, non esse mirabiles, quod attinet ad sensum literalem; nam apertæ sunt, & faciles; & qui eas non seruant, non possunt excusari ab ignorantia. & hoc affirmat Moyses in Deuteronomio. At, quod attinet ad mysticos sensus, præsertim legum ceremonialium, mirabiles, & obcuræ sunt, cum per illas, figurentur omnia mysteria Christianæ religionis: atque hoc significare videtur hoc loco Propheta. Præterea Decalogus, quo lex Domini potissima continetur, hoc ipso valde mirabilis est, quod tam clavis, & apertis sententijs conscriptus sit, cum tamen in summa breuitate

Vuuu 3

com-



complectatur omnia principia iustitiæ, ad quæ reducuntur omnes leges, quæ factæ sunt, & quæ fient. Omnes enim aliæ leges, quæ sunt innumerabiles, & maxima volumina repleuerunt, & deinceps replebunt; omnes, inquam, vel sunt conclusiones, vel determinationes legum decalogi. Itaque sicut parua semina mirabilia sunt, quia virtute continent magnas arbores: sic Decalogus mirabilis est, quia virtute continet omnes leges totius mundi.

II.

*Declaratio sermonum tuorum illuminat: & intellectum dat paruulis.*

Quia dixerat, mirabilia esse mandata divina, nunc addit, quod si declarentur vel ab ipso Deo per infusionem luminis diuini, vel ab aliquo perito doctore, mirificè mentem illustrent. Declaratur autem lex, tum quando aperiuntur mysteria figurarum, quæ in lege ceremoniali continentur: tum quando deducuntur conclusiones ex lege moralis: tum denique quando decreta legis iudicialis ad facta particularia applicantur. Ex hebræo vertit S. Hieron. Ostium sermonum tuorum: sed vox, *petach*, non solum ostium, sed etiam apertionem, ac per hoc declarationem significat. Quod sequitur. *Et intellectum dat paruulis*, significat, legis declarationem paruulis esse necessariam, id est, simplicibus, & ignorantibus. Fortasse etiam, ut S. Augustin. monet, per paruulos, intelligere debemus, humiles. Isti enim facilius res diuinas addiscunt, iuxta illud Matth. 11. *Confiteor tibi Pater, quia abscondisti hæc à sapientibus, & prudentibus, & revelasti ea paruulis*, ijs videlicet, qui non sunt in oculis suis sapientes, nec prudentes.

III.

*Os meum aperui, & attraxi spiritum, quia mandata tua desiderabam.*

Et ego, ut vnus ex paruulis, os meum interiorius aperui orando & petendo, & attraxi spiritum bonum, spiritum scientiæ, & pietatis, quo mandata intelligere, & implere possem. Nā ipsa mandata tua intelligere, & implere desiderabam. Sumpta est metaphora à respiratione corporali: cum enim grauatur aliquo magno labore, ac penè suffoca-

mur, tum aperiunt os, & ashelantes respiramus, & melius habemus.

*Aspice in me, & miserere mei, secundum iudicium diligentium nomen tuum.*

Aperiendo autem os ad orandum ita dixi, *Aspice in me, & miserere mei*, id est, aspice in me oculis pietatis, & miserere mei laborantis sub onere preceptorum tuorum, quæ meis viribus implere non possum: *miserere, inquam, mei secundum iudicium diligentium nomen tuum*, id est, iuxta consuetudinem, qua vteris erga amicos tuos, qui te in veritate diligunt: vox enim hebraica, *mispal*, significat iudicium, morem consuetudinem, modum, habitum, & alia. Sed quia LXX. Interpretes verterunt, *κρίμα*, & noster interpretes, iudicium, in eundem sensum exponere debemus hoc modo, *Miserere mei secundum iudicium*, quo vteris in iudicandis amicis tuis, qui te diligunt.

*Gressus meos dirige secundum eloquium tuum, & non dominetur mei omnis iniustitia.*

In hoc misereberis mei *secundum iudicium diligentium nomen tuum*, si direxeris gressus meos secundum eloquium tuum, id est, si per gratiam tuam feceris, ut ego rectam viam ingrediar ambulans secundum directionem legis tuæ; & sic *non dominetur mei omnis iniustitia*. i. nullam iniustitiam committam, quæ me captiuum teneat: nam, ut Dominus dicit Ioan. 8. *Qui facit peccatum seruus est peccati.*

*Redime me à calumnijs hominum, ut custodiam mandata tua.*

Gressus meos dirige tunc potissimum, cum periculum est, ne perturbatus calumnijs declinem à recta via. Calumnia enim perturbat sapientem, & perdit robur cordis illius, ut dicit Ecclesiastes cap. 7. *Redime me à calumnijs hominum*, id est, libera me à calumnijs hominum, ut animo tranquillo custodiam mandata tua. Non est facienda vis in verbo, *redime*, nam apud hebræos passim accipitur pro, libera.

*Faciem*



*Faciem tuam illumina super seruum tuum, & doce me iustificationes tuas.*

Quod supra dixerat, *Aspice in me*, idem alijs verbis repetit, dicens, *Faciem tuam illumina super seruum tuum*. Sicut enim Sol, cum interpositione nubium obscuratur, priuat nos calore, & lumine: ita Deus cum nos gratia sua non adiuuat, videtur abscondere faciem suam, vel tenebris cooperire; & contra, cum nos gratia suae lumine collustrat, videtur nubium obstacula dissipare, & nobis serenam faciem ostendere. Ait igitur, *Faciem tuam illumina super seruum tuum*, id est, sereno me vultu respice, & lumine ad me transfuso *doce me iustificationes tuas*, id est, legem tuam intelligere, & seruare.

*Exitus aquarum deduxerunt oculi mei, quia non custodierunt legem tuam.*

Quam vehementer Dauid legem dilexit, ostendit hactenus tot precibus toties repetitis pro gratia seruandae legis: nunc demonstrat ex magno dolore, quem concepit ex praeparatione: non enim dicit, se vnam vel alteram lacrymam fudisse, *sed riuus aquarum*, id est, lacrymarum ex oculis, quasi ex fontibus produxisse, *quia non custodierunt legem Domini*. Tamen si enim peccatum, id est, transgressio legis, procedat à voluntate, siue à corde: tamen instrumenta peccati nunc sunt oculi, nunc lingua, nunc manus. Peccati autem grauissimi, quod Dauid aliquando commisit, & pro quo laudabat per singulas noctes lectum suum, instrumenta fuerunt oculi. Vidit enim nimis curiose mulierem nudam, dum se lauaret; inde exarsit in concupiscentiam, inde processit ad adulterium, & homicidium. Theodoretus, & Euthymius, quos aliqui recentiores sequuntur, dicunt Dauidem fuisse peccata aliorum, & sic exponunt illud, *Quia non custodierunt legem tuam*. Sed sancti Patres nostri, Hilarius, Ambrosius, Hieronymus, & Augustinus constanter affirmant, Dauidem loqui de peccato suo, non de alieno.

*Tfide.*

*Iustus es Domine, & rectum iudicium tuum.*

In hoc octonario laudatur lex Domini à summa rectitudine, & iustitia: ac primum demonstrat Dauid esse iustissimam legem, quoniam auctorem habet iustissimum, in quem iniustitia cadere non potest. Ait igitur, *Iustus es Domine*, id est, iustus per antonomasiam, & solus iustus ea iustitia, cum qua admisceri iniustitia nequeat, iuxta illud 1. Ioannis 1. *Deus lux est, & in eo tenebrae non sunt ulla*. Et *rectum iudicium tuum*, id est, & consequenter rectum, ac iustum & iudicium, decretum, mandatum tuum. Nam in hoc Psalmo per iudicium, ferè semper ipsa lex intelligitur. Quamquam etiam illud verum est, iudicium Dei, quo distribuit poenas, & praemia, semper esse iustum, licet interdum non appareat eius iustitia.

*Mandasti iustitiam testimonia tua, & veritatem tuam nimis.*

Ostendit legem Dei non solum esse iustam, quia procedit à Deo iusto, sed etiam quia continet ipsam iustitiam. *Mandasti*, inquit, *iustitiam testimonia tua*, id est, praecipisti nobis testimonia tua, quae sunt ipsa iustitia, & *veritatem tuam nimis*, id est, & sunt ipsa veritas omnino. S. Thom. 1. 2. q. 100. artic. 8. ex hoc principio colligit, legem Decalogi esse omnino indispensabilem, quia continet ipsum ordinem iustitiae, quomodo si quis iuberet, ut nullus peccet; vel, ut nemo sit iniquus, lex esset omnino indispensabilis, quia non potest dari casus, in quo liceat peccare, vel iniquum esse.

*Tabescere me fecit Zelus meus, quia obliti sunt verba tua inimici mei.*

Propter hanc tantam aequitatem legis tuae, dolore afficiebar, ita ut etiam tabescerem, & languerem praeter zelo cum viderem homines, etiam si inimicos meos, obliuisci verborum tuorum, id est, tam vtilium praecceptorum tuorum. In graeco legitur, *Zelus tuus*, & sic legunt Hilarius, Ambrosius, Hiero-



Hieronymus, Augustinus, & Theodoretus in commentario Psalmorum. Sed nostra lectio conformis est hebraico textui; nec defunt antiqui codices, qui nostrae lectioni faueant. Sanctus enim Augustinus testatur, alios codices habere, zelus meus, alios zelus tuus, alios, zelus domus tuæ: sensus autem semper est idem, ut notum est.

IV.

*Ignitum eloquium tuum vehementer, & seruus tuus dilexit illud.*

Iterum docet Propheta legem Dei esse iustissimam, & purissimam, ex similitudine ad aurum igne probatum. Dicitur enim eloquium Dei ignitum vehementer, quia similis est lex Dei, aut in fornace ignis constituto, ubi non læditur, quia purum est ab omni sordē. Nam in textu hebraico habetur, *zerupha*, quod significat, *probatum*, & *examinatum igne*. Neque dici potest LXX: Interpretes non legisse, *zerupha*, sed, *serupha*, quod proprie *ignitum* significat: nam in hoc octonario singuli versus incipiunt per litteram *tsade*, & hoc vocabulum est initium versiculi. Itaque certum est hoc loco per *ignitum*, intelligi probatum, & examinatum igni, ac per hoc significari legem Domini esse purissimam ab omni iniustitia, ut est aurum igne examinatum. Simile habetur in Psalmo II. *Elogia Domini casta, argentum igne examinatum*. Vnde etiam sequitur, ut eadem lex summo amore diligenda sit, & merito David adiungit, *Et seruus tuus dilexit illud*. Neque tamen est falsum, sed verissimum, legem Domini esse etiam igneam, ut dicitur Deuter. 33. *In dextera eius ignea lex*; tum quia instar ignis illuminat, & purificat: tum quia finis eius est charitas, quæ est ignis diuinus.

V.

*Adolescentulus sum ego, & contempnus: iustificationes tuas non sum oblitus.*

Hoc refert David ad comparisonem fratrum suorum, quasi dicat, Ego sum minimus inter fratres meos (hoc enim proprie significat vox hebræa, *zahir*) & con-

temptus à patre, & fratribus; & tamen exaltatus ad Regnum, & à Deo præ omnibus honoratus, quia *iustificationes tuas, non sum oblitus*. Vide libr. I. Reg. 19. S. Ambrosius, & S. Augustinus exponunt mystice de populo Christiano, qui est frater iunior respectu fratris senioris populi Iudaici, & ab illo contemptus, sed à Deo magis dilectus, quia iustificationes Domini non est oblitus, quas populus Iudaicus oblitus est.

*Iustitia tua iustitia in æternum, & lex tua veritas.*

Hæc est repetitio, & declaratio secundi versiculi. *Iustitia enim Domini*, id est, iustissima lex Domini, est iustitia æterna, quia immutabilis, & indispensabilis, & simul est veritas, quia nihil falli continet; promissiones eius, & comminationes omnino impleri debent.

*Tribulatio, & angustia inuenerunt me, mandata tua meditatio mea est.*

Ex hac veritate fit, ut in omni tribulatione consoletur me legis tuæ assidua meditatio. *Tribulatio, & angustia inuenerunt me*, id est, quotiescunque tribulatio & angustia inuenerunt me, *mandata tua meditatio mea est*, id est, id remedij accipio, ut mediter, & oblecter in mandatis tuis. considerandis.

*Æquitas testimonia tua in æternum, intellectum da mihi, & viam.*

Idem alijs verbis dicit, quod in secundo & sexto versiculo: nam per æquitatem hoc loco iustitia accipienda est, ut ex textu hebraico constat. *Æquitas testimonia tua in æternum*, id est, præcepta tua sunt æterna iustitia, quia semper iustissima sunt: ideo peto, ut des mihi intelligentiam præceptorum tuorum, ut ea custodiendo viam quæ si non custodirem, continuo morerer.

Coph.

*Clamavi in toto corde meo, exaudi me Domine, iustificationes tuas requiram.*

In hoc octonario Propheta desiderium suum erga diuinam legem ardenti oratione de-

צוּפָה  
שְׂרֹפָה

צִעִיר



me demonstrat : ac in primo quidem , & secundo versiculo exprimit vehementiam desiderij per clamorem ; in tertio , & quarto per horam intempesiuiam. *Clamauit*, inquit, *in toto corde meo*, id est, toto affectu, totisque viribus clamauit : idè *exaudi me Domine*. Sicut enim vocem corporalem submissam non facile exaudimus , clamorem autem non possumus non exaudire : ita Deus orationem frigidam, & remissam, quasi non audierit, non admittit : ardentem autem, & magno desiderio emissam, quasi non possit non audire, facile admittit. *Iustificationes tuas requiram*, id est, exaudi me, vt iustificationes tuas, id est, præcepta tua diligenter requiram : vel, exaudi me, & ego gratia tua adiutus præcepta tua requiram, quod in idem recidit.

*Clamauit ad te, saluum me fac, vt custodiam mandata tua.*

Potest hoc intelligi de salute in spe, quæ habetur per gratiam in hoc sæculo, & de salute in re, quæ habetur per gloriam in futuro sæculo. *Clamauit ad te*, id est, magno desiderio orauit : *saluum me fac*, per gratiam, quæ est salus inchoata, *vt custodiam mandata tua*, quantum in hoc sæculo fragilitas humana permittit : & rursum, *saluum me fac* in æterna vita, vt custodiam mandata tua sine ullo timore præuaticandi.

*Præueni in maturitate, & clamauit : quia in verba tua supersperauit.*

Hunc locum corruptum esse aliqui putant, quia S. Augustinus legit. *Præueni in immaturitate*. Sed credendum est potius corruptum fuisse codicem, quem habuit S. Augustinus : nam sanctus Hilarius, sanctus Ambrosius, & sanctus Hieronymus in commentario, & alij legunt, vt nos habemus, *in maturitate*. Sciendum est autem verbum, *maturare*, esse ambiguum, & aliquando significare, perficere, vt cum dicimus maturari fructus, aliquando, accelerare, & festinare, qua notione dixit Poeta, *Maturate fugam*, li. 1. *Æneid.* & mature venisti, tam significat, tēpore opportuno venisti, quam satis citò venisti. Hoc igitur loco maturi-

ras, non est opportunitas temporis, sed acceleratio, & anticipatio horæ, & sensus est, *Præueni in maturitate*, id est, præueni tempus surgendi, & in acceleratione, & festinatione antequam dies illucesceret, cum adhuc tempus dormiendi esset, ego præ desiderio anticipaui vigilas, & in oratione mea clamauit, quia valde sperari in verba promissionum tuarum.

*Præuenerunt oculi mei ad te diluculo : vt meditarer eloquia tua.*

Idem repetit alijs verbis. *Præuenerunt*, inquit, *oculi mei* tempus vigilandi, & *diluculo*, id est, valde mane, ante ortum Solis ad te respicere ceperunt, vt gratia tua adiuuante meditarer eloquia tua.

*Vocem meam audi secundum misericordiam tuam Domine, & secundum iudicium tuum viuifica me.*

Pergit in oratione, quam diluculo, remotis eius temporalibus, in magno silentio rerum omnium, attentissimo animo faciebat. *Vocem meam*, inquit, audi non secundum merita mea, sed secundum solitam misericordiam tuam & secundum iudicium tuum, quo reddis quod promissisti, *viuifica me* conseruans & augens vitam spiritualem, quam dedisti, & in futuro sæculo perficiens & consummans, vt amplius mori non possim.

*Appropinquauerunt persequentes me iniquitati, a lege autem tua longè facti sunt.*

Non sine causa peto viuificari ; quoniam non desunt persecutores, qui temptationibus assiduis mortificare me satagunt : qui persecutores, siue homines, siue demones, *appropinquauerunt iniquitati*, & *a lege tua longè facti sunt*, id est, iniquitatem diligunt, illi adherent, illam persuadere alijs conantur : sicut è contrario legem tuam oderunt, illam fugiunt, illam omnibus inuisam reddere student. S. Augustinus, S. Ambrosius, & S. Hieronymus in commentario legunt, *Appropinquauerunt persequentes mihi : inique, siue iniquitate*, id est,

X x x

cum



eum iniquitate: ita ut appropinquatio sit ad hominem, ut ei noceant, non ad iniquitatem, ut illi coniungantur. Et quidem vox græca ambigua est, & tam iniquitate, quam iniquitati reddi potest. vox hebræa, ut nunc se habet, fauet lectioni S. Augustini: nam ad verbum sic reddi potest, *Appropinquauerunt persecutores iniquitatis*, id est, persecutores iniquissimi appropinquauerunt, supple *ad me*. Tamen omnino credibile est verba hebraica non esse legenda, *rodephe zimma*, id est, persecutores iniquitatis, sed *rodephei zimma*, id est, persecutores mei iniquitati, quæ lectio est nostræ editionis vulgata, & habetur apud S. Hilarium, & cum lectione Græca bene cohæret: & optimè respondet verbis sequentibus, *A lege autem tua longè facti sunt*: ubi Propheta opponit iniquitatem legi & dicit, Persecutores suos appropinquasse iniquitati, & recessisse à lege: tamen uterque sensus bonus est.

VII. *Prope es tu Domine. & omnes viæ tuæ veritas.*

Quamvis persecutores mei à lege tua longè facti sint, tamen à te longè fieri non potuerunt, quia *tu prope es* illis per iustitiā, & *omnes viæ tuæ veritas*, id est, omnes leges, omnia iudicia tua iustissima sunt. Itaque manum tuam punientem ipsorum scelera fugere non potuerunt. Mihi quoque prope es tu Domine per auxilium, & quia omnes viæ tuæ veritas, non patieris, ut mihi noceant persecutores: nam & si fortè dabis illis potestatem in corpus meum, non dabis in animam meam, & tandem omnis persecutio in coronam gloriæ conuertetur.

VIII. *Initio cognoui de testimonijs tuis, quia in æternum fundasti ea.*

Quod autem omnes viæ tuæ sint veritas, imò etiam æterna veritas, *Initio cognoui de testimonijs tuis*, id est, iam inde à primo tempore, quo primum cœpi intendere in mandata tua, cognoui ex ipsis dum ea attentè considerarem, *quia in æternum fundasti ea*, id est, quod sint æternæ veritatis, & planè immutabilia & indispensabilia. Nam iam supra dictum est, ea esse immutabilia, quia

continent ordinem iustitiæ, & ipsam legislatoris intentionem.

Res.

*Vide humilitatem meam, & eripe me, quia legem tuam non sum oblitus.*

*Iudica iudicium meum, & redime me, propter eloquium tuum viuifica me.*

In hoc octonario rursus Propheta orationem fundit ad Deum pro liberatione ab inimicis, siue dæmonibus, siue hominibus, qui eum tentationibus suis ad præuaricationem legis pettrahere nitebantur. *Vide*, inquit, *humilitatem meam*, id est, afflictionem & tribulationem meam, & *eripe me, quia legem tuam non sum oblitus*, id est, quamvis legem non perfectè custodiam, tamen non post tergum meum eam abieci, sed recordor & recogito eam, & custodire desidero, ideo æquum est, ut eripias me à tentantibus inimicis, & perficias in me, quod per gratiam tuam cœpisti. *Iudica igitur iudicium meum*, id est, iudica causam meam, & *redime me* per iudiciariam sententiam tuam de manu inimicorum meorum, *propter eloquium tuum viuifica me*, id est, propter promissionem tuam, siue propter legem, quam constituisti de præmijs bonorum, & supplicijs malorum, viuifica me, vitam gratiæ augendo, & vitam gloriæ suo tempore largiendo.

*Longè à peccatoribus salus, quia iustificationes tuas non exquisierunt.*

Dixi viuifica me, quia legem tuam non sum oblitus. Scio enim longè esse à peccatoribus salutem, quia iustificationes tuas non exquisierunt. Nam in primis Dæmones, qui per antonomasiam peccatores dici possunt, longissimè absunt à salute, quia nunquam ad eam peruenient, eo quod legem Domini non exquisierint; sed eam potius superbiendo contempserint. Alij quoque peccatores tam longè à salute absunt, quam longè absunt à lege Domini exquirenda: neque enim frustra dictum est à Domino, *Si vis ad vitam ingredi, serua mandata*, Matth. 19.

Miseri-



*Misericordie tue multa Domine : secundum iudicium tuum viuifica me.*

Quamuis seuerissimè punias eos, à quibus longè fecisti salutem tuam: tamen multa sunt etiam misericordia tua, ideo peto, vt secundum iudicium tuum, quo misericorditer iudicas eos, qui faciunt misericordiam, & qui diligunt legem tuam, viuifices me.

*Multi qui persequuntur me, & tribulant me, à testimonijs tuis non declinaui.*

Non sine causa postulo, vt viuifices me, quia multi sunt hostes mei visibiles, & plures inuisibiles, qui me mortificare contendunt: & tamen ego gratia tua adiutus à testimonijs tuis, hoc est, à præceptis tuis, quæ sunt quasi rectissima via, non declinaui, neque ad dexteram, neque ad sinistram.

*Vidi prauaricantes, & tabescebam: quia eloquia tua non custodierunt.*

Ostendit in hoc versiculo Propheta verū spiritum charitatis, quia non tam molestè ferebat persecutores ob propriam afflictionem, quàm ob iniuriam Dei: quod idem antea dixerat illis verbis, *Defectio tenuit peccatoribus derelinquentibus legem tuam, & rursum, Tabescere me fecit zelus meus, quia obliui sunt verba tua inimici mei.*

*Vide, quoniam mādāta tua dilexi Domine, in misericordia tua viuifica me.*

Ego videns prauaricantes, tabescebam; æquum est, vt tu videns me diligentem mandata tua, misericorditer me viuifies.

*Principium verborum tuorum veritas, in æternum omnia iudicia iustitiæ tue.*

Duobus modis potest intelligi præfens versiculus. Vno modo, vt sensus sit, verba tua procedunt à veritate, vt à suo principio, & quasi fonte, & ideo verissima sunt, & in æternum manent iudicia iustitiæ tuæ, quæ sunt, vt pios maneat præmium, & impios poena: ita exponit S. Aug. Altero modo, vt sit sensus, Principium verborum tuorum, quādo videlicet cœpisti loqui cum Adamo,

& iubens sub poena mortis, ne tangeret lignum scientiæ boni & mali; veritas fuit, id est, verissimum fuit, & iudicia iustitiæ tuæ, quibus peccata tunc punire cœpisti, sempiterna sunt: ita exponit Euthymius.

Scin.

*Principes persecuti sunt me gratis, & à verbis tuis formidauit cor meum.*

In hoc octonatio demonstrat Propheta constantiam suam in custodienda lege Domini, & desiderium cauendi ab omni prauaricatione. Principes, inquit, persecuti sunt me gratis, id est, Saul Rex sine vlla causa me persecutus est, reddens mala pro bonis: vt etiam postea fecit. Isboser filius Saulis, qui duce Abner iniussè mecum bella gessit; & tandem idem fecit filius meus Absalon, qui Regnum sibi usurpare, meque de solio exturbare conatus est. Et à verbis tuis formidauit cor meum, id est, ego tamen tantis tentationibus non succubui, vt eis nocerem, sed timens mandata tua, semel atque iterum Sauli peperci, & mortem Isboser vitus fui, & Absalonem desleui, reddens bona pro malis. S. Ambrosius, & S. Augustinus hæc verba accommodant sanctis Martyribus, quæ persecutionem iniustissimam passi ab Imperatoribus infidelibus, plus timuerunt Deum, vt fidem conseruarent, quàm minas Principum; vt fidem negarent.

*Latabor ego super eloquia tua, sicut qui inuenit spolia multa.*

Non solū timui à verbis tuis, sed etiam dilexi verba tua, & ideo latabor super eloquia tua, cum dabitur occasio illa adimplendi, sicut latatur, qui peracto prælio inuenit multa spolia hostium deuictorum. Aptissima similitudo, tum quia David vir bellicosus erat, & assuetus prælijs, tum quia in præceptis Dominicis obseruandis cum diabolo acriter pugnandum est, & ex ea pugna, qui victor reuertitur, inuenit illustres coronas à Deo paratas omnibus hostium spolijs pretiosiores.

*Iniquitatem odio habui & abominatus sum, legem autem tuam dilexi.*

XXXX 2

Iterum



Iterum repetit amorem suum erga legem diuinam, & odium erga iniquitatem. Quod erat manifestum indicium amoris Legislatoris: nam & Dominus in Euangelio dicit, *Si quis diligit me, sermonem meum seruabit*, Ioan. 14. & ibidem, *Qui habet mandata mea, & seruat ea, ille est qui diligit me*. Felix, qui Spiritu S. reddente testimonium Spiritui eius, dicere potest, *Iniquitatem odio habui, & legem tuam dilexi*.

IV. *Septies in die laudem dixi tibi, super iudicia iustitiæ tuæ.*

Et hoc est charitatis signum, sine intermissione Deum laudare, quod iudicia eius iustissima sint, & leges ipsius summam iustitiam in se contineant. Quamuis per numerum septenarium intelligatur hoc loco frequentissima laus, quomodo intelligitur frequens lapsus, cum dicitur, *Septies in die calidus iustus*, Prou. 24. tamen non sine causa ex hoc loco Ecclesia vsum septem horarum canonicarum instituisse videtur. Nam cum ad imitationem tam sancti Regis vellet filios suos frequentissime Deum laudare, determinauit septenarium numerum, cui si addatur octaua hora, de qua dictum est supra, *Media nocte surgebam ad confitendum tibi*, fiet, ut tertia quaque hora Trinitas Deus à fidelibus laudetur, ut S. Cyprianus notauit in serm. 6. qui est de oratione Dominica.

V. *Pax multa diligentibus legem tuam, & non est illis scandalum.*

Magna, & verissima laus est dilectionis legis diuinæ: nam qui diligit legem, diligit Deum legislatorem: qui autem diligit Deum, diligit omnia in Deo, ac per hoc nullum habet ex parte sua inimicum, sed cum omnibus ex parte sua pacem habet. Deinde, *Diligentibus Deum omnia cooperantur in bonum*, ut dicit Apostolus Rom. 8. Nemo autem nocere potest ei, cui omnia cooperantur in bonum: quare qui diligit Deum, cum omnibus pacem habere debet: & ideo Apost. ad Gal. 5. dicit, *Charitas gaudium pax, &c.* Pari ratione non est scandalum diligentibus legem Domini, sed sine offensione currit ad patriam: nam scandalum

actuum non cadit in eum, qui diligit legem, cum scandalizare peccare sit, & peccare sit legem præuicari. Scandalum autem passuum, vel est pusillorum, qui ex ignorantia existimant, illicitum esse, quod licitum est, & offenduntur cum vident illa fieri, quæ ipsi arbitrantur illicita: vel est Phariseorum, qui ex propria malitia in peiorem partem interpretantur, quæ interpretanda erant in meliorem. At qui diligit legem Domini, perfecti sunt in charitate, proinde nec pusilli, nec Pharisei sunt, ac per hoc non est illis scandalum: vide S. Thom. q. 43. art. 5. & 6. in 22.

*Expectabam salutare tuum Domine, & mandata tua dilexi.*

Induit personam perfectorum hoc loco Propheta, & ideo cum fiducia dicit, *Expectabam salutare tuum*, id est, salutem æternam, quæ à te est, & rationem reddit, *Et mandata tua dilexi*, id est, quia mandata tua dilexi. Quomodo dicit Apost. 2. Tim. 4. *Cursum consummaui, fidem seruaui, in reliquo posita est mihi corona iustitiæ, quam reddet mihi in illa die iustus Iudex*.

*Custodiuit anima mea testimonia tua, & dilexit ea vehementer.*

In eadem perfecti persona loquitur, ac testatur, se mandata seruasse, quoniam ea vehementer amauit. Verè enim amor, ut scripsit S. Gregorius, operatur magna, si est, si autem operari renuit, amor non est: & Dominus in Euang. Ioan. 14. *Qui non diligit me, sermones meos non seruat*: & Apostolus ad Rom. 13. *Dilectio malum non operatur, plenitudo ergo legis, est dilectio*: & ibidem, *Qui diligit, legem impleuit*.

*Seruauimus mandata tua, & testimonia tua, quia omnes viæ mee in conspectu tuo.*

Iterum in persona perfectorum, se omnia mandata, & testimonia seruasse affirmat: sed ex alio motiuo, quod proprium est perfectorum, videlicet, quia in omnibus actionibus suis cogitabat Deum, esse præsentem: id enim significat illud, *quia omnes viæ mee in conspectu tuo*, id est, quicquid agebam,



agebam, in conspectu tuo agebam, sciens, & cogitans, te omnia conspicerere. Hæc enim cogitatio mirabilem vim habet ad moderandas actiones humanas: nam si conspectus Principis terreni id efficit, ut subditi coram eo peccare non audeant, imò etiam desides & negligentes, vel timidi & parui animi videri erubescant: quid faceret conspectus Principis celestis, atque omnipotentis, si ante oculos mentis perpetuo versaretur? Hinc Dominus Abrahamo dicebat, *Ambula coram me, & esto perfectus*, Gen. 17. & Abraham dicebat, *Dominus in cuius conspectu ambulo*, Gen. 24. & Helias ac Elias dicebant, *Vivit Dominus, in cuius conspectu sto*, 3. Reg. 17. & 4. Reg. 3.

Tau.

*Appropinquet deprecatio mea in conspectu tuo Domine: iuxta eloquium tuum, da mihi intellectum.*

In hoc ultimo orationario concluditur Psalmus oratione ad Deum pro gratia & salute sæpius petita, sciebat enim Propheta, quod postea in Evangelio Dominus admonuit, perseverantiam in oratione esse ad impetrandum longe utilissimam. Luc. 11. Ait igitur, *Appropinquet deprecatio mea in conspectu tuo Domine*, id est, deprecatio mea, quæ suis meritis non confidit, eleuetur, & ascendat aspirante gratia tua, & appropinquet tibi, ita ut eam propius aspicere, & admittere digneris. Illud, *in conspectu tuo*, positum est pro, *ad conspectum tuum*, siue conspectui tuo. Quid autem contineat deprecatio, explicatur in verbis sequentibus, *Iuxta eloquium tuum da mihi intellectum*, id est, iuxta promissum tuum, quod audiui in Psalm. 31. *Intellectum tibi dabo, & instruam te*, da mihi intelligere mandata tua eo modo, quo intelligunt, qui ea opere adimplent, & qui adimplendo ad vitam perveniunt.

*Intret postulatio mea in conspectu tuo, secundum eloquium tuum eripe me.*

Repetit alijs verbis eandem petitionem; illud autem, *eripe me*, significat finem, cur

petierit intellectum sibi dari: nam finis illuminationis est liberatio à peccatis, iuxta illud Evangelij, *Cognoscetis veritatem, & veritas liberabit vos*, Ioan. 8.

*Eruclabunt labia mea hymnum, cum docueris me iustificationes tuas.*

Promittit gratiarum actionem, si obtinerit gratiam tam sæpe imploreatam. Cum docueris me iustificationes tuas, ita ut gratia tua illuminante, & iuvante perficiam mandata tua, tunc ex plenitudine lætitiæ interioris, & agnitionis magni huius beneficij, *eruclabunt labia mea hymnum laudis*, & gratiarum actionis: nam rictus ex repletionis oritur, & ex abundantia cordis os loquitur.

*Pronunciabit lingua mea eloquium tuum, quia omnia mandata tua æquitas.*

Non solum dicit se laudaturum Deum, sed etiam docturum homines, ac demonstraturum, quanta sit æquitas mandatorum Dei. *Pronunciabit, inquit, lingua mea eloquium tuum*, id est, loquar hominibus præcepta tua, & docebo, quod omnia mandata tua æquitas sunt, id est, æquissima sunt, ac proinde æquum est, ut ab omnibus diligentissime observentur. Nisi magis placeat, hunc versiculum esse repetitionem versiculi superioris, ut sensus sit, *Laudabit lingua mea eloquium tuum*, id est, præcepta tua, quia æquissima sunt. Sed prior expositio est S. Augustini, & communior.

*Fiat manus tua, ut saluet me: quoniam mandata tua elegi.*

Pergit in oratione sua David petens, quod vnicè petendum est, æternam salutem, quæ est finis mandatorum. *Fiat manus tua, ut saluet me*, id est, sit potentia & sapientia tua ad me saluandum. Sic enim ex Hebræo verti posset, ex quo intelligimus, illud, *fiat*, positum esse pro, *fit*, quomodo etiam in 1. capite Genesis, ubi dicitur, *Fiat lux, fiat firmamentum, fiant luminaria*, semper in Hebræo est verbum substantivum, *fit*. Et

X x x x 3

quo-



quoniam potentiam & sapientiam Dei Christum esse, docet Apostolus 1. Cor. 1. re-  
tē exponunt Patres, *sic Christus tuis ad me saluandum. Quoniam mandata tua elegi.*  
Optima ratio, cur prætendat salutem, qui mandata elegit, quoniam scriptum est, *Si vis ad vitam ingredi, serua mandata.* Mat-  
thæi. 19.

VI.

*Concupiui salutare tuum Domine, & lex tua meditatio mea est.*

Reddit rationem, cur tantopere petat salutem; quia videlicet illam præ omnibus desideratis concupiuit. Sicut re vera super omnia bona concupiscenda est, cum sola desiderium nostrum possit implere: & quoniam non satis est concupiscere salutem, si quis ad eam peruenire velit, sed necesse est ambulare per viam præceptorum Dei; ideo subiungit, *& lex tua meditatio mea est*, id est, de lege custodienda semper cogito, & in illa custodienda me semper exerceo.

VII.

*Viuet anima mea, & laudabit te; & iudicia tua adiuuabunt me.*

*Viuet anima mea*, cum salutem concupitam obtinuerit, & manus tua fuerit ad saluandum eam: & tunc officium eius erit, & solum negotium laudare te: nam *Beati qui habitant in domo tua Domine, in secula seculorum laudabunt te*, Psal. 83. *Et iudicia tua adiuuabunt me*, id est, & mandata tua à me custodita, adiuuabunt me, vt aliquando etiam corpore viuam, cum resurrexero in resurrectione vite: vel, iudicia tua, quibus in nouissimo die iudicabis pro meritis viuos & mortuos, adiuuabunt me, vt corpore quoque vitam sempiternam possideam.

VIII.

*Erraui sicut ovis, que perijt, quere seruum tuum, quia mandata tua non sum oblitus.*

Erraui enim à patria expulsus, & adhuc exul erro propter culpam parentis primi, toti humano generi communicatam: & erraui, sicut ovis, que seducta perijt, non sicut Diabolus Leo rugiens, qui ex malitia cecidit. *Quare ergo seruum tuum*: quamuis e-

nim ex parte quaesieris & inueneris, quatenus animam iustificasti à peccato, & reconciliasti Deo; tamen adhuc quaerenda est ovis perditus, quatenus expectat redemptionem corporis sui, vt tota ad montes celestes, & vberima pascua, vbi relicta sunt nonaginta nouem, quæ non errarunt, perducatur. Confidenter autem peto salutem animæ & corporis, quia mandata tua non sum oblitus. In libris Græcis varietas est propter vocabulorum similitudinem, vt notarunt Sancti Patres Ambrosius & Augustinus; nam alij codices habent *ἵσθω*, id est, *quare*, alij *ἵστω*, id est, *vinifica*: imò S. Hilarius legit solum *vinifica*: sed in Hebræo nulla est varietas, neque literarum similitudo, & habetur vocabulum, quod nihil significat, nisi, *quare*. Non desunt ex recentioribus, qui hunc versiculum exponant de Dauide errante in montibus, quando persecutiones Saulis, vel Absalonis, fugebat. Sed nimis humilis videtur sensus, & ab expositione veterum Patrum alienus.

## PSALM. CXIX.

*Titulus, & Argumentum.*

Canticum graduum.

**P**salmi quindecim, qui proximè sequuntur post Psalmum centesimum decimum octauum, omnes in titulo habent, Canticum graduum, & quamuis gradus tam ad ascensum, quam ad descensum referri possit; tamen hoc loco non nisi ad ascensum pertinet: nam hebraica vox, amahaloth, ascensionem significat, & similiter vox Græca ἀναβαθμῶν. Igitur Psalmi isti quindecim, cantica quedam ascensionum sunt, siue cantica eorum, qui per gradus quosdam sursum ascendunt: & quidem Græci, Theodoretus, & Euthymius, docēt cantica ista intelligenda esse ad literam de ascensione Iudeorum de Babilone in Hierusalem, Spiritu sancto per os David præcimente calamitatem captiuitatis Babilonica, & libertatem liberationis. Alij malunt hos quindecim Psalmos compositos fuisse, vt canerentur in ascen-



In ascensione quindecim graduum templi Salomonis: tot enim fuisse gradus templi non solum scribunt Nicolaus Lyranus, & alij recentiores, sed etiam Sanctus Augustinus, tractatu in Psalmum postremum: Tot sunt, inquit, Psalmi, qui appellantur graduum, quoniam tot fuerunt etiam templi gradus. Sed quicquid sit de his opinionibus, illud certum est, ascensiones istas siue de Babylone in Hierusalem, siue per gradus templi Salomonis, figurasse ascensionis electorum, qui per gradus virtutum, ac precipue charitatis ascendunt de valle lacrymarum ad caelestem Hierusalem, & de hac ascensione Spiritum sanctum potissimum esse loquentum. Certè Psalmi sunt pleni affectibus in Deum, & propriis eorum, qui se peregrinos, atq; exules in terra inimicorum esse intelligunt; & nunc arumnas exilij desunt, nunc ad requiem patriæ iussu ant; semper autem se ad ascendendum, & in via Domini proficiendum accendunt.

EXPLICATIO PSAL. CXIX.

**A**D Dominum cum tribularet clamavi, & exaudivit me.

Inter varias huius exilij calamitates, una est maxime deploranda; videlicet, lingua dolosa eorum, cum quibus versari cogimur: ab hac se liberari petijisse, & impetrasse canit Propheta, ut exemplo suo instruat ceteros peregrinos. Ego, inquit, cum tribularet non respexi ad auxilium hominum, sed clamavi in oratione ad Dominum, & ille pro sua pietate exaudivit me. Verba sunt clara, cordisq; Hebraici, Græci, Latini conveniunt.

Domine libera animam meam à labijs iniquis & à lingua dolosa.

Declarat quid oraverit clamando, Dixi, inquit, Domine libera animam meam à labijs iniquis, & à lingua dolosa, quod est vñ ex maioribus & frequentioribus malis huius nostræ peregrinationis. Labia iniqua proferunt detractiones, cōiicia, calumnias, falsa testimonia, & similia verba contra legem iustitiæ: lingua dolosa proferit verba

deceptionis, adulatoria, simulatoria, fraudulenta: & possunt inveniri labia iniusta sine lingua dolosa, ut cum quis aperte conuiciatur, vel detrahit; sed cum lingua dolosa adiungitur, ad labia iniusta, malum est gravissimum, adeo ut nihil ferè addi possit, ut dicetur in sequenti versiculo. Quod attinet ad verba, illud, animam meam, positum est pro me, quasi diceret, libera me: sed nominatur anima, vel quia est pars nobilior, vel quia lingua dolosa parum nocet, nisi vulneret animam, inducendo videlicet eam ad peccandum. Illud autem, à labijs iniquis, S. Hieronymus legit ex Hebræo à labio mendacij. Sed vox Hebræa, seker, vtrumque significat, mēdacium, & prauitacionem: proinde rectè verterunt etiam Septuaginta à labijs, ἀδίκων, id est, iniquis, & sententia est plenior, & grauior, ut etiam in l. 42. Ab homine iniquo, & doloso eripe me.

Quid detur tibi, aut quid apponatur tibi ad linguam dolosam.

Reddit rationem, cur petierit liberari à lingua dolosa, quia videlicet sit tale malum, ut nihil ei addi possit; quasi dicat, Quid enim mali dari, aut addi posset supra linguam dolosam? sed difficultas est in verbis, tum, quia in Hebræo legitur actiue, Quid dabit, aut quid apponet tum quia illud pronomen tibi, videtur cogere, ut hæc sententia non referatur ad Deum, & proinde non continetur cum superioribus verbis. Quod attinet ad primam difficultatem, verba Hebraica legi possunt etiam passiuè, si mutantur puncta, præsertim illud, itten, quod potest legi, iustan, & legenda esse passiuè perspicuum est, quia non solum Septuaginta verterunt passiuè, sed etiam S. Hieronymus. reddidit ex Hebræo passiuè, Quid dabitur tibi, aut quid apponetur tibi ad linguam dolosam? illud, tibi, potest esse ociosum ex phrasi hebraica, ut in Canticis cap. 1. Egredere tibi, & cap. 2. Veni tibi, surge tibi, imber abiit sibi, & in hoc ipso Psalmo, multum incola fuit anima mea sibi, quod, sibi, ut redundans omiserunt Interpretes: & tunc tota sententia continuabitur hoc modo, Domine

סֵקֶר

III.

יתן  
יתן



*Domine libera animam meam à labijs iniquis, & à lingua dolosa:* quid enim mali dari, aut apponi potest *ad linguam dolosam*; id est, supra linguam dolosam? Quod si non placeat esse hoc loco ociosum illud, *tibi* potest ita exponi, vt Propheta post orationem ad Deum, vertat se, vel ad seipsum, vel ad incertam personam dicens, *Domine libera animam meam à labijs iniquis, & à lingua dolosa:* quid enim, o anima mea, vel o quicumque hic ades; tibi dari mali, aut addi potest *ad linguam dolosam*; id est, super malum linguæ dolosæ?

## IV.

*Sagitta potentis, acuta cum carbonibus desolatorijs.*

Declarat elegantissima similitudine quale malū sit lingua dolosa; ac dicit esse verba eius, quasi sagittas, quæ natura sua longè ferunt, & celeriter, vt vix caueri possint: & addit amplificationem admirabilem dicens, non esse qualescunque sagittas, sed *potentis*, id est, à robusta manu cum impetu emissas, & præterea ab artifice benè politas, & acutas; & denique adeo ignitas, vt quiduis desolare & vastare possint; qualia sunt fulgura cœlestia, quæ ab omnipotenti manu mittuntur, & sunt verè ignita & acutissima. Igitur talia sunt verba dolosa, præsertim quando sunt instrumenta Diaboli ad occidendas animas, quæ vocantur ab Apostolo ad Eph. 6. *Tela nequissimi ignea*. S. Aug. hos duos versiculos multo aliter exponit, nimirum vult esse dialogisimum, vt primum homo in tribulatione positus oret, *Domine libera animam meam à labijs iniquis, & à lingua dolosa*, deinde Dominus respondeat. *Quid datur tibi, aut quid apponatur tibi ad linguam dolosam?* id est, quid remedium tibi dari poterit, aut apponi contra linguam dolosam? hoc videlicet vnicum tibi remedium erit. *Sagitta potentis acuta cum carbonibus desolatorijs*, id est, verba Dei cum exemplis charitatis igne succensis: viuis enim est sermo Dei, & penetrabilior omni gladio ancipiti, cui si accedat exemplum ex vera charitate prodicens; quasi carbo ignitus, nihil ei resistere

poterit. Vtraque expositio ad ædificationem facit, sed prior videtur magis literalis. Quod attinet ad verba, illud, *desolatorijs*, in hebræo est, *rethamim*, quod S. Hieronymus rectè vertit, *iuniperorum*. Sed Septuaginta explicauerunt metaphoram. Carbones enim iuniperorum sunt valde solidi, & ideo aptissimi ad incendendum & desolandum.

*Heu mihi quia incolatus meus prolongatus est: habitauit cum habitantibus Cedar: multum incola fuit anima mea.*

Ex occasione tam magni mali & tam frequentis in hac peregrinatione, suspirat ad patriam, & sic verè & ex corde cantat canticum ascensionis. *Heu mihi*, inquit, *quia incolatus meus*, vel vt ex hebræo vertit S. Hieronymus, *peregrinatio mea, prolongata est*. Cupit enim verus peregrinus cum Apostolo magis peregrinari à corpore, quam à Domino, & ideo nimis longam iudicat præsentem vitam, in qua peregrinatur à Domino. *Habitauit cum habitantibus Cedar*. Non mirū videatur, si longā nimis queror esse hanc habitationem: *habitauit enim hucusque cum habitantibus Cedar*. cum barbaris; & efferatis gentibus, quæ non habitant in ciuitatibus, sed in tentorijs, iisque nigris & rusticis, quales sunt Arabes. In Hebræo, & Græco codice habetur, *Habitauit cum tabernaculis Cedar*; sed idem est sensus: quid enim est aliud habitare cum tabernaculis, quam habitare cum habitantibus in tabernaculis? Vox *Cedar* Hebraica est, & nigredinem tenebrarū significat: vnde Canticorum r. opponuntur tabernacula Cedar pellibus Salomonis, id est, tentoria nigra & rustica, tabernaculis pretiosis & splendidis. Verè autem ciuitates & palatia Regum huius mundi nihil sunt, nisi tabernacula rusticorum, comparata ad mansiones cœlestis Hierusalem. Ideo rursum lamentatur peregrinus Dei dicens, *Multum incola fuit anima mea*, id est, nimis longus fuit iam incolatus meus in terra aliena. In Hebræo additur, *stbi*: sed, vt supra diximus, ex phrasi Hebraica



Hebraica otiose additur, & propterea ab interpretibus sæpe omittitur: idem est, *habitant sibi, & habitauit*. Hinc potest colligi paucos hodie reperiri, qui ex corde canticum graduum, cum plerique omnes diligant adeo peregrinationem, & *tabernacula Cedar*, ut nihil tristius audiant, quam sermonem de discessu ab hac vita.

*Cum his, qui oderunt pacem, eram pacificus: cum loquebar illis, impugnabant me gratis.*

Concludit, rationem reddens, cur sit malum tamdiu peregrinari, & simul declarans metaphoram *tabernaculorum Cedar*: quod enim metaphoricè, & obscure dixit, *habitauit cum habitantibus in tabernaculis Cedar*: clare exponit, dicens, *Habitauit cum his, qui oderunt pacem*, ego, qui nihil diligo magis, quam pacem, id est, habitauit cum mihi dissimilibus, cum peruersis, & adeo iniustis, ut non solum cum hostibus, sed etiam cum amicis belligerare soleant: & si forte loqui de pace incipiebam ad illos; ipsi sine ulla causa magis me impugnabant. In textu Hebræo est alia interpunctio, quam etiam sequitur S. Hieronymus sic ibi legitur, *Mulum incolam fuit anima mea cum his qui oderunt pacem*, Ego pacem loquebar, & illi ad bellum. Sed melior est interpunctio Septuaginta Interpretum, quæ est etiam antiquior; nam in Hebræo non est simpliciter, *Ego pacem loquebar*, sed hoc modo, si verbum verbo reddamus, *Ego pacem & cum loquebar*, Ex quo intelligimus, recte Septuaginta post pacem, posuisse punctum. & quod diximus ex Hebræo reddi, *ego pacem*, potest etiam reddi, *ego pax*; ut sit sensus, cum his qui oderunt pacem, ego pax eram, id est, adeo pacificus eram, ut ipsa pax dici possem; & postea sequitur alius versiculus, *Et cum loquebar, illi ad bellum*, nimirum prouocabant. quod in sententia conuenit cum eo, quod verterunt Septuaginta, & nos id nostra editione Latina legimus, *Cum loquebar illis, impugnabant me*. Quod autem additur, *gratis*; posuit est à Septuaginta explicationis gratia. Totus hic Psalmus conuenit quidem omni-

bus electis, sed præcipue capiti electorum Christo, quatenus viator erat, secundum carnis passibilis conditionem. Vere enim clamauit ipse ad Dominum patrem suum pernoctans in oratione Dei, & postea in hortu, & demum in cruce. & verissime exauditus est, cum exultauerit illum Deus, & dederit ei *nomen super omne nomen*. Vere quoque passus est *labia iniqua*, & *linguas dolosas* usque ad mortem; ut ex toto decursu Euangeliorum patet. Verissime dicere potuit, *Incolatus meus prolongatus est*; cum in Euangelio dixerit, *Generatio adultera, & incredula, quamdiu apud vos ero, quamdiu vos patiar? Vere habitauit cum habitantibus Cedar*. quia licet ipse lux esset, ac per hoc in Cedar, id est, in tenebris, non habitaret, sed in lumine: tamen cum habitantibus Cedar, visus est, & inter eos conuersatus est. Denique vere cum ijs, qui oderunt pacem, erat pacificus, quia cum malediceretur, non maledicebat; cum pateretur, non comminabatur: & cum loqueretur illis de pace, de charitate, de Regno Dei; ipsi contra, cum impugnabant sine ulla ratione, vel causa, quod Ioan. 15. ipse idem notauit, cum ait, *Sed ut impleatur sermo, qui in lege eorum scriptus est, Quia odio habuerunt me gratis.*

## PSALMVS CXX.

Titulus & Argumentum.

Canticum graduum.

SECUNDUS Psalmus ex gradualibus consolatatur peregrinos ascendentes in Ierusalem, promittens perpetuam Dei custodiam ac primum loquitur Propheta in persona peregrini: deinde loquitur in persona propria, & consolatur peregrinum.

## EXPLICATIO PSALMI CXX.

LEuaui oculos meos in montes: unde veniet auxilium mihi.

Peregrini nihil frequentius aspiciunt, quam locum, ad quem tendunt, si is conspici possit, sin minus, locum aliquem vicinior-

Y Y Y



ciuiorem, inde etiam consolationem magnā percipiunt: quæ consolatio vires & auxilium præbet ad ambulandum, & quia terrena Ierusalem in montibus erat, & cælestis Ierusalem supra omnes cælos est, ideo peregrinus, siue vmbaticus, siue verus, dicit, *Leuauit oculos meos in montes*, vbi sedet ciuitas sancta, unde *veniet mihi auxilium consolationis*. In Hebræo est verbum temporis futuri, *Leuabo*, sed sæpe variatur tempora apud Hebræos, & præterea quod ad sensum attinet, non multum refert, siue peregrinus dicat, *Leuauit iam oculos meos*, siue leuabo iam oculos meos. S. Augustinus mystice more suo, per montes, intelligit sanctos Apostolos; sicut enim oriente Sole primi sunt montes, qui lumen recipiunt, sic veniente Christo, iustitiæ Sole, primi fuerunt Apostoli qui lumen receperunt.

II. *Auxilium meum à Domino, qui fecit celum, & terram.*

Declarat peregrinus, se non expectare auxilium à montibus, ad quos oculos leuauit, sed ab eo, qui præsidet sanctæ ciuitati in montibus posita, quod clarius explicat initio Psalm. 122. *Ad te leuauit oculos meos, qui habitas in calis*, describit autem verum Deum per opus creationis cæli, & terre, sicut in alio Psalmo, *Dixigentium Dæmonia; Dominus autem cælos fecit*.

III. *Non det in commotionem pedem tuum, neque dormitet qui custodit te.*

Mutat Propheta personam, & loquitur in persona propria, & respondet peregrino, quasi dicat, Bene, & sapienter leuasti oculos tuos in montes, & non respexisti vanitates, quæ occurrunt in via; sed ijs prætermisissis à conditore cælestis patriæ auxilium & consolationem expectasti: ideo ego opto, *ut Deus non det in commotionem pedem tuum*, id est, non sinat te labi, & cadere in via; sed robores pedes tuos, ut stabiles in cursu ad patriam perseuerent. *Et non dormitet, qui custodit te*, id est, opto etiam, & rogo, ut Pater, qui est custos tuus, semper vigilet in tua custodia, & nunquam sinat commoueri pedes tuos. Obserua primo cir-

ca hunc versiculum, quod Deus metaphoricè dicitur dormire, quando permittit nos cadere, ac si non aduertit, quomodo qui dormitat, non aduertit, quid fiat. Secundo phrasis Hebraica est, commoueri pedes, siue nutare, pro eo quod est labi in peccatum, ut Psalm. 17. *Non sunt infirmata vestigia mea.* & Psalm. 72. *Mei autem pene moti sunt pedes, pene effusi sunt gressus mei.* Tercio, in Hebræo habetur in futuro, *Non dabit ad mouendum pedem tuum*, iuxta quam lectionem, esset prædictio, & promissio. Sed tamen, ut diximus, tempus vnum in Hebræo sæpe ponitur pro alio tempore, unde non solum Septuaginta, sed etiam S. Hieronym. vertit, *non det*. S. Augustinus legit, *Non des commoueri pedem meum*. Sed nescio quem codicem sequutus sit, nostri enim Hebraici, Græci, & Latini habent tertiam personam, *non des, vel, non dabit commoueri pedem tuum*.

*Ecce non dormitabit, neque dormiet, qui custodit Israel.*

Promittit Propheta peregrino impetrationem gratiæ, quæ petebatur, quasi dicat, oro, ut Pater non dormitet, qui te custodiendum suscepit; & sine dubio non dormitabit: nam nunquam dormitat, neque dormiet, qui custodit populum suum peculiarem, qui per Israel significatur, & in quo populo omnes illi continentur, qui tanquam peregrini in hoc mundo versantur, & ad patriam cælestem ascendere festinant. Quod dicitur *non dormitabit, neque dormiet*, hunc habet sensum, non dormitabit subinde oculos claudendo, & aperiendo; & multo minus se tradet profundo somno. Itaq; semper vigilabit, neque oculos ad momentum claudet. S. Augustinus pulchre dicit, homines dormire, quando carnem infirmitatis portant; dormire, quando moriuntur; & ideo non esse fidendum custodiæ hominum. Domino autem fidelissimo custodi tuto credere nos posse, cum ipse neque dormiret vnquam in infirmitate, neque dormiat in morte. Monet etiam idem Augustinus, recte fideles homines per Israel significari.



significari, quia Israel, Deum videns interpretatur, & hinc Deum nunc per fidem videt, visuri postea etiam per speciem.

*Dominus custodit te, Dominus protectio tua super manum dexteram tuam.*

*Per diem sol non uret te, neque luna per noctem.*

Dixit paulo ante Propheta, peregrinum in Deo confidentem, custodiendum esse, ne cadat in via: addit nunc aliam consolationem, custodiendum videlicet etiam esse, ne fatigaretur ab aestu solis per diem, neque à lumine lunæ per noctem, quoniam Deus erit illi quasi umbraculum, quod manu dextera tenebit, eoque tum caput tum etiam reliquum corpus tegere poterit. Dominus, inquit Propheta, non solum custodit Israel, id est, populum suum vniuerse, sed te quoque in particulari custodit, custodit autem, quia est protectio, siue umbraculum, ut proprie sonat vox Hebraica, *super manum dexteram tuam*, ex quo fiet, ut te tali umbraculo, ministerio dexterae manus; tecum neque sol ureat per diem, neque luna per noctem. In textu Græco est tempus futurum, Dominus custodiet te, sed in Hebræo non est proprie tempus præsens, neque futurum; sed participium, *Dominus custodiens te*, siue custodit te: sensus autem idem est. Illud autem, *Dominus protectio tua super manum dexteram tuam*, posset continere metaphoram, ut alij volunt, hominis armati, & ad dexteram stantis, ut sensus sit, Dominus erit, vel est protectio tua, quia stat quasi miles armatus ad dexteram tuam. Sed quod nos diximus, magis conuenit literæ, tum quia in Hebræo pro voce protectio, est, *tsel*, umbra, siue umbraculum: tum quia, & in Hebræo & in Græco est, super manum, non ad manum; unde videtur Propheta respexisse ad umbraculum, quod super manum ponitur, & manu geritur, tum denique quia sequitur, neque sol per diem uret te, neque luna per noctem: a calore autem, vel lumine solis, & lunæ non defendit miles ad dexteram constitutus, sed umbraculum manu dextera

super caput extensum. Porro metaphora umbraculi, & solis, ac lunæ, diei, & noctis, significat gratiam Dei, quæ peregrinum custodit tempore prosperitatis, & aduersitatis, neque enim minus lædere solet in hoc itinere dies prosperitatis, quam nox aduersitatis. S. August. more suo mystice exponit dexteram, & sinistram, ac dicit, Deum protegere dexteram, non sinistram, quia sæpe permittit hominem lædi in temporalibus, quæ significantur per sinistram, & non sinit lædi in bonis spiritualibus, quæ significantur per dexteram.

*Dominus custodit te ab omni malo, custodiat animam tuam Dominus.*

Addit Propheta aliam consolationem, eamque generalem, quasi dicat, non solum te Dominus custodiet, ne cadas, & ne fatigeris, sed ab omni alio malo, quod in itinere occurrere possit, te Dominus proteget atque custodiet, ex quo fiet, ut anima tua, seu vita tua incolumis omnino toto in itinere conseruetur. In Hebraico, Græcoque textu habetur in tempore futuro, Dominus custodiet te, sed in sensu nulla differentia est: Dominus enim & custodit nunc, & custodiet postea & hanc continuationem significare solet tempus futurum apud Hebræos.

*Dominus custodiat introitum tuum, & exitum tuum ex hoc nunc, & usque in sæculum.*

Concludit Propheta addendo ultimam, & optatissimam consolationem, quasi dicat, non solum in aliqua parte itineris peregrinus Dei, qui ascensiones disposuit in corde suo, custodietur: sed in toto itinere semper custodietur; omne enim iter consistit in introeundo, & exeundo, dum enim progredimur, intramus vnā viam, & ea finita eximus: deinde intramus aliam; & postea eximus, sic etiam intramus vnā Prouinciam, vnā ciuitatem, vnā domum, & deinde eximus, & intramus aliam, & eximus donec finito itinere ad patriam peruenimus. Sic igitur in via vitæ progredimur dum inchoamus, & perficimus opera bona: inchoare enim, intrare; perficere, exire est.



Illud autem ex hoc nunc, & usque in seculum, idem est, quod nunc, & semper; quasi dicat, ex hoc nunc, id est, ex hoc presenti tempore, incipiat Dominus introitum, & exitum tuum custodire, & usque in seculum non desinat custodire. S. Augustinus per introitum, & exitum, intelligit introitum in tentationem, & exitum ex tentatione. Alij generalius initium, & finem omnium negotiorum, siue omnium actionum nostrarum; siue omnem humanam consuetudinem, iuxta illud Act. 1. Ex quo intravit, & exiit inter nos Dominus Iesus, id est, ex quo nobiscum cœpit conuersari Dominus Iesus. Parum autem refert, quod in Hebræo legatur in futuro, custodiet: nam significationes temporum facile variantur. Vnde ipse etiam S. Hieron. vertit ex Hebræo, custodiat, vt nos. in editione vulgata legimus.

## PSALMVS CXXI.

Titulus, & Argumentum.

Canticum graduum.

**H**ic est tertius Psalmus gradualis, in quo Propheta describit pulchritudinem, & nobilitatem ciuitatis sanctæ Ierusalem; ad quam reuerti cupiebant Hebræi ex Babylonica captiuitate. Sed vt ciuitas illa typus erat celestis patriæ, ita redeuntes Hebræi ex captiuitate ad terrenam Ierusalem figura erant peregrinationis, & ascensionis nostra ad eam, quæ sursum est, Ierusalem. Itaque totus Psalmus de vtraque ciuitate, & de peregrinis viri que intelligi debet: sed primaria intentio Spiritus sancti ad primum finem sine dubitatione dirigitur.

## EXPLICATIO PSALMI CXXI.

**I.** **L**ætatus sum in his, quæ dicta sunt mihi, in domum Domini ibimus.

Verba sunt populi Dei, qui lætari se dicunt de optimo nuncio accepto reuersionis in pa-

triam. Et quidem nuncius, qui significauit Hebræis, reuertendum iam esse in Ierusalem, Hieremias fuit, qui prædixerat post septuaginta annos soluendam esse captiuitatem, & ciuitatem, ac templum reedificandum, Hiere. 25. & 29. sed clarius id ipsum nunciauerunt Daniel, Aggeus, & Zacharias, qui vixerunt illo ipso tempore, quo soluta est captiuitas. Isti igitur magno gaudio populum repleuerant, cum euolutis iam septuaginta annis dicebant, In domum Domini ibimus. Id est, ad patriam reuertemur, vbi montem Sion, & locum domus Domini videre nobis dabitur, ibique templo reedificato, in domum Domini rursum ingrediemur. Sed nuncius sine comparatione vlla felicior Christus fuit, qui in Euangelio nobis loquitur, & dicit, Pœnitentiam agite, appropinquabit enim Regnum cœlorum, Matth. 4. & clarius, Ioan. 16. In domo Patris mei mansiones multe sunt, si quo minus, dixissem vobis, quia vado parare vobis locum, & si abiero, & parauiero vobis locum, iterum veniam, & assumam vos ad me ipsum, vt vbi ego sum, & vos sitis. Ioan. 14. Hic autem nuncius ineffabili lætitia replet eos, qui didicerunt, quam bonum sit in domum Domini ire, & in ea domo non esse hospitem, & aduenam, sed ciuem sanctorum, & domesticum Dei. Id autem mouit, qui attente cogitauit illud eiusdem Prophetæ, Inebriabuntur ab vbertate domus tuæ, Psal. 34. & rursus, Replebimur in bonis domus tuæ, Psal. 64. & illud Apostoli ad Ephes. 1. Vt sciatis, quæ sit spes vocationis eius, & quæ diuina gloria hereditatis eius in sanctis. Ille ex corde cupit in domum Domini ire, & ideo ex corde cantat, Lætatus sum in his, quæ dicta sunt mihi, in domum Domini ibimus: animalis autem homo non percipit quæ Dei sunt, & ideo propinquante morte, id est, exilij, & peregrinationis fine, non hilarescit; sed turbatur, & gemit & merito, quia sicut non disposuit ascensiones in corde suo, dum viueret, ita non sperat in domum Domini, quæ sursum est, ascendere; sed ad carcerem damnatorum in æternum puniendus descendere timet. Parum autem refert quod Hebræus, & Græcus

textus.



textus pro his quæ dicta sunt; habent participium actiuum, videlicet, *in dicentibus mihi*: vulgatus enim interpres sensum expressit Latina phrasi, vt facilius intelligeretur.

II. *Stantes erant pedes nostri in atrijs tuis Ierusalem.*

Explicat cur Hebraei lætentur de reditu in patriam, & rationem esse dicit, quoniam recordabantur eius temporis, quo fuerant in patria ante captiuitatem, & viderant pulchritudinem, & magnitudinem Ierusalem: multi enim, qui pueri, vel adolescentes abducti fuerant in Babylonem, facile recordari poterant se fuisse antea in ciuitate Ierusalem, multos autem rediisse ex ijs qui ante captiuitatem fuerant in Ierusalem, & viderant ciuitatem, & templum, scribit Esdras lib. 1. cap. 3. dicunt igitur, *Stantes erant pedes nostri in atrijs tuis Ierusalem*, id est: quia recordamur temporis, quo stantes erant pedes nostri in atrijs tuis, id est, in portis tuis, vt expresse habetur in Hebraico codice. Nominat autem Propheta portas, siue atria, & quasi vestibula ciuitatis, potius quam fora, vel plateas, quoniam eo tempore præcipui conuentus, & negotia fiebant in portis ciuitatum, ibique erat maxima hominum frequentia, vt colligitur ex illo Pro. 51. Nobilis in portis vir eius, quando sedebat cum Senatoribus terræ. Constat etiam ex lib. 2. Reg. cap. 18. fuisse in Ierusalem non simplices portas, sed duplices, inter vtrasque satis magnum spatium, quod hoc loco fortasse vocatur atrium *Dauid autem* (inquit Scriptura) *sedebat inter duas portas*, & Hierem. 39. *Et ingressi sunt omnes Principes Reges Babylonis, & sederunt in porta media*. certe magnum spatium debuit esse in illa porta media, vt tot Principes cum ministris suis capere posset. Sed quomodo nos Christiani dicere poterimus, *Stantes erant pedes nostri in atrijs tuis Ierusalem*, qui in cælestis patriæ atrijs nunquam fuimus? Imo fuimus in atrijs patriæ cælestis, alioqui exules, & peregrini non essemus, neque nos Christus de captiuitate redemisset, nisi à patria extorres, & in terra aliena captiui fuis-

semus. Fuimus igitur in atrijs cælestis Ierusalem, quando in parente nostro Adamo Paradisum terrestrem incoluimus, qui Paradisus terrestris quasi vestibulum erat Paradisi cælestis, & status ille innocentie quasi atrium, & porcia erat status gloriæ, & fortasse hæc de causa Spiritus sanctus scribi non voluit. *Stantes erant pedes nostri in plateis Ierusalem*, sed in atrijs vel portis, vt intelligeremus in hoc Psal. præcipue sermonem fieri de cælesti Ierusalem, non de terrena. Igitur lætati sumus ad vocem dicentium: *In domum Domini ibimus*, quia recordamur temporis illius, quo stantes erant pedes nostri in paradiso terrestri, ac per hoc in atrijs paradisi cælestis, & ex bonis illis coniecturam facimus de bonis longe melioribus, quæ nobis in ipsa domo Domini conferuantur, & quamuis paulo ante domus Domini nominata sit, nunc autem ciuitas Ierusalem nominetur, tamen vnus & idem locus est. Patria enim cælestis nunc Regnum, nunc ciuitas, nunc domus dicitur quoniam si respicias multitudinem, & varietatem incolarum, Regnum erit, cum in eo viderit Ioannes Apoc. 7. *turbam magnam quam dinumerare nemo poterat ex omni tribu gentibus, & populis, & tribubus, & linguis*. Si consideres societatem, & familiaritatem, quæ est inter sanctos, & beatos, ciuitas est: quamuis enim multiplicetur numerus electorum, omnes se inuicem noscent, & diligant, vt eiusdem ciuitatis ciues. Denique si cogites, omnes electos vnum habere patrem, vnamque hæreditatem, domus sine dubio erit, in qua omnes erunt quasi fratres sub vno patre Deo.

*Ierusalem, quæ adificatur, vt ciuitas, cuius participatio eius in idipsum.*

Hic iam incipit Propheta sub nomine peregrinorum ad Ierusalem properantium, laudes eiusdem Ierusalem numerare, vt ex ijs se magis ac magis ad ascendendum sine intermissione inflamment: prima laus est, quod sit ciuitas pacatissima, ita vt ex charitate incolentium omnibus omnia sint communia. *Stantes, inquit, erant pedes*

Yyyy 3 nostri

III.



*nostri in atrijs tuis Ierusalem*, quæ Ierusalem ita ædificata est, & quotidie magis ac magis ædificatur, vt sit ciuitas, cuius participatio est in idipsum, id est, simul, & communiter participatur ab omnibus. Vbi notandum est illud, eius, redundare ex phrasi Hebraica, idem est enim, cuius participatio, & cuius participatio eius. Aduerte præterea, interpunctionem in Hebraico codice positam esse post vocem, *ædificatur*: non post vocem, vt *ciuitas*: proinde non est sensus, Ierusalem ædificatur vt ciuitas, quasi possit aliter ædificari, quam vt ciuitas; sed ædificatur, vt ciuitas talis, cuius participatio simul est. Aduerte postremo illud, *in idipsum*, quod à S. Augustino refertur ad æternitatem Dei, quæ semper est eadem; ad litteram nihil aliud significare, nisi, simul, vel coniunctim, vt ex voce Hebraica perspicuum est, vt etiam alibi diximus. Iam vero in sensu posteriore tota hæc sententia multo est clarior, & sublimior: siquidem cælestis Ierusalem vere ædificatur vt ciuitas, quia non est proprie ciuitas, neque sunt in ea lapides proprie dicti, sed ædificatur vt ciuitas dū quotidie lapides viuī à summo artifice expoliti, & conquadati adiunguntur cælestis habitaculi ædificationi: ex quo sequitur, vt qui hæc intelligunt, non modo persecutiones æquo animo ferant, sed gaudeant, & gloriantur in tribulationibus, cum sciant, eo modo se præparari ad cælestem ædificationem. *Omne gaudium*, inquit vnus ex his viuīs lapidibus, *Iac. 5. existimate fratres, cum in tentationes varias incideritis*. Deinde in cælestia verisime est participatio in idipsum. Nam in terra Ierusalem non tam fuit, quam esse debuit participatio in idipsum, id faciente charitate, vt amicorum omnia sunt communia. qualis participatio ad breue tempus fuit in Ecclesia, quæ erat Hierosolymis, *vbi nemo dicebat, aliquid suum esse, sed erant illis omnia communia*. Act. 4. Et nunc etiam certetur in familijs ordinum Religiosorum, vbi regularia instituta in suo vigore persistunt. Sed in cælesti Ierusalem summa est participatio in idipsum, cum sit Deus vnus omnia in omnibus, id est, vnus, & idem

Deus sit honor, & diuitiæ, & deliciæ omnibus habitantibus in domo Domini, & ea felicissima, & summa vbertas sit vere semper idipsum, cum nullam patiatur diminutionem, vel alterationem.

*Illuc enim ascenderunt tribus tribus Domini, testimonium Israel, ad confitendum nomini Domini.*

Hæc est secunda laus Ierusalem, frequentia videlicet incolarum. & coniungitur hic versiculus cum secundo. Reddit enim rationem hoc loco populus Dei, cur dixerit. *Stantes erant pedes nostri in atrijs tuis Hierusalem* quamuis non omnes fuissent ciues Ierosolymitani, sed diuersarum ciuitatum incolæ, tamen omnes ascendebant in Hierusalem ter per annos singulos. Dicitur igitur, *Stantes erant pedes nostri in atrijs tuis Ierusalem*, quoniam illuc ascenderunt tribus tribus Domini, id est, multæ tribus, siue omnes tribus, & ideo maxima multitudo conueniebat in Ierusalem: Hebraismus est enim, tribus tribus, pro multæ tribus. vbi enim legimus Genes. 14. *Vallus autem syluestris habebat puteos multos bituminis*, in Hebræo est, *puteos puteos bituminis* quod sequitur, *Testimonium Israel ad confitendum nomini Domini*; explicat cuius rei gratia tanta multitudo confluetet in Ierusalem: id enim fiebat iuxta testimonium, id est, legem datam Israeli, quæ præcipiebat, vt non obliuiscerentur visitare templum Domini, quod vnicum erat in tota terra promissionis, atque ibi confiterentur nomini Domini, confessionem laudis, & gratiarum actionis. Sed in posteriore sensu, quem diximus esse à Spiritu sancto magis intentum, redditur ratio, cur dictum sit, *Ierusalem, quæ ædificatur vt ciuitas*; ideo enim ædificatur vt ciuitas, quia illuc iam ascenderunt, & quotidie ascendant tribus tribus Domini, id est, animæ sanctæ ex omni tribu, & natione, vt tanquam lapides viuī supera discentur in domos spirituales, vt dicit S. Petrus in 1. epist. cap. 2. Ascenderunt autem animæ illæ



illa sanctorum in caelestem Ierusalem ad confitendum nomini Domini, quoniam hoc est totum quod agitur in illa domo, & ciuitate: cessantibus omnibus negotijs alijs. Beati, inquit idem Propheta Psal. 83. *qui habitant in domo tua Domine, in seculum seculi laudabant te*; & Tobias cap. 13. de caelesti Ierolyma loquens, *Per vias, inquit, eius alleluia cantabitur*, & hoc est testimonium, id est, praeceptum datum Israel; id est, animae videnti Deum, vt nunquam cesset a laude, quae nunquam cessat ab amore. Quod autem testimonium idem sit, quod praeceptum, ostendimus in explicatione Psalms decimi octauis, & perspicuum est ex toto Psalmo 118. vbi frequentissime accipitur testimonium pro lege, siue praecepto.

*Quia illic sederunt sedes in iudicio, sedes super domum Dauid.*

Haec est tertia laus Ierusalem, quod illic sit sedes Regia, & supremum tribunal, & potest continuari hic versiculus cum superiore propter illam particulam causalem, quia, videtur enim reddi ratio, cur Deus voluerit in Ierusalem esse templum, ad quod ter in anno veniret omnis populus Israel, quia illa erat ciuitas Regia, & quasi Metropolis totius Regni. Dicit igitur, *Quia illic*, id est, in Ierusalem, *sederunt sedes in iudicio*, id est, sedes Regum sibi inuicem succedentium, quorum proprium est iudicare populum, *sederunt*, id est, quieuerunt immobiliter constitutae, & fixae, quod dicitur ad differentiam sedis Saul primi Regis, quae fuit in Gabaa Benjamin, sed ibi non quieuit, cum paulo post translata fuerit, & similiter ad differentiam sedium Iudicum, qui fuerunt ante Reges, quae non sederunt aliubi, sed frequenter transmutabantur de loco ad locum: at sedes Regum de familia Dauid sederunt in Ierusalem immobiliter, & ideo subiungit, *Sedes super domum Dauid*, id est, sedes Regni; quae super familiam Dauid fundate, quierem, & stabilitatem inuenerunt, sic enim dictum est Dauidi a Deo

2. Reg. 7. *Fidelis erit domus tua, & Regnum tuum vsque in aeternum, & thronus tuus erit firmus iugiter*. Igitur non dicuntur *sedes super domum Dauid*, quia regerent domum Dauid, regebant enim totam domum Iacob, id est, omnes duodecim tribus Israel, non solum familiam Dauid, sed dicuntur sedes fundatae super domum Dauid, quia ex illa domo nascebantur Reges populi Dei. In Hebraeo non habetur, super domum Dauid, sed domui Dauid, id est, sedes datae domui Dauid. Sed haec omnia longe melius in Christum, & in caelestem Ierusalem conueniunt. Nam ne forte Iudaei crederent, verba Psalms intelligenda esse principaliter de terrena Ierusalem, ac non potius de ea, vt caelestis Ierusalem figuram gerebat: permisit Deus, vt non solum sedes Regia de Ierusalem tolleretur, sed ipsa etiam Ierusalem euerteretur. Promissio igitur illa ad Christum, & ad Ierusalem, quae sursum est, pertinet, iuxta vaticinium Isa. c. 9. & Dan. c. 9. & Angeh ad Virginem Luc. 1. *Dabit ei dominus sedem Dauid patris eius, & regnabit in domo Iacob in aeternum, & Regni eius non erit finis*. Vere enim ac proprie in caelesti Ierusalem sederunt sedes in iudicio, tum quia firmissime stabilitae sunt in caelo thronus Christi, & throni eorum, qui cum ipso regnant: tum quia ipsi sancti cum Christo regnantes & iudicantes sunt sedes Dei: nam anima iusti sedes est sapientiae; & ista sedes vere etiam sedent in iudicio, iuxta promissionem Domini Matth. 19. *Vos, qui sequimini estis me, sedebitis super sedes duodecim iudicantes duodecim tribus Israel*: Et sedes sunt super domum Dauid fundatae, quia omnis Sanctorum potestas, Regia, & iudiciaria a Christo dependet, qui filius Dauid in Evangelio dicitur, & accepit sedem Dauid patris sui, & regnabit in domo Iacob in aeternum, & Regni eius non erit finis.

*Rogate quae ad pacem sunt Ierusalem, & abundantia diligentibus te,*

VI.

Hortatur iam Propheta peregrinos de captiuitate reuertentes, vt salutem saltem a longe



longe ciuitatem Ierusalem, bene precantes ei pacem, & abundantiam, quæ sunt duo potissima bona, quæ faciunt beatas ciuitates: nam pax sine abundantia, est secunda possessio miseræ, abundantia sine pace est dubia & incerta felicitas; sed quando abundantia cum pace iungitur, nihil deest ad statum felicissimæ ciuitatis. Dicit igitur, *Rogato quæ ad pacem sunt Ierusalem*, id est, precamini patriæ vestræ à Deo veram, & solidam pacem, ut sit abundantia non solum ipsi ciuitati Ierusalem, sed omnibus diligentibus te ciuitas sancta. In Hebræo habetur simpliciter, *Rogate pacem ipsi Ierusalem*, proinde illa verba, quæ ad pacem sunt, nihil sunt aliud, nisi periphrasis pacis.

VII.

*Fiat pax in virtute tua, & abundantia in turribus tuis.*

Ponit Propheta ipsa verba, quæ dicenda sunt ab ijs, qui salutantes Ierusalem, precantur illi pacem, & abundantiam, quasi dicat, cum salutatis Ierusalem, dicite, *Fiat pax in virtute tua, & abundantia in turribus tuis*. Per, *virtutem*, recte S. Hieronymus vertit, *muros*: vox enim Hebraica significat proprie *virtutem*, hoc est, robur, & vires. Sed accommodatur etiam ad omnia, in quibus robur consistit, ut ad muros, in quibus consistit robur ædificij; item ad exercitum, in quo consistit robur armorum; item ad multitudinem populi, in qua consistit robur ciuitatis. Sed hoc loco accommodari debet ad muros, ut cohereat cum sequentibus verbis, ubi turres nominantur. Itaque Septuaginta Interpretes, qui verterunt *virtutem*, expresse runt significationem verbi Hebraici, ut sonat generatim, sed B. Hieronymus expressit significationem, ut hoc loco accommodanda erat. Dicitur autem, *fiat pax in virtute tua*, id est, in muris tuis fortissimis, quia quando pax est in muris, id est, quando muri non oppugnantur ab hostibus, tota ciuitas est in pace. Per turres autem, de quibus dicitur, *& abundantia in turribus tuis*, significantur magna palatia, quæ turrita esse solent: nam vox Hebraica significat palatia potius quam turres, & san-

ctus Hieronymus vertit, *in domibus tuis*. Porro vox, *abundantia*, tum in hoc versiculo, tum in superiore, deducitur à voce Hebraica, quæ significat pacem, sed cum Septuaginta viri, & S. Hieron. verterint, *abundantiam*, dubitare non debemus, quia hoc verè significet, neque absurdum est à vocabulo pacis derivari vocabulum abundantia, cum verè sit pax quasi mater abundantia, ut bellum pater est caritatis, & inopia. Porro duo isti versiculi, quatenus pertinent ad cælestem Ierusalem, continent quidem salutationem, & imprecationem pacis, & abundantia: sed non significant, periculum esse, ne ciuitati illi supernæ desit vnquam vel pax, vel abundantia, cum de ea scriptum sit in Psalm. 147. *Qui posuit fines tuos pacem, & adipe frumenti satiat te*. Expriunt igitur solum pium affectum, & lætitiā, quam habemus de bonis cælestis Ierusalem, quomodo etiam dicitur in Apocalypsi cap. 7. *Salus Deo nostro, qui sedet super thronum, & Agno*.

*Propter fratres meos, & proximos meos loquebar pacem de te.*

*Propter domum Domini Dei nostri quasi bona tibi.*

Claudius Psalmum Propheta, dum breuiter explicat, ob amorem ciuium sanctæ ciuitatis, quos fratres & amicos suos agnoscit & multo magis ob amorem Dei conditoris, & habitatoris eiusdem ciuitatis, vel domus, se impulsus fuisse, ut precaretur eidem ciuitati pacem, & abundantiam omnis boni. In Hebræo codice verba illa, *loquebar, & quasi*, futuri sunt temporis: sed qui periti sunt linguæ Hebraicæ, sciunt, tempus futurum sæpissime poni pro perfecto, vel imperfecto: sæpe etiam significare continuationem actionis, quæ ita facta est, ut sit etiam futura.



## PSALMVS CXXII.

*Titulus, & Argumentum.**Canticum graduum.*

**O** *Rationem continet hic Psalmus hominis peregrinantis ad caelestem Hierusalem, & in exilio, vel itinere pressuram patientis.*

## EXPLICATIO PSAL. CXXII.

**A** *D te leuavi oculos meos, qui habitas in caelis.*

Loquitur Propheta tum in persona peregrini, tum etiam in persona sua, qui vnus erat ex veris peregrinis; ac dicit, se in quibuscunque pressuris non respicere ad alium adiutorem, nisi ad Deum; tum quoniam ipse solus habitat in summo caelo, & inde omnia inferiora conspiciat, & moderatur: tum quia ipse est, qui per malos nos flagellat; ac propterea frustra confugimus ad alios, cum sit nemo, qui de manu Dei nos possit eripere.

*Et sicut oculi seruorum in manibus dominorum suorum.*

*Sicut oculi ancilla in manibus domine suae, ita oculi nostri ad Dominum Deum nostrum, donec misereatur nostri.*

Explicat cur oculos ad Deum leuauerit, vt videlicet respiciat Deum flagellantem, vt eo aspectu miserabili moueat ipsum ad misericordiam, & flagellare desinat. Id quod illustrat similitudine seruorum, qui dum caduntur a dominis, respiciunt moesti ad manus cadentium, ipso aspectu quasi petentes, vt miseri ipsorum cessent a plagis. Illud autem, *sicut oculi seruorum in manibus dominorum suorum*, clarius est in Hebraeo, vbi habetur, *Ad manus dominorum suorum*, & respondet applicatio, *Ita oculi nostri ad Dominum Deum nostrum*. Posita est autem similitudo, non seruorum tantum, sed etiam an-

cillarum, vel quia non soli viri, sed etiam feminae peregrinantur ad patriam, & in peregrinatione flagellantur; vel quia viri fortes, proprie viri sunt: viri debiles, & delicati feminae dici possunt: & vtrique tamen sua flagella in hoc itinere patiuntur. Ad flagella vero, quibus a Domino castigamur, non solum pertinent manifestae persecutiones, & calamitates; sed etiam tentationes occultae, quibus anima vexatur assidue; item timores, angores, tristitia, quibus nemo caret in hac vita, & ideo non dicit Psalmus, oculos nostros aliquo certo tempore leuandos ad Deum, sed sine intermissione, *donec misereatur nostri*: quod non fiet, nisi cum ad patriam peruenerimus: tunc enim coronabit nos Deus in misericordia, & miserationibus, cum sanauerit omnes languores nostros, & repleuerit in bonis desiderium nostrum, vt dicitur in Psal. 102.

*Miserere nostri Domine, miserere nostri, quia multum repleti sumus despectione.*

IV.

Non contentus Propheta oculis ad Deum fixis misericordiam implorasse; voce etiam cordis, & corporis clamat, & clamorem ingeminat pro se, & pro sociis peregrinationis, dicens, *Miserere nostri Domine, miserere nostri*. Et sane, qui recte aduerteret, atque attente consideraret, quid sit quod sequitur, quia multum repleti sumus despectione; plane intelligeret tantam esse nostram miseriam, vt cessare ab isto clamore non posset. Homo enim ad imaginem Dei creatus, & super omnia opera Domini constitutus, saepe etiam ab ipso Deo in filium adoptatus, & ad regnum caelorum praedestinatus; ita in hac peregrinatione, non solum a daemonibus, & prauis hominibus; sed etiam ab animalibus, etiam minimis, & ab ipsis elementis despiciatur, & assidue vexatur, vt Propheta verissime dixerit, quia non despiciemur solum, sed etiam repleti sumus despectione, nec solum repleti sumus, sed multum repleti sumus. Quid enim est quod hominem, etiam iustum & sanctum, in hac lacrymarum valle non despiciat?

Zzz

sed



sed præcipua tamen despectio, de qua proprie loquitur hoc loco Propheta, est ea, quam patiuntur boni à malis, & iusti ab iniuris. Verissima enim, & vniuersalis est illa Apostoli sententia, *Omnes qui volunt pie vivere in Christo Iesu, persecutiones patientur*: & illa Domini, *Si de mundo fuissetis, mundus quod suum erat, diligeret: sed quia de mundo non estis, propterea odit vos mundus*: & ratio est manifesta, quoniam bonum & malum contraria sunt, & contraria pacem inter se habere non possunt. Et quoniam iusti patientes sunt, & mites, & didicerunt à Domino non resistere malo, & percutienti maxillam præbere etiam alteram, ideo ab improbis superbe despiciuntur, & conculcantur, vexantur, & irridentur.

V. *Quoniam multum repleta est anima nostra: opprobrium abundantibus, & despectio superbis.*

Docet hoc ultimo versiculo David contemptum, ac despectionem, de qua supra loquebatur, accidere pauperibus, peregrinis ab hominibus copiosis, & superbis. Quamuis enim aliqui auctores velint, illud, *opprobrium abundantibus, & despectio superbis*, esse imprecationem, ut sensus sit, *Opprobrium recidat super abundantes, & despectio super superbos*: tamen, si respiciamus textum originale, & velimus concordare versionem S. Hieronymi cum versione Septuaginta Interpretum, cogemur sequi S. Augustinum, & dicere sensum hunc esse, *Multum repleta est anima mea, confusione videlicet, quia factus sum opprobrium abundantibus, & despectio superbis*. Sanctus enim Hieronymus ex Hebræo recte vertit, *Multum repleta est anima opprobrio abundantium, & despectione superborum*: cum qua versione rectissime coheret, quod habent Septuaginta Interpretes, & Latina editio vulgata, si subintelligatur verbum, *factus sum*; & continetur, *opprobrium, &c.* Ait igitur Propheta, *Multum repleta est anima mea, quod est idem, cum eo quod supra dixit, Multum repleti sumus despectione.*

Sed hoc loco explicandi gratia nominat animam, quoniam despectionis sensus proprie ad animam intelligentem pertinet; quæ enim anima intelligente caret, sentire possunt dolorem, sed non despectionem. Illud autem, *repleta est*, in Hebræo legitur, *satiata est*: quæ vox mirum in modum auget significationem: si enim qui multum satiantur, id est, ultra satietatem replentur, etiam si bonis cibis replentur, magnum dolorem percipiunt: quid sentient, qui nimium satientur malis cibis, qualia sunt opprobria, & despectiones? Quod vero sequitur, *Opprobrium abundantibus, & despectio superbis*; idem omnino significat: idem sunt enim opprobrium, & despectio; & iidem etiam sunt abundantes & superbi. Omnes enim superbi inflati sunt, & proinde abundantes sunt, sed abundant vento, non solido bono, id est, abundant opinione & existimatione sui. Nam si diuitias terrenas habeant, putant suas esse, neque cogitant Deo reddendam esse de earum dispensatione rationem. Si in dignitate & honore constituti sunt, arbitrantur sibi illa omnia deberi, & sua bona esse; & non intelligunt data esse ad aliorum utilitatem, & rationem grauissimam de ea dignitate reddendam, neque ad se aliud, quam onus pertinere. Proinde non minus despiciunt etsi de tali onere insentur, quam si baiulus glorietur, quod valde oneratus incederet. Si virtutes aliquas, si ingenium, si doctrinam habeant, sibi persuadent multa maiora esse quam sint, & sibi tribuunt, quæ sunt Dei dona. Denique si carent diuitiis, dignitatibus, honoribus; & contra, si puniuntur, & flagellantur, existimant sibi fieri iniuriam, & de Deo murmurant, & blasphemant: quod totum inde oritur, quia pleni sunt, vel potius inflati vento propriæ existimationis. Sed veniet tempus, quo opprobrium, & despectio in ipsos reuertetur, quando videlicet in die nouissimo dicent, quod scriptum est in libro Sapientiæ c. 5. *Hi sunt, quos aliquando habuimus in derisum, & in similitudinem improperij. Nos insensati vitam illorum æstimabamus insaniam, & suam illo-*



illorum sine honore. Ecce quomodo computati sunt inter filios Dei, & inter sanctos fors illorum est, & infra, Quid nobis profuit superbia? aut diuitiarum iactantia quid contulit nobis? transierunt illa omnia tanquam umbra.

## PSALMVS CXXIII.

## Titulus, &amp; Argumentum.

(Canticum graduum.)

**H**ic Psalmus continet exultationem eorum, qui de grauissimis tribulationibus liberati fuerant. Et quidem filij Israël, qui de captiuitate Babylonica redierunt in Hierusalem, in itinere nullas graues persecutiones passi fuisse leguntur; sed solum dum captiui detinerentur, & inter adificandam ciuitatem & templum, ut ex vtroq; libro Esdra intelligi potest. Itaque Psalmus hic, quatenus ad carnales Israelitas pertinet, referendus est ad eas afflictiones, quas passi sunt, vel dum essent in captiuitate, vel dum templum & ciuitatem iterum adificarent: quatenus autem ad spirituales Israelitas, id est, ad Christianos ad coelestem Hierusalem ascendentes pertinet, referendus est ad persecutiones Paganorum, aliorumq; impiorum, à quibus liberati sunt Martyres sancti, & electi ceteri quotidie liberantur.

## EXPLICATIO PSAL. CXXIII.

**N**isi quia Dominus erat in nobis, dicit nunc Israël, nisi quia Dominus erat in nobis.

Sermo imperfectus, & interruptus, initio Psalmi, signum est magnæ, atque insolitæ exultationis, quæ loquentem non sinit perficere sententias inchoatas. Dicit igitur multitudo Sanctorum de magnis tentationibus liberatorum, Nisi quia Dominus erat in nobis, id est, nisi Dominus omnipotens nobiscum fuisset, nunquam euadere potuissemus. Sed antequam compleat sententiam, præ lætitia gestiens inquit Ierusalem, id est,

torum populum Dei ad confessionem, & laudem, dicens, Dicit nunc Israël, & iterum repetit, Nisi quia Dominus erat in nobis. Quod attinet ad verba, illud, quia, in Hebraico textu habetur post verbum, Dominus, hoc modo, Nisi Dominus quia erat in nobis. Sed Interpretes Septuaginta, ut sententia esset clarior, ordinem verborum immutasse videntur. S. Hieronymus eam particulam, ut redundantem, & ociosam ex Hebraica phrasi, in sua versione omisit. Sic enim vertit, Nisi Dominus fuisset in nobis. Si quis tamen velit eam retinere, ita supplere poterit, Nisi Dominus, quia erat in nobis, nos liberasset; vel secundum Septuaginta, Nisi liberati essemus, quia Dominus erat in nobis. Quid autem factum fuisset, nisi Dominus nos liberasset, explicatur in sequentibus.

Cum exurgerent homines in nos, forte viuos deglutissent nos.

II.

Cum irasceretur furor eorum in nos, forsitan aqua absorbuisset nos.

III.

Ecce quid accidisset nobis, nisi Dominus fuisset in nobis, neque iuuisset potentissima sua virtute. Cum exurgerent homines in nos, forte viuos deglutissent nos, id est, cum nostri persecutores exurgerent aduersus nos, periculum fuit, ne tanta velocitate nos perderent, quanta solet mare, vel flumen viuos deglutire eos, qui in illud forte præcipitantur. Tria sunt hoc loco consideranda. Primum, vocantur homines, persecutores piorum, quia ducuntur sola ratione humana, qualis remansit in natura per peccatum corrupta: ratio enim humana post naturæ corruptionem, nihil altum sapit, nihil diuinum, nihil spirituale, neque alium finem propositum habet, nisi conseruationem, & augmentum propriæ temporalis felicitatis, de his dicit Apostolus 1. Corin. 3. Cum sit inter vos zelus, & contentio, nonne carnales estis, & secundum hominem ambulatis? & paulo infra, Nonne homines estis? ubi pro eodem Apostolus accipit carnalem esse, & hominem esse:

Zzzz 2

secun-



secundum carnem ambulare, & secundum hominem ambulare. Deinde difficultas non exigua est de particula *forte*, quæ etiam bis repetitur paulo infra. Videtur enim hæc particula non bene posita in editione vulgata, cum potius affirmatiua, ut certe, utique, sane, poni debuisset. Nam si legamus, *forſitan*, sequetur, non necessarium esse auxilium Dei in magnis tentationibus superandis, quandoquidem Propheta non audet certe affirmare, sed sub dubio relinquit, an grauissima tentatio nos deiectione sit, si Deus non sit in nobis. Sed quanquam non desint ex recentioribus, quibus ista particula non placeat, & verbum tum Hebraicum, *azai*, tum Græcum, *ἄρα*, non velint reddi per, forte, aut forſitan, sed per utique, aut certe: nos tamen non audemus vlllo modo à lectione vulgatæ editionis recedere: nam S. Hieronymus vir doctissimus, & vtriusque linguæ peritissimus fuit, & maior ei fides quam vllis doctioribus habenda est. Is autem ex Hebræo constanter vertit, *forſitan*, & in expositione Psalmorum, in qua editionem Septuaginta interpretatur, similiter legit, *forſitan*, denique in emendatione Psalterij ad Suniam, & Fretellam, nihil in hoc loco emendat. Sanctus quoque Hilarius, Origenem sequutus, S. Ioannes Chrysostomus, S. Augustinus magno consensu, *forſitan*, legerunt, neque in Bibliis hoc loco vlla est varietas lectionis. Neque timendum est, ut particula ista detrudere nos cogat aliquid de gratia Dei: non enim illud, *forſitan*, significat, potuisse nos forte resistere inimicis in nos irruentibus sine auxilio gratiæ protegentis: sed, potuisse fieri, ut non viui deglutiremur, quia forſitan inimici non eo vsque defæuissent. Sed quoniam periculum erat etiam, ut vsque ad interuentionem crudelissimam defæuissent, ideo dicitur, *Nisi Dominus fuisset in nobis, forſitan viuos deglutissent nos*. Postremo diximus, illud, *viuos deglutissent nos*, sumptum esse à similitudine maris, vel fluminis deglutientis, siue absorbentis eos, qui cadant in aquas, tum quia nullæ sunt fere bestię, quamuis crudelissimæ, quæ viuos deglutiant homines, sed lacerant ac disperpunt, ut notum

est; tum etiam quoniam hoc requirit versiculus sequens, qui de more Psalmorum, idipsum aliis verbis repetit, sic enim habet, *Cum irasceretur furor eorum in nos, forſitan aqua absorbuisset nos*: sensus enim est, forſitan ut aqua absorbuisset nos, id est, furor hostium nostrorum instar aquæ profundissimæ repente absorbuisset nos. Neque in hoc solo versiculo, sed etiam in sequentibus persistit Propheta in similitudine aquarum, ut mox videbimus.

*Torrentem pertransiuit anima nostra, forſitan pertransisset anima nostra aquam intolerabilem.*

Persistit in eadem similitudine comparans aduersariorum persecutiones torrentis rapido, & profundo, qui sine potentissimo auxilio pertransiri non potest. Et si quis cogitet, quales fuerint persecutiones Paganorum, & Hæreticorum in sanctos Martyres, & tentationes dæmonum aduersus sanctos Eremitas, aliosq; Christi Confessores, videbit simillimas fuisse torrenti violentissimo, quoniam licet sancti Martyres, & SS. Confessores gloriosi euaserint: tamen plurimi, ac fere sine numero, quasi vi torrentis abrepti, & absorpti perierunt, ut cognosci potest ex Cypriano in Serm. de lapsis, & Eusebio Cæsariensi in lib. 8. hist. cap. 1. ex versione Ruffini. Dicit igitur Propheta in persona Sanctorum, *Torrentem pertransiuit anima nostra*, id est, persecutionem, quasi torrentem pertransiuit anima nostra: caro enim succubuit, & cessit persequentorum furori, sed anima gloriose pertransiuit: sed, *nisi Dominus fuisset in nobis, forſitan pertransisset anima nostra aquam intolerabilem*, id est, intrasset torrentem nimis profundum, unde euadere non potuisset. Itaque illud, *pertransisset*, non significat, transiisset, vel euasisset: sed intrasset, & pertransire cepisset, siue pertransire coacta fuisset. Illud autem, *intolerabilem*, recte verterunt Septuaginta, ἀνυπόστατον, id est, sine substantia, sine hypostasi, sine fundamento, sine fundo.



fundo, ubi pedes figi possent: quo verbo significatur profunditas aquarum, quæ transmitti non potest. Sed occurrit hoc loco contrarietas aperta inter codicem Hebraicum, & versionem Septuaginta Interpretum. Codex enim Hebraicus diserte habet, *Torrentes pertransiit super animam nostram*, & editio Septuaginta habet, *Torrentem pertransiit anima nostra*: & paulo post Hebraicus textus habet, *Forſitan pertransiſſent ſuper animam noſtram aqua intolerabiles*, editio autem Septuaginta habet, *Forſitan pertransiſſet anima noſtra aquam intolerabilem*. Et quidem S. Hieronymus in expositione huius loci non tacet, meliorem esse lectionem Hebraicam. Sed existimamus posse conciliari has lectiones duobus modis: Primum enim fieri potest, ut Septuaginta Interpretes non habuerint in suo textu particulam, *hhal*, quæ significat, *super*, remota autem illa particula, quæ determinat vocabulum animæ ad casum accusandi, remanet ambiguum; utrum vocabulum animæ, sicut etiam vocabula torrentis, & aquarum, sint casus nominandi, aut accusandi. Proinde utramque lectionem patiuntur verba Hebraica, illam videlicet sancti Hieronymi, *Torrentes pertransiit animam nostram*, & illam Septuaginta, *Torrentem pertransiit anima nostra*. Et quoniam Septuaginta Interpretes meliores codices habuisse credibile est, quam sanctus Hieronymus habuerit, & fidelissime transtulerunt, quod inuenerunt, sequitur ut lectio Septuaginta, quæ est etiam nostræ vulgatæ editionis, retinenda, & Hebraicæ, quæ nunc extat, anteponenda sit. Deinde potest etiam fieri, ut Septuaginta legerint quidem, ut legit sanctus Hieronymus, sed maluerint sensum potius transferre, quam verba. Nam cum aliquis pertransit profundum torrentem simul sit, ut, & ipse transeat torrentem, & torrentes pertranseat super eum. Sed clarius sententia esse videtur, si dicatur homo pertransire torrentem, quam si dicatur torrentes super eum transire. Potest enim torrentes transire super hominem, etiam immobilem, & iacentem in profundo, sed non potest homo transire per

torrentem, quin torrentes transeat super eum. Ut ergo significaret Septuaginta, torrentem transire super hominem non iacentem, sed ambulantem vel narrantem, maluerunt dicere hominem transisse per torrentem, quam torrentem per hominem.

*Benedictus Deus, qui non dedit nos in captionem dentibus eorum.*

V.

*Anima nostra, sicut passer erepta est de laqueo venantium: laqueus contritus est, & nos liberati sumus.*

VI.

Aggreditur Propheta aliam similitudinem, ex qua magis adhuc illustretur, & intelligatur magnitudo beneficii diuini. Comparat igitur persecutionem, siue tentationem laqueo aucupis, ac dicit, gratias esse Deo agendas, Deumque benedicendum, quod non dedit nos in captionem dentibus aduersariorum, id est, non permisit capi, & occidi, ac deuorari. Quomodo autem id fecerit, explicat, dicens, *Anima nostra sicut passer erepta est de laqueo venantium*, id est, anima nostra incidit quidem in persecutionem, & tentationem, sicut passer, aut quæcunque alia auis (nomen enim Hebraicum, *tsippor*, generatim aures significat) in laqueum venatoris, siue aucupis: sed tamen liberata est ab illa tentatione, & persecutione, antequam caperetur à tentatore, & occideretur, quomodo aliquando auis capitur quidem laqueo, sed eripitur inde, antequam ab aucupe cupiatur manibus, & occidatur, & manducetur. Id autem factum est, quia laqueus contritus est, & nos liberati sumus, id est: quia tentationi per gratiam Dei finis impositus est, antequam anima fidem negaret, vel alio modo in peccatum consentiret, quomodo aliquando laqueus, qui autem comprehenderat, frangitur, & auis auolat, & spem aucupis in prædam inhiantis frustratur.

צפצ

*Adiutorium nostrum in nomine Domini, qui fecit celum, & terram.*

VII.

*Concludit cum laude Dei humiliter*  
Zzzz 3 agno-



agnoscens, victoriam tantam, & liberationem de tam periculosis tentationibus, non viribus suis tribuendam; sed adiutorio celesti Dei omnipotentis: cuius omnipotentiae manifestum est argumentum, quod fecerit cælum & terram. Modus autem, quo Deus solet de magnis tentationibus eripere seruos suos, insinuat dū dicitur, *Laqueus contritus est*: laqueus enim frangi solet, quando auis, vel exterrita aliquo clamore, vel allesta meliore esca, vim facit, & sic laqueum frangit. Quando enim auis quamuis laqueo irretita, inhæret esca ab aucupe proposita, nec intelligit se comprehensam, non conatur aufugere, & eo modo facile capitur, & occiditur. Sic igitur anima hominis in tentatione posita, cum primum a Deo illustrata, & vel clamore Iudicii diuini, & gehennæ exterrita, vel promissionibus celestis gloriæ allesta, incipit cogitare, dura quidem esse tormenta præsentia; sed duriora sine comparatione vlla tormenta futura, & sempiterna: vel dulcem esse vitam præsentem, dulcem voluptatem, dulces diuitias; sed dulciora sine comparatione præmia vitæ futuræ; incenditur amore bonorum supernorum, & metu suppliciorum gehennæ, atque eo igne diuinitus accenso vires concipit, & magno impetu firmissimæ deliberationis non peccandi in Deum, laqueum tentationis frangit, & liberata volat, & cum iubilacione canit, *Adiutorium nostrum in nomine Domini, qui fecit cælum, & terram.* De hoc modo euadendi scribit S. Cyprianus in lib. de exhortatione martyrij cap. vltimo. Has cogitationes, quæ persecutio potest vincere? quæ tormenta superare?

## PSALMVS CXXIV.

*Titulus & Argumentum.*

*Canticum graduum.*

**I**N hoc Psalmo consilium bonum dat sanctus Prophetæ peregrinis ascendentibus in patriam terrenam, tum cælestem. Consilium au-

tem est, vt in Deo totam spem suam ponant. Deus enim potentissimus, & fidelissimus est, neq; vnquam confundet sperantes in se, atque ad se toto desiderio properantes.

## EXPLICATIO PSAL. CXXIV.

**Q**ui confidunt in Domino, sicut mons Sion, non commouebitur in æternum, qui habitat in Ierusalem.

Ponit initio Propheta generalem, atque certissimam promissionem, eamque bis repetit ad maiorem veritatis asseuerationem. Dicit igitur, *Qui confidunt in Domino, sicut mons Sion, id est, omnes qui vere confidunt in Domino, erunt immobiles & securi, quæcunque tandem ingruat tempestas, sicut est ipse mons Sion, qui non solum immobilis est, quia mons est, sed etiam quia Deo sacer, & charissimus est.* Addit repetens, & quasi explicans quod dixerat, *Non commouebitur in æternum, qui habitat in Ierusalem;* vbi quod dicitur, *non commouebitur in æternum,* respondet illis verbis, *Erit immobilis sicut mons Sion;* quod sequitur, *qui habitat in Ierusalem,* respondet illis, *qui confidunt in Domino.* Illi enim qui habitant cogitatione, & spe in cælesti Ierusalem, ipsi sunt qui confidunt in Domino. Sic enim explicatur fiducia in Deum in Psalmo 90. *Qui habitat in adiutorio altissimi, in protectione Dei cali commorabitur.* Quod attinet ad verba, in Hebræo codice habetur alia interpunctio, & proinde alia ordinatio verborum. Sed quia interpunctio non erat in antiquis codicibus, sed à Rabinis addita est, ideo non tanti facienda est, vt propter eam contemnamus interpunctionem Septuaginta Seniorum, & Latinæ nostræ vulgatæ editionis. Præterea illud, *qui habitat in Ierusalem,* ambiguum est in Hebræo, vtrum ad montem Sion, an potius ad hominem confidentem in Deo referendum sit: sed Interpretes Septuaginta declarauerunt referri ad hominē, non ad montē: nam mons Græce ὄρος, est generis neutri, & illud, qui, tū Græce quā Latine est generis masculini. Adde quod



mons non tam proprie dicitur habitare in ciuitate, quam homo. Quia vero non omnibus, qui habitant in terrena Ierusalē, conuenit *non commoueri in aeternum*, cum ipsa Ierusalem stare non potuerit in aeternum, & quia *habitare in Ierusalem*, hoc loco idem est, quod *confidere in Domino*, ideo diximus cum S. Augustino, hic agi de habitatore cælestis Ierusalem per spem, & desiderium, quo modo habitabant, qui dicebant, *Conuersatio nostra in calis est*, Philip. 3.

*Montes in circuitu eius, & Dominus in circuitu populi sui, ex hoc nunc, & vsq; in sæculum.*

Probat quod dixit, montem Sion securum & stabilem esse, sed multo magis eos, qui cōfident in Domino. Siquidem Sion montes habet *in circuitu*, quasi pro muro, sed qui *confidit in Domino*, ipsum Dominum omnipotentem habet *in circuitu*: & montes, qui Sion montem circundant, complanari possunt, & cadere: sed Dominus *in circuitu* est populi *ex hoc nunc, & vsque in sæculum*. Sententia igitur horum duorum versiculorum est, Omnes qui confidunt in Domino, securos esse debere, quia Dominus prętegit eos ab omni malo: & quamuis interdum temporaliter affligantur, id etiam cooperatur illis in bonum, & si forte permittit Deus illis auferri diuitias, vel sanitatem, vel aliquid eiusmodi, reponit aliquid melius, id est, patientiam & consolationem cum merito glorię sempiternę. Sed hoc loco per confidentiam non debet intelligi vana pręsumptio, sed fiducia illa, quę ex fide non ficta, ex corde puro, ex conscientia bona, ex dilectione seruienti nasci solet.

*Quia non relinquet Dominus virgam peccatorum super sortem iustorum, vt non extendant iusti ad iniquitatem manus suas.*

Explicat paulo clarius, qua ratione Dominus protegat confidentes in adiutorio ipsius. Quod si, inquit, permittet Dominus aliquando, iustis de causis, iniquos domi-

nari pijs, non diu hoc permittet, ne pij desperantes incipiant etiam ipsi facere opera impiorum: sic igitur ait, *Quia non relinquet Dominus virgam peccatorum super sortem iustorum*, id est, dabit quidem aliquando Dominus impijs virgam, id est, sceptrum, quod est insignie potestatis, *super sortem*, id est, super hereditatem, siue partem, & portionem *iustorum*, sed non diu relinquet virgam in manu impiorum: in Hebręo est ad verbum, *Non requiescet virga peccatoris super sortem iustorum*, quę verba eundē habent sensum, sed, metaphora *quietis* eleganter explicat breuitatem temporis, quo peccatores permittuntur regnare super iustos, quamuis enim tempus, quo regnant impij super iustos, longum videri possit ijs, qui non cogitant aternitatem, tamen ijs, qui certi sunt ex diuina promissione Regnum Sanctorum cum Christo sine fine duraturum, momentaneum videtur omne quod finem habet. Ait igitur, *non requiescet virga peccatoris super sortem iustorum*, id est, erit quidem potestas peccatoris aliquando super iustos ad eorum probationem, vel exercitationem, vel correctionem, sed erit quasi stans, non sedens, transitura, non manens, temporalis, non aeterna. *Vt non extendant iusti ad iniquitatem manus suas*, hoc est, ne iusti non perseuerent in iustitia, si videant felicitatem iniquorum tam esse diuturnam, vt credi possit nullum finem habitura.

*Bene fac Domine bonis, & rectis corde.*

IV.

Quia dixerat, periculum esse, ne iusti scandalum paterentur ex nimis diuturna potestate iniquorum; conuertit sed ad Deū, atque precatur, vt benefaciat bonis, liberando videlicet eos velociter a potestate impiorum; aut certe patientiam illis, & consolationem internam copiose suppeditando: & simul admonet, ac docet, illos vere esse bonos, qui sunt *recti corde*, id est, qui non scandalizantur de iudicijs Dei; sed in bonam partem accipiunt omnia, quę Deus facit, etiamsi permittat impios dominari, q̄ quantum diuturno tempore, Illi. n. sunt recti

cor-



corde, qui conformant cor suum, id est, iudicium, & voluntatem cum rectissima regula iudicij, & voluntatis Dei, etiam si non intelligant, cur Deus hoc, aut illud faciat, vel fieri permittat: de his scribitur in alio Psalmo, *Quam bonus Israel Deus his qui recto sunt corde?* Isti enim acquiescunt in omnibus Deo, & placet illis Deus, & illi placent Deo, quomodo lignum rectum in paupimento recto optime collocatur, & quiescit, lignum autem distortum non potest collocari, nec quiescere nisi in loco distorto.

**V.** *Declinantes autem in obligationes, adducet Dominus cum operantibus iniquitatem, pax super Israel.*

Occasione ultimi verbi versiculi superioris, quo bona optabantur rectis corde, subiungit Prophetia terribilem comminationem ijs, qui declinant à rectitudine cordis, ac dicit eos, qui declinant à rectitudine ad tortuositatem, & in persecutione, vel tribulatione perdunt sustentiam: ac vel fidem negant, vel de Deo queruntur, ac murmurant, eos cum operantibus iniquitatem, id est, cum ipsis persecutoribus, atque impijs hominibus in iudicium adducendos: quoniam, ut sanctus Iacobus ait cap. 2. *Qui totam legem seruauerit, offendat autem in uno, factus est omnium reus:* & tum demum separatis omnibus malis de medio bonorum, pax vera, & sempiterna erit super Israel, id est, super populum Dei. Hoc loco magna est quaestio de verbo illo, *obligationes:* & quidem alij alia dicunt, sed ego, ut permitto vnumquemque abundare in sensu suo: ita si debeat hic versiculus cohaerere cum superiore, & si conciliandi sunt codices Latini cum Graecis, & Hebraicis, nihil dubito, quin Latinus Interpres scripserit *obligationes*, non tam respiciens ad rem, quae ligatur, & stringitur per obligationem quam ad ipsam obliquitatem, & tortuositatem, quae cernitur in fine, dum aliquid ligatur: neque enim obligari potest aliquid, nisi funis; alioqui directus torqueatur, & in circulos ducatur. Id ita esse primo

colligitur ex voce Hebraica, quae proprie obliquitatē significat, & à S. Hier. redditur, prauitatem. Deinde ex voce Graeca, quam Euthimius explicat, per obliquitatē, & peruersitatē. Deniq; ex ratione continuationis, nā si per, *obligationes*, intelligamus obligationes ad aliquid faciendum, ut sunt vota, iuramenta, promissa, pacta, & similia, vix percipi poterit, quid sibi hoc loco Propheta velit: si vero per *obligationes* intelligantur modi, & tortuositates, quae opponuntur rectitudini cordis, de qua proxime fuerat loquutus, omnia optime cohaerebunt. Interpres igitur vulgatus obscure quidem, sed vere, & proprie loquutus est.

## PSALMVS CXXV.

*Titulus & Argumentum.*

*Canticum graduum.*

**P**salms hic apertissime loquitur de reuersione à captiuitate, & ascensione ad patriam, & conuenit proprie tempus in illud, quo decretum Cyri de soluenda captiuitate Iudeorum primum promulgatum est: quod quidem figura fuit Euangelij, quo nobis annuntiata est remissio peccatorum, & ascensio ad caelestem Hierusalem.

## EXPLICATIO PSAL. CXXV.

**I**N conuertendo Dominus captiuitatem Sion, facti sumus sicut consolati.

Latinus Interpres voluit ad verbum reddere verba Graeca, & ideo minus Latine loquutus videtur. Sanctus Hieronymus sententiam non verba sequutus ita reddit, *Cum conuerteret Dominus captiuitatem Sion facti sumus sicut somniantes.* Vere enim vox Hebraica, *cholemim*, *somniantes* significat, & sensus est, cum primum auditum est à nobis decretum relaxationis, & reuersionis in patriam, praegaudio vix credere potuimus quod dicebatur, & nobis non videre, & audire, sed somnare videbamur. Simile quid accidit Patriarchae Iacob Gen. 45. qui cum audisset filium suum Ioseph



viuere, quem iam dudum mortuum luxerat, quasi de graui somno euigilans non credebat. Sanctus etiam Petrus Act. 12. de carcere præter spem mirabiliter liberatus, existimabat se risum videre. Porro LXX. Interpretes verterunt, consolati, quia ex nimia consolatione fiebat, ut sibi Iudæi somnare viderentur. Sed perspicua erit lectio, si vtrumque iungamus hoc modo. *Cum conuerteret Dominus captiuitatem Sion*, facti sumus ex nimia consolatione & lætitia quasi somniantes, nos liberatos: vel si placeat, hic esse potest sensus, *Facti sumus sicut consolati*, id est, facti sumus ut sunt ij, qui consolationem post magnam tribulationem accipiunt, id est, hilares, & iucundi ex tristibus, & merentibus. Hanc ineffabilem consolationem verè experiuntur, qui serio conuertuntur ad Deum, & contempta spe seculi, atque omnium rerum terrenarum cupiditate deposita, dirigunt pedes suos in viam pacis. Intelligunt enim quàm ineffabile bonum sit, erui de captiuitate Diaboli, & de profundo gehennæ, & ad veram libertatem, atque æternam pacem in cœlesti patria possidendam Deo vocante, & ducente preparari.

*Tunc repletum est gaudio os nostrum, & lingua nostra exultatione.*

Ex consolatione interna prodijt lætitia externa, quæ in hilaritate vultus, & in voce exultationis agnoscitur. *Tunc*, inquit, id est, ubi auditus est bonus nuncius liberationis, *repletum est gaudio os nostrum*, id est, facies nostra hilaris, & iucunda apparuit, & lingua nostra prorupit in verba lætitiæ, & iubilationis. In hebræo, pro, gaudio habetur risus: sed in idem recidit sententia: risus enim lætitiæ signum est. Si quis autem velit per, *os*, non intelligere faciem, sed quod propriè dicitur os, sensus erit, repletum est os nostrum lætis vocibus, & laudibus, & idem significabitur per verba sequentia, *& lingua nostra exultatione*, quæ repetitio est in Psalmis frequentissima.

*Tunc dicent inter gentes, magnificauit Dominus facere cum eis.*

III.

Nuncius bonus huius liberationis sicut eos, qui liberati sunt affecit ingēti lætitia, ita etiam alios, qui hoc audierunt, magna admiratione repleuit, & ideo dixerunt, *Magnificauit Dominus facere cum eis*, id est, magnificè gessit se Dominus cum populo suo: quamuis enim Cyrus fuerit, qui populum hebræorum ex tam longa captiuitate liberauit, tamen omnes facile intelligebant, id factum esse diuino instinctu: nam liberatio facta est ipso tempore, quo Deus per Hieremiam prædixerat esse faciendam, id est, post annos septuaginta, & Cyrus ipse li. 1. Esdræ cap. 1. agnoscit imperium orbis terræ à Deo cœli sibi tributum, & ab eodē Deo iussu se templū in Hierusalem edificare, populumque dimittere: & deniq; nunquam sperandum erat, ut Rex vllus sponte sua, & sine vllō pretio tot millia captiuorum dimitteret, nec solū dimitteret, sed etiam magnis donis oneratos dimitteret. Itaque merito gentes omnes tam magnum beneficium diuinæ prouidentiae tribuebant. Sed cur Propheta vitur hoc loco tempore futuro, cum paulò ante vsus sit tempore præterito? dixit enim, *Tunc repletum est gaudio os nostrum*: vnde consequens erat, ut diceret, *Tunc dixerunt inter gentes*. cur igitur ait, *Tunc dicent inter gentes*? Hebræus codex vtrumque verbum ponit in tempore futuro, quod tamen secundum consuetudinem linguæ hebræicæ, vtrunq; verti potest in tēpus præteritum. Sed codex græcus, quē secutus est Interpres latinus, primum posuit in præterito, secundum in futuro. Fortasse igitur hic est Hebraismus, & accipiendum est tempus futurū pro præterito. Fortasse etiam illud, *tunc*, hoc loco, non significat tempus liberationis iam præteritum, sed tempus diuulgationis huius rei ad gentes etiam longè postas, quod erat futurum, ut sensus sit, Cū perueniet fama huius rei ad gentes longè postas, tunc dicent inter se gentes, *Magna fecit Deus cum populo Iudaorum*. Neque

Aaaaa

minus



minus hæc admiratio gentium locum habet, cum homines, qui de hoc mundo sunt, videt aliquos, qui de Mundo erant, Mundo terga vertere, & ad patriam celestem per viam veræ virtutis, & Christi imitationis ascendere. Mundus enim non diligit quidem eos, qui de Mundo non sunt, sed miratur tamen, & Deum in illis, & cum illis esse negare non potest.

IV.

*Magnificavit Dominus facere nobiscum, facti sumus latantes.*

Approbant liberati quod gentes dicunt, quia vera dicunt, ac si ita subiungeret, Verè Dominus magnificè se nobiscum gessit, & præter meritum, & spem nostram egit, nobiscum, cum de tam miserabili captiuitate nos ad dulcissimam patriam reuocauit: & ideo facti sumus latantes, qui sub iugo captiuitatis gemebamur mœrentes.

V.

*Conuertere Domine captiuitatem nostram, sicut torrens in Austro.*

Quoniam non statim omnes captiui reuerfi sunt; sed primum aliqui cum Esdra, deinde alij cum Nehemia: ideo qui primi redierant precantur Deum pro plena, atque integra reuersione captiuorum. Utuntur verò similitudine torrentis, qui flante Austro plenissimè, & velocissimè fluere solet. Dicunt igitur, *Conuertere Domine captiuitatē nostram*, id est, fac vt reuertantur captiui nostri, qui adhuc remanent in terra aliena, planè omnes, & quam citissimè, vt sit plena, & velox reductio, qualis esse solet earum rerum, quas torrens secum abripit, & deuoluit, quando flante Austro tum pluuijs de celo cadentibus, tum niuib. liquefactis, & de montibus fluentibus impletur. Sed multo magis spiritualibus peregrinis hæc precatio necessaria est: quamuis enim iam aliqui ad patriam peruenerint, tamen multi adhuc peregrinantur: plurimi etiam amare coeperunt captiuitatem, & affixi rebus temporalibus de patria nihil cogitant; ideo necesse est, vt Deus instar torrentis, Austro flante violenter eos compellat, & quasi cogat ascendere. Denique tum isti, tum illi adhuc ex parte captiui tenentur. omnes cum

expectant, vt liberetur omnis creatura à seruitute corruptionis, & ipsi etiam in cælo Beati expectant redemptionem corporis sui. Pro hac igitur perfecta libertate filiorum Dei, de qua loquitur Apostolus ad Rom. 8. rectè precamur. *Conuertere Domine captiuitatem nostram, sicut torrens in Austro.* Quod attinet ad verba, in Hebraico, & græco codice habetur, torrentes, siue riuos aquarum in numero multitudinis, & casu accusandi: sed probabile est in Græcis antiquis, & magis correctis fuisse, *χυνάρεσσ*, id est, torrens. Nam S. Hieronymus in commentario, ubi exponit editionem Septuaginta, legit, torrens, & S. August. similiter legit, torrens. verbum autem Hebraicum potest intelligi tam in casu nominandi, quam accusandi: sed in sensu nulla difficultas est. Nam idem est sensus, siue dicamus, *Conuertere captiuitatē nostram*, vt torrens conuertit, & trahit omnia secum: siue, *Conuertere captiuitatem nostram*, vt torrentem protrudis, & impellis, quando Austro flante impletur aquis. Maior quæstio est de nomine Austri; siquidem recentiores quidam accurati, & docti contendunt, nomine Austri non debere intelligi ventum, sed regionem Australem desertam, & aridam, qualia sunt deserta Arabiæ, ac sensum huius loci esse volunt, *Conuertere captiuitatem nostram, sicut torrentes fluunt in locis aridis & desertis*: sic enim lætificabit nos reuersio captiuorum, quomodo lætificantur loca arida fluentibus aquis. Sed nobis veneranda est Patrum auctoritas: nam LXX: Interpretes, sine dubio per Austrum intellexerunt ventum: id enim proprie significat *ὄρος*, qua voce hoc loco vsi sunt: deinde sanctus Hieronymus, sanctus August. Theodoretus, Euthymius, & alij veteres, tum Græci, tum Latini agnoscunt hoc loco similitudinem venti Australis liquefacientis niues, & congregantis nubes, atque eo modo torrentes implentis. Ratio etiam connexionis, & nomen torrentis huic expositioni fauere videtur. Vtitur enim Propheta nomine torrentium, vt significet plenitudinem reuersionis captiuorum per loca.



loca vero deserta, & arida, riuuli quidam fluere solent, non autem torrentes pleni, & magni, quos ingentes pluuiæ, vel niues de montibus fluentes faciunt. At inquit, vox hebraica, *negheb*, non significat ventum, sed australem plagam, vel loca arida, & deserta. Respondeo, quod sæpe respondi, non debere restringi significationes vocum Hebraicarum ad Hebraica dictionaria: maior enim fides habenda est LXX. Interpretibus, & sancto Hieronymo, quam omnibus dictionarijs; & quemadmodum vox Græca *ὄρος*, significat proprie ventum Australem, & inde transfertur aliquando ad significandam regionem, vnde ventus ille spirat: sic etiam fieri potest, vt vox hebraica, *negheb*, quam ipsi volunt significare plagam australem, transferatur etiam ad significandum ventum australem; & hoc loco ita accipiendam esse hanc vocem, veterum auctoritas satis nobis persuadet.

*Qui seminant in lacrymis, in exultatione metent.*

Posteaquam rogauit Propheta Deum, vt reducat ad patriam omnes captiuos; exhortatur ipsos captiuos, vt libenter suscipiant laborem ambulandi, & ascendendi, neque retineantur amore earum rerum, quas in terra aliena possidebant: quoniam in patria sua, multò plura, & meliora inuenient. Vtitur autem similitudine aptissima seminantis, & metentis. Seminans enim ordinariè in lacrymis seminat, id est, cum dolore, & gemitu; quia cogitur triticum suum proicere in terram, neque scit, an vnquam illud recuperabit, ac proinde videtur laborare, & fatigari, vt opes suas amittat: sed quando messis venit, cum magno gaudio metit, quia videt triticum suum, quod videbatur, dum seminaretur, amissum, non solum non perisse, sed cum maximo scenore redditum sibi fuisse. Sed hæc exhortatio apud spirituales peregrinos præcipue locum habet. Qui enim captiuitatem diligunt, & amore mundi capti, de cœlesti patria nihil cogitant, ij existimant, iustorum iter ad cœlum nihil

esse aliud, nisi iacturam, & detrimentum. Qui enim verè peregrini sunt, & ad patriam cœlestem ascendunt, opes suas pauperibus largiuntur, qui nunquam restituent: sine precio vel præmio laborant, vt fratres suos doceant, vt Apostolus faciebat; sponte seipsi voluptatibus, & delectationibus priuant; quæ stultitia esse videtur ijs, qui nesciunt quid ista pariant. Sed hoc nihil est aliud, nisi seminare in lacrymis, vt postea tempore suo cum exultatione metant: quod si ij, qui captiuitatem adhuc amant, attentè considerarent, certè ipsi etiam mutato consilio ascendere inciperent, & sua omnia, licet cum sensu aliquo doloris interim seminant, vt paulò post in cœlesti patria cum exultatione meterent.

*Euntes ibant, & flebant, mittentes semina sua.*

*Venientes autem venient cum exultatione, portantes manipulos suos.*

Describit paulo fufius, & clarius morem seminantis, & metentis. *Euntes*, inquit, *ibant*, id est, rustici ex domo sua exeuntes ibant ad agrum, & *flebant mittentes semina sua*, id est, cum dolore spargebant triticum suum in terram, videntes se priuari interim opibus suis non sine sudore quæsitis. Sed postea venientes ex agro tempore messis, *venient domum cum exultatione portantes manipulos suos*, id est, referentes pro paucis granis integros manipulos spicarum. Neque curauit Propheta similitudinem applicare; quia facilè erat vnicuique id per se facere. Vtitur hac eadem similitudine Apostolus. 2. Corinth. 9. *Qui parce seminat, parce & metet.* Et quoniam similitudo admirabilis est, non erit inutile considerare, quibus in rebus sementis cum eleemosyna comparatur, vt magis animentur qui ascensiones in corde suo disponunt, ad opes suas libentissimè cum pauperibus communicandas. Primum igitur granum, quod seminatur, res est exigua, & tamen producit tantam granorum multitudinem, vt incredibile videatur: sic etiam eleemosyna res

VII.

VIII.



est in se vilis, cum sit actio humana, & temporaria, & per organum corporis corruptibilis facta; & tamen producit non multas pecunias, aut panes, aut vestes, sed Regnum sempiternum; quomodo si granum tritici seminatum non produceret spicam triticeam, sed spicam auream plenam gemmis preciosis loco granorum. Deinde granum seminatum debet corrumpi, & perdi; alioquin non nasceretur, iuxta illud Evangelij, *Nisi granum frumenti cadens in terram mortuum fuerit, ipsum solum manet*: sic eleemosyna debet donari, non commutari, & donari ijs, qui non possunt retribuere, denique debet amitti, ac perdi sine vlla spe recuperationis in hac vita: ita enim corrupta, & perdit iterum nascitur, & fructum plurimum parit in aeterna vita. Denique seminatum granum eget sole, & pluvia, vt germinare possit: sic etiam eleemosynæ, vt alia omnia bona opera, egent sole diuinæ gratiæ, & pluvia sanguinis Mediatoris, id est, requirunt, si meritorea esse debeant, vt fiant ex gratia Dei, quæ nascitur ex Christi sanguine: tunc enim res in se minima efficitur maxima ratione virtutis, quam ex gratia recipit: & sic non solum meritorea, sed etiam de condigno, vt scholæ loquuntur, meritorea est vitæ aeternæ. Sed hoc interest inter sationem tritici, & distributionem eleemosynæ ritè factam; quod plurima sunt, quæ facere possunt, vt qui seminavit in lacrymis triticum, in exultatione non metat: nam & potest seminatum granum deficiente imbre non nasci; & potest natum à bruchis, vel nebulis corrumpi; & potest iam maturum à furibus diripi, vel incendio perdi. At eleemosyna ex charitate facta, salua est, quippe in cælo reconditur, vbi neque bruchii, neque nebula, neque fures accessum nullum habent. Igitur qui spirituale semen in lacrymis seminat, in exultatione fructum magnum sine vlla dubitatione metet.

## PSALMVS CXXVI.

Titulus, &amp; Argumentum.

Canticum graduum Salomonis.

**P**salms hic semper mihi visus est supra modum obscurus, & nunc etiam post longum studium fateor me non perfectè assequi literalem sensum. Probabilior expositio videtur esse illa, quam tradiderunt Græci, S. Ioannes Chrysostomus, Theodoretus, & Euthymius; quod videlicet pertineat hæc Prophetica exhortatio, siue admonitio ad populum hebraeorum post reuersionem à captivitate Babylonica, quando laborabat in edificanda domo Dei, & restauranda ciuitate Hierusalem, & à vicinis gentibus toto ferè illo tempore vexabatur, & impediabatur. Huc etiã pertinere videtur titulus, Canticum graduum Salomonis: tribuitur enim Salomoni hæc adhortatio, quoniam ipse prior edificauit domum Domini, & ciuitatem Hierusalem amplificauit, & multis bonis repleuit. Ipse igitur commodè introducit, qui admo neat Zorobabelem, qui fuit quasi alter Salomon, quomodo se gerere debeat in domo, & ciuitate reedificanda, custodiendâ, & amplificanda. Sed alio sensu verus Salomon, id est, pacificus Christus, qui est pax nostra iuxta Apostolum, admonet eos, qui ad veram pacem aspirant, & aspirando ascendunt de valle lacrymarum ad visionem pacis, Hierusalem cælestem quomodo debeant edificare, & custodire domum, siue ciuitatem Ecclesiæ: tum etiam vnus quisq; sibi per bona opera domum edificare in calo, eamq; custodire, vt ad eam suo tempore feliciter inhabitadam, perpetuòq; possidendam, ascendat. Scio nonnunquam in Scripturis per adificationem domus, intelligi fecunditatem siue copiam filiorum. Sed hunc Psalmum communis expositio Patrum de vera domo Dei, id est, de templo siue materiali, siue mystico, non de carnali filiorum copia intelligendum esse docuit.



## EXPLIC. PSALM. CXXVI.

**N**isi Dominus edificauerit domum,  
in vanum laborauerunt qui edificauit eam.

Hæc dicuntur Iudæis ædificantibus domum Dei, id est templum, quando infelicitate opus procedebat, impediens vicinis gentibus, ut scribitur in primo libro Esdræ. Admonentur autem, ut cogitent nihil valere opera hominum, nisi primarius ædicator Deus adsit; & ideo non solum operentur manibus, sed etiam corde & ore. Deum inuocent, & in eius adiutorio præcipue fident. *Nisi Dominus edificauerit domum*, id est, Nisi Dominus inuocatus cum fiducia, operantibus adfuerit. *In vanum laborauerunt qui edificauit eam*, id est, omnis labor frustra consumptus est, & frustra etiam deinceps consumentur. Hæc eadem dicuntur Præpositis Ecclesiæ, qui prædicatione verbi Dei conuertere nituntur homines ad Deum, & ex ijs templum Domino, id est, Ecclesiæ ædificare. iuxta illud 1. Corinth. 3. *Dei ædificatio estis*. & ibidem. Ut sapiens architectus fundamentum posuit, alius autem superædificat: sed nisi adsit ille principalis architectus, qui dixit Matth. 16. *Super hanc petram ædificabo Ecclesiam meam*, in vanum ædificant homines, frustra prædicant doctores verbi Dei, dicente Domino, *Sine me nihil potestis facere*. Ioann. 16. Denique dicuntur eadem unicuique nostrum, qui domum nobis peractus fidei, spei, & charitatis in celo ædificare debemus: domus enim Dei, ut S. Augustinus ait serm. 22. de verbis Apostoli, credendo fundatur, sperando erigitur, diligendo perficitur. neque vllus in celesti patria ciuis admittitur, qui talem domum non ante parauerit. Sed hæc domus magis orando, & gemendo, quam operando fabricatur, quia non sumus sufficientes cogitare aliquid ex nobis tanquam ex nobis 2. Cor. 3.

*Nisi Dominus custodierit ciuitatem, frustra vigilat, qui custodit eam.*

Cum ciuitas Hierusalem post captiuitatem ædificaretur, simul ædificanda, & simul

custodienda erat, ut testatur Scriptura in lib. 2. Esdræ. Gentes enim quæ in circuitu erant, non solum impedire conabantur ædificationem, sed etiam demoliri quod ædificatum fuerat, & ideo filij Israel vna manu gladium tenebant, altera faciebant opus; & multi eorum dispositi ad custodiendum perpetuas agebant excubias. Sed nihilominus tot vigilijs suis nihil profecissent nisi Dominus ciuitatem custodire voluisset. Hoc idem contingere certum est, præpositis Ecclesiæ, qui simul ædificare Ecclesiam, & simul custodire debent: versamur enim in medio inimicorum, qui nihil magis oderunt, quam Ecclesiæ amplificationem. Et quamuis Episcopis ad hoc detur in Ecclesia locus altior, ut quasi è specula omnia prospicere, & populum custodire possint; tamen neque corda penetrant, neque ubique cum omnibus esse possunt; ideo *Nisi Dominus custodiat ciuitatem, frustra vigilat qui custodit eam*. Hoc ipsum singulis nobis accidere solet, ut dum per bona opera domum nobis ædificamus, non desint hostes, qui varijs tentationibus destruere moliantur ædificium inchoatum. vnde nos Apostolus armat scribens Ephesijs cap. 6. dum dicit, *Accipite armaturam Dei, ut possitis resistere in die malo*. & infra, *In omnibus sumentes scutum fidei, in quo positis omnia tela nequissimi ignea extinguere*. Sed nisi Dominus nobis adsit, & nos sæpe dormitantes custodiat, & pro nobis pugnet, frustra erit omnis labor noster.

*Vanum est vobis ante lucem surgere: surgite postquam sederitis, qui manducatis panem doloris.*

III.

Filij Israel præ nimia sollicitudine, dum in angustijs essent, ante lucem opus ædificationis aggrediebantur; ideo monet illos Spiritus sanctus, nihil profuturum, quod ante lucem operari incipiant, nisi Dominus illis adfuerit: sed si Dominum adiutorem habuerint, & in illo spem suam posuerint, opus prosperè successurum, etiam si post necessariam quietem, orto iam sole

Aaaaa 3

operi



operi se accingant. *Vanum*, inquit, *est vobis ante lucem surgere*, ad opus videlicet ædificationis profequendum; vbi subintelligendum est, *nisi Dominus ædificauerit domum, vel custodierit ciuitatem*. & ideo confidentes in Domino, & illum assidue inuocantes surgite, *postquam sederitis*, id est, post nocturnam, ac necessariam quietem, *surgite ad opus, qui manducatis panem doloris*, id est, vos, qui in angustia, & oppressione nunc viuitis propter infestationem continuam inimicorum. Sed in sensu magis intento à Spiritu sancto, monentur Præpositi Ecclesiæ, & singuli etiam fideles, vt in ædificanda domo: siue communi, siue particulari non magis fident operationi, quam orationi; sed imitentur Dominum, qui per noctes vigilabat in oratione iuxta illud Luc. 6. *Erat pernoctans in oratione Dei*: & interdiu concionabatur, & miraculis sermonem confirmabat; nec non Apostolos imitentur, qui in Act. cap. 6. dicunt, *Nos autem orationi, & ministerio verbi instantes erimus*. *Vanum*, inquit, *vobis est ante lucem surgere*, id est, totum tempus consumere in ædificatione, vel custodia. *Surgite postquam sederitis*, id est, surgite ad opus, postquam sederitis vacantes quieti contemplationis, & orationis. *Qui manducatis panem doloris*, id est, vos qui præ desiderio cœlestis patriæ assidue gemitis, & dicitis, *Fuerunt mihi lacrymæ meæ panes die, ac nocte, dum dicitur mihi quotidie ubi est Deus tuus?* Qui enim valde amant, dum, non possunt frui præsentia rei amatæ, sustentantur interim desiderio, & gemitu, & eo modo lacrymæ fiunt illis panes die, ac nocte, id est, in prandio, & cœna. In Hebræo non habetur illud, *surgite*, sed videntur Septuaginta legisse paulo aliter, quam nunc habeatur in nostris codicibus: vbi enim nunc est, *cum*, id est, surgere, ipsi videntur legisse, *cumque*, surgite. & quamuis Euthymius ex Græco codice, legat, *surgere*, tamen veteres Patres, legunt, *surgite*, vt S. Hieronymus, & S. Augustinus in commentario, & videtur etiam S. Ioannes Chrysostomus ita legisse. denique ita legit S. Hilarius, qui vt S. Hieronymus scribit in lib. de

Scriptoribus Ecclesiasticis, imitatus est Origenem in explanatione Psalmorum, certum autem est Origenem, & alios veteres Græcos, & Latinos habuisse codices correctiores, quam vnus Euthymius habuerit nisi fortè Euthymius etiam legerit, *surgite*, sed corrigendum putauerit esse textum, vnius literæ mutatione: nam *izigisat*, est surgere, & *izigesi*, est surgite.

*Cum dederit dilectis suis somnum, ecce hereditas Domini filij, merces fructus ventris.*

Post exhortationem, & admonitionem addit, Propheta consolationem, prædicans fore, vt post præsentis tribulationes, det Dominus pacem, & quietem populo suo, & tunc filios Israel manifeste futuros Dei hereditatem, & potentissimos, atque fortissimos, vt nullos deinceps hostes passuri sint. quæ Prophetia respicit nouum populum, id est, Ecclesiam Christi, cuius typus erat templum, & ciuitas ipsa Hierusalem. Nam vt S. Augustinus demonstrat. libr. 18. de ciuitate Dei cap. 45. Iudeis post ciuitatis, & templi instaurationem omnia in deterius prolapsa sunt, donec per Vespasianum & Titum iterum ciuitas euerfa, & templum incensum fuit. Ait igitur, *Cum dederit dilectis suis somnum*, id est, cum pacem, & quietem Dominus populo suo dederit, mittens ad illos verum Salomonem, qui templum verum, id est, Ecclesiam suam, fundabit, & propagabit, atque ipsos etiam Imperatores orbis terræ illi subijciet; ecce hereditas Domini filij merces ventris fructus id est ecce tunc apparebit, quod hereditas Domini erunt filij plurimi, iuxta illud Psal. 2. *Postula à me, & dabo tibi gentes hereditatem tuam, & possessionem tuam terminos terræ*: & merces eiusdem Christi Domini erit fructus ventris, filij videlicet plurimi, iuxta illud Isai. 53. *Si posuerit pro peccato animam suam, videbit semen longauum*. Nam, vt sæpè monuimus, frequentissimè in Psalmis id ipsum bis repetitur. Itaque idem est, *hereditas Domini; filij, & merces*,



ידד  
ידד

res fructus ventris, id est, Christi Domini hæreditas, & merces erunt multi filij, qui nihil aliud sunt, nisi fructus ventris. Atque hæc expositio est conformis hebraico textui, ubi vox illa, fructus, est nominatiuus casus, non genitiuus. Sed in editione Græca vox, fructus, est casus genitiui, & ideo iuxta Græcum codicem, sensus erit, quod filiorum multitudo erit hæreditas Domini, & merces Christi, qui Christus verè, proprièque fructus ventris fuit, cum non ex viro, sed ex sola Virgine ortum habuerit. & hæc fortasse verior est expositio, quoniam verbum hebraicum potest mutatis punctis reddi per genitiuum, sed verbum Græcum non potest reddi per nominatiuum. Proinde si codices omnes conciliandi sint, hæc posterior expositio priori anteponenda erit. Iam verò si Psalmus explicetur secundum altiore sensum, in hoc versiculo prædicetur felicitas cœlestis Hierusalem, quæ post somnum mortis temporariæ in resurrectione manet eos, qui sicut oportebat ad patriam sempiternam, passibus amoris, & fidei ascendere properarunt. At igitur, Cum dederit dilectis suis somnum, id est, cum post varios labores, & certamina dederit Deus omnibus dilectis suis, tam Præpositis Ecclesiæ edificatoribus, quam priuatis fidelibus domum sibi per opera bona fabricantibus, somnum beatæ mortis, ecce hæreditas Domini filij, merces fructus ventris, id est, tunc apparebit in die vltimi Iudicij, quod filij Dei sint ipsius Dei hæreditas, quia tunc dilecti salutem æternam consequentur, & per hoc transibunt in æternam Dei possessionem, & hæreditatem, & iidem filij erunt merces Christi, qui est fructus ventris, quia salus electorum est Christi merces: ipse enim, qui gratiam, & gloriam electis suis patiendo, & moriendo promeruit. Non multum autem refert, quod in Hebræo habetur, sic dabit dilecto suo somnum, pro eo quod nos habemus in Græca, & Latina versione, cum dederit dilectis suis somnum: nam particula hebraica, chen, significat multa, nimirum, sic, vere, Sic, &c. Itaque reddi potest, tunc dabit, id est, post illas tribulatio-

nes dabit, & sensus in idem recidit. vox autem, ledido, dilecto suo, potest etiam legi, ledidau, dilectis suis, & sic legerunt Septuaginta & S. Hieronymus, qui habuerunt codices sine punctis, quæ à Rabinis postea addita sunt. & si fortè necessario legendum esset, dilecto suo, exponeremus vnicuique dilecto suo, vel dilecto populo suo, quod est idem cum eo, quod nos habemus, dilectis suis.

*Sicut sagitta in manu potentis, ita filij excussorum.*

Declarat his verbis Propheta potentiam filiorum Christi, qui sunt eius hæreditas, & merces, ac dicit fore potentissimos, quales sunt sagittæ in manu viri robustissimi, quæ maximo impetu iaciuntur, & omnia per-rumpunt. loquitur autem de spirituali potentia seruorum Christi, quæ non minus cernitur in actione, quàm in passione. nam & cum instat tonitruum, & fulguris terrefaciunt, & conuertunt infideles ad fidem, vel peccatores ad pœnitentiam efficacia prædicationis, splendore sanctitatis, & miraculorum virtute; & quando tormenta omnium generum, incredibili patientia, & fortitudine, ad mortem vique decertantes pro fide, & pietate tolerant, quid sunt aliud, nisi sagittæ in manu potentis? sed cur filij isti tam fortes dicuntur filij excussorum? quia filij sunt hominum eiectorum, & expulsorum à mundo, quasi quisquilæ, & reiectamenta; videlicet filij Prophetarum, & Apostolorum: nam de Prophetis Apostolus dicit Hebr. 11. Alij vero ludibria, & verbera experti insuper & vincula, & carceres, tentati sunt, lapidati sunt, in occasione gladij mortui sunt, circueierunt in melioribus, & in pel- libus caprinis, egentes, angustriati, afflicti, quibus dignus non erat mundus. De Apostolis dicit idem Paulus 1. Corinth. 4. Puto quod Deus nos Apostolos nouissimos ostendit, tanquam morti destinatos; quia spectaculum facti sumus mundo, & Angelis, & hominibus, usque in hanc horam & esuri-



*mus, & sitimus, & nudi sumus, & colaphis  
cœdimur, & instabiles sumus, & laboramus  
operantes manibus nostris, Maledicimus,  
& benedicimus, persecutionē patimur, &  
sustinemus, blasphemamur, & obsecra-  
mus tanquam purgamenta huius Mundi  
facti sumus, omnium peripsēma usque adhuc.  
Et tamen isti ita excussi, & reiecti fortissimi  
fuerunt, & de mundo, & de dæmonibus mi-  
rabiliter triumpharunt. Horum filij sunt o-  
mnes electi, qui sicut sagittæ in manu po-  
tentis hostes vulnerarunt, & vicerunt. Scio  
locum istum variē tam à veteribus, quàm à  
recentioribus exponi, sed, ut alias dixi, unus-  
quisque in suo sensu abundet, ubi nullum  
subsit fidei periculum. Neque refert quod  
S. Hieronymus ex hebræo vertit. filij iu-  
uentutis, ubi nos habemus, filios excussio-  
rum, & versionem suam defendit in Episto-  
la ad Marcellam de quæstionibus super  
hunc Psalmum: nam vox hebraica, *nehari-  
m*, verumque significat, & iuventutem, &  
excussorum. proinde versio Septuaginta &  
nostra vulgata editio non repugnat textui  
originali. Neque reprobamus Sancti Hie-  
ronymi intelligentiam. siquidem electi ut  
sint filij excussorum, quia filij Propheta-  
rum, & Apostolorum à mundo reprobato-  
rum; ita sunt etiam filij iuventutis, quia  
sunt per regenerationem, & renouationem  
iuuenes facti; ac per hoc alacres, & fortes, &  
expediti ad bellum contra spirituales ho-  
stes. Sed in futuro seculo, ac præsertim in  
die resurrectionis, & ultimi iudicii, maximè  
apparebit, quam sint potentes isti filij ex-  
cussorum: qui tunc per resurrectionem glo-  
riolam erunt veri filij iuventutis, quia re-  
nouabitur, ut aquilæ iuentus eorum. *sta-  
bunt enim in magna constantia aduersus  
eos, qui se angustiauerunt, ut dicitur Sap. 5.  
& aduersarij videntes turbabuntur timore  
horribili, & dicent, Hi sunt quos aliquando  
habuimus in derisum, &c. & Psalm. 149.  
Gladij ancipites in manibus eorum ad faci-  
endam vindictam in nationibus, increpat io-  
nes in populis, ad alligandos Reges eorum in  
compedibus, & nobiles eorum in manicis fer-  
reis, ut faciant in eis iudicium conscriptum,  
gloria hac est omnibus sanctis eius.**

*Beatus vir, qui impleuit desiderium  
suum ex ipsis; non confundetur cum lo-  
quetur inimicis suis in porta.*

Concluditur Psalmus per epiphonema  
acclamando ipsi Domino Christo, *Beatus  
vir, qui impleuit desiderium suum ex ipsis,*  
id est, verè felix est ille, Christus videlicet,  
qui impleuit desiderium suum ex ipsis fi-  
lijs, quoniam perduxit ad finem desiderium  
suum, quod erat vidēdi salutem, & gloriam  
filiorum suorum, pro quibus tam multa  
fecit, & pertulit. & ideo *non confundetur,  
cum loquetur inimicis suis in porta,* id est,  
in ultimo iudicio, quod exercebitur in am-  
plissima porta, id est, in conuentu totius  
mundi, non confundetur cum loquetur i-  
nimicis suis dæmonibus, & hominibus i-  
niquis, sed eos potius confundet, & conuin-  
cet iniustitiæ, & imbecillitatis: tota enim  
contentio Christi cum diabolo, & mini-  
stris eius ab initio mundi usque ad finem,  
fuit circa salutem generis humani, quod  
totum ad inferos secum diabolus pertrahe-  
re semper conatus est. Atque ad hunc finem  
singulis ætatibus persecutiones Iudæorum,  
paganorum, hæreticorum, iniquorum om-  
nis generis, aduersus Ecclesiam excitauit.  
Sed cum in die Iudicii conspiciantur tot  
millia Electorum cum Christo gloriose re-  
gnantium, & triumphantium, & iustissime  
coronatorum: & contra, sublata erit ini-  
quis omnis potestas, & ad æterna supplicia  
iustè damnatis nulla spes erit bella reno-  
uandi; tunc ipse Christus non confunderetur,  
sed confundet omnes inimicos suos. In he-  
bræo habetur, *Beatus vir, qui impleuit pha-  
retram suam ex ipsis,* sagittis videlicet. Sed  
Septuaginta Seniores maluerunt explicare  
metaphoram: & quia, implere pharetram  
sagittis, significat, implere domum fortis-  
simis filijs; ideo maluerunt vertere, *Beatus  
vir, qui impleuit desiderium suum ex ipsis,*  
hoc est, pro voto, & desiderio impleuit do-  
mum suam filijs optimis, & robustissimis.  
Illud autem *non confundetur cum loquetur  
inimi-*



*inimicis suis, in Hebraico, & Græco codice habetur in numero multitudinis, non confundentur cum loquentur. Non est improbabile in aliquo textu vitio scriptorum esse numerum variatum: non enim verisimile est Interpretem Latinum, vel Græcū de industria numerum mutasse. Et cum S. Hieron. & S. Augustinus in commentario legāt in singulari, non confundentur cum loquentur, & contra S. Hilarius, & S. Ioannes Chrysostomus legant in numero multitudinis, non confundentur, cum loquentur, necesse est, ut Græci codices fuerint varij, sicut etiam Latini codices vulgati varij sunt: sed utraq; lectio vera est, nam & de Christo verè dicitur, non confundetur, cum loquetur inimicis suis in porta, & de electis filiis Dei verè etiam dicitur, non confundentur, cum loquentur inimicis suis in porta, cum scriptum sit Sap. 5. Tunc stabunt iusti in magna constantia aduersus eos, qui se angustiauerunt: Illud autem, in porta, interpretati sumus in ultimo iudicio, quoniam, ut diximus in explicatione Psal. 121. apud Hebræos in portis ciuitatum conueniebat multitudo populi ad iudicia & præterea ex doctrina S. Augustini in expositione huius versiculi, in porta loqui, est publicè loqui, sicut loqui in cubiculo, est loqui occultè & secretè. Quoniam igitur vltimum iudicium palam & publicè, & in conspectu omnium hominum & Angelorum fiet, rectissimè dicitur in porta fieri, & Christus atque electi eius rectè inimicis suis loqui dicuntur in porta.*

## PSALM. CXXXVII.

Titulus, &amp; Argumentum.

Canticum graduum.

**V**idetur hic Psalmus S. Hilario & S. Augustino, iuxta litera corticem, ita de temporali bus bonis, quorum promissio propria testamenti veteris est, agere, ut necessarium sit mysticum sensum inuenire, si ad Christianorum mores accommodari debent, Sed fortasse non erit difficile ita illum exponere,

re, ut simul ad testamentum vetus & ad nouum, ad bona Hierusalem terrena & cœlestis pertineat. Est igitur argumentum huius Psalmi, exhortatio ad pietatem, proposita ingenti mercede, & virtutis.

## EXPLICAT. PSAL. CXXXVII.

**B**eati omnes, qui timent Dominum, qui ambulant in vijs eius.

I.

Docet Propheta redeuntes à captiuitate, quomodo se gerere debeant, si nolint iterum in captiuitatem reuerti, sed perpetuò frui bonis Hierusalem, quæ doctrina vtriusque peregrinis conuenit, tam ijs, qui peregrinabantur à patria terrena, atque ad eam ascendere cupiebant, quam ijs, qui peregrinantur à patria cœlesti, atque ad eam redire festinant. Ait igitur, *Beati omnes, qui timent Dominum*, id est, illi omnes siue viri, siue feminae; siue magni, siue parui, siue nobiles, siue ignobiles, siue domini, siue serui, siue docti, siue indocti, denique omnes omnino, nullis exceptis, tunc solum verè beati erunt, id est, fortunati, contenti, hilares, in optimo statu constituti, quem statum omnes desiderant, si Deum verè timuerint, id est, si Deum offendere formidauerint, atque eo timore muniti, à Dei gratia, quæ fons est omnium bonorum, nunquam exciderint. Signum autem sancti huius timoris est, *se in vijs eius*, id est, in præceptis eius ambulauerint. Nam timor iste sanctus ex amore procedit, & Dominus, ait Ioan. 14. *Si diligitis me, mandata mea seruare, & iterum, Qui habet mandata mea & seruat ea, ille est, qui diligit me. & iterum, Qui non diligit me, sermones meos non seruat.*

*Labores manuum tuarum quia manducabis, beatus es, & bene tibi erit.*

II.

Incipit numerare felicitates hominis timentis Deum, atque ad eum ipsum sermonem dirigit, dicens, prima felicitas tua erit, quod manducabis labores manuum tuarum, id est, frueris ijs bonis, quæ labore manuum, siue operum tuorum aequisieris.

Bbbbb

Quo



Quo loco diligenter considerandum est, non ponere Prophetam felicitatem piorum in magna copia diuitiarum; sed in iis bonis, quæ proprio labore acquiruntur, quæ ordinariè modica esse solent. Magnæ enim diuitiæ, vel ex hæreditate parentum, vel ex rapina & vñra, aliisque malis artibus plerumque habentur. Laudat S. Hieronymus in epist. ad Hedibiam, quæst. 1. vulgatam illam sententiam, *Dives autem iniquus, aut iniqui heres*. Quare idem Prophetæ in Psal. 36. dicit, *Melius est modicum iusto super diuitias peccatorum multas*. & in Psal. 72. *Ecce ipsi peccatores, & abundantes in seculo obtinuerunt diuitias*, & in Psal. 143. *Promptuaria eorum plena oruſtantia ex hoc in illud, oves eorum fecerunt abundantes in egrediens suis, boues eorum crasse, non est ruina macerij, neque clamor in plateis eorum. Beatum dixerunt populum cui hæc sunt. Beatus populus, cuius Dominus Deus eius*. Itaque sanctus David non hebræis tantum, sed etiam Christianis concionatur, cum non ponat felicitatem in magnis diuitiis, sed in eo solum, quod viuunt de suis iustis laboribus: ubi duo vitia extrema reprehendit: vnum eorum, qui labores aliorum manducant: alterum eorum, qui ne suum quidem laborem manducant, sed auarè recondunt, vt diuitias augeant: illi igitur soli beati sunt, qui labores manuum suarum manducant. Quod si fortè aliqui timentes Deum, & ambulantes in viis eius, non possint frui bonis suis; sed esurire & sitire cogantur, quodd bona sua ab aliis direpta fuerint; non propterea falsa erit promissio, quæ hoc loco habetur: nam si Deus quibusdam amicis suis permittit, vt cupiant saturari de micis, quæ cadunt de mensis diuitum, vt de Lazaro mendico legimus Luc. 16. & nemo illis eas micæ tribuit: dat sine dubio illis Deus aliquid longè melius, videlicet gaudium de tribulatione, vt Apostolus dicit ad Hebr. 10. *Rapinam bonorum vestrorum cum gaudio suscepistis*. & de se ipse dicit 2. Cor. 7. *Superabundo gaudio in omni tribulatione nostra*, & tunc sensus huius versiculi hic erit,

*Laborem manuum tuarum quia manducabis, beatus es & bene tibi erit*, id est, nunc manducabis laborem, id est, de gaudio laboris & tribulationis reficietis, postea verò de fructu ipso laboris, id est, de præmio bonorum operum saginaberis; & ideo nunc *beatus es in spe*, & postea *bene tibi erit in re*. Atque hoc propriè pertinet ad spirituales peregrinos, qui gaudent in tribulatione inopiæ & ærumnarum; scientes, quodd tribulatio patientiam operatur, patientia verò probationem, probatio vero spem. spes autem non confundit, quia charitas Dei diffusa est in cordibus nostris. Rom. 5. Quod attinet ad verba in hebræo est *labores manuum*, vt nos habemus; sed in græco videtur esse, *labores fructuum*, & sic pluri mi vertunt, & legunt ex græco. Sed vox græca *καρπῶν*, & fructus, & volas manuum significat. proinde Septuaginta propriissimè vertunt hebraicam vocem, *cappecha*, quæ propriè volas manuum significat. Igitur nostra editio vulgata planè concordat cum originali hebraico, & cum editione Septuaginta.

*Vxor tua sicut vitis abundans in lateribus domus tuæ.*

Hæc est altera felicitas timentis Deum, & ambulantis in viis eius, quod si fortè vxorem ducere voluerit, vnam tantum ducet, eamque non ad libidinem explendam, sed ad filiorum procreationem accipiet, vt Angelus Tobiam monuit dicens, *Accipis Virginem cum timore Domini, amore filiorum magis, quàm libidine ductus*, & ipse Tobias verè dixit, *Dominus tu facis, quia non luxuria causa accipio sororem meam coniugem, sed solo posteritatis amore*. Tob. 6. & 8. Ait igitur, *Vxor tua*, non vxores. non concubinae tuæ, *sicut vitis abundans*, id est, multos pariens filios, vt vitis fecunda multos racemos, *in lateribus domus tuæ*, id est, intus manens, vt modesta & pudica: & curam domus interioris habens, dum vir de his quæ foris sunt, cogitat. S. Hieronymus vertit, *in penetralibus domus*, quoniam de lateribus interioribus hoc lo-



coagitur. Sed quamuis hæc felicitas quædam sit, tamen vt intelligamus, non magnam esse felicitatem, Deus multis magnificam amicis suis, etiam coniugatis, hanc felicitatem non dedit, vt Abrahamo & Saræ, Isaac & Rebecce, Zachariæ & Elizabethæ: multis etiam inspirauit desiderium & propositum sanctæ virginitatis, vt creditur de sanctis Prophetis Elia & Hieremia, & scitur de B. Virgine Maria, S. Ioanne Baptista, S. Ioseph, & alijs propè infinitis; quos certe Deus non priuauerit felicitate coniugij, & secunditatis carnalis, si non esset virginitas donum longè excellentius. Adde quod sancti viri, qui vel coniuge caruerunt, vel sterilem sortiti sunt, non fuerunt priuari felicitate fecunditatis, sed eam habuerunt altèrius generis, & sine comparatione maiorem. Christus inprimis, qui caput est omnium Sanctorum, non habuit carnalem uxorem, neque filios carnales, sed habuit tamen sponsam Ecclesiam, & filios spirituales innumerabiles. Sic etiam Abraham vnum habuit filium ex Sara, sed per fidem factus est pater multarum gentium: omnes enim fideles filij Abraham dicuntur ab Apost. Rom. 4. & quod mirabile est, viri Sancti non solum patres, sed etiam matres sunt eorum, quos ad fidem, vel ad pœnitentiam conuertunt: patres enim sunt prædicando verbo aut exemplo, & matres gemendo pro eis, & orando. Idem enim Apostolus patrem se dicit. Cor. 4. cum ait, *Non vt confundam vos, hæc scribo, sed vt filios meos charissimos moneo: nam si decem millia pædagogorum habeatis in Christo, sed non multos patres, nam per Euangelium ego vos genui.* alibi verò se matrem dicit, cum ait ad Galat. 4. *Filioli mei, quos iterum parturio, donec formetur Christus in vobis.* Quod si placet spiritualibus filiis assignare patrem & matrem, quamuis ab eodem homine generentur & pariantur, dicere poterimus, patrem esse amorem Dei, & proximi matrem esse sapientiam; verè enim amor est, qui filios gignit, sed per sapientiam gignit, dum sapienter loquens, & scripturas explauans persuadet auditoribus fidem

aut pœnitentiam. Sic enim de sapientia scribitur Sap. 8. *Hanc amavi & exquisiui, & iuuentute mea, & quasi sponsam mihi eam assumere, & amator factus sum forma illius.*

*Filij tui sicut nouella oliuarum in circuitu mensæ tue.*

IV.

Tertia felicitas hic describitur, educatio videlicet filiorum. Viri enim timentes Deum, & ambulantes in vijs eius, non tantum filios multos, sed etiam bonos, & bene moratos habebunt, quoniam ab infantia illos docebunt timere Deum, & ambulare in vijs eius. Sic igitur ait. *Filij tui sicut nouella oliuarum*, id est, similes erunt arbutualis optimis, quales sunt oleæ, quæ semper virent, & fructum dulcissimum faciunt; non autem similes erunt rubis, aut spinis, aut sterilibus plantis: erunt autem *in circuitu mensæ tue*, vt eos omnes simul videns, & cum eis conuiuens, & conuescens maiorem ex illis delectationem capias. Quæ omnia conueniunt etiam in filios spirituales, quos cum Pater Verbo Dei pascit, & proficere videt, mirificè gaudet, & cum Apostolo dicit, *Gaudium meum, & corona mea, sic stete in Domino charissimo*, Phil. 4.

*Ecce sic benedicetur homo, qui timet Dominum.*

V.

*Benedicat tibi Dominus ex Sion, & videas bona Hierusalem omnibus diebus vitæ tue.*

VI.

*Et videas filios filiorum tuorum, pacem super Israel.*

VII.

Quarta est hæc felicitas, quod videlicet vir timens Deum non solum de bonis proprijs gaudium habere debeat, sed etiam de communibus. Idè addit, quod ita sit à Deo, qui habitat in Sion, benedicendus, vt videat ciuitatem suam Hierusalem abundantem omnibus bonis, toto tempore vitæ suæ, & videat in ea ciuitate filios filiorum similiter beatos & felices; & deniq; pacem,

Bbbbb 2 quæ



quæ omnia bona conseruat; & custodit, stabilem videat super populum Israel. Sed altiore sensu, & magis proprio, atq; à Spiritu sancto intento, hic describitur felicitas tantò maior tribus superioribus, quantum distat cœlū à terra, & Deus à creaturis, & propterea non eam narrando, sed imprecando Propheta proponit. *Ecce, inquit, præter omnia quæ dicta sunt, sic benedicetur homo, qui timet Dominum, nimirum dicetur illi; Benedicat tibi Dominus ex Sion, id est, non solum benedicat tibi Dominus de terra temporalia bona tribuens, sed etiam benedicat ex monte sancto suo, ex altissimo habitaculo suo, tibi que præstet, ut videas bona Hierusalem omnibus diebus vitæ tuæ, id est, videas Deum, in quo sunt omnia bona Hierusalem, omnibus diebus vitæ tuæ, id est, in æternum, & in seculum seculi: nam cum anima sit immortalis, & corpus etiam post breuem somnum mortis temporalis, sit resurrecturum ad vitam immortalem; certè bona quæ hic videmus, non videmus omnibus diebus vitæ nostræ, sed per minimam partem dierum vitæ nostræ, quibus in terra peregrinamur, pauci sunt & mali; sed bona cœlestis Hierusalem verè videbimus omnibus diebus vitæ nostræ, qui sine fine erūt: sicut etiam omnes iniqui videbunt mala Babylonis omnibus diebus æternæ mortis suæ. Neque mirum est, quod non dixerit Propheta, ut possideas bona Hierusalem. sed, ut videas: quoniam vera bona Hierusalem videndo possidentur; siquidem in visione Dei perfecta beatitudo consistit. *Similes, inquit Ioann. in 1. epist. c. 3. ei erimus, id est, beatissimi & felicissimi, & quasi Dei quidā, quoniam videbimus eum sicuti est.* Accedet ad gaudium beatorum, quod videbunt in patria illa cœlesti, filios filiorum suorum, id est, non solum illos, quos ipsi per se Deo genuerunt, sed etiam, qui per filios suos spirituales, & per filios filiorum, vsque ad mundi consummationem ad Deum adducti fuerint; & de omnibus, tanquam de proprijs, & ad se pertinentibus gaudebunt; Denique accedet ad consummationem felicitatis, quod videbunt pacem super Israel, pacem*

firmam, & stabilem, quæ securissimos reddet omnes habitatores Hierusalem, vsque in æternum videbunt enim omnes suos inimicos perfectè subiectos sub scabello pedū Christi, id est, in profundam gehennam de- trusos, æternis vinculis alligatos, terra enim scabellum est pedum Dei, iniqui autem omnes sub terram conclusi iacebunt per secula sempiterna.

## PSALMVS CXXVIII.

Titulus, & Argumentum.

Canticum graduum.

**I**N Psalmis Gradualibus, ut initio admodum vicissim Propheta nunc deplorat arumnas peregrinationis, nunc bona patriæ cœlestis laudat, ut tam illa, quàm ista ad ascendendum, & festinandum hortentur. Quoniam igitur in precedenti Psalmo multa dixit de bonis Hierusalem, nunc redit ad mala Babylonis, in quæ exules sumus, & peregrini.

## EXPLIC. PSALM. CXXVIII.

**S**æpe expugnauerunt me à iuuentute mea, dicat nunc Israel.

Consolatur se populus Dei in tribulatione positus, quod iam sit assuerus talibus angustijs, & semper Deo adiuvante liberatus fuerit. Conueniunt autem hæc verba populo Iudzorum, dum in reedificatione templi & ciuitatis, à vicinis gentibus oppugnaretur; & conueniunt etiam Ecclesiæ Christi, quæ vix vnquam ab oppugnatione paganorum, vel hæreticorum, vel falsorum Christianorum respirare potuit. Ait igitur, *Sæpe expugnauerunt me à iuuentute mea, dicat nunc Israel*, i. populus Dei, qui Israel vocatur, nō miretur si ab hostibus oppugnatur, quia nihil noui patitur, sed reuocet ad memoriā præteritas angustias, & dicat. *Sæpe expugnauerunt me inimici mei iam inde à prima mea ætate: nam vix nata Ecclesia* passa



passa est in Abele persecutionem Cain; ac deinceps sapientissime similia pertulit. Quod attinet ad verba, id solum notandum est, verbum, *expugnauerunt*, positum esse, pro *opugnauerunt*, nam vox hebraica, *zavar*, significat, *angustiare*, & vox Græca significat, *bellauerunt*; & ex versiculo sequenti manifeste colligitur, non præualuisse hostes in populum Dei, proinde pugnasse, sed non expugnasse, bellasse, sed non debellasse.

*Sæpe expugnauerunt me à iuuentute mea; etenim non potuerunt mihi.*

Reddit rationem, cur sæpe hostes reperierint prælium, siue pugnam; ac dicit causam esse, quia nunquam præualuerunt nam si semel præualuissent, & populum Dei penitus extinxissent, non fuisset opus tot præliis toties renouatis. Verissimum esse quod hic asseritur, Ecclesiastica historia testatur. Illud, *non potuerunt mihi*, vel positum est pro, *non potuerunt in me*; vel subintelligitur aliquid, *ut non potuerunt mihi nocere, vel præualere.*

*Supra dorsum meum fabricauerunt peccatores, prolongauerunt iniquitatem suam.*

Quod proprijs verbis Propheta dixerat; id nunc per similitudines & metaphoras repetit; & confirmat, Dicit igitur populus Dei de persecutoribus suis: *Supra dorsum meum fabricauerunt peccatores*, id est, supra dorsum meum, artem fabrilis exercuerunt, vtentes dorso meo pro incude, quam fabri ferrarij assidue percutiunt. In Hebræo habetur verbum, *charas*, quod Septuaginta verterunt, *fabricare*, & S. Hieronymus *arare*; sic enim ad verbum reddidit, *Supra dorsum meum arauerunt arantes*; & verè vtrunque significare potest; quamuis enim non habemus locum in Scripturis (quod ego sciam) vbi *charas*, significet, *fabricare*, habemus tamen Gen. 4. vers. 22. & 3. Reg. 7. vers. 14. vocem *chores*, ab eadem radice, quod significat *fabrum ferrarium*. Ex quo sequitur, vt *charas* significet *fabrilis artem exercere*. Neq;

dubium esse potest, quia LXX. Interpretes, homines doctissimi, ex nomine *fabri*, deduxerint verbum, *fabricare*, quod hoc loco nõ significat, ædificium erigere ex lapidibus & lignis (inepta enim similitudo videretur, si quis diceret super dorsum hominis domum vel ædificium quodlibet fabricari) sed, vt diximus, significat iuxta proprietatem vocis Hebraicæ, fabricare instrumenta ferrea super dorsum, quasi super incudem; quæ similitudo significat assiduum & durissimam persecutionem; nihil enim crebrius & fortius percuti solet, quam incus à fabris. Idem significatur verbis sequentibus, *prolongauerunt iniquitatem suam*; prolongatio enim iniquitatis, est continuatio persecutionis, quam semper boni patiuntur à malis. Sanctus Hieronymus vertit, *prolongauerunt sulcum suum*. Sed quamuis vox Hebraica, quæ nunc habetur in Hebraico textu, significet *sulcum*; tamen si vna litera postponatur, vel altera anteponatur, significabit *iniquitatem*, & hoc modo sine dubio legerunt Septuaginta Seniores; & quod litera, *vau*, debeat anteponi, perspicuum est ex eo, quod vbi nunc est, ociosa est & superuacanea. Itaque Septuaginta non legerunt, *lema auotam, sulcum suum*, sed, *lema auonitam, iniquitatem suam*, à voce *auon*, quod est *iniquitas*. Sed licet nos hoc modo concordemus lectionem Græcam & Latinam cum Hebraica; & sententiam vulgatæ lectionis, omnino sequendam esse existimemus; tamen non negamus lectionem S. Hieronymi habere etiam bonum sensum, si ita exponatur; *Supra dorsum meum arauerunt arantes*, *prolongauerunt sulcum suum*, id est, supra dorsum meum iugum grauissimum posuerunt, & me quasi boue abusi arauerunt arantes, & non paruo tempore me iugum ferre compulerunt, sed tempore longissimo, quoniam longissimum sulcum ducere voluerunt.

*Dominus iustus concidet ceruices peccatorum, confundantur & conuertantur retrorsum omnes, qui oderunt Sion.*

IV.

למען  
למען  
תם



Consolatur nunc Propheta populū Dei prædicens non procul abesse vindictam diuinam impios persequutores iustorū: quasi dicat, bono animo estote iusti, quoniam persecutores quidem vestri iniuste dorsum siue ceruicem vestram nunc premunt: sed paulo post *Domus iustus iuste ceruices*, ipsorum non premet, sed *concidet*, & in frustra continuet gladio suo, ut nunquam amplius vobis nocere possint: & tunc demum *confundentur*, qui antea superbe exultabant, & *conuerterentur* retrorsum fugientes & cadentes omnes illi, qui *ederunt* & persequerentur *populum Domini*. Obserua primo, illud, *concidet*, in textu Græco, & Hebraico esse in præterito *concidit*. Sed tamen Sanctus Hilarius, & S. Augustinus legunt, & exponunt, *concidet*; proinde videtur fuisse varia lectio in textu Græco, quam illi sequuti sunt. Hebraica verò lingua faciliè patitur mutationem temporum, ut possimus præteritum accipere pro futuro. Itaque non est facile mutanda lectio nostra Latina. Sed siue legamus, *concidit*, siue *concidet*, sensus constat. Deus enim iam *concidit* ceruices multorum persecutorum, ut Pharaonis, Nabuchodonosor, Balthazaris, Antiochi, Neronis, Domitiani, Diocletiani, & similibus: & in futuro etiam *concidet* ceruicem omnium aliorum, qui similiter persecutores piorum, vel erunt, vel sunt. Obserua secundo, pro verbo, *ceruices*, in Hebræo esse, *laqueos*, siue *funos*; sed verisimile est. Septuaginta non legisse *habbor*, ut nunc est in Hebræo, sed *gabbor*, quod *ceruices* significat, siue *dorsum*: nec minus verisimile est, Dauidem conseruasse eandem similitudinem; & sicut dixerat *supra dorsum meum, gabbi*, ita postea addidisse, *concidet dorsa, gabbor*, ut ostendat simili pœna puniendos peccatores, sed grauiore. Obserua tertio, quod dicitur, Deus *concidere* ceruices peccatorū, intelligi de peccatoribus superbis, vel obstinatis; nam peccatoribus, qui humiliter confitentur peccata sua & emendare cupiunt, Deus non *concidit* ceruices, sed *medetur* languoribus ipsorum, Obserua quarto, illa verba, *confundantur*, & *conuertantur retrorsum*,

non esse proprie imprecationem, sed prædicationem, ut sæpe monuimus. Sed si quis velit accipere, ut verba sonant, poterit pie imprecationem exponere, ut nimirum sit imprecatio bonæ confusionis, quæ poenitentiam adducit, & conuersionis à peccatis ad Deum: sed prior expositio est magis ad literam.

*Fiant sicut fœnum tectorum, quod priusquam exellatur, exaruit.*

*De quo non implebit manum suam, qui meret, & sinum suum, qui manipulos colligit.*

Alia est imprecatio, quæ similiter prædicationem notat: significat enim breuissimam fore persecutorum felicitatem; & mirabili amplificatione comparat eam fœno, quod est res per se vilis & fragilis, & sicut dicitur in Euangelio, *hodie est, & cras in clibanum mittitur*: sed non contentus fœno comparasse, addit similem esse fœno, quod non in campis sed in tectis domorum nascitur, id est, herbarum minutissimarum, quæ nascitur super tecta, quæ nullius est pretij, nullique vsui apta: ac propterea nemo illam metit, neq; in manipulos redigit, sed arescere & perire permittit. Sed quamuis hæc amplificatio sit apud nos, qui nihil videmus vilius & fragilius: tamen cum ad iudicium nouissimum venerimus, fortasse hæc non amplificatio, sed extenuatio nobis videbitur: quid enim erit tunc cernere viros quondam potentissimos & ditissimos, & qui se domos suas Regnis & imperijs stabilivisse crediderant, cernere inquam, abiectos proijci in locum totius mundi infimum? & qui delicijs & voluptatibus affluenti, ne leuissimum quidem incommodum ferre poterant, sempiternis cruciatibus addictos videre, sine vlla consolatione in æternum perseueraturos;

*Et non dixerunt qui præteribant, Benedictio Domini super vos: benediximus vobis in nomine Domini.*

Quia dixerat, fœnum tectorum non tollere meti & colligi; addit non futurum ex-

iam

עב  
גבת

גבת  
גבי



iam, vt messoribus eius à prætereuntibus benedicatur, quo modo benedici solet messoribus tritici vel sceni, quod in campis nascitur & crescit, quod pertinet ad maiorem confusionem iniquorum, qui sceno nascenti in testis comparati sunt. Dicit igitur, non contigit vobis, neque contingeret, vt qui transeunt per vias benedicant ijs, qui vos metunt: nulli enim vos metent, sed qui testia purgant, proijciunt vos in ignem, vel in cloacam. Quamuis autem benedictio prætereuntium proprie ad messoris pertineat, tamē redundat etiam in id, quod metitur: precaur enim prætereuntes, vt copiosa, & matura sit messis: sic igitur benedictionis carentia & priuatio redundabit in ipsos iniquos, quibus in iudicio nouissimo nemo benediceret, nemo eorum miserebitur, sed ab omnibus despicientur & contemnentur, quod ad maximam eorum ignominiam pertinebit. Nemo igitur illis dicit, *Benedictio Domini super vos*, neque dicit, *Benediximus vobis, in nomine Domini*, sed contra potius à Christo Iudice, & ab omnibus sanctis eius diceretur *Ite maledicti in ignem æternum*.

## PSALMVS CXXIX.

## Titulus, &amp; Argumentum.

## Canticum graduum.

**R**egis hic Psalmus est, sed plenus saluberrima doctrina; vt non sine causa in Ecclesia præter ceteros frequentetur: vnus est ex gradualibus, quia deplorat miseriam exilij, vnus est etiam ex poenitentialibus, quia docet rationem agendi veram poenitentiam; pro defunctis quoque recitari solet in Ecclesia frequentissime, quoniam si dicatur in persona animæ in purgatorio detenta, omnia optime quadrant: nam & anima illa sunt in quodam profundo, & ascendere cupiunt, & expectant misericordiam Dei per Redemptoris nostri pretium. In summa tria continet, orationem ad Deum, exhortationem ad populum, & prædicationem redemptionis futuræ.

## EXPLICAT. PSAL. CXXIX.

**D**e profundis clamaui ad te Domine: Domine exaudi vocem meam.

Oraturus Propheta Deum primo postulat audientiam, deinde exponit petitionem suam. Audientiam postulat in primis duobus versiculis. Incipit autem à similitudine hominis iacētis in ima valle, vel in profundo puteo, qui nisi magna voce clamet, non potest exaudiri ab ijs, qui sunt in altissimo monte; & verè aptissima similitudo est: nam licet Deus sit vbique per essentiam & potentiam, tamen ratione dissimilitudinis homino peccator longissimè distat à Deo. Deus enim semper est iustus & beatus, & in altis habitat; homo peccator semper est malus & miser, & similis Ionæ Prophetæ, qui cum Deo nolisset obedire, detectus fuit non solum in profundum maris, sed etiam in profundum ventris Ceti; & tamen inde clamans exauditus est: oratio enim feruens omnia perumpit & penetrat. Dicit autem David, *De profundis*, non de profundo, quia verus poenitens ex duobus profundis clamare debet, ex profundo miseriæ, tanquam ex valle lacrymarum, siue vt in alio Psalmo dicitur, *ex huto fecis & profundo lacu*; & ex profundo cordis, id est, ex intima consideratione, & cognitione propriæ miseriæ: qui enim non cogitat & non cognoscit profundum, in quo est, non curat inde ascendere, sed contemnit, & sic in maius profundum cadit, iuxta illud Prou. 18. *Impius cum in profundum venerit contemnit*: qui autem profunda consideratione intelligit, sed exulem esse & peregrinum, & in magno periculo versari, ne forte ad patriam nunquam perueniat, & quod infinita miseriæ est, se iam in inferno inferiore, si non præsentia, certè merito peccatorum suorum iam locum habere cœpisse; non potest non toto corde horere & pauere, & magno affectu clamare ad eum: qui solus potest eum ex tam horrendo profundo eripere, & manum ad ascendendū porrigere. Sequitur, *Domine exaudi vocem meam*.



*meam*, id est, quamvis in profundo sim, & tu in altis habitas, tamen quia magna voce clamo, potes me exaudire, ideo peto ut exaudias vocem meam.

## II. *Fiant aures tue intendentes in vocem deprecationis meae.*

Non sufficit, ut quis magna voce clamet, ut audiat, sed requiritur, ut ijs, ad quem clamatur, attendat. Sæpe enim fit, ut quis ita animum defixum habeat in alia re, ut non attendat ad vocem loquentis secum: & tunc frustra sonitus verborum pulsat ad aures eius. Deus autem omnia quidem semper videt & audit, sed quando non facit quod petimus, videtur ita se gerere, ac si non attenderet ad vocem orantis, quasi alia cogitaret; ideo David omnino audiri cupiens, non contentus magna voce clamasse, rogat etiam ut Deus dignetur attendere, id est, admittere preces, & donare quod petitur.

## III. *Si iniquitates obseruaueris Domine, Domine quis sustinebit.*

Captata iam audientia, exponit petitionem suam, quæ est, ut Deus non iudicio utatur secum, sed misericordia; non rigide querat rationem debitorum, sed misericorditer ea condonet. Sed hanc petitionem non simpliciter proponit, ne nimis audax videatur, sed illam inuoluit in ratione, propter quam Deus moueri potest ad eam concedendam, quæ est mirabilis rhetorica, & ab ipso Spiritu sancto hausta. Sic igitur loquitur, *Domine si iniquitates hominum obseruare volueris*, omnes condemnabis; non deest autem infinitam bonitatem tuam omnes omnino perdere; igitur non debeo nimis audax videri, si peto, ut peccata mihi condones, & de hoc profundo eruas, in quod me iniquitas sola demersit. Quod attinet ad verba, nomen, *iniquitates*, significat omnia genera peccatorum, ut sunt præuicatio legis, ut dicitur I. Ioan. 3. & peccatum est iniquitas; alioqui enim non omnia peccata proprie sunt iniquitas, id est, iniustitia, cum alia sint peccata luxuriæ, alia superbiæ, &c. illud *obseruaueris*, in textu originali, & in e-

ditione Septuaginta proprie significat, custodire, ut sensus sit, Si iniquitates, quæ sunt debita quædam nostra, in tuo libro rationum, diligenter custodias, ut exigas de illis rationem, nemo nostrum tibi satisfaciet; ideo peto, ut eas de libro tuo deleas, & misericorditer indulgeas, cum soluendo non sumus. Illud autem, *quis sustinebit*, non significat patienter expectare, ut paulò infra, propter legem tuam sustinui te Domine, sed significat, sustinere in iudicio, siue in reddenda ratione non deficere: quamvis enim in Latina editione idem sit verbum in hoc versiculo & in sequenti, tamen in textu Hebraico, & Græco sunt verba diuersa. Verè autem si Deus sine misericordia nos iudicare velit, nemo omnino subsisteret: nam offensio in Deum est infinitæ magnitudinis, & nos sine gratia eius non solum condigne satisfacere non possumus, sed neque sufficientes sumus ad peccati grauitatem agnoscendam, vel ad dolorem pro admissis concipiendum, vel ad penitentiam ipsam inchoandam, præterea nos non scimus numerum, neque grauitatem peccatorum nostrorum, nam *delicta quis intelligit*? Deus autem scit exactissime numerum peccatorum, & in libro suo omnia scripta tenet. Tu quidem, inquit Iob, *gressus meos dinumerasti*: idem etiam scit, & solus cognoscit grauitatem infinitam peccati mortalis: quomodo ergo poterit homo tam ignorans, & tam infirmus reddere rationem tam sapienti calculatori, & tam potenti exactori? Itaque sicut potest homo se in puteum deijcere, sed non inde ascendere; ita potest peccare, sed non satisfacere, nisi misericorditer adiuerit.

*Quia apud te propitiatio est, & propter legem tuam sustinui te Domine.*

Vera præsentia, quam in hoc Psalmo Pœnitentiali Propheta nos docet, duo potissimum requirit, cognitionem propriæ miseræ, & cognitionem misericordiæ diuinæ: qui enim miseriam propriam ignorat, non querit medicinam, nec agit pœnitentiã; qui misericordiã Dei nescit, desperat

veniam



veniam; & pœnitentiam inutilem agit. Igitur Propheta in tribus versiculis præcedentibus ostendit, se plane cognoscere misericordiam suam cum de profundo clamet, & cum dicat, peccata eiusmodi esse, vt si Deus ex solo iudicio agere velit, nemo subsistere possit: nunc ostendit, sed nosse etiam misericordiam Dei maximam, & ideo non obstante magnitudine, vel multitudine peccatorum, se sperare veniam, & salutem. Sic igitur ait. *Quia apud te propitiatio est, & propter legem tuam sustinui te Domine*, id est, quamuis nemo subsistere possit, si observare velis iniquitates nostras: ego tamen quia noui te ex natura misericordem esse, & scio apud te inueniri propitiationem, & quia tu legem posuisti tibi, vt cum impenitentibus seuerissime te geras, cum pœnitentibus misericorditer, & suauiter, & ideo propter hanc legem tuam sustinui te Domine, sperans, & expectans indulgentiam peccatorum. Nota, illud, quia, non reddere rationem superiorum, sed sequentium, nimirum eius quod dicitur, *sustinui te Domine*. Nota præterea, illud, *apud te propitiatio est*, ab Augustino referri, ad pretium sanguinis Redemptoris, qui vere est propitiatio pro peccatis totius mundi, tamen hoc loco simplicior intelligencia esse videtur, vt sensus sit, quia tu facile propitiaris pœnitentibus: nam de pretio redemptionis agitur in fine Psalmi, vt paulo post videbimus. Illud autem, *propter legem tuam*, non significat legem, quam nobis dedit, (nam secundum illam nos condemnaret, non absolueret) sed legem suam, quam ipse seruare solet, iuxta illud, *Omnes via Domini misericordia, & veritas*, & alibi, *Misericordiam & iudicium, cantabo tibi*. Itaque Deus iuxta legem suam, id est, quam sibi ipse præscripsit, primo peccatoribus misericordiam offert, vt pœnitentiam agant, deinde iustitiam, si impenitentes esse perseverarent. Recte ergo S. Augustinus dicit, hęc agi de lege charitatis, non de lege iustitiæ. Sed mira est in codicibus varietas: nam in Hebræo est, *ut timearis*, vel vt S. Hieronymus reddit, *cum terribilis sis*; in Græco, *propter nomen tuum*; in Latino, *propter legem*

tuam. Quæ tamen varietas facile tolli poterit, si verbum Hebræicum, *tiuare*, legatur cum aliis, punctis, *torah*, & sine dubio Septuaginta Interpretes legerunt, *torah*, id est, legem, neque obstat, quod, *torah*, in fine habeat literam *he*, & *tiuare*, habet literam, *aleph*, nam hæc sunt literæ permutabiles, & sæpe vna ponitur pro alia. Porro Græca exemplaria variant, vt Chrysostomus notauit, & alia habent, *propter nomen tuum*, alia, *propter legem tuam*, quæ lectio optima est, & eam habent S. Hilarius, S. Hieronymus, S. Augustinus, & S. Gregorius in Commentariis huius loci; neque difficile fuit in Græco textu ponere *nomen*, pro lege, cum in Græco idiomate *nomen*, & *lex* in idem fere scribantur literis. Itaque lectio Latina vulgatæ editionis omnino conseruanda est, cum à vero textu, Hebræico, & Græco non discordet, & habeatur in Commentariis sanctorum Patrum, & sensum optimum faciat. Verbum *sustinui*, in Hebræico, & Græco clarius est, significat enim *expectare*, siue *sperare*, quod etiam declaratur in verbis sequentibus huius Psalmi.

*Sustinuit anima mea in verbo eius: sperauit anima mea in Domino.*

V.

Hic iam incipit exhortatio ad alios, quos exemplo suo hortatur ad spem in Deo ponendam, Ego, inquit, in profundo miserrum fui, sed non desperavi de misericordia Dei; siquidem anima mea peccatorum vulneribus saucia *sustinuit*, id est, expectauit medelam, *in verbo eius*, id est, iuxta promissionem eius. Sæpe enim Deus per Mosem in Deuteronomio, & alibi promisit indulgentiam pœnitentibus. Cum *quaesieris*, inquit, Deuter. 4. *dominum deum tuum, inuenies eum*, si tamen toto corde *quaesieris*, & *tota tribulatione anime tue*, hinc ipse Dauid in Psalmi 118. dicebat, *Memento verbi tui seruo tuo, in quo mihi spem dedisti*. Quod autem paulo obscurius dixerat, iterum repetit verbis clarissimis, dicens, *Sperauit anima mea in Domino*, nimirum indulgentiam se accepturam, quam petebat. Multum autem valere debet Dauidis exemplum: fuit

Ccccc

enim



enim ipse in profundo miseriarum, siue culpam; siue poenam respicias, culpa eius grauissima fuit, nam adulterium commisit, cum abundaret vxoribus, occidit militem innocentem, qui sibi fidelissime seruiebat, offendit Deum; à quo acceperat Regnum, & donum Prophetiæ, item robur, pulchritudinem prudentiam, diuitias, &c. Sed etiam in profundo miseriæ fuit, quando persequabatur eum Rex Saul, vt sæpe in periculo mortis fuerit: & tamen quia non desperauit, sed sperauit potius, liberatus est.

VI.

*A custodia matutina vsque ad noctem, speret Israel in Domino.*

Quod ego, inquit, facio, totus Israel, id est, omnis populus Dei faciat, speret videlicet in Domino, cum in quocunque profundo fuerit, siue peccatis, siue peccatorum poenis prematur, in Dei adiutorio confidat. *A custodia matutina vsque ad noctem*, id est: tota die, à summo mane, vsque ad noctem extremam, ita vt nullo tempore desinat sperare in Domino. Dicitur autem *custodia matutina*, siue, vigilia matutina, tempus auroræ: nam veteres diuidebant noctem in quatuor partes, quarum quælibet tres horas continebat: & dicebantur custodiæ, siue vigiliæ, quia custodes, siue vigiles ciuitatum, vel castrorum tribus locis vigilando custodiebant ciuitatem siue castra: ac deinde tradebant alteri officium vigilandi, & custodiendi. *Custodia*, igitur, *matutina*, est tempus à nona hora noctis vsque ad exortum solis: in codice Hebraico, & Græco bis repetitur, *custodia matutina*: & in Hebræo non habetur, *vsque ad noctem*, Ex quo videtur vulgata editio partim esse mutila, partim redundans, cum non habeat bis, *à custodia matutina*, vt habet Hebraica veritas, & habeat, *vsque ad noctem*, quod non habet eadem veritas Hebraica. Sed si quis diligenter omnia consideret, videbit, lectionem Latinæ vulgatæ editionis cum Hebraica veritate plane congruere. Nam sanctus Hieronymus ex Hebræo ita reddidit, *A custodia matutina vsque ad custodiam matutinam*; & vulgatus Latinus interpres hoc ip-

sum significauit, cum posuit, *A custodia matutina vsque ad noctem*, non enim dixit, *A custodia matutina vsque ad vespertinam*, quasi per diem tantum, & non per noctem sperare debeamus in Deo, sed *vsque ad noctem*, totam videlicet, quæ terminatur in custodiam matutinam; siue auroram, quæ in Euangelis dicitur, quarta vigilia noctis. Itaque idem est, ac si dixisset, à summo mane, vsque ad summam noctem, siue ab initio diei, vsque ad finem noctis: & hoc modo acceperunt hanc sententiam, Chrysostomus, & Euthymius, qui scripserunt, admoneri hoc loco fideles, vt tota die, & tota nocte sperent in Domino. Ratio cur tota die, & nocte sperandum sit, duplex est, vna, quia semper in periculis versamur, nec est momentum in quo Dei auxilio non egeamus: altera, quia in omni tempore licet sperare in Domino, & semper accepta est conuersio, & penitentia, siue id fiat mane; id est, in adolescentia, siue in meridie; id est, in virilitate, siue ad vespertinam, id est, in senectute, & siue fiat de die, id est, tempore prosperitatis, siue de nocte, id est, tempore aduersitatis. Scio, textum Hebraicum paulo aliter distingui, quam textum Græcum vel Latinum: sed quoniam id accidit ex punctis recens à Rabinis additis, non est difficile, remotis punctis, distinctionem eandem in codicibus omnibus inuenire. Fateor quidem Græcos codices, qui habent, *A custodia matutina vsque ad noctem, à custodia matutina speret Israel in Domino*, non omnino concordare cum codice Hebraico, & cum Latina vulgata editione: sed credibile est, in codice Græco aliquid redundare, quod forte relictum est ex adiunctione alicuius alterius versionis ad versionem Septuaginta Interpretum. Fortasse etiam variæ sunt lectiones editionis Græcæ: nam Chrysostomus videtur omnino legisse in codice Græco: vt nos legimus in Latino.

*Quia apud Dominum misericordia, & copiosa apud eum redemptio.*

Reddit rationem, cur oporteat semper in Deo confidere, & simul prædicat redemptionem generis humani: quæ futura erat per



per Iesum Christum Dominum nostrum. Merito sperare possumus in Domino tota die, & nocte, quoniam apud ipsum *miseri- cordia est*. Sunt quidem extra Deum opera misericordiae: vnde dictum est, *Miseri- cordia Domini plena est terra*: & alibi, *Miseri- cordia tua usque ad nubes*: est etiam in piis homi- nibus participatio quaedam misericordiae, sed ipsa misericordia apud Deum tantum- modo reperitur, inq; solo eius sinu requie- scit: misericordia enim miseras tollit: quis autem potest miseras tollere, nisi qui mi- ser esse non potest? quis potest defectus om- nes curare, nisi qui defectu omni caret, & omnipotens est? Deo soli proprie comenit, quod idem Propheta dicit, *Tu Domine sua- vis, & mitis, & multa misericordia omnibus inuocantibus te*. Itaque rectissime sancta Mater Ecclesia in precibus Deum appellans dicere solet, *Omnipotens & misericors Deus*. Neque solum sperare debemus in Deum, quoniam apud eum *miseri- cordia est*, sed etiam quoniam apud eundem *copiosa redemptio est*: nam misericordia Dei, quae generi huma- no misereri decreuerat, vt iustitiae quoque satisfaceret, inuenit ipsa pretium magnum, sanguinem videlicet Vnigeniti, qui redime- ret copiosissime omnes omnino captiuos: potuit enim homo seipse vendere sub pec- cato, & à diuina iustitia subitici Diabolo tanquam tortori, cui homo consenserat ad peccatum. Sed non potuit vilo modo seipse redimere, neque de potestate Diaboli e- ruere. Ergo quod homo non potuit, mi- sericordia diuina fecit, vt per sanguinem V- nigeniti fieret. Sed hæc redemptio apud Deum erat, cum Psalmus iste scriberetur, id est, in consilio, & decreto Dei, nunc autem *miseri- cordia Domini plena est terra*, quando quotidie pretium illud in redemptionem captiuorum expenditur, vnde ab Apostolo dicitur, *Empti estis pretio magno, glorificate, & portate Deum in corpore vestro*, 1. Cor. 6. & clarius à B. Petro, *Non corruptibilibus auro, vel argento redempti estis, sed pretioso sanguine quasi Agni immaculati, & incon- taminati Christi*, 1. Petri 1. Dicitur au- tem hæc redemptio copiosa, tum quia

*propitiatio est pro peccatis nostris, & non tan- tum nostris, sed etiam totius mundi*, 1. Ioan. 2. tum quia non solum hoc pretio redimimur à captiuitate, sed etiam euehimur ad partici- pationem hereditatis, & Regni, vt simus ha- redes Dei, coheredes autem Christi Rom. 8.

*Et ipse redimet Israel ex omnibus ini- quitatibus eius.*

Redemptio quæ erat apud Deum, tum plane manifestabitur, cum redimetur Israel, id est, populus Dei, non vt Iudei carnales ex- pectant à potestate Regum temporaliū, sed ab omnibus iniquitatibus suis. Quod Ange- lus de Iesu Christo exposuit, cū ad S. Ioseph ait, Matth. 1. *Vocabis nomen eius Iesum, ipse e- nim saluum faciet populum suum à peccatis eorum*. Hæc redemptio iam quidem inchoata est, sed perfectissime complebitur in die no- uissimo, cum liberabimur non solum à pec- catis, sed etiam à pœnis omnibus peccatorū, & à periculo deinceps peccandi, quod signifi- cavit Dauid in Psal. 101. cum ait, *Quantum distat ortus, ab occidente, longe fecit à nobis iniquitates nostras, & initio Psalmi, Qui pro- pitiat omnibus iniquitatibus tuis, qui sa- nat omnes infirmitates tuas, qui redimit de- interitu vitam tuam, qui replet in bonis desi- derium tuum, &c. & perspicue Daniel cap. 9. Vt consummetur prauaricatio, & finem acci- piat peccatum, & deleatur iniquitas, & ad- ducatur iustitia sempiterna.*

VIII.

## P S A L M V S CXXX.

*Titulus, & Argumentum.*

*Canticum graduum.*

**C**antat in hoc Psalmo Dauid humilitatis suæ virtutem, & cantat non cor am tri- bus, aut quatuor hominibus, sed in theatro or- bis terræ, & tamen cū hoc sit vehemēter se lau- dare, non facit contra præceptum illud Pro. 20. *Laudet te alienus, & non os tuum, extra- neus, & non labia tua. Siquidem, vt laudare*

C c c c c 2

sc



se turpe est, cum absq; necessitate id fit: sic non se laudare, quando necessitas id requirit, stultum est. Itaq; B. Paulus, qui dixerat, Non qui seipsum commendat, ille probatus est, sed quem Deus commendat: seipse mirifice commendavit in 2. ad Cor. c. 10. quia vidit id necessarium esse ad pseudoapostolorum calumnias reuocandas. Dauid igitur in hoc Psalmo humilitatis virtutem sibi ipse tribuit, quoniam saepe accusatus fuerat superbia & ambitionis, à quo vitio maxime abhorrebat l. 1. Reg. c. 17. dicit ad eum frater eius, Ego noui superbiam tuam, & nequitiam cordis tui. lib. eodem cap. 22. & alibi saepe Saul queritur de Dauid, quod illi infidiaretur, & l. 2. Reg. ca. 16. Semel maledicens Dauidi, obijcit ei, quod Regnum Saulis inuaserit. Dauid igitur ad eiusmodi calumnias refellendas Deum vocat in teste summae suae humilitatis, ac modestiae singularis. Praeterea etiam si nulla calumnia praecessisset, poterat humilitatem suam predicare, non ut virtutes suas iactaret, sed, ut ostenderet, se, quamuis robore, potestate, sapientia, & opibus omnibus hominibus sui temporis in Palestina excelleret, tamen non in suis viribus fiduciam unquam posuisse, & ideo debere omnes alios ad ipsius exemplum, in solo Deo sperare, ut in sino Psalmi dicitur. Est autem hic Psalmus ex gradualibus vnus, quoniam docet in quo humilitas vera consistat, & nulla est via securior ad ascendendum humilitate, dicente Domino, Omnis qui se humiliat, exaltabitur.

## EXPLICAT. PSAL. CXXX.

I. **D**omine non est exaltatum cor meum, neque elati sunt oculi mei.

Secutus Propheta, quod vera dicturus esset, Deum ipsum alloquitur, quem nemo fallere potest: dicit autem coram Deo se vitio superbiae nunquam fuisse obnoxium, siue cor internum, siue signa oculorum externa considerentur: Multi enim occulte superbi sunt in corde suo, magni aestimantes; tamen extrinsecus humilitatem simulant multi etiam non minus elato supercilio despiciunt proximos suos, quam eos corde tumido, atque inflato contemnunt. Dauid autem neq; cor elatum, neque elatos oculos

gerebat; sed erat humilis corde, & eam humilitatem oculis praeferebat.

*Neque ambulauit in magnis: neque in mirabilibus super me.*

Dixit de superbia cordis & oculorum: nunc addit de superbia verborum, & operum: aliqui enim iactant, se posse facere vel fecisse; aut esse facturos maiora, & mirabiliora, quam re vera possint, & hoc modo ambulant, siue ascendunt super se inter loquendum: aliqui etiam re ipsa praesumunt aggredi opera, quae superant vires ipsorum, & isti ambulant, siue ascendunt supra se ipsos opere, & factis, Dauid autem stabat in gradu suo, in vera humilitate fundatus, ideo neque loquendo, neque operando ambulabat super se ipsum in magnis, & mirabilibus, id est neque gloriabatur se magna, & mirabilia fecisse supra vires suas; neque tentabat facere, quae sciebat se non posse perficere.

*Si non humiliter sentiebam, sed exaltaui animam meam:*

*Sicut ablactatus est super matre sua: ita retributio in anima mea.*

Non contentus Propheta, ipsi Deo, qui corda scrutatur, dixisse, se ab omni superbia semper, abhorruisse: id ipsum confirmat iuramento execratorio, ut tanto maior fides ipsius verbis ab omnibus habeatur. Dicit igitur, *Si non humiliter sentiebam* de me ipso *sed exaltaui animam meam*; vel ut significatius loquitur textus originalis, *Si non composui me ad aequalitatem cum ceteris, sed supra ceteros me extuli*. Sicut ablactatus est super matre sua, id est, sicut infans recens ablactus manet in sinu, vel super genua matris suae, moestus & plorans, quia priuatus est dulcedine lactis, quae pro illo tempore summae deliciae ipsius erant: *ita retributio in anima mea fit*, id est, sic anima mea priuetur dulcedine consolationis diuinæ, quae mea potissima, ac pene solae deliciae sunt. Quantum sit hoc supplicium, quod sibi Propheta sanctissimus imprecatur, soli illi intelligere possunt, qui eodem spiritu repleti gustauerunt, quam dulcis sit Deus. Quod enim



David nihilili faceret opus, & delicias terras, & ipsam regiam celsitudinem, ac maiestatem præ amore diuinæ suauitatis. Psalmi ab ipso compositi, tanquam amatoria cantica, manifeste testantur: *Quam magna*, inquit Psal. 30. *multitudo dulcedinis tua Domine, quam abscondisti timentibus te*; & rursum Psal. 33. *Gustate, & videte, quoniam suavis est Dominus*, & Psal. 26. *Tibi dixit cor meum, exquisiuit te facies mea, faciem tuam Domine requiram, ne auertas faciem tuam à me*; & Psalm. 76. *Renuit consolari anima mea; memor fui Dei, & delectatus sum*, & Psalm. 85. *Latifica animam serui tui, quoniam ad te Domine animam meam leuauit, quoniam tu Domine suauis, & mitis*. & Psal. 103. *Ego vero delectabor in Domino*. & Psal. 62. *In velamento alarum tuarum exultabo, adhesit anima mea post te*. Denique in Psal. 72. *Quid mihi est in calos, & à te quid volui super terram? Deus cordis mei, & pars mea Deus in æternum, & ibidem, Mihi autem adherere Deo bonum est; quasi dicat, quærant alij bona quæcunque, siue in cælo, siue in terra: mihi adherere Deo, summum est bonum; ipse Deus est cordis mei ipse pars, hæreditas; portio, omne meum bonum, ipso vno contentus sum, & in æternum ero. Cum ergo David humilis, & simplex, quasi infans lactaneus in lacte diuini amoris omne suum bonum haberet, non poterat sibi maius aliquid malum imprecati, quam vt fieret, sicut infans ante tempus ablactatus, qui consolationem nullam admittit, cum se ab uberibus matris remoueri videt. Quod attinet ad verba, illud, *Si exaltaui animam meam*, ex Hebræo vertit sanctus Hieronymus, *Si silere feci animam meam*. Sed Septuaginta non legerunt, *dōmamthi*, quod est, *silere feci*, sed *romamthi*, quod est, *exaltaui*: nam literæ d, & r, in Hebræo simillimæ sunt: neque dubitare debemus, quin libros correctiores habuerint Septuaginta Interpretes, quam sanctus Hieronymus habuerit. Sic etiam, *ita retributio in anima mea*; sanctus Hieronymus ex Hebræo reddit, *Ita ablactata ad me anima mea*. Sed in Hebræo eadem vox *ablactatum*, & *retributionem* significat, punctis paulu-*

lum immutatis: nam *gamul*, est *ablactatus*; *gemul*, *retributio*. Igitur Septuaginta, vbi habetur *ablactatus*, legerunt, *gamul*; vbi habetur, *retributio*, legerunt, *gemul*: sanctus autem Hieronymus utrobique legit, *gamul*; sed lectio Septuaginta, cui concordat nostra vulgata editio, est longe melior, tum quia vix intelligi potest quid sit, ita *ablactata ad me anima mea*: tum quia secundum lectionem Septuaginta habetur in Hebræo elegantissima allusio vocis retributionis ad vocent similem, *ablactati*.

*Speret Israel in Domino, ex hoc nunc, & vsque in seculum.*

Ex hac Psalmi conclusionem intelligi potest, quo tendat illa humilitatis prædication: non enim vir vere humilis propositum habuit se laudandi; sed admonendi populum suum, quam parum de se præsumere, quam multum in Deo confidere debeat. Ait igitur, *Speret Israel in Domino*, id est, si ego Rex, & Propheta, non me efferre audeo, propter potentiam, & sapientiam, neq; de me ipse præsumo, sed omnem spem meam in Deo collocatam habeo; certe par est, vt populus meus Israel, qui etiam populus Dei est, non se existimet aliquid esse, cum nihil sit, neq; in viribus suis confidat, sed speret in Domino, & non hodie solum, aut cras, sed omni tempore speret.

## P S A L M V S CXXXI.

*Titulus, & Argumentum.*

*Canticum graduum.*

**P**salium hunc vel Salomon composuit, cum adificato templo, intulit arcam Domini in locum ei præparatum, vel certe compositum à Dauid, sibi quoque datum ad concinendum post templi adificationem Salomon cecinit: id perspicuum est tum ex fine capituli sexti in 2. libro Paralipomenon, tum ex toto serie huius Psalmi.



ac prapue ex illis verbis, Propter Dauid seruum tuum non auertas faciem Christi tui. Continet autem ad literam Psalmus hic, primo commemorationem ardentissimi desiderij, quo tenebatur Dauid adificandi templi: secundo, petitionem ad Deum, ut stabiliatur Regnum in domo Dauid, ut sanctificentur ministri domini, & alia id genus, iuxta promissiones dei, quas multo antea Dauid acceperat. Numeratur hic Psalmus inter graduales, tum quia cani debebat à populo redeunte à captiuitate, ut exercitaretur ad imitandum desiderium Dauidis, & diligentiam Salomonis in templo reedificando; tum, ut admoneatur spiritualis peregrinus quanto feruore flagrare debeat in edificando spirituali templo, tum in corde suo: tum in celesti Hierusalem, cum pro templo lapideo, in quo arca lignea locum quietis acceptura erat, tam ingenti desiderio arserit corda Dauidis, & sumptus prope infinitos fecerit Salomon, & tantos labores susceperint longissimo tempore multa hominum millia. Nam ut legitur in lib. 3. Reg. c. 5. Erant octoginta millia latomorum, & septuaginta millia portantium onera, & tria millia trecenti praefecti operum. Neque tamen superuacanea, aut nimia dicenda sunt, cum ad illius honorem pertineant, cuius magnitudinis non est mensura vel finis.

## EXPLICAT. PSAL. CXXXI.

I.

**M**emento Domine Dauid, & omnis mansuetudinis eius.

Verba Salomonis haec sunt, qui Deum orat per merita patris sui Dauid. Memento, inquit, Dauidis amici tui, & meritorum eius, inter quae precipuum fuit studium mansuetudinis. Illud, memento, non arguit obliuionem in Deo, sed significat Deum, quando non misereretur filiorum viri iusti, ita se gerere, quasi non recordaretur, quid apud se vir ille iustus meruerit. Nihil igitur isto modo loquendi significatur, nisi Deum orari velle per merita hominum iustorum; & propter eadem merita multa concedere, quae alioqui minime concessisset: id cognosci potest ex lib. 3. Reg. cap. 11. vbi Deus per Prophetam loquitur ad Hieroboam, ac di-

cit se valde irritatum esse peccatis Salomonis, sed tamen conseruaturum illi Regnum omnibus diebus vitae suae, propter Dauid seruum suum, qui custodiuit mandata, & praecepta sua: ex quo loco apparet, orationem huius Psalmi fuisse exauditam. Meminit autem Salomon mansuetudinis Dauidis, omisiss aliis virtutibus, tum quia mansuetudo in Dauid potissimum eluxit, ut patuit ex eo, quod noluit Saulem occidere, cum posset, cum tamen ab eo sine ulla causa quereretur ad mortem, lib. 1. Reg. cap. 24. tum etiam quia mansuetudo mirabiliter placet in oculis Dei, quia indiuidua comes est humilitatis, & charitatis, & quia similem facit hominem Deo, qui suauis, & mitis est, & multa misericordia omnibus inuocantibus eum, Psal. 85. Itaque ante Dauidem, Moyses amicus Dei maximus fuit, quia mitissimus erat super omnes homines. Num. 12. & post Dauidem Christus Dominus: plenus gratia, & veritate, non aliam virtutem magis in se imitandam esse docuit, cum ait, *Discite à me, quia mitis sum, & humilis corde*, Matth. 23. Neque repugnat mansuetudini Dauidis, vel Moysis, quod vterque multos homines occiderit; neque mansuetudini Christi, quod eiecerit ex templo euentes & vendentes, menfasque eorum subuerterit: nam mansuetudo non est contraria iustitiae, imo soror est zeli honoris Dei; & qui facile tolerat iniurias proprias, quod est mansuetudinis, aptior est ad vindicandas iniurias Dei, & proximi, tum quia omnes vident eum non moueri ex affectu proprio, sed ex solo iustitiae zelo, tum quia oblitus quodammodo sui, totus occupari potest in Dei honore querendo, & propugnando. S. Hieronymus ex Hebreo vertit, *Memento Domine Dauid, & omnis afflictionis eius*. Sed vox Hebraica, *hunnutho*, quam Hebraei *humiliari eum*, reddere solent, potest cum aliis punctis legi, *hananutho*, quod significat, *mansuetudinis eius*: & sic legerunt Septuaginta Interpretes.

*Sic iurauit Domino, votum vouit Deo Iacob.*



*Si introiero in tabernaculum domus  
meae, si ascendero in lectum strati mei.*

*Si dederō somnum oculis meis, & pal-  
pebris meis dormitationem.*

*Et requiem temporibus meis, donec in-  
ueniam locum Domino, tabernaculum Deo  
Iacob.*

Effectum exponit Salomon mansuetu-  
dinis, & humilitatis Dauid patris sui: quo-  
niam enim mitis erat, & humilis corde, in-  
dignum putabat, vt ipse haberet domum ad  
habitandum, & lectum ad quiescendum; &  
arca Dei non haberet sedem stabilem, tem-  
plum videlicet, in quo honorifice perma-  
neret, sed huc & illuc transferretur: propter  
ea iurauit, & vouit, se non intraturum do-  
mum suam, nec in lectum ascensurum; imo  
etiam neque extra lectum dormiturum, aut  
quietem vllam capiturum, donec inueniret  
locum quietis arce Dei. Quando Dauid hoc  
votum vouerit, non habetur expresse in di-  
uinis literis; sed tamen colligi videtur ex li-  
bro secundo Regnum cap. 7. vbi Dauid di-  
cit ad Nathan Prophetam, se constituisse  
aedificare templum Domino, eo quod eru-  
besceret ipse habitare domo cedrina, dum  
arca Dei maneret in tentorio. Sed eadem  
nocte iussit Deus per Nathan significari Dau-  
idi, nō velle, vt ipse edificaret templum, sed  
hanc prouinciam filio suo relinqueret: quod  
ipsum repetit ipse Dauid in 1. lib. Paralipo-  
menon cap. 22. & 28. Sed questio est, quid  
proprie Dauid vouerit. Qui Hebræos se-  
quuntur, existimant, Dauidem ignorasse,  
vbi Deus vellet sibi erigi templum, & ideo  
vouisse se non accepturum vllam quietem,  
donec sibi à Deo locus templi reuelaretur;  
ac ne nimis longo tempore cogant Dau-  
idem extra domum sub dio manere; ad-  
dunt, hoc votum susceptum fuisse à Dauide  
quando vidit Angelum percurrentem po-  
pulum, & illo ipso die reuelatum ei fuisse  
per Gad Prophetam, velle templum sibi æ-  
dificari in area Areunæ Iebusæi in monte  
Moria. 2. Reg. 24. Sed ista sine fundamento

dicuntur & ad fabulas Rabinorum fortasse  
reici possunt: nō enim de situ templi, sed de  
ipso templo edificando sollicitus erat Dauid:  
neq; vouisset quod non erat in sua potestate,  
quale est, habere Dei reuelationem; sed quod  
ipse prestare poterat suo sumptu, & labore.  
Quando igitur dicit, *Donec inueniam locum  
Domino, per locum*, non intelligitur situs, sed  
templum, quod erat futurum locus, id est,  
habitaculum Dei: quod explicatur per vo-  
cem sequentem, *tabernaculum Deo Iacob*, id  
est, donec tale templum extruxero, vt in eo  
digne possit arca Domini collocari. Verum  
est quidem situm templi fuisse à Deo de-  
monstratum Dauidi, vt dicitur 2. Paral. cap.  
3. sicut etiam demonstrata fuerant omnia,  
quæ ad templum pertinebant, vt dicitur 1.  
Paral. 28. *Omnia*, inquit, *venerunt scripta  
manu Domini ad me*: sed nulla sit eo loco  
mentio iuramenti; aut voti; neq; vero, si Dau-  
id iurauit, se non ingressurum in domum  
suam, donec extrueret templum, periculum  
erat ne nimis diu pernoctaret sub dio; verba  
enim illius iuramenti amplificationem  
continent Scripturæ diuinæ familiarem:  
proprie autem significant sollicitudinem  
magnam rei faciendæ. Simile est illud in 1.  
Psalm. *Sed in lege eius meditabitur die ac no-  
cte*: & illud Psalm. 33. *Benedicam Dominum  
in omni tempore, semper laus eius in ore meo*:  
& clarius Isaia 62. *Super muros tuos constitui  
custodes, tota die, & tota nocte in perpetuum  
non tacebunt*: & Prou. 6. præscribit Salomon  
talem sollicitudinem ei, qui promisit ali-  
quid proximo suo, qualem hoc loco tribuit  
Dauidi, dicens, *discurre, festina, suscita ami-  
cum tuum, ne dederis somnum oculis tuis, nec  
dormitent palpebra tua*. Simile est illud in  
Testamento nouo, *Oportet semper orare,*  
& *nunquam deficere*, Luc. 18. & caput  
21. *Vigilate itaque omni tempore orantes*.  
Neque enim ista significant, omni ho-  
ra, & omni momento esse orandum,  
sed habendam esse orationem in maxi-  
mis negociis, & non permittendum,  
vt ab aliis terrenis occupationibus im-  
pediatur. Sic igitur iuramentum illud in-  
telligimus, *Si introiero in tabernaculum  
domus*



*domus mea*, id est, iuro me non intraturum in domum meam, ita ut obliuiscar domus Dei ædificandæ: *si ascendero in lectum strati mei*, id est, iuro me non ascensurum in lectum strati mei, ita ut non cogitem de lecto, id est, de loco templi, ubi proprie arca Domini requiescat: *si dederò somnum oculis meis, & palpebris meis dormitationem*, id est, iuro me non dormitaturum, ita ut non vigilem circa templum Domini erigendum: *& requiem temporibus meis*, id est, iuro, me non compositurum caput meum ad quiescendū, ita ut quiescam à sollicitudine domus Domini preparandæ. Quod iuramentum, & votum, quod in se fuit, accuratissime adimpleuit, ut intelligi potest ex verbis eius, 1. Paralip. 26. Ego, inquit, totis viribus meis preparavi impensas domus Domini Dei mei: aurum ad vasa aurea, argentum in argentea, asin amea, ferreum in ferrea, lignum in lignea; & lapides onychinos, & quasi stibinos, & diuer sorum colorum, omnemq; pretiosum lapidem, & marmorarium abundantissime, & super hac, qua obtuli in domum Dei mei, de peculio meo aurum, & argentum do in templum Dei mei, exceptis his, qua preparavi in adem sanctam, tria milia talenta auri de auro ophir, & septem milia talentorum argenti probatissimi ad deaurandos parietes templi. Ac præter has ingentes opes, parauit etiam idem Dauid descriptionem omnium partium templi, atriorum, porticum, cœnaculorum, exedrarum, & similitum rerum, ac præterea omnium ornamentorum, ut habetur 1. Paralip. cap. 28. Hæc omnia typi fuerunt, ac figure veri Davidis Christi, qui ve templum viuum, & tabernaculum æternum Deo pararet, pernoctans in oratione, vere non intrabat in domum suam, neque ascendebat in lectum suum, neque dabat oculis somnum, neque temporibus requiem, & non corruptibilibus auro, vel argento, sed pretioso sudore, ac sanguine pretiosissimo parauit sibi gloriosam Ecclesiam non habentem maculam, neque rugam; & ciuitatem illam ædificauit in cælis, quam vidit S. Ioannes in Apocalypsi ornatam omni lapide pretioso, Apoc. 21. Ex his denique vniuersis nostrum

intelligere debet, quanta vigilantia, sumptu, & labore sit opus, ut in corde nostro templum Domino erigamus.

*Ecce audiuiimus eam in Ephrata, inuenimus eam in campis sylue.*

Adfert rationem, cur Dauid optauerit templum Domino ædificare; quoniam arca Domini sedem propriam, & stabilem non habebat. *Ecce, inquit, audiuiimus eam*, arcam videlicet, *fuisse in Ephrata*, id est, in terra Ephraim, quando videlicet erat in Silo tempore Samuelis, 1. Reg. 4. deinde *inuenimus eam in campis sylue*, 1. Reg. 6. quando dimissa à Philistæis inuenta est in agro Iosue Bethsamitæ, quem esse locum syluosum perspicuum est ex proxima ciuitate Cariathiarim, quo fuit transportata ex agro Iosue: nam *Cariathiarim* dicitur ciuitas syluarum: sed singula verba consideremus, per pronomen, *eam*, dicimus significari arcam, Chrysostomus, Euthymius, & alij docent, tamen enim antea nominata non fuerit, tamen significata est implicite in illis verbis, donec inueniam locum Domino, tabernaculum deo Iacob: neque enim Dominus, & Deus Iacob, eget loco pro se, sed pro arca sua, in qua ipse tanquam in sede sua manere, vel tanquam in scabello pedes habere videbatur, cum in responsa daret. Quod autem Sanctus Hieronymus reddit ex Hebraeo, *Audiuiimus eum in Ephrata, inuenimus eum in campis sylue*, nos mouere non debet. Nam fieri potest, ut S. Hier. inciderit in textum corruptum: nunc enim in Hebræo habetur *eam*, non eum, ut etiam in codice Græco, & Latinis omnibus, & hoc modo Patres legem. Per vocabulum, *Ephrata*, exposuimus terram Ephraim, in qua erat Silo, ubi longo tempore mansit arca: quamuis enim *Ephrata*, in vno, vel in altero loco Scripturæ significet Bethlehem, tamen hoc loco non potest Bethlehem significare, cum in ea non legatur vnquam fuisse arca Domini & cum minore fundamento alij quidam per, *Ephrata*, hoc loco intelligi volunt Hie-



rusalem, quod non longè absit à Bethlehem. Per, campos sylvarum, non desunt, qui intelligant arcam Ornan Iebusæi, qui erat in monte Sion, quos irridet S. Hilarius, quia nihil simile habeat arca cum sylva. Alij intelligunt *Cariatthiarim*, quæ interpretatur ciuitas sylvarum: sed Scriptura non dicit, inuentam fuisse arcam in ciuitate, sed in campis; & verbum, inuenimus, significat casu inuentam, cum esset amissa: cum autem esset in *Cariatthiarim*, non erat querenda, vel inuenienda tanquam amissa, cum in ea ciuitate studiosè collocata fuisset. Respicit igitur Scriptura, ut nos diximus, ad illud tempus, quo arca iam dudum à Philistæis capta, inuenta est in agro Iosue Bethsamitæ, quod eam detulerant vacca indomitæ, quibus à Philistæis fuerat alligata. Verba illa, *audiuimus, & inuenimus*, volunt quidam significare, arcam fuisse in Silo ante tempora Dauidis, sed Dauidis tempore fuisse in *Cariatthiarim*: idè enim de priore mansione dictum esse audiuius, quia non ipse viderat; sed à maioribus acceperat: de posteriore dictum esse inuenimus, quia tempore suo id acciderat. Sed nos existimamus, non esse verum, Dauidis tempore fuisse arcam inuentam in campis sylvarum: fuit enim eo loco inuenta post septem menses à captiuitate sua, ut patet ex lib. 1. Reg. c. 6. quo tempore Dauid nondum natus erat, ut ex collatione temporum manifestè colligitur. Itaque verba illa non dicuntur à Dauide, vel à Salomone in persona sua, sed in persona populi, & idcirco dicitur in numero multitudinis, *Audiuimus eam in Ephraim, inuenimus eam in campis sylvarum*, quasi dicat, Audiuius à maioribus nostris, arcam aliquando fuisse in Silo, in terra Ephraim, & rursus postea inuenimus, & vidimus eam in campis sylvarum; non enim deerant senes, qui eius rei meminisse potuissent: ex quo refellitur argumentum, quo nonnulli demonstrari putant, hunc Psalmum non fuisse compositum à Salomone, quia videlicet ipse nondum natus erat, quando arca inuenta est in campis sylvarum. Si enim hoc argumentum concluderet, demonstraretur etiam Psalmum non fuisse à

Dauide compositum: nam neque ipse natus erat quo tempore arca Dei reperta est in campis sylvarum.

*Introibimus in tabernaculum eius, adorabimus in loco, vbi steterunt pedes eius.*

Exposito voto, & desiderio patris sui Dauidis, reducturus Salomon arcam in templum à se ædificatum, ait, *Introibimus in tabernaculum eius*, id est, fuit hæc arca Domini quasi hospes in varijs locis, sed nunc habebit stabilem domum, & idè nos introibimus in tabernaculum eius iam erectum, & exstructum in monte Sion, & *adorabimus in loco vbi steterunt pedes eius*, id est, adorabimus conuersi ad arcam sanctam, quæ est scabellum, vbi steterunt, ac stare solent pedes eius. Sic enim sanctuarium in interiore parte tabernaculi constructum erat, ut arca esset quasi scabellum pedum Domini, & super arcam esset propitiatorium, quasi sedes Domini, quæ tenebatur à duobus Cherubim. Itaque illud, *adorabimus in loco*, positum est pro, *adorabimus ad locum, vel adorabimus locum*, ut in Hebræo clarius est, *Adorabimus scabellum pedum eius*. Adorabant enim Hebræi arcam, non vt Deum, sed vt scabellum pedum eius. vnde dicitur etiam in Psal. 98. *Adorate scabellum pedum eius, quoniam sanctum est*. Est autem hoc loco notandum, verbum adorandi in Hebræo, *stachau*, propriè significare, incuruare se, & idè construui cum dariuo, vel cum accusativo addita præpositione, ad, vt incuruate vos arcam, vel ad arcam: & non rectè diceretur, incuruate vos arcam. & hæc est ratio, cur aliquando Interpretes vertant, Adorate ad scabellum, aliquando, orate scabellum; quia aliquando seruant phrasim Hebraicam, aliquando Latinam.

*Surge Domine in requiem tuam, tu & arca sanctificationis tue.*

Introducitur Salomon arcam in templum magnificentissimè ædificatum, poetico more eam inuitat ad templum ingrediendum, & inhabitandum. *Surge*, inquit, Domine de loco, vbi hæc arca, quasi hospes habitasti, & ingredere in domum tuam propriam.

VII.

וְיָשֻׁבִי

VIII.



priam, in qua deinceps requiesces, id est, unde non transibis de loco ad locum, vt vsque modo fecisti. Explicat autem se loqui Domino: non vt in se, sic enim cœli cœlorum Deum non capiunt, vt idem Salomon alibi dicit; sed vt peculiari modo in arca testamenti erat, quia ex illa responsa dabat, & ideo addit, *Tu & arca sanctificationis tuæ, i. tu cum throno tuo, & scabello pedum tuorum: quod scabellum est arca sanctificationis tuæ, id est, arca in qua, & per quam tu ab omnibus, qui illam sciunt, sanctificaris, & honoraris.* In Hebræo habetur, Arca fortitudinis tuæ, & hoc modo legitur in 2. Paral. c. 6. non solum in textu Hebræico, sed etiam in Græco, & Latino Videntur igitur LXX. Interpretes hoc loco voluisse non tam reddere verbum verbo, quàm explicare sententiam. Arca enim fortitudinis Dei dicitur, quia per eam ostendit Deus fortitudinem suam: nam Iosue 3. cum arca intrasset Iordanem, portantibus eam Sacerdotibus, continuo aquæ Iordanis conuersæ sunt retrorsum, item Iosue 6. cum arca septies ciuitatem Hierico circuisset, muri Hierico coruerunt. Item li. 1. Reg. c. 5. cum arca fuisset à Philistæis, & posita in templo idoli Dagon, mane sequenti inuentus est Dagon iacens pronus in terra coram arca, & quocunq; circumferretur arca à Philistæis, interfecit innumerabiles homines, ita vt Philistæi dicerent, *Non maneat apud nos arca Dei Israel, quia dura est manus eius super nos, & super Dagon deum nostrum.* Deniq; Bethsamitæ cum arcam Dei ad se delatam curiose inspexissent, occisi sunt supra quinquaginta millia ex ipsis, vt habetur libr. 1. Reg. cap. 6. & cum Oza tetigisset arcam Dei, continuo à Deo occisus est, 2. Reg. cap. 6. Sed hæc ipsa fortitudo Dei, quæ per arcam demonstrabatur, efficiebat, vt Deus ab omnibus sanctificaretur, timeretur, & honoraretur. Siquidem Bethsamitæ cum interficerentur ob arcam Dei à se visam, dixerunt, *Quis poterit stare in conspectu Domini Dei sancti huius?* in idem igitur recidit, *arca fortitudinis tuæ, vt habetur in Hebræo, & arca sanctificationis tuæ, vt habetur in codice Græco, & Latino.*

*Sacerdotes tui induantur iustitiam, & sancti tui exultent.*

Introducta iam arca in templum, orat Salomon primo pro Sacerdotibus, secundo pro Rege, id est, pro se: nam ab his dependet salus totius populi. Sacerdotes enim regunt populum in spiritualibus, & Reges in temporalibus. Pro Sacerdotibus duo quædam postulat, vt sint iusti & sancti, quales esse debent, vt rectè fungantur officio suo, & vt alacriter Deum laudent, quod est proprium eorum munus. Debent enim pro se, & pro toto populo reddere Deo tributum laudis, & gratiarum actionis, pro beneficijs, quæ omni tempore accipimus à Deo, & gratias agendo, ac laudando benefactorem, prouocare benignitatem eius ad continuanda, & augenda beneficia. Dicit igitur, Oro Domine, vt per gratiam tuam *Sacerdotes tui induantur iustitiam*, id est, non solum iusti sint intus in corde, & animo, sed etiam exterius in omni eorum vita, in verbis, & operibus cernatur iustitia, & nihil turpe in eis appareat, qui tibi ministraturi, & populum tuum docturi sunt. Metaphora enim indumenti ad hoc adhibetur, vt intelligamus quemadmodum vestis regit turpitudinem, & ornat hominem, ac distinguit à cæteris: ita debere Sacerdotes per opera iustitiæ id efficere, vt nihil turpe in eis appareat, & per eximiam sanctitatem discernantur à reliquo populo, & non possit dici, Sicut populus sic Sacerdos. Et *sancti tui exultent*, id est, & iidem Sacerdotes, qui Sancti tui propriè sunt, cum ad administrandum tibi sanctificari, & dedicati sint, exultent alacriter laudando te, & sic bene fungantur munere suo. In Hebræo habetur, Et sancti tui laudent te, siue iubilent tibi: ex quo intelligimus, exultationem, quam in nostro textu habemus ex Græco, non esse quamcunque exultationem, sed exultationem in laudando Deo, & gratias agendo illi, siue dum sacrificant, siue dum psallunt. Et si tanta iustitia, & sanctitas, & alacritas requirebatur in Sacerdotibus illis, qui sacrificabant oues, & boves, & laudabant Deum pro temporalibus bene-



beneficijs, quid quæso requiritur in Sacerdotibus illis, qui sacrificant diuinum agnū, & gratias agunt pro beneficijs sempiternis: vñ nobis miseris, qui ministerium altissimum sortiti, tam procul absumus à feruore, quem Salomon in umbraticis Sacerdotibus exigebat.

*Propter Dauid seruum tuum, non auertis faciem Christi tui.*

Orat nunc pro Rege, id est, pro se Salomon, & vt facilius impetret, adducit merita patris sui Davidis. Orat autem, vt quando-cunque accesserit ad precandum Deum, Deus exaudiat orationem eius. *Propter Dauid*, inquit, *seruum tuum*, id est, propter fidele obsequium, quod tibi præstitit pater meus dum in terris vixit; *ne auertas faciem Christi tui*, id est, non facias, vt ego, qui loco patris mei vnctus sum in Regem populi tui, confusus recedam à te, reiecta videlicet prece mea, & eo modo facias me auertere faciem orantis, sit eum non exaudire, sed confusum dimittere, perspicuum est ex libr. 3. Reg. c. 2. vbi cum mater Salomoni dixisset, *Petitionem vnā paruulā, ego deprecor à te, ne confundas faciem meam*: respondit Salomon, *Pete mater mea, neque enim fas est, vt auertam faciem tuam*. Sed quamuis hæc vera sint, tamen videor mihi altiore sensum in his verbis videre. Omne bonum nostrum in duplici respectu positum est, in respectu pio Dei ad nos, & in respectu nostro pio ad Deum, vt videlicet ille nos patris pietate respiciat, & nos illum filiorum pietate respiciamus; mutuus enim iste pietatis aspectus fons est, & origo bonorum omnium; sed prior est respectus Dei, & ab illo respectus noster oritur. *In hoc* (inquit Ioan. in 1. Epistola c. 4.) *est charitas, non quāse nos dilexerimus Deum, sed quoniam ipse prior dilexit nos*. Itaque Deus dum nos diligit, facit etiam nos diligere, & dum nos respicit vt filios; facit, vt eum respiciamus vt patrem: quamuis autem nos peccando liberè auertamus faciem à Deo; tamen si Deus respicere

nos voluerit, & misereri; respiciendo, & miserendo faciet, vt peccare non libeat, & vt faciem à Deo non auertamus; vel si auertimus, iterum conuertamus. Quomodo Luc. 22. quando conuersus Dominus respexit Petrum iam auersum; continuo illum conuertit, ita vt egressus foras amarè fleuerit: atque hoc est, quod Dauid orat in Psalm. 24. *Respice in me, & miserere mei*; & hoc loco Salomon, *Ne auertas faciem Christi tui*, id est, ne sinas auerti à te faciem meam, quod facies si non auertis à me faciem tuam.

*Iurauit Dominus Dauid veritatem: & non frustrabitur eum: de fructu ventris tui ponam super sedem tuam.*

Hic iam incipit commemorare promissiones factas à Deo Dauidi patri suo, vt ijs commemoratis facilius impetret quod petit, cum quasi debitum reposcere videatur. *Iurauit*, inquit, *Dominus Dauid veritatem*; quasi dicat, iurauit Dauid Domino, se domum illi ædificaturum; & Dominus vicissim iurauit Dauidi, se Regnum in domo eius in sempiternum stabiliturum: Deus enim vinci se liberalitate non patitur, & non solum opera, sed etiam voluntates, & desideria cumulatissimè renumeratur. Iuramentum Dei significat rei immobilitatem, & hoc loco præfertim, vbi dicitur, *Iurauit Dauidi veritatem*, i. rem per se veram ex Dei promissione, certiore, & firmiore reddidit iuramento. Addit postea aliam firmitatem dicens. *Et non frustrabitur eum*. i. non faciet irritum iuramentum, quod alias dicere solet, *Iurauit Dominus & non pœnitēbit eum*. Quo loco rectè admonet S. August. pœnitentiam in Deum cadere non posse, sed metaphoricè dici, pœnitere, quando rem aliquam mutat; non pœnitere quando non mutat, sed stabilem & firmam esse decernit. Ponit exemplum ex li. 1. Reg. c. 15. vbi Dominus dicit, *Pœnitet me, quod constituerim Saul Regem*; & in eodem capite dicit Samuel, *Deum non esse vt hominem, vt pœnitentiam agat*. Ergo, inquit Augustinus, cum Deus immutabili suo consilio aliquid mutat, propter ipsam rei, non consilij mutationem pœnitere dicitur. Neque

Dddd 2 multum

IX.



multum refert, quòd in Hebræo, & Græco legatur, *Non frustrabitur eam*, id est, veritatem promissam, & in Latino textu legamus, *Non frustrabitur eum*, id est, Dauidem, vt legit etiam S. Hilarius: nam sensus est idem. Pergit Salomon, ac docet, quæ sit veritas promissa, & iuramento confirmata à Deo, & ait, *De fructu ventris tui, ponam super sedem tuam*, id est, dabo tibi successorem in Regno filium tuum: quæ verba videntur intelligenda ad literam de Christo, non de Salomone, nisi fortè de Salomone dicantur, vt typum Christi gerebat. nam de hoc eodem iuramento dicitur in Psalm. 88. *Semel iuravi in sancto meo, si Dauid mentiar, semen eius in æternum manebit, & thronus eius sicut Sol in conspectu meo, & sicut Luna perfecta in æternum, & testis in cælo fidelis*. Itaque illud, *ponam*, cum dicitur, *De fructu ventris tui ponam super sedem tuam*, non significat, simpliciter ponam, sed constituam, & firmabo: quæ certè Salomoni non conueniunt. adde, quòd B. Petrus. Act. 2. dicit de Dauid, *Propheta cum esset, & sciret, quia iureiurando iurasset illi Deus, de fructu lumbi eius sedere super sedem eius*; prouidens loquutus est de Resurrectione Christi, quia neque derelictus est in inferno, neque caro eius vidit corruptionem. Vbi S. Petrus vnâ scripturam Psalmi quintidecimi exponit ex alia Psalmi centesimi trigesimali primi, quem nunc explicamus. Atque hoc est, quod Luc. 1. Angelus dicit ad Virginem, *Dabit ei Dominus sedem Dauid patris eius, & regnabit in domo Iacob in æternum*.

XII. *Si custodierint filij tui testamentum meum, & testimonia mea hæc, quæ docebo eos.*

XIII. *Et filij eorum vsque in sæculum sedebunt super sedem tuam.*

Iuramentum, & promissio sine pœnitentia est de vno filio, id est, de Christo, cuius Regni nullus vnquam erit finis: sed de alijs filijs promissio conditionata est, id est, *si custodierint testamentum*, id est, fœdus Domi-

ni de non habendis Dijs alienis; *& si custodierint testimonia*, id est, præcepta Dei, *sedebunt super sedem tuam*, sin minus, proijciuntur. Sic enim expressius dicit ipse Dauid Salomoni, 1. Paralip. 28. *Si quisieris Dominum, inuenies eum: si autem dereliqueris eum, proijcet te in æternum*; & paulò ante de eodem Salomone dicit Deus, *Firmabo Regnum eius vsque in æternum, si perseverauerit facere præcepta mea, & iudicia sicut & hodie, & in Psalm. 88. vbi legimus, Si dereliquerint filij eius legem meam, visitabo eos in virga virorum*; non addit, misericordiam meam non dispergam ab eis; sed, non dispergam ab eo, id est, à Dauid, quia videlicet thronus Dauid erit firmus iugiter, propter æternum Christi Regnum; etiam si Regnum terrenū Salomonis, & Roboam, & similibus deficiat, & destruat. Quod attinet ad verba, in Hebræo pro testamento est, pactum, siue fœdus; sed Septuaginta vertere solent illam vocem Hebraicam, *berith*, per vocem Græcam, *διαθήκη*, quæ testamentum significat, nec solum Septuaginta, sed etiam B. Paulus ad Rom. 9. ad Gal. 4. & alibi testamentum vocat, quod Hebræi dicunt fœdus. Verisimile igitur est, vocem illam Hebraicam vtrunq; significare vel etiam præcipuè testamentum: maior enim fides habenda est LXX. Interpretibus, quam Rabinorum dictionarijs. constat autem ex S. Hieron. in cap. 2. Malachiæ, LXX. Interpretes semper vertisse, testamentum fortasse autem diuina prouidentia voluit, vt in Ecclesia extarent duo ista vocabula testamenti, & pacti: quoniam reuera pactum Dei cum populo, non est simplex pactum, sed habet conditiones testamenti, cum sit pactum de hereditate danda, & quod non habuit vim, nisi intercedente morte testatoris Christi, vt dicitur Hebr. 9. ad hoc enim significandum *Moyse asperse sanguinem cum pactum nomine Dei cum populo sanciuir*, Exod. 24. Et præterea testamentum hoc, non est simplex testamentum, sed habet rationem pacti, cum requirat conditionem de obseruantia mandatorum, & perseverantia in fide. Et igitur testamentum simul & pactum. Illud autem, *vsque in sæcu-*



*seculum*, non coniungitur cum, *sedebunt super sedem tuam*, sed cum verbis praecedentibus, *si custodierint filij tui, & filij eorum*, ut aperte colligitur ex textu Hebraico. Igitur sensus est, Si filij tui, & filij eorum custodierint pactum, & praecepta usque in saeculum, id est, si perseverauerint in timore Dei, non deturbabuntur à folio Regni tui, si autem non perseverauerint, Regnum ipsorum ad alios transferetur, ut factum est & experientia docet.

*Quoniam elegit Dominus Sion, elegit eam in habitationem suam.*

*Hæc requies mea in saeculum saeculi, hic habitabo, quoniam elegi eam.*

Possent aliquo modo hæc accommodari ad arcem siue ciuitatem Sion terrenam, ut figura erat Ecclesiae nunc militantis & postea triumphantis: elegit enim Deus ciuitatem illam pro tempore, ut esset ciuitas regia & sacerdotalis, ita ut ibi esset thronus regius & etiam templum Domini. Sed tamen quia breui diruenda erat & euertenda, & Regnum ex ea tollendum, & templum ipsum incendendum; dicendum est, hæc pertinere ad Ecclesiam, quæ est Regnum Christi, & ipsa est Hierusalem & Sion, de qua dicitur in Psal. 2. *Ego autem constitutus Rex ab eo super Sion montem sanctum eius*, & continuantur hæc verba cum illis, *Iurauit Dominus David veritatem, & non frustrabitur eum, de fructu ventris tui ponam super sedem tuam*, id est, iurauit Dauid, se positurum & stabiliturum filium eius Christum super sedem eius, quæ est Sion, quæ ideo dicitur ciuitas Dauid, quia elegit Dominus Sion, id est, Ecclesiam, in habitationem suam perpetuam; & de ea dixit: *Hæc requies mea in saeculum saeculi*, id est, non deferam vnquam hanc Ecclesiam, sed in ea perpetuo requiescam, quoniam transferam eam ad perfectam beatitudinem in caelis, & ibi habitabo in ea in sempiternum, quoniam firmissimo atque aeterno decreto elegi eam. Dicitur autem Deus requiescere, ut S. Augustinus notat, quando facit nos requiescere: tunc autem perfecte requiescemus, quando pars Ecclesiae peregrinans in terris peruenit

ad eam partem, quæ gloriosa triumphat in caelis.

*Viduam eius benedicens benedicam, pauperes eius saturabo panibus.*

Hic versiculus cum sequentibus promittit ciuitati Dauid, quæ est Sion, multa bona, quæ vtrunque applicari possunt terrenæ ciuitati, ut figura erat Ecclesiae; sed ipsi Ecclesiae proprie & perfecte conueniunt. Primum igitur promittit abundantiam rerum temporalium tantam, ut etiam viduæ, quæ solent esse maxime destitutæ, & alij pauperes satari possint: benedictio enim Dei abundantiam in Scripturis significare solet. Sed hæc abundantia in sensu altiore significat copiam cibi spiritualis, verbi Dei & Sacramentorum, quibus abundant filij Ecclesiae; illi praesertim, qui sunt spiritu pauperes. Antiqua hæreticorum calumnia occurrit hoc loco breuiter refellenda. Rider enim Caluinus editionem nostram vulgatam, quod pro, *viduam*, substituerit, *viduam*. Dicit enim presbyterum aliquem lusciosum existimasse e & t, esse vnum d, & sic pro, *viduam*, legisse *vidum*, & quia *vidum* nihil significat, addidisse, a, & fecisse *viduam*; & neminem fuisse in Ecclesia nostra, qui hanc corruptionem aduertere potuerit. Sed facile est, calumniam refutare. Latinus enim Interpres rectissime vertit, quod inuenit in Græco: in Græco autem sine dubio inuenit, *χήραν*, quod viduam significat omnium consensu; neque solus noster Interpres in Græco legit, *χήραν*, sed etiam Patres, Hilarius, Ambrosius, Augustinus, Chrysostomus, Prosper, Cassiodorus, & alij. Imo S. Hilarius meminit vtriusque lectionis, & contendit, veram lectionem esse, *viduam*, & sic lectum fuisse antequam Christus nasceretur. Verum quidem est, in Hebræo non haberi, *viduam*, sed *venationem*, vel *viduam*; neque vllam esse similitudinem literarum, ob quam suspicari quis possit, illos scripsisse *viduam*: siquidem vidua Hebraice dicitur, *אלמנה*, & viduus seu venatio dicitur, *צידה*, & hæc vocem in omnibus codicibus inuenimus: sed in Græco idiomate magna similitudo literarum est inter *χήραν*, quod

XVI.

אלמנה  
צידה



quod significat viduam, & *Ḍāpar*, quod significat victum. Igitur necesse est, vel in Hebræo mutatum esse textum, & Septuaginta legisse longe aliter, quam modo se habet, & hæc sententia S. Hilarij est; vel in Græco textu esse corruptionem factam vitio scriptorum, quia vnam literam legerunt pro alia, vt S. Hieronymus putat. Sed in sensu nulla fere diuersitas est, cum per vtrumque vocabulum significetur abundantiam ciborum fore in ciuitate Dei. Et quoniam, vt idem Hieronymus dicit, vsus obrinuit, vt legeretur, *vidua*, non est lectio Latina vilo modo mutanda, cum non à luscioso Sacerdote, vt Caluinus dicit, sed à veneranda antiquitate ortum habuerit.

XVII.

*Sacerdotes eius induam salutari, & sancti eius exultatione exultabunt.*

Alterum bonum sanctæ ciuitatis erit, quod Sacerdotes eius sanctitate & iustitia conspicui erunt. Salus enim animæ iustitia est, sicut morbus animæ iniquitas est: & quia precatus fuerat Salomon, vt Sacerdotes induerentur iustitiis; ideo nunc Deus dicit se id effecturum, vt Sacerdotes induantur salutari, id est, salute, quæ est eadem cum iustitia, cum de salute spiritali agatur. Fortasse etiam altiore sensu per *salutare*, intelligitur hoc loco Saluator Christus, vt in Cantico Simeonis: *Quia viderunt oculi mei salutare tuum*: & ab hoc loco Psalmi accepit fortasse B. Paulus modum illum loquendi ad Rom. 13. *Induimini Dominum Iesum Christum*, id est, facite vt in vestris moribus conspiciatur sanctitas & iustitia Christi. Illud autem, *& sancti eius exultatione exultabunt*, respondet ei quod antea dictum erat, *& sancti eius exultent*: nam vt eo loco per exultationem intelligebatur laus Dei cum alacritate; ita hic quoque intelligitur: & vt ibi per sanctos intelligebantur Sacerdotes; ita & hic. Eadem enim verba sunt in textu Hebræico in vtroque loco.

XVIII.

*Illuc producam cornu Dauid, paraui lucernam Christo meo.*

Tertium bonum, & quidem maximum sanctæ Sion erit, quod ibi oriatur Regnum Dauid: nam pro voce, *illuc*, in Hebræo & Græco est, *ibi*. Accipiendum est igitur, *illuc*, pro, *illic*, id est, in Sion. Per, *cornu*, significatur metaphorice potestas & excellentia Regia: vt enim corau est durissimum & eleuatum, ita Regia dignitas est potens & supereminens. Significatur autem ad literam per, *cornu Dauid*, Regnum Messiae, quod erat inchoandum in Sion, & inde per totum mundum propagandum. Explicuit hoc Zacharias in suo Cantico Luc. 1. cum ait: *Erexit nobis cornu salutaris in domo Dauid pheri sui*. Et idem prædixerunt omnes Prophetæ, Itaias cap. 9. *Super solium Dauid, & super Regnum eius sedebit, vt confirmet & corroboret illud vsque in æternum*. Hieremias c. 23. *Eccce dies veniunt, & suscitabo Dauid germen iustum, & regnabit Rex, & sapiens erit, & faciet iudicium & iustitiam*. Ezechiel c. 1. non solum prædicit Regnum Christi, sed etiam curram eius triumphalem, qui vehebatur à quatuor animalibus, homine, leone, vitulo & aquila, quæ sunt quatuor Euangelistæ. Daniel c. 2. *In diebus Regnorum illorum suscitabit Deus cæli Regnum, quod in æternum non dissipabitur*. Zacharias c. 9. *Exulta satis filia Sion, ecce Rex tuus venit tibi iustus, & Saluator ipse pauper, & ascendens super asinam, &c.* Ex quo manifeste apparet, non posse intelligi versiculum istum Psalmi de Salomone, nec de Regno eius: tunc enim Salomon regnabat & florebat; hic autem de futuro dicitur: *illic producam*, id est, oriri faciam, & quasi germinare cornu Dauid: quasi aperte prædiceret euerionem Regni temporalis, quod tunc vigeat, & suscitandum postea in eadem ciuitate Regnum æternum Messiae. Quod autem sequitur: *Paraui lucernam Christo meo*; potest duobus modis intelligi. Primum enim per *lucernam* potest intelligi Messias, & per *Christum*, Dauid. Scriptura enim passim vocat lucernam, filium siue posteros: nam in filiis parentes viuunt & lucent. Vide lib. 3. Reg. c. 11. & 15. & tunc sensus erit, *Illic producam cornu Dauid*, quia paraui lucernam, id est, filium successoremq; eius Messiam Christo meo Dauidi;

XIX.



vidi; & erit quasi explicatio eius, quod antea dixerat: *De fructu ventris tui ponam super sedem tuam.* Vt enim hoc non intelligerent carnales Iudæi de Salomone, explicatur hoc loco de Messia futuro. Potest tamen etiam aptissime intelligi, vt S. Augustinus exponit, de Præcurfore Domini, & ipso Domino, vt lucerna sit Ioannes, & Christus sit Dominus Iesus. Quoniam enim Messias venturus erat sine opibus & comitatu regio, non facile à Iudæis expectantibus Messiam, Regem temporalem, agnosci potuisset, nisi præcessisset Ioannes, qui singulari sua sanctitate & vitæ austeritate omnium oculos in se conuerteret instar lucernæ lucentis in caliginoso loco; dicit igitur: *Illuc producam cornu David*, id est, Regnum æternum Messie, & iam *preparavi lucernam*, id est, Præcurforem, qui erit quasi lucerna, *Christo meo*, id est, ipsi Messie: atque ad hunc locum videtur Dominus aspexisse, cum ait Ioan. 5. *Ipsæ erat lucerna ardens & lucens.*

*sanctificatio mea.* Illi induentur confusione, Christus induetur gloria: nam sanctificatio, quæ in hoc mundo erat quasi semen in terra absconditum, tunc florebit in gloriam, id est, germinabit flores sanctificationis: Nec solum Christus, sed etiam omnia membra eius induentur gloria, quia tunc sanctificatio emittet flores incredibiles pulchritudinis, quando gratia vertetur in gloriam. In Hebræo vox est, *nizro*, quæ significat diadema eius: sed quamuis Exod. 24. illa vox significet thiarum Pontificis, & lib. 4. Reg. cap. 11. accipiat pro corona regia: tamen potest etiam significare sanctificationem, vt hoc loco verterunt LXX. Interpretes: nam venit à verbo, *nazar*, quod significat separare & consecrare, vnde dicuntur, *Nazarei*, quasi sanctificati & consecrati Deo: & corona pontificia vel regia dicitur, *nezzer*, quia consecrat quodammodo Pontificem vel Regem, & à vulgo separat. Sed in sensu non est diuersitas, nam gloria sanctificationis rectissime corona vel diadema dici potest: nec multum interest, si dicatur, *florebit sanctificatio*, id est, sanctificatio emittet flores gloriæ; siue, *florebit sanctificatio*, id est, micabit diadema gloriæ. Neque etiam multum refert quod nos legamus, *sanctificatio mea*, & in Hebræo sit *sanctificatio* siue *diadema eius*: nam Septuaginta legerunt, *iod*, vbi nunc est, *vau*, & eadem sanctificatio vel diadema, & Dei est, quia ab illo datur; & nostra est, quia nobis datur: proinde vtraque lectio veritatem continet; sed nostra præponenda est, cum sit in codicibus Græcis & Latinis, quibus Ecclesia semper vsa est.

*Inimicos eius induam confusione, super ipsum autem efflorebit sanctificatio mea.*

Prædicit, Christum multos habiturum inimicos, vt reuera habuit Iudæos, qui dixerunt: *Nolumus hunc regnare super nos*, Luc. 19 & ad Pilatum: *Non habemus Regem, nisi Cæsarem*, Ioan. 19. Sed prædicit quoque poenam inimicorum Christi. *Inimicos*, inquit, *eius induam confusione*, id est, implebo ignominia maxima; quod etiam impletum esse scimus, & oculis nostris videmus. Nam paulo post Christi mortem, venerunt Romani, & ciuitate illorum euerfa, ipsos magna strage affecerunt, & eorum qui supererant, alios vilissimo pretio vendiderunt, alios in publicis ludis bestiis obiecerunt: & ab illo tempore gens Iudæorum vbique seruit, vbique contemnitur. Sed in die nouissimo, non solum Iudæi, sed etiam omnes pagani & hæretici, & omnes falsi fratres, qui Christo in membris eius inimici fuerunt, induentur confusione. *Super ipsum autem*, id est, super Christum, *efflorebit*

## P S A L M V S CXXXII.

*Titulus, & Argumentum.*

*Canticum graduum.*

**C**ompositus videtur hic Psalmus, vt à Iudæis cantaretur, quando post redi-



tum à captiuitate, & reedificata ciuitate ac templo, cœperunt simul pacifice habitare, & esse vnus populus remota distinctione vel schismate, quod erat ante captiuitatem inter Regnum Israël & Regnum Iuda. Sed conuenit etiam omni multitudini, vbi viget concordia & communio, quales sunt multitudines seruorum Dei in monasteriis, vbi regularis obseruantia viget. Sed potissimum locum habet hic Psalmus in cœlesti patria, & cantatur ab iis, qui finita peregrinatione ad eos perueniunt, vbi omnes sunt consummati in vnum, vt loquitur Dominus Ioan. 17. & vbi Deus est omnia in omnibus, iuxta Apostolum 1. Cor. 13.

## EXPLICAT. PSAL. CXXXII.

- I. **E**cce quam bonum, & quam iucundum habitare fratres in vnum.

Vox est eorum, qui iam experiri & gustare cœperunt vtilitatem & dulcedinem perfectæ charitatis. Vocat enim bonum, id quod est vtile; & iucundum, id quod est dulce: quamuis enim aliqua sint bona, quæ non sunt iucunda, vt labor penitentiar; & quædam iucunda, quæ non sunt bona, vt voluptas peccati; tamen in concordia & pace fratrum simul habitantium hæc duo coniuncta inueniuntur. Nam virtus vnita est maior & fortior, & melius ac facilius conseruatur, quod pertinet ad vtilitatem: & vbi per charitatem multi sunt cor vnum & anima vna, vnusquisque gaudet de bono aliorum non minus quam de suo; quod pertinet ad iucunditatem.

- II. *Sicut vnguentum in capite, quod descendit in barbam, barbam Aaron.*

- III. *Quod descendit in oram vestimenti eius: sicut ros Hermon, qui descendit in montem Sion.*

Duabus similitudinibus explicat iucunditatem & vtilitatem habitantium in vnum: ac primo iucunditatem comparat vnguento

precioso, quo vtebatur caput summi Pontificis, quod erat odoris suauissimi, vt patet ex cap. 30. Exodi: quod quidem vnguentum effusum in caput Pontificis, inde defluebat ad barbam, & à barba in oram vestimenti, id est, in illam partem quæ circumdat collum, quæ immediate subiecta est barbæ: non enim per oram, intelligitur extremitas vestis, sed summitas, vt notauit S. Augustinus, & vt sonant vox Hebraica & Græca, & vt ratio ipsa demonstrat: non enim tantum vnguenti effundi solebat in caput, vt vique ad extremas vestes deflueret. Sed illud hoc loco notandum est, vnguentum non communicari à capite, nisi partibus vnitis: nisi enim barba capiti adhereret, sed abscissa alicubi maneret, sine dubio defluxum vnguenti non participaret, & nisi vestis vnita esset corpori, sed plicata maneret in arca, similiter vnguento non perfunderetur; sic igitur, nisi fratres habitarent in vnum, & inter se glutino charitatis coniuncti essent, dona cœlestia à capite Christo defluentia non descenderent in barbam, id est, in Prælatos, neque à barba in vestimenta, id est, in reliquum populum. Ait igitur: *Sicut vnguentum in capite, quod descendit in barbam*, id est, iucunditas fratrum habitantium in vnum, & inter se coniectorum, ac debita proportionem inuicem subiectorum, est sicut vnguentum preciosum & fragrantia suauissima, quod in capite effusum descendit in barbam. *In barbam Aaron*, id est, non loquor de quocunque vnguento, sed de illo, quod descendit in barbam Aaronis, tempore consecrationis suæ: *quod etiam descendit in oram*, superiorem videlicet partem vestimenti eius. Deinde comparat vtilitatem eorundem fratrum habitantium in vnum, rori, qui descendit in montem: neque enim montes ex rore iucunditatem vllam percipiunt, sed vtilitatem magnam: quoniam pluuia ad montes, vel non descendit, vel non haberet, sed ex montibus ad valles continuo descendit: ros autem hæret in montibus, eosque infundit, & germinare facit: nominat autem duos montes, Hermon & Sion, qui quamuis loco coniuncti non essent, cum mons Her-



Hermon esset trans Iordanem ad Orientem, & mons Sion citra Iordanem ad Occidentem: tamen coniuncti erant quoad similitudinem qualitatum, cum uterque sit verus mons, & vnus maior & altior, videlicet Hermon, alius minor & humilior, id est, Sion. Ex quo voluit nos Spiritus sanctus admonere, coniunctionem fratrum habitantium in vnum debere esse cordium magis quam corporum: nam de primis fratribus habitantibus in vnum scriptum est: *Erat autem multitudinis credentium cor vnum & anima vna*, A. A. 4. Dicitur igitur: *Sicut ros Hermon, qui descendit in montem Sion*, id est, bonum utilitatis habitantium in vnum, est sicut ros Hermon, qui descendit in montem Sion, siue vt est in Hebræo, *in montes Sion*. Quomodo autem ros montis Hermon, qui longe distat à Sion, descendat in montem Sion, variis modis exponunt interpretes. Mihi videtur, Prophetam considerasse montem Hermon esse altissimum & amplissimum, atque in eo magnam esse roris abundantiam: montes autem Sion esse multo humiliores & aridiores: & ideo more poetico dixisse, ex monte Hermon descendere rorem in montes Sion, quasi communicet mons Hermon rorem, quo abundat, cum montibus Sion, qui eo carent: non quod idem omnino ros, qui est in monte Hermon descendat in montes Sion, sed quod similis ros descendens in montes Sion, videatur quodammodo ex monte Hermon descendere. Et aptissime conuenit hæc similitudo in conuentum fratrum habitantium in vnum: sunt enim fratres concordēs, quasi tot montes siue colles Sion, in quos descendit ros cœlestis à Christo, qui est quasi Hermon altissimus, & rore cœlesti plenissimus; vnde dixit Ioannes: *Et de plenitudine eius omnes accepimus*, Ioan. 1. Non communicat autem Christus nobiscum eam ipsam gratiam & gloriam numero, quam in se habet, sed aliam similem & minorem.

*Quoniam illic mandauit Dominus benedictionem, & vitam vsque in seculum.*

Reddit rationem, cur tantis bonis abundet conuentus fratrum, concorditer pacificeq; viuentium. *Quoniam*, inquit, *illic mandauit Dominus benedictionem*, id est, illic misit Dominus benedictionem suam, quæ est fons omnium bonorum; Domino enim benedicere; benefacere est. Quoniam igitur Deo gratissima est concordia & charitas fraterna, ideo replet eam copia bonorum omnium; idq; non ad breue tempus, sed in æternum; nam ideo cum benedictione misit ad eos *vitam vsque in seculum*; quæ omnia hic in terris habentur in spe, sed in patria habentur in re. Recte igitur in iro diximus, hunc Psalmum ab illis proprie cantari, qui ex peregrinatione perueniunt ad patriam. Ibi enim perfecta est concordia, ibi vnguentum perfectæ charitatis continuo defluit à capite Christo in omnia membra, & ros luminis gloriæ à monte Hermon in omnes colles Sion: dicitur enim Hermon, lumen eleuatum; & Sion, specula: proinde recte ab altissimo lumine descendit participatio eius in eos, qui digni sunt speculari Deum facie ad faciem. Ibi est benedictio Domini, id est, affluentia omnium aliorum bonorum: ibi denique est vera vita vsque in seculum, quæ nunquam deficiet.

## PSALMVS CXXXIII.

*Titulus, & Argumentum.*

*Canticum graduum.*

**H**ic est Psalmus postremus gradualium, qui eos, qui iam feliciter ascenderunt, hortatur, vt vacent perpetuis laudibus; quod est officium habitantium in domo Domini, iuxta illud Psal. 83. Beati qui habitant in domo tua Domine, in secula seculorum laudabunt te. Pertinet tamen suo modo hic Psalmus ad eos, qui post adificationem templi, in illo habitabant; & ad eos, qui, dum peregrinantur in terra, corde habitare nituntur in caelo, & cum Apostolo dicere possunt: Conuersatio nostra in cœlis est, Phil. 3.

Eccc

EX-



## EXPLICATIO PSAL. CXXXIII.

I. **E**cce nunc benedicite Dominum omnes serui Domini.

Ecce, inquit, nunc liberati à tentationibus & persecutionibus, tempus est, vt toti intenti sitis laudibus Domini, proinde benedicite Dominum vos omnes serui Domini, qui non habetis aliud, in quo illi iam seruiatis, nisi in persoluendo tributo perpetuæ laudis & gratiarum actionis.

II. **Qui statis in domo Domini, in atris domus Dei nostri.**

Vos, inquam, qui statis in domo Domini, id est, qui permanentem habetis domum, & non amplius tanquam peregrini in tentoriis habitatis: & præterea statis, id est, securi consistitis non timentes casum, quomodo ille, qui in veritate non stetit, Ioan. 8. Nec solum domum, sed etiam atria possidetis, ita vt interioriorem domum, vbi Deus videtur, & exterioriorem, vbi videntur creaturæ, quæ sunt veluti atria, felicissimi habeatis.

III. **In noctibus extollite manus vestras in sancta, & benedicite Dominum.**

Tempus maxime opportunum orandi & laudandi Deum nox est, quando quies vbiq; esse solet. Itaque Dauid Psal. 118. *media nocte surgebat ad constendum Domino*; & Isaias c. 26. dicit: *Anima mea desiderauit te in nocte*. Et Hieremias Thren. 2. hortatur: *Consurge, lauda in nocte, in principio vigiliarum*. Et ipse Dominus noster Luc. 5. *pernoctabat in oratione Dei*. Et Apostolus cum Sila Act. 16. *in ipso carcere media nocte orantes laudabant Dominum*. Recte igitur admonet Propheta seruos Dei, vt nocturno potissimum tempore extollentes manus in sancta, id est, ad Sancta Sanctorum, vbi erat propitiatorium & arca Dei, benedicant Dominum. Moraliter autem significat hic versiculus, seruos Dei debere benedicere Deum, non solum in die prosperitatis, sed etiam in nocte aduersitatis. Sed in sensu præcipue intento, significatum

hoc loco in cœlesti patria, sicut semper est dies, si de luce & tenebris agatur; ita semper esse noctem, si agatur de labore & quiete. Intranstibus enim in illam requiem dicit spiritus, vt requiescant à laboribus suis, quia opera eorum sequuntur illos; & illa est nox, de qua dicitur in Psal. 138. *Et nox illuminatio mea in deliciis meis*: & de qua dicit Dominus Ioan. 5. *Venit nox, in qua nemo potest operari*, & proinde solis Dei laudibus vacare oportet. In his igitur quietissimis, sed lucidissimis noctibus extollite manus vestras beati serui Dei, quod sanctuarium verum, vbi Deus ipse residet, conuersi, benedicite Dominum.

**Benedicat te Dominus ex Sion, qui fecit cælum & terram.**

Hortatus est Propheta sanctos Dei seruos, vt assidue Dominum benedicant: nunc vicissim ipse benedictionem illis à Domino præcatur; sed vtitur numero singulari, quia videbat eos ita esse glutino veræ charitatis unitos, vt essent vnum in Domino. Illi igitur unitati seruorum Dei, dicit: *Benedicat te Dominus ex Sion, qui fecit cælum & terram*. Quod ad verba attinet, in Hebræo codice desunt illa verba, *in atris domus Dei nostri*. Sed verisimile est, in codicibus correctioribus, quos habuerunt LXX. Interpretes, illa verba non defuisse, præsertim cum in Ps. 134. idem versiculus repetatur, & in eo verba illa legantur etiam in codicibus Hebraicis. Illud vero, *in noctibus*, Hebræus codex coniungit cum superioribus, hoc modo, *qui statis in domo Domini in noctibus*, & postea incipit alium versiculum ab illis verbis, *Extollite manus vestras*, &c. Sed interpunctio Rabinorum modernorum, qualis nunc est in codicibus Hebraicis, non debet præiudicare auctoritati grauiusimæ LXX. Interpretum, qui illud, *in noctibus*, principium esse versiculi, & cum sequentibus verbis coniungi debere, censuerunt.



## PSALMVS CXXXIV.

Titulus &amp; Argumentum.

Alleluia.

**D**uo Psalmi sequentes eiusdem sunt argumenti; hortantur enim fideles ad laudes Dei, quod argumentum in titulo demonstrant: & recte subiunguntur Psalmis gradualibus, quoniam optime conueniunt iis, qui ex captiuitate in patriam redierant, quiq; iam gradus perfectionis Deo iuuante vel ascenderunt, vel in ascensione non modicum profecerunt.

## EXPLICATIO PSAL. CXXXIV.

**L**audate nomen Domini, laudate serui Domini.  
*Qui statis in domo Domini, in atrii domus Dei nostri.*

Hi duo versiculi habentur etiam initio Psalmi superioris: sed ideo repetuntur, vt continetur laudatio, quæ ibi fuerat inchoata. Alloquitur igitur Propheta seruos Domini, eosq; hortatur, vt laudent nomen Domini, & ipsum Dominum: hic enim est sensus, vt colligitur ex principio Psalmi 112. *Laudate pueri, id est, serui, Dominum, laudate nomen Domini.* Qui sint autem serui, quibus indicatur laudatio, indicat, dicens: *Qui statis in domo Domini, in atrii domus Dei nostri,* id est, qui non estis exules, non in via positi, non peregrini, quibus oratio magis quam laudatio necessaria sit, sed iam peruenistis, iam statitis in domo Domini, de qua dicitur in alio Psalmo, *Beati qui habitant in domo tua Domine, in sacula saculorum laudabunt te.* Itaque videtur hic Psalmus præcipue conuenire iis, qui ad celestem patriam peruenierunt, & domum Domini non manufactam, sed æternam in celo introierunt. Conuenit tamen illis etiam, qui spe ac desiderio in ea domo degere incipiunt, & cum Apostolo dicere possunt: *Nostre autem conuersatio in caelis est.* Conuenit denique speciali quadam ratione Sacerdotibus, quorum officium est stare in domibus Deo sacris, & ipsi Deo im-

mediate & proprie ministrare. Sunt quidem omnes fideles serui Domini, sed illi præter ceteros, qui toti sunt Domini obsequio addicti & mancipati. Ex Hebræo legunt aliqui, *Laudate serui Domini*, quia vox, *serui*, aude, secundum regulas grammaticæ regit genitiuum. Sed hoc non est perpetuum, & legendum esse, *Laudate serui Dominum*, perspicuum est, ex versione non solum Septuaginta, sed etiam S. Hieronymi. Sunt etiam qui stare in domo, tribuunt Sacerdotibus, stare in atrii, tribuant laicis. Sed probabilius est, pro eodem accipi hoc loco domum Domini, & atria domus Domini; nam vt plurimum secunda pars versiculi repetit & explicat priorem; vnde sensus est, *Qui statis in domo Domini, qui statis, inquam, in atrii domus Dei nostri.*

*Laudate Dominum, quia bonus Dominus, psallite nomini eius, quoniam suauis.*

III.

*Quoniam Iacob elegit sibi Dominus, Israël in possessionem sibi.*

IV.

Hortatus est Propheta populum Dei ad laudandum Dominum: nunc adducit tres rationes, quibus persuadeat, ita esse faciendum; primam, quoniam Deus dignissimus est omni laude; secundam, quia id nobis bonum & iucundum erit; tertiam, quia tene-mur, cum nos præter ceteras gentes Deus maximis beneficiis affecerit. *Laudate, inquit, Dominum, quoniam bonus est Dominus: bonum enim laude, malum vituperatione dignum est.* Deus autem ita bonus est, vt solus sit absolute bonus, & omni ex parte bonus, & non aliunde, sed ex se ipso sit bonus, & nihil sit bonum, nisi participatione & dono eius; denique cetera sint bona in certa specie, & cum addito, vt bonus homo, bona domus, bona vestis; Deus autem sit ipsa bonitas, omnem omnino boni rationem continens. *Psallite nomini eius, quoniam suauis:* hæc est secunda ratio, quasi dicat, *Psallite nomini eius, quoniam istud psallere & laudare non erit vobis opus molestum*

E e e e 2

&amp; la-



& laboriosum ; sed dulce, iucundum, suaue. Vox Hebraica, *nahim*, significat dulce & dulcis, & ideo referri potest tum ad *Dominum*, tum ad *nomen*, tum ad *psallere* ; & sensus esse potest, Psallite nomini eius, quoniam suavis est Dominus : item, quoniam suaue est nomen Domini : denique, quoniam suaue est psallere nomini Domini. Sed vox Græca & Latina, quæ sunt generis neutri, non possunt referri ad Dominum, sed, vel ad nomen, vel ad psallere : & hæc postrema acceptio videtur esse magis propria. Cæterum in sententia nulla dissensio est. Ideo enim laudare Deum suaue est, quia Deus suavis est : quomodo dulces cibos comedere dulce est, quoniam ipsi cibi dulces sunt. Et quidem Beatis in cælo psallere Deo suauissimum est, & ideo ne ad momentum quidem cessant à laudibus, quoniam dulcedinem Dei in ipso fonte suauitatis sine intermissione degustant : nobis autem nunc dulce est canere Deo, nunc laboriosum, quoniam non semper gustamus, quam suavis sit Dominus ; sed tunc solum, cum ex gratia Dei, & præcedente meditatione assurgimus ad cognitionem, & accendimur ad amorem. *Quoniam Iacob elegit sibi Dominus*, elegit, inquam, *Israel in possessionem sibi*. Hæc est tertia ratio, quæ ducitur à debito, & iure obligationis : cum enim Deus singulari dono gratiæ suæ filios Iacob in populum peculiarem sibi delegerit, certe iustum est, ut is populus præter omnes alias gentes Deum laudet. Hic sunt aliqua notanda. Primo, Deum conditorem vniuersitatis omnium gentium prouidentiam gerere, & omnibus dedisse lumen rationis, & legem naturalem scriptam in cordibus ; & Angelos custodes tum singulorum hominum, tum etiam Prouinciarum & Regnorum : sed præter hæc omnia, quæ communia sunt populo Israëlitis cum aliis populis, suscepisse Abrahamum & posteros eius, per Isaac & Iacob descendentes in proprium populum, qui esset quasi eius hæreditas, & portio, & possessio, eisq; dedisse legem scriptam in tabulis, & ceremonias, quibus coli volebat, & Prophetas, quasi internuncios, à quibus de notitia Dei erudirentur. Secundo, hoc fuisse

se admirabile beneficium Dei : elegit enim Deus populum illum in possessionem sibi, ut eis beneficeret, eosq; diligenter excoleret, quasi vineam dilectam addo, fuisse hoc beneficium gratis omnino illi populo collatum, non enim elegit Deus populum illum ob eorum merita, sed quia sibi ita placuit : quod perspicuum est ex prædestinatione æterna, cuius meminit Malachias cap. i. & Apostolus ad Rom. 9. Nam antequam nati essent Iacob & Esau, & cum nihil boni vel mali egissent, dictum est, *maior seruiet minori ; quoniam Iacob dilexi, Esau odio habui*. Tercio, hoc idem, & etiam maius beneficium collatum esse populo Christiano, ex gentibus congregato : nam, ut Apostolus docet Rom. 11. Gentiles erant quasi oleastri respectu Iudæorum, qui erant naturales rami oliuæ : sed cum fracti essent multi rami naturales ob incredulitatem, Deus assumpsit oleastros, & inseruit in bonam oliuam, id est, super fundamentum Apostolorum & Prophetarum superadificauit Gentiles, vocans eos per fidem ad populum suum, & faciens ciues Sanctorum, & domesticos Dei. Nobis igitur conuenit, & ex debito obligationis tenemur, laudare Deum : sed propriissime Iacob, siue Israël electus in possessionem, est celestis Hierusalem, cætus videlicet Beatorum, cui dicitur : *Lauda Hierusalem Dominum, lauda Deum tuum Sion*.

*Quia ego cognoui, quod magnus est Dominus, & Deus noster præ omnibus diis.*

*Omnia quaecunque voluit Dominus fecit in cælo, in terra, in mari, & in omnibus abyssis.*

Respondet Propheta obiectioni, quæ fieri poterat, cur ipse tanto ardore inuitaret populum Dei ad laudes Domini. *Quia*, inquit, *ego cognoui, quod magnus est Dominus : & non solum magnus super omnes homines, sed etiam super omnes Deos : & ideo filere non possum, ideo clamo, ideo canto & psallo, & ad canendum & psallendum omnes*



omnes inuito. Deinde probat vtrunque, nimirum Deum esse magnum Dominum, & esse maiorem omnibus Dijs; ac primum, quod sit magnus Dominus, probat ab omnipotentia, quia *omnia quaecunque voluit fecit in vniuersa creatura, in caelo, in terra, in mari, & in omnibus abyssis*; vbi per mare intelligit mare Oceanum, per *abyssos* intelligit maria mediterranea, quasi diceret, in mari magno, & in alijs aquarum profunditatibus. Ita Chrysostomus: sed possunt etiam per *abyssos* intelligi loca subterranea inferorum, vbi est gehenna; de quibus legimus in Euangelio, rogatum fuisse Dominum à demonibus, ne eos mitteret in abyssum. Sic enim comprehenduntur omnia loca, summum caelum, imi inferi, media terra, & mare. Sed placet breuiter conferre nostram infinitatem cum Dei potentia. Ille fecit omnia, quæ voluit; nihil enim impossibile est illi: nos autem multa volumus facere, & non possumus. Item Deus fecit, quia voluit, id est, libera voluntate fecit, non aliqua necessitate; quia nulla re indiget: nos maxima ex parte operamur, quia indigemus, & nisi cogeret necessitas, ociaremur. Denique Deus in omnibus rebus fecit quaecunque voluit, quia Dominus est rerum omnium: nos ne in nobis quidem facere possumus omnia, quæ volumus, quanto minus in alijs rebus? Aequum igitur est, vt non nos ipsi, sed Deum nostrum assidue laudemus.

*Educens nubes ab extremo terræ, fulgura in pluuiam fecit.*

Ponit exempla aliquot eorum, quæ Deus facit, quando vult, in aere, in terra, & in aquis. Facit quidem Deus mirabilia in Angelis, & in cælis superioribus, & rursum in abyssis subterraneis. Sed quia incognita nobis sunt; ponit exemplum eorum, quæ facit in cælo aëreo; in terra, & in aquis, quæ à nobis videntur, quamuis causas ignoremus. Primum igitur ponit exemplum in nubibus, quæ oriuntur ex terra, sed formantur in cælo aëreo, & conuersæ in aquas reuertuntur ad terram. *Educens, inquit, nubes ab extremo*

*terra*, id est, qui educit nubes ab extrema parte terræ. Accommodat se Spiritus sanctus in scripturis sensibus nostris: nos autem videmus ordinariè nubes ascendere vel ab Oriente, vel ab Occidente, vel à Meridie, vel à Séptentrione, quæ sunt quatuor extrema terræ, sed varia pro varietate regionum. Et quamuis ista assiduitate viderint, tamen omnino mirabile est, vnde tanta copia vaporum repente existat; vt totum caelum in puncto ferè temporis nubibus quasi velo cooperiat: nisi ideò mirabile esse desinat, quia ab omnipotente fit. Sed mirabilius est, quod sequitur, *Fulgura in pluuiam fecit*; vbi, in *pluuiam*, positum est pro, in *pluuia*, quomodo 2. Cor. 12. dicit Apostolus, *Nocte & die in profundum maris fui*. Sensus autem est, Deus in pluuiam fecit fulgura, id est, inter pluuiam miscuit fulgura, quæ res est omnino mirabilis: nam fulgura sunt ardentia, aërentia, acutissima; & pluuiæ est res humida, frigida, mollis: & tamen nec fulgura absument aquam, nec pluuiæ extinguit fulgura. Ita exponunt antiquissimi Patres, Hilarius & Chrysostomus, & confirmari potest eorum expositio ex cap. 9. Exodi, *Grando & ignis mista pariter ferebantur*: ad quem locum videtur alluisse Propheta Dauid. Omitto alias expositiones recentiorum, quæ minus probabiles sunt.

*Qui producit ventos de thesauris suis, qui percussit primogenita Egypti ab homine vsque ad pecus.*

*Et misit signa & prodigia in medio tui Egypte; in Pharaonem, & in omnes seruos eius.*

Tertium exemplum magnitudinis Dei sumitur à generatione ventorum. Venti enim notissimi sunt, & quotidie sentiuntur à nobis; & tamen nihil est obscurius generatione ipsorum. Vnde & Dominus Ioan. 3. ait: *Spiritus ubi vult spirat, & vocem eius audis, & nescis vnde veniat, aut quò vadat*, id est, audis strepitum venti, & nescis, vnde veniat, aut quò vadat, id est, quomodo

Eccc 3

oriatur,

VIII.

IX.



oritur, & quomodo desinat, præsertim quando repente ventus existit, & paulò post repente cessat. Illud autem, *de thesauris suis*, metaphoricum est: non enim venti inclusi manent in speluncis, aut abditi locis, ut fabulantur Poëtæ, sed ita repente producuntur à Deo, quasi educerentur de thesauris, id est, de locis absconditis. Verè autem educuntur de thesauris Dei, id est, de potentia Dei secretissima & ditissima, quæ nunquam exhausti potest. Cum hoc tertio exemplo coniungit Propheta, quantum de occisione omnium primogenitorum Ægypti, tam hominum, quàm iumentorum, quæ habetur Exod. 12. coniungit autem hanc occisionem cum productione ventorum, quia quemadmodum venti, spiritus quidam sunt corporales, qui non videntur ob nimiam subtilitatem, & tamen maximas edunt strages arborum in campis, domorum in ciuitatibus, & nauium in mari: sic spiritus angelici inuisibiles oculis hominum, incredibili celebritate ad nutum Domini interfecerunt omnia primogenita Ægypti, tum hominum, tum iumentorum: neque enim occisio illa poterat tribui pesti, aut morbo naturali, cum eadem nocte perierint omnia & sola primogenita Ægyptiorum, tum hominum, tum pecorum: & apud Hebræos, qui in Ægypto degebant, nullus omnino homo, aut bestia perierit. Adiungit denique in summa omnia signa & prodigia, quæ fecit Deus per Moysen in Ægypto, quæ legi possunt in Exodo cap. 7. 8. 9. 10. 11. 12.

X. *Qui percussit gentes multas, & occidit Reges fortes.*

XI. *Sehon Regem Amorrhæorum, & Og Regem Basan, & omnia Regna Chanaan.*

XII. *Et dedit terram eorum hereditatem, hereditatem Israel populo suo.*

Post mirabilia Dei edita in Ægypto aduersus Pharaonem; addit mirabilia edita in itinere aduersus duos potentissimos Reges, Sehon & Og, quos populus Dei debellauit magis extraordinario auxilio Dei, quàm ar-

mis. Vide lib. Num. cap. 21. Et denique addit mirabilia, quæ fecit Deus in ipsa terra promissionis aduersus triginta & vnum Reges, qui regnabant in illis prouincijs. Vbi multa miracula acciderunt, ac præter alia, ut muri Hiericho ad sonitum tubarum Sacerdotilium corruerint: & Sol & Luna steterint ad imperium Iosue. Vide librum Iosue cap. 6. 10. & 12. Ipse igitur Deus dedit totam illam terram possidendam, & quasi propriam hereditatem populo suo Israelitico: quomodo etiam Regnum celorum per terram promissionis significatum, vult quidem Deus à fidelibus suis bellando & laborando capi, sed quia nisi ipse præueniret, & comitaretur, & subsequeretur gratia sua labores nostros, nihil omnino facere possemus; ideo ipse est, qui nos saluat, ex captiuitate liberat, & hereditatem æternam donat.

*Domine nomen tuum in æternum, Domine memoriale tuum in generatione & generationem.*

*Quia iudicabit Dominus populum suum, & in seruis suis deprecabitur.*

Concludit Propheta priorem partem suæ probationis, qua demonstrare instituerat magnitudinem Dei: ea enim satis apertè demonstrata, dicit: *Domine nomen tuum in æternum*, id est, propter hæc tanta mirabilia, nomen tuum, memoria tua, fama tua, in æternum vigeat, & id ipsum more suo repetens, *Domine, inquit, memoriale tuum*, id est, recordatio nominis tui in generatione & generationem permanebit. *Quia iudicabit Dominus populum suum*, id est, semper manebit celebris memoria Dei, quoniam Deus semper, ut hæc fecit, & iudicabit populum suum, id est, iusto iudicio vindicabit de persequentibus eum puniens iniquos hostes eius. *Et in seruis suis deprecabitur*, id est, erga seruos suos exorabilis erit: accipiendum enim est passiuè illud, *deprecabitur*, pro, *exorabitur*. In cantico Moysis Deuteronom. 32. eadem sententia sic vertitur à Latino interprete, *Iudicabit Dominus populum suum, & in seruis suis miserebitur.*

Simu-



XV. *Simulachra gentium argentum & aurum, opera manuum hominum.*

XVI. *Os habent, & non loquentur; oculos habent, & non videbunt.*

XVII. *Aures habent, & non audient; neque enim est spiritus in ore ipsorum.*

Probat his versiculis Dauid, Deum nostrum magnū esse præ omnibus Dijs, quod erat alterum, quod affirmauerat in quinto versiculo. Quamuis enim non magnū sit Deo, maiorem esse Dijs aureis & argenteis, vt S. Hilarius admonuit; cū longē maior sit Regibus, dæmonibus, & Angelis: tamen voluit Propheta conferre Deum cum simulachris, vt clarius ostenderet infirmitatem Deorum Gentilium; tum etiam quoniam licet Dijs gentium essent dæmonia, vt dicitur in Psal. 95. tamen, multi Gentilium hoc non sciebant, sed arbitrabantur ipsa simulachra esse Deos, vt perspicuum est i. Reg. de statua Dagon. Denique quia ex his argumentis colligitur etiam infirmitas ipsorum dæmonum, qui simulachris suis non potuerunt dare sensum & vitam, quomodo Deus verus simulachro suo, quod est homo, dedit spiritum vitæ, sensum & motum, & quod est excellentius, dedit rationem & arbitrij libertatem. Rectē igitur Dauid probat, Deum esse magnū præ omnibus Dijs; quia simulachra gentium, siue ipsa, siue inhabitatores eorum habeantur pro Dijs, oculos habent, & non vident; aures habent, & non audiunt; os habent, & non loquuntur; manus & pedes habent, & nec mouere, nec moueri possunt: quia non est spiritus vitæ in facie ipsorum. Vbi alij dicit Propheta ad id quod dicitur Gen. 2. de simulachro veri Dei, *Inspirauit in faciem eius spiraculum vitæ.* Cætera, quæ ad hos versiculos pertinent, vide in explicatione Psal. 113.

XVIII. *Similes illis fiant, qui faciunt ea, & omnes qui confidunt in eis.*

XIX. *Domus Israel benedicite Domino, domus Aaron benedicite Domino.*

XX. *Domus Levi benedicite Domino, qui timetis Dominum, benedicite Domino.*

Facta collatione Dei veri cum Dijs falsis, confert cultores falsorum Deorum cum veri Dei cultoribus, & illis prædicit per modum imprecationis, similitudinem Deorum suorum, videlicet illos fore mutos, cæcos & surdos, quoad vera bona intelligenda, & quærenda, & laudanda: cultores autem Dei, inuitat ad benedicendum Dominum, quoniam cultores Dei vident, audiunt, loquuntur, vt imagines vitæ Dei viuētis, & idē debent exercere linguam ad laudandum Deum, à quo habent sentire, viuere, intelligere. Inuitat autem primum in genere domum Israel, id est, populum Dei, deinde per partes, domum Aaron in primis, quia illa erat domus Sacerdotalis; tum domum Levi, vnde erant Leuitæ, qui Sacerdotibus ministrabant; deniq; omnes timentes Deum, id est, laicos omnes. Porro quamuis hæc comparatio cultorum Dei ad cultores Idolorum, propriē conueniat Idololatris Paganis respectu Christianorum: tamen conuenit etiam ijs, qui sequuntur auaritiam, quæ est Idolorum seruitus, & ijs quorum Deus venter est, & denique illis omnibus, qui fatentur se nosse Deum, factis autem negant; respectu hominum verē piorum, quorum conuersatio in cælis est. Illi enim veluti simulachra Idolorum, non vident vera bona, nec vera mala, quamuis oculos habere videantur: neque audiunt, quid loquatur in illis Deus, quamuis auribus non careant: denique non loquuntur laudes Dei, quamuis ore & lingua præditi sint, contra, veri pii, & qui cor habent in cælo, oculos interiores habent, & vident; aures cordis apertas habent, & intelligunt; os & linguam, soluta & libera habent, vt Deum benedicant in omni tempore, & semper laus eius sit in ore ipsorum. Lege Psal. 115.

*Benedictus Dominus ex Sion, qui habitat in Hierusalem.*

Concludit orans, vt ex Sion procedat benedictio Domini, qui habitat, tanquam in propria regia sua, in Hierusalem, id est, vt omnes ciues Sion & Hierusalem, non cessent benedicere Domino, qui Rex magnus est,

XXI.



est, & in ipsa Hierusalem sedem regni sui collocavit: quæ conveniunt Ecclesiæ Christianæ militanti, sed multo magis triumphanti, quæ omni labore vacua, & ab omni molestia libera unicum habet negotium, vacare & videre, quoniam Dominus ipse est Deus.

# PSALMVS CXXXV.

## Titulus, & Argumentum.

Alleluia.

**P**salms iste idem habet argumentum, quod Psalmus superior. Inuitat enim populum Dei ad laudem misericordiae Dei, & in singulis versiculis repetit, Quoniam in æternum misericordia eius; ut ostendat, omnia opera Dei, siue ad creationem, siue ad providentiam, siue ad redemptionem pertineant, ex misericordia Dei profecta esse. Deus enim, qui nulla re indiget, & rerum omnium absolutus Dominus est, nihil facit ex necessitate, nihil ex debito: sed omnia ex misericordia, quia placuit illi bonitatem suam effundere & communicare. In Hebræo non habetur, Alleluia, in principio huius Psalmi, sed solum in fine superioris. Ceterum Septuaginta Interpretes initio Psalmi posuerunt, Alleluia, vel quia inuenerunt in suis Hebraicis codicibus in principio huius Psalmi, & non in fine superioris: vel, quod credibilis est, inuenerunt in utroque loco, ut habetur in fine Psalm. 104. & in principio Psalm. 105. qui idem habet initium cum 135. videlicet, Confitemini Domino, quoniam bonus, quoniam in sæculum misericordia eius; & postea negligentia scriptorum excidit ex Hebræo codice in principio huius Psalmi, Alleluia. Ut ut se res habeat, aptissime ponitur initio huius Psalmi, titulus, Alleluia.

## EXPLICATIO PSAL. CXXXV.

I. **C**onfitemini Domino, quoniam bonus, quoniam in æternum misericordia eius.

II. Confitemini Deo deorum, quoniam in æternum misericordia eius.

*Confitemini Domino dominorum, quoniam in æternum misericordia eius.*

In primis tribus versiculis laudatur Deus Trinitas ab his, quæ in se habet: in sequentibus autem laudatur ab operibus suis. In primo versiculo habetur nomen quatuor litterarum, quod soli vero proprium est, & nunquam communicatur cum rebus creatis: significat autem hoc nomen, ipsum esse, ut Exod. 3. ipse Deus explicuit, cum ait: *Ego sum, qui sum.* Et quoniam esse & bonum conuertuntur, & omne quod est, bonum est; & quod summe est, summum bonum est: ideo hic adiungitur bonum absolutè ei, qui absolutè est. *Confitemini*, inquit, *Domino*, id est, confitemini confessionem laudis ei, qui est, quoniam absolutè bonus est: nec solum in se bonus est, sed etiam in æternum, misericordia eius est: nam ipse qui est summum bonum, nullam habet admixtum malum, nullam miseriam, & ideo solus potest mala & miseras aliorum tollere, & re ipsa semper tollit & tollet in æternum. Magna miseria est nihil esse; Deus igitur dum conseruat esse rerum quarundam in æternum, in æternum erga eas misericors est, & dum beatos facit sanctos Angelos & homines, in æternum misericordiam æternam illis exhibet, non tollendo miseriam infelicitatis, quæ sit, sed quæ esset, nisi beatitudinem æternam illis donaret. Porro hæc prima confessio tribui potest personæ Patris, quoniam Pater fons est essendi, & communicat ipsum suum esse Filio per generationem, & Spiritui sancto per spirationem, sibi Filioque communem. Secunda confessio potest tribui personæ Filij, nam dicitur Filius Deus Deorum, quoniam Dij creati dicuntur Angeli & homines, quia sunt filij Dei, iuxta illud Psalm. 81. *Ego dixi Dij estis, & filij excelsi omnes.* Filius autem Dei vnigenitus est Deus Deorum, quia filius est Dei naturalis, ceteri adoptati; ille natus est Deus de Deo, isti sunt Dij facti, ac per hoc tanto inferiores Deo Filio, quanto res creata inferior est Creatore. Et quamuis alio modo dicantur Dij respectu inferiorum:



feriorum: tamen respectu Filij vnigeniti non sunt Dij, sed creaturæ. Ergo *confitemini* confessionem laudis Deo Deorum, id est, Filio Dei vnigenito, cuius participatione dicuntur Dij, filij Dei adoptiui. *Quoniam in æternum misericordia eius*, id est, quoniam ipse cum Patre in æternum miseria tollit à rebus creatis. Tertia confessio tribui potest Spiritui sancto; dominium enim fundatur in naturali liberi arbitrij: illi sunt Domini, qui faciunt, quod volunt; illi serui, qui aliorum voluntati subijciuntur. Princeps autem libertatis Spiritus sanctus est, de quo dicitur, *Vbi spiritus Domini, ibi libertas*, 2. Cor. 3. & *Spiritus ubi vult, spirat*. Ioan. 3. & *Hæc omnia omnia operatur vnus, atque idem spiritus diuidens singulis prout vult*. Ait igitur Dauid, *Confitemini Domino Dominorum*, id est, laudate Spiritum sanctum, Amorem increatum & omnipotentem, cui omnia seruiunt, *quoniam in æternum misericordia eius*. Notat hoc loco S. Ioan. Chrysostomus in Psalmo superiore dictum esse, Deum magnum præ omnibus Dijs, sed in hoc Psalmo multum accessisse ad laudes Dei, quod appellatus sit Deus Deorum, & Dominus Dominorum, vt non solum ceteri Dij minores sint Deo nostro, sed eius sint creaturæ, atque mancipia.

*Qui facit mirabilia magna solus, quoniam in æternum misericordia eius.*

Ad hunc versiculum, vt ad ceteros omnes sequentes intelligendum est, *Confitemini Domino*. Incipit igitur laudare Deum operibus magnis & mirabilibus, quæ solus ipse facere potuit, qualia sunt opera creationis: nam in cæteris vsus est Deus opera Angelorum, vel aliarum creaturarum: In his autem operibus laudatur præcipuè misericordia, quia, vt supra diximus, nihil fecit Deus ex necessitate, quasi egeret creaturis, sed ex misericordia sua magna & ineffabili.

*Qui fecit celos in intellectu, quoniam in æternum misericordia eius.*

Primum opus Dei fuit cælum, vt notum est ex cap. 1. Gen. *Fecit autem Deus cælum,*

siue cælus in intellectu, id est, in sapientia sua, siue per sapientiam suam. Fecit autem, *quoniam in æternum misericordia eius*, id est, quia placuit ei, cælus ex nihilo educere, & simul parare æternam domum Angelis & hominibus. Fecit igitur cælus per sapientiam & bonitatem suam, intelligendo & volendo, quæ sunt quasi duæ manus eius. Itaque non laborauit, non fatigatus est, non eguit mora temporis, non instrumentis varijs, non materia circa quam operaretur, non adiutoribus ministris.

*Qui firmavit terram super aquas, quoniam in æternum misericordia eius.*

Alterum opus principale fuit terra. Fecit enim in principio Deus cælum & terram. Cælum enim factum est, vt esset palatium immortalium ciuium, terra vt esset mansio mortalium. Aër & aqua sunt elementa intermedia, quæ in vsum hominum deseruiunt. Porro dicitur terra stabilita super aquas, non quod aqua sit infra terram in imo loco mundi; sed quod superficies terræ magna ex parte sit altior superficie aquæ, vt possint in superficie terræ homines & cætera animalia viuere. Quod enim terra sit in imo loco mundi, scribit idem Dauid in Psalm. 103. *Qui fundasti terram super stabilitatem suam, non inclinabitur in sæculum sæculi*. Itaque terra intra ciuitates suas ita continet aquas, vt ex vna parte aquæ super terram quiescant, & tamen ex altera parte terra superemineat aquis. In Hebræo pro, *firmavit*, est, *extendit*, vt sensus sit, terram, quæ initio erat cooperta vndique aquis, & erat minus extensa, quàm aqua; Deus congregando aquas in cauitates terræ, extendit super aquas, id est, fecit, vt latius pateret, quàm aqua. Vterque sensus est verus, & iuxta vtrumque sensum in hoc facto triplex cernitur misericordia Dei, vna respectu terræ, quam eduxit ex nihilo; altera respectu aquæ, cui sedem stabilem præparauit; tertia respectu hominum, quibus dedit terram aquis discoopertam, & tamen aquis irrigatam, vt possent in ea degere, eam colere, & frugiferam reddere.

F f f f f

Qui

VI.



VII. *Qui fecit luminaria magna, quoniam in eternum misericordia eius.*

VIII. *Solem in potestatem diei, quoniam in eternum misericordia eius.*

IX. *Lunam, & stellas in potestatem, nobis, quoniam &c.*

Tertium opus magnum & mirabile, fuit fabricatio Solis, & Lunæ, & Stellarum, quæ ad cælum & terram pertinent: siquidem cælum mirifice exornant, & terræ mirifice profunt. Dicuntur autem omnia luminaria magna, quia revera maiora sunt, quàm ut à nobis eorum magnitudo mente comprehendi possit, cum stellæ firmamenti, quæ nobis ob longinquitatem perexiguæ videntur, totum orbem terræ molis magnitudine superent: dicitur autem Sol factus in potestatem diei, & Luna cum stellis cæteris in potestatem noctis, quia lucendo & illuminando terram, præfunt operibus nostris tum diurnis, tum nocturnis, ut dicitur, cap. 1. Geneseos. Et quidem in libr. Geneseos duo sola dicuntur luminaria magna, Sol & Luna, quia ista duo maius lumen in terras effundunt, quàm omnes aliæ stellæ simul: tamen hoc loco videtur David, non Solem tantum & Lunam, sed omnes stellas appellare luminaria magna, quia in se talia sunt, & si Astronomis credimus, longe maiores sunt stellæ firmamenti, quàm Luna sit.

X. *Qui percussit Ægyptum cum Primogenitis eorum, quoniam in eternum misericordia eius.*

XI. *Qui eduxit Israel de medio eorum, quoniam &c.*

XII. *In manu potenti, & brachio excelso, quoniam &c.*

XIII. *Qui diuisit mare rubrum in diuisiones, quoniam &c.*

XIV. *Qui eduxit Israel per medium eius quoniam &c.*

XV. *Et excussit Pharaonem, & virtutem eius in mari rubro, quoniam in eternum &c.*

*Qui traduxit populum suum per desertum, quoniam &c.*

*Qui percussit Reges magnos, quoniam &c.*

*Et occidit Reges fortes, quoniam &c.*

*Sehon Regem Amorrhæorum, quoniam &c.*

*Et Og Regem Basan, quoniam &c.*

*Et dedit terram eorum hereditatem, quoniam &c.*

*Hereditatem Israel seruo suo, quoniam &c.*

In his versiculis laudatur Deus ab opere providentiæ, & sunt omnia perspicua tum ex libro Exodi, tum ex Psalmo superiore. Illud quæri posset, cur dicantur opera misericordiæ, percussio Ægypti, occisio primogenitorum, interfectio Regum, & cætera, quæ videntur ad iustitiam potius, quàm ad misericordiam pertinere. Respondetur, opera illa fuisse, respectu impiorum percussorum & occisorum, opera iustitiæ; sed respectu populi Dei fuisse opera misericordiæ; & quia liberatio populi erat præcipue à Deo intenta, ideo illa omnia tribuuntur simpliciter misericordiæ. Quanquam etiam impijs misericordiam facit Deus, cum eos citò de hoc mundo tollit, ne diutius viuendo grauius peccent, & grauiorem iram sibi ipsi thesaurizent in die iræ & iusti iudicii Dei. Circa verba horum versiculorum pauca notanda sunt. Vers. 12. *In manu potenti, & brachio excelso*; metaphora est significans Deum grauius punisse Ægyptum plagis multis, ut cogeretur dimittere liberum. Dei populum, quomodo si vir bellator robusta manu, & brachio fortissimo vteretur ad eiusmodi opera. Vers. 13. illud, *in diuisiones*, fabulantur Hebræi significare duodecim diuisiones maris rubri factas fuisse, ut vnaquæque tribus per suam diuisionem transiret. Sed fabula sine fundamento est: nam Exodi 14. dicitur Deum immisisse ventum validum, qui tota nocte flaret, & siccaret partem quandam



quandam maris, ita, vt à dextera, & à sinistra essent aquæ stantes instar murorum, & in medio esset terra arida, per quam transiuit populus Dei. Itaque, in diuisiones, significat diuisionem maris, in duas partes. Vers. 15. illud, & virtutem eius, significat, & exercitum eius: id enim sonat vox Hebraica, & aperte dicitur, Exod. 15. *Currus Pharaonis, & exercitum eius protexit in mare.*

*Quia in humilitate nostra memor fuit nostri, quoniam in æternum misericordia eius.*

*Et redemit nos ab inimicis nostris, quoniam in æternum misericordia eius.*

Hæc referri possunt ad liberationem Iudæorum à seruitute Pharaonis, Philistinorum, & Nabuchodonosoris; item ad liberationem Ecclesiæ, à persecutionibus Tyrannorum & hæreticorum; denique maxime proprie à liberatione Electorum à captiuitate Diaboli & omnibus periculis huius sæculi. Illud, quia, non refertur ad versiculos immediate præcedentes; sed ad illa verba, quæ in singulis versibus subintelliguntur, nimirum, *Confitemini Domino*, vt sensus sit, *Laudate Deum, quia in humilitate nostra, id est, in afflictione & tribulatione & humiliatione nostra, memor fuit nostri, &c.*

*Qui dat escam omni carni, quoniam in æternum misericordia eius.*

Hunc versiculum adiunxit Propheta pro ijs, qui non patiuntur persecutiones; ne putarent, sibi non esse necesse confiteri Domino. Dicit igitur, *Confitemini Domino omnes omnino, quia ipse est, qui nutrit & conseruat omnem creaturam viuentem, ac præcipue omnes homines. Id quod facit, quoniam in æternum misericordia eius.* In Hebræo est, *Qui dat panem omni carni*: sed panis accipitur pro omni cibo apud hebræos.

*Confitemini Deo cæli, quoniam in æternum misericordia eius.*

*Confitemini Domino Dominorum, quoniam in æternum misericordia eius.*

Concludit repetendo duos vltimos ver-

siculos ex primo ternario: nam per Deum cæli intelligit, Deum Deorum, vt notat S. August. Dicitur enim Deus cæli, tum quia ipse solus verus Deus cælum fecit, iuxta illud Psal. 95. *Dij gentium damonia, Dominus autem cælos fecit*: tum quia residens in summo cælo tanquam in proprio throno, hoc ipso demonstrat, se Deum Deorum esse. Vltimus versiculus non habetur in Hebræo, nec in Græco, nec apud Hilarium & Chrysostomum, sed habetur apud Augustinum & Hieronymum in commentario: & apud Chrysostomum habetur repetitio primi versiculi loco tertij. Ad extremum huius explicationis reddenda est causa, cur à S. Augustino dissentire coactus sim in expositione verborum illorum, *Quoniam in æternum misericordia eius.* Existimat S. Augustinus, hæc verba non esse referenda ad singula opera Dei, quæ narrantur in toto Psalmo, sed solum ad prima illa verba, *Confitemini Domino*: & vult hunc esse sensum totius Psalmi, *Confitemini Domino, qui est bonus, qui est Deus Deorum, qui est Dominus Dominorum, qui fecit mirabilia, qui fecit cælos in intellectu, qui firmavit terram super aquas, &c. quoniam in æternum misericordia eius est in peccatores, quos redemit à seruitute peccati, &c. Ratio eius est, quoniam opera quæ narrantur, vt effectio mirabilium, formatio cæli & terræ, & similia, non sunt opera misericordiæ, sed bonitatis & benignitatis Dei. At nos sequuti sumus Hilarium & Chrysostomum, qui verba illa, *Quoniam in æternum misericordia eius*, accommodant ad singula opera, quæ in singulis versiculis narrantur: alioqui enim frustra repeterentur in singulis versiculis, si ad opera illa non pertineret. Accedit, quod vox, *misericordia*, in diuinis literis, & Hebraice, *chesed*, non restringitur ad misericordiam, quæ tollit miseriam proprie dictam, sed extenditur ad bonitatem & benignitatem. Adde vltimo, quod non est difficile in singulis operibus Dei inuenire veram misericordiam, vt nos ostendimus. & comprobatur ex verbis illis, *Vniuersa via Domini misericordia & veritas.**



## PSALMVS CXXXVI.

Titulus, &amp; Argumentum.

Psalmus David Hieremias.

**H**ic titulus non habetur in Hebræo, & à Theodoretō confectus dicitur ab aliquo audaculo. Sed extat in libris Græcis, & Latinis, neque ratio Theodoretī conuincit, titulum esse confectum, quia Hieremias non fuerit unquam in Babylone. Titulus enim non significat, Hieremiam in Babylone fuisse, sed Psalmum compositum fuisse à Davide prouidente & pradicente captiuitatem Babylonicam, quam postea Iudæis imminentem Hieremias pradicauit, & presentem deplorauit, & finem eius post Septuaginta annos futurum denuntiavit. Fieri quidem potest, ut hunc titulum David non addiderit presenti Psalmo, sed postea additus fuerit, vel à Septuaginta Interpretibus, vel ab aliquo alio; tamen non idē reiiciendus est, quasi falsam historiam contineret. Argumentum Psalmi continet lamentationem captiuorum, & desiderium patriæ, ac pradictionem seuerissimā ad aduersionis in Babylonicos & Iudæos: quæ à Davide scripta sunt, non tam ut simplicem historiam futuram narraret, quam ut admoneret Hebræos, ut quando in Babylonem ducerentur captiui, non afficerentur rebus Babylonis, sed assidue ad patriam suspirarent. Et quoniam Propheta spiritualis erat, & nouerat, Babylonicam captiuitatem figuram esse captiuitatis humani generis, & terrenam Hierusalem figuram esse cœlestis patriæ; simul admonet omnes electos, quomodo se gereere debeant in exilio & captiuitate. Et sine dubio ad hunc præcipue finem Ecclesia cantica ista spiritualia frequentat, ut ex his intelligere possint homines, an sint ciues Babylonis, an Hierusalem, id est, an sint cum electis in cœlesti patriâ regnaturi, an cum reprobis & hoc Mundo damnandi.

**S**uper flumina Babylonis illic sedimus, & fleuimus, cum recordaremur Sion.

Verba sunt captiuorum, qui ab Hierusalem in Babylonem abducti fuerant: qui quidem, ut Chrysostomus docet, non in ipsa ciuitate primaria habitabant; sed in agris ad varia opera vilia deputati degebant, & ad ripas fluminum, quibus ea prouincia abundat, aliquando fessi sedebant, & ex recordatione & desiderio patriæ flebant. Dicuntur autem flumina Babylonis, nō quod omnia per ipsam ciuitatem labantur (solus enim Euphrates per Babylonem fluit) sed quod ad ditionem Babylonis pertinerent; nisi placeat per Babylonem, totam prouinciam hoc loco significari: quomodo Samaria ciuitas est, quæ toti etiam regioni nomen dedit. Sed spiritualiter verba sunt electorum Dei, cui corpore captiui tenentur in mundo, quamuis corde à mundo separati, ciues se nouerint cœlestis Hierusalem: isti enim sancti peregrini super flumina consistunt, non in fluminibus demersi voluntur, & præcipitantur ad mare. Flumina Babylonis sunt bona temporalia huius mundi, quibus qui affixi sunt per desiderium, ut auari, ambitiosi, voluptarij, magno sonitu contentionum & litium alliduntur ad saxa, & cum ipsis aquis voluntur in præceps, donec ad abyssum magni maris æternum puniendi præcipitentur. Hæc igitur est prima conditio ciuium supernæ patriæ, & primum signum, unde quisque intelligat, ad quem populum pertineant: qui enim supereminet rebus temporalibus, & corde in cœlum defixo, non abripiuntur desiderio rerum terrenarum; hi sunt, qui non ad Babyloniam, sed ad Hierusalem pertinent. Deinde iidem ciues Sanctorum, sedent ad ripas fluminum, id est, in humili loco se ponunt, non erigunt se ad excelsa, non ambiunt dignitates, non superbe sapiunt: & si forte contingat eos eleuari ad regimen Babylonis, ut verè contigit Danieli, & non paucis sanctis Christianis Regibus; isti in

alto



alio positi non alta sapiunt, neq; existimant exaltationem suam, esse honorem; sed onus, sub quo gemant, non in quo gloriantur; ac semper quod ad se attinet, discumbunt in nouissimo loco, si vere spiritum illius habent, qui mitis fuit, & humilis corde. Tertio, non solum in humili sedent, sed gemunt ac plorant, non iacturam temporalium rerum, sed captiuitatem suam, dum recordantur dulcissimæ patriæ, quæ est in sancto monte Sion: qui enim obliuiscuntur patriæ, exultant cum filiis Babylonis; qui autem desiderant, & ex desiderio recordantur patriam; etiam tunc cum abundant rebus temporalibus, non in eis lætantur, sed gemunt ex desiderio patriæ: neq; vllum manifestius signum habere possumus, vnde cognoscamus, vtrum ciues Babylonis, an Hierusalem simus, quam si attente consideremus; quid nos delectet, quidve nobis cordi sit. Vbi enim thesaurus noster est, ibi & cor nostrum erit, Luc. 12.

II.

*In salicibus in medio eius suspendimus organa nostra.*

Captiui Hebræi organa lætitiæ, citharas videlicet, vt est in Hebræo, suspendebant in salicibus in medio Babylonis, id est, palam & publice Babylonis videntibus abiiciebant à se instrumenta lætitiæ, vt ostenderent, sibi fletum magis cordi esse, quam cantum. Quod ipsum imitantur viri Dei, qui intelligentes captiuitatem & exilium suum, dicunt cum eodem Propheta: *Renuit consolari anima mea; memor fui Dei, & delectatus sum:* quamuis enim non delectet ciues Hierusalem cantare & lætari cum Babylonis, & de bonis Babylonis; tamen cantant in cordibus suis Domino, & gaudent in spe future beatitudinis. Illud, *In salicibus in medio eius*, id est, Babylonis, significat in salicibus, quæ sunt ad ripas fluminum, quæ per mediam regionem Babylonicam fluunt. Suspendere autem citharas in salicibus fluminum Babylonis, nihil est aliud, nisi relinquere instrumenta lætitiæ hominibus huius sæculi, qui tanquam arbores infructuose irrigantur assidue aquis Babylonis, & fructum nullum ferunt:

ipsi pulsent citharas, ipsi cantent in hoc seculo, quibus manet in alio luctus sempiternus.

*Qui illic interrogauerunt nos, qui captiuos duxerunt nos, verba cantionum.*

*Et qui abduxerunt nos: hymnum cantate nobis de canticis Sion.*

Non solum ob mœstitiam suspenderunt citharas suas in ramis arborum captiui Iudæi, sed etiam ne obsequerentur Babylonis audire & irridere cupientibus sacros hymnos, quos in celebratibus Domini cantare soliti erant. Vbi notat S. Ioannes Chrysostomus, ex tribulatione illa Iudæos factos esse meliores, id est, magis religiosos, & magis timentes Deum: antea siquidem ridebant Prophetas, imo & occidebant; nunc autem captiui in terra aliena, non audent hymnos sacros Gentilium irrisioibus exponere. Aiunt igitur: *Quoniam illic interrogauerunt nos, qui captiuos duxerunt nos, verba cantionum*, id est, suspendimus organa nostra, & noluimus illis vt, ne sacra cantica irrisioni Gentilium exponeremus: quia ij, qui nos captiuos duxerunt, illic in sua regione interrogauerunt nos verba cantionum, id est, de verbis cantionum, & dixerunt, *qui abduxerunt nos, hymnum cantate nobis de canticis Sion.* Per *verba cantionum*, intelliguntur cantica, id est, verba ad cantum accommodata; quasi dicant: Interrogauerunt nos de canticis nostris, cur videlicet non caneremus, vt in patria nostra faciebamus. Posset etiam illud, *interrogauerunt*, verti, rogauerunt, vt sensus sit, Rogauerunt nos verba cantionum, id est, petierunt, vt caneremus. Illud autem, *Et qui abduxerunt nos*, quod in Hebræo est, *thalalenu*, aliqui vertunt, *spoliauerunt nos*, volentes, positum esse more Chaldaico pro *W*, alij, *afflixerunt nos*, quasi eiulare fecerunt, à verbo, *ialal*: sed non video, cur non possit verti, *Extulerunt nos*, quod est idem, cum, *assortauerunt nos*, vel *abduxerunt nos*, vt Septuaginta venterunt: nam, *thalal*, est eleuare, extollere, suspendere. Extollere autem, non solum significat, tollere in altum, sed

III.

IV.

תוללנו

ללל

ללל

Fffff 3



sed etiam tollere ex vno loco, & asportare in alium, & hoc modo acceperunt hanc vocem LXX. Interpretes. Illud, *hymnum cantate*, in Hebræo est, *lætitiā cantate*: sed sensus est idem: nam hymnus est carmen lætum, proinde lætitiā hoc loco accipienda est, pro cantico lætitiæ. Denique parum refert, quod pro illo, *de canticis Sion*, sit in singulari *de canticis Sion*; accipitur enim numerus singularis pro numero multitudinis.

V. *Quomodo cantabimus canticum Domini in terra aliena?*

Hec est responsio captiuorum ad petitionem illam, *Cantate nobis de canticis Sion*. Aliqui existimant, legendum esse, *in terra alieni*, id est, in terra Dei alieni: atque ideo noluisse Iudæos cantare, ne honorem Dei veri tribuerent falsis Dijs. Sed quamvis secundum regulas grammaticæ illa vox, *in terra*, regat post se genitiuum: tamen LXX. Interpretes, & ipse etiam Sanctus Hieronymus verterunt, *in terra aliena*; quia vel sciebant regulas grammaticæ non esse infallibiles, vel acceperunt illud, *in terra alieni*, pro, *in terra alieni populi*, quod est idem cum, *in terra aliena*. Sensus igitur est, respondisse Iudæos ob moerorem captiuitatis, non se potuisse cantare cantica læta, ut in patria sua solebant. Quamvis enim, ut supra diximus, ideo cantare nolebant, ne sacri hymni ab infidelibus riderentur: tamen non hoc responderunt, ne Dominos suos offenderent; sed quod iustæ causæ speciem habere poterat. Spiritualiter, viri iusti, ciues supernæ Hierusalem, scientes lætitiā propriam esse patriæ, gemitum exilij, & captiuitatis dicunt, *Quomodo possumus lætis canticis operam dare*, inter tot pericula & tentationes? risum reputari errorem, & gaudio dixi, cur frustra deciperis? Sed illi quoque cantant canticum Domini in terra aliena, qui sacros hymnos, & psalmos ita decantant, ut carnalem aurium voluptatem solum, aut præcipue quærunt: quique audientium carnales aures delectare varijs vocum inflexionibus satagunt. cantica enim sacra instituta sunt ad mentem eri-

gendam in Deum, & spiritum potius, quam corpus recreandum. Contra autem nonnulli sunt, qui canticum Babyloniz in domum Dei, & sanctam Sion inducunt, illi videlicet, qui verba sacra modulis prophanis ita vestiunt, ut qui audiunt, non tam verba considerent, quam prophanam modulationem attendant.

*Si oblitus fuero tui Hierusalem, obliuioni detur dextera mea.*

*Adhareat lingua mea faucibus meis, si non meminero tui.*

*Si non proposuero Hierusalem in principio lætitiæ meæ.*

Qui dixerant, *Quomodo cantabimus canticum Domini in terra aliena*, nunc vna voce, quasi vnus homo, totus populus introducit iurans, & firmiter statuens, se nunquam obliuioni mandaturum patriam: & quia signum obliuionis fuisset, pulsare citharam, & canere canticum Domini in terra aliena, ideo imprecatur sibi per iuramentum execratorium, ut manus qua pulsari solet cithara, exarescat, & lingua, quæ cantui defertur, adhareat immobilis faucibus, si vnquam obliuiscetur patriam, & in signum obliuionis pulsare citharam, vel canere canticum Domini in terra aliena decreuerit. *Si oblitus*, inquit, *fuero tui Hierusalem*, quod fiet, si pulsare incipiam citharam in terra aliena. *Obluioni detur, dextera mea*, id est, pereat dextera mea, arescat, non sit vlli vsui: quorum enim obliuiscimur ea non amplius curamus, neque conseruamus. S. Hilarius, & S. Augustinus legunt actiue, *Obluiscatur me dextera mea*; & sic putant recentiores vertendam esse vocem Hebraicam, *tsench*: sed vox Hebraica rectissime accipitur etiam passiue, vnde S. Hieronym. ex Hebræo vertit, *In obliuione sit dextera mea*: & sanctus Hilarius testatur vocem Græcam passiuè accipiendam, & dum reprehendit lectionem sui codicis, laudat lectionem nostram, quæ responderet Græcæ, & Hebraicæ voci. *Adhareat lingua mea faucibus meis*, ut moueri nequeat, *si non meminero tui Hierusalem*, id est,



est, si cantando in terra aliena demonstrabo, me tui non amplius meminisse. Imo etiam obliuioni detur dextera mea, & adhæreat lingua mea faucibus meis, si non solum obliuiscar, & non meminero tui Hierusalem; sed etiam nisi proposuero te in principio lætitiæ meæ, id est, nisi initium, & summa lætitiæ meæ fuerit ciuitas sancta Hierusalem. In Hebræo pro verbo, proposuero, est, *ahale*, quod significat, ascendere faciam, siue extollam: pro nomine, in principio, est, *abose*, ad caput, quod & initium, & summam significat. Itaque sensus est, Nisi extulero Hierusalem super omnes iucunditates meas, ut ipsa mihi prima; & summa lætitiæ sit. Hæc vero propria qualitas est, ciuium patriæ celestis, & certa nota electorum Dei, si neq; in prosperis, neq; in aduersis obliuiscantur patriæ supernæ; & si optent catere manu, & lingua, si gloriæ Dei, atq; æternæ salutis de seruire non debeant; & si nulla in re serio lætari nouerint, nisi in desiderio, & spe celestis illius domus non manufactæ, ubi est gaudium Domini, de quo dicitur in Euangelio, *Intra in gaudium Domini tui*, Matt. 25.

Memor esto Domine filiorum, Edom, in die Hierusalem.

Qui dicunt, Exinanite, exinanite vsq; ad fundamentum in ea.

Filia Babylonis misera, beatus qui retribuet tibi retributionem tuam, quam retribuisti nobis.

Beatus qui tenebit, & allidet paruulos tuos ad petram.

Prædicat Dauid in fine Psalmi perditionem Idumæorum, & Babyloniorum, qui persecuti sunt filios Israël; Babylonij enim sub Rege Nabuchodonosor euerterunt Hierusalem, & transtulerunt Hebræos captiuos in Babyloniam, ut notum est ex lib. 4.

Regum, & lib. 2. Palipom. in fine. Idumæi autem, qui descendeant ab Esau fratre Iacob, qui & Edom dictus est, hortati suat Babylonios, ut euerterent Hierosolymam, & populum captiuum abducerent. Id aperte narrat Abdias Propheta, & multo ante id futurum prædixit Dauid hoc loco. Incipit igitur Dauid ab Idumæis, vel quia ipsi incitauerunt Babylonios aduersus Israelitas, vel, ut à minoribus ad maiora procedat: multo enim minus nocuerunt Hebræis Idumæi, quam Babylonij. *Memor*, inquit, *esto Domine filiorum Edom*, in die Hierusalem, id est, memor esto filiorum Edom, quid uidelicet, egerint in die Hierusalem, id est, quando Hierusalem affligebatur, & euertebatur à Babylonijs. Quid autem egerint, explicat in sequenti versiculo. *Qui dicunt*, id est, qui dicebant Babylonijs, *Exinanite*, euacuate, effodite vsque ad fundamentum, in ea, id est, euertere eam à fundamentis. Illud, *memor esto*, intelligitur ad puniendum. Deus enim dicitur non recordari, quando non punit, & recordari, quando punit, Ezech. 18. *Iniquitatum eius non recordabor amplius*. & Tob. 3. *Nō reminiscaris delicta mea, vel parentum meorum*. Transit deinde ad Babyloniam, & per modum imprecationis prædicat eius ruinam. *Filia*, inquit, *Babylonis misera*, id est, ciuitas Babylon, quam ego miseram esse prævideo, licet nunc tibi felicissima videaris: *Beatus, qui retribuet, tibi retributionem, quam retribuisti nobis*, id est, Rex Medorum, & Persarum beatus erit, quia prosperabitur aduersus te, & retribuet tibi mala, quæ tribuisti nobis. Quod factum esse testatur Daniel c. 5. & Isaias cap. 13. prædixit, quod hoc loco Dauid etiam prædicat, tanta crudelitate seuituros Medos, & Persas in Babylonios, ut etiam infantes eorum ad parietes allisuri sint, & sine ulla miseratione interfecturi. Illud, *paruulos tuos*, in Hebræo, & Græco, & in multis Latinis libris manuscriptis legitur, *paruulos tuos*; neq; est incredibile, in nostrâ editionem impressorū vitio irrephisse, *suos*. pro, *tuos*, proinde rectè correctus est hic locus Apostolica auctoritate.

Sensus



Sensus autem est idem, si illud, *suos*, accipiat non ut reciprocum, secundum proprietatem linguæ Latinæ, iuxta phrasim Græcam & Hebraicam accipiat pro, *eius*, ut significetur paruuli Babylonie. Spiritualiter hæc omnia dupliciter intelligi possunt. Primo allegorice, ut per Idumæos intelligantur Iudæi, per Babylonios Pagani: vere enim Pagani sunt, qui præcipue conabantur Ecclesiam Christianam à fundamentis diruere, sed Iudæis exhortantibus, incitantibus & gaudentibus. Nam ipsum etiam Christum Iudæis accusantibus, Pagani crucifixerunt. Iacobum occidit, & Petrum vinculis alligauit Herodes, quia videbat id placere Iudæis. Apostolum Paulum Iudæi apud Romanos reum mortis facere conati sunt. Alias etiam Iudæi concitauerunt animos Gentilium aduersus Christianos, teste S. Luca Act. 14. sed memor fuit Deus, ut utrosque puniret. Nam Iudæorum urbem primariam euertit, regnum destruxit, & ipsos per totum orbem terrarum dispersit. Paganorum quoque, qui toto fere orbe imperabant, potentiam & Regna ita sustulit, ut iam paucissimi restent Pagani Reges. Et quoniam Idololatria & potentia Paganorum non armis & violentia, sed prædicatione verbi Dei superata est; ideo dicit Propheta: *Beatus qui retribuet tibi*, &c. nam Pagani infelicitate persequantur Christianos, sed felicem persecutionem à Christianis passi sunt. Utillissimum enim illis fuit, ut Idololatria extincta ipsi morerentur peccato, & iustitiæ viuere inciperent: quod præcipue paruulis eorum contigit, id est, iis, qui minus radicati erant in erroribus & vitiis Paganorum. Scimus enim maximam multitudinem puerorum & puellarum, aliorumque simplicium hominum facillime conuersam ad Christum, & ad martyrium usque decertasse pro Christi gloria aduersus paternam Idololatriam: quod significatur illis verbis: *Beatus qui tenet, & allidet paruulos tuos*, siue paruulos eius, ad petram, id est, qui admovebit paruulos Babylonie ad petram Christum, ut feliciter allisi moriantur homini veteri, & resurgant in hominem nouum.

Secundo possunt hæc intelligi moraliter, & per Idumæos intelligantur carnales homines, ut Augustinus exponit, per Babylonios, intelligantur Dæmones; quod est magis conforme principio Psalmi: Babylonica enim captiuitas figura fuit, ut initio diximus, captiuitatis generis humani, quæ captiuitas adhuc ex parte durat, dum caro concupiscit aduersus spiritum, & electi clamant: *Quis me liberabit de corpore mortis huius?* Rom. 7. & Apostolus dicit: *Nos ipsi intra nos gemimus, adoptionem filiorum Dei expectantes redemptionem corporis nostri*, Roman. 8. & denique hospites & peregrini habitamus in terra aliena, & in Mundo damnabili sumus, licet de mundo non simus. Retribuet ergo Deus Babylonie retributionem, quam retribuet nobis, quoniam sicut Rex Babylonie Diabolus captiuos nos fecit, & alligauit vinculo culpæ, quo vinculo alligati nascuntur omnes filij Adam: sic in die Iudicii captiuum faciet Christus Rex Hierusalem, Diabolum, & alligabit vinculis æternæ poenæ, ut nulli amplius nocere possit, de quo dicit B. Iudas, *Angelos qui non seruauerunt suum principatum, sed dereliquerunt suum domicilium, in Iudicium magni diei vinculis æternis sub caligine reseruauit*. Neque solum Diabolum ligabit Christus vinculis æternis, sed etiam omnia membra eius, siue omnes ministros eius, mundanos videlicet homines, qui pios persequantur, & captiuos tenebant, alligabunt Angeli in fasciculos ad comburendum, ut dicitur Matth. 13. Sicut autem Rex Babylonie seducit præcipue, & captiuos facit paruulos Christi, id est, eos, qui non creuerunt, nec profecerunt in Christo; quibus semper lacte opus est: sic è contrario beatus est, qui paruulos Babylonie, id est, qui minus creuerunt in vitiis mundi, feliciter allidit ad petram, occidens peccato, ut iustitiæ viuant. Non est omitenda spiritualis expositio sanctorum Patrum, Hilarij, Hieronymi & Augustini, qui per paruulos Babylonie, intelligunt initia tentationum, quæ facile superari possunt, si continuo exortæ, allidantur ad petram, quæ



quæ Christus est. Vere enim beatus dici potest, qui semper vigilat, & incentiua tentationum crescere non sinit.

*In conspectu Angelorum psallam tibi, adorabo ad templum sanctum tuum, & confitebor nomini tuo.*

II.

## PSALM. CXXXVII.

Titulus & Argumentum Psalmi.  
David.

**I**N Græcis libris, quos nunc habemus, inuenitur titulus, Aggæi & Zachariæ; sed videtur additus à recentioribus: nam non solum in Hebræo nihil est, nisi, David: sed neque ullus veterum legit, Aggæi & Zachariæ, nec Hilarius, nec Hieronymus, nec Chrysostomus, nec Augustinus, nec Theodoretus, nec Euthymius. Itaque merito contemni potest. Argumentum est gratiarum actio, quod exaudierit Deus humilem orationem suam: pro qua re autem orauerit, & quid acceperit, alij aliter sentiunt: sed nobis videtur petiisse aduentum Messia, & gratias agere, quod exauditus prouiderit, & predicere potuerit Christi gloriam & conversionem gentium.

## EXPLICATIO PSAL. CXXXVII.

**C**onfitebor tibi Domine in toto corde meo: quoniam audisti verba oris mei.

Initio Psalmi pollicetur Propheta sacrificium laudis ex toto corde, quia pro beneficio omnium maximo gratias acturus erat, pro salute sua, & totius populi sempiterna. *Confitebor tibi Domine* confessionem laudis & gratiarum actionis, non verbis tantum, sed ex intimo corde, summa attentione & ardore mentis, eo quod exaudieris verba oris mei, orationem videlicet meam. In Hebræo non habentur hæc verba, *quoniam audisti verba oris mei*. Sed credibile est excidisse, & esse debere: habentur enim apud antiquos Patres, Hilarium, Hieronymum & Augustinum in commentariis huius Psalmi. Apud Græcos autem habentur quidem, sed post verba, *In conspectu Angelorum psallam tibi*, sensus semper est idem.

Declarat confessionem suam fore talem, qualem requirit excellentia auditorum. *In conspectu Angelorum psallam tibi*, id est, scio me psallentem tibi, ab Angelis, qui tibi assistunt, videri & attendi, & ideo ita considerate me geram in psallendo, vt qui intelligam in quo theatro consistam. Et certe si nos quoque cum Psalmos recitamus, intelligeremus, vel cogitarem ab Angelis sanctis videri & audiri, & nostram attentionem & deuotionem laudari, vel contra, euagationes & negligentiam reprehendi, profecto longe aliter caneremus, quam nunc facimus. S. Ioan. Chrysostomus addit, illud, *in conspectu*, significare, è regione, vt re vera significat vox Hebraica, *neged*, & vult sensum esse, *psallam è regione Angelorum*, quasi vnum chorum faciant Angeli, alterum homines; vt non solum nobis canendum sit audientibus & videntibus Angelis, sed etiam illis ex altera parte concinentibus & respondentibus. Quare multum omnino prodesset ad attentionem & diligentiam, si recitaturi diuinum officium, intra nos cogitando diceremus, *In conspectu*, vel è regione *Angelorum psallam tibi*: id enim efficere, vt vere in toto corde confiteremur Domino. *Adorabo ad templum sanctum tuum*, id est, in templo manufacto, quod est orationis domus, psalmos decantans, *adorabo*, hoc est, incuruabor & prosternar *ad templum sanctum tuum*, quod est non manufactum, sed æternum in celo: & in eo templo animo & contemplatione positus, *confitebor laudes nomini tuo*. In Hebræo pro, *Angelorum*, habetur, *Deorum*: sed LXX. Interpretes intellexerunt per, Deos, hoc loco significari Angelos, vt etiam in Ps. 8. *Minuisti eum paulo minus ab Angelis*: & videmus ab Apostolo hanc interpretationem approbati ad Heb. 2. proinde verissima interpretatio censenda est. Illud autem, *adorabo ad templum*, potest accipi de templo siue tabernaculo, in quo erat arca Dei, & po-

Ggggg

test



test sensus esse, *Adorabo ad templum*, id est, in templo; vel etiam, *Adorabo ad templum*, id est, versus templum, quod faciebant Hebræi, quando aberant à Hierosolyma; tunc enim adorabant, & orabant conuersi ad eam partem Mundi, ubi erat tabernaculum Domini, ut intelligi potest ex c. 6. Danielis. Sed quoniam David dixerat, se in toto corde laudaturum, & in conspectu Angelorum Psalmos cantaturum, credibile mihi est, eum de templo cœlesti esse loquutum, ubi sunt Angeli, & ubi præsidet ille, qui intuetur corda.

III.

*Super misericordia tua & veritate tua, quoniam magnificasti super omne nomen sanctum tuum.*

Antequam exponatur hic versiculus, constituenda est litera ex concordia codicum. In Hebræo habetur sic: *Super misericordia tua & veritate tua, quoniam magnificasti super omne nomen tuum, verbum tuum.* In Græco illud, *sanctum tuum*, est generis neutri, τὸ ἅγιον σου, nec desunt, qui existiment, Græcum textum esse corruptum, & legendum esse λόγιον, pro ἅγιον, id est, *eloquium*, siue *verbum*, pro *sanctum*. Sed cum antiqui Patres, Hilarius, Augustinus, Chrysostomus, Theodoretus, & alij in commentario; & ipse S. Hieronymus in epistola ad Suniam & Fretellam, ex Græco legant, *sanctum tuum*; non facile adducor, ut credam textum Græcum esse corruptum. Existimo igitur sic textum Hebraicum cum Græco & Latino esse concordandum, ut per *sanctum tuum*, intelligamus Filium Dei Dominum nostrum Iesum Christum, ut S. Hieronymus admonet loco citato epistola ad Suniam & Fretellam. Ipse enim est Verbum Dei, ut dicitur in Hebraico codice, & est Sanctus Dei, ut dicitur in Græco & Latino: neque refert, quod in Græco, *sanctum* sit generis neutri; nam Angelus quoque Gabriel Luc. 1. dicit: *Quod nascetur ex te sanctum, vocabitur Filius Dei.* Dicitur autem Filius Dei, *sanctum* absolute, quia res est sanctissima, neque est in cœlo vel in terra aliquid eo sanctius. His ita constitutis, sensus versiculi erit, *Confitebor nomini tuo super mi-*

*sericordia tua & veritate tua*, id est, hæc erit materia canticorum meorum. In toto corde laudabo te, & super magna illa misericordia tua & fidelitate tua, quæ sicut promissisti Patribus, misertus generis humani, magnificasti Christum tuum, qui est Verbum tuum, & sanctum tuum, super omne nomen, quia dedisti illi nomen, quod est super omne nomen. Nam hoc facto misertus es generis humani misericordia prorsus ineffabili, & ab omnibus in æternum prædicanda, cum genus humanum depressum per peccatum vsque ad inferos, exaltaueris in Christo super omnes cœlos, & super omnes res creatas; & sic impleuisti cumulatissime veritatem tuam, quæ promissis tuis stare solitus es. Quia vero in Hebræo non est absolute, *Super omne nomen*; sed, *Super omne nomen tuum*, dupliciter potest accipi nomen Dei. Primo, pro potentia & gloria, quam Deus communicare solet cum creaturis, & tunc sensus, Magnificasti filium tuum super omne nomen tuum, id est, super omnem potentiam & gloriam, quam alij à te acceperunt, quod est idem cum illo, *Dedit ei nomen, quod est super omne nomen, ut in nomine Iesu omne genu flectatur.* Secundo, ut nomen Dei accipiatur pro fama & gloria, quæ redundat ex operibus Dei, & tunc sensus est, Magnificasti filium tuum super omne nomen tuum, id est, ex nullo alio opere acquisiisti maius nomen, famam & gloriam, quam ex glorificatione Filij tui.

*In quacunque die inuocauero te, exaudi me: multiplicabis in anima mea virtutem.*

Ex eo quod magnificasti sanctum tuum, confidenter peto, ut semper per illum aduocatum nostrum exaudias me, *in quacunque die*, id est, quocumque tempore inuocauero te, ille enim dixit: *Quicquid petieritis Patrem in nomine meo, dabit vobis. Multiplicabis in anima mea virtutem.* Hoc autem est quod peto inuocans te, ut multiplices siue dilates, ut proprie sonat vox Hebraica, non annos vitæ corpori meo, aut opes, aut filios, aut alia eiusmodi, sed virtutem in anima mea, id est, robo-

V.

VI.



robores animam meam (virtus enim hoc loco robur significat, vt vox Hebraica & Græca demonstrant) vt resistam cupiditatibus, vt tolerem patienter aduersa, vt ambulem sine fatigatione in via iustitiæ, vt vim inferam Regno corlorum, vt ad eum, quem magnificasti, aliquando perueniam.

*Confiteantur tibi Domine omnes Reges terre, quia audierunt omnia verba oris tui.*

Quemadmodum paulo antedixit, *Magnificasti sanctum tuum*, prædicens futurum per verbum præteriti temporis, quoniam videbat per spiritum rem futuram, quasi præsentem vel præteritam more prophetico: sic nunc prædicat futuram conuersionem gentium, per modum imperantis. *Confiteantur*, id est, magnificato sancto tuo per Resurrectionem & Ascensionem eius, confitebuntur sibi confessionem laudis *omnes Reges terre*, quoniam per Apostolorum prædicationem *audierunt omnia verba oris tui*, id est, quicquid Mundo reuelare dignatus es per Prophetas & Apostolos tuos: quæ verba oris Domini antea in sola Iudæa erant, vt dicit Apostolus Roman. 3. *Illis tradita sunt eloquia Dei*: sed postea per Apostolos audierunt omnes Reges, & omnes populi terræ: nam, *In omnem terram exiuit sonus eorum*.

*Et cantent in viis Domini, quoniam magna est gloria Domini.*

Pergit Propheta explicare mysterium vocationis gentium. *Et cantent*, inquit, *in viis Domini*, id est, ambulant Reges, & eorum populi in viis Domini, quæ sunt misericordia & veritas: istis enim viis Deus ad nos descendit, & nos ad illum ascendimus; ille misericorditer condonando peccata poenitentium, & iuste puniendo impoenitentes, & coronando iustos; nos misericorditer condonando peccata proximorum, & iuste cum omnibus conuersando, atque Deo & proximo reddendo quod debemus: ambulant autem non inuiti & mœsti, sed læti & volentes cantando, *quoniam magna est gloria Domini*. Cognoscent enim & admirabuntur quotidie magis ac magis, quam magna Dominus fe-

cerit, & quam magnifice glorificauerit Christum suum, caput nostrum, & quæ sint diuitiæ gloriæ hæreditatis eius in sanctos.

*Quoniam excelsus Dominus, & humilia respicit, & alta à longe cognoscit.*

Hæc est magna gloria Domini, quod cum excelsus, imo altissimus sit natura, dignitate, potentia, sapientia, imperio; tamen humilia de proximo respicit; quoniam ad humiles descendit: & vere in Filio suo in terris visus est, & cum hominibus conuersatus est: *alta autem à longe cognoscit*, quoniam à superbis longe recedit, vel eos longe à se proicit, quomodo Regem superborum Diabolum de cælo ad inferos præcipitauit. Hæc doctrina sanctæ humilitatis omnibus quidem necessaria est, sed præcipue Regibus, & aliis in sublimitate constitutis: ipsis enim maximum periculum est à spiritu superbiæ. At cur Deus excelsus, non diligit excelsos, sed humiles, cum omne simile diligit sibi simile? Diligit Deus excelsos vera celsitudine præditos, non elatos celsitudine falsa: illi enim similes Deo sunt, isti dissimiles. Porro humiles, qui se nihil esse ex se agnoscunt, implentur à Deo veris bonis, & exaltantur ad celsissimam dignitatem: superbi autem, qui se existimant esse quod non sunt, inanes remanent, & solo vento distenti & inflati, procul abiiciuntur.

*Si ambulauero in medio tribulationis, viuificabis me: & super iram inimicorum meorum extendisti manum tuam, & saluum me fecit dextera tua.*

Quoniam Deus excelsus humilia benignissime respicit, Dauid conscius propriæ humilitatis cum fiducia sibi pollicetur auxilium Domini in omni tribulatione. *Si ambulauero*, inquit, *in medio tribulationis*, ita vt vndique tribulantibus & tentantibus cinctus sim; tu tamen *viuificabis me*, id est, viuum, illesum, incolumemque seruabis. *Et super iram*, id est, nam super iram (& pro quia, passim legitur in Scripturis, vt sæpe monuimus) *inimicorum meorum me vndique circumstantium & deuorare cupientium, tu extendisti manum tuam*, vt eorum furorē com-



perferes, & conatus impedires; & sic saluum me fecit dextera tua, id est, potentia & virtus tua, quæ Christus est. In Hebræo habentur omnia in futuro, *viuificabis*, extendes manum tuam, saluum me faciet dextera tua: sed idem est sensus. S. Augustinus more suo vtiliorem, sed spirituales sensum excogitauit: Si ambulauero in medio tribulationis, id est, si ex amore ecclesiæ patriæ inuenero presentem vitam esse laboriosam peregrinationem, & sic inuenero tribulationem & dolorem, quem non inueniunt, qui vitam presentem amant; tunc *viuificabis me*, vita gratiæ tuæ: & super iram inimicorum meorum extendisti manum tuam, id est, in medio tribulationis ambulo, qui tu extendisti manum tuam ad me ferendum magis, quàm ira inimicorum ferire me possit. Inimici possunt spoliare, vulnerare, occidere; amplius non possunt: tu differis reditum in patriam, & adoptionem cœlestis beatitudinis, quod mihi grauius est omni tribulatione corporali: sed tamen non despero, quia saluum me fecit dextera tua, spe & promissione; postea quoque re ipsa & visione saluum me faciet eadem dextera tua.

IX.

*Dominus retribuet pro me; Domine misericordia tua in sæculum, opera manuum tuarum ne despicias.*

Explicat modum, quo dextera Domini saluos nos facit. Dominus, inquit, qui est dextera tua, retribuet pro me, retribuet autem tibi Deo Patri pretium pro peccatis meis; sicut alibi dicit: *Qua non rapui, tunc exolvebam*: retribuet etiam vindictam inimicis meis, quam ego retribuere non possum. Domine misericordia tua in sæculum durat, finem non habet; ideo peto, ut opera manuum tuarum ne despicias, id est, quæ tu misericorditer inchoasti opera, inspirans fidem, spem & charitatem, non deseras, sed conseruando, augendo, perficiendo consumes. Recte autem dicit, opera manuum tuarum, non, opera manuum nostrarum; quia quidquid boni habemus, illius dono habemus; sine quo non solum nihil possumus facere, sed neque sufficientes sumus cogitare aliquid ex nobis, quasi ex nobis.

## PSALMVS CXXXVIII.

Titulus, &amp; Argumentum.

In finem Psalmus Dauid.

**A**D hunc titulum additur in Græcis edicibus, Zachariæ in disperfectionem. Sed hæc verba non habentur in Hebræo, & Theodoretus monet, non haberi apud Septuaginta, neque apud ullum Interpretum: neque ea nos inuenimus apud veteres tractatores. De argumento magna controuersia est. S. Hilarius totum Psalmum ad Christum accommodare nititur. S. Augustinus partim de Ecclesia, partim de Christo exponit. Theodoretus prophetiam esse dicit de rebus gestis Iosia Regis. Alij volunt Dauidem de se proprie loqui, & Deum scientem omnia in testem adducere, quod ipse amicos Dei amauerit, inimicos oderit. S. Ioannes Chrysostomus, quem Euthymius sequitur, exponit maxime secundum literam, de scientia & prouidentia Dei. Chrysostomum præter ceteros sequens, existimo, Dauidem voluisse admonere genus humanum, Deum esse magnum remuneratorem operum bonorum, & contra, seuerum Iudicem operum malorum, atque ut id persuaadat, prolixè disputare de scientia Dei, quæ exactissime & profundissime omnia nostra nouit, naturam, opera, verba, cogitationes; ut nemo dicere possit, Deus non nouit, aut non considerat res nostras, ideo vel iudicium eius effugiemus, vel pro meritis coronabimur.

## EXPLICATIO PSAL. CXXXVIII.

**D**omine probasti me & cognouisti me: tu cognouisti sessionem meam & resurrectionem meam.

Hæc Dauid non de se solum dicit, sed assumit personam generis humani, & in persona omnium affirmat, Deo nos & nostra omnia esse notissima. Domine, inquit, probasti me, id est, examinasti & scrutatus es me: id enim sonat vox Hebraica. Dicitur autem Deus examinare & probare per metaphoram, quia vult perfectissime & exactissime cognoscere omnia, ut re vera cognoscit: & quia qui volunt exactissime cognosca-



gnoscere, diligenter scrutantur, examinant & probant; ideo David utitur hoc modo loquendi, non quod Deus egeat examine & scrutinio. Itaque sensus est, Tu Domine non es contentus quacunque cognitione rerum nostrarum, sed voluisti accuratissime cognoscere, ut faciunt, qui examinant & probant, & re ipsa accuratissime cognouisti me. Tu cognouisti sessionem meam, & resurrectionem meam. Quod dixerat generatim, nunc per partes explicat. Tu, inquit, cognouisti ab aeternitate, quando, & quomodo, & qua de causa sedere, vel surgere deberem: nec solum corporaliter, sed etiam moraliter, id est, quando, cur, & quomodo humiliandus vel exaltandus essem. Et si Deus hæc de omnibus hominibus nouit, multo magis nouit de Christo, qui est caput hominum & Angelorum: & ideo rectè Ecclesia in die Resurrectionis Christo accommodat hæc verba, Cognouisti sessionem, & Resurrectionem meam.

*Intellexisti cogitationes meas de longè, semitam meam, & funiculum meum inuestigasti.*

Docet, Deum non solum cognoscere humiliationem & exaltationem, quæ ad totam vitam pertinent; sed etiam in particulari omnes cogitationes, omnia consilia, omnem euentum. Vel cum docuisset David, Deum cognoscere exteriora nostra, humiliationem & exaltationem; nunc docet, Deum cognoscere etiam interiora, cogitationes, & delideria, Intellexisti, inquit, cogitationes meas de longè, id est, multo antea quam cogitare inciperem, tu nosti quid essem cogitaturus; item nosti de longè semitam meam, id est, progressum meum, itinera mea tum corporalia, tum multo magis spiritualia, quæ sunt consilia & deliberationes; denique funiculum meum inuestigasti, id est, finem & metam, ad quam peruenturus essem, quam hereditatem, quam quietem assecutus. In summa intellexisti ab aeternitate principia, media, & finem actionum mea-

rum. Ex Hebræo S. Hieron. vertit, *malum meum*, pro, *cogitationes meas*: sed S. Hieronymus existimauit vocem Hebraicam deduci à *ruah*, & legit, *rohi*, malum meum: sed Septuaginta Interpretes deduxerunt eandem vocem à *raba*, & legerunt, *rehi*, quam vocem etiam si aliqui vertendam putent, *amicum meum*, tamen vertere possumus, *cogitationem meam*, ut ipsi etiam Iudæi fatentur. De voce, *funiculum meum*, magna controuersia est: in Hebræo habetur, *ruhi*, *accubitum meum*, siue *accubationem meam* ut vertit S. Hieronymus, ut sensus sit, Cognouisti ambulationem meam, & accubitum meum. S. Augustinus legit, *Remitem meam*, & *limitem meum*, & rectè, quia finis itineris est limes, siue terminus, & quia in termino homo quiescit, rectè dixit David, *semitam meam*, & *accubitum meum*. Hoc idem significare voluerunt Septuaginta Interpretes per funiculum: nam secundum scripturas funiculus significat hereditatem, siue promissiones, quæ funiculis diuidebantur. Ezech. 47. Ioseph duplicem funiculum habet, id est, duplicem hereditatem, siue possessionem, quia Ioseph duas tribus habuit, Ephraim, & Manassè. Omitto eos, qui per funiculum intelligunt, itinera longa, vel distorta, & alia id genus, quæ cum voce Hebraica nulla ratione coherent.

*Et omnes vias meas præuidisti, quia non est sermo in lingua mea.*

Dixerat, Deum præuidisse cogitationes, consilia, & euentus: nunc addit generatim omnes alios motus, etiam ociosos, ut verba permulta. Præuidisti omnes alios motus meos usque; ad verba inutilia & ociosa: quia non est sermo in lingua mea, supple, quem tu non præuideris. Hinc enim Dominus in Euangelio testatur homines de omni verbo ocioso reddituros esse rationem in die Iudicii: quia Deus omnia obseruat, omnia considerat, ut omnia in tempore suo in iudicium adducat, Vnde & S. Iob perterritus dicebat, Iob 14. Tu quidem gressus meos dinumerasti, sed parce peccatis meis.

Ggggg 3.

L

עוה  
דוע  
רעה  
רע

רע



In Græcis codicibus legitur, *Non est dolus in lingua mea*: sed videtur nostra lectio verior. Nam S. Hieron. in epist. ad Suniam & Fretellam testatur, non solum in Hebraico esse, *millia, eloquium*, sed etiam Septuaginta Interpretes vertisse, *λόγος*, id est, sermonem. S. etiam Chrysost. varias lectiones adducit, quarum alia habet, *Non est sermo*, alia, *Non est dolus*.

IV.

*Ecce Domine tu cognouisti omnia nouissima & antiqua: tu formasti me, & posuisti super me manum tuam.*

Persuadet Propheta duobus argumentis, Deum omnia scire, quæ ad nos pertinent: primò, quia nouit omnia præterita & futura, unde non est mirum, si etiam res humanas exactè sciat, quæ inter cætera non vltimum locum obtinent: secundò, quia ipse fecit hominem, ipse gubernat; ergo dubitari non debet, quin sciat omnia, quæ ad illum pertinent. *Ecce*, inquit, *Domine tu cognouisti omnia nouissima & antiqua*, id est, futura in nouissimis diebus, & præterita ab antiquissimo tempore. *Tu præterea formasti me*, aut fecisti hominem, & posteaquam fecisti, non dimisisti, vt ceteri opifices faciunt, sed *posuisti super me*, super hominem à te formatum, *manum tuam*, vt eum regeres, conseruares, & quasi portares, alioqui enim in suum puluerem, imò in suum nihilum reuerteretur. In Hebræo, quod nos legimus, *nouissima & antiqua*; possunt etiam legi, *retro & ante*, & sic legit S. Hieron. Ratio cur ita legat, est, quia coniunxit illa verba cum sequentibus, *formasti me*; non cum præcedentibus, *cognouisti omnia*; non autem cohærebant, *nouissima & antiqua*, cum, *formasti me*, sicut cohærent, *retro & ante*. Contra autem Septuaginta Interpretes, quia coniunxerunt cum præcedentibus, idèò verterunt, *Cognouisti omnia nouissima & antiqua*. Quamuis autem recentioribus quibusdam valdè placeat illud, *retro & ante formasti me*; tamen vulgata editio præferenda est, tum quia maxima auctoritas Septuaginta Interpretum, tum quia sic legunt omnes Patres, Græci & Latini: tum quia

non est res magna, neque mirabilis, quod qui formauerit hominem, formauerit partes & membra omnia, anteriora & posteriora: id enim omnes artifices statuarum & picturarum & ædificiorum faciunt. Sed quod Deus sciat omnia nouissima & antiqua, id verè magnum, & mirabile, & soli vero Deo proprium & prophetica commemoratibne dignissimum est.

*Mirabilis facta est scientia tua ex me, confortata est, & non potero ad eam.*

V.

Quia demonstrauerat Propheta duobus illis argumentis, scientiam Dei ad omnia, quæ hominis sunt se extendere: ne quis putaret, scientiam Dei nobis iam satis cognitam & perspectam esse, subiunxit hunc versiculum, vt intelligeremus, scientiam Dei notissimam esse, quoad existentiam, id est, quod sit scientia maxima in Deo, sed obscurissimam esse, & planè incognitam, quo ad modum, id est, incomprehensibile esse, quo modo Deus præuideat futura, præterita libera, quæ pro arbitrio hominis possunt esse, & non esse, qualia sunt cogitata, desideria, verba, & pieraque opera hominum. Idem dici potest de essentia & attributis Dei. Deum esse, & esse potentem, sapientem, bonum iustum, misericordem, &c. notissima sunt: quid autem sit Deus, & quomodo tot attributa sint, vna simplicissima res, vna essentia, vnum esse, quis nouit? quis dicere poterit? Ait igitur, *Mirabilis facta est scientia tua ex me*, id est, mirabilior, quam ego assequi possim. Illud enim, *ex me*, phrasi Hebraica, significat, *præ me*, vel *super me*: quod explicatur per verba sequentia, *Confortata est & non potero ad eam*, id est, præualuit supra capacitatem meam; siue eleuata est altius, quam ego conscendere possim vt eam apprehendam. Duæ sunt aliæ, quæ dantur à Patribus, ad hunc versiculum expositiones. Prima est S. Basilij oratione nona in Hexameron, quod illud, *ex me*, significet ex ijs, quæ sunt in me, vt sensus sit. Ex fabrica humani corporis, mirabilem ostendi scientiam, & sapientiam Dei, non minus, quam ex fabrica cœli & stellarum. Hæc expositio

veram



veram doctrinam continet, sed non est ad mentem Prophetæ, vt intelligi potest ex verbis sequentibus, *Confortata est, & non potero ad eam.* Altera est S. Ioannis Chrysost. qui existimat Dauidem loqui de scientia naturæ & attributorum Dei, vt sensus sit, *Mirabilis est scientia tua*, id est, de te, de tua essentia & attributis; quamuis enim sciamus te esse, & esse bonum & misericordem, tamen non capimus quid sis. Hæc expositio vera est, sed debet restringi ad vnum solum attributum, id est, ad scientiam, quæ est in Deo: de hac enim Propheta loquitur. Imò in textu Hebraico non habetur pronomen, sed *mirabilis facta est scientia præ me*, id est, ista scientia, de qua supra dictum est, *Tu cognouisti omnia nouissima & antiqua; & omnes vias meas prauidisti; & intellexisti cogitationes meas de longè*; ista, inquam, scientia mirabilis facta est præ me, id est, mirabilior, quàm ego cognoscere possim.

VI. *Quò ibo à spiritu tuo, & quò à facie tua fugiam.*

VII. *Si ascendero in cælum, tu illic es, si descendero in infernum, ades.*

VIII. *Si sumpsero pennas meas diluculo, & habitauero in extremis maris.*

IX. *Etenim illuc manus tua deducet me, & tenebit me dextera tua.*

Addit aliud argumentum ad probandum neminem esse, qui posset latere scientiam Dei, quia videlicet Deus vbique est, & omnia penetrat. *Quò ibo à spiritu tuo*, vt videlicet abscondar à te, à tua mente, & intelligentia? & id ipsum clarius repetit, dicens, *Quò à facie tua*, id est, ab oculis tuis fugiam? *Si ascendero in summum cælum, tu illic es: si descendero in infernum*, in profundum abyssi, longissimè à cælo situm, ibi quoq; tu ipse idem ades. *Si sumpsero pennas meas*, id est, si dentur mihi pennæ, & mane surgens velocissimè fugiam ab Oriente, & habitem in extremis maris, id est, in vltimo Occidente: non tamen effugere te potero: nam *manus tua deducet me, & tenebit me*: quia sine Dei auxilio moueri non possumus, & quocunq;

imus, Deo nos portante imus: *In ipso enim* (vt ait Apost. Act. 17.) *viuimus, mouemur, & sumus.* In Hebræo habetur pulcherrima figura poetica; sic enim habetur ad litteram. *Si sumpsero pennas aurora, & habitauero in extremo maris.* Aurora enim mox vt apparuerit in Oriente, spargit radios suos vsque ad Occidentem, vt videatur quasi pennis velocissimè ferri ab ortu vsque ad occasum. Porro per, *extrema maris*, intelligimus vltimum Occidentem, non vt quidam volunt, quia Scriptura soleat per mare intelligere Occidentem; sed quia hoc loco extrema maris opponuntur Orienti, vt oritur aurora: nam absolute Scriptura per mare intelligit Austrum, non Occidentem. Psal. 106. *A Solis ortu & occasu*, ab Aquilone & mari: & quamuis terra promissionis habeat ad occasum mare Mediterraneum, habet tamen ad Austrum mare Rubrum, & mare Oceanum. Et hoc loco non terram promissionis, sed totum mundum Propheta describit, à summo cælo vsque ad imum infernum, & à mari Orientali, vsque ad mare Occidentale, quo spatio totus orbis terrarum continetur, vt diximus in explicatione Psal. 71. Denique obseruandum est, illa verba, *Si ascendero in cælum, si descendero in infernum, si sumpsero pennas*, esse accipienda conditionaliter, non absolute, in hunc sensum. Etiam si ascendere possem in cælum, vel descendere in infernum, vel volare ab ortu ad occasum; non possem à te abscondi, vel à te fugere.

X. *Et dixi, Forstian tenebra conculcabit me; & nox illuminatio mea in delictis meis.*

XI. *Quia tenebra non obscurabuntur à te, & nox sicut dies illuminabitur: sicut tenebra eius, ita & lumen eius.*

Obijcit ipse sibi, posse fieri, vt abscondatur à Deo, beneficio tenebrarum. Et respondet id non posse fieri; quia tenebræ apud Deum non sunt tenebræ. *Deus enim lux est*, vt scribit sanctus Ioannes 1. epist. 2. *lux autem in tenebris lucet, & tenebra eam non comprehenderunt*, vt idem scribit in 1. capite.



# EXPLICATIO

742

capite Euangelij. Sicut enim lux Solis corporalis non potest obrui tenebris, quia tenebras præsentia sua fugat; & ubicunque Sol est, dies est: sic etiam lux spiritualis & increata, quæ Deus est, nullis tenebris impediri potest, quia præsentia sua tenebras omnes dissipat. Itaque nullum omnino latibulum homini relinquitur, in quo ab oculo Dei abscondi queat. *Et dixi, forsitan tenebrae conculcabunt me*, id est, forsitan tenebræ densissimæ operient me, & sic effugiam oculos Dei. Vbi illud, *conculcabunt*, non significat, conterent, sed regent & obscurabunt sua densitate: id enim sonat vox Hebraica, quam S. Hieronymus rectè vertit, *operiunt me*. Verbum autem Græcum & Latinum metaphoricum est, quod enim calcatur, in profundo ponitur, & absconditur. *Et nox illuminatio mea in deliciis meis*. Hæc est responsio ad objectionem factam: quæ responsio in codice Hebraico clarissima est, secundum versionem S. Hieronymi, videlicet; *Et nox lux est circa me*, id est, non respectu oculorum Dei non est nox, sed illuminatio circa me. Septuaginta Interpretes non verterunt *circa me*, sed *in deliciis meis*: quia vocem Hebraicam, *bahadani*, duxerunt ab *eden*, quod est voluptas, & rectissime reddiderunt, *in deliciis meis*, sed quia hæc interpretatio obscurior est, S. Ioannes Chrysostomus, & alij multi, qui eum sequuntur, confugiunt ad metaphoram, & volunt per, *noctem*, & tenebras significari tribulationes, & hunc sensum esse horum verborum, forsitan tenebræ tribulationum conculcabunt me; sed per gratiam Dei consolantem me, nox ipsa erit mihi illuminatio, tribulatio conuertetur in consolationem in deliciis meis spiritualibus. Sed non est opus ad metaphoram confugere; & totus contextus Psalmi melius continuabitur & cohærebit, si de veris tenebris hic versiculus explicabitur. Hic igitur est sensus literalis. *Nox illuminatio mea in deliciis meis*, id est, nox ipsa per se obscura, coram oculis Dei, non erit nox, neque obscura, sed erit *illuminatio mea*, id est, illuminabit & patefaciet me in deliciis meis nocturnis versantem: nam, in deliciis

impuris vacant, tenebras noctis quarunt, existimantes se à nemine videri, & ita securius peccare. Vnde & Apostolus ait, *qui dormiunt, nocte dormiunt*, & qui ebrii sunt, nocte ebrii sunt, & poterat addere, *Qui in cubilibus, & impudicitiiis deliciis quarunt, in noctibus eas quarunt*. Sed frustra, nam oculus Domini Sole ipso lucidior tenebras omnes penetrat, & nihil est ei absconditum. Induit autem hoc loco personam impiorum Prophetæ sanctus, dum hæc dicit; & in sequentibus clarius idem repetit, *Quia tenebrae, inquit, non obscurabuntur in te*. In Hebræo elegantius, *Quia tenebrae non tenebrescent apud te*. Et nox sicut dies illuminabitur, id est, & nox non erit obscura, ut solent noctes, sed erit lucida, ut lucidi sunt dies. Sicut tenebrae eius, ita & lumen eius. In Hebræo paulò clarius. *Sic tenebrae, sicut lumen*. Sed addiderunt Septuaginta pronomen, *eius*, generis feminini avras, & sensus est, *Sicut tenebrae eius*, id est, noctis, ita & lumen eius, id est, diei; perinde enim est apud Deum, siue sint tenebræ noctis, siue lumen diei: quia non minus videt in tenebris noctis, quam in luce diei.

*Quia tu possedisti renes meos: suscepisti me de utero matris tue.*

Probat, Deum in tenebris videre, & nihil ei esse absconditum, quamvis occultissimum, ex forimatione membrorum nostrorum, internum ex utero matris adhuc reconditorum. duplex enim hic est obscuritas, una quia membra sunt interna, altera quia sunt in utero matris. *Quia tu possedisti renes meos*, id est, hinc apparet, tibi perinde esse noctem & diem, tenebras & lucem; quia tu formasti, & formando tuos effecisti renes meos, partes videlicet secretas, & absconditas, ubi est sedes internæ cupiditatis: proinde affectus mei & desideria mea in manu tua sunt: neque solum renes meos, sed me totum in utero latentem suscepisti formandum, & fovisti formatum: Illud, *possedisti*, est in Hebræo, *canitha*, quod significat *producere*, & ratione productionis possidere, ut rem suam. Sic Gen. 2. dicit

Eua,

בָּהַדָּנִי  
עֵדֶן

XII. XIII.

כָּנִיתָ



**T**ua. *Possedi hominem per Deum*, quando genuit Cain. & Prouerb. 8. dicit Sapientia Dei, *Dominus possedit me in initio viarum suarum*. Vtrobique est idem verbum Hebraicum. Illud autem *suscepisti me*, non significat suscipere quomodocunque, sed suscipere formandum, siue fouere, & tegere. Vnde S. Hieronymus vertit, *Orsus es me*; alij *umbrasti me*. Illud denique *de vtero*, in Hebraeo est *in vtero*, & colligitur ex versiculis sequentibus, omnia hæc intelligenda esse de conformatione humani corporis in vtero. Quare, vt verba Græca & Latina cõcordent cum Hebraicis, & cum sensu ipso Prophete, illud *suscepisti me de vtero*, non debet exponi de egressu ab vtero, sed de tempore quo erat in vtero, in hunc sensum, suscepisti me formandum & fouendum de ipso vtero, id est, antequam exirem de vtero, dum adhuc essem in vtero. Sicut intelligitur illud Isaia 49. *Dominus ab vtero vocauit me, de ventre matris meæ recordatus est nominis mei*, siue enim hoc intelligatur de Christo, siue de S. Ioanne Baptista, id significat, Deum vocasse nomen eius, & destinasse illum ad magnum officium ab ipsa conceptione, dum adhuc esset in vtero.

*Confitebor tibi, quia terribiliter magnificatus es: mirabilia opera tua, & anima mea cognoscet nimis.*

Interrumpit Propheta narrationem de opificio humano per apostrophen ad Deum, & admiratus magnitudinem scientiæ & sapientiæ Dei in hoc opere, *Confitebor*, inquit, *tibi*, id est, cogitans hæc opera tua, confitebor tibi confessionem laudis, *quia terribiliter* terrore admirationis & reuerentiæ *magnificatus es*. Declarat autem in quo sita sit hæc admirabilis magnificentia, dicens, *Mirabilia opera tua, & anima mea cognoscet nimis*, id est, admiranda sunt opera tua in formatione hominis in vtero matris iam recondito, & obscuro, & anima mea valde sataget, vt cognoscat magnitudinem horum operum tuorum. Vbi non significatur perfecta cognitio operum Dei, sed cognitio, quod

magna & mirabilia sint. Quomodo non videmus, nec scimus, quanta sit magnitudo maris, sed cognoscimus mare esse amplissimum, & ex hoc ipso cognoscimus, esse amplissimum, quod ex nullo loco totum cernere possumus. Quomodo etiam Solem aduersum intueri nequimus, sed hoc ipso intelligimus, Solis lucem esse maximam. In Hebraeo nunc legimus, *magnificatus sum*, sed Septuaginta legerunt in secunda persona, non in prima. Sensus autem est idem: nam Ideo Deus magnificatus est valde in hoc opere, quia magnificum opus fecit, cum nos ita magnificauit.

*Non est occultatum os meum à te quod fecisti in occulto: & substantia mea in inferioribus terræ.*

Reuertitur ad scientiam & sapientiam Dei in opificio humano. *Non est occultatum*, inquit, *à te os meum*, id est, non latet scientiam tuam ossatura mea, vt sic loquar, qualia & quam multa ossa lateant intra carnem humanam, *quia tu ipse ea fecisti, & in occulto fecisti*, videlicet in vtero matris, & intra pellem & carnem nostram. Idem repetit alijs verbis dicens, *Et substantia mea in inferioribus terræ*, id est, non est occultata à te substantia corporis mei, adhuc etiam latens in profundo vtero, quasi metallum in visceribus terræ, vel si non placeat per *inferiora terræ*, intelligere vterum matris: possumus exponere proprie de ipsa terra, quæ infima est inter elementa: nam ad admirationem operum Dei pertinet, quod tam nobilem substantiam formauerit in hac infima terra. Porro qui viderunt anatomiam corporis humani, satis mirari non possunt sapientiam Dei in fabrica tot ossium, magnorum, parvorum, minimorum, mirabiliter inter se connexorum, atque id totum sine instrumentis in loco angustissimo & obscurissimo paratum. Potest etiam hoc intelligi simul de ossibus corporis & animæ, id est, de robore & fortitudine animi humani, quod tantum est, vt homo natus inermis & nudus au-

H h h h h deat

XIV.



עשית  
עשיתי  
רקמתי

רקמתי  
וקמתי

XV.

deat, auxilio Dei fretus, non solum bestias, sed & ipsos daemones ad bellum prouocare. In hebræo, pro, *quod fecisti*, habetur, *quod factus sum*: sed credibile est Septuaginta legisse, *hastia, fecisti*. non *huseri, factus sum*, & sensus interpretationis Septuaginta est longè clarior. Pro illo autem, & *substantia mea*, in hebræo legitur, *ruchamti*, id est, variegatus sum, ut sensus sit, non occulta tum est à te os meum, quod fecisti in occulto, neque etiam occultatum est à te, quo modo variegatus sim à te varietate membrorum, & potentiarum, & partium similium, in inferioribus terra, id est, in vtero matris, siue in hac ima terra, in qua degimus, quæ sententia elegans est, & vera. Sed Septuaginta non legerunt, *ruchamti*, sed vnica litera paululum immutata, & alijs punctis subintellectis, *recomati*, & erectio mea; siue exaltatio, à non esse ad esse, quod est ipsa substantia: & sic legerunt omnes veteres.

*Imperfectum meum viderunt oculi tui, & in libro tuo omnes scribentur, dies formabuntur, & nemo in eis.*

Pergit in ostendenda scientia Dei erga humani corporis opificium: & per *imperfectum*, intelligit, corpus informe, quod vocant embryonem, in quo nondum apparet forma & distinctio membrorum. Hoc, inquit, *imperfectum meum viderunt oculi tui*, nec simpliciter viderunt; sed cognouerunt, quid inde fieri deberet, & quo tandem euasurum esset. Reddit mox rationem subiiciens. *Et in libro tuo omnes scribentur*, id est, quia habes apud te exemplaria, siue Idæos omnium, quomodo pictor vel sculpsor scit ex informi materia, quid futurum sit, quia videt exemplar. Itaque illud, &, accipitur pro, quia. Quia inquit, *in libro tuo*, id est, in mente tua omnes homines, imò etiam res omnes descriptæ inuenientur. *Dies formabuntur, & nemo in eis*. S. Hilarius legit, *Die formabuntur*, & in græco textu est casus accusatiuus, ac per hoc subintelligitur aliquid, ut sensus sit, Indies formabuntur informia corpora, & perducentur ad perfectionem suam,

ut in exemplari relucet. *Et nemo in eis*, supple, deerit; vel, ut est in hebræo, *nihil in eis*, deerit. Ordinariè siquidem nullus homo conceptus in vtero, ad perfectionem suam non pertingit, neque aliquid ex iis, quæ naturaliter requiruntur, in eis deficit: cum enim secus accedit, ut in abortiuis, vel iis, qui nascuntur cæci, aut muti, id non accidit ex defectu primæ causæ, sed secundarum: Possent hæc omnia intelligi etiam de perfectione hominis, quantum ad animam, id est, de sapientia, prudentia, virtutibus moralibus, gratia, & gloria. Nouit enim Deus imperfectum nostrum, & nos ex nobis nihil esse, nisi massam informem, sed iuxta descriptionem in libro vitæ, in dies formamur, & perficimur, donec efficiamur conformes imaginibus Filij Dei, & configuremur corpori claritatis eius. Atque ad hanc perfectionem tam excellentem corporis & animæ, ad quam ex tanta imperfectione perducuntur amici Dei, respiciens Propheta, exclamat id quod sequitur:

*Mihi autem nimis honorificati sunt amici tui Deus, nimis confortatus est principatus eorum.*

Exclamatio ob admirationem nascitur, ut dixi, ex eo quod Propheta considerauit ex quanta abyssio imperfectionis Deus perducatur amicos suos ad summam & eminentissimam perfectionem, in qua simul ostenditur providentia Dei considerantis & curantis res humanas, ut maximè proprias, & merita hominum altissimè remunerantis, & demerita seuerissimè punientis. *Mihi autem*, inquit, id est, apud me; siue meo iudicio, *nimis honorificati sunt amici tui Deus*, id est valde omnino, & supra quam intelligam, honorificati sunt amici tui, *valde omnino confortatus est*, roboratus & stabilitus principatus, eorum: nam educti ex massa perditionis, & ex diabolica captiuitate, transferuntur ad Regnum æternum, facti Angelis æquales, Filij Dei, heredes: fratres autem & coheredes Vnigeniti, quem

con-



constituit Deus heredem vniuersorum. Nō desunt, qui illud, *mihi*, interpretentur, à me, vt sensus sit, à Dauide honoratos semper fuisse amicos Dei. Sed prior expositio, est communior & verior, & melius coheret cum verbis sequētibz, *nimis confortatus est principatus eorum*. Qui enim honorificauit amicos Dei, ille idem confortauit principatum eorum. Deus autem, non Dauid confortauit principatum omnium amicorum suorum. In hebræo, & græco habetur in numero multitudinis, *confortati sunt principatus eorum*. Sed idem est sensus, principatus enim iustorum, & vnus est & multi, vnus, quia vnum est Regnum Dei, commune omnibus Sanctis; multi, quia omnes & singuli Reges sunt & Principes magni, eius naturæ & conditionis est Regnum cœlestis, vt sine contentione, vel æmulatione, vel detrimento, à singulis possideri possit in solidum. Quod autem dicitur, *confortatus est*, non solum referri debet ad robur, sed etiam ad multiplicationem subditorum: tunc enim confortatur principatus, cum crescit & propagatur: & hoc declaratur in sequenti versiculo.

xvi.

*Dinumerabo eos & super arenam multiplicabuntur, exurrexi, & adhuc sum tecum.*

Declarat, quo modo confortatus sit principatus amicorum Dei; & dicit, confortatum esse, quia mirifice breui propagatus est. Quod quidem verissimum est, tum quia ipsi Principes tot sunt futuri, vt S. Ioannes, dicit Apoc. 5. *Vidi turbam magnam, quam dinumerare nemo poterat, ex omnibus gentibus, & tribubz, & linguis, &c.* tum etiam, quia omnes res creatæ, & ipsi etiam dæmones, & homines reprobi subiecti erunt post iudicium pedibus Sanctorum, atque ad principatum eorum pertinebunt. Ait igitur, *Dinumerabo eos*, id est, conabor numerare vel amicos Dei, qui principatu fruuntur, vel subditos eorum, & præ multitudine numerare non potero, quia *super arenam multiplicabuntur*, id est, plures erunt, quam grana

arenæ in litore maris. Est autem hæc amplificatio quædam, sed familiaris diuinæ Scripturæ. Genes. 13. dicit Dominus Abraham, *Faciam te, sicut puluerem terræ*, id est, multiplicabo posteritatem tuam secundum multitudinem granorū pulueris terræ, quæ numerari non possunt. Genes. 22. *Crescere te faciam, sicut arenam, quæ est in litore maris*. His dictis Propheta de se loquitur, atque ostendit ex cognitione tam ingentis gloriæ Sanctorum amicorum Dei, se quoque exarsisse, in affectum Dei, & desiderium participandæ eiusmodi gloriæ. *Exurrexi*, inquit, siue, vt sonat vox hebræica, *euigilaui*, ad hanc nouam lucem, & surrexi per amorem, & desiderium in te: *& adhuc*, id est, vltique adhuc tempus tecum sum, tibi inhæreo, à te pendeo cupidus perseverandi vsque in finem. Scio hæc pauca verba mille modis exponi à veteribus & recentioribus, sed pigrit ea describere, quæ alij dicunt, cum in ipsorum libris legi possint. SS. Patres, Hilarius & Augustinus exponunt de Resurrectione Christi, quos sequuta Ecclesia in Missæ introitu hæc verba posuit, *Resurrexi, & adhuc tecum sum, posuisti super me manum tuā, mirabilis facta est scientia tua*. Sed nimis difficilis est continuatio verborum, si hæc ad litteram intelligantur de Christi Resurrectione; ided dicendum videtur, hæc posse applicari ad Christum, quia illi maxime propriè conueniunt, quamuis de alio dicta sint: quomodo exposuimus illud, *tu cognouisti sessionem meam, & resurrectionem meam*, de humiliatione & exaltatione omnium hominū; & tamen admonuimus, Christi passioni & resurrectioni potissimum conuenire: quo modo etiam Ecclesia in Missa de Assumptione, applicat B. Virgini Deiparæ illa verba, *Optimam partem elegit sibi Maria, quæ non auferetur ab ea*: quoniam in eam optimè conueniunt, quamuis de Maria Magdalena dicta esse constet ad litteram, Luc. 7.

*Si occideris Deus peccatores, viri sanguinum declinate à me.*

vii.

Hhhhh 2

Quia



*Quia dicitis in cognitione, accipient  
in vanitate ciuitates tuas.*

Dixerat Propheta, Iustos Dei amicos valde honoratos esse à Deo, & optauerat confortium eorum nunc è contratio dicit, Impios inimicos Dei interficiendos iusto Dei iudicio, & recusat amicitiam & confortium ipsorum. *Si occideris Deus peccatores*, id est, si tu Deus iusto tuo iudicio, vt probos honorificabis & exaltabis, ita peccatores reprobabis, & ad interitum sempiternum dānabis; ego nolo confortium istorum, ideo dico vobis Impijs, *Viri sanguinum declinate à me*. Vocat autem viros sanguinum, non solum homicidas, qui sanguinem humanū iniuste fundunt, & propriè dicuntur viri sanguinum; sed omnes alios improbos & scelestos, qui alijs nocere cupiunt, vel nocent, & occidunt animas proprias per peccatum, & animas aliorum per scandalū, & verè etiam odio habentes proximum homicidæ dici possunt; quia odium principium est homicidij. Quare S. Ioannes in Epist. i. cap. 3. dicit, *Qui odit fratrem homicida est*. *Quia dicitis in cognitione*, id est, quia cogitatis apud vos, & in corde vestro dicitis, *Accipient, iusti videlicet, in vanitate*, id est, frustra & in vanum, *ciuitates tuas*, id est, ciuitates Dei, frustra, inquam, accipient, quia breui auferemus ab eis. Hæc referuntur ad id quod supra dictum erat, *nimis confortatus est principatus eorum*, id est, valde propagatus per conuersionem infidelium ad fidem, & impiorum ad iustitiam. Quoniam igitur per propagationem Ecclesiæ, ciuitates, id est, cæteris plurimi ablati fuerant à demonum seruitute, & idololatræ dominio; iudeo dicebant impij, qui reliqui erant, in corde suo, inuidentes propagationi Regni Christi, *Accipient in vanum ciuitates*; quoniam sperabant, breui fore, vt eas recuperarent. Obseruanda sunt aliqua hoc loco, Primo magnam esse in Græcis textibus varietatem; quod pertinet ad illud; *quia dicitis in cognitione*: sed cum lectio vulgata Latine editionis concordet cum Hebraica lectione; non dubitamus, illam ex Græcis veniorem

esse, quæ cum Hebraica, Latinaque concordat. Secundo, in Hebraico haberi, *Quia dicunt tibi*, sed in nostra lectione omissum esse illud, *tibi*, quia facile subintelligi poterat; qui enim dicunt in cogitatione, non verbis externis, illi non audiuntur ab hominibus, sed à solo Deo, ideo dicunt tibi Deo, non nobis hominibus. Tertio, illud *ciuitates tuas*, recte correctum esse, cum antea haberetur, *suas*: nam, *tuas*, habetur in textibus non solum Hebraicis, sed etiam Græcis, & in manuscriptis Latinis; & errore librarium mutatum erat in impressis, *tuas*, in *suas*.

*Nonne qui oderunt te Domine, oderam:  
& super inimicos tuos tabescebam?*

*Perfecto odio oderam illos, & inimici  
facti sunt mihi.*

Qui euigilauit in Deum, & illi pleno corde adhesit, nihil mirum est, si profiteatur se odisse eos, qui Dominum oderant: & si tabescebat ex rædio & dolore, cum videbat offendi ab ijs Dominum suum. Quod autem dicit, *Perfecto odio*, S. Augustinus refert ad virtutem charitatis, quæ diligit personas, & odit iniquitatem. Sed potest etiam significare odium consummatum, & inimicitiam irrecõciliabilem: quo tamen odio vir iustus persequebatur peccata non personas: ideo enim adiungit, *inimici facti sunt mihi*, quasi dicat, non ego illis, cū eos diligam, & emendari cupiam, sed illi mihi, qui oderunt inreparationem & conuerti ad iustitiam nolunt.

*Proba me Deus, & scito cor meum: in-  
terroga me, & cognosce semitas meas.*

*Et vide si via iniquitatis in me est, &  
deduc me in via æterna.*

Quod initio dixerat, Deum fecisse: nunc ipse rogat, vt faciat, id est, vt pergat scrutari & examinare cor & semitas eius. id est, cogitationes, desideria, progressus & actiones eius. Finem autem scrutationis esse cupit, vt si Deus videat in ipso viam iniquitatis, quæ ducit ad acquirenda temporalia; abstrahat



strahat eum inde, & deducat in viam aternam, id est, ad ea cogitanda, desideranda, & facienda, quæ pertinent ad bona sempiterna.

## PSALMVS CXXXIX.

Titulus, & Argumentum.

In finem Psalmus David.

**R**ecentiores sequenti Theodoretum Psalmi huius argumentum esse docent precatorem Davidis aduersus Saulem Regem & ministros eius. Sed veteres Patres, Hilarius, Hieronymus, Chrysostomus, Augustinus, argumentum esse volunt precatorem Corporis Christi aduersus Diabolum & iniquos homines, qui instrumenta vel satellites Diaboli sunt. Sanctus autem Hilarius non solum ita exponit, sed etiam refellit expositionem, quam recentiores sequuntur: dicit enim hunc Psalmum non debere exponi de Davide persecutionem patiente à Saule, tum quia nihil proprie in hoc Psalmi de Saule vel Davide dicatur; tum quia non desint multa, quæ non possunt Sauli & Davidi accommodari, ut illud, tota die constituebant praelia: non enim quotidie Saul aduersus Davidem bella constituit; imò nunquā Saul praelium aduersus Davidem constituit, si proprie loqui velimus: sed fugientem persequabatur, vel delitescentem perscrutabatur: bella enim & praelia inter duos exercitus constituntur, non inter unum insequentem, & alium fugientem Adde, quod, quando placuit Davidi de suis persecutoribus Psalmi canere, in titulo nomine eorum posuit, quod videmus in Psalmi 141. 142. 143. & aliis plurimis: & quia hic factum non est, dicamus cum Patribus, Psalmi presentis doctrinam generalem tradi.

## EXPLICAT. PSAL. CXXXIX.

**E**Ripe me Domine ab homine malo, à viro iniquo eripe me.

Christus loquitur secundum Hilarium in persona sua & membrorum suorum; vel

quod est fere idem, loquitur corpus Christi, id est, cœtus fidelium, ut alij Patres dicunt. Per hominem malum, intelligit S. Augustinus Diabolum, qui dicitur Matth. 13. inimicus homo: alij intelligunt homines malos, qui à Diabolo excitantur & reguntur. Vtrunque est verum, & simul coniungi potest, ut sensus sit, Eripe me ab homine malo, siue Diabolus, qui est inimicus homo, per se, siue per homines sibi subiectos me infestet. Et quemadmodum illud, me, non significat unum certum hominem patientem, sed cœtum iustorum; sic etiam illud, ab homine malo, non significat unum certum hominem infestantem, sed cœtum iniquorum, siue omnem iniquum. Quod sequitur, à viro iniquo eripe me, est repetitio eiusdem rei: quamvis enim aliqui sint mali, qui non videntur esse iniqui, id est, iniusti: tamen aliquo modo omnis malus est iniquus, quia nocet saltem ipse sibi, nocet etiam alijs saltem exemplo: & S. Ioannes in Epist. 1. cap. 3. dixit: Qui facit peccatum, iniquitatem facit, & peccatum est iniquitas.

Qui cogitauerunt iniquitates in corde, tota die constituebant praelia.

II.

Reddit rationem, cur dixerit, eripe me, & dicit, rationem esse, quia patitur infestationem cogitationum, verborum & factorum, & infestationes tales, quæ dici possint praelia assidua, ut nullæ dentur induciæ, nulla intermissio: proinde non sine causa hortatur Apostolus ad Ephes. 6. ut sumamus armaturam Dei, Græce, πανοπλίαν id est, omne genus armorum, galeam, loriam, scutum, gladium. ut possimus resistere, & in omnibus perfecti stare. Ac primum de praelio cogitationum, qui cogitauerunt, inquit iniquitates in corde: illud, cogitauerunt, demonstrat verum esse, quod supra diximus, per hominem malum, non intelligi unum certum hominem, ut Saulem, sed cœtum iniquorum dæmonum & hominū. Porro, cogitare iniquitates in corde, est meditari deceptiones, parare insidias, ordiri stratagemata. Tota die constituebant praelia,

H b h h h 3



*Ua*, id est, per omne tēpus sine ulla intermissione instruebant praelia, quæ in corde meditati fuerant. Possent hæc fortasse præcipue intelligi de praeliis internis cogitationū malarum, quæ opera Principis tenebrarum nobis immittuntur, qualia sunt desideria impudica, tentationes infidelitatis, scrupuli, & perplexitates mentis, quæ miro modo nos cruciant & perturbant.

III.

*Acuerunt linguas suas sicut serpentis: venenum aspidum sub labijs eorum.*

Hoc est alterum malum, quod patimur ab inimicis, malum verborum, videlicet, calūniarum, detractionum, cōuiciorum, fraudū, & aliorum id genus malorum: & quidem finis hominum malorum conuiciantium, detrahentium, fraudantium, est, lucrum temporale, vel vindicta tēporalis. Sed finis Diaboli est pertrahere hominem ad impatientiā, vel iracundiam, vel odium proximi, & ad peccata, quæ inde sequuntur. Potest etiam per linguam serpentium intelligi prædicatio hæreticorum, quæ molliter serpit, sed lethale virus inspirat, & occidit. *Acuerunt*, inquit, viri illi mali *linguas suas sicut serpentis*, ut facilius penetrarent in aures & in corda: *venenum aspidum*, nocentissimum, *sub labijs eorum* absconditum est, quod per linguam iaculantur in auditores. Illud, *sicut serpentis*, antea legebatur, *sicut serpentes*: sed merito correctum est, quia in hebræo erat ambiguū, an esset legendum, *sicut serpens*, an *sicut serpentis*: sed textus græcus declarauerat ambiguitatem, & posuerat, *sicut serpentis, serpentes* autem in numero multitudinis, neque in hebræo legebatur, neque in græco, sed in sensu nulla diuersitas est.

IV.

*Custodi me Domine de manu peccatoris, & ab hominibus iniquis eripe me.*

Hoc est tertium malum, quod ad rem ipsam pertinet, ac primum petit cœtus iustorum protectionem, ne manus peccatoris appropinquet & noceat: ubi videtur per peccatorem intelligere Principem ipsum tenebrarum, deinde addit ad petitionem, ut etiā

eripiat ab hominibus iniquis, qui membra sunt Diaboli, ne ipsi nocendi potestatem accipiant. Quid autem mali potissimum timeat, & à quo liberari cupiat, explicat in duobus versiculis sequentibus.

*Qui cogitauerunt supplantare gressus meos: absconderunt superbi laqueum mihi.*

*Et funes extenderunt in laqueum: iuxta iter scandatum posuerunt mihi.*

*Qui cogitauerunt supplantare gressus meos.* Hic est finis Principis tenebrarum, ut nos impediāt à via salutis, ex qua ille irreparabiliter excidit. Itaque ipse & Angeli eius in hoc vnum semper intenti sunt, ut supplantent gressus nostros, ut non ambulemus in via Domini, ut eadā in ea, ut retrocedamus, ut saltem lentē progrediamur. Id autem faciūt abscondēdo & multiplicando laqueos, eosque iuxta viam constituendo. *Absconderunt*, inquit, *superbi laqueum mihi*: non poterant demones aptius designari, quam nomine superborum: siquidem peccatum eorū, non est ortum ex concupiscētia carnis, id est, luxuria, vel concupiscētia oculorum, id est, auaritia, sed ex sola superbia vitæ, quia similes altissimo esse voluerunt. Tob. 4. *Superbia in tuo sensu, aut in tuo verbo nunquam dominari permittas; in ipsa enim sumpsit initium omnis perditio*: & Iob 41. dicitur Diabolus, Rex super omnes filios superbiæ. Abscondit autem Diabolus laqueos, quando in actionibus humanis manifestat bonum, abscondit malū, id est, facit, ut homo cogitet utilitatem aut voluptatem, non cogitet iacturam & amaritudinem adiunctam: manifestat aduultero pulchritudinem mulieris, abscondit turpitudinem peccati; manifestat furi lucrū pecuniarum, abscondit iacturam Regni cœlorum; manifestat ambitioso excellentiam gradus altioris, abscondit periculum lapsus grauioris: denique manifestat dulcedinem culpæ, abscondit amaritudinem pœnæ. Extendit autem funes in laqueos, dum multiplicat laqueos, quasi dicat, extendit funes, ut inde multiplices efficiantur laquei: nam cui



cui tendit laqueum adulterij, tendit paulo post laqueum homicidij, vt adulterium tegatur; & cui tenderat laqueum homicidij, tendit postea laqueum perijurij, vt iustam sententiam iudicis euadat. Denique, iuxta iter ponit scandala, id est, laqueos: id enim sonat vox hebraica, *mocheſcim*, laqueos & offendicula: quia in ipsa via, quæ est lex Domini, nulla offendicula, siue laquei esse possunt, iuxta illud Psal. 188. *Pax multa diligentibus legem tuam, & non est illis scandalum.* Sed cum incipimus declinare à via, ibi continuo inueniuntur laquei & offendicula. Quare vnicum remedium est, cautè ambulare, vt Apostolus monet, & pedem extra viam legis Domini nunquam ponere.

*Dixi Domino, Deus meus es tu, exaudi Domine vocem deprecationis meæ.*

*Domine, Domine virtus salutis meæ, obumbrasti super caput meum in die belli.*

Aduersus tot pericula inuocat auxilium Dei, sine quo nihil possumus facere. *Dixi*, inquit, *Domino, Deus meus es tu*, ac per hoc ego sum populus tuus, Dominus meus es tu, seruus tuus sum ego: quare ad te pertineo, ideo *exaudi vocem deprecationis meæ*. Deinde, vt ostendat præsentia & virtutia pericula, iterum clamat: *Domine, Domine virtus salutis meæ*, id est, ideo confidenter te rogo, quia tu solus es robur, vnde pendet salus mea: tu es virtus, id est, potentia & fortitudo, per quam ab inimicis saluus esse potero. *Obumbrasti super caput meum in die belli*, id est, iam alias protectionem tuam expertus, iterum ad te confugio, tu enim in die belli, cum videlicet grauer ab hostibus oppugnaret, tu fuisti mihi instar galeæ, nam obumbrasti & texisti auxilio tuo caput meum, vt mortem, quæ mihi instabat, euaderem. Sed potest etiam hoc intelligi de vmbraculo ad refrigerandum caput, & totum hominem in die belli interioris, quod in æstu concupiscentiarum constitit: homo enim fatigatus, & æstuans tentationibus mali desiderij om-

nino aresceret & inflammaretur, nisi Deus obumbraret illi.

*Ne tradas me Domine à desiderio meo peccatori: cogitauerunt contra me, ne derelinquas me, ne forte exaltemur.*

Consequenter ad superiora petit, semper obumbrari ab æstu mali desiderij: nisi enim concupiscentia mala nos ceperit, frustra demones tentant, frustra homines sæuiunt. *Ne tradas*, inquit, *me Domine*, id est, ne sinas me tradi à desiderio meo peccatori, demoni videlicet, vel homini tentanti. Tunc enim à desiderio nostro tradimur inimicis, quando concupiscentia mala nos captiuos facit, & in potestatem Satanæ tradit: exempli gratia, cum vides mulierem ad concupiscendam eam, concupiscentia te reuſ facit, & tentationi subiicit, cum persecutor mortem minatur, nihil potest tradere te Diabolo, nisi desiderium vitæ temporalis: cum tentator offert occasionem lucri per fraudes, nihil te tradit peccatori tentanti, nisi desiderium lucri: & idem de cæteris dici potest. *Cogitauerunt contra me, ne derelinquas me*, id est, ideo cupio vt non derelinquas me sine vmbraculo gratiæ tuæ, quia inimici cogitauerunt contra me, id est, meditati sunt insidias, & si forte ceperint me, triumphabunt, & gloriabuntur, & exaltabuntur, quasi non me solum, sed etiam te superauerint: In hebræo longè aliter habetur hic versiculus; sic enim ad verbum reddi potest: *Ne tradas Domine desideria impio, scelus eius ne effundas, exaltabuntur.* Sed Septuaginta interpretes legerunt easdem voces hebraicas alio modo, quam Rabini legant: nā vox illa, *mauauit*, quæ significat desideria, potest legi, *mequauit*, & significat à desiderio meo, & sic legerunt Septuaginta; sic etiam illa vox, *zemas*, quæ significat scelus eius: potest legi, *zameui*, id est, cogitauerunt. denique illud, *altephoch*, potest significare, *ne effundas*, & etiam, *ne auertaris*, supplicia me, quod est idem cum illo, *ne derelinquas me*. Et quamuis lectio Septuaginta Interpretum, & vulgatæ latinæ editio-

IX.

מאוי  
מאוי  
זממו  
זממו  
אל תפק



nis vterior sit, quippe antiquissima, & quam recipiunt SS. Patres : & expositio à nobis tradita, quæ est S. Augustini & Euthymij, optima nobis videatur : tamen sensus qui eruitur ex Hebraico textu, quem nunc habemus secundum puncta Rabinorum, est etiam verus, & videtur à S. Ioanne Chrysostomo traditus : hic autem est sensus, *Ne tradas Domine desideria sua impio*, id est, ne permittas impium satiare desiderium suum, quod de me perdendo habet. *Ne scelus eius effundas*, id est, ne finas scelus eius effundi super me, ne impij exaltentur, & triumphum canant.

X. *Caput circuitus eorum, labor labiorum ipsorum operiet eos.*

Ab hoc loco Propheta prædicit pœnas, quas dabunt impij, qui persecuti sunt iustos. Quod autem in hoc versiculo dicitur obscure, idem est cum eo quod dicitur clarius in Psalmo 7. *Conuertetur dolor eius in caput eius: & incidit in foueam quam fecit*, id est, afflicto, quam parauerunt impij iustis, super eos reuertetur eosque obruet. Id impij experiuntur in morte, & in die iudicii omnibus manifestum erit: tunc enim omnis pœna iustorum conuertetur in gloriam, & omnia peccata impiorum conuertentur in miseria. *Caput*, inquit, *circuitus eorum*, id est, summa insidiarum, quibus impij quasi per vias distortas circuibant, ut iustos perderent, quomodo Diabolus, ut leo rugiens circuit, quærens quem deuoret, tota, inquam, summa talium insidiarum operiet eos, in eosque recidet. Ex hoc idem repetens Propheta addit, *Labor labiorum ipsorum operiet eos*, id est, labor, siue afflictio & miseria, quam labijs suis procurabant iustis, similiter operiet eos, in eosque recidet, & ipsos opprimit. In Hebræo habetur in prima persona, *caput circuitus mei*, siue *circuitum meorum*: sed non dubium est, quin LXX Interpretes habuerint in suis Hebraicis codicibus in vltima littera, *vau*, non *iod*, & legerint *mesibbai*, quod significat circui-

tus eorum, non, ut nunc legitur, *mesibbai*, *circuitus mei*: & vteriore esse lectionem quâ habuerunt Septuaginta, facile vnusquisque sibi persuadebit. S. Hieronymus vertit ex Hebræo, *Amaritudo conuiuiarum meorum*, pro, *caput circuitus eorum*: & quidem verba Hebraica hanc etiam sententiam ferre possunt, quoniam, *ros*, & *caput*, & *venenum* significat, sed ut plurimum pro capite, siue principio accipitur. Sic etiam, *mesibai*, significare potest *circundantium me*, siue *accubantium in circuitu meo*: sed tamen hæc sententia nec bene coheret cum sequentibus verbis, & vera lectio, ut diximus, est ea quâ habuerunt Septuaginta, quæ lectio hanc sententiam non recipit. S. Augustinus per, *caput circuitus*, intelligit superbiam, quæ est principium peccatorum, & per, *laborem labiorum*, intelligit mendacium, quia laborant, qui mentiri volunt, non laborant, qui vera simpliciter dicunt. Sed hæc spiritualis potius, quam literalis expositio est. Nps Chrysostomum sequuti sumus.

XI. *Cadent super eos carbones, in ignem deiiciet eos, in miserijs non subsistent.*

Pergit explicare pœnas impiorum. *Cadent*, inquit, *super eos carbones*; per carbones ignis intelliguntur acerrima supplicia, per verbum, *cadent*, significatur, ea supplicia ab alto descendere, à iudicio videlicet Dei iudicis supremi. Ac ne putaremus, paucos, aut paruos futuros eos carbones, addit, *in ignem deiicies eos*, id est, tanta erit copia carbonum super eos cadentium, ut obruantur, & opprimantur ab eis. Sic enim Deus in ignem deiiciet impios, quia cooperiet eos igne de celo cadente; atque ad maiorem explicationem addit; *In miserijs non subsistent*, id est, oppressi miserijs, ita iacebunt, ut se attollere & surgere, ac subsistere non possint. In Græco legitur in ablatiuo, *in igne deiicies eos*, id est, igni de celo demisso deiicies: sed idem est sensus. Ex Hebræo, pro, *in miserijs non subsistent*, S. Hieronymus vertit, *in foueas*, ut non confurgant. At Septuaginta reddiderunt sensum:



למד  
כה

sum : delectio enim in foueas profundissimas gehennæ, intolerabilis miseria est, præsertim cum inde nulla confurgendi spes maneat. Alij exponunt, *non subsistent*, id est, non tolerabunt, & ideo deficient, & morientur, sic tamen vt nunquam mortem finiant. Sed prior expositio, est conformior verbis textus Hebraici.

*Vir linguosus non dirigitur in terra, virum iniustum mala capient in interitu.*

Prædixit Propheta pœnas æternas impiorum : nunc addit de pœnis etiam huius vitæ. *Vir*, inquit, *linguosus non dirigitur in terra*, id est, vir promptus ad loquendum, mendax, adulator, detractor cõuiciis assuetus, rixosus, non prosperabitur in terra : eiusmodi enim odio, vt plurimum, habentur tum à bonis, tum à malis. Ideo præcipit S. Iacobus, *Sit autem omnis homo velox ad audiendum, tardus autem ad loquendum, & tardus ad iram. Virum iniustum mala capient in interitu*, non solum non dirigitur, nec prosperabitur vir linguosus, ac per hoc iniustus : sed mala, quæ illum capient, non erunt ad præmium patientiæ, vt iusti esse solent, sed ad interitum sempiternum. Illud, *capient*, in Græco, & in Hebræo est, *venabuntur*, proinde exponendum est, *capient*, vt prædam, vel vt venationem de improviso, & non expectata. Sic enim viri iniusti dum intenti sunt, vt cupiant, & spolient iustos, ipsi nihil tale metuentes capiuntur à Diabolo, vt fera à venatore, nec solum à Diabolo, sed etiam miseris multis, anxietatibus, sollicitudinibus, timoribus : amoribus capiuntur : sed hoc interest inter bonos & malos, quod bonis omnia cooperantur in bonum ; & ad vitam : malis omnia cooperantur ad interitum, & miseriam sempiternam. Illud, in interitu, in Hebræo, & Græco habetur, *in interitum*, proinde vel in Latina editione est error librariorum, vel, in interitu, debet accipi pro, *ad interitum*. Posset quidem sic exponi hic locus, *iniusti mala capient in interitu*, id est, quando morietur iniustus, tunc cum mala capient : & sic videtur intellexisse

S. Hilarius, qui exponit hunc locum de Iuda, quem mala ceperunt in interitu, quia se ipse suspensio enecauit prior tamen expositio, quæ est sanctorum Chrysostomi, & Augustini, magis conuenit textui Græco : & Hebraico. Quidam modernus per vocem Hebraicam, *lemadchepoth*, contendit esse vertendum, *celeriter*, vt sensus sit, *iniustum mala capient celeriter*, & allegat quãdam versionem apud Chrysostomum. Sed Septuaginta & S. Hieronymus verterunt *interitum* & moderni etiam linguæ Hebræicæ periti vertunt, *ad expulsiõnem*, quod idem est cum interitu, in quo anima expellitur à corpore & homo expellitur à vita. Omnes Patres, imo omnes alij tractatores intelligunt per eam vocem, *interitum*, aut *ruinam*, deniq; S. Ioan. Chrysostomus non adducit illam nouam translationem ad hunc versiculum, sed ad superiorem, quare caret omni fundamentum expositio moderni, sed aliqui docti exppositoris.

*Cognoui quia faciet Dominus iudicium inopis, & vindictam pauperum.*

*Veruntamen iusti confitebuntur nomini tuo, & habitabunt recti cum vultu tuo.*

Concludit, certam esse liberationem, & felicitatem iustorum, vt etiam supplicia & miseriam impiorum. *Cognoui*, inquit, *quia faciet Dominus iudicium inopis*, id est, certo scio tum ab experimento proprio, tum ab exemplis maiorum, tum ab ipsa Dei iustitia, & promissis, curæ esse Deo viros humiles & pauperes, qui etiam si diuitiæ forte affluant, nõ apponunt illis cor, vt ad res proprias, sed œconomos Dei se esse intelligunt. *Cognoui*, inquit, *quod Dominus sine dubio iustissime iudicabit causas pauperum suorum*, & vindictam faciet illorum ; puniens digna animaduersione persecutores eorum. Ipsi autem *iusti confitebuntur nomini Domini*, non sibi tribuentes innocentiam, sed gloriam dantes gratiæ eius : vel etiam *confitebuntur*, id est, laudabunt in æternum Dominum, sicut in æternum

Iiii

habi.



habitabant in domo eius cum vultu ipsius, videntes facie ad faciem, & fruenter visione eius. *Habitare cum vultu Dei*, est eum videre, & cognoscere sicuti est: ex vultu enim persona cognoscitur, nam si totum hominem videas, vultu solo excepto, non eum cognoscēs; sin autem vultum solum videas, reliquum corpus non videas, omnino cognoscēs.

## PSALMVS CXL.

*Titulus, & Argumentum.*

Psalmus David.

**H**ic Psalmus eiusdem argumenti est cum superiore, notat autem S. Ioannes Chrysostomus, decretum Patrum, dici solitum hunc Psalmum quotidie ad Vesperas, quemadmodum Psalm. 62. dicitur quotidie ad laudes matutinas. Vterq; igitur est ardens oratio ad Deum, sed ille matutinus fugat tenebras noctis, & conciliat nobis solem iustitiae: iste vespertinus abstergit maculas peccatorum interdum contritas, vt securi requiescamus in nocte.

## EXPLICAT. PSAL. CXL.

**D**omine clamaui ad te, exaudi me, intende voci meae, cū clamaui ad te.

Verba sunt corporis Christi, siue coetus fidelium inter hostium agmina constituti. *Domine clamaui ad te*, vt auxilium ferres inter tot pericula laboranti, & quia clamaui, id est, magna voce interiori magnoque affectu cordis inuocaui te, *exaudi me*. In Hebraeo est, *festina mihi*, id est, ad adiuuandum me festina, & sic re ipsa, & factis exaudi me. Neque solum hodie clamantem *exaudi me*, sed intendere voci meae, cum clamaui ad te, id est, quotiescunque clamaui ad te, tu quoque intende voci meae aures tuas.

*Dirigatur oratio mea, sicut incensum in conspectu tuo; eleuatio manuum mearum sacrificium vespertinum.*

Explicat nunc quid petat, & in quo velit exaudiri à Deo. Ac primum recto ordine, petit, vt Deus adiuuet eum in bene orando: nam, vt Apostolus dicit quid oremus nescimus, & pari ratione, quomodo oremus nescimus, nisi Spiritus adiuuet infirmitatem nostram. Petit ergo, vt Deus illi auxilio gratiae suae adsit, vt bene oret. Qualitates autem bonae orationis declarat similitudine thymiamatis, quod offerebatur in templo ex praecepto Dei, mane, & vesperti, Exod. 30. *Dirigatur, inquit, oratio mea sicut incensum*, id est, hoc primum peto, vt per gratiam tuam oratio mea dirigatur ad te ad modum thymiamatis. Porro thymiamata illud has habebat qualitates. Primo constabat ex quatuor generibus aromatum, thure, galbano, onyche, stacte, vt S. Hilarius monet: hinc efficiebatur odor suauissimus. Secundo, offerebatur in templi parte nobilissima, & interiori, quae dicebatur Sancta Sanctorum vbi erant tabulae testamenti, & altare aureum. Tercio, offerebatur per summum sacerdotem. Quarto, ponebatur super ignem, & inde excitabatur fumus recta sursum ascendens. Quatuor aromata sunt quatuor virtutes, Fides, Fiducia, Charitas & Humilitas, ex his componitur oratio Deo grauissima. Templum Dei est homo. *Vos estis*, inquit Apostolus, *templum Dei*, 1. Cor. 6. sed pars interior est anima in cuius mente est lex Domini, digito Dei scripta: & in cuius voluntate est altare aureum, cor videlicet mundum, & ornatum gratia Dei. Summus Sacerdos est Christus, per illum enim, vt aduocatum nostrum, semper orare debemus, & ideo singulas preces concludimus per Dominum nostrum Iesum Christum. Denique ignis, qui summum suauissimum, & directe sursum ascendentem excitat, est feruor desiderij: sed in recta ascensione notatur recta intentio, & ingis attentio, qui enim orant vt videantur ab hominibus, illi aura temporali detorqueant incensum, vt



non recta ascendat, illi etiam qui euagationes mentis habent, non dirigunt orationem ut debent: euagationes enim veluti flatus ventorum distrahunt, & dissipant fumum orationis, ut non recta sursum ascendat: & quia valde difficile est liberari ab omni euagatione mentis, ideo Propheta huius rei proprie meminit dicens, *Dirigatur oratio mea, sicut incensum in conspectu tuo.* Quod sequitur, *Elevatio manuum mearum sacrificium vespertinum;* eiusdem rei repetitio est: nam per *elevationem manuum*, oratio significatur, quia eleuando manus, orare solebant Hebraei, ut etiam nos facimus. Psal. 113. *In noctibus extollis manus vestras in sancta, & benedicite Dominum,* & Apostolus 1. Tim. 2. *Leuantes puras manus sine ira, & dissipatione.* Itaque à ritu eleuandi manus significatur oratio. Per *sacrificium vespertinum*, intelligitur oblatio incensi, quae vesperi fiebat. Est igitur sensus, *elevatio manuum mearum*, id est, oratio, quam eleuatis manibus fundo, sit veluti sacrificium incensi, quod ad vespeream offerebatur. Nisi magis placeat, per *sacrificium vespertinum*, intelligi maculationem Agni immaculati, quae vesperi fiebat. Cur autem Propheta optet, orationem suam similem esse sacrificio vespertino potius quam matutino, cum tam oblatio thymiamatis, quam agni maculatio fieret mane, & vesperi; ratio est, vel quia Psalmum hunc cecinit Dauid ad vespeream, ut etiam Ecclesia Christiana in vespere eundem Psalmum canit, vel quia Sacrificium vespertinum nobilius erat, quia figura erat sacrificij Crucis, quod ad vespeream factum est.

*Pone Domine custodiam ori meo, & ostium circumstantia labijs meis.*

Hæc est secunda petitio, quam exaudiri cupit à Domino, ut videlicet detur sibi donum loquendi, & tacendi, quando oportet: nam qui non offendit verbo, hic perfectus est vir, ut dicit S. Iacobus, c. 3. & aliud est tempus loquendi, aliud tacendi, ut dicitur Eccles. 3. Sumit autem Propheta, ut hæc explicet, metaphoram à custodia portarum domus, vel ciuitatis: duo enim sunt necessaria ad

hoc, ut exeant, qui debent exire, & non exeant, qui non debent exire, Ianitor, & ostium: nam ostium sine ianitore non sufficit, quia vel semper erit apertum, vel semper clausum: Ianitor sine ostio non facile potest custodire portam, nisi semper vigilet, & vires habeat ad impediendum, ne quis ingreditur, vel egrediatur ipso inuito: sed cum ostium, & ostiarius adsunt, omnia sunt tuta & facilia. Ait igitur, *Pone Domine custodiam ori meo*, id est, os meum est quasi porta vnde exeunt verba, & per verba exeunt cogitata, & facta, ideo rogo, ut adhibeas custodiam, ianitorem videlicet, qui diligenter custodiat. Et *ostium circumstantia labijs meis*, id est, quia solus ianitor egre custodire potest hanc portam, rogo etiam ut apponas ostium circumstantia, id est, ostium circumstans, siue ostium munitionis, id est, munitum, & forte, ut expugnari non possit, in Hebræo ad verbum legitur, *Custodiam super ostium labiorum meorum*, ut sensus sit, *pone custodiam ori meo*, custodiam, inquam: super ostium labiorum meorum: sed eadem sententia est. Porro ostiarius, & ostium significant in presenti duo dona Spiritus sancti: vnum ex parte intellectus, ut sciat homo quando, & quomodo, & quid loqui, vel tacere debeat: alterum ex parte voluntatis, ut audeat loqui quod oportet, & timeat loqui quod non oportet: quæ dona dicuntur Isaïæ 11. *Spiritus consilij & fortitudinis* quæ sunt fere eadem cum virtutibus, Prudentia, & Charitate. Non autem hæc ita petuntur à Deo, ut non debemus etiam nos diligentiam adhibere, ut custodiamus os nostrum, sed ut intelligamus, ipsam etiam diligentiam nostram donum esse Dei, & in nullo gloriemur, quando nostrum nihil est, ut monet S. Cyprius ad Quirinum c. 4.

*Non declines cor meum in verba malitiae  
et excusandas excusationes in peccatis.*

Hæc est tertia petitio, ut quoniam adhibita etiam omni custodia, tamen fragilitas humana facit, ut septies in die cadat iustus, & in multis offendamus omnes: Deus



auxilio suo nobis concedat, vt peccata libere confiteamur, ne dum excusando sani videri volumus, à cœlesti medico non sanemur. *Non declines*, inquit, *cor meum in verba malitia*, id est, non permittas, vt quando peccauimus, cor nostrum declinet in verba mendacij, & simulationis. *Ad excusandas excusationes in peccatis*, id est, ad excusanda peccata varijs prætexitibus: nam *excusare excusationes*, phrasi hebraica, est facere excusationes, id est, texere prætexitus, quomodo dicunt, *præliari prælia*, pro facere prælia, & *iudicare iudicia*, pro facere iudicia. In hebræo est verbum generale, *halal*, quod *operari* significat, itaq; verti poterat, *ad operandas operationes in peccatis*. Sed Septuaginta declarauerunt per, *operari*, hoc loco significati, *prætendere*, quod est idem cum *excusare*. Ipsi etiā Rabini docent, *halal*, non esse operari quomodocunque, sed operari ex occasione, & prætectu.

V.

*Cum hominibus operantibus iniquitatem, & non communicabo cum electis eorum.*

Quarta petitio est, vt custodias nos Deus à consuetudine, & familiaritate impiorum, multi enim innocentiam conseruarent, nisi in peruersos amicos, & sodales inciderent. Porro pars prima huius verticuli pendet à verticulo superiore, & hic est sensus, Non declines cor meum in verba malitiæ ad excusandas excusationes in peccatis, cum hominibus operantibus iniquitatem, id est, non patiaris me querere excusationes peccatorum, vt ij faciunt, qui iniqui sunt, vt non siam socius eorum. *Et non communicabo cum electis eorum*, id est, & sic per gratiam tuam adiutus non communicabo cum conuiujs eorum, sed fugiam ipsorum consortium. Illud, *non communicabo*, in Græco est, *non combinabo*, & sic legunt Sancti Hilarius, & Augustinus, sed idem est sensus, nam *combinare* est coniungi binos, & binos, vt cum duo socij coniunguntur in mensa, vel in opere aliquo. In Hebræo est, *non comedam*, id est, non conuiuabor, non assidebo in mensa. Itaque vnus textus ali-

um declarat, ac per hoc, *non communicabo*, idem est, ac si dixisset, *non communicabo in mensa*; & hoc ipsum magis declaratur ex verbis sequentibus, nam cum electis eorum, non significat, vt ij existimant, qui verba Hebraica non legerunt, cum viris electis: sed cum electis cibus, siue, vt vox Hebraica sonat, cum dulcibus cibus eorum. Itaque sensus est, *Non communicabo cum electis cibus eorum*, id est, non ero particeps familiaritatis, conuiuiorumque ipsorum. Quamuis enim vbique noceat malorum conuersatio, sed nusquam magis, quam in conuiujs, & comotationibus.

*Corripiet me iustus in misericordia, & increpabit me: oleum autem peccatoris non impinguet caput meum.*

Quinta petitio est, vt ex gratia Dei incidamus in amicos ex charitate corripientes, non in adulatores falsis laudibus blandientes, & decipientes. Et hoc vnum ex magnis Dei beneficijs est, vt inueniamus fideles amicos, qui vera nobis de nobis dicant, & nos ex magno Dei beneficio libenter eos audiamus, & ex corde gratias agamus. Nam apud eos, qui de Mundo sunt, & qui hoc Dei donum non acceperunt, *obsequium amicos, veritas odium parit*. Corripiet, inquit, *me iustus in misericordia*, id est, reprehendet, ac, vt vox Hebr. sonat, feriet me peccantem vir iustus, vt sanet, non iniustus, vt occidat, *in misericordia*, in charitate, quia miseretur languentis, non in iracundia, & felle amaritudinis, quia vleisci cupit iniuriam. Iste, inquam, *increpabit me*, seuerius castigans delicta mea, *oleum autem peccatoris non impinguet caput meum*. *Oleum peccatoris*, id est, vnguentum, quo suauiter & cum voluptate perungitur caput; significat blandilentiam adulatoris, qui peccata extenuat, vel excusat; imo etiam sub aliquo colore, vt benefacta laudat. In Hebræo explicatur vtrunque simul, & suauitas, & perniciēs adulationis: dicitur, enim *oleum veneni*, siue amaritudinis, vt vertit S. Hieron. & est in verbis elegans allusio: nam *venenum*, & *caput* eadem voce significantur: *ros enim*



enim, & caput, & venenum significat. Itaque ait, *oleum ros, non impinguet meum ros*. Neque est admittenda eorum expositio, qui utroque loco per ros, intelligi volunt caput, & per *oleum capitis*, accipiunt oleum principale; & pretiosum, & sensum esse volunt, *Corripiet me iustus in misericordia*, quia correptio fraterna est oleum principale, quod non destruit caput. Hæc, inquam, expositio non est admittenda, quia non solum repugnat vulgata editioni, sed etiam versioni S. Hieronymi, & Septuaginta Interpretum, & expositioni omnium veterum Patrum Latinorum, & Græcorum: neque obstat, quod pro *impinguet*, in Hebræo est, *franget*: nam non est certum, verbum, *iari*, significare, *franget*, cum desit litera aleph in fine, & cum Septuaginta, & S. Hieron. verterint, *impinguet*. Adde etiam, quod vox, *impinguet*, non repugnat voci Hebræicæ, quæ *frangere*, & *destruere*, significare dicitur, imo cum ea optime cohæret: nam ideo Septuaginta Interpretes non dixerunt, *liniat*, aut *perfundat*; quæ verba in bonum sonant, sed *impinguet*, quod sonat in malum; pinguedo enim deformat, & destruit caput, & prudentissime considerauerunt Septuaginta viri, oleo non posse frangi, aut destrui caput, quasi malleo contunderetur, sed destrui per deformationem, quam pinguedo adfert; ideo non dixerunt, non destruat; sed *non impinguet caput meum*.

VII. *Quoniam adhuc Oratio mea in beneplacitis eorum: absorpti sunt iuncti petra Iudices eorum.*

Hic versiculus omnium iudicio obscurissimus hunc sensum ex Chrysostomo habere potest, Non solum non communicabo cum impijs; sed adhuc oratio mea ad Deum est *in beneplacitis eorum*, id est, aduersus eorum vitia, & scelera, in quibus ipsi sibi placent. Sed ipsi breui peribunt, sicut Iudices eorum, id est, Principes eorum; & Duces aliorum ad malum, *absorpti sunt iuncti petra*, id est, allisi ad petras perierunt. In Hebræo est, *Præcipitati sunt ad manus petra*, &

sensus est idem: significatur enim velox interitus impiorum, qualis est eorum, qui absorbentur à fluctibus marinis, dum agitati ab vndis alliduntur ad scopulos. S. Augustinus existimat prædici conuersionem infidelium superborum, ut sensus sit, Veniet tempus, quando oratio mea, quæ est, *Dimitte nobis debita nostra, erit in beneplacitis eorum*, id est, placebit, & frequentabitur ab eis: nam Iudices eorum, Philosophi Gentiles, qui de virtutibus, & vitiis iudicabant, *iuncti petra*, id est, comparati ad Christum, *absorpti sunt*, euauerunt, & nihil sciuisse ostensi sunt; sed prior expositio est magis literalis, & communius recepta.

VIII. *Audient verba mea, quoniam potuerunt, sicut crassitudo terræ erupta est super terram.*

Reddit ad id quod dixerat, *Oratio mea in beneplacitis eorum*, & addit multos impios, qui sibi in peccatis complacebant, audituros verba sua, & per ea conuertendos esse ad Deum: quomodo enim terræ durities aratro scinditur super terram; sic humanum cor scinditur potentia, & efficacia verbi Dei. *Audient*, inquit, illi pro quibus oratio à me fiebat, *verba mea, quoniam ea verba potuerunt*, siue ut legit S. Augustinus, *præualuerunt*, efficacissima fuerunt ad conterenda corda eorum, sicut *crassitudo terræ erupta est super terram*, id est, sicut durities, & crassities terræ erumpi solet vi ligonis, aut aratri super terram. In Hebræo, & aliquibus Græcis habetur, *Audient verba mea, quoniam dulcia siue decora fuerunt*, sed idem est sensus, verba enim tunc sunt potentia, & efficacia, & prævalent in animis hominum, quando dulcia, & decora sunt, atque adeo placent, & delectant, & persuadent.

IX. *Dispata sunt ossa nostra secus infernum: quia ad te Domine, Domine, oculi mei: in te speravi, non auferas animam meam.*

Hæc est vltima petitio, quam exaudiri



initio Psal. postulauerat, vt videlicet Deus liberet animas nostras ab omni periculo tentationum. *Dissipata sunt*, inquit, *ossa nostra secus infernum*, id est, propter multitudinem, & grauitatem tentationum, virtus & fortitudo nostra, quæ per *ossa* significatur, ita dispersa: infirmata, & debilitata est, vt ad os inferni pene peruenerit, vt videlicet pene ad nihilum redacta sit: & quia in his omnibus *ad te Domine sunt oculi mei*, ad auxilium tuum respexi, *in te speraui*; oro vt non auferas animam meam, id est, non sinas tolli vitam meam, non patiaris me perire. Iuxta interpunctionem Hebraicam coniunguntur illa. *Sicut crassitudo terra erupta est super terram, dissipata sunt ossa nostra secus infernum*; vt sensus sit, *Quemadmodum* terra scinditur aratro, & rumpitur, ita vt partes terræ hinc inde spargantur, ita dissipata sunt ossa nostra secus infernum in hac magna tribulatione: sed nos interpunctionem Græcam, & Latinam sequuti sumus, quoniam interpunctio non est ab ipso Propheta apposita, sed ab interpretibus addita.

X.

*Custodi me à laqueo, quem statuerunt mihi, & à scandalis operantium iniquitatem.*

Declarat, vnde timeat mortem; ac dicit, se timere à laqueis; & à scandalis, id est, à tentatione Diaboli, & à malis exemplis hominum. *Custodi me à laqueo, quem statuerunt mihi* insidiatores, siue is laqueus sit concupiscentia carnis, siue concupiscentia oculorum, siue superbia vitæ: & *à scandalis operantium iniquitatem*, id est, ab exemplis carnalium, cupidorum, & superborum: quamuis in Hebræo sit potius repetitio eiusdem rei, id est, à laqueo quem posuerunt mihi, & à discipulis, siue laqueis operantium iniquitatem: tamen in sensu non est discrepantia: scandalum quoque est genus laquei, & discipula.

XI.

*Cadent in retiaculo eius peccatores: singulariter sum ego, donec transeam.*

Docet in fine, illos tandem casuros esse in retia Diaboli, qui amant peccata; se autem, sui similes, qui oderunt peccata, liberos euasuros: quæ admonitio demonstrat, hominem esse liberi arbitrij, & simul valde consolatur eos, qui timent Deum. *Cadent*, inquit, *in retiaculo eius*, id est, in rete principis venatorum qui est Diabolus, *peccatores*, id est, qui delectantur peccatis, qui sunt, & esse volunt peccatores. *Singulariter sum ego, donec transeam*, id est, ego autem solitarius ero, donec transeam omnes laqueos, & retia; de mundo non ero, quamuis in Mundo, vt peregrinus esse cogat, donec transeam ad patriam, ubi nulla erunt pericula. Per pronomen, *eius*, aliqui intelligunt Deum, vt sensus sit, peccatores capiendos retibus Dei ad supplicium. Ita Chrysostomus, & Theodoretus: sed quia illud, *eius*, est relatiuum ad aliquid antea nominatum, & Dei nulla mentio facta est; ideo probabilius est, referri ad Diabolum Principem peccatorum, vt sanctus Hilarius exponit. Illud autem, *singulariter sum ego*, sanctus Augustinus exponit de Christo, qui in passione fuit relictus solus, cum omnes discipuli fugerint, & in rete Diaboli per negationem, vel prodicionem, vel nimium metum, vel scandalum acceptum, aliquo modo inciderint. Ipse enim Dominus ait, *Omnes vos scandalum patiemini in me in nocte ista*, Matth. 26. & futurum est, vt *dispergamini in propria*, & *mo selum relinquatis*, Ioann. 16. Sed hæc expositio vera, & pia non videtur literalis; & ideo Chrysostomus potius in expositione literalis sequuti sumus: qui S. Ioannes Chrysostomus rectissime monet, non satis esse, si aliquo tempore singulares sumus, & solitarij, ac penitus segregati à moribus peccatorum; sed necesse esse, vt tales simus donec transeamus, per-

seuerantes vsque ad  
vitæ finem.



## P S A L M V S CXLI.

## Titulus, &amp; Argumentum.

Intellectus Dauid eum esset in spelunca, Oratio.

**T**itulus demonstrat tempus, & locum, & occasionem, & materiam Psal. Tempus fuit, cum fugisset à Saule ad Regem Achis, & ab illo etiam male habitus conuulisset se in speluncam Odollam solus, atque in maximo vita periculo constitutus, ut habemus l. i. Reg. c. 22. Locut, est ipsa spelunca Odolla, nam quod alij dicunt de spelunca Engaddi, de qua lib. i. Reg. c. 24. non est probabile: quia in hac secunda spelunca Saul potius in periculo vite fuit, quam Dauid. Occasio, fuit persecutio Saulis, & periculum à Rege Achis. Deniq; materia, siue argumentum, est oratio ad Deum, qua liberationem petit à periculo imminente. Sensus tituli hic est, Intellectus Dauid, id est, in hoc Psalmo declaratur prudentia, & sapientia Dauid, qui cum esset delitescens in spelunca, sapienter cogitauit, unicum remedium in tantis malis esse orationem ad Deum. Recte autem totus hic Psalmis altiore sensu refertur ad Christum filium Dauid, cum oraret in horto, vel in cruce desertus ab omnibus, & in mortis presentissima periculo constitutus.

## EXPLICAT. PSAL. CXLI.

**V**oce mea ad Dominum clamaui, voce mea ad Dominum deprecatus sum.

Effundo in conspectu eius orationem meam, & tribulationem meam ante ipsum pronuncio.

Hoc principium Psalmi nihil aliud continet, nisi argumentum, quod videlicet Dauid orationem fundat ad Deum: sed verba singula considerata sunt. Illud, *voce mea*, significat, Dauidem non orasse sola voce corporis sui, ut faciunt qui non intelligunt, vel non attendunt quid dicant; sed orasse

voce sua, quam ipse in corde formabat, & per organum corporis etiam foris emittebat. Illud, *clamaui*, significat, ut alias diximus, vehementiam desiderij. Illud, *deprecatus sum*, est explicatio clamoris: clamant enim ad Dominum etiam qui blasphemant, & maledicunt, sed non orant: hic autem precando, & inuocando clamabat. Illud, *effundo orationem in conspectu eius*, significat orationem illam factam fuisse, ubi solus Deus videbat, in spelunca, quasi in clauso cubiculo, ut Dominus postea monuit esse orandum: sed preterea significat precipuum clamorem fuisse in corde, ubi re vera solus Deus conspicit. Illud, & *tribulationem meam ante ipsum pronuncio*, est explicatio precedentium verborum: nam effundere orationem in conspectu eius, & tribulationem ante ipsum pronunciare, idem sunt: tunc enim effunditur oratio, cum tota paulatim ex vase cordis producit, ut ab aliquo videatur: hoc autem fit, cum tribulatio in oratione per partes ad aures audientis pronuntiatur.

In deficiendo ex me spiritum meum, & tu cognouisti semitas meas.

III.

Explicat, cur, & quando pronunciauerit tribulationem suam coram Deo. In deficiendo, inquit, *ex me spiritum meum*, cum ex me fere discederet spiritus meus vitalis, cum deficeret vita mea, & in vicinia mortis essem. Vox Hebraica, significat angustari, deficere, constringi, & operire seipsum, ut faciunt qui valde timent. Id autem optime Dauidi in spelunca latitanti, & in magno vite periculo constituto, sed verius conuenit Christo in horto, vel in cruce oranti. Sanctus Augustinus explicat sanctis Martyribus pro Fide agonizantibus. *Et tu cognouisti semitas tuas*, id est, oraui cum deficeret spiritus meus, & oraui ad te, quia tu omnium optime cognouisti semitas meas, actiones, & studia mea, & nosti, quam sine ulla iusta causa hæc patior.

In via hac, qua ambulabam, absconderunt laqueum mihi.

IV.

Do.



Docet, afflictionem suam primum incepisse ab insidiis inimicorum, deinde aperta violentia. Saul enim sæpe procurauit mortem Davidis per insidias, mittens eum ad prælia, & sperans in præliis occidendum, sed cum id non succederet, aperta vi illum aggressus est. Sic etiam Dominum nostrum sæpissime tentarunt capere in sermone, ut eum perderent, sed cum sapientia vinceret malitiam; violenter ceperunt, & per Pilatum crucifigi postularunt. *In via hac, qua ambulabam, id est, in via iustitiæ, & mandatorum Dei, in qua ambulabam, in ipsis semitis: quas tu optime nosti, absconderunt laqueum mihi.* Explicemus hoc exemplis. Saul obtulit filiam suam Davidi in coniugem, modo ille interficeret ducentos Philistæos, cum quibus tunc bellum iustum erat populo Dei. Id autem fecit Saul, sperans Davidem in eo prælia interficiendum: sed ille, à Deo adiutus obediuit Regi, & progressus ad prælium ducentos Philistæos interfecit. Sic etiam Pharisei obseruabant Christum, an Sabbato curaret, ut postea dicerent, *Non est hic homo à Deo, qui Sabbatū non custodit*: ita ponebant laqueos in via mandatorum Dei: sed ille curabat, & ostendebat, ea curatione non violari Sabbatum; sicut vere non violabatur, cum essent illa opera non seruilis, sed diuina, sic alias oblata adultera ponebant laqueos in via iustitiæ, dicentes, *Hanc mandauit Moyses lapidare, tu quid dicis?* Norat hoc loco S. Augustinus, in ipsa via Domini non posse poni laqueos, sed iuxta viam, ut dictum est in Psal. 139. *Iuxta iter scandalum posuerunt mihi*; vnde & Ecclesiasticus cap. 9. dicit, *Ignoras, quia in medio laqueorum ingrederis?* Sunt enim laquei à dextris, & à sinistris, in medio est via iustitiæ. Quod ergo hic dicitur, *In via absconderunt laqueos*, intelligendum est, opinione ipsorum, non re vera; nam cum illi sint extra viam, & existiment se esse in via, ponunt laqueos iuxta viam, existimantes se ponere in via: sed vir iustus non declinans à via iustitiæ, neque ad dexteram, neque ad sinistram, laqueos omnes euadit.

*Considerabam ad dexteram, & videbam; & non erat qui cognosceret me.*

Hæc etiam pertinent ad violentiam. Inimici enim, quibus insidiæ non profuerunt, conuertunt se ad vim apertam. In illa autem pressura, *Considerabam*, inquit, *ad dexteram*, id est, ad auxilia amicorum, & *videbam*, cum quis mihi socius, & amicus adesset: *& non erat, qui cognosceret me*, id est, nullus mihi notum se esse cōfiteri ausus est. Hæc Davidi conueniunt, qui Saulis persecutionem fugiens ad Regem Achis peruenit, sed & ille inimicum se ostendit; proinde solus in speluncam se contulit. Sed apertius Christo accommodantur, qui in passione multos videbat à sinistris, id est, inimicos, & aduersarios: à dextris autem, id est, amicos, & notos nullos habuit. Nam & Euangelista dicit, *Stabant autem omnes noti eius à longe.* & Petrus ipse, qui præcipuus erat amicorum, cum iuramento dixit, *Non noui hominem hunc*, Recte igitur Dominus dicebat, *Non erat, qui cognosceret me.* In Hebræo sunt verba in finitui modi, considerare, & videre: sed modus infinitus deseruit etiam aliis modis, ac præsertim indicatiuo: & sensus etiam esse potest, seruato modo infinito, *Erat mihi considerare, & videre*, id est, considerabam, & videbam, quo modo Germani, & Turcæ, qui non tenent perfectæ linguam Italicam, vel Latinam, dicunt, *Io stare Todeſco, Io stare Turco*, & passim vtuntur modo infinitiuo pro indicatiuo.

*Perijt fuga à me, & non est qui requirerat animam meam.*

Ostendit, se in iis angustiis fuisse, ut non solum ab aliis auxilium habere non posset, sed neque fuga seipſe iuuare posset. *Perijt*, inquit, *fuga à me*, id est, nullum remanet effugium. Et non est qui requirat animam meam, id est, non inuenitur, qui sollicitus sit de vita mea, ne pereat. Et quidē David quebatur sibi aditū ad fugam corporalem non patere, quia fugere non poterat: sed Christus dicit, petiisse à se fugā, quia fugere nolebat, & ipse sibi, & Pater ei fugam interdixerat.

Fuga



Fuga enim non minus perit ab illo, qui non potest, quam ab illo, qui non vult fugere. Et verè non erat, qui requireret vitam Christi, vt eam seruaret, cum ipse idem dixisset: *Ego pono animam meam: & Bonus Pastor animam suam dat pro ouibus suis*, Io. 10. & Patri dixerit, *Deus meus vt quid dereliquisti me?* Matt. 27.

VII.

*Clamaui ad te Domine, dixi, tu es spes mea, portio mea in terra viuentium.*

Exclusus Dauid ab omni humano auxilio, ad Deum recurrit, cui nihil difficile est; & quoniam vir erat spiritualis, & nouerat Deum aliquando amicos suos in terra peregrinationis huius affligere, vt in patria gloriosius coronet; dicit, *Clamaui ad te Domine, dixi, tu es spes mea*, hic in peregrinatione; *portio mea*, hereditas videlicet, *in terra viuentium*. Sed cum ad Christum hæc referuntur, accipienda sunt pro corpore eius, quod est Ecclesia; vel, si in persona propria Christus loquitur, accipienda sunt de expectatione resurrectionis, & gloriæ corporis: quasi dicat. *Quia non est qui requirat animam meam*, id est, vitam meam corporalem, ne pereat; *clamaui ad te Domine Pater, dixi, tu es spes mea*, id est, expectatio mea, vt non des sanctum tuum videre corruptionem; sed ostendas illi vias vitæ: tu quoque es *portio mea in terra viuentium*, id est, tu facies, vt caro mea glorificata per resurrectionem, adipiscatur perascensionem hereditatem suam in superna Hierusalem, quæ est terra viuentium.

VIII.

*Intende ad deprecationem meam, quia humiliatus sum nimis.*

IX.

*Libera me à persequentibus me, quia confortati sunt super me.*

Duplici argumento petit à Deo liberationem, cum quia ipse nimium depressus sit, tum quia inimici eius nimium sint exaltati, & aduersum se innocentem viribus præualuerint. *Intende ad deprecationem meam*, & tandem exaudi me, *quia humiliatus*, id est, depressus, & afflictus sum valde. *Libera me à persequentibus me, quia confortati sunt*, id

est, roborati sunt, & viribus aucti, vt facile præualere possint. Hæc Dauid mentio dicitur, cum ipse solus lateret in spelunca, & hostis eius Saul exercitum armatum duceret Christus autem plane ad literam dicere poterat: *Humiliatus sum nimis, quia humiliatus semetipsum, factus obediens usque ad mortem, mortem autem crucis*. Item humiliatus erat nimis, cum penderet inter latrones, cui iure conuenit sedere super Cherubim. Verè etiam inimici eius confortati erant valde, quando venit hora ipsorum, & potestas data est tenebris, vt in ipsum Solem iustitiæ ad tempus præualere viderentur.

X.

*Educ de custodia animam meam ad confitendum nomini tuo: me expectant iusti, donec retribuas mihi.*

Quod attinet ad Dauidem, S. Ioannes Chrysostomus intelligit per custodiam, tribulationes, & afflictiones, ob quas se in speluncam abdiderat, vt sensus sit. *Educ me de his afflictionibus*, vt de hac spelunca egressus, & liberè vbique discurrens, laudem nomen tuum. Id enim expectant omnes iusti, vt à tua prouidentia tribuatur mihi innocenti liberatio. Sed fortasse Dauid, vt vir sanctus, & à Deo mirificè illustratus altius aspirabat, & de mortali corpore, tanquam de custodia educi desiderans, cum Apostolo dicebat. *Quis me liberabit de corpore mortis huius?* Illi enim verè cōfitentur nomini Domini, qui illuc ascendunt, vbi qui habitant, in secula seculorum laudant Dominum: quod confirmatur verbis sequentibus. *Me expectant iusti, donec retribuas mihi*: expectabant enim Prophetam iustum, animæ sanctorum Patriarcharum in Limbo, donec requies tribueretur ei: & Angeli in cælo, donec vera, atque æterna felicitas retribueretur meritis eius. Sed quod attinet ad Christum, orate educi de custodia corporis passibilis & animalis, & induere per resurrectionem corpus impassibile & spirituale, ad confitendum nomini Domini, vt qui laborauerat prædicando populis, deinceps requiescat laudando Patrem. Atque vt sanctus Augustinus,

Kkkk

stinus,



stinus, sanctus Hieronymus, & sanctus Hilarius docent, Christo maximè proprie conuenit quod sequitur. *Me expectant iusti, donec retribuas mihi*: omnes enim iusti, & qui mortui fuerant ab origine Mundi, & qui uiebant in carne, ut Apostoli, alique fideles discipuli, expectant maximo desiderio Christum resurgentem, & debita retributione gloriæ exaltatum; quia ex plenitudine gloriæ eius omnes accepturi erant: nam quem admodum dicit S. Ioannes cap. 7. *Nondum erat spiritus datus quia nondum Iesus erat glorificatus*: sic etiam dicere possumus, nondum animæ Sanctorum ex carcere Limbi ad Regna celorum ascenderant, quia Rex gloriæ Christus in gloriam suam nondum introierat. Ex hebræo aliqui vertunt. *Me coronant iusti*, pro me expectant, sed vox, *cathar*, non solum coronare, sed etiam expectare, & sustinere significat, ut perspicuum est ex cap. 36. Iob. ver. 2. nam quod legimus, *Sustine me*, in hebræo est. *cather li.*

כתר

כתר לי

bus, atque hunc sensum persequitur S. Ioannes Chrysostomus.

## EXPLICATIO. PSAL. CXLII.

**D**omine exaudi orationem meam, auribus percipe obsecrationem meam in veritate tua: exaudi me in tua iustitia.

Postulat initio Psalmi Dauid exaudiri in veritate, & in iustitia, & non explicat, in qua petitione exaudiri velit, quia præsupponit, Deum intelligere, peti à se remissionem culpæ commissæ, ob quam puniebatur. Intelligebat autem Deus hoc cum petere, & in hoc exaudiri velle, tum quia videbat desiderium cordis eius, tum etiam fortasse ex gemitu, & suspiriis veræ contritionis. Sic enim S. Maria Magdalena non legitur postulasse verbis remissionem peccati; sed ex lachrymis, quibus pedes Domini rigabat, intellexit Dominus quid peteret, & ait, *Remittuntur tibi peccata tua*. Ergo corde contrito Dauid, & interno gemitu petens culpæ remissionem dicit, *Domine exaudi orationem meam*, quam tu benè intelligis, quæ sit: & id ipsum repetens addit. *Auribus percipe obsecrationem meam*, in veritate tua, id est iuxta fidelitatem tuam, qua seruas promissâ tua de remissione pœnitentibus danda. Quod ipsum iterum repetit, cum addit. *Exaudi me in tua iustitia*, ubi per iustitiam intelligit fidelitatem, quæ est pars iustitiæ, quam paulò antè veritatem vocauit, S. Ioannes Chrysostomus intelligit per iustitiam, benignitatem, qua vertitur Deus erga veros pœnitentes: idè enim notat; Prophetam non dixisse. *Exaudi me in iustitia*, sed, *in tua iustitia*, qua videlicet uti soles erga pœnitentes, quæ non tam iustitia, quam ineffabilis benignitas est. Si quidem Deus ubi viderit pœnitentiam, ubi audierit confessionem, continuò indulget offensas. *Dic tu prior*, inquit per Isaiam ca. 43. *iniquitates tuas, ut iustificeris*. Iudices homines quarant confessionem Rei, ut eum damnent; Deus quærit, ut absoluat. Deui-

## PSALMVS CXLII.

## Titulus, &amp; Argumentum.

Psalmus Dauid, quando cum filius suus persequeretur.

**I**n hebræo solum habetur, Psalmus Dauid, cetera verba explicandi argumenti gratia Septuaginta interpretes addiderunt, ut sanctus Hilarius affirmat. Quamuis autem Patres latini hunc Psalmum exponant de passione Christi, quem quasi alterum Dauidem persequeretur Iudas, ut alter Absalon secundum Augustinum; vel populus Iudaicus secundum Gregorium: tamen dubitari non debet, quin ad litteram exponi possit de ipso Dauid, qui persecutionem Absalonis, pœnam peccati sui esse agnoscens, peccata sua deplorat, & misericordiam à Deo postulat. Hinc enim Ecclesia Catholica hunc Psalmum inter septem Pœnitentiales numerat, quia præscribit Dauid exemplo suo formam precandi veris pœnitenti-



Deniq; pater filij prodigi, per quem intelligitur Deus, mox vt vidit reuertentem, filiū, & audiuit, *Pater peccauit in calum, & coram te, cecidit super collum eius, & osculatus est, iussit afferri stolam primam, annulum, calceos, occidi vitulum saginatum, &c.* Hæc expositio ferè eadem est cum ea, quam supra attulimus: nam iustitia illa, qua Deus promissam indulgentiam penitentibus exhibet, nihil est aliud, nisi fidelitas præstandæ benignitatis eximie. Sanctus Augustinus per iustitiam Dei, intelligit iustitiam, quam non ex nostris meritis, sed ex gratia Dei habemus: quæ sententia vera est, sed prior magis conuenit literæ.

II.

*Et non intres in iudicium cum seruo tuo, quia non iustificabitur in conspectu tuo omnis viuens.*

Petit remissionem peccati ex promissione, & fidelitate Dei: nunc addit aliud argumentum ex conditione & fragilitate generis humani. *Non intres in iudicium cum seruo tuo*, id est, noli mecum iudicio contendere, neque enim ego resistere audebo, neque me iustum dicam; sed peccatum meum confitebor. *Quia non iustificabitur in conspectu tuo omnis viuens*, id est, quia non ego solus, sed omnis viuens cadet causâ, si tecum iudicio contendere voluerit. Omnis enim viuens, aut est peccator, aut iustus in via, aut iustus in patria. Qui peccatores sunt, vt homicidæ, adulteri, & similes, poterunt quidem iustificari coram hominibus, apud quos aliorum crimina sæpè occulta sunt, vel iuridicè probari non possunt: sed in conspectu Dei non iustificabuntur, quia Deus videt corda, & conscientias, & ex ipsius conscientie testimonio conuincet eos. Qui iusti sunt, sed adhuc in via, non iustificabuntur in conspectu Dei, quoniam non audebunt se iustificare; sed cum Apostolo dicent, 1. Corinth. 4. *Nihil mihi conscius sum, sed non in hoc iustificatus sum, qui enim indicat me Dominus est.* For-

tasse enim ille videt in me, quod ego non video: & cum Iob cap. 9. dicere debeo, *Si habuero quidpiam iustum, non respondebo, sed meum iudicem deprecabor.* Item non iustificabuntur in conspectu Dei, quoniam intelligunt iustitiam suam, non à se acquisitam, sed à Deo donatam esse, & ideo non se iustificabunt coram Deo, quasi ex se iusti sint, sed gratias agent iustificatori suo. Denique non iustificabuntur in conspectu Dei, quoniam etiam si iusti sint, quia criminibus carent, tamen etiam peccatores se esse intelligunt, quia peccatis quotidianis non carent, & dicunt cum alijs sanctis, *Dimitte nobis debita nostra*, Matthæi 6. & si dixerimus, *quia peccatum non habemus, nos ipsos seducimus*, 1. Ioan. 1. Qui iusti sunt in patria, & criminibus, & peccatis non solum carent, sed etiam inquinari non possunt; non iustificabuntur in conspectu tuo, tum quia iustitiam suam non sibi tribuunt, sed Deo, à quo illam habent, tum quia tanta est puritas Dei, vt comparatione eius omnis alia iustitia iniustitia esse videatur. *Stella enim non sunt munda in conspectu eius*, Iob. 25. Sed quoniam hæretici, Lutherani, & Calviniani, ex hoc loco probare contendunt, nullam esse in homine iustificatio veram iustitiam, sed solum imputatitiam & omnia opera iustorum esse peccata mortalia, & digna supplicio æterno, si à Deo imputarentur: obseruandum est, Dauidem non dixisse, nullum esse verè iustum; sed contra dixisse in Psalm. 17. *Et retribuet mihi Dominus secundum iustitiam meam, & secundum puritatem manuum mearum retribuet mihi: Quia custodiui vias Domini, nec impiè gessi à Deo meo: Et ero immaculatus cum eo, &c.* & in Psalm. 118. *Beati immaculati in via, qui ambulant in lege Domini.* Neque hoc loco dixisse eundem Dauidem, nullus verè iustificabitur, sed, non iustificabitur in conspectu tuo: quod intelligunt Patres. Vel quia iustitia iustorum vera quidem est, sed ab ipsis non est, quasi proprijs viribus acquisita, sed à Deo gratis donata. Ita sanctus Augustinus hoc loco: vel quia

Kkkkk 2



iustitia eorumdem iustorum vera, sed non pura est, cum admista sit peccatis venialibus Ita sanctus Gregorius hoc loco Sanctus Hieronymus in epistola ad Ctesiphonem, & sanctus Augustinus in libro de perfectione iustitiae. Vel denique quia etiam si vera, & pura esse absolute, tamen comparata ad iustitiam Dei, increatam, & infinitam, iustitia esse non videtur, quomodo lux lucernae coram Sole non lucet. Ita sanctus Hilarius, sanctus Hieronymus, & alij hoc loco, & sanctus Bernardus serm. 5. de verbis Isaiae. Atque hoc est, quod legimus Iob. 4. *Nunquid homo Dei comparatione iustificabitur?* & cap. 9. *Verè scio quod ita sit, & quod non iustificabitur homo compositus Deo.* In quem locum vide S. Augustinum in libr. ad Orosium contra Priscillianistas, & Origenistas cap. 10.

III. *Quia persecutus est inimicus animam meam: humilavit in terra vitam meam.*

Hæc est tertia ratio, quam adducit ad impetrandam remissionem peccatorum, quæ sumpta est ex gravitate tentationis: non enim sponte sua, & nullo tentante peccavit, ut fecerunt Angeli reprobi, qui propterea remissionem peccati non inuenerunt: sed gravissima persecutione inimici nostri Diaboli, qui tanquam leo rugiens circuit quærens quem deuoret, prostratus fuit, & deiectus ab altitudine innocentiae; ad imum peccati lethalis. Itaque illa particula causalis, quia, iungenda est cum verbis illis, *exaudi me in tua iustitia*: quasi dicat: Exaudi me, quia es iustus, promissa adimplens: *quia non iustificabitur in conspectu tuo omnis viuens: quia persecutus est inimicus animam meam*, sollicitando ad adulterium, & tentando ad homicidium, & humilavit, prostravit, abiecit vitam meam usque ad terram, quia me vilem, & contemptibilem reddidit in conspectu tuo, & sanctorum Angelorum: & rursus humiliavit ad terram, quia terræ amatorem fecit, qui antea in cælestibus conuersabatur. Hæc

expositio communis est SS. Patrum, Chrysostomi, Augustini, Gregorii, & aliorum.

IV. *Collocavit me in obscuris, sicut mortuos seculi: & anxius est super me spiritus meus: in me turbatum est cor meum.*

Pergit in explicatione calamitatum, quas Diabolica persecutio per peccatum adfert. Postquam enim animam humiliavit ad terram, id est, terrenis cupiditatibus implicauit, in obscuris eam collocat, in tenebris videlicet spiritualibus, excæcans oculos interiores, ut falsa bona amplectatur pro veris; ut voragine, & præcipitia non aduertat; ut viam, quæ ducit ad vitam, omnino non videat; denique in ijs tenebris collocat, in quibus versantur mortui seculi, id est, iam dudum mortui, siue à seculo mortui, vel ut vertit S. Hieronymus, antiqui mortui, in quibus ne vestigium quidem oculorum remanet. Est enim hæc amplificatio tenebrarum spiritualium, in quibus versantur amatores mundi. De quibus tenebris loquitur Apostolus ad Ephes. 4. *Tenebris obscuratum habentes intellectum, alienati à via Dei, propter ignorantiam, quæ est in illis; propter cæcitatem cordis ipsorum.* & cap. 6. *Non est nobis colluctatio aduersus carnem, & sanguinem, sed aduersus principes, & potestates, aduersus Mundi rectores tenebrarum harum.* quamuis fortasse non sit dicenda amplificatio tenebrarum spiritualium, cum tantæ sint, ut nihil addi posse videatur. Quæ enim maior obscuritas mentis, quam propter momentaneam voluptatem contemnere felicitatem æternam? Sequitur, *Et anxius est super me spiritus meus*; quibus verbis indicat, se ex diuino lumine cœpisse videre tenebras suas; & abiectionem animæ ad res terrenas diligendas: & inde consecutam esse anxietatem spiritus ex terrore diuini iudicii; & ex misero statu, in quem cecidit propter peccatum. Atque hoc est initium penitentiae. *Anxius est super me spiritus meus*; in hebræo est eadem vox, quæ in Psalmo. *supra*



superiore, *In deficiendo spiritum meum.* Itaque significat magnam anxietatem, quæ ferè ad defectum vitæ perducebat, nisi spes misericordiæ consolationem attulisset. Illud, *super me*, significat, super meam miseriam, super maximum languorem meum *anxiatus est spiritus meus.* Deinde idem repetit alijs verbis, *In me turbatum est cor meum*: nisi quod in me, non est idem, quod super me; sed significat hoc loco, in medio mei, siue, intra me. Itaque sensus est, Spiritus meus hanc miseriam considerans, valde anxius est, & cor meum in intimis meis conturbatum est, non leuiter, aut in superficie, sed seriò, & in profundo cordis expauescere, & conturbari corpi. Ad huius poenitentis imitationem debent, qui liberari cupiunt, seriò, & profundè cogitare detrimenta peccati.

*Memor fui dierum antiquorum, meditatatus sum in omnibus operibus tuis, & in factis manuum tuarum meditabar.*

Docet nunc, vnde ex tanta anxietate respirare cœperit, & nobis exemplo suo viam ostendit ad reparationem post lapsum. *Memor*, inquit, *fui dierum antiquorum*, id est, recogitare corpi misericordiam tuam, quam ab initio Mundi Patribus nostris exhibuisti, portans infirmitates eorum, sanans languores, & parcens iniquitatibus. Nec solum obiter memor fui, sed *meditatus sum in omnibus operibus tuis*, id est, diligenter consideraui omnia opera tua siue naturæ, siue gratiæ, & in omnibus misericordiam tuam eminere vidi: & idipsum iterum repetens addit, *In factis manuum tuarum meditabar*, id est, in operibus tuis considerandis exercebar. Poscent hæc cum sancto Gregorio referri ad antiquos dies, quibus in statu innocentie homo fruebatur delictis paradisi, & inde magis intelligitur miseria captiuitatis: sed prior expositio, in qua Chrysostomum secuti sumus, videtur literæ magis inhaerere.

*Expandi manus meas ad te: anima mea sicut terra sine aqua tibi.*

Spe concepta, ex consideratione misericordiæ ad Deum aspicere, & suspirare incipit. *Expandi*, inquit, *manus meas in oratione ad te*: quoniam anima mea ita fuit gratiam tuam, vt terra arida pluuiam. Quæ aptissima similitudo est. Nam sicut terra sine aqua, neq; consistentiam habet, neq; vestitur herbis, neque ornatur floribus, neque producit fructus, sed est inanis & vacua: sic anima sine gratia Dei non resistit temptationibus, sed sicut puluis iactatur à facie venti, neque vestem habet iustitiæ, neque ornamentum sapientiæ, neque fructus operum bonorum: quod totum intelligit poenitens experimento suo, & ideo magis fuit, quod melius cognoscit.

*Velociter exaudi me Domine, defecit spiritus meus.*

Turpitudine peccati, quam agnouit, & desiderium gratiæ urget animam poenitentis, vt non possit ferre moras reconciliationis, atque hoc est signum veræ contritionis, quando peccator non differt confessionem, & alia remedia de die in diem, sed cito currit ad medicum animæ, quomodo agrotus in periculo constitutus cito medicum accersiri iubet, & sitibundus cito currit ad aquas. *Velociter*, inquit, *exaudi me*, non possum diutius ferre turpitudinem meam, citò laua me ab iniquitate mea; sana velociter languorem meum, quia *defecit spiritus meus*, id est, in extremis ago, vix spiritum duco: ponitur enim præteritum pro præsentem, amplificandi gratia.

*Non auertas faciem tuam à me, & similis ero descendentibus in lacum.*

Idem petit alijs verbis, *Non auertas faciem tuam à me*, id est, nec recuses reconciliari mihi, ne fias inexorabilis, conuerte faciem benignitatis tuæ ad me misericorditer respiciendum; ne fiam similis pereuntibus, qui descendunt in lacum profundissimum gehennæ. Quibus enim Deus non ignoscit, neque donat vitam gratiæ, ij pereunt in æternum. Illud, & sumitur pro, quia, vt sæpè notauimus, & sensus est. *Non auertas*  
Kkkk 3 *faciem*



*faciem tuam à me, quia si auerteris similis ero  
descendentibus in lacum.*

IX. *Auditam fac mihi mane misericordiam  
tuam quia in te speravi.*

Rursus ad idem redit, sed alia ratione. *Auditam fac mihi mane*, id est, cito, velociter, incipiente die, *misericordiam tuam*: vel per, *mane*, intelligit lumen gratiæ quod succedit tenebris peccati in reconciliatione, quasi dicat, satis diu fui, te irascente, in nocte peccati: incipiat te miserante dies gratiæ, & audiam in corde meo vocem tuam dicentem mihi, *Salus tua ego sum. Quia in te speravi*, id est, gratia spei, quam iam accepi, mereatur gratiam remissionis. quamvis enim peccator ex se non mereatur aliquid apud Deum, tamen ipsa gratia meretur augeri, vt aucta mereatur, & perfici, vt loquitur S. Augustin. in epist. 106. & quemadmodum eo loco S. Augustinus dicit, per Fidem impetrari iustificationem: ita etiam dici potest de Spe, quod videlicet impetret iustificationem.

X. *Notam fac mihi, viam, in qua ambulem,  
quia ad te leuavi animam meam.*

Pœnitens Dauid accepta iustificatione, timens ne iterum cadat, in hac extrema parte Psalmi petit sollicitè gratiam cognoscendi viam iustitiæ, & per eam ambulandi. Atque hoc etiam signum est veri pœnitentis, quando post reconciliationem, studet vitam instituere, vt decet amicū & filium Dei. *Notam*, inquit, *fac mihi viam, in qua ambulem*, id est, illumina mentem meam, vt cognoscam viam iustitiæ, in qua ambulare debeo, vt ad te perueniam. Siquidem *ad te leuavi animam meam*, id est, ad te direxi cursum meum, renunciaui secularibus desiderijs, te vnum desidero: ideo lumen sapientiæ quero, ne aberrarem à te. Potest etiam cum Chrysostomo, illud, *ad te leuavi animam meam*, intelligi per spem, vt sensus sit, à te pendeo, in te confido.

XI. *Eripe me de inimicis meis Domine, ad  
te confugi, doce me facere voluntatem  
tuam, quia Deus meus es tu.*

Persistit in eadem petitione, rogans liberari à tentationibus Diaboli, qui sæpè conatur obscurare mentem, ne videat viam iustitiæ. Concupiscentiæ siquidem à Diabolo excitatæ faciunt, vt res aliter appareant, quàm sint, & inde contingat error iudicij. *Eripe me*, inquit, *de inimicis meis*, id est, eripe me à tentationibus inimici; quoniam ad te confugi, & illi renuntiaui. *Docere me facere voluntatem tuam*, id est, adiuua lumine tuo, vt repulsis tentationibus veram viam inueniam, & sic intelligam; quæ sit voluntas tua bona, beneplacens, & perfecta. *Quoniam Deus meus es tu*, id est, debeo, & cupio tibi vni seruire; quoniam tu es Deus meus, principium & finis omnium bonorum meorum, à quo naturam, & cætera bona animæ & corporis accepi, & à quo beatitudinem; & gloriam sempiternam expecto.

*Spiritus tuus bonus deducet me in terram rectam: propter nomen tuum viuificabis me in equitate tua.*

Petit sapientiam, quæ ad intelligentiam pertinet: nunc petit charitatem; quæ pertinet ad voluntatem: tunc enim verè ambulamus per viam iustitiæ, quando scimus, & volumus bene agere. *Spiritus tuus bonus*, id est, non spiritus meus, sed tuus, qui bonus est, & de quo Saluator dicit Lucæ 6. *Quanto magis Pater vester dabit, spiritum bonum petentibus se? Spiritus bonus est Spiritus sanctus, essentialiter bonus, per quem diffunditur charitas in cordibus nostris*, Rom. 5. & hic facit, vt velimus, & operemur, & de hoc dicitur Ezech. 36. *Ponam spiritum meum in medio vestri, & faciam vt ambuletis in preceptis meis*. Hic igitur *Spiritus deducet me in terram rectam*, id est, in viam planam, & directam, quæ est lex Domini rectissima & planissima. Posset etiam per, *terram rectam*, intelligi patriam cœlestis, quæ est terra viuentium, in qua iustitia inhabitat, & in qua obliquitas vitiorum nullum locum habet. Sequitur, *Propter nomen tuum viuificabis me in equitate tua*; vt ostendat, iustificationem, quæ est quæ-



quædam viuificatio spiritualis, non ex meritis proprijs, sed ex dono gratiæ Dei nobis cōtingere. Propter nomen tuum, inquit, id est, propter gloriam tuam ex gratia tua viuificabis me, in equitate tua, id est, in iustitia tua; sic enim est in hebræo. Per iustitiam autem potest intelligi veritas, siue fidelitas in seruandis promissis: potest etiam intelligi iustitia, quæ nos iustificat. Deniq; potest intelligi lex Domini iustissima, quomodo intelligitur illud Psal. 118. vers. 40. In equitate tua viuifica me.

*Educes de tribulatione animam meam, & in misericordia tua disperdes inimicos meos.*

*Et perdes omnes, qui tribulant animam meam, quoniam ego seruus tuus sum.*

Concludit prædicens salutem, & liberationem suam, & perditionem omnium inimicorum suorum: quod sine dubio adimplebitur in vltimo Iudicio: & quod de se Dauid Propheta dicit, dici etiam potest de omnibus veris Dei seruis, qui vel innocentiam custodierunt, vel per veram poenitentiam ad viam iustitiæ redierunt.

## PSALMVS CXLIII.

*Titulus, & Argumentum.*

*Psalmus Dauid aduersus Goliath.*

**I**n hebræo habetur solum, Psalmus Dauid: quæ sequuntur, addita esse à Septuaginta Interpretibus testatur sanctus Hilarius: sed quoniam Psalmus videtur meminisse Regni ipsius Dauid versus tertio, ubi dicit. Qui subdit populum meum sub me; existimant aliqui, verba illa, aduersus Goliath, non esse conformia Psalmo: & liberius etiam putant hæc verba posse contemni, quod Theodoretus testatur ea non haberi in exaplis Origenis, ac proinde non esse ex interpretatione Septuaginta Seniorum. Sed respondere possumus, Psalmum scriptum esse proprie pro victoria aduersus Go-

liath, & verba illa. Qui subdit populum meum sub me; non intelligi de Regno, sed de principatu militis: fuit enim Dauid Dux belli multo antea quam Rex fieret: neque verum est, quod aliqui dicunt, hunc Psalmum esse eiusdem argumenti cum Psalmo septimodecimo; ut patet ex versu octauo huius Psalmi. Itaque existimamus, hunc Psalmum compositum fuisse paulo post victoriam aduersus Goliath, ut habet titulus. Quod autem attinet ad versionem Septuaginta, maiorem fidem habere debemus S. Hilario, qui affirmat, hæc addita à Septuaginta viris, quam Theodoretus, qui negat. Sanctus enim Hilarius in explicatione Psalmorum Origenem sequutus est, ut testatur S. Hieronymus in lib. de Scripturis Ecclesiasticis: quare credibile est, Hilarium in Origine legisse, verba illa addita fuisse à Septuaginta viris: nemo autem melius nouit, quid esset in versione Septuaginta, qua habetur in exaplis, quam Origenes, qui exapla collegit. Adde quod cum hic titulus legatur in omnibus libris latinis, & à S. August. & alijs exponatur, non est vlla ratione tollendus, aut contemnendus. Argumentum Psalmi ex Hilario, est victoria Christi aduersus Diabolum: ex Augustino, victoria Ecclesiæ aduersus eundem Diabolum: ex Theodoro victoria Machabæorum aduersus Antiochum. Sed nos cum sancto Ioan. Chrysostomo existimamus, ad litteram cani victoriam Dauid aduersus Goliath, ut titulus docet: spiritualiter prædici victoriam Christi, & Ecclesiæ aduersus Diabolum.

## EXPLICAT. PSAL. CXLIII.

**B**enedictus Dominus Deus meus, qui docet manus meas ad prælum, & digitos meos ad bellum.

Laudat Propheta Deum, & gratias illi agit, quia dono singulari eius vicerit Gigantem, unde initium duxit, omnis ipsius gloria. Dicit autem, Qui docet manus meas ad prælum, & non dicit. Qui robustam facit manum meam; quoniam in eo genere prælij, quo vicit Gigantem, plus valuit ars, quam robur. Præualuit enim, ut Scriptura dicit, in funda & lapide aduersus Philistæum. Iacere



Iacere autem lapidem ex funda, ita vt recta attingat frontem hominis, maximæ artis est, quam tamen victoriam sapiens Propheta nõ suæ arti, aut exercitationi, sed Dei dono tribuit. Pari ratione in prælio spirituali aduersus Diabolum magis indigemus arte, quam robore; & Christus ipse per Dauidem figuratus, non potentia, sed sapientia Diabolum vicit. Patientia enim, & humilitate superbū, & crudelem hostem prostrauit: & idcō non dixit Propheta. Qui armat manus meas, sed, *Qui docet manus meas.* Quod additur, *Et digitos meos ad bellum;* idiplū est alijs verbis repetitum.

II. *Misericordia mea, & refugium meum, susceptor meus, & liberator meus.*

III. *Protektor meus, & in ipso speraui, qui subdit populum meum sub me.*

His quinque vocibus docet Propheta, quo ordine dederit illi Deus victoriam: quo etiam ordine nobis quoque dabit, si in illo spē nostram totam posuerimus. Primum Deus misericorditer Dauidem respexit, *Misericordia enim Dei prima origo est omnium bonorum nostrorum, & omnia omnino merita præuenit.* hinc igitur primo dicit, *Misericordia mea.* Deinde Dauid misericorditer præuenit, & vocatus respexit ad Deum, atque ad eum sperādo, & inuocando confugit: hinc subiungit, *Et refugium meum.* Tertio, Deus confugientem ad se non despexit, sed manū illi porrigens suscepit eum protegendum, & adiuuandum: inde subiunxit, *susceptor meus.* Quarto, susceptum liberauit de captiuitate, & ab imminente periculo vitæ: hinc subiunxit, *Et liberator meus.* Denique liberatum, ne iterum caperetur, aut vulneraretur, protexit, & protegere pergit, dum præliū durat: idcō subiunxit, *Protektor meus;* addit, *Et in ipso speraui, qui subdit populum meum sub me,* id est, Deus quidem mihi est misericordia, refugium, susceptor, liberator, & protektor: & ego vicissim in ipso sperabo, qui fecit plus quam petere, aut optare potuissim: nam non solum liberauit me de manu Goliath, sed etiam subiecit mihi populum

meum, cum fecit me Principem malitia super omnem populum meum: nam 1. Reg. 18. paulō post victoriam de Goliath, fecit Saul Rex Dauidem Tribunal super mille viros, nec solum illis, sed vniuerso populo præeat Dauid. Sic enim legimus ibidem, *Omnis Israel, & Iuda diligebat Dauid: ipse enim ingrediebatur & egrediebatur ante eos,* quod repetitur 2. Regum 5. Nec solum subiecit, sed etiam nunc subdit, cum dono gratiæ suæ facit, vt populus quietē & pacificē regi se sinat.

*Domine quid est homo, quia innotuisti ei? aut filius hominis quia reputas eum?*

Ex tot beneficijs prorumpit Dauid in magnam admirationem, quod tantus Deus, quo nihil maius cogitari potest, dignetur tanti facere hominem, qui ferē nihil est, vt etiam velit ab illo cognosci & amari. Et si hæc Dauid dicit, & tanto sensu pietatis dicit, quid nos facere, sentire, & dicere par esset, quibus Deus non solum innotuit, sed formam serui accepit, & in ea forma humiliauit semetipsum, factus obediens vsque ad mortem, mortem autem crucis: & victoriam nobis tribuit, non aduersus carnem & sanguinem, sed aduersus Principes & potestates, aduersus mundi Rectores tenebrarum harum, contra spiritualia nequitia in celestibus; & qui nobis non populum vnum subiecit, sed euectos ad participationem Regni sui constituit cum Christo super omnia bona sua? sed verba consideremus. *Domine quid est homo, quia innotuisti ei?* ex hebræo aliqui vertunt, *quid est homo, quia cognoscis eum.* Sed S. Ioannes Chrysostomus affirmat, rectē vertisse Septuaginta interpretes, *innotuisti ei?* nam & vox hebraica hunc sensum patitur, & est multo admirabilius, quod Deus dignetur cognosci ab homine, quàm quod hominem cognoscat, imō nihil admirationis habet, quod Deus hominem cognoscat, qui hominem fecit, & nihil ignorare potest. Obseruat quoque idem Chrysostomus, rectē dictum esse, *quia innotuisti ei,* non autem, *quia cogni-*



*ius es ab eo: cognitio enim Dei in homine ab ipso Deo est, qui ei se reuelare, & demonstrare dignatur. Aut filius hominis, quia reputas eum? Repetitio eiusdem admirationis est: nam in hoc apparet, quanti Deus hominem aestimet, quia voluit ei innotescere, & cum eo familiaritatem, amicitiamque contrahere.*

V. *Homo vanitati similis factus est, dies eius sicut umbra praterunt.*

Explicit causam suæ admirationis; quia videlicet homo sit res modica, & id modicum breui destinat esse. Non poterat magis extenuari vilitas hominis comparata ad magnitudinem Dei. Deus plenitudo est omnium bonorum, & plenitudo semper stans, & manens in æternum sine ulla imminutione, aut mutatione: Homo non est quidem vanitas, quia aliquid est, sed vanitati similis, quia modicum quid est, & capax magnorum bonorum, si à Deo impleatur; sed donec impleatur, similis est vasi vacuo, & inani. Id autem quod est, semper mutatur, & transit donec deficiat: quomodo interdum umbra montium insensibiliter transit, donec nocte superueniente, penitus euanescat. Atque hæc dicit Propheta de homine, quo ad vitam corporalem, & comparatione facta cum Deo: alioqui enim homo magna res est, ad imaginem & similitudinem Dei creatus, & ad ipsum Deum intelligendum & amandum factus; propter quem Vnicus Dei sanguinem profunderet non dubitauit; qui denique si Deo per fidem, spem, & charitatem in hac peregrinatione inhaerit, futurus sit in patria æqualis Angelis, semperque felicissimus. Itaque quemadmodum puluerem, & cinerem se reputare debet cum Deo collatus; ita dignitate suam agnoscere debet, cum ei bestiales voluptates à Diabolo suggeruntur, ut dedignetur delectari voluptatibus pecorum, qui ad Angelorum æqualitatem aspirat.

VI. *Domine inclina cælos tuos, & descende: tange montes, & fumigabunt.*

VII. *Fulgura coruscationes, & dissipabis eos: emitte sagittas tuas, & conturbabis eos.*

Propheta Sanctus ex beneficijs Dei prorumpit in admirationem misericordiae Dei, quod tanta Maiestas tantam vtilitatem aspicere dignaretur: nunc vero considerans ex aduerso superbiam, & cæcitatem multorum hominum, qui Deo contempto toti essent occupati in opprimendis hominibus pijs, & in cumulandis terrenis diuitijs: precatur Deum, ut ostendat potentiam suam in eiusmodi homines; ut saltem timore poenae peccare cessent, qui amore iustitiae, & reuerentia conditoris bene agere nesciunt. *Domine, inquit, inclina cælos tuos, & descende*, id est, quandoquidem humana superbia ex beneficijs te non agnoscit, nec timet; ostende praesentiam tuam per nubes tenebrosas, per ignem de caelo demissum, per fulgura, & tonitrua, aliaque id genus, quibus homines terreri, & expauescere cogantur. dicitur autem Deus inclinare cælos quando demittit nubes, & densas caligines, quæ videntur partes cæli aerei; & eo modo descendere dicitur, quia demonstrat per eos affectus, praesentiam suam. sic dicitur Exod. 20. Deus descendisse in montem Sina, quando impleuit montem illum tenebrosa nube, & caligine densissima; & simul montem calefecit, ut totus fumigare videretur, & hoc est, quod addit, *tange montes, & fumigabunt*: sed præcipue Deus praesentiam, & potentiam suam demonstrat fragore horrendo tonitruorum, & coruscatione fulgurum, ac vibratione fulminum, quibus nihil velocius, subtilius, efficacius, horribilius. Ideo addit, *fulgura coruscationem, & dissipabis eos*, superbos videlicet hostes piorum: *Emitte sagittas tuas*, id est, cælestia fulmina, & *conturbabis eos*; nemo enim est tam ferrox, & audax, qui non expauescat fulmina de caelo, aduersus quæ nihil valet humana defensio. Vnde dicitur 1. Reg. 2. *Dominum formidabunt aduersarii eius, & super ipsos in cælis tonabit.*

*Emitte manum tuam de alto, eripe me, & libera me de aquis multis, de manu filiorum alienorum.*

Ex hoc versiculo apparet, Psalmum hunc non

VIII.



non esse scriptum à Dauide Post Regnum adeptum, neque esse eiusdem argumēti cum Psalmo septimo decimo: nam in eo Psalmo gratias agit de liberatione à manu Saul, & omnium aliorum inimicorum: in hoc autem Psalmo adhuc pugnabat cum filiis alienis, id est, Philistæis, & orat Deum pro liberatione, & victoria. Itaque posteaquam rogauerat Deum generatim aduersus impios, & superbos, rogat pro se in particulari. *Emitte*, inquit, *manum tuam de alto*, id est, de cœlo potentiam tuam ostende, *& eripe me*, & libera de aquis multis, id est, à multitudine hostium infidelium, cum quibus quotidie bellum gero. & declarans ipse metaphoram, addit, de manu filiorum alienorum. Itaque, aquæ multæ, significant multitudinem filiorum alienorum, qui ad literam erant Philistæi: spiritualiter sunt hæretici, ut vult S. Iohann. Chrysostomus, vel generalius omnes filij huius seculi, siue foris, siue intus sint, ut docet S. Augustinus, & conformius est versiculo sequenti, & à versiculo duodecimo vsque ad finem.

IX.

*Quorum os loquutum est vanitatem, & dextera eorum dextera iniquitatis.*

Describit filios alienos, atque ait, illos esse, qui & ore, & opere iniqui sunt. *Quorum os locutum est vanitatem*, non veritatem, non legem tuam, non boni aliquid: & dextera eorum non operatur, nisi rapinas, oppressiones pauperum, adulteria, homicidia, &c.

X.

*Deus canticum nouum cantabo tibi, in psalterio decachordo psallam tibi.*

XI.

*Qui das salutem Regibus, qui redemisti Dauid seruum tuum de gladio maligno: eripe me.*

XII.

*Et erue me de manu filiorum alienorum, quorum os loquutum est vanitatem, & dextera eorum dextera iniquitatis.*

Interponit duos versiculos, quasi parenthesim ex affectu in Deum; deinde reuertitur ad describendos filios alienos. *Deus*, inquit, *canticum nouum cantabo tibi*, id est,

peto alia multa beneficia, sed non sum oblitus acceptorum, id est canticum nouum, preclarum, nondum auditum, cantabo tibi, & simul in psalterio decem chordarum psallam tibi, iungens sonitum psalterij cum laudatione vocis; id autem faciam, quia tu das salutem Regibus, ut paulo ante dedisti Sauli Regi per ministerium meum; & tu redemisti me Dauidem seruum tuum de gladio maligno, id est, de gladio iniusto Gigantis Goliath. tu igitur, sicut hæcenus fecisti, *eripe me*, *Erue*, inquam, *me de manu filiorum alienorum*, qui & verbo, & opere scelestissimi sunt.

*Quorum filij sicut nouella plantationes in inuentute sua.*

Declarat filios alienos ab affectu, & opinatione ipsorum: illi enim sunt filij alieni, qui non nouerunt, neque diligunt nisi terrenam felicitatem, in fecunditate, & prosperitate filiorum, & filiarum; in abundantia frumenti, vini & olei; in armentis pecorum, & fructibus eorum, in pace, & securitate omnium quæ possident. Sed hoc loco obseruandum est; ex hebræo hæc omnia nunc legi in prima persona, non in tertia, & sensum facere omnino contrarium, nimirum hunc, *Eripe me de manu filiorum alienorum*, ut sint filij nostri, sicut nouella plantationes, filiarum nostrarum, ut similitudo templi, promptuaria nostra, &c. sed cum omnes greci, & latini codices habeant in tertia persona, & omnes Patres ita exponant; non possumus approbare lectionem hebraicam, nisi dicamus, ut Genebrardus iudicauit, hic introduci loquentes ipsos filios alienos, & Dauidem non ex suo sensu, sed in persona eorum hæc dicere; ut hic sit sensus, *Eripe me de manu filiorum alienorum, quorum os locutum est vanitatem, & dextera eorum dextera iniquitatis*; qui videlicet loquuti sunt vanitatem dicentes, *Sint filij nostri sicut nouella plantationes*, &c. Voller etiam facile fieri, ut verba hebraica tempore Septuaginta Interpretum fuerint in tertia persona, & postea successu temporis incuria librariorum mutata sint in personam primam,



primam, quod facillimum fuit, cum discrimē personæ primæ, & tertiæ in literis, non in syllabis consistat: nam si desit litera, *nun*, erit persona prima, si adsit, erit persona tertia. præterea vox, *ascer*, quæ potest verti, *quorū*, vt nostri legunt, & potest etiam verti, vt, quomodo legunt hebræi: videtur hoc loco vertenda, *quorum*, non, *ut*: nam in versu. 9. & 12. vbi legimus, *Quorum os loquutum est vanitatem*, eadem est vox, & ab omnibus vertitur, *quorum*, cur ergo non etiā hoc loco vertatur, *quorum*, & legamus, *quorum filij*? Quare lectio nostra omnino retinenda est. Ac primo loco inter humanas felicitates ponuntur filij, quoniam illi super omnia alia desiderantur, & propter eos quaruntur cætera. Ideo Propheta dicit, *Quorum filij sicut novellæ plantationes in iuuentute sua*, id est, tunc habentur felices filij huius seculi, quando filij eorum sunt in iuuentute sua similes novellis plantationibus arborum, id est, bene radicati, & fundati, & virides, ac florentes, vt spes sit, eos longissimo tempore supervicturos.

*Filia eorum composita circumornata, vt similitudo templi.*

Hæc est secunda felicitas temporalis, filia formosæ, & ornata, vt faciliē viros inueniāt, quibus nubant. Illud, *composita*, videtur referendum ad naturalem pulchritudinem, quæ ex compositione, siue conformatione membrorum constat: ex hebræo vertunt aliqui, *Filia vt anguli incisi*: sed credibile est, Septuaginta interpretes deduxisse vocē hebraicam à *zin*, quod splendorem significat, vt sensus sit, *filia eorum composita*, id est, splendida; & speciosa. Quod sequitur de similitudine templi, videtur intelligendum de ornatu tabernaculi. in quo erant multa ornamenta purpuræ, byssi, auri, gemmarum, vt nihil pulchrius in tota ea regione inueniretur.

*Promptuaria eorum plena eructantia ex hoc in illud.*

Hoc est tertium genus felicitatis filiorum alienorum, promptuaria ita plena variorum

frugum, aliarumque rerum ad huius vitæ vsum, vt necessesse sit ex vno in aliud exonerare copiam rerum. Qualis felicitas describitur in Euangelio, cum dicitur, diuitem quendam cogitasse intra se, *Quid faciam, quia non habeo vbi congregem fructus meos*: scio quid faciam, destruam horrea mea, & maiora faciam, &c. Luc. 12. Id vero potissimum contingit, quando superuenientibus nouis frugibus, adhuc supersunt veteres, quæ in aliud promptuarium refundendæ sunt, vt detur locus nouis.

*Oues eorum fetosæ abundantes in egressibus suis: boues eorum crasse.*

Hoc est quartum genus bonorum temporalium, oves fecundæ, & plurimæ, abundanter in egressibus suis, id est, quæ plurimæ conspiciantur, cum egrediuntur ad pascua: & simul cum gregibus ouium armenta bouum, & quidem pinguium.

*Non est ruina macerie, neque transitus, neque clamor in plateis eorum.*

Hoc est vltimum bonorum temporalium, vt non solum domus, & palatia ruinam nullam minentur, sed ipsæ etiam maceriæ, quæ ex vili materia eriguntur, integræ maneant: & nullus sit tumultus, neque rumor in plateis eorum, sed omnia tranquilla, & pacata. Illud, *neque transitus*, potest significare transitum per diruptas macerías, vel transitum latronum, aut militum cum tumultu circumcursantium.

*Beatam dixerunt populum cui hæc sunt: beatum populum cuius Dominus Deus eius.*

Hæc est conclusio Sancti Prophetæ, qui refert ex sententia filiorum alienorum beatum esse populum cui hæc sunt, quæ paulo ante descripsimus: sed ex propria sententia dicit, *beatum esse populum, non cui hæc sunt, sed cuius Deus est Dominus*, id est, qui habet pro Deo verum Deum: nam vox, *Dominus*, hoc loco scribitur quatuor literis, quæ nomen proprium Dei significant, quod nunquam tribuitur, nisi vero Deo, qui fecit



fecit cœlum, & terram. Ad finem huius Psalmi diligenter annotandum est, nō facere differentiam inter filios Dei, & filios alienos copiam, vel inopiam rerū temporalium: multi enim filij Dei his bonis abundarunt, & Dominus Matth. 19. promisit centuplum eorū, quæ dimittimus, in hoc mundo, & postea vitam æternam: & contra multi filij huius seculi miserè perierunt in egestate, in exilio, in trirēibus, in patibulis. Sed quod differentiam facit inter filios Regni, & filios gehennæ, filios huius seculi, & filios lucis, est affectio: qui enim bona temporalia magna bona esse ducunt, & ijs ita afficiuntur, ut præ illis æterna bona contemnunt; & contra, qui detrimenta temporalia magna mala esse ducunt, eaque ita timent, ut pro ijs euadendis Deum offendere, & vitam æternam perdere non formidant; illi sunt filij tenebrarum, huius seculi, & gehennæ. & hoc significatur in illis verbis, *beatum dixerunt populum cui hæc sunt*, id est qui tanti faciunt hæc temporalia, ut in illis beatitudinem sitam esse arbitrentur. Qui vero bona temporalia parua bona; & iacturam eorum parua mala esse ducunt, ut re vera sunt: contra autem gratiam Dei, & cœlestem patriam in maximis bonis reponunt: & offensionem Dei, ac vitæ æternæ detrimentum, mala grauissima putant; illi sunt filij lucis, filij Regni; qui non surda aure audierunt, *Primum querite Regnum Dei, & iustitiam eius*, & hæc omnia adjiciuntur vobis. Matth. 6. & hoc significatur in illis verbis, *Beatus populus, cuius Dominus Deus eius*, id est, bona temporalia, bona sunt, sed beatum non faciunt: quod autem verè facit beatum, est possessio summi boni, quod in Dei visione consistit.

## PSALMVS CXLIV.

Titulus, & Argumentum.

Laudatio David.

**T**itulus indicat argumentum: est enim hic Psalmus perpetua laudatio Dei, quæ partim sumitur ab ipsa Dei magnitudine, partim ab operibus eius, partim à qualitatibus

Regni ipsius, partim à virtutibus Regis, quæ in ipso perfectissime inueniuntur. Est autem Psalmus alphabeticus, ut facilius memoria commendetur, & delectabilius canatur. S. Hilarius, & S. Augustinus ita exponunt titulum, *Laudatio David*, id est, laudatio, quæ laudatur David, & per Davidem intelligunt Christum, qui filius est David secundum carnem. Sed communior expositio est, ut sit sensus, *laudatio, quæ laudatur Deus à Davide*. Neque obstat, quod in greco dicatur in datiuo, *laudatio ipsi David*, est enim sensus, *laudatio Dei inspirata, & dictata à Spiritu sancto ipsi Davidi*. Vide titulum Psalmi 3.

## EXPLICAT. PSAL. CXLIV.

**Aleph.** **E**xaltabo te Deus meus Rex, & benedicā nomini tuo in seculum, & in seculum seculi.

**Beth.** Per singulos dies benedicam tibi, & laudabo nomen tuum in seculum, & in seculum seculi.

In his duobus primis versiculis continetur proœmium, in quo Propheta docet, quid in hoc Psalmo canere proposuerit; sed hoc docet more poetico, per apostrophē ad Deū. *Exaltabo*, inquit, te, id est, in hoc Psalmo celebrabo te versibus meis, ut tu qui altissimus es, altissimus etiam habearis, & prædicaris ab hominibus. Vocat autem Deū Regem suū, vel ut ostendat, se Regem esse sub Rege Deo, qui omnes regit, & à nullo regitur, vel quia Deum celebrare intendit ob ea præcipue attributa, vel opera, quæ illi conueniunt, ut Rex est, & gubernator hominū, & cæterarum rerum creaturarum. *Et benedicam nomini tuo*, repetitio est eiusdem rei. idem enim est, *Exaltabo te*, & *benedicā nomini tuo*, id est, laudabo nomen tuum, celebrabo gloriam tuam. Quod autem additur, *in seculum, & in seculū seculi*, significat laudationē hanc fore perpetuā, ita ut hic incipiat, & perseveret per successiones hominum canentium hos Psalmos usque ad mundi consummationem; & deinde in



de in cœlesti patria nunquam omnino deficiat. *Beati enim, qui habitant in domo tua Domine,* ait ipse idem in Psal. 83. *in seculum seculorum laudabant te.* Hoc idem clarius repetitur, & explicatur in secundo versiculo. *Per singulos dies benedicam tibi,* id est, perpetuo laudabo te siue in prosperis siue in aduersis, dum hic viuam, & postea quoque in cœlesti patria laudabo nomen tuum in seculum, & in seculum seculi.

III. Gimel. *Magnus Dominus, & laudabilis nimis, & magnitudinis eius non est finis.*

Quatuor sunt quasi partes magnitudinis, latitudo, longitudo, sublimitas, & profundum, quæ suo modo in Deo quoque considerari possunt, iuxta illud Apost. ad Eph. 3. *Ut possitis comprehendere cum omnibus Sanctis, quæ sit latitudo, longitudo, sublimitas, & profundum.* Igitur Propheta incipit laudare Deum à magnitudine, & potest hæc laus intelligi de magnitudine essentiae diuinæ, quæ est magna quo ad latitudinem; quia est immensa, quo ad longitudinem; quia æterna, quo ad sublimitatem; quia altissima, quo ad profunditatem, quia incomprehensibilis. vel si placet, Prophetam explicare de magnitudine Dei, ut Rex est, magnus Rex est Dominus, quo ad latitudinem, quia omnia seruiunt illi à summo Angelo usque ad vltimum vermiculum; quo ad longitudinem, quia Regni eius æterna duratio est; quo ad sublimitatem, quia potestate summa, & absolutissima regnat; quo ad profunditatem, quia non solum corpora, sed etiam corda regit, & moderatur intimas omnium cogitationes, & affectiones, denique nihil est tam abditum, & reconditum, quo virga Regni eius non penetret. *Magnus ergo Dominus, ideo laudabilis nimis,* id est, valde: *& magnitudinis eius non est finis,* quia & latitudo infinita est, & longitudo, & sublimitas, & profundum pariter infinita sunt. Vox hebraica proprie inuentio-nem, siue inuestigationem, non finem significat. Sed Septuaginta sensum verterunt. *Idem enim magnitudinis Dei nulla est inuen-*

tio, quia finis eius non inuenitur, nec inueniri potest cum non sit. Itaque magnitudo Dei est infinita, & ideo à nobis, qui finiti sumus est omnino inuestigabilis. dicitur autem à nobis in inuestigabilis, non quod ignoremus, magnum esse Deum, & magnitudinis eius nullum esse finem, sed quia magnitudinem illam totam non capimus, non comprehendimus. Admonet autem nos hæc magnitudo infinita Dei, ut sicut magnitudinis eius non est finis, sic etiam laudationis nullus sit finis. Ita S. Augustinus. Item, ut nos quoque non simus contenti angustijs nostris, sed quotidie magis ac magis in vera magnitudine, quæ in virtutibus posita est, crescere studeamus; iuxta illud, Psal. 83. *Ascensiones in corde suo disposuit in valle lachrymarum; ibunt de virtute in virtutem,* &c. nam qui crescere student potentia, vel diuitijs, ut alios supergrediantur, isti non magni, sed inflati sunt; non succo pleni, sed vento distenti: aliud enim superbia, aliud animi magnitudo est. Ita S. Ioan. Chrysostr.

IV.

Daleth. *Generatio, & generatio laudabit opera tua, & potentiam tuam pronuntiabunt.*

Ab essentia Dei magni Regis, quæ inuestigari non potest, transit Propheta ad opera ipsius mirabilia ex quibus potentia eius intelligi potest, & non dicit, ego laudabo opera tua, sed generatio, & generatio laudabit opera tua, quasi dicat, ego solus non sufficio laudare, sed omnes generationes laudabunt opera tua, quia nunquam deerunt qui ea considerent, admirentur, & laudent. *Et potentiam tuam pronuntiabunt,* id est, omnes generationes laudabunt opera tua, & inde potentiam tuam, quæ in illis relictæ, assidue prædicabunt. In hebræo habetur ad verbum, *Generatio generationi laudabit opera tua,* ut in Psalmo 18. *Dies diei eructat verbum,* quæ phrasi significatur, generationes sibi inuicem succedere, ut dicitur Ecclesiast. 1. *Generatio aduenit, & generatio præterit;* & sicut vna alteri succedit



quo ad subsistentiam, ita etiam unam alteri succedere in laudandis operibus Dei, quasi una defuncta munere suo, tradat alteri munus Deum laudandi, & hoc modo generationes laudabunt opera Dei. Itaque lectio hebraica non est contraria lectioni græcæ, & latinæ, sed eas explicat, & illustrat.

V. He. *Magnificentiam gloria sanctitatis tue loquentur, & mirabilia tua narrabunt.*

Dixit in genere de operibus Dei mirabilibus: nunc distinguit tria genera operum Dei, quædam gloriosa, & pulcherrima, ac per hoc mirabilia ob eximiam speciem & splendorem; quædam terribilia, & ob terrorem maximum valde mirabilia; quædam denique amabilia, & ob ingentis benignitatis Dei significationem, non minus, quam cætera mirabilia. In hoc igitur versiculo laudantur opera mirabilia ob splendorem, & gloriam operis, qualia sunt cæli superiores quibus nihil maius, & pulchrius. de quibus dicitur Psal. 18. *Cæli enarrant gloriam Dei.* ad idem opus pertinent ea, quæ in cælo conspicimus, sol, luna, stellæ cæteræ, & earum varietas, multitudo, splendor, & perpetui sine ulla intermissione, vel fatigatione discursus. *Magnificentiam*, inquit *gloria sanctitatis tue loquentur*, id est, omnes generationes laudando loquentur excellentiam gloriosi operis magnificentie tue. & quia multa sunt in eo opere mirabilia, ideo laudantes gloriosum hoc opus, mirabilia tua multa, & magna narrabunt. per magnificentiam non intelligitur hoc loco actio virtutis, quæ dicitur magnificentia, sed qualitas operis magnificentissimi, quæ dici potest excellentia, siue præstantia, siue decor & pulchritudo. hæc enim omnia significat vox hebræa, quæ hoc loco ponitur. per gloriam intelligitur claritas, & splendor, & per claritatem, & splendorem ipsum opus gloriosum, & splendidum. denique per Sanctitatem Dei, si respiciamus vocem hebraicam, intelligenda est maiestas, siue magnitudo, siue magnificentia Dei, quæ etiam sanctitas dici potest, quia maiestas Dei sanctissi-

ma est vox hebraica non est *chodes*, id est, sanctitas, sed *hod*, quam vocem in Psalmo 8. verterunt Septuaginta *magnificentiam*; & hoc loco vertit S. Hieronymus magnitudinem: & potest etiam verti maiestas, siue decor; siue etiam robur, ac potentia. Itaque sensus erit, omnes generationes præstantissimum, & clarissimum opus Maiestatis Dei, quæ sancta, id est, inuiolabilis, & purissima est, decantabunt.

Vau. *Et virtutem terribilium tuorum dicent, & magnitudinem tuam narrabunt.*

Hoc est alterum genus operum Dei, quod terror diuinæ maiestatis in puniendis impijs demonstratur. *Et virtutem*, inquit, *terribilium tuorum dicent*, id est, robur, & potentiam terribilium flagellorum, quibus impios castigare solitus es, dicent; & ex eis magnitudinem potentie tue enarrabunt. Ad hoc opus pertinent diluuium generale tempore Noë: combustio quinque ciuitatum igne de cælo demisso: plagæ Aegypti, & Pharaonis: hiatus terræ ad absorbendos viuos seditiosos, Dathan, & Abyron: denique terræ motus, pestilentie, fulmina celestia, eluuiiones aquarum, procellæ ventorum, & alia, quæ non raro ex diuino iudicio terris immittuntur.

Zain. *Memoriam abundantie suauitatis tue eructabunt, & iustitia tua exultabunt.*

Hoc est tertium genus operum Dei, quod ad misericordiam pertinet. quod quidē pluribus verbis, & maiori significatione grati animi explicatur, quoniam ad pios Dei seruos maxime pertinet. *Memoriam*, inquit, *abundantie suauitatis tue eructabunt*, id est, oēs generationes repletæ abundantia suauitatis, & benignitatis, & misericordie tue, quoniam *misericordia Domini plena est terra*, ex hac plenitudine eructabunt memoriam huius abundantissimæ suauitatis, id est, mandabunt posteritati memoriam horum tantorum, & tam multiplicium beneficiorum. nec solum eru-

abunt



Stabunt hæc memoriam posteris, sed ipsi exultabunt iustitia tua, id est; ob fidelitatem, quia promissa beneficia præstitisti. Ad hoc genus pertinent innumerabiles consolationes, quas toti generi humano diuina bonitas tribuit ex vicissitudine dierum, & noctium, ex pluuijs de cælo, ex fecunditate terræ, ex infinita multitudine pecorum, auium, piscium, quæ generi humano seruiunt; ex amœnitatē sylvarum, pulchritudine horreorum, commoditate maris, & fluminum, alijsque id genus plurimis. Sed hæc leuia, & parua sunt, si comparentur ad dona gratiæ, ad incarnationem Verbi diuini, ad passionem, resurrectionem, & ascensionem Christi, ad missionem Spiritus S. vocationem gentium, ædificationem Ecclesiæ, iustificationem impiorum, prædicationem, promissionem, & exhibitionem Regni cælorum. Quæ omnia cum suauis meditatione quasi comeduntur, mirum non est, si ex tanta plenitudine pijs omnes eruant memoriam abundantie suauitatis Dei.

- VIII. Cheth. *Miserator, & misericors Dominus, patiens, & multū misericors.*  
 IX. Teth. *Suauius Dominus vniuersis, & miserationes eius super omnia opera eius.*

Non contentus dixisse, tantam esse abundantiam suauitatis Dei, vt omnes generationes eructaturæ sint memoriam huius suauitatis: ipse eructat primus, & prædicat dicens, *Misericors, & miserator Dominus, patiens, & multum misericors Dominus est*, quia tollit misérias creando, gubernando, iustificando, glorificando: nec solum misericors est, sed etiam miserator, id est, paternè misericors, id enim significat vox hebraica, *rachum*, nec solum affectu paterno misericors, sed etiam patiens, siue longanimis, vt est in hebræo, id est, perseveranter misericors; etiā enim sæpè à nobis prouocetur ad iram, ille tamen nō subito irascitur, sed expectat ad penitentiam. denique hæc misericordia non modica, non exigua, sed multa, & copiosissima est. Id explicatur in sequenti versiculo, Nam suauis

est Dominus omnibus, id est, omnibus benignus, & misericors, & ex se suauis, licet non omnibus videatur suauis, sed ijs tantum, qui sanum palatum habent. nec solum erga omnes suauis, & bonus, ac per hoc misericors est: sed etiam misericordia eius extenditur super omnia opera eius. nullum enim est opus Dei, in quo misericordia eius locum suum non habeat. sic enim intelligimus illud, *super omnia opera eius*, id est, in omnia opera eius, vt exponunt SS. Chrysost. & Augustinus, & vt vertit ex hebræo S. Hieron. & vt requirit proprietas linguæ græcæ. S. tamen Hilarius exponit, *super omnia opera eius*, id est, excellit omnibus operibus eius, & hanc expositionem paritur textus hebraicus, & hinc Theologi disputant, quomodo intelligendum sit, misericordiam esse excellentiorem omnibus virtutibus, de qua re vide S. Thomam, & Caietanum in 22. q. 30. art. 4. Illud autem, *suauius Dominus vniuersis*, verum est absolutè, quia Deus solem suum oriri facit super bonos, & malos, & pluit super iustos, & iniustos, vt dicitur Matth. 5. Et ne dæmones quidem Deus excludit à misericordia sua, cum eis vitam, & intelligentiam tribuat, & conseruet: tamen magna misericordia, quæ ad salutem æternam perducit, de qua dicit David Psalm. 50. *Miserere mei Deus secundum magnam misericordiam tuam*, & Iacobus cap. 2. *Iudicium sine misericordia ei qui non fecit misericordiam*, restringitur ad timentes, & inuocantes Deum: nam Psalm. 85. dicitur. *Tu Domine suauis, & mitis, & multa misericordia omnibus inuocantibus te*, & Psalm. 102. *Quoniam secundum altitudinem cæli à terra corroborauerit misericordiam suam super timētes se*, & *Quomodo miseretur Pater filiorum miseris est Dominus timentibus se*. Sc, *Misericordia Domini ab æterno, & usque in æternum super timētes eum*: quod etiam significauit B. Virgo Luc. 1. cum ait, *Et misericordia eius à progenie in progenies timentibus eum*.

Iod. *Confiteantur tibi Domine omnia opera tua, & sancti tui benedicant tibi.*

Caph.

X.



- XI. Caph. *Gloriam Regni tui dicent, & potentiam tuam loquentur.*
- XII. Lamed. *Vt notam faciant filijs hominum potentiam tuam, & gloriam magnificentiæ Regni tui.*
- XIII. Mem. *Regnum tuum, regnum omnium seculorum, & Dominatio tua in omni generatione & generationem.*

Cecinit hætenus opera Dei gloriosa, terribilia, & amabilia: nunc transit ad qualitatem Regni Dei, cantaturus etiã postea qualitates ipsius Regis. *Confiteantur*, inquit, *tibi Domine omnia opera tua*, id est, laudent te opera tua, de quibus hætenus te laudavi: opera enim opificem laudat, quando pulchra sunt, & bona. Opera autem Dei talia sunt, vt nihil eis addi, vel minui possit. *Vidit enim Deus omnia quæ fecit, & erant valde bona* Gen. I. & *Magna opera Domini, exquisita in omnes voluntates eius* Psal. 110. Atque his verbis concludit narrationem præteritam. Addit deinde inchoans nouam laudationem. *Et sancti tui benedicant tibi*, id est, opera tua, quæ patent oculis omnium, generatio, & generatio laudabit, vt supra dictum est, sed qualitatē Regni, de qua nunc dicturus sum, non nouerunt nisi sancti tui, quibus per Spiritum S. reuelata est, idē sancti tui, fideles tui, populus tuus peculiaris. benedicant tibi, laudent te. In quo autem laudaturi sint, subiungit, cum ait, *Gloriam Regni tui dicent, & potentiam tuam loquentur*. Gloria Regni, est potentia Regni. Potentia Regni consistit in multitudine subditorum, & in magnitudine diuitiarum, quibus subditi ali & sustentari possunt Gloria, siue potentia Regni Dei cognosci potest ex differentia inter Regnum Dei, & Regnum hominum: est autem quadruplex differentia. Prima, quod homines Reges habeant subditos paucissimos, & opes tenuissimas, homines videlicet, & opes vnius, aut plurium prouinciarum: Deus autē subditos habet omnes Angelos, omnes homines, omnes dæmones: & quicquid in cælo,

in terra, & in mari est, opes eius sunt. Altera differentia est quod Reges terreni sic dominantur subditis, vt etiam illis seruiant, quia pendunt ab illis, & sine illis nihil possunt: & pari ratione sic abundant opibus, vt semper egeant, & cogantur à subditis exigere vestigalia, & tributa, & vt plurimum grauati sunt ære alieno: Deus autem dominatur omnibus, & nulli seruit, quia non eget opera illorum: abundat opibus sine vlla inopia, quia potest in momēto producere ex nihilo multo plura, quàm habeat. Tertia differentia sequitur ex secunda; Reges enim terreni gaudent honore, ac dignitate sua, sed simul anguntur assidua sollicitudine, & formidine, vt propterea inuenti sint, qui spontē Imperium deposuerint: Deus autem nulla premitur sollicitudine, nullo metu, sed cum tranquillitate, & securitate regnat. Quarta est, quod Reges terreni breui tempore regnant: Deus autem in æternum. Prima differentia attingitur in versiculo illo, *Gloriam Regni tui dicent, & potentiam tuam loquentur*, id est, sancti tui prædicabunt gloriam, & potentiā Regni tui, quæ in multitudine innumerabili subditorum, & abundantia infinita opū tuarum consistit. Secunda & tertia attinguntur in versiculo sequenti, *Vt notam faciant filijs hominum potentiam tuam, & gloriam magnificentiæ Regni tui*, quæ verba indicant maximum discrimen inter regna hominum, & Regnum Dei. Idē enim dicit, *Vt notam faciant filijs hominum*, id est, vt faciant filios hominum intelligere, regna sua terrena nihil esse, si comparentur ad Regnum Dei. & non contentus dixisse, vt notam faciant potentiā tuam, addidit, & gloriam, & hoc non contentus; addidit, *magnificentiæ Regni*, id est, gloriam excellētissimi Regni tui. Deniq; quarta differentia habetur in versiculo sequenti, *Regnum tuum regnum omnium seculorum, &c.*

Nun. *Fidelis Dominus in omnibus verbis suis, & sanctus in omnibus operibus suis.*



Hic iam incipit explicare Propheta virtutes proprias Regis, quæ in Deo perfectissime inueniuntur, vt etiam in Christo homine, & ad quarum quasi speculum, vel exemplar Reges omnes respicere deberent. Prima virtus regia est probitas vitæ, & præcipue veracitas in verbis: nam totus componitur orbis Regis ad exemplum; & de Christo Rege dicitur, *Qui peccatum non fecit, nec inuentus est dolus in ore eius*, 1. Petri 2. & hoc ipsum dicit hoc loco Propheta, *Fidelis Dominus in omnibus verbis suis*, id est, verax, non mendax, non decipiens, non fallens, promissa omnia constanter obseruans, & sanctus in omnibus operibus suis; innocens, impollutus, immaculatus in omni opere suo. Hunc versiculum non habent codices Hebraici, sed hoc ipso conuincuntur esse corrupti: nam Septuaginta viri nullo modo ausi fuissent verba sua, ac præcipue integram versiculum inferere verbis Dei, præterea cum totus hic Psalmus alphabeticus sit, nulla ratio reddi potest, cur David vnâ literâ omittere voluerit. Itaque non dubitamus in Hebraico textu quem habuerunt Septuaginta Interpretes, fuisse hunc versiculum, cuius prima litera erat nun, vt re vera vox Hebraica, quæ fidelem significat, à litera ista principium habet: dicitur enim *neeman*, id est, *fidelis*.

**Samech.** *Alleuat Dominus omnes qui corruunt, & erigit omnes elisos.*

Hæc est altera virtus Regia, & Pastoralis: nam Regis, & Pastoris idem est officium, regere subditos, ne corruant, & erigere eos qui forte corruerunt. Misericordia hæc virtus dicitur, & Rebus maxime necessaria. Illud, *alleuat*, in Hebræo est, *sustentat*, siue confirmat, proinde *alleuare* hoc loco non est erigere eos, qui corruerunt, sed sustentare, & alleuare ne cadant, eum in proximo sunt, vt cadant, iuxta illud, *Impulsus euersus sum vt caderem: & Dominus suscepit me*. At quomodo verum est, à Deo sustentari omnes cadentes, & erigi omnes elisos? nonne plurimi cadunt, & eliduntur quotidie, siue corporaliter, siue spiritualiter hoc intelligatur? Dicitur Deus *omnes alleuare, ne cadant, &*

*erigere elisos*: quia quicumque in tentatione non cadunt, Deo iuuante non cadunt; & qui ex casu resurgunt, Deo erigente resurgunt: qui autem cadunt, aut ex casu non resurgunt ex se habent, non ex Deo, vt cadant, vel non resurgant. Quod alijs verbis dicit Olee cap. 13. *Perditio tua ex te Israel, tantummodo in me auxilium tuum*. Quod autem non velit David dicere, omnes omnino corruentes alleuari, siue sustentari, perspicuum est ex verbis sequentibus, vbi dicit, erigi à Deo omnes elisos: nam si Deus sustentaret omnes cadentes, nemo caderet; aut certe nemo cadens elideretur: quomodo ergo verum esset illud, *erigit omnes elisos*? Atque hæc de spirituali casu dicta sunt, de corporali autem casu dicimus Deum, si nec alleuare, & erigere, quia ex natura pronus est ad alleuandum, & erigendum, quod si multos non alleuat, neque erigit, imò sæpe ipse deiecit, & præcipitat in ruinam: id facit vel ad probationem, & coronam, vt cum iustos affligit, & hoc non est proprie deiecere, sed exaltare: vel ad poenam, & supplicium, & tunc id exigunt peccata hominum, ac per hoc prima radix malorum ex nobis est, & semper vera est Prophetæ sententia, *Perditio tua ex te Israel, tantummodo in me auxilium tuum*.

**Ain.** *Oculi omnium in te sperant Domine, & tu das escam illorum in tempore opportuna.*

**Phe.** *Aperis tu manum tuam, & implebis omne animal benedictione.*

Tertia virtus Regia, liberalitas est. pertinet enim ad Reges, non expilare subditos, non emungere pecunias varijs artibus, eoque ad egestatem redigere: sed contra, liberaliter alere, vt filios, sic tamen in tempore suo comedant, non totos dies in comestationibus consumant. *Oculi omnium*, inquit, *in te sperant Domine*, id est, oculi omnium viuientium ad te respiciunt, sperantes à te cibum vt inde alantur, & viuant. *Et tu das escam illorum*, id est, & tu per creaturas tibi subiectas, terram, solem, pluias produ-

M m m m m

XVI.

XVII.

1583  
XV.

XIV



producit fructus copiosos in escam omnium viuentium: *das autem escam illorum in tempore opportuno*, quando tempus opportunum est, vt comedant, non enim semper comedere debent. Itaque qui comestationibus superfluis vacant, non accipiunt escam à Deo, sed à cupiditate sua. Item *dat escam Deus in tempore opportuno*, id est, quando esuris, quando eges, quando necesse habes; proinde qui recondunt & multiplicant superflua, non à Deo accipiunt, sed furantur bona communia, & ideo mirum non est, si multi egeant & esuriant. Item *dat escam in tempore opportuno*, quia dat quando æquum est dari: aliquando enim æquum est tolli, quia id merentur peccata hominum; quomodo medicus præscribit cibi inedia, & abstinentiam vini, hinc sæpe Deus immittit sterilitates & penuriam, vt flagellet peccatores. Denique iuxta Chrysostomum, *dat escam in tempore opportuno*, quia non omnes fructus dat omni tempore, sed per temporum varietates varios fructus ex terra producit. Vt autem intelligas primam causam omnium bonorum esse Dei liberalitatem, addit: *Aperis tu manum tuam, & imple omne animal benedictione*, in qua sententia omnia verba sonant liberalitatem. *Aperis*, inquit, *manum*, id est, non stricta manu, sed larga atque aperta, summa liberalitate, *imple*, id est, abunde satias, *omne animal*, non solum hominem, sed omnia animalia, *benedictione*, id est, abundanti refectione. Sic enim accipit benedictionem Apostolus 2. Cor. 6. *Vt benedictionem, non vt auaritiam*, id est, largam elemosynam. In Hebræo non est proprie, *benedictione*, sed, *raz on, benefacere*, sed idem est sensus, significat enim Propheta, impleri omnia animalia cibo sibi conuenienti, qui eis placet, & quem cupiunt. S. Hieronymus vertit generalius, *refectione*. Septuaginta adhuc generalius, *benedictione*. At si Deus larga manu implet omne animal benedictione, vnde tot mendici? tot famelici? tot nudi? Iam supra indicauimus id accidere ex iniustitia diuitum, qui multo plura volunt & conseruant, quam necesse habent, & multa effundunt in vanitates, quæ pauperibus dari

debuissent, addidimus etiam, id aliquando euenire ex iudicio Dei: quia id exigunt peccata hominum, denique adiungimus, ipsos pauperes sæpe esse in causa, quia vel confidunt in astutia sua & malis artibus, non in Deo, vel non sunt contenti victu & vestitu statui suo congruenti, vel quod lucrantur per integram hebdomadam, vno die comestando vel ludendo perdunt.

**Tfadic.** *Iustus Dominus in omnibus viis suis, & sanctus in omnibus operibus suis.*

XVIII.

Quarta virtus Regia, est iustitia, quæ omnino necessaria est, vt populi pacem & quietem habeant. *Iustus Dominus in omnibus viis suis*, id est, Dominus in omnibus actionibus suis externis, quibus quodammodo exit ab interno conclaui suo ad nos, iustissimus est: tribuit enim omnibus, quod illis debetur, & hoc idem significant verba sequentia. *Et sanctus in omnibus operibus suis.*

**Coph.** *Prope est Dominus omnibus inuocantibus eum: omnibus inuocantibus eum in veritate.*

XIX.

Quinta virtus Regia est facilem se præbere omnibus accedentibus, atque auxilium implorantibus. Hoc mirifice præstat Deus noster, qui *prope est omnibus inuocantibus eum*, id est, quamuis Deus excelsior cælo sit, tamen appropinquat facile omnibus inuocantibus eum, neque vnquam audientiam negat. Hinc gloriatur Moses Deut. 4. *Non est alia natio tam grandis, quæ habeat Deos appropinquantes sibi, sicut Deus noster adest cunctis obsecrationibus nostris*, addit Propheta, declarans quomodo intelligendum sit, *omnibus inuocantibus eum*, & ait, *omnibus inuocantibus eum in veritate*, quæ particula, *in veritate*, includit omnes condiciones bonæ orationis: nam qui siue vera fide orat, non inuocat Deum *in veritate*, quia non inuocat Deum, sed Idolum capitis sui, & qui siue

spe



spe & fiducia orat, non inuocat Deum *in veritate*, quia non potest serio & ex animo inuocare eum, à quo non sperat se audiri, & qui sine charitate vel sine dilectione saltem inchoata orat, non inuocat Deum *in veritate*, quia nemo inuocat serio eum quem odit, & à quo se odio haberi credit, & qui sine affectu ac desiderio orant, vt qui recitant Psalmos & orationem Dominicam absque desiderio consequendi quæ petunt, non inuocant Deum *in veritate*, sed inuocare videntur: denique qui sine attentione orant, nec sciunt quid dicant, ij voce tantum, non mente orant, & ideo non inuocant Deum *in veritate*, quia non ipsi vere inuocant, sed fingunt inane inuocationis ostendunt.

XX. Resc. *Voluntatem timentium se faciet, & deprecationem eorum exaudiet, & saluos faciet eos.*

Sexta virtus Regis est benignitas, quæ non solum facile admittit subditos ad audienciam, sed etiam benigne concedit quæ ipsi petunt, modo ea petant quæ deceat Regem concedere. *Voluntatem*, inquit, *timentium se faciet*, id est, audita oratione præstabit quod ipsi volunt. Sed addit, *timentium se*, quia hoc iustum est, vt Deus faciat voluntatem eorum, qui faciunt voluntatem ipsius. Illi autem faciunt voluntatem Dei, qui timore sancto metuunt offendere Deum, & quidlibet potius amittere volunt, quam gratiam Dei. Id ipsum more suo repetit, cum addit, & *deprecationem eorum exaudiet*. Addit postremo, & *saluos faciet eos*, vt declaret, quomodo Deus semper exaudiat deprecationes timentium se, Sæpe enim Deus videtur non exaudire orationem timentium se, vt cum Apostolum non liberauit à stimulo carnis, pro qua re ter Dominum rogauerat, 2. Corinth. 12. & tamen vere semper exaudiat primarium desiderium timentium se, quod est salutis æternæ desiderium. Sicut enim Dominus iussit, *Primum querite regnum Dei & iustitiam eius*, id est, gloriam & gratiam: sic omnes timentes Deum timore sancto, primo & principaliter in omni oratione petunt salutem inchoatam, quæ est gratia,

& perfectam, quæ est gloria. Deus igitur exaudiat semper timentes se, quia *saluos faciet eos*, id est, exaudiat, quando & quomodo expedit ad salutem.

Scin. *Custodit Dominus omnes diligentes se; & omnes peccatores disperdet.* XXI.

Vltima virtus, sed maxime necessaria Regi est prouidentia, qua protegit iustos, ne à multitudine peccatorum opprimantur, & peccatores dissipat, ne iustis noceant, aut non tantum noceant, quantum vellent: si enim aliquando sunt iustos à peccatoribus multa pati, tamen custodit eos, ne passio illis noceat, imo gratia sua facit, vt multum proficiat. Permisit Deus Martyres sanctos flagellari & occidi, sed custodiuit eos tribuens illis constantiam in fide & patientiam in doloribus, vt animæ gloriam mox adipiscerentur, & paulo post corpus etiam reciperent gloriosum, & verum esse intelligerent, quod eis veritas promissit, *Capillus de capite vestro non peribit*. Quod autem dicit, *omnes peccatores disperdet*, ideo verum est, quia vel peccatores conuerterentur ad iustitiam, & non erunt amplius peccatores, vel iniusti permanebunt vsque ad finem, & disperdentur per detractionem in gehennam, vt ad iustos in æternum appropinquare non possint.

Thau. *Laudationem Domini loquetur os meum, & benedicat omnis caro nomini sancto eius in seculum & in seculum seculi.* XXII.

Concludit Propheta Psalmum, iungens finem cum principio, quasi dicat, propter hæc omnia, quæ dixi de magnitudine Dei, de operibus eius, de perpetuitate Regni ipsius, ac de virtutibus regis, quæ in ipso perfectissimæ & absolutissimæ inueniuntur, *laudationem eius semper loquetur os meum*, nec solum ego laudare cupio, sed opto, vt omnis caro, omnis homo, omne quod spirat & viuunt, nomen Domini semper laudet.



## PSALMVS CXLV.

Titulus &amp; Argumentum.

Alleluia, Aggæi, &amp; Zachariæ.

**H**unc titulum non habent codices Hebraici, excepta prima voce, Alleluia; sed habent codices Græci, & Latini, etiam antiquissimi. S. Hilarius docet, nomina Aggæi, & Zachariæ addita esse ab interpretibus, quoniam duo illi Propheta prædixerunt renovationem Hierusalem. & captiuos consolabantur, & hortabantur ad reditum in patriam, & ad ipsam ciuitatem in laurandam. Hic autem Psalmus, ut etiam duo sequentes, cœlestem Hierusalem prædicant, atq; ad iter suscipiendum ad eam inuitant, & quoniam nihil est, quod magis retardet Peregrinos ab hoc itinere, quam spes felicitatis terrena; quæ ab amicitia & obsequio magnorum Principum dependet; hortatur grauissimis verbis, ut in nullo homine, quantumuis magno, spem ponamus, sed totam fiduciam nostram in Domino collochemus.

## EXPLICATIO PSALMI CXLV.

**L**auda anima mea Dominum: laudabo Dominum in vita mea: psallam Deo meo quamdiu fuero.

Incipit per dialogismum. Peregrinus enim homo animaduertens carnem suam gemere in labore peregrinationis, hortatur animam suam, ut ipsa saltem, quæ spe beata esse cepit, Deum laudet, & canendo reficiat totum hominem. *Lauda*, inquit homo ad animam suam, *anima mea Dominum*. Respondet anima, *laudabo Dominum in vita mea*, id est, tunc vere laudabo, quando veram vitam viuam, nunc enim gemendum, & orandum est, potius quam canendum, & laudandum, quamuis enim & nunc Deum laudemus, tamen non est hæc simplex, & plena laudatio; sed admixta lacrymis, & precibus: tunc autem erit sola, & perpetua, ac iucundissima laudatio. Repetit hoc idem dum addit, *Psallam Deo meo quamdiu fuero*, id est, cum ad vitam æternam peruenero, si-

ne intermissione psallam Deo meo. Nunc enim non possum psallere quamdiu sum, quia multa nimis psallentem interrumpunt; sed tunc ab omnibus negocijs liber & expeditus psallam Deo meo quamdiu fuero, id est, toto spatio veræ illius vitæ; & sicut semper ero, sine timore moriendi, ita semper psallam sine periculo deficiendi. Ita sanctus Hilarius, & sanctus Augustinus exponunt. Non tamen reieciimus expositionem aliorum, qui de præsentī laude hunc versum exponunt.

*Nolite confidere in Principibus, in filiis hominum, in quibus non est solus.*

Videt sanctus Propheta multos retardari ab itinere ad salutem, quia mirantur Præfecturas humanas, Principatus, & Regna, quasi possint, qui ea possident, beatos facere quos volunt; & miseratus cæcitatem ipsorum exclamat, *Nolite confidere in Principibus*; & mox declarat, *in filiis hominum*, id est, in Principibus, qui sunt hominum filij: nam vnus est Princeps verus, qui est conditor hominum, in quo confidere licet. Adiungit rationem, cur in Principibus filij hominum, non sit sidendum, cum dicit, *in quibus non est solus*. Potest autem intelligi efficienter, & formaliter: siquidem in Principibus terrenis non est salus, quia saluare non possunt alios, neque ipsi salui sunt, sed saluandi cum cæteris si digni erunt. At, inquit, Saluator noster filius hominis est; sic enim in Euangelio se vocat Saluator noster Dominus Iesus Christus, quo modo ergo in filio hominis non est salus? Recte S. Augustinus respondet. In Christo salutem esse: non quia filius hominis est, sed quia filius Dei, ac per hoc Deus super omnia benedictus in sæcula, vbi S. Augustinus non negat, Christi humanitatem concurrere ad salutem nostram; ut instrumentum coniunctum, sed significat originem, & fontem salutis in Christo esse, non ex eo quod sumpsit ex homine, sed ex eo quod erat in principio apud Patrem; & eundem Christum non fore Saluatorem si filius hominis esset, & filius Dei non esset.

Exi.



III. *Exibit spiritus eius, & reuertetur in terram suam: in illa die peribunt omnes cogitationes eorum.*

Non esse salutem in filiis hominum multis rationibus demonstrare potuisset Propheta, quia videlicet infirmi sunt; mutabiles, fallaces; sæpè non possunt quod volunt, sæpè nō volunt quod possunt; sed vnicam rationem attulit, cui nemō contradicere potest; videlicet à morte communi petitam, quomodo enim saluare potest alios, qui se ipse saluare non potest? nam, velit nolit, etiam in arce munitissima constitutus, & exercitu armato vallatus; etiam si orbis terrarum Monarcha fuerit, *exibit spiritus eius* ex corpore, & corpus spiritu recedente, in terram, vnde sumptum est, *reuertetur*, & tunc *peribunt omnes cogitationes eorum*, qui videlicet in illo spem suam posuerunt: nam qui Principis fauore gaudent, magnas cogitationum fabricas erigunt, & ipsi diuitias, honores, dignitates ex illius Principis fauore promittunt, sed cum Deus auferat spiritum Principis, concidunt omnia illa palatia, quæ cogitando fabricauerant; & sic illo pereunte pereunt omnes cogitationes eorum. Illud in terram suam reuertetur, non potest vllō modo referri ad spiritum, de quo dicitur, *exibit spiritus eius*, nam in codice Hebraico *spiritus* est generis fœminini, vt etiam verbum *exibit*, sed verbum, *reuertetur*, est generis masculini. Ideo vel exponendum est cum S. Augustino; *exibit spiritus eius*, & caro, siue corpus in terram suam reuertetur: nam & vox, caro, & vox corpus Hebraice sunt generis masculini, vel, vt alij volunt, *exibit spiritus eius*, & ipse homo in terram suam reuertetur. Illud quoque, in illa die peribunt omnes cogitationes eorum, posset intelligi de cogitationibus Principum morientium: vt sensus sit, *exibit spiritus eius*, id est, vniuersiusque Principis, ac per hoc omnium, & singulorum Principum, & tunc peribunt omnes cogitationes ipsorum. Neque explicatio, quam supra posuimus, huic explicationi repugnat, sed ytraque vera est, & simul

consistere potest; non enim repugnat Scripturæ diuinæ, vt plures habeat sentus literales.

*Beatus cuius Deus Iacob, adiutor eius: spes eius in Domino Deo ipsius, qui fecit cælum, & terram, mare, & omnia quæ in eis sunt.*

Reiecta vana confidentia in Principibus terrenis. docet Propheta fiduciam ponendam esse in solo Deo vero. si quis ad veram, atque æternam salutem peruenire desideret. *Beatus*, inquit, est, spe videlicet beatus, & in via recta; & secura ad ipsam beatitudinem in re: cuius Deus Iacob adiutor eius, id est, qui adiutorem, & protectorem in hac via Deum verum habet. Vocat enim Deum verum, *Deum Iacob*, quia familia Iacob Deum verum colebat, cum Moabitæ, Ammonitæ, Philistæi, & ceteræ gentes vicinæ Deos falsos colerent. Illud autem, *eius*, superuacaneum est in lingua nostra: sed apud Hebræos in vsu est, vt alibi monuimus. Declarat continuo Propheta, quis habeat Deum adiutorem, ac dicit, *Spes eius in Domino Deo ipsius*, id est, *beatus est cuius adiutor est, Deus Iacob, beatus*, inquam, cuius spes est in Domino Deo ipsius. Nam hoc loco subintelligitur relatiuum, *cuius*, & superfluum est pronomen, *eius*. Esse autem Deum adiutorem omnium in se sperantium, Scriptura diuina passim docet. Ecclesiastici 2. Nullus sperauit in Domino, & confusus est, & Psa. 113. Domus Israel sperauit in Domino: adiutor eorum, & protector eorum est, & ibidem hoc sæpius repetitur. Probat denique Propheta optimum esse sperare in Domino, quoniam, inquit ipse fecit cælum & terram, mare, & omnia quæ in eis sunt; ex quo sequitur, vt sit potentissimus, & Dominus omnium rerum, & omnia sint ei subiecta, ac per hoc qui ab eo protegitur, nihil timere debeat.

*Qui custodit vernatem in sæculum. V. facit iudicium iniuriæ patientibus, dat escam esurientibus.*

Poterat peregrinus dicere, Deum omnipotentem

M m m m 3



potentem esse scio, & posse, si velit, me protegere, & iuuare, sed vnde intelligam illum velle? Huic respondet Propheta, ac demonstrat, Deum velle, quia iustus & misericors est. Et quidem quia iustus est, *custodit veritatem in saeculum*, id est, semper obseruat promissa: promittit autem auxilium sperantibus in se. Item quia iustus est, *faciet iudicium infirmis patientibus*, id est, iuste iudicat causam, quam habent iusti aduersus iniquos, & iniquos punit, iustos coronat, quia vero misericors est, *descescam esurientibus*, id est, per admirabiles vias prouidentiae suae prospicit inopiam tum spiritali, tum corporali eorum, qui sperant in se.

VI.

*Dominus soluit compeditos, Dominus illuminat cecos.*

VII.

*Dominus erigit elisos, Dominus diligit iustos.*

Quia non sufficit peregrinantibus ad patriam, protegi à latronibus, & alimonia refici, sed necesse est habere pedes solutos, & oculos illuminatos, & totum corpus sanum; ideo adiungit, vt ostendat Deum omnino velle iuuare sperantes in se, *Dominus soluit compeditos*, à compedibus concupiscentiae malae, mortificans paulatim omnes cupiditates: & quia concupiscentia excæcat, *Dominus illuminat cecos*, præbens lumen sapientiae & prudentiae interioris: & quoniam ex peccato non sola cupiditas & cæcitas, sed etiam infirmitas orta est, & homo per peccatum similis illi factus est, qui descendens ab Hierusalem in Hiericho incidit in latrones, & spoliatus ac vulneratus seminiuus relictus est; ideo addit Propheta, *erigit elisos*. Denique adiungit, *Dominus diligit iustos*, vt homo per gratiam sanatus, solutus & illuminatus speret perseuerantiam de Dei benignitate. S. Augustinus legit, *Dominus sapientes facit cecos*; & notat, non esse dictum, *illuminat cecos*, sed, *Sapientes facit cecos*, ne putaremus Prophetam loqui de illuminatione corporali. Sed sciendum est, in Hebræo esse, *Dominus illuminat cecos*, vt habet nostra le-

ctio, Septuaginta autem vertisse, *Dominus sapientes facit cecos*, vt explicarent, Hebraicam lectionem non esse intelligendam de cecitate corporali, sed spiritali; proinde vtraque lectio laudanda est.

*Dominus custodit aduenas, pupillum & viduam suscipiet, & vias peccatorum disperdet.*

Alia metaphora docet Propheta, Deum esse adiutorem & protectorem peregrinorum suorum, qui per viam angustam tendunt ad patriam. *Dominus custodit aduenas*, qui non sunt ciues Babylonis, nec filij huius saeculi, sed peregrini in terra aliena, *pupillum & viduam suscipiet*; pupilli sunt homines iusti, destituti humano praesidio, qui patrem non habent in terris, neque confidunt in villa re temporali, vidua autem dicitur Ecclesia, quia est quasi vidua, cum virum suum non videat in terris, & multis iniuriis & calamitatibus exposita sit. Hos pupillos, & hanc viduam suscipiet Dominus in domum suam, tempore suo: *Et tunc vias peccatorum disperdet*, id est, prosperitates mundi, per quas ambulant peccatores vt per vias latas, quae ducunt ad perditionem, Deus in consummatione saeculi omnino disperdet ac destruet.

*Regnabit Dominus in saecula, Deus tuus Sion in generationem & generationem.*

Denique peregrinatione finita, & viis peccatorum cum impiis peccatoribus exterminatis, adueniet Regnum Christi sempiternum. *Regnabit enim Dominus* cum sanctis suis *in saecula*: Regnabit, inquam, ô sancta Sion, Deus tuus cum filiis suis in saecula saeculorum, Amen.

## PSALMV'S CXLIV.

Titulus, & Argumentum.

Alleluia.

**T**itulus, Alleluia, in Hebraicis codicibus ponitur in fine Psalmi praecedentis secundum



*dum distinctionem Iudaorum, sed LXX. Interpretes posuerunt in principio Psalmi; ut credibile est se habuisse codices Hebraicos tempore LXX. Interpretum: Addunt aliqui Interpretes ad vocem, Alleluia, Aggaei & Zachariae, ut in Psalmo precedente. Argumentum Psalmi est exhortatio ad laudandum Deum, propterea quod Deus sit dignissimus laude ob eius beneficentiam, sapientiam, potentiam, providentiam, iustitiam & misericordiam.*

## EXPLICATIO PSAL. CXLVI.

**I.** *Laudate Dominum, quoniam bonus est Psalmus, Deo nostro sit iucunda decoraq; laudatio.*

Hortatur Prophetia omnes ad laudandum Deum, quoniam laudatio Dei & nobis utilissima & Deo gratissima est. Hunc sensum apertius facit littera Hebraica, quæ ad verbum sic reddi potest: *Laudate Dominum, quoniam bonum psallere Deo nostro, quoniam iucundum, decora laudatio.* Vbi post, *iucundum*, subintelligitur, *Deo nostro*, ut sensus sit, *Laudate Dominum, quoniam bonum est vobis psallere Deo nostro, & iucundum est Deo, quando psallitur, sicut oportet.* LXX. Interpretes paulo aliter verterunt, sed erit idem sensus, si hoc modo exponamus, *Laudate Dominum, quoniam bonus est Psalmus*, id est, quoniam nobis utile est psallere Domino: *Deo nostro sit iucunda decoraq; laudatio*, id est, efficit, ut laudatio, quam offertis Deo, dum psallitis, sit illi iucunda, ut re vera erit, si sit etiam decora, id est, qualis decet eius Maiestatem, pulchra, ornata, virtutum omnium choro stipata. Porro bonum nobis esse psallere Deo, dubitari non potest: primo enim mercedem non parvam accipit diuina laudatio: nam si is, qui orat, mercedem accipit, ut Dominus dicit Matthæi 6. cur non magis qui laudat? secundo, eadem laudatio animum à terrenis ad celestia eleuat: tertio, est prægustatio celestis beatitudinis, nosq; cum Angelis & Beatis coniungit: quarto, dulcissima est, cum

ex charitate procedit; nihil enim iucundius amanti, quam laudare dilectum: quinto, utilis est, quia per eam soluimus debitum tributum, iustum enim est, ut laudemus bonorum omnium fontem, & gratias agamus summo benefactori. Hinc enim in diuino sacrificio, cum Sacerdos dicit: *Gratias agamus Domino Deo nostro*, respondetur: *Dignum & iustum est*: Et Sacerdos addit: *Vere dignum & iustum est, æquum & salutare, &c.* Quod autem iucunda sit Deo decora laudatio, vel ex eo intelligi potest, quod ipse non alia de causa creauit Angelos & homines, nisi ut essent, qui bonitatem eius cognoscerent & laudarent. Isaïæ 43. *Omnem, qui inuocat nomen meum, in gloriam meam creauit eum*: neque hæc est ambitio, sed iustitia. Iustus autem Deus est, & iustitiam dilexit, æquitatem vidit vultus eius. Præterea delectatur Deus sacrificio, ut odore gratissimo & suauissimo: sacrificium autem laudis sacrificiorum præstantissimum est, iuxta illud Psalmi 49. *Sacrificium laudis honorificabit me.* Denique iucunda est Deo decora laudatio, quia delectatur bonis nostris, ac præcipue bonis magnis, quales sunt virtutes: in laudatione autem Dei exercetur Fides, Spes, Charitas, Religio, Deuotio, Humilitas, &c.

*Ædificans Hierusalem Dominus, dispersiones Israël congregabit.*

II.

Incipit materiam diuinæ laudis ostendere, ut sciamus, vnde Deum laudare possumus; ac primum dicit, laudandum esse Deum, ex beneficentia erga populum suum: quasi dicat, *Laudate Dominum, quoniam ipse ædificauit Hierusalem, & ad eam congregabit dispersiones Israël*, id est, filios Israël in locis variis dispersos. Postest autem hoc intelligi cum Chrysostomo & Theodoro de terrena Hierusalem: quæ post euerisionem à Nabuchodonosor cepit iterum ædificari tempore Cyri & Darij Regum Persarum, & captiuitate solu-



soluta redierunt in patriam dispersi Iudæi: hoc autem prævidit David futurum spiritu prophetiæ. Potest etiã intelligi de edificatio-  
ne Ecclesiæ per Apostolorum prædicationem; & congregatione dispersorum filiorum Dei, iuxta illud Ioan. 11. Iesus moriturus erat pro gente, & non tantum pro gente, sed ut filios Dei, qui erant dispersi, congregaret in vnum. Denique potest intelligi cum sanctis Hilario, & Augustino, de cælesti Hierusalem, quæ quotidie ædificatur ut ciuitas, ascendentibus ad eam lapidibus viuus: ad quam cõgregandi sunt omnes peregrini, qui nunc dispersi sunt per regiones Babyloniar.

III.

*Qui sanat contritos corde, & alligat contritiones eorum.*

Docet, quo modo dispersiones Israël congregabit: & quidem si hunc locum intelligamus de dispersis in captiuitate Babylonica, cõtriti corde dicuntur illi, qui magnitudine calamitatum humiliati erant, & in se non amplius confidebant: ut exponit S. Ioan. Chrysostomus. Hos ergo calamitosos, & mortuos, & inde humiliatos ex corde, Deus sanauit, varijs consolationibus illos erigendo, & latificando: & alligauit contritiones eorum, quando per Cyri beneuolentiam effecit, ut calamitas nõ procederet ulterius, & ad perfectam liberationem dispo-  
neretur. Sed altiore sensu colligit Deus dispersos Israelis, quãdo sanat cõtritos corde, id est, quando cor contritũ, & humiliatũ nõ despiciens, sanat à morbo peccatorũ: sic enim explicat ipse idẽ David in Ps. 102. *Qui propitiatur omnibus iniquitatibus tuis, qui sanat omnes infirmitates tuas.* Quod autem hic additur, *Et alligat contritiones eorum*, significat modum quo Deus sanat contritiones. Id enim facit more Chirurgorum colligando vulnera. Sunt autem ex Augustino, alligamenta peccatorum, sacramenta visibilia, per quæ Deus peccata curare solet: & quemadmodum curatis perfecte vulneribus alligamenta tolluntur: sic in resurrectione corporum, curatis omnino languoribus nostris omnia sacramenta cessabunt.

*Qui numerat multitudinem stellarũ, & omnibus eis nomina vocat.* IV.

Secundo laudandum esse dicit Propheta Deum à sapientia. Et quidem sancti Patres Hilarius, & Augustinus dicunt, non esse magnum Deo numerare stellas, quod etiam homines tentare ausi sunt: & ideo exponant hunc locum de stellis spiritualibus, id est, de electis, qui veluti stellæ fulgebunt in cælesti Hierusalem. Electorum enim numerum solus Deus nouit, sed nos quemadmodum expositionem horum Patrum libenter amplectimur; sic etiam ad literam existimamus hunc locum de veris stellis accipi posse. Nam etiam si nõ sit difficile Deo stellas numerare, cui non fuit difficile eas creare: tamen absolute magnum est, & multæ sapientiæ multitudinem stellarum numerare: alioqui non diceret Deus Abrahamo Gen. 15. *Numeras stellas si potes*: neq; conferret. Gen. 22. multitudinem stellarum, cum multitudine atenæ, quæ est in litore maris, de qua dicitur Eccles. 1. *Arenam maris quis dinumerauit?* præterea non solum hic dicitur, *Qui numerat multitudinem stellarum*: sed etiam additur, *Et omnibus eis nomina vocat*: quod significat, noticiam distinctam naturæ, & proprietatem singularum stellarum. Neque hoc solum significat, sed etiam obedientiam stellarum, quæ vocatæ nominatim, cum non essent, esse cõperunt. Deus enim vocat ea quæ non sunt, & vocando facit, ut sint. Baruch. 3. *Stellæ vocatæ sunt, & dixerunt, adsumus, & luxerunt ei cum incunditate, qui fecit illas.* Denique significat etiam stellas, quasi militum exercitum, vocari ut progrediantur; quæ velocissime obediunt vocanti, Isaie. 40. *Leuate in excelsum oculos vestros, & videte quis creauit hæc, qui educit in numero militiam eorum, & omnes ex nomine vocat.* Rectè igitur subiungit Propheta.

*Magnus Dominus noster, & magna virtus eius, & sapientia eius non est numerus.*

Vbi



Vbi non solum sapientia, sed etiam virtus, id est, potentia Dei laudatur, quia non solum Deus nouit numerum, & naturas, & proprietates stellarum: sed etiam vocando eas nominatim, dedit illis esse, & moueri. Illud autem, *Sapientia eius non est numerus*, significat, non esse numerum earum rerum, quas Deus per sapientiam suam cognoscit. Nouit enim sapientia Dei omnia quæ sunt, quæ fuerunt, quæ futura sunt, & quæ esse possunt, quamuis nunquam futura sint; item, omnia verba, omnes cogitationes, omnia desideria præterita, præsentia, & futura usque in æternum; denique nouit omnia, quæ sunt in Deo, id est, in essentia sua perfectiones, & attributa, usque ad intima, & profunda Dei, quæ sunt sine mensura, & numero.

VI. *Suscipiens mansuetos Dominus, humilians autem peccatores usque ad terram.*

Tertia laus Dei sumitur à iustitia, & misericordia. Dominus enim, ut pius & misericors suscipit humiles, & mansuetos in protectionem suam, eosque exaltat usque ad cælum: contra autem, ut iustus Iudex superbos peccatores, qui se ipsi exaltant super sydera, ut fecit Rex eorum Satanas, humiliat, & deprimit, ut humi iaceant, & viles, atque abiecti viuant.

VII. *Præcinite Domino in confessione, psallite Deo nostro in cithara.*

In medio Psalmi, antequam pergat ad laudem prouidentiae diuinæ, iterum hortatur ad canendum, & psallendum Deo. *Præcinite*, inquit, *Domino in confessione*, id est, præmittite confessionem laudis, canendo hymnum, deinde etiam psallite in cithara, addite ad hymnum, sonitum citharæ. Spiritualiter significat, post verba laudis Dei, debere sequi sonitum operum bonorum, ut manus non discorder à lingua, neque de nobis dici possit, *Dicunt & non faciunt.*

VIII. *Qui operit cælum nubibus, & parat terræ pluuiam.*

Materiam confessionis esse docet prouidentiam Dei generalem, qua suis temporibus

bus cogit aerem in nubes, non ut cælum obscuraret, sed ut pluuiam necessariam terræ tribuat; sine qua nihil omnino in terra nascetur. Spiritualiter operit Deus cælum nubibus, cum serenitatem prosperitatis subducit, ut ex tribulatione pluuiæ gratiæ Dei, per patientiam, & humilitatem ad nos descendat, vel secundum S. Augustinum, operit Deus cælum nubibus, cum scripturas, figuris, & metaphoris obscurat, ut ijs explicatis per Doctores, pluuiæ intelligentiæ gratissima descendat.

*Qui producit in montibus fœnum, & herbam seruituti hominum.*

Declarat cui vsui deseruiat pluuiæ, nimirum, ut producat in montibus fœnum, & herba seruituti hominum. Illud, *qui producit*, significat, non sufficere terram, & pluuiam ad producendam herbam, nisi Deus auxilio suo cooperetur; imò nisi Deus ut principalis auctor, sicut per nubes exprimit pluuias, ita per pluuias tãquam per instrumeta sua producat herbas. Illud; *in montibus*, significat, montibus maximè necessarias esse pluuias, quoniam valles, & campi per aquas fluuiorum irrigari possunt: montes autem, nisi de cœlo pluuias acciperent, omnino areferent. Quod sequitur, *Et herbam seruituti hominum*; non habetur in hebræo, sed vel excidit, cum ibi fuisset tempore Septuaginta Interpretum, vel ab aliquo alio positum est hoc loco ex Psal. 103. vbi dicitur, *Producens fœnum iumentis, & herbam seruituti hominum.* significatur autem his verbis, fœnum agreste nasci in montibus in pastum iumentorum; herbam autem, quæ satiatione & cultura gignitur, produci in cibum hominum, vel ut exponit S. Ioan. Chrysostom. fœnum esse herbam iumentorum, ut iumenta homini deseruiant. Vide versiculum 8. Psal. 103.

*Qui dat iumentis escam ipsorum, & pullis coruorum inuocantibus eum.*

Pergit in explicanda prouidentia Dei erga bestias, & volatilia, ut inde intelligat  
Nnnnn homo,

IX.

X.



homo, quanto magis sperare debeat se à Dei prouidentia nunquam esse deferendū. Quod argumentum habetur etiam in Euangelio Matth. 6. & Luc. 12. Quo autem hic dicitur de pullis coruorum, valde probabiliter. S. Gregor. Nazianzenus in epist. 1. ad Cledonium Presbyterum, intelligit de omnibus auiibus, vt posita sit species pro genere: nam & Matth. 6. dicitur, *Respicite volatilia celi*, & Luc. 12. dicitur, *Considerate coruos*: & tamen res eadem ab vtroque Euangelista narratur. Expositores tamen explicant hunc locum de coruis in specie: & quoniam corui non possunt inuocare Deum, necesse est vel coruos, vel inuocationem accipere per metaphoram. Sancti Patres Hilarius, & Augustinus accipiunt inuocationem Dei propriè, & coruos metaphoricè. Dicunt enim per coruos significari paganos, per filios coruorum Christianos, qui inuocant Deum, quem patres eorū inuocare nescierunt. Alij cōmunis accipiunt filios coruorum propriè, & inuocationem impropiè. Dicuntur enim filij coruorum inuocare Deum dum crocitant, quærentes cibum, non quod Deum agnoscant, sed quia Deus est, qui prouidentia sua illis cibum desiderantibus procurat. quomodo etiam dicitur in Psalm 103. de catulis leonum, *Quarunt à deo escam sibi*. Cur autem Propheta dicat potius, Deum prouidere pullis coruorum, quàm ipsis coruis; ratio est, quia corui iam assueti sunt cibum quærere; sed pulli coruorum cito deferuntur à parentibus, & insueti per se cibum quærere, vagantur crocitando, quasi destituti omni auxilio, vt dicitur Iob 38. Quod si Deus pullis coruorum, auiibus immundis, inutilibus, rapacibus, tanta benignitate prospicit, quid præstabit hominibus, si in eius pietate sperare voluerint?

XI. *Non in fortitudine equi voluntatem habebit, nec in tibijs viri beneplacitum erit ei.*

XII. *Beneplacitum est Domino super timentes eum, & in eis qui sperant super misericordia eius.*

Quia dixerat, Deum prouidere pullis coruorum inuocantibus eum; concludit Psalmum dicens, Deo non esse gratos superbos, qui in suis viribus confidunt; sed humiles, qui timent Deum, & confidunt in Deo, qui similes sunt pullis coruorum infirmis, de se diffidentibus, & qui crocitando à Deo auxilium petunt. *Non in fortitudine equi voluntatem habebit*, id est, non placet Deo, siue, non amat Deus fortitudinem equi, quatenus, de ea superbiunt homines. *Neque in tibijs viri beneplacitum erit ei*, id est, neque complacet sibi Deus in tibijs robustis hominum, quatenus in illis ipsi confidunt, vt Dei auxilio sibi egere non videantur ad euadendam periculam: *sed beneplacitum est Deo super timentes eum*, id est, super humiles, & trementes ad mandata Dei, & qui non in suis viribus, sed in Dei misericordia totam spem suā ponunt. S. Hilarius, & S. Augustinus pro illis verbis, *Neque in tibijs viri*, legunt, *Neque in tabernaculis viri*: sed in hebraicis codicibus habetur, *tibijs*, non *tabernaculis*.

## PSALMVS CXLVII.

*Titulus, & Argumentum.*

*Alleluia.*

**H**ic Psalmus apud hebraeos non habet titulum, quia non est nouus Psalmus, sed continuatio Psalmi superioris: nos autē sequimur Septuaginta Interpretes, qui hinc incipiunt nouum Psalmum cum titulo, Alleluia, & credibile est in codicibus hebraicis antiquis, quos ipsi Septuaginta viri habuerunt, hunc fuisse nouum Psalmum cum suo titulo. Quod autem ad argumentum attinet, hortatur Propheta populum Dei ad ipsum Deum laudandum ob multa beneficia in ipsum collata: & qua hic dicuntur, conueniunt primo terrena Hierosolymæ, vt Sanct. Chrysostom. docet; sed magis perfectè conueniunt Ecclesia Christiana, vt idem S. Chrysost. & S. Hieronym. admovent; sed perfectissimè quadrant in cœlestem Hierusalem, de qua hunc Psalmum exponunt S. Hilar. & S. Augustinus.

EXPLI.



## EXPLICATIO PSAL. CXLVII.

I. **L**auda Hierusalem Dominum : lauda Deum tuum Sion.

Hierusalem ciuitas sancta est : Sion, pars eius ciuitatis nobilior, vbi templum Domini edificatum erat, & pro ipsa tota ciuitate accipitur; proinde idem est, *Lauda Hierusalem, & lauda Sion*. Si de cœlesti Hierusalem hæc accipiantur, nihil potuit magis appositè dici: nam ciuitas illa cœlestis, nullum habet negocium, vel vt sibi prospiciat, quæ ad vitam sustentandam necessaria sunt, vel vt in alios exerceat opera charitatis, cum ibi nullus sit egens, nullus miser: ideo tota, & semper vacare potest, vt re vera vacat laudibus Dei. Rectè igitur illi dicitur, *Lauda Dominum*, quæ ab omni alio negotio libera es; *lauda Deum tuum*, quoniam præ omni alia ciuitate beneficijs Domini fructus; lauda denique, quia singulariter tibi pulchritudinem, & præstantiam Domini speculari, vel potius cernere datum est. Ecclesia, quæ peregrinatur in terris, laudare quidem Dominum debet, sed nec tota, nec semper id facere potest, cum sæpè sollicita esse, & circa plurima turbari necesse habeat. Et si Ecclesia non potest tota, & semper laudare: multo minus Iudæorum synagoga poterat.

tulit: non enim benedixit Deus filij Hierusalem hac, aut illa benedictione, sed benedictione absoluta, id est, vt Apostolus loqui solet, *omni benedictione spiritali in cœlestibus*, Ephes. 1. Sed hæc duo perfectè conueniunt cœlesti Hierusalem, vbi securitas est æternitas, & benedictio est fruitio summi boni. Ecclesiæ peregrinanti in terris conueniunt etiam suo modo, sed non omnibus modis: nam *porta inferi non praualebunt aduersus eam*; & non desunt ei bona plurima: sed interim tamen multi in eam intrant mali, multi ex ea deficiunt boni; paleas cum tritico, pisces malos cum bonis, hædos cum agnis admixtos, habet. Denique conueniunt etiam vtcunque, sed valdè imperfectè terrenæ Hierusalem: nam in montibus sita & montes in circuitu habens satis munita videri poterat, & plena populo, atque opibus aliquando fuit: sed tamen non semel euerfa, & succensa satis ostendit, non de illa potissimum intelligendum esse, quod hic dicitur, *Confortauit seras portarum tuarum*: sed illud potius, quod dicitur Thre. 2. *Defixa sunt in terra porta eius, perdidit & contriuit vestes eius, luxitque antemurale, & murus pariter dissipatus est*. Quo tempore ita non abundauit copia bonorum, vt in eodem legamus, *Matribus suis dixerunt, vbi est triticum & vinum*, cum deficerent quasi vulnerati, in plateis ciuitatis, cum exhalarent animas in sinu matrum suarum.

II. *Quoniam confortauit seras portarum tuarum, benedixit filiis tuis in te.*

Hæc est ratio, cur debeat Hierusalem laudare Dominum, quia dedit illi securitatem, & abundantiam, in quibus summa bonorum omnium consistit: nam securitas sine abundantia, est securitas egestatis, abundantia sine securitate, est abundantia plena timoris & periculi. Deus igitur confortauit seras portarum Hierusalem, vt nulla vi expugnari possint, & qui intus sunt securi sint, quia nihil mali intrabit, nihil boni exibat, nullus admittetur inimicus, nullus excludetur amicus: atque in hanc tam munitam ciuitatem benedictio diuina copiam omnium bonorum in-

*Qui posuit fines tuos pacem: & adipe frumenti satiat te.*

Non solum munitissima est ciuitas sancta Hierusalem, sed immunis à bellorum periculis, vnde & nomen habet Hierusalem, id est, visio pacis. Qui enim initio pacem turbare tentauit, tanto impetu mox expulsus fuit, vt Dominus dicat, *Videbam satanam tanquam fulgur de cœlo cadentem*, Luc. 10. *Qui posuit, inquit, fines tuos pacem*, id est, pacem diffudit per vniuersam regionem tuam, vsque ad vltimos eius fines: vel, fines, siue terminos tuos

Nnnnn 2 pacem



pacem esse voluit, vt nullo modo ad te bellum penetrare possit. Nec solum hæc ciuitas abundat copia bonorum, sed habet bona optima, & exquisitissima, atq; adeo ipsam medullam bonorum. *Et adipe, inquit, frumenti satiat te:* vbi notatur excellentia ciborum in verbo, adipe frumenti, & vbertas maxima in verbo, *satiat te.* Hæc omnia propriè, & absolute soli patriæ cœlesti conueniunt: ibi enim pax summa erit partis inferioris cum superiore, & superioris cum Deo: nec non inter omnes ciues sanctæ illius ciuitatis maiores, & minores. Erunt enim verè *cor vnum, & anima vna,* & vt Dominus dicit Ioan. 17. *consummati in vnum.* Ibi quoque satiabuntur omnes adipe frumenti; quoniam eibus animæ veritas, & sapientia est: habebunt autem veritatem in se ipsa, non in figuris, & ænigmatibus; gustabunt dulcedinē æterni Verbi, sine cortice Sacramenti, vel Scripturarū; apponent os ad fontem sapientiæ, non ad riuulos, aut stillicidia stillantia super terram. Ita verò satiabuntur, vt non esuriant, neque sitiant in æternum. In Ecclesia peregrinante, quæ etiam Hierusalem quædam est, habemus pacem an Deum, sed simul in Mundo pressuram sustinemus. Cū omnibus, quantum in nobis est, pacem habere curamus; sed in medio versamur eorum, qui oderunt pacem. Proinde foris pugnæ intus timores nunquam desunt: & adipe quidem frumenti pascimur, sed non sine integumentis varijs: Verbum Dei habemus, sed in carne, & ipsam carnem Verbi verè manducamus. sed sub cortice Sacramenti. Aquas sapientiæ bibimus; sed ex stillicidio Scripturarum; & adeo non satiamur his bonis, vt nostra beatitudo interim sit esurire, & sitire. Multo minus ista conueniebant terrenæ Hierusalem, anti. quæ Synagogæ Iudæorum, quibus omnia contingebant in figuris.

IV.

*Qui emittit eloquium suum terra, velociter currit sermo eius.*

Hortatus est Propheta sanctam ciuitatem, vt Deum laudet pro beneficijs sibi præstitis: nunc hortatur, vt laudet etiam pro benefi-

cijs præstitis alijs nationibus, ex quibus cognosceret, quanto maiora dona sibi, quam alijs concesserit Deus. Hortatur igitur vt laudet Deum, *qui emittit eloquium suum terra,* id est, qui præcepta, & decreta prouidentia suæ dat vniuersæ terræ; & eius sermo velocissimè currit, id est, cuius præcepta, & decreta celerrimè deferuntur ad omnes res creatas, mox penetrant omnia, & executioni mandantur. Significatur his verbis ordo prouidentia diuinæ, qui se ad omnia extendit, idque summa velocitate, quia Deus vbique est, & omnia portat verbo virtutis suæ; vt dicitur Hebr. 1. *& attingit à fine vsque ad finem fortiter, & disponit omnia suauiter.* Sap. 8. vnde Dauid Deo dicit Psalm. 118. *Omnia seruiunt tibi.* Expendit S. Augustin. verba græca, quæ pro eo, quod nos habemus, velociter, habet, *ὡς τὰ ἄστρα,* vsque in velocitatem, & sensum esse dicit. sermonem Dei tanta celeritate ferri. vt non modo aues, ventos, fulmina, quæ velocissimè, moventur, sed ipsam velocitatem currendo æquent. iuxta illud Sap. 7. *Omnibus mobilibus mobilior est sapientia;* non quòd sapientia, vel sermo Dei propriè moueatur, sed quod omnibus in locis adfit, præsens, ac si velocissimè accurrisset.

*Qui dat niuem, sicut lanam, nebulam sicut cinerem spargit.*

V.

*Mittit crystallum suam sicut buccellas, ante faciem frigoris eius quis sustinebit?*

VI.

Ab vniuersali prouidentia descendit ad effectum vnum particularem, in quo apparet admirabilis potentia, & sapientia Dei, ob quam merito laudari debeat Dominus etiam ab illis, qui in superna Hierusalem extra, vel supra mutationes temporum degunt. Effectus mirabilis potentia, & sapientia Dei, qui tamen sensu percipitur, & omnibus nouissimus est, in frigore & calore aeris cernitur. Aliquando enim in certis regionibus tanta niuium, pruina, & glaciæ copia repente existit, vt lacus, & flumina, & ipsa maria congelentur, & ita congelentur, vt super lacus & flumina ducantur palustra. bene:



bene onusta, vt per campos duci solebant: cuius rei testis est S. Basilius oratione in Quadraginta Martyres: & nos ipsi in Gallia Belgica aliquid huiusmodi vidimus. Et cum ea glacies ferrois lignonibus vix dirumpi queat; Deus tamen, cum ei placet, ventum calidum repente ex thesauris suis aduocat, & dicto citius soluitur glacies omnium fluminum, & lacuum, & marium simul & vbiq; ex tectis domorum, ex montibus, & collibus defluunt aquæ. Ita ferè in momento Deus rigorem maximum cum caloris suauitate commutat: sed verba singula explicemus. *Qui dat niuem, sicut lanam*, id est, niuem dimittit ex cælo tantæ magnitudinis, vt frustra singula floccos lanæ imitari videantur. Comparatur enim hoc loco nix lanæ, non solum ob similitudinem leuitatis, & candoris, sed vt magnitudo niuis ostendatur: aliquando enim ita modicè ningit, vt frustula niuis videantur similia atomis, sed alias, vt diximus, ita granditer ningit, vt frustra niuium lanarum floccos imitentur. *Nebulam sicut cinerem spargit*. Sanctus Hieronymus in commentario huius loci reprehendit latinum Interpreterem, quod nebulam verterit, cum pruinam vertere debuisset: sed latinus Interpres non verba hebraica, sed græca traduxit in latinum idioma. Verbum autem græcum hoc loco positum *ἐμίχλην*, nebulā propriè significat quamuis autem vox hebraica, *chephor*, pruinam significet, & sit ad propositum huius loci, vbi de frigore agitur: tamen textus faciliè conciliantur. Siquidem quando densa pruina decidit, nebulosum, sicut caliginosum aërem reddit, & ipsa pruina ex caliginoso vapore conrescit. Porro comparatio pruinæ cum cinere ad densitatem pruinæ pertinet, sicut diximus de comparatione niuis cum lana. Itaque sensus est, tanta densitate pruinam caliginosam, siue nebulam ex pruinā diffundit, vt cinerē spargere videatur: cinis enim fufus obsecurissimam nebulam facit. *Mittit crystallum suum sicut buccellas*: crystallus vox est græca, & non solum quam vulgo crystallum dicimus, sed etiam glaciem significat: & hoc loco glaciem signifi-

care apertè colligitur ex voce hebraica. Aliqui per crystallum hoc loco grandinem significari volunt, quæ est aqua in aëre congelata; sed grando non habet similitudinem buccellæ, neque dicitur hebraicè *cerach*, sed *barad*, hoc autem loco est, *carecho*, glaciem suam, non *berado*, grandinem suam: deniq; grando in æstate potissimum descendere solet, proinde non efficit in aëre frigus, de quo hic dicitur, *Ante faciem frigoris eius quis sustinebit?* Illud igitur, qui mittit crystallum, non significat, qui de cælo descendere facit; sed qui iussu suo causa est, vt glacies frigidissima in terra existat. quomodo dicebatur Deus mittere Prophetas, & Ioannes dicitur homo missus à Deo, qui tamen non de cælo cadebant. Illud, *sicut buccellas*, significat fragmenta glaciæ, quæ tempore frigidissimo passim inveniuntur in terra, vbiunque aliquid aquæ fuerat, similia esse buccellis panis quia figura habent fragmentorum panis. *Ante faciem frigoris eius quis sustinebit?* Hæc est apostrophe Prophetæ admirantis frigoris vehementiam, quasi dicat, Quis tantum frigus tolerare poterit? *Ante faciem frigoris eius*, id est, coram tanto frigore, siue ad præsentiam tanti frigoris quis sustinere poterit? quis non congelabitur, & peribit? est enim hebraica phralis, ante faciem, pro, coram, vtitatissima.

*Emitte verbum suum, & liquefaciet ea: flabit spiritus eius, & fluent aquæ.*

VII.

Descripsit hætenus vehementissimum frigus ex niue, pruina, & glaciæ: nunc ostendit quanta facilitate, & celeritate Deus illud recedere faciat. *Emitte, inquit, verbum suum*, id est, mandatum suum, *& liquefaciet ea*, iubebit Deus, & mox liquefcent nix, pruina, & glaciæ & continuo frigus remittetur. Modus autem quo id faciet Deus, explicatur, cum subiungitur, *Flabit spiritus eius, & fluent aquæ*, id est, iubente Deo surget ventus australis, perflabit vndique aërem, & nix, pruina, & glaciæ soluentur in aquas.



VIII.

*Qui annunciat verbum suum Iacob, iustitias, & iudicia sua Israel.*

IX.

*Non fecit taliter omni nationi, & iudicia sua non manifestavit eis.*

Concludit ostendens, quantum interfit inter providentiam Dei erga populum suum, & alias nationes. Alias enim nationes docuit Deus per effecta naturalia, ut ex rebus creatis agnoscerent creatorem: sed populum suum ipse docuit per Prophetas suos. *Qui annunciat verbum suum Iacob*, id est, lauda Hierusalem Dominum, qui annunciat verbum suum populo suo Iacob, loquens illi per Moysen, & Prophetas; & qui demonstravit iustitias, & iudicia sua Israel per Moysen, cui Deus ipse legem dedit, ut eam traderet populo suo Israel: & ex hoc intelliges, quia non fecit taliter omni nationi, quia tibi soli, non alijs iudicia sua, leges videlicet suas manifestavit. Porro ista conclusio convenit quidem terrenæ Hierusalem, cui Deus misit Prophetas, qui annuntiarent verba eius, & docerent leges eius: sed multo magis conveniunt spirituali Hierusalem, quæ est Ecclesia, quæ recepit ipsum Verbum Dei incarnatum per Apostolorum prædicationem, & multo sublimiorem legem, iustitias, & iudicia didicit: sed perfectissimè conveniunt cælesti Hierosolymæ, cui Deus ipse coram annunciat Verbum suum, & in ipso Verbo vident omnes habitatores Hierusalem iudicia Dei, ordinem, ac dispositionem, & rationes providentiæ divinæ, quæ nobis sunt abyssus multa. Verè igitur, *non fecit Deus taliter omni nationi*, sed cælestis patriæ habitatores præ omnibus alijs hominibus, dilexit, & diligendo felicissimos fecit. Hæc mihi visa est literalis expositio huius obscurissimi Psalmi, in qua S. Ioannem Chrysostomum ex Patribus præcipue imitatus sum, quantum ad illos versiculos, *Qui dat nivem sicut lanam*, &c. Quia tamen hæc pars obscurissima est, indicabo brevissimè quid sanctus Hilarius, & sanctus August. senserint. Igitur sanctus Hilarius existimat, in illis verbis, *Qui dat nivem sicut lanam*, &c. Prophetam declara-

re, quæ sit via ad cælestem Hierusalem, & qua dixerat, *Lauda Hierusalem Dominum*. Viam autem esse dicit per multas tribulationes, & angustias, easque significari per nivem, pruina, & glaciem, & frigus ferè intolérable: sed ex his omnibus tandem liberandos peregrinos Dei, flante spiritu consolationis, & refrigerij Sanctus Augustinus paulò aliter exponit. Dicit enim, Prophetam post commemorata bona cælestis Hierusalem in tribus versiculis, commemorare bona peregrinantium in sequentibus versiculis, & eius expositio satis proluxa nota est in libris eius: nos ad eius imitationem, aliam similem adiungemus. Igitur illud, *Qui emittit eloquium suum terra*, exponi potest de consolatione scripturarum, quam hic habemus, quasi manna de cælo plueret in desertum. Illud autem, *qui dat nivem sicut lanam*, potest exponi de consolatione, quam accipiunt Sancti ex tribulationibus, iuxta illud Apostoli, *Repletus sum consolatione, superabundo gaudio in omni tribulatione nostra: nā nix quidem frigore affligit, sed lana calore suo fouet, & calefacit*. Itaque Deus, dat nivem sicut lanam, quia dat nivem, ac si daret lanam; dat enim tribulationem, quæ Sanctis convertitur in consolationem. Illud *Nebulam sicut cinerem spargit*, referri potest ad poenitentiam, ad quam pertinet cinis: Deus enim spargit nebulam, siue pruina tribulationis, ex qua multi compunguntur ad poenitentiam; atque ita Deus dat nebulam sicut cinerem, quia dat nebulam, ac si daret cinerem, quia tribulatio ad poenitentiam adducit. Illud denique, *mittit crystallum suum, sicut buccellas*, exponi potest de maxima consolatione, quā Deus in tribulatione concedit: tunc enim mittit crystallum sicut buccellas, quando ita dat glaciem, ac si daret panem, quia in ipsa glacie tribulationis infunditur panem consolationis.

\* \*



## PSALMVS CXLVIII.

Titulus, &amp; Argumentum.

Alleluia.

**T**Res postremi Psalmi, qui habent in titulo, Alleluia, inuitant omnes res creatas ad laudandum creatorem. Et quidem in Psalmo 148. enumerantur ordine res omnes creatas, & quasi vocantur ad chorum, ut suo modo omnes cantant: in Psalmo sequenti iniungitur hominibus, ut ij potissimum Deum laudent, qui plura, & maiora beneficia receperunt: in postremo mandatur iisdem hominibus, ut non solum Deum laudent, sed per omne genus instrumentorum musicorum laudent.

## EXPLICATIO PSAL. CXLVIII.

I. **L**audate Dominum de cælis: laudate eum in excelsis.

II. **L**audate eum omnes Angeli eius, laudate eum omnes virtutes eius.

Primo loco inuitantur Angeli, qui in summo cælo, tanquam in ipsa Regis æterni aula resident. Porro vox illa, laudate, non est imperantis, neque propriè exhortantis, quasi Angeli desint officio suo, sed est inuitantis per affectum complacentis, & optantis, quasi dicat Propheta Dei amore vehementer accensus, Vtinam omnes res creatæ creatorem laudent, & vos Angeli, qui primi estis in ordine rerum creatarum, pergit, ut facitis, laudate Dominum. Illud, de cælis, significat locum, ubi Angeli degunt, ut sensus sit, Laudate Dominum de habitaculo vestro cælesti vos omnes, qui estis in cælo. Idem verò repetitur cum additur, *Laudate eum in excelsis*. Deinde clarius explicatur, qui sint, qui habitant in excelsis, cum dicitur, *Laudate eum omnes Angeli eius*: & idem alijs verbis repetitur, cum additur, *Laudate eum omnes virtutes eius*, id est, omnes exercitus eius, ut habetur in hebræo. Per virtutes Dei, siue exercitum, & militiam Dei, intelligi debere Angelos, non Solem, & Lunam & Stellam, ut a-

liqui volunt, perspicuum est, primò ex consuetudine Davidis, qui frequentissimè idem repetit alijs verbis: secundo ex Patribus, qui hunc locum exponunt, ac præsertim ex Chrysostomo, qui virtutes hoc loco dicit esse Cherubim, & Seraphim, & cæteros Angelos: tertio ex cap. 2. Lucæ, ubi Angeli dicuntur multitudo militiæ cælestis: quarto ex Psalmo 102. ubi clarius Angeli dicuntur virtutes Dei, & ministri qui faciunt verbum eius.

*Laudate eum Sol & Luna, laudate eum omnes stella, & lumen.*

*Laudate eum cæli cælorum, & aquæ omnes quæ super cælos sunt, laudent nomen Domini.*

Ab Angelis, qui mente, & intelligentia præditi Deum propriè laudant; descendit ad corpora cælestia, quæ non laudant mente, vel intelligentia, quæ earent, sed laudant magnitudine, velocitate, efficacitate, splendore, & pulchritudine admirabili; quomodo omne opus egregium, opificem laudare dicitur. Ac primo nominat Solem, qui omnium consensu princeps est luminum reliquorum: deinde addit Lunam, quæ vel absolutè, ut Patres velle videntur, præsertim S. Augustinus lib. 2. de Gen. cap. 16. vel certè quo ad apparentiam, & efficaciam in corpora inferiora, maior est omnibus alijs stellis: postea adiungit stellas cæteras: postremo subiungit lumen, per quod intelligimus lumen à Sole, Luna, & stellis diffusum in corpora inferiora, ac potissimum in aërem, unde nos omnes mirificè recreat. His enumeratis, quæ continentur in cælo, transit ad ipsum cælum, & vocat cælos cælorum, id est, cælos superiores, quibus subiecti sunt cæli inferiores, in quibus nubes concresecunt, & aues volant. unde in Scripturis legimus nubes cæli, & volucres cæli. His cælis superioribus adiungit aquas, quæ super cælos sunt, ut nihil omnino sit in parte Mundi superiore, cuius non meminerit. Porro de aquis istis aliqua videntur extra controuersiam esse debere, alia disputationi hominum permittuntur: primo certum

III.

IV.



certum esse debet, aquas esse corporales, non spirituales; in quo errasse Origenem conuincit S. Epiphanius in epist. ad Ioann. Episcopum Hierosolymæ, quam S. Hieronymus latinam fecit, nec non Basilius, & Ambrosius de opere sex dierum. Secundo esse super cælum æthereum, non vt quidam voluerunt, in cælo aereo: nam hoc loco indicat Propheta, eas esse super cælos cælorum, quia cum dixisset, *Laudate eum cæli cælorum*, mox adiungit, *Et aqua omnes, quæ super cælos sunt*, illos videlicet, quos immediatè nominauerat cælos cælorum. & in Psal. 102. de cælo eodem loquens Propheta dicit, *Extendens cælum sicut pellem, qui tegit aquas superiora eius*. & apertè in primo cap. Geneseos, ponit Moyses aquas super Firmamentum, in quo firmamento paulò post stellas posuit. Et a pertissimè in hymno trium puerorum Danielis cap. 3. enumerantur ordine omnia opera Domini: & primo loco ponuntur Angeli, deinde cæli, & aquæ quæ super cælos sunt, postea Sol & Luna, & stellæ, & cætera inferiora, atque hæc est sententia veterum Patrum, vt notauimus in Psalm. 103. vers. 3. tertio esse aquas incorruptibiles, & sempiternas: nam de ijs, quæ hucusq; numerata sunt, dicitur in sequenti versiculo, *Statuit ea in æternum, & in sæculum sæculi*.

V. *Quia ipse dixit, & facta sunt, ipse mandauit, & creata sunt.*

VI. *Statuit ea in æternum, & in sæculum sæculi: praeceptum posuit, & non præteribit.*

Hæc est ratio cur omnia, quæ hæcenus nominata sunt, Deum laudare debeant: quoniam ab illo facta sunt, & in æternum incorrupta permanebunt: & quod est admirabilius, non magno labore, nec multo tempore, sed verbo, atque imperio fecit vt essent, & in æternum essent. Ipse dixit, *Fiat lux, & facta est lux*. Ipse mandauit rei non existenti, vt existeret, & mox obediens cœpit existere, quæ antea nihil erat. *Statuit ea in æternum, & in sæculum sæculi*, id est, constituit, vt semper maneant, & non ad morem inferiorum

corporum oriantur, & occidant. *Præceptum posuit*, id est, decretum de hac re fecit Deus. *& non præteribit*, id est, & hoc decretum non præteribit, non abibit in auras, sed manebit, & manens res ipsas conferuabit, vt nec ipsæ prætereant. per hoc præceptum intelligitur natura incorruptibilis, quam Deus Angelis, & cœlestibus corporibus in creatione attribuit. Potest etiam per præceptum positum, intelligi præceptum datum rebus cœlestibus, id est, Angelis, vt semper Deum laudēt, Soli, & Lunæ, & stellis, vt circumeundo, & illustrando seruiant humano generi, quod præceptum non præteribit, id est, vt exponit S. Hilarius; non irritū erit; vt re vera nō irritum fuisse experimento didicimus. Euthymius legit, non præteribunt: sed codices hebraici, graeci, & latini omnes, quos videre potui, habent, non præteribit.

*Laudate Dominum de terra, dracones, & omnes abyssi.*

VII.

Transit nunc ad elementa corruptibilia, & Mundum inferiorem; vbi sunt terra, aqua, & aer, & animantia terrestria, aquatica, & volatilia: nec non tonitrua, fulmina, grandines, venti, & alia id genus. Ex quo apertissimè refelluntur Manichæi, qui res istas inferiores non à Deo bono, sed à malo quodam principio condita fabulabantur. *Laudate*, inquit, *Dominum de terra*, dixerat, *Laudate Dominum de cælis*: nunc dicit, *Laudate Dominum de terra*: quoniam Dominus in principio creauit cælum, & terram; & sicut ad cælum, quod est sedes Angelorum, omnia superiora reuocauit: sic ad terram, quæ est sedes hominum, omnia inferiora reuocare voluit. Hæc videlicet est causa, cur non primo loco nominauerit ignem, aut aërem, aut aquam: quoniam terra est altera pars Mundi, & homini habitatori terræ cætera omnia, siue ignis, siue aër, siue aqua deseruiunt. Sed posteaquam dixit, *Laudate Dominum de terra*, id est, omnia, quæ estis in terra, vel pertinetis ad terram: incipit particularia numerare, & primo loco meminit aquarum, & piscium, quæ sunt in locis

VII

IX.

X.



in locis terræ declinioribus: nam per Draco-  
nes intelliguntur hoc loco magni pisces, &  
per abyssos intelliguntur aquarum profun-  
da, in quibus pisces habitant: ita S. Ioan.  
Chrysostomus, qui id probat ex Psal. 103.  
*Draco iste, quem formasti ad illudendum ei,*  
*id est, mari, Psal. 73. Contribulasti capita*  
*Draconum in aquis.*

VIII.

*Ignis, grando, nix, glacies, spiritus pro-*  
*cellarum, quæ faciunt verbum eius.*

Ab aquarum abyssu transit ad aerem, v-  
bi inveniuntur ignes, id est, fulgura; fulmi-  
na, coruscationes: item *grando, nix, glacies;*  
item *spiritus procellarum,* id est, venti vehe-  
mentes, qui tempestates excitant, & inges-  
tes pluuias secum ferunt, *quæ omnia faciunt*  
*verbum eius,* id est, obediunt præcepto eius:  
quod postremum addi voluit Spiritus san-  
ctus, ne Manichæus aliquis, aut Atheus sus-  
picaretur, vel hæc mala esse, quod sæpè ma-  
gnas calamitates hominibus inducant, vel  
casu fieri, vt fulmine quis percellatur, vt  
grando vineas vrât, vt vi procellarum nauig-  
ia perëant. Deus igitur vtitur his rebus, vt  
instrumentis iustitiæ, vel misericordiæ suæ,  
ad malos puniendos, vel bonos admonen-  
dos, ac per hoc non casu eueniunt, neque res  
malæ dici debent, sed bonæ, cum bono Deo  
seruiant.

IX.

*Montes, & omnes colles, ligna fructi-*  
*fera, & omnes Cedri.*

X.

*Bestia & vniuersa pecora, serpentes, &*  
*volucres pennatæ.*

Nunc tandem ab aere ad terram reuertit-  
tur, & enumerat primo partes ipsius terræ  
eminentiores, *Montes, & colles,* ex quibus  
subintelliguntur campi patentes & valles:  
æque enim montes & colles sine campis &  
vallibus esse possunt. Deinde transit ad ea  
quæ nascuntur ex terra, & primo nominat  
*ligna fructifera,* deinde *infructifera,* quales  
in primis sunt *Cedri,* quæ tamen ad ædifi-  
candas domos, & naues necessariæ sunt. Pos-  
tea conuertit orationem ad animantia, quæ  
terram inhabitant, & ipsa genera breuiter  
attingit, bestias syluestres, iumenta, & pe-  
cora domestica, serpentes qui per terram re-

punt, & aues, qui per aerem volant. Atque  
ista omnia ad Deum laudandum prouocat,  
non quod ista Deum nouerint cogitare, ne-  
dum laudare, sed vt homines considerantes  
vtilitatem, quæ ex illis capitur, Deum lau-  
dent, ei quæ debitas gratias agant. At, inquis,  
quæ vtilitas ex agrestibus feris, ex serpen-  
tibus, leonibus muscis, & culicibus capi-  
tur? Magna omnino vtilitas ex animantibus  
illis capitur, quæ nobis vel terrorem incu-  
tiunt, quales sunt leones & serpentes; vel  
molestiam adferunt, quales sunt culices &  
muscæ. Nam erudunt nos ad humilitatem,  
dum in memoriam nobis reuocant inobe-  
dientiam & superbiam parentum primorum  
in nos generatione transfusam, ob quam  
imperium in animantia, magna ex parte  
perdidimus.

*Reges terræ, & omnes populi: Princi-*  
*pes, & omnes Iudices terræ.*

XI.

*Iuuenes, & virgines: senes cum iunio-*  
*ribus laudent nomen Domini, quia exal-*  
*tatum est nomen eius solius.*

XII.

Postremo genus humanum citat ad lau-  
des Dei, atque vt omnes homines compre-  
hendat, tres differentias hominum enume-  
rat, potestatis, sexus, & ætatis. *Reges,* inquit,  
& *populi,* id est, qui imperant, & qui parent:  
& quoniam, qui imperant, non sunt eiusdè  
ordinis, sed alij alijs præsunt, addit, *Princi-*  
*pes,* suprema videlicet, & *omnes iudices,* qui  
à Principibus auctoritatem habent, atque  
hæc est differentia potestatis. *Iuuenes, &*  
*virgines,* id est, viri & feminæ, quod pertinet  
ad differentiam sexus. *Senes cum iunioribus,*  
quæ est differentia ætatis. Omnes igitur siue  
Principes, siue priuati, siue viri, siue femi-  
næ; siue senes, siue adolescentes *laudent no-*  
*men Domini, quoniam exaltatum est nomen*  
*eius solius,* id est, quoniam non est aliud no-  
men verè sublime, & altum, & omni laude  
dignum, nisi Dei nomen. Res enim creatæ,  
quamuis magnæ, si ad magnitudinem Dei  
comparentur, nihil sunt: & quicquid ma-  
gnitudinis & excellentiæ habent, ab illo ha-  
bent, qui solus altissimus iure nominatur &  
est.



XIII.

*Confessio eius super calum, & terram; & exaltavit cornu populi sui.*

Reddit ratione m. cur dixerit, *exaltatum est nomen eius solius*; quoniam, inquit, *confessio eius est super calum & terram*, id est, quia omnia quæ in cælo, & quæ in terra sunt, confitentur laudes eius, ita pleni sunt cæli, & terra gloria eius; vel ut ait Habacuc, *Operuit cælos gloria eius, & laudis eius plena est terra*: ideo *exaltatum est nomen eius solius*. Et *exaltavit cornu populi sui*, id est, ipse per se solus sublimis & excelsus exaltavit potentiam & gloriam populi sui Israel, quia elegit cum sibi in populum peculiarem, deditque illi diuinas leges proprio digito scriptas, ac singulari prouidentia curam illius gerit.

XIV. *Hymnus omnibus sanctis eius, filijs Israel, populo appropinquanti sibi.*

Hæc est conclusio Psalmi, quasi dicat, *Igitur hymnus Deo canendus præcipue conuenit omnibus sanctis eius*, id est, omnibus Deo dicatis & consecratis, filijs Israel videlicet, qui populus est præter cæteros omnes Deo ipsi propinquans. vera cognitiōe & fide, vero cultu & adoratione, vera filiali fiducia & dilectione. Sed rectissime admonet S. Augustinus, hæc non dici de filijs Israel secundum carnem, sed de filijs Israel secundum spiritum: siquidem filij Israel secundum carnem dura ceruice cum essent, Deo non propinquabant. Sic enim loquitur S. Prothomartyr Stephanus Act. 7. *Vos semper Spiritui sancto resististis; sicut Patres vestri, ita & vos: quem Prophetarum non sunt persecuti Patres vestri, & occiderunt eos, qui prænunciabant de aduentu iusti, cuius vos nunc proditores & homicida fuistis*: Apostolus autem ad Rom. 9. demonstrat, qui sint veri filij Israel appropinquantes Domino, cum ait, *Non omnes qui ex Israel, hi sunt Israelitæ: neque qui semen Abraham, omnes filij, sed in Isaac vocabitur tibi semen*, id est, non qui filij carnis, hi filij Dei, sed qui filij sunt promissionis æstimantur in semine. Et ad Rom. 4. scribit, eos ad filios Abraham pertinere, qui sectantur vestigia fidei Patris

nostri Abraham, siue ex circuncisione, siue ex præputio sint. Neque enim excludere debemus omnes Israelitas secundum carnem alioqui etiam Prophetas & Apostolos excluderemus, sed eos tantum excludimus, qui solum secundum carnem Israelitæ sunt, & non secundum spiritum, quales erant ij, de quibus loquitur S. Stephanus loco citato, & quibus Præcursor Domini dicebat, *Genimina viperarum, quis vobis demonstrauit fugere à ventura ira? & nolite dicere, Patrem habemus Abraham* Luc. 3, & quibus Dominus ipse dicebat, *Si filij Abraham estis, opera Abraham facite, & Vos ex patre diabolo estis*. Ioan. 8. Denique tales sunt, qui post abnegatum Dominum dispersi sunt inter gentes, & sine Rege, sine Sacerdotio, sine Deo viuunt in hoc mundo.

## PSALMVS CXLIX.

*Titulus, & Argumentum.*

*Allèluia.*

**P**salmum hunc exponunt græci de victorijs Machabeorum, alij de victorijs ipsius Davidis. Sed nescio ubi legatur vel tempore Davidis, vel tempore Machabeorum fuisse ab hebræis alligatos Reges nationum in compedibus. Alij mystice exponunt omnia de victoria spiritali Ecclesiæ aduersus infideles. Quas expositiones ut non rejicio, ita existimo ad litteram Psalmum esse exponendum de obligatione, qua tenetur populus Dei laudare Dominum suum præter cæteras gentes, ob gloriam sempiternam sibi promissam, & ad quam finito præsentis exilio sine dubitatione perueniet.

### EXPLIC. PSALM. CXLIX.

**C**antate Domino canticum nouum, laus eius in Ecclesia sanctorum.

Primus hic versiculus alloquitur eos, quibus dictum est in fine Psalmi superioris. *Hymnus omnibus sanctis eius, populo appropinquanti sibi*. Sunt enim hi tres vltimi Psalmi inter se connexi, & vnus continuatur cum alio. Et ea causa est fortasse, cur in



eur in officio Ecclesiastico in fine laudum matutinarum quasi vnus Psalmus tres isti Psalmi concinuntur. Ait igitur, o vos Sancti, qui populus estis Deo propinquans, *Cantate Domino canticum nouum*, id est, ceteræ creaturæ cantant canticum ratione creationis, quod est canticum vetus; vos autem cantate canticum ratione renouationis, iustificationis, glorificationis, quod est canticum nouum, super noua materia, à nouis hominibus decantandum. *Laus eius in Ecclesia sanctorum*: hæc est ratio verborum superiorum, quasi dicat Propheta, Vos sancti cantate Domino canticum nouum, quia decet, vt laus Dei potissimum audiatur in congregatione Sanctorum.

II. *Letetur Israel in eo, qui fecit eum, & filij Sion exultent in Rege suo.*

Canticum nouum magnam habet letitiam, quoniam annunciat beneficia perfectæ felicitatis, & quia ex ardentissimo amore procedit. Igitur *Israel*, populus Dei electus, qui cantat canticum nouum, *letetur*, cantando in eo, qui fecit eum, in ipso conditore suo, qui non solum creauit naturam, sed etiam donauit gratiam, & sic fecit non solum vt esset, sed vt esset Israel. *& filij Sion exultent in Rege suo*, est repetitio per alia verba; nam filij Sion, ipse est Israel. Recte in Biblijs recognitis sublatum est, *filia*, & repositum *filij*: quoniam in Hebræo & Græco habetur, *filij Sion*, & sic legunt S. Augustinus, S. Hieronymus, S. Chrysostomus, Euthymius, & alij: neque deerant textus Latini, qui haberent, *filij*, vt videri possit typographorum vitio irrepsisse vox, *filia*, pro *filij*.

III. *Laudent nomen eius in choro, in tympano & psalterio psallant ei.*

Neque solum cantent canticum nouum cum letitia & exultatione, sed etiam instrumenta musica ad voces suas adiungant, id est, non solum ore, sed etiam opere, non lingua tantum, sed etiam manu, hoc est vita & moribus cantent. Per *chorum*, intelligunt aliqui instrumentum musicum, vt etiam per *tympanum* & *psalterium*, quod clarius

colligi videtur ex Psalmo sequenti. Dicunt autem chorum, cum accipitur pro instrumento, tibiam significare, sed possumus etiā per chorum intelligere multitudinem cantorum simul canentium, vt sonat vox Græca & Latina; & vt Patres intellexerunt. Ait igitur, Laudent eum in choro vocibus consonis simul concinentes, in tympano & psalterio manibus psallentes lætitiæ sonitum edant.

*Quia beneplacitum est Domino in populo suo, & exaltabit mansuetos in salutem.*

Hæc est ratio cantici noui, quia complacuit sibi Dominus in populo suo, id est, amauit eum ab æterno ex mera benignitate sua: hoc beneplacitum Dei, Græce εὐδοκία, est fundamentum & prima radix omnium bonorum nostrorum: nam ideo prædestinauit, ideo vocauit, ideo iustificauit, ideo glorificauit; quia complacuit sibi in populo suo. De hoc dicit Dominus Luc. 2. *Nolite timere pusillus grex, quia complacuit Patri vestro dare vobis Regnum*: hoc beneplacitum passim in suis Epistolis B. Paulus prædicat. Merito ergo materia est cantici noui. *Et exaltabit mansuetos in salutem*. Non complacuit solum sibi Deus in mente sua, sed hoc beneplacitum re ipsa implebit, quia *exaltabit mansuetos in salutem*, id est, populum suum humilem & mitem, vt vera membra eius, qui dixit, *mitis sum, & humilis corde*, exaltabit vsque ad summam excellentiam, quæ est æterna salus. Quidam Latini codices habent, *exaltauit*: sed emendata lectio habet, *exaltabit*: nam in Græco, & in hebræo habetur, in futuro, *exaltabit*: verumque est verum, nam exaltauit in spe, & exaltabit in re.

*Exultabunt Sancti in gloria, letabuntur in cubilibus suis.*

Hic iam describit futuram gloriam electorum, ob quam toto corde cantare debebant canticum nouum. *Exultabunt*, inquit, *sancti in gloria* illa celesti, ad quam non perueniunt nisi vere sancti: & simul *letabuntur in cubilibus suis*, in loco illo summæ



quietis. *Amodo enim dicit spiritus, ut requiescant à laboribus suis.* Apoc. 14. Itaque Sancti in gloria requiescent à laboribus, sed non requiescent ab actione laudationis: erunt in cubilibus, ut quiescant; non ut dormiant.

VI.

*Exaltationes Dei in gutture eorum, & gladij ancipites in manibus eorum.*

In illa superna felicitate adeo non sunt oculos sancti, ut & ore cantent, & manibus gladios vibrent. In textibus hebraicis & græcis habetur, *Exaltationes Dei*, ut etiam legitur in Bibliis recognitis; tamen S. Augustinus, & quidam alij legunt, *Exultationes Dei*: facile fuit vnius literæ mutatione inducere hanc varietatem: sed in sensu nulla dissensio est: nam Sancti cum gaudio magno laudant & exultant magnitudinem Dei: proinde simul exaltant & exultant. Per gladios autem intelligimus potestatem iudicariam, qua Sancti omnes in die nouissimo ferient persecutores suos, iuxta illud Deuter. 32. *Si acueo ut fulgur gladium meum, & perfruerint iudicium manus mea.*

VII.

*Ad faciendam vindictam in nationibus, increpationes in populis.*

Ad hoc utentur sancti gladiis bis acutis, ut in die iudicij vindictam sumant de hostibus suis, & eos increpent, atque eis exprobrent iniquitates suas: *Stabunt enim tunc iusti in magna constantia aduersus eos, qui se angustiauerunt.* Sap. 5. Ex hoc loco intelligi potest, paulo duriorem esse eorum expositionem, qui hæc referunt ad conuersionem iniquorum, qui dicuntur occidi gladio verbi Dei: nam qui conuertunt iniquos, eosq; feliciter occidunt gladio verbi, occidentes in eis peccatum, & resuscitantes iustitiam; non sumunt de eis vindictam, sed beneficio maximo illos afficiunt.

III. *Ad alligandos Reges eorum in compedibus, & nobiles eorum in manicis ferreis.*

Diximus per gladios, intelligi iudicariam potestatem, ideo non debet absurdum videri, si dicantur sancti habere gladios in manibus ad faciendam vindictam; & ad alli-

gandos Reges in compedibus: potestas enim iudiciaria vtrunque facere potest, & ferire condemnando, & alligare in compedibus, sententiam per ministros suos exequendo. Tunc igitur Sancti alligabunt Reges gentium in compedibus, & nobiles eorum, id est, Principes terræ in manicis ferreis, quando cum Christo in extremo die iudicii sententiam ferent aduersus Antiochos, Herodes, Neronem, Diocletianos, & cæteros Principes infideles, ac dicent, *ligatis manibus & pedibus proiciantur in tenebras exteriores,* Matth. 22.

IX.

*Ut faciant in eis iudicium conscriptum; gloria hæc est omnibus sanctis eius.*

Hic aperte declarat Propheta quorsum dixerit, *Ad faciendam vindictam, & Ad alligandos Reges in compedibus. Ut faciant*, inquit, sancti, qui in terris iniuste iudicati sunt, iustum iudicium, iam olim conscriptum, decretum & firmatum; & quasi in columna, inquit Chrysostomus, incisum, ut mutari non possit. *Gloria hæc* sedendi cum Christo in nubibus, & iudicandi mundum & Principes eius, *erit omnibus sanctis eius.* Quamuis enim Beda in sermone de S. Benedicto dicat, in iudicio duos ordines futuros electorum; vnum iudicantium cum Christo, alterum misericorditer iudicandorum: tamen illi qui misericorditer iudicati fuerint, postea etiam iudicabunt cum Christo persecutores suos, ut constat ex B. Paulo 1. Cor. 6. *Nescitis, quia sancti de hoc mundo iudicabunt?* si ergo in vobis, id est, à vobis iudicabitur mundus, indigni estis, qui de minimis iudicetis? Verè igitur *gloria hæc est omnibus sanctis eius.*

## PSALMVS CL.

Titulus, & Argumentum.

Alleluia.

**I**N hoc postremo Psalmo inuitatur populus Dei ad laudes Domini in summo calo habitans, cum omnibus musicis instrumentis, ut hoc



hoc modo demonstrat ardentissimum affectum suum.

## EXPLIC. PSALM. CL.

I. **L**audate Dominum in sanctis eius, laudate eum in firmamento virtutis eius.

*Laudate Dominum in sanctis eius*, id est d vos electi & sancti laudate Dominum in sanctuario coelesti habitantem. Nam vox hebraea, *chodes*, sanctitatem proprie, & sanctuarium significat: & quamvis cum alijs punctis legi posset in sancto eius, & in numero multitudinis, in sanctis eius, & exponi de sanctis hominibus, ut fore Patres exponunt; tamen, quia in secunda parte versiculi idem repeti solet, & ibi expressè legitur, *laudate eum in firmamento virtutis eius*, & per firmamentum intelligitur cœlum ex 1. ca. Genes. ideo ad litteram videtur omnino per vocem, *in sanctis eius*, intelligendum esse sanctuarium coeleste, quod ad Hebræos 9. vocatur *sancta*, in numero multitudinis. *Introivit*, inquit, *semel in sancta*. Quia tamen sanctuarium Dei supremum, sunt animæ iustorum; imò ipsi sancti sunt templum Dei: ideo potest etiam cum Patribus simpliciter hic locus exponi de sanctis hominibus, quatenus in eis Deus habitat, ut in præcipuo sanctuario suo. *Laudate eum in firmamento virtutis eius*, vox, *firmamentum*, eadem est hoc loco etiam in textu hebraico, quæ est in 1. c. 5. Genes. proinde non est dubium, sensum esse, *laudate eum in firmamento virtutis sue*, id est, in fortissimo palatio suo, quod est cœlum, habitantem, vel in firmissimo throno suo coelesti residentem: nam Dominus ait Matth. 5. *Nolite iurare per cælum, quia thronus Dei est*: & quemadmodum paulò antè diximus, sanctuarium Dei esse sanctos homines, sic etiam dicere possumus, per firmamentum syderibus plenum, intelligi posse Ecclesiam sanctorum, qui veluti stellæ fulgent, & in quibus Deus sedet, ut in præcipuo solio suo. Anima enim iusti sedes est sapientiæ.

*Laudate eum in virtutibus eius, laudate eum secundum multitudinem magnitudinis eius.*

Docet, Deum esse laudandum, non quia in cœlo simpliciter habitat; sed quia in eo habitat, ut omnipotens Imperator, & Dominus omnium rerum: nam per *virtutes* hoc loco non intelliguntur virtutes morales, neq; exercitus Angelorum, sed robur & potentia: & per *multitudinem* magnitudo: quo modo alibi dixit idem Propheta, *Quam magna multitudo dulcedinis tuæ*; & alibi, *Secundum multitudinem miserationum tuarum*, id est: quam magna excellentia dulcedinis tuæ; & secundum eximiam misericordiam tuam: est enim phrasis Hebraica, & per vocem, *rab*, significare multum, & excellens. Ergo, inquit, *laudate eum in virtutibus eius*, id est, ob magnas vires, & magnum robur eius: *laudate eum secundum multitudinem magnitudinis eius*, id est, magnificè laudate eum, quoniam eximia est magnitudo eius, cum sit absolute & simpliciter magnus.

*Laudate eum in sono tubæ, laudate eum in psalterio & cithara.*

III.

Tria sunt instrumentorum musicorum genera, vox, flatus, & pulsus: omnium meminit hoc loco Propheta: nam in hoc versiculo nominantur tubæ, quæ flatu sonitum reddunt, psalterium & cithara, quæ pulsu chordarum resonant. Psalterium enim esse instrumentum decem chordarum, non semel legitur in Psalmis.

*Laudate eum in tympano & choro, laudate eum in chordis & organo.*

IV.

Hic numerantur omnia genera: nā tympanum & chordæ pulsantur, chorus est, ut alibi diximus, vel instrumentū musicū nobis incognitum, vel concentum vocum humanarum; organū inflatur: quamvis enim ignotum sit, quid organum hoc loco significet, tamen probabiliter dici potest, esse instrumentum plurium tibiæ simul coniunctarum; ad cuius postea imitationem facta sunt ea, quæ nos organa vocamus.



V.

*Laudate eum in cymbalis bene sonantibus, laudate eum in cymbalis iubilationis: omnis spiritus laudet Dominum.*

Cymbala quatiuntur, & tinnitum reddunt. Dicuntur autem cymbala iubilationis, quæ magnum lætumque sonitum reddunt, quales sunt campanæ apud Christianos. Mystice à Patribus instrumenta ista exponuntur, vel pro sensibus corporis, ut à Chrysostomo, vel pro virtutibus animi, ut à S. Augustino. Concludit Psaltes. *Omnis spiritus laudet Dominum.* Sunt autem quatuor huius loci explicationes. Prima S. Augustini est, qui per *spiritum* intelligit spirituales vim, ut opponitur carni. Quia, inquit, sapere secundum carnem, mors est: *Omnis spiritus laudet Dominum*, id est, omnis qui spiritualis est, & de Spiritu S. viuit, laudet Dominum. Sed B. Augustinus non obseruauit proprietatem linguæ hebraicæ: nam in hebræo est, *col nesema*, quæ vox non significat spiritum, ut opponitur carni, sed ut opponitur non spiranti, & non viuenti. Itaque *omnis spiritus* hoc loco ponitur pro omni quod spirat & viuit. Altera explicatio est Theodoretii & Euthymij, qui per *omnem spiritum* intelligi volunt omnem hominem; quomodo accipitur illud Psal. 144. *benedicat omnis caro nomini sancto eius*: sæpè enim in Scriptura per carnem, vel per animam intelligitur totius homo. Sed mirum esset, si Dauid restringere voluisset laudis officium ad solos homines, cum paulo ante inuitauerit Angelos, homines, bestias, Solem, Lunam, stellas, ignem, grandinem, niuem, & cætera omnia. Tertia explicatio est aliquot recentiorum, qui per *omnem spiritum* intelligunt omnia animalia, sed si Dauid loquitur de laudatione propriè dicta, frustra bestias inuitat ad laudes: si de laudatione etiam impropria, non debuit excludere ea, quæ non spirant. Potest igitur quarta explicatio adferri, ut

per *omnem spiritum*, intelligamus generatim omnia quæ viuunt, siue spiritali vita, ut Angelos; siue animali, ut bestias; siue vtraque, ut homines; siue metaphorica vita, ut cætera omnia, quæ licet in se inanima sint, tamen Deo viuere dicuntur, quoniam ita seruiunt & obediunt Deo, ac si viuerent & sentirent, & Creatoris mandata perciperent: unde est illud Ecclesiasticum, *Regem cui omnia viuunt*: in quem sensum accipiendum est illud Baruch. 3. *Vocata sunt stella, & dixerunt, adsumus*: & illa ex Euangelio; *Imperauit febri, & dimisit eam.* & Luc 4. *Comminatus est vento, dixit mari, tace, obmutescet, & cessauit ventus, & facta est tranquillitas magna*, Marc. 4. Ergo Propheta cum multa percussisset, & videret se non posse omnia fingillatim enumerare, & ad laudandum Deum inuitare, voluit compendio omnia comprehendere, & ait, *omnis spiritus laudet Dominum.* Sed si omnia comprehendere volebat, cur non apertè dicebat. Omne quod subsistit, laudet Dominum. Ratio est, quoniam laudatio ad viuentes pertinet, & absurdum videtur, res mortuas, aut inanimas vocare ad chorum, præsertim cum idem Propheta dixerit in Psal. 113. *Non mortui laudabunt te Domine.* Et Ezechias apud Isaiam cap. 38. *Viuens, viuens ipse confitebitur tibi.* Voluit ergo Dauid potius dicere, Omne quod viuit, quam omne quod subsistit, laudet Dominum; ut declararet, se inuitare omnes res ad Deum laudandum, quatenus aliquo modo viuunt, ut supra explicatum est. Atque hic sit finis huius Commentarij. Precor autem Deum, ut quem admodum dedit, ut has diuinas laudes utcumque explicare possemus; ita ex magna misericordia sua donet, ut aliquando de peregrinatione perueniamus ad patriam, ubi præsentem præsentem toto corde diligamus, & sine vllō fine laudemus.

Amen.

LAUS DEO.



# I N D E X.

## R E R V M N O T A B I L I V M PRIOR NVMERVS PAGINAM INDICAT, POSTERIOR PSALMI VERSI- culum.

A.

- A**ARON Princeps Ecclesiasticus tantum mi-  
nor Moyse p. 432. vers. 20  
Abimelech nomen erat commune Regibus  
Philistinorum. 157  
Abyssus quid. 431. 15  
Abyssus abyssum inuocare multipliciter intelli-  
gi potest. 226. 9  
Abyssus nomine aquarum profunda significantur.  
841. 7  
Abraham per fidem factus est Pater multarum  
gentium. 746. 3  
Abundantia sine securitate, est plena timoris. 835. 2  
Abundantia, & pax, beatas facit Ciuitates. 727. 7  
\* Accidia eius qui psallit indicat, ab ipso parum a-  
mari cui psallit. 456. 1  
\* Adam & Eva primi a Serpente interempti. 590. 11  
Adipem claudere, significat non misereri. 59. 11  
Adiutorium omnium maximum, & potentissimu,  
est vultus Dei. 253. 4  
Adolescens cur indigeat, doceri legem Dei. 686. 1  
Adorare Dominum, & coram Domino, idem 92. 30  
Aduentus Christi primus omnia consecrauit, secu-  
ndus omnia glorificabit. 563. 12  
\* Aetas hominis quanta Dauidis, ac Moyse tem-  
poris. 116. 519. 520. in tit. & 7. 11  
Eternitas Dei. 518. 519. 4. 5  
\* Affectus, per renes significantur, cogitationes, per  
cor. 55. 7. & 108. 2  
\* Altitudo dierum pro Diuino iudicio sumitur. 307. 3  
Altaria iustorum niduli. 470. 4. 471. 5  
\* Ambulare coram Deo, quid. 673. 9  
Amici Dei dicuntur mortui seculi, inimici, mortui  
Dei. 61. 15 (302. 12)  
Amicus fraudulentus peior est manifesto inimico.  
Amicitia specie decipere maxima iniquitas. 174. 22  
Amor Sponsi Christi ineffabilis erga sponsam suam  
247. 12  
Amor animam portat, eius ala cogitatio, & deside-  
rium. 483. 3.  
Amorem accendere solent tria, quae in Deo reperi-  
untur. 223. 2  
\* Angeli significantur per aues Cali. 33. 8  
Angeli dicuntur Di. 33. 8.  
Angeli an cognouerint Christum esse Regem gloriae,  
99. 8.  
Angeli cur dicantur esse in nubibus. 502. 7  
Angeli custodes hominum, & regionum. 534. 11  
Angeli nunquam desunt officio suo. 839. 2  
Angeli ad Deum laudandum maxime idonei. 599. 19  
Angeli nunquam fatigantur, ib. 19  
Angeli ventis comparati. 603. 8  
Angeli auriga currus Dei. 65. 1  
Angeli mali significantur per pisces maris. 33. 8  
Angeli reprobi cur peccati remissionem non inueni-  
runt. 812. 3  
Angelorum mira potentia. 160. 7  
Angelorum praesentia attentionem in oratione con-  
ciliat. 785. 2  
Angelos in calo praecedat Ecclesia & Beata Virgo.  
246. 11.  
Angelos multos praecedent in Calo multi Sancti ho-  
mines. ibid.  
Angelus vnus vicem exercitus supplet. 160. 7  
Anima voluntatem significat, oculus intellectum,  
venter memoriam. 134. 11  
Anima pro homine saepe vsitata in Psalmis. 92. 33.  
156. 20  
Anima quare & quomodo dicatur vnica. 173. 20  
Anima quo magis destruitur carnalibus bonis, eo  
facilius ascendit ad caelestia gustanda. 337. 3  
Anima spoliata gratia Dei, est sicut terra arida  
813. 6  
Anima nostra imago Dei quoad essentiam, & Per-  
sonarum Trinitatem. 224. 4

Anima



# INDEX.

*Anima nostra Scala aptissima ad cognoscendum Deum.* 224.4.

*Anima ante corpora non fuerunt.* 154.15.

*Anima salus homini datur sine praecedente, comitante, & subsequente gratia Dei.* 240.17.

*Anima sterilitas duobus modis accipitur.* 155.14.

*Animam effundere in se, tribus modis accipi potest.* 324.4.

*Animam primi hominis cum Deus creauit, non creauit, in confuso omnes animas.* 145.15.

*Animam in manib. esse, est, periclitari de vita.* 706.5.

*Animam adhaerere Deo, quid sit, & quanti facendum.* 338.8.

*Animalis homo propinquante exiliu sine curgemat.* 714.1.

*Animalia omnia hominibus utilia.* 841.10.

*Animus diues debet esse, non arca.* 161.9.

*Animus aliquando gaudet, cum corpus dolet.* 170.12.

*Animus non omnino quatit Deum, dum aliquid habet in terra, quod amet.* 219.3.

*Antichristi astutia, & consiliatio cum Diabolo.* 466.2.3.

\* *Apostoli dicuntur montes.* 712.1.

*Apostolica praedicationis fructus.* 309.16.

*Apostoli uere Sapientes.* 522.14.

*Apostoli primi Ecclesia filij, toti Orbi leges dederunt, quod nullus Monarcha ante eos fecit.* 251.18.

*Apostoli, & Martyres licet interfecti, de omni tamen tribulatione uere liberati sunt.* 164.17.

*Apostoli cur Cedris similes.* 124.6.

*Apostoli cur dicantur Cali.* 74.4.

\* *Aqua pro tribulationibus sumuntur.* 145.8.

*Aqua spiritalis qua nam.* 94.2.

*Aqua mitio creationis non tam aqua, quam vapores aquei erant.* 603.7.

*Aqua uere corporales, & incorruptibiles supra Calum.* 840.4.

*Aquila quomodo renouetur.* 595.5.

\* *Arbitrii libertas.* 656.

*Arca foederis scabellum pedum Dei.* 574.5.

*Arma Christi quam sint.* 241.5.

*Arma Dei defensiva, & offensiva.* 166.23.

*Arma Diaboli astutia, & malicia.* 241.5.

*Arrogantia proprietatis.* 40.25.

\* *Asaph quis, & quid significet.* 247. in tit.

*Ascendere super Cherubim, quid.* 65.12.

*Aspectus Dei ad nos, & nostri ad Deum, quam sit necessarius.* 763.10.

*Aspicere iniquitatem in corde, quid sit.* 355.17.

\* *Attentionem exigit Deus, ut nobis loquatur.* 228.8.

*Attributa Dei notissima, & obscurissima.* 790.8.

\* *Auauitia.* 53.6.

## B.

**B** *Aptissimus cur dicatur Illuminatio.* 159.5.

\* *Beatitudo Caelestis, qualis.* 179.9.

*Beati qui nam in hoc seculo.* 471.6.

*Beatitudo in operatione intellectus consistit.* 102.22.

*Beatitudo huius uite, in quo consistit.* 1.1.

*Beati expectant redemptionem corporum.* 738.5.

*Beatitudinem iustus Deus conseruat.* 55.5.

*Beatitudinem assequimur, si quatuor praestemus.* 97.4.

\* *Benedicere Deum, ad quos pertinent.* 663.27.

*Benedicere Deum in omni tempore, quid sit.* 158.1.

*Benedictio Dei qualis.* 669.24.

*Benedictio Dei in scripturis abundantiam significat, & fecunditatem.* 447.16.

*Beneficia Dei celebranda.* 49.6.

*Beneficia Dei, qua pauci agnoscunt.* 387.7.

*Beneficiorum diuinorum summa, qua sit.* 310.13.

*Beneficium magnum, Deum memorem esse nostrum.* 128.4.

*Beneficia omnia diuina quomodo duplicia sint.* 602.4.

*Beneficiorum Dei memoria qualis esse debeat.* 67.22.

*Beneficium Dei fundamentum omnium bonorum.* 843.4.

*Benecolentia Dei radix omnium bonorum.* 21.13.

*Bona quandoque Deus Sanctis tribuit, quandoque aufert.* 238.28.

*Bona temporalia umbra sunt veri boni.* 203.9.

*Bona Caelestis Hierusalem.* 347.7.47.6.

*Boni omnis ratio in solo Deo est.* 670.1.

*Bonum omnia appetunt.* 670.1.

*Bonorum omnium auctor Deus.* 17.8.23.4.

*Bonorum omnium principium lumen Dei.* 98.31.

\* *Brachium significat potentiam.* 42.68.

## C.

**C** *Ecitas humana in uera felicitate quarendam.* 539.16.

*Calum est domus nostra.* 112.7.

*Calum, primarius est effectus potentia Dei.* 151.4.

*Calum cur opus digitorum Dei, non brachiorum.* 32.4.

*Calum dicitur templum Dei.* 63.8.

*Calum tribus modis praedicat Deum.* 73.2.

*Calum*



# INDEX.

- Calum Beatorum mons Domini. 97. 3.  
 Calorum regnum à Christo promissum spernentibus  
 quum grauer irascatur Deus. 643. 25. 76. 27.  
 Cali Calorum qui sint. 840. 4.  
 Cali quomodo laudent Deum. ibid.  
 Cali quomodo peribunt, aut veterascent. 600. 28.  
 Cali dicuntur Apostoli & pradicatores, & quare. 74. 4.  
 Calos inclinare, quid. 64. 11.  
 Calorum sonus non concentus corporalis, sed quid. 73. 4.  
 Calestis hereditas qua via acquirenda. 380. 30.  
 \*Calix vini meri, quid. 420. 7.  
 Calix idem atque hereditas, portio, & pars. 45. 7.  
 Calumniam, & persecutionum morbo qua medicina  
 facienda. 183. 6.  
 Cantica Dei quomodo canenda, & audienda. 782. 5. &  
 222. in tit.  
 Canticum vetus veteris hominis est, nouum noui.  
 149. 3.  
 Cantare Deo canticum nouum, & vetus, quid sit. 843. 1.  
 Cantare in tympano & Psalterio quid sit ibid. 3.  
 Canticum graduum pauci ex corde cantant. 721. 5.  
 \*Captiuitas Babylonica figura captiuitatis generis hu-  
 mani sub peccato. 784. 12.  
 \*Carnales, licet ociosi, Deo vacare non possunt. 256.  
 10.  
 Carnalem esse, & hominem esse aliquando pro eodem in  
 scrip. 731. 3.  
 Caro quomodo dicatur sitire Deum. 836. 1. 2.  
 Causa secunda defectus tribuendi sunt, non prima. 994.  
 15.  
 Causa secunda sine Deo nihil possunt. 605. 17.  
 \*Cedri Libani quinam. 124. 2.  
 Corui proprietates. 84. in tit.  
 Corui cum amatore Dei similitudo aptissima. 223. 1.  
 \*Charitas Dei bonorum omnium nostrorum Causa, &  
 origo. 503. 1. 505. 3.  
 Charitas in Deum ardens, radix confidentia in eum.  
 112. 7.  
 Charitas perfecta vehementissime timet, ne in aliquo  
 dilectum offendant. 161. 9.  
 Charitas dicitur simbra aurea. 249. 15.  
 Charitas precipuum est inter dona à Christo in terras  
 effusa. 355. 20.  
 Charitas Dei virtutes omnes complectitur. 568. 11.  
 Charitas verus spiritus molestius fert iniuriam Dei,  
 quam propriam. 715. 6.  
 Charitatis signum est, Deum sine intermissione lauda-  
 re. 716. 4.  
 Charitatis magna indicium, miseratio erga peccatores.  
 696. 3.  
 Christus, lapis angularis, cur dicatur. 489. 1.  
 Christus, cur in Sion dicatur natus. 492. 5.  
 Christus cur dicatur primogenitus. 509. 27.  
 Christus, quomodo fuerit pauper. 217. 3. 1.  
 Christus, cur dicitur puer & seruus. 378. 21.  
 Christus non Redemptor solum sed & Doctor & Magi-  
 ster humani generis. 243. 12.  
 Christus, cur dicitur dilectus. 125. 6.  
 Christus, cur dicitur vitulus. ibid. 6.  
 Christus quomodo dici possit arbor. 5. 7.  
 Christus peccata nostra sibi tribuere potuit. 85. 1.  
 Christus resurgens comparatur Ceruæ, & Stellæ. 84. in  
 tit.  
 Christus Aduocatus potentissimus. 646. 30.  
 Christus Sacerdos æternus. 653. 5.  
 Christus supra homines formosus dicitur, cur non supra  
 Angelos. 240. 3.  
 Christus nuncius futuri ingressus in calum. 749.  
 Christus superauit sapientia, & iustitia Diabolum.  
 241. 5.  
 Christus nos docuit exemplo suo clauso ostio Patrem o-  
 rare. 256. 10.  
 Christus Dominus, & cum eo iusti omnes ab impijs, &  
 inimicis aliquando laudandi. 344. 10. 339. 8.  
 Christus quomodo dicatur inops, mendicus compunctus  
 corde. 645. 15.  
 Christus non eguit custodia Angelorum. 534. 11.  
 Christus: Rex iure dicitur, & regnare. 563. 10.  
 Christus quid retribuerit Iudeis post Resurrectionem  
 suam. 221. 11.  
 Christi amor erga inimicos excellentior, quam Davidia  
 erga Saulem. 172. 17.  
 Christi affectus erga persecutores non solum est ut fratris  
 ad fratrem, sed ut matris ad filium. 71. 17.  
 Christi arma que sint. 241. 5.  
 Christi mors, & resurrectio. 12. 5.  
 Christi mors quare dicitur somnus ibidem. 5. 220. 9.  
 Christi vita qualis. 16. 4.  
 Christi beneuolentia erga electos. 54. 8.  
 Christi passio holocaustum. 79. 3.  
 Christi dona in instanti conceptionis. 81. 8.  
 Christi reliquia sunt electi. 83. 12.  
 Christi passionis fructus. 92. 23.  
 Christi persecutores quomodo Deus accepit. 6. 7. 4. 5.  
 Christi generatio triplex. 8. 7.  
 Christi potestas in omnes gentes. 9. 8. 9.  
 P P P P P  
 Chris



Christi iudicium rectissimum significatur per virgam ferream. ibid. 9.

Christi morientis, & resurgentis Prophetia. 117. in tit. 1.

Christi Mortis, Resurrectionis Ascensionis, &c. prophetia Psalm. 29. toto. 127.

Christi anima nil ignorabat in passione. 130. 9.

Christi passiones cur plurima fuerunt. 245. 16. 17.

Christi proditoris indignitas. 221. 10.

Christi Aduentus primus fructus. 395. 7.

Christi figura Salomon, & eius nomina. 39. 2.

Christi passionis, & doloris vehementiam per Prophetas, eius constantiam per Euangelistas cur Spiritus sanctus exprimi voluit. 327. 3.

Christi Regnum adumbrat Prophetia. 433.

Christi Regnum aeternum. 501. 502. 509. 150. 650. 27. 28.

Christi patientie figuram gerebat David in passionibus suis. 313. 11.

Christi ascensus in caelum describitur. 258. 5.

Christi iniuria aliqua peculiariter ad Patrem pertinent. 375. 12.

Christi Natiuitas ex Virgine. 653. 4.

Christi generatio aeterna. 655. 4.

Christi humilitas in carne, & exaltatione in gloria. 655. 8.

Christi passio describitur, eiusque dolores Psalm. 68. toto. 372. 655. 8.

Christi virtutes, quas in passione spirauit dicuntur mirra, aloes, & Cassia. 245. 10.

Christi humanitas vestis, & domus dicitur. ibid. 10.

Christi virtutum fragrantia. ib. 10.

Christi sponsa Ecclesia est, B. virgo & reliqua Virgines. 240. 11.

Christi Regnum consumeret omnia Regna. 254. 6.

Christi innocentia quomodo mundo innotuit. 641. 1.

Christi cum Diabolo contentio circa quid fuerit. 74. 6.

Christi aduentu omnis creatura exultabit. 563. 12.

Christi mirabilia qua. 169. 1. & 170. 2.

Christi salutare, & iustitia in quo sita sit. 570. 3.

Christi humanitas scabellum Diuinitatis. 575. 5.

Christi corporis beneficia propter passionem qua nam, 81. 82. 4. 56.

Christi Sacerdotium per coronam auream. 81. 3.

Christi conuenit ieiunare, & cilicium indui prout est membrum suis. 171. 16.

Christo quomodo conueniant verba Psalm. 39. Comprehenderunt me iniquitates meae & non potui, ut

viderem & illud Mar. 6. Et non poterat ibi virtutem ullam facere, & mirabatur propter incredulitatem eorum. 245. 16. & 17.

Christianorum persecutio ab Imperatoribus illata describitur. 233. 12.

\* Cicatrices quid in Psalm. 37. significant. 194. 5.

Cilicium quid. 171. 16.

Cilicium & ieiunium Christi. 376. 14.

Ciuitas Dei cur aeterna stabilitate solidabitur. 264. 4.

Ciuitatis muri viri perfecti dicuntur. 266. 1.

Ciuium caelestium conditiones & signa. 780. 1.

Ciuium Babylonie conditiones & signa. 781. 1.

\* Cogitare quomodo tribuatur lingua. 292. 2.

Cogitatio mirabilium Dei radix omnium bonorum. 119. 7.

Cogitationes significantur per consilia. 40. 23.

Cogitationes per cor, desideria per renes significantur. 56. 7.

Cognoscere, pro approbare sumitur. 890. 17.

Columba aptissime comparatur Iustus. 300. 6.

Commoueri pedes, in Scriptura sumitur pro labi in peccatum. 722. 3.

Concupiscentia dicuntur necessitates. 106. 18. à Concupiscentia rerum terrenarum vacandum praecipitur. 256. 10.

Concordia fratrum bona & iucunda. 768. 1.

Confessorum tentationes torrenti rapidissimo simile. 333. 4.

Confidentia in Deo est firma allegatio ad misericordiam impetrandam. 310. 1.

confidentes in Domino qui sint, & quod vere sint mortui. 734. 1.

confidentes in Domino quam securi esse debeant. 732. 3.

confidentia in Deo cooperationem nostram non excludit. 305. 25.

confiteri in Ecclesia magna, quid. 173. 21.

confiteri, & laudare idem. 174. 21.

coniunctio fratrum magis esse debet cordium quam corporum. 769. 2.

conscientia stimulus per spinam significatur. 144. 4.

consilium Dei mirabile in paucitate electorum scriptum. 614. 8. 9. 10. &c.

consolatio diuina quibus datur. 138. 23.

consolatio interna prodit in externam, & hac ex quo agnoscitur. 257. 2.

consolatio diuina dolori carnis correspondet. 552. 19.

constantes viri lapides infirmi vero pulvis dicti. 589. 15.



# INDEX

Contemplatio rerum diuinarum requirit animum liberum à tumultu perturbationum rerum seculariū. 255.10.  
 Contemplationis materia qualis. 19.4  
 Contemnentis temporalia. premium. 16.4  
 Contritio David quanta fuerit. 812.4  
 Contritionis signa. 813.7  
 Contritionis cordis efficacia. 810.5  
 Contritionem quomodo consolatio subsequi debeat. 810.5  
 Conuertentes se serio ad Deum, quam consolationem experiuntur. 737.1  
 Conuerti ad uesperam quid sit. 319.7  
 Cor mundum creare quomodo dicatur Deus. 287.11  
 Cordis dilatationis effectus. 69.2.8.  
 Corda quomodo Deus obduret. 557.8  
 Corda effundere quid sit. 333.8  
 Corda feriunt sermones fraudulentī, licet aures delatent. 394.24  
 Cornu significat potestatem regiam. 766.18  
 Cornu pro superbia. 419.4  
 Cornu David regnum Messia dicitur. 766.18  
 Corona gloriæ celestis duo continet. 595.5  
 Corporis salus non contingit homini sine auxilio Dei. 855.17  
 Creatura omnes instrumenta iustitiæ, & misericordiæ Dei. 841.8  
 Creatura quantumuis magna collata cum Deo nihil sunt ibid. 12  
 Creature omnes excitant ad laudem Creatoris. 350.14  
 Creature omnes sunt milites Dei. 254.7  
 Crux est thronus. 35.4  
 Cupiditatis radix omnium malorum ostenditur. 255.10.

D.

**D**æmones per Antonomasiā peccatores dici possunt. 714.3  
 Dæmones sunt perpetui calumniatores. 708.1  
 Dæmones significantur per pisces maris. 33.8  
 Dæmones exultant, si quem iustum ad inchoandum peccatum induxerint. 47.5  
 Dæmones sicut insidiatores. 116.17.  
 Dæmones venatores. laquei res creatæ. 528.3  
 Dæmonem nos odisse odio iniquo, quid. 106.20  
 Dæmonum peccatum superbia. 798.5  
 Dæmonis artus ibid. 5.6

\* Dammati quomodo dicantur non esse, & non uiuere. 208.18  
 Dammati semper in pœnis uiuunt, ut semper moriantur. 305.26  
 David in Regem cur de humili loco eligitur. 445.76  
 David non solum res, sed etiam uerba prænouiit, & prædixit. 89.18.  
 David affectus erga inimicos quantus, & qualis. 117.17  
 David in aduersis ad Deum solitus confugere. 481. in tit.  
 David figura Christi. 507. 508. 25. 19. & deinceps.  
 David cur uocet Ecclesiam filiam. 247.12  
 David exemplum iustitiæ & misericordiæ posteris. 289.14  
 David magis arte, quam robore uicit Goliath. 815. 816.1  
 David facta promissio de Regno aeterno in Christo impleta. 501. & 502.5  
 Davidici peccati deformitates, & circumstantia. 193.4  
 Davidis, & Prophetarum mos in Psalmorum uersiculis. 1.1  
 \* Decalogus uirtute continet omnes leges Mundi. 710.1  
 Delatores iniquos punire grauissime, regium est. 582.6  
 Delectari in Domino, quid. 183.4  
 Delicta superuacanea à Diabolo, incunditas moderata à Deo. 606.17  
 Delinquere in semetipso, quid. 176.1  
 Delinquere varijs modis accipitur. 165.21  
 Desideria impiorum nunquam expleantur. 479  
 Desiderium tribuere, & similia, quid. 81.2  
 Detrahentium lingua instar sagittæ longe feriunt. 312.6  
 Deus solus uere magnus est. 158.3  
 Deus uigilat pro iustis. 163.15  
 Deus aliquibus modis iustum exaudit in tribulatione. 14.1  
 Deus auctor omnium bonorum. 17.8  
 Deus quando orantem contemnit. 912  
 Deus uult solum à paruulis, id est, humilibus cognosci, & laudari. 31.3  
 Deus laborem oppressorum, & opprimentium favorem considerat. 42.37  
 Deus cum irascitur quid operetur. 36.9. & seq.  
 Deus nunc uidetur in Tabernaculo, in calis uidetur in domo propria. 74.5  
 Deus Pater. 93.1

Ppppp

Dess



# INDEX.

- Deus cur dicatur Dominus exercituum. 100.1.  
 Deus quomodo laudandus. 148.1.  
 Deus quibus placeat, quibus non placeat. 149.1.  
 Deus non solum verbis, sed etiam operibus laudandus. 149.1.  
 Deus & singulatim & coniunctim laudandus. 149.1.  
 Deus laudandus ex cognitione creaturarum, & ex reuelatione diuina. 149.1.  
 Deus cur summo affectu laudandus. 149.1.  
 Deus cur solus timendus. 152.9.  
 Deus cur omnia fecerit verbo. 152.9.  
 Deus ideo beatus, quia videt se sicut est. 153.13.  
 Deus aliter vigilat super iustos, aliter super iniustos. 163.16.  
 Deus quem amat, securus est. 166.2.  
 Deus quibus armis se defendit, & nos protegit. 167.2.  
 Deus quomodo, & quare dicatur salus animarum. 167.3.  
 Deus quare fons sapientia & scientia. 179.10.  
 Deus ordinarie per Vicarios suos regit, & docet. 432.20.  
 Deus quo sensu dormiat. 444.71.  
 Deus respiciet aliquem cum ei placatur, auertit oculos cum irascitur. 450.2.  
 Deus a nobis oculos auertit, cum nos ab eo faciem auertimus. 4.14.  
 Deus quando ab omnibus cognoscitur. 469.17.  
 Deus propriè viuus est, & vita. 470.2.  
 Deus protector iustorum, & clypeus. 501.9.  
 Deus qua ratione loquebatur ad Prophetas. 506.8.  
 Deus affectu paterno nos amat. 487.14.  
 Deus cum iniquis innocentes puniri cur sinat. 237.28.  
 Deus Pater quomodo vixit Deum Filium. 247.12.  
 Deus magnus, & laudandus in fundatione Ecclesia. 261.265.9.  
 Deus Deorum quomodo dicatur Dominus. 275.1.  
 Deus, ut nobis loquatur, attentionem exigit. 278.7.  
 Deus in se eminenter omnia continet. 279.12.  
 Deus in periculis unicum refugium. 297.1.  
 Deus non minus est bonus cum flagellat, quam cum parcat. 298.6.  
 Deus quomodo errare faciat, excacet, obduret. &c. 639.39.39.40.  
 Deus quomodo cōuertat corda aliquorum, ut alios odio prosequantur, & tamen non sit causa peccati. 617.22.23. &c.  
 Deus quomodo dicatur protector bonorum, quamuis tribulatione eos permittat probari. 341.2.  
 Deus quando non videt, nec audit. 752.2.  
 Deus quando queratur. 37.10.  
 Deus Sol increatus. 523.18.  
 Deus cur dicatur Dominus absolute. 518.2.  
 Deus cur Aquila, & Gallina comparatur in Scripturis. 528.4.  
 Deus remuneratur opera bona ex iustitia. 67.23.  
 Deus regnare dicitur multipliciter. 562.9.  
 Deus quomodo inuisibilis. 565.2.  
 Deus dupliciter dicitur custos animarum sanctarum. 608.11.  
 Deus quomodo sedeat super Cherubim. 573.1.  
 Deus quomodo dicitur loquutus in columna: nubis. 567.7.  
 Deus solus aternus, quia immutabilis, & cur immutabilis. 562.28.  
 Deus non solum necessaria, sed etiam incunda prabet. 605.17.  
 Deus quomodo latari, dolere, & obliuisci dicatur. 610.32.7.8.1.  
 Deus passionibus subdi non potest. 610.32.  
 Deus quomodo magnus iuxta quadruplicem dimensionem. 821.3.  
 Deus quomodo escam omnibus impertiat, & tamen quosdam esurire permittat. 826.16.17.  
 Deus quomodo orandus, ut preces nostras exaudiat. 1.19.  
 Deus presentiam suam quibus modis demonstrat. 817.7.  
 Deus non semper minatur, sed aliquando iram effundit. 29.12.13.  
 Deus nobis est robur, petra, arx munitissima, munitio scutum, clypeus, cornu salutis. 62.1.2.  
 Deus petra cur dicitur. 69.34.  
 Deus iustus per antonomasiam. 711.1.  
 Deus prope est malis per iustitiam, bonis per auxilium. 71.4.2.  
 Deus celi quomodo dicatur filius Dei. 779.26.  
 Deus cur absolute bonus. 776.1.  
 Deus excelsus cur non diligit excelsos. 787.7.  
 Deus quomodo dicatur examinare, cum non egent examine. 788.1.  
 Dei beneuolentia radix omnium bonorum. 21.13.  
 Dei protectio est velut tentorium. 14.14.  
 Dei respectus causa omnium bonorum sicut sol. 23.21.71.7.



# I N D E X.

Dei gladius, & sagitta, quid 29. 13. 166. 2. 3. 243. 7.

Dei incarnatio fuit visitatio 32. 5.

Dei studia quid 37. 11.

Dei promissa qualia 47. 7. 8.

Dei amici, & inimici, quinam 61. 15.

Dei currus, equi, auriga, sagitta, quæ 65. 12.

Dei præsentia quid operetur, eiusque potentia 64. 9. & seq.

Dei mos cum tepidis 955. 5.

Dei protectio in tribulatione 11. 2.

Dei potentia laudes 121. 1. & seq.

Dei vocis efficacia 123. 3.

Dei opera mouent homines ad fidem 150. 4.

Dei misericordia latius patet, quam iustitia, ibid. 5.

Dei cogitatio una, & simplex, continet eminenter innumerabiles cogitationes 153. 11.

Dei arma offensiuæ, & defensiuæ 166. 2. 3.

Dei pietatem experiri quam dulce 179. 8.

Dei veritas, & iudicia quam profunda 150. 4. 173. 6. 810. 1.

Dei misericordia erga pios & impios.

Dei memoria plus delectat, quam præsentia carnalium voluptatum 426. 3.

Dei indignatio igni comparatur 447. 5.

Dei suauitas, misericordia, & mansuetudo 489. 4. 64. 5.

Dei nomen quatuor literarum 178. 6. 7. 8. & seq.

Dei iuramentum 653. 5.

Dei veri, & deorum falsorum anthites 668. 15.

Dei reſtitutio in quo conſiſtat 565. 2.

Dei mira in puniendis impiis celeritas, & aliquando tarditas, ibid. 3. 173. 20.

Dei nomen quare ſanctum, & terribile 574. 3.

Dei magnitudinem quomodo laudare, & imitari poſſimus 821. 3.

Dei perfecta laudatio non niſi in Patria exhiberi poteſt 828. 1.

Dei filius, peculiariter Deus deorum 776. 2.

Dei opera omnia ex miſericordia proſecta ſunt, ibid. in tit.

Dei omnipotentia in extremo iudicio quanta, 566. 4. 5.

Deo quinam honor debeat 122. 2.

Deo quomodo fruemur in Patria 179. 9.

Deo cur nemo poſſit comparari 210. 8.

Deo quomodo conueniat poenitentia 653. 5.

Deum hominis recordari, quid ſit 32. 5.

Deum furere, & irasci, quid ſit 6. 5.

Deum memorem eſſe noſtri, magnum beneficium 1. 8. 4.

Deum pro Deo ſuo, quis habeat 153. 12.

Deum videntes, ſimiles ſunt Deo; nunquam videntes, ſemper diſſimiles, ibid. 12.

Deum pugnare pro nobis neceſſe eſt ut nobis innoſceat 167. 3.

Deum ſemper laudat, qui ſemper bene agit 176. 32.

Deum quomodo nunc videamus 180. 10.

Deum refugium ſuum, & virtutem pauci ex vero affectu pronuntiant 252. 1.

Deum cognoſci ab hominibus, quam ſit admirabile 816. 4.

Dij Gentilium, Vani Deiculi 560. 5.

Dextera Chriſtum aliquando ſignificat 798. 4.

Diabolus non robore, ſed arte, ſcilicet patientia vincendus 816. 1.

Diabolus Rex ſuperbia 798. 5.

Diaboli arma aſtutia, & malitia 241. 5.

Diabolus Pharaoni ſimilis 504. 11.

Diabolus unde in nos potens, & quod effugium 503. 12.

Dies proſperitatis, nox tribulationis tempus aliquando ſignificat 56. 7.

Dies vita, nox mortis tempus aliquando ſignificat 85. 2.

Dies huius ſæculi, dies peregrinationis, & doloris 484. 6.

Dies tranſeundo, & fluendo, & quomodo permanere dicantur 703. 1.

Dilectionis præceptum, ſinis perfectionis, ibid. 8.

Disciplina paterna, caſtigatio 703. 9.

Disciplina virtutem prudentia aliquando ſignificat 698. 2.

Discordia fratrum damna 768. 2.

Diſſimi peccatores cur ſape laborent are alieno grauati 188. 23.

Diues eſſe debet animus non arca 660.

Diuitijs bene vtendi gratia 662.

Diuitia non perdunt homines, ſed ſuperbia 482.

Diuites, dum Deum non timent, inopes ſunt 161. 10.

Diuites impij cur dicantur Leones, ib. 10.

Diuites mali, non raro ad extremam inopiam rediguntur, ib. 10.

Diuitijs non caret, qui diuitias non deſiderat, ib. 9.

Diuitia inſtabiles ſunt, & fallaces, ib. 10.

Diuitia multis periculis ſunt expoſita, ib. 10.



# I N D E X.

*Diuitias temporales qui diligunt, semper egent, ib. 10.*  
*Diuitijs aut potentia fidere, vanum, & stultum est.*  
 269. 6. 170. 10.  
*Diuitia fluunt, dum effluunt. 334. 10.*  
*Doce quomodo dicatur mentius dicendo verum. 301.*  
 4.  
*Dolosi in sua lingua confidunt. 46. 4.*  
*Dolosorum, & mendacium merces iusta. 119. 6.*  
*Domini exercituum, & Rex gloria soli Deo in Scri-*  
*ptura iribuitur. 100. 10.*  
*Domus spiritalis quomodo erigatur, & perficiatur.*  
 741. 1.  
*Domus spiritualement adificando, non magis fidere debe-*  
*mus operationi, quam orationi. 742. 3.*  
*Dormire Dei quid sit. 27. 6.*  
*Dormitare, & dormire quomodo dicantur homines.*  
 722.

## E.

**E**cclesia, cur Columba sit. 19. in tit.  
*Ecclesia quare, & quomodo magna. 165. 21.*  
*Ecclesia Christi semper a Deo protegend. 685. 20.*  
*Ecclesia soli, luna, tridi comparatur. 511. 36.*  
*Ecclesia, quomodo ancilla, quomodo libera dicatur.*  
 683. 6.  
*Ecclesia breui tempore propagata. 651. 3.*  
*Ecclesia ex gentibus diu sterilis. 665. 8.*  
*Ecclesia sponsa Christi. 246. 21.*  
*Ecclesia dicitur assistere in celo non sedere, ib. 11.*  
*Ecclesia Dei duobus capitibus mirabilis apparet. 261.*  
 1.  
*Ecclesia cur dicatur mons Sion, latera Aquilonis, Cui-*  
*tas Domini virtutum. 266. 7. 26. 10.*  
*Ecclesia Dei mons conglutatus, mons pinguis &c. 364.*  
 15. 16. 17.  
*Ecclesia vix nata in Abel persecutionem patitur. 749.*  
 1.  
*Ecclesia Sanctorum firmamentum Dei. 140. 1.*  
*Ecclesia Catholica noua Hierusalem. 591. 22.*  
*Ecclesia cur dicatur fundari, non fundata. 261. 2.*  
*Ecclesia adificatio ex quibus lapidibus. 383. 10.*  
*Ecclesia & Christi Regni propagatio. 396. 8.*  
*Ecclesia fundamenta qua. 489. 490. 1.*  
*Ecclesia persecutores. 649. 30.*  
*Ecclesia dignitas precedit Angelos. 240. 11.*  
*Ecclesia contra inimicos suos, victoria mystice designa-*  
 ta 327. 10.

*Ecclesia pugna aduersus hostes Deo precipue auctore,*  
 ib. 13.  
*Ecclesia firmitas, beatitudo, successio. 308. 24.*  
*Ecclesiam cur vocet filiam David. 247. 12.*  
*Ecclesia, quid significet. 132. in tit.*  
*Effundere frameam quid. 167. 3.*  
*Electi Dei sunt oues. 93. 1.*  
*Electi, reliquia sunt Christi. 83. 12.*  
*Electis Deus multa bona praestat. 94. 1.*  
*Electorum propria qualitas, & nota. 799. 8.*  
*Electorum salus est Christi merces. 743. 4.*  
*Eleemosyna qua bona pariat. 663. 6.*  
*Eleemosyna quas circumstantias habere debeat. 348. 6.*  
*Eloquium Dei est scutum. 69. 33.*  
*Eloquium Dei cur dicatur ignitum. 712. 4.*  
*\* Eman Egraita quis. 494. in tit.*  
*\* Epistola, historia, & Prophetia sacra quomodo diffe-*  
 rant. 238. 1.  
*\* Episcopi longe abesse ab Episcopatu suo non debent. 642.*  
 7.  
*Episcopo quare in Ecclesia detur locus altior. 741. 2.*  
*\* Et, particula, in oratione Hebraica saepe redundat. 69.*  
 32.  
*Et, saepe in Scriptura ponitur pro, quia. 197. 17. 787. 8.*  
*Et han quis. 500. in tit.*  
*\* Evangelica predicatio dicitur vox Domini. 121. 1. &*  
*seq.*  
*Evangelica predicatio quomodo diuidat flammam i-*  
 gnem. 125. 7.  
*Evangelica predicationis vis. 121. 1. & seq.*  
*Euangelij vis in hominibus spiritalibus, & nationi-*  
 bus barbaris. 125. 126. 127. 7. 8. 10.  
*\* Exitium impiorum hoc tempore in Iudaia impletur,*  
*sed manifestius in die Iudicij. 168. 7.*  
*Exultatio Iusti qualis. 169. 12.*

## F.

**F**abulationes sunt hereticorum colloquia. 701. 5.  
*Facies aliquando in Hebraeo sumitur pro ira. 555. 2.*  
*Faciem auertere quomodo dicatur Deus. 236. 26.*  
*Facultas exequendi non erit in inferno, licet futura*  
*sint desideria mala. 314. 2.*  
*\* Fideles significantur aliquando per oues & boues. 33.*  
 8.  
*Fideles infidelium esca. 447. 7.*  
*Fideles populi, quomodo vocantur, commutandi, & li-*  
 tia. 238. in tit.

Fide.



# INDEX.

**Fidelibus non promittitur carentia inopia, sed consolatio spiritualis.** 164. 10.

**Fidelium numerus magnus.** 90. 24. 25.

**Fides requirit hominem vere humilem.** 673. 1.

**Fidei tempus aurora comparatur, infidelitas tenebris noctis.** 254. 4.

**Fidei diuina signum quodnam sit.** 571. 6.

**Fidei propagatio capis per Apostolos in Hierusalem.** 651. 3.

**Fidem ad iustitiam reputari, quid.** 142. 2.

**Fiducia in potentia propria aut diuitijs vana ostenditur.** 269. 6.

**Filijs inter humanas felicitates primo loco numerandi.** 819. 13.

**Filius se habet ad patrem, ut radix ad arborem.** 294. 5.

**Filia Hierusalem que sint.** 266. 10.

**Finis consummationis, diuersimode à Patribus intelligitur.** 704. 8.

**Firmamentum varie accipitur.** 309. 16.

**\*Flagella quibus à Domino castigamur.** 729. 3.

**Fletus, & ieiunia vera patientia signa.** 586. 7.

**Fletus, cur tribuatur nocti, letitia vero diei.** 129. 6.

**Fletus in Scriptura saepe ponitur pro signo fletus.** 370. 14.

**Flumina Babylonis bona sunt temporalia.** 780. 1.

**Federe in Hebraica lingua varia significat.** 702. 5.

**Felicitas iniquorum magna est tentatio.** 184. 7.

**Felicitas vera quam.** 820. 18.

**Felicitas mundana pertransit.** 585. 4.

**\*Frangere sitim, quid sit.** 604. 13.

**Fraudulentus amicus peior est inimico manifesto.** 302. 12.

**\*Fulgura sagitta Dei.** 64. 12.

**Fulgura & tonitrua presentiam Dei maxime demonstrant.** 817. 7.

**Funiculus in Scriptura pro hereditate sumitur.** 789. 2.

## G.

**G**emma cur dicatur Infernus inferior. 486. 12.

**Gens non sancta quamnam sit.** 228. 1.

**Gentes omnes tam fideles, quam infideles Christi sunt hereditas.** 8. 8.

**Gentium ad Deum conuersio.** 485. 8.

**Gentiles Deus docuit per naturalia.** 838. 9.

**\*Gladius, & lancea Dei quid.** 167. 3.

**Gloria Domini, qua sit.** 560. 4.

**Gloriari, quando malum.** 158. 2.

**Gloriam Dei Sol precipue predicat.** 74. 5.

**Gloriatio non semper vitiosa.** 158. 2.

**Gloria ecclesiastica corona, duo continet.** 595. 5.

**\*Gratia predestinationis dicitur fors.** 56. 6.

**Gratia Dei scutum.** 21. 15.

**Gratia lux est, peccata tenebra.** 141. 1. & 671. 2.

**Gratia est anima vita, peccatum mors.** 156. 19.

**Gratia adiuvans non tollit libertatem arbitrij, sed confirmat.** 448. 9.

**Gratia cur aliquando subtrahatur.** 586. 8.

**Gratia praeueniens, quid.** 672. 5.

**Gratia Dei ad exterminandum peccatum multo plus, quam studium nostrum valet.** 299. 3.

**Gratia dei pinguedo anima, & eius effectus.** 337. 6.

**Gratia excitans, & comitans, bonorum operum causa.** 524. 18.

**Gratia Dei in anima, est veluti aqua in terra arida.** 813. 6.

**Gratia est salus inchoata.** 713. 2.

**Gratia effectus.** 55. 3.

**Gratia Dei necessitas.** 15. 2. 20. 9.

**Gratia auxilia varia.** 94. 3.

**Gratias Deo agere quinam debeant.** 670. 27.

**\*Gubernatio aliorum dissilis.** 134. 12.

**Gubernatio Dei qualis.** 657.

## H.

**H**abitus mali, & vitia sunt hostes hominis. 24. 7.

**\*Hereditas cur dicatur calix.** 45. 7.

**Hereditas malorum, & infortiorum, ibid.**

**Heresis modernorum haereticorum, qui vota rerum non imperatarum à Deo omnino contemnunt, refellitur.** 425. 12.

**Haereticorum dogmata de peccatorum iustificatione.** 141. 1.

**Haereticorum predicatio, lingua serpentum.** 798. 3.

**\*Hebraeus populus aliquando ludas, aliquando Israël dicitur.** 666. 2.

**Hebraei utuntur genere foemino pro neutro.** 145. 7.

**Hebraei ponunt futurum, quando significatur quaedam continuatio.** 12. 5.

**Hebraei orantes manum extollebant in altum.** 118. 2.

**\*Hierosolyma desolatio per Antiochum facta deploratur.** 409. & deinceps.

**Hierusalem muri quinam sint.** 291. 19.

**Hierusalem filia quamnam sint.** 260. 10.



# INDEX

Hierusalem celestis porta qua 490.1.  
 Hierusalem terrestris prerogatus, ib. 2.  
 Hierusalem celestis, ac terrestris latitudo 493.7.  
 Hierusalem euerunt Titus, & Vespasianus propter o-  
 dium Iudaorum, non propter odium Dei 493.5.  
 Hierusalem typus celestis Patrie 724. in tit.  
 Historia Prophetia, & Epistola sacra, quomodo diffe-  
 rant 238.1.  
 \*Holocaustum gratius quodnam 79.3.  
 Holocaustum perfectum 354.12.  
 Holocausta medullata quanam dicantur, ib. 13. 14.  
 Holocausta spiritualia, & oblationes qua dicenda sint.  
 291.20.  
 Homo quomodo imago Dei 17.7.  
 Homo ex natura corrupta viribus quid facere possit.  
 49.2.  
 Homo à creaturis omnibus despicitur in hac peregrina-  
 tione 729.4.  
 Homo sine adiutorio Dei, similis mortuo 118.1.  
 Homo propria virtute liberari non potest à malis 154.  
 16.  
 Homo cur similis floribus, aliisq. caducis, non autem  
 soli, & luna, & stellis 440.44.  
 Homo exaltatus à Deo 665.7.  
 Homo quam modica res sit respectu Dei, respectu sui  
 magna 817.5.  
 Homo sicut ovis seductus perit, Diabolus sicut leo ex  
 malitia recidit 718.8.  
 Hominem in iudicio quid poteris reddere securum.  
 268.5.  
 Homines dicuntur aliquando Dij 33.8.  
 Homines sunt vasa lutea recentia 9.9.  
 Homines cur per infantes, & lactentes significantur.  
 32.2.  
 Homines iniqui membra sunt Diaboli 798.4.  
 Homines fideles per Ierusalem significantur 722.4.  
 Homicida dicuntur viri sanguinum 110.9.  
 Hora Canonica quomodo recitanda 149.3.  
 Horarum septem Canonicarum usus in Ecclesia unde.  
 716.4.  
 Hostia spirituales quanam 562.8.  
 \*Humilitas Christi vestis, & domus dicitur 245.10.  
 Humana natura post peccatum corrupta status 731.3.  
 Humanarum rerum cursus, dicitur torrens 655.8.  
 Humilitas gravissima Deo 68.30.  
 Humilitas salcondiens recte facta 17.6.  
 Humilitatis doctrina Regibus, & Principibus precipue  
 necessaria 787.7.

Humiliatio ex tribulatione veniens, magnum donum  
 est 699.7.  
 Humiliari usque ad terram, quid sit 237.27.  
 Humilis oratio non reuertitur vacua 171.16.  
 Humiles deus respicit 664.5.  
 Humiles spiritu, quomodo saluentur 164.19.  
 Humiles significantur nomine lactantium, & infan-  
 tium 32.3.

## I.

**I**acula, tentationes aliquando significant 69.32.  
 \*Idea diuina res omnes representant 894.51.  
 Idithun, quis fuerit 200. in tit.  
 Idolorum vanitas indicatur 485.7.8.  
 Idololatra similes Idolis 608.16.  
 \*Ieiunium, & saccus, sunt ala orationis 171.16.  
 Ieiunare, & cilicio indui conuenit Christo, prout est in  
 membris suis, ibid. 16.  
 Ieiunando caput operire, quid sit 375.13.  
 Illuminatio vultus Dei multiplex super nos 356.1.  
 Illuminationis Dei finis, est liberatio à peccatis 717.2.  
 \*Imagines Sanctorum 668.16.  
 Impedimenta in quarendo Deo 612.4.  
 Imperatorum persecutio in Christianos describitur 233.  
 11. & seq.  
 Impius, adeptus gloria mundana, quam quassuit, iuste  
 priuatur celesti, quam non quassuit 274.20.  
 Impius aperta, & occulte insidiatur Iusto 30.16.  
 Impius quasi leo 60.13.  
 Impij sunt simulacra Idolorum 775.18.  
 Impij cum iustos offendunt, Deum potius offendunt 25.  
 12.  
 Impij timent ubique 51.9.10.  
 Impij quomodo in exitum precipitantur, & qualis via  
 illorum 68.7.  
 Impij cur trepidant timore, ubi non est timor 296.7.  
 Impij omnes mendaces esse conuincuntur, & caci 314.1.  
 Impij tamdiu Deum laudant, quamdiu eis benefacit.  
 273. & seq. 19.  
 Impij in hoc saculo Iusti, iusti in futuro dominabuntur  
 Impis 272.15. 273.18  
 Impij quam breui tempore regnent super Iustos 735.3.  
 Impiorum status in hac vita 209.2.  
 Impiorum miseria 3.5.  
 Impiorum mala illata Iustis, ipsis solum nocent 29.15.  
 30.16.16.  
 Impiorum desideria nunquam 47.9.



# INDEX.

- Impiorum exitium hoc tempore in Iudais impletur, sed Ira, cor virtutis ibid. 5.*  
*manifestus in die iudicii 168.7.*  
*Impiorum prosperitas, quasi somnium 403.8.*  
*Impiorum mors nunquam finienda 272.14.*  
*Impiorum iusta retributio est, ut male pereant qui alios Iraelita in portis ciuitatum conueniebant ad precipua perdere student 294.5.*  
*Impiis facit Deus misericordiam, cum cito eos de hoc mundo tollit 778.10.*  
*Improbi omnes, viri sunt sanguinum 796.18.*  
*\*Incarnatio Dei fuit visitatio 32.5.*  
*Indignatio significat aliquando iustum Dei iudicium 120.5.*  
*Infernus accipitur aliquando pro Purgatorio 56.10.*  
*Infernus cur aliquando pro morte accipitur 63.6.*  
*Inferni pericula qui non aduertant 678.4.*  
*Infideles sunt ciuitates Diaboli 35.6.*  
*Infidelitatis tempus tenebris noctis comparatur 293.4.*  
*Infirmittas nostra cum Dei potentia cellatio 773.7.*  
*Inimici Dei sunt inimici iustorum 27.6.*  
*Inimici iustorum latrare possunt, mordere non possunt 13.7.*  
*Inimici nostri nihil magis oderunt, quam Ecclesia propagationem 797.2.*  
*Inimico manifesto, peior est fraudulentus amicus 303.12.*  
*Iniquitatis origo in pauperibus, & diuitibus 402.7.*  
*Iniquitates cogitare, quid sit 798.2. & seq.*  
*Iniqui sceno, iusti palma ac cedro comparantur 643.12.*  
*Iniqui quomodo odio habendi, & diligendi 707.1.*  
*Iniquorum insidia dicuntur laquei 63.6.*  
*Iniquorum finis 642.9.*  
*Iniquorum consortium impedit meditationem verbi Diuini 707.3.*  
*Iniquis Deus misereatur ut pater, non ut Iudex 319.6.*  
*Innocentia cordis in quo consistat 581.3.*  
*Innocentia oculorum quae ibid. 4.*  
*Innocentia, & robur rarissime coniunguntur 69.35.*  
*Innocentes cum iniquis cur Deus puniri sinat 237.8.*  
*Insidia quomodo nocent insidiatoribus 169.9.*  
*Insipiens & stulto quomodo discrepet 270.9.*  
*Instrumentis omnibus musicis laudari se Deus precepit 839. in tit.*  
*Inuidia, & odium nomine doloris, cur 29.15.*  
*Inuidiam superat, qui timeat Deum 663.*  
*\*S. Ioannes lucerna fuit Christo venturo 767.18.*  
*\*Ira Dei dupliciter accipitur 192.1.*  
*Ira Dei unde colligatur 443.8.*  
*Ira cur nobis à Deo data 17.5.*  
*Ira significat aliquando poenā, & castigationem 182.5.*  
*Ira proprietas 40.25.*  
*\*Iraelita carnales, & spirituales, qui nam sint 842.3.*  
*Iraelita in portis ciuitatum conueniebant ad precipua negocia 725.2.*  
*Iucunditas moderata à Deo est, superuacanea delicia à Diabolo 606.17.*  
*Iudaorum Ecclesia, oliua bona fuit 258.4.*  
*Iudai occisi in Paschate 411.5.*  
*Iudai quo sensu dispersi, & non dispersi 440.42.*  
*Iudaorum dispersionis causa fuit superbia 321.13.*  
*Iudaorum sera conuersio 322.16.*  
*Iuda & Iudaorum in Christum crudelitas 645.15. ib. 16.*  
*Iudaicus populus, cur dicatur hereditas Domini 430.3.*  
*Iudas, cur in Psalmo vocatus sit, homo pacis 221.10.*  
*Iudaica Synagoga fecunditas Ecclesia gentium sterilitate commutata 638.35. & seq.*  
*Iudices excacantur donis 464.5.*  
*Iudices reprehensi à Deo ob acceptationem personarum 462.12.*  
*Iudicium falsum, radix peccatorum cordis 52.3.*  
*Iudicium inter homines ex nouissimis faciendum 406.18.*  
*Iudicium ad quos precipue spectet 276.6.*  
*Iudicium, extremum terribile simul, & latissimum 564.12.*  
*Iudicium iniustitia quid pariat 463.5.*  
*Iudicii dies 654.7.*  
*Iudicia Dei occulta, non possunt esse iniusta 657.178.6.*  
*Iudicii extremi apparatus, & effectus 10.13. 507.6. & seq. 485.89. & seq.*  
*Iudicia in portis apud Hebraeos 509.*  
*Iudicium & iustitia quomodo differant 392.2.*  
*Iuramentum Dei significat rei immobilitatem 763.11.*  
*Iustus quomodo perpetuo legem Dei meditetur 2.2.*  
*Iustus peccata leuia magna existimat 104.12.*  
*Iustus cur sapienter loquatur 190.32.33.*  
*Iustus aptissime comparatur columba 3006.*  
*Iustus oliua fructifera: impius ligno arido similis 294.8.*  
*Iustus quomodo dicatur lauare manus suas in sanguine peccatoris 317.10.*  
*Iusti studium precipuum 19.3.*  
*Iusti vitam aeternam merentur ex condigno 13.5.*  
*Iusti timentis Deum bona 104.12. & seq.*  
*Iusti peculiariter respiciuntur à Deo 156.18.*  
*Iusti timent, & sperant ibid. 18.*  
*Iusti egent semper noua Dei misericordia 17.22.*



# I N D E X.

Iusti semper Deum laudant 158.1.  
 Iusti pro se Deum habent vigilantem 163.15.  
 Iusti exultatio, qualis 169.12.  
 Iusti contra persecutores defensio, est oratio 171.16.  
 Iusti filij hominis impij iumentis 180.11.  
 Iusti non multum debent formidari insidijs impiorum  
 186.12.13.  
 Iusti non alios habet inimicos, nisi impios 318.2.730.  
 Iusti qui nam sint 613.3.621.3.  
 Iusti solatium ex tribulationibus capiunt 789.9.  
 Iustis ab ipso Deo temporalia subministrantur 161.9.  
 Iustitia interdum misericordiam significat 505.14.  
 Iustitia & Sapientia Christus Diabolum superavit  
 241.5.  
 Iustitia, & veritas Regi necessaria 242.6.  
 Iustitia Dei, quid 811.1.  
 Iustitia Iustorum vera est, non imputatitia, ut hereti-  
 ci volunt ibid. & seq.2.  
 Iustitia Iustorum respectu Iustitie Dei nulla 812.2.  
 Iustitia pro opere bono, & Charitate ponitur 595.  
 Iustitia viam ambulare, quid sit 815.12.  
 Iustitiam iudicare quid 35.4.  
 Iusto spes est tutissima domus 18.10.  
 Iusto melius est modicum, quam ingentes diuitie pecca-  
 toris 187.17. & seq.  
 Iustorum merita ex misericordia Dei 113.5.  
 Iustorum auxilium à Domino 62.2.  
 Iustorum in hac, & altera vita pramium 30.3.4.  
 Iustorum chypeus 113.501.9.  
 Iustorum mors, qualis 165.22.  
 Iustorum preces à Deo semper exaudiuntur 163.15.  
 Iustorum prosperitas diuturna, impiorum brevis 181.  
 2.188.21.191.37.38.  
 Iustorum magna tentatio est felicitas iniquorum 1.  
 quomodo superetur 184.7.  
 Iustorum principatus vnus est multiplex 795.16.  
 Iustos perpetuo respicit Deus 163.15.  
 Iustos de tribulatione quomodo liberet Deus 14.15.164.  
 18.  
 Iustum iustitiam suam predicare, presumptio, quando  
 non est 67.23.  
 Iustificacionis impij ordo 23.4.  
 Iustificacio fit cum gratia infusione 142.1.  
 Iustificacionis initium non nisi à Deo 505.4.

L.

**L**aus Dei quomodo à sacrificio laudis interroga-

tur 280.16.  
 Laus propria aliquando non mala, & quando mala  
 158.2.  
 Lau Dei unde sumenda 832.2.  
 Laudari vtiliter quomodo debeat Deus 656.  
 Laudari in Deo, quid sit  
 Laudis Dei materia, qua nam sit 612.5.663.2.  
 Laudis sacrificium summam salutis complectitur 282.  
 24.  
 Laudes Dei omnia confitentur 842.13.  
 Laudem Dei, qua ore catur pracedere debet silentium  
 346.1.  
 Leuare manus, signum innocentie 405.13.  
 Latitia spiritualis unde oriatur 661.  
 \*Lex Dei multis modis nominatur in scripturis 75.8.  
 Lex Domini quibus modis soluitur 2.1.  
 Lex Dei qualis sit impijs, & iustis 6.3.  
 Lex alia charitatis alia iusticie 753.4.  
 Lex Domini quomodo dicatur ignea 711.4.  
 Lex Domini terra sancta est, in quam ducimur à Spiri-  
 tu S. 8.4.2.  
 Lex peccati, siue cupiditas excacat homines 705.1.  
 Lex Decalogi cur sit indispensable 711.2.  
 Legis diuina sex encomia 75.8.  
 Legis diuina obseruatio à Dei timore promanet 162.13.  
 Legis Dei sedes est cor iusti 2.2.  
 Legis diuina nomina diuersa 685.4.686.7.  
 Legis diuina amor qualis esse debeat 687.4.  
 Legis Dei obseruantiam qua impediunt 688.1. & seq.  
 Legis consideratio, qua bona pariat 704.2.  
 Leges Dei mirabiles in sensu mystice quam sint  
 709.1.  
 Legis ad obseruantiam quatuor à Deo petenda 692.1.  
 \*Liberalitas, regia virtus est, ac diuina 825.16.17.  
 Liberalitas Dei, bonorum omnium causa 826.16.  
 Liberatio à malis, & à vitijs 538.16.  
 Liber viuentium, & iustorum quis dicatur 382.33.  
 Ligna Domini que sint 606.18.  
 Limbus, locus inferior 495.6.  
 Lingua quomodo meditatur iustitiam Dei 176.32.  
 Lingua loqui iudicium, & ore meditari sapientiam  
 quid ib. 32.  
 Lingua dolosa eorum quibuscum versamur, valde ma-  
 gna calamitas 719.12.  
 Lingua dolosa parum nocet, nisi inducat ad peccatum  
 ib. 2.  
 Lingua dolosa sagitta similis, & eius remedia 720.4.  
 Lingua dolosa, & iniqua descriptio, & differentia



# INDEX.

- 716.2.  
Lingua peccata alijs frequentiora, difficillime cau-  
tur 164.13.  
Lingua quomodo tribuatur cogitare 292.2.  
Lingua detrahentium instar sagitta longe ferit 312.6.  
Literaturam cognoscere, quid sit 3017.  
\*Locorum mutatio vana 43.1.  
Loquendi prudentia euitantur maxima incommoda  
661.  
Lucerna in scriptura passim vocantur filij, siue posteri  
766.18.  
Lumen Dei principium bonorum omnium 68.31.159.5.  
Lumen gloriae, ad videndum Deum necessarium 180.10.  
Lumen vultus Dei quod dicatur 506.16.  
Lumine caelesti iuste priuantur, qui rationis lumine v-  
ti noluerunt 274.21.  
Luna aliquando significat corruptionem, & mortalita-  
tem 395.7.  
Lux interdum pro latitia ponitur 159.5.  
Lux gratiam, & misericordiam saepe significat 228.3.  
Lux quam Deus initio creauit, qualis fuerit 415.17.  
Lux iustitia, quomodo oriri dicatur 568.12.  
  
M.  
Magnificencia Dei qualis 31.2.  
Mabelet quid 493. in tit.  
Mala natura corrupta 49.1. & seq.  
Maledictio diuina, omnium malorum cumulus aptis si-  
militudinibus ostenditur 646.17.18.  
Malum simpliciter, est malum culpa 533.10.  
Malorum omnium initium, mentem à Deo auertere  
297.3.  
Malorum conuersatio nunquam magis nocet, quam in  
conuiujs & computationibus 804.5.  
Mandatum Dei quomodo dicatur latum 702.8.  
Manichaeorum haeresis circa rerum, creationem refelli-  
tur 840.7.  
Manna Eucharistia figura 437.28.657.  
Mansuetudinis virtute excellentes viri 758.1.  
Manus peccatoris, quid 181.12.  
Mare ostendit Dei potentiam 503.1.  
Mare & flumina aliquando pro gentibus & Iudaeis su-  
muntur 509.25.  
Mare, quomodo manus habere, dicatur 608.26.  
Martyrum Christi fides, & constantia 715.1.732.4.  
324. & seq.  
Martyrum Christi de tribulationibus victoria 164.17.  
Maturare ambiguum est, & varia eius significata  
713.3.  
Maximus reprehensus quod delatoribus nimis indulse-  
rit 582.6.  
Medici, & Gigantes iisdem literis scribuntur Hebraice  
497.11. & seq.  
Media quarendi Deum 612.4.  
Memoria Dei plus delectat, quam praesentia carnalium  
voluptatum 426.3.  
Memoria Dei inter operandum quomodo haberi possit  
338.7.  
Mendacium perniciosum, multorum malorum est cau-  
sa 162.13.  
Mendacium dicitur iniquitas 699.1.  
Mendaces filij hominum in stateris quomodo 632.9.  
Mendacium ordinarie primum peccatum in pueris  
314.3.  
Mendacij coarguit Deus diffidentes potètia virtutis sua  
351.2.  
Mendacium, & dolo sorum merces iusta 690.6.  
Mensa sumitur aliquando pro lectione sacrarum scri-  
pturarum 379.27.  
Messias quomodo filius, & Dominus Dauid 650.1.  
Messia aduentum Dauid efflagitat 314. & seq.  
\*Milites Christi fugiendo, & tolerando vincunt tenta-  
tiones 252.1.  
Milites Dei sunt creatura omnes 294.7.  
Misera corporales communes quatuor, & totidem spi-  
rituales 632.4.  
Misera propria consideratio utilis 752.1.  
Miseretur Deus iniquis, ut pater, non ut iudex 319.6.  
Misericordia Dei clarius patet quam iustitia 150.5.  
Misericordia à miseratione quomodo differat 102.6.  
Misericordia perfecta solius Dei propria 150.5.  
Misericordia Dei in quo potissimum consistat 708.4.  
Misericordia Dei quam magna, & quanta erga pios &  
impios 178. & seq.  
Misericordia est simul corona iustitia 180.11.  
Misericordia Dei praecedit iustitiam 484.15.  
Misericordia Domini praevita diligenda 337.4.  
Misericordia in solius Dei sinu requiescit 755.7.  
Misericordia est, tollere miseriam & defectum 150.5.  
Misericordiam Dei imitari debemus 108.8.  
Misericordia diuina affluentia 283.2.  
Misericordia nomen omnia beneficia complectitur 325.  
20.  
Missa sacrificium 91.27.  
Mites facile Deum habent adiutorem 258.19.163.2.  
29999 2. Ma-



# I N D E X.

- Monachi veteres hospitibus ad lautit. m. legumina o-  
leo condita apponebant 606.17.  
Mons Sion quare immobilis fuerit 733.1.  
Montes terra qui dicantur 253.3.  
Montis Sion varia significationes 266.10.  
Montium creatio 517.2.  
Mortalitas, & possibilitas in Beatis conscindenda, non  
deponenda 131.15.  
Mors peccatorum, quare pessima 164.21.  
Mors iustorum, quare pretiosa, & qualis 165.21.22.  
Mors Christi quare dicitur somnus 12.5.220.9.  
Mors impiorum nunquam finienda 272.14.  
Mortis tempus, nocte: vite, die significatur 86.2.  
Mortui cur Deum laudare negentur 497.11. & seq.  
Mortuorum an Deus curam gerat 495.5.  
Moses Princeps Ecclesiasticus, & politicus simul 433.  
20.  
Moses, an auctor aliquorum Psalmorum 519. in tit.  
Motus pravi reprimendi, & timendi 16.5.  
\*Mulierum infelicitas, est sterilitas 633.8.  
Mulieris Christiana ornamentum ad intus esse debet  
249.11.  
Mundus sine intercessione Sanctorum non tamdiu sub-  
sisteret 626.20.21.  
Mundus miratur, non diligit eos, qui de mundo non  
sunt 7.8.3.  
Mundus, terra deserta, inuia, & inaquosa 337.3.  
Mundi vanitatem agnoscences, quid petant a Deo  
208.18.  
Mundum obliuisci, quid sit 248.12.  
Munera qua Christo placent 307.10.  
Munerum acceptio, causa iniquitatis 110.10.  
Muri ciuitatis, dicuntur viri perfecti 266.11.  
Muri Hierusalem quinam 291.19.  
Mutatio locorum vana 43.1.  
N.  
Nasus pro iracundia cur 74.51.  
Nationes barbare deserta cur dicantur 125.7.  
Natura humana non vilis apud Deum 308.14.  
Natura humana propter fragilitatem infanti a paren-  
tibus neglecto comparatur 115.16.  
Natura humana corruptio describitur 195.7. & seq.  
Natura corrupta mala 49. per totum Psalmum.  
Natura vulnera quatuor, & eorum contraria 632.4.  
Nazarei quomodo dicuntur consecrati 767.19.  
\*Necessitas Gratia Dei 15.2.20.9.  
\*Nomen Domini cur dicatur sanctum 157.21.  
Nomen Domini inuocare, & in nomine Domini inuo-  
care idem 80.8.  
Nox quomodo reperitur in calo 770.3.  
Nox, orandi tempus maxime opportunum ibid. 3.  
Nox, occasio occulta pescandi 57.4.  
Nox, aliquando significat tempus tribulationis 55.3.  
Nox aliquando significat tempus quo abest lux gratis  
671.4.  
Nox, aliquando significat mortis tempus, sicut dies  
tempus vite 85.2.  
Noctis diuisio in quatuor partes apud veteres 754.6.  
Nubes, curus Dei, domus, tentatorium 64. & 55.12.  
Numerus septenarius sumitur pro frequenter 716.4.  
Nuptiarum sponsi, & sponsa celestis quis sit finis 251.15.  
O.  
Obedientia summa debetur Domino, quod simus  
figmentum manuum eius 698.1.  
Obedientia a Deo requisita 57.8.  
Obedientia mandatorum, tributum est, quod Deus pro-  
collatis in suis bonis requirit 620.43.  
Oblationes spirituales, & holocausta, qua sint dicenda  
291.20.  
Obliuio Dei, radix peccatorum 38.18.  
Obliuisci, quomodo conueniat Deo 236.25.  
Obliuisci mundum quid 247.12.  
Obstinati, & superbi, cur cedro similes 124.6.  
\*Octaua, quid 122. in tit.  
Oculus intellectum aliquando significat, animam volun-  
tatem, venter memoriam 134.11.  
Oculos mentis auertere a Deo, malorum omnium ini-  
tium 297.3.  
Oculis officium aurium, & lingua tribuitur 701.2.  
\*Odor exoblatis arietum carnibus, cur suauissimus di-  
ceretur 354.13.14.  
\*Oliua fructifera iustus comparatur, Impius ligno ar-  
do 686.8.  
\*Opera bona sacrificium sunt Iustitia 16.6.  
Opera mala laboriosa 30.16.  
Opera consona esse debent cordi, & ori 59.6.  
Opera infidelis, qualia 50.2.  
Opera bona remuneratur Deus ex Iustitia 67.23.  
Opera Dei mouent hominum ad fidem 150.4.  
Opera Dei conformia sunt verbis illius ib.4.  
Opera qua Deo placent, sunt in fide, ut in radice ib.4.  
Opera Domini inuestigabilia 432.19.



# INDEX.

- Opera nostra minima unde valorem excipiant 347. 6. Passio Christi à voluntate, & potestate Dei processit sed non sine culpa Iudeorum 648. 26.  
 Operum bonorum venenum presumptio 17. 6. Passio Christi ab infantia capit 499. 16.  
 Operibus Deus laudandus 149. 2. Passiones Christi cur plurimæ fuerunt 245. 16. 17.  
 \* Oratio quomodo faciendâ 19. 1. 2. Passio Christi magnitudo 495. 7.  
 Oratio est Domus Dei 20. 8. Passiones Christi prædicationem, vide Psal. 63. tot. 340.  
 Oratio verbalis, & realis, quæ 78. 3. & Psal. 98. toto 372.  
 Oratio qua peccata remittat 102. 7. Passionem Christi, quomodo abominarentur discipuli 496. 8.  
 Oratio humilis non reuertitur vacua 171. 16. Passionis Christi meditatione centemuntur omnia 328.  
 Oratio est defensor iusti contra persecutores, ibidem 2. 3.  
 Oratio feruens, & assidua ad impetrandum apta 510. 3. 713. 1. 752. 1. Pater æternus generando Filium, cruciasset Verbum dicitur 239. 1.  
 Oratio eadem ter à Psalmista iterata, quod mysterium contineat 299. 1. Patientia melior est, quam liberatio de calamitate temporali 164. 17.  
 Oratio peccatoris, quando non sit peccatum 642. 6. Patientia melior est diuitijs 111. 9.  
 Orationis als ieiunium, & saccus 171. 16. Patientiam in malis causa bonorum 123. 17.  
 Orationis donum effectus tribulationis 138. 25. Patientes facile experiuntur in se dei auxilium.  
 Orationem Deus inspirat 671. 2. Per patientiam Deus est cum iustis tribulatis 164. 18.  
 Orantem quando Deus contemnat 19. 1. 2. Patria celestis, Regnum, Ciuitas, Domus dicitur 727. 2.  
 Orantes quare Deus non semper exaudiat 511. 4. Patria genitum Gracia lectio, & cur 541. 7.  
 Orando manus leuare, quid significet 337. 5. Pauperi quomodo Deus assistat à dextris 649. 30.  
 Orationis perseverantia, insigne donum Dei 355. 19. Pauperi qui miseretur feneratur deo 662.  
 Ordo Melchisedech 652. 5. Pauperes voluntate, ut Deum quarant 382. 37.  
 Oro meditari Sapientiam quid sit 190. 32. Paupertatis fructus 37. 16. & seq.  
 Ornamentum mulieris Christiana ad intus esse debet 249. 15. Pauperes quos exaudit Deus 38.  
 \* Ossa robur significant 134. 13. Pax non solum habenda cum omnibus, sed optanda, & querenda 163. 14.  
 Ossa iustorum, quomodo Deus custodiat, & quid sint 164. 20. Pax quomodo in hac vita querenda sit ib. 14.  
 Ossa pro viris perfectis, caro pro infirmis, aliquando sumitur 169. 12. Pax perfecta haberi nequit in hac vita ib. 14.  
 Ossium exultatio perfectam latitiam significat ib. 12. Pax celestis Hierusalem est inquirenda, ib.  
 P. \* Peccatum veniale proprie non relinquit maculam 52. 2.  
 Pabula ouium Dei, quanam sint 94. 1. Peccatum mortale cur dicatur maximum 77. 14.  
 Palatia huius mundi, cur dicantur tabernacula peccatorum 502. 11. Peccatum mors est anime; gratia, vita eiusdem 156. 19.  
 Panis pro quolibet cibo in Scriptura ponitur aliquando Peccatum solum miseros facit 210. 1.  
 605. 16. Peccatum primum in pueris, ut plurimum est mendacium 314. 3.  
 Paradisus terrestris atrium fuit celestis 625. 2. Peccatum est interdum pana peccati, & grauissima 1012. & 206. & 380. 33.  
 Paruuli in Scriptura, vel simplices, vel ignorantes, vel humiles intelliguntur 710. 2. Peccati fuga à Dei timore proficiscitur 460. 13.  
 Paruuli dicuntur aliquando amici huius seculi 25. 8. Peccati remissionem, & infusionem iustitie, Lutherani male dixerunt, non imputationem peccati, & putationem iustitie 107. 12.  
 Passeres pro omnibus auiculis; Hebræa locutio est 606. 19. Peccati instrumenta sunt membra externa 711. 8.  
 Passio Christi holocaustum 79. 3.



# INDEX.

- Peccans graviter, praesertim peccato luxuria, miser, & nocte 728.5.  
curvus 194.6.  
Peccati radices duo 177.1.  
Peccata recogitanda nocte 16.5.  
Peccata quot modis committuntur 20.6.7.  
Peccata miseria sunt 22.2.  
Peccata laquei sunt 45.7.  
Peccata leuia, magna iustus existimat 104.12.  
Peccata sunt tenebrae, sicut gratia lux est 140.1.  
Peccata, quae magis misericordiam merentur 102.7.  
Peccata Christianorum causa persecutionem in Ecclesia 324.1.  
Peccata parentum in filiis, quomodo Deus castiget 644.33.  
Peccata quomodo Deus operiat 504.2.  
Peccata parentum Deus punit in filiis, ac posteris, cum similia peccata non vitant 447. & 448.8.  
Peccata regi & non imputari, quid 140. & seq. 2.  
Peccata nostra Christus sibi tribuere potuit 85.1.  
Peccatorum poenitentia 24.6.  
Peccatorum cognitionis effectus 2.23.  
Peccatorum remissio optanda 140.1.  
Peccatorum causa, cur vita hominis breuior sit 519.7.  
Peccatorum radix, quae 38.18 & 594.3.  
Peccator omnis quomodo dicatur prauaricator 519.7.  
Peccator dum iusto vult nocere, magis sibi nocet 186.11. & seq.  
Peccator Aranea pulchra assimilatur 207.14.  
Peccator Aspidi surda similis 314.5.  
Peccator quomodo dicitur longe distare à Deo 751.1.  
Peccatoris excacati mala 40.26.  
Peccatoris manus, quid 181.12.  
Peccatoris salus, quod habeat initium 210.5.  
Peccatoris furor, ut furor serpentis, qui nulla arte mansuesci potest 314.4.  
Peccatores iustificari possunt in conspectu hominum, sed non in conspectu Dei 811.2.  
Peccatores, licet ditissimi, cur saepe laborent are alieno grauati 188.23.  
Peccatores ex peccatis suis sensum doloris, quem par esset, cur pauci percipiant 193.4.  
Peccatorum usura 308.14.  
Peccatorum potentia torrentis, vel pluuia velocissime transeunti similis 315.7.  
Peccatorum multorum ceruices concidit Deus 750.4.  
Peregrinis caelestis patria, Deum esse tabernaculum in die, parantur 586.8.  
Perfecti Deum timent timore filiali 161.9.  
Perfecti etiam viri semper aliquid habent, quod sibi petant ignosci 205.12.  
Perfecti viri ciuitatis muri dicuntur 266.11.  
Periculum salutis aeternae maximum 671.3.  
Pericula inferni, qui non aduertant, ibid. 4.  
Pericula ab hostilibus pietatis semper sunt in hac vita 662.  
In Periculis Deus unicum refugium 297.1.  
Pericula vitae praesentis, soli spirituales viri norunt 306.9.  
Perpetuum in terris nihil 638. 38.40.41.  
Persecutor, quos persequitur facit egrotare morbo poena, seipsum vero morbo culpa 171.16.  
Persecutores iustorum, cur vocentur homines sine addito 731.3.  
Persecutiones cur Deus permittat 679.13.  
Persecutiones Imperatorum in Christianos descriptio 233.11. & seq.  
de Persecutione Sancti quandoque queruntur 238.28.  
Persecutionum tria genera, quibus iustos affligunt impij 169.9.  
Persecutionum & calumniarum morbo, quae medicina facienda 183.6.  
Perseuerantia in oratione, insigne donum 355.19.  
Perseuerantis donum, proprium Praedestinatorum 344.8.  
Pes superbia, quid 181.12.  
Peti nihil melius potest à Deo, quam ut conuertat nos ad se, & ipse conuertatur ad nos 452.8.  
\* Pharaon, figura Diaboli 504.11.  
\* Pij & humiles paucissimi respectu impiorum 655.7.  
Piorum honores & opes 377.  
\* Plaudere manu, quid significet 257.1.  
Plenitudo temporis in Scripturis, quid 588.13.  
Pluuia voluntaria, quid sit 361.10.  
\* Paena aperit oculos, quos culpa clauserat 423.5.  
Paena peccati in hac vita 588.12.  
Poenitentia 672.4.  
Poenitentia vera, quae requirit 752.4.  
Poenitentia Deo semper grata 754.6.  
Poenitentia & Confessionis efficacitas 106.1.  
Poenitere dicitur Deus, quando rem mutat, non poenitere quando non mutat 763.11.  
Poenitentium genera tria, tribus autem generibus com-



# INDEX.

- Pœnitentium vita peccatoribus displicet* 587.9.  
*Pœnitentium officium* 197.19.  
*Populus Dei regendus à Magistratu Ecclesiastico, & civili* 432.20.  
*Populus Dei, aptissime vinea comparatur* 452.8.  
*Populus Dei, quid cupiat & oret* 346.2.  
*Porta mortis, quid* 37.14.  
*Porta Sion, quid ibid.* 14.  
*Postulanda à Deo* 696.2.  
*Potentia Dei laudes* 121.1. & seq.  
*Potentia Daemonum, & fragilitatis humana descriptio* 332.4.  
*ad potentiam omnia opera Dei mirabilia reuocantur in* 621.2.  
*\* Prædestinationis gratia dicitur sors* 56.6.  
*Prædicatores cur dicantur cali* 74.4.  
*Prædicationis Apostolica fructus* 209.16.  
*Præmium contemptis temporalibus* 10.4.  
*Prælati portat & portatur* 489.1.  
*Præsentia Dei mirabilem vim habet ad moderandas actiones* 716.8.  
*Præsumptio venenum operum bonorum* 17.6.  
*Prætorum sodalitas cauenda* 77.13.14.15.  
*Principium malorum poena* 10.12.  
*Principes operam dent, ne peccata fiant* 497.14.  
*Prodigium fieri alicui, quid sit* 388.8.  
*Progressus in Via vite, apte describitur per introitum* & exitum 724.8.  
*Propheta etiam sancti Patriarcha fuerunt* 615.12.13.14.  
*Promissa diuina sunt dulcis meditatio in tribulatione* 702.1.  
*Promissiones diuinas consequendi modus* 661.  
*Promissa Dei qualia* 47.7.8.  
*Principum contemptus magni criminis præcedentis indicium, & poena* 31.32.  
*Prosperitas impiorum quasi somnium* 403.8.  
*Prosperitas iniquorum, magna tentatio iustorum, & quomodo superetur* 18.4.7.  
*Prosperitas effectus* 111.1.  
*Prosperitatis fructus in impijs* 401.4.  
*Prosperitatis tempus, dies significat nox tribulationis* 56.7.  
*Protectio Dei* 111.2.515. & 526.1.667.10.668.19.  
*Protegere dexteram, quomodo dicatur Deus non si istram* 732.5.  
*Providentia Dei singularis erga iustos* 188.24. & seq.  
*Providentia Diuina in Ecclesia præsertim elucet* 638.39. & seq.  
*Providentia Dei mira erga animalia* 234.10.  
*Proximorum auxilio vacans facile colliget animum cum voluerit, si nihil desideret eorum, quia videntur* 256.10.  
*\* Psalmi nonnulli, cur Alphabetici scribantur* 150. in tit.  
*Psalmi Graduales unde dicti* 759. in tit.  
*Psalmi Graduales cuius rei figura* 719. in tit.  
*Psallere sapienter, quid sit* 259.7.  
*Psallendi Deo genera quatuor* 572.7.  
*Psalmis significatio primi verbi est regula significationis secundi* 5.1.  
*Psalmodia omnibus operibus anteposenda* 149.3.  
*\* pulchritudo spiritualis, quæ nam sit* 241.15.  
*Pulchritudo sponsæ Christi, quæ nam* 246.14.  
*Purgatorij ignis, non contemnendus* 192.1.  
*Purgatorij locus aliquando infernus dicitur* 506.

Q.

**Q**uærendi faciem Dei quid sit 611. & 612.4.  
 Quærendi Deum unde initium sumatur 612.4.  
 Quærendi Deum in duobus positum est ib.4.  
 Quiescere quomodo dicatur Deus 765.15.  
 Quoniam particula in oratione Hebraica sæpe redundat 69.32.  
 Quoniam, sæpe pro, & vel autem 87.19.

R.

**R**apina cur homini, non bestiis prohibita 607.24.  
 Ratio naturalis, cur dicatur lumen virtutis Dei 17.7.  
 \* Recordari & obliuisci quomodo dicatur Deus 32.5.  
 571.4.783.9  
 Redemptio & Redemptor 618.  
 Redemptio nostra perfectissime complebitur in die indicij 755.8.  
 Redemptionis humana excellentia 211.9.10.  
 Redemptionem cur operatus sit Saluator in medio terræ 415.13.  
 Regi duo sunt necessaria, Veritas, & iustitia 242.6.  
 Regnum Christi consumet omnia Regna 254.6.  
 Regni Dei ab hominum Regno quadruplex discrimen 824.11. & seq.

Reg.



# INDEX.

- Regnum Calorum bellando, & laborando capitur 774.  
 10.  
 Regnum Davidicum aeternum in Christo impletur 501.  
 509.10.5.  
 Renouatio corporis in Resurrectione, cur Aquila com-  
 paratur 795.5.  
 Religiosa vocationis beneficia expressa in electione Po-  
 puli Israelitici 772.4.  
 Rerum humanarum cursus dicitur, Torrens 655.3.  
 Res creata possessio Dei dicuntur 608.25.  
 Res sacra, quomodo adoranda 575.5.  
 Resurrectionis Christi dies, cur à Domino facta dica-  
 tur 682.22.  
 Res magna dicuntur res Dei 178.6.  
 Reuerentia pro verecundia sumitur 301.23.  
 Rex bonus quis 363.2.  
 Robur & Innocentia rarissime coniunguntur 69.35.  
 S.  
 Sacerdotum Aaron, & Melchisedech differentia 653.5.  
 Sacerdotum officium quod nam sit 762.9.  
 Sacramenta visibilia sunt alligamenta peccatorum.  
 823.3.  
 Sacrificium vespertinum figura sacrificij Crucis 803.  
 2.  
 Sacrificium laudis à Dei laude quomodo internoscat 282.  
 280.16.  
 Sacrificium laudis summam salutis complectitur 24.  
 Sacrificium magis acceptum Deo 382.36.  
 Sacrificium verum, & proprie dictum extat in Ecclesia Dei 653.5.  
 Sagitta Domini quid; & earum effectus 192. & 193.  
 2.3.  
 Sagitta vocantur verba Dei 245.7.  
 Salomon typum Christi gerebat 362. in tit. 762.9.  
 Saluare alios nullus potest, qui se saluare non potest 282.3.  
 Salus corporis non contingit homini sine auxilio Dei 155.17.  
 Salus animae nemini datur, sine praueniente, comitan-  
 te, & subsequente gratia Dei ib. 17.  
 Salutem concupiscere non sufficit 718.6.  
 Salutis peccatoris, quod sit initium 209.3.  
 Salutis via, arcta, & angusta 671.3.  
 Samuel Sacerdos non fuit, sed tantum Leuita 375. & Septenarius numerus sumitur pro frequenter 702.2.  
 576.6.  
 Sancti, & fideles in hac vita absconditi 466. 4.  
 Sancti appellari possunt fideles, & iusti 482.2.  
 Sancti quandoque de persecutione queruntur 238. 28.  
 Sancti quomodo dicantur transire per ignem & aquam 353.11.  
 Sancti viri Patres sunt, & Matres eorum, quos ad fi-  
 dem, & penitentiam conuertunt 747.3.  
 Sancti omnes una cum Christo Mundum iudicabunt 544.7.  
 Sanctificatio pro Sanctuario aliquando ponitur in scri-  
 ptura 561.6.  
 Sancti cum Christo regnantes, sunt sedes Dei 727. 5.  
 Sanctis quandoque Deus bona tribuit, aliquando au-  
 fert 238. 28.  
 Sanctuarium, quid 513. 38.  
 Sanctorum opera quibus stultitia sint 739.6.  
 Sanctus Israel, est cognomen Dei 392.24.  
 Sapere sapientibus est viuere 178.10.  
 Sapientia, & scientia inundatio in Beatis unde ib.  
 10.  
 Sapientes huius Mundi, nomine inimicorum aliquan-  
 do significantur 31.3.  
 Sapientia perfecta duo requirit 659.  
 Scandalum pusillorum & Phariseorum actuum, &  
 passuum 716.5.  
 Sceptrum aliquando significat potestatem Regiam 667.3.  
 Scientes Deum, notitia amicitia, qui nam dicantur 180.11.  
 Scientia Dei tenebras omnes penetrat 792. 11.  
 Scientia Dei mirabilis in opificio humano 793. 13. &  
 seq.  
 Scientia Dei mirabilis in opificio spiritali, & corporal 780.15.  
 Scientia Diuina mirabiles effectus describuntur Psal-  
 138. toto 786.  
 Scientia Dei notissima & obscurissima 790.5.  
 Scientiam Dei nemo latere potest 791.6.  
 Scriptura sacra facta est Iudaeis in laqueum 379. &  
 380.7.  
 Scuta hostium spiritalium, qua nam sint 422.3.  
 Securitatis & benedictio Calestis Patria, qua nam 835.2.  
 Secunda sabbati, qua nam dies apud Iudaeos 260. 11.  
 tit.  
 Semet, quomodo intelligendum sit, praeceptum fuisse, &  
 malediceret Dauidi 205.13.  
 Septenarius numerus sumitur pro frequenter 702.2.  
 Septuaginta



# INDEX

Septuplum in sacris literis, significat generatim ma-  
ius, & multiplex. 449.13.

Sermo Dei velocissimus. 836. 4

Servi Dei, qui nam, qui filij, & qui filij filiorum. 546  
29.

Servi Dei quales esse debeant. 663.1

Servorum & puerorum magna affinitas, ibid. 1.

Sessio Christi à dextris Patris. 650.5

\* Sion, Ecclesia typus. 492.5

Sion Mons, caput regni populi Iudaici. 410.3

Similitudines sacra Scriptura caute usurpada. 315.5

Sibi, particula saepe redundat in scriptura. 719. 3.  
720.5

Sodalitas prauorum cauenda. 77.13.14.15

Sollicitudo Dei erga homines, pulchra metaphora  
exprimitur. 311.3

Sol cur dicatur factus in potestatem diei, & luna in  
potestatem noctis. 778.8

Sol praecipue gloriam Dei predicat. 74.5

Somnus, mors temporalis, & spiritualis. 48.4

\* Spes est tutissima domus in isto. 18. 10

Spes proprio dicta in Christo non fuit, sed fiducia.  
542.1.

Spes cum timore iungenda. 155.18.

Spes firma in Deo quomodo habetur. 182.4

Spes viua ad obtinendam vitam aeternam necessa-  
ria. 166.22

Spei utilitates 753.5

Sperans in Deo quomodo pascitur in diuitiis. 183.4.

Sperantes in Domino cur aliquando plus affliga-  
mur, ibid. 4

Sperare in nomine Domini quid. 157.21

\* Spina aliquando significat tribulationem, & sti-  
mulum conscientiae. 144.4

Spiritus varie exponitur. 346.5

Spiritui S. quomodo conueniat peculiariter dici Do-  
minum dominorum. 777.3

Spiritus S. schola nulla utilior. 162.11.

Spiritus aliquando significat cor, & os. 141.2

Spiritus contribulatus, quis. 290.18.

Spiritus principalis, quis. 239.15

Spirituales filij quo cibo pascantur. 747.4

Spirituales oblationes, qua nam dicenda. 291. 20

Spiritualibus filiis, quis sit pater, & mater. 747.3

Spiritualis pulchritudo quae. 241.5

Spiritualis potestas servorum Christi non minus  
cervitur in actione, quam passione. 743.5.

\* Sponsa Christi Ecclesia, B. Virgo, & alia Virgines.  
246.11

Sponsa vestis laeaurata & amictus varius, quid  
247.11

Sponsa Christi per prerogatiuam dicuntur qui Vir-  
ginitatem in Ecclesia vouerunt, non extra. 250.  
16.

\* Stella sunt veluti castrorum caelestium acies ordi-  
nata. 151.6

Sterilitas anima duobus modis accipitur. 170.14.

Sterilitas quadam incredibilis post hanc vitam. 187.  
19.20

Studium praecipuum insti. 26.3

Stulti vocantur, qui confidunt in diuitijs suis. 270.  
10.

\* Substantia pro fundamento, aut subsistentia su-  
mitur. 372.2

Superbia fuit causa dispersionis Iudaorum. 321.  
12.

Superbia initium omnis perditionis. 181.13

Superbi, & obstinati, cedro similes. 124.6

Superbia obnoxij sunt magni viri. 181.12

Superbia pes quid ibid. 12.

Superbi potentes montes terre vocantur. 174.3

Superbia cordis, oculorum, verborum, & operum.  
761.2

Superbi omnes vento inflati sunt. 730.5

Superbi, non tenent superbiam, sed a superbia tenen-  
tur. 402.6

Superbos Deus spernit. 707.6

Susanna innocentia manifestata. 184.6

Susceptio matutina. quid. 83. in tit.

Sustinere Dominum, quid. 101.2.113.9

\* Synagoga initium sub Moysse. 410.2

T.

**T**abernaculum Arca cur domus Dei, & locus  
habitationis gloria eius. 36.3

Tabernaculum erat figura Ecclesiae. 121. in tit.

\* Temporalia contemnens prodigium fit multis.  
388.8

Tenebra spirituales, qua nam sint. 813.4

Tentationes diaboli sunt gladij, & tela ignea. 35.6.

Tentationes ubique. 43.1

Tentatio magna infortiorum, est felicitas iniquorum,  
& quomodo superetur. 184.7.

Tentationes vincunt milites Christi fugiendo, &  
tolerando. 252.5

Tentationes quomodo dissoluat Deus. 734.7

Tentationis tempore quid faciendum. 102.5

Tentare proprium hypocritarum. 172.19.



# I N D E X

Tentationum initia, paruuli sunt. *Babylonia.* 784.  
 12.  
 Tentatus liberatur à tentatione dupliciter. 48.4.  
 Tentatus duo mala patitur. *ib.* 1.  
 Tempestas Passionis Christi varia significat. 372. 3.  
 Temporalia bona sunt verorum bonorum imagines,  
 & umbra. 203. 9.  
 Temporalibus anxie quarendis, & conseruandis  
 frustra insudant homines. 518. 9. 10.  
 Temporalia contemnentis premium. 16.4.  
 Terra quomodo in incarnatione Verbi dederit fru-  
 ctum suum. 357.5.  
 Terra amatores, terra nuncupantur. 253. 3.  
 Terrena bona, quæ sint. 15. 3.  
 Testimonia iniquorum peruersa arguuntur quin-  
 que capitibus. 170. 14.  
 Testamentum, & pactum quomodo conueniant in  
 promissionibus Christi. 764. 12.  
 \* Tharsis quid significet. 263. 4. & seq.  
 Thesaurus nunc res pretiosas, nunc earum locum de-  
 signat. 168. 7.  
 Thymiamatis, quod offerebatur in templo, qualita-  
 tes. 802. 2.  
 Thymiamatis qualitates habere debet oratio. 803. 2.  
 \* Timere Deum, in scriptura aliquando sumitur pro  
 colere. 90. 25. 657.  
 Timor Dei idem, ac pietas. 76. 10.  
 Timor filialis, *ibid.*  
 Timor, & spes coniungi debent. 155. 18.  
 Timor cum spe vera charitatis iudicium est, *ibidem*.  
 18.  
 Timor Domini veram vitam felicem parit. 162.  
 11.  
 Timor Domini quomodo faciat beatum. 654. 7.  
 Timor Domini securitas maxima. 429. 5.  
 Timoris sancti signum. 746. 1.  
 Timore filiali. Deum timent perfecti. 161. 9.  
 Timorem Domini ante oculos quomodo semper ha-  
 bere possimus. 338. 7.  
 Timorem Dei abicere quam malum. 51. 7.  
 Timentis Dominum premium. 659.  
 Timentis Deum felicitates, *ibid.*  
 Timentes se Deus protegit. 661.  
 \* Tonitrua, cur voces Dei. 66. 15.  
 Torcular, quid. 30. in tit.  
 Torrens voluptatis quid. 179. 9.  
 \* Traianus laudatus, quod delatoribus operam  
 mandaret. 582. 6.

Tribulatio significatur per spinam. 147.  
 Tribulationis tempus nox significat; dies tempus  
 prosperitatis. 66. 7.  
 Tribulationes sunt sacrificia. 79. 3.  
 Tribulationis effectus. III. 1. 138. 24. & seq.  
 Tribulationes aliquando dicuntur aqua. 146. 8.  
 Tribulationes euadendi via facilior. 385. 3.  
 Tribulatione correptus, quid facere debeat. 681.  
 Tribulationes iustorum minores sunt, quam carna-  
 libus videantur. 324. 3.  
 Tribulationes, quibus purgantur electi, signa sunt  
 grauissimarum poenarum, quas luunt impii post  
 hanc vitam. 324. 4.  
 Tribulationum iustorum varia Metaphora. 352. 9.  
 10.  
 Tribulatio ad poenitentiam adducit. 838. 9.  
 Tribulatio gutta est, gloria flumen.  
 cum Tribulatis quomodo sit Deus. 537. 15.  
 Tribulationum utilitas. 788. 8.  
 Trinitas Diuinarum Personarum. 656.  
 Trinitatis opera indiuisa. 151. 6.  
 \* Turpia verba, factor. 50. 5.

V.

**V**anitas varia significat. 133. 7.  
 Vaticanum de Christo & Ecclesia. 444.  
 445.  
 \* Veniale peccatum proprie non relinquit maculam.  
 52. 2.  
 Ventorum cum Angelis similitudo. 774. 9.  
 Ventus dispergens impios dicitur Angelus. 168. 6.  
 Venti, equi currus Dei. 64. 12.  
 Verbum asperum mors aeterna, vel iudicii sententia.  
 528. 3.  
 Verbum Domini, quod sit. 150. 4.  
 Verba pro operibus aliquando intelliguntur. 346. 3.  
 Verba sagitta vocantur. 243. 7.  
 Verbo offendere facile, ac periculosum, & quando.  
 201. 1. 2. 3.  
 Verborum Christi vis. 240. 3.  
 Verecundia, quæ prohibetur à Domino. 234. 7.  
 Veritas Dei quantæ. 178. 6.  
 Veritas passim fidelitatem significat seruandi pro-  
 missa. 658.  
 Veritas & Sapientia cibis anima. 835. 3.  
 Veritas nos liberauit, Charitas seruos fecit. 578. 1.  
 \* Via duplex qua Deus ad nos descendit. 787. 6.

Pia



# INDEX.

*Via Resurrectionem, vita Beatitude[m] quando-*  
que significat. 56. 1.

*Via Domini varia significationes.* 103. 11.

*Victoria nobilissima, qua sit.* 201. in tit.

*Victoria iusti in hac, & alia vita.* 53. 8.

*Videntes Deum similes sunt Deo, nunquam viden-*  
tes semper dissimiles. 153. 12.

*Videre in lumine lumen, quid sit.* 180. 10.

*Viribus suis nemini fidendum.* 506. 16.

*Virga pro sceptro Regio.* 410. 3.

*Virtus alia in via, alia in Patria.* 501. 7.

*Viri sanguinum, & uolosi quomodo plestantur.* 305.  
27.

*Viri Belial, qui dicantur.* 581. 4.

*Viri constantes lapides, infirmi vero pulvis dicti.*  
589. 15.

*Virginitas longe excellentior coniugio.* 747. 3.

*Virtutum quatuor Cardinalium mystica significa-*  
tio. 572. 7.

*Virtute propria homo liberari non potest à malis.* 154.  
16.

*Vita Christi qualis.* 16. 4.

*Vita fundamentum est omnium bonorum.* 155. 19.

*Vita hominis ob peccatum contractior facta.* 519. 7.

*Vita mortalis cur vocetur via.* 683. 1.

*Vita aterna corona Iustitia, & merces operum ho-*  
norum. 672. 7.

*Vita humana spiritus dicitur.* 598. 15.

*Vita aterna Christo est Iustitia, nobis misericordia.*  
1. 135.

*Vita sine addito in scriptura passim significat vi-*  
tam aeternam. 700. 5.

*Vita Christi descriptio Prophetica.* 721. 6.

*Vita humana breuitas.* 202. & 203. 5. 6. 7. 8.

*Vita praesentis pericula soli spirituales viri norunt.*  
226. 9.

*Vita beata & sempiterna descriptio.* 672. 8.

*Vitia, & habitus mali, sunt hostes hominis.* 30. 7.

\* *Vmbra mortis, quid sit.* 49. 4.

\* *Vnicornis filius dilectus cur dicitur.* 124. 6.

\* *Voluptuariorum in die iudicii angustia.* 750. 6.

*Vota distinguere quid sit.* 354. 12.

\* *Vsurpeccatorum.* 308.

\* *Vter in pruina, quid sit.* 701. 3.

\* *Vultus Dei, ira Dei.* 82. 9. 32. 12.

*Vultus Dei adiutorium omnium maximum &*  
*potissimum.* 354. 4.

Z.

**Z** *Elare super iniquos, quid sit.* 182. 2.

## FINIS.





INDEX

1. The first part of the book is devoted to a general history of the country, from the earliest times to the present day. It contains a detailed account of the various tribes and nations which have inhabited the country, and of the changes which have taken place in its government and constitution. It also contains a description of the natural history of the country, and of the various minerals and plants which it produces.

2. The second part of the book is devoted to a description of the various tribes and nations which have inhabited the country. It contains a detailed account of the customs and manners of each tribe, and of the changes which have taken place in their government and constitution. It also contains a description of the natural history of each tribe, and of the various minerals and plants which they produce.

3. The third part of the book is devoted to a description of the various minerals and plants which the country produces. It contains a detailed account of the various minerals which are found in the country, and of the various plants which grow in the country. It also contains a description of the various animals which are found in the country, and of the various birds which fly in the country.

4. The fourth part of the book is devoted to a description of the various animals which the country produces. It contains a detailed account of the various animals which are found in the country, and of the various birds which fly in the country. It also contains a description of the various insects which are found in the country, and of the various reptiles which are found in the country.

5. The fifth part of the book is devoted to a description of the various birds which the country produces. It contains a detailed account of the various birds which are found in the country, and of the various insects which are found in the country. It also contains a description of the various reptiles which are found in the country, and of the various fish which are found in the country.

6. The sixth part of the book is devoted to a description of the various fish which the country produces. It contains a detailed account of the various fish which are found in the country, and of the various insects which are found in the country. It also contains a description of the various reptiles which are found in the country, and of the various birds which fly in the country.

7. The seventh part of the book is devoted to a description of the various insects which the country produces. It contains a detailed account of the various insects which are found in the country, and of the various reptiles which are found in the country. It also contains a description of the various birds which fly in the country, and of the various fish which are found in the country.

8. The eighth part of the book is devoted to a description of the various reptiles which the country produces. It contains a detailed account of the various reptiles which are found in the country, and of the various birds which fly in the country. It also contains a description of the various fish which are found in the country, and of the various insects which are found in the country.


9. The ninth part of the book is devoted to a description of the various birds which the country produces. It contains a detailed account of the various birds which are found in the country, and of the various insects which are found in the country. It also contains a description of the various reptiles which are found in the country, and of the various fish which are found in the country.

10. The tenth part of the book is devoted to a description of the various fish which the country produces. It contains a detailed account of the various fish which are found in the country, and of the various insects which are found in the country. It also contains a description of the various reptiles which are found in the country, and of the various birds which fly in the country.


INDEX













Biblioteka Jagiellońska



stdr0029966







